



E. BARCLAY - SMITH, M.D.



Bools in 3 folio.

157

A xxxi. Hof

FRIDERICI
HOFFMANNI
OPERA OMNIA,
IN SEX TOMOS DISTRIBUTA.





FRIDERICUS

HOFFMANNUS

*Regiæ Majestatis Prussicæ Consiliarius intimus Archiater et
Professor Medicinæ primarius Comes Palatinus Cæsareus
Academiæ Fridericianæ Senior Imperatoriæ Carolinæ Petropolitane
Britannicæ et Prussicæ Academiæ Scientiarum Sodalis Natus 1660.*

FRIDERICI HOFFMANNI

CONSILIARII REGIS BORUSSIÆ INTIMI,

ET ARCHIATRI,

PROFESSORIS MEDICINÆ PRIMARI IN ACADEMIA HALENSI,

OPERA OMNIA PHYSICO-MEDICA

Denuò revisa, correcta & aucta,

IN SEX TOMOS DISTRIBUTA,

QUIBUS CONTINENTUR

DOCTRINÆ SOLIDIS PRINCIPIIS PHYSICO-MECHANICIS,
& anatomicis, atque etiam observationibus clinico-practicis superstructæ.

METHODO FACILI AC DEMONSTRATIVA DEDUCTÆ,
& per experientiam LVII. annorum stabilitæ.

CUM VITA AUCTORIS,

Et ejus PRÆFATIONE de differente medicinæ & medicorum statu atque conditione,
& criteriis boni ac periti medici.

TOMUS PRIMUS.



Delamonce jnv.

D. Sornique sculp.

GENEVÆ,
Apud FRATRES DE TOURNES.

M. DCCXL.



CELSISSIMO POTENTISSIMOQUE
PRINCIPI,
FRIDERICO
GUILLELMO,
PRUSSORUM REGI.
MARCHIONI BRANDENBURGICO
SACRI IMP. ARCHICAMERARIO
ET NOVEMVIRO ELECTORI
PIO. FELICI. AUGUSTO.
INCOMPARABILI RERUM MEDICARUM ÆSTIMATORI
PATRI PATRIÆ CLEMENTISSIMO

FELICITATEM PERPETUAM.

GLASSIMO POTENTISSIMOQUE

PRINCIP

FRIDERIC

GUILLELMO

PRUSSORUM REGI

MARCHIONI BRANDBURGO

ARCHICAMERARIO

DE ROYALTE VICTORI

PIO FELICI AUGUSTO

NOBILITATIS RUM VICECOMITI

PRUSSORUM REGI

FRIDERIC

SERENISSIME
ET POTENTISSIME REX
REX ET DOMINE CLEMENTISSIME.



IHI nunc ad illam ætatem, divini Numinis gratia, provecto, ut ultimam vitæ meæ scenam agissentiam, animum subinde subit illa cogitatio, quibus potissimum, si a Deo discesserim, ea omnia debeam, quæ mihi per hos octoginta, quos transegi, annos fausta ac felicia acciderunt.

Et en ! agnosco, summorum beneficiorum à Serenissima domo BORUSSICO-BRANDENBURGICA acceptorum

EPISTOLA

me debitorem esse gravissimum. Patere, **REX ET DOMINE CLEMENTISSIME**, paucissimis me recensere, quæ longissimo ætatis decursu à **TE TUISQUE** adeptus fuerim beneficia. Inter paucissimos forte supersum, qui gloriosissimæ memoriæ Principi Divo **FRIDERICO GUILLELMO** avo **TUO**, honorum fortunæque exordia in acceptis referunt. Tanti enim Principis gratia ante hos quinquaginta & sex annos ego in Principatu Mindensi provinciæ illius physis clementissime constitutus, mox præsidii ibidem militaris medicus factus, honorificam postea aulici medici dignitatem adeptus sum. Quum vero terris excessisset magnus hic Princeps, atque imperium denuo suscepisset sapientissimus **FRIDERICUS**, inter ipsa ejus primordia mihi accidit, ut ante hos quadraginta & novem annos Principatus Halberstadiensis proto - medicus designarer. Longe autem majus erat beneficium, quo gaudebam, cum ad novam studiorum universitatem, à Suo nomine vocandam, inque ea urbe, cui natales meos debeo, erigendam primus medicinæ & philosophiæ naturalis professor An. **MDCCXIII.** vocarer. Accidebat tum post duodecim circiter annos, ut idem **SERENISSIMUS PRINCEPS**, procurante Illustrissimo Comite de Wartenberg, me rursus in locum **D. Weisii**, archiatri haud ita pridem defuncti suscipiendum statueret: qua tamen statione, tum ob valetudinem minus firmam, tum ob alias rationes satis urgentes, submissè deprecata, consilarii & medici aulici dignitate ornabar munificentissime. Nihilominus An. **MDCCCIX.** quum **REX SERENISSIMUS** graviore decumberet morbo, me ante annum in thermis Carolinis sibi propius cognitum, celeri, ut aiunt, nuncio in consilium vocabat, & curatione ex voto peracta jubebat, ut valetudinis tuendæ procurandæque gratia archiater ordinarius ibi permanerem. Accepi summam gratiam; quamvis probe conscius, admodum lubricas esse res aulicas, munerique

demanda-

EPISTOLA

demandato pro viribus satisfactus, incolumitatem tanti Principis dies noctesque observavi quam diligentissime; donec triennio inter hæc exacto, munus academicum, quod mihi reservaveram, ob graves quasdam causas repetii. Ego vero musis sic restitutus, redintegratis quasi viribus strenue enitebar, ut non solum salubribus doctrinis imbuerem eos, qui studii medici causa hac confluunt: verum etiam lucubrationibus in publicum emissis, & in exteris quoque regionibus recensis, famam haud exiguam industriæ meæ reportarem. Non poterant hæc latere **MAJESTATEM TUAM, REX ET DOMINE CLEMENTISSIME**, qui inter curas patre patriæ dignas, hanc vel maxime refers, ut illos, qui sacras doctrinas propagant, quique corporum saluti tuendæ idoneos viros formant, probe cognoscas, cognitosque exornes. Id quum antea sæpius visum sit, maxime tamen ante hos sex annos eluxit, quo tempore gravi valetudine affectus è castris ad Rhenum positus revertebaris. Clementissime enim significabas, quantum & meæ fidei tribueres, & peritiæ tot annorum usu acquisitæ confideres. Annuit Deus consiliis, & curationem felicissimis ornavit successibus. TU autem, quæ est clementia TUA, non solum summa gratia me laudandum remunerandumque ducebas; verum etiam ostendebas, TE percupere, ut perpetuo TIBI præsens adesset; nisi grandi jam ætati meæ missionem ac immunitatem hanc concedendam clementissime judicasses. Summo senectuti meæ præsidio atque solatio est ista **CLEMENTISSIMI REGIS** erga me benignissima & constans voluntas, quam crebris etiam litteris, regia manu signatis, confirmatam multos per annos expertus sum. Huic itaque otio, quod per TE mihi factum est, debetur hæc omnium, quæ diversis vitæ temporibus elaboravi, scriptorum in unum fascem collectio, cui **AUGUSTUM NOMEN TUUM** hac etiam justa causa præscribendum putavi, ut in omnibus Europæ locis, ad quæ hæc volu-

EPISTOLA

*mina perventura sunt , videant prædicequent homines FRI-
DERICI GUILLELMI incredibile studium viros in
arte medica peritos æstimandi , distinguendi , & , quod maxi-
mum est , præclare efficiendi , ut , remota omni empiria , res medicæ
& chirurgicæ in provinciis S U O sceptro subjectis floreat ,
vireant & nova quotidie incrementa accipiant. Effectum hoc ma-
xime est singulari ista providentia T U A , qua non solum colle-
gium , quod Berolini floret , anatomico - chirurgicum largis instru-
xisti privilegiis ; ibidemque olim fundatam scientiarum societatem
bibliotheca satis numerosa splendidoque rerum naturalium appa-
ratu donasti ; sed etiam singulis prope annis homines quosdam
idoneos liberalitate T U A clementer adjutos , ad cultissimas gen-
tes peregrinatum amandasti , ut si quid in anatomiae , chirurgiæ
& historiæ medicæ studio perfectius invenirent , id omne sollici-
ta diligentia domum referrent. Neque minus silentio prætereun-
dum , sed ad omnis posteritatis memoriam propagandum est , quam
impense bonarum artium & litterarum studiis faveat CELSIS-
SIMUS omnisque generis virtutum & scientiarum decoribus
ornatissimus PRINCEPS HERES , à cujus imperio uni-
versa res publica & litteraria sibi olim promittit pulcherrima.
Eodem certe jure SERENISSIMÆ NOSTRÆ RE-
GINÆ incredibilis erga eruditos , maximeque medicos amor ,
ejusdemque eximium artium curiosarum , atque experimentorum
tam physicorum , quam chymicorum studium prædicandum est :
quandoquidem cum cæteris sapientiæ partibus illam præcipue æsti-
mat , unde plenior naturæ cognitionem nanciscimur. Pulcher-
rima minerarum ex toto orbe specimina , lapides pretiosissimos , ut
& herbarum florumque collectiones elegantissimas lectissimæ S U Æ
bibliothecæ , in quam & mea scripta meamque imaginem inter
viros clarissimos repositam suscipere dignata est , adjecit ; atque
de his omnibus tam perite differit , ut apertum sit , hæc non esse
reposita , ut otiosa quiescant , sed ut plane perspicerentur , subinde
probeque considerata fuisse.*

Supereſt ,

EPISTOLA

*Supereſt, ut, REX POTENTIſſIME, TE ſupplex
rogem, velis pietatem hanc meam clementiſſime admittere, nec
adſpernari munus TIBI debitiſſimum TUIS Divorumque AVI
ac PARENTIS TUORUM beneficiis produetum, auetum
& ad maturitatem proveetum. Equidem dum vivam non deſi-
nam piis apud Deum precibus TUAM incolumitatem SERE-
NIſſimæque DOMUS REGIÆ perpetuitatem ef-
flagitare, eroque ad ultimum halitum*

SERENIſſIME AC POTENTIſſIME REX

REX ET DOMINE CLEMENTIſſIME

REGIÆ MAJEſTATIS TUÆ

humillime devotus ſervus
FRIDERICUS HOFFMANNUS.

MISSOURI BOTANICAL GARDEN

LEX ET DOMINE CLAUSTRUM



COMMENTARIUS
DE VITA
FRIDERICI
HOFFMANNI

REGIS PRUSSIAE CONSILIARII INTIMI,
Archiatrorum & Professorum in Academia Regia
Halenſi Senioris &c.

AUCTORE

JOANNE HENRICO SCHULZE

Philosophiæ ac medicinæ Professore publico.



LORENTISSIMA & per totum orbem celeberrima Academia Fri-
dericiana, quæ Halæ Magdeburgicæ, auspiciis FRIDERICI
primi Borussiae Regis & Electoris Brandenburgici, An. MDCXCIV.
fundata fuit, tam felici incremento caput extulit, ut non solum
omnes litterarias civitates sub ejusdem regis sceptrō degentes, &
jam olim coalitas, brevi tempore superaret, verum etiam vicina-
rum academiarum nulli quicquam concederet, sive famam & me-
rita docentium in iisdem patrum spectes, sive litteris operantium

frequentiam & nobilitatem. Tam læti & ad votum potentissimi fundatoris omnino fluen-
tis successus causam si quis quæsierit; ex hominum quidem parte non aliam potiore
facile inveniet, quam quod initio statim provide curatum fuit, ne alii constitueren-
tur professores, nisi nominis celebritatem consequuti, eaque ætate vigentes, qua
& strenuis laboribus sufficerent, & rerum usu jam essent subacti & exercitati.
Unde factum est, ut tot viris lectissimis per omnes, ut vocari solent, facultates
summæ viribus simul enitentibus, omnique ingenio pro novæ academiciæ gloria con-
tendentibus, nulla sive divinarum sive humanarum rerum scientia fuerit, quam non
nova luce collustrarent, adeo, ut mox in sui admirationem plurimos raperent, nec
paucos ad æmulum studium provocarent.

Eluxit quam maxime inter hæc sidera doctrinæ elegantis copia & varietate or-
natissimus, splendorum munerum meritorumque decoribus illustris & variis ingenii
monumentis artisque felicissimis operibus inclytus vir, Dominus FRIDERICUS
HOFFMANNUS, Comes Palatinus Cæsareus, Regiæ Majestati Borussiae à
consiliis sanctioribus & valetudinis tutela, doctrinæ naturalis & medicæ primus in
Academia Fridericiana Professor & primarius, omniumque, qui in ea publice do-
cent, Senior, academiciæ Cæsareæ Naturæ curiosorum ut & Petropolitane ac re-
giarum societatum Britannicæ ac Borussiae Socius, Patronus ac Præceptor meus per-

ii COMMENT. DE VITA AUCTORIS.

petuo obsequio ob plurima beneficia colendus; Cujus vitam tanto majore fiducia litteris mandare adgredior, quod longa ac diuturna ejus consuetudine usus, nullaque rerum ad illum pertinentium notitia destitutus, tum Commentarii de vita HOFFMANNI, quem ipse composuit accuratissime, particeps factus, certiora omnino allaturus esse videar, quam ab aliis exspectari possint. His itaque praesidiis instructo & diligenter uso haud metuendum videtur, ne mediocre hoc ab omnique ornatu vacuum scribendi genus minus gratum atque posteritati demerendae inidoneum existimetur.

Videor autem mihi in laudatissimos HOFFMANNI nostri majores inquirendo familiam vere Asclepiadeam intueri. Quantum enim per duo admodum saecula respicienti patet, medici aut pharmacopœi sunt, quibus suam debet originem. Atque ut à materna stirpe initium faciam, indicandus est vir praestantissimus *Wolfgangus Holtzvirth* ex familia nobilissima & consulari apud nos ortus, qui artis pharmaceuticae studiosus illo tempore *Wittebergæ* versabatur, quo *Valerius Cordus* magna sui nominis gloria *Dioscoridem* ibi explicabat. Tantopere autem *Cordi* doctrina capiebatur *Holtzvirthius*, ut *Wittebergæ* discedentem eum Romam usque prosequeretur, atque indivulsus comes & socius c. 1510 XLIV. eidem immatura morte obeunti adfisteret. Quum biennium Romæ exegisset, stimulabat ipsum plura lustrandi & simplices medicinas in patriis locis requirendi desiderium, quasi hereditate à *Cordo* præceptore acceptum ut *Venetis* navem conscenderet & *Hierosolymam* usque pergeret. Ex longinqua peregrinatione redux *Wolfgangus* noster c. 1510 LIV. viri magnifici & consultissimi *Melchioris Klingii* Archiepiscopatus *Magdeburgici* Cancellarii filiam *Catharinam* uxorem duxit, & ex hac suscepit filiam *Elisabetham*.

Hanc vero *Elisabetham Holtzvirthiam* conjugem c. 1510 LXXIX. duxit LAURENTIUS HOFFMANNUS, ex celeberrima Episcopatus *Bambergensis* metropoli ortus, *Lipsiæ* autem artem pharmaceuticam edoctus. Hic FRIDERICI nostri proavus, atque HOFFMANNORUM *Halensium*, quotquot cognatione nostrum tangunt, factor fuit. Ex progenie hujus Laurentii maxime notari merentur duo filii *Laurentius* & *Andreas*; quorum ille, Jo. Georgii Electoris Saxoniae archiater, eximium & immortale nomen inter præcipuos Germaniae medicos consequutus nobilitatis insignia, tribuente divo *Ferdinando II.* Romanorum imperatore, familiae *Hoffmannianæ* intulit, & ingenii etiam præclara monumenta reliquit: hic autem pharmaceuticae rei consecratus in hac urbe mansit & ex *Gertrude*, *Friderici Seyferti*, ædilis & camerarii *Halensis* filia, progeniuit FRIDERICUM HOFFMANNUM, qui *Friderici* nostri parens factus est.

Postulat hic maxime locus honorificam commemorationem *Balthasaris Brunneri*, viri inter sui temporis medicos celeberrimi & de *Hoffmanniana* familia meritissimi facere. Erat is *Halæ* natus, patre *Laurentio*, cive & senatore, qui originem duxerat ex *Briga* Silesiorum urbe & quondam sede ducali. Commendatissimus autem erat hic *Balthasar* magno trium imperatorum archiatro Jo. Cratoni à *Kraftheim*, in cuius ædibus aliquanto tempore vixit filii loco habitus. Non minus carus erat *Georgio Laureæ* electorum & marchionum Brandenburgicorum archiatro, cujus filiam uxorem ducebat. Quum vero illam immatura morte amisisset, secundis nuptiis sibi adjungebat *Laurentii Hoffmanni* viduam *Elisabetham Holtzvirthiam*, ejusque liberis *Hoffmannianis* summa benevolentia fovendis & educandis operam ita impendit, ut non in vitrici manus eos incidisse, sed amantissimum patrem in eo habere intelligeretur. Despondebat hic unicam filiam ex priori uxore susceptam, privigno *Laurentio*, quem ad optimas scientias & medicinae penetralia deduxerat, eundemque commendatione sua potissimum juverat. Gratus hoc beneficium prædicat *Laurentius* in præfatione, quam amantissimi vitrici socerique consiliis præfixit, quum apud nos c. 1510 CXVII. primum ederentur. Eadem enim non ita pridem apud *Batavos*, procurante *Hermanno Boerhavio* recusa esse publice notum esse debet.

Transimus ad FRIDERICUM HOFFMANNUM, *Andreas* filium, qui c. 1510 CXXVI. apud nos natus & litteris probe tinctus, medicinae autem scientia *Jenæ* ac *Wittebergæ* imbutus tantam crebro & felici artis exercitio famam consequutus est, ut *Augusti Saxoniae* Ducis & Archiepiscopatus *Magdeburgici* administratoris, archiatri munus consequeretur. Nomen etiam illustre in republica litteraria scriptis immortalibus consequutus est, quæ inter maxime celebrantur *Methodus medendi* & *Clavis Schræderiana*. Hic in matrimonio habebat *Annam Mariam* ex antiqua & nobili *Knorriorum* gente ortam, *Friderici Knorrii*, patricii & senatoris filiam, proxima adfinitate junctam medico & chymico clarissimo *Matth. Unzero*; cujus gener fuit itidem celebris

bris *Andreas Nietnerus*, Ducis Saxoniae & Administratoris Magdeburgici Archiepiscopus archiater; Ex hac inter complures liberos suscepit M. D. CLX. a. d. XIX. Februarii FRIDERICUM nostrum, qui non solum omnes ex iisdem parentibus natos, verum etiam ejusdem familiae majores, quantumvis laudatissimos, ut eruditionis & meritorum magnitudine ac dignitatum splendore, ita etiam longævitate, divino quidem munere, longissime superavit.

Primam ejus ætatem ad christianam pietatem & litterarum rudimenta, quantum sese explicantes animi vires capere poterant, pii parentes formarunt, eidemque tam necessario negotio idoneos homines in subsidium adhibuerunt. Quum hæc inter ætatis decimum tertium attigisset annum, publico urbis gymnasio, tunc frequentia auditorum & docentium celebritate florentissimo, tradebatur. Inter cæteros eminebat M. *Prætorii* neque minus M. *Drechleri* fidelis industria & singularis nec omnibus concessa facilitas, qua teneris adolescentulorum animis ea instillare præcepta novebant, quibus ad altiores disciplinas cum fructu percipiendas præparari debent. Atque horum imprimis virorum fideli institutione per quatuor annos gavissus, præter pure ornateque loquendi & scribendi exercitia, per omnes etiam philosophiæ partes deductus & mathematicis insuper disciplinis large imbutus fuit. Memini ipsum sæpe auditoribus suis, sæpius filiis, iisque quos filiorum loco præter cæteros amabat, commemorare, nihil magis præclare sibi profuisse, quam quod mature ad numerorum doctrinam & mathematicas res tractandas deductus fuerit. Ita enim se se adfuisse clarorum & perspicuorum conceptuum desiderio, & ex cognitis certisque principiis obscuriora & incognita eliciendi demonstrandique methodo, ut deinceps, tam discendo quam docendo occupatus, non nisi quæ clara & perspicua sunt, vel ipsemet amplecteretur, vel aliis proponere amaret. Solebat in hanc rem commemorare HIPPOCRATIS ad *Thessalum* filium epistolam, quæ hujusmodi studiorum in omni vita multiplicem fructum impense laudat, medicinæ vero cupido eadem seorsim commendat. Et ingenium omnino tale nactus erat noster, ut istiusmodi disciplinis, quæ certis conclusionibus innituntur & connexæ sunt, præcipue delectaretur: minime vero ferretur ad illa, quæ imaginationis & memoriæ ingentem vim & naturam promptitudinem poscunt, ut sunt poëtica facultas aut musica, item oratoria atque amplissima stirpium cognitio; quibus quidem justum pretium statuit, ipse autem severioribus istis, quæ judicium & meditationem requirunt, animum à primis annis, & per omnem deinceps vitam impendit.

Hæc inter domi ipsum ab otio illiberali satis revocabat indulgentissimi parentis semper occupatissima ad aliis inserviendum industria. Nam quum continuo illi adhærent medicinæ studiosi, quibus per omnes artis salutaris partes instituendis operam dabat; creberrime noster doctissimo parenti adstabat, quoties vel anatomicis vel chemicis demonstrationibus occupabatur. Sicque vere illum reportabat fructum, quem isti priscorum Asclepiadarum filii, qui cum patribus, artis opera, eoque pertinentia progymnasmata, exercentibus continuo versantes, ipsi propemodum non sentientes proficiebant, tamque profunde animis visa, audita propriisque manibus tractata immittebant, ut facilius fuisset elementa litterarum oblivioni tradere, quam ex animo hæc dimittere, quibus à teneris unguiculis adfueverant.

Tam felici successu, gradibusque citatis ad metam studiorum decurrentem adolescentem acerba clades *Hoffmannianam* domum MDCLXXV. adfligens graviter percussit. Dei enim nutu fiebat, ut intra triduum uterque parens & filia natu maxima, epidemio morbo, qui veris initio tunc sæviebat, abriperentur. Non possum quin hoc loco commemorem, quod ex ore excellentissimi viri sæpe me audire cum summa jucunditate nec minori fructu meo, memini. Nam ut sæpe solebat vel liberis vel familiaribus amicis recensere, quæ sibi adversa olim visa, ad felicitatem tamen veram promovendam potentissima, divinitus evenerint; & non minus ex sobria philosophia quam pietatis christianæ intimis doctrinis de fructu ex adversis capiendo graviter differere: ita hujus quoque casus non aliter meminisse solebat, quam ut divinae providentiæ gratias ageret, quæ hæc in maximam utilitatem sibi & suis evenire jussisset. Decefferant optimi parentes, quo tempore lubrica ætas natorum maxime indigebat parentum consiliis, monitis & multis ad vitam commodam subsidiis, ab illorum pietate & indulgentia expectandis. Decefferant non amplissimo patrimonio relicto, & hujus non exiguam partem flammæ consumserant. Sed orba parentibus adolescentia ad Deo constantius fidendum, ad preces ardentius fundendum, ad virtutes amandas & honesta studia impensius colenda impulit, & loco fastus, quem felicissime vivere adfueti vix effugiunt, veram modestiam & inserviendi promptum ho-

iv COMMENT. DE VITA AUCTORIS.

nestumque studium inspiravit, quibus virtutibus effectum est, ut satis mediocres opes, divino adspirante favore, sufficerent ad illud in vita consequendum, ut nemo illorum, quos tam gravis calamitas simul cum nostro perculerat, non abunde haberet, unde vitam honeste & cum decore toleraret. Quin nec studia, quibus se noster consecraverat, detrimenti quicquam inde cepisse idem probe accurateque ostendit. Nam quum mature gustum medicinæ beatus parens præbuisset, verendum erat, ne se his, quæ huic disciplinæ domestica & propria sunt, nimis cito immergeret, eorumque dulcedine captus segnius aut minori saltem ardore ea tractaret, sine quibus hæc, quæ ad sublimiores scientias pertinent, nec bene digeri nec communicari cum aliis possunt.

Manfit autem gymnasii patrii alumnus usque ad finem An. MDCLXXVIII. quo editis speciminibus eruditionis suæ per disputationem *de Mundo*, præside laudato Prætorio defensam & solennem orationem publice eidem vale dixit, & cum patronis ac necessariis amicis de ratione studiorum alibi locorum ineunda earumque sede eligenda deliberavit. Amor artis salutaris, *Hoffmannianæ* domui quasi gentilitius, semper animum nostri tenuerat; ejus autem celeberrimus Professor *Georg. Wolfgangus Wedelius* in inclyta *Jenensi* academia tunc unus omnium maxime florebat: quare omnium consilio hæc ipsi schola *Asclepiadei* dogmatis eligebatur.

Quemadmodum mature cognoverat, medico futuro maxime idoneas esse disciplinas mathematicas & philosophiæ naturalis assiduum studium: ita inprimis curæ cordique habebat, ut in hisce magis confirmatus medicinæ operam felicius navaret. Nec deerant tam honesto amori, qui abunde satisfacerent, celeberrimi tunc doctores *Erhardus Weigelius*; ille *Archimedes Jenensium* & *Jo. Andr. Schmidius*, theologus postea *Helmstadiensis* & abbas *Mariævallensis*, quorum doctrinis se plurimum debere gratus sæpe celebravit. Ad medicinæ autem doctrinas recte percipiendas præter cæteros utebatur jam laudato *Wedelio* præceptore: plurimum tamen ab assidua meditatione & frequenti bonorum medicinæ auctorem lectione expectabat. Sub hoc præside in cathedra stabat An. MDCLXXIX. & de *Menstruo ventriculi* disputabat.

Quum annum tempus Jenæ transgisset omnibusque commilitonibus industriam suam comprobasset; rogabant ipsum non pauci amicorum suorum, ut se participes redderet domesticarum exercitationum, quibus chemiam assidue colebat. Horum itaque in gratiam, & ut ipsemet docendo magis confirmaretur; hunc laborem minime subterfugiendum duxit. Neque parum isto se studio tam illis, quam sibi, profuisse sensit. Enimvero major erat cupiditas per chemiam speranda medico doctrinæ emolumenta consequendi, quam ut retinere se ipsum posset, quo minus ardenti desiderio quovis modo satisfaceret. Florebat tunc artis hujus singulari laudē *Caspar Craemerus* medicinæ in vicina *Erfordiensis* academia Professor longe celeberrimus, ad quem anno cLo Io CLXXX. ineunte proficiscebatur, seque omni officiorum genere in amicitiam tanti viri insinuabat. Multum ipsi profuerunt prælectiones chemicæ, quibus assiduo studio intererat: sed longe plus emolumenti ex domestica conversatione & quotidianis colloquiis ejusdem medici percipiebat. In hoc secessu elaborabat ad dogmata potissimum *Helmontiana* quæ tunc in scholis medicis regnabant, quibusque *luria*, quam circa finem anni Jenam reversus illustri *Wedelio* legendam & percensendam offerebat, ut, si luce digna esset, sub ejus præsidio publice ventilaretur.

Enimvero tantopere commentatio hæc celeberrimo viro placebat ut nostro aperte declararet, tam egregium specimen majori præmio dignum se existimare. Ne vero ambiguum esset, quorsum hæc tenderent; suadebat nostro, ut se illis viris adjungenturi erant. Noster vero sine consilio & auctoritate illorum, quos patrum loco venerasset, tantam rem minime adgredi ausus, quum id excellentissimo *Wedelio* declaratoribus & proximis agnatis vel affinibus exhiberet. Quo viso illi facile assenserunt, ut oblatos honores ambiret. His auspiciis examina legibus præscripta subiit, & cum omnium calculos promeruisset, An. cLo Io CLXXXI. ultimo Januarii die de *Autochiria*, vigesimum primum ætatis annum attigisset, doctorales in medicina honores, brabeuta & præcone toties dicto *Wedelio*, reportavit.

Enimvero nostro minime illa mens erat, quæ in pluribus conspicitur, qui publico eruditionis testimonio acquiescentes, non tam amplificandæ ac ulterius comprobandæ doctrinæ student, quam emolumentis cito reportandis inhiant. Vix doctorem è cathedra

cathedra *Wedelius nostrum* dimiserat, quum jam flagraret cupiditate, maxime quidem laudabili, omnibus comprobandi quam esset docendo, cathedræque per se tuendæ idoneus: Periculum itaque virium sequenti Maio tanto cum successu fecit, ut disputatio, quam primam suis auspiciis habuit, de *cinnabari antimonii*, mox diversis formis recusa prodiret, quum admirabilis & profunda chemiæ, quam pandebat, doctrina lectores ubicunque alliceret. Est enim *Lugduni Batavorum* procurante celeberrimo *Paulo Hermanno* cIo Io CLXXXV. 12. edita, & *Frankofurti ad Moenum* cIo Io CLXXXIX. 8.

Quantopere jam confiderent novi doctoris *nostrî* dexteritati ac peritiæ juvenes academici, mox elucebat, quum prælectiones in chemiam & alias universæ medicinæ partes institueret. Majori enim numero & notabiliore ardore ad scholas *ejus* confluebant auditores, quam ut æquo animo ferre posse viderentur illi, quibus ordinarium docendi munus demandatum erat. Annum itaque tempus, & quod excurrit utilitati artis cupidorum Jenæ impendit, hocque ad finem tendente de *morbo convulsivo ex viso spectro* novam disputationem publice proposuit.

Hoc facto Jenam tantisper relinquere statuit, ut crebrius repetitæ invitationi generosissimi & perillustri viri domini *Joach. Martin. Unversaerth*, Serenissimi Electoris *Brandenburgici* Consilarii & principatus *Mindensis* Cancellarii, affinis sui dilectissimi, satisfaceret, jamque vacillanti valetudini suæ hac peregrinatione consulere. Evenerat enim ipsi, quod omnibus solet, qui intentius naturæ contemplationi & indagationi sese dedunt, ut corporum suorum robora inquieta cogitatione nocturnaue vigilia minuant: jamque hypochondriaci morbi rudimenta non obscure sentiebat, & cur pulmonibus suis à phthisi metueret, haud adeo læta percipiebat præsentia. Quum Mindam pervenisset, non solum ipsa itineris jucunditate admodum erectas & refocillatas vires mirabatur, verum etiam in honoratissimi affinis dilectissimæque sororis domo ita omnia ad votum suum comparata deprehendebat, ut reditum suum ad *Jenenses* musas, longius, quam initio statuerat, differre non dubitaret. Sed quum mox intelligeret, quam planam sibi tanti viri domus viam ad amicitiam summorum in illa provincia virorum panderet; divinoque beneficio contingeret, ut pluribus gravi morbo decumbentibus medicas manus singulari dexteritate nec minori felicitate ad moveret; amantissimæque domus preces propriæque salutis rationes liquidissimæ accederent; statuit tandem Mindæ potius benevolentia præcipuorum virorum frui ac florere, quam se denuo invidiæ fluctibus ac valetudinis periculo Jenæ exponere. Sæpius memini me ex ore ipsius audire, quod admodum jam male afflicto corpore Jena digressus, iterum ac vitæ magis activæ utilitatem tum primum recte cognoverit, quum à sedentaria vita semet subtraxisset. Atque ab eo tempore usque in senectutem id maxime tenuit, ut quantum fieri posset à sedendo sibi caveret. Quoties itaque aliquid meditabatur, deambulabat: quæ autem scribenda erant, inter ambulandum dictabat. Habebat etiam complures semper, quibus dictabat calamo excipienda, vel describenda dabat, quæ recensuerat. Ita vero agendo & sibi proderat, valetudinem tuendo; & illis, qui, dum ipsi à manu erant, rerum utilissimarum ampla cognitione vix sentientes imbuebantur, & ad medicam prudentiam deducebantur.

Biennium hic lætus & felix exegerat, ubi animum cupido incessit, exteras etiam regiones adeundi. Primum itaque ad *Batavos* excurrit, ibique præcipuas & florentissimas civitates ordine lustravit, neminemque, cui ab arte & eruditione nomen patrum erat, insalutatum reliquit. Sed præcipue benevolentia celeberrimi botanici, *Pauli Hermanni*, professoris *Lugdunensis*, patria *Halenfis* delectabatur, qui hunc civem suum non solum peramanter hospitio excipiebat, verum etiam quovis officiorum genere demereri non desistebat. Navem deinde conscendit, & mense Julio in *Britanniam* trajecit, ubi per aliquot menses *Londini* & *Oxonii* exactos quicquid in physicis, anatomicis, chemicis vel mechanicis curiosum & utile obvenit, avide consideravit, & ex clarissimorum virorum consuetudine fructum non mediocre percepit. Sæpius tunc familiariter cum illustri domino *Roberto Boyle* versatus fuit, qui non obscure significavit, se virtuti & eruditioni *nostrî* magnum pretium statuere, quum ultro sæpe ad se accerferet, & de rebus chemicis ac physicis longum colloquium institueret. Sed & *Slarii*, *Crellii* aliorumque artis salutaris antistitem amorem & benevolentiam sibi comparavit. Tam optato hujus itineris successu lætus Novembri mense Mindam revertebatur; pristinoque more se ægrotantium languoribus depellendis indulgebat.

Sequenti anno cIo Io CLXXXV. præsidio militari, quod apud *Mindenses* collocatum erat, cuique generosissimus & admodum strenuus vir, dominus *de Zieten* cum imperio

vi COMMENT. DE VITA AUCTORIS.

præerat, medicus dabatur, & præter honestum salarium multum benevolentiae tam à summo harum copiarum ductore, quam à centurionibus & reliquis cohortium præfectis semper experiebatur, quoties cum ipsis aliquid esset negotii. Non hic subsistebat HOFFMANNI nostri felicitas, sed dexteritatem artis quotidiano usu actam pari passu insequabatur. Gloriosissimæ enim memoriæ princeps *Fridericus Wilhelmus* Elector Brandenburgicus, ipsum totius principatus *Mindensis* physicum provincialem An. cLo Io CLXXXVI. constituebat, & honorificum medici aulici titulum adjungebat. Sed & præcipui per illam provinciam & comitatum *Ravenspergenssem* nobiles suæ suorumque valetudinis curæ libentius gerendæ ipsum annuis stipendiis obligabant. Cumque his ita inferviret, ut præmonendo, consulendo, medendo industriam conservandæque valetudinis & vitæ studium omnes intelligerent, nunquam autem sostrum à quoquam ope sua uso exigeret, expertus est hanc sibi viam ad commendationem & opes etiam comparandas certissimam esse, à qua nunquam deinceps tota sua vita discessit.

Quum itaque ad votum omnia *nostro* hic fluerent, accidit, ut eodem anno jam ad finem tendente status principatus *Halberstadiensis* ipsum ad se invitarent, quo locum provincialis medici, morte ejus, qui munus id gesserat, vacuefactum, capefferet. Non adspernandis conditionibus vocabatur, quum præter ordinarium, quo id munus gaudet, salarium multi ex præcipuis tam urbis, quam provinciæ, viris annum ipsi stipendium decernerent. Nullus itaque dubitabat invitantibus obsequi. Dum vero abitum in annum sequentem differt, interea novam excursionem, comite affine suo, Domino *de Unversaerth* per *Brabantiam* & *Hollandiam* instituit. Ineunte igitur vere An. cLo Io CLXXXVIII. Halberstadtum petiit, incredibili omnium studio exceptus. Artis crebra documenta inter omnes generis homines edebat, tantumque sibi omnium amorem conciliabat, ut expectationi quisque suæ abunde esse satisfactum fateretur. Eodem tempore solidam eruditionem suam medico orbi ostendebat tractatu *de insufficiencia acidi & viscidi* in lucem edito; quo *Cornelii Bontekoe*, archiatri *Brandenburgici* & Professoris medici in Academia *Frankofurtensi* hypothesen, tunc novitatis eximia gratia florentes, de morborum causis, eosdemque submovendi rationibus, oppugnavit, & multis tam ex theoria quam praxi rationali desumptis argumentis ita destruxit, ut ex eo evilescerent, plane ab omnibus explosæ. Ejus autem scripti laudes vel attingere supervacuum fuerit, postquam doctissimi viri, qui *Acta Eruditorum Lipsiæ* ediderunt, admodum honorifico elogio illud An. cLo Io CLXXXIX. mense Julio mactaverunt.

Hornhusæ, in principatu *Halberstadiensi*, larga aquarum salubrium scaturigo tunc prorumpebat; quo loco olim idem contigisse, sed mox defecisse, aliqui reminiscuntur. *Noster* in aquæ scaturientis naturam & vires accuratius tunc inquirebat, & incredibili hominum ægrotantium multitudini, quæ brevi tempore adfluebat, omnia opera & studio consulere annitebatur. Hujus vero laboris fructum hunc habuit, quod tot ægrotos inspiciendo, & malorum originem inquirendo curationum quoque successus observando & consignando, artis peritiam insigniter augebat, in diesque pluribus per rectorum consiliorum optatos successus innotesceret & commendaretur. Exstat de hoc fonte scriptum vernaculo sermone tunc à *nostro* editum.

Eodem tempore cœpit animum contrahendo matrimonio adpellere, tamque felicibus auspiciis hoc negotium adgressus est, ut nulla re clarius forte intelligatur, quam bene Numen propitium rebus HOFFMANNI nostri faverit, salutique ejus prospexit, quam considerata matrimonii illius felicitate. Elegit enim, Deo sic dirigente, & electa jam anno ad finem properante cLo Io CLXXXIX. potitus est, virgine honestissima, & non minus venusto corpore, quam animo vera pietate, prudentia & manfuetudine ornatissima *Joanna Dorothea* viri integerrimi, probe docti & artis pharmaceuticæ consultissimi *Andree Herstelle*, pharmacopœi *Clausthalensis* & *Zellerfeldensis* unica filia, fœmina ad exemplum proba & mariti per omnem vitam amantissima, cum qua per XLVIII. annos conjunctissime vixit. Deo enim visum fuit honestissimam matronam An. MDCCXXXVII. mortalium rebus eximere; de quo inferius dicendi locus recurrit.

Circa hæc tempora ad exitum felicem deducebantur diu agitata consilia de Academia in *Halensi* urbe erigenda; jamque in eo erat, ut per omnes ordines eligerentur ac advocarentur viri celeberrimi, à quibus expectari poterat, fore ut Serenissimi conditoris spei ac voluntati satisfaceret. Aderant jam aliqui celeberrimi viri, qui omne sublimium disciplinarum bonarumque artium genus docendo famam novi *Heliconis* excitabant: jamque discendi cupidorum non manipuli, sed cohortes adfluxerant: erantque

que in illa multitudine studiosorum complures ex illustrissimis familiis orti juvenes : prorsus , ut quemadmodum ex vegeto germine præstantiam ac proceritatem stirpis , & ex primitiis fructuum messis ubertatem : ita ex primo hoc initio præsentem , quam intuemur , felicitatem novæ academiciæ augurari liceret. His sese FRIDERICUS HOFFMANNUS medicinæ ac naturalis doctrinæ Professor primarius à Serenissimo Principe constitutus An. MDCLXXXIII. a. d. Mart. in publica cathedra primum ostendebat , initiumque publici muneris faciebat recitanda oratione de *Atheo ex artificiosissima corporis humani fabrica convincendo* : quam typis mox publicis exscriptam Perillustri academiciæ Fridericianæ Curatori ac Directori *Dan. Ludolpho de Danckelmann* dedicabat. Ita autem placuit illa eruditis viris , ut propter illam numero medicorum theologorum pridem à pluribus adscriptus sit & inter præcipuos relatus , qui contra atheos calamum cum fructu effatu digno strinxerunt.

Prima ipsum & præcipua cura distinebat , ut de omnibus , quæ ad muneris susceptionem pertinebant , provide dispiceret. Conscripsit itaque facultatis medicæ statuta , eademque Serenissimo universitatis conditori confirmanda obtulit : sigillum etiam facultatis , quali hodie utitur , invenit. Deinceps de collega medico cogitavit ; cumque Dominus D. *Georgius Ernestus Stahlus* , qui tunc principi Saxo-Vinariensi faciebat medicinam , scriptis ad se litteris veterem amicitiam *Jenæ* cultam renovaret , seque ad novam academiam evocari cupere ostenderet : aulæ ipsum meliori modo commendavit , & collegam ut expetiit , ita impetravit.

Proxima occupatio in usum præsentium studiosorum dirigebatur , quibus in partes medicinæ omnes intimius deducendis omnem operam navabat , scholasque tam publicas , quam privatas aperiebat. Probabat autem illam medicinæ tam faciendæ quam docendæ rationem , quæ corporis curandi omnium partium structuram ex anatomica autopsia ante omnia exquirat ; actionum autem , quas vivæ edunt , causas tam ex motuum æternis legibus , quam rerum , quæ in nos non agere non possunt , ut aëris , aquarum , ciborum , medicamentorumque viribus insitis eruit & indagar , atque ad hoc tam physicis , quam chemicis & medico-præcticis experimentis utitur. Atque anatomiciæ docendæ una cum practica medicina provinciam nactus ejus multiplices utilitates ad practicum usum inculcandi occasionem crebram habuit ; nunquam autem dimisit , sed luculento academiciæ fructu eas administravit. Diu enim abdicaverat illa dogmatum genera , vel auctoritati veterum innixa , vel ex hypothese gratis adsumpta ratiociniorum intortorum ancipiti nexu , magno autem loquacitatis tractu derivanda.

Quumque non minus ea , quæ vitam & sanitatem præstant , quam quæ vel morbos inducunt vel eosdem expellunt ; cujus generis sunt res externæ , in scholis dictæ non naturales , ex necessitate & certis legibus agant : non poterat utique probare illorum rationes , qui talibus insuper habitis , aut levissime tactis , principium aliquod vitale cogitans & intelligens præcipue respiciendum in medicina existimant , & ab illius vel sapientia vel erroribus omnia consequi arbitrantur. Graviter potius & creberrime inculcabat , animæ vires in corpus utique magnas esse & conspicuas , verum magis ad lædendum corpus ac variis morbis exponendum eam valere : quod adfectuum exemplo clarissime cognoscitur. Quicquid tamen vel mali hinc evenit vel boni , semper corporis statui alterando cedit ; ut omnino medicus non possit succurrere ulla alia parte , quam corporis rationem habendo , inque eo occurrentes motus vel dirigendo vel moderando aut omnino sopiendo. Urgebat autem præcipue illam medicinæ partem , quæ aëris , ventorum , regionum , aquarum , ciborum , potuum , vitæque generum insignes vires ad vitam sanam præstandam , morbosque avertendos ; atque ex horum prava vel constitutione vel usu morborum ortus explicat ; deinde vero vias recuperandi valetudinem & confirmandi ex eadem cognitione invenit & designat. In ipsa proinde medicina facienda ita pariter comparatus erat , atque auditores suos ita formabat , ut non sperarent à medicamentis ullis curationum optatos successus , tanquam illis perpetuæ & absolutæ vires inessent ; sed ab ea corporum , quibus offeruntur , conditione , quæ efficaciam à medicinis exsertat vel obsecundando vel resistendo & contra nitendo ad eas medendi vias ducitur , quæ præsentis curandorum statui maxime congruunt & ad salutem requiruntur. Hanc cognitionem in medico vocabat rationem sive potius judicium universæ medicinæ præsidem , cujus beneficio omnium , quæ fieri aut facta esse vel ipsi videmus , vel ab aliis consignata legimus , causas invenimus , facileque cognoscimus , cur ab eodem medicamento vel auxilii genere hic optimos , alter pravos , alius omnino nullos effectus annotaverit. Ægrotantibus , aut in alicujus morbi initio positis , præcipue inculcabat , omnium aut saltem plerarumque ægritudinum sibi quemque causam esse ; adeoque multum sane in unoquoque situm esse ,

viii COMMENT. DE VITA AUCTORIS.

esse, ut vel immunis à morbis ad conspicuam ætatem perveniat, vel continuo delinquendo variis morbis obnoxius reddatur, vitæque exitum immaturum sibi contrahat. Multos itaque multarum medicinarum longo usu magis indies magisque corruptos ad emendatiorem valetudinis statum deduxit hujusmodi consiliis omninoque paucis & selectis medicinis apud tales, qui monitis audientes essent, plus effecit, quam antea infinita medicamentorum farrago & varietas potuerat efficere.

Qui medicinam ad naturæ universæ rationes ita revocabat optimo sane nascentis *Fridericianæ* fato ad physicam docendam fûerat admotus. Hujus enim tantopere ad humani generis commoda multiplicia comparatæ doctrinæ scholas aperiebat, non mera ratiocinia allaturas aut veterum traditiones repetituras; sed æque perspicuis ac jucundis experimentis omnia sensibus probaturas. Splendidissimum merito dicas primum illud auditorium decem illustrissimos Comites, sex Barones, complures nobiles & honestos alios auditores complectens. Admirabilis sane ardor ille commemoratione dignus visus est, quoniam & felicitatem novæ ac nondum sollenniter dedicatæ academiciæ comprobabat & præclaram fiduciam in docentis dexteritate positam ostendit. Nam quum is philosophiæ eandem partem sedecim ordine collegiis tractaverit, neque desisissent qui omni molimine applausum hunc minuere conarentur: semper tamen habuit frequens & nobilissimis civibus effulgens auditorium & in eo viros jam publicis & honorificis muneribus admotos qui assidua præsentia sua testarentur, quantum hujusmodi solidum docendi genus æstimarent, ipsoque exemplo secus sentientium non satis sincera judicia refutarent.

Quum Serenissimus Elector Fridericus III. à suo nomine vocandam universitatem ipsis Kalendis Juliis inaugurasset; postridie ejus diei *noster*, præsentibus Electore, aulæ, universitatis & urbis proceribus decem medicinæ Doctores solenni ritu creabat. Finitis autem solennibus, quum principi diutius Halæ commorari non liceret, isque abiens clementissime jussisset, ut patres academiciæ deliberarent, si quid ad salutem *Fridericianæ* in posterum tempus sanciendum existimarent; hi quidem re mature deliberata, duos ex suo ordine ad munificentissimum suum nutritorem miserunt, qui publica universitatis negotia tractarent & conficerent. Delectus autem cum Illustri JCto & Consiliario Electoris intimo, *Samuele Stryckio noster* eo proficiscebatur. Atque hi duumviri non minori universitatis bono, quam sua gloria, ex voto perfecerunt, ut privilegia academiciæ amplissima sancirentur.

Tertio academiciæ natali magistratum ejus annum *noster* suscipiebat ab Illustri JCto *Samuele Stryckio* ad se delatum. Vere dici potest, neminem forte ex omnibus, qui *Fridericianæ* in perpetuum prodesse annisi sunt, feliciori successu, quam FRIDERICUM HOFFMANNUM, primo hoc academico consulatu gavisum fuisse. Et enim hic fuit, cui licuit apud Perillustres *Ducatus Magdeburgici Proceres* efficere, ut viginti quatuor studiosis liberalem victum præbere annuerent; huicque beneficio mille thaleros in singulos annos præbendos assignarent. Non satis hoc beneficio impetrato academiciam sibi obligasse sese existimabat, nisi plures eidem Principi devotas provincias exoraret, ut idem exemplum sequi vellent. Feliciter res succedebat, quum ad principatus *Halberstadiensis* Perillustres status deferret. Nam cum plures ex proceribus patronos sibi omni obsequio & valetudinis ipsorum prompta felicique cura parathaleros decernerent, idque suum beneficium perpetuum sancirent. Ut vero tanto munere ad reipublicæ emolumentum suumque verum commodum rectissime omnes uterentur: ipsemet tum hospitibus bonas leges præscripsit, tum etiam alumni; quas à Perillustribus patronis ac mæcenatibus confirmatas promulgavit, & ut ab omnibus rite observarentur, eo majori semper studio quæsit, quoniam utriusque provinciæ proceres ipsum alumnorum suorum ephorum legumque custodem constituerant.

Nec inter minima hujus magistratus referri debet quod *noster* apud Serenissimum Principem nutritorem impetravit, vel ex redditibus cœnobii *Hillerslebiensis* in ducatus *Magdeburgici* boreali limine inter *Haldenslebam* novam & *Wolmirstadium* siti, quingenti quotannis thaleri academiciæ donarentur, pro collegio elegantioris litteraturæ fundando. Institutum hoc erat, ut in melioris ingenii & spectationis industriæ aliquot juvenes quadringenti thaleri quotannis impenderentur, qui se, hoc auctoramento inducti, elegantiorum litterarum sollerti cura officiis scholasticis ardentius præpararent, ut essent idonei viri, qui scholis præfici aliquando possent. Huic tanto consilio susceptæ rei præficiēbatur una cum venerando theologo *Joach. Justo Breithauptio*, sacrorum *Hillerslebiensium* præposito & sacrarum litterarum Professore Seniore, vir undiquaque celeberrimus *Christoph. Cellarius*, eloquentiæ antiquitatum & historiarum Professor

Professor Publicus, cui pro labore isto centum thaleri decernebantur.

Qui tanto *Fridericianæ* emolumento primum magistratum gesserat, eundem ordine ad se redeuntem ter suscepit, & cum summa integritatis laude sustinuit annis hujus sæculi quinto, decimo octavo, & vigesimo octavo. Accessit autem ultimo non exiguum additamentum oneris, quum Illustris quondam JCtus *Nic. Hieron. Gundlingius*, ad quem fasces academici delati fuerant, longo satis tempore graviter decumberet, tandemque morte auferretur, vix dimidia temporis legitimi parte absoluta: quo fiebat, ut & languentem sublevare oporteret, & derelictum tandem magistratum resumere.

Satis hinc facile intelligitur, quam multum pro publico *Fridericianæ* bono *Hoffmannus* laboraverit. Sed non solum domi nulla in parte defuit ejus commodis promovendis; verum etiam peregre missus ejus nomine dignitatem illius decore sustinuit. Nam post illam legationem, quam privilegiorum impetrandorum & amplificandorum causa suscepisse eum diximus, iterum *Berolinum* adiit, ut sollennibus exsequiis, quæ reginæ An. c1o 1o ccv. memorabili pompa peragebantur, interesset: eodemque anno *Francofurtum ad Viadrum* mittebatur, ut illi academiæ, sæcularia gaudia celebranti, nostræ nomine gratularetur.

Quam celebre HOFFMANNI nostri nomen etiam primis academici muneris annis per omnem *Germaniam* fuerit, ex multis licet cognoscere. Nam non solum Illustris *Academiæ Cæsareæ naturæ curiosorum* Præses, *Lucas Schrækius* eum ad Societatem honorifice & sponte invitavit, quantumque ejus in anatomicis, physicis & chemicis indagationibus industriam æstimaret, *Democriti* nomine imposito testatus est; verum etiam Perillustris *Leibnitius* eundem inter primos regię *Scientiarum Societatis*, quæ *Berolini* ineunte hoc sæculo fundabatur, sodales adscribebat. Excitavit hoc nostrum ad observationes barometrico-meteorologicas adornandas, quarum non nudas consignationes, sed ad usum applicatas & in ætiologiam epidemiæ constitutionis conversas condere ephemerides cogitabat. Exstat hujus operæ specimen, omnem annum c1o 1o cc. complexum: cui præmissæ sunt curiosæ meditationes physicæ de ventorum causis eorundemque viribus & operationibus tam in hominum corpora, quam in barometra. c1o 1o ccxix. in celeberrimam regiam *Scientiarum Societatem Britannicam* receptus, cui dein observationes suas physico-chymicas inscripsit. Postea sub auspiciis *Societatis Scientiarum Russicæ* per *Blumentrostium* Archiatrum, genuinum ipsius discipulum, sodalis electus & per diploma transmissum, renovata illa Societate, c1o 1o ccxxv. Kalend. Junii sub Præsidio Illustrissimi Ministri & Camerarii *de Korff*, pro membro honorario una cum Celeberrimi nominis in Anglia medico domino *Sloane* in classe physico-medica est declaratus.

Hic quoque amplissimus sane dicendi locus esset, si ex diurnorum libris exhibendi essent, quibus ægrotantibus opi & auxilio venerit. Neque tamen possum quin aliquot ex maxime eminentibus & præcipuo loco positis attingam. Eminentissimus Elector *Moguntinus Lotharius Franciscus* ex primis erat, qui nostrum valetudinis tuendæ causa ad se evocaverunt. Ad hunc sapientissimum Principem An. c1o 1o ccii. profectus, in aula ejus aliquamdiu retinebatur ejusdem precibus; quippe cupiebat omnino, ut coram intuendo omne vitæ ejus genus, quæ vires corporis ejus essent, quæque proprietates, cognosceret, ut tanto commodius rectis consiliis & auxiliis succurreret. Quantam in ejus fide & dexteritate fiduciam poneret tantus Princeps, non solum tunc ostendit, verum etiam omni deinceps tempore. Non enim solum de suæ valetudinis statu sæpe ad ipsum clementissime scripsit; verum etiam consilium ejus in difficilioribus casibus ad forenses medicinam pertinentibus, sua manu exaratis litteris, identidem requisivit. Eodem itinere ad aulas celsissimorum Landgraforum tam *Hasso-Darmstadiensis* quam, *Cassellani* invitabatur, ut in rebus ad valetudinem Principum pertinentibus consilia suppeditaret. Atque sæpius deinceps ab aula *Cassellana* litteras accepit, quibus vel ad curationem advocabatur, vel in medium consulere jubebatur.

Circa idem tempus *Cizam* revocabatur à Celsissima Principe *Maria Amalia* Potentissimi Regis *Borussicæ FRIDERICI I.* Sorore, *Mauritio Wilhelmo* Duci *Saxo-Cizensi* nupta: cujus gratia tantum florebat HOFFMANNUS, ut per plurimos deinceps annos sæpius vocaretur, nunquam non clementer habitus & honorifice dimissus.

Neque defuerunt magni Principe, qui ipsum in suas terras invitarent, & splendida satis munera offerrent. Sic factum à morte Celeberrimi *Meibomii* scimus, ut in academiæ *Juliam* ipsum pertrahere niterentur, quorum est de talibus negotiis deliberare. Neque minus ab aula *Guelpherbytana* in locum defuncti *Behrensii* Archiater desiderabatur. Omnium autem maxime serio & multum requirebatur, ut in *Cassellana* aula Archiatri munus capefferet. Enimvero omnibus se modeste excusabat noster, cui patriæ inservire pulcherrimum videbatur; aulæ autem servitiis se mancipare non solum

molestum, sed cum periculo etiam multo conjunctum videbatur. Et sane plus gratiæ est magno & celebri medico, qui ad magnates vocatus venit & peracto negotio abit, quam qui semel adstrictus cum empiricis omnis generis luctari, adversus invidiam autem, calumniam & fastum aulicorum perpetuas excubias agere debet, prorsusque sæpe cum gemitu sub magno strepitu boni viri officium exercere.

Anno c1o 1o cciii. *Weisio* juniore Regis Borussiae Archiatro mortuo, nomine regis, qui tunc temporis Magdeburgi degebat, nostro *Hoffmanno* ab Illustrissimo Camerario Comite de *Wartemberg* splendida hæc sparta fuit oblata, sed ipse humillime ob prætextam infirmi corporis valetudinem summam hanc clementiam deprecatus est; brevi vero tempore diplomate regio in numerum consiliariorum & Archiatrorum est receptus, & vacuefactum archiatri munus *Gundelsheimerus* ex Gallia redux obtinuit.

Anno hujus sæculi quarto rogabant ipsum aliqui aulæ *Berolinensis* primarii ministri, quibus auctor fuerat, ut thermarum *Bohemiæ* Carolinarum usum experirentur, secum ut iter istud institueret, fontisque hujus aquis recte utendi modos edoceret. Hac occasione ita utebatur, ut naturam & vires admirabilis hujus scaturiginis ad examen accuratius revocaret. Quicquid igitur per complura experimenta tunc cognoverat, id omne cum publico communicabat, scripta eleganti dissertatione de *thermis Carolinis*, quæ sæpius typis renovata, & in vernaculum etiam sermonem translata legitur, cum pluribus aliis, quæ ad fontes foterios pertinentia deinceps observavit & in usus publicos convertit. Sæpius enim posthæc easdem *Bohemiæ* salubres aquas adiit, hortantibus ipsum Principibus aut aliis illustribus ægrotis, quibus spem emendandæ valetudinis ab hac medicina divinitus concessa fecerat. Factum hinc fuit, ut HOFFMANNUS magis magisque indies innotesceret: quum singulis annis magna ægrotantium multitudo ad thermas confluat: qui quum ipsius consilia pluribus fuisse salutaria intelligerent, non solum tunc iisdem uti volebant, verum postea etiam per litteras edoceri modos & vias ad salutem recuperandam proficuas desiderabant. Notumus multa cumulare de summorum hominum personis, quarum saluti tuendæ aut recuperandæ fontium usum attemperavit: neque tamen reticendum est, quod AUGUSTISSIMÆ IMPERATRICI c1o 1o ccxx. thermis hisce utenti vocatus adfuerit, & quod deinde An. c1o 1o ccxxxii. AUGUSTISSIMO IMPERATORI CAROLO VI. una cum AUGUSTISSIMA ad hos fontes profectis consilio adfuerit. Incredibili studio favebat Summus hic christiani orbis Monarcha intelligendis harum aquarum principiis & constitutivis partibus, quas HOFFMANNUS coram per experimenta omnis generis demonstrabat. Non opus est hic multis commemorare, quam conspicuis summæ clementiæ signis Augustissimæ personæ hunc medicum prosequutæ fuerint, quantisque magnificis muneribus exornatum dimiserint: illud certum est, quod & postero tempore non intermiserint, HOFFMANNI nomen honorifice commemorare & laudare industriam ac peritiam in se curandis comprobata.

Illis tam crebris itineribus in Bohemiam detexit *noster* jam An. c1o 1o ccxvii. aquas amaro cathartico sale pollentes *Sedlicenses*; earumque prima mentio publice facta est in dissertatione inaugurali, quæ *observationes & cautela circa acidularum & thermarum usum & abusum* inscribitur. Sed quum post sex annos ad thermas rediret, *Augustissimæ* inserviturus, ejusque mentionem apud Celeberrimum & Perillustrem archiatrum Cæsareum Dm. *Nic. Pium de Garelli* injiceret, horumque duumvirorum sententia illæ aquæ & ex iisdem paratum sal comprobatum commendatumque esset; mirum erat quantam mox celebritatem per universam *Germaniam* consequerentur.

Neque tamen his thermis solum, aut his, quas modo nominavimus, aquis *Sedlicensibus* illustrandis operam dedit, sed omnino ad omnes aquas foterias, & inter has præcipue ad acidulas, industriam suam convertit. Infederat nostratium animis pervulgata opinio, quod thermarum & acidularum natura toto, quod aiunt, cœlo distet, & quod hæ acidum aliquod foveant. Ostendit autem *noster* perspicue quod non solum ab acido longe distent acidulæ; quippe potius alcalini salis prædominio insignes; sed quod omnino à thermis acidulæ uno tantum illo discrepent, quia calore destituuntur. Primus itaque fuit *noster* HOFFMANNUS, qui docuit, acidulas & minerales aquas cum lactis connubio tuto & cum singulari fructu esse potandas, quod olim valde exitiosum habebatur à medicis, qui harum aquarum naturam ignorabant. Præterea quam optime docuit justos omnibus his fontibus utendi modos, cum omnibus cautelis, quæ ex modo illarum aquarum operandi & corporum, in diversis ab ætate, temperamento & morbo constitutionibus diverso statu resultant. Tantum igitur abest, ut nobilissima hæc sanitatis principia, quæ Deus humano generi ex terræ visceribus suppeditat, abusibus pristinis reliquerit, aut persuasione ab empirico & impe-

imperito usu olim stabilitis obnoxia eadem passus fuerit: ut omni nisu ad rationalem usum ea revocavet. De aliquibus fontibus seorsim commentando, ut de *Selteranis* & *Lauchstadiensibus* quorum insignissimum, tum in avertendis, tum in debellandis contumacibus morbis usum primus omnium recte detexit, & peculiaribus de iisdem conscriptis dissertationibus docuit, ut inde famam celebritatemque non modo per Germaniam, sed per plurimas quoque externas regiones testimonii sui auctoritate con- sequuti sint, in non leve urbium, apud quas scaturiunt, incrementum, & incola- rum, quod gratissimo etiam animo agnoscunt, emolumentum.

Crebrorum ad fontes *Carolinos* itinerum etiam ille fructus erat, ut Potentissimo Regi Borussiae FRIDERICO I. propius innotesceret. Nam quum anno MDCCVIII. quo Rex fontium horum usum experiebatur, multi ex praecipua nobilitate viri me- dica HOFFMANNI opera uterentur, & ad salutationis officium admissi praedi- carent viri hujus peritiam: jubebat Rex ipsummet ad se vocari, multaque de suae valetudinis statu colloquutus, jubebat ut ad se frequentius veniret. Id quum faceret HOFFMANNUS & Rex Clementissimus non obscure ostenderet, se viro huic multum confidere & eruditis sermonibus ejus plurimum delectari: jam tunc aliqui non obscuris signis ostendebant, quam suspectum ipsum haberent; suae scilicet exi- stimationi decessurum rati, quantum Rex huic tribueret.

Anni hujus ultimis mensibus Rex Potentissimus adversa valetudine graviter affli- gebatur. Et quum nulla medicina constantem ferre opem videretur; in mentem Regis veniebat HOFFMANNUS, à Serenissima sorore sua toties ipsi commendatus & nuper ad *Carolinas* thermas propius cognitus. Jubebat igitur per celeres nuncios eum protinus advocari, ut inter ceteros medicos salutis regiae curam susciperet.

Non recusare HOFFMANNUS poterat, quod Rex serio volebat; quamquam bene intelligens, quam sit lubrica aulicorum virorum fortuna atque vita omnis liber- tatis & quietis ratione animi & corporis expers: Abiit igitur jam ad exitum vergente anno, divino numine fretus & sapientissimi Regis gratiae confisus. Atque primo statim adventu suo industriam fidemque suam Regi adeo probabat, ut is propriae vo- luntatis instinctu nostrum inter consiliarios aulicos adscisceret & archiatrorum suorum collegio, cum amplissimo salario, illum adjungeret. Provide tamen HOFFMANNUS, sibi academicum munus conservari, petebat: quum semper tranquillis musis inservire, quam in aula continuo versari satius putasset: cui desiderio Rex clementissime adnuebat.

Ab hoc itaque tempore HOFFMANNUS per tres solidos annos, & quod excur- rit, tanta fide tamque promptis & paratis obsequiis inserviebat aulae, ut Regi Reginae- que abunde satisfaceret, neque unquam in ipso vel fides & assiduitas vel dexteritas desideraretur. Non autem modici laboris res erat, Regi haud firmissima valetudine praedito per hibernos menses & gravibus pathematibus vexato inservire: saepeque in- tegras noctes corporis proprii necessariae curae subtrahere, & cum diebus noctes con- tinuare opus erat. Neque minus Regina ipsi laborem facebat pathematibus, sub- inde gravioribus, obnoxia. Has tamen æumnas, utpote officii partes, facile supe- rabat, & conscientia recte diligenterque navatae industriæ molestias omnes inde ena- tas solabatur: praesertim quum Regias personas clementissima voluntate se prosequi intelligeret. At vero ipsa muneris sui tam diligens cura & indefessum illud studium omnes officii demandati partes implendi objiciebat ipsum molestissimæ invidiæ, mox etiam capitalibus odiis, collegarum praesertim *Andreae Gundelsheimeri*, qui nunquam pro- motus, quum Celeberrimo *Tournefortio* Regis Galliae sumtibus itinere per *Græciam* & *Æ- gyptum* instituto adfuisset, aulae Berolinensi redux commendatus, violentas medicinas etiam ex regia familia ortis porrigebat, cui *noster* modeste conscientiae vi impulsus con- tradicebat. Multa dici hic possent de controversiis HOFFMANNO valde mole- stis, quæ ipsi cum hoc viro intercesserunt. Quum vero neminem magnopere juvare posse videatur hæc recensio; ista vero, quæ ad concertationis hujus causam perti- nent, in *Medicinae Consultatoriæ* vol. I. pridem legantur ample exposita, malumus rem totam sicco pede præterire, postquam in vivis esse pridem desierunt, qui tunc adver- sarii gravissimi fuerunt. Certe ab HOFFMANNI moribus alienissimum fuisse, ut ullum unquam hominem lacefferet, ex eo cognoscitur, quod nullius unquam con- troversiae initium ipsemet fecit: & quod multis satis diserte contra se insurgentibus, quin fere insultantibus, nihil omnino respondere, reique dijudicandæ arbitrium erudito orbi permittere maluit, quam disceptationibus bonas horas disperdere. Quicquid autem hic fecit, quo adversarius irritatus fuit, ita cum jurata fide, qua obstrictus tenebatur, arcto vinculo cohærebat, ut sine officii neglecti gravissimo reatu non potuisset omitti.

Ob plura itaque & gravia tædia aulica dimissus HOFFMANNUS repetebat di-

lectissimam patriam An. cLo Io ccxii. mense Junio & ad intermissas aliquamdiu occupationes academicas tanto majori alacritate redibat, quo majorem ex illo otio dulcedinem jucunditatemque nunc percipiebat. Non possum quin hoc loco commemorarem, quæ medicus Jo. Papius ad Keplerum scripsit epist. de vita aulica XL. p. 76. *non est, quod mireris consilium meum de migratione in Borussiam, locum minus, ut videri potest, tutum. Expertus ego sum huc usque vitam primum academicam tunc hic (Onolsbachii) aulicam: contabesco propemodum recollectione vitæ academicæ, tantæ ejus est bonitas, si cum cæteris conferatur. Huic si accedat copiosæ praxeos, ut nos loquimur, facultas, regiam fere vitam dixerò. In aulis est splendida miseria, imo omnis aularum ratio liberalibus ingeniis est inimicissima.*

Si quid temporis relinquerent vel studiosæ juventutis institutio, vel ægrotantium querelæ, id ita dividebat, ut partem impenderet scriptis olim editis nunc recensendis & per fasciculos edendis, aliquibus etiam ab integro condendis partem alteram tribueret naturæ per experimenta chemica profundius scrutandæ. Hinc factum est, ut ab illo tempore *dissertationum* olim emissarum *decuriæ* apud *Batavos* excuderentur; aliquis etiam fasciculus, ad thermas & acidulas pertinentia complexus, *Ulmæ* prelum subiret: quem mox alius exceperit, qui diversi argumenti minora opuscula antea separatim edita, conjungebat.

Prope jam sexagenarius animum adjiciebat condendæ Medicinæ rationali systematicæ, cujus primam partem luci publicæ sistebat An. cLo Io ccxviii. quam cæteræ ad hunc usque præsentem, quo ultimam manum operi immortalis futuro octogenarius imponit, per justa intervalla exceperunt. Merito videntur reprehendendi, qui ad medicinæ vel cujuscunque artis, quæ rationibus per experientiam longam comprobandis & firmandis constat, systemata condenda juvenes accedunt, alienaque fide conscribunt, non satis intellecta. Ex quibus dum multa ratiociniis porius consentaneis, quam certa scientia eruunt, curandique methodos eliciunt: fit ut & ipsi ætate jam provectiores & experiendo cautiores facti, multa inveniant, quæ corrigant, & alii eorum præscripta sequuti, ægrotantes non paucos pessumdent. Quodsi ad scribendum nemo accederet, nisi multum experiendo confirmatus; in experiendo autem ratione prælucente duceretur ut eventuum causas rite erueret; brevi omnino futurum videtur, ut certum, quod sequamur, minime obscurum esset, dissensionumque infinita multitudo aut omnino tolleretur, aut ad insignem paucitatem redigeretur. HOFFMANNUS certe, qui tot annos docendo & artis opera edendo consumserat, semperque eventus fideliter notatos accurata & repetita meditatione ad veras causas revocare annis fuerat; ostendit suo exemplo, quantum in rationibus inveniendis & reddendis feliciores simus majoribus, qui eandem rem moliti fuerunt. Quemadmodum vero ad lucis claritatem cognoscendam nulla alia re opus est nisi oculo sano & aperto; ejusque usura omnibus jucunda & utilis accidit: sic omnino *Hoffmanniana* de medicis doctrinis præcepta ita universis, ad quos ea penetraverunt, facilia, plana & luculenta sunt visa, ut vix alius liber nostra patrumque memoria æquali plausu susceptus fuerit. Nam quum bibliopola, apud quem primum emissæ fuerunt, plerasque partes bis terve renovare debuerit; exteri etiam in ejus messem involaverunt & tam extra *Germaniam*, *Venetis* & *Basileæ*, quam in illa *Frankfurti*, recudendum illud medicinæ systematicæ opus susceperunt; invito quidem auctore omnes præter honestissimos illos viros *Lugdunenses*, à quibus omnium suorum scriptorum editionem fieri non solum consensit, verum etiam exempla passim correctæ & locupletata iisdem suppeditavit. In *Gallicum* sermonem conversæ medicinæ systematicæ primam partem, & *Parisiis* emissam, his diebus conspeximus. In quo tam egregio opere, qualem se præstiterit, sera etiam posteritas livoris expers longe adhuc apertius prædicabit. Eodem tempore, quo ad medicinam rationalem systematicam accedebat, alius utilissimi operis editionem aggrediebatur. Nam quum tot annis sæpius accidisset, ut vel ordinis medici nomine respondendum esset de casibus propositis, vel ad medicinam forensam vel curandorum salutem pertinentibus; neque minus crebræ imo longe etiam frequentius ad ipsum solum directæ adferrentur litteræ, quibus consilia expetebant vel ipsi decumbentes, vel de illorum salute solliciti medici: cœpit illa colligere & per fasciculos edere sub titulo *Medicinæ Consultatoriæ*.

Atque hujus jam duodecim tomi, quorum quisque decurias quinque complectitur, prodierunt vernaculo sermone. Curavit autem ut inde selecta quædam in latinum sermonem transferrentur & ederentur consilia: quod opus vix apud nos prodierat, quum jam binis locis, ut *Amstelodami* & *Frankfurti ad Moenum*, recusum conspiceretur.

Putares virum tot scriptis elaborandis, tot consiliis scribendis occupatum non aliis semet indulgere potuisse laboribus. Enimvero longe aliter se res habet, plurimique sunt, quibus vel in hac urbe, vel peregre degentibus operam suam navavit, ut graves morbos

morbos devincerent. A quo enim tempore, aula relicta, huc reversus est, vix ulla aula Serenissimorum Principum *Saxoniae* aut *Anhaltinorum* fuit, quæ non HOFFMANNI opera & consiliis usa fuerit, eumque identidem ad se invitaverit. | *Schvvartzburgicus* Princeps semel iterumque ad se eum vocavit, sub cujus clementia per auctoritatem Imperatoriam anno cdo Io ccxxvii. mense Jul. comitis Palatini munus gratiose obtinuit. *Cassellas* ad Serenissimi Landgraffi curationem expetitus ivit, ut & *Guelpherbytum* ad Principis salutem procurandam accitus fuit. Longum foret, si Principes, comites aliosque ex prima nobilitate proceres recensere velim, quorum valetudini tuendæ, aut languoribus tollendis consilia misit: aut si enumerare velim, quot magnates ex remotis regionibus huc venerint & curandos se ipsi præbuerint, magnumque fructum ab ipso consequuti sint. Nolumus quoque hic referre, quantum per omnem vitam temporis impenderit litterarum commercio, quod cum summis nostri ævi & medicis & philosophis, maximeque cum magno *Leibnitio*, Imperatoris Regumque archiatis, & plurimis Professoribus tam in- quam extra Germaniam de rebus physicis ac medicis habuit; de quibus alio forte tempore meminisse juvabit.

Anni cdo Io ccxxxiv. æstare jam adulta HOFFMANNUS *Berolinum* accedebat, ut ibi habitantes carissimos, generum filiamque unicam cum familia ipsorum, inviseret. Accidebat tunc, ut triste nuncium adferretur de gravissimo & fere desperato viso morbo, qui potentissimum Regem in castris ad *Rhenum*, corripuerat. Quum jam in eo esset, ut ad nos reverteretur, non solum regii ministri suadebant, sed clementissima Regina jubebat diutius subsistere, ut ad manus esset, si consilium ipsius expetendum videretur. Et sane eadem vespere, quæ Regem *Potsdamio* reddiderat, celerrimo nuncio accersebatur; quo non parum faciebat, quod Celeberrimus *Bata-vorum* medicus *Hermannus Boerhave* de morbo consultus nostri potissimum opera uti suaferat. Non levis erat morbus, qui optimum patriæ patrem affligebat, ejusque initia jam à tertio anno infederant, & mora fuerant confirmata. Asthma erat hydropicum, quod omnino plus terroris, quam bonæ spei ostendebat: omninoque magni viri, quorum consilia requisita antea fuerant, aperte declaraverant, quod plus metuerent, quam bene sperarent.

Enimvero Dei clementiæ tribuendum est, quod ex ingenti discrimine liberatum patriæ patrem recuperavimus. Neque parum effecit animus Regis inter tot molestias semper alacris, numquam earum gravitate depressus, rectisque consiliis audiendis ac admit-tendis paratissimus. Nunquam enim diætæ præscriptas regulas migrabat ac medicinarum usui sese libenter præbebat.

Quinque mensium spatio consumto, quo tempore HOFFMANNUS regiæ valetudini recuperandæ una cum eruditis & celeberrimis viris, *Horchio* præcipue ac *Ellero* ad eandem curationem vocatis, præcipuam operam dederat, id omne effectum dabatur, quod infinita hominum millia ardentissimis precibus à summo Numine efflagitaverant. Pater patriæ non solum immunitatem à doloribus & molestiis consequutus erat; verum etiam pristinas vires, Dei munere, collegerat, ut prodire & negotiis solita alacritate peragendis impendere se posset. Evenisse tum omnibus diceres, quod Alexandri militibus, cum is Philippi medici arte & cura confirmatus subito in conspectum illorum venit, ut quemadmodum illi non avidius ipsum Regem quam Philippum intuiti fuerant, ita omnes pari admiratione & Regem & HOFFMANNUM adspexerint, ac pro se quisque gratiam habuerint regiæ valetudinis ac vitæ post Deum flatori ac conservatori sollertissimo.

Jam vero Rex Clementissimus nihil omittebat, quo HOFFMANNUS ostenderet, quanta ipsum gratia complecteretur. Non solum splendidis muneribus laborem ac studium tanto tempore exantlatum compensabat, verum etiam sæpissime, præsentibus legatis ac proceribus, profitebatur, quod post Deum immortalem recuperatæ valetudinis beneficium ipsi deberet. Ornandum itaque honoribus etiam clementissime censuit: tantoque id magis se etiam facere professus est, ut orbis cognoscat, quantum amet, virum, quem alio tempore inimicorum malæ artes in eadem aula opprimere conatæ fuerant. Sua igitur sponte ipsum *Consiliariorum intimorum* ordini adjunxit, filioque unico cognomini, paternarum virtutum æmulo, inter *Fridericianæ* academiae Professores medicos ordinarios locum tribuit & consilarii aulici honorificam dignitatem adjunxit.

Nequeminus fuit in Clementissima Regina studium HOFFMANNUS benignissimam voluntatem suam declarandi. Nam inter alia præclarissima munera donavit ipsum sua imagine quam celeberrimus pictor summo artificio elaboraverat: ab eodemque pingi HOFFMANNUM jubebat, ut in regio secessu *Monbijou* collocaretur. Scripta etiam viri omnia mitti sibi jubebat, bibliothecæ ejusdem arcis inferenda. Sæ-

pius inter hæc proponebatur ipsi, cupere utique Regem & Reginam, ut in propinquo esset, promteque posset, si quid accideret, ad opem ferendam advocari. Enim vero excusabat sese iisdem argumentis, quibus quondam apud Regem *Davidem* Senex Barfillæus fuerat usus; & opus esse dicebat, ut in tam adulta senectute ad vitam beatam se præpareret, & breve, quod ipsi vivendum sit, tempus medicinæ suæ systematicæ ad finem perducendæ & consiliis saluberrimis dandis impendat: neque minus clementer admissa hujus excusatio fuit, quam illius fuerat.

Mensis itaque Aprilis clō 15 ccxxxv. initio Clementissimo Regi valedixit, ac non sine multa gratiæ propensissimæ significatione, cui osculum Rex adjiciebat, dimissus fuit. Ad suos salvus omnino redux maximo gaudio non solum domi suæ, à qua octo mensibus abfuerat, exceptus, verum etiam academiciæ & urbis studiosissima congratulatione, quæ venerandum senem, tanquam præcipuum decus suum & ante observaverat, & nunc tanto ardentius excipiebat, quum tot præclaris laudibus illud meritum divinum Numen adjecisset, quod Regem optimum & clementissimum servavisset.

Crebris ab eo tempore litteris, etiam ipsissima Regis manu signatis, & insignibus muneribus per singulos fere annos transmissis certior redditus fuit de propensissima in se voluntate, qui non semel regia sua manu testatus est, vitæ suæ conservationem post Deum ipsius curæ deberi. Ut vero etiam academia Fridericiana, cujus Senior jam est, cognosceret, quantum Rex cupiat consilia hujus tam multorum annorum usu exercitati viri, apud eam plurimum valere, Augustali libello jubebatur, nullam rem alicujus momenti absque ejus consilio & sententia perficere.

Tam felicem & fortunatam HOFFMANNI senectutem haud modice interpellabat. An. clō 15 ccxxxvii. gravis morbus, qui dilectissimam ejus conjugem, qua cum per xxxviii. annos conjunctissime vixerat, ab ipso divellebat, in placidam ejus mortem terminatus. Sed hoc quoque adversum eo animo, qui Christianum & philosophum decet, perferebat moderatissime, atque cogitationes à tristibus avertendo impendebat piis meditationibus. Eo enim tempore omnem *Christianæ doctrinæ summam* perspicua & nervosa brevitate verbisque latinis complectebatur & cum publico communicabat.

Quum de eo scripto apud Regem Clementissimum mentio facta esset, illeque gratiosissimis litteris ostenderet, se cupere, illud etiam vernaculo sermone exstare; non poterat defugere jussu, efficiebatque ut primo quoque tempore germanica lingua legeretur.

Nuper elapsi anni clō 15 ccxxxviii. æstate gravissimus morbus febrilis optimum virum occupabat & non mediocriter affligebat: prorsus ut multis metuendi causæ plures & majores, quam bene sperandi viderentur. Divino tamen munere factum est, ut recuperaverimus virum, ipsiusque vegeta & alacri senectute gaudeamus, nuper octogesimum annum feliciter ingressa. Ultimo nec reticendum esse puto suum connatum quasi in extrema ætate discentibus inserviendi studium; siquidem per integros jam octo annos eam publice docendi iniit rationem, ut auditores, theoreticis præceptis bene instructos, recta medendi scientia imbueret. Quem in finem quovis semestri collegium medico-præctico-clinicum aperuit, in quo accurate conscriptos & ab exteris ad se transmissos casus communicavit, & ex his veras tam proximas quam mediatas causas solide eruit, quibus dein genuinam sanandi methodum superstruxit ac candide docuit. Dici vix potest, quem singularem plane fructum ac usum ii inde percipiant, qui artem salutarem feliciter & cum laude exercere cogitant. In tota enim medica scientia plurimum sibi observatio & longus rerum usus vendicat, qui optimus medicinæ interpret & docendi discendique magister merito prædicatur.

Faxit Deus ut non solum hunc jam ingressum octogesimum optabili valetudine perficiat, sed & multos deinceps annos subjungat: ut optimo viro, communi utique bono, patria urbs, Fridericiana academia, regia domus, universum genus humanum, quibus commentando ac consulendo prodest, diutissime salvo & incolumi perfruantur.

Atque nunc sermonis filum abrupto commentandique finem facio. Satis tenuiter hæc de summis viri meritis esse tradita, ipsemet agnosco: quamquam, quod multa dici porro potuerint aut debuerint de laudibus ejus, optime video. Quoniam tamen ad hanc descriptionem accedere nisi impetrata venia & exoratis subsidiis nolui; non alia autem conditione illam nactus sum, quam ut parcerem modestiæ ipsius, quæ professam laudationem minime perferre potest: simplici hac vitæ factorumque recensione defungendum fuit. Certe non deerit amplissima dicendi materia cuicunque ad laudandas virtutes, quæ illustres & summæ in eo eluxerunt, progressuro: atque ut vitæ etiam annorumque series, longius divino beneficio producta, plurima, quæ his addi debeant, facta suppetet, omnibus votis ab illo expeto, qui vitam resque mortalium omnes liberrimo arbitrio moderatur.



FRIDERICUS HOFFMANNUS

LECTORI BENEVOLO SALUTEM.



ETIERUNT nuper à me Nobilissimi Bibliopolæ FRATRES DE TOURNES Genevenses, quorum nomen & merita in rem litterariam eximia jam ultra sæculum cognita sunt, ut ipsis, omnium à me editorum operum & scriptorum novam & omnibus aliis me invito divulgatis editionibus, accuratiorem concederem editionem; eo quòd non modò in *Gallia*, sed etiam *Hispania* & *Lusitania*, medicorum eruditiores omnia à me usque eo edita, quibus rem medicam illustrare & perficere sim annixus, aliquot

voluminibus comprehensa desiderent avidissimè. Ut verò majorem fidem apud cæteros mea habeat concessio, petierunt insuper à me jam *Laudati Viri*, ut omnia, quæ hætenus sub meo nomine evulgavi, reviserem, atque si opus sit, emendarem & ulterius illustrarem, præfationemque toti operi præmitterem.

Ego his omnibus probè pensitatis, quum vix ullam unquam inserviendi publico & posteritati occasionem prætermiserim, nolui hisce honestis & in Reipublicæ Medicæ emolumentum vergentibus precibus deesse, & officium meum denegare; præsertim quum *Medicinæ Systematicæ* Tomos, qui *Basileæ*, *Venetiis* & novissimè *Francofurti*, me invito, recusati sunt, multis mendis & erroribus, omnem sensum & contextum turbantibus, refertos animadverterim; certa spe fretus, futurum, ut sicuti *Domini DE TOURNES*, integerrimi viri promiserunt, nunc longè correctiora & limatiora scripta mea luci sistantur.

Inter immensas igitur, quibus quotidie distrahor, in senio occupationes, horis subcisis id otii & curæ sumsi, ut non modo tomos, præcipuè priores *Medicinæ Systematicæ*, ante octodecim annos primum editos reviserim & hinc inde emendaverim, verum etiam reliqua scripta & dissertationes *Lugduni Batavorum* & *Ulmæ* recusati, quibus decem adhuc alias præclari argumenti & numquam antea editas adjeci, in meliorem ordinem certasque classes redegerim; ut *Benevolis Lectoribus* & *Editoribus* satisfacerem plenissime. Neque destiti hisce operibus PRÆFATIONEM præmittere. Argumentum sumsi de rationalis & periti Medici, ab eo qui, sola nixus experientia, veris & firmis principiis destitutus praxin exercet, differentia; ut exinde evidenter & dilucide *Lectori* innotescat, quæ memet impulerint causæ, ut artem nostram in Rationale Systema methodo demonstrativa innixum redigere, atque hoc ipso Divinæ nostræ artis dignitatem & præstantiam, quam pauci pernoscent & capiunt, demonstrare primus omnium allaboraverim.

Hæc, *Benevole Lector*, dicebam, in Monito ad Editores misso, ut Operibus meis præmitteretur: cum vero, ab eo tempore, Dei O. M. gratia, mente sana in corpore sano fruius sim, dum hæc sub prælo sudabant, absolutissimum de morbis

Infan-

Infantum Tractatum, à me promissum, perfeci; hunc invenies in extremo Tomo tertio. Nec silentio præterire possum, *Nobilissimos Bibliopolas* promissis suis planè stetisse, spem meam non fefellisse, mihiq; nihil desiderandum reliquisse quoad char-
tæ nitorem, typorum elegantiam, mendorumque correctionem, adeò ut Opus, quod nunc in lucem prodit, sit omni numero absolutum, illudque ut veram, genuinamque Scriptorum meorum editionem lubens agnoscam; hoc me maxima affecit lætitia; hoc, ut spero, omnibus artem Medicam colentibus jucundissimum simul & utilissimum erit: sicque meorum ipsorumque desideriis satis superque factum est.





PRÆFATIO

AUCTORIS

DE DIFFERENTE ARTIS MEDICÆ
& Medicorum conditione ac statu & Criteriis boni ac periti
Medici.



MAGNA sunt elogia splendidique tituli, quibus medicinam à multis passim condecoratam videmus; nullum tamen, me iudice, majori jure saluberrimæ huic arti tribuitur, quam quo ab optimo medicinæ parente *Hippocrate* divina appellatur. Et recte quidem: quia sapientissimus universi conditor non modo in triplici naturæ regno, ad valetudinem tuendam, omnisque generis morbos profligandos, remedia recondidit aptissima, sed & ipsam corporis humani naturam tam sapienti construxit ratione, ut determinato quodam motuum ordine, se à tetra corruptionis labe & imminente interitus periculo vindicare possit quam optime. Quin imo ipse Deus in sacris litteris se medicum profitetur, & Christus benignissimus generis humani servator, quamdiu inter homines egit, nullam magis artem, quam medicam exercuit, ut ideo tum animæ, tum corporis medicus extiterit præsentissimus. Et profecto, si benefaciendo, ut constans fuit sapientum sententia, homo ad Dei naturam proxime accedit, ego certe, an ex ulla doctrina, si cœlestem exceperis, majora in genus humanum beneficia, quam ex medendi scientia possint redundare, non perspicio. Quid enim præstantius, quid optabilius, quam corpus humanum, sublime illud immortalis spiritus domicilium, diu sanum servare & integrum, & non modo dolores corporique pariter ac animo infensas ægritudines avertere, sed mortem quoque diutissime arcere? Sæt graves igitur rationes habuerunt veteres, quibus inducti, medicinæ inventores in Deorum numerum retulerunt; & quare primi & præstantissimi heroes, qui populis præfuerunt, inque gravissimis bellorum tempestatibus fortitudinis documenta dederunt, ut Chiron Centaurus, Palamedes, Achilles, Machaon & Podalirius vel docenda arte, vel discenda & exercenda eadem occupati ab illis describuntur, qui plurimum illis adjungere laudis & honoris voluerunt.

At vero, quo nobilior, quo excellentior hæc est scientia, eo magis cum *Hippocrate* dolendum est, propter ignorantiam eorum, qui eam exercent, & propter eos, qui temere de medicis judicant, rem esse vilissimam, omniumque opprobrio expositam; siquidem in nulla fere professione, tanta artificum ignorantia & multitudo conspicitur, quam in medica, dum quisque fere, vel ex infima etiam plebe, se medicum profitetur, & medicamentum adversus certum morbum jactitat; quare scite *Plinius lib. 1. cap. 29.* ait: in hac arte sola evenit, ut cuicumque medicum se profitenti statim credatur, cum tamen periculum sit in nullo mendacio majus. Verum enim vero, ut ut ignarum vulgus medici nomine indignum prorsus æstimandum sit: datur tamen, etiam inter eos, qui medicinæ addiscendæ & faciendæ ex instituto quasi se manciparunt, ingens admodum differentia, dum auctore gravissimo *Hippocrate loc. cit.* multi fama & nomine medici, re autem vera & opere pauci dantur; & *lib. de veter. medic.* ait: sunt ex iis, qui medicinæ operam dant, alii leves, alii multo præstantes; ut enim aliarum artium opifices plurimum inter se differunt, sic etiam in medica evenit arte. Atque hoc ipsum in

omnis generis disciplinis certo observari, fatis in propatulo est. Neque enim omnes, qui cœlestem doctrinam profitentur, rerum divinarum cognitione earundemque tradendarum ac tuendarum dexteritate ita æquales sunt, ut ut venerandum nomen theologorum æquo jure mereantur: nec omnes, qui causas in foro agunt, statim jure consultorum nomen merentur; nec denique, qui agros vel turres metiri, aut ædificium exstruere didicerunt, mathematici habendi sunt: sed longe utique plura & majora requiruntur, quæ efficiant, ut tam pulchris tamque honorificis appellationibus, quibus exornari plerique gestiunt, peritorum judicio digni existant. Quæ vero cum ita sint, & in medicina, perinde ac in cæteris disciplinis, non omnes, qui per vicos obambulando sese fatigant & morborum curationes suscipiunt, veris ac peritis accenseri medicis debeant; operæ omnino pretium fore arbitror, paulo accuratius diducere, quænam ad nomen hoc cum laude obtinendum desiderentur; unde pronum intellectu erit, perpauca, etiam nostræ ætatis esse medicos, qui jure sibi ac merito hoc nomen possint vindicare.

Primum vero præstantis & periti in arte medica viri criterium, ex ipsa medicinæ definitione, quam *Galenus lib. de præcognit.* prodidit, ubi eam salubrium & insalubrium scientiam denominavit, desumemus; liquidem & præfixus medicinæ scopus & medici officium in eo unice consistit, ut, remotis vanarum opinionum & præjudiciorum commentis, ex fundata, solida & sufficiente ratione demonstrare ac scienter adserere possit, cur & quare hoc vel illud alimentum aut medicamentum ad valetudinem conservandam morbosque sanandos, salutare, vel minus tale sit dicendum. Ex quo consequitur, solidam omnium earum rerum cognitionem, quæ tum ad rationalem & demonstrativam explicationem, tum ad æquum rectumque judicium, de propria ægrotantis natura, morbi causa & de convenienti remediorum applicatione formandum spectant, a medico desiderari. Nam si ulla in disciplina, acriori, exquisito & quasi ad exactam lancem revocato judicio, (quod tamen non adeo facile, sed ipsius *Hippocratis* effato difficillimum esse solet,) opus est, cetera illud ad artem medicam requiri arbitror. Quicumque enim ægrotantibus vel salutaria vult proponere, vel noxia dissuadere, is non modo propriam ipsius ægrotantis naturam corporisque constitutionem, morbi originem, genium & causas, symptomatumque rationes, sed & innumerabilium aliarum rerum & imprimis naturalium, atque remediorum tam à priori, quam à posteriori, vires ac effectus cognitos perspectosque habere debet accuratissime. Quo quis enim meliori rerum naturalium cognitione, quo maturiori judicio, tam ob longiorem usum, quam ob rerum salubrium & insalubrium exquisitius perspectam naturam medicus est instructus, eo certe magis aliis est præferendus. Magnifica certe & omnino præclara laus est, qua *Thuanus*, historicorum ille princeps, *Hollerium*, excellentem quondam medicum & professorem Parisiensem commendat, quando commemorat, quod ipse assidua meditatione acerrimum judicium ad medendum attulerit, ut deploratos morbos, & ob festinationem ab aliis medicis per vicos vaga cursitatione multos fatigantibus, minus cognitos, summa felicitate curaverit. Longe vero aliter imperiti medicorum agunt & sentiunt, qui in sola experientia medendi artem repositam existimantes, ex hac unice, quid proficuum corpori, vel noxium sit, cognosci posse arbitrantur; quum tamen & res ipsa doceat, & ipse antiquissimus artis parens confirmet, experientiam in rebus medicis admodum esse fallacem. Equidem experientiam in nostra arte tum haberi putamus, quando in morbo ad datum aliquod remedium, non semel, sed aliquoties faustum vel adversum observavimus effectum, quod quidem cum in sensus incurrat, non fallit: sed in eo fallaciam committi deprehendimus, quod nimis præcipitanter talem effectum ipsi medicamento, ceu veræ & unicæ causæ adscribere non dubitamus, cum plures sæpe aliæ ad talem effectum producendum concurrentes causæ, quas adsequi vel non possumus, vel non studemus, simul debeant considerari. Atque ex hoc falso principio, uti innumeri fere in rem medicam & artis exercitium, errores irrepleverunt: ita etiam hoc malum maxime deducendum esse arbitror, quod omnis fere generis homines, ut supra jam ostendimus, ad consilia danda artemque exercendam, tam prompti sint atque faciles. Nam medicina empirica tam magnum lateque diffusum, & epidemium quasi malum est, ut vix ullus à summis ad minimos usque ab eo sit immunis, sed quisque ad curandum paratus expertum remedium deprædicet; id vero cum maximo sæpius damno, ex quo eluctari, vel in clariori hujus seculi luce difficillimum est.

Et quoniam medicorum plurimi hanc sibi viam eligunt, nudæque experientiæ inhærendo, morborum curationes moliuntur, sit omnino, ut ne probabilem quidem, multo minus adæquatam & perspicuam rationem, quare hæc vel illa suas erint vel

dissua-

diffuaserint, possint afferre, quin imo sponte exinde sequitur, ut tantæ inter medentes dissensiones & dissidia circa remediorum efficaciam etiam nunc vigeant, adeo, ut quod unus in certo morbo probat atque extollit, alter penitus improbet atque rejiciat.

Quot enim nostro tempore sunt de venæ sectionis in intermittentibus, inque exanthematicis febribus; de corticis chinæ & cascarillæ ad rebelles intermittentes febres profligandas; de medicamentorum martialium usu in cachexia & malo hypochondriaco; de purgantibus acrioribus in hydrope; de camphoræ usu interno in malignis & deliriis; de lactis usu in phthisi & doloribus podagricis; de mannatis laxantibus circa tempus suppurationis variolosæ, quot, in quam, de horum utilitate & noxa plane dissidentes ac prorsus contrariæ medentium opiniones jactantur, cum tamen omnes & singuli, quo suam sententiam defendant, ad experientiam ceu inconcussam veritatis medicæ fundamentum, confugiant. Consultum itaque fore ducimus, ut non modo in veras tantarum dissensionum causas paulo accuratius inquiremus, verum etiam, quomodo ex hoc labyrintho emergere possimus, solícite circumspeciamus.

Primum itaque sciendum est, perpaucos esse medicorum, qui de remediorum viribus & operandi modo recte judicandi fundamentum norunt. Plurimi sunt in hac sententia, activis rebus, ipsisque medicamentis & alimentis certas, perpetuas & absolutas quasdam juvandi vel nocendi inesse vires, cum tamen eorum operationes & effectus, re paulo altius perspecta, certis tantum relationibus & conditionibus nitantur, ideoque limitatæ sint, adeo, ut pro corporum & naturarum differentia, nec non causarum morbificarum diversitate, neque minus pro diverso, quo adhibentur tempore, mensura, ordine & modo, multum inter se varient ac discrepent. Quadrat huc notissima illa philosophorum regula: corpora non agere secundum sphæram activitatis, sed secundum modum receptivitatis.

Ut veritas hujus dicti in re medica paulo clarius innotescat, diversum alimentorum & medicamentorum effectum, pro diversitate rerum & naturarum paulo curatius considerabimus. Quid quæso frequentius est, quam ut cibi ad sustentandum optimi, ægrotantibus summo sint detrimento? Aqua pura frigida exæstuantibus fere optima & analeptica est medicina; cum corpori ex nimio labore sudanti paulo largius ingurgitata pro veneno sit. Infusum fabarum coffee senibus insignem vigorem, & corpori, & animo fœnerat; juvenibus vero, præsertim fœminis, quorum systema nervorum admodum mobile, non adeo amicum, ut molestum interdum artubus tremorem inducat. Ex medicamentorum classe magnesia alba, ubi prima regio acidis scatet succis, egregie alvum movet, in aliis, ubi primæ viæ obsessæ sunt viscido humore, non nisi ventris tormina provocat. Mercurius dulcis est præstans in infantibus adversus vermes remedium; sed ubi primarum viarum regio biliosis, acerbis recrementitiis succis scatet, deleteriam sæpe induit naturam. Suaveolentia, ut ambra & moschus in infantibus sæpius adversus convulsivos & epilepticos motus summo cum fructu adhibentur, cum in fœminis hysteris & animi deliquia, & motus spasticos potius augeant. Medicamenta, quæ nitrum vel opium correctum ingreditur, in illis, qui doloribus & spasms urgentur, insigniter sudorem & exanthemata expellunt, cum in corporibus phlegmaticis & imbecillioribus, retinendo transpirationem cum exanthematibus, summam perniciem inferant. Vidimus matura venæ sectione juvenes sanguineos ad phthisin valde dispositos, ab ea prorsus immunes redditos, cum alii, phlegmatici temperamenti, ex repetita venæ sectione in hæmoptysin & phthisin incidere. Spiritus cornu cervi & salis ammoniaci urinosus sanguinis massam omnium consensu nimium commovent; nihilo minus sæpius vidi in hæmoptysi, in narium quoque & uteri hæmorrhagia optimo cum successu fuisse hæc medicamenta exhibita. Compertissimum porro est, à duobus granis resinæ jalappæ solutis vel in pilulam redactis, in quibusdam vel decem posse moveri sedes, cum in aliis vix decem grana eundem effectum producant. In nonnullis mercurius parva dosi pedum malleolis inunctus brevi tempore movet salivationem, cum in aliis & majori dosi id fiat difficillime; idem purgans pluribus unius ejusdemque ætatis oblatum, mirum inter se differentes exserit operationes. Atque hoc ipsum simili ratione de reliquis & magnæ activitatis remediis, quæ vulgo heroica dicuntur, tenendum esse arbitramur; quare recte dictum est ab Hippocrate in *Lib. de prisca medicin.* neminem ad medicinam addiscendam animum applicaturum esse, si eadem vitæ & victus ratio, & sanis & ægris accommodata esset; vel etiam, si idem semper effectus data remedia sequeretur, quod tamen nullo unquam tempore expectare licebit; nam alimenta non minus ac medicamenta tam ad juvandum, quam ad nocendum pro se & sua natura prompta atque parata sunt; sed tum demum proficiunt, quando prudenter, circumspecte, & cum recta ac fundata ratione fuerunt usitata, alias plus nocent quam profunt.

Jam vero non immerito movetur quæstio: in quonam rectus vel perversus eorum usus consistat, & quomodo hic evitari debeat? Qua de re, ubi antiquissimos & summos in arte nostra viros consulimus, invenimus inprimis *Hippocratem*, *Galenum*, *Celsum* unanimi consensu affirmasse: in medicina cum ægrotantium emolumento facienda, non solum ad morbum & ejus symptomata esse reipiciendum, sed potissimum requiri, ut ad propriam cuique corpori naturam sive idiosyncrasiam, robur quoque virium, prægressos morbos, dispositionem ad morbum à parentibus, insuper ad ætatem, habitum corporis, diætam & vitæ genus, consuetudinem, clima, anni tempora, imo ad ipsius morbi tempus & progressum animum advertamus, quia pro horum diversitate, medendi methodus & remediorum operationes multum admodum differunt. Ut rem in pauca contrahamus: medicus in curatione morborum & præscribendis remediis, ad completam, si haberi potest, morbi, & ægrotantis historiam ante omnia debet advertere; quam si ex sana theoria physico-medica quoad omnes circumstantias, & præcipue quoad causam morbi & symptomatum recte cognoscendam, resolvere satagit, facile perspiciet, non certa & specifica quædam ad morbum sanandum proflare medicamenta, sed plura sæpius, quæ alios juvant, aliis eodem morbo laborantibus nocere. Atque hanc ob rationem clarissime apparet, non meliorem ad medicorum discordiam & dissensiones, quas inter se alunt maxime de diversis in hoc vel illo morbo medicamentorum effectibus, componendas viam dari, ac si semper, ubi faustus vel infautus in morbis effectus ab iis observatus fuerit, is ad circumstantias in historiis morborum contentas referatur. Verum vulgus medicorum hæc omnia parum curat, sed audito tantum morbi titulo, & recensitis quibusdam symptomatibus, protinus ad præscribenda remedia properat, quæ ipsi vel per experientiam in simili morbo visa vel audita fuerunt salutaria, vel mox etiam promptus & paratus est ad rejicienda ea, quæ ex perverso quodam præjudicio ipsi vel audita, vel visa fuerunt noxia.

Deinceps præstans & peritus medicus ex vera morbi historia & rebus antecedentibus, primam morbi originem & fontem, à quo symptomata ceu effectus profluunt, curate eruere studet, medendique intentionem ad causam, maxime proximam removendam dirigit. Verum, qui sine ratione artem exercent, symptomatum magis quam causæ rationem habent, & ad illa abigenda omne conferunt studium, & varia atque minus accommodata exhibent. Est vero præcipuus sagacis & rationalis medici character, non multis variisque, sed paucis, appropriatis & efficacibus ad morbum profligandum, uti remediis. Etenim causæ morborum tam proximæ, quam mediatae non tam multiplices & diffusæ, sed simplices & paucæ sunt, licet ratione locorum valde dissidentes effectus producant, ad quas abigendas non tanta remediorum copia & varietate opus esse deprehendimus, modo recto ordine, tempore & modo adhibeantur. Longe vero aliter procedit minus rationalis in morborum curatione, utpote qui, si exhibitum medicamentum non statim desideratum exhibet effectum, hoc facile mutat & aliud ordinat; quod si iterum expectationi minus respondeat, rursus aliud substituit. Quæ perversa medicamentorum varietate & multitudine tantum abest, ut vim morbi debellet, ut potius ægrotum obruendo, morbum pejorem & contumaciorem sæpissime reddat. Quæ cum ita sint, antiquissimi artis nostræ magistri sat graves habuerunt causas, quare crebriorem remediorum mutationem tantopere prohibuerint, eamque tantum non semper insecurem & salutem ægrotantium valde adversam existimaverint. Ea quippe cujusvis medicamenti indoles atque facultas est, ut corpori inferat mutationem, quæ si non apta, sed aliena, nec abigendæ morbi causæ accommodata est, longe majores sæpe concitat turbas, salubres naturæ motus pervertendo. Scite itaque magnus ille Anglorum philosophus *Verulamius Lib. I. de augment. scient. remediorum copiam & varietatem ignorantie filiam appellavit*; & medicos ad præscribenda & mutanda remedia tam faciles justo zelo his verbis reprehendit: *etsi ex opera medicorum quotidiana, quam invisendo, assidendo, præscribendo ægrotis præstant, putaret quispiam, haud segniter illos curationem persequi, atque in eadem certa quasi via insistere; tamen, si quis ea, quæ præscribere & administrare solent medici, accuratius introspiciat, inveniet pleraque vacillationis & inconstantie plena, & quæ ex tempore excogitantur, ac in mentem illis veniunt, absque certo aliquo præviso curationis termino.*

Ego sæpius à Principibus etiam viris quæsitus, quomodo peritus & præstans medicus, cui fidere tuto possimus, ab imperito discerni possit, responsum dedi, vitandum eum esse, qui, antequam veram morbi indolem & causam, ægrotique naturam paulo penitius cognoverit, mox ad præscribenda & sæpius mutanda medicamenta paratus sit; commendandum vero eum esse, qui, priusquam se accingat ad ordinandum

dum remedium, permultis quæstionibus habitum corporis & animi, robur naturæ, digestionis & excretionis negotium, morbi genium, originem & causas remotas ex diætâ, vitæ genere & aliis accuratissime scrutatur, & prægressa seria meditatione, perpauca cum debito vitæ regimine, sed diutius continuanda remedia præscribere consuevit; utpote semper suspecta esse debet nimia medicamentorum mutatio, quam etiam valde improbarunt veteres, id quod *Celsus* l. 3. c. 1. prodidit his verbis: *oportet, ubi aliquid non respondet, non experiri aliud atque aliud; nam in longis morbis, quos tempus ut facit, ita solvit, non statim condemnetur, si quid non statim profuit, minus vero removeatur, si quid paulum saltem juvat, quia profectus tempore expletur.* Nam si ulla in re & arte ad exoptatum consequendum scopum, temporis expectatione atque beneficio opus est: certe in operibus artis nostræ valet; nam ad certum effectum præstandum, sive ad infensum illud, quod motibus vitalibus obest è corpore removendum, certa proportione, mensura & numero motuum, qui tempore continetur, opus est. Spectat huc *Juvenalis* dictum: Cunctator debet esse, qui de salute judicat.

Deinceps prudens medicus in recto administrandi remedia usu, maxime omnium naturam corporis debilem & imbecillem à valida & robusta probe distinguere debet; utpote illa & omnibus morbis & gravioribus symptomatibus obnoxia est, & quam facile à causis atque rebus minus amicis offenditur, imo difficulter sanescit, cum naturæ corporum robustæ morbum, validaque ad nocendum medicamenta facilius ferre, nec non superare possint. Medici itaque periti est, non modo naturas robustas à debilibus, sed etiam medicamenta valida, fortiora à debilibus & lenioribus probe discernere; nam divus senex in *Lib. de homin.* §. 54. perite prodidit, *medicamenta à natura fortiora, quibus vis statum corporis transmutandi inest, nec in debilibus morbis, nec debilibus naturis dare oportere*; omnesque saniorum medicorum scholæ quotidie adhuc utilissimo hoc monito personant; sed vulgares practici saluberrimum hoc monitum non attendentes, nec morbi vehementiam, nec vires ægrotantis imbecilles, nec medicamenti fortiorem effectum considerant, sed ad contumacem & chronicum occurrentem morbum ut eradicetur, vi quadam & vectibus quasi opus esse existimant, & hinc fortioribus ex purgantium, salivantium, emeticorum, sudoriferorum & diureticorum classe utendum esse, perverse judicant. Sed dici vix potest, quantum damni malo chronico laborantes inde experiantur. Ego sæpius non sine dolore, à medicis etiam in dignitate constitutis, exitiales à medicamentis, fortioribus & sæpius repetitis, imbecillimis administratis, errores commissos animadverti, ut splendide etiam personæ, quæ securioribus poterant servari, perierint. Ego sancte affirmare possum, me, cum ultra dimidium sæculi innumerabilibus ægrotantibus profuerim, nunquam non ab omnibus vehementioribus ex evacuantium, sedantium & alterantium classe, sedulo & sollicito tam in morbis acutis, quam chronicis abstinuisse, sive naturæ robustæ, sive imbecilliores fuerint, sed lenioribus, securioribus usu longo exploratis, cum patientia & expectatione temporis, curationes, benedicente Deo, absolvisse felicissime. Hac enim secura & leniori methodo, innumeros affectione hypochondriaca, melancholica, maniaca, cachectica, scorbutica, hydropica, asthmatica, & intermittentium contumacia laborantes, me integerrime sanasse certe profiteor.

Accedimus jam ad alia criteria, quibus peritus ab imperito medico possit distinguere: hic quippe firmiter sibi persuasum habet, non modo in quovis morbo, certa dari specifica & salutaria medicamenta, quæ ceu arcana summe extollit, verum etiam medicinas exstare universales, per chymicam artem, ex auro maxime paratas, quarum mirabiles in singulis morbis effectus deprædicando, magnam apud ignarum vulgum famam magnumque lucrum aucupatur. At vero eruditus & candidus medicus phantasmata hæc & ludibria, quæ ex male sana theoria physico-medica proveniunt, ridet, optime gnarus, morborum causas & tempora, ægrotantiumque naturas, multum admodum variare; ideoque nec ullum esse medicamentum, quod his omnibus possit satisfacere, multo minus id, quod aurum ingreditur. Siquidem abunde satis ex chymicis constat, nullum omnino in universa rerum natura existere corpus, quod ad medicum usum ipso auro minus sit idoneum, dum à nullo menstruo liquore, nisi corrosivo, quem ex nitro & sale communi præparare solemus, arctissima ejus compages, à qua gravitas, qua nulla major est, dependet, dissolvitur; & falsissimum est, per insipida, ut falso perhibent, menstrua, intimam hujus metalli solutionem posse obtineri, quæ tamen necessaria sit, quando in corpore humano effectum debet præstare.

Neque minus inter requisita præstantis atque vere rationalis medici, id omnium maxime debet referri, ut de rebus medicis, per experientiam nondum satis cognitis, rectum ferre judicium possit. Occurrit sæpius medenti in artis exercitio, ad consilium

dandum, casus plane singularis, & propter varia & mirabilia symptomata nunquam ante annotatus, ubi diligenti circumspeditione, meditatione & acri judicio opus est, ut non modo morbi atque symptomatum rationem, sed aptam quoque & tollendis causis accommodatam inveniat methodum. Neque deinceps novum, sed frequenter obvium est, ob peculiarem & extra naturæ ordinem quasi contingentem tempestatum & temporum anni constitutionem nova morborum, maximeque febrium grassantium, prodire schemata, quorum commoda sanandi ratio per experientiam nondum satis constat, sed sollicitam medici de ea inveniendâ curam omnino postulant. Neque hic labor medicum, rerum medicarum vere peritum, adeo multum fatigat; siquidem hic non minus theoria physico-medica, quam necessario observationum clinicarum apparatu instructus, attenta circumstantiarum ac causarum, tam antecedentium quam consequentium consideratione, facile potest invenire, quænam medendi via sit ineunda; & num per venæ sectionem, per laxantia, & per acida ac nitrosa potius, quam per volatilia & spirituosâ institui debeat curatio. Quare perite ab *Hippocrate* inter præstantis medici notas, hanc præcipue in ejus *lib. de prisca medicina* relata legimus, *ut aliquid possit invenire, si quando novus, & antea non observatus morbus occurreret.*

Notum quoque porro est, sub diverso climate, v. g. in regionibus ad septentrionem vel meridiem vergentibus, certa dari morborum genera, à diversa cœli, aëris, victus & vivendi ratione derivanda, quæ pro diversitate sua differentem quoque postulant sanationem, dum, optime notante *Celso Lib. I. p. 8. aliud opus est Romæ, aliud in Ægypto, aliud in Gallia.* Quandocunque igitur medicus rationalis, ut sæpius evenit, locum mutare, & ex Dania & Suecia in Italiam, vel ex hac & aliis calidioribus regionibus septentrionem versus debet concedere: facile auguratur, ipsa medicamenta sibi esse permutanda, longeque aliam curandi methodum excogitandam, dum fortiora & potentis indolis remedia, quorum usum septentrionales, ceu robustioris naturæ incolæ sine noxa commodissime ferunt, calidiorum regionum gentibus, quæ sensibilibus sunt naturæ, nunquam fere non gravissimo solent esse detrimento. Accedit adhuc, quod pro temperamentorum varietate, & pro diversa humorum in diversis gentibus conditione, medicamentorum quoque operationes mirum in modum differant. Ita Belgis, quorum corpora rudiores habent fibras, minus elasticas, & difficulter mobilibus scætant succis, salia volatilia, spirituosâ & infusa calida optime conferunt, quæ Italis contra, quorum humores fluxiliores & mobiliore, ac fibræ magis tensæ & elasticæ sunt, graviter ut plurimum nocent; sed his anodyna, lenientia, nitrosa conducunt. Id quoque circumspæctum medicum probe admonet, ut in perlegendis medicorum monumentis diligenter attendat, in quam regione vixerit, cujus scripta legenda & imitanda sibi sumit, ne forte Belgici auctoris præscriptas formulas, in ista regione optime proficuas, sine discrimine, ægrotantibus in calidioribus locis commendare audeat.

Magnum adhuc est discrimen inter medicum principiis physico-mechanicis probe instructum, & inter eum, qui in utilissimis hisce doctrinis rudis & quasi hospes est. Ille enim cujusvis simplicis ex triplici naturæ regno petiti, v. gr. aquarum, maximeque fontium tam calidorum quam frigidorum elementa, principia & vires, licet usu antea nunquam exploraverit, ex odore, sapore & analysi chymica potest cognoscere; & quales in hoc illove morbo, hoc vel alio tempore, & in hac illave corporis constitutione effectus exferere possit, prævidere. Quod ut clarius adhuc pateat, exemplum adducere placet. Satis, ut arbitror, per experientiam notum est, corticem cascarillæ in nimis alvi fluxibus, tam serosis, quam sanguineis, efficacissimam esse medicinam: quem effectum & operandi modum rationalis medicus, etiamsi nihil unquam de eo audiverit, ex penitiori, & secundum artis leges suscepta hujus medicaminis exploratione, facile poterit cognoscere. Etenim, quum hicce cortex gratum de se spargat odorem, & principium contineat amarum, terreum ac resinosum, optime exinde anodynam, roborantem & acres humores temperantem colligit virtutem.

Uterius sagax & peritus medicus in persanandis, maxime acutis passionibus, non solum ad medicamenta eorumque agendi efficaciam, sed ad beneficium quoque & ministerium ipsius naturæ, quæ ab antiquissimis optima morborum medicatrix dicitur, respicit, eo, quod hæc ipsa sola sæpius, vel levi tantum arte, aut commoda diæta adjuncta, in plebejis, rusticis & iis, qui medico & medicamentis destituti sunt, populis, ægritudines valde periculosas, ut pestem, exanthematicas, variolosas, morbillosas & inflammatorias febres depellit quam optime.

Perpauci vero ex medicorum numero sunt, qui hanc salutarem artificiosissimæ corporis

poris animalis fabricæ, five naturæ à Deo insitam therapiam agnoscunt recteque intelligunt, cujus tamen ope non modo ipsum corpus animale, in se & sua natura perpetuo corruptioni obnoxium, per omnem vitam à terra putredine integrum conservatur, verum etiam quod sanitati & vitæ adversum est, per varii generis emunctoria expellitur, amicum vero & utile intus retinetur. Rectissime hinc prudens medicus in morbis, maximeque acutis sanandis, excretionum motuumque præternaturalium indolem, vim & efficaciam, & tempora quibus fiunt, probe scrutatur, & num ad salutis vitæque tutelam ac sanitatis restitutionem, an potius ad corporis destructionem & interitum tendant, probe examinat, eosque si deficiunt, vel excedunt, commoda medicina moderari inque ordinem redigere studet, præsertim quum in hoc naturæ ministerio recte gubernando, artis nostræ usus & potentia quam maxime consistat. Quum vero naturæ motus ordine & tempore sæpius recto fiant, & per convenientia loca materia corpori infensa expellatur; cavet omnino prudens medicus, ne forte salutarem naturæ ordinem inepta & vehementi medicina perturbet.

Minime vero id attendunt imperiti medici, qui naturæ legum in medendo nescii, medicamento vel fortiori, vel leniori singulis fere horis repetito, sæpiusque incongruo hunc laudatissimum naturæ ordinem pessimo ritu intercipiunt, & damnum inferunt præsentissimum.

Verum enim vero surrexerunt hac tempestate celeberrimi nominis viri, qui huic naturæ beneficio nimium pretium tribuerunt, adeo, ut fere rationalis medicina non parum inde decrementi accipiat. Statuunt videlicet, per naturam intelligi debere animam, quæ rationis particeps est, & quæ summa sapientia atque arte ipsum corpus formavit; & hinc non dubitandum esse, quin eadem sapientia illud gubernet & conservet; motus videlicet ita administrando & dirigendo, ut in statu tam sano, quam præternaturali, quod noxium est, & interitum minatur, per convenientia loca expellatur; indeque concludunt, ad artem exercendam non subtili theoria, vel ratione ex principiis physico-mechanicis petita, ad explicandas res medicas, opus esse; utpote quæ in consideratione rerum inanimatarum magis, quam in corporibus, quæ sensu & cognitione interna prædita sunt, locum sibi vindicent; sed sufficere, ut medicus tantummodo naturam, per medicamenta pauca & selecta, quæ alterandis vitiosis humoribus, & iis per congrua loca blande evacuandis serviunt, adjuvet. Licet vero hæc simplex & facilis medendi methodus in persanandis passionibus levioribus & quæ facile transeunt, & ubi satis virium est, non improbanda sit: minime tamen eam solam tam in acutis quam chronicis avertendis ac vincendis morbis sufficere arbitramur, cum natura & hæc methodus benigna in persanandis contumacibus passionibus, ut sunt lues venerea, gonorrhœa, affectio hypochondriaca, melancholica, maniaca, cachectica, scorbutica, hydropica, phthisica, asthmatica & diurnæ intermittentes & anomalæ febres, atque epileptici, spasmodici motus, parum valeat: & opus hic sit potentioribus, & multo pluribus remediorum generibus, & magno in applicandis remediis judicio, quod plura requirit subsidia.

Verum, ut aperte de hac nova theoria medica nostram interponamus sententiam, asserimus, artis medicæ objectum neutiquam esse corpus, à sapiente principio formandum, sed quod jam sapiente & divina semini insita virtute formatum est; cujus motus tantum medicus sua sapientia, per convenientem rerum necessariorum administrationem regere debet; siquidem motus vitales, qui pure mechanici sunt, in formato corpore neutiquam amplius à sapiente interno principio fiunt & sustentantur, neque ad salutarem finem in morbis diriguntur; sed à causis mere externis, evidentibus, necessariis, puta elementis & alimentis, medicamentis aliisque remediorum generibus dependent reguntur & conservantur: Siquidem deformes post vulnera externarum partium relictæ cicatrices abunde docent, nihil adhuc à natura in corpore sapienter formari. Deinceps notandum est, veteres per vocabulum naturæ, vel vires corporis motrices, vel solidarum partium structuram, quæ pro diversâ ætate, sexu, vitæ genere, & dispositione nativa ac hæreditaria varia est & mutabilis, tantummodo indiguisse, ideoque has res naturales dixisse. Equidem non negandum est, magnam vim phantasie esse vitales motus non quidem efficiendi, sed duntaxat turbandi & pervertendi, ut videmus in animi affectibus & morbis, qui exinde fiunt; sed hos prævos effectus, ut in ordinem redigat, nec phantasia, nec anima rationalis quicquam valet, sed prudens medicus ac commoda medicina id præstare debet. Neque unquam veteribus in mentem incidisse reor, ut in animantibus ens cognitione interna præditum, omnis generis motus certum in finem efficiens, constituerint. Hippocrâtes pluribus in locis id disertis verbis negat, qui *lib. 1. de diæta* §. 6. *de naturis hominum* inquit,

res faciunt, non sciunt; quæ vero faciunt, scire sibi videntur; & quæ quidem vident, non cognoscunt: attamen omnia ipsis fiunt per divinam necessitatem. Et lib. de morb. vulgar. Sect. VII. §. 6. ait, natura ipsa sibi per se, non ex consilio, motiones ad actiones subeundas invenit à nullo edocta, citraque disciplinam ea quæ conveniunt, efficit. Helmontius, qui aliàs multum immaterialibus animæ ideis favet, ab hac sententia plane etiam est alienus; utpote in Lib. de mort. introitu in natur. human. lectu dignissimo §. 10. negat, corpus humanum, quale nunc est lapsum, à mente ad certum finem agente, immediate regi, quemadmodum fieri videmus in iis quæ hominum artificio instruuntur & perficiuntur; & ridet hoc in passu ipsum Aristotelem ceu naturæ plane ignarum, quod res naturales cum artificialibus confuderit, dum in his quidem causa finalis locum habeat, & supponatur artifex, qui media dirigat; in illis vero, seu rebus naturalibus locum non inveniat; unde, quicquid in natura fit vel generatur, seminum necessitate fieri, recte arbitratur, adeo, ut semina sint rerum principia & causæ naturales, ac ob fines, non quidem sibi, sed soli Deo cognitæ agant. Aretæus hinc recte naturam artem Dei appellare videtur. Equidem natura non est unum quid, sive una causa, qua animales functiones reguntur; sed vox est, quæ plures complectitur causas, & non modo organicam solidorum structuram, & peculiarem fluidorum crasim, sed potissimum mutuum atque alternum solidorum ac fluidorum motum systalticum & diastalticum, nec non progressivum, intestinum, secretorium & excretorium, item undulatorium & tonicum denotat; quo salvo, omnes functiones tam vitales & animales, quam naturales recte se habent.

Et quemadmodum in macrocosmo, animantium & vegetabilium ex seminibus evolutio, nutritio, fœcundatio, maturatio, perfectio & vita per motum atque causas evidentes mere mechanico-physicas, & per elementa, & potissimum per aëreæ æthereum fluidum solis calore, quem veteres ignem dixerunt, agitatum producit: ita etiam in microcosmo id simili modo evenire, certissime colligitur; cum quotidie observemus, quantam mutationem in omnibus corporis humani functionibus vitæ genus, habitus corporis, diætæ, aëris, temporum anni, tempestatum, locorum differentia efficiant, & quomodo etiam ab hisce rebus animi operationes, mores, inclinationes & ex parte actus rationis varient. Sed non hujus est loci & instituti, diutius hisce immorari; id tantum dico, hanc philosophandi rationem nihil plane ad disciplinam medicam pertinere, ut de ea filere consultius ducamus. Nam omnem rationis in rebus medicis explicandis, & causis morborum investigandis, in quibus tamen omne medicationis momentum consistit, usum adimit, atque etiam rerum non naturalium & medicamentorum virtutem & operationem in corpus humanum dubiam nec non incertam reddit: namque illa non ex arbitrio animæ operantur, sed inviolabili necessitate, si requisitis conditionibus applicantur, certum ac determinatum effectum edunt. Id unicum adhuc in eorum gratiam, qui medicinam principiis physico-mechanicis superstructam quasi infamare omni conatu student, ad bene expendendum addere volo: ponamus, naturam sive animam rationalem, vitalium etiam & naturalium functionum principium & causam esse, eas in certum finem dirigendo: sed tamen eam ipsam nihil prorsus sine mechanismo, id est, sine certa solidorum structura & fluidorum dispositione efficere posse, certissimum est. Nam hæc, si non conveniente temperie, proportionem & ordine sunt constituta, omnia fiunt præter naturam, & versa vice. Jam vero nihil evidentius est, quam quod medicus arte sua non in animam, sed in causas physico-mechanicas, quibus hæc tanquam instrumentis utitur, tantummodo operationem & effectum habeat.

Permulum quoque interest scire, ad boni medici doctrinam, studia & officium minime pertinere, ut subtiliori rerum obscurarum meditationi & cognitioni indulgeat, sed ea potissimum, quæ in sensus incurrunt, quæ usum habent, & de quibus evidens ratio constet & dari potest, sectetur. Uti enim multa in rerum natura sunt difficultatum mæandris involuta, quæ omnem cognitionem & intellectus humani aciem exsuperant; ita etiam in philosophia rerum naturalium & medicarum id contingit: quæ secreta naturæ tutius est mirari, quam rimari velle. Ad hunc censum pertinent, unde vis in quovis semine multiplicativa oriatur, & quomodo formatio partium in utero fiat; qua ratione cogitatio & phantasia in corpus operetur, & rursus, quomodo sanguinis constitutio & motus, mentis usum alterare possit; item, in quonam stupenda vis miasmatis & contagii in peste aliisque morbis malignis consistat; qualis sit proportio inter naturæ & morbi vires; quomodo sensationes fiant in nervosis partibus; an motus febriles & præternaturales propter causam naturæ infestam, bona intentione & sæpius mala inventionem; excitentur? Quæ omnia possunt tuto à medico ignorari,

ignorari, quia sine his ad sanitatem hominem potest perducere. Sufficit, ut is per frequentem usum, attentamque experientiam & solidam demonstrationem & rationem sciat discernere perniciofa à salutaribus, atque rationes physicas, licet non geometricas adferre. Accedit, quod hanc maxime ob causam nimis curiosa harum rerum imper-scrutabilium indagatio sit evitanda, quod videlicet non nisi materiam & occasionem pessimarum contentionum, litium & alterationum præbeat, quæ medicorum amicam harmoniam & concordiam, in consultationibus valde necessariam, dirimunt.

Ceterum ad sagacis & præstantis medici scientiam atque officium quam maxime pertinet, ut valetudinem integram, & ab omni morborum insultu liberam idoneis remediis, ex fonte diætetico potissimum petitis, diutius præstet. Nam inter partes medicinæ diætetica primas omnium tenet, & olim etiam maximi semper habita fuit, artisque certitudinem in avertendis morbis evidenter demonstrat; cum longe expeditius sit, corpus à morbis defendere, quam illud corruptum & vitiosum restituere. Per remedia vero diætetica ea intelligimus, quæ ex sinu rerum non naturalium, seu absolute ad vitam necessariorum, cumprimis desumta sunt. Nam quemadmodum recto harum rerum usu, vita & sana, & longa, diu persistere potest: ita ex plane perverso & inordinato harum abusu, omnis generis vitia & mala in corpus incidere, certa & attenta observatione edocemur. Est itaque præcipua doctrinæ & scientiæ medicæ pars, harum rerum, quibus omni momento ad vitam opus habemus, ex solidis physicis principiis, intimam cognitionem sibi comparare, ut quid mali ad morbos procreandos, & boni ad eos avertendos ac sanandos efficere queant, dilucide addiscant. Nam & elementorum, aëris potissimum, & alimentorum, præsertim ubi à temperie valde deflectunt & subito mutantur, maxima vis & potestas est in corpus humanum, ejus humores & motus immutandi, imo ipsum animum & rationem alterandi. Ideoque dantur morbi certis locis, regionibus & climatibus proprii, & pro diversa temporum anni, tempestatum constitutione, & extraordinaria ac subita mutatione, varii generis mala enascuntur. Non datur itaque certior & securior methodus & præservatoria, & curatoria, quam per ejusdem naturæ & generis auxilia, quia sunt naturæ magis amica, temperatiora, nec vehementia, sed per gradus & paulatim operantur. Inde etiam factum, ut nulla pars medicinæ, antiquissimis quoque temporibus, majori pretio, quam diætetica habita fuerit. *Hippocratis* monumenta, quæ posteritati reliquit, *Libri de victu acutor: de diæta, Libri epidemior:, de natura aëris, aquar. & locor. de alimentis*, id luculenter declarant. *Ajclepiadis* tota sanandi methodus in recta victus ratione reposita fuit. Si *Cornel. Celsi* librum quartum evolvimus, in quo fere de omnium vitiorum, quæ in interioribus corporis partibus sedem suam habent, curatione agit, hanc ipsam maxima ex parte mutatione cœli, locorum, vitæ generis, varietate ciborum atque potus, item abstinencia, variaque corporis exercitatione & motu, fricationibus, balneis, linimentis hunc virum præstitisse animadvertimus. Et inter omnes medicos, qui solidi quicquam & laude dignum memoriæ prodiderunt, quos imitari possumus, sunt maxime Itali, ut *Sanctorius*, *Mercurialis*, *Montanus*; & nostro ævo *Ramazzinus*, *Baglivus*, *Lancisius*, quia hanc principem artis nostræ partem, adjuti experimentis physico-mechanicis, quæ optime naturam corporum & motuum causas ac leges explicant, paulo subtilius, longeque optime excoluerunt. Sique veritatem non dissimulemus, utique non modo in avertendis, sed etiam sanandis, præcipue chronicis passionibus, per remedia & præcepta diætetica, si observentur, plus quam per pharmaceutica & secreta tantopere decantata effici posse, certissimum est. Præterea recte ac perite *Galenus* dixit: *nullum tam efficax remedium medicinam habere, quod auxilium asferre queat, si ei victus vel resistat, vel non adjuvet*. Neque hujus moniti deficit ratio; siquidem morborum origo à causis evidentibus, prava diæta, & malo vitæ regimine, atque sex rerum nonnaturalium perverso usu, inprimisque ab imbecilli & insensibili natura, unice dependet; quibus causis permanentibus, omnis medicamenti vis infringitur. Præter hæc optime olim *Plutarchus* annotavit, *ob novam victus rationem, novos incrudescere morbos, & corporum naturam aliam atque aliam inde temperaturam suscipere*. *Purpura chronica*, quod Germaniæ incolis, nostro jam tempore, tam familiare sit vitium, nulla mihi videtur alia causa, quam frequentissimus infusorum calidorum, præsertim potus coffee usus, quo visceri & biliosi recrementitii humores acciuntur, & ad superficiem corporis propelluntur. Dispositio quoque, quæ inclinat ad hæmorrhoides, nostro tempore longe frequentior quam olim est, apud eos potissimum, qui cibis penetrantis saporis per aromata peregrina comparati, & vinis calidioribus ex Gallia, Hungaria, & exteris regionibus petitis, delectantur; quibus sanguis circa lumbarem regionem ebulliens,

& per pilulas quas aloë ingreditur, concitator redditus, ubi per venas sedis exitum non invenit, non modo stagnans cœcas hæmorrhoides parit, sed & ad interiora regurgitans, pathemata spasmodica sic dicta hypochondriaca excitat, qui morbus nostro tempore nimium solennis est. Ulterius sciendum est, sagacem hominem sibi debere esse medicum, observando ea, quæ ex cibo & potu, aliisque rebus ipsi utilia atque salutaria, vel minus talia sint. Quare semper mihi perplacuit pulcherrimus locus, qui extat in *Xenophonte de dictis & factis Socratis* p. 513. Is monebat suos auditores, ut magnam haberent valetudinis curam, tum à peritis discendo, quæ commoda sint, tum etiam totam per vitam de se observando, quis potus, quis cibus, quisve labor conferat, quia obli-vio, mœror, furor, duritiesque animi nonnunquam à mala corporis habitudine oriuntur, & quibus corpora recte valent, nullum inde ad mentem redundat periculum. Et profecto tam mutua & amicabilis mentis & corporis communio est atque societas, ut corpus sanum mentis sanitati etiam faveat; & contra sana mens ad corporis sanitatem servandam multum valeat. Spectat huc insignis locus ex *Hippocrate*, qui extat lib. de flatibus §. 20. nihil magis, inquit, ad prudentiam confert quam sanguis; hic ergo cum in constanti habitu persistit, consistit etiam prudentia; sanguine vero permutato, concidit simul & prudentia. Et lib. 1. de diæta §. 30. totus in eo est, ut demonstret, animæ sapientiam à recto victu dependere, & si læsa fuerit, restitui posse, illo emendato. Quam utilis vero & necessaria ad tuendam vitam & sanitatem diæterices sit scientia, nullibi rectius & clarius, quam in corporibus imbecilibus, apparet; quorum in numero sunt senes, & à natura debiles, à gravi morbo vix convalescentes, & qui ab immodica sanguinis, ex quacunque etiam causa, profusione, vel à nimis vigiliis, fame, aut diuturno mœrore languentes redditi, vires amiserunt: iis vel levis in diæta error nocet; si gravis fuerit, vel morbi antecedentis recidivam, vel alium pejorem morbum ingignit. Hos itaque ante omnia ordinate agere & leges diætericas servare oportet: ne in vitia, præcipue tabem inferentia incidant, quod fit, si convalescentes à morbo, arbitrio suo vivant, & subito rursus inordinato vitæ genere utantur. Quamvis vero doctrina harum rerum sit longe optima & utilissima, mirandum tamen est, perpaucos ex medicinæ studio deditis esse, qui hanc inprimis excolendam, sibi persuadent; & sunt præcipue ii, qui non nisi medicamentis & arcanis adversus morbos pugnant, & qui hanc doctrinam imbiberunt, naturam corporis humani satis per se esse sapientem, ut si vitium quoddam in diæta accesserit, illud quod nimium sit, per convenientia emunctoria expellat, sique valde infensum fuerit, adversus id se armet, imo quandoque auctiori motu in febribus expellat; ut non tam curiosa victus observatione opus sit. Et ea propter etiam doctrina & institutio rerum physicarum, quæ per effectus & varia experimenta, tam chymica quam mechanica comparatur, nimis aperte ab his negligitur nec satis æstimatur, nec aliis, ut scitu necessaria commendatur. Ego vero omni tempore, quo arti nostræ docendo & exercendo vacavi, nihil prius, nihil posterius habui, quam ut hanc medicinæ partem, quæ nos ad rerum naturalium, elementorum & alimentorum penitiorem cognitionem atque peritum usum & applicationem perducit, iis omnibus, quibus sua aliorumque salus curæ cordique est, sum-mopere commendarem; idque in meis de diæta, rerumque physicarum indagatione editis scriptis satis ostendi.

Restat jam, ut etiam de parte medicinæ omnium nobilissima & vetustissima chirurgica, quæ externarum partium vitiis recte medendi præcepta tradit, nostram sententiam dicamus; quod videlicet hæc ipsa medico scitu sit summe necessaria. Complures quidem in hac perversa versantur opinione, hanc artem, quæ manu sanat, & in sectionibus atque externis remediis applicandis versatur, directe ad medicinam non pertinere; at hi certe nesciunt, totum hominem, tam quoad externas, quam internas partes, medicinæ esse objectum, & has invicem tam mirabilem intercedere consensum, ut vitium, quod externis inhæret, perfacile transeat ad interiores, & istæ contra graviter luant, si hæ morbose afficiantur. Præterea sciendum est, vitia, quæ externis partibus inhærescunt, & quæ chirurgi ope egent, etiam internas occupare, ut dolores, tumores, extravasationes, scirrhi, inflammationes, ulcera, apostemata; & singula non tantum externa, sed etiam interna medicamenta requirere; ut adeo pateat, chirurgi & medici munus non multum differre. Neque prætereundum, tota pica, pro diversa vitiorum ratione & natura corporum, insignem, ne qua noxa inferatur, prudentiam desiderare; ex quo clare apparet, nec medicinam à chirurgia, nec chirurgiam rationalem, ut verum dicam, à medicinæ fundamentis nullo modo posse separari. Recte igitur sentiebant veteres, qui ex familia Æsculapii ortos & arte medica imbuendos, ante omnia chirurgiam edocebant; ideoque in suis de re medica

dica monumentis summum eidem pretium statuebant. Atque etiam olim, & nostra hac tempestate, illi medici, qui paulo curatorem corporis humani anatomen cum chirurgia excoluerunt, præ omnibus aliis magno honore habiti, summam celebritatis famam consecuti sunt. Sed quam pauci sunt, qui egregiam hanc artem probe intelligunt! Ii quoque, quod turpe dictum est, qui unice huic arti operam suam addixerunt, eamque ex instituto tractare volunt, ut plurimum suam in ea ignorantiam palam faciunt, ut ideo & ratio & salus reipublicæ medicum hujus artis pariter gnarum, rerumque in ea obviarum peritum jure postulet, quo inscitiam chirurgorum consilio adjuvare, & modesta admonitione possit corrigere. Etenim, quicumque ex chirurgis artem suam non empirice, sed ita, ut decet rationalem, tractare vult, is non modo ex anatome, corporis humani partium externarum, ut ossium, musculorum, nervorum, tendinum, membranarum, glandularum, vasorum, fibrarum structuram, situm, connectionem atque usum tenere: sed & insuper doctrinam de circulo sanguinis, de vita & conservatione sanguinis, de viribus & robore partium, de nutritione recte perspectam habere debet, ut deinde eo melius de externis læsionibus, nec non de remedium usu & noxa, judicium ferre possit.

Præter hæc utique operationes manuales, congruis & aptatis instrumentis, omni dexteritate ac circumspeditione, administrandi rectam scientiam possideat, necesse est; quibus subsidiis etiam medicus probe sit instructus, ut chirurgum inscium consilio juvare, imo sæpius corrigere valeat. Ceterum ad medicinam rationalem & illud referri debet, ut quis solidum & rectum judicium de morbi eventu salutari vel periculoso, de pernitialibus, quæ supervenire solent, symptomatibus, de medicamentorum operatione, qualis futura sit, proferre sciat. Nihil enim est, quod plus ad estimationem medici cumulandam, ad artis quoque certitudinem demonstrandam confert, quam prudens de dictis rebus prognosis. Præclare ideo Hippocrates in Principio Prænotation. differit: medicum prænotationem adhibere, optimum esse mihi videtur; prænoscent enim & prædicent apud ægrotos & præsentia, & præterita, & futura, fidem utique fecerit, quod ægrotorum res magis cognoscat; quare gaudebunt homines se ipsos medico committere. At vero, quam excellens hæc præfagiendi scientia est, tam infida, incertaque ea deprehenditur, adeo, ut non immerito judicium de morborum eventu recte formandum difficillimum sit. Plurimi medicorum vanis & inanibus suis de futuro eventu prædictionibus, sæpius se & artem ludibrio exponunt, dum subinde ægrum, de cujus salute spem fecerunt certissimam, interire videamus. Neque alia hujus ignorantiae datur causa, quam quod non sufficiente accuratarum & completarum observationum clinicarum copia & apparatu instructi sunt; neque, quod maximum est, morborum historias ex sanioribus artis principiis rite resolvere, neque de eo, quod per corporis humani vires & effectus, atque per medicamentorum energiam fieri potest, recte dijudicare valent. Veteres hanc partem medicinæ maximi semper æstimarunt; sed quoniam non ex integris morborum historiis & observationibus, sed ex paucis tantum circumstantiis suas regulas prognosticas, quarum ingens copia in Hippocratis variis libris reperitur, deduxerunt, non mirum est, rarius illas respondere, sed maxima ex parte fallere.

Accedit, quod veteres nullas veras causas rebus naturalibus & medicis explicandis idoneas, ob ignorantiam physices universæ & veræ medicæ physiologiæ asserre poterant; neque in quo vitæ, sanitatis, mortis & morborum ratio posita sit, intelligebant, multo minus, per quæ principia, remedia suas vires exferant, cognoscebant; unde etiam de futuris eventibus vix ullum solidum judicium proferre poterant. Etenim curatior & propria cujusque corporis cognitio ad prognosin multum valet. Pulcher hanc in rem extat locus apud Celsum Lib. 5. cap. 26. *ad prognosin confert aliquid & ætas, & corpus, & vitæ propositum, & anni tempus; quia facilius sanescit puer vel adolescens, quam senior: valens, quam infirmus: neque nimis tenuis, neque nimis plenus, quam si alterum ex his est: integri habitus, quam corrupti: exercitatus, quam iners: sobrius & temperans, quam vino venerique deditus. Opportunissimumque curationi tempus vernum est; aut certe neque fervens, neque frigidum. Siquidem & nimius calor & nimium frigus infestant: maxime tamen horum varietas; ideoque perniciosissimus autumnus est. Et porro idem auctor in antecedentibus: ante omnia scire medicus debet, quæ insanabilia sint, & quæ difficilem curationem habeant, quæ promptiorem. Est enim prudentis hominis, primo eum, qui servari non potest, non attingere, nec subire speciem ejus, ut occisi, quem sors ipsius interemit. Deinde, ubi gravis metus sine certa tamen desperatione est, indicare necessariis periclitantis, in difficili rem esse: ne, si victa ars malo fuerit, vel ignorasse, vel sefellisse videatur. Sed ut hæc prudenti viro conveniunt: sic rursus histrionis est, parvam*

rem attollere, quo plus præstitisse videatur. Sed nolo hisce deducendis diutius immorari, quia hoc argumentum in dissertatione de certo mortis in morbis præfatio fusius persecutus sum.

Denique iniquum iudicium, imo potius calumnia non tantum vulgi, sed & eruditorum, quin imo medicorum est, theoreticum malum esse practicum, & eum sapientiorum ac peritiorum esse, qui multos habet ægros tractandos, quam qui paucos, existimant. Erroris huius illecebra & occasio inde nascitur, quod medicina res existimetur, uti etiam est, multi laboris, temporis ac experientiæ; hinc argumentantur, qui multos habet ægros sanandos, eum peritiorum esse eo, qui bene & recte ratiocinari de morbis solet, sed paucos habet ægros. At vero utique experientia, id est, accurata observatio earum rerum, quæ nocent, vel profunt, in invenienda medicina locum præcipuum invenit, & ordine præcedit rationem: sed cum jam dudum medicina inventa sit, & per tot secula, per tot nationes ac climata, instituta in tot individuis experientia & observatione eorum, quæ corpori infensa, vel amica sint, à præstantissimis medicis notatum fuerit; jam non tantopere amplius de experientia cogitandum, sed eo nitendum est, ut remedia, quorum noti effectus sunt, ad certa individua, ad certas morbi circumstantias debito ordine, tempore ac loco applicemus, atque prudenter ea accommodemus. Et hæc specialis medendi methodus nil nisi prudentia, consilium ac ratio medici est, & ex morbi cum indole remediorum accuratiore collatione, comparatione & omnium circumstantiarum pensitatione nascitur & acquiritur. Ubi non negandum, quod qui tali prudentia, ratione & habitu iudicandi instructus sit, artis continuo exercitio multum proficiat & adhuc confirmetur. Bonus itaque theoreticus saniorum medicorum consensu is est, qui theoriam ac ratiocinationem suam accommodare historiæ morborum, nec non experientiam rationi conformem ac demonstrativam reddere didicerit. Unde bonus theoreticus non potest etiam non esse bonus practicus. Hinc medici ratio vel theoria, debitis præfidiis instructa & experientiæ superstructa, magnos in medicina facit progressus, causas ac fontes morborum apte aperit, cur alia corpori noxia sint, alia proficua, incredibili solertia disquirat, veteres cum recentioribus feliciter conciliat, medendi methodum pro differentia climatum, anni temporum, subjectorum, ætatum, vitæ generis discrepantem probe distinguit; quin & remediorum verum usum ab abusu sedulo discernit; præterea aliorum minus securam curationem perquam facile perspicit, multoque tutiorem & expeditiorem curandi viam in novis ingruentibus affectibus adinvenit. Quibus omnibus ille, qui soli inhiat praxi, utut numerosis adfuerit ægrotis, si insuper theoria bona careat, destituitur. Solenne itaque, sed revera stolidum est, experientiam allegare, ubi deficit ratio, circumstantiarum pensitatio, subjecti & causæ morbi & modi agendi in remediis cognitio. Ceterum tamen non negandum, plures etiam in theoreticis committi errores, ubi nempe quis ad hypothesin inanes, speculativas, fictitias magis, obscuris & nihil significantibus terminis, quam principiis perspicuis superædificatas vult praxin accommodare, & ex hisce principiis ea remediorum genera rejicere conatur, quæ per omnia secula & nationes usu, aliorumque applausu se commendarunt. Hic valet illud axioma: malum theoreticum esse malum practicum, si videlicet ex theoria hac nuda, praxin instruere velit.

Præterea boni & præstantis theoretiçi est criterium, liberum animum ad veritatem inspiciendam afferre, nullis præjudiciis, auctoritatibus, opinionibus, scholis & sectis obstrictum: nam libertas philosophandi præstantissimum est mentis humanæ ornamentum & munus, qua is maxime utitur, qui à natura iudicii acumine instructus est; quicumque vero hoc naturæ beneficio caret, is quam maxime magistrorum suorum, quos amat, & quos audivit iudicio & sententiis firmissime inhærescit, & fidos illos, tam in theoria, quam praxi, in eo quod laudant vel vituperant, sequenmagistralium consistat, minus firmiter de aliorum scientia & dogmatibus iudicare possunt.

Ex hisce omnibus abunde jam deductis clarissime apparere arbitror, quam multa præclara & plane eximia, ad artem nostram in ordinem & connexionem redigendaneccessaria; atque quam exiguus eorum sit numerus, qui periti & rationalis medici nomen ac dignitatem jure sibi vindicare & tueri possint, cum maxima ex parte uniusdequaque ferme ars medica empirice tractetur, certis fundamentis & solidis rationibus destituta. Equidem in rebus physicis, anatomicis, physiologicis, botanicis, chymi-

chymicis egregii & pulcherrimi prostant libri; at ex præcipuis, qui ad artem faciendam pertinent; quales sunt pathologici, dogmatici & therapeutici, paucissimi sunt, qui laudem merentur; plerique plus opinionibus, nutantibus hypothesibus, auctoritatibus ac præjudiciis, quam veritatibus utilibus & necessariis superstructi sunt. Prostant quidem nostro tempore à celebribus hinc inde viris conscriptæ pathologiæ seu theoriæ morborum medicæ, quæ ab iis, quibus in verba jurare magistri solenne est, multum laudantur, & supra modum tamquam omnibus suis absolutæ numeris efferuntur; quas tamen, si paulo accuratius consideramus, magna ex parte mancas & imperfectas conspiciamus; siquidem nec perspicuas virium & imbecillitatis corporis humani, nec veras moriendi necessitatis causas reperire ibi licet: de morborum epidemiorum, qui multum medentibus faceffunt negotii, origine altum est silentium: humorum intemperies & virulentæ qualitates propemodum relegantur: concretionum in vasis, quæ polyporum nomine veniunt, & immedicabiles morbos producant, nulla fit mentio; de mirabili nervosarum partium consensu, sine cujus notitia vix ac ne vix quidem symptomata explicari possunt, ibi plane non agitur: corruptio partium sphacelosa, quæ plerumque mortis, tam acutis quam chronicis passionibus supervenientis, causam constituit, habetur rarissima: doctrina de pulsibus, magnæ in judicio de eventu morbi ferendo utilitatis, ibi neglecta aut penitus omissa animadvertitur; & si ad rationalem actionum corporis nostri præternaturalium explicationem respicimus, operationes animæ cum causis physico-mechanicis, & actiones morales cum physicis mirum quantum invicem confunduntur. Dantur adhuc alii doctissimorum & celebrium virorum pathologici libri, in quibus plus materiæ morborum, quam motuum vitiosorum habetur ratio; quandoquidem diversissimæ intemperiei, pro stabiliendis morborum causis adducuntur humores; cum tamen ex motuum inæqualitate & vitio sive errore in locis, dum ex uno loco ad alienum humorum fit transitus, præcipua symptomatum in morbis ratio deduci debeat. Deinceps in therapia recentiorum auctorum curationes morborum, quæ per abstinentionem, quæ per decocta sudorifera & exsiccantia, per aquæ potum & aquas minerales, acidulas & thermas, per balnea, per lac vel serum lactis, per acidulas cum lacte mixtas, per peregrinationes & loci ac cœli mutationes, per varia exercitationis genera, cum primis per frictiones fiunt, penitus silentio involvuntur, cum tamen ad vincendas longas & rebelles passiones, nihil convenientius, nihil efficacius hisce jam dictis, & olim, & nostro jam tempore reperiatur. Præterea innumeros possidemus pharmaceuticos libros, qui immensa medicamentorum simplicium & compositorum, Galenicorum & chymicorum, copia & farragine referti sunt: in quibus proprias & veras eorum facultates & vires, quas vel in hoc, vel in illo casu præstare possint, nullo modo licet reperire, adeo ut eorum utilitas plane nulla, vel admodum exigua sit; atque inter innumeros libros practicos, maxime observationes & morborum historiæ plenæ & accuratius, cum omnibus scilicet circumstantiis conscriptæ, valde deficiunt, cum tamen hæ ipsæ firmum & inconcussum artis nostræ, tam theoreticæ, quam practicæ, fundamentum constituent.

Cum itaque à multis retro annis, magna illa, quæ artis nostræ successum & incrementum, ac perfectionem huc usque retardarunt, impedimenta animadverterim, nihil magis à longo tempore ardentibus mihi in votis fuit, quam ut maturioribus annis, sufficienti observationum copia, & firmiore judicio munitus, artem in systema, & corpus methodo rationali constitutum redigere & digerere possem, quod res, faciendæ medicinæ tantummodo utiles & necessarias complecteretur. Secutus etiam sum salutare *Celsi* consilium, qui in fine præfationis, *rationalem medicinam esse debere, pronuntiat; instrui vero ab evidentibus causis, obscuris omnibus, non à cogitatione artificis, sed ab ipsa arte rejectis.* Inter causas vero evidentes primo loco liber & æquabilis sanguinis & fluidorum in circulum progressus, cum motibus secretoriis & excretoriis ponendus est; ex quo, tanquam fundamento & principio demonstrandi, omne in rebus medicis ratiocinium desumimus. Deinceps per causas evidentes intelligimus quoque rationes ex anatome & philosophia naturali petendas; sine quibus theoria medica plane manca ac cruda est.

Divina igitur suffultus gratia, sexagesimo ætis meæ anno, primum medicinæ rationalis tomum evulgare cœpi. Postea succedentibus annis, sub ingenti occupationum, consultationum, itinerum onere reliqui secuti sunt, ita ut sub septuagesimo octavo ætatis anno, inter vires utique valde decrecentes, septimus per Dei gratiam, absolutus fuerit tomus. Quod si hoc labore & studio nihil aliud consecutus sum, certe id me præstitisse confido, ut ii, qui artis opus aggredi incipiunt, viam planam

atque apertam inveniant; cui si insistent, non facile errare & nocere, sed perpaucis & efficacibus remediis, accedente præsertim cum usu rerum judicio, misere ægrotantibus opem & levamen afferre poterunt exoptatissimum. Atque, quod nostri labores, & strenui artem juvandi conatus, peritioribus non displicuerint, vel exinde dijudicare licet, quod tomi medicinæ systematicæ, simul ac lucem adspexerunt, & consultationes ac dissertationes varii argumenti, non modo in Germania, sed etiam in Belgio, Helvetiis & Italia variis editionibus in lucem prodierint. Quod vero hæc in unum opus congesta scripta mea, non æquali stili nitore atque cultu compareant, id benevolus lector meditationi & solertiæ continuis aliis laboribus sæpius interruptæ, & diversæ ætatis tempori, quo concinnata sunt, tribuendum esse, judicabit. Ceterum sermo in toto opere licet non adeo venustus, tamen purus, perspicuus & dilucidus est, rei tradendæ accommodus, & resectis omnibus superfluis, eam præcipue medicinæ partem persequutus sum, in qua proprie & principaliter ars consistit: in allegandis auctoribus non adeo diffusus fui, sed potissimum veteres adeundos & consulendos putavi: quos in iis, quæ ad historiam morborum describendam pertinent, & quæ experientiæ respondent dogmata, sequutus sum fidelissime. Quod superest, Deum immortalem precor, velit arti nostræ quam nobilissimæ, quam ipse mortalium beneficio largitus est, quamque ipsius gratia adjutus, ultra dimidium sæculi exercui & docui, atque his diligentiae meæ fructibus ad omnem posteritatem propagandis hanc promovere unice cupio, eos progressus largiri, ut, falsis & noxiis omnino profligatis, ejus veritas, certitudo & decor plenissime effulgeat, omnesque, qui se colendæ ipsi consecrant, ex hisce meis laboribus in generis humani utilitatem fructum repetant amplissimum.



APPROBATIONES.

NOI RIFORMATORI DELLO STUDIO DI PADOA.

HAvendo veduto per la fede di Revisione, & Approbatione del P. F. Thomaso Maria Zennari Inquisitore nel Libro intitolato *Friderici Hoffmanni Medicina Rationalis Systematica*, non v'esser cos' alcuna contro la santa Fede Catolica, e parimente per Attestato del Segretario Nostro, niente contro Principi, e buoni costumi, concedemo Licenza, che possi esser stampato, osservando gl' ordini in materia di stampe, & presentando le solite copie alle Publiche Librerie di Venezia & di Padoa. Dat. 31. Luglio 1735.

(Zan Pietro Pasqualigo Reff.

(Michiel Morosini Kau. Reff.

Agostino Gadaldini Seg.

1735. 22. Novembre.

Regist. nel Magist. Eccell. contro la Bestemmia.

Angelo Legrenzi Seg.

NOI RIFORMATORI DELLO STUDIO DI PADOVA.

HAvendo veduto per la fede di Revisione, & Approbatione del P. F. Thomaso Maria Zennari Inquisitore, nel Libro intitolato *Friderici Hoffmanni &c. Consultationum & Responsorum Medicinalium Commentaria priora Centuria prima, e Tomo uno* non v'esser cosa alcuna contro la santa Fede Catolica e parimente per Attestato del Segretario Nostro, niente contro Principi, & boni costumi, concedemo Licenza che possi esser stampato, osservando gl' ordini in materia di stampe, & presentando le solite copie alle Publiche Librerie di Venetia, & di Padoa. Dat. 24. Novembre 1734.

(Andrea Soranzo Proc. Ref.

(Z. Pietro Pasqualigo Ref.

Agostino Gadaldini Seg.

1734. 22. Decembre.

Registrato nel Magistrato Eccellentissimo contro la Bestemmia.

Angelo Legrenzi Seg.

CONSPECTUS GENERALIS TOTIUS OPERIS.

TOMUS PRIMUS.

Medicinæ Rationalis Systematicæ Tomus Primus.

De Philosophia Corporis Humani vivi & sani.

Ejusdem Medicinæ Rationalis Systematicæ Tomus Secundus.

De Philosophia Corporis Humani morboſi.

Ejusdem Medicinæ Rationalis Systematicæ Tomus Tertius.

De veræ Therapiæ fundamentis, medendi methodo, & selectissimis remediis.

TOMUS SECUNDUS.

Medicinæ Rationalis Systematicæ Tomi Quarti Pars Prima.

De omnis generis Febris.

Ejusdem Tomi Quarti Pars Secunda.

De Hemorrhagiis & Doloribus.

TOMUS TERTIUS.

Medicinæ Rationalis Systematicæ Tomi Quarti Pars Tertia.

De Morbis spasmodicis & convulsivis.

Ejusdem Tomi Quarti Pars Quarta.

De Morbis ex viscerum labe partiumque solidarum atonia provenientes.

Ejusdem Tomi Quarti Pars Quinta.

De Morbis ac vitiis, externas potissimum partes adfligentibus; accedit supplementum de Morbis Infantum, nunquam editum.

TOMUS QUARTUS.

Consultationum & Responsorum Medicorum Centuriæ tres.

I. *De Morbis Capitis & Pectoris.*

II. & III. *De Morbis abdominis & artuum externorum.*

Observationum Physico-Chymicarum selectiorum Libri tres.

Dissertationum Physico-Chymicarum Trias, quarum

I. *De generatione salium.*

II. *De analysi Chymico-Medica reguli Antimonii Medicinalis.*

III. *De Mercurio & medicamentis mercurialibus selectis.*

TOMUS QUINTUS.

I. Opuscula Physica varii argumenti; XIII. *Dissertationibus constantia.*

II. Opuscula de aquis mineralibus earumque salutari virtute; XIV. *Dissertationibus constantia.*

III. Opuscula Diætetica; XVII. *Dissertationibus constantia.*

Harum Dissertationum Elenchus post hujus Tomi titulum invenitur.

TOMUS SEXTUS.

I. Opuscula Medica de remediorum efficacia, facultatibus & viribus; XIII. *Dissertationibus constantia.*

II. Opuscula Pathologico-Practica varii argumenti; XX. *Dissertationibus constantia.*

III. Opuscula Medico-Practica, quæ curam morborum & medendi methodum nec non circumſpectum remediorum usum spectant; XI. *Dissertationibus constantia.*

Horum omnium Opusculorum Elenchus adest post hujusce Tomi titulum.

FRIDERICI
HOFFMANNI
CONSILIARII MEDICI

& Professoris Regii nec non Com. Palat. Cæsar.

MEDICINÆ
RATIONALIS SYSTEMATICÆ

TOMUS PRIMUS,

QUO

PHILOSOPHIA CORPORIS HUMANI
VIVI ET SANI

EX SOLIDIS PHYSICO-MECHANICIS

& *Anatomicis principiis, Methodo planè demonstrativa per certa
theoremata ac scholia traditur;*

ET

PATHOLOGIÆ AC PRAXI
MEDICÆ CLINICÆ

CEU VERUM FUNDAMENTUM PRÆMITTITUR

in Usum Docentium & Discientium.

THE UNIVERSITY OF CHICAGO

LIBRARY

HOFFMAN

CONSTITUTIONAL

AND

MELODY

RATIONALITY

AND

THE

UNIVERSITY OF CHICAGO

LIBRARY

HOFFMAN

CONSTITUTIONAL

AND

MELODY

RATIONALITY

AND

THE

UNIVERSITY OF CHICAGO

LIBRARY

HOFFMAN



PRÆFATIO

AD SOLIDIORIS DOCTRINÆ ET PERITIÆ MEDICOS.



EDICINÆ rationalis systematicæ tomum primum, qui humani corporis, cum vivi, tum sani, philosophiam complectitur, vobis, EXPERIENTISSIMI VIRI, exhibendum constitui, ut judicetis, quænam utilitas & quis fructus, ad artis medendi tam desideratam huc usque certitudinem, ex labore hoc redundare possit. Neque vero adeo facilis, sed intricata potius res est, rationali, id est, demonstrativa methodo, universæ medicinæ doctrinam conte-

xere, atque omnia in tot morborum historiis contenta phænomena, & quæ valetudini in melius, vel pejus mutandæ, idonea sunt, ad solidas rationes revocare, inque aptum ordinem & nexum digerere. Postquam enim salutifera illa & pene divina ars vix ex incunabulis rudioris experientiæ ab antiquissimo & optimo auctore *Hippocrate* potracta fuerat, statim quidem non defuerunt, qui de rationis fulcro, ut eam stabili-
rent, cogitare cœperunt. Sed quam infelici successu id præstitum ab eis fuerit, ipsa res satis abundeque loquitur. Surrexerunt deinceps, qui ex duobus principiis, laxo & stricto, via prorsus brevissima, vitæ, sanitatis, nec non morborum & curationis causas, explicare laborarunt, ob quam valde compendiosam docendi rationem, ejus dogmatis asseclæ Methodici dicti fuerunt, quorum potiora doctrinæ capita ab unico adhuc superstite *Cælio Aureliano* & ex parte à *Celfo* referuntur. Postea inter rationales Medicinæ professores primum fere locum occupavit *Galenus*, qui ex *Aristotelis* schola quatuor qualitates ac temperamenta in Medicinam infelici quidem fidere introduxit. Hujus deinde vestigia per multa secula universa fere Medicorum turba, & ex veteribus maxime, *Aëtius*, *Oribasius*, *Paulus* nec non *Arabes*, & tandem præcipui Italiæ, ad quam tunc temporis artes transmigrarunt, Medici, presso pede & uno ore sequuti, ejusque placitis tanquam saxo adhæserunt. Verum enim vero, ex quo rationalis illa *Galen*i disciplina regnavit, tantum abest, ut ars nostra profecerit quicquam, ut potius majora decremenda experta fuerit. Siquidem ab eo tempore Medici plus speculationibus variisque commentitiis rationibus & inde enatis concertationibus inhærere cœperunt, quam ut morborum historiis & luculentis observationibus, quæ tamen veritatum medicarum matrem, experientiam, constituunt, Medicinæ dignitatem amplificarent. Posterioribus demum seculis Chymix, Anatomies, nec non Philosophiæ experimentalis scientia magis agitata & paulo subtilius exculta est. Et tunc quidem magna lux veritatibus medicis accendi potuisset, sed tamen, re paulo accuratius inspecta, parum inde augmenti ad Medicinam accessisseprehendimus. Si quis enim illas hypothesen, quæ ex *Paracelsi*, *Helmontii*, *Tachenii*, *Sylvii* & *Cartesiano-*
rum aliorumque scholis prodierunt, intueatur, liquidissime apparebit, pro genuinis rerum medicarum causis, conficta tantum, grande sonantia, ex parte sensu penitus cassa, ut Veterum mos erat, nomina, quæ hoc loco recensere nimis longum foret, esse venditata; observationes vero & morborum historias relictas & penitus oblivione fuisse sepultas. Quot non verborum monstra & hypothesen ætatis nostræ Medici nobis obtruserunt, ad quas morborum & symptomatum, imo curandi rationem, detorquere conati sunt? Reperies quosdam, qui cum *Helmontio* principium vitæ ac omnium motionum in corpore subtiliori sensatione & cognitione præditum admittunt,

quod nocentes intro causas velut ex longinquo prævidens, motu quasi excandescen-
 tiæ adversus illas exturbandas se armet, & hac ratione febris naturam explicare alla-
 borant. Alii ad causas morborum magis respiciendo, ex pituita, acido & bile, non-
 nulli ex solo acido & viscido, plurimi ex dylicrasia humorum salsa, acri, scorbutica,
 maligna, vel ex obstructionibus, aut putredine, alii rursus ex sola sanguinis abun-
 dantia ejusque solennibus excretionibus suppressis, omnium fere morborum origi-
 nem, symptomatum causas & medendi rationem derivant. Mihi vero semper hæc
 astetit sententia: hypothèses, quæ nonnisi dubiæ & confictæ de rebus opiniones & ge-
 nuinæ litigiorum procreatrices sunt, à veritate, & quidem pretiosissima, quam Me-
 dicina pertractat, esse debere remotissimas. Quod autem non tantum in Medicinâ,
 verum in ceteris etiam disciplinis, plures hypothèses, quam veritates conspiciantur,
 ego non in ipsas res, sed in homines, qui de rebus non recte ratiocinantur, culpam
 transferendam esse judico. Cujus rei ratio est, quod perpauca literis dediti sub pri-
 mis studiorum annis ea adminicula in pretio habeant, quæ veritatibus concipiendis,
 inveniendis & bene ordinandis fere unice velificantur; cujus generis sunt sublimior
 illa numerorum & quantitatum scientia, in qua praxis logica residet. Nam in hisce
 nihil obscurum admittitur, sed omnia prius convenienti explicatione plana ac perspi-
 cua redduntur, postea ignota ex notis debita & syllogistica connexionione eliciuntur.
 Quare qui paulo maturius his scientiis animum assuefaciunt, promptissimi inde evadunt
 ad ea, quæ ex intellectu, vel quæ ex fictionibus proficiscuntur, & quæ reales, aut
 nominales rerum definitiones & invalidæ conclusiones sunt, probe discernenda. Ego
 sicuti hanc philosophandi rationem, ita etiam Medicinam, qua ex aliorum sententiis
 bene pensitatis optimæ seliguntur inque ordinem rediguntur & diversæ sententiæ in-
 vicem conciliantur, semper impensius amavi & magno in pretio habui. Et fateor,
 me plus operæ ac temporis semper experimentis tam medicis practicis, quam physi-
 cis, chymicis, anatomicis, chirurgicis impendisse, quam ut aliorum obscuris specu-
 lationibus, confictis terminis & sterilibus theoriis, maxima ex parte verbosis, dele-
 ctatus fuerim, nihil quicquam, quod non intellectui clarissimum ac plane obvium fuit,
 in rationibus reddendis admittendo. Animadverti etiam, omnium veritatum princi-
 pia facillima esse & simplicissima, & divinam sapientiam facili & simplici via stupen-
 dos in rerum natura produxisse effectus. Et hinc merito viam ad veram & rationa-
 lem Medicinam simplicissimo niti principio conclusi. At vero neutiquam inficias ire
 possum, ad veram theoriam medicam condendam plura desiderari. Primo enim opus
 est pleniori & accuratori omnium morborum historia, quæ ægrotantium naturam,
 morborum, quibus subinde affliguntur, genium, originem, causas, signa, eventus
 faustos, vel sinistros aliasque notabiles circumstantias complectatur. Nam historiis
 morborum theoria medica applicanda est, ut per hanc eæ explicentur. Theoria quip-
 pe observationum practicarum quasi clavis est, & vice versa etiam observationes sunt
 instar lapidis Lydii, quo theoriæ medicæ examinari debent. Quare prius, quam quis
 incipiat theoriam condere, probe perspectum habere oportet, num omnium phæno-
 menorum in historiis morborum occurrentium explicationi illa respondeat. Si res se-
 cus se habet, de ejusdem veritate omnino dubitandum est. Interior vero morborum
 notitiâ potissimum ex propria, deinde quoque ex aliorum fide dignorum experien-
 tia, comparanda est. Quem in finem amplissimam laudem & commendationem me-
 rentur ex antiquissimis *Hippocrates, Aretæus, Alexander Trallianus, Celsus, Cælius Au-
 relianus*: ex recentioribus vero *Martianus, Hollerius, Duretus, Ballonius, Jacotius,
 Montanus, Crato, Carolus Piso, Alpinus, Hildanus, Forestus, Sennertus, Sydenhamus,
 Riverius, Ramazzini, Malpighius, Baglivus, Wepferus, Lancisus & Boerhaven*, ceteris
 aliis palmam præripiunt. Spectant huc quoque *Miscellanea Naturæ Curiosorum*, nec
 non, *Acta Uratislaviensium Medicorum &c.* Deinde ad bonam theoriam medicam
 utique rei anatomicæ, physicæ experimentalis, mechanices plenior & exactior notit-
 tia necessaria est, quia hæ scientiæ rerum corporearum, quarum maxima potentia est
 in corpus humanum, naturam, proprietates ac vires explanatissime aperiunt. Quo
 igitur omnibus pateat, cui fundamento universæ Medicinæ systema superstruere ha-
 ctenus consueverim, non inconsultum duco, hujus rei summam publico conspectui
 exponere. Ego scilicet definitionem VITÆ universæ medicæ theoriæ & praxeos
 rationalis fundamentum constituo. Est vero VITA nihil aliud, quam motus san-
 guinis & humorum in circulum abiens, à systole ac diastole cordis & arteriarum
 omnisque generis canalium ac fibrarum, sanguinis & fluidi nervei influxu sustenta-
 ta, proficiscens, qui secretionibus & excretionibus corpus ab omni vindicat corrup-
 tione

tione & omnes ejus functiones gubernat. Hic enim circulus est ille vitalis motus, qui ipsum sanguinem, in se valde in putredinem primum, à præsentanea corruptione defendit. Hic est, qui calorem, vires, agilitatem, robur, tonum, nec non sensum ac motum, partibus conciliat & vitæ ac sanitati utilissimas secretiones & excretiones moderatur. Ab hoc quoque diversæ hominum inclinationes, mores, ingenii dotes, imò sapientia atque insania, dependent. Neque minus diversa hominum natura & dispositio, quam veteres temperamentum dixerunt, inde proficiscitur. Hic motus præterea nutrimentum & incrementum præstat corpori, succos calore & motu deperditos reparando, vitamque sic diuturnam homini confert. Hic porro extinctus teterimæ penitus corruptioni corpus objicit & tristissimam mortem accersit. Ab hoc denique sanitatis & integritatis omnium actionum tam corporis, quam animi, ratio ducenda est, si videlicet is liber, moderatus & æqualis sit, atque hac ratione excretiones superfluum & inutilem succorum recte procedant. Turbato vero hoc sanguinis circuitu, quod fit, si nimis augeatur, vel plus justo impediatur, aut inæqualis reddatur, morbi, tam acuti, quam chronici, præsto sunt. Atque ex hoc sanguinis circuitu de morborum vehementia, periculo, & fausto, vel infasto eorum eventu, firmum in diagnosi & prognosi judicium petimus. Deinde quisquis humana corpora à morbis, doloribus, tristitia, præservare vel defendere velit, eum nihil aliud agere oportet, quam ut salutaris consilio & convenientibus auxiliis, præsertim diætetis, hunc motum cum excretionibus in debita proportionem & moderationem conservet. Neque aliam dari medendi viam, vel etiam medendum debere esse intentionem, arbitramur, quam ut motus & excretiones, à naturali statu desciscientes, in ordinem reducantur. Omnia enim remediorum genera id tantum præstant, ut vel nimis auctos motus sedent ac moderentur, vel depressos & impeditos excitent, promoveant & rursus æquales reddant. Qua de causa scitissime ab Hippocrate Medicina definita est *Lib. de Flatibus*, quod sit *ablatio eorum, quæ excedunt, & appositio eorum, quæ deficiunt*. Qui autem istud optime facere possit, illum optimum medicum censendum, quantumque quis ab hoc præstando deficiat, tantum deficere quoque ab ipsa arte. Est quoque ipse sanguinis auctior circulus illa tantopere à veteribus decantata natura morborum curatrix, cujus ope, præsertim acuti, sine Medicis & medicamentorum apparatu, convenienti ordine ac tempore, sponte sanescunt. Hujus naturæ ductum arte sua sequi & imitari Medicos debere, toties ab antiquitate inculcatum fuit. Hic enim auctior sanguinis & humorum motus, infarctus viscerum & periculosas stases & stagnationes, à quibus plerique morbi proficiscuntur, successive removet atque noxios humores expellit. Quam ob rem, quum tanta beneficia in corpus nostrum ab hoc sanguinis circulo redundent, merito quæritur: à quam causa hic motus proveniat? quum nihil se ipsum movere, vel locum mutare possit. Nam qui eas causas recte callet, illi in proclivi est perspicere, quænam huic motui convenient, vel repugnent, sive quæ salubria & insalubria sint, in quo maxime Medici officium positum existimamus. Sunt vero duplicis generis solidorum motus, contractio nempe & dilatatio, quibus omne fluidum in universo corpore movetur atque propellitur. Hujus itaque causæ sunt inquirendæ, quarum nulla alia, meo quidem judicio, præter sanguinem reperitur. Hic non modo ex solido & humido elemento, sed & ex celerrimæ ad motum promptitudinis sulphurea, aëreo-ætherea materia, quæ in cerebro, quo nullum animal caret, quoad partem, cum tenuissima lympa, quæ ipsius vehiculum, secernitur, compositus est. Jam vero notatu perquam dignum est, nullum motum in parte quadam solida, aut musculosa, aut membranacea, celebrari posse, nisi ejus interior substantia sanguinis & fluidi nervei influxu sufficienter perfusa sit, quo intercepto, omnis movendi facultas, omne robur ac tonus exspirant. Etenim sanguis in convenienti mensura ac temperie & motu bene constitutus, omnium virium ac motuum in corpore nostro fons atque origo mihi videtur. Qui copiosorem & benignum sanguinem in vasis capacioribus alunt & nervos robustiores obtinent, ii ceteros vigore, robore animique acumine antecellunt; quum contra observemus, eos plerumque timidiores & imbecilliores esse, qui exilioribus vasis ac nervis præditi sunt. Neque incognitum est, omnia ea, quæ sanguinis tenuioris liberiores in partes influxum promovent, ut sunt, præter animum tranquillum & purum ac sincerum aërem, vinum, motus, exercitatio corporis, bona alimenta & medicamenta penetrantis virtutis & fragrantiae, vires ex diuturna fame, longiori morbo, aut largiori sanguinis effusione amissas, confestim & mirifice restaurare. Sensibilis quoque & ordinaria virium in senibus vacillatio atque inopia, utut legibus diætetis obedientissimi sint, & absoluta atque ineluctabilis

moriendi necessitas, à nulla alia causa derivari potest, quam principaliter à sanguinis, nec non fluidi nervei in officinas motuum influxu languidiori. Illud enim tenendum est, in decliviori ætate majorem semper fieri fibrarum ac membranarum duritiem ac densitatem, & consequenter vasorum minimorum, quæ ex fibris & membranis contexta sunt, angustiam. Per hæc autem fluidum illud movens & activum, quod cerebrum & nervos incolit, secernitur, tenuior sanguinis portio ad minima fibrarum motricium & membranarum intima penetrat, & per hæc tenuissima quoque emuntoriorum & glandularum vasa maxima excrementorum pars è corpore exturbatur. Si itaque declinante senio hæc vasa penitus coeunt, non mirum est, insignem utilissimorum fluidorum, quæ motum & vigorem partibus præstant, adeoque virium, nasci defectum, impuros contra atque corruptos succos succrescere & accumulari. Nunc vero dicendum est, quemadmodum sanguis cum nervorum fluido vitalem illum contractionis & dilatationis motum in organis motuum efficiat. Fibræ videlicet, ex quibus tota organorum compages coagmentata est, magna vi elastica instructæ sunt, quæ sanguinis appulsu amplius expansæ, non modo se contrahunt inque pristinum locum restitunt, sed & nimium coarctatæ, in priorem debitæ expansionis statum sponte resiliunt. Si itaque intra cor inductus sanguis calidus ejus parietes extrorsum urget, tunc ob potentiam fibrarum, quibus constat, elasticam, quæ à sanguine subtiliori & rore nerveo, per vasa coronaria & nervos continenter affluente, in magna tensione ac renisu sustentantur, cor rursus se contrahit & systolen patitur, qua sanguis non modo in arteriam magnam, sed in ipsam quoque cordis substantiam per coronaria vasa refunditur, ut ejus musculos ad novam contractionem & reactionem systolicam stimulare possit. Atque adeo diastole semper fit causa systoles, ac systole rursus transit in causam diastoles, & hac ratione in cordis machina liquidissime conspicitur perpetuum mobile, cujus inventio tot ac tanta huc usque ingenia nimium quantum torlit ac fatigavit. Sanguis enim cor movet, & sanguis à corde movetur, & hoc modo causa producit effectum, qui eandem causam denuo resuscitat. Una ergo motus species alterius causa est, & alterutra cessante, cessat & altera. Quam ob rem fieri non potest, quin sola immodica auriculæ dextræ, quæ tenerioris est ceteris cordis musculis texturæ, à sanguine copiosiori & rarefacto ibi congesto dilatatio, totum circulum vitalem ad tempus extinguat & syncopis causa fiat. Neque jam in difficili posita est ratio, quare vel sola manuum ac pedum fortior agitatio, aut frictio, vel calidum pediluvium, aut crebrior pulmonum per intentam vocem expansio, universum sanguinis circuitum accelerare ipsumque calorem ac perspirationem intendere possit. Neque ullam aliam causam reperimus, cur in syncope per tempus aliquod extinctus cordis motus, sola venæ sectione, vel vehementiori præcordiorum frictione, solo forti odore, vel aquæ frigidæ aspersione, reviviscat, & quare modicum salis volatilis oleosi cordis motum & calorem augere ipsumque sudorem prolicere, vel pauxillum opii vigilias & dolores levare possit. Quum vero sanguis, quamlibet temperatissimus, tandem jugi ac perenni motu & intestina partium agitatione, successive consumatur inque effoetam & inertem ad sustinendos amplius vitales motus massam fatiscat, idcirco opus est, ut excrementitiæ ac rejectaneæ partes à corpore non modo removeantur, sed & in harum locum novi & laudabiles succi surrogentur. Et hos quidem præter aërem, qui impetum facientes partes maxima ex parte suggerit, alimenta, in sinuoso ventriculi & intestinorum canale probe digesta, egregie suppeditant. Ex quo apparet, ad perennandos hos motus vitales, opus esse continuis ingestionibus æque, ac egestionibus, utpote sine quibus nec vita, nec sanitas diu salva & illibata persistere potest. Hæc vero ut rite perficiantur, necessaria utique est circumspecta rerum non naturalium observatio, quam salutaria diætetices præcepta uberius docent. Quo magis eorum temeritas inde elucet, qui ad tuendam valetudinem convenientem vivendi rationem & diæteticas regulas non adeo multum momenti habere contendunt, quum tamen in confesso sit, homines ex his rebus vivere, ægrotare, mori amissamque sanitatem recuperare. Illud autem quam maxime notari velim, quod excretiones, in homine jam adulto & qui statum ac perfectum corporis robur consequutus est, ipsis ingestis propemodum æquales esse debeant; id quod vel ex hoc unico experimento luculenter patet, quo corporis pondus, ante alimentorum assumptionem lance examinatum, elapsis aliquot diebus, licet vel centum interea alimentorum libræ ingestæ fuerint, plane non pondere increvisse observatur. Quicumque igitur in pathologicis ex pravis ingestis, per quæ non modo alimenta, sed & eas nocentis & activæ indolis materias, quæ aëris vehiculo corpus subeunt,

subeunt, intelligimus, deinde & excretionibus, tam solennibus, quam extraordinariis sanguinis, nempe per uteri & ani venas, inæqualibus, aut plane suppressis, morborum primordia ac natales arcessit, ille à veritatis tramite neutiquam aberrare mihi videtur. Nihil enim est, quod vitali corporis conservationi magis adversetur, quam, præter vehementem animi commotionem & venenum, superflua sanguinis & succorum abundantia, qua periculi plenæ stases, vel saltem stagnationes, quarum illæ acutas maxime, hæ vero tardas passiones excitant, gignuntur. Omnis itaque generis morbi, qui nil nisi naturalium motuum læsiones sunt, non secus ac motus, qui vitæ ac sanitati præsent, ad duas potissimum classes, nimirum ad systolen ac diastolen, sive ad contractionem ac dilatationem, referri possunt. Illa, si nimia atque intensior est, spasmus appellatur; hæc, si immodica est & diutius partibus infidet, atoniæ nomine venit. In utroque hoc motu fluidorum circuitus mirum quantum perturbatur; & in illo quidem, ab æquali, in hoc autem, à liberiori suo cursu multum deflectit. Est vero hic spasmus vel universalis, vel particularis. Ille, si cor cum vasis suis, quæ sanguinem & humores vehunt, hostili contractione aggreditur, febres producit; si vero magis nervorum ac membranarum systema affligit, epilepticos & convulsivos motus excitat. In illo sanguis, in hoc fluidum nerveum, in concitatissimam commotionem abripitur. Quando vero spasmus certas tantum partes, imprimis membranaceas, quæ exquisito sensu pollent & impressos motus sibi invicem communicant, violenta contorsione afficit, ob inæqualem sanguinis circulum, ingentes fiunt aliis in partibus, quamlibet remotissimis, sanguinis & humorum congestiones, quas pro locorum diversitate varia symptomata, plerumque vero dolores, tumores, sanguinis effusiones, feri defluxiones, & sæpe etiam inflammationes, presso pede insequuntur. A tono autem & robore solidorum dejecto, sanguinis & humorum stagnationes, viscerum infarctus, obstructions, scirrhusæ indurationes & corruptiones, à quibus præcipua chronicorum labe & causa defluit, profiscuntur. Cæterum ea spasmodorum natura & indoles est, ut noxiam sæpe materiam, sive in sanguine, sive in humoribus hæreat, intensiori motu felicissime eliminant. Id quod maxime valet de spasmodis istis universalibus, qui febris naturam constituunt, utpote qui stases illas inflammatorias, à quibus febrium origo derivanda est, cum tempore propria efficacia resolvunt, vel nocentem materiam ab humorum consortio segregant ac foras propellunt. Qua ratione febres sæpius sunt optimo præsidio, & sponte, sine ulla Medicorum vel medicamentorum ope, profligantur. Si quis symptomatum, quæ tam acutis, quam chronicis passionibus propria ac familiaria esse solent, rationem commode explicare velit, ille non modo nervorum distributionem & nervosarum partium consensum, qui non nisi mutua motuum præternaturalium inter se communicatio est; sed & fluidorum motum secundum leges hydraulicas & staticas probe perspectam habere debet. Alias fieri non potest, quin in enodandis historiis morborum ac phænomenis, nil nisi fuitiles & à veritate alienas rationes in medium proferat. Quæ vero morbosus motibus producendis idoneæ sunt causæ, eæ ut plurimum, sive à quantitatis, sive à qualitatis vitio proveniant, ex segniori sanguinis per viscera abdominis cursu & excretionibus impeditis, vel non recte procedentibus, resultant, & maxima ex parte intra primarum viarum regionem fixam suam sedem ac domicilium habent. Neque vero primis in viis tantum consistunt, sed pariter ac venenum intra corpus assumptum, latius grassantur & vim suam perniciosam per universam vasorum ac nervorum compagem longe lateque disseminant. Qua de causa, maximum, & præservationis, & curationis momentum in eo positum esse omnes solidioris doctrinæ Medici affirmabunt, ut, spreto solius naturæ negotio, ab aliis superstitiose pene laudato, materia morbosa decenti modo correctæ, evacuantibus primis ex viis maturius exturbetur. Dicit enim vix potest, quam commode graves passiones hac ratione prima statim in herba jugulari, & nascentes primum, vel supervenientes aliis morbis ægritudines, penitus averti possint. Secus res habet in passionibus acutis, ubi tota motuum, tam sanguinis, quam fluidi nervei œconomia, turbata est. In his enim plus quiete, temporis expectatione & clementiore medicina, quam multiplici & operosa remediorum varietate & apparatu, perficitur. Si quid vero agendum est, in morbi remissione, quam omnis morbus habet, ea potissimum exhibere oportet, quæ materiam nocentem aggrediuntur eamque foras ejiciunt: quæ medendi ratio etiam inter morbi initia, vel sub ejus declinatione, opportunum maxime locum habere potest. Quando enim natura, ut cum Veteribus loquar, in motu, & omnia emunctoria spasmis constricta sunt, tantum abest, ut

commoventia quicquam profint, ut potius insigne detrimentum afferant. Magnopere vero dolendum est, quod princeps hæc medendi regula, quo majoris momenti atque utilitatis est, eo magis à plerisque negligatur, vel plane ignoretur. In morborum autem, qui corpus diutius affligunt, curatione, ubi plus artis, quam naturæ auxilio efficitur, id saltem Medico perito agendum est, ut viscerum atoniam tollat, metus depressos excitet, obstructions solvat & nocentem materiam per convenientia emunctoria eliminat. Ad quem scopum obtinendum diuturniori quidem remediorum usu opus est; notandum tamen, quod temperatiora longe plus in hujusmodi morbis valeant, quam nimis activa & validiora, si modo debitum tempus curationi impendatur. Quemadmodum vero perpaucae & simplices sunt morborum origines & causæ, quæ naturalem corporis statum immutant; ita etiam perpauca sunt remediorum genera, causis hisce removendis accommodata. Univerſus enim remediorum apparatus, mea quidem sententia, tantummodo ad materiam nocentem emendandam ac removendam & perniciales motus tollendos, collineat. Jam quum duo tantum sint motus morboſi, intensi nimirum ac depressi; planissime inde conficitur, duo tantum statuenda esse remediorum genera, quorum alia spasticis illis motibus sedandis, alia tono partium flaccidarum restituendo, dicata sunt. Illa, recepto in scholis loquendi more, antispasmodica & sedativa, hæc roborantia & tonica appellantur. Quæ vero causis morborum amoliendis idonea sunt, ea humorum, vel copiam detrahendam, vel pravam qualitatem corrigendam, unice respiciunt. Illa evacuando, hæc alterando, suam operationem exsequuntur. Ex quo clarissime, ut puto, intelligi potest, Medicum rerum suarum satagentem, ad sanandos omnis generis affectus, non opus habere magna & multiplici remediorum farragine, vel medicamentis validioribus, aut magno & labore & pretio conquisitis. Sufficiunt enim pauca, simplicia, temperatiora & quorum virtus longo usu & experientia probata est, utpote quæ omnibus speciosis compositionibus anteferenda sunt. Et sane, ut *Helmontii* verba mea faciam, pauca sunt, quæ Medicum nobilitant, si quis modo rectam iis utendi rationem, in quo prudentiæ medicæ & methodi medendi cardo versatur, cognitam habeat & exploratam. Tot enim diversæ ratione corporis affecti, & causarum morbificarum, atque symptomatum concurrentes circumstantiæ, multum utique difficultatis Medicinæ adjiciunt, eamque ob causam acre judicium, assiduam attentionem, observationem, meditationem & crebriorem exercitationem desiderant.

Ex his igitur jam dictis inque medium prolatis, universæ Medicinæ, tam theoreticæ rationalis, quam veræ practicæ, fundamentum, nexum & ordinem cuivis facillimum erit animo comprehendere, quæ omnia in hoc, quod sub manibus habemus opere, fusiori doctrina & explicatione persequuti sumus. Nunc quidem in lucem prodit primus tomus, qui scientiam corporis humani, quatenus vivum est, quam *Φυσιολογικὴν* Græci vocant, & alteram, quæ sanitatis tuendæ præcepta tradit & Hygieine audit, complectitur. Hunc brevi post, sub favore divini Numinis, alter excipiet, in quo philosophia corporis humani morboſi, pathologia nimirum generalis, mortis, morborum, morbosorumque moruum natura, causæ ac genesis ex observationibus solidisque principiis deducuntur. Succedet postea tertius, quo vera therapie fundamenta, medendi methodus & leges, tam naturæ, quam artis, nec non selectissima remedia, cum eorundem operandi & dextre applicandi ratione fideliter tradentur. Postremo autem quarto, sigillatim & ex professo, quasvis corporis humani internas passiones, artem iis medendi, cum adjunctis rationibus, cautelis & selectioribus morborum enarrationibus, saluberrimas medendi regulas illustrantibus, pertractare animus est. Neque vero aliquis sinistre mihi hoc interpretabitur, quod in primo hoc tomo Physiologiæ Hygieinen associaverim. Hanc enim illi statim subjungendam putavi, quia rei nexus & ordo magnopere hoc mihi suadere videntur. Quem enim fugit, omnis generis morbos, ex legibus diætetis insuper habitis ac temere neglectis, suas demum trahere origines? Placuit autem hanc physiologicam ac diæteticam scientiam corporis humani vivi & sani philosophiam appellare, eo quod artium hæc nobilissima summum sapientiæ gradum constituere mihi videatur. Hæc enim plana atque aperta nobis reddit opera summi artificis, & egregie declarat stupendum ipsius in corporis nostri constructione ordinem atque sapientiam, quæ nunquam non devota mente suspicienda est. Neque ego, præter salutarem hanc scientiam, ullam artem dari arbitror, quæ generi humano magis necessaria sit, vel majora in illud beneficia conferat. Hinc sane prudenter fecit antiquissimus medicinæ parens,

parens, *Hippocrates*, quod hanc artem divinam, & medicum philosophum, Deo æqualem, appellaverit. De cætero mihi consultum visum fuit, eam, qua Mathematici utuntur methodum, in scribendo adhibere, quia nihil in arte nostra admittendum puto, nisi quod experientia & solidis rationibus demonstrari possit. Unde semper in ea fui sententia, omnes rationes, nisi ex scientia anatomica, vel physica, quæ experimentis mechanicis & chymicis nititur, depromptæ fuerint, tanto magis hypotheses & fictiones, explodendas esse ac penitus à Medicina proscribendas. Qua re impulsus, universum hoc artis systema solidis definitionibus & axiomatibus, quæ principia demonstrandi sunt, superstruere, omniaque præcepta variis theorematibus, scholiis & observationibus practicis, convenienti nexu & ordine dispositis, non sine insigni labore & meditatione, salva tamen ubivis judicii & modesti dissensus libertate, concinnare annisum sum. Ex mechanica vero desumptis principiis & rationibus, in adornando hoc opere, ad explicanda naturæ microcosmicæ phænomena usus sum. Mechanica enim est motuum scientia, quæ eorum naturam, causas ac leges tradit, easque postea ad varios usus applicat. Invento autem sanguinis circulo & structura machinæ humanæ per tot pulcherrima inventa anatomica altius perspecta, quis jam negare ausit, vitæ, mortis, sanitatis, morborum causas, remediorum vires curandique rationem, optime derivari posse ex sanguinis & solidorum motu. Quamvis vero hæc nullo modo in dubium vocari possint, nonnullis tamen in eo dissentire placuit, quod motuum, qui in corpore humano celebrantur, causam in intelligente quodam ac interiori vitali sensu prædito agente, sive principio, quærendam esse putarint, eo maxime inducti, quod corporum essentiam mere passivā & ad motum inepta extensione absolvi, animam vero ejusque commotiones, tam in regendis animantium artubus, quam sanguinis & cordis motu pervertendo, magnam vim ac potentiam exercere, ideoque reliquorum etiam motuum causam esse existiment. Verum enim vero minime quidem diffitendum est, machinæ nostræ insitum esse adhuc excellentius quoddam principium, sentiendi & ratiocinandi facultate instructum, quod in motibus & actionibus voluntariis, quas Veteres animales dixerunt, celebrandis, & vitalibus ac naturalibus perturbandis, minime vero regendis, ob intimum, quod ipsi cum corpore intercedit commercium, insigni potentia gaudeat. Sed tamen, quod hoc principium omnes motus, præsertim vitales ac naturales, qui præcipuum Medici & Medicinæ objectum, efficiat, illud est, quod in totum negamus, firmiter statuentes, cetera omnia, quæ in corpore humano secundum naturam contingunt, ex causis mere corporeis & necessario agentibus, id est mechanico-physicis, proficisci, si modo animi tranquillitas ac pacatus status, qui nihil turbet, accedat. Primo enim penitus rejicienda est Veterum opinio, corporum essentiam in pure passiva extensione consistere, quum recentiori ætate ab acerrimi judicii viris passim ostensum sit, substantiam, qua corpora operationes suas, quæ nil nisi certæ motuum species sunt, exercent, in re quadam movente ac mobili, sive vi quadam nitente ac renitente, contineri, & hinc extensionem nihil aliud esse, quam substantiæ hujus agentis ac moventis diffusionem. Deinde quum omnia corpora vi ad motum instructa, illorum phænomena ex hac dependere, magnamque calori, igni, ætheri inesse potentiam movendi & mutandi res, quotidie observemus, equidem non video, quare hisce rebus virtutem movendi in corpore nostro detrahare velimus. Et sane magistra experientia docemur, alimenta, elementa, venena, medicamenta omnesque res noxias, posse animalium motus augere, imminuere, destruere, in ordinem redigere, ita prorsus, ut pro veneni diversitate, diversissimi in corpus nostrum resultent pravi effectus, certis etiam remediorum generibus debellandi. Accedit, quod ipsæ hæc res corporeæ & mechanicæ, animæ ac mentis operationes variis modis afficiant, siquidem exinde ad varios affectus dispositio, dissidentes mores, inclinationes diversæque ingenii vires proveniunt. Si denique iis rebus, quibus tam ad præservandum, quam ad curandum Medicus utitur & quibus quotidie vitales conservamus motus, vires in corpus nostrum denegare omniaque ad principium quoddam intelligens referre velimus, quid hac ratione aliud continget, quam ut uno quasi ictu omne quod in Medicina certum, certa remediorum efficacia, omnis rationalis doctrina & scientiæ Physicæ ac Anatomices usus in Medicina prosteratur. Neque etiam ego facile intelligo, quomodo omnibus numeris absoluta theoria medica stabiliri possit, si principium, seu causa omnium, qui in corpore nostro fiunt, motuum, nec definiri, nec concipi ullo modo potest. Nihil enim ex ejusmodi metaphysico principio explicari, nihil

etiam

etiam inveniri potest, quæ tamen duæ veræ theoriæ characteres jure meritoque haberi debent. Ecquis rerum salubrium, virulentæ quoque materiæ morbificæ vires, vel remedium efficaciam, aut symptomatum rationes, ex ejusmodi principiis ordine quodam & nexu deducere poterit? Non dicam, quod ad commodiorem & certior medendi methodum nihil exinde inveniri possit. Theoriam itaque, quam in opere præsentis profiteor, ex anatomicis & physico-mechanicis principiis desumptam, quemadmodum cum praxi cohæreat & quæ utilitas in certam & compendiosam medendi methodum inde redundet, non hominum ad judicandum ineptorum, non juvenum & in praxi plane inexercitatorum, non sectariorum, & qui veras demonstrandi & logicas regulas ignorant, sed vestro, VIRI SOLIDISSIMA PERITIA ET DOCTRINA INSTRUCTI, judicio, candori atque integritati, nec non attentiori meditationi atque experientiæ etiam atque etiam commendo.

Hæc sunt, quæ præfari placuit, quum primum in lucem prodiret primus hic Medicinæ rationalis systematicæ tomus. Nec sine peritiorum applausu ipsum exceptum esse, confirmant reperiunda passim, tam in fastis literariis, quam celeberrimorum virorum scriptis, publica testimonia. Multi etiam, & sermone, & literis, me identidem hortati sunt, ut cœptam pertexerem telam, & reliquos promissos operis tomos in publicum emitterem. Quorum desideriis eo lubentius annui, quo magis nihil antiquius mihi fuit unquam, quam ut, quicquid per assiduam meditationem & longam experientiam, & didiceram, & confirmatum habebam, ad publicam utilitatem conferrem omne. Eaque propter biennio post secundum, & post hunc tertium quoque tomum, evulgavi, sicque philosophiam corporis humani ægri, nec non generalem medendi methodum perspicue & candide exposui. Nunc superest adhuc quartus, pathologiam & therapiam specialem complexurus, in quo conficiendo jam, quantum quidem reliqua quotidiana multa negotia permittunt, sum occupatus, ita, ut, si DEUS vitam viresque concefferit, eundem pariter brevi luci exponere constituerim. Quia vero interea temporis primus hic tomus avidius coemptus omniaque exemplaria distracta, majorem in modum is, cujus impensis primum prodierat, rogavit, ut iteratam ipsius permitterem editionem, & si qua emendanda, aut addenda putarem, adjicerem. Denuo igitur ad manus sumsi librum, totum revisi ac ut emendatior multum & auctior prodiret, operam dedi. Irreperant nimirum in primam editionem, typothetæ, an corrigentis culpa nescio, innumera fere typographica, sensum etiam subinde turbantia errata, quæ adhibita omni diligentia, expungenda curavi. In numerandis quoque paginis error satis conspicuus erat commissus, qui justam numerorum seriem substituendo & ubique servando, curate est correctus. Lima dein passim adhibita, & multa, quæ minus pure ac terse scripta videbantur, mutata, multa etiam, quæ obscurioris, aut æquivoci intellectus, planiori sermone & verbis magis accommodatis exposita. Potissimum vero insignis, quoad ipsa realia, facta est accessio. Etenim non modo sparsim inserui nova plurima, sed & tractationem de actionibus animalibus integris tribus capitibus adauxi, & tam sensuum rationem & indolem, quam quinque sic dictorum externorum physiologicam considerationem addidi. Quæ tamen omnia legenti, & facta hujus editionis cum priore collatione, uberius patefcent. Quod itaque superest, tibi, CANDIDE ATQUE PERITE LECTOR, novam hanc editionem iterum trado, ac ut eadem cum amplissimo fructu utaris, exopto. Scrib. in Fridericiana Hallensi, Idibus Septembris, anni c1810ccxxviii.

CONSPECTUS

TOMI PRIMI MEDICINÆ

Rationalis Systematicæ.

PROLEGOMENA

De Medicinæ natura, fundamentis, & principio demonstrandi.

- CAP. I. De medicina ejusque natura.
 II. De Artis medicæ fundamentis.
 III. De variis sectis & opinionibus medicorum.
 IV. De optima Hippocratis medica disciplina.
 V. De incrementis artis medicæ promovendis.
 VI. De medicina eclectica.
 VII. De fine medicinæ & potestate medici.
 VIII. De vero demonstrandi principio in medicina.

PHILOSOPHIÆ CORPORIS HUMANI

VIVI ET SANI

LIBER PRIMUS,

SECTIO I.

De vita, ejus causis, & motibus vitalibus.

- CAP. I. De artificio in structura humani corporis.
 II. De vitæ ac mortis natura & causis.
 III. De causis motuum vitalium, systoles atque diastoles.
 IV. De motu fibrarum vitali elastico.
 V. De sanguine humano ejusque natura.
 VI. De sanguinis circuitu.
 VII. De sanguinis circulo per pulmones, & respirationis usu.
 VIII. De sanguinis circulo per viscera & varias corporis partes.
 IX. De excellenti circuli sanguinis ad conservationem corporis usu.

SECTIO II.

De actionibus naturalibus, sive motibus secretoriis & excretoriis.

- CAP. I. De motibus & organis secretoriis & excretoriis in genere.
 II. De nutritione & succo nutritio.
 III. De lymphæ ejusque motu & usu.
 IV. De alimentorum solutione & salivæ usu.
 V. De chyli in intestinis perfectione deque bilis ad hoc negotium usu ejusque natura & secretione.
 VI. De secretionem chyli & motu ventriculi atque intestinorum peristaltico.
 VII. De

- VII. *De excretionibus, in specie ea quæ fit per alvum.*
- VIII. *De sudore & transpiratione.*
- IIX. *De excretionē urinæ.*
- IX. *De excretionē muci.*
- X. *De excretionē sanguinis per uterum.*
- XI. *De generatione corporis humani.*
- XII. *De semine humano utriusque sexus.*
- XIII. *De nutritione fætus.*
- XIV. *De secretionē lactis.*

S E C T I O III.

De actionibus animalibus, usu cerebri, sensibus, & animæ potentia in corpus.

- CAP. I. *De secretionē tenuissimi in cerebro & nervis fluidi.*
- II. *De usu fluidi cerebri & nervorum.*
- III. *De sensibus eorumque ratione & indole.*
- IV. *De visu & auditu.*
- V. *De olfactu, gustu & tactu.*
- VI. *De somno ac vigilia.*
- VII. *De anima ejusque cum corpore commercio.*

PHILOSOPHIÆ CORPORIS HUMANI

VIVI ET SANI

LIBER SECUNDUS

De vita & sanitate per salubrem diætam conservanda.

P R O L E G O M E N A

De scientia sanitatem & vitam conservandi.

- CAP. I. *De sanitatis natura ejusque signis ac causis.*
- II. *De animæ conditione motus vitales vel conservante vel destruyente.*
- III. *De aëris ad sanitatem usu.*
- IV. *De salubritate & insalubritate esculentorum.*
- V. *De alimentis aliorum insalubritatem corrigentibus.*
- VI. *De potulentorum salubri ac insalubri natura.*
- VII. *De moderatione in victu optima sanitatis conservatrice.*
- VIII. *De excretionibus ad vitæ ac sanitatis tutelam necessariis.*
- IX. *De motu optimo sanitatis præsidio.*
- X. *De quiete & somno.*
- XI. *De diætâ robustorum & imbecillium.*
- XII. *De diversa ratione temperamentorum, ætatum ac temporum anni diætâ.*
- XIII. *De diætâ sexui convenienti.*
- XIV. *De consuetudinis in tuenda valetudine efficacia.*
- XV. *De remediis ad sanitatem tuendam morbosque præcavendos accommodatis.*



PROLEGOMENA

DE

MEDICINÆ

NATURA, FUNDAMENTIS,

ET PRINCIPIO DEMONSTRANDI.

CAPUT PRIMUM.

De Medicina ejusque natura.

§. I.



D prolegomena cujusunque scientiæ rite & ordine tractanda pertinet, cum illius rei, de qua agitur, realem definitionem præmittere, tum principia indicare, ex quibus solida scientia hauriri possit.

§. II.

Medicina est rerum salubrium & insalubrium scientia, qua corporis humani vitam ac sanitatem, quantum fieri potest, conservamus, vel eam amissam convenientibus remediis restituimus.

Scholion.

Definitio hæc est realis, quia intimam artis medicæ naturam ac genium explicat, qua scimus, quid medicus & scire & agere debeat, item in quo ejus officium sit positum. Quæ vulgo afferri solent medicæ artis definitiones, à fine tantummodo desumptæ, minus rem exhauriunt.

§. III.

Medicus itaque appellatur is, qui recte, quæ homini ad vitæ ac sanitatis tutelam morborumque curationem salubria, vel vicissim insalubria sunt, judicat.

§. IV.

Quia sanitas & vita hominis res tam magnifica, pretiosa & optabilis est; medicus in hoc negotio nihil sine solida ratione agere vel moliri debet.

Scholion.

Non sufficit, medicum omnia ea, quæ fiunt, recensere posse, sed etiam rationes dare ac demonstrare debet, quod, & cur hæc, in hoc, vel illo casu, fa-

Frid. Hoffmanni Oper. Tom. I.

lubria, vel insalubria sint? Unde apparet, medicinam recte definiri scientiam.

§. V.

Quia medicina non tantum in scientia eorum, quæ obsunt & profunt, consistit; verum etiam horum usum & applicationem desiderat: hinc recte in theoreticam & practicam dividitur.

§. VI.

Sicuti theoria est scientia omnium eorum, quæ ad corpus humanum, sive sanum, sive morbis obnoxium, adeoque restituendum, pertinent: ita praxis est prudentia, recto ordine, tempore ac dosi remedia, pro cujusvis corporis & morbi ejusque causarum conditione, applicandi.

Scholion.

Medicus in theoria magis universalia tractat, functiones partium, causas vitæ ac sanitatis explicat, & quibus remediis, qua ratione victus, quo vivendi genere hæc tuenda sit, saluberrimas præscribit regulas; tum & in singulorum morborum causis & symptomatum rationibus investigandis, & quibus remediis tolli debeant, occupatus est. In praxi vero magis specialiter & quoad individua agit, & ipsa corpora corporumque naturam, robusta sint, an imbecilla, quæ ætas, quæ consuetudo, quis habitus corporis, qualis functionum s. & p. n. status? scrutatur, & secundum has admodum variantes circumstantias, cum judicio & diligentia, tam diætetica, quam pharmaceutica præsidia, dosi, ordine ac tempore debitis, adhibet atque disponit. In theoria omnes; ad lectum vero pauciores sanitati redduntur.

§. VII.

Quum medicus nec scienter, nec prudenter agat, si veras morborum causas, rationes symptomatum & cujusvis corporis naturam ignoret, neque remediorum vires modumque operandi ac medendi ordinem intelligat: hinc videmus, eam demum theoriam, quæ ex praxi atque experientia desumpta est, & quæ historiis morborum explicandis accommodari potest ipsamque experientiam postea reddit rationalem, recte dici medicam & esse optimam.

B

§. VIII.

§. VIII.

Theoria medica, nec solida, nec fundamentalis est absque doctrina physica, quæ accurationem omnium rerum naturalium, quibus homo perpetuo ad vitam & sanitatem indiget, cognitionem affert, & absque anatome, quæ intimam corporis nostri structuræ notitiam suppeditat.

Scholion.

Alioquin duo medicinæ oculi, anatome & astronomia, habiti fuerunt. Hujus vero, quia prope nulla in re medica utilitas est, hinc rectius ei physicam substituiamus, sic tamen, ut chymicam & mechanicam scientiam simul complectatur. Quicumque itaque medicorum his oculis destituitur, is profecto cæcus tantum per caliginem palpat. Nam omnes rationes, quas medicus unquam affert, nisi physicæ vel anatomicæ sint, ut nudæ speculationes & cerebri figmenta haberi debent. Rectius itaque medicus philosophus per cultrum & ignem à quibusdam dicitur.

§. IX.

Per physicam non veterum scholasticam nominalem, qua nihil explicatur & mera nomina grande sonantia pro causis afferuntur; sed realem & quæ usui est, intelligimus, quæ vires, proprietates corporumque effectus variis experimentis, videlicet mechanicis, chymicis, anatomicis inquirat, eorumque causas non ex principiis abditis & incertis, sed manifestis, corporum videlicet dispositione, situ, nexu & motus natura ac legibus, & mutua eorum inter se actione & reactione, derivat; unde hodierna philosophia merito experimentalis appellatur.

§. X.

Medicina in quatuor partes rectissime dispescitur, I.) in *Physiologiam*, quæ scientia est corporis nostri, quatenus vivum ac sanum est. II.) in *Hygieinen*, quæ tradit præcepta ad vitæ ac sanitatis tutelam necessaria. III.) in *Pathologiam*, quæ scientia est corporis nostri, quatenus varie læditur morbisque fit obnoxium, qui ex certis signis & dignoscuntur, & dijudicantur. IV.) in *Therapeutice*n, quæ regulas, leges ac methodum medendi, tam internis, quam externis humani corporis vitiis, docet.

Scholion.

Secundum scholas in quinque partes huc usque medicinam divisam esse, atque *Hygieinen* quartum inter eas locum occupasse, novimus. At nos, melioris ordinis & connexionis causa, quatuor tantum partes admittimus, & physiologiæ, quæ corporis humani structuram ejusque usum, ad vitæ & sanitatis negotium explicat, mox scientiam tuendæ valetudinis subnectimus, ut quomodo & quibus mediis, veluti convenienti alimentorum, aëris ac eorum, quæ excernenda ac retinenda adjuvent, usu, ea servanda sit appareat. Quum enim ex horum demum neglectu causarum morbificarum origo subnascatur: pathologiæ præmittendam hanc doctrinam esse judicamus. Neque semioticam distincte tractandam censemus, quia symptomata morborum, quæ in pathologicis tradi debent, signa dignoscendi, ægritudines & earum eventus prænoscenti ministrant.

CAPUT II.

De Artis Medicæ Fundamentis.

§. I.

Dantur in rerum natura corpori nostro salubria & insalubria, quæ profunt, vel obsunt: & hoc ipso artis medicæ existentia satis probata est.

Scholion.

Utitur hoc argumentum vetustissimus auctor *Hippo-*

crates ad artis nostræ existentiam demonstrandam, in libro *de arte* §. VI. ubi ita scribit: *Sunt nihil minus ea, quæ damno fuerunt, quam ea, quæ opem tulerunt, in testimonium arti, quod ars ipsa sit. Quæ enim profuerunt, ob rectum usum profuerunt, quæ vero nocuerunt, ob id, quod non recte usurpata sunt, nocuerunt. Atqui ubi rectum & non rectum utrumque suum finem habet, quomodo quis hoc artem esse neget?*

§. II.

Medici itaque præcipuum officium est, ut salubria ab insalubribus, tam quoad sanitatem conservandam, quam restituendam, discernat iisque recte utatur.

Scholion.

Nihil amplius desideratur à medico, quam ut proponat ea, quæ saluti sunt, ad usum: & iis, quæ noxia sunt, interdicit. Quapropter in iis certo niti fundamento oportet, quæ certitudo tamen sine principiis claris, ex quibus ea fluant, haberi nequit. Quæ vero theoria vel hypothesis medicorum ad hunc scopum directe non tendit, & rationes salubritatis & insalubritatis rerum, pro tanta varietate corporum, clare reddere non potest: eam pro ingenii speculabundi foetu ac nullius in adjuvanda hominum salute fructus atque momenti agnoscimus; sicuti est illa, quæ non ex principiis physico-mechanicis & anatomicis, sed magis ex pneumaticis & moralibus philosophatur.

§. III.

Sicut vero omnes vires corporum nunquam absolutæ sunt, sed relative semper, conditionate & limitate se habent: ita etiam nulla dantur ex alimentorum, vel medicamentorum classe, quæ absolute, id est, sua natura ac semper, salutaria, vel noxia sunt, sed respectus semper corporis humani & diversæ ejus naturæ esse debet. Neque enim certa quædam & eadem semper virtus idemque effectus inest remediis, utpote quæ ad nocendum, æque ac adjuvandum, prompta sunt, sed is demum ex actione, remedii, & reactione, quæ est in corpore ejusque dispositione, resultat.

Scholion.

Fundamentum perniciosissimæ empiriæ medicæ est, quod vulgus falsam hanc persuasionem imbiberit, dari certam medicamentorum efficaciam, ad quendam morbum vincendum potentem. Hac ducti opinione, sine ullo respectu ad corporis naturam & vires, illis utuntur. Et delinquant in eo frequenter docti alioquin medici, quod semel, vel iterum, dextro à dato remedio annotato effectu, specificam & perpetuam adversus hunc morbum efficaciam ei inesse credunt, & simili recurrente morbo, etiam non iisdem plane circumstantis stipato, idem propinant. Ita, quum à cortice chinæ salutaris in tollendis intermittentibus aliquoties visus fuerit effectus, mox pro universali remedio, incredibili tamen mortalium damno, is habitus est ad febres fugandas. Idem fieri in ceteris fere omnibus, indies, non sine gravi dolore & detrimento, observamus.

§. IV.

Solidæ igitur & rationalis medicinæ cardo in eo unice vertitur, ut alimentorum & medicamentorum vires atque effectus, secundum differentiam corporum, quæ maxima est, addiscamus, quæ res non est cujusvis hominis, nec tam facilis, quam quidem vulgo putatur.

§. V.

Hanc vero doctrinam longe utilissimam ut affequamur, duobus opus est subsidiis, quæ sola & genuina fundamenta veritatis & certitudinis in arte medendi sunt, quorum unum EXPERIENTIA, alterum RATIO appellatur.

§. VI.

Per experientiam non intellectam volumus illam temerariam & fallacem imperitorum, dum protinus fausti, vel infauti, à remedio assumpto observati successus causam,

causam, dato remedio adscribunt, nullo habito ad individuum, vel ad alias circumstantias & causas concurrentes, respectu.

Scholion.

Fallit talis experientia, quia nimis precipitanter annotatus effectus, remedio, tanquam causae adaequatae & soli, adscribitur: & ab hac judicandi precipitantia tot tantaeque practicum diffensiones oriuntur, dum quidam certum remedium in morbis ad coelum extollunt, alii ad orcum usque deprimunt, singuli autem ad experientiam confugiunt.

§. VII.

Vera experientia nascitur ex compluribus observationibus, magna diligentia, attentione & cura notatis, quae integram morbi historiam, cum omnibus ad rem pertinentibus circumstantiis, complectuntur, unde medicarum observationum summa patet utilitas.

§. VIII.

Quia vero experientia, quae observationum copia acquiritur, valde difficilis & longissimi demum temporis filia est, cum corpora humana mirifice, pro diversitate virium, climatum, temporum anni, victus, consuetudinis, aetatis, temperamentorum innataeque dispositionis diffideant, ea propter sola experientia insufficiens & difficillimum est artis principium; alterum itaque, seu fulcrum, ut adjungatur, videlicet ratio, necessarium est.

Scholion.

Speculat huc *sect. I. aphor. I. ars longa, vita brevis, experientia fallax, judicium difficile.*

§. IX.

Per rationem hoc loco non tam rectum medici judicium, siue subactam recte concludendi facultatem, quae utique semper ut veritas eliciatur necessaria est, quam potius veram & realem, non nominalem, quae scholasticorum est, theoriam medicam, intellectam volumus.

§. X.

Theoria medica vera est rationalis & demonstrativa explicatio eorum, quae in historiis morborum continentur & quaecunque per alimentorum, aequae ac medicamentorum & rerum naturalium vires, ut sanitas conservetur & morbi propulsentur, possibilia sunt.

Scholion.

Rationalis ac demonstrativa effectuum per causas explicatio fit, si quis ex indubiis principiis, seu primis veritatibus, apta & syllogistica connexionione incognita deducit; explicat more ac methodo geometrarum, quae in demonstrationibus suis uti consuecunt. Nam geometrae, ipse quoque *Euclides*, si rem probe perpendimus, non alia ad demonstrandas veritates usi sunt methodo, quam rerum ordine & syllogismorum serie ac connexionione. Sed hanc methodum scribentibus laboriosam & difficillimam, legenti facillimam esse, quilibet harum rerum gnarus noverit.

§. XI.

Medicus, veram theoriam callens, ex morborum historiis completis, id est, quae totum morbi cursum complectuntur, primo morbi origines ac causas ejusque indolem ac symptomatum generationem investigat atque explicat: ex his cognitis deinde indicationes sibi format, quid faciendum vel omittendum sit: tum quae remedia, ipsi prius probe cognita, quo ordine, qua dosi & tempore sint adhibenda, proponit: & post haec rectum de morbi eventu judicium in medium profert. Et haec methodus maxime locum habet in consiliis dandis.

§. XII.

Medicus, bonus theoreticus, ex accuratioribus observationibus multum sapit, maxime vero ex his medicamentorum vires atque effectus exquisitissime, pro corporum & circumstantiarum diversitate, investigat. Tum ex particularibus & pluries observatis, universalialia

Frid. Hoffmanni Oper. Tom. I.

praecepta ac regulas medendi sibi colligit, neque minus ex nocuentis documenta & cautiones comparat utilissimas.

§. XIII.

Vera igitur theoria medica est fundamentum ac clavis certae, securae ac facilis praxeos. Hac promte scimus, quid in morbo, etiam novo & insolito agendum, vel omittendum, aut promittendum sit, ne unquam noceamus, si prodesse non possumus, ac aliorum medicorum errores facile cognoscimus, hac denique securiorem medendi viam in difficilioribus morbis invenimus.

§. XIV.

Character itaque solidae ac verae theoriae medicae est, si quis ea uti possit ad praxin, quod fit, si historias morborum, quoad omnes circumstantias, rite ac debito ordine ex ea evolvere, explicare ac demum utilissimas in praxi conclusiones inde derivare & consilium medicum firmum ac fundatum dare valet.

Scholion.

Ex his clare intelligitur, quam erronea sit communis illa sententia, bonum theoreticum esse malum practicum. De perversa theoria valere illud concedimus, vera autem & solida practicum, & solidissimum, & felicissimum reddit. Et qui caret hac, solidus & peritus practicus nunquam evadet, etiam si per centum annos artis opera exerceat.

§. XV.

Nemo exquisitam verae theoriae medicae cognitionem sibi vindicare potest, nisi corporis humani, ratione structurae, exactam & intimam habeat notitiam; deinde, nisi rerum, quae illud mutare possunt, vires cognitas ac perspectas habeat. Illud anatome, hoc physica doctrina, quae potissimum ex mechanicis & chymicis experimentis deprompta est, & maxime omnium annotata experimenta medico-practica, pandunt.

Scholion.

Ex diligenti inspectione & penitiori scrutinio fabricae corporis nostri, sanitatis & vitae causae, & quare corpus, in se ad corruptionem primum, internis solidorum ac fluidorum motibus, ab ea vindicetur, manifestae fiunt, quibus cognitis, longe jam est facilius in mortis & morborum causas hasque praescindendi rationem penetrare. Accedit, quod medicus, ex frequenti & circumspecta eorum, qui morbis extincti sunt, sectione, non modo mortis, sed & morborum causas lethales addiscat; quarum instructus cognitione, eas postea convenientibus remediis tanto facilius avertere & amoliri potest. Et quia medicus externis partium vitiis saepius ipse manum adhibere debet, utique necesse est, ut, si id cum ratione peragere velit, omnium partium, praesertim nervorum, vasorum, muscutorum, tendinum situm, connexionem, usum atque consensum, tanquam digitos suos, in numero habeat.

§. XVI.

Quoniam nemo vivere, vel sanitatem sine alimentis, sine elementis, sine excretis & retentis, sine somno & motu tueri, neque sine his aptisque remediis amissam valetudinem recuperare potest; quia porro omnes morbi, seu perversae actionum corporis mutationes, externis & non naturalibus rebus suam maxime debent originem: hinc per se patet, medico physicam scientiam summe esse necessariam, ut hac ipsa vires, proprietates & effectus rerum corporearum, in mutando corporis nostri statu, a priori justa demonstratione ac fundata ratione investiget.

§. XVII.

Neglectus itaque anatomici & physici studii, causa est indubia omnium errorum ac diversissimarum adeoque incertarum opinionum, sectarum & dissensionum, tam in theoria, quam in praxi medica.

Scholion.

Turpe est, medicinam nonnisi sectis, quæ ex minus certis, imo dubiis opinionibus, & de quibus adhuc disputatur, ortæ sunt, huc usque innixam fuisse: cum tamen vita sit res omnium pretiosissima. Quare eo laborandum est, ut veris & inconcussis principiis stabilatur.

CAPUT III.

De variis sectis & opinionibus Medicorum.

§. I.

Veteres accurata corporis humani & rerum physicarum, quæ illud mutandi facultate pollent, notitia destituti, etiam vera ac rationali theoria medica carebant, unde in varias sentiendi ac medendi vias discesserunt. Atque adeo anatomes ac physices veræ ignorantia, tot sectarum & opinionum causa omnino genuina fuit.

§. II.

Antiquissimi medicorum, notitia corporis humani & causarum morbi insuper habita, artis certitudinem in sensuali ac evidenti cognitione, sive experientia eorum, quæ in morbis profecerant, vel nocuerant, unice collocabant, evidentes vero morborum causas, ut frigus, calorem, famem, sitim, intemperantiam animique affectus admittebant, & hi *empirici* vocabantur.

Scholion.

In eo laudem merentur empirici, quod sensualem ac evidentem causarum cognitionem urserunt, abditas potissimum negligendo, quarum nec curatior quidem investigatio, medico utilis vel necessaria admodum est. Et de his quoque perpetuum inter medicos & philosophos est litigium. Intimæ enim rerum naturæ ac causæ, quæ virium & proprietatum in corporibus fontes sunt, intellectus nostri vim ferme in totum transcendunt. Longe itaque facilior ac tutior philosophandi in rebus medicis via est, proprietates tantum & vires rerum, mutuis actionibus atque effectibus investigare, idque optime fit experimentis physicis, chymicis, mechanicis, medico-practicis. Sic experientia recte constituta, recte experientissimi nominantur medici. At vero quia veteres & genuinam investigandi vires corporum methodum per experientiam ignorabant, mutuas corporum relationes, ex quibus demum verus effectus judicandus est, non attendendo: hinc eorum experientia minus solida ac firma, sed fallax & dubia habenda est.

§. III.

Alii, cum viderent, solam experientiam ad certitudinem artis minus sufficere, causarum non modo evidentium, sed & abditarum notitiam atque rationes, in applicandis remediis, urgebant; hinc dissectionem corporum & rerum naturalium scrutinium in auxilium vocabant, & hi dicebantur *rationales*, quorum facile princeps fuit *Hippocrates*.

Scholion.

Urgebant quidem olim rationales medici, & anatomicum, & physicum studium, tractandæ medicinæ esse utile, horum vero convenientem tractationem ignorabant. Siquidem manifestas & sensui propinquas, quas phænomena & experimenta subministrant, causas negligebant, eas vero, quæ & rationi & sensibus occultæ sunt, prosequi cœperunt. Unde vix alia, quam sterilia nomina & figmenta in rem medicam atque physicam irrepserunt, & infelicitè, quod pessimum, pro rerum veris causis venditata fuerunt. At vero exquisitior rerum naturæ cognitio est quoque ad verum

anatomiae usum perquam necessaria, utpote physicae scientiæ adminiculo, ea quæ sensu cognoscuntur in corporum abditis, explicantur, & usus fabricæ partium corporis investigatur recteque recluditur. Hinc facile apparet, sine physica doctrina & anatomicum studium non multum juvare, sed truncum & mancum esse atque olim fuisse.

§. IV.

Quidam, spretis omnibus aliis, notitiam causarum proximarum morbificarum in praxi unice urgebant & has triplices esse dicebant, laxum nempe, strictum & ex utroque mixtum, eamque ob causam triplices tantum medendi indicationes & fontes curandi statuebant: strictum scilicet esse laxandum, laxum vero roborandum, & si neutrum fuerit, utroque modo faciendum, judicabant. Et hi medici, ob hanc compendiosam & brevem methodum, dicti fuerunt *methodici*, cujus sectæ auctores *Themison Laodiceus* & *Thessalus Trallianus* celebrantur.

Scholion.

Indicationes curandi utique sunt paucæ & simplices, quia à paucissimis & simplicissimis causis morbi oriuntur. Hinc vires quoque medicamentorum à paucioribus proprietatibus pendent, eæque ad paucas classes reduci possunt. Inque eo laudanda erat methodicorum intentio; sed quia physices ac anatomes studio carebant, neque vires remediorum experientia practica rite consequi poterant, neque vitæ, neque mortis, neque sanitatis & morborum naturam, nec veras formare indicationes ac remediorum vires recte intelligere poterant. Ceterum de origine & auctoribus sectarum in medicina legi merentur *Plinius in Hist. Nat. L. XXIX. C. II. Calius Aurelianus L. I. C. 31. Corn. Celsus in præfatione operis sui & Petrus Castellanus*, adde *Conringii introductionem in medicinam*, nec non *Barckhuysen historiam medicinæ*.

§. V.

Galenus, anno post Christum natum CXL. *Aristotelis* physica principia, quatuor elementa & ex his productas temperies ac intemperies, quatuor qualitates ac humores, infelici tamen fidere, in medicinam induxit, quem *ἡ πύλη*, ad seculum fere decimum sextum, plerique Arabes, Græci, Latini, Itali, Hispani & Germani secuti sunt.

Scholion.

Non incongrue medicina in nominalem & realem distinguenda videtur. Illa, quæ veterum fuit, in allegandis rerum veris causis, tantum nominibus & compluribus distinctionibus nihil significantibus contenta est, & loco proximarum & sensui ac rationi manifestarum causarum, ad potentias quasdam spirituales, morales, ad ens interno sensu & cognitione præditum, vel in occultioribus ad ipsum Deum, vel dæmonem, confugit. Realis vero, quæ potissimum nostri sæculi est, in ipsis rebus earumque natura indaganda sapere intendit, atque effectuum causas maxime proximas, sensui ac rationi obvias, inquirat, spretis omnibus inanibus ac nihil significantibus nominibus atque principiis. Sicut vero nominalis medicina, quæ est plurimorum veterum, maxime *Galen*i, jure scholastica & phantasiæ tantum filia est, rebusque explicandis & inveniendis minus idonea: ita recentiorum, magis realis & experimentalis, ad usum & praxin magis accommodata est, magisque observationis, meditationis, judicii ac rationis res existit.

§. VI.

Circa exitum sæculi decimi sexti prodit in Germania *Paracelsus*, qui, repudiatis Aristotelicorum elementis, principia chymica, sal, sulphur & mercurium, astrorum quoque potentias & influxus, in medicinam introduxit: chymica quoque, per ignem præparanda pharmaca, in praxin invexit, de quibus mire gloriatus est.

Scholion.

Scholion.

Neque *Paracelsi* principia, quæ ignis plus, quam naturæ producta sunt, ullam lucem medicinæ accendebant, siquidem nec vitæ ac sanitatis, nec morborum negotio eosque curandi scopo, poterant accommodari. Tacemus insulas illas superstitiones & miras arcanorum & specificorum, ex minerali potissimum regno petitorum, jactationes, quibus plus artis nostræ excellentiæ detraxit, tantum abest, ut eam perfecit.

§. VII.

Seculo decimo septimo *Helmontius* prodibat, qui Philosophus per ignem appellari volebat. Hic etiam repudiatis maxime Galenicorum scitis ac placitis, in homine ac animantibus internum motus ac sensus vitalis quoddam principium constituebat, quod archeum nominabat, qui cum vitæ, tum morborum ac medicationum, omniumque actionum in homine causa ac fons esset. Omnes vero alias causas, etiam morborum, nec non remediorum vires, per se mortuas atque desides, cum nec se, nec aliud quicquam movere possint, judicabat: sed tantummodo has esse occasionales asseverabat, quibus archeus excitaretur, ut vel inde expavesceret, vel excandesceret, aut sedaretur, vel aliis modis afficeretur. Ceterum multum secutus est *Paracelsum* & ab eo tradita scriptis suis inseruit. Nimum tamen paradoxis studuit nimisque fuit credulus, & loco causarum manifestarum, multa rationis entia, speciosa nomina, ideas, semina, fermenta, occultum animæ regimen, duumviratum & id genus plura, in medicinam introduxit & jure medicinæ idealis & pneumaticæ conditor dicendus.

Scholion.

In eo quidem non culpandus *Helmontius* est, quod in corpore humano causâ vitæ, mortis, morborum & sanationis, item motuum ac sensuum, quæsierit & scholas Galenicorum destruxerit: in hoc tamen aberravit, quod causis morborum, item rebus externis, videlicet alimentis, elementis remediisque, omnem actionem, motum & influxum in corpus, denegavit, archeo autem sensum internum vitalem, quo discernat, quasi per occasionem, noxia vitæ ab innoxiiis, item pavorem, timorem, iram adjudicavit. Nam posito ejusmodi principio & rejecta rerum externarum & corporearum vi activa, corrui omnis usus anatomici ac physici studii, cum tamen absque eo theoria medica plane sit fictitia minusque rationalis. Neque video, si omnes vires mortuæ sunt, quomodo salubris vel insalubris rerum usus & abusus adstrui & recte explicari possit. Neque intelligo, quo pacto ignis, frigidi, humidi, aeris ejusque gravitatis & elateris, nec non salium & sulphureorum, quorum vis in corpus nostrum, ipsius motus & functiones mutandi, summa est, operationes, explicare ex hoc fundamento possimus.

§. VIII.

Superiori sæculo egregius ex Germanis medicus, & omni laude major *Daniel Sennertus* exstitit, qui ex Græcis, Arabibus, Italis & Gallis meliora dogmata & salutaria artis præcepta selegit, inque systema universam medicinam redigere & præcipue consensum Galenicorum cum chymicis stabilire allaboravit: idque non sine magno orbis medici applausu. Is igitur primus inter philosophos & medicos Germaniæ eclecticus merito haberi potest.

§. IX.

Eodem etiam sæculo prodiit *Takenius* aliique plures, qui ex sale acido & alcali, quorum proprietates ac vires noxias & utiles primus fere in rem medicam *Helmontius* introduxerat, præcipuas morborum causas ac fundamentum curandi deduxerunt.

§. X.

Non multo post in Belgio surrexit *Sylvius*, qui novam medicis scholam aperuit, & ex manifestis causis agere coepit, quum ex acido, bile & pituita, omnium mor-

Frid. Hoffmanni Oper. Tom. I.

borum causas deducere, & remediorum vires, adversus acidum & bilis acrimoniam, vel inertiam, pugnantes, demonstrare natus est: inque Belgio & Germania plures ejus doctrinam, ut fieri in novis rebus affolet, sequuti sunt.

§. XI.

Cartesiana philosophiæ addicti medici, quorum principes fuerunt *Craanius*, *Bontekoe*, *Regius*, *Blancardus*, inter Germanos *Waldschmidtus*, summa ope annisi sunt acidum & viscidum, & inde enatas obstructions, pro causis morborum universalibus obtrudere, omnemque morbis medendi rationem in fluiditate sanguinis ejusque circulo per congrua medicamenta conservando, posuerunt, contentis fere purgantibus, acidis sanguinisque missionibus; plethoram quoque ex morbidarum causarum classe ejicere conati sunt.

Scholion.

Insufficienciam acidi & alcali, pro stabiliendis rerum naturalium principiis *CL. Bohnius* ostendit. Acidi vero & visceri pro assignandis morborum omnium causis, item alcali fluidi, pro iisdem amoliendis, insufficienciam, nos peculiari olim dissertatione epistolari edita anno MDCLXXXIX. evicimus.

§. XII.

Postquam res tam medica quam physica, ob circulum sanguinis, divinum illud & incomparabile ad veritates medicas stabiliendas & asserendas inventum, item ob philosophiam chymicam & mechanicam experimentalem, nec non ob præstantissima multa alia inventa anatomica, maxima cepit incrementa: physica etiam corporis humani longe cultior ac perfectior redita est, solidior tamen pathologia & huic superstructa therapia adhuc in desiderio fuerunt. Nam pluri recentiorum adhuc, in explicandis morborum causis, nimium potentiis materialibus, v. gr. salibus, acribus, acidis, causticis, item fermentis ac texturis materialium fere inexplicabilibus, spreto motuum, circuli sanguinis, nec non secretionum atque excretionum, ad recuperandam sanitatem summe proficuarum & necessariorum, item circuli sanguinis usu, inhaerent: adeoque causarum verus nexus cum indicationibus curativis multum hætenus neglectus fuit.

§. XIII.

Attenta observatione discimus, motum omnium mutationum in corporeis causam esse, atque motu quoque vitæ ac sanitatis fundamentum contineri, ipsas morborum causas vix alio modo, quam motu, in corporis nostri solidas & fluidas partes agere, neque medicamenta aliter, quam motu, operationes exserere. Qua de causa in explanandis medicis rebus inque remediorum viribus explicandis, ad motum principaliter, deinde ad mobile, sive dispositionem corporum ipsasque vias, respiciendum esse existimamus. Quoniam vero mechanice scientia dispositionem corporum ad motum atque hujus naturam, causas, leges atque effectus clare docet & explicat, iisdemque principiis & ratiociniis ex mechanica desumptis, præstantissimi medici in causarum explicatione uti consueverunt; ideo, hæc tractandi medicinam methodus, hodie mechanica recte appellatur.

Scholion.

Hanc mechanice medicinam tractandi methodum, quæ quam maxime anatomicæ & veræ physicae scientiæ superstructa est, præstantissimi ævi nostri medici, in Italia *Bellinus*, *Borellus*, *Malpighius*, *Michelotti*, *Santorini*, *Ramazzinus*, *Baglivus*, *Lancisus*, *Bianchi*, in Belgio & Britannia, *Pitcarnius*, *Freindius*, *Keil*, *Albinus*, *Boerhaaven*, in Germania, *Bohnius*, *Brunnerus*, *Camerarius*, *Scheuchzerus*, *Bergerus*, *Vaterus*, *Zvingerus*, *Nebelius*, *Paulli*, *Schaperus*, aliique hinc inde egregii viri, magno cum applausu artisque incremento amplexi sunt.

§. XIV.

Mechanicæ medicinæ contrarii videntur ii, qui artificiosam quidem partium in corpore structuram negare nequeunt, sed admittere coguntur, materiam tamen omniaque corpora in se & sua natura passiva & omnis actionis ac motus expertia, tantum ut instrumenta motuum considerant, unde, ut ab alio movente, quod principium motus in se habeat, actuentur, dijudicant, rebus etiam physicis & externis causalem efficaciam faciendi, immutandi ac destruendi corporis nostri motus, denegant. In homine vero illud principium, quod vitæ, sanitati & morborum curationi præsit, naturam, vel animam vitaliter agentem appellant, cujus actiones non ex principiis & modis agendi mechanicis, sed rectius ex morali quadam æstimatione explicari autumant.

Scholion.

Infelicissimum hoc in philosophicis dogma, materiam in se & sua natura esse ens mere passivum & ab alio ente activo actuandum, complures erroneas, in re philosophica pariter & medica, omni tempore peperit opiniones: siquidem alii credebant, Deum esse motus causam, alii spiritum, animam, vel naturam substituerebant. Ex prima assertione multa absurda ipsumque fundamentum Spinozismi, fluunt, sicuti id latius deduximus in *diff. de universali agente in corporibus*, item in *diff. de potentia diaboli in corpora*, nec non *de natura morborum medicatrice mechanica*. Qui vero mera tantum nomina pro causis motuum, nec quicquam reale, vel demonstrativum afferunt; ii nihil quod concipi possit, vel ad praxin utile sit, explicant. Res potius ita se habet. Infinita Dei potentia produxit substantias agentes, seu viribus activis instructas, quæ sint fontes operationum atque effectuum in aliis. Quid enim creatura, vel substantia mere passiva, sine actione vel operatione est? certe nihil. Sicuti vero substantiæ, vel in intelligentes & libere agentes, vel in moventes, mobiles, sive resistentes atque ex necessitate agentes, optime distinguuntur, quarum priores spiritus, posteriores corpora appellantur: ita & vis intelligens libereque agens, spiritibus, movens autem & ex necessitate agens, corporibus, substantialis & essentialis assignatur. Atque adeo non opus est, pro his peculiare agens, fingere, siquidem omne corpus est agens, & in perpetuo nisu ad motum, vel in motu, unum in alterum agit ac reagit, & mutationem, licet non semper ratione loci, producit. Has vires ratione effectuum quos in aliis edunt, observat mechanicus & mensurat geometra, quia effectus certi semper ex certis causis necessario sequi debent. Igitur res externæ, elementa, alimenta ac medicamenta, quibus nec ullus hominum, vel medicorum carere potest, agunt in corpus nostrum ipsique necessarias mutationes inferunt. Non negandum tamen est, mentem quoque in corpus agere & animam sensitivam illud turbare posse; ex his tamen minime consequitur, omnes actiones, præsertim vitales & naturales, in corpore nostro à mentis, vel animæ directione, dependere.

CAPUT IV.

De optima Hippocratis medica disciplina.

§. I.

Præstantissimam medicinæ tractandæ disciplinam, primus, isque vetustissimus parens, *Hippocrates*, in monumentis suis posteritati tradidit.

§. II.

Gravissimus hic auctor maxime urgebat, ad perficiendam artem in observando & annotando diligen-

tiam, ut constet ex ejus *libris epidemiorum, de morbis & affectionibus*.

§. III.

Ex sæpius observatis regulas universales, seu aphorismos concinnabat, ut in similibus casibus eximius eorum exstaret usus, sicuti testes sunt ejus omni laude majores *sectiones VII. aphorismorum*.

§. IV.

Idem studium anatomicum medicinæ summe necessarium judicabat, de quo *libri de corde, ossium natura, venis, humoribus, genitura, principiis & carnibus, item de glandulis ac de natura humana*, testes sunt.

§. V.

Exquisitum rerum naturalium studium pensi habebat: cujus testimonium præbent *libri de flatibus, de locis in homine, de alimentis, aëre, aquis & locis*.

Scholion.

Siquidem ex variis præcedentibus tempestatibus temporumque mutationibus, regionum situ, soli natura ac indole, terræ exhalationibus, aquarum qualitate & diversa victus ratione, grassantium ac popularium morborum causas tanta sagacitate deducebat, ut certis etiam regionibus ac naturis hominum imminentes morbos potuerit prædicere.

§. VI.

Naturarum & corporum diversitatem magna cura commendabat, quare in medendo circumspicere jubebat, imbecilla an robusta corpora, quis sexus, quæ ætas, quæ vires, qualis temperatura, habitus corporis, consuetudo vel hæreditaria dispositio sint?

§. VII.

Scientiam præservatricem, qua nihil aut præstantius, aut optatius est, excoluit.

Scholion.

Unde singulari studio *libros tres de dieta, item de alimentis, humidorum usu & salubri dieta*, composuit, inque morborum curatione multum fuit occupatus, ut in quibusvis, pro diversitate naturarum, convenientem victum ac vivendi rationem præscriberet, quod patet ex *libro de victu acutorum*.

§. VIII.

Quoad studium dignoscendi ac dijudicandi morbos, nullus ipsi fuit superior.

Scholion.

Hoc videre est ex *aphorismis, libris prædictionum, prænotionibus & Coacis*, quare factum est, ut prudenti prognosi magnam sibi famam nominisque celebritatem conciliaverit.

§. IX.

Neque minorem chirurgiæ studio, quo nihil utilius est nihilque evidentius, navavit operam.

Scholion.

Libri ejus *de articulis, fracturis, vulneribus capitis, de fistulis*, aliaque documento sunt.

§. X.

Morum ac decori doctrinam, & prudentem vivendi rationem, nemo ipso rectius tenuit, & medicis quoque qui multorum consuetudine uti debent, commendavit.

Scholion.

Hujus rei testimonium ejus *jusjurandum, liber de medico, de decenti habitu, sive ornatu ejusque præceptiones ac epistolæ*, lectu dignissimæ, exhibent.

§. XI.

Hippocrates omnium primus mechanicis rationibus in difficilioribus explicandis usus est, dum ex justa mensura, proportionem, temperie motuumque æquilibrio, sanitatis naturam, & ex his destructis, morborum rationes apte deduxit.

Scholion.

Id ex variis locis fit conspicuum, qui exstant in *libris de flatibus, diatæ, natura hominis*, item ex definitione

fructione medicinae mechanica, quam optimam dedit in *libro de flatibus*, dum ait, esse additionem eorum, quae deficient, & subtractionem eorum, quae abundant: quibus luculenter indicat, medicum in eo solum occupari debere, ut mediocritatem inveniat & veram mensuram motuum ac humorum, quae sanitati conservandae idonea sit.

§. XII.

Circulum sanguinis, quo non excellentius in medicina inventum est, jam tum cognovisse *Hippocratem*, non obscura in scriptis ejus exstant vestigia.

Scholion.

Patet hoc ex *libro de alimentis* §. de *insomniis* §. 8. & 12. adde *librum de flatibus* §. 21.

§. XIII.

Laudandus quam maxime in eo est, quod naturae motus motuumque ordines, successiones, ductus, vias, tempora observanda, & motus salutare, à pernicioso, in medendo distinguendos commendat, quod ex ejus aphorismis, & iis, quae de crisi & prognosi passim memoriae prodidit, clarum ac perspicuum fit.

Scholion.

Ex *Hippocrate* hausturi doctrinam, quod provectionum in arte esto, commendatos sibi habeant *Foessi* labores, qui optime principem hunc medicorum & terse interpretatus est, & in adiectis annotationibus, oeconomia etiam seorsim prostante, multa lectu non inutilia protulit. Sed nec omittat *Mercurialis* & *Prosperi Martiani* laudatissima scripta, ad illustrandum hunc auctorem in lucem emissa. Denique *Hollerius*, *Duretus* & *Heurnius* pariter de eodem sunt praclare meriti.

CAPUT V.

De Incrementis Artis Medicæ Promovendis.

§. I.

H*ippocrates*, uti primus optima solidæ medicinae fundamenta jecit: ita mirandum est, ab ejus temporibus per multa secula non ulterius artem progressam esse.

Scholion.

Id detrimenti ars nostra maxime ab *Hippocratis* successoribus passa est, qui observationibus non ulterius insistentes, perversa potius philosophandi, & quidem secundum *Aristotelis* placita, methodo, eam plus corrumperunt, tantum abest, ut observationum copia atque inventorum apparatu, eandem magis perfecissent:

§. II.

Nostrium est, laudatissimam, quam divus senex calcavit viam, omni cura prosequi, illudque quod ipsi defuit nostra industria supplere, augere variisque inventis locupletare & hac ratione ad majorem perfectionem, quoad theoriam & exercitationem, artem perducere.

§. III.

Non meliorem viam id perficiendi ingredi possumus, quam si 1) summa attentione ac diligentia observationes & historias morborum accuratas & completas in praxi conscribamus; 2) artificiosam corporis humani structuram paullo subtilius atque curatius diligenti scrutinio & cultro anatomico investigemus; & 3) beneficio solidioris physices experimentalis, quae mechanica & chymica experimenta complectitur, abditas rerum & effectuum causas ulterius scrutemur.

Scholion.

Praxis medica incredibile damnum ac detrimentum olim passa est à tanta ineptiarum compositionum pharmaceuticarum farragine & simplicium supino neglectu; neque minus quod medicina tanta ab illo tempore observationum, quae plenam & exactam morbi historiam com-

plectebantur, inopia laboravit: nostris vero temporibus non parum decrementi artis exercitatio passa est à chymicis, qui validissimas ex mineralium regno medicinas, magnifica arcana & specifica pro expugnandis morbis temere jactarunt, securam vero medendi viam, quae fit per dietam & parabilia simplicia, nihil habuerunt. Si quod igitur incrementum arti nostrae accedere & ad perfectionem propius pervenire hæc debet; certe in eo maxime laborandum erit, ut thesaurum selectissimarum observationum practicarum nobis comparemus, ut paucis, securis & probatissimis remediis uti consueamus, eorumque vires & facultates, in tam differentibus corporibus & morbis, plenius exactiusque addiscamus; & tot practicum compositiones & chymicorum tantopere jactata remedia missa tandem faciamus, hisque repudiatis, plus ex diætâ vitæque regimine, quam ex pharmacopolio, salutem aëris afferre laboremus, præsertim in arcendis morbis.

§. IV.

Quicquid salutari nostrae arti, tam quoad theoriam, quam quoad solidiorem praxin instituendam, incrementi adhuc accessit, id maxime attentis observationibus practicis, item anatomiae ac physices studio, debemus:

§. V.

Post nobilissimum *Harvæi* sanguinis circuli inventum, longe jam facilius est, vitæ, sanitatis ac mortis causas dare: in pathologicis vero febrium, hæmorrhagarum, inflammationum pluriumque aliorum morborum, qui à perverso sanguinis motu fiunt, doctrinam, exponere.

§. VI.

Inventis chyli ex intestinis ad sanguinem viis, nec non detectis variis glandulis & tunicis glandulosis in intestinorum canali, observato quoque duodeni, quod recte ventriculus secundus, seu succenturiatus vocatur, in quo bini humores menstruales & fermentales, biliosus nempe & pancreaticus, confluunt, flexuoso situ, longe rectius & melius jam digestionis, chylicationis & sanguificationis negotium explicatur, & morborum, qui prima in regione consistunt, generatio perspicitur.

§. VII.

Postquam vasa, quae lympham vehunt, à *Bartholino* & *Rudbeckio* reperta & à *Nuckio* & *Ruyschio* amplius explorata fuerunt, glandularum quoque fabrica & usus, præeunte *Whariono*, *Nic. Stenonis*, *Nuckio*, *Covvpero*, *Malpighio* & *Morgagni*, plenius innotuit; chyli etiam viæ per vasa lactea & ductum thoracicum per *Pecquetum*, *Bartholinum*, *Hornium* aliosque detectæ sunt: morborum ex vitio glandularum & lymphæ, & quæ ex depravata nutritione fiunt, longe clarior est expositio.

§. VIII.

A solertissimo *Malpighio* viscerum, pulmonum, cerebri, hepatis, ac à *Bellino* renum structura & compage perspecta, morborum, qui hisce visceribus inhaerent, ut phthiseos, hydropis & nephritidis, originès longe rectius intelliguntur: ut & plurimum adjuti sumus illo studio, quod *Stenonis*, *Vieussens*, *Willisus*, *Ridleius*, *Leuvenhoeek*, *Ruyschius* alique cerebro & nervis penitus inspiciendi; hepatis autem *Glissonius*, *Bianchi*, *Morgagnus*, pancreatis *Græfius* & *Brunnerus* impenderunt.

§. IX.

Posteaquam mere vasculosam itemque cellulofam lienis compagem *Casseri* & *Ruyschius* clarissime oculis exposuerunt, hujus visceris vitia ejusque morbos luculentius jam cognoscere & curandi rationem ac modum invenire licet.

§. X.

Perspecta plane peculiari venæ portæ, arteriæ & venæ munere fungentis, structura & distributione, melius quoque eruto vasorum hæmorrhoidalium numero, ortu, situ & reptatu; omnes nunc morbi, qui ex hæ-

morrhoidum vitiis & motu progressivo sanguinis per viscera abdominis intercepto proficiscuntur, quos inter maxime eminet affectio hypochondriaca, in plano sunt & commode ad rationes revocari possunt, uti quidem à nobis fufius demonstratum in *dissert. de morbis ex vitio hepatis*.

§. XI.

Admiranda uteri fabrica evoluta sanguinisque per ipsius contorta vasa cursu cognito; in expedito est morbos & vitia hujus visceris, nec non affectus ex mensium anomaliis pullulantes perquirere ipsorumque ortum & symptomata ex claris & conceptu facillimis principiis derivare, de quo videatur *dissertatio nostra de ignorata uteri structura multorum in praxi errorum fonte*.

§. XII.

Nervorum ex cerebro & spinali medulla ortu eorumque admiranda quoad ramificationes distributione à *Vieussens* multisque insecutis optime investigata, nunc in expedito est, morbos convulsivos, spasmodicos, imprimis illud hypochondriacum & hysterium malum, explicare savorumque symptomatum causas aperire, simul quoque consensum partium, præcipue nervosarum, perversorum etiam motuum communicationem, rectius intelligere.

§. XIII.

Postquam *Svammerdamius* & *Graafius*, & post hos, *Covvperus*, *Morgagnus*, *Santorinus* alique insignes viri, partes, generationi utriusque sexus inservientes, accuratius perlustrarunt; ab hoc tempore ii morbi, qui sedem suam ac domicilium ibi habent, sensui & intellectui jam facillime patent.

§. XIV.

Admirando auditus organo, à *du Verney*, *Valsalva*, & *Cassebohmio*, eximio professore nostrate, per anatomen accuratiorem investigatis, jam longe rectius auditus vitia intelliguntur.

§. XV.

Glandulis juncturarum in ossibus à *Cloptone Havero* repertis, morborum articularium origo & causæ nunc magis planæ ac perspicuæ fiunt.

§. XVI.

Ex quo à solertissimo anatomicorum *Friderico Ruyschio*, post multa præclara, eaque non curiosa minus, quam utilia tentamina, per injectiones liquorum coloratorum in vasa, innumerabilis minimorum vasculorum & diversissimus reptatus fuit detectus, organorum secretiorum ac glandularum usus, adeoque etiam læsiones & vitia, in cognitionem accuratiorem medico oblata sunt.

§. XVII.

Quantum commodi geometrico-mechanica musculorum structura, à *Borello* & *Nic. Stenonis*, *Winslovio*, *Santorino*, *Albino* descripta, & cordis musculosa compages à *Lorvero* & *Lancisio* detecta, in motu artuum determinando & potentia cordis ac pressione & impulsu liquidorum intelligendo, usum præbuerit, res in propatulo est.

Scholion.

Quantum utilitatis inventa anatomica feliciori medendi arti attulerint: hoc copiosius exposuimus in dissertatione *de usu anatomes in praxi medica* conscripta.

§. XVIII.

Neque minorem lucem salutari arti inventa physico-chymica foenerarunt: siquidem aëris gravitate & elatere variis experimentis cognito, neque minus ignis, caloris, frigoris, gravitatis ac levitatis causis perspectis, item solidi ac fluidi natura cognita, fermentationis quoque & putredinis indole & causis expositis, ut & effectibus, quos salia & sulphura diversæ indolis in rerum natura & per artem edunt, annotatis, potentia aëris immutandi corporis nostri motus, sive in pejus, sive in melius, clare jam cognoscitur, nec non generatio causarum morbificarum materialium, ipsorum-

que remediorum vis & efficacia innotescit atque perspicua fit.

§. XIX.

Chymicæ & pharmaceuticæ nobilissimum studium, nostro tempore præclare excultum, ad efficacissima præparanda & componenda remedia multum contulit.

§. XX.

Immutabiles motuum leges, ex staticis, mechanicis, hydraulicis inventis atque experimentis, jam rectius patent, unde etiam vires motrices musculorum, cordis & fibrarum potentiam elasticam, earum robur & atoniam, spasticam contractionem, pressionem quoque ac impetum in fluida, nec non mirificos effectus, ex inæqualitate circuitus sanguinis prodeuntes, multo clarius exponere nobis datum est.

CAPUT VI.

De medicina eclectica.

§. I.

Quemadmodum ii, qui in veritate inquirenda, omni posito præjudicio, nullius opinionis servi sunt, sed libero animo solidoque judicio cuncta perpendunt, de opinionibus prudenter dubitant, & nil, nisi quod clarum, facile, simplex atque intellectui planum est, amplectuntur & optima quæque ex omnibus seligunt, laude digni sunt: ita quoque cordati medici est, nulli sectæ, vel hypothese, in totum se mancipare, sed potius omnia suis examinare ponderibus, & quæ usui sunt ac veritati consentiunt, seligere, variis opinionibus, quæ perniciosarum dissensionum in praxi & theoria genetrices sunt, rejectis & prorsus repudiatis.

§. II.

Ex *Hippocrate*, medicorum principe, hæc ad praxin non inutilia discere licet, quod natura optima sanitatis conservatrix & morborum quoque medicatrix sit, & quod omne nimium & subita mutatio corpori periculum minetur, æquabilitas vero & moderatio ac temperies in omnibus naturæ humanæ semper & ubique amicissima, contra vero omne intemperatum & excessivum, præsertim quoad usum rerum non naturalium, aëris maxime & ingestorum, ad morbos progignendos aptissimum sit. Tum & hoc discere convenit, quod medicus viam ac ductum naturæ sequi, tempora, præsertim criseos, expectare & observare debeat. Postremo, quod non movere, nisi materia sit mobilis, vel concocta, vel nisi turgeat, expediat. Eximie quoque peritissimus senex morborum solutionem persequitur, dum vel excretionem critica, aut abscessione, sive decubitu in alias partes, materiæ, quæ in vitio est, morbum solvi, pluribus locis indicat, & quod valde periculosum sit, si ab interioribus partibus à natura propulsa ad exteriores, inde recedat.

§. III.

Ex *Methodicorum* disciplina, illud laxum & strictum in theoria, perquam commode ad fibrarum spasmodum & atoniam, referre licet, quod etiam in applicatione ad praxin non mediocris usus est. Ad ipsam vero morborum curationem illud decerpere valde utile est, quod *Asclepiades*, ut *Celsus* *L. I. c. 3.* & *L. III. c. 4.* prodidit, validiora purgantia & vomitoria & quæcunque vehementiora ex medicina expulerit, medica vero abstinencia, motu, exercitatione, gestatione, frictione, voce, balneis, abstinencia à vino ac convenienti victu, graves & longos morbos curare præceperit. Quibus addendum, quod primus fuerit, qui febre se tanquam remedio uti professus est.

§. IV.

§. IV.

Ex *Celfo*, qui de methodicorum schola multa nobis prodidit, hoc sumendum est, quod anodynis, quæ somno dolorem levant, parcius, nisi summa necessitas urgeat, utendum sit, quia ex vehementibus medicamentis & stomacho aliena sint, & quod in febribus etiam hæc non sine periculo exhibeantur, vid. *L. 1. cap. 25.* Is quoque primus est, qui clysteres ex simplicissimis emollientibus, si opus fuit, parare iussit. vid. *L. IV. c. 15.* Tum aquæ frigida, tam interne, quam externe, usum, ad multa levanda vitia, commendavit.

§. V.

Cælius Aurelianus, *Galeno* superior & ex methodicorum censu unicus adhuc superstes, multa utilia & specialia ad morbos dignoscendos proponit, & ad solidorum strictionem, quæ nil nisi spasmus est, solvendam, balneorum, clysterum ex meris oleis præparatorum, venæ sectionis & cucurbitularum cum ferro usum plurimi facit, in papaveraceis vero & vehementioribus evacuantibus adhibendis, admodum est circumspectus.

§. VI.

Galenus præclara circa usum rerum non naturalium ad tuendam sanitatem monita ad posterum transmisit. Hic primus aloë elotam miscuit cum aromatibus & balsamicis gummatibus, ad vitiosos ventriculi humores emendandos. Primus etiam cornu cervi ustum in usum traxit & magnopere commendavit. Ad hæc, plethoram multorum morborum chronicorum causam conjiciens, venæ sectionis auxilium aliarumque sanguinis missionum usum, adversus *Erasistratum* egregie defendit.

§. VII.

Avicenna, qui circa medium sæculi XII. floruit, Arabumque generatim medicis conatibus hæc laus debetur, quod Galenicam praxin auxerint & instruxerint pluribus ex *Ægyptorum* antiquissimo usu petitis & comprobatis. Sequebantur autem maximè tutum illud genus morbis per diætetica remedia medendi, & in hunc finem ea fere tantum adhibuere, quæ sunt lenissima. Ipsis igitur debemus, quod in officinas cassia solutiva, manna, tamarindi, rhabarbarum, senna & id genus plura lenissima, venerunt. Sed & aliqua chymica ab illis ad nos sunt propagata, quorum in Hispania primum notitiam nacti *Arnoldus Villanovanus* & *Raymundus Lullus*, deinceps plurium studia, & præcipue *Theophrastum Paracelsum*, excitarunt. Mercurii vivi usus externus primum ab Arabibus est præmonstratus *Jacobo Berengario Carpenfi*, à quo deinceps familiarissimus factus est.

§. VIII.

Paracelsus fere primus fuit, qui medicamenta chymica nos docuit, & salium, tam alcalinorum, quam acidorum mineralium, usum in medicinam introduxit.

§. IX.

Helmontium in eo imitandum censemus, quod multifarias illas, ineptas & maximam partem effoetas veterum compositiones pharmaceuticas exagitaverit, iisque simplicium virtutes atque vires in medendo longissime anteposuerit. Ceterum & funestas à purgantibus validissimis illatas noxas commemorat, & quod virus quoddam foveant, atque adeo magis fugienda sint, non sine magna ratione inculcat. Sed nec prætermittendum est, secundum ipsius experientia haud destitutam sententiam, ea, quæ sedativa & anodyna vi gaudent remedia, magnas in medendo vires possidere, quum certum sit, ex irritatione, pressione, vel rosione sensibilis & nervosæ partis, gravissima subnasci symptomata, quæ unica dosi anodynæ mature data, averti possunt.

§. X.

Fernelius focum & sedem febrium, tam putridarum, quam intermittentium, in prima corporis regione rectius posuit, earumque causam in sanguine crudo, qui in venis, quæ ad ventriculum, jecur, lienem, pancreas, omentum abeunt, i. e. vena portæ, vehitur, hæ-

rere judicavit. Neque minus à ventriculi, & intestinorum nervis affectis, quia consentiunt cum aliis partibus exquisitius sentientibus, in intermittentibus symptomata, rigorem, horrorem, tussim siccam, oscitationem, anxietatem, præcordiorum distensionem, nausæam ac vomitum derivavit; quam sententiam etiam *Carolus Piso* plurimis observationibus corroborat.

§. XI.

Montanus, *Crato*, *Ballonius*, *Hollerius*, *Foësius*, *Duretus*, *Heurnius*, *Mercurialis*, *Jacotius*, *Joubertus*, inter veteres, qui *Hippocratem* maxime sequuti sunt, præstantissimi fuerunt medici, atque ex eorum scriptis multa salutaria monita diætetica & cautiones in medendo, nec non complura, quæ ad historiam morborum complendam pertinent, haurire possumus.

Scholion.

Montanus, præceptor *Cratonis*, securissima methodo in praxi usus est, & leniora tantum evacuantia admisit, plus quoque victu, quam medicamentis, curare annis est, inque longis ac difficilibus morbis medicorum & medicamentorum copiam maxime damnavit.

§. XII.

Nec sua laude privandi sunt, qui, antiquorum vestigia relegendes, illustrare illud lene & mansuetum medendi genus annisi sunt. Ex his *Hieronymus Mercurialis* Veterum gymnasticam medicinam ex suis rudibus excitare cœpit, & modum docere, per corporis motum voluntarium, tum roborandi corpora, tum etiam morbos certos profligandi. Ita quoque *Prosperus Alpinus*, in utroque volumine de secta methodicorum, & de medicina *Ægyptia*, hanc partem incomparabili industria illustravit. Ipse *Cornelius Bonikeoë*, præco ille potus aquarum, eo bene meruit, quod hominibus auctor fuit, ut infusa calida libenter hauriant, & medicus ex præstantissimis herbis nostratibus necessaria & efficacissima possit hac forma nunc persuadere ægris, & multum boni efficere.

§. XIII.

Ex *Glaubero*, & qui hujus vestigia presse sequutus est, *Becchero*, in usum quoque tam pharmaceuticum, quam chymicum, multa præclara depromere licet, siquidem *Glauberus*, quod sciam, primus fuit, qui spiritum urinosum ex sale ammoniaco elicuit, qui sal enixum, ex sale vitrioli & communi, purgans, cujus usus hodieque in praxi est amplissimus, conficere docuit. Ex *Becchero* vero, præter alia laudabilia, hoc unicum ad praxin sufficere potest, quod is primus, casu forte inductus, securum aloës in pilulis usum, nobis monstravit, qui eo major est, quo magis aloë amaræ extractis & balsamicis temperatis refinis immiscetur.

§. XIV.

Botallus venæ sectionis, sæpius etiam repetitum usum, in morbis, tam acutis, quam chronicis, tam curandis, quam præservandis, mirifice laudavit plurimisque experimentis & observationibus nobis probavit; & *Bellinus* nobilissimum hoc remedii genus ejusque usum, multis demonstrationibus mathematicis confirmare contendit.

§. XV.

Ex *Sylvio* id in usum nostrum decerpere possumus: quod plurimorum morborum focum duodenum & sic dictæ primæ viæ constituent, & quod iis inhaerentes cruditates acidæ, biliosæ & viscidæ, multorum, maxime chronicorum morborum, & symptomatum causam foveant, & eam ob causam absorbentium, fixorum alcalium & salium volatilium oleosorum usus, præstantissimus sit.

§. XVI.

Willisus plurima in morbis chronicis symptomata, mali imprimis hypochondriaci & hysterici, rectissime

ex spafmo & nervosi generis afflictione & consensu partium derivavit; postquam nempe structuram cerebri ac nervorum per anatoimē accuratius, quam antea investigarat.

§. XVII.

Sydenhamus ad curandas variolas omnesque febres acutas, temperatissimum externum regimen, nec non interna temperata, & quæ plus sedandi, quam motus excitandi facultate gaudent, repudiatis omnibus calidioribus & alexipharmacis, egregie commendavit. In chronicis vero passionibus sublevandis chinæ chinæ, lactis, martialium & equitationis usum amplissimum, non sine ratione & experientia nobis proposuit.

§. XVIII.

Malpighius, *Vieußens* & *Lancisus* ex frequenti dissectione cadaverum hoc plane & perspicue docuerunt, quod polyposæ massæ, majoribus cordis, pulmonum, vel etiam uteri vasis inhærentes, subitæ mortis multorumque insuperabilium morborum, præsertim asthmatis convulsivi & hydropis pectoris, nec non ascitis, frequentissimæ causæ sint.

§. XIX.

Ludovici in copia & indigesta farragine pharmaceuticorum reformanda admodum præclaram navavit operam, nobisque ostendit, quod paucis, selectis & parabilioribus remediis, sepositis tam variis & numerosis, nec non pretiosis medicamentis, cum fructu & commodo luculento uti possimus.

§. XX.

Baglivus, genuinus *Malpighii* discipulus, in pathologicis æque, ac practicis, egregia nobis fragmenta & experimenta hujus summi viri tradidit, inque eo maxime laudandus est, quod in morbis explicandis & curandis, non tam ad fluidorum, quam potius solidorum, constitutionem, labem ac vitia respiciendum monuerit.

§. XXI.

Riverius ex sagacioribus sui ævi Practicus, Galenica cum chymicis in usum vocanda recte docuit, & primus, uti ex ipsius observationibus patet, nitri puri & camphoræ internum usum, ad graves inflammationes & hæmorrhagias vincendas, commendavit.

§. XXII.

Sanctorio, fido alias *Galenii* sectatore & commentatore, in pereleganti *de medicina statica* libello, nemo rectius & accuratius fundamenta ac leges diæteticas nobis præscripsit, & excretionum, præsertim perspirationis necessitatem maximamque in tuenda sanitate & morbis præcavendis salubritatem, plurimis experimentis staticis docuit & confirmavit.

§. XXIII.

Expedit, ad stabilienda fundamenta solidæ, veræ & eclecticæ medicinæ, theoriam veram & realem cum praxi, veteres cum recentioribus, & methodum medendi simplicioribus & facilioribus, Galenicam, cum validioribus & efficacioribus chymicorum præparatis, amice conciliare atque conjungere; multasque salutares veritates ex singulis cum judicio haurire, postea eas in ordinem & connexionem attenta meditatione digere, ut doctrina medica scientiæ demum opus evadat.

Scholion.

Ex veterum monumentis ea, quæ experientiæ, facti & observationis sunt, & quæ ad prognosin, prænotiones & ad victus rationem pertinent, quam maxime deprommere debemus: ex recentioribus vero egregia anatomica, physica, chymica, mechanica inventa, ad perficiendam meliorem theoriam, quæ tutæ, solidæ & rationalis praxeos basis atque observationum clavis est, accipere oportet.

CAPUT VII.

De fine medicinæ & potestate medici.

§. I.

EUm in finem addiscitur ars divina, ut vita & sanitas diu illibata servetur, ut morbosæ afflictiones & quæcunque sanitatem lædunt, quoad fieri potest, avertantur & depellantur.

Scholion.

Eximia sunt, quæ *Hippocrates*, libro de flatibus §. 1. scribit: *agrotantes artis beneficio à maximis malis, à morbis, à doloribus, à tristitia, à morte liberantur; omnibus enim his evidens medicina reperitur.*

§. II.

Quia tanta beneficia ab arte medica in genus humanum profluunt, ab omni tempore artium nobilissima & Deorum inventum habita est. Et profecto medicus, qui eam recte callet, magno honore dignus, ipsius Spiritus sancti testimonio, æstimari debet.

§. III.

Is artis medicæ scopus est, ut hominem à tot & gravibus malis liberet: ideoque medicus nullo modo nocere, nedum vitam destruere, aut sanitatem lædere debet, utpote quum medicina non nocendi, sed juvandi sit scientia.

§. IV.

Medicus, & consilio, & auxilio, graves afflictiones, tam à corpore, quam ab animo avertit, dissuadendo ea, quæ ullo modo nocent causamque malorum ministrant, & suadendo cuivis corpori & naturæ salutaria.

Scholion.

Non est in potestate medici cuncta pro arbitrio perficere, morbos in totum tollendo, vel vitam prolongando & sanitatem sine molestiis conservando, quia medicus sine subsidio naturæ, quæ viribus & motibus salutaribus instructa, parum boni arte sua perficere potest, ideoque recte utique à Veteribus naturæ minister dicitur, quum illius motus spectare; imitari, corrigere & adjuvare debeat, nullo vero modo magister habendus est naturæ, eo quod vires remediorum non sunt absolutæ, sed variis relationibus naturæ, temperamenti, ætatis, corporis aliorumque nituntur.

§. V.

Nam sicuti perpetua est proportio, inter vires causarum, & inter productum ab iis effectum, qui nunquam superior est illis: ita vires remediorum, quando non sufficiunt tollendo morbo, iste non curatur. Hinc sapienter *Hippocrates* libro de arte §. 4. *Medicus eorum, qui à morbis victi sunt, curationem non aggredi debet, cum id in confesso sit, quod medicina tales servare non possit.*

§. VI.

Facilius est morbos præcavere, quam eos curare, eo, quod præservatio consilio, dum nocitura dissuadentur, curatio vero auxilio, quod non perpetuo est in potestate medici, perficitur. Facilius quoque est morborum vehementes imperus obrundere, quam morbos in totum tollere, quia subinde morbi causa remediis effectui major est.

§. VII.

Si medicus vitam ac sanitatem hominis arte sua tueri & conservare vult ac debet: necesse est, ut genuinas vitæ ac sanitatis causas, & quomodo hæ remediis sustineri debeant, & remediorum quibus succurrere potest vires, perspectas habeat.

§. VIII.

Quandocunque medicus præmaturam mortem & graves

graves morbos intendit à corpore arcere : tunc utique eorum primordia ac generationem , item veras causas & proximas , exquisitè pernoscere debet , ut quomodo tam convenienti auxilio , quam prudenti consilio , hæc mala avertenda sint , judicare possit.

§. IX.

Medici est , aut morbos in totum tollere , aut insanabiles duntaxat mitigare : hinc morborum veras causas , & quibus remediis hæ tollendæ sint , & quare alii morbi sanabiles , alii non sint , intelligere debet.

Scholion.

Nihil in rerum natura fit sine causa , atque omnis effectus , omnis mutatio in homine , ex necessariis & adæquatis causis proficiscitur , quibus positæ , ponitur effectus , quibus remotis , & ipse removetur. Quare etiam medicus , si non cæco impetu agere , vel quicquam in negotio vitæ ac sanitatis temere moliri velit , in causis investigandis omnium mutationum , quæ fiunt in corpore humano , sedulo occupatus sit necesse est.

§. X.

Cum vero genuinas rerum cognoscere causas non cuiusvis hominis , sed sapientiæ ac scientiæ opus sit , quæ principia indubia , atque ex his claras demonstrationes & conclusiones desiderant : oportet medicum quoque , si cum demonstratione res suas gerere velit , de veris & perspicuis principiis , quæ commode rebus medicis applicari possint , sollicitum esse.

Scholion.

Veritatem doctrinæ rectè cognoscere , est eam ex evidentibus principiis , clara connexione demonstrare. Qui vero in disciplina quadam nihil probat & demonstrat , is facile fallit & fallitur , nec quicquam cum certitudine statuit & aggreditur , sed semper hæsitantis est animi , tam paratus ad juvandum , quam ad nocendum : quod tamen ab arte salutari debet esse alienissimum.

CAPUT VIII.

De Vero Demonstrandi Principio in Medicina.

§. I.

Sicuti methodus mathematica , quæ vere logica est , qua utuntur geometræ , in demonstrationibus ad veritates & inveniendas , & docendas , omnium est optima : ita quoque medicus & philosophus secundum hanc demonstrationes veritatum suæ disciplinæ adornare debet. Sicuti vero geometræ ex principiis & propositionibus simplicibus , facilibus ac claris & manifestis , aptas conclusiones & connexiones , debito ordine ac serie efformant , & sic difficilia explicant , deducunt ac incognita detegunt : ita etiam medicus & philosophus in omnibus quæ circa corpus humanum eveniunt mutationibus , ex claris principiis veras conclusiones & connexiones conficere & elicere debet.

Scholion.

Commendamus maxime eximiis medicinæ cultoribus methodum mathematicam addiscendam , quæ ad veritates cognoscendas ac detegendas aptissima , inque omnibus disciplinis maximæ utilitatis est , eo quod firmis demonstrationibus nititur , sine quibus nulla veritas intelligi & cognosci potest : quod etiam suo jam tempore divinæ scientiæ princeps cognovit , hincque ad *Theophilum* filium ita scribit : *ad cognoscendam geometriam & numerorum scientiam , mi fili , multum studii adhibeto. Non solum enim vitam tuam illustrem & ad multa commodam in humanarum rerum statu efficient , sed etiam animam acutiorē & clariorem reddent , ad omnium , quorum usus in medicina expetitur , utilitatem consequendam. Etenim geometriæ cognitio , quæ*

multiformis ac varia est , & omnia cum demonstratione transigit , utilis erit , quapropter ad huiusmodi experientiæ facultatem pervenire sedulo stude.

§. II.

In omni disciplina scientifice tractanda principia ante omnia inquirenda sunt , ut cum iis subalternæ causæ connectantur : ideo in medica scientia quoque ejusmodi investiganda sunt omnium subalternarum causarum atque effectuum fontes , ex quibus omnia demonstrari & in quæ omnia demum resolvi debent.

§. III.

Principium in medicina debet esse perspicuum , quod concipi , quod rebus medicis , præsertim observationibus & morborum historiis , applicari potest , quo experientia rationalis , certa & minus fallax efficiatur , quo etiam omnia difficilia enodentur & explicantur.

Scholion.

Iusta demonstratione , quia res difficiles faciles , incognitæ notæ , obscuræ perspicuæ redduntur : hinc principium plane obscurum , quod nec definiri , nec concipi potest , demonstrationibus est ineptum. Ex dictis jam clare patet , quid sit sentiendum de principiis veterum , videlicet calido innato , humido radicali , temperie & intemperie quatuor humorum , de facultatibus animæ , de natura morali ac sensu vitali interno prædita , sive quod idem de archæo *Helmontii* , flammula , vel luce vitali. Quæ nonnisi speciosa nomina sunt , quæ nec explicari possunt & quæ nihil explicant , adeoque in causis & effectibus rerum medicarum investigandis , nullius sunt ponderis ac momenti , & mea quidem sententia , pigrorum ingeniorum solatia & asyla.

§. IV.

Principium , quo maxime medicus in cognoscendis & indagandis veritatibus utatur , debet esse proxima causa omnium eorum , quæ existunt & eveniunt in corpore humano , sive ad negotium vitæ & sanitatis , sive ad morborum ortum & causas , eorumque curationem , sive ad vitam sanam & longam tuendam pertineant : vel etiam quatenus corporis conservationi ullo modo noxia sint & contraria.

§. V.

Quia principium demonstrationum medicarum , omnium actionum , motuum & mutationum , quæ fiunt in nobis , causa esse debet : facile intelligitur , id ipsum in corpore nostro existere & contineri debere.

Scholion.

Vulgaris , sed pessima , philosophandi est ratio , non ex ipsis rebus earumque natura sapere , neque ipsas illas veras causas , quæ etiam nobis non cogitantibus operantur , & effectus suos secundum earum vires proportionatos proferunt , investigare , sed pro lubitu fingere actionum naturalium principia & causas , de quibus nondum constat ac certum est , an realiter ita existant inque ipsorum corporum natura contineantur. Quo pertinent illa vocabula , quibus , in non mediocri artis nostræ detrimentum , adhuc plures , loco principiorum & causarum , & quidem nostra ætate celebres viri , uti non verentur. Cujus generi sunt naturæ bona vel erronea directio , sensus naturæ , sensus vitalis , moralis rerum noxiarum æstimatio , directio motuum rationalis ad elidendam morbi causam in certo gradu , tenore agendi , item certo tempore & ad certa loca , naturæ in negotiis vitalibus inque curando error , ejus bona intentio , sed mala inventio , & hujus generis ad nauseam usque plura. Quæ omnia feliciter quidem fingi , sed infeliciter in corpore humano , quoad ipsam rei existentiam , inveniri , vel demonstrari possunt.

§. VI.

Neque ad principium demonstrandi res medicas , anima rationis particeps , vel pro arbitrio agens , vis , aut alia substantia , referri debet , siquidem tali admissio principio , neque in theoria , neque in praxi medica , aliquid sciri , vel explicari potest , eo , quod concipi vel demon-

demonstrari nequeat, quod & quomodo res intelligens & libere agens vires motrices rerum omnium corporum, quæ præsertim ad negotium vitale spectant, disponat, immutet vel dirigat.

Scholion.

Sicut enim distinctissima est essentia & operatio corporis, ab essentia & operationibus spiritus: ita spiritus sine corpore, & corpus sine spiritu, subsistit & operatur. Et cum in universo omnia ordinatissime, certo numero, mensura, proportionem, & certo denique sine ac tempore, sine mente vel spiritu rationali, fieri conspiciamus, cur non etiam sine ejusmodi substantia intelligente & pro arbitrio agente, vita, sanitas, morbus, mors, sanatio & sanitatis conservatio, à causis mere necessariis & physicis, quarum maxima, teste experientia, in hisce omnibus immutandis est potentia, contingant? equidem non video, quamvis intellectus noster non omnes æque facile assequatur vel demonstrare valeat.

§. VII.

Neque ad explicandas res medicas indigemus principio quodam sensitivo, quod noxas vel causas nocentes prævideat, percipiat & motus ad noxium emolendum dirigat. Nam ubi solo motu, qui est operatio corporum, quippiam explicari potest, non opus est ut peculiarem sensum, five perceptionem in auxilium vocemus; siquidem aliud est motus, aliud motuum perceptio, deinde etiam ad certas leges & regulas motus fiunt, quæ in perceptionibus neutiquam observantur.

§. VIII.

Medicus, in reddendis effectuum causis & sciendis demonstrationibus, contentus sit, si causas proximas effectus & phaenomenorum invenerit, quibus positus, ponantur, & quibus remotis, ipsa quoque removeantur; quandoquidem in rebus contingentibus causarum progressio fit in infinitum.

Scholion.

Nam una causa semper est effectus alterius causæ, & ita porro. Quantumvis vero has omnes & earum progressum ignoremus, tamen ad artem & scientiam satis erit, causas adæquatas & proximas effectuum investigasse. Ut rem clariorem faciamus exemplo, vegetationis & foecunditatis in plantis causæ sunt temperate calidum coelum, humidum subtile, proportionatum, ut est aqua pluvialis, & solum leve, probe identidem temperatum; quibus præsentibus, arbor fert optimos fructus, his autem remotis, exoptata illa foecunditas perit. Hæ causæ sufficiunt pro plantarum vegetatione: neque enim amplius refert scire, unde temperatus ille calor, quæ aquæ pluvialis origo, qualis ejus natura & essentia, quænam sit causa hujus essentia; & quæ porro quæri de his possent.

§. IX.

Sicut nullius corporis, & omnium maxime humani, productio, conservatio, auctio, vel etiam destructio, corruptio, imminutio aut reparatio, sine motu fieri nequit: ita quoque vita, sanitas, morborum productio, eorundem curatio, mortis quoque genesis, sine motu, nec fit, neque intelligi potest. Itaque horum omnium causa proxima debet esse motus, qui principium est physicum atque mechanicum æque ac medicum.

Scholion.

Equidem novi odiosum esse quibusdam mechanices vocabulum in medicina, & causas has reddi, quod non omnia, quæ in corpore nostro fiunt, ex causis necessariis corporeis proveniant: deinde quia motus sit res incorporea, adeoque à corpore non derivanda: tandem quod scientia mechanica tantummodo rerum mobilitatem & dispositionem corporum ad motum scientia sit. His pauca reponimus: nos scilicet ultro largimur, mentem, & quod in nobis sentit ac percipit, res non esse corporeas, sed quodammodo, ex lege unionis, quia partes sunt hominis, motus vitales conservatorios

afficere, vel potius turbare, manifesto affectuum animi & phantasiæ testimonio; ex hoc tamen non consequitur, nullas mechanicas causas alias dari in corpore. Et utur phantasia non sit res corporea, non tamen sine mechanicis causis, quales sunt partium fluidarum & solidarum debita dispositio & conformatio, agere potest. Omnes quoque effectus, quos anima præter naturam producit in corpore, sunt non alii, quam mechanici, siquidem à vehementi terrore spastice extimæ partes contringuntur, sanguis ad interiora pellitur, & versus cor ac pulmones stagnans, ingentes anxietates & palpitationes efficit, adversus quos prave effectus, si eos remove vellet medicus, vix aliud agere potest, quam ut mechanice, remediis convenientibus, flagrantem sanguinem discutiat & versus ambitum corporis eundem propellat. Quod vero maximum est, ipse varius motus sanguinis, & remedia ac alimenta, ipsam mentem & animam afficere eamque vel sapientiore, vel dementiore reddere, valent. Pulchra sunt, quæ hac de re prodidit *Hippocrates Lib. 1. de diæta §. 34. melior reddetur anima rectæ diæta usu, & pejor prave.* Et in fine hujus §. *Si sanum fuerit corpus & non ab aliquo alio periurberetur, animi temperamentum sapiens existit.* Quod vero in corpore animantium vita ac sanitas, non secus ac mors & morbus, à causis etiam pure corporeis mechanicis dependant, vel ex eo unico liquidissime conficitur, quod alimentis & elementis vivamus & moveamur viresque accipiamus, iis vero detractis, omnis vis & agilitas corporis pereat & mors in propinquo sit: item, quod convenienti & recto aëris, alimentorum rerumque non naturalium usu, diu illibata valetudine frui possimus, quæ, minus provido horum usu, protinus sic labefactatur, ut morborum, imo brevioris vitæ & mortis, origo ac causa inde nascatur. Neque etiam ullius ponderis, eorum, qui mechanicæ disciplinæ medicorum adversantur, erit ratio, quod mechanica mobilitatis, non vero motuum, sit scientia, & motus potius res sit incorporea. Enim vero, cui obscurum amplius esse poterit, mechanicam minime tantum pro objecto habere machinas, sed potius in eo esse occupatam, ut vires motrices, quæ cum massa corporea coherent, in mutua actione atque reactione observet atque mensuret, & ita immutabiles motuum leges, tam in elasticis solidis, quam fluidis corporibus condant, quæ ad effectus naturæ alios explicandos magno usui sint. Postremo vero absolum erit dicere, motum rem incorpoream esse, cum motus non res ipsa sit, sed mutatio tantum rei, five mutatio status corporum.

§. X.

Principium itaque, seu causa prima & proxima omnium actionum in corpore humano, erit motus: is vero cum varius in natura sit, plenius omnino & exactius ejus speciem determinare juvabit.

§. XI.

Motus itaque, quo omne, quicquid fit & evenit in corpore nostro, perficitur, & quo etiam medicus in demonstrando uti debet, nullus alius est, quam contractio & expansio, five, secundum Græcos, systole ac diastole fibrarum nervearum & musculosarum, & quæ ex his contexti sunt, cordis atque arteriarum omniumque ductuum, cujus beneficio omnis generis fluida, per innumerabiles & varios canales, in orbem moventur, atque utilia secernuntur usuique asservantur, inutilia autem secreta excernuntur.

Scholion.

Vix ulla datur simplicior motus species, quam contractio & dilatatio; hæc ipsa tamen est causa unica, quæ omnes vitales motus tuetur, quæ totum corpus à putredine vindicat, quæ universum secretionis & excretionis negotium moderatur, hac salva & recte sese habente, omnes functiones, omnis vigor, tam animi, quam corporis, recte sese habent, hac læsa, vel turbata, omnia

omnia præter naturæ ordinem & morbi fiunt, eademque destructa, mors fit. Circulus itaque sanguinis, est primum & præcipuum fundamentum, seu principium, ex quo, tanquam ex fonte, ea, quæ fiunt in corpore nostro, explicare, & difficilia, per omnes medicinæ partes enodare, obscura perspicua reddere & veras curandi rationes ac vias derivare ac invenire, propitio Numine, in hoc opere constituimus.

§. XII.

Circulus hic sanguinis est causa vitæ. Nam quamdiu sanguis & humores, per ductus & canales corporis nostri in orbem moventur, tamdiu corpus dicitur vivere. Si vero sanguinis circuitus penitus definit atque exinguitur, mors adest. Si sanguinis circuitus liber, moderatus & æquabilis est, corpus sanum atque vegetum est: in omni vero morbo idem circuitus vel immoderatus, vel inæqualis, aut impeditus, existit. Et morbificæ causæ non aliter suam exercent operationem, quam quod œconomiam motuum vitalium turbant, atque secretiones excretionisque pervertunt. Morbi quidem acuti stasi sanguinis, chronici vero ejus stagnatione atque viscerum & emunctoriorum obstructione, continentur. Neque medicus in præservando aliud intendere debet, quam ut per convenientia remedia, & quam maxime prudens rerum non naturalium regimen, stases, stagnationes & obstructiones impediendo, liberum sanguini & humoribus motum, per universam corporis compagem vasculosam, præstet. Neque aliud in sanandis morbis quærere debet medicus, quam, ut causas morbificas earumque noxios effectus per congrua remedia removendo, liberum sanguinis motum atque circuitum restituat.

§. XIII.

Utut progressivus per innumerabiles vaforum myriades sanguinis & humorum abiens motus, cum secre-

tionibus & excretionibus, immediata & proxima omnium, quæ in corpore humano eveniunt actionum & functionum, causa sit; nihilo minus tamen, quia progressio omnis generis fluidorum, non modo in cordis musculo & arteriis, sed & in omnibus tubulis secretoriis & excretoriis nervoso-muscularibus, beneficio reciprocae contractionis & dilatationis, perficitur, hæc autem ab influxu liquidi spirituosi arteriosi & nervosi convenienti fit, quam facile patet, omnia ea, quæ motum hunc solidorum ulla ratione turbandi, pervertendi, vel destruendi facultate pollent, genuinas morborum causas subministrare.

§. XIV.

Certa, indubia ac constanti experientia confirmata regula, seu lex motus microcosmici est: quod omnia, quæ nervosas partes ullo modo, vel lancinando, arro- dendo, irritando, aut distendendo, vel constringendo, lædunt & violenter afficiunt, universam motuum vitalium œconomiam perturbare & pervertere possint.

§. XV.

Certa pariter & immutabilis lex motus microcosmici est: motum violentum, præter naturam in parte quadam nervosa concitatum, quam maxime cum vicinis & connexis nervosis partibus, immo quandoque cum toto systemate nervorum & nervosarum partium, communicari, quod veteres consensum partium appellarunt.

Scholion.

Accuratior notitia consensus, quem partes nervosæ inter se alunt, in pathologicis & therapeuticis summæ est utilitatis. Nam plurimorum symptomatum ratio inde clare peti potest & erui, eamque in rem legi meretur, præter ea, quæ nos in *tom. III. med. systemat. sect. I. cap. V.* attulimus, doctissimus *cl. Regæ de sympathia corporis humani tractatus.*



P H I L O S O P H I Æ
C O R P O R I S H U M A N I
V I V I E T S A N I
L I B E R P R I M U S ,
S E C T I O I .

De vita, ejus causis & motibus vitalibus, sanguinisque & humorum circulo.

C A P U T I .

De artificio in structura humani corporis.

§. I.



Itam, mortem, sanitatem, morborum sanationem & horum omnium causas, in corpore humano consistere & perfici, extra dubium positum est: quare medicus, ad meliorem horum intelligentiam, corporis humani naturam plenius atque exactius cognoscere debet.

Scholion.

Scitissime *Hippocrates lib. de loc. in homine* §. 4. pronunciat: *naturam corporis humani omnis sermonis & ratiocinationis in medicina esse principium.* Hic gravis auctor in morborum curatione, naturarum differentiam, robustæ an imbecillæ sint, & quomodo sese ad has vel illas res externas, item medicamenta habeant, passim & sedulo in monumentis suis inculcat. Quia vero accuratiorem corporis humani cognitionem ob ingentem anatomes & veræ scientiæ physici id temporis defectum, non habuit: proinde quoque de natura, quatenus illa sanitatis & morborum productrix eorundemque medicatrix est, ex omni parte ac numero rectissime & præclarissime sentire ac differere non potuit.

§. II.

Homo rectius definitur, quod sit mens, sive substantia intelligens & libere agens, unita cum corpore organico, artificiosissime constructo, vivo.

Scholion.

Essentia humanæ naturæ in eo potissimum consistit, quod ex duplici substantia, una immortalis, quæ rationis & libertatis agendi, item conscientiæ capax est, ac spiritus appellatur; altera corruptibili & destructibili, corpore scilicet, sit coalita: & quamdiu hæc unio utriusque principii, inter se distinctissimi, perdurat, tamdiu homo dicitur, simul ac vero hæc unio perit, spiritus abit ad altiora, corpus autem cadaver evadit.

§. III.

Neque vero mens est subjectum medicinæ, quia est naturæ indivisibilis & immutabilis, adeoque in eam di-

recte medicina non ullam habet potestatem; sed subjectum medicinæ est vivum corpus, quod mentis tantisper instrumentum est, ejusque operationibus inservit.

§. IV.

Corpus humanum duplici modo à medico considerandum venit, primo quatenus est mixtum, deinde quatenus est structum.

§. V.

Totum corpus nostrum ex summe corruptibili materia mixtum est.

§. VI.

Materia corruptibilis constat ex partibus diversæ indolis, minus coherens, sed facile à se invicem secedentibus.

Scholion.

Corruptio recte opponitur durationi, quæ in unione partium, mixtum constituentium, consistit. Tamdiu enim corpus durat, quamdiu unio partium quæ corpus constituunt salva ac integra permanet: simul ac vero hæc dissolvitur partesque à se in vicem secedunt ac separantur, protinus tota textura & forma corporis mutatur atque in animantibus corruptio ingruit. Præclare hinc *Hippocrates lib. I. de diata* §. 6. inquit: *generari idem est, quod commisceri: perire, corrumpi ac minui, idem est, quod secerni.*

§. VII.

Corpus humanum, quia ex materia admodum differentis, & minus coherens, & hinc facile disjungibilis indolis, aquea nempe, pingui & inflammabili, item terrea solubili, sive salina, & fixiori insolubili, constat, ideo celerrimæ corruptioni obnoxium est.

Scholion.

Experientia quotidiana edocemur, nulla corpora tam subito in foedam & putridam corruptionem ruere, quam animantium ipsiusque hominis, sub humido præsertim & calido coelo. Quum vero corpus nostrum tam corruptibilis sit naturæ, mirandum non immerito est, quare, si vita adest, tamdiu duret & immune à corruptione præstetur. Quia tamen nihil fit sine causa; hinc medico maxime incumbit, hanc ipsam perscrutari; siquidem universi medici studii cardo in eo potissimum vertitur, ut corpus diutissime maneat vivum & à corruptione vindicetur. Oportet itaque scire causas, quare corpus humanum in se tam corruptibile, à corruptione tamdiu immune præstetur, quibus cognitis, postea facilius est vitam diutius conservare ac tristissimam mortem avertere.

§. VIII.

§. VIII.

Est quoque corpus humanum ratione structuræ à medico spectandum, quæ est longe artificiosissima, ad ordinatos motus producendos comparata, & hoc respectu rectissime dicitur machina.

§. IX.

Machina est corpus, ex variis partibus, singulari artificis ingenio inter se unitis, constructum, eo consilio, ut certos ac ordinatos motus producat.

Scholion.

Operationes quas machinæ edunt consistunt in motibus, qui ex structura, situ, cohæsiōe, variæ figuræ & magnitudinis partium, secundum immutabiles leges, consequuntur & structuræ suæ perpetuo convenientes sunt. Artificium vero illud structuræ, sive ingeniosa partium unio & coordinatio, ad motum producendum disposita & apta, à recentioribus dici solet mechanismus.

§. X.

Id machinarum & mechanismi præcipuum est requisitum, ut partes inter se junctæ cohæreant atque connexæ sint, ita prorsus, ut vitium unam partem afficiens & cohæsiōem turbans, ceteras statim omnes partes in consensum trahat, & inde regulares machinæ motus pervertantur.

Scholion.

Clarissime id patet in machinis arte humana fabricatis, ut horologiis, molendinis, ubi vitium vel unicus dentis in rotula, aptum est ad motus totius machinæ inordinatos reddendos.

§. XI.

In corpore humano ita sunt inter se partes solidæ unitæ ac coordinatæ, ut hujus vel alterius notabilis læsio, hanc cum omnibus reliquis statim communicet, indeque motus regulares turbentur & inordinati fiant.

Scholion.

Præclare Hippocrates L. de locis in homine §. 3. hanc in rem scribit: Si quis minimam corporis partem male afficere velit, totum corpus affectionem sentiet; qualiscunque tandem ea fuerit, propterea, quod minima corporis pars omnia habet, quæcunque & maxima.

§. XII.

Machina quævis id habet, ut ex diversæ naturæ partibus mobilibus, moventibus ac instrumentis motuum composita sit, siquidem hæc omnia ad producendos motus necessaria sunt.

§. XIII.

Constat machina corporis humani ex partibus solidis ac fluidis.

§. XIV.

Solidæ sunt duræ & renitentes, quatum nonnullæ continent & vehunt liquida, ut sunt omnis generis canales & cavitates: aliæ sunt motus instrumenta, ut muscoli, & ex tunicis musculosis & nerveis contextæ partes, quædam continuo moventur & non quiescunt, ut cor & arteriæ, quædam firmamentum toti machinæ præbent, ut sunt ossa, cartilagine, ligamenta.

§. XV.

Fluida corporis nostri duplicis generis sunt; alia sunt crassiora, quæ sensibus patent, ut sanguis, chylus, lymphæ & quæcunque secernuntur & excernuntur, & hæc omnia per tubos magis obvios & ampliores circumvehuntur; alia sunt subtiliora, agilia & maxima vi ac potentia motus instructa, quæ ab Hippocrate impetum facientia, & à veteribus, quos natura tenuissimorum corporum latuit, spiritus vocari solent, eo, quod hæc

Frid. Hoffmanni Oper. Tom. I.

tenuiora fluida motum præstent ac impetum faciant in solidis, atque adeo fluidorum cursum regant ac moderentur.

§. XVI.

Fluida tenuiora, quæ impetum faciunt & motum machinæ præstunt, sunt nihil aliud, quam subtilissima & agilissima pars optimi sanguinis & lymphæ, quæ non tantum ex alimentis, sed & ex puriori aëris ac ætheris & ignis solaris parte, magna potentia elastica agente, originem habet.

Scholion.

Quantumvis propter summam tenuitatem suam spirituosæ hæ partes sensus fugiant; ex effectibus tamen earum origo & efficacia cognoscitur; siquidem certum est, bono & laudabili nutrimento, aëre quoque sereno ac temperato, vires egregie refici, cum ex alimento pravo, intemperato, vel aëre vitiato, imminuantur ac labefactentur, adeo, ut ex alimenti, vel aëris plenario defectu, omnes vires cum vita penitus extinguantur.

§. XVII.

Est structura corporis humani maxime hydraulica, cum tota fere ejus compages vasculosa sit, sive ex innumeris diversæ magnitudinis & stupendæ exiguitatis & angustia tubis conflata, per quos varii generis fluida jugi & perenni motu circumvehuntur, vel secernuntur.

Scholion.

Recentiorum anatomicorum inventis id maxime debemus, compagem ferme omnium viscerum, ut lienis, hepatis, renum, neque minus emunctoriorum, glandularum, testium quoque & ipsius cerebri corticalis substantiæ, item placentæ uterinæ, in totum canaliculosam esse, & quod nulla corporis pars vel membrana sit, quæ non tubulis, per quos fluida feruntur, minimis sit instructa. Et hæc maxima angustia vasorum in pathologia & praxi medica magnæ est considerationis; siquidem ob hanc tot frequentes stases, stagnationes & obstructions fiunt foecundæ morborum matrices.

§. XVIII.

Quemadmodum in machina hydraulica fluida impulsu ac pressione per varii generis tubos pelluntur ac motu agitantur: ita quoque corpus nostrum, præter tot & tam innumerabiles varii generis & magnitudinis tubos, & diversæ indolis fluida, etiam fibris, potentiis motricibus instructis, quæ quasi vectes ac elateres sunt, gaudet, quarum motu constrictorio & dilatatorio liquida indefinenter propelluntur.

Scholion.

Princeps & præcipua vis motrix est in corde, deinde in arteriis, quarum motus in perpetua coarctatione & expansione consistit, ut liquida & impellantur, & recipiantur. Præterea omnes ductus atque canales, qui liquida diversi generis vehunt, tandem etiam omnes partes, tam musculosæ, quam membranaceæ, ex fibris elasticis conflatae sunt, quibus potentia dilatandi se & contrahendi inest.

§. XIX.

Quemadmodum mechanicus, quando construit machinam, semper sibi præfixum habet certum finem: sic Dei infinita sapientia voluit, ut machina tam artificiosa instrumentum ac domicilium esset spiritus, sive substantiæ ad imaginem Dei conditæ.

§. XX.

Quia vero ex materia valde flexili, laxa, dissolubili, adeoque corruptibili, universa corporis compages constat: hinc utique primus & principalis structuræ scopus

& ratio fuit corporis duratio, five ejus à corruptiva putredine præservatio, & hic scopus merito vitalis dicitur & quam maxime considerationis medicæ est.

§. XXI.

Firma edocemur observatione, corpora liquida diversæ indolis in putredinem admodum prona esse, solida vero & dura neutiquam.

Scholion.

Nam quia corruptio est dissolutio unionis partium mixtum constituentium, qua à se invicem separantur; humida vero ad disjunctionem partium, dum poros invadunt eosque relaxant, plurimum faciunt: proinde liquido apparet, duras & exsuccas partes ab ejusmodi corruptiva celeri solutione esse immunes, liquida vero, quo plus ex diversæ indolis partibus constant, eo ad corruptionem existere pròiora, cujus generis sunt sanguis & animantium reliqui succi.

§. XXII.

Constat certa & firma experientia, humida quiete ad putredinem maxime disponi, motu vero continuo, tam intestino, quam locali, ab ea libera permanere.

Scholion.

Etenim, quia in putredine secessio & separatio fit partium inter se valde dissimilium, hæc vero sub quiete peropportune perficitur, qua crassiores, fixiores & graviores coeunt, subtiliores vero & fluidæ avolant: ex eo facile sequitur, motum optime corpora à putredine defendere, quia hoc ipso partes, utut dissimilis indolis, inter se arctius ac intime uniuntur, miscentur, atque combinantur.

§. XXIII.

Mirabilis itaque structuræ animantium ratio in eo consistit, ut partes fluidæ jugi & perenni motu ac libero cursu agitentur inque orbem moveantur.

§. XXIV.

Temperatis quoque succis & moderato eorum motu opus est, ut animantia nutriantur, augeantur. Atque adeo temperies vitæ ac sanitati est accommodatissima: nam sub intemperie humorum & motuum, nutritionem, vitam ac sanitatem diu persistere non posse, animadvertimus.

§. XXV.

Cum vero continua & intestina agitatione & motu attritivo, humores temperata & blanda indole gaudentes, successive intemperati, falsi, impuri, adeoque servationi vitali corporis minus idonei reddantur: ideo, ne perniciem inferant corpori, hi ipsi eliminandi sunt.

Scholion.

Quæ cum ita sint, jam facile peti potest ratio, quare tot colatoria & emunctoria, pro alienis diversæ naturæ particulis & separandis, & evehendis, à sapienti architecto constructa conspiciantur, & cur sine excretionibus vita ac sanitas diu salva esse nequeat.

§. XXVI.

Tota humorum massa continuo motu in excrementa successive fatiscit: hinc utique opus est, ut benigni, insipidi, temperie gaudentes succi, ut sunt lactei & gelatinosi, in eorum locum rursus succedant.

Scholion.

Vita & conservatio corporis non modo continuis egestionibus, sed & perpetuis ingestionibus opus habet. Et quum humorum massa benignis succis subinde renovanda sit; ideo in hunc finem divina sapientia tot officinis & organis pro alimentorum, digestionem, dissolutionem & bonorum succorum præparatione, animantium corporibus prospexit.

§. XXVII.

Corporis itaque nostri, in se summe corruptibilis, duratio & conservatio perpetuis in circulum abeuntibus liquidorum motibus, neque minus inutilium excretionibus & utilium ingestionibus & appositionibus; optime, immo unice, impetratur atque absolvitur.

Scholion.

Ex hisce jam petenda venit ratio, quare, circulo sanguinis, vel in parte, vel in toto corpore, destructo, cesset vita & pressio pede corruptio sequatur, & quare ingestionibus & egestionibus non recte se habentibus, vita & sanitas periclitetur & morbosæ affectiones corpus invadant.

§. XXVIII.

Machina itaque corporis nostri admodum corruptibilis, solo artificio mechanico, five motuum coordinatione, qua instructa ipsa est, à præsentaneo interitu & corruptione optime vindicatur.

Scholion.

Hoc præstantissimum naturæ, quo utitur in conservando corpore, mysterium & artificio, cognoscere utique debet medicus, & hoc est, quod veteres naturæ nomine insigniverunt, cui tam mirabiles in vita tuenda & morbis sanandis vires adscripserunt, cujus ductum, vias ac motum, ut sequatur & imitetur medicus, passim in monumentis suis magna cum sedulitate inculcarunt.

§. XXIX.

Corpus nostrum quia est machina, hinc ejus partes mirifice inter se conspirant & consentiunt, & hujus consensus, quo partes, tam fluidæ, quam solidæ, inter se communicant, plenior cognitio medico in praxi & pathologicis scitu summe est necessaria.

Scholion.

Consensum partium cum describere vult *Hippocrates lib. de aliment.* ita loquitur: *confluxus unus, conspiratio una, consentientia omnia.*

§. XXX.

Consensio, quæ inter partes mutua intercedit, quam maxime consistit in communicatione motuum.

Scholion.

Quemadmodum in machina, cujus effectus sunt motus, vitium parti illatum, lædit ejus motum, eumque cum aliis sibi connexis communicat: haud dissimili ratione in corpore humano, læsio partis cujusdam notabilis, aliarum sibi connexarum motum statim quoque inturbat.

§. XXXI.

Est primo magna consensio motus fluidorum sanguinisque circuli in partibus.

Scholion.

Ita videmus vasis cujusdam majoris in corde orificio à polypo concreto obturato, omnes corporis partes & functione sua, & vita privari. Auricula dextra, ob nimiam ibi sanguinis congestionem vehementius expansa, ejus contractio minuitur, hinc tam animi, quam corporis vis incipit deficere. Deinceps quodcumque in certa corporis parte, v. g. in pulmone, vehementi vocis exercitio, in manibus per harum fortiorum agitationem, aut in pedibus, facta ibi diuturniori frictione, sanguinis progressio ac pleratur, tunc universa sanguinis & humorum massa incallescere incipit, à motu & circulo intensiori facto. Quando exigua sanguinis pars, in tenuissimis vasis immota hæret, universum inde corpus graviter luit, siquidem non modo pars affecta tumet, rubet, dolet, sed & febris accenditur cum siti & vigilia. Sanguinis in hepate

aut liene stagnatio, universi corporis functionibus turbandis idonea est, quandoquidem inde non modo digestio & alvi excretio vitium contrahit, sed & intestina cum ventriculo & partibus annexis, vehementer spasmodicis & flatibus exercentur, qui morbus vulgo mali hypochondriaci nomine insignitur.

§. XXXII.

Mirabilis quoque est consensio & mutua communicatio partium, quæ exquisitori motu ac sensu gaudent, ut sunt nervosæ ac membranosæ.

Scholion.

Ex omnibus partibus nulla majorem communicationem cum capite & universo nervorum genere habet, quam ventriculus ac intestina. Nam is flatibus vehementer distentus, ut fieri solet in affectione, quæ dicitur hypochondriaca, maximas in præcordiis anxietates, in spirando angustias, in functionibus animalibus turbationes concitat. Exigua partis ventriculi vel intestinorum à veneno erosio tantum valet, ut summa anxietas & continuus vomendi conatus, convulsiones, sudores frigidi, vehementes nervorum spasmi, animi deliquia, fatalem catastrophem non raro inducant. Similiter vel levis tantum lancinatio à lumbrico in intestinis, quas non convulsiones & artuum stupendas agitationes horrendo spectaculo excitare valet? In infantibus sola distensio & lancinatio gingivalis carnis ab erupturo dente, complures interficit, non alia ratione, quam quod exinde febres, deliria, convulsiones, tormina, asthmata consequuntur. Levissima, in exsectione clavi pedum, aut in male administrata venæ sectione tendinis, aut nervi punctio, funestam inflammationem cum febre ac delirio haud adeo raro induxisse visa est.

§. XXXIII.

Magna quoque in corpore nostro est consensio inter systema nervorum, & fluidorum progressum ac circulum, ita prorsus, ut læsis vel male affectis nervis, libera sanguinis & humorum progressio inde vitium trahat, quemadmodum etiam in circuitu humorum apparens labes, protinus nervosarum partium statum & actionem perturbat.

Scholion.

Hæc mutua consensio & conspiratio sanguinis circuli in vasis, & fluidi tenuissimi in nervis, in pathologicis ad morborum & symptomatum generationem intelligendam maximi est usus atque considerationis. Animadvertimus enim, sanguine in viscere vel vasis partium stagnante, aut immobili reddito, protinus genus nervorum præter naturam affici & spasmodice contrahi, ut exinde dolores, febres, hæmorrhagiæ, excretionum suppressiones, oboriantur. Animadvertimus quoque, à nimia distensione, vel lancinatione, aut erosionem partium nervosarum, protinus pulsum mutari, vascula minima constringi, comprimi, hinc sanguinis libero ac æquabili cursu intercepto, inflammatoriæ & periculosæ stases, vel copiosioris sanguinis ad alias partes & vasa ampliora morbosæ congestiones, emergunt.

§. XXXIV.

Datur adhuc longe nobilior & sublimior harmonia atque consensio inter œconomiam motuum vitalium & animalium, ita prorsus, ut vitium in circulo sanguinis conspicuum, protinus animales functiones alteret, sicut rursus depravata phantasia, universi corporis functiones vitare potest.

Scholion.

Hæc veritas innumeris exemplis confirmari posset, sed pauca tantum adduxisse suffecerit. Quiescente cordis motu, anima protinus in operationibus suis cessat & omnis sapientia ac cogitatio expirat. Moderatus sanguinis per cerebrum motus animi & inge-

Frid. Hoffmanni Oper. Tom. I.

nii vires in vigore conservat; simul ac vero hic motus turbatur, ut vel retardetur, vel æquo celerior fiat, statim ad inordinatos motus & rationis alienationes etiam anima disponitur. Ex eodem fluit fundamento, quod animi mores ac propensiones sequantur corporis temperamentum, sive rectius sanguinis motum per cerebrum. Vinum, vel aliud quodvis assumptum, quod sanguini motum ac vigorem addit, ingenii quoque vim acuere & excitare solet. Medicamentum, quod graveolenti vapore succos contaminat, uti est narcoticum, omnem rationis, ingenii, memoriæ & sensus vim minuit & quandoque enecat. Quantam vim perversa phantasia & impressio in partium motibus alterandis possideat, & vehementes animi affectus, & melancholicorum perversa phantasia aliaque prava desideria & aversiones luculenter testantur.

§. XXXV.

Ex quibus omnibus elicitur, rectissime corpus nostrum machinam omnium perfectissimam appellari, eo, quod infinitam DEI artem pro auctore agnoscit, quam nulla humana ratio imitari poterit & quod perfectissimæ regulæ ac leges hydraulicæ, staticæ, opticæ, hydrostaticæ, mechanicæ ibi reperiuntur & inde addisci possunt, denique, quod tam mirabiles effectus & conspirationes mutuae partium in humana machina conspiciuntur, quæ omnia longissime quamcunque excellentissimam ullius hominis artem exsuperant.

Scholion.

Ex quo jam facile liquet, perperam eos judicare, qui pro crimine habent, corpus nostrum machinam vocare, dum sibi persuadent, machinas tantum esse artis humanæ opera. Quasi vero intellectus humani imbecillitas regula & norma divini & sapientissimi artificii esse debeat. Quapropter & desinant obrectare ii, qui non erubescunt asserere, ejusmodi doctrinas saniora medicinæ principia labefactare. Sed aliud est dicere, aliud probare.

§. XXXVI.

Infinitæ licet sapientiæ machina corpus humanum sit; nihilo minus ratione materiæ est summe corruptibilis, & ratione structuræ & nexus partium, est mutabilis valde & tandem destructibilis, id est, facile integritate, mobilitate ac denique vita privari potest.

§. XXXVII.

Utut homo purissimo aëre ac temperatissimo & corpori congruo alimento fruatur, & secundum saluberrimæ diætæ præcepta vitæ rationem instituat, ipsi tamen est moriendum: ergo causa absolutæ moriendi necessitatis non tam in fluidis, quam potius in solidis partibus quaerenda est.

§. XXXVIII.

Experientia constat, animantia, quo annosiora sunt, eo duriores & compactiores solidas illorum partes fieri. Hinc quoque carnes vetustiores diuturniori coctione egent & cartilagine in decrepitis in ossa transeunt, hæc vero solidiora in vetustis, quam juvenibus offenduntur.

Scholion.

Quum siccitas & durities ab appositione materiæ majori, quæ minimos poros & ductus replet, fiat, facile apparet, per hos fluida amplius ferri non posse & tenuissima vascula evanescere, id quod etiam in emunctoriis & secretoriis organis, quæ ex copia minimorum ductulorum coagmentata sunt, evenit. Quare in senibus, ob vasorum angustiam & minimorum plenariam occlusionem, succi utilissimi, lympa nutritia, fluidum nerveum, non tam prompte & in tanta copia fecernuntur, inque partes influunt, sed & inutiles, quæ retentæ sanguinem impurum reddunt, non recte separantur, hinc non mirum est, in nutante & extrema ætate,

nutritionem partium solidarum deficere, vires quoque & potentiam movendi, item animi vigorem, corporisque agilitatem cum calore decrefcere, & succos vasorum valde impuros fieri, ut senectus ipsa morbus evadat & mors certo nec tardo pede, subsequatur.

§. XXXIX.

Ob viarum angustiam & partium solidarum majorem duritiem, nec bene humores amplius influunt, nec satis promte effluunt, unde consequitur, nec machinam amplius functionibus recte obeundis aptam esse, sed cum tempore eam magis magisque reddi ad motus edendos ineptam planeque tandem fatiscere.

Scholion.

Ductuum & vasorum tenuitas & angustia, ad nutritionis negotium, ad secretionem tum liquidorum subtilium utilissimorum, tum inutilium, est summe necessaria: nihilo secius hæc vasculorum angustia & subtilitas causa quoque est destructionis machinæ; siquidem ob hanc causam tam facile fiunt stases, stagnationes, obstructiones fecundissimæ morborum, & acutorum, & chronicorum, matrices, hinc tandem machinæ perit vigor ac mors subsequitur. Conspicimus ex eo, longævitas & præservandi à morbis præsertim chronicis fundamentum in eo potissimum residere, ut medicus tenuissima vasa aperta fervet.

§. XL.

Mutationem, corruptionem & destructionem, in quam corpus humanum facillime ruit, avertere & ejus vitam diutius conservare, medici est præcipuum officium; unde omnino is, in quo vitæ ratio & causa posita sit, exactius nosse debet.

CAPUT II.

De vitæ ac mortis natura & causis.

§. I.

Quamvis in corpore humano omnes partes solidæ, ratione structuræ, integræ ac salvæ sint, & fluida quoque benigna temperie ac justa quantitate consent; nihilo minus ubi horum motus progressivus deficit, nec calor, nec agilitas, neque nutritio, neque sensus, multo minus cogitatio observantur. Simul ac vero fluida incipiunt rursus moveri & circumvehi; protinus hæc omnia & singula redeunt, & tunc dicitur adesse vita.

§. II.

Vita itaque rectius definitur, quod sit motus progressivus, in circulum abiens sanguinis atque humorum, ab impulsu cordis & arteriarum, nec non ab elatere fibrarum proficiscens, secretionibus atque excretionibus totum corpus à corruptione atque in integritate conservans ejusque functiones gubernans.

§. III.

Vita non accurate per conservationem mixti à putredine definitur.

Scholion.

Quamquam vita perpetuo conservationem corruptibilis corporis comitem habet, dum quasi ejus effectus est; ex eo tamen minime consequitur, hanc conservationem & durationem corporis vitam esse dicendam, eo quod animantium corpora, vita diu jam privata, à putredine immunia solo intenso frigore, aut spirituosoliquore fervari possunt.

§. IV.

Neque vero omnis motus fluidorum in machinis dici potest vita, sed is tantum, qui fit à cordis reciproca systole & diastole, & ubi fluida in orbem mota incallescunt.

Scholion.

Quamquam in plantis, quæ crescunt, motus succorum animadvertitur, nequiquam tamen vitam ipsis competere recte dicitur, eo, quod carent corde & sanguine calido ac purpureo. Qua de causa vegetabilia non proprie vivere, sed crescere, nec mori, sed exarescere, dicuntur.

§. V.

Quamdi in homine vel alio animante motus cordis & arteriarum sive pulsus observatur, tamdiu dicitur adesse vita.

Scholion.

Nam quodocunque cor quiescit, ut in syncope, nec sanguis amplius movetur: tunc omnia quiescunt ac torpent in toto corpore, omnesque partes perfrigerantur; sique non amplius revocari sanguinis & cordis motus potest, homo recte mortuus censetur.

§. VI.

Cordis itaque motus est causa circularis sanguinis motus, adeoque vitæ: & recte primum vivens & ultimum moriens dicitur.

Scholion.

Præclare Hippocrates libr. de corde §. 5. naturam ac causas describit, dum de corde & venis hæc pronunciat: *hi fontes sunt humanæ naturæ, hi flumina, quibus totum corpus irrigatur. Atque hi etiam vitam homini conferunt, & ubi resiccati fuerint, homo moritur.*

§. VII.

Cor machina est motoria non simplex, sed composita ex quatuor cavitatibus, duabus majoribus, quæ sunt ejus ventriculi, & totidem minoribus, quæ sunt auriculæ, quarum singulæ motu expansionis & constrictionis gaudent.

Scholion.

Cor musculus esse valde fortem dudum Hippocrates lib. de corde §. 4. agnovit, eo tamen ab aliis musculis distinguitur, quod ejus fibræ in spiram productæ, cavitates efformant, quæ contrahuntur, vel ampliantur. Atque sub systole & contractione cavitatum, cordis sanguis expellitur in tubos annexos arteriosos, sub diastole vero seu ampliatione, ex venis recipitur, adeoque reciproca illa systole ac diastole, vera est causa circulationis sanguinis.

§. VIII.

Reciproca musculorum cordis contractio & dilatio causa est fluxus & refluxus sanguinis ad cor. Nam si contractio tantum fieret cordis, neque eam sequeretur rursus dilatio, sanguis quidem expelleretur, non vero reciperetur: hinc opus est, ut pars constricta rursus dilateretur, & dilatata, postea iterum constringatur.

§. IX.

Cordis potentia motrix licet validissima sit, tamen regendo & impellendo tanto ponderi sanguinis & humorum non esset sufficiens, nisi magnus tubus, simili potentia motus instructus, in minima corporis eos impelleret & refluxum per venas promoveret.

§. X.

Cordis itaque & arteriarum systole & diastole vera & adæquata circuli sanguinis causa est.

§. XI.

§. XI.

Cordis machina motoria tam affabre constructa est, ut ejus systole diastolen arteriarum, quæ pulsus est, producat, & diastole arteriarum rursus provocet earum systolen, quæ causâ postea rursus diastoles cordis evadit, & sic motus fit perpetuus. Quam ob rem non inepte perpetuum mobile cor dici potest & circulus sanguinis perpetuus motus, quamdiu nempe homo vivit.

Scholion.

Quandocumque arte humana perpetuum motum in machina producere velimus, illud requiritur, ut causa motum seu effectum producat, qui effectus rursus sit similis motus sive effectus causa. Igitur meritissimo jure infinitam DEI sapientiam admiramur, qui tot perpetua mobilia construxit, quot sunt animantium corda; humana vero ratio & ars in ejusmodi machina invenienda adhuc magno labore defudavit.

§. XII.

Quia successiva & reciproca cordis & vasorum systole ac diastole, perennis sanguinis in orbem, fluxus, adeoque vitæ, causa est, ipsaque systole diastoles, & rursus diastole systoles causa fit: sequitur, quiescente uno horum motuum, sive in corde, sive in arteriis, totius circuli sanguinis cursum ipsamque vitam periclitari.

Scholion.

Quando supra modum ex congesto sanguine distenditur auricula dextra, quæ tenerioris texturæ est, propter aërem nimis rarefactum, ut fit in vacuo, vel calidissimo aëre, systole ejus languescit, vel plane perit, unde syncope. Ex vehementiori animi affectu, vel ex dato veneno, tanta sæpius fit systematis nervosi, quin & cordis constrictio, ut ejus expansio, qua recipitur sanguis, aboleatur, unde immotus coagulatur sanguis & homo moritur.

§. XIII.

Quando cordi vel arteriis quiescentibus, unica systole in tempore rursus procuratur; subito vitæ animantia morti proxima restituantur.

Scholion.

In vacuo animantia, si extremum spiritum jam emittere volunt, ut nihil certius, quam mors appareat, & moderatius aër admittitur, protinus ad vitam, motum & vires pristinas redeunt, cujus phænomeni nulla alia subest ratio, quam quod, aëre exteriori substracto, sanguis & humores intra cor & vasa, aucto elatere, valde expandantur & supra modum vasorum tunicas inque primis auriculam dextram distendant, ut difficilius ad contractionem redeant, qua cessante, sanguis non impellitur, hinc progressio totius massæ sanguineæ tollitur & mors in propinquo est. Si vero aër quantocyus, leni modo, rursus admittitur, nimia vasorum distensio cessat & systole cordis atque arteriarum de novo incipit. Aëre valde rarefacto & intensius calido necari animantia posse, certo certius est. Id fit, dum pulmonum vasa, à nimia sanguinis expansione, constrictiōnem suam amittunt, quæ ab aëre admissio frigido, vel aqua adpersa frigida, mox restituitur, unde morti vicina animantia & mox extremum halitum emissura, plenarie ad vitam hac ratione revocari posse non novum est. Memorabilis est observatio, quam profert *Sachsus in Ampelographia Sect. II. Cap. III.* in aqua submersos, sine vita ac motu jacentes, vitæ restitutos fuisse, forti & diuturniori percussione pedum, quia nempe ejusmodi contusione, vasa & fibræ ad motum systoles vitalem producendum excitantur. Syncopticos, forti in planta pedis frictione, aspersione aquæ frigidae in faciem, frictione labiorum cum sale, vel odore spiritus volatilidis, excitari posse, vulgaribus experimentis

constat. Curiosum etiam, quod Arabes in diuturniorem syncopen abreptos, provocato per instrumentum aliquod vomitu, restituere soleant.

§. XIV.

Unica quoque diastole, jam conquiescenti machinæ reddita, totam sanguinis massam in motum rursus progressivum excitare & cordi atque arteriis motum, adeoque vitam, restituere potest.

Scholion.

Perquam curiosum & plane singulare experimentum est, quo canibus, qui thorace discisso & corde diu quiescente, vere mortui sunt, vita ad tempus reddi potest: quod hoc fit, dum si tubulus ductui thoracico, vel venæ jugulari, aut cavæ, immittatur & aër infletur, vel totum cor palpitare incipit, vel ad minimum auriculæ dextræ motus ad aliquot horas restituitur, quod etiam in homine mortuo factum esse *Cl. Brunnerus in tract. de glandulis duodeni*, memorabili exemplo confirmat. Intensiori frigore, quando incipit cor quiescere & mors præ foribus est, tunc sola fortior frictio cum calido panno, in dorso vel thorace instituta, vitam reddere potest. Vidimus quoque solis frictionibus moribundos ad aliquot horas adhuc servatos. Neque ignotum est, aqua suffocatos, vel laqueo strangulatos, si mature frictionibus, venæ sectione & immissione corporum in aquam calidam, tractentur, ad vitam revocatos fuisse, non aliam ob causam, quam quod sanguini & humoribus, ad coagulum jam proximis, fluiditas, & cordi & arteriis, facta fibrarum à calore expansione, motus restituitur.

§. XV.

Quemadmodum calor, agilitas, nutritio, integritas, sensuumque ac mentis vigor, uno verbo vita, motu systoles & diastoles solidorum & fluidorum progressu perficitur: ita horum motuum intermissio, vel plenaria extinctio, syncope, vel mors est.

§. XVI.

Est itaque mors plenaria motus cordis & arteriarum circuli sanguinis extinctio, corruptionem corporis post se trahens.

Scholion.

Corruptio & putredo corporis, effectus quidem mortis, sed non semper ejus necessaria causa est: nam hominem externa violentia vita privari posse, machina corporis diu adhuc salva & à corruptionis labe immuni persistente, notissimum est.

§. XVII.

Quodcunque itaque cordis motum subito atque in totum extinguere valet, id quoque præsentaneam mortem inferre potest.

Scholion.

Ex hoc nunc liquido intelligitur, quare insigne vulnus cordis vel majoris vasis, aut polypus, orificium magnæ venæ claudens, subitam mortem ingeneret, & quare intensissimum frigus hominem possit necare: siquidem per cordis aperturam, tanta sanguinis copia effluente, mox in totum concidit ejus diastole, hinc totus sanguinis cursus simul & semel definit ac in momento mors adest, quo vel unico argumento clarissime mortis natura intelligitur. Polypus necat, quia sanguinis ad cor sufficientem affluxum, & consequenter ejus diastolen, tollit, acri verò frigore, quum sanguis coagulatur, utique ejus cursus ac fluxus omnimode sistitur.

§. XVIII.

Quemadmodum liber sanguinis circulus universum corpus ab abominabili corruptione & morte vindicat, ita necessario consequitur, corruptionem funestam

partis, five internæ, five externæ, quæ tandem totum corpus in putredinem trahit & vitales motus in totum extinguit, à circulo sanguinis sublato originem suam trahere.

Scholion.

Citissime pars corruptioni sphacelosæ subijcitur, modo fortissime vinculis stringatur: sic enim, ligatis vasis, affluxus & refluxus sanguinis impeditur, ut immotus ibi stagnans, promte putredinem, cujus vis est valde sui multiplicativa, concipiat.

§. XIX.

Quicumque itaque medicus, quod suum est munus, mortem avertere & corpus diu vivum, saluum ac integrum conservare laborat: is nihil aliud agere debet, quam ut eo omne suum auxilium & consilium dirigat, quo sanguinis liber ac perennis cursus, per omnes corporis partes, præstetur, funesta vero ejus stasis, quies, vel stagnatio avertatur.

Scholion.

Neque enim ullus moritur homo, ubi non circuli sanguinis destructi & mortiferæ staseos, adeoque mortis, evidentissima testimonia ac indicaturæ adsint: quapropter in omni morborum curatione, circuli sanguinis conservatio primum & principale debet esse in intentione medici, & ultimum in executione. Hoc argumentum fusius in *dissertatione de generatione mortis in morbis* executi sumus.

§. XX.

Atqui jam liquido apparet, ea, tam ad vitam longius producendam, quam ad morbosas afflictiones præcavendas & avertendas, optima esse præsidia, quæ ad conservandum sanguinis liberum & progressivum motum, maxime per tot subtilissimos & innumerabiles rubulos & vascula minima, quibus omnes partes obsitæ sunt, faciunt: sicut è contrario tum ad morbos proferendos, tum ad mortem accelerandam, multum conferunt, quæ vitalem hunc motum cohibent, vel retardant atque angusta vasa occludunt.

Scholion.

Maximæ hinc utilitatis ad sanam & longam vitam sunt omnia, quæ fluiditatem sanguinis & humorum conservant ac perspirationem liberam præstant, ut infusa calida herbarum, item motus atque exercitatio corporis, nec non quæ acidum corrigunt, item stomachica temperata balsamica, quæ blandam spirituosam chyli & sanguinis promovent, neque minus provide administrata venæ sectio, quæ, sanguinis nimiam copiam subtrahendo, liberiores ejus per omnis generis vasa cursum procurat. Quam noxia vero & proferendis morbis vitæque abbreviandæ apta sint adstringentia, validiora purgantia, anodyna, narcotica, putridæ exhalationes, acida, nimium refrigerantia, nimia quoque repletio vitæque sedentaria, cum affectuum animi intemperantia, à solidæ praxeos gnaris ignorari amplius nequit.

§. XXI.

Ergo vita & mors mechanice fiunt, & nonnisi à causis mechanicis, physicis & quæ ex necessitate agunt, dependent.

Scholion.

Patet ex hisce quam ineptum conceptum de vita & morte ejusque causis, veteres sibi formarint, dum vitam actionem & imperium animæ in corpus, vel animæ conjunctionem cum corpore, mortem vero vitæ privationem, calidi innati marcorem, separationem animæ à corpore, vel animæ secessum, aut animæ vel principii vitalis energiam fatiscentem & functiones

corporis deferentem, dixerunt. Multo minus autem causas, cur homo mori debeat, invenire poterant, siquidem illorum sapientia plus nominibus & metaphysicis speculationibus, quam rerum corporearum & structuræ corporis humani cognitioni, inhærebat.

C A P U T III.

De causis motuum vitalium systoles atque diastoles.

§. I.

QUUM vita à mere mechanicis & ex necessitate agentibus corporeis causis dependeat, & simplicissimus ille motus systoles & diastoles, qui in corde atque in universo canalium systemate residet, circuli sanguinis omniumque secretionum ac excretionum causa sit: plurimum utique ad rem nostram pertinet, veras systoles ac diastoles causas investigare.

§. II.

Neque satis erit, cum veteribus motuum vitalium causam nomen quoddam, ut naturam, animam, spiritum, archeum, aut sapientem quendam dæmonem, vel principium certum vitale allegare, eo quod hisce obscuris nominibus nihil explicatur, nihil perspicuum redditur nullaue ad usum vel inventionem applicatio fieri potest.

Scholion.

Natura quidem ab *Aristotele* principium motus & quietis, adeoque etiam vitæ & mortis causa, habetur; sed tamen hoc ipso nihil dicitur. Nam cum principium philosophis idem sit ac causa, ideo sequitur, ut quando naturam causam motuum vitalium systoles ac diastoles agnoscimus, nihil aliud dicamus, quam naturam, quæ causa motus definitur, esse causam motuum vitalium. Sicuti vero in omni demonstratione & seria veritatis indagine, petitiones principii, lusus, fictiones, ambiguae opiniones & inania nomina procul abesse debent: ita tanto magis id in ea doctrina, quæ de vita ac sanitate hominis agit, necessarium erit.

§. III.

Neque sufficit, animam actionum in corpore, & hinc quoque motuum vitalium, cordisque systoles ac diastoles, causam dicere.

Scholion.

Equidem vis illa & potentia, quæ in nobis percipit, sibi ideas imprimit, easque certa ratione æstimat: vel adhuc superior substantia, quæ intelligens, conscia & libertatis agendi particeps est, & mens vocatur, vi unionis certam actionem ac directionem in quosdam corporis motus obtinet: nullo tamen solido ratiocinio evinci potest, utrumque principium proxime & directe & semper omnes in corpore motus, inque primis vitales illos systoles ac diastoles, producere, atque functiones naturales regere ac gubernare.

§. IV.

Si anima, vel aliud quoddam ens immateriale, cuncta penetrans & movens, muscutorum ipsiusque cordis motus causa esset: tunc utique consequi necesse foret, ut salvo ac integro existente motus instrumento, nempe musculo, utcunque nervi affecti, vel vasa ligata fuerint, adhuc motus systoles ac diastoles vigeret, quod tamen minime evenit.

§. V.

Neque opus est, ut ad causam quandam superiorem metaphysicam, five pneumaticam, moralem & occultam,

De causis motuum vitalium systoles atque diastoles. 33

tam, quæ non sciri potest, refugiamus, ubi manifesta physica, à vi & operatione rerum corporearum desumpta, rationi & sensibus obvia est.

§. VI.

Motus, qui fiunt in partibus solidis corporis nostri, à fluidis ipsoque sanguine calido & partibus ejus subtilissimis, sive impetum facientibus, tam in vasis, quam in nervis contentis, proficisci, multis evidentibus argumentis potest evinci.

§. VII.

Si intercipitur sanguinis & liquidi nervei fluxus ad partem, ligatis aut discissis arteriis, vel nervis, protinus omnis potentia motrix expirat; ergo causam intermissionis motuum in arteriis & nervis quæri deberi, non inepte censemus.

§. VIII.

Ad cordis machinam motoriam non modo insignes pari octavo & intercostali nervi feruntur, sed & ingens sanguinis quantitas, per vasa sic dicta coronaria, adducitur.

§. IX.

Experientia docet, liberaliori sanguinis, aut per vulnerationem, aut per sectam venam emissionem, cordi potentiam motricem subtrahi, adeo ut quiescere incipiat & syncope fiat, simul ac vero ille per inclinationem corporis paulatim rursus affluit, protinus motus cordis redit.

§. X.

Observamus homines, quanto calidiorem & copiosiore habent sanguinem, tanto robustioris esse naturæ atque ad animi defectionem minus proclives.

§. XI.

Animadvertimus, diuturna inedia & defectu boni nutrimenti, universi corporis vires frangi, & cordis quoque motum languidiorem fieri, cum contra à pastu, à calido potu, à vino, à pane & spirituosissimis balsamicis assumtis, vires antea depressæ mox erigantur, pulsus quoque fortior & celerior evadat. Ergo quod cor & solidas partes movet iisque vires ac vigorem addit, materialis indolis est, & forinsecus ex alimentis & aëre accedit.

§. XII.

Caloris ad vitam, nutritionem, propagationem & motus vitales producendos & conservandos, maxima necessitas & potentia est.

Scholion.

Quotidiana edocemur experientia, nullum semini terræ mandatum, sine calore, ad fecunditatem produci, vel plantam sine eo crescere & augmentum accipere posse. Nunquam ex piscium, ranarum, insectorum, vel cujuscunque generis volatilium ovis atque seminibus animalculum, vel pullus excluditur, nisi convenienti & temperato calore, vel solari, vel qui ab incubatu animantium provenit, prius fota fuerint. Hirundines, Alpini mures, multa insecta, intenso frigore, sine motu sensibili ac sensu jacent, accessu vero caloris & vernali tempore, mox motum & sensum recipiunt. Ægyptios furnorum temperato & æquabili calore pullos gallinaceos excludere, historiarum fide constat; & novis experimentis comprobatum novimus. Animantia perfectiora utero foetus generant, eo quod calori sanguinis materni proportionata semina quam optime fecundari & nutriri possunt. Vernali & calidiore tempore accedente, omnia animantium & vegetabilium genera agilia, fecundiora & vegetiora evadunt & tota quasi natura robur acquirit: tum fecundus animalium fit congressus & aquatilia ova deponunt. Sine calore nullum animal vivere vel crescere potest,

unde integumentis, lecti vel hypocaufti calore, aut alimentis calidioribus acriter frigus temperandum est.

§. XIII.

Calor est valida ætheris, in intestino & vorticoso motu consistentis, in partibus sulphureis fluidorum actio, qua pori solidorum expanduntur, partes eorum fluidæ dividuntur, crassiores subtiliores redduntur, dura & resistentia flexilia evadunt.

Scholion.

Hoc theorema innumeris experimentis hydraulicis & physicis confirmari potest: suffecerit vero pauca attingere. Liquida, præsertim spirituosissima, fermentescibilia, vasis firmissime inclusa, calore accedente, solidissima vasa magna vehementia disrumpunt. Aqua fontibus artificialibus inclusa, solo calore, in altissimum spatium evehi potest. Liquor thermometris inclusis calore expanditur, inque altius spatium attollitur. Quam mirabiles in dissolvendis brevi tempore duris corporibus aër & aqua, in machina Papiniana inclusi, ope caloris edant effectus, res vix amplius rerum physicarum curiosis ignota esse potest.

§. XIV.

Longe vero majorem vim ac potentiam expansivam calor exserit in corpora, quæ tenuioris sunt indolis.

Scholion.

Id clarissime experimentis evincitur, dum aquæ fontium salubrium, videlicet acidularum, vel etiam vina generosa, aut spiritus inflammabiles, vitris arctius inclusa, leni calore foris accedente, protinus ea in minima frustula disjiciunt.

§. XV.

Atqui nostra sic conficitur sententia: partem sanguinis optimi, calida ætheris materia subtilisatam, magna potentia elastica præditam, motuum vitalium, systoles nempe atque diastoles, & inde dependentis motus fluidorum, veram & adæquatam existere causam.

Scholion.

Sanguis est vehiculum istius moventis tenuissimæ substantiæ, quæ à veteribus anima, calidum innatum, aut spiritus impetum faciens, sive principium vitale, quod proprio conamine motum excitet, vel quod respondeat elemento stellarum, appellatur. Et quia veteres caloris magnam vim, ad sustinendam vitam, deprehendebant, hinc factum est, ut principium vitæ & causam omnium functionum in animantibus *δυσμὸν* substantiale & *ἐμφυτον*, quod in corde resideat, asseruerint. Et ob id quoque ii, qui credebant, animam & naturam esse omnium actionum in animantibus causam, calidæ & igneæ indolis eam esse judicabant. Idcirco etiam *Hippocrates L.I. de diet.* dixit: *ignem omnia per omnia movere*. Vitam in ipso sanguine consistere sacra nos pagina docet. Sanguis quoque primum in generatione conspicitur, idque non solum in ovo, sed in omni foetu animaliumque conceptu contingit: & sanguine ex venis amisso, vel ejus motu & calore penitus extincto, vita aboletur. Et quo major sanguinis boni & spirituosissimi copia in corporibus visitur, eo agilia, robustiora, vivaciora & sagaciora sunt animalia: & contra, quo parcius adest sanguinis copia, isque intemperatus, vel frigidus, animalia eo sunt timidiora, minus vivacia magisque imbecillia. Omnia denique alimenta, quæ bonum sanguinem præbent, ut panis & carniarum genus, vinum generosum; vigorem atque agilitatem animo & corpori addunt & vires depressas protinus erigunt. Præterea aër purus, temperatus, serenus, qui in altioribus & temperatis locis, tempore verno & sub flatu orientali animadvertitur, mire omnes vires corporis recreat & animo quoque vigorem & agilitatem reddit, appeti-

appetitum excitat & erigit, ad venerem stimulat, in morbis vires inspirat. Ex quibus omnibus rectissime colligimus, illam ipsam substantiam, quæ nos nutrit, sustentat, roborat, animat, sanguinem movet & vires corpori ac animo largitur, esse materiale, eamque existere in sanguine, cum eo etiam amitti, ejusque portionem esse delibatissimam, optimam, tenuissimam, magna potentia expansiva donatam.

§. XVI.

Sanguis itaque rectissime thesaurus vitæ & animæ vehiculum ac vinculum ejus cum corpore dicitur.

Scholion.

Insignis ad elucidandam hanc rem exstat locus in *Harvæo*, qui meretur adduci. Hic *exercitatione* 71. ita differit: *solemus rerum negligentes speciosa nomina venari. Sanguis, qui nobis præ manibus atque oculis est, nil grande sonat, ad spiritum vero & calidi innati magna nomina obstupefcimus, detracta autem larva, evanescit ut error, sic etiam admiratio. Profecto si sub lapidis philosophici ænigmate sanguinem quis depingeret, atque omnes ejus mirabiles dotes, operationes ac facultates proponeret, illum procul dubio pluris æstimaret & supra vires elementorum agere facile crederet, corpusque illi aliud ac divinius non illibenter attribueret.* Hactenus *Harvæus*. Ego vero ænigma formabo tale: si quis dicat, sibi notam esse universalem medicinam, quæ in omnibus regionibus & omni tempore haberi possit, inque animantium regno reperiatur, cujus tanta sit efficacia, ut hominem ab omni generis morbis, imo ipsa præmatura morte, præservet, quæ universum corpus ab excrementitiis sordibus liberet, quæque vigorem ac robur omnibus partibus conciliet, animoque sapientiam ac intellectum reddat, quæ porro medicus, debito regimine, omnes morbos, quantum possibile est, sanare possit. Profecto ad unum omnes ejusmodi medicamenti præstantissimas vires admirarentur & nulli studio vel sumptibus, ut eam inquirerent, parcerent. Quandocunque vero postea quis edicat, hanc medicinam sanguinem esse animantium, tunc protinus omnis admiratio & æstimatio, propter rem vilem & omnibus notam, exspirabit. Quo ipso nostrum ingenium optime potest cognosci, quod vilia, sensibus obvia & facilia ac simplicissima despiciunt, ad ignota vero, obscura & magnifica magno impetu fertur.

§. XVII.

Reciproca & continua systole & diastole cordis & vasorum ita peragitur: subtilior atque calidior expansiva seminis & postea sanguinis pars, in primis foetus rudimentis, expansionem fibrarum cordis incipit, quæ, elatere instructæ, impatientes istius expansionis, sese contrahendo in pristinum statum restituunt, & ita sanguinem in tubos arteriosos expellunt, qui à sanguinis expansiva calida potentia identidem dilatantur & postea, ob vim quoque elasticam, sese contrahunt.

§. XVIII.

Machinæ motorie cordis, arteriarum, intestinorum & omnium, qui motu gaudent, canalium, tam sapienter constructæ & eo consilio tanta virtute ac potentia elastica donatæ sunt, ut vel levior fibrarum expansio, earum contractionem provocet, quæ postea novæ expansionis in vicinis partibus causa fit.

Scholion.

Ita animadvertimus cor canis exemptum, prorsus in quiete consistens, levi flatu admissio, ad motum aliquamdiu revocari posse. Neque ignotum est, cor ranarum, omni motu privatum, levi acus punctione, denuo palpitare & motum diu adhuc continuare.

§. XIX.

Magna elastica cordis, arteriarum aliorumque canalium potentia, non tantum ab ipsa fabrica mechanico-statica, sed quam maxime à subtilissimis fluidis expansivis, quæ partim vasa sanguinea, partim etiam nervi advehunt, dependet; quæ duo elastica fluida, unita in fibris, tantam potentiam exserunt.

§. XX.

Quemadmodum motus vitalis duplex est, diastole nempe atque systole: ita etiam duplex vis expansiva utriusque causa existit: sanguis nempe appulsus & intra cavitatem cordis vel vasorum contentus, copia & calore expansivo diastolem efficit, fluidum vero quod per arterias coronarias sanguinis atque nervorum agilissimum, quod intra fibrarum cordis substantiam & interstitia fertur, ibique residet, succedentis systoles sive contractionis causa est.

§. XXI.

Quanta est pressio laterum arteriarum extrorsum, à sanguine impulso, tanta est elateris fibrarum, à fluidis animatarum renitentia: atque cessante illo impulsu, fibrarum ad pristinum statum, nempe introrsum, fit reductio.

Scholion.

Siquidem ex mechanicis notum est, elaterem semper esse æqualem vi comprimentis vel tendentis corporis, & eundem quoque esse æqualem vi percutientis. Notum quoque est experimentis pneumatico-hydrostaticis, potentiam elasticam aëris aliorumque corporum, ingenti eorum ponderi æquari.

§. XXII.

Sicut à subtilissima & mobilissima calidi optimi sanguinis parte motus vitales fibrarum dependent; ita à sanguinis corrupti vel impuri tenuissima putrida parte, non modo vires corporis, sed & animi vigor periculum patiuntur.

§. XXIII.

Sicut subtilissima, spirituosa & temperate sulphurea alimentorum & medicamentorum pars, & purissimus, temperate calidus aër, egregiè vires motrices restituunt: ita nihil magis eas destruit, quam putredo, sive putridus vapor.

§. XXIV.

Putredine, quæ mixtionem & structuram corporis animantium potenter destruit, nihil vitæ potest esse infensus, & hæc quoque indivulsus comes atque effectus est extincti sanguinis circuli, & causa præcipua mortis, sive plenariæ systoles atque diastoles, adeoque fluidorum progressus, extinctionis.

Scholion.

Quod ex sphacelo partis externæ, item ex putredine terribilissima, quam cancer secum gerit, vitalium virium successiva & tandem plenaria defectio fiat; vix alia est causa, quam quod subtilissimus putridus vapor nobilissimam sanguinis partem, quæ vitalibus motibus præsidet, inficiat & in totum corrumpat. Pestis, aliique maligni morbi contagiosi, non ulla alia ratione tam infensi vitæ sunt & tam celeriter necant, quam quod penetranti ac tenuissima putrilagine interiori & subtiliorem spirituofam sanguinis partem inficiant, unde mox vires prosternuntur. Sique rem accuratius perpendimus, mortis præcipua & familiarissima causa est interna sphacelatio visceris nobilioris, aut partium, quæ exquisito sensu ac motu gaudent, ut sunt ventriculus, intestina, meninges. Quæ de re legatur *dissertatio nostra de generatione mortis in morbis*. Provocamus ad omnes, qui dissectionibus ex morbis

morbis defunctorum operam navarunt, an non semper in sectione, etiam mox post mortem instituta, foetidissima & intolerabilis putrilago, quæ neutiquam est in iis, qui morte violenta pereunt, observetur. Et quis dubitet, interitus causam non tam partis destructionem à sphacelo, sed potius putredinem, quæ principium illud vitale inficiat & contaminet, exillere? Spectat huc quoque præfagium illud mortis, quod vulgus ex corvis & nocturnis importuno cantu ægrotantium domos molestantibus, promittit, quæ effluvia putrida, ex ejusmodi corporibus exhalantia, propius accedunt. Ex hisce jam facile quoque elicitur ratio, quare medicamenta, quæ narcotici agunt, tam graviter vires affligant, stuporem, torporem sensibus motibusque inferant, ita, ut non immerito à cautiore medicis veneris annumerentur. Aer vapore carbonum, vel sulphuris vivi, aut aliis peregrinis exhalationibus refertus, non ob id solum interficit, quod aeris liberum accessum ad pulmones impediat, sed maxime, quod sese altius sanguini insinuans, ejus nobiliorem spirituofam partem contaminet.

§. XXV.

Ergo non mens, non anima sensitiva, adæquata & perpetua ac proxima causa est motuum vitalium systoles & diastoles, quibus omnes actiones secundum & præter naturam celebrantur: sed fluidum tenuissimum, calidum, elasticum, quod in minimis membranarum ac nervorum tubulis & in ipso sanguine continetur, horum motuum, adeoque vitæ, sanitatis & morborum causa est.

CAPUT IV.

De Motu Fibrarum vitali Elastico.

§. I.

DUplex motus vitalis est: unus in corde & arteriis atque in toto canalium genere reperitur, & in reciproca systole & diastole, sive in expansione & contractione, vasorum consistit, quo fluida à centro ad ambitum corporis pelluntur: alter in toto fibrarum & musculorum & membranarum systemate conspicitur, & in elasticitate, resistentia, sive tono versatur: uterque ad circulum sanguinis modificandum multum contribuit.

Scholion.

Motum illum elasticum, quem fibris partium solidarum adscribimus, Hippocrates L. de locis in homine, cutis tensionem & adstrictionem, alii tonum & robur partium, nonnulli villorum contractilitatem nominant. Nos potius illum motum, quo fibræ gaudent, elaterem constrictorium & expansivum, sive motum elasticum, appellare volumus.

§. II.

Corpus elasticum illud est, quod ex variis filamentis duris, tensilibus constructum & vi alterius corporis expandi ac constringi, sive elongari ac abbreviari potest, qua vi cessante, in pristinum statum se restituit.

Scholion.

Ita ligna, coria, laquei, stramina, crines, spongiæ tæta sunt naturæ, ut à causa externa facile expandi, elongari & rursus quoque constringi & abbreviari possint: & hæc est ratio, quare hæc corpora, ad præparanda pulcherrima instrumenta, quibus humiditatem & siccitatem aeris explorare solemus, usurpentur, quandoquidem si humidum sese horum poris insinuat, distensionem ac elongationem efficit, quo à calore & siccitate exulso, filamenta coarctantur, inque pristinum statum revertuntur.

§. III.

Fibras, ex quibus solidæ partes animantium constructæ sunt, simili motu elastico gaudere, pluribus & indubis argumentis evinci potest.

Scholion.

Mira est expansio, quam cutis in hydropicis, in gravidis, scrotum in hernia intestinali, uterus à foetu grandiori, & non raro gemello, ventriculus à nimia ciborum copia, intestina à flatibus, glandulæ colli in scrophulis, testium canaliculi ab humore ibi stagnante, experiuntur: ubi tamen mirabile, quod remota causa expansionis, brevi intervallo in pristinum rursus & naturale spatium ac statum revertantur.

§. IV.

Attenta observatione constat, cœlo existente humido & temperate calido, ut fit vere & autumnus, sole inclinate, vel vento ex occidente aut meridie flante, cutem totumque corporis habitum inflari ac tumidiorem reddi, vasa quoque distendi ac majora apparere.

§. V.

Quo magis calor & humiditas intenditur, ut fit in balneis vaporosis & laconicis, eo tumidior fit corporis habitus, pori ac tubuli cutis magis expanduntur, vasorum sanguiferorum tenuissimæ ramificationes in conspectum veniunt, à nimia etiam interna sanguinis expansione, humor copiose per poros extruditur.

§. VI.

Observamus quoque, cœlo existente frigido & rigido, ut fit hyeme & borea regnante, sub cœlo sereno, cutim ejusque poros contrahi, vasa detumescere, ut vix in conspectum veniant.

§. VII.

Atque adeo aeris fluidum tonum ac elaterem fibrarum corporis nostri diversimode afficit, alterat atque immutat. Neque id tantum in externis, sed & internis partibus visitur.

Scholion.

Animadvertimus non raro sub notabili aeris & tempestatis mutatione & quando austrum vel zephyrum diutius regnantem, subito boreas vel eurus excipit, & vice versa, in partibus antea sauciatis, in pedum clavis sensum molestum, punctorium, cum ardore & pruritu, sæpius perferri, adeo ut con incongrue dicatur, eos homines calendarium quasi perpetuum vivum in corpore gerere. Neque id tantum exterius observatur, sed & internæ partes inde mutationem quandam experiuntur: ita non semel notavimus, eos, qui ex pulmonum vitio laborant, vel qui calculum in vesica urinaria gerunt, à ventis septentrionalibus valde & sensibilibiter affici. Idem fit, quando calculus in renibus delitescit, qui à frigore aeris commoti & contracti artius ad calculum premuntur, sicque à calculo dolor excitatur. Multo magis veroid evenit in iis, qui ingenti capitis vel nervorum imbecillitate laborant: hi enim à quacunque levi aeris mutatione, statim incommodi quippiam pati solent.

§. VIII.

Potentia illa fibrarum elastica & robur partium, à sufficienti boni sanguinis per vasa arteriosa & fluidi per nervos affluxu, multum dependet.

Scholion.

Siquidem observamus, robusta ea esse corpora & musculos multum roboris in iis exferere posse, qui temperati & benigni sanguinis copia gaudent, imbecillia vero fieri corpora, & partes robur amittere, sub sanguinis boni defectu, qui ex morbis, vel ex nimia ejus profusio-

profusione, aut ex fame fit, nihilque cœrtius est, quam à laudabili alimento robur partium increfcere.

§. IX.

Quod à sanguinis in fibras influxu earum robur dependeat, vel ex eo colligitur, quod confestim, arteria cujusdam partis ligata, ejus ad omnem motum impotentia succedat.

§. X.

Neque tantum sanguinis, sed & fluidi nervei influxus, ad robur partium gignendum, necessarius est.

Scholion.

Patet hoc ipsum in paralyticis, nec non apoplecticis, ubi, vitio vel obstructione residente in cerebro, vel in spinali medulla, atonia, resolutio & flacciditas partium subjectarum, cum impotentia motus & gravitate instar ponderis, consequitur.

§. XI.

Quod fluidum nerveum male affectum, vel præternaturaliter commotum, tonum, elaterem & robur partium immutet, animi pathemata luculentum testimonium edunt.

Scholion.

Ita observamus, à terrore partes externas fortiter constringi, ut, vasis compressis, sanguis ab ambitu ad interiora & majora vasa circa cor & pulmones feratur, unde ejus palpitatio & circa præcordia anxietas, cum extremorum frigore, suboritur. A tristitia, fluidi nervei influxus valde intercipitur, unde omnes fere universi corporis partes suum robur ac tonum amittunt, atque magna ad morbos chronicos fit dispositio: quin ob vires deperditas, affectus alias benigni, facile malignitatem, non sine periculo, induunt. Iracundiæ affectus, dum vehementer fluidum nerveum commovet, validiorem stricturam in universo fibrarum systemate provocat, hinc pulsus & respiratio citatior cum augmento caloris fit, & validissimo tunc robore & potentia homines pollent.

§. XII.

Sub fomno & à medicamentis, quæ eum conciliant, ordinario fibrarum relaxatio, cum habitus corporis intumescencia, fit, quod eo tempore languidior & parcius fluidi nervei & sanguinis ad partes affluxus est.

§. XIII.

In iis, qui cholericæ sunt constitutionis, vel ob largiorem vini usum, celeriores habent sanguinis cûrsus, fibræ magis tensæ & validæ sunt; flaccidiores vero in phlegmaticis & cachecticis existunt.

Scholion.

Quæ omnia satis docent, robur & vim elasticam, quam exferunt partes, à fluidorum natura & affluxu plurimum dependere. Et quia robur & tonus partium, à boni sanguinis & fluidi nervei temperie ac copia in partes influente dependet, aër vero & alimenta sanguinis statum ac texturam varie alterant, sequitur, aërem utique serenum & purum & solari calore temperatum, & benigna ac congrua alimenta, ad robur partium, & conservandum, & amissum restituendum, plurimum valere, quod etiam ipsa experientia abunde corroborat. Ex hoc quoque porro conficitur, ea remedia optima esse roborantia, quæ blandam sanguinis spirituoscentiam principio subtili, suavi, oleoso promovent.

§. XIV.

Eximius & plane mirabilis elateris, qui in fibris consistit, est usus ad fluidorum vitalem progressum moderandum, modificandum & facilitandum, item ad secretiones atque excretiones, ad vitam & sanitatem admodum necessarias, tuendas.

§. XV.

Fibræ musculares, tensione sua, sanguinis, ab ingenti pressione cordis & arteriarum, ad partes appulsi renituntur; nisi enim magna vi elastica resisterent, nimia fieret vasorum & fibrarum expansio, adeoque tardissime sanguis per venas ad cor remearet & partium fieret intumescencia.

Scholion.

Notum est vasa sanguinea inter membranas & muscululos ferri, quorum tonus & resistentia ejus regressum egregie adjuvat. Nam pressio mutua semper est æqualis, sive corpus elasticum tanta vi resistit, quanta comprimitur.

§. XVI.

Sanguinis affluxus & inde facta distensio, sese habet ut fibrarum & vasorum resistentia, quare aucta eorum resistentia, minus sanguinis admittitur & plus affluit alio, eadem vero rursus minuta, redit affluxus ad priorem statum.

Scholion.

Hæc fibrarum tensio & remissio magnam mutationem in sanguinis motu & affluxu ad partes efficit, & hinc maximæ in pathologicis est considerationis. Nam circuitus sanguinis inæqualis ejusque in aliis partibus nimia congestio & inde facta stagnatio, vasorum distensio, vel apertio, quæ multorum morborum productrices sunt, inde originem tradunt. Mentionem vero potentiae ejusmodi partium tonicæ jam injicit *Hippocrates lib. de loc. in homine §. 15.* cum ait: *fluxiones propter frigus fiunt, cum caro in capite & venæ tensæ fuerint. Hæ enim horrente carne & ad angustias perveniente adstrictæque ac excludente, humiditatem exprimunt & simul carnes ipsæ contra exprimunt ad angustias pervenientes & capilli sursum erecti fiunt, utpote simul undiquaque fortiter compressi.* Quibus verbis clarissime subindicat, à tensione, angustia & adstrictione fibrarum, humores ad alia loca cogi ibique exprimi. Idem *Hippocrates* sanguinis motum translatorium ab una parte ad alteram morbiferam passim, & egregie *lib. de virginum morbis*, docuit. Neque tantum in pathologicis hæc doctrina multi usus est, sed etiam in remediorum derivantium viribus explicandis insignem lucem accendit. Hinc *Hippocrates Sect. V. aph. 5.* mulieri, ad cohibendum menstruum, cucurbitam mammis apponit. Nos, ad derivandum motum sanguinis à partibus superioribus, in hæmorrhagiis, fluxionibus capitis & oculorum, item in doloribus superiorum partium, à distensione ortis, jubemus pedes immitti in balneum, ut fibrarum tensione & resistentia minuta, humores majori copia rursus affluant, superiores deferendo. Et hujus motus fibrarum tonici usum in pathologicis & praxi nemo præclarius *Baglivo* & *Stahlio* ostendit.

CAPUT V.

De sanguine humano ejusque natura.

§. I.

Sanguis humor vitalis est, quo nullum animal perfectum caret, & in quo vita & corporis nostri robur continetur: quo effuso, omnis corporis & animæ operatio cessat; quapropter utique, ut ejus indolem plenius atque exactius cognoscamus, opus est.

Scholion.

Anima & vita, ipsius quoque scripturæ sacræ testimonio, est in sanguine, prout nempe is in orbem circumvehitur, & per universi corporis vasculosam compagem motu agitur;

agitatur ; nam simul ac hic motus quiescit, omnium partium functio & animæ operatio intercidit.

§. II.

Sanguis est liquor purpureus, ex parte aquea, sulphurea & terrea subtiliori compositus.

Scholion.

Sanguis est humor, ex partibus indole inter se differentibus constans : nam ex solidis & fluidis, gravibus & levibus, diaphanis & opacis, subtilioribus & fixioribus, aqueis, terreis & oleosis inflammabilibus, minus bene coherentibus, mixtus est.

§. III.

Sanguis maxime ex fluido & solido elemento est conflatus.

§. IV.

Solidum inexistere sanguini, vel ex eo apparet, quod liquida ejus parte leniori calore evaporata, sicca & solidescens substantia relinquatur.

§. V.

In sanguine sani hominis tres ordinarie partes liquidi, & una pars solidi continentur.

Scholion.

Quæ sit proportio solidi & liquidi in sanguine, quam optime pondus docet. *Boyle in historia naturali sanguinis humani* ex uncis quatuor & drachmis quinque sanguinis, unciam unam & drachmas tres atque XXXIV. grana solidæ substantiæ obtinuit. Nos semper ex quatuor uncis sanguinis, sive vena incisa, sive scarificatione ex poris tubulis extractus fuerit, unciam unam solidi & sicci pulveris, facta prius leni in fornace calido evaporatione humidi, obtinemus. Ex hac vero theoria sanguinis addiscimus, potulenta tripla fere portione solidos cibos exsuperare debere.

§. VI.

Sanguinis humida portio longe citius in auras avolat, quam aliud quoddam aqueum.

Scholion.

Quo experimento probare possumus, copiosas tenues & volatiles in sanguine hospitari partes, quæ calori ac motui promte obsecundant, & consequenter mobilioris, subtilioris & valde expansivæ indolis sunt.

§. VII.

Sanguis humanus aqua specie gravior est.

Scholion.

Utut sanguis ex partibus aqueis valde tenuibus sit compositus, tamen, propter solidum in eo contentum, aqua est ponderosior, quod sequenti experimento certum fit : quandocunque vas aqua repletum uncias novem & drachmas sex ponderat, fit, ut, si idem vas sanguine humano impleatur, uncias X. drachmas duas ac grana IV. pendeat. Ergo sanguis uncia dimidia in dicta mensura aquæ præponderat. Et quod solidum in sanguine, ejus sero, seu liquido, gravius sit, vel ex eo clare dignoscitur, quod serum sanguinis parti rubicundæ supernatet.

§. VIII.

Solida pars sanguinis non unius ejusdemque, sed valde dissimilis, est indolis.

Scholion.

Siquidem sanguis humanus exsiccatus & chymico igne tractatus, primo phlegma, deinde oleum subtile, postea crassius, fundum petens, empyreumaticum, cum

Frid. Hoffmanni Oper. Tom. I.

fale volatili, & denique terram fixam, in vasis fundo relictam, elargitur. Sanguis enim omnes ejusmodi materias continet, quales ex omnibus animantium solidis partibus igne eliciuntur. Quo magis confirmatur, solida ex fluidis suam indolem atque incrementum accipere.

§. IX.

Optimus sanguis gelat iniformem consistentiam habet, & non nisi gelatina purpurea videtur.

Scholion.

Sanguis valde convenit cum gelatina, qualis ex animantium carne & ossibus excoquitur. Siquidem frigore facile concrefcit & temperatæ indolis ac nullius evidentis saporis est. Et sicuti gelatina, evaporata aquea parte, in gluten transit; ita etiam ex sanguine optimum gluten parari potest : quin imo calore interno sanguinis serum subinde tam spissum evadit, ut per sectionem venæ emissum, firmioris glutinis faciem ac formam frigore induat. Deinde acidum fortius gelatinæ coagulum inducit; quod evenit quoque cum humano sanguine. Tum gelatina siccata & destillata phlegma & subtile oleum, cum fale volatili & fixiori terra, largitur, non secus, ac cum sanguine humano fieri solet. Et quod sanguis sit gelatina diaphana, à sulphurea & rubicunda materia tincta, clarissime apparet, quando ipse guttatim in aquam immittitur, ubi rubicunda sulphurea portio supernatat; vel quando sanguis in calidam aquam effunditur, tunc non multo post substantiam mucidam albam, tenuibus filamentis contextam, in fundum dimittit.

§. X.

Sanguis gelatinosæ temperatæ indolis & consistentiæ est, ideo sequitur, ea alimenta, quæ gelatinosum succum coctione fundunt, vel quæ principia gelatinam constituentia continent, optimo sanguini ingenerando esse aptissima.

Scholion.

Atqui ex hisce jam facile petenda est ratio, quare carnes juniorum animantium copiosum sanguinem ingenerent, & cur Gallorum natio, cui optimi & gelatinosi succi ac cibi familiares sunt, tam subito sanguinem amissum recuperet, & ob id liberaliorem sanguinis missionem facilius, quam alii populi, tolerare possit. Neque jam in obscuro erit ratio, quare alimenta, in quibus principium salinum, acidum aut spirituosum prædominatur, aut quæ nimis terrea ac compactæ substantiæ sunt, ad sanguinem augendum minus apta existant.

§. XI.

Quancumque sanguinis textura multum similis sit gelatinæ animantium : attramen ille differentes quoque ab hac quasdam proprietates obtinet.

Scholion.

Primo sanguis exsiccatus longe promptius flammam concipit ac diutius eam alit, quam siccata gelatina. Deinde major quantitas salis volatilis & olei ex sanguine, per destillationem, quam ex gelatina, e. g. cornu cervi, obtinetur. Tum sanguis putrefactus tetrum magis foetorem, quam alia quævis gelatina corrupta, exhibet. Itaque sanguis magis excocta & subtilior reddita gelatina dicenda est.

§. XII.

Sanguis ex parte subtili sulphurea constat.

Scholion.

Quod copiosum sulphur insit sanguini, ejus inflammabilitas testatur, & quod ingentem olei quantitatem sub destillatione fundat & motu valde incalescat.

D

§. XIII.

§. XIII.

Sanguinis calor dependet quam maxime à parte ejus subtili sulphurea, in motum concitata.

Scholion.

Quamdiu sanguis fertur per vasa, tam diu sanguis calidus observatur. Hinc calor nihil aliud est, quam intestinus partium ejus sulphurearum motus, qui eo fortior est, quo major partium sulphurearum copia est, & quo plus motu attritivo agitantur & mutua collisione impelluntur. Hinc patet ratio, cur celeriori sanguinis circulo facto, ut fit in febre, à vehementiori corporis exercitio, ab assumtis spirituosiss, intensior quoque calor fiat.

§. XIV.

Calore partes temperatæ, oleosæ ac terrea sanguinis alcalisantur & subtiliores fiunt; quare ex connubio & mixtura principii alcalini & olei subtilis, purpureus sanguinis color emergit.

Scholion.

Sal alcalinum, cum sulphure subtiliori commixtum, leniori calore ac digestionem, rubicundum induere colorem, experimentis chymicis compluribus stabiliri potest. Videmus spiritum vini rectificatissimum fortissimo sali alcalino, quod fit, quando nitrum cum regulo antimonii æquali portione calcinatur, superfusum, brevi elapso tempore, elegantissime rubicundo colore imbui. Olea destillata sulphuri vivo, vel si mavis, sali lixivioso recluso affusa, leni digestionem, rubineum colorem induunt. Spiritus ex animantium partibus destillati, & sale volatili ac oleo turgidi, primo diaphani, brevi tempore colore obscure rubicundo tinguntur. Et quod portio sanguinis subtilior & sulphurea gelatinæ ejus purpureum colorem reddat, vel hoc unicum experimentum satis evincere poterit, quod sanguis ex secta vena in aquam tepidam effusus, ingentem portionem substantiæ mucidæ diaphanæ in fundum demittat, aqua vero supernatans rubra, post factam evaporationem, tenuem rubicundum pulverem, qui promississime ardet, relinquat.

§. XV.

Pars subtilior sanguinis sulphurea, cum teneriori terra alcalina commixta, ipsi deterisivam penetrantem vim conciliat.

Scholion.

Ex oleo cum alcali intime nupto, saponiformem absterisivam texturam emergere, ex mechanica chymica compertum est. Et ejusmodi deteritiva & quasi saponiformis materia in sanguine animantium quoque apparet, unde ad abstergendas pingues, viscidas sordes eo utiliter utuntur. Et inde fluit etiam ratio, quare sanguis è vena emissus calidus & in terram prolapsus, lignis eorumque poris tam alte se insinuet, ut ejus maculæ nulla fere arte possint extergi.

§. XVI.

Saponiformis & absteriva sanguinis indoles, vitali humorum circulo conservando admodum proficua videtur.

Scholion.

Cum enim sanguis penetrantis alcalinæ sulphureæ & abstergentis indolis sit, hinc simul medicam obtinet virtutem, qua viscidum & acidum, cum chylo ex alimentis advectum, quod obstructions minimorum tubulorum minatur, egregie corrigit ac temperat. Unde non mirum, acidum ad sanguinem delatum mox in salsum converti. Ejusmodi quoque absteriva alcalina sanguinis indoles impedit, quo minus in tenuissimis tubulis ipse consistat & perniciosas obstructions efficiat.

§. XVII.

Pars sanguinis sulphurea, volatilis & alcalisata causa est, cur sanguis tam subito in foetidissimam putredinem ruat.

Scholion.

Quemadmodum in sanguine, quamdiu decenti modo movetur, vita & robur universi corporis consistit: ita etiam idem ille, omnis corporis corruptionis, putrefactionis, immo mortis, materiam ac causam subministrat, quod fit, simul ac desinit moveri & in parte quadam quiescit. Nullum enim corpus tam foetidæ putrilagini est obnoxium, quam sanguis humanus, qui in habitu corporis consistens, celerrime in fermentativam putrefactionem abit, quæ jure meritoque agiliori, calidæ, sulphureæ sanguinis parti, ad motum ejusmodi dissolutionis intestinum maxime idoneæ, debetur. Et observamus, sanguinem fluidiorem & floridiorem, qualis est sanguineorum & cholericeorum, si incipit quiescere, longe citius ac vehementius putrescere, quam qui est solidioris texturæ, qualis est melancholicorum; & ob hanc quoque causam sanguineos plus morbis putridis, quam melancholicos infici, & eorum corpora post mortem citius præ aliis putrescere, animadvertimus.

§. XVIII.

Sanguinem humanum ingreditur quoque elementum paulo fixioris naturæ, terreum nempe, quod sulphuris nimiam activitatem infringit ipsique temperiem conciliat.

Scholion.

Aqua sanguini fluiditatem, gelatinæ nutrimentum partium, sulphurea portio calorem, rubedinem, subtilitatem & penetrantiam foenerat; terra vero firmiorem ipsi consistentiam largitur, sub qua, ceu involucro, ligata subtilis portio retinetur.

§. XIX.

Multum sanguinis ingredientia, & consequenter ejus consistentia, color ac virtus differunt, eaque ab alimentis, item à dispositione vasorum & solidorum structura ac fluidorum progressu, maxima ex parte dependent.

Scholion.

Populi, qui victu crasso, duro & falso fruuntur, ut Finni, Westphali, Pomerani, item qui multum comedunt, parum corpus exercent & nullam sanguinis evacuationem experiuntur, item ii, qui fibras duras, crassas, densas obtinent, senes, & qui temperamento melancholici sunt, sanguinem è vena emissum consistentia crassum, pondere gravem, colore nigricantem habent, qualis juxta *Celsum L. 2. c. 10.* utiliter effunditur, quia profundas inflammationes & difficiles chronicas passiones, quæ ex ingenti viscerum obstructione & infarctu oriuntur, minatur. Qui vero habitus corporis sunt spongiosi, & angustiora, sed copiosiora, vasa gerunt, corpus motu exercent, & cibos boni succi assument, hi non modo fluidiorem & floridiorem sanguinem alunt, sed & copiosiore citius generant, quare etiam ob sanguinis fluidioris copiam & orgasmum, hæmorrhagiis, inflammationibus, sed levioribus, abscessibus, ipsius, febribus admodum expositi sunt.

§. XX.

Cum sanguis ratione consistentiæ, gravitatis atque indolis, tam in statu sano, quam morbofo, multum differat, sequitur, ut medicus differentem sanguinis indolem probe cognoscere debeat.

Scholion.

Gravitas sanguinis, præter alia experimenta, optime cylindro statico, hunc in usum à nobis confectum, exploratur, cujus beneficio sanguis è vena in vitrum, quod

quod certam capit mensuram, emissus, exacte ponderari potest.

§. XXI.

Neque nimis crassus, niger, neque nimis fluidus, tenuis, purpureus, optimæ indolis est, sed qui medio modo se habet, & facile in purpuream gelatinam concrevit.

Scholion.

Quando tam crassus est sanguis ut serum mox in lardum, vel gluten quoddam coeat, profundæ inflammationis, vel gravis chronici morbi ex obstructione, metus est. Si copioso sero imbutus est, jecoris & renum in fecerendo imbecillitatem & morbos ab impuro sero oriundos, ut scabiem, arthritidem & scorbuticam cachexiam indicat. Sanguis vero nimis fluidus & purpureus, qui omne coagulum & grumescentiam respuit, pessimæ notæ est, & talis subinde ex iis, qui peste, hæctica, phthisi, variolis & febribus acutis moriuntur, extrahitur.

§. XXII.

Ex solo sanguinis aspectu sanitas & integritas partium corporis internarum æstimari neutiquam potest.

Scholion.

Præclare *Ballonius L. 2. Ephem. p. 191.* scribit: *plurimis impurus sanguis detractus est, quibus mortuis & sectis, partes omnes integræ deprehensæ, aliis purus, quibus viscera & pulmones putres sunt inventi. Formosissimis mulieribus impurus detrahatur.* Siquidem morbi gravissimi non tam in partibus fluidis, quam potius in solidis, sedem suam fixam habent, quando hæ inflammatae, sphacelatae, induratae & obstructæ sunt.

§. XXIII.

Sanguinis quantitas non una eademque est in homine, sed multum pro diversitate habitus & structuræ corporis, ætatis, alimentorum & vitæ generis variat.

Scholion.

Nonnulli copiosum sanguinem in vasis custodiunt, eumque amissum cito recuperant, in aliis vero hæc reparatio tardius procedit. Quod robusti & sani homines præ tenerioribus, imbecillioribus & valetudinariis, majorem sanguinis copiam in venis foveant, extra dubium est. Hinc quoque venæ sectio illis magis, quam his convenit.

§. XXIV.

Sanguis licet ex elementis, dissidentis naturæ ac virtutis, & quæ male uniuntur partibus compositus sit; attamen motus intestinalis ac progressivus has optime miscet & conjungit, & homogeneous vitalem liquorem reddit.

Scholion.

Sanguis in tubulo vitreo per accuratius microscopium quando inspicitur, apparet ut aqua, cui innumeri rubicundi globuli innatant, qui nihil aliud sunt, quam gelatinosa & sulphurea sanguinis pars, quæ per motum & intestinam agitationem divisa, globosam assumit figuram. Omnia enim heterogenea, in alieno fluido contenta & quassata, globosam figuram accipiunt. Et quo magis hi globuli sunt divisi, adeoque minores & copiosiores, eo sanguis fluidior, floridior & ad circulum vitalem tuendum aptior existit: quo majores vero & pauciores hi globuli sunt, eo crassior ac nigricantior est.

§. XXV.

Motus ille intestinalis partium sanguinis calorem efficit, hic vero in ipsam sanguinis texturam agit; quare non potest aliter fieri, quin continuus ille motus

Frid. Hoffmanni Oper. Tom. I.

calidus ingentem subinde mutationem in sanguinis consistencia efficiat.

Scholion.

Motu calido intestino adaucto partes unitas à se invicem discerpi, dissolvi, fixas volatilifari, insipidas sapidas & falsas reddi, pingues ac temperatas acres & valde calidas fieri, compluribus experimentis physicis ac chymicis comprobari potest. Idem animadvertimus in sanguine nostro, ubi nimius calor eum ferme totum in excrementa falsa, sulphurea, biliota, viscida ac mucosa, sub febre ardente & præsertim hæctica, convertit.

§. XXVI.

Motus & calor continuam in sanguine humano facit mutationem, qua de causa unus idemque non diu in venis perdurare potest.

Scholion.

Ex quo intelligitur, quam inepte nonnulli medicorum fingant, primum à nativitate & à parentibus acceptum in utero sanguinem adhuc corpori inexistere, qui ratione suæ mixtionis & temperiei, causa sit temperamentorum.

CAPUT VI.

De Sanguinis circuitu.

§. I.

Quamquam sanguis optime temperatus est & convenienti etiam quantitate gaudet; tamen, nisi continuo moveatur, perniciem, quin immo mortem, corpori infert, quia in tetram putrilaginem confestim ruit: si vero jugi & non interrupto motu per vasa fertur, vitam conservat & corpus ab omni corruptione vindicat; quare hujus motus vitalis naturam, causas & modum scrutari fas est.

§. II.

Sanguinis & humorum in animantibus progressivus motus est circularis, dum à corde, tanquam principio motus, per tubos arteriosos ad partes adducitur, & ab iis per venas ad idem principium reducitur.

Scholion.

Hinc sanguinis & humorum in circulum abiens motus divinum profecto inventum est, quo non datur ad rem medicam illustrandum præstantius, sine cujus cognitione, nihil in arte salutari agi, vel explicari potest. Mirum tamen est, per tot secula illum latuisse, donec ab illustri Anglo, *Harvæo*, superiori seculo propositus & inconcussis argumentis stabilitus fuit. Vestigia quidem & indicia circuli sanguinis magnus *Hippocrates* in monumentis suis reliquit; attamen propter anatomes id temporis incultum studium, res non satis perfecte detegi potuit. Loca, quæ mentionem circuitus sanguinis faciunt, in primis exstant *lib. 11. de diæta* §. 45. ubi disertis verbis scribit: quod in febre celerem circuitum faciant ea, quæ in corpore sunt, & quod tum totum corpus, majori transpiratu facto, purgetur. Item *lib. de flatibus* §. 21. ita habens: *Cum prohibetur cursus sanguinis, alio quidem loco consistit, alio lentius penetrat, alicubi autem citius pertransit, qua inæqualitate sanguinis transitus facta, omnigenæ inæqualitates per omne corpus contingunt.* Porro *lib. de alimentis* §. 4. in pilos alimentum, id est sanguis, in ungues & in extremam superficiem intrinsecus pervenit, forinsecus alimentum ex extrema superficie ad intima pervenit. Nec non *lib. de locis in homine* §. 6. solæ arteriæ temporales, ex venis non sanguine irrigantur, sed digrediuntur ex ipsis sanguis, digressus vero, contrarium motum habet influendi, & di-

gressus quidem volens sursum migrare, superne vero influens volens deorsum recedere, hic impelluntur ac diffunduntur & mutuo circumagitantur & pulsus venis exhibent.

§. III.

Sanguinis circuitum indubiis argumentis & experimentis demonstrari posse clarissimum est.

Scholion.

Motum sanguinis & humorum in orbem redeuntem inter alia hæc clarissime evincunt. I. Quod vase quodam vulnerato, omnis ex corpore sanguis effluat, quod fieri non posset, nisi ex venis in arterias, & rursus ex his in venas, transfiret. II. Si coloratus liquor per siphonem in venam injicitur, tunc per arteriam in altero latere apertam effluit. III. Arteriæ ligatæ, inter vinculum & cor, sanguine plenæ fiunt, inter ligaturas vero & partes externas, inaniuntur & detumescunt; venæ autem ligatæ, inter ligaturam & partes externas sanguine implentur, inter ligaturam vero & cor deplentur; evidenti indicio, sanguinem à corde per arterias ad partes advehi, per venas autem versus cor revehi. IV. Ligato trunco iliaco arterioso, omnes venarum iliacarum ramificationes, infra ligaturam, sanguine evacuatæ conspiciuntur. V. Transfusio sanguinis ex uno animante in alterum, feliciter aliquoties celebrata, hunc sanguinis circularem motum eximie declarat. VI. Fluxus sanguinis ex arteriis in venas, per pulchre in piscis cauda bene elaborato microscopio accurate conspici potest.

§. IV.

Sanguinis & humorum progressivus & circularis motus, legibus hydraulicis, quæ motum corporum fluidorum exactissime tradunt, subjectus est.

Scholion.

Corpus animantium machinam esse hydraulicam, in qua impulsu & pressione solidorum, fluida per tubos moventur, jam dudum accuratiores medicorum & anatomicorum agnoverunt. Et sicuti omnis fluidorum progressus, certis legibus, secundum quas certi & constantes effectus observantur, continetur: ita etiam has ipsas in corpore animantium deprehendere licet.

§. V.

Cor est principium motus & circuli sanguinis.

Scholion.

Quemadmodum in antlia, beneficio emboli, liquida per orificia & tubos magna pressione ejiciuntur: ita cor perfectissime ejusmodi antliam & machinam hydraulicam æmulator, qua, beneficio compressionis ventriculorum, sanguis in annexos tubos per eorum orificia fortiter ejicitur. Omnis enim impetus ac vehementia motus sanguinis, non secus ac in hydracontisteriis & siphonibus, à viribus prementibus dependet.

§. VI.

Quando cor contrahitur, sive systolen patitur, ejus fibræ intumescunt, abbreviantur, conus cordis versus basin ejus immobilem adducitur & latera arctissime, non secus ac in foliis, comprimuntur, & sic cavitas interna minor redditur & coarctatur, & hac violenta cavitationum coarctatione, sanguis premitur in annexos tubos arteriosos.

Scholion.

Is est fibrarum in corde situs, ut exteriores, à sinistro cordis latere versus dextrum porrectæ, ad basin ejus oblique descendant, interiores vero à dextro latere versus sinistri basin assurgant, sicque spirali flexu, geminam sibi oppositam helicem forment, adeo, ut commode cum linteo, ad exprimendam aquam utrinque contorto, possint comparari.

§. VII.

Cor, seu principium motus circularis, instar antliæ, & recipere, & expellere, continuo flumine debet sanguinem; hinc pluribus cavitatibus, duobus quoque diversis tubis, diversæ figuræ & situs valvulis duabus, nec non distinctis motibus, instructum sit necesse est.

Scholion.

Cum enim una cavitas, sive amplus canalis, seu cordis ventriculus, sanguine repletur, alter exinanitur, & contra. Et quia ad cor remeare debet sanguis, necesse fuit, ut per unum tubum, qui est arteria, ad partes advehatur, per alterum vero, qui est vena, revehatur. Et quia cor recipere & expellere etiam debet sanguinem, duplici opus erat motu, uno activo, qui est constrictionis & coarctationis, altero passivo, qui fit illo remittente motu, nempe relaxationis & expansionis.

§. VIII.

Cor non unus est musculus, sed ex quatuor conflatum est cavitatibus musculosis, duabus nempe minoribus, quæ auriculæ appellantur & assistunt venarum, tam cavæ, quam pulmonalis, orificiis, & duabus majoribus, quæ cordis ventriculi vocantur. Tot itaque sunt emboli, quot sunt cavitates, quarum singulæ motu contractionis & dilatationis, sive systole & diastole, gaudent.

Scholion.

Auricula dextra dum comprimitur, pellit sanguinem ad cordis dextrum ventriculum, & ventriculus dexter dum coarctatur, sanguinem pellit ad pulmones: & auriculæ sinistræ contractione ex pulmonibus rediens cruor premitur ad sinistram cavitatem, quæ contracta, sanguinem magna vi pellit in arteriam aortam, sive magnam, & per hanc per totum corpus. Est vero auricula dextra capaxior sinistra, quia tardius sanguis per venam cavam sursum affluit: in sinistram vero longe celerius ab expansione & motu pulmonum premitur. Accedit quod sinistra sacco venæ pulmonalis apposita sit, in quem sanguis gravitate sponte descendit & ex hoc quoque in sinistram ventriculum.

§. IX.

Cum beneficio sinistri ventriculi sanguis per universum corpus propelli debeat: triplo crassior, rugosior & robustior est dextro, ut majori robore ac potentia motrice polleat; dein figura oblonga, pluribus hiulcis distincta, gaudet: quum si alia, cubica, vel sphaerica fuisset figura, nunquam tam bene potuisset comprimi.

Scholion.

Sinistri ventriculi potentia & vis motrix profecto maxima est, quia totius sanguinis & humorum massæ, quæ in universo vasorum systemate continetur, pondus & resistantiam vincere debet, siquidem in omni motu progressivo, movens majori instructum esse debet potentia, quam corpus mobile resistens. Accedit, quod aortæ varia curvatura & divaricatio in ramos ejusque tunicarum durities ac renitentia, nec non ultimorum vasculorum angustia, pressionem huic, quæ fit à sinistro ventriculo, valde etiam resistat. Et propter vehementiam motus, quam hic ventriculus exercet, efficitur, ut cordis systole fortissima manus compressionem non cohiberi possit, sique amputato cordis cono, in ventriculum immittas digitum, is vix à manu fortius potest constringi, quam tum à ventriculi parietibus comprimitur.

§. X.

Quemadmodum in hydraulicis, quo magis fluidorum motus promoveatur, opus est valvulis, quæ fluidum in cavitatem vel vas admittunt, regressum vero per eandem viam impediunt: ita quoque, ad promptiorem &

non interruptum sanguinis motum conservandum, artificiosa & mechanica valvularum, quæ cordis vasibus assistunt, inque tubis venosis conspiciuntur, structura, situs ac figura plurimum contribuit.

Scholion.

Valvulæ pelliculæ sunt, vel triangularem, vel semilunarem figuram habentes. Illæ ita sunt positæ, ut transitum humorum ad cor liberum concedant, regressum vero impediunt, semilunares autem convexa sua parte eam regionem respiciunt, unde sanguis accessit, sed concava parte exiguum sacculum formant, qui impedit regressum, unde apparet, quare tricuspidales venarum, semilunares vero arteriarum orificiis appositæ sunt. Nam cum uterque ventriculus in sua basi geminum orificium habeat; utrique veluti janitor erat præficiendus, quorum alter in recipiendo & retinendo, alter in emittendo & excludendo, occupatus esse debebat, ne sanguis per utrumque orificium fluat refluatque & hoc ipso motus sanguinis turbetur.

§. XI.

Ad promptiorem & non interruptum sanguinis progressum musculosa tubi arteriosi, sive aortæ, fabrica plurimum confert, qui simili dilatationis & compressionis motu cum corde gaudet.

Scholion.

Non modo cor emboli vicem sustinet, dum hujus beneficio sanguis ex sinistro ventriculo in tubum magnum arteriosum pellitur, sed & hic ipse cylinder cavus & musculosus est & ex multis stratis fibrarum annularium & longitudinalium, potentia elastica gaudentium, compositus, qui simili expansionis & contractionis motu, ut cor, gaudet. Quando enim fibræ annulares abbreviantur & tunicæ ad se invicem accedunt, cavitas minor redditur & sanguis propellitur in tubum venosum, per quem ob ascensum progressio difficilior est, unde motu arteriorum opus fuit. Et quod in iisdem magna vigeat sanguinis pressio, vel maxime inde apparet, quod digitus, in apertam arteriam immissus, valde comprimitur.

§. XII.

Sicuti in hydraulicis expeditus fluidorum motus est per canales continuos, licet inversos: ita etiam in animalium corporibus tubus ille magnus arteriosus & venosus unicum continuum canalem conicum & cylindricum inversum efformat, cujus basis est in corde, apex vero in partibus extremis.

Scholion.

Mutuum vasorum communicationem suo jam tempore non ignorasse magnus noster *Hippocrates* videtur, qui *libr. de locis in homine* hæc habet: *communicant omnes venæ & conflunt inter se mutuo, & aliæ quidem sibi ipsis per se committuntur ac coincidunt, aliæ vero per venulas à venis extensas.* Hæc vasorum continuïtas partim injectionibus liquidorum, dum ea ex arteriis in venas prompte transeunt, partim etiam oculari inspectione in curiosissimis *Cl. Ruyschii* præparatis, de quibus videndi ipsius *thesauri*, confirmatur. Equidem recentiorum nonnulli poros intermedios admittere malunt: sed quia hi pori non confusam, sed ordinatam constructionem habere debent, ut sanguis ab arteriis recipiatur & in venas immittatur, alias enim perpetuæ fere essent stases & extravasationes: hinc exiguum certe differentiam animadverto, an per pororum ordinatam & reticulatam texturam, an vero per minima vasa in rete contexta, sanguinem ex arteriis in venas progredi dicamus. Innumeræ divisiones & subdivisiones ramorum & ramusculorum in uno trunco arteriæ vel venæ occurrunt, ut ob subtilitatem fere sensus fugiant, nihilo minus tamen per hæc subtilissima

Frid. Hoffmanni Oper. Tom. I.

& angustissima vasa omnis humorum massa progredi debet. Sed quemadmodum liquor, etiam saturate coloratus, in tubos capillares vitreos receptus, colorem exuit, ita etiam nullum dubium est, quin sanguis purpureus, per angustissimas vasculorum myriades pressus, rubedinem deponat, quæ tamen vascula, si nimium sanguine distenta fuerint, sensum antea fugientia, postea satis distincte rubra conspiciuntur, uti id fit in inflammationibus, quæ in partibus membranosis, ut ventriculo, intestinis oculorumque tunicis, resident.

§. XIII.

Ad expeditiorem sanguinis per vasa cursum non parum contribuit, quod vasa eorumque extremitates ac tenuissimæ ramificationes intra membranarum lamellas positæ sint, ne, hoc sepimento membranaceo munitæ, nimium aut distendantur, aut facile aperiantur, vel disrumpantur.

§. XIV.

Sanguinis motus per arterias multo velocior est ac per venas, partim quod propria gravitate sanguis descendat, partim quod arteriæ motu, quo carent venæ, instructæ sunt, per quas utique difficilis admodum sanguinis reditus est, quia contra naturam est, gravia sursum ferri.

§. XV.

Cum sanguinis cursus per arterias velocior sit: hinc angustiores & pauciores arterias, capaciores vero & numerosiores venas conspiciamus.

Scholion.

Capacitas & diameter venæ cavæ, item auriculæ dextræ, respectu sinistræ & arteriæ aortæ, circa cor & omnes partes longe major est, & numerus quoque venarum longissime arteriarum numerum superat. In pedibus usque ad genua, nos constanti observatione anatomica binas imo ternas semper venas, inter quas arteria locata est, conspeximus. Angustia vero & minor numerus arteriarum velocitate fluxus compensatur, secundum constantem & immutabilem legem hydraulicam.

§. XVI.

Perpendicularis & ob id tardior ac difficilior sanguinis per tubum venosum regressus, plurimis adminiculis providentissime adjuvatur: ex quibus sunt venarum juxta arterias situs, nec non tunicæ venarum musculosæ & valvularum in venis existentia, item vasorum tam arteriosorum, quam venosorum, intra musculos situs.

Scholion.

Valvularum in venis existentia ad promptiorem sanguinis fluxum non exigui usus est, reperiuntur frequentissime circa ramificationes binæ valvulæ ita locatæ, ut ex minoribus ramis sanguis proveniens, libere quidem penetrare possit, ex trunco vero majori versus extremitates impediatur, quia, si illuc urgeatur, valvulæ clauduntur. Ostendunt igitur hæ valvulæ sanguinem ex ramificationibus minoribus venæ cavæ ad majores, & ex his ad truncum ipsumque cor, moveri. Præterea venæ quoque musculosa tunica donatæ sunt, quæ tamen rarioribus & tenuioribus circularibus fibris gaudet, quibus utut manifestus pulsus & motus desit, tamen robore, resistentia & tono impediunt, quo minus sanguis has tunicas supra modum distendat. Venarum vero intra musculos situ non parum sanguinis regressus promovetur, quod maxime a motu & exercitatione corporis accidit, dum enim fibræ tenduntur, comprimuntur, non potest aliter fieri, quin sanguini in venis contento pressio & impulsus quidam accidat: id quod clarissime conspicitur, quando vena incisa sanguis mittitur, tunc semper digitis manus compressis, celerius effluit.

§. XVII.

Ne sanguis in angustissimis vasis restagnet & totus circuitus inde impeditior fiat, longe celerius ipse movetur in angustioribus, quam in capacioribus vasis; adeo, ut pro differentia angustiae, proportio reciproca velocitatis motus fluidorum crescat.

Scholion.

Sicut aequalis capacitas tubi, aequalem liquidi progressum & eandem velocitatem in qualibet tubi parte efficit: ita si difformis tubus est, velocitas non est eadem, sed major in ea parte, quae angustior est. Nam si ponamus, vim, quae fluidum pellit, esse aequalem, vas vero duplo angustius esse altero, necessario eadem fluidi quantitas reciprocam proportionem longitudinis in utraque canalis parte servabit, ut in angustiori contenta, duplam canalis longitudinem occupent, eadem enim hujus tubi angustioris longitudo, nonnisi dimidiam partem, ob subduplam angustiam, recipere valet, hinc necessario similis adhuc longitudo ab altera dimidia occupatur, ergo dupla. Cum igitur eadem liquoris quantitas propulsa in angustiori tubo longius eodem tempore procedat, velocius hæc in angusto, quam ampliori canalis loco movetur.

§. XVIII.

Motus, five circulus sanguinis, pro diversa cordis systole atque compressione ventriculorum, multum variat.

§. XIX.

Vis impulsiva cordis, quae sanguinis cursum modificat, optime arteriarum pulsu cognoscitur.

§. XX.

Pulsus est diastole, five expansio arteriarum, à finistri ventriculi coarctatione & pressione sanguinis in eas proveniens.

§. XXI.

Qualis itaque est compressio cordis & sanguinis in arteriam expulsio, talis etiam est pulsus.

Scholion.

Si magna sit ventriculorum cordis expansio, qua ingentem sanguinis copiam recipiunt, & validior compressio succedit, magna sanguinis copia in arteriam ejicitur & ingens ejus fit dilatatio, unde pulsus plenus & magnus gignitur: si vero ob spasticam quandam stricturem, vel aliam ob causam, cavitates cordis se non satis aperiant, vel si ob defectum virium, ut in malignis morbis, non robusta & valida sit constrictio, parum sanguinis ejicitur, & pulsus parvus, debilis ac depressus fit; interdum etiam plane intermittit. Quod si vero hic motus dilatationis & constrictionis certo temporis intervallo saepius repetitur & numero crescit: tunc pulsus frequens fit, qui de singulorum motuum cordis celeritate clarum præbet indicium. Equidem frequentia proprie non est motus affectio, sed celeritas & tarditas de motu prædicatur; quia vero motus cordis & pulsatio arteriarum est motus continuus & singuli fere ictus non accurate determinari & mensurari possunt, hinc ex pulsum frequentia, five eorum certo intervallo temporis subsequuta pluralitate, singulorum celeritas judicari debet. Atque adeo nihili habenda est hæc contradictio, pulsum celerem & frequentem in praxi multum differre, sicuti id longius contra Cl. Virum deduximus in *dissertatione de pulsum theoria & praxi*. Si vero pulsus magnus cum celeri concurrit, dicitur vehemens, si exiguus cum celeri jungitur, debilis & frequens vocari solet, tardus vero pulsus est, si non multi certo dato tempore numerantur, inæqualis est, quando mox celer, mox tardus, interdum vehemens, paulo post debilis est, durus, si arteriæ valde sunt tensæ & renitentes, & talis tactui digitorum resistit.

§. XXII.

Ex arteriarum pulsu sanguinis per corpus progressio & circulus optime potest dignosci, quare accuratior pulsum exploratio in praxi medica magnæ utilitatis & usus est.

Scholion.

Quanta sanguinis copia ex corde in arterias pellitur, tanta necessario in cor rursus ex venis influere debet. Si itaque pulsus est citatior & simul magnus; certum est indicium celerioris sanguinis per cor & vasa progressus, si tardus & vehemens est, vel exiguus & frequens, imminuti motus sanguinis notam præbet. Ad mensurandam vero pulsum celeritatem, ex nostra inventione, horologium accuratius, quod minutas secundas indicat, egregie servit.

§. XXIII.

Ex pulsum numero & magnitudine probabili conjectura assequi possumus, quot vicibus singulis horis universa sanguinis massa cor pertranseat.

Scholion.

Quandocunque in sano & robusto homine ad minimum sanguinis uncia una cordis systole in aortam propellitur, & ponamus, viginti octo libras sanguinis & lymphæ adesse, singulisque horis sex mille pulsus observari: tunc totam sanguinis massam, singulis horis, tredecim, & intra viginti quatuor horarum spatium, CCCXII. vicibus, suum absolvere circulum & per cor transferri, calculus indicat.

§. XXIV.

Mirum est, quanta differentia & mutatio pulsum ratione temperamentorum, ætatum, assumtorum, æris, motus & quietis, item ratione medicamentorum & morborum, beneficio accurati horologii, observetur, quæ pulsum mutatio satis indicat, vim motricem cordis & arteriarum, quæ sanguinis circuli gubernatrix est, à causis potissimum externis, corporeis & ex necessitate agentibus, five mechanicis, dependere.

§. XXV.

Tametsi præter potentiam fibrarum cordis elasticam, princeps ejus motus & arteriarum vis motrix à sanguine ejusque turgescencia calida elastica dependeat: nihilo minus nervi plurimum quoque ad cordis atque arteriarum motum faciunt.

Scholion.

Nam nervis octavi paris in collo arcte ligatis, aut penitus abscissis, cor, quod paulo ante æquali pulsu agitabatur, mox tremere incipit, donec animal, uno vel altero die post, moriatur: quod citius fieret, nisi rami ex plexu intercostali ad cor simili modo abeuntes, liberi permansissent. Qui à solo nervorum liquido motum cordis ducere ac derivare contendunt, mihi videntur errare, quia secretio liquidi nervei in cerebro jam motum cordis supponit, quo cessante, cessat & secretio & influxus liquidi nervei in cor, nihilo minus nervorum variam constitutionem multum mutare posse cordis motum, pluribus argumentis convincitur; siquidem ea omnis animi motus indoles est, ut pulsum mutatio mox sequatur. Deinde si spasmo nervorum systema fortiter afficiatur, ut fit in gravioribus doloribus, hæmorrhagiis, in febribus, inflammationibus, affectu spastico-hypochondriaco & sub omni morbi impetu, pulsus fit durior, qui magis tactui resistit, declinante vero paroxysmo & cessante spasmo, pulsus mollior evadit, qualis liberiolem transpiratum & sudorem venientem subindicat. Tum in paralyticis non raro ingens differentia inter pulsum læsi & sani lateris visitur, quæ etiam subinde in partibus vulneratis male-

que curatis notatur, qua de causa non sine ingenti ratione moneamus, ut prius utriusque carpi pulsus tentetur, quam de morbi natura pronunciemus; eo, quod crebrius in una manu est naturalis, in altera præternaturalis. Convulsiones quoque nervorum transire ad motum cordis & pulsum, formicantes, caprizantes & inæquales, in morti proximis, arteriarum pulsationes satis abundeque indicare videntur.

§. XXVI.

Sanguinis varius ad cordis cavitates affluxus in pulsumutationem quoque efficit.

Scholion.

Si enim, ut supra ostendimus, diastole causa est systoles, & systole diastoles, eæque inter se sunt æquales: facile patet, sanguinis copiosorem ad cor affluxum, pulsum magnum, vel etiam celerem efficere. Et jam in promptu est ratio, quare febres, quarum omnium origo & genesis in universali generis fibrosi & vasculosi spastica constrictione est, item quare dolores & hæmorrhagias, plerumque celeritas, vel magnitudo pulsum comitetur; quandoquidem hi affectus pro causa agnoscunt internarum partium spasmodum, qui impetum & copiam sanguinis ad præcordia urget. Si vero cordis musculosæ cavitates nimium sanguine replentur, quod maxime evenit si polyposum inest concretum, & systole cordis, ob languidiorem vim motricem, non respondet; pulsus intermittere sæpius, sine ullo tamen vitæ discrimine, vel sanitatis dispendio, solet. Nos à stagnantibus in intestinis flatibus; pulsum intermissionem notavimus, quæ illis discussis, protinus cessavit.

§. XXVII.

Quemadmodum in hydraulicis, permanente eadem potentia movente, fluidum si premitur, ipsius partes ad omnia vasa, pro illorum capacitate, æquali nisu tendunt, illuc vero maxime feruntur, ubi nullam, vel minorem resistantiam inveniunt: ita etiam sanguinis circuitus non ubique æqualis est, sed in partibus debilibus, ubi minor tensio, resistantia & tonus est, cursus ejus minuitur, unde stagnatio vel infarctus fit, ubi major tensio augetur.

Scholion.

Hoc theorema in praxi rationali multum affert utilitatis, quandoquidem morbi chronici & hæreditarii ex nativa, vel etiam ascititia viscerum atonia & debilitate, plerumque sua incunabula trahunt.

§. XXVIII.

Sicut in hydraulicis aliquot canalibus, per quos antea libere ferebatur fluidum, obstructis, ejus impetus vergit in tubulos apertos, per quos celerius transfluit: ita etiam evenit in corpore nostro, ut viscerum vel partium internarum vasis & tubulis obstructis, aut sanguine stagnante infarctis, aut spasmo contractis, indeque libero sanguinis transitu prohibito, is majori copia & impetu ad alia vasa aperta ruat.

Scholion.

Ab inæqualitate circuitus, quæ præsertim propter spasmodum fit, complures morbi & symptomata suam trahunt originem, inde enim ingentes sanguinis profusiones, dolores, tumores & funestæ humorum congectiones & extravasationes nascuntur, quarum origo eos penitus latet, qui leges motus fluidorum parvi faciunt, vel parum intelligunt.

§. XXIX.

Quemadmodum fluidorum motus & affluxus se habet ut vasorum resistantia, adeo, ut hac minuta, plus

affluat, eadem vero aucta, plus alteri accedat: ita etiam id fit in sanguinis affluxu ac motu.

Scholion.

Patet exinde quam clarissime usus remedium derivantium, qui non de nihilo est, v. g. pediluviorum, clysterum, venæ sectionis, cucurbitularum atque balnearum emollientium.

§. XXX.

Quemadmodum in hydraulicis, pro diversitate pressionis & capacitate cavitatis, quæ liquida continet, nec non pro amplitudine majori, vel minori orificiorum & canalium, per quos liquida ferri & ejici debent, motus liquidorum valde differt, ratione accelerationis & tarditatis, atque adeo ratione copię, quæ effunditur; ita etiam nullum dubium est, quin diversitas circuli sanguinis, quæ ratione individuorum, pro differentia ætatis, & dispositione ac structura nativa partium solidarum, multum variat, à capacitate majori, vel minori cordis & vasorum eorumque ad motum dispositione, rectissime deducatur.

Scholion.

Quare doctrina veterum de temperamentis rectius ex sanguinis differente circulo, & partium solidarum ad eundem modificandum dispositione, quam ex fluidorum varia temperie, aut qualitatibus, five elementorum sanguinem constituentium, mixtione & proportionem, deducitur.

§. XXXI.

Res notatu digna est, inter corda & vasa animalium exquisitam reperiri proportionem, ut ex vasorum capacitate, magnitudinem cordis optime concludere possimus.

Scholion.

Constanti & frequente observatione, per cadaverum sectionem exploratum habeo, obesa & spongiosa ac flaccidi habitus corpora, & quæ tenuia & angusta vasa habuerunt, cor etiam parvum obtinuisse. In macilentis vero & qui ampliora, sed pauciora vasa, habebant, cor longe capacius & maius deprehendimus.

§. XXXII.

Quicumque igitur cor capacius cum vasis amplioribus obtinent, & fibras habent strictiores, ingenti potentia elastica donatas: in iis motus cordis vegetior sanguinis motum valde accelerat.

Scholion.

Ejusmodi homines pulsu vehementi, qui ex magno & frequenti compositus est, gaudent, & magno robore, tam corporis, quam animi, pollent, & vulgo cholericis audiunt.

§. XXXIII.

Ubi cor majus cum vasis capacioribus, sed paucioribus est, genus vero fibrarum crassitie ac densitate, adeoque immobilitate laborat, sanguinis circulus tardior est, & pulsus magnus, tardus tamen evadit.

Scholion.

Ejusmodi homines sunt quidem tardiores, tam in animi, quam corporis actionibus, constantiores tamen & judicio valent & vocari solent sanguineo-melancholici: & quia senectute talis fit fibrarum dispositio, senes plerumque pulsum durum, tardum & magnum habent.

§. XXXIV.

Qui fibras valde spongiosas & laxas, venas vero cum corde parvas habent, in iis valde debiliter & languide cursus sanguinis & humorum succedit, & ii vocari solent phlegmatici: & horum actiones, tam quoad ingenium, quam quoad corpus, languidæ debilesque sunt.

§. XXXV.

Quandocunque vasa copiosa, sed non adeo ampla sunt, & cor mediocre, fibræ quoque nec adeo laxæ, nec adeo strictæ, tunc temperatior & placidior sanguinis cursus est, nec nimis celer, nec nimis tardus, nec nimis vehemens, nec nimis debilis; temperamentum sanguineum fit, quod, quia in mediocritate consistit, optimum est.

§. XXXVI.

Ubi cor angustius cum angustioribus vasis est, fibræ vero tensæ, renitentes & teneræ; pulsus celer, qui ex frequentia judicari debet, fit, & tunc sanguinis motus celeriter per corporis vasa fertur, & tales simpliciter cholericæ audiunt & in omnibus actionibus valde sunt præcipites.

§. XXXVII.

Si vasculosum genus minus capax est, fibræ vero rudiores, duriores & crassiores, sanguis tardius evolvitur, & ita pure sic dictum melancholicum corporis temperamentum evadit, quod ratione corporis & animi actionum miserum est.

§. XXXVIII.

Ergo retardatio & acceleratio motus sanguinis, & exinde dependens animæ & corporis vis, vigor atque languor, à causis mere mechanicis, physicis, in structura & dispositione partium ad motum quærendis, unice requiescit.

Scholion.

Hæc omnia clarissime docent, quantum à veri tramite ii aberrant, qui, neglectis his causis manifestis, & sanguinis circuli, & diversitatem actionum corporis & animi in alio, incognito tamen principio, moralitatis, cognitionis & arbitrii particeps, quærunt: cujus tamen naturam, vel proprietates, adeo explicare non possunt, ut potius loco demonstrationis, nihil aliud, quam sterile nomen, vel petitionem principii afferant.

CAPUT VII.

De sanguinis circulo per pulmones & respirationis usu.

§. I.

Vitalis sanguinis circuitus fieri nequit, nisi ex dextro ventriculo, per pulmones, ad sinistrum transeat; cum vero per pulmonum vasa complicata & collapsa pertransire nequeat: hinc opus est, ut hi expandantur, quod fit mediante respiratione, unde ejus amplissimus ad vitam patet usus.

Scholion.

Duplex in homine, extra uterum vivente, sanguinis est circulus, alter late diffusus, alter brevis, ille mediante aorta & vena cava fit per universum corpus, hic vero tantum ex uno ventriculo ad alterum, per pulmones, mediante arteria & vena dicta pulmonali. In foetu hic circulus cessat, quia respiratio deficit, quare brevissime sanguis ex dextro ventriculo, per duos canales, unum arteriosum, cujus situs est inter arteriam pulmonalem & aortam, alterum venosum, sive foramen ovale, quod inter venam cavam & pulmonalem existit, ad sinistrum transfertur.

§. II.

Respiratio est aëris atmosphaerici intra pulmones receptio & successiva emissio: sive, respiratio consistit in inspiratione & expiratione aëris.

§. III.

In inspiratione cavitas thoracis, in qua siti sunt pulmones, amplior fit, sursum elevatis costis ac diaphragmate descendente.

§. IV.

Facto ampliore in thorace spatio, aëreum fluidum, grave & elasticum, propria vi nititur illud spatium occupare, sed quia in pulmones immediate fertur, eos expandendo, replet sic vacuum thoracis spatium, adeoque in inspiratione pulmones expanduntur.

Scholion.

Aërem corpus esse fluidum, impenetrabile, grave & elasticum, quod in spatia ab aëre vacua magno impetu ruat, compluribus experimentis physico-mechanicis, de quibus *demonstrationes nostræ physicae* consulendæ, demonstrari potest.

§. V.

In expiratione, costis descendantibus & sursum delato diaphragmate, redit thorax ad pristinum suum spatium, & pulmones concidunt & aër per eos & nares emititur.

§. VI.

Ab alternata thoracis dilatatione & constrictione totum respirationis negotium dependet: quando enim aperitur & ampliatur thorax, aër, & gravitate, & elatere suo, per os & nares ingreditur & pulmonum vesiculosum corpus expandit; simul ac vero thorax contrahitur & coarctatur, idem aër ex compressis pulmonibus per easdem vias expellitur.

Scholion.

Costarum capitula cum vertebrae spinæ, & illarum pars cartilaginea flexilis cum sternum, tam mirabiliter necuntur, ut contractione intercostalium muscutorum, oblique extrorsum flecti atque erigi, & eorum relaxatione, deorsum introrsumque converti possint; unde thorax nunc dilatatur & capacior redditur, nunc constringitur atque angustior fit. Dilatationem thoracis diaphragma multum auget, cujus duplex musculus, unus à costis spuriis & sternum, altera lumborum vertebrae in centrum tendinosum tendens, ita contextus est, ut utriusque contractione, ejus fornix ad figuram magis planam perveniat, hinc imi ventris viscera deorsum protruduntur atque costæ spuriae oblique extrorsum flectuntur, & sic amplior fit thorax. Idem duplicatus musculus, quando à contractione remittit, è plano in fornicem refilit, atque intra pectoris cavum ascendit, cujus magnum spatium replet.

§. VII.

Pulmones sunt immediatum respirationis organon, quos aër reciproce & successive ingreditur, & egreditur, hinc eorum fabrica investiganda erit.

§. VIII.

Pulmones sunt corpus mere vesiculosum & vasculosum.

§. IX.

Vesiculæ sunt innumeræ, quibus pulmones constant, ex membranis orbicularibus, expansilibus & contractilibus compositæ, atque ex arteria aspera, cujus expansiones sunt, ortum suum habent & sibi invicem ita racematim adhærent, ut facile ex uno ramo tracheæ in plurimas vesiculas, & rursus ex his in illam, detur aditus.

§. X.

Vesiculæ pulmonales omnes cohærent & connexæ sunt cum aspera arteria; hinc inflata trachea, omnes vesiculæ

De sanguinis circulo per pulmones & respirationis usu. 45

ficulae pulmonales; & sic totus pulmo, expanditur, vel inflato tantummodo ramo tracheae, vesiculae tantum eae, quae ex hoc prodeunt, expanduntur, ceterae, quae non prodeunt ex hoc ratio, flaccidae manent.

§. XI.

Aspera arteria innumeras ramificationes spargit per pulmones, quae dicuntur bronchia.

§. XII.

Bronchia & vesiculae ex his prodeunt constant ex membranis variis, primo nempe carnea, sive musculari, quae ex fibris longitudinalibus & annularibus contexta est, secundo nervea, tertio vasculosa, quarto glandulosa.

§. XIII.

Ratione tunicae musculosae & nerveae, pulmones sensu & motu instructi sunt, dilatationis nempe & constrictionis: nam quando ab aëre dilatantur, proprio nisu & motu activo, rursus contrahuntur & ad aëris expulsiorem faciunt.

Scholion.

Par vagum octavum, ramos, partim in pulmonum membranam, partim in bronchia & eorum vesiculas, quas superascendunt & circumligant, emittit, & ratione horum sanguis in pulmonum vasis stagnans maximas facit anxietates atque angustias. Quandocunque fibrarum motricium, quae per vesiculas & bronchia expansae sunt, contractio fit spasmodica, non modo aër, ut decet, recte neque admittitur, neque redditur, sed & ipsa vasa sanguinea, inordinate contracta, sanguinem transeuntem intercipiunt, hinc asthma fit convulsivum, certis & statis periodis revertens. Ad diaphragma vero nervi, tripla radice exorti, ex cervice per cavum thoracis descendunt, & in quatuor ramulos dividuntur, tendinosaque diaphragmatis parti inferuntur, qui vellicati, mox pectoris dilatationem excitant. Si itaque hi nervi vel paralyti tentantur, vel etiam, si per nervos octavi paris tendentes ad pulmones, fluidi nervei influxus impeditur, magna oritur spirandi difficultas, uti fit in apoplecticis & paralyticis. Si vero violenter diaphragma contrahitur & thorax dilatatur, aër magna vi, nec sine strepitu, in pulmones impellitur, sicque singultus fit. Quando diaphragmatis descensus ab inflatione ventriculi impeditur, quod facile fit in hypochondriacis, hysteriis & asciticis, respiratio valde difficilis redditur.

§. XIV.

Aspera arteria, & quae ab hac producantur bronchia glandulis obducta sunt, quae humidum unctuosum à sanguine separant, quod etiam expiratione eliditur. Hanc vero utilitatem habet, ut humectet membranosa bronchiorum substantiam, ne perpetuo & irrequieto aëris appulsu exsiccentur & incommodi quippiam patiantur.

Scholion.

Quando glandulae, arteriae intertextae & bronchii adiectae tumidae fiunt atque crescunt, liber aëris egressus à pulmonibus impeditur, qui tunc expansi thoracis spatium replent & asthma difficillimum gignitur, quod aliquoties in dissectis asthmate defunctis vidimus.

§. XV.

Pulmo est viscus admodum vasculosum, siquidem arteria & vena pulmonalis in innumeras ramorum myriades dividitur, qui cum arteria aspera, in eorum medio jacenti, distribuuntur & vesicularum membranas retis in modum ambiunt & ubique cellulosa spatia occupant.

Scholion.

Dum sanguis per innumeras vasculorum pulmo-

nalium myriades transire debet, quae facile tam à sanguine, quam à sero copiosius ibi congesto, infarciuntur nimiumque distenduntur; vesiculis bronchiorum compressis, libera harum expansio impeditur & spirandi difficultas nascitur, quod cachecticis, plethoricis, & ubi solennes ac criticae sanguinis evacuationes suppressae sunt, familiare est. Hæc quoque vasorum angustia & copia in causa est, quod facile ibi collecti humores stagnent, corrumpantur & molliissimam substantiam rodant; unde fit humorum & sanguinis extravasatio, indeque major stasis, acrimonia & humorum consumptio: & hunc in modum tussis humida & phthisis, cum spato cruento & purulento, nascitur. Ob eandem vasorum angustiam fiunt etiam facile in pulmonibus tubercula & scirrhi.

§. XVI.

Quoniam in collapsis pulmonibus innumerabiles ac tenuissimae vasorum ramificationes valde complicantur atque contrahuntur; hinc cursus sanguinis per has, nisi expandantur & elongentur, difficulter succedit.

§. XVII.

Quando aër pulmones ingreditur, omnes tracheae tubuli vesiculaeque ipsis annexae inflantur, expanduntur, quo fit, ut non modo vesiculae ex planiori per complicationem figura in rotundiores extendantur; sed & innumeras vasorum sanguiferorum rami, antea complicati, exporrigantur, unde jam facilius sanguis per arteriam & venam pulmonalem ad sinistrum cordis ventriculum pergit atque urgetur.

§. XVIII.

In expiratione quando elasticae & fibrosae pulmonum membranae concidunt, tunc venae non secus ac spongia comprimuntur, & ex eorum ramis minimis ad ramos majores sanguis urgetur, atque adeo, & inspiratio, & exspiratio, transitum sanguinis per pulmones promovet.

§. XIX.

Circulatio sanguinis per universum corpus sine transitu sanguinis per pulmones, & hic sine respiratione; diu permanere nequit, hinc facile patet, sublata respiratione, vitam tolli.

Scholion.

Jam clarius apparet ratio, quare constricta arteria aspera, vel si hæc ipsa aqua, vel vapore denso, sulphureo, ut carbonum accensum, qui aëris ingressum impedit, repleta fuerit, item si stagnet ingens copia aquarum, vel puris in thorace, qua pulmonum expansio impeditur, aut subtracto aëre per antliam, vel sub aëre nimis tenui, rarefacto & calido, homo suffocetur & pereat. Nam si quando pulmonum expansio impeditur, sanguis ad sinistrum ventriculum pergere nequit, sed stagnat in dextro & deinde in toto venarum systemate, neque ad cerebrum ulterius fertur, unde vita perit.

§. XX.

Sanguis per innumeras vasculorum pulmonalium myriades cum premitur atque pertransit, ipse in minimas partes dividitur, conquassatur & comminuitur, unde fluidior & floridior ex pulmonibus redit, quam fuit ingressus.

Scholion.

Aër gravis & elasticus quando interiora pulmonum subit & calore adhuc magis expanditur, tunc explosiva vi vesicularum parietes undique premit; & sic mirum in modum, nisibus suis, sanguinem per exilissimos membranarum tubulos transactum, quasi pistillo in minimas partes dividit atque discerpit, unde longe liquidior ad cor redit, & qui obscuriore colore tinctus erat in dextro ventriculo, nunc rutilo, cominutionis indice, conspicuus ad sinistrum revertitur.

§. XXI.

§. XXI.

Pulmonum igitur munus est, partes sanguinis diversae indolis, graves ac leves, fluidas & solidas, intime inter se miscere, unire, combinare, quod ad circulum sanguinis per vasa minima liberum promovendum & ad vitae conservationem admodum necessarium est.

Scholion.

Corpus nostrum constare ex capillaribus & minimis vasculis, patet autopsia. Ne itaque sanguis ibi stagnet, sed libere ea pertranseat, opus est, ut in fluiditate conservetur, quod fit, si partes ejus graves & solidae cum aqueis, fluidis & subtilioribus, motu conquassatorio & comminutorio, intime uniantur, quod optime in pulmonibus perficitur. Et quia transitu sanguinis per pulmones, eorumque motu contractionis & dilatationis, ejus partes concussione & conquassatione intime miscentur, ut fluidus evadat, hinc ad vitalem sanguinis per minima vasa circulum conficiendum summe necessarius est. In foetu autem, & respiratio, & motus pulmonum, cessat; ideo provida natura in pulmonum locum placentae corpus constituit, quod totum, ut pulmo, vasculosum est, siquidem ex innumeris vasorum umbilicalium ramificationibus constat, & quoties inspiratione matris diaphragma descendit & imi ventris viscera comprimit, toties quoque uterum eique cohaerentem placenta concutit, motumque pulmonum sic concussa placenta aemulatur.

§. XXII.

Difficiliori igitur facta respirazione & sanguinis transitu per pulmones reddito impeditiori, mixtio intima partium sanguinis minuitur & hinc facile graves & solidae partes à fluidis ac levibus secedunt.

Scholion.

Ex hoc theoremate nascitur ratio, quare in morbis, ubi ex pulmonum vitio laborat respiratio, ut in asthma, orthopnoea, pulmonum consumptione & phthisi, tumores aquosi & oedematosi pedum, hydrops thoracis, abdominis, obstructions & infarctus viscerum & polypi in cordis thalamis, praesertim dextro, secessiones feri per alvum, sudores immoderati, facile generentur: cum enim sanguis stagnat in systemate venoso, secedunt facile partes fluidae à solidis.

§. XXIII.

Calor corporis à calore sanguinis fit, hic vero à forti & intestina agitatione partium, praecipue sulphurearum, gignitur, quare rectissime colligitur, respirationem & motum sanguinis per pulmones, non refrigerium sanguini afferre, sed potius ejus calorem intendere.

Scholion.

Animadvertimus animantia calidiora, & quae copiam sanguinis calidi in venis alunt, pulmonibus gaudere; frigidiora vero, ut piscium genera, iis destitui, item observamus, quo thorax amplior est & pulmones majoris molis, eo homines esse & calidiores, & robustiores, & vivaciores: deinde quo citatior est respiratio, ut fit in vocis elevatione & sermone longo, eo magis corpus incalescit.

§. XXIV.

Aëris fluidum atmosphæricum non pertransit vesicularum pulmonalium membranas, nec immediate cum sanguine transeunte miscetur.

Scholion.

Etenim aëreum fluidum, vesicis inclusum, neque in vacuo, harum transit poros, multo minus, ubi vasa liquidis repleta sunt & pori membranarum humido obducti, in eos intrabit, praesertim cum impenetrabile aëris fluidum non ullum occupet locum, nisi vacuum

ab alio corpore. Deinde aër atmosphæricus cum liquidis non bene miscetur, neque etiam cum sanguine, quia ejus interstitia jam aëre per alimenta advecto repleta sunt.

§. XXV.

Quamvis aër in pulmones haustus, non cum sanguine immediate & proxime misceatur, sed rursus expellatur: nihilo minus & partes solidae pulmonum, & ipse fluor sanguineus, eas percurrens, ab aëre inspirato magnam mutationem accipiunt.

Scholion.

Sicut enim aëris fluidum corpus nostrum ambiens & partes ejus solidas & fluidas varie afficit: ita multo magis id perficiet, quando in amplum illud pulmonum viscus ingressum fuerit.

§. XXVI.

Sicut calor & frigus aëris externi liquidum thermometro inclusum multum expandit, vel condensat, subeundo, & vitri, & liquidi poros: ita nullum est dubium, quin aër respiratione haustus, prout calidus, vel frigidus est, sanguinem simili modo afficiat.

§. XXVII.

Sicuti aër serenus, vivida & expansiva ætheris virtute imbutus, vel vaporum copia repletus ac minori elasticitate donatus, omnia corpora, tam animata, quam inanimata, varie afficit, fibras vel constringendo, vel relaxando: ita nullum dubium est, quin serenus aër, fibris bronchialibus & membranosis nerveis vesiculis tonum, robur & motum majorem afferat, levis vero & humidus, fibrarum relaxatione, tonum ac motum imminuat.

§. XXVIII.

Quo major tensio membranarum pulmonalium, eo fortior pressio sanguinis, consequenter vegetior circulatio & calor est.

Scholion.

Animadvertimus, ventis flantibus orientalibus ac septentrionalibus, qui serenam & compressam atmosphæram reddunt eamque ab humiditatibus purgant, omnes animi & corporis actiones fieri vegetiores, circulationem, pulsus, calorem & transpirationem quoque intendi: sub atmosphæra vero humida, coelo existente turbido, pluvioso & nebuloso, agilitatem partium & totius corporis, appetitum quoque, calorem & transpirationem etiam minui. Ratio quoque jam facile in pathologicis reddi potest, quare in affectibus pulmonum spasticis, pleuritide, peripneumonia, tussi sicca & convulsiva, asthma sicco, item in hectica, aëre sicco & sereno existente, dolores, angustiae, aliaque symptomata majora fiant, sub temporato vero, pluvio ac humido coelo, decrescant eo, quod in illis morbis jam fibrae pulmonum nimis tensae & contractae sunt. Patet porro jam ratio, quare propter imminuentem pluviam, aëre reddito leviori & magis rarefacto, homini ac ceteris animantibus angustia, anxietas circa praecordia, cum spirandi difficultate accedat, quia nempe tali aëre, & fibrae vasorum, & membranarum pulmonalium, valde relaxantur & intus contenta fluida expanduntur, unde pressio & refluxus sanguinis ad cor fit impeditior.

§. XXIX.

Aër variis exhalationibus repletus, quamvis non eas immediate cum sanguine misceat, tamen & fluidis ac solidis, praesertim pulmonum partibus, vel noxam quandam affricat, vel etiam emolumentum affert, teste virtute suffimigiorum & contagii morborum.

Scholion.

Aër exhalationibus valde sulphureis refertus, membranas & vesiculas pulmonales exsiccat & glandulosas

tunicas constringit, unde pulmonum tabescentia & sic- cum asthma fit, cui valde obnoxii sunt, qui metalla igne tractare solent & qui vaporem carbonum fossilium continuo hauriunt. Juvat vero aër, vapore sulphuris blandi, vel balsamico refertus, eos, quibus glandulae bronchiales nimis sunt relaxatae & aspera arteria valde humida. Miasmata vero putrida & maligna morbofa, cum aëre poris corporis nostri, adeoque succis sese insinuare, in iis maxime partibus, per quas transeunt, experientia prohi dolor satis ostendit.

§. XXX.

Respiratio ad recipiendum sanguinem ex corde in pulmones & ad eum exprimendum in cor, multum facit, hinc auctiori reddita respiratione, circulum sanguinis promoveri, facile intelligi potest.

Scholion.

Supra dictum est, impulsus sanguinis ad cor, qui fit sub ejus diastole, provocare ejus contractionem sive Systolen, qua fit sanguinis expulsio, & systolen rursus provocare diastolen; hinc sequitur, celeriori facta pressione sanguinis in pulmonibus per inspirationem & expirationem, citatiori motu ipsum ferri ad cordis finistrum ventriculum, & eodem celeritatis gradu vergere per arterias: atque adeo per universum corpus sanguinis circuitus fit velocior.

§. XXXI.

Vociferatione, sermone intensiori, tussi & motu corporis auctiori facto, sanguinis circulus promove- tur, adeoque & calor, & transpiratio, fit major.

Scholion.

Sanguinem celerius & magis cum impetu fluere ex secta vena sub tussi & aucta respiratione, certa experientia confirmatur, & quia sub labore, motu & exerci- tio corporis muscoli partium constringuntur & sangui- nem majori in copia ac celeritate urgent ad cor & pul- mones, hinc quoque sub motu crescit perspiratio, pul- sus fit celerior, & calor ac sudor occupat corpus.

§. XXXII.

Respiratio multos adhuc fines & usus secundarios habet, siquidem secretiones & excretiones faciliat at- que secundat.

Scholion.

Quoniam in inspiratione musculus diaphragmatis deorsum descendit, hinc omnia viscera in abdomine contenta comprimuntur & abdomen expanditur, & compressione musculorum abdominis, exclusio fecum alvinarum, urinæ, foetus, secundinarum, multum ad- juvatur.

§. XXXIII.

Multum quoque respiratio ad motum peristalticum ventriculi & intestinorum & ad promptiorem chyli in vasa lactea ingressum & contentorum per intestina pro- gressum confert.

Scholion.

Sub successiva enim inspiratione & expiratione, mus- culorum abdominis alternativa compressio & expansio fit, quo motu subjecta intestina etiam afficiuntur.

§. XXXIV.

Sine inspiratione nec olfactus, nec lactis, vel taba- ci suctio, aut liquidorum sorbitio, & sine expiratione nulla loquela & nullus clamor fieri potest.

Scholion.

Nulla quidem attractio, vel suctio datur in rerum na- tura, sed omnis motus tam solidorum, quam liquido- rum, pulsione perficitur. Quando vero inspiramus, ma- jus spatium effecimus in thorace, quod cum aër gravis ingredi nititur, simul vel liquida, vel fumos in os abri- pit atque impellit.

C A P U T VIII.

De sanguinis circulo per viscera & varias cor- poris partes.

§. I.

Pro differente viscerum partiumque fabrica & situ, sanguinis circulus differt.

Scholion.

Quaedam partium à corde remotæ admodum sunt, ut pedes, quædam proximæ, ut pulmones, in quibusdam debet ascendere sanguis, ut in caput, in aliis descende- re, ut in pedes visceraque imi ventris, in aliis ejus mo- tus debet ad latera dirigi, ut in renibus, liene, nonnul- læ valde mollis, spongiosæ & meræ vasculosæ sunt tex- turæ, ut pulmones & lien, aliæ firmioris & strictioris, ut uterus, quædam sunt ex meris membranis composi- tæ, ut ventriculus & intestina, quædam ex meris glan- dulis conflatae, ut pancreas & mammae. Pro diversi- moda itaque partium structura & situ, necesse est, ut sanguinis motus & circulus differentem modificationem habeat.

§. II.

Difficilis est sanguinis motus & ascensio ad caput.

Scholion.

Omnia gravia natura deorsum tendunt. Hoc vero eo- rum motus difficilior est, quo major ascensio ad perpen- diculum. Provida hinc natura caput & cerebrum non procul à corde collocavit, ut quo brevior est via, eo va- lidior potentia motrix cordis ad propellendum sursum liquidum sit.

§. III.

Immituta igitur & valde languida potentia cordis motrix invalida est ad sanguinem propellendum versus cerebrum, quare in situ erecto facilis est propensio ad animi defectionem.

Scholion.

Ubi ingens virium est defectus, qui fit vel à nimia sanguinis detractione, vel in morbis malignis aut visce- rum corruptione, ibi facile sub erecto corporis situ ani- mi deliquia incidunt. Non semel, sed sæpius & iterum, in acutis, quam maxime malignis febribus, ex solo erec- to situ, animæ defectionem & exinde summum peri- culum notavimus, toto morbi statu & cursu immuta- to. In ejusmodi enim malis languida cordis contractio non sufficit debitæ sanguinis quantitati ad cerebrum im- pellendæ, hinc subtracto nervis & organis sensoriis flui- do, motus & sensus perit. Præstat itaque in omnibus morbis ubi vires deficiunt, corpora in declivi situ & de- cubitu fervare.

§. IV.

Peculiaris arteriarum cerebri fabrica motum sangui- nis per caput varie quoque modificat.

Scholion.

Neque enim ignotum ex anatomicis est, arterias tam carotides, quam vertebrales, antequam calvariam sub- eunt, deponere crassiorem suam tunicam & ex tenui- bus tunicis more venarum tantum esse contextas, omni procul dubio eum in finem, ut subtilius liquidum ex san- guine per has allato, & separari, & in corticalem & tu- bulosam cerebri substantiam feliciter penetrare possit, forsan etiam, ne validior earum vibratio atque impetus, mollem cerebri pulpam nimis comprimat.

§. V.

Ob tunicarum, quibus cerebri arteriæ constant, te- nuitatem & minorem resistentiam ac debiliorem elate- rem,

rem, fit, ut à copia & turgescencia sanguinis, item ab omnibus vaporosis & expandentibus rebus, nimiam dilatationem pati possint, qua earum contractio & systole minuitur sanguisque transitus per cerebrum difficilior redditur.

Scholion.

Hoc theorema anatomicum non mediocrem in pathologicis ad difficilia explicanda utilitatem habet. Perpicimus enim exinde, quare spirituosa, inebriativa, item anodyna, narcotica & omnia, quæ exhalationem sulphuream copiosam, tam suaveolentem, quam male olentem emittunt, capiti noceant, & ad periculosas sanguinis stagnationes & congestiones in eo disponant, ex quibus postea, tanquam ex fœcundo sinu, dolores capitis gravativi, torpores, stupores sensuum & mentis, somnolentiæ, paralyfis, apoplexiæ prodeunt. Quando enim ex inferioribus partibus, spasmo constrictis, sanguis plus justo ad caput urgetur, minoremque in arteriarum tunicis resistantiam invenit, harum distensio sanguisque stagnatio fit, ejusque impeditior per caput motus dicta hæc mala procreat. Atque etiam jam clarius perspicimus, qua ratione anodyna, papaveracea & ex opio præparata, operationem suam in levandis doloribus & conciliando somno exserant, & quare ad torporem & graves capitis passionem eorum abusus perquam facile disponat.

§. VI.

Ad faciliorem sanguinis à cerebro ad cor regressum, sinuum venosum, qui sub dura matre latitant, structura & venarum jugularium situs, contribuit.

Scholion.

Nisi enim dura mater & sub ea latitantes venosi sinus ex tam renitentibus & elasticis membranis essent compositi, sanguinis stagnatio, propter situm cerebri & sinuum horizontalem, longe facilius contingeret, quam horum vasorum renitentia & lenior contractionis motus feliciter impedit. Præterea sanguinis ad cor regressum egregie perpendicularis jugularium situs adjuvat. Sanguis enim per has proprio gravitatis motu ad cor descendens, efficit, ut, ne detur vacuum, reliquus ex sinibus tanto promptius succedat: non secus ac in siphonibus recurvis fieri solet, ubi per longius crus humor profluens, reliquum in minore crure, ad eundem effluxum invitat.

§. VII.

Quemadmodum corporis situs erectus ad faciliorem sanguinis à cerebro ad cor regressum facit: ita horizontalis decubitus eidem resistit.

Scholion.

Pater jam ratio, quare capitis situs declivior somnum invitet, neque unquam utilis sit affectibus capitis, item somnus meridianus pleno ventre caput ad graves morbos, ex stagnatione humorum oriundos, disponat. Caveant sibi quoque omnes plethorici à decliviori capitis situ. Neque obscura amplius erit causa, quare, si morbi vicinis pulvinar subtrahatur & capitis situs declivior fiat, mors accelerari possit; reddita enim majori sanguinis stagnatione in cerebro ejusque refluxu ad cor impedito, motus cordis jam languidissimus penitus extinguitur.

§. VIII.

Ingens illa vasorum in ventriculo & magno intestinorum volumine copia & reptatus, mutæque tam arteriarum, quam venarum anastomoses, notabilis sunt considerationis, ratione sanguinis circuli per has partes.

Scholion.

Quia sanguinea vasa intra harum partium tunicas, tam musculosas, quam nerveas, situm suum habent, in nullis partibus tam prompte stases sanguinis inflammatoriæ & valde funestæ, quam in his fieri possunt; siqui-

dem hæc partes membranaceæ majori tono, elatere & robore instructæ sunt & sensu exquisitiori pollent. A causa igitur vehementi vellicante, corrode, promptissime in spasticas stricturas abripiuntur, quibus vasa sanguinea, non secus ac vinculo, constringuntur, unde fit, ut sanguis motu suo interceptus ibique hærens, quam facile in inflammationem & sphacelofam corruptionem abeat. Omnia itaque acriora & draustica & caustico stimulo agentia, ut sunt validiora vomitoria, purgantia, venena, liquores acidi, corrosivi & acres biliosi, nec ullis corporis partibus tam infesta & funesta sunt, quam hisce partibus, in quibus celeriter interitum producere possunt.

§. IX.

Per hepatis viscus sanguinis progressio difficilis admodum est.

Scholion.

Singulari privilegio gaudet hepar præ aliis visceribus, quia magno vase advehente venoso instructum est, quod pulsu caret, vena nimirum portæ, quum ad omnes ceteras partes arteria pulsans sanguinem adducat; quapropter etiam peculiaris est hujus venæ structura & optime cum arbore comparari potest, cujus radix in innumeras fibrillas abit, truncus in medio est, ex quo deinde innumerabiles quoque rami oriuntur. Hæc vena igitur dispersa per ventriculum, intestina, mesenterium, omentum, pancreas & lienem, recipit sanguinem ex arteriis in has partes adductum & in truncum invehit, ex quo postea innumeras ramificationes majores, minores & minimas in hepar emittit, per quas sanguinem ad hoc viscus adducit & hinc arteriæ munere fungitur; quia vero impulsu destituitur, non potest aliter fieri, quin tardior sanguinis per hanc venam in hepate sit cursus atque progressio.

§. X.

Difficile sanguinis per hepar iter provida natura variis adminiculis secundat.

Scholion.

Primo venæ portæ in hepate existentes tunice crassiores sunt ac aliæ venarum, laxæque hepatis substantiæ annectuntur, ut non facile subsideant, concidant, sed tubuli & rami magis aperti maneant. Deinde motus diaphragmatis, cui firmiter ligamenti magna hepatis moles annexa est, ascensionis & descensionis motu in spiratione, multum difficilem sanguinis per hoc viscus transitum adjuvat, eo quod continua illa succussione, non facile in vasis sanguis restagnet. Tum sanguis ex liene revertens tenuior, cum crassiori, qui ex intestinis & mesenterio, appellitur mixtus, transitum ejus faciliorem per tenuissimas vasorum ramificationes procurat.

§. XI.

Ob difficilem sanguinis per venam portæ & hepar cursum, hæc vena multorum affectuum chronicorum causa est.

Scholion.

Cum enim facile in hac vena restagnet sanguis, præfertim in iis, qui vitæ sedentariæ addicti sunt atque salubres corporis motus ac exercitationes intermittunt, ipseque ad ea viscera, quæ eadem vena tangit, ut intestina, lienem, omentum, pancreas, regurgitet, feræles ibi stagnationes, infarctus & obstructions fiunt, quæ magnorum morborum chronicorum, ut hydropis, cachexiæ, scorbuti, mali hypochondriaci, fluxus mensuum & hæmorrhoidum inordinati, genitricis sunt, de qua materia consuli potest *Cl. Stablii Diss. de vena portæ porta malorum.*

§. XII.

Est quoque peculiaris sanguinis progressio per lienis humani viscus, quia mere vasculosum est & cellulas habet.

Scholion.

De sanguinis circulo per viscera & varias corporis partes. 49

Scholion.

Lien humanus nonnisi compages est mere vasculosa, ex innumerabilibus & tenuissimis vasorum arteriorum ac venosorum ramificationibus contexta, ut egregia est *Ruysschii* anatomica observatio. Hujus visceris fabrica non alium in finem videtur elaborata, quam ut sanguis transitu per tot myriades vasculorum, non secus ac in pulmonibus, vel in placenta uterina, continua attritione intime dissolvatur, misceatur & fluidior evadat, quo sanguini, per ramos venæ portæ ex imi ventris visceribus tardius redeunti & crassiori affusus, ipsi fluiditatem ad expeditius iter per hepar conficiendum conciliet, unde liene in canibus exsecto, hepar indurescere, animantia reddi pigriora & obefiora, multis experimentis anatomicis compertum est.

§. XIII.

Propter innumerabiles & tenuissimas vasorum, quibus lien constructus est, ramificationes, nullum viscus tam facile sanguine infarciri & repleti, ad ingentem sæpe magnitudinis tumorem solet, præter hoc ipsum.

Scholion.

Ad infarctum illum & pessimam sanguinis in hoc viscere stagnationem multum facit, quod lien humanus valde tenuibus membranis cinctus sit, quæ, quia minus sanguinis appulsui resistunt, facile cedunt sanguinisque majorem affluxum & subsistentiam invitant: destructo vero sic lienis officio, sanguinis circuitus per hepar quoque vitium capit, & ad ventriculum, per vasa sic dicta brevina, regurgitat, quæ, cum sub tenuissimis membranis serpant, facile aperiri possunt, hinc sanguinis in cavum ventriculi fit effusio & vomitus cruentus nascitur, qui plus feminas, quam viros, ob menses suppressos, infestat.

§. XIV.

Paulo tardiori cursu, sanguis etiam ex colo sinistri lateris, ad ramum mesentericum sinistrum penetrat, propter situm venæ splenicæ & hæmorrhoidalis admodum in longitudinem porrectum & perpendicularem.

Scholion.

Stagnatio sanguinis in vena splenica hæmorrhoidali, atrocia pathemata & tormenta colica, præsertim si per venas sedis non exitum habet, procreat, & quia Præctici rarius gravissimi ejusmodi doloris causam penetrant, hinc præpostera curandi methodo & remediis carminativis, calidioribus, plus damni, quam emolumenti afferunt.

§. XV.

Difficilis admodum sanguinis per venam portæ, & imprimis per hepar, transitus, non modo gravissimarum chronicarum in abdomine consistentium passionum fons est, sed & corpora ad hæmorrhoidalem fluxum disponit.

Scholion.

Ratio est in procinctu, cum enim, obice in hepate posito, sanguis per venam portæ non progreditur, & ex arteria mesaraica inferiori novus ad intestinum colon & rectum fertur, fieri aliter vix potest, quin hæc vasa, sanguine mirum distenta, tandem in extremis an partibus rumpantur. Illi ergo inepte agunt, qui causam hujus in quadam naturæ sapientia, vel intentione activa, quærunt.

§. XVI.

Neque minori difficultate circulus sanguinis per omentum laborat, quia membrana est valde tenuis, fibris motricibus nerveisque destituta, insensibilis, pinguedinosa, quare sanguinis ascensus per venas, ob situm hujus membranæ identidem rectum & perpendicularem, non sine labore procedit.

Frid. Hoffmanni Oper. Tom. I.

Scholion.

Quia deficiunt fibræ motrices in omento, hinc motus tonici ope; sanguinis liber cursus non secundatur, & quia facile sanguis in omenti vasis stagnat, hinc in gravioribus chronicis morbis, ex vitio viscerum infimi ventris, ut hydropo, cachexia, plerumque illud corruptum, putrefactum & exesum deprehenditur, valdeque verosimile est, ex lymphaticis omenti ruptis, copiam feri, in malo hydropico, in cavum abdominis descendere.

§. XVII.

Est quoque ascensio sanguinis per venas spermaticas in primis in viris non adeo facilis, propter earum longitudinem perpendicularem & quod multas tortuosas flexuras habent.

Scholion.

A difficiliore hoc sanguinis, præsertim crassioris, per venas spermaticas regressu, herniæ varicosæ, carneæ & aquosæ, circa testiculos enatæ, virili sexui non adeo infrequentes sunt.

§. XVIII.

Neque per uteri substantiam admodum fibrosam, elasticam, compluribus plicatis & circumflexis vasorum ramificationibus instructam, tam promptus sanguinis cursus est.

§. XIX.

Quando propter copiam sanguis per vasa uterina, nimium distenta, non libere fertur & circulatur, obice in venis posito, tunc extrema, in vagina uteri posita vascula, singulis mensibus aperiuntur & sanguis effluere incipit.

Scholion.

Quomodo sanguinis menstruus fluxus contingat, id infra fufius deducere volumus.

§. XX.

Admodum vero difficilis est sanguinis reditus ex pedibus ad cor, propter ascensionem perpendicularem, tam remotam à corde.

Scholion.

Jam ratio facile inveniri poterit, quare in corporibus imbecillioribus, præsertim à diuturno morbo fractis, item in cachexia, vel gravidis, ubi utero extenso, vasa iliaca comprimi solent, tumores pedum, item varices, quæ nihil aliud sunt, quam insignes venarum tumores, à sanguine intra valvulas contento orti, facile producantur.

§. XXI.

Per nullum viscus sanguis celerius trajicitur, quam per pulmones, quia vasa pulmonalia capacissima sunt & via brevissima est à corde.

Scholion.

Illam portionem sanguinis, quæ intrat pulmones & ex iis ad sinistram tendit cordis ventriculum, mediante systole arteriarum, per canales universi corporis tam diffusos distribui debet; unde per nullam partem corporis tota sanguinis massa tam celeriter, quam per pulmones, circumfertur.

§. XXII.

Admodum impetuose & celerrime sanguis per pulmones trajicitur, hinc non mirum, vasa interdum minora valde distendi & demum disrumpi.

Scholion.

Fit id maxime in hæmoptysi, quando unam pulmonum partem obstructio, aut scirrhotas, aut corruptio, obsidet, dissectionibus hæmoptysi demortuorum

E

rum

rum id testantibus; utpote cum hæc liberiori sanguinis itineri majorem adhuc obicem ponant, sanguinis copia & impetus ad alia pulmonum vasa ruens, hæc facillime distendit, aperit atque disrumpit.

§. XXIV.

Sanguinis transitus admodum promptus est per renale colatorium, ob viam à corde ad renes brevem, & quod renum pori ac tubuli urinofi valde laxi sunt, unde serum salsum facile absorbetur.

Scholion.

Celerrimam sanguinis per renes eorumque vasa emulgentia trajectionem, clarissime copia urinæ, quæ brevi tempore post potum largiorem mittitur, comprobatur: neque enim ulla alia via brevior à ventriculo ad renes adhuc detecta est, quam quæ per vasa lactea ad ductum thoracicum, & ad cor, & postea ad renes, pertingit. Et quia celerrime sanguis per arterias emulgentes in renum substantiam adductus, per venas remeat, hinc necesse est, ut mox alius, eadem celeritate, sequatur, quo fit, ut urinæ secretio cito peragatur.

CAPUT IX.

De excellenti circuli sanguinis ad conservationem corporis usu.

§. I.

Prestantissimi & plane mirabiles sunt effectus, qui à sanguinis circulo in corpus & animam redundant.

§. II.

Circulus sanguinis chylum mutat in sanguinem, sive causa est sanguificationis.

Scholion.

Equidem chylus proxima materia sanguinis est: atamen vitæ, nutritioni & actionibus animalibus minus inservit, nisi prius in sanguinem mutetur; quandoquidem ille valde à sanguine differt. Nam chylus, non secus ac lac, ex pinguibus, aquosis & terreis partibus, quæ facile à se invicem secedunt, est compositus, in sanguine vero ejusmodi partium secessio non observatur; chylus stagnatione, non secus ac lac, acescit, sanguis vero foetet ac putrescit & sal volatile exspirat. In chylo pinguedo est valde temperata, in sanguine salina & penetrans; chylus est albus & caret gelatina, sanguis vero est succus gelatinosus, rubicundus.

§. III.

Ut chylus in sanguinem mutetur, necesse est, ut nexus & unio partium, chylum constituentium, primo dissolvatur, secundo, ut dissolutæ partes rursus de novo, ratione figuræ ac situs, combinentur, sicut textura sanguinis est; tertio, ut partes ad novam hanc texturem subeundam inutiles separentur.

Scholion.

Novimus ex philosophia experimentalī, corporum diversam formam, virtutes atque proprietates, à situ, figura & nexu partium dependere, quibus mutatis, mutatur, & qualitas, & virtus, corporis: si quis itaque unum corpus in aliud veli transmutare, opus est, ut priorem texturem partium dissolvat, de novo vero talem earundem combinationem efficiat, qualem corpus, in quod transmutari debet, obtinet.

§. IV.

Ut chylus sanguinis naturam induat, animadvertimus, præter ipsum sanguinem ejusque motum, complura viscera conspirare.

§. V.

Ut chyli partes à nexu suo liberentur & intime cum sanguine misceantur, id optime perficitur in pulmonibus.

Scholion.

Videmus id clarissime, dum sanguis, ex dextro cordis ventriculo emissus, crassus apparet ipsique chylus supernatat, ex sinistro vero spumosus, floridus & fluxilis redditur.

§. VI.

Ad eandem partium chyli divulsionem & intimam cum sanguineis combinationem, sanguinis transitus per vasculosum lienis viscus multum facit.

Scholion.

Quod in pulmonibus non perfectum, id ulterius lien absolvit, cujus functio maxime in eo consistit, ut partes sanguinis & chyli, transitu per innumerabiles vasculorum myriades, in minimas moleculas dividantur, divellantur atque invicem misceantur.

§. VII.

Ut chylus sanguinis naturam induat, id optime perficitur in venarum toto systemate, ubi tardior sanguinis est progressio, qua optime partium assimilatio fieri potest.

§. VIII.

Sicuti portio vini immissa in acetum, diuturna digestionem ac macerationem, in illud convertitur: ita etiam chylus, intime cum sanguine mixtus, diuturniori mora & calore, demum cum ipso confermentatur, inque vasis maxime venosis, figuram, texturem & situm partium sanguinis assumit.

Scholion.

Contextus sanguinis est maxime globosus, sive sanguis constat ex minimis globulis, fluido innatantibus, qui perpetuo circa axin motu rotantur. Huic globulorum motui & collisioni quando particulæ alienæ figuræ sese interponunt, tunc prominentiæ harum facile deteruntur, abraduntur, ut figura identidem fiat globulosa.

§. IX.

Chylus multas superfluas & connubio sanguinis repugnantes, aqueas nempe, falsas, mucilaginosas, in sinu recondit partes, à diversitate alimentorum desumendas, unde opus est, ut ab earum consortio liberetur, in quod excretionem per omnia emunctoria conspirant.

Scholion.

Ex dictis jam apparet, sanguificationis officinam perperam à veteribus in hepate, & à recentioribus in corde collocari, neque hujus causam spiritum in corde vitalem, aut peculiare in sanguine fermentum, statui posse: sed præcipua viscera, emunctoria, immo ipsum sanguinem, symbolum suum conferre, ut ex chylo sanguis fiat.

§. X.

Chylus, dum in sanguinem mutatur, induit colorem purpureum, qui de intima partium mutatione, mediante calore & motu facta, testatur.

Scholion.

Unde rubedo sanguinis suam habeat originem, supra abunde satis discussimus.

§. XI.

Ad chyli mutationem in sanguinem, & ipse sanguis, & omnium viscerum functiones, conspirant: hinc consequitur, hisce læsis, cessare quoque sanguinis boni generationem.

Scholion.

De excellenti circuli sanguinis ad conservationem &c. § 1

Scholion.

Differt utique in sanguinis productione natura à natura, corpus à corpore, in non nullis celeriter ingens ejus copia amissa reparatur, in quibusdam vero valde languide id procedit. Semper vero citius sanguis in corpore spongioso & laxo, exilibus & copiosis venis instructo, quam in gracili, fibroso ac majoribus, sed paucioribus vasis dotato, producitur.

§. XIII.

Sanguinis circulus causa est caloris in corpore nostro.

Scholion.

Calorem esse intestinam partium sulphurearum sanguinis vehementiorem agitationem, vel ex eo cognoscimus, quia, quo progressio & circuitus sanguinis est celerior, ut in febrilibus, quarum pulsus celer & vehemens certissimus index est, eo magis calor in universo corpore augetur, qui, depascendo humidum, sitim inextinguibilem, vigiliam & marcorem infert, simul ac vero pulsus rursus naturalis fit & circuli intensio minuitur, calor etiam corpus deserit: cum enim sanguis celerime per vasa strictiora & angustiora, propter spasmus febrilem reddita, fertur, partium ejus sulphurearum ad partes solidas major fit attritio, appulsio, unde æther in rapidissimum calidum motum conjicitur.

§. XIV.

Omnia, quæ circulum sanguinis potenter augent, ea quoque calorem intendunt: & quæcunque ejus motum retardant, illum minuunt.

Scholion.

Quia motu laborioso, corporis exercitatione, vehementi vocis exercitio, aëre existente nimis calido, potu spirituofo & volatilibus aromaticis medicamentis, pulsus celerior evadit: hinc quoque ab iis crescit calor; ab humectantibus vero, à papaveraceis, ab acidis & nitrosis, cum pulsus debiliior & tardior evadat, calor minuitur & corpus deserit.

§. XV.

Cum calor corporis à sanguinis affluxu dependeat, sequitur, ejus influxu intercepto, partes frigore corripitur.

Scholion.

Clarissime id conspiciamus in principio intermittentium, ubi, ob spasticas cutis stricturas, venæ comprimuntur, ut ad summam cutim sanguis perungere nequeat, hinc frigore & horrore ea afficitur.

§. XVI.

Calor temperatus ad vitam ac sanitatem tuendam valde est necessarius.

Scholion.

Quia partes solidas ac rigidas flexiles reddit, poros & vasa expandit ac aperit, & humores, dum fluidas partes cum solidis intermiscet, tenuiores ac fluidiores reddit: quare calor ad perspirationem, ad circulum sanguinis per minima vasa promovendum, ad nutritionem quoque, multum facit.

§. XVII.

Calore dura corpora flexilia reddi & poros expandi, crassa attenuari & liquari, ut minima spatia ac ductus eo lubentius subire possint, chymicis ac physicis experimentis copiose adstrui potest.

§. XVIII.

Calor frigori ambienti resistit, quod vitæ & conservationi corporis valde est inimicum, humores inspissando, poros occludendo & partes flexiles rigidas efficiendo.

Frid. Hoffmanni Oper. Tom. I.

§. XIX.

Circulus sanguinis est causa secretionum & excretionum, quæ fiunt in corpore nostro.

Scholion.

Ut corpus, in quo vita celebrari debet, ad debitum augmentum perveniat, & ut succi, motu continuo deperdiri, reparentur, opus erat novo succorum recentium apparatu, quo ingestio & digestio alimentorum spectat. Quia vero hæc varii generis succos suppetant, quorum aliæ partes utiles, aliæ inutiles ac superflue sunt, hinc illæ in usum secernendæ, hæ vero ejiciendæ. Hinc patet, sine secretionibus & excretionibus, corpora animantium conservari non posse. Hæ vero non aliter nisi sanguinis motu perficiuntur, hic enim tam utiles, quam inutiles humores recipit, & utrosque per diversa organa & emunctoria separat.

§. XX.

Utiles humores secreti ad conservationem & perfectionem partium corporis nostri faciunt, & hinc retineri, nec statim ejici debent.

Scholion.

Utilissimi humores, qui à sanguine separantur, sunt fluidum nerveum, succus nutritius, lympa, semen, lac: humores vero, qui, postquam secreti sunt, statim excerni debent, sunt sudor & urina: qui vero, post factam secretionem, antequam ejiciantur, egregium adhuc usum atque utilitatem exhibent, sunt saliva, lympa pancreatica ventriculi & intestinorum, bilis & intestinalis mucus.

§. XXI.

Omnes secretiones & excretiones ope sanguinis circuli perficiuntur: hinc sequitur, has cessare deficiente sanguinis circulo; nisi enim sanguis ad specifica secretoria, colatoria & emunctoria per arterias advehatur, nihil secerni potest.

§. XXII.

Quo promptior itaque sanguinis ad colatoria est appulsio, eo magis secretionis negotium viget, & contra.

Scholion.

Hoc theorema plurimi usus est in praxi. Si quando medicus intendit, secretionem ullius humoris utilis, vel excretionem noxii promovere, necesse est, ut respiciat ad colatoria & ad sanguinis versus has partes appulsus.

§. XXIII.

Sanguinis circulus est præcipua causa nutritionis & augmenti corporis.

Scholion.

Mediante enim motu progressivo, succus nutritius per arterias ad partes adducitur, iis apponendus: deficiente itaque hoc motu, necesse est, partes alimento suo defraudari. Deinceps augmentum & incrementum corporis partium dependet maxime à repletionem omnis generis tubulorum, quæ fit à succis, quibus exinanitis, concidis & subsidet substantia partium & marcor fit.

§. XXIV.

Sanguis ejusque circulus est omnis agilitatis & roboris causa.

Scholion.

Robusta illa corpora dicimus, quæ majoribus muscularibus prædita sunt, & quæ multum in attollendis ponderibus valent; magnos labores ac motus perferre possunt, neque facile a causa externa afficiuntur: imbecillia vero ea sunt, quæ minus laboris ac motus, sustinere valent, parum roboris in musculis habent & quam facile a causa externa afficiuntur. Jam vero deprehendimus, robu-

fiora corpora majora vasa, cor capacius, nervos validos & sanguinem copiosum habere, præ imbecillioribus, quæ habent vasa tenuia, angusta, cor minus, teneros & exiguos nervos, & parum sanguinis in venis alunt. Robur itaque corporis perit, sanguine plus justo, sive per inediam, absunto, crescit autem robur partium, appetitu reddito.

§. XXV.

Præcipuus quoque sanguinis circuli usus atque effectus est, ut corpus animale, in se & sua natura valde corruptibile, ratione suæ mixtionis ac structuræ, salvum ac integrum conservetur & à mortifera putredine vindicaretur.

Scholion.

Circulus sanguinis vitalis est; quamdiu is in corpore viget, tamdiu dicitur adeste vita, & tamdiu etiam universum corpus omnesque ejus partes à putredine immunes sunt: simul ac autem is extinguatur, corruptio & mors adest. Hæc latius deducta videas in superioribus.

§. XXVI.

Continuus sanguinis circuitus avertit omnia ea, quæ fluida in motum putredinosum dissolutorium conjicere apta sunt.

Scholion.

Putrescunt & corrumpuntur corpora liquida corruptibilia, in quiete constituta, ab aëre externo calido, qui motu suo intestino, nexum partium male cohærentium dissolvit. Quodcumque vero sunt in perpetuo motu progressivo, tunc ejus, vel minimæ partes, circa axin suam perpetuo rotantur, sive intestina motione agitantur, qui motus internus aëris & ætheris actioni externæ resistit. Hinc videmus vina generosa & spirituosæ, ob intestinam partium agitationem, non vappescere, quæ vappescencia corruptiva & tenacitas, sola agitatione & conquassatione, impediri potest. Ejusmodi agitatione & ventilatione etiam putredo à vegetabilibus in acervum congestis arcetur. Avertit quoque sanguinis circulus putredinem à sanguine, dum partes fermentescibiles agilissimas & heterogeneas perpetuo separat; ut est latex salivalis, bilis, urina materia perspiranda, quæ si remanent, & impurum, & corruptibilem sanguinem reddunt.

§. XXVII.

Libera perspiratio sanguinem omniaque fluida à putredine defendit.

Scholion.

Quia motu progressivo sanguinis partium intestinus calidus augetur, & multæ particulæ subtiliores, calidæ, salinæ, sulphureæ, agilissimæ indolis gignuntur, quæ expirari & foras propelli debent, ne motu suo texturam temperatam sanguinis invertant: inde insignis transpirationis usus, ad conservandam genuinam sanguinis texturam, clarissime apparet. Et discimus exinde, non dari meliorem viam ab imminente putredine & corruptione sanguinem defendendi, quam liberiori transpiratu reddito, quod in febribus omnibusque morbis malignis & qui ab impuritate nascuntur, ut scorbuto, lue venerea, magno usui esse potest.

§. XXIX.

Neque datur præsentius, ad omnes præcavendos morbos, præsidium, ac liber sanguinis & humorum circulus.

Scholion.

Quod si enim morborum, tam acutorum, quam chronicorum, primordia atque origines exquisitiori paulo indagine exploramus, deprehendimus, sanguinis & humorum stases, stagnationes, minimorum vasculorum obstructions & excretiones, maxime vero omnium perspirationem impeditiorem, eos progignere. Cum vero sanguinis liber motus ac circulus has causas omnes

avertat; facile intelligitur, in eo maximam efficaciam adversus ingenerandas morborum materiales causas sitam esse.

§. XXIX.

Circulus quoque sanguinis est illa toties decantata natura veterum, optima morborum medicatrix.

Scholion.

Veterum sagacissimi & experientissimi medici, quia perspiciebant, homines periculose ægrotantes, sine ullo medico & medicina, feliciter sæpe sanitatem recuperasse, ac si ipsis usi fuissent, non sine ratione asseverarunt, naturam corporis humani esse optimam morborum medicatricem, cujus ductum & viam medicus sequi debeat. In quonam vero hæc natura consistat, ob defectum anatomes & minus cognitam machinæ nostræ structuram & motus vitales ignoratos, neutiquam comprehendere poterant: nostro vero tempore, cum beneficio diligentioris anatomes atque experimentalis ac mechanicæ physicæ, motuum naturæ & causæ clarius pateant, constanter asserimus, naturam illam, cui tantas ascripserunt in curando & conservando corpore vires, nihil aliud esse, quam sanguinis liberum circulum, qui in morbis, præsertim febribus, adauctus, stases & stagnationes humorum removet, spasticas strictureas partium aperit, humorum tenacitatem dissolvit, eorumque nimiam quantitatem motu imminuit & per colatoria omne superfluum excludit. Neque alia chronicas passiones expugnandi excogitari potest via, quam ut per medicamenta sudorifera & aquas medicatas salubres, atque decocta medicinalia, motus sanguinis & humorum augeatur, ut fluxiles reddantur, quo adaperitis poris, massa sanguinea ob omnibus excrementitiis sordibus purgetur.

§. XXX.

Sanguis bonus & temperatus, per cerebri vasa translatus, vigorem & robur animo infert.

Scholion.

Attenta & crebra experientia compertum habemus, quod præsentia animi & moderatio affectuum, ingenii quoque vigor, maximam partem à sanguinis laudabili per cerebrum cursu moderatori, dependeat: nam simul ac ille immoderatus fit ac nimis celer, proclivitas ad præcipientes animi affectus, iram, rixas nascitur; si nimis velox est, furoris metus subest, uti videmus in febribus; si sanguis nimis paucus, ad timorem & terrorem fit proclivitas; si tardius movetur, mœstitia & angor, mentem occupant.

§. XXXI.

Diversæ animi inclinationes ad virtutes ac vitia plurimum à sanguinis circulo per caput dependent.

Scholion.

Hinc petenda est ratio, cur temperamentum corporis sequantur animi mores. Observamus ad ideam motus sanguinis, fieri actiones sic dictas animales. Cholerici, in quibus sanguis celerius transfertur, ad temeritatem, ambitionem, factiones, seditiones, inimicitias, odia admodum proni sunt. Sanguinei, in quibus placidior & facilior sanguinis cursus est, ad voluptates, luxuriam, otium, libidinem & omnia, quæ sensus delectant, valde sunt proclives. Phlegmatici, in quibus sanguinis cursus admodum languidus est, ad socordiam, pigritiam, sorditiam, turpitudinem inclinant & nihil æstimant. Melancholici, in quibus sanguinis motus est tardus, sunt valde timidi, suspiciosi, pertinaces.

§. XXXII.

Non modo temperies & motus, sed & copia sanguinis, animi dispositionem & operationem varie modificat.

Scholion.

Scholion.

Sicuti longe diversa est ratio, aliusque effectus motus, si major, ac si minor corporis moles movetur: ita etiam in corpore nostro alia vis in animum à motu sanguinis copiosi, alia à motu parioris redundat, ideoque observamus, si cholericus sanguine abundat, omnes ejus animi actiones vehementiores atque potentiores esse. Quare majus robur, vigor, animositas, soliditas, constantia & vehementia in agendo animo increfcit, quæ omnia non parum remittunt, si exilior sanguinis in venis copia existit. In melancholicis, si copiosior & crassior sanguis per cerebri membranas earumque minima vascula fertur, magna idearum fixitas, firmior rerum impressio & major in agendo pertinacia produciuntur. Sanguinei, sub majori sanguinis abundantia, magis sunt voluptuosi, magis ad libidinem excitantur & animositas in animo crescit: si vero minor copia vasa perluit, timidi, fluctuantes, inconstantes evadunt.

§. XXXIII.

Sicut sanguis copiosus & crassus, ad fortitudinem & robur corporis: ita tenuis & parvus, ad timiditatem & subtiliorem sensationem disponit.

Scholion.

Egregia sunt, quæ circa hanc rem tradidit *Aristoteles Lib. 11. de partibus Cap. IV.* ita scribens: quorum animalium sanguis fibris multis & crassus refertus, illa animosa & furibunda sunt, solida enim omnia, quando calefacta sunt, vehementissime calefaciunt, ex quo fit, ut tauri & apri animosi, iracundi furibundique sint, sanguis enim eorum fibris refertus est. Et idem gravis auctor *Lib. 11. de partibus animalium Cap. II.* prodidit: sanguinem crassiorem & calidiorem ad efficiendum robur concurrere, sed non ad intelligentiam, tenuiorem vero obtinere vim plenioris sentiendi ac intelligendi.

§. XXXIV.

Sanguinis itaque circulus, non modo animam cum corpore connectit, sed & illius operationes dispensat.

Scholion.

Salvo & incolumi sanguinis circulo, actiones vitales & animales recte sese habent & legitime procedunt, homo videlicet percipit, videt, audit, cogitat, & ratiocinatur, simul ac vero circuitus sanguinis minuitur, cessat, vel plane extinguatur, protinus etiam sensus, memoria, vis imaginandi, & ratiocinandi minus recte sese habent, vel plane intercidunt. Quicumque itaque cupide desiderat, ut diu anima in hoc terrenò corporis domicilio commoretur & operationes suas perficiat, is eo omnem curam dirigere debet, ut circulus sanguinis & motus vitales, qui eum dispensant, maneant salvi: quod optime bona diæta perficere poterit: & quicumque etiam mentem sanam in corpore sano conservare vult, is sanguinis temperatum motum ut reddat, curam diligentiamque impendat. Optime enim *Hippocrates L. de flat. §. 20.* prodidit: opinor, inter omnia, quæ in corpore sunt, nihil magis ad prudentiam conferre, quam sanguinem, qui ergo, cum in constanti habitu persistit, consistit & prudentia, sanguine vero permutato, concidit etiam prudentia. Videmus id in temulentis per ebrietatem, ubi aucto repente sanguine, percellitur animus & in animo prudentia, sunt presentium malorum obliviosi, & futurorum bonorum spe beantur. Et notabile est, quod prodidit *Democritus* in quadam ad *Hippocratem* epistola: augefcit, inquiens, intelligentia presente sanguine, cujus providentiam habere, honestum est eos, qui recte sentiunt. At ubi corporis habitus agrotat, nec mens ipsa alacritatem habet ad virtutis meditationem: morbus præsens animum vehementer obscurat & intelligentiam in consensum trahit.



P H I L O S O P H I Æ
C O R P O R I S H U M A N I
L I B R I P R I M I,
S E C T I O I I.

De actionibus naturalibus, five motibus secretoriis & excretoriis,
chylum sanguinem & succum nutritium perficientibus
ac depurantibus; item de generationis negotio.

C A P U T I.

De motibus & organis secretoriis & excretoriis in genere.

§. I.



Actiones naturales eæ dicuntur, quæ ad naturam corporis nostri constituendam & perficiendam faciunt, succos congruos, pro nutritione partium fluidarum & solidarum, reparando.

§. II.

Actus & motus vitales, nec salvi, nec diuturni esse possunt, sine actibus & motibus naturalibus, quibus commoda materia, pro nutriendis & augendis partibus corporis, fluidis ac solidis, præparatur atque perficitur.

Scholion.

Actiones & motus vitales sunt systole & diastole cordis atque arteriarum, & thoracis constrictio & dilatatio, quibus sanguinis non interruptus fit circuitus, quo omnis corruptio à corpore, in se putrescibili, arceatur: actiones vero naturales eæ vocantur, quæ naturam corporis nostri conservant, id est, quæ partibus, tam solidis, quam fluidis, ut augeant ac reparentur, congruum succum atque materiam ex alimentis subministrant.

§. III.

Universa œconomia actionum naturalium maxime in secretionibus & excretionibus consistit, quibus utile ab inutili secernitur, & illud in usum conservatur, hoc vero foras ejicitur.

Scholion.

Quemadmodum operationes, quæ perficiuntur in universa rerum natura, synæresi & diæresi, five conjunctione & separatione potissimum fiunt: ita etiam hisce duobus naturæ instrumentis, salva potissimum & incolumis manet totius corporis nostri œconomia; quandoquidem natura nostra microcosmica semper est occupata, ut utile ab inutili discernat, illud cum aliis uniendo, hoc vero foras ejiciendo. Ita in ventriculo & intestinorum canali, virtute succi salivæ fermentativa, & accessu bilis in duodeno, alimenta dissolvuntur,

utilis & chylosus succus ex iisdem extrahitur, & postea per publicum illud colatorium, tunicam nempe intestinorum villosam, secernitur & cum sanguine demum miscetur. In extremitatibus & poris vasorum, succus *γλίσχυρός*, pro nutriendis & augendis partibus solidis, separatur. In cerebro tenuissimum fluidum, ad motum & sensum præstandum, à sanguine arterioso sequestratur; in testium virilium canaliculosa textura liquor seminalis, gelatinosus, subtilissimus, ad corporis propagationem, secedit; in mammis, chylus pro nutritione infantum, à sanguine segregatur; tenuissimum & fermentativum liquidum, in glandulis salivalibus & in pancreate, pro intima alimentorum dissolutione, elaboratur; serum salino-sulphureum, viscidum, quod bilis nomine venit; in hepatis tubuloso viscere, ab advecto per venam portæ sanguine secernitur ad pleniorum chyli elaborationem; inutiles vero alimentorum reliquæ & feces per alvum expurgantur; serum superfluum falsum, crassum, per tubulosam renum substantiam; vaporosum autem subtilius & aquosum, falso-sulphureum recrementum per transpirationem & cutis ductus ac glandulas separatur atque ejicitur; & mucofitas denique superflua per glandulas narium, bronchiorum & intestinorum crassorum tunicas utilissime sequestratur & foras ejicitur.

§. IV.

Secretio liquidorum, vel sine interventu certorum organorum, quæ glandulæ sunt, five machinæ secretoriæ, vel earum ope perficitur: illa in succi nutritii & lymphæ secretionem locum habet, hæc vero, quæ fit per glandulas, circa reliquos omnes secernendos & excernendos humores occupata est.

§. V.

Glandulæ duplicis generis sunt, vel simplices, seu conglobatæ; vel compositæ, seu conglomeratæ, ex multarum glandularum acervo aggregatæ.

§. VI.

Simplices, ex fibris elasticis motricibus & circularibus conflatae, non separant, sed lymphæ & chylo transcurrenti impulsu præstant: compositæ vero humores sequestrant, ita, ut singulæ glandulæ canalem minorem habeant, quo continuato, canalem majorem constituunt, hinc ubi glandulæ sunt conglomeratæ, ibi vasa quoque excretoria conspiciuntur.

§. VII.

Secreti humores mirum inter se differunt, sicut apparet

De motibus & organis secretoriis & excretoriis in genere. 55

paret in saliva, bile, nervorum liquido, urina, mucus, sudore, semine & lacte: hinc secretio, quæ fit per glandulas, non potest esse una eademque, unde non immerito hujus diversæ secretionis ratio quærenda est.

Scholion.

Nonnulli causam hujus differentis secretionis collocant in peculiaribus partium fermentis, præcipitantibus, vel assimilatoriis; nonnulli in certa canalium figura, quæ nihil, nisi quod cum ipsa respondeat, admittat: sed, ut nostra fert sententia, admodum falluntur, siquidem nec fermentorum existentia, vel constantia in canaliculis, per quos perpetuo transit liquidum, multo minus eorum specificus in discernendo effectus, intelligi potest. Neque liquidum discernendum peculiarem & constantem orificiorum & canalium figuram desiderat, sed diversissimæ naturæ liquidum in omnia canalium orificia transit ac penetrat, modo sint satis ampla, & consistentia humorum discernendorum respondeat.

§. VIII.

Diversitas secretionis rectissime à diametro & amplitudine canalium, majori, vel minori, deducitur.

§. IX.

Angustissimi canales nullum alium fluorem admittunt vel recipiunt, quam tenuissimum, qui ferri per has angustias possit: unde, qui crassioris est indolis, remanere debet.

§. X.

Ampliores canales crassis humoribus transitum præbent.

§. XI.

Quum per canalem ampliorem non modo crassus humor, sed & tenuis transfluat, hinc utique colatoria glandulosa, laxioris consistentiæ, præter humores crassos, tenues etiam admittunt.

Scholion.

Bilis & mucus sunt humores crassioris consistentiæ, nullumque dubium est, quin vasa secretoria in hepate etiam simul lymphæ transgressum præbeant, quæ tamen de novo per alios angustos canales separatur, hinc facile dilucescit ratio, quare in iis locis, vel visceribus, ubi humores crassi separantur, ut in hepate, palato & ductu narium, copiosa lymphatica vasa conspiciantur.

§. XII.

Diversorum humorum secretio à diametro & amplitudine canalium discernentium dependet, quare consequitur, angustos canales, si præter naturam ampliuntur, fluida crassioris etiam consistentiæ suscipere posse.

Scholion.

Hoc theorema magni usus in praxi medica est; observamus enim, angustis canalibus à copioso humorum affluxu præter naturam ampliatis, ingentem copiam crassiorum etiam liquidorum secerni. Quanta enim copia crassioris sputi in tussi humida per tunicam bronchiorum glandulosam ejicitur? Sub cute positæ glandulæ, in hecticis & debilitatis nimium relaxatæ, etiam admittunt illud serum, quod urina materiam constituit, quæ tunc pauca redditur. Glandulæ genitalium, tam in feminis, quam in viris, ab humorum affluxu nimium relaxatæ, ingentem & copiosam viscidam materiam ejiciunt, quod in gonorrhœa & fluore albo conspicitur.

§. XIII.

Per canales nimis apertos etiam liquidum tenue, in sanguine contentum, quod fluido nerveo materiam subministrare potest, simul transfluit. Ex eo jam liquida ratio est, quare sub diuturnis & copiosis excre-

tionibus, vires tam motrices, quam facultas sentiendi & cogitandi, detrimentum capiant.

Scholion.

Apparet hoc ipsum in longis diarrhœis, sudoribus copiosis, nimio salivæ profluvio, item effusione feri in cavitatem thoracis & abdominis, gonorrhœa, fluore albo, diuturna lactatione.

§. XIV.

Quando pori emunctoriorum laxiores, qui crassioris texturæ humores transmittunt, valde angustantur, quod maxime fit spasmis; tenues tantum & aquosos, remanente crassiori portione, recipiunt.

Scholion.

Videmus id clarissime in affectibus spasmodicis, qui, renum vasa secretoria coarctantes, efficiunt, ut urinae tenues ac aquosæ mingantur. Ab iisdem spasmis si ductus biliosi coarctentur, materia biliosa manet in sanguine, unde color cutis & faciei flavescent, qui ab iracundia sæpissime fit, nascitur.

§. XV.

Ampliantur ductus secretorii & excretorii in glandulis à copioso sanguinis per arterias ad has partes affluxu & impulsu, siquidem glandularum tubuli nonnisi continuati extremarum arteriarum ductus intorti ac involuti sunt, unde non mirum, arteriis dilatatis, hos ductulos etiam dilatari.

Scholion.

Hæc theoria eximiam lucem in praxi medica accendit & rationes subministrat, quare venæ sectiones, purgationes & derivationes humorum per pediluvia, multum faciant ad nimias excretiones cohibendas.

C A P U T II.

De nutritione & succo nutritio.

§. I.

Nutritio est actus, cujus beneficio non modo corpus humanum producit & ad conveniens augmentum pervenit, sed & continuo reparatur ac restituitur.

§. II.

Sine nutritione, neque generatio corporis, neque ejus perfectio, duratio & vita consistere potest.

Scholion.

Generatio enim corporis nihil aliud est, quam minutissimi corpusculi, quod jam in semine delitescit, extensio, quæ secundum longitudinem, latitudinem & soliditatem, antequam ad perfectionem veniat, ad multos annos se extendit, & tunc dicitur auctio.

§. III.

Non tantum partes solidæ, verum maxime etiam fluidæ, continuo nutrimento & jugi reparatione opus habent.

Scholion.

Intestinus ille calidus sanguinis motus, qui à motu continuo progressivo maxima ex parte dependet, ejus est naturæ ac indolis, ut perpetuo in partes liquidas & etiam solidas corporis agat, eas separando, dissolvendo, immutando; unde animadvertimus, sanguinem & humores temperatos & benignos, validiori calore, uti videmus in febribus, penitus fere, progressu temporis, in excrementa salino-sulphurea viscida converti posse. Et utut homo alimentis plane insipidis expertibus vescatur, nihilo minus, & sudor, & urina, & alvina excrementa, copiosis particulis salino-sulphureis scatibunt.

§. IV.

Cum calor continuo temperatos succos consumat utilesque in inutiles atque excrementitios convertat, opus utique est, ut in horum locum nova semper temperatorum accessio fiat.

Scholion.

Quare ingens vitæ in morbis periculum imminet, ubi calor præter naturam diu affligit & omnis appetitus extinctus est.

§. V.

Sanguis & humores quotidie consumuntur & restituantur.

Scholion.

Quando cibus non assumitur, aut non recte coquitur, universum inde corpus emaciatur, adeo, ut præter fibras & vasa, in partibus vix quicquam maneat, cum contra cibo sufficiente assumto & bene concocto, turgida & succi plena fiant. Et cum ex alimento succi & sanguis generentur, idque quotidie, certum est, nisi iterum consumerentur, eos in ingentem nimis copiam brevi excrecere debere: quod tamen non accidit.

§. VI.

Nutritioe etiam partes spirituosæ & quæ vires sustinent, restituantur.

Scholion.

Diuturna inedia vires admodum consumi extra dubium est, quæ, alimento bono & spirituofo assumto, subito increscunt & reparantur; ex quo clare intelligitur, robur & vires corporis nostri à partibus subtilioribus alimenti potissimum proficisci, quemadmodum etiam videmus, & medicamentis, & alimentis, à morbo, vel alia ex causa deperditas vires, reparari.

§. VII.

Succus, qui partes solidas corporis nostri nutrit & augeat, easque amissas reparat, fluidus, gelatinosus & temperatus esse debet.

Scholion.

Sicut omnes partes corporis nostri solidæ, carnes, ossa, omni sapore carent: ita etiam nutrimentum valde temperatum desiderant, in quo nulla excessiva qualitas eminet; & hujus indolis est gelatina.

§. VIII.

Membranæ, cartilagine, ossa, carnes animantium decenti coctione, in gelatinosum, diaphanum succum dissolvuntur; unde recte concluditur: in quod quid resolvitur, ex illo etiam constat.

§. IX.

Animadvertimus prima animantium rudimenta à succo lymphatico, sive albumine ovi, incrementa sumere, & embryones ac pullos, in aqua tepida, in liquamen pellucidum penitus dissolvi.

Scholion.

Rectissime hinc concludimus: ex quibus constamus & generamur, ex iis etiam nutrimur.

§. X.

Gelatinosa alimentorum substantia, quæ in sanguine continetur ac bene elaborata est, est vera nutriendarum partium materia.

Scholion.

Quare observamus in robustis corporibus sanguinem admodum gelatinosum: eorum vero, qui tabe vel fame pereunt, sanguis nimis fluidus est & gelatinoso concrecibili succo caret.

§. XI.

Sanguinis itaque diaphana, non rubicunda portio, nutrit.

Scholion.

Sanguinis rubicunda portio non transcendit suos alveolos, arterias & venas, neque in porosam fibrarum, quæ stamina omnium partium sunt, substantiam vertitur. In fame enectis vasa adhuc plurimum liquoris rubicundi, sed minus concrecibilis, continent. Neque color musculorum rubicundus est ipsis naturalis, sed dependet à sanguine interfluente, quo, per aquam cum siphone injectam, eloto, omnes fibræ carneæ albidæ coloris fiunt.

§. XII.

Neque chylus proxima nutritionis materia est, quia nondum satis elaboratus, sed multis aqueis, superfluis, falsis, à quibus liberari debet, particulis, adhuc scatet.

§. XIII.

Quamvis chylus non abeat in partium solidarum substantiam, tamen oleosa ejus & pinguis portio materia pinguedinis est, qua copiosæ corporis partes interiorius sæpe perfusæ sunt.

Scholion.

Pinguedo in animantibus sacculis inhæret membranaceis, qui sanguiferorum vasorum ramificationibus, tanquam uvæ racemis, adhærent: & ex portione chyli oleosa originem trahit, quæ ex tenuissimis arteriolarum orificiis exsudat, inque membranis caloris expertibus densatur atque concrecit. Quicunque itaque copiam chyli pinguis generant, insuper temperamento calido ac humido gaudent, corpus parum exercent & tranquilla mente utuntur; ii facile pinguescunt.

§. XIV.

Quia materia nutritionis est gelatinosus succus, hinc alimenta, quæ copiam gelatinæ continent, nutritioni admodum idonea sunt, quæ vero parum gelatinosæ substantiæ complectuntur, nutritioni quoque minus apta existunt.

Scholion.

Carnes itaque juniorum animantium succulentæ, bovina, vitulina, vervecina, gallinacea, pulli, ova quoque & ex illis parata juscula, celerem nutritionem efficiunt & sanguinem morbo absumentum, vel extra largissime effusum, celerrime restitunt; hinc Gallorum natio, quæ hoc victu delectatur, ad largas & crebras admittendas sanguinis emissiones apta & promptissima est. Patet porro ex dictis ratio, quare alimenta ex plantis, vel vegetabilibus, si semina exceperis, desumpta, parum nutrant.

§. XV.

Quia auctio est expansio partis quoad omnem dimensionem, hæc vero fieri nequit, nisi succus nutritivus omnes poros subeat & fibris apponatur; non potest autem eos subire, nisi valde sit subtilis, motu & pressione intus adigatur; neque potest assimilari nisi sub quiete: ergo ad nutritionem absolvendam opus I.) est subtilitate partium, materiam nutritiam constituentium, opus quoque II.) est calore ac motu, quo materia intrudatur, denique opus est III.) quiete, ut apponatur.

Scholion.

Observamus in vegetabilium nutritione, aquam pluviam, quæ omnium levissima & subtilissima est, optimam esse, sique velimus per tempus virides plantas, vel flores conservare, opus est, ut quotidie aquam renovemus, ex qua tantum subtilem & delibatissimam partem recipiunt, relicta inutili crassiori, quæ facile putrescit. Novimus quoque, albumen ovorum esse veram nutritionis pullorum, ovis inclusorum, materiam;

riam, quod ex tenuissimis partibus constare debet, alias calore non ita resolvi posset, ut minimas in semine latitantes partes subire atque expandere posset.

§. XVI.

Ad tenuitatem succi nutritii conciliandam multum nos facere arbitramur liquidum nerveum, quod lymphæ in glandulis passim affunditur, quæ spirituosæ materiæ conveniens est vehiculum.

Scholion.

Spirituosum & simplicissimum cerebri ac nervorum fluidum materialiter quoque omnibus corporis nostri partibus esse admixtum vero est simile, unde ab omnis generis excrementorum nimia profusione ingens nascitur debilitas: deinde observamus, nutritionem non bene procedere earum partium, vel corporum, quæ vitio cerebri, vel nervorum laborant.

§. XVII.

Ut nutriatur pars, sive majorem soliditatem acquirat, opus est, ut motrice quadam vi succus in poros partium adigatur; unde videmus, calorem ad omnem nutritionem esse necessarium, qui elastica & expansiva vi poros partium aperiat & succum nutritium in minimas moleculas dissolvat easque in fibrarum minima intrudat.

Scholion.

Quod vis quædam elastica, potenter movens ac expandens, ad nutritionem sit necessaria, vel ex eo judicamus, quod radices arborum, lapidum commissuris infixæ, succrescentes, horum pondere in incremento non impediuntur, ut potius ipsas fissuras dilatent, ponderosos sæpe lapides findendo, diruendo & submovendo.

§. XVIII.

Mediante pulsu & ictu arteriarum, succus nutritius, qui lymphæ vehitur, per extrema vasorum & poros arteriarum lateralium secernitur, postea fibras intrat, quas nove quasi rigat & perluit, redeunte, per vasa lymphatica, materia aquosa & superflua gelatinosa.

Scholion.

Apparet exinde, sanguinis circulum esse medium, quo advehitur succus nutritius ad partes, unde ligata arteria ex toto nutritio partis perit.

§. XIX.

Ad convenientem partium nutritionem non tantum impulsus sanguinis ac succi nutritii necessarius est: sed requiritur quoque, ut pars nutrienda decenti tono ac robore gaudeat, quo succi alibilis debita admissio & superfluarum fiat exclusio.

Scholion.

Tonus & robur partium utique bonæ nutritioni admodum inservit, quia, si nimium contracti sint pori, ut sit in spasmis, nihil admittitur, si nimis fuerint laxi, ut in cachecticis & paralyticis, valde crassas ac mucidas recipiunt, unde cito quidem caro, sed non bona concrevit, quod in partium externarum vulnerationibus sæpius animadvertitur.

§. XX.

Ut liquidum solidis apponatur, quiete opus est, quæ optime sit partium coagmentatio atque concretio.

Scholion.

Perpicua hinc fit ratio, quare animantia æque ac homines cito & largiter nutriantur & accrescant sub somno & quiete, præsertim corpore existente spongioso & sub laudabili victu: item quare sub labore & motu

graviori, vigilia, nec non sub febrili sanguinis commotione, corpus decrescat & nutritio minuatur.

§. XXI.

Corpora juniora facilius nutriuntur & incrementum capiunt, quam senilia, quæ potius decrescunt: in illis enim pori sunt ampli, partes flexiles & facile succos recipiunt; in senibus vero fibræ sunt contractæ, earum spatia inanita, poris coarctatis, & partes nimis rigidæ, vel duræ, fluidi nervei sanguinisque & succi nutritii minorem quantitatem admittunt.

Scholion.

Ex dictis jam facile fluit, quod ii, quorum corpora adolescere debent, copiosius desiderant nutrimentum; senes vero, & qui partes valde rigidas habent, pariori contenti esse debeant.

§. XXII.

Quia nutrimentum dulce ac temperatum esse debet: hinc existente sero valde impuro, excrementitio, non laudabilis fit nutritio.

Scholion.

Ostendunt hujus theorematris veritatem omnes cachectici, scorbutici, cacochymici, item ad extremam senectutem perducti, quorum serum, ob occlusa emunctoria & excretiones imminutas, valde salsum ac impurum fit.

CAPUT III.

De lymphæ ejusque motu & usu.

§. I.

Lymphaticus quoque humor secernitur ab arterioso sanguine, & est liquor diaphanus, aqueus, subtili gelatina imbutus, qui peculiaribus vasis, dictis lymphaticis ac pellucidis, ab ambitu corporis & substantia partium ad cor revehitur.

Scholion.

Lymphæ multum convenit cum succo nutritio, quinimo originem suam ex hoc mutuatur; siquidem ejus fluxilis & nimis aquea portio est & recrementum quasi nutritionis. Lymphæ vero, quæ in lymphaticis vasis vehitur, non nutrit, quia vasa hæc revehunt à partibus, non autem advehunt: sed potius est vehiculum sanguinis.

§. II.

Duplex est origo vasorum lymphaticorum, quædam ex ipsis arteriis prodeunt, alia ex porosa & cellulosa partium substantia nascuntur.

§. III.

Arteriæ, postquam in minimas ramificationes distributæ fuerint, tandem, pulsu cessante, in duplicis generis canales reflexos abeunt, & hi, qui sunt majoris diametri, portionem sanguinis crassiorem & rubicundiorum recipiunt, qui minoris vero sunt amplitudinis, tenuem tantum & fluxilem lympham, sive aqueam sanguinis partem, suscipiunt.

Scholion.

Quod arteriæ in vasa lymphatica terminentur, vel ex eo dilucescit, quia flatus, vel liquor, aut argentum vivum, siphone per arterias immissa, experimento Nuckii & Malpighii, non tantum per venas, sed & per vasa lymphatica partium transeunt.

§. IV.

Lymphatica, quæ ex partium substantia oriuntur, aquosam succi nutritii partem resorbent ac revehunt ad cor.

§. V. Quia

§. V.

Quia lymphatica vasa ex substantia partium nascuntur, quæ ibi subsistentem aquosam partem revehant: hinc dari ratio potest, quare ab usu fortiorum purgantium, vel diureticorum, in cachecticis, copiosum humidum ibi subsistens in hos canales resorberi & per intestinorum glandulas expurgari possit.

§. VI.

Quia vasa lymphatica recipiunt aqueum & fluxilem humorem ex sanguine arterioso: hinc facile perspicitur ratio, quare in iis locis, vel partibus corporis, ubi regressus sanguinis per venas valde est difficilis, copiosa vasa lymphatica reperiantur eaque facile intumescant, in hydatides explicentur, vel etiam disrumpantur.

Scholion.

In procinctu jam ratio est, quare in hepate, item in utero, nec non in intestino colo, in vasis spermaticis, in pedibus quoque, insignia & plura adsint lymphatica vasa, & quod in illis partibus facile tumores aquosi suboriantur.

§. VII.

Revehunt vero omnia lymphatica, ex universo corpore lympham suam ad capsulam lumbarem & chyli-ferum ductum, in quem se exonerant.

Scholion.

Tres rami majores vasculorum lymphaticorum, videlicet iliacus, mesentericus & hepaticus, capsulam constituunt; quæ vero ex partibus superioribus lympham revehant, ipsi ductui thoracico implantantur.

§. VIII.

Cum omnia vasa lymphatica revehant lympham à circumferentia ad centrum, omnis autem regressus, propter ascensum perpendicularem, præsertim ex partibus remotioribus, contra naturam & valde difficilis sit; hinc sapientissimus opifex multa ordinavit adjumenta, quæ lymphæ regressum faciunt.

§. IX.

Attenta observatio anatomica docet, vasa lymphatica in itinere suo semper transire & salutare glandulas conglobatas, quarum ea est, auctore Nuckio, structura, ut ex multis membranis densis & fibris elasticis motricibus, nec non tenuissimis nervorum & vasorum sanguineorum ramis, compositæ sint.

Scholion.

Animadvertimus, vasa lymphatica ex pedibus ascendentia, per eximias glandulas inguinales ac iliacas, itemque mesentericas, transire, quæ vero à superiori trunco descendunt, per jugulares & axillares ferri. Quod vero horum transitus fiat per glandulas, hoc experimento perspicuum evadit, quando videlicet ope tubuli vitrei in vas lymphaticum hydrargyrum, vel atramentum immittitur, tunc penetrat in glandularum substantiam & earum corpus argenteo, vel atro colore tingit.

§. X.

Causa, cur vasa lymphatica per glandulas conglobatas transeant, hæc solertioribus anatomicorum videtur, ut fibrarum motricium contractione, pressionem ac impulsu ipsi lymphæ subministrant.

Scholion.

Hiscæ itaque glandulis, præsertim jugularibus, vel etiam iliacis, obstructis, vel induratis, quod ex earum pertinaci tumore cognoscitur, lymphæ in suis vasis stagnat, vappescit, corrumpitur & ad porosam substantiam

carnis musculorum effunditur, & hinc rheumatismorum, exulcerationum, vel catarrhalium defluxionum, origo fit.

§. XI.

Ad facilitandum lymphæ regressum, vasa hæc valvulis instructa sunt, & quidem sigmoidæ, numerosioribus & angustioribus, quæ quidem lympham libere transmittunt, impediunt tamen, quo minus regurgitet.

§. XII.

Causa, quare uno arterioso vasi adducenti, duo revehenti, nempe venosum & lymphaticum, apposita sint, hæc videtur esse, quia sanguinis & humorum, propter pulsum cordis & arteriarum ac nisum liquidorum, ad inferiora celerrima est progressio, tardior vero & difficilior reditus; igitur, ne retardetur sanguinis circuitus, sed æqualis maneat, per duplicis generis vasa reducens, celeritas fluxus in arteriis compensatur.

§. XIII.

Lymphæ adducta una cum chylo, quem etiam vehunt lymphatica, affunditur sanguini, ad dextrum cordis ventriculum remeanti, paulo crassiori, eum in finem, ut inde fluiditatem, tenuitatem ac spiritualementiam novam accipiat, quo ad circulationem per minima, eaque capillaria sæpius vasa idoneus reddatur.

§. XIV.

Circulus itaque lymphæ à circulo sanguinis dependet, hinc qui lymphæ motum vult celeriore effecere, is sanguinis circulum augeat, necesse est.

Scholion.

Si quis itaque morbos à vitio, vel stagnatione lymphæ provenientes, sanare intendit, is non alia ratione id perficere poterit, ac si circulum sanguinis promoveat, nec non fibris glandularum motricibus stimulum quandam addat.

CAPUT IV.

De alimentorum solutione & salivæ usu.

§. I.

Succi corporis nostri calore & motu subinde consumuntur, hi itaque semper reparatione opus habent, quæ fit succo congruo nutritio, quem alimenta, tam solida, quam fluida, subministrant.

§. II.

Ex alimentis, tam liquidis, quam solidis, succus pro reparatione partium, tam solidarum, quam fluidarum, corporis nostri, est extrahendus, qui vocari solet chylus.

§. III.

Non unius ejusdemque, sed plane diversæ indolis, sunt alimenta, quibus homo utitur, alia sunt solida & compactæ substantiæ, alia valde glutinosam & tenacem texturam habent, multa inutilibus, terreis, incongruis & ad constituendum succum nutritium inidoneis partibus scatent. Quapropter dura alimenta sunt dissolvenda partesque utiles ab inutilibus separandæ.

§. IV.

Ut partes utiles & congruæ ab inutilibus & incongruis separentur, opus est, ut prius earum textura intime dissolvatur.

§. V.

Ad intimam alimentorum dissolutionem liquor menstrualis,

strualis, qui intime alimenta recludat, neque minus calor requiritur.

§. VI.

Salivalis latex est menstruum microcosmicum universale, quo alimenta omnis generis intime recluduntur, & est humor insipidus, indolis subtilis, penetrantis, fermentescibilis & solventis.

Scholion.

Saliva merito distinguitur à submucido & spisso liquore, qui tam ex glanduloso peristromate faucium & laryngis profluit, quam ex ductu glanduloso narium secreta ejicitur.

§. VII.

Salivam liquorem esse ex subtilissimis partibus constantem, & glandularum salivalium firmiter compages, & tubulorum angustia, & quod non facile in frigore concrevit inque vacuo multas bullulas more spirituosorum reddit, nec non ejus virtus medicamentosa, comprobant.

Scholion.

Glandularum salivalium, ex quibus constant tubuli angustiores, ex fero sanguinis vix aliud, quam aquam subtilem, cum multis particulis aëreo - æthereis & salinis, sulphureis, simplicissimis & tenuissimis separant, & ratione harum, saliva jejuni hominis egregiam virtutem tumores discutiendi & lichenes ac serpiginem sanandi obtinet, nec non in vacuo, subtracto per antliam aëre atmosphærico, saliva in vitro posita mire ebullit & innumeras bullulas emittit, more omnium liquorum subtilium.

§. VIII.

Saliva est fermentescibilis naturæ, hinc addita rebus ad fermentationem aptis, eam facile excitat.

Scholion.

Clarissime id conspicitur, quando saliva additur fructibus saccharo conditis, dum eos brevi in fermentationem conjicit. Simile quoque apparet, quando cibi masticati in ore & cum saliva mixti, in vitro reconduntur, tunc leni calore accedente, incipiunt fermentescere.

§. IX.

Saliva est liquor potenter solvens, particulis tenuibus valde elasticis, aqueis, nec non purissimo & universali sale simplicissimo, imbutus.

Scholion.

Menstrua insipida magnam penetrantiam & potentiam solvendi habent, quod videmus in argento vivo, quod ætissima metallorum spatia & claustra subit, eorumque partes discontinuat. Visitur id quoque in aqua pluviali, quæ non modo prompte omnis generis salia imbibit, glutinosos succos dissolvit & dura etiam corpora emollit, unde aselli & marini pisces, sola maceratione in aqua mollescent, ut leni igne coqui possint, multo magis autem id fit, si sale subtili alcalino est instructa, quale etiam salivæ ineffe non modo auctor est *Verheyen*, qui uncias octo salivæ leni calore inspissatas, drachmam dimidiam salis largiri affirmat, sed & experimentum cum solutione saturni, quæ salivam reddere solet turbidam eamque præcipitat, confirmat. Præter sal fixum vero, salivæ inexistere judicamus longe simplicius ac purius quoddam sal, quod tamen sensorium gustus non æque afficit.

§. X.

Neque dubitandum, portionem liquidi nervei salivalem laticem ingredi.

Scholion.

Quia insignes nervorum rami ad glandulas salivales

abunt, quales ad sensum & motum sunt superflui; & consumitis viribus per profundas meditationes, debilitatur quoque vis digestionis. Deinde motum perversum liquidi nervei, qui fit sub animi affectibus, ira, terrore, item furore, rabie, simul transire ad salivalem laticem, venenati morsus bestiarum ira percitarum, nec non funesti morsus animantium rabie tactorum, testantur.

§. XI.

Saliva itaque est verum & universale alimentorum menstruum & fermentum, quo ea intime dissolvuntur & extrahuntur.

Scholion.

Non superficialia, sed intima solutio alimentorum in ventriculo fieri debet, qua videlicet unio & textura partium, certum mixtum constituentium, intime dissolvitur, ut hac ratione & sapor, color, odor, consistentia, & virtus prioris mixti mutetur: superficialia vero solutio est, quando corpus in partes tantum minimas, virtute menstrui, redigitur, salva earum textura ac mixtione. Ita aurum, quando dissolvitur ab aqua regis, omnes ejus particulae, ex menstruo rursus præcipitatae, auri naturam, crasin ac virtutem exactissime adhuc conservant. Exemplum vero intimæ solutionis est, quando mustum motu fermentativo ita dissolvitur, ut non amplius mustum maneat, sed in vinosum liquorem transeat. Quod vero alimenta in ventriculo atque intestinis intime dissolvantur, ex eo patescit, quia post solutionem & simulac è ventriculo fuerunt egressa, color, sapor, odor & consistentia, immutantur.

§. XII.

Intima dissolutio corporum, sine fermentatione, quæ motus intestinalis est, mixti partes unitas intime solvens, fieri nequit: nullum hinc dubium est, quin in ventriculo etiam atque in intestinis tenuibus actus fermentationis celebretur.

Scholion.

De fermentatione ciborum in ventriculo, ejus turgescencia & inflatio, item ructus & flatus qui prodeunt, testari possunt: & sicuti fermentationis effectus est acescentia, ita ciborum reliquiae, quæ à resolutione ciborum in ventriculo remanent, manifestum saporem & odorem acidum præ se ferunt, sique fermentatio paulo intensior & acrior est, quemadmodum fit in hypochondriacis, copia acidi exsuperantis in ventriculo progeneratur, adeo, ut omnia in ventriculum ingesta acescant, sive in acidum liquamen mutantur.

§. XIII.

Sicut omnis fermentatio fermentescibilium, à fermento, quod est portio massæ jam in actu fermentationis existentis, & excitatur, & adjuvatur: ita saliva utique alimentorum fermentum est, quod etiam largissime provida natura producit & cibus admiscet.

Scholion.

Non tantum eximiae glandulae, ut parotides & maxillares, ingentem salivæ quantitatem fundunt, sed & tota palati caro glandulosa est, nec non œsophagi, ventriculi & intestinorum glandulosæ tunicae, quin imo glandulae peculiare duodeni & reliquorum tenuium, præsertim ilei, maxime omnium vero pancreas, quod totum glandulosum est, salivalem illum ac fermentescibilem laticem fundunt & undiquaque fere ciborum massæ admiscet, ad plenariam & intimam alimentorum dissolutionem & utilium partium separationem.

§. XIV.

Quemadmodum omnis fermentatio & omnis solutio, admoto calore egregie juvatur: ita etiam ventriculo circumposita calida viscera, ut hepar, lien, calorem

rēm ipsi subministrant & digestionis negotium promoven-
vent.

§. XV.

Caloris magna vis est intime poros mixti penetrandi & expansiva virtute compagem partium dissolvendi : sicut contra frigus solutionis & digestionis actum semper retardat.

Scholion.

Clarissime apparet in fermentatione musti, item farinæ pro panificio, nec non frumentorum ad præparationem spiritus vini, quod calore intendi & frigore impediri possit.

§. XVI.

Calor agens in humidum & corpora solidiora, si loco fuerint inclusa, ut mirabilem in dissolvendo præstat effectum, ita nullum dubium, quin calor viscerum in ventriculo conclusus, potentissime in compagem alimentorum agere eamque solvere possit.

Scholion.

Non amplius naturæ curiosis sunt ignota experimenta, quæ beneficio machinæ Papinianæ, in emolliendis durissimis ossibus & in facilitanda coctione, mirabili plane ratione perficiuntur, ubi totus effectus tantum à calore & liquido incluso dependet; hinc non mirum est, quod brevi tempore, calore viscerum & fermentescibili, salivali lymphæ, lupus integrum cervum devorare & concoquere possit, lucius piscis integros carpiones devoret inque liquamen convertat, canes ossa, Finni ac Lappones crudas carnes & duros, exsiccatos pisces digerere possint. Curiosa vero quæstio est, cum in ventriculo insit tanta solvendi potentia, quare non ipsius substantia tandem calore & subtili salivali menstruo solvatur? cujus rei non alia videtur ratio, quam quod succus salivæ non possit ita penetrare poros & partes ventriculi, ut libere undique in ejus plures superficies agere possit. Ita animadvertimus, flammam non posse accendere materiam v. g. chartam, quando duro corpori, ut plumbo, vel alii metallo, circumvoluta est, quia nempe ignis recta linea transit, non vero æquali nisu & quasi gyratorio motu, in chartam agere potest. Deinceps ventriculi compages, admodum strictior resistit, externæ actioni menstruorum. Et materia quoque calida, quæ à visceribus adjacentibus continuo influit per ventriculum ad alimenta, impedit, quo minus calor, in alimentis susceptus, agere in ipsam substantiam ventriculi, eam dissolvendo, possit.

§. XVII.

Menstrualis & fermentalis liquor ventriculi, ex intimis succis corporis nostri desumptus est, quare chylosam massam fermentatione ita disponit, ut sanguinis & humorum indolem facilius induat.

§. XVIII.

Dissolvens energia salivæ laticis multum reliquiis chymi, in ventriculo contenti, adjuvatur.

Scholion.

Est enim acidorum magna in dissolvendo potentia. Ita ossa, dentes, lapides, metallâ, acidis solvi menstruis chymica docet experientia. Atque propter penetrans acidum, etiam ossa devorata, canes, item limaturam martis, homines, dissolvere possunt.

§. XIX.

Acidum in ventriculo residuum, & calore ac spiritali lymphæ gastricæ subtilius redditum, tunicam nerveam ventriculi, præsertim partis ejus superioris, blande vellicando, causa est appetitus.

Scholion.

Quare non obscura esse potest ratio, cur omnia aci-

da subtiliora & spirituosiora, ut spiritus salis dulcis, vinum Rhenanum, item volatilia salia & aromatica, quæ acidum fixum in ventriculo contentum subtile reddunt, appetitum languentem excitent.

§. XX.

Liquo salivæ & gastricus, cum moderato calore, causa est digestionis & solutionis alimentorum: quocirca omnia ea, quæ sanguinis calidi influxum in ventriculum impediunt, quæque menstrui virtutem dissolventem infringunt, aut ejus generationem prohibent, digestionis admodum sunt inimica; & contra, quæ salivæ menstrui influxum, proventum & activitatem procurant, digestionis & chylicationis negotio egregie favent.

Scholion.

Quare experientia discimus, nihil magis appetitum & digestionem, quam alcalina terrea, lacticia, dulcia, farinacea, nimis pingua, opiata, adstringentia & spirituosiora morari, præsertim quando hæc copiose & jejuno ventriculo assumuntur; infusa vero herbarum calida, acidulæ, thermæ, salia neutra, aromata paulo acriora, appetitum & digestionem secundare, quia tunicas glandulas in primis viis ab obstructione & a mucositate liberant, ut sic liberior gastricæ lymphæ fiat affluxus.

§. XXI.

Notatu digna res est, quod in omni fere morbo appetitus & digestio lædatur.

Scholion.

Quia videlicet nullus morbus est, qui non temperatum calorem sanguinis & temperiem atque influxum fermentalis liquoris in ventriculi atque intestinorum canalem inturbet. Actio igitur ventriculi merito dici potest systematica, quia à systemate, & solidarum, & fluidarum corporis nostri partium dependet, hinc iis læsis, læditur etiam digestio, quare appetitus emortuus, certum morbosæ dispositionis humorum, vel partium solidarum indicium est, & appetitus quoque restitutio, signum convalescentiæ & morbi jam victi faustum omen præbet.

§. XXII.

Salivæ latex, qui fauces & œsophagum irrigat, dirigit quoque appetentiam liquidorum, sive sitim.

Scholion.

Appetitus tam solidorum, nempe fames, quam liquidorum, sive sitis, est quidem res animæ, nihilo minus à causis mere corporeis, certis in organis, determinatur atque dirigitur.

§. XXIII.

Sitis causa minime est defectus humidi in sanguine, sed in faucibus atque œsophago.

Scholion.

Apparet id clarissime, dum in febribus, vel etiam in hydrope, ingens copia humidorum sitim non compefcere potest, potus vero calidus, ut infusum herbæ thæe, item nitrosa, in pauca quantitate sumpta, eam sedare possunt. Quin imo observamus, sitim sæpius in affectibus spasticis ventriculi, item in frigore intermittentium urgere, quia videlicet spasmodica glandularum in faucibus & œsophago fit constrictio, & hac ratione humoris influxus in has partes impeditur.

§. XXIV.

Somnus, nec non anodyna, sitim sedandi facultate pollent.

Scholion.

Quia stricturam in glandulis faucium tollunt, ductus rela-

relaxant, ut copiosior humidi ad faucium regionem fiat affusio.

§. XXV.

Saliva facit ad saporem.

Scholion.

Quia lapidas salinae indolis alimentorum partes optime extrahit, ut ad papillas linguae nerveas penetrent. Omnis sapor fit à sale, nullum vero sal agit, nisi sit solum, quia alias non ingredi poros, neque saporis organa nervea afficere potest; quia vero saliva, propter tenuitatem partium, ex alimentis optime lapidas partes extrahit, hinc ejus in ore praesentia multum ad saporem facit, atque adeo ejus defectus ac crassities in ardentibus febribus, vel aliis morbis, saporis, vel nullius, vel imminuti, amplissima est causa.

CAPUT V.

De chyli in intestinis perfectione, deque bilis ad hoc negotium usu, hujusque natura & secretionem.

§. I.

Sicuti in ventriculo, mediante saliva, compages alimentorum dissolvitur: ita in intestinis, praesertim in duodeno, haec dissolutio ulterius mediante bile perficitur, & chylosus utilis succus elaboratur.

Scholion.

Quod duodenum vice fungatur ventriculi parvi, vel ex eo patet, quia similem, ut ventriculus habet flexuram, ut diutius ibi massa ciborum morari possit; & quia duo potentissima menstrua, bilis nempe & succus pancreaticus, affluunt, tam ad ulteriorem alimentorum digestionem, quam ad correctionem & meliorem chyli elaborationem.

§. II.

Bilis est humor resinoso - sulphureus, coloris flavi, saporis amari, sero dilutus inque hepate secretus, dissolutioni alimentorum & secretioni chyli multum inferviens.

§. III.

Bilis humor est resinoso - sulphureus, hinc inspissata bilis, non modo apertissimam flammam concipit, sed & à spiritu vini rectificato solvitur, remanente mucositate.

Scholion.

Differt resinofum bilis principium ab aliis resinis vegetabilium, quod aliae resinae solvuntur quidem à spiritu vini, sed non ab aqueo menstruo, bilis vero inspissata & extractum quoque resinofum, ex ejus solutione paratum, promte etiam aqua communi solvitur. Secundo, essentiae aliae resinosae aquae instillatae lactescentem colorem faciunt, quod neutiquam solutio bilis praestat. Tertio, aliae resinae ex vegetabilibus acidum liquorem fundunt, bilis vero igne tractata & cremata, praeter oleum, sal volatile urinofum praebet, sale alcalino paucio, fixo, in cineribus relicto.

§. IV.

Resinofum igitur bilis principium ab aliis resinis differt, quia has acidum sal, illam vero alcalinum ingreditur.

Scholion.

Bilis est resina ex animantium regno petita: & sicuti ob intestinum calidiorem in succis corporis animantium motum, insipidae terrae, vel etiam acida salia fi-

Frid. Hoffmanni Oper. Tom. I.

xiora, subtilifantur & alcalinam naturam suscipiunt, omnesque tam fluidae, quam solidae partes, de ejusmodi sale volatili urinofso participant; ita etiam bilis mixtionem sal alcali ingreditur, quod postea cum sulphureis partibus combinatum, in aquea menstrua habet ingressum.

§. V.

Quod elementum alcalinum parti sulphureae bilis fit admixtum, plura experimenta comprobant. Bilis I.) admixta syrupo violarum, viridescens, ut mos est alcalinorum, eam reddit: II.) omne acidum concentratum, ut oleum vitrioli, aqua fortis, cum bile ebullit, praesertim calore admoto, viridi colore emergente: III.) virtus ejus abstersiva, attenuatoria & acidum temperans, id comprobatur, dum optime maculas pingues detergit ex linteis, colores, uti pictoribus notum est, diffundit, & cerevisiarum acorem corrigit.

Scholion.

Sicut ex sale alcali & oleo, invicem combinatis, saponiformis fit mixtura; ita etiam ejusmodi saponiformi abstersiva virtute gaudet bilis, unde non inepte à quibusdam medicis sapo animalis appellatur.

§. VI.

Bilis composita est ex particulis resinoso - sulphureis, neque minus alcalinis; hinc sanguis, qui multum sulphuris & salis continet, ad copiosam bilem ingenerandam admodum idoneus est.

Scholion.

Patet jam ratio, quare homines qui calidiorem sanguinem habent, ut cholericus, quique motu corpus vehementer exercent atque alimentis calidis, spirituosissimum utuntur, copiam bilis progenerent; item, cur in omni febrili aestu, bilis copiosa in excrementis valde conspicua, etiam ex alimentis humectantibus & refrigerantibus generetur, siquidem ex Chymia mechanica compertum est, calido intestino fluidi aetherei motu, materiam etiam insipidam, terream, fixam, inflammabilem, successive sulphuream, salinam, volatilem & inflammabilem reddi posse.

§. VII.

Secernitur biliosus humor in hepate, quod nonnisi glomeramen est ex vasorum venae portae, cavae, arteriae hepaticae & ductuum biliariorum capillamentis, sive flaminibus, compositum.

Scholion.

Vena portae adducit sanguinem ad hepar, & quia est vas venosum, lentior per illud cursus est, de quo jam supra latius egimus. Per venam cavam autem sanguis reducitur versus cor; arteria hepatica nutrimentum partibus, ex quibus hepar coagmentatum est, adducit, ductus vero biliarii secretam bilem partim per cholodochum ad duodenum, partim per cysticum ad cystidem felleam deducunt, siquidem non alium hepar usum atque utilitatem habet, quam ut sulphuream, adustiore & lixiviosam sanguinis partem, una cum sero, per venam portae advectam, separet. Hallucinati enim in eo fuerunt veteres, quod hepar praecipuam sanguificationis officinam crediderint.

§. VIII.

Bilis, quae est humor crassus & ipso sanguine ponderosior, peculiari eget apparatu mechanico ad suam secretionem.

§. IX.

Ad secretionem crassioris humoris opus est, ut sanguis crassior accedat ad organon secretorium, ne tenue liquidum in nimia copia per ductus capaciores transeat.

Scholion.

Quia separatio crassioris humoris requirit canales & ductus

ductus secretorios satis amplos, per hos autem, eadem, immo majori facilitate, liquidum tenue, quam crassum transit; hinc ne nimia tenuis lymphæ fiat separatio, opus erat, ut sanguis parte tenui lymphatica maxima ex parte prius spoliatur, quod in renibus, ventriculo, toto intestinorum volumine, omento & pancreate fit, quas partes omnes prius sanguis pertransire debet antequam ad hepar deferatur.

§. X.

Ut bilis in hepate separetur, opus est tardiori per hoc viscus progressu atque itinere.

Scholion.

Nam sub tardiori motu in genere, omnes secretiones & excretiones melius, quam motu existente celerissimo, celebrantur, quia partes fluidæ à crassioribus solidioribus tunc longe facilius sese separant, & tenues aqueæ in vasa lymphatica, quorum copia in hepate est, crassiores vero per ductus biliferos vehuntur.

§. XI.

Ad separationem crassioris humoris biliosi, singularis structura ac connexio venæ cavæ cum vena portæ, qualis in universo corpore non observatur similis, attendenda est.

Scholion.

Quandoquidem arteriarum extrema in aliis partibus cum finibus venarum conjunguntur & unum continuum canalem constituunt, in hepate vero id non evenit, sed minimæ ramificationes venæ cavæ latera venæ portæ ingrediuntur, adeo ut hæc ad angulos rectos diffluent, non alium in finem, quam ut sanguis, qui bile tenuior est, in venæ cavæ orificia, non secus ac chylus in intestinis, in vasa lactea impellatur, crassiori liquore bilioso relicto, qui deinde in ductus biliarios, venæ portæ continuos, influit, indeque per ductum cholodochum & communem, ad duodenum, & per cysticum, ad felleam vesiculam truditur.

§. XII.

Utcunque bilis sit humor, ratione suæ mixtionis, partibus corporis nostri tam solidis, quam fluidis, plane incongruus, & hujus respectu excrementitius; nihilo minus respectu elaborationis chyli, utilissimus est, unde antequam foras ejiciatur, huic negotio impendi debet.

Scholion.

Eximium bilis esse in animantibus usum compluribus argumentis comprobari potest: I.) quod nullum in rerum natura animal bile caret, utut non in omnibus vesicula fellea adsit; II.) in omni animantium genere bilis non ad intestinum rectum, sed ad duodenum, quod primum est à ventriculo, fertur, manifesto indicio peculiaris ibi præstandæ utilitatis; III.) quia amplissimum hepatis viscus nullum in alium usum in animantibus prostat, quam, ut bilem separet; IV.) quod duplici ductu, hepatico nempe & cystico, ad duodenum tendit ipsaque in cystide semper reservatur, ut ibi fiat saturatio; V.) quod insignis bilis copia ex hepate quotidie segregatur.

§. XIII.

Non tam accurate bilis quantitas, quæ singulis diebus in hepate separatur, determinari potest.

Scholion.

Ductus illi satis conspicui & capaces, cysticus & hepaticus, ex minoribus plurimis conflatus, tandem in unum amplum canalem cholodochum communem coeuntes, bilis copiosum ad massam chylosam influxum luculenter comprobant. Saturatus quoque fecum alvinarum flavus color, qui à bile est, largiorem ejus quantitatem indicat. *Bianchi* ad uncias sex quantitatem bilis æsti-

mat, idque sequenti experimento probat, quando nempe ex ductibus biliferis & ex cystide fellea, hominis sani & violenta morte extincti, bilis per repetitas aquæ tepidæ, prius pondere examinata, injectiones eluitur & aqua illa cum bile mixta rursus ponderatur, tunc facile bilis pondus in toto hepate contentæ explorari potest.

§. XIV.

Duplex bilis datur, hepatica nempe & cystica, illa per ductus undique per hepar dispersos biliferos ad cholodochum, & porro ad duodenum fertur, ac longe fluidior est cystica, quæ crassior, saturatio & amaricanior est.

§. XV.

Bilis per ductus hepaticos advecta, propter obliquam & valde compressam ductus cholodochi per duodeni membranas in cavitatem ejus insertionem, in cystidem facile regurgitat. In quibusdam quoque animantibus immediate per ductus peculiare, hepatico-cysticos, ad vesiculam fertur.

§. XVI.

Bilis non tantum pondere ex ductibus biliariis & cystide deferretur ad duodenum: sed motu activo proprio, contractorio, ad illud & intestina maxime fertur.

Scholion.

Non modo ipsa fellea vesicula, sed & ductus bilem vehentes, ex diversis tunicis, glandulosa nempe, nervea & carnea, fibris motricibus donata, constant, vasaque arteriosa, venosa, lymphatica & complures nervorum ramificationes obtinent, non alio fine, quam ut motus constrictionis ibi quoque exerceatur, cujus beneficio bilis motus atque effusio dispenseatur. Ex quo facile emeticorum operandi ratio intelligi potest, quæ subtiliori salino-sulphureo vellicante principio, motum peristalticum citatiorem efficiendo, bilis copiosorem ad intestina effusionem simul cient. Dein ex hoc ratio patet, quare his ductibus nerveo-musculosis, spasmo, v.g. ab iracundia, vel fortiori purgante vomitorio, aut veneno, contractis, bilis per vasa lymphatica ad sanguinem regurgitet, unde icteri origo.

§. XVII.

Ventriculus, ab alimentis & eorum fermentatione expansus, multum affluxum bilis ex cystide fellea ad duodenum adjuvat.

Scholion.

Notabilis est vesicæ felleæ situs in homine, dum cervix fundo altior est, qui ad inferiora jacet, quare difficilis est ejus ascensus, præsertim cum ex loco latiori ad angustiores debeat fluere; deinde, quia inter secundam & tertiam tunicam duodeni ductus cholodochus longo itinere progreditur, & demum foramine rotundo in cavum intestini hiit: non potest omni tempore, sed tantummodo relaxatis intestinis & compressa cystide à dextra ventriculi parte, quæ ciborum copia & fermentatione turgit, in duodenum exonerari.

§. XVIII.

Quo copiosior est alimentorum in ventriculum ingestio, eo major ventriculi fit expansio & consequenter cystidis felleæ adjacentis compressio, unde copiosioris bilis ad intestina tunc fit affluxus.

Scholion.

Notabilis est observatio, quod in animantibus, post longam inedia m flaccido existente ventriculo, cystis bile admodum turgida fit, quæ post insignem alimentorum ingestionem semiplena observatur. Notabile quoque est, in foetibus humanis cystidem bile repletam inveniri, quia ventriculus in iis feriatur & ab expansione liber est.

§. XIX.

§. XIX.

Differt bilis cystica à bile hepatica in eo, quod illa fit crassior, saturatior, amaricantior, hæc vero tenuior & magis sero diluta.

Scholion.

Sicut vero utraque hæc bilis indole differt, ita quoque ejus virtus atque usus distinguitur, siquidem bilis hepatica non tam efficax est, quam cystica, quæ magis medicamentosa virtute prædita, & illa quoque perpetuo ad duodenum, hæc vero tantum, quando ventriculus cibis est onustus, influit.

§. XX.

Bilis cystica hunc habet usum, ut purgans quasi fit & clyster naturalis, quo tunica villosa, quæ chyli secretorium est, abstergetur & intestina ad ejectionem fecum stimulentur.

Scholion.

Chylus valde viscosus, dum transit per tunicam intestinorum villosam, relinquit magnam amurcam, qua crusta villosa, sive secretorium chyli, & intestinorum parietes valde obducuntur, pori quoque ac tubuli lactei eorumque orificia oblinuntur, quo liberior progressus chyli impeditur, quare hic mucus est abstergendus, ad quod præter lympham ex glandulis & pancreate continuo stillantem, bilis acrior cystica multum contribuit, quæ lixiviosa & saponaria virtute mucum abstergit; tubulosque lacteos & oscula glandularum aperit.

§. XXI.

Quemadmodum bilis, rite constituta ac temperata, est magna & universalis medicina primarum viarum, digestionem alimentorum & excretionem alvinæ maxime inserviens: ita si intemperie & motu, item copia peccat, venenum est corpori.

Scholion.

Hanc rem olim latius in *Diff. de bile medicina & veneno corporis* exsecuti sumus.

§. XXII.

Bilis cystica chylo non æque, quam hepatica admiscetur, sed præcedit chymi egestionem ex ventriculo & viam quasi præparat: bilis vero hepatica, quæ continuo affluit, chylosæ ex ventriculo massæ semper admiscetur.

Scholion.

Patet jam ratio, quare bilis cystica stagnans in duodeno & ex mora corrupta, fecunda plurimorum morborum, maxime ex primis viis ortorum, vomitus nempe, cardialgiæ, cholerae, dysenteriae, inflammationis ventriculi & intestinorum ac omnium fere febrium biliosarum, mater existat.

§. XXIII.

Bilis hepatica, item cystica benignior & dilutior, in duodeno chylicationis negotium promovet, dum cum lymphâ pancreaticâ mixta, ulteriorem solutionem partium, præsertim pinguium & viscidarum in alimentis, promovet, acorem chyli, qui sanguinis temperiei infestus est, temperat & abstergit, & parte sua resinosa sulphurea subtilitatem & blandam spirituascentiam chyli procurat.

Scholion.

Ex dictis jam facile patet ratio, quare bile vitata, multæ cruditates primis in viis accumuluntur, quæ nauſeam, ardorem stomachi, flatulentiam, alvum adstrictam, cachexiam ac tabem facile inferunt, & quare omnia fere amara, in chylicationis negotio secundando, in corrigendis primarum viarum vitiis & præcavendis ac sanandis multis chronicis affectionibus, tantæ utilitatis atque usus existant, quia idem præstant quod bilis, cujus defectum ac vitia emendant.

Frid. Hoffmanni Oper. Tom. I.

CAPUT VI.

De secretione chyli & motu ventriculi atque intestinorum peristaltico.

§. I.

Alimenta tam esculenta, quam potulenta, non modo in ventriculo, sed & in duodeno, quod ventriculus succenturiatus est, & in toto intestinorum tenuium canale, calore & menstruorum, lymphæ nempe gastricae & bilis, ope dissolvuntur & extrahuntur in liquorem alimentarium, chylum, qui per colatorium intestinale ab inutili massa alimentorum, quæ per alvum excernenda est, secretus, peculiari mechanica motuum ad sanguinem vehitur.

Scholion.

Quod duodenum sit ventriculus succenturiatus, vel ex eo patet, quia capax satis est & flexuram habet uti ventriculus, qua fit, ut diutius in eo morari chymi massa possit. Gaudet quoque suis peculiaribus menstruis, seu liquoribus solventibus, dum non modo innumeræ glandulae, à Cl. *Brunnero* detectæ, menstrua-lem lympham plorantes, ibi collocatæ sunt, sed & succus pancreaticus cum bile permixtus, ulteriorem elaborationem & rectificationem chyli absolvit.

§. II.

Chylus est liquor lacteus, insipidus, ex partibus oleosis, mucilaginosus constans, ex alimentis solutis extractus.

Scholion.

Chylus est quasi emulsio naturalis: & sicut ad hanc constituendam partes oleosæ, pingues, cum aqueis & mucilaginosus mixtæ desiderantur: ita quoque ex iisdem ingredientibus chylum compositum esse, lactis, quod nihil nisi chylus est, butyroſa, caseosa & serosa substantia demonstrat. Et sicut omnis emulsio artificialis, ex feminibus oleosis contusis cum aqua parata, colorem habet albicantem, qui ab oleo in tenuissimos globulos, radios luminis reflectentes, subactis, proficiscitur: ita etiam chyli albedo, vix aliam, quam hanc habet originem.

§. III.

Quia chyli præcipuum elementum est oleum temperatum, dulce & gelatinosa ac mucilaginosâ substantia: hinc facile patet, alimenta, quæ bonum & copiosum chylum suppeditant, ea esse optima, quæ temperatam, oleosam & mucosam substantiam obtinent, ut sunt præter carnes animantium, ex vegetabilibus omnia semina farinacea.

Scholion.

Hinc patet ratio, quare solo pane & aqua homo vivere possit; nam hæc omnia chyli & sanguinis ingredientia in debita temperie & proportionem complectuntur. Ex hoc identidem apparet, quare oryza populis orientalibus nutriendis loco panis sufficiat, & hordeo, avena, tritico, pisces, fabis, castaneis, homines optime nutriri & omnis generis animantia pingua reddi possint. Ex hoc elucescit porro ratio, quare ex alimentis ea, quæ non temperata sunt, ut acida, spirituosâ, salia & plures vegetabilium succi, herbæ, radices, acria, aromatica, ad chylum constituendum & nutritionem præstandam minus idonea sint.

§. IV.

Chylus ex solutis alimentis extractus, per tunicam villosam tenuium intestinorum colatur osculisque vasorum lacteorum imprimatur atque infunditur.

F 2

§. V.

§. V.

Tunica villosa, quæ optime in jejunio conspicitur, nonnisi congeries est innumerabilium villorum, five minutissimorum tubulorum, variis modis sibi intertextorum, atque hæc est principium vasorum lacteorum.

Scholion.

Intestinorum villos cavitare gaudere, microscopiorum beneficio indaganda, *Brunnerus in Tr. de glandulis intestinorum* egregie demonstravit. Eodem auctore discimus, quod ubi villi intestinorum dantur, ibi etiam reperiantur vasa lactea, & ubi hæc non videntur, ut in ventriculo, ibi lactea quoque vasa invisibilia sint.

§. VI.

Tunica villosa intestinorum non mere se habet passive, sed ob liquidi nervei & sanguinis affluxum, gaudet vigore & tono, five motu constrictionis ac dilatationis, ita, ut canaliculi hi villosi & vasorum lacteorum orificia, & nimium contrahi, & relaxari ac aperiri possint.

Scholion.

In spasmodicis ac tormentis intestinorum, item ab acrioribus medicamentis purgantibus, vel erodentibus venenis sumtis, tunicam villosam valde stringi, ut nonnisi tenue liquidum transmittatur, symptomata, quæ maxime hypochondriacis familiaria sunt, & flatulentia ac nimia congestiones vitiosorum humorum tali in statu confirmant. De quo in pathologicis prolixius agendum erit.

§. VII.

Tunica villosa, qua gaudent maxime tenuia, est colatorium illud solenne & publicum, per quod omnis humor ex primis viis accedit ad sanguinem & ad universum corpus: hinc multum interest, ut hoc rite sit constitutum. Quod si enim nimis hiantia sunt oscula, crassior & feculentior chyli pars recrementitia ad sanguinem fertur: si vero nimis angustata & contracta sunt, tenuis saltem aquosa pars, remanente utili & alimentosa solida, transmittitur.

§. VIII.

Quia omnis chylus & omne liquidum, per minima tunica villosæ capillamenta vasaque lactea, debet transire ad sanguinem: hinc tubuli & oscula hæc debent esse hiantia & aperta, non vero mucositate quadam obstructa.

§. IX.

Ad obstruendos hos tunica villosæ tubulos multum contribunt alimenta, quæ in viscosum coagulum abeunt, ut sunt v. g. panis calidus & omnia farinacea ac placenta non bene fermentata, lac coagulatum, cibi nimis viscosi & compacti, pinguedines, ut vervecina, facile in coagulum abeuntes, omniaque alimenta & medicamenta adstringente facultate donata.

§. X.

Provida itaque natura prudenti consilio constituit, ut bilis, saponaria & abstergente vi, una cum lymphâ, ex glandulis & tunicis glandulosis effusa, perpetua affusione facta, hanc tunicam ab obstructione crassi muci vindicent.

Scholion.

Ex quo jam apparet aquarum salubrium & potuum calidorum thee, coffe aliorumque infusorum & decoctorum ex herbis insignis utilitas, quæ in eo maxime consistit, ut tunicam hanc ab obstructione liberent & apertos tubulos teneant. Dilucescit & inde ratio, quare hæc liquida, vel etiam aquæ salubres, in principio, si copiosius bibantur, cum ob obstructa vasa non bene

transeunt, multas turbas, flatulentias, anxietates, quandoque etiam vomitum, provocent.

§. XI.

Per colatorium chylosum prius liquidum ex alimentis tenuissimum fecernitur, quod sine obstaculo ductus init & progreditur, hinc quoque post pastum, vel potum liberaliorem, etiam aquarum salubrium, urina primo mere aquea & insipida, deinde coloratior profluit.

§. XII.

Crassiora & quæ non respondent orificiis vasorum lacteorum, minus ad sanguinem feruntur, sed ob angustiam ductuum retinentur & per alvum potius eliminantur.

Scholion.

Bilis propter consistentiam crassiorem non transit per vasa lactea, sed cum alvinis fecibus eliminatur. Neque animadvertimus, amara medicamenta, vel etiam alimenta, item potus amaricantes crassiusculos, ut potum coffe, cerevias crassiores, ad sanguinem ferri, sed potius cum fecibus, quas etiam saturatori bruno colore tingunt, crassior & coloratior pars foras exturbatur. Neque ex medicamentis, nisi subtiliora, volatilia, salina & sulphurea, vasa lactea transcendunt, sed plerumque inter primas vias operationes suas exerunt. Si vero diutius sub alvo strictiori ibi morantur, majori facta compressione intestinorum, etiam crassiores, salina & terrestres partes, in sanguinem penetrant.

§. XIII.

Non vero tantummodo ex intestinis tenuibus, sed etiam ex crassioribus, liquidum adhuc fecernitur & per vasa lymphatica ad sanguinis & humorum massam abit.

§. XIV.

Alvo plus justo retenta, vel adstricta, feces, quæ prius liquidæ & foetidæ ejiciebantur, jam exsuccæ, aridæ, gravis odoris expertes prodeunt, manifesto documento, foetidum illud liquidum ab iis fuisse separatum.

Scholion.

Ex dictis jam facilis dari potest ratio, quare alvi tardior secessio cacoehymia procreatrix sit, & impuros admodum humores reddat. Et quod in intestinis crassioribus etiam adhuc secretio fiat, clysteres sic dicti nutritives, quorum usus non est de nihilo, item clysteres antifebriles, ex cortice chinæ parati, & antispasmodici ac roborantes, ex herbis nervinis & cephalicis, in capitis affectibus, abunde id comprobant.

§. XV.

Secessio chyli in vasa lactea intestinorum motu peristaltico valde adjuvatur.

§. XVI.

Ventriculus & intestina gaudent singulari dilatationis & constrictionis motu, qui successive progreditur à superioribus ad inferiora, & à Græcis peristalticus appellari solet.

§. XVII.

Hujus motus organon sunt maxime fibræ annulares, quibus totus intestinorum ductus, spiræ, vel helices in modum, circumvolutus est, adeo, ut ab œsophago usque ad anum, continuo ductu fibræ hæc producantur.

Scholion.

Confirmari hoc potest sequenti experimento: dum intestinum animalis coquitur, & separatis cum tunica exteriori fibris longitudinalibus, annulares uno continuo ductu & serie, instar fili longissimi, ab intestino separari

separari possunt. Et hæ maximè constrictionem adjuvantibus longitudinalibus præstant.

§. XVIII.

Intestinorum motus peristalticus secundum naturam valde placidus, lenis & quasi undulatorius est.

Scholion.

Quod sit eam ob causam, ne alimenta concocta nimis præcipiti cursu intestinorum canalem pertranseant, & ne justo celerius ad ejectionem vergant, quod in diarrhœa accidit. Deinde, placidiori intestinorum constrictione & dilatatione, tenuior & subtilior tantum ex massa alimentorum concoctorum chyli portio, in villos intestinales & lacteorum vasorum oscula infunditur, feculentiori & rudiori relicta: quemadmodum id fieri in omnibus transcolationibus animadvertimus, ubi cribrum leni compressione facta, tantum tenuiorem humorem transmittit, fortiori autem accedente, crassior & quæ turbida est, simul trahitur. Tam lenis vero intestinorum motus, qui contentorum progressui servit, est, ut non nisi in grandioribus animantibus vivis dissectis, ut bobus & equis, in sensum incurrat.

§. XIX.

Sicut omnis humorum progressio atque impulsus desiderat principium quoddam magno movendi robore instructum: ita etiam in motu peristaltico canalis alimentarii triplex observatur. Primum est in pharynge, alterum in pyloro, tertium in crassiori intestini, quod colon dicitur, initio.

Scholion.

Fortiori facta pharyngis constrictione, ingesta per œsophagi canalem in cavitatem ventriculi trudentur: dextra dein & inferiori ventriculi parte atque pylori robore, ibi contenta in intestina tenuia propelluntur, donec ad capaciora & crassiora deferantur, ubi circa dextrum ileon initium coli est, ex membranis valde robustis, nerveo-musculosis ac fibrosis compositum, cujus motu ac impulsu, per totum hoc intestinum varie convolutum, excrementa usque ad ani sphincterem urgentur.

§. XX.

Motus intestinorum, quo contenta propelluntur, satis validus est, quia magnam resistantiam vincit, & argentum vivum, quod mineralium fere gravissimum est, in copia etiam haustum, per omnes intestinorum convolutiones, sursum ac deorsum, ad exclusionem per anum urget, quod animadvertimus in iis, qui passione iliaca afflicti, in ingenti sæpius copia hoc fluidum metallicum non sine fructu hauriunt.

§. XXI.

Successiva & reciproca est illa constrictionis & dilatationis motio, quæ viget in intestinis. Nam quando una pars intestini contrahitur & angustatur, materia contenta ex ea in vicinam partem propellitur, quæ inde dilatatur, & mox cessante dilatatione, rursus constringitur.

Scholion.

Quemadmodum ad sanguinis & humorum progressum perpetuo conservandum, talis est fibrarum motricium in corde & arteriis constructio, ut earum dilatatio, sive diastole, fiat causa systoles, & hæc rursus diastolen producat, & sic porro: ita etiam similis fibrarum & membranarum motricium in structura intestinorum conditio observatur, ut earum dilatatio contractionem, contractio vero rursus dilatationem proferat.

§. XXII.

Quod si constructio in intestinis eorum dilatationis causa est & dilatatio quoque constrictionem excitat, se-

quitur: validiori vel constrictione, vel dilatatione, in una tantum parte ventriculi & intestinorum reddita, motum peristalticum in universum accelerari, ut celeriter ingesta ejiciantur.

Scholion.

Ex quo jam facile intelligi poterit ratio, quare à putrante, quod in una sæpius intestini parte hæret & ibi dolorificam constrictionem efficit, tam celeri cursu & impetu, in intestinis contenta ejiciantur, quemadmodum id etiam ab humoribus acris, biliosis in diarrhœis fieri animadvertimus. Patet etiam jam porro ratio, quare ab assumpto in copia liquido, quod stimulante, præsertim salino elemento, imbutum est, citissime alvus deiciatur & ingesta prodeant, quemadmodum id in thermarum ac acidularum potu videmus.

§. XXIII.

Quemadmodum robur, tonus & motus systoles activus partium motricium in universo corpore, à convenienti liquidi nervorum subtilioris & sanguinis tenuioris influxu dependet: ita etiam motus ille, quo canalis alimentorum & excrementorum gaudet, ab eadem causa proficitur.

Scholion.

Omnia ea remedia, quæ vires corpori addunt, quæ robur ac tonum partium augent ac restituunt, ut sunt quæ subtilissimo & suaveolenti, oleoso, aromatico oleo imbuta sunt, vel sal subtile volatile foveant, aut resina temperata ac suavi abundant; motum intestinorum quoque egregie conservant & languidiorem restituunt; cum contra omnia, quæ vires deiciunt, motus sistunt, ut sunt graveolentia, opiata, vel etiam nimium refrigerantia, acida, adstringentia, harum partium robur non parum imminuant. Ex nervis vero promanans fluidum intestinorum motui inservire, vel ex eo elucescere arbitror, quod animi affectus, qui operationem suam maxime in hoc fluidum exercent, potenter ventriculi & intestinorum motum naturalem immutare, destruere, vel etiam intendere possint.

§. XXIV.

Motus itaque intestinorum peristalticus præcipua causa & secretionis chyli, & ejus progressus per lactea est.

Scholion.

Non parum vero chyli progressionem & iter ad sanguinem adjuvant, primo valvulæ sic dictæ conniventes, copiose in tenuibus conspicuæ, quæ impediunt, quo minus facta compressione, chylosus succus lacteorum orificia & intestinales villos statim præterlabatur, siquidem in illis moram necere debet alimentorum digestorum massa, ut eo melius & exprimi, & succus ex ipsa delibatur in vasa impelli ibi possit. Secundo, ad receptionem chyli faciliorem in tenuissima lactea vasa & villos, horum tubulorum angustia non parum contribuit, quod eo experimento illustratur, quo cernimus, in minimos & capillares vitreos tubulos, subtile liquidum sponte ingredi. Tertio, progressum & ascensum chyli per lactea vasa & ductum thoracicum, valvulæ semilunares, quibus copiosis hæc ipsa instructa sunt, multum faciunt; illæ enim ex fibris carneis subtilioribus & motricibus constructæ sunt, quarum motu ab una valvula ad alteram liquidum promovetur. Eum quoque valvulæ habent situm, quo chylus & lympa quidem sursum ferri & progredi, minus vero regurgitare & regredi possit. Quarto, neque minus glandulæ, quæ in centro mesenterii sitæ sunt satis eximie, ex conglobatarum numero, impulsu fibrarum, ex quibus constructæ sunt, ulteriorem chyli progressum adjuvant.

§. XXV.

Chyli progressum per thoracicum & lacteos ductus

ad sanguinem, respiratio, qua muscutorum abdominis continua & successiva fit compressio & dilatatio, multum promovet.

Scholion.

Cum sub inspiratione & expiratione, muscutorum abdominis valida compressio & dilatatio, alimenta non modo ex ventriculo & intestinis, sed & chyli expressio- nem valde urgeat, qua de causa, & digestionem alimen- torum, & sanitati, minus convenit, post pastum largio- rem vocem nimis intendere, vel corpus magno labore exercere. Hora autem circiter à pastu quarta, vel quin- ta, quando digestio peracta est, motus & exercitatio corporis minus nocet, sed magis proficit, ita, ut aucta respiratio, tunc chyli secretio & progressio melius ad- juvetur.

C A P U T VII.

De excretionibus in specie ea quæ fit per alvum.

§. I.

Quemadmodum sine ingestionibus congruorum alimentorum, vita, sanitas, nutritio & vires sub- sistere, & temperati, laudabiles humores generari ne- queunt: ita etiam sine excretionem partium inutilium, superfluarum, noxiarum, hæc quoque identidem non recte & secundum naturam se habent.

§. II.

Excretiones in homine perfecto & sano ingestioni- bus, ratione quantitatis, fere respondere debent.

Scholion.

Equidem homo, ut vivat & sanus sit, quotidie ali- menta assumere debet; horum tamen maxima pars in iis qui non amplius adolefcunt, rursus ejici debet. Quan- doquidem posito calculo liquidorum & solidorum, quæ robustus & laboribus assuetus intra septimanam assumit, is certe ad centenarium usque sæpius sese extendet; in- terim tamen pondus corporis non augebitur, eviden- ti argumento: eandem fere quantitatem illorum, quæ assumuntur, rursus debere excerni. Adeoque sub con- tinuis ingestionibus corporis vita ac sanitas conservatur.

§. III.

Non vero unius ejusdemque indolis sunt, quæ ex- cernuntur, sed sicuti diversissimæ naturæ ea sunt, quæ ingeruntur, videlicet solida, crassa, liquida, visci- da, falsa, sulphurea, pingua: ita etiam excrementa di- versissimæ indolis ut sint necesse est, quorum singula per congrua emunctoria separantur atque excernuntur.

Scholion.

Ita crassiora & solidiora, mucus quoque & bilis, per alvum, liquida vero salina, crassiora & pingua at- que mucosa, per urinam, subtilia autem fluida & sa- lino-sulphurea, per sudorem & cutis poros, commo- distime ejiciuntur.

§. IV.

Et sicut excretio partium inutilium, sine motu & impulsu, concipi nequit: ita etiam ad urinam & ma- teriam transpirationis & sudoris propulsandam, motu cordis & arteriarum, ad feces vero ex intestinis crassio- ribus eliminandas, motu peristaltico opus est.

§. V.

Per alvum omnia ea, quæ non lacteorum oscula in- grediuntur, neque ad sanguinem pervadunt, ejiciuntur. Ejusmodi est alimentorum crassior, feculenta, terrestris, biliosa, mucida, acida substantia.

Scholion.

Principium terreum & sulphureum, cum acido in stercorebus commixtum, vel ex eo concludendum esse videtur, quia ex stercorebus humanis, si liquidum vi- triolo imbutum infunditur, color atramento similis fit: quemadmodum idem fieri animadvertimus, si infusa & decocta adstringentium, ut gallarum, corticum ju- glandium, granatorum, florum balauftiorum, quæ identidem ex mixtione terræ solubilis & salis acidi ex- surgunt, cum vitriolo invicem misceantur. Neque alia potest dari ratio, quare ab assumtis martialibus, quæ in ventriculo acido soluta in vitriolum fatiscunt, aut à vitriolaccis, quales sunt tincturæ martiales, vel ab aci- dulis, quæ parum vitrioli subtilioris continent, feces, quæ prodeunt solidiores, atramentoso colore tinctæ sint.

§. VI.

Non tantum impuriore, terrestres salino-sulphureæ, sed & aqueæ & viscidæ sordes per alvum secedunt.

Scholion.

Chymicus Parisiensis *Homborg* cum stercore huma- no hoc fecit experimentum: uncias nempe decem in- didit Mariæ balneo, ita aquæ limpidæ foetidi odoris uncias undecim destillavit, relicta uncia solidæ mate- riæ. Ex quo disci potest, multum aquosi phlegmatis simul cum fecibus exire, sique diutius eæ in crassis stagnaverint, ut siccissimæ evadant, indicium est, mul- tum liquoris foetidi per poros & vasa lymphatica ad sanguinis & humorum massam abiisse.

§. VII.

Quo major bilis in corporibus gignitur copia, ut in nimio æstu, vel febre detentis, eo saturatio solet esse stercoreum color.

§. VIII.

Maxima quoque acidorum liquorum pars per se- cessum evacuatur, unde à nimio usu vinorum acido- rum, ut Rhenani, item fructuum acidorum, fæces al- bidiores prodeunt, & cum tenesmo & vellicatione in- testini recti excluduntur, acidumque adhuc spirant ni- dorem.

§. IX.

Crassior quoque esculentorum & potulentorum co- loratio pars alvo excluditur.

Scholion.

Animadvertimus à potu coffee, item cerevisiarum lupularum, coloratiores fieri fæces & ab oleribus ve- getabilium assumtis, stercore viridescere.

§. X.

Fœtor stercoreum non fit à putredine, sed à mutua actione & reactione acidorum cum particulis sulphu- reis biliosis, non secus ac in chymicis ingens nascitur fœtor, quando lixivio sulphuris vulgaris, aut antimo- nii, acidus liquor affunditur. Quo copiosior vero & volatilior sulphurea & biliosa fecum pars est, & acidi parciore admixtio, eo intolerabilior fit fœtor; quo vero acidum est fixius & copiosius ac sulphur parcius, eo mi- nor & tolerabilior fœtor exsurgit.

Scholion.

Experientia & usus docet, foetidissimas sæpenumero excludi feces in febribus ardentibus & biliosis, præser- tim si aliquanto diutius stagnaverint, longe vero into- lerabilior fit fœtor, ubi sanguis fuerit in intestinis ex- travasatus, ejectis tunc nigerrimis. In hypochondriacis vero, ubi copia acidi primis in viis est, ad albedinem stercorea inclinant & sæpe fœtoris expertia sunt.

§. XI.

Excrementorum alvorum color, odor & consisten- tia multum in hominibus variat, licet eadem alimenta assumerint, quod dubio procul accedit à varia condi- tione humorum interiorum.

Scholion.

Scholion.

Scitu dignum est, & canum, & hominum, si aqua & pane tantum vescuntur, valde differentia esse alvi excrementa, id quod etiam in diversi temperamenti & ætatis hominibus observatur, iisdem licet alimentis assumtis. Neque enim eadem humorum, præsertim bilis, est constitutio, utut non diverso, sed eodem victu, homines usi fuerint.

§. XII.

Quia alvi scybala diutius retenta valde exsiccantur, ob humiditatem ad vasa & sanguinem abeuntem, hinc clare intelligitur, quam gravis noxa impendeat iis, qui præsertim in febribus, alvum diutius clausam habent.

Scholion.

Quum valde corrupti, tam biliosi, quam lymphatici humores, in febrili æstu descendant ad intestina & foetidissimi quoque ejiciantur, patet, quam graviter peccent medici, si non caute eos subducant, nam diutius retenti, foetidissimam putrilaginem rursus insinuant venis ac sanguini, unde non mirum, alvum aliquanto diutius in febribus cohibitam, pessima symptomata, ut purpuram, faucium inflammationes, cephalalgias, appetitus & virium dejectiones, inquietudines provocare.

§. XIII.

A motus peristaltici conditione dependet fecum exclusio, hinc quo tardior & placidior ille est, eo segnius hæc, & quo citior est ille, eo citius hæc procedit.

Scholion.

Cholerici citius deponunt alvum, quam phlegmatici, quia illorum motus vegetior, horum vero languidior est. In hypochondriacis, ob motum intestinorum valde destructum, alvi excretio ingenti vitio laborat, ita, ut quandoque ad longum tempus ne quicquam ejiciatur, alio vero tempore, citior rursus fiat alvus.

§. XIV.

Ordinario intra diem & noctem in sanis alimentorum ore assumptorum recrementa excluduntur.

Scholion.

Sub motus peristaltici tanta in corporibus differentia, non adeo accurate egestionum tempus determinari potest, siquidem & alimenta indole differentia, & copia, vel parsimonia potus, & motus ac quies corporis, ad celeriores, vel tardiores excretionem, multum faciunt. Nam si fermentescibiles cibi, sale, aromatibus, vel dulcibus conditi, in copia fuerint assumti, expeditior fit alvus, sicut contra sub sedentaria vita, potu paucio, victu duro & crasso atque acido, difficilior hæc succedit.

§. XV.

Ad tuendam itaque valetudinem & avertenda plurima mala, motum ventriculi & intestinorum peristalticum naturalem medicus omni cura custodire debet; quo destructo, nihil ad gignendos morbos perniciosius est.

Scholion.

Destruunt maxime hunc saluberrimum motum omnia excessivis qualitatibus & viribus imbuta, ut nimis acida, frigida, adstringentia, opiata, narcotica, acria purgantia, nimium quoque humectantia ac refrigerantia, maxime omnium vero graves animi affectus, terror, diuturnus moeror, ira. Conservant vero & tuentur hunc motum salutarem omnia temperata, nervina, blanda balsamica & quæ sanguinis atque fluidi nervei influxum in membranaceas has partes procurant. Faciunt huc quoque amara, elixiria stomachica, salia volatilia oleosa, pilulæ balsamicæ &c.

§. XVI.

Destructo intestinorum tono, alvina evacuatio non recte se habet, & flatulentia ac spasmi multas molestias creant.

Scholion.

Profecto malum illud, quod vulgo vocari solet hypochondriacum, in foeminis hysterikum, & frequentissimum est, spasmi & flatulentis maxime tyrannidem suam exercet, & corpori humano infensum varia & gravia producit symptomata, sique ejus originem paulo accuratius investigemus, certe hæc nulla alia est, quam nobilissimarum harum partium, quæ alimentorum digestionem, chyli secretionem, & fecum alvinarum exclusionem, dicatae sunt, motus & toni læsio, vel destructio.

C A P U T VIII.

De sudore & transpiratione.

§. I.

Motus in sanguine & succis nostris continuus viget ac calor, isque perpetuo in humidum agit, idque in tenuous halitus resolvit, qui cum contineri nequeant, hinc per poros & insensibilia cutis foramina exhalare debent.

§. II.

Calor exhalationum est causa efficiens, quare quo major est intra corpus æstus, eo fortior quoque est transpiratio, sicuti id manifesto apparet in febribus, inque iis, qui motu & vehementiori labore exercentur.

§. III.

Quo mitior vero est calor & sanguinis cursus placidior, magis minuitur perspiratio, sicuti videmus in iis, qui otio & desidii dediti sunt, pulsumque habent debilem & languidum.

§. IV.

Non vero tantum ex poris, quibus innumeris scatet cutis, superfluum humidum exhalat, sed & per peculiare ductulos & tubulos subcutaneos, serum subtile, falso-sulphureum effertur.

Scholion.

Non modo cutis humana, sed & omnia animantium coria, innumeris poris & foraminulis sunt pertusa, quod ex eo clarum fit, quia argentum vivum per quodvis corium compressione trajicitur. Recte itaque ab *Hippocrate* dictum est: totum nostrum corpus esse perspirabile. Glandulas exiguas & tubulos subcutaneos recentiores anatomicorum microscopiorum ope detexerunt, quorum orificia foras spectant & inutile excrementum per sudorem egregie evehunt. Atque adeo halituosum & tenue per transpirationem, per sudorem vero aliquanto crassius illud educitur. Vaporum exhalatio sub atmosphæra maxime frigida & compressa, in conspectum venit.

§. V.

Cutis universale illud colatorium & emunctorium sanguinis, est rete mirabile, ex fibris tendineis nerveisque, item ex arteriarum & venarum extremitatibus contextum & papillis nerveis, pyramidalibus oblitum, cui substratae sunt glandulae, majores minoresque tubuli, seu siphunculi, in cuticulam hiantes, ex quibus, velut ex fontibus, humor salsus, halituosus exit.

§. VI.

Quia cutis fibrillis nerveis sensibilibus instructa est,

quæ ad ipsas quoque papillulas & tubulos subcutaneos pertingunt, hinc suo quoque tono ac motu gaudet.

§. VII.

Tonus cutis ejusque tubulorum ac pororum elater diversimode sudoris & transpirationis egressum modificat.

§. VIII.

Tonus hic, si nimis intenditur, quod fit à frigore externo, in horrore febrili, inque spasminis atque doloribus, tunc spiracula coarctantur & parum exhalat: tono vero relaxato & poris ampliatis, quod fit sub declinatione febris, vel ex morbo, aut alia ex causa debilitatis, cœlo maxime existente humido & calido, sudor largius profluit.

Scholion.

Patet jam ratio, quare in somno, ubi liquidi nervei influxu fibræ multum destituuntur, sudor facilius producat, item si aërem & halitum calidum & humidum, exspiratione emissum, intra lectum contineamus, vel in balneum concedamus, ubi corpora mox fiunt exterius turgida, rubicunda & mollia. Deinde non obscura amplius est ratio, quare sedativa, opiata & quæ dolores ac spasmos placant, item nitrosa & diaphoretica fixa, transpirationem & sudorem quandoque restituant.

§. IX.

Inest utique transpirationis & sudoris materia sanguini ac per ejus circulum ad cutem affertur, hinc fit, ut sanguinis circulus multum transpirationem modifcet.

§. X.

In quibus partibus sanguinis circulus aliquanto difficilior & calor mitior est, eæ quoque nec tam facile transpirant, nec tam bene sudant, uti videmus in pedibus, in abdomine & partibus extremis. Ubi vero celerior ac promptior sanguinis cursus est, ubi vasa majora & calor intensior est, ut in collo, dorso, pectore, ibi etiam fortior est transpiratio.

§. XI.

Omnia itaque alimenta & medicamenta aliaque ex rebus non naturalibus, quæ citatiorem sanguini motum inferunt, ut sunt sudorifera, spirituosas, volatilia, potus calidi, acria, aër serenitas & calidus, motus corporis, transpirationem quoque adaugent: sicut contra quæ nimis refrigerant & quæ adstringunt, acida sunt, item aër frigidus-humidus, transpirationem imminuunt, eo quod motum sanguinis retardant.

Scholion.

Ufu discimus, ad nullum remedium nos fortius transpirare, vel sudare, quam ad potum calidum v. g. ad infusum thee, veronicæ, præsertim si medicamento oleoso volatili fuerit acuat: nam liquidum calidum fluxilem reddit sanguinem, tenaces humores resolvit, obstructions aperit & salium excrementitiorum vehiculum præbet.

§. XII.

Non vero ad excretionem sudoris sufficit præsentia humidi excrementitii, neque sanguinis motus citatior satis est, sed etiam ut viæ sudoris, sive tubuli & pori cutis, sint aperti, requiritur.

Scholion.

Discimus exinde, male consulere ipsis ægrotantibus medicos, qui sub clausis ac constrictis cutis spiraculis ac tubulis, sicut fit in principio & statu febris, sub gravioribus doloribus & spasminis, fortiora sudorifera, calida & sanguinem exagitantia propinant, quibus vix aliud efficiunt, quam ut æstum, anxietates atque in-

quietudinem adaugeant. Hinc semper eo videndum est, ut in sudore eliciendo, ad tonum cutis & ejus conditionem respiciamus.

§. XIII.

Tanta vero est exhalationum vis & copia, ut bene posito calculo, omnibus ferme aliis excretionibus, junctim sumtis, major sit perspiratio.

Scholion.

Siquidem secundum *Sanctorii* calculum, plus uno die per transpirationem emittimus, quam per alvum & urinam quinque diebus ejicitur; quando spatium unius noctis, lotii & fecum uncias septem, quadraginta vero uncias per transpirationem amittimus; vid. *Sect. I. Obs. 59. 60.* quamvis id experimentum non omni tempore, neque sub omni climate & apud omnia corpora, valeat.

§. XIV.

Non vero transpiratione & sudore tantum emittimus aqueum, sed & falso-sulphureum excrementum, quod ex indusiis patet, quæ viscida & colorata sæpius pinguedine obducuntur, quin sub urinae fluxu pariori & alvo segniori facta, crassa sæpe excrementa per sudorem, ob poros nimis ampliatis, evehuntur.

§. XV.

Exhalat quoque ex corpore, præter excrementum superfluum, etiam tenue, spirituosum fluidum, quod patet ex virium dejectione, quæ continuum & largum sudorem sequitur.

Scholion.

Recte itaque *Hippocrates Lib. de morbis* judicat: eos imbecilliores quidem esse, ubi corpus bene transpirat, sed saniores, promteque ad sanitatem redire præ aliis; nos quoque à morbis præservari addit: unde macilentiores semper, teste eodem auctore, minus morbis obnoxii & facilius quoque ab iis curantur, quam qui obesi sunt corporis habitus.

§. XVI.

Quum itaque tanta sit copia excrementi, quæ per cutem quotidie effertur, facile colligitur, nullam excretionem, quam hanc, suppressam vel cohibitam, tantum detrimenti corpori esse allaturam.

Scholion.

Plurimi morbi, præsertim acuti & epidemici, ex transpiratione fiunt prohibita, ea propter, si eos avertere velimus, curandum est, ut hæc facta tectaque maneat, sique eos tollere velimus, nihil plus curæ cordique habeat medicus, quam ut convenientibus remediis eam restituat, qua de causa diaphoretica omnium remedium sunt securissima & optima.

CAPUT IIX.

De excretionem urinæ.

§. I.

Urina est liquor aqueus, salibus diversi generis & partibus pinguibus, sulphureis, mucidis, refertus, per renum vasculoso-tubulosam substantiam colatus & in vesica ad excernendum collectus.

§. II.

Proportio fluidi & solidi, nec non diversorum elementorum, quæ urinam ingrediuntur, varie se habet.

Scholion.

Scholion.

Quandocunque libræ duæ, five uncia triginta duæ, urinæ sani hominis in aperto vase leni calore exhalant, tunc remanet crassa massa, quoad colorem & consistentiā melli similis, quæ drachmas sex ponderat. Igitur uncia quinque urinæ drachmam tantummodo dimidiam substantiæ salino-sulphureo-terreæ nostro experimento complectuntur, id quod tamen non perpetuum est, sed sicuti corpora ratione ætatis temperamentorum, alimentorum, vitæ generis & climatum variant, ita quoque quantitas urinæ & proportio ingredientium differt. *Anonius de Heide Obsl.* 89. ex urinæ uncis tribus per evaporationem crassæ materiæ pariter drachmam unam eduxit. Experimento vero à *Barckhuysen* in *pyrosophia* allato, ex urina hæc fuerunteducta: uncia nempe sex urinæ sani hominis destillatione dederunt uncias quinque & drachmas sex phlegmatis, residui in cucurbita scrupuli quinque & scrupulus semis, ulterius igne tractati, salis volatilis drachmam semis, olei empyreumatici scrupulum semis, salis fixi & terræ grana octodecim, præbuerunt.

§. III.

Diversi vero generis salia in urina continentur.

Scholion.

Primo observamus sal tartareum, quod ex terra alcalina, sale acido & paucō oleo componitur, & lateribus matulæ, vel vitri urinalis, non mediocri interdum mole se apponit & genuinum calculorum, tum renum, tum vesicæ, elementum subministrat. Secundo, sal ammoniacale, quod ex sale volatili & acido mixtum est, quare urina inspissata, quando miscetur cum calce viva, vel sale alcali, protinus odor volatilis urinosus, æque ac cum sale ammoniaco, dispergitur & nares ferit. Tertio, sal quoque in igne fixum, partim alcalinum, partim medium, ut sal commune, in urina reperitur. Quod si enim urina igni ad exhalandum imponitur & remanentia in crucibulo calcinatur, & quod relinquatur solvitur, & saturatius lixivium digestionem exponitur; sal medium sali communi proximum obtinetur. Idem patescit ex eo, quod non modo urina inspissata, adjecto vitrioli oleo, spiritum & vaporem salis communis volatilem in auras emittat; sed & lixivium ex cineribus cremati residui lunam ex solutione in menstruo ad fundum deiciat.

§. IV.

Nullum sal magis naturæ animantium accommodatum est, quam sal medium illudque commune, quo cibos condire solemus, non tantum ad meliorem saporē, sed & ad digestionem & excretionem facilitandam. Quia vero sal purum vix unquam mixtionem animale m ingreditur, hinc debet è corpore rursus expelli.

§. V.

Quamvis homo omnia insipida & sine sale assumat alimenta, tamen sal in ejus urina deprehendetur.

Scholion.

Tota natura animantium est salifica, id est, ex humoribus temperatis, motus intestinalis calidus salia fixa & volatilia, & sulphurea quoque, fabricat, nusquam vero, licet exterius assumatur, acidum purum in sanguine & in succis animantium reperitur, sed omne sal, quod ex partibus animantium igne educitur, est alcalinæ volatilis naturæ.

§. VI.

Calor salia gignit in animantium humoribus, ideo aucto calore, ut fit in febribus, urina majorem salium copiam complectitur & coloratior fit. Quanto mitior

vero in corpore est calor, ut in istis, qui quietum vitæ genus sequuntur, tanto dilutior urinæ color tantoque minor quantitas salium est.

§. VII.

Scorbuticorum urinæ salibus valde sunt saturatæ & hinc coloratæ, quod analysis docet chymica, quia obstructis emunctoriis hepaticis & cutaneis, nec bilis bene secernitur, nec volatile sal sudore evacuat, hinc retenta excrementitia salia & fortiori intestino calido motu ulterius agitata, incrementum, & majorem acrimoniam concipiunt.

§. VIII.

Quamquam majori in copia acida, ut acetum, succi acidi vegetabilium, vinum, assumpta fuerint, nunquam tamen urina acida emittitur, vel ad mixtionem alcalini salis effervescit.

Scholion.

Ratio hujus rei est, quia acidum, licet etiam purum transeat ad sanguinem, invenit ibi principium alcalinæ indolis, cum quo congregiens, mox mediam naturam induit, adeo, ut vel in sal tartareum, vel sal ammoniacale, commutetur.

§. IX.

Lixiviosa salia largiori copia sumpta transeunt integra per urinam, nisi acido in primis viis hærente immutentur.

Scholion.

Observavimus id in thermis Carolinis, quæ præter sal neutrum, copiosum sal alcalinum fixum continent, hæ, si quotidie ad libras sex vel octo bibuntur, urina prius secedit plane limpida, nullius odoris & saporis, dein dilutum colorem accipit, hora postea à pastu tertia, vel quarta, valde saturata & colorata, instar lixivii est, saporis admodum falsi, & tunc cum spiritu acido affuso, non secus ac lixivium, ebullit, & facta evaporatione, sal instar tartari vitriolati emergit.

§. X.

Transeunt quoque per urinam partes sulphuræ, pingues, item biliosæ.

Scholion.

Observamus manifestam sæpius pinguedinem, urinæ febricitantium & hecticorum supernatantem, & lateribus vitri se apponentem. Oleaginosæ urinæ sine strepitu, ut oleum solet, minguntur & effunduntur. Sulphurea vero materia, in urina contenta, ex eo colligitur, quod putrefacta admodum foeteat & massa urinæ inspissata ardeat & per destillationem oleum empyreumaticum ex ea eliciatur. Sulphureis quoque partibus abundare urinam solennis illa præparatio phosphori, qui ex urina inspissata & cum pulvere carbonum mixta fit, satis superque declarat. Biliosas vero urinæ admixtas esse partes, ex eo colligimus, quod evaporata urina jumentorum relinquat magma amaricans, cui affusus spiritus vini rectificatissimus extrahit tincturam flavissimam, instar bilis amaricantem, remanente sale tartareiformi, instar terræ foliatæ tartari, cujus salis origo sine omni dubitatione ex herbis comestis, quæ ejusmodi sale imbutæ sunt, provenit. Deinde bilem transire cum urina icterici docent, qui mingunt urinam saturati bruni coloris, quæ instar bilis linteaminæ croceo colore tingit.

§. XI.

In urina substantia quoque mucosa, viscida continetur.

Scholion.

Conflata hæc est ex tenui terra, cum aqua & oleo pingui mixta & sanguinis est soboles. Munuatur inde urina ordinariam nubeculam & crassius ac copiosius sedimentum

tum inde fit, quo istorum urina instructa esse solet, qui bene pransi sunt & victu laudabili fruuntur.

§. XII.

Quia urina ex diversæ indolis partibus, videlicet ex falsis, sulphureis, mucidis, pinguibus, aqueis mixta est, hinc calore facile putrescit & foetidissimum odorem exhalat, remanente in fundo crassa terrestri substantia.

§. XIII.

Calor urinæ quam maxime particulis sulphureis salinis commixtis debetur, unde quo major amborum ingredientium in urina est quantitas, ut in febricitantibus, scorbuticis & in iis qui parum bibunt, eo color est saturatior.

Scholion.

Sola salia, præsertim alcalina, cum pauxillo sulphuris commixta & digesta, colorem saturate rubicundum exhibent, cujus rei testis est tinctura antimonii acris, cujus color ad rubedinem saturatus, unice à salibus alcalinis fortiter calcinatis est, unde evaporato spiritu vini, remanet purum sal fixum aurantii coloris, sine ullo vestigio sulphuris, quæ remanentia rursus in aqua soluta, eandem tincturam restituit. Notabile circa hanc rem est experimentum *Bellini*, qui urinam saturate rubram, admixtione aquæ, pro lubitu mutari ejusque colorem vel intendi, vel minui posse, ex vero tradit.

§. XIV.

Quo major in corpore calor est, eo saturatior urina est, eoque copiosius sedimentum deponit.

Scholion.

Ratio sedimenti est partium aquosarum defectus, & salinarum, sulphureo - mucidarum terrestrium copia, unde frigore partes graviores coeunt & fundum petunt; quod non accidit, si sufficiens adest phlegmatis vehiculum. Quia vero calor absorbet humidum, hinc urinam quoque saturatorem efficit, ut sedimentum promte deponat, ut videmus cessante febris impetu.

§. XV.

Copiosior urina redditur liberaliori potu & aliarum excretionum imminutione.

Scholion.

Largior potus copiosam reddit urinam, quia hæc maxime ex phlegmate constat. Ob alvum adstrictiorem, vel transpirationem imminutam, serosior pars sanguinis ad renale cribrum majori in copia vergit, ibique facta ductuum renalium majori dilatatione, copiosius separatur, quare atmosphæra borealium ventorum flatu frigidiori & compressiori reddita, majorem & crebriorem urinæ profusionem fieri animadvertimus.

§. XVI.

Mirior sanguinis calor ejusque tardior progressio, urinæ copiosorem facit fluxum.

Scholion.

Hinc promte peti potest ratio, quare refrigerantia, ut sunt acidulæ, cerevisiæ minus spirituosæ, & quæ subtilem acorem habent, serum lactis, emulsiones ex seminibus quatuor frigidis, fraga, melones; ex remediorum classe nitriosa, spiritus nitri, item salis, urinæ fluxum vehementer moveant; contra omnia ea, quæ calidum intestinum sanguinis motum intendunt, ut sunt calida, sudorifera, spirituosæ, purgantia, parciorem urinæ fluxum efficiant.

§. XVII.

Renes sunt congruum illud salis laticis emunctorium

& ex meris tubulis sanguineis & urinariis sunt compositi.

Scholion.

Tota renum substantia est contextus vasculorum continuorum, siquidem ductus *Bellini*, sive urinarii, non nisi continuationes capillarium arteriolarum renalium sunt, quod manifesto evinci potest, dum aqua arteriæ emulgenti per siphonem injecta, vena, prius ligata, non interrupto itinere per siphunculos urinarios ad pelvim & inde ad uretheres & vesicam fertur. Quinimo testante *Ruyfchio in thesauro anatomico II. pag. 64.* si arteriæ renales materia ceracea infarciuntur, simul etiam ductus *Bellini* omnes urinarii, ipsique tubuli pelvis, eadem materia replentur.

§. XVIII.

Universa renum vasculosa compages, ob tunicas nerveas & musculosas, ex quibus ductus constant, peculiari elatere, tono motuque dilatationis & constrictionis gaudet, qui ad liberiores sanguinis transitum & urinæ separationem non parum contribuit.

Scholion.

Neque enim ullum visitur emunctorium in corpore, quod robore, tono & vigore motus destitutum sit. Non hepatis mere vasculosa compages & ductus biliarii hepatici, cysticus & cholodochus, non uretheres, aut vesica, neque tunica villosa intestinorum, vel salivales glandulæ, tono, sive potentia se dilatandi & contrahendi, carent. Pro varietate autem hujus toni, secretio & excretio humorum diversimode modificatur.

§. XIX.

Constrictis renalibus, e. gr. à spasmodis, à doloribus, tubulis, urina instar aquæ pellucida, saporis & odoris expers, redditur.

Scholion.

Igitur urina ante coloratior, si subito in aqueam & limpidam mutatur, certissimum affectus spasmodici, vel præsentis, vel imminentis, indicium est, quod in hypochondriacis, hysteris, calculosis & epilepticis subinde observamus. In febrili impetu, ubi universalis est fibrarum constrictio, renues, crudæ & sine sedimento urinæ minguntur, sique eæ subito aquosæ & largæ redduntur, ingens vitæ imminet periculum, quia partim vehementem spasmus, quo sanguis ad pectus, vel caput impellitur, partim separationem feri à sanguine & infarctum ab eo vasculorum minimorum, adeoque periculosam & lethalem in meningibus, vel ventriculo, inflammationem, denotant.

§. XX.

Sub remissione toni, sive robore deperdito ductuum renalium, tardior sanguinis & urinæ fit progressio.

Scholion.

Toni renalis nimia resolutio, morborum, qui renes occupant, potissima causa & origo est. A nimia enim sanguinis ibi facta congestione & vasorum renalium dilatatione, renes vel in ingentem molem solvuntur, vel vasorum sanguineorum fit apertio & mictio cruenta producit. Ob nimiam quoque tubulorum arteriorum & urinalium dilatationem, serum, crassioribus, lapidescentibus & terreis partibus onustum, separatur, quæ perquam facile in concretionem calculosam coeunt. Qua de causa temperata adstringentia & roborantia, in calculo, tam præservando, quam curando, palmam cæteris præripiunt. Quo de argumento legi meretur eruditissima *Diff. Cl. Heucheri de adstringentium usu in calculo.*

§. XXI.

Renalium tubulorum tonus, spasmodis, doloribus & febrium paroxysmis remittentibus, ordinario relaxatur.

Scholion.

Scholion.

Ea est indoles spasmodorum, ut partem, quam vehementer exagitarunt, postea valde debilem reddant. Nam gravem patris spasmodum ordinario atonia & relaxatio sequitur. Videmus hinc, remittente dolore ex calculo, crassam mingi urinam, quæ antea erat tenuis & pellucida. Quiescente febrili aestu, urina crassior & ponderosior, quæ facile sedimentum deponit, emititur, qualis à veteribus dicitur cocta, inque acutis bonam crisin & eventum morbi, in intermittentibus vero paroxyfmi solutionem, designat.

§. XXII.

Neque vero tantum renes, sed & canales, qui urinam ad vesicam deducunt, & Græcis uretheres vocantur, dilatationis & constrictionis motu, tono ac potentia instructi sunt.

Scholion.

Quare non solo pondere, sed simul constrictione horum ductuum, humor ad vesicam propellitur. Canales hi magnam dilatationem patiuntur ab affluxu urinæ, si in parte inferiori horum cavitas calculo obturata fuerit. Meminimus, tunc instar farciminis eos diductos repertos fuisse. Iidem canales nimium quoque constringuntur & angustantur ex dolore, quem calculus acutus parit: hinc etiam ipse dolor à calculo excitatus ejus per uretheres progressum ac transitum in vesicam impedit. Quare, quæ spasmodum & dolores sedant, quæ partes constrictas emolliunt & laxant, ut balnea, ad propulsandum calculum sunt efficacissima. Sæpe etiam spastica uretheris constrictione tanta est, ut alterum, utur à calculo liberum, simul in consensum trahat, quo casu, urinæ fluxus in totum supprimitur & quandoque unica sedativi vel anodynii medicamenti dosi restituitur.

§. XXIII.

Neque elastica, contractibili potentia vesica est destituta, quippe quæ ex tunicis musculosa, nervea & glandulosa est composita.

§. XXIV.

Distensionem patitur vesica ab urina contenta, cui semper elater vesicæ renititur, quare sub mictionis actu urina in angustum & arctum ductum urethræ coacta, redditur. Hic renisus vesicæ elasticus, est quoque causa, quod urina non proprio pondere, sphinctere vesicæ aperto, prodeat, sed contractione & compressione fibrarum ejus musculosarum propellatur. Observamus, ab improvida, diuturna & molestissima urinæ copiosæ retentione, ejus exitum difficilem fieri, quia nimia urinæ copia & distensione, elater vesicæ fractus & destructus fuit, ita prorsus, ut ad debitam constrictionem difficulter redeat.

§. XXV.

Urinæ inspectio medico valde necessaria & insignifima in praxi medica usus est.

Scholion.

Quemadmodum empiricam illam ac divinatricem artem imperitorum ex urina judicandi & specialissima prælagendi in totum damnamus & pro fallaci ignorantia habemus: ita ejus inspectio perito medico magnam utilitatem foenerat, siquidem hac ipsa non modo constitutionem ac naturam sanguinis & humorum, sed & eorum circulum ac progressum celeriores, neque minus partium solidarum ipsarumque viarum urinalium spasmodum, tonum & conditionem cognoscimus, quod ad morbos tam chronicos, quam acutos dijudicandos, multum utique facit.

CAPUT IX.

De excretionemuci.

§. I.

Mucus est humor glutinosus, qui in certis emunctoriis glandulosis, ad varios sæpe usus secernitur & excernitur.

§. II.

Exstant in corpore multa & varia lymphæ mucosæ colatoria. Obsita his est tota narium, palati & faucium regio. Deinde tota interior arteriæ asperæ glandulosa tunica mucum sæpe crassum & copiosum separat. Denique solenne muci emunctorium glandulæ lenticulares, quæ in intestinis crassis consistunt, constituunt.

§. III.

Tota interna faucium ac narium structura ac regio ossaque turbinata squamosa & capitis ossium cavitates tunica glandulosa, quæ pituitaria audit, obductæ sunt, inque his locis sanguis & humores à mucos egregie liberantur.

Scholion.

Sinus, qui in ossibus capitis absconditi sunt, duodecim numerantur: duo frontales, qui in inferiori ossis frontis parte siti sunt, quorum singuli, tres adhuc habent concamerationes: duo sphenoidales, in ossis sphenoidis, sub sella Turcica delitescentes, septo osseo distincti sunt: sex ethmoidales, minimi, in ossis ethmoidis inter nares & oculi orbitam exstant, & duo majores intra maxillam superiorem collocati, qui ab *Higmore* antra vocari solent. Hæ omnes & singulæ ossium capitis sinuositates tunica glandulosa & pituitaria obductæ sunt, quæ lympham in mucum abeuntem separant eamque per ductus invicem connexos ad unum & communem narium canalem vehunt.

§. IV.

Non mucositas in ea forma, qua ex naribus vel aspera arteria, aut per alvum ejicitur, separatur, sed demum facta separatione, hanc consistentiam induit.

Scholion.

Muci materia dum vehitur in sanguine satis fluida est, alias neque ad minimas arteriolas & ductus, qui sunt in glandulis, accedere, neque ibi secerni posset, spissam vero consistentiam stagnatione & effusione in cavitatibus demum acquirit, ubi partes æthereæ tenuissimæ, quæ fluiditatem humoribus conferunt, avolant, & aqueæ tenues per poros refluunt inque ductus lymphaticos recipiuntur. Quam facile vero fluidi & tenues humores, dissipatis partibus subtilioribus, in coagulum abeant, albumen ovi documento est, quod calore firmum & stabile coagulum induit. Neque parum frigidioris aëris accessus in aspera arteria inque faucibus & naribus, fluidiorem lympham ad glutinositatem disponit.

§. V.

Neque tamen mucositas per emunctoria sua omni tempore, neque in eadem quantitate & consistentia, secernitur.

Scholion.

Animadvertimus copiosas mucositates in infantibus, in pueris, in senibus, in fœminis, inque phlegmaticis & qui spongiosi sunt habitus corporis & delicatum ac quietum vitæ genus sequuntur, aëre maxime humido secerni.

§. VI.

§. VI.

Excretoria, quæ mukum separant, vasa & ductus, peculiari tono, robore & motu constrictorio & dilatatorio gaudent, atque adeo pro hujus motus variatione, muci excretio diversimode modificatur.

§. VII.

Ubi magna horum vasorum est dilatatio & toni remissio & mucosæ materiæ in sanguine abundantia, tunc ductus ampliati majorem copiam lymphæ mucidæ separant: contra vero, ubi horum ductuum fit constrictio & parcior materiæ mucidæ in sanguine quantitas existit, ibi parcior ejus est excretio.

Scholion.

In procinctu jam posita est ratio copiosioris secessio- nis muci in imbecillioribus & phlegmaticis, in declina- tione morborum, in fine tussis & coryzæ, præhumida existente atmosphæra tempore quoque verno & au- tumnali, neque minus in pueris & senibus, in phthi- sicis, ubi sicuti totius corporis, ita maxime ductuum horum excretiorum, tonus, læsus & imminutus est. Supprimatur vero hæc salutaris excretio in ficcioribus, in spasticis affectibus, pulveris tabaci & constringen- tium calidorumque abusu, item ab acri admissio frigore: leniori vero errhinorum stimulo, neque minus eo- rum, quæ humectant, humores crassos diluunt, ut sunt balnea, infusa herbarum calida, thermæ, usu promo- vetur.

§. VIII.

Ingentem quoque muci copiam intestinorum crassa, ut colon & rectum, lenticularibus glandulis separant, quæ ad humectanda scybala & eorum progressum fa- cilitandum, multum contribuit.

Scholion.

Neque existimandum est, mukum intestinale sub forma spissa, qua visitur, in glandulis separari, sed om- nino in principio etiam tenuis & fluidus in intestina in- fluit, paulatim vero sub tardiori alvo spissescit, ob sub- tilioris aquositatem in eos ductus redeuntem, per quos etiam humiditas, si diuturniori mora scybala pe- nitus exsiccantur, pertransit.

§. IX.

Res notatu admodum digna est: solennia muci emun- ctoria singulari inter se commercio & communicatione gaudere & invicem conspirare.

Scholion.

Quapropter uno ex emunctoriis istis obstructo, v. g. naribus, major mucositatis copia in intestinis depre- henditur, sique per asperam arteriam multum sputi & muci redditur, intestina & feces exsiccantur. Proinde non melior datur via ac methodus copiosum sputum & tussim humidam curandi, ac si stimulo laxante, vel purgante, ad intestina nimia serositas alliciatur.

§. X.

Dantur adhuc alia mucidæ lymphæ secretoria glandulosa, quorum in numero sunt prostata virorum, quæ corpora sunt globosa, instar nucis juglandis, ante col- lum vesicæ sita, quæ liquorem albicantem secernunt eumque decem plerumque vel duodecim ductibus ex- cretoriis in urethram pro ejus lubricatione ejaculantur. Huc etiam spectant glandulæ, quæ in vagina uteri & circa meatum urinarium, item in vesica urinaria repe- riuntur, quæ mucosum liquorem secernunt eumque per peculiaris oscula, sive lacunas, pro humectatione ha- rum partium, excernunt.

Scholion.

Ob harum glandularum nimiam relaxationem to- numque deperditum, hi ductus identidem nimium am- pliati, ingentem lymphæ mucidæ copiam separant, quod in gonorrhœa & fluore albo visitur. Interior ve- sicæ urinariæ nervea tunica glandulis, juxta collum ma- xime conspicuis, obsita est, quæ mucosum humorem, quo hæc sensibilis tunica ab erodente urinæ sale defen- ditur, separant. Huc etiam spectat urethræ tunica glandulis exiguis referta, quæ liquorem viscidum, rotundis & longitudinalibus foraminulis, ad urinæ acrimoniam temperandam, plorant. Quo etiam referendæ sunt glandulæ tres à *Conpero* inventæ, parvæ fabæ magni- tudine, quæ liquorem mucidum per speciales ductulos in urethram inferunt; nec non glandula *Littirii*, polli- cem lata, urethram proxime infra prostatas ambiens & aliquot osculis liquidum mucosum urethræ immittens. Quibus glandulis nimium relaxatis, vel erosis, ingens muci tam in vesica, quam in urethra, fit proventus.

§. XI.

Ut omnes glandulæ, & glandulosæ tunicæ; ita ma- xime, quæ mucosi liquidi secretioni serviunt, id habent peculiare, ut erosæ in magna copia mukum separent.

Scholion.

Tunica pituitaria, quæ narium & palati ossa cingit, si in lue venerea eroditur, viscidum & glutinosum muci co- piam fundit; si à calculi asperioris attritione, vesicæ tunica nerveo - glandulosa eroditur, magna quantitas muci in urina conspicitur; sique glandulæ prostata, vel urethræ utriusque sexus, aut circa collum vesicæ, in in- fectis, vel in scorbuticis, eroduntur, ingens viscosi hu- moris profusio fit, non parum vires debilitans.

§. XII.

Dantur adhuc aliæ intra juncturas artuum glandu- læ, quæ mucilaginosæ & pinguedinosæ appellantur, & ad eorum flexuram facilitandam, diaphanum mu- cum sequestrant, cui fini quoque serviunt ligamenta glandulis obsita, quibus artus invicem colligantur.

Scholion.

Dictæ hæ glandulæ ab insigni anatomico Anglo *Clopton Havers* inventæ sunt, earumque inventio in pa- thologicis non minimum usum foenerat. Si enim mu- cus hic lymphaticus, acribus, erodentibus salinis par- ticulis imbutus est, dolores articulorum, qui difficulter discuti possunt, suboriuntur, si tartareis, fixis, terreis, partibus onustus est, tophorum, qui arthriticis & po- dagricis familiares sunt, origo fit. Hic mucus quoque copiosius transmissus, si in luxatis membris coagulatur, luxatorum ossium repositionem impedit. Glandulis ve- ro articulorum mucilaginosus, aridis, exsuccis redditus, strepitus ossium, peculiare scorbuticorum symptoma, producitur.

CAPUT X.

De excretionis sanguinis per uterum.

§. I.

AD actus naturales, qui motibus vitalibus succos & materiam aptam præparant, pertinet omnino menstrua foeminarum purgatio, quatenus superfluum & inutilem sanguinem excernit, ut reliquus in venis eo me- lius circuletur & depuretur.

§. II.

Excretio sanguinis ab utero, singulis mensibus, ob nimiam

nimiā sanguinis in foeminis abundantiam & ob peculiarem uteri fabricam, sanitatis & alendi foetus causa fit.

§. III.

Sanguinis, qui ejicitur singulis mensibus, quantitas exactius determinari nequit.

Scholion.

Differt hæc ipsa pro differentia ætatis, vitæ generis & habitus corporis: primis annis solet esse parcius, in juvenili ætate plenior. Macilentiores & sanguineæ plus quoque sanguinis effundunt, quam obesæ & frigidioris naturæ foeminæ: plus quoque gulæ & otio deditæ, quam quæ tenui victu & multo exercitio utuntur. *Hippocrates Lib. I. de morbis mulierum Sect. XV.* duas heminas assignat, alii libram, vel etiam libram unam & semis, effundi statuunt.

§. IV.

Causa menstrui fluxus est nulla alia; quam nimia sanguinis redundantia, quæ optimo consilio ad sanitatem tuendam evacuat.

Scholion.

Variae prostant de hujus fluxus causis in scholis medicorum opiniones. Alii ad lunæ motum & mutationem, alii ad fermentum uteri peculiare, nonnulli ad *Helmontii* archæum seu corporis nostri rectorem, quidam ad arcanam & sapientem naturæ legem, eam referunt. Nos reconditis & à communi sensu longissime remotis ejusmodi principiis penitus neglectis, ex re maxime obvia & simplici, sanguinis nempe plenitudine majori, quam necessaria est, hujus fluxus originem ac causam repetimus.

§. V.

Mollior & laxior solidarum partium in foeminis textura vasorumque angustia in causa est, quod foeminæ majorem sanguinis abundantiam habeant, quam viri.

Scholion.

Quo major partium fibrosarum est soliditas, eo majori resistentia ac robore ad impellendum fluidum sunt instructæ; contra quo fibræ molliores, quo laxiores sunt, eo minoris roboris & efficacis ad impellendum sunt. Quale autem est fibrarum robur & vasorum capacitas, talis est pulsus cordis & arteriarum. In viris, qui solidiorem partium corporis compagem & majora vasa obtinent, pulsus vegetior, plenior & velocior est, quam in mulieribus, in quibus ob vasorum angustiam & fibrarum molliem, languidior, mollior & magis exiguus. Qualis vero est pulsus, talis est fluidorum progressio, & quale secretorii vasis orificium, talis est transpiratio & humidi consumptio. Et quia in foeminis minor sanguinis velocitas & tardior circulus est & major capillarium angustia, quam in viris, minor quoque in foeminis humidi perspirabilis erit secretio, & consequenter major erit sanguinis & humorum in vasis redundantia. Huc accedit, quod foeminæ labore minus exerceant corpus, quam viri, quo tamen corpora secundum *Sanctorum Sect. V. aph. IX.* semper leviora sunt, eo quod multum humoris detrahant.

§. VI.

Plethoram menstrui fluxus causam esse, plura adhuc alia sunt, quæ id declarant.

Scholion.

Ordinario eæ foeminæ, quæ gulæ liberalius indulgent, quæ otio fruuntur, quæ macilentiores & mollioris sunt texture, largiorem experiuntur mensium fluxum, propter uberiorem sanguinis redundantiam; obesæ vero, in quibus sanguis, non tam intra vasa colligitur, quam in corporis habitum diffunditur, mulieres

Frid. Hoffmanni Oper. Tom. I.

rusticæ, quæ labore corpus fortiter exercent, nec ror quæ ex diuturniori morbo convalescunt, aut puerperio, vel aliis evacuationibus, multum sanguinis amiserunt, aut lactantes sunt; vel prægnantes, eæ vel parcius, vel plane non purgantur.

§. VII.

Optimus & nutritio succo refertus sanguis, non vero corruptus, utero expurgatur.

Scholion.

Error fuit veterum, ex sanguinis circuli ignorantia profluens, venenatum & corruptum sanguinem esse menstruum, quod ex eo dijudicabant, quia fluxus mensium suppressus, ingentem corpori struit perniciem. At vero sanguis, qui utero in sanis purgatur, fluidus & floridus est, in junioribus tenuior, in adultioribus crassior. Si vero in vasis stagnaverit plus justo, ex moratuque congrumatus, niger & foetidus reddi potest.

§. VIII.

Peculiaris uteri structura & fabrica in causa est, quod non per alia loca, sed per ipsum, abundans sanguis evacuetur.

Scholion.

Ipsius enim uteri compages ita est comparata, ut fibræ & vasa in ea incredibilem in modum distendi & explicari, iterumque contrahi & sponte ad pristinum statum redire possint; quo fit, ut sanguis copia redundans eo quam facile ruat ibique colligatur. Vasa deintam arteriosa, quam venosa, ex spermaticis & hypogastricis orta, numero fere infinitas ramificationes ad uterum ejusque vaginam emittunt; quæ non recto cursu, sed varie contortæ, curvæ & quasi serpentinis ductibus proserpunt, & in non gravidis minimæ sunt; in prægnantibus vero sensim crescente utero, & majores fiunt, & exporriguntur; nisi enim ejusmodi incurvatio & flexura vasorum esset, uterus a foetu, sine vasorum disruptionis metu, non posset distendi. Porro membranae, quæ & internam, & externam uteri superficiem cingunt & per quas vasa disseminantur, nulla adipe obductæ sunt; quare ejusmodi fulcro destituta vasa facilius distendi & aperiri possunt. Tum truncus aortæ descendens multo amplior semper in foeminis, quam in viris observatur, propter sanguinem copiosorem, qui ad uterum deferri debet, quod in viris non accidit. Præterea, sicut omnem fluidi ad perpendicularum ascensum, ita sanguinis per venarum spermaticarum admodum longum & valde tortuosum & inflexum ductum; valde esse difficilem ad superiora perpendiculari via cursum, animadvertimus. Demum, uti valvulae, in aliis corporis partibus venis accretæ, sanguinis progressum egregie adjuvant ejusque stagnationem impediunt; ita vicissim in venis uterinis valvulis destitutis, cruor utique ægrius circumagitur & in amplioribus collectus, ad minores & capillares relabitur, eorumque tenera oscula plus justo distendit ac premit. Quod si igitur major sanguinis copia congesta fuerit, quam vasa capere & robur cordis ac solidarum regere possit, tunc in nulla parte difficiliter regreditur, nullibique commodius ipsi diverticulum, quam in utero, unde in alveis vasorum sensim lapsu temporis accumulatur, vasculosas sinuositates replet ac infarcit, donec earum extremitates, quæ oblique hiant in uterum, nimium distentæ, dissiliant tandem & cruorem effundant.

§. IX.

Causa eruptionis sanguinis per uteri vascula capillaria, præter stagnationem in venis, est quoque spasmotica partium constrictio.

Scholion.

Constans est observatio practica, in omni majori & critica sanguinis eruptione, extremorum quandam refrigerationem.

frigerationem, dolorem dorſi & inflationem in abdomine, alvum ſtriſtam cum corporis languore & gravitate obſervari; ſiquidem nimia vaſorum à ſanguine repletio, ſecundum *Hippocratis* effatum, *aph.* 39. *Sect.* VI. efficit ſpaſticas conſtrictiones, quibus liber progreſſus ſanguinis per capillaria vaſcula impeditur, hinc ad vaſa majora regurgitat, in corde vero nimium congeſtus, ejus validiorem & velociorem contractionem, quam pulſus durus & magnus, in omni ſanguinis enormi eruptione conſpicuus indicat, ſuſcitatur. Impetu igitur per arterias ſanguis ad uteri vaſcula delatus, ea aperit, idque multo facilius, quia uterinæ venæ, jam tum ſanguine infarctæ, liberiori ſanguinis curſui obicem poſuerunt.

§. X.

Sanguis menſtruus per minima vaſa tum uteri, tum vaginæ, evacuatur.

Scholion.

Ex quibus canalibus, utrum ex iis, qui ad uterum, an qui ad vaginam feruntur, ſanguis menſtruus promanet? magna inter medicos, rei anatomicæ peritos, controverſia agitur. Utraque ſententia ſuos habet patronos, ad autopſiam provocantes. Nos utrumque fieri poſſe affirmamus. Quia vero plura vaſa ad uterum, quam ad vaginam excurrunt, & ſpermaticæ, quæ ovarium perreptant, venæ, valde flexuoſæ ſunt, non ſine ratione aſſerimus, largiorem ſanguinis effuſionem, ut in abortu, è vaſis uteri apertis, ordinarium vero menſium fluxum, ex vaginæ vaſis fieri. Num vero ex arteriis, an ex venis, prodeant menſes, tam exquiſite determinari non poteſt; quia tamen guttatim ſuccedit fluxus, potius ex venis, quam arteriis, eum deducere vellem, præſertim cum teſte *Fantoni in anatomia corporis humani pag.* 186. ſtatu venis uterinis immiſſus, in cavum uteri & vaginæ commodiſſime impelli poſſit, & venarum tunicæ facilius, quam arteriarum latera, aperiantur.

§. XI.

Periodicæ fluxionis ſanguinis ab utero cauſæ ſunt mere mechanicæ.

Scholion.

Plurimi hujus notabilis phænomeni cauſas in lunam rejiciunt, quia ad certum ejus ſtatum, vel phaſin recurrere ſolet. An vero imbecille argumentum eſt, aſtrum eſſe cauſam, ubi ad certum menſem, diem, vel horam, effectus idem recurrit. Res potius ita ſe habet: ob tardiorem ſanguinis in foeminis progreſſum, ac languidiorem perſpirationem, neceſſe eſt, indies quippiam ſucci, vel ſanguinis ſuperflui in vaſis coacervari, ex quo paulatim creſcit plethora. Ponamus jam, certam menſuram ſanguinis abundantioris requiri, v. g. libram unam ſemis, ad efficiendam eruptionem per uteri vaſa, ad hanc vero colligendam requiri certum tempus, v. g. viginti octo dies; manifeſto exinde conſequitur: non tempus eſſe directam fluxionis cauſam, ſed menſuram certi temporis neceſſariam eſſe ad certam abundantioris ſanguinis quantitatem accumulandam, quæ potens ſit ad ſpaſmum concitandum & vaſa uteri perrumpenda. Ex quantitate igitur ſanguinis, qui ſub menſium fluxu ſingulis foeminis evacuatur, haud difficilius invenire poſſumus, quantum ſanguinis & ſucci nutritii ſuperflui in quavis foemina ſingulis diebus generetur & quam quantitas rurfus debeat expelli.

§. XII.

Sanguinis menſtrui in foeminis fluxus ſanitati prodeſt.

Scholion.

Veritatem hujus problematis quotidiana comprobatur experientia, ſiquidem recte ſe habente hoc fluxu mulierum quoque ſanitas bene ſe habet, is autem, ſi vi-

tium capit, vel deficiat, vel excedat, ilias morborum ingruit; vid. *Hippocratis aph.* 57. *Sect.* V. *Galenus libr. de venæ ſeſtione adverſus Eraſiſtratum* ita ſcribit: *Nonne natura ipſa mulieres cunctas evacuat ſanguine ſuperfluo ſingulis menſibus foras effuſo? quippe muliebri genus, quod domi ageret, neque vehementibus laboribus exerceretur, neque ſub claro ſole viveret, & propterea quam plurimos humores coacervaret, oportebat, opinor, evacuationem huiusce plenitudinis, tanquam remedium à natura datum, accipere.* Ad æquabilem enim, liberum & moderatum ſanguinis circulum & curſum, qui omnium partium & actionum integritatem tueretur, certa & proportionata ſanguinis menſura requiritur, qua læſa, ſive in exceſſu, ſive in defectu, motus ille humorum, qui ſanitatem diſpenſat, neceſſario læditur.

§. XIII.

Nimia ſanguinis ex ſuppreſſis menſibus redundantia circulum ſanguinis impedit, & robur, elaterem & contractionem cordis vaſorumque infringit, hinc valde inſenſæ ſanguinis ſtaſes, ſtagnationes, congeſtiones, viſcerumque obſtructiones, quæ chronicorum morborum foecundæ procreatrices ſunt, reſultant.

Scholion.

Ab imminutis vel deficientibus menſibus, magna utique muliebrium morborum copia naſcitur, qui pro differentia partium valde differentes ſunt. Si enim ſanguis ſtagnat in capite, melancholiam, capitis gravem dolorem, vertiginem, oculorum, & auditus gravitatem, pallorem, inſaniam, quandoque etiam apoplexiam, concitat; in præcordiis nimium congeſtus, dyſpnœam, aſthma, tuſſim, hæmoptiſin, cordis palpitationem, ſyncopen parit; in ventriculo & inteſtinis ſi reſtagnaverit, ſiunt inflationes, borborygmi, ructus, præcordiorum anxietates, cardialgiæ, vomitus etiam cruenti ac tormina; viſcera abdominis, ſi ſanguine craſſo infarctæ fuerint, cachexiam, totius corporis gravitatem, ſcorbutum, icterum, pathemata hyſterica, purpuram, tumores crurum ac pedum, venarum varices, progigni in conſeſſo eſt. In utero, fluor albus, ejus inflammatio, molæ uterinæ & abortus reſultant, quæ omnia fluxu hoc reſtituto levantur vel tolluntur, vel matura ſanguinis miſſione præcaventur. De quibus quidem omnibus iſque medendi methodo, ex inſtituto egimus in diſſertatione, *de ignorata uteri ſtrutura multorum in praxi errorum fonte.*

§. XIV.

Circa decimum quartum annum, menſes incipiunt, circa ſeptimum vero ætatis ſeptenarium deſinunt, & tunc multa ſanitatis incommoda procreari ſolent.

Scholion.

Incipiunt menſes plerumque circa decimum quartum ætatis annum, quia hoc tempore major alimenti copia ingeritur, digeritur & plus ſanguinis ingeneratur, qui prioribus annis multo ſeroſior & nutriendo corpori inſerviebat. Hic ſanguinis incipiens fluxus corpus non raro à plurimis malis, quæ à copioſiori ſero primis in annis naſcebantur, vindicat. Ceſſat vero ſanguinis fluxus circa quinquageſimum, quia tunc fibræ rigidioreſ ſiunt, capillaria oſcula occluduntur, & motus naturæ ſpaſtici, qui fabri ſolent eſſe excretionum ſanguinearum, deficere incipiunt. Niſi itaque tunc plethora matura venæ ſeſtione, aut evacuatione, per urinam, vel per tranſpirationem, auctiori reddita, ſuccurramus, proſecto foeminæ poſt quinquageſimum annum in varia & diuturna mala incurrunt.

§. XV.

Non vero tantum foeminæ, verum etiam viri, qui multum ſanguinis ſuperflui ingenerant, ejus excretionem,

nem, & quidem per venas sic dictas hæmorrhoidales, patiuntur.

§. XVI.

Sicut fœminæ ob laxiorem, flexiliorem ac molliorem fibrarum structuram vasorumque exilitatem, plethoricæ fiunt, & sanguinis effusionem cum sanitatis emolumento experiuntur: ita etiam ejusdem texturæ & habitudinis viri, ob plethoram auctam, per hæmorrhoides sanguinem superfluum emittunt.

Scholion.

Profecto hæmorrhoidum fluxus non tam infrequens est ac vulgo putatur, quod medici accuratiori facto scrutinio optime norunt. Patent vero quam maxime huic fluxui viri succi pleni, facie formosi, spongiosioris carnis, quia ejusmodi corporis habitus, ob vasorum etiam secretiorum angustiam pulsusque languidiorum, non tantum consumit, quantum fuerit assumptum. Junioribus annis ejusmodi homines narium hæmorrhagiis obnoxii sunt, vel etiam ad hæmoptysin inclinant; adultiores vero facti, hæmorrhoidalem fluxum experiuntur, qui eo largior & frequentior est, quo plus sanguinis in venis coacervatur.

§. XVII.

Salubris est maxime hæmorrhoidalis fluxus, quia corpus à plethora liberat, & morbos ab hac oriundos præservat.

Scholion.

Non inepte igitur à veteribus fluxus sanguinis per venas sedis, propter egregium commodum, quod sanitati præstat, vocari solet aureus, *oder die gûldene Ader*. Alii hunc fluxum egregium naturæ bene valentis opus salutant, quod longam sanitatem ac senectutem polliceatur. Nihil itaque deterius est, ac si hic fluxus consuetus & salutaris, prava diæta, vel medicina, intempestive minuatur, vel cohibeatur, siquidem graves viscerum obstructions & infarctus, & exinde chronicæ passiones, ut cachexia, hydrops, calculus, flatulentia spasmodica, melancholia, colica convulsiva, passio ischiadica, resultant, quæ hoc fluxu prudenter ac tempestive restituto, sanantur. Distinguendum vero est inter fluxum hæmorrhoidalem criticum & sua natura salubrem, qui ex sanguinis redundantia & ad eam tollendam fit, & inter eum, qui ex constitutione viscerum abdominis præternaturali originem suam trahit; hinc observamus cachecticos, hypochondriacos & hydropicos fieri hæmorrhoidarios, quæ excretio quandoque cum levamine, quandoque etiam cum detrimento fit, præsertim si nimia fuerit.

§. XVIII.

Conservatio corporis nostri valde corruptibilis, à libero sanguinis circulo & progressu, hic vero à convenientibus ingestis, retentis & excretis, dependet.

Scholion.

Actus utique vitales in motibus tam solidarum, quam fluidarum partium consistunt, hi vero nec diu subsistere, aut continuare possunt, nec materiam, in quam vim suam exercent, habent, nisi per actiones naturales, quæ alimentorum congruorum ingestione & convenienti secretione ac excretionem continentur. Magna itaque vis est ingestorum & egestorum ad vitam & sanitatem conservandam, & ad morborum quoque causas statuminandas, quare medicum ad hæc semper diligentissime respicere oportet.

CAPUT XI.

De generatione corporis humani.

§. I.

Generatio est actus, quo minimum, sed organicum corpusculum, in semine præexistens, nutritione evolvitur ac producit.

Scholion.

Generatio nil nisi nutritionis & auctiois species est, qua, mediante lymphæ nutritia, corpusculum in semine contentum extenditur, quare etiam hæc materia ad actiones naturales recte refertur.

§. II.

Organica tantum corpora, non vero alia, virtutem sui multiplicativam habent.

Scholion.

Per corpora naturalia organica ea intelligimus, quæ singulari artificio ad certos edendos motus a natura constructa sunt, & quia in metallis talis organica constructio non datur, ideo multiplicativam vim ibi quærere vanus labor est: in regno autem vegetabili & animantium vis seminalis, sive multiplicativa, observatur.

§. III.

Virtus multiplicativa in eo nobis consistere videtur, quod omnes vegetabilium & animantium partes sint organicæ, id est, totius corporis ideam complectantur.

Scholion.

Quemadmodum minima atomus auri totam texturam auri continet, ita etiam minima molecula plantæ, vel animantis, ejus structuram complectitur. Quid enim femina, tam vegetabilium, quam subtilissima & delibatissima succi nutritii portio, & unica arbor, planta, aut animal, vel multa millia feminum producit, quorum singula novum & simile organicum corpus producant. Neque tantum in feminibus vegetantium, sed in quovis etiam minimo ramulo arborum, ut ex insitione patet, vis propagativa consistit.

§. IV.

Ergo in quovis semine jam totum, quamvis stupendæ exiguitatis, organicum corpus, latet.

Scholion.

Utut intellectus nostri limitatæ vires minime capere possint modum, quo in semine & quavis corporis organici naturalis parte totum lateat; hoc ipso tamen rei existentia & veritas non destruitur, quia plura sunt & fiunt in rerum natura, quæ limites intellectus nostri longissime exsuperant. Neque ad medici scopum pertinet, abdita & sublimiora hæc, quomodo videlicet organica in semine corpuscula producantur, inquirere, aut sollicitius agitare. Suffecerit, ea adesse, & nutritione evolvere & in conspectum dari. In minimo, proceræ etiam arboris semine, jam tum ejus rudimenta plena latitare, inque insectorum ovis, integra eorum corpuscula jam formata contineri, inque humano semine viva animalcula accuratioribus microscopiis conspici, recentiorum curiosæ inventioni debemus.

§. V.

Subtilissimum illud, quod medullæ cerebri & nervorum porulos incolit, fluidum, ad specificas & organicas actiones & motus recipiendos & producendos aptissimum est.

Scholion.

Singularis & plane mirifica res est, perversam matris phantasiā deformandi foetum ejusque partium naturalem conformationem mutandi ac destruendi potentia instructam esse. Neque enim infantes tantum lineamenti corporis, sed & moribus, ingenio, inclinationibus, ratione animi, parentibus subinde similes sunt. Admirationem meretur, quod scribit *Avicenna in Canone Med. Lib. 1. can. 98.* natum similem esse illi, cujus imago impensa cogitatione tempore congressus fuit repræsentata.

CAPUT XII.

De semine humano utriusque sexus.

§. I.

AD producenda vegetabilia unicum tantum semen desideratur; ad generationem vero animantis duo, maris nempe & foeminae, ut concurrant, necesse est, ob duplicem animalium sexum, qui in vegetantibus non observatur.

Scholion.

Ad arborem vel plantam producendam ut semen in terra foecundetur, tantummodo solis calore & tenui pluviarum humido opus est: ad generationem vero animalis duo semina requiruntur, alterum quod in membranacea capsula continetur, sive ovum, alterum fluidum, quod in subtilissimos halitus resolvitur, quale est masculinum.

§. II.

Animantium semen ex liquido longe tenuissimo constat

Scholion.

Semina vegetabilium nihil aliud sunt, quam succi nutritii subtilissima per angustissimos demum canales secreta portio, multo vero magis in animantibus tenuissima seminis indoles ex subtilitate canaliculorum, quibus secernitur, dijudicanda est. Neque si non adesset tanta in semine tenuitas partium, in minimos meatus corporis organici ingredi, nec motum inibi ciere, aut partes extendere posset.

§. III.

Semen maris est tenuissima lymphæ nutritiæ portio, in canaliculosa testium fabrica à sanguine secreta.

Scholion.

Anatomicis experimentis constat, testes viriles ex meris concavis, sed tenuissimis tubulis, & secundum *Belini* calculum triginta ulnas Florentinas exæquantibus, invicem convolutis, esse compositos, qui diuturniori, in aceto præsertim maceratione, dissolvi possunt: neque minima hæc vascula cavitare destitui, vel ex eo dijudicandum est, quod per hæc ipsa liquidum ad vasa deferentia, & inde ulterius ad feminales capsulas, quæ convoluta quasi intestinula constituunt, deferatur. Si que interdum liquidum in minimis testium canaliculis restagnaverit, ingens sæpe tumor nascitur, qui reddito humore fluidiori, quam facile discutitur.

§. IV.

Quemadmodum per angustissimos tubulos non nisi tenuissimum, & quod eorum diametro respondet, liquidum fertur; ita longo ductuum itinere per attritivum motum multo subtilius redditur.

§. V.

Fluidum, quod in testium vasculosa compage secer-

nitur, ejusdem fere indolis videtur, ac illud, quod corticalis & vasculosa cerebri substantia à sanguine arterioso separat.

Scholion.

Fabrica enim testium & corticis cerebri multum inter se convenit. Utraque fluidum à sanguine separat tenuissimum, magna activitate & potentia movendi instructum. Et hinc petenda est ratio, quare ab intempestiva & immoderatiore venere, non modo animales functiones detrimentum capiant, sed & vitale partium robur ac tonus inde enervetur, ita prorsus, ut qui in prima ætate frequentem venerem exercent, corpus infirmum & morbis obnoxium reddant. Id quod etiam jam suo tempore *Hippocrates Lib. de Genitura, §. 1.* his verbis agnovit: *Genitura viri provenit ab humido, quod in corpore est robustissimum; argumentum vero, quod robustissimum secernatur, hoc est, quia à veneris usu, tam pauca materia emissa, imbecilles reddimur.*

§. VI.

Summa tenuitas, sive spirituascentia feminis, in causa est, quod circa tempus pubertatis ingens mutatio in corpore observetur. Tum enim vox fit sonora & aspera, pili in mento & pube incipiunt crescere, neque minus vigor ac robur animo & corpori accedit.

Scholion.

In eunuchis hæc omnia non videntur, neque barba in iis crescit, neque vocem sonoram edunt, habitus corporis manet laxus, animus est effoeminatus, capilli ad muliebrem modum in longitudinem crescunt. Animantibus castratis, ut equis, multum decedit roboris. Caro in castratis bobus, hircis, vervecibus, caponibus, fit succulentior & pinguior.

§. VII.

Subtilior succi nutritii pars, per testium canaliculosam compagem transitu spirituosior facta, & ex vesiculis feminalibus per vasa lymphatica ad corporis succos reflua, toti corpori agilitatem, spirituascentiam, elaterem, robur, calorem, quo castrati destituuntur, confert, & instar medicinæ optimæ confortantis & balsamicæ se habet.

Scholion.

Refluit semen retentum ex vesiculis feminalibus per lymphatica vasa ad sanguinis & lymphæ massam, ob vasorum lymphaticorum communicationem, quæ ipsis cum vesiculis feminalibus intercedit. Nam si flatus per tubulum in deferentia vasa fortiter immittitur, non modo ipsæ feminales capsulæ, sed & totum lymphaticorum systema, cum ductu thoracico, inflatur.

§. VIII.

Liquoris feminalis, qui naturæ mobilissimæ, tenuissimæ, simplicissimæ est, minima pars, universi corporis organicam structuram continet, & secundum hanc vividissime operatur.

Scholion.

Est enim ea indoles fluidi tenuissimi, ut omnium impressionum, quæ nonnisi vestigia sunt objectorum, recipiendarum capacissimum sit, quemadmodum id videmus in cerebri, nervorum ac sensoriorum fluido, quod veteribus spiritus animalis nomine venit. Neque dubium est, vel minimam feminis portionem, organismum similem corporis in quo subsistit, ut modo ineffabili complecti. Et hoc modo veterum sententia intelligi potest, semen à singulis corporis partibus decidere & animam in corpore unam esse, sed totam in singulis ejus partibus.

§. IX.

Constat observatione, tanto saniores ac robustiores

rem fieri infantem, quanto semen maturius, magisque excoctum & subtile est.

Scholion.

Perfectio vegetabilium, florum quoque, multum dependet à feminis maturitate & perfectione, quare, si in horti cultura flores, ut tunicae, primularum, auricularum, pleniores, copiosiores & bene coloratos reddere velimus, opus est, ut non omnes feminales capsulas relinquamus, sed paucas tantum, quibus diutius aëri fere-no & calido, minime vero coelo pluvioso & frigido, expositis, semen inde magis coctum & perfectum evadit.

§. X.

A femine aquoso, minus maturo, vel cocto, debiles infantes, morbis obnoxii, neque diutius viventes & foeminae frequentius, quam mares progignuntur.

Scholion.

Attenta observatione discimus, debiles & morbosos parentes gignere etiam ejusmodi liberos. Observamus quoque, liberos in extrema senectute, vel prima adolescentia, aut in ebrietate, vel ab iis qui venerem nimis mature & copiose exercent, genitos plerumque admodum debiles & brevioris vitae esse.

§. XI.

Genitura virilis est soboles optimi succi nutritii, ea propter, qui benigno, temperate spirituofo alimento fruuntur, quique succi nutritii & sanguinis copiam ingenerant tardiusque congregiuntur, neque vires perdunt, ii ad coitum & procreandam sobolem sunt aptiores.

Scholion.

Recte igitur dictum: sine Cerere & Baccho frigere venerem. Et parentes, qui nec congruis alimentis, nec satis largiter fruuntur, & vires ex morbo, vel aliis causis deperdiderunt, minus bonum & laudabile semen proferunt, & ad procreandam sobolem ineptiores sunt.

§. XII.

Uti omne animal, ita etiam homo, ex ovo produ-citur.

Scholion.

Quare ovulum, quod nonnisi tenuissimus lymphaticus est inclusus humor in capsula membranacea, ad animalis generationem necessarium sit, hæ videntur rationes: quia in liquido incluso partium situs, formatio, nutritio commodissime, neutiquam vero in humore, qui diffluit, qui exhalat, fieri potest; deinde quia ovula foeminarum à spiritu geniturae virilis actuari & foecundari debent, opus est, ut humor seminalis membranis includatur, per quas subtilior feminis virilis pars transire & penetrare debet.

§. XIII.

Neque tantum in minutissima geniturae virilis portione, sed & in quovis foeminae ovulo, integra corporis organici structura, utut maxime exigua, latitat.

Scholion.

Nisi in ovulo ipsa stamina & prima rudimenta foemel-lae containerentur, nulla ratio appareret, qua ex virili femine foemininum corpus, diversis generationis organis donatum, posset prodire. Accedit & hoc, quod infantes non tantum patris, verum etiam matris lineamenta & utriusque corporis, æque ac animi dispositionem similem habeant. Ex ovulo vero foeminino, quod vasculus generetur, id nostro quidem iudicio sic procedit. Si geniturae virilis corpuscula organica majori motu & activitate prædita sunt, quam ea, quæ in ovulo continentur, tunc unum ex iis nutritur & mas fit: si vero major motus in organicis corpusculis lymphæ seminalis ovo

Frid. Hoffmanni Oper. Tom. I.

inclusæ est, foemina gignitur. In hanc sententiam concedit quoque *Hippocrates*, qui in *Lib. de genitura* prodidit: marem generari, si semen viri fortius & foeminae debilis; foeminam vero nasci, quando semen maris debilius & foeminae fortius est. Quæstio verò moveri potest: quomodo corpuscula organica mascula in ovulum perveniant? verum, si consideremus, omnes partes animantis multo magis minimas & subtilissimas, hinc feminis etiam, esse organicas, facile eas in poros ovuli ingredi illudque foecundare posse, res non adeo intellectu difficilis est.

§. XIV.

Vulgo habitum ovarium an vera ovula generationi apta contineat, nondum res satis plana ac perspicua est.

Scholion.

Corpora globosa & membranacea, vasis dictis spermaticis, nec non vesiculis plurimis turgida & ad latera uteri posita, secundum receptam sententiam usque eo pro testibus & ovariis foeminarum habita sunt: hæc tamen assertio plurimis adhuc difficultatibus premitur. Primo, utut concedendum sit, vesiculas quasdam humore lymphatico refertas in dictis ovariis contineri, quæ etiam aquæ calidæ injectæ coagulum induant, neutiquam tamen rationem assequi licet, quomodo hæ ipsæ foecundatæ à firmo membranarum involu-cro, cui altius infident, sine insigni læsione & erosione ovarii & extravasatione humorum, se liberare possint. Secundo, nullo modo concipi potest, quomodo ovulum ab ovario liberatum, per canales *Fallopianos*, ultra duos transversos digitos ab ovario distantes, recipi & ad uterum provolvi possit. Tertio, non intelligitur, quomodo genitura virilis per solidum uteri corpus, vel tubas clausas, commode ad ovarium & ovulum, salva sua textura, pervenire idque foecundare possit.

§. XV.

Verisimilior eorum apparet sententia, qui ovarium intra uterum & circa internum ejus orificium ac cervicem constituunt, ubi utique racemus innumerorum ovulorum semper conspicitur, quæ & facilius virili semine foecundari & a compedibus liberari possunt.

Scholion.

Recentiorum quorundam anatomicorum industriae & dexteritati detectio novi ovarii debetur, inter quos merito ego numerare possum anatomicum peritissimum, Lipsiensem quondam Professore, *Dn. Naboth*, qui ovarium hoc novum invenit, & in *diff. de Sterilitate* egregiis argumentis stabilivit. Is enim jam ante triginta annos, in anatomia publica cadaveris foemini-ni, in nostra Academia dissecti, nobis illud monstravit, & ego etiam postea semper, quoties occasio tulit, foemininum corpus diffecandi, inveni idem aliisque monstravi. Equidem harum vesicularum jam alii etiam mentionem fecerunt, sed plurimi pro hydatidibus eas habuerunt, vel earum usum nesciverunt: uti *Grafius*, item *Novesius* in *Zodiaco medico Gallico*, itemque *Livius dans les memoires de l'Academie Royale des sciences*, nec non *Morgagni in adversariis anatomicis* abunde confirmarunt. Fatemur vero, contra hanc sententiam pugnare, quod foetus humanus quandoque intra tubam Fallopianam inclusus repertus fuerit, deinde, quod nullus appareat testium muliebrium hæctenus pro iis habitorum alius usus; cum tamen in iis ovula, calore in coagulum abeuntia, reperiantur. Ut vero ad has dubitationes paucis respondeamus, dicimus: longe facilius ovulum ex uteri cavitate ad tubam Fallopianam, foecundo coitu, quam ex testibus sic dictis muliebribus ad tubam pervenire posse. Ad secundum reponimus: corpora, quæ huc usque pro ovariis habita sunt, potius esse fulcimenta vasorum sanguineorum, quæ inflata ad uteri substantiam copiosissima abeunt.

Tum capsulae vesiculares, quarum humor inclusus à calore coagulatur, non modo in testibus vulgo habitis, sed & in uteri ligamentis inque externa uteri superficie copiose subinde conspiciuntur, quas utique, quoniam dispersae sunt, longe meliori jure pro vasorum lymphaticorum expansionibus, quae copiosissima sunt circa uterum, quam eas, quae in cervice haerent & quae semper prostant, ut acervatim collectae, limitibusque suis inclusae sunt, haberi posse asserimus.

CAPUT XIII.

De nutritione foetus.

§. I.

NUnquam ex ovo animantis, nisi foecundetur à femine virili, prodit animal. Idem etiam fit in ovo foeminino humano, quod agitari in motum, hoc est, foecundari debet femine virili, ut calore aequabili & temperato alimento, per uteri vascula allato, nutriatur & augmentum accipiat.

§. II.

A feminis foecundi immisione, mediante coitu in uterum facta, ingens in eo mutatio subsequitur, quia ejus vasa incipiunt turgere, sanguis incalcescit ac liberius per uterum movetur, succum nutritium ibi deponit, mensiumque fluxus definit.

Scholion.

Semen masculinum, ex tenuissima elastica lymphâ compositum, non modo ovula, sed & sanguinem & succos in vasis uteri rarefacit, expandit, neque minus tonum & robur uterinis fibris confert. Jam patet ratio, quare coitus ex mensium defectu cachecticas sanas reddere & salutarem hunc fluxum restituere soleat, quod etiam jam suo tempore optime notavit Hippocrates Lib. de genitura, dum ait: *coitus sanguinem calefacit ac viam faciliorem mensibus facit*. Etenim mensium defectus, ob nimiam vasorum uteri angustiam & contractionem subinde accidit. In quibus autem menses fluunt, in iis coitus foecundus eorum fluxum sistere solet.

§. III.

Facta imprægnatione, menses desinunt, quia ampliori à virtute feminis expansiva facto vasorum uteri spatio, sanguis jam liberius per ea circulatur, ejusque stagnatio, quae causam & occasionem eruptionis sanguineae præbet, impeditur.

Scholion.

Supra modo demonstravimus, redundantem sanguinem in vasis uteri stagnantem segniusque progredientem, & spasmi, & eruptionis cruoris menstruae, causam esse; quia vero à coitu foecundo vasa liberius expanduntur & partes fibrosae maius robur acquirunt & vasculorum orificia, quae in mensium fluxu aperiiri solent, contrahuntur, sanguis effluere desinit.

§. IV.

Incipit in foeminis potentia generativa cum mensium fluxu, & desinit quoque eo desinente.

Scholion.

Neque enim aliter generatio, sive corporis organici in femine evolutio, quam actu nutritionis fit, quae succum gelatinosum, temperatum desiderat, & qui sanguinis quoque materiam constituit. Hæc succi nutritii, & consequenter etiam sanguinis superflui redundantia, circa annum decimum quartum incipit, inque non gravidis

optimo consilio omni mensis spatio effunditur. Quia vero in gravidis non amplius ob dictas causas menses fluunt, hinc succus alibilis superfluus per porosam uteri à coitu mutati substantiam filtratur ac deponitur, qui ad ovuli augmentum & infantis nutritionem spectat. Desinit vero hæc potentia generandi, sive potius nutriendi, circa annum quinquagesimum, uteri fibris tunc factis durioribus, rigidioribus & poris ac vasculis arctioribus, ut nec sanguis, nec succus nutritius superfluus, ad minima uteri vasa amplius accedere, vel ibi deponi possit.

§. V.

Gravidæ prioribus mensibus à sanguinis & succi nimia abundantia mensiumque defectu in gravia mala incidunt.

Scholion.

Fiunt hæc ipsa, cum sanguis singulis mensibus purgari solitus non evacuatur, neque ad nutritionem prioribus mensibus omnis impenditur, hinc superabundans & passim in vasis stagnans, pro partium ac temperamenti differentia, graves & molestas parit afflictiones. In ventriculo vomitiones, nausæ, inflationes, inappetentia; in præcordiis anxietates, spirandi angustiae; in capite dolores, vertigines, tinnitus & susurrus aurium; in partibus externis variae fluxiones, dolores & tumores, odontalgiae, capitis erysipelata, tussis, tumores crurum, dolores dorsi & artuum languores oriuntur, quae cuncta symptomata posterioribus mensibus, ubi infans majorem nutrimenti quantitatem exposcit, sua sponte conquiescunt, vel etiam si gravidæ nimium indulgent otio & gulæ, atque nimis plethoricae sunt, usque ad partus tempus durant.

§. VI.

Nutritur infans mediante succo temperato, gelatinoso matris, qui per spongiosam uteri substantiam transcolatur & à secundina recipitur, per cujus vasa ad infantem defertur.

Scholion.

In principio ovulum foecundatum & ingressu feminis virilis turgidum & expansum, succum tenuem, lymphaticum ex uteri osculis stillantem, per poros recipit ac nutritur, donec ejus externa membrana poris uteri continua fiat, sive eidem agglutinetur.

§. VII.

Secundina est corpus figurae orbicularis, octo vel decem pollicum diametrum & unius pollicis crassitiem habens, ex innumerabilibus majoribus & minoribus vasis compositum, quod parte convexa & spongiosa uteri ut plurimum fundo adhæret, in parte vero concava funiculum habet, qui ex duabus arteriis, una vena & uracho, invicem contortis compositus, inque umbilicum infantis implantatus est.

Scholion.

Secundinae primordia intra ovulum continentur & primum producuntur. Glandulosum maxime esse ejus corpus eo usque anatomici crediderunt, sed Cl. Ruyschius in *Thesaur. anat. V. Fig. 1.* pulchre demonstravit: ex meris & numero infinitis vasculis illud esse compositum, cujus externa tunica, quae chorion dicitur, utero continua est ipsique adhæret, & exterius quoque ipsum infantem cingit, valdeque crassa vasis sanguineis repleta est, interior vero & subtilior, quae amnios dicitur, ejus concavam partem obducit & immediate ipsum involvit.

§. VIII.

Ipsa secundina, quatenus utero adhæret, ex ejus substantia porosa succum alibilem, non vero sanguinem matris, recipit.

Scholion.

Scholion.

Crediderunt veteres, sanguinem matris nutrire infantem, & vasa uteri cum vasis secundinae & foetus invicem connecti; sed notabile est, liquorem siphone per umbilicales arterias injectum per venam umbilicalem redire, modo placenta illaesa fuerit, ex quo apparet, nullas dari anastomoses vasorum uteri cum vasis secundinae & foetus, neque sanguinem foetus rursus ad venas matris redire.

§. IX.

Succus nutritius & chylosus matris, ex poris & vasculis uterinis, interventu membranæ villosæ tenuissimæ, quæ chorio contigua est, non secus ac chylus à tunica intestinorum villosa recipitur, absorbetur & per umbilicalem venam fertur, ex qua cum sanguine ad hepar infantis deducitur.

Scholion.

Vas, quod succum nutritium matris & sanguinem per arterias ex infante refluxum ad venam cavam & cor infantis adducit, est vena umbilicalis; quæ in venæ portæ sinu terminatur, ubi sanguinem cum nutritio succo deponit, quem vero non prius per hepatis viscus & ramificationes venæ portæ, sed per singularem venosum cylindricum canalem, qui in *Ephemeridibus naturæ curiosis Cent. V. & VI. observ. 27. à Cl. Heistero* recte delineatur, proxime in venam cavam & exinde in cor transmittit, manifesto documento, eum succum & sanguinem tam purum esse, ut non necesse sit, biliosas & excrementitias sordes prius ibi separari.

§. X.

Placentæ uterinæ munus est, non tantum succum nutritium ab uteri orificiis recipere, inque corpus foetus infundere, sed & sanguinem ex arteriis foetus iliacis acceptum fluidiorem & subtiliorem reddere.

Scholion.

Placenta uterina ex innumeris capillaribus minimis vasculis est contexta, per quæ dum transit sanguis, atteritur, comminuitur inque minimas partes ac globulos dividitur, intima unione succi nutritii cum sanguine facta, ut hac ratione per tenues canaliculos embryonis commodius transire & nutritionem præstare possit: unde revera secundina in foetibus vice fungitur pulmonum, qui in foetu à munere suo vacant, quod identidem in intima sanguinis partium comminutione earumque unione cum chyloso succo consistit. Qua de causa etiam vena umbilicalis id habet peculiare cum vena pulmonali, ut sanguinem fluxilem, floridum & arterioso similem vehat, quod omnibus aliis venis negatum est. Gaudet præterea placenta uterina hoc officio, ut motu dilatationis & compressionis musculorum abdominis, in matre compressa & dilatata, fluxum & refluxum sanguinis ex foetu in placentam, & rursus ex ea ad hunc, egregie promoveat.

§. XI.

Quando orificia vasorum uteri, ex quibus succus nutritius à villosa placentæ substantia recipitur, sanguinis copiosi impetu nimium distenduntur & aperiuntur & secundina divellitur, fit abortus, qui est contractio uteri convulsiva foetum ejiciens.

Scholion.

Abortum semper præcedere solet enormis uteri hæmorrhagia, & ipse plerumque circa mensem tertium, vel quartum fit. Hæmorrhagia vero sine nimia distensione & apertione vasorum uteri contingere nequit, qua non modo succus nutritius, cujus vehiculum sanguis est, infanti detrahitur, sed & secundina ab utero separatur atque avellitur, quia ejus conjunctio cum te-

nuiissimis vasorum uteri orificiis amplius persistere nequit. Qui sanguinis fluxus & separatio, si levior fuerit & tantum quoad partem, salvus semper manet embryo. Neque cum hoc fluxu sanguinis ex secundina divulsa confundi debet menstruus fluxus, qui in nonnullis gravidis plethoricis per aliquot menses, sine ullo vitæ & sanitatis detrimento, quandoque adhuc durat, sed per vaginæ vascula effertur.

§. XII.

Quodcunque itaque impetum sanguinis ad uteri vasa urget eumque ad spasmodicas contractiones disponit, id abortum quam facile provocat.

Scholion.

Cujus generis sunt motus & exagitationes corporis nimiae, ira & terror vehementior, ex medicamentorum classe, fortiora purgantia, emetica, balnea sanguinem nimis rarefacientia, ex morbis febres acutæ, variolæ, affectus hysterici, quæ frequentissimæ, præsertim in dispositis, solent esse abortus causæ.

§. XIII.

Quæ semel abortum passæ fuerunt, facile in eundem recidunt, præsertim si non ita brevi post factæ rursus fuerint gravidæ.

Scholion.

Quia tenuissimæ vasorum uterinorum ramificationes, à sanguinis impetu nimium distractæ & dilaceratæ, non tam subito rursus contrahi & consolidari possunt, hinc facile rursus facta imprægnatione, à sanguine plethorico, circa tertium, vel quartum mensem, aperiuntur. Elucescit inderatio, quare prudens missio sanguinis gravidæ à periculo abortus securissime præservet.

§. XIV.

Abortus periculosior solet esse partu, ob lethalem subinde evenientem hæmorrhagiam.

Scholion.

Abortus periculosior est partu, quia si ab impetu sanguinis vasa uteri nimium aperiuntur & placenta avellitur, infans moritur, qui, præsertim grandior, ob vires imbecilliores matris factas, difficulter egreditur; unde utero ab infante mortuo distento, orificia vasorum, ex quibus sanguis stillat, aperta manent & quam facile lethalem sanguinis profusionem efficiunt, quæ alias post foetus exitum, spontanea uteri contractione, clauduntur. Unde utique tali in casu abortus, sive cita foetus ejectio, vel etiam ejus artificiosa extractio, salutifera dicenda est, quia morti eripit.

§. XV.

Succus nutritius matris foetum in utero nutrit. Quævis itaque indolis is est, talis quoque est nutritio foetus in utero.

Scholion.

A sanitate omnino matris ejusque sanguinis atque humorum bona temperie ac indole, foetus humani nutritio & vigor dependet. Qua de causa omnia errata diætetica matris gravidæ luere debet infans, & quo melius habet ea & sana ac integra est: eo robustior & minus morbis obnoxius infans prodit; quin imo inordinatos animi affectus in matre mox percipit foetus in utero.

§. XVI.

Cum motus constrictionis & dilatationis in placenta uterina circulum sanguinis per eandem & foetum egregie promoveat, hic autem a respiratione matris dependeat, sequitur, vitam nimis sedentariam & otiosam infanti maxime esse inimicam.

Scholion.

In vita sedentaria respiratio admodum lenta est, hinc

circulus sanguinis in matre etiam lentior, succos valde spissos gignit. Nam respiratio lenior, motum quoque musculorum abdominis leniorem efficit, hinc non potest aliter fieri, quin placenta motus & compressio segnior evadat: quare succus & matris & infantis valde spissus & glutinosus evadit, qui firmiorem agglutinationem in utero non modo efficit, sed & succos impuros in foetu producit. Ex quo apparet, quam salutaris sit moderatus gravidarum motus, & quam inimica sanitati sit nimis otiosa earum vita.

§. XVII.

Non probabile est, foetum ultimis mensibus succo gelatinoso in amnio contento nutriri.

Scholion.

Eronea utique videtur sententia, infantem per os, non vero per umbilicalem funiculum, accipere nutrimentum. Nam organa, ventriculus & intestina cum vasis lacteis, in tenello corpore minutissima sunt, ut succum nutritium non bene capere, multo minus per tam longum iter venarum lactearum & ductus thoracici ad cor deducere possint, cum via longe brevior & amplior ad cor per funiculum umbilicalem detur. Neque ego ullam magni momenti rationem invenire possum, quæ mihi nutritionem foetus per os ultimis mensibus fieri persuadeat. Etenim suctio & deglutitio sine respirationis ope fieri nequit; quæ tamen in utero materno plane cessat. Deinde, illud tam certum est, quam quod certissimum, aquas in amnio contentas, foetu grandiori facto, non decrescere, sed potius augeri, quia plus urinosi, quamquam insipidi, liquoris emittit. Sique foetus in utero alimentum ore assumeret, tanta excrementorum moles in ejus intestinis colligi deberet, ut necesse haberet in utero alvum deponere. Neque hic obijcere sufficit, liquorem amnii esse nutritiis partibus turgidum; eum enim nutrire, inde haud quaquam evinci potest, nam serum hydropicorum extravasatum ejusdem indolis est.

§. XVIII.

Foetus in utero non respirat, sed pulmones feriantur.

Scholion.

Deficit enim aer atmosphaericus, qui, nisi pulmonum vesicularem & vasculosam substantiam distendat, sanguis ex uno ventriculo in alterum transire nequit, sed brevioram viam, per canalem arteriosum, ex arteria pulmonali in arteriam aortam porrectum & insertum, & per foramen ovale, quod ex auricula dextra ad venam pulmonalem spectat, instituit. Quod vero nullus aer in foetus pulmone contineatur, experimentum per antliam pneumaticam institutum probat, dum pulmo infantis, arteria aspera constricta, sub campana collocatus, educto ex eodem aere, nihil prorsus intumescit aut inflatur, & aquæ immixtus submergitur. Qua etiam de causa non de nihilo est illud experimentum, quo nimirum in casu infanticidii per pulmonem infantis injectionem in aquam explorare solemus, utrum foetus vivus, an mortuus in lucem prodierit? nam in priori casu, pulmo aquæ supernatat, in posteriori, ad fundum fertur.

§. XIX.

Foetus humanus mense solari nono, secundum naturæ ordinem, partu excluditur.

Scholion.

Plures causæ partus dari solent, inter quas hæc mihi valde videtur verosimilis, quod grandior foetus majorem potentiam movendi in artubus acquirat, qua non modo, sed & pondere, membranas, quibus includitur,

ipsumque uterum distendit atque laceffit, unde spasmus in universo genere nervosarum partium concitatur, cujus beneficio uterus comprimitur foetusque expellitur, ipsaque secundina hac ratione paulatim sese ab uteri villosa substantia separat atque divellitur.

§. XX.

Excluso foetu cum secundinis, uterus se rursus contrahit, & humor sanguineus dilutior ex ejus vasis apertis exprimitur, qui fluxus lochialis à medicis appellatur.

Scholion.

Maxima & plane mirabilis vis elastica utero inest, qua supra modum distendi & contrahi potest, quæ partim à fibrarum, ex quibus variis conflata est uteri substantia, mechanica structura, partim etiam à subtilioribus succis & sanguine ibi contentis dependet. Compressionem uteri edito foetu, externæ ligaturæ promovenit, quæ ad eliciendos ex uteri poris stagnantes succos valde necessaria est, ne ibi corrupti, putredinosam inflammationem causentur.

CAPUT XIV.

De secretione lactis.

§. I.

Post foetum editum, tertio ut plurimum die, mammae turgescunt, attolluntur & lac copiosum gignunt.

Scholion.

Humores redundantes inque uteri insignioribus vasis contenti, ejus contractione in venas ingrediuntur, inque copiosa & laxiora mammarum vasa divertunt, eaque distendunt, ut lac in earum glandulis separetur, quæ mutatio in mammis, nec non glandularum ac ductuum subita & insolita distensio, dolorem & febrem subinde producere solent, quam vocant *das Milch-Fieber*.

§. II.

Lac est succus chylosus, à sanguine in glandulis mammariis ad alimoniam infantis secretus.

§. III.

Lac est chylus, non vero sanguis, immutatus.

Scholion.

Hoc theorema pluribus argumentis demonstrari potest. Etenim dantur nutrices, quæ duas lactis libras quotidie emittunt; quædam ex vaccis in Frisia singulis diebus triginta pintas lactis, quæ sexaginta libras complent, reddunt: si vero lac esset sanguis, hic non tam copiosus in venis existeret, neque sine virium & vitæ detrimento posset amitti. Deinde ipsæ nutrices animadvertunt, non multo post à pastu, calido sumto potu, ingentem & sensibilem lactis ad mammas fieri adfluxum. Porro, à varietate alimentorum lactis magna est differentia. Ita vaccæ, quæ vere tenui gramine & herbarum floribus vescuntur, optimum lac, flavum & butyrosus, præbent; quando vero hyeme stramine hordeaceo pascuntur, lac saporis subamaricantis fit & parum butyri reddit, quod statim melius evadit, si matres familiæ floridas herbas reponunt & pabulo admiscunt. Ipsa quoque virtus & color alimentorum transit in lac, & hæc est causa, quare croco, vel rhabarbaro assumpto, tingatur, ac purgante paulo validiori nutrici dato, infantis alvum laxandi virtutem acqui-

acquirat. Et quia sic lac suam bonitatem ab alimentis mutuatur, videndum est, ut nutrices, si salutare pro alendo infante lac gignere debent, alimenta congrua & amica assumant, vel etiam medicamentis lactis vitium corrigant. Differt demum multum sanguis à lactis textura & crassi; nam hoc in butyrum, serum & caseum facile fatiscit atque acescit, sanguis vero mora in foetidam abit putrilaginem, neque unquam butyrum aut caseum præbet.

§. IV.

Licet sanguis non sit proxima lactis materia, ejus tamen gelatinosam & pinguem partem ad lactis generationem multum conferre, vero videtur proximum.

Scholion.

Singularem indaginem meretur; quod nutrices febribus detentæ à cibo abstinentes, nihilo minus lac in mammis copiosum subinde generent, quod citra noxam infantibus offertur; videtur hoc suam originem habere ex colliquata per calorem pinguedine, quæ cum potu tenui mixta, lacteum succum ingenerat.

§. V.

Neque tenuissimum, quod per cerebri canaliculos & nervos vehitur fluidum, à consortio & mixtione lactis alienum est.

Scholion.

Hoc subtile fluidum videtur & excrementitiis & alimentariis corporis succis admixtum esse, quorum copiosa excretionem vires amitti in propatulo. Et longe quoque salubrius lac esse, quod mox ex mammis emulctum sumitur, quam si illud frigidum redditum rursus calefactum fuerit, certissimum est. Notum quoque est, à vehementi animi affectu, terrore, ira, lac insaluberrimum reddi, ita, ut epilepsiam, vel ventris tormina, in tenellis infantibus suscitetur. Animam autem agere immediate in fluidum nerveum, idque inordinate movere, nulla ratione negari potest.

§. VI.

Mammæ, quæ ex copiosis glandulis, medium potissimum locum occupantibus, & ductibus lactiferis compositæ sunt, genuinum lactis colatorium constituunt.

§. VII.

In gravidis & lactantibus mammarum increscit magnitudo, quæ in virginibus & ante pubertatem minima est.

Scholion.

Mammarum, quæ ex glandulosis globis pinguedinosissimis, arteriis, venis & ductibus lactiferis constant, magnitudo à copiosiori sanguinis & succi chylosi affluxu, adeoque à tubulorum & vasculorum distensione, maxime dependet, unde abundantiori facto sanguine, quod fit post pubertatem, vel cessante mensium fluxu in gravidis & lactantibus, turgidiores quoque mammæ fiunt. Observamus quoque macilentiores & quæ vasa capaciora habent foeminas, mammas majores & copiosiores lactis proventum habere, quam pingues atque exilibus vasis donatas.

§. VIII.

Neque tono & motu elastico destituuntur mammæ, ita ut & dilatari & contrahi possint.

Scholion.

Gaudent enim & glandulæ & lactiferi ductus tunicis nervosis fibrosis & sensibilibus, quarum motus est dilatationis & constrictionis. A frigore itaque, a terrore, cum ductus mammarum constringuntur, parcius

lac affluit; frictionibus vero cum oleo factis, calidis & temperantibus, sedativis, quia tonus constrictus relaxatur, lac rursus copiosum reddi potest. Peti hinc quoque potest ratio; quare medicamenta sale volatili, acri, aromatico imbuta, in calidioribus & macilentis, lactis incrementum plus impendant, quam promoveant.

§. IX.

Lac difficulter profluit, sed suctione elicitur.

Scholion.

Nam tubuli lactei, ex folliculis glandulosis prodeuntes, variis ramulis & anastomosibus coeunt; illique modo expansi, modo coarctati, cellularum instar lac custodiunt, qui circa papillam in fistulas angustiores & exigua ostiola desinunt, ut exitus prohibeatur.

§. X.

Lac primum & optimum tenellorum est nutrimentum, quia in iis ventriculus valde adhuc est debilis, & salivæ, nec non bilis, tanquam liquorum solventium, atque etiam caloris digestorii ea est inertia, ut alimentum in chylosum succum minus possit dissolvere.

Scholion.

Ex hisce petenda est ratio, quare lactis potus phthificis & imbecillis corporibus, in quibus vis digestrix & dissolutrix ventriculi languida est, saluberrima & ad reficiendas vires admodum opportuna sit medicina.

§. XI.

Cum itaque lactis materiam constituat chylus, ejus autem bona, vel mala indoles, ab assumtis & digestis alimentis & à salutaribus excretionibus, quæ chylum & sanguinem depurant, dependeat, satis apparet, ad laudabile lac pro nutrimento infantis generandum, opus esse, ut ad ingesta & excreta nutricis maxime respiciamus.

Scholion.

Attenta edocet experientia, nutritionem & sanitatem infantis à lactis materni bonitate maxima ex parte dependere. Quare, si nutrices varia incongrua devorant, corpus non motu exercent, & imminutas excretiones habent, vel animi affectionibus obnoxie sunt, graves statim noxas tenelli infantes experiuntur.

§. XII.

Lac mutuatur suam naturam ab alimentis ipsius nutricis: unde ex horum indole ac conditione, lactis conditio dijudicari potest.

Scholion.

Multum refert ad lactantium infantum sanitatem conservandam, ut lactis conditionem perspectam habeamus; id vero variis modis explorari potest, I.) evaporatione, II.) pondere, quod optime exploratur instrumento statico, quo specificam gravitatem cerevisiæ, vel aquæ salis cognoscimus, III.) affusione spiritus vini rectificatissimi; hac enim ratione, proportio solidi, crassi & terrestris elementi, neque minus fluidi, perspicitur. IV.) Butyrofa ejus substantia apparet, si per viginti quatuor horas in locum tepidum seponitur.

§. XIII.

Quoniam nutricum lac valde differt, & corpora quoque infantilia, eorumque constitutio ac vires, multum inter se ratione teneritudinis, & imbecillitatis dissident; hinc facile colligitur, non omne lac singulis infantibus convenire, ita prorsus, ut quod alii ferre possunt, ab eo alii lædantur.

Scholion.

Sicut enim & copia, & facultates, alimentorum ad corporum

porum vires aestimare, secundum sapientissimum *Hippocratis* monitum *L. de prisca medicina*, semper convenit: ita teneriores infantes à lacte crassiori, ejusque copia valde lædi, animadvertimus, siquidem exiliora eorum vasa facile obstruuntur, & ab ejus crassitie subtilior tunica villosa intestinorum obducitur, ut atrophie & flatulentie primarum viarum inde sequantur. Huc accedit, quod lac crassius in coagulum facile secedat, & diuturniori mora corruptum, corrosivum evadat, quo postea facile tormina & convulsiones concitantur.

§. XIV.

Cum major & deterior noxa à lacte crassiori, quam à tenui metuenda sit, consultius semper est, nutricibus

ejusmodi alimenta præbere, quæ lacteum humorem factis tenuem, fluxilem, ac dulcem generant.

Scholion.

Pessimus est mos & falsa vulgaris persuasio, optimum & sanitati infantis conveniens lac generari, si nutricibus alimenta substantifica, ex carne, ovis, farinaceis parata administrentur, ratio potius ex perversa hac diætâ deducenda est, cur divitum liberi frequentius & facilius ægrotent & moriantur, quam pauperum. Semper itaque tutius est, primis mensibus lac tenue infantibus præbere: successive vero, & circa exitum anni primi, crassius & plus alimenti continens, minori periculo offerri potest.



P H I L O S O P H I Æ
C O R P O R I S H U M A N I
L I B R I P R I M I,
S E C T I O I I I.

De actionibus, animalibus, fluidi tenuissimi in cerebro secretion-
ne ejusque usu, atque animæ potentia in corpus, nec non
sensuum exercitio.

C A P U T I.

*De secretion: tenuissimi in cerebro & nervis
fluidi.*

§. I.



N cerebro fluidum secernitur, & mediante duræ matris tono ac motu systaltico, placide & æquabiliter tubulos corticales & medullares comprimente, ad medullam oblongatam, ac inde per nervos ad partes fertur, ut motum, sensum & nutritionem præstet ac perficiat.

Scholion.

Neque enim ullus alius cerebro usus, nisi secretorius assignari potest, quem tota ejus fabrica ac vasorum apparatus satis abundeque ostendit. Nisi etiam per cerebri substantiam liquidum progredieretur, periculum foret, ne in corruptionem abiret, quia vix quicquam, nisi solus motus ac progressus fluidorum, universi corporis partes à præsentanea corruptione defendit. Cujus verò proprietatis & indolis sit id, quod ibi secernitur liquidum, de eo variæ sunt auctorum sententiæ. Veteres, quibus fluidorum & subtilissimorum corporum natura, agendi & movendi vis atque potentia ignota fuit, hoc spiritum appellarunt, & quidem animalem, quia anima hoc tanquam instrumento ad functiones suas exercendas utitur. Complures ex recentioribus hoc fluidum aëreo-æthereæ, lucidæ ac igneæ elementaris naturæ esse volunt. At, qui lucis, ignis, aëris & ætheris proprietates perspectas habet, is quam facile judicabit, ejusmodi fluidum à sanguine per canales, utut tenuissimos, neque separari, neque iis contineri posse.

§. II.

Duplex in fluido cerebri & nervorum admittenda est substantia, altera omnium tenuissima, ad motum celerrimum & varium recipiendum atque propagandum apta, altera crassior, quæ magis humida atque illius vehiculum est.

Scholion.

Liquores magnæ agilitatis, qui spiritus à chymicis vocantur, ex tenuissimis, exilissimis vaporibus & qui celerrime in auras avolant, compositi, sub phlegmate,

tanquam involucro detinentur, inde fit, ut in spirituum mineralium præparatione, receptaculis parum aquæ indatur, quo vapores tortura ignis ex iis expressi, commodius in hac recipi & custodiri possint. Similem quoque in modum tenuissimum ac spirituosum cerebri fluidum in lymphatici humoris sinu servatur.

§. III.

Fluidi tenuissimi secretorium est cerebri cinericea, corticalis & mere vasculosa compages.

Scholion.

Cerebrum jam tum olim *Hippocrates* glandulam agnoscebat. Ex recentioribus *Malpighius* glandulosum corticem ejus pronunciabat, ibique separari tenue quoddam liquidum affirmabat. *Ruyfchius* autem in *thesauro anatomico* pulcherrimis injectionibus ad oculum demonstravit, corticem cerebri non glandulosum, sed ex minimis vasculis compositum esse, quia ater liquidi injecti color intime hunc ipsum tingit, quod etiam nobis in nuperrima anatome visum est, ubi tenuis rubicundus liquor, per carotides injectus, pluribus in locis in corticem cerebri penetravit.

§. IV.

Stupenda vasculorum, quibus cortex cerebri constat, angustia, clare docet, liquidum summe subtile, remanente crassiori parte, ibi deponi atque secerni.

Scholion.

Per canales, qui sunt amplioris diametri, liquidum non modo subtilius, sed & crassius transit; ubi vero summa canalium est angustia, nihil, nisi quod eorum diametro respondeat, transmitti potest. Neutiquam hinc mirandum est, si chylus multis excrementitiis & impuris particulis adhuc scatens & recens sanguini affusus atque ad caput delatus, tantummodo delibatissimam & subtilissimam ex alimentis portionem, non vero crassas atque impuras aqueas partes ibi deponat.

§. V.

Matéria fluidi, quod in cerebro separatur, est spiritiosa & subtilior chyli, lymphæ & sanguinis pars.

Scholion.

Certum est, neque negari potest, mox à pastu, maxime vero ab alimentis roborantibus, e. g. pane, vino & aromatibus, protinus hominem refici, & corpus inde vigorem, & partes robur accipere, cum contra inedia corporis æque, ac animi vires, deficere incipiant.

Ani-

Animadvertimus quoque, à vaporibus graveolentibus, & inprimis narcoticis, languorem & stuporem menti ac corpori induci. Ergo necesse est, separari quippiam ex alimentorum perinde ac medicamentorum teneriori substantia in cerebro, quod sensum, motum partiumque robur faciat, augeat, vel etiam imminuat.

§. VI.

Tertia fere pars sanguinis cum chylo & lymphâ permixti transitque per pulmonum vasculosam fabricam prius inter se probe comminuti & subacti, ex sinistro cordis sinu, per arteriosa vasa, ad cerebrum deferuntur.

Scholion.

Consideratione omnino dignum est, quod sanguis in dextro ventriculo, affluxu lymphæ & chyli de novo quasi animatus, & in pulmonum canaliculosa substantia prius comminutus, in ingenti satis copia, brevissima via, & antequam contingat alias partes, per carotides & vertebrales arterias, mirifice inter se anastomosibus junctas, protinus ad cerebrum propellatur; certe non alio fine, quam ut tenuissima & spirituosâ chyli cum sanguine confermentati pars ibi in peculiarem usum separetur.

§. VII.

Tardior etiam sanguinis per vasa cerebri progressus multum ad secretionem lymphæ spirituosæ fluidissimæ confert.

Scholion.

Validus quidem sanguinis ad cerebrum, ob validiorem in propinquo cordis systolen; per carotides est impetus: nihilo minus plura sunt, quæ eundem minuunt, infringunt atque retardant. Facit huc arteriæ magnæ, ubi è sinistro cordis ventriculo egreditur, incurvatus arcus, qui propter obliquam resistantiam propulsi cruoris impetum multum frangit. Deinceps curvatura carotidum, quæ observatur, dum per quartum foramen, sub ossæ petroso, in canali ossi sphænoideo insculpto cranii cavum ingrediuntur & sub dura matre prorepunt, appulsum impetuosum refrænât. Idem præstant variæ illæ complicationes, innumeræ divisiones in minutissimos ramos & anfractuosis tractus vasorum, eo quod in singulis curvaturis & flexionibus angulus incidentiæ mutatur & nova oritur resistantia. Accedit arteriarum, tam carotidum, quam vertebrarum, utrarumque, æque ac ambarum, inter sese connexio & mutua inosculatio, qua sanguis oppositis velut nisibus sibi occurrit & unus impetus alterum infringit. Maxime omnium vero ad placidum sanguinis per cerebrum progressum confert, quod arteriæ tum vertebrales, tum carotides, simul ac cranium subeunt, validam suam tendineam tunicam, cui vis systaltica elastica inest, deponant & venarum similes quasi fiant. Hæc ergo lentior sanguinis per cerebri, & arteriosos, & venosos, canales ac sinus progressio, admodum velificatur secretioni subtilissimæ & spirituosæ lymphæ, idque legibus naturæ microcosmicæ admodum est conforme, quum in iis partibus in quibus tardius procedit sanguinis iter, ut in mesenterio, hepate, ipsis quoque pedibus, notabilis humorum, per vasa, præsertim lymphatica, observetur secessio.

§. VIII.

Separari liquidum in cerebri cortice, idque per medullarem substantiam ferri, plura sunt, quæ confirmant.

Scholion.

Quandocunque consideramus arteriolarum tomentum quasi habitum, imperscrutabili contextu corticem cerebri componentium, deinde arteriosi cruoris, ex pulmonibus egredientis, parte subtiliori lymphæ & chyli

imbuti, copiam, validiori cordis vi ad cerebrum appulsum, porro si perpendimus, assidua illa, ordinata ac proportionata staminum cerebri, à primo vitæ puncto, ad ultimum ipsius terminum, incrementa atque propagines, & quod lymphâ in cerebro contenta citissime exhalet, neque ad ignem concreseat, facile apparebit, cerebri & cerebelli canaliculos esse debere tenuissimos, pervios, quod etiam *Levvenheuck*, se per vitra optica vidisse, in *epist.* 36. testatur, & qui subtilissimum corporis humorem excipiant, qui in cortice secretus, in minimas medullæ fistulas impulsus inque medulla oblongata & spinali collectus, undique ad omnes corporis partes deferatur.

§. IX.

Non minimam, sed insignem esse liquidum, quod in cerebro separatur copiam, partim ex hujus, nec non cerebelli & medullæ spinalis mole nervorumque copia, partim etiam ex sanguinis appulso, qui ad hæc loca fertur, dijudicare possumus.

Scholion.

Cerebri moles in homine major est, quam in robustissimo bove; & non raro libras quatuor ponderat, & medulla, quæ in spina dorso continetur, nil nisi corticalis & medullaris cerebelli portio continuata est, ita tamen constructa, ut corticalis interior, medullaris vero exterior sit, & quia ex hac tam numerosa nervorum paria prodeunt, nullum est dubium, quin etiam in hac ingens tenuissimi fluidi copia separetur.

§. X.

Fluidum in cortice cerebri separatum, in medulla oblongata, quæ nervorum radix est, colligitur, & ad sensoria & alias partes, pro motu & sensu efficiendo, transfertur.

Scholion.

In cerebro novem paria ex medulla oblongata, quæ basis & inferior pars cerebri compactior est, prodeunt, siquidem nervi olfactorii & optici ab inferiori & anteriori crurum medullæ oblongatæ parte producuntur, ideoque error est, ex thalamis sic dictis opticis visui inservientes nervos prodire. Tertium par, quod oculorum motui destinatum est, ab antica & superna, quartum & quintum à media, sextum à posteriori processu annularis parte enascitur. Septimum vero ex caudice medullari prope secundum cerebelli processum emergit. Octavum ex corporibus pyramidalibus, nonum ex olivaribus, incunabula trahere conspicitur. Reliqua tria, quæ paria nervorum cerebri à quibusdam venditantur, ex vertebis potius colli, ad ejus motum sustinendum, prodeunt.

§. XI.

Quod liquidum nervos ingrediatur, & per eos ad musculos pro motu efficiendo feratur, evidenti experimento evinci potest.

Scholion.

Quandocunque canis viventis sternum & anterior diaphragmatis portio caute à se invicem separantur, ita, ut nervi phrenici nil detrimenti capiant, & alteruter horum paulo superius, antequam diaphragmati se inserit, digitis comprimatur, tum paulo post moveri desinet diaphragma, & si pars nervi inter diaphragma & comprimentes digitos, alterius adstantis digitis per totum suum ductum ad insertionem usque comprimatur, ut possit exprimi, si quis superest è nervo succus, & diaphragmati immitti, tum rursus in motum redibit diaphragma, eumque servabit per aliquod tempus, alterne se contrahendo, & quando hoc peracto, amovetur per paucillum temporis à nervi contactu digiti, & postea rursus admoventur & in compressionem adducuntur, cessabit à motu diaphragma, donec pars nervi

nervi inferius intercepta, altera manu admota, successive exinaniatur versus diaphragma, tumque rursus in motum deducetur ille musculus, eademque omnia sæpius eveniunt.

§. XII.

Medulla oblongata est omnium partium in toto corpore, si à corde discedamus, princeps & præcipua.

Scholion.

In hac enim fluidum in cerebro secretum colligitur inque nervos, sensum ac motum partibus conciliando, infunditur. Qua ex causa, vel minima etiam ejus læsio, compressio, aut dilaceratio, lethalis habetur, ut videmus in apoplecticis & graviori ac violenta capitis læsione, ubi sanguis extravasatus hanc partem si comprimit, subito mortem infert. Et notabile est, quod nulla cerebri vulnera, si modo stagnantibus humoribus exitus mature possit concedi, in se sint lethalia, quod ingens clavus, salva vita, per caput & cerebrum canis, modo non sinus cerebri vel medulla oblongata tangeretur, transfigi possit.

§. XIII.

Nervi sunt fasciculi plurimorum pellucidorum & tenuissimum filamentorum, quorum latera interventu membranarum inter se invicem uniuntur.

§. XIV.

Nervos esse fasciculum canaliculorum, qui, intus cavi, liquidum vehunt, non facile affirmaverim. Sed tamen tenuissimum quoddam liquidum nervea stamina, à cerebro usque ad extremas partes & ubique per eorum poros, comitari ac perfundere, utique recte infertur.

Scholion.

Qui liquidi in nerveis existentiam ejusque influxum in partes negant, vel in dubium vocant, hisce argumentis utuntur: primo, quod dissectis nervis, neque ulla cavitas, neque manifesta humiditas, appareat, deinde, quod ligato nervo, non fiat inter ligaturam & cerebrum turgescencia. At vero, qui considerant, in plantarum radicibus inque ramis & foliis arborum dissectis, identidem nec ullum ad sensum succum exstillare, nec cavitatem conspici, nec etiam ligatura contracta hæc intumescere, quum tamen liquidum nutritioni & incremento serviens, per has partes ferri certum sit: is facile hujus argumenti debilitatem animadvertet. Nervos autem à ligatura non turgescere, hæc maxime est ratio, quod ipsi ex fasciculo filamentorum tenuissimorum, quorum singula subtili membrana & poris prædita sunt, & innumerabilibus ramificationibus constent: hinc facile liquidum compressum per latera in alias vicinas partes influit. Nervos vero multis poris pervios esse, vel ex hoc unico dijudicandum est, quod portio nervi cruralis abscissa, & per aliquot dies in aqua pluviali macerata, in triplo majorem excrescat magnitudinem.

§. XV.

Dura mater, motu dilatationis atque constrictionis, in cerebro, fluidi tenuissimi separationem sanguinisque progressum egregie adjuvat.

Scholion.

Mater dura refluxum per venas ex arteriis piæ matris inque sinus suos receptum sanguinem reducit ad cor, & motu leniori tonico adjuvante, quo placide succussat cerebrum, liquidi nervei motum & secretionem simul promovet. Considerandus hunc in finem est peculiaris fibrarum nervearum, membranacearum & musculosarum, ex quibus componitur, apparatus, situs atque structura, siquidem situm rectum atque ob-

Frid. Hoffmanni Oper. Tom. I.

liquum, non secus ac in vesica urinaria, nactæ sunt; præterquam quod circa sinus duos laterales, magis arcuatæ & circulares deprehendantur. Neque minus fibræ nerveo-carneæ, instar columnarum & lacertorum cordis, ab uno pariete transversum, in tribus majoribus sinibus dissectis, ad alterum abeunt, ibique cellulae rotundæ atque ovales, secundum seriem vasorum. sinus ingredientium, dispositæ conspiciuntur. Fibræ hæc impediunt, quo minus ab irruente sanguine arterioso sinus plus justo dilatentur, & dum successive sese contrahunt, sanguinis progressum promptiorem efficiunt. Ipsæ vero columnæ faciunt, ut sanguis ibi magis con- quassetur, & cellulae sunt quasi valvulae & obices, ne semel elapsus sanguis ex sinibus, in vasa eadem rursus pellatur. Quemadmodum vero omnes membranæ, ex vario situ, ductu & ordine fibrarum compositæ & sanguine arterioso & fluido per nervos subtiliori perfusæ, non magis tonum ac robur, quam successivum quandam contractionis & dilatationis motum exercent: ita etiam nullum dubium, quin dura mater non nudum cerebri involucrium, sed machina compressoria, elastica sit, cujus ordinatis systoles ac diastoles ictibus fluidum cerebri in nervorum tubulos imprimitur, & ad universi corporis partes propellitur. Nam quandocunque hæc membrana à sanguine arterioso & à pulsu arteriarum cerebrique elevatione expanditur, fit, ut tubuli cerebri nervorumque pori magis aperti, separando & recipiendo fluido fiant aptiores, remittente vero dilatatione, hæc membrana, fibrarum suarum forti elatere, sese constringit, fluidumque ex cerebri cortice in ejus medullam principiaque nervorum trudit.

§. XVI.

Pro hujus itaque membranæ elasticæ varia constitutione, robore, constrictione, laxitate, aut atonia, motus ejus systoles ac diastoles differt, unde etiam fluidum nerveum cum majori, vel minori celeritatis gradu ad partes movetur: indeque peculiares in hominibus ad sensum ac motum differentes effectus & affectiones dependent.

Scholion.

Igitur à differente & præternaturali hujus elasticæ membranæ motu atque affectione, indeque pendente multum discrepante secretionem & influxu liquidi in nervos, nec non sanguinis per cerebrum circuitu, recte utique gravissimorum capitis morborum, huc usque fere incognita generatio, deduci potest. Quod si enim hæc membrana atonia laborat insigni, sanguis hinc tardius progreditur simulque per arteriolarum poros transsudat humiditas nimia in medullarem substantiam, affectus nascuntur soporosi. Vicissim quando dura mater longius & validius spasmò detinetur, liber etiam sanguinis progressus intercipitur, & substantia medullaris compressa, fluidi ex tubulis cerebri nihil admittit, neque illud ad sensoria distribuit, unde omnium sensuum privatio & apoplexia emergit levior, gravior, quando disrupta vasa humorem effundunt, & quidem vel sanguineum, ut in sanguinea, vel serosum, ut in serosa. Ubi demum vehementiori & celeriori constrictione & dilatatorio reciproco motu agitur hoc cerebri involucrium, intenditur sanguinis motus, augetur secretio & liquidum magno impetu fertur ad nervos ac inde ad universum corpus, quo epilepsia suscitatur, quæ idem in systemate nervosarum partium, quod febris in systemate vasorum.

§. XVII.

Ex medulla spinæ osseæ inclusa, quæ nonnisi cerebelli elongatio & pia æque ac dura matre, vasis tam arteriosis, quam venosis dotatis, investitur, eodem modo ac ex cerebro & oblongata medulla prodeunt nervi; hinc nullum utique dubium, quin duræ matris

H

mem-

membrana, heic eodem constrictionis & dilatationis motu eademque functione gaudeat.

Scholion.

Morbi quorum sedes in spinali medulla à Medicis adhuc non satis cogniti sunt atque perspecti; ego vero omnium motuum febrilium initium ac fundamentum ibi constituendum esse censeo. Nulla enim febris sine universali quadam spastica tunicarum & fibrarum nervearum oritur constrictione, quæ meo quidem iudicio, ex spasmo membranarum, quæ medullam in spina cingunt, nascitur, prout latius peculiari *dissertatione de vera motuum febrilium indole ac sede*, deduxi. A validiori autem & crebrius repetito systaltico & diastaltico membranæ hujus motu, motiones artuum convulsivæ, & à nimia ipsius resolutione, paralyse, ortum trahunt.

§. XVIII.

Fluidum nervorum, quum ex partibus admodum tenuibus, flexilibus & mobilissimis compositum, à globulis æthereis, solari calore vigoratis, quibus innatat, omnes in partes agitari possit: facile sequitur, partim id sanguini & lymphæ reaffundi, partim etiam insensibiliter perspirare.

Scholion.

Sicut fluida corporis continuo accrescunt & decrescunt inque perpetua circulatione ac motu sunt: ita nil dubii, quin nervorum fluidum, ex parte cum sanguine & lymphæ rursus mixtum per circulum transferatur, partim etiam per excretiones abeat, unde fit, ut nimix excretiones admodum debilitent. Ingentem vero hujus fluidi copiam lymphæ & salivali latici admisceri, ex eo colligendum est, quod omnis generis glandulas insignes nervorum rami ingrediuntur.

§. XIX.

Nervorum in universo corpore datur continuïtas, unde ingens ratione motuum per eos datur consensus & conspiratio, quæ in vicinis ramis maxima est.

Scholion.

In pathologicis ad mirabilium symptomatum rationes explicandas utique necesse est, nervorum per universum corpus structuram, texturam ac propagationem nosse, nisi mire in causis reddendis hallucinari vel nomina ac fictiones tantummodo afferre velimus. Conferatur nostra *dissert. de consensu partium*, item *Baglivus* in elegantissimo libro *de fibra motrice*, nec non *Vieussen* in *Nevrologia*, qui nervorum propagationem in corpore humano omnium optime descripsit. Cæterum nevrologia in corpore hydrope demortuo omnium optime demonstratur.

C A P U T II.

De usu fluidi cerebri ac nervorum.

§. I.

IN cerebri cortice ex subtilissima & temperata sanguinis ac lymphæ portione secretum liquidum ac fluidum, & per nervos, interventu pororum, ad membranas & fibras elasticas delatum, tam ad sensationes motusque voluntarios & involuntarios, quam ad nutritionem quoque plurimum confert.

§. II.

Nervo ad partem abeunte ligato, corrupto, vel abscisso, ipsa pars non tantum motu & sensu, sed & debita nutritione privatur.

Scholion.

Crebriori in chirurgicis experientia perspectum nobis est, si sphacelosa corruptio usque in nervum quandam penetrat, quod fit non raro in pessimis scorbuticorum ulceribus, ipsam putredinem lentius continenter per tendines grassari, nec prius sisti, nisi ad partes & tendines accedat, qui ab illibato alio nervo vigorem ac robur accipiunt. Spinalis medulla læsa, vel diffracta si fuerit, partes infra læsionem omni sensu, tono, vigore ac laudabili nutritione privantur, adeo, ut à levi externa læsione promptissimus in sphacelum transitus sit. Membra paralytica, vel tabe, vel præternaturali tumore infestantur: certo indicio, nec partium conservationem, nec earum nutritionem ac debitam functionem, sine nervorum integritate, sine eorum fluidi sufficienti affluxu, persistere posse.

§. III.

Neque vero nervi materiam & succum nutritium vehunt ac subministrant.

Scholion.

Fuit hæc superiori tempore nonnullorum in Anglia medicorum sententia, quod nutritionem, vitio laborantibus nervis, admodum lædi animadvertabant. Ut vero nervi non materiam nutritionis præbeant, attamen ad eam recte perficiendam multum utique nervorum integritas confert, quia advecto subtilissimo fluido, fibræ partesque solidæ robur vigorem ac tonum accipiunt, quo nutritius succus ad intima fibrarum melius penetrare, apponi & purum ab impuro ac solidum à liquido rectius secedere possit. Demum, succus, quem vehunt nervi, & propter summam subtilitatem, & propter parciorem quantitatem, minus idoneus est partium auctiori & ad materiam tam copiosam, quæ continuo exhalat & excernitur, resarciendam. Neque fluidum, quod per nervos vehitur, ad ipsorum nutritionem quicquam confert, eo, quod eorum, ut aliarum partium nutritio, identidem sanguine arteriis advecto perficitur.

§. IV.

Nervorum fluidum motuum, tam voluntariorum animalium, quam naturalium involuntariorum, sive mechanicorum, prima & præcipua est causa.

Scholion.

Primus fuit *Willisius*, qui motus voluntarios à cerebro, involuntarios autem & automaticos, quibus maxime integritas & vita corporis efficitur, à cerebello venire notavit. Nota etiam sunt *Bohnii* & *Perraultii* experimenta, quibus docemur, cerebrum totum fere ex canis cranio frustulatim eximi posse, salva tamen vita & cordis succussione, exempto autem cerebello, integro quantumvis manente cerebro, illico vitam tolli. Is autem nobis dicitur mechanicus motus, qui ex absoluta quadam necessitate, ordinariis motuum legibus, à causis mere corporeis proficiscitur, quem pro lubitu nec sistere, nec impedire nec suscitare, nec augere possumus. Motus autem animalis à causis identidem corporeis perficitur, quia tamen anima pro arbitrio & imperio eas dirigere potest, voluntarius ac animalis vocatur.

§. V.

Organa motuum voluntariorum sunt muscoli, ex fibris cylindraceis mollioribus ac porosis, in fasciculum collectis, constructi: motuum autem mechanicorum instrumenta sunt tunicae nerveæ & musculosæ, seu carneæ, ex fibris maxime annularibus compositæ.

Scholion.

Fibræ carneæ, sive motrices, vel rectilineum, vel transversum situm habent, illæ longitudinales, hæc annulares

nulares vocantur. Ex duplici hoc ordine canales membranacei, qui fluida vehunt ac propellunt, compositi, motu constrictionis & dilatationis, sive systoles ac diastoles, instructi sunt, quorum omnis generis vasa, arteriosa, lymphatica, inprimis venosus duræ matris sinus, ventriculorum cum œsophago & intestinis, canales qui bilem vehunt, tubulos renum urinosos, cum uretheribus & vesica, neque minus glandularum & viscerum minimos ductus, referimus. Harum autem partium motus voluntati humanæ subicere sapientissimus opifex, qui solus vitæ nostræ est dispensator, noluit. Nam si directam & plenam dispositionem horum motuum anima habuisset, ut pro lubitu eorum organa regere potuisset, propter innatum vivendi amorem, ipsum quoque vitæ terminum pro arbitrio disponere & prorogare potuisset.

§. VI.

Sphincteres & valvulae, quæ ex fibrarum annularium copioso strato sunt compositæ, motibus mechanicis maxime patent.

Scholion.

Sphincteres, qui pluribus canalibus præfunt, ex copioso strato fibrarum annularium compositi sunt: ejusdem structuræ etiam solent esse valvulae. Tales sphincteres, quibus inest magna constringendi & propellendi potentia, in sinistro & dextro ventriculi orificiis, in ano, orificio vesicæ urinariæ, nec non interno uteri ostio sunt conspicui; orificium quoque ductus cholodochi, item pancreatici, ubi duodeno inferitur, fibroso ejusmodi sphinctere munitum est. Et valvulae, inprimis ea, quæ colli initio apponitur, ex copiosis & conspicuis carneis circularibus motricibus fibris constant.

§. VII.

Quia magna potentia motrix constrictoria ejusmodi sphincteribus & orificiis ductuum inest; in excretionibus utique sistendis & promovendis multum valent.

Scholion.

Quando spasmus ventriculi orificia constringit, vapores & flatus, ob denegatum exitum, molestam & anxiam ejus inflationem causantur. Orificium ductus cholodochi spasmi constrictum, bile regurgitante, ictericam parit. Violenta & celerior pylori & valvulae coli systole & diastole crebræ alvi dejectionis causa est; fortissima vero constrictio pylori cum ventriculi parte inferiori, nimiaque orificii sinistri dilatatio, vomitus procreatrix est; validior orificii interni uteri spasmus, vel ejus magna atonia, causa ut plurimum sterilitatis est. Spasmus sphincterem vesicæ cum urethra afficiens, parit dysuriam. Ani sphincter validissime una cum intestino recto constrictus flatuum & fecum descensum non modo moratur, sed & stagnationi sanguinis, adeoque cæcis hæmorrhoidibus generandis, occasionem subministrat. Neque dubium est, quin medicamenta, præsertim magnæ activitatis, ut emetica, mercurialia, purgantia, in ejusmodi machinulas activas motrices vim suam ac operationem potissimum exercent. Quo magis instar axiomatis tenendum est, has partes, quæ fibris robustis, elasticis, copiosis, in circulum ductis donatæ sunt, præ aliis à venenis, ab animi affectibus, à morborum causis, & à validioribus quoque remediis, vehementius pati atque affici.

§. VIII.

Omne robur ac potentia motrix, quæ musculosis partibus insidet, partim ab ipsa structura fibrarum, partim à fluidis, nerveo videlicet & sanguineo, influentibus, quæ eas animant, dependet.

§. IX.

Certum est, si nervorum liquidum, vel etiam sanguis-

nis, ad musculosas partes affluxus quocunque modo intercipiatur, earum motum, tonum, resistantiam perire, ac atoniam, sive debilem fibrarum resistantiam, produci.

Scholion.

Nusquam igitur musculus conspicitur, qui non sanguine & liquido nerveo perfundatur, neque unquam in corpore canalis vel ductus observatur, qui præter tunicam carneam, non simul etiam nervosa cinctus sit; in quam etiam ordinario sanguinea vascula nervorumque rami inferi solent.

§. X.

Quo copiosior itaque & intensior fluidi nervei & sanguinis ad partes, quæ motibus inserviunt, est affluxus, eo majori quoque robore & potentia movendi pollent.

Scholion.

Quare videmus, corpora vasis amplioribus & nervis eximioribus instructa, plus roboris & fortitudinis habere iis, quæ vasa exiliora & nervos subtiliores habent, quæ ordinario naturæ sunt imbecillioris.

§. XI.

Neque vero tantum copia succi nervei & sanguinis ad robur & vires solidorum sufficit, sed simul etiam singularis solidarum fibrarum textura requiritur.

Scholion.

Rustici magno robore pollent & summas vires in sustinendis laboribus habent, licet alimentis fruantur simplicibus & qui paucos spiritus ingenerant. Ii vero, qui lautiori cibo ac vino utuntur, subinde imbecilles observantur.

§. XII.

Certa & indubitata experientia confirmat, quod illa animantia iique homines, qui fibras valde compactas, tensas, duras & elasticas habent, plus roboris obtineant, præ iis, quibus fibræ sunt teneriores, subtiliores & laxiores.

Scholion.

Qui leones & alia fortissima animalia dissecarunt, in eorum fibris peculiarem stricturam & soliditatem, ut non facile disrumpi possent, observarunt. Veterum Romanorum & Græcorum athletæ immenso robore pollentes, cibis levioribus & simplicioribus contenti, admodum robustas fibras habebant, quas assidua exercitatione acquirebant. Et observamus quoque in mechanicis, quod funes ex cannabe confecti plus resistantiæ habeant iis, qui ex serico vel lana parati sunt. Ergo vis ingens, in obeundis motibus necessaria, non modo à fluidis, sed & a solidis eorumque varia dispositione & structura dependet.

§. XIII.

Observamus, partes eas multum ratione roboris polere & magnam resistantiam vincere posse, quæ ex robustis & copiosis ac durioribus fibris compactæ sunt, uti videmus in corde & arteriis.

§. XIV.

Gaudet universi corporis fibræ duplici motu, systaltico, sive contractorio & diastaltico, sive expansivo, cujus beneficio circularis fluidorum progressus atque impulsus & inde dependentes secretiones & excretiones peraguntur.

Scholion.

Simplicissima hæc motus species partium solidarum rectissime vitalis dici meretur; quia hac cessante, protinus fluida stagnant & corrumpuntur, & hac recte se habente, fluidorum circulus recte & ordinate fit. Neque enim solum cor, cujus vis movendi determinata ac

limitata est, tantum impetum sanguini imprimere potest, quantus requiritur ad superandas tot resistentias partium, per quas perpetuo fluit refluitque, sed fibræ, ex quibus partes constant, quasi infiniti multiplicati vectes, insensibili suo systaltico motu, fluidorum cursum adjuvant, & quasi in subsidium & levamen cordis factæ sunt. Quod verum esse, manifestè ostendit utilitas, quam ab assidua motione corporis & à quotidiana exercitatione percipimus, & contra ingens damnum, quod otiosa & sedentaria vita experimur. Liquidum enim per continuas fibrarum muscularium pressiones impulsum, feliciter cursum per partes perpetuat & versus cor magis magisque urgetur, ut ab eo novum motum atque impetum ad vitam necessarium acquirat. Quæ pressiones, cum in otiosis & sedentariis vel deficient, vel non ita vividæ sint, necesse est, ut fluidum, quod ad contactum fibrarum circulat, tardiori motu progrediatur, atque hinc inde per fibrarum spatia hærendo, corpus ad cachexias tumoresque pedum disponat, & inde alvi siccitates & consuetarum evacuationum suppressiones succedant.

§. XV.

Fluidum nerveum primum impulsum, sive instinctum ad motum producit, vis vero ingens musculorum, quæ in obeundis motibus est, partim ab elatere fibrarum, partim à sanguinis copiosiore affluxu dependet.

Scholion.

Potentia musculorum, quibus artus moventur, ita peragitur: anima dirigens nerveum fluidum majorem ejus efficit influxum, unde fibræ rectilineæ incurvatæ in angulos facile ducuntur, hinc partium fit contractio venarumque compressio, adeoque sanguis paulo diutius in partibus constrictis moratur, nec tam cito refluit; remittente vero hujus liquidi pressione atque affluxu, contractæ antea partes rursus facile elongantur sanguisque refluit.

§. XVI.

Utut fluidum nervorum non per canales influat, subtilissima tamen ejus substantia, qua intime & ubique nervi perfunduntur, eorum stamina ac filamenta satis valide movere, flectere atque agilia reddere potest.

§. XVII.

Notum ex staticis est, vel minimam corporis vim accedentem, aut decedentem, motus facere, vel sistere posse.

§. XIX.

Ita videmus, infantem etiam, vel aliquot centenarios in machinis sursum tollere, atque etiam leve pondus in bilancibus constituta ingentis molis corpora deprimere & elevare posse, si illud adjicitur, vel demitur.

§. XIX.

Nervorum quoque & cerebri liquidum ad sensationes magni & amplissimi usus est.

Scholion.

Dari in homine inque reliquis animantibus quoddam principium, quod varias motuum species, diversis organis & sensoriis, ab objectis externis percipiat, extra omne dubium est, id vero mediante liquido nerveo operatur, quod ejus quasi instrumentum est, in quod agunt objecta, & in quo etiam eorum actiones & motus percipiuntur: videntur vero actiones & motus objectorum in fluidum nervorum motu undulatorio, non secus ac radii luminis in undis æthereis, propagari & ad sensorium commune in cerebro deferri.

CAPUT III.

De sensibus eorumque ratione & indole.

§. I.

IN homine non tantum artificiosa illarum partium fabrica, quæ ad vitales pro incolumitare & conservatione corruptibilis corporis motus edendos sunt conformatæ, medico est pernoscenda, verum etiam ingeniosa harum organicarum partium structura atque dispositio, quæ ad sensus, sive perceptiones faciunt.

Scholion.

Tria potissimum, ratione essentia & operationum distincta admodum agentia in homine sunt consideranda & distinctis nominibus, ne confusio fiat, insignienda. Sunt hæc secundum Veteres natura, anima sensitiva & rationalis. Per naturam nihil aliud intelligendum, quam universa œconomia motuum, qui in partibus solidis ac fluidis, ad tuendam corporis vitam & incolumitatem, vigent. Anima sic dicta sensitiva illud est agens, quod homini cum aliis animantibus commune, impressas à variis externis objectis in fibrillas & tunicas nervosas peculiare motiones percipit, sive sentit, & inde ideas vel aversionis, vel appetentia excitat. Et tertium nobilissimum principium, quod sensuum ministerio utitur & sui & aliarum rerum ac sensationum conscium est, ideas inde prognatas non modo conferre, sed & æstimare, intelligere & dijudicare novit, & libere quoque actiones suas instituit atque determinat, rationalis vocatur anima, sive mens, qua distinguimur à brutis.

§. II.

Quum perceptio, appetentia, aversio, item cogitatio, æstimatio, liberrima actio, neque à figura, neque à situ, magnitudine, nexu, unione & dispositione fluidi, vel solidi, neque à virtute nitente & renitente, pendeant, opus utique est, ut præter mechanismum, sive coordinationem motuum, qui ex structura & situ partium profluunt, aliud quoddam, licet sensibus minus obvium principium, quod sentiat & percipiat motus eosdemque dijudicet, supponatur.

Scholion.

Essentia quidem & natura tam pure sensitivi appetentis, quam intelligentis & libere in corpore agentis, in sensus non cadit, sed intellectum humanum transcendit. Interim tamen magna utriusque est differentia & diversa plane ratio, ideoque ambo non pro uno eodemque habenda, ne confusio, quæ mater errorum est, oriatur, sed probe ratione diversarum operationum, quæ discrepantem etiam essentiam produnt, sunt distinguenda. Est vero etiam summopere necessarium, ut medicus & philosophus solcite inquireat & consideret, quomodo bina in corpore humano sint connexa atque unita, quomodo unum alterius ministerio utatur & unum ab altero afficiatur, disponatur, vel mutetur.

§. III.

Ea vero lege atque conditione anima unita est cum corpore, ut per certas motuum species, vibratorios scilicet & oscillatorios, nervis nervosisque partibus impressos, variæ perceptiones & differentes sensationum, gratæ etiam, vel ingratae, species, suscitentur.

§. IV.

Omnis igitur sensatio, sive perceptio, duplicis generis & indolis est, respectu nimirum vel animæ vel corporis.

§. V.

Ratione animæ perceptio nihil aliud est, quam certa ideæ, five notionis, de diversimoda motione productio, cujus illa conscia est. Hinc ubi nulla notio, ibi etiam nulla sensatio.

Scholion.

Vehementer igitur errant, qui animæ adscribunt internum quendam, cujus nulla datur notio, in nerveis corporis nostri partibus sensum, productum vel à moribificis quæ exitium minantur causis, vel à salubribus rebus, ut medicamentis, ita, ut occurrentibus illis, ipsa postea dirigat motus ad expellendas easdem, has autem applicet earumque vires ad salutarem effectum deducat. Nititur enim assertum hoc gratis supposito principio, nec prius ceu principium demonstrandi in explicandis medicis rebus potest admitti, quam evidentissimis argumentis fuerit evictum, & interea potius speculationibus tantum seu figmentis annumerandum.

§. VI.

Ratione corporis, sensatio est certa & specifica motus, à vario objecto externo facta in partes, seu membranas nervosas, quæ genuinum sensationis organon constituunt, impressio.

Scholion.

Sensus nusquam in ulla corporis parte viget, quam quatenus est nervosa. Hinc in osse, cartilagine, pinguedine, ipsis quoque fibris, in quantum nervis destituuntur, immo in ipsa musculosa cordis substantia, nullus sensus nullusque dolor percipitur. Idem patescit ex noto experimento, quod ligato, abscisso, vel compresso, aut alia etiam ratione vitiato nervo, partis ad quem tendit sensatio vel ex toto pereat, vel valde imminuatur aut corrumpatur. Contra ea quo copiosioribus, subtilioribus magisque tensis atque expansis tunicis nervosis partes constant, eo acutiori & exquisitiori sensu pollent, cujus generis sunt periosmium, pericranium, ventriculus, intestina, uretheres, ligamenta dentium, artuum, item cutis, præsertim quando præter naturam extenditur, uti fit in erysipellate.

§. VII.

Non tamen tam nervi ipsi, quam potius eorundem expansiones membranaceæ, proprium sensationis sunt instrumentum.

Scholion.

Ita visio non fit in nervo optico, sed in retina oculi tunica, quæ non nisi tenuis membranacea hujus nervi expansio. Neque auditus in nervo auditorio celebratur, sed in elongata & ducta ex ipso membrana, quæ internam auris partem, labyrinthum & cochleam, investit. Olfactus etiam non in nervis olfactoriis, sed nervosa illa membrana, quæ interius narium cavum, maximeque ossa squamosa obducit, perficitur. Eodem modo sapor neque in musculosa linguæ substantia, neque in ipsis nervis lingualibus, sed in horum extremitatibus, papillulis nempe nerveis pyramidalibus, sedem habet; uti etiam tactus genuinum organon nerveæ cutis fibrillæ & papillulæ constituunt.

§. IIX.

Quo major itque fibrarum & nervearum membranarum tensio est, & vehementior earum ab objecto externo agitatio, eo acutior & sensibilior quoque est perceptio.

Scholion.

Ex quo patet ratio, quare juvenes & qui temperamento sunt cholericis, tenasque ac teneras fibras obtinent, acutiores dolores ac sensus habeant, item quare

Frid. Hoffmanni Oper. Tom. I.

fibræ cutis tumore nimium expansæ, ut in podagra & erysipellate, vel à levissimo contactu, male & cum dolore afficiantur. Quod ab usu externorum in cutis læsionibus alii bene, alii male se habeant, & quidam emplastra ac pingua humidaque ferant, alii vero ab iis graviter lædantur, quidam spirituosa balsamica linimenta optime tolerant, à quibus alii pessime afficiantur, id unice à diversitate toni fibrarum nerveo-tendinosarum cutis dependet, quam omnino exacte nosse in quibusvis individuis, utile non minus, quam valde necessarium chirurgis ac medicis est.

§. IX.

Vicissim, quo magis hæ nerveæ membranæ sunt relaxatæ atque remissæ, aut humore obsessæ; eo hebetioris sensus eoque plus minuitur sensatio.

Scholion.

In coryza olfactoriis & gustatoriis narium membranis nervosis multo humido obsessis, gustus & olfactus perit, vel male habet. In membris paralyti tactus nulla fit perceptio, eo quod in hoc affectu fluido elastico nervorum, quod tensionem efficit, partes destituuntur. A tympani atonia fit surditas, à laxitate retinæ cæcitas sensibus familiaris est.

§. X.

Neque vero in nerveis membranis, tanquam solidis, fit sensatio, sed necesse est, ut animatæ sint fluido tenuissimo, æthereo, quod in cerebro & spinali medulla à sanguine separatur.

Scholion.

Id vel exinde clarum redditur, quia quando sanguinis affluxus ad cerebrum cessat, vel intercipitur, ut in syncopis, omnis fere pereat sensatio, quæ mox reddit, simul ac motus sanguinis rursus procedit ad caput. Deinde compressa, vel depressa medulla oblongata cerebri & principio spinalis medullæ, omnis sensus perit, & experientia docet, à valde vaporosis rebus, item graveolentibus, ut croco, opio, papavere, stramonio, hyoscyamo, vel interne datis, vel exterius applicatis, sensus minui & auferri, salva structura sensorii organi, neque prius redire, nisi discussis hisce vaporibus sulphureis, manifesto indicio, fluido quodam bene constituto & naturæ amico, quo ab heterogeneis rebus alterato, vel immutato, recte secundum leges nec motus fiunt, nec sensatio rite perficitur, egere organa sensoria, ad percipiendos motus nervis impressos.

CAPUT IV.

De visu & auditu.

§. I.

Sensus, quorum numerantur quinque, visus, auditus, olfactus, gustus & tactus, menti, five substantiæ in homine ratiocinanti & judicanti, vi ordinationis divinæ, materiam cogitandi, five varias ideas, ex diversis innumeris rebus conditis exhibere debent: unde utique ad ratiocinationis actum sensus quam maxime necessarii.

Scholion.

Homo sensibus, maximeque auditu & visu, à nativitate destitutus, parum à bestia differt, immo ex parte eadem inferior est, quia deficientibus ideis, circa quas fit cogitatio & dijudicatio, ratiocinationis actum minime exercere potest.

§. II.

Pro varietate autem objectorum, quæ diversis modis debent percipi, divina sapientia varia in machina

animali singulari artificio organa construxit sensoria, quorum fabricam medicus omnino penitus debet habere perspectam, quo eo melius varias sensationum læsiones earumque causas & modos distinguere, cognoscere & tollere queat.

§. III.

Hæc inter supremum in corpore situm obtinet visus organon, quod est ipse oculus, orbitæ ossæ inclusus & palpebris munitus, cujus compages interior & structura ex tunicis, humoribus, musculis, nervis & vasis artificiosissime est coagmentata.

§. IV.

Tunica igitur oculorum propriæ, præter exteriorem adnatam, ex ambitu orbitæ à perioestio ortam, re paulo accuratius inspecta, à cerebri membranis ortum ducunt. Nam vagina illa, quæ nervo optico à dura matre obducitur, quando orbitam subiit, in sphaericam admodum solidam mox sese expandit membranam, quæ antè pellucida & prominens appellatur cornea, postèrè vero crassior, durior, magisque opaca est ac sclerotica audit, vasa nervosque fulcit & musculos, tendines eorum sustinendo, firmat.

§. V.

Tenuis dein tunica, quæ immediate opticum nervum involvit, à pia est matre, subtilissimis sanguineis vasculis dotata & sclerotica contigua in duas finditur lamellas & intus nigrore imbuta est, sicque oculum investiens, postica in regione choroideam, in antica autem, ad marginem corneæ reflexa, uveam sic dictam tunicam efficit, quæ in medio rotundo pertusa est foramine, quod constituit septam colorata iride pupillam, ex cujus margine emergunt fibræ nervosæ & musculares, quæ in limbum orbicularem desinentes & introrsum flexæ ligamentum, arcus instar & vinculi humori crystallino incumbens, conficiunt ciliare, atque adeo ut pupillæ spatium definiatur, & tam hæc, quam lens crystallina, motu cum pupillæ modificatione consimili, ampliatur & dilatetur, faciunt.

§. VI.

In fundo tandem oculi medullosa interior nervi optici portio instar tenerrimi muci undiquaque diducta, retinam sic dictam constituit tunicam, in qua pinguntur imagines & primaria visionis sedes.

§. VII.

Humores porro in oculo observantur tres pellucidi, quorum primus fluidus admodum est & aqueus audit. Replet hic utramque oculi cameram, tam anteriorem, quæ inrer corneam & uveam, quam posteriorem, inter uveam & lentem crystallinam, atque ex osculis arteriolarum, quæ in uvea & choroidea, profluit.

§. VIII.

Secundus humor, ob pelluciditatem, crystallinus vocatur, & cum tertio, vitreo dicto, tenui coercetur membrana vasculosa, arachnoidea vocata. Lentiformis figuræ est crystallinus hic humor reliquisque solidior, ex lamellis sibi invicem incumbentibus conflatus, & ita locatus, ut convexa una superficie pupillam respiciat, altera vero subiecto vitreo humori inhæreat eidemque fibrillarum membranacearum ope nectatur, à ciliari vero ligamento suspensus teneatur & excipientis radiis luminosis adaptetur.

§. IX.

Vitreus autem humor, à vitreo colore ita nuncupatus, densior est aqueo reliquosque mole superat, & quidem aqueum duodecies & crystallinum quater. Tenui obducitur propria membrana, à choroidea elon-

gata, posteriorem oculi partem, retinæ ubique contingens, occupat & antè in excavato sinu crystallinam lentem excipit. Vasculare quoque est vitreum hoc corpus, & non secus quam ipsa crystallina lens, canaliculis, tam adducentibus, quam abducentibus, instructum, per quæ pellucida subtilissima lymphæ ad nutritionem circulator.

§. X.

Hic tot diversarum oculum constituentium partium apparatus universus, id efficit, ut in fundo oculi, recta post pupillam, distincta & vivida radiorum luminis fiat collectio, qui ab uno puncto objecti progressi, oculum ingredienti, per lentem crystallinam feruntur, ut ita in retina tot repræsententur puncta, quot fuerunt in objecto conspicua; unde similis objecti in retina pingitur imago, quæ eam sensorio communi offert.

Scholion.

Oculus itaque optime refert cameram obscuram, ubi pupilla foramen, tunica uvea & choroidea locum tenebricosum obscurum, humor crystallinus & vitreus lentes, ac retina tunica papyrus efficiunt. Et uti distincta repræsentatio imaginis in camera obscura à pelluciditate lentium; ita visio quoque ab humorum perspicuitate & figura dependet, ut videlicet radii ab uno puncto visibilis objecti in unum distinctum retinæ punctum colligantur quasi in foco, qui nec nimis remotus, nec nimis propinquus esse debet.

§. XI.

Accedunt muscoli oculorum motui servientes, quorum sex numerantur paria, obliquum superius & inferius, rectum superius & inferius, ac rectum internum & externum. Primum horum vocatur etiam trochleare, amatorium & patheticum, & ab ossæ sphenoidæ, juxta foramen nervi optici in parte superiori recta procedens, in angulo oculi interno supra trochleam movetur & in scleroticam inseritur, pupillæ oblique demittendæ & quadantenus educendæ serviens. Secundum ab ossæ maxillari, juxta foramen lacrymale, sive in confinio ossis zygomatici & lacrymalis, oblique versus exteriora vergens, posteriori & inferiori oculi parti inseritur ad latus insertionis nervi optici, ac ut bulbus oblique fursum moveri & extrorsum trahi possit, facit.

§. XII.

Ex reliquis quatuor rectis, idem cum pathetico ab ossæ sphenoidæ, juxta foramen nervi optici, principium habentibus & eidem scleroticæ in confinio ambitus corneæ insertis, superius, superbum alias dictum, oculum superiora versus elevat & attollit; inferius, deorsum movet, sive deprimit oculum, humile hinc dictum; internum, bibitorium & studiosum vocatum, naso adducit oculum; & externum ab eo quo oculum afficit motu, abducens nuncupatur, sive indignandum.

§. XIII.

Vasa demum & nervi oculorum sunt multi. Ex nervis quintum par oculum prope nasum ingreditur & in retinam explicatur, opticum ideo vocatum; tertium par oculorum motorium musculis, palpebris ipsisque tunicis ramulos impertit; quartum musculus trochlearem subit, patheticum dictum; quinti ramus superior ophthalmicus & potissima sexti abducentis paris portio, per musculos, membranas & palpebras sese explicant. Vasa ex carotidibus passim oculos subeunt & succos in ultimis minutissimis canaliculis pro humorum & tunicarum nutritione advehunt, reliquus vero sanguis per venas partim ad sinus duræ matris, partim ad jugulares reducit.

§. XIV.

§. XIV.

Anatomica hæc & physiologica organi visus consideratio insignem lucem cognitioni veræ generationis morborum oculorum, præsertim eorum in quibus visio depravata, affundit.

Scholion.

Quamvis multi & innumeri fere oculorum observentur morbi, præcipui tamen sunt ii, in quibus visus depravatur, vel plane perit, omnesque quam optime vel ex nervi optici vitio, vel ex pelluciditate humorum, qui radios luminis transmittunt depravata, possunt deduci.

§. XV.

Nimirum à vitio circularis hujus humorum per oculos motu, & vasculorum nimia, vel laxitate, vel stricture, variorum visus vitiorum genesis commode deducitur. Ubi enim nimis relaxati sunt nutrimentum humoribus advehentes canaliculi, ideoque succus crassior, turbidus, in humorem maxime aqueum, pertingit, pro diverso gradu & quantitate particularum heterogenearum, variæ emergunt suffusionum, tam perfectæ, quam imperfectæ, species. Et quando humor crystallinus ab alieno succo vitiatum & turbidum fit, glaucomatis species gignuntur.

Scholion.

Hinc facile jam patefcit ratio, quare, qui sanguinem crassum & scorbuticum in venis alunt, item cachectici, scorbutici, hypochondriaci & senes, quando validiori impetu humores feruntur ad caput, hisce oculorum vitiis frequenter pateant. In proclivi quoque est ratio, quam ob causam, uti practicæ testantur observationes, ab ira, furore, phrenitide, ab assumtis emeticis, purgantibus fortioribus, inunctione mercuriali, à balneo nimis calido, vehementiori corporis exagitatione, à frigore vehementi capiti admissio, à lapsu, punctione, vel contusione oculi, varia scotomiæ & suffusionum genera sæpe inducantur, & cur hæc visionis vitia facile ophthalmias, diurnas cephalalgias, imo apoplexiam & epilepsiam insequantur.

§. XVI.

Inprimis, quum humorum, tam aquei, quam vitrei & crystallini pelluciditas, à lymphæ nutritia pura & perspicua, quæ circulari motu per tenuissima tunicarum vascula adducitur & abducitur, dependeat, rectius utique tam cataracta incipiens, quam spuria & vera explicari potest.

Scholion.

Incipiens quippe cataracta est, quando muscæ & punctula nigra fixa oculo obversantur, & oriuntur à nimia relaxatione vasorum arterioso-lymphaticorum, quæ non puram & pellucidam, sed variis moleculis crassioribus perspicuitatem turbantibus lympham imbutam, in aqueum humorem transmittunt, quæ copiosiores tandem factæ & crassiores, in concrementum quoddam mucosum convertuntur, quod in camera anteriori, vel posteriori oculi subsistens, & transitum radiorum luminis impediens, cataractam inducit spuriam. Quando vero humores, vel crystallinus, vel vitreus, à defectu succi nutrientis pellucidi lymphatici, propter obstructa advehentia vascula, aridi fiunt, vel ab admixto crasso opaco succo, propter nimiam vasculorum laxitatem, turbantur, vera excluditur cataracta.

§. XVII.

Neque minus ex hac oculorum physiologia vera & recta hisce visus vitiis medendi ratio elicienda ac discenda, quæ omnium optime adornatur, per salubrem dietam, convenientia diluentia, sanguinem & lympham

repurgantia, discutientia, nervina, roborantia, cinnabarina & antimonialia rite parata, nec non ea, quæ clementer per epicrasin evacuant.

§. XVIII.

Alter principalis sensus, cujus ministerio ideæ in mente suscitantur, est auditus, qui nihil aliud, quam soni ope organi auditorii perceptio:

Scholion.

Sonus autem, qui auditu percipitur, nihil aliud, quam tremulus & undulatorius aëris elastici motus, à corpore sonoro, hunc concutiente, productus, cujus propagatio fit à centro sonoro per circulos, & quidem secundum leges progressus & reflexus, quæ in radiis luminosis observantur.

§. XIX.

Ad penitiorem auditus explicationem, fabrica auris externæ & internæ, probe consideranda, illa comprehendit auriculam cum meatu auditorio, hæc tympanum & labyrinthum.

§. XX.

Extrema auris pars sistit cartilagineam semicircularem, elasticam, tremulam, variis sulcis & fornicibus instructam, quæ membrana tensa & polita obducta est, quo radii sonori eo melius reflecti possint, nec sonus suffocetur.

§. XXI.

Orificiò dein meatus auditorii apposita est in cavo conchæ cartilaginea pars erecta, triangularis, tremula, quæ facit, ut omnes huc illapsi radii sonori intra meatum auditorium determinantur.

§. XXII.

Ipsæ auditorius meatus tuba est figuræ cylindro-ellipticæ, progressus serpentine, quo eo melius reflexione augeat & multiplicet sonum, nec tamen uno impetu irruere sinat. Media parte cartilagineus, qui anterior est & concham auris externæ excipit, & osseus qui posterior, qui ad tympanum terminatur, uterque membrana valde nervosa vestitur, ac oblitur pingui, flavo, mucido humore, cerumine dicto, qui ex suppositis in cartilaginea parte glandulis miliaribus flavis venit & à qualibet glandula per peculiarem ductum excretorium in meatum stillat, eum in finem, ut nimius tremor frangatur, nec jugi aëris allapsu membrana exsiccet & areseat.

§. XXIII.

Tum tympanum, à fine meatus auditorii ad labyrinthum usque porrectum, anterieus clausum est membrana ex triplici lamella conflata, quarum prima exterior, ex meatus auditorii membrana elongata, altera interior à dura matre, & inter has media vasculosa est, à *Ruyfchio* ep. 38. descripta. Hæc membrana aëris & incongruorum in tympanum ingressum arcet & ita locata est, ut extus cava, intus convexa, super osseum marginem oblique expansa, ad superiora meatus inclinet ibique obtusum, ad inferiora autem acutum, cum meatu formet angulum, quo in centrum ipsius radii sonori incurrant, ipsaque fortius tremulet.

§. XXIV.

Excavatus autem in osse petroso tympani sinus, periossio vasculoso obductus, nervulum habet ex quinti & septimi paris concursu, tympani membranæ sustentum, chordam dictum, cum tribus periossio vestitis ossiculis. Ex his primum, malleus, ad propagandum per tympani membranam sonum, membranæ ipsius necitur manubrio suo, & capitulo incudi committitur, prætereaque tribus firmatur musculis, uno externo

ex superiori ambitu meatus auditorii, qui manubrium versus meatum auditorium trahendo, tympani membranam laxat; altero interno, ex cartilaginea tubæ Eustachianæ parte, qui membranam arctius ad cavum tympani adducendo, eandem tendit; & tertio obliquo, five semicirculari, ab externa ossea ductus Eustachiani parte oriundo, tympanum varie remittente & tendente. Omnia eum in finem, quo sonus varie intendatur, vel remittatur, prout nempe tympani membrana recipiendis radiis sonoris horum muscutorum ope adaptatur & aer in concha vario modo comprimitur, admittitur, vel expellitur.

§. XXV.

Alterum officulorum auditus, incus dictum, cum capite malleoli, & crure longiori, interventu apophyseos orbicularis, cum apice cavo stapedis est connexum. Stapes autem basi sua fenestræ ovali immittitur & fibrillarum membranacearum ope eidem libere adhæret, simulque musculo ex osse petroso in capite instructa est, qui ipsam elevat & margini fenestræ ovalis arctius adducit.

§. XXVI.

Accedit tuba, ex parte ossea, ex parte cartilaginea & membranacea, Eustachiana vocata, quæ ex cavo tympani egrediens, versus palatum patet osculo aperto & semilunari margine cartilaginoso clauditur. Communicat hæc cum aëre externo, qui naribus aut ore hauritur, & facit, ut aer in loca hæc ire, exire, renovari & comprimi, radii quoque sonori naribus aut ore admissi, intrare, & meatu auditorio male affecto, auditum efficere possint.

§. XXVII.

Intima auris pars ob mirabiles gyros & meatus audit labyrinthus, vestibulum, canales semicirculares & cochleam complectens. Vestibulum intermedia est pars, ad quam per fenestram ovalem ex tympano patet aditus, qui stapede inserta munitus, ut spatium vestibuli majus, vel minus reddi, & aer labyrinthi ad sonum modificandum comprimi, vel dilatari queat, facit. Canales semicirculares tres, inferior, superior & medius, posteriorem labyrinthi partem constituunt & quinque orificiis in vestibulum hiant. Et cochlea, canalibus his opposita, duas cum dimidia spiras conficit, & à lamina spirali in duos divisa est canales, quorum superior in vestibulum hians, scala vestibuli, & inferior, membrana tenui clausus, per fenestram rotundam tympanum respiciens, scala tympani vocatur.

§. XXVIII.

Cochlea, vestibulum, canales semicirculares tres intus vestiti sunt membrana subtilissima, ab expansione mollis portionis nervi auditorii oriunda, haud secus ac retina in oculo in qua proinde primaria auditus sedes.

Scholion.

Vero quippe admodum simile, radios sonoros à tympani membrana percussos & per officula propagatos, membranam fenestræ ovalis afficere ac tremorem inducere aëri & membranæ in cochlea & scala vestibuli, sonum inde ad vestibulum ipsum propagatum, hujus etiam membranam nerveam commovere, pergere ad canales semicirculares horumque zonis imprimere distinctos motus, per fibrillas nerveas sensorio communi in cerebro ad perceptionem communicandos.

§. XXIX.

Ex hac theoria & anatomica organi auditorii per investigatione ejusque naturali functione & officio, varia nunc de auditu phænomena explicari, & gravis auditus, five surditatis causæ, dilucide monstrari possunt.

Scholion.

Patet hinc ratio, quare abscissis auriculis, vel meatu auditorio à crasso & indurato cerumine infarto, auditus fiat gravior, quare auditus aperto ore intendatur, nec non quare surdi stridulum corpus dentibus continentes ipsius stridorem percipiant. Elucet porro quod surditatis causa sæpe esse possit ductus Eustachianus obturatus, vel induratus. In proclivi quoque tinnitus aurium causa, si nimirum nimia humiditas, ex perioestio vasculoso, quod intus tympanum & officula auditus cingit, justo laxiori, in internam aurem veniat ibidemque in vapores resolvatur.

§. XXX.

Potissimum gravitas auditus fit, si tympanum, vel nimis tenditur, vel relaxatur, si crassescit & induratur, aut plane perforatur.

Scholion.

Primum sæpius evenit in febribus, cephalalgis gravioribus, hypochondriacis & hystericis per consensum. Alterum contingit à copia humoris serosi, per glandulas ceruminis nimis relaxatas & magnum sanguinis & feri ad caput affluxum. Tertium obvium quam maxime est in ætate senili, nec non post usum calidorum fomentorum & instillatis spiritibus volatilibus. Et ubi quartum præsto est vitium, aer, qui per tubam Eustachianam ad cavum tympani fertur, per aurem instar flatus, præsertim ore clauso, erumpit.

§. XXXI.

Sæpe etiam difficilis auditus & tinnitus, parum licet nota, causa est, glandulosa sinus mastoidei membrana nimis relaxata.

Scholion.

Hæc enim quando lympham copiosiore & crassiore ad membranam tympani, musculos mallei atque stapedis, tympana duo minora, quæ foramen ovale atque rotundum claudunt, dimittit, partes hæc omnes, immo chorda ipsa, nimis humectantur, tonus earum naturalis remittitur ipsarumque functio pervertitur; id quod sæpius certe in statu, vel etiam declinatione acutarum accidit.

CAPUT V.

De olfactu, gustu & tactu.

§. I.

Olfactus organon constituunt nares, duplicatæ ideo & ex ampliori in angustius spatium coeuntes, quo effluvia odora eo copiosius easdem subire & eo rectius applicari queant.

§. II.

Amplum autem & spatiosum est narium cavum, ac in utraque nare duo conspiciuntur tubuli spongiosi, ex tenuissimis & fere papyraceis osseis lamellis ita complicati, ut plures in progressu efforment tubulos cavos, in quos hiant duodecim sinus, duo nempe frontales, duo maxillares, duo sphenoides & sex ethmoides.

§. III.

Tam omnes hi tubuli, quam duodecim sinus, intus duplici vestiuntur membrana. Prima mollis & crassa vasculisque copiosissimis & distinctis rotundis glandulis prædita est, ex quarum osculis stillat lymphæ copiosa, tenuis & inodora, quæ aëris frigidi accessu crassescit & in mucum densatur. Pituitaria hinc, five mucosa, hæc

hæc audit tunica, & humectandis naribus, arcendis aëris & noxiorum injuriis, olfactui moderando, nec non particulas odoris captandis & retinendis iisdemque rectius & diutius nervis olfactoriis applicandis, servit.

§. IV.

Sub pituitaria latet altera tunica nervea, quæ nihil aliud quam expansio fibrarum nervearum. Multi enim ad nares tendunt nervorum ramuli, ac non modo primum nervorum par plures teneras fibrillas per ossis ethmoidei foramina transmittit, per totam narium superficiem & in omnes sinus ac cellulas, dispersas, sed & quintum par ramum per foramen cranii rotundum huc mittit insignem satisque conspicuum, in plures sese diffundentem.

§. V.

Igitur in nulla corporis parte nervi tam aperti & accessui rerum externarum expositi, quam in naribus.

Scholion.

Hanc ob causam odoriferorum maxima virtus in cerebrum, ejus membranas & nervos, eosdem variis modis & subito afficiendi, commovendi, immo lædendi. Luculenter id patet in animi deliquio laborantibus, apoplecticis, sopore affectis & hysteris, qui penetranti odore excitantur & ad se redeunt. Idem confirmant ii, qui ob debilitatem generis nervosi in motus spasmodicos & convulsivos proclives sunt, ut hypochondriaco & hysterico malo laborantes, qui à suaveolentibus læduntur. Hæc etiam causa subest, quod sternutatoria, in morbis capitis à lenta pituita stagnante oriundis, egregie proficiant, dum in cerebro, ejus membranis, nervis horumque fluido fortiolem excitant motum. Neque ulla dubium, quin miasmata morborum, qui contagio inficiunt, per has vias ad cerebrum serpant nervorumque fluidum, ipsumque inficiendo, mox universam motuum vitalium œconomiam turbare & pervertere queant.

§. VI.

Hinc etiam merito concludendum, nervosam hanc narium tunicam esse ipsius odoris sedem; ita quidem, ut pro diversa modificatione motus ab objectis odoriferis eidem impressi, varia in sensorio communi fiat perceptio.

§. VII.

Objectum vero odoris sunt effluvia, ex particulis subtilioribus, salino-sulphureis, quæ mediante aëris & ætheris fluido solvuntur, conflata, & inspirationis ope ad intima narium deducta, nervorum fibrillis & tunicis sese insinuant. Hinc quo intensior inspiratio, eo penetrantior odor.

Scholion.

Patet hinc ratio, quare homo non olfaciat, quando spiritum cohibet, vela aërem exspirat, nec non cur nulla odoris, quantumvis penetrantis, fiat perceptio, quando aspera arteria discissa, aër per hiantis vulneris ora ingressum habet. Et quoniam particulae sulphureæ quæ odorem excitant, volatiles sunt & facile exhalant, hinc fit, ut calore, motu & attritu, corpora odorem spargant longe penetrantior.

§. VIII.

Notandum præterea quinti nervorum paris, quod ad nares etiam pertingit, eam esse distributionem ac connexionem, ut non modo ad linguam insignem dimittat pro gustu faciendo ramum, sed & in quamplurimis cum sexti paris propaginibus coalescens, nervum conficiat intercostalem, qui omnibus fere pectoris & abdominis visceribus, præcipue vero organis respira-

tionis, ramulos largitur & præterea cum pari vago, idemdem per thoracem & abdomen discurrente, variis passim plexibus cohæret. Ex quo utique variorum phaenomenorum rationes eliciendæ.

Scholion.

Nimirum hinc planum fit, quare tanta inter gustum & olfactum observetur conspiratio, nec non quare odores universum corpus tam promte afficere, reficere, vel lædere queant. Innotescit exinde, cur irritatis à sale acri subtili, quod sternutamentis inest, naribus, par intercostale & vagum, nec non nervi musculorum respirationi servientium, in consensum trahantur & motus subsequatur thoracis convulsivus, qui sternutationis nomine insignitur, & quo mucus intra cavitatem & sinus narium hærens expellitur.

§. IX.

Gustus organon præbet lingua, cujus interior substantia est musculosa, ex quinque potissimum musculorum paribus conflata, ita quidem, ut fibræ eorundem tanquam stratum super stratum incumbant sibi invicem, ac uti illorum, sic harum quoque sit tractus, obliquus, longitudinalis, quibus omnes mirabiles linguæ motus perficiuntur.

§. X.

Exterior vero gustui serviens compages ex triplici coagmentatur tunica. Prima & externa, quæ cuticulæ vicem sustinet, multis pervia est foraminulis, quæ corpora papillaria recondunt iisdemque quasi vaginulas largiuntur, quo eadem tam à nimis vehementi gustandorum impressione defendantur, quam sapida eo melius recipi & applicari queant. Altera est retiformis, cribrosa Malpighii, hic quam maxime conspicua, quæ transitum concedit papillulis.

§. XI.

Tertia, quæ carneum linguæ corpus cingit, est nervosa, ex innumeris papillaribus corpusculis conflata. Intertextæ sunt huic etiam plures glandulæ, quæ in basi linguæ majores & copiosiores, in apice minores, è quarum foraminulis, cellis dictis, lymphæ stillat.

§. XII.

Ipsæ papillulæ nerveæ, in quibus gustus sedes, nihil aliud sunt, quam extremitates nervorum ac tendinum, in dorso linguæ, præcipue vero in apice & ad latera conspicuæ, quæ in lingua jejuna & famelicis eriguntur, in mortuis sæpe disparent. Triplicis autem magnitudinis & figuræ esse observantur. Aliæ sunt capitatae, quarum plures in homine, quæ referunt cornua limacum; aliæ conicæ, mollioris in homine texturæ, quæ conjunctæ pectinem carminatorium constituunt; & quæ in basi linguæ conveniunt ac majores fiunt, dentem apri referunt, aperinæ ideo vocandæ.

§. XIII.

Nervi, qui ad hoc gustus organon excurrunt, à quinto & nono sunt nervorum pari, & plerumque illis papillulas nerveas & gustum deberi, his vero linguæ motum perfici, censetur.

§. XIV.

Objectum saporis est ipsum sal, prout varium illud est varique cum particulis insipidis, oleosis, sulphureis, terreis & aqueis commiscetur. Hinc quæ sale destituta, nullius saporis.

§. XV.

Quando igitur in sapidis corporibus particulae salinæ, mediante saliva & calore oris solvuntur, & postea
motu

motu oris vaginulis intruduntur & papillulis applicantur, pro motus papillulis ab his impressi varietate, diversa illico diversi saporis in mente excitatur idea.

§. XVI.

Varius tamen sapor est, nec in uno homine, ut in altero.

Scholion.

Differt enim saliva, quæ menstruum est principii sapidi. Ipsæ papillulæ nerveæ magis, vel minus quandoque sunt exsuccæ, humidæ, temperato, vel præternaturali humore imbutæ. Cuticula etiam linguæ magis vel minus obstructa, vel quandoque plane excoarctata. Hinc est, quod non nunquam in morbis omnis sapor sit salis, vel amarus, vel prorsus putridus.

§. XVII.

Tactus organon est universa corpori instrata cutis, seu potius existentes in ipsa papillæ nerveæ pulposæ, quæ ex mollioribus nervorum subcutaneorum villis, deposita exteriori membrana, oriuntur, tenui semper humectantur lymphæ & in locis tactui potissimum fervientibus maxime conspicuæ, uti in digitorum apicibus, volis manuum ac plantis pedum.

§. XVIII.

Acutissimi hæ papillulæ sunt sensus & ita locatæ, ut per reticulare *Malpighii* corpus distincto ordine ferantur & in foveis cuticulæ delitescunt, ab externis corporibus facile quidem, sed non nimium, affici possint.

Scholion.

Epidermidem enim, seu solidam membranam, tactum moderari, patet exinde, quod exusta, vel per vesicantia ablata eadem, dolor à tactili excitetur, & vicissim, si dura nimis & callosa fiat, ut nequeat ad papillas objecti externi actio perungere, tactus pereat.

§. XIX.

Papillulæ hæ in corporis superficie perpendicularem habent situm, in manuum vero & pedum digitorum apicibus secundum longitudinem, aucto semper in progressu ordine, exporrectæ sunt, ubi in epidermide, seu vagina, complicatæ, exsuccæ in ungues densantur, quo digitorum extrema hoc munimento molles servantur & defendantur.

§. XX.

Tactus igitur fit, quando papillulæ nerveæ sese erigentes objecto tactili applicantur, earum superficies inde leni tritu afficitur, motusque sic ipsis impressus, per nerveum fluidum ad sensorium commune propagatur, qui in mente excitat ideam calidi, frigidi, mollis, duri, sicci, humidis, figurati, magni, remoti &c.

§. XXI.

Ad perceptionum species merito etiam referendus dolor, qui non nisi molesta, à violento & præternaturali per objectum externum impresso motu, sensatio est.

Scholion.

Doloris subiectum sunt omnes membranæ ex fibris carneis & nerveis compositæ, adeoque præter summam cutim & sentientes jam dictas membranas, intus etiam latentes partes, ex tunicis maxime musculofo- nerveis conflatæ, doloribus patent. Maxime omnium vero totus ille canalus, qui à faucibus ad anum porrectus, oesophagum, ventriculum & omne intestinorum volumen comprehendit, & alimentorum digestionis, solutioni & excretioni dicatus est, præcipuam variorum graviter affligentium dolorum sedem ac domici-

lium constituit. Huc etiam pertinent pulmonum bronchia, ex tunicis valde fibrosis & nerveis conflata, uretheres, cum vesica & urethra, ductus biliaris ipsaque pleura & peritonæum, nec non membrana ossa cingens, periostium dicta, quæ sæpe atroci dolore in statu præternaturali afficiuntur.

§. XXII.

Dolor, five molestus sensus, varius est & differt pro diversitate motus, qui partibus nervosis ab externo objecto imprimitur.

Scholion.

Omnis utique sensatio molesta supponit motum, ab æquabili & moderato, qui naturalis est & omnis molestiæ expers, deflectentem, violentum nempe, qui vel in validiori contractione, crispatura, vel etiam distensione nimia & pressione, aut, ut Veteres loqui amant, tentata continui solutione, consistit. Hic prout à variis causis, qualitate, mole, aut motu diversis, inductus, varius etiam & gradu discrepans à Medicis observatur, & gravativus, pressorius, ardens, lancinatorius, pungitivus, acutus, constrictorius, pulsans &c. denominatur. Quicumque igitur doloribus apte mederi contendit, id efficere debet, ut vel causam, quæ motiones tales præternaturales in partibus sensu dotatis ingignit, congruis præfidiis amoveat, vel liquidi nervei, cujus ministerio motus fit & solidis impressus ad sensorium commune transfertur, influxum minuat, vel sufflammet, id quod vaporosorum, ut papaveraceorum, ope perficitur, quæ hinc vocantur stupefactiva. Sed de hac materia plura in pathologicis & therapeuticis.

CAPUT VI.

De somno ac vigilia.

§. I.

Nullus homo sine somno & quiete diu vivere vel sanus manere potest, unde somni natura ejusque causæ Medico sunt investigandæ.

§. II.

Somnus est cessatio operationum animæ ad tempus, ob secretionem & influxum fluidi nervei in sensoria languidiorem.

Scholion.

Quia homines dormientes nec vident, nec audiunt, nec contactu facile moventur; ergo anima cessat operari per somnum, in organis maxime sensuum exteriorum; quamvis ejus operatio non cesset in tractandis & evolvendis ideis, quæ vestigia sunt cerebro impressa ab objectis externis, testantibus id insomniis.

§. III.

Cessatio sensationum fit ab influxu fluidi tenuissimi in nervos & sensoria languidiori, unde hæc flaccescunt, relaxantur, ut actiones & motus objectorum vivide ad sensorium internum, quod in cerebro est, perducere nequeant.

§. IV.

Prout itaque hic influxus fluidi nervorum, gradu secundum majus & minus diverso, impeditus est, eo quoque magis, vel minus, somnus est profundus, & difficilior excitatio.

§. V.

Cessat & minuitur in nervos & sensoria liquidinervei influxus ob tubulos cerebri & nervorum minus vegetos,

vegetos, & quodammodo à lymphâ roscida minus mobili ibi stagnante relaxatos & compressos.

§. VI.

Perit vigor & tonus tubulorum cerebri, vel languescit, partim quod sub diuturna vigilia ipsi debilitantur, partim quod de nocte sanguinis motus in toto corpore, adeoque in cerebro etiam, tardior & languidior evadit, unde serum & lymphâ roscida, quæ cum sanguine eodem gaudet progressu, ibi moratur inque majori copia secernitur, & hiantes poros ac tubulos cerebri implet, unde fluidum tenuissimum minus in nervos & principium nervorum influit. Quodcunque itaque sanguinis circulum per cerebrum languidiorem efficit, id etiam ad somnum producendum multum valet.

Scholion.

Ex hisce jam facile petenda est ratio, quare quæ vapore extendunt arterias teneras cerebri, ut sunt papaveracea, inebriativa, fumus carbonum, sulphuris, omnia graveolentia & suaveolentia, ad somnum conciliandum multum faciant; item quare aer humidus & temperate calidus, coelum pluviosum, aer nocturnus, & deficiens in atmosphæra sol, alimenta, quæ blandis & oleosis succis scatent, fumus tabaci & humectantia roscida, circa noctem assumpta, ad somnum conciliandum multum faciant. Apparet etiam porro ratio, quare nimia & laboriosa corporis præcedens defatigatio, ad somnum disponat, siquidem à motu fortiori ipsæ fibræ universi corporis ipsiusque cerebri in movendo vigorem amittunt.

§. VII.

Sub somno sanguinis cursum per ipsum caput & universum corpus languidiorem esse, & fibras corporis relaxari, plura sunt, quæ id confirmant; siquidem in somno, & pulsus arteriarum, & respiratio, longe languidior & imbecillior est, quam in vigiliis, habitus corporis cum vasis turgescit, sanguine repletur, tubuli cutis magis relaxantur, hinc etiam cutis fit humida, vel plane sudore perfunditur, sique à somno quis profundo confestim excitetur, torpor & gravitas in capite sentitur, neque sensus statim, sed successive, redeunt ad officium.

Scholion.

Quia sub somno fibræ relaxantur & flaccescunt, transpiratio & urinæ secretio melius nocte, quam de die perficitur. Qui ex summa debilitate viriumque in morbo, vel post morbum prostratione, fibrarum cutis atonia laborant, iis largiter noctu sudor sponte manat, qui cessare frequenter solet, mane ægro evigilante.

§. VIII.

Somnus utilis & necessarius corpori est, ut fibræ totius corporis & cerebri, quæ sub vigilia in perpetua agitatione erant, quiete rursus tonum, robur & nutrimentum accipiant; deinde, ut partes spirituosæ, quæ sub vigilia & motu diurno exhalant & consumuntur, recolligantur & resarciantur, quare placidus somnus optimum virium est refectorium.

§. IX.

Vigilia somno opposita est, hinc oppositas causas habeat, necesse est.

§. X.

In vigilia, & ipsum cerebrum, & nervi atque sensoria, fluido tenuissimo turgent, ejusque liber & sufficiens adest influxus, unde fibræ ac membranæ tensæ ac rigidæ manent, ut objecta externa in eas prompte agant hæque actiones anima percipiat.

§. XI.

Quodcunque itaque sanguinis cursum celerem per vasa capitis & cerebri efficit, & fibras in motu & actione conservat, id quoque vigiliam assiduam efficit.

Scholion.

Jam perspicua erit ratio, quare cura & continua animæ actio in affectibus, nec non profunda & intensa cogitatio, aer valde siccus & simul calidus, potus calidi, ut herbæ thæ, caffèe, medicamenta acria, volatilia, ingens calor & æstus corporis in febribus, concoctio difficilis, cibi falsi & acres, somnum arceant & vigiliam procreent. Nam hæc omnia in perpetua agitatione fibras servant, serum roscidum diluunt, sanguinisque motum per cerebrum velociorem ac impetuosum reddunt.

§. XII.

Vigiliæ diurnæ nocent corpori, quia nimium fibras corporis exsiccant, ipsis nutrimentum subtrahunt & vires consumunt.

Scholion.

Patet ex hisce, quam periculosum sit in febribus aliisque morbis symptoma assidua vigilia, quæ tamen nullo modo anodynus est sopienda, quia post vigiliis nimias extreme debilitatæ sunt cerebri ac partium fibræ, unde facile dicta medicamenta exitialem stagnationem, vel stasim humorum, causantur, in morbis acutis eo majori cura pertimescenda.

CAPUT VII.

De anima ejusque cum corpore commercio.

§. I.

IN homine, præter corporis organici ordinatos motus, sentiens & appetens facultas, neque minus mens, qua intelligimus, cogitamus & libere agimus, considerari debet.

Scholion.

Tria inter se distincta, ratione naturæ & proprietatum, principia in homine invicem juncta & connexa esse, superius *capite III.* jam diximus. Ipsa vero etiam scriptura sacra in homine tres distinctas ejusmodi substantias, corpus nempe, animam & spiritum, agnoscit.

§. II.

Hæc tria, ratione naturæ, proprietatum & virium inter se distincta agentia in homine obvia, distinctim considerata, nec invicem confundenda sunt.

Scholion.

Primum & palmarium in philosophicis præceptum est, ne res inter se distinctæ confundantur, quia confusio est fecunda errorum mater, & errores nihil aliud ex parte sunt, quam rerum distinctarum confusiones. Itaque non sine ratione, & Veteres, & recentiores, naturam ab anima, scite & sapienter distinxerunt, utur accuratiori corporis & motus notitia caruerint. Siquidem naturam motuum vitalium, secretionum, morborum, mortis, sanationis, principium appellabant, facultatem vero sentiendi, appetendi, motusque spontaneos dirigendi, ad animam referebant.

§. III.

Actus perceptionis, imaginationis, æstimationis, neque minus memoria, docilitas, appetitus, aversatio, quum ab extensione, à figura, situ, connexionione, motu, virtute nitente & renitente, derivari minime possint, opus

opus est, ut præter mechanicam partium structuram & ex hac productos motus, aliud adhuc, à corporis proprietatibus cognitis distinctum agens, statuamus.

Scholion.

Cujus indolis sit illud principium, à quo tanquam à causa & fonte vires percipiendi, appetendi ac certos motus determinandi profluant, penitus humani intellectus captum exsuperat. Ex ejus vero operationibus cognoscimus, quod ad corporum naturam, quorum vires nobis perspectæ sunt, minus recte referri possit. Num præter corpus & spiritum, alia substantia adhuc detur, quæ elementum purissimum, homogenum & simplicissimum, ad impressiones recipiendas & secundum has ordinatas reactiones producendas, aptissimum sit, ad altioremetaphysicam magis, quam medicam indaginem pertinere videtur.

§. IV.

Facultas in homine sui & aliarum rerum conscia, veritates & errores distinguendi, ratiocinandi libereque agendi, quum nec à corporis, nec ab animæ sentientis essentia deduci possit, sequitur, aliud adhuc operandi principium, siue substantiam longe nobiliorem, in homine constitui debere, quam mentem Veteres, sacra vero scriptura spiritum ad imaginem Dei conditum vocat.

§. V.

Utut tria distincta in homine sint & concurrant agentia, ita tamen inter se connexa sunt ac conspirant, ut unum alterius ope & auxilio in hac vita egeat, unumque in alterum agat & invicem quoque patiantur.

Scholion.

In universo rerum naturalium ordine ita sapientissimus opifex cuncta constituit, ut unum corpus semper agat in alterum, & ex mutua actione & reactione, motus resultet, omniaque invicem ita connexa sint, ut unam mutationem altera subinde sequatur.

§. VI.

Mens ministerio animæ sensitivæ utitur, & ab ea rerum perceptiones, impressiones & ideas accipit, quas in ordinem redigit. Læsionem quippe partium solidarum & fluidarum enormem, ut videmus in morbis, læsio facultatum, tam sensitivæ, quam rationalis, sequitur, & destructa machina, utriusque operatio cessat, ut apparet in morte.

Scholion.

Animadvertimus, variarum impressionum copia & impetu subinde recte ratiocinandi facultatem turbari, ut videmus in mente captis, in deliris, in ebriosis. Quo fluidi cerebri natura & motus temperatior est, eo nobilior quoque mentis est operatio. Deinde perversæ impressiones & cupiditates sana ratione corriguntur ac sedantur. Et mentis imperio artus moventur, idque mediante nervorum & sanguinis fluido, nec non instrumento motus bene disposito.

§. VII.

Principium sentiens liquidi cerebri & nervorum ministerio utitur, siquidem in ipsum fiunt objectorum impressiones, & hoc mediante, etiam anima sensitiva suam movendi potentiam in corpus exercet.

Scholion.

Qui nulla ratione ducti fluidum cerebri, quod veteres spiritum animale nominarunt, negant, ii animam proxime in nervos partesque solidas agere easque movere existimant. At vero, cum supra satis hujus fluidi

existentia stabilita fuerit, id potissimum urgemus, animam longe facilius & promptius in hoc fluidum, ceu mobilissimum, quam in solidum, motui minus idoneum, agere posse, præsertim quum videamus, salvo & integro musculo, læso autem cerebro, vel nervo partibus, animam nihil posse efficere.

§. VIII.

Fluidum cerebri & nervorum materiam & originem suam petit à sanguine arterioso ejusque motu ad caput, hinc facile intelligitur, sanguinis magnam esse potentiam animæ sensitivæ actiones valde alterandi & immutandi.

Scholion.

Animantia, quæ calidiorem & copiosorem sanguinem habent, ut sunt carnivora, alijs dociliora & ferociora sunt. Sanguinei plus ingenii ac memoriæ habent, quam qui boni sanguinis penuria laborant.

§. IX.

Vires imaginationis, memoriæ, ingenii, propensionum, valde differentes, à sanguinis temperie ac motu maxima ex parte dependent.

Scholion.

Ex quo fit, ut mores & inclinationes temperamentum sequi soleant, quod experientia confirmat & jam dudum *Galenus* notavit. Nam in quorum corpore fibræ admodum sunt teneræ, tensæ, strictæ ac mobiles, & sanguinis motus celerior est, in eorum actionibus temeritatem, in moribus ambitionem, in animo vehementiam animadvertimus. Ubi vero ob fibrarum densitatem, immobilitatem viarumque angustiam, cum quadam difficultate sanguis movetur, ibi fixior est imaginatio, in moribus pertinacia, in actionibus tarditas & timiditas, in vitiis avaritia dominatur. At vero sanguine temperatiori libere ac placide corporis meatus percurrente; ingenii ac memoriæ adest alacritas, ad voluptates vero æque ac ad vitia & virtutes, prompta & mobilis est facilitas. Et quia ætas diversa, in solidis partibus, quæ motus instrumenta ac fluidorum viæ sunt, mutationem quandam affert, hinc in animo quoque morum, ingenii, inclinationum, impressionum mutationem efficit, adeo ut alii mores & vitia sint puerilis, alia juvenilis, alia senilis ætatis, uti pluribus in *diff. de temperamento fundamento morum & morborum*, docuimus.

§. X.

Cum sanguis ejusque motus, in animæ sensitivæ operationes, mediante cerebri fluido, magna polleat efficacia; sequitur, ut quoque ea, quæ sanguinis indolem ejusque motum immutandi facultatem habent, insignem potestatem in animam obtineant.

Scholion.

Minime itaque mirandum est, si clima, si alia victus ratio, si medicina, animum, & mores, & sapientiam, mutandi facultatem habeant. Sapienter adstruxit *Hippocrates Lib. 1. de diet.* §. 30. 34. meliorem & sapientiore dietâ reddi posse animam. Et eodem libro scribit: *Si sanum fuerit corpus & non à morbis perturbetur, animæ quoque temperamentum sapiens existit.* Sanguinisque temperamentum multum ad sapientiam conferre, idem auctor *Lib. de flatib.* §. 20. affirmat. Deinceps inter populos, qui diversa incolunt climata, alios esse acutiores, alios obtusiores, quosdam ingenio ac judicio alijs præstare, & diversis vitiis quoque obnoxios esse, ipsa experientia edocemur. Melioris notæ vino assumpto, homines alacriores & ingeniosiores, flatulentis vero cibis, ut fabis & pisces, nec non graveolentibus, ut opio, semine hyoscyami, daturæ, stupidos

stupidos atque insanos reddi, indubitata experientia constat. Neque ulli peritiori medico ignotum est, quod continua & ardens febris delirium, affectio vero fluctu-lenta hypochondriacorum melancholiam & insaniam, efficiat.

§. XI.

Est quoque ingens, sed tamen limitata animæ, mediante liquido cerebri & nervorum, potentia in corpus ejusque fluidas & solidas partes, eas varie commovendi & mutandi.

Scholion.

Exserit sese potestas animæ maxime in musculos, qui artus movent, siquidem non modo pro arbitrio eorum motus dirigit, sed & vehementior impressio atrocissimos convulsivos motus & artuum agitationes involuntarias efficere potest, cujus rei inspirati sic dicti solenne documentum edunt.

§. XII.

Anima sensitiva vitales & naturales actiones minime pro lubitu & directe augere, vel minuere potest, utut non negandum sit, eas ab anima multum perturbari posse.

§. XIII.

Affectus animi, qui principii in nobis sentientis & appetentis actus, motus & operationes sunt, sanguinis circulum, & ab eo dependentes partium functiones, vehementer & diversimode perturbant.

Scholion.

Ex gravi iracundia confestim cordis & arteriarum motus celerior fit, ut sanguis cum impetu per vasa trahatur, facta respiratione citiori, siti & vigilia. Tristitia pertinacior solidorum robur valde imminuit, ut fibræ inde flaccescant, relaxentur, earumque vigor ac tonus pereat, inappetentia, nausea, diarrhoea, alvi fluxu subsequente. Terrore partes externæ contrahuntur, frigida tremunt, sanguine ad cor & pulmones cum impetu congesto, à quo anxietates, tremores, palpitationes fiunt. Rectissime itaque vehementes animi affectus primum & principem inter causas, quæ morbos inferunt & quæ sanitatem destruunt, locum inveniunt.

§. XIV.

Vis quoque phantasiæ in actionibus naturalibus immutandis se valde exserit.

Scholion.

Quam nocivæ sint foetibus phantasticæ illæ gravidarum subitæ & fortiores impressiones, cum quodam terrore junctæ, earum in corpore relicta vestigia, maculae, deformationes partium, abunde testantur. Omnia vehementia desideria quam perniciofa sint corporis valetudini morbosque inferant, amor insanus, malacia gravidarum & intensa cupiditas videndi patriam & parentes, luculenter comprobant. Rerum ingratarum fastidium, ex solo odore, vel aspectu, ita subvertit ventriculum, ut noxia vomitio subinde sequatur. Quantæ turbæ in universo corpore ex averfatione innata casei, felium, sanguinis fusionis, vel aliarum rerum adversarum, nasci soleant, quotidianus usus ostendit. Profunda animi meditatio atque intentio in studiis vigorem universo corpori ipsique ventriculo detrahit, & animadvertimus, magno ingenii labore, meditatione ac forti impressione, cerebri membranas valde constringi, vel relaxari, ut graves capitis affectus inde propullulent. Solo aspectu epilepticorum, vel variolosorum, complures in eisdem morbos prolapsos fuisse, medicorum historiæ passim obviæ testantur. Ex sola impressione pestis, eadem quos-

Frid. Hoffmanni Oper. Tom. I.

dam correptos fuisse, licet non affuerit, certo certius est. Ex firmiori imaginatione nonnullos purgare, vomere, sudare, salivare posse, identidem experientia confirmat. Habent hæc omnia maxime locum, atque efficacia animæ sese potentius exserit, in corporibus sensibilibus, imbecillioribus, vel à præcedente morbo, aut alia quadam ex causa, enervatis.

§. XV.

Igitur anima, quo magis vacua à desideriis & impressionibus, & quo tranquillior ac quietior est, eo minus corporis motus turbat atque offendit, neque alimentorum aut medicamentorum vires pervertit. Qua de causa ab omnis ævi philosophis, mentis tranquillitas, ad sanam & longam vitam, nunquam non commendata est.

§. XVI.

Neutiquam vero animæ potestas in homine eo sese extendit, ut omnium in corpore motuum, etiam morbosorum, causa efficiens sit.

Scholion.

Qui hoc statuunt & contendunt, motus veram naturam & causam corporumque essentiam ac operationem ignorant, quæ non secundum veteres in extensione quam passiva, à DEO, vel alio quodam ente, in actum & motum deducenda, consistit; sed potius corpora sunt substantiæ activæ, viribus nitentibus ac renitentibus, quibus unum in alterum agit reagitque, donatæ, quarum operatio non alia est, nisi nisus ad motum, qui demum ex mutua & inæquali virium actione & reactione resultat. Et quemadmodum fluida, ut aër, ather calore solari animatus, celerrimæ sunt activitatis ad producendum motum, neque ullo externo alio agente egent: ita tenuissimis animantium fluidis, cur hanc movendi energiam denegare velimus, nec ullam solidam rationem invenio; utpote cum indies edoceamur, non modo à venenis, item ab alimentis & medicamentis, a solo mutato aëre ejusque calore, solidorum & fluidorum actiones & motus augeri, minui, variisque modis immutari posse. Tacemus, quod ejusmodi principium, in medicinam rationalem infelici fidere introductum, rebus corporeis activitatem demendo, omnes physicas, mechanicas & anatomicas causas & rationes uno quasi ictu prosterнат, in quibus tamen certitudo ac demonstratio, si qua in medicina fieri potest, consistit. Et quæ plura firmo subnixæ talo contra hanc metaphysicam de rebus medicis & physicis sententiam dici possunt tam in præfatione hujus libri, quam passim in aliis nostris scriptis attulimus.

§. XVII.

Utut igitur anima in homine, five rationis particeps, five sentiens, potentiam quandam ac directionem limitatam in corporis nostri partes obtineat; Medicina tamen, tam in theoreticis, quam practicis demonstrationibus ac deductionibus, pure mechanica est, id est, principiis mere mechanicis, quæ sunt motus & materia, innititur.

Scholion.

Neutiquam certe indicationes medentum, five sint præservatoriæ, five curatoria, vel alimentorum, aut remediorum vires ac potestates, quibus medicus omne id, quod debet, præstat, ad mentem, vel animam sensitivam, ullo modo spectant, vel eo dirigi possunt, quia horum nulla datur absoluta, vel directa in dicta agentia potestas, sed potius medicorum functio plane est mechanica, quæ in eo versatur, ut, quomodo motus varie disponat materiam, & diversa quoque materiæ indoles motum modifcet, intelligant; deinde, ut sciant

nimios motus compescere, deficientes promovere, fibris motricibus & languentibus robur addere, motus fluidorum ad convenientia excretoria dirigere; præterea nocentes succorum qualitates corrigere, invertere & ad excretionem disponere, quæ pure mechanica sunt. Si quidem omnes vires corporis, immo ejus effectus, certo numero, mensura & pondere, five efficacia ad motum, fiunt; adeoque pure mechanicæ sunt. Quare etiam medicus cujusvis naturæ & individui mechanif-

mum, & quomodo hic conservandus, vel restituendus sit, unice omni cura ac prudentia attendere debet, ita enim solide, perite ac feliciter in operibus artis versatur. Neque alius medico aditus ad animam, five sentientem, ejusque motus turbativos componendos, patet, vel concessus est, quam ut conveniente, vel alimentorum, vel medicamentorum usu, delinquentes motus, aut materiæ qualitates ac vires noxias, in ordinem ac statum naturalem reducat.



PHILOSOPHIÆ CORPORIS HUMANI VIVI ET SANI

LIBER SECUNDUS,

De Vita & Sanitate per salubrem diætam conservanda & præmatura morte morbisque avertendis.

PROLEGOMENA

De scientia sanitatem & vitam tuendi.

§. I.



Scientia earum rerum, quæ ad diutius continuandos vitales machinæ animalis motus conferunt, ut homo longa vita & sanitate fruatur, Græcis *ὕγιεινὴ* appellatur.

Scholion.

Hæc medicinæ pars omnium utilissima in medicorum scholis quartam quidem artis partem constituit, & post pathologiam tractatur, quum tamen proxime physiologiæ subjungi deberet; siquidem hæc genuinas vitæ ac sanitatis causas explicat, hygieine vero eas pertractat, quæ salubritatem, vel insalubritatem, corpori afferunt, adeoque scientiam tradit, qua corpus diu vivum ac salvum servatur, qua demum neglecta, origines & causæ morborum pullulant, hinc commodissime physiologicam corporis humani tractationem excipit, & pathologiæ præmittitur.

§. II.

Quemadmodum sanitas omnium rerum pretium excedit omni quæ felicitatis fundamentum est, ita scientia vitæ ac sanitatis tuendæ omnium nobilissima omnibusque hominibus commendatissima esse debet.

Scholion.

Vehementer profecto dolendum est, quod perpauca eo sapientiæ perveniant, ut partes, quibus homo componitur, mentis nempe & corporis sanitatem, recte curent, sed potissimum hominum princeps cura & cogitatio eo in vita dirigatur, quo multis laboribus ac desideriis ea consequantur, quæ neque mentem, neque corpus in altiori perfectionis gradu collocare possunt. Quin potius cum dolore animadvertimus, nostris etiam temporibus, utilissimam hanc medicinæ partem ab ipsis medicis insuper haberi, vel parum digne tractari.

§. III.

In potestate medici non semper positum est morbos tollere & ægros sanare, eos vero prudenti consilio avertere & sanum illibatumque corpus tueri, utique in potestate medici magis situm est.

Frid. Hoffmanni Oper. Tom. I.

Scholion.

Ubi enim inveterati fuerint morbi & altiores radices in viscerum labe egerint, ut plurimum omnes remedium vires eludunt; qui vero ex morbis acutissimi, & qui magnam stragem edunt, naturæ potius, quam artis beneficio sanescunt. Id vero medicus sua arte efficere potest, ut primas origines & semina morborum præscindendo, diutius corpus salvum & à morbis ac præmatura morte liberum conservet.

§. IV.

Quia longior vita & sanitas integra tam chara ac pretiosa res est, utique in impetranda hac, medicus nihil, nisi cum certa ac fundata ratione & experientia, agere, vel præscribere debet.

Scholion.

Sicuti therapia, sive ars medendi morbis, huc usque plus empirice, quam scientificæ, ex certis atque indubiis principiis tradita est, ita etiam hygieine solidis rationibus ac demonstrationibus fere destitutam videmus, eam maxime ob rationem, quia partim vitalis corporis conservatio, in quoniam ea consistat, nondum intime perspecta, partim quia rerum salubrium & insalubrium, ratio ad tot ac tam diversa hominum corpora & naturas differens, non satis digne adhuc evoluta & ad liquidum perducta est.

§. V.

Scientia rerum homini salubrium & insalubrium non tam intellectu facilis est, ut vulgo putatur.

Scholion.

Nullæ enim dantur res absolute & in se salutares, vel noxiæ, sed certis relationibus & conditionibus corporum vires nituntur. Quicumque ergo medicus præcepta cuivis salutaria præscribere vult, is non modo naturam corporis in individuo perfecte nosse, sed relationes etiam ac respectus, quibus variant salubrium vires, accurate tenere debet.

§. VI.

Vera itaque hygieine veras vitæ & sanitatis causas supponit; & medicus in applicatione ipsius, vires ac proprietates earum rerum, quæ sanitatem conservandi, vel labefactandi potentia gaudent, partim ex experientia, partim ex solida demonstratione, altius perspectas habere debet.

CAPUT I.

De sanitatis natura ejusque signis & causis.

§. I.

Sanitas est vigor actionum, tam corporis, quam animi, à temperato & libero solidorum ac fluidorum motu sanguinisque & humorum temperie, neque minus à convenientibus secretionibus & excretionibus, dependens.

Scholion.

Hæc definitio sanitatis realis est, quia non tantum ejus formalem rationem, quæ in vigore actionum animi & corporis consistit, sed & veras ejus causas complectitur.

§. II.

Subjectum sanitatis non modo est corpus, sed & in corpore residens mens, quia corporis sanitate destituta, ob mutuum commercium & vinculum, mens quoque in suis operationibus impeditur & turbatur.

Scholion.

Tamet si mens & anima sentiens per se non ægrotent, nihilo minus tamen fit, ut corpore male affecto, sanguinisque temperie male se habente, illorum operationes quoque lædantur. Est enim mirifica mentis & sanguinis motus conspiratio, adeo, ut unius læsio in alterum repente transeat; quemadmodum in physiologicis id abunde ostensum atque confectum est. Pulchre hinc *Democritus* scribit, vid. *Hippocrat. Lib. de Natur. Human. p. 281. augefcit intelligentia præsentis sanitatis. At ubi corporis habitus ægrotat, neque mens ipsa alacritatem habet ad virtutis meditationem. Morbus enim præfens animum vehementer obscurat, intelligentiam ad affectiones in consensum trahens.*

§. III.

Quia res externæ, quibus continuo utimur, ut aer, victus & aliæ ex rebus non naturalibus causæ, magnam potentiam in solidorum ac fluidorum temperiem & motus obtinent, hinc animadvertimus, ab insalubri aëre & victu, animam quoque & mentem turbari.

Scholion.

Peritissime enim *Hippocrates Lib. de Dieta* scribit, quod si quis velit sapientiore animam reddere, hoc debeat per diætam præstare. Nihilque familiarius est, quam quod in morbis acutis, ubi sanguis per vasa corporis celerrime trajicitur, impatientia & præcipitantia, imo insania observentur, inque chronicis passionibus, præsertim in hypochondriaco illo malo, sine causa tristitia, timiditas & ingens in animo anxietas enascantur.

§. IV.

Recte igitur mentis animique vigor, quia sanguinis motu temperato sustentatur, sanitatis indicium, & contra etiam integritas actionum animi deperdita, labefactam corporis sanitatem subindicat.

Scholion.

Quando itaque vires ingenii atque animi minuuntur, vel pervertuntur, certum indicium est, corporis quoque vim ac robur pati, ut videmus in senibus, languidioribus & morbo fractis. Neque in morbis, animus erectior & alacrior factus, fallax redeuntis sanitatis indicium præbet.

§. V.

Sanitas quoque ex vigore actionum corporis, quæ

in vitales & naturales dispescuntur, recte utique æstimatur.

Scholion.

Actiones vitales, quæ vitam immediate sustinent, sunt motus, qui partim in cordis & arteriarum pulsu, partim in robore fibrarum corporisque agilitate, item in respirationis actu observantur, & ex horum habitudine actionum vitalium vigor dijudicatur; actiones vero naturales ex appetitu, digestionem, nutritionem, maxime vero ex excretionibus per alvum, urinam, transpirationem, æstimantur.

§. VI.

Is itaque sanus ratione corporis dicendus est, qui pulsu gaudet magno, æquabili ac moderato, qui faciem habet bene coloratam, & calorem per universum corpus diffusum obtinet, libere respirat, & qui corpus minus grave, sed agile & ad labores promptum habet. Deinde, qui bene appetit, ingerit, nullas molestias in abdomine persentit, & proportionate secundum ingestiones excernit, placidoque & reficiente somno fruitur.

Scholion.

Is itaque medicus, qui statum hominis sanum explorare vult, ad omnes has actiones respicere earumque vigorem, vel defectum, observare debet.

§. VII.

Quum in rerum natura nihil fiat sine sufficiente ratione, & effectus viribus causarum semper respondeant, vigor quoque actionum, tam animæ, quam corporis, causis adæquatis ut fiat necesse est, quæ utique à medico investigandæ sunt.

§. VIII.

Sicuti sanguinis & humorum continua progressio, à motu cordis & fibrarum robore dependens, causa est vitæ, ita temperatus, liber & æquabilis sanguinis & humorum progressus, proximam sanitatis causam constituit.

Scholion.

Per moderatum sanguinis circuitum eum intelligimus, qui nec nimis tardus, nec nimis celer, nec nimis vehemens, aut debilis est, qui optime ex pulsu cognoscitur. Motum vero æquabilem eum appellamus, quo sanguis eodem celeritatis gradu per vasa fertur. Et liber est, qui ad omnes partes libere & sine ullo impedimento devolvitur, neque in aliis partibus auctior, in aliis vero impeditior & tardior est.

§. IX.

Existente sanguinis motu per universi corporis partes moderato, æquabili & libero, animadvertimus universi corporis functiones recte se habere. In cerebro vigent sensus, ingenii adest alacritas, animus ad intelligentiam & moderationem affectuum compositus, calor est moderatus, facies vivida, respiratio bona, membris inest agilitas, appetitus integer, neque cibus assumptus molestiam creat. Præterea alvus recte respondet, urina citrinum colorem refert, ac naturali consistentia gaudet, cutis, ob perspirationem bene & ordine succedentem, mollis atque uda observatur, corporis habitus laudabilis, neque homo à celebrato coitu facile debilitatur, & denique etiam somnus ac vigilia se moderate habent. Perspectis itaque insignibus beneficiis, quæ à convenienti sanguinis ac humorum motu in corpus humanum, ipsamque ejus in sanitatem redundant, rei ordo postulare videtur, ut genuinas causas inquiramus, quibus naturalis sanguinis circuitus sustentatur.

§. X.

Fluida autem regi à solidis, & solida à fluidis, motumque solidorum, cordis videlicet & arteriarum, omnisque

nisque generis fibrarum, in earum successiva dilatatione & constrictione consistere, supra satis demonstratum est. Exinde igitur haud in difficili est perspicere, motum sanguinis ordinatum, qui sanitatis praeses est, à moderato & æquabili motu & pulsu cordis atque articularum tonoque partium, nec nimis aucto, nec nimis remisso, dependere.

§. XI.

Motus solidorum non à se ipso, sed ab alia causa, nimirum fluido tenuissimo nervorum & influxu sanguinis arteriosi subtilissimi, proficiscitur.

Scholion.

Fluida hæc mira mobilitate instructa, cordis & articularum fibras ad motum impellunt, & solidis partibus debitum tonum foenerant. Atque eam ob causam necesse est, ut & sanguis, & quod ex eo generatur fluidum nerveum, rite sit constitutum; hac enim ratione motus ordinati, qui vitæ ac sanitati favent, optime perficiuntur.

§. XII.

Ad naturalem sanguinis constitutionem, quæ solidorum motus sustentat ac fluidorum progressum juvat, certa quantitas & conveniens temperies requiruntur.

§. XIII.

Debita quantitas ea est, quæ nec copia excedit, nec deficit. Si enim vasorum alvei superfluis humoribus inundantur, succumbunt oneri, nec undas vitales per corpus rite circumferre possunt. Sub nimia autem humorum inopia, solidorum virtus hebescit, unde accidit, ut fluida sufficienti in quantitate ad emunctoria & supremum corporis habitum provolvi nequeant.

§. XIV.

Sanguis decente gaudet temperie, quando principia, quibus sanguis componitur, debita ac justa proportionem inter se invicem combinata sunt.

Scholion.

In physiologicis satis evictum ac stabilitum est, sanguinem ex partibus 1.) aqueis 2.) oleosis inflammabilibus temperatis, & 3.) terreis tenerioribus esse coactum, ea tamen proportionem, ut ad minimum tres aquæ partes, ad unam partem solidi, duæ vero principii terrei subtilioris, ad unam partem oleosi inflammabilis, referri debeant.

§. XV.

Temperatus itaque & optimæ indolis sanguis est, qui nec humido, nec solido abundat, qui nec nimia crassitie, nec tenuitate laborat, neque nimium olei, neque terræ fovet, adeoque ad motus subeundos nec nimis promptus, nec prorsus iners est.

Scholion.

Veteres, qui cognitionem principiorum sanguinem componentium plane non callebant, sanguinis temperiem, quam sanitatis causam agnoscebant, in æquali ac temperata quatuor humorum & qualitatum mixtione quærebant. Qua de re præclara sunt; quæ Hippocrates Lib. III. de Nat. Hum. §. 5. & 6. tradit: *Homo, in-quiens, constat ex sicco, humido, calido & frigido, hincque sanguinem & pituitam & bilem duplicem, flavam & nigricantem habet, & sanus maxime est, ubi temperamentum inter se habuerint moderatum, tam facultate, quam copia, & ubi maxime fuerint permixta: agrotat autem, horum si quid minus, aut amplius fuerit, aut separatur in corpore, & non fuerit reliquis omnibus contemperatum.* Conf. quoque locus de Prisc. Medic. §. 24. ubi hæc exstant: *inest in homine & amarum & salsum, & dulce & acidum, & alia infinita omnigenas facultates habentia, copiamque*

Frid. Hoffmanni Oper. Tom. I.

ac robur. Atque hæc quidem mixta & inter se invicem contemperata, neque conspicua sunt, neque hominem lædunt. Ubi vero quid horum secretum fuerit, tunc & conspicuum est, & hominem lædit.

§. XVI.

Si sanguis bene temperatus ac mixtus, inque conveniente quantitate constitutus, moderato & libero motu per omnis generis vasa ac tubulos ferrur atque in circulum volvitur, tunc non modo universum corpus à corruptione vindicatur, sed & secretiones fluidi nervorum, succi nutritii, feminalis, lymphæ, item salivæ, recte sese habent & sanguis cæterique humores per omnia emunctoria ab omnis generis sordibus bene depurantur, neque minus omne superfluum & inutile excernitur; præterea omnes actiones, tam animæ, quam corporis, partiumque robur ac tonus, ingenii alacritas & vigor, in optimo statu constituta sunt.

Scholion.

In physiologicis supra satis clare & solide deductum est, in sanguinis bene constituti motu ac circulo temperato, materiam, causam & originem vitæ, sanitatis & omnium actionum, quæ secundum naturam in corpore fiunt, positam esse. Quare etiam veteres, ipsaque scriptura sacra, non sine ratione, vitam & animam in sanguine collocarunt. Igitur omnia ea, quæ bonum & temperatum; quantitate minus excedentem, gignunt sanguinem, eumque in moderatiori motu conservant, sanitati admodum congrua & vitalibus motibus apta judicari debent.

§. XVII.

Sanguis etiam optime tam ratione quantitatis ac temperiei, quam motus constitutus, continuis mutationibus, propter intestinum calidum motum, qui ipsum consumit inque excrementa convertit, est expositus, quare opus est, ut in amissi locum semper nova materia boni sanguinis substituat.

§. XVIII.

Certa & attenta observatione constat, in homine robusto ac perfecte adulto, eandem fere quantitatem ac mensuram earum rerum esse, quæ excernuntur & quæ ingeruntur, sive excretiones debere esse æquales ac proportionatas ingestionibus, si sanitate frui debet corpus.

Scholion.

Id liquidum & clarum evadit experimento, quo constat, hominem, utut per septem dies vel quinquaginta libras alimentorum liquidorum ac solidorum assumat, non tamen pondere, si lance examinetur, crescere; hinc necessario sequitur, ut idem assumptorum pondus rursus è corpore secedere & excerni debeat, quod si non accidit, certe morborum origines ac semina ingenerantur & sanitas periclitatur.

§. XIX.

Novam materiam sanguini, qui fons vitæ omnisque roboris in partibus est, partim aër, partim etiam alimenta subministrant, unde homo alimentis & aëris usu destitutus, mox vigorem & vitam amittit. Ergo ingestiones & egestionem, ratione vitæ tuendæ, pari ambulant passu.

§. XX.

Quum itaque vita & sanitas non diu salva & illibata sine aëre & alimentis persistere possint, hæc vero mirum in modum variant, magisque, vel minus, sanguini bono ingenerando idonea sint, sequitur, diuturnæ vitæ ac sanitatis rationem unice esse quærendam, tam in aëris, quam alimentorum convenienti usu, qualis est, qui bonum sanguinem ingenerat ejusque motum liberum ac temperatum tuetur.

§. XXI.

Anima, tanquam præcipua hominis pars, magnam etiam potentiam habet motum partium corporis solidarum ipsiusque sanguinis & humorum, indeque dependentes secretiones & excretiones, alterandi, adeoque œconomiam actionum naturalium turbandi; eam ob causam recte concluditur, in animæ quoque habitu, vitæ, sanitatis, morborum ac mortis rationem esse positam.

§. XXII.

Sine motu & labore, sine quiete etiam & somno ac vigilia, homo vitam degere non potest; hæc vero quum diversimode etiam & sanguinis temperiem immutare possint, liquido constat, sanitatis ac vitæ rationem in horum convenienti usu quærendam esse.

Scholion.

Patet hinc clarissime, quantæ utilitatis ad tuendam vitam ac sanitatem sit conveniens earum rerum usus, quas res non naturales *Galenus* appellavit, & sunt animi conditio, aër, cibus & potus, excreta & retenta, motus & quies, somnus ac vigilia. Quicumque igitur vitam ac sanitatem diu salvam & illibatam servare cupit, is ad has res earumque debitum usum, pro conservando sanguinis bene constituti motu, secundum cuiusvis corporis & partium ejus constitutionem & structuram, probe attendere ac respicere debet.

CAPUT II.

De animæ conditione motus vitales vel conservante vel destruyente.

§. I.

Magna inest potentia animæ, pro diversis impressionibus, proxime & directe, motus vitales ac naturales afficiendi & alterandi.

Scholion.

Quia anima est pars hominis cum corpore intime unita, eaque variarum impressionum ac motuum capax est, magnamque & celerem potentiam possidet, sanissimi etiam hominis sanguinem & motus alterandi, liquido apparet, indagandum esse eum animæ statum, qui ad motuum vitalium conservationem multum faciat.

§. II.

Firma experientia edocemur, quemlibet animi vehementiorem affectum pulsus ac respirationem mutare, perspirationem omnisque generis excretiones perturbare, & appetitum ipsumque virium robur dejicere.

§. III.

Historiæ medicæ testes sunt locupletes, hominem, etiam robustum & perfectæ sanitate fruentem, vel solo improvise ac vehementi terrore, omnibus viribus ita prorsus privari, ut, nec manum, nec pedem, movere possit. Quin etiam haud raro accidit, ut homo repentino & inopinato terrore perculsus, in summum vitæ discrimen adducatur, vitamque cum morte commutare necesse habeat.

§. IV.

Sub terrore partium extremitates coarctatæ refrigerantur & contremiscunt, facies foedo pallore discoloratur, cessant excretiones per alvum & urinam, subsistunt exhalationes cutaneæ, inque molliori sexu lunare tributum supprimitur. Cor autem inusitata concutitur palpitatione, & præcordia suffocativa propemodum anxietate strangulantur.

§. V.

Frequenti constat observatione, ad concitatiorem animi ab iracundia factam commotionem, pulsus ac respirationem fieri citatiorem, cor cum anxia luctari palpitatione, partes extremas tremere, ac mentem de statu suo deturbari, ita, ut interdum brevem quasi furorē mentiatur.

§. VI.

In diuturnum tempus productus animi moeror totius corporis vires frangit, tonum ac robur partium enervat, ipsiusque ventriculi ac viscerum vigorem destruit, unde est, quod pertinacem animi angorem, vel nimiam, vel deficientes excretiones, excipiant.

§. VII.

Omnis animi ardor effusumque desiderium, five in rem veneream, five in aliarum rerum, quæ obtineri haud possunt, possessionem feratur, miris modis corpus fatigat ejusque vires obterit atque extenuat.

§. VIII.

Tam notum est, quam quod notissimum, quantum profundior & abstrusis rebus infixæ cogitatio corporis vires limare, ventriculi robur obtundere somnumque turbare possit.

§. IX.

Mens itaque tranquilla, composita & ab omnibus perversis desideriis atque aversionibus vacua, integrum corporis statum optime custodit vitæque conservationi patrocinator. Atque eam ob rationem unumquemque, cui sanitatis tutela curæ cordique est, summa ope eniti decet, ut laudatam hanc animi tranquillitatem consequatur.

§. X.

Quæcunque igitur ita comparata sunt, ut mentem in statu pacato & quadam quasi malacia ponant, ea pro viribus tuendis optime militant & sanitati servandæ optatissimum præsidium ferunt.

§. XI.

Veræ ac genuinæ virtutes, quarum in censu sunt in rebus adversis & angustis patientia, animi moderatio, mens præsentibus contenta, intra se ipsam collecta, neque in varias diffusa agitationes, ut & veritatis inquisitio, quoniam ejusmodi sunt, ut mentis pariant tranquillitatem, eamque suavi voluptate perfundant, utique sanitati ac vitæ longius proferendæ velificantur.

Scholion.

Patet exinde, veræ pietatis ac virtutum culturam studiumque veritatis, omnibus ac singulis, qui his adminiculis utuntur, sanam & longiorem vitam promittere. Gravis autor, *Plutarchus*, tradit: plures, corpore aliquin infirmo & vacillante, philosophiæ præceptis, vitam sibi fecisse protractiorem. Atque adeo præclare egisse videntur Platoniciæ sectæ addicti medici, quod paucis & parabilioribus remediis contenti, moralibus maxime præceptis sanarent ægros, & difficillimos sic morbos jugularent.

§. XII.

Mente tranquilla existente, nil quicquam turbatum in motibus vitalibus percipitur, omnesque, quæ ad sanitatem spectant, excretiones, recte & ordine procedunt. Hinc bene meminit *Sanctorius Sect. II. aph. 49.* nihil magis liberam reddere perspirationem, quam animum quietum.

§. XIII.

Maxime sanitatem juvat, esse animi hilaris & ab affectibus vacui, eo tempore, quo cibus vel somnus capitur. Digestio enim & requies corporis ab omni affectu gravem

gravem patiuntur jacturam, quum tamen somnus & alimentorum concoctio ea sint naturæ beneficia, quibus succi ac vires deperditæ restaurantur & totius corporis ac animi vigor acuitur.

§. XIV.

Quum omnes animi commotiones tanta corporis integritatem affligendi potentia polleant, utique pravus earum affectus omni studio & circumspeditione avertendus est.

§. XV.

Quemadmodum à gravi terrore externæ partes spasmo contractæ, sanguinem & humores ab ambitu corporis ad interiora repellunt omnesque excretiones cohibent: hinc nihil magis periculosum est, quam eo tempore frigori corpus exponere, vel frigidum potum ingurgitare. Male etiam & sinistro successu emetica, purgantia, vel opiata exhibentur, quippe quæ, motum humorum, qui extrorsum tendere debebat, sufflaminant ac retrahunt, vires adhuc magis infringunt & spasmodicas externarum partium constrictiones adaugent.

Scholion.

Nihil perniciosius est, quam emetica, purgantia, aut aliud fortius medicamentum præscribere, si quando graviore animi perturbatione œconomia motuum vitalium & secretiorum in transversum acta fuerit. Ipsi perspectum habemus, imprudenti ac temeraria ejusmodi medicatione, insanabiles læsiones generi nervoso fuisse inductas. Præstat potius tali in casu motum sanguinis ad ambitum corporis allicere, ejusque spiritualescentiam blande accendere ac vires dejectas refocillare. Quare commendanda sunt animi & corporis quies, à cibo ac potu abstinencia, modicus vini generosi usus, cum lapidibus cancrorum & pulvere quodam bezoardico, aqua liliorum convallium cum vino, balsamum nostrum vitæ cum liquore nostro minerali, mixtura simplex, & præcipue infusa calida ex herba melissæ, veronicæ, salviæ parata; quæ omnia hoc in affectu operam locant præstantissimam.

§. XVI.

In iracundia, ubi sanguis & humores torrentis instar per vasa feruntur, nihil ex alimentorum, vel remediorum classe quadrat, quod fortiter commovet, aut humores ad ebullitionem jam satis assurgentes magis accendere potest. Hinc ab omni vehementiore purgatione, vomitione, sudoris prolectione, medicina calidiori, vino & spirituosis abstinendum est. Sed potius hic locum inveniunt omnia, quæ sedativa & antispasmodica virtute splendent; quo pertinent animi & corporis quies, pulvis præcipitans & nitrosus, aquæ antepilepticae ex floribus concinnatæ, clyster emolliens & laxans, rhabarbarum cum nitro & lapidibus cancrorum.

Scholion.

Vidimus multos ineffabilem fecisse sanitatis jacturam, qui gravi iracundia incensi, infusum herbæ théæ copiose & calidissime potarunt; id quod etiam à balneo calidiori administrato observavimus. Horum enim perversus usus dolores artuum ac tremores cum lenta febre viriumque languore post se reliquit.

§. XVII.

Quoniam contumax angor animi omnem naturæ vim hebetat sensumque consumit, ac solidis partibus, imprimis autem ventriculo & intestinis, tonum suffuratur multumque roboris detrahit, idcirco præter moralia & salutaria rationis præcepta, ea in usum vocare decet, quæ roborandi virtute instructa sunt. Quo in numero habentur vinum generosum, ambrata, balsamica, præsertim balsamum nostrum liquidum, sal volatile cinnamomifatum, aër serenus ac purus, somnus & mode-

rata corporis exercitatio. Quæ omnia ejusmodi sunt indolis, ut moribundam quasi naturæ vini excitent eamque suaviter reficiant.

§. XIX.

Quibus affectuum iudulgentia quasi in consuetudinem abiit, ii plerumque vitium aliquod ac morbosam diathesin in visceribus, aut partibus fluidis alunt, unde opera adhibenda est, ut opportuna vitæ ratione & convenienti medicina, gliscentes hi morbi & intra viscera lente serpentes, è corpore exterminentur.

Scholion.

Qui phthisi laborant, ad impatientiam & iracundiam valde proni ac proclives sunt. Quibus hypochondria male habent, in supervacaneum timorem ac tristitiam propendent, varia sibi somnia & perversas fingunt impressiones, rebus suis diffidunt, despondent animum, ac tandem abruptis quasi omnibus vitæ blandimentis, ad ultimam desperationem adiguntur. Quo in casu moderatissima & strictis legibus contemperata vitæ ratio, omni medicamentorum apparatusi palmam præripit, cujus usus etiam per omnia multum valet, ubi morbosæ mentis suspicio adest & affectuum intemperantia conspicitur.

CAPUT III.

De aëris ad sanitatem usu.

§. I.

Fluidum aëreo-æthereum, mobilissimæ, elasticæ, expansivæ indolis, cum esculentis ac potulentis intra corpus illatum, intimum cum succis vitalibus ac rore nerveo init connubium, motusque ac roboris solidorum præcipua causa est. Deinde etiam exterius corpori incumbens aër, internum succorum elaterem gravitate sua moderatur, & respirationis ope intra pulmones receptus, sanguinis pressionem ex uno ventriculo in alterum egregie adjuvat, quare ejus usus ad motus vitales sustentandos est longe amplissimus.

Scholion.

Quamvis aër respiratione pulmones subiens cum sanguine in iis contento non misceatur, quod in physiologicis solide deduximus; in omnibus tamen corporis nostri succis, in sanguine, lympa, saliva & bile, cunctisque excrementitiis humoribus, præsens est, & alimentorum vehiculo, quorum pori & intervalla spiritus aëris imprægnata sunt, se in corpus insinuat. Imprimis verò aëris in sanguine præsentia curioso experimento, ope antliæ pneumaticæ instituto, ad oculum patet. Quam ob causam multum interest medico intelligere, qualis sit aëris conditio, quem homines hauriunt, quippe qui semper multas alienas partes sibi admixtas habet, quæ sanitati motibusque vitalibus noxam præsentem inferer possunt.

§. II.

Aër, cujus pabulo homines fruuntur, non unius ejusdemque est indolis, sed ratione gravitatis, elasticitatis, caloris ac frigoris, insigniter differt. Diversa quoque ejus conditio est contentorum respectu, quæ parum exhalationes humidæ, partim impuritates salinæ causticæ, sulphuræ, fermentescibiles, imo putredinosæ sunt.

Scholion.

Res extra omne dubium posita est, morbos, qui eodem tempore multos adoriuntur, & vel benigniori, vel maligniori genio incedunt, non aliunde, quam ex adulterata aëris constitutione, suam trahere originem. Se-

mina enim morbosa, quæ intra aërem delitescunt, valde activo instructa principio, corpus subeunt, & graves sæpe turbas ac violentas commotiones excitant; cujus rei luculentum testimonium edunt miasinata, quæ contagio serpunt, ac fumi carbonum accensorum aliarumque rerum odoratarum, quibus magna nocendi & commovendi vis inest. Atque eam ob rationem medicus exacte sciat oportet, qualis aëris status sanitati faveat, vel adverferur.

§. III.

Experientia magistra quotidie docemur, aërem purum, serenum ac temperatum sanitati ac vitæ quam maxime esse accommodatum.

Scholion.

Per aërem purum eum intelligimus, qui partibus heterogeneis vacat, & à variis adventitiis exhalationibus probe defœcatus est; præterea, qui de subtilissimo ac mobilissimo ætheris fluido, quod primario ejus texturam ingreditur, multum participat. Quo major enim pars substantiæ æthereæ aëri associata est, eo liquidiori serenitate fulget, motuque vivido intestino graves ac peregrinas exhalationes à consortio suo arcet. Aër vero temperatus is est, in quo nec calor, nec frigus, neque humiditas, modum excedunt, sed qui blanda ac moderata temperie gaudet.

§. IV.

Purus, serenus ac temperatus aër solidorum motum contractorium & expansivum factum ac rectum servat, fibrisque debitum robur & convenientem tonum foenerat. Neque enim poros ac tenuissima vascula nimis constringit, vel justo plus laxat, neque partium fluidarum compagem solvit, vel attenuat, neque etiam spissum lentorem inducit, sed potius decentem earum mixturam ac temperiem egregie tuetur.

Scholion.

Quanta enim caloris ac frigoris in corpora solida æque ac fluida potestas sit, mechanica, physica & chymica experimenta satis superque testatum faciunt.

§. V.

Quum purus ac temperatus aëris habitus sanitati sit amicissimus, causa in propatulo est, quare loca montosa, editiora, præcipue orientalibus ventis exposita, & habitationes quoque rusticanæ, corporis salubritati magnas suppetias ferant. Loca enim altiora aërem tenuiorem, magisque sincerum & intaminatum alunt, quoniam ibi crebrior ventorum perflatus omnium exhalationum impurarum colluviem diffundit ac dissipat.

§. VI.

Tempus vernale, quo temperatior solis æstus aërem calefacit, salubritate omnibus reliquis anni partibus antecellit.

Scholion.

Circa æquinoctium vernale animantibus summum robur constare observamus. Hoc enim temporis tractu pisces & reliqua omnis fere generis animantia suam produunt foecunditatem, semina & ova deponunt, & pullos excludunt, liquidissimo, ingentis, quo tunc temporis pollet, vigoris, indicio.

§. VII.

Neque minus Majus ac September, cæteros menses salubritate superant, quoniam præ aliis singulari temperie dotati sunt.

Scholion.

Obvia jam ratio est, quare tardarum passionum curationes his mensibus optatissimo cum successu instituantur; & quare præservationis causa susceptæ curationes,

adhibito venæ sectionis, laxantium, aquarum medicatarum, acidularum ac thermarum usu, horum mensium favore felicissime eveniant. Ratio etiam in aperto est, cur salivationes & curæ mercuriales, in lue venerea affectis, intra hoc temporis intervallum secundiorem edant operationem, & quare mutationes cœli inque aliena loca sanitatis ergo destinari peregrinationes, id temporis cum insigni fructu suscipiantur.

§. VIII.

Aër temperate frigidus, justo calidiori anteponeendus est, quia corporis vires custodit, & intus quasi conclusas detinet.

Scholion.

Præstat itaque aëri subfrigido, quam nimis calido assuefieri. Populi septentrionales, aëri frigido assueti, plus virium ac roboris possident & corpore sunt longe habitiori, quam qui regiones sub præcalida cœli inclinatione fitas incolunt. Nimiis enim, qualis his regionibus familiaris est, solis fervor, corporis succos exurit & supra modum expandit, auctaque præter naturam transpiratione, ingentem viribus facit injuriam. Pervulgatus autem ac pessimi moris error est, cui obnoxia sunt pleræque matres, vel etiam mulierculæ, quibus infantum cura commissa est, quando nimirum tenellos in continuo calore servant, & omni ex parte circumspiciunt, ne levi aura, vel aëre frigidiusculo, assentur. Unde accidit, ut infantes hac ratione mirum in modum debilitati, quando sub cœlo libero versantur, vel mitissimi frigoris accessum, graviter, & interdum non sine læsione, ferant. Laude hinc digna est veterum Germanorum consuetudo, quibus solenne erat, recens natos infantes aquæ frigida, vel ipsis fluminibus immergere, non alium in finem, nisi ut corpora tenellorum, primis statim sub annis frigori assueta, constantius robur induerent.

§. IX.

Dispiciendum est, ut eo inprimis tempore, quo cibos, vel somnum capimus, aëre puro ac temperato fruamur.

Scholion.

Nimirum cum cibis ac potulentis aërem in ventriculum & interiores corporis recessus ipsumque in sanguinem intromittimus. In somno autem, sub quo sanguinis cursus per pulmones lentiori gradu fertur, eum aërem haurire præstat, qui elastica & expansiva qualitate imbutus est, ut tenuissimas pulmonum vesiculas, perque eas retiformi contextu serpentes venarum ramulos, leniter coarctet & constringat, ne sanguis ac humores diutius quam par est, ibi commorantes, pulmonum obstructionibus, asthmati, vel etiam polyporum generationi, velificentur. Nihil itaque perniciosius est, quam cubacula vel alia quævis loca incolere, quæ nimis depressa & terræ vicina, vel intra intra ejus viscera conclusa jacent, & quæ variis aquarum stagnationibus opportuna sunt. Neque minus eorum sanitas periclitatur, qui hyemali tempore sub aëre præter modum excalefacto, vel furnorum expirationibus & fumis carbonum accensorum repleto, somno indulgent. Res vero periculi plenissima est, in eo conclavi somno corpus committere, cujus parietes calce viva non ita pridem incrustati, vel luto recenter obducti sunt. Gravissimæ enim inde passiones, ut asthmata & anginosæ suffocationes, oriuntur. Vapidus denique & corruptioni proximus aër scorbuto & cachexiæ mirum quantum lenocinatur.

§. X.

Eorum sanitas in præcipitio versatur, qui intensiori hyeme in conclavi degunt, vel etiam somno conquiescunt, ubi carbones accensi sunt.

Scholion.

Scholion.

Dici vix potest, quam periculose accensorum carbonum fumus vitæ ac sanitati insidietur. Testem citamus experientiam, quæ pluribus historiis medicis subnixa, penitus confirmat, multos, alias integre valentes, à solo accensorum carbonum fumo, intra conclave minus spatiosum concluso, esse jugulatos, vel affectibus apoplecticis, syncopiticis, soporosis aut epilepticis pathematibus, correptos. Qua de re legi potest iudicium nostrum *de noxa carbonum accensorum*. Neque aliud quicquam, nisi nimius carbonum fossilium usus, in causa est, quare peripneumonia, asthma siccum & phthisis, morbi & Leodii, & Londini, endemii sint. Consulatur etiam *Ramazzini Tr. de morbis artificum*, ubi hæc res diffusius pertractata reperitur.

§. XI.

Quemadmodum temperatus aër sanitati amicissimus est, ita intemperatus & excessiva quadam qualitate peccans, inexplicabiles corporis integritati insidias struit.

§. XII.

Aër nimio calore fervens, qualis est circa solstitium æstivum, in sole meridiano, in locis calidioribus, ac ventis, maxime australi & orientali, regnantibus, humores corporis immodice attenuat ac raros facit, dumque pororum hiatus latiores reddit, inconspicuas diffusiones nimis auget. Atque hac ratione sanguinis particulas subtiliores, quæ virium effectrices ac motuum opifices sunt, plus iusto eliminat, gelatinosas vero, quæ in corporis alimentum cedunt, resolvit, dissipat, adeoque magnam inducit debilitatem. Quare talis aëris status, quacunque fieri potest ratione, fugiendus est.

Scholion.

Quamvis aëris spiræ corporis nostri poros non subeant, neque intimam cum sanguine ineant societatem; materia tamen cœlestis, ætherea, purissima, in celerissimo motu constituta, causa caloris est, omnes, quamlibet durissimi corporis meatus & vitra, ut in thermometris videmus, penetrat, multoque magis poros corporis animalis transit, ubi liquida expandit inque celerimum motum intestinum rapit, à qua humidæ partes absorbentur, oleosæ ac terreæ magis acres salinæ & volatiles evadunt. Unde in procinctu est ratio, quare graviores morbi chronici, & passionēs hypochondriacis & arthriticis familiares, per totum æstatis decursum fileant, & febres quartanæ pertinacioris ingenii sponte ab ægris recedant, calidiores vero regiones non adeo multum scorbutico malo infestentur.

§. XIII.

Sub immodico igitur calore, somnus & quies corporis, abstinencia à potu spirituofo, qui humores adhuc magis exagitat, moderatio in labore, & in omnibus iis, quæ æstum & ebullitionem inducunt, saluberrimo consilio imperantur. Præterea etiam potiones moderate frigidæ & alsæ omniaque humectantia succis calore adustis egregium solamen afferunt.

§. XIV.

Frigus intensum, quale rigidissima hyemè à ventis orientalibus & occidentalibus conflatur, & circa solstitium vernale locisque polo arctico adjacentibus familiare est, humores spissat, condensat, poros & capita tubulorum constringit, & humores ab ambitu corporis retro ad interiora urget, unde fieri haud aliter potest, quam ut sanitatem multis iisque gravioribus macet incommodis.

Scholion.

Aër frigidus iis præcipue corporis partibus infestus

est, quæ pariori sanguinis affluxu perluuntur, adeoque sic dictis frigidis, nervosis, tendineis, abdomini inque eo contentis intestinis, ut & capiti ac cerebro, maxime omnium vero pedibus eorumque plantis, inimicus est; quoniam hæ partes valde tendinosæ ac nerveæ sunt, & sanguis per eas, à corde admodum remotas, tardiori cursu provolvitur.

§. XV.

Sub acri ac vehementi frigore hoc imprimis agendum est, ut habitus corporis contra frigoris sævitiam integumentis & luculento foco circumspicte muniatur, ut infusa & iuscula calidiora, eaque omnia, quæ moderatum sanguini calorem inspirant, in frequentem usum adhibeantur.

§. XVI.

Aër superflua exundans humiditate corpori universo languorem inducit, humores accumulat, fibras motrices nimis laxat & resolvit, adeoque omnibus, quæ pro sanitate sunt, excretionibus, obicem ponit, ex quo summa ejus insalubritas nemini non esse potest perspicua.

§. XVII.

Sub diuturna aëris intemperie præhumida, qualis à ventis occidentalibus & cœlo immiti ac pluvioso producit, maxime consultum est, medicamentis spirituosiss, videlicet vino, balsamo liquido & sale volatili oleoso, vel motu corporis, languidiorem sanguinis circuitum excitare, cutaneas exhalationes adjuvare, & à nimia ciborum, præsertim intemperatorum, copia, abstinere.

§. XVIII.

Aër impuris, putridis, contagiosis ac metallicis exhalationibus refertus, variis quoque modis corporis labefactat integritatem. Convenit ergo tunc temporis abstinere à jejuniis, quoniam in jejuniis vehementior est inspiratio, & aër plenius ad interiora admittitur. Præstat vero panem butyro illitum, vel infusum calidum Thé, Coffée &c. matutinis horis assumere.

§. XIX.

Tandem vero nulla res sanitati majus detrimentum affert, quam subita aëris, præsertim calidi in frigidum, & frigidi in calidum, mutatio.

§. XX.

Autumnus, præsertim mensis October ac November, ac veris principium, non aliam ob causam tot conferta morborum agmina producant, quam ob repentnam & frequentissimam cœli ac tempestatum mutationem.

Scholion.

Aëris mutationes nostris temporibus vix exactius investigantur, quam thermometris, barometris & hygrometris, cum cura & ad amissim elaboratis. Siquidem barometra aëris gravitatem ac levitatem, thermometra caloris ac frigoris, hygrometra diversos humiditatis & siccitatis gradus, haud fallaci indicio nobis manifestant. Atque ideo conveniens eorum usus omnibus ac singulis, qui tuendæ sanitati invigilant, maxime vero medicis, commendandus est. Nullo autem anni tempore tantas cœli & aëris mutationes, quam autumnis, horum instrumentorum ope animadvertimus.

§. XXI.

Subita aëris calidi in frigidum & frigidi in calidum mutatio, in solidarum partium tonum mirifice injuria est, & præcipue halituosas cutis excretiones remoratur, unde catarrhi, arthritides, rheumatismi, hæmorrhagias & humorum corruptiones, largo proventu pullulant.

§. XXII.

Quoniam omnis subita aëris in alium habitum transfor-

formatio, cum insigni sanitatis nostræ periculo conjuncta est, omni ratione dispiciendum est, ut, ubi corpus nimio solis æstu sub æstivo tempore incaluit, nocturnum & vespertinum frigus cane & angue pejus fugiamus.

§. XXIII.

Aër frigido humidus & variis vaporibus infectus, in poros corporis nimio calore expansos se altius insinuat, & imprimis in partes nervosas vim suam hostilem exserit.

Scholion.

Pessime profecto sanitati consulunt, qui die ferventissimo existente, loca frigida & humida temere subeunt, vel noctu ibi obambulant, aut sub aperto aëre somno merguntur. Nullibi autem locorum homines magis contra diæticam legem hanc impingunt, quam in Italia, ubi plures hoc sanitatis præceptum floccipendentes, gravissimas corporis noxas sibi contrahunt.

§. XXIV.

Deinde sanitatem in gravissimorum morborum aleam committunt, qui hiemali tempore ex loco frigido, in valde calefactum conclave se recipiunt, quippe quo errore catarrhas ac pertinaces capiti suo accerunt defluxiones. Præstat itaque, interposito quodam temporis intervallo, frigus cum calore commutare.

§. XXV.

Corporis integritatem in summum discrimen adducunt, qui membra acriori frigore tacta & quasi ambusta, excessivo calori committunt.

Scholion.

Tristibus docemur exemplis, membra ab inclementia frigoris læsa, accedente nimis calido aëre, quadam quasi corripit sideratione ac prorsus emori, non secus ac vegetabilia, quæ hac ratione celerrimam putredinem subeunt.

§. XXVI.

Sub statu itaque aëris inæquali & crebra tempestatum mutatione, nihil magis sanitati patrocinator, quam adhibita in cibo ac potu temperantia. Si enim unquam, certe tunc temporis, nimia ciborum repletio atque ebrietas summum corpori intentant periculum. Præterea eo nitendum est, ut sol meridianus, matutinum ac vespertinum frigus, & stagnantium aquarum exhalationes, circa æquinoctia imprimis, quam fieri potest diligentissime evitentur.

CAPUT IV.

De salubritate & insalubritate esculentorum.

§. I.

CORPORIS humani integritas convenienti sanguinis ac humorum copię & qualitati, ceu fundamento superstructa est; unde facile apparet, omnia ea, quæ justam humorum temperiem & quantitatem tuentur, sanitati præsidium ferre, quæ vero his adversantur, insalubria habenda esse.

Scholion.

Sanguis enim temperatus ac decenti gaudens quantitate, commodissime in orbem circumactus & ab omnibus alienis particulis bene depuratus, nutriendis partibus ac viribus fovendis optime inservit verumque vitæ thesaurum constituit.

§. II.

Sanguis temperatus & benignissima indole dotatus,

motuque, qua progressivo, qua intestino, qui per integrum vitæ curriculum perdurat, non modo continenter consumitur, sed & intemperatam indolem induit, inque impuras & excrementitias fordes degenerat.

Scholion.

Adstipulatur experientia, eorum sanguinem, qui diurnam inedia perpeffi sunt, in excrementa falsa ac biliosa, quæ per alvum, urinam & sudorem ejiciuntur, converti, imo gelatinosum suum ac dulcem habitum prorsus deponere, unde accidit, ut humorum massa nimis fluxilis & resoluta, partium nutritioni inepta evadat. Quæ res longe liquidius apparet in febribus continuis & hæctica, quorum morborum indoles ita comparata est, ut brevi etiam tempore præsentis in corpore succos consumant, & temperatissimos humores in effoeta, falsa, ac biliosa excrementa transmutent. Præterea etiam labor ac corporis exercitatio, quoniam sanguinis motum & intestinum & progressivum auctiorem reddunt, exundanti humorum quantitati multum detrahunt, id quod plethorici non sine insigni sanitatis fructu experiuntur.

§. III.

Quoniam sanguis jugi motu, qui vitæ auctor est, continuo consumitur, inque inertem & excrementitiam massam fatiscit, quæ solidis partibus nutriendis, & subtilissimo fluido, quod corpori sensum ac motum præstat, reparando plane inidonea est, penitissime exinde conficitur, si vita ac sanitas perstare debeant, temperatos hos motus sine ulla intermissione esse instaurandos, & novos subinde succos in eorum locum, qui per excretionem à corpore eliminantur, substituendos.

Scholion.

Obvia igitur est ratio, quare homines perpetua ingestione & egestionem opus habeant. Sanitas enim diu integra esse haud potest, nisi egestionem deperditorum humorum jactura aliorum ingestione refarciatur.

§. IV.

Tam alimenta, quam potulenta, amissos humores restituunt, si convenienti temperie gaudent. Adeoque in hunc censum omnia ea referri debent, quæ convenientem cum sanguine naturam & mixtionem habent.

§. V.

Sanguis & humores benigni, qui nutritioni inserviunt, temperati sunt & gelatinæ instar ex partibus terreis tenerioribus, aqueis & oleosis mobilioribus, invicem exacte mixtis, constant. Hinc omnia alimenta, quæ succum temperatum gelatinosum in sinu suo recondunt, generando sanguinem maxime accommodata sunt.

§. VI.

Carnes juniorum animantium, eorumque succi & juscula, præsertim bovinæ, vitulinæ ac vervecinæ, copiosam gelatinam foveant, & hanc ob causam inter ea alimenta, quæ sanguinem celerrime ingenerant, primum locum sibi vindicant. Omne gallinarum & columbarum genus, cum pullis suis, nutritioni quoque est accommodatissimum, quia gelatinam subtiliorem, licet parciorem, præbent, quam carnes.

Scholion.

Notatu digna res est, quod munda animantia, quibus in sacrificiis olim teste *Mose* Israelitæ fuerunt usi, sint maxime illa, quæ salubritate & bona nutritione præ ceteris se commendant, & succum gelatinosum nutritivum præbent.

§. VII.

Juscula, ex gelatinosis carnibus pro viribus roborandis

dis parata, non sine ratione iis exhibentur, qui per largas hæmorrhagias ac febres nimis æstuosas ingentem sanguinis jacturam fecerunt. Homines ac populi, qui ejusmodi gelatinosis alimentis fruuntur, quos inter Galli classem ducunt, & largiores, & crebriores sanguinis missiones melius ferre possunt, quam illi, quorum palatum ejusmodi cibus non adeo multum assuetum est.

§. VIII.

Chylus proximam sanguinis materiam constituit, & emulsionem quasi naturalem refert, quæ ex partibus oleosis temperatis, insipidis, aqueis & mucilaginosi composita est. Quare alimenta, quorum mixtionem partes chyli amulæ ingrediuntur, nutriendis partibus, lymphæque ac sanguini ingenerando, perquam idonea sunt.

§. X.

Lac, quod nihil aliud est, quam chylus, omnibus aliis, respectu nutritionis, antecellit & universale alimentum constituit.

Scholion.

Atque eam ob rationem lac non modo infantibus, sed aliis etiam perfectioribus animalibus, primum alimentum suppeditat, ut corpora eorum citius adolescant & celeriter robur ac maturitatem consequantur. Cibus enim solidior & compactioris naturæ, qui ventriculo negotium faceffit, tenellis corporibus minus quadrat, quoniam ventriculus ac intestina non tanto robore instructa sunt, quod ad solidorum ciborum, & solutionem, & expulsionem, necessario requiritur. Exinde autem nemini non perspicuum evadit, quare nonnulli populorum, imprimis autem Helveti, qui lac unice in deliciis ejusque usum frequentissimum habent, in tantam excrescant corporis proceritatem, ut vix ullam Europæorum gentem dignitate corporis habeant superiorem. *Plinius, Tacitus, Justinus, Cæsar, Salustius* memorant, solo lacte multos diu vixisse, & *Galenus Lib. V. de Sanit. tuend. cap. 7.* mentionem facit viri, qui ultra centum annos vixit solo lacte nutritus. In Hollandia & locis septentrionalibus, in Frisia quoque, multi solo potu lactis loco cerevisiæ contenti sunt. Et *Ovidius Lib. IV. Fastor.* scribit: *Lacte mero veteres usi memorantur & herbis, sponte sua si quas terra ferebat.*

§. X.

Omnia femina temperata, quæ succo lactiformi turgent, ad nutrientium classem referri debent.

Scholion.

Hinc sua luce radiat ratio, quare omnis generis frumenta & femina, ut hordeum, triticum, avena, fæcale, fabæ, pisa, amygdalæ, castaneæ, nuges pineæ, pistaciæ, oryza, amyllum, frumentum Saracenicum, frumentum Turcicum, animantibus alendis quam maxime sint opportuna, & quare farinæ ex frumento paratæ inque panem coctæ, inter alimenta principem locum obtineant. Et hinc nemini potest esse absconditum, cur homo solo pane & aqua vitam tolerare possit.

§. XI.

Panis inter reliqua alimenta principem locum tenet, nec facile eo sine sanitatis detrimento carere possumus. Ejus usus omni tempore, ætati omni ac temperamento accommodatus est, ideoque recte universale alimentum vocari potest, neque carnes & alia, sine pane, facile assumi possunt, quippe quæ sibi relicta nauseam creant.

Scholion.

Panis textura cum sanguinis & succi nutritii indole insignem alit conformitatem, siquidem partes temperatas oleosas & mucilaginosas, sal etiam subtile acidum

sibi admixtum habet, quod ventriculo valde amicum est, vimque succi fermentescibilis ac salivæ solventem acuit atque exaltrat. Quemadmodum autem non unum ideinque frumenti genus est, ex quo panis conficitur; ita alius alii falubritate antecellit. Optimus & valentissimi alimenti panis ex farina secalis sicca, non adeo candida, sed cui adhuc tenuiores surfures admixti sunt, cum fermento paratur. Teste enim analyfi chymica, nigricans, grossior panis, plus olei, quam candidus ac depuratus, per destillationem elargitur, gratiorem quoque odorem spargit, longeque magis vires instaurat. Vid. *Programma nostrum de Pane grossiori Westphalico, Germ. Pompernickel.* Qui vero ex hordeo, avena, frumento Turcico, oryza, vel etiam ex glandibus aut castaneis paratur, oneri est ventriculo, nec tanta vires reparandi facultate gaudet.

§. XII.

Ova, quoniam delibatissimum gelatinosæ acc pellucidæ lymphæ florem continent, quæ proximam nutritionis materiam constituit, celerrimam partibus alimoniam præstant.

Scholion.

Ova celerrime nutriunt, si mollia ac recentia fuerint, juxta *scholam Salernitanam: Si sumas ovum, molle sit atque novum.* Vitellus plures unctuosas, pingues & sulphureas partes fovet, albumen vero humiditas habet ac mucilaginosas, seroque sanguinis conformes, adeoque si ullus cibus, hic certe, universalis est, & liquorem imprimis feminalem auget. Convenit autem maxime, ubi corpus largiori sanguinis profusione, vel febre consumtum, celeriore nutritionem desiderat; quare etiam *Talmud* iis, quibus sanguis è vena missus est, ova forbilia commendat. Præcipue tamen senibus conducunt, qui bono nutrimento, & quod facile à ventriculo subigi potest, indigent. Ex adverso eorum usum, in illis improbamus, qui primam regionem bile, vel acidorum humorum colluvie repletam habent; eo quod corpora impura quo magis nutriveris, eo magis læseris. Sciendum vero, quod recentia exinde cognoscantur, si lumini opposita pelluceant, & forti igne cocta, lacteum adhuc liquorem custodiant.

§. XIII.

Caseus & butyrum universale & præstantissimum alimentum constituunt.

Scholion.

Quia lac in butyrum & caseum resolvitur, illudque ejus oleosas, hic vero mucilaginosas ac terrestres partes continet, facile apparet, hæc duo, præsertim pane & aqua accedentibus, præstantissimum & universale præbere nutrimentum, omni tempore, vitæ generi ac temperamento consentaneum. Quo vero recentius est butyrum, eo gratus est magisque sanitati conducit. Diuturniori vero tempore foedum & injucundum rancorem contrahit. Nimius ejus usus, fibras ventriculi relaxando, ejus tonum labefactat & nauseam excitat. Caseus butyro adjunctus etiam valide nutrit, non tamen nimis recens, nec nimis vetus esse debet. Ille enim, ventriculum onerat & alvum facile obstruit; hic vero acri sapore, & foetido onerat & alvum facile obstruit; hic vero acri sapore, & foetido odore imbutus, acrimoniam & impuritatem humorum augere solet.

§. XIV.

Quemadmodum sanguis & succus nutritius omnesque corporis partes ex tribus elementis sunt coalitæ, nimirum I.) sulphureo, oleoso, & inflammabili, II.) terreo alcalino subtiliori, fixiori tamen, III.) aqueo: ita alimentorum genera & facultates ad tres etiam has classes commodissime referri possunt.

Scholion.

Scholion.

Hæc triplicis generis alimenta, probe inter se mixta & fociata, demum succum nutriendo corpori idoneum constituunt.

§. XV.

Sulphuream partem maxime corpori largiuntur animalia eorumque carnes, præsertim affæ; ubi tamen notari meretur, quod animalia fera ac sylvestria, domesticis ac cicuribus, hoc respectu antecellant.

§. XVI.

Animantium carnes plus olei subtilis fovere, quam vegetabilia, vel exinde clarum ac perspicuum evadit, quoniam tempore æstivo celerrimam subeunt putredinem, & ingentem foetorem spargunt, quod in vegetabilibus haud quaquam observatur.

Scholion.

Vegetabilia in mixtionem suam admittunt acidum, adeoque eorum oleum magis est temperatum, herbis calidioribus exceptis. Animalia vero à mixtionis suæ confortio omne acidum proscribunt, omnesque eorum partes destillationis ope oleum subtile ac sal volatile fundunt. Hoc autem oleum intestinum calidum & fermentativum sanguinis motum præcipue excitat, & penetrantissimi foetoris originem præbet.

§. XVII.

Carnes affæ, ex animantibus feris ac volucribus desumptæ, sanguini majorem levioris sulphureæ substantiæ copiam, præ carnibus elixis & à domesticis animantibus petitis, elargiuntur.

Scholion.

Caro ferorum animalium & volucrium procul omni dubio levior, subtilior magisque oleosa est, pariori vero mucosæ & gelatinosæ materiæ quantitate gaudet, eam imprimis ob rationem, quia animalia sylvestria vehementiori motu corpora exercent, vitamque sub cælo libero ac puriori degunt, & cibo ficciori nutriuntur. Accedit, quod ipsa affatione multum humiditatis evaporet, unde oleosum principium ex admixtarum partium vinculis evolutum & mediante igne exaltatum, sui juris fit & præ reliquis eminet partibus.

§. XVIII.

Alimentis, quæ humidam partem sanguini foenerant, ex animantibus pisces, & ex vegetabilibus olera ac temperatæ radices, neque minus fructus quidam ex horæis, accenferi debent.

§. XIX.

Pisces destillationi subiecti multum phlegmatis, parum olei, pauxillum vero salis volatilis, præbent.

Scholion.

Quoniam pisces saltem de exiguo oleo ac sale volatili participant, ideo non tam facile in putredinem ruunt, eamque ob rationem in febribus non tam insignem, quam carnes, noxam afferre solent.

§. XX.

Ad tertiam alimentorum classem, quæ fixiorem ac terream sanguinis portionem custodiunt, omnis generis accedunt frumenta, ut sunt panis genera, oryza, pisa, fabæ, lentæ, castaneæ, amygdalæ, fructus cacao, caseus & reliqua diversi generis panificia.

§. XXI.

Ex dictis nullo negotio confici potest, ea saltem alimenta, quæ temperie gaudent & proxime ad chyli &

sanguinis similitudinem accedunt, nutritioni corporis esse accommodata.

§. XXII.

Omnia igitur, quæ à chyli & sanguinis natura & indole recedunt, vel plane aliena sunt, alendis partibus nequaquam inserviunt.

§. XXIII.

Omnia, quibus nimium acidi inest, minus nutritioni quadrant, quia lac & sanguis acidi confortium respuunt, quippe quod indolis à sanguine prorsus diversæ est, & humoribus vitalibus coagulum inducit.

Scholion.

Haud obscura jam esse potest ratio, quare nimius acetariorum, fructuum horæorum, præsertim qui adhuc crudi nec satis excocti sunt, ut & aceti, cerevisiæ acerbis, & vinorum, quæ acido abundant, usus, sanitatem insigniter affligat.

§. XXIV.

Nullum sal, cujuscunque etiam generis sit, in sanguinis, chyli & lactis mixtionem admittitur, quare omnia salia, & alimenta nimio sale condita, corporis nutritioni minus conveniunt.

§. XXV.

Sanguis & chylus nunquam cum spirituosissimis ineunt societatem, sed potius ab iis faciunt divortium, unde in proclivi est judicare, quantum detrimentum à copioso eorum usu & sanitas & corporis nutritio patiantur.

§. XXVI.

Dulcia, mellita & saccharata nullam quoque cum sanguine & chylo convenientiam habent, sed ab eorum textura plane dissident; siquidem eminenti sapore imbuta sunt, quo tamen sanguis, chylus & succus nutritius destituuntur.

Scholion.

Quamvis dulcia temperata partium gaudeant mixtura, adeoque nutritioni quodam modo idonea videantur, quoniam tamen dulce est sal sui generis, quod in aqua liquescit, hinc partium substantiæ apponi haud potest, siquidem ab humido præterlabente statim solvitur.

§. XXVII.

Alimenta, tuendæ sanitati idonea, non tantum materiam laudabilis succi in se reconditam habere, sed bene etiam à ventriculo dissolvi debent. Exinde necessario sequitur, ea ciborum genera, quæ ob duram & compactiorem texturam dissolutionis negotium facessunt, non adeo sanitati esse congrua.

§. XXVIII.

Carnes animantium ætate provectorum, infumatæ, salitæ, ova indurata, & omnis fere generis pisces marini, neque minus panis grossior secundarius, ob rigidioris magisque implicitum, quo gaudent, partium contextum, difficulter à ventriculo expugnari inque succum & sanguinem converti possunt.

Scholion.

Ejusmodi cibi duriores, ut intricatior eorum nexus disjungatur, multum caloris, copiam fermentalis & salivæ lymphæ & ventriculi robur desiderant; adeoque non nisi robustis corporibus, & quæ motu exercentur, conveniunt. Quam ob rem populi earum regionum, quæ versus septentrionem spectant, ut Sueci, Norvegi, Lappones, Finni, Westphali ac Pomerani, ab ejusmodi ciborum frequentiori usu non facile læduntur, quippe quorum ventriculus cum ab ipsa natura, tum etiam consuetudine firmatus, compactiora hæc alimenta levi negotio atterere ac conficere potest.

§. XXIX

§. XXIX.

Ex vegetabilibus radices, fructus ac herbæ, præsertim si crudæ & ante quam debita coctione emollitæ fuerint, assumantur, ventriculo in solvendo laborem exhibent; quoniam fibrosior eorum textura ægre digeritur.

§. XXX.

Alimenta ex vegetabilium regno petita eam quoque ob rationem oneri sunt ventriculo, dum multas flatulentias producunt, quæ primas vias variis turbis exagitant.

Scholion.

In hunc censum transcribi debent omnes fructus horæi crudiores, pisæ, fabæ, napi, rapæ, bulbi, brassicæ species, allium, cepæ, raphani, acetaria ex lactuca variisque herbis parata, pira, poma, pruna, mulsum, mel, mustum & omnia dulcia, quocunque etiam nomine veniant. Horum enim ea est conditio, ut facillime subeant fermentationem, vel etiam acorem concipiant, & ob viscosam suam tenacitatem in halituosos vapores resolvantur.

§. XXXI.

Tenaces ac glutinosæ animantium partes, quarum in numero sunt ventriculus, intestina, lienes, renes, rostra, vulvæ, aures, corium, ungulæ, difficilioris quoque sunt solutionis, nec menstruo ventriculi promte obediunt.

§. XXXII.

Pingua difficulter à ventriculo subjugantur; accedente enim acido, quo præsertim vegetabilia scatent, in coagulum abeunt.

Scholion.

Alcalinum liquorem desiderant pingua, qui implexam eorum compagem & coagmentationem optime recludit ac disjungit. Quare, ne pingua ventriculum affligant, sufficiens bilis accedat necesse est. Quando enim acidum ventriculi pinguium solutionem aggreditur, halitus & ructus sulphurei ardentes exsurgunt, qui fistulæ cibali molestiam creant.

§. XXXIII.

Quo viscosiores magisque rancidæ ac vetustæ sunt pinguedines, eo peioris sunt indolis. Meliori se modo habent recentiores & quæ facilius solutioni obtemperant.

Scholion.

Elucet exinde ratio, quare pinguedo bovina, si cibi cum ipsa coquantur, non æque noceat, ac vervecina, hoedina, suilla & anserina. Patet quoque causa, quare omnes carnes fumo duratæ ac vetustiores, ob rancorem, quem pingua procedente tempore contrahunt, ut & lardum, quod fitum flavumque colorem duxit, tuendæ sanitati neutrquam consentanea haberi debeant.

§. XXXIV.

Ut nutritionis negotium rite expediatur, crustæ intestinorum villosæ oscula chyli liquorem imbibere & ad sanguinis massam transvehere debent. Quare omnia, quæ cribrosam hanc tunicam obstruunt, vel plus justo constringunt, non sine aliquo sanitatis dispendio assumuntur.

Scholion.

Quoniam effœta alimentorum massa, à qua chylus jam separatus est, motu intestinorum expansivo & constrictorio, per tubulosum eorum canalem foras ejici debet, propterea obvium intellectui est, quam ob causam sanitatem offendant alimenta, quæ intestinorum volumen ægre trajiciunt, quæ eorum motum sufflamant,

Frid. Hoffmanni Oper. Tom. I.

tonuinque & robur infringunt, salutarem alvi excretionem supprimendo.

§. XXXV.

Acida, constringentia, mucida, glutinosa, viscosa, austera, coagulo facile obnoxia, eam imprimis ob causam sanitatem oppugnant, quia intestinorum tonum labefaciunt, & hac ratione impediunt, quo minus superflua ciborum fœces per inferiora eliminantur.

Scholion.

Hanc insalubritatis notam incurrunt omnes fructus horæi & immaturi, pira, mala cydonia, punica, mespili, fructus acaciæ & myrtillorum, panis bis coctus, crusta panis, panis mucidus, durus ac grossior, vel calide furno extractus, omnia farinacea, pultes ex pis, fabis, lentibus ac milio paratæ, placentæ ac panificia non factis subacta ac fermentata, caseus in nimia quantitate assumtus, lac ovillum, omniaque lacticia & pinguedines, quæ omnia noxam inferunt insigniorem, vino, vel acidis, vel potionibus frigidis, simul sumtis; ita enim in firmum coagulum densantur, quod intestinorum tunicis immobiliter infixum, tenuissimorum vasorum capita spisso lentore incrustat, unde uber flatuum & spasmodorum proventus est.

§. XXXVI.

Alimentorum insalubritas vel ex eo æstimari debet, quando ventriculi vim fermentativam & solutricem infringunt, & ita generationi cruditarum favent.

Scholion.

Fermentalis succi actione nervant omnia pingua, oleosa, prædulcia, mel, mulsum, uvæ recentes, fructus horæi, ficus virides; omnia quoque legumina, farinacea, pultes ex milio factæ; neque minus omnia tepida, olerum radices fibrosæ, caseus & lac coactum ac solidatum; quæ omnia sanitati eo infensiora sunt, quo majori quantitate jejuno ventri ingeruntur.

§. XXXVII.

Omne acidum omnisque putredo corporis vitali conservationi valde adversantur, hinc alimenta, quæ in ventriculo facile acorem aut putredinem concipiunt, insalubrium numero jure meritoque adscribi debent.

Scholion.

Acidum primis viis pariter, ac sanguini hostile & inimicum est, siquidem bilis balsamicam & alcalinam indolem destruit, succo chyloso coagulum inducit alvi que excretionem moratur. Deinde acidum sanguini affusum eum ad spissitudinem & coagulum disponit, unde humorum stagnationes viscerumque infarctus graviores proveniunt. Putredo vero, intra primam regionem concepta, latius ad interiora corporis penetralia serpens, succis, etiam optimæ indolis, exitiosam labem affricat. Cibis vero, qui ex diuturniori mora facile in primis viis acescunt, annumerari debent omnes fructus horæi, lac, mel omneque pistorium opus, dulcia varique generis vina, mustum, mulsum & panis fermentatus. Et qui in celerrimam putredinem ruunt, quando diutius in primis viis subsistunt, præcipue sunt carnes elixæ. Nulla enim alimenta facilius, quam carnes, in putredinem inclinant. Quare non sine ratione natura in omnibus morbis acutis & ubi corpora variis impuritatibus repleta sunt, sponte à carniū usu abhorret, cujus institutum laudabiliter adjuvant medici, qui agris juscula nutritiva interdiciunt. Hujus generis enim alimenta putredini, quæ formalem malignitatis causam constituit, mirum quantum velificantur. Unde in peste & morbis populariter grassantibus à carniū esu abstinere consilium est, quo tempore acidula, quæ putredini admodum inimica sunt, operam plane insignem præstant. Hoc

K

ipsum

ipsum tamen de illis corporibus intelligendum est, quæ infirmiora sunt, febre decumbunt, vel multas impuritates in humoribus accumulatas habent; unde jam olim recte dictum est ab *Hippocrate*: *quod corpora impura, quo plus nutriantur, eo magis lædantur*. Imprimis vero ad putredinem in corpore producendam inclinant pisces corrupti, & foetore ac putrilagine infectæ carnes, vel etiam ex animantibus depromptæ, quæ vitiosam quandam labem intra corpus aluerunt.

CAPUT V.

De alimentis aliorum insalubritatem corrigentibus.

§. I.

Nihil est, quod insalubrium alimentorum noxam magis arceat, quam corpus humanum robustum ac valens, quod calore, motu, tono vivido ac vegeto fibrarum instructum, protinus per debita emunctoria ea expellit, adeo, ut nocere nequeant.

§. II.

Plura quoque sunt ex alimentorum classe, quæ non adeo corpori amicam esculentorum facultatem corrigunt, & ne noceant, efficiunt.

§. III.

Inter præstantissima ciborum corrigentia sunt potus calidi referendi, infusa videlicet thée, caffèe, vel aliarum herbarum, quæ cum aqua ebulliente facta & præsertim post digestionem absolutam assumpta, insigni virtute pollent.

§. IV.

Potus aquæ calidæ, herbis roborantibus conditus, cruditates mucosas, viscidas, acidas, à digestionem in prima regione relictas, & tunicis intestinorum eorumque crustæ villosæ inhærentes, diluit, abstergit, dissolvit, temperat, ut per alvum facilius descendant, neque intestina ullo modo, vel acrimonia, vel inflatione, lædant.

§. V.

Potus caffèe non modo ob calidam aquam proficiuus est, sed & insuper terreo suo, amaricante, alcalino oleoso principio, acido - viscidas sordes, ex glandulosa intestinorum crusta eluit acidumque contemperat.

Scholion.

Ex his dictis jam facile patet, potum aquarum calidum & infusa theiformia, cum aliis præstantibus herbis facta, non sine ratione commendari & insignem quoque fructum ferre, modo non statim post cibum, vel cum ipso ingerantur. Ingens quoque ab hisce potibus fructus est expectandus, dum omnis generis succos reddunt fluidos, omnia emunctoria aperta servant, sanguinis circulum, & hujus beneficio omnes excretiones, præsertim perspirationem, promovent.

§. VI.

Ad salubritatem alimentorum, & ne corpus offendant, multum faciunt condimenta, quæ cum cibis assumuntur.

§. VII.

Omnia condimenta in tres classes commodissime redigi possunt, nempe ad sal acre & oleosum, magis vel minus volatile, vel ad sal acidum, vel ad sal falsum.

§. VIII.

In eorum numero, quæ sale & oleo volatili subtilissi-

mo constant, condimenta sunt sequentia, videlicet omnia aromata, piper, zingiber, caryophylli, cinnamomum, cardamomum, nux moschata, flores macis, cortices citri, aurantiorum, & ex plantis sale volatili oleoso turgentibus semen sinapi, herba nasturtii, cochleariæ, raphanus rusticanus, radix armoraciæ & omnia ceparum, allii ac porri genera, item cuminum, anisum, anethum, thymus, satureja, majorana, basilicum, origanum Creticum, salvia, petroselinum, pastinaca, radix cichorii, herba pimpinellæ, piperitis, ranunculus esculentus, artemisia, folia lauri, myrti, baccae lauri, juniperi, & id genus plura alia.

Scholion.

Hæc omnia egregie mucositates incidunt, resolvunt, digestionem promovent, flatu discutiunt & excretionem per alvum transpirationem, urinam adjuvant.

§. IX.

Ad acida corrigentia spectant acetum vini, vinum ipsum, succus citri, aurantiorum, agrestæ, cappares conditæ.

Scholion.

Acida, moderate cibis admixta, appetitum excitant, digestionem & solutionem ciborum, imprimis durorum & compactorum, adjuvant & putredini potenter resistunt.

§. X.

Ad condimenta falsa spectat sal commune, quod condimentorum princeps merito salutari debet, sine quo omnis cibus gratiam saporis perdit, nec bene à ventriculo & natura corporis subigitur. Hinc sale fortiter condita, ut haleces, fartellæ, olivæ sale conditæ, cortices citri sale conditi, eodem effectu gaudent.

Scholion.

Hæc salia, quæ neutrius sunt generis, partim mucositatem dissolvendo, digestionem alimentorum secundant, partim etiam irritando alvum movent, urinam cient & excretionem omnis generis, sine quibus sanitas non diu subsistere potest, egregie promovent.

§. XI.

Multum quoque interest, ne ciborum qualitas & quantitas nocumentum afferant, debito ordine eos assumere.

§. XII.

Non convenit prandii vel jentaculi initium facere à dulcibus, à pinguibus, farinaceis, lacticiniis; quippe hæc omnia vim fermentalem ventriculi enervant & valde labefactant.

§. XIII.

Melius sanitati consulunt, qui prandium à paulo durioribus, induratis, salitis & vegetabilibus, oleraceis & leguminosis incipiunt, utpote quæ recentem adhuc & vegetam fermenti salivæ vim requirunt. Hisce subjungendæ sunt carnes & postea farinacea, dulcia ac fructus horæi cum butyro, quæ ad expeditiorem ingestorum descensum per alvum multum conferunt.

§. XIV.

Coena requirit cibos facilioris solutionis, ne eorum stagnatio in ventriculo ipsum inflet ac somnus turbetur.

Scholion.

Præstat itaque in coena assumere juscula & bene nutrientes cibos, ut ova sorbilia, quia nutritio de nocte optime perficitur; abstinere autem oportet ab omnibus durioribus, gravioribus, dulcibus & omnibus inflantibus, vel quæ succos corrodescentes, acres & acidos fov-

§. XV.

§. XV.

Cavendum maximopere est, ne dulcia cum acidis & potibus fermentescibilibus, cerevisia nempe recenti, invicem ingerantur.

Scholion.

Vidimus hac ratione, in corporibus præsertim imbecillioribus, biliosis & iracundiæ deditis, cholicas passiones, ac ventris & colica tormenta atrocia, non sine periculo, excitata.

§. XVI.

Deterrima res est, in ventriculum acidis cruditatibus obfessum ingerere lactinia, caseum copiosum, imo pultes ex pis, ex milio, oryza, cum lacte paratos, vel inter hæc acida & austera vina, aut acetosos fructus, vel acetaria assumere, eo quod hac ratione nocens firmum coagulum producat, quod ægerrime dissolvitur & ingentes creat molestias.

Scholion.

Quantæ turbæ in primis viis flatulentæ & spasmodicæ ab ejusmodi alimentis & lactiniis, quæ ventriculum ab omnibus impuritatibus, præsertim acidis, liberum desiderant, excitentur, dici vix potest, & quo imbecillius & ad ejusmodi afflictiones magis proclive corpus offendunt, eo gravior noxa inde est expectanda.

§. XVII.

Neque minus digestionem offendit, liquores spirituosos, ipsumque spiritum vini, lactiniis, dulcibus, farinaceis, neque minus duris, mucilaginosi, alimentis, superingerere.

Scholion.

Pravo & communi more receptum est, juvandæ digestionis causa, post dura & compactæ substantiæ alimenta, spirituosam assumere; quandoquidem tantum abest, ut hæc dissolvendi facultate polleant, ut potius duras jam ingestorum fibras rigidiores & compactiores efficiant, ac præterea chylo & sanguini coagulum & spissitudinem inducant.

§. XVIII.

Quamvis multa ex alimentis dentur sanitati incongrua, nihilo minus tamen minus efficiunt, si parciore manu offerantur & cum aliis conjuncta usurpentur.

Scholion.

Sicuti omne nimium, tam ratione quantitatis, quam qualitatibus, naturæ maxime est inimicum, ita parum, licet intemperatum, minus nocet. Improbamus itaque frequentem & copiosum insalubrium ciborum usum potius, quam ut in totum eum, si moderatior fuerit, rejicere velimus, præsertim si corpus fuerit robustius motuque se exerceat & iis assuetum sit. Semper enim, recte monente Hippocrate, consuetudini aliquid dandum, & consueta, uti habet, aph. 50. Sect. II. multo tempore, etiam si deteriora fuerint, inconsuetis minus molestare solent.

CAPUT VI.

De potulentorum salubri ac insalubri natura.

§. I.

Quemadmodum sine solidis alimentis, ita etiam sine liquidis, nec homo, nec cætera animantia, vitam tueri possunt; quia solidum ac fluidum duo sunt præcipua vitalium humorum elementa.

Frid. Hoffmanni Oper. Tom. I.

§. II.

Sanguis convenienti fluiditate destitutus, per minima vascula non ferri, nec circulari potest, hinc ad vitam liquido nequit carere ullus.

§. III.

Sine humido, nulla nutritio, nulla liquidorum progressio, generatio, secretio, excretio, neque ulla fluiditas, aut solidorum unio, vel mixtio, tam in vegetantium, quam in animantium regno, fieri potest: hinc aqua præcipuam vitalium humorum ipsiusque sanguinis partem constituit.

§. IV.

Sanguis humanus, cum cura examinatus, quando è vena mittitur, tres partes ad minimum liquidi, ad unam partem solidi elementi, referendas, continet: hinc facile colligitur, liquidi usum ad vitam tuendam plus conferre, quam solidi rationem, & potum alimentis solidis prævalere.

Scholion.

Potus, modo sit congruus & mixturæ animali non adversus, nimia quantitas non facile nocet, quod vero de solidis dici nequit, unde proverbium, plures perire gula, quam potu, enatum est.

§. V.

Ergo potus aquæ, qui antiquissimus, omnium primus & communissimus est, ad vitam & sanitatem tuendam commodissimus haberi debet.

Scholion.

Non modo omne animantium genus, sed & maxima pars hominum, solius aquæ potu vitam conservat; & saltem paucae gentes sunt in plaga septentrionali degentes, quæ cerevisiis utuntur.

§. VI.

Aquæ potus, omnibus cerevisiis & per artem paratis liquoribus, salubritate antecellit, quia aqua est purior, simplicior, fluidior, omnes vero reliqui potus multis heterogeneis & solidioribus partibus referti sunt.

Scholion.

Cerevisia & vina multis partibus acidis & spirituosiss, item glutinosis, alimentosis, substantificis ac salis particulis saturati sunt liquores, unde partim nutriunt, partim etiam non satis fluidum sanguinem & excretorios tubulos apertos servant, sed viscositate obstruunt & humores spissos efficiunt.

§. VII.

Aqua pura ad fluiditatem humoribus conciliandam, ad extrahendum ex cibis utilem succum, ad referendas obstructions & dissolvendas viscositates, ad evendendas excrementitias salinas è corpore sordes, ad succum nutritium poris partium intime insinuandum, omnibus aliis humidis præstantior est, quia levior, fluidior, subtilior, mobilior & plus solidi solvere, absorbere & recipere potest, quam aliud gravius liquidum, cujus pori multum sunt repleti.

§. VIII.

Aquæ purissimæ, five calidæ, five frigidæ, potæ, digestionem peracta, tempore matutino, aut si cubitum ire velimus, sanitati admodum conducunt.

Scholion.

Qui sanitati suæ consulere & graves à corpore morbos arcere cupiunt, cerevisiis vero & vino assueti sunt, iis omni modo usum aquæ puræ, simplicis, frigidæ, vel calidæ, cum herbis convenientibus infusæ, maximopere commendamus, & quidem frigidam aquam

æstate & calidioribus subiectis. Calida vero nunquam nocet, sed semper utilis est, siquidem emendat cruditates à digestionem in ventriculo & primis viis relictas, abstergit oscula tunicae villosae ac glandulosae, mucositates diluendo aperit, salia excrementitia vero, & biliosam pituitam diluit; tum & sanguinis circulum & omnes excretiones eximie adjuvat, unde medicina præservatoria adversus omnes morbos certe in aqua salubri requiescit.

§. IX.

Experientia constat, aquae potatores saniores, longæviores & edaciores esse iis, quibus cerevisia in usu est.

Scholion.

Aquae potatores dentes habere firmiores & nitidius albicantes, certissimae experientiae fide confirmatum est; carie vero magis laborant, facile exeduntur & albedinis gratiam exuunt, in iis, qui crassis, vel etiam dulcibus potibus fruuntur & qui scorbutico malo vexantur, luculento testimonio, aquam ab hoc malo præservare, succos vitales ab excrementitiis & corruptivis partibus vindicando. Neque dubium est, quin scorbutus, populis septentrionalibus adeo familiaris atque endemius, maxima ex parte cerevisiarum potui adscribi debeat, à quo plane immunes sunt ii populi, quibus aqua pro potu inservit. Notatu digna existat observatio in *Misc. Nat. Curios. Dec. I. A. III Obs. XV.* de senectute obigit, neque aliam proferre potuit longævitatis causam, quam potum aquarum ex scopulis & fontibus vivis scaturientium, quibus à teneris delectatus fuerat. De *Andrea Tiraquello* JCto referunt, eum solo aquae potu contentum, tam sanum corpus, cum sana mente habuisse conjunctum, ut quadraginta liberis progenerandis, totidemque foetibus ingenii edendis, suffecerit. Usus quoque docet, eos, qui aquam bibunt, oculorum aciem diutius conservare, quam qui vino aut cerevisiis indulgent.

§. X.

Aqua, quo purior, quo subtilior & levior est, eo magis sanitati inservit; quo vero magis heterogeneis partibus referta, quo gravior, eo minus salubris habenda est.

Scholion.

Ratio in procinctu est, quia quo purior, simplicior & magis sincera est, eo plus continet fluidi, ætherei elementi in interstitiis suis, hinc plus addit virium liquido nervorum & eo magis quoque ad solutionem partium viscidarum, ad extractionem succi chylosi, neque minus ad eluendas & evehendas excrementitias è corpore sordes apta est. Puritas vero & levitas aquarum optime cylindro statico à nobis invento, qui accuratissime etiam minimam aquae gravitatem indicat, vel admixtione solutionum metallicarum, aut salium alcalinorum, demonstrari potest. Quae heterogeneis partibus, praesertim calcareis refertae, protinus, ab admixto oleo tartari per deliquium, turbidae evadunt, latelescent & sedimentum deponunt.

§. XI.

Aqua pluvialis, quoniam aqua destillata est, subtilior & levior est omnibus fontanis & fluviatilibus.

Scholion.

Hoc jam sua ætate agnoverunt *Hippocrates* & *Celsus*; sed opus est, ut colligatur non in urbe, sed in rure inque editioribus locis & sub libero & aperto coelo, postea ut conservetur in figulinis, vel vasis vitreis, sedimento prius deposito, maxime in locis frigidioribus.

§. XII.

Ad aquam pluviatilem proxime accedit fontana, hac

inferior est fluvialis, gravis & insalubris ex puteo, posthæc ex nive aut glacie, gravior ex lacu, gravissima ex palude.

Scholion.

Optime *Celsus Lib. II. c. 18.* de præstantia & notis bonitatis aquae differit, *levis*, inquit, *aqua pondere apparet & ex his, quæ pondere pares sunt, eo melior quæque est, quo celerius & calefit & frigescit, quoque celerius ex ea legumina percoquuntur.* Plura de differentiis aquarum levium à gravibus, subtilium à duris & asperis, salubrium ab insalubribus, vid. in *diff. nostra de aqua Medicina universalis*, nec non *tom. II. opusculor. physico-meduor.*

§. XIII.

Aqua impurior & salubrior optime coctione, leniori tamen, vel destillatione, ut & varia rerum admixtione, corrigitur.

Scholion.

Quando diutius aqua decoquitur, particulae omnes subtiliores nimis avolant, crassioribus relictis: nam & particulae, quæ aquam constituunt, sunt ratione ponderis & subtilitatis differentes, hinc videmus, longe sapidiorem fieri potum coffeæ, quando cum aqua paratur, quæ non adeo diu percocta fuit: destillatione vero partes terrestriores & graviores ad fundum descendunt, quod liquido apparet, quando in patina sub calore leni aquas evaporari patimur. Siculi aquam palustrem per lapidem, qui filtrum dicitur, depurant, siquidem ex poris huius lapidei filtri aqua prodit limpida, terreae vero sordes in illo retinentur. Corrigitur vero noxa aquarum additione vini, spiritus vini, succi citri, vel etiam aceti vini, neque minus panis tostii, argillæ tostæ, vel cornu cervi usti.

§. XIV.

Nulla aqua insalubrior est, quam quæ ex lacu, ex paludibus, vel etiam ex nive, hauritur.

Scholion.

Stagnantes aquae & solis calori expositae incipiunt putrescere & complura exigua insecta generare, multumque terræ pinguis, viscidæ in se recipiunt, unde non modo foetorem concipiunt, sed & pondere graviores fiunt & multum sedimenti evaporatione relinquunt, sub qua, quod curiosum est, multas bullulas cum strepitu emittunt: aqua vero nivalis & glacialis gravior est communi, quia ipsa congelatione textura aquae immutatur & particulae æthereae, subtiliores, à gravioribus liquidis secessum faciunt, quæ postea liquefactione, vel si in locum calidum deferantur, cito avolant: quare aqua ante congelationem ponderata, & post eam liquefacta, semper paucior & levior evadit.

§. XV.

Quia liquidum, quo subtilius est, quo purius, quo facilius excretoria transit & intima corporis nostri subit, eo salubrius habendum est, hinc cerevisiae præstantiores eae sunt judicandae, quæ specifica levitate gaudent, nec adeo crassae, aut lupulo, vel alimentosa substantia saturatae, tum quæ facile & ventriculum & omnia emunctoria transeunt & cito per urinam redduntur.

Scholion.

A salubritate & insalubritate cerevisiarum certe multorum morborum quibusdam locis familiarium ratio, & incolarum salubris, vel morbofa dispositio, dependet; unde omnis, qui artem salutarem exercere vult, ad harum naturam attendere debet.

§. XVI.

Optimae notae cerevisia est, si non caput gravat, in ventriculo non acescit, hypochondria non inflat, sique cito per urinam excernitur.

Scholion.

Scholion.

Sicut vero hæc indicia sunt salubris cerevisiæ : ita quando contrarium evenit, malæ notæ cerevisia iudicanda est.

§. XVII.

Bonitas cerevisiarum primo à salubri aqua, secundo à debita ingredientium coctione, denique à fermentatione multum dependet.

Scholion.

Quo salubrior aqua fontana est, eo præstantiorem exhibet cerevisiam, & quo subtilior aqua, eo plus ingredientia extrahit, eoque melius fermentescit; deinde diuturniori coctione cerevisiæ salubrem naturam acquirunt & nutritiva hordei substantia coctione mitescit & quasi maturatur, & lupulus vaporosum suum grave sulphur in auras emittit; fermentatione vero crassum à subtili separatur atque extruditur.

§. XVIII.

Omnis vero cerevisia crassa, turbida, feculenta, minus fermentata, acida & quæ non sufficienter cocta fuit, caput gravat, flatuum est procreatrix, obstructions, stranguriam, asthma & colicam generat.

§. XIX.

Vina, five dulcia, five spirituosæ, vel acida, aut temperata fuerint, congruum potum ad nutritionem & ad alendas corporis solidas & fluidas partes, minime constituunt, siquidem eorum mixtio ac crasis à natura sanguinis plane aliena est.

§. XX.

Vina itaque merito inter medicamenta, five alimenta medicamentosa, quibus & concoctio ciborum, & excretio alienorum, nec non virium & caloris restitutio; egregie adjuvatur, referenda sunt.

Scholion.

Profecto vinum inter nobiliores medicinas principem locum tenere meretur, siquidem vix ulla in rerum natura medicina, quæ tanta virtute instructa est, acido, spirituosæ, temperato, vires ventriculi & universi corporis restaurandi & circulum sanguinis promovendi, quam præstantissimæ notæ vinum, moderate ac prudenter usurpatum: unde etiam non sine ratione à divo *Paulo*, modicus vini usus, ad infirmum ventriculum roborandum, commendatur.

§. XXI.

Vinum acido-spirituosum motus vitales systoles & diastoles in universo corpore resuscitat, hinc sanguinis circulum & calorem auget; unde ejus usus iis proficius est, qui virium resuscitatione opus habent, naturæ debilioris, frigidæ & humidæ sunt, ac multa alimenta cruda & humida assumerunt, vitæque sedentariæ indulgent & vires variis ex causis amiserunt.

§. XXII.

Usus vero vini, præsertim immoderatus, minus convenit iis, qui multum caloris habent, ut infanti, juvenili ætati & qui calidioris temperaturæ sunt, corpus motu exercent, tempore æstivo & qui agilioris sunt animi pulsusque celerem habent.

Scholion.

Sicut enim natura, five sanus ac ordinatus corporis nostri status, gaudet temperato sanguinis motu: ita creber & immoderatus vini usus, intemperiem caloris & motus introducendo, ad labefactandam sanitatem paratissimus est.

§. XXIII.

Juvat egregie bonum vinum moderate sumtum coctionem & perspirationem crudorum alimentorum.

Frid. Hoffmanni Oper. Tom. I.

Scholion.

Quate assumtis fructibus horæis & variis piscium generibus, etiam marinis, oleraceis atque infantibus, non inconvenienter vinum admiscetur & superbibitur.

§. XXIV.

Præstantissimum & saluberrimum vinum judicatur, quod nec nimis spirituosum, nec acidum est, sed temperatum, quod non gravat caput, aut in ventriculo stagnat, vel acescit, sed cito excretoria per urinam & perspirationem transit.

Scholion.

Dulcia vina augent sanguinem & plethoram facile ingenerant; spirituosæ nimium commovent humores; acida ac nimis tartarea facile acescunt atque stagnant in ventriculo; quæ vero vaporoso sulphure scatent, capiti imprimis molesta sunt & nervos debilitant, unde ad multos & graves morbos usus eorum frequentior disponit.

§. XXV.

Quia igitur vinum magis vicem medicamenti, quam alimenti gerit, parciore semper manu præbendum est; & sicuti conveniens ejus usus optimæ medicinæ loco habendus est, ita etiam vini abusus nocet ac sanitatem offendit.

Scholion.

Experientia suffragatur, quod, qui vino largius indulgent & prima statim ætate bibunt, minus longævi sint, uti contra aquæ potus & vini abstinentia multas gentes macrobios reddunt.

§. XXVI.

Vinum cum aqua pura temperatum ac dilutum, quale erat omne Græcorum vinum, sanitati magis conducibile est, quam vinum purum.

Scholion.

Laudandus veterum in eo mos est, quod pro diversitate naturarum, anni temporum atque ætatum, valde curiosi ac circumspecti erant in temperando vino cum aqua, adeo, ut interdum duas partes aquæ, uni parti vini admiscerent, interdum vero plus, vel etiam minus vini adderent. Egregia hinc sunt, quæ habet *Tackius chrysog. anim. mineral. p. 99.* dum ait: *dilutum aqua merum, ut antiquis præferri cæpi; sic dolendum, hodierno seculo id ipsum in mortalium detrimentum evilescece cæpisse; quum sic nocituri spiritus frangantur faculentiaque terrestres rectius ad urethres, mediante lymphæ, deducantur, nec tam cito coagulationi spiritus vini pareat, si sit temperatus.* Cavendum tamen est, ne vinis nix aut glacies admisceatur, præsertim tempore æstivo, quia ventriculi & intestinorum motus peristalticus hac ratione facile læditur, & morbis tam acutis, quam chronicis gignendis, occasio præbetur.

§. XXVII.

Ex spirituosæ, Hungaricæ omnibus palmarum præripit, iisque commendandum est, quibus cibi facile in ventriculo acescunt & qui morbis chronicis obnoxii sunt.

§. XXVIII.

Largior vini boni usus quibusdam corporibus medicinam præbet, excretiones per alvum, urinam & transpirationem augendo.

Scholion.

Vina Mosellana & Rhenana temperatiora illud corpori præstant beneficium, ut largiori etiam manu sumpta, alvum sollicitent, urinam cieant ac transpirationem moveant: hinc in corporibus humidioris naturæ & ubi crudorum humorum copia est, quandoque profunt, tamen

tum abest, ut noceant, moderatione tamen & cautione semper opus est.

§. XXIX.

Moderatus spiritus vini usus, præsertim si cum saccharo dilutus fuit, in defectu vini, ad calorem resuscitandum, in corporibus humidioribus, admitti potest.

CAPUT VII.

De moderatione in victu optima sanitatis conservatrice.

§. I.

NUllum præsentius ad vitam producendam tuendamque sanitatem datur præsidium, quam moderatus & conveniens cujuscunque corporis naturæ victus.

Scholion.

Omne enim moderatum conservationi corporis nostri est convenientissimum, sicuti omne nimium naturæ est inimicum. Sub moderato & æquabili cordis & arteriarum motu ac systole, viget sanitas, quæ etiam convenientem & moderatam mensuram, quæ nec excedat, nec deficiat, sanguinis & humorum postulat. Hæc vero temperantia in victu maxime comparatur. Sapienter hinc *Hippocrates Lib. de Morb. §. 10. Si homo, inquit, parum edit, & parum bibit, in nullum morbum incidit.* Et *lib. VI. Epidem. sanitatis studium est, non satiari cibis & impigrum ad laborem esse.* Notum hinc elegans proverbium: *modicus cibus, modicus medicus.* Antiquioris ævi philosophi, quos inter *Plato* & *Socrates* eminent, simplici ac tenui victu consueverunt. *Pythagoras* suam philosophandi rationem à sobrietatis studio exorsus est. Et *Plato* in *Charmide* præclare dicit, temperantiam vitæ custodem esse; qui etiam in *Gorgia* præcipit, ut, qui vitam beate & salva sanitate traducere velit, hanc imprimis virtutem exerceat. Vid. etiam *Seneca Epist. XCI.* ubi gravissimos & plures morbos, à luxuria ortos, enumerat. Cæterum *Cornarius Venetus*, qui tenui semper diætâ usus, vitam ad centum ac viginti annos perduxit, insigni etiam est documento, quantum simplex & circumcisus victus, in vita proroganda efficere possit.

§. II.

Quemadmodum adhibita in victu moderatio vitæ ac sanitati quam maxime patrocinator: ita nimia ciborum repletio, & vitæ, & sanitati, multis modis adversa est.

Scholion.

Optime *Celsus Lib. I. cap. 11. ait, ubi ad cibum ventum est, nunquam tuta est nimia satietas.* Cujus in sententiam conspirat *Hippocrates Sect. II. Aphor. IV. Neque, inquit, aliud quicquam bonum est, quod naturæ modum excedit.* Nimia nimirum ciborum copia, nec bene à ventriculo concoqui, neque in succum laudabilem converti potest. Neque etiam chylus, ex nimia ciborum abundantia extractus, probe à sanguine subigitur, & hinc perspirationi parum idoneus est. Quemadmodum autem perpetuo inter movens & mobile justa debet esse proportio, quo conveniens motus perficiatur, adeo, ut læsa hac proportionem, motus ipse etiam male se habeat; ita hæc proportio perturbatur, quando succi mobiles virtuti cordis ac fibrarum motrici nimis, quam par est, resistunt.

§. III.

Exundans succorum copia non modo ventriculi & intestinorum tunicas & parietes, sed & cordis arteriarumque fibras motrices, supra modum distendit earum-

que elaterem ac vim contractivam labefactat; unde tardior humorum progressus proficiscitur.

§. IV.

Tardiori factò succorum in corpore progressu, ea, quæ excerni debebant, remanent, & succi nimium accumuluntur, hinc cruditates ac stagnationes fiunt, & hac ratione multorum morborum origo stabilitur.

Scholion.

Peritissime dictum est ab *Hippocrate Sect. I. aph. 17.* cibum præter naturam copiose ingestum morbum facere, atque à medicis, abdomen insaturabile, non inepte perniciofa sentina omniumque tam animi, quam corporis vitiorum fons appellatur. Hinc etiam illud apud Germanos in proverbii consuetudinem venit: *dass der Vielfrass mehr auffreißt, als das Schwerd, und dass sich viele zu Tode gefressen.* Quam ob rem itidem aureum est monitum, quod *Syracides* proponit *cap. XXXVII. v. 32. seq. Ne esto insatibilis omnibus deliciis, neque projectus esto ad escas.* Nam multis cibis adhæret morbus, & insatiabilis voracitas maxime accedit ad choleram. Voracitate insatiabilis voracitas maxime accedit ad choleram. Voracitate insatibili multi sunt mortui. Idem *cap. XXXI. v. 22.* ita fatur: *laboriosæ vigiliæ & cholera torminaque adsunt viro insaturabili.*

§. V.

Cibi, licet sint saluberrimi, nimia assumti in quantitate, magis sanitatem affligunt, quam intemperati, quando parciori modo assumuntur.

Scholion.

Observamus, à nimia repletionem, & ingenii, & corporis, alacritatem pessundari, contra vero lassitudinem, torporem, pigritiam ac somnolentiam, sub rariore præsertim labore ac motu, corpus occupare. Omne enim quod modum excedit, naturæ est inimicum, sive vitalem sanguinis circuitum lædit, quia nimia succorum resistantia tonum ac motum fibrarum infringit, quem intemperatum quoddam, parcius assumtum, non adeo labefactare potest.

§. VI.

Nulla quantitas in se & absolute spectata, sed certa saltem ratione ac respectu, mala, vel noxia vocari potest. Hinc etiam affluens alimentorum & succorum copia, non ex se metienda est, sed ex viribus motricibus, quibus corpora ac partes solidæ instructæ sunt.

Scholion.

Proportio quantitatis innoxie, sufficientis ac perniciose, in singulis individuis, exactiori habito ad illa respectu, investigari debet. Quod enim in nonnullis extra modum est & sanitatem oppugnat, id aliis valde est congruum & nullam omnino sanitati infert injuriam. Hinc apprime ad veritatem sunt, quæ tradidit *Hippocrates lib. de vet. med. c. 15. oportet, scribens, modum aliquem conjectare. Modum autem, neque pondus, neque numerum aliquem ad quem referas, cognoscas. Certitudinem enim exactam, non reperies aliam, quam corporis sensum.*

§. VII.

Vires corporum, quo magis fractæ ac debilitatæ sunt, eo magis patent incommodis, quæ à nimia ciborum quantitate proficiscuntur; quo vero firmiores magisque robustæ sunt, eo minor noxa ab abundante ciborum quantitate extimescenda est.

Scholion.

Omnibus igitur, qui imbecillioris naturæ sunt, qui corpus causarium trahunt, vel etiam ex morbo, aut alia quadam causa vires depressas habent, tenuis ac parcior victus

De moderatione in victu optima sanitatis conservatrice. 115

victus omni ratione commendandus est, ne morbum exulcerent, vel in deteriorem incidant, aut quoque recidivam patiantur.

§. VIII.

Nimiae & nocentis ciborum copiae plerumque comes est vehemens eos ingerendi aviditas, ita, ut intra breve tempus ingenti ciborum cumulo se ingurgitent.

Scholion.

Hac effreni edendi cupiditate & intemperantia praecipue laborant, qui modo ex morbo convaluerunt, qui diutius inedia vel fame pressi fuerunt, ut milites ex castris redeunt, vel qui multum acidi priinis in viis alunt, ut hypochondriaci, quartanarii, melancholici & maximam quoque partem pueri, qui vermibus infestantur. Multum sibi etiam hac in re vindicat sola, sed prava consuetudo. His vero omnibus, praesertim ob naturae debilitatem, nimia ciborum satietas perquam noxia est, morborum sanationem, ex quibus laborant, haud parum impediens, ipsas remediorum vires infringendo & hebetando; quare, nisi haec tollatur voracitas, nulla prorsus spes morborum sanationi relicta est.

§. IX.

Edendi aviditas hoc imprimis vitium sibi conjunctum habet, ut cibi debita masticatione non satis comminuantur, sed subito demittantur in ventriculum, ubi soluturo humori gastrico mirum quantum refragantur.

Scholion.

Ut alimenta masticationis ope decenter permolantur, utique ad secundandam concoctionem magnopere necessarium est; tunc enim saliva, ceu genuinum menstruum microcosmicum, copiosius cibis admiscetur, qui activo hoc liquore imbuti, citius à ventriculo conficiuntur. Alias vero crudi, nec dissoluti, intra primas vias diutius, quam par est, subsistunt, unde cruditates, inflationes ac tensiones ventriculi, neque minus somni perturbationes proveniunt.

§. X.

Ciborum varietas nimiae aviditati apprime multum lenocinatur & ad maiorem satietatem invitat; eamque ob causam omni studio ac ratione vitanda est.

Scholion.

Recte scribit *Sanctorius in Libr. de cib. ac Pot. aphor. 51. tria mala eveniunt ob ciborum varietatem: nimium comeditur, minus concoquitur & minus perspirat.*

§. XI.

Quo crudiores & compactioris texturæ cibi sunt, eo insignior inde noxa emergit, quia non solum nimia eorum distensio robur ventriculi destruit, sed etiam eorum succus ad sanguinem delatus, non nisi difficulter perspiratione diffilari potest.

Scholion.

Cibi difficilioris concoctionis sunt carnes animalium ætate provectorum, duræ, exsiccatae, fumo duratae, panis cibarius grossior, pisces marini, caro suilla, anguillarum, pingua, farinacea, legumina, acetaria, vina austera, ova indurata & id genus plura.

§. XII.

Ciborum aviditas, seu festinata duriorum ciborum deglutitio, praecipue ab iis aliena esse debet, in quibus vires affectæ sunt; quo minor enim est vis corporis, eo minus cibus digeritur, subigitur & transpiratione depuratur, unde cruditates morborumque origines petendæ sunt.

Scholion.

Quotidiana, sed tristis loquitur experientia, plurimum damni hac ratione pati imbecilliores, quorum in numero sunt puerperæ omnesque valetudinarii, & qui modo ex morbo convaluerunt, aut nimiam sanguinis jacturam perpeffi sunt, ut & milites ex castris reduces facti; quæ subjecta graves & insanabiles inde morbos sibi contrahunt.

§. XIII.

Tantum ingerendum, quantum absumtum est, tantum excernendum, quantum concoctum.

Scholion.

In sano homine & qui perfectum staturæ augmentum consequutus est, tantum ejicitur, quantum assumtum fuit; hinc natura non ante novis alimentis oneranda est, quam debita excretio præcesserit. Quantitas autem evacuatae materiae, partim ex ipso ejus pondere, partim ex corporis agilitate, cognoscitur.

§. XIV.

Scite dicit *Sanctorius Lib. II. aph. 33. Si sciveris quotidie, quantum cibi tibi conveniat, scies vitam diutissime conservare.*

Scholion.

Hoc levi negotio indagari potest, quando non ante novus corpori cibus ingeritur, quam priora alimenta probe concocta & foras eliminata fuerint; cujus rei perspicua indicia præbent somnus quietus, feces alvo exclusæ, corporis animique agilitas, levitas & ventriculus nullo affictus incommodo. Si vero contrarium eveniat, tunc certus quis esse potest de ciborum cruditate ac imminente morbo, nisi mature succurratur.

§. XV.

Præstat alimenta, cujusvis naturæ ratione quantitatis ac temperiei accommodata, partitis vicibus, quam semel & simul, de die assumere.

Scholion.

Quemadmodum omni menstruo, cum re solvenda, justa semper intercedere debet proportio; ita facile exinde conficitur, quod ciborum quantitas, simul & semel ingesta, non tam exacte dissolvatur, quam si partitis vicibus assumitur. Siquidem copia salivalis ac fermentalis succi & calor ventriculi digestorius, tantæ alimentorum quantitati solvendæ, neutiquam sufficiunt. Optime hinc *Sanctorius loc. cit. aph. 37. loquitur: magis homo gravatur ob octo libris ciborum, semel in die ingestorum, quam à decem, tribus vicibus una die assumtis.* Conducit itaque non semel de die, sed potius bis, in meridie nimirum ac vespere, cibum capere; infantes vero & imbecilliores, parum saltem unica vice, sed eo frequentius, edere oportet, ne ventriculo obruto, vires prosterantur. Nostri temporibus, communi quidem, sed minus laudabili consuetudine receptum est, semel tantum de die, sed plenius & ad superfluam satietatem usque, cibum capere, quæ tamen consuetudo magis ad commodiorem rerum civilium administrationem, quam ad sanitatis tutelam proficua est. Illud vero hoc loco tenendum, quod cœna parciore, & cibus facillimæ concoctionis ac boni nutrimenti instructa esse debeat. Calor enim de nocte, ob deficientem sanguinis & corporis motum, paulo est moderatior, perspiratio quidem æquabilis, sed tardior, nutritio vero nocturno tempore commodissime peragitur. Quam ob rationem accisa ciborum quantitas, & alimenta, quæ ventriculo facilius obsequuntur, cœnæ quam maxime sunt accommodata. Expeditius autem à ventriculo digeruntur pisciculi, pulli, aviculæ, juscula, vegetabilia cocta, panis similagineus. Carnes vero induratae, an-

guillæ, pisces marini, extremæ animantium partes, omnia pingua, caseus, butyrum, castaneæ, imprimis vero aceraria & flatulenta, minus cœnæ inserviunt, adeoque eorum usus tunc temporis ex toto circumcidendus est.

§. XVI.

Quo major ciborum copia ante præcedentium concoctionem ingeritur, eo major colligitur cruditarum congeries & salutaris perspiratio sufflaminatur.

Scholion.

Cibus in ventriculo non satis percoctus ibique stagnans, non modo eum flatu implet ac distendit maximasque efficit anxietates, sed & morborum, præsertim febrium, segetem ac materiam præbet. Quare scite dictum est à veteribus, vitium primæ concoctionis, non corrigi in secunda, vel tertia. Et quia insensibilis perspiratio tertiæ concoctionis excretionem constituit, hinc prima cessante concoctione, & ventriculo repleto, perspiratio læditur. Nulla vero secundum *Sanctorium* major pestis est valetudinis, quam cibo non cocto, alium cibum ingerere.

§. XVII.

Præclara sunt, quæ *Sanctorius Lib. I. aph. 54.* tradit: *qui comedit, inquit, magis, quam oportet, alitur minus, quam oportet.*

Scholion.

Conueniens corporis nutritio à succo alibili temperato perficitur, qualem indolem induit, quando perspirationis beneficio, ab omnibus fordibus excrementitiis probe est depuratus. Quia vero nimia ciborum copia, perspirationi præcipue infensa est, hinc etiam succus alibilis impurus & nutriendis partibus parum idoneus evadit.

§. XVIII.

Quemadmodum nimia repletio multa corpori humano incommoda inducit: ita etiam inedia non semper tuta, sed sæpius cum quadam noxa conjuncta est.

Scholion.

Quicquid enim à temperie recedit, illud naturæ adversatur; amica vero ipsi est mediocritas & moderatio, quæ virium custos ac optima sanitatis conservatrix est, sicuti omnis intemperies, in excessu, vel defectu peccans, sanitatis pestis ac perniciēs habenda est.

§. XIX.

Nimia fames, sive inedia, hominum vires insigniter prostermit & non nunquam in summum vitæ discrimen adducit, cujus rei indubia experientia locuples testis est.

Scholion.

Hippocrates de Vet. Med. §. 15. satis acute tradit, *famem magnam potentiam habere in naturam corporis, ipsum sanandi, debilitandi & occidendi.* Nimirum corporis nostri vires partim à subtiliori & puriori aëris pabulo, partim à crassioribus alimentis suam trahunt originem, adeoque earum essentiam materia quædam subtilis constituit, quæ cito collabatur, & mediante perspiratione continuo in auras avolat. Hinc ea perpetua aëris inspiratione & alimentorum usu quotidie refarciatur necesse est, quod si negligitur, homo ingentem virium jacturam facit, tandemque brevi tempore exacto, prorsus enecatur. Atque adeo vel hoc unico argumento, insulsa eorum opinio destruitur, qui omnes vires ac motus corporis à principio quodam immateriali dependere statuunt, quum tamen in confesso sit, motus ac vires pro lubitu aëre & alimentis immui & augeri, vel etiam destrui posse & conservari.

§. XX.

Corporibus succi plenis & humida carne tumentibus,

vel quæ multas cruditates intra primam regionem fovent, omnium maxime abstinentia imperanda est.

Scholion.

Laude dignum est effatum *Hippocratis Lib. de vet. Medicin. §. 15.* *fames magnam potentiam habet sanandi homines.* Cujus sententiæ calculum adjicit *Celsus Lib. II. cap. 16.* *nulla res, inquit, magis adjuvat laborantem, quam tempestiva abstinentia.* Abstinentiæ autem nonnulla genera sunt: est, ubi homo nihil assumit, vel saltem exigua & pariori ciborum quantitate fruitur: est etiam, ubi cœnam intermittit, aut ad minimum semel in hebdomade jejunium instituit.

§. XXI.

Sicuti tempestive adhibita abstinentia in repletis vires oppressas erigit ac resuscitat; ita diutius producta, in macilentis & infirmioribus eas detrahit.

Scholion.

Firmo talo stat *Celsi* judicium, quod *Lib. II. cap. 16.* proponit his verbis: *Si fames sanis corporibus inutilis est, quanto inutilior erit infirmis, nedum ægris.* Et eam ob rationem *Hippocrates Sect. II. aph. 16.* laborantibus famem interdicit.

§. XXII.

Inedia gelatinosam sanguinis ac lymphæ substantiam resolvit humorumque quantitati detrahit, vires extenuat, & sanguinis imminuta quantitate, perspirationem reddit languidiorem.

Scholion.

Minor sanguinis quantitas ad emunctoriorum tubulos non satis perungere, neque eos apertos servare potest, hinc evenit, ut concidant & excrementis exitum ex cute intercludant, unde acrior & impurus humor in venis colligitur. Quantam vero noxam ac debilitatem fames afferat, insigni documento sunt milites, qui bono nutrimento in castris fuerunt destituti, vel diuturnam famem sustinuerunt. Hi enim ex levissima subinde causa, v. g. à vulnere, non adeo per se periculoso, moriuntur, vel etiam, si copia ciborum fractum ventriculi robur sollicitant, febres malignas sibi contrahunt.

§. XXIII.

Uti in diuturnum tempus producta inedia perspirationem remoratur: ita corpore decenter rursus nutrito, copiosius perspirationis excrementa prodeunt ac vires magis magisque reficiuntur.

Scholion.

Accedens novus ad sanguinem succus humores ad tubulos cutis excretorios protrudit, unde interceptæ ibique stagnantes acres excrementorum reliquæ eliduntur.

§. XXIV.

Cavendum est, ne fracto inedia corpori, copia ciborum, qui difficilius solutionis sunt, aut valentissimum ac plenum nutrimentum præbent, ingeratur, quoniam vires corporis & alimenta assumpta iusta semper inter se proportionem ac mensuram conspirare debent.

Scholion.

Hippocrates Lib. 2. aph. 7. jubet: *per inediam debilitates sensim reficere, non vi.* Et *Lib. de Aliment. §. 8.* inquit: *magna res est quantitas, selerti ratione adaptata.*

§. XXV.

Qui ex quacunque causa aliquam sibi contraxerunt debilitatem, eos pauca saltem alimenta & quæ facile solvuntur & perspirationi idonea sunt, assumere oportet.

§. XXVI.

De excretionibus ad vitæ ac sanitatis tutelam necessariis. 117

§. XXVI.

Nocent quam maxime infirmioribus ac diuturnam inediam passis intemperata, salsa, acria, spirituosâ, cruda ac dura, temperata vero eos egregie juvant.

Scholion.

Hæc enim ita comparata sunt, ut factam humorum iacturam non refarciant, sed potius eorum intendunt acrimoniam; cibi vero, quibus temperies inest, succos viresque deperditas longe facilius restaurant.

§. XXVII.

Quemadmodum nimia ciborum repletio ac fames sanitatem affligunt, ita & nimia potus copia ejusque defectus corporis integritati insidias struunt.

Scholion.

Omnia enim, quæ mediocritatis terminos egrediuntur, secundum verissimam *Coi* sententiam, naturæ exosa sunt, adeoque omnium animis, qui sanitatem salvam volunt, semper obversari debet aurea hæc regula: *In omnibus moderatio & mediocritas*. Sanguis enim, ut vitæ ac nutritioni idoneus sit, certam, qua solidi, qua fluidi, mensuram desiderat, quæ si turbatur, vel plane invertitur, benigna etiam ac naturæ amica ejus indoles pessum eat necesse est.

§. XXVIII.

Vitalis humorum circuitus perque minimorum variorum alveolos progressio, quæ continuas secretiones & excretiones sibi conjunctas habet, plus liquidi quam solidi postulat, quare nimia liquidorum inopia incredibile quantum sanitatem lædit.

Scholion.

Tres ferme partes liquidi ad unam solidi partem referendas sanguini inesse, jam supra exquisitoribus rationibus stabilitum est. Atque hinc facile colligitur, quod ad servandam hanc fluidi ac solidi proportionem, major potus, quam ciborum copia assumi debeat. Ubi enim contrarium accidit, sanguini spissus ac tenax lentor inducitur humoresque tardius in orbem circumeunt, & hac ratione obstructionibus, magnorum morborum procreatricibus, occasio subministratur.

§. XXIX.

Plures hominum, præsertim tamen foeminas, sufficientis potus penuria, in gravissimas subinde ægritudines præcipitat.

Scholion.

Verbis exprimi vix potest, quantum detrimenti affert potus parcius, hominibus præsertim otio ac vitæ sedentariæ addictis, quos inter foeminæ classẽ ducunt. Quanta enim morborum seges inde non propullulat? Alvus contrahitur, tardius procedit transpiratio & abdominis viscera humorum tenacitate infarciuntur, unde menstrui fluxus suppressiones, ac spasticæ diuturnæ, quas hypochondriacas vocant, passionẽs, omniaque, quæ a scorbuto proficisci dicuntur, mala, & interdum etiam synochæ, putridæ ac funestæ febres, satis larga messe proveniunt.

§. XXX.

Et si ad tuendam boni sanguinis indolem major liquidi quam solidi quantitas requiratur; est tamen, ubi etiam mediocritatis leges transcendendi possunt, existente imprimis potu incongruo.

Scholion.

Congruum potum constituunt aqua pura ac laudabilis, omnesque potus temperati, quorum usus, si intra modum est, non facile aliquod corpori incommo-

dum affert. Incongrui potus nobis audiunt cerevisiâ crassâ, vinum ac spiritus vini, à quorum copioso & frequenti usu, nunquam non insignis noxa expectanda est.

C A P U T VIII.

De excretionibus ad vitæ ac sanitatis tutelam necessariis.

§. I.

Totius vitæ ac sanitatis fundamentum perpetuis ingestionibus & egestionibus superstructum est, ac tota machinæ humanæ structura organica cum in finem ita est comparata, ut ex ingestis, prævia solutione, boni ac laudabiles succi ad sanguinem redundant, & omnia superflua & inutilia è corpore eliminantur.

Scholion.

Vitalem corporis nostri conservationem, omnesque actiones animales, motu sanguinis omniumque fluidorum perfici, jam supra solidis rationibus adstructum est. Quum autem motui progressivo calor quasi perpetuus comes adjunctus sit, qui sanguini infert mutationem, dum humores dulces, pingues ac gelatinosos intensiori agitatione resolvit, qui exinde à naturali sua temperie deflectunt, inque falsas, sulphureas, mucidas & a corpore plane alienas sordes degenerant; eam ob rationem necesse est, ut humores temperie exuti per diversa emunctoria è corpore ejiciantur, quorum in locum novi ac recentes succi, corpori ac nutritioni apprime utiles, surrogari debent. Ad oculum exinde patet, summa ingestionum & excretionum utilitas.

§. II.

Eadem materiæ quantitas, quæ ingesta fuit, è corpore jam plene ac perfecte adulto rursus excerni debet.

§. III.

Homo omni ex parte sanus & corpus labore exercens ultra viginti sæpe libras ex potulentis & esculentis quotidie assumit, quum tamen ejus corpori nulla fiat ponderis accessio. Penitus ergo manifestum est, ingestorum & egestorum quantitatem exactissime inter se invicem convenire.

Scholion.

Totius medicinæ cardo maxime in eo vertitur, ut medicus ad ingestorum & egestorum rationem prudenter respiciat. Prout enim mutue ingestiones & egestionẽs in corpore celebrantur, ita etiam stat, vel cadit sanitas; siquidem ab incongrua ingestione & inconvenienti excretionẽ, morbi maxima ex parte suam trahunt originem. Ipsa quoque natura in morborum amolitione excretionum beneficio utitur, quippe cujus motus adaucti eo potissimum collineant, ut excrementitiæ sordes, quæ morbum accendunt, ex ambitu corporis exturbentur. Quare medicum, apud quem valetudinis & tuendæ & restaurandæ cura excubat, illud imprimis agere oportet, ut excretorios naturæ conatus rimetur, eosque, si rei necessitas exigat, decenti opera adjuvet & ad finem salutarem sapienter dirigat. Quam in re qui sufficienter exercitatus est, ille veri medici officio summa cum laude perfungitur.

§. IV.

Quemadmodum corpus humanum ex quatuor potissimum elementis mixtum est, terrea nimirum, aquea, salina & pingui, seu oleosa parte: ita etiam producta ex his excrementa, ad quatuor imprimis classes reduci possunt.

§. V.

§. V.

Inutiles ac superflui humores per alvum, urinam, perspirationem, sudorem, sputum & mucum narium, à corpore removentur.

§. VI.

Alvus fordes præcipue crassiores, viscidas, terrestres ac mucidas è corpore excludit: urina serum superfluum, cum salino ac sulphureo principio, rudiori & crassiori, evehit: transpiratio fluidum tenue, & subtile sal ac sulphur eliminat; mucus vero narium partes viscosas, terra & aqua mixtas, ab utilium humorum consortio abalienat.

§. VII.

Per alvum non modo ciborum fæces & scoriam, sed & bilis, quæ satis copiose ad intestina affluit, partes terrea & crassiores, una cum muco, quem intestinorum glandulæ largius plorant, ejiciuntur.

§. VIII.

Alvi purgamenta ex viscida & solidiori materia constant, hinc in procinctu est ratio, quare diuturniori retentione auctoque corporis calore, duritiem induant.

§. IX.

Nimia alvi retentio magnam humoribus conciliat impuritatem, dum fordes excrementitiæ, vel mora in pejorem indolem ruunt, vel etiam per intestinorum poros ac tubulos ad sanguinem revertuntur. Quam ob rationem omni modo laborandum est, ut alvus sanitatis tuendæ causa quotidie semel, vel repetita vice, suum faciat officium.

§. X.

Ex physiologicis perspectum est, bilem alvinæ excretionis esse stimulum; idcirco biliosus humor, vel deficiens, vel male constitutus, augeri, vel emendari debet.

Scholion.

Optime hoc præstat auctior motus corporis, qui humidi superfluum absumit, tenacitatem humorum attenuat, ipsamque bilem egregie corrigit. Pertinent huc etiam cibi aromatibus & sale conditi, omniaque amara, quæ bilis efficaciam insigniter acunt.

§. XI.

Labascente & segniori facto motu intestinorum peristaltico, alvinarum fecum exclusio retardatur.

Scholion.

Motum ventriculi & intestinorum peristalticum, alimentorum reliquias, per intestinalem tubum ad anum usque devolvere, jam alio loco demonstratum est. Fractum vero intestinorum motum excitant medicamenta maxime salina, ut sal Glauberianum, nitrum, arcanum duplicatum & tartarus vitriolatus. Ex laxantibus eminent pilulæ, quas aloë in refracta dosi ingreditur & quæ ad *Becheri* exemplum confectæ sunt. Ex alimentis autem huc spectant omnes cibi acres, salsi ac dulces, qui paulo majori in copia assumti, alvum egregie ducunt, eamque nunquam non laxiorem servant.

§. XII.

Humida alvum insigniter fundunt, & alvinarum fæcum descensum magnopere adjuvant, ideo sufficiens portus quantitas, ad digerendam alvum, præcipue commendanda est.

§. XIII.

Qui alvi beneficium quotidie experiri volunt, eos à parciore potu, à cibis duris, adstringentibus, acidis, viscidis, mœrore, nimiaque voracitate & frequentiori spiritus vini usu, abstinere decet.

§. XIV.

Ut nimia alvi durities plurimum sanitati adversatur; i/a nimia ejus laxitas, seu crebrior dejectio neutiquam pro sanitate est.

Scholion.

Qui alvum fluxam ac citatiorem habent, eos omnia stimulantia evitare oportet, quorum in numero sunt cibi nimium saliti, acres, fermentescibiles, dulces, aromatibus large conditi & pingues, quibus etiam ex affectibus ira adjungenda est. Sub nimia vero alvi laxitate, ad diluendam acrimoniam, potius absorbentia ac diluentia, sique deperditus intestinorum tonus in causa est, temperata balsamica conveniunt.

§. XV.

Urinæ fluxus succos serosos salino-sulphureos è corpore subducit.

§. XVI.

Urina, quæ sub integro corporis statu redditur, non nimis tenuis, alba, aut copiosa, nec nimis parca & saturato colore tincta esse debet. Optimum vero sanitatis vigorem ea indicat, quæ vini Rhenani colorem refert.

Scholion.

Urina, quæ tam ratione coloris & quantitatis, quam consistentiæ, à naturali statu deflectit, sanguinis ac humorum & motum & temperiem depravatam designat. Nimis enim aquosa ac tenuis, calorem cum ventriculi, tum totius corporis, depresso patefacit. Nimis vero crassa, colorata ac sedimentum deponens, caloris aucti humidique deficientis index est. Hinc nitrosa, humectantia ac diluentia, admodum accommodata sunt, ab omnibus vero spirituosus & calidioribus abstinendum est. Quando urina non bene redditur, tunc morbi ex ferro falso, acri propullulantes, ut catarrhi, rheumatismi, calculi, tumores cum cachexia, expectandi sunt. Hinc semper omni cura providendum, ut liberior satisque copiosa fiat urinæ profusio. Urinam vero majorem in modum movent cerevisiæ tenues, infusa calida, ex alimentis radix asparagi, fraga, mala persica, petroselinum, pastinaca, ranunculi, cepæ; fructus cynosbati, baccæ juniperi, semen anisi, fœniculi, lac ejusque serum, semina quatuor frigida majora, & id genus alia.

§. XVII.

Transpiratio maxime omnium impuras & excrementitias fordes è corpore evehit, serum tenue halituosum salino-sulphureum per cutaneos poros elidendo.

Scholion.

Hoc enim intra corpus retentum, facile putridas humoribus inducit corruptiones, & febres mali moris accendit, vel etiam seri falsi decubitus, rheumatismos, diarrhœas, catarrhales febres cutisque exulcerationes excitat. Optime profecto annotavit *Sanctorius*, perspirationem omnibus reliquis excretionibus, quibus humanum corpus perfungitur, antecellere; siquidem eas non modo excrementorum pondere, inprimis in calidioribus regionibus superat, sed corpus etiam ab iis foribus immune reddit, quæ intus relictæ, multas graves injurias sanitati machinantur.

§. XVIII.

Curandum est, ut perspiratio, omnium excretionum præcipua, rite semper succedat, ne halituosæ fordes, quæ expelli debent, interceptæ, aliorum, cum insigni sanitatis dispendio, divertantur.

Scholion.

Perspirationem inhibent ac retro vertunt externum frigus, subita aëris ac tempestatum mutatio, cibi acidi ac difficulter

De excretionibus ad vitæ ac sanitatis tutelam necessariis. 119

difficulus solubiles inque copia assumti, inquietus animi & nimia alvi evacuatio.

§. XIX.

Transpirationi favent aer purus, serenus ac ficcus, cibi solubiles ac molles, moderatus motus, ex affectibus lætitia mentisque tranquillitas, somnus, septem vel octo horis finitus & qui corpore contra externum aerem stragulis probe munito capitur. Juvant quoque potus levior ac tenuis, infusa herbarum cum aqua calida, panis bene fermentatus & frictiones.

§. XX.

Quemadmodum à partibus sanitatis semper stat mediocritas: ita etiam insensibilis hæc cutis excretio magnopere sanitati conducit, si moderate se habet. Nimia enim perspiratio, universo corpori vires detrahit; depressior autem, humoribus inducit putredinem.

Scholion.

Præclara sunt, quæ Hippocrates Sect. VII. aph. 66. & 67. ita prodit: *qualia sint, quæ per urinam & alvum exeunt, & quæ per carnes abeunt, spectare oportet: nam si pauca, parvus morbus est, si multa, magnus, si valde multa, jam erit perniciosum.* Et Lib. de Insomn. §. 11. scribit: *sanitatem hominis designat & corpus se recte habere, omnes circuitus & excretiones & secretiones salvas & integras esse.*

§. XXI.

Non inutiles tantum ac superflui humores è corpore amoveri debent, sed utiles etiam & laudabiles succi, si eorum adest redundantia, magna cum opportunitate è corpore exterminantur. Seminis ipsiusque sanguinis tam per uteri, quam ani venas rejectio, sanitati maximum sæpe adjumentum affert.

§. XXII.

Frequenti experientia cognitum habemus, nimiam feminis retentionem corpori inertiam ac torporem inducere, & molestis sæpe nervorum affectibus primam dare originem.

§. XXIII.

Seminalis liquor delibatissimus, quasi flos sanguinis ac liquidi nervorum est, hinc diligenter circumspiciendum, ne immoderata ejus excretio sanitatem offendant.

Scholion.

Seminis ejectio sanum ac vegetum corpus desiderat, quia vires exhaurit & corpus necessario robore defraudat. Quare rogatus Pythagoras, quando celebrandus esset concubitus? sapienter respondit: *tunc, quando te ipso vis infirmior fieri*; teste Lartio in Vit. Pythag. Eamque ob rationem imbecillioribus, pueris & qui proventioris ætatis sunt, vel non ita pridem cum morbo in gratiam redierunt, veneris usus saluberrimo consilio dissuaderetur. Neque sanitati suæ consulunt, qui post graves animi labores, agitationes ac vigilias, veneri indulgent, quippe qua ratione ingentem corpori debilitatem contrahunt. Quum autem veneris exercitium non nisi vegeto & valentissimo corpori conveniat, hinc ejus usus ventriculo imprimis depleto, facta perspiratione, post somnum quietum, balneum, cibi facile solubilis beneque nutrientis assumptionem, & quod caput rei est, tempore potissimum vernali, sanitati quam maxime opportunus est. Hæc omnia enim ejusmodi sunt, ut amissum robur instaurent, & pristinum corpori vigorem restituant, adeoque veneris exercitio egregie velificentur. Qui denique veneri frequentius litare volet, eum vitare oportet omnes crapulas, inediam, labores, studiorum intemperantiam, venæ sectiones, vigilias, purgationes & omnia, quæ vires ullo modo frangere, aut destruere, possunt.

§. XXIV.

Veneris exercitium, ex Celsi sententia, non inutile est, quod corporis neque languor, nec dolor sequitur, sed quod corpus excitat viresque non opprimit. Cavendum tamen est, ne venerem cibis, vel labor cum vigilia, statim excipiat.

§. XXV.

Ut moderatio in tuenda sanitate per omnia plurimum valet, ita ejusdem quoque ratio in convenienti veneris usu habenda est.

Scholion.

Unumquemque vires suas metiri decet, ut quid valeant, quidve ferre recusent, perspectum habere possit: pro harum enim conditione moderatio instituenda est. Nam qui robustus est omnique ex parte valet, ille sine ullo sanitatis dispendio veneri indulgere potest, quæ tamen alium, minori robore instructum, insigniter debilitat.

§. XXVI.

Providens natura maxime in eo occupata est, ut omne nimium, quod sanitati insidiatur, è corpore proscribat. Atque hinc nocentem materiam non modo ordinariis motibus aggreditur, sed & novas sæpe & insolitas affectat vias, quibus, vel qualitate, vel abundantia, sibi molestos humores è corpore protrudere & amoliri possit.

§. XXVII.

Homo ut plurimum majorem, quam pro sanitate, alimentorum copiam ingerit, eamque ob causam superfluos sæpe humores in venis alit; hinc natura ad commune protelandum exitum sese accingit, & extraordinarios producit motus, quibus insurgens, omne superfluum & quicquid noxam minatur, è corporis diversorio profligat & excutit.

§. XXVIII.

In sequiori sexu, intra mensis spatium superfluum collectus sanguis, per uteri ejusque vaginæ venas insigni cum sanitatis emolumento evacuatur; siquidem ab hac evacuatione turbata, vel penitus oppressa, multorum morborum, graviumque symptomatum, quibuscum mollior sexus subinde conflictatur, origo derivanda est.

Scholion.

Quoniam hæc sanguinis rejectio foeminino generi non minus familiaris, quam salutaris est, hinc nullo modo prohibenda, vel perturbanda, sed summo potius studio servanda est. Si enim hoc genitale profluvium modum excedit, moderandum ac coercendum est, sin plane deficit, arte proritari inque ordinem redigi debet.

§. XXIX.

Sanitas muliebris sexus ab hac evacuatione maxime dependet; idcirco fæminas eam vivendi rationem colere & amplecti decet, quæ promovendæ huic excretioni accommodata est.

Scholion.

Ut salutaris hic fluxus sanguinis rite & ordine procedat, caveant sibi foeminæ ab omni graviore animi commotione, ira, terrore, moestitia diuturna; fugiant etiam frigoris injurias frigidæque potiones, & ex alimentis, cibos acidos, duros, flatulentos & qui ventriculo solvendi negotium exhibent. Juvat vero quam maxime potu aquarum calidarum, quibus herbæ infusæ fuerunt, sanguini fluiditatem conciliare, cibis mollioribus uti, corpus moderate movere, semperque animum eo advertere, ut salutaris perspiratio salva & integrâ conservetur.

§. XXX.

Nobilior sexus solenni quoque excretioni obnoxius est,

est, qua sanguis, ex liberaliori victu ac motus intermissione, plenius & redundanter in corpore collectus, per venas hæmorrhoidales, statim quibusdam temporibus, imprimis autem vere & autumno, salutarem prorsus in finem foras ejicitur.

Scholion.

Hæmorrhoidalem fluxum plerumque patiuntur plethorici, qui exinde haud exiguum levamen sentiunt; quam ob causam quoque salutaris hæc sanguinis profusio à Germanis satis splendida appellatione, *die guldene Ader*, insignita est. Adeoque provideri oportet, ne utilissima hæc sanguinis depletio ulla ratione intercipiatur.

§. XXXI.

Sanguinis, quamlibet sinceri ac laudabilis, per ani venas rejectionem, ingens corpori afferre emolumentum, vel ex eo clarum ac perspicuum evadit, quia homines, salutari hoc fluxu turbato, vel penitus suppresso, gravissimis subinde passionibus corripiuntur.

Scholion.

Oriuntur inde chronicæ & periculi plenæ ægritudines, hydropes, asthmata, apoplexia, aphonia, tormina ventris, & plura ejus generis incommoda, quæ solennes sanguinis evacuationes suppressas pressio pede insequuntur.

§. XXXII.

Natura alias quoque exquirat vias, quibus se nimia sanguinis abundantia exoneret; siquidem in puerili ac juvenili ætate, ut plurimum sanguinis per nares profusionem molitur.

Scholion.

Sanguinis per nares fluxiones teneriori ætati familiares sunt, ac sæpe salutaris criseos vicem sustinent, quæ etiam interdum ad provectiorem ætatem usque continuantur. Hinc liquidissime apparet ratio, quare ejusmodi sanguinis profusiones, nisi homines in apertum sanitatis ac vitæ discrimen adducere velimus, nunquam sufflaminari aut plane intercipi debeant.

§. XXXIII.

Neque vero solum providentia naturæ accidit, ut superabundans sanguinis sinceri copia à corpore proscribatur, sed eadem quoque tales adornat motus, quibus superfluam serosi humoris quantitatem sanguini detrahit.

Scholion.

Non raro evenit, ut homines exundante sero repleti, per aliquot dies alvum fluxam solitoque molliorem experiantur, quæ tamen copiosæ dejectiones eorum sanitati admodum opportunæ ac fructuosæ sunt. Hinc neutiquam ratione destituitur *Celsi* hac de re judicium, quod *Lib. II. cap. 4.* hunc in modum proponit: *una die fluere alvum, quin & pluribus, sæpe pro valetudine est, modo absit febris, & intra septimum diem conquiescat.*

§. XXXIV.

Quandoque etiam feri falsi superfluum largius per urinam ejicitur.

Scholion.

Notatu digna sunt, quæ hac de re tradit *Sanctorius P. I. aph. 65. 66. corpora*, inquiens, *sana & moderatissimo victu utentia, singulis mensibus sunt ponderosiora, ita, ut ad duas libras pondus crescat. Redeunt autem ad consuetum pondus circa finem mensis ad instar mulierum, facta crisi per urinam paulo copiosior & turbidior, præcedente capitis gravitate, vel corporis lassitudine, quæ paulo copiosiori urina separata, protinus sedantur.*

§. XXXV.

Est etiam solennis falsi feri evacuatio, quam natura vernali & autumnali maxime tempore, per nares asperamque arteriam in catarrhis, coryza ac tussi instituit.

Scholion.

Præcedentibus enim corporis gravitate, horrore & calore, quasi febrilem in modum aucto, ingens feri copia, sæpe per aliquot dies, cum insigni sanitatis allevamento, ejicitur.

§. XXXVI.

In quibusdam natura certo noctis, vel anni tempore, copiosum sudorem amat effundere; quæ tamen evacuatio nullam post se relinquit lassitudinem, sed potius vires mirifice erigit.

§. XXXVII.

Ad salutare naturæ excretionem referri debent crusta infantum lactea, tinea capitis, scabies, purpura, in foeminis fluor albus, quibus se natura ab humoribus excrementitiis, falsis, acris & corruptis vindicat.

Scholion.

Recensitæ excretionem in se neutiquam insalutares appellandæ sunt, dum corpus à pravis humoribus liberant. Hinc nemini non potest esse perspicuum, quam graves ii committant errores, qui has evacuationes externis constringentibus cohibere moliantur. Siquidem materia, à qua omnis mali origo defluit, retro in corpus versa, longe graviores symptomatum exacerbationes producit.

C A P U T IX.

De motu optimo sanitatis præsidio.

§. I.

Nihil est, quod utilissimam superflui & nocentis humidi perspirationem tam egregie juvet, quam motus corporisque exercitatio, qua tuendæ sanitatis vix præsentius datur auxilium.

Scholion.

Ad sanitatis conservationem maximum momentum habent excretionem, quarum princeps est insensibilis perspiratio, id quod in superioribus fuse deductum est. Quum vero insensibilis perspiratio, secundum *Sanctorii* calculum, plus intra diem evacuet, quam reliquæ excretionem omnes à corpore evehunt, hinc magnam ejus vim esse, cum in tuenda sanitate, tum in morbis arcendis, recte colligitur.

§. II.

Perspiratio à sanguinis circulo dependet, quare quæ illum vel celerem reddunt, vel tardiorē, ea salutarem hanc evacuationem vel augment, vel minuunt.

Scholion.

Tubuli subcutanei excrementum halituosum falsosulphureum à sanguine segregant, idque per cutis meatus à corpore divellunt. Quo major itaque sanguinis ad cutaneum hoc colatorium affluxus est, eo major quoque copia halituosi feri vitalibus succis detrahitur. Quo languidior vero sanguinis appulsus est, eo minus etiam discernendæ materiæ suppeditatur.

§. III.

Sub motu musculares partium fibræ stringuntur, unde accidit, ut fluida majori nisu impulsæ, citiori cursu per

per vasa progrediantur. Quo frequentior ergo & copiosior sanguinis est per vasa ad cor affluxus, eo maior fit huius expansio, quo major ejus expansio, eo validior contractio subsequitur; quare dum sanguis sanguinem trudit, universa humorum massa vehementiori cursu per vasorum alveos devolvitur.

Scholion.

Quum diastolem excipiat systole, & hæc illam vice versa subsequatur, causa in aprico est, quare una saltem corporis parte vehementius commota, circulus sanguinis in universo corpore intensior fiat & hoc calore perfundatur, ipsaque perspiratio promptius succedat.

§. IV.

Motus ac labor, quo sanguinis in orbem progressum vehementius intendit, eo magis transpirationi velificatur eamque depresso excitat.

Scholion.

Motum ac laborem sanguinis circuitum accelerare, inter alia testatur calor, qui eo plus increfcit, quo rapidius sanguis per vasa fertur. Jam vero tam notum est, quam quod notissimum, calorem à motu sanguinis, cum progressivo, tum intestino, auctiori proficisci. Testes sunt febres, quibus ob celeriores sanguinis circuitum, quem pulsuum celeritas indicat, admodum intensus calor adjunctus est. Præterea quotidiana experientia nos docet, frigoris hybernici sævitiam vix sensum imprimere corporibus, quæ laborioso motu exercentur.

§. V.

Motus, quia sanguinis circuitum auctiorem reddit, eum non modo attenuat, multasque sordes ex humoribus detergit, sed vacillantem quoque appetitum excitat, vires collapsas erigit, & tam animo, quam corpori, vigorem conciliat.

Scholion.

Per ipsam experientiam satis manifesti sunt insignes effectus, qui ex motu in corpus redundant. Neque vero eximii hi effectus aliunde, quam ab auctiori sanguinis & humorum circuitu proficiscuntur. Motus enim humores non modo tenues ac fluidos reddit, sed eos quoque in ventriculum ac digestionis officinam impellit, inque omnes musculos ac fibras motrices copia majori insinuat; hinc appetitus acuitur & robur corporis insigne augmentum capit, id quod à sufficiente boni sanguinis influxu maxime dependere, in physiologicis jam satis superque demonstratum est.

§. VI.

Aucta transpiratio corporis gravitati multum detrahit, quia magna humorum quantitas diffilatur.

Scholion.

Præclare Sanctorius Lib. de Motu & Quiete §. 9. exercitio, inquit, corpora leviora fiunt; omnes enim partes, præcipue muscoli & ligamenta, motu ab excrementis purgantur, perspirabile ad exhalationem præparatur, & spiritus tenuiores fiunt.

§. VII.

Non datur præsentius ad tuendam sanitatem morbosque avertendos motu & exercitatione corporis remedium.

Scholion.

Homines laboribus dediti à multis gravibus ac chronicis passionibus, calculo, podagra, arthritide, quartana, malo hypochondriaco, cachexia, scorbuto, hydrope plerumque immunes degunt. Nihil magis enim sanitati adversatur, quam diuturna quies ac vita sedentaria.

Frid. Hoffmanni Oper. Tom. I.

ria cum humidi defectu; cui si quis se totum tradit, facillime ejusmodi morbis corripitur, qui ab humorum copia æque, ac impuritate, eorumque stagnatione, infarctu & obstructione in visceribus suam originem trahunt; quorum tamen omnium præservatio quam maxime in motu quaerenda est. Motus enim exundantem humorum copiam consumit, eosque ab excrementis sordibus probe depurat. Deinde fluiditatem humoribus conciliando eosque fortius per vasa impellendo, tenuissimorum tubulorum alveolos apertos servat, quibus occlusis, conferta morborum agmina producuntur. Denique etiam subtilitatem ac spumescentiam humoribus foenerat & solidorum robur instaurat, unde universa corporis natura à motu roboratur.

§. VIII.

Motus aliorum remediorum viribus, in custodienda sanitate morbisque profligandis, longissime antecellit.

Scholion.

Motus sane universalem medicinam constituit, neque eo excellentius datur in rerum natura remedium, à quo tam eximia prorsus beneficia in corpus humanum redundant; siquidem omnes propemodum evacuationes, citra ullam virium jacturam, mirifice promoveret. Quod intelligens Galenus Com. XI. §. 3. exercitatio, ait, supplet purgationem vitiosorum humorum, qui in corporis profundo sunt: Cui suffragari videtur sæpe laudatus Sanctorius, qui loc. cit. sic prodidit: Si homines exercitio ac labore uterentur, carere possent multis medicis & medicamentis. Atque hinc Verulamius Lib. IV. de Augment. Scient. cap. I. monet, vix aliquam in morbum inclinationem inveniri, quæ non exercitatione quadam propria corrigi possit. Dicente enim Avicenna Lib. I. F. E. N. cap. I. possent homines, si debito tempore exercitio ac labore uterentur, omnibus medicis carere & medicamentis. Quam ob causam neminem tenere debet admiratio, quare motus ipsum quoque animum afficere possit. Quum enim motus in universo corpore insigniter salubres producat effectus, fieri non potest, quin ipse quoque animus ob intimam, qua corpori conjunctus est, consociationem, aliquid mutationis inde sentiat. Hinc satis recte Platinus Lib. de Tuend. Valetud. pag. 145. scribit: Stomachus motu, in quo calor inest, ad appetitum excitatur, & mens ad cognitionem rerum occultarum & mirabilium celerior & acutior redditur. Mirum quoque est, inquit Plinius epist. 6. Lib. I. quam animus agitatione & motu corporis excitetur. Et Seneca de Tranquillitate Lib. I. pag. 56. affirmat, quod eorum animus, qui in aperto aëre ambulant, sese attollat.

§. IX.

Variae sunt motus species, quarum quælibet peculiarem in corpus humanum vim habet, eique tam emolumentum, quam noxam inferre potest. Hinc medicus omnium earum vires ac proprietates probe perfectas habeat necesse est.

§. X.

Ad motus species referri debent deambulatio in plano, ambulatio maxime per acclivia, cursus, equitatio, globorum lusus, palæstra, navigatio, pilæ parvæ lusus, saltatio, vectura, gestatio, venatio, peregrinatio, sermo, clamor & motus, qui manuum agitatione peragitur.

§. XI.

Omnium levissima species est deambulatio in plano.

Scholion.

Hæc etiam post cibum sumtum leniter instituta, nullam omnino noxam affert, & literatis maxime proficua est.

est. Eadem multum debet esse commendata in stomachi vitiis, quoniam corpus ab omnibus cruditatibus & alvi obstructionibus vindicat. Præterea hoc etiam præstat deambulatio, ut animus inde acuatur simul seseque attollat. Vid. *Verulam. Lib. IV. de Augment. Scient.*

§. XII.

Cursus, pilæ parvæ lusus ac saltatio, vehementiori motu peraguntur, atque hinc maxime nocent corporibus, quorum venæ sanguine crasso & copioso turgent.

Scholion.

Copiosus enim & crassus sanguis, cum impetu impulsus, vascula quam facillime aperit, vel ut stasin ibi concipiat, efficit. Quam ob rem caveant sibi ab hac corporis exercitatione omnes cholericis ac sanguine pleni, macilenti inque iram proclives, qui pectus angustum habent, & foeminæ, quæ uterum ferunt. Exinde enim graves inflammationes, sanguinis profusiones & abortus proficisci, satis compertum est.

§. XIII.

Equitatio maxime chronicis malis dicata est, adeoque omnium maxime quadrat hypochondriacis & qui viscera copiosis & crassis humoribus infarcta habent.

Scholion.

Equitatio, in leniorem gradariam, & graviolem, seu succussantem, merito distinguenda est. Illa huic salubritate anteposenda est; nihilo minus tamen & hypochondriacis convenit succussatio, quoniam maximus impetus ventrem imprimis inferiorem ferit, unde non modo mesenterii & intestinalium glandularum obstructiones referantur, sed & humores in viscerum tubulis hinc inde stagnantes discutiuntur. Præterea quoque equitatio ventriculi & intestinorum calorem accendit, & sanguini pristinum vigorem restituit.

§. XIV.

Gradaria equitatio, quia æquali nisu omnes partes tangit, citra ullum virium decrementum ac lassitudinem, universo corpori proficua est, perspirationem imprimis æqualiter promovendo, unde vultus vivo colore suffunditur, animus nova quasi alacritate exsurgit, ipseque etiam appetitus acuitur.

§. XV.

Equitationi postponendæ omnino sunt aliorum remedium vires, quæ in dispositione phthifica, hectica, scorbutica & cachectica, alias utramque paginam facere putantur.

Scholion.

Hoc *Sydenhamus* alique ex recentioribus frequentis experientiæ fide & solidis rationibus penitus confirmarunt. Neque enim erubescunt asserere, recensitis in passionibus, equitationem omnibus aliis remediis esse superiorem. Auxiliatur imprimis imbecilles, nec ita pridem è morbo expeditos, qui ob insignem virium jacturam, corpus exercendi facultate destituuntur. Commode huc referri potest locus apud *Oribasium Lib. IV. cap. 24.* qui ita habet: *Equitatio magis, quam omnes reliquæ exercitationes, corpus præservat, stomachum confirmat, & sensuum organa purgat eaque reddit acutiora.*

§. XVI.

Vectura hypochondriacis singulariter accommodata est, & corpus præcipue à tardis passionibus vindicat; expedit etiam iis, quibus infractum corporis robur vehementiorem motum interdicit.

§. XVII.

Vectura viscerum compagem molliter concutit, &

hac ratione humorum decubitus & stagnationem, quæ vasis venæ portæ admodum familiares sunt, resolvit ac dissipat.

§. XVIII.

Peregrinatio ad omnium salubritatem pertinet, quia non modo cum continuo motu, sed frequentiori etiam aëris insalubris in salubriorem mutatione conjuncta est, quæ tuendæ sanitati & corpori à pluribus morbis defendendo egregie velificantur.

Scholion.

Veteribus pro tuenda valetudine maximo in pretio erant peregrinationes, quas suscipiebant in loca juveniæ sanitati opportuna, temperata nimirum & montosa, ubi aër purior magisque sincerus spirabat. Perspectissimum enim ipsis erat, peregrinationem non modo sanguinis juvare circuitum, sed usuram quoque puri & intaminati aëris, deperditum solidorum robur & elaterem mirum in modum restaurare, quam in rem plura commentati sumus in peculiari *dissertatione de peregrinationibus sanitatis causa instituendis.* Ratio, quæ peregrinationes tuendæ sanitatis causa suscipiendas suadet, præcipua hæc est, quia animus alias gravioribus curis intentus, paululum tunc temporis relaxatur, dumque frequens novarum rerum varietas oculos pascit & animum ad sui contemplationem blande invitat, mens etiam tranquillior evadit, omnesque ex eo sollicitudines exulant. Quantum vero animi tranquillitas sanitati præsidium ferat, jam supra dilucidius declaratum est.

§. XIX.

Sermo, seu claræ vocis exercitium, peculiarem quoque motus speciem constituit.

Scholion.

Veteres intensiorem vocis exercitationem iis, qui ob membrorum, præcipue vero pedum, debilitatem, à motu ac labore prohibebantur, mirifice commendabant. Vocis enim contentio sanguinis iter & cursum per universum corpus accelerat, & hac ratione, & calorem, & perspirationem, auget. Continuata enim per tempus aliquod claræ vocis prolatio respirationem intendit, unde sanguinis itus ac reditus, majori facto per pulmones impulsu, ex uno ventriculo in alterum, & hoc modo per universi corporis compagem, celerius absolvitur. Sanguinem vero in iis, qui vocis exercitio utuntur, celerius per vasa devolvi, testimonio esse possunt concionatores, qui dum hyeme è suggestu magna vocis & laterum contentione sermones faciunt, calore & rubore perfunduntur, audientibus interea præ vehementi frigore trementibus.

§. XX.

Vocis exercitatio præcipue in usu esse debet literatis & qui ex ventriculi debilitate laborant.

Scholion.

Qui studiis vacant, iis nulla motionum species accommodatior est, quam deambulatio & claræ vocis pronuntiatio, quæ stomachi vitiis, quibus ferii Musarum cultores plerumque obnoxii sunt, adversa, neque ab instituenda meditatione aliena est. Vocis autem exercitationem ventriculi integritati præsidio esse veteres unanimi sententia confirmant. *Hippocrates Lib. III. de Diata §. 23.* ita suam hac de re sententiam exponit: *vocis exercitatio à cæna valde commoda est.* Et *Lib. de insomniis §. 3.* *vocis exercitio repletus utatur*, jubet. *Celsus Lib. I. cap. IIX.* claram vocem in stomachi vitiis magnopere laudat. Instar omnium vero est gravis autor, *Plutarchus*, qui *Operr. Tom. II. pag. 130.* ita differt: *Usus sermonis voce pronuntiati quotidianus mirum dictu quam utile sit genus exercitationis non ad sanitatem duntaxat, sed & ad vires, non quidem athleti-*

cas eas, aut quæ carnes augeant, sed quia principibus corporis membris, penes quæ vitæ potissimum facultas est, naturale robur verumque vigorem ingenerat.

§. XXI.

Sermonis usus stomachi vitiis expedit, quia majorem sanguinis ad ventriculi parietes influxum, adeoque secretionem salivalis succi, præstat uberiores. Deinde, quia iterum iterumque repetita diaphragmatis commotione, abdominis viscera leniter conquassantur, evenit utique, ut crebrior vocis exercitatio stagnantes intra viscerum diverticula humores, qui acidis cruditatibus fomitem præbent, egregie discutiat.

Scholion.

Pulchre *Aetius Sermon. III. cap. V.* scribit: *vox egregie convenit stomacho laborantibus & acidum eructantibus.* Siquidem cruditates acidæ & hypochondriacæ, ex acida colluvie intra ventriculum collecta maxima ex parte oriuntur.

§. XXII.

Quemadmodum moderata vocis exercitatio apprimè fructuosa est sanitati, ita nimia vocis intensio & sine ulla intermissione continuata, capiti præsertim infesta est, quia sanguinis imperum ad illud urget.

Scholion.

Quare *Areteus Lib. I. Curat. Chronic. cap. II.* monet, *ne temere quis gravibus vocibus utatur, quia acutæ voces capitis distensiones, temporum palpitationem, cerebri pulsationes, oculorum inflammationes auriumque tinnitum efficiunt, mediocris vero ejus usus capiti prodest.* Et *Aetius loc. cit.* tradit: *capitis affectionibus incommodissima est vociferatio.* *Montanus Lib. II. cap. 2.* eandem sententiam fovet, *vox est, inquit, multum efficax ad caput replendum & omnes partes superiores.* Vidimus multos aurium tinnitum, surditatem & hæmoptysin sibi ita contraxisse.

§. XXIII.

Caveant sibi à nimia vociferatione omnes plethorici, sanguinei, & quibus ebulliens sanguis magno impetu ad caput vibratur.

Scholion.

Hoc cognitu est facillimum ex facie rubicunda, tumida, vehementi temporum pulsu, capitis dolore & sanguinis per nares profusione. Tales enim perquam facile in cæcitatem, surditatem, aut apoplexiam, facta vasis cujusdam rptione, incidunt.

§. XXIV.

In lenissimis corporis commotionibus locum quoque sibi vindicat gestatio, quæ vel in nave, vel lectica instituitur.

§. XXV.

Ad motus speciem, quæ perspirationi promovendæ plurimum velificatur, frictio quoque referenda est; à cujus frequenti usu, senes maxime & languentes, non spernendum sanitatis præsidium expectare possunt.

§. XXVI.

Frictio poros cutis patulos & apertos reddit, auctoque calore, majorem sanguinis influxum allicit, & sanguinem attenuando, ejus cursum accelerat, qua ratione juvandæ perspirationi commodissime inservit.

§. XXVII.

Frictio valde amica est ventriculo, cujus languenti digestionem egregie succurrit.

Scholion.

Hinc *Celsus Lib. IV. cap. 6. & 13.* prolixè suadet, ut frictione brachiorum & crurum, ad emendandas stomachi affectiones, ter, vel quater de die, celebrentur.

Frid. Hoffmanni Oper. Tom. I.

Frictio enim majorem sanguinis affluxum, à quo vis solutionis maxime dependet, ad digestionis officinam invitat.

§. XXVIII.

Frictiones instituendæ sunt molles ac prolixiores, ita, ut per universam cutim blandus calor provocetur.

§. XXIX.

Gestatio, omnium exercitationum mollissima, imprimis imbecillibus quadrat, & quibus ob defectum virium robur se ipsos movere non licet; adeoque in longis & jam inclinatis morbis convenientissima est.

§. XXX.

Quemadmodum motus species dantur vehementiores, temperatæ ac leniores; ita medici prudentis est, pro rerum & corporum diversitate, decentem eorum usum vel suadere, vel dissuadere.

Scholion.

Robusta corpora ac duro victui assueta graves ac laboriosos motus citra ullum incommodum ferre possunt, quibus tamen imbecilliores majorem sibi debilitatem contrahunt. Hinc potius clementiores exercitationum species, nimirum ambulatio, vectio & vocis usus, illis imperari debent. Admodum vero imbecilles in gestationibus & frictionibus acquiescant, necesse est.

§. XXXI.

Moderatam corporis exercitationem natura maxime amat, immoderator vero ipsi mirum quantum exosa est.

Scholion.

Sicut præstantissimum quodvis remedium magis nocumento, quam emolumento est, nisi conveniens ejus usus cum prudentia, debito ordine ac regimine, instituitur: ita & hoc de motu tenendum est, qui pro diverso usu, & noxam, & præsidium, sanitati afferre potest. Constat enim experientia, homines pariter ac animantia, nimio motu defatigari viresque amittere.

§. XXXII.

Quærenda est cuivis homini moderata & æquabilis corporis motio, quæ liberum & æquabilem sanguinis circuitum juvet, quæ vires alat, neutiquam vero destruat.

Scholion.

Quum homo ab homine ratione temperamenti, ætatum, virium, habitus corporis, anni temporum, victus & climatis, insigniter differat, hinc motus cujusvis naturæ & constitutioni conveniens investigandus & imperandus est.

§. XXXIII.

Quia magna motus vis est & efficacia in superflua humorum quantitate consumenda omnibusque juvandis excretionibus, ideo circumspiciendum est, ut ingestorum mensuræ motuum quantitas exacte respondeat.

Scholion.

Consentit nobiscum *Hippocrates*, qui *Lib. Epidem. 6.* scite hac de re ita judicat: *Qui comedit, sanus esse non potest, nisi laboret.* Et *Lib. I. de Dieta §. 1. contrarias*, inquit, *inter se vires habent cibi ac labores.* *Verum inter se mixti, conferunt ad sanitatem: labores enim ea, quæ insunt, consumere solent, cibi autem & potus ea, quæ evacuata sunt, explent.* Quare qui mensuram ac proportionem laborum ad ciborum multitudinem, pro diversa corporum, respectu staturæ, ætatis, anni temporum ac situs regionum constitutione, scite & sagaciter applicare poterit, ille profecto sibi gratulandum habet, quod summum & exquisitissimum

tuendæ sanitatis præsidium invenerit. Caput totius rei hoc est : qui multis laboribus perfungitur, eum plus comedere, & qui plus comedit, eum frequentiori motu corpus exercere oportet. Qui vero parcius laboribus vacant, iis liberalior ciborum usus circumcidendus est. Videtur huc collineare monitum scripturæ sacræ, quæ significanter & explanate præcipit, *ut homines, qui non laborant, nec edere debeant*. Quod præceptum neutiquam ratione destituitur; labor enim magnam humorum copiam absorbet, quorum jactura facilius per cibos refarcitur, quam si multum adhuc evacuandum in corpore relictum est.

§. XXXIV.

Corpora, quo magis succis turgent & humiditate repleta sunt, eo majori & constantiori motu perfungi debent. Quo autem macilentiora sunt & velociorem sanguinis cursum obtinent, eo parciore exercitiis ac laboribus vacare oportet.

Scholion.

Fœminæ, humida temperie ut plurimum præditæ, longe saniores minusque valetudinariam vitam degunt, si paulo liberaliori motu corpus ventilant, quam si vitam colunt sedentariam. Constat etiam frequenti observatione, gravidas, quæ frequentiori, sed moderato motu, corpus circumagunt, faciliore utero uti foetumque edere robustiorem, quam, quæ continuo otio indulgent. Motus enim ea consumit recrementa, quæ in otiosis accumulata, impuros humores & matri, & infanti, ingenerant. Præterea etiam nutrices, quæ motu ac labore corpus subigunt, longe salubrius lac infanti propinant, quam quæ continuo fellæ & cunis affixæ hærent.

§. XXXV.

Quemadmodum humidis & spongiosæ carnis corporibus summum commodum affert moderata exercitatio, ita hæc sicciorebus & macilentis non adeo opportuna est.

Scholion.

Aristoteles Lib. III. de Partib. Animal. pinguibus ac obesis vehementem suadet exercitationem, ut prospera sanitate fruantur. Et *Hippocrates corpulentis itinera velociora* imperat. Contra vero *Lib. de Diet.* omni ratione suadet, *ut graciles, iter facturi, lentis passibus incedant*. Hinc idem auctor sapienter ait *Lib. I. Epidem.* *Calidis naturis refrigeratio, aqua & quies conveniunt; & minuendus est iis labor ac cibus, quos ob laborem infestat sitis: ubi vero fames, laborandum non est.*

§. XXXVI.

Quia motus perspirationem imprimis factam ac tectam servat, hinc digestionem peracta commodissime instituitur, ut excrementum tertiæ sic dictæ concoctionis foras eliminetur.

Scholion.

Tempora, quæ motui celebrando favent, sunt matutinum ac circa vespem, & quod cibus proxime antecedit. Egregie *Sanctorius Lib. cit. aph. 72. exercitium*, scribit, *post septimam usque ad duodecimam horam ab assumpto cibo, magis resolvit insensibiliter horæ spatio, quam tribus temporibus alterius spatii*. Chylus enim sanguini associatus multis recrementitiis fordibus scatet, per motum & exercitationem difflandis. Alio autem tempore, vel parum in corpore residuum est perspirationis ope evehendum, vel, si maturius motus instituitur, nihil quicquam adhuc ad cutaneos tubulos appulsum est, quod per exteriorum habitum exhalare possit.

§. XXXVII.

Motus ante ciborum assumptionem maxima cum utilitate instituitur, tunc temporis enim non modo univer-

sum corpus superfluum onus deposuit, sed & stomachalis liquor ab omnibus investitiis fordibus probe defœcatus est, hinc edendi cupiditas ordinario à motu accenditur.

Scholion.

Hac ratione inducti *Hippocrates & Galenus* omnesque saniores medici, uno ore pronunciant, corporis exercitationem semper ante cibum esse celebrandam.

§. XXXVIII.

Sicut corporis agitatio, ante cibum instituta, sanitati egregie patrociniatur; ita, quæ sumtum cibum statim subsequitur, cum summa perniciæ conjuncta est.

Scholion.

Vehementior motus alimenta maturius, quam par est, ex ventriculo præcipitat, unde debita eorum solutio impeditur. Deinde etiam multa observatione constat, equitatione, vel unctione à prandio instituta, cibos ad duodenum ac ventriculum regurgitare, ubi flatu & ructus procreant, & stomacho, præsertim in iis, quibus hypochondria male habent, angustiam & ardorem inducunt, quod maxime fit ab assumtis in prandio pinguibus, acidis ipsoque vino.

§. XXXIX.

Intensior corporis exercitatio alvi dejectionem nunquam præcedere debet, quia motus ad corporis ambitum succos pellit & intestina exsiccat.

Scholion.

Causa jam in propatulo est, quare labor ac motus iis conveniant, qui alvum justo fluxiorem habent.

§. XL.

In motu ratio certi ordinis habenda est, primo enim esse debet lentior, postea vero sensim accelerari potest.

Scholion.

Quemadmodum omnis subita mutatio intuta, quod vero sensim & per gradus peragitur, omnis periculi expertus est; ita etiam à diuturna quiete fortior instituta corporis commotio, sanitati nocumentum affert. Sanguis enim crassior & copiosus, vehementi agitatione impulsus, per minimos tubulos difficilius vibratur, dumque restagnat, vel ad vicina vasa regurgitat, dolores vatorumque tensiones, cum insigni corporis languore conjunctæ, oriuntur.

§. XLI.

Motum sub aëre sereno ac temperato celebrare oportet, qualis duabus horis post solis ortum & ante ejus occasum observatur; aer vero calidus, vel nimis frigidus, salubri corporis exercitationi neutiquam accommodari debet.

Scholion.

Et si serenitas ac temperatus aer per se optimum vitæ pabulum & sanitatis præsidium constituat: cumulus tamen ejus utilitati accedit, quando conveniens motus ipsi adjungitur. Hinc dispiciendum, ut sub omni corporis motu, quælibet aeris intemperies fugiatur. Nimirum, immoderate calidus aer cum fortiori motu sanguinem accendit, perspirationem plus justo auget, & hac ratione corpori debilitatem inducit. Cavere itaque oportet, monente *Hippocrate*, à sole meridiano, tempore præsertim æstivo, mane autem ac vespere institutæ corporis commotiones egregie faciunt ad sanitatem. Neque corpus, dum fortiori motu exagitur, aëri nimis frigido committendum est, ne cessante motu, frigus rarefactos & expansos corporis poros ac tubulos subiens, & solidis, & fluidis, perniciem afferat. Quamobrem *Hippocrates Lib. III. de dieta* §. 10. dissuadet motus mane & vespere, frigido cœlo existente, neque minus corporis damnat exercitia, quæ circa flumina, stagna, aut nives, peraguntur. Frigus enim non tam in ipso

motu,

motu, quam post illum pertimescendum est, quando nempe corpus diutius in eo detinetur. Fortis autem motus hieme, quam æstate conducibilior est. Unde præclare *Hippocrates Lib. de Sal. Diet. §. II.* scribit: *Qui exercitio utuntur, hieme currere debent, æstate vero parum, currere autem minime, sed multum deambulare, secundum ventum ac frigus.*

§. XLII.

Motui gradatim aucto tamdiu indulgendum est, donec sudor per universum corpus proliciat, partesque extremæ sanguine & calore turgeant.

§. XLIII.

Motu exacto & sudore largius profluente, corpus in temperato aëre linteis abstergendum, & perspiratio omni modo promovenda est.

Scholion.

Nunquam frigidior aër intra corpus motu calefactum admittendus est, nisi graves inflammationes, rheumatismos, aut febres, corpori arcessere velimus. Longe autem perniciosior est frigida potio corpori calefacto ingesta, quia hæc facillime in poros venarum calore dilatatos sese insinuat, ubi humoribus coagulum inducendo, libero sanguinis circulo obicem ponit; unde non sine periculo graves inflammationes & viscerum obstructions enascuntur. Idcirco semper præstat potum magis calidum, quam frigidum assumere, & corpus paulo diutius in lecto detinere, ut salutaris perspiratio promoveatur.

§. XLIV.

Fortiorem motum non statim cibus excipiat, sed per horæ dimidium expectare præstat, usque dum motu facta corporis turbatio paulum sedata fuerit.

Scholion.

Succus enim ciborum ante debitam solutionem corporis poros subit, ipsaque digestio, viribus motu exhaustis & fracto ventriculi robore, insigne detrimentum capit.

§. XLV.

Qui vehementiori motu fortiter se fatigarunt, iis cibus humidus & succulentus egregie convenit.

Scholion.

Optime *Celsus Lib. 1. cap. III. §. 28.* præcipit: *Omnibus fatigatis aptum est cibum sumere eoque humido uti, maximeque ea, quæ urinam movent, & vinum aqua dilutum. Illud quoque nosse oportet, quod ex labore sitienti frigida potio noxiosissima sit, atque etiam itinere fatigatis inutilis.*

CAPUT X.

De quiete & somno.

§. I.

CONSTANS intemeratæ sanitatis conservatio non tantum debitis excretionibus opus habet, verum etiam quibusdam in corpore retentis sustinetur. Ex alimentis enim ingestis ac bene digestis quædam intra corpus retineri debent, quibus vires & succi, motu & calore deperditi, reparentur.

§. II.

Ut motus corporis excretiones, & omnium maxime utilissimam perspirationem, insigniter juvat, & ad inertes effluosque humores è corpore evehendos necessario requiritur: ita, & quies, & somnus, pro sanitate

Frid. Hoffmanni Oper. Tom. I.

egregie militant; dum utiles & naturæ amicos succos colligunt & intra corpus retinent, absumtasque fluidas partes restaurant.

Scholion.

Motus, labor diuturnus ac vigiliæ non modo vires motrices consumunt multumque humidi dissipant, sed ipsa quoque motus instrumenta, partes nempe musculosas, atterunt ac debilitant; hinc quies, seu motus quædam intermissio, laboribus ac vigiliis interpolanda est, qua utiles & concocti humores retineantur, & tam solidæ, quam fluidæ corporis nostri partes, à quibus virium origo derivanda, novum subinde alimentum ac vigorem recipiant. Hinc nemini non perspicua esse potest summa quietis ac somni necessitas.

§. III.

Quies multum facit ad corporis nutritionem, quia gelatinosos humores colligit & condensat, nimiamque eorum exhalationem remoratur.

Scholion.

Artificium saginandi animalia maximam partem in eo consistit, ut angustiori loco inclusa, ab omni motu prohibeantur.

§. IV.

Quies maxime accommodata est corporibus imbecillis, cholericis, macilentis & qui interno æstu vehementius agitantur, vel febre decumbunt.

Scholion.

In quibus celerior est motricium fibrarum contractio, & sanguis citatius per vasa fertur, iis utique quies longe utilior est motu, qui internum calorem exauget ac stimulat.

§. V.

Quies, vel saltem lenior deambulatio, quæ assumptum cibum statim subsequitur, ventriculo alimentis repleto valde amica ac necessaria est. Fortior enim motus cibum crudum adhuc, nec satis percoctum, cum insigni sanitatis detrimento, ex digestionis officina præcipitat.

§. VI.

Quia quies nimix corporis lassitudini allevamento est, iudice *Hippocrate sect. II. aphor. 48.* hinc quo major ac diuturnior præcessit motus, eo longior etiam quies eum excipiat necesse est; atque adeo labori cum quiete iusta semper intercedere debet proportio.

Scholion.

Quod tamen non hunc in modum accipiendum est, quasi motus & quies tempus æquale sibi vindicent; sed potius illud intellectum velim, quod pro eo, ac vires amissæ sunt, per quietem sufficiens earum fieri debeat reparatio.

§. VII.

Quemadmodum moderata quies magnopere sanitati inservit: ita motum superans perniciosissima est.

§. VIII.

Quiete longiori corporibus magna fit ponderis accessio, tum quia excrementorum, quæ mediante motu è corpore diffillantur, exclusionem diuturna quies sufflammat; tum quia succi ex cibo ac potu copiosiori, quiete parum probe digeruntur & in vasis nimium congeruntur.

Scholion.

Hippocrat. Lib. 2. de Diet. sic hac de re tradit: *Otium humectat & debilitat, labor vero siccatur ac roborat. Motu enim dissipantur humores, unde nervosarum partium fit tensio. Vitæ otiosæ & sedentiæ addictas mulieres facile in passiones hystericas & hypochondriacas*

driacas incidere quotidie animadvertimus; juvenes vero ac viri, qui otio litant & vitam quietam colunt, plerumque hypochondriorum vitio laborant, & subinde scabie & scorbuto corripiuntur; cujus rei imprimis testes sunt sartores omnesque opifices, qui fellularias artes exercent.

§. IX.

Ut motus perspirationi favet, & sanguinis cursum accelerat eumque tenuem ac fluidum reddit: ita diuturna quies, sanguini crassitiem inducendo, viscerum obstructions, sanguinis impuritatem humorumque stagnationes progenerat, & hac ratione ad graves & pertinaces morbos disponit.

Scholion.

Non prætereunda sunt verba *Fonsæ*, quæ *Lib. de Tuend. Sanit. pag. 37.* profert: *ex nimio*, inquit, *otio suffocatis, apoplexia, podagra, colica, calculus renum nascitur, præsertim, si cum crapula ac libidine ipsi indulgetur.*

§. X.

Sessio corpus hypochondriaco malo præparat, & illud imi ventris passionibus obnoxium reddit.

Scholion.

Sub sessione incurvatum corpus talem angulum efformat, qui ventrem præmit, & intestinorum flexuras in angustiam compellit, atque hinc flatus sursum versus ventriculum retruduntur. Deinde etiam corporis incurvatio vasa mesenterii, quæ ad venam portæ decurrunt, comprimit, & hoc modo liberum sanguinis progressum intercludit. Exinde vero humorum stagnationes ac viscerum infarctus suos natales trahunt. Quare etiam *Plautus* hypochondriacis ambulationem his verbis commendat: *ambula, hoc lienosis prodest.*

§. XI.

Neque diuturna statio pro sanitate est, sed potius nunquam non fugienda.

Scholion.

Statio hæc non modo sessione deterior est, sed majorem quoque corpori perniciem affert. Corpore enim perpendiculariter erecto, sanguis quidem ac reliqui humores facillime ad inferiores partes descendunt, sed eorum ascensus mirum quantum retardatur, nisi membrorum nisus & actio, qualis ambulationi adjunctus est, progredienti sanguini suppetias ferat.

§. XII.

Statio musculorum æquilibrium, hoc est, æquali eorum tensione peragitur, cui tota corporis moles ad perpendicularum incumbit. Quantum vero hoc viribus detrahat, dici vix potest, maximeque perniciofa hæc statio in studiis literarum tractandis fugienda est, quia spiritus dupliciter impenduntur, dum & menti in formandis ideis, & corpori in tono musculorum servando, vacare debent. Consultius itaque est eo tempore, quo meditationibus indulgemus, leniorem ambulationem instituere, ut in mutua musculorum actione æquilibrium conservetur.

§. XIII.

Non tantum quies corporis, verum etiam somnus, jacturam humorum motu deperditorum refarcit, & corpori novum robur foenerat.

Scholion.

Animadvertimus à somno reparari vires, corpora fieri agilia & ad subeundos labores magis idonea, animum quoque ad præstandas actiones suas inde reddi alacriorem, & universum corpus omnem deponere lassitudinem, unde somnus optimum virium pabulum summo

jure appellari debet. Quam insigniter enim vires morbo collapsæ per somnum reficiantur; optime perspectum habent, qui gravioribus acutis morbis affliguntur. Quanto maturius enim somni beneficio perfrui possunt, eo celerius vires ac sanitatem recuperant.

§. XIV.

Vires, omnium motuum in corpore effectrices, vix ab alia causa, quam à sanguinis partibus fluidissimis & sic dictis spirituosas, suam originem trahunt, & continuo motu, vigilia sensuumque exercitio diffantur, hinc somnus, qui nihil aliud est, quam quies corporis, sensuumque, tam internorum, quam externorum, cessatio, accedat necesse est, qui spirituosas ac subtiles particulas colligat & intra corpus detineat, ut exinde vires incrementum capiant & corpus cum animo ad suas præstandas functiones rursus fiat idoneum.

§. XV.

Somnus non modo vires, quas partes humorum spirituosæ largiuntur, reparat, sed & nutritionem, seu alibilium partium appositionem, plurimum adjuvat.

Scholion.

Vigiliæ continuo motu ac calore succum nutrientem attenuant, eumque foras ejiciunt, ut solidarum poris insinuari nequeat. In somno autem placidior est sanguinis motus, nutritius succus colligitur, & intime partium poris se associat; unde tam animantia, quam homines, vigiliis emaciari, somno vero roborari & pinguescere videmus. Hinc pulchre *Hippocrates Epidem. Sect. 4. labor*, ait, *articulis & carnibus cibis est, somnus visceribus.* Solida enim augentur ac roborantur exercitationibus, sub somno autem melior fit alimentorum coctio, & hinc viscera nutriuntur.

§. XVI.

Si somnus deperditum nutrientem succum partesque spirituosas absumptas restaurat, in proclivi est judicare, quare longiori somno opus habeant, qui corpus vehementiori motu ac labore, & animum assiduis & profundis cogitationibus fatigarunt, quam qui otium, tam corporis, quam animi, per diem coluerunt.

Scholion.

Iis præcipue somnus egregie succurrit, qui diuturna cogitatione & fixis meditationibus animi & corporis robur limarunt, ne animi & corporis vires aliquod exinde capiant detrimentum.

§. XVII.

Sufficientis somni signum præbent corpus agile, pondere imminutum, mens alacris, neque ulterior in somnum propensio.

§. XVIII.

Quum vires somno imprimis reficiantur, ideo quantum demitur somno, tantum viribus ac digestionem decedit, & quia ad literarum studia rite colenda non pauci requiruntur spiritus, ideo male agunt & pessime de sanitate sua merentur, qui studia in seram noctem protrahunt, vel noctes plane insomnes ducunt, seque tam egregio beneficio mira improbitate defraudant.

§. XIX.

Observamus, somnum, qui ante mediam noctem capitur, plus incrementi viribus addere, quam qui eam subsequitur.

Scholion.

Ratio hæc esse videtur, quia homines tunc temporis profundiori somno merguntur, dum spirituosæ alimentorum partes ex ventriculo ad massam sanguinis & humorum accedunt, quæ ibi sub leniori somno copiosius collectæ, tubulos cerebri subeunt, inque ejus corticali mere vasculosa parte postea fecernuntur.

§. XX.

§. XX.

Non omnis fomnus, sed quietus saltem, vires reficit.
Scholion.

Sapienter monet *Plato lib. VII. de LL. qui vitæ ac sapientiæ curam gerit, plurimo tempore vigilet, id solum providens & observans, ut somnum tantum capiat, quantum ad sanitatem pertinet, ad cujus conservationem non multo fomno opus est, si modo recte fuerit constitutus.*

§. XXI.

Somnus quietus is dicitur, in quo non facile excitamur, sed potius continenter per consuetum tempus conquiescimus, & qui ciborum, & concoctionem, & perspirationem, juvat ac vires reparat.

§. XXII.

Somnus inquietus est, qui interruptus & turbulentis insomniis plenus est, quemadmodum eum definit *Sanctorius sect. II. aph. 5.* & qui nec vires reficit, nec perspirationem juvat, sed potius impedit.

§. XXIII.

Somnum placidum ac tranquillum reddit temperatior sanguinis per cerebrum cursus; quam ob rem omnia, quæ nervosas partes irritant & sanguinis per cerebrum iter accelerant, somnum variis modis interturbare solent.

Scholion.

Omnes vero cibi acres, sale, aromatibus, allio, sinapi & id genus aliis conditi, vel duriores ac flatulenti, neque minus potus calidi ac spirituosi, circa somni tempus assumti, variis turbis somnum exagitant, quia ventriculo cum capite summus intercedit consensus & conspiratio. In febribus, ob celeriores sanguinis per cerebrum cursum, paucus, vel plane nullus, aut valde turbulentus, fomnus est. Quare quicquid ita comparatum est, ut ventriculi membranas, vel acrimonia, vel gravitate quadam, sollicitare ac stimulare possit, illud etiam molestum cerebri membranis inducit sensum & somnum quietum arcet.

§. XXIV.

Insignia ex fomno in corpus nostrum beneficia redundant, quia fomnus ciborum concoctioni egregie patrociniatur.

Scholion.

Quia alimenta non subito extra ventriculum propellit, & quoniam succi fermentales, qui in prima regione ex glandularum scatebris large promanant, pluribus spirituosius particulis abundant, & majori activitate instructi sunt, hinc alimentorum nexum melius dissociare & laudabilem chylum evolvere possunt. Qui ventriculum copia ciborum repletum habent, eos diutius fomno indulgere oportet, nisi multa ex collectis cruditatibus incommoda sibi contrahere velint. Hinc bene dictum est à *Celso Lib. III. cap. 1. qui bene concoxit, mane tuto surget; qui parum, quiescere debet, & si mane surgendi necessitas fuerit, mane redormire, qui non concoxit, ex toto requiescere, ac neque labori se, neque exercitationi, neque negotio credere.*

§. XXV.

Somnus, ad absolutam concoctionem perdurans, optimum viribus fomentum præbet.

Scholion.

Observatione constat, eos, qui ventriculum copiosiori cibo ac potu refertum, vel caput crapula gravatum habent, à longiori quiete & continentia in lecto longe melius vires recipere, quam si nimis cito è lecto se propriant.

§. XXVI.

Somnus placidus non tantum conficiendis in ventriculo alimentis velificatur, sed etiam perspirationem magnopere juvat.

Scholion.

Sanctorius sect. IV. aph. 2. memoriæ prodidit, dormientem magis perspirare, quam vigilantem. Et aphor. 1. loc. cit. somnus, inquit, placidus adeo fovet perspirationem, ut septem horis quinquaginta uncia cocti perspirabilis in robusto homine exhalent. Perspiratio melius in fomno, quam in vigilia succedit, quia habitus corporis sub fomno magis relaxatus est, cutis tubuli ac meatus ab æquabili calore magis patuli atque aperti sunt, & sanguis placidiori cursu ad emunctorium cutis devolvitur. Quæ omnia hujus excretionis negotium mirifice auxiliantur.

§. XXVII.

Quamvis in vigilia sanguis celeriori gradu ad cutis superficiem feratur, tamen quando strictiores sunt pori ac tubuli, major saltem copia tenuis ac perspirabilis feri exhalat; sub fomno vero ampliatis poris, particulæ sudoris ac transpirationis crassiores diffillantur. Duplex enim datur materia perspirabilis, una tenuior, altera crassior, particulis pinguioribus ac viscidis gaudens, quarum vestigia in indusiis conspiciuntur, & hæc etiam pediculis, quibus pueri vexantur, nutrimentum præbet.

§. XXVIII.

Quum perspiratio absoluta concoctione melius succedat, & majorem sanitati ferat utilitatem, solerti cura dispiciendum est, ne salutaris hæc excretio matutino tempore ullo modo cohibeatur.

Scholion.

Patet jam ratio, quare matutinis horis sudorifera, diaphoretica & quæ perspirationi ulterius præsidio sunt, inter quæ principem locum tenent infusa calida, insigni cum euphoria propinentur, quia tunc temporis ipsa materia ad exitum præparata est.

§. XXIX.

Somnus cogitationum ac sensuum quies est, ideo eo tempore, quo fomnus capitur, omnes curæ & profundæ meditationes animo exulare debent.

§. XXX.

Causam somni, qui nihil aliud, quam sensuum, & internorum, & externorum cessatio est, languidior fluidi nervei in partes, quæ sensuum domicilia sunt, influxus constituit.

Scholion.

Parciior roris nervei in cerebrum ac sensoria influxus, partim à tubulorum, ex quibus cerebri compages contexta est, tono dejecto, partim à nimia arteriolarum, quæ cerebrum perreptant, distensione, suam originem trahit. Spirituum vero animalium, seu succi nervei, in cerebro secretio unice à sanguinis motu per caput dependet. Facto igitur tardiori sanguinis per tubulosam cerebri substantiam progressu, ejus quoque separatio retardatur. Nimia vero arteriolarum cerebri expansio debitam earum contractionem prohibet, unde sanguis lentius vasa trajicit. Quare secundum *Hipp. effatum l. 1. de Affect.* quæ somnum conciliant, ea sanguinis quietem procurant. Cæterum causæ somni & arteriolarum expansionis, in physiologica tractatione perquisitius jam investigatæ sunt.

§. XXXI.

Si spirituosæ partes parcius in fomno secernuntur & magis in sanguine remanent, facillima intellectu ratio est, quare nutritio corporis & alimentorum concoctio præcipue sub fomno vigeant, & quare universa san-

guinis & humorum massa, partibus spirituosius aucta, solidorum tono majus robur inspiret & universo corpori vires suppeditet.

§. XXXII.

Somno imprimis accommodatum est tempus nocturnum, ob atmosphæram frigidam & humidam, quæ omnes corporis fibras à tenfiori tono remittit, & celeriore sanguinis progressum remoratur.

§. XXXIII.

Somnus capiendus est in aëre sereno, temperato, non nimis calido, nec nimis frigido, multo minus vappido, præhumido, aut variis vaporibus referto.

Scholion.

Aër, quem sub somno haurimus, eam ob causam optime debet esse constitutus, quia vires sub somno colligendæ sunt. Harum vero elementum ac pabulum sunt particulæ sanguinis tenuiores ac spirituosæ, quæ maxime ex aëre sereno ac puro in corpus nostrum invehuntur. Laudamus hinc cubacula ampla & perspirabilia, in quibus vero aër arcte conclusus, vel fornacibus calefactus est, ea vehementer improbamus.

§. XXXIV.

Optimus in somno decubitus fit in lateribus, capite paulo elatiori & corporis trunco inflexo cruribusque aliquantum contractis.

Scholion.

Declivior decubitus sanguinis ex capite regressum quodammodo impedit, quia is per venas jugulares descendere debet, quod elatiori capite commodius peragitur. Hinc capite nimis demisso ac depresso, profundiores somni cum insomniis fiunt, & universo corpori torpor inducitur. Eadem ratione, si quis facie prona, velut in mensa, in somnum delabatur, ob difficiliorem sanguinis regressum, gravitatem capiti & ingenio stupiditatem accersit. Præterea etiam crebrior ejusmodi decubitus graves interdum ophthalmias parit.

§. XXXV.

Neque pro sanitate est supinus decubitus, quia vasa dorso instrata valde incalescunt, pressisque musculis thoracem elevantibus, difficilior fit respiratio.

Scholion.

Plethoricos omni cura fugere oportet supinum decubitus, facile enim incubo premuntur, cujus causa à sanguinis in pulmonibus stagnatione deducenda est, vel etiam in calculum, uterinas sanguinis profusiones & pollutiones nocturnas incidunt.

§. XXXVI.

Ventriculo cibus repleto, præstat prius lateri dextro incumbere, eo quod chylus promptius sic ad intestina descendere potest, & hac etiam ratione præcavetur, ne hepatis ponderosum viscus ventriculo incumbens, graviter eum comprimat.

§. XXXVII.

Somnum statim à coena capere nunquam conducit, sed potius una vel altera hora expectanda est. Deinde & hoc tenendum, quod parvus ac mollior cibus suaviorem somnum efficiat.

§. XXXVIII.

Somnus meridianus ex toto insalubris est, quia capiti & universo generi nervoso debilitatem inducit, idque torpidum & catarrhis obnoxium reddit.

Scholion.

Quandocunque ventre repleto obdormimus, chylus

sanguinis vehiculo ad cerebrum delatus, non modo copia, sed partium etiam elasticitate, ejus vasa nimis expandit, eorumque tonum solvendo, ingentem humorum stagnationem parit, qui ubi, intus bulosam & inferiorem cerebri substantiam descendunt, capitis torporem ac gravitatem ibi excitant.

§. XXXIX.

Res cum majori noxa conjuncta est, quando sub meridiano somno corpore supino decumbitur, ita enim humores longe facilius stagnationem subeunt, quæ ob varia incommoda, capiti imprimis valde hostilis atque infensa est.

§. XL.

In terris calidioribus, somnus meridianus sanitatem non tam facile offendit.

Scholion.

Quia vires & succos, qui diurno solis fervore nimium diffillantur, colligit & intrà corpus detinet. Cavendum tamen est, ne supino corpore, sed capite erecto, decubitus fiat. Neque meridianus somnus adeo novicus est iis, qui noctes inquietas & insomnes agunt, & ab immoderatiore æstu languent, vel corpus variis modis delassarunt; neque iis interdicens est, qui gracilioris corporis habitus, vel ætatis provectioris sunt.

§. XLI.

Quemadmodum nulla regula tam firma est, quæ non suas patiat exceptiones: ita etiam somnus meridianus, in quibusdam casibus certa sub conditione, tuto admitti potest. Non est inutilis, ubi vires custodiendæ, ubi benignum humidum in corpore retinendum, vel cerebri partiumque humectatione opus est, qua præcipue senes indigent.

§. XLII.

Ut moderatus somnus magnam corpori utilitatem promittit; ita modum excedens noxam insignem affert.

Scholion.

Immoderatus somnus non modo capiti gravitatem ac torporem, sed omnibus etiam corporis partibus languorem inducit, & tam animo, quam corpori, agilitatem detrahit, quia sufficientem fluidi subtilissimi in nervos & partes solidas, quæ motuum opifices sunt, influxum nimis remoratur. Inde vero sanguis & humores suam amittunt fluiditatem, eorumque spirituscentia depressa corpus tardis passionibus opportunum facit. Causa immoderati somni, ad ingentem vasorum cerebri & duræ matris debilitatem, seu atoniam, referenda est, quæ evenit, ut sanguis nimium ibi congestus, lentius procedat, humidumque demittat, quod postea in tubulos cerebri delabatur. Omnia vaporosa, opiata & quæ copiosas exhalationes sulphureas exspirant, somnum immoderatum gignunt, quia elaterem ac tonum membranarum & vasorum cerebri majori, quam par est, expansione, multum debilitant, unde nimia fit sanguinis congestio, atque humidum à sanguine tardius progrediente secessionem faciens, poros ac tubulos cerebri occupat, hinc immodicum somnum arte paratum plerumque stupor, animalium functionum segnities, & somnolentia cum capitis gravitate, subsequuntur.

§. XLIII.

Qui adolefcunt & primam adhuc ætatem agunt, semper suavius dormiunt, quam qui provectioris ætatis sunt homines & qui ad perfectum corporis augmentum jam pervenerunt.

Scholion.

In puerili & adolescente ætate, mollior cerebri vasorumque textura est, ex quibus succus nutritivus roscidus exsudat.

exsudet. Senes vero ficcioris texturæ sunt, vasa obtinent duriora, hinc nimia pororum angustia non nisi parcam nutritii succi in tubulosa cerebri substantia secretionem admittit. Qui bene valent ac parum dormiunt, maxime sunt cholericus; hos autem, si sanitatis rationem habere velint, à vino & potibus spirituosus, neque minus à cibis acris, salitis & aromaticis, abstinere oportet. Natura nulli rei magis, quam somno ac vigiliis certis temporibus assuecit, quare consultum est, omnibus modis somnum diurnum declinare, utpote qui noctes infomes reddit.

§. XLIV.

Notatu dignum est, somnum eo fieri impeditiorem, quo diuturniores vigiliæ præcefferint.

Scholion.

Experiuntur hoc illi, qui integras noctes vigiles ducere coguntur. Diuturnæ enim vigiliæ benignos humores consumunt, acres vero calidas particulas in sanguine cumulant, quæ cerebri fibrillas continenter sollicitant, sicque somnum arcent.

§. XLV.

Ut immoderatus somnus sanitati adversatur, ita etiam protrahiores vigiliæ, corporis & animi vigorem ac vires exhaustiunt.

Scholion.

Siquidem & humidum roscidum, & liquidum nervum, sub assidua vigilia in vehementem motum abripitur, & magna etiam ex parte consumitur. A nimis vigiliis concoctio perturbatur, corpus macie contabescit, facies fœdo pallore discoloratur, oculi recedunt & concavi fiunt, ipseque vultus austerum ac tristem habitum induit. Hinc *Hippocrat. Lib. de Diæt. in Acut. vigilia*, perhibet, *nimia post cibos noxia, quum cibum colliguescere non sinat. Et eod. Libr. vehemens*, inquit, *vigilia potus cibosque, tum crudos, tum incoctiores, reddit.*

§. XLVI.

Diuturnas vigilias sequitur plerumque maxima partium internarum debilitas; unde stagnationes humorum in capite, periculi plenæ inflammationes ac deliria oriuntur.

Scholion.

Perpetuæ observationis est, quod fortiolem spasmus, seu intensiorem partium tonum, ut plurimum magna relaxatio & flacciditas excipiat.

§. XLVII.

Qui per nocturnam quietem anxii ac terrificis infomis agitantur, in iis sanguinis ac humorum circuitus per caput & pectus male procedit; siquidem in ejusmodi subjectis graviores sanguinis stagnationes dictis in partibus observantur.

Scholion.

Quare somnia anxia ac turbulenta, secundum *Hippocratem*, præternaturalem corporis statum morbosque impendentes denunciant, quibus convenienti diætâ & recto remediorum usu obviam eundum est.

CAPUT XI.

De diætâ robustorum & imbecillium.

§. I.

Quemadmodum nihil in se & sua natura, seu insita necessitate, salutare, vel noxium est, sed uterque, tam salubritatis, quam insalubritatis effectus, ex viribus

agendi & ex relatione ad corpus humanum facta, demum resultat: ita etiam rerum non naturalium salubrium & insalubrium virtus & efficacia, ex corporum diversitate, in quibus sese varie exserunt, dum salubris & insalubris eorum effectus variis modis, vel impeditur, vel adjuvatur, nunquam non æstimari debet.

§. II.

Perperam agunt præfides valetudinis, qui singulis unam eandemque vivendi rationem præscribunt, & quod uni confert, illud aliis quoque commodum esse judicant omnibus.

Scholion.

Magistra enim experientia quotidie edocemur, non omnia omnibus esse accommodata, & quod unus citra ullam noxam ferre potest, hoc alteri in summam cedere perniciem. Ipsum quoque tempus, in rerum salubritate determinanda, plurimum valet, quædam enim certis temporibus tuto & citra ullius offensæ metum ingeruntur, quæ alio tempore assumpta, sanitati haud leve detrimentum afferre solent.

§. III.

Diversi salutare & noxii alimentorum effectus maximam partem à corporum differentia deduci debent, siquidem, ut recte monet *Hippocrates*, natura à natura, corpus à corpore differt.

Scholion.

Hæc naturarum differentia fit tam ratione ætatis, temperamenti, habitus corporis, consuetudinis & connatæ dispositionis, quam præcipue ratione roboris ac imbecillitatis.

§. IV.

Quemadmodum in universum inter vires, ratione potentiae & debilitatis, ingens intercedit discrimen: ita etiam robustorum & imbecillium corporum humanorum varia ac dispar conditio est; quare semper ad corporum diversitatem respiciendum, quippe quæ in medicina, tam therapeutica, quam diætetica, multum momenti habet.

§. V.

Homo robustus is est, qui insigni robore ac potentia motuum instructus est.

Scholion.

Id est, qui magna facultate pollet non tantum in edendis motibus voluntariis, verum etiam in actionibus vitalibus & animalibus; sive, ut res dilucidius appareat, qui multum ponderis elevare magnosque animi & corporis labores sustinere potest, & qui bene ac copiose ingerit atque egerit, nec facile gravem à vigiliis variisque, licet minus congruis alimentis, læsionem patitur.

§. VI.

Qui corpore robustus, is etiam animo fortis & ingenio alacris est, nec facile morbis & affectibus animi fit obnoxius, nec facile à rebus externis læditur.

§. VII.

Ut quælibet vis motrix partim ab instrumento, quo motus exercentur, partim ab activitate & energia motus dependet: ita etiam robur corporis humani, partim à musculorum duritie & magnitudine, partim etiam à copioso boni sanguinis & liquidi nervorum in has partes influxu, proficiscitur.

§. VIII.

Robur itaque corporis ex vasorum amplitudine & capacitate, nervorum crassitie & musculorum soliditate, cognoscitur.

Scholion.

Scholion.

Siquidem omne corporis robur, secundum originem suam, à dispositione parentum, quoad partes solidas, quoad fluidas vero à decenti in rebus non naturalibus regimine, derivandum est. Inter robustos homines numeramus plebejos, duris laboribus affuetos & qui simplici & crasso victu utuntur, ratione ætatis juvenes ac viros, ratione temperamenti sanguineo-cholericos, respectu habitus corporis, qui non adeo pingues aut spongiosæ texturæ sunt, sed ossa solidiora, nervos strictiores, firmos tendines & vasa capaciora obtinent. Quoad nationes & climata hunc in censum referendi Westphali, Pomerani ac Brunsvicenses. Imbecillioris naturæ sunt, qui fibras teneriores & exquisitiori sensu præditas, vel ad subeundos heterogeneous motus idoneas obtinent, qui facile animi affectibus exagitantur, & quorum vasa angustiora non sufficiente boni ac spirituosissimi sanguinis quantitate instructa sunt; præterea, qui tendines ac nervos exiguos & laxiores, dentesque pauciores habent, & à laboribus, tam animi, quam corporis, facile fatigantur.

§. IX.

Imbecilliores non tantum facile à rebus externis læduntur & levi data occasione in morbum incidunt, verum etiam morbo quodam correpti, in malis sunt, animum habent mobilem ac versatilem, nec vitam adeo longe protrahere possunt.

Scholion.

Imbecillium numero adscribi debent infantes, senes, vitæ urbanæ ac otiosæ dediti, continuis studiis & meditationibus addicti, ex sexu foeminae, natione Svevi ac Misnici. Deinde etiam horum in societatem veniunt ii, qui gravi morbo, nimis vigiliis, longiori fame ac inedia, aut largiori sanguinis profusione, ut & diuturno mœrore, multa venæ sectione, aut crebriori purgantium usu, insignem virium jacturam passi sunt. Deinde huc pertinent puerperæ ac foeminae mensium fluxu laborantes. Imbecilles, vel à solo suaveolentium odore, se male habent, ab exigua dosi alicujus emetici, vel purgantis, copiosas patiuntur excretiones, & à cibo, seu flatulento, seu acido, vel etiam levi saltem aëris frigidiusculi afflatu, noxam sibi contrahunt.

§. X.

Quia corporis imbecillitas & nimia ad morbosos motus recipiendos aptitudo, à benignorum succorum inopia maxima ex parte proficiscitur, ideo medicum, qui debite corpus firmare, idque adversus externarum rerum injurias fortiter munire intendit, omnem curam in eo defigere oportet, ut blandioribus succis vasa ac nervos repleat, inertes vero ac superfluos humores corpori detrahat.

Scholion.

Ex his perspectis levi negotio conficitur, imbecilles, qui omnibus morbis patent & quemcunque excessum graviter ferunt, longe tutius ac facilius integram recipere posse sanitatem, si moderatam vivendi rationem sibi imperent, quam si in medicina validiori, ex pharmacopoliis petita, salutem quærant.

§. XI.

Neminem magis decet vitam ad sanitatis leges exacte componere, quam imbecilles, quia à levi saltem errore in diætâ commisso graviter offenduntur, & insigni sunt documento, quantam vim ac potentiam rerum naturalium, & usus, & abusus, in corpus habeat.

§. XII.

Imbecilles animum eo advertere debent, ut concoctio ac perspiratio, quanta maxima fieri potest circumspeditione, in statu integro conserventur.

Scholion.

Ad juvandam concoctionem, oportet imbecilles, paulo largius somno indulgere, ante cibum corpus, non quidem vehementi, sed moderata exercitatione, ventilare, nec adeo multum assumere. Circumcidenda

ipsis sunt acida, dura, flatulenta, falsa ac dulcia, quæ in imbecilibus facile in acorem vertuntur. Expedit etiam ventos fugere septentrionales, animi tranquillitatem colere & omnia, quæ modum excedunt, & intemperie infensa sunt, cum cura à se amoliri. vid. *Celsus Lib. I. cap. II.*

§. XIII.

Quum homo robustus & omni ex parte valens non facile à quodam excessu læsionem sentiat, ideo secundum *Celsum Lib. I. cap. I. non se tam strictè obligare debet legibus diæticis, sed varium vitæ genus habere omnibusque adsuescere oportet.*

Scholion.

Præclare tamen laudatus auctor in fine ejusdem capituli monet, cavendum esse robustis, ut *ne in secunda valetudine adversæ præsidia consumantur*, hoc est, ne vires detrimentum capiant, quæ efficacissimam in profligandis morbis medicinam constituunt.

§. XIV.

Imbecillis, quibus *Celsus* annumerat literarum cupidos, qui diurnis nocturnisque ingenii laboribus corporis robur frangunt ac spiritus dissipant, eam vivendi rationem inire convenit, quæ imprimis concoctionem ac perspirationem juvet viresque refarciat.

Scholion.

Quare eos, qui Musarum sacris operantur, eo tempore, quo cibus capitur, ab omni cura ac meditatione vacare oportet. Tempus vero exercendis ingenii laboribus maxime accommodatum est matutinum, & quod peractam concoctionem subsequitur. Quam in rem plura notatu digna commentati sumus in tractatu nostro: *de studiis per regulas diæticas facilitandis & prolonganda literarum vita*, nec non in *parte IX. diæticorum Germanico idiomate prostantium scriptorum, disquisitione ultima*. Literarum etiam cultores teneriori victu uti oportet, qui subtiles & fluxiles succos corpori ingenerat. Caveant vero sibi à flatulentis, leguminosis, pisicis, fabis, cerevisiis crassioribus & vinis deterioris notæ, quæ caput gravant, sensus obtundunt & lumen ingenii obtenebrant. Cerevisiæ enim ac vina, quo tenuiora sunt, eo magis literarum sanitati velificantur. Et quoniam debita alimentorum concoctio cerebro ac nervis favet, & spirituum animalium uberem proventum suppeditat; hinc literarum studiosis sufficiens somnus quam maxime commendatus esse debet. Quantum enim somno decedit, tantum quoque viribus ad pertractanda studia necessariis detrahitur. Deinde iis, qui litterarum studiis se consecrarunt, diligenter circumspiciendum est, ne nimia studiorum intemperie & luxuria corpus enervent, & variorum morborum injuriis obnoxium reddant. Præstat potius laborum intervalla suavi otio dispungere, & quandoque gaudia curis interponere, ut mens ad functiones suas rite perficiendas excitatior fiat. Nihil quoque magis sanitatem offendit, quam perpetua sessio, literarum amantibus familiarissima, qua sibi solennem illum affectum hypochondriacum alvique adstrictionem accersunt.

§. XV.

Magnam quoque in diæticis considerationem merentur corpora obesa multisque humoribus repleta, & graciliora, seu habitus macilenti.

§. XVI.

Obesi & vel fero, vel sanguine repleti, quam maxime in morbos proni ac proclives sunt, & tam ab animiurbationibus, quam externis rebus, ut frigore, calore, graves patiuntur læsiones, & morbo quodam correpti, ægre convalescunt.

§. XVII.

Obesis ac repletis commendanda imprimis sunt ea, quæ extenuant & superfluos humores corpori subtrahunt.

Scholion.

Faciunt huc aqua calida, acidulæ, thermæ, vigiliæ, omnis vehemens exercitatio, acida, falsa, cibus semel de

de die sumtus, leves vomitiones ac purgationes, quæ non nimis validis remediis excitantur, alias enim majorem sanitati perniciem afferre solent.

§. XVIII.

Gracilioribus & macilentis quadrant ea, quæ succos nutritios & vires conservant & intus detinent.

Scholion.

Quare modica exercitatio, frequentior quies, cubile molle, animi securitas, copiosior cibus, quanto nimium solvendo ventriculus par est, somnus plenus, balnea à prandio, assumpta inter cibos ac potus dulcia, frigus & plura alia, quæ benignos humores pariunt eosque intra corpus detinent, macilentis egregie conveniunt. Omnis vero vomitus ac purgatio gracilibus & imbecillis mirum quantum infesta est.

§. XIX.

Dantur corpora, quæ alvum justo, vel duriorum, vel fluidiorum subinde experiuntur, & his etiam peculiare in diætâ regimen præcipiendum est.

Scholion.

Qui alvi adstrictioris sunt, eos cibis uti oportet, qui alvum fundunt, & vinis præsertim dulcibus, falsis & oleosis. Quæ si parum proficiunt, ut *Celsus* suasor est, alben fumant; à frequenti tamen purgantium usu sedulo abstinendum est. Qui alvum nimis fluxam habent, eos validiori exercitatione corpus ficare decet. His quoque accommodata est fames cum pariori cibo & exigua potio; magis etiam frigida, quam calidæ usus iis imperari debet.

C A P U T XII.

De diversa ratione temperamentorum, ætatum ac temporum anni diætâ.

§. I.

Temperamentum nihil aliud est, quam certa partium, & solidarum, & fluidarum habitudo, ad circulum sanguinis motusque microcosmicos & functiones, tam naturales, quam vitales & animales, perficiendas.

Scholion.

Firma experientia exploratum habemus, pro diverso sanguinis circulo, ejusque in partes solidas influxu, diverso etiam modo se habere robur corporis, ipsamque digestionem cum secretionibus & excretionibus mirum quantum variare, imo animi quoque inclinationes ac mores, cum ingenii facultatibus, disparilem nancisci conditionem. Quare hæc omnia à diverso sanguinis circuitu, velut ab origine sua, profluere, extra omnem dubitationis aleam positum est.

§. II.

In cholerico sic dicto temperamento, fibræ sunt superiores valdeque tensæ, nec non vasa angustiora, per quæ validior vis motrix vehementi impetu vitales undas jaculatur.

Scholion.

Hinc est, quod etiam in animo præcipitantia, inque cæteris corporis functionibus quædam velocitas observetur. Et quia sanguis in hoc temperamento celerius per vasa vibratur, hinc major exsurgit calor & partes sulphureæ exaltantur.

§. III.

Hoc præditi temperamento caveant sibi ab omnibus, quæ corporis calorem accendunt & sanguinem rapidiori motu exagitant. Ea potius in usum feligere conducit, quæ igneum quasi hunc motum paululum stringunt, eique quandam temperiem conciliant, ut potius quæ optima sanitatis est conservatrix.

Scholion.

Quam ob rem cholerics neutiquam accommodata est vehemens ac longior corporis exercitatio, motus

laboriosus, cibi aromatici, calidi, pingues, potus spiritui pleni, vinum præsertim generosum, spiritus vini, cerevisiæ inebriantes, fervidior solis æstus, omnis immoderata animi commotio, medicamenta validiora, purgantia, sudorifera, volatilia, nimis diuturnæ vigiliæ & quæcunque ita comparata sunt, ut sulphuream humorum intemperiem cumulent, eorumque incendium augeant. Periculum quoque cholerics intentant omnia excessive frigida, tam aer frigidus, quam potio frigida, quippe quæ ejusmodi sunt, ut sanguinem, per se spissum ac debita orbis humiditate, in tenacissimum gluten cogant, unde graves cholerics inflammationes ac febres ut plurimum proficiunt. At vero cholerics sanitati præsidium promittunt infusa calida, potus copiosiori aqua diluti, aqua decocta, vinum cum aqua mixtum, omnes cibi humectantes, temperatus hypocausti & lecti calor, & conclave spatiosum. Denique per omnia mediocritatem colant, sique alvum adstrictam experiuntur, non purgantibus validis, sed laxativis, v. g. passulis, manna, rhabarbaro, tamarindis & aloë, solvenda est.

§. IV.

In temperamento melancholico, ob fibrarum duriem ac densitatem, sanguis lente & cunctanter per vasa devolvitur, unde humores crassitiam induunt, omnesque, tam animi, quam corporis actiones, quadam cum difficultate exercentur. Quare nocumento sunt omnia, quæ humoribus spissum lentorem inducunt & impedientem eorum circuitum magis magisque sufflamant.

Scholion.

Melancholicos, quia sanguinem spissum ac minus mobilem in venis alunt, abstinere oportet à victu crasso, acido, cibis ac piscibus compactioris texturæ, leguminibus, cerevisiis grossioribus ac spirituosius, quæ nimium commovent. Neque iis adeo opportunus est aer, tam frigidus, quam calidus, quia uterque necessariam humoribus fluiditatem detrahit. Exulare etiam ab eorum animis debent omnes affectus, quibus vehementia inest, ut ira ac terror, utpote qui spissum sanguinem in tenuissimorum vasorum angustias fortius impellendo, graviter plerumque eorum sanitatem affligunt. Contra ea melancholicis conveniunt motus & corporis exercitatio, non simul ac semel, sed successive aucta, potus largior & humectans, vinum generosum moderate sumtum, venæ sectio & cibi aromatibus moderate conditi. Expediit his quoque non multum satari cibis, impigrum esse ad labores, peregrinationes sub aëre temperate calido ac sereno instituere, eaque magni habere ac sectari, quæ animum varia delectatione reficiunt.

§. V.

In temperamento phlegmatico serum abundat, valdeque tardus ac languidus est humorum circuitus, & omnes, cum animi, tum corporis actiones, pigritiam ac torporem sibi adjunctum habent. Juvat itaque sanguini tardius progredienti stimulum & calcar addere, vires ac partium robur firmare & humidam frigidamque humorum intemperiem ad sicciorem statum reducere.

Scholion.

Quia sanguis in hoc temperamento tarde iter suum absolvit, hinc phlegmaticis egregie quadrant carnes assæ, sale & aromatibus conditæ, cerevisiæ non adeo tenues & vina, quæ spiritu turgent. Eosdem diligenter vacare oportet corporis exercitationi, quæ superabundans humidum egregie discutit. Abstineant vero necesse est à fructibus horæis & crudis vegetabilibus, ab aëre vappido ac humido, qualis in locis angustis & depressioribus, ut plurimum tempore autumnali, observatur. Neque minus animo exesse jubeant omnem angorum ac moestitiam, ea studiose sequendo, quæ animo vigorem & agilitatem conciliant.

§. VI.

Sanguinei vocantur, quibus habitus corporis spongiosus

fus est & laxè cohæret, qui venas copiosas, sed exiles & angustas obtinent, per quarum alveos sanguis placido & secundo flumine decurrit. Quum itaque hic status corporis ad copiosum sanguinem prognerandum maxime sit idoneus, hinc sanguineos se ab eorum usu retrahere decet, quæ superfluam sanguinis copiam accumulanti.

Scholion.

His præcipue conducunt sobrietas, temperantia ac durius quodammodo vivendi genus. Temperent sibi à dulcibus, spirituosis, vino, spiritu vini, nimio carniū esu, cærevisiis multum nutrientibus, carne suilla ac somno diuturno. Apprime multum iis prodest motus non adeo fortis, sed moderatus, inque aëre temperato eos versari oportet, quia & nimis calidus, & nimis frigidus, ipsorum sanitati calamitatem inferre solet. Conferunt potus tennes, infusa herbarum & aqua calida sanguinisque missiones. Et quia sanguineorum natura ad criticas sanguinis excretiones valde inclinatur, hinc dispiendum, ne ullo modo cohibeantur.

§. VII.

Quemadmodum non una est corporum, tam quoad solidas, quam fluidas partes, in omnibus ætatibus habitudo ac dispositio, ita nec eadem vivendi ratio omni ætati accommodata est.

Scholion.

Sub certis ætatibus, quibus curriculum vitæ humanæ absolvitur, corpora crescunt, ad statum ac vigorem perveniunt, tandemque amisso robore, ingens patiuntur decrementum. Sub omni vero ætate diversa machinæ nostræ conditio est, quoniam & fluida ratione temperiei & quantitatis, & solida respectu aptitudinis ad motum, magnam subeunt mutationem. Pro varia igitur ac differente corporum habitudine, diversa quoque vivendi ratio instituenda est.

§. VIII.

Sicut in condendis legibus, ad quas diætæ ratio componenda est, omnium maxime attendi debent virium robur & imbecillitas; ita, quum sub omni ætate vires quoque diverso modo se habeant, non nisi indagatis cujuslibet ætatis natura ac viribus, accommodæ vitæ leges præcipiendæ sunt.

Scholion.

Infantes, pueri ipsique senes imbecillioribus accensendi sunt; robustiorum vero numero juvenes ac viri continentur. His igitur diversus vitæ cultus imperari debet.

§. IX.

Infantes, ob insignem fibrarum teneritudinem & sensibilitatem, à quacunque re noxia, facile offenduntur morbisque obnoxii fiunt, quare circumspicienti diætâ eos tractare oportet.

Scholion.

Infans ille dicitur, cui nondum fandi facultas est; puer, qui nondum ad pubertatem pervenit. Infantes autem gravissimis nervosi generis affectionibus patent, id quod vehementes spasmi, convulsiones, tormina, epilepsiæ, pavores, febres ac dolores testantur. Apparet hoc etiam exinde, quia, si lac sugunt nutricis, gravi animi affectu exagitata, maxima plerumque incommoda, ipsamque interdum epilepsiam, patiuntur. Præterea eorum teneritudo inde perspicua evadit, quum à lacte matris, quæ pridie purgans assumsit, alvum frequenter dejiciant, & ab omni graviore errore in diætâ à matre commisso, se male habeant, e. g. si spiritum vini assumerit, si cum viro celebraverit concubitum, si comederit acida, aut flatulenta, sique frigus ad mammas libere admisum fuerit.

§. X.

Quemadmodum infantes, ratione firmitatis ac teneritudinis, à se invicem plurimum dissident, ita etiam diversa eorum diætâ & tractatio instituenda est, nec unum idemque lac omnibus ac singulis propinari debet.

Scholion.

Animadvertimus enim, infantilia corpora, habito ad

viros partiumque texturam respectu, longis invicem distare intervallis. Qui enim ex sanis ac robustis parentibus prognati sunt, ut sunt homines plebei, rustici, operarii, ii non facile à noxia quadam re læsionem sentiunt, nec adeo frequenter morbos afflictionibus tentantur. Qui vero infantes facti sunt à parentibus imbecillioribus, in adolescentia, vel senectute constitutis, valetudinariis, vel intemperantiæ & ebrietati litantibus, ii longe magis morborum injuriis patent & levissimam quoque læsionem ægre ferunt. Deinde infantes etiam ratione habitus corporis discrepant. Quibus enim caro spongiosa est & nimis mature in pinguedinem exuberat, qui teneiores nervos ac tendines habent, ii facilius morbis obnoxii, nec adeo vivaces sunt. Qui vero carnem habent compactiorem, nervos solidiores, tensasque membranas ac tendines obtinent, eorum sanitas meliori nititur firmamento. Denique & illud hoc loco animadvertendum est, quod infans unus præ altero magis expositus sit affectibus spasmodicis ac convulsivis, & observando à nobis notatum est, infantes ab iis parentibus procreatos, qui affectibus animi fræna laxant, & lauto ac delicato vitæ generi indulgent, quo in numero divites, magnates & aulici sunt, vitam non adeo longe protrahere, & maxime iis morbis infestari, qui ex nervorum debilitate suam trahunt originem. Atque his lenissima diætâ & severiori lege circumscripta vitæ ratio accommodari debet.

§. XI.

Nihil est, quod lactentis infantis sanitati magis adversetur, quam nimia lactis repletio.

Scholion.

Quemadmodum omnis repletio naturæ exosa est, & maxime digestionem lædit; ita eadem multo magis in tam imbecillo subiecto pertimescenda est. Quare pessima nutricum consuetudo invaluit, dum infantibus, quando male habent, vel vagitus edunt, subinde mammas præbent, & invitis propemodum obtrudunt, quo nihil aliud efficiunt, quam ut ventriculum nimio lacte obruendo, cruditatibus ejus cumulum addant ac vim morbi exasperent. Ingesta enim à ventriculo male digesta intra primam regionem stagnant, acescunt & corrumpuntur. Hinc ingeniose dictum est ab Hippocrate: *nutrices dum lactant infantes, sepe etiam mactant.*

§. XII.

Tenerioribus propinandum est lac tenue ac fluidum; nam crassum, butyrosū & caseosū graviter tenellos affligit, quia à ventriculo non satis vinci atque expelli potest.

Scholion.

Res maximæ utilitatis est, lactis, quod nutrices infantibus præbent, examen instituere, & explorare, cujus sit consistentiæ, & qua in proportionem partes serosas, caseosas ac butyrosas contineat. Optime autem hoc indagari potest evaporatione, deinde instrumento quodam statico, quo cerevisiæ & aquæ librari solent; tum affusione spiritus vini rectificatissimi, qua proportio solidi ad fluidum cognosci potest; denique etiam butyrosam lactis substantiam investigare licet, quando lac per viginti quatuor horas in tepido loco reponitur.

§. XIII.

Pessimæ conditionis lac crassum ac pingue est; melioris notæ, quod non adeo spissum, nec adeo tenue ac falsum, sed dulce & liquidum, & quod à sana ac vegeta nutrice funditur.

Scholion.

Nimia lactis crassities commodissime emendari potest, si nutrix ante cibum moderato labore corpus exerceat, si infusa ex feminibus foeniculi, anisi, cymini, cum aqua calida parata, mane jejuno ventriculo sumat, sique nimia ciborum copia ipsi circumcidatur.

§. XIV.

Consultum est primis mensibus offerre infanti lac tenue; procedente vero tempore & circa exitum anni paulo crassius non nocet, quod infantes recens editi ægre ferunt.

Scholion.

Scholion.

Lac crassum vasa adhuc tenuissima obstruit, & glandulas meferaicas villosque & ostia vasorum lacteorum spissa ac tenaci amurca oblinat & infarcit. Præterea lac copiosum & spissum difficiliter motu peristaltico per intestinorum anfractus trajicitur, hinc in acorem fatiscit inque corruptivum liquamen degenerat, unde molestæ inflationes, tormina, spasmi, dolorosæ alvi dejectiones, vigiliæ, epilepsiæ & pavores in somno coarantur.

§. XV.

Lactis usus infantibus ultra annum concedendus est, ita enim majus robur partiumque firmitatem consequuntur. Si autem lactatio sex vel octo mensibus circumscribitur, tunc sensim cibo tenuiori & facillimæ concoctionis affuefaciendi sunt.

Scholion.

Pleræque matres in eo delinquere solent, quod infantes eo tempore, quo adhuc lac ex mammis hauriunt, pulmentis ex farina, ovis & lacte paratis infarciant, quod alimenti genus ob multam viscositatem non potest non esse noxium. Quare infantibus accommodatiora sunt ea, quæ ex medulla panis similaginei, aqua & butyro parantur. Faciunt quoque ad infantum sanitatem infusa v. g. ex radice glycyrrhizæ, herbis veronicæ & scordii concinnata, quibus adjungi potest decoctum hordei corticibus citri infusum, cujus ulus etiam nutricibus pro lacte depurando suaderi debet.

§. XVI.

Maximopere cavendum est, ne infantibus, si dentitione molesta perfunguntur, vel alio quodam morbo laborant, copiosum lac offeratur, quia facillime corruptionem ex stagnatione subit, morbumque exulcerat.

Scholion.

Sub omni enim graviore dolore, universa nervorum compages, ob singularem, qui nervosis partibus communis est, consensum, afficitur; siquidem dolor nervosas partes violento spasmo constringit, unde ventriculi & intestinorum tonus motusque peristalticus, una cum digestionem & excretionibus, mirifice perturbatur & fecum per alvum excretio impeditur.

§. XVII.

Quo tenerior ætas est, eo longior somnus ipsi convenit. Quo magis vero ætas increfcit, eo magis somno quippiam paulatim detrahendum.

§. XVIII.

Curare oportet, ut infantes semper alvum habeant laxiorem, eamque frequenter deponant. Simul ac enim alvi officium desideratur, morbum certissime imminere judicandum est.

Scholion.

Quemadmodum in omni, ita etiam in infantili ætate, alvina excretio rite procedens, convenientissimum sanitatis indicium constituit, utpote quæ de nervosi generis integritate, à qua salvus intestinorum peristalticus motus dependet, liquidissime testatur. Alvus vero adstrictior semper extimescenda est, quia labefactatum nervosarum partium robur, adeoque corporis ad recipiendos morbos aptitudinem, designat. Cæterum præclare annotavit Hippocrates de Dentib. §. I. infantes saniores esse, quibus alvus valde lubrica est, & bene concoquunt; morbosos autem, quibus modice fluit, & qui voraces sunt, nec tamen convenienter nutriuntur.

§. XIX.

Nihil magis ventriculi & intestinorum tonum in infantibus destruit, quam medicamenta purgantia paulo validiora.

Scholion.

Hujus generis sunt ex gialappa & scammonio parata, ut & metallica, aurum fulminans & mercurius dulcis, quæ diutius intestinorum plicis inhærendo, membranosos eorum parietes erodunt, facta imprimis acrium humorum accessione. Magis quadrant leniora laxantia,

Frid. Hoffmanni Oper. Tom. I.

ut sunt rhabarbarina cum absorbentibus mixta, vel mannata cum rhabarbari extracto maritata. Quamquam vero semper eo laborandum sit, ut crassa ac viscida lactis recrementa quotidie per alvum eliminentur, curam tamen adhibere decet, ut integer & salvus ventriculi atque intestinorum tonus custodiatur. Hoc enim infracto, vel penitus destructo, alvus nunquam suum rite præstat officium, unde frequentissima infantilium morborum origo derivanda est. Validiora enim purgantia hoc habent, ut una vice fortiter quidem alvum ducant, postea vero, læso ac destructo intestinorum tono, alvi obstructions efficiant, quæ in infantibus fecundissimæ morborum sunt genitrices. Sæpe hoc à nobis non citra dolorem, etiam in illustribus & conspicuis dignitate subjectis, animadversum atque prædictum est, quod etiam sinister & luctuosus eventus confirmavit, quamvis medicorum quorundam ignorantia candide prolatam hanc veritatem multis modis fugillaverit. Suffragatur autem nostræ sententiæ solidum Ferrarii judicium, quod *Libr. de Art. Med. Infant.* ita proponit: *Infantes ob virium imbecillitatem medicamenta valde alterantia tolerare non possunt.* Eadem opiatorum est ratio, quæ infantum ingenio infesta sunt, & corpus ad morbos præparant.

§. XX.

Infantes ac pueros sapius, sed parum semper, assumere oportet, quod, quo temperatius est, eo magis alendis partibus accommodatum.

Scholion.

Fulcitur hæc lex diætica auctoritate Hippocratis, qui *Libr. de Pueror. Nutrim.* ita fatur: *Qui crescunt, plurimum habent calidi innati, plurimoque egent nutrimento, alias corpus absumentur.* Infantum enim ac puerorum corpora, ut procedente ætate majus subinde capiant incrementum, copioso indigent succo nutritio, qui eorum partibus sensim apponi debet. Quum autem tenellus eorum venter copioso cibo concoquendo plane impar sit, hinc infantibus parum cibi, sed eo frequentius præbere decet, & quo magis alimentum temperie gaudet, eo etiam magis nutriendis partibus est idoneum.

§. XXI.

Quæcunque temperiem excedunt, ea infantes ac pueri in universo rerum non naturalium usu evitent necesse est.

Scholion.

Vinum, spiritus vini omniaque acida, infantibus ac pueris instar veneni nocent, quia non solum nutritioni & partium augmento resistunt, sed etiam cerebro ac nervis inimica sunt ac sapius cerebri functiones perturbant.

§. XXII.

Ad conservandam tenellorum sanitatem plurimum confert æqualis & moderata transpiratio. Quare infantes sub temperato regimine & calore in lecto & conclavi detineri, & ab omni intensiori frigore probe muniiri debent. Si secus sit, facillime in tormina ventris & singultum incidunt.

Scholion.

Bene Hippocrates *Lib. de Aliment. §. VI.* qui probe, inquit, perspirant, debiliores, sed saniores sunt, & à morbis facile reconvalescunt. Qui male perspirant, priusquam agrotent, fortiores sunt, ubi autem agrotarunt, difficiliter à morbis reconvalescunt. Est autem transpiratio eam imprimis ob rationem infantibus necessaria, quia multo egent nutrimento, cujus maxima pars rursus è corpore ejicienda est. Quo melius autem succedit hæc cutanea excretio, eo sincerius & salutarius nutrimentum evadit.

§. XXIII.

Lactentium infantum sanitas maxime dependet à lactis natura, & nutricis sana, vel debili corporis constitutione.

M

Scholion.

Scholion.

Quum enim infans à nutrice suam accipiat alimonia, fieri non potest, quin à lacte deterioris notæ, vel penitus depravato, maximum patiat incommo- dum. Atque hinc evenire solet, ut infans, nutrice gravi ira, vel terrore correpta, facillime in epilepticas afflictiones incidat. Quo in casu consultum est mammas frequenter emulgere, & sedulo cavere, ne intra viginti quatuor horas infanti lac præbeatur. Quare infanti bene morata nutrix adjungenda est, semperque curare oportet, ut lac unius naturæ tenellis propinetur. Maxime autem infantis sanitati accommodata est nutrix, quæ mediocris ætatis, semel saltem lactavit, & jam bis partu defuncta, nunquam vero abortum passa est. Deinde & hæc ad dotes bonæ nutricis referri debent, si laudabili cibo nutritur, si multum liquidi, sed valde tenuis, assumit, si ab omnibus acidis, spirituosus, inque putredinem pronis, ut & acrioribus purgantibus, abstinet, diurnum à cibo somnum fugit & à venere prorsus abhorret, & quæ inferiores corporis partes binis vicibus de die exercet, neque lac adeo crassum ac superfluum in mammis alit, quippe quod furunculos, multasque ægritudines intra primam regionem progenerat.

§. XXIV.

Maximopere cavendum est, ne tenerum infantum corpus multis ac validioribus medicamentis exagitetur, & benigniora potius in usum vocanda sunt, quæ non intestinorum tonum lædunt ac transpirationem sartam tectamque servant.

Scholion.

Infantibus nunquam validiora remedia offerri debent, sique rei necessitas tale quid exigat, illud tutius nutrici exhibetur. Constat enim frequenti observatione, exhibito nutrici quodam purgante & laxativo, infantis alvum fieri molliorem.

§. XXV.

Pueros, quoniam nutritione & auctione opus habent, multum quoque, sed parum simul, & quod paribus alendis idoneum est, assumere oportet, maximeque necessarium est, ut corpus moderato motu exerceant, inque perpetua perspiratione servant, hac enim ratione egregie adolefcunt.

Scholion.

Qua fieri potest circumspeditione pueri arceantur ab usu dulcium, lactis & casei, utpote quæ vermium generationi favent, & humoribus corruptionem inducunt. Aliena quoque esse debet puerilis ætas à vino, potibus spirituosus & nimia corporis exercitatione, ne humores plus justo accendantur, & corpus intempestive exsiccatum, decenti augmento defraudetur. Qui autem literarum studiis animum consecrarunt, eos alimenta crassioris texturæ & flatulenta, ut fabas, pisa, milium, farinacea, & cerevisias inebriantes, diligenter evitare oportet. Hæc enim non tantum corporis robur enervant, verum etiam ingenii vim deprimunt, ejusque acumen multum obtundunt.

§. XXVI.

Recte scribit *Celsus*, *juvenum minus, quæ assumant, & quomodo curentur, interest.*

Scholion.

Juvenili ætati magnus vigor inest & ingens partium solidarum robur, quare juvenes, dum ætatis suæ patrocinium habent, non tam facile læduntur, nec adeo stricte diætericis legibus se obligare debent.

§. XXVII.

In juvenili ac virili ætate semper colenda est mediocritas, & ita edendum, ut animi & corporis vires resusciantur, neutiquam vero opprimantur.

§. XXVIII.

Circa victum illud maxime cavendum est, ne ad sanguinem, nimis calidis ac spirituosus & fortiori motu exagitatum, frigidus potus, vel aer admittatur, ita

enim magna pars juventutis funclis inflammationibus correpta præmature extinguitur.

§. XXIX.

Juvenes ac viri, quantum fieri potest, abstineant à calidioribus & sanguinem commoventibus, fugiant quoque fortiora purgantia, nec nimis immodice animi affectibus indulgeant. Venæ sectio autem, si necessitas urgeat, hac in ætate non improbanda est.

Scholion.

Non possumus nobis temperare, quin huc plane illustrem locum ex *Baglivo* transferamus, qui hac de re ita sentit: *In juvenibus humores ut plurimum faciunt impetum superiora versus, in senibus vero versus inferiora. Pendet id, si licet opinari, ex laxitate nimia solidorum & fluidorum in senibus, contra vero ex nimia vi, tensione ac elatere eorundem in juvenibus.* Hac de causa ait *Duretus in Coac. fol. 66. & 69. febres ardentes in juvenibus solvuntur per hæmorrhagiam narium, in senibus per dysenteriam; sed ut hæc certo observentur in praxi, sicut revera observari debent, jubente sic naturæ lege, animus omni cura solvendus est, ut libere hinc inde diffuere possint spiritus & irradiare partes singulas, juxta naturæ ordinem; nam animo curis, studiis & mille aliis causis vitæ civilis agitato turbatoque, liquidorum omnium cursus mille modis turbantur agitanturque, effluunt hinc inde furibunde, qua fluere non debent. Vid. pluribus *Bagliv. Oper. pag. 350.**

§. XXX.

Pro valetudine est, à prima juventute duris laboribus, & victui duro corpus affluere, & aëre magis frigido, quam nimis calido, uti.

§. XXXI.

Senum diæta ad examen paulo curatius revocanda est, utpote qui jure ac merito imbecillis accenseri debent.

Scholion.

Quo majus enim decrementum vires patiuntur, eo magis corpus externarum rerum injuriis opportunum est.

§. XXXII.

Senili ætati maxime commendari debet mediocritas, temperantia in victu ac potu animique tranquillitas; omne enim nimium senum naturæ quam maxime est inimicum.

Scholion.

Quare à provectiori ætate aliena sint nimia ciborum repletio, frequens vini, præsertim acidi ac tartarei, usus, alimenta intemperata, falsa, acida, dura & quæcunque difficilius à ventriculo subiguntur.

§. XXXIII.

Nihil æque senum valetudinem affligit, quam crebrior acidorum usus & frigoris vehementia.

Scholion.

In decliviori ætate sanguis lentiori gradu per vasa fertur, & omnes, quæ alias sanitati præsidio sunt, excretiones languent, unde humores spissitudinem induunt & ad subeundam stagnationem inclinant. Quum itaque frigus & acida humores debita privent fluxilitate ipsumque calorem deprimant, in procinctu est ratio, quare frigus & acida senum valetudini magnopere adversentur, inque morbis, quibus hæc ætas patet, progenerandis plurimum valeant. Alimenta in senum ventriculo facile acescunt, eamque ob rationem lactinia & caseus huic ætati insignes molestias creant.

§. XXXIV.

Senibus maxime conveniunt ea, quæ ventriculo prompte obsequuntur, præsertim in cœna, ut quietiori somno fruantur, qui devexæ ætati maximum semper solatium affert.

§. XXXV.

Victus quo propius ad simplicitatem ac temperiem accedit, eo magis tuendæ senum valetudini velificatur.

§. XXXVI.

Nunquam senibus à vitæ genere, cui tam ratione motus,

motus, quam victus, jam inde à multo tempore affueti sunt, sine gravi causa recedendum est.

§. XXXVII.

Senibus maxime conducibilis est moderata transpiratione, hinc laborandum, ut illa semper rite succedat.

Scholion.

Transpirationem egregie juvat motus, sive exercitatio corporis, sub aëre temperato instituta, & vinum forte ac generosum, quod non modo transpirationem movet, sed & universo corpori vigorem ac robur conciliat, unde vinum haud illepide lac senum appellatur. Faciunt quoque huc infusa herbarum aromaticarum, ut salviæ, melissæ, corticum citri & cinnamomi. Valde autem senibus nocent vina vaporosa ac sulphurea, vel quæ principio acido & adstringente pollent, quoniam alvum obstipant & decentem urinæ fluxum interceptiunt.

§. XXXVIII.

Venæ sectio ætate affectis magnam promittit utilitatem, quæ præcipue tunc locum habet, si vires suppetunt, si appetitus est integer & universum corpus adhuc quodam vigore instructum est.

Scholion.

Magna pars senum quam longissime vitam posset extendere, nisi sanguinis depletionem neglectui haberet. Sanguinis enim abundantia, in quam hæc ætas, ob vitam sedentariam & victum paulo liberaliorem, proclivis est, multos jugulare solet, siquidem scorbutum, viscerum infarctus, marasimum, affectus soporosos, & præcipue apoplexiam, corpori inducit. Quo de argumento plura legi possunt in *Dissert. nostr. de Venæ sectione magno ad vitam longam remedio.*

§. XXXIX.

Senes, quos vires corpus exercendi destituunt, frictionibus curare debent, ut sanguinis circuitus promoveatur.

§. XL.

Senes à nimio carniū esu abstinere oportet, vegetabilia autem coctione mollita, ut passulæ, pruna, poma, magis eorum sanitati accommodata sunt.

Scholion.

Carnes nimiam sanguinis abundantiam corpori ingenerant, quæ senibus, utpote à corporis exercitatione alienis, insensibilissima est, & præcipuam morborum, quibus senes affliguntur, causam constituit. Longe melius senum valetudini inserviunt legumina molliora, olera & pisces, quia parum saltem nutritii succi continent. Placet autem hoc loco peculiarem observationem inferere, quam *Baglivus in Operib. pag. 388.* scriptam reliquit, & ita habet: *Animadvertes in praxi, aliquos ægros fluxionibus & diuturnis morbis obnoxios, tempore quadragesimali convalescere; paschate iterum ab esu carniū languescere. Observabis etiam quosdam morbos ab obsoleto esu caulium, leguminum, olerum, piscium, aliorumque ciborum hujusmodi evanescere, cibis vero boni succi exacerbari & crescere.*

§. XLI.

Senibus quam maxime nocent purgantia, & graves animi commotiones, quo magis enim corpus debile & imbecillum est, eo majorem à qualibet intemperie læsionem sentit.

§. XLII.

Diversis anni temporibus diversum quoque vitæ regimen accommodandum est, quoniam aëris status immutatus magnam animantium corporibus inducit mutationem.

§. XLIII.

Hyemali tempore, ob auctam aëris elasticitatem, fibræ majori robore instructæ, & ad motus exercendos, juvandamque ciborum concoctionem promptiores sunt, quare tunc temporis victum paulo duriores & crassiores longe melius, quam alio quovis anni tempore, ferre possumus.

Frid. Hoffmanni Oper. Tom. I.

§. XLIV.

Quum transpiratio per hyemem, tubulis cutaneis à frigido aëre admodum contractis, quodammodo cohibeatur, hinc brumali tempore vinum meracius & cerevisia efficacior egregie conveniunt. Expedit quoque jusculis & infusis calidis frequenter uti, & semper curam adhibere, ut perspiratio assumptorum quantitati respondeat.

§. XLV.

Pessima consuetudo est, quæ præsertim apud Germanos invaluit, sub aciori frigore conclavia, imprimis humiliora, nimis calefacere, ita prorsus, ut ferventissimo calore homines quasi torreantur. Quum enim brevi post ad levandum ardorem corpus frigido aëri committant, catarrhosas defluxiones, coryzas & capitis debilitatem, sibi accersunt, quæ præcedente tempore periculosas nervorum affectiones, inducere solent.

§. XLVI.

Vere aliquantum cibo detrahendum & potui adiiciendum est, quo temporis tractu veneri etiam tutissime litatur.

§. XLVII.

Pessime sanitati consulunt, qui sub ipso veris initio statim vestes hybernas deponunt, & levi saltem incedunt amictu, qualis tempore æstivo in usu est.

Scholion.

Verno tempore magna est cœli varietas, & perpetua caloris ac frigoris vicissitudo. Si itaque calida aëris constitutio in frigidam tempestatem subito transmutatur, frigus poris calore apertis sese insinuat, eosque constringit, unde cutaneæ exhalationes, quarum emissio tempore vernali admodum salutaris est, cum insigni sanitatis detrimento intra corpus retinentur.

§. XLVIII.

Prohibita transpiratio vix ullo tempore magis, quam vernali extimescenda est, quia corpus ad gravissimas afflictiones præparat.

Scholion.

Testes hujus rei sunt complures morbi & febres, præsertim exanthematicæ, quæ plerumque vernali tempore incidunt, nec aliunde, quam ab intercepta transpiratione, suam trahunt originem. Per hyemem enim plures ac superflui succi copia ciborum in corpore accumulatur, quos natura ceu alienos & supervacaneos, facta sub vernali anni statu majori, tam in solidis, quam fluidis partibus, expansione, foras ejicere laborat. Quare nulla anni pars magis, quam verna, præservandis à morborum insultu corporibus accommodata est. Atque hinc etiam ratio perspicua evadit, quare consuetudine receptum sit, vernali tempore venæ sectiones instituere, & sanguinem lenioribus laxativis & infusis depurare; siquidem hic cœli status ejusmodi præservativis curationibus cum fructu suscipiendis egregie patrocinatur. Diligenter itaque dispiciendum, ne salutaris perspiratio, quæ corporis universi sordes expurgat, per vernum tempus ullo modo interceptiatur.

§. XLIX.

Nullus est anni status aut conditio, quæ plures producat morbos, quam tempus vernum & autumnale. Jam quum summum sanitatis præsidium in libera transpiratione sit collocatum, laborare oportet, ut illa semper rite succedat.

Scholion.

Quare tunc temporis corpus adversus frigoris inclementiam probe munire decet, & quia aër multis, naturæ inimicis exhalationibus refertus est, summo studio cavendum, ne sub initium veris, vel exitum autumnii, nimirum mense Martio ac Novembri, ut & tempore matutino ac vespertino, corpus liberiori aëri exponatur.

§. L.

In autumnno eadem, quæ in vere observanda sunt, quia eadem est cœli intemperies & subita tempestatum

mutatio, qua salutaris perspiratio facile supprimitur. Et quoniam in hanc anni partem æquinoctiale tempus incidit, ideo imminentibus morbis præservativa curatione obviam eundum est.

§. I.

Æstate magis pro sanitate sunt vegetabilia & potiones dilutæ, abstinendum vero à victu duro & crassiori, vino, vel spiritu vini, intempestivo & nimio usu tabaci, qui tamen vere & autumnno admitti potest. Venerus autem secundum *Celsi* monitum æstate fugienda est.

CAPUT XIII.

De diætâ sexui convenienti.

§. I.

Corpora diverſi ſexus diverſam quoque diætâ & vitæ regimen deſiderant.

§. II.

Fœminæ viris ſunt imbecilliores, hinc diætâ peculiari opus habent.

Scholion.

Fœminæ laxiori corporis habitu, & maximam partem vitæ otioſæ & voluptatibus addictæ ſunt, parum bibunt, corpus habent exquiſite ſentiens, ad ſpaſmos & convulſivos motus proclive & ſanguini redundanter colligendo valde opportunum. Præterea etiam certis ac ſtatis temporibus ſolennem ſanguinis per uteri venas profuſionem patiuntur. Ex quibus conficitur, ſexui potius fœminino, quam virili, de peculiari vivendi ratione eſſe proſpiciendum.

§. III.

Mollior ſexus, teſte experientia, ut plurimum peſſime habet, turbato, vel male procedente ſanguinis ex utero profluſio; viget vero ejus ſanitas menſtruali hoc fluxu rite conſtituto.

Scholion.

Quapropter medicum omnem curam in eo collocare oportet, ut uterina hæc ſanguinis excretio debita ſemper in quantitate, tempore & ordine reſpondeat, nunquam vero perversa diætâ & neglecto vitæ regimine turbetur, vel plane cohibeatur. Menſtruam vero ſanguinis ejectionem nihil æque pervertit, ac frigoris, impendente menſium fluxu, liberior ad ventrem & inferiores partes admiſſio. Multum quoque in violanda hac ſanguinis excretionem valent gravioreſ animi commotiones, præſertim terroris vehementia, cujus tanta vis eſt, ut ſæpius ipſum præſentem fluxum ſiſtere & cohibere ſoleat. Neque tunc temporis expedit, gravioreſ curis inhærere, vel animum pravis deſideriis exagitare, ſed potius animi tranquillitas omni ſtudio colenda & obſervanda eſt. Tempore quo menſes fluunt, abſtinere oportet ab omnibus acidis, flatulentis, victu duro, crasso & nimium refrigerante, lacticiis & viſcoſis. Evitari quoque debent panis calidus butyro illitus, frigida potio, cereviſia fœculenta & omnia, quæ adſtringendi facultate gaudent.

§. IV.

Instante menſium fluxu, ſanguinis circulum ac motum liberum omni modo promovere conſultum eſt.

Scholion.

Liberiorem ſanguinis fluxum egregie efficiunt infuſa herbarum temperate baſamicarum, ut ſunt herba meliſſæ, veronicæ, flores cheiri, anthos, cortices cinnamomi, citri recentes, loco infuſi herbæ thée mane ſumta. Expedit etiam alvum ſemper habere paulo laxiorem, unde ſi illa diutius adſtrieta fuerit, clyſter emolliens infundendus, vel doſis pilularum baſamicarum exhibenda eſt. Multum quoque juvant moderata corporis exercitatio & aëris temperate calidi uſura, ſem-

perque curandum, ut pedes & inferiores partes à frigore probe defendantur.

§. V.

Singularis etiam vitæ ratio præcipienda eſt fœminis, quæ uterum ferunt, ne vel ipſa mater, vel quod inaus gerit, aliquid capiat detrimenti.

Scholion.

Infans enim utero conſuſus quaſi partem corporis materni conſtituit.

§. VI.

Qualis eſt matris ſanitas, qualis animi, humorum motuumque conditio, talis quoque ſtatus infantis eſt. Quo vegetior ergo mater eſt, eo vegetior quoque fœtus obſervatur, & quicquid matri nocumentum affert, illud multo magis imbecilli fœtus ſanitatem pervertit. Quare ſumma exigit neceſſitas, ut fœminæ ante omnia ſub imprægnationis ſtatu ſummam corporis ſui curam gerant, vitamque degant ad ſanitatis leges quam maxime accommodatam.

§. VII.

Fœminas in diætâ amplecti decet maxime ea, quæ ſanguinem bonum ac temperatum corpori ingenerant, quæ humoribus conciliant fluiditatem, & ſuperfluas excrementitias partes à vitalium ſuccorum conſortio arcent. Fugere autem oportet omnia intempera, quæ humores vehementer in motum cient, quæ eos impuros reddunt, vel nimis copioſum ſanguinem ſuppeditant.

Scholion.

Quemadmodum omne intemperatum ſanitati & naturæ corporis noſtri noxam minatur, ita hoc multo magis prægnantibus inſidias ſtruit. Quare à fœminis exulare debent gravioreſ animi affectus, frigus immodicum, removeantur immoderatiores æſtus, nimia ciborum repletio, vehemens corporis motus, ſomnus diuturnus, alimenta difficilis ſolutionis & mali ſucci, omniaque validiora emetica, purgantia, & quæcunque ob ſuam activitatem humores in vehementem motum conjiciunt. Majorem vero gravidarum ſanitati utilitatem pollicentur omnia temperata, quæ benignos & laudabiles ſuccos corpori largiuntur, ventriculo rite obtemperant & excretoria cito trajiciunt.

§. VIII.

Quoniam ſanguinis fluxus in gravidis ceſſans in ſtatum plethoricum eas conjiciat, hinc nihil magis confert ad tuendam matris ſanitatem ſpemque uteri ſervandam, quam debito tempore inſtituta venæ ſectio, quæ in nonnullis menſe ſtatim ſecundo, in plurimis vero tertio celebranda, & pro rei neceſſitate, ſeptimo, vel octavo repetenda eſt.

Scholion.

Nimia ſanguinis redundantia eam ob rationem corpori in gravidis detrahenda eſt, quoniam ſibi relicta & matrem & infantem in graviffimas afflictiones præcipitat. Quia vero una fœmina præ altera copioſiorem ſanguinem in venis alit, ea propter huic deplendo ne utiquam ſufficit unica vice adminiſtrata venæ ſectio, ſed potius in quibuſdam ſubjectis aliquoties, nimirum ter, vel quater, ſanguis è vena mittendus eſt. Hac enim ratione triſtis abortio, aliaque, quæ gravidas invadunt, incommoda, egregie avertuntur.

§. IX.

Plethora, gravidis quam maxime familiaris, ut plurimum cacochymiam progenerare ſolet; idcirco medicum, cui matris, & infantis, ſalus commiſſa eſt, curam adhibere oportet, ut pernicioſa hæc ſuccorum depravatio decenti auxilio à corpore arceatur.

Scholion.

Commodam hac in re operam locant leniora evacuantia, quæ collectam in primis viis impurorum ſuccorum colluviem blande educunt; quod conſilium ſuo quoque confirmat ſuffragio *divus ſenex ſecl. V. aphor. 29. prægnantes*, inquiens, *purgabis, ſi materia turgeat, quadrimeſtres*,

mesires, & usque ad septimum mensem, sed has minus. Huic scopo conveniunt medicamenta balsamica, quæ clementer evacuant, simulque ventriculū & intestina, cum universo genere nervoso, roborant. Faciunt huc pilulæ *Becheri* & rhabarbarinæ, neque minus passulæ rhabarbarinæ, adjecto pauxillo cinnamomi.

§. X.

Gravidis maxime infesta sunt fortiora purgantia, quia validiori spasmo intestinorum membranas & nervosas corporis partes contorquendo, uterum ad elidendum foetum sollicitant, vel etiam ventriculi tonum ac robur destruunt.

§. XI.

Ad removendam impuritatem succorum egregiam quoque opem ferunt ea, quæ perspirationem reddunt liberiores.

Scholion.

Quare gravidis frequenti in usu esse debent pulveres bezoardici fixi, elixir stomachale, infusa herbarum calida, moderata corporis exercitatio & vinum generosum, sed parce & convenienter usurpandum.

§. XII.

Primis mensibus gravidas non adeo edaces esse oportet, inque toto ingravidationis statu temperantia maxime commendanda est.

Scholion.

Nimia enim repletio multas producit cruditates, quæ benignorum succorum generationem impediunt. Unde frequenti nobis constat observatione, nimiam ciborum satietatem debitæ infantis nutritioni esse impedimento. Et videmus, obesas mulieres frequenter infantes edere imbecilles ac macilentos, quum è contra pingues ac robusti à macilenta matre sæpissime procreentur.

§. XIII.

Maxime omnium gravidæ sibi temperare debent ab animi commotionibus, præsertim terrore, & perversis impressionibus, quæ infantis sanitati magnopere adversantur, decentemque ejus conformationem turbant atque impediunt.

Scholion.

Testatur experientia, perversam matris imaginationem multa infantibus dehonestamenta corporis imprimere, ita, ut sæpius manifesta earum rerum vestigia conspiciantur, quarum imagines diuturna contemplatione animo altius à matre infixæ fuerunt, id quod maxime ultimis mensibus evenire solet.

CAPUT XIV.

De consuetudinis in tuenda valetudine efficacia.

§. I.

Quemadmodum in omnibus rebus, quæ animum & corpus humanum afficiunt, magna vis est consuetudinis, ita etiam illa in tuenda sanitate & rerum non naturalium usu, plurimum valet, eamque ob rationem à medicis diligenter attendenda est.

§. II.

Consuetudo nihil aliud est, quam certa partium corporis, quæ motibus præsunt, ad certos motus edendos, ob frequens & repetitum præcedens exercitium, dispositio, qua, vel sponte, vel levi saltem data occasione, iterum similes motus producuntur.

Scholion.

Quid sit consuetudo, cujus tanta in animo & corpore nostro alterando est efficacia, huc usque nondum satis exquisitè exploratum atque perspectum est. Nos in ea sumus sententia, consuetudinis naturam certa partium, tam solidarum, quam fluidarum, ad motus quosdam repetendos, aptitudine, contineri. Quare omnes

corporis nostri partes obnoxia sunt consuetudini, & ejus efficaciae prompte obediunt.

§. III.

Quotidiana experientia docemur, diutius consueta difficulter mutari, & consuetudinem alteram quasi naturam constituere.

Scholion.

Per corporis enim naturam nihil aliud intelligitur, quam peculiaris solidarum & fluidarum partium, ad certos motus & functiones præstandas, dispositio. Quum itaque à sæpe repetitis aliis motibus, per externas causas introductis, insita & naturalis deleatur dispositio, & prorsus alia inducatur, priori contraria, hinc talis aliorum motuum assuefactio haud inconcinne altera natura appellari potest.

§. IV.

Consuetudo efficit, ut motus non solum in certis partibus, sed fixis & statis quoque temporibus, certoque gradu, iterentur.

Scholion.

Si quis aliquoties certo tempore cibum assumit, aut somnum cepit, vel ex eo expergefactus est, aut alvum deposuit, statim his actionibus assuefcit natura, & eadem hora accedente, harum rerum desiderium redit. Quanquam autem difficile sit atque arduum, genuinam & mechanicam hujus rei dare explicationem; intellectus tamen humani imbecillitas, quæ ad interiorem harum actionum, præcipue quoad modum, cognitionem adspirare haud potest, ipsius rei existentia nihil derogat. Neque vero accurata harum rerum explicatione nos destitutos, à claris & manifestis causis temere transire decet, ad tale principium, quod omnem pene conceptum exsuperat. Neque eam ob causam confugiendum ad principium, fibris corporis nostri motricibus insitum, quod occulta quadam sentiendi & externas res percipiendi facultate polleat.

§. V.

Natura ob frequentem usum rebus in se insalubribus & corpori minus proficuis tandem facillime assuefcit.

Scholion.

Qui prima vice tabaci fumum haurire tentant, graviter ut plurimum ab eo offenduntur, quem tamen procedente tempore commodissime ferunt, tandemque ita ipsi assuefcunt, ut frequentiori ejus usu penitus delectentur. Eodem modo comparata sunt narcotica, quæ quamquam rarius assumta corpori torporem & sensibus stupiditatem inferre soleant, diuturna tamen assuetudine non amplius nocumento sunt. Luculentum hujus rei testimonium Persæ exhibent, qui prima in pueritia saltem pauxillum opii assumunt, cujus tamen quantitatem sensim ita augent, ut tandem ingentem ejus copiam, sine ullo incommodo, devorare possint; quod quidem eo faciunt consilio, ut ad coitum celebrandum sint promptiores. Ipse novi quendam hæmoptycum, qui ob crebriorem opiatorum usum ita iis assuefactus est, ut postea extracto opii ad drachmæ dimidium, sine ulla noxa, aut gravi symptomate, uti potuerit. Neque ignotum est, certorum locorum incolas aëri vappido atque humido ita posse assuefieri, ut sanam ac diuturnam vitam ibi degere possint, quum tamen hæc cœli insalubritas aliorum, qui ejusmodi loca perunt, sanitatem protinus insigniter affligat. Illud vero hoc loco neutrquam prætermittendum est, consuetudinem alimentorum etiam, quæ naturæ admodum inimica sunt, insalubritatem ita quasi mitigare & temperare posse, ut eorum nocendi facultas multum vel penitus hebetetur. Res pervulgata est de pessimo Polonorum more, qui spiritum vini fortissimum ad aliquot mensuras quotidie hauriunt, quod si quis alius insuetus tentaret, nullum dubium est, quin ingens sanitatis, aut vitæ periculum, sit aditurus.

§. VI.

Amat natura etiam medicamentis sæpius usurpatis ita

affuescere, ut eorum medendi efficacia tandem plane obtundatur.

Scholion.

Quam ob rem vere dictum est ab *Aristotele*: *natura pharmacis assueta, eorum vires contemnit*. Atque hinc valde consultum fore arbitramur, si medici in diuturnis morbis medicamenta permutant.

§. VII.

Noxam, quæ ab affectibus animi extimescenda est, etiam consuetudo amolitur, siquidem iracundia, quæ quasi in consuetudinem cessit, nullam prorsus sanitati injuriam inferre solet.

§. VIII.

Nihil magis satitati insidias struit, quam subita rerum consuetarum mutatio.

Scholion.

Sapienter *Celsus Lib. I. cap. 3.* scribit. *Neque ex salubri loco in gravem, neque ex gravi in salubrem transitus, satis tutus est, neque ex multa fame nimia satietas, neque ex nimia satietate fames, idonea est, periclitaturque & qui semel, & qui bis, de die cibum incontinenter contra consuetudinem assumit; neque ex nimio labore subita intermissio sine gravi noxa est. Ergo, quum quis aliquid mutare velit, paulatim debet assuefacere.* Atque hinc est, quod in regionibus septentrionalibus educati, ubi in regiones calidiores veniunt, infuerum calorem primo moleste ferant, & raro à morbis immunes sint, quod etiam vice versa valet. Neque minus frequenter accidit, ut si quis relicta patria in aliam regionem, ubi alia vivendi ratio & insueti aëris usura est, magnas ut plurimum ab hac mutatione molestias sentiat, quæ tamen longiori consuetudine multo fiunt mitiores. Deinde etiam observando nobis cognitum est, infantes lactentes, qui diutius intra parietes domesticos detenti, postea subito in liberiores aërem procedunt, graves pati læsiones; quarum omnium vix alia causa est, quam subita & improvisa rerum consuetarum mutatio.

§. IX.

Laude digna sunt verba *Hippocratis*, quæ *sect. II. aph. 50.* ita proponit: *Ex multo tempore consueta in-consuetis molestare non solent, etsi sint deteriora.* Et *aph. 49. adsueti*, inquit, *debiles ferre possunt ea, quæ inassuetis robustis molestiam creant.*

Scholion.

Qui urbano & concluso aëri multum assuefactus est, facile à puro, libero & aperto aëre, qualis maxime ruralis est, perturbatur, & plerumque lassitudinem corporis sentit, vel quandam capitis gravitatem. Qui diu cerevisias amaras potarunt, dulces postea ferre nequeunt. Quam ob rem etiam ægris in iis rebus, quibus diu assueti sunt, & à quarum usu non adeo gravis noxa extimescenda est, interdum gratificari oportet. vid. *Sponius ad Hippocr. sect. IV. aph. 64.*

§. X.

Si quis aliquid mutare velit, etiamsi perniciosum sit, paulatim hanc mutationem instituere debet; quod enim paulatim ac successive fit, illud tuto fit. Vid. *Hipp. sect. II. aph. 50.*

§. XI.

Homo perfecte sanus ac robustus nullis rebus nimium ac longius affuescere debet.

Scholion.

Optimum hac de re *Celsi* præceptum est, quod *Lib. I. cap. I.* hunc in modum tradit: *Sanus homo, qui & bene valet, & suæ spontis est, varium habere debet vitæ genus, modo in rure esse, modo in urbe, modo in agro, navigare, venari, quiescere interdum, sed frequenter se exercere. Prodest etiam balneo uti, interdum aquis frigidis, modo ungi, modo id ipsum negligere, nullum cibi*

genus fugere, quo populus utitur, interdum in convivio esse, interdum se ab eo retrahere, modo plus justo, modo non amplius assumere.

C A P U T XV.

De remediis ad sanitatem tuendam morbosque præcavendos accommodatis.

§. I.

Homo sanus & perfecte incolumis, quantum fieri potest, nec medico, nec pharmacopœis utatur, sed potius, juxta *Montani* consilium, & medicos, & medicamenta fugere debet, si sanitatem suam salvam & integram conservare velit.

Scholion.

Intelligendum hoc ipsum est de corporibus tam robustis, quam imbecillioribus. Illa ex vasorum capacitate, carnis soliditate, nervorumque & ossium firmitate & insigni externarum rerum injuriis resistendi potentia, cognoscuntur. Hujusmodi corpora non adeo facile à morborum insultu expugnantur, diutius perennant, & facilius amissam sanitatem recipiunt, si modo illud in omni vitæ genere observent, ut temperantiæ & mediocritatis cultum magni habeant. Atque hujus indolis corpora non adeo rigidis legibus diæteticiis, nec magna remediorum multitudine, aut varietate, indigent. Imbecilliores etiam & debiles ac morbis obnoxios, ut in hypochondriacis videmus, à copia & varietate medicamentorum lædi, quotidiana experientia edocemur. Quare merito his in suis curationibus, exercitissimus in arte nostra vir, *Montanus*, suadet, ut, si valere velint, medicos & medicamenta fugiant.

§. II.

Cui corporis sui integritas curæ cordique est, eum abstinere oportet à fortioribus purgantibus, quippe quæ infestæ admodum & virulentæ indolis sunt, ac non modo stomachi, sed & universi corporis vires frangunt, nullique ætati conveniunt.

Scholion.

Asclepiades, teste *Celso*, in *Præfatione Lib. V. p. 241.* usum purgantium maxima ex parte sustulit, quia omnia fere stomachum lædunt & mali succi sunt. Huic ipse *Celsus* adstipulatur, scribens: *optima medicina est, non uti medicina.* Qua in re sequi videtur *Hippocratem*, qui *sect. II. aph. 33.* qui bene, inquit, corpus habent, hoc purgare periculosum est. Et *aphor. 36. sana*, ait, *habentes corpora, dum purgantibus fatigantur, cito solvuntur.* Merito igitur *Campegius de cribrat. medicam.* venenosa & maledicta vocat purgantia. Et apprime ad veritatem de validis pharmacis longo usu edoctus *Crato* sentit: qui *re-ctam*, inquit, *victus rationem tenere volunt, iis optimam medicinam præscribere supervacaneum est; nam omnia prius ad valetudinem rectam tuendam tentanda sunt, quam corpus medicamentis laboriose commoven-dum.*

§. III.

Pessimo more receptum est, corpus replere, & omnia pro lubitu ingerere, postea vero à medicis evacuantia sollicitare, & rursus nimie corporis repletioni indulgere.

§. IV.

Si quis ex usu rerum non naturalium male se habeat, ita, ut imminensem morbum extimescat, abstinencia, motu & quiete, tam animi, quam corporis, materia superflua & morbum committens, evacuanda est, antequam medicorum auxilium exposcatur.

§. V.

§. V.

Quia nimia ex cibo ac potu repletio plethoræ & cacochymia, fecundissimis morborum procreatricibus, plurimum favet, necesse est, ut medicus promovendis superflui sanguinis & humorum evacuationibus invigilet, quas inter venæ sectio primum locum tenet, & præsentaneum auxilium constituit.

Scholion.

Sanguinis ex vena emissio penitus quidem è medicina exulare posset, si superfluum sanguinis & humorum copiam abstinencia, motu & exercitatione corporis imminuere quæreremus. Quum vero pauci sint, qui id consilii amplectuntur, ideo ipsa necessitas nos ad hoc remedii genus compellit, quæ de re plura legi possunt in *Dissert. nostr. de magno venæ sectionis ad vitam sanam & longam præsidio.*

§. VI.

Venæ sectio verè & autumnò, præsertim circa tempus æquinoctiale, convenientissima est, summumque corporis à variis afflictionibus defendendi præsidium constituit.

Scholion.

Optime *Hippocrates sect. VI. aph. 47.* ait: *Quibus venæ sectio, aut medicamentum conducit, his vere venam secare, aut medicamentum purgans exhibere convenit.* Hinc quæ vere & autumnò præservationis causa instituuntur curationes, ut antiquissimæ, ita neutiquam contemnendæ sunt. Venæ sectio enim nimiam sanguinis quantitatem, quæ vere maxime molesta & periculi non expers, purgationes vero feri vitiosi copiam corpori detrahunt.

§. VII.

Quia morbi contumaces & chronici partim ex ingestorum & digestionis vitio, partim quoque ab excretionum defectu suam originem ducunt, ideo medicum operam dare oportet, ut, si præservationis officio rite perfungi velit, exigente rei necessitate, non modo coctionem alimentorum, sed eorum quoque excretiones, & maxime transpirationem, remediis adjuvet.

Scholion.

Quare omnia, quæ chyliificationi favent, hoc est, chylum blandum, dulcem & spirituosum gignunt, & quæ acescentiam, chyliificationi admodum infensam, in primis viis remonent, optimæ, & tutissima ad vitam & sanitatem tuendam remedia haberi debent. Spectant autem huc omnia balsamica, roborantia, medicamentum stomachica, ex balsamicis, aromaticis & roborantibus parata, ut essentia corticum aurantium, sal volatile oleosum *Sylvii*, nostrum sic dictum balsamum vitæ, essentia ambrae, elixirum stomachale *Michaëlis*, elixir nostrum balsamicum in *notis ad Poterium* descriptum. Pertinent huc quoque amara, quorum maxima in promovendo chyliificationis negotio virtus est, dum acorem obtundunt, viscidum abstergunt & alvinas excretiones insigniter adjuvant, si nimirum cum recensitis balsamis combinentur. In horum numero sunt essentia maræ, absinthii, trifolii fibrini, radicis gentianæ, centaurei minoris, cardui benedicti. Faciunt huc denique alcalina, præsertim fixiora terrea, acidum absorbentia, & ex animali regno tutissima, ut lapides cancrorum ac stæ ovarum, quæ terra subtiliori gaudent, & ob ingrem usum vix satis deprædicari possunt.

§. VIII.

Origo morborum, quos medicus amoliri intendit, tutissimum à segnioribus & interceptis excretionibus ducenda est, atque hinc medico incumbit curare, ut us quotidie suum præstet officium.

Scholion.

Ex iis, quæ alvi excretionem sine noxa & destructione motus peristaltici promovent, maxime commendanda sunt salina, quæ omni virulentia carent, & præcipue stimulando operantur. Eminent ex illis sal Ebshamense, Sedlicense, à nobis detectum cum ejus fonte in Bohemia, arcanum duplicatum, sal fontium Egranorum, tartarus tartarifatus & vitriolatus. Omnibus tamen palmam dubiam facit aloë, rite præparata, & secundum imitationem *Becheri* cum balsamicis mixta, quod in pilulis *Hermannianis*, *Stahlianis* & nostris observatum est.

§. IX.

Quum perspiratio libera omnes reliquas excretiones superet, & summum sit sanitatis præsidium, idcirco medicum semper eo respicere oportet, ut huic excretioni male procedenti convenienti auxilio succurrat.

Scholion.

Perspirationem egregie & sine ullo incommodo movent infusa herbarum nostratum, temperate balsamicarum, imò roborantium, ex aqua calida, ut sunt veronica, betonica, salvia, melissa, mentha, basilici, faturejæ, item seminis fœniculi, anisi stellati, cinnamomi, corticum citri, aurantium recentium, nec non infusum herbe thee, decoctum caffèæ, moderatius usurpatum, quæ calidissime, vel in calfacto conclavi, vel melius in lecto, mane hausta, sanguinis & humorum motum juvant, fluiditatem succis conciliant, viscidos humores dissolvunt, & salia peregrina & excrementitia, facta cutaneorum tubulorum dilatatione, eliminant. Ubi vero fortior cuticularis excretio provocanda est, conveniens dosis spiritus *Bussi*, balsami vitæ, vel spiritus eboris balsamici, commendatis infusis addi potest.

§. X.

Quandocunque chronicae passionēs corpori diutius infederint, vel causæ morbificæ præsentēs gravem morbum minentur, tum ad hunc avertendum & chronicas passionēs leniendas, decens usus fontium salubrium & mineralium esse debet quam commendatissimus.

Scholion.

Fontes salubres sunt vel calidi, vel frigidi, quorum illi thermæ, hi acidulæ appellari solent. Utrique eadem fere ingredientia, videlicet spiritum sulphureum volatilem, sal fixum alcalinum, vel neutrum, & volatile vitriolum custodiunt, inque decenti copia & convenienti regimine hausti, universum corpus pervadunt, & ad ipsius minima vasa ac tubulos penetrant, obstructions recludunt, stagnantes humores dissolvunt & in motum cient, omniaque emunctoria stimulant, adeoque urinam, alvi recrementa, sudorem, salivam, omnesque superfluos humores, sine ulla virium, vel appetitus defectione, potenter educunt. Quare non datur in rerum natura inque artis chymicæ inventis remedium, quod in sanitate tuenda, & morbis vel avertendis, vel tollendis, fontibus sic dictis salubribus æquiparari possit. Siquidem horum virtus amplissima & plane excellens omnium saniorum medicorum consensu & diuturna experientia, per tot seculorum decursum, in omnibus individuīs cunctisque in regionibus satis superque comprobata est. Mineralia enim activo & potenti principio gaudent, & quæ ex salium classe tutissima remedia constituunt. Deinde etiam ipsum aquæ elementum ita est comparatum, ut omnibus aliis medicamentis virtute antecellat, id quod fufius explicavimus in *Dissert. nostr. de aqua medicina universalī.* Et ipsa quoque natura, quæ velut optima medicinae magistra sedulo imitanda est, medicos peritos docet, salia subtiliora alcalina fixa & neutra, ut & vitriolacea tenuiora, omnium, quæ ex chymicis in usu sunt, ad tollendos

tollendos morbos esse efficacissima. Caterum de horum fontium ingredientibus eorumque usu & abusu legi possunt *dissertationes nostræ de prudenti fontium medicorum usu*, item *de thermis Carolinis*, *de thermarum & acidularum ratione ingredientium convenientia*, *de thermarum & acidularum usu & abusu*, & quæ plura in unum fasciculum collecta de mineralium aquarum elementis, viribus ac usu prostant in *tomo II. opusculorum physico-medicatorum*.

§. XI.

Balneis, tam naturalibus, quam artificialibus, ad reparandas vires, & valetudinem tuendam, multum usi fuerunt veteres, præsertim calidiorum regionum incolæ.

Scholion.

Testatur hoc magnifica & luxuriosa balneorum structura, quæ hodieque in Græcia & regionibus Turcicis visuntur. vid. *Langius Lib. I. epist. 50.*

§. XII.

Quamquam in regionibus calidioribus balneorum usus sit laudatissimus, parcius tamen usurpari debent nostris in terris, quæ sub coelo frigidiori & humidiori sitæ sunt.

§. XIII.

Ubi immoderatus calor nimiam partium humidarum & subtilium facit difflationem, & corpori ficcitatem & lassitudinem inducit, ibi fibrarum emollitione & humectatione opus est, quod balnea & aquarum dulcium infusus commodissime præstant.

Scholion.

Ex quo apparet, balneorum usum nostris quoque regionibus accommodatum esse, si corpus ab æstivo calore nimis exsiccatum ac delassatum fuerit, hac tamen adhibita cautione, ut ne balnea nimis calida usurpentur, alioquin excedens calor, plus nocementi, quam emolumenti, afferre solet.

§. XIV.

Infusus aquarum dulcium insignes corpori infert mutationes, aqua enim octingenta vicibus aëre gravior, superficiem vasculorum in cute premit, & liquida ex ambitu corporis ad interiora retro vertit, unde libera transpiratio impeditur, serum difflationi debitum retinetur, & ad urinam vergit alvusque adstringitur.

Scholion.

Exinde perspicimus, balnea in regionibus calidis, inque macilentis & calidioris naturæ hominibus non sine insigni fructu adhiberi, quia non solum exsiccatas partes emolliunt, sed etiam humidum, quod calore exha-

lat, intus detinent, adeoque nimiam transpirationem ad temperiem reducunt, idque corporibus calidioribus & æstivo tempore est commodissimum.

§. XV.

Nocent balnea & capitiluvia humidioris temperaturæ hominibus, qui vasa sanguine & superfluis humoribus repleta habent, qui capitis & ventriculi imbecillitate, vel cruditatibus in primis viis collectis laborant, & frequentius catarrhis tentantur, siquidem improvidus hic balneorum usus non modo has afflictiones auget, sed alias quoque graviores suscitatur.

Scholion.

Balneorum & capitis lotionum usus res periculi plena est, & magnam prudentiam desiderat, hinc cautissime usurpari hæc debent, & tutius ab iis nostris in regionibus abstinetur.

§. XVI.

Balneis nostris in locis substitui possunt pediluvia, item asperiores frictiones pedum, quæ ad circuitum sanguinis æqualem reddendum & perspirationem juvandam, multum conferunt.

§. XVII.

In pediluviiis, pedes surarum regione tenus, aquæ non nimis calidæ, sed temperatæ, immergendi sunt, eorumque usus paulo, vel mox ante somni tempus, per horæ dimidium, vel etiam ultra, commodissime instituitur.

§. XVIII.

Pediluvia calore suo sanguinem tenuem & fluxilem reddunt, ejusque difficiliorem per pedes cursum promovent, & hac ratione universo corpori profunt. Deinde humiditate suâ temperate calida fibrarum tonum in partibus inferioribus valde relaxant, carnemque & cutim emolliunt, unde sanguis, relicta superiori corporis regione, ad ampliatas inferiores partes majori impetu ruit.

Scholion.

Si ullum remediorum genus magnum universo corpori commodum afferre, & præcipue capitis morbos expugnare potest, hoc certe à pediluviiis expectari debet, quorum usus in omnibus capitis affectibus est laudatissimus.

§. XIX.

Pediluvia tempore etiam æstivo cum magna utilitate usurpari possunt, quia exsiccatas partes emolliunt & humectant, & membra motu ac labore delassata egregie reficiunt.

F I N I S.

FRIDERICI
HOFFMANNI
MEDICINÆ
RATIONALIS SYSTEMATICÆ
TOMUS SECUNDUS,
QUO
PHILOSOPHIA CORPORIS HUMANI
MORBOSI
EX ACCURATIS OBSERVATIONIBUS
*Solidisque Anatomicis & Mechanico - Physicis principiis ,
Methodo planè demonstrativa per certa theoremata
ac scholia traditur ;*
ET
VERA PATHOLOGICÆ FUNDAMENTA
NEC NON
PRÆSERVATIO AB OMNIS GENERIS MORBIS
CLARE EXPONUNTUR
in Usum Docentium & Discipulorum.

LECTURES
HOPKINS

MEDICAL
NATURAL HISTORY

OF THE
HUMAN BODY

AND
THE HISTORY OF THE
HUMAN MIND

AND
THE HISTORY OF THE
HUMAN SENSES

AND
THE HISTORY OF THE
HUMAN REASON



P R Æ F A T I O.

LECTORI ÆQUO ET VERI STUDIOSO

FRIDERICUS HOFFMANNUS.



Lterum jam Tibi, veritatis medicæ cupide Lector, rationalis medicinæ systematicæ tomum exhibeo, qui præcipua doctrinæ de morbis capita & fundamenta, neque minus partem artis nostræ præstantissimam, sed haud satis, meo quidem iudicio, adhuc excultam, nec pensi habitam, complectitur. Hæc illa est, quæ genuinas ægritudinum, quibus subinde genus humanum infestari, & à vita præmature tolli solet, origines, seu primas causas, clare & liquido evol-

vit, quæ omnium earum rerum, quæ ullo modo conservationem corporis nostri lædunt, vires ac potestates dilucide exponit, quæ denique simplicem & planam viam ad sanam & longam vitam perveniendi monstrat. Duplex esse officium medici, alterum hominem à doloribus, à morbis ac matura morte vindicare, alterum ægritudines, quibus corpus affligitur, jam præsentibus arte depulsare, nemini ignotum est. Quanto autem facilius, quanto etiam magis in potestate medici situm est, morborum, à quibus hi initia ducunt, causis occurrere, & integritatem corporis tueri: tanto difficilius ac incertius est, morbos, quibus jam premitur, vel penitus oppressum est corpus, feliciter expugnare. Quamvis vero omnium consensu nihil dulcius, exoptatius & præstabilius his in terris homini contingere possit, quam æqualis & prospera sine dolore animi & corporis valetudo; tamen haud satis intellectus humani miseriam & imbecillitatem hoc in genere demirari licet, quod adeo parum de vita & valetudine tuenda homines curiosi ac solliciti sint, ut potius firmiter sibi persuadeant, inevitabili cujusdam necessitatis fato, longam vel brevem, adversam, vel secundam valetudinem deberi, neque à ratione & scientia, vel ab hominis voluntate & arbitrio, eam dependere. Quo factum etiam est, ut nec medici satis digne hanc medicinæ partem hactenus tentaverint, neque vera sanitatis conservandæ præsidia morborumque natales recte & perquisitius indagarint, tantummodo operosi in multis arcanis & magnificæ famæ remediis & compositionibus ad omnis generis morbos propulsandos conquirendis: etsi neminem fugiat, quam iners & circumcisa sit, tum in rebellibus chronicis, tum acutis passionibus persanandis, potestas medici, quoniam id præstare magis naturæ, quam artis beneficium est. Ego, ut ingenue fatear, de arte nostra sic statuo, hanc ipsam diversis rationibus agitari posse, dum alii morborum curationibus tantum intenti sunt & unice in exercitio artis versantur, alii vero in universale totius scientiæ & omnium eorum, quæ ad hoc perficiendum pertinent, studium incumbunt. Nam qui tantum se occupatum habet in curatione morborum, is utique theoria rationali & hanc spectantibus subsidiis, anatomes, physices, chymicæ & mechanices scientiis & demonstrandi methodo, facile carere potest; quemadmodum etiam veteres has scientias ignorasse novimus. Siquidem ad artis exercitium sufficit morborum genium, corporum differentias, & naturæ, quæ sola & optima subinde acutorum morborum medicatrix est, ductus nosse, & remediis, non validioribus, sed mitioribus, eam adjuvare. At vero præter hæc multa alia in eo, qui veri & solidi medici nomen tueri vult, desidero, quæ non tam facile & celeriter obtineri possunt. Nimirum is non solo

usu & experientia, quæ pro tot morborum & corporum diversitate mire variat & fallit, contentus est, sed ex ægrotantium historiis & accuratis observationibus, magna diligentia & limatiori judicio conscriptis & inter se collatis, artis certitudinem quærit. Hæ enim sunt quasi veritatum medicarum claves, quæ intimos & arcanos naturæ recessus, motus atque effectus recludunt. Ex his veras morborum origines ac primordia, generationem, differentem indolem & effectum, præservandi ac medendi leges & vias, juvantium & nocentium vires, & dextrum de morborum eventu judicium petere licet. His etiam falsæ theoriæ, pugnantes hypotheses, opiniones, fictiones atque errores in rebus medicis optime discutuntur. Ut autem ejusmodi observationes ad usum recte transferre possit, opus utique est, ut accommodis scientiæ medicæ instructus sit præsidiiis. Nam sicut sine physices, chymicæ & mechanicæ scientiæ, nullo modo veram vitæ, sanitatis, mortis, morborum eorumque generationis cognitionem consequetur, nec rerum salubrium ac nocentium facultates & vires cognoscet, ita nec historias ægrotantium resolvere omnesque partes digne excutere, eorumque, quæ facta sunt & fieri debent, causas dare & enucleare & apta remedia invenire poterit. Præterea à medico, qui omnes suas partes recte implere vult, etiam id requiro, ut læsiones externarum partium, & quemadmodum eæ reparandæ sint, probe dignoscere sciat, & quibus mediis & operationibus eæ removendæ sint, intelligat, ex quo artis chirurgicæ eminentia ac necessitas demum innotescit. Denique innumera sunt in rerum natura, quæ hominis valetudinem variis modis & mutare & vitare possunt, tam ex alimentorum, ac elementorum, quam medicamentorum & rerum venenatarum classe, præcipue ex tam multiplici cœli varietate, aliarumque rerum fortuito incidentium copia, quorum singulorum ingenium, facultates & vires, si quis casus incidit, ut idoneum judicium proferre possit, perspectas habere debet. His itaque fulcris totum doctrinæ medicæ corpus superstructum esse videmus. Quæ quamquam ita se habere omnes facile judicent, dolendum tamen est, paucos admodum ad eum eruditionis medicæ gradum pervenire, & quod præcipuum rei momentum est, paucos scriptores laboribus suis eo esse annisos, ut doctrinæ medicæ, præsertim quæ de morbis agit, veritates in facilem & perspicuum ordinem digerent. Quanta enim librorum prostat silva, qui terminis obscuris & nullum liquidum sensum fundentibus referti sunt, ubi nullæ veritatum connexiones nullique demonstrationum nervi conspiciuntur. Ego itaque pro mediocritate virium, quas divina clementia concessit, semper omni studio annisus sum, divinam hanc scientiam in systema perspicuum redigere, & veritates apta connexione in scientiæ & demonstrationis formam disponere, jam senio vicinus & maturiori judicio & longiori usu instructus, laboravi. Cujus rei gratia & præsens opus excudi, de cuius instituto pauca tantum admonere visum est. Videlicet hoc ipsum rationalis pathologiæ & praxeos medicæ fundamentum complecti existimo, quare etiam à pathologia speciali & clinica praxi, quæ bono cum Deo ordine sequetur, hunc tomum secernere & seorsim edere constitui, ut à veritatum medicarum studiosis non semel, sed iterum iterumque attente legatur, & relegatur, quia hujus partis cognitio clarissimam lucem tomis sequuturis foenerat, ita ut specialis morborum, quoad signa, causas & symptomata disquisitio, promptius percipi, quæ ipsis depulsandis idonea præsidia cognosci & enarratæ quoque historiæ facilius explicari inque usum converti possint. Maxime omnium vero id operam dedi, ut demonstrarem, quomodo morbi in corpore humano pullulent & generentur & quibus firmis & statutis legibus motus, qui morbos inferunt, & naturam destruunt, vel eam conservant & à morbis liberant, sint subiecti, ut qui in salutem, vel perniciem tendunt, eo melius possint distingui. Deinde clarius & prolixius omnium rerum insalubrium, venenorum, ac validiorum, & quæ in exitium prona sunt medicamentorum, naturam & vires exposui, ut majori etiam studio medentes ab iis remediorum generibus, quæ morborum causas augere & mortem dare, vel accelerare possunt, sibi cavere discant. Tum etiam morborum origines ex planis & simplicissimis principiis, nimis admodum homo prospera & integra sanitate fruitur, si æqualem proportionem invicem ingesta & excreta habent: ita ex diminutis vel deficientibus vacuationibus morborum origines nasci, eosque, nisi illæ restituantur, in actum produci, experientiæ est certissimæ. Ecquis vero ignorat, quam anxie adhuc nobilissima ingenia in morborum causis inveniendis se fatigaverint, quum pro sua quisque hypothesis & fictione procursant, repudiando. Præterea clarius in hoc opere docui, morborum fomites & mineras in intestinorum canale potissimum ex variis confluentibus succis per diuturnam

moram concipi, ibique fixam sedem habere ac domicilium. Tandem etiam demonstravi, acutas passionēs & motus in morbis, ut sunt febres, spasmi, dolores, anxietates, convulsiones, motricium partium esse affectus, & perniciales morborum causas primario in has, quæ mutuū inter se consensum fovēt & insuper motuum ac sensuum instrumenta sunt, vim & operationem suam exercere. Explanavi quoque ulterius, ex sanguinis tardiori motu plethoram & cacochymiam, chronicarum maxime ægritudinum amplissimas causas deducendas esse. Ultimo his cognitis & expositis pauca præcepta & regulas adjeci, quæ facilem à morbis se præservandi viam ostendunt. Sicut enim in omnibus huc usque à me productis laboribus, ita & in hoc tomo maxime laboravi, ut partem illam medicinæ præstantissimam, quæ præservandi corpora à morbis rationem docet, stabilirem & in solidæ scientiæ formam reducerem. Quæ omnia ut in convenientia capita, rationem & ordinem redigerem, non mediocri labore & meditatione opus fuit, quia nemo præivit, cujus vestigia sequi potuissem. Quam vero arduum ac difficile sit, doctrinam, in qua quædam quasi est vastitas, & quæ caret connexionē, in ordinem redigere, id ii optime intelligunt, qui in ejusmodi rebus ingenium exercere solent. Dixi itaque in priori tomo, me mathematicis familiari demonstrandi methodo usum fuisse & impofterum uti velle, cujus ratio neuti- quam in eo consistit, ut propositis doctrinis definitiones, axiomata, theoremata, corollaria, postulata, observationes, problemata præscribat, sicut cujusdam nuper ineptissimum fuit judicium, sed ut veritates faciles, simplices & perspicuas adducat, easque probe invicem connectat, disponat, ordinet, & ex notis ignota deducat. Neque ego hic, ut in cæteris omnibus meis laboribus, servili animo aliorum doctrinas velut oracula sine ulla meditatione vel ratione cæco impetu sequutus, vel ullius auctoritate me à veri contemplatione facile abduci passus sum, sed libero semper usus judicio sententiarum & rationum momenta libravi, & secundum observationes practicas, ceu ad Lydium lapidem, modeste examinavi, & ita demum, quid veri, falsi vel ficti visum fuerit, & quæ in morborum curatione usum habeant, vel non, exposui. Quam unam novi solam & optimam esse veri investigandi rationem, quam homines, aliorum tantum æmuli, nec ad observandum, nec ad meditandum nati, plane ignorant. Neque vero est, ut diffitear, me & hic & alibi interdum ab opinionibus, quas olim fovi, recessisse, quod ad eruditi candorem & veri investigationem in rebus difficillimis & nunquam ad solidam rationem & perspicuum ordinem redactis utique pertinere mihi videtur. Uti enim pertinaciter opinionibus de falsitate convictis tanquam saxo adhærere turpe est: ita priora relinquere, & meliora amplecti, proxime ad honestatem & candorem accedit. Neque hic mea jactare unquam volui, conscius meæ mihi tenuitatis; sperare tamen ausim, meam hanc qualemcunque diligentiam & operam veritatis medicæ æstimatoribus & viris ad judicandum aptis non ingratis fore, quum & hæc & plura adhuc in aliorum scriptis pathologicis desiderentur. Cæterum si quis unquam, ego certe præter veritatis curam ac studium æquitatis & moderationis in judicando maxime æstimavi & adfectavi laudem, & nunquam ferendum in republica litteraria, præsertim christiana, turpem quorundam morem puto, qui, quamvis non meliora sciant proponere, aliorum tamen dicta & facta acri & mordaci stylo perstringere, eorumque famam ac merita lancinare & arrodere non erubescunt. Ego vero nec unquam ejusmodi ineptissimorum hominum vocolas moror, sed plane nihili habeo, & potius acquiesco & quasi triumphare mihi videor in præclaris tot illustrium virorum judiciis, qui verum à falso, perspicuum ab obscuro, utilitatem ab inani speculatione, & evidentes usuique aptas causas ab abditis & remotis, quæ nullius usus sunt, discernere consueverunt. His, candide Lector, bene vale, sique DEUS vitam & vires suppeditat, cæteros nostros labores, usui publico unice destinatos, propediem expecta.

CONSPECTUS

Tomi Secundi Medicinæ Rationalis Syftematicæ.

PROLEGOMENA

De veræ Pathologiæ natura, ejus fundamentis, observationum medicarum usu
& hypothesium noxa.

- CAP. I. *De vera Pathologiæ medicæ natura, definitione ac fundamentis.*
 II. *De hypothesium Medicarum in arte nostra damno.*
 III. *De veritatibus Pathologiæ fundamentalibus ex physiologia repetendis.*

PHILOSOPHIÆ CORPORIS HUMANI

Morbofi, five Pathologiæ generalis.

PARS PRIMA.

De Mortis, morborum & motuum morbosorum natura, Legibus in producendis
morbis ac symptomatibus & causis morborum.

- CAP. I. *De Mortis natura & causis.*
 II. *De Morborum & symptomatum natura.*
 III. *De Motuum microcosmicorum legibus & effectibus in producendis morbis & symptomatibus.*
 IV. *De Morborum & motuum morbosorum causis.*
 V. *De Causarum morbificarum sede & operatione.*
 VI. *De differente morborum ratione causarum indole atque effectu.*

PARS II.

De rerum nocentium & insalubrium natura, proprietatibus & viribus in corpus hu-
manum, item de omnibus iis, quæ ullo corpora modo ad morbos proclivia reddunt.

- CAP. I. *De rerum insalubrium & nocentium natura & viribus, speciatim de affectibus animi.*
 II. *De venenis eorumque natura, viribus & modo agendi.*
 III. *De venenis corporis humani.*
 IV. *De venenis in aëre contentis epidemiorum morborum causis.*
 V. *De medicamentis veneni vim habentibus.*
 VI. *De virulenta mercurialium noxa ceu gravium malorum causa.*
 VII. *De venenis soporiferis.*
 VIII. *De ceteris medicamentis virulentam naturam referentibus.*
 IX. *De rebus venenatis in aëre, interque esculenta & potulenta reperiundis.*
 X. *De frigido potu, vitæ & sanitati hominum inimicissimo.*
 XI. *De rebus non venenatis, sed instar veneni in corpus humanum agentibus.*

PARS III.

De morborum ortu ac generatione ex imbecillitate corporis humani, vitio ingestorum,
impeditis excretionibus, sanguinisque & humorum abundantia atque impuritate,
itemque de iisdem & præmatura morte præcavendis.

- CAP. I. *De corporum imbecillitate morbis potissimum obnoxia.*
 II. *De Morborum origine ex copia & vitio ingestorum.*
 III. *De alimentis intemperatis ingentique acidorum noxa.*
 IV. *De noxa potus spirituosi vel nimis pauci.*
 V. *De excretionum defectu, præcipuo morborum fundamento.*
 VI. *De perniciali earum rerum, quæ excretiones cohibent, indole atque effectu.*
 VII. *De morborum maxime epidemiorum origine ex aëris vitio & transpiratione impedita.*
 VIII. *De morborum generatione ex nimia sanguinis quantitate & humorum impuritate.*
 IX. *De genuinis corpora à morbis præservandi præsidis.*

PROLEGOMENA

DE

VERÆ PATHOLOGICÆ NATURA, EJUS Fundamentis, Observationum medicarum usu & hypo- thesium noxa.

CAPUT PRIMUM.

*De vera pathologicæ medicæ natura, definitio-
ne ac fundamentis.*

§. I.



Sicuti physiologia veras vitæ & sanitatis causas tradit & motuum, qui conservant corpus nostrum, indolem atque usum explicat; Hygieine vero præcepta circa rerum non naturalium usum, quibus motus vitales in vigore servantur, exhibet: ita pathologia genuinas mortis &

morborum causas & effectus ex ordine illorum motuum perverso exponit. Therapia vero monstrat, quibus auxiliis inordinati motus à corporis œconomia averti tollique debeant.

Scholion.

Ex quo animadvertimus, medicinæ partes arcto inter se coherere nexu, ut unam sine altera plene exacteque intelligere nemo possit. Attamen scientiam corporis humani vivi & sani ceterarum medicinæ partium quasi matrem & fundamentum esse merito dixeris. Ex medicinæ vero tam amica & necessaria partium connectione artis nostræ certitudo & demonstratio, quæ convenienti nexu & ordine rerum fit, satis abundeque conspicitur.

§. II.

Vera pathologia est doctrina, quæ ex integris morborum historiis eorum origines, generationem, progressum, peculiarem genium, neque minus symptomatum atque eventuum rationes ex motuum natura & legibus, quæ in œconomia corporis nostri observantur, convenienti nexu & ordine tradit, explicat & maximis in praxi medica utilitatibus accommodat.

§. III.

Ex hac definitione reali facile pathologicæ veræ & fictitiæ differentia intelligitur: nam illa ex plenis & ac-

curate conscriptis observationibus & principiis anatomicis & motuum doctrinis perspicuis suas deductiones & conclusiones in praxi utilissimas format: altera vero æque vulgaris quam superficialia singularibus duntaxat experimentis, minus plenis observationibus & dubiis opinionibus atque hypothesebus nititur, unde nihil solidum vel vera laude dignum in usum artis nostræ redundat.

Scholion.

Quemadmodum scientia ab opinione, ita pathologia vera ab hypothetica distat. Hanc differentiam præclare innuit Hippocrates, libelli, qui *Lex* inscribitur, §. 3. *duo sunt scientia & opinio; quarum altera quidem scire facit, altera vero ignorare.* Eundem in sensum graviter scribit libro de decenti ornatu, §. 4. *opinio in medicina maxime in crimen vertitur eam adhibentibus. His vero, qui ea in se usi sunt, perniciem adfert.*

§. IV.

Duo sunt veræ pathologicæ fundamenta: unum plenissima omnium & singulorum morborum historia, quæ ex compluribus observatis & annotatis circumstantiis nascitur: alterum est exquisitior corporis nostri structuræ motuum omniumque earum rerum, quæ illius statum mutare possunt, scientia.

Scholion.

Veritas duplicis generis est, alia enim *veritas facti* dicitur, quæ res contingentes & factas cum omnibus circumstantiis sub debito nexu, ordine, tempore describit: altera est *demonstrativa* sive *rationalis*, quæ ex principiis jam clavis & cognitis phænomenorum & effectuum causas, modum & fines inquit & utilissima theoremata vel axiomata format, quorum recto usu ex notis ignota porro invenit. Et quemadmodum illa maxime memoriæ & attentæ diligentia; ita hæc intellectus potissimum soboles est. Utraque ad veram pathologiam constituendam necessaria est. Veritas enim, quæ integram morbi, quoad omnes circumstantias, ortum, progressum, historiam atque exitum describit, basis est rectæ ratiocinationis in medico.

§. V.

Accuratior morborum historiæ & observationes primum & præcipuum pathologicæ & therapia constituant fundamentum.

N 4

Scholion.

Scholion.

Ex pluribus enim & accuratioribus observationibus demum vera experientia, quæ medicinæ anima est, quæque ornat & perficit medicum, nascitur. Illa vero pathologia atque therapia manca & trunca est, quæ ex observationum fide non est deducta. Neque dubium est, quin ad progressum artis nostræ augendum potiores partes observationes, quam ratiocinia sibi vindicent; quia plura circa corporis humani naturam quotidie fiunt, quorum vera ratio & adæquata causa difficilis & abstrusæ cognitionis manet. Ego quidem sic sentio, medicos, si ad altiore dignitatis gradum artem suam provehere velint, imitari debere eximios nostri temporis astronomos, qui observationibus, quas hinc inde circa fiderum motum observandum instituerunt, inter se probe collatis id effecerunt, ut eorum cursum & situm vel centum annis prædicere possint. Ego spe aliorum firmissima, fore, si medici diligenter omnia, quæ circa morborum generationem, decursum & curationes contingere solent, annotent & observata invicem conferant ac cum publico communicent, ut ars nostra ad summam certitudinem, non solum in prædicendis & avertendis morbis, sed & iisdem dextre sanandis, totoque eorum decursu prædicendo, perveniat.

§. VI.

Medicas observationes, si utilitatem exoptatam inde percipere debemus, oportet plenas ac integras esse nullisque circumstantiis alicujus momenti destitutas.

Scholion.

Sicuti juris periti, quando de jure respondere ac sententiam ferre debent, integram, ut loqui solent, facti speciem cum necessariis suis circumstantiis requirunt: ita etiam medici nonnisi ex completis morborum historiis quippiam firmi vel solidi elicere aut concludere possunt. Sæpe enim in unica circumstantia multum momenti situm est. Operam itaque dare debemus, ut plenas & perfectas observationes undiquaque conquiramus; quarum rêvera numero satis exiguæ in medicorum tot monumentis nobis relictæ sunt. De plerisque certe, quas apud veteres non minus, quam apud recentiores videas, jure dixeris eas observationum potius fragmenta esse, quam ipsas observationes, quales in verum salutaris artis incrementum scribi oportebat.

§. VII.

Ad integram morbi cujusvis historiam requiritur, ut exquisitam individui cum illo morbo conflictati notitiam lectori suppeditet.

Scholion.

Primum & præcipuum in medendo illud mihi videtur, ut medicus, quando corporis alicujus sanandi curam suscipit, exactam eorum habeat notitiam, quæ in ipso illo homine peculiariter deprehenduntur. Idque scitu maxime est necessarium, quia morbus idem & eadem causa, quæ ipsum facit, pro differenti corporum conditione, mirum dissidentia symptomata atque effectus producant. Quemadmodum enim idem alimentum, idem medicamentum, idemque venenum longe alios diversissimosque effectus & operationes pro differenti corporum indole edit: ita etiam morbificæ causæ ejusdem indolis plane multimodis diversam morbi faciem, ratione symptomatum, ratione periculi & salutis in diversis subiectis exhibent. Alta enim mente repositam semper omnibus optavi hanc præstantissimi usus regulam philosophicam; non dari absolutas agendi vires in corporibus, sed omnes esse conditionatas & relativas, atque mirifice, pro diversa corporum, in quæ agunt & quæ illas recipiunt, conditione mutari atque modificari. Ad interiorem vero corporis ægrotantis naturam cognoscendam non satis est ætatem, sexum, structuram partium;

temperamentum, vires, hæreditariam ad morbos dispositionem, vitæque genus, mores animi & consuetudines considerare, verum etiam scire oportet, in quo statu omnis generis excretiones positæ sint vel fuerint, quo forsitan morbo antea laboraverit æger, an perfecte is curatus sit, an imbecillitatem partium & dispositionem ad alios morbos forsitan reliquerit & qua ratione fuerit finitus & solutus. Juvat etiam inquirere, qualis sit sanguinis status, num is nimium abundet aut valde impurus sit, qualis dispositio viscerum & generis nervosi constitutio, robusta an imbecillis fuerit, quæ omnia & singula judicio medici probe subacta in morbis tam cognoscendis & dijudicandis, quam sanandis egregium lumen afferunt, ad dijudicandam autem historiam ab alio consignatam omnino requiruntur.

§. VIII.

Quæ veram utilitatem adferre debent medicorum observationes, eas morbi genus, ejusque genium, origines, progressum, & varias ad eorum generationem concurrentes causas accurate describere oportet.

Scholion.

Perspecta ægrotantis corporis natura præcipua cura esse debet medici, ut morbi genus, genium & causas perscrutetur. Quisque enim morbus peculiarem & quasi propriam indolem, qua incedit, habet, dum non modo certos typos, tempora, periodos ac ordines in accessione & incremento servat, certis etiam modis & per certas vias atque excretiones solvitur; sed & plane speciali ratione in turbandis & pervertendis motibus & actionibus secundum naturam, sive symptomatibus efficiendis, singuli procedunt, ex quibus omnibus probe collatis morbus recte cognoscitur & ab aliis quoque distinguitur. Denique ex erratis in diætâ & usu rerum, quibus quotidie ad corporis conservationem indigemus, commissis, primordia & morborum origines probe cognoscere juvat, quod certe ad præventionem à morbis amplissimum usum habet. Maxime omnium verò morborum causæ proximæ indagandæ erunt, quibus inventis curationem inventam esse constans & philosophorum & medicorum perpetuaque fuit sententia. Nam si quis, effato *Hippocratis Libr. de flatibus §. 3. causas corporis affecti probe cognoverit, is quoque potens est ea adferre, quæ corpori commodent, nimirum contraria.*

§. IX.

Medicorum observationes, quæ ad faciliorem & tutiorem sanandi rationem facere debent, remediorum, quæ adhibita fuerunt, operationes contineant.

Scholion.

Ausim dicere ex illis rebus, quæ ad augendam medicinæ utilitatem & dignitatem faciunt, nihil aptius esse, quam si quis exquisitè remediorum, quæ adhibentur, vires & operationes nosse allaboret. Hæ enim multum pro diversitate corporum, naturarum, morborum, & temporum differunt. Gaudet enim & quodvis & maxime potens remedium peculiari agendi & operandi facultate, quæ medico utique ex arte cognita esse debet. Is enim demum veri medici nomen tueri mihi videtur, qui ipse selecta præparare scit remedia, eorumque vires & in agendo proprietates in tot diversissimis casibus probe perspectas cognitasque habet. Ex quo consequitur, ut iis etiam postea recte & cum judicio uti possit. Quodvis enim medicamentum tam promptum est ad nocendum, quam ad juvandum pro eo nempe, ut quis illo utitur. Mirifice igitur *Hippocrates* medicamentorum facultates, quas habent, medicorum memoriæ commendat, cum ait in *Libr. de decenti ornatu §. 8. firma memoria teneto, medicamenta & simplices facultates & descripias* (intelligo per observationes)

nes) *si modo tales existant. Sini & in memoria tibi morborum curationes & harum modi, quotupliciter & quomodo in singulis sese habeant. Hoc enim principium est in medicina, medium & finis.*

§. X.

Ad completam cujusque morbi historiam adornandam sectio cadaverum morbis defunctorum maxime pertinet.

Scholion.

Non facile aptius ad morborum & mortis causas revelandas medium sectione & inspectione solertiori cadaverum, quæ iisdem morbis extincta sunt, invenitur. Quanquam enim non omnia, quæ in dissecis cadaveribus observantur, semper primæ & proximæ morborum causæ habenda sunt, sed sæpius effectus tantum causarum atque ipsius mortis: nihilo minus non raro accidit, ut hac ratione genuinæ insolitorum subinde morborum atque symptomatum causæ manifestæ fiant. Noti mihi sunt plures casus, ubi tum in ipsis morbis, tum, in eorum causis cognoscendis, non incelebres etiam medici valde hallucinati sunt, maxime alienas proferendo, cum postea facta sectione polyposæ in corde vel vasis majoribus concretiones, abscessus mesenterii, calculi in vesicula fellea vel vesica urinaria, rupta sanguinis vel lymphatica vasa, ingentes glandularum tumores, putrida viscera, uterus disruptus in conspectum venerunt, de quibus nihil plane antea cogitatum fuit. Quare dissectiones utique cadaverum frequentiores & solertiores à medicis anatoines peritis majorem in modum commendandæ sunt, eo quod vera causarum morbi cognitio & prudens remediorum ad eas auferendas adplicatio duo quasi poli sunt, circa quos tota praxis medica vertitur.

§. XI.

Ex medicorum plenioribus observatis complura eaque maxime utilia in perfectionem & certitudinem artis nostræ redundant.

Scholion.

Neque enim alia via vel methodus suppetit, qua morbos à se invicem probe distinguere eorumque causas, multum quoque dissidentes, cognoscere possimus, quam per multiplices & recte institutas observationes. Ad prudentem etiam prognosin, sive ad iudicium de morborum eventu forinandum, quæ doctrina mirifice ornat & perficit medicum, ejusque estimationem auget, certior & melior, quam per observationes, nulla via invenienda est. Quam infinitæ circa morborum prognosin regulæ in Hippocratis aliorumque veterum monumentis prostant, quæ tamen maxima ex parte fallaces sunt, tantum abest, ut pro universalibus sententiis & aphorismis veris haberi possint. Idque accidit maxime ob eam rationem, quia non ex integris morborum historiis, sed ex earum fragmentis tantum & quibusdam, non omnibus & singulis circumstantiis, depromptæ sunt. Igitur, longe perfectior & hæc doctrina de prognosi speranda nobis erit, modo ex multiplici observatione & accuratiori consideratione circumstantiarum prognosticas regulas demum elicere incipiamus. Neque dici satis potest, quam utilia corollaria in usum futurum, ratione methodi medendi, ratione adplicationis remediorum, & in cognoscendo, quænam ex horum genere noceant vel profint, hauriri queant. Medico enim nunquam desistendum est ab observationibus & experimentis, neque ulla, licet etiam minoris momenti videantur, negligenda sunt. Ego certe non facile casum quendam medicum prætermitto, quia vix ullus incidit, ex quo non quippiam adhuc addiscere possim, cum ad minimum, quod jam inventum & cognitum fuit, exinde confirmetur.

§. XII.

Observationes medicæ itemque historię morborum accurate conscriptæ, ad dissidentes medicorum hypotheses, opiniones & controversias etiam in praxi decidendas aptissimæ sunt.

Scholion.

Si ulla, certe medica disciplina innumeris opinionum figmentis, sectis & controversiis immerfa est. Ex harum vero dissidentium opinionum labyrintho nosmet extricandi non ego meliorem novi modum, quam si earum adplicationem ad medicas observationes, quæ genuinum ac immutabilem naturæ ordinem & processum in vitæ, sanitatis ac morborum negotio complectuntur, urgeamus; tum enim facile earum sterilitas apparebit, eo quod tam paucis phænomenis & circumstantiis explicandis congruant aut sufficiant. Quot diversissimæ medicorum in praxi medica circa remediorum valentium & heroicorum usum e. g. venæ sectionis, foniculorum, vesicatoriorum, purgantium, opiatorum, chinæ chinæ, salium volatilium, martialium, sunt sententiæ? dum quidam in certis morbis sanandis illa in cœlum quasi efferunt, alii eadem in iisdem morbis penitus deprimunt & damnant: & singuli tamen, ut adfectiones suas confirmant, ad experientię asylum confugiunt. Hic certe non proclivior emergendi ex hisce difficultatibus patet via, quam si observationes cum cura & diligentia conscriptas de illis morbis, in quibus damnum vel salutem hæc medicamenta attulerunt, consulamus: tunc facile apparebit, pro differenti circumstantiarum ratione in eodem morbo remedia hæc insignem opem vel etiam damnum attulisse, adeoque in se non esse nociva, sed in medicos culpam esse refundendam, qui iis non recte usi fuerunt.

§. XIII.

Alterum veræ pathologiæ & therapiæ fundamentum est scientia corporis humani anatomica & mechanica, quæ in eo celebratur.

Scholion.

Corpus nostrum machina est, summo DEI artificio & sapientissimo ordine constructa, ut motus structuræ convenientes edat; quorum naturam & leges exquisite nosse oportet medicum. Hi enim sunt, qui vitam sive conservationem corporis nostri corruptibilis tuentur: hi sunt, qui omnes ejus actiones secundum ordinem & divinum præscriptum moderantur, id est, sanitatem præstant; hi quoque perversi vel destructi morbos, imo ipsam mortem efficiunt. Hæc motuum scientia adprime utilis est medico, quia ex horum natura omnia ea, quæ circa corpus contingunt, atque tum in corpore morbofo, tum in morborum historiis continentur, apte explicari debent. Et hoc est, quod medicorum recentiores urgent, omnia ex mechanicis rationibus deducenda ac derivanda esse, cum veteres duntaxat materiæ variis qualitatibus & temperiebus inhæserint, omisso motu, qui tamen præcipuum est mechanices principium. Ex quo intelligitur, quantum utilitatis in rem medicam ex interiori rerum mechanicarum & physicarum notitia, quæ etiam ipsam physiologiam corporis nostri comprehendit, profluat.

§. XIV.

Quicumque anatoines peritus est & mechanicam corporis nostri bene callet, is utique aptissimus erit ad multas difficiles & alias abstrusas res, quæ in nobis fiunt & contingunt, explicandas.

Scholion.

Facile damus & concedimus, mechanicam corporis humani longe superiorem esse illa, quæ ab arte humana

humana proficiscitur. In quantum enim divina ars ab humana distat, in tantum etiam scientia ejus mechanices, quæ in animantibus reperitur, præcellentior est quam illa, quæ in vulgus nota est. Opera itaque sedulo adhibenda est, ut in mechanismi, qui in œconomia corporis nostri observatur, rationes, modos & leges, quoad humani intellectus imbecillitas patitur, penetremus: plura enim adhuc sunt, quæ in nobis mechanice peraguntur & captum nostrum longe exsuperant. Quis enim dubitabit, illas etiam actiones, quæ ab anima proficisci dicuntur, mechanismo, utut subtiliori, cerebri in acceptis esse referendas; præsertim cum videamus, mores, cupiditates, vitia ac virtutes, prudentiam quoque & insaniam hominis à sanguinis conditione & mechanismo, qui per diætam & medicamenta varie immutari potest, dependere, utut eorum explicatio, quomodo fiant, adhuc paulo sit cognitu difficilior.

§. XV.

Cum res corporeæ quibus continuo ad vitam & sanitatem tuendam & restituendam utimur, magnam potentiam habeant corpus immutandi, destruendi & morbosas afflictiones inferendi: tantarum mutationum causas inquirere solius physici & mechanici est.

Scholion.

Quam insignis utilitatis in explicandis rebus medicis sit veritatum physicarum studium, liquido ex dictis constat, id quod etiam jam olim optimi & antiquissimi medicorum, in quibus merito habendus est *Hippocrates*; agnoverunt. Testes sunt ejus libri physici, quos *de humana natura*, *de corde*, *de locis in homine*, *de flatibus*, *de diætis*, *aëris*, *aquarum & locorum natura* nobis reliquit, quibus maxime adstruere contendit, ex diætâ & aëre non tantum varii generis nasci morbos, sed & mentem humanam inde sapientiorē aut stolidiorē reddi. Quo magis mirandum est, dari hodieque quosdam, qui veræ physices studium in rebus medicis parum utilitatis habere adfirmant, ducti potissimum hac ratione, quod ex animi affectionibus & impressionibus perversis varias morbosas motiones nasci videant. Id quod uti non negamus, ita tamen nobis comprehendere non licet, quare omnes motus & actiones animæ principio adscribi debeant. Ecquis enim est, qui causarum morbificarum, medicamentorum vel venenorum operationes plane peculiare & diversas, quas singula edunt, inde explicare conetur?

§. XVI.

Cum duo sint veræ & rationalis pathologiæ fundamenta; nimirum observatio sedula, & scientia mechanices naturalis; sponte & per se fluit, veteres & qui hisce fundamentis caruerunt, nihil solidi in arte nostra tradidisse.

Scholion.

Equidem veterum solertiam in eo dilaudandam esse cenſeo, quod plura, quæ ad morborum indolem, genus, progressum & eventum pertinent, annotaverint. Quia tamen corporis humani plena & exacta structura, quæ anatome indagatur, neque minus solida mechanices & rerum naturalium scientia caruerunt; præterea observationes paucas, breves & minus completas nobis exhibent: non mirum est, eos, pro veris causis sterilia maxima ex parte nomina vendidisse verasque vitæ, mortis & morborum causas & medendi etiam rationes aptas ignorasse. Quare ex eorum scriptis tantum ea, quæ ad historiam morborum pertinent, depromi & hauriri possunt. Nam morbi semper & constanter, uti nunc, ita etiam olim, suam peculiarem habent naturam & ordinem servant immutabilem, adeoque & veterum observationes, modo plurimas haberemus, eandem utilitatem habent quam recentiores.

§. XVII.

Nostrum seculum quanquam præstantissimis in re anatomica, physica, botanica, chymica & mechanica inventis splendet, mirandum tamen est, quare in vera pathologia adstruenda tam exiguus progressus adhuc factus fuerit.

Scholion.

Hujus rei multæ dari possunt causæ, quarum una est, quod plures ex recentioribus tam negligentes sint in observationibus practicis accuratioribus adornandis: altera est, quod inventa illa præstantissima physica ad historias morborum & observationes vel plane non, vel non satis recte adplicent & referant. Ut sanguinis tantummodo circulum attingam, quis divino plane illo invento ad pathologiam & therapiam scientifice tractandam satis recte usus fuit? videas enim quotidie repeti falsas conclusiones ex diu repudiatis veterum principiis pullulantes, sed sanguinis circulo directe contrarias. Tertia ratio & potissima est, quod plures fictis principiis & hypothesebus nimium in doctrinis suis inhæreant & à novis condendis, iisque antiquitatis consensu subinde incrustandis non desistant. Pauci medicorum, ut in aliis etiam disciplinis, suo sensu & judicio utuntur & uti sciunt, sed aliorum, quos fallere & falli non putant, potius dogmata servili animo sequuntur & adorant, iisque tanquam ad saxum adhærent, & quod maximum est, has opiniones suas oborto quasi collo ad morborum historias, plerumque non sufficientes & recte instructas, detorquent. Atque hæc potissimum sunt illa impedimenta, quæ progressum artis nostræ huc usque valde retardarunt.

CAPUT II.

De hypotheseum medicarum in arte nostra damno.

§. I.

Veritatibus & certitudini in medicina nihil magis contrariatur, quam hypotheseum, opinionum & sectarum copia.

Scholion.

Multum veritates & fictiones, quæ foecundæ variarum opinionum & hypotheseum genitrices sunt, inter se differunt. Nam veritas est una, simplex & succincta atque intellectu facilis; opiniones vero sunt variae & multiplices, multumque dissidentes & captu sæpe difficiles, incertæ, dubiæ, quæ cum veritate, quæ una est, consistere nequeunt. Deinde veritas est intellectus puri, sinceri soboles: opiniones vero & hypotheses ex imaginationis efficacia profluunt; tandem omnes veritates sunt frugiferae ad explicationem, demonstrationem & inventionem aliarum rerum incognitarum utilissimæ, opiniones vero magis errorum & gravium dissidiorum matres existunt.

§. II.

Hypotheses sunt principia quædam ficta, quæ nonnullis phænomenis explicandis inserviunt, minime vero cum omnibus quadrant atque conveniunt.

Scholion.

Si non ficta, sed vera principia essent hypotheses, omnibus quadrarent phænomenis explicandis & nulli errores vel perversæ explicationes inde profluerent. Cæterum non in totum omnes damnamus hypotheses, quia plerumque quasdam veritates continent, utut non sint universales.

§. III.

§. III.

Illa ars, quæ sanitatem & longam vitam mortalibus promittit, dolores ac morbos propulsat & ob præstantissimum usum plane divina est, merito ab omnibus incertis opinionibus, fictionibus & hypothefibus libera & immunis esse debet.

Scholion.

Pudet & piget dicere, sed tamen verissimum est, infinitas fere esse inter medicos dissensiones, quæ non tantum in eorum scriptis, sed maxime, ubi ad lectum ægotantium concurrunt, animo advertuntur, cum rarissime inter eos de morbi, quo quis laborat, genere, causis, multo minus de medendi methodo & remediis præscribendis conveniat, ut potius subinde sibi adversentur. Quid frequentius evenit, quam quod unus alterum erroris & damni illati in curatione arguat atque criminetur, quæ omnia ex eo proveniunt, quod non illorum judicia & facta firmis nervis, demonstrationibus & veritatibus nitantur, sed ex variis ingenii commentis & lusibus errantis phantasiæ proveniant. Neque enim facile discordiæ in disciplinis, ubi veritates manifestæ sunt & regnant, ut sunt mathematicæ, reperiuntur, sed in iis, ubi veritas nondum inventa & opinionum est multitudo atque varietas, apparent. Ea est natura veritatum, ut, quia ex intellectu puro profluunt, alterius etiam mentem convincant & quasi ad adfensum pertrahant; opiniones vero, quia potentiæ ficticis foetus sunt, in mente humana nonnisi dubia pariunt & relinquunt, atque ab iis, quibus major vis imaginativa, quam iudicii est, facile arripiuntur & pro verissimis habentur. Variæ itaque hypothefes in medicina non modo discordiam inter medicos, sed maxime ægotantibus perniciem adferunt, & artis nostræ dignitati multum detrahunt, ita, ut etiam apud vulgus male audiat; quod suo tempore jam indicavit *Hippocrates*, dum Libro de victu acutorum §. 4. ait: *calumniam incurrit tota ars apud vulgus adeo magnam, ut neque omnino medicinam esse putent. Nam in acutis morbis in tantum inter se differunt artifices, ut quæ alter exhibet, optima esse putans, ea alter jam mala existimet: & fere ob id artem vaticinationi similem esse dixerint.* Igitur vehementer optandum & laborandum est, ut salutifera nostra ars tandem à perniciosis hypothefibus purgetur, ita futurum speramus, ut graves illæ contradictiones, contentiones, odia, similitudines, quæ inter medicos hodiernum vigent, finem tandem habeant in maximum ægotantium commodum atque salutem.

§. IV.

Hypothefes medicorum optime in tria genera dispesci posse videntur, quorum primum ad eam causam sive principium pertinet, quod omnes in universo corpore actiones efficiat, moderetur ac dirigat: alterum ad morborum causas spectat; tertium in differenti medendi morbis methodo & remediorum facultatibus positum est.

Scholion.

Ipsas hypothefes medicorum non unius ejusdemque esse notæ, sed alias aliis esse præstantiores, vel ex eo colligitur, quod medicorum opiniones sapius versentur circa eas res, quæ plane nec sensu nec intellectu comprehendendi possunt & quorum existentia prorsus non concipi potest. Quædam vero opiniones utique & sensui & intellectui non adversantur, sed iis, quibus adhibentur, explicandis vel deducendis minus sufficiunt.

§. V.

Pejoris notæ hypothefes fovant illi, qui nonnisi mera nomina pro causis universalibus vitæ, sanitatis, morborum, sanationis & omnium, quæ fiunt in corpore, constituunt, eo quod nec ullum in theoria vel praxi habeant usum.

Scholion.

Hicce merito sunt annumerandi veteres, quibus structura corporis nostri & ex ea provenientes motus penitus fuerunt incognita & quos porro corporum vires & potestates, ex mutua eorum reactione potissimum resultant, latuerunt: hinc neque vitæ, nec sanitatis aut morborum causas veras intellexerunt, sed pro hisce ipsis mera nomina nihil significantia in medio posuerunt, cujus generis sunt innatum calidum, humidum radicale, spiritus insitus & influus, natura sapiens, anima consilii, rationis & intentionis particeps, principium agens, quod sensu & motu interiori gaudeat, neque ab aliis externis motum accipiat, principium omnia movens ac dirigens & sapienter administrans, spiritus vitalis certis facultatibus instructus. Quorsum etiam spectant recentiorum nonnullorum commenta, uti *Helmontii* archæus, duumviratus & occultum vitæ regimen, anima sensitiva in ventriculi orificio sinistro, flammula vitalis, phosphorus cordis & cerebri: quæ perversæ medicinæ principia ex male intellecta in physicis doctrina de corporum natura, proprietatibus & motu, cum illa pure passiva, omnis actionis & motionis expertia habeantur, profluxerunt. Deinde, motus, certa proportionem, ordine, tempore ad certos etiam fines collineantes & contingentes in corpore humano, qui sapientissimæ structuræ & actioni solidorum in fluida, & fluidorum in solida in acceptis ferendi erant, interiori cuidam cum ratione agenti principio adscribebant, cujus tamen existentiam nec ullo solido, quod non infirmari possit, argumento adstruere possunt. At vero nunquam, quod instar regulæ tenendum est, ad causas plane abstrusæ cognitionis & non intelligibiles perveniendum est, si explicationes manifestæ per causas plane perspicuas adfuerint. Quas quidem si non statim sensu & ratione comprehendimus, præstat saltem agnoscere effectus & de causis, quæ nos latent, tacere, quam talia adducere, quæ nec concipi, nec explicari, nec applicari rebus medicis ullo modo possunt & omni usu destituuntur.

§. VI.

Ad inanes quoque & valde noxias hypothefes referenda est illa doctrina, qua omnium morborum causas vel ex quatuor humorum intemperie, ut *Galenus* & ejus affectæ, Galenici, vel ex acido, viscido & bile, ut *Sylvius*, vel ex acido & viscido, ut *Bontekoë*, vel ex potentiis multiplicibus salinis, fermentis morbificis, ut plures ex recentioribus, deducere in systematibus suis allaborarunt.

Scholion.

Utut omnibus hisce causis magna insit potentia motus secundum naturam pervertendi; minus tamen sufficiunt ad omnes causarum morbificarum classes constituendas. Veras enim & proximas, quæ morbos efficiunt, & quæ in motuum turbato ordine consistunt, non attingunt, neque cur certis ætatibus proprii sint morbi, aut quare vehementes animi turbationes aut venena in perfecte sanis etiam corporibus gravissimas afflictiones celerrime inferant, ex hisce explicari potest.

§. VII.

Neque eorum hypothefes, qui omnes morbos ex salina, acri vel scorbutica humorum intemperie aut dyscrasia deductos volunt, examen sustinent.

Scholion.

Utique magna est salium, uti videmus in causticis, potentia in corporis nostri solidas partes, eas lancinando, irritando, corrodendo: sed tamen longe adhuc aliæ causæ sunt, quæ morbos & dispositionem ad eos inferunt. Ecquis enim est, qui apte ex iis morbos ex humorum & sanguinis redundantia eorumque circa viscera stagnatione provenientes explicare conabitur; multo minus

minus hæreditariorum morborum & qui certis ætatibus proprii, quorum ingens est numerus & vehementia, origines & causæ exinde repeti poterunt: item, quare ii, qui intemperantissime vivunt, non statim ægrotent.

§. VIII.

Neque ex sola sanguinis & humorum nimia redundantia eorumque excretionibus suppressis omnium affectuum causæ apte deduci possunt.

Scholion.

Eam abundantiam sanguinis, quæ liberæ ejus circulationi obicem ponit, multarum earumque chronicarum maxime passionum primam subinde & præcipuam originem præbere, omni caret dubio. Testes sunt solennes illæ mensium in foeminis & hæmorrhoidum in viris impeditæ, suppressæ vel repente cohibitæ excretiones. Sed tamen hoc principio universali posito, quomodo vel unde eos, qui a sanguinis defectu oriuntur, atque ea corpora, quæ a morbo acuto vel chronico jam convalescerunt vel nimias hæmorrhagias passa sunt aliosque valde infirmos infestant, deducere velint morbos, ego quidem satis non perspicio. Atque etiam morbos epidemicæ grassantes, quorum ingens numerus est, & qui aëris vitio ejusque subitæ mutationi ac tempestatum præternaturali constitutioni debentur, ex hac hypothese derivare longe erit difficillimum. Sunt etiam præter sanguinis consuetas excretiones suppressas aliæ, quæ per alvum, per insensibilem transpirationem, per expectorationem fiunt, ejusdem indolis, ut graves ad morbos progignendos causas subministrant. Plethora quidem & hujus effectus, stagnatio, œconomia corporis nostri insensibilissima primam subinde originem chronicis maxime morbis præbent atque ad hos avertendos plethora solutio mirum quantum valet; sed tamen, quia ex plethora fiunt stagnationes, stases, infarctus, obstructions, indurationes, corruptiones atque exulcerationes viscerum, unde cachexiæ, hydropis species, lentæque & hæcticæ febres oriuntur, ubi hæc jam acciderunt, non amplius ad primam causam, sed potius ad effectus, qui eam sequuntur, in curando respiciendum erit.

§. IX.

Neque illa doctrina in universum valet & firma est, qua statuitur vitam & conservationem corporis nostri corruptibilis à solis excretionibus recte peractis ducendam esse.

Scholion.

Sine excretionibus nec sanitatem, nec vitam diu consistere posse tam certum est, ut nihil indigeat probatione. Hæc tamen non omne punctum ad vitam & sanitatem tuendam absolvunt, nisi enim in eorum locum, quæ quotidie excernuntur, novi, iique idonei & benigni succi ex ingestis succederent, actum certe mox etiam esset de nostra vita & sanitate. Quare medicus in sanitatis negotio conservando tum ad excretiones, tum ad ea, quæ ingeruntur, congrua vel incongrua, non modo respicere, sed & morborum originem inde repetere debet.

§. X.

Minime quoque in eorum opiniones salva veritate descendere possumus, qui adserunt, morborum causas materiales esse duntaxat occasionales & naturam prudentem morbos in bonum finem, ut eas corpore ejiciat, instituere.

Scholion.

Ut ejusmodi agens corporis nostri medullis inhæreretur, quod ex longinquo & morali quadam æstimatione perniciosas causas pervideret & ad eas ejiciendas variis motibus secretoriis, resolutoriis, excretoriis se semper amaret optandum certe foret. Qua vero ratione cum tam

sapiente agente concilianda sint ea phænomena, quod videlicet ad leves causas v. g. flatuum in ventriculo vel intestino incarcerationem, vermes nervosas partes lancinantes, nervi punctiorem ab aculeo vespæ vel instrumento acuto aut cuspides arsenici ventriculi tunicis inherentes vehementissimos motus, qui vitam quoque destruant, excitet, ego quidem non video. Multo minus ad sapientiam referendum esse puto, quod ad causas febrium corpore eliminandas tantas spasticas strictiones in excretoriis & extremis partibus excitat, quibus sanguinis motus non invertitur tantum, sed versus interiora vergit, quæ omnia remorantur expulsionem: præsertim cum longe commodior & tutior modus esset emunctoria referendi & cordis atque arteriarum motus ad propulsione intendendi & excitandi. Neque ego video, cur tantum occasionales morborum causas statuere velimus, cum eæ satis potentes in se & sua natura sint ad motus, qui fiunt in machina nostra, ordinatos turbandum, pervertendum, destruendum. Id quod in excessivo aëris calore, frigore, humiditate, alimentis valde potentibus, & omnis generis venenis satis cogniti planum atque perspicuum fit. Quis istis rebus nocentem potentiam, quam nonnisi motu exerere possunt turbativo & destructorio, denegare audeat?

§. XI.

Ad hypotheses quoque referendum esse puto, quod natura sive anima rationis, consilii, intentionis & scientiæ interioris particeps, medicinæ & omnium motuum, qui vitam tuentur, & morbos curant, principium constituitur.

Scholion.

Quemadmodum enim sine anima intelligere non modo in macrocosmo, sed & in vegetabilibus & animalibus ordinatissimi ad certum finem directi fiunt motus, ita cur corpori nostro perfectissime constructo hos motus, ex potentia materiæ minus passive sed active fluentes, denegare velimus, nulla verisimilis adest causa. Non solam esse machinam corpus nostrum, sed ei altioris indolis principium junctum esse, quod influxum & potentiam in certos partium motus exserat, nec ullus negare poterit, qui considerat, ad solum arbitrium moveri artus, ad perversas cogitationes & fluidorum & solidorum motum turbari, sed inde tamen minime eliciendum erit, omnes motus, qui conspiciuntur in corpore humano inde dependere, eo quod anima, licet vehementissime velit, nec motum cordis & arteriarum aut motum peristalticum ductuum impedire vel intendere possit. Ecquis præterea non novit, & mentis sapientiam ejusque inclinationes & mores à solidorum & fluidorum motu, quem miris modis res corporeæ immutant, multum dependere? Quare mentis commercium mutuum cum corpore omnino statuendum est, quia hujus ratione habita pluribus difficultatibus enodandis & phænomenorum rationibus explicandis sufficere possumus.

§. XII.

Tertium genus hypotheseum ad remediorum vires & curandi modum pertinet & inter has primum locum ea tenet communis fere opinio, qua medicina quædam universalis statuitur.

Scholion.

Fuerunt complures & adhuc sunt imprimis ex chymicorum choro, qui medicinam omnium morborum curationi accommodatam venditant, quam potissimum ex auro preparandam esse adfirmant, quod peculiariter principium corporis nostri movens roboraret atque confortaret. Si effectus pollicitationibus responderet, etiam si rationes solidæ (quæ ignorari possent) non adferrentur, haud inutilis utique foret eorum labor. Quia vero illi deficiunt, iis, qui vires remediorum a viribus

viribus naturæ probe discernere callent, non immerito de ejusmodi medicina plane dubitandum est. Ego quidem semper hac in sententia fui, ejusmodi medicinas universales venditatas plane esse innocentes & validis ad agendum viribus carere atque hac ratione in quocunque morbo sine damno porrigi posse. Nulpiam enim memini tale remedium in universa rerum natura mihi occurrere, quod si potens sit in agendo, non etiam noceat, si perverse quis utatur. Deinde ut omnes rerum corporearum vires non sunt absolutæ, sed semper conditionales & relativæ: ita etiam de viribus remedium statuendum esse existimo, quorum effectus tantummodo ad certos respectus se extendit, secundum quos variant etiam illorum vires, id est, nocere vel prodesse possunt. Præterea si quis consideret, motus, qui proxime morbos efficiunt, non unius ejusdemque esse generis; eosdemque in quibusdam valde auctos & intensos, in aliis nimis remissos & deficientes, in ceteris inæquales, inversos, ab externis partibus ad interiora vergentes deprehendi: non difficile erit judicare, ab uno remedio hos motus præternaturales, tam multis modis inversos, in ordinem restitui non posse. Illud vero maximum est, quod tantæ causarum, quæ motus inordinatos efficiunt, multitudini, quæ mox quantitate mox defectu aut differenti temperie vel summa activitate delinquant, unum remedium sufficere neutiquam possit.

§. XIII.

Idem judicium esto de remediis in certis morbis specificis, quorum nomine plura habentur & venditantur.

Scholion.

Perversa admodum opinio est, dari medicamenta certis morbis sanandi specificè accommodata, quæ vel sola eos tollant, vel minimum cum fructu adplicari possint. Ita vulgus sentit, ita sibi plurimi medicorum persuadent; quare si semel vel iterum faustum à medicamento laudato in curatione morbi effectum observent, statim si similis morbus incidit, ad idem præscribendum parati sunt; sed sæpius oppido infelici successu. Ita cortex chinæ specificum antifebrile, mercuriale medicamentum adversus luem Gallicam, lac antiphthificum atque antipodagricum, martialia, item acidulæ contra malum hypochondriacum, lumbrici terrestres antepilepticum, acmella & pareira brava antinephriticum, sanguis asinus antimaniacum habentur maximè æstimantur, quibus eximiam, quam ferre possunt, dictis in morbis non detrahimus, si recte quis iis utatur, laudem: sed id saltem urgemus, non indistincte, nullo habito individuorum vel causarum respectu, esse adhibenda talia, multo minus hæc sola dictis morbis curandis sufficere. Interea tamen nullus modus vel finis est conquirendi & aucupandi arcanæ & adversus morbos specifica, cum tamen nulla in rerum natura dentur vel existant, sed arcanum medicorum in scientia & prudentia quæri & inveniri debeat.

§. XIV.

Dari unam eandemque morbis ejusdem generis medendi methodum præconcepta quoque opinio est.

Scholion.

Illi medici, qui in curando morbo v. g. quartana, colica, mensium suppressione, epilepsia chronica, asthma eadem methodo, qua antea feliciter usi fuerunt, incedere semper solent, mirum quantum falluntur; quandoquidem ejusdem morbi diversæ existunt causæ & subjectorum, quæ morbo adfliguntur, natura longe multumque differt. Quia vero is rectam medendi viam sequitur, qui inter causam morbi & remedium

rum vires proportionem invenire, & quæ in vitio est, materiam corrigere & debito tempore excernere novit: palam est non eodem modo & ratione id præstari posse. Quare prudenter *Celsus Libr. III. Cap. II.* monet, non omnibus ægris eadem auxilia convenire, & *Sydenhamius in praxi sua* testatur, eandem methodum, qua quis olim feliciter in tollendis v. g. febribus epidemicis usus est, alio tempore nocere & ægrotantes è medio tollere. Quisque enim morbus & quodvis individuum peculiarem medendi & tractandi rationem desiderat; hinc morbi eorumque historiæ probe prius sunt indagandæ ac ponderandæ, ut ex omnium circumstantiarum ratione medicus solido judicio instructus methodum seu viam tractandi inveniat. Specialissima enim medendi methodus nonnisi in judicio medici versatur, & quo quis attentior & acutior in judicando est; eo melior medicus haberi debet.

§. XV.

Autocratia naturæ non nimis in medendo est extendenda.

Scholion.

Naturas morborum esse medicatrices, non modo ab *Hippocrate* sapienter dictum, sed & ab omnibus Græcis medicis semper repetitum est. Quid per naturam hic indigitaverint, non satis est perspicuum, utpote diversissima hujus nominis significatio in veterum monumentis reperitur. Id vero in facto verissimum est, quod multi ægrotantes à morbis maxime acutis convalescant sine accedente medici arte. Hæc consideratio quosdam induxit, ut principium corpori nostro inexistere putarent, quod sciat, quomodo, quo tempore & in quantum, per quas vias etiam agere, movere & morbi causam expellere debeat, quam viam & methodum sequi, imitari, & rectos conatus adjuvare debere medicum statuerunt. Utut vero negandum non sit, motus in corpore nostro, à quacunque etiam causa proveniant, sive materiali sive immateriali, sæpius proportionem, ordinem & tempus servare, si à causa morbifica excitati fuerunt, & eo etiam collineare, ut ipsam causam, à qua proficiuntur, è corpore auferant: attamen non id semper contingit, sed multi morbi & motus morbofi, non certe salubres, sed plane perniciosi dicendi sunt; quos, quam primum fieri potest, sedare debet medicus; quemadmodum id maxime conspicitur in illis motibus ac excretionibus, quæ à materia acri, caustica vel læsione nervosarum partium à vermibus, à calculo, à stagnatione sanguinis in cerebro, à virulento morborum miasmate, vel veneno adsumto excitantur. Deinceps in tollendis affectionibus chronicis, uti videmus in malo hypochondriaco, hysterico, omnes illi spastici motus inanes sunt, nec tollendæ causæ quicquam inserviunt, sed maximam potius perniciem adferunt. Sunt etiam plures ex chronicis, in quibus natura parum vel nihil per se juvat; sed arte adjuncta id maxima ex parte præstat, ut videmus in morbo Gallico, in affectu scorbutico, cachectico. Succumbit quoque penitus natura adsumto veneno narcotico vel caustico, nisi remedia artis accedant: idem fit in cholericæ affectione, inque passione iliaca ex hernia, colica sic dicta convulsiva atque epilepsia chronica. Est itaque autocratia naturæ recte prius explicanda, & postea ad negotium praxeos adplicanda.

§. XVI.

Ex falsis medicorum hypothesebus ac præconceptis opinionibus pathologicis plures iique perniciosi admodum errores in praxin medicam redundant.

Scholion.

Possem id adsertum innumeris confirmare exemplis, si instituti ratio maxime exposceret; perpauca tamen

attigisse suffecerit. Plures adhuc sunt medici, qui summum illud venæ sectionis remedium in plerisque morbis reformidant vel plane non admittere volunt, ex prava hypothefi huc adducti, quia sanguinem optimum esse vitæ thesaurum, nec abundantia eum peccare posse credunt. Quidam emeticorum usum vel penitus è foro medico eliminare student, quia secundum eorum hypothefin plurimi morbi, tam acuti, quam chronici, ex plethora vel sanguinis excretionibus consuetis suppressis oriuntur, cum ad hunc scopum nihil efficere queant vomitoria. Nonnulli in morbis chronicis, quos ab exsuperante acido & viscido omnes deducere amant, nihil nisi talia remedia, quæ acidum absorbent & contemperant, uti sunt martialia, alcalina terrea, præscribenda esse autumant. Cortex chinæ præstantissimum & fere infallibile in intermittentibus antipyreticon creditur, non alia de causa, quam quia secundum eorum opinionem fermentum febrile prima in regione oberrans immutare & corrigere creditur. Opiata & omnia sopientia, imo ipsa castorina & vaporosa, nonnullis ob id exitiosa sunt visa, quia ad plethoræ solutionem & sanguinis excretionem juvandas adeo nihil faciunt, ut potius eas impedian. Quidam ex recentioribus etiam venæ sectionis usum in febribus, tam acutis, quam intermittentibus, damnant, eo ducti hac hypothefi, quod natura in febribus non excretioni, sed consumptioni abundantis sanguinis intenta sit. Quicumque vero acidum in morbis peccans rarius vel plane non admittunt, ii remedia alcalina, lixiviosa, salia volatilia rarius propinanda esse arbitrantur.

§. XVII.

Ex tot tamque vexatis & dubiis opinionibus atque hypothefibus, quæ salutari nostræ arti plus exitii, quam utilitatis adferunt, ut medicus emergat, omni modo annitatur.

Scholion.

Uti omnis sectaria doctrina, utpote à veritatis simplicitate aliena, maxime vitanda est: ita multo magis id fieri debet in disciplina medica, quia variæ opiniones, fœcundæ errorum genitrices, non, ut in aliis disciplinis, tantummodo in mente subsistunt, sed ad artem, quæ morbos sanare & mortem propulsare debet, transeunt, ubi in magnam subinde cedunt perniciem.

§. XIX.

Non propior aut certior ex tanta opinionum difficultate & multitudine, quæ premit artem nostram, emergendi via invenitur, quam de omnibus prudenter dubitare, neque totum se illis mancipare, sed omnia dogmata ad observationes practicas tanquam ad lydium lapidem examinare ac dispicere, num usum in iis resolvendis & in praxi habeant. Deinde, cum medicina sit summa philosophia, medicus nihil in ejus doctrina, nisi quod clarissime cognitum ac demonstratum fuit, admittere & singulares veritates in ordinem, rationem, connexionem contrahere & ex jam notis ignotas detegere debet.

Scholion.

Optandum vehementer foret, ut in academiis, ubi prima veritatum fundamenta poni debent, nonnisi optimis præceptis & pura, nullisque opinionibus vel erroribus contaminata doctrina animi tironum imbueretur, quia, teste *Quintiliano*, ea, quæ rudibus annis didicimus, pertinacissime hærent, neque facile ex memoria excidunt: sed hoc rarius evenire testatur experientia, quia plures ex iis, qui artem profitentur, sibi de decori ducunt, ab iis, quæ olim parum considerate foverunt, sententiis recedere, easque vel emendare vel prorsus rejicere. Mihi semper hic mos fuit,

quem perpetuo etiam aliis commendare soleo, in nullius verba magistri jurare, sed de omnibus prudenter dubitare, aliorumque dogmata expendere, eaque ad observationes practicas tanquam ad cynosuram, quem usum habeant, examinare, meliora retinere eaque postea in certum nexum & ordinem redigere. In quo labore omnes eruditos, qui veritates utilissimas, quæ divini quid habent, amant, vitam suam transigere & consensescere debere ego quidem existimo. Denique omnibus, qui præcepta artis nostræ aliis tradere volunt, hujus rei exercitationem commendare soleo. Certissimum enim est, eum qui sola lectione aut auditu artem medendi comprehendit, non posse aliter eam tradere, quam aliena dicta aut scripta sequendo aut illa referendo instar convallium echus, quæ alienas duntaxat voces aut sonitus refert. Sapienter *Hippocrates Libr. de Præceptionibus num. 10.* inanem futuram ejus expectationem adferit, qui in multifida dogmatum hujusce disciplinæ sectione citra exercitationis constantiam veri rectique cognitionem habere sperat.

CAPUT III.

De veritatibus pathologiæ fundamentalibus ex physiologia repetendis.

§. I.

Sicuti omnis scientia & demonstratio veritates quasdam jam notas & cognititas seu principia, ex quibus aliæ incognitæ, convenienti ordine, ratione & nexu deteguntur, supponit, ita etiam in doctrina de morbis scientificè tractanda certæ & jam demonstratæ veritates seu principia & postulata supponenda sunt.

Scholion.

Veritates, quæ demonstrationibus in pathologia serviunt, maxima parte ex scientia corporis humani sani sive physiologia depromendæ sunt. Sicut enim rectum est norma obliqui: ita status corporis vivi & sani turbati & perversi sive morbofi index erit.

§. II.

Vera vitæ definitio, quod ea sit sanguinis & humorum in circulum abiens motus, à solidorum contractione & relaxatione proficiens, quo corpus à præsentanea corruptione vindicatur, est ex primis & præcipuis veritatibus, quæ pathologiæ solidæ stabilientiæ subternenda est.

Scholion.

Uti in mathematicis & philosophicis veræ rerum definitiones sunt optima demonstrandi principia: ita, quæ naturam, genefin & ipsam formalem vitæ & efficientem causam complectitur, permultum nobis in demonstrationibus pathologicis serviet; cum primum & præcipuum medici munus sit, vitam tueri & tristissimam mortem propulsare; quoniam vero modo cum ratione id præstare velit, si causæ, quæ vitam efficiunt, fuerint incognitæ, ego quidem non satis comprehendo.

§. III.

Genuina sanitatis definitio, quod sit integritas actionum, quæ ab æquabili & libera solidorum contractione & relaxatione sanguinisque circulari motu, quem justo ordine secretionis & excretionis sequuntur, provenit, in præcipuis pathologiæ fundamentis est.

Scholion.

Plena & exquisita motuum naturæ, qui certo ordine & legibus constant & sanitati patrocinantur, notitia ad

ad motuum , qui morbos efficiunt , cognitionem scitu admodum est necessaria. Liber sanguinis circulus is est , qui sine ullo impedimento per tubulos apertos ab interioribus versus exteriora fertur ; æquabilis vero is dicitur , qui nec nimis celer aut tardus est , sed qui iustam in gradu , successu , ordine & tempore servat proportionem. Hi motus ejusmodi sunt indolis , ut omnes functiones , vitales nempe , naturales & animales secundum naturæ leges & ordinem administrent.

§. IV.

Motus , qui in œconomia corporis nostri celebrantur , duplicis sunt generis : vel enim ad solidas , vel ad fluidas partes pertinent.

§. V.

Qui in solidis peraguntur , simplicissimæ sunt indolis ; nam tantum contractione & relaxatione reciproca , quas Græci systoles & diastoles nomine efferunt , continentur ; qui duo motus omnem fluidorum impulsus , progressionem , circulum , secretiones & excretiones efficiunt.

§. VI.

Hæ duæ simplices motuum species mirabilium in corpore humano effectuum unicæ sunt causæ : ratione partium vero quodammodo inter se differunt & propria etiam nomina obtinent. In corde & arteriis pulsus efficiunt , in ventriculo , intestinis & omnis generis ductibus excretoriis v. g. biliaris , urinosi motum peristalticum exhibent , in fibris motricibus tonum , robur , resistantiam & potentiam elasticam exerunt , in nervosis undulatorium quendam motum producant.

§. VII.

Fluidorum motus identidem duplicis sunt generis : vel enim sunt progressivi , dum è loco in locum feruntur , vel intestini , ubi partes fluidorum continuo situm suum mutant & motu vorticoso agitantur ; & hi sunt illi , qui calorem & fluiditatem efficiunt.

§. VIII.

Ex progressivis primus & princeps , à quo reliqui & intestini dependent , est sanguinis circulus.

Scholion.

Motus secretorii , quibus utiles succi à sanguinis massa in usum discernuntur , & excretorii , quorum ope superflui & perniciosi foras ejiciuntur , maxime sanguinis sequuntur circularem motum , adeo , ut quo citatior & liberior sanguinis ad organa secretoria & excretoria sit adpulsus , hoc copiosiores & celeriores secretiones & excretiones fiant ; contrarium accidit , si contrario modo res sese habeat. Duæ quoque sunt motuum intestinorum species , quæ à sanguinis progressivo motu reguntur. Primus est , qui calorem efficit , alter qui fluiditatem humoribus conciliat , & intime solidas partes cum liquidis miscet ; nam à fortiori & continua cordis & arteriarum contractione sanguis premitur ad latera arteriarum , ejusque partes sulphureæ , intestina & attritiva agitatione incalcescentes universo corpori calorem foenerant. Ab eadem solidorum contractione & interiori partium agitatione fit , ut solidæ sanguinis partes cum fluidis intime misceantur , quo eo melius minutissimas vasorum angustias pertransire possint. Sunt præterea duo intestini humorum motus , qui vero à sanguinis motu progressivo non pendent , sed potius quadam quiete sive lentiori sanguinis cursu producuntur. Atque hi sunt motus fermentationis & transmutationis : ille maxime in primis viis conspicitur & alimentorum texturam resolvendo spiritualescentiam vel etiam acescentiam relinquit ; hic vero , cujus beneficio unus humor alterius figuram , dispositionem poro-

Frid. Hoffmanni Oper. Tom. I.

rum & partium facile induit , transmutatorius nobis vocatur , qui chyli transmutationem in sanguinem , seri sulphurei in bilem , chyli in lac adjuvat , inque statu morbofo , dum bonus humor in naturam perniciosi stagnantis transit , sæpius occurrit. Nam uti in panificiis parum fermenti ingentem farinæ massam in sui similem naturam convertit , & parum aceti , vino adfufum , id acidum reddit : ita etiam humores corporis nostri , præsertim cum moram quandam trahunt , vi quadam transmutatoria præditi sunt.

§. IX.

Cor & arteriæ omnisque generis solida movent & actuant fluida eorumque cursum gubernant ; cum autem motum suum non à se suaque natura habeant , necesse est , ut motuum , qui in illis vigent , causæ quædam existant.

Scholion.

Veteres omnium , qui in animantibus conspiciuntur , motuum causam ab anima , quæ interiori motu gaudeat & primum movens sit , deducebant , sed quia sub hoc nomine nulla res concipi , neque cujus naturæ sit , intelligi potest , utique causa hæc allegata principii , ut Logici loquuntur , petitionem involvit. Etenim ex eo , quod ad certas cogitationes , impressiones vel nostrum arbitrium motus quidam in partibus solidis fiant , minime sequitur , ut omnes motus , qui vitam maxime & sanitatem sustinent , inde derivari debeant. Solidioris enim physicæ & medicæ doctrinæ peritis Viris non amplius ignotum est vel esse debet , omnia corpora vim activam motricem sibi insitam habere eorumque unum in alterum agere & diversos effectus producere : adeoque ineptissimam illam veterum esse sententiam , qui statuerunt , corpora omnia esse passivæ indolis , quæ ab alio agente sive anima essent actuanda , à corporis natura distinctissima.

§. X.

Cor & omnes partes motrices solidæ motum , robur , tonum & vim contractilem ac elasticam à fluidis tenuissimis , quæ in cerebro , nervis atque ipso in sanguine sunt , mutuuntur.

Scholion.

Hoc theorema , quia in rationali status morbofi explicatione magni usus est , firmis quibusdam argumentis stabilendum est. Primo nempe indubia constat observatione , nullum organum , utut ratione texturæ salvum , integrum atque illæsum sit , ad motum , quicumque etiam fuerit , edendum esse idoneum , si nervi ad illud tendentes vel etiam arteriosa vasa ligentur aut præscindantur , luculento testimonio , causam motus ab hisce fluidis dependere. Deinde perquam notatu dignum est illud experimentum , sæpius à nobis observatum , quod cor ex pisce recenter exemptum & longo adhuc tempore pulsans aquæ calidæ immissum , omni motu privetur , qui eodem corde in aquam frigidam injecto mox reviviscit. Quo ipso planissime patet , materiale esse quandam causam motus in corde existentem , quia calidum & frigidum ingentem ei inducit mutationem. Neque minus illud memorabile est , expresso ex vasis coronariis incisis sanguine statim cessare pulsationes. Veri itaque simillimum est , non modo fluidum per nervos , sed & sanguinem per minima arteriolarum ad organa motuum & fibras motrices atque membranas musculosas adductum eas non tam nutrire , quam systalticum motum & vim contractivam illis conciliare. Atque hinc est , quod nimia sanguinis amissio solidorum robur , tonum ac vim motricem infringat , corporis autem vires valde attritæ à boni & largioris sanguinis proventu augmentum capiant.

§. XI.

Sanguinis temperati defecatiſſima & ſubtiliſſima ætherea atque elãſtica portio eſt illud principium corporis noſtri agens & movens, cujus origo & generatio ab æris & alimentorum puriori & ſubtiliori parte potiſſimum arceſſenda eſt.

Scholion.

Sicuti enim ſtupendi in rerum natura à fluidis mobiliſſimæ indolis v. g. æthere, ære effectus proveniunt: ita nihil dubii eſt, quin tenuiores æreo - æthereæ & ſulphureæ ſanguinis & lymphæ partes maximam motus excitandi in animantium corporibus habeant potentiam; præſertim cum continuo animadvertamus ab alimentis & medicamentis ſubtilioris indolis, neque minus ab ære puriori robur & vires corporis manifeſto augeri; ab alimentis vero incongruis & ære impuriori eas decreſcere. Rectiſſime itaque in ſanguine theſaurus vitæ & virium quærendus eſt, in quo vitalem veteres ſpiritum collocarunt. *Hippocrates L. de Corde §. 8.* pura & illuſtri ſubſtantia ex ſanguinis diſcretione nata mentem hominis nutriri aſſeverabat: fortaſſe ob hanc rationem, quia animadvertebat, ſapientiam hominis à bono & temperato ſanguine plurimum foveri.

§. XII.

Æris ad ſuſtentandam animantium vitam inevitabilis eſt neceſſitas, tum propter ejus vim elãſticam & gravitatem, qua pollet, tum etiam propter ſimpliſſimum & agiliſſimum ætheris elementum, quod pro anima & ſpiritu quidam habent, cujus vehiculum ær eſt.

Scholion.

Quare non temere prodidit *Hippocrates Libr. de flatibus §. 4.* ærem in omnibus, quæ corpori accidunt, maximum eſſe & auctorem & dominum, cujus potentiam diligenter perſpicere oportet. Item §. 6. mortalibus vitæ & morborum ægrotis ærem eſſe auctorem & ob eum inquinamenti plenum, quibus humana natura offenditur, homines ægrotare, non minus vere, quam ſapienter, idem graviſſimus auctor innuit. Cui enim ignotum eſt, æris mutationes parere morbos epidemios ſimplices & peſtilentes & qui in certa anni tempora incidunt. Ex quo recte colligitur majorem in ære eſſe vim ad immutandum corporis habitum, quam in diætã, ſiquidem ær reſpiratione non modo intra pulmones recipitur, atque exterius corpus noſtrum ambit, ſed & alimentis intermixtus ad ipſum ſanguinem tranſit. In pulmonibus elãſtica vi magis aucta & etiam gravitate ſua circulantem per eos ſanguinem urget, propellit, promovet & torpidum jam ac motui ineptum ad cordis fontem vivida circumpulſione perducit. Externe vero gravitate ſua elãſticam ejus & expanſivam vim in ſanguine in æquilibrio quaſi ſervat, intra humores vero contentus ejus elater virtute ſua expanſiva ſolidorum motus excitat, adeo ut mirandum non ſit, pro diverſo æris ſtatu & animi & corporis robur vel augeri vel imminui. Sique veterum inprimisque *Hippocratis* monumenta conſulamur, clare patet, ærem ſive potius ætherem pro anima illos habuiſſe: quorſum ſpectant loca *L. I. de diæt. §. 8.* animam hominis augeri, ſapientiſſimam eſſe, quæ ignis & aqua habeat temperamentum, & *libr. de ſanitate tuenda.* Calore continetur anima, qua vivimus. it. Sanguis animam vitiat & *L. VI. Epidem.* hominis anima ſemper producitur, id eſt, vegetatur uſque ad mortem.

§. XIII.

Ad impulſum ſanguinis ejusque motum in convenienti æquabilitate conſervandum ſolidarum partium, quæ motus instrumenta ſunt, ſtructura non parum contri-

Scholion.

Partes corporis noſtri ſolidas ex meris fibris & filamentis contextas eſſe, non ignotum eſt. Multum itaque refert ſcire, quænam ſit harum fibrarum in conſtituendis ſolidis ſtructura, an ex fibris tenſioribus, tenerioribus, ſolidioribus & compactioribus, aut flaccidis, rudioribus quoque & denſioribus contextæ ſint, ſiquidem illis major vis reſiſtendi & premendi, his vero minor & debilior ineſt. Neque ignorare oportet, an corpus capacioribus & paucioribus: vel copioſioribus & anguſtioribus vafis donatum ſit. Nam ex ſolidorum varia textura & ſtructura illam temperamentorum & motus ſanguinis diverſam rationem maxima parte petendam eſſe, ego quidem arbitror. Et quia varia fibrarum ratione ætatis, ſexus & nativitatis eſt diſpoſitio, mirandum non eſt, certas ætates & ſexum quoque ſuos peculiareſ ferre morbos & nonnullos eſſe hæreditarios.

§. XIV.

Pæpetuis naturæ microſcopicæ legibus fancitum eſt, ut ad motuum vitalium juſtam adminiſtrationem moderata & proportionem ſervans ſanguinis & humorum quantitas & temperies requirantur.

Scholion.

Ut tunicæ vaſorum, in quibus fluida circumvehuntur, libere & convenienter tum contrahantur, tum expandantur, humores nec in exceſſu, nec in defectu peccare debent. Copioſior enim eorum moles ac reniſus vaſorum elaterem & potentiam ſyſtalticam non mediocriter deprimit, unde tardior enaſcitur progreſſus, qui deinceps ad ſtagnationes & corruptiones plurimum confert. Quod ſi vero deficiunt humores, expansio vaſorum ſit inſufficiens, neque etiam ad minima & capillaria vaſa tunicarum, quibus ea inveſtiuntur, quæque eorum ſyſtalticum motum adjuvant, pertingere ac continuari poteſt; quare non mirum videri debet, ſi pulſus cordis & arteriarum fiat debilior atque robur univerſo corpori decedat.

§. XV.

Legibus naturæ & hoc continetur, ut ſanguis vitalibus motibus rite proſequendis aptus ex partibus, quæ ejus eſſentiam conſtituunt, probe ſit mixtus.

Scholion.

Elementa, ex quibus vitalis ille purpurei coloris fucus conflatur, debentur partim principio oleoſo-ſulphureo, partim terreo & aqueo. Horum vero perfectã mixtio ac unio in eo conſiſtit, ut tres fere partes liquidi aquei ad unam ſolidi neceſſario requirantur, quemadmodum id apparet in ſanguine hominis ſani, ſi lento calore ejusdem evaporatio inſtituatur. Proportio vero principii terrei & ſulphurei exacte determinari nequit, eo quod pro diverſitate alimentorum & motus progreſſivi ac inteſtini ſanguinis illa ipſa admodum variet. Fluidum autem ſolido hanc ob rationem prævalere debet, quo tenuiſſimos mæandros atque canales, ex quibus machina noſtra, quæ tota hydraulica eſt, conſtat, libere permeare poſſit.

§. XVI.

Eadem lex naturæ præcipit, ut partes ſolidæ ſulphureæ, terreæ & mucidæ aqueis fluidis intime ſint intermixtæ.

Scholion.

Niſi enim ſolida cum fluidis intimam inirent ſocietatem, facile fluida à ſolidis ſecederent & minimi partium tubuli neceſſario obſtruerentur. Quo minus itaque hæc contingerent, provido naturæ conſilio multorum viſcerum, maxime pulmonum & lienis fabrica ferme tota ex canaliculis minimis eſt conſtructa, hunc præ-

præcipue in finem, ut pressione ac impulsu per vasculorum myriades transeuntis sanguinis partes solidæ in minimos globulos discerptæ eo melius cum interlabentibus fluidis per vasa circumferrentur: unde patet quoque ratio, quare textura sanguinis ex horum viscerum obstructione vitata plurimorum morborum generatio- ni velificetur.

§. XVII.

Ordo & lex naturæ nostræ microcosmicæ postulat, ut temperatus, id est, ab omnibus salino-sulphureis mucidis excrementitiis partibus liber & depuratus sanguis ad actiones quæ in corpore humano fiunt decen- ter præstandas esse debeat.

Scholion.

Qua de causa tam copiosa excretoria organa & emun- ctoria, quæ varii generis inutiles & effœtas fordes continuo educunt, in animantium corporibus à pro- videri natura constituta reperies. Quo plus enim excre- mentitiis sordibus inquinatus est sanguis, eo sanitati minus patrocinator, quin etiam morborum & mortis causa fit, unde excretiones ad vitam & sanitatem tuen- dam valde sunt necessariae.

§. XVIII.

Vitales illi progressivi & intestini sanguinis motus ejus sunt naturæ, ut optimi sanguinis & temperati cra- sin tandem resolvant, eumque intemperatum & vitæ continuandæ inutilem reddant; opus hinc est, ut con- tinuo inutiles & excrementitiæ partes secretæ foras pro- trudantur, novæ vero & temperatæ in earum vicem surrogentur.

Scholion.

Quibus cognitis jam clarissime intelligitur, cur ho- mo sine alimentis & sine excretionibus non diu vivere & robustus ac validus permanere possit: calor enim, qui nonnisi intestinus partium sanguinis motus à pro- gressivo oriundus est, continuo in temperatam humo- rum crasin agit, quam in excrementa salino-sulphu- rea, mucida, corruptibilia dissolvit, ut perpetuo no- vorum & benignorum succorum accessu opus sit. Con- tinuis itaque ingestionibus atque egestionibus corpus nostrum corruptibile conservatur, adeo ut perpetui hu- mores in illud influant & rursus ex eo effluant. Quare sapienter more suo *Hippocrates* ad sanitatem hominis & ut corpus recte sese habeat *Lib. de insomniis* §. 12. requi- rit, ut omnes circuitus & exhibitiones ciborum ac secre- tiones integræ sint. Pressius autem & specialius idem gravissimus auctor sanitatis naturam per convenientes ingestiones & egestionem *Lib. IV. §. 16.* describit & sensus hic est: *per ingesta humor ad corpus venit & in eo ma- net, si postmodum vero alius ad ipsum accedit, tum prior ca- liditate diffusus & tenuis factus à recenti expellitur & tempore graveolens factus una cum stercore & urina exit copia ipse sibi inæqualis & consimilis & æquilibris, etiamsi pars quædam sit, quæ maneat in corpore, tamen tertia die, si novus influit humor, rursus secedere debet atque hoc modo, scribit, sanitas contingere solet; Et in eodem §. addit: humor in corpore manens robur exhibet; & porro addit: si humor pluribus, quam tribus diebus in corpore permaneat aut alius multus implens accedat ve- nis calescentibus ac stantibus majus aut minus malum facit.*

§. XIX.

Denique etiam à natura constitutum est, ut, si sani- tas constare debeat, excretiones in homine qui non amplius crescit, pondere sint æquales ingestionibus.

Scholion.

Quæ veritas amplissimi in pathologicis usus experi- mento statico cominode confirmatur. Nam si corpus exacta lance quoad ejus pondus, & simul etiam ea, quæ trium dierum spatio ex liquidis & solidis ingerit, examinantur, tunc in sano & laboribus dedito quin-

Frid. Hoffmanni Oper. Tom. I.

quaginta facile libras æquabunt; si postea rursus pon- dus corporis indagetur, ejus vel minimum accessisse haud deprehendemus; si aliud evenit, plura incommo- da sequuntur. Ex quo clare intelligitur tantum in sano statu decedere, quantum accessit. Multum itaque re- fert ad morbos præcavendos & sanitatem hominis in- dagandam, diligentius ingesta & excrèta spectare, num proportionem inter se habuerint: nam si eam non ser- vant, certe morborum primordia non procul erunt. At- que revera totius diæteticæ cardo in eo vertitur, ut ex- cretiones ingestis bene respondeant.

§. XX.

Per insensibilem transpirationem quæ fit excretio, secundum *Sanctorii* calculum aliis, quæ excernuntur, multum prævalet, unde ex hac suppressa vel cohibita sanitas multum patitur detrimenti.

Scholion.

Quare non minus vere quam perite *Lib. I. de diætâ* §. 3. *Hippocrates*: si inventa fuerit ciborum mensura & laborum ad unamquamque naturam numerus, ita ut ex- cessus neque supra neque infra modum fiat, inventa sane exacte fuerit hominibus sanitas. Ratio quoque in prom- tu est; namque labor & exercitatio corporis egregie sanguinis circulum, adeoque excretionem per transpira- tionem auget & promovet.

§. XXI.

Quoniam alimentorum feculentia à solutione atque extractione residuæ una cum succo superfluo bilioso & copioso muco per alvinas vias, vigore motus peristal- tici, continuo ejici debent, patet hinc luculentissime, nihil ad sanitatis tutelam æque necessarium esse ac il- lum motum in sua proportionem & æquabilitate conser- vare. Ab hoc enim læso gravia mala in corpus huma- num redundant.

Scholion.

Dici vix potest, quantum commodi justa alvi succe- sso, quæ à debita constrictione & expansione motus pe- ristaltici, quem etiam vermicularem adpellant, unice proficiscitur, ad valetudinem tuendam & morbos à corpore propulsandos adferat. Accedit, quod hujus mo- tus integritas ad alimentorum solutionem, plenioris extractionem & ad succi chylosi ingressum ac motum per venas lacteas multum contribuat. Qua de causa optimam salutis suæ curam gerunt ii, qui in earum re- rum, quæ ullo modo hunc ipsum motum conservandi vel labefactandi aut penitus destruendi facultate pol- lent, exactam notitiam pervenire allaborant.

§. XXII.

Cum homo fere ordinario plus ingerat, quam excer- nat, deinceps quoque structura unius corporis præ al- tera ad generandam succorum abundantiam pronior & accommodatior sit, ac demum parum nonnulli corpus suum laboribus vel alia motionis specie exerceant, hinc plerumque plus sanguinis progignitur, quam ad corpus nutriendum vel motus vitales æquabiles conservandos est necessarium; uti & contingere videmus potissimum in feminis & in viris sanguinei temperamenti & spon- giosi corporis habitus. Quare summo cum fructu mo- tu quodam naturali spasmodico superflui humores cum sanguine etiam optimæ notæ certis temporum periodis in foeminis per menses, & in quibusdam viris per hæ- morrhoides evacuantur.

§. XXIII.

Verbis vix potest efferri, quam salubres sint ejusmo- di excretiones sanguineæ, unde etiam petenda est ratio, quare ab iis turbatis vel ex vehementi quadam causa cohibitis tanta morborum in corpore seges proveniat, qua de re infra fusius agendum erit.

§. XXIV.

Cum vitæ & sanitatis ratio maxime in eo versetur, ut in machinam nostri corporis mere hydraulicam & vasculosam humores continuo adfluere inque orbem & circulum ferri & effluere quoque debeant: sequitur om-

nino, ut ii non modo fluxiles, sed & viæ atque tenuissimi meatus, ex quibus maxime secretionibus & excretionibus dicata colatoria constant, patentes atque aperti esse debeant.

Scholion.

Ex quo clarissime intelligitur, quam noxia & sanitati adversa sit sanguinis & humorum crassities atque tenacitas, qua minima vasa, ex quibus pleraque viscera constant, facile obstruuntur. Plurimarum autem chronicarum passionum fundamentum in viscerum obstructione, quæ promte in scirrhescentiam vel etiam corruptionem abire solet, positum esse, nemo medicorum facile in dubium vocabit.

§. XXV.

Fundamentum itaque conservationis corporis nostri corruptibilissimi in perpetuo affluxu succorum benigna temperie gaudentium & effluxu sive excretionem intemperatorum atque inutilium situm cum sit, iis utique utendum est, quæ ad convenientes ingestiones & excretionem faciunt.

Scholion.

Præstat id maxime conveniens & moderatus sex rerum à Galeno dictarum non naturalium usus, quarum usui recto & perverso tum sanitatem & conservationem vitæ, tum morbos & mortem debemus; quarum nonnullæ, ut alimenta, quies animi & corporis, itemque somnus ad generationem & recentiorum succorum corpori nostro utilium conferunt, quædam vero, ut corporis exercitatio ac motus, item vigilia ad inutilium excretionem faciunt. Aer vero & animi affectiones ejus sunt indolis, ut pro differenti statu solidas maxime partes afficiant, quibus varios motus imprimunt.

§. XXVI.

Cum rerum non naturalium ad vitam & sanitatem tuendam tam inevitabilis sit necessitas & mors quoque ac morbi inde suam ducant originem, plurimum utique refert, ut quæ ex iis, noxia sint & morbis progignendis idonea, probe intelligat medicus eaque à salutari-bus discernat.

Scholion.

Quo magis patet, quam utile medico sit aëris, aquarum, alimentorum, locorum & vivendi generis naturam; vires & proprietates exquisite nosse & quomodo ad sanitatem vel etiam generationem morborum contribuant, qua in re illustri exemplo nobis prævit Hippocrates, qui non sine cura & solertia libros mere phisicos de diæta, de aëre, aquis & locis, de alimento, humidorum usu, de flatibus conscriptos posteritati reliquit; sed hæc omnia & singula, quod ad morborum generationem & quomodo concurrant, fusiori infra doctrina sub divino favore prosequemur.

§. XXVII.

Præcipuum quoque ex fundamentis pathologicis illud est, quod corpus nostrum sit artificiosissime constructa machina, cujus omnes partes tam solidæ, quam fluidæ, uti in machinis fieri solet, arctissime inter se connexæ sint & cohæreant, ut solidæ in fluidas & fluidæ in solidas agant, & omnes læsiones ac vitia, sive in solidis sive in fluidis hæreant, invicem conspirent & omnes motus mox in consensum rapiant.

Scholion.

Quomodo fluidorum ratione temperiei & motus læsiones in solidas musculosas & nervosas partes mox transeant & harum motus vitiosi fluidas in temperie,

mixtione & crassi sua turbent: qua ratione porro gravior quædam partis nervosæ læsio universum nervorum & membranarum genus in consensum rapiat & inde etiam rursus fluida alterentur, hæc probe cognoscere debet is, qui in pathologicis variorum & sæpe insolitorum symptomatum rationes & causas explicare conatur. Legi hanc in rem meretur nostra *Dissert. de consensu partium præcipuo pathologiæ & praxeos medicæ fundamento.*

§. XXVIII.

Mira est consensus & communicatio partium nervosarum cum universo fere corpore.

Scholion.

Hujus asserti veritas facile patet, si quis consideret, à læsione nervi vel tendinis, v. g. sub infelici venæ sectione, vel à vespæ aculeo, aut a violenta pressione & vellicatione nervosarum tunicarum à vermibus, à flatibus, febres, deliria, lipothymias, epilepsiam, convulsiones provenire.

§. XXIX.

Longe vero maxima est consensus ventriculi & intestinorum cum aliis partibus nervosis & universo fere corpore.

Scholion.

Hanc consensionem inter alia clarissime demonstrat congeries gravissimorum symptomatum, quæ venenum, quod ventriculi tunicas arrodit, subsequitur, quæ sunt partium extremarum frigus cum sudore algido, urinæ difficultas, syncope, convulsiones, tormina atrocissima, præcordiorum summæ anxietates, spirandi angustia, epilepsia; paralyse, inflammatio faucium & deglutendi difficultas, inquietudo, & id genus plura. Atque etiam mirifico illo ventriculi cum corpore consensu adductus est *Helmontius*, ut sedem animæ sensitivæ in ventriculo collocaverit.

§. XXX.

Maxima operationum animalium fluidique cerebri & nervorum cum actionibus vitalibus viget consensus ac mutua communicatio.

Scholion.

Ita in vulneribus capitis à duræ matris punctura vel irritatione vomitus aut motus convulsivi, item febre oriuntur: sanguinis in basi cerebri extravasatio tandem motum cordis & arteriarum tollit. In membris, quæ paralyti tacta sunt, robur, tonus, sensatio & nutritio minuitur, sanguisque circulus cum pulsu lentior ac debilior evadit. Ad vehementes animi perturbationes v. g. iram, cor validissime palpitatur & contrahitur, ut sanguis, perinde ac in febre, per vasa cum impetu feratur. Terror externas partes constringit, sanguinem circa præcordia sistit, pulsu parvo, debili & inæquali reddit. Anxiæ diuturnæque curæ & meditationes profundiores, tonum & motum peristalticum ventriculi & intestinorum invertendo, digestionem & egestionem alvina valde turbant. Perversa quoque phantasie actioni alienum visceribus imprimit motum. Ita ad aspectum rei ingratae nausea oritur vel vomitus concitatur: ad conspectum pulchræ puellæ copiose sanguis & fluidum nerveum ad genitalia influit: à variis impressionibus fetus in utero conformationem vitari, inter omnes constat. Quod naribus susceptus suaveolens vapor in vehementes convulsiones abdominis viscera adigat, easque graveolens rursus supprimat, notissimum est. Ex quibus satis elucet, quanta sit consensus cerebri & nervorum cum solidis & fluidis corporis nostri partibus.

PHILOSOPHIÆ CORPORIS HUMANI MORBOSI,

S I V E

PATHOLOGIÆ GENERALIS,


PARS PRIMA.

De Mortis, morborum & motuum morbosorum natura, Lègibus in producendis morbis ac symptomatibus & causis morborum.

CAPUT PRIMUM.

De mortis natura & causis.

§. I.

 Uemadmodum vita conservationem corporis animati inque corruptionem proni denotat, à motu interno solidorum & fluidorum, præsertim circuli sanguinis beneficio pendentem: ita mors est plenaria destructio circuli sanguinis & motuum in solidis & fluidis peragendorum cessatio, corporis corruptionem putredinosam post se trahens.

Scholion.

Egregie & mechanice *Hippocrates L. IV. de morbis §. XI.* vitæ & mortis causas explicat his verbis: *Donec vivit homo, venæ apertæ sunt & suscipiunt & dimittunt humorem. Ubi vero mortuus fuerit, clauduntur & extenuantur.* Quas veteres nobis reliquerunt definitiones mortis, quod sit discessio animæ à corpore, vel cessans animæ in corpus operatio aut destructio vinculi, quod calido innato cum humido radicali intercedit, aut secundum *Galenum* virium corporis nostri plenarius lapsus aut destructio facultatum ob deficientem à corde innati caloris influxum: eas non satis perfectas & adæquatas esse, perspicacior quisque facili intelligit negotio. Illa enim ignorantiae vocabula, ut anima, calidum innatum & humidum radicale, quæ pro causis allegare veteribus placuit, realem & sufficientem mortis conceptum; ex quo aliquid demonstrari possit, intellectui haud sane offerunt, quod realis definitionis proprium esse debet. Attamen illæ veterum aberrationes jure meritoque excusandæ sunt, quia pulcherrimum illud circuli sanguinis inventum eos prorsus latuit, quo cognito scimus nos utique, quod sublato sanguinis ad partem vel universum corpus influxu liberoque refluxu prorsus intercluso, non modo ejus functiones penitus cessent, sed & in præsentaneam corruptionem atque putredinem prolatur.

§. II.

Plenaria systoles & diastoles, quæ in corde & arte-

riis viget, extinctione, & tōni ac roboris fibrarum omnimoda remissione, sanguinis motum & progressum non modo deficere, sed & in momento cogitationes, sensum, calorem, vires & robur, item respirationem artuumque motus perire, certæ indubiæque experientiae testimoniis quotidianis edocemur.

Scholion.

Neque vero syncope, quæ duntaxat cessatio motus cordis & sanguinis temporaria est, in qua etiam cogitationes, sensationes, vires & motiones ad tempus pereunt, cum morte, quæ est destructio motuum omnimoda, ut non revocari amplius queant, confundenda est. Quare sibi maxime caveant medici, ne fortiori syncope correptos pro mortuis habeant, cujus rei infelix olim exemplum, ut fertur, edidit instaurator ille anatomicae disciplinæ, *Vesalius*, qui ad mulierem hysteri- cam, quæ mortua credebatur, dissecandam accersitus, adeo se negligenter gessit, ut novaculam in corpus adigeret; verum illa motu & clamore se vivam mox ostendebat; quæ res optimum virum invisum ac detestabilem reddidit, & in calamitates acerbis conjecit.

§. III.

Non desunt indicia, quibus vera mors ab ejus imagine, nempe syncope, discernitur.

Scholion.

Interdum paulo difficilius est vere mortuos à vehementiori syncope correptis distinguere, quia tam lenis sæpenumero aëris alternus motus, cordis quoque agitatio & sanguinis cursus tam subtilis est, ut vix ac ne vix quidem in sensus incurrat; sunt tamen certi mortis indices omnium membrorum frigiditas & corporis gravitas; sique ad forte sternutatorium naribus admotum nulla sensatio conspiciatur, neque in cordis regione aut in collo, ubi carotides sitæ sunt, vel minima quædam motio observetur, aut in speculo ori adnoto nulla macula observetur. In certissimis autem mortis signis incipiens corruptio habenda est.

§. IV.

Mortis ratio formalis & adæquata non unice in corruptione vel putredine quærenda est; hæc tamen sæpius tanquam causa proxima, potissimum vero tanquam effectus mortis præsto fuisse deprehenditur.

Scholion.

Illud quidem certissimum est, corpus vel partem ejus mortuam esse, quæ putredine tacta est, utpote quæ proflus mixtionem & structuram destruit: at vero haud quaquam sequitur, corpus non esse mortuum, ubi putredo non deprehenditur. Hujus adferti veritatem quotidiana confirmant exempla eorum, qui violenta morte ex transfossa nobiliori parte, ut corde vel vase majori aut cerebri parte inferiori, aut intensissimo frigore moriuntur. Putredo enim non proxima ratione ab extinctione motuum machinæ nostræ dependet, sed est potius diuturnioris quietis, nec non atmosphære calidæ humidæque in corpus multa humiditate perfusum agentis productum.

§. V.

Proxima cum mortis causa in plenaria cordis & sanguinis quiete consistat, sequitur sane, ut omnia ea inferendæ morti sufficiant, quæ systolen atque diastolen cordis, sanguinisque circularem motum, ex toto auferre valent.

§. VI.

Genuinas mortis causas quicunque paulo altius à motus cordis & circuli sanguinis causis derivant, hi recte sane agunt. Nam quo posito ponitur vita, hoc sublato eadem etiam tollitur.

§. VII.

Ad machinam cordis movendam sanguinis per vasa & fluidi tenuissimi per nervos, itemque aëris in pulmones ingressus requiritur: quare statuendum est, quicquid sanguinis ad cordis ventriculos & fluidi per nervos ad ejus fibrosam elasticam compagem adfluxum cohibet, & aëris usum intercipit, id inter certissimæ mortis causas referendum esse.

Scholion.

Ex physiologicis repetendum est, nervis omnibus, qui ad cor abeunt, præcisus ejus motum tolli, & diastolen cordis, à sanguine adfluente factam, esse systoles, & systolen rursus diastoles causam: sive cor movere sanguinem & à sanguine quoque moveri. Notandum quoque hic est, miram esse in corde fibrarum fabricam, quæ vi sua elastica pressionem sanguinis mirum in modum adjuvare valent.

§. VIII.

Vehementior apoplexia, quæ à sanguine extravasato ex plexu choroideo in ventriculos cerebri irrumpente nascitur, nec non fractura vertebrarum colli, præsentissimæ mortis causæ sunt, quia fluidi ex cerebro vel spinali medulla per nervos ad cor & viscera liber influxus intercipitur.

§. IX.

Sanguinis ex venis immodica effusio, polyposum concretum ostium vasis in corde claudens, aërisque interceptio mortem præsentissime inferunt.

Scholion.

Patet jam ratio, quare vasorum majorum insignia vulnera, item suffocatio in aquis, strangulatio & aër, ob contentas in eo tenuissimas sulphuris & carbonum exhalationes, expansiva virtute sua orbatus, celerrime homines necandi facultatem habeant.

§. X.

Si cordis substantia, præsertim ad cavitates penetrante vulnere læsa sit, celerrime mortem inferri necesse est.

Scholion.

Id non tamen eam ob causam evenit, quod san-

guis effluat, sed quod etiam machina illa motoria, cujus beneficio fit impetus & compressio, non amplius integra, sed destructa sit.

§. XI.

Venena penetrantioris causticæ indolis, & morsus ac ictus animantium non alia ratione celerrime perimunt, quam quod omne genus membranarum & nervosarum partium graviter convellendo, universum æquilibrationem motus solidorum & fluidorum invertunt & cordis quoque & sanguinis cursum liberum sufflaminant, atque in ventriculo stases sphacelosas & inflammatorias producunt.

§. XII.

Alia tenui sulphure vaporoso narcotico necant, quo fluidum in membranis & nervis mobilissimum contaminando cordis & aliorum solidorum systolen & robur auferunt.

§. XIII.

Præter violentas has mortis causas sunt adhuc aliæ naturales, quæ mortem in morbis inferunt, inquirendæ: & inter has atonia nimia partium solidarum, ex qua stagnatio, quies humorum plenaria & putredo nascuntur, principem sibi locum vindicat.

§. XIV.

In corporibus morbo extinctis ordinario extravasationes sanguinis vel feri corrupti in thorace, in capite & abdomine; vel viscera putrida, sphacelosa & foetida deprehendimus.

Scholion.

Notatu perquam digna est observatio, quod violenta morte perempti sine ullo foetoris & putredinis sensu dissecantur; quos vero morbi vehementia oppressit, in iis semper fere in dissectione insignis foetor, putredo atque corruptio sese offerunt.

§. XV.

Mortis, five violenta five naturalis ea fuerit, causæ semper in dissecto cadavere reperiuntur.

Scholion.

Legenda hac de re est nostra *dissertatio de generatione mortis in morbis*, in qua plurima attulimus exempla & observationes cadaverum certis morbis defunctorum & dissectorum, & ostendimus, vel extravasationem humorum, vel corruptionem aut polyposas concreciones fuisse repertas. Cavendum tamen maxime est, ne causas mortis pro morborum causis habeamus ac venditemus, quod plures facere adsolent medici, qui adstantes fallere volunt, proponendo, morbum ob tantam vehementiam læsionis, quæ cernitur, non potuisse sanationem recipere. Mors enim utique non fit sine causis evidentibus & manifestis, sed hæc non statim causa morborum, sed potius harum effectus sunt. Id vero in quæstionem venit, an non causæ, quæ morbum intulerunt, tolli adeoque morbus sanari causæque mortis illæ, quas secantes deprehendunt, averti prohiberique potuissent?

§. XVI.

Porro mortis ex morbis causa familiaris admodum est putredo visceris vel partis intra corpus progenita, quæ celerrime ex inflammatoriis stasibus in acutis, ex sanguinis vero & humorum stagnationibus in chronicis producitur.

Scholion.

In hujus adferti testimonium allegamus anatomen eorum, qui morbo five acuto five chronico interierunt; quæ licet instituat paucis à morte horis, tamen foetidissima intus corruptio subinde offenditur. Vel enim viscera,

viscera, ut ventriculus & intestina, ex parte aliqua; aut omentum, lien, hepar, uterus sphacelo correpta cum summo foetore sunt, vel aqua aut pus foedi odoris in cavitatibus stagnat, aut apostemata, quæ pus continent, hinc inde deprehenduntur: aut in capite sanguis vel humor extravasatus putrefactus cernitur. Ex quo conficitur, putredinem visceris internam esse frequentissimam mortis causam; & putredinem quoque universi corporis mortem insequi: quo magis mirari licet præcipitem quorundam adfersionem, quod sphacelus sit res rarissima, adeo ut ex centum mille hominibus vix unus eo intereat: quum potius dicendum sit, ex centum mille vix unum dari, qui morbo pereat, ubi non sphacelosa cujusdam partis internæ corruptio cum foetore ostendatur.

§. XVII.

Putredo vitæ est inimicissima, quia non modo omnes vires, quibus moventur solida & fluida, aufert, sed & structuram atque mixtionem corporis penitus dissolvit.

Scholion.

Putredinis ea est indoles, ut celerrime sese diffundat & vicinas partes in similem corruptionem conjiciat: deinde, ut vires brevi tempore omnes prosternat, id quod conspicimus in iis, qui ex cancro exulcerato laborant, aut sphacelo in parte quadam externa corripuntur.

§. XVIII.

Putredo vires & tandem quoque vitam adimit, quia foetore suo corruptivo purissimam illam sanguinis & fluidi nervei substantiam, quæ robur, tonum, motum cordi, fibris elasticis & reliquis solidis partibus conciliat, inficit atque depravat.

Scholion.

Repetendum hic erit, quod supra tetigimus, fluidum, quod in cerebro separatur, ex sanguinis subtilissima parte sulphurea, aëreo-ætherea, motum maxime facere atque gubernare in corde & aliis solidis partibus existentem.

§. XIX.

Omnis itaque morbus, qui corpus brevi tempore in putredinem conjicit, vires & vitam facile destruit, & ob id summe malignus habetur.

Scholion.

Hujus rei testes sunt febres pestilenciales, petechiales & aliæ epidemicæ & exanthematicæ malignæ, quæ plerumque ex miasmate, quod ad celerrimam corpus disponit putredinem, nascuntur. Si vero lentius procedit corruptio putrida, & magis in lymphâ, quam sanguine residet, ut in scorbuto, lue venerea: tamen non vitam statim auferat, tamen lassitudinem summam relinquit; quin imo ex præsentis virium prostratione malignitas & periculum morborum semper æstimari debent.

§. XX.

Putredo mortifera in morbis ex stasi & quiete sanguinis omnimoda, sive ejus circulo penitus sublato, prognascitur.

Scholion.

Quamdiu sanguis per vasa circumfertur, nullus foetor vel putredo observatur: simul ac autem firmiter consistit & motus progressivi expers fit, protinus mors partium sive sphacelosa corporis corruptio producitur. Recte itaque *Hippocrates Lib. II. de morbis* §. 8. à motu & calore sanguinis vitam, ab ejus vero congelascentia & quiete mortem dilucide explanat.

§. XXI.

Itaque princeps & præcipua medentium intentio esse

debet, ut in morbis omnem stasim & majorem ac plenariam quietem sanguinis avertant, ne mors inde sequatur: quod fit, si virium conservatio maxima medentis cura atque intentio sit.

Scholion.

Patet hinc amplissimus analepticorum, & quæ moderate sanguinem & transpirationem movent, in acutis & malignis morbis usus, & quam noxia sint ea, quæ motus sistunt atque vires infringunt, cujus generis sunt purgantia, sanguinis missiones, perturbationes animorum, omniaque anodyna & opiata, quibus nihil in hisce morbis perniciosius est, quia horum usu tristissimam mortem acceleratam fuisse, tristissimis aliquot exemplis edocti sumus.

§. XXII.

Mors, quæ morbos sequitur, vel ex nimia virium defectione, vel ex spasmo præcedente producitur.

Scholion.

In febribus continuis excessivus calor, assiduæ vigiliæ, diuturna cibi abstinentia, miasma malignum sanguini admixtum benignorum succorum ipsiusque sanguinis nativam crasim penitus destruendo, omnes vires, quibus solidorum & fluidorum motus conservatur, adimunt, unde incipit sanguis in hac vel illa parte, præsertim in cerebro vel etiam pulmonibus aut abdominis aliquo viscere, ventriculo vel intestino quiescere, putrescere, atque cordis & arteriarum systolen tollere. Innumera afferre possem exempla, ubi ægri morbis acutis valde debilitati, paulo longius in erecto situ existentes subitam & inopinatam mortem sibi accersiverunt: siquidem in hoc situ difficilis est sanguinis à corde propulsio, quæ ob nimis languidum cordis motum, si cessat vel non sufficiens est, liquidi nervei in cordis fibras influxus etiam cessans plenarie cordis motum aufert. Quare non sine ratione *Hippocrates Lib. Prænotionum* §. 4. in omnibus acutis morbis malum pronuntiat, si æger erectus in morbi vigore sedeat. Deinceps haud infrequenter mors in vigore ac statu febrium acutarum à sanguinis, propter rigorem & spasimum in extremis partibus, supervenienti congestione in cerebro, valde ob vim morbi imbecillo, producitur, ex quo si non per narium fluxum prorumpit, lethalem stasim vel inflammationem meningum & convulsionem producit. Pessimum itaque & lethale est indicium, si, præsertim die impari, quo secundum adfersionem *Hippocratis Lib. II. Epid. S. III.* & testante experientia plerumque mori solent acute febricitantes, in variolis, purpura alba, petechiis & aliis epidemiis acutis & malignis rigor accedit cum urina tenui, & sine stillicidio sanguinis mentis emotio sequitur. Recte enim habet, quod *Hippocrates in Prænotion. Coac.* in acutis rigorem, corpore jam debili, lethalem observavit. Inde etiam ratio quam prompte elici potest, quare ungues nigri, digiti frigidi & contracti, labia inversa frigida, aures frigidae contractæ, tempora collapsa mortis imminentis signa sint.

§. XXIII.

Virium in senectute ordinaria est defectio & omnibus hominibus, utut temperatissime secundum præcepta saluberrima viventibus, mors inevitabilis est.

Scholion.

Licet homo purissimo aëre, qui pabulum virium & spirituum est, fruatur, & benignissimæ indolis ad pondus alimenta adsumat; optima etiam adsit mentis tranquillitas: tamen extrema senectus & vires & vitam aufert. Quare non in fluidis, sed in solidorum structura, quæ sub ætatum decursu valde immutatur, horum effectuum causa quaerenda erit.

§. XXIV.

§. XXIV.

Fibrarum & membranarum nimia soliditas & durities, atque canalium angustia genuina & mechanica virium & vitæ defectionis in senio confectis causa videtur.

Scholion.

Perpetuæ observationis est, fibras & membranas, ex quibus compages corporis nostri maxime vasculosa consistit, eo duriores & densiores fieri, quo annosiora sunt animantia; unde etiam eorum carniū valde difficilis est coctio. Neque vero anatomes peritum latere potest, liquida præstantissimi usus ad robur & motum per capillares & tenuissimos canales in cerebro secerni & per membranas ac nervos filtrari. Notum quoque porro est, tenuissimum & valde activæ indolis excrementum per subcutaneos minimos tubulos foras ejici. Durioribus itaque & densioribus, sub decrepita ætate, redditis membranis, quæ formant hos canales, hi angustantur vel plane clauduntur, ut nec liquida laudatissima ad motum ac nutritionem libere, & quantum satis est, influere, neque excrementitia effluere possint. Non mirum hinc est, & sensoriis & motoriis organis suum robur atque potentiam movendi subtrahi, & bonos alias succos excrementitiis fordibus depravari. Unde nutritionem in senibus perire, vires deficere & multas impuras sordes in corpore accumulari necesse est, quas necessario tandem sanguinis & humorum stagnatio & quies excipit. Cum itaque manifestas & in solidorum conformatione fundatas habeamus mortis in senibus causas; concidit utique frivola eorum opinio, qua moriendi necessitas in animantibus animæ, cui limites operandi à Deo præscripti sint, adscribitur.

§. XXV.

Homines habitus corporis spongiosi mollioris, repleti & qui angusta, exilia & copiosa vasa obtinent, facilius moriuntur atque ex morbis difficilius convalescunt, quam macilentiores. & qui ampliora vasa habent.

Scholion.

Hanc veritatem sua auctoritate quoque corroborat divus Senex in *aph.* 44. §. 2. Rationem is facile inveniet, qui considerat solidis & tensis fibris plus roboris & potentiæ morricis inesse quam laxis; & per vasa amplioris diametri sanguinis cursum liberiores & per angustiora difficiliorem esse, unde in his stases & stagnationes, mortis procreatrices, frequentiores & periculosiores sunt.

CAPUT II.

De morborum & symptomatum natura.

§. I.

Corpus humanum multis mutationibus, quæ sanitatem, imo vitam destruunt, obnoxium est: itaque harum mutationum naturam & causas scire oportet medicum, cujus officium est, mortem avertere & sanitatem reparare.

§. II.

Morbus à nonnullis definitur, quod sit mutatio status naturalis in præternaturalem.

Scholion.

Definitio hæc est nominalis, quia tantummodo explicat nomen morbi, non autem ipsam rem & causam, in qua illa mutatio consistat. Et hujus indolis sunt quoque à veteribus plures allatæ definitiones morbi, quod videlicet sit affectus præter naturam, vel constitutio

præternaturalis, five alteratio stabilis, quæ vitiet vel lædat actiones. Quo spectant etiam illæ recentiorum, quod morbus sit moriendi conatus vel symptomatum complexio. Neque nobis hæc arridet, quod omnis morbus sit molimen five extraordinarius motus à natura susceptus eum in finem, ut, quod corporis mixtioni adversum est, per motus ejiciat atque à morte five corruptione præservet. Etenim obscurissimum vocabulum naturæ & ejus molimen salutare est, neque hac ratione concipi potest, cur morbus in mortem sæpius terminetur, vel dispositionem ad alios morbos pejoris sæpe indolis relinquat.

§. III.

Morbus rectius sic definitur, quod sit magna mutatio & turbatio proportionis & ordinis motuum in solidis & fluidis, cum vel nimis accelerati vel retardati in universo corpore, aut in certis partibus sunt, juncta cum insigni læsione secretionum, excretionum & aliarum functionum corporis animati, tendens vel ad ejus salutem aut interitum, vel ad pravam partium ad alios morbos dispositionem.

Scholion.

Hæc definitio, quæ morbos in genere, seu potius statum morbosum à sano deflectentem, explicat, realis est, utpote non modo rationem ejus formalem, quæ læsio & depravatio actionum est, sed insuper ejus genesin ac proximam & continentem causam, quæ est mutata proportio motuum in universo corpore vel ejus partibus, complectitur & effectum morbi in corpus declarat.

§. IV.

Uti sanitas est integritas actionum corporis & animi, ita status morbosus utique in læsione & depravatione actionum, quæ ad corpus & animum spectant, consistit.

§. V.

Non quæcunque levior & transitoria functionum læsio statim pro morbo haberi debet, sed stabilis & quodammodo perseverans requiritur.

Scholion.

Cum nemo mortalium perfecta, constante & omnibus numeris absoluta facile gaudeat sanitate, propter innumeras res, quibus homo utitur & quæ eam mutare atque adfligere possunt; ideo non quisque levior sanitatis defectus aut læsio actionum pro morbo statim haberi debet, sed ea tantum causa quæ æquilibrium & ordinem motuum in solidis & fluidis machinæ valde turbat atque pervertit eaque stabilis est, causæ veræ morbificæ nomen sibi vindicat. Quia vero ejusmodi causæ rariores sunt, quæ omnem motuum ordinem invertere queant, ideo fit, ut homines non tam frequenter per vitam ægrotent.

§. VI.

In omni morbo vel actiones vitales, ut virium robur, pulsatio arteriarum, respiratio sanguinisque circulus; vel animales, ut sensuum exercitium, motus membrorum arbitrarius, item somnus & vigilia, mentis vigor & constantia; vel naturales, cujus generis sunt appetentia, digestio & apta per alvum, urinam & perspirationem sordium excretio, vitio quodam laborant & depravatæ sunt.

§. VII.

Ex actionum harum majori vel minori turbatione & perversione morbi utique & causæ lædentis magnitudo æstimanda venit.

Scholion.

Nam sicut effectus semper proportionalis est viribus suæ causæ, ita vehementior turbatio functionum corporis animati causæ morbificæ vim ac potentiam manifestat.

§. VIII.

§. VIII.

Ut moderatus, liber & æquabilis sanguinis & liquidorum cursus, à proportionata solidorum in universo corpore, quæ impellunt & recipiunt fluida, systole & diastole sive constrictione & relaxatione ortus, sanitati & proportionatis secretionibus patrocinator: ita immoderatus, impeditus & inæqualis sanguinis & liquidorum cursus ac circulus ab improporionata solidorum vel universi corporis vel certarum partium systole vel diastole improporionata sive imminuta vel nimis aucta contractione & relaxatione natus, turbationem functionum corporis efficit & morbum format.

§. IX.

Motus itaque solidorum & fluidorum valde immutati, ratione proportionis suæ vel nimis deficientes vel nimis excessivi, proximam & intimam morborum causam, qua posita ponitur & qua sublata tollitur morbus, constituunt.

Scholion.

Quemadmodum in macrocosmo omnes, quæ contingunt, mutationes à motu pendent: ita etiam id fit in microcosmo. A motibus enim dependet vita, a motibus quoque sanitas provenit, motus quoque graviter lædunt & adficiunt homines in morbis: motus quoque ejus sunt indolis, ut destruere corpus & mortem inferre valeant. Idem in ipsis etiam morbis id beneficium corpori præstant, ut sanitatem amissam reparent & læsiones à morbis factas emendent. Veteres, cum in explicandis rebus medicis, quippe ignoto sanguinis circulo ad solidorum vel fluidorum motiones non respicerent, sed tantummodo conceptibus circa materiæ copiam, temperiem, facultates, variasque ejus conditiones inhærent, utique nihil solidi vel demonstrativi in pathologicis adferre potuerunt. Testes sunt eorum libri dogmatici, quorum maxima pars, ubi causæ morborum vel symptomatum adferendæ erant, figmentis enarrandis & quantum fieri poterat, incrustandis consumitur.

§. X.

Motus fluidorum in machina nostra duplicis potissimum generis in statu morbofo observantur. Vel enim sanguis & reliqua fluida à centro ad peripheriam, sive ab interioribus ad exteriores partes moventur & propelluntur: vel à peripheria sive ambitu corporis & partibus extremis atque externis sanguinis & fluidorum motus ad interiora corporis viscera dirigitur.

Scholion.

Motus, qui ab interioribus ad exteriora tendunt, non adeo naturæ insensu sunt, sed salutarem sæpe effectum relinquunt: præsertim, si fuerint aucti & intensiores, quoniam excrementitiis sordibus è corpore eliminandis inserviunt; posterioris vero generis illi, qui introrsum vergunt, œconomiae corporis nostri admodum inimici & κατ' ἐξοχήν morbofi dicendi sunt, quoniam in se nunquam, nec nisi per accidens utiles evadunt; & sub horum etiam vehementia totus vitalis corporis nostri mechanismus destrui solet.

§. XI.

Si sanguis cum magna celeritate & impetu, beneficio systoles cordis & arteriarum intensioris & valde auctæ, per universi corporis canaliculosam compagem fertur, motus hic dicitur febrilis, idemque ex immoderato calore & celeritate pulsuum dignoscitur.

§. XII.

Si nimia fit contractio solidorum membranaceorum inque primis duræ matris, concitatissime fluidum nervum in membra, quæ motibus voluntariis auscultant,

influit atque inde vehementior distensio, tractatio, constriction & agitatio musculorum perficitur, qui motus epilepticus dici solet.

§. XIII.

Motus peristalticus, qui in reciproca & blandiori contractione & dilatactione consistit, atque in canalibus excretoriis majoris vel minoris diametri locum habet, nimis auctus & citatior redditus excretiones alvinas & quæ per transpirationem, per urinam atque per ductus biliarios fiunt, promovet & auget.

§. XIV.

Glandularum conglobatarum, quæ elatere suarum fibrarum lympham impellunt ejusque progressum per vasa lymphatica promovent; motus systalticus auctus celeriore lymphæ, vel etiam salivalis laticis, progressum atque excretionem efficit.

§. XV.

Quandocunque in partibus corporis, sive fibris muscularis sive membranosis ac nerveis eæ consent, systole sive contractio intenditur, hic motus vocari solet spasmus.

§. XVI.

Spasmus est vel universalis vel particularis. Ille à partibus extremis vel remotis incipit & totum systema fibrarum carnearum atque vasorum, quæ ex membranis nerveis & muscularibus contexta sunt, afficit. Et talis quidem motus maxime observatur in principio februm intermittentium, item in plurimis chronicorum paroxysmis & affectibus spasmodicis; atque rigore, horrore, frigore, contractione externi habitus, interna vero anxietate, & in arteriarum pulsu duritie ac debilitate sese manifestat.

§. XVII.

Si quando spasmus, à partibus extremis initio sumto, membranas exquisitæ sensationis, inque primis cerebri meninges & nervos in consensum trahit, in epilepsiam transit: si vero tantum nervorum illa paria occupat; quæ ad certas partes abeunt vel ex spinali medulla prodeunt, motus tantum convulsivi emicare solent.

Scholion.

Atrociores infantum ex intestino dolores, vel qui ex dentitionis difficultate fiunt; quandoque etiam in adultis immanes dolores intestinorum, aut qui calculo vel cardialgiæ junguntur, in epilepticos motus non raro transeunt. Quin imo videmus morbi sacri paroxysmos sæpiissime ab extremis partibus, nempe pedum digitis oriri; alii testantur, primum accedentis mali sensum in intestinis se percipere, hinc illum per spinalem medullam usque ad caput penetrare, ubi membranas tandem cerebri occupantes motus in epilepticas contractiones easdem adigunt. De cetero in partibus internis quasdam convulsionum species dari, id colicæ, tusses, asthmata convulsiva cordisque palpitationes, nec non vomitiones & singultus vehementissimi satis planum atque testatum faciunt.

§. XVIII.

Spasmi, qui certas tantum nerveas & membranosas partes corripunt, dolores pariunt, & hi pro diversitate partium, quibus insident, varia sortiuntur nomina.

Scholion.

Dolor, qui in tunica ventriculi vel ejus orificiorum nervea sedem habet, cardialgia; qui in intestinis, dolor ilei vel colicus vocatur: qui in membranis capitis, cephalalgia, hemicrania, cephalæa audit: in intestino recto dolor hæmorrhoidalis sese offert: in articulis podagra, chiragra, dolor ischiadicus, gonagra scenam adornant: idem,

idem, si membranis costarum insidet, pleuritis spuria; si musculorum membranis inhæret, dolor rheumaticus adpellari solet.

§. XIX.

Spasmus, qui summam cutim & sub ea delitescen-tes excretorios tubulos adprehendit, horripilationis quo-
dam sensu percipitur, unde tubuli occluduntur, trans-
piratio cohibetur & excrementitia materia versus inte-
riora repellitur.

§. XX.

Spastica intestinorum contractio non modo flatus concludit eorumque exitum præpedit, sed & alvum constringit & sordium excretiones, quæ per eam fiunt, cohibet. In ductibus urinariis si consistit, urinæ efflu-
xus vel cum dolore fit, vel sæpe prorsus intercipitur, aut saltem valde difficilis redditur. Canaliculum, qui bi-
lem ex hepate in duodenum vehunt, per spasmos con-
strictio biliosi liquoris ad intestina descensum impedit, unde ob bilis ad vasa lymphatica regurgitationem icte-
rus prompte gignitur.

§. XXI.

Nulla pars tam gravibus stricturis spasticis patet at-
que obnoxia est, quam ipse ventriculus cum intestinis, quia horum viscerum canales ex membranis valde ner-
vosius acutæque sensationi maxime idoneis contexti sunt.

Scholion.

Clarissime hoc apparet in affectibus colicis, hypo-
chondriacis, hysteris, variisque chronicis & spasmodicis morbis, quorum primaria sedes & quasi campus, ubi morbus tyrannidem suam exercet, est in ventriculo ac intestinis. Et quia his partibus ingens consensus, propter communem nervum intercostalem, cum capi-
te, cum pectore, renibus, hepate & aliis nobilissimis partibus intercedit; hinc tanta symptomatum multitu-
do & vehementia affectibus spasmodicis jungi solet.

§. XXII.

Quemadmodum nimia solidorum contractio atque intensior systole, five spasmus, plures morbosas afflic-
tiones parit: ita etiam solidorum languidior & debi-
lior systole, five laxitas & resolutio eorum nimia, & ad movendum impotentia, quæ Græcis atoniæ nomine venit, functiones œconomiae nostræ corporeæ valde lædit atque immutat.

§. XXIII.

Quantum systole intensior motum fluidorum acce-
lerare valet: tantum atonia eundem, vel in universo corpore, vel in certis tantum partibus, impedit atque retardat.

§. XXIV.

Uti spasmus, ita etiam atonia est vel universalis vel particularis. Illius exemplum in summa virium pro-
stratione & maxime in animi deliquio videas: hæc vero, quæ certas tantum partes obsidet, in morbis maxime chronicis atque hæreditariis conspicitur.

§. XXV.

Ex motu liquidorum impedito & retardato decubitus humorum, infarctus, obstructions, indurationes, item corruptiones viscerum fiunt: adeoque pervicaces & chro-
nicæ passionis ex nimia atonia partium progignuntur.

§. XXVI.

Sanguinis & humorum circulus retardatus valde dis-
ponit corpora ad morbos; quandoquidem exinde hu-
mores valde spissi, impuri & copiosi evadunt, ob reten-
tas in corpore multas excrementitias partes, quas eva-
cuationes rite atque ordine fientes excluderent. Sic

plethora atque cacoehymia, multarum, inque primis
chronicarum passionum fecundæ genitrices, nascuntur.

§. XXVII.

Motus solidorum & fluidorum in morbis valde im-
mutati lædunt & turbant functiones corporis nostri va-
riis modis: & hæ functionum læsiones vocari vulgo
solent symptomata.

Scholion.

Ingens confusio apud auctores morborum & symp-
tomatum reperitur, dum plures morbos pro sympto-
matibus, & symptomata pro morbis habent. Ex quo
intelligas, eos veras utriusque rei notiones animo non
concipere nec modum, quo singuli producuntur mor-
bi, satis recte indagasse.

§. XXVIII.

Symptomata duplicis sunt generis: vel enim à mo-
tibus morbosus immediate & proxime fiunt, vel de-
mum ex aliis concurrentibus causis producuntur: illa
quidem symptomata morbi essentialia, hæc secundaria
vocantur.

Scholion.

Essentialia sequuntur presso pede ipsum morbum,
seu potius motus morbosos speciales, neque possunt di-
velli aut separari, unde etiam certa morborum, ex qui-
bus illi dignoscuntur & invicem distinguuntur, signa
atque indicia præbent. Ita febris, quæ motus solidorum
ac fluidorum nimis acceleratus est, symptomata sunt
immodicus corporis calor, sitis inexhausta, vigiliæ af-
fiduæ, virium & succorum consumptio, appetitus deje-
ctio, respiratio auctior, urina rubicunda: nam hæc om-
nia sunt fructus & effectus nimis accelerati sanguinis
circuli. Simili modo inflammationis symptomata, ex
quibus ea cognoscitur, sunt partis affectæ dolor, tu-
mor, rubor, arteriarum vehementior pulsatio: quia hæc
omnia à denegato sanguinis libero circuitu, propter
ejus in vasculis stases vel partium nervosarum stricturas,
necessario proveniunt.

§. XXIX.

Symptomata secundaria non immediate ex priori
morbo, seu motu morbofo, sed ex alia causa superven-
iente, pronascuntur.

Scholion.

Horum symptomatum exemplum præbent ventricu-
li aut meningum vel pulmonum inflammationes febri-
bus acutis vel etiam exanthematicis, variolis, morbillis
in earum statu demum supervenientes; nam sine illis
prior morbus consistere potest. Sed hi, si æque rem æs-
times, distincti à priori illo sunt morbi & motus mor-
bosi, in aliis etiam partibus residentes: quia vero effec-
tus & producta sunt prioris morbi, symptomata jam vo-
cantur. Nihil in nostris regionibus solennius est, quam
ut febribus acutis, item variolis & morbillis demum in fi-
ne purpura rubra vel alba, sæpissime funesta, superveniat:
quia, ut mihi quidem videtur, excrementitii succi, ex
ipsa sanguinis febrili dissolutione geniti, atque ob co-
hibitam diutius alvum in intestinorum latebris occlusi,
in humorum massam postliminio recipiuntur, & hæc
pessimæ sane indolis exanthemata cum febrili insultu
fuscitant.

§. XXX.

Neque symptomata morbis supervenientia confundi
debent cum aliis affectibus, qui demum sublati morbis
prioribus subnascuntur.

Scholion.

Ita ex quartana non raro hydrops, ex hæmoptysi ph-
thisis, ex tertiana intermittente affectio hypochondria-
ca & melancholica vel colica spasmodica; ex variolis
&

& morbillis abscessus, ex pleuritide empyemata pulmonum prodeunt. Motus enim morborum ejus sunt indolis atque ingenii, ut non modo sanguinis & fluidorum crassum, sed & solidorum robur, tonum atque substantiam multum lædant, destruant vel labefactent, unde quam facile, ob tantam imbecillitatem partium, indeque excretiones debiliores redditas, nova materia novorumque fomes morborum producit. Neque vero infrequenter etiam ex perversa prioris morbi ab imprudenti medico tractatione, & ob materiam morbificam relictam, novi & subinde pejoris notæ morbi pullulant.

§. XXXI.

Ex symptomatibus maxime, secundariis supervenientibus, morbi vis atque vehementia judicanda est.

Scholion.

Siquidem effectus testatur de sua causa, quæ ut plurimum latet; ex symptomatibus vero, ceu effectibus dignoscitur. Quo major itaque est symptomatum morbo supervenientium vehementia; eo plus quoque periculi ille morbus habet. Est itaque boni ac periti medici in prudenti prognosi, formanda, vel ipsa etiam curatione adornanda symptomatum rationes atque genus & effectus quæsitissimo studio expendere.

CAPUT III.

De motuum microcosmicorum legibus & effectibus in producendis morbis & symptomatibus.

§. I.

Motibus in machina nostra proportionatis & ad excretiones tendentibus vita & sanitas sustinetur: morborum vero natura & indoles mutatis, impeditis & inæqualibus istis motibus continetur. Motus quoque morborum ejus sunt indolis, ut vel ad interitum machinæ vel ad sanitatem recuperandam convertantur: quare motuum, qui in machina nostra morbos efficiunt, vitamque ac sanitatem dispensant, naturam, leges, effectus probe intelligere oportet medicum, qui cum certitudine agere & operari tum in præservando, tum in curando velit.

§. II.

Quemadmodum in macrocosmo motus secundum certas leges, tanquam ad normam, fiunt, & constantes edunt effectus; ita quoque in microcosmo tum illi, qui functiones secundum ordinem præstant, tum vero etiam, qui easdem lædunt vel turbant, aut machinam à præsentanea corruptione & morte præservant, certis legibus continentur.

Scholion.

Scientia legum, quæ in hydraulicis, staticis, mechanicis & motu elasticorum corporum observantur, ingens lumen mechanicæ corporis nostri scientiæ; ad clariorem phænomenorum explicationem, accendit. Neque enim dubitandum est, quin cuncta in corpore nostro mechanice, id est, secundum certam mensuram & proportionem motuum peragantur; neque illud inficiandum, quod mechanica corporis animati scientia tanto excellentior & sublimior sit ea, quæ per experimenta intellectui humano cognita perspectaque redditur, quantum sapientia Dei omnem humanam artem longissime exsuperat. Enitendum tamen omni labore ac cura arbitror, ut, quantum fieri potest, divinam in corporibus animatis & vivis mechanicam, motuumque, quæ tantas mutationes efficiunt, leges inquiramus & addiscamus.

Frid. Hoffmanni Oper. Tom. I.

§. III.

Prima itaque lex hydraulica microcosmica hæc est: quod spasmi tubulos, qui fluida vehunt, constringendo liberum eorum cursum impediunt atque eum inæqualem reddunt.

Scholion.

Inæqualitas circuli sanguinis in eo posita videtur, ut ad partes spasmo affectas & constrictas minor sanguinis corpora, ad alia vero inque primis vicina aperta vasa major, quam convenit, adfluat & irruat. Hunc sanguinis inæqualem progressum pulchre & dilucide satis jam suo tempore notavit *Hippocrates Lib. de flatibus §. 21.* his verbis: *prohibetur sanguinis cursus atque alio quidem loco consistit, alio lentius penetrat, quia sane inæqualitate transitus sanguinis per corpus facta omnigenæ inæqualitates per omne corpus contingunt.* Ex uno enim canale continuo machina nostri corporis hydraulica constructa est, qui, pro differenti structura, diversa accipit nomina, ut vel arteria vel vena vel vas lymphaticum, vel excretorius tubulus, vel glandula nominetur. Si igitur liber fluidorum cursus in uno loco sistitur: necesse est, ut in altero statim inæqualitas progressus fiat.

§. IV.

Quo major est spasmorum, qui vasa coarctant, vehementia, & quo latius illi sese diffundunt atque ad ampliora vasa exporriguntur: eo copiosior & impetuosior ad alias & remotas partes fit sanguinis appulsio, translatio & congestio.

Scholion.

Hujus theorematis veritas nititur hoc axiomate, quod causa semper viribus suis proportionatum & adæquatum effectum producat, quare validior spasmus validissime etiam liberum sanguinis cursum impedire, & ad alias partes eum transferre debet. Fundamentum quoque hæc nostra thesis habet eximium in hydraulicis. Nam fluida, certo velocitatis gradu per plures tubulos æqualiter decurrentia, tanto majori velocitate per apertos feruntur, quanto magis per obstructos tubulos effluxus impeditus fuit.

§. V.

Varia eaque satis gravia sunt symptomata, quæ ab intercepto alicubi sanguinis motu ejusque majori ad alia loca adfluxu subnascuntur.

Scholion.

Quando crassiora fluida in arctiores canales, ubi firmitus inclusi hærent, imprimuntur, fiunt inflammationes. Si vero vasa ob nimiam distensionem aperiuntur, sanguinis fiunt profusiones five hæmorrhagiæ: à nimia congestione sanguinis & humorum in porosa & vasculosa partium substantia tumores gignuntur & ob membranarum nervearum violentam ibi factam distensionem dolores gravativi pullulant. Si à stagnante sanguine partes aqueæ & serosæ secedunt, catarrhi, defluxiones, rheumatismi fiunt. Ex hoc quoque fonte apostemata atque exulcerationes prodeunt; sanguis enim in poros partium illapsus, si regredi nescit & ibi firmitus hæret, in pus mutatur vel erodentem, fæcilem, acrem indolem adsumit.

§. VI.

Prout loca differunt, in quibus congestio & translatio sanguinis à spasmi facta est: pro eo diversi quoque prodeunt effectus seu morbi.

Scholion.

Congestio & stagnatio vehementior sanguinis in capite ejusque vasis, narium hæmorrhagiam parit: ob rupta vasa plexus choroidei apoplexia sanguinea oritur: à

P

nimia

nimia distensione vasorum in meningibus apoplexia spasmodica vel etiam epilepsia progneratur. Si vero secedit serum à sanguine & medullæ spinalis nervos occupat, hemiplexiæ vel paralyfes fiunt; si in cerebri cortice vel ventriculis serum extra vasa subsistit, affectus soporosi: si decumbit circa thalamos nervorum opticorum, gutta serena propullulant. Si serum secessum facit circa par septimum nervorum, surditas; si circa nonum par, aphonia subnascuntur. Si firmiter sanguis impactus est in meningibus phrenitis; si difficilius per vasa cerebri progreditur, insomnia terrificæ dæmoniaca & melancholica pathemata fiunt.

§. VII.

Nimia sanguinis ex spasmodorum violentia congestio & decubitus in pulmonibus hæmoptysin, pleuritidem, peripneumoniam, asthma sanguineum, spirationem valde anxiam & difficilem gignit. In cordis thalamos si multus confluit & diutius retinetur, summas anxietates animique deliquia prompte admodum inducit, neque minus ad immanem ejus palpitationem vel polyporum ibi generationem, adeoque ad subitam mortem, facilem occasionem subministrat.

§. VIII.

Infarctus & congestio sanguinis in abdominis vasis ex spasmodorum vehementia infuetas sanguinis effusiones subinde non sine periculo producit.

Scholion.

Si enim ex coli nimia strictura in sinistro latere jacentis ad vasa ventriculi brevía sanguis cum impetu urgetur, facile iis apertis vomitio gignitur cruenta. Si vero ruptio vasculorum in tenuibus, præsertim in ileo, contingit, fœtidæ & nigræ dejectiones fiunt, & morbus sic dictus niger Hippocratis nascitur. Si vero obstructuram vehementiorem tunicarum intestinalium nimia sanguinis appulsio atque congestio in vasis hæmorrhoidalibus est, atque eorum orificia aperiuntur immodica sanguinis per hæc vasa fit profusio. Vasa renum emulgentia, à nimio sanguine ibi appulso aperta, mictionem cruentam; disrupta uteri vasa enormes hæmorrhagias vel etiam abortiones pariunt.

§. IX.

Quandocunque spasmus organa & vasa excretoria arctat atque constringit, fit ut excretoriis illis motibus inversis & intro vergentibus humores superflui & impuri ad alia & interiora loca non sine damno transferantur.

Scholion.

Constrictis à ventis septentrionalibus subito ortis subcutaneis tubulis ac spiraculis, per quæ vaporis specie subtilis humor sine sensu subinde exhalatur, subito ad pectus & glandulosa capitis ac faucium loca fit ejus repulsio ac retrocessio, & sic coryzæ, gravedines, tussiles cum externorum horripilatione, & internorum ardore propinque generantur. Sub spasmodis intestinorum, qui continenter hypochondriacos exercent, excernenda, & maxime flatus sursum feruntur & ad ventriculum regurgitant, qui anoterici motus ingentes & admodum molestas ibi inflationes anxietates, spirandique angustias, phlogoses quoque & continuas eructationes causantur. Canalibus, qui bilem ad intestina deferunt, spasmus arctatis, biliosum illud excrementum, ad lympham & sanguinis massam per lymphaticas venas repulsum, vividum faciei & cutis colorem vitiat, & malum habitum inducit. In pertinaci urinæ ex spasmodorum in urinariis ductibus vehementia suppressione copiosus ille falsus liquor ad interiora viscera regurgitans & in capite subsistens facile affectus soporosos pa-

ralysin, convulsiones; in pulmonibus oppressionem respirationis vel etiam pectoris hydropem ingignit.

§. X.

Spasmus quoque fortior tanta vi & potentia pollet, ut tumores ingentes œdematosos partium infernarum ad interiora non sine insigni damno repellat.

Scholion.

Vidimus id sæpius à subito & vehementi terrore, vel suffimigiis aut adstringentibus imprudenter applicatis id factum fuisse: labem inde repentinam pulmones, ubi feri secessio facta, contraxerunt, cum respiratio valde anxiosa ac difficilis non sine suffocationis metu inde redita fuerit, ingenteque virium languore cum pulsu parvo ac debili subsequuto.

§. XI.

Spasmi quoque efficiunt, ut non bonis certe ægrorum rebus ex summa cute, quæ jam deposita ibi erant excrementa, ad sanguinis massam partisque nervosas periculose admodum repellantur.

Scholion.

Nihil perniciosius, & quod magis œconomiam motuum vitalium inturbare possit, est, ac si excrementum tenue, à massa sanguinis jam separatum & ad cutem depositum, v. g. in scabie, lue venerea, scorbuto, in tinea capitis, it. variolis, morbillis, purpura retropellatur, quod promptissime à frigore improvide admissio, terrore, vel purgantibus aut nimis refrigerantibus fieri solet; siquidem materia ex mora & stagnatione jam pejoris indolis facta nervosis partibus inhærens exitiales inflammationes, convulsiones, dolores, inquietudines, anxietates, animique defectiones suscitât. Quod magis intelligitur, quam plena res periculi sit, excretiones, quæ per cutem fiunt, negligere, vel eo prorsus audaciæ progredi, ut extrinsecus ea admoveamus, quæ repellendi facultatem custodiunt.

§. XII.

Neque tantum à spasticis stricturis, sanguinis, sed & lymphæ circulus impeditur & inæqualis redditur.

Scholion.

A spasmodis quam maxime venæ, ob debiliorem resistentiam, compressionem patiuntur, atque adeo sanguinis libera traiectione per eas intercepta partes ejus serosæ & fluxiles à crassioribus in vasa lymphatica secedunt, quæ nimia distensione tandem rumpuntur, & ingentem feri copiam in cavitates effundunt. Jam facile intelligi poterit ratio, quare asthma spasmodico, validissimo affectui, testantibus id sectionibus, nunquam non pectoris vel etiam pericardii hydrops junctus offendatur. Qui sævissimis ex intestino doloribus, vel à sumto veneno cruciatibus intereunt, in iis plerumque ingens feri colluvies in abdominis cavitate collecta conspicitur. Ingentes dolores & spasmos post partum non raro abdominis diuturna sequitur intumescencia. Novimus ab operatione fortioris emetici quosdam in mesenterii tumores & abscessus incidisse. Mercurialia præsertim stimulo salino armata, magnam feri profusionem concitare notissimum est; id vero vix alia de causa accidit, quam quod spasticis stricturis venas & vasa lymphatica comprimendo largiorem serositatum effusionem per nimiam relaxationem tubulorum efficiant.

§. XIII.

Quandocunque spasmus magis universalis est, id est, totam membranacearum & nervosarum partium rempublicam affligit, & maxime cutim totius compaginis seu corporis superficiem cum subtilibus vasculis arctat atque stringit, fit, ut sanguis cæterique humores à circumferentia

cumferentia ad centrum, five ab exterioribus & minoribus vasis ad cor, motus circularis principium, pulmones, & majora vasa reprimantur & horripilatio, rigor cum habitus corporis subsidencia & vasorum cutis detumescencia generetur.

§. XIV.

Repressus sanguis ex partibus exterioribus per spasmus ad cor & majora vasa eorum contractionem ac systolen adeoque arteriarum pulsationem intensiorem & auctiorem reddit, unde cum magno impetu & celeritate sanguis per universum corpus fertur, comitante valde intenso calore, donec, remittente in membranis & exterioribus partibus spasmo, exorbitantes hi motus in statum naturalem reducantur.

Scholion.

Solennes hi naturæ motus, quibus magna vis inest & salvandi & perimendi corpora humana, dicuntur febriles, & quam maxime effectus spasmodorum sunt, qui obsidendo partes nervosas & exteriores liquida sanguinemque ad interiora & versus vitæ fontem, cor, urgent, ubi primum anxietates & pulsus parvos & languidos faciunt, postea vigore legis atque imperii naturæ, ut ita loquar, validior cordis motus & impetus, quacunque etiam de causa, exsurgit, & ipsum sanguinem cum magna intensione & celeritate rursus versus exteriora pellit, & relaxatis antea constrictis tubulis liberum cursum ei restituit, adeo, ut perspiratio & sudor longe liberalior inde sequatur. Hunc solennem naturæ motum à circumferentia ad centrum & à centro rursus ad circumferentiam jam olim suo tempore dilucide satis descripsit *Hippocrates Lib. de Flatibus*, ut suus honos ilibatus atque integer etiam antiquitati constet, dum ait: *dum ingesta ventri diu immorantur, & alvus obduratur, per universum corpus permeant flatus sanguineque plenas corporis partes maxime petentes eas frigefaciunt, frigefactis autem his locis, unde fontes & radices sanguinis prodeunt, per universum corpus horror consequitur, sanguis vero horrore concurrit, ac penetrat per omne corpus ad locos maxime calidos. Hi enim sunt ejus saltus. Decedente igitur ab extremis partibus sanguine, viscera contremiscunt & carnes. Sunt autem quedam corporis partes sanguine plenæ, quedam vero exangues. Exangues itaque propter frigus non tremunt, sed parumper commoventur, ac palpitant, quum calor ex eis defecerit. Sanguine autem abundantes propter sanguinis multitudinem & tremunt & inflammationes suscitant. Neque enim fieri, ut sanguinis multitudo conquiescat.* Et in fine §. 3. scribit: *Hoc ergo modo febres fiunt.*

§. XV.

In gravioribus doloribus & pathematibus spasmodicis, quæ hypochondriacis sic dictis perquam familiaria sunt, ejusmodi motus, qui ab extra intro, & ab intra foras tendit, adeoque febrilis animadvertitur.

Scholion.

Neque enim ullus atrocior dolor occurrit, ubi non extremorum refrigeratio cum horripilationis sensu & pororum cutis constrictio junctæ sint; postea vero intensior cordis motus cum calore, superveniens extremorum spasmus solvendo dolorum finem facit. Et quum terroris eadem sit indoles, ut constringendo extrema sanguinem intro pellat, hinc etiam fit, ut tandem in sudorem & calorem universi corporis terminetur.

§. XVI.

Neque tantum ex spasinis liber & æquabilis sanguinis & humorum cursus impeditur, sed etiam ob atoniam & nimiam partium solidarum & morricium relaxationem ac debilitatem & retardatum fluidorum

Frid. Hoffmanni Oper. Tom. I.

motum variæ in sanguinis circuitu inæqualitates &urbationes functionum in corpore animato fiunt.

Scholion.

Siquidem ob vasorum, fibrarum ac membranarum, ex quibus solida contexta sunt, robur deperditum & vim contractilem & elasticam imminutam motus liquidorum retardatur, adeoque eorum fiunt in vasis stagnationes, à quibus multa mala, viscerum intumescenciæ, infarctus, obstructions & non raro indurationes, scirrhescentiæ & corruptiones subnascuntur.

§. XVII.

A stagnante in visceribus sanguine serum separatur, inque vasa lymphatica copiosius transiens ea tandem dirumpit, unde tumores oedematosi & ascitici enascuntur.

Scholion.

Valet id maxime, ubi duo ampla illa & spongiosa, ex meris sanguineis vasis contexta viscera, hepar ac lien, ex nimia atonia infarctæ, obstructæ, aut indurata fuerint. In his enim ut plurimum fons & scaturigo hydropis & cachexiæ residet. Qualis vero est sanguinis per hæc viscera transitus, talis quoque est lymphæ per abdominis vasa circuitus.

§. XVIII.

Stagnante & difficilius progrediente sanguine per hepar, regurgitat ille ad vicina venæ portæ vasa ac viscera, sicque ingentes in circulo sanguinis fiunt inæqualitates, ejusque nimix in aliis partibus congestiones, quæ plura mala progignunt.

Scholion.

Per nullum viscus difficilius est sanguinis transitus, quam per hepar, quia potissima vasa ad illud adventitia sunt venæ, quæ sufficienti pulsu & impulsu destituuntur. Compertum enim ex anatomicis est, omnem sanguinem, qui ex toto volumine intestinorum, ventriculo, omento, liene & pancreate redit, per venæ portæ ramos advehi ad hepar: quum vero valde difficulter hoc viscus trajiciat, facillime, præsertim in vitæ sedentariæ addictis, regurgitat ad eandem venam illaque viscera, unde sanguis hic prodierat. Hinc non est mirum, ob tam difficilem & impeditum sanguinis per hepar transgressum eadem viscera, unde hic sanguis prodierat, ab eodem per hepar liberum transitum non inveniende, tandem infarciri, distendi & multum in functionibus suis vitiari posse. Si vero in mesenterii vasis nimia sanguinis copia subsistit, facile inde generantur abscessus, febres lentæ & mesentericæ. Ex obstructo hepate & liene vomitus sæpe cruentus & dejectio nigra foetida fit per alvum. Neque novum est, immodicum sanguinis per hæmorrhoides fluxum ex obstructis hisce visceribus subnasci, qui cachecticis & hydropicis admodum familiaris evenit. Quod si sanguis inter membranarum intestinalium interstitia congestus earum nimiam distensionem facit, atroces subinde dolores graviter hæmorrhoidarios affligere solent.

§. XIX.

Difficilis quoque est regressus sanguinis per uterum, qui valde copiosis & in se convolutis vasis constat. Ab horum itaque à sanguine infarctu mensium suppressio aut immoderatus sanguinis, vel feri visceris albi fluxus concitatur; exinde quoque non raro ipse uterus in tumorem attollitur, & copiosæ feri foetidi per uterum effusiones, hydropes ovarii, vel etiam ulcera aut abscessus uteri generantur.

§. XX.

Ob difficiliorem sanguinis per renes atonia laborantes transitum mictiones cruentæ, renum tumores, exulcerationes,

rationes, inflammationes & calculosæ concreciones fiunt.

§. XXI.

Motus sanguinis valde retardatus in pulmonibus tubercula, abscessus, respirationem difficilem, asthma, peripneumoniam, hæmoptysin atque exulcerationem gignit. In corde autem cunctatior sanguinis transitus ejus palpitaciones summasque anxietates parit.

§. XXII.

Impeditior sanguinis per vasa progressus ad polyporum generationem multum contribuit. Nam à sanguine intra vasa subsistente ejus fluidæ partes perquam facile secedunt, unde fit, ut solidæ & crassiores procedente tempore concrecant & firmiter coagmententur.

Scholion.

Polypi in vasis majoribus hærentes liberum sanguinis itum ac reditum valde perturbant & plerumque in corde crebriores lipothymias, pertinaces palpitaciones & subitam mortem producant. Si majora pulmonum vasa obsident, asthma convulsivum, hydropem thoracis, catarrhum suffocativum vel etiam enormem hæmoptysin efficiunt. In sinibus duræ matris epilepsiæ, affectuum apoplecticorum, pertinacis cephalalgiae & affectuum sopororum causæ sunt. In abdominis vasis majoribus tumores oedematofos & hydropem: in utero vel continuas sanguinis aut feri profusiones vel omnimodam mensium suppressionem inducunt. Huc etiam ob similitudinem referre licet, quod in gravidis vasa iliaca ab utero distento compressa inflationem ac tumorem crurum circa ultimos gestationis menses efficiant, qui foetu emissio evanescunt.

§. XXIII.

Nimia laxitas & atonia glandularum multas præternaturales & immodicas humoris serofi, ob copiosum affluxum, excretiones excitat.

Scholion.

Ex hoc fonte diarrhoeæ, ejectiones copiosi humoris per nares, per tussim, immodicæ urinæ & salivæ profusiones immoderate feri vitiosi & humoris seminalis secessiones per fluorem album, gonorrhoeam tam benignam quam virulentam, pullulant. Atque hæc nimia glandularum in naribus ac faucibus laxitas etiam in causa est, quod tumores in lue venerea hic suborti miserrime has partes corrodant & foeda putredine inficiant.

§. XXIV.

Glandulis, quæ elatere fibrarum lymphæ per vasa appropriata circuitum adjuvant, obstructis ac tumefactis, humores lymphatici circa earum confinia stagnant, ibique diutius hærentes acrem & erodentem naturam induunt, unde solidarum partium erosiones, exulcerationes, falsæ fluxiones, rheumatismi & catarrhi proficiuntur.

Scholion.

Attenta observatione à nobis notatum est, ea cutis vitia, quæ ab acri & erodente lymphæ proveniunt, in quorum censu sunt scabies, lepra, herpes, tinea capitis, achores, exulcerationes foedæ in lue venerea vel scorbuto, nec non falsæ ex oculis defluxiones à glandulis tumefactis ortum habere, quæ vel in collo vel in ipsa cute atque in artubus hærent, ubi sæpe tumores, globuli molles, mobiles, rotundi, nunc majoris nunc minoris ambitus, interdum ovi columbini magnitudine, doloris expertes, in maligna præsertim scabie & lue venerea observantur: & quamdiu hi tumores non tolluntur, perfecta horum vitiorum curatio frustra speratur.

§. XXV.

Quo majores glandulæ obstructæ sunt, eo magis li-

ber lymphæ transitus impeditur, eoque graviores exulcerationes, apostemata vel lymphæ effusiones nascuntur.

Scholion.

Testes hujus rei sunt glandulæ in inguine & sub axillis sitæ, quæ in peste aut febre erysipelacea vel à miasmate venereo intumescunt sæpe mali moris apostemia vel ulcus excludunt. Glandulas mesenterii obstructas & valde tumidas sequitur hydrops ascites, vix ingens intumescencia abdominis.

§. XXVI.

Est quoque lex firma & constans naturæ, quod vehementior spasmus, membranarum nervosis insidens, vitiosum hunc motum per universam sæpe nervorum ac membranarum compagem mirifice propaget.

Scholion.

Luculentum hujus rei testimonium præbent venena, v. g. arsenicum album aut mercurius sublimatus, quæ intra corpus assumpta statim tormina atrocissima, sitim ingentem, ob stricturam glandularum oesophagi & faucium, extremorum frigus, sudores gelidos, anxietates intolerabiles, inquietudines, animi deliquia, vomitiones, constrictiones præcordiorum & convulsiones excitant. Quæ omnia à validissima illa & spastica partium nervosarum constrictione ac celerrima vitiosæ hujus oscillationis fibrarum per totum nervorum genus propagatione proficiuntur. Si dentes eruptionem moluntur, à sola hac generis nervosi irritatione & punctione gravissima oriuntur pathemata. Inde enim præsto sunt febres, vigiliæ, pavores, epilepsiæ, inquietudines, alvi constrictiones, tormina abdominis, & alvo suppressa feces virides, in quibusdam diarrhoeæ, vomitiones & asthmata fiunt; nihilque contingit frequentius, quam ut tormina infantum cum alvi suppressione juncta febres & epilepsiæ funestæ sequantur. A purgantibus improvide & crebrius sumtis flatulentias, ventris tumores tympaniticos, urinæ suppressiones, sitim, febrilem calorem, sudorem gelidum in ipsa medicamento operatione animadvertimus. Quod crudeles intestinorum dolores in paresin vel paralytin terminentur, res in praxi notissima est. Sic nimia pedum refrigeratio mox ventris dolores concitat. Sic etiam dolor ex calculo nauseas ac vomitiones parit, pulsusque in latere affecto parvus ac depressus reddit & urinæ exitum ob solam spasticam compressionem sæpius in utroque uretere impedit. Nec raro est tanta spasmi vis ac magnitudo, ut testem affecti lateris sursum trahat, & crus constringat. A lacte post partum intra mammas stagnante febres excitari & lochiorum fluxum sufflaminari, sæpiissime in praxi occurrit. Longe autem clarius motuum horum spasmodicorum per eximios nervorum plexus propagatio in hysteris conspicitur, ubi maximam partem spasticæ illæ oscillationes in intestinis incipiunt, alvo adstricta & urina aquosa existente; inde vero ad plexum mesentericum, testante id ipsum dolore in prima lumborum vertebra, abeuntes, ad ventriculum, diaphragma, pulmones, fauces & usque ad caput grassantur, indicantibus id summis præcordiorum anxietatibus, diaphragmatis constrictionibus, faucium strangulatione, animi deliquio, respiratione ad suffocationem usque difficili, vertigine, scotomia, hemicrania, quibus interdum epilepsiæ & suffocationes superveniunt. Hæ spasmodicæ ac violentæ partium nervosarum tractiones & commotiones sæpius ex capite per eadem nervorum paria, ceu vias, ad inferiores partes, unde processerunt, revertuntur, sed plerumque cum majori symptomatum vehementia viriumque debilitatione. Ita sæpius ex capite summæ præcordiorum anxietates cum vomitionibus & torminibus ventris prodire annotavimus.

§. XXVII.

De motuum microcosmicorum legibus & effectibus &c. 169

§. XXVII.

Spasmi ejus sunt indolis atque ingenii, ut iis partibus, ad quas ingens sanguinis & humorum copia cum impetu vibratur, magnam inducant debilitatem.

Scholion.

Nimia humorum copia fibrarum elaterem, tonum ac robur valde infringit atque enervat, adeo, ut pristinam vim ac robur difficulter recipiant. Unde fit, ut novis spasmodicis insurgentibus ad capiendos æque ac retinendos humores appulsi valde dispositæ atque accommodatæ sint. Exemplo esse potest vesica, quæ ab urina diutius retenta ita distenditur, ut postea ob debilitatam ejus vim systolicam laticem urinosum difficiliter emittat. Petenda hinc venit ratio, quare in plurimis morbis eorumque paroxysmis ac recidivis humores per spasmos repulsi prompte admodum eas partes, quas semel occuparunt, per vias quoque & meatus eosdem, rursus affligere ac laceffere soleant.

§. XXVIII.

Ad leges, quæ motus microcosmicos respiciunt, etiam hæc referenda est, quod spasmi, quam partem semel vel iterum atque iterum occuparunt, ei talem inducant habitudinem, ut postea levi causa accedente easdem spasticas constrictiones repetant, habitum quasi & consuetudinem quandam consequutæ.

Scholion.

Elucet hinc ratio, cur omnes morbi spasmodici, & qui circuitum habent, ut paroxysmi febriles, epileptici convulsivi, vel acerbiores dolores, uti maxime videmus in hypochondriacis & scorbuticis, ex levi admodum causa & occasione tam facile revertantur.

§. XXIX.

Perpetua lex naturæ est, quod spasmodorum in partes operatio non sit continua, sed plerumque ad certum tempus eorum vehementia se remittat, vel plane intermittat, interjecto autem aliquo tempore statis ac certis periodis, cum eodem sæpe impetu, revertatur.

Scholion.

Est hæc natura atque indoles omnium morborum tam acutorum quam chronicorum, & qui per paroxysmos, periodos & exacerbationes corpora humana exercent, ut non continuo affligant eodem gradu vehementiæ, sed certo temporis spatio conquiescant, & quasdam quasi faciant inducias. Adeo etiam atrocissima intestinorum tormina, intolerabiles anxietates, vomitiones aut concitatæ alvi dejectiones à veneno, vel drastrico purgante aut emetico subortæ, non continenter corpora affligunt atque excruciant, sed remissiones & exacerbationes suas habent.

§. XXX.

Quod spasmi illis partibus, quas diu obsederunt, atoniam atque imbecillitatem inducant, hæc etiam una ex præcipuis naturæ legibus & observatis censenda est.

Scholion.

Partium imbecillitas, quæ diuturnius spasmodorum sequitur exercitium haud aliunde arcessenda videtur, quam quod validissima illa fibrarum agitatione, inmuta alligione & contorsione fluidissimæ sanguinis ac succi nervosi partes, quæ tonum ac robur vitale efficiunt, avolent ac dissipentur. Unde sequitur, partibus tamdiu illam inhærere debilitatem, usque dum cum tempore paulatimque recentibus succis spirituosius iterum perfusæ ac refocillatæ fuerint.

§. XXXI.

Atonia & imbecillitas, quam vehementia spasmodorum

rum in partibus relinquit, variorum phaenomenorum in pathologicis rationem & causam subministrat.

Scholion.

Mirum est, quam levi negotio plura difficilia phaenomena per hanc legem mechanicam explicari possint. Res perquam notatu digna est, quod sub intermittenti paroxysmi maxima adsit pulsuum, cum intenso calore, celeritas ac vehementia, diebus vero vacuis mirabilis pulsuum tarditas ac debilitas cum partium refrigeratione observetur. Si affectus & motus spasmodici hypochondriacos, arthriticos vel hystericas exercent, pulsus valde duri, celeres cum interno ardore & anxietate observantur: remittentibus vero his paroxysmis pulsus tardissimi ac debilissimi evadunt. In febrium paroxysmis inque acerbis doloribus cutis arida, tensa, fervida, stricta & exsiccata visitur, ut necquicquam humoris prodeat: finito autem paroxysmo relaxatur, & tumida ac mollis redditur, largissimoque sudore cum frigidiusculo sensu perfunditur. Sub spasmodis, febrili calore, ac doloribus urina valde aquosa ac tenuis, & quæ nihil sedimenti deponit, mingitur, quum tamen in declinatione & silentibus spasmodis propter nimiam meatuum laxitatem urina valde crassa ac saturata, quæ facile sedimentum dimittit, excernatur. Quid notius est, quam quod partem vehementer inflammata & acutissima sensatione vexata non ita multo post tanta atonia & resolutio excipere soleat, ut omnis dolor sublatus sit, atque sanguis ob extremam debilitatem partis quiescens sphacelosam corruptionem concipiat. Sub omni graviore dolore partis adest constrictio, quam insequens intumescencia certum desævientis doloris indicium est. A venenis causticis mire contorquentur intestina cum ventriculo; operatione vero peracta & post mortem venter ab intestinis inflatis in magnum tumorem attollitur. Fortiorem emetici aut purgantis operationem plerumque ventriculi & intestinorum atonia ac flatulentia excipit, & labefactato motu peristaltico alvi tarditas subsequitur. Petenda hinc etiam est ratio, quare cessante febris impetu aut convulsione demum ingens languor ac virium prostratio percipitur. Similiter in principio tussis materia admodum tenuis est, sub declinatione vero, remittente glandularum spasmo, valde copiosa ac mucida excernitur.

§. XXXII.

Quo vehementior itaque est spasmus, & quo diutius partem affligit; eo major atonia, imbecillitas ac virium resolutio relinquitur.

Scholion.

Inde fit, ut profundior ac vehementior inflammatio sphacelum post se trahat. Motus vero epileptici asthma convulsivum, si diu perdurant, plerumque ita vitiant tonum cerebri ac nervorum, ut paralyxis, hemiplexia vel apoplexia finem vitæ imponant.

§. XXXIII.

Quia partes per motus spasticos & paroxysmos admodum debiles & imbecillæ evadunt, hinc fit, ut stagnantes & subsistentes, qui affluerunt, humores, fomitum ac materiam ad novos paroxysmos producendos ingenerent.

Scholion.

Frequentissime accidit in intermittentibus, ut paroxysmi, statis temporum intervallis redeant, etiamsi omnis materia febrilis subacta & exturbata fuerit. Qua de re ego ita sentio. Nimirum ipsi paroxysmi novam semper materiam & causam novi & futuri paroxysmi prodigunt, dum intensiori calore & motu sanguinis adaucto plures biliosæ ac falsæ excrementitiæ fordes, in quas sanguis vehementiori motu attritus, tandem fatiscit, producuntur, quæ in partibus membranosis à paroxys-

mo valde debilitatis, facile stagnant, easque ad concitandas spasticas constrictiones exstimulant. Multo autem facilius paroxysmi regenerantur in partibus valde debilitatis, si materia febrilis adhuc præsens sit, inque abdominis visceribus adhuc resideat. Idem nostrum iudicium est de causis, quare febres aliique morbi facilem patientur recidivam. Nisi enim partes à morbo fractas ac debilitatas convenienti medicina roboremus, atque earum tonum instauremus & materiam, quæ in vitio est, evacuemus, quid mirum est, si de novo priores morbi repullulascant. Ex dictis aperta jam erit ratio, quare cortex chinæ & alia subadstringentia & roborantia febrilibus paroxysmis & id genus spasticis pathematibus avertendis sint utrique præsidia efficacissima.

§. XXXIV.

In juvenili & virili ætate, item in corporibus vegetioribus & agilioris indolis sanguis & humores impetum magis faciunt versus superiora: in senibus vero infirmis & segnioris naturæ hominibus versus inferiora.

Scholion.

Ita observamus, profusiones sanguinis per nares, per pulmones in hæmoptysi, familiares admodum esse juvenibus, adeo, ut etiam ardentes febres in iis sæpius per narium hæmorrhagiam solvantur. Et quia ex sanguinis impetu ad pectus facile phthisis gignitur, patet jam facile ratio, quare nulla ætas phthisico malo tam obnoxia sit, quam juvenilis. Ratio vero, quare in hac ætate versus superiora magnus humorum fiat impetus, dubio omni procul in fibrarum robore, nimia tensione, elatere, quærenda erit: in senibus vero & infirmis humores magis versus inferiora tendunt, quoniam nimia est solidorum laxitas & flacciditas atque fibrarum robur diminutum, hinc remittit etiam ille vividus humorum versus superiora impetus, sed magis vitiosi humores descendunt ad inferiora inque visceribus stagnantes chronicas passiones, scorbutum, cachexiam, hydropem, nephritidem, colicam, fluxus hæmorrhoidales & ex his varia resultantia incommoda producunt. Accedit & illud, quod in juvenili ætate semper alvus sit adstrictior, in senibus vero mollior & laxior. Quin etiam horum libere hinc inde diffuere liquidum nerveum & juxta naturæ ordinem robur ac motum partibus præstare possit. Sunt vero affectus animi certis naturis & corporibus magis vel minus infensi & cum in juvenili ætate magno impetu agitantur humores, non mirum est iracundiam juvenibus maxime esse noxiam, dum inde in enormes hæmorrhagias narium, hæmoptyses, phthises, pleuritides, febres ardentes, cephalalgias & deliria facile incidunt. Et quia in proVectiori ætate solida laxitate naturali laborant, facile intelligitur, moestitiam & curas, terrorem quoque senibus esse insensibilissimos affectus, quibus graves chronicæ passiones, & ipsa etiam mors promte admodum suscitantur. Est enim mirifica tristitiæ vis tonum ventriculi & intestinorum labefactandi & destruendi, ut alimentorum digestio, secretio & excretio mille modis inde turbetur.

§. XXXV.

Fluida & solida ex repetitis actibus & consuetudine talem acquirunt naturam ac dispositionem ut facillime eosdem motus repetant.

Scholion.

Hæc lex naturæ universalis est & hinc probe custodienda, eo quod plurimorum phænomenorum explanationi inserviat. Plures sunt morbi, seu potius motus morbofi, quibus fluida ex uno loco in alterum cum impetu transferuntur, qui certo anni, aut mensis tempore revertuntur suamque tragœdiam ludunt. Qui semel vel iterum colico dolore correpti sunt, ii facile

rursus in eundem incidunt. Et quibus circa tempora æquinoctialia hæmorrhoides fluere consuecunt, illi eodem tempore revertente spasmos hæmorrhoidales in lumbis, dorso, ossæ sacro ac infimo ventre experiuntur. Si qui certo anni tempore venæ sectioni aut scarificationi adsuecunt, recurrente eo tempore, gravitatem & pressionem in iis locis patiuntur, sique has evacuationes omiserint, sæpe fit, ut inde in morbos incurrant. Qui nimis exercitationibus & laboribus corpora assuefecerunt, si intempestivæ & diuturnæ quieti postea indulgent, facile ægrotant & maxime in articulorum dolores incidunt & contra, si quis ex multa quiete, ut verba sunt Hippocratis Lib. de victu acutor. §. 24. ad ampliorem laborem derepente perveniat, multo magis lædatur, quam si ex multo cibo ad vasorum vacationem transmutatur & si ex multo labore derepente ad otium & segnitiam exciderit. Oportet tamen & his corpus quiescere. Oportet item illis ventrem à ciborum copia quiescere. Sin minus & dolorem in corpore inducet & totius corporis gravitatem. Et idem auctor §. 13. levis lectus præter morem mollis dolorem inducit, itemque præter consuetudinem durus. Qui dormire consueverunt hyemali tempore in conclavi minus calefacto, ii læduntur, si somnum capiunt in hypocaustis tepesactis. Qui adsuecunt determinata diei hora cibum adsumere vel etiam expergisci, ii eadem hora revertente ad ciborum appetentiam coguntur vel evigilant. Quibus in usu est certa noctis hora mingere, eadem singulis noctibus ad mingendum excitabuntur. Sic plura circa hanc rem valde utilia tradidit Hippocrates de veteri medicina §. 19. item de victu acutorum. §. 15. 16.

§. XXXVI.

Motus omnes & singuli, qui functiones corporis animati turbant, in se & sua natura noxii atque perniciosi sunt, nihilo minus salutarem sæpius effectum relinquunt & causas morborum jugulando corpori sanitatem restitunt.

Scholion.

Quemadmodum omnis ordo tam in moralibus quam in physicis & quodcumque cum illo recto ordine convenit, in se & sua natura bonum ac salutare est, ita etiam, quod huic ordini repugnat & contrariatur, in se & sua natura malum est. Sicuti itaque motus, qui vitæ & sanitati præsumt, temperati, proportionati & in æquilibrio consistentes absolute salutes & proficui censendi sunt, ita necessario inde inferitur, omnes eos motus extra proportionem & æquilibrio constitutos, qui vitiant & lædunt actiones, sua natura & suis viribus esse perniciosos. Ecquis est, qui motus circulares humorum retardatos, depresso, excretiones suppressas & ex his pendentes sanguinis & feri stagnationes, viscerum infarctus, obstructions, corruptiones, quibus maxime natura morborum chronicorum continetur, dicere velit salutes. Neque de motibus intensioribus & spasmodicis absoluta salubritas, quæ corpori utilis sit illudque à corruptione & morte vindicet, prædicari potest: perquam enim notum est, spasmos ejus naturæ ac indolis esse, ut excretiones sistant, emunctorium cutis, quo utilissima perspiratio continetur sit, constringant atque humorum motum ab ambitu corporis & extremis partibus ad interna & ipsum cor retrovertant, cum tamen motus illi, qui sanitati & vitæ patrocinantur, excretorii, debeant esse liberi & à centro ad peripheriam corporis ferri. Et quod spasmodorum natura vitæ è diametro adversetur vel ex eo colligendum est, quia sub spasmis & per spasmos symptomata, quæ mortem inferunt, producuntur.

§. XXXVII.

Non spasmi, sed qui spasmos sæpius subsequuntur, intensiores sanguinis per vasa motus à validiori & celeriori cordis & arteriarum systole suscitati & qui ab

interioribus ad exteriora devergunt & febriles dicuntur, salutarem sæpenumero effectum præstant, dum corpora à causis morbofis & earum pravis effectibus liberant.

Scholion.

Neque etiam febris, utut ejus effectus sæpe salutaris sit, in se & sua natura adeoque absolute & nullo respectu habito salutis motus vel conatus naturæ in bonum finem institutus dici potest, quia vires consumendo sæpe, præsertim in morbis chronicis, stagnationes humorum & viscerum corruptiones ac putredines deteriores reddit, hinc fit, ut febris phthisi aut hydropi vel cachexiæ & scorbuto superveniens vel senilibus & infirmioribus corporibus accedens plerumque, imo fere semper mortem inferat; salutis itaque effectus sequitur, si spasmi ejus sunt naturæ, ut causam, à qua proveniunt, nempe sanguinem stagnantem, evacuent & celerrime febriles motus identidem stases & stagnationes perniciosas discutiant, & sanguinem, qui copia & ipsitudine laborat, resolvant.

§. XXXVIII.

Periti itaque & prudentis est medici, motuum, qui fiunt in morbis, naturam & effectus probe cognoscere, & in salutarem finem convenienti auxilio convertere.

Scholion.

Profecto in eo therapie cardo versatur, ut medicus valde perniciosos morbosos motus discernat ab iis, qui salutarem possunt præstare corpori effectum; illos enim præcis tanquam radicibus compescere, hos vero arte, qua fieri potest, exquisitissima secundare & adjuvare debet. Neque vero feliciter hoc negotium conficere poterit, nisi naturæ leges & effectus, item diversissimas motuum morbosorum, à quibus suscitantur, causas & corporum afflictorum naturam probe & accurate intelligat & hæc omnia invicem probe discernat. Et qui omnia hæc bene norit, is nostra sententia optimus erit censendus medicus.

CAPUT IV.

De morborum & motuum morbosorum causis.

§. I.

Quum turbatio functionum corporis vivi & sani à motibus, qui secundum leges naturæ fiunt, valde immutatis proveniat; nulla autem corpori mutatio sine causa, quæ hanc inferat, induci possit, necessario sequitur, ut motus in corpore insigniter mutati ab adæquatis & quoad proportionem accommodatis causis proficiantur.

Scholion.

Quoniam variæ, eæque graves admodum turbationes motuum secundum naturam incidunt, quæ etiam variis modis corpus humanum excruciant, facile patet non unam eandemque, sed valde diversas ratione principii & virtutis agendi esse causas, quæ hos motus excitant.

§. II.

Plena & exquisita causarum morbi cognitio Medico summe est necessaria.

Scholion.

In accurata causarum morbi perspicientia medentis por maxime versatur atque absolvitur. Nam si quis causas morbi, quo corpus afficitur, juxta effatum Hippocratis, *Lib. de Flatibus*. §. 2. probe cognoverit, valde tens est ea aff. rre, quæ corpori commodent, nimirum

contraria morborum natura perspecta. Quam sententiam divus senex magis planam ac perspicuam facit *Lib. de Natura human.* §. 25. *curationem, inquit, instituere oportet; ut causæ morbi nos opponamus, sic enim solvitur utique id, quod morbum in corpore fecit.* Pertinet huc illud Celsi: *causæ investigatio, ejusque primordia & occasio in affectionis & remedium cognitionem deducunt amplissimam.* Sique origines & principia ex quibus pravæ corporis adfectiones proveniunt, plene atque exacte perspectæ sunt, longe facilius præcavendi morbos erit ratio; ex parva enim occasione sæpe ingens nascitur morbus. Neque vero quicquam præclarius à medico desiderari potest, quam ut corpora humana à morbis & præmatura morte defendat.

§. III.

Causa motuum morbosorum minus recte in principio omnes corporis motus dirigente ponitur.

Scholion.

Si hoc principio fluidum illud nobilissimum in sanguine & nervis contentum atque ex puriori & delibatissima aëris & alimentorum substantia oriundum, significatur, non plane repudianda est hæc assertio. Quod enim motus secundum naturam efficit, id immutatum eosdem turbare ac pervertere potest. At enim vero si pro tali principio ens quoddam materiæ expers agnoscitur, quod sensu interno, intentione ac sapientia instructum motus ad certos fines in morbis dirigat, id neutriquam admittere possumus. Clarius enim ac distinctius prius hujusmodi principii, quod motus ad vitam pertinentes tam in statu sano, quam afflictio dirigat, tam existentiae probatio, quam explicatio à nobis desideratur.

§. IV.

Causæ ex Metaphysicorum scholis in physicam & pathologicam corporis humani doctrinam minime transferri debent.

Scholion.

Metaphysici causarum suarum classes maxime secundum actiones humanas instruxerunt, quo referri videntur causa efficiens, principalis, impulsiva, moralis, physica, instrumentalis, formalis, objectiva, finalis, subjectiva & id genus plures. Ut itaque genuinus harum distinctionum valor & usus, qui ab instituto nostro non alienus videtur, appareat, ponamus, hominem esse, qui imminentem domus ruinam præcavere atque avertere velit. Causa igitur efficiens hic ponenda erit in domino, qui hanc impendentem domus ruinam præsentit, intelligit, & omnia ad hanc avertendam conquirat præsidia. Causam materiale & subjectivam constituet res, quæ ruinam minatur; objectiva consistet in hujus abolitione; formalis erit modus hanc amovendi; instrumentalis continebitur instrumentis huic scopo accommodatis: causa denique finalis dicenda erit præservatio à damno. Hanc concatenatam causarum seriem nonnulli ex recentioribus transferunt ad œconomiam corporis humani, quod causa morbi ruinæ & corruptioni facit obnoxium. Rem igitur hunc fere in modum explicant: dicunt nimirum, hoc periculum corruptionis esse omni modo à corpore avertendum, atque ad hoc concurrere omnium primo animam humanam, quæ prævideat atque intelligat imminentem corporis sui interitum, omniaque media ad hunc amoliendum dirigat, adeoque causam esse morbosorum motuum efficientem; pro causa autem materiali seu subjectiva habendam esse materiam illam perniciosam, quæ corporis destructionem inoliatur; causam objectivam esse ejus ex corpore eliminationem, formalem motus secretorios & excretorios, instrumentalem vias & partes solidas, finalem denique corporis ab omni interitu ac putredine conservationem. Hæc utique animæ methodus, in conservatione corporis, quem-

admodum est simplicissima : ita etiam à tironibus, quibus simplicia, facilia, & quæ ingenium non adeo fatigant, maxime arrident, avidissime & cæco animi impetu arripitur. At enim vero, quum hæc nimis generalia sint, atque ejusmodi principium, scientia, intentione, & potentia motus tam vitales quam naturales dirigendi instructum, frustra supponatur, quippe cujus existentia nondum solido quondam ratiocinio probata est; causas has metaphysicas, quæ potius mentis, quam corporis operationibus explicandis inserviunt, jure meritoque rejicimus, easque in physicam corporis humani scientiam neutiquam recipiendas esse existimamus: præsertim cum ejusmodi admissis omnis vera ratio & demonstratio in medicina, quæ maxime in vera causarum, quæ corpus in functionibus suis mutant, inquisitione versatur, uno ictu præscindatur.

§. V.

Quemadmodum functiones ac motus, qui ad machinæ corruptibilis conservationem tendunt, à causis mere mechanicis, i. e. rerum corporearum facultatibus earumque mutua actione ac reactione dependent; ita ab eodem fonte causas, quæ machinam corporis nostri pervertunt, vel plane destruunt, derivandas esse arbitramur.

§. VI.

Causa morbifica recte definita est à *Galeno Lib. de Symptom. Different.* quod sit illa, quæ suapte natura, propriisque ac insitis viribus ad morbi generationem confert sive proxime sive remote.

Scholion.

Nam quemadmodum alimentis æque ac elementis & venenis peculiaris inest vis ac facultas operandi in corpus humanum, ejus motus diversimode mutando: ita nullum est dubium, quin causæ, morborum opifices, proprias atque insitas vires ac facultates habeant, corporis nostri partes solidas ac fluidas multifariam in motu suo turbandi & alterandi. Patet id maxime ex diversis phænomenis atque effectibus, qui in morborum generatione conspiciuntur.

§. VII.

Venenorum vehemens illa operatio, qua celerrime pervertunt ac destruunt machinæ nostræ vitales & conservatorios motus, causarum aliarum nocentium & morbidarum indolem, principium & modum operandi perquam pulchre declarat.

Scholion.

Quod venenorum diversa genera sint & cuivis peculiaris potentia agendi in corpus pernicialis insit, ex eorum effectibus diversissimo, quem exercent, satis clarum ac perspicuum est. Ita mercuriale venenum peculiari ratione agit in fauces earumque glandulas, eas constringendo & exulcerando. Arsenici virus atrocibus tormentis, vomitionibus enormibus, convulsionibus, & sphacelatione tunicarum intestinalium necat. Semen daturæ insaniam parit; hyoscyamus stuporem infert, & adeo conturbat phantasiam, ut daemones & spectra homines sibi imaginentur. Opium somnolentiam ac torporem menti infert; purgantia acriora necant inflammatione intestinorum; morsus canis rabidi funestam ab omni liquido horrescentiam affert. Venenum ictus tarantulæ mirabiles effectus producit; nam ictu earum læsi musicis instrumentis delectantur, eorumque sono ad gesticulationem, choreas & tripudia adiguntur. Ictus scorpionis subito & frigidissimo sudore totum corpus perfundit. Lithargyrium improvide & copiose haustum colicam convulsivam cum pertinacissima alvi adstrictione producit. Et quodvis etiam venenum peculiari ac specifica sua antidoto oppugna-

tur. Quo clarius intelligitur, diversorum, quos venena excitant, pernicialium effectuum causam nullo modo, ut nonnullorum fert hypothesis, in principio corporis nostri agente ac dirigente ejus motus, sed in ipsius veneni peculiari crasi, qua violenter totam motuum vitalium rempublicam evertit, quarendam esse. Par ratione plurimæ morborum causæ veneni naturam indolemque æmulantur, & diversis effectibus peculiarem suam texturam & ex hac dependentem activitatem & motum produnt. Ita nullum dubium est, quin variolæ, morbilli, purpura rubra alba, effera, rubeolæ, maculæ petechiales scorbuticæ à peculiari causæ indole & schemate proficiantur, eo quod diversissimus horum morborum sit genius; symptomatum etiam & curandi diversa ratio; item quod unus alteri succedat. Ita non novum in praxi est, variolas supervenire morbillis, his variolas & utrisque tandem purpuram accedere, purpuram rubram sequi albam, vel albam rubræ supervenire.

§. VIII.

Causæ morborum virulentæ non omnibus, sed certis ac determinatis corporis partibus, in quas suam exercent violentiam, insensæ sunt.

Scholion.

Miasma pestilentielle, quod corpora inficit humana, cetera animantia non offendit; contagium, quod boum gregem summa virulentia adurit, equis & aliis bestiis innoxium est, & contra. Contagium scabiosi non alias partes inficit, quam subcutaneas, & similes ibi exulcerationes producit. Virus impurioris coitus maxime glandulas petit inguinales & faucium ossibus firmiter insidet, inque facie pustulas attollit, quod non facile in ulla morbida, etiam maxima impuritate lymphæ, quæ in scabie, scorbuto & lepra est, visitur. Materia, quæ scorbutum ingenerat, peculiari ratione gingivali carni, quam laxam, putridam & sanguinolentam reddit, infesta est. Ex oculis in ophthalmia promanantia effluvia non phthisin inducunt, sed oculos inflammant. Contra halitus contagiosi phthisicorum pulmone non oculis nocent. Materia morbillorum effectrix nervis pneumonicis insidias sruunt, ac sæpius vehementissimam tussim proritat. Variolarum autem materia habitum corporis externum aggreditur, summamque cutim exulcerat. Serum acre, quod arthritidem parit, tantummodo articulorum membranas invadit, & ex una articulatione in alteram grassatur, sique ad viscera interna retropellitur, ventriculi & intestinorum membranas petit, easque ad vehementes spasmos & convulsiones sollicitat. Ex quibus adductis clarissime apparet, morborum causas materiales non esse passivas, sed ad actiones & motiones præternaturales inducendas valde potentes & quasvis peculiari plane elemento, indole modoque operandi esse instructas.

§. IX.

Quæ morbos inferunt causæ, motusque secundum naturam turbant, non unice primario, directe & efficienter motus in corpore perversos excitant.

Scholion.

Enim vero venena, vel exitiosæ morbidæ materiæ motus istos spasmodicos convulsivos febriles in nervorum & vasorum systemate minime suscitant ita prorsus, ut causa horum unice illis sit adscribenda, sed jam tum in motu existunt & constitutæ sunt partes corporis nostri, in quas agunt morbificæ causæ, ut proinde motus isti naturales tantummodo à morbidis rebus immutentur, perversæ augeantur aut minuantur.

§. X.

Igitur motus morborum partim motuum, qui jam vigent in partibus secundum naturam, partim causarum mor-

morbidarum quæ partes motrices infestant, producta sunt.

Scholion.

His cognitis non longius repetenda erit ratio, cur res infestissimæ, ut venena, vel terræ in aëre exhalationes, tempore, quo epidemiæ affectiones grassantur, non in singulis similia, sed subinde plane diversa symptomata inferant, ita prorsus, ut v. g. variolæ in nonnullis valde benigne, in aliis acerbissime procedant. Sicut enim idem pharmacum pluribus oblatum diversas edit operationes, ita etiam eadem morbi causa, pro diversa corporum conditione effectus exerit, longe multumque discrepantes. Nam secundum vulgatum canonem causæ non tantum ratione activitatis, sed etiam receptivitatis operantur, five, quod idem est, causarum vires perpetuo se habent relative, i. e. ab aliis præsentibus rebus multifariam modificantur. Prudentis igitur est medici, non modo respicere ad causarum morbidarum vires, sed etiam pensi habere corporum laborantium naturam, habitum, vires ac temperamentum. Ita demum rectum de morbi diagnosi, prognosi & curandi methodo nascitur iudicium.

§. XI.

In generandis morbis non una, sed plures concurrunt causæ, quarum seriem & ordinem utique scire oportet medentem.

Scholion.

In cunctis rebus, quæ à natura fiunt, infinitus fere causarum progressus observatur. Ut res illustretur exemplo, annonæ defectus causa esto caloris foecundantis defectio, hujus causa erit coelum continuo turbidum ac pluviosum, quod à continuo ventorum ex occidente & septentrione flatu ortum fuit. Qui diuturniores ventri dubio omni procul aliam causam & forsan peculiare ex terra exhalationes, aut siderum positiones habent. Neque etiam hæc ipsa suis, quibus oriuntur, causis erunt destituta. Et hæc concatenata causarum series prope in infinitum extendi poterit. Simili ratione innumerabilis erit causarum morbificarum productio, dum semper causa producit effectum, qui postea causa fit alterius effectus, & sic porro. Quemadmodum vero satis est, si physicus causas tantum proximas sterilitatis temporum novit, ita etiam sufficit, quando medicus earum rerum, quæ præter naturam fiunt in corpore, causas proximas, & antecedentes, & quæ eas regunt, cognoverit.

§. XII.

Causæ continentes proximæ formales morborum dicuntur, quæ immediate & proxima ratione animati corporis functiones vitiant ac perturbant, ita, ut hisce positis corporis afflictiones præsto sint, & remotis, illæ tollantur: & hæc sunt maxime motus solidorum & fluidorum perversi, inæquales, ordinis expertes.

§. XIII.

Causas proximas materiales, quas nonnulli efficientes per excellentiam vocant, morborum nosse etiam oportet medicum; & hæc sunt illæ quæ turbatos istos motus sua natura excitant: hisce vero causis quia antecedunt aliæ tam internæ quam externæ, factum est, ut illæ κατ' ἐξοχήν antecedentes, Græce προηγουμένα, hæc vero externæ sive προκαταρκτηαί & occasionales à veteribus dictæ fuerint.

Scholion.

Medicam hanc causarum doctrinam illustriorem eddemus exemplo. Sævisimorum, quibus hysterica cruciantur, pathematum continens & proxima causa formalis erit vehementia spasmodorum, quibus genus nervorum impetitur. Efficiens materialis erit copiosus, viscosus & impuri sanguinis in nervosis partibus congestio.

Causæ antecedentes erunt vel internæ vel externæ: ex illarum genere plethora ex mensium suppressione, & generis nervosi imbecillitas accusandæ erunt. Quod vero attinet remotiores causas externas, ex rebus naturalibus corporis nimia sensibilitas, vasorum exilitas, terror, vita motus expers, inordinata diæta, liquidorum usus parcior, quæ ad genesin harum causarum occasionem præbent, adducendæ erunt.

§. XIV.

Plurimum refert, causarum morbificarum ordines in morborum & medendi scientia non confundi.

Scholion.

Si medicus in demonstrando & sanando considerate ac prudenter agere velit, opus utique est, ut ordines & successiones causarum non invicem confundat, quod facit, si causas antecedentes loco proximarum & efficientium habet. Quod vitium maxime in recentiorum temporum pathologia solenne est, ubi ad acidum, vel ad humorum acrimoniam, aut ad plethoram causa efficiens vel proxima morborum refertur. Et quum medentes maxime occupati esse debeant in removendis causis proximis, perperam utique curas suas instituunt, dum toti in eo sunt, ut humorum acrimoniam vel acorem extinguant, aut plethoram minuant, quum potius primo omnium causæ proximæ, v. g. vehementia spasmodorum & quæ hanc efficiunt, sanguinis stases vel stagnationes convenienti medicina removendæ essent. Mensium vel hæmorrhoidum suppressio est sæpius causa antecedens cachectici vel etiam hectici status, ubi viscera depravata, obstructa & corrupta sunt, atque vires cum bonis succis exhaustæ. Si quis itaque tali in negotio ad menses vel hæmorrhoides proliciendas curationis rationem dirigere velit, hic certe mirum à scopo aberrabit & secundo successu frustrabitur. Si vero ad præcavendos hos morbos has causas antecedentes animadvertit, pro voto rem suam utique perficiet.

§. XV.

Causæ, quæ motus morbosos proxime efficiunt, duplicis sunt generis: velenim celerrime agunt, vel paulo tardius suam operationem perficiunt. Illæ rursus duplicis sunt ordinis, nimirum vel immateriales aut materiales. Prioris generis sunt animi motus, posterioris, res, quæ dicuntur toto suo genere infestæ, videlicet venena.

Scholion.

Animi commotiones, quæ secundum scholas veterum inter causas morborum remotiores perperam referuntur; cum potius efficientes sint celerrimæ activitatis, immateriales dicuntur, quia in corpore sanissimo absente omni, quæ in vitio sit, materia solidorum & fluidorum motus cum vehementia ac celeritate perverunt, ut in gravi terrore vel ira apparet. Protinus enim concepta in animo iracundiæ idea cor palpitare, arteriæ valide pulsare, & humores cum impetu ad caput ferri incipiunt. A subito terrore protinus frigent & inhorrescunt extrema, tubuli subcutanei constringuntur, venæ antea plenæ detumescunt, & in præcordiis, à congesto ibi sanguine, oritur anxietas. Et profecto ea est motuum animi vis, ut omnium aliarum causarum, quin etiam venenorum vehementia ac celeritatem in operando longissime exuperent, quia in instanti agunt, quum venena spatium postulent; quibus etiam statim in principio adhuc utiliter medicina opponi potest, quod tamen in animi pathematibus non valet. Inter causas igitur, quæ morbos progignunt, primum jure meritoque ordinem animi pathemata tuentur, in secundo autem venena ponenda sunt.

§. XVI.

Res venenatæ, seu toti animantium naturæ suis viribus

bus infestæ, in exili admodum mole ingentes in corporibus vivis motuum perversiones fuscitant.

Scholion.

Venenorum natura & classis latius patet, quam quidem vulgo existimatur, namque epidemiæ grassari & acerbè affligere solent passiones, à virulentis maxime rebus, quæ tenuissimæ & valde corrosivæ aut fermentescibilis indolis sunt, & ex tetræ exhalationibus invicem in aëre mixtis oriuntur. Et prout earum & crassæ & vis & natura subinde multum differt, ita etiam fit, ut uno tempore hæc vel illa corpora aut temperamenta, item has vel illas partes sævissime adorianur. Ad venenorum autem classem quoque pertinent subtilioris indolis sordes, quæ in sanis æque ac ægrotis ad partes extremas, salutarî consilio amandantur. Hæ ibi diutius hærentes & intro repulsæ, veri veneni vires sæpissime æmulantur, ut videmus in transpiratione prohibita, variolis, morbillis, scabie, purpura, erysipellate & doloribus arthriticis cum violentia, repulsis, & fonticulis & ulceribus intempestive consolidatis.

§. XVII.

Dantur quoque motuum morbosorum causæ materiæ vitiosæ majori mole infestæ, & hæ potissimum sunt sanguinis ceterorumque humorum in vasis, vel extra ea, stases aut stagnationes.

§. XVIII.

Quamdiu fluida, intemperie copiaque delinquentia, non quiescunt, sed motu circulari jugiter agitantur, tam diu morbis procreandis inidonea sunt. Simul ac vero motus fiunt expertia vel vasorum alveis elabuntur, vel in iis firmam stasim concipiunt, vel valde tarde progrediuntur, corpus offendunt, & morbos faciunt.

Scholion.

Ita plethorici vel etiam intemperantissime viventes sæpius sine ullo incommodo spiritum trahunt; si natura est in perpetuo motu circulatorio & excretorio occupata. At ubi à terrore vel vento septentrionali subito oborto libera sistitur perspiratio, statim ingens morborum seges progerminat, quia humores, qui antea in motu erant & excernebantur, jam deficiente excretionis consistentes partes præter naturam afficiunt.

§. XIX.

Stases & sanguinis & humorum plus habent periculi, & acutiores sunt, quam horum congestiones & stagnationes. In stasibus humores omni motu carent, vasis minimis firmiter impacti, in stagnationibus vero non ex toto quiescunt, sed ob copiam & infarctum lentiores tantummodo cursus faciunt, & ejusmodi stagnationes potius passionum chronicarum & motuum morbosorum transitoriorum procreatrices sunt.

§. XX.

Stases sunt vel sanguinis, vel seri impuri acrioris: illæ inflammationes, hæ dolores spasticæque contractiones potissimum pariunt, utræque febrilium motuum foecundæ matrices sunt.

Scholion.

Prout gravior vel levior sanguinis stasis est, & partes magis vel minus sensiles sunt, ita diversæ naturæ & effectus prodeunt morbi. Sanguinis stasis in locis valde nervosis plurimum habet periculi, qualis est in meningibus atque in ventriculo & intestinorum canalibus, item in membranis quæ pulmonales vesiculas constituunt. Serum impurius membranas capitis & cerebri lancinans hemicranias, cephalalgias, convulsiones parit: in membranis articulorum dolores arthriti-

cos: in intestinorum tunicis atrocissima tormina, in ventriculo acerbissimas cardialgias: in meatu auditorio sævam otalgiam: in dentium ligamentis gravissimam odontalgiam: in muscutorum membranis rheumaticos dolores fuscitat. Idem serum extravasatum variorum exanthematum, macularum, pustularum & ulcerationum causa fit. In glandulosis locis lymphæ stases, defluxiones & catarrhales febres ingignunt.

§. XXI.

Stagnationes sanguinis convulsionum & spasmodicorum foecundæ genitricis sunt, quæ vel ex copia vel ex inopia humorum, secundum Hippocratis aph. 39. Sect. VI. fiunt.

Scholion.

Ad tutelam secundæ valetudinis proportio humorum in vasis, quæ nec excedat, nec nimium deficiat, semper necessaria est, alias statim proportio & æquilibrium motuum læditur: nam ex nimia copia, æque ac ex inopia, si est supra modum, oriuntur stagnationes, quæ in locis valde nervosis naturam promte ac expedite ad spasmos sollicitant. Et quamvis in infirmioribus & elanguidis nimia humorum & sanguinis copia stagnans viscerum & partium tonum plane resolvat, & morbos chronicos potissimum accersat, tamen in vegetioribus, sensibilibus texturæ & juvenilis ætatis hominibus fibras potius ad validissimas & spasticas constrictiones armat, quibus efficitur, ut magnæ in sanguinis circuitu inæqualitates & infensæ ad alia loca humorum translationes & congestiones fiant.

§. XXII.

Stagnans sanguis ex mensium fluxu suppresso aut vi cohibito graves maxime ad alia loca parit congestiones, acerbissimis symptomatibus stipatas.

Scholion.

Nemo expressius & rectius ipso Hippocrate valde infensas sanguinis congestiones ad alia loca, si menses fuerint obstructi in mulieribus, nobis delineatas reliquit. Ejusmodi clarissimus locus extat *Libr. de virginum morbis* §. 6. qui hic est: *sanguis non habens ex utero effluxum præ multitudine resilit ad cor vel ad septum transversum: vel in tibias & pedem descendens torporem inducit. Et Libr. I. de morbis mulierum hæc prodit: à mensibus suppressis dolor corripit ventris partem infra umbilicum, nunc inguina, nunc lumbos & coxendicum ad sedem juncturam, nunc collum; aliquando vero strangulatio fortis accidet & caligo ante oculos observabitur & vertigo, utpote purgatione sursum vergente ac ascendente.* Præter ea plurimis in locis ut *Lib. I. de morbis mulierum* §. 5. 6. 8. 17. disertè explanat, quam graves passiones oriantur, si menses ad caput, ad præcordia, ad stomachum, ad hepar & ad ventrem allapsi fuerint, quæ loca alias fusiori explanatione persequemur. Neque in praxi obscurum est, quemadmodum menses vehementia v. g. à gravi terrore repressi sanguinis ex pulmonum, ex ventriculi vasis ex renibus profusiones, in capite convulsiones, vertigines, vocis privationes, in præcordiis strangulationes suffocatorias & ingentes angustias efficiant.

§. XXIII.

Neque minus sanguinis hæmorrhoidalis in pleniori & nervoso intestino, quod colon vocatur, stagnatio, graves congestiones ad alia loca & affectiones æruminosas causatur.

Scholion.

Non indignum annotatione est, quod in hanc rem prodidit *Celsus Lib. I. Cap. XVIII.* » cum sanguis per hæmorrhoides exitum non habeat inclinatus ad præcordia materia subitis & gravissimis morbis correpti sunt. Et

Et quemadmodum fluentes hæmorrhoides, teste experientia, & secundum *Hippocratem Lib. VI. epidem. Sect. III. §. 64.* à peripneumonia, pleuritide, ab ulceribus, à lepra & juxta *aph. 2. Sect. VI.* melancholia, à nephritide, item à fideratomorbo vid. *Coacas Prænotiones Sect. III. num. 318.* liberant: ita nihil dubii est, quin cohibitus hic fluxus eosdem morbos proferat. Neque egregius locus *Coac. versu 159.* prætereundus est, ubi scribit: » ex hæmorrhoidæ parum » apparente vertigines obortæ parvam ac modicam si- » derationem significant: solvit venæ sectio & quicquid » hoc modo apparuerit, mali aliquid significat. Item: » anteced. versu sanguinis fluxiones statis temporibus » contingentes, si sanguinem non effuderint, comitia- » les morbi mortem inducunt. *Martianus*, excellens *Hippocratis* commentator in illa loca hæc adjicit: multitu- » do sanguinis retenta nervosum genus invadit & si su- » perna petat aut apoplecticus affectus aut convulsivus » producit, hic quidem, si acrimonia plus lædere ap- » tus sit, si vero corpulentia, eo casu apoplecticus affec- » tus expectandus erit potius: item, si hæmorrhoidis ap- » pareat in sede id sanguinis plenitudinem testatur, quam » si solvere per fluxum natura non potest, in caput trans- » lata vertigines fiunt; sunt & adhuc alia eaque valde ærumnosa pathemata spasmodica convulsiva dolores car- » dialgici, cum summa anxietate, conatuque vomendi » juncti, convulsiva & spasmodica tormina, quæ para- » lysin relinquunt, quibus illi infestantur hæmorrhoida- » rii, ubi consueta sanguinis per sedem profusio violentia quadam cohibita fuit.

§. XXIV.

Sanguinis stagnationes in plethoricis ob consuetas ejus excretiones suppressas obortæ, viscerum tonum solvendo, subinde graves & diuturnas passiones inferunt.

Scholion.

Propullulat inde maxime in imo ventre cachexia, hydrops, calculus, morbus niger *Hippocratis*, icterus niger & scorbutus mille malorum opifex, valde enim impurus à suppressis excretionibus nascitur sanguis, qui graves & spontaneas lassitudines, difficilem spirationem, pectoris angustiam, corporis extenuationem, luridum faciei colorem, varii coloris maculas, artuum dolores, gingivas foetidas & putridas in scorbuticis maxime suscitatur.

§. XXV.

Sicut sanguinis nimia copia; ita etiam ejus magna inopia & periculosas stagnationes & graves spasmos & partium resolutiones efficit.

Scholion.

Neque enim tantum proportionem excedens sanguinis plenitudo, sed & humorum inopia pernitiæ stagnationes, spasmodorum & chronicarum passionum procreatrices, producit. Nihil enim familiarius usu evenit, quam ut amissio vel nimium exhausto per morbos vitali nectare gravissimi & qui difficilem admodum curationem habent, alii superveniant. Observavimus non semel, sed sæpius atque iterum, ab enormi sanguinis profusione corpora valde obnoxia fuisse motionibus spasticis, adeo, ut vel refrigeratione vel terrore accedente in summas angustias, anxietates, animi deliquia, cordis palpitationes & tremores delapsi fuerint: quin imo in exhaustis corporibus à gravi animi affectu aut refrigeratione præpostera aut à validiori medicina, aut ab acidorum perverso abusu ærumnosum hypochondriacum, quod nonnisi spasmodicum est malum, sæpius subortum annotavi. A largiore sanguinis missione molliora corpora, septentrionali frigido coelo paulo diutius exposita, in catarrhales rheumaticas affectiones promte incidunt. Neque indigna consideratione res est, quod si ex vena animalis aperta ingens sanguinis copia effundatur, statim convulsiones succedant, ita ut quo major fiat effusio, intensiores

etiam oriantur convulsiones, quæ circa mortem evadunt vehementissimæ. Quorum ratio hæc veri valde similis videtur: ubi nimirum ingens copia sanguinis effunditur, non sufficiens ejus ad cordis muscolum fit adfluxus, unde ejus dilatatio sive diastole minuitur, qualis vero diastole, talis etiam est sistole sive contractio cordis: proinde hæc debilior reddita sanguinem in vasis præsertim capillaribus constitutum non satis valide propellere & in circulum agere potest, hinc in partibus membranosis & nervosis capitis & medullæ spinalis stagnans eas ad convulsiones sollicitat. Tandem adjungenda & hæc erit ratio: motus ille contractorius, in nervosis & membranosis partibus qui viget, & à liquidi nervei influxu sustentatur, à resistantia sanguinis, qui vasis vehitur, in æquilibrio detinetur, quod plane tollitur sanguine effuso, unde motus contractionis in illis partibus increfcit. Ad motus enim temperatos, qui sanitati patrocinantur, utique proportio sanguinis & humorum, qui nimie contractioni fibrarum, quam fluidum nerveum efficit, resistant perquam necessaria est & contra etiam, ne nimia fibrarum expansio à sanguine fiat, opus est ut sufficienti fluidi nervei influxu fibræ perfundantur, quo systoles & diastoles exactum fiat æquilibrium. Hoc supposito, jam ratio haud difficulter reddi poterit, cur præsentem aut convulsione aut spasmo aut in horrore febrili, in corporibus non plethoricis sectio venæ immane quantum spasmodica pathemata intendat, ut in extremo vitæ periculo ægri videantur constituti.

§. XXVI.

Et sanguinis, & seri & aliorum humorum excrementitiorum stagnationes, morbosas quoque faciunt adflectiones.

Scholion.

Seri excrementum salino-sulphureum, ubi non satis per subcutaneum cribrum vel per urinarias vias expurgatur, intus remanet & in partibus glandulosis & nervosis stagnans eas lancinat, arrodit & morbos salinos producit; cujus generis sunt dolores artuum, rheumatismi, coryzæ, gravedines, tussis, fluxiones falsæ, acres ex oculis, diarrhœæ dolores, abdominis ab erosionem intestinorum & ventriculi, varii generis exulcerationes. Atque etiam febriles spasmos ab excrementitia transpirationis materia intercepta in locis nervosis & membranosis nasci, non sine ratione statuendum est. Quo magis mirari subit, esse nostris temporibus nonnullos, qui ab uno extremo in alterum delapsi, plane inani conatu, contra omnem fere pathologiam falsam pugnant.

§. XXVII.

Serum viscidum & copiosum, in habitu poroso & carnosum stagnans, facit tumores œdematosos; in cavitates effusum comprimendo lædit, & ad corruptionem disponit interiores partes; in glandulis collectum earum tumores & dolores insignes efficit.

§. XXVIII.

Cruditates acidæ biliosæ à prava digestionem & alvo suppressa subortæ & in canali alimentario diutius detentæ, ingentes dolores, inflationes, & ob consensum cum genere nervoso sævissimos spasmos efficiunt.

Scholion.

Profecto sedes plurimorum morborum ex alvo suppressa est, quoniam complures varii generis & indolis fordes in intestinorum canale confluunt, quæ non expurgatæ pejorem naturam, ob diuturniorem moram & ob novam cum aliis mixtionem, induunt, unde fomites & mineræ febrium maxime intermittentium, flatulentiarum, spasmodorum, qui præcipue hypochondriacos & hystericas exercere solent fiunt, inde anxietates,

tates, inde dolores, etiam in remotis partibus, ut in capite, producuntur.

§. XXIX.

Humores acidi, corrosivi cum bile permixti viridem & valde corrosivam indolem nanciscuntur, atque in ventriculo & duodeno stabulantes graves afflictiones inferunt.

Scholion.

Sicuti in nulla corporis parte sibi magis relicta & conspicua est acrimonia acida, quam in ventriculo, ita hæc ipsa nimium ingravescent, quod præsertim fit in senibus, hypochondriacis, melancholicis, quartanariis & vitæ sedentariæ addictis & vina acida bibentibus multas calamitates, ventriculi rosiones cum ardoris & anxietatis sensu, eructationes acidas, vomitiones & insignes debilitates, pectorisque angustias, dolores lancinatorios circa præcordia invehit; quin imo inde cholericæ & dysentericæ affectiones, & diuturni rosivi cum inflatione dolores intestinorum, ab erosionem producuntur.

§. XXX.

Solennes illæ & universales morborum causæ, stases & stagnationes, ubi vel natura vel arte motibus discoloriis & excretoriis removeantur, sanum & salvum evadit corpus: Si vero hoc non fit, in pertinaces obstructions, indurationes, corruptiones, extravasationes, sphacelationes funestas transeunt.

Scholion.

Univerſa therapia, quam vel natura vel ars suis motibus adversus morbos suscipit, præcipue in eo posita est, ut causæ illæ functionum corporis turbativæ, quæ potissimæ sunt sanguinis vel puri vel impuri aut humorum excrementitiorum insensibilis stases & stagnationes, removeantur: quod fit si humores subsistentes vel in ordinem & motum redigantur, vel per congrua emunctoria corpore expellantur. Quod si vero neque natura neque ars id efficere poterit, causæ hæc, quo longius in corpore resident, eo perniciosiorem induunt indolem, adeo ut, elusa omni curatione, in extremam perniciem & mortem corpora deducant.

§. XXXI.

Providendum hoc præcipue est, ne causarum morbidarum producta, in corporibus dissectis conspicua, pro ipsis morborum causis habeamus & venditemus.

Scholion.

Habent utique dissectiones morbis defunctorum corporum in condenda ætiologia magis mortis, quam morborum multum utilitatis atque usus: nam mortis, quæ est destructio plenaria motuum vitalium, causas omnino reddunt perspicuas & sensibus manifestas. Perperam vero hæc causæ mortis cum morborum proximis vel ab imperitis vel ab astutis medicis vulgo confundi solent, cum hi ignaris adstantibus tales esse morborum causas, quæ nulla arte vinci potuissent, promte imponunt, ut eo melius curationes suas sæpe satis frivolas excusare possint: nihilo tamen minus ex frequentioribus inspectionibus cadaverum illud in pathologicum usum trahere possumus, quod videamus, quales effectus graves imo funestos morborum causæ sibi relicte & non sublata post se trahant.

§. XXXII.

Cum nulla causa in rebus contingentibus à se ipsa existat, sed ab aliis causis præincipientibus sustentetur: necesse est, ut insensibilis illæ stases & stagnationes ab aliis producantur, quæ antecedentes secundum scholas vocari solent.

§. XXXIII.

Antecedentes stagnationum & stasium causæ sunt,

maxime sanguinis & excrementitiorum humorum solennes & consuetæ secundum naturam excretiones suppressæ.

Scholion.

Quamdiu humores ratione quantitatis & temperaturæ in convenienti proportionem & æquilibrio consistunt, tamdiu machina placidis & proportionatis, qui pro vita & sanitate militant, gaudet motibus: simul ac vero excretionem illam solennem vitium capiunt atque adeo sanguis vel humores excrementitii nimium in corpore accumulatur, statim hinc inde exitiosæ humorum sunt stagnationes, motus progressivi expertes, & sic morborum fit genesis.

§. XXXIV.

Excretionem summe salutiferam vel à nimia sanguinis & succorum copia, vel ab eorum degeneri & quæ excretoriis motibus resistat indole, vel a partium solidarum depresso robore dependet.

Scholion.

Depressio roboris in solidis partibus plurimum sane ad languidiore excretionem, & generationem tum plethoræ, tum cacochymia confert, unde quotidiana praxis edocet, senes infirmos, viribus fractos, propter ingentes sanguinis profusiones aut perpeffos antea morbos, illis maxime esse obnoxios. Rectissime enim *Celsus* scribit: *infirmitas omnibus morbis patet*. Quo magis elucet, quantum salutis & præsidii ab omnibus iis, quæ vires conservant, quæ robur & tonum deperditum restituunt, cujus generis maxime sunt balsamica medicamenta bene temperata & mixta, in avertendis morbis expectandum sit.

§. XXXV.

Neque universi corporis, neque solidarum partium infirmitas, neque humorum & sanguinis nimia exsuperantia, neque excretionum suppressio, à se ipsa fit, sed ab aliis progignitur causis, quas scholæ remotas, procatacticas, occasionales, primordiales vocare solent.

§. XXXVI.

Causarum remotiorum, quæ disponunt partes fluidas æque ac solidas ad motus vitiosos, classes plures sunt; vel enim partes solidas earumque tonum & robur atque efficaciam motus, vel fluidarum copiam aut mixtionem & dispositionem ad motum respiciunt, & sunt vel naturales, vel non naturales, vel præternaturales.

§. XXXVII.

Ex naturalibus & quæ maxime internam solidarum habitudinem & dispositionem ad motus afficiunt, sunt ætas, temperamentum, sexus, dispositio hæreditaria parentibus, consuetudo, habitus corporis; ex præternaturalibus dispositio prava partium solidarum à morbo vel perversa medicatione relicta; ex non naturalibus diuturnus moeror, cura ac angor animi, & aliæ animi perturbationes.

§. XXXVIII.

Vitia partium fluidarum morbis ingenerandis idonea, maxime aer & ingesta tam solida, quam liquida, motus quoque, quies corporis, somnus & vigilia disponunt & modificant.

Scholion.

A *Galeno* sex res five causæ dictæ non naturales, quæ remote morbos ingenerant, numerantur. Sed qui affectus animi vehementiores, præsertim terror & ira, quæ celerrime agunt, neque minus salutaris sanguinis & aliarum fœdium excretionem cohibita & suppressa inter causas morborum propinquiores & antecedentes referenda.

referendæ funt, hinc & ordinis & doctrinæ caufa has ipfas ex rerum non naturalium numero, quæ valde remotæ funt, excludendas effe arbitramur.

§. XL.

Cognitio caufarum remotiorum, quæ corpora difponendo ad morbos agunt, non vacat in pathologia & therapia fingulari ufu ac fructu.

Scholion.

Nam remotiores caufæ, quæ ex rerum fic dictarum naturalium, non naturalium & præternaturalium claffe petendæ funt, antecedentes & proximas caufas demum progignunt, & conftituunt. Multum itaque refert fcire, qualis victus, loci, aërisque conditio, qualis cœli ftatus, quale vitæ genus, qualis animi difpofitio, qualis ætas ad hunc vel illum morbum ingenerandum confpirent. Ab iftis enim unde morbi veniunt & nafcuntur, ab illis quoque eorum principia caufæque ducendæ funt: unde difcimus, ad morborum præfervationem multum conferre, fi harum rerum ufum & præcepta diætetica non habeamus neglectui, fed accuratius illa obfervemus.

§. XLI.

Cum ingens & innumerabilis vero eorum, quæ corpus humanum infeftant, idque morbis obnoxium reddunt, fit copia; mirum eft, homines non frequentius ægrotare.

Scholion.

Etenim & anni tempora & varia tempeftatum genera & quævis ætatis partes fuos peculiare edunt & proferunt morbos. Deinde corpora diverfi fexus, diverfi temperamenti & habitus & difpofitionis à parentibus acceptæ fuos peculiare & proprios foveant morbos. Multum quoque juvat noffe, gracilia, an obefa, infirma, an robufta fint corpora, utrum perverfæ vitæ & victus rationes, an noxiæ & infalubres efculentorum & potulentorum adfumtorum fint facultates. Hæc enim omnia ad morbos ingenerandos effe aptiffima, nemini facile ignotum eft. At vero inter tot rerum infeftarum, quarum injuria corpus noftrum impetitur, difcrimina, rarius homines graviori quodam morbo divexari mirandum eft.

§. XLII.

Quamvis plures fint res infalubres & ingenerandis morbis aptiffimæ, tamen non femper tanta potentia polent, ut motus naturales univerfæ machinæ turbare valeant: cujus generis funt pernicioles ftases & ftagnationes humorum cum magna imbecillitate vel univerfi generis nervofi vel certarum tantum partium juncæ. Ad harum vero caufarum, quæ proximæ merito dicendæ funt, productionem, non una remotior caufa, fed plures confpirare & confentire debent, & quoniam id rarius contingit, rariora etiam ex caufis remotis vitia & morbi exfurgunt.

Scholion.

Meretur hæc adfertio exemplo illuftrari. Morbus ille familiariffimus, qui affectio hypochondriaca nominatur, eft convulfiva & fpafmodica partium nervofarum præcipue ventriculi & inteftinorum afflictio: hæc ut producat, non una, fed plures concurrere debent caufæ. Neque enim fola à motu abftinentia, neque acidorum ac refrigerantium abufus, neque animi mœor, neque vaforum exilitas, neque pharmacorum, quæ stomachum lædunt, copia, huic gravi malo ingenerando figillatim fufficiunt. Si vero inter hæc plura concurrunt, tota natura debilitatur, excretiones neceffariæ affaminantur, ventriculi robur & digestio perit, ingens faburra vitioforum humorum primis in viis coneritur, adeoque & ftagnatione fanguinis & excre-

Frid. Hoffmanni Oper. Tom. I.

mentitiorum humorum partes nervofæ vehementer afficiuntur, & ad fpafmicas fticturas follicitantur fumma fubfequente earum imbecillitate.

§. XLIII.

Rariores quoque inter homines oriuntur morbi, quia mechanifmus corporis noftri ad eorum caufas avertendas eximie concurrat.

Scholion.

Tam fapienti conftituta eft corporis humani machina artificio, ut in continuo motu & folidæ & fluidæ ejus partes exiftant, cujus beneficio fanguinis & humorum infenfiffima quies & ftasis continuo præcavetur, neque minus fuperflui, effœti, inque corruptionem proni humores continenter per congrua fua emunctoria ejiciuntur. Præfervatoriam itaque medicinam à benigniffimo corporis noftri architecto in ejus ftuctura & mechanifmo pofitam folertior quifque medicorum animadvertit, quam medicinam naturæ internam, & præfervandi ac curandi methodum, fi prudens medicus recte intelligit, & fequi & imitari, eamque adjuvare fcit, is certe non perfunctorie, fed rectiffime officio fuo fungitur. Cum itaque perpetuo corpori noftro adffat medicina, quæ in humorum circulatione & rerum inutilium excretionem confiftit, non facile morbi nafcuntur, nifi violentæ admodum caufæ, ut venenum vel frigidus potus calefacto corpori immiffus, aut vehementiffima animi commotio hunc motuum præfervatorum ordinem valide fubvertant & interturbent.

CAPUT V.

De caufarum morbificarum fede & operatione.

§. I.

CORPUS humanum quando à caufis exitialibus, quæ motibus ejus naturalibus & proportionatis invertendis aptæ funt, adfficitur, non ut mere paffivum, fed ut activum reagens & refiftens confiderandum eft, quæ vivida corporis reactio in vera pathologia & therapia ftabilienda fcitu valde eft neceffaria.

Scholion.

Nunquam enim caufæ etiam morbofæ vires fuas exe-runt fecundum fuam activitatem, fed fecundum receptivitatem & difpofitionem corporis partium, quatenus hæc illarum activitati magis vel minus refiftit. Et profecto confideratio & relatio illa virium, quæ caufis morbificis infunt, ad difpofitionem & motum partium fluidarum & folidarum corporis animati cognitu valde difficilis, difficultatem etiam in judicando parit, ut fæpe plus conjectura, quam firmior prædictio locum habeat. Ab hac diverfitate corporum reagentium fit, ut idem dofi pharmacum valide vel leniter alvum vel vomitum moveat, & materia noxia in quibusdam corporibus nihil quicquam moveat vel perturbet, in aliis vero ingentes turbas faciat.

§. II.

Ut caufa morbi fiat activa, id eft, ut motus naturales perturbandi vi polleat, certa ejus quantitas, fivè ad agendum efficacia, & in corpore ad hanc recipiendam apta proportio requiritur.

Scholion.

Debet enim in morbis generandis & producendis confpirans confenfus & peculiaris quædam inter caufam efficientem & excipientem effe proportionem, fine quibus de natura & effectu caufarum morbificarum rite & κατα λόγον nihil quicquam ftatui unquam poterit. Hoc

Q

funda-

fundamentum, hic cardo morborum nascendorum est, neque aliunde, quam hinc omnis diagnoseos, prognoseos & therapias ratio est comparanda. Res vero sic se habet: omnes causæ corporeæ vires & potentiam suam in alia corpora non nisi motu, qui immutatio status in corpore mobili est, exserere solent. Jam vero in omni corpore est resistantia & nullus fit motus, nisi potentia activa movens & vires alterius corporis resistantis superet. Si igitur causa morbi pernicialis vim & potentiam suam nocendi, & motus naturales turbandi in corpus nostrum exerere velit opus est, ut tanta ejus sit potentia, quanta requiritur ad modum naturalem partium corporis nostri immutandum & destruendum, alias nihil efficiet, ex quo facile intelligendum est, quare exigua veneni portio v. g. unicum granum arsenici albi vel mercurii sublimati non perimendi habeat potentiam, præsertim in robustioribus, & cur exigua purgantis vel emetici quantitas firmiores nihil moveat, imbecilliores vero satis valide exercent.

§. III.

Corpora igitur, quo imbecilliora sunt, eo gravius à causa leviori nocente afficiuntur.

Scholion.

Verissima sunt, quæ *Celsus* prodidit *Lib. I. Cap. III. infirmitatem omnibus morbis maxime esse obnoxiam*. In infirmorum vero numero maxime sunt ii, qui per nimias sanguinis profusiones per diuturnos morbos, per famem, per assiduam vigiliam, per nimiam venerem, per gravem animi moerorem & fatigationem vires, quæ optime corpora præservant, & quæ potentiis rerum noxiarum resistunt, exhausterunt. Ejusmodi imbecillia corpora promptissime contagio afficiuntur, inque passionibus epidemias incidunt, vel ab alia graviore causa facile læduntur: ita non semel, sed sæpius observavimus, à validiori sumto purgante, vel à vehementiori terrore fœminas à puerperio, vel ab abortu valde cruento exhaustas in fonticum affectum illum spasmodicum, qui hypochondriaco-hystericus nominatur & maxime omnibus imbecillis corporibus infestus est, incidisse.

§. IV.

Causa eo potentior ad nocendum est, quo subtilioris indolis & majoris molis existit.

Scholion.

Uti in mechanicis celeritas cum massa comparata constituit impetum: ita quæ celerrime agit materia subtilis nocens, mole accedente, maximam in agendo potentiam producit. Omnis veneni & materiæ morbidæ virulentæ ea est natura & indoles, ut ob summam partium aut sulphurearum aut salinarum, causticarum tenuitatem celerrimæ operationis sit, uti in cicuta, nappello, helleboro albo, arsenico, stibio emetico apparet & sicut subtilissima, quæ aëre vehuntur, morborum miasmata id testantur. Per se igitur liquet, vim nocendi eo esse vehementiorem, quo major materiæ virulentæ est moles.

§. V.

Omnes morbis inferendis aptæ causæ agunt vel in partes solidas vel in fluidas subtiliores sive in spirituosas aut humiditas.

§. VI.

Quæ in partes tenuissimas sive spirituosas agunt causæ omnium pessimæ sunt, quia vires & robur corporis, à quibus vita pendet, destruunt. Nihil vero magis partes corporis nostri impetum facientes destruit, iisque adversum est, quam putredo.

Scholion.

Constans est observatio, quod plurimum terroris &

periculi habeant illi morbi, qui putredinem intus alunt, cujus generis sunt omnes malignæ febres, ubi sanguis in intestina crassa effusus ater fit & in foetidissimam abiit putredinem, quæ brevi tempore perimit. Qui sphacelo, qui exulcerato cancro pereunt, ob putredinem, quæ celerrime subtilissimas sanguinis partes inficit & vires adimit, extinguuntur. Narcotica, ut hyoscyamus, opium, stramonium, solanum cito necant, quia ob sulphureum graveolens, & vaporosum, quo fluidas cerebri & nervorum partes inficiunt & contaminant, vires sursum piunt & motus vitales sistunt. Ingens etiam est potentia odorum in partes, quæ motum & impetum in corpore nostro faciunt, quod apparet in odoramentis fragrantioribus, quæ naribus subiecta in omnibus fere, qui nervorum & cerebri imbecillitate laborant, vehementes motuum turbationes in genere nervorum afficiunt.

§. VII.

Celerrime in sanguinem & partes fluidas agunt acida, austera, actu frigida & valde spirituosas, & quia incrassando & coagulando liberum sanguinis, maxime per exigua vasa circuitum destruunt, ad morborum chronicorum generationem plurimum conferunt.

Scholion.

Nihil frequentius in praxi medica occurrit, quam quod homines ex frigido potu ægrotent, inque acuta & chronicas passionibus incidunt, præsertim si ex labore sudanti & calefacto corpori offeratur. Nihil quoque frequentius observatur, quam quod ab acidorum abusu præsertim feminae & vitæ sedentariæ addictæ pessime sese habeant inque mensium suppressiones & spasmodicas affectiones incurrant. Denique nihil familiarius est, quam quod homines ex potu spiritus vini largiori, præsertim matutino tempore & vacuo ventriculo hausto in insanabiles viscerum corruptelas incurrant. Postremo: hæc tria, acida, frigida & spirituosas ad obstructions & concretiones polyposas, quæ magnorum morborum fomites & crebriores causæ sunt, producendas omnium aptissima sunt.

§. VIII.

Agunt quam maxime nocentes & morbificæ causæ in eas partes solidas, quæ motibus præsunt, cujus generis sunt nervoso-membranaceæ & musculosæ, in quibus maxime motus morborum & præternaturales celebrantur.

Scholion.

Etenim partes, quæ motus secundum naturam ordinatos & proportionatos efficiunt, fluidorum circulum regunt, motusque secretorios & excretorios gubernant & sanitatem efformant, sunt utique etiam motuum morbosorum opportunum subiectum atque instrumentum.

§. IX.

Firma & perpetua naturæ lex est, quod omnes motus & functiones in universo corpore tranquille & placide peragantur, si partes, quæ motibus præsunt, quales sunt nervoso-musculosæ, nullam à causa quadam violenta patiantur injuriam. Quotiescunque vero illæ paulo vehementius agitantur, vel offenduntur, protinus insignis turbatio motuum & functionum animi ac corporis subsequitur.

Scholion.

Naturalis enim tonus, robur & constitutio partium, quæ motus obeunt, quam maxime sanitatis negotium & omnium functionum liberum exercitium dispensant. Quare firmum ac statum nobis est, quod in omnibus fere morbis, maxime motibus morborum læsio nervosorum partium occurrat à causis morbificis & nocentibus inducta, adeo, ut quo major sit causæ impetus & violentia

lentia in morbo, eo violentior læsio, spasmus vel motuum resolutio sequatur. Et quamvis intellectu non capere possimus omnium causarum morbificarum agendi modum, sufficit tamen ad scopum medicum, effectus nosse, eosque mechanica ratione produci.

§. X.

Agunt violentæ & perniciales causæ maxime mechanice in fibras corporis nostri motrices, eas vel nimium distendendo aut comprimendo, constringendo aut irritando, pungendo, arrodendo, discindendo, quas actiones mox sequitur mutatio fibrarum in motu suo naturali.

Scholion.

Infensissima autem nervoso-musculosis partibus sunt omnis generis venena, animi commotiones, humores valde acres, caustici, acidi, stales quoque & stagnationes humorum in vasis & extra vasa contingentes. Denique frigidum excessivum valde inimicum est nervosis partibus, quod etiam adfirmat *Hippocrates Sect. V. aph. 18.* item *de humidorum usu* §. 4. his verbis: *frigidum inimicum ossibus, dentibus, nervis, cerebro, dorsali medullæ.*

§. XI.

Recte igitur plurimorum morborum sedem partes nervosæ & membranaceæ, motu & sensu instructæ constituunt.

Scholion.

Morbi capitis, ut epilepsia, variæ insanix species, sensuum abolitiones, dolores & affectus soporosi, membranis, quæ cerebrum & sensoria investiant, firmiter insident. Convulsivæ motiones, quorsum etiam violentæ tusses, asthmata spasmodica, singultus, cordis tremores & palpitationes atroces, vomitiones & abortiones frequentes pertinent, nervosis partibus potissimum inhaerent: sæviores ventris rosiones, dolores colici, iliaci, cardialgici & qui dentes, artus, juncturas, & vias urinarias male habent, nervosis etiam partibus infixi sunt, nihilque dubii est, quin sæva illa, quæ hypochondriacos & hystericas immaniter exercent, spasmodica symptomata in partibus nervosis & maxime in ventriculi ac intestinorum tunicis, inque mesenterii plexibus & iis nervis, qui ad pulmones, diaphragma & præcordia abeunt, sedem instructam habeant. Febriles motus, & qui eos præcedunt, spasmos ad nervorum partiumque nervosarum pathemata referendos esse, nostra est sententia, quam infra fusius persequemur. Enormes illas sanguinis per menses, hæmorrhoides, pulmones aut nares, vel ventriculi venas, perruptiones identidem non sine spasmo & afflictione generis nervosi unquam fieri, certissimum est.

§. XII.

Nulla in universo corpore pars tam fertiles morborum fomites & materias fovet, quam canal is ille nervoso-membranaceus, qui ventriculi & intestinorum nomine venit.

Scholion.

Longus ille canal is, qui alimentorum præparationi & egestioni præest, morbis ac mineris morbosus solennem quasi officinam præbet. Congeruntur ibi diversissimæ indolis, & subinde valde aliena alimenta: confluant quoque ex universo corpore ibi succi excrementitii valde activæ & fermentescibilis indolis, ut sunt lymphæ salivales, mucus ipsaque bilis. Aliis excretoriis oclusis & constrictis cutis tubulis fordes tenuissimæ indolis ad has vias depelli, ibique deponi consueverunt. Si sanguis per venas meseraicas difficiliter regreditur & transineat per hepar, uti fit in hypochondriacis, cachecticis, senibus, stagnatione impurus evadit, & feculentias per glandulas in intestinorum cavitatem

infundit. Præter hæc nulla pars corporis est, ubi ob tot plicas, valvulas, flexuras & anfractus tam prompte, tam facile, & tam diu humores collecti hærent, morantur ipsaque mora pessimam naturam induunt, quam prima in regione, & præcipue in ventriculo, in duodeno, & in coli flexuris. Accedit & illud, quod ipse aer pessimis subinde inquinamenti imbutus cum ipsis alimentis ad has vias immediate delatus ad fermentationes peregrinas, ad flatulentias concitandas sit omnium aptissimus. Ecquis igitur non perspicit, primam hanc regionem ob varii & pessimi sæpe generis partium combinationes, fermentationes & diutinas moras amplissimam esse, imo instructissimam causarum & materiarum morbifarum officinam. Ex quo porro intelligitur, quam prudenter ii medici agant, qui in omni morborum curatione ante omnia ad statum primarum viarum mentem advertunt & prospiciunt, ut per congrua evacuantia, emetica, laxantia, clysteres, vel etiam per temperantia, absorbentia, corrigentia & salia deterfiva & id genus alia morbosifomites ibi contenti sive pessimorum humorum conferta saburra expurgetur.

§. XIII.

Plurimorum itaque morborum domicilium in ventriculo & primis viis collocandum est.

Scholion.

Omnis fere generis tam malignæ, quam benignæ febres maxime omnium vero intermittentes, & ex his quotidianæ, tertianæ, simplices & duplices, biliosæ, cholicæ & quæ lentarum nomine veniunt, fomitem & mineram suam in duodeni flexura positam habent. Pestilentia morbus, & qui Hungaricus dicitur, & malignæ febres castrenses, item quæ epidemice ex aeris inquinamenti infestant, plerumque causam suam primam in regione fovant, & in hac operationem perniciosam primum exerunt. Plurimi affectuum periodicorum, quo in numero maxime habemus pathemata dolorifica & spasmodica, quæ remotas maxime partes exercent, à colluvie pessimorum succorum prima in regione collecta ut plurimum propullulant. Cardialgiæ, summæ circa præcordia anxietates, diarrhœæ, dysenteria, colericæ passionis, convulsiva infantum tormina à materia corrosiva, acida, biliosa, ventriculi & intestinorum tunicis firmiter insidente incunabula sua trahunt. Continuae eructationes acidorum succorum, anxietates constrictoriae & inflationes sub costis nothi in sinistro latere dolorificæ cum alvo constrictiori, quæ continenter sic dictos hypochondriacos exercent, vix aliud quicquam designant, quam huius morbi affectam sedem esse in ventriculo ac primis viis quarendam. Qui caput pessime habent gravissimi affectus, ut melancholia, mania, epilepsia, acerbissimi dolores, convulsiones, vertigines etiam, frequentissime ex male affectis primis viis oriuntur, adeo, ut vitiosorum humorum saburra per alvum vel vomitum expurgata protinus mitiorem naturam induant. Dolores arthritici, podagrici ibi etiam causam suam delitescentem sapissime habent, hinc fit, ut si statim in principio clementi medicina fordes per alvum educantur, lenissime hi affectus incedant. Sed prolixius hæc omnia persecuti sumus in *Dissert. quæ agit de duodeno plurimorum morborum sede.*

§. XIV.

Quia morbi & motus morbosus in membranis nervoso-musculosis maxime resident, & causæ morbiferæ exitiales in has primario agunt facile patet, pro differenti harum partium textura & ad motus anormales dispositione multum discrepare effectus læsionum.

Scholion.

Constanti notavimus experientia, quod corpora, quæ

fibras habent tenerioris & sensibilibioris texturæ, temperaturæ sunt cholericæ & ætatis juvenilis, longe acerbiores dolores, convulsivas artuum tractiones, spasmos, anxietates & febriles impetus experiantur, quam ubi fibræ sunt densiores, laxiores & ubi temperamentum est phlegmaticum, segnius & provecior ætas. Ita interceptio solennis mensium fluxus in juveniculis tenerioris texturæ atroces spasticas & convulsivas nervosarum partium tractiones parit: in torpidis vero & habitus corporis spongiosi & laxioris foeminis decorem faciem, pedes tumidos & insignem languorem potius inducit & morbum cachecticum, qui chloroseos nomine venit, progignit.

§. XV.

Cum igitur infensæ morborum causæ principaliter in partes sensiles & nerveas agant, atque morborum plurimi & præcipui nihil aliud sint, quam acerbæ generis nervosi afflictiones, plurimum utique refert, ut medicus in quovis morbo nervorum systematis dispositionem, imbecille, an validum sit, ad motus anomalos proclive, nec ne, probe noscat.

Scholion.

Supra jam satis ostensum est, motus præternaturales in morbis non solum suis causis deberi, sed maxima ex parte à dispositione subjecti, in quod agunt, dependere. Quapropter inter causas morborum præcipuas partium nervosarum constitutio jure meritoque reponenda venit, quia hæc ipsa activitatem & effectum causarum morbidarum valde immutat atque modificatur. Juvat itaque, si quis morbum curandum suscipiat, ante omnia inquirere, quale sit genus nervosum, validum, an imbecille & valde sensibile, & utrum hic imbecillitas sit inveterata, an recens, à perversis animi passionibus, nimia venere, vigilia, ebrietate, acidorum abusu, vel ab imprudenti medicatione inducta, vel an à nativa & hæreditaria dispositione, vel à præcedenti graviore morbo dependeat, ubi certe omnis erit supervacanea cura, quæ in evacuatione aut remotione causarum materialium est occupata; sed tum potius id efficiendum erit, ut commoda & benigna vivendi ratione ac medicina amissum robur & tonum nervosis partibus restituamus.

§. XVI.

Homo præ omnibus aliis brutis animantibus & copiosius cerebrum & nervos tenerioris texturæ & subtilioris sensationis obtinet; ideo fit, ut longe frequentius ægrotet & gravioribus morbis obnoxius sit, quam quodvis ex animantibus.

Scholion.

Hujus asserti veritatem ipsa experientia, optima rerum magistra, stabilit atque confirmat. Rarissime febres vel epilepticas convulsiones in animantibus animadvertimus, stas sanguinis eruptiones nunquam videmus, neque pathemata spasmica, quibus maxime affligitur genus humanum, in illis locum inveniunt, unde ob horum defectum impetuosiores sanguinis & humorum ad alia loca congestiones & translationes non observantur: sed brutorum morbi magis ex sanguinis & humorum copia, stagnatione, extravasatione, suppuratione & viscerum corruptela ac sphacelatione subnascuntur. Utut vero homo gravius & frequentius ægrotet, quam ullum animal brutum, tamen vita omnia fere animantia exsuperat. Causa, quod frequentius morbis laborent, in sensibili solidarum partium textura, ad motus febriles & spasticos suspiciendos admodum idonea, quærenda est. Quod vero diutius vivant, hæc causa videtur: sanguinis & humorum in corpore animantium stas nisi removeantur, mortem intendunt eamque certissime inferunt: jam autem ea est motuum febrilium & spasmodicorum indoles, ut plerumque salutarem effectum exerant in resolvendis, discutiendis & tollendis perniciali-

bus illis sanguinis & humorum stagnationibus. Quo cognito jam facile elici poterit ratio, quare homines natura sensibiliores & imbecilli frequentius quidem morbis laborent, facilius vero convalescant & diutius quoque subinde vivant, quam qui natura robusti & valentes sunt, atque rarius morbo afficiuntur.

CAPUT VI.

De differente morborum ratione causarum indole atque effectu.

§. I.

Ingens est morborum ratione effectuum differentia, quæ unice à differenti causarum, quæ eos inducunt, indole, virtute atque actione desumenda est.

Scholion.

Omnes quidem morbi in eo conveniunt, quod functiones corporis vivi & sani lædant. Quia vero id differenti modo, gradu atque effectu fit, quærendæ utique hujus differentię erunt causæ, quæ partim in materiæ lædenti perniciosæ natura, partim in locis & partibus effectis, partim in ipsius corporis ægrotantis natura resident. Quanta sit causarum morbificarum differentia, supra jam ostensum est, loca vero, quibus eæ insident, insignem quoque faciunt differentiam, quod jam olim agnovisse videtur *Hippocrates* cum *Libr. de flatibus* §. 4. ait: *morborum omnium unus & idem modus est, locus vero ipse eorum differentiam facit.* Maxime omnium vero differentem morborum naturam atque effectum ipsius corporis, quod ægrotat, natura reddit. Si quod enim illud imbecille vel senile sit, si viscera sint corrupta vel obstructa, si quædam viscera nativa vel inveterata imbecillitate laborent, si venæ sanguinis puri vel impuri copia turgeant, si tonus ventriculi & intestinorum destructus sit, & prima regio vitiosorum humorum, aut vermium copia referta sit, si menses vel aliæ solennes evacuationes interceptæ, si nervorum systema ad spasmos valde proclive: tunc profecto una eademque morbi causa valde discrepantem ratione symptomatum, eventus & curationis producit effectum.

§. II.

Exquisita morborum differentia medentibus scitu admodum est necessaria.

Scholion.

Morborum plena & exacta ratione differentis causæ & effectus cognitio medicum tum in prognosi, tum in curando multum juvat. Nam secundum *Hippocratis* effatum *Libr. de articulis* §. 6. prædictiones morborum splendide sunt ac gloriosæ ex cognitione, quo & qualiter & quando singuli desinant, sive eo vertantur, ut incurabiles fiant, sive curationis spem exhibeant. Tum differens morborum ratione causarum indoles & aptiorem & certioremedentem reddit, ut sciat, quæ medicamenta, an debilia aut fortiora, quo tempore, qua dosi sint porrigenda & an salus vel spes curationis ab iis sit expectanda, nec ne.

§. III.

Quidam morborum sunt acuti & breves, quidam longi, illi ex stasibus inflammatoriis viscerum vel à læsione partium nervoso-membranacearum ab inhaerente acri caustica materia; hi vero potius ex humorum & sanguinis stagnatione & spasmis ortum suum habent.

Scholion.

Plurimum refert, ut medicus sciat, an morbus, quem curandum suscepit, sit acutus vel longus, siquidem ille cito

cito finitur vel cito hominem tollit, neque periculi expers est: nam si stases non discutuntur & removentur, in exitialem putredinem & sphacelum transeunt. In longis morbis secundum *Celsum Lib. III. cap. I. neque sanitas, neque exitium est in propinquo, sed diutius perseverant*; acuti vero periculi non sunt expertes, quia plerumque inflammatorias stases viscerum vel partium nervoso-membranacearum læsiones pro causa habent, quæ nisi natura adjuvante, quæ in hisce morbis optima est medicatrix, per auctiores motus removentur, in exitialem putredinem transeunt. *Hippocrates Lib. I. de morbis §. 18.* in acutorum classẽ maxime reponit inflammatorias & acutas febres, phrenitidem, peripneumoniam, anginam, pleuritidem; inter longos vero refert tabem, alvi fluxum, podagram, arthritidem, cachexiam, coxendicum morbum, stranguriam, in senioribus nephritidem, hæmorrhoides, ani fistulas, in mulieribus fluxum sanguinolentum. Quod pertinet ad curam acutarum illud sciendum est, quod natura ibi plus sibi vindicet, quam ars, quare secundum *Celsum* loc. cit. *magis ignoscendum medico est, parum proficienti in acutis morbis, quam in longis. Hic enim breve spatium est, intra quod, si quod auxilium non profuit, æger extinguitur: in chronicis & deliberationi & mutationi remediorum tempus patet, adeo ut raro, si inter initia medicus accesserit, obsequens æger sine illius vitio pereat*, & monet idem *Celsus*, quod in cura eorum non statim contemnendum sit, si quid non statim profuit, neque statim removendum, si quid paululum saltem juvit, quia defectus tempore expletur.

§. IV.

Sunt quoque morbi vel continui vel intermittentes: illi dicuntur, ubi sine intermissionibus accessiones & symptomata urgent, quia eorum causæ firmiter nervoso generi & partibus membranaceis insident, ubi universalem & continuum quendam spasmum, uti in febre fit, efficiunt. Si vero lædentes causæ à partibus vitalibus paulo remotiores sunt, & in primis viis vel excretoriis consistunt, tunc spasmus intermittunt, & symptomata plane ad tempus quiescunt, postea certis periodis redeunt.

Scholion.

De continuis illud circa praxin tenendum est, quod plus habeant periculi, quam intermittentes, quia continuo & sine intermissione, utut non aequali vehementia, universi corporis functiones lædunt, & vires frangunt, quæ penitus fractæ causis & effectibus morborum removendis non amplius sufficiunt. Accedit, quod in continuis & ubi natura est in motu, valida auxilia nunquam proficiant. Quia vero vacuo tempore vires elanguidæ recolliguntur, & spasticis motibus conquiescentibus omnia tranquilla reddita sunt, non tantum adest periculi & medicamentorum etiam expeditior & certior est operatio, utpote quæ ex male habentibus primis viis longe citius hostiles causas exturbare, quam ex interioribus nervorum & viscerum sedibus propellere possunt.

§. V.

Morborum acutorum alii sunt benigni, alii maligni: in illis non tam pernicialis indolis est causa morbi, neque tanta labes & proclivitas ad corruptionem, quam in malignis, qui facile inclinant in putredinem vitæ & viribus insensissimam.

Scholion.

Quia benigni à causis non adeo vitæ infestis producuntur, symptomata sunt mitiora & tempora sua ac ordinem servant in excretionibus criticis & remediorum etiam viribus magis obediunt, & ex hisce raro pereunt homines, nisi magna ægrotantium vel medicorum culpa. Quia vero malignorum causæ grassantur magis in eas partes corporis, quæ motum & impetum faciunt &

solidorum robur firman, hinc vires, à quibus vita proxime pendet, valde prosternunt & insuetis incedunt symptomatibus, inconstantibus sunt decursus & expertorum etiam remediorum vires eludendo plures perimunt.

§. VI.

Dantur quoque ex morbis chronicis quidam maligni, & hi sunt, si succi valde impuri & in putridam corruptionem proni sunt.

Scholion.

Ita scabies, gonorrhœa, purpura, intermittentes febres, scorbutus, diarrhœa dantur benignæ vel etiam malignæ. Horum indoles ut plurimum a constitutione ipsorum corporum laborantium dependet, si succis impurioribus in corruptionem pronis venæ magis vel minus refertæ, sique partes solidæ adhuc robustæ vel à robore penitus dejectæ sunt. Et quia temporum anni mutationes & præcedentes constitutiones tempestatum præternaturales magna potentia gaudent corporis nostri succos prava diathesi imbuendi & ad corruptionem eos disponendi, hinc efficitur, ut arthritides, intermittentes febres, purpura, quæ alias satis benigne & placide incedunt, pessimos mores induant, neque absque omni periculo sint. Chronicis quoque malignis merito annumeramus cancrum, si in exulcerationem abit, item sphacelum, qui à causa interna fit, quandoquidem summam dyscrasiam & promittitudinem sanguinis & humorum ad putridam corruptionem indicat.

§. VII.

Morborum quidam sunt communes, qui plures uno in loco invadunt & Græce dicuntur epidemii. Quidam non multos communiter, sed separatim sparsimque apprehendunt & sporadici vocantur. Illi a communi causa, nempe aëris vitio & inquinamenti, hi a pravæ vitæ & victus ratione nascuntur.

Scholion.

Epidemii certis tantum temporibus prodeunt, & quia aëris vitiis & alienis exhalationibus & inquinamenti in eo contentis temporumque constitutioni plane præternaturali debentur, fit, ut in uno districtu plures invadant. Quia vero harum mutationum aëris magna est differentia, neque unius ejusdemque semper indolis sunt inordinatæ aëris constitutiones & exhalationes in eo contentæ noxiæ, quæ diversissimo sæpe genio & moribus incedunt, accidit, ut non una semper methodo curationem recipiant, sed quæ uno tempore profunt remedia, alio noceant, neque etiam eadem auxilia omnibus ægris propter diffidentem vim atque naturam conveniant. Solertis itaque & periti est medici, morborum, qui grassantur, origines & causas à priori, id est, ex præcedenti temporum ac tempestatum habitu probe cognoscere, eo consilio, ut postea communes ejusmodi afflictiones convenienti diætâ vel auxilio avertere & corpora ab iis præservare possit. Nihil enim præstantius est, quam sub præternaturali temporum morbosorum constitutione accuratiori vitæ & victus rationi invigilare, ut vel morbi communiter grassantes arceantur, vel corporibus bene sic præparatis modestius & benignius se exhibeant.

§. VIII.

Alia quoque est morborum endemiorum, alia pandemiorum ratio: hi spectant ad universum populum & quasi sunt plebei ac vulgi fecem maxime afficiunt, atque uno eodemque tempore in multos cujusunque sexus, temperamenti, ætatis, conditionis aut generis vitæ fuerint, promiscue grassantur ac deserviunt, cujus generis sunt morbi pestilentes. Endemii vero certis locis proprii sunt & inquilini & ab aëre situ loci, victu consueto, & pravis aquis nascuntur.

Scholion.

Ad morbos pandemios maxime pertinent castrenses, qui

qui ex fame & annonæ difficultate, ex insolentium & eorum, à quibus natura plane abhorret, esu, ex alimentis, quæ uliginosis in locis ac foetidis iusto diutius condita fuerunt, vel situ putrilagineque obfita atque inquinata sunt, vel ex ingurgitatione aquarum stagnantium nascuntur. Hoc genus morbi sunt febres dysentericæ, diarrhœæ, morbus Ungaricus, angina. Ad pandemios referri etiam debent, qui ex frugibus fideratis, ærugine, quæ pestis segetum est, obductis, fecali corrupto & lolio temulento infecto originem suam traxerunt superioribus annis, cujus generis exemplum nuper habuimus, cum ob copiam pluviarum temulentum lolium fecali admixtum miras convulsiones excitavit. Endemiorum, qui certis regionibus vel etiam locis proprii sunt, causæ variæ sunt, quas longa serie enumeravimus & pertractavimus in *Dissertatione de morbis endemiis*.

§. IX.

Sunt quidam morbi contagiosi, quidam contagii plane expertes; illi ex subtiliori miasmate fermentalis indolis proveniunt, quod cum aëre & alimentis in ventriculum descendit & primum succos ibi contentos, postea lympham & sanguinem inficit atque corrumpit.

Scholion.

Ex contagiosorum classe maxime eminent pestis & omnes febres petechiales & catarrhales malignæ, item variolosæ, morbillosæ, dysentericæ. Ex numero chronicorum scabies, lepra, lues venerea, gonorrhœa virulenta, ulcera mali moris sunt. Res notatu dignissima est, quod omnes febres acutæ, quæ ex sanguinis inflammatoria stasi fiunt, item morbi chronici, qui ex viscerum corruptione nascuntur, à contagio sint immunes; contra vero, qui à lymphæ corruptione & putredine fiunt, fermentativæ & multiplicativæ indolis sint, & contagio se propagant. Sanguinis enim putredo spha-celosa sive internis, sive externis partibus infideat, propter infectionem minus est terribilis, quia crassioris paulo est texturæ & sensus afficit, sed quæ in tenuissimo lymphatico humore residet, penetrantioris est naturæ, quia in poros altius se insinuat, & fluidas partes in intestinam similem motionem promptissime abripit.

§. X.

Morbi sunt vel simplices vel compositi; illi dicuntur, qui ab una morbi causâ proxima oriuntur, hi vero sunt, cum plures causæ ad morbum producendum conspirant.

Scholion.

Sæpissime fit, ut compositi appareant morbi; ita epidemii cum endemiis frequenter miscentur, febres omnis generis, item variolæ, morbilli, catarrhales & aliæ grassantes sæpe cacochymicos, scorbuticos, hypochondriacos, vermibus laborantes, arthriticos & lue venerea infectos invadunt, & tunc semper minus tractabiles fiunt, multumque medentibus faceffunt negotii, quia simplici methodo & remediis alias morbo appropriatis non obtemperant.

§. XI.

Differens quoque morborum idiopathicum & symptomaticorum est ratio. In illis morbi causâ functionum turbationem efficit, ubi sedem suam habet. Quodcumque vero causâ morbi in alio loco residet, quam ubi functiones turbat, symptomaticus morbus dicitur.

Scholion.

Ita epilepsiæ & convulsiones, si quando dentium dolori ex eorum eruptione violenta vel atrocioribus intestinorum tormentis, aut calculo vel vermibus superveniunt, morbi habendi sunt symptomatici. Idem fit si

vertigo, si capitis dolor, si tinnitus & difficultas auditus aut melancholia ex male affecto ventriculo, cruditate acida ibi hærente & spasmos ac inflationes concitante subnascitur. Ita quoque vomitus symptomaticus est, si dolori ex calculo supervenit & tussis symptomatica fit, si ab acidorum & acrimie humorum saburra primis in viis congesta oritur. Epilepsia idiopathica est, quæ supervenit graviore capitis perturbatione, si festuca vel fragmenta cerebri membranis infixæ sint; vomitus idiopathicus fit pyloro existente eroso, vel duodeno, humore corrosivo, bilioso oppleto. Tussis idiopathica pulmonalis est, si tubercula, obstructions aut vomicae ibi hærent, vel serum acre à sanguine secedens bronchiorum membranis altius insidet. Hæc distinctio inter morbum idiopathicum & symptomaticum magni momenti est in praxi medica, nam facilius semper symptomaticus tollitur, si causâ in prima regione, ubi facile corrigi & evacuari potest, hæret, ac si altius interioribus visceribus fuerit infixæ. Dein curato morbo principali secundarii & symptomatici sua sponte desinunt & solvuntur. Tandem vero & illud sciendum est, quod morbus acutus aliis acutis seu symptoma superveniens lethalis plerumque fit, quia exhaustis jam à magno morbo viribus, alius magnus superveniens non potest tolerari. Ita phrenitis vel inflammatio ventriculi, quando supervenit acutis, plerumque necat.

§. XII.

Morborum alii sunt vel genuini, alii corrupti. Priores suum genium, typum, progressum atque effectum decenti tempore & ordine observant; posteriores ex perverso laborantis regimine aut errore medentium alium plane & pejorem morem adsumunt.

Scholion.

Corrupti morbi plerumque sunt effectus malæ administratæ curæ, si e. g. intermittens febris ante correctionem vel evacuationem materiæ peccantis intempestive famigerato illo chinæ cortice, vel alia adstringente medicina reprimatur, vel si exanthemata cum febre sociata ut variolæ, morbilli, purpura, paulo calidioribus & expellentibus præpostere tractantur, vel si solennes & statæ excretiones v. g. mensium, hæmorrhoidum nimis validioribus constringentibus intercipiuntur, vel si virulenta gonorrhœa intempestivis adstringentibus aut calidioribus balsamicis præpropere sistitur, aut excretio quædam critica supprimitur. Tunc enim plerumque insueta & deterioris indolis symptomata, ac ordinario fieri solet, sequuntur & tum certe artis & laboris est, corruptos hos affectus pristinae suæ formæ restituere. Pulchra sunt, quæ circa hanc rem suo jam tempore monuit *Celsus Lib. III. Cap. II. multum interest, ab initio quis recte curatus sit, an perperam, quia curatio minus his prodest, in quibus assidue frustra fuit*. Plura de hac materia legi possunt in *dissertat. nostra de conversione morbi benigni in malignum*.

§. XIII.

Dantur morbi recidivantes, qui ad tempus silent, postea majori vehementia & periculo recurrunt, partim ob causam non penitus sublatam & in corpore adhuc relictam, quæ cum tempore vires sumens pejorem effectum producit; partim ob insignem partis affectæ imbecillitatem à morbo inductam, quæ promte, data causâ occasionali vitiosos motus repetit.

Scholion.

Ex recidivantium numero sunt maxime intermittentes febres, si imperite, quod plerumque fit, tractantur, nec perfecte sanantur. Recidivant quoque sanguinis nimie per hæmorrhoides, per pulmones, per ventriculi pruritiones, quæ plerumque ob validiorem spasmus primarum viarum & à nimia sanguinis abundan-

tia vel bilis acrimonia nascuntur. Recidivant quoque asthma, affectus apoplectici, paralytici, capitis dolores, qui ex raptu sanguinis ad caput ob violentos in imo ventre spasmos producantur, qui si partem à morbo priori debilem relictam inveniunt, facile periculosas stagnationes de novo ibi efficiunt. Ipsa quoque experientia deprehendimus, quosdam ex morbis chronicis, qui sublati videbantur, recurrere, ut icterum, hydropem, phthisin, luem veneream, scorbutum, purpuram; in feminis maxime abortus.

§. XIV.

Redeunt quoque certo anni tempore, quo primum invaserunt, quidam morbi, & hi vocari solent anniversarii.

Scholion.

Nullum anni tempus facilius eosdem morbos revocat, quam vernalis & autumnalis, ob sanguinis copiam, quæ spasmos efficit & sanguinis congestiones, quas veteres raptus vocarunt, ad alia loca: Ita maxime narium hæmorrhagiæ, pleuritides, peripneumoniæ, cephalalgia, asthma, in autumnis certo & statò mense sæpius revertuntur ob congestos multos impuros humores, & ob aeris inæqualitatem frequentiore, quæ ingentem imbecillitatem partium antea laborantium denuo producit. Ita quoque redeunt arthritides, podagra, malum ischiadicum, diarrhoea, catarrhales febres, defluxiones rheumaticæ, qui morbi etiam in senioribus, & imbecillioribus vernali tempore statà sua anni tempora servant.

§. XV.

Alia est differentia morborum recentium, alia antiquorum & habitualium, illi in partibus magis fluidis, hi magis in solidis vitium suum positum habent.

Scholion.

Omnes morbi recentes facilius admittunt medicinam, quam inveterati, eo quod vitium, in partibus fluidis consistens, facilius emendari potest, quam illud, quod in partium solidarum, viscerum vel nervorum depravata constitutione hæret. Affectus quoque spasmodici, & qui in habitum atque consuetudinem abiierunt, uti videmus in hypochondriacis & doloribus inveteratis, difficulter & ægerrime sanationem recipiunt. Hippocrates antiquos morbos difficilius curari, quam recentes adserit Lib. de locis in homine §. 47. quia morbos antiquos primum recentes facere oportet.

§. XVI.

Sunt quoque morbi vel hæreditarii vel adventitii; priores in solidæ cujusdam partis vitio & imbecillitate nativa causam suam positam habent. Adventitii prava victus & vitæ rationi, & omnibus, quæ fluidorum crasin destruant, accepti sunt referendi.

Scholion.

In affectuum hæreditariorum numero sunt epilepsia, mania, melancholia, apoplexia, qui in mala & nativa constitutione cerebri fundamentum suum habent. Ex pulmone, si imbecillitate nativa laborat, nascitur hæmoptysis & phthisis; ubi à natura male affectum est hepatis, cachexia & hydrops cum tempore oriuntur: ubi ventriculi & intestinorum tubus nervoso-membraceus à tono suo plane dejectus, & ad spasmos ac flatulentias à natura promptus est, molestissima illa adfectio, quæ hypochondriaca audit, producitur. De congenitis vero morbis scribit Hippocrates Lib. II. prædict. §. II. quod qui hisce corripiuntur, agre ab ipsis liberentur.

§. XVII.

Alia morborum species est congruorum, alia incon-

gruorum; illi dicuntur, qui certis ætatibus, temperamento, sexui, anni temporibus convenientes & familiares sunt: incongrui vero appellantur, si plane hisce non respondent.

Scholion.

De hisce morbis tale iudicium fert Hippocrates Sect. II. aph. 3. 4. minus periculose agrotant ii, quorum vel naturæ, vel ætati, vel consuetudini, vel tempori familiaris est morbus, quam quibus horum nullus affinis cognatusque existit. Et ut rem planiorem faciamus exemplo, epilepsia, variolæ, morbilli, infantili ætate sunt maxime proprii faciliusque tum solvuntur ac leviores sunt: si vero hisce juvenis vel vir laborat, ob strictiorem fibrarum habitum longe periculosior est eventus. Hæmorrhoides & apoplexiæ senibus familiares, si primam ætatem infestant, aliquid monstri alunt. Febres tertianæ ætati conveniunt, & citius etiam tunc finiuntur; ubi vero, si autumnali tempore incidunt, pertinacissimæ indolis sunt: menstruæ purgationes circa quinquagesimum annum discedunt, si vero in senili ætate accedunt, sanguinis eruptiones gravissimæ, & quæ periculo non vacant, esse solent. Pleuritides, si juvenilis ætas est, facile solvuntur, in senili ætate ut plurimum necant. Plura, quæ ad hoc argumentum pertinent, tractavimus in Dissertatione de morbis incongruis.

§. XVIII.

Diversi quoque sunt morbi ratione ætatum, dum quidam in pueritia, alii in adolescentia & juvenili ætate, alii in virili & senili oriuntur.

Scholion.

Observatione digna sunt, quæ de morbis ætatum Hippocrates in Coacis Prenotionibus Sect. III. §. 95. profert: morbi ante pubertatem non sunt peripneumonia, pleuritis, podagra, nephritis, varix circa tibias, fluxus sanguinis, hæmorrhoides. Horum morborum nullum ante pubertatem fore, expectandum est: verum ab anno decimo quarto usque ad quadragesimum secundum naturam corporis morborum omnis generis ferax est. Rursus ab hac ætate usque ad annos sexaginta tres non sunt struma, neque lapis in vesica, nisi prius existat, neque defluxus medullæ spinalis, neque nephritis, nisi ex alia ætate comitentur, neque hæmorrhoides, neque fluxus sanguineus, nisi prius fuerit. Hi usque ad senectutem absunt morbi.

§. XIX.

Memorabile est, quod ætates suas proferant morbos incipiendo à capite & superioribus partibus, successu temporis ad alias inferiores & extremas progrediendo.

Scholion.

In infantia caput maxime petitur, ibique ob nimiam humiditatem & fibrarum flacciditatem, neutiquam vero ob pulsionem sanguinis ad caput, à natura sapiente institutam eo consilio, ut per nares nimia sanguinis copia excernatur, fiunt à stagnatione feri achores & tineæ capitis, crusta lactea, fluxiones ex auribus, epilepsia, glandularum tumores, parotides, ophthalmiæ, lippitudines; in adolescentia gravedines, coryzæ, cephalalgia: in ætate juvenili & virili morbi magis pectoris invadunt, & tum magis tussis siccae, pleuritides spuria & vera, peripneumoniæ, pulmonum vomica, phthisis, circa hypochondria & præcordia spasmi; ardentes febres, alvi constrictiones. In prima senectate hæmorrhoides fluentes vel coecæ, flatulentia, icterus, quartanæ, cachexiæ, calculus renum, colicæ flatulentia; in proveciori vero senectute morbi magis adhuc descendunt in ima viscera & regionem corporis infimam, unde scorbutus, cachexia, stranguria, calculus vesicæ, tenesmus, hæmorrhoides ulcerosæ, podagra fixa, malum ischiadicum, gonagra, marasmus, atro-

phia, mictus cruentus, in foeminis profusiones sanguinis enormes per uterum contingunt.

§. XX.

Morbi ætatum fundamentum suum maxime habent in dispositione solidarum partium ad motum & ad humores commotos & congestos recipiendos.

Scholion.

Etenim in ætate prima & adolescente & juvenili magno impetu humores sursum feruntur propter validum elaterem, & tensionem, ibique postea, si ob partibus jam antea adfectæ imbecillitatem, stasim vel stagnationem efficiunt, facile hos morbos procreant. Quoniam autem paulatim & procedente tempore hic vigor, hic motus, hoc robur partium remittit, imo plane deficit, illud efficitur, ut ob laxitatem partium solidarum magis humores inferiora petant & descendant, ut in abdominis visceribus stagnationes, & ab his morbi chronici & imi ventris fiant.

§. XXI.

Morborum alii sunt sanabiles, alii insanabiles; illorum vitia magis consistunt in partibus fluidis, quæ facilius emendari possunt: horum causæ in tanta labe viscerum positæ sunt, quæ medicina nulla superari potest.

Scholion.

In morbis insanabilibus præcipui sunt hemiplexia vel paralysis inveterata, surditas & gutta serena antiqua, hæctica ex viscerum corruptione, hydrops ascites ex induratione viscerum; cachexia scorbutica ex corruptis visceribus, hydrops pectoris ex polypo cordis vel vasorum pulmonalium, cordis palpitatio vel asthma ex polypo, calculus renum per plures annos affligens, mania inveterata, cancer exulceratus, sphacelus à causa interna, podagra hæreditaria, gonorrhœa inveterata ex prostaticarum fistulis, exulcerationes pulmonum fistulosæ, calculus vesicæ, exulceratio vetus uteri, chlorosis & sterilitas ex polypo vasorum uterinorum, marasmus senilis.

§. XXII.

Distinctio inter morbos sanabiles & insanabiles non caret suo usu in medicina.

Scholion.

Præclara sunt, quæ hac de re prodidit Hippocrates Lib. de articulis §. 6. possit aliquis dicere, extra medicinam talia esse. Quid enim opus est de his, quæ incurabilia facta sunt, amplius tractare? At hoc facere multum refert. Ejusdem enim professionis est, & hæc cognoscere. Non enim fieri potest, ut inter se dirimantur. Oportet enim curabilia ita tractare, ut ne incurabilia fiant, ea intelligentia, ut quam maxime prohibeamus, ne ad hos deveniant.

§. XXIII.

Plurimi ex morbis sunt salutare, nonnulli etiam exitiales: illi restituunt hominem pristinae secundæ valetudini vel etiam corpus præservant à gravioribus malis; hi ad perniciem vel destructionem corporis vergunt.

Scholion.

Morbi salutare dicuntur, quia salutarem habent exitum, dum motibus suis extraordinariis & vehementioribus à causa perniciali morbida corpus liberant, quatenus eam sive discutiendo sive foras ejiciendo à corpore remonent.

§. XXIV.

Morbi plurimi ex salutaribus solvuntur excretionibus sive sanguinis per varia excretoria, sive propulsione ex-

crementitii humoris ad habitum corporis, vel per sudorem aut transpirationem auctam, sive per crebriores dejectiones.

Scholion.

Non omnes morbi, qui cum excretionibus junguntur, salutare semper fine atque effectu gaudent, sed tantum, qui cum levamine fiunt & causam, à qua motus morborum orti sunt, evacuant: si videlicet morbi non tam à qualitate vitiosa & motu inordinato, quam à copia nimia vitiosæ materiæ nascuntur.

§. XXV.

Ex morbis salutaribus eminet maxime febris, quæ summum præsidium & medicina sæpius est corpori illudque non tantum à causa morbifica, sed à graviori morbo, imo morte præservat.

Scholion.

Præclara sunt, quæ refert Celsus de Asclepiade, quod febre ipsa præcipue se ad remedium uti professus sit, & Lib. II. Cap. VIII. scribit: febris, quod maxime mirum videri potest, sæpe præsidio est. Sanguis enim, cum in febre majori celeritate per omnis generis tubulos fertur, ipsas periculosas stases & stagnationes sensim paulatimque resolvit, humorum nimiam copiam consumit, obstructa & constricta excretoria & tubulos tandem aperit, & liberum sanguinis & humorum reddendo circulum, omnes suppressas evacuationes restituit. Quod si itaque hæc præstat, utique talis febris salutaris dicenda est. Porro omnes febres, quæ cum levamine ad partes extremas materiam nocentem exturbant, uti sunt variolosæ, morbillosæ, purpuraceæ, arthriticæ, catarrhales, & quas dejectiones copiosæ comitantur, salutare quoque morbi sunt. Pleræque etiam intermittentes febres, si sibi relinquuntur, & remotio causæ morbificæ arte adjuvatur, nec præpostera medicina aut diæta impeditur, salutis & præsidio potius sunt corpori, quam detrimento, & corpus ab aliis gravioribus malis vindicant. Maxime omnium vero febres catarrhales cum tussi, cum coryza junctæ, omnium saluberrimæ sunt.

§. XXVI.

Morbi & febres, quæ ad exitium & summam perniciem tendunt corporis, sunt, qui à vehementiori inflammatione, à partium nervosarum corruptione & sphacelo interno nascuntur, item inflammationes, quæ aliis gravioribus morbis superveniunt, ut sunt phrenitis & inflammatio ventriculi ac intestinorum, vel illæ febre atque excretiones, quæ à gravissimo animi affectu, à adsumto veneno, à bile caustica, à gravi læsione externa partium nervosarum, à vermibus intestina rodentibus, à flatibus, ab hernia incarcerata, à nimis doloribus fiunt, quia omnes hi morbi & motus morborum non ita sunt comparati, ut causas removeant, sed potius læsiones reddunt graviores & in extremam perniciem ac imbecillitatem vel universum genus nervosum vel certæ partis tonum ac robur præcipitant.

Scholion.

Ex hisce jam omnibus clarissime apparere arbitror, quanta cum cura & solertia motus, qui in salutarem finem tendunt, & qui perniciem adferunt, sint distinguendi; nam in illis naturam adjuvare & ejus negotium promovere debemus, ubi pestilens error est, ejusmodi motus sine respectu ad causam statim sistamus; cum contra perniciales omnes motus, qui nihil salutare præstant, sed vires magis exhauriunt, utique protinus & sedandi & profligandi sint.

§. XXVII.

Distinctio etiam non exigui usus in medicina admittenda est inter morbos frequentiores & rariores. Priores dicuntur, qui crebrius & fere omnes homines invadunt.

De differente morborum ratione caussarum indole &c. 185

invadunt; posteriores tales sunt, qui rarius & tempore & numero eveniunt.

Scholion.

Omnes quidem morbi in genere rariores sunt, id est, minus frequenter homines infestant, si consideramus tantum rerum insalubrium & nocentium, quibus perpetue corpus humanum obiectum atque expositum est, copiam. Causam hujus peculiaris phaenomeni jam supra attulimus, quia ea est insalubrium rerum indoles, ut non proxime, sed potius remote & tantum diffusive ad morborum generationem quidpiam conferant, atque etiam ex his plures causae ad partium solidarum tonum naturalem destruendum conspirare & concurrere debeant. Sed tamen neque tam rari sunt quidam morbi, quia plures frequentissime in praxi eveniunt, & non semel, sed saepius homines per omnem aetatem excruciant.

§. XXVIII.

Inter frequentissimos morbos, seu potius effectus morborum, qui jugulant & à vita tollunt hominem, est interna viscerum corruptio & sphacelatio.

Scholion.

Quo rarior est sphacelus in partibus externis, eo frequentior est in internis; nam nec ullus fere hominum, qui morbo naturali moritur & non violenta vel celerrima morte perit, est qui non ex putrida & sphacelosa corruptione partium internarum moriatur, quod iis quidem, qui rarius vel plane nunquam morbis defunctorum hominum cadavera dissecuerunt, ignotum videtur, neutiquam vero iis, qui frequentius hisce exercitiis interfuerunt.

§. XXIX.

Morbi frequentiores ii sunt, qui maxime à causa communi, ut aëris constitutione fiunt, & potissimum à transpiratione prohibita suam originem habent. Ita saepius intra anni spatium invadunt & plures simul divexant catarrhi, coryzae, gravedines, tussis humidæ, catarrhales febres & rheumaticæ, item diarrhoeæ, cephalalgiae, variolæ, morbilli, febres intermittentes, praefertim tertianæ, dolores artuum & id genus plures.

§. XXX.

Frequentiores etiam sunt ii morbi, qui certis locis ob peculiarem coeli constitutionem, situm regionis, aquarum & alimentorum naturam familiarissimi sunt.

Scholion.

Ita in Westphalia frequentiores sunt peripneumonia, quartana & hydrops. Qui loca maritima incolunt, vel diutius in mari versantur, scorbutum vix effugere possunt. Qui dulci, farinaceo victu utuntur, in febres putridas, malignas, lumbricos, purpuram & exanthemata maligna facile incidunt; qui in locis paludosis degunt, creberrime intermittentibus iisque anomalis exercentur.

§. XXXI.

Frequentissime quoque & graviter homines laborant ex vehementia animi pathematum.

Scholion.

Nullus fere gravior morbus acutus vel chronicus est, quem non animi affectus, multo vero magis cum aliis causis juncti excitare possunt; inde enim apoplexiae, epilepsiae, haemoptyses, narium haemorrhoidumque effrenes haemorrhagiae, febres inflammatoriae ventriculi, ardentes, cholericae, abortus, mensium, haemorrhoidum, alvi, sudorisque suppressiones, & exinde gravia pathemata, cordis palpitationes, tremores, animi deliquia oriuntur.

§. XXXII.

Frequentiores etiam sunt morbi, qui ex pravae digestionis vitio, item ex mensium vel haemorrhoidum defectu vel suppressione oriuntur.

Scholion.

Foeminae frequentius aegrotant, & de variis incommodis conqueruntur, si sunt gravidae, vel eo tempore, quo menses instant: multoque magis affliguntur, si hi deficiunt vel supprimuntur, aut plane in senioribus cessant. Crebrius quoque afficiuntur homines ex pravae digestionis vitio & cruditatibus prima in regione stagnantibus: inde enim nausea, colicae flatulentiae, diarrhoeae cum torminibus, cephalalgiae, vertigines, vigiliae, spasmi praecordiales, inflationes ventriculi, dolores hypochondriorum, alvi adstrictiones: adfectus enim hypochondriacus dictus malum est, si ullum, frequens & familiare, quod plures hominum per multos annos quotidie divexat & excruciat.

§. XXXIII.

Notabile est, quod morbi salutare, id est, qui ad salutem machinae tendunt longe frequentiores sint, quam qui in ejus perniciem cedunt.

Scholion.

Divinae sapientiae tanquam corporis humani architectrici, hoc beneficium debemus, quod plurimi, qui frequentissime homines exercent, morbi liberent corpus à gravissimis malis, dum materia vitiosa vel corripitur, vel per convenientia emunctoria excernitur; quales sunt illi spasmi & affectiones morbosae, quae circa mensium vel haemorrhoidum fluxum infestant, item omnes catarrhales & rheumaticae febres, defluxiones, coryzae, tussis humidæ, diarrhoeae, intermittentes febres, variolæ, morbilli, arthritides, aliaeque febrium species.

§. XXXIV.

Rariores sunt morbi, qui ratione aetatis temperamenti & structurae partium incongrui sunt, ut & graviores chronici.

Scholion.

Ita infantibus vel pueris rarius vel plane non eveniunt podagra, apoplexia, haemoptyses, vomitus cruenti, vel sanguinis ex haemorrhoidibus, vel utero profusiones, nec non maniae, melancholiae; senibus vero rarissime accidunt haemoptyses, epilepsiae, variolæ, morbilli, phthises, lumbrici, spasmi hypochondriaci. Rariores etiam sunt apoplexiae, hemiplexiae, paralytes, mania, gutta serena, melancholia, epilepsia chronica; rarior quoque est vera phthisis & asthma spasmodicum, rarior hydrops & icterus niger, morbus niger, & vesicae calculus; item lepra scabies maligna: quia dicti hi morbi non tam facile oriuntur, sed summam imbecillitatem & dejectum robur partium earumque magnam labem & corruptionem, sanguinisque ac succorum maximam dyscrasiam, & viscerum obstructionem, quae non tam facili negotio ingignitur, subindicant.

§. XXXV.

Differentia inter morbos raros & frequentes non caret in therapia suo usu: discimus enim exinde naturam earum rerum, quae frequenter & graviter nostra corpora afficiunt iisque inimicae sunt, ut majori cum cura earum noxam evitemus.

§. XXXVI.

Hujus generis sunt animi commotiones, aëris repentinae mutationes, frigus, acida, lacticia, & quae excretionem menstruas, alvinas, & cutaneas supprimunt, intemperantia, nimia voracitas, sedentaria vita.

§. XXXVII.

§. XXXVII.

Dantur quoque plurimi ex morbis, qui statō tempore, certō mense, circa lunæ mutationes, vel certa septimana, die, vel etiam hora determinata redeunt, & hi vocari solent periodici; alii vero sunt morbi simplices, omnis circuitus expertes.

Scholion.

Differunt periodici à recidivantibus morbis, quia hi non servant periodos, utut variis de causis revertantur, neque confundendi sunt periodici cum remittentibus, nam dolores ex calculo, item colici, arthritici remittunt quidem, raro tamen certo ac definito tempore revertuntur.

§. XXXVIII.

Omnes affectus periodici habent suum fundamentum in motibus spasmodicis, quare & omnes morbi spasmodici, qui inæqualem circuitum sanguinis, ejusque congestionem in partibus efficiunt, sunt etiam periodici, & inter hos primas partes tenent hæmorrhagiæ.

Scholion.

De mensium & hæmorrhoidum fluxu res jam satis nota & explorata est, quod statas periodos servant, neque ignotum est, has sanguinis excretiones semper cum spasmō partium externarum & lumborum, quo comprimitur sanguis versus uterum & anum, fieri, & quia abortus etiam cum spasmis & nimis uteri hæmorrhagiis invadunt, illi pariter inter affectus periodicos jure meritoque sunt referendi. Nam in recens nuptis non raro tertio mense & circa ordinarium fluxus menstrui tempus, exactissime etiam septimana respondente, non semel vel bis, sed sæpius ter vel quater imo ultra recurrunt. Ita quoque multiplici experientia compertum est, & narium hæmorrhagias & hæmoptyses dari menstruas, & semper cum extremorum refrigeratione & constrictione invadere; neque rarum est, vomitus cruentos intra certum mensis spatium in feminis, quibus menses suppressi fuerunt, reverti.

§. XXXIX.

Quando statæ & solennes excretiones sanguinis per nares, hæmorrhoides vel menses non respondent, & à spasmis fiunt sanguinis & humorum ad partes infirmas congestiones, varia inde pathemata convulsiva, spasmodica, dolorosa periodica nascuntur.

Scholion.

Sæpissime occurrit in praxi, quod interceptas sanguinis per menses & hæmorrhoidas excretiones excipiant, hemi-crania vel ophthalmico hemi-crania, odontalgia, otalgia, item capitis erysipelata periodica, neque minus in pectore asthma periodica, tussis convulsiva & violenta. Circa præcordia vero graves anxietates, dolores, cardialgia, inflationes ventriculi ructuosæ, vomitus, sitis cum ariditate linguæ, ingentes dolores circa lumbos, & os sacrum fiunt, quæ omnia periodice eveniunt, & exacerbantur. Dantur quoque ex mensium defectu epilepsia, & motus convulsivi periodici, circa mensium maxime fluxum provenientes, & postea singulis diebus certis horis redeunt. Neque minus ab eodem fonte hysterica pathemata, per periodos recurrentia, producta vidimus.

§. XL.

Cum spasmi maxime familiares sint tubis nervo-musculosis ventriculi & intestinorum, non mirum est, eos morbos, qui ex spasmō primarum viarum fiunt, periodos & statas sua tempora sæpissime servare.

Scholion.

Ita dolores cardialgici & colici sæpe certis horis de

die recurrunt. Vidimus vomitus biliosos singulis pleniluniis recurrentes per aliquot dies cum summa angustia, anxietate & virium prostratione. Vidimus quoque ex spasmō duodeni icterum singulis mensibus dominica die recurrentem, & per aliquot dies perdurantem. Vidimus non semel, sed sæpius iterumque ex primarum viarum vitio & cruditatibus inde propullulantibus periodicas tussis, & infarctus pectoris certis horis de die vel nocte redeunt, item vertigines, cephalalgias certis horis ingravescentes.

§. XLI.

Febres intermittentes statis & determinatis diebus, imo sæpius horis redire notissimum est.

Scholion.

Paroxysmi intermittentium etiam soboles sunt spasmodorum, qui ex prima regione veniunt, postea partes extremas & corticem corporis, cutem & subjacentes musculos constringunt, sanguinemque ad interiora repellunt, ubi anxietates, difficultatem respirandi & parvum ac debilem pulsum efficiunt, donec motu in contrarium facto à centro ad circumferentiam validiori, hi motus spasmodici discutiantur.

§. XLII.

Periodicorum morborum causa perperam interno agenti, quod determinato tempore motus præstet, vel fermento morbifico, aut ætheris peregrini per lunas vel sidera influxui adscribitur: sed potius partium imbecillitati, quæ stagnationi & corruptioni humoris, & inde producto spasmō occasionem subministrat, debetur.

Scholion.

Supra jam in *Cap. III.* §. 27. 28. 29. 30. 31. latius deduximus, spasmos semper relinquere post se quandam imbecillitatem, quæ deinde facile ad stagnationes occasionem subministrat, & ad motus jam aduertas fibras producere potest, id quod etiam suo calculo adprobare videtur *Galenus in Libro II. de differentiis febrium, dum omnes accessiones ægritudinum ex membrorum dispositione male affecta ortum habere prodidit.* Atque etiam inter certas & statas leges microcosmicas referenda hæc est, quod natura ad partes infirmas maxime humores ablegare soleat, præsertim si illa in spasmis ac motibus violentis est occupata. Ita frequentissime evenit, quod in hisce partibus, quæ scarificatione vel incisione venarum aliquoties affectæ fuerunt, certis temporum intervallis, idque ex redundantia humorum, tensivi & pungitivi dolores ac languores percipiuntur. Observavimus, à contusione dorsi & scapularum circa æquinoctialia tempora in partibus affectis ingentes dolores recruduisse. Si dens vitio laborat & cariosus est, facile recrudescit dolor intra certum temporis spatium, præsertim circa vesperam; exempto autem dente omnis dolor quiescit. Id quod unicum exemplum nos potest deducere ad cognitionem causalem repetitionis febrium; necessario enim statuenda videtur mala in primis viis diathesis, quæ infirmitas stagnationem & motum humoris facit, qui postea causa febris est: sublata vero hac prava diathesi & vitio partis correcto necesse est, ut motus & febris provocatio cesset.

§. XLIII.

Morborum periodicorum causæ investigatæ clarissime medentem instruant, quod nec valentiora remedia, quæ spasmos concitant, neque opiata & narcotica, omniaque ea, quæ robur partium infirmant, locum habeant, sed potius roborantia, nervina, item diaphoretica cum clementioribus anodynis mixta magnum solatium adferant.

Scholion.

Pessime periodici affectus tractantur, præsertim si adufecti

adsuefacti & habituales sint, per valentiora emetica, purgantia & sudorifera; hæc enim omnia robur partium valde infirmant, & spasmos magis adaugent, tantum abest, ut eos sistant. Deinceps ea est ratio atque indoles motuum adsuefactorum, ut à leviter nocente causa revocentur, cui removendæ tam valida remedium genera minus quadrant. Neque etiam expedit, dolores vel convulsiones fortiori medicina sedativa tractare, quia in principio quidem alleviamentum quoddam præstant, postea vero propter infirmitatem, quam partibus nervosis inducunt, peioris indolis fiunt, & crebriori usu facile in cachexiam, tumores œdematosos ac lentas febres ægros præcipitant.

§. XLIV.

Datur etiam singularis species morborum, in quibus ad externas partes propulsa materia peccans stationem suam relinquit, & ad interiora revertitur, & hi vocantur retrogradi vel retrocedentes.

Scholion.

Variant multum inter sese, retrogradi qui adpellantur morbi. Quidam enim ex iis ad summam cutem, ejusque superficiem tantum feruntur, ut sunt morbilli, variolæ, purpura, scabies, crusta lactea, quidam vero profundius inhaerent partibus carnosiss & nervosis ipsisque glandulis, cujus generis sunt erysipelata, bubones veneri, pestilenciales, carbunculi, tumores podagrici, veneri, œdematosi, antiqua ulcera.

§. XLV.

Retrogradorum morborum pessima est ratio atque eventus, quia materia ad superficiem corporis detrusa indolis subtilioris salino-sulphureæ postea ad interiora delata nervosas partes occupans, gravissima pathemata excitat.

Scholion.

Quod si enim materia retropulsa ad cerebrum ejusque membranas delata fuerit, graves affectus capitis, ut phrenitides, convulsiones epilepticæ, lethargus, hemiplexia, aphonia, gutta serena, mentis & memoriæ alienationes suscitantur. Si vero ad præcordia delata nervosas ibi fatigat partes, graves pectoris morbi, ut asthma convulsivum, tussis ferina, catarrhus suffocativus, difficilis & ægra cum anxietate & angustia spiratio & ingens virium collapsus resultant. Et si ventriculi & intestinorum tunicis firmiter inhaerescat, atrocitas ventris tormina, cardialgiæ & periculosa harum partium inflammationes, singultus, diarrhœæ oriuntur. Ex quo intelligitur, quantum periculi omnes illi morbi habeant, qui ab exterioribus ad interiora convertuntur, id quod jam olim probe annotavit Hippocrates in Coac. §. 103. *erysipelas foras quidem accedere commodum est, intro autem converti lethale, invertitur autem intro, cum*

disparente rubore pectus gravatur, & difficilem spirationem habet. Et quod de erysipelate hic dictum est, id de omni affectu externo, qui cum quadam inflammatione & dolore jungitur, intelligendum venit. Quod vero tantum periculi hi morbi alant, ex eo fit, quod materia morbifica virulentæ indolis ad interiora relegata nervosas maxime partes obsidet, in quibus gravissima pathemata producit, nec tam facile ex iis rursus evelli potest. Quapropter oportet utique medicum hos omnes morbos, qui facile ab exterioribus ad interiora revertuntur, cautissime tractare, & ab omnibus iis, quæ ullo modo repellendi facultate pollent, uti sunt externa constringentia, item purgantia, emetica, sanguinis missiones, quæ ab ambitu corporis humores revocant, abstinere. Contra nihil præsentius est, quam ejusmodi in morbis corpora in perpetua leniori & æquabili transpiratione servare, & omni modo à topicis sibi cavere.

§. XLVI.

Morborum alii sunt cogniti sive manifesti, alii incogniti sive occulti: illi dicuntur, quorum causæ cognitu faciles sunt, hi vero vel novi sunt, vel eorum natura, causæ, eventus adhuc latent.

Scholion.

De novis & incognitis morbis insignis occurrit locus in *Præfatione Cornelii Celsi* pag. 14. dum ait: *rarius, sed aliquando morbus quoque ipse novus est, quem non incidere manifeste falsum est, cum ætate nostra quædam ex naturalibus partibus carne prolapsa & arente intra paucas horas exspiraverit, sic ut nobilissimi medici neque genus mali, neque remedium invenerint, quos ideo nihil tentasse judico, quia nemo in splendida persona periclitari conjectura sua voluerit, ne occidisse, nisi servasse videretur.* Veteres illi morbos, quorum causæ erant occultæ, *θεῖον τι* sive divinum quid in se continere judicabant, & tales fuerunt, quas ex temperaturæ facultatibus minus explicare poterant, unde huc referebant imprimis epidemios, & qui ex aëris infesta & virulenta quadam qualitate nascebantur. Cæterum Hippocrates *Lib. de loc. in homine* §. 461. de curatione morborum incognitorum id egregie monet, ut, si quis morbum non cognoscat, medicamentum bibendum non forte præbeat. Illud saltem hoc loco adjicimus, quod plurimi morborum & ratione indolis & causarum & ratione ægrotantis corporis, adeoque etiam ratione curationis sint prohi dolor incogniti non ex se & sua natura, sed propter ignorantiam eorum, qui divinam hanc artem temerario plane ausu exercent. His itaque & ego auctor suasorque sum, ut cum prodesse nequeant, si non nocere velint, debilissimas semper medicinas porrigant, quibus maxime diaphoretica fixiora, clementer laxantia & analeptica temperata annumero.

PHILOSOPHIÆ CORPORIS HUMANI MORBOSI,

S I V E

PATHOLOGIÆ GENERALIS,

PARS II.

De rerum nocentium & insalubrium natura, proprietatibus & viribus in corpus humanum, item de omnibus iis, quæ ullo modo corpora ad morbos reddunt proclivia.

CAPUT PRIMUM.

*De rerum insalubrium & nocentium natura
& viribus, speciatim de affectibus animi.*

§. I.



Aufis morborum proximis exquisitius enucleatis & perspectis, tractationis nostræ ordo & methodus omnino requirit, ut jam rerum, quæ functiones corporis lædunt & ejus conservationi resistunt, naturam & vires ad causarum morbificarum originem & generationem inquirendam ea, qua par est, accuratone & sedulitate investigemus atque evolamus.

Scholion.

Cum morborum causæ, quæ corporis nostri motus, secundum naturam proportionatos inque æquilibrio constitutos, turbant ac pervertunt, non à se existentiam suam habeant, nec casu quodam incomprehensibili, sed ab aliis causis præexistentibus & antecedentibus progignantur & sustententur; harum utique causarum primordia atque originem sollicita indagine ut perscrutemur, necesse est.

§. II.

Scientia earum rerum, quæ insalubres sunt, & corpori humano vivo ac sano nocent, atque ad causarum morbificarum productionem multum faciunt, medicorum ad præservationem, tum ad curationem morborum summe utilis & necessaria est.

Scholion.

Rectissime hinc definitur medicina ab ipso *Galeno*, quod sit rerum salubrium & insalubrium scientia. Etenim non sufficit, medicum earum tantummodo rerum, quæ saluti sunt corpori, ejusque sanum statum & valetudinem prosperam tuerentur, notitia esse imbutum, sed id etiam potissimum requiritur, ut insimul illas res plene & exacte cognoscat, quæ miserandis doloribus & variis ærumnis corpora humana objiciunt, animo vigorem & integritatem demunt, ac morbos & præma-

turam mortem inferunt. Nam quia præservatio à morbis circa remotionem & depulsionem causarum, quæ illis ingignendis aptæ sunt, unice versatur: facile quisque medicorum solertissimus videt, scientiam harum rerum, quæ corpori officiunt, & vitæ ac sanitati adversantur, ipsi esse pernecessariam, & ad suam perfectionem non parum contribuere.

§. III.

Uti causarum morbificarum multiplices sunt classes atque genera eorumque quædam celerrime & vehementissime, quædam tardiori gradu & longiori tempore vim suam nocentem exerunt; alia vero tantum partium dispositionem ad morbos inferunt & remote concurrunt: ita etiam non unius ejusdemque sunt generis & virtutis res exitiosæ, siquidem nonnullæ citissime & efficacissime inque minima mole operationem patefaciunt, nonnullæ tardius inque majori mole & longiori tempore id præstant: aliæ vero tantum dispositive ad causas morborum proximas ingignendas concurrunt.

§. IV.

Quemadmodum dantur morborum causæ, quæ motus partium solidarum, à quibus sanguinis circulus, vita, sanitas cum secretionibus & excretionibus congruis dependent, proxime ac immediate invertunt ac destruunt: ita similiter etiam dantur, res, quæ hoc præstant, nocentissimæ, cujus generis sunt graves animi commotiones & omnes illæ materiæ, quæ veneni vim habent, & cum magna vehementia ac celeritate inque minima mole solidorum motus destruunt.

§. V.

Plethora & cacochymia magnæ sunt morborum, præsertim chronicorum, causæ, hinc omnia ea, quæ ad nimiam redundantiam, item summam impuritatem & corruptionem sanguinis & humorum aliquid conferunt, in classem insalubrium & nocentium jure meritoque referri debent.

Scholion.

Si probe naturam & vires causarum morbificarum cognitas atque perspectas habemus: utique nobis in facili erit earum rerum naturam explorare, quæ infestæ sunt corpori, & causas illas stabilire.

§. VI.

§. VI.

Quia excretiones sanguinis tum puri, tum impuri consuetæ interceptæ, itemque ordinariæ evacuationes superfluarum & excrementitiarum fordium per urinam, alvum, & cutis porulos cohibetæ ad productionem plethoræ, & ad generationem & augmentationem impuri ac lutulenti sanguinis & lymphæ variarumque excrementitiarum fordium in corpore plurimum contribunt: facile hinc potest intelligi, omnia illa, sive ex classe rerum naturalium, sive non naturalium & præternaturalium sint, quæ salutare illas sanitatis conservatrices excretiones ullo modo impediunt, pro rebus maxime noxiis & infensis esse habenda.

Scholion.

Ad hunc censum pertinent nimia ciborum copia, acidorum & viscidorum abusus, aër valde humidus & frigidus, vita laboris & motus expers, incongruus potus, cibi plane corrupti & alieni, atque id genus plura.

§. VII.

Cum dejectio virium in universo corpore vel atonia & infirmitas certarum partium ad stagnationes humorum, obstructiones glandularum, & viscerum corruptiones, adeoque ad passiones chronicas inferendas & acutas funestas reddendas multum contribuant: hinc facile concludendum, omnia ea, quæ corpus infirmant, & partium tonum ac robur dejiciunt, ut sunt præcedentes morbi vel imprudentes remediorum administrationes, res esse nocentissimas & ad morborum, ipsiusque adeo mortis generationem aptissimas.

§. VIII.

Quoniam morbi non solum ex iis rebus, quibus ad vitæ sustentationem quotidie opus habemus, in corpore nostro progignuntur, sed subinde etiam ad morborum productionem multum conferat peculiaris alicujus corporis structura & natura: hinc utique à medico & ætas & sexus, & temperamentum & habitus corporis & nativa atque hæreditaria, seu à parentibus suscepta partium constitutio, ipsa quoque consuetudo, quæ altera est natura, probe consideranda sunt, ut inde certus reddatur, ad quos morbos singula hæcce disponant.

§. IX.

Inter res nocentissimas, & quæ celerrime corpora afficiunt, & morbos, imo mortem inferunt, jure optimo valde gravia animi pathemata sunt referenda.

Scholion.

Tanta est affectuum animi vehementia, ut celerrime corpus etiam firmissimum & integra sanitate fruens lædere, ejusque motus ordinatos, qui vitæ præfunt, destruere, pervertere & gravissimos morbos, imo subitam mortem inferre possint; hinc fit, ut potentia ac celeritate nocendi validissima etiam venena superent, quæ non tam cito mortem inferunt, vel in momento in actiones vitales grassantur, quam subitus & vehemens animi affectus, qualis est ira vel terror.

§. X.

Animi pathemata in fluidum nerveum, hujusque ministerio in partes nerveo-musculosas, quæ motuum directioni præfunt, proxime & immediate agunt.

Scholion.

Affectus animi maxime ac primario afficiunt cor & arterias, deinde operatio eorum transit in membranas cerebri, ventriculi & intestinorum, tum in ductus biliosos & urinosos præcipue vero in tubulos & fibras subcutaneas; hæ enim partes singulæ ex sensibilibus membranofo-nerveis constructæ sunt. Quod ve-

Frid. Hoffmanni Oper. Tom. I.

ro in fluidas partes animi pathematum vis & operatio sese exferat, id inter alia ex eo clarum fit, quod per salivam, per lac nutricum longe gravissima mala in infantes inde transferri queant.

§. XI.

Quemadmodum motus solidorum ac inde dependens fluidorum triplici modo læditur, dum vel vehementior & celerior fit contractio nervoso-musculosarum partium corporis, & motus ab internis ad exteriora tendit: vel ab exteriori partium constrictione motus humorum ad interiora vergit, vel tonus & robur partium plane dejicitur & perit, atque ob atoniam & imbecillitatem circuitus sanguinis & humorum immittitur: ita etiam affectus animi simili plane modo operantur, & motus solidorum ac fluidorum turbant, uti ex mox subjungendis evidentissime patebit.

Scholion.

Præclare de operatione affectuum animi scribit *Pergamenus Lib. II. de caus. sympt. Cap. V.* ubi hæc verba leguntur: *est quædam ex primis & ut aliquis diceret, principalissimis moventibus ipsa naturalis caloris intro forasque delatio multas animi passiones, sequens, simul autem cum ipso & spiritus & sanguis modo intro & ad principium feruntur ac contrahuntur, modo foras distenduntur & funduntur. Et licet motus hos evidenter perspicere cum in aliis multis, tum in ipsis animi perturbationibus e.g. terrore & ira, ille intro & ad principium spiritum & sanguinem una cum refrigeratione corporis superficialia subducit & contrahit, hæc vero foras agit, fundit & calefacit.*

§. XII.

Ira ejus est indolis, ut vehementiori partium nervoso-musculosarum contractione totum systema nervosum celerrime commoveat, & systolen cordis eique adnexorum vasorum cum arteriosorum, tum venosorum, & tonum etiam partium fibrosarum universo in corpore mirifice adaugeat, ut adeo recte à veteribus parva febris, infania, ac momentanea epilepsia dicta fuerit.

Scholion.

Equidem post iram manifestum motus cordis augmentum, pulsus intensio, respiratio concitatio, sitis, calor, inflatio & rubor faciei, arteriarum capitis, præsertim circa tempora, major pulsatio & intumescencia, oculorum ferocia, tremor extremarum partium & actionum mentis præcipitantia observantur, quæ omnia luculentum satis de impetuosiori fluidi nervei & sanguinis motu edunt testimonium. Neque parum ad hujus rei illustrationem confert illa observatio practica, qua edocemur, nihil tam celeriter febrem acutam biliosam intermittentem inflammatoriam concitare posse, quam ipsum iracundiæ vehementiorem affectum.

§. XIII.

Deinceps is quoque iræ liberioris & à metu, tristitia vel vindicandi libidine non interruptæ effectus est, ut sanguinem à centro ad circumferentiam moveat, & hoc modo humores viscidos, & hinc inde in vasis stagnantes & firmiter hærentes resolvat, discutiat, & excrementa ad habitum corporis externum detrudat. Et ob hunc motum resolutorium & excretorium adauctum accidit, ut iracundiæ affectus interdum saluti sit corporibus, frigidioris præsertim temperamenti, & in morbis sic dictis frigidis, & qui ab humorum infarctu ac nimia mole proficiuntur.

Scholion.

Sicuti febris sive intensior solidorum & fluidorum motus, quo cum impetu sanguis circumvolvitur, ad viscidorum humorum resolutionem & materiæ hetero-

geneæ ad habitum corporis protrusionem maxime confert: ita illud ipsum etiam contingit in ira, unde animadvertimus, purpuram, variolas, morbillos, erysipelata ab eadem fuisse excitata, & graves ac contumaces morbos ejus prudenti proritatione fuisse sanatos. Quare *Hippocrates Lib. II. Epidem. Sect. IV.* hoc remedii genus commendavit in iis, qui ex assiduo leguminum usu crurum impotentes facti fuerunt, dubio procul ad viscidum sanguinem resolvendum & calorem ac spirituscentiam sanguinis reparandam. Dicit enim gravissimus auctor: *diligentia adhibenda est, ut excandescencia inducatur, & coloris reparandi, & sanguinis in habitum corporis invitandi causa.* Et alio loco ita fatur: *ira frigidis remedio est.* Cujus in sententiam eunt plures alii gravissimi viri, ut passim hinc inde annotatæ observationes contestantur. Ita paralyfin inveteratam & singultum enormiorem iræ beneficio sanatum describit *Valeriola Lib. II. Obs. IV. Dan. Beckerus de cultivoro Borussico Quæst. IX. & Crato Lib. VI. Consil.* in paralytico & phlegmatico iram cum insigni euphoria proritari adferit. *Horstius Lib. III. Consil. Epist. XII.* refert: triennalem paralyticum, qui ob præsentiam hostis in furorem fuerit actus, è lecto repente profiliisse, & cum fociis civibus hostem invasisse. Porro etiam in aliis affectibus confirmatis mirabilem iram præstitisse opem observationes testantur. De iræ efficacia in podagrico quodam egregiam communicat observationem *Pechlinus Lib. III. Obs. 28. & Bartholin. in Hist. Anat. Cent. VI. Hist. XXVIII.* Quartanas & tertianas febres contumacissimas subito, & vehementi iracundiæ affectu sublatas fuisse memorant *Miscell. Nat. Curios. Dec. II. A. III. Obs. 93. it. Paræus Lib. I. Cap. XXIII. Valeriola Lib. II. Obs. IV.* adstrictionem alvi ab ira solutam refert. Conf. quoque *Miscell. Nat. Curios. Dec. II. A. V. pag. 57.* mutum ira loquentem vid. *in Act. Hafniens. Vol. I. obs. 81.* Illud certum est, iram minus esse perniciosam, quam reliquos animi affectus vid. *Baco de Verulam. in Hist. Vit. & mort. pag. 249.* Cavendum vero maximopere est, ne in choleris, vel etiam in cachecticis, & ubi male constituta sunt viscera, itemque ubi ad erysipelas, ad hæmorrhagias, ad apoplexiam, & ad metastases sanguinis ad caput, ad affectus spasmodicos inclinant corpora, ejusmodi curam adhibeamus.

§. XIV.

Uterius ira spasmodica partium, qua agit, stricturam vim suam inprimis in ventriculum & intestina, ceu partes valde nervosas & membranaceas exquisitoris, sensus & motus, exerit, & è facili inflammationem ibidem subinde periculofam, imo lethalem efficit.

Scholion.

Nihil frequentius in praxi occurrit, quam ab ira inflammationem pati ventriculum & intestina, eamque cumprimis lethalem fieri, si mox potus frigidus paulo avidius superingeratur, vel purgans, vel emeticum propinetur ad bilem ab ira, ut vulgo putant, commotam è ventriculi sinu exturbandam. Et facillime quidem hoc contingit in subjectis debilibus, qualia sunt hypochondriaco malo obnoxia. Ita in virgine hypochondriaca post iracundiam notavimus inflammationem lethalem, quæ duravit viginti quatuor dies, cum delirio & circa mortem secessu sanguinis per alvum. Aucta fuit inflammatio ultimis ægritudinis diebus, cum denuo iracundia excanduisset, & notabile etiam erat in hoc subjecto, quod feces per intestina inflammata & sphacelata ad colon transferint. Ceterum non semel, sed aliquoties vidimus, à purgantibus vel emeticis post graviolem iracundiæ affectum exhibitis omnia versa fuisse in deterius, & mortem acceleratam. Neque enim aliam, quam nocendi facultatem hoc in statu exserere possunt memorata pharmaca, siquidem eorum

operatio spasmi tunicarum ventriculi & intestinorum absolvitur. Cane igitur & angue pejus vitanda sunt in affectionibus & symptomatibus ab ira productis omnia purgantia drastica & emetica; quo in casu potius exhibere convenit blanda antispasmodica, diaphoretica & nitrosa, bilem corrigentia & abstergentia, neque minus laxantia benigniora rhabarbarina.

§. XV.

Agit insuper iracundiæ affectus in membranas cerebri & alia viscera, ubi sanguis iræ impetu celerrime adpulsus regredi nescit, eamque ob rationem subsistens inflammationes periculosissimas efficit.

Scholion.

Quod si ad caput impetuosius compellitur sanguis, in meningibus exoritur phrenitis. Observavimus ingens sanguinis profluvium per venas sedis in hypochondriaco accedentem iram vehementem ita constrinxisse colon, ut funis instar contortum & angustatum fuerit, & sanguinis ad caput appulsus augendo delirium convulsivum funestum in viro generoso induxerit. *Hildanus Cent. I. Obs. XVII.* meminit juvenis, cui caput vulneratum & cranium fractum erat, qui ex sola ira in phrenesin incidit ac mortuus est. Cranio post obitum aperto inventæ fuerunt cerebri membranæ inflammatae, venæque & arteriæ sanguine congrumato turgentes. Si ad pectus fertur sanguis non raro ab ira exorbitante, oboritur pleuritis & peripneumonia, ad abdomen delatus suscitatur inflammationem hepatis. Erysipelas quoque subsequi iram, præsertim in cacoehymicis & scorbuticis corporibus, res familiarissima est.

§. XVI.

Peculiarem vero vim ira exercet in ductus biliosos & hepatis, adeo ut eorum strictura fortiori facile hepatis scirrhum fiat, imo calculi in cystide ac ductibus biliariis generentur, quia liber motus & effluxus bilis hac ratione impeditur.

Scholion.

Præsertim hoc accidit ab ira pessimæ notæ, quæ cum tristitia aut metu, ubi vindicandi occasio aut facultas deest, conjungitur. Propter constrictionem quoque horum ductuum icterus fit, qui facile in vesicæ biliariæ calculos definit, quemadmodum id ex sectionibus cadaverum eorum hominum, qui ictero demortui sunt, apparet.

§. XVII.

Quando bilis ab iræ affectu vehementius commovetur, & copiose ex ductibus biliariis & cysticis ad duodenum & ventriculum effunditur, ex ejus ibidem facta stagnatione & concepta ob diuturniorem moram acedine, nausea, vomitiones, diarrhœæ, cholericæ passionis, cephalalgia, anxietates, febres biliosæ continuæ & intermittentes suscitantur.

Scholion.

Hinc est peculiare illud iracundorum symptoma, quod in latere dextro sub scrobiculo cordis sentiant dolorem quandam constrictivum, in ore autem amarorem. Originem suam hæc pathemata non aliunde ducunt, quam à motu bilis ejusque effusione in intestina impetuosiori; dum ductus biliarii, nervosis ac musculosis tunicis contexti, ab influxu spirituum animalium citiori nimium compressi ingentem quantitatem bilis exonerant & infundunt duodeno, unde etiam dependet inclinatio ad vomitum & diarrhœa, quare *Hildanus Cent. VII. Obs. XVIII.* annotavit, alvum subductam fuisse ab ira, ac si pharmacum adsumtum fuisset. Si bilis acrimonia delinquit, & à frequentiori hoc adfectu bilis nimium effunditur, intestinorum & ventriculi erosiones cum lenta febre sequente non raro vidimus.

§. XVIII.

§. XVIII.

Tandem & illud proprietatibus iræ accensendum venit, quod intensiori partium solidarum & fluidarum per eam reddito motu sanguis copiosior cum impetu ad partes pellatur, quas deinceps nimium & venarum ibi existentium orificia aperit.

Scholion.

Constat experientia practica, iram maximam habere facultatem, in consuetis & dispositis maxime enormes sanguinis excretiones, five per nares, five per arteriæ pulmonalis aperturam, five per venas ani, & in feminis per uterum excitandi. Quotidianum etiam fere est, vultum statim rubore suffundi, & venas capitis præsertim frontales, mirum quantum intumescere, mox etiam sanguinem naribus, si hæc hæmorrhagia olim juveni consueta fuit, effundi. Ita vidimus feminas ab iracundia in uteri hæmorrhagias incidisse, vel etiam hæmorrhagias narium passas fuisse. Et hæc quoque est ratio, quare in senibus & plethoricis vehemens ira apoplexiam sanguineam, quæ fit ab arteriis plexus choroidei in capite perruptis, non raro producat.

§. XIX.

Terroris effectus est spasmodica partium externarum contractio, qua sanguis à circumferentia ad centrum propellitur, & omnis generis excretiones supprimuntur; hinc disponit maxime ad morbos, qui ab excretionibus sanguinis sufflaminatis ejusque regurgitatione ad interiora proveniunt.

Scholion.

Observamus à terrore subito & vehementi habitum corporis externum constringi, unde vasa detumescunt, venis plane nullis vel minimis tantum apparentibus, facies pallorem contrahit, partes externæ refrigerantur & contremiscunt. Et cum sanguis sic cum impetu ruat ad cor & pulmones; excitat ibi, mole sua premere, anxietates intensas, spirandi angustiam, pulsus debilitatem & frequentiam. Et quoniam cor ab onere hoc sese expedire conatur, fluidum nerveum non raro maximo cum impetu in ejus musculos fertur & convulsivum motum ejus five palpitationem, quæ fere individuum est signum terrore affectorum, producit. Quanta vel ex solo terrore spirituum in sanguineo fluido condensando & præcipitando sit potentia, docet *Malpighius in Obs. de Polypo*, ubi refert, virum quendam robustum terrore percussum, subito in pulsus inæqualitatem ac obscuritatem incidisse, & recurrente ingenti spirandi difficultate brevi tandem per sputa quandoque rubri sanguinis portiones, quandoque copiosa alba quædam frustula excrevisse, postremo turgentibus superioribus & coercita sanguinis copia suffocatum interiisse. Terrorem quoque cor virtute sua spoliare, horroremque febris similem inducere, effatum est *Mæbii in Institutionibus Lib. VII.* siquidem in febris principio itidem partes extremæ spasmodice constringuntur, ut sanguis non libere possit in illas influere, sed potius retrogrado motu ad cor pellatur, ubi subsistens anxietates efficit ineffabiles.

§. XX.

A spasmodica partium ob vehementiam terroris contractione etiam illud dependet, quod omnis generis evacuationes vel retardentur vel penitus sistantur.

Scholion.

Nihil frequentius in praxi occurrit, quam à terrore subito exorto alvum fieri adstrictiorem, ita ut vel quinque vel sex diebus quandoque non deponatur; transpirationem quoque imminui, mensium, lochiorum, hæmorrhoidum & urinæ suppressionem accidere sæpe momentaneam. Neque novum est in puerperis & lactantibus lac in mammarum coagulari & purpuram in febribus.

Frid. Hoffmanni Oper. Tom. I.

bus acutis vel exanthemata in variolis, morbillis retrocelli, uti produnt *Miscell. Nat. Curios. Dec. II. A. IX. obs. 18.* Vidi non semel, sed sæpius atque iterum, fonticulos & ulcera antiqua à vehementi terrore non sine periculo consolidata, asthmate & colica convulsiva subsecutis.

§. XXI.

Singularis quoque observationis est, quod terror non tantum fluxum sanguinis cohibeat atque sistat, præsertim in juveniculis virginibus & quibus venæ sunt exiliores, sed etiam quandoque eundem resuscitet.

Scholion.

Non semel, sed sæpius in praxi annotavimus, mensium fluxum nimium modo cessantem, terroris vi illico fuisse resuscitatum; neque minus lochia post abortum vel partum, immoderate fluentia, si videantur jam sanata & in statum pacatiorem deducta, ex terrore confestim revocari, quod forsan accidit ob nimiam vasorum uterinorum relaxationem, qua impetus sanguinis, à partibus exterioribus repressi, ad imbecillia vasa uteri urgetur.

§. XXII.

Quia terror reprimat sanguinem ad interiora ejusque motum plane inæqualem reddit: hinc is certa in parte congestus pro diversitate locorum, quibus insidet, gravia excitat symptomata & multiplices affectiones.

Scholion.

Si in capite ejus fit congestio, non raro apoplexiæ, hemiplexiæ, paralyse, epilepsiæ & convulsivi motus fiunt, secundum observationem *Plateri Lib. I. p. 17.* Et elegantissimum locum, qua ratione ex terrore quidam delirare & spectra videre possit, vid. apud *Hippocratem Sect. V. pag. 125.* In corde vero accumulatus sanguis inducit ejus palpitationem, anxietatem, syncopen, lipothymiam: in pulmonibus spirandi difficultatem, hæmoptysin, catarrhum suffocativum, in utero apud gravidas abortum. Mensium tempore invadens feminas terror spasmodica symptomata excitat. Ita *Raygerus in Obs. 60. p. 131.* meminit virginis cujusdam, quæ ex terrore levi aliqua de causa concepto incidit in hysterica symptomata, scilicet difficilem respirationem, dolorem lumborum pedumque, lipothymias & alias molestias, cum mensium obstructione nullis remediis facile expugnanda. Similiter observatione constat frequenti, mammas in puerperis & gravidis singulariter affici terrore, dum sæpius tubercula in iis exsurgunt, quæ interdum in ulcera cacoethica vel carcinoma mali moris mutantur. A congesto quoque & ad stasim deducto sanguine per terrorem exulcerationes labiorum & in certis partibus tumores erysipelaceos progigni, in vulgus notum est. In abdomine post terrorem vel metum gravem flatum & borborygmi infestare solent, qui sæpius vel cum alvi fluxu, quod bonum est; vel cum ejus obstructione & abdominis distensione terrore percussos affligunt: & hinc contingit, à terrore hypochondriacorum & hystericarum symptomata familiaria mirifice exacerbari.

§. XXIII.

Quemadmodum terror corpora maxime imbecillia, & quæ sanguine bono ejusque sufficiente ad partes externas influxu destituta sunt, invadere solet: ita in iisdem quoque majorem violentiam exercet.

Scholion.

Terror & frigus debilitatis corporibus validissime nocent, & symptomata spasmodica facile excitant. Experientia certa cognitum perspectumque habemus, si terror post hæmorrhagiam largiorem, vel etiam sub mensium fluxu, vel post eorum prurptionem copiosam aut diuturnum morbum, vel etiam partu debilitatas fe-

minas invadat; spasmos & flatulentias primarum viarum, quin imo multo truculentiora non sine magno vitæ periculo sequi pathemata, cujus generis sunt animi deliquia, extremorum tremores, paralyfes, apoplexiæ, respiratio difficilis, pectoris angustia cum metu suffocationis & horrendæ cordis palpitaciones, omniumque virium subitus lapsus. Quid quod nihil magis morbis contagiosis viam pandit, & miasmati pestilentiali aditum præbet, quam gravis terror. Deinde etiam certissimum est, terrorem morbis acutis continuus præcedentem favissima inferre symptomata, & sæpius totum morbi genus immutare, ut medicus etiam peritissimus, nisi certus fuerit de causa hac antecedente, in prognosi sua insigniter fallatur. Dicit quoque vix potest, quantum terror noceat in morbis acutis, si præsertim die critico superveniat. Evacuationes enim criticas supprimendo & exanthemata repellendo, faciem morbi longe aliam reddit, & ægrum ut plurimum dat internecioni. Ita non semel notavimus, à terrore in cacochymicis febrem lethalem cum summa virium dejectione fuisse abortam.

§. XXIV.

Nulla res tam infensa est vitæ senum, quam gravis terror.

Scholion.

Aliquot nobis nota sunt exempla, ubi senes adhuc vegeti à terrore tam periculose læsi fuerunt, ut appetentia ciborum omni dejecta, & placido somno destituti, ad pristinas vires redire non potuerint, sed marasmo & lento calore confecti diem extremum obierint. Si enim tanta terroris vis est, ut robustos homines infirmet, multo magis minus valentes & infirmiores lædere debet, eorumque vires depopulari.

§. XXV.

Neque vero tantum varii generis morbos inducit terror, sed etiam quandoque ipsius subitæ mortis causam præbet efficacissimam.

Scholion.

Multa hanc in rem exempla in medicorum prostant monumentis. Hac enim ratione plures interiisse dudum notavit *Galenus Lib. de caus. sympt. Cap. V.* Ita & *Plinius Lib. VII. Hist. Natural. Cap. XXXVI.* refert, Publii Rutilium, nunciata fratris in consulatus petitione repulsa, illico exspirasse. Heli quoque Judæorum Pontificem & Judicem accepto tristi nuncio de clade, qua Palæstinæ hostes, capta arca occisisque ipsius filiis, Judaicum exercitum affecerant, magno subitoque terrore oppressum, de sella retrorsum cecidisse, ac subito exspirasse ex sacris literis constat, ne de nuru ejusdem hoc loco dicamus. conf. quoque *Miscell. Nat. Curios. Dec. III. A. IX. & X. obs. 57. pag. 114. Bonetus in sepulchreto suo. Fort. Fidel. de relat. med. Lib. IV. Cap. III. Rayger in Obs. med. obs. 96. Bartholin. Hist. 76. Cent. IV.* Plura quoque exempla collegit & hinc inde historiæ suæ insperfit *Valerius Maximus*. Rationem autem hujus tam subiti & funesti eventus investigare, in proclivi est; sanguis enim hoc modo circa cor & pulmones accumulatus coagulationem, si præsertim natura existit debilis, lethalem subit promptissime.

§. XXVI.

Licet motus, quem terror inducit, à superficie corporis ad centrum vitæ & sanitati corporis nostri sit inimicissimus, & ad morbos internos curandos minus utilis vel constantis effectus: nihilo minus tamen observationes inveniuntur, quæ docent, terrorem quandoque in certis morbis fuisse remedio.

Scholion.

Ita *Rolsinccius Comment. in 1. aphorism. 1.* profert

exemplum maniacy, qui incusso terrore à larvato homine sanatus est. Ipsam paralyfin subito incendii terrore cessasse in viro alterius partis solutione affecto, per complures annos omni ope humana destituto, eleganti observatione refert *Fr. Valeriola Lib. II. Obs. IV. Pechlinus Lib. III. obs. 24.* annotavit, uterum prolapsum terrore sanatum fuisse. conf. quoque *Zacut. Lusit. Lib. II. obs. 65.* Vulgari experimento hæmorrhagiæ narium ex improviso adfusa frigida aqua, ut terrore percutiantur affecti, sæpiissime tolluntur atque cohibentur. *Mæbius in Epitome instit. L. IV. P. II. Cap. VIII.* memorat terrore arthritidem curatam fuisse, quod non aliter fit, ac quia terror ex extremis partibus spasmò repellit materiam, quemadmodum adposito cataplasmate adstringente parti affectæ podagra quandoque, sed non semper salutari cum effectu recedit. *Valeriola in Obs. pag. 162.* refert, singultum contumacissimum terrore subitaneo excitatum curatum fuisse; ratio nulla alia est, quam quia partes nervosæ & musculosæ, quæ singultum efficiunt, terrore constrictæ vehementiorem fluidi nervei adfluxum intercipiunt. Cavendum tamen quam maxime est, ne has curationes terrore præstitas universales habeamus, ac temere imitemur. Sunt enim hæ curationes & rariores & infecuriores, nam is motus naturæ, qui ab exterioribus versus interiora sanguinem & humores impetuose propellit, valde suspectus habendus est. Si quando itaque à terrore salutaris effectus, vel morbi curatio sequuta fuerit, id, nostro quidem judicio, non aliunde fieri arbitramur, quam intensiori & quasi febrili sanguinis ad externas partes commotione, quæ sæpiissime vehementem terrorem, præsertim in vegetioribus, comitari & subsequi solet.

§. XXVII.

Terror salutariter solvitur motu intensiori cordis & arteriarum quodam febrili cum subsequente sudore.

Scholion.

Quia vehementiori spasmò superficies corporis constringitur, & sanguis versus interiora urgetur, non secus ac in febre fieri solet, collecti circa vitales partes humores intensum cordis & arteriarum motum, qui febrilis dicitur, efficiunt, quo postea restituitur sanguini pristinus circulus, unde calor occupat rursus externas partes, & ita salutaris fit solutio morbofi status à terrore inducti.

§. XXVIII.

Quædam gravia symptomata à terrore fiunt statim in principio, dum sanguis ad interiora vehementi spasmò propellitur, uti sunt anxietates, palpitaciones cordis cum virium dejectione, item animi deliquia & apoplexiæ: quadam vero secundo vel tertio die obveniunt, cum sanguis rursus cum quodam impetu ad exteriora vergit, & hujus generis sunt sanguinis immodicæ profusiones per hæmorrhoides, per uterum, quæ in gravidis abortum faciunt, per pulmones, per nares. Huc pertinent quoque erysipelata & tumores glandularum inflammatorii v. g. in mammis, glandulis inguinalibus, pone aures, qui quandoque tertio die terrore correptis superveniunt.

§. XXIX.

Ad lævissima illa mala, quæ terrorem insequuntur, avertenda, non opportunior datur medicina, quam quæ spasticas partium nervosarum stricturas relaxat, vires reficit, sanguinis cursum ad exteriora promovet, eumque liberiores reddit.

Scholion.

Quia tam gravia & periculi plena symptomata à deterrimo illo affectu proficiscuntur, omni utique modo providere oportet medicum, ut commoda medicina præcaveat, quod optima ratione efficitur, spasmodicis stricturis externarum partium attemperatis & sanguinis circulo

circulo ad exteriora revocato : ad quem finem obtinendum ego cum felici semper successu uti solitus sum mixturis, quæ aquas analepticas habent, ut sunt aquæ liliorum convallium, florum tiliaë, salviæ cum vino & sine vino, balsamum embryonum, misceri potest essentia ambraë, spiritus nitri dulcis, mixtura simplex vel etiam essentia theriacalis, item pulvis bezoardicus. Præterea liquor noster balsamicus tribus partibus liquoris mineralis anodynæ præparationis mixtus, & ad guttas triginta vel ultra propinatus expertissimæ virtutis hoc in genere nunquam non observatus fuit. Juvat quoque corpus in quiete servare & probe tegere, frictiones circa præcordia & partes extremas adhibere, pedes quoque balneo immittere, & molliente clysinæ alvum eluere. Sanguinis quoque missio in plethoricis necessaria est, hac tamen cum cautela, ne statim inter initia, ubi omnia frigent & tremunt, administretur, sed tum, quando pulsus incipit fieri major, & redeunt vires, & calor ad partes externas revertitur. Nihil vero deterius est, quam potum frigidum vel externum frigus admittere, & validiora purgantia, emetica aut nimis calida propinare, siquidem hisce omnibus spasmi invalescunt.

§. XXX.

Ex iis affectibus, qui tonum & robur partibus motricibus & nerveis suffurantur & vires maxime subtrahunt, nullus validior est, quam diuturnior & profundior tristitia animique angor.

Scholion.

Sicuti tres maxime motuum naturæ hostilium & morbificorum dantur classes, ut vehementior febrilis, qui ab intra foras cum impetu pellit sanguinem, & spasmus, qui ab exterioribus eum urget ad interiora, & denique atonia, quæ in nimia resolutione & relaxatione fibrarum motricium & remissione toni consistit: ita etiam tres vehementes in anima sic dicta sensitiva exsurgunt passiones, quæ singulas has motiones morbosas peculiari modo foveant & sustinent, adeo, ut ira motu febrili, terror spasmō, tristitia atonia operationes suas exerant. Et quemadmodum ira & terror celerrime agunt, ita tristitia tardiori paulo gradu nocet, paulatim corporis vires depascendo, & tonum ac robur partium solidarum solvendo.

§. XXXI.

Tristitia solvit vires corporis, dum pulsum reddit exilem ac lentum, appetentiam & digestionem dejicit, vires corporis convellit, faciem reddit pallidam, cutim flaccidam, transpirationem remissiore, frigus in partibus extremis, alvi crebras dejectiones, somnum turbulentum parit.

§. XXXII.

Quia tristitiæ affectus tonum & robur fibris motricibus sensim sensimque suffuratur, cordis motum & sanguinis circulum reddit languidiorem, adeoque excretiones sufflammat atque obstructions vasorum viscerumque infarctus gignit, unde longorum & difficilium morborum origo est.

Scholion.

Tristitia maxime infesta est visceribus, præsertim imi ventris, inque primis cursum sanguinis per ramos venæ portæ atque per lienem, pancreas & hepar sufflammat. Quandoquidem hæc viscera jam tum naturali quadam imbecillitate toni laborant, quia fibrarum carnearum & nervosarum elatere sunt destituta, & vena etiam portæ pulsu caret, & ordinario sanguinis segnior fit per hæc viscera trajectio; hinc facile potest intelligi, ab affectu tristitiæ hæc viscera multum pati, & longe imbecilliora reddita morbis, qui ex horum officio neglecto proveniunt, valde obnoxia fieri. Unde Hipp. Lib. II. de Morb. ait: *cura in visceribus veluti spina* Frid. Hoffmanni Oper. Tom. I.

est atque illa pungit. Prodeunt vero à tristitiæ affectu maxime cachexia, scorbutus, malum hypochondriacum, paralyfis.

§. XXXIII.

Tristitia pro diversitate partium, quarum tonum destruit, & quas infirmas reddit, ut ad stagnationem & decubitus humores fiant proclives, alios atque alios graves producit morbos.

Scholion.

In capite ad melancholiam, maniam, affectus soporosos, hemiplexiam, paralyfin, ad guttam quoque serenam; in regione pectoris ad animi deliquia, ad polyposas concreciones, cordis palpitationes: in regione præcordiali ad inflammationem ventriculi, appetitum dejectum; in intestinis ad diarrhœam, flatulentias hypochondriacas, imo ipsum affectum hypochondriacum disponit, unde Sanctorius Sect. VII. A. 3. *mœrentes*, inquit, *facile obstructions, partis duritiem & affectum hypochondriacum patiuntur*, eam nempe ob rationem, quia mœstitia, si diu durat, carnes frigidas facit, dum impedit, ne perspirabilem crassa & inutilis portio exhalet. In reliquis abdominis visceribus cachexiam & maxime scorbutum inducit. Et de scorbutō quidem, quod is originem suam à profundiori tristitia ut plurimum ducat, multis in locis præclare monuit Severinus Eugalenus in Tract. de scorbutō; siquidem pag. 3. ubi de causis scorbuti agit, hunc in modum verba facit: *quos cum crassiori victus ratione diuturnior mœstitia exercuit, de his ægrotantibus constanter semper prædicere ausus fui, eos à scorbutō morbo vel solo vel aliis permixto teneri*. Pressius adhuc hanc suam sententiam explanat Obs. XIX. pag. 300. ubi ait: *quos hac affectione laborasse novi, omnibus fere vel post crassum melancholicum victum, vel post diuturniores tristitias advenisse eam memini*. conf. quoque Obs. XXVII. pag. 293. it. 284. In renibus calculum gignit, in utero mensium suppressionem facit. Observavimus, si magna tristitia ob damnum acceptum, ob maritum vel liberos defunctos, incidat in mensium fluxum, illum statim inordinatum fieri, & gravissime inde luere feminas, adeo, ut sæva pathemata spastica subsequantur, comitante subinde purpura. In habitu porro corporis ad macilentiam, ad sudorem frigidum maxime in locis inferioribus, nimirum in pedibus, disponit.

§. XXXIV.

Observatione constat, morbos alios benignos & familiares hominibus per diuturnam mœstitiam periculosos & lethales fieri, & medicamentis omnem in atrocioribus symptomatibus avertendis alias insitam vim demi atque denegari.

Scholion.

Ita observavimus, in feminis pathemata hysterica, in viris calculum, podagram, itemque scorbutum ob invadentem ingentem tristitiam sævissima imo lethalia symptomata concitasse, eam videlicet ob rationem, quia hic affectus vires penitus destruit, unde morbo ejusmodi ingruente, cui subigendo vires sunt impares, inflammatoriæ & sphacelosaë sanguinis stases perquam facile contingunt. Quod medicamentorum operatio sub gravioribus animi pathematibus & præsertim quoque mœrore suspendatur, id extra omne dubium est & inter alios graphice hac de re loquitur Bagliv. in prax. Med. pag. 133. cujus verba hæc sunt: *anima quamdiu in perturbatione est, remedia nequicquam proficient & licet quis ea recipiat, viribus tamen non auscultatur natura*. Morbi igitur ab animi pathematibus orti blande ac leniter tractandi sunt, & tunc à nimia remediorum copia & vehementia quam maxime abstinendum, uti idem gravissimus auctor pulchre monet. Convenit

igitur, ut verba *Tulpii Lib. IV. Cap. 49.* nostra faciamus, *agros securos agere, ut corpore tantum, non etiam animo laborent, & si quæ sunt, quæ ipsorum animos exasperatura sint, optimum est ea, dum ægrotant, ipsorum notitiæ subtrahere.*

§. XXXV.

Ad præcavendos morbos, qui à diuturniori tristitia proveniunt, nihil utilius esse analepticis, roborantibus, quæ sanguinis & humorum spiritualescentiam & liberio-rem cursum promovent, jam quisque facile perspiciet.

Scholion.

Plura huc pertinent tum ex diætetico, tum ex pharmaceutico fonte petenda remediorum genera. Nam aëris sereni & temperati usura, cœli mutatio, motus, & moderatio vini potentis & purioris aquæ usus, & omnis animi blandior relaxatio mirifice eos profligant morbos, qui à tristitia viriumque dejectione proveniunt. Denique infusa ex herbis aromaticis calide pota, it. succinata, ambrata, salia volatilia, oleosa & alia balsamica & quæ digestionem maxime ciborum succurrunt, vires mirum recreant, & morbos à copia, infarctu & corruptione proficiscentes arcent.

§. XXXVI.

Præter animi affectus motibus vitalibus conservatoriis & excretoriis, ac robori partium nervosarum infestissimos dantur adhuc alii mentis morbi, videlicet intensa desideria, cupiditates, inquietæ cogitationes, profundæ & laboriosæ meditationes, quæ æque vires consumunt, systema nervorum debilitant, & œconomiam naturalium motuum potenter invertunt.

Scholion.

Animus certe variis motibus & laboribus agitatus nunquam sanitati prodest, sed perpetuo secundum naturam actiones inturbat, quarum integritatem mens quieta cupiditatibusque & motibus vacua, id est, sana conservat. Plurimi itaque morbi primam à morbis animi ducunt originem; quemadmodum id ex accuratis morborum historiis abunde discimus. Siquidem anima, quo vocabulo principium cogitandi, sentiendi & imaginandi designamus, directe & proxime operationem in fluidum tenuissimum, quod in cerebro, nervis & medulla spinali continetur, exerit, dumque huius naturam & motum naturalem pervertit, eumque vel intendit vel sistit aut imminuit, non potest aliter fieri, quam ut omnes corporis functiones inde mutationem in deterius patiantur.

§. XXXVII.

Diuturni animi labores & profundæ cogitationes consumunt maxime vires, ut adeo robur non tantum toti corpori, sed etiam potissimum iis partibus, quæ digestionem, secretionem & excretionem vacant, detrahatur, & multæ in primis viis cruditates progignantur & accumulæntur.

Scholion.

Experientia constat, senes illos, in quibus à labore immoderato studiorumque intemperantia spiritus consumti sunt, & novus eorum proventus ac reparatio ob viscerum tonum destructum, digestionem turbatas languidas, & fere deficientes fuit impedita, ad flatulentias, spasmos hypochondriorum, paralyses, admodum proclives fieri. Cicero non ob aliam causam summa fuit corporis gracilitate & infirmitate, quam ob assiduas lucubrationes & meditationes, quas in vita amavit, & quarum adeo frequentem in operibus suis mentionem facit. De *Baronio* refert *Janus Nicius Erythraeus Pinacoth. I. p. 90.* illum tabe obisse assiduo stu-

diorum labore concepta, qua ita cibos omnes fastidiebat, ut nullum esset tam nitidum, tam delicatum, tam suaviter conditum obsonium, ut posset in ejus stomacho edendi appetitum excitare; imo cum ad cœnam vel prandium vocabatur, tanquam ad supplicium se rapi dicebat. Apparet etiam hinc, quare ex nimia studiorum intemperantia hypochondriaca sic dicta passio, in meris spasminis & flatibus consistens, frequentissime suboritur, & quare ex infano amore in feminis cachexia seu chlorosis proveniat, qui morbus identidem ad cruditates & excretionem imminutas velut ad causam suam referendus est.

§. XXXVIII.

Neque vero tantum inordinati animi motus corpori nocent, sed & quod maximum, peregrinæ impressiones & ideæ susceptarum à perversa phantasia rerum plane mirabiles in peculiaribus morbis concitandis, & structura etiam partium vitianda vires possident.

Scholion.

Quantam vim atque efficaciam talis impressio pro diversitate idearum & individuorum in corpus possideat, ut tam varie actiones naturales ab imaginatione determinentur, inter alia conspicuum reddunt gravidæ foeminæ; nihil enim ipsis familiarius est, quam ad perversam earum phantasiam mirifice formationem foetus & structuram partium lædi & immutari. Dependent inde maculæ & nævi materni, item mutilationes & conformationes certorum membrorum in foetu depravata. A sola impressione & imaginatione firma præsentis pestilentiae plures peste correptos esse historiae & observationes testantur, uti videre licet apud *Helmont in tumulo pestis pag. 981. it. Diemerbroeck. in Tract. de peste pag. 859. Pechlin. Lib. III. obs. XVI.* Quod solus aspectus eundem variolarum morbum provocare possit, quotidianæ est experientiae, qua de re consuli potest *Pechlin. Obs. 23. lib. III. it. Miscell. Nat. Curios. Dec. III. A. IV.*

§. XXXIX.

Maxime omnium vero motus partium convulsivi vehementiores & terribiles, concepto inde quodam horrore, aspectu eam vim habent, ut in similes motus spectatores conjicere possint.

Scholion.

Ita plures viso epileptico inciderunt in similem morbum. Huc jure optimo pertinent eæ observationes, quibus edocti sumus, homines meditationibus sacris addictissimos, in convulsivos sanguinis motus non modo incidisse, sed & alios hisce inconditis motibus consternatos similiter extra se raptos atque convulsos fuisse. Facit huc quoque, quod nuperrime in pueris quibusdam Silesiacis observatum, itemque & ille morbus convulsivus & phantasticus, qui annis superioribus Annabergæ sævit; de quo conferri potest. *Andr. Kunadi Consideratio Theolog. morbi convulsivi & phantasmatum, quibus Annabergæ nonnulli homines misere conflictati fuerunt.*

§. XL.

Animi passiones infestant maxime imbecillos & tenerioris constitutionis homines; qui vero animo & corpore robustiores sunt, eos minus lædere solent.

Scholion.

Agunt enim affectus animi maxime in partes nervosas, & quæ sensibus ac motibus vacant, quarum tonum, ac motum violant planeque immutant, dum nervorum fluido valde alienum ac turbulentum motum inferunt. Si itaque hæ partes ad anomalos motus recipiendos jam antea admodum pronæ sunt, in quo maxime natura partium imbecillium posita est, tunc utique longe facilius in

in alienos & præternaturales motus ab animi passionibus abripiuntur. Quin imo harum partium natura atque indoles ita est comparata, ut si semel graviter v. g. à terrore læsa fuerint, postea levi de causa & præter voluntatem terrore afficiantur, eisdemque alienos motus in corpore producant. Quod etiam de ira valet, quæ, si animus semel vel aliquoties vehementer illa excanduit, postea frequenter & levi data occasione recurrit. Notatu etiam dignum est, quod homines præsertim foeminae, ad animi affectus & maxime iram proclives, corpus plerumque infirmum & alienis motibus recipiendis accommodatum obtineant. Et patet hinc etiam ratio, quare foeminae sensibilibus naturæ ut plurimum lædantur à suaveolentibus, siquidem probabile est, hæc eisdem vel similes motus excitare in partibus nervosis, quales ab animi affectibus produci solent.

CAPUT II.

De venenis eorumque natura, viribus & modo agendi.

§. I.

Alit natura res, quæ exigua mole & summa partium tenuitate brevi tempore concentum atque ordinem motuum vitalium pervertunt, vel plane destruant, & hæ vocari solent venena.

Scholion.

Quum itaque venena tam infensa sint naturæ corporis nostri conservatrici seu motibus machinæ conservatoriis & vitalibus, ut vel citò perimant vel in extremam perniciem corpus conjiciant: utique solertis ac prudentis medici est, horum naturam ac vires alta scrutari indagine, & quomodo illata ab iis noxa averruncari possit, paulo sollicitius inquirere.

§. II.

Venenorum tres notæ essentialia sunt, quibus ab aliis rebus exitalibus & humanæ naturæ inimicis discernuntur. Prima est, quod summa partium tenuitate adeoque minima mole agant; secunda, quod brevi tempore partium solidarum ac fluidarum motus ordinatos ac proportionatos universo in corpore pervertant, & gravissima symptomata vel mortem ipsam inducant: tertia, quod in fluidum tenuissimum & partes maxime nervosas vim ac violentiam suam exercent.

Scholion.

Inveniuntur in amplissimo regno naturæ plura, quæ brevi tempore nocent ac perimunt, ut aqua frigida, corpori sudore diffuenti immoderatus superingesta, frigus acerrimus, vel large assumptus spiritus vini aut mineralis, acidus, ut oleum vitrioli, quæ tamen venenorum classi proprie & commode annumerari non possunt, quoniam præcipui characteres ac proprietates venenorum deficiunt.

§. III.

Quodvis naturæ regnum peculiaria venena profert.

Scholion.

Venena omnium subtilissima, & quæ penetrantissima indolis sunt, in regno animali hospitantur, quæ morfu communicantur ab animantibus rabie vel ira vehementi percitis. Secundum locum tuentur ea, quæ regnum minerale suppeditat, ut sunt arsenicalia & mercurialia. His proxime adjungenda sunt quædam ex vegetabilibus, acerrimo & nocentissimo elemento imbuta, quorum

classem ducunt purgantia fortiora & narcotica, principio sulphureo vaporoso infesta.

§. IV.

Nam quorumlibet animantium vel insectorum morsus plagam infert virulentam, sed eorum tantummodo, quæ rabie & vehementi excandescencia exarsuerunt, & quæ calidioris naturæ & ad iracundiam prona sunt.

Scholion.

Ex animantium quadrupedum genere, quæ cholericæ sunt temperaturæ & frequenter ira vel rabie corripuntur, sunt maxime canes, lupi, feles, vulpes, simiæ, quorum morsus ob virulentiam extimescendus est. Ex insectis potissimum hunc censum subeunt viperarum, scorpionum & araneorum species.

§. V.

Firma constat experientia, in climatibus & locis calidioribus & tempore ardentissimo insectorum morsus multo esse venenosiores, quam in locis frigidioribus.

Scholion.

Araneæ, scorpiones & viperæ nostris in regionibus, utpote temperatioribus, & septentrionalibus rarius morfu vel ictu nocent vel necant; serpentes etiam nostrates plane sunt innoxii. In calidissimis vero Italiæ, Siciliae & Asiæ locis horum insectorum venenatus morsus & ictus multiplici experientia satis superque cognitus & exploratus est.

§. VI.

Neque insectum, neque ullum aliud animal in se est venenatum, sed maxime eorum ictus vel morsus vim veneni obtinet; siquidem tunc demum venenosam quasi naturam induunt, quando ira vel rabie, quæ extrema & continua irascentia est, exagitantur.

Scholion.

Nunquam fide dignis historiis vel certa quadam experientia probari poterit, à viperarum, scorpionum, araneorum vel aliorum insectorum, quæ vulgo pro venenatis habentur, usu interno mortem vel insignem quandam perniciem sanis corporibus fuisse inductam. Quamvis enim negari non possit, plurima insecta in se reconditum habere sal quoddam causticum partibus nervosis non adeo amicis; noxam tamen, quam corpori inferunt ab eorum morfu vel ictu proficisci certissimum est. Et quoniam fortiter urinam pellunt interius assumpta, ideo hydropicis hæc ipsa remediorum genera saluti fuisse, fide dignæ observationes testantur.

§. VII.

Venenum quod animantia ictu vel morfu communicant, originem & naturam suam maxime ac primario debet animi affectui vehementiori, qualis est ira, eaque extrema & continuata, quæ in morbum, rabiem vel insaniam tandem degenerat.

Scholion.

Est ea omnium animi affectuum indoles, ut universam fluidi in cerebro ac nervis contenti massam & hujus ministerio totam nervorum & membranarum compagem afficiant, omnesque motus vitales partium solidarum æque ac fluidarum, secretorios nempe, & excretorios magnopere pervertant, quippe in quo veri veneni vis atque effectus continentur. Atque hinc clarissime patet, inter venenum & animi affectum, præsertim vehementiorem, ratione efficaciam, virium & effectuum nullam prorsus intercedere differentiam.

§. VIII.

Quia tonum fluidum nervorum ab ira & rabie in

concitatissimum motum, quo nihil datur perniciosius, violenter abripitur: non mirum est, omnes corporis succos inde venenosam quandam indolem concipere.

Scholion.

Non desunt exempla, ubi à morfu hominis iracundia commoti lethalia symptomata sequuta fuerunt, non aliam certe ob causam, quam quod saliva veneno infecta fuerit. Ita novimus quendam ex morfu hominis irati mortuum cum eruptione macularum purpurearum accedentibus convulsionibus ac delirio, cuius corpus post mortem dissectum tumidum, & summo foetore inquinatum repertum fuit. Deinde non modo rabies, sed etiam vehementiores animi affectus in corpore humano, ut terror & ira, totam lymphæ massam venenata qualitate imbuunt, id quod clarissime ex eo apparere puto, quod infantes ex assumpto lacte nutricis, quæ brevi ante ira vel terrore perculsa fuit, in gravissima pathemata convulsiva epileptica, & sævissima alvi tormina incidant, non secus ac si veneni quid illis fuerit propinatum. Memorabile etiam est exemplum, quod *Timæus à Gùldenkee Lib. VII. de Morb. Venenat. cas. 23.* refert de vacca à cane rabido admorsa, cujus lac omnes, qui eo usi fuerunt, in rabiem egit. Et *Fernelius de Abdit. Morbor. Caus. cap. 14. pag. 508.* commemorat, lupo rabioso trucidato, & in varia obsonia à venatoribus quibusdam parato & cocto, omnes, quicunque esitarunt, non multo post rabie fuisse correptos. Geminum huic exemplum de porco à cane rabido demorso tradit *Borellus Cent. I. Observ. 75.*

§. IX.

Saliva inprimis venenata qualitate imbuitur; quoniam humor est valde subtilis, fermentativæ & spirituosæ indolis, qui facillime motum concitatissimum à rabie impressum recipere, eumque per reliquos succos diffundere & quasi multiplicare potest.

Scholion.

Qua de causa salivalis ille virulentus liquor, non tantum mediante morfu nervosis & fibrosis partibus innuatus, summe pernicialis est, sed alio etiam modo ad fluidum corporis nostri tenuissimum delatus, ipsi virulentam hanc indolem affricat. *Jul. Palmarius Lib. de Morb. Contag. pag. 321.* insigne exemplum de rustico in rabiem acto refert, qui liberis suis oscula figens eisdem pari lue infectos internecioni dedit. A *Cælio Aureliano L. III. c. IX.* hanc in rem quoque notatu dignum memoratur exemplum sartricis cujusdam, quæ in vestimentis à cane rabido dilaceratis reparandis occupata; admoto prius ore, filum præmordens rabiem contraxit.

§. X.

Virus animantium, quod ab eorum ira vel insania generatur, non modo salivam, lac & lympham, sed ipsum quoque liquorem seminalem inficit.

Scholion.

Tristissimus ante aliquot annos obtigit Duderstadii casus, ubi à lupo rabido multi canes & homines admorsi fuerunt, quorum pauci servati, plures cito, quidam post aliquod tempus, præcedente aquæ metu, obierunt. Quidam horum mox post plagam morfu acceptam, quam neglectui habebat, coitum celebravit cum uxore; post aliquot vero dies una cum uxore, quæ à lupo rabioso non tacta fuit, consuetis symptomatibus correptus est, ubi tamen femina servata, maritus vero extinctus fuit. Præterea novimus patrem quendam, certis intervallis maniacum, qui paroxyfini tempore cum uxore congregiendi filium genuit eodem malo post exactos pubertatis annos correptum; quos vero extra paroxysmum progenuit liberos, ii omnes ab hoc malo immunes fuerunt. Spectat huc etiam illud, quod amor insanus per phil-

tra, quæ ex saliva, semine, vel sanguine menstruo parari solent, eadem prorsus ratione in aliis excitari possit. Neque enim ex toto insuper habendæ sunt illæ observationes, quæ de philtorum noxa nos certiores reddunt. Ex hisce vero jam cognitis illud maxime ad usum & salutem generis humani depromendum esse existimo, quod diligenter evitanda sit consuetudo eorum hominum, qui rabie, ira vel terrore exagitantur, ac summa cum cura providendum, ne ejusmodi homines quidpiam de saliva, semine, vel lacte aliis sanis, & imbecillioribus communicent. Dissuademus itaque magnopere coitum cum viris, quos paulo ante gravis animi affectus corripuit.

§. XI.

Utut venenum, quod morfu animantis rabiosi inferatur, valde activæ & penetrantis sit indolis: quandoque tamen accidit, ut illud sine omni noxa diutius partibus admorsis infideat, & demum elapso aliquo tempore in actum deducatur.

Scholion.

Prostant in medicorum tum veterum, tum recentiorum monumentis plures observationes, ubi à rabidis animantibus admorsi longe inde tempore nihil molestiarum perpeffi fuerunt; exacto vero mensis vel ultra spatio consuetis gravibus symptomatibus, inprimisque funesto aquæ timore correpti fuerunt. Recte hinc *Cæli. Aurelianus Lib. 3. cap. 9. post morsum quidam celerius in passionem veniunt, quidam tardius, ideo etiam post annum aut eo amplius sed magis plures post quadraginta dies.* Cujus peculiaris phænomeni causæ quamvis paulo difficiliore videantur, tamen quid verisimile sit, exponere placet. Constat nempe dilaceratas per morsum fibras cutaneas crispari & contractione quadam in se invicem coire, unde renitens quidam tumor subnasci solet. Sub hoc itaque virulentam illam subtilem materiam inclusam & quasi incarceratam detineri posse probabile est. Præterea concursu succi tenacioris, qui ex fauciatibus fibris exstillat, volatile illud virus quodammodo etiam figitur, & sub ejus involucri non secus ac acies in vagina vel favilla sub cinere ad tempus reconditur, donec certas ob causas à compedibus liberatum & sui juris factum, in partes nervosas sævire & vim suam pernicialem prodere incipiat. Existimamus quoque, differens hominum temperamentum huc multum facere, utpote quum in corporibus segnioris, torpidæ, & phlegmaticæ naturæ ejusmodi venenum sine effectu longe diutius, quam in cholericæ & agilioris indolis hominibus latere possit.

§. XII.

Ex penu & regno minerali pauca prodeunt vera venena, inter quæ tantum unicum est nativum cobaltum: tria vero arte facta, arsenicum cujus tres dantur species, mercurius sublimatus, & vitrum antimonii.

Scholion.

Cobaltum, cujus copiosior proventus in venis subterraneis Misniæ est, ob virulentam & enecantem suam vim, quam exerit in insecta, bruta & homines, notissimum est. Est vero hoc ipsum minera arsenici, dum acriori igne sub præparatione vitri carulei, quod dicitur finaltum, germanice *Blaue Farbe*, ex eo flores albi sublimantur, qui vocari solent *Gift-Mehl*; Hi fortiori ignis temperamento funduntur in corpus vitriforme album, quod vocatur arsenicum album, vel etiam crystallinum venenum innumeris lethalibus exemplis satis infamatum. Quodcumque ad partes decem florum additur una sulphuris vulgaris & hæc invicem funduntur, non album, sed citrino colore tinctum arsenicum prodit. Si vero duæ partes sulphuris cum decem partibus pulveris albi miscentur, igne fusionis arsenicum rubrum emergit. Hæc omnia sunt venena, sed perniciosissimum album; veteribus vero plane incognita

cognitæ hæ tres species fuerunt ; mineram vero suam, ex qua præparantur, videlicet cobaltum, vehementia & celeritate nocendi longissime exsuperant. Atque hoc venenum est nostris temporibus commune & usu pervulgatum, quo ad patranda veneficia pessime utuntur, maxime ob hanc causam, quia gustu non percipitur, & in solida æque ac fluida forma commode offerri potest.

§. XIII.

Vera venena mineralia veteribus fuerunt incognita, qui res alias noxias ex hoc regno venenis falso adscripserunt.

Scholion.

Antiqui medici res fere omnes minerales nativas naturæ humanæ incongruas vel infestas pro venenis habuerunt, unde argentum vivum, antimonium crudum, vitriolum album, & omnes vitrioli species, lithargyrium quoque & cerussam, it. lapidem lazuli, adamantem venenorum classi annumerare non dubitarunt. Maxime omnium vero auripigmentum, quod arsenicum vocarunt, teste *Celfo Lib. 5. cap. 5. pag. 260.* in venenorum familiam reduxerunt, quod tamen omnis virulentæ & enecantis naturæ expers est. Quo spectat etiam veterum sandaraca, quam arsenicum rubrum vocarunt, & ex colliquo auripigmento confecerunt, quod etiam enecandi virtute orbatum est. Neque vero negamus, has omnes enumeratas species naturæ humanæ minus convenire, vel etiam rodente quadam virtute esse instructas; sed tamen neutiquam hinc concludendum est, eas ad venenorum classem esse referendas, quoniam veri veneni characteres deficiunt.

§. XIV.

Pessimo errore à recentioribus auripigmentum pro veneno venditatur, & cum arsenico citrino factitio confunditur.

Scholion.

Error est minime excusandus, dum plures ex recentioribus auripigmentum arsenicum citrinum vocant, & pro veneno declarant, quemadmodum id latius deduxi & loca allegavi in *Diff. nostra de Erroribus circa venena vulgaribus*. Nam arsenicorum, quæ veteribus nota fuerunt, & ad auripigmentum referri debent, & quæ demum nostris temporibus inclaruerunt, & ex cobalti minera proveniunt, ratione natalis soli, indolis & effectus ingens est differentia. Nam auripigmentum est minerale aurei coloris, sulphureum, ex tenuibus crustis, tanquam squamis, instar lapidis specularis fissilibus compositum, quod in Græcia, Mysia nempe Hellespontis, ex montibus eruitur & ad nos advehitur. Hoc in pulverem redactum & flammæ admotum fluit, accenditur, & flammam cum fumo albo, subflavo, emittit, qui cultrum superpositum albo luteo & subrubro colore, pulchro spectaculo obducit, in fundo arenosis & lapidosiis particulis relictis: fumus odorem habet foetidi sulphuris. Idem auripigmentum in cucurbita vitrea vehementiori igne liquatum massam dat instar cinnabaris rubicundam, in superficie instar rubini splendentem, quam veteres sandaracam appellarunt. Arsenicum vero album, flavum & rubrum nostrum est factitium & patriam habet Misniam, ubi tantummodo, inque nullis aliis terris, & quidem in pago *Ehren Friedrichsdorff*, conficitur ex minera grysei coloris, quæ vocatur cobaltum, germ. *Fliegen-Pulver*, quia muscas hujus pulvere enecare solent. Ex hac minera parantur, ut supra innui, illæ tres arsenici venenati species, quæ veteribus plane incognitæ fuerunt. Unum vero ex illis igni in vase impositum, totum in auras avolat, ne ullo vestigio ejus in vase relictis, densus albus fumus foetidissimus alliaceum spargit odorem, & laminam ferream albo colore obducit neque flammam concipit. Jam vero au-

ripigmentum omni drastica, purgante & emetica virtute caret, neque animantia necat, frequenti experimento instituto in canibus, felibus, quibus in insigni dosi ad drachmam unam & ultra sine ulla subsequente noxa id obtulimus. Et ut auripigmentum accensum fumum foetidum emittat, tamen potius est sulphureæ, quam arsenicalis vel mercurialis naturæ: quod vel inde patet, dum ex æquali auripigmenti & mercurii sublimati parte sublimatione cinnabarim elegantissime rubicundam obtinuimus. Arsenicum vero, sive album, sive flavum & rubrum, summum est venenum, & omnis generis animantia in paulo majori dosi assumptum brevi necat. Ut adeo ex jam dictis satis clare appareat, auripigmentum cum arsenico citrino neutiquam esse confundendum, quod tamen à plurimis medicis, imo collegiis factum esse acta & responsa publica loquuntur.

§. XV.

Præter arsenici tres species etiam argentum vivum, in spiritibus acidis & mineralibus solutum, veri veneni indolem atque vim habet.

Scholion.

Mercurius currens vivus omnis virulentia expers est, neque in ingenti quantitate haustus ullum ex animantibus interficit, sed pondere suo cito per alvum elabitur, atque adeo in passione iliaca, quæ à fecibus infarctis & intestinorum complicatione fit, summum, & frequenti experimento probatum remedium existit. Si vero ab acido corrosivo, ut est spiritus salis vel nitri, dissolvitur, acrimoniam summe corrosivam acquirit, qua non modo fibras ventriculi & intestinorum nerveas lacinat & discindit, ut omnium corrosivorum mos est, sed & constrictivam & erodentem vim suam ulterius diffundit, & universum systema nervosarum partium in spasticas constrictiones violenter conjicit; unde sanguinis liber influxus & effluxus sistitur, & mors paratur. Quia vero ob causticam acrimoniam hoc venenum non facile offerri potest, hinc rarissimi casus in medicorum libris prostant eorum, qui veneno hoc interfecti fuerunt. Eo plura vero exempla in praxi medica occurrunt, ubi medicamenta mercurialia non rite parata & correctæ valde atrocia, imo funesta symptomata excitarunt.

§. XVI.

Inter venena arte parata non infimum locum tenet antimonium in vitrum redactum, quod in pulvere oblatum non modo vehementes & sævissimis torminibus stipatas vomitiones, sed etiam haud raro mortem inducit.

Scholion.

Cognita nobis sunt aliquot exempla, ubi vitrum antimonii in substantia propinatum, præsertim, cum jam prima regio spasinis obnoxia fuit, non secus ac arsenicum intra aliquot horas mortem intulit, præcedentibus omnibus signis ac symptomatibus, quæ propinatum venenum indicant & sequuntur.

§. XVII.

Ex vegetabilium regno inter præsentissima venena referri debent cicuta vera, napellus sive aconitum carneum, solanum furiosum, hyoscyamus ac datura.

Scholion.

Cicutæ venenum jam antiquissimis temporibus apud Græcos, & maxime apud Athenienses familiarissimum fuit, quippe quo solenni more sibi vel aliis mortem inferendi usi dicuntur. Neque facile aliud venenum veteribus cognitum & familiariter usurpatum, præter hoc ipsum, invenimus. Memoria etiam proditum est, succum cicutæ, leni insolatione spissatum, olim publice Athenis in poenam fuisse asservatum. Neque tamen inficias

inficias ire licet, Græcorum cicutam multo fuisse valentiorē ea, quam regiones nostræ alunt; siquidem illa in locis calidioribus nata, à ferventissimo solis æstu longe penetrantiorē vim insitam habet. Nec tamen cicutā, quæ nostris in regionibus progignitur, indolis venenatæ expers est; nam quod lethalia symptomata hominibus induxerit, aliquot consignatis historiis luculenter docet *Cl. Wepferus in elegantissimo libro de Cicutā aquatica*. Napellum venenum esse plures historiæ & observationes testantur, quas vides collectas in *Dom. Zornii Botanologia Med. pag. 458*. De noxis venenatis solani furiosi, & hyoscyami memorabilia &, ut solet, erudite tradit *Cl. Wepferus loc. cit. pag. 227*.

§. XVIII.

Dantur venena certis potissimum animantibus noxia, quæ in hominibus venenatam efficaciam vix exerunt.

Scholion.

Ita amygdalæ amaræ in volucris, præsertim in ciconia, columba, convulsiones excitant. Eadem amygdalæ & nuces vomicæ felibus & canibus oblatae cum convulsionibus interficiunt. Piscatores cocculis pisces necare, notissimum est. Spiritus etiam vini rectificatus ad unum vel duo cochlearia felium ori infusus, in iis mox horrendas producit convulsiones. Videtur autem sulphur illud vaporosum, quod commemoratis simplicibus inest, & quo etiam amygdalæ amaræ imbutæ sunt, testante id ipsum spiritu vini super illas abstracto, animantium cerebro maxime insensum, atque adeo iis magis noxium, quam hominibus, quos natura majori cerebri mole & uberiori fluidi nervei quantitate donavit.

§. XIX.

Agunt venena summa partium tenuitate, qua sese altius partibus nervosis insinuant, iisque insensibilissimos motus inducunt.

Scholion.

Habet hoc regnum naturæ, ut ex minimo maximi & stupendi producantur effectus. Quam tenuis atque exigua est illa portio, tam in ovulo foemino, quam femine virili, ex qua homo progignitur. Nonne totius naturæ conservatio, si animantium ac vegetabilium regna spectemus, tenuissima materia feminibus inclusa sustinetur. Quam stupendi effectus in rerum natura præstentur à tenuissimis fluidis, aëre, æthere, in propatulo est. Est etiam illud exiguum, quod mortem infert, & machinam corporis humani destruit, ut quidem videmus in peste, cujus contagium subtilissimo vapore serpit, aliisque communicatur. Non igitur mirum videri debet, venena summa partium tenuitate suas præstare operationes, id quod ex morfu rabidorum animantium & venenis per vulnera communicatis clarissime apparet. Antimonium cum vino infusum vel decem sine diminutione sensibili ponderis vehementer purgat. Omnis deleteria purgantium vis, ut hellebori albi, nicotianæ, asari, colocynthidis, it. narcoticorum, ut feminis daturæ, hyoscyami, sola diuturniori coctione cum aqua in auras dissipatur. Mercurius vivus, utut plane insolubilis videatur, & ex fixioris & solidioris naturæ partibus compositus: si tamen cum aqua coquitur, illa vim vermes enecantem acquirit. Cobaltum, arsenicum, utut difficilioris solutionis & nexus videantur, tamen cum aqua si decoquantur, virulentam vim ipsi communicant. Et aqua ejusmodi arsenicalis infamatum illud venenum est, quo veneficæ quædam Romanæ sub Alexandro VII. gravem stragem ediderunt, & aquettam appellarunt. Et memorabile est, quod nuper ad me scripsit *illustris Dom. Garelli, Archiattrorum Cæsaris princeps*, his verbis: *Occasione elegantis Tuæ dissertationis de Erroribus circa venena in*

mentem venit lentum quoddam venenum, quo fænosa venefica, in carceribus Neapolitanis adhuc vivens, in sexcentorum perniciem usa est. Hoc vero nihil aliud est, quam arsenicum crystallinum in larga aquæ copia per simplicem decoctionem soluta, addita, nescio in quem finem, cymbalaria herba. Hoc mihi communicavit Augustissimus Imperator, cui transmissus est processus criminalis propria veneficæ confessione confirmatus. Aqua vero vulgari idiomate Neapolitano Aqua della Toffanina appellatur. Certissime interficit & plurimi hoc veneno occubuerunt.

§. XX.

Agunt quædam venena principio tenuissimo salino acri constringente, alia subtilissimo vaporoso sulphureo, naturæ infesto.

Scholion.

Sale subtilissimo acerrimo caustico agunt maxime venena ex minerali regno, ut arsenicum, cobaltum, vitrum & regulus antimonii & mercurius corrosivus factus. Ex vegetabilibus cicutæ napelli, & quædam fungorum species. Et utut acrimonia illa ob summam tenuitatem gustus organon non feriat, salina tamen acris eorum indoles partim ex solutione cum aqua, partim ex septica, erodente & vesicatoria, quam exserunt, partibus externis applicata, ea satis liquida dijudicanda est. Graveolenti vero & inimico sulphure vaporoso operantur narcotica; siquidem coctione ingratissimum vaporem exhalant. Et sicut corrosiva in substantiam partium nervearum maxime grassantur: ita vaporosa & narcotica tenuissimum illud fluidum, quod nervosis partibus insidet, & ex cerebro ad eas derivatur, corrumpunt ejusque motum extinguunt, unde motus & sensus perire solent, quemadmodum contra corrosiva motus reddunt vehementiores.

§. XXI.

Venena, præsertim ex mineralium & vegetabilium regno petita, sævitiam suam maxime exercent in ventriculum, velut partem valde nervosam & sensibilem.

Scholion.

Ventriculum cum ejus orificiis propter tunicas nerveas & copiosos ex intercostali & octavo pari nervos ad eas abeuntes exquisitissimo sensu & motu peristaltico gaudere, atque adeo cum universi corporis partibus communicationem & consensum habere, supra jam satis ostensum est. Quum itaque venena hanc partem inter nerveas principem primo & immediate tangant atque afficiant, & diutius quoque illi immorentur atque etiam succo fermentali gastrico dissolvantur, non mirum est, illa in ventriculo præcipuam suam tyrannidem exercere, quod cardialgiæ, anxietates, constrictiones & compressiones præcordiorum, vomitiones, nausea, inflammationes, maculæ & stigmata sphaelosa post mortem satis abundeque testantur. Et notabile est, quod narcotica, it. arsenicalia, antimonialia cito, antequam ad massam sanguinis eorum materia dispersa fuerit, cum quasi adhuc integra & vix soluta in ventriculo hærent, virulentiam suam prodant, dum arctissime contrahunt orificia, teste anatome, & vel vomitum & anxietates, vel gravem somnolentiam de repente inferunt, utpote virulentia, simul ac insinuat fibris ventriculi nerveis, statim per universum nervorum systema dispergitur, & hostilis spasmus diffunditur.

§. XXII.

Quum venena summa partium tenuitate agant, ac partibus præcipue nervosis, quas omnes facile in consensum trahunt, infesta sint, in violentos motus eas adigendo, in proclivi est judicare, quam ob causam intra cutim admissa plus noceant, quam majori dosi intus sumta.

Scholion.

Scholion.

Planum ac perspicuum inde evadit, quare tam exitiosa sint vulnera, quæ telis venenatis infliguntur. Notum est, venatores Hispanos & Gallos olim succo helibori albi, qui intus assumptus non statim interficit, tela sua illivisse, iisque necasse cervos, unde venatoria venena & palæstrica vocata fuerunt, qua de re legi merentur *Cæsalpinus in Tr. de Venen. pag. 141. Crato Lib. 2. Prax. p. 220. & Celsus Lib. 5. c. 27.* Tanta etiam napello vis inest, ut telorum mucrones ejus succo infecti plagam lethalem infligant, cujus rei testes fide digni sunt *Dodonaus Lib. 3. de Purgant. Herb. Histor. cap. 12. & Conrad. Gesnerus de Lunarib. Herb. pag. 77. Capivaccius in Med. Pract. Lib. 7. cap. 7.* Notatu quoque dignum est, quod *Franc. Rhedi in observat. de Viper. p. 33. refert: expertum est, inquit, quod terribilia & lethalia jacula incolæ insulæ Bantham feriendo brevi tempore mortem concilient.* Relatum vero mihi est venenum, quo inficiunt tela, esse linimentum ex succo citri & arsenico paratum. Arsenicum interne majori dosi sumtum vim summi quidem veneni obtinet, mirabile tamen est, quot in exigua quantitate exterius applicatum ulceribus cancris febres, deliria & convulsiones moverit, id quod aliquot observationibus confirmat *Hildanus Cent. VI. Obs. 80. & 81.* Cujus experientiae adscribitur *Cl. Wepferus in Tr. de Cicut. Aquat. pag. 281.* qui ab arsenico cum butyro capiti inuncto febrem, deliria, syncopen, & totius capitis intumescen-
tiam imo mortem ipsam annotavit. Denique memorabilis circa hanc rem locus extat in *Thuari Hist. Lib. 27. p. 22.* ubi ita fatur: *A fide dignis mihi narratum est, apud Convallenses, seu Waldenses in usu esse, ut gladiorum acies, spicula, venabula, sagittas, glandes plumbeas & cætera missilia, Toræ vulgo dictæ seu potius phthoræ succo, quæ in illis locis frequens nascitur, & vulgari toxici nomine appellatur, inficiant, quod præsentissimum venenum esse sciunt Medici. Ejus & longe alium in re dispari usum inter Alpinos, quem minime reticendum putavi, mirabitur lector: gallinas & pullos & hujusmodi volucres, quorum carnes edules in diversoriis apponuntur, cultris eo succo illitis sub alis figunt, quo ictu mox emisso sanguine exanimantur, nullo vitio inde contracto; tantum carnes inde teneriores redduntur, & statim hospitibus comedendæ apponuntur.* *Cicuta* exterius si incaute usurpatur, testibus *Borello Cent. 2. obs. 3. & Sim. Pauli Quadripart. Botan. class. III.* pernicialia symptomata excitat. *Ranunculus hortensis* flore pleno miniato omnis quidem odoris expers est, emittit tamen virulenta effluvia; præsertim si naribus admoveatur, unde angustias præcordiorum, capitis dolores, & vomitus ortos fuisse legimus in *Miscell. Nat. Cur. Dec. 3. ann. 9. & 10. obs. 92.* Quibus cognitis neminem magna tenere debet admiratio, quod venenum morfu rabidorum animantium subcutaneis fibrillis in-
nuatum tam acerba ac læva symptomata in universo partium nervosarum systemate concitet. Cæterum quam periculosa symptomata ab inunctione mercurialium proficiantur, id complures historiæ & observationes satis luculenter evincunt, cujus rei exempla profert *Hildanus Cent. 3. obs. 92.* dum à mercurio vivo vel ejus pulvere ulceribus insperso corpora tenella protinus de dolore dentium & gingivarum inflammatione conquesta fuerunt. Idem auctor in alio subjecto mortem ab inunctione mercurii vivi inductam commemorat. Et *Borellus Cent. 2. obs. 92.* perhibet, aquam mercurii sublimati in scabie exterius usurpatam paulo post lypothymiam excitasse.

§. XXIII.

Omnia vera venena id commune habent, ut spasmos partibus nervosis & fibrosis inducendo interficiant.

Scholion.

Vana est in medicorum scholis contentio, utrum ve-

vena sanguinis massam colliquando, an potius coagulando perimant. Nam venena, ut nobis firmiter persuasum est, primario non tam in fluidas, quam potius in solidas partes, quæ fluida regunt, vim suam exercent; sique ex innumeris hominum, venenis interfectorum, historiis invicem collatis annotata ibi symptomata intueamur, facile intelligemus, ea ut plurimum inter se convenire, eorumque causam unice referendam esse ad violentas & convulsivas partium nervosarum contractiones, quæ liberum fluidorum motum perturbant vel penitus extinguunt. Quo magis illa veritas confirmatur, quod spasmi nervosarum partium naturæ humanæ sint insensissimii, nec tantum morbofi, sed etiam plane mortiferi. Perturbant enim sanguinis & humorum motum vitalem, qui ad exteriora & superficiem corporis tendit, omnesque excretiones juvat, atque adeo vitales succos potius ad interiora urgent, ac tubulis constrictis liberum eorum itum ac reditum sufflaminant. Agunt vero omnium trium regnorum venena eadem prorsus vi, spasticas nimirum stricturas inferendo. Pro differente autem locorum & partium natura alia atque alia inducunt symptomata. In cerebro nempe ejusque membranis deliria, convulsiones, epilepsiam nimiumque soporem inferunt; in membranis spinalis medullæ agitationes artuum convulsivas, inquietudinem & jactationem corporis; in corde & arteriarum compage animi deliquia, virium plenariam prostrationem, cordis tremorem, pulsum contractum & celerem, imo plane deficientem producant. In nervis pneumaticis & diaphragmaticis, singultum, ægram & summe anxiam respirationem cum violenta diaphragmatis ad superiora retractione, strangulationis ac suffocationis metu efficiunt. In oesophago sitim intolerabilem ac difficultatem deglutiendi; in ventriculi tunicis nerveis maximas cardialgias cum nausea & vomitu, in intestinorum volumine atrocissima pariunt tormina cum contumaci alvi adstrictione. Cutem horror occupat cum frigore vel sudore frigido, facie pallida, frigida, livida, cadaverosa: ductus urinarii spasmis constricti urinam retinent, vel perpetuo ad illam reddendam stimulantur. Ductus quoque biliarii spasmis coarctati biliosum succum transfundunt in sanguinem, unde ictæritia nascitur. Imo veneni contagium etiam ad membrum virile diffunditur, in quo molesta sentitur tensio. Quibus accedit, quod cadavera venenis interfectorum quoad ventrem mirum intumescere soleant, reliquo corpore maculis & stigmatibus rubris obfesso. Quod procul omni dubio eam ob causam contingit, quoniam vehementes partium stricturas tandem excipit ingens fibrarum laxitas & atonia; unde flatus antea spasmis compressi & coacervati, jam sui juris facti, volumen intestinorum mirifice expandunt. Quod vero ad maculas & stigmata rubra, in ejusmodi cadaveribus conspicua, attinet, illa à sanguine vi spasmorum expresso, & inter fibrarum interstitia stagnante provenire videntur. Atque hæc sunt præcipua & solennia illa, cum quibus veneno tacti conflictantur, symptomata, quæ si non omnia ac singula semper & ubivis sunt obvia, illorum tamen præcipua nunquam non observantur. Ecquis autem inde non perspicit, omnes has truculentas afflictiones à violentis partium nervosarum stricturis præcipue suos trahere natales atque originem.

§. XXIV.

Certæ ac perpetuæ observationis est, quod corpori communicata venena menti vim inferant, eique sanæ rationis usum eripiant.

Scholion.

Est ita omnium venenorum indoles comparata, ut non modo mentem emoveant, sed fere singula eorum peculiarem insaniam speciem inducant. Ita ex morfu canis rabidi hydrophobia, seu vehemens aquæ timor nascitur, ita prorsus, ut ad ipsius aquæ visum, sonitum vel nomen non tantum sine ulla causa vehementissime inhorrescant

rescant ægri, sed & cum anxietate & iracundia quadam insaniant, & quodvis liquidum respuant, licet intensissima siti premantur. Qui tarantula, quæ araneæ majoris est species, in regionibus Italiæ calidissimis, mensibus præsertim æstivis, punguntur, insatiabili saltandi libidine, præsertim ad quendam musices concentum, exagitantur. Qui fructibus solani veri sive Italici belladonnæ dictis vescuntur, eos furor corripit, unde etiam solanum furiosum seu maniacum appellatur. Quam in rem legi meretur *observatio* 161. *Miscell. Natur. Cur. Decur. 3. ann. 7.* ubi sex liberi, assumpto rob baccarum solani somniferi, quod loco baccarum ebuli confectum fuit, somno expergefæcti adeo in furorem acti fuerunt, ut vestimentis abjectis, & solo indusio velati clara die domuncula exirent, & per plateas discursarent gesticulando, tripudiando, cachinando, & delira multa tum loquendo, tum peragendo. Plures historias vid. in *Sim. Pauli Quadrip. Botan. class. III. p. 541.* & *Lobel. Adversar. p. 103.* & *Fabri Strychnomania.* Qui semen vel radicem hyoscyami nigri assumerunt, ita dementantur, ut facti videantur dæmoniacy. Hyoscyamus enim maxime phantasia turbat & satanas ad fraudes, quas intendit, peragendas ut plurimum utitur stupefactivis, uti lamiarum unguenta ostendunt. De hyoscyamo memorabilis est locus ap. *Scribon. Largum cap. 181.* dum ait: *hyoscyamum qui biberunt caput grave venisque distentum habent, mente abalienantur cum verborum altercatione, unde etiam nomen herba trahit altercum: postea sopiuntur & omni sensu carent, livescentibus membris eorum.* Ab assumpto semine daturæ Indicæ omnium sensuum, tam internorum quam externorum, facultas perit, ita ut apertis oculis vel auribus nihil audiant vel videant, omniumque actuum rerum obliviscantur. Haud dissimilem noxam infert radix cicutæ terrestris cocta & comesta; qua de re memorabilem casum tradit *Matthiolus in Comment. Dioscor. Lib. 6. cap. 11.* ubi vinitor cum uxore comestis cicutæ radicibus cubitum ivit, media vero nocte ambo expergefæcti, omni penitus ratione amissa huc atque illuc per domum in tenebris vagantes, amentia & furore commoti caput, faciem & oculos parietibus allidentes misere faciem sibi deturparunt. Plura exempla vid. ap. *Wepferum loc. cit. cap. 4. p. 27. 28.* Ex quibus clarissime intelligitur, mentis humanæ sanitatem cito tolli posse, eamque maximam partem dependere à mechanismo partium solidarum ac fluidarum, quo repente immutato, (mutatur autem maxime à venenis) celerime perit sensuum ac mentis integritas. Ideo *Hippocrates* hominis sapientiam à sanguinis conditione & motu rectissime deducit, & pulchra sunt, quæ gravissimus auctor *Lib. de Flatib. §. 20.* his verbis profert: *Opinor, inter omnia, quæ in corpore sunt, nihil magis ad prudentiam conferre, quam sanguinem. Hic cum in constanti habitu persistit, consistit etiam prudentia; sanguine autem permutato concidit simul & prudentia.* Nihil vero est, quod sensum ac mentis usum tam vehementer inturbet, quam graves ac violentæ partium nervosarum contractiones, quibus sanguis cum impetu ad caput urgetur, & liberior ejus cursus per cerebri vasa mire distenta intercipitur, unde est quod hypochondriaci plerumque phantasia corrupta laborent, ac vanas subinde imagines accipiant, temporisque progressu facile mania vel melancholia corripiantur. Quod vero quædam venena peculiarem insaniam speciem inferant, ut apparet in hydrophobia, id paulo altioris est indaginis, neque ad scopum medicum directe ac necessario pertinet, siquidem curatio horum affectuum sine exploratione modi, quo hæc fiunt, æque feliciter institui potest.

§. XXV.

Venena, præsertim corrosiva, ex minerali regno petita, & morsus virulenti rabidorum animalium sphace-

losis inflammationibus; narcotica vero præter sphacelum vasorum distensione necant.

Scholion.

Digna est notatu observatio, quam tradit *Cl. Zuvingerus Dec. 3. Ephem. obs. 104. pag. 132.* qui in cadavere rustici, hydrophobia secundo mense ob acceptum à rabido cane vulnus correpti & extincti, in humero & scapula sinistri lateris, ut & in reliquo dorso gangrænæ & sphaceli indicia observavit: in intestinis autem & stomachi tunicis, præcipue circa utraque ejus orificia maculas rubicundas, ceu totidem inflammatiuncularum signa, thoracis cameram undique sanguine suffusam & ex rubro livescentem, pulmonem inflammatum, interstitia membranosa circulatorum asperæ arteriæ cartilagineorum intensissime rubentia, diaphragma maxime circa costas inflammatum, in corde, vasis majoribus & pulmonibus sanguinem concretum & omnifero fluido destitutum invenit. Quod eorum, qui cobalto, arsenico, cicuta, emeticis & purgantibus acrioribus enecti fuerunt, ventriculus & intestina maxime inflammata, sphacelosa, & maculis nigris obsita inveniuntur, ipse usus, innumeris dissectionibus cadaverum confirmatus docet, atque etiam experimenta à *Cl. Wepfero loc. cit.* adducta id satis liquido demonstrant. Est vero hæc internarum partium sphacelatio spasmorum soboles, quibus sanguis intra vasa congestus, irretitus, ac refluere nescius, stasin concipit tandemque in putredinem abit, qua sphaceli natura continetur. Quibus narcotica vitam eripiunt, in illis mirabilis vasorum cerebri à sanguine congrumato facta distensio observatur. vid. *Lentil. Misc. Med. Pract. p. 223. Joach. Curæus Lib. 2. de sensu cap. 17. p. 229.* Atque ab hac sanguinis coagulatione ejusque motu per cerebri vasa impedito præcipue sensuum stupor atque insania proficiuntur.

§. XXVI.

Omnis morfu animantium tactos curandi ratio in eo versatur, ut venenum per transpirationem ac sudorem cito è corpore pellatur, & motus spasmodici compecantur.

Scholion.

Quoniam virulenta materia, quæ morfu animantium communicatur, texturæ est tenuissimæ, ideo ad illam corpore expellendam non convenientius datur emuntorium, quam porosa ac tubulosa cutis compages. Unde in proclivi est judicare, quanta vis & efficacia ad noxam venenorum avertendam recondita sit in iis remediis, quæ transpirationem movent ac sudorem proliciunt. Neque ullum aliud inveniri potest remedium, quod spasmos, qui perpetuo à venenis excitantur, & humores ad interiora corporis retrovertunt, magis cohibeat, quam blandum sudoriferum, quod motum contrarium inducendo succos vitales ab internis partibus ad externas propellit. Veteres tantum non omni veneno frigidam qualitatem tribuerunt, quum liberiores sanguinis ad partes externas influxum à spasmis cohiberi observarent, qua ratione inducti calida, & inter hæc maxime potens vinum veluti universalem antidotum mirifice commendabant. Quos etiam sequutus videtur *Celsus*, quo de moribus animantium nemo melius scripsit, dum *lib. 5. cap. 27. necessarium est*, inquit, *exsorbere potionem meri vinicum pipere, vel quodlibet aliud, quod calori movendo est; nam maxima pars venenorum frigore interimit.* Ex quo perspicitur, quam egregie ad expellendum venenum conferat solus motus & exercitatio corporis, qua sudor prolicitur. Et quoniam in tarantismo spasmus cutim constringunt, unde sudor gelidus fluit & corpus refrigeratur, quod etiam in scorpionum moribus observatum fuit, hinc etiam motus & corporis agitatio, quæ sudorem provocat, optimum & frequenti experientia comprobatum in tarantismo est præsidium.

Probe

Probe enim animadversum fuit à sagacioribus, non musicam, qua tantopere delectantur tarantula icti, genuinum esse tarantismi remedium, sed potius motui, ac sudori, quem movet saltatio, adscribendum esse, quicquid musica præstari fingitur. Cæterum interne acetum ac theriaca in omnibus fere venenorum generibus, solis corrosivis exceptis, discutiendo ac sudorem movendo opem ferunt præstantissimam. Quod remedii genus adversus viperarum morsus jam olim commendatum fuit à *Celfo*, quia spissescentem intus humorem discutit & hac ratione sanitatem dat. Præterea etiam veteribus in more positum fuit, veneno tactos & hydrophobia laborantes balneo immittere, quod *Celsus* lib. 5. cap. 27. his verbis testatur: *Quidam post rabiosi canis morsum protinus in balneum mittunt, eumque ibi patiuntur desudare, dum vires corporis sinunt, vulnere aperto, quo magis ex eo quoque virus distillet; deinde multo meracoque vino excipiunt, quod omnibus venenis contrarium est. Idque cum ita per triduum factum est, tutus esse homo à periculo putatur.* Eodem loco gravissimus auctor suadet, vinum calidum cum ruta quam plurimum ingerendum & in calidum balneum mittendum esse eum, qui cicutam bibit. Quod curationis genus apud veteres usu receptum valdopere probamus. Temperatum balneum in omni infania ego magnopere laudo atque commendo, quia hoc partium nervosarum stricturas laxat, poros cutis recludit, & motum sanguinis, spasmodum vi ad cerebrum retroversum, ad corporis exteriora revocat. Poris autem apertis vinum propinatum sanguinis motum liberiores reddit & transpirationem juvando omnem venis conceptam virulentam materiam ex intimis sedibus expellit. Cæteroquin ad hydrophobiam ceu solenne ac potens præsidium commendatur immersio in aquam frigidam. Ego autem cum *Celfo* non semper securum, sed valde infidum id esse remedium puto, quia verendum est, ne, ut ait *Celsus* Lib. 5. cap. 27. *infirmum corpus aqua frigida vexatum nervorum distentio absumat.* Nam si balneum frigidum in ejusmodi casibus juvat, illud exinde contingit, quod terror & vehementior sanguinis ad interiora repulsio in robustis & calidioribus subjectis motum sanguinis & humorum intensiorem cum calore ac sudore efficiant, quo vis morbi infringitur & venenum eliminatur. Quum vero id non semper & ubivis eveniat, tunc utique frigus spasmi à veneno excitati vehementiam augens majorem potius noxam affert. Quam ob rem *Celsus* loc. cit. sapienter monet, ut, si talis spasmus incidat, æger protinus à piscina in oleum vel balneum calidum demittatur.

§. XXVII.

Externe adversus venenorum vim convenientissima sunt, quæ stricturas partium laxant, emolliunt, poros aperiant, & virulentæ materiæ exitum præbent.

Scholion.

Veteres hunc in finem non sine ratione & effectu animalia viva discissa partibus demorsis admovent, quod etiam imperat *Celsus* lib. 5. cap. 27. *vivum oportet gallinaceum pullum per medium dividere, & protinus calidum super vulnus imponere, ut pars interior corpori jungatur. Facit id etiam hædus agnusque discissus, & calida ejus caro statim super vulnus imposita.* Ita etiam pullos gallinarum vel eorum podices admoventes suadet *Forestus observ. chir.* 34. Lib. VI. Neque alia profecto ratione juvat viscus, vel pars quædam animalis rabidi, quod plagam inflixit, apposita, vel oleum scorpionum tantopere adversus eorum ictus commendatum, quam emolliente ac demulcente virtute. Nam quod ex vipera, scorpione, aut alio animali rabido quidpiam interne vel externe usurpatum specifica & vi quadam quasi magnetica omnem veneno efficaciam subito detrahat, id potius inter fabellas aniles, quam veras observationes practicas reponendum puto.

Frid. Hoffmanni Oper. Tom. I.

Serpentum ac viperarum, quas nostræ regiones alunt, ictus minime virulentus est, unde frustra ex serpentibus ac viperis præbetur medicina, quæ etiam sine eo non nocent. Nam vere scribit *Celsus* loc. cit. *Italia frigidioresque regiones hac parte salubritatem habent, quod minus terribiles angues edunt.*

§. XXVIII.

Adversus venena corrosiva ac drastica & inflammatoria purgantia oleosis, pinguibus, & lacte copiosius hausto præsentius non datur auxilium.

Scholion.

Agyptæ & circulatorum ad fucum faciendum, quasi illorum theriaca potentissimum sit adversus omnia venena præsidium, mercurium sublimatum, arsenicum & his similia venena in vulgi conspectu deglutiunt, prius autem stomachum butyro infarciunt, ex quo fit, ut citra omne periculum venena per vomitum rejiciant. Plures vero ob causas lac adversus venena corrosiva certissimum præbet auxilium. Primo enim impedit, quo minus ventriculi tunicæ à veneni spiculis nimium lancinentur. Deinde oleoso ac ramoso suo contextu ipsas veneni soluti acies involvit, atque eo causticam ejus vim obtundit. Tum etiam vehiculum satis opportunum constituit, quo venenum vomitu possit exterminari. Denique vi sua oleosa ac demulcente impedit, quo minus fibræ in vehementiores spasmos adigantur. Ante aliquot annos hic loci nobis memorabilis casus obtigit, ubi decem juvenes, illustri prosapia oriundi, jusculum avenaceum, cui arsenicum ultra duas fere uncias cum æquali pondere sacchari admixtum erat, assumerant, ac brevi post summis anxietatibus ac rofionibus ventris torquebantur, quos omnes propitii Numinis favore adjuti oleo amygdalarum dulcium & lacte liberavimus; hæc vero remedia tanta in quantitate fuerunt exhibita, ut singulis vix decem mensuræ lactis suffecerint, quæ semper vomitu rejiciebantur; imo tam diu à nobis propinata sunt, donec omnis vomendi conatus cessaret. Idem lactis remedium ad noxam venenorum, præsertim quæ inflammatione necant, ut est cicuta, præcavendam magnopere commendamus. Datur autem adversus venena stupefactiva intus assumpta non excellentius remedium emeticis, mature cum oleo oblatis, quo vomitus eo citius provocetur.

CAPUT III.

De venenis corporis humani.

§. I.

PRæter varii generis venena, quæ alma rerum natura tum ex vegetabilium, tum mineralium penu producit, dantur adhuc alia corpori humano insensibilissima & quasi propria, quæ partim in eo generantur, partim ab eo in alia disseminantur, & gravissimos ac plerumque funestos morbos inferunt.

Scholion.

Venenorum classis latius patet, quam vulgo putatur; dantur enim quædam morbifera, quæ incunabula sua primamque originem trahunt in corpore humano; quædam etiam extrinsecus adveniunt, sed modo mirabili in corporis humani succis multiplicantur, adeo, ut funestum morbum aliis communicent. Quare oportet quam maxime medicum venenorum morbiferorum indolem, vires, proprietates, eorumque auxilia paulo accuratius perscrutari.

§. II.

Venena morbifera illa nobis dicuntur, quæ vel extrinsecus mediante aëre interiora corporis humani sub-

S

eunt,

eunt, & gravem periculique plenum, certisque notis distinctum morbum inferunt, & vocari solent miasmata. Tales morbi sunt ex acutis variæ pestilentialium & malignarum febrium species, variolæ, morbilli, dysenteria maligna; ex chronicis lues venerea, lepra & maligna scabies. Vel in ipso corpore generantur, si materia excrementitia jam separata à sanguine repellitur, uti in arthritide, podagra, variolis, purpura, morbillis, scabie fieri solet.

§. III.

Ea est natura virulenti miasmatis, ut agendo in corporis humani succos, mirifice se propaget atque multiplicet, & tenuis saltem ex eo prodiens vapor alios etiam sanos homines simili morbo inficiat.

Scholion.

Qui ex venenis corrosivis vel etiam narcoticis, ex mineralium vel vegetabilium regno petitis pereunt, ii vix ullo contagio alios contaminant; alia vero est natura & indoles eorum venenorum, quæ ex animantium, maximeque corporis humani latebris scaturiunt, quippe horum plura contagio corpora præsertim disposita & vicina, afficiunt.

§. IV.

Miasmata, quæ simili morbo alios inficiunt, sunt fermentativæ & corruptivæ indolis.

Scholion.

Materia fermentativa & corruptiva ea nobis vocatur, quæ intestino motu unionem & texturam corporum mixtorum resolvit vel destruit, similemque motum & crasin, in qua materia hæc constituta est, inducit.

§. V.

Duplicis generis fermentativus & intestinus motus in natura observatur: alter, qui vegetabilium succos, ex partibus oleosis & acidis mixtos, in spiritum resolvit inflammabilem; alter qui mixtionem animale, five animantium succos, qui ex particulis oleosis, subtilibus terreis & aqueis, omni acido excluso, commixti sunt, destruit & cum foetore dissolvit, qualis status vocari solet putredo five corruptio.

§. VI.

Fermenta five miasmata morbifera, nostra sententia non primo & proxime in sanguinem, sed potius in succos lymphaticos subtilioris & fermentativæ indolis, quales præcipue salivales sunt, agunt, iisque similem motum ac texturam imprimunt, adeoque simili corruptione eos contaminant.

Scholion.

Duplicem corruptionis speciem in animantium succis admittendam esse arbitramur; quarum una est, quæ in sanguine, liquore admodum sulphureo, consistit; altera, quæ lymphaticos & serosos magis humores affligit. Illa ob copiosum sulphur eminentioris est foetoris ac putredinis; hæc vero magis in vappescentiam quandam ulcerosam & corruptionem salso-sulphuream, plerumque acrem & causticam, degenerat.

§. VII.

A miasmate morbofo non primario sanguis in putredinem conjicitur, quia sanguis, quamdiu est in motu progressivo, inque orbem & circulum agitur, nullam contrahit putredinem. Deinde sanguinis stagnantis putrida & foeda corruptio non tam est contagiosa, ut apparet ex iis, qui sphacelo vel cancro exulcerato corripuntur, ubi foetidissimæ exspirant exhalationes, omnis contagii expertes.

Scholion.

Videtur putredo, quæ cum foetore jungitur, longe crassioris & rudioris esse texturæ & indolis, præsertim quum sensus afficiat. Longe vero simplicior & tenuior materia esse debet, quæ interiora pororum ingredi, & unionem mixti subvertere potest.

§. VIII.

Salivalis latex ad miasmata virulenta in aëre vecta recipienda & propaganda admodum idoneus est.

Scholion.

Neque enim primo alia & commodior patet via, quæ perniciæ, à morbofis corporibus qui prodeunt, halitus in aëre vecti cum corporis nostri succis communicentur, quam ipsum os, quod perpetuo salivali humore madet, & quo continenter aërem tanquam horum vehiculum haurimus. Quod vero vapores etiam tenuissimi lubentissime humido sese apponant, inque eo quasi figantur & irretiantur, res plurimis experimentis compertissima est. Salivæ igitur vehiculo maligni illi halitus continua deglutitione, præsertim cibo ac potu sumto, ad ventriculum & intestina descendunt, & ibi stagnantes valde corruptibiles & fermentescibiles succos, quos salivales latices ex glandulis ventriculi & intestinorum tenuium & ex magna pancreatis glandula defluentes, nec non biliosi in copia affluentes succi, & varii generis ingesta constituunt, in similem fermentativum & corruptivum motum facile convertunt, ut inde ingens corpori struatur perniciæ. Denique nullus humor est in universo humano corpore, qui ad fermentationem & intimam partium, quæ corpus constituunt, mixtionem dissolvendam magis est idoneus, quam saliva, quæ quum admodum spirituosæ & mobilis naturæ sit fermentum, ideo miasmatis, quæ similis sunt naturæ, promptissime obsequitur, similemque motum facile recipit & continuat.

§. IX.

Error est, per cutis spiracula vel vesicularum pulmonum poros virulentos pestis halitus cum sanguine proxime misceri, eumque inde corrumpi.

Scholion.

Aërem, qui corpus grave & elasticum est, & continua respiratione pulmones subit, non pertransire pulmonum vesiculas & vasa sanguinea, jam superius in tractatione physiologica claris argumentis evincere sustinimus. Licet vero ponamus, tenuissimæ indolis exhalationes per poros pulmonum ad sanguinem deferri: quia tamen sanguis in continuo motu atque in transpiratione est, nulla putredo vel corruptio facile subsistere, neque illæ exhalationes diu in eo hospitari possunt. In prima vero regione longe aliter se res habet, ubi stagnantes & fermentescibiles sunt succi, quibus associatum miasma diutius inhærescit, & perniciæ suum motum atque indolem communicat, atque adeo jam mora valde auctum & multiplicatum longe potentius, quam sibi relictum, violentiam suam in corpus exercere poterit.

§. X.

Quum morbi contagiosi magis ex corruptione lymphæ, quam sanguinis subnascantur: hinc ad lymphaticos rectius, quam ad sanguineos referri debent, atque etiam symptomata à corrupta magis lymphæ, quam sanguine petenda sunt.

Scholion.

Si consideramus omnis generis febres, quæ mali moris sunt, & quæ contagio serpentes maximam stragem edunt, lenissime illæ incedunt sine singulari ardore & dolore, & catarrhalium naturam plerumque mentiuntur, ut peritos etiam medicos hoc in genere sæpius fallant.

lant. Tusses, sternutationes, pectoris infarctus, copiosae salivae effusiones, raucedines, crebrae alvi dejectiones, inflammationes faucium, quae variolis aequae ac morbillis associari solent, pustulae deinde ulcerosae cutis, & ulcera saepius cacoethica à variolis relicta, quae & viscera & artus hostiliter infestare solent, quid aliud designant, quam lymphaticos succos extreme esse corruptos. Ex chronicis scabiem, lepram, elephantiasin, ex summa lymphae corruptione nasci, & ex glandularum vitio prodire res indubia à medicis censetur. Luis venereae miasma in lymphâ seminali primo tyrannidem suam exercet, postea vero universam lymphae massam corripiendo, dolores fixos, tumores, ulcera depascencia, praesertim in glandulosis locis causatur. In pestilentia quoque lympham magis, quam sanguinem, infectam esse, ex glandularum tumoribus, subaxillis, sub inguine, ex parotidibus, in quibus verae pestis pathognomonica signa posita sunt, luculenter apparet. Et quia in peste & in malignis vires subito & vehementer prosternuntur statim in principio & antequam putredo formalis sanguinem destruxerit, hinc recte colligitur, spirituosam & lymphaticam sanguinis & humorum partem, quae genuinum virium fomentum est, magis esse à miasmate corruptam ac destructam, quam ipsius sanguinis sulphuream mixtionem, utut, si invaluerit morbus & mors appropinquet, illud etiam contingat.

§. XI.

Quum contagium subtilioris lymphaticae corruptionis potius soboles sit, facile patet foetidam putredinem, in quam post mortem cadavera abeunt, pestem alioquinque contagio infectos morbos non tam facile producere.

§. XII.

Longiori usu & experientia confirmatum est, quod qui peste laborant, facilius alios inficiant, quam qui ea occubuerunt. In cuius asserti veritatem insignis locus ex *Foresto Lib. VI. obs. 28.* adducendus est: *In agone, inquit, facile alios inficiunt peste correpti, sed homines mortui non facile peste inficiunt, quia corpora mortuorum, quae amplius non expirant, nullum venenum ejaculantur. Quod si aliquod contrahatur, potius ab eorum pannis vel vestibus contrahitur, in quibus virus diu conservari potuit. Siquidem disseceimus aliquando corpora mortua ex peste multis spectatoribus studiosis sine aliquo damno, propterea quod mortuo animali perit omne venenum & quia ignorabamus, eos mortuos ex peste, causa fuit, ut minus turbaremur.* Et quod non à sanguine, sed potius ex corrupta lymphâ, quae subtilioris naturae est, ipsa miasmata generentur, vel ex eo apparet, quod ulcerosa materia maxime sit contagiosa, ut in bubonibus pestilentialibus, scabie, lepra, lue venerea, dysenteria, & variolis videmus.

§. XIII.

Miasmata, quae morbis gravioribus inferendis idonea sunt, veri veneni naturam æmulantur.

Scholion.

Sunt enim veneni characteres in eo maxime positi, ut primo exigua mole ingentem potentiam actiones secundum naturam immutandi exercent, deinde ut celeriter id exequantur; tum ut in nervosas maxime & membranaceas partes vim suam exerant. Hæc omnia propria quoque sunt miasmatis, siquidem tenuissimus est ille in peste aliisque malignis affectionibus halitus, qui robusta & antea sana corpora brevi tempore è medio tollere potest. Tenue est quoque contagiosorum affectuum, qui longius corpora exercent, ut luis venereae, leprae, & virulentæ scabiei principium. Et sicuti venena maxime ventriculo & intestinis, velut partibus valde sensibilibus & nervosis, infesta sunt: ita etiam illae partes in morbis malignis & contagiosis præcipue

omnium læsae sunt & patiuntur. Maximæ enim illae præcordiorum anxietates corporisque iactationes, ventriculi cum fastidio ciborum subversiones, torminosae alvi dejectiones, vel contumaciores ejus adstrictiones, dolor capitis & lumborum, animi deliquia, convulsivæ artuum tractiones, inexhausta sitis, vigilia, extremorum frigus, pulsus contractus, debilis & frequens, tusses convulsivæ, cardialgiæ, funestæ ventriculi & intestinorum inflammationes, quae malignis & exanthematicis morbis saepe statim in principio associari solent, non aliam habent originem, quam quod corrupti in primis viis succi nervosae ventriculi & intestinorum membranas & mediantibus hisce universum nervorum genus vehementer affligant & commoveant. In eo vero deterior natura morbiferorum miasmatum aliis venenis est, quod sese commiscendo cum succis fermentescibilibus multiplicent, & vicina corpora hostiliter invadant.

§. XIV.

Vis multiplicativa venenorum morbiferorum maxime sese exerit in iis corporibus, quae ad fermentationem corruptivam dispositos habent humores.

Scholion.

Firma est & veterum & recentiorum sententia, quod ad suscipiendam pestem & alios morbos malignos certa corporum dispositio requiratur; dum scribunt, quod plures inter ægros infectos versentur, & res infectas tractent, à contagio tamen liberi maneant: alii vero etiam temperatissime viventes levissima occasione peste corripantur. Ex quo utique discitur, vim miasmatis virulenti non esse absolutam, sed à corporum dispositione ejus funestum effectum maxima ex parte dependere. Jam autem experientia deprehendimus, omnia corpora, quae pravis, in corruptionem pronis, repleta sunt humoribus, maxime esse contagiosis morbis exposita. Et hæc est causa, cur mulieres gravidæ, infantes & infimæ sortis homines, qui misere vivunt, & angustas domos habitant, neque minus milites in castris, & qui diuturnam famem sustinuerunt, & continuis vigiliis atque animi commotionibus corporis robur minuerunt, & qui deliciis diffluunt, longe facilius peste aliisque epidemice grassantibus morbis tententur & difficilius evadant. Quorsum virgines, ex mensium retentione laborantes, referimus. Siquidem horum omnium corpora & maxime primæ viæ pravis humoribus scatent.

§. XV.

Unum præ cæteris est, quod humana corpora maxime ad pestis & aliorum morborum contagium recipiendum disponit, idque est timor, quia corpora admodum reddit imbecilla, viresque depauperat, & motus excretorios minuit.

Scholion.

Et quanquam in ea non sum sententia, ut pestis & aliorum contagiosorum affectuum naturam in valido timore constituere velim, quia infantes lactentes & bruta animantia, in quæ nullus cadit timor ejusmodi morbis corripuntur: illud tamen negari nequit, quod ingens mortis formido imbecillitatem, quæ secundum Celsum omnibus morbis patet, corporibus ingeneret, ita ut miasma non modo facilius recipiatur, sed & faviora symptomata inde producantur. Animadvertimus enim, pestem plerumque tunc fieri lethalem, quum aggreditur corpora animi timidioris ac desperabundi; in aliis vero, quibus firmior mens constat, mitius & citra ullum vitæ discrimen decurrere. Nam quemadmodum ipse terror, ut supra exposuimus, veneni vim symptomatum gravitate saepius superat, & similia saepeque vehementiora infert symptomata; ita in proclivi est judicare, terrorem, per se nocentissimum, si

veniat in virulenti miasmatis & morbi contagiosi societatem, summumque minari periculum. Accedit, quod qui de peste memoratu dignissima prodiderunt, constanter & uno ore affirmant, sola contagii, quod tam procul abfuit, imaginatione, & metu inde concepto multos iisdem, quæ sunt pesti familiaria, symptomatibus correptos, imo etiam è vita fuisse sublato.

§. XVI.

Ad præcavendos morbos, eosque maxime acutos, qui oriuntur à contagio, nihil est salutarius, quam fugere, quæ lædere possunt, loca infecta, neque salivam deglutire, nec cibum vel potum in locis suspectis assumere, sed salivalem laticem crebro exspuere, quo fine, quæ ejus fluxum movent, commendanda sunt.

Scholion.

Quum pestilentia aliorumque morborum contagiosorum, præsertim acutorum, ut pètechialium febrium, variolarum, morbillorum, qui validissime contagio infestant, miasmata ore hausta salivali latici admixta cum eo in ventriculum & primas vias descendant: hinc à peritissimis medicis salutari & præservatoria lege optime cautum est, ut, qui propius agunt & conversantur cum infectis, nunquam deglutiant salivam, sed eam potius frequenter ore ejiciant, neque, quod majoris momenti est, cibum vel potum tunc assumant, eo quod miasmate imbuta saliva promptissime hac ratione ad ventriculum deferatur. Convenit vero paulo acriora ore masticare, e. g. radicem imperatoriae, angelicæ, zedoariæ, helenii, ut salivæ fluxus cieatur.

§. XVII.

Ad arcenda pessimorum morborum miasmata, & ad illorum vehementiam mitigandam nihil aptius est remediis acidis, è quibus acetum vini & succus citri præcipue eminent.

Scholion.

Certa & diuturna experientia confirmatum habemus, poma citri, vinum Rhenanum, acetum vini, si quis iis dextre usus fuerit, omnibus alexipharmacis, & aliis, quæ in auxilium pestis prompta sunt, remediis palmam præripere. Atque ob hanc manifestam rationem, quia nihil potentius putredini & motui ejus intestino resistit, quam acidum, vino Rhenano & aceto vini os & nares probe colluenda esse, vel frustum pomi citrei ore tenendum, ventriculo quoque jejuno, parcius tamen, hæc assumenda esse, peritissimi in peste curanda medici magno cum fructu imperarunt. Frangitur enim & enervatur hac ratione immediate & proxime contagii vis virulenta. Idem remedium eundemque eo utendi modum alii non sine fructu in cæteris malignis & contagiosis morbis, item in variolis & morbillis adhibuerunt. Spectat huc etiam non contemnenda virtus phlegmatis vitrioli, tincturæ papaveris rhœados, & rosarum cum spiritu vitrioli paratæ, quæ à Waldschmidio & Archiatris Hassiacis aliquot abhinc lustris maximopere commendata fuerunt, eo fine, ut grassantibus his morbis frequentius usurpata vel plane variolas arceant, vel eas parciore & mitiores efficiant. Nos mixturam simplicem bene præparatam, ubi maligni morbi grassantur, & curandi & præservandi fine cæteris omnibus præferendam esse arbitramur.

§. XVIII.

Concepto in ventriculo & primis viis morbifero contagio non certius datur præsidium, quam citissime clementi emetico illud cum succis ad corruptionem pronis ejicere.

Scholion.

Certe emetica caute & cum prudentia adhibita divi-

nam opeiri ferunt, si in tempore & statim in principio pestis & contagiosorum morborum usurpentur, quod certa experientia nobis constat. Quam primum enim se quis infectum sentit, quod ex ciborum fastidio, languore, anxietate, ventriculi subversione judicandum est, statim offerri debet emeticum, quo non modo pestilentia, sed & Hungaricus morbus, febres castrenses, dysenteria maligna ipsa in herba jugulari possunt. Neque enim tantum ipsum illud fermentum, sed & saburra vitiosorum humorum, quæ pabulum ac fomentum ipsi præbet, felicissime ejicitur. Subjungendum postea est validum alexipharmacum, quo sudor largiter moveri debet. Ex emeticis radix ipecacuanhæ, solutio tartari emetici cum mixtura simplici combinata; ex sudoriferis pulvis bezoardicus cum aliquot granis salis volatilis cornu cervi, nitro & camphora ceu securissima remedia nobis probantur. Quam secuta vero & expedita emetica his in casibus sunt præsidia, si statim inter initia morbi dextre fuerint adhibita, tantum periculi & damni inferunt, si ad totum genus nervosum vehementia veneni jam penetraverit, siquæ, quod pejus est, inflammatio aut sphacelatio ventriculi immineant, tunc enim certissime mortem accelerant.

§. XIX.

Quum colluvies vitiosorum & fermentescibilium prima in regione stabulantium humorum admirandum in modum & pestis & omnium epidemiorum & contagiosorum affectuum vehementiam adaugeat; opportunissimum utique tunc est remedium, statim in principio post vel ante conceptum contagium, emetico vel leniori laxante primas vias sordibus istis purgare.

Scholion.

Hujus insignis remedii virtus non anxie investiganda est. Nam si miasmata vim suam perniciosam maxime exerunt per fermentationem, quæ à copia biliosorum, salivalem aliorumque corruptorum humorum mirifice adjuvatur: facile patet, opportune corruptis hisce succis subtractis vehementiam causæ ipsiusque morbi valde minui atque infringi. Siquæ nihil aliud, certissime tamen id consequimur, ut mitiora, nec graviora succedant symptomata. Harum vero sordium expurgatio etiam vel leni emetico vel benigno laxante instituenda est. Nos pilulas Ruffi, rhabarbarina, vel etiam mercurium dulcem cum extracto rhabarbari in forma electuarii mixtum non satis laudare possumus. Alia enim purgantia, quæ veneni quid habent, aut fermentativa sunt, aut sanguinis massam fortiter commovent, penitus excludenda esse arbitramur. Patet quoque ex dictis, nec firmitus nec præstantius in peste & contagiosis morbis promitti posse præsidium, quam à temperantia, inde *Diodorus Siculus*, dum fatalem illam Numidiæ pestem describit, diserte admonet, commoda victus ratione, frugalitate ac moderatione affectuum ejusmodi tempore commune malum maxime evitari. Qua etiam ratione Socratem accepimus se incolumem præstitisse, cum dirissima lues Græciam & Atticam imprimis devastaret, temperantia nempe legibus se adstringens, cujus etiam beneficii in communi clade superstes perseverabat. Sicuti contra *Riverius* bene observat, proclivia ad pestem ea corpora esse, quæ copioso abundant sanguine, eundemque habitum ex intempestivo & lautiori victu sibi contraxerunt.

§. XX.

Quum materia, quæ ex ulcere prodit, & corruptivæ & fermentescibilis sit indolis, contagio etiam alia corpora infestandi potentia polleat: hinc scabies præsertim humida, gonorrhœa virulenta, ulcerosum & foetidum ex uteri vagina stillicidium, dysenteria, cui plerumque ulcera intestini recti juncta sunt, & aliæ quoque cutis descædationes atque ulcerosæ corruptiones contagiosæ natura

turæ sunt. Neque pulmonum ulcera à contagio prorsus immunia observantur.

Scholion.

Ichorosam, quam ulcera fundunt, materiam fermentativo quodam motu agitari, vel ex eo patet, quod affluentes ex vasis succos simili corruptione ac foetore inficiat, & mirifice suam indolem multiplicandi habeat aptitudinem. Non itaque mirum, eandem materiam cum corporum aliorum succis mixtam in iis similem propagare corruptionem. Illud vero observatione dignissimum est, quod promptissime fluida similis indolis atque originis subeant eaque contaminent. Ita ex scabie vel aliis subcutaneis exulcerationibus materia exiens poris ac tubulis subcutaneis se prompte insinuat, ibique eundem morbum procreat. Ulcerosum gonorrhœæ & luis venereæ fermentum maxime partes genitales adoritur, & ibi contentos succos lymphaticos & feminales contaminat. Purulentus dysentericorum fluxus effluvia spargit, quæ ano excepta, præsertim si quis eadem sellæ infideat, intestinorum tunicas petunt, & foetidissimum hunc morbum pariunt. Ex veteri pulmonum ulcere ore suscepti halitus corruptivæ labi pulmonibus inferendæ aptissimi sunt.

§. XXI.

Ichorosa ulcerum materia non modo affectiones chronicas, sed etiam acutas per contagium aliis corporibus inducit, id quod solenni illo more, qui in Turcia jam obtinet, variolas per insitionem excitandi clarum ac perspicuum evadit.

Scholion.

Non ignotus amplius, opinor, erit iis, qui paulo majori cura in experimentis practicis versati sunt, modus in Turcia familiarissimus variolas pro lubitu per insitionem producendi, qui prolixè descriptus est *Cent. 5. Misc. Nat. Cur. observat. 2.* dum videlicet die duodecima acu pertunduntur tubercula, & pus emanans vasculo excipitur; postea cutis pueri acu pertunditur ad guttulæ sanguinis emanationem & statim pus variolosum infunditur & cum sanguine miscetur. Tunc ad finem plerumque septimi efflorescere solent variolæ, semper tamen cum levioribus, quam fieri solet, symptomatibus, dum rariores erumpunt pustulæ, neque calamitosi aliquid subsequitur, quod experimentum in millenis subjectis intra aliquot annorum spatium securissimum deprehensum fuit. Ex quo discimus, quod non modo fermenti variolosi naturam, sed & fermentatio illa morbigica non tantum sævitæ habeat, si in lymphæ sanguinis immediate suscitetur, ac si cum salivali latice & primarum viarum succis, ut communiter fieri solet, miasma illud prius misceatur. Siquidem fermentum contagii in exhalationibus consistens, magis subtile ac spirituosum adeoque acutum est: in humore vero purulento communicatum magis iners ac languidum existit. Cui accedit, quod pus variolarum in ipsam sanguinis massam infusum, ejus copia obtundatur, ut longe mansuetiorem indolem induat.

§. XXII.

Omnes, qui ex contagio nascuntur, morbi, præsertim chronici, ut scabies, lues venerea, gonorrhœa virulenta, ingressu etiam contagii in corpus jam facto, non commodiori via expurgantur & quasi prima in herba suffocantur, quam exterius per balnea, & interne per data diaphoretica & specifica alexipharmaca.

Scholion.

Morbos, quos contagium profert, cita ope per ea remedia, quæ circulum sanguinis ad habitum corporis promovent, averti posse, & sana dicitur ratio & ipsa experientia confirmat. Neque enim convenientius, quo ex intimis sedibus propelli debet tenuissimæ substantiæ

Frid. Hoffmanni Oper. Tom. 1.

virus, præter ipsam cutem datur emunctorium, quæ temperatis balneis relaxatur & aperitur, quo postea massa sanguinis & humorum diaphoretico appulsa eo lubentius alienum admixtum dimittat. Certe enim non datur præstantior modus omnis generis venena ex corporibus infectis extrahendi, quam per balnea & subjuncta sudorifera modo statim id in principio fiat, & remedium reiteretur. Novimus hac ratione à gonorrhœa, lue venerea, à scabie maligna inter initia multos fuisse præservatos. Imo quamvis etiam hi morbi invaluerint: in iis tamen eradicandis purgantia, mercurialia, balnea & diaphoretica opem ferunt præstantissimam.

§. XXIII.

Præcipuis, quæ venenorum viribus resistunt, alexipharmacis camphoram, sal volatile cornu cervi, nitrum, herbam scordii, radicem pimpinellæ, decocta lignorum & mercurium fixiorem diaphoreticum ad pauca grana terreis & alcalinis commixtum accensenda esse arbitramur.

§. XXIV.

Pesti cæterisque omnibus, qui contagio lædunt, morbis à corpore arcendis magno præsidio sunt fonticuli sive ulcera arte facta.

Scholion.

Fonticuli sicuti purgamenta sanguinis & lymphæ alienæ & noxiæ indolis evacuant, atque adeo iis, qui pertinacibus cephalalgis, & aliis oculorum & capitis vitiis vexantur, non mediocriter solatium afferunt: ita eo tempore, quo aer putridus & contagiosus exhalationibus inquinatus est, si forsan in corpus irreperint, non effectu carent, nam noxiis & corruptis humoribus per hæc loca expulsi minus alimenti miasmati circumfuso vel intus subeunti præbentur. Qua in re consentientes habemus peritissimos medicos, quibus maxime accensendus est *Fabricius Hildanus*, qui *Cent. IV. obs. 23. & 86.* prodit, se in acutissima peste Laufannenfi, ubi ex centum ægris vix sedecim evaserunt, beneficio fonticulorum in brachio sinistro & poplite dextro gestorum servatum, & neminem ex iis, qui fonticulos gerebant, peste correptos vel ea occubuisse, præter unum vel alterum, summe cacochymicum. Horum virtutem etiam laudibus extollunt *Deusingius* in *Tr. de Peste, cap. 23.* *Paræus Lib. 22.* & *Diemerbroekius*, qui scribit: *insignem fonticulorum utilitatem in peste multoties vidimus.* Et *Hier. Mercurialis L. de peste C. 23.* hæc memoratu digna adscribit: *Possum testari, me innumeros peste extinctos vidisse necquenquam, qui haberet cauterium, præter unum tantum, atque ille erat sacerdos. Interrogavi etiam hac de re multos medicos, qui testati sunt, neminem se vidisse.* Quod vero ad ea loca, ubi antea ulcus fuit, noxius & corruptus humor deferatur ibique exitum quærat, hoc inter alia evincere videtur ipse *Hildanus* loc. cit. qui scribit, se ante triginta annos bubonem ruptum in dextro inguine in gravissima peste habuisse, à quo tempore quotiescunque aer aliquis ipsum afflaverit, protinus dolorem in eo inguine persensisse, quod etiam in peste Laufannenfi factum est. Nos vero non tantum in pestilentia, sed & in aliis malignis grassantibus & contagio infectis morbis summo cum fructu fonticulos gestari observavimus, idque remedii genus maxime opere commendamus. Nam quod majus potest, id quoque minus præstare posse, rationi valde consentaneum est.

§. XXV.

Præter venena, quæ extrinsecus corporibus humanis adveniunt, dantur etiam & nascuntur quædam in ipso corpore, & hæc duplicis sunt generis, vel putredinosæ vel causticæ indolis.

§. XXVI.

Quemadmodum nulla res magis vitæ & conserva-

tioni corporis infensa est, quam putredo, qua non modo solidorum structura & fluidorum mixtio, sed & partium, quæ impetum & motum faciunt, vis motrix destruitur: ita sphacelatio, sive putrida & foetida partis solidæ cujusdam destructio intra corpus producta, easdem vires obtinens recte perneciale & mortiferum corporis venenum dici meretur, maxime cum repente serpendo se multiplicet, & putrida contagione vicinas partes opprimat.

Scholion.

Sphacelatio sive intus corripit partem nobilem, cujus generis est nerveo-membranacea, sive extrinsecus etiam in artubus oriatur, subito necat, nisi mature succurramus, quia vehementiam serpendo acquirit, & vitales vires validissime destruit. Quare animadvertitur, ubi putredo invaserit partem solidam, protinus evanescere vires & languidum ac citatum fieri pulsum, & somnum vel nullum vel laboriosum reddi, animique tandem deliquia, ac denique brevi tempore mortem accedere; id quod non modo in cancro exulcerato, qui sphacelosæ corruptionis species est, sed & in sphacelo pedum, intestini recti ex male tractata fistula non semel, sed iterum observavimus. Et quod tam subito mors morbo sic dicto nigro correptos opprimat, nulla alia videtur causa: quam quod extravasatus sanguis in colo ejus stercoreo quasi fermento in foetidissimam putrilaginem conjiciatur, à qua corporis vires repente pessum eunt & plane extinguuntur.

§. XXVII.

Plurimi, qui ex morbo acuto & chronico pereunt, sphaceloso veneno partium solidarum, præsertim ventriculi & intestinorum, succumbunt.

Scholion.

Hujus asserti veritatem ipsæ dissectiones cadaverum morbis defunctorum satis claram & testatam faciunt, sed quoniam hac de re fusius actum est in *Cap. I. Pathologiae generalis*, plura hic adjicere supersedeo.

§. XXVIII.

Oritur sphacelus vel à causa interna vel ab externa, quæ adventitia est & violenta. Illa fit, ubi universa sanguinis & humorum massa valde impura est & ad putredinem inclinat, tum vel levissima læsio partis externæ hanc producit: externa vero est, qua à sumtis venenis, à validissima artuum ligatura, ambustione, contusione, vehementia doloris vel frigoris proficiscitur.

Scholion.

Sanguis quidem, quam diu in motu est progressivo & per vasa circumfertur, in veram & perfectam putredinem non delabatur, si vero valde impurus est, & excrementitiis fordibus scatet, uti videmus in cacoehymicis & scorbuticis corporibus & valde imbecillibus subjectis: tunc levi ex causa, si stagnat & subsistit in parte, non modo ipse corrumpitur, sed & subjectam carnem summo foetore contaminat.

§. XXIX.

Quoniam insignis sanguinis ad corruptionem dispositio ad sphacelum producendum & ad morbos quoque malignos & funestos efficiendos admodum idonea est: providendum utique omni cura erit, ut tum remediis diætetis, tum auxiliis pharmaceuticis nunquam non sanguis integer, purus & ab omni corruptiva diathesi immunis conservetur.

Scholion.

Profecto quæcunque læsiones & quicunque morbi in corpora impura & pravis succis referta incidunt, ii non parum periculi ac terroris habent, eo quod prom-

tissime viscera partesque solidas funesta sphacelatione corripiant. Igitur semper & ubique princeps, quibus sanitatis & vitæ custodia commissa est, cura sit, ut cito ope humoribus depurandis invigilent, quod utique per tempestivas sanguinis missiones, per remedia diaphoretica, per inediam, motum, analeptica & decocta clementer sudorifera obtineri poterit. Neque enim datur opportunior massam omnium humorum depurandi via, quam per cutem, quæ universale emunctorium est, quo halituosæ & pessimæ indolis sordes è corpore tuto exturbantur. Si enim olim in Anglia pestis intra viginti quatuor horas interficiens, placido & continuo ad viginti quatuor horas exacto sudore cardiacis in lecto provocato, sublata fuit, abstinendo simul ab omni somno, quidni etiam sudor prudenter institutus alias corruptiones auferre poterit? sique summa in lue venerea lymphæ & sanguinis corruptio solo sudore prudenter administrato submoveretur, utique ex eo clarissime patet, in sudoriferis maximam corruptionem ex corporis nostri succis expellendi potentiam sitam esse.

§. XXX.

Præter corruptiva dantur adhuc alterius generis venena in corpore humano, quæ nempe ex excrementis pessimæ indolis, si ea non evacuuntur, sed diutius à sanguine separata excretoriis inhaerent, subnascuntur.

Scholion.

Ea est natura humorum excrementitiorum, ut, si in tubulis, quibus efferri solent, stagnant, ipsa mora pejorem indolem induant, dum vel putrescunt, vel acescunt, vel corrosivi evadunt, & valet id maxime de iis excrementis, quæ subtilioris naturæ sunt & per angustos tubulos subcutaneos propelli debent; nam omne excrementum quo est tenuius, eo malignius ipsa mora evadit.

§. XXXI.

Experientia indubia constat, materiam illam alienæ indolis, quæ in variolis, morbillis, petechiis, purpura rubra & alba & aliis exanthematicis febribus naturæ robore atque interno motu ad habitum corporis protruditur, si retrocedat sive ab extra intro pellatur, funesta &, qualia venena solent, producere symptomata.

Scholion.

Inde enim summas præcordiorum anxietates, inquietudines, summas virium prostrationes, phrenitides, sopores, convulsiones & subitam mortem fieri celebratissimi auctores copiose satis & accurate annotarunt.

§. XXXII.

Neque ignotum est ex chronicis scabiem, lepram, herpetem, ulcera capitis manantia & crustam in infantibus lacteam, guttam rosaceam, pustulas luis venereæ, item erysipelas, podagram, si ex errore vel culpa medentium aut ægrotantium intro vertantur, gravissima, imo sæpius funesta symptomata prognerare.

Scholion.

Prostant de hac re copiosæ observationes in practicum libris, quæ evolvi possunt, has enim hoc loco consarcinare non instituti nostri ratio exigit, & potest hanc in rem legi *dissertatio nostra de podagra retrocedente in corpus, idem de imprudenti toxicorum adplicatione & Dn. Lindemanni Diss. de morbo retrogrado.*

§. XXXIII.

Si salutare & critici, qui certis diei horis incidunt, sudores, & qui circa declinantes acutas passiones fiunt, vel ex pedibus aut glandulis subaxillaribus cum fæore emanant, imprudenter cohibentur, summam perniciem corpori adferunt.

§. XXXIV.

§. XXXIV.

Certa quoque observationum fide constat, ulceribus antiquis diu cum fructu gestatis, si ea repente consolidata fuerint, pessimæ notæ symptomata inde oborta fuisse.

§. XXXV.

Excrementitiæ fordes ad sanguinis & lymphæ massam in morbis retropulsæ naturam venenorum exacte æmulantur & rectissime iis annumerari possunt, quia veneni characteristicas habent notas, dum primo tenuissima & exili mole agunt, deinde vires suas exitiales celerime exerunt, tum partes nerveo-membranaceas maxime invadunt, denique quod œconomiam universi corporis motuum turbant vel etiam extinguunt.

Scholion.

Non mirum esse debet, quod præter scholarum morem venenorum classem aliquanto magis extendamus, quippe quod jure facere videmur; plura enim sunt, quæ veri veneni notas habent, quæ fortiter lædunt ac vitam destruunt, & sæviores adhuc effectus exerunt, quam nota illa & authentica venena, quæ tamen neglectui à medicis habentur. Satiùs itaque duxi, venenorum naturam, vires & proprietates paulo majori cura explanare, ut eo magis evitentur ea pericula, quæ ex imprudenti medicatione subinde nascuntur.

§. XXXVI.

Venena succotum excrementitiorum nervosas & membranaceas partes præcipue adoriuntur, sed producta ab iis symptomata pro diversitate locorum differunt.

Scholion.

Materia excrementitia ad cerebrum & nervorum paria delata vertiginem, phrenitidem, soporem, apoplexiam, aphoniam, hemicraniam, cœcitatem, item surditatem facile progignit. Si vero eadem materia nervos diaphragmatis invaserit, summæ anxietates præcordiorum, singultus & asthma spasmodicum oriuntur. Si nervis pneumonicis & pulmonum membranis nerveis altius infideat, fiunt ferina tussis, respiratio summe anxiosa atque ad suffocationem usque difficilis. Si cordis nervos impetit, illud tremore & palpitatione corripitur. Si altius se insinuat œsophagi, ventriculi & intestinorum membranis, cardialgiæ, nausæ, inflammationes stomachi, vomitiones cum ciborum fastidio, inflammationes cum ardore circa scrobiculum cordis, interno & extremorum frigore, atrocia tormina, abdominis inflationes & alvi pertinaces constrictiones suscitantur; in ductibus urinariis urinæ suppressiones, in ductibus biliariis bilis in sanguinem effusiones, in cute sudorem frigidum & horripilationes producit. Re itaque probe perpensa hæc omnia recensita symptomata ejusmodi sunt indolis, quæ à proprie sic dictis venenis concitari solent.

§. XXXVII.

Cum in quibusdam morbis tam promte & expedite lethale venenum medici error & culpa ingeneret, si excretiones non rite tractatæ fuerint, materia foras excernenda incaute cohibita vel retropulsa: prudentis utique erit medici, omnia ea nosse & evitare, quæ retroPELLENDI facultate pollent.

Scholion.

Ex horum numero maxime sunt animi affectus, præsertim terror & timor, corporis refrigeratio, interna adstringentia, opiata, intempestivæ venæsectiones, fortiora purgantia, nimium refrigerantia atque externa cataplasmata, emplastra constringentia, item linimenta mercurialia, quibus omnibus quanta corpori subinde struatur perniciēs, dici vix potest.

§. XXXVIII.

Calidiora quoque & quæ nimium sanguinem exagitant, ex benigno humore venenum & morbum benignum in malignum facile convertere possunt.

Scholion.

Peccatur in eo toto die à vulgo practicorum, quod morbos bene moratos pessimos efficiunt & malignos, quod maxime valet in exanthematicis, ut sunt variolæ, morbilli, purpura, quando imperitiores non modo per hypocaustum & lectum præcalidum, sed & medicamenta, quæ sanguinem accendunt, uti sunt volatilia oleosa regni vegetabilium & animalium, præpostere vi quadam excretionem & ejectionem materiæ peccantis per cutis habitum urgent. Clarissime testatur experientia, imo hinc inde ex observationibus in hanc rem notatis constat, complures hoc modo fuisse interfectos, qui poterant servari, utpote gravissima symptomata, nempe anxietates, hæmorrhagias enormes, virium cum animi deliquio prostrationes, quin imo deliria, convulsiones horum incautum usum subsequi, plus vice simplici vidimus: cum ex adverso, si blandioribus, temperatis, acrimoniam demulcentibus, & quæ nimium ardorem deprimunt, morbus tractetur, ille placide sua decurrat tempora & laudabilis fiat materiæ hostilis à sanguine sequestratio & ad cutim protrusio.

CAPUT IV.

De venenis in aëre contentis epidemiorum morborum causis.

§. I.

Continentur in aëre res corpori humano infestissimæ, quæ parva mole & celeri operatione summam perniciem corpori inferunt & epidemiorum ac malignorum morborum causa sunt, ut adeo rectissime inter venena etiam locum tueantur.

§. II.

Uti venena potissimum sunt naturæ fermentativæ, putridæ, vel acris causticæ volatilis: ita dantur in aëre res animantium corporibus insensæ; quæ vel putredine vel acrimonia caustica delinquentes iis labem aut perniciem inferunt.

Scholion.

Sicuti ad has classes pleraque venenorum genera commodissime reduci possunt: ita etiam deprehendimus, omnia valde insalubria & quæ perniciem morbosam invehere valent, haud dissimili modo operationes suas ferales exerere.

§. III.

Ad res venenatas putridas, corpori humano summe perniciosas, merito referri debent exhalationes ex aquis stagnantibus & corruptis in aërem evectæ.

§. IV.

Ea est natura omnium aquarum diutius stagnantium, ut quiete ac solis æstu putrescentes valde noxia effluvia in aërem emittant.

Scholion.

Sicuti aqua, si purissima est, diu integra atque ab omni foetore & putredine intacta manet; ita si partibus alienis, præsertim sulphureis & terreis, referta est, quas facile ex terra sulphurea & pingui imbibit, per quietem, solari æstu accedente, fitum ac foetorem contrahit, ut in paludosis locis apparet.

§. V.

Effluvia ex aquis paludosis & putrescentibus sublata in aërem morbos pessimi moris malignos & epidemice grassantes inferunt.

Scholion.

Morbi, qui ex aquarum inundationibus earumque putredine fiunt & in locis paludosis regnant, sunt maxime epidemii, ut pestis, petechiales febres, variolæ & morbilli mali moris, febres intermittentes & purpura.

§. VI.

Pestis & pestilenciales morbi familiarissimi sunt iis locis & iis temporibus, quibus ingentes fiunt fluviorum inundationes.

Scholion.

Notum est, quod pestis familiarissima sit in Ægypto, & quod incolæ hujus regionis cum gravissimis morbis iisque contagiosis conflictentur; causa vero unice est quærenda in exundatione Nili, & memorabilia sunt, quæ scribit hanc in rem *Dappert in Descript. Africae pag. 127.* nunquam pestem in Ægypto oriri, nisi Nilus nimium increseat; & totas regiones inundet; addit hanc rationem: quod quando Nili aqua stagnat super terram, tota illa paludosa fiat, & accedentibus ventis Australibus & ferventissimo solis æstu, putridis exhalationibus aër inquinetur, qui validissimus ad excitandam pestem. Subjicit denique hoc memorabile, quod nunquam pestis oriatur ex intemperato æstu; sed tunc potius extinguatur. Alexandriae autumno plures mali moris febres cum vomitione viridis bilis epidemice grassantur, ex nulla alia causa, quam ex putridis aquis sub domibus incolarum stagnantibus. Alexandriae autumnali tempore identidem variolæ mali moris contagiosæ invadere solent homines, quæ nullam aliam originem agnoscere solent, quam evaporationem aquæ putridæ Niloticæ. Nam quodcumque ex Nili cornu, quod vocatur Calech, circa hanc civitatem magnæ fiunt aquarum eluviones, & hæ per totum annum immotæ subsistunt, necessario putrescunt & corrumpuntur, præsertim æstate: unde etiam omnes incolæ, qui accolunt huic brachio Nili, fugiunt ad alia loca, donec ex Nilo subsequente anno aliam aquam accipiant, qua de re *Dappert loc. cit. legi meretur.*

§. VII.

Nostri in regionibus fluviorum inundationes frequentissime mali moris morbos epidemicos eosque acutos excitant.

Scholion.

Leidæ quondam morbus contagiosus pestilentialis oriebatur, qui magnam hominum stragem edebat, ex nulla alia causa, quam quod ex brachio Rheni veteri inundationes in hoc districtu factæ fuerunt, unde aquæ restagnantes putrefactæ diram hanc luem excitarunt; vid. *Pechlini Obs. XVII. Colerus in Tract. de Morbis Castrensibus Dec. III. Obs. V.* plures epidemios morbos observavit post Danubii crebras eruptiones & imbres per plures dies continuos. Notavit *Forestus Lib. VI. de febr. & morbis epidemice grassantibus pag. 162.* quod civitas Delphensis insalubris sit, quoniam in loco profundiori sita est, aquas non currentes habet, fossis non amplis, sed angustis, per quas moventur, instructa, hinc fit, ut aquæ stagnent æstivo inprimis tempore, quæ sub canalicula putrescunt & effluvia, quæ à transeuntibus sentiuntur, putrida sunt, adeo ut fere singulis decem annis præterlapsis incolæ vel peste vel pestilentialibus febribus afficiantur. *Montanus* refert, prope Famaugustam, Cypri urbem, locum esse, qui æstatis tempore putrescat ac causa existat, quod aër putrescat, unde febres pestilentes oriantur, infinitique homines ob vaporum contagionem à paludibus pereant.

Exemplum singulare noxiæ inundationis in nostris regionibus exhibuit annis 1712. nam inundationem fluviorum excepit immanis æstus per sex dies, postea frigus, rursus per decem dies intensissimus erat æstus sine pluvia. Ii, qui se libero aëri præsertim nocturno commiserant, febre corripiebantur, cui ingens virium languor, dolor capitis, dorsi, in præcordiis anxietas, crebra vomitio, in non nullis delirium juncta erant, in quibusdam symptomatum vehementia remittebat, in paucis intermittebat; in plurimis erat pectoris oppressio, sed hæc lues vix inter quatuor vel sex dies persistebat, & oris efflorescentia vel sudore sponte oborto terminabatur. Nulla fere erat Berolini domus, in qua non aliquot ægrotabant, sed paucissimi mortui, nisi ex alio morbo complicato. Hæc febris epidemia totam Marchiam & Ducatum Magdeburgicum, Thuringiam quoque infestabat. Et chronologia nostra Halensis nos luculenter docet, nunquam fere hic à multis retro annis epidemium & pessimum morbum grassatum fuisse, nisi semper ingens fluvii Salæ diluvio & inundatio præcesserit. Memorabilis etiam est obs. *Ramazzini*, quæ extat in *Miscell. Curios. Dec. II. A. IX.* ubi ex copiosis pluviis factæ inundationes & stagnationes aquarum produxerunt tertianas & rebelles febres, quæ indiscriminatim homines, cujuscunque sexus, ætatis, victus rationis, temperamenti & vitæ generis fuerunt, occuparunt.

§. VIII.

Paludosa loca, ubi stagnant & putrescunt aquæ, valde insalubria sunt & febres perniciosissimas producant.

Scholion.

Non procul à Berolino amœnissima urbs sita est, Charlottenburg dicta, quæ propter declivem situm stagnationibus præsertim ex copiosis fluviis aquarum valde obnoxia, inde fit, ut æstivo tempore nemo fere ex incolis immunis à febre intermittente tertiana præsertim permaneat, cum primis si aëri frigido nocturno corpus objicit; & propter stagnationem aquarum ingens est ibi copia culicum, quæ homines divexant. Circa nostram urbem Halam est pagus unum milliare distans, qui vocatur Dieskau, in decliviori etiam loco situs & plurimis stagnis & piscinis cinctus; ibi nullus fere est incola, qui non febre labore vel laboraverit, quæ ita contumax est, ut non modo frequentius recidivet, sed etiam per aliquot annos duret. Est febris naturæ erraticæ, sed typum tertianæ servat, inassuetis vero & qui ex salubri loco huc habitandi causa accedunt, valde gravis atque exitialis esse solet. Ita & *Cl. Lentilius in Epistola ad Cl. Lancisium* data adfirmat, quod ad moenia civitatis Stutgardiae olim fuerit piscina seu stagnum amplissimum plurium jugerum & eam ob causam infamis à multis annis fuerit Stutgardia febribus intermittentibus, ferme non amplius epidemicis, sed endemiis, valde rebellibus, ac diuturnis, quæ proinde nomen tulerint febrium Stutgardianarum. Exsiccatum vero hoc stagnum ob certum finem & in amœnissimum pratum converso, ab eo tempore febres intermittentes adeo raræ sunt factæ, ut ne semel quidem epidemiarum nomen meruerint, sed sporadicæ saltem nunc hunc, nunc illum invaserint, etiam hæcenus curatu faciliores. Apparet inde, febres ab effluviis illius stagni putridis ortas fuisse, quæ flante euro sublata civitati invecata fuerunt, eo quod ventus, allisione ad montes facta, quasi repercussus effluvia dicta provehere non posset. Nemo vero rectius & paulo majori cura hanc materiam aggressus est & pertractavit ipso *Lancisio*, qui in *Tract. de noxiis paludum effluviis* febrium perniciosarum & castrensium, quæ Romæ in Leonina nuncupata civitate ex cœnosis fossarum aquis ab æstatis initio ad autumnum vagatæ sunt, naturam prolixè describit.

§. IX.

§. IX.

Propter aquarum stagnationes anni valde humidi & pluviosi, præsertim sub continuo austrorum flatu, valde insalubres sunt.

Scholion.

Maligni & contagiosi grassantes morbi ex præhumida anni constitutione plerumque originem suam nanciscuntur. Ita *Hippocrates Lib. III. Epidem.* scribit, aliquando post diurnas pluvias ingentem subortam fuisse pestem, totam civitatem Abaton pervasantem, cujus sævitia nonnullis inhabitantibus pedes ac brachia deciderunt. Idem testatur *Lib. II. Epidem.* suo tempore ex austrinæ constitutionis aëre in Cranone primum ichores & pustulas multas, postea & carbunculos propullulasse. Galenus *de temp. Cap. IV.* annum plus justo humidum pestis esse prænuncium scribit. *Benedictus Sylvaticus Conf. 14. Cent. 1.* refert, quod duo anni fuerint austrini, frigidi, pluviosi cum maxima aquarum illuvie, unde etiam morbi uniformes fuerint per totam ferme Italiam. Nempe populariter grassabantur febres spuriae, ardentes, peculiare, morbillosae, variolosae, viros maxime plethoricos corripiebant, præsertim si locorum humiliorum fuerant incolae & veneri indulserant.

§. X.

Endemii & epidemii, qui certis locis certisque annorum constitutionibus populariter grassari solent, morbi plerumque originem & causam suam debent variis exhalationibus & inquinamentis, quæ in aëre continentur.

Scholion.

Ægitudines, quæ genus humanum frequenter & graviter affligere solent, sunt potissimum ex numero grassantium five epidemiarum, quæ certis tantummodo temporibus prodire solent, & in harum numero præcipue sunt omnis generis febres acutæ, quibus exanthemata junguntur, item intermittentes, nec non dolores, fluxiones, inflammationes, ut sunt variolæ, morbilli, febres tertianæ, quartanæ, tertianæ duplices, ardentes, pleuritides, ophthalmiæ, anginae, catarrhales benignæ & malignæ, erysipelaceæ, arthritides, diarrhoeæ, podagra, rheumatismi, pleuritides spuriae, dysenteriae, qui morbi ex aëris vitio rectissime derivandi sunt. Et hæc etiam sententia fuit *Hippocratis*, qui *Lib. de Nat. Hum. §. 18.* ita scribit: *Quando ab uno morbo multi homines corripiuntur eodem tempore, causam ad id, quod communissimum est, & quo maxime omnes utimur, referre oportet. Est autem hoc spiritus & aër, quem inspirando trahimus.* Et §. 19. addit: *Quum unus morbus popularis grassatur, manifestum est, dietam non esse culpabilem, sed, quem trahimus, spiritum in causa esse, & palam est, eum ipsum spiritum morbosam aliquam exhalationem habere.*

§. XI.

Frequenti & attenta observatione didicimus, eas temporum anni constitutiones esse maxime morbosas & communes morbos proferre, quando vel nimias & diurnas pluvias aut diluviones vel terrarum inundationes repentini & immodici æstus sequuntur ad aliquot dies, & postea eos insueta frigora excipiunt, quæ si in tempus vernum vel autumnale incidunt, pejorem effectum exerunt.

Scholion.

Hoc modo productas novimus complures grassantes epidemias passiones; ita etiam febris illa epidemia, cuius supra facta est mentio, suborta est. Atque anno 1698. hic loci hiemem valde placidam, lenem humidamque autumno similem, austrinis stipatam ventis, experti sumus, quam excipiebat initium veris immodice æstuo-

sum. Tum per aliquot menses magna cum sævitia per hanc urbem variolarum morbus grassabatur. Succedebat æquinoctio vernali petechizans febris maligna contagiosa, quæ non paucos è medio sustulit. Cujus febris historia ex professo à nobis pertractata est in duabus peculiaribus dissertationibus. Simili ratione, ut *Miscellanea Nat. Cur. Dec. I. obs. 145.* tradunt, anno 1664. hieme molli ac pluviosa antecedente, sub veris initio grassata est in civitate Thoruniensi purpura epidemia maligna, quæ per totam æstatem & autumnum usque in hiemem sæviit, plurimos utriusque sexus infantes interficiens. Anno 1675. tota æstas erat pluviosa, insequens autumnus modo serenus, modo pluviosus, hinc in tota Silesia & Austria in autumno catarrhus, & coryza cum tussi & inflammatione faucium ita vexavit incolas, ut nulla domus fuerit exempta, ubi non tres vel quatuor catarrhosi inventi fuerunt, & si qui levabantur, alii statim in locum eorum succedebant. Vid. *Reygerus in Misc. Nat. Cur. Dec. I. ann. 6. obs. 313.* Anno 1707. menses Novembr. Decembr. & Januar. 1708. sine nive & omni gelu erant, & diarrhoeæ familiarissime tunc incidebant. Circa initium veris autem æstuosi pleuritides, febres catarrhales cum purpura juvenes & maxime foeminas affligebat. Aderat languor virium, somnus paucus, frequentior frigoris cum calore mutatio & parotidum tumor; paucis vero erant lethales.

§. XII.

Duplicis generis est illud venenum, quod ex aquis stagnantibus putridis per aërem dispergitur inque eo continetur, ex quo morborum gravium, epidemiorum & malignorum origo & causa petenda venit, & vel putredino-verminosae vel acris causticæ indolis est.

§. XIII.

Aquæ paludosæ seminarium sunt foecundum putredinis verminosæ.

Scholion.

Ubi enim paludes, lacunæ & aquæ putridæ sunt, ibi semper ingens præsertim sub solis æstu variorum insectorum copia conspicitur. Non semel, sed aliquoties ejusmodi aquas examinavimus instrumento statico, easque deprehendimus levissimas, forsan propter copiosam admixtam ætheream materiam, quæ etiam putredinis earum parens est. Deinde semper innumerabiles, minutissimos variæ figuræ & generis vermiculos in iis turbidis conspeximus. Porro ejusmodi aquæ vasi stanneo infusæ ignis calore admoto in innumerabiles resolvuntur bullulas, fundo vasis adhærescentes, forsan propter viscositatem, in quam calor agit.

§. XIV.

Insueta vermiculorum in aëre hospitantium copia & morborum malignorum causa existit, & eos quoque prælagit.

Scholion.

In hujus adserti veritate confirmanda adficientem maxime habemus & antiquitatem & peritissimos medicos. *Varro de re rustica Lib. I. Cap. XII.* causam labis morbosæ insectorum copiae asserit his verbis: *Advertendum etiam, si qua erunt loca palustria, & propter easdem causas & quod arescunt, crescunt animalia quædam minuta, quæ non possunt oculi consequi, & per aëra intus in corpora per os & nares perveniunt atque efficiunt difficiles morbos.* Idem ante *Varronem* tensit *Lucretius*, dum canit: *obnoxia cuncta putrori Corpora, putrores insecta animata sequuntur.* Neque ab horum sententia recedit *Columella*, qui *lib. I. de Re rust. cap. 5.* scribit: *nec paludem vicinam esse oportet ædificiis, nec junctam militarem viam, quod illa caloribus noxium virus eructat, & infestis aculeis armata gignit animalia, quæ in nos densissimis agminibus involant, ex quibus sæpe*

contrahuntur cæci morbi quorum causas ne medici quidem perspicere queunt. Quocunque igitur anni tempore insolita insectorum copia observatur, non sine ratione insalubria tempora & grassantes morbos prædicere possumus, quod diuturna experientia & observatio præstantissimorum virorum confirmavit. Ita *Joh. Damascenus aph.* 132. scribit: *Ubivis gentium quocunque anni tempore phalanges muscarum redundaverint, ibidem & ægritudines, quæ ex putredine oriuntur, in corporibus indigenarum redundabunt.* Riverius tradit, post innumerabilem insectorum copiam febrem epidemiam mali moris grassatam fuisse. Auctor quoque est *Verulamius in Oper. pag.* 923. annos insalubres fore & pestis suspicione infamari, quando ranarum, muscarum & locustarum multitudo est. Et *Valeriola obs.* I. Lib. 2. pag. 95. ex insectorum & locustarum copia morbos epidemios prænuñciavit. Atque exemplum habemus in recenti memoria: anno videlicet 1692. incredibilis copia locustarum in aëre volitantium visa est, quæ universam Thuringiam, Misniam & Vogtlandiam infestabant, inque terram descendentes segetibus ac vegetabilibus maximum damnum inferebant; à quo tempore coeperunt grassari in hisce regionibus multæ mali moris, imo cum petechiis junctæ febres. *Hildanus Cent.* 4. *obs.* 23. affirmat, eo tempore, quo pestis grassabatur, talem fuisse muscarum copiam, ut post hominum memoriam vix tanta visa fuerit.

§. XV.

Putridæ, stagnantes aquæ ingentem quoque copiam effluviorum salino-causticæ & volatilis indolis in aërem emittunt, quæ partim ex ipsis aquis, partim etiam ex infectis sale volatili turgidis exspirant.

Scholion.

Insecta fere omnis generis copioso caustico sale imbuta sunt, unde pleraque cuti applicata vesicas excitant, & interius sumta vehementi rosione ac stimulo partes solidas inflammant atque in spasmos conjiciunt, & virulenta vires habent. Quod autem infesta spargant effluvia, cantharides testantur, quæ, ubi arbores & ex his maxime sambucum Hispanicum invadunt, foetidissimo odore aërem replent.

§. XVI.

Ipsæ aquæ stagnantes feraces admodum sunt salibus acribus & causticis, cujus rei documento esse possunt plantæ, quæ in stagnis & humilioribus locis proveniunt, quarum pleræque acrem, plures causticam & virulentam naturam possident; quæ observatio nunquam, quod sciam, antea notata est.

Scholion.

In hujus rei confirmationem exemplo esse possunt acorus, arum, anthora, œnanthe, aconitum, alsine aquatica, cicuta aquatica, colchicum, flammula jovis, gladioli & iridis species, ros solis, persicaria acris, equisetum palustre, ranunculus aquaticus, caltha palustris, nasturtium aquaticum, beccabunga, quarum pleræque sunt venenatæ, & pecoribus etiam, si iis vescantur, exitiosissimæ. Causa, cur stagnantes aquæ acrimoniam plantis ingenerent, hæc poterit afferri: aquæ in terra præsertim limosa & sulphurea diu subsistentes incipiunt putrescere, sive earum mixtio motu intestino dissolvitur. Jam vero ea est motus intestini natura, ut ex fucis temperatis, insipidis & inodoris, imo dulcibus sapidis, salinis, volatiles, item sulphureos foetidos producat, ut in fermentatione vinosa ac putredinosa conspicuum est. Quidni etiam incipiens putredo partes sulphureas ac terreas aquarum, & quæ in plantarum nutrimentum cedunt, in falsas & acres commutare poterit?

§. XVII.

Præter terra illa & morbosæ effluvia, quæ ex putref-

centibus aquis in aërem diffunduntur, dantur adhuc in illo alia, naturæ corporis humani identidem nociva & gignendis morbis idonea.

Scholion.

Qui diu in artis exercitio versati sunt, iis non obscurum esse potest, quo habitu & more subinde diversissimo quotannis fere incedant epidemici morbi & modo has, modo illas partes hostiliter aggrediantur & diversis ac sæpe dissidentibus symptomatibus infestent. Veteres incognitam eorum causam ad τὸ θεῖον referebant. Nos materiis tenuioribus, virulentis & variæ indolis, in aëre potissimum volitantibus, eos adscribimus, & eorum diversam naturam à diversa harum materialium indole deducimus. Est enim aër universale quasi menstruum, quod expansiva sua elastica vi & materia ætherea calida ex omnibus corporibus subtiliores partes solvit, abripit & imbibit, quæ diversissimæ naturæ exhalationes per mutuum conflictum, combinationem & miscelam, intercurrente solari & cœlesti copiosa materia, varias formas ac texturas induunt. Sunt in aëre salinæ, sunt etiam sulphureæ diversæ naturæ substantiæ; Nitrum, inflammabile illud & elasticum sal, aëris foetus est; caput mortuum aluminis & vitrioli extreme adustum & omnis salis expers, si diutius aëri committitur, denuo aluminoso & vitriolico sale imprægnatur. Aër etiam ingentem copiam sulphuris alit, quod sulphuris mineralis naturam & odorem habet, uti ex fulmine & tonitru constat. Ecquis vero ausit asseverare, ex subterraneis locis & sulphureis mineris illud in aërem pervenire, quum solis æstus ultra duas ulnas non facile penetret, nec mediocri igne egeat sulphuris mineralis evaporatio. Veri itaque est simillimum, illud ipsum ex sale illo universali aëris vitriolico & unctuosius ac pinguibus exhalationibus in aëre generari, non secus ac in chymicis videmus, ex sale acido vitrioli mixto cum carbonum pulvere verum sulphur & ex alumine & vitello ovi vel stercore humano sulphur in aëre inflammabile debita encheiresi produci. Quidni igitur pro diversitate effluviorum, quæ certis in districtibus à terra exhalant, & pro anni tempore variant, pro diversa solis operatione & ventorum flatu varia in aëre seminia salina sulphurea fabricari possunt, quæ in corporis cavitates admissa differentes epidemias vel etiam endemias afflictiones inferunt; quorum tamen indolem ac vires potius à posteriori & effectu, quam à priori per sensus & rationem cognoscimus.

§. XVIII.

Morbi castrenses, qui omnium pessimi sunt, & graviter defæviunt, aëris vitiis & pravis exhalationibus potissimum debentur.

Scholion.

Castrenses morbi sunt maxime ex malignorum & contagiosorum numero, & ex intima succorum vitium corruptela nascuntur. Ut ut vero hujus corruptionis variæ & multiplices sint causæ, ad quas maxime fames, assidua vigilia, continua fatigatio, incongrua victus ratio pertinent: aër tamen vitiosus & foetidis varii generis exhalationibus inquinatus omnes reliquas causas facile superat. Quanta enim in castris sub tanta hominum ac pecorum multitudine non est impuritas, excrementorum & foetidorum vaporum copia & colluvies, quæ continuo circumfusus aërem inficiunt & corrumpunt. Unde si accedunt ex imbribus aquarum stagnationes, & venti austrini, purgando aëri minus idonei, diu regnant, atque immodici æstus ac nocturna frigora atque dormitiones sub diu sunt, non potest aliter fieri, quam ut in magnam corruptionem animantium corpora disponantur & graves inde morbi exsurgant. Solent vero & illi certum quendam servare ordinem: incipiunt nempe æstivis

æstivis mensibus intermittentes tertianæ biliosæ & continuæ, sed insuetis symptomatibus stipatæ. Tunc enim solis ferventissimus æstus in aëre acris & causticæ sulphuræ indolis materiam copiose producit. In autumnino, quo fructibus fermentescibilibus & aquarum potu venter repletur, dysenteria malignæ contagiosæ oriuntur. Sique in hyberna concedunt, sequuntur febres majori malignitate infestæ, exanthematicæ & petechiales. Solet enim interna putredo cum tempore vires sumere atque incrementum.

§. XIX.

Virulentæ contentæ in aëre exhalationes lædunt quam maxime & morbos facile inferunt, si quis vespertino & nocturno aëri corpus committit.

Scholion.

Omnis generis effluvia, quæ de die validissimo solis æstu in altissimam aëris regionem evehuntur, tempore vespertino & nocturno sole occiduo per frigus condensari, atque cum humiditate quadam descendere notissimum est.

§. XX.

Cum rore maxime & nebula exhalationes naturæ humanæ insensibilissimæ ad inferiora descendunt, & vel animantibus vel frugibus nocent.

Scholion.

Quod frumenta, arbores & plantæ ex vitioso rore, qui nomine rubiginis venit physicis, multum detrimenti patiantur, agricolæ & horticultræ dediti optime norunt. Peccat ut plurimum sale quodam subtili caustico, quo etiam hominibus nocet, legi hanc in rem potest *Obs. 93. Miscell. Nat. Curios. Dec. III. A. IX. & X.* ubi commemoratur, quod, ejusmodi rore gustato, ulcuscula in labiis suscitata, & qui nudis pedibus incesserant, pustulis & ulcusculis nigricantibus inde vexati, quidam vero febribus ardentibus correpti fuerint. Et profecto dysenteria epidemia, quæ inter initia autumnii post ferventissimam æstatem grassari solet, plerumque est adscribenda corrosivo rori, qui partim fructus inficit, partim corporis humani poris sese insinuat. Sæpius in certo districtu grassatur hæc lues, aliis ab illa immunibus. Et quicumque pruna vel pyra hoc rore infecta comedunt, in eundem morbum labuntur, qui vero ejusmodi fructibus infectis abstinent, eos hæc lues non invadit. Deinde virulentæ indolis effluvia cum nebula quoque decidunt, & morborum epidemiorum causas subministrant, quam in rem lectu digna est *obs. 94. l. c. in Miscell. Curios.* ubi nebula septem viros, cæterum sanos atque robustos, in febrem malignam & lethalem præcipitasse perhibetur.

§. XXI.

Neque tantum tetra causticæ indolis effluvia, sed & organica & animata ex aëre, præsertim nocturno tempore, decidunt, & humani corporis interiora subeunt.

Scholion.

Minutissima ac varii generis & magnitudinis infecta paludibus innasci & postea per aërem circumfusus dispergi, res curiosioribus physicis non ignota est. Sunt enim revera paludes omnium infectorum seminarium, ubi citissime præsertim sub moderatiori æstu fœcundantur, & sunt quorundam adeo minuta corpuscula, ut referente *Lævvenhæckio Tom. I. Epist. LXXI. & Tom. II. Epist. XCVI.* aliquot illorum centena simul sumpta crassum arenæ granum mole non æquent: unde illa & eorum ovula in aërem diffundi & cum rore rursus defluere, mirum non est. Et quoniam hanc materiam jam ingeniose non minus quam copiose pertrastavit *Cl. Lancisus in cit. Tract. Cap. XVI.* lectorem

curiosum huc remittimus. Rorem sæpissime ex aëre in terram descendere fructibus ac plantis noxium, ex quo ingens insectorum atque vermiculorum copia pronascitur, rei agrariæ & horticultræ addicti norunt, quo rore perfusis vegetabilibus si vescuntur pecora, vel vehementer ægrotant vel prorsus extinguuntur. Si homines ejusmodi verminoso rore infectos cibos adsumunt, gravi corripiuntur dysenteria, qualis aliquot ab hinc annis ex tali causa in quibusdam locis Ducatus Brunsvicensis exorta fuit, ubi olera infecta rore verminoso Germ. *Mehlthau*, cocta, gravem etiam hunc morbum induxerunt.

§. XXII.

Quia tantum periculum ab humido & nocturno aëre & rore imminet humanis corporibus, omni cura utique providendum, ut ne circa ejusmodi loca noctu indormiamus vel peregrinemur.

Scholion.

Hanc in rem memorabilia pro more suo erudite scripsit *Lancisus Lib. de Noxiis Paludum Effluviis cap. 20. p. 62.* qui testatur, plurimos incautos & venatores & peregrinos, si in palustribus locis brevem etiam somnum capiant, malignis febribus affligi, præsertim circa Romam. Quod etiam accidit peregrinantibus ad lacustria Romanæ plagæ. Imo ipse *Lancisus l. c.* monitos vult eos, qui vigilantes per cœnosa loca peregrinantur, qui vel Neapoli Romam, vel Roma Neapolin contendunt, iisque suadet, ut diuturnos potius æstus subeant, quam nocturni frigoris voluptate decepti contemneratam ambientis aëris vim excipiant. Incidi etiam in locum insignem apud *Petr. Laurembergium Lib. I. Horticult. cap. 35.* ubi inquit: *Uredinis, vulgo Mehlthau, infelicem delapsus fere cum vitæ periculo æstivis noctibus expertus sum aliquando in Aquitania Montalbani & Tolosæ agens, cum nondum à tam infenso hoste mihi cavere didiceram.* Et notissimum est, homines, qui æstate Romæ degunt, & extra urbem dormiunt, gravibus symptomatibus corripi & plerumque mori, quia infectis aër Romanus & terra scatent, quorum exhalationibus ros & aër nocturnus inquinatur. Post pluvias vel maxime mense Septembri aër salubrior est, & tum extra urbem sine noxa degunt.

§. XXIII.

Aër virulentis exhalationibus refertus per varias vias interiora corporis humani subit.

Scholion.

Primo sese offerunt cutis spiracula, quæ uti perpetuo balneis & topicis medicamentis patent, ita humiditatem virulentis vaporibus inquinatam atque ex aëre descendente facile suscipiunt. Rectissime *Hippocrates Lib. VI. Epidem. Sect. VII. carnes appellat attractrices & ex ventre & extrinsecus, quia totum corpus exspirabile.* Adiunt deinde foramina in naribus, auribus, quæ membranis glandulosis & nerveis cincta sunt, per quæ aër effluviis refertus ingreditur, nullumque est dubium, quin per poros nervosis etiam partibus sese insinuent cum humiditate effluvia, quoniam ab odoribus salubribus & insalubribus & robur & vigor & omnium motuum perversio contingere potest, hysteriarum exemplo. Tum aër humidus & vaporibus repletus per narium & oris vias ac per laryngem ad intima pulmonum delatus, vesicularum pulmonalium poros intrat & hac ratione cum sanguine misceri potest. Tandem in ore ipsi salivæ adhærescit & facile per œsophagum, præsertim cum cibo ac potu, ad ventriculum descendit. Pertinet huc egregius locus apud *Hippocratem Lib. de Flatib.* ubi inquit: *omnia, quæ eduntur ac bibuntur, spiritus in corpus inferunt, aliquando plures aliquando pauciores.* Id autem inde manifestum evadit, quod plurimæ eructationes post cibum

ac potum evenire solent, discurrente nimirum aëre incluso, ubi perruperit bullas, quibus inclusus fuerat. Postremo & illud dicendum est, quod organica & animalia etiam effluvia, si non per poros cutis ipsamque salivam, tamen per cibum ac potum in corporis interiora admittantur. Unde fit, ut in malignis & putridis morbis subinde ingens copia vermium in alvi fecibus & per vomitum rejectis conspiciatur. Neque ignotum est, quod animalcula in ovium visceribus, præsertim in hepate, si paludosas aquas imbiberint, reperiantur. Inde quoque dracunculorum in Africa & in Germania crinorum, qui pueros adoriuntur, sub cute generatio derivanda est.

§. XXIV.

Quicumque urbem ab epidemiis, imo endemiis malignis morbis liberare vult, is præcipue omnium in exsiccatione fossarum ac paludum operam navare & igne accenso id præstare debet.

Scholion.

Quod lacunis & fossis publicis stagnantibus exsiccatis graves & grassantes morbi averti possunt, inter alios testatur *Petrus Salius de Pestilente febre cap. 20. p. 130.* qui prodidit, patriam suam exsiccatione aquarum in fossis publicis stagnantium à febribus pestilentibus, alias quotannis autumnis grassantibus, fuisse liberatam. Et *Cl. Lancisius* in citato illo præclaro opere illud etiam exemplis confirmat. Deinde accensis ignibus palustres regiones ab halituum malignitate purgandæ sunt. Ipse *Hippocrates* igni tantam potentiam tribuit, ut eo pestilentiam abigi posse statuatur, vid. *Galen. de Theriaca ad Pison. cap. 16. & Amat. Lusitanus Cent. 7. curat. 27. Plinius quoque in Hist. Nat. lib. 36. cap. ult.* ignibus medicam vim pestilentiae adscribit; utpote ignis motu celerimo superfluam aëris humiditatem absorbit & ventum gignit, qui ad eventilandum putridum & ignavum aërem magnæ est virtutis. Fumi etiam ex lignis resinosis & bituminosis corporibus ad aëris emendationem multum conferunt. Inter omnes constat, Halam nostram ante usum carbonum fossilium, quorum jam ingens copia ad salis coctionem accenditur, multis malignis morbis, febribus petechialibus, ac dysenteria fuisse infestam & malo scorbutico huic urbi familiarissimo obisse quam plurimos, qui omnes morbi per divinam gratiam jam fere per viginti annos, ex quo carbonum fossilium usus increbuit, ex finibus nostris excefferunt. Nam atmosphæra nostra non modo ob copiosas ex Salsæ fluvio multis ramis luxuriante evaporationes, sed etiam ob continuam salis coctionem multa humiditate imbuitur, cujus noxam fumus carbonum fossilium egregie castigat atque coercet, quippe cujus salubritatem vel hoc unico argumento adstruere licet, dum eæ habitationes, quas aër his carbonum vaporibus repletus perpetuo transiit & fumosa nigredine inficit, nullum incolentium sanitati ferunt incommodum.

§. XXV.

Orientales & septentrionales venti, item pluviae egregie purgant aërem tetræ exhalationibus.

Scholion.

Horum ventorum ea est natura, ut non modo expansiva & elastica sua vi tetra effluvia dissipent ac difficiant, sed & dum animantibus vigorem, robur ac motum afferunt, & circulationem sanguinis ac transpirationem promovent, impediunt, quo minus noceant. *Varro Lib. I. de Re rust. cap. 4. pag. 12.* testatur, se *Coryram* insulam à gravi peste liberasse, obstructis iis fenestris, quæ austrum spectabant, iisque, quæ ad aquilonem vergebant, apertis. Certa etiam observationum fide constat, quod tempore pestis illa gravius sæviat ventis flantibus ex austro & oriente; sub flatu vero septentrionalium illa statim remittat. Imbres quoque, si co-

piofius decidunt, atmosphæram causticis effluviis stipatam egregie corrigunt ac depurant, nam statim post imbres aër est defecatifissimus. Et constat ex historiis, pestilentiam in Ægypto statim cessare, imbris mense Junii largiter descendentibus.

§. XXVI.

Grassantibus morbis epidemiis ad noxam eorum avertendam magno præsidio sunt temperantia in victu & venere, evitatio aëris vespertini & nocturni atque frequens usus eorum, quæ naturam roborant & motum sanguinis cum salutari transpiratione promovent.

Scholion.

Omniibus roborantibus, quæ simul vicem alimentigerunt, summo jure præferendum est vinum potens & generoso spiritu turgidum, cujus notæ est Rhenanum, quod circularem sanguinis & humorum motum augendo, quicquid alieni vitalibus undis admixtum est, potenter eliminat, atque adeo omnem ad suscipiendum contagium dispositionem aufert. Ex medicamentis vero ad arcendum contagium commendationem merentur omnis generis balsamica, salia volatilia oleosa, ambrata, succinata, & balsamum nostrum liquidum, quæ sanguini & humoribus spiritualescentiam foenerant, nervis robur addunt, & omnis generis excretiones egregie juvant. Multum quoque huc confert liberalior usus infusorum ex herba Thee, melissæ, salviæ, veronicæ, & fabis coffe, quæ sanguinem & humores ad corporis habitum propellendo omnes peregrinas sordes per emuntorium cutis everrunt. Neque alia profecto causa afferri poterit, quod nostra in urbe inque vicina Lipsiensi maligni ac putridi morbi, olim familiarissimi & comitem habentes purpuram, jam rarius incidant, quam liberalior usus calidarum sorbitionum, quibus maxima pars incolarum his temporibus affluevit.

CAPUT V.

De medicamentis veneni vim habentibus.

§. I.

Dari in medicamentorum classe res venenatas, quæ & perniciem corpori inferre, & causam mortis præbere possint, mirum forsitan videri poterit.

Scholion.

Plurimis hæc firmiter insidere solet opinio, eas res, quæ remedii nomen sibi vindicant, esse in se salutare, neque ullo modo vitæ & sanitati infensas esse posse; inde etiam fit, ut quidam afflicti vehementiori medicamentorum autilitate, quæ rectius pharmacomania dici posset, laborent, quum tamen omne, quod magnam vim habet, medicamentum, si non cum cautione adhibeatur, noxiosissimum sit. Unde non mirum est medicamenta temere usurpata & morborum & mortis causas subministrare. Quo magis necessarium est, ut peritus medicus ea, quæ plurimum nocendi facultate polent, probe noscat.

§. II.

Quæ veneni vim ac naturam æmulantur medicamenta, in eorum numero sunt emetica & purgantia drastica sive vehementiora; sunt etiam stupefactiva quædam & ex mercurio male præparata.

Scholion.

Si ulla ex remediorum classe multum cautionis & prudentiæ ratione usus desiderant, certe sunt emetica, purgantia, opiata & mercurialia, eo quod ob vehementem eorum vim plures in graves morbos coniectos, vel

in orcum per imperitiam medentum præcipitatos fuisset, experientia proh! dolor quotidiana edocemur.

§. III.

Ex emeticis multum vehementiæ & virulentæ qualitatis habent stibiata, præsertim in substantia data, ut antimonii vitrum, mercurius vitæ, crocus metallorum, sulphur auratum.

Scholion.

Dicta hæc antimonialia in pulvere data vehementissime *ἀνω* & *κάτω* non modo purgant, sed & hypercathartes sæpe lethales inferunt. Unde perpetuo non sine periculo dantur, eo quod plicis ventriculi & intestinorum firmiter inhæreant, & à succis confluentibus soluta continuo ea, quibus insident, nervosa loca lancinando convellant, & vicinos non modo nervos, sed & universum sæpe eorum genus in convulsiones conjiciant. Clementioris autem naturæ sunt, quæ ex horum solutione parantur vomitoria, ut est aqua benedicta *Rulandi*, tartarus emeticus, Syrupus emeticus *Angeli Salæ* vel Dispensatorii Brandenburgici. Sicut vero vitrum antimonii omnium est potentissimum, ita tartarus emeticus ex hoc paratus multo valentior est eo, qui secundum præscriptum *Mynsichti* ex metallorum croco conficitur, quod omnes, qui medicinam faciunt, velim ut notent.

§. IV.

Antimonialia summa partium, quæ salino sulphureo-causticæ naturæ sunt, subtilitate adeoque in exili admodum dosi, & quidem celeberrime operantur; post hæc vim suam in ventriculum & partes nervosas exerunt & majori dosi exhibita etiam interficiunt. Hinc, quia omnes veneni characteres habent, rectissime in eorum numerum referuntur.

Scholion.

Frustrum vitri antimonialis, quod scrupulum circiter ponderat, vel millia hominum vomere facit, si ejus infusio fiat ex vino. Et nota quoque sunt pocula illa emetica ex mixtura stanni & reguli antimonii parata, quibus vinum infunditur, & intra aliquot horas emeticum evadit, atque illa vis poculi nunquam definit. Ex quo apparet, quam stupenda sit illa exiguitas partium, quæ totius corporis functiones perturbare vel etiam destruere possit, quod maxime proprium est venenorum.

§. V.

Necant antimonialia emetica, dum in vehementissimos spasmos genus nervosum conjiciunt, & ventriculum maxime ejusque orificia constringunt, & circum sanguinis intercipiendo inflammationes sphacelosas easque funestas efficiunt, unde præsentissimam mortem & hominibus & animalibus inferre possunt.

Scholion.

Quomodo venena ex mineralibus hominem jugulent, & quæ symptomata producant, jam supra *cap. 2. de venenis* §. 21. explicavimus. Vim vero suam primo omnium exerunt in ventriculum, qui à venenis præsertim causticis primo ac primario affici solet. Incipiunt ibi spasticæ constrictiones, quibus ejus orificia strictissime clauduntur, unde mira ventriculi inflatio sequitur; brevi etiam sphacelosa & atra stigmata illi insunt. Pulchra ac memorabilia sunt illa experimenta, quæ *Cl. Wepferus* instituit, dum variâ venenorum genera animantibus obtulit, & post sectionem alia atque alia phænomena annotavit. Vid. *ejus Tract. de Cicut. Aquat.* ubi etiam *cap. 20.* commemorat, quod ani robusto vitri antimonii grana obtulerit, & facta sectione maculam palma latiore atro-rubicundam in ventriculo, qui flatibus distentissimus erat, annotavit. *Frid. Hoffmanni Oper. Tom. I.*

rit, & quia utraque orificia ob spasmos clausa erant, pertinaciter ventriculus flatus inclusos retinuit. Deinde idem auctor observavit, quod diaphragma à vi medicamenti fortiter succussum vomitum adjuverit.

§. VI.

Antimonialia emetica, in substantia & paulo majori dosi exhibita, funestum sapissime effectum exerunt in corporibus sensibilibus, ad iram pronis & hujus affectus vehementia exagitatis, item si ventriculus ad inflammationem inclinat & doloribus ac spasmis divexatur.

Scholion.

Complura certe in praxi notavimus exempla, ubi post gravem iracundiam & quæ hanc insequitur, cardialgiam datum antimoniale emeticum mortiferum fuit. Et ante aliquot annos tristissimum habuimus casum, ubi ferenissima persona ex tartaro emetico improvide adhibito brevi tempore lethalibus symptomatibus occubuit, ubi post mortem pars ventriculi sphacelosa reperta fuit, & putredo vicinas partes ejusdem lateris, lienem, diaphragma, & pulmonem infestavit. Vidimus brevi ante paroxysmum intermittens pulverem vitri antimonii datum, qui præter vehementissimas vomitiones & purgationes convulsiones & tremores partium cum summa cardialgica anxietate excitavit, quæ symptomata, sub febrili calore insequente, ad tempus cessarunt, altero vero die redeunte paroxysmo resuscitata mortem intulerunt, & identidem ventriculus inflammatus ac sphacelofus repertus est.

§. VII.

Emetica fortiora si non necant, gravem tamen & fere immedicabilem morbum inferre possunt, dum fortissima vasorum strictura & compressione sanguinem & humores cum impetu ad partes præsertim debiles pellunt, ubi subsistentes pro partium differentia varios eoque graves morbos inducunt.

Scholion.

Si spasmi ab antimoniali emetico excitati vehementia sanguinem atque humores cum impetu ad caput propellit, facile aphonix, aurium tinnitus, visus & auditus amissio, imo mentis abalienationes oriuntur. Ita enim *Hildanus Cent. 5. Obs. 12.* commemorat, quendam capitis dolore afflictum assumpto emetico mentis ac rationis usu penitus fuisse orbatum. Idem auctor *Cent. 5. Obs. 19.* refert, in corpore cachectico ab assumpto vomitorio cæcitatem fuisse sequutam. Fœmina quoque optimo corporis habitu prædita, de dolore gravativo ventriculi conquesta, assumtis tribus infusi antimonii dosibus, superveniente inter vomendum doloroso aurium tinnitu, auditum amisit. *vid. Hildan. loc. cit. pag. 395.* Alius, referente *Wepfero in Tr. de Cicuta aquat. pag. 285.* post sumtum antimoniale emeticum ejusque vehementissimam *ἀνω* & *κάτω* purgationem in internum pectoris ardorem, tussim siccam, raucedinem, gutturis strangulationem & aphoniam diuturnam incidit. Si spasmodum ferocitas artus & partes exteriores aggreditur, fiunt inde sævissimi artuum dolores, truculentæ nervosarum partium convulsiones & sphacelosæ corruptiones. Auctor est *Cl. Wepferus loc. cit. pag. 255.* quendam cachecticum, assumtis aliquot granis vitri antimonii per noctem in vino infusis, non modo in enormes vomitus, sed etiam crudelissimos pedis dextri dolores incidisse, superveniente tandem funesta ejusdem partis sphacelatione. *Hildanus* quoque *loc. cit. p. 914. & 915.* ab assumpto fortiori emetico maximas brachiorum & crurum convulsiones, lipothymiam, summam virium prostrationem, imo herniam intestinalem annotavit.

§. VIII.

Quia emetica fortiora graviter convellant ventriculum

lum & partibus nervosis spafmo nocent, atque etiam congestiones humorum in elanguidis partibus efficiunt, prudentiæ est in hypochondriacis, hysteris, hæmorrhoidariis & instante mensium fluxu, & ubicunque ventriculus cum genere nervoso spafmis tentatur, iis tanquam veneno abstinere.

Scholion.

Quum solennes illæ & salutares per menses & hæmorrhoides fluxiones cum spafmis continuo fiant, facile patet, nocentissima tunc esse & purgantia & emetica. Truculenta circa instans mensium tempus ab emeticis etiam non adeo validis exhibitis symptomata vidimus. In hæmorrhoidariis validior vomitus mesenterii abscessus cum lenta febre excitavit. Ubi sanguinis congestio inclinatur ad pectus, periculosa à validiori vomitorio nasci solet hæmoptysis. *Celsus Lib. 2. cap. 13.* si morbus acutus est, si febris est, inter rigores asperiora ejusmodi medicamenta damnat. Tutissimum vero est, ubi natura & morbus urgent vomitum, clementia propinare, & minus periculi est, si in minori & refracta, quam pleniori dosi, offerantur. Deinde antimonialia nunquam in forma solida & pulvere, sed soluta & cum sufficiente liquore adhibenda sunt, & si nimie dejectiones sequuntur, medicamentum theriacale cum analeptico, ut aqua cinnamomi, mixtum, quod confortat, spafmos coercet, & ab interioribus ad exteriora sanguinem propellit, omne punctum absolvit. Cæterum nisi urgeat necessitas, sani ac valentes homines ab ejusmodi emeticis abstineant. Perbelle enim monet *Celsus Lib. 2. cap. 13.* quod omne ejusmodi medicamentum non semper ægris prodest, semper vero sanis noceat.

§. IX.

Medicamentis, quæ veneni quidpiam, quo operantur, habent & ob id atque ob malam administrationem gravium malorum & mortis subinde causa fiunt, non immerito validiora purgantia annumeranda esse censemus. Purgantia, quæ acri & penetranti stimulo sulphureo agunt, non modo tunicas intestinorum spastice comprimendo motum peristalticum augent, & ex eorum glandulis lympham eliciunt, sed & universum membranarum nerveo-musculosarum genus spafmo quodam convellunt.

Scholion.

Adeoque purgantia validiora ea dicimus, quæ vehementer, id est, cum spafmis & torminibus ventrem movent, & subito copiosas dejectiones efficiunt. Horum in numero sunt ex simplicibus uterque helleborus, colocynthis, gummi guttæ, scammonium, elaterium, esula, laureola, resinosa gialappa & species maximeque femina cataputiæ, & quæ fortiora hæc aliquanto majori quantitate recipiunt compositiones.

§. X.

Sicut venenis præsertim causticis commune est, sale acerrimo, valde tenui & volatili operari, eoque omnes per universum corpus nervosas partes, maxime omnium vero ventriculi & intestinorum tunicas irritare atque arrodere ibique violentos spafmos, quos sæpius inflammatoriæ sanguinis stases & sphacelationes sequuntur, brevi tempore & non adeo magna dosi efficere: ita cum purgantia aciora easdem notas & proprietates habeant, jure in venenorum causticorum numerum recipienda esse concludimus.

§. XI.

Manifestum salis acerrimi in purgantibus testimonium est, quod masticata fauces graviter adurant, & horum pleraque cuti admota vesicas excitent, naribusque attracta vehementia sternutamenta moveant, ac denique improvido usu ventriculi & intestinorum erosionem post se relinquunt.

§. XII.

Ut elementum illud, quo venena in corpus agunt, maxime volatilis & penetrantissimæ indolis est, quod per universum corpus & solidarum maxime ac membranacearum partium intimos recessus penetrat: ita etiam illud, quod purgantia custodiunt, virus subtilissimæ naturæ atque indolis est & plura sunt, quæ hujus præsentiam satis abundeque ostendunt.

Scholion.

Primo compertissimum est, validiora purgantia, quo diutius in minutissimo pulvere ferventur, eo plus virtutis suæ, qua supra & subter humores educunt, amittere, utpote cum volatile illud sensim paulatimque expiret, inque auras subducatur. Secundo, nihil tam potenter virtutem purgativam destruit, quam diuturnior, ut omnium venenorum, ita maxime purgantium cum aqua instituta coctio. Neque tantum validiora, ut helleborus uterque, colocynthis, elaterium, esula, sed & leniora, ut folia fennæ, rhabarbarum, aloë, agaricus virtutem suam purgativam hac ratione perdunt, ita, ut si fortior sit coctio, prope ex toto eam amittant. Tertio, non leve tenuissimi in purgantibus principii argumentum est, quod potentiora, ut sunt colocynthiaca, item elleborata, exterius ventri vel pedibus adplicata alvum commoveant. Ita veteres pedes decocto ellebori lavantes per alvum purgatos esse certam auctores faciunt fidem, neque unguento Arthanite ventri adplicato infantes purgari plane novum est. Id vero non omnibus notum, confectionem Hamech cum unguento dialtheæ plantis pedum impositam ad alvum pertinaciter adstrictam referendam vix habere sui simile. Neque forsan aliunde, quam à tenuitate, quod purgat, principii petenda erit causa, cur infans à lacte nutritis, quæ modo purgans adsumsit, promte purgetur; item quod referente *Walæo in methodo medendi pag. 42.* elleborus fonticulis ad mundificationem impositus per vomitum & secëssum subinde purget. Quod etiam illud pertinet, quod adsumta purgantia sæpius stimulent vehementer ad venerem, & quod magis mirum videtur, cum semine vis purgans in foeminam transfundatur, ut *Sinivaldus Lib. III. Geneanthropiæ Tr. I. Cap. XII.* asseverat. Spectat huc quoque ex antiquitate illud, quod *Plinius Hist. Nat. L. 25. c. s.* refert, Melampodem observasse capras elleboro pastas purgari, & lac eorum adhibuisse ad filias Proeti regis furore percitas percurandas.

§. XIII.

Neque diversæ, sed ejusdem indolis sunt mala, quæ à drasticis purgantibus improvide datis, & quæ à venenis causticis excitantur.

§. XIV.

Mala ex drasticis purgantibus importunius datis cum aliis venenis communia sunt, atrocia cum crebris dejectionibus tormenta, subversiones ventriculi, enormes vomitiones, singultus, acerbi cardialgici dolores, præcordiorum incendia, strangulationes faucium, anxietates & inquietudines, animi defectio, pulsus ad tactum durus & contractus; ex capite vero convulsiones, epilepsia & mentis turbationes prodeunt. Præter hæc habitus corporis constringitur, partes extremæ frigent & inhorrescunt cum sudore frigido, quæ cuncta facies cadaverosa & tandem mors excipit.

§. XV.

Ut in dissectis ex veneno caustico, v. g. arsenico, mortuorum corporibus ventriculi & intestinorum partes maxime inflammatae & sphacelosa deprehenduntur, intestinis simul mirum in modum inflatis atque distentis: ita idem etiam me deprehendisse in iis, qui purgantibus vel emeticis interempti fuerunt, bona fide testari

testari & pluribus observationibus omnino confirmare possem.

§. XVI.

Quemadmodum non certius & securius adversus omnis caustici veneni mortalem noxam præsidium & auxilium, quam in pinguibus, mucilaginosis & lacte est, si ingenti in copia hauriantur: ita etiam nihil inveniri potest, quod tam prompte & tam secure ex purgantium abusu lethiferis orientibus malis occurrat, quam lac vel oleum in copia datum.

Scholion.

Res & vulgo non ignota est, agyras sine noxa fere ex venenis pessima, ut arsenicum album, item sublimatum mercurium ferre, si prius pinguibus & lacte ventriculum cum annexis intestinis probe muniverint, & post horum usum etiam copiose adhuc illa adsumserint. Ego ad exemplum experimenti hujus idem tentavi, cum aliquando illustris persona ex incuria loco unius doseos sex pilularum purgantium satis fortium sumisset, tum felicissimo cum successu suasi ingentem lactis vaccini, quod ad manum erat, copiam ebibere, & citra ullam noxam vel atrociam tormina quatuor tantum sedes sequebantur. Nam quod veneni acrioris ferociæ potenter resistit, id etiam vim mitioris evincere posse, quid rationi magis consentaneum videtur? Igitur non sine causa antiqui medici & maxime *Hippocrates* ante & post usum purgantium lactis potum commendarunt, quod præcipue ex insigni illo loco, qui extat *Libr. de internis affectionibus* §. 46. clarius apparet: *si venter nigro elleboro purgatus fuerit superne vel inferne aut etiam scammonii succo, post purgationem ferum ac lac bubulum aut caprinum vel etiam asininum commodissime exhibetur.* Et l. c. §. 31. idem gravissimus Auctor suadet, ante purgationem cum scammonio adhibendum fomentum, & post clysterem lac asininum coctum in potu dandum. *Aëtius* elaterium cum lactis mulcti hemina porrigendum præcipit. *Rulandus in Curationibus* tanquam specificum ad vermes enecandos & expellendos species diaturbith, item radices esulæ in lacte coquendas majorem in modum commendat. Si ullum, certe semen cataputiæ majoris vehementissimum est, cujus tamen ferocia, si cum lacte caprino in emulsionem redigatur, multum mitescit, ita, ut non sine emolumento in hydropicis ad educendas ex habitu corporis aquas adhibitam eam fuisse meminerim. Ob vim, quæ lacti inest, acrimoniam causticam mitigantem, accidit quoque, ut infantes lactentes, si modo lac non corruptum & corrosivum in ventriculi cavitate stabuletur, sine minori subinde molestia acria etiam purgantia ferre queant, quam ætate provectiores. Ex quo conficitur clariusque elucet, ad castigandam nimiam & virulentam illam in drastice purgantibus vim eorum coctionem cum lacte cetera alia tantopere ab auctoribus celebrata purgantium correctiva, quorum ingens adducitur numerus, longissime superare.

§. XVII.

Quum omnium fere venenorum ea natura ac indoles sit, ut præter exitialem, quam corpori animantium inferunt vim, quodvis ex iis propriam quandam operationem atque virtutem possideat: ita etiam illud ipsum circa validiora purgantia animadvertere licet.

Scholion.

Colocynthiaca præ cæteris tormina faciunt, & vasa aperiendo sanguinem sive per alvum sive etiam per alias vias, præsertim si importunius data fuerint, effundunt. Elleborus, præsertim albus, id habet vitii, ut peculiari ratione faucibus insensus strangulationem & suffocationis metum cum summa anxietate inferat. Elaterium vim suam maxime in tunicas arteriarum nervo-musculosas evibrat, hinc pulsus fit celer, febrili non

Frid. Hoffmanni Oper. Tom. I.

distimilis, qui etiam in digitorum apicibus percipi potest. Unde non mirum est, hujus purgantis beneficio hydropicorum in habitu corporis stagnantes aquas ad alvum deduci posse. Aloë utut ex mitioribus sit, ani venas maxime irritat, atque per has sanguinem ejicit. Scammonium & gummi guttæ vires maxime infringunt, & robur ventriculo subtrahunt. Semina cataputiæ perquam facile inflammationem ventriculo funestam inferunt. Resina, quæ elicitur ex gialappa, convulsivæ colicæ & paresis non infrequens est productrix.

§. XVIII.

Quemadmodum venenorum naturam maxime in eo positam esse, ut majori dosi hominem perimant, naturæ consultorum judicium est; pari ratione cum acriora purgantia, præsertim sub majori portione data, celeriter interficiant, non injuste hæc ipsa venenorum catalogum subire judicandum erit.

Scholion.

Lethalium purgantium effectum jam olim ipse *Hippocrates Libr. V. Epid. c. 16. T. 2.* annotavit his verbis: *Quidam homo Eubæus poto pharmaco deorsum purgante (elaterium dicitur in textu Græco) per tres dies purgabatur & mortuus est.* Dicit vix potest, quam multa & tristia, imo deploranda in praxi medica occurrant exempla eorum, qui ab improvide adsumtis pharmacis vel enecti vel minimum in pessimum & vix eluctabilem valetudinis statum conjecti fuerint, si modo quis paulo majori cum industria horum pessimorum experimentorum investigationi & observationi invigilare, aut curiosius, quæ ab agyrtis, ab imperitis chirurgis & aliis etiam plebeiis indies fere hac in re fiunt, colligere velit. Nam profecto ita est, quod impune multi à medicastis occiduntur. Atque ideo non sine ratione ejusmodi drastica à magni etiam nominis medicis Germanice *Mord-Mittel* vocata fuerunt. Impense profecto optandum foret, ut magistratus & phisici civitatum omnibus, qui cum aliis medicamentis purgantia divendunt, severius interdicerent, ne promiscue omnibus, non secus ac cum venenis fit, ea petentibus darent venderentque. Apud nos hic loci sunt in usu pilulæ aloëticæ cum extracto ellebori & trochiscis alhandal acuatae, Germ. vocantur *Geschärfte Haupt-Pillen*, quæ à vulgo etiam ad usum commendantur, & promiscue ex pharmacopoliis dantur; complures tristes eosque funestos non semel, sed sæpius ab hisce pilulis, præsertim in debilioribus & ubi ventriculus maxime in inflammationem proclivis fuit, effectus non sine dolore apud illustres etiam personas observavi. Inter pessima vero, & à quibus maxime cavendum esse suadeo propter nocentem inflammatione interimentem efficaciam, album elleborum, colocynthidem & tilli grana sive semina cataputiæ & quæ extant, referenda esse censeo.

§. XIX.

Cum acrioribus & drastice purgantibus tam nocens & naturæ, sive, ut rectius dicam, motibus, qui vitam conservant, tam infensa insit potestas: sapientissime & optimo consilio saniores tum ex veteribus, tum ex recentioribus ad conservandam integram valetudinem aut eam amissam restituendam eorum usum, vel plane reformidarunt, vel summa cum cautione admiserunt.

Scholion.

Ad confirmandum hoc salutare adsertum non dubitabo auctoritate antiquissimorum medicorum uti maximeque *Hippocratis*, qui in scriptis & aphorismis suis omnes in genere evacuationes repentinas rejicit, easque tantummodo laudat, quæ in corpore talia educunt, qualia sponte exeuntia juvant. Idem quoque disertis ver-

bis *Secl. II. apb. 36. 37.* pronuntiat: *Sana habentes corpora, dum medicamentis purgantur, cito exsolvuntur, nemque qui pravo cibo vivunt. Et porro: qui sani sunt, eos grave est, medicamentis purgar. Plato in Timæo violentis medicamentis corpora nunquam temere esse movenda admonet. Neque ex methodicis præteriri debet Cælius Aurelianus, qui in Opere suo Cap. XXX. pag. 128. de purgantibus, quæ Græce cathartica vocantur, ita statuit, quod nempe ob acrimoniam stomachum tumefcentem efficiant, atque ejus membranas inflamment & periculofam ventris effusionem provocent. Et Lib. I. Cap. I. de cephalæa prodidit, quod purgativis medicamentis stomachus male adficiatur & omnis nervofitas (qua genus nervorum universum subintelligit) inde lædatur. Referente Celfo Lib. I. Cap. III. pag. 31. Asclepiades purgationes omnes ceu perniciosas ex tota medicina expulit. Atque idem Celsus suam sententiam de purgantibus Lib. II. Cap. XIII. pag. 98. his verbis profert: *Quisquis daturus erit pharmacum, id agere ante debet, ut accepturi corpus humidius sit, & illud scire oportet, omne ejusmodi medicamentum non semper agris prædesse & semper sanis nocere; & alibi: purgantia stomachum lædunt & nunquam in adversa valetudine, nisi ubi morbus sine febre est, dantur.* Hæc sententia antiquorum fuit de purgantibus, quam postea superioris & nostri quoque sæculi peritiores medici suo calculo approbarunt. Fernelius Lib. III. Cap. V. catharticis substantiam & vim venenatam disertis verbis adscribit & maxime colocynthidi atque scammonio, quia, uti ait, horum minima portio in putredinem veneno finitimam faceffit. Et nemo prope gravius in purgantia invehitur ipso Helmontio, qui in *Tract. potestas medicaminum* pag. 383. eorum operationes latenti veneno, quo vitales succos fermentant ac putrefaciunt, adscribit. Neque in eo carpendus est Bontekoë, qui identidem purgantia propter virus occultum in totum fere ex foro medico ejicienda putat.*

§. XX.

Propter latens venenum magna cum cautione & cura non in quibuscvis, sed in longis ac difficilioribus morbis, inque valentibus & robustioribus corporibus, & maxime in tempore veteres usi fuerunt purgantibus potissimum elleboratis.

Scholion.

Mirum forsan videbitur, quo modo res infestissimæ usum & auxilium difficilioribus ægrotationibus præbere possint. Sed quod genuina & pura venena in usum etiam humanum ad graves pellendos morbos cedere possint, argumento poterunt esse arsenicum album, argentum vivum vario modo præparatum, antimonii vitrum, opium & hyoscyamus, quæ rite præparata & dextre etiam adhibita non sine emolumento exhibentur. Quare non mirandum est, Hippocratem etiam vehementioribus purgantibus, ut elleboro, elaterio, colocynthide, scammonio, ut ejus monumenta testantur, usum fuisse; non tamen promiscue & sine discrimine, sed ubi morbus sine febre, in principio & ubi penetranti eoque valido stimulo ex partibus solidis & vasis excretoriis nimium relaxatis & languidis subsistentes copiosi humores erant excutiendi, ut in melancholia, insania, morbo comitiali, quartana febre, hydrope. Deinceps ante horum usum aliquot dies præparabant corpus, abstinentiam à vino & cibo commendabant, fluida & mobilia per balnea, per fomenta & interna humectantia reddebant corpora. Et ut Plinius l. c. auctor est, elleborum album in lacte aut pulve dabant; vel secundum Dioscoridem Lib. IV. Cap. 145. cum ptisanæ succo aut lentis cremore & pauco antea cibo sumto, maxime omnium vero satis diu decoquebant elleborum in aqua, addito melle, qua ratione usurpatus, teste Prospero Alpino de *Medicina methodica* Lib. III. pag. 96. neque strangulationes, neque ullum aliud damnum unquam

adfert. Hac occasione non alienum nobis videtur, qui circumspicte, nec temere cum ægrotantibus agere volunt, medicos serio admonere, ne unquam, si ejusmodi purgantibus vel emeticis vel mercurialibus vel antimoniali forte medicina opus est, sine omni præparatione & distinctione corporis hæc ipsa offerant, sed ut, si salutarem utique effectum ab iis expectare velint, eodem modo, ut veteres, si elleboro vel alio forti pharmaco usi fuerunt; præparent prius & disponant corpora. Quod nostris temporibus cum valentioribus chymicis ex minerali regno petitis remediis in vincendis contumacibus morbis præstamus, id olim veteres valenti pharmaco dextre adhibito præstiterunt.

§. XXI.

Peritiores ex antiquis & recentioribus medicis omni tempore sapienti consilio in morbis tam avertendis quam sanandis rarissime usi fuerunt fortioribus, sed id egerunt, ut potius lenioribus, tutioribus & ventriculo non inimicis excretionem intestinalem, si opus erat, promoverent.

Scholion.

Laudandi hoc nomine maxime sunt methodici, qui omnia vehementia repudiantes solis lenientibus, ut manna, cassia, aloë, rhabarbaro contenti alvum movebant, vel eam commodis infusis tantummodo ducebant, ut ex præclaris Celsi monumentis & Prospero Alpino, qui methodicorum dogmata fideliter tradidit, id dilucide apparet. Horum postea vestigia ex Italiis maxime Montanus, & apud Germanos Crato, circumspicte admodum medicus, Solenander, Caspar Hoffmannus & Simon Pauli laudatissime sequuti sunt. Quorum quidem egregiæ pilularum compositiones hodie in frequentissimo usu sunt. Quo pertinent etiam aloëphanginæ sic dictæ insignis usus, in Augustana Pharmacopœa descriptæ. Atque ad harum jam dictarum imitationem Becherianæ, quæ in concisa admodum dosi aloën recipiunt, aliaque temperatiora gummata & extracta admixta habent, concinnatæ magno cum emolumento nostris temporibus usurpantur. Nam ut evacuatio, quæ per alvum fit, præter liberam perspirationem valetudini tuendæ apprime favet; ita etiam, quæ sine destructione ventriculi ejusque toni salutariter id præstant remedia, magno utique in pretio habenda esse existimo.

§. XXII.

Nihil tam valide ventriculi atque intestinorum tonum lædit atque pervertit, & ob id excretionis alvinæ negotium turbat, ac forte purgans.

Scholion.

Salutaris illa fœcum alvinarum excretio, sine qua nemo diu valere potest, quam maxime à motu intestinorum naturali, qui Græcis peristalticus dicitur, neque minus à bilis & lymphæ glandularum intestinalium affluxu dependet. Ille ejus generis est, quo successive & reciproce intestinorum canales contrahuntur & expanduntur, ut ejus beneficio contenta in intestinis propellantur. Cui negotio bilis stimulus & lymphæ intestinalis lubricitas multum servit. Quandocunque igitur à vehementi per purgantia irritatione & stimulo nimis citis & crebris dejectionibus biliosi & lymphatici humores magna in abundantia eliciuntur; non mirum postea est, segniores alvum sequi. Tonus vero intestinorum à purgante validiori læditur, quia id nunquam sine spasmo fortiori operationem suam in intestinorum tunicas nerveas, in quas primum & proxime salva & integra sua virtute agit, exercet. Notum vero ex natura legis microcosmicæ est, longiorem & validiorem partis spasmodum tandem subsequi ejus atoniam, sive magnam ad motum imbecillitatem. Atque adeo turbata illa motuum alternorum, contractionis & expansionis, in

in intestinorum canalibus nerveo-musculosis successione non potest aliter fieri, quam ut excretio, quæ per alvum fit, non recte post purgantium usum respondeat. Atque id ipsum jam olim suo tempore ipse *Galenus* animadvertit, qui libro *de methodo medendi* hæc prodidit: *Non nulli in præsens gaudent, si copiosius dejecerint, verum quanto magis fuerint vacuati, tanto his venter sequentibus diebus adstringitur.* Neque de hac re ullo modo dubitandum, quia quotidiana confirmat experientia, crebriores à purgante secessus sequi postea per alios dies alvi difficultatem.

§. XXIII.

A crebriori & perverso purgantium usu, si ventriculi & intestinorum naturalis tonus pervertitur, multa eaque gravia in hisce partibus mala enascuntur.

Scholion.

Præcipua certe integri status corporis nostri pars in motu ventriculi & intestinorum peristaltico versatur: hoc quippe salvo, biliosi & lymphatici humores, qui alimentorum digestionem, extractionem & stimulo ad excretionem ferviunt, recte influunt, atque inutiles fordes ac sæculentia foras debite ejiciuntur. Quandounque vero harum partium *ἰσχυρία* non recte sese habet, & vel nimia has ipsas spastica contractio aut relaxatio occupat, totum digestionis & excretionis negotium turbatur. Nam neque succi utiles ex resolutis alimentis per glandulas & vasa intestinalia recte secernuntur, neque excrementitii per alvum secedunt. Unde diutius stagnantes naturam suam mutant, corrumpuntur & corrosivi evadunt. Hinc spasmi & flatus continuo urgent, & molestissimum demum ac longum illud, quod hypochondriaci nomine venit, malum, præsertim aliis simul rebus, quæ has partes nerveas offendunt, accedentibus progignitur. Et quoniam communi, sed pessimo more hisce malis per purgantia medici succurrere conantur: hinc fieri aliter non potest, quam ut ea incrementum, tantum abest, ut minuantur. Perpetuo enim inflationes ventriculi vel intestinorum cum alvo adstricta, anxietate, nausea, internorum phlogosi, tensione præcordiorum & capitis gravitate urgent, & non nisi flatibus vel ructibus exeuntibus quodammodo mitescunt. Profecto in praxi mea, quam ultra 50. annos sub divino favore exercui, innumeros præpostero & crebro purgantium usu, præsertim infirmos, in diuturnas ægrotudines, flatulentias, tympanitides, tumores, morbum coeliacum, *ἀσθῆν*, convulsivas colicas coniectos observavi. Id etiam *Casp. Hoffmannus* in *Institut. lib. 9. c. 9.* confirmare videtur his verbis: *Loquor de experientia 30. annorum, quod homines apud nos fiant lætularii, ob intempestivas vel venæ sectiones vel purgationes.* Atque in hac re eximium illud *Cratonis* monitum attendi meretur, qui, (*vid. Schulzii consilia p. 1076.*) hanc de purgantibus sententiam fovet: *Purgantia valida & vires dejiciunt, & sæpe graves exulcerationes, tormina debilitateque sequuntur, & maligna qualitas stomacho imprimitur, ut postea plura excrementa colligantur, quam evacuatio sustulerit. Quod si ob id rursus & sæpe ad purgandum redeundum est, cito vitam breviorē reddunt.* Neque præteriri hoc loco debet insignis locus, qui apud *Cæl. AURELIANUM lib. V. pass. chron. cap. 31.* extat, dum ita ait: *Vitandam probamus frequentem potationem medicaminum, quæ ventris flua dicuntur. Etenim sitis intenditur, & solidioris cibi fastidium duplicatur & ejus fortitudo minuitur atque cibi accepti corrumpuntur.*

§. XXIV.

Quum tam infesta sint ventriculo & intestinis acria purgantia, adeo ut etiam alvinas evacuationes valde perturbent easque segnes efficiant; non mirum est, tenellos & lactentes infantes graviter ab illis assumptis lædi.

Frid. Hoffmanni Oper. Tom. I.

Scholion.

Quam salutate & congruum naturæ infantum alimentum lac est, tam perniciosum illud fit, si in ventriculi & intestinorum plicis diutius stagnans in corrosivum coagulum abeat, & pejorem adhuc, acri & sulphurea bile accedente, naturam induat. Hinc plurimorum, qui infantes exercent, morborum origo est. Tormina quippe ventris subinde convulsiva, febriles æstus, inquietudines, asthmata atque intumescentiæ abdominis flatulentæ, neque minus epilepsiæ lethales inde sua trahunt incunabula. Quæ omnia non sunt extimescenda, alvina excretionem recte succedente. Cum autem eam crebrius data purgantia mirifice lædant, tonum intestinorum plane destruendo; non mirum est, si ante bene valens & sanus infans à temerario præsertim evacuantium usu, si v. g. mercurialia & alia ex gialappa acria frequenter offeruntur, in summas misérias & epilepticas tandem convulsiones, quibus maxime hæc ætas ob imbecillitatem nervorum patet, conjiciantur; cujus rei tristissimos casus cum dolore vidimus.

§. XXV.

Acriora purgantia, præsertim sub majori dosi, sæpius lædunt & arrodunt teneras & valde sensibiles intestinorum tunicas, ut hypercatharses, dysenteria & longi ventris fluxus cum torminibus sequantur.

Scholion.

Evenit id maxime omnium in corporibus impuris & tempore autumnii, ubi ex varietate cœli, ob transpirationem prohibitam, multæ impuræ, falso-sulphureæ fordes in venis colliguntur, & stimulo in intestinis validiori præcedente, affatim ad vasa meseraica atque ad intestinorum glandulas, neque minus ad hepatis viscus feruntur. Hisce autem viis valde laxatis & dilatatis humores & biliosi & falsi, per habitum alias corporis evacuari soliti, ingenti copia ibi separantur. Ex quo fit, ut intestinorum corrosione hæc mala producantur.

§. XXVI.

Neque vero unquam gravior noxa à purgantibus metuenda est, quam ubi ventriculi inflammatio imminet.

Scholion.

Imminet ventriculi inflammatio in omni febre acuta, præsertim circa statum, ubi etiam superveniens certissime mortifera est. Ad eandem quoque inclinat post gravem animi excandescentiam, item si frigidissima potio corpori sudore diffuenti ingesta fuit; aut, si retrocessio variolarum, morbillorum, atthritidis, erysipelatis, purpuræ, & aliorum symptomatum ex habitu corporis fuit. Quibus existentibus casibus, validum, non adeo magna dosi datum, purgans cito perimit, ventriculo & intestinis post mortem inflammatis vel sphacelo tactis inventis. Siquidem inflammatio, quæ est firmior sanguinis in vasis stasis & quies, non facile, nisi vehementi spastica membranarum, per quas feruntur vasa, strictura gignitur. Nam per venas compressas sanguis redire nescius firmiter subsistit, & nisi fiat mature discussio, in putredinem terminatur. Nunquam vero putredo gravius minatur periculum, ac si consistit in partibus nerveis, cujus generis sunt ventriculus cum intestinis & membranæ cerebri, eo quod putrida illa corruptio fluidum mox nerveum inquinat, & citissime per omne membranarum & nervorum genus propagatur. Unde uti spasmus, ita etiam putredo, tantummodo in parte quadam ventriculi existat, mox in universi corporis partes nerveas derivatur atque tyrannidem suam exercet. Quamobrem non mirandum est, si ab exigua veneni vel purgantis acrioris dosi, brevi admodum interjecta mora, mors sequatur, levi tantum sphacelatione in ventriculo aut intestinis reperta. Ex

quo apparet, quam caute agendum sit Medicis ejusmodi in casibus cum purgantibus, & quam facile mortem, citra omnem opinionem, inferre queant.

§. XXVII.

Spasmus ex purgante non modo intestinis inhæret, sed & altius in reliquis nervoso-musculosas partes corporis penetrat; ex quo fit, ut ab ejus usu pulsus celerior & elevatior evadat, cutis summa cum strictura quadam paullulum inarescat, facies detumescat, parcius urina emittatur, sæpiusque paresis vel convulsio sequatur.

Scholion.

Febris naturam in spastica quadam eaque universali systematis vasculosi & membranosi strictura positam esse, supra jam tetigimus & infra latius deducemus. Quare non mirum est, ad ventris dolores, tormina & spasmos subinde mutationem in pulsu, ut ad celeritatem inclinet, item cutis inhorrescentiam, sudorisque suppressionem fieri. Et ob hanc causam accidit, ut exanthemata, & maxime purpura ad omnem alvi irritationem, præsertim torminosam, facile retrocedat, idque non sine periculo. Siquidem per stricturam meatuum cuticularium residens ibi prava materia introvergit, inque ventriculi vel intestinorum membranas transmittitur. Ex quo conficitur, quam periculosum sit in omni febris, præsertim exanthematica, & ubi materia peccans per cutis habitum eliminanda est, alvum fortiter stimulare. Id quod etiam jam suo tempore antiqui Medici, præsertim *Hippocrates Lib. de purgantibus*; item *Celsus* probe annotarunt; qui nec unquam in febre tuta esse purgantia, memoriæ prodiderunt. Ille enim *lib. de purgantib. §. 4.* inquit: *Purgans dare non oportet, donec febris remiserit. Nihil purgandum, nam febris major fit & calor revertitur, & §. 5. purgans forte à febris forti correptis non est dandum. Verum si alicubi opus fuerit, infusum per clysterem exhibere potes, quotiescunque volueris.* Denique quia purgantia ob spasmum, quem derivant in tunicas arteriarum, systolen harum celerior reddunt; clarum fit, cur intermittentium paroxysmi cortice Peruviano suppressi, subinde fortiori purgante revocentur.

§. XXVIII.

Ubi dolores sunt, & sanguinis profusiones metuentes, ibi purgantia magnas calamitates afferunt.

Scholion.

Hujus quidem assertionis ratio inventu non adeo difficilis est. Nam nusquam febris dolor sine affecto genere nervoso est, nusquam hæmorrhagia sine spasmo partium musculosarum & sine ingenti pulsus mutatione fit; ideo nihil pejus est, quam spasmos per purgantia, quæ tormina cient, augere. In omnibus quidem à spasmo morbis perpetuo utile est, alvum apertam servare, vel eam blande subducere, minime vero omnium per purgantia, sed potius per emollientes clysteres & clementia laxativa id efficiendum est.

§. XXIX.

Plethoricis & more athletarum repletis, item impuris corporibus omni tempore à validiori cathartico ingens periculum imminet.

Scholion.

Nullum corpus tam subitis afflictionibus obnoxium est, præter illud, in quo sanguinis & feri, præsertim impuri, copia redundat. Equidem quamdiu humorum etiam peccantium libera & æqualis per vasa progressio est, tamdiu non facile quis morbo afficitur. Simul ac vero hæc ipsa, quod maxime fit per spasmos, turbatur, protinus gravia imminet mala. Intercepto enim san-

guinis per stricturas libero motu, impetus & copia ejus ad alia loca transfertur, ubi nimium congestus & stagnans difficilia minatur mala, quæ eo certius sequuntur, quo majori pars jam tum imbecillitate quadam laborat. Ab ejusmodi congestionibus in gravidis facile fiunt abortus, in senibus lethargi, apoplexiæ, peripneumoniæ, viscerum infarctus & ex hisce hæmorrhoides cæcæ vel nimix, febres lentæ, marasmi, abdominis tumores. Igitur in plethorico & cacochymico corpore ab omni valida medicina, & maxime ab emetica & purgativa, maximopere cavendum esse, perpetua regula practica est. Nunquam enim utile, corruptos humores fortiter commovere, sed blande eos ducere oportet. Multum hac in re mihi placuit constans *Eugeleni*, optimi scriptoris, de scorbuto observatio, qua affirmat, semper scorbuticos purgantibus pessime se habuisse.

§. XXX.

Omnia drastica purgantia vires valde infringere, res haud dubiæ experientiæ est; ideoque ubi vires jam fractæ & corpora debilia in morbis sunt, plurimum periculi habent.

Scholion.

Quare à purgantibus adeo debilitentur homines, si ratio investiganda erit, certe non copia dejectionum sola accusari poterit, utpote ab aquis mineralibus, v. g. thermis Carolinis, ab infuso mannæ copiosius dato sæpe viginti & ultra sedes, citra ullum virium vel appetitus decrementum, moventur; sed potius præter spasticas illas & convulsivas stricturas, quibus genus nervosum affligitur, etiam ipsa substantia purgantis, tanquam naturæ valde infensa & virium destructrix culpanda venit. Est enim in omni fere purgante nauseabundus quidam sapor & odor, de peregrini sulphuris & salis volatilis miscela testimonium edens: atque adeo nihil dubii est, quin ex purgantibus vapor adversus volatilis, dum nervosis partibus sese celeriter insinuat, fluidum purissimum, quod solidis robur & vires foenerat, validissime contamine, ejus crasin & motum destruendo, unde virium fit dejectio. Ex quo clarius detestabilis purgantium in malignis, in senibus & omnibus infirmis, cacochymicis, infantibus quoque & à morbo præcedente, vel à gravi aliquo animi affectu fractis abusus apparet.

CAPUT VI.

De virulenta mercurialium noxa ceu gravium malorum causa.

§. I.

IN eorum classem, quæ magna facultate nocendi, abusu accedente, instructa sunt, ex mineralium regno maxime, quæ ex argento vivo prodeunt, recensenda esse existimo.

Scholion.

Peritiores non sine ratione mercurialia in heroicorum remediorum numerum retulerunt, eo quod ejus indolis ac virtutis sint, ut eorum providus usus valde prodesse, abusus vero validissime obesse possit, ideoque in manu imperiti tanquam gladius in manu furiosi sint.

§. II.

Medicamenta mercurialia sunt remedia, validiora arte ex argento vivo additione salium parata, quæ maxime glandulas afficiunt vehementique harum strictura lymphæ motum promovent, corrosiva vero reddita propter spasmos, quos in partibus nervosis excitant, violentos veneni vim & naturam induunt.

§. III.

§. III.

Argentum vivum nullam in corpus humanum exercit operationem, nisi prius fuerit solutum & fluidum redditum.

Scholion.

Argentum vivum ingenti copia cum jusculis oleosis haustum, non raro in desperato affectu iliaco divinam, testantibus observationibus, præbuit opem, dum solo pondere convoluta inter se intestina, vel fæcibus induratis obseffa expedit, idque sine ulla noxa. Nam quia pondere celeriter intestina transit, nec diu ibi moram necit, sed citius alvo effluit, innoxium est. Deinde mercurius currens difficulter admodum à salino quodam, nisi is valde corrosivus sit, liquore dissolvitur, qualis primis in viis rarius continetur. Quod vero metallica operationis in corpore humano expertia sint, nisi fuerint soluta, ratio videtur non longinquius quærenda. Præcipua siquidem in corpore nostro mutatio à motu partium solidarum in fluidas proficiscitur. Si quid igitur solidorum motum augere vel imminuere aut alia ratione mutare debet, necesse est, ut immediato contactu ea afficiat. Id vero fieri nequit, nisi in eorum poros altius sese insinuet. Quemadmodum vero id fieri possit sine summa subtilitate & exiguitate partium & sine vehiculo fluidi, ego quidem non capio. Cum vero solutio corporis nihil aliud sit, quam ejus in minimas partes per liquidum quoddam redactio, facile apparet, corpora firmioris compagis, ut sunt metalla, non aliter, nisi in minimas partes redacta & soluta fuerint, mutationem in corporibus animantium efficere posse.

§. IV.

Omnis generis salia in argentum vivum agunt, idque tandem solvunt.

Scholion.

Menstruis corrosivis, ut sunt spiritus salis concentratus, spiritus nitri, aqua fortis, promptissime solvi mercurium, vel chymicorum vulgo est compertum. Lixiviosa vero & soluta sal ammoniacum, item sal commune, aliaque cum mercurio cocta eum ex parte dissolvere, forsitan non adeo notum est. Quin etiam sola aqua communis propter subtilissimum illud universale, in poris ejus residens sal tandem, coctione diutius instituta, ex argento vivo partes abradit, unde hoc decoctum ad luis venereæ virus, item ad verminosam progeniem expellendam, in praxi non ignotum est.

§. V.

Promptius adhuc solutio mercurii cum salibus perficitur, si is in pulverem prius attenuatus fuerit.

Scholion.

Currentem mercurium propter politam & globosam figuram paulo difficulter menstrua aggrediuntur, facilius vero id fit, si chymicis artificiis in pulverem, ut multas superficies adquirat, redactus fuerit. Quare si mercurius dulcis vel præcipitatus albus aut ruber, aut minerale turpethum, cum sale ammoniaco vel sale tartari mixtum ex aqua coquitur, protinus solutio valde corrosiva, fauces constringens, coloris grisei evadit, quod tam subito non fit, si experimentum cum mercurio currente tentetur.

§. VI.

Mercurius salium additione solutus virulentam & corrosivam naturam plene atque exacte induit, adeo, ut, quo magis fuerit à salibus solutus & concentratus, eo potentius venenum fiat.

Scholion.

Manifestum exemplum præbet mercurius ille vulgaris sublimatus, venenum valde infame, qui ad grana

decem intus sumtus interimendi facultate pollet. Et quamvis non adeo plura in medicorum monumentis veneno hoc intersectorum prostant exempla, cum veneficio patrandi propter corrosivum saporem plane inidoneum sit; Eo tamen major numerus observationum colligi potest, ubi remedia mercurialia non rite parata vel administrata gravissima & venenis similia symptomata intulerunt, siquidem à mercurio dulci non legitime parato, sed adhuc corrosivo sæpius truculenta symptomata orta legimus. Placet vero hic insinuare symptomata, quæ à mercurii vere corrosivi sublimati granis duodecim infanti annorum vix duorum exhibitis funesta fuerunt, historiam describente *Cl. Wedelio in Diff. de mercurio dulci pag. 22.* assumpto pharmaco mox sudor anxius exsurgebat, hinc vomitus pituitosus, mox repetitus cum mero sanguine, hinc strepitus pectoris, rauco, insequente morte eodem die hor. V. à meridie, frustra non uno medicamento porrecto. Aperto & lustrato cadavere, deprehensi fuere ungues digitorum & manus ipsæ fusæ, totum abdomen tumefactum, colore ex viridi cœruleo, os plenum vesiculis & pustulis albis, cavitas ventris distenta intestinis inflatis, effluente mox ab apertione aqua insigniter flava, quæ eodem colore & prosectoris manus & orificium interius ventriculi & intestina, maxime colon, impense tinxit; sinistro latere ventriculus à superiori corrosus, non nisi exigua adhuc membrana quasi vesiculari perstante. Atque etiam plura nobis sunt nota exempla, ab Azoth Heslingii, ab arcano corallino, turpetho minerali, in majori dosi oblatis, & non bene edulcoraris atrocissima tormina cum vomitu, alvi dejectione, præcordiorum anxietate, & spasmo internarum partium producta.

§. VII.

Mercurialia veri caustici & constringentis veneni vim & naturam æmulari, ex aliis communibus veneni notis judicandum est.

Scholion.

Primo enim mole non admodum magna celerissime operationes suas exequuntur vel etiam necant. Deinde acrimonia penetranti non modo in ventriculum & intestina, sed & in omnes corporis membranas nerveas grassantur & vehementissimis spasmis sæva symptomata, quæ à venenis proficisci solent, inque primis viis inflammationem sphacelosam lethalem inferunt. Tum corrosiva mercurialium acrimonia in salivationis actu ex faucium ulcusculis, ex doloribus & exulcerationibus, quas excitat vel jam præsentis exasperat, commode evinci potest.

§. VIII.

Argentum vivum non secus ac aliud venenum ob penetrantem suam vim intima corporis subit, & non modo nervosas partes petit, sed propria & quasi peculiari ratione glandulas faucium afficit & salivalem laticem copiose ex iis elicit.

Scholion.

Illud maxime proprium & quasi peculiare habet mercuriale venenum, quod præcipue fauces cum larynge, linguam & dentes afficiat, utut externe tantum nervosis pedum plantis vel articulis cum unguento fuerit illitum; inde fit, ut lingua cum amygdalis intumescat, fauces aphthis obsideantur, continuum salivæ, cum fœtore interdum, fiat stillicidum, gingivæ flaccescant, dentibus mobilibus & nigricantibus redditis. Vidimus quoque unguentum mercuriale, ex impura venere ortis bubonibus inunctum, brevi tempore salivationem concitasse, quod & à solo pulvere mercuriali exulceratæ parti insperso evenit. Sæpius expertus sum, inquit *Hildanus, Cent. 3. Obs. 92.* à mercurio vivo vel ejus pulvere

pulvere ulceribus in corporibus tenellis insperso, protinus eos de dolore dentium & gingivarum inflammatione conquestos fuisse. Atque etiam *Joh. Langius Lib. 1. ep. 47.* refert, se crebrius expertum esse, cum sordidis in genis ac juxta alas ulceribus mercurii præcipitati pulverem paulo frequentius inspergeret, illius virus cæteris membris illæsis ad dentes penetrasse, & os ac pharyngem diurno nocturnoque salivæ effluxu maduisse.

§. IX.

Sicut ex venenis caustica & ex evacuantibus acriora & drastica membranarum nervearum vehementiori constrictione & spasmo suas perficiunt operationes & molestissima subinde symptomata excitant: ita etiam eodem modo mercurialia in corpus nostrum vim suam exerere, plura argumento esse possunt.

Scholion.

Ingens illud salivæ profluvium, quod mercurialia, intus data vel extrinsecus inuncta, peculiari ac prope modum propria quadam ratione movent, non aliunde derivari videtur, quam quod mercurius, salibus præsertim armatus, maxime glandulas, quæ ex pluribus membranis nerveis & vasis invicem convolutis contextæ sunt, aggrediatur & fortiori fibrarum nervearum strictura modo lymphæ per universum lymphaticorum vasorum systema motum augeat, modo ex glandulis potissimum conglomeratis, cujus generis sunt salivales, fortiori compressione facta in copia salivalem laticem eliciat. Cui excretioni sanguinis per venas glandularum compressas regressus impeditior multum velificatur. Præterea medicina mercurialis glandulas quoque ventriculi & intestinales, imo pancreaticas maxime omnium laceßere videtur, dum à paulo acriori & caustico sumto mercuriali remedio subinde per vomitum & dejectiones alvinas non sine anxietate ac torminibus ventris ingens pituitæ viscidæ copia elicitur, & non raro ad aliquot dies alvus fluida cum stimulo & irritatione quadam interna permanet. Si vero copiosius ac diutius saliva fluit, venter adstringitur, urina pauca ac tenuis profluit, & partes extremæ refrigescunt, manifesto documento, quod constrictis aliis emunctoriis ipsaque cute, excrementitiæ sordes undiquaque ad glandulas faucium & palati cum impetu confluant, quarum vasa nimium distenta & à salibus quoque excrementitiis erosa non modo ingentem salivæ ac pituitæ viscidæ, corruptæ ac foetidæ effluxum causantur, sed & tumores, exulcerationes, dentium vacillationes, putredines pariunt. Quibus molestis symptomatibus non meliori ratione occurratur, ac si humorum impetum à faucibus ad excretoria relaxata & aperta derivemus, & per temperata constringentia & balsamica uberiores in faucibus affluxum præpediamus.

§. X.

Truculenta & lethalia symptomata à veneno mercuriali excitata partim vehementiori humorum motui ad caput, partim etiam inflammationi & vehementi spasmo primarum viarum in acceptis ferenda esse videntur.

Scholion.

Prioris effectus exemplum poterit esse & epilepsia & apoplexia, quæ interdum mercurialium usum tristissimo eventu subsequitur. Vidimus à granis sex mercurii dulcis, binis vicibus in corpore repleto sumtis, postquam ab ejus usu intenso frigori æger se exposuit, subito apoplexiam lethalem obortam. Vidimus ab aqua mercurii sublimati largiori dosi data summas diaphragmatis cum anxietate constrictiones, inquietudinem, corporis jactationem, delirium & convulsiones & postero die mortem secutam, ventriculo in dissectione cadaveris inflammato reperto. Quæ mala utique à ve-

hementi generis nervosi strictura potissimum derivanda videntur.

§. XI.

Quum argentum vivum in se innocens & nullius fere operationis, & pro additione demum salium vim suam & virulentiam acquirat, atque multa diversi generis salia in corpore humano reperiantur: non mirandum est, à mercurialibus vel extra per unguentum applicatis, vel intus in pulvere insipido datis vehementem effectum observari.

Scholion.

Corporis humani naturam prorsus salium genitricem esse, sudor, urina & alvina excrementa, salis admodum foecunda, eorum, qui continenter insipidis plane alimentis utuntur, satis abundeque demonstrant. Neque vero unius ejusdemque salia illa microscopica, sed omnino dissidentis sunt indolis, idque maxime pro conditione locorum, quibus insident. Ventriculus maxime omnium acidus & ponticos humores fovet & continet, qui in statu præter naturam, ut in hypochondriacis, quartanariis & qui alvi sunt durioris, item in senibus & otio deditis manifestius se produnt. Intestina secundum naturam magis alunt humores, qui ad alcalinam indolem vergunt, præsertim, si copiosa bilis, alcalinæ & sulphureæ naturæ, influat, & acidi in ventriculo minor adsit quantitas. Serum vero sanguinis in vasis contentum manifestam ad sensum quoque acrimoniam salinam medii generis & sali ammoniaco æmulam habet. Igitur mercuriale remedium ubivis invenit salia, quibus si associetur, non caret effectu & operatione. Quoniam vero in quibusdam morbis ob deficientes excretiones & copia & acrimonia salium augetur, ut in arthritide, scorbuto, podagra, scabie, & quibusdam intermittentibus febribus: non mirum est, mercurium corrosivum inde redditum admodum fieri perniciosum.

§. XII.

Igitur mercurialia neque interne neque externe conveniunt, ubi succorum magna est impuritas & dyscrasia salino sulphurea, ut in scorbuto, arthritide, & qui à salibus nascuntur, morbis.

Scholion.

Notissimum in praxi medica est, quod mercurialia dextre adhibita præstantissimam sæpe opem ferant, interdum vero pessima & molestissima producant symptomata. Hujus diversæ operationis ratio, si medicamenti præparatio alias commoda fuerit, & nullus in ægrotante error accesserit, in dispositione corporis humani ejusque humoribus unice quærenda videtur. Et quoniam hæc rarius à medicis minus attenditur, utique fit, ut hæc medicamenta sæpius infida & insicura sint. Ego sæpius ab aliquot granis mercurii dulcis, in quartana vel etiam tertiana exhibitis, gravem & vix coercibilem salivationem observavi, id quod etiam confirmat *Harderus Obs. 43. p. 192.* qui granis quindecim mercurii dulcis in sexagenario quartana laborante ptyalissimum excitavit. Aliis vero quartana laborantibus pulverem meum antiquartanarium, qui describitur in *Diff. de felici quartanæ curatione*, felicissimo cum successu dedi, ea tamen cautione, ut ante ejus usum acidæ & corrosivæ, biliosæ & viscidæ sordes convenienti medicina correctæ & expurgatæ fuerint. Quare non mirum videtur, si aliis, idem remedii genus tentantibus, quando hæc non observant, non exoptatus successus obveniat. Quam noxia à mercurio suscitata salivatio hypochondriaco fuerit, id satis ex *Dec. 1. ann. 1. obs. 80. Misc. Nat. Cur.* edocemur. Mercurialem inunctionem arthriticis corporibus valde noxiam fuisse, autor est *Hildanus Cent. 4. obs. 81.* Scorbutici & cacochymici ab aliquot mercurii dulcis granis aliquot mox sedes experiuntur, quod non fit in sanis corporibus. A turpetho minerali tormina & anxietates

De virulenta mercurialium noxa ceu gravium malorum causa. 221

tates *Hellwichius in Misc. Cur. Dec. 3. ann. 8. obs. 7.* spectavit. Idem turpethum minerale ad granum unum quotidie in pilulis cum extractis virgini cachecticæ ex mensium suppressione quidam ex nostris Practicis dedit, idque per tres septimanas continuavit, quæ inde in intolerabiles artuum dolores & mali moris exulcerationes, in pedum malleolis orientes, in contracturam brachii, & atrophiam incidit. Quæ mala quum à mercurialibus sumtis indies crescerent, quidam medici morbum à lue venerea ortum esse existimarunt. Tandem vero his omnibus remotis decocta ex solis emollientibus parata, item balnea & diaphoretica medicamenta depellebant hæc mala, & integræ sanitati ægram restituebant. Legimus præterea in observationibus, quod à solo mercurio dulci bene præparato & gravia symptomata & mors sequuta fuerint, quem funestum effectum non tam soli mercurio, quam potius pravæ humorum in primis viis dispositioni adscribendum esse arbitramur. Legitur notabilis historia de mercurio dulci pulverisato, anno 1702. Quedlinburgi typis mandata, ubi adolescens quindecim annorum sanus sumsit quindecim grana mercurii dulcis bene præparati pro una dosi; sequutus fuit vomitus, anxietas, tremor manuum ac pedum, inquietudo, corporis jactatio, contractura manuum & sexto die mors. *Miscellanea Nat. Cur.* referunt, quendam errore inductum sumsisse unciam semis mercurii dulcis bene præparati, qui intra viginti quatuor horas extinctus est. Retulit etiam nobis celebris Practicus, D. D. NABOTH, Lips. foeminam scorbuticam ab assumpto mercurio præcipitato, quem empiricus aliquot diebus ad sex grana cum paucis potu obtulit, horrendis spasminis fuisse affectam & mortuam. Sectione facta plures maculæ rubræ in fundo ventriculi, duodeno & jejuno repertæ fuerunt; ventriculus tumefactus, portio vero jejuni arctissime constricta fuit.

§. XIII.

Quemadmodum vero nunquam, si prima regio foridibus & cruditatibus acido-biliofis & viscidis conferta est, medicamenta ex mercurio parata exhibere oportet: ita multo magis id tenendum est in infantibus teneræ ætatis, & ubi ventriculus atque intestina ex lacte corrupto humoribus corrosivis ac viridi colore tinctis infarcta sunt.

Scholion.

Ex duplici causa infantibus tenellis & lactentibus infensissima sunt hæc remediorum genera. Primo, quia mercurius, præsertim in pulvere, ob gravitatem suam intestinorum plicis & valvulis firmitus inhærescens, à corrosivis ibi contentis humoribus virulentam facile naturam induit. Eximium profecto est monitum, quod Clarissimus Professor Erfurtensis VESTI in *Dissert. de usu & abusu medicamentorum mercurialium* proposuit, dum ait: *per accidens fit, ut mercurius dulcis in venenum abeat, si scilicet ab imperitis datur, non considerato prius, an cruditates acidæ adsint, his enim accedentibus mercurius dulcis fit corrosivus & interiores corporis partes, ut ossa, nervos &c. corrodit; quandoque etiam gangrænam & sphacelum in intestinis causatur, quo tandem ægrotans morbo succumbat.* Deinde mercurialia, ut omnia vehementia, infesta admodum sunt huic ætati propter teneritudinem & imbecillitatem generis nervosi, quod ad spasmos & convulsiones subeundas valde preclive est. Quare *Willisus de anima brutorum Cap. IX. de paralyti* hortatur, ut omnes, qui cerebro debili laborant, aut motibus convulsivis obnoxii sunt, mercurialibus abstineant: & *Glauberus Part. II. Furni philosophici XXXVIII. pag. 82.* valde dissuadet infantibus mercurium dulcem paulo majori dosi dandum, quia debilitatem & membrorum infirmitatem adferat. Et *Cl. Doleus in Encyclopædia Cap. 15. de lue venerea* à mercurio dulci convulsiones & epileptica

symptomata in Principe Nassovico observavit; it. *Cl. Wedelius in Dissert. de mercurio dulci* identidem hoc medicamentum infantili ætati ob teneritudinem inimicum judicat. Longe vero magis inunctio mercurialis teneris infantibus adversa est. Qua de re legi meretur *Miscell. Curios. Dec. II. A. IV. Obs. 16.* ubi gemelli dimidium annum nati, unguento mercuriali inuncti, eodem die convulsionibus epilepticis prius correpti misere perierunt.

§. XIV.

Longe vero major noxa ab inunctione mercuriali in corpore impuro, & non bene prius præparato, quam ab intro sumto mercuriali remedio extimescenda est.

Scholion.

Innumera certe prostant in medicorum monumentis memoriæ consignata exempla, ubi pessime inunctio mercurialis vel ejus suffumigatio cessit & subinde lethifera fuit, sed pauca saltem huc adduxisse suffecerit. *Doleus Epist. III. ad Waldschmidium* historiam narrat de ulceribus faucium lethalibus, ab unguento mercuriali inductis, quod etiam confirmare videtur *Lanzoni in Miscell. Curios. Dec. III. A. II. Obs. 38.* Quin etiam ex improvida inunctione mercurii mortem secutam esse, *Hildanus Cent. III. Obs. 92.* testatur. Ita quoque *Montanus Consil. 62.* ab eadem epilepsiam & mortem secutam notavit. Et scitu dignam hic referre licet historiam, quam ante aliquot annos Berolini notavi, cum pestis in vicinia grassaretur. Civis hujus urbis primarius amuletum, quod argentum vivum capiebat, præservationis causa cordis scrobiculo imposuit, quod pedetentim ex poris corii, cui inclusum erat, profluens cutis meatibus se insinuavit, ita, ut juxta inguina currens mercurius digitis exprimi potuerit. Perquam diu hunc virum inappetentia, virium languor, motus impotentia cum tremore artuum & facie decolorata tenebat, donec tandem præstantissimis remediis ad sanitatem fuerit perductus. Studiosus quoque hic loci tenerioris constitutionis ante annum mercurium ex fracto barometro manibus excepit eumque diutius in earum volis facta attritione versavit, idque aliquoties repetiit; postero die præter omnium opinionem lipothymia, quas artuum tractiones sequebantur, urgebant, diuque adhæsit artuum imbecillitas faciesque plane livida ac pallida. *Cl. Ramazzini de morbis artificum Cap. II. pag. 27.* refert: juvenem inauratorem, postquam per duos menses decubisset, tandem mortuum esse, qui à fumo mercurii cachecticum habitum primo contraxit, postea facies illi facta est livida & cadaverosa, oculi turgidi, gravis anhelitus, mentis stupor, totius corporis torpor, cui graveolentia ulcera in ore suborta sunt, è quibus sanies teterrimæ magna in copia continuo stillabant. Mercurium vero foris illitum majorem noxam creare, ac si intro sumtus fuerit, hæc videtur ratio, quod primis in viis ejus vis sæpius multum ab occurrentibus humoribus infringatur aut etiam per vomitum aut secessum citius eliminetur; secus accidit, quando salva sua textura sese insinuat poris cutis, cui salinis fordibus immixtus diutius inhærens, facilius vim suam deleteriam cum reliquis nervosis corporis partibus communicat.

§. XV.

Cum tanta symptomatum sævitia minus caute adhibitorum mercurialium usum excipiat, omni utique cura & opera eo enitendum est, ut & individui & morbi & regiminis in usurpando hoc auxilii genere ratio habeatur.

Scholion.

Primo nunquam corporibus infirmis, sanguine vel succis impuris abundantibus, senibus, infantibus, & qui à præcedente morbo, gravi animi motu, vel immodica excre-

excretionem vires amiserunt, mercurialia adhibere oportet. Deinde scorbutici, hypochondriaci, arthritici, cachectici maximopere sibi ab horum usu caveant, & ubi genus nervosum spasmi valde lacescit. Tum si salivatio mercurialis movenda est, tenendæ sunt hæ observationes. Si plethora est, missione sanguinis solvenda, si cruditas in primis viis, corrigentibus & commodis evacuantibus ea est removenda; deinde balneis & decoctis temperatioribus lignorum humores fluxiles reddendi sunt & corpus humectandum. Quod ad rationem victus attinet, omnia, quæ falsæ & acidæ naturæ, sunt removenda, vinum vero ex toto circumcidendum. Tandem omne frigus arcere & conclave temperate & æqualiter calidum habere oportet, quo perspiratio libera maneat. Postremo etiam videndum, ne mercurialibus medicamentis salia adsociantur, præsertim quæ ad alcalinam vel salis ammoniaci naturam accedunt, siquidem si hæc ipsa invicem in mortario probe triturentur, vel quod pejus est, invicem coquantur, certissime mercuriale alias insensibile deleterium induat naturam necesse est. Hac de re etiam eximium *Cl. Wedelii in Dissert. de mercurio dulci* in fine extat monitum, quod cum salibus neutris mercurius dulcis non temere, sit maritandus, ne turbas majores in corpore excitet & spicula nova redinduat.

CAPUT VII.

De venenis soporiferis.

§. I.

Soporifera græcè dicuntur hypnotica, item anodyna, si valentioris sunt indolis, narcotica seu stupefactiva vocantur, & sunt ea remediorum genera, quæ subtili, tetra & naturæ inimica exhalatione & motum & sensum solidarum partium modo minuunt, modo plane sistunt.

Scholion.

In horum numero maxime eminent, quæ ex papaveris tota planta in usum medicum recipi solent, præcipue opium, quod à veteribus papaveris lacryma vel meconium, quod papaveris extractum coctione factum est, vocatur. Ad stupefactiva vero, quæ valentioris sunt virtutis, omnia ex mandragora, hyoscyamo, solano, stramonio, datura, pertinent.

§. II.

Stupefactiva & soporifera venenis non sine ratione annumerantur.

Scholion.

Celeriter enim & exigua mole nocent, paullo vero majori dosi necant. Deinde operationes suas præcipue in nobilissimas corporis nostri partes, quibus sensus & motus inest, exerunt. Tum agunt elemento naturæ plane infenso, tetro nempe sulphureo vapore, quo fibrarum motricium & sensum & motum minuunt, vel plane etiam auferunt.

§. III.

Alia operatio est veneni caustici, alia stupefactivi. Illud sale penetrante acerrimo motus præter naturam augeat, & spasmi œconomiam motuum vitalium infensum est: hoc vapore sulphureo motus & sensationes, quæ maxime in membranis nerveis vigent, sedat vel sistit, atque ideo & sanguinis circuitum languidiorem & excretiones segniores reddit.

Scholion.

Corporis humani vita ejusque functionum integritas

in *ἐντρονία* solidarum & fluidorum libero & æquabili motu consistit. Illa fit per moderatam & æquabilem eorum systolen & diastolen, sive constrictionem & dilatationem; hic vero à convenienti sanguinis temperie & quantitate & meatibus apertis oritur. Quodcunque itaque potenter & celeriter *ἐντρονίαν* illam solidarum destruit, & motum æquabilem fluidorum turbat, id omnibus functionibus corporis animati pervertendis aptum est, & si cum vehementia id fiat, recte venenum dicitur. Cum vero soporifera & narcotica nimium motus sistant, & *ἀντρονίαν* solidis partibus inferant, & sensum imminuant, sanguinisque circulum cum excretionibus languidiorem efficiant, utique naturæ admodum infensa existunt.

§. IV.

Haud dubia experientia constat, ab opiatibus & narcoticis, præsertim immoderatus usurpatis, pulsus languidum, depressum ac parvum fieri, angustam ac difficilem spirationem reddi, soporem & torporem capitis, cum sensuum stupore & mentis sæpe alienatione, inferri; denique appetentiam ciborum imminui, alvum adstringi, digestionem elanguescere, & virium notabile enasci decrementum.

Scholion.

Quæ singula quidem symptomata vix alia ex causa, quam à sanguinis & fluidorum tardiori progressu atque stagnatione in partibus, proveniunt. Cum vero fluidorum motus unice à partium solidarum conditione, nempe tono, robore motuque systoles atque diastoles dependeat, liquido apparet, fluidum illud cerebri five spiritum animale, qui solidarum motum regit ac dirigit, primario ab hisce remediis præter naturam affici.

§. V.

Volatilis ac penetrantis admodum indolis, quo narcotica agunt, elementum est, quod altius membranarum & nervorum poris instar vaporis sese insinuans, purissimum illud ac mobilissimum fluidum inquinando, tonum ac motum solidis suffuratur.

Scholion.

Fugacis & penetrantis admodum naturæ elementum esse, quo vim suam narcotica exerunt, pluribus argumentis evinci potest. Primo enim forti & longa coctione instituta cum aqua, omnis pene eorum virulenta vis in auras dissipatur. Deinde in unguento vel epithemate capiti aut aliis locis nervosis, ut pedum plantis vel manuum volis, applicata, vel etiam tantum odore suscepta, soporem inferunt. *Dioscorides* opium solo odoratu soporiferum esse affirmat, & *Plutarchus in Sympos. lib. III. qu. I. p. 648. memorat, vaporem à papavere prodeuntem, non caute observantibus iis, qui succum collegerunt, homines subvertisse.* Tum non rectius eorum virus castigari, quam acidis, ut succo cydoneorum, citri, aceto vini, spiritu vitrioli, quæ volatile sulphur valide figunt, multiplici experientia chymica compertum est. Neque ignotum est, opium, lamina ignita tostum, privari fere penitus sua virtute. Graveolentis vero & adversæ indolis omnia narcotica & hypnotica, odore teste, exhalant vaporem, manifesto ingrati, quod alunt, sulphuris indicio.

§. VI.

Agunt maxime sulphure vaporoso & graveolente in nervosas ventriculi & intestinorum membranas.

Scholion.

Sicut omnem remediorum vim & efficaciam primo & proxime ventriculus cum intestinis experitur; ita eo magis id circa validiora, & quæ penetrantioris sunt naturæ, medicamenta obtinet. Opium vel aliud narcoticum

um sumtum, quam primum calore & humido dissolvi incipit, tetros spargit vapores, quos dum nervosae membranae in poros suscipiunt, fluidum illud, à quo eam tonus & motus pendet, protinus amittit suam naturam. Hinc sensatio & motio quoque intestinorum pestilentialia languidior fit. Nam si odor graveolens, hyssoparum exemplo, naribus susceptus, v. g. ex accensis lumis vel asa foetida, efferos motus in nervoso & membranoso systemate componendi tam praesentem vim habet; sique suaveolens vapor mox vehementibus spasmus universam musculorum rempublicam pervertere potest; vidui etiam narcoticorum tetra exhalatio, fluidum celerissimae activitatis inquinando, motus sistere vel suffocare poterit. Celerrima vero est harum, quae in nervos agunt, rerum efficacia, quod mox per universum nervorum systema dispergitur. Opiatum, simul ac fuerit assumptum atque adhuc in ventriculo haeret, mox inclinationem ad somnum & dolorum levamen in diffitis etiam partibus infert. Exserunt vero maxime omnium opiata suam efficaciam in nervos, unde in momento atrocitas dolorum, qui intestina torquere consueverunt, sese remittit: nausea vero & ciborum fastidium, interdum etiam, ubi satis virium est, vomitio sequitur.

§. VII.

Agunt etiam potenter narcotica in membranas cerebri, ubi arteriarum, quae tenuissimis tunicis vestitae sunt, laterem & systolen valde minuendo, sanguinis ibi stagnationes & vasorum capitis distensiones efficiunt, ita ut torporem, somnolentiam, mentem alienatam, insomnia terroris & phantasmatum plena causentur.

Scholion.

Neque ullum aliud quid in rerum natura tam celeriter sanum & intelligentem hominem stolidum & stupidum reddere potest, quam narcoticum. De datura res est notissima, de solano furioso ejusque baccis, quod sanos subito maniacos reddat, plures prostant observationes, quae legi possunt apud *Matthiolum Comment. in Dioscorid. L. IV. c. 69.* item *Wierum de praestigiis demonum lib. III. c. 17.* *Mercurialem lib. I. de venenis cap. 13.* *Lobelum in adversariis stirpium pag. 103.* Et quae nostra est observatio, medicina, quae seminis hyoscyami largiorem portionem habebat, liberalius ex incuria assumpta, haemoptycus aliquot dies vigilans omnisque memoriae & sensus expers erat. Simile quidpiam ex pilulis de cynoglossa largiori dosi sumtis ad compescendam vomitionem annotavimus. Quin immo hyoscyamum exterius applicatum ad insaniam hominem redigere posse, ex *Rondeletii fide Platerus prax. T. I. c. 3.* recenset. Qui pessimus horum medicamentorum effectus neque veteribus incognitus fuit. Hinc *Caelius Aurelianus lib. I. c. 4.* inquit: *facile mente alienantur, qui papaver aut mandragoram aut hyoscyamum bibunt, sed tunc pulsus est rarus.* De opio vero rectissime *Helmontius lib. de Lithiasi* sentit: *errant insigniter, qui maniam opiatis compescere satagunt, cum omne opiatum sit in se amens.* Et *lib. Retenta p. 82.* *Narcotica vix somnum conciliant amenibus quadrupla dosi, sed amentiam insuper augent.* Spectat huc quoque *obs. 78. Dec. II. M. N. C.* ubi dysentericus, injecto enema te ex hyoscyami libra una, statim emulentus factus, & in eo statu per sex septimanas permanisse legitur.

§. VIII.

Ob vim deleteriam stupefactiva antiquis & sapientioribus medicis valde semper fuerunt suspecta in sanandis morbis.

Scholion.

Placet in hujus rei confirmationem quaedam ex innumeris testimonia adducere. *Galenus* in opio exhibendo semper fuit timidissimus, & *lib. III. de medicamentorum compos. cap. 10.* scribit: *Corpora viventia ab*

omnium ex opio, hyoscyamo & mandragora compositorum usu mortificationis simile quippiam patiuntur. Hunc sequitur *Celsus*, pulcherrimus ille autor, *lib. III. c. 18.* ita pronuncians: *Si medicamentis somnus est arcessendus, necessaria haec moderatio est, ne, quem obdormire volumus, excitare postea non possimus.* Et *lib. V. cap. 25.* *anodynus vii, nisi nimia necessitas urget, alienum est.* *Sunt enim ex vehementibus medicamentis & stomacho alienis.* Pejoravero sunt, quae recenset phaenomena *Scribonius Largus Compos. 108. cap. 48.* *Opium potum facit capitis gravitatem, gelationem & livorem artuum sudoresque frigidos manare, praeterea spirationem impedit, mentem soporat, sensus alienat.* *Trallianus quoque Lib. III. cap. 5.* memorat, quendam solo usu opii vocem & sensum amisisse, ut non potuerit amplius restitui. Neque reticendus est *Aëtius*, qui optime noxas ab opiatis *Serm. XII. p. 221.* describit, dum ait: *Opiata nequaquam affectiones ipsas, in quibus dolores fiunt, curant, verum stuporem & sensus hebetationem membris inducendo quietem quandam doloribus obducunt.* Et id ipsum ulterius *Lib. IX. pag. 102.* idem auctor confirmat; *sedant confestim dolores, causam vero intus reservant, & aut paulo post animi deliquium inferunt & mortem, aut diuturnos & indissolubiles affectus reddunt.* Ac profecto hi effectus tam celeres & noxii, quos omnis aetatis medici à sumtis somniferis annotarunt, non sunt nihili prorsus habendi, sed potius de principio intus latente valde activo & ad nocendum potente praebent testimonium. Quo magis medici circumspiciuntissime cum hisce remedium generibus agere debent.

§. IX.

Utut hisce medicamentis multum noxae & periculi subsit, adeo, ut non longe à veneni natura recedant: tamen omni tempore magnum praesidium in anodynis, hypnoticis adversus graves praesertim dolores & fluxiones tum antiqui tum recentiores quaesiverunt.

Scholion.

Quid enim dulcius & jucundius est, quam à dolorum tormentis atrocibus liberari. Accedit, quod ea saepe dolorum sit indoles, ut, si diutius durent, vires animi & corporis frangendo, morbum alias benignum lethalem efficiant, vel etiam ipsi soli mortem accersant. Quicumque itaque hos tollere & tanta pericula avertere scit, is profecto egregiam & fere divinam miseris aegrotantibus opem & solamen adfert. Quare si vetustissimas medicamentorum compositiones spectemus, quas maxime congeffit *Scribonius Largus*, item *Celsus*, plura ibi contra dolores & fluxiones antidota reperimus, quae fere, ceu basin, opium recipiunt. Exemplo possunt esse celebratissimum illud *Cassii* antidotum, descriptum à *Scribonio Largo Compos. 120.* cujus etiam meminuit *Celsus Lib. VI. Cap. XIV. pag. 239.* Porro theriaca, mithridatum, aurea Alexandrina, requies Nicolai, triphera magna Nicolai, Philonium; à recentioribus autem fere infinitae praeparationes, correctiones opii & ex hoc adornatae compositiones prostant, ut volumini iis enarrandis vix sufficeret. Sunt, qui ceu universale, omnium morborum curationibus idoneum opium celebrant. Sunt, qui panaceas ex eo eliciunt; sed profecto validissime optandum esset, ut quidam ex medicis celebrioribus in deprædicandis hujus remedii laudibus parciores fuissent. Neque enim ulla medicina tam impune oppressit & necavit homines, quam haec ipsa, nostris praesertim temporibus. Meretur hac de re legi *Cl. Stahl's Dissert. de impostura opii.* Ego hoc loco praetere nequeor, quod nostris temporibus nimium invalecat mos, nimias haemorrhagias vel etiam dolores compescendi gratia pilulis de cynoglossa utendi, quae tamen, quum habeant & opium & semen hyoscyami, & ingentem capitis stuporem saepius relinquunt, cautissime omnino adhibendae sunt. Neque unquam, ubi mi-

tiora

tiora rem expedire possunt, ea dare oportet, sed tamen hac cautione, ne corpus valde viribus dejectum sit.

§. X.

Omnia, quæ stuporem inferunt, in ventriculi & intestinorum vitiis cautissime vel nunquam offerre oportet, quia nec ullum remedii genus tam inimicum naturali tono & motui partium nervosarum est eumque lædit, quam ejusmodi auxilii genus.

Scholion.

Ad valetudinem tuendam & ægrotudines corpore arcendas nihil æque juvat, ac tonum, robur, & motum primarum, ut vocant, viarum custodire incolumem, eo quod saluberrima illa per alvum excretio, qua modo sordes, quæ ex digestionem remanent, modo quæ ex universo corpore huc confluunt, expurgantur, ab hoc ipso maxime dependeat. Ea itaque segniore facta, vel penitus intercepta, ingens vitiosorum humorum ibi collectio colluvies & dare & fovere morbos consuevit. Nihil vero tam repente intestinorum peristalticum motum minuit & intestinale excretionem supprimit, quam sedativum & anodynum, ipsa testante experientia. Nam sicut omnia remedia, ita etiam validiora, & quæ motum sistunt, in ventriculum & intestina primum & primario suam exerunt efficaciam.

§. XI.

Res periculi plenissima est, ubi ventriculus & intestina ad inflammationem & sphacelum inclinant, vel ubi magna humorum in corruptionem prona impuritas est, opiata & anodyna propinare.

Scholion.

Stasin & quietem sanguinis firmam in vasis, quæ inflammationis productrix est, nisi opportune discutiatur, in sphacelolam putredinem abire, extra dubitationem est positum. Quodcumque itaque atroces has partes exercent dolores vel spasmi, corporaque sunt infirma vel impura certe haud parvum imminentis inflammationis est periculum. Prudentis itaque est, in dysenteria, in passione iliaca, colica spasmodica & atroci cardialgia, probe & vires ægrotantium & tempora morbi atque humorum dispositionem intueri, si sedativa exhibere velimus: alias, loco exoptati solaminis, mortem accersimus. Ita legimus apud probatæ fidei autores, ab opiatibus per os assumptis, vel per clysterem infusis, lethalia mox symptomata exorta fuisse. vid. *Thonnerus in Observat. lib. III. cap. V. Waldschmidtus in Dissert. de noxa opii, Tillingius de Opio pag. 46. Sennerius lib. VI. Praxeos P. III. cap. 1. it. Marcellus Donatus in historiis medicis mirabilibus.*

§. XII.

Quum sedativa & stupefacientia tantam vim robori intestinorum inferant, ut illud labefactent & tantum non penitus evertant: ideo nihil & producendæ & fovendæ hypochondriacæ passioni tam opportunum est, quam crebrior horum medicamentorum usus.

Scholion.

Morbum, qui dicitur vulgo hypochondriacus, ex continuis inflationibus & spasimis ventriculi & intestinorum canalis plane nervei fieri, eumque excretionis alvinæ suppressæ, & inde ingentis vitiosorum humorum congestionis abortæ productum esse, certissimum est. Cum vero hæc remediorum genera alvo cohibendæ admodum sint dicata, vim & robur intestinorum minuendo, quid iis exitiosius in hoc morbo excogitari possit, ego quidem non video. Non semel, sed aliquoties, quod sancta fide testari possum, à solo immoderato adstringentium & opiatorum usu, in diarrhœæ vel dysenteriae fluxu coercendo, vel cohibendo inter-

mittentium impetu, molestissimum hypochondriacum, quod in feminis hystericum dicitur, malum, & quod per omnem fere reliquam ætatem homines misere exercuit, enatum animadverti. Et si quis symptomatum, dolorum nempe in hac passione sævitiam paullo frequentius anodynus infringat, profecto ad tempus quidem allevamentum quoddam adfert, sed contumacia malum auget.

§. XIII.

Sunt etiam sedativa & maxime soporifera & stupefacientia admodum infensa capiti ejusque morbis, quia carotidum, quæ ex tenuissimis tunicis conflata sunt, motum & pulsum languidiorem reddendo, valde tardum sanguinis per caput faciunt circuitum. Unde sanguinis ibi factæ stagnationes graves pariunt morbos.

Scholion.

Multum interest, ut caput à morbis immune maneat, membranarum cerebri tonum & sanguinis circuitum per hoc ipsum integrum ac saluum custodire. Nihil vero præter omne vaporosum, graveolens, & quod fortem spargit odorem, nervosis cerebri tunicis infestius est. Nam sistitur inde earum tonus & robur, minuiturque vis illa arteriolarum systolica & elastica, atque ideo tardior fit sanguinis per caput progressio, quam humoris serosi secessio sequitur, ex qua præcipui capitis morbi, ut paralytis, memoriæ abolitio, aphonia, auditus difficultas, affectus soporosi, hemiplexia, & dolores fixi suam trahunt originem. Vel etiam à vasorum cerebri nimia, ob infarctum sanguinis, distensione melancholia, cui non raro phantasia plane corrupta, spectrorum visio, & insomnia terribilia junguntur, item mania, quæ facile in furorem transit, natales suos ducunt. Hisce morbis & ingenerandis & fovendis vaporosa hæc & stupefactiva maxime sunt accommodata, neque ego semel, sed aliquoties vidi, ab incauto horum remediorum usu mitiores capitis morbos in gravissimos transmutatos, adeo, ut capitis dolor in affectum soporosum, hemicrania in fatuitatem, paralytis in apoplexiam, vertigo in epilepsiam, auditus difficultas in surditatem degeneraverit.

§. XIV.

Quum tam iniinica & cerebri & intestinorum membranis sint anodyna & opiata, minuendo harum partium vim ac robur, maxime omnium infantes & senes cavere ab eorum usu oportet.

Scholion.

Duplici ex causa & infantibus & senibus exitiosa sunt sedativa. Primo, quod alvinam excretionem retardant, deinde quia systemati nervorum & membranarum imbecillitatem quandam inferunt. Utrumque & senibus & infantibus perniciosissimum est, quia morbi, has ætates infestantes, vel ex alvo adstricta, vel ex debilitate cerebri & nervorum prognascuntur.

§. XV.

Certæ & indubiæ experientia est, infantes ab anodynus paullo liberalius datis ingenii & memoriæ stuporem longius durantem contrahere.

Scholion.

Siquidem in tenerrima illa membranarum cerebri apud infantes structura facta gravior læsio non tam facile diluitur. Præeximium & sapiens est monitum *Stalpartii vander Wiel*, qui *Cent. 1. Obs. 42.* inquit: *Caveant atque observent, quotquot curæ suæ infantes traditos custodiunt mulieres nutricesque, ne illis, quamprimum molestia ac dolore afficiuntur, anodyna propinent. Contingit enim sæpenter, ut quamvis non occidant, infantum tamen cerebrum nervosque debilitent ad summumque tremorem paralytin & fatuitatem excitent.* Hujus

sententia est etiam *Willisus*, in *Pharm. P. I. p. 191.*
inquit: *Ab hoc pharmaco ingenii tarditatem & stultitiam, alios amentiam contraxisse scio.*

§. XVI.

Anodyna & opiata nocentissima sunt valde debiles, vel ætate vel morbo fractis, item ubi pulsuum est agrior, motuum defectus in succorum corruptionem bona dispositio.

Scholion.

Perpetuum in praxi medica debet esse monitum, imo, ut nunquam valida sedativa propinemus, ubi vim est infirmitas, ubi pulsus, qui semper ab exhibitis iatis fit minor, est debilitas. Secundo, ubi viscerum est infarctus & ἀπορία, ut in morbis chronicis, nunquam fere utilia sunt, & tertio, ubi ingens sanguinis & humorum est impuritas, ut in cacochymicis, scorbuticis; in quibus ad sistendum dolorem vel spasmus paullo moderatius datum opiatum lethiferum est, sphacelum quia inducit paratissime. Quarto, ubi diutius inrens atrox dolor admodum vires debilitavit, parcius remedia tentare oportet, ne post majorem virium lapsum & sudorem paresis vel alius nervorum adfectus tenebra occupet. Quare semper præstat, si res postulat, in morbis incipientibus, ubi vires semper sunt firmiores, quam ubi per vim continui morbi eæ exhaustæ sunt, nec auxiliorum genera adhibere.

§. XVII.

Quoniam duo doloris sistendi capita ac veluti scopi sunt, doloris nempe magnitudo atque atrocitas, pulsuum viruties & robur, videtur profecto, si hæc adsunt, tendendum hypnoticum esse, præsertim si dolor à causa quadam externa enatus fuerit.

Scholion.

Per causam externam eam volumus intellectam, ubi vermis, à calculo, à dente prorumpente, à punctura tendinis vel nervi, discissione unguium, vel profundiore clavo in pedibus atrox nascitur dolor, qui non raro ingentem symptomatum insultum, quin ipsam mortem post se trahit.

§. XVIII.

Sicut in genere omnia leniora, ceu tutiora, præferenda sunt validioribus: ita ad levandos etiam dolores, si mitioribus possumus esse contenti anodynis, non facile ad fortiora confugiendum est.

Scholion.

In mitiorum classem sulphur ex vitriolo anodynum & spiritum nitri dulcem bene præparatum, ex vegetabilibus crocum, nucistam, ex suaveolentibus moschum & ambram, ex præparatis oleum chamomillæ & millefolii verum referenda esse existimo. Atque etiam huc pertinet opium, saltem cum aqua pluviali depuratum, & adjectione analepticorum, aut purgantium, aut alexipharmacorum dextre correctum. Plura vid. in *Dissert. nostra de correctione opii.*

CAPUT VIII.

De ceteris medicamentis virulentam naturam referentibus.

§. I.

Ræter supra allata veneni vim habentia medicamenta, sunt adhuc alia, nocendi virtute instructa, quæ improvide ex errore medentium usurpata & gravum symptomatum & mortis sæpius causam præbere possunt.

Frid. Hoffmanni Oper. Tom. I.

Scholion.

Horum in numero & classe sunt cantharides, nuxvomica & medicamenta ex metallis, auro, venere & saturno parata, quorum non adeo tutus usus est.

§. II.

Cantharides penetranti caustico sale pollent, quo inflammant & vesicas excitant, atque ideo solidis partibus vim quandam inferunt.

Scholion.

Acrimoniam salis volatilis, quod ejusmodi insectis inest, satis abundeque inflammatoria & vesicatoria earum vis demonstrat, quam promptissime in cute, si ei applicentur, exserunt. Et præterea luxuriantem carnem absumunt; nam si emplastrum vesicatorium, in globulum redactum, fonticulo, qui ob carnem exsuperantem conglutinari incipit, imponitur, carnis excrescentia statim tollitur, & fluxus ichoris promovetur.

§. III.

Sal volatile cantharidum causticum, si vel interne vel externe usurpentur, ductus urinarios maxime petere & spasmis corripere solet: unde plerumque ardorem & difficultatem urinæ, quandoque etiam mictionem cruentam efficiunt.

Scholion.

Sicut omne virus fere peculiarem & propriam in certas, quas afficit, partes nervosas vim habet, ob convenientem forsan pororum particulis veneni structuram: ita etiam mirabile, cantharides, & intro sumtas & exterius adplicatas, in ductibus istis nervoso-membranaceis, qui & segregandæ, & retinendæ & emittendæ urinæ destinati sunt, vim suam causticam & spasticam exerere, id quod satis abundeque ex observationibus fide dignissimis liquet. Legi hanc in rem possunt *Miscell. Nat. Curios. D. II. A. VIII. Obs. 137. it. Dec. II. A. X. Obs. 133. it. Bartolinus Cent. V. Hist. XXI. it. Hist. 82. urinam quoque cruentam non raro reddit, observante Johanne Langio Epist. 47. it. Henrico ab Heer Obs. IX. Raygerus l. c. scribit: se plus quam centies à vesicatorio adplicato urinæ difficultatem observasse.*

§. IV.

Neque tantum in urinariis viis erodens cantharidum vis subsistit, sed & alias nervosas partes vehementer stimulo dolores accendit.

Scholion.

Referunt *Miscell. Curios. Dec. II. A. VII. Obs. 236.* juvenem pro stimulanda venere binas cantharidum drachmas vino infusas potasse, unde in inquietudinem, graves dolorum cruciatus & animi deliquium incidit. *Hildanus Cent. VI. Obs. 98. & 99. à vesicatorio ex cantharidibus febrem, dolores & urinæ ardores notavit.*

§. V.

Quum sal volatile illud causticum, etiam per usum externum, in universum nervosarum partium systema penetrans, eas convellat, non sine periculo & exacerbatione in inflammatione meningum, ventriculi, & ubi delirium & convulsiones sunt, vel eæ metuendæ, vesicatorium adplicatur.

Scholion.

Peccant in eo sæpius medici, quod præsentē in acutis febribus delirii vel convulsionum periculo ad vesicatorium, tanquam ad sacram anchoram, confugiant. Quam tristis sæpe sequatur eventus, brevi post auctis istis symptomatibus, & ipse didici experientia, & aliorum hac de re observationes id confirmant. vid. inter alia *Obs. 131. Dec. II. A. IX. Miscell. Nat.*

V

Curios.

Curios. ubi *Cl. König* exempla adfert febre maligna laborantium, deliriis, vigiliis & inquietudine afflictorum, quibus adplicata vesicatoria intensissimos dolores, ardores summos, ac si pars ætheo igne torrere-tur, & capitis incendium cum convulsionibus epilepti-cis funestis concitarunt, id quod etiam *Thönerus lib. I. Obs. XX.* variis exemplis confirmat. Et *Baglivus pag. 68.* phreneticis valde pernicialia vesicatoria esse scribit, quia omnes iis usi in pejus ruebant, & maxima ex parte convulsi moriebantur. *Gerhardus Columba de febre pe-silenti* dissuadet ea in tenellis hac febre laborantibus, ne ob dolorem ansam convulsionibus dent. Horum quoque usum valde noxium in variolis deprehendit, quia non multo post secutæ sunt convulsiones, dubio procul ob dolorem, quem excitant, præsertim quando eo tempo-re adhibentur; quo ardentissimus in exulceratione ma-nuum dolor urget: ex quo certe, mea quidem senten-tia, juvenes sensibilibus texturæ, præsertim si confluen-tes sunt, moriuntur, eo quod atrocissimus ille dolor membranas cerebri in consensum rapiendo, mox deli-rium & convulsiones suscitatur.

§. VI.

Quamvis cantharides virulento quodam & sæpius cum noxa agant principio, tamen in febribus continuis, etiam malignis, ubi pulsus sunt languidi, sopor & tor-por capitis urget, & petechiæ, variolæ, morbilli, pur-pura, podagra, erysipelas retrocedunt, non sine emo-lumento vesicatorio ex cantharidibus nuchæ & carpis manuum imponi, observationes practicæ testatum fa-ciunt.

Scholion.

Mercurialis inter alia auxilia vesicantia in peste, ut præstantissima *Libr. de peste Cap. 26.* commendat, & *Gerhardus Columba* ea brachiis adplicata in retrocessione morbillorum & variolarum magni facit. *Cl. Waldsch-midius in Miscell. Curios. Dec. I. A. II. Obs. 214.* scribit: *Nunquam me fefellit vesicatoriorum usus in morbis mali-gnis. Neque vero alia ratione & tempore juvant, ubi motus solidorum & fluidorum deficiunt, motus arteria-rum languidi sunt & vis quasi naturæ fracta, dum pe-netranti illo, quo prædita sunt, stimulo universi corpo-ris tubulos nervoso musculares ipsasque arterias de novo animant, easque ad vividiorém contractionem & systo-len invitant. Qua de causa ab eorum adplicatione pul-sus ante depressi sese attollunt, parvi majores fiunt.* Ex quo apparet, non sine cura & cautione in pulsu forti & celeri vesicantia adplicanda esse, nisi dolores, febres, inflammationes accendere & phrenitidem accersere ve-limus. Ex his quoque credo facile apparere rationem, cur in vetustis & rebellibus hemicraniis, cephalalgis, doloribus ischiadicis, ophthalmia inveterata, interne vero in hydropse cantharides maximum levamentum adferant; siquidem irritando nerveas tunicas fortio-rem reddunt arteriarum systolen, qua universa sanguinis & humorum massa velociori cursu per vasa fertur & ve-teres subinde obstructions hac ratione resolvuntur.

§. VII.

Inter medicamenta suspecta & quæ virus quoddam reconditum alunt, ut adeo plus damni, quam utilitatis ab iis expectandum sit, merito nux vomica referri debet.

Scholion.

Nuces vomicæ duplicis sunt generis, aliæ sunt ma-jores, aliæ minores: illas arbor, quæ dicitur *Caniram* & in *Horto Malabarico pag. 67.* descripta est, profert, eæque sunt officinales. Minores sunt fructus arboris *Timorensis*, quæ lignum colubrinum suppeditat. Utræ-que sunt amaræ, sed sub amaritie virus quoddam la-tere, ex symptomatibus, quæ præsertim in animanti-bus produciunt, judicamus.

§. VIII.

Quum canibus nuces vomicæ oblatae brevi tempo-ris intervallo omnis generis musculos & artus, neque minus diaphragma atque ventriculum & intestina in vehementes convulsivas tractiones & constrictiones con-jiciant, quas post subita mors sequitur; recte ideo con-cluditur, eas non sine periculo in usum, præsertim si is promiscuus fuerit, esse vocandas.

Scholion.

Experimenta illa, quæ cum nuce vomica in canibus *Cl. Wepferus* perfecit in *Libr. ejus de cicuta aquat. Cap. XIII. pag. 194. & seqq.* pulchra sunt & lectu utilissi-ma. Atque horrendas convulsiones tam in internis, quam externis partibus nervoso-membranosis eas con-citasse animadvertimus. Quamquam vero nonnulli ex medicis hoc simplex animalibus, non vero humano corpori infestum esse contendunt, ego tamen ininime hisce ex toto adfentiri possum; nam legimus apud *Mat-thiolum*, pauca nucis vomicæ quantitate mulierem jam senescentem esse extinctam. Et ipse novi exemplum, ubi puellæ decem annorum ad pertinacem vincendam quartanam grana 15. nucis vomicæ duabus vicibus propinata fuerunt, quæ brevi post summis anxietatibus præcedentibus & ad vomendum conatibus extincta est; quo magis apparet, quam periculosa sint ejusmodi ex-perimenta, sine ratione & cautione instituta, ubi uti-que satius est cum *Celso* nullum ejusmodi experimen-tum tentare, ne medicus occidisse, nisi servasset, vi-deatur.

§. IX.

Quamvis sit venenum summe activum, vehemen-ter genus nervosum convellens nux vomica: tamen ut aliis venenis, ita etiam huic non omnis laus & virtus detrahenda est, & non modo verisimile est, sed & ipse usus docet, in morbis languidis, ubi natura ad motum & ad excretionem quasi est excitanda, alexi-pharmacis aliis hoc medicamentum mixtum non leve auxilium ferre posse.

Scholion.

In hac re maxime observatio *Fallopæi* me confirmat, qui in *Tract. de tumoribus præternaturalibus Cap. 27.* adseverat, in peste nucis vomicæ scrupulum unum vel duos, & quandoque drachmam unam pro dosi adsum-tam magnum sudorem excitasse, & quibus hic sudor accidit, eos evasisse. Neque existimo, citra experien-tiam & usum tantopere olim celebratum fuisse *Ele-ctuarium de Ovo*, Maximiliano I. Imperatori oblatum, de cujus eximio effectu idem *Wepferus l. c.* refert: ipsi peste periculose ægrotanti parentem suum portiunculam *Electuarii de Ovo* in aceto rosaceo solutam propinasse, inde mox obdormivit, tota nocte sudavit, mane sur-rexit emergente sub axilla dextra bubone parvo, qui citra suppurationem evanuit. Ex quo rursus apparet, non omnia venena esse in medendo respuenda, sed hæc velut heroica auxilia magnam observationem & pru-dentiam in medentibus desiderare. Cæterum de nuce vomica ejusque effectibus & symptomatibus, quæ sumta excitat qui præter *Sennertum lib. VI. part. 7. c. 20.* copiosius & accuratius scripserit, novi neminem.

§. X.

Ad medicamenta veneni loco habenda pertinent etiam metallica ex auro, ex venere non recte præpa-rata vel usurpata, item omnis generis saturnina.

§. XI.

Aurum est corpus mercuriale, naturæ fixissimæ & compactissimæ, sique aqua regia solvitur & solutio coa-gulatur, tam corrosiva evadit, ut fere mercurium subli-matum in corrodingo æmuletur.

Scholion.

Scholion.

Equidem aurum, per solutionem corrosivum redditum, in eo discrimen quoddam recipit à caustico mercurio, quod illud fixioris naturæ in ventriculum potissimum agat, hoc vero indolis penetrantioris magis & volatilis in diffitas corporis partes vim suam evibret; sed tamen utrumque ob corrosivam virulentiam & gravia symptomata & ipsam mortem accersere potest.

§. XII.

Aurum salibus adfociatum stimulando primas vias purgat, vel nimium tunicas nerveas ventriculi & intestinorum laceffendo inimicos spasmos concitat.

Scholion.

Aurum fulminans licet bene præparatum sit, tamen majori dosi vel in pulvere vel in pilulis datum alvum fortiter subducit, & aliquot sedes cum torminibus movet, sine omni dubio ob particulas menstrui salinas, in ejus poris adhuc derelictas; mirum quippe est, quomodo salia vim hujus metalli intendunt. Nam si quis granis tantum duobus auri fulminantis drachmam semis salis cujusdam v. g. arcani duplicati adjecerit, omnibus his invicem bene tritatis, ita vis intenditur hujus remedii purgativa, ut vel decem exinde sedes non sine contortione abdominis moveantur.

§. XIII.

Aurum fulminans non rite edulcoratum inque pulvere paullo majori dosi datum tam vehemens est, ut ventriculum vel intestina interdum corrodat, idque magis fit in subjectis tenerioribus, & ubi prima regio corrosivis cruditatibus obfessa est.

Scholion.

Neutiquam is noster est animus, ut aurum, quod dicitur, fulminans aliaque ex nobiliore hoc metallo parata, in curationibus ex toto damnare & rejicere velimus, cum probe nobis cognitum sit, mercurium vivum, auri connubio fixatum, incomparabile esse præsidium. Id tamen inficiari non possumus, ea inficura sæpius fieri medicamenta per salia, si ipsis intime admisceantur, sive ea extrinsecus, sive in corpore demum accedant. Tunc enim aurum non secus ac mercurius corrosivum quasi in venenum armatur. Vidimus quartanariis, hypochondriacis etiam ad quatuor vel sex grana tantum aurum fulminans datum tormina, spasmos atque anxietates cum sudore extremorum frigido, languore, immo animi defectione excitasse. Idem medicamentum teneræ constitutionis virgini, ex rheumatica febre laboranti, virides cum summa anxietate vomitiones, quas brevi tempore animi deliquium & mors sequebatur, concitavit.

§. XIV.

Infantibus, si à lacte corrupto ægrotant, & virides feces, quæ corrosivos testantur succos, ejiciunt, aurum fulminans præbere valde perniciosum est.

Scholion.

Memini, olim à medico, magni quidem nominis, sed temeritate omnibus superiore, infanti dimidii anni, ex corrosivo lacte ventris torminibus vexato, fulminans aurum ad sex grana pro una dosi in pulvere oblatum; ubi paulo post summa anxietas, inquietudo cum extremorum frigore, convulsiones, & mors secuta fuit. *Cl. Rivinus, Professor Lipsiensis*, memorat in *belli Pathologico Therapeutico*, ab auro fulminante mortuum infantem, in cujus intestino, facta sectione, vermina reperta fuerunt.

§. XV.

Aurum fulminans aliaque ex auro concinnata tutius pilularum, quam pulveris forma exhibentur.

Frid. Hoffmanni Oper. Tom. I.

Scholion.

Uti aurum omnium, quæ in tota rerum natura reperiuntur, est ponderosissimum, ita etiam medicamenta ex eo parata gravia admodum sunt. Hinc fit, ut non facile è sede sua possint dimoveri. Ita aurum fulminans, si in cochleari cum vehiculo deglutiendum offertur, vix ac ne vix quidem elui ex cochleari poterit. Igitur gravis hic pulvis, descendens in ventriculum, fixam quandam sedem ibi occupat, & à succis occurrentibus corrosivis vim deleteriam assumens, vehementer eam partem, cui inhærescit, lancinat atque erodit, unde gravia nervosi generis pathemata nascantur necesse est. Id malum vero præcaveri potest, si ejusmodi gravia aliis forma pilularum misceantur. Tum enim successive fit in ventre dissolutio, & graves metalli partes non in unum coeunt, nec unam partem occupant, sed hinc inde parietibus ventriculi & intestinorum inhærent.

§. XVI.

Alia quoque ex auro corrosiva, quæ venditantur, remedia non omni periculo & noxa vacant.

Scholion.

Venditat quidam empiricus chymicus in hoc districtu pulverem, ad tria grana singulis diebus sumendum, in doloribus podagricis, quos tribus dosibus se sublaturum promittit. Accepit eundem pulverem vir generosus, annorum 60. sed admodum sensibilis constitutionis, atroci podagrico dolore vexatus, & altero die statim cessavit omnis dolor. Cum vero alteram dosin circa somni tempus sumfisset, post mediam noctem maximis anxietatibus, ventris torminibus, inquietudine exagitatus fuit. Mane caput ob vertiginem & virium languorem vix attollere poterat. Animi postea deliquium & ipsa mors successit, & sic sanus alias & robustus vir brevi interemptus fuit. Cognati miserunt ad me aliquot doses pulveris, qui saporis admodum constringentis & corrosivi erat, ut longo tempore amarulentus & quasi venerem referens sapor non potuerit ex lingua detergi. Sive ex auri, ut vulgo fertur, sive ex veneris & mercurii prosapia hic pulvis prodierit, certum est, corrosione intestinalium tunicarum eum nocuisse. Quod vero ad ejusmodi remedia interdum atrocissimi dolores repente conquiescant, id mea quidem sententia fit, quod genus nervosum afficiendo, etiam ex extremis partibus validioribus stricturis materiam peccantem ad interiora celeriter repellant, sed majori certe damno atque periculo. Monendi proinde etiam sunt omnes illi, qui arcana ex auro venditant, sub titulo pulverum vitalium, auri diaphoretici, qui tamen saporem ad venerem proxime accedentem adhuc præ se ferunt, ne ea corporibus sensibilibus, & quæ spasmis exercentur, in liberaliori dosi offerant. Neque enim paucae sese mihi obtulerunt observationes, ubi de summa anxietate præcordiorum post largiorem eorum dosin ægrotantes conquesti fuerunt, ita ut inflammati ventriculi principium adfuerit.

§. XVII.

Naturam quoque valde corrodentem & virulentam possident ex venere parata, proinde rarius & magna cum cautione sumenda sunt.

Scholion.

Pertinent ad hanc classem vitriolum album, mere venereum, vitriolum Cyprium ejusdem ingenii, tincturæ vel crystalli veneris, item tincturæ lunares cœruleæ, quæ à venere tantum suum mutuuntur colorem. Quæ remediorum genera ad vermes necandos & expellendos, ad quartanam contumacem expugnandam, atque ad morbum epilepticum vincendum à quibusdam majorem in modum commendantur.

§. XVIII.

Cavendum ab omnibus venereis corrosivis est, ubi corpora sunt infirma, cholericae ac sensibilibus naturae, & ubi spasmodicae stricturae ventriculi & intestina exercent; circumspicte vero data non penitus usu & laude privanda sunt.

Scholion.

Vidi certe, à granis 15. vitrioli albi cum granis 10. croci sumtis & desuper pingui jussulo hausto, in contumaci quartana vomitiones cum summis anxietatibus ortas, quibus aliquot diebus finitis ex toto febris desuit. Eundem effectum à granis 6. vitrioli Cyprii notavi. Vidimus quoque à tinctura veneris *Helvetii* in infantibus vermes cum alvina colluvie secretos. Sed tamen fatendum etiam est, ab ejusmodi remediis, sub ventriculo infirmo & spasmodicis obnoxio, diuturnas anxietates, pectoris constrictiones cum spirandi difficultate, tussi sicca, nos non semel observasse. In memoriam mihi hoc loco incidit, medicum temerarium febre acuta laboranti drachmam unam vitrioli albi cum aqua rosarum sumendi septimo demum die praescripsisse, quo sumto non multo post strangulatus periit.

§. XIX.

In numerum eorum medicamentorum, quae minus tuta, & tristibus exemplis quasi infamata sunt, jure meritoque ex saturno parata referri debent, quippe quae sale constringente vim suam perniciosam in tunicas maxime ventriculi & intestinorum nerveas, quas spasmodicis adfligunt, exercent, & inde quoque in alias corporis partes virus suum evibrant.

Scholion.

Equidem in frequenti usu interno nostris temporibus non amplius sunt remedia ex plumbo parata, nisi quod saccharum saturni & ex eo paratam tincturam antiphthasicam Grammanni praescribere etiam nunc solennis moris sit: à chirurgis vero & empiricis magisterium saturni, cerussa quoque ejusque saccharum ad sistendam gonorrhæam eo frequentius usurpantur.

§. XX.

Ex omnibus, quae inimica naturae sunt, nullum est, quod tam valide & tam graviter intestina eorumque tonum destruat, quam saturninum quoddam.

Scholion.

Equidem saturnina non sunt ejus generis, ut more aliorum venenorum cito perimant, etiam si in paullo majori dosi praebentur: tamen, repetita si fuerit etiam minor dosi, lenta morte homines tollunt, adeo ut plures sibi persuasum habeant, lentum illud venenum, quod Galli *la poudre de succession* vocant, saturninae esse propriae. Quemadmodum vero omnibus venenis propria & peculiaris indoles ac virtus est, quae certas quasdam partes praeter aliis gravius adficit; ita saturnina inimicissima sunt intestinis.

§. XXI.

Symptomata, quae ex saturninis in corpore producuntur, sunt maxime contumacissima alvi adstrictiones, atrocia tormina, colicae convulsivae, nauseae, vomitus, icterus, ventris intumescenciae, gravitas in ventriculo, urinae suppressio, color plumbeus; postea pareses, contracturae, asthmata, lentae febres, vertigines, & saepius mors sequuntur.

Scholion.

Hisce symptomatibus metallurgi, qui saturninas mineras igne tractant, vel lithargyrium ponderant, aut fumum ejus ore hauriunt, si ad ventriculum descendit, torquentur. Neque ignotum est, figulos à fumo lithargyrii saepe se pessime habere, saevisque intestinorum

doloribus & alvo pertinacissima frequentius corripitur. Neque forsan adhuc ignoratur, quam funesta damna ante aliquot annos quidam lucri cupidi, acidis vinis lithargyrii pulvere, ea dulcificandi causa, admixto intulerint, dum plures hoc modo è medio sublati sunt, cum colicae convulsivae, nauseae, vomitus, icterus, contumax alvi strictura, paresis, contractura, asthma, eos adorirentur, & elumbes quasi, pendulis artubus & resolutis enervati viserentur. Plura de hisce legi possunt in *Miscellan. curios. Dec. III. ann. IV. obs. 30. 92. & 100. item Dec. I. anno III. 131.* Item in nostra *Dissertatione de Metallurgia morbifica.*

§. XXII.

Propter vim naturae humanae valde infensam veteres saturnina venenis annumerare non dubitarunt.

Scholion.

Scribonius Largus de Compositione medicamentorum Composit. 184. p. 101. scribit: *Cerussam qui bibunt, vertigine urgentur, asthmate laborant, praefocantur: Juvat oleum, lac cum melle, cremor ptisanæ, aqua mulsa &c. Anazarbaeus lib. 6. cap. 27.* inter symptomata lithargyrium haustum sequentia memorat stomachi, ventris & intestinorum gravitatem, cum magnis torminibus distendentibus, urinae retentionem, tumorem ventris & plumbeam deformitatem. Quibus suffragatur *Casalius lib. III. cap. 24.* qui cerussam & lithargyrium venenis annumerat, & sequentia ab iis notavit symptomata, cum ait: *horum usum insequuntur gravitas in ventriculo, intestinis, visceribus, tormina vehementia, urinae suppressio, corpus intumescit, color plumbeus est, valvulosa tormina incenduntur, alvus supprimitur.*

§. XXIII.

Quum tanta noxa à saturninis intro sumtis corpori humano imminet: prudenter ii agunt, qui plane ejusmodi medicamentis, quae plumbum habent, in curationibus abstinere, ut sunt saturni saccharum, & tinctura Grammanni antiphthasica.

Scholion.

Ego testari hic bona fide possum, me nunquam auspicatum vel diu durantem effectum ab ejusmodi remediis exhibitis annotasse. Laesus inde non modo fuit ventriculus ejusque digestio, sed & alvus adstrictior reddita. Plures, qui gonorrhoea laborarunt, in tumorem testium exinde lapsi sunt. Et merentur hanc in rem certe attendi, quae de noxa salis saturni *Borellus Centur. IV. Obs. 32.* observatione digna memoriae reliquit: *Habui amicum, qui sacchari saturni nimiam hausit quantitatem, ut tanquam paralyticus & fere mortuus factus sit; rigebant membra ejus & tanquam congelatus & apoplecticus erat.*

CAPUT IX.

De rebus venenatis in aëre, interque esculenta & potulenta reperiundis.

§. I.

Sicut aër fluidum est & menstruum ac vehiculum universale, quod omnis generis effluvia & exhalationes ex corporibus extrahit & in se recipit: ita etiam subinde noxias & naturae infensas detinet exhalationes, quae spirando intus haustae in summam perniciem hominem conjiciunt.

Scholion.

Aërem corpus esse fluidum, elasticum, materia aetherea, quae caloris fons & causa est, repletum, & quod inter sua interstitia copiosos vapores & exhalationes recipere

recipere possit, nemo ignorat, nisi qui plane rerum physicarum sit expers. Neque vero illæ exhalationes, quas recondit, sunt tantummodo aqueæ, sed & subtiles terreæ, salino - sulphureæ, caloris vel solis actione attenuatæ inque aërem diffusæ. Quemadmodum id apparet, dum ligna, carbones, guminata accenduntur, vel etiam mineralia ac metalla fortiter igne torquentur.

§. II.

Recipit etiam aëris fluidum multas graves tetras exhalationes, quæ & nocent, & subinde etiam, imo cito mortales perimunt.

Scholion.

De hoc ne ullus quidem facile dubitabit, qui miasmata pestilentiae & aliorum, quæ contagio infesta sunt, morborum per aërem ferri, inque alia corpora transmitti considerat.

§. III.

Ex virulentis & valde infensis exhalationibus primo fere loco habendæ sunt eæ, quæ ex carbonibus vivis & ardentibus in aëra feruntur, eo quod non modo gravem noxam, sed & celeriter necem & hominibus & ceteris animantibus inferre possint.

Scholion.

Id quidem vix videtur credibile, tantam noxam, tantumque virus habere hunc fumum, quia quotidie homines carbones accendunt, neque tamen semper, sed rarius sanitatis vel vitæ damnum exinde sentiunt; cum tamen res sit verissima, abunde id testantibus tristissimis exemplis, dum quidam ex hoc fumo, præsertim concentrato, celeriter opprimuntur, vel grave damnum accipiunt.

§. IV.

Jam inde à vetustissimis temporibus plures à fumo carbonum ardentium interfectos physicorum pariter & medicorum monumenta referunt.

Scholion.

Cæsarem Jovinianum fumo carbonum in conclavi mortuum esse, testatur *Eutropius & Cellarius in notis ad Libr. X. Cap. X. item Galenus lib. VII. de usu partium Cap. VIII.* Plures historias in unum collegit *Marcellus Donatus in Historia Memorabilium pag. 107. Velschius in Sylloge Curationum & Observationum inter Rhumelianas Obs. 54. pag. 173. item Forestus Lib. IX. Obs. IV. Solenander in Consiliis Sect. V. pag. 461. Chesneau Obs. Lib. I. pag. 78. item Amatus Lusitanus Cent. VII. Curat. 33. pag. 58.* Ex recentioribus *histoire de l'Academie des sciences A. 1710. pag. 727. Lossius in Observat. Lib. I. Obs. 26. Lancisius de subitis mortibus Lib. I. Cap. IV. Obs. II. pag. 136. Ramazzini in supplemento diatribes de morbis artificum, & plura exempla à nobis notata legi merentur in Germanico à nobis conscripto Traßtatu, Bedencken von dem schädlichen Dampf der Holts-Kohlen, qui extat parte V. Dissertationum, quæ de valetudine tuenda agunt in fine.*

§. V.

Symptomata, quibus affliguntur, qui incautius hunc fumum ore & naribus hauserunt, sunt sensuum omnium oppressio & torpor, profundus sopor, ut quasi cataleptici videantur, mentis alienatio; alii, qui non tam copiose spirando hunc fumum attraxerunt, in graves cephalalgias, animi deliquia, aphoniam, fumina aruum impotentiam viriumque languorem incidunt; qui difficulter discutitur.

Scholion.

Cælius Aurelianus Lib. II. Cap. X. tradit, non aliter esse habere, qui ex odore carbonum sensuum oppressione vel torpore afficiuntur, quam catalepticos, qui oculos habent

distentos, dentium concidente junctio cum pulsu parvo atque imbecillo. Subito sensibus & motibus homines exinde privari *Marcellus Donatus l. c. & Lossius l. c. item Solenander l. c.* notarunt. Vehementem vero cephalalgiam, animi deliquia & mentis alienationem inde secutam *Velschius & Forestus loc. cit.* prodiderunt.

§. VI.

Sectio perniciali hoc fumo enectorum cerebrum maxime affectum ostendit; dum vasa meningum nimium sanguine distenta, infarcta & inflammata invenerunt.

Scholion.

Id ipsum maxime advertere licet in *Histoire de l'Academie des Sciences anno 1710. p. 727.* ubi memorabilis & lectu dignissima ejusmodi observatio occurrit, qua docemur, quam lethiferum effectum in tribus hominibus hic fumus habuerit, & quæ post mortem in cerebro reperta fuerint. Neque forsan adhuc ignoratur tristis ille casus, qui aliquot abhinc annis Jenæ contigit, ubi asperima hyeme in humili & parvo conclavi tres homines cita morte oppressi fuerunt, quem insuetum & rariorem casum rerum physicarum penitus ignari omnibus viribus dæmoni adscribendum esse contenderunt. Quæ de historia consuli potest nostrum judicium, item *Responsum Facultatis Theologicae, Juridicae & Medicæ Lipsiensis.*

§. VII.

Omnia & singula symptomata, quæ ex fumo carbonum ardentium immoderatus hausto contingunt, satis abundeque planum ac testatum faciunt, huic fumo, præter viam suffocativam, omni fumo concentrato communem, inesse narcosin inferens sive stupefactivum magnæ activitatis principium.

Scholion.

Necat hic fumus, si valde fuerit compressus & in unum collectus, duplici ex causa. Primo enim solenne est, animalia ab omni fumo, etiam lignorum, accenso, item sulphuris, & qui ex fermentatione musti vel cerevisiæ fortiori prodit, suffocari: quia susceptus intra tracheam & vesiculas pulmonales vapor destituitur potentia illa elastica, qua aër vesiculas istas & vasa pulmonalia expandit, ut liberior sanguini pateat transitus. Deinde hoc vapore repletus totus pulmo, ob impenetrabilitatem & resistentiam, difficulter aëris etiam purioris illapsus admittit. Porro cum vapor ille narcoticæ virtutis poris vasorum & membranarum per nares, fauces & pulmones mox altius sese insinuet, more aliorum narcoticorum statim elaterem & systolen arteriarum, quæ in meningibus sunt tenuissimæ, infringit & tandem penitus tollit, unde ob deficientem arteriolarum capitis systolen sanguis ibi stagnat & congeritur, unde sopor, torpor, mentis alienatio & omnium sensuum privatio, animi quoque defectio non secus ac à narcoticis contingunt.

§. VIII.

Quoniam vapor carbonum vel ab intenso frigore, vel in conclavi minus spatioso nimis coarctatur, non mirum est, tunc demum pernicialem, vel etiam lethalem noxam ab accensis carbonibus homines experiri; minus vero, si in loco libero, patente & spatioso hic fumus continetur, per quem aër transit & movetur, id contingere.

Scholion.

Ex hoc jam apparet clarius, cur sub algidissima, quæ anno 1709. & 1715. incidit, hyeme complures ejusmodi funesti casus hinc inde, alias fere inauditi, acciderint. Possem enim vel decem mihi notas recensere ejusmodi historias, illi per omnia similes, quæ contigit Jenæ. Servati autem sunt plures & ex mortis faucibus erepti, si quis statim auxilium tulerit, homines semimortuos

tuos in liberum & purum aërem transferendo eorumque membra fortiter cum pannis fricando, vel sanguinem detrahendo. Ceterum ex hisce allatis illud in usum nostrum addiscere debemus, pessimum morem esse, hypocausta clausa accensis carbonibus calefacere, vel arandi frigoris causa ollas, carbonibus repletas intraque muliebres vestes abditas, pedibus subicere. Graviter enim inde luere foeminas, & caput torpore & gravitate affici, non una simplici, sed crebra experientia perpeximus.

§. IX.

Ejusdem fere noxiæ indolis est vapor, qui ex muris vel domibus recenter calce obductis exhalat, si quis in iis diutius versetur, vel noctu dormiat. Experientia enim quotidiana & plures annotatæ observationes ejus noxam satis abundeque patefaciunt.

§. X.

Symptomata, quibus adfligi solent, qui domos calce recenter illitas incolunt, sunt maxime febres, sternutatio fortis & diuturna, præfocatio faucium, infarctus pectoris cum febre lenta.

Scholion.

Notabilis profecto est historia, cujus meminit *Hippocrates lib. III. Epidem. agrot. II.* ubi Hermocratem, qui decumbebat juxta murum novum, febris corripuit. Accidit ante viginti & aliquot circiter annos hic fatalis casus, dum tres filii, infantes adhuc, consiliarii aulici aliquot dies in camera, non ita pridem calce obducta, dormiverunt, & omnes intra duos dies angina suffocati perierunt. Generosus vir, ex vehementiori motu calefactus, adiit furnum, in quo paulo ante calx usta fuit, ex quo incidit in morbum quendam peculiarem, qui vocari potest sternutatorius, & per aliquot annos ipsi adhæsit. Sternutavit enim sæpius centies, & hæc accessio facta est certis temporibus, præsertim, si quodam animi affectu fuerit correptus, aut si corpus fortius moverit, neque ulla medicina profecit. Novimus quosdam in pectoris infarctus cum vigilia assidua, lentaque febre fuisse delapsos, morte tandem infecuta. *Ramazzini de morbis artificum Cap. XXI. pag. 201.* acuta febre inde correptus vix evasit, sed postmodum ipsi cum lenta febre diu colluctandum fuit.

§. XI.

Vapor calcis vivæ non sulphuræ, sed subtilissimæ, acris & corrosivæ indolis est, qui nervosis partibus in arteria aspera & in capite altius sese insinuans spasticis stricturis & commotionibus superius dicta symptomata accersit.

Scholion.

Quod in calce viva valde nocens & causticum refideat principium, ex historia, quam adfert *Tulpius Lib. III. Cap. XLI.* luculenter adparet, ubi memorat, quod vir splendidus cum tota familia, quæ eidem accubuerat mensæ, in vertiginem, ardorem gutturis, vomitum & præcordiorum angustiam inciderit. Neque hæc mala aliam habuerunt originem, quam quod ex pariete recens illito calcis efflorescentiæ in patinam deciderunt. Calcem vero tam acriter urere & erosione sua pun gere intestina, manifeste docuit *Dioscorides Lib. V. Cap. 91. & Lib. VI. Cap. 29.* Incidit hic mihi in memoriam pessimus temerarii medici cujusdam ausus, qui theologo magni nominis, cum ex pleuritide cum purpura complicata laboraret, manipulum calcis vivæ spiritu vini inadefacto imposuit pectori, quo postridie extincto, locus ille valde rubicundus & arrosus vesiculisque repletus apparebat.

§. XII.

Neque hoc loco prætereunda est gravis & tetra exhalatio, quæ ex lucerna extincta, vel sevo hircino, vel ex sebacea candela extincta in aërem diffusa naribus hauritur, quæ subinde gravia symptomata excitavit.

Scholion.

Olaus Borrichius in Actis Hafniensibus Vol. V. Hist. 86. narrat historiam cujusdam mulieris, quæ in formandis candelis occupata in respirationem difficilem, gravem cephalalgiam, vertiginem & oculorum ruborem incidit. *Forestus Lib. 28. Obs. 30.* ex foetore lucernæ extinctæ hysterica pathemata foetumque extinctum observavit. Alii ex sebacearum candelarum nitore in pulmonibus & capite maximas sibi noxas accersunt. Mira enim est odorum tam suaveolentium, quam graveolentium in genus nervosum potentia, ut mox quædam mulieres inde in suffocationes, vel hystericas convulsiones conjectas fuisse legamus. Sed quod epilepsia & mors etiam ex fumo ellychnii extincti, naribus diutius suppositi, in dormientibus inferri possit, id clarius *Cassius Lib. LIX. in Ammanni Parænesi Critica* ostendit. Qui metalla in cryptis subterraneis fodiunt, à fumo ellychniorum plus periclitantur, & majorem spirandi angustiam contrahunt, quam à vaporibus metallicis, qui in imis terræ visceribus, nisi ignis accedat, non reperiuntur.

§. XIII.

Dantur etiam inter esculenta eaque frumentacea certi generis venena, magnæ ad nocendum, quin ad nocendum efficacitæ, & hæc inter lolium temulentum & secale corniculare nigrum, quæ duo gravissimorum epidemicorum malorum haud infrequentes causæ sunt.

Scholion.

Utraque hæc sunt venena, multum autem inter se ratione naturæ, ortus & virtutis differunt. Vidi tamen, nonnullos ex medicis ea invicem confundere, adeo, ut pro iisdem habeantur. Lolium temulentum vocari solet à *Casparo Hoffmanno* lolium avenaceum, *Wilder Haber* oder *Schwindel Haber*. Vocari etiam solet gramen loliaceum & describitur à *Rajo Hist. plantar. Lib. XXII.* Crescit in locis humidis vel æstate admodum pluviosa. Symptomata, quæ excitat, sunt cephalalgia, vehemens vertigo, sopor, genuum contabescencia, in quibusdam delirium & temulentiam quandam excitat, si nempe pultem avenaceam comedunt, & avena à granis istis per cribrum non bene fuerit separata. Vomitus cum manifesto levamine fit. Qua de re vid. *Misc. Curios. Dec. II. A. VIII. Obs. 173. it. Dec. II. A. III. Obs. 186.*

§. XIV.

Lolium temulentum capiti maxime est infestum ob narcoticam, quam alere videtur, virtutem, quæ exinde patet, quia vertiginem ac torporem celerrime infert, si in pane comedatur. Si autem ex frugibus, quibus lolium immixtum est, parantur cerevisiæ, valide inebriant. vid. *Mart. Schockius Cap. XIX. de cerevisiis.* Jenæ ab usu loliacei panis quosdam in nyctalopiam incidisse, *Schenckius in Obs. 133.* confirmatum dedit. Crescit vero hoc vitium non tantum in avena, sed & in hordeo.

§. XV.

Majoris virulentia est secale corruptum nigrum, quod corniculatum dici potest, propter cornicula nigra, sive grana secalis degenera, quod cum pane comestum gravissimas generis nervosi convulsiones, immanes dolores & alia funesta symptomata producit.

Scholion.

Crescere identidem id genus corrupti frumenti solet in agris humidis & sub æstate valde pluviosa, hoc non à fecali separatum, sed cum pane pistum & calide maxime comestum, & olim & nostris subinde temporibus peculiarem morbum endemium, veteribus incognitum, valde spasmodico-convulsivum excitavit de quo peculiaris *Tract. extat, à Facultate Medica Marburg. 1597. editus, von der Kriebel Kranckheit oder ziehenden Seuche,* qui morbus tum temporis universam Hassiam aliasque vicinas

vicinas regiones adflixit. Idem morbus anno 1648. item 1649. item 1675. in Voigtlandia graves strages edidit. Anno vero superiori 1717. idem morbus gravissime in Lusatia, in Misnia ex eadem causa defævit, & hunc satis copiose & solide *Cl. D. Gottlieb Buddæus in Consilio Medico von der Krampff-Sucht* descripsit. Quo de morbo etiam legi potest. *Obs. 234. Dec. III. A. VI. & Cent. V. Miscell. Nat. Curios. Obs. 82.*

§. XVI.

Symptomata, quibus venenum hoc frumentaceum infestum est, sunt gravissima & ex vehementibus universi generis nervosi spasimis & hos subsequente atonia & summa debilitate cerebri deducenda.

Scholion.

Primo hic morbus occupat artus & extremas manuum ac pedum partes, in quibus fornicationis sensus, percipitur. Quosdam sub accessione vomitus corripit, sequuntur contractiones vehementes digitorum in pedibus vel manibus, quas contractiones in genibus, in scapulis, in cubito, in ore, labiis, cum intolerabili dolore, quandoque cum summi frigoris, interdum etiam incendii quodam sensu subsequuntur, quæ symptomata per certas repetunt periodos, & quandoque per aliquot & ultra septimanas perdurant. Quiescentibus doloribus incidunt in soporem & torporem plenarium mentisque sæpius alienationem, vertiginem, auditus difficultatem, membra manent rigida & ad motum inepta. In partibus membrorum extremis sæpe vesicæ magnæ aqua repletæ vel etiam tumores, qui in sphacelum abierunt, derelicti sunt, motu valde tardo procedente, ut ipsa ossa frustillatim delapsa fuerint, quod maxime annotatum à *Cl. Camerario, vid. Cent. V. Obs. 82.* item *Brunnero in Miscell. Curios. Dec. II. A. III.* Quosdam superveniens epilepsia è medio tollit; necat enim maxime infantes.

§. XVII.

Grana hujus corrupti fecalis venenato sali subtili caustico, sulphuri ejus viscoso inhærenti, deberi videntur, quod peculiari plane ratione in nervosas partes grassatur sævitiamque suam exercet.

Scholion.

Utut ad scopum directe medicum non pertineat scire, cujus generis sit illud venenum, & quomodo agat, cum sufficiat nosse, quos producat effectus, & quomodo illis sit occurrendum: tamen haud alienum videtur, quantum fieri potest, elementum, quo venenum hoc agat, scrutari, quo invento, postea facilius remedium adversus illud accommodum inveniri potest. Quod autem, præter vaporosum peregrinum sulphur, sal quoddam volatile causticum reconditum habeat, ex eo id dijudicamus, quod omnes, quæ in humidis & paludosis locis crescunt plantæ, ob sal, quod alunt, causticum virulentæ sint; sub nimia enim humiditate oritur quædam corruptio, nunquam salis & sulphuris peregrini experts. Et sicut hæc grana ab exsuperante quodam nutritio succo, ob dilaceratas quasdam fibras, crescunt: ita ille rore corrosivo & solis ardore adustus alienam plane indolem induit, non secus ac videmus, eadem ratione prognasci fungos, qui omnes & singuli non expertes sunt acrimoniæ, adeo, ut quædam causticam virulentiam habeant. Deinde ipsa symptomata, ut spasmi, contracturæ, convulsiones & immanes dolores, vellicationem nervosarum partium valde penetrantem indicant, quæ à salino principio commodissime derivanda est. Quibus accedit, quod hæc grana ab animantibus, ut gallinis, asinibus, suis devorata, graves, imo lethales inducunt contracturas, & muscæ quoque à lacte cum illis delectæ, non secus ac à fungis venenatis interierunt. vid. *Buddæus l.c. pag. 13.* Volatilem vero, ut omne venenum, naturam hoc corruptum habere frumentum, id indicio esse potest, quod grana illa diu in aëre detenta & exsiccata

innoxia observata sint, in pane vero adhuc calente comesta noxam intulerint. Denique mihi relatum fuit, adversus hunc morbum haud ulla in re præsentius fuisse auxilium repertum, quam in vomitu, in aceto, quod vim figendi habet, & in pinguibus copiose adsumtis, exterius quoque adplicatis.

§. XVIII.

Ad præservationem hujus sævissimi endemii mali, non possumus, quin sapiens *Galenus* monitum commendemus, quod reperitur *Libr. I. de aliment. facultat. Cap. XXXVII.* ubi prodidit, quod semina alienigena, & præsertim lolium & durum rotundumque aracum, quæ non esculenta sunt, item nigrum triticum, ex tritici mutatione generatum, quod lolio adhuc pejus est, deprehendantur, quæ comesta & capitis dolorem & ulcera prava in cute inducant. Hinc suadet, ut omnes pistores, & qui populo publice inserviunt, frumentum probe cribris expurgent, & prava semina seligant. Ex quo insigni loco rectius colligitur, etiam veteribus non plane hunc morbum cum origine ipsius fuisse incognitum.

§. XIX.

Ex venenis, inter esculenta, quæ reperiuntur, non infimum locum tenent fungi, qui identidem ob copiosas pluvias & ex mucoso & pituitoso superfluo lignorum succo solis calore progerminant, quorum fere omnes alienam & naturæ adversam facultatem habent, quæ in quibusdam plane deleteria est.

Scholion.

Ingens est fungorum copia & numerosæ species, & forma & colorum diversitate & qualitate inter se distinctæ, de quo Botanici maxime *Clusius*, *Baubin* in *universali plantarum Historia*, & *Størenbeccius*, qui ex professo de ipsis scripsit, consuli possunt. Qui coloris nigri miniati sunt & punctulis diversisque coloribus notati, hi omnes pro malignis habentur.

§. XX.

Symptomata gravissima, imo lethalia, quæ à deleteriis fungis excitantur, sunt maxime vomitus, præcordiorum oppressio, ventris tormina, cardialgia, diarrhœa, animi deliquium, frigidus sudor, dysenteria, singultus, tremor partium.

Scholion.

Scribonius Largus Cap. 66. pag. 107. hæc de eorum usu narrat: *pariunt nauseam, nequicquam magnopere rejiciunt. Præterea stomachi ventrisque & præcordiorum acutos efficiunt dolores, manante sudore frigido per artus. Forestus de venenis Obs. II. pag. 36.* solo interdum odore eos comitialis similisque cerebri morbi, imo subitæ mortis causam extitisse scribit, & mulierem ex esu fungorum in morbum gravissimum incidisse, & ab eo insanam permanisse refert. Plura exempla eorum, qui ex esu fungorum perierunt, vid. apud *Joh. Schenckium in Obs. Medic. Lib. VII. item Stalpartium van der Wiel Cent. I. Obs. 40. Hildanus Cent. IV. Obs.* memorat, symptomata pessima cuidam, qui manibus tantum fungos versabat, accidisse. Et *Plinius in Hist. Nat. Lib. XXII. Cap. XIII.* quasdam familias inde periisse commemorat.

§. XXI.

Utut quædam fungorum species inter edulia concedi possint: tamen non plane expertes sunt malignæ cujusdam acrimoniæ, præsertim, si non bene elixentur vel præparentur.

Scholion.

Meretur sane hanc in rem egregius locus ex *Galeno Lib. II. de medicamentorum facultatibus Cap. 69.* adduci: *equidem novi, ait, quendam, cui post holetorum non satis elixorum, qui innocentissimi esse putantur, usum largiorem os ventriculi pressum ac gravatum coarctatumque*

fuit, difficilemque habuit respirationem & in animi deliquium incidit & ægre servatus demum est oxymelite cum hyssopo incocto. Cl. Sennertus in Institut. Lib. IV. P. I. Cap. III. dicit, nullam esse ætatem, nullam corporis constitutionem, in qua non plus plerumque incommodi, quam commodi ex usu tuberum & fungorum proveniat.

§. XXII.

Symptomata, quæ celeriter in ventriculi & intestinorum tunicis & cæteris corporis membranaceis ac nervosis partibus fungi concitant, ab acrimonia subtili caustica provenire, vel id argumento esse potest, quod exsiccati & bene cum aqua calida eloti non ita noceant, & secundum Galenum acetum, & secundum Celsum Lib. V. Cap. XXVII. oleum, si cum hoc inferbeant, eos plane omni noxa vacuos faciant.

Scholion.

Patet jam ratio, quare rei culinariæ periti cum butyro, oleo, aceto tubera & fungos bene fricare, vel etiam cum cremore lactis præparare soleant, ut usui apti fiant, sine qua præparatione nunquam utile erit, hos intus adsumere. Si quis vero forsan venenatos quosdam comederit, ego nullum præsentius possem suadere auxilii genus, quam ut emeticum cum copioso lacte & oleo bibat, quod & temperandæ acrimoniæ & expellendæ ex ventriculi regione venenatæ materiæ erit accommodatissimum.

§. XXIII.

Corruptis alimentis & quæ virulenti adeoque valde noxii quidpiam ad destruendos vitales corporis nostri motus aptum continent, annumerandæ sunt animalium ægotantium & ex morbo mortuorum carnes, quæ putredinem ipsis inhærescentem in corporis nostri suc-
cos propagant, & morbida corpora reddunt.

Scholion.

Sicut quivis peculiaris rei effectus primo per experientiam adstruendus, postea per rationem stabiliendus est: Ita oportet primum circumspicere, num carnes animalium ægotantium noxam quandam corpori humano esu adfricent. Communis est hæc opinio, neque prorsus nihili facienda. Observatio legitur in M. N. C. Dec. A. VI. Obs. 91. quod quis morbidam & ad col-
lum tumefactam suam mac-taverit, à cujus carne indurata & salita comesta maritus cum uxore & filiolo, præcedentibus capitis doloribus, vertigine, faciei intumescencia & crebra lipothymia, mortuus est, adeo ut statim in omnes, quotquot morbida hac carne in victu usi erant, hoc malum grassatum fuerit. Athanasius Kircherus in Scrutinio de peste pag. 97. refert, anno 1617. diuturnis pluviarum diluviis camporum pascua cæno oblita nonnisi virides comas protulisse, quas armenta boum carpentia, repentina putrilagine in faucibus concepta, suffocata interierunt, & horum boum carnes, qui comederunt, eos par calamitas adorta est. vid. quoque Ammanni Irenicum p. 177. ubi refertur funesta strages duodecim studiosorum, qui anno 1677. in convictorio Lipsiensi culpa œconomi propter pessimum victum interierunt, siquidem ille carnes ex vaccis maris & intus copiosa apostemata habentibus comedendas dedit.

§. XXIV.

Quum omnis putredo, præsertim quæ fit à morbo, sit multiplicativa & humores animantium ad putredinem valde proclives facile afficiat, mirum non est, hominibus multum noxæ & periculi à comestis carnibus animantium morbidorum impendere.

Scholion.

Et homines & animantia, quæ ex morbo quodam, multo magis contagioso, intereunt, ob intus latentem putridam corruptionem vitam amittunt, conf. Patholog. generalis Part. I. Cap. I. §. 14. 15. 16. Hæc vero pu-

trede multum differt ab ea, quæ ex intemperie aëris calida & humida in sanum mac-tatum animal incidit. Nam illa perniciosior est, quia contagio lædit; hæc vero minus noxia, utut secundum nostram sententiam ab omnibus foetore infectis carnibus aliisque putridis alimentis tantum non penitus abstinendum sit, quia res foetidæ nunquam utiles, sed fluidorum in animantibus mixtioni admodum adversæ sunt. Nam ex usu putridarum carni-
um, qui in Indiam Orientalem navigant, facile incidunt in dysenteriam, quibus alium comestum præsentaneum est remedium. vid. Otton. Heurnii notæ in Ferneli Patholog. Lib. VI. Cap. X.

§. XXV.

Non tantum morbidæ carnes animantium, sed etiam pisces morbo laborantes vel mortui perniciem corpori creant.

Scholion.

Ad marinorum genus referri etiam debent mytuli, qui macilenti & morbidum adsumti graves subinde noxas creasse observati sunt. Multoties & in me ipso animadverti, à mytulis ingrati saporis & nullius frugis in cœna sumtis, noctu maximas anxietates, inquietudines, vigilias secutas; altero die totum corpus maculis & tuberculis ardentibus, ac si urticis cæsum fuisset, obfessum fuit: & meretur hoc loco attendi historia ab Ammanno in Irenico tradita, ubi vir primarius ex mytulis cœna adsumtis paulo post male habuit ejusque etiam uxor & ancilla, quibus omnibus vomitus obtigit, vir vero tota nocte parum quievit, postea semper pejus se habuit ac frequenter vomuit & brevi post mortuus est. Plurima viscera putredine corrupta visa sunt, ventriculus valde corrosus, ex parte foraminibus pisorum & lenticularum magnitudinem superantibus, ex parte vesiculis refertus erat. Plures suspicati sunt, venenum fuisse adsumtum, & judicia à pluribus Collegiis Medicis de hoc casu requisita fuerunt, quorum tamen potioribus suspicio veneni corrosivi remota fuit.

§. XXVI.

Ad esculenta veneno infecta merito referendam esse existimo brassicam crispam, Braun-Kohl, si rore vermiculoso, Mehl-Thau, infecta fuit, quam si homines comedunt, facile incidunt in dysenteriam morbosque malignos.

Scholion.

Rerum œconomicarum peritos non fugit, quam pestilens & frugibus, dum adolescunt, & animantibus, quæ iis frugibus utuntur, sit materia, quæ sub foliis inhærescere solet, ex cumulo vermiculorum minutissimorum conflata; vulgus exprimit Mehlthau, & existimat cum pluviis defluere ejusmodi rorem farinaceum, qui transformetur in vermiculos. Enim vero nobis rectius & paulo accuratius hæc considerantibus res videtur plane alia & à vulgi opinione aliena. Veri enim simile est, cum vermiculi illi sub foliis degentes magnitudine & figura caseorum vermiculos æquent, qui acari & Germ. Mülben oder Mühlen, dicuntur; originalem & veram vocem Mülenthau abusu in Mehlthau transmutatam fuisse, cum tamen cum farina nihil quicquam commune habeat. Deinde falsa quoque est vulgi persuasio, à rore si vehumore cœlitus delapso tantam congeriem vermiculorum deducendam esse. Quod si ita esset non sub foliis, sed super folia vermiculosa ista materia subsideret, nec certa saltim invaderet loca & fruges ibi confitas, sed latius sese diffunderet, & foliis etiam arborum inhæreret, quod tamen non accidit. Sed potius res ita se habet: observamus, maxime hoc vermiculosum venenum generari in locis humidis & foetidioribus post pluvias tenuiores cum solis aestu decedentes, vel si solis intensissimus fervor, qualis est circa solstitium, ejusmodi subtiliores pluvias mox excipiat. Ex pluvia itaque illa humectante terram valde sulphuream, pinguem beneficio solis subito putredinem

linem nasci in terra animatam existimo, adeo ut effluvia illa ex terra hac sub frugibus contenta organica sint, id est, animata, quæ sub foliis plantarum dum subsistunt, mox ex succo horum foliorum nutrimentum capiunt, & cito adolescunt, ut virides fiant & visui pateant. Experientia enim compertum est, aquam pluviosam, tenuem, vasi conclusam folique expositam mox in vermes animari. Uti vero omnia insecta sal quoddam causticum habent, quo tenues fibras & tubulos frugum destruendo impediunt, quo minus veniant ad maturitatem: ita si brassicam crispam inficit, quæ populus frequentissime utitur, neque hæ fordes venenosæ prius aqua abluuntur, sed potius cum aqua incoquantur: accidit sæpiissime, ut dysenteria, vel venenis aut effectibus venenorum similia symptomata producantur. Ejusmodi verminoso veneno si herbas infectas oves vel alia animantia edunt, inter hæc strages ingentes sæpius fiunt, & vermiculi etiam, maxime in ovibus & in earum hepate, copiose generantur & repiuntur.

§. XXVII.

Ex potulentis, quæ veneni naturam induunt, sunt aquæ maxime stagnantes, putridæ, verminosæ, quæ & animantibus & hominibus insensibilissimæ sunt, & ad morbos maxime castrenses morbumque Hungaricum ingenerandum multum faciunt.

Scholion.

Quantum damni perpeffa fuerit Laida ex cerevisia Wesopiana, quæ ex aqua stagnante putrida & verminosa cocta fuit, nondum oblivioni datum, inquit Ammannus loc. & cit. addit: Anno 1671. hic locorum grassabatur morbus malignus inter famulos pistorum, unde vocabatur etiam die Becker Kranckheit, quo ultra quindecim brevi moriebantur, oriebatur autem à pravo potu: nam in dolium cerevisiæ per orificium superius (das Spuntloch) glires irrepsent, dubio procul à putredine illius ortum fuit malum.

C A P U T X.

De frigido potu, vitæ & sanitati hominum inimicissimo.

§. I.

EX iis rebus, quæ præsentissimam humano corpori noxam inferunt, & quasi instar veneni illud celeriter afficiunt, quamvis in se omnis virulentia sint expertes, eminet frigidus potus, incalescenti corpori copiosius immixtus.

Scholion.

Nos equidem hic non ex toto rejicimus omnem aquæ frigida portionem, quin potius cum Galeno inter remedia continentium febrium & ad bilis flavæ impetum coercendum eam reponimus: sed damnamus saltim copiosum & frigidissimum haustum in corpore æstuantem & ab exercitatione calefacto.

§. II.

Experientia certa constat, plures à frigido potu hausto mox interiisse, vel in extremum animi incidisse deliquium.

Scholion.

Plures de funesto frigida potione effectus historias collectas vide in Marcello Donato de medicis historiis mirabilibus Lib. IV. c. 6. item in Casp. Calderæ de Heredia Tractat. de potionum varietate, nec non in Amato Lusitano. item Benivenio de abditis ac mirandis morbo-

rum causis, & Hildano Cent. III. Obs. 48. Animi vero deliquium ex frigida aquæ haustu cum acerbissimo ventriculi dolore juvenis expertus est, cujus mentionem facit Hildanus Centur. V. Obs. 29. Similemque historiam affert Schenckius Lib. II. Observat. p. 277. Quidam sub ardentissimo sole pilæ lusu incalescens & sudans, cum calicem frigidissimi vini biberet, animo mox defecit, ut semimortuus ad cubile delatus fuerit.

§. III.

Frigida potio vitam tollit, quia copiosius calefactum in corpus ingesta sanguinis progressivum per vasa motum repente sistit.

Scholion.

Repetenda hoc loco erit veritas in physiologicis jam satis abundeque demonstrata, vitam hominis perenni sanguinis & fluidorum circuitu conservari, adeo, ut, si is vel in totum, vel ad certum tantummodo tempus sistatur, omnis cogitatio, omnis calor, motus, sensus, omnes denique vires repente auferantur. Cum vero nihil in rerum natura tam potenter & celeriter humores, in fluiditate & motu constitutos, coagulet, inspisset & immobiles reddat, quam frigidum liquidum in corpus admissum; non mirum est, à copioso frigida potu, celeriter venis, æstuantem sanguine spumantibus, concepto mox vitalem istum circulum sisti, cordisque systolen & diastolen si non in totum, tamen ad tempus tolli, quia vitales hæ motiones à perpetuo influxu & effluxu sanguinis in corde dependent.

§. IV.

Frigidus potus maxime adversus est ventriculi & intestinorum nerveo-musculosæ & membranaceæ texturæ, atque ideo gravissimas in iis passiones ob spasmos ingignit.

Scholion.

Sicut enim omne frigus partibus nervosis, secundum Hippocratem sect. V. aph. 17. & 18. & Celsum lib. I. cap. 10. inimicum est: ita maxime ventriculus & intestina, inter nervosas præcipuæ partes, perniciosam à frigido potu proxime & primario vim experiuntur, dum non modo à frigore sanguinis & lymphæ nervorum per has partes liber transitus impeditur, sed & tonus & motus earum peristalticus ob rigiditatem, quam fibris infert, labefactatur, unde inflammatio, cardialgia, colica, iliaca passio, proveniunt. Ita Aëtius TETRI. III. ferm. lib. cit. 28. à potu frigidus si quando à sudante ingurgitetur, iliacam passionem ortam notavit. Borellus cent. II. obs. 2. memorat, puellas delitii gratia deglutientes glaciem torminibus, imo dysenteria perisse. In febris biliosa cum juvenis potaret frigidam, cardialgia oborta est, teste Rhodio Cent. II. Obs. 71. In puella annorum 5. post emulsionem gelidissimam iliacam passionem productam vide in Miscell. Cur. an. 7. Obs. 73. Et nihil certe frequentius in praxi occurrit, quam quod à frigida potione mox homines in singultum, alii in colicam, cum alvi adstrictione, incidant. Quæ omnes graves passiones testantur, naturalem harum partium tonum ingentem quandam vim passum fuisse. Ego plures novi sanos antea & valentes, juvenes æque ac femellas, qui à solo frigida potu, postquam ab exercitatione præcedente valde incaluerant, hausto, molestissimum illud, quod hypochondriacum dicitur, malum sibi contraxerunt, à quo nulla arte poterant liberari. Siquidem hoc malum præcipuam suam causam atque originem in destructo ventriculi & intestinorum tono ac motu naturali positam habet.

§. V.

Neque tantum ventriculus & intestina, sed & alia, præsertim sanguinea viscera noxam à frigido haustu percipiunt.

Scholion.

Scholion.

Quia frigidum fluido & calefacto sanguini immis-
tum illum densat atque in spissitudinem cogit : facile
patet, in visceribus, quæ tantum non penitus vasculosa
sunt, ut lien, hepar, pulmo, à sanguine tardius progre-
diente, stagnationes, infarctus & oppilationes fieri, unde
graves & diuturnæ passiones incunabula sua trahunt.
Nihil sane in praxi frequentius occurrit, quam quod à
tempore messis ægrotent homines, dum phthisi, tabe vel
hydrope laborant. Causam & originem horum malo-
rum, si paullo exactius inquiremus, unice eam rejice-
re solent in copiosum frigidæ haustum, quam se tunc
temporis siti vehementi pressos affatim accepisse dicunt.
Qui morbi plerumque & foveantur & vires accipiunt à
polyposis concretionibus, hinc inde in vasis viscerum
majoribus post sectionem repertis. Et profecto poly-
porum generationes, qui magnos & fere insanabiles
chronicos morbos efficiunt, meo quidem iudicio, vix
ab alia causa rectius, quam à frigido potu, celerius in
corpus sudans ac calefactum admissio, deduci possunt.
Dissecui aliquot abhinc annis generosum juvenem, pal-
pitatione cordis multos annos afflictum, tandem pe-
ripneumonia extinctum, ex cujus arteria pulmonali
ingentis magnitudinis polypus extrahebatur. Hic pal-
pitationis tam contumacis causam non aliam, quam po-
tum cerevisiæ frigidum, post vehementem saltationem
haustum, allegare poterat. Neque destituunt nos au-
thoritates veterum. *Celsus lib. I. c. III. p. 28. perite;
Illud nosse oportet, quod ex labore sudanti frigida potio
sit perniciosissima, atque etiam, cum sudor se remisit,
itinere fatigatis inutilis est. Et Galenus lib. de sanit. tuen-
da: frigidus potus spirandi difficultatem & tussim indu-
cit, invalidat cerebrum, ac fluxiones inde concitat, ven-
triculum imbecillum reddit, & nervos lædit languidos.
Et Hippocrates sect. V. aph. 23. Frigida, velut nix &
glacies, pectori inimica, tusses movent, ac sanguinis flu-
xiones & destillationes efficiunt.*

§. VI.

Neque vero tantum frigidus haustus corporibus sa-
nis, à causa externa, motu & exercitatione calefactis,
nocet, sed & febrili æstu correptis exitium infert, gra-
via concitando symptomata.

Scholion.

Ita referente *Foresto lib. I. Obs. 13. potus aquæ frigi-
dæ copiosus in quodam comite, febre continua labo-
rante, graves pectoris convulsiones induxit. Et notatu
quoque digna historia est, quam Hildanus Cent. III.
Obs. 48. proponit, cum quidam febre ardente laborans,
aquaalem frigida impletum sibi à domesticis afferendum
mandasset, ac haustum maximum & quantum anhe-
litus ferre potuit, bibisset, qui eadem die extinctus est.
In intermittentibus etiam cautissime frigidus haustus
admitti debet. Plures propter nimiam humidi frigidi
ingurgitationem in cachexiam, anasarcam & tumores
pedum œdematosos morbo finito incidunt. Præclarum
circa hanc rem extat monitum in *Ludovico Mercato
lib. I. de recto præsidior. usu. p. 55. Aqua frigida in pa-
roxysmo intermittentium oppilat splenem, eumque in ma-
gnitudinem attollit, sudorem promovet & symptomata
plus auget, quam mitigat: nam lienem, jecur & cetera
viscera, ubi phlegmate obsidentur, attollit; & Lib. cit.
p. 50. hæc habet: Arabes in frigido potu nimis sunt li-
centiosi, Græci religiose frigidum potum cavent, plura
damna inde verentur, præsertim si quis laborat visceris
alicujus obstructione, si humor putridus insit, adhuc cru-
dus, si tumor aut dolor in viscere præcipuo, aut imbe-
cillitas quædam ventriculi, jecoris, lienis. Et certe facile
exinde tumor œdematosus vel anasarca gigni potest. In
hujus asserti confirmationem meretur adduci observa-
tio notata in *M. N. C. Dec. I. A. VI. Obs. 52. Juvenis***

*tertiana laborans messis tempore aquam frigidam copiose
bibit, hinc hepate refrigerato incidit in hydropem.*

§. VII.

Frigidus potus excretiones sanitati admodum saluta-
res sistit, & non tantum solennes sanguinis vacuatio-
nes in viris & feminis, sed & liberam per cutim spira-
tionem impedit alvumque constringit.

Scholion.

Non una est causa, quare frigida potio saluberrimas
corporis nostri excretiones sistat; nam primo, dum flu-
xilitatem humoribus secernendis adimit, fit, ut ad venas
capillares, ex quibus maxime excretoria constant, secer-
nenda materia perungere nequeat. Deinde frigoris ea
est natura, ut partes solidas constringat easque rigidas
efficiat. Quia vero totius corporis membranæ, præser-
tim nerveæ, mutuam inter se habent commercium, ita,
ut si una pars vehementius contrahatur, ceteræ omnes
de statu pristino pariter declinent, & simili plane mo-
do afficiantur, ut de corporibus elasticis id perpetuum
est; hinc frigida potio in ventriculum admissa mox to-
tum afficit corpus, cutis contrahitur, ejusque meatus
strictiores reddit, perspirationem difficiliorem efficiunt,
alvus quoque dura, tensa & constricta fit, & vasa ute-
rina, quæ sanguinem plorant menstruum, arctiora eva-
dunt; quare non mirum est, aquæ frigidæ potu femel-
lis nihil esse nocentius & sistendo mensium profluvio
aptius. Eandem ob causam frigida potio eo tempore,
quo in morbis materia peccans ad habitum corporis
amandari & per cutis secerniculum expelli debet, alie-
nissima est. Ita legimus in *Miscell. Curios. Dec. II. A.
IX. Obs. 19. frigidum potum in petechiis jam expulsis
lethalem effectum habuisse. Idem metuendum est, si
quis in exanthematicis febribus, eo tempore imprimis,
quo variolæ, morbilli, vel purpura ad cutem propelli
debent, frigidum potum concedere velit. Ego aliquot
funestos effectus in febribus jam inclinatis & fere fini-
tis vidi. Laborabat ante aliquot annos Berolini vir il-
lustris, jam senex, ex peripneumonia, & post decimum
quartum diem fere omnia remiserant symptomata, nisi
quod ob copiosos sudores siti premeretur. Concessit
medicus tunc ibi notissimus potum acidularum Tenn-
steinensium liberaliorem, pro lubitu sumendum. Ille
intra trium horarum spatium duo vasa, quæ duas fere
mensuras continebant, exhausit; brevi post ingens uni-
versum corpus languor tenebat cum summa virium de-
jectione, & intra quatuor horas interiit. Vidi quoque,
feminam, quæ ex morbillis decumbebat & iis jam eva-
nescentibus haustum valde frigidum adsumserat, non
modo in tussim & asthma, sed & contracturam pe-
dum plures per annos durantem incidisse. Siquidem
post febris impetum, hisce in morbis sedatum, natura
jam tota occupata est in excernendis per transpirationem
copiosis istis fordibus, quæ ipso in morbo genitæ fue-
runt: quarum violenta retentio novis & gravioribus
subinde malis producendis occasionem subministrat.
Vidi quoque aliquoties ob frigidum potum, corpori
exercitatione valde calefacto copiosius immis-
sum, maculas & pustulas, imo tubercula in universa cute, præ-
sertim in facie, oborta, non aliam certe ob causam,
quam ob perspirationem repente interceptam.*

§. VIII.

Est vero potio frigida pestifera, ubi ventriculo im-
minet quædam inflammatio. Quare, qui pharmacum
validius vel emeticum quoddam adsumserunt, aut ve-
hementer ira commoti fuerunt, ab haustu frigidus velut
à veneno sibi caveant.

Scholion.

Res enim extra controversiam posita est, & ab ira
& à fortioribus pharmacis ejusmodi ventriculum eique
annexa

annexa intestina spastica quadam strictura corripitur, quæ utique à frigido dum augetur, inflammatoria sanguinis stasis quam facile induci potest. Plures hac ratione mortuos, vel in miserimum infirmæ valetudinis statum coniectos fuisse notavimus.

§. IX.

Nulli vero ætati ut omne frigus, ita maxime frigida potio tam infensa est, quam senili.

Scholion.

Senes jam per se ex omnium medicorum consensione calidi, ut loquuntur, nativi defectu laborant, & valde languidum ad concoctionem habent ventriculum, idque eam ob causam, quia arctioribus meatibus redditus sanguis & fluidum nerveum; uti in omnes partes, ita maxime in ventriculum & intestina parviori copia influunt. Quare multo facilius cursus sanguinis à frigido in his partibus sisti potest, adeo ut sphacelus mox eas partes corripiat. Quin etiam à sola refrigeratione harum partium propter fructus horæos refrigerantes, æstivo tempore magna in copia ingestos, aliquot decrepitæ ætatis viros mortuos animadverti. Quidam in stranguriam inde incidunt molestissimam, quæ ægerime sanationem recipit. Alii dolorem colicum, rursus alii affectus soporosos inde sibi contraxerunt. Atque hoc saluberrimum præceptum circa noxam potionis frigidæ non modo senes, sed & alii infirmioris naturæ homines & valetudinarii, & qui ex præcedente morbo, vel immodicis evacuationibus vires & vigorem amiserunt, omni cura observare debent: siquidem nihil tam subitam in perturbanda motuum vitalium œconomia mutationem, præter excessivum frigus, sive cum potu, sive extrinsecus corpori admissum, inferre potest, sique medici morborum tam chronicorum, quam acutorum primordia paulo curatius investigare vellent, certissime futurum esset, ut nihil magis, quam frigidum potum sanitatem offendere deprehenderent.

CAPUT XI.

De rebus non venenatis, sed instar veneni in corpus humanum agentibus.

§. I.

Plures dantur in natura res, omnis quidem venenosæ qualitatis expertes, tam inimicæ vero ratione effectus humanæ naturæ, ut veneni vim tantum non æmulentur.

Scholion.

Hujus generis effectus sunt crudeles illi dolores, qui à rebus plane ludicris, intra vel etiam extra corpus admissis, ut vermibus, calculis, dentibus, aciculis, ictu vesparum, punctura partium nervosarum proveniunt.

§. II.

Uti venenorum actio est pure mechanica, dum caustica spiculis acutissimis in nerveas partes grassantur, easque arrodendo & lancinando in universo nervorum genere pro differentia partium atrocissima pa-
hemata inferunt: ita etiam ab arrosione nervearum partium à supra dictis asperis & scindentibus rebus symptomata venenis similia induci, experientia docemur.

Scholion.

Operatio certe venenorum non rectius & clarius, quod sit pure mechanica, explicari potest, quam per hujusmodi res sensui manifestas, quæ cuspidibus & spiculis fibrillas nerveas pungendo, discindendo eadem, quæ à venenis proficiuntur, symptomata concitare

solent. Quo magis apparet, quam crassus eorum sit error, qui ad plane occultas qualitates & rationes agendi, v.g. terrores archæi, ob damnum à veneno præsens, horum operationes referri debere contendunt.

§. III.

Vermes, in ventriculo vel etiam intestinis stabulantes, tunicarum nervearum rosione & vellicatione sæpe totum nervosarum partium systema graviter convellunt, & vehementes spasmos atque convulsiones inducunt.

Scholion.

Qui historias morborum, à verminosa progenie natum, paulo accuratius perlegere cupit, quæ hinc inde à probatissimis auctoribus memoriæ prodita sunt, is veritatem hujus thesæos facile animadvertet. Ex compluribus vero meretur ea attendi, quæ conscripta est à *Cl. Pechlino*, vid. *Lib. I. Obs. 65.* ubi puer septem annorum magna urinæ incontinentia divexari coepit, & sæpius velut fulmine ictus violentas corporis palpitaciones, seu mavis conglobationes, intensissima thoracis elevatione & animæ defectione comitatas, expertus est, cum ingenti simul fame juncta, quæ omnia dejectis vermibus binis longis & teretibus conquieverunt. Alius puer, vermibus vexatus, de lumborum, ventris & penis dolore conquerebatur, ut suspicio calculi excitata fuerit; tandem oborta epilepsia est, quæ cum colicis doloribus cessavit, vermibus alvo emissis. Legi quoque potest in *Miscell. N. C. Obs. 187. Dec. I. A. VI.* ubi à vermibus filia octo annorum ita fuit vexata, ut caput, brachia & crura in continuo essent motu & caput à dextro in sinistrum & contra brachia & crura sursum deorsum agitantur. *Gregorius Horstius in Epistolis Medicinal. Sect. VII.* tradit, filiam 14. annorum à vermibus non tantum ingentem colli constrictionem, quasi laqueo injecto fauces præcludente, cum imminente suffocationis periculo, sed utriusque insuper tum brachii, tum cruris motum convulsivum fuisse perpessam. Perquam notatu digna etiam est observatio *Cl. Thomasi in Miscell. Curios. Dec. III. A. III.* de juvencula, horrendis epilepticis insultibus correpta, cum apparitione simul spectrorum, quæ omnia statim cessarunt, verminosa progenie superne & inferne rejecta.

§. IV.

Graviora sunt symptomata, si ventriculi tunicas vermes arrodunt, quia hujus ingens est consensus cum universo nervoso genere, & sæpius exinde mors subsequitur.

Scholion.

Trallianus Lib. VII. Cap. IX. ait, frequenter vermes sursum ad os ventriculi ascendere & cardiacos affectus ac immodicas animi defectiones excitare, ut nonnulli statim intendant, unde mors infantum inopinata ab eroso fit ventriculo. Equos à vermibus in ventriculo subito in horribiles artuum jactationes conjici & brevi interire, res vulgo etiam est comperta. Nam sicut causticæ indolis venenum sola rosione tunicarum ventriculi mox lethales infert spasmos; simili ratione id posse fieri à vermibus, vero est congruum.

§. V.

Vermes in omnibus nervosis partibus suas ludunt tragoedias & gravissima concitant symptomata, non secus ac venena id efficiunt.

Scholion.

In ventriculo vomitum, nausæam, famem, cardiacam cum summa virium defectione, in intestinis tormina, flatulentias, lenteriam, alvi fluxum, in corde syncopen & febres tam acutas, quam lentas & quotidianis similes; in capite præter convulsiones delirium, aphoniam, cephalalgiam, somnolentiam, omnium sensuum

suam privationem, ut instar apoplecticorum velut morti vicini jaceant; in faucibus strangulationem & salivæ fluxum, in ductibus urinariis urinæ incontinentiam, in facie colorem lividum, in naribus pruritus, in habitu corporis extremorum frigus & frequentem mutationem frigoris in calorem & contra; in aspera arteria tussim excitant. Neque vero continuo hæc producant pathemata, quæ potius interdum conquiescunt, quandoque certis periodis repetunt, uti fere omnium, quæ à spasmis oriuntur, afflictionum mos est, quia immanes partium à spasmis tractiones & motiones pressio pede earundem summa sequitur imbecillitas, seu motuum debilitas.

§. VI.

Quum spasticis stricturis vim & robur nervosarum partium laceßere soleant vermes, idque per paroxysmos: prudenter ii agunt medici, qui ab acrioribus & expulivis, ne spasmos augeant, abstinent, utpote quæ magis silentibus accessionibus usui esse possunt.

Scholion.

Error hic medicorum vulgaris propemodum notandus est, quod sine distinctione temporum & individuorum plerumque statim, ad expellendos ingratos hospites, acria purgantia, vel etiam calidiora alia propinant, cum sæpissime inde symptomatum fiat exasperatio, tantum abest, ut auspicatus effectus inde sequatur. Fabula quoque est, quod circa novilunium anthelmintica tantum porrigi debeant; sed potius delinquentia & antispasmodica in impetu symptomatum dare convenit. Postea iis quiescentibus mercurium dulcem cum purgante stimulo, quod remedium omnium aliorum vires exsuperat, dare expedit. Semper tamen præstat prius intestina probe emollire lacte, vel cum lacte etiam acriora dare, hinc vulgus etiam non mediocri cum effectu allium ex lacte cocto exhibere solet.

§. VII.

Immanes etiam sunt illi dolores, qui ex asperioribus vel grandioribus calculis, in viis urinariis hærentibus, excitantur, qui si graviores sunt, facile etiam universum nervosarum partium systema in consensionem rapiunt.

Scholion.

Solet ordinario calculus, ureteri inhærens, vicinas primum partes, ut ventriculum & intestina ipsamque vesicam cum ductibus urinosis, & nervos ejusdem lateris cruales spasmo afficere, unde individui calculi comites nausea, cibi fastidium, vomitus vel conatus ad eum, frequens ructatio, intestina torquens dolor, alvus adstrictior, urinæ stillicidium, ægra spinæ flexio, ac torpor cruris esse solent. A dolore vero acerbiori ex toto fit urinæ suppressio, pulsus febrilis, convulsio, summa anxietas, jactatio corporis, epilepsia & convulsio sequitur, quæ viris plus, quam feminis funesta esse solet, interdum etiam lethalis ventriculi accedit inflammatio.

§. VIII.

Neque tantum calculus in ureteribus, sed etiam in ductibus nervoso-musculosis, qui bilem ad duodenum devehunt, inhærens acutissimos efficit dolores, vicinas pariter & remotas partes in spasticos motus abripiens.

Scholion.

Si calculus, ex cystide fellea protrusus, biliariis ductibus impactus est, crudeles in dextro hypochondrio oboriuntur dolores, cum summa anxietate juncti, intercipitur sæpe usque ad suffocationem spiritus, noctes sunt insomnes, jactatur corpus, alvus est dura & contracta, pulsus est contractus, extremæ partes inalgescunt & conatus est ad vomendum. Si diutius ibi moram trahit, sequitur tabes vel etiam hydrops, quæ cuncta symptomata facile necem inferunt. Protinus autem

cessant, calculo ex ureteribus in vesicam, vel ex ductu cholodochi in duodenum delapso. De calculo vesiculæ fellis vid. Hist. in *Miscell. Curios. D. I. A. VI. VII.*

§. IX.

Quum gravia illa sæpiusque funesta à calculis orta symptomata nonnisi spasticæ stricturæ partium nervosarum inprimis imputanda sint: facile patet, quam imprudenter ii medici agant, qui in impetu morbi fortiora pellentia, calida, acria diuretica & stimulantia propinant.

Scholion.

Notandus utique hic est nocentissimus & vulgaris error, qui per diuretica fortiora committitur, quæ spasmos augendo non modo symptomata exasperant, sed & impediunt, quo minus è sede sua calculus moveatur. Sed potius clysteribus emollientibus, foribus, balneis, anodynis laxandæ sunt viæ, ita iis remittentibus lenissimum pellens hujus propulsionem accelerabit.

§. X.

Immanes etiam sunt spasmi & generis nervosi afflictiones, quæ funestum sæpius in modum infantes terrores exercent, dum dentes difficulter pariunt.

Scholion.

Plures ex infantibus à difficili dentitione gravia symptomata pati, imo mori, notissimum est, præsertim, si sint habitiores, & debile ex matre, si hæc est hysterica, nervosum genus obtinuerint. Simulac dentes, præsertim canini, movere & perrumpere gingivalem carnem incipiunt, protinus ingruunt pavores in somno, oriuntur febres, tormina in ventre cum alvi strictura, accedunt asthmata, convulsiones, catarrhi suffocativi, epilepsia lethales plerumque, quæ omnia à solo dolore proficisci certissimum est.

§. XI.

Neque vero tantum infantes, sed & adultiores ex dolore dentium gravia patiuntur mala.

Scholion.

Si vehementior dolor urget, statim mutatio fit in pulsu, qui ad celeritatem inclinat, temporum arteriæ ejusdem lateris valide moventur, suboriuntur anxietates, alvus fit strictior & tardior, urina tenuis mingitur, pedes refrigescunt, in quibusdam accedunt lipothymia; dolore cessante dolor & gravitas caput diutius detinet. Notabilis sane occurrit historia, descripta à *Tulpio Lib. I. Cap. 36.* cum seni medico genuini dentes erumpere cœperunt, quorum eruptionem incis gingivis cum scalpello accelerare voluit, sed inde omnia in pejus ruerunt, dum dolor non placatus, sed crudelior factus: præterea febris, vigilia & delirium adeo efferum fuit, ut dies noctesque præ furore discurrere per conclave debuerit, antequam miserrimo dolori finem mors imposuerit. *Novi*, inquit *Hildanus Cent. II. Obs. 12.* qui ex nimis dentium doloribus facti sunt epileptici, alii visum amiserunt, alii visum duplicatum acquisiverunt, de quo symptomate legi potest memorabilis historia *Cl. Raygeri in Miscell. Nat. Curios. Dec. I. A. VIII. Obs. 62.*

§. XII.

Quoniam acerbus dolor unica & vera causa tam gravium & subinde funestorum symptomatum est in corpore, ubi nihil vitii in universa sanguinis & humorum massa latet: nihil aliud utique agendum est medico, quam ut omnibus viribus annitatur, quo dolorum hæc sævitia mitescat, & effrenes illi in genere nervoso motus & fortes oscillationes & agitationes componantur; qua ratione mox omnium malorum alleviatio sequitur.

Scholion.

Scholion.

Qua propter graviter errant medici, qui in difficultationis alvi laxandæ causâ acribus ex gualappa ejus refina, cum vel sine mercurio dulci, non una, repetitis vicibus teneros infantes exercent, & copia medicamentorum, potissimum calidorum, miseros infantes fatigant, à qua perversa curandi ratione utique nihil aliud, quam major symptomatum vehementia ipsæque mors expectanda est. Simili ratione ad placandam dolorem dentium orta symptomata nihil præsentius est, quam alvum aperire clysteribus emollientibus, & triacris discussionem per blanda potius diaphoretica cum anodynis mixta & paregorica externa moliri, quam phlegmatizantibus & acrioribus calidis uti.

§. XIII.

Tam crudelis etiam est ille dolor, qui in meatu auditorio valde sensibili, sive ex inflammatione, sive ex humoralculo, in aurem descendente, suboritur, ut præterimmanissima symptomata furorem atque etiam mortem accersat.

Scholion.

Legi hac de re possunt *Miscell. Nat. Curios. Dec. II. Obs. 39. it. Dec. I. A. IV. Obs. 50.* Memorabile exemplum, quod à globulo, in aurem sinistram intruso, omnes nervi ejusdem lateris in consensum trahi possunt, adeo, ut convulsiones, epilepsiæ & summæ anxietates producantur, *Hildanus Cent. I. Obs. 4.* proposuit. Idem auctor *Cent. IV. Obs. 25.* id ulterius confirmat, cum ex instillato liquore in aurem ab empirico vehementissimum cum febre & delirio dolorem excitatum fuisse testatur.

§. XIV.

Quam pernicialia à punctura nervorum & tendinum mala non sine vitæ periculo proveniant, ob consensum, quem nervæ hæ partes inter se alunt, complures fuisse historiæ testantur.

Scholion.

Quemadmodum ex spina pedi infixâ dolor, febris, inflammatio oriatur, *Hildanus*, ceu testem, provoco. *vid. Cent. V. Obs. 2.* idem auctor *Cent. I. Obs. 34.* à deglutita acicula dolorem ardentem, febrem, delirium, convulsionem ortam fuisse tradit. *vid. quoque Miscell. Natur. Curios. Dec. I. A. III. Obs. 86.* Ex sola acus punctura in digito *Amatus Lusitanus Cent. I. Hist. 38.* dolorem & febrem notavit. *Chesneau in Observat. Lib. I. pag. 120.* historiam refert: quendam ex punctura tendinis in pollice septimo die mortuum esse; ex vespæ punctione gangrænam secutam, identidem *Hildanus Obs. 80. Cent. IV.* historiam proponit. Infelix est ea venarum sectio ubi nervus in manu circa basilicam, vel tendo sub cephalica lancetta læditur. Qua de re notabile refert exemplum de Rege Galliarum, Carolo IX. *Paræus in Operibus Lib. IX. Cap. 38. & Fonseca Lib. I. Consultat. 74.* item *Hildanus Cent. IV. Obs. 20.* ubi ex læso tendine per phlebotomum mox totum brachium cum maximo dolore intumuit. Convulsionem lethalem ex unguibus incaute resectis describit *Rhodus Cent. I. Obs. 40.* item *Meckern in Observat. chirurg.* à contusione mediæ digiti intolerabiles dolores cum tumore, inflammatione & vehementi febre ortam proponit. Et quid frequentius evenit, quam à clavo pedum improvide resecto multos ob gangrænam supervenientem pereire, præsertim, si corpora sunt senilia, impura & cachymica. Immanis dolor, qui ex ingenti partium nerveo-tendinosarum, ut sunt pedes, manus, facies, amputatione oritur, plures interficit. Superveniunt vomitus, inquietudo, animi deliquium, sopor, convulsio, inquietudo, in nonnullis insania. Et certe ardentissimus ille dolor, qui in variolis confluentibus ab exulceratione ma-

Frid. Hoffmanni Oper. Tom. I.

num die nono excitari solet, frequentissima est in hominibus, qui ætate florent, meo quidem iudicio, mortis causa.

§. XV.

Magna itaque est dolorum potentia corporis nostri vires & motus destruendi, ita prorsus, ut veneni effectus non ab similes exhibeant.

Scholion.

Dolor est tristis in mente sensatio, & oritur à violenta motione & oscillatione partium nervosarum, quam perpetuo spasmus sive contractio insequitur; quæ eo major est & latius per universum nervorum genus subinde diffunditur, atque naturalem motuum directionem in fluidis interturbat, quo violentior est ille in partes membranaceas insultus. Sicut vero gravior spasmus, qualis fit à venenis, ingentes & periculi plenas stases & stagnationes, vehementium symptomatum, imo mortis productrices, movet & vires plane exhaurit: simili ratione tanta sæpe est dolorum atrocitas ac magnitudo, ut spasmus inde suborti vitales motus, sanguinis scilicet circuitum inæqualem reddant aliterque dirigant atque determinent, ita ut in hac vel illa nobili parte subinde fistatur, & homo tantum non penitus intereat.

§. XVI.

Ea est dolorum indoles ac vis, primum, ut aucto in systemate partium nervosarum motu oscillatorio vires destruendo homines quasi exanimatos reddant; deinde, ut summas inquietudines atque anxietates cum frequentiori loci mutatione accersant; tum ut pulsus duriores & celeriores efficiendo calorem in universo corpore accendant, ac tandem, si invalescunt, convulsione ac delirio spiritum vitalem præcludant.

Scholion.

Horum molestissimorum symptomatum ratio non aliunde repeti posse videtur, quam à vehementer laceffitis nervis & partibus, quæ ex iis constructæ sunt, dum causa subinde plane inutilis & ludicra, nempe flatus, vermes, calculus, dentes, scissura, instrumenti cuspis & his similia, vehementer eas exagitat. Quisquis hæc videt, facile intelligit, omne consilium incedentis eo maxime omnium esse dirigendum, ut confessum dolorem auferat, & violentas illas generis nervosi afflictiones allevet, si vel vires, vel vitam hominis servare velit. Divinam utique ejusmodi in casibus opem ab iis, quæ dolorem efficaciter levant, & somnum inferunt, expectare licet; modo maturius, neque eo demum tempore, quo omnes vires jam penitus exhaustæ, & funestæ sanguinis stases sunt, exhibeantur. Nam incipientibus morbis semper vires sunt firmiores, quam ubi jam diutius perseverarunt.

§. XVII.

Ea est dolorum vis atque molestia, ut non modo totum corpus inde patiatur, sed imprimis, etiam alimentorum in stomacho digestio inde labascit, atque saluberrimæ illæ, quæ alvo atque perspiratione fiunt, evacuationes non parum imminuantur.


Scholion.

Nam si vehemens ex dolore spasmus in universum omnes nerveo-musculosas per consensum corripit partes easque valide constringit, certe perstringit is etiam ad intestina, unde vis motrix & peristaltica ventriculi & intestinorum læditur, cibi diutius ibi retinentur cum excrementis, & summa quoque cutis ob ingentem strictionem, quam patitur, parum perspirat. Ex quo intelligi debet, in omni graviore dolore cibi abstinentiam utilissimam esse, vel eum saltem imbecillum præbendum, & loco vini aquam bibendam. Ex hisce etiam recte

colligitur, evacuationes magno dolore cohibitas non acribus & stimulantibus, sed potius sedativis, & quæ dolorem levant, restituendas esse, quia cessante spastica strictura sponte sequuntur pristinae tam per sudorem, quam per alvum evacuationes. Recordor hac in re nefariam medici curam, qui, quando ex dentitione difficili tenelli infantes alvo strictiori laborare coeperunt, repetitis purgantibus, quæ ex mercurio dulci & resinæ jallappæ aliquot granis constabant, eam moliri, tristi sæpiissime exitu, in splendidis etiam personis tentabat: epileptici enim mox sequebantur insultus prorsus funesti. Sed longiores fuimus in recensendis illis gravibus vitiis, quæ causæ externæ potissimum & violentæ inferunt: sequitur nunc, ut morborum origines ex iis rebus, quæ ad vitam & valetudinem intemeratam servandam pertinent, & nobis quotidianæ & domesticæ sunt, persequamur. Id enim non dubium est, quin tum vita, vires & sanitas, tum morbi & mortes ex iis rebus, quæ in corpora humana ingeruntur, cujus generis sunt aër, cibus & potus, & quæ ex iis quotidie ejici debent, suam originem ac generationem habeant, ut adeo mi-

randum sit, quod ea ipsa, quæ materiam & causam foveant vitæ & integritatis, mortem quoque & tot mala inferre possint. Ex aëre enim & diætis morbos oriri, rectissime *Hippocrates Libr. de flatibus* pronuntiat. Visum est igitur nobis primum de dispositione corporum ad morbos deinde de ingestorum vitiis & copia & intemperantia, naturæ inimicis, tum de excretionibus deficientibus & suppressis, & quæ exinde mala oriantur, ordine dicere omnemque rem tam clare oculis & menti subjicere legitimum, ut, quæ vera sit origo & generatio omnium morborum, & qua via illi præcavendi sint, satis superque appareat. Neque enim ego satis huc usque mirari potui, quemadmodum, qui morborum origines & causas scriptis tradiderunt, è longinquo quasi eas deducere ac derivare ex tot obscuris & minus evidentibus rationibus atque principiis allaborarint, neglectis iis omnibus simplicissimis, facillimis, & quibus quotidie indiget homo, rebus, nempe ingestis, retentis & excretis, quæ tamen ad veram & realem morborum causam subministrandam satis apta atque idonea sunt.





PHILOSOPHIÆ CORPORIS HUMANI MORBOSI,

S I V E

PATHOLOGIÆ GENERALIS,

PARS III.

De morborum ortu ac generatione ex imbecillitate corporis humani, vitio ingestorum, impeditis excretionibus, sanguinisque & humorum abundantia atque impuritate, itemque de iisdem & præmatura morte præcavendis.

CAPUT PRIMUM.

Corporum imbecillitate morbis potissimum obnoxia.

§. I.



EDICUS non tantum rerum nocentium, & quæ morbos inferunt, proprietates ac vires generatim & absolute, sed etiam relative imprimis & effective in individuo spectare & considerare debet: ita enim demum vera & utilis & ad judicandum & ad medendum apta observatio atque experientia enascitur.

Scholion.

Neque enim ullibi corporum dari vires certas & absolutas, sed omnes esse relativas & certis conditionibus adstrictas, supra jam docuimus. Has autem relationes ad tot diversa individua probe intelligere & invenire, id præcipui in medicina studii, laboris atque momenti est, & inter ea referendum, quæ vulgus atque empirici non satis capiunt, qui effectum in medicamento tantum ponunt, neque eum pro diversitate corporum mirifice variare & dissidere perspiciunt. Et ita quoque sese habent morborum causæ & res naturæ humanæ infensæ, quarum effectus pro varietate individuorum valde disjunctus & subinde plane alienus est. Siquidem ex activa rei virtute & reactione corporis, velut subiecti, quod recipit actionem, demum effectum certum produci, apud omnes philosophos in confesso est.

§. II.

Ingentem corporum humanorum differentiam veteres medici atque ex iis sapientissimi *Hippocrates* ac *Celsus* probe attendebant, quin imo pro primo & præcipuo artis nostræ habebant fundamento, eo quod in dies fere observabant, quod alterum lædit, idem alteri sæpius ne ullam quidem molestiam procreare. Atque ideo tam in morborum generatione & curatione, quam in iis præcavendis omne iudicium, consilium & remedium adplicationem ad corporum differentiam, quæ potissimum in ætate & habitu corporis posita est, ma-

Frid. Hoffmanni Oper. Tom. I.

xime omnium vero ad eorum vires dirigi debere, rectissime judicabant.

Scholion.

Hippocrates *Libr. de flatibus* §. 8. differentiam corporum ita describit: *Differt corpus à corpore, natura à natura & nutrimentum à nutrimento; non enim omni animantium generi eadem aut non conferunt aut commoda sunt, sed sunt alia aliis magis convenientia.* Et *Libr. I. de morbis* §. 11. pag. 16. *differt corpus à corpore, & ætas ab ætate, & aliqui majorem tolerantiam in morbis habent, alii omnino ad tolerandum impotentes sunt.* Et *Sect. III. aph. 2. naturas quasdam ad æstatem, alias ad hiemem bene aut male se habere prodidit.* Neque hoc caret experientia & ratione: nam videmus senes & phlegmaticos & hypochondriacos ætate, quia perspirationem auget, optime se habere, contra hieme, quæ eandem cohibet, pessime. *Idem Auctor Libr. de articulis* pag. 83. ait: *magna est differentia naturarum in hominibus, ut hoc vel illud facile aut difficulter ferant.* Et *Libr. II. Prædictionum* §. 20. *multum differt corporis ipsius hominis structura, aliquando enim neque febricitat, neque inflammatur sauciatus, aliquando etiam citra causam febricitat, & aliqua corporis pars omnino inflammatur.* Alii præ vulneris dolore delirant & febrientes mortui sunt. *Quicunque enim aut corpus febricitans habent aut mentem turbatam, talia patiuntur. Sed neque hæc admirari oportet, neque formidare, illud expendendo, quod & animæ & corpora hominum plurimum differunt & vim maximam habent.*

§. III.

Differentia inter corpora imbecillia & inter firma ac robusta maximi est momenti in arte medendi; utpote illa morbis admodum sunt obnoxia, hæc vero rarius ægrotant.

Scholion.

Maximæ utilitatis hæc veritas primum auctoritate veterum, deinde solida ratione, tum etiam experientia omnino stabilienda venit. Primum prodeat *Hippocrates*, qui in *Libr. de Veteri Medicina* §. 21. hunc in modum differit: *Cæterum tales naturas, quæ cito & fortiter ejusmodi delictis offenduntur, imbecilliores aliis esse judico. Proximus autem est imbecillus languenti: verum imbecillior est languens.* Et eodem *Libr.* §. 7. scribit: *Consentaneum est, plurimos & debiliore natura præditos*

periisse, eos vero, qui victum illum superare poterant, longiori tempore durasse & restitisse. Huic suffragatur Celsus Lib. I. Cap. III. in fine: Omnibus morbis obnoxia maxime est infirmitas. Et alibi: quando corpus offensum est, id maxime sentit pars vitiosa; adde Cap. I. ubi quemadmodum sanos agere conveniat, edisserit hunc in modum: Sanus homo, qui & bene valet & suæ spontis est, nullis obligare se legibus debet, ac neque medico, neque iatroalipia egere. Hunc oportet varium habere vitæ genus, nullum cibi genus fugere, quo populus utatur, interdum in convictu esse, interdum ab eo se retrahere, modo plus justo, modo non amplius adsumere. Cap. II. vero, quæ imbecillis servanda sunt, prolixius exponit. Multum quoque refert, in adhibendis medicamentis scire, robusta an infirma natura fuerit; hinc Hippocrates Libr. de Locis in Homine §. 39. fortibus forte, debilibus vero debile medicamentum exhiberi jubet.

§. IV.

Robusti & firmi homines rarius ægrotant, & multi per omnem ætatem à morbis immunes degunt.

Scholion.

Utut innumerabilis sit multitudo & morborum & earum rerum, quæ hominis valetudinem offendere possint, tamen mirandum est, complures dari homines, qui per omnem ætatem, si forsan infantilem exceperis, à morbis immunes degunt. Quot sunt, qui nunquam febrem experti sunt, qui nullis spasmodis, doloribus, vel cruentis profluviis urgentur, qui à podagra, phthisi, hydrope, cachexia, malo hypochondriaco, scorbuto aut sphacelo & gravibus capitis morbis non infestantur. Et hoc in numero maxime sunt robusti, laboribus dediti, duro & simplici victu utentes, plebei, rustici, qui vitam sine affectibus & sine angore transigunt, ætate juvenes, viri, ratione habitus corporis macilenti, venis amplioribus præditi, carne tensa, firma & musculosa gaudentes, de quibus verissime pronunciat sacra scriptura, robustos non egere medico vel medicina. Contra vero parum firmi homines, ætate infantes, senes, habitus corporis fluxi & spongiosi, à natura debiles, & qui tenues & copiosas habent venas, qui vires ex præcedente morbo, vel vehementi medicina, aut animi turbatione gravi adfectas habent, ii continuo morbis patent, conqueruntur, & pluribus malis ac molestiis idque frequentissime exagitantur.

§. V.

Robusta & imbecillis natura hominum maxime ex virium substantia, copia & proportionem æstimanda est.

Scholion.

Vires in corporibus non aliæ intelligendæ sunt, quam motrices, quæ motu maxime se exerunt. Hæ vero ex certis sedibus quasi comprehensæ in universum corpus diffunduntur. Animales, quæ sensum motumque præstant, è cerebro & medulla spinali per nervos veniunt; vitales ex corde per arterias diffusæ identidem ad calorem, motum, respirationem & ad corpus à corruptione per continuam rerum alienarum excretionem vindicandum conferunt: naturales ex ventriculo & alimentorum canali proficiscuntur, & materiam sanguinis & succi nutritii præbent. Itaque somnolentia, assidua vigilia, debilitas sensuum & motuum voluntariorum, virium animalium imbecillitatem arguunt; pulsus vero parvi, debiles contracti, respiratio crebra & difficilis infirmum vitæ robur ostendunt: depravatus vero appetitus, flatus, retenta excrementa, vitiosa nutritio, virium, ut ita loquamur, naturalium defectum commonstrant.

§. VI.

Igitur robusta & sana corporis natura illa nobis dicitur, in qua omnes corporis functiones salvæ ac inte-

græ sunt, quod fit, ubi motus solidorum systoles & diastoles & progressivus fluidorum, neque minus excretorii, qui aliena & inutilia à corpore separant, vigent; imbecilla vero natura est, in qua motus illi depressi, impares & languidi functiones corporis animati depravant.

§. VII.

Quo vividiores sunt motus progressivi & excretorii in corpore, eo valentior & robustior est homo, eo quod sufficiens & proportioni congrua lymphæ per nervos, & sanguinis, nec non succi nutritii per arterias in totum corpus inque motus organa copia influit; tum etiam, quia motu inutile & effœtum semper à corpore sejungitur, & utiles succi in ejus locum restituuntur.

Scholion.

Superioribus locis satis abundeque explicavimus, vires ex aëre & alimentis probe digestis & subactis, quæ commodam materiam boni sanguinis & lymphæ subministrant, ratione primæ originis proficisci; fufius quoque docuimus, per continuas & proportionem ingestis respondentes excretionem corpus vires & vitam conservari.

§. VIII.

In imbecilibus vires & motus deficiunt, excretionem non recte fiunt, & parum boni sanguinis & spiritus accedit ad corpus, unde succorum & nimia fit abundantia & nimia impuritas, atque adeo ex retentis & stagnantibus humoribus solennis morborum fit origo ac generatio.

§. IX.

Cognoscitur natura robusta ex motuum organis ac vasis & cavitatibus, quæ succos continent, & per quas illi feruntur.

§. X.

Quorum corpus vasis latis & capacibus est, quorum fibræ solidæ, compactæ & renitentes sunt, quorum nervi ac tendines robusti, cor & caput amplum, ii robustam naturam præ se ferunt. Qui vero exiles & tenues habent venas, fibras valde laxas, molles ac solutas, nervos quoque & tendines teneriores possident, ii naturæ infirmæ & debiliores recte habentur.

Scholion.

Per ampliora enim vasa ac nervos magnos plus sanguinis & fluidi subtilissimi succique nutritii ad partes adfertur, quam per tenuia & exilia; per capaciora etiam vasa sanguis ceterique humores liberiori & expeditiori cursu circumferuntur, qui in angustioribus facile hærent & stagnant. Præterea per majores diametros vasorum in excretoriis liberiores & largiores fiunt excretionem, quam per angustiores & minores. Et quia in liberiori sanguinis circuitu & vacationibus bene succedentibus ita robur & sanitas consistit: sequitur, languidiorem sanguinis motum deficientes, excretionem ad congerendos vitiosos, qui morbum inferunt, & humores esse aptissimas. Accedit, quod major calor sit in robustiori, minor in imbecilliori, nam secundum Galenum Libr. II. de temperamentis, quicumque latioribus sunt venis, natura calidiores existunt, qui angustis, frigidiores. Atque ob id etiam secundum Hippocratem calido sunt ventriculo graciles & qui venas prominentes habent.

§. XI.

In numerum imbecillium referendi etiam merito sunt, qui texturam corporis exquisitius sentientem habent, i. e. qui ex levi causa atque occasione motuum anomaliis spasticis & convulsivis sunt obnoxii.

Scholion.

Videtur quidem diathesis facilis ad spasmos & præter naturam

naturam oscillationes fibrarum imbecillitati, quæ in defectu motus consistit, repugnare. At distinguenda hic merito est sensibilitas, quæ fit secundum & quæ præter naturam: illa ex integris & plenis, hæc ex viribus exhaustis & sanguinis ac fluidi nervei defectu potius oriri videtur. Quod & convenit cum experientia, nam videmus, qui è morbo mox convalescent, qui ex immodicis sanguinis profusionibus vires amiserunt, ad terrorem non modo & animi affectus valde esse proclives, sed & à frigore vel ab intemperato cibo & potu gravissime lædi, & doloribus, spasmodis atque anxietatibus corripi. Videmus quoque infantes, ætate & natura imbecillimos, & doloribus & convulsionibus valde esse obnoxios. Senes ut plurimum tam teneri sensus sunt, ut minimam mutationem aëris in corpore persentiant, ut quasi perpetuum secum ferant calendarium. In partes enim nervosas imbecilles, calore & succo nerveo destitutas, plurimum potentiæ causas externas habere animadvertimus, ita ut earum actioni & motui promptius nerveæ, quæ sensus & motus præfides sunt, obtemperent, quod apud eos non evenit, qui corpora possident interno ac naturali calore, sanguine ac spiritu, quantum satis, prædita.

§. XII.

Quædam infirmitas ab ipsa natura & ex structura corporis fluit, alia est adventitia, quæ per violentiam quandam ab abusu rerum externarum, imo per ipsos morbos & intempestiva medicamenta inducitur.

Scholion.

Ad imbecillitatem, quæ à natura fit, pertinet ætas, habitus corporis, sexus, hæreditaria dispositio, temperamentum, consuetudo; adventitiam vero rerum nocentium abusus, animi affectus, intemperantia in cibo & potu, validiora medicamenta & maxime omnium vehementes morbi producunt & post se relinquunt.

§. XIII.

Ad eos, qui ætate imbecilli sunt, maxime pertinent infantes & senes, nam & infantilis & senilis ætas frequentioribus morbis obnoxia atque implicita est.

Scholion.

Morbos infantibus & pueris familiares recenset *Hippocrates Sect. par. 24. seqq.* Atque testatur experientia, ætatem infantilem multis morbosus molestiis expositam esse, & duplo plerumque esse majorem numerum, qui singulis annis moriuntur, infantum, quam in ceteris ætatibus. Maximam vero stragem morbi epidemiiique maligni, ut pestis, dysenteria, variolæ, in infantibus ordinario edere solent.

§. XIV.

Morbi, infantibus tenellis & pueris quoque proprii, infestant maxime caput, inque ejus parte tam interna, quam externa fixam suam sedem & domicilium habent.

Scholion.

Unde videmus, capitis tineam, crustam lacteam, achores, oculorum & aurium fluxiones, epiphoram, strabismus, coryzam, gravedinem, glandularum in collo tumores, aphthas & capitis dolores, fluxiones narium, epilepsiam quoque, convulsiones, pulmonalium nervorum paralyfin, sive catarrhum suffocativum, familiarissimos esse infantum morbos.

§. XV.

Infantibus qui infesti sunt morbi, modo ab universo corpore laxo, raro, molli ac debili, modo ab imbecillitate capitis & systematis nervorum dependent. Et quia motus solidorum tam in corde & vasis, quam in intestino canali admodum languidus est, atque excretio-

Frid. Hoffmanni Oper. Tom. I.

nes, quæ fiunt alvo, non recte respondent, major humoris ferofi & impuri fit accumulatio.

§. XVI.

Cum infantiles morbi maxime ab excretionibus deficientibus ac suppressis per secessum & transpirationem proveniant: humores impuri accumulantur, & prout stagnantes variis partibus inhærescunt, diversa morborum schemata in scenam producunt.

Scholion.

Prima in regione cruditates acidæ, biliosæ, viscidæ, ex nimia voracitate productæ, anxietates, dolores, ejulatus, vigilias, inquietudines, inflationes ventriculi & abdominis, pertinaces tussis, singultum, vomitum, capitis gravitatem & dolorem producunt. Si validiori naturæ robore ad partes capitis externas impuri humores propelluntur, exulcerationes capitis, achores, crusta lactea, aphthæ, aurium & oculorum fluxiones, gravedines, coryzæ, tumores glandularum colli fiunt. Interdum quoque ad habitum corporis, ad ipsos quoque pedes falsæ impuritates delatæ, varias pustularum, macularum & exanthematum species producunt. A terrore vel vehementi dolore & spasmo humores delati ad cerebri membranas epilepsiam concitant, quæ est universalis spasmus omnium nervosarum partium in toto corpore. Si vero ad membranas medullæ spinalis acres humores feruntur, convulsivi & sæpe stupendi motus fiunt. Nimia vero ligamentorum laxitas ad luxationes & rachitidem disponit.

§. XVII.

Quicumque igitur vult præcavere infantiles morbos, is certe omni cura eo anniti debet, ut infantum corpora perspirabilia servet, & ut excretiones alvinæ semper bene respondeant ingestis, & alvus nunquam clausa sed bene fluxilis sit, ita enim omnis fomes morborum præscinditur. Dicitur vix potest, quantum commodi hisce corporibus hujus rei gratia conferat usus pulverum absorbentium, oleo tartari per deliquium imbibitorum, si cum æquali portione rhabarbari, addita una vel altera gutta olei anisi vel fœniculi, vel etiam pauxillo croci, misceantur & crebrius offerantur. Singularem etiam hic opem ferunt infusa veronicæ, seminis fœniculi ex aqua calida, & frequens usus clysterum plane emollientium, præsertim, qui ex decocto florum chamomillæ vulgaris fieri solent.

§. XVIII.

Senum morbi identidem non ex alia causa, quam imbecillitate virium & defectu salutarium excretionum per alvum & cutis spiracula enasci solent.

Scholion.

Vires decrescere in senibus & ipsam senectutem maxime in languore consistere, extra controversiam est; ob fibras enim, per tot annos densiores & rigidiores factas, ob angustiora reddita vascula, quæ modo secretioni lymphæ nutritiæ in habitu corporis, vel spirituosæ in nervis cerebri & spinalis medullæ, modo excretionibus vacant, sensus, motus & nutritio non solum decrescunt & vires adfliguntur, sed & major succorum copia & impuritas in senili corpore accumulatur, quæ nunquam non graves afflictiones post se trahunt.

§. XIX.

Ob deficientem alimentorum digestionem & sordium excrementitiarum in alvo retentionem flatulentia, ructus, colicæ, corporis languor, vigilie, inquietudo subinde senes premere solent.

§. XX.

Libera halituum perspiratio, ordinario in senibus ob

meatuum cutaneorum angustiam & constipationem, neque minus ob caloris defectum, cum facile refrigerantur, difficilius multas serosas impuritates, quæ excerni debebant, fovet atque ingenerat.

Scholion.

Inde familiarissimæ senio confectis sunt gravedines, coryzæ cum capitis gravitate junctæ, ruffes valde humidæ, raucedines. Aucta vero impura falsedo atque ad cutaneos tubulos delata, si ibi stagnat, molestissimum pruritus, siccam scabiem herpeti similem, cutis ariditatem squamosam & similia vitia suscitatur. Si vero serum falsius ac tartareis partibus onustum per urinario ductus viam atque exitum affectat, atque diutius ibi moram trahendo sensibiles partes affligit, stranguriæ, urinæ difficultates acerbissimæ, vesicæ arrosiones, urinæ mucosæ, quæ in vesicæ calculum subinde coeunt, hanc ætatem infestant.

§. XXI.

Plures ex senibus, qui adhuc bene valent & nimium otio indulgent ac laute vivunt somnoque utuntur pleniore, nimiam succorum plenitudinem, quæ virium robur vincit, & quæ transpirationem difficiliorem reddit, sibi ingenerant, quam impuritas pressio pede infequitur. Hinc non mirum est, humorum insensas stagnationes hinc inde in visceribus & ab his morbos chronicos, senibus admodum familiares, oriri: cujus generis sunt lentæ febres, quæ marasmi nomine veniunt, cachexia, tabes, scorbutus. qui perquam facile in sphacelum abit, in capite apoplexia, auditus gravitas, visus hebetudo, paralyfis, memoriæ abolitio & similes.

§. XXII.

Quum senum morbi potissimum & nimiae humorum plenitudini & horum impuritati, propter diminutas & deficientes excretiones, origines ac incrementa sua debeant: in promptu est judicare, ea, quæ vacuatione detrahunt, prudenter adplicata, ut virium robur fervetur, optima esse adversus hos morbos præsidia.

Scholion.

In quæstione positum id esse tum à veteribus, tum à recentioribus video, debeatne senibus, & quidem decrepitis, sanguis emitti. Plures adferunt, venerabilem illum virium & vitæ thesaurum omni modo esse custodiendum. Alii nimiam sanguinis copiam onerare naturam ac vires, ut regere motus & subigere materiam nequeant, adfirmant; sed eximenda rei hujus controversia est. Plurimi ex senibus sunt plethorici, & quia parum exercent corpus, & sub tranquillo animo pleno & lauto victu utuntur, plus sanguinis generant, quam ipsis utile est. Tali utique in casu iusta sanguinis detractio, modo non sit nimia, sed moderata & post eam debitum regimen fervetur, prorsus non repudianda est. *Rhases*, auctor Arabs, adeo sanguinis missionem non horruit, ut vel ipsis etiam decrepitis, modo qualiscunque suppetere vis, eam confidenter bonoque cum successu adhibuerit. *Helvetii*, ad extremam etiam senectutem pervenientes sanguinem non sine commodo quotannis bis vel semel emittendum curant. Rectissime enim & *Galenus* & *Celsus* sentiunt, in sanguinis detractio non tam annorum numerum, sed potius corporis habitum & vires respiciendas esse. In iis vero, qui jam imbecilles sunt, parum cibi sumunt, vel ex morbo laborant, vel morbidæ constitutionis sunt, hoc auxilii genus prorsus non probandum esse judicamus. Copiosius hac de re egimus in *Dissert. de magno venæ sectionis ad vitam longam præsidio*.

§. XXIII.

Parcior cibus isque concoctu facilis, frequens corporis, præsertim sub sereno & temperato cælo & ma-

xime per equitationem, lecticam aut currum, motio & moderatio vini generosi aut medicamenti balsamici usus cum sufficiente, sed opportuno potu; hæc sunt, quæ & vires & valetudinem senum tuentur, adeo, ut his præsidiiis adjuti ad extremam & placidam senectutem pervenire possint.

Scholion.

Qui valetudini senum tuendæ præsumunt, id etiam curare debent, ut alvus non resistat, nec officii sui obliviscatur. Cum vero nihil magis perniciosum sit huic ætati, quam purgans, & quod nimium stimulando vim stomachi laceffit: certo optime ii rebus suis consulunt, qui ejusmodi cibos admittunt, quibus laxandi facultas inest, unde falsa, dulcia, vina, quæ laxant, si reliqua bene habent, non ex toto senibus circumcidere oportet.

§. XXIV.

Corporis habitus plurimum quoque facit magnamque vim habet ad morbis obnoxiam imbecillitatem, qualis est spongiosus, rarus, laxus, non latus, sed tenuibus & copiosis vasis conspicuus, sub quo facilius homines ægrotant, difficilius evadunt, & brevioris quoque vitæ sunt, eo in quoque consentiente *Hippocrate* Sect. II. *aphor.* 44.

Scholion.

Quemadmodum omne robur vitale in libero & expedito solidorum & fluidorum motu & circulatione, & recrementitiarum partium ejectione consistit: ita infirmitas in languore illorum motuum posita esse utique videtur. Cum vero per fibras laxiores & tubulos tenues atque exiles non multum sanguinis laudabilis ad motum ac robur solidorum accedere, & parum quoque per convenientia loca inutilis succi effluere potest; facile apparet, ejusmodi structuræ corpora & vires habere subinfirmas & quam facile etiam à copia, intemperie & aliena rerum facultate lædi & præter naturam affici posse. Accedit, quod in ejusmodi corporibus sanguinis & humorum stases in acutis morbis: in chronicis vero stagnationes & vasorum infarctus difficilius, quam in iis, qui compactas & robustas fibras habent, & qui latioribus vasis gaudent, discutiantur & ob id magis in morbis succumbant. Sique experientiam consulimus, certe ea nos docet, qui frequentius ægrotant & rheumatismis, catarrhis, podagræ, hypochondriaco calculo, phthisi, lentis febribus, abscessibus, cachexiæ, mensium & hæmorrhoidum inordinatæ fluxioni obnoxii sunt, & inter scæminas, quæ facile abortiunt & gravida in puerperio mala perpetiuntur, eos fere omnes tenuioris & laxioris esse carnis ac spongiosi corporis habitus, pinguedine sæpius & nimia vasorum tenuitate laborantes.

§. XXV.

Quum ratio temperamentorum, quæ hominibus assignantur, meo quidem iudicio, non tam in natura & temperie sanguinis, sed potius in structura & habitudine solidorum ad motus, quæ haud ita facile ac fluida immutantur, quærenda sit; rectissime etiam morbos, qui vulgo sic dictis temperamentis adscribi solent, à solidorum structura, habitu & viribus deducendos esse arbitramur.

§. XXVI.

Qui in spongioso & vasculoso corporis habitu multum sanguinis boni & temperati alunt, sanguinei: qui plus feri, quam sanguinis habent, phlegmatici dicuntur. Ubi ob fibras teneriores, tensiores, atque ad motum, impulsu & sensum vegetiores, expeditior & celerior per vasa cursus est, temperamentum sic dictum cholericum enascitur. Sub fibrarum vero & partium solidarum densitate, rigiditate & ad motum tarditate circuitus sanguinis difficilior vel tardior est, & ita melancholicum sic dictum exsurgit.

Scholion.

Scholion.

Quando cholericus vasa ampliora, adeoque magis sanguine distenta habent, temperamentum cholerico-sanguineum fit. Si vero melancholici latioribus vasibus, ad maiorem sanguinis quantitatem vehendam aptis, instructi sunt, sanguineo-melancholicum dicitur temperamentum; ut adeo pateat, ex partium solidarum structura diversa, & pro majori vel minori sanguinis & humorum quantitate eorumque celeri vel tardo cursu, differentem temperamentorum rationem commodissime explicari posse. Apparet quoque porro ex dictis clarissime, sanguineum facile in phlegmaticum, & phlegmaticum in sanguineum, & sanguineo-cholericum in sanguineo-melancholicum, & contra etiam hoc in illud per diversam victus & vitæ rationem, vel etiam per morbos, transire & commutari posse.

§. XXVII.

Diffidens hæc & varia solidorum ad fluida & fluidorum ad solida, respectu motus sanguinis, habitudo ad morborum dispositionem, ortum, ad symptomatum quoque exacerbationem, item ad medicamentorum operationem aliam atque aliam utique plurimum valet & magnam vim habet, atque ob id hæc cognitio medico necessaria & dignissima est.

§. XXVIII.

Sanguinei facile incidunt in eos morbos, qui ex spongioso habitu corporis & sanguinis plenitudine proveniunt. Phlegmatici in eos propendent, qui ex humorum impuritate & abundantia fiunt; cholericus in acutas passiones, in chronicas vero, quæ ex viscerum infarctu & obstructione fiunt, magis melancholici proclives sunt.

§. XXIX.

Magna quoque est sequioris sexus ad morborum frequentiam ex habitu spongioso & tenero proclivitas.

§. XXX.

Fœminas præ viris morbis plus esse expostas, adeo ut duplo majores, *Helmontii* effato, illæ patiantur, extra dubium est; id vero non aliunde fit, quam quod spongiosiori carne & vasibus exilioribus instructæ, maiorem sanguinis copiam, quam natura regere & digerere potest, ingenerant.

§. XXXI.

Morborum origo in sexu sequiori, præsertim, si utero gerunt, ex nimia sanguinis & humorum affluentia maxime omnium deducenda est. Quamobrem si per menses superfluous sanguis recte & ordine secernitur, optime, si minus id accidit, vel plane cessat, ut in anæstosioribus, pessime se habent.

Scholion.

Quia scilicet nimiam sanguinis abundantiam subito sequitur ejus impuritas, nec ulla fere pars est, quæ non graviter in fœminis, si diu excretiones sanguinis subsistunt, inde affligatur. Nam in capite vehementes cephalalgias, odontalgias, erysipelata & graviores cerebri affectus patiuntur. In pectore spirandi angustia cum faucium constrictione, cordis palpitationes animique defectiones oriuntur. In ventriculo ab ejus inflatione frequens est ciborum fastidium, vomitio, ructus, phlogosis, malacia. Intestina tormina ventris, colicæ convulsivæ, flatulentia, alvi adstrictiones infestant. Ex utero male affecto, & ibi denegato sanguinis liberiori cursu, fluor albus, uteri procidentia vel immoderata sanguinis profusio, abortus, uteri scirrhus, inflammatio, apostema, hydrops, sterilitas, & ex sanguinis stagnatione concretiones polyposæ, quæ molas fingunt, proveniunt. Virgines vero ex suppressis mensibus peculiari febre,

quæ alba dicitur & Græcè chlorosis adpellatur, laborant. Nam subito inde in fœdum & pallidum faciei colorem, totius corporis languorem, ciborum fastidium, cordis palpitationem, pedum intumescuntiam, pulsus celerem, frequentem, & ægram spirationem, gravativum ventriculi dolorem incidunt. Quæ vitia, sanguinis fluxu in ordinem redacto, protinus levantur vel plane decedunt.

§. XXXII.

Post quinquagesimum annum, si ex toto cessat sanguinis per uterum effusio, fœminæ plurimis malis fiunt obnoxia. Quibus natura sensum teneriorem dedit, eæ in pathemata hysterica & hypochondriaca incurrunt, in aliis sanguis per hæmorrhoides vel per renum vasæ exitum affectat, si motu abstinent, & natura torpidior est, in calculum renum, arthritidem, atque ex infarctu viscerum in hydropem, cachexiam & suffocativos catarrhos facile incidunt.

Scholion.

Hæc omnia mala & frequentiora sunt & majora sumunt incrementa, si vitæ nimis otiosæ indulgent & plane à motu & labor abstinent, sique accedit intemperantia in victu, acidorum abusus, corporis refrigeratio, neque minus diuturnus mœror atque tristitia.

§. XXXIII.

Alia adhuc est imbecillitatis morbosæ in feminis ratio, videlicet nimia generis nervosi ad spasmos, convulsiones motusque inordinatos propensio, quæ semper in feminis major est, quam in viris.

Scholion.

Ex hac nervosarum partium infirmitate & ad motus inordinatos dispositione fit, ut feminæ animi sint mobilioris ac vindictæ cupidi, & facile ira excandescant, vel levi ex causa in terrorem conjiciantur. Hinc etiam est, quod earum affectibus facile convulsiones, epilepsia vel graves spasmi adfocientur, ut videmus in malo hysterico, inque difficiliore partu ac puerperio.

§. XXXIV.

Non certior igitur & melior ad præcavendos sexui sequiori familiares morbos via & ratio inveniri potest, quam si nimia sanguinis & humorum plenitudini convenientibus auxiliis occurramus.

Scholion.

Id vero quam optime præstat tempestive & cum prudentia adhibitæ sanguinis per incisionem venarum, hirudines, cucurbitulas, emissiones. Quo spectant etiam abstinentia, inedia, motus & exercitatio corporis, peregrinatio & cœli mutatio; posthæc decens thermarum, acidularum vel aliorum fontium salubrium usus, liberalior potus cerevisiæ tenuis, vel aquæ calidissimæ herbis infusæ, non omissis clementioribus laxativis, ipsas ab omnium morborum insultu egregie vindicant.

§. XXXV.

Supereft alia imbecillitatis ad morbos valde proclivis in corporibus humanis ratio, eaque nativa & à morbidis parentibus in liberos transmissa, qua vel totum corpus vel quædam tantum ejus partes infirmæ & ad morbos suscipiendos aptæ evadunt.

Scholion.

Verissimum est, utut cognitu difficile admodum, & animi & corporis vitia à parentibus per generationem transire in liberos, ita ut nihil certius sit, quam quod robusti robustis, imbecilli imbecillis, morbofi morbofis procreentur. Morborum autem hæreditariorum ratio profecto non in vitio fluidarum partium, quæ continenter mu-

tationi sunt obnoxia, sed potius in depravato solidorum statu, quorum mutatio non sub potestate medici est, & quæ nonnisi per annorum decursum fit, quærenda est, & maxime vel in earum nimia imbecillitate, atonia, sive tono nimis laxato & resoluta, vel in nimia nervosarum partium ad anomalias motuum dispositione consistit.

§. XXXVI.

Hypochondriaci plerumque hypochondriacos, phthifici phthificos, calculosi calculosos, epileptici epilepticos, hæmorrhoidarii hæmorrhoidarios, cachectici cachecticos progenerant, id quod indies in praxi animadvertere licet.

Scholion.

Acutas passiones non transire in liberos, quia ex vitio magis fluidarum partium proveniunt, certissimum est; sed eo frequentius solidorum vitia & labem viscerum liberis affricari conspiciamus. Quemadmodum vero quævis pars corporis nobilior peculiari chronicæ passioni exposita est; ita etiam in hæreditariis id observare licet. Molestissimum illud, quod dicitur hypochondriacum, malum mere spasmodicum ac flatulentum ex ventriculi & intestinorum motu peristaltico perverso, juncto cum summa atonia, nascitur: phthisis præcipuus pulmonum morbus est, epilepsia & melancholia cerebri, hydrops hepatis, cachexia lienis, calculus renum, podagra articularum, & hi omnes morbi sunt hæreditarii & maxime fundati sunt in cujusque partis nativa imbecillitate & prava dispositione, quæ vel in vasorum angustia, vel in fibrarum & vasorum nimia laxitate, ad materiam vitiosam recipiendam & retinendam apta, ex qua facile humorum stagnationes & vasorum oppilationes, infarctus, indurationes fiunt, consistit.

§. XXXVII.

Quemadmodum nihil tam difficile est, quam labem, quæ in structura & conformatione solidæ partis hæret, emendare: ita etiam prava solidorum per nativitatem accepta ad morbos dispositio non adeo facile, optimis etiam datis præfidiis, extingui potest, quin potius, accedente occasionali causa, primis subinde annis prompte excitatur atque in actum deducitur.

Scholion.

Sicut *senium*, ut præclare differit *Trallianus Lib. XII. de marasmo*, nulla medicina tolli potest, eadem ratione prava, quæ in solidorum structura & labe consistit, ad morbos proclivitas difficulter admodum eradicatur. Ita phthisis, podagra aut affectio hypochondriaca hæreditaria nulla propemodum arte averti possunt, idque ægrius medicina, quam accuratiori diætæ observatione, quæ eo magis necessaria est, quo certius ex neglectis diæteticis præceptis hæreditarii morbi & ingravescent & difficiliter levantur.

§. XXXVIII.

Mala quoque est illa fibrarum motricium per nativitatem acquisita habitudo, qua levi de causa ad fortes oscillationes & spasticas stricturas proclives, sanguinis æquabilem & liberum ad exteriora vergentem cursum inturbando, regressum ejus ad interiora, & congestiones nimias in his vel illis partibus efficiunt.

Scholion.

Ex spasminis & quæ hos consequuntur, congestionibus proveniunt sanguinis effusiones, quæ in prima ætate in capite & per nares, in juvenibus per pulmones, in ætate virili per venas sedis, solenni fere modo contingere solent. Intercepta vero per has vias sanguinis eruptione, sub certis ætatibus familiari, sanguis subli-

stens & congestus multa & gravia creat symptomata, quorum de frequentia, magitudine & noxa *Cl. Stahlus in scriptis suis* copiosius & quasi ex professo egit.

§. XXXIX.

Præter infirmitatem à natura acceptam datur adhuc alia, quæ acquisita est, & per morbi vehementiam solidis infertur partibus, ex qua facilis morborum recursus & afflictio ejus partis fit, quam semel morbus fortiter exercuit, idque non tantum in chronicis, sed & in acutis passionibus accidit.

Scholion.

Qui febribus, sive continuis, sive intermittentibus, semel vel iterum laborarunt, ii quam facile non adeo urgentibus causis in eas recidunt. Qui pleuritide vel peripneumonia decubuerunt, illi eundem morbum facile rursus experiuntur. Si semel vel iterum erysipelas pedem vel dextrum vel sinistram occupaverit, tum frequentius in eodem pede malum affligit. Coli acerbior dolor talem imbecillitatem in intestinis relinquit, ut parvas ob causas recurat. Eodem modo dolores podagrici, & qui dicuntur rheumatici, ita partem adfligunt, debilemque reddunt, ut serum acre vel tartareum, ad glandulas vel ligamenta artuum glandulosa delatum, facile ibi subsistat & crudeles hos dolores denuo provocet. Raro à calculo renali sunt immunes per omnem ætatem, qui semel vel bis ex eo laborarunt. Quibus sanguis per hæmorrhoides vel vias insolitas, nempe urinarias, aut pulmones, aut vasa ventriculi brevia, vel etiam per nares semel vel aliquoties ferri solitus est, in iis per has vias lubentius rursus exitum affectat, adeo ut in hæmorrhagiis narium non per aliam, sed per dextram vel sinistram, per quam ferri consuevit, sanguis effluat. Qui semel gravi morbo capitis, aut cephalalgia aut apoplexia, vel etiam epilepsia aut paralyfi correptus fuit, in hoc facile idem morbus levi interdum occasione excitatur. Tumor hydropicus, icteritia quoque & alia hepatis vitia licet bene curata fuerint, ea tamen sæpius recurrere, testem cito experientiam.

§. XL.

Neque tantum à morbis, sed & à læsionibus quibuscunque partes externæ imbecilles ad eundem morbum suscipiendum faciles & aptæ redduntur.

Scholion.

Frequens nos docet experientia, quemadmodum partes ad quandam læsionem vel vulnerationem, aut puncturam mox ita fiant imbecilles, ut levem etiam in aëre mutationem subito persentiant. Frequentissime accidit, ut in quibus partibus vena incisa, vel cucurbitulæ cum ferro adpositæ fuerunt, eæ elapso temporis spatio dolore tensivo & pungitivo afficiantur, non quod istis peculiare agens & nescio quod intelligens infideat, sed quia imbecilliores hæ partes redditæ à nimis redundante sanguine ad oscillationes & agitationes stimulantur. In qua parte, v. g. circa malleolos, semel orta est exulceratio, hanc eidem malo facile subjici, ut ulcus recrudescat, quotidianum est observare.

§. XLI.

Tam subtilis & delicata est fibrarum in corpore animalium natura atque conditio, ut prorsus nullam læsionem vel violentiam pati possint, quin inde statim talem mutationem accipiant, quæ ad functionum tam in motu, quam in sensatione turbationem inclinet.

Scholion.

Ex quo illud consequitur, homini, si per totum vitæ decursum sanus & integer persistere velit, omni modo & cura cavendum esse, ne in gravem quandam morbum incidat, quia nunquam is ita transit, quin læ-

sionem

De corporum imbecillitate morbis potissimum obnoxia. 245

fionem & mutationem quandam corporis partibus inferat, quæ occasionem postea ad eosdem vel alios morbos dare & fovere possit.

§. XLII.

Quum morbi antecedentes ita vim naturæ laceffere & robur ex solidis auferre soleant, ut quam facile novus morbus propullulet: omni modo & diligentia, ut is ipse per salutaria diætæ præcepta præcaveatur, laborandum est.

Scholion.

Quoniam hanc utilissimam materiam copiose non minus, quam perite in peculiari *Dissertatione de morbis ex aliis prodeuntibus* persecuti sumus, nolumus hac in re esse longiores.

§. XLIII.

Quum non tantum universi corporis, sed & singularium partium infirmitas à viribus nimium exhaustis & deperditis proficiscatur, ita, ut deinde tam facile obnoxia sit morbis; sequitur, omnia ea, quæ vigorem & vires corporis suffurantur, easque exhauriunt, & vitæ & valetudini prosperæ inimicissima, gravibusque ac funestis morbis ingenerandis esse aptissima.

§. XLIV.

Quoniam materiam virium & motuum causam boni & temperati succi in vasis præbent, quid manifestius est, quam quod ea vires corporis consumant, quæ optimos succos & benignum sanguinem auferunt.

§. XLV.

Hoc in genere sunt, præter morbos quoscunque, immodicæ sanguinis profusiones, sive natura sive arte factæ, diuturna inedia, incongruus plane cibus, assidua vigilia, immoderatio venus, crebrior purgantium usus, plenaria motus intermissio, anxietas curæ, sollicitudines, tristitia diuturna, profundæ sine voluptate quadam meditationes, animi contentiones, tempestates valde æstuosæ vel nimis humidæ, ignavia & desidiosa, ebrietas, luxuria & hujus generis plura.

Scholion.

Hæc omnia & singula ita sunt comparata, ut, si quædam tantum ex illis, præsertim in corpore natura debili, concurrant, adeo vires pessundent & naturam imbecillem reddant, ut postea non modo omnibus fere pateat vitis, sed & magnum periculum in morbis accendat, & ægri difficillime sanentur. Miserum itaque & infelicem illum medicum habeo, qui cum ejusmodi debilibus & corruptis naturis corporum agere & curationes tentare debet. Verum deterioris adhuc conditionis sunt illi medici, quibus cum valetudinariis, hypochondriacis, scorbuticis, quotidie conflictandum est. Hi sunt illi ægrotantes, qui medicum non modo molestissime exercent, sed & ejus existimationi multum detrahunt. Beatum vero & felicem eum prædico, præsertim quando incipit in artis operibus versari, si ejusmodi curationes & corruptas naturas effugere possit, nam medicus & medicina hac ratione subinde contumeliis exponuntur. Et profecto, ut verum dicamus, consultius multo est, ut ejusmodi debiles, qui continuo cum morbis, & spasmodis conflictantur, à medicina abstineant, & tantummodo in recto vitæ regimine & commoda diætæ ratione levamen & solatium quærant. Illud vero perpetuo à medicis observari velim, ut semper cum imbecilibus & valetudinariis, & qui vitium in quadam parte foveant, mollissime agant, & ab omnibus vehementibus sibi caveant, ne fortiori commotione ad partem imbecillem & vitiosam peccantes humores impellantur, ex quo sæpius graves & funestissimi effectus propullulant; siquidem infirma pars & atonia quadam laborans quam facile vitiosum recipit humorem, à quo postea ipsi major læsio accedat necesse est.

§. XLVI.

Præcipua igitur medicinæ rationalis pars in eo consistit, ut medicus probe inter se corporum humanorum naturas discernat.

Scholion.

Hoc fit, si in quovis individuo structuram partium fibrosarum, vasorum capacitatem & dispositionem, temperiem ac proportionem partium fluidarum ad motum probe perpendat, & insuper cujusvis partis peculiare robur vel imbecillitatem ex variis phaenomenis, circumstantiis, observationibus & effectibus accuratius perspiciat, qualem cognitionem si impetraverit, tum facile & promte judicium & rationem reddere poterit, cur hoc vel illud medicamentum, hæc vel illa insalubris res aut morbifica causa, hic vel ille morbus aliam in hoc corpore, aliam rursus in illo operationem, effectum atque eventum exerat, in quo potissimum medicinæ rationalis momentum ego situm esse arbitror. Nam harum rerum scrutinium non tam facile est, ac si quis ad ens, sensu quodam interno æstimatione atque intentione motus vitales & naturales corporis humani dirigens atque administrans, cujus existentia nullo solido ratiocinio demonstrari potest, confugere velit. Nam posito ejusmodi principio, ceu suprema rerum, quæ fiunt in corpore nostro, causa, omnis ratio, omnis certitudo in theoria non minus, quam in praxi medica uno ictu prosternitur, ut nonnisi fallax judicium & fallax experientia in arte nostra relinquatur.

C A P U T II.

De morborum origine ex copia & vitio ingestorum.

§. I.

Homo continuo eget alimentis, ut sanguinis, qui vitam vires & robur solidorum sustentat, qui universo corpori nutrimentum præbet, qui perenni motu à præsentanea, in quam inclinat, corruptione corpus vindicat, justa & conveniens quantitas, temperies atque inde moderatio motuum conserveantur.

§. II.

Neque vero totæ sanguinis substantia, sed purissima tantum ac delibatissima ejus pars, quæ lymphæ vocatur, corpus nutrit, neque alia; quam subtilior ac mobilissima ejus portio, quæ nervis vehitur, ad motum & robur solidis præstandum accommodata est.

§. III.

Sanguinis pars defecatissima, & tam corporis nutritioni, quam motuum vitalium conservationi idonea, continuo solidorum attritu, indeque oriundo intestino sanguinis calido motu partim per cutim diffilatur, partim intra corpus retenta in liquamen demum salino-sulphureum & excrementitium fatiscit.

Scholion.

Habet hoc omnis motus, ut statum corporis, in quod agit, vel ratione situs & loci, vel ratione texturæ ac figuræ immutet. Quid mirum igitur, si vis illa systaltica & motrix solidorum potentia, quæ continenter agit in fluida, sanguinis etiam mixtioni & crasi tantam inducat mutationem, ut continuo attritu & intestina agitatione eum vel consumat ac dissipet, vel in serum excrementitium convertat. Hinc in febribus tum acutis, tum lentis & hæticis sanguinis copia sæpius intra breve spatium consumitur, inque humores excrementitios degenerat. Usque adeo mirabilis est corporis humani

œconomia, ut motus, qui vitæ præest & sanitatem custodit, & vitam tollat & corporis integritatem destruat, materiam videlicet, quæ pabulum ipsius est, paulatim & successive in fomitem morborum & mortis convertendo.

§. IV.

Quantum igitur quotidie motu cum intestino attritivo, tum excretorio corpori subtrahitur, tantum commodis alimentis refarciri debet, ut vires cum ipsa vita & sanitate factæ ac rectæ servantur.

Scholion.

Ex his, puto, inevitabilis alimentorum necessitas satis abundeque intelligitur. Nimirum omnes, qui in corpore humano exercentur, motus tam mirabili nexu & vinculo inter se coherent, ut actiones, quas vocant animales, à vitalibus dependeant, hæc vero à naturalibus gubernentur, suamque accipiant perpetuitatem. Nam digestio, secretiones & excretiones, quibus actiones naturales absolvuntur, motibus vitalibus prospiciunt, eorumque incolumitatem tuentur; his vero salvis & integris omnes bene habent actiones, quæ vulgo ad animam referuntur.

§. V.

Scire oportet, hominem non tantum eum in finem indigere alimentis, ut subtilissima illa & nutritiva sanguinis portio, motu & calore destructa, restauretur, sed etiam, ne motus illi vitales systaltici & expansivi cordis, vasorumque sanguiferorum & canalium, qui liquida vehunt, qui secernunt, & qui reciproce ac per vires exercentur, torpescant vel interrumpantur.

Scholion.

Paucis admodum cognitam esse hanc veritatem intelligo, quare homo ad vitam servandam non exigua alimenti optimi mole possit esse contentus, sed ingens quotidie quantitas cibi & potus necessaria sit. Ratio nobis hæc esse videtur, quoniam nempe futurum, ut motus canalium systaltici & expansivi, qui fluidorum progressum & directiones moderantur, brevi elanguescant vel penitus pessundentur, nisi sufficiens & paulo copiosior fiat alimentorum, præsertim liquidorum, ingestio. Nam ut in doctrinis physiologicis jam satis explanatum est, vasorum vis contractiva partim à nervorum rore lymphatico, partim à sanguine, tunicas vasorum permeante proficiscitur; tubulorum vero expansionem contenta intus conveniens humorum moles efficit. Hi motus, in æquilibrio positi, ita sese invicem excipiunt, ut systole producat diastolen, diastole vero rursus provocet systolen. Jam quum ingens quotidie humorum copia per tot secernicula, per tot tubulos ac meatus è corpore ejiciatur, sequitur, ut nisi quotidie amissi fiat restitutio, vivida illa vasorum expansio minuatur, tandemque ex toto desinat. Deinde sufficiens succorum copia in vasis necessaria est eam ob causam, ut vasa minima, quæ maxime excretionibus dicata sunt, & quorum interventu humores ex arteriis in venas transeunt, expansa atque aperta servantur, quum alias succorum appulsi destituta facile conciderent. Ex quo utique conficitur, vasorum obstructions à defectu æque ac copia humorum prognerari.

§. VI.

Vigor motus intestinorum peristaltici, atque ab eo dependens debita fecum alvinarum excretio sufficientem cibi ac potus quantitatem desiderat.

Scholion.

Alimentarii canalis motus peristalticus, quem vermicularem vocant, & cujus beneficio ingesta ex ventriculo ad intestinum extremum devolvuntur, identidem convenienti ejus systole & expansione absolvitur.

Nam vis ejus contractiva ab influxu roris nervei & sanguinis tunicas intestinales perluentis, expansio autem à mole contentorum celebratur. Hinc, ubi multus cibus revomitur, alvus sistitur, & qui patiuntur inedia, vel pariori manu cibos assumunt, in iis contrahitur ventriculus, & rarior fit alvi dejectio. Quod vel maxime apparet in febribus & reliquis morbis, ubi parum alimenti appetitur. In iis enim segnior esse alvus consuevit, & quoniam ejus sordes & inquinamenta, quæ ex universa sanguinis massa hic deponuntur, mucosa, biliosa, salivalia atque adeo ad fermentationem prona, non satis mature expelluntur, facile accidit, ut mora diuturniori corrupta novo morbo & gravioribus symptomatibus materiam & occasionem subministrant.

§. VII.

Igitur copia alimentorum intestina ad crebriorem ingestorum expulsionem sollicitat, nisi à præcedentibus causis horum vis contractiva valde debilitata fuerit.

Scholion.

Ex quo causa apparet, ob quam, qui multum comedunt & bibunt, crebrius alvum demittant. Neque ignotum est, aquas medicatas plurimum conferre ad promovendas excretiones tam alvinas, quam urinarias, quod maxime præstant mole sua, siquidem interdum decem vel duodecim earum libræ hauriuntur.

§. VIII.

Ex quibus conficitur, sine alimentis certa que & convenienti eorum mole diu constare non posse corporis humani integritatem. Atque ideo plenaria appetitus dejectio, si longis in morbis diutius affligit, nunquam non ingens periculum ostendit.

§. IX.

Ad vitæ & sanitatis tutelam mutuum conspirare debet commercium inter ea, quæ corpori accedunt ex alimentis, & quæ per necessarias excretiones ipsi subtrahuntur.

Scholion.

Quo plus ergo ingeritur, eo copiosiores & frequentiores esse debent egestiones, sique multum per excretiones secesserit, multum quoque per ingestiones restituatur necesse est. Qui autem parum excernit, eum ingerere parum oportet, & qui parum ingerit, is moderatius debet excernere. In certa itaque & convenienti mensura & proportionem ciborum ac laborum, quibus perspiratio juvatur, punctum sanitatis non inepte veteres posuerunt, atque ex iis maxime Hippocrates, qui Libro I. de Diet. §. 2. & 3. ait: labores consumunt, & cibi, quæ evacuata sunt, explent.

§. X.

Sicut in universum hæc lex firma & stabilis valet, omne nimium naturæ esse contrarium & inimicum: ita etiam ciborum copia & vitæ & viribus & sanitati hominis erit inimicissima.

Scholion.

Gaudet enim natura animantium certa proportionem, ordine, temperie, symmetria & æquabilitate motuum tam in solidis quam in fluidis, & si quis in hac ipsa sani & integri status genuinam & proximam causam querere & constituere velit, is prorsus non errabit. Quoniam vero omne nimium, siue ad materiam, siue ad motum id pertineat, adversus illam proportionem atque temperiem, qua gaudet natura, pugnat, hinc recte ab Hippocrate Sect. II. aph. 51. dictum: πᾶν τὸ πλεονέκει φύσει πολέμιον i. e. omne nimium naturæ inimicum; & Sect. II. aph. 4. non aliud quicquam bonum, quod naturæ modum excedit.

§. XI.

Quoniam omne nimium & mole exsuperans motibus naturæ ordinatis & proportionatis, quibus sanitatis natura continetur, est contrarium, cibus quoque præter naturam copiosius ingestus, ut prudenter admodum prodidit *Hippocrates Sect. II. aph. 17.* morbum facit. Et *libr. de dieta acutorum: prava hæc est dieta, cum quis plures cibos corpori præbet*, & hinc impotentia gulæ non inepte dira generis humani carnifex nuncupatur.

Scholion.

Huic sententiæ suffragatur etiam *Celsus Libr. I. Cap. II. pag. 25. ubi ad cibum ventum est, nunquam est utilis nimia satietas.* At vero id maxime hic in quæstionem venire video, quid τὸ nimium sit, atque ex quo illud æstimari debeat, utpote cum advertamus, quod aliis naturis est nimium atque inimicum, id rursus aliis esse moderatum adeoque amicum, & quod aliis est minus sufficiens, id certis rursus infestum esse ac nimium. Mirum enim est, quantum discriminis corpora humana inter se recipiant, tam ratione structuræ & habitudinis partium, quam ratione vasorum capacitatis & solidorum potentia motricis seu roboris. Quin imo ipsæ naturæ per ætates, per anni tempora, per vitæ genus, per ipsum victum, per climata mirifice mutantur, adeoque pro tanta varietate & mutatione corporum difficile admodum erit, unam & certam ciborum quantitatem & mensuram omnibus & singulis commodam & sufficientem invenire. Nam quod uno tempore homini conveniens & sufficiens est alimentum, id sæpius eidem alio tempore nimium & noxium esse usu atque experientia animadvertimus.

§. XII.

Igitur rectissime iusta & conveniens alimentorum mensura adeoque vel nimium vel parum ex solidorum robore ac viribus semper æstimari debet, *magna enim est, testante Hippocrate Libr. de alimentis, quantitas ad vires solerti ratiocinatione adaptata.*

Scholion.

Nam neque ullius corporis vires & efficacia in rerum natura absolute, sed semper relative considerari debent, hinc etiam τὸ nimium vel τὸ parum ciborum ratione individui æstimare oportet, robustum an imbecille sit, vasa habeat capacia, an angusta, exilia. Hinc fit, ut docente *Hippocrate Libr. de Affection. §. 52. quæcunque sanis commoda sunt, ea etiam ægrotis exhibita fortiora sint.*

§. XIII.

Quo major copia virium & plus roboris in corpore humano inque ejus ventriculo est, eo plus nutrimenti ferre potest homo & contra.

Scholion.

Quare paucos cibos senes requirunt, & facilius jejunium tolerant, quam juvenes, quia attestante *Hippocrate Sect. I. aph. 14.* illis parum caloris inest, propterea paucis alimentis indigent.

§. XIV.

Sicuti in rerum natura virium motricium efficacia recte æstimatur ex effectu, cum plus vel minus resistentia vincere possunt: ita etiam robusta corporis humani natura vel ventriculus firmus is nobis habetur, qui motu peristaltico fortiori instructus alimenta probe subigere, miscere, digerere, ex uno loco ad alium propellere, imo convenienti tempore expellere & puras chylosas partes in vasorum lacteorum oscula impellere possit.

Scholion.

Canalis enim illius nervosi & alimentarii robur ma-

xime consistit in vigore motus peristaltici, sive successiva vividiori ejus dilatatione & constrictione; nam hujus beneficio solventes illi ac fermentescibiles humores ex glandulis decenti quantitate profluunt, & bilis non mediocris quantitas ex ejus ductibus in duodenum descendit, hujus etiam beneficio alimenta non modo inter se, sed & cum dictis solventibus intime alterantur, miscentur, dissolvuntur: hujus beneficio succi utiles & chylosi per crustam villosam debite secreti per canales lacteos transeunt; & hujus tandem beneficio inutiles & excrementitiæ sordes & feculentia utilissime & cito alvo ejiciuntur.

§. XV.

Quo robustior itaque est ventriculus, eo plus cibi desiderat, eo plus etiam sine ullo incommodo concoquere & ferre potest. Videmus inde, homines robustos, agrestes, plebejos, labori deditos, ingentem prorsus alimentorum copiam sine ullo periculo & optime ferre posse, adeo ut inde firmiores & robustiores evadant, à qua imbecilles & infirmi læduntur.

Scholion.

Videmus cibum non modo copiosorem, sed & sæpius intemperantiorem non tam facile officere robusto, quam imbecilli homini, quia illius ventriculus motu & robore instructus eum celeriter expellit, ut non diu ibi moram trahere & corrumpi possit. Neque quantitate, vel qualitate delinquentes humores facile sanitatem offendunt, si in perpetuo progressivo motu constituti sunt neque diu in loco morantur, sed cito propelluntur. Siquidem ii demum humores materiam morbo dant eumque fovent, qui motus progressivi expertes sunt, qui stagnant, nam ex stagnatione corrumpuntur & acorem induunt, & vim partis, cui inhærent, valde laceffunt, ejusque motum turbant.

§. XVI.

Infirmus itaque homo parum alimenti desiderat, quia non multum digerere subigere & propellere motus sui imbecillitate potest, unde fit, ut imbecilles facile à cibis paulo majori copia sumtis, quos optime robusti ferre possunt, lædantur.

Scholion.

In numero imbecillium nobis sunt ii, qui non multum sanguinis & parum ejus subtilioris, spirituosæ, mobilis, sulphuræ, elasticæ portionis, quæ omnium virium tam vitalium, quam naturalium in corpore humano causa ac fons est, habent, & hujusmodi sunt, qui ex nimia sanguinis profusione laborarunt, qui ex gravi morbo sive acuto convaluerunt, qui nocturna vigilia & inquieta cogitatione, meditatione vel diuturno animi affectu, præsertim mœrore, corporis sui robur imminuerunt, & uno verbo, omnes valetudinarii. Quo pertinent ratione ætatis infantes, senes, ratione habitus corporis, qui laxo & spongioso præditi & copiosa & exilissima vasa habent: ii omnes propter virium infirmitatem à nimia alimentorum copia sibi cavere debent, nisi fomitem morbis præbere velint.

§. XVII.

Tanto gravior est noxa cibi copiosius adsumti, quanto majori aviditate ingeritur.

Scholion.

Nimia ciborum copia per se semper resistit eorum intimæ solutioni atque concoctioni, maxime ob eam causam, quia necessaria proportio illa inter menstruum solvens & solvendum læsa est. Deinde, si celeriter magna cum aviditate cibus ingeritur, tum non bene masticatur, neque cum saliva, quæ menstrui vicem gerit, probe subigitur. Accedit, quod nimia copia repente in-

gesti cibi, vel etiam potus, ventriculi tunicas nimium distendat earumque liberam actionem & motum systolicum contractivum impediat, unde diutius hærens in ventriculo lædit, & vellicando paulo fortius totum nervorum contextum in consensum trahit.

§. XVIII.

Misera res est, imbecillos plerumque ingenti cum aviditate atque intemperantia comedere. Ita videmus infantes, & fame diuturna pressos, item eos qui mox ex morbo evaserunt, itemque valetudinarios, phthisicos, melancholicos, hypochondriacos, & qui vermibus laborant, pueros nimium voraces esse, & exinde multas sibi contrahere ægritudines.

§. XIX.

Infantes lactentes ex copia lactis, diutius in stomacho detenti, & bilis acrioris adfluxu corrosivi redditi, gravissime ægrotant.

Scholion.

Sicut omnium rerum nec quicquam ad sanitatis in infantibus tutelam, ac alvus bene fluida, aptius est: ita lac copiosius ingurgitatum, quam ventriculi teneritudo subigere & expellere potest, stagnat, acore inficitur & confermentati ne cum bile corrosivam & propemodum virulentam naturam inducit: hinc feces coagulatae & viridi colore tinctæ tam corrodescentes sapiunt, ut linteamina exedant. Mirum enim est, lac diuturna mora & stagnatione in intestinis acidissimum evadere, ut flavum bilis colorem in viridem convertat, qui adfuso oleo tartari per deliquium protinus in flavum rursus transmutatur. A cruditate hac corrosiva ex copia lactis male digesti graves & periculi plenissimæ, quæ hanc ætatem infestant, ægritudines, ut tormina, cardialgicæ anxietates & convulsiones, oboriuntur; si quando à lactis viscido coagulo tunica villosa & crustosa intestinorum, in quam vasorum lacteorum innumera ostiola desinunt, obstruitur, abdominis intumescencia, atrophia reliqui corporis cum alvi ingenti dejectione nascuntur.

§. XX.

Qui proxime à morbo & febre fatigati convalescunt, ob nimiam voracitatem, quam quidam medici stomachicis acrioribus & aromaticis vel acidulis spiritibus promoveri consueverunt, tardius vires amissas recuperant, sæpius recidivam sibi accersunt, vel in lentum chronicum morbum incidunt.

Scholion.

Sine injuria culpandus hic venit perversus sæpe stomachicorum appetentiæ excitandæ causa usus, quem non semel, sed sæpius in infirmioribus summe noxium deprehendi; nam cum plus adsumant, quam ferre & regere imbecillior ventriculus potest, necessario ingens cruditas fit proventus, qui in corpore adhuc debili quam facile languorem & lentum calorem & postea ciborum fastidium cum male olente ex ore spiritu, sitim quoque & inquietudinem concitat. Atque adeo optimam medicinam intempestive datam morbis causam dare & suggerere posse, clarissime ostenditur.

§. XXI.

Nunquam nimia repletio cum majori periculo juncta est, quam apud eos, qui per diuturnam inediam pressi & valde debilitati sunt.

Scholion.

Plures post inediam nimis fortiter pastos mortem sibi accelerasse, testis est FORESTUS *Libr. XVIII. Obs. 2. in schol.* ubi inquit, *nota est multorum historia, qui à longa inedia sese repleverunt, adeo, ut inde suffocati fue-*

rint, uti nos cognovimus in obsidione Harlemensi & Leidana id præcipue contigisse, quando obsidione liberati cives victu pleniori se replentes mortem quam plurimi incurrerunt. Denique non ignotum est, milites, ex castris in hibernia secedentes liberaliter pastos ex corruptela ciborum in debili admodum corpore in febres pessimi moris stomachicas & caput validissime afficientes incidisse.

§. XXII.

Qui quartana laborant, plerumque sunt nimium voraces ob exsuperantem primis in viis acidum humorem, qui ventriculi oscillationem, in qua appetentiæ causa residet, fortiolem inducit, sed quo plus comedunt, eo longiorem & difficiliorem sanationis fieri febrem, certissimum est.

Scholion.

Hujus febris contumaciam non tam facile etiam præstantissimis præsiidiis evinci posse, nisi prius infracta fuerit nimia illa voracitas, peritis practicis non obscurum est. Nam quo plus ingeritur in ventrem cruditatibus obfessum, eo magis illæ augentur, & eo magis fomes morbi increfcit, atque hepatis infarctus, ubi præcipue sedem suam hæc febris fixam habet, incrementa capiunt.

§. XXIII.

Hypochondriaci & melancholici identidem ob copiosum in primis viis acidum plus appetunt & ingerunt, quam ipsis utile est; ex quo fit, ut morbi symptomata exacerbent, & morbum minus sanabilem reddant.

Scholion.

Molestissimus, sed certe frequentissimus ille affectus, qui hypochondriaci nomine venit, ab ingenti motus peristaltici destructione ejusque ad superiora retrocessione, meo quidem judicio nascitur, & à spasmodica partium membranacearum universi corporis diathesi fovetur & augetur. Quare in iis semper vitiata digestio est, & excretio flatuum ac fecum segnior inflationes & cruditates acidæ, quæ stimulant & spasmum afficiunt has partes, semper adsunt. Ecquis igitur non videt, à copiosis cibis hoc malum semper augeri & deterius, imo habituale reddi.

§. XXIV.

Evenit sæpissime ante accessionem podagræ, corryzæ, vel etiam intermittens febris inordinate crescere ciborum appetentiam, languido licet corpore, idque semper cum incommodo fieri.

Scholion.

Videtur hæc insolita ciborum aviditas ab acriori stomachica lymphæ, accedente peregrino ex prohibita transpiratione stimulo, derivanda, & quia hanc alvi tardior secessio ordinario comitatur, imminens morbus, pabulum copiosius nactus, necessario majora accipit incrementa: sapienti igitur consilio statim ejusmodi morborum fomentis occurrendum est. Prima nempe regio commoda medicina expurganda, sive per superiora sive inferiora, præmissa tamen semper humorum, qui in vitio sunt, correctione. Ita opportune præscinditur morbi fomes, & morbi insequentes levissime succedunt & brevi etiam finiuntur.

§. XXV.

Neque tantum imbecilli & debiles, sed & sani ac robusti homines si supra modum comedunt, morborum semina sibi fabricant, saburram in primis viis cumulando.

Scholion.

Non inepte Galenus in *Comment. Sect. II. aph. 17.* geminam satietatem sive ciborum redundantiam statuit, ad vasa scilicet atque ad virtutem. Satietas ad vasa est, ubi

bi tanta ciborum ingesta copia est; ut ventriculi capacitas nimium distendatur: satietas vero ad virtutem hanc facultatem est, ubi plus cibi ingeritur, quam natura, aut facultas corpus nostrum regens, superare possit. Saepe vero accidit, ut magna cibi copia non gravet facultatem robustam: contra vero imbecillem exigua modum & mediocri alimenti copia non raro gravet. Si vero nimium ventriculus à sumto cibo distenditur, hanc facultas ejus motiva & contractoria minuitur, ut diutius, quam par est, cibi ipsi inhæreant eumque teneant, ex quo multa vitia incidunt & robustos etiam teneant.

§. XXVI.

Optime Hippocrates de veteri Medicina §. 13. for-
tissima edulia maxime & manifestissime hominem lædunt,
sive sanus sit, sive ægrotus.

Scholion.

Differunt enim mirifice alimentorum genera: quædam sunt valentioris naturæ, quædam imbecillæ, & hæc omnia bene distinguit & enarrat atque in classes redigit Celsus Lib. II. Cap. XVIII. Valentiora illa dicuntur, quæ difficilius resolvuntur & plus alimenti habent, & sunt maxime legumina & ex frumentis panificia, omne animal quadrupes, omnis bellua marina, item panis, mel, caseus, annosiores carnes, item omne opus pistorum valentissimum est, quod ex farina, butyro, ovis, saccharo conflatum: nam hæc difficilius subiguntur, firmum ventriculum exigunt, & ægrius ventre dimittuntur.

§. XXVII.

Cum ciborum genera multum inter se differant, facientissimum certe Celsi præceptum est, quod tradit Lib. I. Cap. XVIII. in fine: imbecillis corporibus rebus infirmis opus est, mediocriter firmos media materia optime sustinet & robustis apta validissima. Plus aliquis adsumere ex levioribus potest, in his magis, quæ valentissima sunt, temperare sibi debent.

Scholion.

Inter imbecillia alimenta refert Celsus omne olus, quicquid in cauliculo nascitur, item omnia forbilia, mollia, omnia poma, cucurbitas, cucumeres, pulticulas & panem aqua madentem; ad mediam vero materiam aves minores & pisciculos & ex quadrupedibus leviorem refert, item ex oleribus ea, quorum radices vel bulbos adsumimus.

§. XXVIII.

Multa eaque gravia sunt mala, quæ ex vitiosa alimentorum concoctione & cruditate exsuperante oboriuntur.

Scholion.

Hippocrates hæc ipsa optime recenset Libr. de Prisca Medicina §. 19. Si pransi fuerint, idque eis non conducit, statim graves & corpore segnes fiunt itemque mentis pigri hiatuque & oscitatione & dormitatione & siti pleni. Si vero etiam insuper cœnaverint, & flatus & tormina & alvus effringitur. Celsus Lib. I. Cap. VIII. hæc recenset stomachi laborantis vitia his verbis: stomachum infirmum indicant pallor, macies, præcordiorum dolor, nausea & nolentium vomitus, in jejuno dolor capitis, quæ in quo non sunt, is firmi stomachi est.

§. XXIX.

Famelici si plus justo sese avidissime sumtis cibis, præsertim pinguibus replent, in febriculam quandam ephe-
meram, quæ digestionis adpellari poterit, subinde incidunt; siquidem non multo post cibum sumtum ventriculi inflationem cum summa anxietate, inquietudine & spirandi angustia, & dolorem ventriculi tenuissimum persentiunt, qui ad scapulas, ad fauces & ad ip-
Frid. Hoffmanni Oper. Tom. I.

sum caput progreditur, quod graviter dolet, facies rubet & mens incipit fieri inquietior. Præterea languor totum corpus occupat, extremæ partes inalgescunt, tempora pulsant, pulsus durior & frequentior fit, alvus constringitur, & hic paroxysmus plerumque intra aliquot horas supervenientibus ructibus vel vomitu aut sudore solvitur.

Scholion.

Hunc affectum ego aliquoties observavi in hypochondriacis famelicis, cujus symptomata ab inflatione stomachi unice mihi repetenda videntur, & hujus dextra pars sæpius in tumorem vesicæ inflatæ instar juxta scrobiculum cordis in dextro latere attollitur. A nimia igitur ventriculi, qui totus nervosus est, distensione nervorum paria, præsertim intercostale & octavum, tensionem & tractionem patiuntur, unde partes, quas pertranseunt, spastica strictura & crispatura affici, & hæc mala produci, non mirandum est. Similem morbum Hungaris endemium, qui vocatur Tsoemer, in peculiari Dissert. Dr. Milether erudite descripsit.

§. XXX.

Crudititas, à nimia ingestorum copia & concoctione difficilius orta, placidum somnum impedit, & capiti ac toti corpori gravitatem infert.

Scholion.

Neque certe Sanctorii dictum Sect. IV. aph. 40. experientia vel ratione caret, videlicet seminum nihil magis inturbare, quam ciborum corruptelam; Nam fortius laceratis ventriculi nerveis tunicis totum systema nervorum, cum quo princeps hæc partium magnam communicationem & consensionem fovet, præter naturam tenditur, ac stringitur, unde inquietudinis origo: & quia constrictis excretorium meatibus pauca secedunt, & perspiratio minuitur, sequitur, ut totum corpus inde gravitatem & languorem persentiat.

§. XXXI.

Sicut concoctio, recte sentiente Celfo, Lib. I. Cap. IX. in omnibus corporis affectibus necessaria omnibusque vitiis occurrit: ita cruditas maxime lædit, & quoties offensum corpus est, vitiosa pars maxime sentit.

Scholion.

Quare prudentes medici, tam imminentibus, quam præsentibus morbis, item in omni dolore, & vulneratione, id omni cura efficere debent, ut cruditates præcaveant & parum cibi adsumatur; nam excretionibus sub morbis labascentibus fomentum semper novum, & majus illi ab intemperantia & cruditate, omnium malorum matre, accipiunt.

§. XXXII.

Rectissime enim Hippocr. lib. I. aph. 22. qui à satietate veniunt morbi, vacatione curantur. Optima ad vitia, quæ ex nimis copioso sumpto cibo & cruditate prima in regione proveniunt, tam præcavenda, quam fananda, sunt abstinencia, alvi ductio, vomitus & liberior perspiratio & medicamenta roborantia.

§. XXXIII.

Abstinencia & inedia sunt validissima adversus vitia stomachi ex repletionem præsidia.

Scholion.

Si ullum, certe hoc magni Hippocratis salutare præceptum diæticum est, quod Libr. IV. de morbis §. 10. proponit: si homo parum edit & bibit, in nullum morbum incidit. Neque enim ulla res, sunt verba Celsi, Lib. II. Cap. XVI. magis adjuvat laborantem, quam tempesta abstinencia, quam etiam semper morborum initia deside-
V rant.

rant. Nam ut ea summas in secunda valetudine sibi partes vindicat; ita quoque in adversa plurimum momenti obtinet, sanat enim plenitudinem nimiam, obesos, pituitosos, vitiaque ex cruditate nata, quo rectius inedia à veteribus inter ea auxiliorum genera recensetur, quæ corpus nostrum tam sanum, quam agrum vacuant, siquidem, ut *Galenus in Comment. Sect. II. aph. 17.* docet, *nullo in ejus locum, quod fuit vacuatum, accedente alimento, fit, ut inedia vacuet.*

§. XXXIV.

Vomitio & alvi per infusa elutio optima quoque sunt adversus nimiam repletionem à cibis auxilia.

Scholion.

Nihil enim tam tempestive faburram in ventriculo contentam & molestatam ciborum copiam exonerat, quam vomitus, qui brevissima via statim, quod molestum est, expellit, unde mox incommoda disparere incipiunt. Et erant hæc duo repletionis præsidia olim athleticis familiarissima, qui ut melius ferrent tam copiosum alimentum, & novo ingerendo idonei essent, & clysmatibus & vomitionibus tantum non quotidianis utebantur. Vomitus vero ciebant lenissimis, bibebant enim hyssopum contritum in aqua, cui aliquid aceti vel salis miscebant. Et veteres quoque Romani utebantur vomitu sæpius ex aqua tepida adjecto sale & melle, ante & post cœnam, & vomitandi consuetudine Imperatores Vitellius & Caligula luxuriæ & comestationibus frequentibus sufficiebant. vid. *Sueton. in Vitell. Cap. XII. item in Nerone Cap. XX. & Celsus Lib. I. III.* meminit athletarum consuetudinis, qui quotidie ejicientes vorandi facultatem moliuntur. Ut vero ad vomendum faciliores essent veteres, familiari in usu habebant certa instrumenta, pennas nempe & lora vomitoria, quæ intrudebant in ventriculum, digito quoque quam longissime in fauces intruso vomitum provocabant, qua de re latius egit *Cl. Dr. Schulzius in eruditissima Dissert. de athletis veterum eorumque dieta & habitu §. 61. 62. 63.* Idem laudatus *Celsus* alio loco, nempe *L. I. c. 3.* vomitum nimium repletis, & qui parum concoxerunt, suadet & hanc adjicit rationem: *sive plus est, quam quod concoqui possit, periclitari, ne corrumpatur, non oportet, sive jam corruptum est, nihil commodius est, quam id, qua via primum expelli potest, ejicere.*

§. XXXV.

Denique ciborum nimia copia robustam naturam sæpius ad purgationem sollicitat.

Scholion.

Hinc *Hippocrates Libr. de purgantibus* cibis etiam adscribit vim purgantem, si supra modum edantur, & addit, quod homines purgentur ab iis, velut à sinceris medicamentis, id est, purgantibus, verum minus & tardius, hinc concludit his verbis: clarum igitur est, quod & cibi medicamenta existant. Si vero natura non sponte se à cruditatibus per secessum liberet, tunc utique eam stimulare clementiori laxante oportet. Cujus rei gratia pilulas aloëphanginas vel Avicennæ, Cratonis vel Becherianas commendamus; quarum tamen operatio auspiciatior semper erit, si ante earum usum acidum temperantia, quod alvum moventibus valde resistit, exhibeantur.

§. XXXVI.

Vitia ex mala concoctione nata optime somnus & perspiratio liberior discutit.

Scholion.

Sicuti somnus & quies præter naturalem nervosarum partium agitationem, motum & spasmus, qui perspi-

rationi liberæ admodum adversus est, sedat ac sistit: etiam illas generis nervosi adfectiones, quæ ex laesente & nimium distendente ventriculum cruditate perveniunt, componit, hinc facta liberior perspiratio, quod adhuc residet vitii in partibus solidis, promte discutit. Præclara igitur sunt & sapientiæ plena illa facta, quæ nobis hanc in rem tradit *Celsus Cap. Libr. I.* præcepta: *qui bene concoxit, mane tuto surgat, qui parum, quiescere debet, & si mane surgendi necessitas fuerit, redormire. Qui non concoxit, ex toto quiescere, ac neque labori se, neque exercitationi, neque negotio credere.* Ipsa quoque experientia, ceu optimarum rerum magistra, deprehendimus, opportuno reddi somno per urinam & perspirationem, item per alvum melius & copiosius excretionem fieri, & totum corpus levius atque agilius inde reddi. Qua de causa etiam ex meo quidem certe salutari consilio omnia evacuationum genera, quo etiam pertinent thermæ & acidulæ cum multo utiliori fructu post sufficientem somnum & concoctionem factam usurpantur. Tum etiam infusa herbarum ex aqua calida ad promovendam perspirationem utilissime sumuntur, & frictiones ad discutendum in habitu corporis, qui in vitio est, humorem adhibentur.

§. XXXVII.

Liberior perspiratio, quæ aucto sanguinis circulo fit, stomacho laborantibus bene succurrit & ad concoctionem juvat.

Scholion.

Perspirationem egregie adjuvat corporis motus & exercitatio, unde *Celsus Lib. IV. Cap. V.* in omnibus stomachi vitiis hanc ipsam primo levem, deinde majorem & maxime eam, quæ superiores partes moveat, laudat, idque adserit quoque *Libr. I. Cap. VIII.* his verbis: *si quis stomacho laborat, legere clare debet, perlectionem ambulare, tum pila vel armis aliove genere quo superior pars movetur, exerceri.* Spectat huc quoque sapiens dictum *Hippocratis*, quod proponit *Lib. Epid. VI. Sect. IV.* *exercitatio sanitatis est vesci citius satietatem & non refugere laborem.*

§. XXXVIII.

Neque tantum laboranti stomacho in concoctione juvanda evacuantibus, sed & roborantibus succurrere oportet, quo eo melius & digestio & expulsio ingesta fieri possit.

Scholion.

Id consilium secuti quoque fuerunt laudatissimi veteres, quare *Celsus Libr. I. Cap. VIII.* stomacho laborantibus suadet, ut non aquam, sed vinum calidum jungerent bibant, item post cibum vinum frigidum, sed per siphonem. Idem quoque sentit *Hipp. lib. de Affect. 52.* cum ait: *quicumque cibi aut flatum, aut æstum aut morsum, aut repletionem, aut tormen faciunt, talibus liberat vinum meracum insuper potatum; corpus enim à vino calefactum per calorem amovet ea, quæ in stomacho sunt à cibis & potibus & à similibus.* Et *Celsus Libr. IV. Cap. V.* jejunis potionem ex absinthio, hyssopo & ruta commendat, & jubet uti cibis & potionibus calidis primo aquæ vel etiam vini austeri. Patet hinc egregium stomachum roborantium usus, quo in genere sunt & volatile oleosum Sylvii, stomachale Michaëlis, nostrum item liquores balsamici ex oleis penetrantibus ætheribus & suaveolentibus parati, qui balsama vitæ audiuntur, quæ utique moderata & frequenti dosi egregie discutunt cruditates, concoctionem adjuvant & stomachi vitiis succurrunt, modo & sapiens & egregium illud *Celsi* præceptum, quod proponit *Libr. IV. Cap. V.* observetur, & hoc est: *illud in omnibus stomachi vitiis præcipiendum, ut quomodo se quisque ager refecerit eodem sanus utatur, nam redit huic imbecillitas sua nisi iisdem defenditur bona valetudo, quibus reddita est.*

Tandem

De alimentis intemperatis ingentique acidorum noxa. 251

Tandem & illud adjiciendum putamus, motum in aëre fereno ac puro, qualis est ruralis, & animum ab omni cura & sollicitudine vacuum mirifice concoctionem adjuvare & stomachi vitiis tollendis aptum esse.

C A P U T III.

De alimentis intemperatis ingentique acidorum noxa.

§. I.

Alimenta, quæ temperie gaudent, sicuti sanguinis crassi ac naturæ admodum convenientia atque amica sunt, & corpus nutriunt & robur ac vires ipsi præstant; ita eminenti facultate & sapore prædita, tum ad nutritionem, tum ad vires conservandas minus sunt idonea, ut potius morbis materiam & fomitem præbeant.

Scholion.

Hanc sententiam plenissime confirmat *Hippocrates Libr. de veteri medicina §. 26. Verum robur & augmentum per nihil aliud contingit, quam quod probe temperatum est alimentum, & quod nihil intemperatum & forte habet §. 24. & 2. hos cibos incommodos esse & ingestos lædere*, qui intemperati sunt aut nimis falsi, acidi, aut amari aut dulces aut fortes, copiose exponit & dicit, eos humana natura potentiores esse, qui non superari possint, quibus conferri potest *Lib. de Natura Humana §. 6.*

§. II.

Temperata alimenta corpus humanum conservant & roborant, quia vitales humores, temperie blanda gaudentes, calore & motu amissos refarciunt.

Scholion.

Sanguis temperatus admodum humor est, gelatinosus, omnis saporis expers, ex variis elementis, oleosis, aqueis & subtilioribus terreis commixtus, de cujus natura, mixtione atque ingredientibus latius egimus in *Tomo priori*, qui *philosophiam corporis humani vivi & sani* pertractat, *Cap. 5.* Et cum temperata, ut carnes, lac, ova, panis, ratione mixtionis valde conveniunt cum sanguine, quare non modo eum generant, sed & ad nutriendum & robur corpori conciliandum præ aliis admodum sunt idonea.

§. III.

Omnia itaque intemperata esculenta & potulenta crebrius & copiose ingesta, quia non conveniunt cum temperata & blanda sanguinis mixtura, & lædunt corpus & sanitatem offendant.

Scholion.

Equidem non mea est sententia, ac si plane nullum intemperatum intus sumi debeat, cum videamus, & dulcia & amara & falsa & spirituoza moderatori usu non facile nocere, sed sæpius medicinæ loco esse; sed illud tantum urgeo, quod hæc ipsa copiosius ingesta nocere, neque corpori alimoniam præbere possint. Quare etiam *Hippocrates Libr. cit.* non in totum damnat diversos cibos, si probe inter se commixti & contemperati fuerint, sed saltem in suo genere fortissima, separata neque aliis contemperata, ut inter acida acidissimum.

§. IV.

Ex intemperatis nullum tam infestum humanæ naturæ est, variisque modis lædit, quam acidum copiosius assumptum, quia mixtioni sanguinis plane est adversum

eamque destruit, crassiores coagulat & subtiliores sulphureas ejus partes figit.

Scholion.

Neque hæc in re destituti sumus veterum consensu: Ipse *Hippocrates Libr. de Vict. acutor.* acida plus nocere foeminis, quam viris, adfirmat & *Libr. de affectionibus* vim erodendi ipsis adscribit. *Celsus Lib. II. Cap. XVIII.* acetum infirmis nunquam dari debere præcipit, & *Cap. XX.* acida alimentis mali succi annumerat.

§. V.

Alimenta, quæ acidis succos fovent, id habent incommodi, ut excretiones retardent, sanguinem & lymphaticos humores inspissent, coagulent, viscera ad obstructions & infarctus disponant, solennes sanguinis excretiones morentur, & hac ratione ad ingenerandas longas & graves ægritudines magnam vim & potentiam obtineant.

Scholion.

Quum diligenti observatione & attenta ac crebra experientia teste liberior acidorum in cibo & potu usus nunquam fere non valde noxius & naturæ humanæ inimicissimus deprehensus sit, inde perducti eo sunt quidam superiori seculo medici, ut acidum omnium morborum causam adferere non dubitaverint, quam sententiam tamen peculiari tractatu ego adhuc juvenis olim sat validis argumentis infirmare laboravi. Quamvis autem non omnes morbos foveant atque ingenerent acida, ad plurimos tamen producendos utique conferunt.

§. VI.

Quæ acidi sunt generis atque naturæ, ea cumulatius assumpta alvinam excretionem retardare, indubia docet experientia. Hinc recte *Hippocrates Lib. de dietis* acetum alvum potius fistere, quam movere pronunciat.

Scholion.

Neque difficulter hujus rei inveniri poterit ratio. Nam biliosi succi, qui satis largiter ex amplo hepatis viscere primum in intestinum descendunt, deterfiva sua alcalina sulphurea virtute acidis, è ventriculo egredientes succos, non modo contemperant, sed & intestinorum tunicas ad propulsorium motum stimulant, idque cum omnibus amaris commune habent, quæ excretiones alvinas egregie juvare solent. Jam vero nihil est, quod tam valide bilis alcalinam & absterfivam naturam infringat, quam forte acidum, adeo, ut mutua mixtione postea corrosivam subinde naturam induant, id quod æruginosa bilis testatur. Deinde videmus indies, hypochondriacos sic dictos, nec non melancholicos & quartanarios non aliam ob causam, quam quod copiosum prima in regione semper foveant acidum, alvi esse adstrictioris, quam absorbentia & quæ acidum temperant, ut mannata & fontes medicati, Carolinæ thermæ, quæ alcalinum sal in sinu fovant, longe felicius in iis expediunt, quam fortiora pharmaca, eo quod eorum vis purgativa volatilis salina forti acido plane invertatur. Et quoniam in iis corporibus ordinario acidi succi biliosis prædominantur, hinc fit, ut eorum excrementa, quorum color alias ex flavo brunus, qui bili debetur, pallida & albicantia appareant.

§. VII.

Acida supra modum comesta generationem succi chylosi plane impediunt, ita ut nec sanguis bonus, nec nutritius succus laudabilis produci possit.

Scholion.

Chylum emulsionem quasi naturalem esse, ex alimentorum roscidis, aqueis, gelatinosis, oleosis partibus

invicem inter se exacte mixtis confectam, nemo negabit. Nihil vero in natura reperitur, quod hanc aquearum cum oleosis partibus mixtionem magis impediatur & destruat, quam acidum, quod statim terreis & oleosis sese adsociando coagulum ad fundum secedens efficit. Destruata itaque statim sub primo ortu succi chylosi, qui proxima materia & sanguinis & lymphæ nutritiæ est, natura ac crassi, non mirum est, propter abundantiam succorum primis in viis acidorum corpora & robore & nutritione debita defraudari. Canes Bononienses minimæ staturæ permanere ferunt, si primis statim mensibus modicum aceti ipsis datur. Atque eam ob causam etiâ fit, ut acetum polysarcia laborantibus commendetur. Notum præterea est illud memorabile exemplum apud *Famianum Stradam Libr. VIII. de bello Belgico*, ubi refert, quendam præfectum Regis Hispaniarum inedia ætate adeo increvisse, ut fascia e collo demissa sustinendus venter esset, quod ille incommodum minuere volens, vino valedixit & aceto usus est, effecitque, ut ante mortem octoginta librarum pondere decrevisse compertum sit.

§. VIII.

Nocent quam maxime tam esculenta, quam potulenta acida iis, qui ventriculum habent infirmum, in quo videlicet succi facile coalescunt, diutius retinentur, nec probe per alvum transeunt.

Scholion.

Horum in numero sunt infantes, senes, mœrore animi aut morbo præcedente confecti, maxime omnium vero hypochondriaci & hystericae foeminae, & quibus caput infirmum est, vel spasmo laborat. His omnibus fructus horæi, qui multum acidi habent, ac fermentatione in succos acidos transeunt, vina acida & cerevisiæ triticeæ, quæ facile coalescunt, insensibilissima sunt.

§. IX.

Acida ingesta & diutius retenta ipsa mora pejora fiunt, & commixtione cum biliosis succis valde corrosivam & virulentam naturam induunt, ita, ut nerveas ventriculi & intestinorum partes exquisitissimæ & tennerrimæ sensationis, quæ cum toto nervorum genere consentiunt, arrodendo gravissima symptomata suscitent.

Scholion.

Hæc veritas antiquissimis medicorum non ignota fuit. *Hippocrates Libr. de prisca medicina §. 34.* in fine prodidit: quos acuta acrisque ac æruginosa bilis adfligit, qualis mox rabies & morsus viscerum ac pectoris & desperatio? non sedatur autem hæc, priusquam eadem expurgetur & prosternatur & aliis permiscatur. Nam atra bilis, quæ atro carbone semper notata veteribus fuit, non aliunde suam habet originem, quam à miscela fortis acidi cum succo bilioso, cujus color primum fit viridis, deinde niger, si diutius in corpore retineatur. *Martianus* qui optime commentatus est in Hippocratem, pag. 382. noxam, quam acida in primis viis excitant, egregie describit, dum inquit: acidum in ventriculo existens vapores acres huc & illuc diffundit, quotidie observatur dum acetum non est conveniens, quemadmodum etiam in illis, in quorum ventriculo cibi acescunt; nam communiter talibus caput dolet propter cerebri membranas, quæ ab acetoso vapore punguntur, idque huius humoris adeo proprium est, ut raro caput per consensum à ventriculo dolere invenias, quin acetosa in eo consistant, & qui epilepticis motibus sunt subiecti, à symptomate corripuntur, cum acida in ventriculo peccant, id enim vomitiones subsequente palam faciunt, & ego observavi, quam plurimos podagricos ab eadem causa doloribus tolli consuevisse liberatosque aut saltem mitigatos, ubi acetosa evomissent. Taceo mulieres variis uteri symptomatibus conflictatas, quæ à vomitione acetosa e vestigio liberabantur. Et præ-

fecto à copioso acido, ut patet in hypochondriaci morbus melancholia nascitur, somnus absurdus ac vanis imaginibus turbatur, animus continua tristitia atque metu concutitur, cardialgia quoque, frequens vomitio, ardor, soda, continuæ eructationes, animæ defectio, circa præcordia anxietas, alvi quoque crebrior defectio vel cholera etiam frequentissime inde suam trahunt originem.

§. X.

Illud quoque incommodi habent cruditates, quæ in prima regione consistunt, acidæ, ut lacticia, dulcia & pingua corrumpendo, ea quasi in venenum convertant.

Scholion.

Lac, si ventriculus est firmus & purus, optimum alias corpori præbet nutrimentum, si vero infirmus est & acidis succis confertus, hostile illi inducit coagulum, inde magnæ molestiæ, ut cardialgiæ, anxietates, ventriculi inflationes, capitis dolores, flatulentiæ intestinorum, alvi obstructions oriuntur, atque ob eam causam, hypochondriaci, senibus, quibus compressa alvus est, nihil lacte potest esse infestius. Neque dulcia, nisi ingenti mole, firmis & qui laboribus dediti sunt, facile nocent, sed alvum apertam mollemque servant. Si vero acidum restagnat in ventriculo, vel cum acidis adsumuntur, & paulo diutius intus retinentur, fermentatione tam corrosiva evadunt, ut cholera vel tunicarum intestinalium corrosio metuenda sit, & semper cum dolore & tenesmo & sine odore excrementa alvi pallida dejiciantur. Eodem modo pingua & butyro frixa in ventriculo acidum offendunt humorem, mutua effervescentia & conflictu excitant ardentissimos flatus seu ructus, summa cum molestia junctos, ut subinde tussis vel vomitio irritetur. Quin etiam optime alias nutriendi cibi, ut sunt ova sorbilia, carnes juniorum animalium gelatinosæ, in impuro & acidis succis referto ventriculo ut plurimum corrumpuntur, ut major læsio, quam nutritio & robur inde expectanda sint. Ex quo jam liquidi apparet ratio, cur hypochondriaci, hystericae, febricitantes, & qui cum alvo adstricta flatulentis & spasminis subinde exercentur, ad omnem fere cibum etiam optimum pessime se habeant.

§. XI.

Nihil est, præter frigidum excessivum, in rerum natura, quod tam promptè fluxiles humores inspissat, coagulat adeoque ad circuitum per minima vasa ineptos, & ad stagnationem aptissimos reddit, quam acidum; nihil quoque est, quod teneriori nervosarum partium texturæ, tum ob constipationem, tum ob arro- sionem, tam hostile sit, quam illud ipsum: unde non mirum est, affectus spasmodicos & hypochondriacos, præsertim concursantibus aliis causis, & ab hisce generari, & ab iisdem foveri.

Scholion.

Ego hac in re experientiam ceu testem provoco, ex ingenti hysteriarum numero vix unam dari, quæ non ex acidorum & fructuum horæorum abusu sub paucopotu & vita sedentaria in inordinatum mensium fluxum, & malum inde subortum hypochondriaco-hystericum inciderit, quod mœstitia diuturniori & perversa in medendo tractatione ita sæpius invalescit, ut nulla arte vinci possit: sunt vero plures causæ, cur sexui feminino tam insensum sit acidum.

§. XII.

Quicumque evitare volunt graves & diurnas ægritudines, ii maxime sibi cavere debent ab acidis intemperantius adsumtis, eo quod hæc ipsa motibus vitalibus progressivis, secretoriis & excretoriis admodum sint adversa, humores coagulent, polyposas & calculosas concretiones inducant, visceraque infarciunt.

Scholion

Scholion.

Inter chronicos morbos malum hypochondriacum & scorbutus præcipuum locum tenent, & misere per multos annos homines excruciant, quia in visceribus radices agunt, si infarcta, obstructa vel nimium distenta, aut indurata & scirrhusa, præsertim hepar, pancreas, lien, renes fuerint, vel si polypi in vasis majoribus subsistentes liberum & promptum sanguinis circuitum impediunt. Hæc omnia prompte fiunt, si gelatinosa sanguinis pars ab acido coagulatur ejusque sulphurea, quæ caloris genitrix est, figitur. Rectissime enim statuit *Helmontius*, acidum venis admodum esse hostile, & morbos chronicos gignere, quia bilis generationem impedit. Nam acidum sanguinem recenter è vena emissum prompte coagulat, & liquor acidus, siphone in venas animantis vivi injectus, brevi illud enecat.

§. XIII.

Acida copiosius sumta, dum migrant in sanguinem, non modo ipsi fluxilitatem demunt, sed & congregiendos cum particulis terreis & salinis copiosum tartareum sal in humoribus produciunt, à quo intra corpus retento, nec per renales tubulos everso, varia calculorum genera in renibus, vesica, ductibus biliosis & variæ arthritidis species oriuntur.

Scholion.

Ego multoties observavi, ab immoderata vinorum, quæ multum acidi continent, potione & arthritidem & renalem calculum, præsertim accedente quadam hæreditaria dispositione, diu adfixisse. Helvetos & Batavos vesicali calculo maxime esse obnoxios, notissimum est; cujus causa dubio procul in crebrum lacticiniorum ac acidorum usum rejicienda venit. *Cyprianus*, celeberrimus ille Angliæ lithotomus, referente *D. Allen in Synopsi universæ medicinæ*, inter 4000. in quibus extractionem calculi vesicæ tentavit, oenopotas quamplurimos, sed ne unum quidem zythopotam calculosum invenit, unde cerevisiam blandam & mitem magis, quam vetustam, ad potum ordinarium commendat.

§. XIV.

Acida foeminis gravidis & lactantibus & puerperis, & quibus ob ætatem menses deficiunt, valde perniciose esse, experientia edocemur.

Scholion.

Horum ratio ex modo dictis facile elici potest; nam nutritius succus, qui infantem in utero & extra eum alere debet, miscela acidorum destruitur atque intemperatus fit. Infantes, qui mammas sugunt, si nutrices acida sumserint, inde ardorem & tormina percipiunt, & gravidæ, si fructibus horæis abutuntur, infantes vel debiles gignunt, vel in puerperio graves poenas luunt. Ubi menses plenarius est ob ætatem defectus, facilis est dispositio ad chronicas & spasmodicas passiones, quam cum acida augeant, omni cura ea evitare oportet. Puerperis vero nocent, quia lochiale impuri sanguinis fluxum cohibent.

§. XV.

Utut acida intempestivo & immoderato usu admodum noceant, moderate tamen adsumpta, ubi corpus nimium æstuat & celerius sanguis movetur, sique æstas est ferventissima & corpus juvenile motu exercetur, tantum abest, ut valetudinem offendant, ut potius conferant, atque appetitum & digestionem excitent.

Scholion.

Ita certe est, ut, quæ nocere vehementer possunt abusu, prudenter usurpata prosint plurimum. Medicinæ aque potius, quam alimenti vicem præbeant ejusmodi excessivis facultatibus donata, quorum etiam vina

Frid. Hoffmanni Oper. Tom. I.

acidiuscula & spirituosæ referimus. Et profecto alimenta illa validiora, quæ potius ut medicamenta consideranda sunt, ingentia illa in differenti corporum natura discrimina satis abundeque docent, quæ observatio utique in medicina tam diætetica, quam therapeutica summe necessaria est, multumque momenti habet. Perpetuum enim id esse debet, ab uno homine, qui hoc vel illud sine læsione ferre possit, non judicandum esse ad alterum. Noti mihi sunt medici, quibus ob temperaturam cholericam acida nihil fecerunt incommodi, & ob id perducti sunt, ut insens fere acidum, nec morbosum, neque in hypochondriacis etiam accusandum esse contenderint. Tam corrupta sæpius est argumentandi ratio, cui quotidiana experientia contradicit.

§. XVI.

Quam perniciosus acidus vitæ & sanitati est humor, & ex omnibus intemperatis, qui adsumuntur, pessimus, tam promptum ac facile est, si in prima regione consistit, eum temperare, corrigere & plane innoxium reddere.

Scholion.

Id præstant efficacissime omnia terrea, alcalina, ut conchylia, ovorum testæ, cancerorum lapides, item salia fixa alcalina & hujusmodi alia quamplurima, quæ absorbendo, invertendo omnem statim noxam adimunt. Sunt hæc simplicissima, domestica & parabilia medicamenta, sed probatæ virtutis & præstantioris usus, quam ulla alia pretiosa, summa arte conquisita, vel chymico igne confecta. Et certe hoc nomine *Tackenius* & *Sylvius*, qui horum usum summe proficuum in artem nostram introduxerunt, eximiam laudem merentur. Optandum certe foret, ut & alii intemperati, & qui in vitio sunt, humores, quales sunt nimis acres, falsi, biliosi, visceri, tam cito & tam valide aptis remediis & specificis alterantibus corrigi & inverti possent. Certe absorbentia, si quis iis recte uti potest, subjunctis nempe clementioribus laxantibus & temperatis balsamicis ac roborantibus, tanta pollent, tum in avertendis, tum in mitigandis chronicis & gravissimis, quæ fomenta sua primis in viis habent, passionibus efficacia, ut longissime aliorum medicamentorum vires post se relinquunt.

§. XVII.

Inter cibos intemperatos & insalubres referendi etiam sunt nimium sale conditi & immoderatus usurpati.

Scholion.

Est quidem sal commune non alimentum, sed potius ejus condimentum præcipuum & utilissimum, quia ciborum dissolutionem non modo adjuvat, sed & saluberrimas excretiones maxime per alvum & urinam promovet. Rectissime enim *Hippocrates Libr. de affectionibus* de falsis pronuntiat, quod alvum & urinam cieant. Aquas falsas purgationis causa & foenum Græcum falsum, ut refert *Celsus Libr. III. Cap. XXVII. Asclepiades* præscripsit: atque etiam acidularum & thermarum operatio purgativa & diuretica salinis ingredientibus præcipue adscribenda est. Aqua falsa alvo infusa plus eam stimulat, ac forte purgans. Deinceps & sal commune & omnis generis salia non modo alvum promovent, sed & urinam provocant, urinosos renum tubulos apertos servando & stimulando, quo magis palam fit salium usus ad sanitatem proficius.

§. XVIII.

Salia cum cibis sumta non remanere diutius in corpore, sed rursus mox tam per alvum, quam per urinam excerni debent, alias dulces & ruscidas sanguinis ac lymphæ partes vitiant, & morbis, quorum origo a sale est, causam ac fomitem suppeditant.

Scholion.

Salia sibi relicta minime corporis animantis principia constitutiva ingrediuntur, sed præstito usu vel per urinosum renum cribrum, vel per alvum rursus evehuntur. Illud enim sal, quod in urina continetur, maxima ex parte sali communi, quod etiam arte elici potest, debetur. Nam omnium salium promptissimum est iter per renes, qui primum aqueos & tenues in sanguine humores evehunt, unde urinæ sunt aquosæ & pallidæ, postea vero crassiora & sale turgida liquida admittunt, unde urinæ fiunt coloratiores. Quo plus itaque salis, sive inter cibum, sive inter medicamenta, sive cum aquis medicatis & thermalibus, adsumtum fuerit, eo largiorem salium copiam urinæ continent, quod vel ex earum per instrumentum staticum instituto examine, vel leniori evaporatione constat. Si itaque salia in corpore accumulata per congruum eorum emunctorium, quod renes constituunt, si vitio laborant, vel spasmo constricti sunt, non probe separantur, sed remanent: tunc multi ex sale vitioso prodeunt morbi, cujus generis sunt varia pustularum, vesicularum & exulcerationum genera, artuum dolores, rheumatismi, catarrhi, fluxiones falsæ & acres, diarrhœæ, tormina, cutis erosiones & varia calculorum genera, in quibus omnibus medicamenta salina, sive volatilia sive fixiora, tantum abest, ut prosint, ut potius præsentaneam noxam inferant atque symptomata exasperent.

§. XIX.

Non præsentior medicina adversus morbosæ salia & ab iis nascentes morbos ipsa communi aqua frigide vel calide largius hausta datur, utpote quæ commode omnis generis salia diluit atque imbibit. Præterea viscidos humores dissolvit, obstructa vasa aperit, & per urinam æque ac per sudorem excrementitia salia evehit.

Scholion.

Quare non possum non laudare consuetudinem, quæ nostris temporibus invaluit, aquam domestica quadam herba alteratam copiosissime & calidissime hauriendi, quæ mane & peracta digestionem egregie pro valetudine est. Et hæc quoque mihi videtur ratio, quare scorbutus, qui olim hisce quoque regionibus communissimus fuit, in eminentiori gradu rarius conspiciatur. Sed uti in omnibus, ita & hic moderatione ac prudentia opus est, qua de re satis egimus in *Dissert. de Aqua Medicina Universali*. At ego quidem non possum non hoc loco solennem, sed detestabilem consuetudinem improbare, qua foeminæ præsertim, quæ debile genus nervosum obtinent, infusum fabarum Caffée non semel, sed bis vel aliquoties de die hauriunt. Hac enim ratione efficiunt, ut, cum infusum illud ad acidum primarum viarum domandum alias non sit inutile, nervoso tamen generi inimicum immoderatiore usu toti corpori & maxime nervis inducat imbecillitatem, unde, si in morbum quendam acutum incidunt, rarius, quod expertus sum, evadunt.

§. XX.

Intemperatis quoque & insalubribus cibis jure nimium dulcia, mellita, saccharata, fructus dulces & musta annumeranda sunt, cum modo fermentatione acefiant, modo valde tenaces & glutinosos humores reddendo viscera infarciunt, obstruant & ad generationem morborum chronicorum multum contribuant.

Scholion.

Uti quidem sanis & robustis omnia sunt sana, nec facile lædunt, ita etiam dulcia, si non diutius primis viis inhaerent, sed alvo mox expelluntur, non adeo nociva sunt. Aliter vero res habet in infirmis, & ubi ventriculus laborat, tunc enim facile coalescunt. Et hanc

ob causam *Celsus Lib. I. Cap. II. pag. 25.* de hisce hanc profert sententiam: *condita omnia duobus de causis inutilia sunt, quoniam & plus propter dulcedinem adsumitur, & quod modo par est, tamen ægrius concoquitur; secunda mensa bono stomacho nihil nocet, in imbecillo coalescit, omniaque prædulcia stomacho aliena idcirco.* Auctor *Cap. XXV. judicat.*

§. XXI.

Experientia clarum est, dulcia jejuno sumpta ventriculo appetitum destruere & vim digestionis infringere, manifesto documento, succum illum fermentativum & menstruaalem, qui alimentis optime solvendis servit horum copia multum debilitari.

§. XXII.

Eadem dulcia, quia glutinosos & viscidos humores reddunt, morbos, qui ab affluentia & decubitu pituitæ fiunt, exasperant; præter hæc & atoniam pulmonibus inferunt, eorumque fibras nerveas & membranas solvendo decubitus viscidæ pituitæ ibi causantur. Simili ratione tunicarum ventriculi & intestinalium robur & tonum laxando digestionem minus patrocinantur.

Scholion.

Quod vel ex eo cognoscitur, quia non tantum à nimio eclegmatum, pectoralium & dulcium usu gravitas in ventriculo fit, sed & alvus nimis relaxatur; & videmus, ut *Crato* animadvertit *Lib. V. Consil. Med. VII.* à nimis frequenti usu eclegmatum eos, qui pectoralibus morbis laborant, ut tussis humida & asthmatis diuturno, interdum in hydropem & tumores pedum oedematosos incidere.

§. XXIII.

Eadem alimenta propter glutinosos, quos ingenerant succos nimis corpus replent, & visceribus vasculosis ut sunt hepar, lien, pulmo, admodum inimica sunt.

Scholion.

Dulcia replere jamdudum notavit *Hippocrates Lib. II. de diæta §. 33.* & *Celsus Lib. IV. Cap. 9.* omnia dulcia lienosis inimica pronuntiat. *Oribasius Lib. IV. Cap. 23.* auctor est, omnia dulcia lienem & jecur obstruere & scirrhum producere. Quod vero dulcia multum nutrant & venas repleant sanguine & succis malis, *Nonnius de re cibaria Lib. I. Cap. 41. p. 129.* clare hoc experimento comprobatur: *uvæ, scribit, non mediocriter præbent alimentum quod in vinearum custodibus observare licet, qui dum duos prope menses solis ficibus & uvæ vescuntur, corporis molem egregie augent, sed cum desierint eas comedere, celeriter iterum concidit & detumescent, quia carnem non solidam, sed fluxam generant, minus tamen, quam ficus nutriunt.* Quo etiam pertinet illud, quod *Antonius Musa Brasavolus* refert *Comment. in Hippocrat. de victu acutor.* Ferrariæ suo tempore fuisset anseres farfiles, quorum hepar duas sæpe libras pendebat. Ut autem illud in molem excreveret, ficibus illos alebant. Spectat huc *Horatii Flacci* illud: *pinguibus & ficis pastum jecur anseris albi.*

§. XXIV.

Igitur abstineant à prædulcibus omnes plethorici phlegmatici, imbecilles, senes, pueri, mulieres, in cachexiam vel alios morbos longos proclives, qui spongiosi habitus sunt, qui exercitationibus minus sunt dediti multo magis vero hypochondriaci.

Scholion.

Infantes, qui dulcibus delectantur, facile laborant lumbricis, qui optime inde & generantur & nutriuntur. Præterea dulcium usum intemperantiorem lympham corrumpere, vel illud argumento esse poterit, quod dentes ab eo facile nigredinem & cariem contrahant, atque in senibus, item hypochondriacis cruditates acida

das augeant. Si quis vero dulcia velit adsumere, is ex consilio *Celsi* melius fructus dulces primo cibo comedat *Lib. I. pag. 25.* Idem suadet *Nonnius Libr. cit. pag. 71.* quod nempe, si quis velit vesci melonibus & aliis dulcibus fructibus, eos primum sumere & deinde probos cibos comedere debeat, ut adventu melioris escæ illorum malitia obtundatur. *Cuspinianus in vita Friderici* auctor est, ab esu melonum quatuor Cæsares periisse.

§. XXV.

Ad minus salubres cibos referendos quoque eos duco, qui pistorii operis sunt, & placentarum nomine veniunt, ex butyro, ovis & saccharo confecta, vel in igne frixa, præsertim, si non satis spongiosam & tenebram, sed lentam & glutinosam habeant substantiam.

Scholion.

Dici vix potest, quam nociva sint illa edulia, quibus maxime infantes, pueri, sceminae & plerumque imbecilli, qui motus corporis non exercent, sed vitæ otiosæ indulgent, delectantur. Nam rarius hæc recte in ventriculo subiguntur ac resolvuntur, sed in tenacem & acidam massam degenerant, quæ modo tunicam intestinale villosam, qua chylus filtratur, obstruit, glandulasque gastricas & intestinales muco obducit, modo ad sanguinem delata lentam & vappidam lympham reddit, & glandularum obstructions causatur, unde impuræ lymphæ morbi oriuntur, quo in numero maxime est purpura, tam chronica, quam quæ acutis passionibus se adsociat, qui difficilem sanationem recipiunt. Neque ego aliam rationem conjicere possum, cur in iis locis, ubi hæc alimentorum genera quotidiani fere usus sunt, & albus fluor & purpura familiarissime in sceminas incidant, & illis etiam locis jam regnare cœperint, quæ ante aliquot lustra plane ab hisce affectionibus fuere immunia, idque frequenti sacchari usui in potu Coffec, Thee adscribendum esse puto, præsertim, si simul utantur cerevisiis triticeis.

§. XXVI.

Neque adversus vitia, quæ ex intemperatis, dulcibus & viscidis alimentis prodeunt, efficacius novi præsidium, quam ut iis omnibus abstineant, corpus probe exerceant, & aquas puras & simplices, balsamica herba temperatas calidissime bibant, & cerevisias præstantissimo lupulo Bohemico bene coctas hauriant, quod consilium vidi sæpe salutare.

CAPUT IV.

De noxa potus spirituosi vel nimis pauci.

§. I.

EX potulentis valetudini infensissimis & naturæ humanæ plane incongruis maxime eminent spirituosæ, quæ largiori & continuato usu & solidis & fluidis corporis humani partibus gravem noxam inferunt.

Scholion.

Per potum spirituosum præcipue intelligimus spiritus inflammabiles, ex fermentatione paratos, aquas sic dictas ardentes & vina valde potentia, omnes liquores ac cerevisias, quæ facile inebriant. Quorum noxa eo gravior, quo usus est liberalior & frequentior.

§. II.

Observatione frequenti & certa comperimus, eos, qui paulo liberalius aquarum ardentium potationi indulgent, morbis maxime chronicis, quæ sunt sanationis difficilioris, implicari, ut sunt hydrops, atrophia, icte-

rus, phthisis, anorexia, universi corporis languor, hectica febris. Nonnulli in ferale capitis morbos, ut apoplexiam, paralyfin, affectus soporosos, vel capitis dolores, incidunt.

Scholion.

Experientiam hac de re satis evidentem auctoritatibus etiam quibusdam præstantissimorum medicorum stabilire nobis visum est. Et hos inter eminet *Casp. Hoffmannus*, qui in *Præfat. de medicamentis officinalibus* aquarum ardentium abusum admodum increpat, cum ait: *jam etiam & mulieribus innotuit, aquas stillatitias propter empyreuma, quod plerumque omnes habent, ventriculis quibusdam sensibilibus adeo esse adversas, ut per usum earum manifestam perceperint læsionem vel ventriculi scilicet & appensorum intestinorum, vel hepatis, lienis, &c. num: olea stillatitia, quæ fere essentias vocant, tam aperte inimica sunt ventriculo quidem membranaceo, absumendo humidum illius radicale, hepatis autem aliisque visceribus sanguineis inflammando, aut, ut distinctius loquar, phlogosin excitando, ut quidam sitim perpetuam sibi accersiverint, quidam cachexiam biliosam, quidam hydropem calidum. Ne longe abeam, spiritus vini nostras, seu ex fecibus factus, seu ex baccis juniperi, tam est infestus hepatis, ut duorum triumve mensium spatio colliquatione introducta hydropem fecerit, qui omnibus funestus fuit.* Eiusdem quoque sententiæ est *Sylvius*, qui *Libr. I. Prax. Cap. X.* ab abusu spiritus vini frequentissime morbum regium & hydropem ascitem observavit; & *Cap. VII. §. 30.* plenariam appetitus prostrationem & abolitam ciborum digestionem à spiritus vini crebriori usu oriri adserit. *Lysterus in Exercitat. de hydropo* eum Londino popularem abusui spiritus vini & cerevisiæ adscribit: *hinc fundi*, inquit, *nostræ calamitas, hinc illæ lachrymæ.* *Wedelius in Pathologia* ab eodem spiritu largius hausto sæpius phthisin & frequentissime hydropem oriri observavit. *Vidimus*, pergit, *talia frequentissime, adeo ut si offeratur æger alias orthostedios, qui citra aliam aliquam causam manifestam conqueratur de inappetentia ciborum & lassitudine membrorum, solenne sit nobis quærere, an spiritus vini utatur, an fumo tabaci.*

§. III.

Omnis generis liquida spirituosæ copiosius sumpta partibus sulphureis inflammabilibus non modo intestinam calidam & expansivam in sanguine commotionem efficiunt, sed & systolen cordis & omnium impellentium vasorum augendo fluidorum progressum per universum corpus accelerant, unde pulsus fortior, celerior, & fitis horum usum ordinario sequi solet.

§. IV.

Auctiori sic facto sanguinis circulo & crescente æstu humida & subtilior sanguinis portio, quæ secundum naturam triplo major, quam solidi esse debet, plus justo consumitur, nutritio hinc perditur, partes elanguescunt, & sanguis intemperatus, imo ad coagulum valde pronus evadit.

§. V.

Spiritus vini, phlegmate suo privatus, mixtioni & consistentiæ sanguinis, lactis, chyli & succi gelatinosi plane adversus est, quia hisce rebus adfusus unionem & vinculum illud partium fluidarum & solidarum, in quo earum genuina crasis consistit, plane destruit, partes solidas à fluidis separando. Et quia rectificatissimus spiritus, sanguini humano infusus, illi forte & stabile coagulum infert, non datur eo præsentius ad sanguinis fluxum cohibendum auxilii genus.

§. VI.

Propter vim, quam spirituosæ obtinent animantium succos coagulandi, ad morbos, qui ex vasorum obstructionibus, viscerum indurationibus, polyposis concretionibus, scirrhescentiis nasci solent, valde disponunt.

Scholion.

Et hujus generis morbi utique sunt hydrops, cachexia, contumax febris, phthisis, atrophia: nam hi ipsi morbi, testante sectione corporum iis mortuorum, in hepatis indurationibus, pulmonum tuberculis, pancreatis & glandularum meseraicarum scirrhescentia, lienis infarctu & corruptione sedem suam & radicem fixam habent. *Riedlinus in Lin. Med.* refert, quendam continuo vini spiritus usu, neglectis carnibus aliisque eduliis, mortuum, & dissecto corpore ventriculum, intestina omnia rugosa & contracta, hepatis tubulos concretos, bilem in totum corpus succedentem, pancreas aridissimum, membranam aliquam corrugatam & concretam referens, totum vero corpus exuccum repertum fuisse. Nota mihi aliquot sunt exempla hominum immoderatus spiritum vini & cerevisiam bibentium, qui ex hydrope, phthisi, hæmoptysi mortui fuerunt, ubi in apertione corporum non modo hepatis & pulmonis indurationes & exulcerationes, sed & polyposæ concretiones in vasis repertæ fuerunt.

§. VII.

Liberaliores aquarum ardentium & aliorum spirituum forum potatores tandem penitus ciborum appetentiam amittere & anorexia laborare, indubitata experientia fide constat, & hinc tabe & viribus consumti tandem pereunt.

Scholion.

Spirituosi liquores ventriculo & annexis intestinis eorumque functionibus valde inimici sunt, & quidem plurimis ex causis. Primo enim minimas illas in tunicis insidentes glandulas, ex quibus fermentalis & solvens liquor stillat, quæ innumeræ sunt, spirituosa rigidas efficiunt atque indurant, ut lympham illam stomachicam, ad appetentiam & digestionem ciborum valde utilem, amplius plorare nequeant. Deinde appetitus & ciborum digestio secundum naturam quæ à liquamine illo acidulo fermentativo, à coctione in plicis ventriculi relicto fit, plane destruitur, quoniam spirituosa vim lymphæ gastricæ valde enervant. Notum enim est, summe corrosivos liquores, adfociatione valde rectificati spiritus, penitus edulcorari posse, & omni fermentationi spirituosa admodum resistere. Tum etiam totum digestionis in primis viis negotium maxime à temperato calore sanguinis æque ac à temperata succorum lymphaticorum salivalium & solventium natura & crasi fovetur, utriusque vero temperiem spirituosa plane destruere, apud omnes in confesso est.

§. VIII.

Spirituosi potus lædunt maxime omnium caput, unde in capitis & nervorum morbis nocentissimi sunt, quippe quos etiam vel excitant vel exasperant.

Scholion.

Id quoque intelligendum est de vino fortiori & potente, nam spiritus vini veteribus erat incognitus. De vino vero *Galenus Libr. III. de temperamentis & Libr. II. de symptomatum causis* hæc prodidit: tremore corripuntur, qui se vino meraco amplius impleverunt, & vinum immodice haustum morbum attonitum, epilepsiam, læsiones motus sensusque facit. *Rolfinckius ord. & method. medend. Comment. Sect. III. Cap. 89.* mentionem facit quartanarii cujusdam, qui pro recuperanda sanitate spiritum vini ad ebrietatem usque ingurgitavit brevi insequente convulsione & insperata morte. *Hæchstædterus dec. X. Cap. VI.* scribit: quidam de aqua vitæ *Matthioli* copiosius bibit & is paralyticus factus est; alter simili vitio laborans, apoplecticus; tertius, qui cacochymicus fuit ac podagricus, totius corporis pruritus sentiebat ac lassitudinem, cui icterus, dyspnœa ac tandem mors supervenit. *Platerus* à spiritu vini immoderate sumto ho-

mines attonitos observavit & stupidos, ac si opium bibissent. Et puer apud *Wepferum in Tract. de cicuta aquatica* profundo somno obrutus, semimortuus cum extremorum frigore redditus est. Meretur quoque huc elegans locus adduci ex *Hollerio in Comment. Sect. V. aph. 5. sæpe accidit nostris, ut per ebrietatem fiant phreneticis similes & delirent. At si obmutescant, statim moriuntur perinde ac apoplectici, & hoc fit ratione vinorum vinosorum, crassorum, qualia sunt Cretica.* Quod vero capiti tam infensa sint spirituosa inebriativa, ejus rei ratio non una videtur. Primo enim sulphure admodum volatili, vaporoso, cerebri & nervorum mæandros replent, unde non aliter ac narcotica purissimam nervorum lympham inquinando stuporem, torporem, somnolentiam imo brevem insaniam, sensuumque ac motus impotentiam inferunt, quæ symptomata tamdiu durant, dum sulphur illud volatile exhalaverit; nam ob vim narcoticam spiritus venenum est felibus, cum cochleare ori immixtum eas brevi convulsionibus necet, sicuti omnia narcotica & ob id etiam nuces vomicæ id efficiunt. Deinde à spirituosius motu intestino sanguis valde rarefit & expanditur, unde arteriæ carotides & vasa plexus choroidei tenuissima hinc nimium dilatata in systole & contractione impediuntur, & sanguinis transitus per caput tardior fit, unde venæ ab eo infarciuntur, serum secedit & sic graves capitis morbi ingenerantur.

§. IX.

Tamet si vinum longe temperatius sit spiritu vini, tamen ex ejus immoderato usu plurimæ etiam noxæ in corpus humanum redundant.

Scholion.

Quamvis præcipua vinorum potentia & virtus in ejus spiritu resideat, tamen, quia ille admixtione partium aquearum & acidulo tartarearum temperatus est, quæ quasi freno ejus subtilitatem coercerent, ne nimis præceps sit in commovendo, hinc vinum innocentius est ejus spiritu, qui totum corpus penetrat, inque membranas ventriculi maxime & cerebri magna potentia grassatur. Et in eo quoque consentientem habemus *Pechlinum*, qui *Libr. III. Obs. 38.* ita judicat: qui vino se quotidie ingurgitant, non adeo periclitantur, quam qui spiritu ejus, & in hisce pauci seram ætatem attingunt. A vini quidem consuetudine, si eo natura contendat, arthritidis periculum, sed à vini spiritu tabes, hydrops atque icterus membrorumque omnium ac sensuum palpitatio.

§. X.

Vina ex acido tartareo & spiritu temperata, ut sunt Germanica, præsertim Rhenana, quotidie immoderatus hausta, & jejuno imprimis stomacho & ante cibum assumpta, ad calculum, ad arthritidem, ad podagram, ad catarrhos, ad phthisin etiam disponunt, & nocent quoque iis, qui capite & ventriculo infirmo, ubi cibi facile coalescunt, laborant.

Scholion.

Vinum purum, antiquum, Rhenanum convenienti usu summa est medicina stomachum confortans & omnes vires reficiens, quod mentem exhilarat, quod circulationem sanguinis promovet & digestionem quoque juvat; nihilo minus immoderatiore usu corpora disponit ad morbos jam dictos: & quidem propter spirituosum elementum sanguinem nimis expandit, capiti nocet, & propter acidum, quod fovet, abundantissimum non modo ad morbos tartareos disponit, sed & eos præsentis exacerbat. Valde vero infensa hæc vina sunt hypochondriacis, quia augent acidum & difficilius per alvum & alia excretoria secedunt. Novi plurimos hisce morbis obnoxios, post multa frustra tentata, sola abstinencia vini, ad sanitatem perductos fuisse. At vero major est

noxa à vinis metuenda, si vaporosa spirituosa substantia imbuta sunt, si vilioris conditionis, si diu in sanguine morantur, nec bene transeunt excretoria. Ea enim est salubritas & meliorum vinorum nota, si urinam cient, alvum movent & bene transpirant, ut nullum torporem, sed potius alacritatem & levitatem quandam in capite relinquant.

§. XI.

Nocet vero quam maxime vinum ante cibum copiosius sumtum, si caput infirmum est, si dolet; nocet quoque infantibus & senibus in majori copia datum.

Scholion.

Recte Hippocrates de veteri medicina: vinum meum potum hominem quadam imbecillitate afficit: & Lib. de flatibus: aucto derepente sanguine per ebrietatem animi functiones ejusque intellectus concidunt. Et Lib. de diata in acutis §. 30. in ejusmodi morbis, ubi vehementem capitis gravitatem aut mentis læsionem metueris, vino omnino abstinendum & tum aqua utendum est. Celsus Aurelianus nunquam vinum concedit in morbis capitis, in doloribus, vel acutis passionibus, nisi morbo declinante vel finito. Ita etiam Celsus Lib. IV. Cap. II. in dolore capitis vinum rejicit & aquam bibendam suadet. Si vero excussus ex toto dolor est, etiam ad vinum reverti posse scribit. Idem auctor in dentium dolore vinum ex toto circumcidendum esse suadet, Lib. VI. Cap. IX. pag. 406. Pueris vero Plato in secundo de Legibus præcepit, ne usque ad duodevigesimalium annum vinum gustarent, quia nutritionem impedit propter nimium calorem, & aliam adhuc addit rationem Galenus Lib. I. de tuenda sanitate, quia eos ad iram & libidinem præcipientes facit, & partem animi rationalem hebetem turbidamque reddit. Præclare hinc olim Eobani cecinit:

Immodici sensus perturbat copia Bacchi,
Inde quis enumeret, quot mala proveniant?
Corporis exhaurit succos, animique vigorem
Opprimat, ingenium strangulat atque necat.

§. XII.

Quæcunque de vinis crassioribus & vaporosis dicta sunt, ea etiam intelligenda sunt de cerevisiis valde inebriativis, quæ plus certe nocent sanitati, quam vina.

Scholion.

Dici vix potest, quantum sanitatis detrimentum patiantur ii homines, qui pro ordinario potu cerevisiis crassis inebriativis utuntur; multo vero magis periclitantur, si immoderatus eas adsumant, utpote quæ longe diutius manent in sanguine, nec tam facile excretoria subeunt. Nec vero tantum cerebro & nervis, sed & visceribus vim inferunt, dum illa obstruendo morbos dant chronicos incurabiles. Non possum autem non pessimum illum medentium quorundam morem de loco reprehendere, qui morbis tam chronicis, quam acutis laborantibus ejusmodi crassas cerevisias concedunt, quas vix sani homines, multo minus ægroti, ferre possunt. Ego omnibus ægrotantibus suadeo, ut decoctum hordei, vel chinæ & scorzonæræ cum passulis, quantum velint, bibant, sanis autem & valentibus vinum aqua pura & levi dilutum, quotidie bibendum commendando, ubi pro ratione temperamentorum plus vel minus aquæ addendum est; nam vina certe lymphatissimis cerevisiis & potibus præstant.

§. XIII.

Quam nocivi vero sunt potus intemperati vel nimis copiose hausti, tam perniciosum etiam est, quæ consuevit maxime foeminarum est, nimis parum liquidi assumere, siquidem hoc ipso passionum chronicarum fundamenta sæpissime sternuntur.

Scholion.

Nam sanguis bonus & sanitati commodus minimus tres partes liquidi aquei, & unam solidi continere debet; quo satis fluxilis minimos tubulos libere & sine impedimento permeare & excrementitias salino-viscidas sordes per emunctoria evehere possit. Si itaque ex defectu liquidi humores nimia spissitudine & crassitie laborant, quid aliud contingere potest, quam ut hinc inde in minimis vasculis restagnent, & viscera ad obstructions atque indurationes disponant, & relictis excrementitiis partibus impuri succi reddantur, præsertim si corpora motu & exercitatione careant, atque intemperatis, acidis & viscidis utantur. Videmus itaque, præter experientiam, etiam ipsam rationem pro valetudine integra servanda non modo motum, sed & potum liberaliorem, modo is sit congruus, suadere. Videmus etiam eos, qui nimium potu se ingurgitant, non tam frequentibus morbis esse obnoxios, quam qui nimium voracitati dediti sunt & gulæ indulgent.

CAPUT V.

De excretionum defectu, præcipuo morborum fundamento.

§. I.

AD firmam valetudinem & corpus sanum servandum non tantum ingesta, sed maxime omnium etiam excreta spectari debent. Siquidem & nimia ingestorum copia & mala eorum materia non facile offendet corpus, si modo bene per excretoria transeat & foras ejiciatur. Nam illud saltem, quod in vitio est, si in corpore retinetur, si motus expers est, si subsistit, & partes exquisitoris sensus & motus laceffit, morbum parere & motuum œconomiam salutarem pervertere solet.

§. II.

Ingens est copia, quæ homo adultus, laboribus & exercitationi deditus, quotidie adsumere debet, sed ejus corporis tamen pondus subducto calculo non increfcit; ergo sequitur, ut & ingestorum & egestorum eadem esse debeat mensura.

§. III.

Non modo optimo rerum magistro, usu atque experientia docemur, sed & præstantissimæ illæ a Sanctorio propositæ diæteticæ ex staticis leges confirmant, hominem & bene valere & ad omnes actiones tum animi, tum corporis obeundas esse promptissimum, si corpus, absoluta digestionem non ponderosius fiat, & excreta ingestis per omne tempus bene respondeant.

Scholion.

Si ullus ex veteribus medicis scriptor, qui utilia proposuit, laudem meretur, certe est Sanctorius, qui elegantissimum illum de medicina statica maximi usus libellum composuit, in quo docet, si corpus ponderosius ob excretionem, præsertim transpirationem, imminutas evadat, paratissimam esse ad morbos viam, qui etiam, nisi evacuationes restituantur, certissime sequuntur.

§. IV.

Maximi igitur momenti est, ad morborum generationem probe intelligendam, & ingestorum & excretionum naturam, modum & rationem recte examinare atque perpendere.

Scholion.

Amplissimæ hujus veritatis vestigia jam apud antiquissimum artis medicinalis auctorem Hippocratem reperire

reperire licet, cum *Libr. IV. de morbis* §. 16. hunc in modum differit: quomodo & cur homo sanus degat, referam. Postquam comedit ac bibit & humor ad corpus pervenit, admiscetur ei, qui in corpore jam est, & ea die, quâ accessit, in corpore manet, postridie alius humor ad ipsum accedit atque duo sunt dies & duo in corpore humores, & alteri quidem humori duo dies sunt, alteri unus, qui postridie accessit, manet in corpore, alter autem cœctus à caliditate diffunditur & tenuis factus postera die à recenti expellitur. Si vero permanserit, graveolens fit, tertia vero die una cum stercore & urina exit copia ipse sibi æqualis & consimilis & æquilibris, & cibi quidem semper postridie per alvum secedunt, humor autem ad tertiam diem. Et hoc modo sanitas contingere solet. Deinceps addit: si humor pluribus diebus, quam tribus, in corpore permaneat, aut alius implens accedat, majus aut minus malum homini accedere. Et hic totius paragraphi sensus est.

§. V.

Sapientissimum, quod in structura microcosmicæ machinæ apparet, artificium maxime in eo positum esse video, ut innumera organa velut officinæ sint, quarum beneficio per continuum tritum, motum, impulsu ingesta subiguntur, attenuantur & inter se invicem probe miscentur; postea innumera quoque organa colatoria & emunctoria exstant, per quæ materia supervacua, inutilis & mixturæ animali ac vitæ aliena corpore ejicitur.

Scholion.

Quum ventriculus & longus ille intestinorum canalus & pulmones omniaque viscera & cor cum magno arterioso canali motu elastico & contractorio perpetuo exerceantur, tritorii quasi vicem gerunt, quo alimenta interventu liquidi subtilissimi solvuntur inque minutissimas partes dividuntur, exquisitè miscentur ac uniuntur, ut inde puri fovendisque viribus & alendis partibus idonei succi prognerentur. Cum vero ex alimentis plures supervacaneæ & inutiles relinquantur feculentiae, & boni quoque ac laudabiles humores per continuum illum attritum atque intestinum motum paulatim benignam suam naturam exuant, inque materiam alienam, quæ excerni debet, tandem faceffant, eaque non sit unius ejusdemque, sed plane dissidentis indolis, ecce providentissima natura multiplicia fabricavit organa, evehendis hisce varii generis sordibus apta. Hæc inter eminet cutis, quæ quasi universale totius corporis emunctorium est, innumeris poris ac tubulis pervium, ex quo innumerabilis vaporum copia continuo exhalat. Neque exigua est sulphurei illius falsi feri, quod urinæ nomine venit & per tubulosam renum colatoria perpetuo transit, copia. Per glandulosas quoque arteriæ asperæ, faucium, oris & narium tunicas multum vitiosi feri quotidie exhalat atque emittitur. Tum crassioris naturæ feculentiae, quæ ab extractis alimentis remanent, & plures alieni, falso-sulphurei, biliosi & lymphatici humores, qui ex glandulosis intestinorum tunicis quotidie separantur, alvo excludi solent. Ex quo maxime disci potest, mirabile illud conservationis vitalis mysterium in excretionibus motibusque excretoriis & organis, per quæ secretionis fieri debent, apertis ac salvis potissimum consistere.

§. VI.

Vigentibus itaque excretionibus viget universum corpus ejusque functiones salvæ & integræ sunt, eo quod alienum & noxium, & quod vim sanitati minatur, perpetuo separetur, ut puri ac incorrupti vitales permaneant humores.

Scholion.

Visum est mihi hanc veritatem auctoritate *Hippocratis* confirmare, qui *Libr. IV. de Morbis* §. 15. ita

differit: ubi humor aliquis adfligens copiosior factus fuerit, si his locis, nempe per nares, os, podicem, urinæ meatum, homo depurgetur, nullus ab ipso morbus hominem premit. Nam certe materiam pro morbis non aliunde quærendam esse puto, quam in retentis, quæ ejicienda essent, purgamentis, quod ipsa ratio & experientia quoque adfirmat. Quid enim est, quod majorem perniciem partibus corporis solidis & fluidis inferre & motuum vitalium æquilibrium magis interturbare & tantum non evertere possit, ac si humores & quantitate & mixtione atque effectu plane insensu in interioribus corporis partibus consistant fixamque ibi habeant sedem, & continenter partes, quæ sensu & motu vividæ sunt, laceffant.

§. VII.

Non præsentius ergo ad firmandam valerudinem & saluberrimum corpus servandum, atque ad omnes morborum origines præscindendas datur consilium, quam adhibere operam, ut excretionis, inque primis perspiratio & intestinalis excretio, per omne tempus non labascant, sed recte se habeant & sufficientes sint.

Scholion.

Præcipuas inter excretionis est perspiratio, quam reliquas omnes superare confessæ & firma medicorum sententia est, post quam vacuatio, quæ alvo fit, sequitur: illa materiam tenuissimam adeoque & nocentissimam indolis, hæc crassiorem & rudiorum feculentiam excludit ac removet. Videndum itaque, ut si homo securus à morbo vivere velit, præter salvam transpirationem etiam venter quotidie bis semelve pro consuetudine eat & satis plenæ defectiones fiant. Vera enim, quæ scribit *Fuchsius in Institutionibus Lib. II. Sect. V.* reperiri: venter si naturæ beneficio laxus fuerit, id in magnam felicitatis partem est numerandum. Quippe qui alvum naturam apertam habent, haud facile morbis corripiuntur, qui contra adstricta sunt alvo, in perpetuo cum morbis conflantur. Siquidem alvo diutius compressa multa incidunt mala, præcordia moleste inflantur, dolores in abdomine sunt tensivi, corporis est gravitas, caput dolet vel etiam grave est, ad superiora tendunt flatus & cruditates in ructus solvuntur, in quibusdam fiunt phlogoses. Cohibita paulo diutius vel imminuta perspiratione falsi & tenues humores feruntur ad caput & pectus, & alias quoque corporis partes infestant, & liberiores motum ac circuitum minuendo languorem & lassitudinem, capitis gravitatem, mentis torporem, coryzam, gravedinem, tussim, inquietas noctes, lentum calorem cum extremorum refrigeratione & urina acri concitant. In quibusdam ventris tormina cum crebrioribus defectionibus oriuntur. Equidem in corporibus alias sanis & robustis hæc frequentius incidere, præsertim autumnis, ubi mutatio & varietas cœli maxima est, videmus. Si autem corpora mali habitus sunt, graviora inde mala nascuntur, quæ non tam subito transeunt, quemadmodum infra id fusius proponere volumus.

§. VIII.

Neque tantum pro sanitate noxii & excrementitii varii humores utiliter foras ejiciuntur, sed & puri & laudabilis mixtionis, si nimium adfluunt & corpori incommodant, maximo sanitatis emolumento excernuntur, quemadmodum in foeminis sanguinem per uteræ extrema vasa, vel etiam in viris per hæmorrhoides, in quibusdam per nares ferri in propatulo est.

Scholion.

Plurima hominum pars plus adsumit alimenti, quam necessarium est & natura ferre & digerere potest, unde non possunt non & alias utiles succi sola copia & mole offendere, eo quod liberiori sanguinis per corpus progressui, dum solidorum elaterio & constrictivæ potentiae resistunt, obicem atque impedimentum injiciunt.

Et hac ratione fecunda illa morborum mater, plethora Græcis dicta, nunquam bona, producitur. Quæ ne in præceps deducat periculum corpus, protinus remouenda est, idque opportune fit, si sanguinis sinceri quod est superfluum, per exteriores & ultimos fines valorum in naribus, ano vel utero ejiciatur.

§. IX.

Maximam itaque partem sanitatis apud fœminas in iusta mensium vacatione atque in viris spongiosi & repleti corporis in consueta sanguinis & iusta per sedis venas prorupione consistere experimur.

§. X.

Quum omnes vacationes, quæ fiunt secundum naturam, corpori egregium commodum atque salutem adferant, sic, ut hæc diminutæ vel deficientes nunquam non valde perniciosæ & noxiæ fiant, in promptu erit colligere, si non una, sed simul plures non respondeant, sed vitio laborent, rectissima via eas ad morbos deducere.

Scholion.

Sæpe accidit, ut labascente vel minuta una vacatione, altera salva maneat vel etiam augeatur; & tum noxa non tam facilis & parata est corpori. Quid enim frequentius est, quam si alvi vel per se crebrior dejectio fit, vel illa medicamento solvitur, cutem constringi & perspirationem tantisper minui, contra alvo compressa eam augeri. Sub cœlo frigido impeditior perspiratio urinam largius profluentem & alvum facit laxiorem. Humor si quando tussi copiosius rejicitur, alvus segnescit. Atque adeo quod uni excretioni subtrahitur, alteri sapius non sine comodo adjicitur, horumque ratio ex perpetuis motuum legibus corporis nostri hydraulicis commodissime peti potest. Illud vero salutare in usum practicum inde trahi poterit, quod una vacatione aucta altera supprimi, & deficiens per aliam imminutam augeri possit. Nam si consilium est, alvi fluxum coercere, opportune id fieri potest perspiratione auctiori reddita, sique vacationem per cutim moliri ex re erit, alvus comprimenda est.

§. XI.

Quod si à mala diætâ, vel animi adfectu præcedente plures ex nobilioribus vacationes simul deficient, metus est futuri morbi. Nam nulla febris, siue sit intermittens siue continua, neque ullus alius adfligens corpus morbus facile nascitur, nisi aliquot dies ante alvus muneris sui obliuiscatur, & causæ prægressæ fuerint, quæ liberum transpiratum vel alias adhuc vacationes prohibeant.

Scholion.

Profecto si quis probe morborum initia, quod præcipuum in medendo momentum est, scrutari velit, reperiet, ea tam ex pravis ingestis, quam ex deficientibus & suppressis pluribus simul vacationibus, maximeque alvo & transpiratione duci. Nam hisce labascentibus ingens excrementitiarum varii generis fœdium tam in intestinali canale, quam in aliis receptaculis & vasis fit cumulus, quæ mixtura peiores redditæ nerveas & motrices corporis partes laceffendo febres, rheumatismos, fluxiones, dolores, spasmos concitant. Deterioris vero notæ morbus nascitur, si corpus jam tum repletum, si impurum est, vel alias consuetæ sanguinis vacationes deficient. Tum enim major adhuc variæ excrementitiæ materiæ invicem mixtæ congeries & cumulus fit.

§. XII.

Non raro ex defectu excretionum secundum naturam nimia humorum copia & impuritas collecta viore naturæ, siue motuum in solidis partibus robore,

vacuationibus extraordinarie auctis saluberrime excluditur. Igitur intelligentis est medici, ejusmodi excretiones nullo prorsus modo cohibere, sed potius, prout res exigit, eas prudenter moderari.

Scholion.

Ita sapius ex digestionis & motus intestinorum vitiis non recte respondente alvo multus & corruptus humor primam occupat regionem, qui saluberrime sapius naturali facta purgatione ejicitur; utilissima hinc *Celsi* observatio est *Libr. V. Cap. XII. uno die fluere alvum pro valetudine est atque etiam pluribus, dum febris absit & intra septimum diem conquiescat, purgatur enim corpus & quod intus læsurum erat, utiliter effunditur.* Simili modo feri impurioris abundantia per urinæ largiorem fluxum subinde magno valetudinis commodo solvitur. Neque enim de nihilo est *Sanctorii*, quam *Sect. I. §. 68. loc. cit.* proponit, observatio, quod corpora virorum sano & moderato victu utentium singulis mensibus fiant solito ponderosiora, unius scilicet duarumque librarum pondere, & redeant ad consuetum pondus circa finem mensis ad instar mulierum, sed facta crisi per urinam paulo copiosiore vel turbidiorem. Quo pertinet etiam saluberrima supra modum affluentis sanguinis in sexu fœminino singulis per uterum mensibus & in quibusdam viris per ani venas statis plerumque temporibus, & maxime circa æquinoctia, evacuatio. Vel etiam natura alia via, nempe motibus resolutoriis & excretoriis auctis, qui in febre conspiciuntur, nimiam humorum copiam minuere tentat, quemadmodum id felicissime sapius per intermitteutes, & quæ rheumatibus jungi solent, perficitur.

§. XIII.

Quicumque igitur cito obstructions solvere atque excretionis inter morbi initia vel ante ejus accessionem restituere scit, is certe & plurimis malis & vitæ periculo opportune occurrere potest.

Scholion.

Præcipuum in arte nostra est, & quod etiam in potestate medici positum, morborum principiis resistere, antequam incrementa sumant, ita vel statim in herba quasi jugulantur, vel longe mitiori incedunt habitu. Aureum est illud *Hippocratis* monitum *Sect. II. aph. 29. incipientibus morbis, si quid movendum, move, vigentibus vero quietem agere melius est.* mox enim in principio, si res postulat, sanguinem mittere, alvum solvere, aut ducere, ventriculum vomitu deplere aut perspirationem movere oportet. Ita enim commode vis morbi præscinditur. Nam si hæc ipsa jam jam nervorum systema occupaverit, quiescere, quam agere vel movere consultius est.

§. XIV.

Neque vero tam facile est, deficientes vel suppressas vacationes, siue sudoris siue sanguinis menstrui vel hæmorrhoidalis, in ordinem restituere, quia causa non tam in materiæ vitio, quam in motus perversitate posita est.

Scholion.

Falluntur, qui in reducendis vacationibus tantummodo ad materiæ vitia & ad obstructions respiciunt, non animadvertentes, motum potius esse in culpa, qui fibras constringit & à minoribus & exterioribus tubulis humorum cursum versus interiora dirigit. Ita compressis à spasmo intestinis crassis, cui ea valde obnoxia sunt, nihil prorsus transmittitur, ne flatus quidem, sed omnia ad superiora tendunt & regurgitant. Simili modo constrictis, siue à frigore siue à terrore vel alia causa, subcutaneis tubulis feri subtilis falsi, diffilari soliti, motus intro convertitur atque vel ad glandulas intestinorum vel ad eas, quæ in bronchiis pulmonum, ore &

naribus

naribus sunt, dirigitur. Maligna in variolis, morbillis, purpura materia ex summa cute repressa nervosas intus partes occupat, nec tam facile artificio quodam revocatur. Constricti, qui bilem vehunt, ductus ira vel alia ex causa mox ejus motum ad lymphæ & sanguinis massam convertunt. Hos omnes motus inversos atque excretionibus adversos in ordinem & versus exteriora reducere non tam facile & expeditum est. Neque res incidentibus & vehementioribus commoventibus, sed potius blandis demulcentibus, relaxantibus, antispasmodicis & leniter moventibus tractanda erit.

§. XV.

Illos etiam & difficiles & longos morbos, qui immodicas humorum & sanguinis profusiones sequuntur, à depressis & imbecillibus excretionibus originem suam ducere observamus.

Scholion.

Post effrenes sanguinis vel humorum profusiones, quacunque ex causa ortas, non modo virium substantiam exhaustiri, sed & paulo post longos & periculosos morbos, cachexiam, hydropem, tabem, hecticam initia sumere, frequenti cognitum est experientia. Neque tamen illæ nimie inanitiones proximæ horum morborum causæ statuendæ sunt, sed quia supra modum consumptæ sunt vires atque humores exinaniti, ideo fit, ut quæ cibo & potu adsumuntur, nec recte subigi, superari, nec rursus ejici possint, sed intus remaneant, stagnent, corrumpantur, & fertiles sic morborum causas præbeant: nam à nimium exhausto sanguine concidunt vires, quæ solida regunt, concidunt quoque & clauduntur vasa minima in secretoriis & excretoriis, quæ secundum naturam ab humorum copia aperta fervari debebant.

§. XVI.

Quum diminutæ excretiones veræ & adæquatæ morborum causæ sint, nullus hinc vel sponte à natura vel arte sanatur morbus, nisi illis restitutis.

Scholion.

Illustre hujus rei documentum præbent omnis generis febres, quæ nec ex toto desinunt, nec intermittunt aut mitescunt, nisi prægressis vel per alvum vel per sudorem evacuationibus, quibus etiam circa convenientia tempora, quæ critica vocari solent, accedentibus, febris declinat vel finitur. Nam hæ ipsæ in integrum restitutæ spasmus, qui in febre universum vasorum & membranarum genus occupat, & vehementer motus secundum naturam concitat, jam resolutum & morbum victum denuntiant. Accedit & hoc, quod ob meatus jam apertos & ob sanguinis circulum ad excretoria restitutum omnes fordes, etiam sub ipso motu morbofo contractæ, cum certa spe secundæ valetudinis felicissime removeantur. Utilis vero hac in re est illa observatio, quod macilentiores, si febre inflammatoria laborant, magis per sudorem, repleti vero & qui spongiosi sunt corporis habitus, in febribus putridis plus per alvinas dejectiones crisi facta ad sanitatem perducantur. Ex quo salutare illud monitum fluit, medicum naturæ ductum in hoc etiam sequi, minime vero eum prævertere & pervertere debere. Qui vero ex chronicis graviter decumbunt, si ex plethora orti sunt, mensium & hæmorrhoidum fluxu vel ex toto liberantur, vel mitiorem morbum experiuntur; si vero ingens impuritas, quæ à vitio & deficientia excretionum originem trahit, morbum fert chronicum, tum nec specifica alterantia, nec depurantia hic usum quendam conferunt: sed omne medentis consilium eo dirigi debet, ut meatus aperiantur & excretiones per alvum, per transpirationem, per hepatis ductus bilarios per renem urinosos, in ordinem redigantur. Ita enim ex sangui-

ne impuro, interposito quodam tempore, mox purus & benignus fieri potest.

§. XVII.

Quum totus valetudinis secundæ status in salvis excretionibus, & adversæ in earum defectu consistat, neque aliter ægrotans ad sanitatem perducatur, nisi per evacuationes in integrum restitutas, cuivis facile apparere arbitror, illa remediorum genera, quæ aptam excretioni materiam morbidam reddunt, quæ meatus occlusos aperiunt & motus humorum ad excretoria dirigunt, omne in medendo ferre punctum.

Scholion.

Quibus præcognitis jam apparet ratio, quare inter tot remediorum classes palmam ferant ea, quæ vacuationi serviunt, quo in numero sunt venarum sectiones, cucurbitulæ, hirudines, atque etiam quæ vomitum cient, alvum solvunt, urinam movent, salivæ fluxum augent & perspirationem ac sudorem promovent. Quo pertinent etiam balnea, membrorum fricationes, item omnia alia corporis exercitia, vox clara, labor, ambulatio, vectura, equitatio, item fames, abstinentia, quæ omnia ejus sunt facultatis, ut materiam demant, & minuant. Hujus generis etiam sunt liberalior potio & usus thermarum, acidularum & fontium aliorum salubrium, puræ aquæ frigidæ vel calidæ, herbæ cuidam infusæ, ex lignis decoctæ, potus feri lactis. Nam eorum omnium operatio nulla alia est, quam ut crassos humores dissolvant, obstructos meatus referent, emunctoria stimulent, & motus deficientes excretorios restituant. Equidem anodyna & sedativa, item adstringentia videntur vacuationibus adversa, sed tamen, nisi ab eorum usu damnum velimus expectare, illa ipsa etiam excretiones adjuvare debent. Nam illa, dum spasmos & dolores demulcent & sistunt, clausos meatus aperiunt & hac ratione sudorem non raro restitunt. Et quia roborantia & subadstringentia tonum & motum partibus & fibris nimium resolutis & laxatis reddere solent, hinc eorum usus aperitivus, & qui excretioni velificatur, etiam manifestus est; nam in genere hic velim notari, nec opiata, nec alia, quæ dolorem levant & somnum inferunt, nec adstringentia unquam salutarem effectum præstare, nisi à prudentia medici eorum usus ad submovendas obstructions & promovendas excretiones dirigatur. Sique spes esset invenendi talem medicinam, quæ omnibus morbis & avertendis & sanandis cum effectum accommodata sit, ejus certe operatio ita deberet esse comparata, ut pulsus roborando liberum sanguinis circulum, sublatis ubique spasminis, sine acri calore promoveret, adeoque & omnium saluberrimam transpirationem & alias excretiones augeret ac restitueret. Et quoniam huc usque tale quid in nullo tantopere jactato & pretiose venditato remedio vidi vel reperi, motum corporis & aquam puram tamdiu pro medicina universali habeo & commendando, dum melior & efficacior, quæ hos effectus præstet, inveniat.

CAPUT VI.

De perniciali earum rerum, quæ excretiones cohibent, indole atque effectum.

§. I.

Quum excretiones, quæ fiunt, per cutem, alvum, urinam & per uteri aut ani venas, diminutæ vel deficientes graves & varii generis morbos certissime procreent eademque restitutæ eos finiant ac profligent, quid evidentius est, quam quod omnia ea, quæ constrictivæ sunt indolis, quæ excretorios tubulos occludunt, quæ

quæ excernenda retinent, inter humanæ naturæ infensissima numeranda sint.

§. II.

Non sunt unius ejusdemque indolis, quæ saluberrimas illas excretiones, quibus noxia & corruptibilia corpore excluduntur, cohibent vel penitus sistunt. Alia enim ad alimentorum, alia ad medicamentorum classem pertinent, aliaque sunt interna, alia externa, quædam valentioris quædam mitioris naturæ; nonnulla etiam ad res naturales & præternaturales spectant: quædam alvum adstringunt, quædam transpirationem reprimunt: rursus quædam excretiones sanguinis impediunt aliasque fluxiones cohibent.

§. III.

Ad alimenta, quæ alvum adstringunt, referenda sunt omnia dura, macra, austera, acida, aspera, tosta & in eadem carne assa potius, quam elixa, panis bis coctus, tostus, spiræ, puliculæ ex oryza, milio, ex pisces, dura ova & omnia opera pistoria, caseus, castaneæ, nuges, amygdalæ, mala cotonea, pira immatura, fructus acaciæ, mespili, ribes, berberes, acetum, vina rubra & adstringentia, item paucior cibus, corporis quies & æquilonia aëris constitutio.

§. IV.

Inter medicamenta, quæ alvum & omnis generis excretiones cohibent, eminent omnia ex alumine, marte, plumbo & vitriolo parata, inque primis tinctura hæmatitis, sulphuris vitrioli, liquor martialis ex capite mortuo florum salis ammoniaci cum hæmatite confectus, omnes terræ sigillatæ, bolli, terrea marina; ex vegetabilium familia radix tormentillæ, bistortæ, plantaginis, quinquefolii, cortex chinæ, fraxini, granatorum, terra dicta catechu: quo pertinent etiam omnia, quæ dolores levant, somnum inferunt & quæ papaver aut opium ingreditur.

§. V.

Ex iis, quæ omnium saluberrimam perspirationem cohibent & materiam morbificam, saluari sæpe & critico motu ad summam cutem effusam, reprimunt, sunt præter externum frigus, sive humidum, terror & linimenta ex sulphure, ex mercurio vel saturninis parata, et balnea frigida, adstringentia, & linimenta pingua, oleosa & emplastra adstringentia; quo pertinent etiam recentia.

§. VI.

Omnes spasmi & dolores acerbiores, neque minus urgatio per alvum, per vomitum fortior nimiaque sanguinis missiones, id habent incommodi, ut modo materiam à corporis habitu ad interiora revocent ac diuertant, modo etiam spasticis stricturis meatus subcutaneos occludant.

Scholion.

Omniū dolorum, quacunque in parte corporis continentur, indoles tam perniciofa est, ut & alvum & summam cutem & vias urinarias constringant, ut parcius urina & alvus & sudor fluant, idque videmus non modo in dolore capitis, intestinorum, ventriculi, dentium, sed etiam in eo, qui in ano ex hæmorrhoidibus nascitur, vel ex calculo in uretheribus hærente oritur. Quam noxium & inconsultum est tali in casu compositiva & stimulantia adhibere, tam proficuum est, quod somnum conciliant & dolores levant, in usum vocare. Nam eorum usum subinde mox & sudoris & urinis fluxus sequitur, & alvus mollior evadit. Deinde sudores, quæ fiunt per vomitum, aut per salivationem, per purgationem, vel per copiosum ex pectore vacuum, vacuationes & alvum comprimunt, & cutis contumaciter constringendo transpiratum valde imminuunt partem quod vel nimis excretionibus plerumque sint spasmi.

Frid. Hoffmanni Oper. Tom. I.

juncti, partim etiam, quod materia aliorum divertatur.

§. VII.

Sanguinis nimias effusiones atque ejus per arteriam factas emissiones & transpirationem & alias utilissimas excretiones diminuire & imbecilles reddere observamus.

Scholion.

Cujus rei rationem non difficile est invenire; nam subblata nimia sanguinis mole demitur vis & robur solidarum partium, demitur etiam is humor, qui extremos illos excretorios cutis tubulos apertos fervare & transpirationem juvare debebat. Igitur quam perniciosum sit, validas sanguinis & humorum vacuationes, ubi jam transpiratio languida est, moliri, & quemadmodum longi morbi per eas & foveantur & procreentur, haud satis dici potest.

§. VIII.

Diuturna corporis quies & cessatio motuum, somnus longior, ingens cura, angor, mentisque agitatio sunt quoque ex his, quæ robur & vigorem solidis auferendo & transpirationem & alias excretiones, etiam illas criticas, solennes sanguinis minuunt atque retardant. Quare non mirum est, hisce diu adfligentibus & prævas & longas ægritudines cooriri.

§. IX.

Positive adstringentia, quæ eminentioris sunt virtutis, & austero ac fixiori elemento agunt, naturæ humanæ inimicissima sunt; quin imo veneni cujusdam naturam in eo æmulantur, quod gravissimam noxam valetudini inferunt.

Scholion.

Ex anatomicis & mechanicis compertum est, machinam nostri corporis mere esse hydraulicam, & ex innumeris tubulis majoribus atque minoribus constructam, per quos jugi & non interrupto motu varii generis humores perfluere, influere, refluere & effluere debent: in quo motu progressivo sicuti vitæ & sanitatis conservatio præcipue posita est; ita ab hoc impedito, intercepto vel deficiente & morborum & mortis origo repetenda est.

§. X.

Nihil tam valide fluida corporis nostri inspissat, coagulat & hostili crispatura ac contractione liberam solidorum expansionem & systolen impedit, & tonum ac motum peristalticum intestinorum destruit, quam forte adstringens, iteratis vicibus datum.

§. XI.

Mirabile est, forte adstringens adsumtum mox & celerime in diffusas etiam partes operari, easque constringendo nimias excretiones cohibere. Ita vidimus, in hæmoptysi, vel immodico mensium profluvio, ab usu tincturæ sulphuris vitrioli vel hæmatitis brevi post sanguinis eruptionem conquievisse.

Scholion.

Hujus singularis effectus atque phænomeni ratio ita mihi explicanda videtur. Animadvertimus, à dato veneno, vel fortiori emetico, aut purgante, vel mercuriali medicina universum mox membranarum & nervorum genus in consensum trahi, & stricturis affici, eam ob rationem, quoniam omnes fibræ & membranæ, quibus vasorum compages constat, sunt elasticæ, id est, à vi externa facile constringuntur & explicantur. Nam in omnibus corporibus elasticis id est perpetuum, ut, si qua eorum pars aut contractior fiat, ceteræ statim omnes, etiam in extremo loco positæ, in illum statum declinent, id quod experimento chordæ vel funis clarum fit. Si itaque tunicae intestinorum partem quandam

vehementius contrahi contingit, non mirum est, totum membranarum systema inde affici, quia propter contiguitatem & propagationem similemque naturam plane inter se consentiunt. Jam vero quis non videt, idem fieri posse ab adstringentibus? Nam hæc quoque est causa, quod ad usum adstringentium, v.g. martialium, cito pulsus immutetur, isque antea languidus durior & fortior evadat; siquidem ipsos etiam arteriosos tubos ex membranis nerveis & musculosis conflatos esse, ad quas vis medicamenti activa ex intestinis derivatur, ex anatomicis cognitum est.

§. XII.

Si qua alia remedia noxam humano corpori inferre possunt, atque ideo summa cum cautione usurpari debent, certe sunt ea, quæ adstrictivam facultatem habent, utpote sæpius per inopportunam vasorum constrictionem inæqualitatem sanguinis circuitus, ut verbis utamur *Hippocratis Libr. de flatib.* efficiunt, ut in alia loca parcius, in alia justo copiosior sanguis feratur, ex quo stases & stagnationes, in partibus imbecillioribus productæ, graves & multas inducunt ægrotudines.

Scholion.

Placuit mihi maxime ex veteribus eximium de adstringentibus monitum *Aëtii* quod *Libr. XVI. Cap. 66. Animadvers.* ita proponit: *Communis error & mulierularum & barbitonorum, quin & indoctorum medicorum omnino est fugiendus adhibentium adstringentia, quæ nullo tempore vel occasione unquam in usum venire possunt. Adstrictis enim locis aut nobiliora membra invadunt molesta excrementa, aut retenta in malum habitum aut hydropem laborantes ducunt.*

§. XIII.

Omnis generis adstringentia, sive in classe medicamentorum, sive alimentorum sint, ventriculi & intestinorum partibus nervosis motuque gaudentibus facile vim & noxam inferunt, nec sine periculo in alvi nimis profusionibus aut vomitionibus dantur, quia nimium stringendo liberum illum motum peristalticum, à quo alvina excretio & plurima alia circa digestionis negotium bona pendent, facile intercipiunt.

Scholion.

Nihil familiarius est, quam ab alimentis austeris & acidis, item duris & siccioribus, secundum *Hippocratem Libr. II. de diæta* copiosius datis, alvum tensam & duram per aliquot dies reddi, idque multo magis fit, si diuturnior est aquilonia aëris constitutio & corpus nimio labore exercetur, qui siccet alvumque sistit. Curato quoque alvi profluvio medicamentis nimium adstringentibus, ita sæpe adstringuntur & siccantur intestina, ut æger ad duos aut tres dies nequeat excernere, quæ *Hollerii Comment. in aph. 20. Sect. II.* observatio est; compressa vero diutius alvo intestina potius sursum, quam deorsum moventur, regurgitant flatus, ad ventriculum inque ructus solvuntur, id quod etiam jamdudum ab *Hippocrate* notatum fuit, qui *Libr. de Loc. in Homine §. 50. restitante*, inquit, *alvo propter vehementem stabilitatem corpus intumescit, & Libr. de flatibus: obstructo inferiori ventre in universum corpus flatus discurrunt.*

§. XIV.

Nulli vero parti tam incommoda est alvus constricta, quam capiti, quod semper exinde male habet morbi que ibi consistentes ingravescent; sicut contra ab alvo liquida, vel si obstructa fuerit, per clysterem subducta mox superiores partes, ut scribit *Celsus L. IV. C. III.* resolvuntur.

§. XV.

Per multiplicem in certo habemus experientiam, alvi fluxu temere adstringentibus suppresso, ita tonum vis-

cerum & intestinorum læsum fuisse, ut in imbecillioribus & repletis sævissimum illud & chronicum hypochondriacum malum suam inde originem traxerit. Vel etiam febres lentas, mesentericas, aut decubitu facto ad viscera abdominis cachexiam, tumorem pedum œdematosum, ad thoracem pleuritides, ad caput apoplexias, ophthalmias, ad articulos arthritides inde coartatas observatum fuit.

§. XVI.

Majori adhuc periculo dysentericus fluxus adstringentibus sistitur; acris enim & maligna materia intus retenta pejora mala procreat, ut sunt cardialgia, singultus, summa anxietas & inquietudo, vel funesta intestinorum inflammatio, vel etiam cruentæ in albam & incruentam, quæ peioris est naturæ, conversio.

Scholion.

Certe nihil magis est pestiferum, quam adversus dysenteriam statim sistentibus pugnare; corrigere potius causticam materiam temperantibus & delinientibus convenit eamque sive statim inter initia per vomitum, sive etiam per laxantia leniora educere iisque balsamica & roborantia externe pariter & interne interponere.

§. XVII.

Nulla infecurior & perniciosior immodicas sanguinis profusiones compescendi ratio est, quam validioribus constringentibus uti, eo quod gravissima mala nunquam non fere insequantur.

§. XVIII.

Neque hujus rei causam in obscuro positam esse illi intelligunt, qui sciunt, hæmorrhagias ab internarum partium spasmodis & inde facto sanguinis ad partes majori appulsu nunquam non proficisci. Quum vero adstringentia spasmos non sistant, sed potius mirifice augeant, ex eo sequitur, ut vel ipsæ eruptiones sanguinis augeantur, quod non semel, sed sæpius iterumque observavimus, vel sanguis ad alias & insolitas vias cum impetu feratur, ubi si non exitum habet, gravia molitur mala.

§. XIX.

Mensium fluxus repente adstringentibus cohibitus ingentes & suffocatorias quasi angustias, itemque cordis palpitationes parere, vel etiam in capite dolores immanes & hemicranias, in artubus convulsiones & distensiones movere solet. Converso vero ad ambitum corporis sanguine erysipelata, rheumatismi, arthritides, tumores oriuntur; quædam inde totalem mensium suppressionem & sterilitatem, vel etiam hydropem uteri sibi contrahunt.

§. XX.

Lochiorum immoderata profusio repente cohibita pestifera est, siquidem quam facile inflammationem in utero & febrem acutam movet, vel coarctatis nimium uterinis vasis varices ibi fiunt, in quibus concretiones polyposæ, quas foeminae molas dicunt, nascuntur, vel intercepto sanguinis per uteri vasa circulo abortiones, vel continua sanguinis stillicidia, vel inordinatæ mensium effusiones proveniunt.

§. XXI.

Nullus fluxus tam cito & tam periculose ab adstringentibus & opiatas reprimatur, quam qui per ani venas fieri solet; constrictis enim intestinalibus inque primis coli, ceu plenioris & majoribus vasis turgidi, tunicis ac vasis sanguis se convertit & regurgitat ad reliqua intestina, ubi subsistens immanes dolores, spasmos & convulsivas stricturas efficit, quas plura mala insequuntur, sæpe etiam lethalia, præsertim, si ad caput nimia sanguinis fiat congestio & stasis. Vidimus enim hæc ratione & deliria & lethales convulsiones secutas. In ventriculo ejus inflationes, vel etiam spasmos, præcordiorum

iorum anxietates, vomitiones, singultus & extremorum frigora parit. Adhæc longa etiam vitia in quibusdam producit; infarctis enim sanguine abdominis visceribus ad cachexiam, ad hydropem, ad lentas & intermittentes febres via panditur expeditissima.

Scholion.

Quam facile & expeditum est, & mensium & hæmorrhoidum fluxum sistere, tam arduum & difficile erit, eundem revocare inque ordinem redigere; & quidem eam ob rationem, quia constrictis extremis vasis & partibus, per quas fluxio fit, & vasorum & nervorum partium motus statim invertitur & versus interiora & superiora declinatur, qui motus à natura alienissimus si diu durat, quasi in habitum abit & ægerrime emendatur. Hinc fluit ratio, cur mala illa spasmodica à retento vel intempestive cohibito mensium & hæmorrhoidum fluxu tam pertinacia ac fere insaniabilia sint, nisi mox inter initia convenientibus remediis occurramus.

§. XXII.

Æque pestifer est adstringentium usus, si ruptis pulmonum vasis cruor copiosissime effunditur; nam reentina constrictione sanguis congestus spirandi auget difficultatem, vasorum minimorum pulmonalium obstructions, indurationes, in majoribus vero polyposas concretiones progignit, ut deinde facile recurrat hæmoptysis, vel phthisis & hectica febris ex pulmonum corruptela enascantur. Consuetæ narium hæmorrhagiæ, si repente variis artificiis cohibeantur, in adultis facile in dolores capitis gravativos, vertiginem, auditus difficultatem, vel etiam in apoplexiam abeunt; in junioribus inde pectoris oppressiones, hæmoptysis, difficilis respiratio vel etiam phthisis sequuntur.

§. XXIII.

Neque cruenta vomitio hanc perversam medendi methodum sustinere commode potest, insequentibus eam anxietatibus, cardialgiis syncopiticis animique deliquiis vel atrocibus circa hypochondria spasmodicis.

§. XXIV.

Quam perniciosæ sunt sanguinis repentinae compressiones, tam noxium quoque est, si impurius feri profluvium intempestive coërceatur. Hujus rei exemplum dat fluor albus, quo suppressio nihil frequentius accidit, quam ut conversa ad habitum corporis corrupta materia purpura chronica diu & pertinaciter affligens enascatur, quæ etiam exquisitissimis remediis non facile cedit, nisi hic fluxus resuscitetur. Fiunt quoque à fluore albo vi quadam cohibito ventris intumescentiæ, lumborum dolores lentæque febres cum artuum torpore & ingenti corporis lassitudine.

§. XXV.

Pejoris indolis est virulenta ex impuro coitu gonorrhœa, si inconsulte adstringentibus tractetur. Repulsa enim ad vasa lymphatica corrupta materia instar fermenti totam lymphæ massam inquinat eamque ita corrumpit, ut tenax, viscida & acris caustica evadat, quæ postea in parte vel glandulosa, vel in summa cute, aut membranis stagnans atroces dolores, noctu maxime urgentes, in facie pustulas, in aliis partibus pravas exulcerationes, in glandulis inguinalibus bubones, inque universo corpore ingentem languorem & lassitudinem procreat.

Scholion.

Hanc universæ lymphæ corruptionem non licet tam facile radicitus tollere, sed validioribus & sæpe mercurialibus opus est bene præparatis, ut glandularum & partium nerveo-fibrosarum fortiori strictura totus lymphaticus latex in validiorem motum abripiatur, & vel

per salivales fontes, vel per intestinales glandulas, aut subcutaneos tubulos, vel per omnia hæc excretoria simul, quod præstat, materia malignæ impuritatis evacuetur.

§. XXVI.

In aliis feri impuri vitiis ad summam cutem partesque externas delati, quæ inter eminent erysipelata, arthritides, achores vel tineæ capitis, gutta rosacea, scabies, purpura & variæ pustularum & macularum species, nihil inconsultius est, quam corruptam materiam, quæ exitum per transpirationem affectat, variis linimentis ex mercurio, sulphure, vel etiam balneis constrigentibus & intro sumtis purgantibus, aut intempestivis sanguinis missionibus reprimere, siquidem tubulis cutaneis hoc modo constrictis sævissima subinde mala oriuntur.

Scholion.

Prout enim materia maligna, & quæ veneni vim induit, alia atque alia petit loca membranoso-nervea, varia oriuntur mala; quandoquidem in capite non raro inde hemicrania, guttæ serena, vertigines, epilepsiæ, phrenitides, in faucibus angina, in pectore asthmata & pleuritides, in ventriculo cardialgicæ anxietates & inflammationes, vomitus, singultus, in intestinis atrocia tormina, alvi strictura, in universo corpore febres lentæ vel etiam acutæ generantur.

§. XXVII.

Erysipelata vel etiam arthriticos dolores male tractatos per saturnina exterius applicata, & medicamenta intro sumta, quæ impetum sanguinis à cute divertunt, ut sunt purgantia, præsertim in impuris corporibus, in lethalem sphacelum degenerasse, plurimis experimentis cognitum habemus.

§. XXVIII.

Quum itaque in plurimis morbis adstringentium & interne datorum & extrinsecus adplicatorum abusus sit maximus & plerumque exitialis, multo consultius videtur ab iis prorsus abstinere, sed potius rationali methodo fluxionum, si immodicæ fuerint, curam aggredi; quod fit, si spasmi idoneis remediis coërceantur, materia irritans temperetur, & impetus motuum ad alias vias opportune divertatur.

C A P U T VII.

De morborum maxime epidemiorum origine ex aeris vitio & transpiratione impedita.

§. I.

EXperientia certa & indubia constat, nihil in rerum natura esse, quod, præter adfectus animi & venena, tam subitam mutationem motibus & functionibus corporis animati inferat, quam aer mutatus, adeo, ut etiam animi vigor exinde varie afficiatur.

Scholion.

Aër teste Hippocrate, libr. de flatibus §. 4. & 6. maximus est in omnibus, quæ corpori accidunt, & vitæ & morborum autor & dominus. Nam major in hoc est vis ad immutandum & solidorum & fluidorum statum, quam in ullo alio: hinc aeris mutationes varii sequuntur morbi.

§. II.

Videmus sub cælo sereno, puro & temperato, venti flatibus orientalibus, vel iis cum meridionalibus aut septentrionalibus junctis, item si vere temperatus & æqualis aer est, insigne robur & corpori & animo accedere,

dere, hominemque ad actiones corporis & ingenii præstandas tunc longe esse alacriorem, sanio-rem & ad procreandam sobolemeriam aptiorem. Contra aëre existente nubilo, turbido, pluvioso & regnantibus diu ventis humidis & levibus, quales sunt, qui ex occidentali plaga veniunt, non modo corpus in languorem & pigritiam incidere, sed & ingenium hebetari, animumque tristitia sine causa sæpius infestari, & appetentiam perire observamus.

§. III.

Corpora & robustiora & alacriora fieri, somnum etiam & ciborum appetentiam melius se habere, hominemque invalidum & ægrotantem citius sub aëre sereno, puro, frigidiusculo sique argentum vivum in barometro altiora petit, convalescere, quin imo & morborum curationes & medicamentorum operationes tunc felicius cedere, notavimus. Hisce contrarias vires habere coelum turbidum, nebulosum, pluvium, & ubi mercurius in descensu est attenta experientia etiam compertum est.

Scholion.

Ego sæpius apud ægrotantes observavi, ubi morbus in declinatione fuit, eos non potuisse placidum somnum, appetentiam & vigorem in animo & corpore recuperare sub argenti vivi humiliori statu in barometro; cum primum vero loca altiora petiit mercurius, mox languor decessit, & vires incrementum coeperunt.

§. IV.

Quatuor illis anni temporibus variisque aëris constitutionibus, neque minus locis, prout ea varium situm habent ventisque exposita sunt, quasdam familiares & proprias quasi esse ægritudines, non dubitandum est.

Scholion.

Nemo ex veteribus rectius & dignius hanc utilissimam materiam ipso Hippocrate persecutus est, qui non modo in *Secl. III. aphor.* morbos, qui per certa anni tempora & tempestatum aërisque & ventorum mutationes nasci solent, proponit, sed & ex temporum constitutione præsentis & futuros morbos cognoscendos & dijudicandos exponit.

§. V.

Duplex statuendus est aër, ad vitam & sanitatem incolumem & integram servandam necessarius: unus nempe est internus, qui in succis corporis, imo in universo corpore continetur; alter est externus, qui corpora ambit, iisque circumfusus est. Ille elatere suo & expansiva virtute maxime in solida & fluida agit, hic vero gravitate & pressura magis nimiam elaterii interni expansionem impedit atque in æquilibrio servat.

§. VI.

In omnibus animantium succis, in sanguine, lymphæ, lacte, bile, in ovis, urina, multum aëris continetur, qui etiam beneficio antliæ extrahi & variis experimentis demonstrari potest. Ab hoc incluso sanguis & humores intra vasa non secus ac liquidum in thermometro se expandunt majusque spatium acquirunt, à frigore vero condensantur, inque arctius se conferunt.

§. VII.

Cum aëris fluidum alimentis liquidis & solidis intime mixtum sit, inque ipsa aqua magna ejus abundantia detur, non dubitandum amplius est, quomodo aër ad sanguinem intra corpus venire possit.

Scholion.

Non modo ex aqua, sed & omnibus liquidis aëre ope antliæ expellitur in forma bullularum, & tantam vim habet, ut mercurium etiam in alto tenere possit;

quidni etiam in ipsum chylum & sanguinem aër transeat? Conspeximus sæpius corporibus dissectis majora vasa sanguine vacua & aëre repleta. Porro quod tanta vaporum copia è corpore vivo quotidie exhalet, id certe expansivæ & calidæ aëriarum partium in sanguine existentium expansioni adscribendum videtur. Neque hoc ignotum fuit ipsi Hippocrati qui *Libr. de Flatibus* §. 9. ita differit: *ciborum ingestione necesse est multum spiritum ingredi: omnia enim, quæ eduntur bibuntur, spiritus in corpus inferunt, id quod manifestum est per eructationes erumpente aëre incluso.* Plurimum itaque refert cibum sumere sub liquido, puro & sereno aëre, qualis enim aër externus, talis cum cibo & potu irrepit in corpus & miscetur ejus succis. Perquam curiosa est observatio, pro mutatione aëris & ventorum vinum in doliis multum claritate differre: quidni etiam sanguinem & cætera corporis liquida ab aëre externo in crasi sua mutationem subire posse arbitremur.

§. VIII.

Utut respiratione aër ipse per vesiculas pulmonales non admisceatur sanguini, tamen non modo per inspirationem, sed etiam per poros universi corporis materiam ejus calidam ætheream ad sanguinem transire, nihil dubii esse arbitror, eo quod à calore aëris crescit calor corporis, & quia calor aëris per ipsos thermometri poros liquorem expandit; multo magis id fiet in animantium corporibus, quæ non tam compacta sunt & dura, quam vitra.

§. IX.

Agit aër & æther duplici modo: nam primo qui subtilissimis succis immixtus est, expansiva sua vi robur maxime, tonum & constrictionem fibris elasticis præstat; qui vero in crassioribus fluidis & sanguine est, vasorum expansionem adjuvat. Et calidus quoque expansivus aër vitales succos intime miscet, agit, nec non transpirationem promovet. Qui vero ambit, gravitate sua internum aërem quasi in æquilibrio servat, ne nimia fiat vasorum expansio, humorumque rarefactio & evaporatio.

§. X.

Igitur in conservatione æquilibrii istius & proportionem aëris interni cum externo vitalis ille & moderatior fluidorum circuitus & transpiratio potissimum consistit.

Scholion.

Nam in aëre nimis calido & rarefacto si versantur homines, validissima fit transpiratio, ob nimiam & præcalidam humorum expansionem. Quin imo si excessiva fit, uti videmus in balneis nimis calidis, ob nimiam auricularum cordis expansionem sistitur systole, ut animi interdum oriatur deliquium. Eadem est ratio, quare animantia sub vacuo moriantur. Nam subtracto aëre atmosphærico graviore aër sanguinis tam fortiter expandit cor & vasa, ut ad debitam contractionem redire nequeant, unde sanguinis motus prorsus intercipitur & vita perit.

§. XI.

Cum totum corpus nostrum innumeris tubulis & poris pervium atque vasculosum sit, per quod continuo & perenni motu æstuantur humores circumferuntur, non mirum est, ingentem copiam tenuissimorum corpusculorum aqueo-aëreorum & sulphureo-salinorum modo sub forma vaporum, modo humoris, per illud evehi.

Scholion.

Totum corpus humanum & exspirabile & inspirabile esse, apud omnes in confesso est: *Galenus Comment. in aph. 15.* inquit, *nemo est, qui non consentiat, diffilari animalium corpora, idque fit per sensui occulta foramina.* Deinde per nares, & os ex pulmonum bronchiis maxima halituum copia, quæ etiam sub frigido aëre in sensum incurrit, exspirat.

§. XII.

§. XII.

Tanta est exhalationum, quæ perspirant, copia, ut secundum *Sanctorii* calculum excretiones per alia emunctoria omnes exuperet, & ratione humoris, qui alvo egeritur, proportio sit, ut 1 ad 4. ita, ut si cutis 24. uncias ejiciat, sex tantum ex intestinis profluant.

Scholion.

Etiā id *Jacobus Sylvius* adfirmat, copiosiore semper materiam à corpore nostro excerni per transpirationem insensibilem, quam per urinam & secessum, ita ut ex octo alimentorum libris, quas quotidie quis usurpavit, quinque earum per poros avolent. At vero id non esse perpetuum, propter ingens climatum discrimen, sciendum est. In aëre enim calidiore major utique est perspiratio, quam in nostro climate septentrioni propinquo. Mirum videri potest, quod tam apud *Hippocratem*, quam apud *Celsum* quantum ego scio, ad sudores eliciendos raro commendetur medicina, cum sudor tantummodo ut præfagii nota adducatur, procul omni dubio, quia in præcalida Græciæ regione jam tum nimia humorum per sudores diffusio est, alvus vero ibi constrictior.

§. XIII.

Perspiratio, qua ingens quotidie copia humoris è tubulosa & poris pervia cute effunditur, à duplici fit causa: altera est continuus ille beneficio systoles & vasorum cordis sanguinis ad tubulos cutis excretorios appulsus; altera est internus calor, qui expansiva, qua præditus est, virtute, & quæ satis in thermometro conspicitur, succos expandit, poros aperit, & humidum in tenuissimos vapores resolvit.

§. XIV.

Quo validior itaque est fluidorum à solidis ad habitum corporis impulsus auctiorque circulus, eo plus humoris, nisi constrictus cutis cortex sit, exhalat. Quodcumque itaque cursum & circulum sanguinis promoveret, id quoque perspirationem augere certissimum est.

Scholion.

Ideoque videmus, laborem & exercitationem corporis, pulsum, calorem & transpirationem augere. Observamus quoque, ea, quæ sudorem eliciunt, fortiorem pulsum efficiendo id præstare. Et quia sub aëre puro & sereno vividior est omnium fibrarum motio & liquidorum propulsio, eo tempore transpirationem melius vigere nihil dubii est.

§. XV.

Perspirationis duplex videtur ratio: una, quæ cum nimio interno æstu & cutis ariditate juncta est, qualis in impetu febrium sub strictura atque angustis tubulorum cutis fit, quæ minus naturæ amica est, quia per nimiam sanguinis & intestinam & progressivam motionem ejus temperata crasis non modo destruitur, sed & consumitur atque tandem substantia virium exhauritur; altera, quæ sub moderato calore & dilatatis subcutaneis tubulis fit, est magis humido-vaporosa, ceterumque mollem ac turgidam reddit, & hæc valde est salubris, quoniam superfluum & effœtum humorem consumit, in justa vero temperie, proportionem & crasi vitales succos conservat. Illa sicca & præcalida transpiratio in statu, qui fit præter naturam, hæc moderata & vaporosa in sano contingit.

§. XVI.

Quotidiana cognitum est experientia, diffusionem esse majorem ac sudorem largiorem per corpus fluere, quo major in aëre est æstus, rarefactio atque tenuitas, unde æstivis mensibus, & sub sole ferventissimo, sudore diffuunt corpora, quod etiam fit si descendimus in balnea calida & vaporosa.

Frid. Hoffmanni Oper. Tom. I.

Scholion.

Æstate corpora minoris ponderis, quam hieme esse, recte judicavit *Sanctorius cap. de Aëre aph. 23.* tenuissima enim ætheris, qui calorem efficit, materia, quæ per omnia spatia diffunditur & mirifice se expandit, & fortiori intestina partium agitatione humidum in vapores disjicit.

§. XVII.

Maximum est illud commodum, quod liberior perspiratio, quæ æquabili & vegetiori sanguinis cursu fit, ad integram valetudinem servandam præstat, quoniam à multis superfluis, impuris & corruptioni inferendæ aptis tum aqueis tum salino sulphureis agilioribus partibus, vitales succos vindicat, ut vires & nutritionem corporis & fovere & tutari rectius possint; quare sub liberiori perspiratione corpus & mens ad obeundas functiones majori semper alacritate fruuntur.

§. XVIII.

Liberior perspiratio corpus à plurimis morbis vindicat, & ad eos quoque expugnandos permultum confert magnamque vim habet.

Scholion.

Superiori capite jam clarius deductum est, ex deficientibus vacuationibus & remanentibus excrementis morbos natales potissimum suos trahere, jam vero, si certum est, majori copia pessimæ indolis excrementa per cutem transmitti, quam per reliqua omnia emunctoria, sequitur, ea diminuta morbos pullulare complures. Præclara sunt, quæ habet *Primerosius lib. 3. de erroribus vulgic. cap. 2. Vix fieri potest, ut ille, cui corpus optime transpirat, liberum ac patens est, in morbos graviores atque periculosiores incurrat, & rectissime Hippocrates lib. de Alimentis eos salubriores prompteque ad sanitatem restitui pronunciat, qui corpus habent bene transpirans, difficilius vero restitui, si illud male transpirat.* Observatur quoque, æstivis mensibus, ubi transpiratio est maxima, homines & parum ægrotare & paucos mori. Spasmi, qui hypochondriacos, dolores, qui podagricos alias torquere solent, tunc fere silent & conquiescunt. Senes imbecilli, perpetuis molestiis obnoxii, nulla anni parte melius degunt, quam æstate: contumacissima quartana & alii, qui longo tempore fatigarunt, morbi, ab infarctu maxime viscerum oriundi, æstate vel minuuntur, vel penitus expirant. Quid porro notius est, quam quod in integrum restituta maxime transpiratione periculossimi morbi solvantur, & ob faciliorem transpirationem macilentiores præ spongiosis & repletis facilius ad sanitatem perducantur.

§. XIX.

Magna & periculi plenissima sunt mala, quæ perspiratio diu cohibita corpori infert; succos enim impuros auget atque ad corruptionem & putredinem disponit, & hinc morbos universales, ut febres & cachexiam, producit, iisque malignam quandam vim ingenerat.

Scholion.

Habemus in eo consentientem & veterum & recentiorum experientiam. *Hippocrates, lib. II. de diata* ita differit: *quicquid ab excretionem (puta cuticulari) intus remanserit non solum corpori laborem exhibet, sed etiam ei parti, quæ humiditatem suscepit, non enim commoda est corpori, sed infesta, circuitum enim non habens materia quiescens calefit tum ipsa, tum quæ allabuntur, & inde totum concalescit corpus, & febris fortis inducitur.* Ex *Galenis* quoque passim in suis scriptis prodit, à libero transpiratu impedito & febres fieri & succos corrumpi. *Sanctorius Sect. 1. aph. in Medicina statica* prodidit: *si ex statico deprehenditur, impeditam esse perspirationem, diebus sequentibus vel succedet plenior perspiratio, vel aliqua sensibili*

bilis evacuatio, vel cachexia, vel febris. Et aph. 43. Con-
suetum perspirabile retentum, si non in lotium, vel su-
dorem facessit, indicat futuram putredinem. Hæc mala
vero & citius & gravius pullulant, labascentibus simul
& diminutis aliis solennibus & salutaribus, quæ fiunt
per alvum, per urinam, per menses, per hæmorrhoides,
vacuationibus.

§. XX.

Omnes illas, quas tempora anni ferunt, ægritudines
à prohibita transpiratione generari, verisimillimum est;
experientia enim & *Hippocrates Sect. III. aph. 20. &*
Celsus lib. II. cap. I. testantur, vere insanias, hæmor-
rhagias, epilepsias, anginas, arthritides, gravedines,
tussés, lippitudines, abscessus, pustulas, rheumatismos,
variolas, morbillos, catarrhales febres, item synochas
facile oriri.

Scholion.

Ratio generationis morborum tempore verno hæc vi-
detur: hieme ob copiosiore & duriorē victum, æ-
remque asperiorē & vitam quietiorē sanguinis copia
& crassities major gignitur; inchoante autem vere at-
mosphæra valde inæqualis & mutabilis est, modo humi-
da, modo calida, modo frigida & ventosa, ut non raro
per diem ter vel quater argentum vivum in barometro
situm suum mutet, idque maxime fit Martio, qui ob
plurimos morbos & mortes, quas infert, fere infamis
est. Hisce accedit, quod aëre ferventiorē facto, quæ
hieme diu stagnarunt in terra, humiditates in putridas,
corruptibiles exhalationes dissolvi incipiant, quare pe-
reginari & diu versari in ejusmodi aëre, præsertim, si
corpus imbecillum est, periculo non vacat; siquidem
potentia illa fibrarum elastica, quæ in cordis vasis &
musculis est, cujus beneficio fluida reguntur, neque mi-
nus tonus & elater cutis à frigore, humiditate & ca-
lore sic variante mirifice labefactantur, ut sanguinis cir-
culus, & exclusio sordium per halitus valde diminuta
& plethoram & impuritatem, quæ proxima morborum
& motuum morbosorum est causa, ingignat.

§. XXI.

Morbi æstate familiares, qui juxta recensitionem *Hip-*
pocratis Sect. III. aph. 21. sunt maxime febres ardentes,
biliosæ, cholicæ, tertianæ continuæ & intermittentes,
non tam siccitati & æstui primario & directe debentur,
quam potius aëri frigidiori & humidiori, qualis tunc
nocte & mane esse solet, qui cutem occludit & præcali-
das bilioso-sulphureas scorias intus retinet, adscribi debent.

Scholion.

Æstas alias ob liberiorē perspirationem valde salu-
bris est, si vero morbos profert, hi, ut accuratæ tes-
tantur observationes, gignuntur, si corpora æstu nimis
calecta aëri frigidiori vespertino, qui frigido-humi-
dus est, diutius committuntur, qui in locis humilioribus,
declivibus & paludibus cinctis gravior, & hinc majore
noxam infert. Et solet ejusmodi aër, ut ego sæpius
vidi, non tantum transpirationem, sed & alvum con-
stringere, sique ex prava diætâ cruditates in primis viis
accedant, in promptu febres sunt, magno calore hoc tem-
pore plerumque stipatæ.

§. XXII.

Autumnus & experientiæ & omnium peritiorum
medicorum consensu morbosissimus est, certe non ob
aliā rationem, quam quod ob inæqualitatem & cre-
bram mutationem cœli modo frigidi, modo humidi,
modo calidi, multis & diversæ indolis vaporibus stipa-
ti, virtus elastica, quæ in fibris est, immutatur, adeoque
& libera & vivida sanguinis circulatio & sordium trans-
piratio imminuatur, earumque retentio in corpore au-
geatur.

Scholion.

Optime de hisce egit *Celsus lib. I. cap. 4.* qui nostram

sententiam confirmat, dum scribit: *ob autumnī varietate*
tem periculum maximum est, itaque neque sine veste, ne-
que sine calceamentis prodire oportet, præcipue que diebus
frigidioribus, neque sub divo nocte dormire, aut certe
bene operiri; & lib. II. cap. I. hæc adjicit: *autumna-*
le tempus & diutinis malis fatigatos, & ab æstate etiam
proxima pressos interimit, & alios novis morbis conficit,
& quosdam longissimis implicat, maximeque quartanis,
quæ per hiemem quoque exerceant. Cæterum morbos au-
tumnales *Hippocrates Sect. III. aph. 21.* enarrat.

§. XXIII.

Hiems quos excitat morbos, ii certe intenso frigori,
tam sicco, quam humido, omnino debentur, utroque
transpirationem impediēte; inde enim pleuritides &
peripneumonix, item rheumatismi & defluxiones,
arthritides, acuti dolores, & qui caput eo tempore im-
petunt morbi & ab *Hippocrate loco citato aph. 23.* des-
cribuntur, quoque gignuntur: nam acriori frigore, cu-
jus virtus valde est constrictiva, non tantum transpira-
tio impeditur, sed & humorum impetus & copia ad
pectus, ad caput, vel etiam ad artus & partes extre-
mas dirigitur, unde rebelles fiunt humorum stagnatio-
nes & periculosæ tenuissimorum vasorum ab impactis
humoribus oppilationes.

Scholion.

Frigoris effectus in cute ad oculum patet, dum illa
arida, dura, aspera, & constricta inde evadit, eaque
ante mollior in monticulos quasi attollitur, vasa dispa-
rent, & quia ea frigoris est natura, ut humida increas-
cet, condenset, & omnia solida induret, hinc eundem ef-
fectum quoque ab excessivo frigore corpora nostra pati
rectissime colligitur.

§. XXIV.

Duplicis generis frigus est, vel siccum, vel humi-
dum: cujusque peculiaris natura, vis atque etiam effi-
cacia est in corpus humanum. Illud, aquilonare maxi-
me, aerem valde compressum & constrictum continet,
qui calore expanditur. Humidum vero oritur maxime
hieme, austris & zephyris flantibus. Siccum & constrictum
frigus argentum vivum in tubo Torricelliano in
sublime tollit ob elasticam fortem pressuram: humidum
vero illud dimittit ob elaterem imminutum.

§. XXV.

Frigus siccum, purum, serenum, humido vacans cor-
pora mobilia atque expeditiora reddit, quia elaterem
fibrarum, quo fluida impelluntur, roborat, inde, mo-
do corpus vestibus probe tectum sit, sanum hominem
non adeo offendit, ut potius tonum & robur partibus
solidis adjiciat.

Scholion.

Ex quo jam apparet ratio, quare, qui septentriona-
les regiones incolunt, sana, robusta & quadrata habeant
corpora, quæ non facile offenduntur, & vitam quoque
agant longiorem; item, cur hyeme, si frigus est serenum
& æquale, & mentis & corporis vigor alacrior sit,
& homo tum plus alimenti appetat & concoquat, ut
Hippocrates etiam ventres calidiores hieme putet. Aër
enim serenus & frigidus, fluidis admixtus, intra cor-
pus calore sese eximie expandit, & hac ratione & so-
lidorum & fluidorum motum ac progressum auget.

§. XXVI.

Nocet frigus siccum boreale, ubi partes nervæ &
membranosæ rigidæ sunt, spasmo & dolore affectæ,
quare omnes morbos à spasmo exasperat, & quietos
facile resuscitat; nocet quoque iis, qui macra & exte-
nuata habent corpora, qui imbecilles sunt, & qui non
diu à morbo convalescent.

Scholion.

In spasmis enim & doloribus nimiam esse nervosarum
partium

partium strictionem ac tensionem, non ignotum est. Frigus vero quia solidas partes magis constringit, induratur easque rigidas efficit, non mirum est, omnes dolores, convulsiones, distensiones & rigores inde augeri. Frigus omnibus partibus nervosis & morbis, qui ex nervis fiunt, ab *Hippocrate Sect. V. aph. 17. & 18. it. 20.* hostile habetur. Animadvertimus quoque, ut bene notavit *Celsus Lib. II. cap. 1. aquilonem tussimovere, fauces exasperare, ventrem adstringere, urinam suppressere, horrores excitare, item dolorem lateris & pectoris; sanum tamen corpus spissare, & mobilius atque expeditius reddere.* Pathemata, quæ hypochondriacos tam graviter exercere solent, forti frigore invalescunt: quia à spasmodica partium nervosarum strictione proveniunt. Calculum in renibus quietum nihil tam subito movere, præter acre frigus, lumbis improvide admissum, aptum est: neque quicquam tam facile recidivas febrium & dolorum, quam frigus aquilonare parere ac reducere solet & ventus borealis; atque etiam angustiam spirandi in asthmate à sincero frigore crescere, ab humido & leviori vero decrefcere observatione non indignum est.

§. XXVII.

Vehemens frigus id habet incommodi, ut fortiori fibrarum & vasorum strictione & compressione humorum motum ab ambitu corporis magis ad interiora urgeat & convertat, & æqualem atque per vasa minima exteriora liberum sanguinis & humorum circuitum impediendo, graves & periculosos in partibus præsertim debilioribus infarctus, vasorum repletiones & morbiferas semper stases & stagnationes efficiat.

§. XXVIII.

Quo magis itaque vasa sanguine vel puro vel impuro sunt repleta, eo plus frigus improvide admissum officit.

Scholion.

Nocet quam maxime plethoricis, cachecticis, cacochymicis, item obesis & habitioribus corporibus. Neque enim tantum in iis liberiolem transpiratum intercipit, sed etiam ad interiora non sine periculo reprimat, & urget succos, unde ex observationibus scimus, omne frigus, sive sit humidum, sive siccum sub ejusmodi statu in cephalalgias, vertigines, affectus soporosos, apoplexiam, paralyfin, aurium tinnitum, auditus difficultatem, oculorum obfuscationem, lippitudines, prompte & expedite concitare. Neque aliud tam facile coryzas, gravedines, rauces, tusses, pleuritides & peripneumonias, item asthma humidum, præter frigus acre pectori admissum, suscitatur, inque artubus dolores tractorios, lancinantes & rheumatismos producit.

§. XXIX.

Frigus humidum plus valetudini corporis infensum videtur, quam siccum, quia non modo valde inspissat humores, & minimos meatus obstruit, sed & humiditate tonum fibrarum relaxando universum humorum cursum retardat, & sic transpiratione diminuta & copiam & impuritatem succis adjicit; quare ad morborum generationem atmosphæra humida & simul frigida & diu persistens plurimum confert, cum aer siccus & frigidus eos magis moveat atque in actum deducat.

§. XXX.

Corporis conservationi nihil tam adversum & hostile videtur, quam nimium humidum, sive frigidum, sive calidum sit, quia relaxando fibras earum elaterem, tonum & robur imminuit, unde tardior fit humorum progressio, quæ crescente nimia humorum abundantia atque impuritas ingravescent.

Scholion.

Caveant igitur sibi quam maxime ab humiditate frigida omnes imbecilles, & ubi est sanguinis tardior progressio.

Frid. Hoffmanni Oper. Tom. I.

gressio & intercepta transpiratio, atque corpora nimis spongiosa & laxa sunt, infantes, foeminae, senes, & qui intemperantiae vacant, multum comedunt & acida supra modum assumunt, qui corpus non exercent, & somno nimium dediti sunt, qui gravi moerore anguntur; multo magis vero ceu venenum illud effugiant cachectici, hydropici & qui oedema in pedibus habent, asthmatici & foeminae circa mensium fluxum, & quando gravidæ vel in puerperio constitutæ sunt.

§. XXXI.

Certa ac firma constat observatione, diu regnantem in quacunque etiam anni parte humidam aëris constitutionem admodum esse morbosam, & loca declivia & humidiora paludibus cincta & continuis nebulis obsita ad parandas febres & putredines esse aptissima.

§. XXXII.

Ad morbos ingenerandos varii generis epidemios nihil plus confert majoremque vim habet, quam tempestas diu humida, pluvia, nebulosa, ventis vacans, si postea repente flante aquilone acia frigora, vel etiam dies præcalidi sequantur. Quod si vere & autumno fit, tanto certior horum morborum proventus est.

Scholion.

Attenta & diligenti observatione constat, hiemem tepidam & pluviolam si ver excipit in principio aquilonare, item si vernum tempus potissimum humidum, nebulosum & pluvium, ventis vacans, subito frigidis diebus sequuntur, sique autumno nimis humido frigus hibernus supervenit, morbos grassantes certo expectandos esse. Idem quoque accidit, si æstatem nimis ferventem, vel etiam dies valde calidos, humidum frigus excipiat. Et quid notius est, quam quod ex loco si quis concedat valde calido in valde frigidum, vel ex frigido in calidum, corpus grave fiat & destillationes oriantur. In genere enim sciendum est, æquabili cutis tono, sub quo maxime viget libera perspiratio, nihil magis esse adversum eumque destruere, quam repentinam mutationem aëris calidi in frigidum, vel humidi in nimis calidum. Nam sicut alvina excretio à tono & motu intestinorum peristaltico æquabili & integro; ita cuticularis illa, quæ sanitati maxime patrocinator, excretio ab eutonia cutis ejusque tubulorum, ut nec nimis laxi, nec nimis constricti sint, dependet. Deinde certum est, atmosphæram diu & nimis humidam ac levem intime penetrare, & universum fibrarum & membranarum corporis systema ita afficere, ut solutum & à tono suo dejectum sanguinis & humorum impulsus & progressum & transpirationem nunquam non languidiorem & imbecilliolem reddat. Si vero atmosphæra valde frigida est, ita fibræ & membranæ constriunguntur & rigida redduntur, ut fortior quidem fiat liquidorum impulsus, sed extrema vasorum ora, præsertim ea, quæ sunt in cute, claudantur vel angustentur. Utroque modo vitatur transpiratio & solidorum motus ac circulus sanguinis turbatur, & hinc non solum materia ad morbos præparatur, sed & ea in motum & actum morbosum maxime per frigus superveniens deducitur.

§. XXXIII.

Morbi, qui certis temporibus ac locis plures simul infestare solent, non sunt unius ejusdemque generis, sed pro diversa conditione præcedentium & præsentium tempestatum, item pro varia hominum natura, ingens discrimen recipiunt; modo enim totum corpus, ut sunt febres, modo certam tantum partem occupant, ut sunt dolores & fluxiones, modo placide procedunt & bene morati sunt, modo pessimis symptomatibus stipati multos perimunt.

Scholion.

Morbi utique epidemii sunt ex eorum numero, qui

mortales & frequentius infestant & in vigore sæpius ætatis tollunt singulisque fere annis diversam ferunt naturam atque indolem. Et quoniam à causis plane manifestis mechanico-physicis, maximeque æris constitutione & victu ac vivendi ratione cuivis loco propria ac familiari dependent, optandum vehementer foret, ut medici majorem operam, meditationem & studium in iis indagandis & ex præcedenti & præsentis temporum constitutione iisdem prædicendis & postea recte tractandis conferrent, quam hucusque in usu fuit. Altum plerumque in pathologiis de hac amplissimi usus doctrina est silentium, forsitan quia non accommodata est omnium hypothefibus. Antiquissimum & optimum medicinæ scriptorem *Hippocratem* & qui fere primus ejus vestigia secutus est, *Sydenhamium*, postea *Ramazzinum* laudare & commendare debemus, qui facem nobis prætulerunt & bono exemplo, quod sequi debemus, ad excolendam & illustrandam hanc doctrinam, præverunt. Quare omnes & singulos medicorum cordatiores, quibus curæ cordique salus hominum est, rogatos etiam atque etiam volo, ut in annotandis morborum historiis, si epidemii morbi grassantur, & diligentissimi & accuratissimi sint, & quisque in suo loco temporum & tempestatum præcedentium & præsentium constitutionem & mutationem, nec non ventorum conditionem, item in barometro mercurii motum, ac gradum caloris ex thermometro simul adjiciant, integrasque & plenas historias cum methodo curandi & eventu exhibeant.

C A P U T VIII.

De morborum generatione ex nimia sanguinis quantitate & humorum impuritate.

§. I.

Veteres potissimum medici duplicem morborum materiam & causam statuebant; alteram nimiam sanguinis abundantiam, quam dixerunt plethoram, alteram ejus aliorumque humorum magnam impuritatem, quam cacochymiam vocarunt. Illam maxime à ciborum, qui bonos præbent succos, hanc, qui malos & intemperatos dant, copia derivabant. Nos non tantum ex ingestorum, sed maxime excretionum vitio & defectu horum causam ducendam esse existimamus.

§. II.

Non omnis abundans & copiosus sanguis statim officit & plethora dici meretur, sed is tantum, qui lædit & vitiat actiones secundum naturam, maximeque, qui vegetiorem & liberiores sanguinis circulum impedit.

Scholion.

Nam videmus homines sanos, vegetos & nulli adversæ valetudini obnoxios, qui ingentem sanguinis in corpore quadrato continent copiam. Contra deprehendimus quosdam, qui ne dimidiam quidem, illorum respectu, sanguinis continent quantitatem, à qua tamen male se habent & laborant.

§. III.

Veteres duplicem statuebant plethoram, unam ad vasa, alteram ad vires. Illam dixerunt, quando succi supra justam mensuram accumulati venas supra modum plenas & distentas & totam corporis molem tumidam efficiunt. Quando vero vasa & corporis substantia nec rument, nec copia sanguinis distenduntur, plus tamen sanguinis continetur, quam à viribus imbecillis regi ac moveri possit, hanc plenitudinem ad vires nominabant.

Scholion.

Quamvis hanc distinctionem plures recentiorum repudient neque aliam, quam ad vasa plethoram admittant, tamen hanc ipsam non parum momenti & attentionis in praxi habere fatendum est. Nam uti ciborum copia & satietas duplici modo considerari potest, quatenus ab eorum nimia ingestione supra modum ventriculus distenditur, vel quatenus minor eorum quantitas à minus firmo stomacho subigi & concoqui non potest. Simili ratione id quoque adplicandum est ad sanguinem ejusque vasa eorumque robur.

§. IV.

Igitur illa tantum sanguinis abundantia, sive ad vires, sive ad vasa æstimetur, plethora morbida dicenda est, quæ sanguinis liberum progressum ac circuitum retardat, vel impedit; nam sanguis etiam valde affluens, modo promte & expedite iter suum per vasa absolvat, robur magis & vigorem corpori dat, tantum abest, ut illud imbecille reddat: simul ac vero incipit à vigore motus deflectere, tum demum noxius est & morbos minatur.

Scholion.

Nimia succorum & sanguinis copia congesta vasorum demum latera nimis distendit eaque ad solito majorem diametrum urget, hinc sua resistantia cordis & vasorum potentiam elasticam frangit atque diminuit, quare segnior statim fit sanguinis impulsus; nam fibras, quæ sunt elasticæ naturæ, nimia extensione debiliores reddi, ipsa experientia abunde testatur. Et hæc est generis plethoræ ad vasa. Ubi vero jam solidorum tonus ac vis elastica à præcedente morbo, vel alia de causa fracta & debilitata est, tum non adeo magna humorum quantitas & resistantia ad eorum vim contractivam & impulsum diminutum requiritur, ut tardior sanguinis & humorum circulus fiat, perpetuo vitæ ac sanitati infensus.

§. V.

Plethora ad vires æque frequens ac familiaris est, quam illa ad vasa. Nam illam, qui sunt rari, laxi & spongiosi corporis, vasis copiosis & tenuibus donati, maxime sustinent: deinde, qui ex præcedente morbo, inedia, nimia sanguinis profusione, aut vehementi & diuturno animi motu vires amiserunt, facile in eam incidunt. Qui vero sunt corpore denso, fibroso, stricto, & vasa ampliora habent, valdeque voraces sunt & quieti, plethoram ad vasa magis experiuntur.

Scholion.

In genere illud notari velim, ea corpora magis patere morbis, qui à tardiori sanguinis progressu proveniunt, quæ imbecilliora sunt, quæ habitus sunt laxi, turgidi & spongiosi, item quæ sunt obesa & repleta, quam quæ vasa habent ampliora & corporis sunt gracilioris & strictioris: quandoquidem expeditiorem sanguinis circulum esse in vasis capacioribus, quam in angustioribus, & ubi fibræ sunt tensæ & renitentes, quam solutæ & laxæ, per se clarum ac liquidum esse puto. Accedit, quod secundum observationem nostram & forsitan primam cor cum vasis corporis semper æqualem habeat proportionem, ita ut ampliora vasa de magno corde, parva & exilia de parvo testimonium exhibeant. Parvum vero cor ob inopiam fibrarum elasticarum non tantam resistantiam sanguinis superare posse, quam magnum, ubi major fibrarum elasticarum est apparatus, credibile est.

§. VI.

Sanguis non quatenus abundat, sed quatenus vires premit & tardius progreditur, actiones corporis pervertit & morbum infert: & quia non tantum ex nimia san-

sanguinis quantitate, sed etiam ex imbecillitate virium tardior fit circulus, hinc apparet ratio & explicatio illa vera veterum, qui ignorarunt sanguinis circulum, distinctionis inter plethoram ad vires & vasa.

§. VII.

Statum plethoræ ad vasa plura indicant signa. In macilentis mire expansa sunt vasa, spongiosi corpus habent repletum & turgidum, faciem coloratam & inflatam. Utrique ad exercitationem sunt inepti, nam facile delassantur, sique superiora petunt, ægre spirant & ab inconfueto motu dolorem quendam contusivum in omnibus artubus experiuntur, profundo quoque gaudent somno, plerumque insomniis pleno, & ab adsumtis calidis, spirituosus molestas turgescencias & exæstuationes patiuntur, sique multum ingerunt & parum laborant.

§. VIII.

Nihil est, si forsan venena & animi affectus exceperis, quod tantam ruinam ac perniciem corpori minetur, atque illud tam gravibus morbis obnoxium reddat, quam nimia succorum abundantia; quia vires premit & motibus impulsoriis resistit, unde tardior fit sanguinis progressus, segniores etiam excretiones, à quibus tamen salvis præcipuæ sanitatis functiones dependent.

Scholion.

Nemo sane rectius ex veteribus præter Hippocratem morborum originem ex nimia repletione explicuit, uti planissime apparet ex *Libr. III. de dieta* §. 13. & *Lib. II. de Morbis*, inque primis §. 10. Et *Lib. I. aph.* 3. diserte scribit: *in exercitantibus boni habitus ad summum progressi periculosi sunt.* Clarius adhuc Celsus *Lib. II. Cap. 11. se* explicat: *si plenior aliquis & speciosior & coloratior factus est, suspecta habere bona sua debet.* Et *Lib. I. Cap. 1. ea corpora, quæ more athletarum repleta sunt, celerrime & senescunt & ægrotant.*

§. IX.

Sublato solidorum in fluida à nimia humorum copia æquilibrium, totus eorum progressus retardatur ac minuitur, hinc quoque attritus ac divisio sanguinis in minimas partes, & solidi cum fluido intima mixtio minor, sanguinem spissum, immobiliorem & ad secretionem atque excretionem subeundas ineptum reddit.

§. X.

Plura & gravia sunt illa vitia ac mala, quæ à tardiori sanguinis circulo proveniunt.

Scholion.

Sanguinem ex triplici & valde dissimili substantia compositum esse, observatione non indigna experimenta demonstrant. Prima est tenuis & fluida, aquea, cujus tres partes in sanguine sano sunt ad unam partem solidi, quod leni facta evaporatione innotescit. Hæc quarta pars solidi duplicem rursus diversæ indolis substantiam continet, unam solubilem in aqua & rubicundam, alteram tenacem, fusci coloris, quæ aqua non dissolvitur, & hæc fere dimidii ad illam ponderis est. Hæc duplicis generis & naturæ in solidiore sanguinis parte consistens substantia deprehenditur etiam, si sanguis missus & secta vena profluens dimittitur in aquam tepidam, tum brevi tempore aqua supernatans valde fit colorata, in fundo vero hærent albi, spongiosi flocci, & interdum, ubi plethora urget, tam firma coagula, quasi ex fibris & membranis retis in modum compacta, ut nulla aqua solvi possint, reperiuntur. Ecquis dubitet, illa ipsa ex segniori sanguinis progressu & diminuta ejus divisione esse prognata, & fertilem infarctuum, obstructionum & concretorum, quæ polyporum formam habent & vasa periculosissime occludunt, materiam & causam subministrare.

§. XI.

Cum nimia sanguinis redundantia in universo vasorum systemate tardiores faciat progressum, liquido apparet, eum adhuc fieri impeditiorem in iis partibus ac locis, per quæ ordinario & secundum naturam paulo tardius sanguis fertur, quod maxime fit in visceribus abdominis, præsertim in intestino colo ac recto.

Scholion.

Quo remotiores sunt partes à validissima potentia cordis motrice, eo minorem esse sanguinis per has velocitatem, clarum per se est. Deinde, quia adscensus liquidorum ad perpendiculum valde est difficilis, facile poterit peti ratio, cur pedes facilius intumescant, quam aliæ partes, & cur in intestino recto & colo facile stagnet sanguis & difficulter moveatur, item quare in vasis meseraicis inque omnibus abdominis visceribus, ex quibus sanguis in venam portæ atque hepar infunditur, faciles sanguinis stagnationes locum habeant. Perspectum enim ex anatomicis est, sanguinem, qui ex ventriculo & toto intestinorum volumine, mesenterio, omento, pancreate, liene reducit, per venam portæ, quæ pulsu & systole caret, & per innumera hepatis vasa trajici debere. Cum autem id segniter præstetur, facile intelligitur, tardiores utique etiam secundum naturam sanguinis per hæc viscera esse progressum.

§. XII.

Mala, quæ ex nocente sanguinis tardiori motu ac stagnatione intra abdomen proveniunt, modo à spasmodicis partium membranarum stricturis, modo ab atonia viscerumque infarctu & obstructione proficiscuntur.

§. XIII.

Ubicunque sanguis intra membranas nerveas & carneas subsistit, stagnat, easque valde distendit, ibi dolor & spasmus gignitur, qui tanto vehementior est tantoque facilius alias nerveas simul partes in consensum abripit, liberumque & æquabilem sanguinis circuitum præpedit, quanto stagnatio & repletio vasorum major est, & quo exquisitioris membranæ sensationis sunt ac validiorem potentiam motricem habent.

Scholion.

Recte à repletione spasmus oriri Hippocrates *Sect. VI. aph.* 39. pronuntiavit. Sed tamen non ubique vasorum à sanguine repletio, uti videmus in hepate, in liene, in utero, in mesenterio, spasmus & dolorem producit, sed tantum in iis partibus, quæ ex membranarum nerveo-musculosis, quæ genuinum omnis motus & sensus organon sunt, constant.

§. XIV.

Si intra membranas intestini coli & recti validas & robustas, nerveo-musculosas, multus sanguis in vasis satis capacibus firmiter hæret ac stagnat, ob difficilem ad venam splenicam valde remotam adscensum, multi graves oriuntur dolores & spasmi, gravium pathematum, præsertim in hypochondriacis, auctores.

Scholion.

Fortissimam colon, præsertim ejus partem, quæ in sinistro latere sita varias flexuras habet, stricturam pati, aliquoties reperi in iis, qui ex pathematibus spasmodicis mortui dissecti fuerunt, ubi alias satis amplum & capax colon ita constrictum fuit inventum, ut funem medii digiti crassitie vix æquaverit. Et non raro tanta in hypochondriacis vel etiam hystericis est recti & coli strictura, ut nec clysterem admittat vel flatum transmittat. Incipiente itaque in hoc intestino strictura statim motus peristaltici in toto intestinorum canale fit læsio atque inversio, ut flatus & feces non recte def-

cendant, sed potius ad superiora regurgitent, unde ventriculi & duodeni molestissima fit inflatio, propter tensionem nervorum molestissima mala post se trahens. Ex quo jam rationem apparere claram existimo, cur hæmorrhoides fluentes horum malorum sævitiam non parum minuant, & quare illæ suppressæ aut temere cohibitæ acerbissima pathemata in toto systemate nervorum producant, item quare opportuna sanguinis per hirudines ex venis ani extractio, vel ejus in pedibus missio plus auxilii, quam ullum aliud remedii genus, simili in casu adferre soleat, & quare clysteres ex puris oleis confecti, qui stricture relaxant, præsentissimam opem quoque præstent.

§. XV.

A vehementibus intestinorum, præsertim coli, spasmodis fiunt graves sanguinis in his vel illis partibus congestiones, periculosa stases, vel etiam enormes sanguinis per hæmorrhoides, vel per cruentum vomitum, apertis brevibus vasis, vel dehiscuntibus venis, quæ ad ileon pertinent, nigrae & foetidissimæ dejectiones.

Scholion.

Equidem non negari potest, sanguinis per venas sedis fluxum spasmos hypochondriacorum egregie mitigare; neutiquam tamen ex eo concludendum est, omnem affectum hypochondriacum semper & unice ab intercepto fluxu hæmorrhoidali provenire. Nam ex compluribus malo hoc ægrotantium historiis certum habemus, sanos antea homines, & ubi nullum hujus fluxus fuit indicium, ætate adhuc juvenes, per male curatas febres, dysenterias, per frigidum potum, calefacto corpori immissum, vel post gravem terrorem, vehementes purgationes, malum hoc sibi contraxisse & ab eo tempore statim dispositionem ad hunc fluxum subnatam fuisse. Plures enim adhuc causæ habituales quasi spasmi vel etiam flatulentiam partibus his nervosis inducere possunt. Notum vero est, per spasmos valde comprimere vasa, ut libero sanguinis circuitu præpedito ille impetuose ad alias partes urgeatur, unde vasorum nimia distensiones & apertiones fiunt. Quare etiam non mirum est, in vomitu cruento & sic dicto morbo *Hippocratis* nigro, ruptis vasis brevibus & ilei, quæ ambo tenuissimis membranis tecta sunt, in ventriculi & intestinorum cavitatem cruorem effundi, quod tanto facilius fit, quanto obstructio & infarctus in liene & dolor lateris sinistri tensivus, qui non tam lieni, spasmi & doloris experti, quam potius colo adscribi debet, familiarius hisce malis jungi solent.

§. XVI.

Quando sanguis copiosior in foeminis singulis mensibus per uteri vasa non recte depletur, nimia ejus in corpore fit accumulatio atque vasorum, quæ membranas investunt, etiam intestinorum, ventriculi, spinalis medullæ, imo cerebri à stagnante sanguine distensio & fibrarum nervearum pressio, unde vehementes in hisce partibus fiunt spasmi, dolores, convulsiones, nervorum distensiones & gravissima alia pathemata, hystericiis quam familiaria.

Scholion.

Si enim ob vasa uterina nimis tenuia & angusta, vel etiam illa obstructa aut infarcta, aut spasmo contracta, menstrualis deficit aut minuitur purgatio, sanguis ad interiora regurgitat, & vel in visceribus abdominis nimios parit infarctus, vel membranosas & nerveas partes ad vehementes spasmos concitat, qui totam demum œconomiam motuum sanguinisque liberum circulum atque saluberrimas excretiones nunquam non turbant atque pervertunt, unde plura & gravissima mala à mensium retentione fieri compertissimum est.

§. XVII.

A tardiori sanguinis ex plethora per universum corpus & maxime per abdominis viscera progressu longæ & difficiles ægitudines, ut scorbutus, cachexia & variæ hydropis species nasci solent, idque fit maxime ab hepate, liene, pancreate & mesenterii atque omenti vasis ac glandulis infarctis, obstructis, induratis, ut incisiones corporum post mortem testantur, unde læso harum partium officio sanguis nec bene miscetur, nec bene depuratur, sed potius crassus, impurus & corruptus evadit.

Scholion.

Nullæ infimi ventris partes ex tam innumerabili vasorum copia constructæ sunt, quam hepar & lien. Et quia non satis validis motricibus & nerveis fibris instructæ sunt, non mirum est, eas sæpius à nimio sanguine mirifice inque amplissimam molem distendi, obstrui & indurari. Et quia totum pancreas glandulosum est, & exilissima in omnibus glandulis, quarum ingens copia in mesenterio est, sunt vasa, quæ ob stupendam parvitatem facile possunt obstrui, eas itaque tardiori sanguinis progressu facile indurari & scirrhasas fieri posse, non mirum est. Jam quum liberior lymphæ circuitus unice à sanguinis circuitu dependeat, isque valde imminutus & præpeditus sit in amplissimo hepatis viscere, non difficulter concipi potest, quomodo ex tam lento, in hoc aliisque imi ventris visceribus, sanguinis progressu & stagnatione lymphæ separetur, & copiosius in lymphatica vasa ingrediens tandem illa nimium distendat ac rumpat. Quod vero pedes tam frequenter obnoxii sint tumoribus oedematosis, id maxime propter hanc causam fit, quia tardior sanguinis per has partes extremas & remotas à corde est cursus & recursus per venas, ob situm perpendicularem & erectum, admodum difficilis, unde ex subsistente sanguine serum facillime secernitur omnesque poros ac tubulos ibi implet atque occupat.

§. XVIII.

Ob nimiam quoque redundantiam segnior sanguinis progressus, & inde facta major ejus crassities, non modo in parvis vasis ea obstruendo morborum dat fovetque causas, sed in ipsa quoque cordis cavitate, ejusque vasis majoribus non raro mirabile quasdam coagulationes, ex meris fere membranarum ac fibrarum coalitas, duras, indissolubiles, sæpe ingentis molis, quæ vulgo polypi nominari solent, ingenerat, quæ perniciosas longarum & insanabilium non tam infrequenter ægitudinum causæ & comites existunt.

§. XIX.

In iis, qui subita morte extinguuntur, aut apoplexia, suffocativo catarrho, aut asthma convulsivo cum pectoris hydropo vitam finiunt, quandoque etiam, qui ex hæmoptysi, pleuritide, asthma hydropico extinguuntur, insignis magnitudinis polypi, cor vel pulmonalia vasa occupantes, reperiuntur.

Scholion.

Vel unicum id illustre exemplum polyporum abunde nos edocere potest, inspectionem cadaverum, morbis difficilibus præsertim chronicis mortuorum medicinalem artem & maxime doctrinam de morbis, eorumque causis & sedibus insigniter promovere & maximam lucem illi adferre posse. In veterum monumentis nulla polyporum mentio reperitur, quia parcius vel plane nulla post mortem facta fuit corporum incisio & inspectio, quum tamen testantibus, quæ nostris temporibus fiunt, sectionibus in omni fere difficili & gravi morbo non tantum in corde & annexis venis atque arteriis, sed & ultra in cerebri finibus, in uteri aut iliaceis vasis, quandoque ejusmodi concrementa & coagula membranacea reperiuntur.

§. XX.

§. XX.

Scholion.

Experientia compertum habemus, polypos maxime generari in corporibus spongiosis, sanguine copioso turgidis, vitæ sedentariæ addictis, & qui vino vel vini spiritu supra modum se ingurgitant, cæterum parcius bibunt, nec potus facile tenues vel aquam adsumunt. Novi quoque eos subito productos in iis, qui valde frigidam & largiorem potionem in corpus calidum adsumserunt, item in foeminis ex mensium retentione, si lacticiis & acidis nimium delectatæ fuerunt.

Scholion.

In sanguine humano plures dari glutinosas, terreas & limosas non solubiles partes, jam supra ostensum est, idque ad oculum patet, si exsiccatus aquæ calidissimæ infunditur, tunc solvitur quidem subtilior ejus terrea, sulphurea, salina portio, sed remanet fusca & glutinosa, quæ omnem respuit solutionem. Si quando igitur hæc limosior sanguinis pars, vel propter tardio-rem progressum ac quietem, vel ob admixtum acidum, spirituosum, aut valde frigidum, à reliquo sanguine secedit ac separatur, & fortiori facto vasorum appulsu atque compressione partium arctissime compingitur, dura ejusmodi corpora emergunt, quæ vasa obstruendo inæqualem sanguinis motum efficiunt, vel vasa majora claudendo universi sanguinis cursum ac circulum penitus sistunt. Haud fallacia vero præsentis polypi indicia sunt ingens circa præcordia angustia cum magna difficultate spirandi, vehemens cordis palpitatio, pulsuum inæqualitas, vel etiam intermissio, & frequentior lipothymia: quæ symptomata maxime à motu sanguinis, quacunque ex causa aucto, exasperari solent.

§. XXI.

Plethora quoque & ex hac tardior factus sanguinis circuitus primum quasi ad impuritatem & cacochymiam ponit fundamentum. Recte enim *Hippocrates Libr. de sanitate tuenda ad Mæcenatem*: sanguis, cum abundat, valetudinem vitiat, quia bilis acida & amara & pituita, imo sanies nascitur. Nam quo lenior est sanguinis cursus, eo minus ille in tenuissimas partes dividitur atque discerpitur, eoque spissior & tenacior evadit. Quo vero tenacior est, eo plus infarcit & obstruit vasa & excretoria, quæ sanguinis impuritatibus secernendis inserviunt. Quo major vero horum obstructio, eo copiosior impuritas in sanguine emergit proventus.

§. XXII.

Impuri & non bene mixti sanguinis indicium est, si is è vena extractus nimis aquosus est, qualis in hypochondriacis, lienosis & cachecticis apparere consuevit, item si nigricans & pici liquidæ similis, uti in melancholicis, vel si in superficie spissam instar glutinis vel corii crustam habet, uti in scorbuticis, & qui inflammatione interna laborant, vel ad eam dispositi sunt, item si serum nimis flavum ac biliosum est, uti in ictericis.

§. XXIII.

Duplicis vero generis cacochymiam in vasis esse statuendam, non adeo mihi videtur improbabile. Altera quidem subito fit, & facilius quoque transit ac discutitur, atque ex alvi & transpirationis neglectu ducenda est, & ad febres, morbos acutos & epidemice grassantes facillime disponit inque iis locum habet. Prodeunt porro ex hac rheumatismi, catarrhi, febres catarrhales, tussis, diarrhœæ, erysipelata & multiplicis formæ aliæ febres. Altera pertinacior firmiores in visceribus & excretoriis obstructis habet, & à tardiori sanguinis & lymphæ motu pullulat, neque tam facile removeretur, & chronicarum maxime passionum parens est.

Obstructo vel infarcto hepatis viscere sanguis à sulphureis & salinis adustis particulis, quæ bilem constituunt, non probe depuratur. Si vero renes sui muneris obliviscuntur, serum multis salibus excrementitiis fixioribus tartareis imbutur. Per lienem incre vasculosum si sanguis minus libere ob infarctum vel obstructionem transit, crassitiem & visciditatem contrahit, qua fit, ut secretoriorum & excretoriorum vasculorum stupendæ parvitatæ meatus, qui sunt in glandulis, pertransire amplius nequeat. Obstructis vero hæc ratione glandulis vel plane induratis & liberiori lymphæ circulo impedito, ipsa stagnationem, accrescentiam & vapidityatem in vasis concipit.

§. XXIV.

Alia adhuc datur cacochymia, sive magnæ in sanguine impuritatis, quæ subito gignitur, ratio, quæ à validiori ejus per cordis & arteriarum motum auctiorem impulsu, attritu & commotione oritur, quemadmodum id clare apparet in omni febre, in qua temperatus & bene mixtus sanguis solo motu, tam progressivo, quam intestino auctiori, interposito aliquot dierum spatio, tam impurus reddi potest, ut compluribus falsis, sulphureis, viscidis partibus refertus ad nutritionem & omnes actiones secundum naturam præstandas penitus sit ineptus.

Scholion.

Motus solidorum in fluida vehementior, qualis est febrilis, blandam gelatinosam sanguinis crasin & consistentiam valde resolvit, adeo, ut è vena emissus sæpe coccineus & flammeus instar coloris floris cardinalis appareat, adeoque nec frige factus in gelatinam abeat, nec in aquam calidam infusus bombyciformes floccos deponat. Est itaque febrilis motus medela quidem sanguinis, tam copiosi, quam crassi ac tenacis optima, sed tamen valde impurum eum reddit, adeo, ut præcipua ejus pars in excrementa colliquecat. Unde non tantum corpus & vires consumuntur, sed & urinæ ingentem quantitatem viscidæ, mucidæ, falso-sulphureæ materiæ, quæ fundum petere solet, evehunt; sudores glutinosi, pingues, acidum spirantes prodeunt; ex alvo copiosa biliosa & foetida, licet parum cibi assumptum fuerit, quotidie ejiciuntur. Quæ excrementa si non secedunt, sed intus cohibentur, certum novi morbi prodituri indicium est. Opera itaque danda est, ut semper, si febris impetus cessat, vel si ex toto quiescit, impuritates illæ, à febre intus productæ, per emunctoria probe eliminantur, quæ præcipua medicorum in convalescentibus a febre debet esse cura.

§. XXV.

Nihil vero tam prompte impuritatem & corruptionem sanguini inducit, quam tardior humorum circuitus & progressio, si sanguis præsertim circa viscera abdominis stagnat, vel lymphæ ob glandulas obstructas in vasis lymphaticis moram trahit & subsistit.

§. XXVI.

Quod si sanguis & humores stagnationem subierunt, intestino calore agitati in corruptionem proclives fieri incipiunt, idque maxime fit, si vasis uteri obstructis menses non feruntur, & sanguis diutius illis inhæret, item si ipsi consuetus per venas hæmorrhoidales exitus præcluditur.

Scholion.

Sola quiete & calore externo aquam simplicem, brevi interjecto tempore, foetidissimam contrahere posse putredinem, inter alia satis vulgatum, notum ac domesticum documentum exhibet aqua illa, quæ in destillatione spirituum vel aquarum ex vesica refrigerationis sine in vase ligneo, per quod canalus stanneus pertransit,

transit, aliquot dies continetur, hæc enim ob calorem non solum insigniter turbida fit, sed & pestilentem foetorem contrahit. Hinc mirum non videbitur, sincerum sanguinem stagnatione diutina in vasis inclinare in corruptionem, eumque sola quiete in foetidissimam putrilagine dissolvi, id quod apparet maxime in sphacelo. Quapropter haud temere pronuntiamus, sanguinem & humores, qui ex valde corruptibili & aliena, sibi-que dissimili materia constant, eo magis ad corruptionem tendere, quo tardior eorundem per vasa corporis humani motus atque progressio est.

§. XXVII.

Datur itaque impuritas humorum putrida, quæ omnium teterrima est, & pessimi generis morbos excludit, eosque malignos tam acutos, quam chronicos reddit, quos inter merito scorbutus eminentioris gradus referri debet.

Scholion.

Scorbutus est maxime malum endemium, ex ingenti sanguinis & humorum corruptione enatum, ortumque suum maxime debet pravis ingestis, duris nempe, acidis & salis cibus, aëri humido & vappido, item vacuationibus præsertim sanguinis per menses & hæmorrhoides varias ob causas imminutis, unde propter tardiores sanguinis progressum & retentionem excrementiarum sordium humores tum salinam, tum viscidam & putridam dyscrasiam induunt, quæ deinceps variis exulcerationibus, maculis, pustulis, atrocibus doloribus & depravata nutritione sese prodit, & necem interna viscerum corruptione vel sphacelatione externarum partium infert; quare scorbuticorum sanguis plerumque plumbeus & viridis ac fere putridusprehenditur, teste *Eugaleo de scorbuto pag. 70.* id quod vel ipso plebis iudicio subinde confirmatur, cum sanguis hisce coloribus tinctus ex sectis venis prodit. E scorbuticorum gingivis sanguinem foetentem profluere, vulgatum itidem est & nemini ignotum.

§. XXVIII.

Non solum sanguis, sed & lymphæ vel propter virulentum miasma admixtum, vel ob glandulas & vias obstructas motus progressivi expers, summam internam contrahit putredinem, quæ gravissimorum morborum, cuiusmodi sunt lues venerea, lepra, elephantiasis, herpes, scabies maligna, facunda mater est, & serpentibus ac malignis exulcerationibus variis æque ac vitiata nutritione viriumque plenaria deiectione abunde se manifestat.

Scholion.

Maximam ineffe istis morbis humorum corruptionem, inter alia clare testatur eorum sanguis è vena missus, qui in lue venerea, teste *Foresto Libr. VI. pag. 72.* corruptus, viscosus, fibris destitutusprehenditur, inque lepra grumofus, adustus, feculentus, lenticulosus, imo arenosus, vel etiam verminosus observatur. Quade re legi potest *Camerarius in Sylloges Memorabilium Cent. XIX. 36.* item *Kircherus in Mund. Subterr. Lib. XII. Sect. I. Cap. X. & Sect. II. Cap. VII.*

§. XXIX.

In cutis vitis, quæ à succorum impuritate & acrimonia oriuntur, frequenter observavimus glandularum tumores, instar globulorum, sub cute; vel etiam inter musculorum interstitia in artubus hærentes, quibus prius non dispulsis morbus nullo fere artificio expugnari potest.

Scholion.

Ejusmodi tumores instar majoris pisi duros & glandulosos non modo circa collum in tinea capitis, in lipitudine & acri defluxione oculorum, sed & in pedi-

bus & manibus in maligna & sæpius recidivante scabie, in purpura quoque chronica atque in pedibus, ubi malleolos occupabant ulcera, sæpius vidimus & tactu cognovimus, neque unquam ad sanitatem perducipotuerant hi morbi, nisi prius his tumoribus discussis & disparentibus; siquidem glandulæ, quæ è conglobatarum numero sunt, lymphæ motum fibrarum nervearum strictura promovere debent, adeoque si intumescunt, satis clare denuntiatur, progressum lymphæ in his locis esse interceptum, unde illa in corruptionem & acrimoniam abit, atque erosionem & defœdationem ulcerosam cutis producit.

§. XXX.

Purpura, nostris temporibus admodum familiaris, rubra & alba; chronica & acuta, maligna & benigna, lymphæ à naturali crasi deflectentis, vel insigniter corruptæ soboles mihi identidem videtur, neque si acutis vel statim in principio accedit, vel in declinatione supervenit, periculo vacat.

Scholion.

Purpura chronica, scorbuticis, hypochondriacis & iis scæminis, quæ mensium defectu & alvo adstricta laborant, admodum familiaris, raro perfecte curatur, quin potius curata sæpius regeneratur & revertitur. Vidi sæpenumero, eam resuscitatam fuisse diuturno mœnore, vel alio gravi animi affectu. Et certe radicitus auferre hunc morbum non exigui operis res est, neque mediocrem exigit prudentiam atque observationem; difficulter enim glandularum obstructions referantur & lymphæ circulus restituitur. Pejoris vero naturæ est ea purpura, quæ puerperarum morbis, vel acuta febre decumbentibus supervenit, quoniam tunc majoris impuritatis soboles est; quæ in puerperis nunquam non est manifesta, & plerumque in statu graviditatis contrahitur. Quæ tandem purpura demum febribus acutis supervenit, ea partim ab excrementis, ob alvum adstrictam diutius retentis, biliosis & salivalibus, partim etiam ab humoribus effœtis, balsamica sua vi à nimio febrili æstu orbatis, & circa viscera abdominis stagnantibus & putrescentibus, incunabula sua trahere mihi videtur.

§. XXXI.

Humores quoque lymphatici diuturniori mora & stagnatione summam sæpius acrimoniam causticam contrahunt, quæ in scorbuticis maximeprehenditur, ubi molestissima procreat symptomata.

Scholion.

Ab hac acrimonia dolores artuum vagi, fixi, defluxiones acres, falsæ, erodentes, sitis inexhausta, cholera, diarrhoea, erosiones ventriculi & intestinorum & pessimæ exulcerationis species, febres quoque cholicæ biliosæ derivari possunt. Mirabile exemplum corrosivi sanguinis reddit, ut ab una guttula vesica in cute excitata fuerit, refert *D. Læbenwald in Miscell. Curios. Dec. II. Ann. II. Obs. 107.* *Sennertus de Consensu & Dissensu Libr. I. Cap. XVI.* refert, scorbuticum fuisse cuius sanguis naribus emissus tam acris fuerit, ut lintamina, quibus exceptus fuerit, corroderet. *Bonetus in Medic. Septentrion. Part. II. Libr. II. Sect. XXII. Obs. 2.* urinam scorbutici lintea corrodentem annotavit. Lac corrosivum vidit *Wolfus in Miscell. Naturæ Curiosorum Dec. II. Ann. VIII. Obs. 72.* Plura allegata loca vide in *Dissert. nostra de generatione salium morbosorum.* Est enim tota scorbuticorum natura salifica; nam si excrementa biliosa sulphureæ alcalinæ indolis, quæ per alvum excludi debent, si salina tartarea fixioris naturæ, quæ urina evehuntur, si subtiliora, quæ per cutem transeunt, maxima ex parte remanent in succis, postea salina ex alimentis falsa, acida & diversi generis alia admiscuntur, non mirum est, pro varia horum unione intimaque combina-

combinatione, eorumque intestina inter se agitatione, diversi generis & naturæ salia summe acria & caustica quoque ingenerari.

§. XXXII.

Quum origo impuritatum, sive salinæ, sive sulphureæ sint, primo ad tardiores sanguinis & lymphæ progressum, deinde ad obstructions, seu pravum emunctoriorum statum vel defectum excretionum referenda sit, liquidissime constare arbitror, ea remediorum genera depurando sanguini esse accommodatissima, quæ circulum sanguinis promovent, quæ excretionem per universum corpus liberat & expeditas efficiunt, & quæ materiam evacuationi idoneam reddunt.

Scholion.

Non ignotum est, quanta in materia medica remediorum silva ad sanguinem purificandum proponatur, dum quædam sal acidum, acre, salsum, vel tartareum invertere & præcipitare, quædam sulphur peregrinum figere, causticam materiam demulcere, involvere, vel viscidum incidere dicuntur, quum tamen nihil quicquam fere hujus habeant facultatis, neque etiam hæriolari liceat, quomodo tam exigua medicamenti quantitas universum sanguinem aggredi atque immediato contactu, quicquid vitiosi ipsi inhæret, corrigere vel emendare possit. Sed potius censemus, ipsa suffragante experientia, à pessimæ indolis impuritatibus ibi collectis massam sanguinis & humorum non rectius, quam per alvinas purgationes & per diaphoresin moventia, interpositis vicibus ac diutius usurpata, liberari.

§. XXXIII.

Observationes practicæ docent, foeminas, si mensium defectu laborant, & viros, quibus hæmorrhoides consuetæ non bene fluunt, inter alia plura vitia in partibus externis varias exulcerationes, quæ cutim defœdant, pustulas, erosiones & tumores mali moris pati, quæ omnia, nisi in ordinem sanguinis fluxiones redactæ fuerint, ægre aliis remediis tolluntur.

Scholion.

Hippocrates lib. 6. Epid. Comment. 3. & ad finem *lib. de Humorib.* utilitatem hæmorrhoidum plenius recenset, ubi dicit, hæmorrhoides non solum solvere melancholicos affectus, sed & tubercula, pustulas, furunculos, vitilignes, denique omnia, quæ habent melancholicum humorem, aliis humoribus permixtum. Nam certe vero est valde simile, sanguinem, si vel in uteri pampiniformibus & intortis vasis, vel in meseraicis quasi incarceratus & immotus diu persistit, à naturali sua dulci & gelatinosa indole deflectere, & falsam putridam naturam induere, unde sensim paulatimque universa sanguinis & humorum massa à corruptione inficitur. Et tum, si quis, ut bene monet *Hippocrates lib. 6. Epid. sect. 7.* impurgatus labori se dederit, ulcera erumpunt; quod etiam fieri solet post omnem validiorem sanguinis, etiam per medicamenta, commotionem. Ita enim sordes salinæ ad partes externas feruntur, quæ aqueis partibus per auctam transpirationem dissipatis aciores redditæ causticam & catharteticam naturam exerunt. Ex quo patet, quam salutiferum in omnibus gravioribus cutis vitiis sit, solennes sanguinis vacuationes in ordinem redigere.

§. XXXIV.

Pessima igitur status corporis plethorico-cachymici est conditio, quippe non modo omnibus morbis tam acutis, quam chronicis patet, sed eos etiam deteriores reddit atque effectum remediorum & spem medentium plerumque eludit.

Scholion.

Si quando morbus epidemicus, etiam per se non adeo

exitiosus in corpus impurum & repletum incidit, certe non caret periculo. Vehemens animi commotio, ut terror, ira, mœstitia, lethalem sæpius in ejusmodi corpore producit effectum. Frigus paulo acrius admissum mirifice officit, & omne, quod valide commovet, remedium, sive sit purgans, sive emeticum, aut mercuriale, vel fortiter sudorem movens, sive balneum præcalidum, in plethorico cacochymicis gravissima concitare mala solet, maxime vero iis infensa sunt medicamenta, quæ adstrictivæ sunt facultatis, quæque opium recipiunt. Atrox dolor & spasmus, si ejusmodi detinet corpora, producit sæpe alias ægritudines, quæ funestum habent eventum. Felicem itaque eum habeo medicum, cui cura ejusmodi corporum non adeo frequenter committitur, parum enim arte sua proficere poterit.

C A P U T IX.

De genuinis corpora à morbis præservandi præsidis.

§. I.

Precognitis sic atque reclusis veris morborum, quibus homines infestant & vitam præmature tollunt, fontibus atque originibus, in facili nunc atque proclivi erit, rationem atque remedia opportuna invenire, quibus primis morborum initiis eorumque generationi occurrere possimus, quod præcipuum & desideratissimum omnium fere hominum votum est.

Scholion.

Profecto nulla pars artis nostræ tam claris & evidentibus nititur principiis & fundamentis, neque ulla ita in medici potestate est, quam ea, quæ constantem & meliorem valetudinem ac certam longæ vitæ spem promittit, utpote, si animi vim & motum exceperis, morborum initia ex levibus, manifestis, externis & mere physicis causis paulatim pullulant, crescunt & vim acquirunt. Quicumque itaque tum ex observatione atque experientia diligenti & accurata, tum ex vera & clara theoria omnium earum rerum, quibus homo uti solet, salubrem & insalubrem vim, naturam ac potestatem accurate novit, & quomodo plures causæ invicem junctæ ad producendum quendam morbum concurrant, intelligit, is certe magno studio atque cura eo eniti poterit, ut apta remedia inveniat, quibus gravissimas ægritudines, & dolorem & molestias & tristissimam mortem minantes, felicissime sub divina gratia avertere possit. Nam sicuti omnium rerum difficultas principii semper facilius obsistere licet, quam ea, quæ læsa ac vulnerata sunt, reintegrare: ita multo certius & expeditius est, morbis in principio occurrere, quam si corpus jam à morbis infestatum vel victum jacet. Tunc profecto difficile, vel prorsus extra potestatem medici est, remedia morborum causis removendis apta invenire.

§. II.

Supra jam satis evictum & demonstratum est, sub eutonia partium solidarum & moderato ac libero humorum circulo ac sufficientibus excretionibus & vitam & sanitatem atque integritatem corporis & animi salvam perstare atque incolumem, omnisque generis ægritudines in perverso solidorum motu fundari & ex male ingestis & excretis oriri. Ex quo utique clarum fit ac perspicuum, omnem præservandi rationem maxime in eo positam esse, ut ea conquiramus remedia, quæ motum solidorum & fluidorum æquabilem & liberum, omnesque excretionem integras & illæsas conservant.

§. III.

§. III.

Superioribus locis satis abundeque ostensum est, tardioris sanguinis progressum per universum corpus, & maxime per viscera abdominis, corpus multis & valde impuris humoribus replere, & retardatas tam solennes sanguinis, quam eas, quæ fiunt per transpirationem & alvum, evacuationes morborum epidemiorum, acutorum & chronicorum, matres esse fecundissimas. Opera igitur danda est, ut omnibus modis evitemus ea, & maxime, quæ ad ingesta & aëris usum pertinent, quæ ullo modo humores augere, eos intemperatos reddere, tardioris sanguinis progressum facere & excretiones impedire possunt.

§. IV.

Quum libero sanguinis progressui & ab eo pendentibus salutaribus excretionibus nihil magis adversum sit, quam sanguinis & humorum copia ac crassities, ideo ea inquirere & sibi quam maxime ab iis cavere non modo sanus, sed maxime etiam natura imbecillis debet.

§. V.

Immodicus & intemperatus cibus uti morbis amplam materiam & occasionem præbet: ita modicus ac temperatus & vires & sanitatem optime tuetur, & securissima via est ad vitam sanam & longam perveniendi.

Scholion.

Ad alimenta intemperata & noxia, præsertim copiosius si sumantur, omnia dulcia, dura, pingua, acida, acerba, viscida, & quæ ægre coquantur & dissolvuntur, item nimis acia, aromatica, calida & spirituosissima pertinent. Quæ bonos vero & naturæ amicos succos præbent, sunt omnis panis & carniū, præsertim juniorum animantium, genera, & maxime omnium ova forbilia. Quæ cuncta & bonum chylum & bonum præbent sanguinem, ac nunquam, nisi nimia quantitate, in sano statu nocent.

§. VI.

Homo ordinarie, sive robustus, sive imbecillis sit, plus adsumeret solet alimenti & plus etiam sanguinis generat, quam ipsi ad motum vegetum & nutritionem necessarium est, & quam natura ferre, subigere & regere potest. Et quia in ejusmodi nimia succorum redundantia primum destructæ valetudinis fundamentum fitum est, hinc nimiam sanguinis & succorum in venis repletionem & probe indagare & inter initia statim remove oportet.

§. VII.

Si quis itaque à nimio adsumto potu & cibo & imminuto labore ac motu corpus grave & lassum, ad motum ineptum & venas simul turgidas atque inflatas sentit: consultum est statim variis remediorum generibus huic plenitudini occurrere, eaque adhibere, quæ eam demant ac minuant.

Scholion.

Hoc in numero est primamque laudem meretur abstinencia, ubi parum, vel nihil adsumit homo in coena, vel per totum diem; nam nihil æque corpus à morbis vindicat, quam tempestiva abstinencia. Deinde victus quædam mutatio est instituenda, & plenus ac lautus in tenuem vertendus, ideoque ad tempus à carnibus, & quæ ex genere ac familia animantium sunt, abstinendum est, & potius cibi ex vegetantibus sumendi, modo ventriculus eos ferre possit, & aqua vel sola, vel dulcis vini & spirituosissimi miscela bibenda, tum etiam motum & exercitationem vel laborem corporis augere oportet. Nam motus prudenter & cum debita observatione adhibitus omnia alia remedia præservatoria longissime superat, quia non modo circulum sanguinis au-

gendo minuit humores & transpirationem restituit, sed & crassum sanguinem resolvit & vires adjicit. Debet autem motio fieri non post, sed ante cibum & semper peracta concoctione.

§. VIII.

Si quis ejusmodi remediis, quæ minuunt humorum copiam, uti detrectet, & nimia vasorum plenitudo tardiorque sanguinis circuitus præsentia mala minetur, tunc præstat, quantocyus fieri potest, plethoram solvere, idque optime fit sanguinis missione, quæ statim ejus motum liberiores restituere incipit, adeo, ut etiam excretiones, sanguine superfluo detracto, melius, quam antea, succedere observatum fuerit.

Scholion.

Non semel, sed iterum & aliquoties observavi in corporibus sanguine valde repletis segniores alvum, cutem aridam, urinæ fluxum parciorem, & imminutum quoque mensium fluxum, ubi mox à sanguine emissio alvus fluidior facta est, fecibus valde biliosis prodeuntibus, ob liberiores jam bilis in hepate separationem & adfluxum ad intestina factum; urina quoque fluxit coloratior & copiosior, somnus contigit placidior & corpus post motum liberius sudavit. Neque obscurum est, sed satis etiam vulgo compertum, secta ante tempus mensium vena liberiores eorum fluxum fieri. Magna itaque sunt illa beneficia, quæ ex venarum incisione prudenter administrata in valetudinem hominis redundant. Optimi vero successus indicium expulsum magnitudine & robore à secta vena aucto desumendum est, eo quod magnitudo pulsuum sanguinis progressum & circulum auctiorem factum significet.

§. IX.

Quam egregium vero ad multos morbos avertendos præsidium est in venæ sectione opportune instituta, tam magnam quoque vim nocendi habet eadem, improprie ac inconsiderate administrata. Plures sæpe noxas sanguinis detractionem excipientes animadverti, dum quidam in magnam corporis lassitudinem & gravitatem inciderunt, somno facto inquieto, atque à sumto cibo male se & anxie habuerunt, alii in gravedines cum febricula quadam inciderunt. Quidam rheumatismos, sive acerbos & pertinaces dolores in artubus passi sunt, quidam lentas febres inde sibi contraxerunt, quod maxime obtinet in corporibus spongiosi habitus, quæ venis tenuibus & angustis referta sunt, & ubi non tam ex nimia sanguinis plenitudine, quam ex defectu virium in partibus solidis humorum tardior est progressio. Deinde si autumno vel vere coelum diu humidum & frigidum regnat, idque post venam sectam incidit, vel etiam si cibi non concoctu faciles adsumuntur. Cohibita enim hac ratione transpiratio longe pejorem statum corpori, quam antea fuit, infert, & facilis fit ad febres vel etiam defluxiones dispositio.

§. X.

Tutissime venæ sectio instituitur circa exitum Februarii & medio Septembris, si tempestas est constans, non adeo mutabilis, sique tempus serenum & venti orientales dominantur. Deinde, si corpus probe ab aëre frigido & humido defenditur, & cibi concoctu faciles, & alimenta, quæ transpirationem juvant, adsumuntur. Tertio, si minor semper quantitas è corpore spongioso, quam è macilento vasis copiosioribus instructo, extrahitur.

Scholion.

Duo utique mittendi sanguinis præcipua capita veluti scopi sunt, vasorum magnitudo & turgescencia viriumque robur. Nam ubi hæc adsunt, confidenter sanguinem detrahare licet. Neque hic ætas senilis obstat;

stat; nam firmis senibus sanguis tam præservandi, quam curandi sine utiliter & bono successu mittitur. Ubi vero vires sunt subinfirmae, licet ætas sit juvenilis, appetentia & concoctio minuta, præstat tam in cura, quam in præservatione à venæ sectione abstinere, præsertim in molli & raro corpore. Et sanguinis quoque emittendi quantitas ex plenitudine vasorum viriumque constantia à medico, sine cujus consilio nunquam magnum illud auxilii genus tentandum est, determinanda erit. Medicus enim si unquam, certe hic consulendus est, ut vires & habitum ægri spectet, & secundum horum proportionem mittendi sanguinis quantitatem determinet: nam certe, quam expeditum venæ sectionis remedium est ad juvandum, tam promptum quoque est ad nocendum, si quis eo non recte utatur.

§. XI.

Consultius est, ubi corpus molle & rarum sanguine ac succis turget ac rubicundum est, non adeo magnam vasorum inanitionem per sanguinis missionem moliri, sed partem ejus & uncias aliquot saltem extrahere, & reliquum, quod est in vasis superfluum, abstinencia, frictione, motu, vacuatione per alvum, balneis, maxime omnium vero aquarum salubrium usu consumere & discutere.

Scholion.

Nunquam salutarem reperi nimiam vasorum depletionem in corpore spongioso & raro; transpiratio enim facile læditur & crescit humorum impuritas. Tutissimum vero est, præsertim si plethora cum cacochymia urget, portionem saltem sanguinis detrahere, unde ab onere quasi levata natura, corporis rectrix, facilius postea, quod reliquum est materiæ vitiosæ, vincere, concoquere, & quod alienum est, excernere potest; tum etiam remediorum operationes semper feliciter succedunt & maxime aquæ salubres facilius per emunctoria transeunt.

§. XII.

Cum supra clarius demonstratum sit, morborum plurimorum, causas & fomites maxime primis in viis, hoc est, in canale intestinorum, & præcipue in duodeno, vel etiam coli flexuris, stabulari, præcipue omnium videndum est, si ab hisce morbis nobis cavere velimus, ut hæc regio pura maneat, & nunquam colluvie ac sentina vitiosorum humorum repleatur, quod fit, si intemperatos & nimios cibos fugiamus, & alvum satis fluidam ac mollem conservemus eaque maxime evitemus, quæ tonum ventriculi & intestinorum destruunt alvumque adstringunt; maximum enim præsidium adversus morbos à corpore arcendos in excretionem intestinali recte se habente latitat. Præstat vero semper alvum servare apertam alimentis, quam medicamentis purgantibus & acrioribus stimulantibus, quæ nunquam non vim inferunt subtilissimæ & valde sensibili texturæ intestinalium tunicarum.

Scholion.

Cavendum maximopere est à purgantibus, neque ad laxantia facile senata, rhabarbarina, mannata transeundum, si alimentis id fieri potest. Præterea in salibus neutris, si quis iis recte uti sciat, magna latitat virtus ad promovendas excretiones alvinas, sine ullo virium vel digestionis detrimento, uti id clarissime apparet ex thermarum & acidularum salubri usu, qui nonnisi salibus neutris inibi contentis & insigni aquarum ponderi ac copię adscribendus est. Ejusmodi quoque salibus neutris, quæ multum conveniunt cum iis, quæ aquis medicinalibus insunt, utimur optimo fructu & successu, si alvus muneris sui obliviscitur.

§. XIII.

Cibi nimis duri, acidi, adstringentis facultatis, item

lacticia, opera pistoria, ex potulentis cerevisiæ feculentæ, valde frigida potiones, ex medicamentis omnia adstringentia, opiata, purgantia intestinorum motum & tonum naturalem mirifice pervertunt ac turbant; igitur omni opera, studio & cura, si integram servare velimus valetudinem, iis abstinere convenit.

§. XIV.

Et quia ad cruditates pessimæ indolis acidas ingenerandas primæ viæ admodum accommodatæ sunt omnesque fere cibi diutius iis inhærentes coacescere incipiunt, illæ vero & solidis & fluidis partibus & excretionibus valde sunt inimicæ; prudenter, ne cruditates acidæ invalescant, providendum est.

Scholion.

Non modo in melancholicis & hypochondriacis & in foeminis, ubi menses deficient, ubi alvus durior & strictior est, ubi vita sine motu agitur, acidorum succorum saburra in ventriculo ac primis intestinis stabulatur, sed etiam in senibus, & ubi ventriculus est infirmus, & ob alimenta, quæ multum acidi in recessu habent, illa colligitur. Magnum itaque sanitatis conservandæ momentum in eo situm esse quisque sibi persuadeat, ut à nimia quantitate esculentorum & potulentorum, quæ acidum fovent, ut sunt fere omnis generis vina, exceptis Hungaricis, fructus horæi, qui eminentis saporis acidi, sibi temperare discat. Vinum magis inter alimenta medicamentosa, quam nutrientia locum invenire, adeoque, nisi cum aqua temperetur, ordinario plus nocere, quam prodesse, firmiter credendum est. Deinde quoque vinorum est ingens differentia. Quædam citius per alvum, per urinam & alia excretoria transmittuntur, nec diu morantur in ventriculo & venis, & horum liberalior etiam potio non tam nociva est, quam ubi diutius in ventriculo vel venis retinentur, & quæ vel nimiam sanguinis & humorum turgescientiam, vel acidos corrodescentes humores in primis viis producant. Magna itaque cum cautione vino utendum est, ne plus detrimenti, quam emolumenti valetudini inferamus. Si indicium est ingentis acidorum succorum abundantia in ventriculo, subtiliora alcalina, ut sunt maxime cancrorum lapides, cum oleo tartari per deliquium imbibiti, addita una vel altera guttula anisi vel olei de cedro, egregium faciunt officium. Cæterum pilulæ amaræ balsamicæ, secundum Becheri & methodum nostram paratæ, & singulis mensibus bis vel ter usurpatæ, salibus aperitivis altero mane interpositis, primam regionem à copiosis fordibus, præsertim acidis, egregie deplent & liberant.

§. XV.

Retentis in sanguine & humribus ob prohibitam transpirationem excrementitias salino-sulphureas feculentias graves, maxime acutas & periculi plenas passiones, imo populariter grassantes ingenerare, certissimum est. Ut itaque corpus ab iis liberum maneat, maxime id agendum est, ut per cutem perspiratio libera, integra ac salva maneat. Quem in finem probe illud ab omni frigore humido, ventisque ejus naturæ, custodire oportet, & nunquam illud fortiter calefactum, sive ab aëris æstu, à morbo, animi affectu, aut à vehementiori motu, vel potu spirituofo, frigidiori & humidiori atmosphæræ, mane ante solis ortum vel vesperti post ejus occasum, objicere. Vitandæ quoque sunt habitationes in locis humilioribus quæ venti non perspirant, & ubi aër conclusus & vappidus est, multo minus vero in his somnus capiendus est, fugienda quoque est ignavia, laboris intermissio & nimius somnus, item terror & moestitia, quæ omnia transpirationem mirifice retardant & fomites morbosos ingenerant.

Scholion.

Ad corporis per liberum transpiratum purgationem nihil

nihil præstantius est convenienti motu & exercitatione corporis, quæ omnia alia antidota & remedia adversus morbos præservatoria longissime exuperant. Verissima enim sunt, quæ scribit *Celsus Lib. I. Cap. I. Ignavia corpus hebetat, labor firmat, illa maturam senectutem, hic vero longam adolescentiam reddit.* Motus vero remedium etiam caute est adhibendum, siquidem corpore cibis repleto & alvo adstricta plus nocet, quam prodest; concoctione vero absoluta, mane post sufficientem somnum, vel quinque aut sex horis à prandio, instituenta est & primo lenis ac temperata, postea fortior, ut corpus calidum & madidum fiat, idque in aëre temperato & sereno, & post potionem aquæ calidæ, in qua balsamica herba infusa fuit, ira enim majorem utilitatem adferet.

§. XVI.

Quia vero ob mutationem aëris & tempestatum multi morbi infestare consuecunt: prudentis medici est, eos per convenientia auxilia & consilia avertere. Quia in re nos cum *Celfo Lib. I. Cap. X. hæc præcipimus: Tum vitare debet homo fatigationem, cruditatem, frigus, calorem, libidinem multoque magis se continere. Si quæ gravitas est in corpore, tum neque mane surgendum, neque pedibus nudis ambulandum est, neque movenda alvus, atque etiam, si per semota est, comprimenda est.*

Scholion.

Eorum si rationem, quæ *Celsus* gravibus anni temporibus in præsentī loco prohibet, intueamur, vix alia occurrit, quam quod hæc omnia, quæ vires & robur corpori suffurantur, ut est fatigatio, cruditas, libido, vigilia immoderata, & quæ transpirationem impediendo sordes excrementitias accumulanti, ut frigus, ambulatio pedibus nudis, vomitus, purgatio, omni studio & cura evitari debeant. Commendat vero abstinentiam & cibum semel de die adsumendum, & modo aqua, modo vinum bibendum, quia hoc modo evitantur cruditates & transpiratio opportune promovetur.

§. XVII.

Cum indubiæ sit experientiæ foeminarum sanitatem à sanguinis per uterum singulis mensibus fluxu & plurimorum virorum valetudinem à fluxu hæmorrhoidalis ratione & modo decente dependere, iisque inordinatis utrumque sexum graviter luere; omni cura ac studio maxime providendum est, ut hi fluxus salvi sint & ordinem ac tempus servant, neque deficient vel impediuntur.

§. XVIII.

Ut solennes & salutares sanguinis vacationes in ordine conserventur, opus est, ut accuratam diætam fervent homines, præsertim circa imminens fluxionis tempus. Quare maxime iis abstineant, quæ motum hunc naturæ ad excretionem tendentem turbare possunt.

Scholion.

Caveant sibi maxime hæmorrhoidarii & foeminae circa tempus mensium ab omni acri & humido admisso frigore, ab omnibus induratis, concoctu difficilioribus, acidis, fructibus horæis, fermentescibilibus,

inflantibus cibis, lacticiis, potu frigido, ab omni gravi animi commotione, præsertim terrore & mœstitia. Nocet etiam nimia quies corporis & somnus longior. Officiunt quoque sanguinis derivatoriæ evacuationes, v. g. in brachio institutæ, & omnes validæ medicinae, item nimis spirituosæ, sed præstat alvum blande balsamicis pilulis aperire, corpus moderate movere, & potu magis calido, quam frigido uti, pedes vero & extremas partes à frigore bene defendere, & sanguinis cursum liberiores pediluvii efficere.

§. XIX.

Cum in motibus vitalibus, qui corporis nostri conservationi velificantur, integris & salvis servandis justa portio virium, in quibus vis rectorix & motrix totius naturæ consistit, omnes fere partes impleat, viriumque imbecillitas omnibus morbis & periculis obnoxia sit, connitendum utique omni opera ac studio est, ut illæ foveantur & firmæ permaneant, quia non modo secundæ, sed & adversæ valetudinis præsidia à *Celfo Lib. I. Cap. I.* rectissime dicuntur.

Scholion.

Si vires constant & firmæ sunt, ventriculus bene appetit, digerit & egerit, circuitus sanguinis liber est, nullæ fiunt obstructions, nullæ motus sanguinis retardationes, vel humorum stagnationes, sed excretiones recte se habent, & tunc infensa semper plethora & cachymia minime gignitur.

§. XX.

Quemadmodum vires corporis animus hilaris & desiderii ac affectibus vacuus, usus aëris puri, sereni & temperati, cibis modicus & concoctu facilis, & motus proportionatus egregie tuentur, erigunt ac resuscitant: ita nihil est, quod virium substantiam magis exhauriat & corpus imbecillum funestis morbis objiciat, quam intemperantia affectuum, angor, mœstitia, nimia animi intentio & fatigatio, frequentissima venus, aër humidus & vappidus, crebra cœli mutatio, fames, incongruus cibus, assidua vigilia, dolor, morbus, & nimius labor.

§. XXI.

Ad vires debiles erigendas, præsertim in imbecillibus & senibus, præter jam dicta & vinum optimæ notæ, succurrendum etiam est interdum medicamentis roborantibus, quæ fibrarum languidos motus resuscitant; quo in numero sunt ea, quæ blando, balsamico, suavi oleo & refina pollent, & quæ ambra, succinum, balsamum Peruvianum, vel olea vera destillata aromatica ingrediuntur. Ex compositis vero ego semper optimo successu sal volatile oleosum, ad mentem Sylvii compositum, balsamum nostrum liquidum sic dictum vitale, elixir nostrum balsamicum, commendare soleo, ut roborandi causa bis vel ter in septimana, mane in potu calido, vel vespere in frigido, sumantur. In quibus certe remediorum generibus, si dextre sint præparata & etiam cum moderatione adplicentur, magna præsidia valetudinis, & ut quis se diu à morbis immunem præstet, delitescunt.

F I N I S.

FRIDE-

FRIDERICI
HOFFMANNI

MEDICINÆ
RATIONALIS SYSTEMATICÆ
TOMUS TERTIUS,

QUO
VERA THERAPIÆ FUNDAMENTA

MEDENDI METHODUS ET LEGES TAM
NATURÆ QUAM ARTIS,
NEC NON

SELECTISSIMA REMEDIA CUM EORUNDEM
Phyfico - Mechanico operandi & dextre applicandi
modo fideliter traduntur,

OMNIA SOLIDIS RATIOCINIIS DEMONSTRANTUR
& compluribus practicis observationibus illustrantur ;

OPUS

NON TAM AD PRAXIN VULGAREM
QUAM RATIONALEM TUTAM ET COMPENDIOSAM
ADORNANDAM PERUTILE AC NECESSARIUM.

DEO TRIUNI
OMNIPOTENTI RERUM SALUBRIUM
CONDITORI

BENIGNISSIMO VITÆ AC SALUTIS
NOSTRÆ INSTAURATORI

ET
SAPIENTISSIMO SALUTARIS SCIENTIÆ

DOCTORI OMNISQUE MEDICATIONIS
AUSPICI SACRUM

NEC NON
INGENUÆ POSTERITATI MEDICÆ

DICATUM

ESTO HOC OPUS.

P R Æ F A T I O.



UAMVIS complures eæque nobilissimæ ac utilissimæ scientiæ ad ornandum & perficiendum Medicum scitu sint necessariæ; nihil tamen est, quod ad scopum medicum obtinendum propius pertineat & cui cætera omnia adeo serviant, quam ipsa praxis rationalis clinica. Potissimum vero hoc & princeps studii medici caput quam utile & necessarium, tam parum ab omni usque eo tempore excultum & ad perfectionem laudabili conatu perductum conspicitur. Possidemus certe egregios & multis experimentis ac inventis anatomicis, physico-mechanicis, botanicis, chymicis & physiologicis refertos plures libros; sed de ejusmodi scriptis, quæ pluribus praxin rationalem, specialissimam, individualement & clinicam solide doceant ac perpetuæ veritatis de hac præcepta tradant, minus, si eloqui licet quod verum est, gloriari possumus. Nolo equidem merita laude Veterum & Recentiorum *Sennerti*, *Sylvii*, *Riverii*, *Willisii*, *Sydenhamii*, *Plateri*, *Mortonis*, *Craanii*, *Bontekoe*, *Ettmulleri*, *Waldschmidii*, *Dolæi*, *Wedelii* practicos defraudare egregios labores: verum quam multa adhuc in iisdem circa adæquatas causas, morborum & symptomatum genealogiam, remediorum quoque vires & genuinum usum in variis casibus deficient, ii demum, qui in artis exercitio versantur & prolata theoremata ad resolvendas morborum historias aut consilia inde capienda applicare volunt, rectius intelligunt. Deinceps neminem in medici argumenti scriptis vel mediocriter versatum latet, quam dissidentes, inter Medicos haud exigui etiam nominis circa morborum ætiologiam & pathologica fundamenta, quæ tamen basin veræ therapiæ constituunt, regnent opiniones. Quot sunt & ante aliquot lustra fuerunt amplissimæ famæ Medici, qui applaudentibus multis ex acido & viscido, acido, bile & pituita morborum duxerunt primordia? Quot porro innotuerunt, qui ex varii generis salibus acribus, acidis, ponticis & humorum multifaria intemperie, materiales omnium fere morborum derivarunt causas & ad easdem removendas & remedia & medendi methodum direxerunt? Alii Cartesiana & corpusculari philosophia maxime imbuti, diversum & peregrinum ætherem, specifica & morbifica fermenta, turbatam sanguinis & humorum crasin atque texturam & varias materiæ peccantis peregrinas & heterogeneas, ratione figuræ & magnitudinis qualitates, ad evolvendas morborum causas in partes vocarunt. Nonnulli contra repudiatis excessivis salinis qualitatibus & potentiis; ex sola sanguinis & humorum nimia abundantia, spissitudine & excretionum defectu pathologicam doctrinam eruere & statuminare sategerunt. Ut discrepantes mirum Medicorum sententias, de causa & principio motuum & mutationum, quæ in corpore humano subinde contingunt, præteream. Et quum in morbis tum avertendis, tum curandis, præcipuum medentis auxilium à remediorum congruorum usu, quæ quasi ipsius instrumenta sunt, omnium consensu peti debeat; illæ adeo discordes Practicorum de medicamentorum viribus, facultatibus in hoc vel illo morbo opiniones, utique luculenter arguunt, plurimos sanitatis præsidiorum, inprimis magnæ efficaciæ, sive sic dictorum heroicorum, genuinas virtutes, usum atque applicationem latuisse. Quod, ne gravius dictum videatur, liceat in confirmationem adducere exempla. Quot adhuc sunt & olim fuerunt, qui magnum istud & incomparabile sanguinis missionis auxilium penitus rejicere haud veriti sunt? Quam diversus Medicorum est sensus, de venæ sectionis in febribus sive continuis, sive intermittentibus, nec non exanthematicis, purpura, variolis, morbillis, petechiis, item erysipelaceis, arthriticis & catarrhalibus, puerperarum quoque morbis administratione, aliis eandem prorsus repudiantibus? aliis contra dilaudantibus & necessariam judicantibus. Quæ opium pro basi habent, & olim ab antiquissimis Medicorum, & nostro ævo à celeberrimis Chymiatri, inter panaceas & incomparabilis in multis morbis & enormi motuum impetu componendo efficaciam relata fuerunt; quum jam non desint, qui eadem propter virus quod recondunt naturæ viribus inimicissimum tantum non infamia censent. Peruvianus ille ex America allatus cortex ad expugnandam intermittentium contumaciam usque eo non modo in Germania nostra,

sed & in exteris regionibus ceu specificum venditatus fuit remedium, qui à nonnullis tanquam intutum & damnosum pharmacum fere ex toto rejicitur. Ex marte præparatis medicamentis olim à *Quercetano*, *Hartmanno*, *Michaelis*, *Ludovici*, *Willisio*, *Sydenhamio* & *Wedelio* in morbis ex mensium vitio; item ad cachexiam & hypochondriacam passionem sanandam laus adscripta est maxima; sed complures iisdem in morbis hæc ipsa plus damni quam emolumenti afferre, afferere non dubitant. Salia ex animantium regno volatilia & concinnati ex iis spiritus volatiles oleosi, ante aliquot lustra à Germanis æque ac Belgis, ceu spectatæ virtutis adversus chronicas potissimum afflictiones celebrabantur, quorum usus, quasi nimiam & noxiam sanguini inducerent commotionem, jam plane evilescebat incipit. Mixtura sic dicta simplex Paracelsi & confectæ ad hujus exemplar à Chymiatris, potissimum MICHAELIS, tincturæ bezoardicæ, in pluribus morbis, acutis æque ac chronicis, usui quondam erant egregio; ast ab hodiernis quibusdam, cur nescio, nisi forsan camphoræ, vel acidorum connubium, spernuntur & minoris pretii essentia alia præferuntur. Purgantibus acrioribus, nec non aloëticis, quæ basin fere omnium pilularum constituunt, usi fuerunt veteres & recentiores; quæ tamen ob virulentam quam ratione & experientia teste obtinent indolem, merito suspecta sunt. Neque minus mirum profecto discrepantes Practicorum sunt sententiæ, de thermarum, acidularum & foteriorum aliorum fontium elementis, viribus ac usu, ita, ut à plerisque propter acidum & vitriolicum elementum, fluidis & solidis infensum, quam maxime infecura censeantur, ab aliis vicissim ob innocentiam & præstabilem virtutem, in omnibus fere morbis commendentur. Nihil jam dicam, quantopere de mercurialium, emeticorum, antimonialium, nec non fonticulorum, vesicatoriorum, seraceorum & hirudinum usu medico, in diversum abeant sententiæ; hoc autem, quod omnium maxime mirum adjiciendum: cunctos ad confirmandas suas adeo discordes sententias, ad unam tamen eandemque experientiam confugere & audacter provocare; cui an fidendum sit, prudentes judicent atque periti; id minimum pro certo asserendum: nullibi in pervestigandis effectuum causis tam crebro fallaciam causæ ut causæ committi, quam in medicis rebus. Decumana certe sunt, quæ de pharmacorum virtute in botanicis, chymicis & pharmaceuticis libris vel scripto consignata sunt mendacia, & adeo increvit medicamentorum ex universo naturæ penu simplicium & compositorum, indigenorum & exoticorum, Galenicorum & chymicorum supellex, ut propter immensum fere numerum, nec diligentissimus ad singulorum penitiorem cognitionem pertingere queat, primum vero artis opera tentans non possit non mirum turbari atque confundi. Gravis quoque oppido est illa formularum sarcina, quam ex amplissimo materiæ medicæ apparatu confectam, Medici, quasdam illarum in quovis morbo usui commendantes, tam scripto, quam dicto, suis liberaliter obtrudunt; quas tamen omnes, si quis peritior & virtutum in remediis solide gnarus curatius paullo expendit, ultro perspicit, propter inconcinnam differentis indolis ingredientium congeriem, parum, vel nihil auxilii inde posse exspectari, sed morbum multo magis trahi, neutiquam abigi. Contra ea simplicissima, securissima & spectata adversus morbos arcendos æque ac persanandos præsidia, ut aqua pura simplex, sive calide in infuso, sive frigide assumpta, balnea aquæ dulcis, lacticia & maxime lac asininum, serum lactis rite paratum, minerales aquæ, item ex nitro & salibus neutris parata, plurimis medentum ignota plane sunt, vel minimum pensi ab ipsis habentur. Et quod maximum fere est, quum optima etiam medicamenta nihil valeant, nisi eorundem usus debito ordine, regimine, tempore, mensura & methodo ad morbi curationem perite dirigatur: plures tamen sunt, qui tumultuarie sine certa ratione medicationem instituunt, ac si unum non statim juvat, alterum promunt & subinde medicamenta commutant, alii methodo plane contraria incedunt, ut rarissime duos aut tres Medicos, qui eandem ad lectum de methodo porrigendi medicamenta foveant sententiam, invenias, plurimos autem in morbis eorumque causis recte cognoscendis & distinguendis, in judicio de morborum eventu, medicaminum effectui, item in signis prognosticis ex urina, pulsu, sanguine, dierum criticorum habitudine aliisque desumendis, mirum discrepare, errare & hallucinari cum tædio videas. Ex quibus omnibus quisque sagacior haud difficulter perspiciet, non tam firmis & inconcussis, ut communis fert opinio, praxin clinicam insistere fulcimentis, ut potius pluribus adhuc difficultatibus, defectibus & erroribus tanquam morbis prematur, qui utique convenienti medico & medicina opus habent. At vero ad tollenda hæc artis medicæ opprobria & incrementa ipsius ex voto promovenda, neutiquam certe apti sunt, qui tantum agunt sectarios & magistri sui verbis atque practicis semel haustis principiis tanquam saxo adhærent, nec volunt admittere,

quæ

quæ nunquam audiverunt, vel didicerunt, qui magnifica arcana & certa specifica in quovis morbo quærunt & jactitant & exotica pretiosa, ex auro etiam deprompta, item varia composita chymica, domesticis, simplicibus & facile parabilibus ac diæteticis remediis præferunt. Neque illi ad perficiendam praxin clinicam quicquam conferre poterunt, qui absolutas quasdam vires & virtutes, in his vel illis morbis, nulla habitatione individui & conditionis solidarum ac fluidarum partium medicamentis assignant, qui non ex morborum historiis complete & accurate notatis sapiunt suamque theoriam praxi applicandam hauserunt, & qui non ex his ipsis de remediorum effectibus, viribus & operationibus, immo de eventu ipsius morbi, judicare didicerunt, sed una eademque methodo semper morbum unum tractari posse sibi persuadent. Neque etiam illi evehendæ ad altius fastigium arti nostræ erunt idonei, qui observationes & veritates facti variaque occurrentia phænomena non clare, distincte & ordine explicare & consuetudina quædam in usum practicum inde elicere norunt. Sunt autem hi maxime, qui nec debitis subsidiis, ut philosophia naturali & experimentalis, mechanica, chymica & anatomica scientia corporis humani ejusque partium instructi sunt, quique artem solide demonstrandi non callent, nec recte definire, distinguere & apte res inter se connectere, nec scetus phantasiæ à claris conceptibus, speciosa nomina à causis & rebus, res morales & metaphysicas à physicis & quæ necessario fieri debent, veritates ab opinionibus & apparenter veris distinguere unquam didicerunt. Nam profecto ego quidem asseverare plane non dubito, ob ignorantiam, quæ olim regnavit & adhuc apud plurimos regnat, structuræ corporis humani & principiorum mechanicorum, præsertim doctrinæ illius de motibus, ejus causis, legibus & effectibus in rerum natura, & ex defectu sufficientium observationum practicarum, artem nostram non meliora potuisse capere incrementa, sed omnium dissensionum, opinionum atque errorum causam atque originem inde merito esse petendam. Quare etiam cum illis nunquam facere possum, vel potero, qui ad explicandas res medicas, novum quasi systema condituri, plane incongrua quædam & inaudita principia, vel sola prorsus nomina nihil significantia, ut naturæ rationalis sensus, instinctus, conamina, molimina, pro veris & formalibus morborum causis venditant, omnes præternaturales & morbosos motus in se & sua natura ratione intentionis bonos & salutares censent, & omnium quoque ac singulorum motuum & diversarum mutationum in corpore humano causam efficientem directricem, non tam physicum ex pura necessitate agens, sed morale, intentionale, rationale, pro arbitrio suo cuncta administrans principium, constituunt; eo quod admissio moraliter & intentionaliter, quandoque cum ratione, quandoque erronee, ad certum finem agente motus principio, uno quasi ictu omne quod certum, quod demonstrative verum in rebus medicis, practicis potissimum, penitus concidit atque exspirat. Quod si enim rebus physico-mechanicis corporeis, quæ necessario, non pro arbitrio aliter atque aliter agunt, quo præcipue elementa, alimenta, medicamenta, immo partes solidæ & fluidæ corporis nostri pertinent, potentiam & efficaciam movendi & mutationes efficiendi in motibus vitalibus & naturalibus denegare, & causis moralibus atque arbitrariis, quæ captui humano non obviæ, nec in potestate medici sunt, eadem tribuere velimus: nihil certi, nihil demonstrativi de rebus quæ ad vitam faciunt & morbos inferunt, nihil quoque solidi & firmi de remediorum effectibus atque operatione, proferre & determinare poterit medicus. Ne dicam suppositas ejusmodi metaphysicas theorias, tironum ignaviam & ignorantiam in rebus physicis, utpote inertibus per se & superiori principio agenti subjectis, mechanicis quoque & anatomicis, mirum fovere ac promovere. Quamvis vero non is sim, qui penitus neget, esse animæ spiritualis potentiam, regimen & influxum, admodum tamen limitatum, quasdam ex solidis partibus præsertim externas, ad motum excitandi, & fluidum quod immediate movet artus subtilissimum quodammodo dirigendi, licet etiam probe gnarus sim, principii sensitivi vim imaginativam magnas turbas in motibus naturalibus efficere posse: his tamen minime induci possum, ut à particulari ad universale concludam & credam, omnes motus vitales, systolen nempe & diastolen solidorum, fluidorum progressum, atque motus secretorios & excretorios ab iisdem causis semper dirigi. Quin potius firmum semper erit manebitque, res corporeas quæ ab extra intra corpus operantur, regulis & legibus motuum & effectibus necessariis, pro dispositione causarum in corpore humano, non secus ac in macrocosmo, esse subjectas, adeo, ut positis certis ad agendum requisitis in corpore nostro causis, certi semper ex necessitate, non absoluta, sed hypothetica, & indeclinabiles proveniant effectus. Nihil enim in corpore humano contingit, quod non certas suas, adæquatas & sufficientes habeat causas. Et licet has

veras invenire atque eruere res non adeo facilis sit, neque omnibus expedienda; de felici tamen pervestigatione & progressu scientiæ causarum non dubitandum vel desperandum, modo longiore observatione & profundiore meditatione artem nostram tractet quisque pro viribus, & physico-mechanica paullo subtilioris indaginis principia, diversas quoque motuum leges, in universa rerum natura inquirat & ad corpus humanum paullo sollicitius applicare discat. Quum verò morborum historia omnis fere pathologiæ, prognoseos, therapiæ & intimioris virium quæ insunt medicamentis notitiæ sit basis seu fundamentum; ad provehenda feliciter praxeos clinicæ incrementa nihil utique magis erit necessarium ac utile, quam ut Medici diligentes & attentī sint in consignandis observationibus practicis & morborum historiis, quæ quo pleniores sunt, nullis plane omissis circumstantiis, eo majorem usum atque utilitatem in ratiocinando præbent. Hinc etiam merito inter characteres indocti & infelicitis Medici referendum; quando statim audito vix morbo, vel perceptis quibusdam ipsius tantum symptomatibus, ad formulas præscribendas promptus est, antequam de ægrotantis natura & constitutione, morbi indole, causis, statu, progressu & aliis necessariis phænomenis plenius certior factus. Neque tamen sufficit practicarum tantum observationum uberi instructum esse apparatus, sed accedat etiam necesse est solida in anatomicis, physico-mechanicis, chymicis scientia sive vera theoria medica, quæ clavis historiæ de morbis & causis diversissimorum phænomenorum eruendis inservit; his enim amico junctis connubio, demum fiet, ut ex multis particularibus veritatibus & regulis, universales sive axiomata resultent, quorum copiam si quis sibi comparabit, is profecto aptissimus erit demonstrative & scientificè resolvendis & explicandis quibuscunque etiam difficillimis in re medica casibus & ad suppeditandum accommodatum consilium. Ad hæc incrementis solidæ praxeos clinicæ quam maxime servit, ut paucis & selectis Medicus, bene tamen longiori usu cognitis & exploratis remediis, utatur. Nam sub tanta ut prostat medicaminum multitudine, medens ad veram singulorum notitiam perveniet & solidi quid in praxi præstare poterit nunquam, sed potius una cum natura eximie turbabitur. Mihi certe à multis jam annis vix duodecim classica quasi medicamenta à me ipso solcite confecta fuerunt frequentissima, quorum virtutem in variis morbis & varia circumstantiarum conditione exploratam penitus habeo, ut interius vix aliis quam his optimo cum successu utar. Quæ quum ita sint, id sane usque eo quam maxime mihi agendum esse ratus sum, ut solidis hisce fundamentis, omnia quæ dicto quæ scripto traderem, inniterentur, eademque mihi etiam in elucubrandâ medicina hac rationali systematica, proposui normam. In primo & secundo tomo quid præstiterim, qui veritatis & candoris cupidi legerunt judicent, in hoc autem tertio excutienda mihi quam maxime sumsi veræ therapiæ, tutæ nempe ac rationalis fundamenta, quæ ad tria potissimum genera referenda esse arbitror, quorum primum est, ut Medicus solidas observationes & morborum historias accurate & solide consignare discat; alterum, ut ex regulis mechanicis, quæ materiæ & motuum indolem atque effectus tradunt, theoriam suam formet & causas, phænomena ac quæcunque fiunt & eveniunt in corpore humano recte & ordine explicare eorumque causas ac rationes reddere possit; ac tertium demum, ut medicamentorum facultates eorumque modum operandi probe noscat, paucis tamen & selectis recte utatur & quæ insalubria sunt, vel minus juvant remedia, à salutaribus discernere discat. Ita autem in perficiendo hoc labore versatus sum, ut varias inanes ac dubias in re medica opiniones atque hypotheses rejecerim; omne auctoritatis præjudicium seposuerim, & nonnisi ea, quæ ad valetudinem cum vita tuendam morbosque sanandos manifestum usum, utilitatem & conspicuam applicationem habere possunt, attulerim. Neque etiam quisque candoris & veritatis amans vitio mihi vertet, quod hac usus sim libertate & à nonnullorum celebrium nostro tempore virorum, qui cæterum non parum opis ad illustrandam artem nostram attulerunt, placitis discefferim. Quod vero libri hujus editionem licet ab eruditis crebro sollicitatus eo usque distulerim, hanc maxime factum ob causam: quod ego quidem quam optime facere censeam Medicos, qui cum perpetuas & tempus sustenturas practicas veritates posteris tradere propositum ceperunt, arduum hoc opus ad maturam ætatem, quin senectam differunt, quo longiori & multiplici experientia instructi, quæ usui sunt ipsi edocti prius sint, nec errores aut opiniones disseminent, ut quidem fieri solet ab iis, qui vel juvenes minusque in artis operibus exercitati practicos conscribunt & ex auctoribus compilant libros. Neque etiamnum hoc opus therapeuticum pro vulgo medicorum scripsi, qui præsidii ad scientiam & veram theoriam medicam pertinentibus destituti, nec historias morborum curant, nec earum causas recte inquirere sciunt, multo minus motuum

regulas & leges in genere & œconomiam motuum vitalium in specie, in quonam ea consistat, pernoscent, nec selectu remediorum probatissimorum utuntur, nec de aver- tendis morbis eorumque causis primario solliciti sunt, sed tantummodo certa arcana magnifice commendata acquirunt & variis inhiant formulis ad persanandos etiam diffi- ciles morbos, in quibus tamen incongrua quam servant methodo, plus damni, quam salutis afferunt. Neque etiam eorum ului accommodavi hunc meum laborem, qui recte judicandi, ratiocinandi & philosophandi facultate destituti, præjudiciis magistri occæcati quasi sunt, tantummodo haustis opinionibus firmiter inhærescunt & ad per- fectionem jam perductam medicam scientiam autumant. Sed dicata est opera medi- ex certis principiis physico-nempe mechanicis, materiæ naturam, affectiones & dis- positionem ad motum, item motuum causas, regulas, leges & effectus dilucide ex- ponentibus, petunt, adstruunt & agnoscunt, horum usum in ipsa medica praxi, mor- borum causis cognoscendis, & remediis inveniendis esse longe amplissimum, & qui etiam paucis & selectis remediis vitam & sanitatem tueri, morbos avertere & persanare tuto & compendiose student. Hos certe non pœnitebit repetita lectione hæc quæ scripsimus capita perlustrare & assidua meditatione in suum convertere usum. Nam licet is non sim, qui mihi tantum arroganter tribuere velim, ut credam, do- ctrinam medicam à me traditam omnibus numeris esse absolutam, cui nihil adjici vel subtrahi possit: hoc tamen dicere & mihi vindicare licebit, quod viam Medico in- grediendam ad ultiores in re medica progressus faciendos compendiose & recte præ- monstraverim. Et quicumque hunc in finem prolata à me in hoc tomò utilissima præ- cepta penitus cognita habebit atque perspecta; is etiam mox b. c. D. subsequutu- rum, qui specialiora de morbis omnibus sigillatim tractabit, longe majori cum fructu suo poterit impendere commodo. Summo autem Numini, cujus gratiæ omne omni- no quicquid à me factum in acceptis refero, devotissimas reddo gratias, ac ut cle- menter efficere velit, quo veritas in physicis etiam & medicis rebus, magis semper eniteat, & falsæ ac detrimentosæ opiniones pessundentur, precor ac voveo.



CONSPECTUS TOTIUS OPERIS.

SECTIO I.

De Rationalis Therapiæ fundamentis, historia morborum completa, notitia mechanismi corporis sani & ægrotantis, mutua motuum inter se conspiratione, nec non prædictione ex motuum morbosorum natura recte formanda.

- CAP. I. *De veræ therapie medicæ natura & fundamentis in genere.*
 II. *De historiis morborum recte consignandis, ceu primo therapie medicæ fundamento.*
 III. *De morbis caute discernendis & recte dignoscendis.*
 IV. *De genealogia morborum ex turbato solidorum & fluidorum mechanismo, ad explicationem historiae morborum & veram ac solidam therapiam.*
 V. *De consensu partium nervosarum generatim & sigillatim cum ventriculo, præcipua passionum & symptomatum origine.*
 VI. *De fluidorum vitiis ex vitiosa solidorum dispositione.*
 VII. *De causis morborum & quidem latentibus recte cognoscendis.*
 VIII. *De damnis ex cohibita cuticulari excretionem.*
 IX. *De vitiis ex turbatis sanguineis aliisque evacuationibus.*
 X. *De generatione morborum ex morbis.*
 XI. *De commutata morborum, seu potius causarum morbificarum sede, sive metastasi.*
 XII. *De rationali pulsuum explicatione & judicio in morbis recte ex iisdem formandis.*
 XIII. *De judicio ex sanguinis inspectione & examine recte eliciendo.*
 XIV. *De judicio ex urina aliisque excretis in morbis rite ferendo.*
 XV. *De crisi & criticis diebus in experientia rationali fundatis.*
 XVI. *De certis imminenti in morbis periculi ipsiusque mortis indiciis.*
 XVII. *De causis mortem in morbis gignentibus.*

SECTIO II.

De methodo, ordine & legibus medendi, tam naturæ quam artis, nec non de remediis, eorum quatuor generibus, operandi & recte applicandi modo, una cum cautelis & observationibus utilissimis.

- CAP. I. *De optima naturæ morbis medendi methodo.*
 II. *De methodo, ordine & legibus artis in medendo.*
 III. *De medicamentorum viribus & causis ignorantie earum.*
 IV. *De medicamentorum quatuor summis generibus & operandi modo, speciatim alterantibus.*
 V. *De evacuantibus.*
 VI. *De roborantibus.*
 VII. *De sedantibus.*
 VIII. *De specifica quorundam remediorum certis in morbis efficacia.*
 IX. *De venæ sectione aliisque sanguinem subtrahendi modis.*
 X. *De balneorum, pediluviorum & clysterum usu medico.*
 XI. *De aquæ frigide potu salutari.*



SECTIO PRIMA.

DE

RATIONALIS THERAPIÆ MEDICÆ FUNDAMENTIS, Historia morborum completa, notitia mechanismi corporis sani & ægrotantis, mutua motuum inter se conspiratione, nec non prædictione ex motuum morborum natura recte formanda.

CAPUT PRIMUM.

De veræ therapie medicæ natura & Fundamenti in genere.

QUum solidæ, hoc est, demonstrativæ, therapie medicæ principia & fundamenta, à quibus certa & tuta medendi methodus potissimum pendet, tradere, jam constitutum sit: non incongruum fore duxi, si prius paucissimis attingerem, quam arcta & quam amica inter scientiam physiologicam, pathologicam ipsamque therapiam intercedat connexio; quo tam necessarius præcipuarum artis medicæ partium nexus eo clarius innotescat. Nimirum Physiologia motuum vitalium, qui corruptibilem nostram machinam à præsentaneo interitu vindicant, & motibus, tam progressivis, quam intestinis, nec non secretoriis, & excretoriis, absolvuntur, ac universi partium corporis functiones secundum naturam efficiunt & moderantur, indolem, causas atque effectus perquam clare & perspicue explicat. Pathologia vero ea est scientia, quæ motus hos vitæ inservientes præter naturam turbatos, & inde pullulantes actionum læsiones, proponit, earumque indolem, nec non multiplices à quibus dependent causas, accurate & solide indagat atque scrutatur. Et Therapia denique est prudentia, corruptos & inversos vitales motus, functiones ipsius corporis diversimode lædentes, per congrua remedia, debito tempore & accommodata methodo, in integrum restituendi & amissam sanitatem revocandi. Ex quo utique conficitur, nullam solidam & veram therapiam medicam doceri, vel addisci posse, nisi veræ & rationalis physiologiæ ac pathologiæ præcepta prius cognita fuerint atque perspecta. Sane, nemo unquam firmis rationibus mortis & morborum causas demonstrare poterit, quam qui vitæ ac sanitatis naturam & fontem exacte intellexerit. Neque etiam ullus medentum solide & rationi congruenter declarabit, quibus auxiliis & qua metho-

do, morborum præternaturales motus, qui sanitatem læbescunt & machinæ nostræ perniciem intentant, in ordinem redigendi sint; nisi ante mortis & morborum causas atque effectus intime perspexerit.

Posteaquam igitur in primo Medicinæ rationalis systematicæ tomo philosophiam corporis sani & integri: in secundo philosophiam corporis ægroti, sive pathologiam, plenius pertractavi; succedit jam tertius, qui solida præcepta & fundamenta artis therapeuticæ tradet, quæ luculenter quemvis edocebunt, non perfunctorie, palliative & ambigue, sed cum ratione, certa & explorata convictione, quin etiam indubia successus spe, morborum curationes moliendas esse & suscipiendas.

Asserui vero therapiam esse prudentiam, per quam habitum cum recta ratione effectivum, sive practicum, intelligo: & rectam hanc medendi rationem, in acri & firmo Medici judicio consistere, persuasissimus sum; adeo ut, quo magis is ipse subacta & præsentis iudicandi facultate polleat, eo feliciorum illum habendum esse existimem. Nunquam enim properato, temere aut inconsiderate is, qui salutari arte fessos levare nititur, agere, sed diu meditando, solícite inquirendo & studiose deliberando, ex claris & jam cognitis principiis iudicare & demonstrare debet, quare in hoc vel illo morbo, quædam remedia, ex fonte chirurgico, pharmaceutico, aut etiam diæterico, deprompta, juvent, adeoque præscribenda: & vicissim, cur alia noceant & à curatione plane excludenda sint. Neque salubria & inludibria in sanandis morbis tantum nosse sufficit, sed medicus perspicaci etiam iudicio determinare debet, quo tempore, quo ordine, quo loco, quocum regimine & qua mensura, seu dosi, pro corporis ægrotantis, morbi & symptomatum conditione, medicamina offerenda, nec non, quibus de causis & quem in finem, hæc vel illa, potissimum in usum vocanda sint. Tandem exigitur etiam à medente, ut de morbi decursu atque eventui, nec non remediorum effectu, certum iudicium & verax præsagium interponere possit, quo certe ad famam, existimationem & celebritatem consequendam nihil magis facit.

Quum

Quum autem ad rectum in therapeuticis iudicium stabiliendum, plura, quæ accurate prius tenenda sunt, pertineant, eo quod iudicium hoc actus voluntatis est, & jamjam eorum, de quibus sententia ferenda, exquisitam notitiam supponit: rerum in hoc tomo dicendarum ordo utique exigere videtur, ut de iis, quæ ad iudicium therapeuticum exacte formandum scitu & cognitu valde sunt necessaria, ante agamus, quam ad ipsam specialem morborum considerationem eorumque medelam descendamus. Videlicet primum & potissimum therapeuticæ veritatis ipsiusque iudicii medici fundamentum est, perfecta & omnibus numeris absoluta ægrotantis & morbi historia, quippe quæ, præterita & præsentia, omniaque quæ affligunt, fideliter, perspicue & ordinatim enumerat: quo ex iisdem futura certo dijudicari possint. Alterum est exquisita notitia mechanismi corporis, tum sani, tum ægrotantis, sive cognitio effectuum, legum & genii motuum in genere, non solum qui vitæ ministrant, sed etiam qui morbos excludunt, secundum quæ iidem jugiter & nunquam non operationes suas edunt. Deinde palmarium quoddam momentum conficit consideratio communicationis motuum in machina nostra præternaturalium, qualis nimirum & quanta cum his, vel illis partibus sit; quo medicus claras & perspicuas symptomatum rationes, quæ vulgo consensui partium tribuuntur, inde desumere ac derivare queat. Tum ordo & series causarum, quæ functiones præter consuetam naturæ normam mutant, & morbificæ dicuntur, quæ multiplicis sunt generis, earumque ratio & modus operandi, studiose rimanda & penitus animo concipienda sunt: quod fufius jam & luculenter satis in secundo hujus operis tomo excussi. Præterea eximium iudicii medici argumentum suggerit contemplatio naturæ motuum vitiosorum, certis morbis solennium, quinam videlicet horum ad corporis conservationem, & quinam ad ejus destructionem, sive mortem tendunt, ex qua postea veracem & firmam prædictionem de exitu morbi, tum ratione salutis & mortis, tum longinquitatis & brevitatis, nec non solutionis & discessus, summa cum prudentia depromere medentis est. Porro mechanica remediorum operandi ratio, quæ aut circa materiæ, quæ morbum facit, vel correctionem, vel evacuationem, aut etiam motuum vitia emendanda versatur, tam à priori, elementis nempe & principiis quibus agunt, quam à posteriori, per identidem confirmatam experientiam, mente comprehendendi & explorata esse debet. Non minus etiam illi, qui morbis medelam afferre tentat, summo eo annitendum est studio, ut animo complectatur firmiterque teneat accommodatam componendis & in pristinum ordinem reducendis morbofis motibus methodum, nec non, quod præcipuum est, solidas medendi, tam rationi congruas, quam crebrioribus experimentis comprobatas, leges. Succedunt tandem observationes & cautiones, in omnis generis remediorum usu provide adhibendæ & applicandæ, quas altius animo infixas, memoria custodire debet is, qui cum ratione & exoptato successu in artis, quæ mortalium saluti præest, exercitio versari gestit.

Hæc sunt solida illa & firma fundamenta, quibus omne therapeuticum iudicium superstruendum est: jam unumquodvis eorum seorsim curatius enucleabo & uberius illustrabo.

C A P U T II.

De historiis morborum recte consignandis, seu primo therapie medicæ Fundamento.

Primum itaque iudicii therapeutici principium sunt historiae morborum. Hæ autem, ut insignem, tam in ipsa medicatione, quam vera prædictione, utilitatem

ferant, recte utique concinnandæ sunt, ita, ut non mancæ, mutilæ aut necessariis circumstantiis privatæ, sed potius, quoad fieri potest, omni ex parte completæ, integræ atque perfectæ sint. Quemadmodum enim in Jure ad decidendas ex æquo controversias & solidum iudicium ferendum, integra facti, ut dicere amant legum periti, species, cum singulis circumstantiis, requiritur: ita idem in Medicina obtinet. Sane medicus parum solidi de indole morbi judicabit, minus quoque aptum & salubre consilium exhibebit; nisi prius omnium phænomenorum circa morbum observandorum exacta notitia fuerit instructus. Et hæc circumscriptio eo magis necessaria est, quia eorundem morborum non eadem semper sunt causæ eademque prorsus symptomata, subjecta quoque differunt, quoad ætatem, sexum, temperamenta, vitæ rationes, consuetudines & plura alia, quæ ad producendos fovendosque morbos concurrunt: adeo ut interdum certam constantemque morbi ejusque symptomatum naturam perturbent, & difficile sit veritatem indagare; nisi complexus horum omnium plene annotetur & sagaci rationis usu perspiciatur & perpendatur. Sæpissime etiam unicum in morbo phænomenon tanti momenti est, ut longe alia medendi via sit ineunda. Quandoque minima visa circumstantia maximæ est considerationis, ideoque non facile quippiam est prætermittendum. Præclare hanc in rem commentatur *Baglivus libr. III. Prax. med. cap. 3. natura*, inquit, *nihil frustra molitur, minimaque sunt sæpius magnarum rerum initia, & minima quoque ad notitiam grandium nos ducunt.* Eandem quoque sententiam exemplo illustrat, hunc in sensum pergens: *flatus pedendo emissi judicantur motus viles & nullius ad curationem momenti, & tamen, si in dysenteria flatus, qui prius non aderant, per inferiora exire incipiunt, brevi sanitatem promittunt, ut nos aliquoties observavimus.* Proinde quisque qui therapie medicæ manum admoveere tentat, totus in eo esse debet, ut plenas & perfectas, nec fictitiis circumstantiis corruptas observationes condant & undiquaque colligat. Quia vero rariores eæ deprehenduntur in monumentis tum veterum, tum recentiorum medicorum: vehementer certe optandum foret, ut quivis ad cultiorem in arte saluari eruditionem adspirans, hominumque sanitati fideliter invigilans medicus, casus in artis exercitio occurrentes, præsertim notabiliores, plenissime consignare, atque hoc pacto indefesso studio artis medicæ incrementum promovere anniteretur.

Ad integram vero historiam de morbis contexendam, non solum requiruntur circumstantiæ, quæ corporis ægrotantis naturam & constitutionem intime patefaciunt, ac morbi genium & indolem exhibent, sed etiam ea, quæ vires & effectus produnt remediorum, phænomena annotanda. Subjecti quod patitur accuratior cognitio, quantum conferat ad rationem, inprimis symptomatum, in eodem morbo non raro mire dissidentium, in diversis subjectis detegendam ac medendi methodum inveniendam, res tam clara est, quam quæ clarissima. Etenim pro differente corporum indole ac conditione, idem morbus, ab eadem causa productus, diversis plane symptomatibus incedit. Quemadmodum enim idem alimentum, idem purgans, vel emeticum, vel aliud quodvis heroicum remedium, idem quoque venenum, longe alios diversissimosque effectus pro differenti corporum indole edit: ita etiam morbificæ causæ, ejusdem indolis, plane multis modis, dissidentem morbi faciem, ratione symptomatum, ratione periculi & salutis, in aliis atque aliis subjectis exhibent.

Necessarium igitur est, ut in condenda perfecta morbi cujusdam historia, mentio imprimis injiciatur ætatis, sexus, structuræ partium solidarum, sive habitus corporis, & virium, nec non hæreditariæ ad hunc vel illum morbum dispositionis. Et sane ætatis, tam ad morbi genium perspiciendum, quam ejus curationem legitime adornandam, maximum est momentum & mira

diversitas:

diversitas : eo quod procedente eadem, solidorum structura & fluidorum ipsiusque sanguinis crasis atque temperies, adeoque & humorum motus multum immutantur. Scilicet in pueritia insignis fibrarum mollities, emissio, laxis & rarus habitus, cum feri abundantia dest; juvenes autem fibras tensas & strictas obtinent, sanguinemque calidorem & mobiliorem alunt; & senibus propria est magna solidorum rigiditas & viarum atque canalium angustia, nec non falso-sulphurea humorum dyscrasia. Ex qua differente partium constitutione, universi certe fluidorum & solidorum mechanismi diversa indoles, & dependens hinc ad certos morbos proclivitas, dissidentes etiam mores & inclinationes, non solum derivari debent, sed pro hac ipsa etiam varietate, varia quoque & accommodata methodus exogitanda est & adhibenda: id quod experientia luculenter confirmat, ipsisque medentibus sagacioribus aptissime cognitum est.

Præterea differentiarum sexus exacte ratio habenda est, quum feminæ ob menstruum sanguinis fluxum, vel primum erumpentem, vel minus ordinate succedentem, vel plane tandem subsistentem, nec non ob partus & parturitionis labores, multo pluribus ac ipsi viri, & peculiaribus prorsus afflictionibus, non solum sint obnoxie, sed systema etiam nervorum longe imbecillius in ipsis sit, & hinc motuum *ἀταξία*, spasticis ac convulsivis affectionibus & distensionibus, vehementius afficiatur & facilius etiam ad integritatem reducat, quam in virili & nobiliori sexu.

Plurimum quoque refert nosse: an ægrotans laxi & solutioris, an strictioris, habitus sit? an vasa exiliora & copiosiora, an capaciora & pauciora obtineat? Siquidem sub angustia & tenuitate canalium fibrarumque remissione, longe difficilior fluidorum & progressus, & secretorius, & excretorius motus procedit: multo autem expeditior & promptior est, ubi fibræ magis tensæ & strictæ, vasaque non nimis angusta, sed ampliora sunt. Unde observamus, illos multo magis morbis & morbosis afflictionibus patere, difficilior etiam sanescere, in quibus ob validiorem fibrarum motricium potentiam, fluidorum cursus per corporis compagem citior est. Id quod etiam de corporum macie & obesitate tenendum est.

Porro color faciei & cutis dispiciendus. Floridus enim pulcher & nitidus aspectus de lymphaticorum humorum puritate & pelluciditate; lividus vero, luridus & clarescens, de eorundem impuritate salino-sulphurea, & vacillante secretioni dicatarum organorum, in primis hepatis, officio, evidens præbet indicium.

Et sicuti testante quotidiana observatione, viscerum & fibrarum debilitas, labes, vitia & inde pullulantes morbi, plerumque ad liberos propagantur: ita maxime omnium medicum de his percontari oportet; utpote quæ, ad prædictionem non fallacem promendam multum faciunt. Nam imbecillitates & morbi, qui à nativitate infestant, ægrius semper sanationem admittunt, facile recurrunt & medentibus multum negotii accessunt.

Neque virium sollicita exploratio intermittenda est: utrum scilicet natura depressæ fuerint? an vero sub morbo, præsertim acuti, initio, quod inter pessima signa connumerandum, statim concussæ & prostratæ appaerint? In robore enim & vigore virium, quæ non aliter nisi motu & impulsu fluidorum sese produnt, magnum sanitatem recipiendi, & vitam, quæ à viribus nomen sortita, servandi, præsidium collocari, inducendum est.

Non solum autem corporis conditio scrutanda, sed ipsius quoque animi indoles perquirenda, & quibus morbis laboret considerandum. Quum enim amicalis admodum & magna sit motuum, tam animi, quam corporis conspiratio & communio; prudens certe rebus suis satagens medicus, ex mentis, ad has vel

illas impetuosas commotiones dispositione & proclivitate, recte & ad veritatem accommodare argumentari potest, ad solidorum & fluidorum mechanismum, & dijudicare, quomodo hic sit comparatus. Nam major & vegetior fibrarum solidorumque tensio & mobilitas, ad iracundiam animum disponit; laxitas vero & deficiens eorum vis motrix, angustum, demissum, timidum & pavidum illum reddit. Ita etiam solidorum tonum & stricturam augendo, fluidis impetuosiores motum inducit: timiditas vicissim, robur solvendo & dejiciendo, ut remissius truantur & tardius circumagantur, efficit. Terror valide superficiem & extrema corporis constringit, sanguinemque ad interiores & nobiliores partes, præcordia nempe & caput, impetuosè reprimendo, graves ingignit affectus, nervosi maxime generis, id quod sensim enervat & languore frangit. Idem præstat diuturnus moeror, qui sæpius quidem ex vitio viscerum & cursu humorum impedito, ut in hypochondriaco malo affectis constat, originem nanciscitur; sed dum nociva sua efficacia solidas maxime partes aggreditur, mirifice vires universi corporis atterit ejusque functiones, robur fibrarum minuendo illasque laxando, labefactat. Quid? quod ii, qui attentius & curiosius morbis sanandis præsumunt, subinde experiuntur, difficulter admodum ægri tudines elidi & expugnari, si animus non est compositus atque pacatus, sed patheticarum commotionum intemperie diversimode jactatur. Præterea in medica hac animi consideratione inquirendum etiam est: num forsan, quod literatorum maxime vitium est, ex nimia studiorum intemperantia, profundis & mentem fatigantibus meditationibus, quæ in disciplinis abstractivis, ut metaphysicis & mathematicis, familiares, nec non intempestivis lucubrationibus, consumtis spiritibus sic dictis animalibus, ingens cerebro & nervosis partibus illata fuerit debilitas? utpote quæ, postea ad gravissimos capitis morbos, apoplexiam nempe, melancholicam, maniam memoriæque debilitatem promptum parat aditum, & vix summo labore refarcitur. Dicit enim vix potest, quanta consensus cerebro ejusque membranæ, cum ventriculo eique annexis intestinis, ceu valde nervosis, nec non aliis exquisito sensu præditis partibus intercedat: quo fit, ut nimium literis sese ingurgitantes, plerumque depressa ciborum confectione & vacillante digestionem, nec non segniori & difficiliori intestinalis excretionis successu, maxime omnium vero familiarissimo ipsis morbo, sic dicto hypochondriaco, affligantur & excrucientur.

Porro ad pleniorum morbi historiam consignandam referendum etiam est, ut medicus non solum ubi locorum ægrotans degat & quo coelo & aëre fruatur, sed etiam quo victu utatur, curatius pernoscat. Altiora enim & sublimiora loca, ob liberiores ventorum perflatus, aëre puro gaudent, ideoque salubriora sunt; humiliora autem & depressiora, aëre magis condensato, crassiore impurisque vaporibus referto infesta sunt. Et nihil certe ad ingenerandas graves & chronicas passiones, neque minus ad vigorem & robur solidis & motricibus partibus subtrahendum validius est, quam si quis sub coelo graviore, impuro & vappido aëre, cibum & somnum capit; eo quod hic ipse una cum esculentis & potulentis, ipsaque inspiratione, interiora corporis subintrant, humoribus sese intimius commiscet, & fluidum illud aëreo-æthereum contaminat, ut motibus in corpore non ea, qua decet efficacia, præesse possit, sed functiones partium inde gravissime luant.

In victus autem ratione potissimum dispiciendum: num ægrotans duriori & crassiori victus generi, cujus census sunt cibi ex mari deprompti, carnes induratae, salitæ & infumatae, panis grossior, assuetus? quippe quod in locis maritimis recepti usus est, & ad dyscrasiam, sive impuritatem sic dictam scorbuticam, ibi locorum endemiam, multum confert. Vel etiam explorandum est: an decumbens fructibus horæis, aut etiam acetariis, farinaceis

farinaceis cum butyro, ovis & saccharo frixis, quod mulierculis solenne, nimium delectetur. Alii caseum in deliciis habent, eoque immodice vescuntur, qui tamen & obstructioni, & calculorum generationi, multum velificatur.

Maxime omnium vero potus consueti genus considerare & explorare decet: eo quia maximum sane est momentum, quod ad texturam & crasin sanguinis humorumque constituendam potus confert; qui quo magis est temperatus, aqueus & dilutus, eo salubrior quoque existimandus est: quum ad sustinendum vitalem humorum motum, tres liquidi partes, & una tantum solida desiderantur & secundum naturam recipiantur. Hinc cerevisiæ nimis crassæ & nutrientes, multo magis acescentes, nec non omnes potus nimium spirituosi, vini & frumenti etiam spiritus, matutino inprimis tempore & ventriculo vacuo copiose ingurgitatus, mirum quantum sanitatem lædunt, quin sensim frangunt atque prosternunt. Inde enim viscera indurantur, polyposæ concretiones hinc & illinc in cavitatibus generantur & humores à debita temperie deturbantur, ut postmodum ad hæticam, cachexiam, hydropem, apoplexiam & subitam mortem promptus fiat transitus. Quum vero homo ad tuendam valetudinem copioso liquido indigeat; nihil certe parcior potu, in quo foemina & qui vitæ sedentariæ incontinentius dediti sunt plerumque delinquant, damnosius est & infensius: siquidem hoc pacto, ob necessarij fluidi defectum, minimi tubuli, è quibus emunctoria corporis organa penitus coagmentata sunt, viscido & crasso humore infarciuntur, occluduntur, & obstructions fecundæ plurimorum morborum genitrices exsurgunt. Præterea sedula inquisitione etiam percontandum: num à largiore, nimis frigido haustu, corpori sudanti & impenso calefacto ingesto, morbus sua duxerit primordia? Quod si enim primam morborum originem perquisitus scrutamur, nihil certe frequentius occurrit, quam quod a potu nimis perfrigerato, largiter & celeriter, post intensam corporis commotionem & exercitationem, vel post affectum quandam vehementiorem animi, aut succedente critica aliqua & salutari sanguinis excretionem, ingurgitato, universa functionum & motuum vitalium œconomia illico turbetur ac pervertatur, ita prorsus, ut ipsa veneni virulentia, neque citius, neque potentius, destructionem & exitium inferre queat.

Accedit vitæ genus, decumbenti huc usque solitum atque familiare, in cuius contemplatione hæc potissimum expendenda: an sit laboriosum, requietum & sedentarium? an aulicum? an militare? an curis & laboribus mentis adstrictum? Nec non quale opificium tractet atque exerceat? an scilicet metallis & mineralibus fodendis, igne coquendis & perficiendis operam det? Nam quamlibet vitæ generis rationem, peculiare suos alere morbos, non modo indubia experientia comprobatur, sed fusiuse etiam & solido argumentorum robore in elegantissimo libro, quem *Ramazzinus de morbis artificum* composuit, abunde evictum atque excussum est.

Tandem exitium momentum ad interiorem status, à naturali ordine descendentis notitiam, ipsa consuetudinis ratio subministrat. Quum enim nullus fere homo sit, qui non peculiari quadam rerum non adeo salubrium assuetudine teneatur, in victu, potu, somno, motu, exercitio Venereo, tabaci, suffimigii, vel sternutationis causa adhibiti, usu, nostro ævo potus coffeæ sorbitione, quia etiam, quod inprimis hypochondriacis solitum, nimia ipsorum medicaminum assumptione, aliisque rebus: certe, singula hæc errata, naturæ corporis nostri minus proficua, probe inquirenda sunt & noxa ab iis illata studiose pensitanda.

Nihil vero, nostra quidem sententia, ad ægri naturam & morbi generationem plenius cognoscendam & intelligendam, plus adjumenti affert, quam excretorum

modum & rationem recte examinare atque perpendere. Ea enim excretionum indoles, conditio, quin etiam necessitas est, ut sine his valetudo salva persistere nequeat: propterea, quod in homine, non amplius quoad corporis molem incrementum, tantum egeri debet, quantum ingeritur, & deficiente, vel suppressa, consueta & salutari per varia organa, superfluum, inutilem & mixturæ animali ac vitæ inimicorum eliminatione, è vestigio plurimæ morborum causæ propullulant; ita, ut non fallaci præfagio exinde morbi prævideri atque prædicti possint. Inprimis autem id vacuationis genus, quod per alvum succedit, eo studiosius est considerandum, quo majus momentum est, quod ad sanitatem illibatam præstandam, conficit. Etenim alimentaris ille & excrementitius intestinorum canalis, si diutius retinet ea, quæ è corpore proscribenda sunt, gravissimorum non solum morborum fomes & minera excluditur, sed sedes etiam illorum ac domicilium in hoc erigitur atque firmatur. Hinc si alvus incipit officii sui oblivisci, & præter consuetudinem obseratur, in proclivi & pro certo est judicare, morbum vel præsentem, vel certe futurum esse. Præter alvinam hanc excretionem, attenta etiam contemplatione exploranda est perspiratio, quæ per universale illud corporis colatorium extimam cutem, perficitur, & qua, secundum *Sanctorii* calculum, plus ejicitur, quam per omnia reliqua emunctoria. Hujus salutaris successus ex vestitu, ad corpus fovendum & in æquabili semper calore servandum apto, nec non temperato pedum tepore & madore optime dignoscitur: vicissim autem pedes ficci & frigidi, tubulosum cutis corticem strictiorem & sordium per hunc exhalationem sufflammatam esse, subindicant. Hinc si sub frigido, humido, mutabili & inæquali aëre, nec non vernali & autumnali tempore, tempestatibus crebrioribus vicissitudinibus interpolatis, exclusio sordium per halitus valde diminuitur, corpora fiunt languida, & morbi, qui populares habent circuitus, perquam familiariter infestant.

Quum vero homo plerumque plus alimenti assumat, plus etiam feri & sanguinis ingeneret, quam natura corporis ferre & in usum convertere potest, ut ordinariæ etiam excretiones sæpe supervacuis humoribus evehendis non sufficiant, extraordinarii subinde & statis nonnunquam temporibus, mensibus & annis recurrentes motus excretorii contingunt, quibus vel ipse sincerus sanguis nimis abundans, uti fit in sexu sequiore, per uteri, & in nobiliore, per ani venas, nec non in pueris & adolescentibus, per narium stillicidium, foras dimittitur; vel etiam humores serosi & impuri per largiores sudores, per copiosas alvi dejectiones, per narium in coryza defluvium, nonnunquam validiori tussi, per diuturniorem viscosi ac glutinosi humoris excreationem, cum singulari sanitatis commodo ejiciuntur: quæ salutares & consuetæ ejectiones, si deficiunt, vel prorsus supprimuntur, metus est, ne gravissimi morbi exinde emergant. Nihil vero æque perniciosum atque exitiale est, quam si criticæ ejusmodi, præsertim sanguinis, excretiones, celerrime & uno quasi ictu sistuntur; cujusmodi noxia vi potissimum pollet, tum gravis animi affectus, inprimis extrema & minima vasorum oscula constringens terror, tum aër nimis frigidus, aut frigus externum inconsideratius corpori admissum; siquidem exinde exitiales humorum fiunt stagnationes, & subitæ ac capitales noxæ in motuum vitalium ordinem redundant. Idem sentiendum est de excretionibus illis, quibus plurimi morborum solvuntur, & quæ propterea vocantur criticæ; si nempe medicus, vel ægotans, easdem perperam & pessimo consilio compescere tentet; quippe cohibitis illis & compressis, facillime morbus non solum recrudescit & redit, sed pejor etiam multoque periculosior resultat.

Præterea ad genuinam morbi indolem exactius intelligendam, plurimum facit curiosius sciscitari & per-

contari: quibus morbis per vitæ decursum æger fuerit obnoxius? an forsitan quidam haud ita diu præcesserit, & qua methodo quibusque auxiliis is fuerit sublatus? Nam turpe quidem dictu, sed proh! verissimum est: ex emeraria & imprudenti morborum, imprimis febrium medicatione, damnosissimam & maxime periculosam nonnunquam symptomatum oriri catastrophem, ita, ut fugato ambigue priori morbo, alius & longe gravior irruat ac diutissime infestet. Sæpe numero etiam, is, qui morbo convaluit, salutaribus medici præceptis minus obtemperat, sed pro cœco libidinum impetu, gravissimos & nocivos in rerum non naturalium usu errores admittit, & hoc pacto de novo mineram morbificam colligens & cumulans, ipse sibi damnum procurat & morbum contrahit. Novimus sane plures, qui morbo superato & funditus extirpato, ex intemperanti & nimia ciborum ingestione, suppressa per subcutaneos tubulos ex incuria sordium exhalatione, nec non neglecto debito evacuationis alvinæ successu, in pessimas egritudines iterum inciderunt & per diuturnum tempus cum iisdem conflictati sunt.

Nonnunquam etiam morbi mire complicantur, ita ut sæpenumero hypochondriaco malo jam antea affectus, aut cachexiæ implicitus, scorbutica labe infectus, debilitate capitis afflictus, hæmoptysin passus, phthisi maciatus, hæmorrhoidum minus legitimo successu laborans, calculo excruciat, vel etiam podagræ doloribus detentus, alium adhuc durum morbum, five acutum five chronicum, nanciscatur: ubi utique in medicatione summa adhibenda est prudentia, & longe alia medendi via ineunda, quam in alio ægrotaute, eodem quidem morbo decumbente, sed visceribus integris, ac viribus nondum attritis & per antegressam valetudinem exhaustis.

Pari ratione ad exquisitius de morbis illisque medendi methodo iudicium ferendum multum certe valet, corporis laborantis, quoad viscerum & nervosarum partium dispositionem, plenior cognitio, in qua potissimum dispiciendum, utrum corpus succo & sanguine nimis sit fartum, vel an impura excrementitiorum & serorum humorum sentina scateat, five an sit cacochymium? Qualis sit ventriculi & intestinorum ratio? an rubibus, flatibus & spasimis cum alvi strictura exercean- tur, & æger sit hypochondriacus? Quæ hepatis sit conditio? an inoffensus sanguinis per hoc viscus transitus? an humoris bilioli in eodem secretio debita & non suffragaminata? id quod ex faciei colore & diminuta corporis nutritione patescit. Porro disquirendum: an tenera vesicularis & vasculosa pulmonis substantia adhuc sit salva & integra? quippe quod, exspiratio vel facilis vel difficilior, nec non rejectio humoris ex ore, luculenter produnt. Denique etiam temperies cerebri & systematis nervosi consideranda est, & ex natura somni, animi affectibus, mentis etiam & phantasiæ interturbatione, prudenter dijudicanda.

Exacte sic perspecta corporis ægrotautis natura, ad ipsum morbum quocum æger conflictatur, paullo penitus considerandum ejusque indolem & peculiarem genium intimius indagandum, transcundum, & maxime omnium videndum est: utrum malum populares habeat circuitus & epidemium sit? an ejus virulentia per xanthemata se prodatur? ex quo materiæ, quæ morbum facit, tenuitas & virulenta indoles potissimum dignosci potest: quippe quæ, dum nervosis partibus insidet, præcordiorum anxietatem, inquietudinem, extremorum rigus, conatum vomendi, capitis & dorso, circa primam vertebram, dolorem, pulsus celeritatem, tum duritie junctam, mentis turbationem & spirandi difficultatem promptissime concitat; relegato autem ad corporis corticem noxio humore, horrida hæc symptomata, plurimum de vehementia sua remittunt & tandem conquiescunt. Scrutandum præterea est: an cum agenti virium prostratione & intenso partium languo-

re, nec non jactatione & summa inquietudine, morbus ægrum apprehenderit? utpote quod occultæ humorum corruptionis, quæ vulgo malignitatis nomine venit, haud dubium subministrat indicium.

Et quum nulla fere febris vel alius morbus sit, in quo non sensibiles symptomatum remissiones vel intermissiones conspicuæ sint: medicus certe actiones tam naturales, quam vitales & animales, quomodo tam intra, quam extra paroxysmum comparatæ sint, sedulo persequi debet. Nam in accessionibus & impetu ac vigore morbi, in quo motus & solidarum & fluidarum intensiores & acceleratiores deprehenduntur, necessarium est, ut omnia ea quæ motus cum excretionibus augent & exacerbant, penitus absint & prorsus intermittantur: contra vero diebus vacuis & intercalaribus, nec non paroxysmo silente, ubi omnes motus, maximeque pulsus, ob insignem solidarum succedentem atoniam & debilitatem, sunt imbecilles & languidi, ea, quæ materiæ peccanti commovendæ & exterminandæ inserviunt remedia, perquam opportune propinari possunt. Maxime vero omnium in morborum incremento, dispiciendum est: quas functiones maxime, animales, an vitales, vel naturales? iidem lædant & labefactent; quippe ex hujus læsionis gravitate, morbi causæque morbificæ vehementia dijudicanda est. In acutis ex somni, respirationis, nec non pulsuum conditione atque natura, morbi genium & vim uberius & perquisitius cognoscere, solerti & perspicaci medico datum quidem est atque concessum; sed dolendum certe, quod perpauca sint, quæ ex arteriarum pulsatione, sanguinis per universum corpus, & præcipue pulmones, circuitum, atque etiam systematis nervosi & fluidi nervei, quod veteres spiritus animales vocarunt, naturam & constitutionem indagare atque perspicere norunt. Plane mirabilis enim cerebri & cordis est conspiratio, ita, ut quivis cerebri vel nervorum morbus, quivis etiam animi ex affectu motus, pulsus illico mutet. Porro quum nemo ex morbo, nisi inflammatione & sphacelatione interna moriatur, & in acutis quidem ventriculi & membranarum cerebri inflammationes facile succedant & interitum inducant; in chronicis vero viscerum sphacelationes, lethalem vitæ catastrophem imponant: medicus certe oculum & animum ad funesta hæc symptomata cum primis advertere & dirigere debet, quo exinde perquam utilia confectaria in usum suum elicere possit. Neque minus diligens suscipienda est investigatio in primarum viarum, sub totius morbi decursu conditionem: an scilicet for- dibus refertæ sint, vel sordescere incipiant, & quidem sub initium vel progressum morbi? Qualis sit excretionis alvinæ ratio? quæ rejectorum copia, color & qualitas? utpote quæ de functionum naturalium vitata vel legitime comparata constitutione, haud incertum præbent indicium. Urina etiam contemplanda, qualis hæc reddatur colore, consistentia, indole & quantitate, è quibus, collatis aliis in morbo phænomenis, spasmodicæ partium internarum stricturæ cognosci & æstus præternaturalis augmentum vel decrementum judicari potest.

Uterius ad integram morbi historiam contexendam, nihil aptius judico, quam si medicus probe & summa cura operationes remedium, quæ præscripsit observet, & omnes, quæcunque post medicaminis usum inciderunt mutationes, studiosè annotet, imprimis; utrum symptomatum vis ac vehementia inde tantisper vel mitigata, vel adaucta sit? an vero nihil plane horum contigerit? Quum enim totius therapie cardo in eo potissimum vertatur, medici etiam peritia ex eo maxime pateat, si is in graviore morbo apta & idonea ad oppugnandum eum sciat exhibere remedia: certe qua ratione medicus palmario hoc suo officio satisfacere & auxilia utiliter & convenienter applicare possit, si non exacta illorum notitia fuerit imbutus, equidem non video. Hanc vero remedium intimiorem cognitionem

animo rite concipiendi, vix certior, rectior & compendiosior datur via, ac per observationes & morborum historias, quæ simul medicaminum propinatorum usum, genuinam applicationem & certos effectus recensent atque complectuntur. Et hinc demum vera, certa & non fallax de remediorum viribus & efficacia, quæ tanto pere in desiderio est, experientia, proficiscitur & medenti innotescit. Jam dudum enim non solum *Celsus* monuit, sed experientiæ etiam calculo constat: eadem medicamenta, quæ in eodem morbo uni subiecto maxime proficua sunt, alteri gravissime nocere; quo fit, ut ipsi medici, remedium quoddam mirificis laudibus & encomiis extollant, alii vero illud ipsum plane damnent atque rejiciant, utrisque ad experientiæ asyllum confugientibus, cujus tamen ea ratio est, ut nunquam fallere possit, si modo omnes & singulæ circumstantiæ omniaque phænomena, quæ in perfecta subiecti & morbi historia commemorantur, exacte pensitentur: neglectis autem, ut perditus plerumque mos obtinet, iisdem, hæc ipsa utique anceps est summeque ambigua. Nam vires & operationes remediorum neutiquam sunt absolutæ, sed conditionatæ, hoc est, ad varias conditiones & circumstantias, tam individui, quam morbi, nec non causas, tempora aliaque id genus relatæ; ideoque eum omnino in finem accuratæ observationes & exactæ curationum historiæ conscribuntur, quo genuinæ medicamentorum virtutes, in tot diversis naturis, locis atque temporibus, perspiciantur & intelligantur. Hinc præstantissimum profecto est *Hippocratis* monitum libro de decenti orn. Sint, inquit, in memoria tibi morborum curationes & harum modi, quotupliciter & quomodo in singulis subiectis se habeant: hoc enim principium in medicina est, medium & finis.

Quum vero morbi, præsertim acuti, sæpissime sine ullo medico & pharmaceutico subsidio, aut aliis per artem adhibitis auxiliis, solius naturæ beneficio, & nonnisi domesticis quibusdam remediis, temporis præsertim diuturnioris tempestivitate, cedant, quin non raro rectius persanentur, ac ubi ingens pretiosissimorum medicaminum copia exhibita fuit: multum profecto ad therapiam rite instituendam & convenienter perficiendam proficit, omnes sedulo annotare circumstantias, sub quibus, quo tempore, quo ordine, quibus excretionibus, quo symptomatum successu, morbus decurrerit & tandem solutus fuerit. Optandum hinc quam maxime foret, ut accuratæ prostant observationes de singulorum morborum in diversis individuis naturali processu ac spontaneo decursu, ubi nimirum totum opus naturæ commissum, nec ullum plane adhibuit medicamentum, & in quibus omnes circumstantiæ tam nude & simpliciter enumeratæ sunt, quam se invicem non interrupta serie exceperunt. Ita firmitus sane iudicium de viribus remediorum interponi posset, & non solum facillimum esset dijudicatu, utrum affectus alicujus exacerbatio, quæ post medicaminis usum contigit, ex immutabili naturæ lege atque causarum nexu profluxerit, an vero à remedio illo strictè & absolute inducta fuerit; sed vicissim etiam longe certiori argumentatione concludi posset, remissio & allevatio symptomatum, administrationi remedii succedens, hujusne, an naturæ operationi, an utrique simul adscribenda sit & tribuenda. Non infrequenter enim fit, ut medici arcanis suis accepta ferant, quæ suffragante tantum natura, quoad afflictionum mitigationem, vel totius morbi curationem, evenerunt; unde tam gloriosa simplicium & compositorum medicamentorum encomia in libris practicis & botanicis prostant, quæ tamen plerumque omnem spem & expectationem tam medici, quam ægrotantis, fallunt atque destituunt.

Denique ad observationes & completas morbi historias adornandas, sectio cadaverum morbis defunctorum maxime referenda est: quandoquidem non fa-

cile aptius & certius ad naturam causæ morbificæ & sedem affectam pernoscendam, immo ad mortis causas detegendas medium, sectione & inspectione solentiori cadaverum eorum hominum, qui iisdem morbis extincti sunt, invenitur. Quanquam enim non omnia, quæ in dissectis corporibus observantur, semper primæ & proximæ morborum causæ habendæ sint, sed sæpius effectus tantum causarum atque ipsius mortis fiant: nihilo minus non raro tamen accidit, ut hac ratione genuinæ morborum atque symptomatum insolitorum causæ manifestæ fiant. Obversantur sane animo plurimi casus, ubi tum in ipsis morbis, tum in eorum causis cognoscendis, non incelebres etiam, sed magni nominis medici, valde hallucinati sunt, maxime aliena de morborum quorundam indole & causis proferendo; quorum erroneas cogitationes cadaveris post mortem apertio evidentissime refutavit. Facta enim sectione, ut plurimum polyposæ in corde vel vasis majoribus concretiones, aut empyemata in pectore, abscessus mesenterii, calculi in bilis conceptaculo, vel in urinaria vesica, rupta sanguinea vel lymphatica vasa, ingentes glandularum tumores, scirrhotitates, vel corruptiones putredinosæ viscerum, uterus disruptus, in conspectum venerunt, de quibus nihil plane antea suspicionis fuit. Monendum tantum est, ne in cadaverum dissectionibus, causam morbi confundamus cum causa mortis, quod à pluribus minus ingenuis medicis fieri assolet, quibus sufficiens peritia ad iudicium aptum de læsionibus partium, quæ in sectionibus deprehensæ fuerunt, ferendum deest. Nonnulli etiam data opera causam mortis pro causa morbi venditant, ut hoc pacto aliis imponant, quasi nulla arte morbus, quo vita defunctus æger, medicamentis potuisset submoveri, & sub hoc indeclinabilis moriendi necessitatis prætextu famam suam salvam atque integram conservent.

Dissectiones itaque cadaverum frequentiores & solentiores à medicis anatomes peritis majorem in modum commendandæ sunt; eo, quod vera causarum morbi cognitio, & prudens remediorum ad eas auferendas applicatio, duo quasi poli sunt, circa quos tota praxis medica vertitur. Et utut accuratior causæ morbificæ cognitio, non semper satis sit ad morbum tollendum, sed is sæpe remediorum efficaciam vincat; non tamen ideo inquisitio diligentior cadaverum, tanquam labor parvæ utilitatis incusanda, quod à nonnullis sciolis, qui sapientiam suam non ex puro naturæ fonte, sed lutulentis lubricæ phantasiæ speculationibus, haurire satagunt, fieri consuevit: siquidem ad minimum id emolumenti inde resultat, ut medicus an morbus similis occurrens, sanationem admittat, necne? & quænam medicamenta huic malo avertendo idonea sint, quæ non? dijudicare possit. Profecto enim ex unica per anatomen circa morbi alicujus causam facta observatione, plus utilitatis in praxin, præsertim si eadem affectio iisdem plane circumstantiis stipata denuo occurrat, redundabit, quam ex mille subtilibus theoreticorum ratiunculis, ex fictitiarum hypothesium, scrinio depromptis. Pulchre hanc in rem scribit *Baglivus* lib. I. *Praxeos med. cap. V. §. 6.* dum ait: errant, qui putant, se morbos feliciter curaturos, quia doctrinam theoretizandi ad amissum callent; errant, inquam, quia medicus ad multo altiora respicere debet, ut innocentem artem à calumniis vindicet, ægrosque à morborum tadio ad salutis tranquillitatem revocet: cadavera hominum morbis denatorum secunda sunt ei, manusque inquinandæ, ut inveniat, quæ morbi sit sedes, quæ causa, qui exitus antecedentium symptomatum, qui demum effectuum omnium in antecedenti morbo observationum eventus.

Reliquum nunc est, ut, præter ea, quæ jam sparsim in ipsa tractatione monuimus, etiam dicamus, quinam fructus ex medicorum plenioribus observatis in perfectione

perfectionem & certam rationem artis nostræ redunt. Sunt vero hi eximii. Neque enim alia via vel methodus suppetit, qua morbos à se invicem probe distinguere eorumque causas multum quoque dissidentes cognoscere possumus, quam per multiplices & recte institutas observationes. Ad prudentem etiam prognosin, sive iudicium de morbi eventu formandum, certior & melior, quam per observationes, nulla ratio inveniunda. Quam infinitæ circa morborum prognosin regulæ in *Hippocratis* aliorumque veterum monumentis quidem prostant; sed maxima ex parte fallaces sunt, tantum abest, ut pro universalibus sententiis & aphorismis veris haberi possint. Idque accidit eam maxime ob rationem, quia non ex integris morborum historiis, sed ex earum fragmentis tantum, & quibusdam, non omnibus & singulis circumstantiis, depromptæ sunt. Igitur longe perfectior & hæc doctrina de prognosi speranda nobis erit, modo ex multiplici observatione & accuratiori consideratione circumstantiarum prognosticas regulas elicere incipiamus. Neque dici satis potest, quam utilia corollaria in usum futurum, ratione methodi medendi, ratione applicationis remediorum, & in cognoscendo, quænam ex horum genere noceant, vel profint, hauriri queant. Medico enim nunquam desistendum est ab observationibus & experimentis, neque ulla, licet etiam minoris momenti videantur, negligenda sunt. Nos certe non facile casum quendam prætermittimus, quia vix ullus incidit, ex quo non quippiam adhuc addiscere possimus, quum ad minimum, quod jam inventum & cognitum fuit, exinde confirmetur.

Inter alios vero fructus, quos ex recte consignatis morborum historiis expectare possumus, insignis omnino etiam est is, quod ad diversas medicorum hypothesen, opiniones & controversias in praxi decidendas reddamur aptissimi. Quod si enim ulla, certe medica disciplina, innumeris opinionum figmentis, sectis & dissensionibus immersa est. Ex harum vero dissidentium sententiarum labyrintho nosmet extricandi non meliorem novimus viam, quam si earum applicationem ad medicas observationes, quæ genuinum ac immutabilem naturæ ordinem & processum in vitæ, sanitatis ac morborum negotio complectuntur, urgeamus: tum enim clarissime elucescet, quæ firmo stent talo & ad veritatem accedant, ac vicissim, quæ à vero abludent & luxuriantis imaginationis foetus sint.

Quot diversissimæ medentur in praxi medica, circa remediorum valentiorum & heroicorum, e. c. venæ sectionis, fonticulorum, vesicatoriorum, purgantium, emeticorum, mercurialium, opiatorum, chinæ chinæ, salium volatiliū, martialium usum sunt sententiæ: hi eadem laudant, illi damnant, & omnes pro veritate sententiæ suæ acriter pugnant, ut demum cui assensum præbere possis, nescias. Hic certe non accommodatior emergendi ex hisce difficultatibus patet via, quam si observationes cum cura & diligentia conscriptas de illis morbis, in quibus damnum vel salutem hæc medicamenta attulerunt, consulamus; quippe tunc facile apparebit, pro differenti circumstantiarum ratione, in eodem morbo remedia hæc insignem opem, vel luculentum etiam damnum attulisse, adeoque in se non esse nociva, sed in medicos culpam esse refundendam, qui iis non recte usi sunt.

Ad hæc integræ atque exactæ morborum historiæ hanc quoque eximiam utilitatem afferunt, ut eorundem originem, primordia atque generationem exinde perspiciamus ac discamus. Etenim quemadmodum nihil in rerum natura sine causa evenit, & effectus semper proportionati sunt viribus causarum suarum: ita etiam graves & plane inordinatæ motuum vitalium mutationes, ac inde dependentes turbatæ & læsæ fun-

ctiones, ab efficacibus & sufficientibus causis ut proveniant necesse est. Has sollicita & sedula indagine perinvestigare oportet medicum. Quocirca præter considerationem ætatis, habitus corporis & temperamenti, nec non dispositionis ad morbos, secundum ordinem rerum non naturalium, quibus unusquisque quotidie indiget, itemque quoad regimen in vitæ ratione, inquirere decet medicum: in quoniam deliquerit vel errores admiserit æger; quò deinde his exploratis ac junctim pensatis, proximæ, quæ morbum facit causæ, generatio elucescat. Nam si quispiam originem morborum curate investigaverit, semper observabit, causas plures, quæ medicis remotæ dicuntur, concurrere ad causam proximam, qua posita morbus ponitur, constituendam. Et hac remotas, sive antecedentes causas, iis rebus contineri, quæ maxime sunt externæ & ab arbitrio ac potestate utentis pendent, exploratum est.

Quò facilius autem & crebrius erratâ inconvenienti harum rerum usu committuntur, præsertim ab iis, qui vires illorum; tam ad juvandum quam nocendum aptas, plane ignorant, quorum tamen maxima pars est: eo facilius quoque, certior magisque obvia est, enata inde ad morbos dispositio, quin ipsa eorundem origo. Hinc dici vix potest, quantum utilitatis exactior primæ morborum generationis cognitio, nobilissimæ medicinæ parti, præservatoriæ, conferat. Quod si enim ex crebrioribus observationibus perspectum habeamus, à quibus causis prægressis; & admissis in vitæ ratione delictis, morbus in hoc vel illo corpore incunabula traxerit; in prono deinde ac facili est, salutare consilium aliis impertire, à quibus scilicet, valetudini dispendiosis rebus, sibi cavere ac temperare debeant, ne in eundem morbum incidant. Et utinam hæc præstantissima artis nostræ pars, quæ afflictionibus morbosus avertendis addicta est, qua nihil utilius, & quæ etiam in potestate medici plus posita, quam morborum sanatio, nostris temporibus majori studio & solertia excuteretur, & hunc in finem uber observationum idonearum apparatus colligeretur; tunc utique futurum esset, ut mortales, & vitam à morbis magis immunem, & diuturniorem, ducerent.

Sed hæc de modo conscribendi observationes morborum in uno individuo earumque insigni utilitate dicta sunt: nunc etiam perpauca subjicienda erunt monita, observanda iis, qui historias de affectibus vel epidemiis, sive populariter in loco quodam grassantibus, vel endemiis, sive certis regionibus inquilinis & quasi propriis, rite concinnare ac colligere nituntur. Scilicet quum multi morborum, ac imprimis omnis generis febres, tam malignæ & periculi plenæ, quam contagio infestæ, continuæ; æque ac intermittentes, exanthematicæ & catarrhales, arthriticæ ac rheumaticæ, nonnunquam certo quodam anni tempore, regionem vel urbem universali quasi labe inundent & multos simul invadant; sæpius etiam gravioribus aut mitioribus, immo peculiaribus symptomatibus stipatæ sint, & non unam semper eandemque, sed subinde aliam atque aliam medendi rationem exposcant: causæ utique popularis hujus incursus & singularitamen quem obtinent genii, non aliæ esse possunt, quam quæ pluribus hominibus sunt communes & in omnes æque cadunt. Jam vero si oculos circumferimus, exploratione curatius instituta, aëris potissimum insalubrem conditionem, ejusque communem omnibus sub eadem plaga usum, incusandum esse patefcit: eo quod non solum fluidum illud catholicum aëreo-æthereum elasticum, ad motus qui vitæ præsumt conservandos & immutandos, prout ex physiologicis constat, multum facit, sed ipse etiam aër mutatus, fluidorum temperiem & solidorum constitutionem afficit, iisdemque aliam & præternaturalem habitu-

dinem inducere potest. Etenim quam ingentes mutationes diversum tantum solis ad telluris superficiem positum subsequantur, anni tempora luculenter arguunt, quibus si accedunt tempestatum vicissitudines, ac ventorum varietate & sibi invicem succedentium diuturniori ex certis plagis flatu oriundæ, ut coelum vel nimis frigidum, nebulosum & pluviosum incumbat, vel æstuosum & siccum regnet: utique corpora his exposita, non possunt non inde graves alterationes, tam quoad ipsam partium constitutionem, quam ordinatum motuum successum incurrere, eo pluribus solenniores, quo minus quispiam ambientis aëris accessum arcere potest.

Verum hæc generalis aëris, quoad tempestatum vices contemplatio, quæ plures sæpe regiones tangunt & latissime se diffundunt, non sola sufficit ad eruendam morborum epidemiorum generationem. Nam multiplici observatione constat, sub eadem plaga & cœli constitutione, hunc vel illum morbum unius tantum loci incolas affligere, proxime adjacente ab eodem vel plane immuni, vel minimum mitius & parcius infecto; id quod variolarum, dysenteriae ac purpuræ exemplis inprimis confirmatum habemus. Quare simul ratio habenda fluidi aëris cuivis loco proprii, quod mirifice pro varia indole exhalationum, tam ex patulis stagnorum ac paludum conceptaculis, quam reconditis ibi in terræ sinu mineris sulphureis, vitriolicis, aluminosis, bituminosis, salinis, ipsi insinuaturnum, discrepat. Quæ effluviorum, & inde dependens ipsius aëris, cuivis loco & urbi quasi propria varietas, non luculentius demonstrari potest, quam ex cærevisiarum diversitate, utpote quæ, licet ex eadem polenta iisdemque aliis ingredientibus, eodem quoque modo & artificio, quin eadem aqua coquantur, mirifice tamen & sapore, & colore, & virtute, differunt.

Non minus ad meliorem & specialiolem causarum, quæ morbos epidemios gignunt, cognitionem, ipsius loci situs, aquarum indoles, receptum vitæ genus & fueta victus ratio pensanda sunt: quo ex omnibus his inter se comparatis ac simul consideratis, innotescat, in quo epidemiorum morborum causæ, indole, materia, textura, potentia ac virtute differant, & partium corporis structuram motusque turbent ac præter naturam afficiant. Quin prævisis sic causis & concurrentibus circumstantiis, in proclivi est, non tantum imminem cuivis regioni epidemiam luem prædicere, verum etiam utilissima suggerere consilia, quo pacto eadem arceri, vel congruis auxiliis mature abigi possit. Et quamvis hoc negotium admodum arduum & perdifficile esse videatur: spem tamen non penitus abjiciendam esse reor, modo plures periti & rerum naturalium gnari medici, unitis consiliis, in diversis locis, per omnes occurrentium annorum periodos, singulis diebus, cœli mutationes, tempestatum vices, ventorum flatus, & in barometris ac thermometris exacte conspirantibus, liquidi ascensum & descensum, nec non in hygrometris siccitatis & humiditatis differentias, curate annotarent, & simul quoque locorum situm, victum in genere & specie, præsertim eorum, qui in morbos epidemios incidunt, quibus symptomatibus hi incedant, quem exitum fortiantur, quæ medicamenta respuant, quæ admittant? exponerent. Intensissime itaque optandum ac serio monendum est, ut omnes, qui historias ejusmodi popularium morborum contexere sibi sumunt, quemadmodum id laudabili instituto per aliquot annorum decursum quidam exorsi sunt, ad omnia hæc inculcata monita studiose attendant & ad earum normam observationes consignent, emolumento certe non satis deprædicando.

CAPUT III.

De morbis curate discernendis & recte dignoscendis.

§. I.

AD therapiam tuto & feliciter instituendam nihil æque conferre, ac morborum, quorum sanationi medicus manum admove sibi sumit, causas, symptomata atque peculiarem indolem probe nosse, res est, de qua inter medicos, rationali artis culturæ vacantes, nulla unquam fuit relicta dubitatio; ut potius jam apud priscos medicinæ auctores inter universales aphorismos relatum legamus: quod qui bene cognoscat, idem quoque bene curet. Et certe veritas hujus dicti in aprico posita est; siquidem plures utique sunt morbi, qui maximam inter se alunt cognationem, tantaque procedunt symptomatum similitudine, ut eorum interior indoles & specialis differentia, vel à sagacissimo medico interdum vix deprehendi, cognosci & erui queat.

§. II.

Quare quum unus morbus alterum, tam invasionis modo, quam symptomatum plurimorum parilitate, tam exacte sæpius referat, ut primo statim intuitu vix alius ab alio exquisite possit discerni; utique maxime necessarium est scire: quænam specialiores notæ characteristicae attendi debeant, ex quibus postmodum intimior de morbo aliquo possit obtineri cognitio. Si quid enim est, quod medicum reddit fama celebrem & quasi *ισόδορον*, profecto est illa doctrina, qua ipse instructus, ad firmum & indubium de genuina indole ac certo eventu morbi proferendi judicium, redditur longe capacissimus. Contra vero nihil perinde existimationi medicorum detrahit, quam si hac in parte turpiter impingant & fallacem inprimis circa morbi cuiusdam processum atque exitum interponant sententiam; quandoquidem si de iis, quorum veritatem dies futurus demonstrare debet, alienum quis fovet conceptum, error ipsius facile fit evidens ac manifestus. Nam qui circa nudas theoreticas in medicina veritates singulares ex phantasiæ potius fonte, quam ipsa ex rei natura desumptas opiniones alit, is ea propter ignominiae labem haud incurrit, quoniam maxima hominum pars incapax plane est de rebus medicis solide judicandi, & connexionem theoreticorum axiomatum cum practicis perspiciendi. Haud injuria vero ignarus medicaster imprudentiæ præmium fert ignominiam, quum non levis ex ignorantia causarum morbi & neglecta inter morbos apparenter cognatos distinctione, in medicina facienda & indicationibus medendi eliciendis, emergat difficultas. Etenim *quem morborum origo & primordia fefellerunt*, is, secundum præclarum Medicorum Ciceronis, Celsi, effatum, *minus recte curam suscipit*: & vicissim, *qui ad cognoscendum sufficit medicus, ad sanandum etiam sufficit*, quemadmodum sapienter proditum est ab Hippocrate *Lib. de arte* §. 20.

§. III.

Verum enim vero, quo excellentiori usu hæc doctrina sese commendat, eo minus vulgo ejus rationem haberi constat. Dicit certe vix potest, quam turpiter nonnunquam ludibrio vulgi sese exponant medici etiam ii, quorum eruditio in reliquis medicinæ partibus non mediocris est, si v. c. uterum à prole expansum pro hydropse ascite, vel ascitem pro imprægnatione venditant: si febrem malignam, periculi raro expertem, pro benigna catarrhali: si inflammationem ver-

tricoli & intestinorum, pro solo dolore colico: asthma flatulentum pro catarrho suffocativo: syncopen pro apoplexia: variolas pro petechiis: purpuram pro variolis: dolorem ex calculo pro affectu ischiadico, molimine hæmorrhoidali vel dolore colico & quæ plura sunt, habeant. Ecquis hic non clarissime perspicit, medicum in morbis hisce distinguendis hallucinantem, tum in prognosi facienda, tum in curæ administratione legitima, quam facile peccare posse? Alia enim remedia hydropicus & cachecticus status, alia imprægnatio, rursus alia febris maligna, quam benigna catarrhalis, postulant. Quæcunque profunt in dolore colico, illa ipsa in ventriculi inflammatione maxime nocere possunt. Secus procedendum in cura asthmatis flatulenti, quam catarrhi suffocativi. Sic etiam methodus, qua utimur in syncopiticis excitandis non sufficit in apoplexia auferenda. Longe alia quoque medendi via ineunda in calculosa affectione, quam in ischiadica, & urgente hæmorrhoidalis sanguinis congestione accolicis torminibus. Variolarum, petechiarum, purpuræ diversa itidem inter se est conditio, & diversam quoque ex parte therapiam & medicam tractationem requirunt. Ut adeo pateat, ingentem intercedere differentiam inter medicos artis suæ gnaros & rerum suarum fatigantes, qui doctrinam de distinguendis morbis ex observationibus conquistissimis rite hausserunt, & inter illos spurios Æsculapii filios, qui hujus doctrinæ prorsus rudes, fortunæ tantummodo omnia committunt.

§. IV.

Ne igitur medens in re tanti momenti inpingat, sed morbum quem curandum suscipit ab aliis, eadem ferme facie incedentibus, curate discernere possit, animo imbibenda & firmiter tenenda sunt, indicia certa & notæ characteristicæ, quæ unicuique propriæ sunt eundemque produnt ac manifestant. Nimis vero longum foret singulas morborum species percurrere eorumque differentias inter se conferre; ideoque mihi suffecerit communissimos, difficulter tamen distinguibiles, in medium attulisse, in quo differant indicasse, & mutuo demum comparasse. Et febris quidem denominatio permultis morbis communis est, qui tamen ratione causarum, indolis, periculi & medendi methodi quam maxime discrepant, eamque ob causam caute sunt distinguendi. Scilicet est febrium quoddam genus ephemera dictum, quod præcipuum & peculiare id obtinet, ut intra breve temporis spatium, & plerumque intra viginti quatuor horas, perspiratione auctiori ad finem pertingat. Alia febris species est synocha, his à reliquis dignoscenda signis, si primo horror & refrigeratio levior, quam in cæteris est, dein parum remittunt symptomata, quam ob causam à veteribus febris continentis nomine insignita fuit. Solet quoque maxime circa auroram adoriri; & terminatur ut plurimum hæmorrhagiis narium vel sudoribus largis, circa quartum vel septimum diem erumpentibus. Causus à tertiana continua, in qua simillima præsto sunt symptomata, differt in eo, quod in hac exacerbatio tertio die observetur, in causo vero singulis diebus ea præsens sit.

§. V.

Febris porro maligna, κατ' ἐξοχὴν ita dicta, discrepat ab aliis febribus, v. g. semitertiana, synocha putrida, febre ardente biliosa inflammatoria, quæ inflammationem ventriculi vel intestinorum junctam habent, periculo. Ratio autem distinctionis in eo posita est, quia febres malignæ, strictè sic dictæ, contagio ortum debent, quo recensitæ febres inflammatoriæ carent. Dein causam quoque agnoscunt diversam, quæ in sic dictis inflammatoriis est stasis ad sphacelum transiens, in malignis vero lymphæ magis fermentescibilis, putrida, nervorum fluidum celeriter eadem corruptione contaminans; unde subitanea virium corporis prostratio jungitur. Distinguitur identidem hæc febris maligna à catarrhali in eo, quod in illa repentina & mox ab initio morbi virium adsit defectio, cum perpetua agrypnia, quam mentis perturbatio tandem excipit, maculæ quoque rubræ, petechiarum nomine venientes, vel etiam purpura, plerumque alba, ipsis complicantur & funestum exitum minantur, quæ cuncta in benignis catarrhalibus non observantur, ubi potius feri erodens salina qualitas coryzam, gravedinem, raucedinem, tussim & pectoris oppletionem & quasi erysipelaceum intra fauces asperamque arteriam ardorem causatur. Ubi itaque hæc signa non adsunt, ibi etiam perperam catarrhalis febris judicatur. Illud tamen non inficias eundem, febrem catarrhalem malignam æque ac benignam, cum malignis petechialibus multum alere convenientiæ, adeo, ut ab incautis minusque exercitatis medicis læpissime confundantur; eo quod lenissime sine magno æstu, dolore atque anxietatibus eminentibus procedunt, in utrisque dejectio mucidæ materiæ per tussim jungitur & circa vesperam symptomatum fit exacerbatio.

§. VI.

Accedunt aliæ febrium species & quidem mesentericæ, quæ quo frequentiores, eo difficilius vulgo dignoscuntur, ita, ut sub malignarum titulo plerumque vendantur. At vero longe distinctissimæ sunt ab his, quoniam non epidemice grassantur, neque contagio aut exanthematibus infestæ sunt, neque celerem mortem inferunt, sed ultra vigesimum primum diem ut plurimum trahuntur, & lubentissime in hecticas lentasque degenerant. Signa reliqua, quibus hæc febres ab aliis distinguuntur, præter jam prolata, sunt extrematum frigus, urinæ tenues, paucum spissamenti & subsidentis sedimenti dimittentes, tussis copiosæ, sine multa materia, siquidem non cocta, sed cruda exspunt, faucium dolor & rubor, perpetuum cibi fastidium, sitis defectus, febris uno die remissior, altero gravior, iterumque exacerbatus hemitritæorum more insultus, quæ signa sigillatim collegit *Hippocrates Lib. I. popular. §. I.*

§. VII.

Quod attinet ad febres purpuraceas, variolaceas, morbillosas & petechiales, eæ facillima ratione ex cutis efflorescentiis dignoscuntur. Differt enim purpura rubra à petechiis & febre sic dicta purpurata maligna, dum in hac maculæ non sunt elatæ, nec cutim scabram reddunt, neque cum frigore, æstu volatico, pruritu & ardore cutis, ac summa oppressione pectoris erumpunt, uti purpura tam tubra, quam alba, quæ & tangentibus & videntibus sese conspicuam præbet: & iisdem notis distinguitur quoque à morbillis. Petechiarum à variolis in eo diversa est ratio, quod septimo plerumque die, non vero ut variolæ quarto erumpant, ac sine elevatione & suppuratione superficiem obsideant: à morbillis autem distinguuntur, quod minoris ambitus maculæ sint, quam in his: neque instar morbillo- rum tantisper emineant. Variolæ & morbilli primo eruptionis die ægrius discernuntur, secundo autem facillime, quia illæ mox sese efferre, pustulasque protrudere solent. Differunt vero utraq; à purpura, quod neque cum horripilatione cutis ejusque scabritie prorumpant neque tactui ita sese offerant. Variolæ & morbilli respectu periculi etiam dispescuntur in malignæ & benignæ indolis, item in regulares & irregulares. Distingui etiam merito debent variolæ veræ à spuriiis, quæ vulgo dicuntur *Wasser-Pocken*, *Spirz-Pocken*, & erumpunt cum vesiculis malignis pellucido humore oppletis, minori symptomatum agmine, vehementia & sine periculo.

§. VIII.

Jam ad febres intermittentes transitum facimus. Differt quotidiana intermittentes à quotidiana continua, qualis solet esse sæpius catarrhalis benigna & maligna, dum in hac remissio tantum fit symptomatum & singulis diebus exacerbatio, non autem plenaria intermissio, uti in quotidiana intermittente; quæ etiam differt à febre lenta & hectica, siquidem illius paroxysmus tempore matutino, harum vero circa tempus vespertinum ingruit. Dein discernitur quoque à tertiana duplici, quæ etiam singulis diebus accedit, sed ita, ut ejus accessiones non sint æquales, id est, non quovis die in eundem temporis articulum incidant; sed altero tantum die sibi respondeant, ut tempus paroxysmi, qui invasit primo die, congruat cum tempore paroxysmi tertii diei, & tempus paroxysmi secundi diei, conveniat cum tempore quarti diei.

§. IX.

Variæ autem sunt tertianarum species & differentiæ: distinguitur enim in simplicem & duplicem. Illa est, quando uno die, qui spatium viginti quatuor horarum complet, plenaria est febris & symptomatum intermissio; in hac vero singulis diebus paroxysmus recurrit, ita tamen, ut subinde alternis diebus ratione temporis convenientiam invicem monstrent. Rarius quoque tertiana duplex in principio invadit, sed potius simplicem sequitur. Deinde dispescitur in legitimam & notham, seu spuriam: illa dicitur, quando horrorem insignis æstus sequitur, cum siti, capitis dolore, quæ ultra decem horas non facile durant, urina flammea secedente; hæc vero non adeo magno æstu stipatur, ad viginti horas & ultra extrahitur, urinam turbidam reddit, non flammeam; & finito paroxysmo, insignem languorem & concussionem quasi artuum, *als wenn alle Glieder zerschlagen wären*, cum inappetentia post se relinquit. Distinguuntur alias quoque tertianæ in cholicas & pituitosas, in regulares & irregulares, vernaes & autumnales, epidemicas & endemicas; sed quoniam exigua admodum difficultas in hisce discernendis occurrit, quum ex ipso adposito epitheto differentia satis superque pateat, earum nomina tantum attingisse suffecerit.

§. X.

Accedimus nunc in explicatione differentiarum febrium ad quartanam, quæ dividitur in legitimam ac simplicem, & in duplicem ac notham, dein quoque in intermittentem & continuam. Simplex & legitima est, si quarto quoque die revertitur paroxysmus, si vero intra quatuor dierum spatium duo paroxysmi ingruunt, febris quartana duplex audit. Notha quartana dicitur ea, quæ non servat tempora ordinaria invasionis, quæ sunt post meridiem ac vespere. Quartana continua vocatur, ubi paroxysmi quarto quidem die redeunt, intra id vero tempus febriles motus non plenarie silent, sed symptomatum tantum remissio adest, & languor corporis, cum lento & præternaturali calore & pulsu celeri, remanet.

§. XI.

Febris porro lenta & hectica ita distinguitur, ut hectica superveniat hydropi, phthisi, atrophie, vel cachexie scorbuticæ, & incunabula trahat ex viscerum, aut ipsius mesenterii apostematibus, vel etiam glandularum mesentericarum corruptione, putredine, induratione, eamque ob causam sit insanabilis. Lentæ vero febres ex febribus maxime diariis, quotidianis, tertianis, duplicibus oriuntur, si eæ perversa methodo per adstringentia styptica & nimis calida tractantur. Nascitur quoque febris lenta à virium debilitate summa, ob præcedentes enormes hæmorrhagias, uteri v. g. in abortu, vel à gravioribus vulnerationibus, item à lon-

gioribus morbis prægressis; siquidem ob virium imbecillitatem ventriculus debilis multas ingenerat cruditates, à quibus postea lentæ febres suam originem nascuntur. Lentæ quoque febris ab hectica in eo dispar est ratio, quod longe gravioribus hæc stipata sit symptomatibus, siquidem pulsus continuo celer micat, etiam matutino tempore, post somnum peractum, unde genæ quovis tempore aliqua rubedine tinctæ observantur, major quoque præsens est virium resolutio, ac in lenta, ubi mane & ante cibum artiarum ictus remissior & naturali similis, vespere vero & post cibum celerior fit, genarum rubor cibo sumto tantummodo se prodit, minorque virium adest prostratio, quippe adhuc extra lectum versari febre lenta laborantes possunt.

§. XII.

Hisce deductis inflammatoriæ febres expendendæ, è quibus frequentissimæ sunt peripneumonia & pleuritis. Admodum autem conspicua est peripneumoniæ ac pleuritidis veræ & spurie differentia; siquidem pleuritis spuria ea est inflammatio, quæ membranas & musculos intercostales tantum occupat & ad rheumatismi potius speciem referenda est; vera autem pleuritis sedem suam habet in ipsa pleura, quæ intus thoracis cavitatem investit & plerumque in consensum trahit annexos subinde pulmones; & peripneumonia ipsam pulmonum substantiam occupat. Porro in pleuritide spuria fit dolor etiam exterius manifestus, dum tactu manuum exasperatur, isque magis vagus, quam fixus est, quandoque latius sese extendit & usque ad scapulas propagatur: tussis magis sicca, quam humida, omnis cruoris expers, cum febricula quadam leniori complicatur, vespere potissimum incommoda est, & hic morbus intra breve plerumque temporis spatium, sæpius sine venæ sectione, discutitur. Contra ea in pleuritide vera, dolor est acutior, magis fixus, febris intensior, respiratio difficilior. Et in peripneumonia hæc omnia quidem concurrunt, sed dolor non ita intensus est, licet ad dorsum & scapulas sese extendat, major visitur pectoris oppressio, respirandi difficultas, & sputum cruentum, sanguine fusco tinctum, scretu rejicitur.

§. XIII.

Ad inflammationem ventriculi quod attinet, differt illa à cardialgia, neque cum ipsa debet confundi. Nam licet in utroque morbo adsit maxima anxietas, inquietudo, *dass sie sich hin und wieder schmeissen im Bette*, & dolor pressorius atque ardens circa præcordia; in eo tamen subest differentia, quod inflammationis ventriculi dolor sensum intensissimi ardoris præ se ferat & quasi instar prunæ sit; deinde, quod nec alimenta, nec medicamenta facile ferre, sed ab illis ingravescere soleat, item quod febris cum pulsu celeri & inæquali, depresso ac debili, ventriculi inflammationi juncta sit, quod secus evenit in cardialgia. Distingui etiam debet inflammatio ventriculi ab inflammatione hepatis, & quidem concavæ partis, qua ventriculus tegitur, non solum vehementia symptomatum, sed etiam quod ardor circa scrobiculum cordis in ventriculo inflammato est vehementissimus & fixus, in hepatide vero ad latus magis dextrum & spurias costas vergit, neque ab assumtis dolor & anxietas increfcit, ut fit in ventriculo inflammato. Discrepat etiam ventriculi inflammatio ab ejus erosione; nam illa subito oritur passioque est acutissima, & sicuti spasmi ortum debet, ita cum spasmi violentis & symptomatibus gravissimis stipata est. Dolor vero ex erosione non tam ardens est, neque stricturis spasticis infestus, sed malum potius chronicum febrem lentam comitem habens, nisi quod in eo similitudo cum inflammatione ventriculi adsit, quod ad assumpta dolor anxius exasperetur.

Denique

Denique inflammatio ventriculi, à veneno caustico animique vehementiori affectione orta, distinguere debet ab ea, quæ fit ex potu frigido corpori calefacto immisso, quæ non tam horridis & atrocibus symptomatibus est infesta, neque tam violentas in totum corpus exercet spasticas contractiones, sed febre magis lenta & putrida, nisi mature succurramus, jugulat.

§. XIV.

Anginæ præterea species variæ sunt, & pro earum differente indole, diversa quoque sortiuntur nomina, quas distincte nosse in praxi non minus utile, quam necessarium est. Nimirum quando inflammatio obfidet interiores partes laryngis, præsertim musculofas, extus autem nec rubor, nec tumor quidam apparet, sed magna adest respirandi angustia ad suffocationem usque, vocari solet cynanche, & intra viginti quatuor horas sæpius necat, dum complicata est exquisita acuta febris. Altera species anginæ, in qua interiores pharyngis muscoli magis affecti sunt; & ubi major difficultas deglutendi, quam respirandi est, pariter sine insigni externo rubore vel tumore, dicitur cynanche. Quando vero inflammatio vergit ad partes exteriores, adeoque tumor & rubor magis est conspicuus, tunc, si malumprehendit gutturis seu laryngis partes, paracynanche, si vero pharyngis exteriora occupat, parasynanche appellatur.

§. XV.

Distingui etiam solet angina in veram & spuriam. Illa fit à stasi sanguinis inflammatoria & morbus maxime acutus est, ob febrem impenso acutam, & talis plerumque est interior: hæc notha vero, pro causa magis agnoscit congestiones sanguinis, vel etiam lymphæ, in partibus oris, faucium & colli glandulosis, febrem magis comitem habet lymphaticam & minus alit periculi, sed diutius affligit. Deinde angina optime dispesci potest in siccam, valde ardentem, & humidam, sive mucosam. Illa fit a sanguinis stasi in morbis maxime acutis; in hac vero muco copioso & lingua & faucium regio obducta & quasi inviscata est ac febribus catarrhalibus complicatur, neque minus scorbuticis, cachecticis familiaris est & diutius durat, orisque foetore molesta est.

§. XVI.

Ab hisce inflammationum speciebus discernenda porro est inflammatio oris & oesophagi mucosa, quæ vocari solet prunella, & febribus acutis exanthematicis supervenit, vel etiam plerumque inflammationi ventriculi succedit. Dicitur à nonnullis Germanico idiomate *die Hertzbräune*, & malum est admodum anceps ac periculosum, in quo muco etiam incrustata sunt narium interiora, sub quo ardens inflammatio delitescit. Differt etiam angina ab aphthis, sive pustulis ardentibus in lingua & faucibus; siquidem angina latius diffunditur & vicinas partes late in consensum rapit, in aphthis vero tantum ardentes & dolentes vesiculæ in lingua vel faucibus certas modo partes obfidet.

§. XVII.

Deinde angina sicca interna, quæ vocari solet cynanche, non confundi debet cum spasmo, hysteriarum fauces firmiter constringente & respirationem ac deglutationem difficilem reddente; quia hic sine periculo & facilius transit, facile etiam vincitur; in angina autem vera sanguinea interna, non tantum dolor ardens & pungitivus, circa interiora faucium percipitur; sed & lingua sanguine turget, tumida ac rubicunda fit, quandoque nigra redditur, facies rubore inflata est, temporum arteriæ valide pulsant, in quibusdam etiam cephalalgia, in aliis somnolentia, in nonnullis lipothy-

mia visitur, externa ut plurimum frigent & alvus adstricta est.

§. XVIII.

Ab angina pergimus ad phrenitidem, quæ est inflammatio membranarum cerebri & sese manifestat delirio feroci, cum oculis rigentibus fulgentibusque; febre ardente, vigiliis assiduus, rubore faciei, arteriarum vehementi, non secus ac si in cranii cavo pulsarent, & circa tempora vibratione. Differt phrenitis à mania, quod illa affectus acutus & ut plurimum febrium symptomata valde periculosum, mania vero malum est chronicum sine periculo & febre. A phrenitide porro mentis alienatio, aliis febribus jungi solita, gradu dignoscenda, quia mitius procedit & facilius abigitur. Distat etiam phrenitis à melancholia, quæ itidem malum est chronicum, & collecto in vasis, præsertim capitis, sanguini crasso originem debet. Tandem etiam differentia intercedit inter phrenitidem & hydrophobiam. Etenim hydrophobia à canis rabidi morfu inducitur, ejusque specialior nota characteristica est liquidorum omnium averfatio, adeo ut affecti viso tantum liquore aliquo, mirum inhorrescant & motibus convulsivis corripiantur.

§. XIX.

Hepatis inflammatio duplex est, vel enim in parte concava consistit, vel in parte convexa. Signa, quibus illa cognoscitur, sunt singultus, vomitus, cardialgia, ardor & dolor fixus sub scrobiculo cordis, versus latus dextrum, febris, tussis sicca, inspiratio difficilis, alvus adstricta. Quando vero in convexa parte erysipelacea inflammatione hepar affectum est, tunc in costis spuriis lateris dextri dolor gravativus, constrictivus & punctorius percipitur, cum tussi, febre, respiratione difficili. Et hac ratione mentiri solet pleuritidem spuriam, à qua tamen discriminatur febre ac respiratione remissiori, & dolore infra diaphragmatis regionem urgente: quibus accedit, quod pleuritis spuria facilius discutitur & die septimo ut plurimum finiatur sudore vel hæmorrhagia: in hepatitide vero, si res male succedit, convulsiones præsto sunt, vel si diutius perdurat, quippiam hydropici vel hectici, ob abscessus latentes, post se relinquit.

§. XX.

Nephritis pura & simplex, quæ est levior renium inflammatio, in eo à nephritide calculosa discedit, quod in illa dolor circa lumbos fixus, sed tendens & pressorius diuturnus esse solet, in calculosa vero longe acerbior, qui etiam locum mutat & se magis extendit ad illa; siquidem exquisitus ille dolorificus sensus, qui à calculo fit, demum in ureteribus eorumque principio, non vero in renali substantia, sese exserit. Deinde in calculosa nephritide sabulum crassum per urinam secedit, quod in nephritide simplici non contingit, utut crystalli rubicundæ & pellucidæ vitri urinæ parietibus sese apponant. Neque etiam nephritis cum malo ischiadico confundi debet, quod quidem facile accidit, quia in hoc dolor sæpius per totum femur excurrit, quod inde stupore atque rigore afficitur, nihilominus tamen disparitas utriusque exinde patescit, quod ejus dolor nephriticis in loco, quo renes situm habent, pertinacius consistat, quam ischiadicus dolor ossi coxendicis fixus magis inhæreat. Tum in nephritide crebrior ad urinam est stimulus, parcior tamen ejus fluxus, quod secus in ischiadica affectione observatur.

§. XXI.

Ex inflammationibus, quæ partibus externis incumbunt, frequentius occurrit erysipelas, quod superficiem tantummodo cutaneam rubore, tumore & dolore afficit, eaque propter probe distinguendum est à phleg-

mone, in qua ipsos substratos musculos inflammatio simul corripit. Phlegmonem autem à gangræna discernere idemtidem oportet; siquidem in hac inflammatio aliquando profundius serpit & non modo musculosas, sed & tendinosas ac nervosas partes occupat, atque adeo tum intensiori ardore & dolore, tum profundo ac latius se extendente duro tumore ac rubore, qui tandem in livido-nigricantem transit, cognoscitur.

§. XXII.

Devenimus nunc ad varias hæmorrhagiarum species, è quarum censu, quæ non parum periculi alit est hæmoptysis, sive sanguinis floridi è pulmonibus per tussim rejectio. Hæc curate distinguenda est à sputo cruento, quod ex interiori gurgulionis, faucium ac narium ductu emergit, & potius scretu, quam tussi, succedit, parcius etiam esse solet, pituita remixtum & obscuro sanguineo colore tinctum. Deinceps vera hæmoptysis discernenda quoque est ab illo sputo cruento, quod parciore in quantitate ex fauciatæ arteriæ asperæ vasis cum tussi ejicitur, & cum pruritu ac sapore falso jungi suevit. Multum quoque hæmoptysis distat à vomitu cruento, siquidem in illa sanguis tenuis, nitide floridus, arteriosus, non sine magno nisu ac labore eliditur. in sanguinea vero vomitione cum anxio conatu crassus, coagulatus & nigricans cruor, ex venosis magis vasis elapsus, citra tussim exturbatur. Neque ipse vomitus cruentus sine discrimine considerandus & excipiendus est, sed ratione causarum multum differens, aliam & diversam medendi rationem quoque desiderat. Alius enim est à causa materiali caustica erodente, in ipsius ventriculi cavo contenta, quemadmodum fit à venenis causticis & fortioribus emeticis assumtis; alius vero oritur à motu sanguinis impetuosiori, ex aliis & remotis partibus ad ventriculi vasa, præsertim brevia, quæ facile perforantur, delati, quale quid fieri suevit in mensibus & hæmorrhoidibus subito & cum violentia quadam repressis; atque ejusmodi vomitus plerumque suas statas ac certas periodos servare solent.

§. XXIII.

Porro in mictione cruenta hæc potissimum distinctio observatu digna est, quod alia fiat ex calculo asperiori, ureterum vel urethræ vascula dilacerante, quæ tamen rarior est, neque facile in nephriticis comparet, & exigua etiam tunc stillat sanguinis quantitas: contra vero si citra quandam violentiam à sanguinis impetu, ad renum substantiam ex aliis partibus rapto exoritur, sincerus largiter sæpius sanguis, sine singulari incommodo vel sensu, cum urina emittitur, & interjecto pauco tempore, ad fundum, colorem non rubicundum, sed ex bruno fuscum exhibens, secedit. Affectus hic familiaris accedit ætate gravibus, vegetis tamen & plethoricis, ac sæpius sine periculo contingit. Stillicidium sanguinis ex præputio rarior quidem affectus est, à nobis tamen binis vicibus observatus in plethoricis & senio jam proximis, his à mictu cruento notis dignoscendum, quod guttatim stillat sanguis, & quidem continuo, etiamsi urina non reddatur, quum in mictu cruento nunquam, nisi simul cum urina, sanguis proluciat.

§. XXIV.

Tum fluxus sanguinis periodicus, qui in gravidis quandoque salutariter contingit, probe etiam discerni debet ab eo, qui abortum minatur. Scilicet quando sanguis periodice & paulatim, per tres vel quatuor priores menses, manat, tunc fluxus est salutaris: si vero largius sanguinis profluvium, ex internis uteri vasis apertis succedit, vix sine gravidæ & embryonis detrimento fit. Quin si fluxus est vehemens, indicium præbet totalis separationis secundinæ & subsequenti

abortus; si moderatus, pars tantum abscessit, & fœtus salvari potest. Et hoc sanguinis stillicidium, si periodo catameniorum responderet, & orificium uteri sub fluore clausum contrectatur nullique partus dolores superveniunt: tunc probabiliter infertur, non ex ipso utero, verum è vagina tantum scaturire hunc laticem. Contra vagæ sive erraticæ magis & periculosa judicanda excretionis sanguinolentæ, quæ male ad calculum tribui lunaris exsolvuntur, iusto copiosiores prodeunt, quæ ostium uteri patulum & conatus partus imminentis junctos simul habent.

§. XXV.

Præterea etiam hæmorrhoidum fluxus à dysenteria rite est distinguendus, quum ambo convenientiam in eo exhibeant, quod utroque in affectu sanguis excrementis intermixtus secedat. At si paulo curatius reliquorum symptomatum inter se comparisonem instituiamus, tum facillima ratione differentia harum fluxionum inter se invicem patefcat. Etenim in hæmorrhoidum fluxu sanguis cum excrementis prodit, sine ullis torminibus & dolorificis spasmodis, ejusmodi etiam fluxio critice & salutariter succedit: contra vero in dysenteria cum atrocissimis spasmodis & torminosi doloribus stercora sanguinolenta dejiciuntur & universum corpus inde gravissime affligitur, præsertim si intestina tenuia simul patiuntur, ubi primis morbi diebus adsunt vomitus, singultus, anxietates præcordiorum, appetitus prostratus & virium insignis languor. Denique dysenteria alba à rubræ & carnosæ indole haud parum abluat; in alba enim parum cruoris manat, ingens autem mucii copia excernitur, in rubra autem sanguis copiosior, cum frustis parvis carneis, quandoque rejicitur.

§. XXVI.

Nunc sequuntur dolores, è quibus ii, qui caput divexari solent, frequentiores sunt, & pari ratione admodum variare præsertim quoad causas & generandi modum, observantur. Etenim causa cephalalgicæ si est sanguinis impetuosior ad caput congestio, tum calore, rubore & tumore faciei, cum magna arteriarum, quæ sunt in collo & temporibus, pulsatione se exserit, quin immo dolor & ardor interdum ad oculi bulbos se extendit, atque extremorum refrigeratio plerumque jungitur. Si pertinacior est cephalalgia & Venerei contagii soboles, noctu magis, quam interdiu ingravescit, & plerumque certæ parti firmiter dolor insidet, ut cutis ibi à subdito humore viscido non raro in tumorem attollatur. Porro quemadmodum frequentius causa doloris in capite partibus externis cranii & maxime pericranio inhæret; ita, si in cerebri meningibus sedem suam ac domicilium habet, cum vertigine, rubore oculorum, stupore, oblivione, auditus gravitate infestat, & vel paralyfin vel apoplexiam præcedit, aut sequitur.

§. XXVII.

Alia vero doloris capitis causa est effusio feri & sanguinis è vasorum alveis & in sinuositatibus ossium frontis firmiter impacti, quod si accidit dolor est pertinax, acerbus, fixus, & supra oculos in radice frontis per dies noctesque urget. Interdum quoque caput male habet ex cruditatibus in ventriculo obhærescentibus, quæ ructibus, phlogosi ac primarum viarum spasmodis sese produnt, dum quoque ingestis flatulentis dolor augetur, vomitu vero, evacuantibus & stomachicis medicamentis minuitur. Alia adhuc, sed minus à medicis cognita est cephalalgicæ causa, si lymphæ extravasata in ventriculis cerebri secedit & stagnat, neque per infundibulum aut glandulam pituitariam seceratur; quo casu interiora totius capitis continuo dolent, & doloris allevatio non certius & commodius impetratur, quam abstinencia à potu, & feri per evacuantia aut diuretica in cachecticis & cacochymicis absumptione ac eliminatione.

§. XXVIII.

§. XXVIII.

Inter omnes dolorum species cardialgia acerbitate ceteras facile superat. Hæc autem est dolor spasmodicus orificiorum ventriculi, tam dextri, quam sinistri, qui tamen longe multumque ratione causarum differens est. Scilicet alius est à causa intra ventriculum hærente, materia nempe acri, caustica, ut à veneno assumpto; item in cholericâ passione, vel etiam dysenteria, ab acerima caustica bile proficiens. Alia vero cardialgia est à sanguine suppresso mensium vel hæmorrhoidum fluxu, ad membranas ventriculi nerveas regurgitante, easque nimium tendente. Hinc enim est, quod affectus hic foeminis; quibus post quinquagesimum annum menstrua purgatio vel parcius accidit, vel plane subsistit, præsertim si spongioris habitus sint, admodum familiaris esse observetur, & in curando eo, convenientes vel per scarificationem aut venæ incisionem sanguinis missiones, omne pæne absolvant punctum; quum vicissim in illa cardialgia, quæ à materia acri caustica suscitatur, demulcentia, oleosa, temperantia, lac asininum, vel infusum florum chamomillæ saturatum, cum cremore lactis, interposito pulvere absorbente, desideratissimam opem ferant. Deinceps cardialgia jure meritoque etiam distingui debet ab inflatione ventriculi dolorifica, quæ à flatibus mirifice stomachum distendentibus subnascitur. In hoc affectu sub costis spuris, præsertim in sinistro latere, dolor, & sub cordis scrobiculo, versus dextrum, tumor instar vesicæ flatu distentæ, frequentius visitur & percipitur, adest simul magna spirandi cum anxietate difficultas, quæ eo gravior est, quo magis diaphragma à distento stomacho, sursum urgetur & pulmonum expansioni obicem ponit. Et hoc malum admodum solenne est infantibus, qui adhuc lactantur, si ipsum lac in ventriculi cavo flagrans, coagulum & corruptum in flatum explicatur. Frequentius quoque accidit hypochondriacis, præsertim si nimium & cum magna aviditate cibos, qui ob viscosam & ægrius solubilem substantiam flatuum proventui favent, ingerunt.

§. XXIX.

Neque parum refert, ut medicus dolorem colicum probe discernat ab eo, qui ex calculi descensu per ureteres oboritur. Quippe in calculo renali dolor profundus pressorius, lumbis quasi infixus pertinaciter hæret; cum quodam horripilationis intercurrente sensu; ad sunt porro nausea, vomitus & tormina etiam ventris, & ubi calculus per urinarias vias iter conficit, tunc ad regionem ossis ischii dolor etiam excurrit, & stuporem femori ejusdem lateris non infrequenter inducit: urget præterea creber ad urinam emittendam conatus, quæ cum stranguria mingitur & sæpius sabulum deponit. In dolore vero colico res secus se habet; tunc enim dolor & tormina magis circa umbilicum colliguntur, vaga sunt, & nunc huc, nunc illuc discurrunt, & plerumque flatibus venter distenditur. Non raro tamen contingit, ut colica simul sit nephritica, inde dijudicanda: quod in ea gravissima tormina ventrem torqueant, cum alvo fortiter adstricta, vomitu, cephalalgia, extremorum frigore, mingendi stimulo, donec finito paroxysmo, urina sabulosa secedat vel calculi etiam excretio sequatur. Deinde dolor colicus à dolore, qui hypochondriacos excruciat, in eo diversus observatur, quod hic in hypochondriis magis; ille vero circa umbilici regionem potius consistat. Tum in hypochondriacis latus, præsertim sinistrum, tumere solet, quia ibi in coli flexuris flatus incarcerati hærent, & crebrius quoque hic dolor recurrit, quam communiter sic dictus colicus:

§. XXX.

Verum enim vero quum doloris intestinorum variæ

etiam sint causæ, diversis etiam signis, ut à se invicem mutuo dignoscantur, necesse est. Si igitur flatus in causa sunt, tunc magna inflatio fit abdominis & quandoque tam ingens, ut hernia circa umbilici regionem à flatibus protuberet. Et talis colica in dispositis, præsertim in corporibus infirmis & senilibus, ex refrigeratione abdominis, aut tantummodo pedum, vel à frigido, item foeculento potu, cibo flatulento, carne vervecina, præsertim frigido potu superingesto, quam facile excitatur. Et quia multi ex calculosis ad colicam flatulentam valde proclives sunt, hinc crebrius nephriticum malum cum colico complicatur.

§. XXXI.

Quod si vero, prout frequentius obvium est, dolor intestinorum flatulentis, maximis anxietatibus & dolore dorsi tensivo alvoque pertinaciter clausa infestat ac ægros torquet, & ex levi occasione aut errato irritatur, faciesque simul est cachectica; tunc plerumque causa vitii hæret in visceribus abdominis, per quæ sanguis non recte & libere trajicitur, sed in intestinorum volumine stagnat, & quum exitum ibi per vasa hæmorrhoidalia non inveniatur, intra intestinorum membranas hærens, ea nimium distendendo & lancinando, hanc colicam parit, quæ ob genus nervosum graviter simul afflictum, convulsiva audit. Eadem sanguinis stagnatio, si fit ab hæmorrhoidibus consuetis non rite fluentibus, vel præpostere cohibitis, atrocem intestinorum dolorem parit, qui exinde vocari solet hæmorrhoidalis: & si in foeminis, a mensium inordinato & pariori successu, sanguis ad intestinorum volumen refluit & tormina inducit, colica audit hysterica. Alia denique est species colicæ, quæ dicitur biliosa, & cholericæ constitutionis hominibus, nec non iracundiæ deditis sensibilibus perquam familiaris est. Hæc cum vomitu, capitis dolore vel etiam diarrhœa sæpius complicatur, & quia spasmodica constrictione liberior bilis descensus ad intestina inhibetur, ipsa ad habitum corporis regurgitans colorem flavescentem ei inducit.

§. XXXII.

Multum etiam interest, ut medicus colicæ, spasmodicæ, sive convulsivæ, genium, ab aliis colicæ speciebus probe discernat. Illa sæpe horrendum in modum non modo intestina, sed & alias universi corporis nerveas & membranaceas partes per consensum exagitat, siquidem vehementior spasmus per universum fere genus nervosum dispergitur, ut non modo ventriculus & intestina sursum & deorsum trahantur, & alvus, omnibus spretis enematibus, arctissime claudatur, sed & muscoli abdominis cum umbilico introrsum stringantur & ad interiora arctentur. Et quia violentia spasmus ad partes genitales sæpius pertingit, fit, ut testiculi retrahantur, & contractis vesiculis feminalibus, involuntaria feminis fiat excretio, ob urinarias autem vias spasmus affectas, urina difficulter reddatur. Si etiam ad pneumonicos nervos vehementia spasmus penetrat, respiratio valde anhelosa ac difficilis est, cum valido motu thoracis. Quin malo ingravescente, cerebri etiam membranæ ac nervi patiuntur, & vertigo, scotomia, levior mentis alienatio, vigilia & extremarum partium refrigeratio intensa, & pedum ac brachiorum vehementissima agitatio; observatur, non raro etiam tam atrocem dolorem, harum partium resolutio, sive paralysis, subsequitur.

§. XXXIII.

Sunt autem huic affectui gravissimo spasmodico quam maxime obnoxii metallurgi, qui mineras Saturninas igne tractant & improvide copiosum lithargyrii fumum ore hauriunt atque cum saliva deglutunt. Perquam etiam familiaris est hæc spasmodica affectio scorbuticis, cachecticis, præsertim ubi consuetus hæmorrhoidum

morrhoidum fluxus definit, vel non rite procedit, aut si intermittens febris temere vel imprudenter adstringentibus validioribus cohibita est. A vermibus, à calculo ductibus biliosis vel cystidi felleæ inhærente, idem malum non semel ab auctoribus observatum fuit. Ut hinc clarissime videamus, in hac passione, non tam peccare materiale, mobile, aut quæ corrigi vel evacuari facile possit, causam, ut in colica biliosa, flatulenta vel viscida sit, quam potius nervosis membranaeis partibus, quæ tam faciles sunt ad subeundos hos spasticos motus, vitium inesse. Etenim & cardialgiam & dolorem intestinorum convulsivum, in sensu exquisitiori præditis corporibus, sæpissime à cohibita iracundia, affectibus animi gravioribus, terrore, crebra ira, & in adolescentibus, à nimio & intempestivo Veneris, nec non largo potuum spirituosorum usu, ortum traxisse observavimus.

§. XXXIV.

Quum vero ingens plerumque in morborum cognitione admittatur confusio doloris arthritici & rheumatici; operæ pretium visum est, amborum differentiam hoc loco planius sistere. Uterque quidem dolor spasticus est, & partibus membranaceis infestus, rubore, ardore, dolore, tumore & partis ad movendum impotentia, sese prodit; in eo tamen discrimen compareret: quod arthriticus à fero tartareo acri, intra juncturas articulorum obhærescente, proficiscatur; in rheumatico vero materia illa serosa salino-caustica, membranis musculorum & ligamentis articulorum exterius potius insideat. In arthritide quoque tum glandulæ, quæ in articulationibus reconduntur, mucosæ, à cl. Anglo *Clopton Havers* inventæ, tum ligamenta glandulosa, materiam arthritidis evomunt: contra ea in rheumatismo stagnans illud acre serum, ex sanguine in canalibus nimium congesto, inter membranarum & musculorum interstitia magis secedit & colligitur. Ex quo jam facile apparet ratio, quare rheumatismi curatio, minus laboris vel difficultatis habeat, quam articularis morbi, & quare arthritidis, topicis cujuscunque fere generis adhibitis, minus feliciter componatur, quum rheumatici dolores iisdem sæpius mitigentur.

§. XXXV.

Deinceps probe etiam notari debet illa differentia, quæ inter dolorem arthriticum & inter dolorem artuum Venereum intercedit. Ille interdum magis affligit, hic vero noctu ingravescit; arthritico quoque febrilis quædam commotio associatur, cujus venereus expers est. Arthritidis porro statura sua & anniversaria tempora observare solet & acrioribus pharmacis, ut mercurialibus, mirum exacerbat; quum contra dolores luis Gallicæ continuo fere affligant, & nonnisi hisce præfidiis facile auferantur. Tandem etiam peculiarem adhuc differentiam ponendam esse existimo inter dolores artuum v. g. crurum aut pedum, cum tensione, rigiditate, imbecillitate movendi junctos ac epidemice quasi grassantes; & inter veros arthriticos. Audiuntur enim sub certa temporum & tempestatum constitutione passim ejusmodi querelæ de doloribus crurum, ut alii de tensivo, alii de obtuso & contusivo, alii de pungente, in profundo circa ossa tarfi & metatarfi hærente, conquerantur, cum immobilitate, stupore & rigiditate harum partium, & doloris à motu graviore augmento. Afficiuntur autem, prout observavi, hoc dolore maxime ii, qui sanguinem è vena pedis mittendum curarunt & aëri frigidiusculo corpora exposuerunt; quo facto ingens mox sequuta fuit affecti membri debilitas, & successit postea dolor, qui ad aliquot menses duravit & pro arthritico ac podagrigo vulgo habitus fuit; sed quum nulla febricula, nullus tumor, rubor aut ardor simul apparuerit, neque tam in juncturis, quam potius in ipso periosseo, animad-

versus fuerit, jure meritoque eum distinguendum à vero arthritico esse dijudicamus.

§. XXXVI.

Progressum nunc facimus ad eos morbos inter se bene discriminandos, qui convulsivi vel spasmodici quippiam foveant, è quibus pectoris illa ingens concussio, quæ tussis vocatur, non postremum sibi vindicat locum. Perquam plurimæ etiam, pro differentia causarum & sedis affectæ, dantur tussis species; nobis vero jam tantummodo commodum visum est, eam tussim, ubi causa hæret in ipsis pulmonibus, ab ea, ubi in aliis, præsertim nervosis partibus, & præcipue stomacho, consistit, certis notis atque indiciis à se invicem mutuo discernere, quippe quæ distinctio non parum utilitatis in medendo affert. Si igitur causa subsistit in pulmonibus, respirationis semper adest quædam difficultas, quæ motu, vel exagitatione corporis aut sanguinis, augetur, adest quoque plerumque vox clangosa, dolor pressorius in pectore & rauco quædam. Si sicca est & per longum tempus durat, plerumque tubercula dura, vel vomica pure repletæ in causa sunt, & tussis phthisica est: si vero est humida cum ejectione materiæ copiosæ viscidæ stipata, judicium est magnæ cavitatis & secessionis humorum è tubulorum alveis in pulmonibus; atque in ejusmodi tussi pulmonali difficilis est in latere affecto decubitus, sique pus purum vel sanguine tinctum simul eliditur, de pulmonibus affectis non amplius dubitandum erit.

§. XXXVII.

Tussis vero stomachalis alia identidem humida, alia etiam sicca est. Si humida, lentum & copiosum sputum post sumtum cibum maxime ejicitur & sæpius quoque simul vomitus movetur, à pectoralibus, dulcibus increbescit tussis & circa matutinum tempus maxime suum resumit impetum. Adsunt quoque simul multæ spasmodicæ & flatulentæ in abdomine afflictiones, neque excretiones per alvum suum servant ordinem, neque in foeminis menses recte procedunt. In tussi vero convulsiva, ferina & sicca, causa maxime hæret in stomachi tunicis nerveis, ac vehemens tunc totius thoracis concussio adest, cum sono profundo, ac post partum, post potum etiam frigidum, aut acidum assumptum, valde augetur. In hac tussi pertinaciori plerumque hypochondria laborant, vel diathesis scorbutica, falsa sanguini intermixta; quare non infrequenter ejusmodi tussi purpura jungi solet. Si vero latitat materia in duodeno, quale quid sæpius contingit in febribus intermittentibus, præsertim tertianis, item in hypochondriacis; tunc ructus acidi & flatus præsto sunt, & in paroxysmo, post horripilationem, infestat, ac facile vomitum, qui valde biliosus & acidus est, proritat. Infantili ætati tussis convulsivæ admodum sunt familiares, partim quod eorum systema nervorum ad spasticos convulsivos motus admodum proclive est, partim etiam quia cruditates acidæ biliosæ in ventriculo & duodeno in his solenniter stabulantur. Vomitus quoque infantum tussi frequenter accedit; interdum vero plane sicca est, atque ita invalescit, ut suffocationis metum adesse judicaveris.

§. XXXVIII.

Asthma, frequentissimum malum, uti diversas suas agnoscit causas ac causarum sedes; ita etiam non parum inter se differentia alit. Frequentius hæret vitium in stomacho, & tunc flatulentum est, & fit ab inflato ventriculo, diaphragmatis liberum descensum impediens. Frequens symptomata est hypochondriacis, imbecillitate ventriculi laborantibus, ab ingestis præsertim flatulentis, malum recrudescere, & vomitu humoribus rejectis, mitigari solet. Asthma convulsivum, ab asthma humorali, immo sanguineo, multum distat; nam periodicum est & certis tantum temporum intervallis infestat,

infestat, maxime vero noctu invadit; spiritus sæpe adeo est angustus, ut collo extenso erectoque corpore eundem trahat æger necesse sit. Adest sæpius sudor frigidus, sique ad viginti & ultra horas durat, animi defectio accedit. Percipitur maxime compressio constrictoria circa thoracem, quæ sæpius usque ad collum & jugula propagatur. In hoc affectu subest plerumque vitium in visceribus abdominis, præsertim hepate, & facile cachecticus subsequitur status. Si vero polyposum in cordis vasis obhærescens concrementum asthma parit, vel illud exacerbat, tunc cordis palpitatio jungitur. Si denique, quod frequentioris observationis est, asthmatis convulsivi & suffocatorii causa est ingens aquarum in thoracis cavitate extravasatio; dolor simul extra paroxysmum fixus in latere thoracis, qua aqua comprehenditur, percipitur, & pes ejusdem lateris, vel ambo, intumescunt, & paroxysmus est diuturnus ac vehementissimus, cum maxima anxietate, licet sine tussi, & plerumque etiam necare solet.

§. XXXIX.

Non minus & differentia quædam inter asthma convulsivum, & catarrhum suffocativum, adstrui debet; siquidem hic paralysis quædam species est, nervorum paria, quæ respirationi interviunt, tangens, quæ ex improvise adortur, cum magna anxietate, stertore & sono quasi spumido, inter respirandum vultus rubore intumescit & suffocatio imminet: asthma vero convulsivum servat magis suas periodos & chronicum malum est, quum suffocativus catarrhus ad passiones acutas non sine ratione referendus sit. Deinde quoque in hoc perpetuus quasi materiæ affluxus percipitur, qui in asthma deficit, ingens etiam virium jactura, plus catarrhum suffocativum, quam convulsivum asthma comitatur. Est autem catarrhus suffocativus maxime familiaris senibus, imbecillioribus, immo infantibus, præsertim retro pulsus exanthematibus, variolis, morbillis, tinea capitis, achoribus faciei, scabie & hujus generis aliis.

§. XL.

Accedimus jam ad gravem illum apoplexiæ morbum, qui quomodo ab aliis affectibus differat, dispiciendum est. Cum syncope multum alit convenientiæ quum in utroque omnium sensuum, tam internorum, quam externorum, fiat obliteratio; in eo tamen conspicua est differentia: quod in hac pulsus & respiratio non amplius percipiatur, facies palleat & omnia frigeant, in illa vero, præter durantem spiritum, florida sæpe & rubra facies sit, atque arteriarum pulsatio adhuc observetur. Majoris difficultatis est, veram apoplexiam à spuria distinguere. Hæc frequentissimum hystericarum symptoma est, & à violentia spasmodum in abdomine proficiscitur, quibus sanguis ex mensium stagnatione redundans, magno impetu ad cerebrum delatus, in ejus vasis subsistens, omnem sensum ac motum intercipit, salvo tamen pulsu & spiritu. Vulgo habetur pro syncope, vel etiam epilepsia hysterica, sed minus recte, raro quoque feralis est, sed ubi remittit strictura, vel sanguis largius ex pertusa vena subtrahitur, facile discutitur. At vero magis terrere debet apoplexia vera, quæ ob sanguinem, vel serum, vasorum alveis elapsum, subito sæpius jugulat. Deinceps apoplexia perfecta à debiliore ita etiam est distinguenda, quod illa ex vasorum cerebri rptione, hæc vero ex horum tantummodo nimia disten-

sione & sanguinis ibi facta stagnatione subnascat, & sæpius paralyfin sensuumque debilitatem inducat, vitam autem non adimat.

§. XLI.

Quod attinet ad paralyfin, identidem hæc recte in veram & spuriam dispescitur. Illa in ipso cerebro, vel principio spinalis medullæ, fixam habet sedem, sensumque fere omnem ac motum sufflammat: spuria vero mitior est, neque tam altas radices agit in cerebro, sed quibusdam nervorum paribus, ad certam partem decurrentibus, tantummodo inhæret, & sensum ac motum quodammodo lædit. Hæc quoque à colicis, cardialgicis & spasmodicis gravioribus, si præsertim à sanguinis stagnatione in plethoricis fiunt, originem suam sæpissime trahit, quando nimirum sanguis ad nervos, vel etiam musculos, qui manus vel pedes movent, transfertur, & stagnatione viscidum serum deponit, quod membranis nervis incumbens, motus quidem impotentiam, sensu tamen & dolore residuo, efficit.

§. XLII.

Distinguere etiam convenit epilepsiam à convulsionibus. In illa affectæ sunt cerebri membranæ; in hisce vero membranæ & nervi spinalis medullæ magis patiuntur, neque pollices tam fortiter contracti sunt, licet maximum robur sub artuum agitatione deprehendatur. Motus convulsivi etiam invadunt maxime pueros, circa decimum quartum ætatis annum, ex suppressa iracundia, terrore gravi, intempestivo Veneris exercitio, corporis refrigeratione, vel etiam vermium morfu, ac tam mira sæpe artuum totiusque corporis est distorsio atque quassatio, ut ob insolentiam fascino vulgo tribuantur. Mens quoque in quibusdam variis phantasmatibus turbatur, sique non opportuno ac prompto auxilio oppugnatur malum, ita vires sumit, ut vigesies & sæpius quoque quotidie ingruat. Epilepsia autem accessionum periodos magis circa lunæ phases statas, neque tam crebras, servat, ac tempore pubertatis plerumque cedit. Denique catalepsis differt ab apoplexia, quod illa derepente invadat, & membra rigida in ea positura ac situ detineat, in qua accedens eaprehendit. In utroque vero affectu sensuum omnium ad tempus abolitio, cum stupore ac sopore quodam, præsens est.

CAPUT IV.

De genealogia morborum ex turbato solidorum & fluidorum mechanismo, ad explicationem historiarum morborum & veram ac solidam therapiam.

§. I.

Cognito sic atque perspecto, ex allatis superioris capite characteristicis notis, quis & qualis sit? morbo; necessarium porro est, ut medicus formalem ejus essentiam, genealogiam, causarum primordia & ubi sedem obtineat, curate scrutetur, quippe quod alterum veræ pathologiæ ac therapie fundamentum est. Nam profecto exquisitior cognitio modi, quo morbi succrescunt, planam ac facilem ad eos tam arcendos, quam persanandos, viam medenti pandit. Hinc licet

*Alterum
therapie
funda-
mentum est
cognitio
originis &
causarum
morb.*

Quæ mi-
nus recte
huc usque
tradita.

licet in secundo Medicinæ Rationalis Systemati-
cæ tomo de morborum ortu & causis copiose fa-
tis egerim: haud supervacaneum tamen fore du-
xi, si succinctam pathologiæ synopsin, proximas
morborum quorumvis causam complectentem,
hoc loco insererem. Enimvero si fateri licet quod
res est, solida pathologiæ fundamenta usque eo
minus recte, hoc est, cum connexionione ac demon-
stratione, exposita sunt, ut potius passim quam-
plures hallucinationes, ac ipsis in exercitio artis
obviis factis minus respondentes opiniones depre-
hendantur.

§. II.

Ex variis
tamen me-
dicinam
tractandi
methodis
optima
Hippocra-
tis.

Scilicet varii quidem sunt modi, hypotheses
atque principia, quibus tum ab antiquioribus,
tum à recentioribus, medica disciplina fuit tradi-
ta: nulla tamen, ut verum fatear, faciliior, sim-
plicior & naturæ magis consentanea salutaris ar-
tis doctrinas pertractandi ratio mihi utiquam vi-
sa est, quam quæ à primo & antiquissimo medi-
cinæ parente, *Hippocrate*, in ipsius monumentis,
immortali memoria dignis, proposita est. Gravif-
simus enim hic auctor, non ex solis materiæ af-
fectionibus, respectibus & qualitatibus phyfi-
cis, neque etiam ex speciosis nominibus, sed
potissimum ex proportionem, mensura & tem-
peramento, tam motuum, quam humorum
corporis nostri, nec non eorum, quæ ingeri &
egeri debent, adeoque pure mechanice, solidas
rationes, in difficilibus rebus medicis explicandis,
scite ac docte deducere annisus est, usus maxime
ad hoc, ministerio scientiæ physicæ, anatomicæ
& observationum clinicarum.

§. III.

Quod ejus
potiora
dogmata
testamur.

Sane primus fuit magnus hic naturæ consultus,
qui artem nostram, ex vero non minus, quam
apposite, per subtractionem eorum, quæ super-
flua sunt, & additionem, quæ deficiunt, per con-
venientia nimirum remedia, definiivit. Primus
porro fuit, qui corpus humanum ex partibus so-
lidis, fluidis & impetum facientibus, sive spi-
rituosis, constare, illud permeabile esse, ejusque
partes invicem consentire & conspirare, rectissi-
me docuit. Hic quoque primus omnium de san-
guinis progressu & circuitu, ejus motu inæquali
& à partibus exterioribus ad interiores resiliente,
& rursus ab his ad illas controverso, in scriptis suis,
præsertim libro de flatibus, luculentam mentio-
nem iniecit. Idem præterea peritissime in me-
diocritate ac temperie sanitatis fundamentum,
in nimio vero, & tam ratione quantitatis, quam
qualitatis, excessivo, quod naturæ humanæ ini-
micissimum judicat, læsionum & morborum cau-
sas constituit. Denique ex omnibus primum as-
seruit, naturam corporis humani esse optimam
morborum, ut cum ipso loqui liceat, præservatri-
cem & curatricem, immo omnis ratiocinationis
in medicina principium.

§. IV.

sed perpe-
ram Hip-
pocratis
doctrinam
deserue-
runt poste-
ri.

Jam itaque vehementer optandum foret, ut
qui post *Hippocratem* vixerunt artis professores,
& inter hos maxime *Galenus* cum suis sectatori-
bus, his tam egregie jactis à summo viro fun-
damentis, pressius institissent, & divinam artem
magno apparatu observationum practicarum,
nec non inventis anatomicis, quæ artificiosissi-
mam corporis structuram pandunt, atque expe-
rimentis physico-mechanico-chymicis, quæ re-
rum corporearum vires, quibus ad vitam conti-

nua homo eget, & motuum quibus vita conser-
vatur leges, recludunt, melius excolere, ulterius
perficere & confirmare, per tot sæculorum decur-
sum operam impendissent. At vero, si verum fa-
teri licet, otiosis potius speculationibus & sterili-
bus ratiociniis, ex Philosophia potissimum Aris-
totelica, secundum quatuor elementa desumptis
quatuor qualitatibus, humoribus, temperiebus
& intemperiebus, nec non variis animæ & spi-
rituum potentiis & facultatibus, vix aliud ege-
runt, quam ut majorem progressum & lætiora
artis incrementa mirum quantum retardarint,
tantum abest, ut quicquam solidi ad amplifican-
dam illam addiderint. Neque melioris notæ sunt
quorundam nostri ævi medicorum principia at-
que hypotheses, quæ partim ex corpusculari *Car-
tesii* Philosophia, partim ex Chymicorum poten-
tiis salinis & sulphureis, partim etiam ex Meta-
physicorum scholis, ortum trahentes, ac specio-
so multorum, ut obscurorum, sic sterilium nomi-
num, fucis innixæ, ad solidam theoriam & ra-
tionalem medicinam stabiliendam, parum adju-
menti attulerunt.

§. V.

Ego vero quamdiu per divinam gratiam promo-
vendis artis medicæ incrementis, in publico etiam
docendi munere, mentem & operam adjeci, id ma-
xime mihi agendum duxi, ut vetustissima illa ab
Hippocrate inventa & felici auspicio inchoata me-
chanice circa corporis humani naturam & acci-
dentia ratiocinandi methodus, ulterius luculen-
tioribus observationibus, nec non anatomicis,
item physico-mechanicis & chymicis inventis
atque experimentis, illustraretur, confirmaretur,
& ad uberiores perfectionem traduceretur. Proinde jam etiam hæc instituti erit ratio, ut
breviter, solide tamen, ex simplicissimis & me-
ris naturæ principiis, motu nempe atque materia
illiusque affectionibus & legibus in microcosmo,
vitæ, sanitatis & mortis naturam, morborum &
varii generis symptomatum genealogiam, cui
deinde rationalis therapia, sive vera remedia in-
veniendi & applicandi methodus, firmiter super-
struenda, in usum maxime discipulorum & futuræ
praxeos, eruam atque ingenue exponam.

Quæ igitur
tur revocanda
ma-
gisque ex-
colenda.

Instituti
ratio.

§. VI.

Quemadmodum autem ad omnem in discipli-
nis demonstrationem ac veritatem, prima quæ-
dam simplicia & intellectu facilia, principia seu
fundamenta requiruntur, è quibus, tanquam no-
tis, multa incognita & difficilia phænomena ap-
ta serie clare deduci, explicari atque resolvi de-
bent: ita pari modo, in medicina rationali red-
denda, sive scientificè tractanda, idem merito fa-
ciendum esse judico. Inquirendum videlicet tale
principium ac fundamentum est, in quo non mo-
do vitæ, mortis, sanitatis ac morborum ratio con-
tinetur, sed ex quo etiam, ceu fonte, accom-
moda omnium, quæ in naturali & præternatu-
rali statu occurrunt ac in morborum historiis con-
tinentur, explicatio promi, nec non ea, quæ in
hoc vel illo casu salubria & insalubria sint, peti
possunt. Quodnam vero hoc sit principium, de
eo discors admodum est medicorum sententia.
Qui corpus nostrum mere passivum atque ad mo-
tus edendos ineptum judicant, rebus quoque cor-
poreis vim & efficaciam in istud agendi dene-
gant, immateriale quoddam principium, quod
apte plerumque & sapienter motus exsequatur
& dirigat, animam nempe, sive rationalis sit,
sive sensitiva, universæ medicæ doctrinæ funda-
mentum

Inquiren-
dum pri-
mo verum
medicina
princi-
pium.

quod non
est anima.

mentum esse contendunt. Alii spiritus in cerebro & sanguine contentos, æthereæ, sulphuræ, mobilis & elasticæ naturæ, motuum vitalium causam, eorumque considerationem in pathologicis & therapeuticis utilissimam ac potissimam esse, asserunt.

§. VII.

Nos cum *Hippocrate* naturam corporis humani principium omnis sermonis & ratiocinationis in Medicina esse censemus. Per hanc vero nihil aliud intelligimus, quam perennem sanguinis & fluidorum per corpus mere tubulosum & hydraulicum, beneficio systoles & diastoles, quæ in omnibus canalibus viget, progressivum & in circulum abeuntem motum: ut adeo vita in corpore humano nihil aliud sit, quam motus fluidorum, à solidis, præsertim corde & arteriis, & solidorum, à fluidis proficiens, quo salvo, machina, ratione mixtionis suæ maxime in putridam corruptionem prona, ab hac immunis persistit, & quo prorsus extincto, putrefactio mortifera incipit.

§. VIII.

Quamvis autem de penitus inquirendis remotioribus motuum vitalium causis non valde sumus solliciti, eo quod subtilior talis theoria, non tam ad scopum medicum, quam potius ad physicam, seu metaphysicam scientiam sublimiorem spectet; non dubitamus tamen asserere: motum illum systoles & diastoles in universo vasorum systemate, qui fluida movet eorumque cursum moderatur & dirigit, neutiquam persistere posse, nisi ad tunicas fibroso-nerveas, è quibus vasa coagmentantur, sanguini per arteriolas, & liquido, cujuscunque sit indolis, per nervulos, liber pateat affluxus, adeo, ut hoc intercepto, repente omnis motus concidat. Porro firmiter asserimus: sanitatem, quæ in libero & ordinato functionum, tam animi, quam corporis, exercitio consistit, à motu systoles & diastoles in solidis, & progressivo fluidorum in vasis, imperturbato & æquabili, à partibus internis & vasis majoribus, ad extimos & minimos canaliculos vergente, unice dependere, quo integro ac inoffenso, humorum utilium, qui ad usum retineri debent secretiones, & inutilium ac superfluum excretiones saluberrimæ legitime perficiuntur.

§. IX.

Hoc itaque posito sanitatis fundamento, læsionem functionum corporis nostri, quæ formalem morborum statum rationem exhibet, à vitiato solidorum & fluidorum motu unice deducimus; qui, sicuti variis modis lædi potest, ita etiam morborum, seu potius motuum morbosorum causas formales & proximas varias adstruimus. Attenta tamen in omni morbo, seu statu præternaturali, observatione compertum habemus; motum illum vitalem à partibus interioribus ad exteriores, constrictione minimorum vasculorum & fibrillarum spastica, valde intercipi, ac inverso plane cursu, à circumferentia ad centrum urgeri, & deinde rursus cum impetu à penetralibus ad ambitum, accelerata systole & diastole, agi, qualis motus, si universum corpus afficit, febris dici solet. Deinceps id quoque observatum constat, motum intensiorem systoles, five spasmum, certas nonnunquam tantummodo partes occupare & fluidorum motum ibi turbare, qui motus vocari suevit spasmodicus. Porro in quibusdam morbis animadvertimus: motum reci-

Frid. Hoffmanni Oper. Tom. I.

procum constrictionis & expansionis in partibus musculosis, tam internis, quam externis, præter voluntatem intendi, qui convulsivus, aut si enormis, epilepticus, dicitur. Tandem etiam in plurimis morbis obvium, motum activum, systoles in solidis valde esse remissum ac resolutum, & fluidorum progressum inde retardari, quæ affectio, si levior, atonia, si gravior, paralyxis vocatur, & foecunda est morborum mater.

§. X.

Constitutis sic quatuor motuum morbosorum generibus, primo loco istos recensebimus, qui ex aucta spastica vasorum & fibrarum strictura in externo corporis habitu, sanguinem & fluida ad interiora urgente, subnascuntur, quos inter maxime eminet febris. Nulla enim ejus species est, five sit intermittens, five continua, eaque vel benigna, vel maligna, acuta five lenta, inflammatoria, sanguinea, aut lymphatica vel biliola, item, cum vel sine exanthematibus, five denique symptomatice, in qua non sub accessione, progressu, immo tempore exacerbationis, partium extimarum refrigeratio, summæ cutis ejusque pororum constrictione, vasorum detumescencia, horripilatio, partium rigor, sudoris suppressio alvique constipatio, observentur. Nullam porro febrem videas, qua sanguis non ab exterioribus ad interiora, cor & appensos eidem majores canales, superiores quoque partes pellatur & congeratur, ut hinc dolor dorsi & capitis, præcordiorum anxietas, inquietudo, spirandi difficultas, pectoris oppressio, pulsum durities & frequentia, oboriantur, vel plane, coacto ad cerebri & spinalis medullæ membranas sanguinis impetu, deliria, convulsiones ac epilepsiæ, nonnunquam in principio, quandoque etiam, quod magis periculosum, in vigore, accedant. Nulla denique febris, vel motus febrilis species discedit ac solvitur, nisi spastica illa in superficie cutis & minimis vasculis strictura intermittat, vel plane remittat, ut liberior & æquabilis sanguinis ad exteriora & emunctoria affluxus restituitur, quem mollior & validior arteriarum pulsatio, sudor vel mador & perspiratio auctior, nec non alvus solutior & urina crassior, tanquam bonæ criseos signa, sequuntur, vel comitantur. Et duplici hoc motu, omnis febris five motus febrilis essentia & natura continetur.

§. XI.

Post febres multi alii adhuc sunt morbi & motus morborum, in quibus pariter sanguinis à partibus exterioribus & inferioribus, ad interiores ac superiores cursus præter naturam convertitur. Videlicet obvium hoc est in omni generis hæmorrhagiis, tam salutaribus, five criticis, quam pernicialibus five symptomatice. Menstrualis illa sanguinis in feminis, & hæmorrhoidalis in masculis effusio, antequam succedit, inferiora refrigerant, cutis stringitur, in dorso circa pubem & os sacrum dolor percipitur, artus lassantur, genæ gracilescent & pallent, demum pulsus intenditur & tunc sanguis effluit. In narium stillicidio, extremæ & inferiores partes levius minimum quoque frigent, facies vero rubet ac tumet, vasa temporum intensius saliunt, gravativus dolor caput obsidet, & sub aucto arteriarum pulsu, sanguis stillat. Hæmoptysin porro nunquam non antecedit extremorum, præsertim pedum, frigus, lassitudo, flatu in abdomine, alvi adstrictio, pectoris oppressio & difficilis spiratio. Ipse cruentus vomitus, & nigri cruoris per anum secessus, nec

C c

non

4) per aliam.

Ad primam classem, referenda sunt omnis generis febres.

Hæmorrhagie criticae & symptomatice.

neque spiritus.

Sed natura corporis humani Hippocrati, quæ æquabili solidorum & fluidorum motu continentur.

Ex integro hoc motu proxime vite ac sanitatis causæ pendenda.

Ex læsione morborum origo arcescenda.

Perveniunt autem quadruplici modo: 1) per spasmum

2) per spasmodicas stricturas

3) per convulsivos epilepticos motus

non miſtus ſanguinolentus, nunquam accidunt, niſi præceſſerint ſpaſmi in abdomine, dolor in dorſo, ani conſtipatio, cum cutis & extimarum partium refrigeratione ac detumeſcentia, arteriis ſemper citatius & ad tactum durius micantibus.

§. XII.

*Inflam-
mationes om-
nes.*

Eadem ratione inflammationum geneſis contingit. Phrenitis idiopathica æque ac ſymptomatica in febris continuis, vix aliter inducitur, quam cum horrore & rigore in corporis cortice, alvo compreſſa & urina tenui aquoſa, raptò interea ſanguine ad caput, in quo arteriæ, tam internæ, quam externæ, fortiter pullant, facies rubet, oculi ſcintillant & nares ſiccæ & calidæ ſunt. Et quia ſanguis copioſius appellitur, quam canalium ſanguiferorum diameter capere poteſt, neque per nares exſolvitur, ad lateralia arteriolarum, non cruoris, ſed ſeri vel lymphæ trajeſtui dicata vaſa, cogitur, in quibus ſtaſin concipiens, dolorem, ardorem, ac delirium cum phantaſiæ turbatione ingignit. Reliquæ inflammationes, in oculis ophthalmia, in faucium & aſperæ arteriæ principio, angina, in pulmonibus, pleuritis & peripneumonia, in ligamentiſ hepatis membranofis, hepatitis, in renum ſubſtantia, nephritis, nec non ea quæ in ventriculo, inteſtinis, utero & veſica conſiſtunt, non alio etiam modo ſubnafcuntur, quam quod ſanguis per ſpaſmos & dolores, in abdomine inteſtinis præſertim, è minoribus vaſorum propaginibus repellatur, & inde ad alias partes fortiori appuſſu congeratur; unde ſæpiſſime obſervavi peripneumoniam & pleuritidem, perpeſſo prius colico dolore, acceſſiſſe. Inſuper inflammationes illæ dolorificæ, quæ extremas partes cum dolore & rubore obſident, ut eryſipelas in cute vel facie, rheumatismi in membranis muſculorum, arthritis in ligamentiſ nerveis juncturarum, podagra in pedibus, gonagra in genubus, chiragra in manibus & iſchiatis in oſſibus iſchii, eoſdem obtinent natales: quandoquidem ante earundem acceſſionem, cutim plerumque horripilatio & refrigeratio tangit, vaſa detumeſcunt, vires cum appetentia languent, præcordia anguntur, quandoque etiam vomitus exoritur & feces retinentur, luculento indicio, ſpaſmis extrema ac interiora ſtringi, ipſumque ſanguinem retro agi.

§. XIII.

*Graves
quidam
capitis
morbi.*

Accedunt graves illi capitis & cerebri affectus, inſultus ſive paroxyſmi epileptici, maniaci, apoplectici, paralytici ac ſoporofi. Dum enim in his ſanguinis & humorum impetus ad caput, & maxime ejus interiora, urgetur, neque exitum ibi invenit, cruor vel in vaſis membranarum cerebri ſtagnat, & principia nervorum comprimendo, apoplexiam, levioſam tamen ſive ſpaſmodicam, hyſtericis & hypochondriacis familiarem inducit, vel ruptis plane ob nimiam diſtentionem plexus potiffimum choroidei vaſculis, effunditur, ac ventriculis illapſus, funeſtam gravioſam apoplexiam gignit, vel ſerum ob moram ſecedit, ac in ſubſtantiam cerebri & ſpinalis medullæ deſcendens, paralyſin nec non ſoporofos affectus & memoriæ imminutionem ſuſcitatur, vel denique raptò velocius & cum impetu per cerebrum ſanguine, diſtentiſ quoque ſimul nimium canalibus, furor exoritur. Hinc eſt, quod ſemper ante incurſum horum morborum, in extremis frigus ac horripilatio ſentiat, & maxime in hypochondriacis, iſdem maxime obnoxiis, dolores & ſpaſmi in ventriculo, in dorſo, hypo-

chondriis & abdomine, membrorum laſſitudo & alvus compreſſa, advertatur. Quin imò in epilepſia, compreſſis per ſpaſmum venis externis jugularibus, facies à copioſioris ſanguinis appuſſu, non modo turget, ſed & colore ex rubro nigricante perfunditur, motu arteriarum velociori ac duriori, quam in apoplecticiſ inſultibus viſitur.

§. XIV.

Porro omnis ſeri copioſioris & vitioſi in coryza, per glanduloſam faucium & narium ſubſtantiam, in tuſſi humida ex pulmonum bronchiis, ac in diarrhœa ſeri acris, ſalſi & bilioſi largior & ſalutaris ſæpe excretio, cum horripilatione cutis, extremorum refrigerio, artuum laſſitudine, corporis languore ac perſpiratione ſuppreſſa, accedit, & vernali potiffimum, nec non autumnali tempore, quo ob aërem frigidum & humidum cortex corporis conſtringitur & fluida ad interiora ſeſe recipiunt, ſolennis eſt. Neque effrenis ſalivæ profuſio argento vivo proritata, quæ mihi aliquoties lethalis viſa eſt, ſine ingenti & continua refrigeratione extremorum, cutis conſtipatione, alvi ſiccitate & urinæ difficultate, obſervatur.

§. XV.

Omnis quoque febrilis vel alius morbus recidivans, perfrigeratis prius notabiliter artubus, dorſo dolente, viribus languentibus, corpore laſſo, horroris cujuſdam ſenſu & alvi obſtipatione, incipit ac repetit. Inprimis frequentiffimæ obſervationis eſt, exanthemata in acutis quidem variolas & morbillos, purpuram rubram & albam, nec non petechias, in chronicis ſcabiem, puſtulas vel ſaſſas alias acres & erodentes cutis deſœdationes, poſt ſpaſticam tubulorum cutis criſpaturam, incauta perfrigeratione, vel topicis adſtringentibus improvide applicatis, inductam, diſparere, reſiccari ac ad interiora recedere, gravius damnum certo inveſtura. Quin ſæpius vidi, oedematoſos pedum tumores, acceſſione febris intermittentiſ, cui horror & extremorum ſtupor junctus, evanuiſſe, ſed intropuſſos, pectoris ſuffocationem intuliſſe.

§. XVI.

Neque denique in artis exercitio verſantibus ignotum eſſe poterit, quam ſæva pathemata ſubitam lochiorum, menſium & hæmorrhoidum fluxus ſuppreſſionem, conſequi ſoleant, nullam certe aliam ob cauſſam, quam quod, quæ ſanguinem plorant vaſcula, vehementiori ſtrictura, vel à frigida aura, vel animi affectu, vel etiam medicina præpoſtere adhibita, afficiantur, quibus compreſſis, motus antea eo directus retrocedit, & ſanguinem ad nobiliora viſcera & majores canales trudit, ubi copioſius collectus, varias & difficiles turbas ſuſcitatur, in inteſtinis quidem, acerba tormina, in ventriculo, cardialgiæ, in præcordiis, ſummas anxietates, in thorace, ſpirandi anguſtiam & difficilem ad ſuffocationem uſque anhelitum, in dorſo dolores, in artubus laſſitudinem, languorem & movendi impotentiam, in corde palpitationem ac tremorem, immo ſyncopen cardiacam, in capite, cephalalgias, aurium tinnitum, ſcottomiam, quandoque vertiginem, nonnunquam plane epilepſiam, melancholiam, ſive anxias & meticuloſas cogitationes, cum perverſa phantaſiæ impreſſione, ac in univerſo corpore languores viriumque jaſturam.

§. XVII.

§. XVII.

Et hæc cuncta timoris & periculi plena atrocitas mala, in omnibus quos recensui morbis, febribus, inflammationibus, doloribus, profluviiis aliisque, prius non desinunt & laborantes deserunt, quam sanguinis ac fluidorum à centro ad peripheriam, ab interioribus ad exteriora & vasorum minima, beneficio naturæ vel congruis remediis, repetat aut restituatur. Quare etiam perfectæ solutionis morbi, quam Græci crisin vocant, certa indicia præbent pulsus mollior & sedatior, calor per omnem corporis ambitum æqualiter diffusus, tepidus ex auctiori perspirationis successu mador ac sudor, somnus placidior, alvus solutior & urina crassior, facile sedimentum ponens, ex quo potissimum Veteres, coccam esse febrilem & morbificam materiam, augurabantur.

§. XVIII.

Quæ quum ita sint, nemo certe, qui allata curatius expendit, facile in eorum sententiam descendet, qui haud verentur affirmare: & febres, & omnes hos plane morbosos motus, in se & sua natura esse salutes, ad vitam conservandam & corpus ab interitu vindicandum, à sapienti natura provido consilio institutos. Qui enim motus ejusmodi spastici, qui circulum sanguinis vitalem, liberum, æquabilem, ad exteriora corporis per minima vascula iter legentem, sistunt, cohibent ac pervertunt, naturæ amici & salubres dici possent? quum non modo excretionibus saluberrimas, sine quibus vita consistere prorsus nequit, intercipient ac sordes ad interiora reprimant, sed & attentæ observatio doceat, sub iisdem lethalem vitæ catastrophem induci. Certe in omnibus chronicis & acutis morbis ipsique febribus, quando ægri occumbunt, ex iisdem motibus mortis signa desumuntur, quæ inter tanquam ipso eventu toties comprobata referuntur maxime extremorum frigus, horror & rigor partium, sudor frigidus, & exanthematum, si adiunt, retrocessio, facies contracta, nares acuminatæ, tempora collapsa, respiratio anxiosa & difficilis, summa virium prostratio, cum pulsu inæquali, debili, contracto vel etiam intermittente, insequente demum mentis ac sensuum emotione, aut convulsione. Ipse quoque notavi, eos, qui ex intermittente moriuntur, in ejusdem accessione & frigore, ubi omnia à spasmo contracta rigent, perire, & omnes, qui ex præcedente morbo, ad infestos hos motus, proni sunt, ut hypochondriaci, hysterici, hæmorrhoidum vel mensium suppressione laborantes, his in morbis acutis per se non adeo periculosi, repetentibus, jugulari.

§. XIX.

Quapropter nulla certe alia ratione, nulloque alio respectu, hi motus, per se morbos, vocari possunt salutes, quam quod per accidens, licet sæpius, per eosdem, alter iste, revera per se salutaris dicendus, sanguinis nempe à partibus internis ad externas tendens progressus, mechanica quadam ratione excitetur, augeatur, ac per ejusdem appulsu, interventu mechanicorum, quibus à summo opifice machina animalis sapientissime instructa est, motuum, ipsius morbi causa, vel stagnantem materiam resolvendo, vel eandem expellendo, auferatur. Et hoc demum sensu, febris ad Celsi loquendi modum medicina & præsidium corporis appellari, vel ut Hippocrati aliisque Veteribus solenne, denominatio pugnæ naturæ cum morbo, nec non naturæ optimæ mor-

Frid. Hoffmanni Oper. Tom. I.

borum medicatricis, admitti poterit, intelligendo per morbum perniciosos illos spasmodicos & *κατ' ἐξοχήν* morbosos motus, vincendos per naturam, hoc est, salutarem illum ab interioribus ad exteriora corporisque ambitum vergentem sanguinis & humorum motum.

§. XX.

Atque hi sunt natales morborum, quos spasmi, sanguinis & fluidorum motum retro agendo, ingignunt: jam etiam lustrabimus perniciosos illos effectus, quos iidem spasmi in partibus, ubi incipiunt & fixam habent sedem, suscitant. Incipimus à doloribus, quorum causam plerumque præbent spasmi, dum scilicet nervosae tunicae, quæ acutiore sensu præditæ, gravius & pertinacius infestant, & tantum pro diversitate locorum diversam sortiuntur denominationem. Videlicet vehemens ejusmodi spastica strictura, externas capitis membranas, ut pericranium, attentans, cephalalgiam, modo in fincipite, modo in occipite, parit; si dimidiam cranii partem, in sinistro vel dextro hemisphærio, detinet, dolor vocatur hemicrania; quando vero circumscriptæ tantum certæ regioni insidet, clavus audit. Idem hic spasmus ad ligamenta nervosa descendens, odontalgia; & valde nervosam meatus auditorii membranam exercens, otalgia vocatur. Ventriculi tunicae nerveæ, nec non orificia, crispata & spastice contracta, cardialgiam, cum ingenti circa præcordia anxietate & angustia faciunt. Intestina quum spasmi exagitant, & quidem tenuia, dolor ilei, circa umbilicum subsistens, urget; si in confiniis hypochondriorum crassa, præsertim colon, tormina vocantur colica; & quando infimam voluminis regionem, à stagnatione maxime sanguinis hæmorrhoidalis, dolor hæmorrhoidum cæcarum nominatur.

§. XXI.

In ureteribus reliquisque urinæ evehendæ dicatis & ex tunicis penitus nervosis & musculosis conflatis canalibus, si quando infixus major calculus, hinc distractionem, hinc crispaturam, causatur, immanis dolor, cum dysuria & aliis gravibus symptomatibus stipatus, gignitur. Stricto autem & corrugato vesicæ sphinctere, ardens urinæ stillicidium, quod stranguriam dicunt, adest. Dolorificus porro hic spasmus, ligamenta, quæ artus vinciunt & continent, obsidens, articulorum morbos excludit, & denominatione à proxima parte desumpta, podagræ, gonagræ, chiragræ, vel ischiatis, vel etiam extremam tantum musculorum membranam sollicitans, rheumatismi, vel pleuram, pleuritidis spuriae nomine, in medicorum scholis insignitur. Ipsum periosmium ubi lancinatur & spastice quoad certam partem affligitur, acutissimus crudelisque dolor suscitatur, in lue Venerea & paronychia obvius, cui atrocitas non cedit is, qui facta in luxatione ossium dislocatione, ægros angit.

§. XXII.

His non minora, sed majora utique sunt damna, quæ perniciosi spasmi, locis, quæ saluberrimis excretionibus vacant, firmiter inhærescentes, intentant. Nimirum tubulosa & cribrosa cutis substantia, è cujus spiraculis copiosissimi tetri vapores exhalant, spasticam stricturam, vel ab acri frigore improvide admissa, vel per consensum ob affectas interiores partes, ut fit in febribus & doloribus, patiente, excrementitiæ illæ salinæ & sulphureæ activæ admodum indolis

Ce 2

sordes,

*Alii enim
classis mor-
bis ex spasti-
mo parti-
culari, ac-
censendi
dolores in
capite &c.*

*Aliis quæ
corporibus
partibus.*

*De noxiis
spasmi ef-
fectu in
excretoriis;
& 1) cutis
emuncto-
rio.*

*Nihil ex
his morbis
solviuntur,
quam spasti-
mo subla-
to.*

*Morbo-
si
igitur mo-
tus non
per se &
sua natura
sunt salu-
tares.*

*Sed san-
tum per
accidens
sunt salu-
tiferi.*

fordes, in corporis penetralia resorptæ, vel febres catarrhales ipsamque coryzam ac tusses cient, vel ad intestinorum tunicas latæ, & bile acriori reddita, diarrhœas cum torminibus concitant, vel ad renale emunctorium & urinarios ductus appulsæ, copiosiores quidem urinam, sed cum difficili mictu, efficiunt; quid? quod eadem superficiales tubulorum in cute stricturæ, liberam perspirationem sufflaminantes, ad fomitem chronicarum passionum, primis in viis præsertim duodeno constituendam, multum conferant.

§. XXIII.

2) intesti-
norum vo-
lamine.

Alimentaris ille canalis, ab œsophago ad anum porrectus, ingestorum digestionem & relictorum ex his fecum excretioni dicatus, si hostili spasmo stringitur, maxima inde & varia in corporis integritatem redundat noxa. Inprimis alvi contumax adstrictio, plerumque debetur spasmo, qui vel ipsis in intestinis, & maxime inferiori coli portione & recto consistunt, vel per consensum è strictis remotioribus partibus eo propagantur. Suppressa autem hac ratione alvi evacuatione, scybala non modo retinentur, sed & omnes flatus cum ipsis fordibus ad superiora & tenuia intestina, immo sæpius ad stomachum, reprimuntur, ubi propter inflationes inde pullulantes, multa eaque gravia insequuntur symptomata, id quod hypochondriaco vel hysterico malo laborantium exemplo luculenter patet. In medio intestinorum hospitans spasmus, motum peristalticum invertit, & ad superiora non modo flatus, sed & feces excernendas urget, ut sursum latæ, per os ac vomitum rejiciantur, quod sæpissime fit in passione iliaca, præsertim incarcerationa hernia stipata.

§. XXIV.

Speciatim
ileo.

& ventri-
culo.

Ileon sicuti intestinorum est tenuissimum & sensationis exquisitissimæ; ita hoc modo præternaturam affectum, non solum atrocissima circa umbilicum tormina, sed etiam dejectiones crebras & copiosas parit, ut in colica cum diarrhœa juncta, sive biliosa, aut ubi drasticum purgans fuerit assumptum, contingit. Vehemens quoque strictura spastica, quum occupat inferius orificium ventriculi ejusque motum subvertit, vomitus vel conatus ad vomendum emergit; quando vero ambo orificia, sinistrum & dextrum obferantur, ipse ventriculus flatibus turgit & mirum distenditur, unde in hystericeis & hypochondriacis truculenta sæpe pathemata. Nonnunquam etiam clauso adhuc pyloro, stomachus superius laxatur, & patefacto exitu, ipsi flatus ingenti copia & cum impetu à faucibus erumpunt & ructus fiunt.

§. XXV.

3) In duc-
tibus bi-
liariis.

Et quia totum systema vasorum biliariorum, quæ in hepate & extra illud discurrent, & motu identidem peristaltico, quem nonnulli recentiorum oscillatorum dicere malunt, biliosum succum demum ad duodenum trudent, spasmo pariter ex facili patet, ob tunicas, quibus canales biliares instructi sunt musculares & nerveas, fit, ut pro diversitate stricturæ in vasa hæc cadentis, variæ affectiones morbosæ resultent. Nam orificio ductus cholodochi constipato, ut sæpe accidit ab ira retenta, nec non in cardialgia, in vomitu, vel ab assumpto purgante aut veneno, bilis motu etiam inverso peristaltico regurgitat ad lymphæ & sanguinis massam, & icteritium cuti inducit colorem, simul quoque

crasin temperatam & benignam sanguinis & humorum corrumpit ac destruit. Ductus cystici & hepatici, quando ob bilem nimis acrem redditam, vel modo dictas causas, arctius adducuntur, ipsa bilis ingenti in copia amandatur ad duodenum, & sedes vel vomitiones admodum biliosas efficit, ipsumque cholericum sæpe parit morbum. Detenta vero in duodeni cavo bilis tam copiosa & vitiosa, cum aliis corruptis ibi flatulentibus male coctis succis facile in corruptionem abit, & gravium symptomatum atque inflammationum fomitem præbet.

§. XXVI.

Idem de systemate ductuum, qui urinam vehunt, tenendum. Hi enim quum non minus peristaltico, hoc est, reciproco systoles ac diastoles motu gaudeant, intensiori facta per spasmus systole earum, & quidem ubi ureteres renibus implantantur, urinæ fluxus plane intercipitur, ac retentus falsus latex non modo renale conceptaculum valde distendit, sed & ad sanguinis massam redit, ut, si diutius perstiterit malum, gravis ad suffocationem usque anhelitus, vel etiam tumor hydropicus, aut convulsiva quædam affectio, quin non raro mors, ingruant. Clausura ureterum ad ingressum in vesicam, quacunque etiam ex causa, contingente, urina è pelvi jugiter stillans appensos ureteres cum sævissimo dolore mirum expandit, ut instar farcimicis diducti post mortem appareant. Quando vero spasmus ad vesicæ sphincterem vergit, urina non redditur, sed vesicam implet ac ampliat. Urethra demum à graviore strictura compressa, mictum difficilem cum ardore & dolore, sive stranguriam, conciliat.

§. XXVIII.

Uti vero excretoria, sic quoque secretoria corporis organa, detrimentosus spasmus nonnunquam tangit, admissio inprimis externo frigore, vel perpeffo graviore terrore. Sic ductus mammarum lactiferi eidem crebrius obnoxii sunt, ut non solum secretio lactei liquoris in glandulosa mammarum substantia impediatur, sed etiam inde tumores, in abscessus & ulcera definientes, contrahantur. Faucium & palati glandulosa compages, ex qua continuo lymphaticus & salivialis succus stillat, ubi arctius stringitur, quod non tantum in æstu præternaturali, sed etiam febrium accessione, nec non in aliis affectibus internis spasmodicis contingit, fauces arefunt & sitis accenditur. Patiter tunica villosa intestinorum tenuium, quæ tota vasculosa & cellulosa si inflata exsicceretur apparet, spasmodice contrahitur, ob tunicam nerveam cui insternitur, & tunc parum humoris ex ingestis per venas lacteas ad massam sanguinis fertur, unde corpus emaciatur, imus contra venter intumescit, immo durus ac renitens à flatibus intro coactis fit, ac ita tandem tympanitis gignitur. Vicissim quum glandulæ, quæ salivalem laticem in fauces eructant, medicamento mercuriali ad iteratas fortiores stricturas sollicitantur, salivæ ingens exoritur profluvium, quod etiam evenit, in hypochondriacis ab humore stimulante acri acido.

§. XXVIII.

Superiores & nobiliores corporis partes, quo magis reliquis in œconomia animali præstant, eo gravius detrimentum, si infesto spasmo premuntur, ipsa corporis patitur integritas. Diaphragma, & maxime ejus portio nerveo-tendinosa, quando præternaturam valide contrahitur, asthma

4) In ur-
nariis vi-

In secre-
tis orga-
nis.

faucibus
& palati.

villosa in
testina-
rum.

glandulæ
faucium.

Porro in
diaphrag-
mate.

asthma nascitur sic dictum spasmodicum, cum sensu coarctationis & compressionis circa præcordia, solenne hypochondriaco malo vexatis symptoma. Quin spasmus hoc diutius sepe incumbente; summa spirandi urget angustia, quam haud raro oedematosus, sive hydropicus inferiorum partium tumor, insequitur, eo quod cava vena, ex hepate emergens ac per diaphragmatis substantiam nerveo-tendinosam transmissa, hoc corrugato, simul angustatur, ut sanguis per adductum ejus alveum difficulter ad cor volvatur, & liberiore transitu exclusus, non tantum in inferioribus partibus, verum etiam in venæ portæ ramis & plurimis abdominis visceribus copiosius collectus, restagnet, ac mora ferofam in poros dimittat portionem, unde tumores. Vasa & ramificationes asperæ arteriæ per pulmonum substantiam dispersæ, tunicis muscularibus & nerveis vestitæ, quando vehementiam spasmus experiuntur, quod non raro fit inhærente iisdem intus genita, vel retropulsa quadam acri, serosa, exanthematica materia, ingens pectoris oppressio & respirationis difficultas oritur, quæ, propulsa ad habitum corporis perniciali illa materia, protinus cessat. Laryngis & pharyngis nerveis & musculosis partibus, quum infidet spasmus, constrictivus quidam circa gulam observatur sensus, haud secus ac si palus ibi fixus hæret, quod hysterici, spasmus ventriculi laborantibus, familiare.

§. XXIX.

Longe magis adhuc terrent spasmus sensibilibus cerebri membranarum. Nam dura sic dicta mater, per quam sinus venosi feruntur, & à qua, tanquam matre, omnes membranæ nervosæ originem sortiuntur, ob texturam prorsus nervosam ac fibrosam, motu tonico vitali, systole & diastole, pollet, & sanguinis per caput & cerebrum progressum, nec non fluidi tenuissimi in nervorum principia ingressum, quam maxime moderatur. Quapropter læso ejusdem motu eoque per spasmos intensiore facto, non mirum est, perquam sæva pullulare pathemata. Inprimis hoc loco ceu perpetuæ veritatis assertum inculcandum: quod animi dispositio, inclinatio ejusque varii motus, immo impressiones & functiones in judicando, à sanguinis & fluidorum motu ac transitu per cerebrum ejusque membranas, plurimum dependant; hic vero sanguinis cursus, pro varia duræ potissimum meningis textura, tono ac motu, succedat atque regatur. Et hanc ob causam mentis emotionem sive delirium, tam melancholicum, quam furibundum, aliaque gravia in capite mala à præternaturali hujus membranæ constitutione quam maxime arcessenda esse judico.

§. XXX.

Scilicet quando ita stringitur dura mater, ut sinus venosi angustentur, & hinc per ipsam sanguis impeditius trajiciatur, in animo variæ anxietate & sine omni causâ formidolosæ ac tristes comparent phantasiæ, ad desperationem quandoque accedentes, cum intellectus errore, qui affectus melancholia vocatur, in spasmodico hypochondriaco malo obviat. Ubi vero durante tali strictiore duræ matris habitudine, sanguis à causis in corporis interioribus delitescens, vel etiam ab iracundia, cum impetu ad caput rapitur, insania furibunda cum lædendi impetu, vehementi odio & ira sine evidenti causa, nascitur. Et nunc facile intelligitur, quare melancholia facile transeat in furorem, & hunc

Frid. Hoffmanni Oper. Tom. I.

sæpe melancholia excipiat. Quod si verò sanguinis progressus ob rigidum duræ matris spasmus sistitur, & vasa cruore repleta nervorum principia comprimunt, levior species apoplexiæ gignitur, quæ nobis dicitur spasmodica, & crebro visitur in gravi affectione hysterica, ac tempestive admissa venæ sectione, repente nonnunquam tollitur.

§. XXXI.

Neque sensoria à crispatura spastica penitus sunt immunia. Si ad nervos pertingit opticos, quod aliquoties vidimus à vermibus, visus ad tempus perit, vel duplicatur. Si ad interiores aures, quæ labyrinthum cochleam & meatuum auditoriorum succingunt, tunicas fertur, non modo tinnitus & susurrus molestissimus, sed & intolerabilis anxietas à sono externo acuto percipitur. Nervi linguales spasmus correpti, quod etiam aliquoties in verminantibus observatum est, aphoniæ sive loquelæ defectum inferunt. Internum narium spatium, una cum sinibus ossium cranii, tunica valde nervosa & glandulosa, quæ pituitaria vocatur, obductum est, quæ ubi spasmus, sive acri frigore, sive ab austero humore huc delato, aut nimio pulveris tabaci usu, adstricta, non modo muci excretio cum odore impeditur, sed & gustus simul læditur. Insignis enim est saporis & odoris sympathia, utpote membrana narium posticæ ossis palati parti, quæ columellam apprehendit, appenditur, & ex pari quinto nervi ad palatum & nares etiam mittuntur. A spastica hujus membranæ strictura deducenda etiam mihi videtur ratio, quare feminæ hystericae & qui gravibus pathematibus spasmoticis affliguntur, suaveolentia, quæ penetranti agilitate stricturas intendunt, ægerrime ferre queant; adeo ut si factum fuerit, universo nervorum systemate in consensum tracto, sævissima symptomata, syncope, summa præcordiorum anxietas, spirandi angustia, in quibusdam convulsiones, proritentur.

§. XXXII.

Neque dubium est, quin membranæ, quæ medullam in spina contentam cingunt, & ejusdem sunt structuræ, naturæ & usus cum membranæ cerebri, spastica strictura afficiantur, idque secundum meam sententiam sæpissime, maxime omnium vero in principio omnium febrium, præsertim intermittentium contingit. Nam illa per universum corpus conspicua horripilatio, refrigeratio, pororum cutis corrugatio & vasorum ejus cum pallore detumescencia, neque minus oscitatio, pandiculatio, sunt affectus nervorum, qui ex medulla spinali suam accipiunt originem. Idem quoque dolor circa primam vertebrae lumborum, qui plerumque ab initio omnium motuum febrilium obviat, id adstruere videtur. Quod argumentum tamen in peculiari dissertatione, de vera motuum febrilium indole ac sede fusius prosequutus sum.

§. XXXIII.

Supereft adhuc alia motuum præternaturalium, qui morbos proxime efficiunt, species explicanda, cujus indoles non tantum in intensiori & aucta fortius systole, seu contractione, sed etiam reciproca & successiva vehementiori expansione, seu dilatatione, consistit. Dicuntur hi motus convulsivi, & incipiunt in locis nervosis, sive immediate, sive per consensum valde irritatis, & demum transeunt ad musculos, etiam eos, qui voluntatis arbitrio subjecti sunt, quos dire & horribiliter sæpius agitant, distor-

Et apoplexia levior

In sensoria sensus læsa

aspera arteria.

Larynx & pharynx.

Cerebri ejusque membrana præsertim dura matre.

In medulla spinali accessiones febrium.

Tertia species motuum morbosorum convulsivi.

Furore.

universa-
lis epilep-
sia.

quent & è situ suo dimovent. Quod si dura mater cerebri, cujus actio & conspiratio cum membranis nerveis universi corporis, inque primis medullæ spinalis maxima, convellitur, universalis hæc est convulsio, particularis magis, si membranae & nervi medullæ spinalis, in hoc vel illo latere, tali motu afficiuntur. Sæpe ipsa spina, vel antrorsum, vel retrorsum, horribiliter curvatur, jactatur & distorquetur, modo totum corpus flectitur, modo certi artus, manus vel pedes, hinc inde agitantur.

particula-
ris, motus
convulsi-
vus ar-
mum.

§. XXXIV.

Intra cor-
pus palpi-
tatio cor-
dis.

asthma
convulsi-
vum.

singultus.

tussis con-
vulsiva.

sternu-
tatio.

Hisce motibus internæ quoque musculosæ & nobiliores partes obnoxia sunt. Cordis quippe palpitatio, qua è sede sua validissime dimove-
tur, nonnisi convulsione species est. Diaphrag-
matis succussus, quo thorax cum impetu amplia-
tur & rursus angustatur, cum intensiori exspi-
ratione, rectissime etiam ad convulsionem re-
ferri potest. In apoplexia, epilepsia & gravi-
bus quibusdam capitis morbis, ipsius thoracis
convulsio conspicitur, qua cum intensiori facta
respiratione, thorax vehementer diducitur & re-
pente etiam contrahitur, lethale ut plurimum in
apoplexia signum. Quando diaphragmatis mus-
culus convellitur, fit singultus, cujus causa ut-
plurimum hæret in ventriculo. Quandocunque
larynx valde nervosa & tunica quæ bronchia
pulmonum cingit nerveo-glandulosa, à sero acri
irritantur, pectoris etiam fit convulsio & succus-
sus, cum vehementi conatu expectorandi, in tussi
sic dicta ferina, seu convulsiva. Quamprimum
fibrae nervosæ nares oblinentes ab acri quodam
stimulo vellicantur, illico, ob comneatum ner-
vi intercostalis, diaphragma per inspirationem al-
tiorum deprimuntur, & mox spasmio remittente,
violenter retractum, fortiorum exspirationem,
cum vehementi aëris exsufflatione præstat. Quin
notabile est, quod à titillatione super costas fa-
cta, diaphragma motu reciproco agitatum, ca-
chinnos moveat.

§. XXXV.

vomitus.

cholera,
diarrhoea.

ructus.

abortus &
parius.

Percommode quoque in convulsionum cen-
sum vomitum referre licet, qui à fortiori strictu-
ra pylori & fundi ventriculi, aucta vero nimium
expansione orificii sinistri & oesophagi, perfici-
tur. Non raro ex intestinis tenuibus, ut fit in
passione iliaca, contenta vomitu rejiciuntur, quod
non sine inverso motu peristaltico, qui in succe-
danea contractione & relaxatione consistit, fieri
potest. In cholera ac diarrhoea, qua sordes mu-
cosæ & biliosæ brevi tempore ingenti copia eji-
ciuntur, ejusmodi convulsivam affectionem,
non modo intestinorum, sed & ductuum biliar-
iorum, adesse, censendum est. Ructuum im-
petuosa è stomacho fortiter contracto expulsio,
hypochondriacis perquam frequens, eo quoque
referri debet. Præmatura foetus in utero exclu-
sio, sive abortus, nunquam sine ejus convulsione
contingere potest; neque partus legitimus aliter
peragitur, ita tamen, ut convulsiva agitatio non
tantum uterum, verum etiam partes vicinas in
regione pubis & ossis sacri, tangat, & musculos
quoque dorsi & abdominis in consensum trahat.
Nam ejusmodi vehementes spasmos, sive con-
strictivos motus partium, subsequitur tandem mi-
ra orificii uteri interni dilatatio.

§. XXXVI.

Atonia de-
bentur.

Expositis sic iis morbis, quorum formalis ra-
tio in convulsione versatur: transeundum nunc

est ad eam affectuum classem, qui ex toni, seu
potentiæ motricis, in nervosis & musculosis par-
tibus, item in ipsis canalibus qui fluida vehunt,
imbecillitate, seu nimia remissione, aut exsolu-
tione; quam Græci atoniam, vel si gravior af-
fectio, paralyfin, vocant, subnascuntur, quippe
qui non levius periculum ac priores, vitæ inten-
tant, sed certo respectu gravius. Quicumque
paullo curatius ipsius mortis theoriam scrutatur,
is non à vero aberrabit, si censebit, eandem in
plenaria & universali resolutione, seu potius ex-
tinctione motuum, qui in corde, arteriis, mem-
branis & omnibus musculis vigent, consistere.
Nam simul ac motus ille activus systoles cordis &
arteriarum filet, vel extinguatur, protinus tota
œconomia reliquorum motuum & functionum
aboletur. Si systole cordis ad tempus intercipi-
tur, syncope, quæ imaginem mortis præbet,
oritur. Sub languida valdeque imbecilli cordis
& arteriarum pulsatione, quæ fit sæpius à metu
vel magna mœstitia, vires naturæ ita exsolvun-
tur ac prosternuntur, ut anima, cujus operatio in
sensu & cogitatione consistit, deliquium quod-
dam patiatur. Mors, quæ venenum assumptum
sequitur, ab extincta vi motrice cordis oritur,
dum illud vel narcotico quodam vapore hanc sup-
primit, vel ob vehementiam spasmodorum, cor
quassantem, fluidum, quod motum præstat, pe-
nitus dissipatur, ut ex toto desinat systole.

Mors ip-

Syncope.

Animi de-
liquium.

§. XXXVII.

Lubet vero sigillatim damna certarum par-
tium ex atonia exponere. Graves illi cerebri
morbi, stupor, sopor, torpor, continua ad som-
num propensio, sensuum, memoriæ & ingenii
abolitio, vix gigni possunt, nisi sub magna ato-
nia & imbecillitate ac systole deperdita duræ ma-
tris, nervorum & membranarum nervosarum,
si nempe fluido summæ activitatis, tenuissimo
& purissimo, quod veteres spiritum animale
vocant, variis de causis destituuntur. Gutta se-
rena, sive plenaria visus obscuratio, salvo oculo,
nihil aliud quam nervi optici paralyfin indicat.
Sique hi nervi à vicina carotide, sanguine di-
fluenta, paullo arctius comprimuntur, vertigo
fit, quæ tamen etiam à spasmo nonnunquam
suam petit originem. Soluta penitus nervorum
acusticorum vigore, quod vel à nimia ibi exun-
dante humiditate, aut occallescentia fit, surditas
est. Molestus ille aurium tinnitus, qui in inte-
riori aure, intra tympanum & tubam Eusta-
chianam, continetur, à nimia humiditate mem-
branarum, quæ osses has partes cingunt, de-
mum in vapores resoluta, producit. Nervi
linguales, uti spasmo contracti, ita etiam para-
lysi resoluti, loquelam auferunt. Nimium re-
laxata ab incumbente sero tunica nervosæ, quæ
ossa narium squamosa investiant, quod frequen-
tius fit in coryza, odoris sensum auferunt. Ni-
mia musculorum pharyngis laxitas efficit, ut dif-
ficulter ore ingesta deglutiantur, quod etiam fit,
si tunica nervea oesophagi, ab humore pituitoso
nimium relaxata fuerit. Nervorum pneumoni-
corum & qui ad bronchia porriguntur paralyfis,
spiritum intercipit & catarrhum sic dictum suf-
focativum infert.

Graves
cerebri
morbi.

Gutta se-
rena.

Vertigo.

Surditas
& tinni-
tus.

Aphonia.

Odoris &
deglutitio-
nis vitia.

Catarrhus
suffocati-
vus.

§. XXXVIII.

Inprimis nimia tunicarum nervearum ventri-
culi atonia gravi detrimento corpus maciat;
quippe hac præsentem, ingesta non tantum grava-
tivo dolore epigastri regionem premunt, verum
etiam diutius ibi hærentia & mora corrupta,
stomachi

Parvi ven-
triculi &
intestino-
rum affe-
ctus.

Stomachi inflationem & anorexiam caussantur. Idem evenit, si à tono suo admodum dejectum est intestinum duodenum, quod alter & succenturiatus quasi secundum nostram sententiam ventriculus & altera chyli officina; quandoquidem humores ex ventriculo appulsi, moram in ejus cavo necentes, si in corruptionem abeunt, multorum morborum causam præbent, adeo, ut sedes ac seminarium fiat multarum ægritudinum. Labefactatus quoque peristalticus intestinorum reliquorum motus, flatulentias, borborygmos, murmura ac sonitus in ventre parit, qui si in acuto & periculoso morbo comparent, lethalis internæ sphacelationis indicium præbent. Sphincteris qui vesicam & anum claudit paralytica resolutio, involuntarium urinæ & secum secesum affert, atque in morbis robur virium naturæ exsolutum subjudicat. Laxata nimis atque remissa tubulosa cutis secretoria compages magnam imbecillitatem prodit, ac ut sudores frigidi, vel plane colliquativi, manent, efficit.

§. XXXIX.

Nobiliora porro viscera robore debito orbata, variis & pernicialibus morbis ortum præbent. Sic pulmones infirmati, copioso humorum affluxui & collectioni patent, unde tussis humida & copiosa, vel etiam asthma sic dictum pituitosum, quin sic allectus salforum & acrium humorum decubitus, ad abscessus, exulcerationes, vomicas ipsiusque phthisici mali generationem quam facile disponit. Hepatis & lienis viscus, propter vim motricem tonicam amissam, humorum infarctibus, vasorum obstructionibus, indurationibus quoque & scirrhescentiis obnoxium est, & hinc diræ illæ chronicæ passionēs, icterus niger & flavus, cachexia, scorbutus, hydrops, incunabula trahunt. Ipsa vasa sanguifera, præsertim arteriosa, robore haud raro exuuntur, ut languente eorundem motu, sanguis difficulter cursum conficiat, spissescat, passim in alveis stagnet minimosque obstruat, & sic gignatur sic dicta plethora ad vires, fecunda morborum matrix, quæ frequentissime causam constituit morbiificam in corporibus imbecillis ab alio morbo brevi liberatis.

§. XL.

Et quum nullum viscus in universo corpore ægrius per copiosissima vasa sanguinem transmittat, simulque ad dejectionem toni ac roboris & hinc oriundam humorum stagnationem ac tumorum generationem, tam proclive sit, quam hepar & in foeminis uterus: grave utique & frequens damnum ex iis imminet. Nimirum advehit ad hepar sanguinem vena sic dicta portæ, quæ, si robur obtrusum est, minus expedite ac promte sanguinem per hoc mere vasculosum viscus trajicere & propellere valet, sed cruor regurgitat ad illas partes illaque viscera, quibus vena hæc propagines suas inserit, stomachum puto, omentum, pancreas, lienem ac totum intestinorum volumen, & propter stases atque stagnationes parit ibi dolores, spasmos, flatus, obstructiones, indurationes, corruptiones, abscessus, hæmorrhagias, aliasque timoris & periculi plenas passionēs. Uterus vero mille ærumnarum, juxta Hippocratem, mulieribus auctor, si copiosissimi tortuoso ductu per ejus compagem discurrentes canales, ob remissum robur sanguini trudendo non sufficiunt, is pariter relabitur ad vasa hypogastrica arteriosa & ad viscera abdominis reliqua, unde non secus ac in nobiliori sexu

pathemata sic dicta spasmodico-hypochondriaca, in foeminis hysterica dicta, suboriuntur. Ipsa quoque uteri vasculosa substantia, stagnante sero ac sanguine farta, immodicum mensium aut ferimucidi profluvium, abortum & sterilitatem, tumores ingentis magnitudinis, carcinomata, quin in ipso cavo, varias concretiones carneas, quæ molarum nomine notæ, contrahit.

§. XLI.

In tubuloso renum colatorio, debito robore destituto, serum à sanguine effuse secedit & diabetes nascitur, qua plus urinæ redditur, quam liquidum assumptum. Ex eodem etiam fonte, destructo nempe renum tono, calculi renalis petenda est generatio. Quod si enim transitus sanguinis per vasa emulgentia languida tarde difficulter succedit, retardatur simul excretio urinosi liquoris, qui in tubulis urinariis prope pelvim subsistens, dimittit crassam, tartaream & mucidam materiam, successive in calculos concrecentem. Pariter si vesica enervis, vi, ut ita loquar, expultrice privata, urinam non reddit, hæc retenta, mora illa crassum ponit ac mucidum sedimentum, quod sensim solidescens, calculo generando ansam præbet. Insuper hebetata vesicularum & vasorum seminalium contractilitas, in causa est, ut lymphaticus & seminalis liquor copiosius in loculis colligatur, ac demum nimium congestus, per pollutionem nocturnam, immo ipsam benignam gonorrhœam, sponte exstillet.

§. XLII.

Denique etiam membranæ & nervi spinalis medullæ, variis de causis sæpe penitus à tono ac robore dejiciuntur, quod, si in uno latere accidit, hemiplexia, sive paralyxis fit, dextri, vel sinistri lateris, sub qua sensu & motu orbantur partes lateris, ad quas nervi ex spina feruntur. Si autem non in ipsa spinali medulla, sed extra eam discurrentes nervi ac membranæ nervosæ artuum, v. c. brachiorum & pedum obtunduntur, motus affectæ partis remanente quodammodo sensatione, expirat, & affectus vocari solet paresis.

§. XLIII.

Quum itaque omnes omnino morbi ad motus, nimium vel intensos, vel debiles atque remissos ortum referant, ita quidem, ut hi chronicæ & rebelles, illi autem acutæ & celeres magis passionēs invehant; quæstio nunc disquisitione haud indigna incidit: Spasmus, an atonia partium sit deterior & negotio vitali magis infensa? Nos ingenue & libere profiteamur: atoniam esse pejoris indolis ad sanitatem cum vita subruendam, quam spasmus. Nam licet ipse spasmus atroces dolores, ingentes molestias atque anxietates pariat; sæpius tamen per accidens utilissimum effectum præstat, dum motu solidorum & fluidorum aucto, causæ morbificæ, ex qua ipse pullulat, submovendæ inservit, stases, stagnationes & infarctus dissolvendo, & humores vitiosos, temperie & quantitate peccantes, exturbando, ut hoc facto, morbus ipse feliciter solvatur atque discedat. Deinde longe facilius est, motus excedentes impetuosos componere ac sedare, quam deficientes plane revocare & excitare, quandoquidem atoniæ ea est ratio, ut exhaustis naturæ viribus, sanguine nempe & succo nerveo consumptis, subnascatur, quorum jactura non tam prompte refarcienda. Debi-

Urine,
stercorum
& sudoris
effluxus.

De morbis
ex atonia
in pulmo-
nibus.

Hepate &
liene.

Vasis san-
guiferis.

Speciatim
vasis he-
patis.

Uteri.

In renibus.

De vesicâ.

Vasisque
seminali-
bus.

In mem-
branis spi-
nalis me-
dullæ.

Atonia
spasmo de-
terior.

litas quoque, five vis motricis in partibus languor, causa plerumque est sanguinis in certo loco congestionis, stasis, stagnationis, corruptionis, immo viscerum infarctus, è quibus postea, ceu proximis causis, febres, spasmi & præternaturales motus succrescunt, vel denuo repetunt ac recidunt. Neque etiam ullus morbus ullumque symptoma gignitur, nisi præcedat eximia generis nervosi infirmitas, aut nobiliorum partium atonia, five hæc in ventriculo, intestinis, systemate vasorum mesaraicorum, membranis cerebri aut medullæ spinalis, five etiam ipsis excretoriis, consistat; quo etiam fit, ut roborantia & balsamica medicamina, languidam partium facultatem refocillantia, ad morbos arcendos efficacissima sint præsidia.

§. XLIV.

*Spasmus
atoniam,
hæc illum
ingignit.*

Porro, qui motus microcosmicos eorumque indolem attentius expendit, compertum habet: spasmus, qui truculenter in morbis torquet & exagitat corporis partes, in iisdem semper motus impotentiam, five imbecillitatem, relinquere; & hanc plerumque causam esse repetentis denuo paroxysmi. Atroces dolores excipit demum partium affectuum intumescencia; inflammationem acutam, sphacelatio, quæ summus atoniæ gradus. Vehementem illam in febrium insultibus externarum partium stricturem, in declinatione magna cutis relaxatio cum sudore copioso sequitur, æstus antea intensus, cutis refrigeratio, pulsus celerem ac durum, die vacuo tardus ac molliter undulans. Convulsivi truculenti motus, artibus quos exagitarunt, ingentem post imbecillitatem atque languorem conciliant. Ipse quoque observavi, post vomitiones & dejectiones alvi creberrimas, immo validiorem purgantium operationem, alvum claudi & ventriculi atque intestinorum robur mirum atteri, quod potissimum uber flatuum proventus testatur. Ut adeo perpetua hæc sit microcosmica lex, in pathologicis studiose imprimis observanda: quod spasmus relinquat atoniam, & atonia vicissim spasmodicis ingignendis velificetur.

§. XLV.

*De morbis
ætatium ex
hoc fonte
derivandis.*

Monendum tamen est: quod tam imbecillitas, quæ auctore Celsō, omnibus morbis patet, quam ipse spasmus, certis ætatibus, ratione partium quas afficit, certis quoque ratione structura corporibus, magis vel minus solennis atque familiaris sit. Enimvero historia medica experientia innixa testatur: atoniam & infirmitatem capitis & quæ ad illud pertinent partium, infantibus & pueris esse frequentissimam, ac inde veram morborum, quæ teneriorem ætatem infestant & capiti plerumque incumbunt, derivandam esse originem. Hanc enim sæpius achoribus, tinea capitis, aurium & oculorum defluxionibus, glandularum tumoribus, coryza, narium stillicidiis, sanguinolentis & mucosis, epilepsia quoque corripitur, res est inter omnes notissima. Currente juvenili & prima virili ætate, spasmodicæ stricture in præcordiis ac pectore, in universum quoque motus solidorum & fluidorum intensiores, frequentius conspiciuntur. Hinc enim est, quod juvenes ac viri ad inflammationes pulmonum, pleuritidem veram ac spuriam, peripneumoniam, hæmoptysin, phthisin, hæcticam, asthma, inflationes ventriculi, affectum hypochondriacum, qui in præcordiis maxime sedem obtinet, immo ad febres ardentes biliosas, tertianas & continuas, admodum sint proclives &

crebrius iisdem tententur. In adultioribus tandem, debilitas & atonia inferiores in imo ventres partes magis corripit. Et hanc ob causam ætate ingravescente, morbi, qui in abdomine sedem & originem habent, quam maxime affligunt, quorum in numero sunt renum, vesicæ calculus, colica, diarrhœa, cachexia, hydrops, scorbutus, mictus cruentus, fluxus hæmorrhoidum nimius, tumores pedum oedematosi, atrophia, anorexia & stranguria, infesta senibus pathemata.

§. XLVI.

Ex hisce autem omnibus uberius hætenus excussis, perquam dilucide apparere arbitror: quod solus spasmus & simplex atonia, æquabilem, liberum ac proportionatum sanguinis omnisque generis fluidorum motum, qui excretionum successus & integritas functionum animi & corporis proxime nititur, turbando ac pervertendo, universam vitalem œconomiam subruant ac destruant, atque hinc universa pathologia longe rectius atque facilius ex vitio motuum microcosmicorum in solidis, quam ex variis affectionibus vitiosorum humorum, deduci atque explicari possit, adeoque omnis generis ægritudines internæ, ad præternaturales generis nervosi affectiones sint referendæ. Etenim læsis quocunque modo vel nervis per corpus discurrentibus, vel membranosis quibusvis à nervosis partibus, illico motuum anomaliam, modo leviores, modo graviores, subsequuntur. Deinde attentæ observatio docet, motus quosvis morbosos, principaliter sedem figere & tyrannidem exercere in nervosis corporis partibus, cujus generis præter omnes canales, qui systaltico & diastaltico motu pollentes, contentos succos tradunt, universum nimirum intestinorum & ventriculi ab œsophago ad anum canalem, totum systema vasorum arteriorum, ductuum biliariorum, salivalium, urinariorum & subcutaneorum, sunt quoque membranæ nerveo-musculares cerebri & medullæ spinalis, præsertim hæc, quæ dura mater vocatur, organis sensoriiis obductæ, nec non tunica illæ ac ligamenta, quæ ossa cingunt artusque firmant. Nam nullus dolor, nulla inflammatio, nullus spasmus, nulla motus & sensus impotentia, nulla febris, aut humoris ullius excretio, accidit, in qua non hæc partes patiantur. Porro etiam omnes, quæ morbos gignunt causæ, operationem suam potissimum perficiunt in partes motu & sensu præditas, & canales ex his coagmentatos, eorum motum, & cum hoc fluidorum cursum, pervertendo; ita tamen, ut sicuti variæ indolis sunt, sic etiam varie in nerveas partes agant iisdemque noxam affricent. Demum omnia quoque eximiæ virtutis medicamenta, non tam in partes fluidas, earum crasin ac intemperiem corrigendo, quam potius in solidas & nervosas, earundem motus alterando ac moderando, suam edunt operationem: de quibus tamen omnibus, in vulgari usque eo recepta morborum doctrina, altum est silentium.

CAPUT V.

De consensu partium nervosarum generatim & sigillatim cum ventriculo, præcipua passionum & symptomatum origine.

§. I.

OMnis generis morbos & præternaturales motus ad duo genera, spasmus nempe & atoniam,

*Omnes
tur morbi
sunt gene-
ris nervo-
æfectio-
nes.*

*Tractatio-
nis ratio.*

niam, referri posse, & generis nervosi maxime esse affectiones, superiori capite succincte & distincte docuimus: jam sequitur, ut consensum, sive potius mutuam illam conspirationem & communicationem motuum vitiosorum, quam partes nervosæ motu ac sensu exquisitiori gaudentes, inter se alunt, tradamus, ac inprimis quam singularis ventriculo, cum nervosis universi corporis partibus, sympathia intercedat, edisseramus; exposituri simul, quod non modo omnes quæ motus præternaturales cient causæ, sed & medicamenta, proxime nervosas partes, & maxime ventriculum cum intestinis, virtute sua ac operatione afficiant. Et hac demum ratione fiet, ut genealogia multarum passionum & symptomatum in morbis, quæ eo usque abstrusa admodum atque incognita fuit, ipsorum quoque remedium effectus ac operandi modus, clarius innotescant & perspiciantur.

§. II.

Partes in corpore tanquam machina connectæ.

Videlicet corpus nostrum esse machinam, & artificio & usu omnibus aliis, quæ ab humana arte proficisci possunt, longe superiorem & perfectiorem, dudum quidem sagacissimi medicorum agnoverunt; non tamen facile firmius ad idem demonstrandum suppetit argumentum, quam exquisita illa mutua connexio & coordinatio, inque eundem finem conspiratio partium, quæ undiquaque in universa compage conspiciuntur. Hinc etiam est, quod unius partis vitium, aut læsio, mox, ob arctum hunc nexum, in alias transeat, ut inde omnes machinæ motus inordinati fiant, vel sensibilem turbationem patiantur: haud secus ac videmus, læso vel unico rotulæ dente in machinis artificialibus, protinus earum motus inde reddi inordinatos.

§. III.

Ex partium structura motus.

Sicuti vero omnis machina tantummodo eum in finem constructa est, ut ex sua structura convenientes edat motus: ita animadvertimus, corporis nostri structuram, maxime esse hydraulicam & vasculosam, quo fluida diversi generis jugi & continuo motu, vi & potentia motrice, non modo cordis atque arteriarum, expansiva & contractoria, sed & aliorum ductuum secretoriorum & excretoriorum, per diversissimæ amplitudinis tubulos circulari in orbem motu ferantur, & variæ indolis humores, pro diametro & directione canalium, & secernantur, & excernantur. Animadvertimus porro machinam corporis nostri ex meris fibris ac membranis nervosis elasticis, contractilibus & expansilibus, esse contextam, atque in iis ipsis motus quosdam tensivos, tremulos, oscillatorios celebrari, qui tam motibus vitalibus secundandis, quam ad offerendam materiam principio, quod in animantibus est, sentiendi ac percipiendi, serviunt. Et quia præterea rotum systema nervorum & membranarum cohæret ac mirifice inter se connexum est, non aliter fit, quam in chordis tensis, ut fibrilla una pulsa, altera quoque moveatur, in quo quidem mutua illa conspiratio fibrarum & membranarum, qua motus vitiatos & præternaturales invicem communicant, consistit.

§. IV.

Partes speciatim consentientes.

Atque hæc harmonia ac sympathia partium nervosarum, maximi momenti & usus est in pathologicis, adeo, ut sine ejusdem accurata notitia, plurima, quæ in morbis accidunt symptomata, quomodo producantur, vix ac ne vix qui-

dem explicari possit. Quapropter merito dolendum esse arbitror, quod hæc doctrina in libris medicis huc usque partim minus recte pertractata, partim etiam penitus neglecta & prætermissa sit. Operæ hinc pretium utique fore duco, si tam utile argumentum pervestigatius paullo & subtilius in præsentis disquisitione agitem atque expendam. Prius vero quam id exsequar, ante omnia in genere tenendum est: quod partes nervolo-membranaceæ, inter quas ejusmodi consensus quam maxime viget, sint primo membranæ cerebri & spinalis medullæ, deinde membranæ nerveæ, quæ organa sensuum, oculos, aures, nares, ora & fauces interius investiant, ac porro membranæ, quæ omnis generis ossa succingunt, caput, dentes, articulos ipsosque musculos. Tum quoque totus ille canal, qui à pharynge ad anum usque elongatur, ac œsophagum, ventriculum totumque intestinorum volumen conficit, & mere nervosus ac membranaceus est, conspectius consentit. Idem præterea consensus in universo systemate ductuum biliariorum, urinariorum cum vesica, & qui glandulas constituunt ac ex iisdem liquorem secretum devehunt, & denique in ipsa cute, quæ ex meris fibris tendinosi & nerveis contexta est, per omnem corporis ambitum, observatur atque succedit. Omnium itaque & singularum harum partium mira invicem est connexio, conspiratio, sympathia & motuum quoque læsionum communicatio, quando à causa quadam violenta, sive crassiori, gravius afficiuntur.

§. V.

Quemadmodum vero nobiles hæ partes motum, sensum atque actionem suam, à nervis eorumque propaginibus sortiuntur, licet emergentes inde singularum functiones mirum differant; ita plurimum utique refert, nervorum conjugationes ac distributiones ramulorum, à quibus singulæ partes animantur atque moventur, probe pernoscere, quo vitiosorum organis ab iisdem impressorum motuum origines rite pateant. Recte enim jam cel. *Etmullerus*, ex hoc fonte partium sympathiam derivavit, dum *Opp. Tom. II. pag. 36.* ita scribit: *consistit ergo consensus partium in connexione unius cum altera, quæ triplici inprimis solet fieri ratione, ita quidem, ut omnis proprie dictus consensus fiat ratione saltim nervorum. Consentiant nempe partes nerveæ triplici modo: primo, quatenus fibra nerveæ sunt continua, qua ratione imminente vomitu, tremat labium inferius: vel secundo, quatenus sunt contigua, quarum ratione calculus vesicæ subinde stimulum infert alvi & tenesmus excitat, quia colum vesicæ & intestinum rectum invicem incumbunt, sic affecto orificio stomachi, sequitur singultus. Tertio, consensus partium fit ratione connexionis mediantibus funiculis nerveis; qua ratione consentiunt renes, uretheres & intestina, stomachus & caput.*

Omnis sympathia partium à nervis.

§. VI.

Inprimis tamen necessarium est, exacte cognitas habere illas nervorum conjugationes & propagines, quæ ex cerebri inferiori substantia oriuntur, & extra calvariam delatæ, ad internas partes corporis abeunt; siquidem per has, & partes inter se, & omnes ac singulæ cum cerebro ejusque membranis, consensu fruuntur. Sunt vero hæc paria solenniora & notabiliora, quæ ex cerebro ad partes feruntur, duo, quintum videlicet & octavum. Et quia intercostale ex ramis quinti

Inprimis à quinto & octavo pari.

quinti paris & ramo sexti, item octavi paris, originem suam sumit, & cum pari octavo quoque intra cavum thoracis & abdominis plurimum conjungitur, & ramis ex spinali medulla, intra costarum spatium prodeuntibus, incrementum, & hoc ipsum demum fere ad omnes corporis partes, quo motum, robur ac sensum accipiant, defertur, ideo ob hunc nervum diffusissimum maxima fit partium inter se & cum capite consensio atque motuum communicatio. Quia vero ut omnium, sic etiam horum nervorum, descriptionem nemo accuratius & excellentius persequutus est ipso *Vieussen*; nolumus eam repetere, sed ingenuum lectorem ad hujus *Nevrographiam*, pro perspicenda & intelligenda varia nervorum distributione, remittimus. Nobis vero jam satis erit ostendere, quomodo per hos dictos nervos partes inter se consentiant, & unius læsio in alias transmigret, variaque symptomata inde progenerentur.

§. VII.

Ad consensum evolvendum sufficit maxima nervorum sensibilitas.

Ut autem hæc omnia, quomodo peragantur, & qua ratione præter naturam affecti nervi tantas mutationes, etiam non sine exitio & periculo vitæ ac sanitatis efficiant, intelligi possint: neutiquam nobis opus est, in subsidium principium quoddam incorporeum, singulari sensu & notitia rerum, quæ corpori insunt & in eo fiunt, instructum, vocare, quia ejusmodi principio ad vitale negotium plane non indigemus, utpote quum non sensus, sed motus tantum, ad producenda symptomata morbosa satis sit. Neque disputare hic nostri instituti erit, quod & quale liquidum in nervis vehatur, & quomodo ejus motus à causis morbificis præter naturam afficiatur; sed suffecerit saltem nosse, omnes motus vitales cum secretionibus & excretionibus, naturales, placidos & ordinatos esse, si in nervorum ac membranarum systemate omnia tranquilla & pacata sunt: id est, si nullam vim patiuntur, neque ulla, quæcunque etiam fuerit, violenta motio ipsis inducitur. In genere enim hæc regula perpetuo ac probe, in rationali morborum explicatione, observanda est: nullam vim vel motum tolerare posse nervos, & quæ ex iis prodeunt partes membranosas. Simul ac enim hæc à causa quadam vehementer commoventur, concutiuntur, vel distenduntur, aut comprimuntur, lancinantur, puniuntur & trahuntur, protinus ratione motus contractio, crispatura, strictura & partium vicinarum, præsertim vasorum, compressio præsto est: unde magnæ in circuitu sanguinis & humorum æquabili turbæ atque anomalix exoriuntur.

§. VIII.

Hinc facile afficiuntur, ab animi pathemate.

Sola perversa & minus rationalis cogitatio & impressio, quæ sub animi quodam impetu fit, quæ & directe & proxime nervosas invadit partes, ingentes turbas in tota œconomia motuum vitalium & animalium excitat. Sciendum autem est, vim perversæ cogitationis & impressionis nihil quidem corporei esse; attamen, simul ac influit in corpus & nervosas partes præter naturam exagitat, meros effectus corporeos, videlicet vel partium vehementem stricturam, contractionem, aut earum resolutionem, laxitatem & flacciditatem producit. Quare etiam ea remedia, quæ spasmodice contractos nervos molliunt, leniunt & efferos motus sedant, perquam feliciter acerbis illis symptomatibus, quæ animi impetuosior quidam motus concitat, op-

ponuntur. Eum vero in finem hæc adduximus, ut addiscamus, ab animi motu, ceu ideali atque incorporeo tantum actu, universum genus nervorum ita affici & commoveri posse, ut omnium partium munera inde labem contrahant & periclitentur.

§. IX.

Deinceps quanta læsio & perniciēs toti corpori accedat ex gravi percussione capitis & cerebri, ac principii nervorum inde facta sola commotione, salva partium internarum textura, sensuum abolitio cum corporis lapsu in terram, nausea, vomitus, omnium virium simul & semel facta convulsio, satis abundeque declarant. Et quod magis mirandum est, à sola commotione corporis & capitis externa, in sano homine, confestim acerba symptomata produci possunt: cujus rei exemplum navigationis insueti præbent, quos navi maris fluctibus jactata, vel in gyrum circumacta, vertigo, nausea, enormis vomitio cum summa anxietate, pallor faciei, virium languor, appetitus prostratio, satis misere excruciare solent, quæ morborum ærumnæ vix ullam aliam agnoscunt causam, quam quod nervorum in capite principium insolito motu agitur & commoveatur.

§. X.

Igitur minimæ molis sæpius materia & levissima causa, modo in nervosis partibus insolentem quandam motionem vel agitationem excitare possit, magnis præter naturam motibus provocandis apta est. Fumus tabaci, etiam non adeo magna quantitate ore haustus, quas non ingentes anxietates cum sudore frigido, faciei pallore, vomitione, nausea ad animi fere usque defectionem, in insuetis producit. Effluvia stupendæ quanquam sunt exiguitatis, quæ ex suaveolentibus, moscho, zibetho & floribus jasmini exhalant; attamen tanta efficacia pollent, ut foeminam, cujus nervi enormibus anomalis contractionibus assueti sunt, id est, quæ secundum veterum loquendi modum sensibilissimæ est indolis, vehementissime affligant, syncopen inferendo, usum vitæ ad tempus suspendant, corpus humi prosternant, vel graves anxias & suffocatorias pectoris oppressiones & spirandi angustias concitent, quæ aspectu horrenda symptomata, foetido naribus admoto vapore, ex tempore & miraculi instar sisti possunt, eam videlicet ob rationem, quod exhalationes tenuissimæ sulphureæ, intimæ ad nervosas partes sint admissionis, & contrarium suaveolentibus effectum, nempe sedativum, in iis exserant. Etenim quando vapor, odore per nares susceptus, nervorum ramulos, ex quinta conjugatione prodeuntes, præter naturam afficit, protinus hujus insoliti motus communicatio, mediante pari intercostali & octavo, transit ad fauces atque ventriculum, cor & pulmones, unde horum symptomatum ratio petenda est.

§. XI.

Simili ratione quando à subtilissime caustica materia, sive, venenata, in cute sauciata nervæ fibrillæ interius tanguntur, quod fit, si cum punctura vel morsu virus sese altius insinuat, in morsu viperæ, scorpionum, canis rabidi, vel instrumento, succo hellebori albi, oleo tabaci, aut linimento, quod arsenicum ingreditur, imbuto, in quas non horribiles universum systema nervorum commotiones & spasticas stricturas conjicitur? unde acerbissimorum, maxima ex parte lethalium

A commotione interna & externa.

Minime molis materiam.

Aliqua tenuissima caustica.

De consensu partium nervosarum generatim &c. 311

lethaliū symptomatum, origo. Febris enim, syncope, sudor frigidus, faciei pallor, vomitus, nausea, flavus color faciei, artuum convulsio, mentis emotio, alvi pertinax constrictio, urinæ suppressio, summa anxietas, inquietudo, spirandi angustia, nonnisi affectus sunt præter naturam & supra modum generis nervosi commoti, quibus gravissimis & funesti certo effectus afflictionibus, non alia ratione, nisi mature, & statim inter initia, antequam motuum vitalium œconomia prorsus destructa fuerit, medicina, eaque specifica, succurrere licet. Nam, si unquam tantopere à medicis collaudata specifica locum inveniunt; certe tunc opem conferunt præstantissimam, ubi genus nervosum ex minima, virulenta tamen causa, in pessimos, vitæ inimicos motus & contractiones abreptum fuerit; si videlicet contrariæ indolis materia, eas maturiori exhibitione cita ope coinpescunt. Quam gravia & funesta symptomata post medicamentorum septicorum, ut est arsenicum, factam partibus tendinosis & nerveis exterius tantum applicationem sequantur, legi meretur *Obs. 80. Cent. VI. Hildani*, qui refert: virum robustum, qui tumore cancroso laboravit & cui Chirurgus pulverem ex arsenico applicuit, mox in dolorem vehementem, vigiliam, febrem ardentem & continuum cibi fastidium ac vomitum incidisse, & tandem delirio & syncope exorta, intra paucos dies mortuum fuisse.

§. XII.

Multo magis à solido & rigido corpore, quancunque nervi portio læditur, acerbæ & gravia in toto corpore visuntur symptomata. Ita tenuissima acu vel lanceola, ex purissimo chalybe confecta, quando in ferienda vena improvide læditur substratus nervus vel tendo, in corpore etiam exquisitè sano, dolor, tumor durus, partis inflammatio, cum horrore, febre, vigilia, & quandoque, nisi cito succurramus, sphacelus & mors consequitur. Qualia tristia exempla complura sæpius, non sine dolore, in praxi conspiciuntur. Neque tantum Chirurghi, qui læsionem inferendo primam occasionem malis subministrant, sed & ipsi maxime medici, qui progredienti malo commoda medicina, quæ tantummodo in principio unico emolliente consistit, non satis dextre & mature occurrunt, inculpandi sunt. Anni jam aliquot exacti sunt, ubi juvenis, medicinæ culturæ addictus, subito febre, cum siti, vigilia, summa anxietate levique delirio corripiebatur; quæ quum per sex dies durassent, in consilium vocor. Inquisivi in causam, edixit: bene se sanum & valentem fuisse, simul ac vero cuspis cultelli scriptorii, de mensa forte delapsi, incidit in dorsum pedis, ingentem dolorem ibi fuisse excitatum, & ab eo tempore graviter se laborasse. Locus affectus erat durus, tumidus & bruni coloris; applicuimus cataplasma emolliens ex floribus emollientibus, croco etiam, in lacte decoctum: insuper dedimus emulsiones papaveraceas, cum pulveribus bezoardicis, quo facto, mox omnia symptomata interitum minitantiæ ex toto conquieverunt. Quam infeliciter pedum clavi, in senio præsertim confectis & scorbuticis corporibus, non raro excindantur, tristissimis exemplis ac historiis indies fere edocemur. Tendinibus enim cum supersedeant clavi; hinc quo altius adigitur cultelli cuspis, eo facilius fit, ut tendo subjectus pungatur, unde exitialis, ob sphacelum exorientem, corporis ruina pendet. Spina vel levis festuca membranosis,

vel tendinosis locis altius, v. g. infra ungues, infixa, brevi etiam in sano homine, similis generis symptomata, dolorem, tumorem, ruborem, partis pulsationem & febrem, cum siti & vigilia parit. *Hildanus Cent. V. obs. 2.* complura exempla proponit, ubi à punctione spinæ in pede vel in digito manus facta, dolor maximus, inflammatio, febris, delirium & sphacelus obortus fuit. Non ita pridem à caustico, ad excitandum fonticulum, in loco incongruo improvide posito, in honoratiori foemina ingentem totius brachii tumorem doloremque usque ad humeros & pectus pertingentem, cum febricula notavimus; ubi tamen mox externis & internis convenientibus auxiliis, divina sub Numinis gratia, suppetias tulimus. Quod vero sphacelus, inprimis in extrema ætate & scorbutico corpore, tam facile nervosis partibus, præsertim extremis membris, infideat, id non tantum propter nervorum læsionem fit, verum quod exinde membranæ nerveæ constringantur, & interpositis numerosis venis & arteriis sanguis immotus detineatur, qui in sphacelosam corruptionem quam facile ruit.

§. XIII.

Quam gravia ex punctura vesparum, præsertim in locis membranosis & tendinosis, ut sunt carpi manuum, tempora capitis, juncturæ artuum, pathemata suboriantur, compluribus observationibus, hinc inde in medicorum clarissimorum monumentis annotatis, edocemur. Inter has notabilis est ea, quam in medium producit *Hildanus Obs. 87. Cent. IV.* ubi foemina à vespa punctiōnem circa carpum sinistrum accepit, & protinus ingens dolor in loco affecto, cum lipothymia, exortus est, qui ab initio manum quidem & carpum solum occupavit, mox tamen per totum corpus expansus, acerbior factus est, quin eodem die etiam vesicæ, seroso & pellucido humore repletæ, effloruerunt; convaluit tamen, inunctione facta ex oleo scorpionum. Et *observatione 80. l. c.* refert: juvenem robustum & plethoricum, à vespa in dextrum faciei latus, haud procul à minori cantho oculi, punctum fuisse, ubi ingens dolor & inflammatio cum gangræna faciei sequuta est. Idem laudatus auctor *Cent. V. obs. 25.* refert historiam puellæ, cui Empyricus liquorem in aures instillavit, incredibili dolore, postea febre, vigilia & tumore subsequentibus. Et *Cent. I. obs. 4.* memorat exemplum puellæ, cui in concavum auris globulus vitreus instar pisi illapsus est, quo facto, mira symptomata successerunt, tota pars illa capitis usque ad futuram nocte dieque doluit, accesserunt etiam sinistro brachio stupores usque ad digitos, pollicem & indicem, progredientes ad lumbos usque, tibiam & pedem, tussicula sicca assidua affuit, menstrua suppressa sunt, accesserunt epilepticæ convulsiones & ipsum brachium in atrophiam incidit: quæ cuncta acerbæ pathemata, feliciter extracto globulo, simul & semel conquieverunt. Hæ adductæ observationes satis abundeque id confirmant, læsiones nervosarum partium, quæcunque & ex quacunque etiam causa exortæ fuerint, propter communicationem, quam nervorum propagines inter se habent, ministrice functiones partium etiam dissitarum lædere & conturbare posse.

§. XIV.

Quod quidem quemadmodum in læsionibus partium nervosarum externarum in propatulo est; ita idem gravius affectis internis exquisite sentientibus

Punctura vesparum.

Aliisque levibus causis.

Et inde universum systema patitur.

Ejusdem indolis sunt internæ nervosæ partes.

Magis commoventur nervi à crassioribus materiis.

Ut punctura tendinis.

Clavo exciso.

Spina & festuca.

tientibus partibus contingit, ut plane mirandum sit, quam horrenda symptomata exinde subsequi soleant. Insigne hac de re exemplum prodidit idem laudatus *Hildanus Cent. I. obs. 34.* ubi aciculam grandiusculam forte quæpiam deglutivit, ex quo non ita multo post in fundo ventriculi & circa pylorum exortus est tam intolerabilis dolor, ut dies noctesque exclamare & ululare coacta fuerit. Sexto die à morbo phrenitica facta est, cum ardentissima febre, lingua arida, vultu inflammato, ut neminem agnosceret, nec cibum nec potum exposceret. Convulsiones colli, brachiorum & crurum maximæ & horrendæ aderant. Aliquando sese ex una in alteram partem lecti tali impetu projiciebat, ut tres viri, quantumvis robusti, vix illam tenere possent, mox tanquam semimortua jacebat, rursus tamen & repente priora symptomata revertebantur. Huic tam graviter afflictæ, *Hildanus*, optimo consilio, nihil nisi oleosa & juscula præcepit. Et quum aciculam tandem egressisset, pristinae sanitati paullo post restituta est.

§. XV.

*Inprimis
ventricu-
lus, qui
consentit
cum uni-
verso gene-
re nervoso.*

Utut vero consensus & mutua motuum communicatio inter omnis generis partes, quæ nervosæ sunt texturæ ipsisque nervis dotantur, perpetua sit, idque inprimis in acutis passionibus elucescat: attamen nulla pars in universo corpore est, quæ tam conspicuam ac intimam cum omnibus & singulis nervosis corporis locis & organis harmoniam ac sympathiam alat, quam ipse ventriculus, adeo, ut si ulla pars, quæ exquisitæ sensationis est, etiam longius distita, præter naturam afficiatur ac moveatur, statim etiam stomachus inde luat & compatiatur. Inde etiam patet ratio, quare in omnibus fere morbis, actio ventriculi, quæ revera est systematica, videlicet appetentia, digestio, chylificatio, vacillet, ac attenta observatio medico-practica doceat, quod ventriculo male habente, vel gravius læso, à quacunque etiam causa id fiat, protinus universum nervosarum partium systema inde offendatur, quo procul dubio permotus fuit acutissimus ille *Helmontius*, ut animæ sensitivæ sedem in ventriculo collocaverit. Et profecto, res est maximi momenti & subtilioris indaginis, quod nonnulli, percusso fortius, pugno vel duro alio instrumento, exterius cordis scrobiculo, sub quo pylorus reconditur, cito ac insperato perierint, inventa post mortem nulla læsionis mortiferæ nota, sed macula tantum ex flavo rubra, circa extremitatem diaphragmatis & inferiorem ventriculi partem, quales casus, ambigentibus de lethalitate medicis, aliquoties ordini nostro ad decidendum oblatis.

§. XVI.

*Quod re-
statu ve-
nerorum
operatio.*

Nihil vero clarius & manifestius ventriculi cum omnibus corporis nervosis ac sensibilibus partibus conspirationem demonstrat, quam actio veneni, è vegetabilium, vel mineralium censu desumpti, spiculis acerrimis, causticis, tenuissimis ventriculi & intestinorum tunicas nerveas intime penetrantis, lancinantis ac arrodentis, cujus generis maxime sunt arsenicum, & quæ ex mercurio ac regulina antimonii substantia prodeunt corrosiva, *cicuta aquatica*, fungorum varia genera, ipsa quoque purgantia, quæ non alio modo necant, quam per fortissimas spasticas universi generis nervosi contractiones. Inde enim cardialgia, inanis vomendi conatus, singultus, præcordiorum anxietas, spirandi angustia, contractio

diaphragmatis, linguæ ac faucium ariditas, sitis inexhausta, alvi suppressio, flatuum retentio, diarrhœa torminosa, perpetuus ad urinam emittendam stimulus, extremorum refrigeratio, sudor frigidus, facies sic dicta Hippocratica, artuum tremor, pulsus intermittens & suppressus, delirium, animi deliquium, epilepsia, convulsio, inquieta corporis agitatio, quæ ordinaria sunt veneni assumpti symptomata, atque ab atrosione tunicarum ventriculi fiunt. Et tamen in iis, qui veneno corrosivo necantur, ventriculi & intestinorum inflammatio ac sphacelatio semper post mortem conspiciatur; hæc tamen neutiquam tantorum symptomatum & tam celeris mortis causa est, sed potius horrendi illi per totum genus nervosum propagati spasmi, quorum consequens in intestinis & ventriculo consistens inflammatio est, feralem vitæ catastrophem inferunt. Nam spasmus veluti forti vinculo coarctatis ventriculi venis minimis sanguis immotus hæret, regredi nescit inque corruptionem transit. Ex quo jam facile intelligi potest, quare non præsentius & certius adversus corrosiva venena sit præsidium, quam in copioso lactis, oleosorum atque emollientium usu, quæ non modo ob id mortem avertunt, quod tenuissima veneni spicula obtundant atque contextu suo oleoso viscoso involvant, sed & quia ad contractas nervosas partes relaxandas, vix ullum melius quam in hisce est auxilium. De quibus autem omnibus meretur certe evolvi *Wepferi*, Medicorum & Anatomicorum peritissimi, doctissimus libellus de *cicuta aquatica*, qui varia experimenta cum venenis, emeticis & purgantibus, animantibus eadem ingerendo, instituit, & quæ ea sequuta sunt symptomata, nec non internas quæ post mortem deprehendit læsiones, curate notavit & consignavit.

§. XVII.

Ipsa mercurialia, sicuti dextre præparata & prudenter adhibita, usus sunt longe præstantissimi; ita vicissim minus recte parata & præpostere exigua etiam dosi propinata, universum corpus gravissimo damno afficiunt. Memini præ aliis, Chymicum quendam Empiricum ante aliquot annos jactitasse, se incomparabilem adversus podagram possidere medicinam, tam præsentaneæ virtutis, ut tribus tantum granis, tertia quavis hora assumtis, omnes omnino dolores, intra XXIV. horas, ad miraculum usque abigeret. Permotus hac gloriatione generosissimus quidam vir, exquisitissime sentientis naturæ & jam à trigiuta annis dolore podagrico ex hæreditaria dispositione afflictus, Lipsiæ periculum fecit, ac per diem sex pulveres deglutivit, quibus usurpatis, omnis quidem dolor simul & semel conquievit, sed subsequente nocte inquietus erat, anxietate summa cum vertigine premebatur, ut caput vix erigere posset, extrema frigescebant, & mane quum è lecto surgere volebat, apoplexia tactus misere interiit. Oblati postmodum à cognato mihi sunt ad examen efficacissimi hi pulveres, ubi, institutis nonnullis experimentis, eosdem mercurialis esse prosapiæ deprehendi, tam corrosivos, ut gustatæ fauces & linguam instar mercurii sublimati afficerent atque constringerent; quod autem dolor inde evanuerit, procul dubio ratio est, quod suscitato in exterioribus spasmus, materia acris ad interiora repulsa est.

§. XVIII.

Porro *Forestus lib. XVIII. de stomach. aff. obs. XIV.* ex lacte in stomacho concreto symptomata veneno

*Mercurium
lium pro-
postere
torum
za.*

*Alia nota
in ventri-
culo de-
sentia.*

De consensu partium nervosarum generatim &c. 313

veneno. similia annotavit, quippe ægra nausea sine vomitione afficiebatur, cum ingenti ventriculi dolore, adeo ut syncope subsequeretur & anhelitus præfocatio, adstantesque illam morituram putarent, omnia tamen pathemata, rejecto per vomitum lacte evanuerunt. Et *Galenus* memoriæ prodidit, adolescentem ab humore æruginoso, os ventriculi mordente, sæpius universali convulsione fuisse tentatum, eamque ipsum non deseruisse, donec ærugo ejecta. *Dum aliquid*, inquit; *os stomachi vellicat, mordendo ac æstuando, sunt fastidia, jactationes, cardiognus, atque jam vomituri-entibus os sputo plenum esse videtur & labrum inferius concutitur, ventris ore ad vomitum excitato*:

§. XIX.

Pathemata hypochondriaci hysterici;
Eandem ventriculi cum universo nervorum systemate sympathiam confirmant porro symptomata truculenta, quæ subinde hypochondriacos exercere solent, quandoquidem radix mali sic dicti hypochondriaci omniumque in eodem solennium symptomatum in ventriculo male affecto fixa est, in quo spasmus incipiunt, postea per propagines nervorum successive serpunt & consueta illa symptomata ingenerant. Nam si ventriculus, quod sæpissime fit, flatibus prorsus distentus est, ejus orificiis simul spasmo constrictis: tunc nervorum conjugationes, quæ ex pari octavo, item ex intercostali, ad ipsum feruntur, molesta tractione, tensione in partibus diversis, quas simul transeunt, varia & gravia invehunt pathemata. Ita nervi pneumonici & qui ad præcordia abeunt retracti, summas & constrictivas anxietates, cordis tremores, palpitationes, pulsuum frequentem, durum & contractum suscitant; sique ii tenduntur, qui ad fauces, ad oesophagum ac cervicem abeunt, faucium constrictio cum deglutione difficili, tractio molesta in cervice, dolor constrictivus in humeris, regurgitatio ciborum & flatuum ad os; in capite vero vertigo, oculorum caligo, cataracta spuria, capitis dolor, frigoris in eo acerrimus sensus, anxia & tristis cogitatio, hemicrania, animi perpetua anxietas & desperatio maxima, ad timorem ac terrorem proclivitas, nullius rei voluptas, somnus parvus & inquietus, cum virium languore & vitiata in sensorii perceptione, oriuntur. Et quia simul plexus mesenterici & nervi intercostales in consensum trahuntur, dolores adsunt dorso, tormina ventris, mensium & hæmorrhoidum inordinatus fluxus, dolor artuum, urinæ tenuis & aquosæ mictio, alvi strictura, quandoque etiam nimia ejus dejectio, extremorum quoque refrigeratio. Quorum omnium & singulorum symptomatum ingens fit allevatio, discussis ex ventriculo & intestinis ructibus aut flatibus, spasmodicis constrictionibus per clysteres, per balnea & antispasmodica sedatis, & viscida acida ac biliosa colluvie, per benigna laxantia cum amaris balsamicis juncta, edueta.

§. XX.

Nec non intermittens paroxysmi.
Communicationem quoque ventriculi cum partibus nervosis universi corporis, paroxysmi febrium intermittentium non obscure declarant. Procul enim omni dubio harum febrium minera primis in viis delitescit, & ex universo corpore, per glandulas, ductus biliosos & pancreaticos, in hæc loca descendit, & ex mora, dum firmius tenuium intestinorum valvulis ac tunicis inhaeret, corrumpitur ac pessimam indolem contrahit, & nonnisi spasmis, qui in prima regione in-

Frid. Hoffmanni Oper. Tom. I.

cipiunt, omnia illa, quæ febribus solent associari symptomata, absolvit. Nam extremorum frigus, tremor & horror partium, præcordiorum anxietas, pulsus in principio parvus & compressus, postea celerior, nausea, vomitus, faucium & linguæ ariditas, sitis, dolor dorso & capitis, tensio abdominis, constrictio alvi, urinæ tenuis & flammæ sine sedimento secessio, pandiculatio, oscitatio, dolor ossa quasi contundens: perfectio nullam aliam nanciscuntur originem, quam quod plexus stomachicus & mesentericus, qui ex intercostali & octavo pari concresecunt, vehementi spastica tractione & constrictione laborant. Quare etiam non certior & præsentior intermittentibus medendi est methodus, quam convenienti medicina mineram febrilem temperandi, expellendi & vehementes spasmos compescendi, postea afflicta & debilitata partes roborandi. In eo tantum unice latitat intermittentes curandi arcanum, ut pro diversitate causarum, individuorum ac temporum, hæc remedia debito ordine, tempore ac dosi offerantur.

§. XXI.

Sigillatim vero maximus observatur consensus inter capitis membranas, ipsumque ventriculum. Rectissime hinc scribit *Baglivus* pag. 565. *qui laborant animi pathemate, potissimum corripuntur morbis ventriculi, ut inter cetera observavi in morientibus, qui conqueruntur primo de languore ventriculi, mox inappetentia, oris amaritie, sui circa horas matutinas, cruditatibus, flatibus & tensionibus hypochondriorum.* Eamque ob rem monet Medicos, ut in morbis ab animi pathematibus præ ceteris ventriculo prospiciant. Ego non semel sed sæpius à diuturno animi angore & moestitia, in hominibus antea sanis, hilaris animi & sanguineæ complexionis, affectum hypochondriacum, qui potissimum in ventriculo consistit, subortum fuisse, vidi, anxium scilicet dolorem circa præcordia, inappetentiam, languorem, inquietudinem, moestitiam sine causa, alvi constrictionem, continuam eructationem & inflationem circa cordis scrobiculum.

Consensus ventriculi cum capite.

§. XXII.

Ira quoque potissimum operationem suam exercit in ventriculum & duodeno connexos ductus nervosos biliosos, unde frequentissime ii, qui ira excanduerunt, cardialgiam, contractionem circa scrobiculum cordis, cum ardore, propensione ad vomitum, oris amaritie & alvi obstipationem experiuntur. Et tunc nihil deterius est, quam frigidum potum ingerere, quo affectum perfecte hypochondriacum optime antea valentibus inductum, sæpe observavi. Longe autem perniciosius est, sub tali spastica stomachi ex ira constitutione, drasticum aut emeticum porrigere, quandoquidem ex facili inflammatio ipsaque mors accedit, quod pluribus in dissertatione: *de medicina emetica & purgante post iram veneno*, asserui ac demonstravi. Quam grave damnum ex ardentiori desiderio ventriculus experiatur, peculiaris ille Helvetis maxime familiaris affectus, nostalgia dictus, testatur, quo apud exteros degentes, tam impenso patriæ desiderio tenentur, ut, si patrios lares non repellant, appetitus prosternatur, digestio lædatur, flatibus & ructibus è cruditatibus gignantur, cardialgia accedat & cum languore ipsum corpus emacietur.

Quod testatur animi pathemata esse ira.

Et desiderium.

§. XXIII.

Immoderata studia & nimia per speculationes animi fatigatio incredibili modo debilitant ventriculum.

Animi fatigatio per meditationem.

D d

ventriculum ejusque vim digestivam enervant tonumque & robur auferunt, unde acidæ cruditates gignuntur, quæ ad suppressendam alvum, ad progignendas flatulentias malumque hypochondriacum, primum fere fundamentum ponunt. Quin immo sunt inter exempla hypochondriaco malo obnoxii, qui simul ac impenso-
re meditatione animi nervos nimis intenderunt, illico anxietates præcordiorum, ructus è stomacho & borborygmus in ventre, persenserunt. Vertiginem ex ipso ventriculo fieri, vel ex eo cognoscitur, quod, si quis jejunos sit, maxime affligat, sumto vero cibo, minuatur, atque post ea, quæ primam regionem clementer expurgant & digestionem juvant, plane discedat. Meminit etiam *Lommius Lib. II. Observat.* suffusionis seu incipientis cataractæ, ex stomacho proficiscentis, & asserit, talem suffusionem intermittere & remittere, si curata coctione prospectum stomacho est, invalescere & reverti, si is cruditate labefactetur. Ventriculo bene habente, totum corpus alacrius est, somnus fit placidus, si vero onustus est alimentis incongruis, præsertim circa noctem sumtis, somnus deficit, vel insomniis terrificis interturbatur. Nihil frequentius est, quam quod ventriculo vino non adeo bonæ notæ nimis obruto, ex retenta vappa, acorem corrosivum contrahente, postridie atroces capitis dolores oboriantur.

§. XXIV.

Capitis dolores, vulnere aliaque phænomena.

Eundem ventriculi consensum cum capite adstruit; quod si caput gravius doleat, omnis ciborum appetentia pereat, multæ cruditates flatuum genetrices crescant, alvo strictiore reddita & stomacho ad vomitum inclinante. Graviore etiam cerebri morbi ventriculum mox in consensum rapiunt, unde observamus, in iis, qui apoplexia tanguntur, ventriculum ad subversionem stimulari. Ubi mens ægrotat & duram matrem spasmus corripit, cibi est fastidium, tormina & anxietates præcordia exercent, & ructus cum impetu erumpunt, alvo stricta & magna in pulsibus facta mutatione. Nemini facile obscurum est, quod ii, qui graviter vulnerantur, vel læduntur in capite, vomitu & ciborum fastidio afficiantur; ac quod vicissim ventriculo laborante, ipsum caput gravius luat. Pariter scriptorum medicorum fide constat, à comesto solano, furioso dicto, atque in ventriculo adhuc hærente, maniam productam fuisse, & semen hyoscyami, & maxime daturæ, majori paullo quantitate exhibitum, promptissime ingentem torporem, stuporem, ac omnium sensuum internorum & externorum usum abolere & phantasmia corrumpere.

§. XXV.

Dentitionis symptoma-
ta.

Et quia nervi stomachici & intestinorum, ex intercostali & octavo pari coaliti, cum pari quinto, cujus ramus ad maxillas & dentes fertur, communicationem habent; hinc fit, ut infantibus, ob gingivalis carnis ab erupturo dente lincinationem, non modo in capite convulsiones, vigilæ & epilepsiæ, in pectore asthma, in corde febris, & inferiori ventre tormina cum alvi adstrictione, vel nimia ejus fluxione, contingant, & quod notabile est, feces virides & corrosivæ secedant, eo quod, à spastica harum partium sub dolore contractione, ingesta non alvo exclusa, sed diu retenta, acefcant & corrosivam indolem accipiant. Ex quo judicare promptum est, quam imprudenter & temerarie ii fa-

cient, qui in dentitionis difficultate, ubi spasmus genus nervosum vehementer torquent & feces virides sunt, purgantia acria & cum mercurialibus mixta, iterum iterumque propinant, tristi eventu præposterum ejusmodi consilium satis confirmante. Atque ob eandem communionem, quam nervi stomachici & intestinales cum pari quinto foveant, accidit in gravioribus stomachi spasmis, qui fiunt à veneno vel validiori purgante aut emetico sumto, faciem fieri Hippocraticam, tempora collabi, vultum pallescere & nasum acuminari. Neque semel, sed iterum iterumque notavimus, in pathematibus hystericeis vultus deformitatem & aspectu horribiles oris, labiorum & oculorum distorsiones.

§. XXVI.

Proxima vero stomachi est societas atque connexio cum œsophago, propter tunicarum communionem; hinc fit, ut à pluma vel digito tantum faucibus intruso, principium œsophagi irritante, protinus ventriculus, præsertim humorum copia onustus, subvertatur & vomitio fiat. Fumus quoque tabaci ore suctus stimulat alvum, nullam, mea ex sententia, aliam ob causam, quam quod hic fumus sale suo volatili acri tunicas oris & faucium irriteret, è quibus propagato ad ventriculum motu, is contenta citatius protrudat ad intestina & anum. Et quando in ventriculo acris residet humor, vel inflammatio est, œsophagus cum faucibus moleste constringitur, ita, ut non raro copiosa aqua in os effundatur, quod unum ex pessimis indiciis est. Infantibus quorum ventriculus saburra causticæ bilis infarctus est, convulsionis certa species molesta & fatalis est, dum ii, spasmo gulæ affecti, continuo deglutire coguntur & certum sonum cum quodam singultu edunt, quæ symptomata identidem ab irritatione ventriculi, œsophago, faucibus & diaphragmate in consensum raptis, oriuntur. Fovet quoque ventriculus consensum cum intestinis: unde sub atrocissimo intestini ilei vel etiam coli dolore, vomitus tam vehementes fiunt, ut non modo in intestinis contenti humores, sed & ipsa stercora haud raro sursum ferantur.

§. XXVII.

Deinceps magna est consensio ventriculi & annexi duodeni cum ipsis biliariis ductibus, eam maxime ob causam, partim quod ductus chodochus per duodeni membranas feratur, partim, quod dexter nervi intercostalis & paris octavi ramus, qui ventriculum adit, ramum quoque ad hepar ejusque biliferos canales mittat. Propter hunc itaque consensum fit, ut spasmo ventriculi & duodeni, qui in febre tertiana observatur, item à vehementi vomitorio, vel purgante, aut veneno assumpto, nec non ab atroci dolore colico, icterus oborietur. Infantes tertio vel quarto à partu sapius die ictero corripiti, ex retentione mœconii in intestinis, auctor est *Baglivus Operr. pag. 38.* Iracundiæ vehementiori icterum supervenire non novum est; siquidem ab hoc affectu patitur maxime fibrosior & robustior pars ventriculi, quæ pyloro adjacet, dum constringitur: unde ordinario in dextro circa scrobiculum cordis latere, ab ira, dolor compressorius, cum ascensu bilis ad os, observatur. Quod si vero vel calculo, vel bilioso alio concreto tartareo humore, in vesicula fellea aut ductibus biliariis contento, horum tunica nerveo-musculosa violenter tenduntur; in consensum

Consensio
stomachi
cum œsophago.

Cum ductibus
biliariis.

sum quoque abripitur ventriculus, & hinc immanis cardialgia, nausea, vomitus cibique fastidium cooritur. Memorabilis & lectu dignissima est observatio, quam *Misc. nat. curios. A. VI. Dec. I. obs. 20.* referunt: ubi mulier immanem dolorem & lancinatorium ventris per triginta fere annos passa est, cujus originem & causam sagacissimi etiam Medicorum vix hariolari poterant, post mortem autem inventus est ingentis magnitudinis calculus, qui totam fere vesiculæ felleæ cavitatem implevit. Eandem quoque in rem *obs. 61. Sculteti in armamentario*, conferri meretur.

§. XXVIII.

Porro exquisitam ventriculus cum diaphragmate & pulmonibus fovet communicationem. Quid enim familiarius est, quam in infantibus stomacho refrigerato, vel materia acri ejus tunicis inhærente, singultum concitari, qui thoracis est convulsio? Quid solennius est? quam à cruditate ventriculum obsidente, vel sero acri intra ejus membranas detento, tussim nasci convulsivam, in infantibus non raro suffocatoriam, quæ pectoralibus & dulcibus assumtis plus exacerbatur, acrimoniam vero corrigentibus, emollientibus atque discutientibus, neque minus lenioribus laxativis, expugnatur. Quid porro crebrius occurrit in praxi, quam quod à violenta tussi, vitio hærente in bronchiis, vomitus conciteretur? Nihil quoque frequentius est, quam quod ab inflatione ventriculi summa fiat spirandi angustia cum suffocationis periculo, quod symptoma in infantibus, quorum ventriculus lacte corrupto factus est, sæpius visitur, ubi leni emetico, vel quæ leniter alvum ducit medicina, omne punctum curationis absolvitur. Quin in convulsiva tussi ex stomacho, tantam pectoris vidi concussionem, ut sternutatio impetuosa & reiterata, cum ingenti sanguinis vel lymphæ profusione è naribus, facta fuerit.

§. XXIX.

Præterea magnæ considerationis ea est sympathia, quam renes cum ventriculo & intestinis, propter communionem nervorum, alunt. Nimirum nihil familiarius est, quam quod dolores ex calculo perpetuo fere nausea & vomitus comitetur, & calculosos tormenta intestinum torqueant. Nam quando ren calculo laborat, abdomen semper multis flatibus turget, qui majores faciunt molestias, quo gravior dolor est, immo ipsæ flatulentia sæpissime dolorem renum provocant & calculum in ureteres urgent. Providendum itaque est calculo obnoxiiis, ne abdomen frigori exponant, alias facile dolor renum irritatur. Si quis dolore ex calculo premitur, digestio turbatur, stagnant ingesta in ventriculo, acefcunt & bilis viridis evomitur. Et faciunt tunc egregium officium clysteres carminativi & emollientes oleosi, nec non omnia ea, quæ citra calorem flatum dispellunt & dolorem lumborum mitigante facultate pollent. In spasmodicis flatulentis ventriculi, qui affectione hypochondriaca vel hysterica detentos torquent, molesta crispatura identidem ad renes pertingit, ita prorsus, ut eorum tubulis constrictis, urina alba mingatur, quæ certum fere paroxysmi hysterici vel hypochondriaci imminentis indicium præbet.

§. XXX.

Neque exiguus ventriculi consensus est cum pedibus, qui innumeris tendinibus & nervis atque membranis constant. Quum enim nervus

Frid. Hoffmanni Oper. Tom. I.

intercostalis ad crura etiam pertingat, & nervum cruralem anticum & posticum constituat, mutua hinc inter caput, ventriculum & pedes consensus nascitur. Ex quo jam facile patet, quare digitorum in pedibus immanem dolorem, quod aliquoties vidimus, spasmus cynicus subsequatur, & quare ex pedis pollice epilepsia non raro originem capiat, dum spasmus ibi incipiens, successive ascendit, & primo ad abdomen, postea ad cor & diaphragma, tandem ad caput delatus, abdominis tensiones, præcordiorum constrictiones, pectoris oppressiones, aphoniam, denique convulsiones & epilepsias producit. Ægroti exprimunt, sensum quasi venti à pollice ad caput sursum ascendere ac elevari, quæ tamen in sensu est fallacia; siquidem nullus datur flatibus locus ita per solidam substantiam ascendendi, sed spasmi sunt, qui oscillatorio quodam motu successive per nervorum propagines ad superiora serpunt. Notum quoque est, ex incessu nudis pedum plantis in pavementum frigidum, nec non improvida pedum refrigeratione, cutim per omnem corporis ambitum stringi & tormina ventris, nonnunquam cum alvi fluxu, arcessi.

§. XXXI.

Tandem nec silentio prætermittere oportet sympathiam, quæ est inter ventriculum & ipsam cutem. Videmus exanthemata, quæ in cute efflorescunt, cujusque etiam fuerint generis, repulsa, non sine ingenti periculo ad ventriculi & intestinum tunicas migrare, ubi feræles spasmos, tormina, anxietates, constrictiones alvi & inflammationes efficiunt. Quare etiam omnia, quæ spasmum in ventriculo concitant, ut sunt purgantia & animi pathemata, in exanthematicis morbis admodum perniciose esse observantur; quandoquidem contracta ex consensu simul ipsa cute acris illa exitialis materia ad interiora, ipsasque nerveas ventriculi & intestinum membranas, revocatur. Et sæpius quoque observavimus, ab induriorum, præsertim si frigida & humida fuerint, mutatione, in sanis etiam, ventris inflationes & inquietas noctes redditas fuisse. Quo patet, quam gravem noxam ejusmodi improvidus ausus in morbis, quorum materia per summam cutim expelli debet, causetur. Quandocunque dolor ventriculum vel intestina torquet, pori cutis clauduntur & nihil sudoris effluit, extrema refrigerantur, meatibus vero cutis rursus adaperitis, certum indicium est doloris aut alvi fluxus finem adesse. Si variorum materia subtilis caustica intestinum membranis infidet, ægri sunt inquieti, jactabundi, loco stare nesciunt & ne minima pustula prodit in cute, neque sudoris guttula profilit, alvo contracta & convulsiva, adeo ut universum cutis systema contrahatur, quod probe notavit *Baglivus*.

§. XXXII.

Neque tantum ventriculo, verum etiam intestinis, quæ ejusdem cum illo naturæ & structuræ sunt, ex tunicis nempe pariter musculosis & nerveis contexta, cum universi corporis tunicis membranaceis societas est atque consensus, ob plexum maxime mesentericum, intercostalem & paries vagi, quem præter alia truculenta universi generis nervosi pathemata, quæ à vermibus, teneras tenuium tunicas arrodentibus, suscitantur, testatum reddunt. Neminem enim, qui leviter in artis exercitio versatus est, fugit, inde pullulare in capite epilepsiam, deliria, vertiginem, sternu-

Dd 2 tationes,

tationes, guttam serenam temporariam, aphoriam, surditatem & tinnitum aurium transitorium; in spinali medulla, aspectu horribiles motus convulsivos & artuum agitationes; in corde & systemate valorum, febres, cordis tremores ac palpitationes; in pectore, tusses, dolores, qui pleuritidem mentiuntur; in ventriculo, inappetentiam, inclinationem ad vomitum, ptyalismum & lymphæ ex ore fluxum; in intestinorum volumine, atrocia tormina; in urinariis viis, ad urinam stimulum; in extremis, horripilationes & refrigerationes, manuum pedumque contracturas: quæ cuncta symptomata, primo aspectu admodum funesta, exturbata à specifico anthelmintico, pilulis nempe ex asa foetida, mirrha, croco & mercurio dulci paratis, verminosa progenie, protinus sedantur & conquiescunt.

§. XXXIII.

Colica sic dicta convulsiva & iliaca.

Colica sic dicta convulsiva & passio iliaca, quibus intestina, ileon, vel colon, vehementi spasmo constringuntur, quot non atrocia, & nonnunquam lethifera symptomata inducunt? febres, deliria, convulsiones, inquietudinem, summas anxietates, animi deliquia, artuum contractiones, extremorum frigora, cum sudore frigido & pulsu duro & contracto, vomitus, alvi tam insolentem constipationem, ut nec clysterem admittat, vel flatum transmittat. Eiusdem indolis sunt acerbissima pathemata in colica spasmodica metallurgis solenni obvia, quæ sigillatim evolveri & ad rationes revocavi, in dissertatione *de metallurgia morbifera*. In cholera quoque quando bilis caustica nervosos intestinorum parietes rodit atque gravius irritat, omne nervorum genus compatitur, ac eadem plane, quam si venenum assumptum fuisset, prodeunt passiones, mortem celeriter arcessentes, quæ non aliis, quam quibus venenorum noxæ, demulcentibus nempe oleosis, lacticiniis, terreis & antispasmodicis, discutuntur; id quod etiam pari modo de dysenteria, ab eadem causa prognata notum est.

§. XXXIV.

Purgantium effectus.

Accedunt phænomena post purgans assumptum conspicua. Quamvis enim omnis generis cathartica operationem suam nonnisi in intestinis exsequantur, iisdem tamen oblati, dissitæ etiam partes annuunt. Elaterium quando hydropicis exhibetur, virtutem suam tam late diffundit, ut strictis in extremis quoque partibus fibrillis, stagnans humor ex universo corporis ambitu ad intestina agatur, ac per anum effuse exturbetur, subsidente postea notabiliter in exterioribus tumore. Similiter in tussi humida, qua magna humorum colluvies scretu è pulmonibus ejicitur, nullum certius atque efficacius præsidium est, lenioribus & balsamicis laxantibus, quibus superfluum serum è pectore ad intestinales glandulas allicitur & per alvum educitur. Inprimis autem imprudens purgantium usus, intestinorum cum reliquis nervosis partibus, ac præsertim spinali medulla, conspirationem, prodit. Præterquam enim quod *Solenander* in consiliis & *A. N. C. Dec. II. A. VII. obs. 162.* fidem faciant, quod grave damnum inde in universum corpus redundarit, ipse quoque aliquoties notavi, propinata in pulvere vel pilulis resina jalappæ, non solum enormes cum acerbis torminibus successisse dejectiones, sed etiam in quibusdam convulsiones, epilepticas commotiones, quin in aliis paralyfin dextri & sinistri lateris accidisse, hanc procul dubio ob rationem, quod re-

sina jalappæ, quæ facile in liquido aqueo conglobatur & difficillime liquefcit, firmiter partim cuidam nerveæ intestinorum tunicæ adhæsit, eandemque jugiter lancinando, convulsivas ejusmodi in dissitis etiam locis spasticas tractiones suscitavit.

§. XXXV.

Viget itaque consensus inter partes nervoso-membranaceas mutuus, qui an etiam his, cum visceribus sic dictis sanguineis, quorum structura & compages ferme tota vasculosa, ut sunt hepar & lien, nec non uterus, intercedat? jam paucis dispiciendum. Plurimi quidem ex Practicis, quos inter maxime eminet *Willisius*, consensionem uteri cum nervoso totius corporis systemate constanter asserunt, imprimis quum experientia fere quotidiana doceat, quod affectio hysterica, quæ ex vitio uteri & sanguinis irregulari motu in foeminis æque ac in puerperis cooritur, pathematibus spasticis, convulsivis, epilepticis, quæ præternaturales generis nervosi læsi affectus sunt, absolvatur. At vero ipse uterus minime partibus nervosis exquisitæ sensationis annumerari potest, utut motu tonico suo & interno non destituatur. Nam si talis esset, nequam summas illas sæpius à gemellis distensiones in gravidis, item à tumoribus & excrecentiis intra ejus cavitatem ipsamque substantiam prognatis, sine summa molestia & vitæ periculo, ferre posset.

§. XXXVI.

Quare recte distinguendum potius esse censeo, inter sedem morbi, sive spasmodicorum, quæ nullo modo est in utero, ac inter sedem causæ morbi, sive pathematum spasmodicorum in genere nervoso existentium, quorum causam ipse uterus male affectus subministrat. Neque quidem inficiandum est, quod si ob dejectum uteri & ejus vasorum tonum ac robur, sive à puerperio, sive ab aliis causis externis & internis, sanguinis superflui menstrua periodo non sufficiens fit diminutio, sed fluxus supprimitur & cohibetur, gravissima inde sæpius in universo corpore, inque primis ejus partibus nervoso-membranaceis, oboriantur symptomata; horum tamen ratio non à nervis, quos sensibiles hæ partes cum utero communes habent, sed potius à sanguine, ad interiora ac sentientes nobiles partes retagnante, petenda est ac derivanda. Et hanc etiam *Hippocratis* fuisse sententiam, auctor nuclei *Hippocratis Cent. III. aph. 44.* clarius exponit, *refluens*, inquit, *sanguis ab utero & pre-mens septum transversum, retracto utero, præsecationem, in caput irruens, insaniam, epilepsiam, catochos, apoplexias; occupans thoracem, tussiculares affectus; irruens in cor, palpitationes & tremores, nonnunquam syncopes, in nervis denique faciei stuporem, immobilitatem & resolutionem.*

§. XXXVII.

Ego proinde re paullo curatius expensa, præcipuam pathematum hystericorum sedem in ventriculo & canali intestinorum collocandam esse arbitror. Nam anxietas illæ constrictiones & angustia circa præcordia, dolores cardialgici, qui ad dorsum, ubi sinistrum ventriculi orificium, porriguntur, palpabilis stomachi circa scrobiculum cordis inflatio, continuæ eructationes, nausea & ad vomendum proclivitas, alvus firmiter obferata, cum flatuum retentione, & regurgitatione ad superiora, borborygmi, tormina, convolutiones intestinorum instar globi, molesti

Viscera sanguinis non cum nervis sentiuntur.

Ut uter.

Mali hysterici causa quid in utero.

Sedes in ventriculo & intestinis.

molesti dolores in hypochondrio sinistro, dolor circa vertebrae lumbares, creber ad urinam stimulus, extremorum frigus, inquietudo, pulsus celerior, contractus, vel plane intermittens, animi defectio, cordis palpitatio, quæ perpetua fere passionis hystericae sunt symptomata, nihil certe aliud subindicant, quam nobilissimam & ex præcipuis sensibilem maxime partem, ventriculum nempe, esse affectam. Quare etiam omnia ea, quæ spasticas strictureas efficaciter leniunt & laxant remedia, ut sunt fons calidus præcordiis applicatus, interne liquor noster sic dictus anodynus mineralis, seu summum & tutissimum antispasmodicum, vel solus, vel cum essentia carminativa, aut castorei, remixtus, & clyster oleosus emolliens, præsentissimæ & fere miraculosæ sunt efficaciae. Horum quippe atrocium ventriculi spasmodorum proxima causa, non sunt acres, biliosi, vel viscosi, crudi succi in stomacho contenti, sed solus sanguis copiose irruens in vasa ventriculi, quæ quum tunicis ejus nervosis intertexta sint, nimia distensione has fortiter premunt, & hac ratione jam memoratas passiones gignunt. Hinc etiam ratio patescit, quare foeminae, quibus menses post quinquagesimum annum deficiunt, si non sanguinem, vel per scarificationem, vel per incisionem venarum, emittunt, aut etiam consuetas has artificiales evacuationes omittunt, hysterici ejusmodi spasticis affectionibus, præ omnibus aliis excruciantur: & quare vicissim institutæ opportune ejusmodi sanguinis subtractiones, paroxysmos hystericos certis periodis redeunt, vel minuunt, vel penitus tollant.

§. XXXVIII.

Idem de hepatis & lienis viscere sentiendum. Nam licet nonnulli inter hæc & nervosas partes consensionem adstruant, & potissimum ad pathemata in malo hypochondriaco, sub quo labe & vitium plerumque in sanguineis hisce visceribus consistit, conspicua provocent; ambo tamen, hepar & lien, præsertim humanus, partes, ut luculenter injectionibus suis cl. *Ruysschius* demonstravit, sunt fere totæ vasculosæ, ex innumeris quippe vasis majoribus, minoribus & minimis contextæ, sensus plane expertes, ut hinc sæpe sine acuti doloris perceptione intumescere ac etiam in magnam molem augeri possint. Interim tamen, si ipsarum compages, & maxime quidem vasa, quæ sanguinem ad hepar, ut est vena portæ, adducunt, convenienti tono ac robore & vi sufficienter motrice impellente destituuntur, promptam spasmodorum in nervosis locis causam subministrant. Nam quando sanguis à ventriculo, toto volumine intestinorum, mesenterio, liene, omento & pancreate refluus, per truncum venæ portæ, qui manifesta systole sive pulsu caret, per minimos copiosissimos hujus venæ in hepatis parenchymate propagines, non satis expedite trajicitur, necesse est, ut regurgitans ad viscera unde advectus, in iisdem non modo stagnet & canales farciat atque distendat, sed & ulterius, ut appulsus per arteriam celiacam & mesentericam a tergo ad has partes sanguis, præcluso in venas repletas transitu, ad vasa minima & lateralia cogatur, & sic undiquaque obhaerescens in vasis nervosæ maxime ventriculi & intestinorum tunicae insinuat cruor, molesta pressione strictureas & trunculentos spasmos cieat. Et hac utique ratione omnia illa pathemata, quæ hypochondriacos per certos insultus vexant, affectiones & læsiones generis nervosi sunt, ac ut

Frid. Hoffmanni Oper. Tom. I.

probe primus *Willisius* & *Hobokenius* notarunt, exquisitam convenientiam eandem quoque sedem cum hystericiis pathematibus obtinent. Minus enim recte secundum Veteres, ac ut nonnullorum recentiorum adhuc opinio fert, dolores & passiones in latere sinistro, lieni adscribuntur, quum potius stomacho, cujus tres partes in hoc latere conduntur, nec non subjectis coli flexuris, ut inter alios primus cum *Conringio* docuit *Ettmüllerus*, debentur. Ipse quoque ante aliquot annos peculiari dissertatione monstravi atque defendi, quod præcipua sedes spasmodorum hypochondriacorum in ventriculo sit constituenda.

§. XXXIX.

Neque etiam ut plurimorum recentiorum est sententia, cruditates vitiosæ primis in viis stabilantes acidæ & viscidæ biliosæ, primam, originalem & veram causam pathematum hypochondriacorum suppeditant, sed sequuntur demum spasmos & eorum productum sunt, licet ad eorum recursum & exacerbationem multum conferant, & ipse potius sanguis copiose circa hæc viscera stagnans, sive harum partium plethora particularis, accusanda. Testatur hoc inter alia cura affectus hypochondriaci, in qua quidem ea, quæ spasmodis placandis, strictureis partium fibrosarum relaxandis dicata, insigne levamen afferunt; nisi tamen redundanti sanguini exitus pareretur, ac is vel per sanguinis missionem in partibus inferioribus, vel fluxum hæmorrhoidum, si natura ad eum inclinaret valde salutarem, exsolvatur, aut ejusdem progressus aquarum mineralium, balneorum & medicamentorum roborantium tonicorum usu, vel etiam per motum & exercitium corporis, liberior reddatur, ac per vasa venosa mesenterica ipsumque hepatis & lienis viscus restitatur, certum & constans vix, aut plane non, sperare licet auxilium.

§. XL.

Is autem à nobis assertus nervosarum partium consensus, quemadmodum tam eximius est atque conspicuus, ut venenum, vel etiam alia infesta materia, nervoso, ubicunque sit loco, insidens, vel in ventriculo contenta, illico vires suas perniciosas cum universo nervorum systemate communicet: ita simili ratione pharmacum efficacis ac penetrantis indolis, accisa etiam dosi exhibitum, immo adhuc in stomacho versans, mediante eadem nervorum conspiratione, protinus vim suam in universum corpus diffundere potest. Liceat in confirmationem producere liquorem à nobis inventum & ex sulphure mineralium concinnatum, jure dictum anodynum mineralem, gratissimæ & penetrantissimæ indolis, qui certe, si ullum aliud medicamentum, promte, sine noxa tamen, dolores & spasmos in universo corpore levat atque sedat, & in pathematibus hypochondriacis, hystericiis, gravi cardialgia, enormi vomitione, commotionibus etiam epilepticis & convulsivis, singultu, diarrhoea, ad guttas tantummodo XXX. vel XL. semel aut bis, oblatus, præsentaneum & mirabile plane præstat auxilium. Massam pilularum ita dictarum de styrace ad aliquot tantum grana deglutitam, in tussi ferina, quæ universum corpus affligebat & concutiebat, omnibus aliis frustra exhibitis, singularem plane effectum sedativum exseruisse, sæpius observavi, subsequuto simul blando cutis, quæ ante frigida, horrida & exsucca erat, madore.

Hinc rursus
dicitur non
fuisse causam
mali hypo-
chondriaci

Consensus
restatur
medica-
mentorum
opiratio.

Liquor
anodynis.

§. XLI.

*Aliorum
sedativo-
rum cran-
i spasm-
dicorum.*

Pauxillum laudani liquidi si vel solum, vel cum liquore volatili Bussii, aut cornu cervi succinato remixtum, in enormi, etiam cruenta, alvi dejectione, porrigitur, protinus, quando adhuc in ventriculo hæret, atroces cruciatus in abdomine, borborygmi & motus conquiescere incipiunt, somno blando obrepente. Idem medicamentum si in pathematibus hystericis, quæ universum corpus exagitant spasticis, datur, mox mirabile sequitur levamen. Pariter in enormibus sanguinis profusionibus, hæmoptysi nempe, narium hæmorrhagia, ab assumtis aliquot granis massæ pilularum de cynoglossa, vel aliquot guttulis liquoris martialis, sæpe extemporaneam vidi fluxus adstrictionem. Oleum amygdalinum bene præparatum, & cum jusculo ad aliquot cochlearia ingestum, præbet medicinam in omnibus doloribus & spasms, etiam diffitas partes quatientibus, efficacissimam; eaque propter in tussi convulsiva clamosa, asthmate spasmodico, dolore ex calculo, stranguria, colica, non sine insigni fructu usurpatur. Nitrum saltem vulgare, probe depuratum, ad aliquot grana datum, protinus fervorem præternaturalem extinguit, vel ad sensum refrigerat, sitim sedat, commotiones sanguinis hæmorrhagicas sistit, cutim ad madorem disponit & alvum lubricam reddit.

§. XLII.

*Corticis
Peruviani.*

*Pilularum
balsami-
capum.*

*Cephalico-
rum.*

*Et clyste-
rum.*

Corticem Peruvianum, pulverem florum chamomillæ, crocum martis subtilissimum, quem fontes Lauchstadiensis eructant, ad sistendos febriles in intermittentibus motus summa pollere efficacia, res est nec leviter in praxi versatis ignota. Longe etiam præstantissimus certe est effectus, quem pilulæ balsamicæ, leniter aloeticæ, in omnibus fere uteri affectibus, atque etiam in hypochondriaca passione, exsequuntur, dum ad foetum, secundinas, molas, immo lochia expellenda in puerperio, præ omnibus aliis purgantibus & uterinis eximie conferunt, non aliam ob causam, quam quod peculiari ratione, non modo intestina, sed & confines partes atque vasa uterina solentur & afficiant. Has tamen cum plerisque reliquis non facile primarum viarum limites operatione sua transcendere, veri videtur simillimum. Ad vires à senio vel morbo collapsas restaurandas, nec non animo deficientes refocillandas, balsamum nostrum liquidum spirituosum, exterius & interius usurpatum, singularem præstat opem; contra vero suaveolentia ex moscho, ambra, zibetho, si naribus tantummodo offeruntur, hystericis vel hypochondriacis, totum genus nervosum in consensum trahendo, sævissima symptomata, ut syncopen, cordis palpitationes, anxietates summas, nausæam, vomitum, immo convulsiones quandoque, arcessunt. Clysteres oleosi demulcentes in colica convulsiva & paroxysmis hystericis & hypochondriacis levamen afferunt exoptatissimum, eo quod non tantum in intestina, verum etiam in alias nervosas partes suam maxime distribuunt facultatem.

§. XLIII.

*Item speci-
ficorum.*

Neque dissimilis mihi specificorum sic dictorum videtur ratio, ut castorei & asæ foetidæ in pathematibus hystericis placandis, pulveris secundinæ humanæ, cranii & corii humani, in epilepticis insultibus sedandis; hæc enim dum ventriculi & intestinorum tunicas nerveas ἀναστυλάσσει sua mulcent ac imbuunt, ex his ad diffitas etiam

atque remotas partes virtus propagatur. Fuit nobis à multis abhinc annis in usu singularis quidam mercurius diaphoreticus fixioris naturæ, qui ad pauca grana adhibitus, in lue venerea & morbis à summa lymphæ impuritate nascentibus, sudorem per multas hebdomades eliciendo, mirabilem præstitit opem. Sic quoque sulphur antimonii, si rite præparatum fuerit, quo etiam referenda panacea sic dicta Glauberiana, nec non regulus antimonii medicinalis, duorum vel trium granorum pondere oblata, acres & falfas diu durantes in oculis, faucibus quoque ac pedibus defluxiones resiccant, simulque perspirationem ac respirationem liberiores reddunt.

§. XLIV.

Et hæc tam singularis & late patens interorum quorundam medicaminum virtus, in externis quoque, ob eandem partium sympathiam deprehenditur, ut miro plane modo in extremis sæpius interiora leventur. Exemplo sit vesicatorium, vel emplastrum Strobelbergeri, quod carpis applicatum, paroxysmos intermittentium experientia teste, compescit. Pariter vesicatorium nuchæ appositum lippitudinem discutit, & in apoplexia tactis sufflaminatum sensum sanguinisque motum reducit. Oleum terebinthinæ umbilico tantum illitum, in urinæ suppressione efficacissimum est remedium. Unguentum, de arthanita dictum, umbilico inunctum, alvum non solum efficaciter movet, sed etiam vermes in intestinis necat. Emplastrum anodynum temporibus appositum, non modo capitis dolores placat, sed & vomitiones sæpe enormes sistit. Linimentum spirituosum ex oleis oromaticis paratum & præcordiis admotum, tam ventriculo, quam toti corpori vigorem præstat. Frictio quoque artuum & maxime præcordiorum asperior, suspensum in syncopitici cordis pulsus revocat.

§. XLV.

Egregia porro huc trahenda est observatio: quod in morbis capitis, quæ ex atonia & imbecillitate nascuntur, ut memoriæ ac sensuum debilitate, paralyfi, quæ sæpe post apoplexiam relinquitur, item somnolentia, vesicatoria & rubefacientia pedibus applicata, efficacissimo sint præsidio. In iisdem morbis capitis ex resolutione ac remissione nervorum subortis, capiti admota spirituosæ cephalica aromatica; omnes non æque ferre quidem possunt, ut potius sæpe magis inde lædantur: si vero pedes iisdem perfriantur, ut aqua Anhaltina cum oleo majoranæ & lavendulæ, caput inde allevamentum percipit præsentaneum; & vidi aliquando, hac ratione in affectu soporoso, largiorem pituitæ ex naribus & faucibus effluxum suscitatum, summo subsequente levamine. Rubefacientia quoque plantis pedum applicata, sanguinis è naribus stillicidium comprimunt. Qui difficulter sudant, appposito plantis latere calefacto, sudore perfunduntur, si vero manus & pedes sub sudore nudantur, perspiratio illico sistitur. Et pediluvia temperate calida, quid in capitis morbis & omnibus passionibus spasmodicis efficiant, tam notum est quam quod notissimum.

§. XLVI.

Sed ne latius evagemur, mittimus alia, ac interim ex allatis insignem consensionem & magnam conspirationem partium in corpore sensibilibus liquido patere arbitramur. Quo magis mirandum censemus, esse adhuc inter medicos, qui hunc nervorum

nervorum consensum plane negare, imino pro fabula venditare, haud verentur. Sed videant, rogo, novaturientes hi doctores, qui sapientiam medicam in obscuris, metaphysicis, noviter quoque confectis terminis quærent, & universam fere pathologiam ex moliminibus naturæ ad hæmorrhagicas excretiones consarcinant, quo pacto cum connexion ac demonstratione, ex spiritali sua natura, hæc vera & per experientiam confirmata phænomena, deducere atque explicare possint. Ego certe, si ullam in rebus medicis doctrinam scitu perquam necessariam & utilem, hanc ipsam de consensu, fructuosam judico, & his egregio *Hippocratis lib. de aliment. §. 4. effato finem impono: confluxio una, conspiratio una, & consentientia omnia.*

CAPUT VI.

De fluidorum vitiis ex vitiosa solidorum dispositione.

§. I.

Fluida à solidis vitiis partium.
Perlustravimus in superiori capite mutuam illam conspirationem & harmonicum consensum, quem partes corporis nervosæ exquisitoris sensationis & motus inter se fovent; ac pluribus argumentis asseruimus, quam utilis & scitu necessaria in rebus medicis explicandis hæc sit doctrina: nunc porro sequitur, ut solidorum, si vitio laborant, in fluida corporis nostri actionem & ad pervertendam naturalem eorum constitutionem monstremus ac eruamus operationem; quod certe argumentum, non minus eximie in pathologicis erit utilitatis. Jam nemo quidem facile negabit, machinam animalem ex solidis & fluidis esse constructam, & corporis vitam maxime in eo consistere, ut solida agant in fluida ipsaque moveant, & fluida rursus in solida eademque animent: ideoque hisce suppositis, nostra inpræsentiarum meditatio in statu tantum præternaturali & morbo erit defixa, clarius ostendendo, quid patiantur fluida à solidis læsis & præter naturam constitutis.

§. II.

Et quidem sub febrili motu.
Initium autem merito facimus à celeriter aucta reciproca systole & diastole cordis & artiarum, ac universi generis vasculosi ac fibrosi, quæ pulsu duro & celeri, velociori quoque sanguinis tam progressivo quam intestino motu, stipatur, in quo formalis febris ratio continetur. Sub auctiori hoc & adeo accelerato motu, in omni febre, cujuscunque sit generis vel speciei, sanguinis & humorum crasin, temperiem ac mixtionem incredibili fere modo immutari ac perverti experientia docet. Sanguis qui antea erat temperatus & sensu medico dulcis, bonæ consistentiæ, diuturniori intenso solidorum motu quassatus, à blanda sua temperie plane desciscit, falsus, sulphureus ac biliosus redditur, ut demum in excrementa pæne fatiscat. Hinc sudor febricitantium falso-acidus ac foetidus, urina materia viscida, tartarea, sulphurea admodum saturata & tincta, & feces alvinæ, valde pituitosæ, biliosæ, coloratæ & foetidæ secedunt. Deinde validiori illa intestina sanguinis motione, partes subtiliores spirituosæ, quæ vires & motum materialiter constituunt, aufugiunt, materia sanguinis *πικρὰ*, dulcis, rosca, qua nutriuntur solida & quæ pla-

cidum somnum conciliat, consumitur, idque eo magis, quo vehementior ac diuturnior est febris. Quin crebriori observatu constat, commotionibus febrilibus demum vappidam sanguinis & humorum fieri massam, ut corpus aliis chronicis passionibus, cachexiæ, tumoribus œdematosis, exulcerationibus, abscessibus, viscerum scirrhis & infarctui facillime pateat, & profecto res non mediocris prudentiæ sit, febre intermittente vel acuta diu afflictum corpus sanitati & viribus brevi reddere, & commoda medicina atque diæta ab aliis morbis defendere.

§. III.

Sed hæc omnia longe deteriora sunt & cum majori periculo eveniunt; si febris apprehendit corpus, cujus vasa sanguine & humoribus impuris, sive particulis falsis, sulphureis, excrementitiis, sive diathesi scorbutica, jam antea imbutis, facta sunt, quippe tum major adhuc partium, quæ mixturam sanguinis constituunt, dissolutio corruptiva metuenda est, quam exanthemata varii generis, purpura miliaris, maculæ purpuratæ & pustulæ acri humore turgidæ arguunt, non sine summo virium & vitæ discrimine. Vidi sæpius in scorbuticis suborto levi tantum febrili à catarrhis motu, præsertim vere vel autumnio, materiam arthriticam vel purpuraceam in sanguine delitescentem, commotione ista excitatam & ad exteriora pulsam fuisse, sub atrocium dolorum & gravium symptomatum choragio.

§. IV.

Inprimis si corpus jam ante impurum.
Affectus animi, quorum operatio in solidas & nervosas partes impetuosa ac vehemens est, crasin ac temperiem humorum mirifice immutant. A diuturna tristitia & animi angore, succi corporis spissescunt & cruditates viscidæ acetosæ ventriculo ingignuntur, quin si diutius durat, à sanguinis spissitudine fiunt viscerum infarctus & chronicæ multæ passionēs. Ira, quæ vasa potissimum biliaria stringit eaque accelerata systole à bile nimis vacuat, simul quoque ventriculum & duodenum stricturis exagitat, efficit, ut humores biliosi in his coacerventur, corrumpantur & ad vomitus, febres biliosas cholericas, cardialgias, viam sternant. Quinque animi pathemata, maxime operentur in ventriculum, ejus motum invertant, digestionem & chylificationem lædant multasque hinc cruditates, foecundas morborum matrices, ingignant, nihil etiam perniciosius est, quam post omnes animi patheticas commotiones esculenta aut potulenta capere, vel etiam inter cibum & potum, vel post eum, animo gravius affici.

§. V.

Animi affectuum effectus in fluidis.
Vehemens membranarum capitis in atroci dolore spasmus, detinet etiam cibos in stomacho, concoctionem turbat, inappetentiam conciliat & cruditates excludit, quod etiam valet in dolore dentium. In dentitione infantum difficiliore, nihil occurrit frequentius, quam quod in paroxysmo feces antea naturales & bene coloratæ, virides & corrosivæ, cum acerbis torminibus & flatuum impetu, non sine convulsionum metu, secedant, dubio procul, quod à spasmodicis per dolorem gingivarum excitatis, ipse stringatur ventriculus cum tenui intestino, & lac diutius contentum ingentem corrosivum acorem contrahat, & à bile admixta viridis emergat color.

§. VI.

Dolorum operatio ex solidis in fluidis.
In omnibus porro doloribus & spasmodicis, cutis poros & spiracula claudi, subinde observamus.

Non mirum itaque est, ab excrementis subtilioribus salino-sulphureis, quæ in naturali statu exhalant, intus retentis, valde impuram sanguinis & lymphæ massam reddi, & inde vel morbum augeri, vel ad novos paroxysmos pabulum suppeditari. Alvus quoque ubi dolores & spasmi urgent, ut videmus in hypochondriacis & hysteri-
cis, semper fere clauditur. Quare à retentis for-
dibus & fecibus istis putridis salino-biliosis, & ad sanguinis massam vergentibus, hanc inde valde inquinari & conspurcari extra dubium est. Præterea in omnibus spasmodicis morbis urinam aquosam & tenuem reddi, ob stricturam tubulorum urinariorum, perpetuæ fere observationis est, neque dubium, quin vasa in hepate biliaria, quæ ex tunicis valde nervosis & musculosis contexta, hisce in morbis eandem experiantur crispaturam, ut hac ratione plures crassiores excrementitiæ, biliosæ & falsæ tartareæ urinosæ sordes in sanguine remaneant, eumque non leviter deturpent. Et hæc subest causa, quare in malo tam hypochondriaco, quam hysterico, ingens simul cacochymia, sive impuritas humorum scorbutica, successive ingeneretur, quam ipse sanguis è vena missus, coloris ob alcalium excrementi-
tiorum salium mixturam intense rubicundi, luculenter arguit. Ex hoc autem succorum vitio, plures postea passiones, cachexia icteritia, dolores, rheumatismi, inflammationes atque exulcerationes fecundo germine pullulant. Sed omnium pessimum est illud vitium, quando sub vehementi spastica strictura, ut fit à veneno, inflammationibus & doloribus, sanguis firmiter incarcerationis in sphacelosam putridam corruptionem abit.

§. VII.

Ex spasm
diaphrag-
matis hy-
drops.

Nihil frequentius in artis exercitio obvium, quam quod ab asthma spasmodico, quod validiori diaphragmatis spasmu potissimum absolvi-
tur, diutius affligente, hepar tandem obstruatur, induretur ac tumores œdematosi pedum ipseque dirus hydrops, ascites maxime sequatur. Quod quidem nullam profecto aliam ob rationem evenire arbitror, quam quod vehementi strictura portionis diaphragmatis nervosæ, cui adhæret hepar & emergens inde vas venosum cava, sanguinis recursus ad cor valde retardetur, & cruor, præcluso transitu, ad inferiora relabatur, ibique & maxime in portæ vena & hepatis viscere stagnans, tam trunculentos morbos cieat.

§. VIII.

Et sic spasm
mi succos
inquinant.

Quæ quum ita sint, liquido patescit; spasticas in morbis quæ urgent affectiones, majorem obtinere succos corrumpendi iisdemque impuritatem conciliandi potentiam, quam ipsa incongrua & intemperata alimenta, paullo largius etiam sumpta, modo excretiones, maxime per alvum & sudorem, vigeant. Hæ enim quamdiu salvæ sunt & integræ, ac omne quod superfluum, alienum & mixturæ humorum vitalium minus congruum est, secedit, nullum ab eo metuendum erit detrimentum. Porro etiam ex dictis prona fluit consequentia, quod sub ejusmodi morbis spasmoticis, & maxime eorum paroxysmis, oppido tutum & consultum sit à copia alimentorum, & præsertim heterogeneæ indolis, abstinere, eo quod his ingestis, ob retentas sordes excrementitias, major adhuc humorum vitalium inquinatio contingat necesse est.

§. IX.

De vitis
fluidorum
ex atonia.

Ingens vero etiam illa est dyscrasia atque im-

puritas, quam humores & fluida ex atonia, tam solidorum in genere, quam speciatim viscerum, contrahunt. Sic nimiam sanguinis & humorum redundantiam, quæ plethora vocatur, & tonum ac robur validamque systolen cordis, arteriarum, omniumque vasorum, resistantia sua imminuit & frangit, cacochymiam inducere nemo nescit. Nam sicut ipsa plethora ab imminutis & suppressis excretionibus ortum trahit; ita tardior sub eadem sanguinis cursus & minus expeditus ad excretoria appulsus, non parum fordium secretionem & secessum, tum per varia organa, tum maxime per universale illud omnium præcipuum emunctorium, cutim, minuit atque sufflammat. Hinc etiam est, quod sanguis è corpore plethorico emissus, crustam gelatinosam & variegatam exhibeat, & frequentius ad minima & lateralia vascula coactus in iisque incarcerationis, inflammationes suscitet ægre discutiendas.

§. X.

Si hepatis vel lienis viscera, mere fere vasculosa, ex atonia nimium sanguine infarciuntur, vel demum occallescent, aut indurantur, non modo intercipitur biliosi humoris secretio ac sanguineus latex bilioso sulphureo excremento inquinatur, sed & sanguinis ac lymphæ motus plane aliter & præter naturam dirigitur. Sanguis enim ad vasa & viscera vicina regurgitans, & appulso arterioso, transitum in venas impediendo, obicem ponens, efficit, ut nimie ac perniciosæ cruoris fiant profusiones, in ventriculo quidem per vasa breviter dehiscentia, vomitiones cruentæ, ex disruptis uterinis vasis, menses copiosi & uteri hæmorrhagiæ, ex venis ani nimium apertis, enorme hæmorrhoidum profluvium & in renibus mictio cruenta. Lymphæ autem itinere per vasa lymphatica, quæ his in visceribus discurrent copiosissima, intercepto, humor restagnat, & copiosius in vasis abdominis collectus hydatides format, quibus tandem disruptis, feralis lymphæ extravasatio & partium corruptio inducitur. Hinc attenta observatione patescit, & cachexiam, & scorbutum, & hydropem, ex solo hepatis vitio, obstructione & infarctu, incunabula trahere.

Ex atonia
viscerum
& quidem
hepatis &
lienis.

§. XI.

Insuper grave est vitium, quod sanguis tam in crasi, quam temperie, à tono uteri admodum dejecto patitur. Videlicet quando perquam salutaria illa per uteri vasa singulis mensium periodis succedens sanguinis evacuatio, quacunque etiam ex causa id fiat, imminuitur, supprimitur, vel ob ætatis rationem plane cessat, omnis humorum massa protinus inde vitium capit, & totius corporis malus habitus, sive cachexia, sequitur, languor universum corpus occupat, appetitus prostermitur, facies fit livida & luridi coloris, pedes intumescunt, lassitudo omnes artus infestat, ac demum variæ exulcerationes, item erysipelata, dolores rheumatici, lentæ quoque febres, proveniunt. Quin sanguis ipse in tali statu exantlatus, morbidum & prævum exhibet colorem, valde serosus est, quandoque pæne lacteus.

Ex atonia
uteri.

§. XII.

In affectibus soporosis, item paralyticis & hemiplecticis, progressus sanguinis & humorum languidior, languidam sæpe secretionem feri superflui impuri arcessit; unde fit, ut feri summa subnascat impuritas. Proinde sæpius vidi, post hos cerebri & medullæ spinalis affectus diuturniores,

Ex debili-
tate capi-
tis.

niores, erysipelata, exulcerationes, tumores artuum, purpuræ morbum, ipsamque cachexiam scorbuticam, accessisse. A longiori morbo tonum & robur ventriculi valde exsolvi, ut cibi assumpti in ejus cavo hæreant, dolorem procreent gravativum, aciescant, corrumpantur & materiam tandem ad febrem lentam, nisi medicamento digestivo, emetico, aut roborante stomachico, id avertatur, subministrant, certæ & constantis est observationis.

§. XIII.

Intermittentium paroxysmos, qui universum genus valorum & fibrarum graviter exagitant, sequenti intercalari die ingentem excipere atoniam atque debilitatem, pulsus languidum, cutem humidam ac frigidam, à paucis quidem attenditur, licet res ad oculum pateat. Hanc autem partium solidarum laxitatem, & inde retardatum excretionis salutaris impurarum partium negotium, ego quidem merito pro præcipua causa habeo, quod nova materia ad insultum febrilem denuo ciendum succrescat. Sub ipso enim paroxysmo, à motu auctiori solidorum & nimio fluidorum attritu, temperata succorum schesis destruitur plurimæque gignuntur recrementa, quæ si prudens medicus, remittente febrili motuum impetu, die vacuo, comoda vacuante medicina, per omnis generis emunctoria opportune educit, fomes subtrahitur & levior incurrit paroxysmus, sin minus, non modo gravior imminet, sed & collectis nimium sordibus, deteriora alia mala sunt metuenda.

§. XIV.

Quemadmodum itaque ex vitio & prava solidorum corporis nostri habitudine, in fluida labes & vitium transit; ita vicissim illis ad meliorem rationem redeuntibus atque erectis, ob communionem inter utrosque mutuam, hæ quoque meliorem schesin, indolem atque efficaciam recipiunt. Sic quando vires naturæ ita collapsæ sunt, ut cordis motus languidior, periculosa in morbis omnium motuum, tam secretorum, quam excretorum, intermissionem ac cessationem minetur, efficax analepticum ex cinnamomo, vel aliquot guttulæ balsami nostri liquidi, aut potus vini generosi, mox fluidorum progressum & circulum refocillat atque intendit, & omne abigit periculum.

§. XV.

Quando remissa vis tonica & elastica cordis & arteriarum in corpore plethorico, in quo pulsus contractus & compressus est & excretiones imminutæ, subtractione superflui sanguinis per venæ incisionem, augetur & revocatur, protinus cordis & valorum systole intenditur, excretiones suppressæ sordium restituuntur, interdum etiam consuetæ sanguinis evacuationes repetunt. Sanguis nimis spissus & glutinosus, qualis est in vitæ sedentariæ nimium addictis, ad graves morbos disponit: sed motu & exercitatione corporis, aut partium frictione, tenuis, fluidus & ad progressivum motum aptus redditur. Id quod etiam, si occasio vel vires ad corpus motu exercendum deficient, clara voce & intenso sermone perfici potest, utpote ex diuturna elata voce facta oratione, universum corpus calore & sudore perfundi, perspirationem augeri, pulsus celeriores fieri, non ignotum est iis maxime, qui brumali tempore sermones ex suggestu in templo perorant. Dum enim sub loquela vox intenditur, citatior quoque fit respiratio, & pulmonum expansio

cum reciproco collapsu acceleratur, unde sanguis celerius per pulmonum compagem trajicitur ad cordis ventriculum sinistram, ex hoc incitatus ad canales appensos per universum corpus traditur, tandemque auctiori facto ubique circulo, velocius ad dextrum ventriculum agitur, pristinumque iter relegit.

§. XVI.

Neque id tantum succedit in partibus externis, sed idem quoque contingit, si partes internæ vehementiori motu agitantur. Nimirum videmus in iis, qui forti & repetita manuum agitatione tympana pulsant, vel globis conos prouunt, universum corpus cum pulsu & respiratione impensiori incalescere, eo quod aucto inde tonico musculorum partium motu, sanguis vegetius circumagitur. Sola pedum paullo longior & fortior frictio tantum valet, ut universam sanguinis & humorum massam in celeriores motum, cum intensiori calore ut & perspiratione, adducat; quæ quidem sanguinem commovendi ratio eorum valetudini tuendæ convenientissima est, qui ob senium vel infirmitatem alio motus genere corpus exercere nequeunt. Contra vero si spasmodicæ constrictiones in febribus vel affectibus chronicis vehementer urgent, & sanguinem gravius exagitando æstum atque dolorem inferunt, medicamentum nitrosum, vel nostrum minerale, naturæ amicissimum, universum sanguineum laticem æstuantem placat, fervorem exstinguit, & cutis poros relaxando liberiores efficit perspirationem.

§. XVII.

Quando cortice Peruviano febriles paroxysmi, qui totam massam sanguinis fervidam & fallino-sulphuream reddunt, sistuntur, protinus id ipsum in urina & fecibus alvi animadvertitur. Nam urina, quæ antea, remittente impetu febrili emissa, erat saturate colorata & crassum deponebat sedimentum, jam tenuior & limpidior redditur, feces autem valde biliosæ & obscuro colore tinctæ, nunc naturalem rursus colorem acquirunt. Longe vero major & excellentior virtus fluidis valde impuris & turpatis in hypochondriacis & scorbuticis insinuat, quando viscerum infarctus congruo aquarum mineralium potu tollitur & obstructions expediuntur. Et sic quoque solidorum ad immutandam fluidorum schesin facultas patefcet.

CAPUT VII.

De causis morborum, & quidem latentibus, recte cognoscendis.

§. I.

SI ulla in universa arte nostra doctrina insigni utilitate ac fructu sese commendat, atque etiam ad tutam & auspiciatam medicationem expeditam viam pandit, profecto ea est, quæ morborum genuinas causas perspicue tractat, & quomodo recte eas cognoscendæ sint, clarius exponit. Quod si enim medici officium potissimum hoc est, ut morbos, vel imminentes arceat, vel præsentibus abigat, simulque verum de eorum eventu judicium promat, quomodo ad hunc finem obtinendum certiori ratione pervenire possit, ac si morborum causas exacte scrutetur ac feliciter quoque inveniat, equidem non video. Sane corpus

corpus à morbis ingruentibus defendere, quid aliud est, quam eorum primordia & origines scire, & iis salubri consilio & medicina depul-landis studium operamque conferre? Neque aliud sanare est, quam causas, veluti fontes gra-viorum symptomatum, prudenti medicatione re-movere. Multo minus vero quis rectum de mor-bi cursu & certum de eventu formare pote-rit iudicium, nisi ejus causæ veræ & proxi-mæ planius & plenius perspectæ fuerint. Sa-pienter itaque proditum est ab *Hippocrate* ejus-que fidis sectatoribus: *medicum ad sanandum sufficere, si ad cognoscendum suffecerit*, ut ait, *Lib. de arte* §. 20. Id quod clarius exprimit *Lib. de flatibus* §. 2. *Si quis causas corporis affecti probe cognoverit, potens est valde ea corporibus adferre, quæ corpori commodent, nimirum con-traria, morborum natura perspecta.* Atque etiam pulchre more suo *Celsus* scribit: *causæ morbi in-vestigatio ejusque primordia & occasio in affectio-nis & remediorum cognitionem deducunt amplissi-mam.*

§. II.

*A medicis
tamen ple-
rumque
ignoratur.*

Verum enimvero, quo majori & plane mirifi-ca utilitate hæc de morborum, quin immo mortis natalibus recte cognoscendis doctrina, eminet: eo negligentius & incuriosius fere in medicorum scholis & monumentis, vel minimum non satis exquisitè & solide agitur, vel plane silentio trans-mittitur. Plurimos, qui quotidianis in artis ope-ribus versantur, id tantummodo quærere, ut no-men morbi, quo æger laborat, noscant, neque multum ulterius de corporis ægrotantis natura, de causæ morbificæ indole ac vehementia, de sede affecta, deque mali prima origine sollicitos esse, vulgari & ubivis obvia curandi ratione per-spectissimum est. Perquam paucos profecto Pra-cticorum invenies, qui non prius curam morbo-rum aggrediuntur, quam completam & integram morbi historiam hauserint: sed plurimi audito tantum morbi nomine, mox ad medicamenta præscribenda se accingunt, sique unum remedii genus non juvat, confestim aliud in promptu ha-bent, ac demum inopes consilii ad practica scripta confugiunt. Quin oppido rari sunt, qui ex hi-storiis & morborum observationibus, cum cura etiam consignatis, veras causas elicere, vel quod ad praxin tutam conferat, cum certa & fundata ratione eruere possunt, vera theoria & philoso-phia corporis humani, rerumque, quæ saluti vel damno sunt, destituti.

§. III.

*Quod res
stantur
quorum-
dam indi-
cationes.*

Morborum causas certa auxiliorum genera indicare & ex causis bene perspectis, aptam cu-randi methodum sibi formare debere medicum, constans quidem omnium merito tulit sententia; sed ineptæ in scriptis obviæ indicationes, eosdem nec unquam de genuinis morborum causis verum & utilem habere & habuisse conceptum, lucu-lenter produnt. Videas, qui magno conatu per-hibent, furibundum archeum esse sedandum, & depressum ac emortuum excitandum, naturam in opere suo deficientem adjuvandam, ejus erro-rem corrigendum, naturam vel archeum alibi & minus recte occupatum, vel aberrantem, sui officii admonendum, discursivum spirituum mo-tum sistendum, morborum fermenta peregrina ejicienda, viscerum fermenta debiliora & acido exuberante deturpata reparanda, acidum certis morbis ingenerandis aptum invertendum, lym-pham fermentificam acido-volatilem tollendam, humorum qualitatem malignam temperandam & expellendam, calidum innatum restaurandum

esse, & id genus innumera alia, quorum me-minisse piget, immo pudet. Quid vero aliud obscuræ hæ, ineptæ, nullius conceptus & nihil reale significantes, neque ad vitæ, sanitatis, vel morborum rationem explicandam, vel ad reme-diorum inventionem idoneæ, medendi indica-tiones, quæ proxime ex natura perspecta causa-rum morbificarum depromendæ erant, manife-stant, quam genuinas morborum & symptoma-tum, immo mortis causas, ejusmodi speculato-ribus minus esse perspectas planeque incognitas. Quare an quicquam certi vel tuti ab eorum me-dicatione polliceri sibi quispiam possit, æquus & perspicax quisque dijudicet.

§. IV.

Hæc autem tam utilis tamque necessaria veras morborum origines investigandi doctrina, quod adeo incognita sit, præter alias hæc quoque subest causa, quod morbis defunctorum dissectiones rariores sint, & quod perpauci ex illis utile quip-piam & quod ad morbi mortisque historiam ex-plicandam pertinet, apta ratione elicere queant. Non enim certius & melius ad naturam morbi-ficæ causæ & sedem affectam pernoscentiam datur subsidium, diligentiori cadaverum morbis enectorum inspectione. Plurima certe in prom-tu sunt exempla eorum, qui mirificas speculatio-nes de morbi causa in hoc vel illo casu habue-runt, dum alii lienis, alii glandularum mesente-rii & hepatis vitia, alii rursus naturam in moti-bus suis aberrantem, quidam humorum excessi-vam acredinem accusarunt; ubi dissecto cada-vere, apostemata in mesenterio, aut empyemata in pectore, aut polypi in vasis majoribus, vel scirrhusitates viscerum, aut extravasationes humo-rum in conspectum venerunt. Et licet accuratior causæ morbificæ cognitio non semper satis sit ad eam tollendam, si nempe remediorum efficaciam vincat; id tamen efficit, ut medicus, an mor-bus sanationem admittat, nec ne? & quænam medicamenta imminenti malo avertendo idonea sint, quæ non? dijudicare possit.

§. V.

Interim non diffitendum, arduum & minus firmis conjecturis esse plerumque stipatum causarum morbi scrutinium, ut inter præstantissimos medicos jure meritoque is haberi debeat, qui in eo excellit. Hoc enim revera est, quod medico nominis famam ac celebritatem quam maxime conciliat, si verati augurio quæ impervia cor-poris penetralia recondunt, assequi, & felici cum successe ad eadem medicationem suam dirigere, vel si majus arte malum, ipso sub sectione as-pectu, ratiocinii veritatem confirmare novit. Et justa certe de causa *Johannes Langius Lib. I. Epist. I.* conquestus est: quod minus celebre no-men sit medicorum Germaniæ apud exteros, quia nempe præcipua medicinæ pars diagnosti-ca, quæ ex suis signis morbi naturam, causas & substantiam docet cognoscere, vel ignoratur, aut ob desidiam negligitur.

§. VI.

Posteaquam igitur in superioribus formalem omnium morborum rationem in turbato æquabili & moderato solidorum inprimis cordis & omnis generis valorum, motu contractorio & expansi-vo reciproco, contineri demonstravimus, simul-que vitia quæ inde in fluida redundant exposui-mus: transeundum nunc etiam est ad causarum disquisitionem. Quum vero in *secundo medicinæ rationalis*

rationalis systematicæ tomo omnes omnino causarum series, quæ proxime, mediate & remote ad morbos producendos conferunt, cunctas quoque res quæ sanitati & vitæ infestæ, accurate satis & copiose excussimus: licebit ibi dicta hic tantisper supponere, & meditationi potius subijcere eas tantum morborum causas, quæ latentes & paullo abstrusioris sunt indaginis, graves tamen ac difficiles morbos, quin ipsam mortem, ingignunt, simulque dispicere, quo pacto Medicus probabili, rationali tamen conjectura, easdem possit investigare atque cognoscere.

§. VII.

de causis
remis re-
enda
aligni-
Placet autem tractationis exordium ab evolutione malignitatis, quæ communi Medicorum consensu compluribus morbis summum adjicit periculum, capere. Jam vero nihil certius est, quam plurimos inter mortales morbis extinguere, quibus malignitas assignatur, seu causa summi periculi & mortis, & quæ prudentiam medentis & virtutem medicamenti facile superat, quod testantur potissimum febres acutæ & præcipue epidemice grassantes malignæ, purpuratæ, petechiales, catarrhales, pleuritides, dysentericæ, anginæ, variolæ atque morbilli. Malignitatis itaque in morbis acutis nota est subita & plenaria omnium virium prostratio atque defectio, quæ hisce indicibus se prodit: omnis animi ac corporis vigor dejectus est, artus robur & pristinam ad motum potentiam amiserunt, pulsus arteriarum ob systolen cordis contractiorem & languidam exilior & debiliior fit, nullus placidus & qui reficiat est somnus, sed somnolentia quædam magis magisque debilitans, vel assidua vigilia premit, ægri jacent plerumque sine dolore & sine singulari sensu, neque calor in exterioribus partibus adeo intensus est, sunt anxii & inquieti, mutant sæpius situm, inque eo erecto perquam facile in animi defectionem incidunt, alvus minus recte respondet, urina plerumque tenuis, licet crebrius emittitur, respiratio est difficilior, male coherrentia loquuntur & sine singulari convulsione valida frequentius intra paucos dies extinguuntur.

§. VIII.

de viri-
maxi-
infer-
Ex hisce liquido apparet, malignitatem viribus, quæ vitam absolvunt & tuentur, insensissimam esse. Quid vero sit malignitas, & cur tam perniciosa sit? non alienum erit, hic exponere. In quo quidem evolvendo, si quis defectionis virium & malignitatis causam per calidum nativum debile vel extinctum, aut per cessationem naturæ vel archæ à motu suo & directione corporis, aut per spirituum vitalium oppressionem, explicare velit: is certe nihil, quod concipi possit, quod vere existat & quod in applicatione & in connectione usui sit, afferet. Missis potius ejusmodi fictis terminis, ita sentiendum esse censemus: vires quæ corpori nostro insunt, non alias esse, nisi motrices, & quæ à convenienti boni sanguinis in partes influxu, salvis tamen & integris nervis, proficiuntur; atque adeo eos præ aliis esse robustiores, qui ampliora habent vasa, qui fibras compactiores & laudabilem sanguinis apparatus obtinent; imbecilliores vero, quibus fibræ sunt laxæ, vasa angustiora & quibus parcius sanguis inest. Præterea corporis nostri vires à convenienti victu, à liquido subtili & spirituosissimo, ab aëre puro & temperato egregie fovendi & depresso mox resuscitari, & vicissim à victu incongruo, omnis spiritus & virtutis experte, ab odore vel medicina vaporosa & graveolenti, in-

gentem induci virium jacturam. Denique omnibus iis affectibus, qui à conferta crudorum & impurorum humorum, vel sanguinis copia, originem trahunt, notabilem languorem viriumque lapsum perpetuo fere jungi. Manifestæ igitur sunt virium, quæ vitæ, & omnium actionum vitalium præsidēs sunt, causæ: præsentē quippe sanguine temperato, subtilibus elasticis & volatilibus partibus referto, & sufficiente facto ad quævis organa affluxu, omnes partes solidæ & motrices, earumque princeps cor, debitum suum tonum, robur, motumque constrictionis & dilatationis, qui universam œconomiam animalem gubernat, accipiunt.

§. IX.

Has itaque vires prosternt malignitas, cujus indoles atque origo quam optime ex interiorum perlustratione in iis, qui ex acutis & malignis morbis decesserunt, erui potest. Nimirum si observationes & dissectiones eorum, qui peste, petechiis & aliis malignis febribus mortui confusimus, & quæ à nobis ipsis hac in re visa sunt recordamur, nunquam non notabilis, vel in ventriculo, vel intestinorum volumine consistens putrida, foetida corruptio, sive sphacelatio, sese obtulit; ut inducamur credere, nunquam veram malignitatem periculi plenam adesse, ubi non quædam ex solidis partibus interioribus sphacelo & putredine infectæ fuerint. Jam nihil in universa rerum natura existit, quod magis animantibus adversum sit, quam ipsa putredo. Hæc enim intestinus & celerrime vires sumens destructivus motus est, qui non modo partium fluidarum texturam ac mixtionem, sed & solidarum structuram invertit, dissolvit & subtiliores fluidas, impetum ac motum facientes partes, hostili vapore contaminat. Videmus certe sphacelum exterioribus partibus incumbentem subito & omnes vires exhaurire & vitam brevi extinguere; multo magis interior ejusmodi partium corruptio exitium creabit præsentissimum. Et quemadmodum, qui ex cancro maligno, cui teterrima putredo semper jungitur, vel ex sphacelo moriuntur, haud dissimilibus symptomatibus, ac illi qui peste & malignis febribus decedunt, devexantur, ita horum unam eandemque esse causam, nempe putredinem, merito concludimus.

§. X.

Neque vero tantum putredo & sphacelatio internarum partium in acutis & malignis febribus reperitur, sed hæc ipsa etiam funestorum morborum aliorum frequentior causa est, ac plerumque fert opinio. Proinde nostrum de morbis plurimis feralibus & periculosis judicium hoc est: plerique pro causa putridam corruptionem internam agnoscunt, & raro homo ex morbis moritur, ubi non putris quædam corruptio in causa fuerit. Sicuti autem ipsa putredo gradu majori, vel minori, differt, & alia in ferro, alia in sanguine est, ipsæ etiam partes, quibus insidet, ratione structuræ & usus valde dissidentes sunt; ita effectus quoque & vis putredinis diversa est, quum quædam vehementius agat & celeriter interficiat, alia mitiori modo incedat magisque chronica sit. Patet hoc febrium hæcticarum exemplo, quæ nunquam non à corruptione viscerum foveantur, & phthisi, hydropi, cachexiæ scorbuticæ, in fine ordinario fere accedere solent, similibus quoque ferme symptomatibus progrediuntur. Nemo enim non novit, hæcticis & quæ demum hydropicis, scorbuticis & cachecticis compli-

Ob putredinem in interioribus corruptionem nem.

Quæ in acutis & chronicis morbis adest.

complicantur febribus, ingentem corporis languorem viriumque jacturam, cum plenaria ad motum & labores impotentia, appetitus identidem totalem prostrationem nec non somni quieti & reficientis assiduum defectum & calorem consumentem, cum sudore colliquativo & marcere incredibili pulsusque continua celeritate ac debilitate, perpetuo conjungi; donec tandem alvi profluvium, pedum intumescencia, crebrior animi defectio finem vitæ claudant. Quo facto, sub interiorum lustratione, hepar, lienem, pancreas, maxime omnium vero omentum, interdum etiam uterum, in thorace pulmones corruptos ac putridos; cum extravasato ibi putrido fero, plerumque reperimus.

§. XI.

De sphacelo Ventriculi.

Quamvis autem morbi, à putredine & sphacelo interno orti, plurima signa communia habeant: nihilo tamen secius pro differentia viscerum quæ occupant, & pro natura etiam putredinis, celerius vel tardius serpentis, peculiaribus notis, quas breviter strictimque recensebimus, distinguuntur. Primo vero notandum est, terribilissimæ indolis esse eam sphacelationem, quæ partes ventriculi & intestinorum nerveas membraceas occupat, eo quod celerrime interficit & morbos etiam peracutos, immo acutissimos, progignit. Videlicet, si putrida corruptio in ventriculo consistit, præter summam illam virium prostrationem & signa malignitati communia, singularis nausea & quædam eructationis lymphæ in os species, ad vomitum inclinatio, itemque singultus, cum sensu quodam frigoris circa præcordia interno, sese exserunt: præcedit summa anxietas corporisque jactatio, & fixus in regione præcordiorum ardor, qui tamen cum dolore subito cessat. Ab hac non differt, quæ à veneno vel maligno pharmaco in robustis & sanis antea corporibus producit, quippe quæ brevi pariter necat, & delirium ac convulsio, cum plenaria pulsuum per aliquot horas intermissione, mortem antecedit.

§. XII.

De duodeni.

Neque duodeni inflammatio eique succedens sphacelatio infrequens est. Nam morbis acutis, cholerae & febribus cholericis, ex facili supervenit, & gravissimæ quoque iræ soboles est. Hisce vero notis distinguitur; ingens & valde anxius visusque prosternens cum sudore frigido circa dextrum regionis præcordialis latus constans est ardor, cui facies lurida & flavo colore tincta jungitur, quia per spasticam stricturam liber bilis ad intestina descensus præcluditur, eademque per vasa lymphatica ad sanguinem regurgitat: comitem quoque duodeni inflammatio plerumque habet singultum, incredibiles anxietates & inquietudines, ob nervosas partes tam graviter lacestas. Intestina tenuiora ubi sphacelosa inflammatio adoritur, præter assiduam febrem, dolor cum interno incendio circa umbilicalem regionem percipitur, alvi nimia strictura est, succedit tandem summa virium defectio, cum sudore frigido, pulsu debili & inæquali, sensus doloris simul & semel perit & excrementa foetida, interdum sanguinea, sponte feruntur. Quæ signa priora inflammationem, posteriora vero sphacelum designant; ubi iterum notandum hoc est, quod, si à causa violenta externa, ut ab intestino in hernia incarcerato, ab assumpto veneno, vel pharmaco virulentia non experte, aut ab animi graviore affectu, producta fuerint, delirium & convulsio mortem celeriores efficiant.

Et reliquorum intestinorum tenuium.

§. XIII.

Intestina in deterioris notæ dysenteria, inflammatione acuta & sphacelo quoque corripiti, procul ab omni dubio est. Illam atrociam, cum febre, siti, interno ventris ardore, tormina, penitus manifestant: hujus vero subita indolentia, quando confestim simul & semel dolor, qui antea erat intolerabilis, & ardor desinit, haud fallax indicium est; majori simul reddito excrementorum pædore & virium decremento adaucto. Rectum etiam intestinum ex acutissimo & immani, ob profundiorum hæmorrhoidum internarum tumorem, dolore, foetidissimæ sphacelationi obnoxium esse, non semel sed sæpius experti sumus. Hæc mox latius serpit, & tam intestina, quam partes exteriores nates & scrotum, tetra putrilagine cum nigrore ac tumore inficit. Fæces, quæ sponte plerumque secedunt, intolerabilis, ob iis admixtum putredinis fermentum, sunt foetoris, tandem febris continua, sed mitior, cum totali virium lapsu juncta, cujus naturæ solet esse putrida & vere maligna, vitam exstinguit.

Maxime dysenteria.

§. XIV.

Quando porro putrida corruptio abdomen inque eo contenta viscera, hepar, lienem, omentum, invaserit, tum non tam cito tragœdiam suam conficit. In hydropicis, scorbuticis & cachecticis eandem prodit totale ciborum fastidium, pulsus celer, debilis & inæqualis somnusque laboriosus. Certum vero ac plane infallibile viscerum in abdomine sphacelatorum signum est, si plenaria appetitus prostratio indefinenter per aliquot hebdomades laborantem premit, & hanc nunquam in ejusmodi morbis fausti ominis esse plurimis experimentis confirmatum habeo. Putredo enim adjacentibus visceribus insidens, non potest non ventriculi robur enervare & liquoris gastrici menstrua vim atque activitatem penitus infectione contaminare atque infringere. Neque uterus ab ejusmodi foetida perniciali corruptione plane immunis est. Hæc in puerperis, vel in aliis, maxime nimio sanguinis profluvio debilitatis, sexus sequioris corporibus, facile contingit. Visitur ab initio inflammatio & febris acuta inflammatoria, ex suppressione lochiorum frequentissima, qua sedata, circa pubem frigoris sensus est, ad alvum maximeque urinam stimulus, & fluxus lochiorum, antea pertinaciter cohibitus, brevi ante mortem sponte sua demum procedit.

De sphacelo viscerum abdominalis.

Uteri que.

§. XV.

Phthificis & qui ex pulmonum diuturno vicio laborarunt, tandem putredo cum febre putrida sic dicta hectica, quæ vires paulatim opprimit, supervenit, cujus indicia sunt, præter foetidam ex ore exhalationem, facilis in situ erecto animi defectio, expectoratio cessans, pectorisque oppressio cum spiritus difficultate. Ætate confecti tandem in similem viscerum corruptionem incidunt, omnis perit appetitus, assiduus adest calor, unde vires paulatim consumuntur, ut tandem penitus deficient, qui affectus communiter marasmus appellatur. Cæterum internis viscerum corruptionibus individuus comes est febris continua, cum calore quidem non adeo acri & externo, qui tamen vires & succos sensim absorbit: ita quidem, ut certis intervallis remittat, non vero intermittat, postea exacerbetur, donec tandem plenario virium lapsu penitus opprimat.

De corruptione pulmonum.

Et senilibus familiaribus marasmus.

§. XVI.

§. XVI.

sphace-
mem-
brarum
cerebri. Corripit denique sphacelus ipsas membranas cerebri, ejusque substantiam, qui tamen non nisi præcedente inflammatione oboritur, & hisce indiciis sese manifestat. Primum arteriæ temporum & interiores cerebri vehementius pulsant, facies est rubicunda, oculi feroces, somnus nullus, urina tenuis, omnia furoris plena, quæ notæ phrenitidis sunt. Postea subito compositus fit animus & ad intelligentiam redit, nihil vero nisi de summa virium defectione ægri conqueruntur, facies ante rubicunda in luridam mutatur, pulsus inæqualis ac debilis est, & sponte sæpe sanguis è naribus, paucus tamen, prodit, & hæc omnia inflammationem in sphacelum transiisse & mortem adesse significant. Lethalem ejusmodi phrenitidem aliquoties vidi in puerperis, quæ subsistente lochiorum fluxu, accedente febre acuta, nono interierunt die.

§. XVII.

putri-
da san-
guinis cor-
ruptio. Præter putridam quæ in sanguinem cadit, corruptionem, alia adhuc non adeo tamen exitiosa, ejus species est, qua ille extra vasa consistens, ex inflammatione præcedente, in purulentam substantiam fatiscit, & apostema, quod nihil nisi ingens purulentæ materiæ in quadam parte collectio est, efformat. Prout vero ejusmodi abscessus variat, easque vel internas, vel externas,prehendit partes, ita differentibus etiam & peculiaribus signis cognoscitur. Et quum subinde apostema longo artis usu exercitatos Medicos fallat, non incongruum erit, hoc loco exponere, quibus indiciis in universum & speciatim etiam sese prodatur. Igitur in genere sciendum est: omnibus abscessibus, ubicunque etiam lateant, febrem continuam, lentam quotidianam, cum remissione & exacerbatione, pulsu debili & celeri, quæ tandem vires & succos depascit, nec non sudorem continuum, præsertim nocturnum, conjungi, adeo, ut corporis partium marcor nunquam non sequatur.

§. XVIII.

absces-
us in ab-
dominis
regimen. Primum vero apostema non raro abdominis regionem obsidet, atque inter peritoneum ejusque musculos sedem fixam habet. Cognoscitur, si vel supra, vel infra umbilicum, aut ad latera, circa costas spurias, versus dorsum, fixus cum tumore duro dolor per longius tempus persistit. Præterea inappetentia, calor lentus cum insigni marcore, pulsuque celeri adfunt, urina sedimentum ponit, & vires indies decrescunt. Quæ symptomata, valde dissidentes Medicorum conjecturas subinde peperisse meminimus, quum alii malum pro inflatione intestini coli, alii pro glandulæ omentalis tumore & scirrho, nonnulli pro dolore calculi habuerunt: adhibitis vero externis mollientibus cataplasmatibus, tumor durus tactui renitens, mox pure repletus valde increvit, & apertus copiosum cum foetore pus effudit.

§. XIX.

thoraci. Si quando abscessus thoracem occupat, quod sæpius ex male curata pleuritide, & vera & spuria, aut ob graviolem casum, vel etiam ex morbillorum aut variolarum reliquiis accidit, tunc identidem continua lenta adest febris, sed tamen specialibus indiciis ejusmodi abscessus se prodit. In dextro vel sinistro thoracis latere dolor est obtusus & pressorius, cum anxietate

Frid. Hoffmanni Oper. Tom. I.

inexplicabili, tussi nocturna, spirandi difficultate, pulsus est celer & languidus, partes marcore confectæ, & inter has maxime pectus emaciatum, quin sano lateri vix incumbere possunt. Si vero ingens puris quantitas ad plures sæpius libras in thoracis cavo fluctuat, tumor in latere affecto circa dorsum satis manifestus, à scapulis usque ad ilia, sæpe prominet.

§. XX.

Quando pus extra vasa effusum fuerit, id diuturniori mora acere factum, diaphragmatis nervos processus vehementius lacinat, & dolor intolerabilis non procul à lumbis oritur, qui sæpe sagacioribus Medicis imponit. Redit præ ceteris in memoriam exemplum serenissimi Principis juvenutis, qui post variolas lenta febre, spiratione difficili, cum virium languore & macie afficiebatur, quibus demum accedebat atrox circa regionem lumbarem sinistri lateris dolor, appetentia prostrata, somnum cum viribus penitus consumens, ægro post aliquod tempus occumbente. Medicus curæ præfectus dolorem naturæ esse errorem quidem volebat, sed aperto post mortem abdomine, ex diaphragmate, acie cùltri læso, sanies copiosa stillabat, & dissecto demum thorace, ingens puris quantitas in conspectum prodibat, totusque sinister pulmo ad vasa usque consumtus & tabe diffuens deprehendebatur. Ubi vero purulenta sanies conceptaculo adhuc includitur, vomica appellatur, quam fixus diuturnus ac comprimens in pectore dolor prodit, qui nec per sputa, nec per sanguinis detractionem, neque per infusa calida resolventia placatur, sed cum pulsu celeri, tussi sicca, anhelitus foetore, marcore, virium languore, inappetentia & largo debilitante sudore, continuat. Ipsa magnitudo vomicæ ex majori spiritus angustia, ingenti anxietate, pulsu duro, quandoque erecto collo intermittente, judicatur. Ubi demum pus perrumpit & vomica aperitur, tussi foetidi quippiam puris ejicitur.

Pure effu-
so.Et vomit
incluso.

§. XXI.

Evenit quoque non raro, ut variis ex caussis, præsertim vehementiori in terram lapsu ac contusione, intra mesenterii membranas abscessus colligatur, cujus notæ non semper cognitu adeo faciles sunt. Sentitur in medio abdominis quædam gravitas, sine manifesto dolore vel tumore, febris est lenta, virium languor & animi crebrior defectio cum sudore frigido urget, quandoque vires melius constant, interdum sanies cum excrementis per alvum secedit, inhorrescit sæpius æger, & hæc symptomata diutius detinent. Si ex disrupto abscessu sanies in abdominis cavum ipsamque pelvim descendit, dolor acutus cum crebriori ad urinam stimulo affligit, sed parum redditur, quandoque etiam puris acrimonia, intestinorum tunicas rodendo, immanem dolorem cum febre ac tumore procreat.

Abscessus
mesenterii.

§. XXII.

Ubi vero in dorso, intra peritonei membranam, & musculos psoas usque ad os sacrum, tabi copia colligitur, præter alia consueta abscessuum symptomata, dolor cum tumore ardens in lumbis continuus & satis gravis ac fixus, qui situ in dorso exacerbatur, percipitur, & tunc urina, pauca tamen, variis fibrillis repleta, cum stranguria emingitur. Observatum quoque nobis est apostema in utero, post abortum, ab assumpto vehementi emetico productum, ita quidem, ut postquam diutius laborantem dolor

In muscu-
lis dors.

Et utero.

E e

circa

circa os sacrum & pubem cum febre, alvo adstricta, urinæ difficultate, exercuisset, facta sectione, pus foetidissimum circa uterum ad libram & ultra fluctuans, totus uterus pure scatens, erosa passim per cuniculos perforatos ejus substantia, deprehenderetur.

§. XXIII.

In renibus. Renes porro patent pariter abscessibus, qui totam eorum substantiam non adeo raro ita consumunt, ut teste anatome, nihil præter membranofum concrementum, sacculi in modum contractum, relinquatur. Tali in casu mingitur urina mox cruenta, mox ob puris miscelam lactescens, interdum glutinosa, crassa, tenaci materia mali odoris referta, quæ in fundo hæret, neque ad vitri agitationem dissolvitur. Nonnunquam sanies ex rene putri in pelvim stillat, subsequente vix tolerando in regione pubis dolore, ob rosionem quam in vesica & adjacentibus partibus efficit. Ejusmodi abscessus in plethoricis & scorbuticis foeminis, cessante circa quinquagesimum annum mensium fluxu, item in viris, quibus hæmorrhoidum fluxus substitit, vel consueta sanguinis missio omissa, notavi, imprimis si medici diureticis calidioribus, vel etiam imprudenter thermis Carolinis ad calculum dissolvendum & ejiciendum, usi fuerunt.

§. XXIV.

In capite. Neque caput ab abscessibus penitus immune est, quandoquidem intra parotides, præsertim apud infantes, si pus detinetur, intolerabilis circa aures cum tumore fit dolor, vigilias cum febre ad delirium usque produciens. Intra cavitates ossis frontis abscessus quoque delitescit, qui intensissimum in fonte & circa radicem nasi dolorem, totum caput in consensum trahentem, excitare solet, sed pure tenui, flavo, foetido, successive ad aliquot cochlearia per nares sive sponte prodeunte, sive ab applicato convenienti rhino subducto, tandem conquiescit.

§. XXV.

Tumores seroso-lymphatici in thorace. Accedit aliud genus abscessuum, sive potius tumorum, qui non purulentum, sed lymphaticum & serosum humorem continent, neque ex præcedente inflammatione, sed potius ex lymphæ cursu impedito originem trahunt, quorum sedes minime in visceribus vel in partibus sanguine plenis est, sed intra membranarum tunicas consistit, neque humor, quem condunt, erodentis, ut pus, est naturæ, inde etiam non partium quibus inest substantiam depascit. Hi tumores non raro prægrandes fiunt, ut vel plures libras feri puri, quod calore in offam, ut albumen ovi, abit, complectantur, ac sæpiissime hærent intra duplicaturam pleuræ, & cavitatem thoracis replent; quibus disruptis, ingens pectoris fit inundatio, quæ pulmonum expansionem & motum diaphragmatis impediendo, ægrum suffocatione tollit opprimitque. Vidimus talem casum ante aliquot annos in generoso militiæ præfecto, qui de dolore in pectore continuo, fixo & compressorio sinistri lateris conquerebatur, paulo difficilis cum tussi sicca perpetuo aderat respiratio, quæ intervallis, præsertim noctu ab incongruo maxime situ, ita ingravescebat, ut summa anxietas cum suffocationis metu per aliquot horas adesset, pulsus continuo frequens, mollis tamen, sine siti, vel notabili calore, neque appetitus, neque somnus plane deficiebant; pedes frigidi & una cum scroto tumore oedematoso laborabant,

exterius in thoracis regione nihil tumoris, nihil ruboris animadvertebatur. Accidit demum, ut à paulo fortiori thoracis commotione à cachino confestim in maximam & continuam spirandi angustiam atque anxietatem, quæ ad quindecim horas durabat, incideret, qua etiam infelicitè misereque suffocatus periit. Aperta thoracis cavitatem, latus sinistrum totum feri minimum octo libræ inundabant, quod largius, levi saltem incisura facta, effluebat, eodemque penitus effuso, membranaceum receptaculum disci majoris magnitudine, tenuè tamen, ad latus sinistrum in conspectum venit, quod sine omni dubio ex membrana pleuræ productum erat, & collecta intra duplicaturam ex vasis lymphaticis disruptis lymphæ, talem capsulam sibi efformaverat. Reliqua viscera satis erant integra, nec alio, nisi quod ex morbi diuturnitate contraxerant, vitio laborabant. Causam vero & ortum hujus affectus æger in acre ac intensum frigus, quod in expeditione Rugiensi passus rejecit.

§. XXVI.

Neque dubium est, quin ejusmodi serosi abscessus & tumores in abdominis cavitatem sæpe occulti lateant, & vel in mesenterio, aut in dorso, intra duplicaturam peritonei, vel intra uteri membranas, quandoque etiam intra ipsum ovarium, contineantur, qui dehiscences, secto semper affluxu majori, feri copiam in abdominis cavitatem ingentem fundunt, quod corruptione dum inficit viscera, fatalem diem arcessit. Non quidem sine difficultate ejusmodi tumores cognoscuntur, & à posteriori magis & noxio eventu atque effectu demum se produnt, si videlicet in mali habitus corporibus & diutius infirmis subito hydrops gignitur, abdomen intumescit, & fluctuantes aquæ vario in latera decubitu percipiuntur; id quod etiam concludendum est, si quis diuturno pectoris dolore & respirandi angustia affectus, confestim in suffocativam spirandi angustiam non superabilem incidit, ubi certe subiti ejusmodi hydropis generatio non aliam causam, quam rupturam ingentis aquosi tumoris & effusionem copiosam feri in cavitates agnoscit. Quod vero intra membranas tumores, quibus extra vasa positus humor insidet, gigni possint, evidenti testimonio est ille tumor, qui salvis internis visceribus intra duplicaturam peritonei hospitur & mole sua abdomen ejusque musculos mire distendit, adeo, ut verum hydropem mentiatur. Quo in casu *Nuckius* alique paracenthesin, quæ in anasarca nunquam non plus exitii quam salutis affert, summe proficuum observant.

§. XXVII.

Ab abscessibus ad partium exulcerationes transimus, quæ ab illis non parum differunt, tum quod abscessus copiam materiæ, & purum, album, coctum pus, ulcera vero parum ichoris & feri foetidi fundant, illi magis partes sanguineas succulentas, hæc vero membranaceas, frigidas & siccas adorianur ibique sedem fixiorem habeant. Ipse ventriculus, qui partium membranacearum facile princeps est, ab his nonnunquam attentatur. Meminimus olim civem Mindensem, ob nimiam spiritus vini ingurgitationem & frequentiore iram, acerbissimo dolore ac tumore circa præcordia correptum fuisse, qui sumto cibo crescebat, utut vomitu non ita multo post rejiceretur. Accedebat universi corporis marcor, frequens erat lipothymia, alvi excrementa nigricante colore interdum tincta erant, quumque

De caussis morborum & quidem latentibus, &c. 327

quumque per dimidium fere anni misere decubisset, tandem fato contractus, crassus tamen & albicans inventus fuit, rugis & etiam punctulis intus oblitus, quibus incisus, materia saniosa foetida exstillavit, & in corde ac omnibus vasis parum sanguinis repertum.

§. XXVIII.

In vesica.

Vesicam quoque non raro chronicum & molestum ulcus, sive ex luis Gallicae contagio, sive ex calculi grandioris attritu; aut ex cessante consueto haemorrhoidali fluxu fovere, non novum est. Id vero magnus urinam emittendi stimulus, cum ardore & difficultate manifestat. Urina mingitur crassa, quae subinde instar albuminis ovi cohaerens, simul ex vase effunditur, inque ea non modo pelliculae & furfuracea quaedam natant, sed & serum viscidum ac purulentum in fundum dejicitur. Dolor etiam valde gravis pubis ac perinaei regioni incumbit, cujus tanta saepius saevitia, ut partes extremae inde inhorrescant, qui tamen remittit, si largiorem quotidie ac tenuem potum aegri assumunt, quippe tunc urina facilius prodit, cum copioso mucido sedimento. Ab ejusmodi ulcere vesica densatur & corrugatur, exterius albicat, fibrae contractae, nigrigantes ac sphacelatae apparent, & pus in ea cuniculos format. Quin si materia foetida acris in pelvim descendit, vicinae etiam partes putredine inficiuntur, qualem observationem *Miscell. Natur. Curios. Dec. II. Ann. VI. observ. 100.* commemorant. Si calculus in vesica ejus exulcerationis causa est, tenesmus, cujus vehementia non raro rectum propellitur, perpetuo urget, urina est purulenta & arenosa, inque pelvi pruritus percipitur, & sub erecto situ dolor augetur.

§. XXIX.

In prostratis.

Si vero prostratis & glandulosae urethrae multis lacunis praeditae tunicae, quod saepius a male curata gonorrhoea, nec non in lue venerea infectis accidit, exulceratio insidet, ut plurimum in consensum collum vesicae trahitur, crebrior ad urinam est stimulus, sed cum intenso ardore & dolore mingitur, & difficulter, ob urethram spasmo contractam redditur. Ex glande etiam membri subinde liquor, qui consistentia, colore & acrimonia differt, stillat, vel manu exprimitur, atque in urina sedimentum albicans, cum filamentis natantibus, quae vermiculorum figuram referunt, conspicitur.

§. XXX.

Inestis morborum caussis annumeranda effusio sanguinis in capite.

Ad caussarum quae valde difficiles & plerumque lethales affectus inducunt classem referendae porro sunt sanguinis, vel etiam feri extra vasa factae effusiones & stagnationes. Inter has ea, quae intra cerebri ventriculos, ob plexum choroideum disruptum, contingit sanguinis extravasatio, periculosissima est, & apoplexiam fortem, brevi enecantem, efficit. At vero quum alia etiam sit apoplexiae non infrequens species, qua aegri salvo pulsu & respiratione facie florida & rubicunda, diu sine sensu & motu jacent, & tamen servantur, non immerito indicia, quibus utraque distinguitur, desiderantur. Fortis quum a sanguinis effusione immedicabili fiat, has habet notas: jungitur illi ut plurimum vel paralysis, vel convulsio. Illa visitur, si unum latus frigidum & quasi mortuum torpet, alvusque sponte fertur: haec vero vehementi thoracis motu & elevatione cum stertore, roncho & sonitu, neque minus artuum distractione, elevatione, aut ventriculi per vomitum subversione, manifestatur, & sanguis in-

Frid. Hoffmanni Oper. Tom. I.

terdum è naribus profluit. In mitiori vero, secus res habet, quae in hystericeis, hypochondriacis, plethoricis, à vasorum cerebri, ob copiosius per spasmos eo congestum sanguinem, distensione fit: quo casu maxima spes in sanguinis missione reponenda est, ne pernicialis canalium ruptura accedat.

§. XXXI.

Rarius in thoracis cavitate, nisi à violenta vasorum dilaceratione, sanguinis effusio contingit; in abdomine vero id evenisse recordor. Ante viginti circiter annos nobilis in hac urbe foemina triginta annorum, elegantis formae, quartum mensem gravida, praeter omnium opinionem de subito virium languore conqueritur, facies contrahitur, livida & frigida fit, ad vomitum adest inclinatio, erecto capite animi defectio invadit, quae crebrius repetens, intra decem horas cum magno dolore mariti uxorem à vivis abripit. Dissecto abdomine, in ejus cavitate ingens sanguinis congrumati ad libras aliquot copia reperiebatur, qui ex disruptis ovarii multum tumefacti & grumis sanguinis adhuc obsessi, vasis effusus erat.

In abdomine & quidem ex ovario.

§. XXXII.

Nullibi tamen canales sanguiferi facilius dissiliunt, quam in sinistra ventriculi parte vasa sic dicta brevia, quae tenui membrana obducta, ab irruente copiosius cruore, non solum ex facili diducuntur, sed etiam demum perforantur, hanc potissimum ob causam, quod intercepto sanguinis per lienis vasculosam ac rarae mollisque texturae compagem progressu, is per brevium emissaria exitum sibi paret. Hoc autem si evenit, vomitus sequitur saepe effrenis sanguinis nigri, foetidi atque grumosi, qualis etiam per alvum secedit & clysteribus educitur. Et licet rejecta stomachum aggravante sanguinis mole, symptomata tantisper levare videantur; repetit tamen ut plurimum vomitio & aegri intra paucas horas inter lipothymias placide obdormiscunt. Cognoscitur hic morbus ex inappetentia, animi dejectione, magna circa praecordia anxietate, vomituritione ad animi usque deliquium, ardore ac aestu in regionis epigastricae sinistro maxime latere, & familiaris est foeminis post quinquagesimum annum, diuturno moerore confectis. Dici enim vix potest, quam gravem labem lienis viscus ex longa contrahat tristitia, quae uti ira hepar & ductus biliarios potissimum afficit, lienem noxam affricat, ita quidem, ut praeter imbecillitatem, quae inde in universum corpus redundat, huic potissimum robur & vim resistentem adimat illudque ad concipiendos infarctus disponat. Ut adeo Veterum sententia, quae hepar irae & lien melancholiae sedem esse volunt, ratione & experientia non destituatur, inodo melior & rationalis accedat explicatio.

Ex vasis brevibus ventriculi.

§. XXXIII.

Pariter quandoque lethalis ruptura vasorum internorum haemorrhoidalium accidit. Novimus primipilum quendam, natione Gallum, qui liberalius utens vino adstringente Francico, quod vocant Pontack, subsistente consueto haemorrhoidum fluxu, in atrocem dolorem dorsi & cruciatus infra umbilicum incidit, cum febre lenta, purpuracea etiam, largo sudore & alvi tam firma constipatione, ut clystere injecto nihil redderet, sed tormenta potius augefcerent. Secta fuit vena, propinata nitrosa, oleosa, demulcentia, mannata aliaque plura, demum simul

Ex ruptis interne haemorrhoidalibus.

& semel aliquot mensuras sanguinis foetidi & grumosi per anum eiecit, ipseque lipothymia correptus diem obiit. Neque alia hujus affectus & eventus fuit causa, quam quod farta nimium & distenta coli ac recti vasa, dolorem, & rupta, funestum profluvium intulerint.

§. XXXIV.

Extravasationes feri variae.

His frequentiores sunt feri intra cavitates effusiones, ac inter has ea, quæ fit in capite, & ætati infantili infesta, immani magnitudine ac tumore, quem hydrocephalum dicunt, & aliarum partium marcore, in conspectum venit. Eadem feri intra cavum thoracis collectio & stagnatio, quæ hydrops thoracis audit, iis, qui polypum grandiore in corde & majoribus ejus vasis gerunt, & asthmate convulsivo laborant, satis frequens est, & nunquam fere non, ubi magna spirandi difficultas jungitur, extravasati feri copia in thorace, instituta anatome, visitur. Hæc ipsa vero sic dijudicanda est: respiratio antea difficilis si longe difficilior redditur, & paroxysmus quasi suffocatorius diutissime affligit parumque remittit, non fallax feri in thorace copiosius collecti indicium præbet, præsertim, si, quod exspuitur, sanguineis striis distinctum, eo quod ob nimiam pulmonum compressionem & diaphragmatis motum sufflaminatum, sanguinis liber cursus ex uno cordis ventriculo in alterum intercipitur, & is ex arteria pulmonali vehementius contracta, in arteriam asperam exprimitur, quod signum in funestis præcipuum est. In abdominis cavo serum valorum alveis elapsum tum ex murmure, fluctuatione, tum etiam ex majori virium prostratione & lenta febre, quum viscera corrumpi incipiunt, in hydropicis dignoscitur, quæ corruptio per paracenthesin, æris atmospherici liberiori accessu facto, magis magisque promovetur, & mors acceleratur. De purulenta materia ex abscessibus disruptis in cavitates exstillante, quibus nimirum effectibus se prodat, jam in superioribus mentio facta est.

§. XXXV.

Ruptura partium internarum.

Quid? quod quandoque plane pars quædam interna disrumpatur & subitam insperatam mortem afferat, id quod potissimum de liene & utero annotavimus. Erat quondam Hemipoli foemina viginti & quod excurrit annorum, sanguineæ constitutionis & floridæ faciei. Hæc venæ sectionem nunquam passa & sexto jam mense uterum gerens, non solum ob matris obitum gravi afficiebatur mœrore, sed etiam incendio suborto terrore percellabatur, eoque excitata, præcipiti lapsu è scala cadebat, post quadrihorium exspirans. Inquirentibus autem in tam subitæ mortis causam, facta sectione, aliquot libræ sanguinis corrupti, ex disrupto in convexa parte tumido & friabili liene, effusæ, in abdominis cavo sese obtulerunt, licet exterius ne vestigium quidem sugillationis compareret. Oblatus etiam haud ita pridem ordini nostro ad ferendum judicium est casus, de viro, qui inverso rastro forte percussus, paullo post obiit, inventa sub sectione nulla externa macula aut læsionis mortiferæ nota, sed abdomen cruore ex liene, ad costas usque spurias infimas elongato, discisso, plenum. Uterum vero perrumpi, sæpius quam quidem putatur accidit. Videlicet quando foeminæ per aliquot dies graviter ex partu laborarunt, & retento foetu, subito occumbunt, post mortem plerumque uterus ex ruptura perforatus deprehenditur, propendentibus, ex hiatu, infantis pariter extincti, pedibus.

§. XXXVI.

Dantur adhuc aliæ chronicorum & rebellium affectuum causæ, quæ licet aliquanto rarius occurrant, eo plus tamen habent in sanando & cognoscendo difficultatis. Sunt autem hæ ipsæ partium scirrhosæ indurationes, quæ tum viscera, ex innumeris tenuissimis vasis conflata, tum etiam glandulas, quarum structura identidem mere vasculosa & nervoso-membranacea est, potissimum invadunt. Quum enim ex obturatione tubulorum trahant incunabula, facile colligitur, eas partes, quæ fere penitus ex minimis & capillaribus vasis constructæ sunt, ejusmodi malis ex facili patere. Sicut autem in abdomine copia glandularum & varia viscera continentur, ita etiam hæc vitia crebrius ibi conspiciuntur. Inprimis pancreas, quod totum mere glandulosum est, immo corporis glandula maxima, crebrius quam ullam aliam partem, scirrhis indurationibus expositum invenimus. Profecto diuturniora illa mala ac vitia, quæ circa digestionem & primas vias in hypochondriacis & hysteris frequenter occurrunt, ut plurimum pro causa pancreatis inexpugnabilem obstructionem, teste anatome, agnoscunt; unde fit, ut ejus succus deficiens, vel heterogeneo acore imbutus, non solum digestionem & dissolutionem ciborum minus recte interservire possit, sed etiam perpetuus sit acidi corrosivi proventus, qui famem caninam efficit. Denique pancreas etiam penitus induratum in iis, qui ex quartana diuturna laborarunt, sæpius vidi.

§. XXXVII.

Quumque pylorus eique annexum duodenum copiosis & eximiis glandulis obsideantur, accidit quandoque, ut scirrhus tumor etiam in iis deprehendatur, qualis tumor, si aliquanto major fuerit, circa dextrum epigastrii latus renitentia se manifestat, & ad tactum digitis compri-mentibus, utut non sine dolore, cedit. Pylorum & duodeni principium dum ambit idque angustat & fere occludit, alimentorum in ventriculo digesta massa neutiquam ad intestina descendere inque corpus distribui potest, unde fit, ut hoc marcore consumatur. Diutius vero alimentorum massa ibi subsistens & acidior reddita, ventriculum ad vomitum sollicitat. Præterea ejusmodi duodeni exquisitè sentientibus membranis inhærescens tumor, distensione acerbissimum & indefinentem dolorem circa ventriculi regionem per aliquot menses concitat, cujus sævitia somnus impeditur & vires consumuntur.

§. XXXVIII.

Vix ulla vero in abdomine contenta pars facilius scirrhis infestatur, quam vesicæ corpus membranaceum & ex parte glandulosum, cui, præsertim circa cervicem, neque tantum externe, sed & interne, accrescunt. Ita *Miscell. Nat. Curios. Cent. I. & II. Obs. 186.* memorant: scirrhusum tumorem exterius vesicæ tam insignem adnatum fuisse, ut totam pelvim impleverit. Pro-
dunt ejusmodi tumorem, præter dolorem in pube gravativum, dysuria cum tenesmo, alvi difficultas; in foeminis fluor albus sanguini permixtus. Neque novum est, vesicæ ostio interius tumorem scirrhusum appendi, vel interiori ambitum orificii in magnam crassitiem excrescere. Hæc difficilem producit mictionem, siquæ incrementum capit, pæne supprimit, ut urina retenta & vesicam & ureteres farciminis in modum cum exquisito dolore distendat, abdominis sequatur inflatio

inflatio & febris, quale exemplum notavimus in illustrissimo Comite *de Harrach*, in Carolinis mortuo. Occlusi vero orificii scirrhuso tumore indicium est, catheteris plane negata admissio. Interdum etiam exterius circa ipsum vesicæ col- lum atque ejus ostium glandulosa surgit excre- scentia, quæ urinæ effluxum & catheteris in ve- sicam ingressum plane impedit, unde abdomen attollitur; de quo videatur *Riedlinus obs. 2. Anno 1697. mense Februar.*

§. XXXIX.

In prostaticis

Quandoque scirrhusus tumor non vesicæ cer- vici adhæret, sed in prostaticis consistit. Hic ple- rumque ex gonorrhœa male curata oritur, & non inodo in urina emittenda difficultatem pa- rit, sed & magnitudine increfcens, collum vesi- cæ ita comprimit, ut in totum urina supprima- tur, quo casu neque remedia interna & externa, urinam prolicere possunt, sed vomitus & con- vulsiones supervenientes, fatalem diem arcessunt. Quod vero tumor in prostaticis consistat, ex eo judicandum: si gonorrhœa præcesserit, ac ad ra- dicem penis renitentia quædam observetur. Fre- quentissime enim accidit, à coitu impuro & fluxu feminis maligno, inter initia præpostera medica- tione excepto, pessimum prostaticas contrahere vi- tium, ac induratas in scirrhum densari, qui de- mum sæpe longo post exulceratur inque fistulam abit, partes vicinas exedentem, eoque facto, go- norrhœa redditur inveterata ac rebellis, quæ Chi- rurgos æque ac medicos, ipsosque potissimum ægros, miserrime exercet.

§. XL.

In mesen-

Porro mesenterium, in cujus centro copiosæ ex- stant glandulæ generandis ingentis magnitudinis tumoribus quam maxime opportunum est. Qui atrophia affliguntur, præter abdomen inflatum, quod subinde in pueris conspiciamus, obstructas & valde tumidas in mesenterio, testantibus id anatomicorum observationibus, delitescentes glan- dulas gerunt, quæ liberum iter ac transitum chyli impediendo tabem & marcorem corpori infe- runt, intestina humoribus replent, qui fluxuum & frequentium dejectionum causæ fiunt. Non- nunquam accidit, ut ingentis magnitudinis scir- rhus, vel plures etiam, mesenterii membranis in- hæreant, quibus venter in molem attollitur, ut vel ingravitationem, vel molam, vel hydropem mentiat; reliquas vero partes corporis tanta sæ- pius absomit macies, ut ossa atque pellis videan- tur cuncta, qualia exempla passim in observa- tionum medicarum scriptoribus leguntur. Tali in casu id tantum vitandum est medico, ne in prognosi imprudenter delinquat suamque existi- mationem lædat. Differt enim ejusmodi tumor ventris, à scirrhusa glandularum mesenterii intumescencia productus, à graviditate, magnitudi- ne ingenti & magis magisque increfcens, reli- quarum partium contabescencia, & quod tumida moles non tam ad ilia & versus dorsum, quam potius ad medium abdominis sese extendat, nec non quod in prægnantibus motus infantis vivi- dus perferenscatur. Ab hydrope autem distin- guitur, dum huic tumores pedum œdematosi cum facie plumbea & lurida, urina pauca & ru- bicunda complicantur, aqua quoque in scrotum descendit & in abdomine impressi digiti vesti- gia relinquuntur, quæ in tumidis mesenterii glan- dulis non conspicua sunt. Sed multo difficilius est, à mola, quæ ab auctoribus vocatur nutri- tionis, & quæ potius excrefcencia fungosa utero

Frid. Hoffmanni Oper. Tom. I.

adnata est, hunc tumorem in foeminis discernere, nisi quod in ejusmodi carnosus molis magni pondus in regione pubis percipiatur, alvi & uri- næ fiat difficultas & humor peregrinus cum san- guine interdum ex poris & glandulis uteri ex- primatur, quod mesenterio affecto non facile ac- cidit.

§. XLI.

Præterea scirrhusi tumores frequentius etiam duo illa in hypochondriis magna viscera sita, he- par & lienem, adoriuntur, quia ob singularem venæ portæ structuram, dum vasis advehentis & arteriosi munere fungitur, infarctibus, ob- structionibus & ex iis pronascentibus scirrhis, quam maxime sunt exposita, quibus generandis adhuc eorum structura vasculosa plurimum ve- lificatur. In hepate si consistit & magnam ejus partem occupat, gravativus in dextro hypochon- drio percipitur dolor, sæpius etiam prædurus ac renitens tumor exterius conspicitur ac sub costis spuris & scrobiculo cordis tangi potest, præser- tim si quis ventri incumbat. Cæterum color fa- ciei flavus & luridus est, eademque cum oculis tumida, pedes quoque intumescunt, respiratio est difficilior, & compressione ventriculi post ci- bum, præsertim flatulentum, anxietas circa præ- cordia augetur.

In hepate.

§. XLII.

Quandocunque lien intumuerit, vel etiam in scirrhum abierit, in latere sinistro versus dorsum sub costis spuris gravativus & pressorius est do- lor, qui usque ad præcordialem regionem sese extendit, cachexia quoque in facie conspicua, & ructus ac flatus molestant, languet appetentia & spiritus difficulter trahitur. Accedentibus dolo- ribus & stricturis, ex animi graviori affectu, vel aliis de causis, spasticis, vomitus cruentus ni- gricans, vel solus, vel ejusdem coloris dejectio- nibus conjunctus, quem morbum *Hippocrates* ni- grum appellat, ut plurimum funestus nascitur: id quod sæpius vidi in foeminis adultioribus, san- guineæ complexionis, diu mœrori indulgentibus, immo etiam post paralyfin sinistri lateris, post quam & atonia & infarctus lienis incescit. Scir- rhum quandoque etiam uterum invadere; ita ut fere totus in illum mutetur, observationum fide constat, & de ejusmodi casu vid. *Misc. Nat. Cu- rios. Cent. I. obs. 120.* Hæc vero adsunt sympto- mata: premitur vesica & intestinum rectum, hinc urinæ ardor, stranguria, alvi evacuatio; atque eximius dolor fixus & stabilis circa pubem & circa lumborum regionem, vomitus, cibi fasti- dium & præcordiorum anxietates exsuscitat.

De utero.

§. XLIII.

Sed transeamus jam ad morborum alias causas, non ita quidem obvias, misere tamen & variis modis ægros torquentes, quin ipsum lethum in- ferentes. Hæ sunt massæ ex variis pelliculis & fibris concretæ solidiores, cordis & vasorum ca- vitatibus præcipue majoribus inhærentes, quæ medicis polyporum nomine veniunt. Morbos, quibus sese jungunt, sive acuti sive chronici fue- rint, perpetuo fere immedicabiles reddunt, & diligentior cadaverum morte sublato- rum ana- tome nos facit certiores, vix tria cadavera oc- currere, ubi non infesti hi hospites conspec- tui sese offerant. Domicilium vero suum ma- xime omnium in cordis thalamis, inque pri- cipio arteriæ pulmonalis & arteriæ aortæ, ra- rissime in vena pulmonali habent. Obver- satum adhuc animo serenissimi Holsatiæ Prin-

De polypis.

cipis, anno abhinc è vivis sublato exemplum. Hic quum de dolore comprimente fixo in sinistro thoracis latere supra papillam conquereretur, cum anxietate & angustia spirandi, pulsu inæquali, cordisque palpitatione, quibus oedematosa pedum accedebat intumescencia, ego per litteras in consilium anno ante obitum adscitus, polypum adesse prædixi & difficilem fore medicationem, quod præsagium sectio cadaveris confirmavit, dum quatuor polypi, duo in dextro, unus in sinistro cordis ventriculo & quartus in arteria magna, inventi. Sinus cerebri quando à polyposo concremento obsidentur, atrocissimi affligunt capitis dolores, & ad hemiplexiam, quin apoplexiam, via panditur. Præterea polypi non modo subitæ mortis, ubi canalium alveos, præsertim dextro ventriculo appositorum, claudunt, sed & si pulmonalibus vasis inhærent, gravissimæ & sæpe funestæ hæmoptyses, catarrhi suffocativi, asthmatis convulsivi, nec non hydropis thoracis, causa sunt.

§. XLIV.

Signa polyp.

Plurimum itaque interest, ut medicus hos occultos, insensibilissimos motuum vitalium hostes exploret ac detegat. In quo quidem scrutinio tenendum est: temperamentum sanguineum, & habitum corporis angustioribus vasis, fibrisque mollioribus donatum, vitæ genus laboris & motus expers, parciolem potum & usum eorum alimentorum, quæ glutinosum succum præbent facilesque sunt ad coagulum subeundum, libera-liorem usum vini acidi & spirituosorum, coenam quoque largiorem, ad generationem ingratorum horum hospitem symbolum conferre. Proximiora vero & manifesta indicia, è quibus ipsorum præsentia conjici & dijudicari debet, huc redeunt. Polypi initium arguit compressio pectoris & fixus circa cor dolor, si vero jam incrementum cepit, præter hæc frequentius, vel levi de causa, recurrit cordis palpitatio, pulsus miris modis inæqualis & varius est, sæpiusque notabilibus intervallis intermittit. Tum à motu corporis fortiori, vel medicamento sanguinem exagitante sumto, aut ab affectu animi vehementiori, dispnoea & incredibilis cordis anxietas urget. Postremo, lipothymia frequentia, sine causa evidente, vel quæ à certo corporis decubitu provenit, est in signis polypi præcipuis commemoranda, quibus accedit quod sanguis emissus in aquam calidam, mox instar gelatinæ concreseat & in filamenta alba mucilaginosa fatiscat.

§. XLV.

A polypis uteri hydrops uterinus.

Nonnunquam ejusmodi carnosæ & membranosa involuta concretiones vasa uterina opplent, & hinc varia circa uterum & mensium negotium insolita pathemata occurrunt. Notum ex pathologicis est, certam hydropis speciem, quæ maxime inferiorem abdominis regionem petit, utero veluti causæ adscribi, neque male. Etenim si libera sanguinis per ejus vasa progressio impeditur, quod promptissime fit, canalium alveis à polyposis massis obstructis, non potest non fieri, quin ingens feri copia secedens, aut in uteri, aut in abdominis cavitatem, descendat. Cl. Payerus in *Hist. Anat.* p. 127. foeminam tumore hydropico demortuam disseccuit, ubi uteri vasa copiosis molis carneis intus oblecta invenit. Ante aliquot annos foemina generosa Berolini peculiari laboravit affectu: per aliquot nempe menses ex utero limpidissima aqua, quæ intra viginti quatuor horas interdum libram æquabat, stillavit, ægra

tandem marcore & febre confecta. Post sectionem uterus magna ex parte etiam polypis quoad vasa oblectus, inventus fuit. Accidit etiam, ut serum in hydatides sive magnas vesicas concedat, quæ si fuerint intra uterum ruptæ, aqua ex orificio uteri exstillat, si verò exteriorem uteri substantiam obsident, humor in cavum abdominis funditur. Referenda huc est historia, quam *Vesalius Lib. V. de corporis humani fabrica Cap. IX.* de quadam muliere Augustana refert: se in ejus uteri cavitare serosæ materiæ supra sexaginta mensuras Augustanas reperisse, reliquis visceribus ab inundatione plane immanibus. Et *Mauritius Cordæus Comment. in Lib. I. Hippocr. de morb. mulier.* notabilem affert historiam mulieris hydropis uteri laborantis, in cujus utero & reliquis corporis partibus, plurimæ vesiculæ aqua citrina plenæ, inventæ fuerunt.

§. XLVI.

Neque dubium est, quin polypi uterini causa profusissimæ sæpius sint hæmorrhagiæ, non secus, ac qui vasa pulmonum obsident, incoercibilem hæmoptysin proferunt. Quæ frequenter abortiunt foeminæ sanguine redundantes, iis solenne admodum est, ut paullo ante abortum cum ingenti lumborum dolore primo sanguinem, deinde massas carneas ovi gallinacei magnitudine, numero plures, excludant. Has enormis non raro cum animi defectione sanguinis effusio sequitur, & paulo post embryo. Perperam autem hæc massæ habentur pro molis, quæ nihil aliud sunt, quam polyposæ ejusmodi à mucido stagnante intra venas uterinas sanguine concretiones, quibus ejectis, ob vasorum nimiam distensionem & apertionem, largissima sanguinis effusio sequi necessario debet. Id tamen interdum accidit, ut aliquot placentulæ abortivæ in uteri cavitare maneant, ibique auctæ ac induratae, varia symptomata producant, quorum causa mola à medicis communiter dicitur & adstruitur, cujus indicia sunt, si intumescit abdomen, tumor vero magis ponderosus & durus est in ventre, nec versus umbilicum extenditur, sed in inguine subsistit, nullus se exferit motus infantis, nec verus, nec calcitrativus, neque circa umbilici regionem, nec exterius percipitur, sed interius debilis & tremulus est, cui multæ præcordiorum anxietates cum tensivis doloribus junguntur. Quandoque cum sævissimis partus doloribus ejusmodi molæ, quæ nonnisi membranacea concreta sunt, excluduntur, unde venter mox in totum subsidet.

§. XLVII.

A polypis ad alias res ferè leves & ludicras, nihilo minus sævissimorum, quin lethaliū, affectuum causas nos convertimus, inter quas jure meritoque calculus ex materia tartarea, terrea, mucida concretus, si infelicissime canales vel cavitates eximias & notabiles obstruat, refertur. De renum calculo illud perquam notatu dignum est, eum, quamdiu renum incolit substantiam, nihil molesti sensus creare, simul ac vero incipit è sede sua moveri & ureterem ingredi, tunc protinus incredibilis se primo in lumbis, postea in lateribus circa ilia, secundum ureterem ductum se exferit dolor, quem ordinario fere nausea, vomitus, summa anxietas, extremorum frigus, stupor partis affectæ, ardor urinæ, calor præternaturalis, alvus constricta, contractio testiculi & vigilia, comitantur. Quandoque

Hæmorrhagia uteri aborti

De calculo in renibus

que etiam atroces in ventre cruciatus complicantur, qui, si calculus subito per ureteres transit, atrocissimi fiunt, ut medentum imperitiores, & qui prima vice cum hoc malo conflictantur, morbum potius pro convulsiva & funesta colica, quam pro calculo, habeant. Neque inficiandum est, dolores ex calculo plura habere cum colica spasmodica communia, in eo tamen differentiam esse experientia docet, quod calculus subito & cum atrociam invadat, principium in lumbis habeat, ventriculum ad nauseam & vomitionem sollicitet & in urina crassius sabulum conspiciatur. Tandem ne hic prætereundum est, quod, si ren male affectus & prægrandibus calculis obsessus fuerit, flatus in intestino colo ejusdem lateris stagnantes, dolorem ibi satis molestum procreent, vel quod eum è sede sua dimoveant, vel quod mutuo contactu & attritione intestini flatibus distenti, & renis calculis expansi, dolor ille suscitetur.

§. XLVIII.

In ureteribus.

At vero longe majores molestiæ sunt, quas calculus ureteribus firmitus ac diutius impactus, efficit. Dum enim urina liberum in vesicam fluxum intercipit, pertinax fit dysuria & feralis urinae suppressio, quæ etiam pro diverso situ calculi certis suis notis ac indiciis dijudicanda est, quas hoc loco exponere, non erit incongruum. Ubi urina supprimitur & calculus uretheris cavitatem obstruit, vesica est vacua, catheter potest immitti, sed parum humoris elicit, tantaque est doloris circa illa atrociam, ut spastica constrictio etiam alterum ureterem in consensum rapiat. Si vero calculus, vel etiam sanguinis grumus, circa orificium uretheris, ubi obliquo ductu per vesicæ membranas transit, hæret, vesica etiam ab urina vacua est, immanis cruciatus in inguine sentitur.

§. XLIX.

In vesica.

Deinceps sicut calculus in renibus, ita etiam qui in vesica delitescit, & urinae egressum impedit, certis dignoscitur indiciis. Videlicet ægri de tumore & dolore in pube conqueruntur, urina guttatim stillat, quandoque cum horrendo cruciatu, & sæpius crassum ac puriforme sedimentum deponit, permixtis moleculis, nunc carptam lanam, nunc vermiculos, referentibus. Interdum accidit, ut urina copiosissima reddatur, quandoque alvus & urina supprimatur, & abdomen ad lapidis duritiem, cum dolore circa pubem acutissimo & horrore molesto distendatur. Nonnunquam alvus subducitur cum flatu & larga lotii emissionem. Si atrox dolor adest, anorexia, febris & constrictio alvi urget, & urina pauca, pallida tamen, cum magno nisu & molestia excernitur. Hæc symptomata potissimum affligunt, si quando lapis scaber, non adeo magnus & figuræ complanatae ac ovalis, orificium tegit obstruitque, & ab asperitate & attritione dolorificus spasmus fit, qui tam atrociam gignit symptomata. Per intervalla vesicæ calculo laborantes, præsertim sub boreali aëris statu, item flatibus retentis, & alvo obstructa, graviori cruciatu & pondere laborant, mictio fit sæpius purulenta, in senibus jungitur tenesmus, membri pruritus & alvi cum urina suppressio est, quandoque etiam ipse anus procidit: pro situ vero corporis variante levamen accipiunt.

§. L.

De calculis vesicæ.

Quod attinet ad vesiculam felleam, neque hæc à calculosis concretionibus libera deprehenditur,

sed sæpiusculæ calculi ingentis magnitudinis ejus cavitatem totam replent, interdum numero plures, variæ figuræ ac magnitudinis in ea delitescunt, & gravibus symptomatibus corpora affligunt, quæ tamen non eadem, sed diversimode comparata, prout vel ingens calculus vesicam ipsam male afficit, vel plures per ductum cholodochum transitum moliantur. Quandocunque fellis vesica tota fere lapillis turgit ac repleta est, pertinax cum gravativo & continuo dolore dextri hypochondrii icterus, omnium remediorum efficaciam eludens, corpus flavedine tingit, cui si diuturnior fuerit, morbus aquatus adjungi solet. Quibusdam continua nausea vel etiam ciborum vomitio, in aliis atrocissimus ischiadicus dolor & asthma diuturnum conjunguntur. Præterea quibus ingens in fellis vesicula calculus est, ab iracundia insolentia symptomata patiuntur. Nam quando à vehementiori iracundiæ affectu spastica, ut ordinario solet, ductuum biliariorum constrictio fit, liber bilis in duodenum effluxus impeditur, ipsaque regurgitat ad vasa biliaria felleamque cystidem, inde efficitur, ut, quum calculis cystis jam repleta sit, à bilis copia ductus valde sensibiles distendantur, hinc ob consensum non modo acutissimus abdominis dolor, præcipue in dextro hypochondrio oriatur, sed & tanta respirandi fiat angustia & difficultas, ut suffocationis periculum appareat, alvo simul adstricta & extremis refrigeratis.

§. LI.

Si vero ipse calculus transitum per ductum cysticum & cholodochum, qui intra membranas duodeni fertur, affectat, fixus & intolerabilis circa eam regionem, qua ductus cholodochus duodeno inseritur, in dextro hypochondrio est dolor, cum molestissimo vomendi conatu, nausea, appetitus dejectione, colore cutis intense flavo, membrorum lassitudine, alvi duritie: quæ symptomata una cum flavescente cutis colore, repente & ex toto solent remittere, excretis per anum calculis pondere levissimis, & tunc ipsa cutis nitorem suum recuperat. Confirmatum hoc habemus notabili exemplo. Erat quippe honoratior quidam vir, sexagenario jam major, qui post diuturnum in dextro hypochondrio comprimentem ac obtusum dolorem, in spiritus difficultatem incidens, paulo post oedematoso pedum primum ac postea hydropico crurum, scroti & abdominis tumore afficiebatur & aliquandiu affligebatur. Huic præscribebat medicus infusum purgans, cujus basis cortex medius sambuci, à quo efficaciter purgabatur & plures lapillos, planæ & acuminatæ sexangularis figuræ, nigricantes ac leves, plus quam viginti numero, per alvi secessum excernebat, quo facto, asthma disparuit, tumor subsedit & cum valetudine in gratiam redire visus est, quæ tamen, si ob ætatem, vel priorem longum morbum attritis nimium viribus, minus constans erat, sed hydropi paullo post iterum implicitus, naturæ debitum solvit.

Et per ductus biliarios tenentibus.

§. LII.

A calculis progredimur jam ad alias ludicras res, quæ tamen potentissimæ sunt ad corpora humana tam misere affligenda, ut non majora prope modum tormenta possint excogitari. Et hæc sunt varia ratione figuræ & magnitudinis infecta, siue vermes, qui maxime ventriculum & alimentorum magnum illum canalem inhabitant, ibique nidos & hospitia sua habent. Non eadem vero sed diversa pro locis, quibus insident, & prout

De vermibus.

*In ventri-
culo.*

variae eorum sunt species, pathemata observantur. Si rotundi proboscide & pedunculis quasi totidem uncis instructi fuerint, graviter rodunt, lancinant, & interdum membranas perforant. Hi quando ventriculum obsident, incredibilis ejus morsus cum inexplicabili dolore, anxietate, inquietudine, nausea, salivæ fluxu infestat; foetidus ex ore vapor halat, vultus mox pallet, mox rubet, narium adest pruritus, vomendi cupiditas, sicca ac molesta tussis per intervalla affligit, animique defectio frequentius jungitur.

§. LIII.

*In ileo
lumbri.*

Si in intestinis, præsertim ileo, cui lubentissime insident, eo quod amarorem bilis minus ferre possunt, nidum suum habent, hæc sunt indicio symptomata: venter mirifice, præsertim in infantibus, distenditur, ut tympanitide laborare videantur, alvi subinde nimia jungitur dejectio, qua feces foetidæ coloris cinerei, stercorei bubulo similes, secedunt, partes superiores tabescunt, ita prorsus, ut nonnisi ossa cohærentia conspiciantur, licet multum appetant. Facies plerumque pallet & tumida est, & cum excrementis ramenta quædam, feminibus cucumeris vel eucurbitarum similia ejiciuntur. Lumbrici dicuntur hujus intestini incolæ, qui plerumque lati sunt & longi & mirifice se convolvunt, neque tam alacres sunt, quam rotundi, sæpius quoque ob tussim, febrem & lateris dolorem pleuritidem mentiuntur, quæ tamen à vermium symptomatibus, dolore sub costis spuriis, febre acuta & tussi sanguinolenta distinguenda.

§. LIV.

*In crassis
ascarides.*

Quod attinet ad ascarides, neque hæc obscuris indiciis se produnt. Hospitium suum quam maxime in intestinis crassis quærunt, & frequentius ac copiosissime recto insident, similesque tineis sunt, & manipulatim sæpe alvo ejiciuntur, quin ex ano non raro prorepere & muliebribus pudendis se insinuare solent, ut cum urina in matulam descendant, sæpiusque incautioribus medicis imponant, ac si ex vesica prodiissent. Utur vero multa cum reliquis insectis communia habeant, si inflationem abdominis, si maciem, si nauseam respiciamus; in eo tamen quædam est differentia, quod multus ac gravis pruritus in ano percipiatur, & alvus ad deponendum frequentius sollicitetur odoremque identidem foetidum excrementa exhalent. Hæc vermium species natu etiam majores, præsertim foeminas luxui & otio indulgentes, divexare solent.

§. LV.

*Insolita
inde sym-
ptomata.*

Præter memorata hæcenus è vermibus gravia symptomata illud adhuc notandum est, quod febres subinde eos invadere soleant, qui vermibus exercentur, quæ ex lentarum & putridarum sunt numero & similes quotidianis nullumque servant typum, sed sunt erraticæ, cum pulsu inæquali, frequenti & obscuro. Neque dubium est, quin ex vermibus in putredinem foetidam colliquescentibus exsurgant. Porro etiam non prætereundum, quod vermes præsertim minuti, quos sex pedibus cum nigro capite instructos vidimus, si nerveas tunicas intestinarum graviter lancinant, arrodunt, mirabilia atque insolita, quæ ab imprudentiori vulgo incantationibus solent adscribi, symptomata producant. Videlicet sunt inter exempla verminantes, quos convulsivæ artuum ad stuporem usque tractiones, distensiones & incredibiles circumgyrationes, miro torquent modo, mox

aphonia tentantur, mox aliena & male cohærentia cum mentis turbatione loquuntur, strident dentibus, in furorem agitantur, dæmonia se videre asseverant; remittit tamen sæpius hæc symptomatum sævitia, si nimirum vermes à rosione desistant. Tam valde gravis vero symptomatum violentia non aliunde repetenda videtur, quam quod universum genus nervosum, à vehementi rosione tunicarum intestinalium, mutua consensione & communicatione in exorbitantes hos motus rapiatur.

§. LVI.

Neque in hac latentium causarum morbificationum consideratione silentio transmittendi flatus, qui utut res levissimi momenti videantur, tantas tamen anxietates, cruciatus & insolentia in diffitis etiam partibus symptomata concitant, ut vitam in summo discrimine positam credas. Causa horum ut plurimum est tenax & viscida copioso aëre plena materia, quæ à calore in halitus, quibus inest magna expansiva vis resolvitur; accedit tamen etiam atonia, sive paralytica quædam resolutio, tunicarum ventriculi & intestinalium, qua fit, ut nimium à contentis vaporibus expandantur, præter naturam huc illuc trahantur demumque per consensum atroces passiones accedant. Discrepant tamen symptomata à flatibus pro differentia locorum quæ patiuntur. Ventriculus quidem ab iis inflatus & per omnem ambitum fortiter expansus, summas præcordiorum anxietates & spirandi ad suffocationem usque angustiam, cum faucium constrictione efficit, atque inferior ejus pars sub cordis scrobiculo versus latus dextrum, instar vesicæ turgidæ, ovi gallinacei magnitudine, sensibus & tactui sese offert, demum ructus superveniunt, quibus flatibus exitus conceditur & anxietatum fit allevatio. Et hæc ventriculi inflatio frequentissima est hypochondriacis, nec non hystericis, in quibus sæpe tanta, ut ea affectæ, ob interceptum diaphragmatis descensum sine omni sensu & motu jaceant & respirationis successus vix observetur.

§. LVII.

Sæpius quoque intestina torquet flatuum proventus. Si quando accidit, ut tota intestinarum moles flatibus mirifice distenta, ingentem abdominis tumorem efficiat, dolores atroces cum alvi adstrictione exsurgunt, qui affectus colica flatulenta vocari solet. Quæ distensio ubi est diuturna, ob intestinarum quandam paralyfin & viscidæ materiæ copiam intus hærentem, abdomen instar tympani expanditur; tandem jungitur cachexia & tabes, ac morbus vocatur tympanitis. Frequentius vero contingit, ut tantummodo partes quædam intestini, præsertim coli, flatu dolorifice diducantur, quod circa hypochondria utraque sæpiissime obvium, quia colon ibi in flexuras curvatur, quæ impediunt, quo minus & flatus & alia contenta promte transeant, sed stagnent. Familiarissime id in hypochondriacis evenit, & perperam dolor ille tensivus sinistri lateris, pro tumore & inflatione lienis à medicis anatomes ignaris habetur, eo quod lien in homine non in hypochondrio, sed in dorso, sub diaphragmate situm obtinet. Testatum etiam faciunt observationes, quod in osse ilei dextri ingens & dolorificus tumor quandoque diutius per intervalla affligat & à cibis flatulentis sumtis exacerbetur, hanc ob causam, quia principium coli satis capax & membranis robustis inotricibus instructum, ut sursum excrementa propellere possit, hic

De flatibus.

In ventriculo.

Et intestinis.

hic constitutum, quod adeo ampliatur, ut cum exquisito dolore ipsa integumenta extrorsum urgeat, & periculum ruptionis sit, quod etiam quandoque factum observationes practicæ & anatomicæ confirmant. Ejusmodi vero flatulentos tumores exinde licet cognoscere, si ad emissionem flatuum vel ejectionem materiæ tenacis copiosæ, per vomitum aut secessum, tumores cum dolorum allevatione minuuntur. Dolores lumborum, pulsuum intermissio, dolores in ossē coxendicis, tumores pedum œdematosi, sæpe solis flatibus intestina distendentibus & vasa vel nervos comprimētibz debentur, & datis carminativis ac clysteribus, conquiescunt.

§. LVIII.

De erosione
ventriculi
& intesti-
norum.

Restat demum alia causā abstrusa memoranda, quæ in ventriculo neque minus in intestinis consistit, rariusque animadvertitur, mortis tamen & gravissimorum morborum genitrix est. Est hæc ventriculi vel etiam intestinalium tunicarum erosio, quæ vel ab erodentium acidorum succorum copia in hypochondriacis, vel ab iracundia vehemēti & frequenti, vel à sumto veneno emetico vel purgante aciore accidit, vel etiam post cholerae, dysenteriae aut diarrhoeæ morbum relinquitur, & affectus est chronicus, ab inflammatione, quæ celerum passionum præcipua, distinguendus. Ventriculus & duodenum, quando erosa, continuus & fixus dolor est circa præcordia, tensivus, tractorius, interdum cum ardoris sensu, qui usque ad dorsum porrigitur, & summas anxietates circa præcordia parit, ipsum quoque jugulum petit, mirumque vires atterit atque nauseam & inclinationem ad vomitum suscitāt. Post omnem medicinam aut cibum aliquanto intemperatiorem, qui falsæ, calidæ, acidæ, spirituosæ, acris est naturæ, exacerbatur, ac inprimis à purgantibus atrocissimus redditur; demulcentia vero, humectantia atque emollientia, & optime medicamenta ex chamomilla & millefolio ferre potest: pulsu demum accedente celeri hectico, res est conclamata. Quod si in intestino quodam ejusmodi erosio fuerit, identidem dolores in abdomine ac dorso cruciant, qui semper assumtis calidis, falsis, acidis mirum exacerbantur, dejectiones alvi sunt creberrimæ & varia calor & frigoris est in corpore vicissitudo, urina mox tenuis & aquosa, mox rubicunda & crassa mingitur, malum etiam admodum diuturnum est, vires depascit, corpus consumit, longum certe tempus & accuratam ac demulcentem diætā, plusquam medicamenta, præsertim activiora, desiderat. Et affectus senibus cessantibus hæmorrhoidibus non adeo rarus est.

CAPUT VIII.

De damnis ex cohibita cuticulari excretionē.

§. I.

Se. ex-
cretiones
sunt neces-
saria.

Quicumque artificiosissimam corporis nostri machinam partiumque in ea admirandam configurationem paullo curatius perlustrat, eandem ex numerosa organorum secretoriorum & excretoriorum congerie maxima ex parte coagmentatam esse animadvertit. Tanta enim secretionum & excretionum ad vitam cum sanitate tuendam utilitas est atque necessitas, ut sine iis

corpus nec vivum, nec sanum, nec robustum, nec ad exsequendas animæ actiones idoneum esse, neque etiam augescere & ad legitimum incrementum perungere possit. Videlicet corruptibile est corpus humanum, nec à putredine immune durare potest, nisi perennis sanguinis omnisque generis fluidorum, mediante vigore systoles atque diastoles in solidis, progressivus motus libere succedat, cum quo simul intestina partium sanguinem constituentium calida agitatio augetur. Sub hoc autem progressu maximeque intestino mutuo attritu, sanguinis moleculæ aliam figuram, texturam ac magnitudinem nanciscuntur, & à blanda temperata schesi desciscētes, salino-sulphuream, vel etiam viscidam, utramque vitæ adversam naturam, induunt. Quare opus est, ut succi intemperati, nutritioni & motibus vitalibus continuandis inutiles facti, à purorum connubio segregati proscribantur, ac in eorum locum temperati, blandi satisque fluidi, per congrua solida & liquida alimenta, denuo substituantur. Quod quidem quum per saluberrimas secretionē atque excretionē perficiatur, earundem utique necessitas, neminemque diu sine cibo & potu vivere posse, luculenter patet.

§. II.

Deinceps hæ ingestiones atque egestionē reciprocæ certa proportionē sibi respondere, in iis autem, qui legitimam corporis firmitatem jam adepti sunt, æquales esse debent. Hinc est, quod adultum corpus lance libratum, elapsis octo diebus eandem gravitatem exhibeat, licet interea à robusto & laboribus operosis occupato, vel centum alimentorum libræ ingestæ sint; quin si pondus increvit, nec omne quod ingestum iterum egestum, restibile in vitio est ac morbus certo præstolatur. Etenim universa œconomia animalis non solum certo numero pondere & mensura, sed etiam debita proportionē, ac moderamine, tam ratione materiæ, quam motuum, maxime gaudet, ab omni autem excessiva qualitate & quantitate, motuum æque ac materiæ, sive humorum, læditur atque offenditur.

Ac egestis
respondere
debent in-
gestis.

§. III.

Quapropter ad sanitatem ipsamque vitam tuendam, plurimum utique refert, ut Medicus & ingestorum & egestorum curatam habeat rationem. Nam profecto optimum corpus à præmatura morte & morboſis varii generis afflictionibus defendendi modum, in eo quam maxime versari cum Hippocrate lib. de diætā, censeo: ut mensura ingestorum ad vires, imo ad motum & exercitationem corporis, exacte accommodetur, tenendo, corpus quo robustius, quo magis viribus pollet, majora vasa firmioresque fibras obtinet, & plus ferre posse atque subigere. Ex ingestis autem quæ facilius solvuntur & vasa atque excretoria promte subeunt, aliis salubritate præstant; vicissim, quæ ægrius digeruntur minusque expedite emunctoria pervadunt, sed passim resistunt, valetudini infensa, hæc interdicienda, illa suadenda. Quin, is demum, qui ex ingestorum & egestorum natura, indole ac mole, morborum causas & primordia derivare novit, prudens Medicus dicendus est atque peritus.

Quod à
Medico ob-
servan-
dum.

§. IV.

Quum vero ea, quæ in pabulum assumuntur, non unius sint ejusdemque, sed admodum dissidentis naturæ & facultatis, alimenta quippe viscida, falsa, acria, acida, sulphurea, spiritiosa, texturæ

Excernit
la hunc in
finem sunt
varia.

texturæ quoque compactioris, excessivæ omnia indolis, sapientissima certe summi opificis providentia factum est, ut varia emunctoria in corpore fabrefacta sint, quæ singulorum genio cunctisque heterogeneis evehendis, apprime respondeant. Nimirum residuæ ex alimentis feculentia per alvum secedunt, ac cum his non solum scoriam biliosam, plurimis salino-sulphureis recrementis repletam, sed etiam mucus in glandulosa crassiorum tunica secretus. Sero recrementitio, crassioribus & terrestribus sulphureis moleculis onusto, urina dicto, renale dicatum est colatorium. Et copiosa aquea portio, tenuibus salino-sulphureis particulis imbuta, ex cutis spiraculis sub perspiratione, quæ insensibili modo jugiter in corpore succedit, exhalat atque diffatur. Tacemus mucida illa purgamenta, quæ in narium, palati & bronchiorum glandulosa substantia secreta & collecta, scretu & munctione rejiciuntur.

§. V.

Perspiratio suppressa maxime noxia.

Per omnia hæc organorum excernentium emissaria, recrementa jugiter à corpore eliminantur. Quod quemadmodum si debito tempore & sufficienti copia perficitur, integritatem corporis & functionum in eo fulcit atque tuetur; ita vicissim si segniter minusque sufficienter succedit, plures & gravissimas, præsertim chronicas passiones, pullulare atque excludi prona elucescit consequentia. Quam grave autem detrimentum ex saluberrimarum excretionum defectu in valetudinem redundet, speciatim & accurate in *tomo secundo Medicinæ rationalis systematicæ*, & quidem *Part. III. cap. 4. de excretionum defectu præcipuo morborum fundamento*; *cap. 6. de perniciali eorum quæ excretiones cohibent indole*; *cap. 7. de epidemicorum morborum origine ex transpiratione impedita*, exposui. Quapropter ibi dicta heic lubens mitto, & potius id maxime jam excutere ac demonstrare allaborabo: ex omnibus evacuationibus suppressis, vel deficientibus, nullam esse, quæ majorem noxam ac periculum corpori minetur & causa sit innumerarum passionum, quam perspiratio & insensibilis illa subtilissimarum sordium, per universi corporis corticem porulis pervium succedens emissio, si impediatur, cohibeatur, materiaque excernenda in corpore remaneat, vel ad exteriora jam appulsa, ad interiora relabatur.

§. VI.

Quia excretionum præcipua.

Et sordes maxime perniciales evehit.

Enimvero depuratur in universali corporis emunctorio, cute, universa sanguinis & humorum massa, & tam copiosa per istud contingit excretio, ut ex *Sanctorii calculo*, omnes reliquas quantitate superet. Hac itaque suppressa maxima recrementorum pars restitat, omnes corporis succi sorditiem contrahunt, corrumpuntur ad putredinem disponuntur, ut valetudo inde gravissime luat. Quod vero maximum est, ipsæ sordes quæ sub perspiratione exhalant, valde tenuis salina sulphurea & aereo-æthereæ activæ indolis sunt. Hæ enim in corporis penetralibus retentæ, vel ex cutis tubulis retrocedentes, haud secus ac mortiferum venenum, quod exigua mole & summa partium tenuitate acri causifica pernicipalem vim in nervosis maxime partibus exsequitur, ob penetrantem subtilitatem, prompte per universum corpus infesta semina spargunt, intimæ ad partes exquisite sentientes sunt admissionis, easdemque atrocissime adoriantur atque exagitant, ut vehementissimæ, immo

lethales, in nervolarum potissimum partium genere, oboriantur affectiones.

§. VII.

Inter ea vero, quæ ad sufflaminandam saluberrimam perspirationem faciunt, aer potissimum connumerandus. Hic enim sicuti purus ac temperatus sanitati egregie patrocinator; ita vicissim excessiva qualitate præditus, eandem gravissime labefactat, hanc maxime ob causam, quod immediate corporis corticem ambiat ejusdemque tonum varie alterando, succedentem per substratos tubulos sordium excretionem dirigat ac moderetur, intendat, vel frequentius cohibeat. Nimirum si nimis frigidus, nervis inimicus est, succos coagulat & fibras rigidas reddit, unde non solum ad affectus spasmodicos disponit, sed etiam cutis poros & vasa nimium coarctans, ad interiora urget humores, stagnationem demum ac stasim concipientes. Nimis humidus tonum solidorum laxat ac solvit, ut liquida languide circumagantur & ad emunctoria ipsosque subcutaneos tubulos non vegete appulsa fordescant, morbi que ex atonia & humorum impuritate oriundi pullulent. Nimis calidus rarefacit & dissolvit corporis succos, ac intestinum motum augendo, acres & biliosos reddit, licet perspirationis successui non officiat, nisi simul humidus sit, & sic ad morbos malignos viam sternat. Potissimum autem cuticulari excretioni obest frigidus-humidus, quippe qui humores incrassando & fibrarum elaterem minuendo, efficit, quo minus succi spissescerent per minimos canales ad corporis corticem trudi, & remisso nimis colatorio, sordium secretio atque excretio rite perfici possit.

§. VIII.

Insuper aeris tempestatumque insalubris constitutio ac inde pendens in perspirationis successu mutatio, plurium morborum causa est, qui certis anni temporibus, quandoque etiam epidemicæ, grassantur. Sapienter hinc ab *Hippocrate lib. de humor. §. 7. proditum est: qualia sunt tempora, tales etiam sunt morbi & constitutiones ex ipsis. Si tempora tempestatum & ordinate se habuerint, morbi judicatu faciles sunt. Vernaculi autem temporum morbi indicant mutationes, & prout variaverit tempus, similes aut dissimiles erunt morbi, qui in hoc tempore oriuntur.* Qui vere enascuntur, ita sunt comparati, ut ob atmosphæram inæqualem & mutabilem, elater fibrarum & maxime tonus cutis mirifice labefactetur, & retardato sanguinis circulo, exclusionem quoque sordium per halitus diminuta, & plethora & impuritas, proximæ morborum causæ, ingignantur. Aestatis morbi non tam calori, quam potius aëri frigidiori & humidiori, qualis tunc solet esse nocturnus & matutinus, poros occludenti, debentur. Autumnus omnium morbosissimus est, nullam aliam ob causam, quam quod ob crebriorem cœli ex frigido in calidum, humido in siccum, & vice versa, mutationem, æqualis sanguinis progressus & libera sordium exhalatio intercipiatur. Et hiems ob frigus, tam siccum, quam humidum, transpirationem impedit, eaque propter variis morbis inducendis favet, quos una cum vernalibus, æstivis & autumnalibus sigillatim recenset *Hippocrates Sect. III. aphor. 20. seqq. nec non Celsus lib. II. cap. 1.*

§. IX.

Inprimis autem nocent aeris tempestatumque vicissitudines, & si diu durant sæpiusque repetunt, morbos

Defectus perspirationis causa tistissimus aer.

Unde morbi anni temporibus facillimes.

Morbi quæque epidemici.

morbos qui populares habent circuitus excludunt; eo quod æquabili cutis tono, sub quo maxime viget libera perspiratio, nihil magis adversum est eumque destruit, quam repentina mutatio aëris calidi in frigidum, vel humidi in nimis calidum. Hinc certa & constanti experientia in comperto est, quod si calefacto per fervidum vernum vel æstivum æstus corpore, & resoluta, sub calore intestino motu intenso in excrementitias sordes humorum massa, tempestas postea subito aquilo-naris & frigida succedat, qua constrictis spiraculis sordes reprimuntur, accumuluntur, mutuo quasi confermentantur, iisdemque nervosis ac membranosis partibus inhærescentibus, febriles, spastici & convulsivi motus, varii generis febres, sæpius exanthematicæ, variolosæ, morbillosæ, purputaceæ, alvi quoque fluxiones plus vel minus cruentæ, oboriantur ac plures corripiant. Et enim id ceu perpetuum in genere est observandum: quo major materiæ impuræ salino-sulphureæ tenuis, perspiratione eliminandæ, in corpore proventus est ac copia; eo magis infestum & periculofum est, si ejusdem excretio impeditur, intercipitur vel cohibetur.

§. X.

*Nec non
endemiis.*

Ex eodem porro fonte morborum, qui certis locis familiares sunt atque vernaculi, origo arcessenda. Testantur quippe Medicorum commentaria, Hungariam & Italiam proferre febres pessimæ indolis acutas, cum vehementi cephalalgia & delirio junctas. Jam vero identidem constat: eam Hungarici cœli esse qualitatem, ut æstus diurnus sit ferventissimus, eundemque frigus excipiat nocturnum satis horridum. Huic itaque si corpus prius æstivans incautius, maxime ab iis qui in castris excubias agunt & sub dio morantur, committitur, perquam facile febris illa Hungarica dicta acuta accedit, quam perperam vulgo liberaliori vini Hungarici, quod stipendia merentes vix degustant, potui, tribuunt. In Italia autem, & maxime Romæ, idem febrium acutarum & malignarum genus sæpius stragem edit, nullam pariter aliam ob causam, quam quod interdiu æstus vehementissimus, & noctu algor regnet, cui si improvide sese exponunt incolæ, vel fenestras aperiunt, ut aër nocturnus, qui ob copiam insectorum atmosphæram incolentium, identidem valde insalubris, corpori allabatur, illico postero die mutatio in corporis functionibus & inclinatio ad febrem præsto est, quæ nisi præscinditur, vires sumit, & non raro funestum fortitur eventum.

§. XI.

*Pariter ac
scorbutus.*

Neque vero tantum acutas, verum etiam chronicas endemias passiones, interceptus cuticularis excretionis successus, affert. Certe genesis scorbutici mali, quod nonnisi maximus impuritatis gradus est, non aliunde quam ex hac origine repetenda. Quo magis enim in humoribus vitalibus crescit impuritas, ex incongruis & minus temperatis assumtis, eo plus vigere debet excretionum, inque primis perspirationis negotium, eoque sufflaminato, eo gravior metuenda est noxa. Jam vero in confesso est, in regionibus maritimis & borealibus intolas crassiori victu uti, copiosius carnibus ac piscibus salsis, infumatis ac induratis vesci, & densa, frigida ac humida atmosphæra frui. Sub hac itaque cœli victusque ratione, non modo crudi & multi male cocti succi ingignuntur, sed & ob perspirationem segniorē, quamplurimæ excrementitiæ salinæ vis-

cidæ sordes in corpore remanent, quæ simul aliæ emunctoria obstitant & occludunt, præsertim si vita sedentaria motus expers, animi crebrior perturbatio & mœstitia accedit, quo demum fit, ut humores benigni, serum & lymphæ, à miscela particularum varii generis salinarum inquinantur, putridi fiant, corrumpantur, & pro diversa corporum & temperamentorum conditione, vel vappescant ac lente putrescant, vel etiam summam fixam & volatilem acredinem contrahant. Et hac ex sentina, omnia pathemata scorbuticis solennia manant, oris foetor, maculæ lividæ, gingivæ putridæ, ulcera foetida ichorosa, inclinatio ad sphacelum, artuum dolores fixi & vagi, spasmi & convulsiones, tormina ventris, tremores & contracturæ artuum, aliaque id genus plura.

§. XII.

Quæ omnia sicuti vitam in grave discrimen adducunt; ita quid subitanea aëris ac inde facta excretionis per cutis poros mutatio, ad sanitatem labefactandam valeat, quotidianis adhuc experimentis confirmatum habemus. Nimirum quando ex conclavi valde calefacto, vel ex lecto calido, in auram frigidiorē subito concedimus, horrore corpus è vestigio corripitur, & suppressa perspiratione, materia acris excrementitia in interiora maximeque glandulosas tunicas faucium, oris, narium & bronchiorum vergens, tussim, coryzam, defluxiones & febres catarrhales conciliat. Pariter frequenti experientia edocemur: nihil ad ingenerandas acutas passiones & febres magis conferre & aptius esse, quam si quis graviori iræ affectu, vel liberiori spiritus vini potu, aut fortiori corporis exercitio æstivans, in auram humidam & frigidiorē, præsertim vespertinam, delatus, paulo diutius in ea versatur; quandoquidem hoc facto, facilis admodum in febres, & intermittentes, & acutas inflammatorias, est lapsus.

§. XIII.

Nihil vero est, quod subitam febrium generationem ex perspiratione cohibita clarius demonstrare & illustrare potest, ac intempestivus & imprudens thermarum Carolinarum usus externus in balneo. Nam si quis corpore paulo pleniori & impuriori, ante sanguinis missionem vel debitam aliam præparationem, descendit in balneum nimis calidum, & aliquandiu in eo commoratur, non tantum inde experietur insignes cordis tremores, languorem & cephalalgiam, verum etiam febrem intermittentem plerumque, nonnunquam continuam, cum præcedente horrore, dolore dorsi & anxietate summa. Quod vero hoc balneum præ aliis id singulare habeat, quod tam facile, atque ex tempore quasi suscitēt febres, hæc vera mihi videtur subesse ratio: tum quod nulla alia tam fervidi caloris thermalis aqua reperiatur, tum etiam quod largiorem quam ulla alia terræ martialis ochreæ & calcareæ adstringentis, in lapidosas concrétiones pronæ, copiam in sinu foveat; quo fit, ut usu externo subito tumores œdematosos intro repellet & abigat, diuturna ulcera consolidet, pustulosas & ulcerosas cutis defœdationes & erosiones ficcet, & sic efficacem poros & tubulos subcutaneos constringendi facultatem luculenter prodatur. Si quis itaque in balneum hoc nimis calidum corpus immittit, ab externo calore sanguis æstivatur & in magnam intestinam agitationem, præsertim si jam copiosus & impurus, abripitur,

*Febres &
defluxiones
catarrhales:*

*In Caroli-
nis febres
ab occlusis
poris gi-
gnuntur:*

exterius

exterius vero ob constrictos poros particulæ aëreo-sulphureæ non exhalare possunt, sed eadem insultantes in partes nervosas, arteriarum ipsiusque cor systoles & diastoles motum valide intendunt, & ita febrem accendunt.

§. XIV.

A transpiratione cohibita exacerbantur morbi ex impuritate

Præterea excretionis per cutis poros tite succedentis utilitatem, & suppressæ noxam luculenter testatur, quod qui impura habent corpora, sive humores excrementitiis partibus refertos, ut sunt podagrici, arthritici, æstivo tempore, quo liberius & copiosius sordes per subcutanea spiracula diffiantur, à paroxysmis & symptomatibus immunes degant; brumali autem & autumnali, gravius affligantur, quia aëre circumfluo denso atque compresso, perspiratio inminuitur, sordisque excrementitiæ magis retinentur, gravius detrimentum corpori certo allaturæ. Eadem ratio subest, quare senes, quum ob cutis poros & vasa minima strictiora, non tam liberam & copiosam per cutis poros experiantur evacuationem, quam viri & juvenes, ab impuritatibus resistentibus morbos ætati senili infestos incurrant, ut sunt maxime scorbutus, calculus, ulcera vesicæ, scabies, tormina intestinorum, diarrhœæ, stranguriæ, oculorum & aurium vitia.

Et senibus familiares gignuntur.

§. XV.

De damnis à repulsa materia perspiranda.

At vero licet magni & graves morbi à prohibita perspiratione & remanentibus intus sordibus originem ducant: longe sæviora tamen & quæ plus periculi habent paenemata pullulant, si quando materia excrementitia, à connubio sanguinis jam tum segregata & ad cutis peripheriam tubulosque subcutaneos salutariter propulsa, foras non ejicitur, sed ibi subsistens ac ad interiora recedens, cum succis vitalibus denuo nupta fuerit. Hæc enim certe materia veneni vim & naturam obtinet, ac licet mole valde exigua, dum tamen sub penetranti & adversa subtilitate partium valde heterogenearum, in partes nervosas sensibiliores agit, truculenta instar veneni symptomata excitat. Id quod ut jam ulterius excutiamus & luculentis fide dignis exemplis ac observationibus confirmemus, operæ certe erit pretium; quo rerum medicarum cultores perspiciant, plures & sævissimorum affectuum causas, non tam in mole & quantitate nimia, vel intemperie crassa sanguinis & humorum, quam sæpius in parva & exilis molis materia, nervosis tamen partibus summopere infesta, esse quærendas.

§. XVI.

Ex achoribus tinea capitis &c. repulsa.

Ut itaque ab ipso capite ordiamur, sæpius observavi, eos qui capillamentum gestare sueverunt, demto improvide operculo, exquisitum capitis dolorem, cum tinnitu aurium, nec non vertiginem incurrisse; alios vero his malis afflictos, tecto falsa coma capite, ab iisdem liberatos. Nihil porro frequentius in infantibus visitur, quam à crusta lactea, solo frigore repulsa, febrem continuam excitari, qua desinente illa revertitur, quæ quoties repulsa fuit, toties de novo febrem accensam annotavimus. Nihil quoque periculosius est, quam in tinea capitis improvide exterius unguenta vel lavamenta applicare. Repulsa enim materia corrupta acri ad cerebrum ejusque membranas ac nervorum principia, epilepsiæ, præsertim in infantibus, alique graves capitis morbi, accidunt. *Amatus Lusitanus Cent. I. obs. 36.* in puella undecim annorum, obesa & sanguinea, à capitis lotionne apoplexiam, elapsa

nondum hora, supervenisse, memoriæ prodidit. Ex capitis ulceribus obfessi lotionne, furditatem concitatam, *Misc. nat. cur. Dec. III. Ann. III. obs. 9.* commemorant. Et nos à linimento tineæ capitis præpostere adhibito, in infante decem annorum oculi dextri inflammationem observavimus, quæ in suppurationem & perfectam demum cœcitatem transiit. Vidi quoque ab achoribus & favis linimento inconsulto siccatis, asthma convulsivum subortum, ad quod abigendum, vesicatorium in nucha insigni cum levamine applicatum.

§. XVII.

Singulare etiam salutaris & criticæ in capite excretionis genus est, plica sic dicta Polonica, qua serum excrementitium viscidum cum sanguine ad caput copiose delatum, ex poris capitis exsudans ac per crinium tubulos descendens, capillos in cirros conglutinat inexplicabiles, per quos tanquam peculiare organon excretorium, vitiosum serum eliminatur, non sine summo levamine & sanitatis emolumento. Quod si vero plica molesta abscinditur, graves, immo mortiferi morbi, corpus impetunt. Hoc enim factò, atroces capitis dolores, insultus epileptici, convulsivi, item phrenitis, mania, melancholia, vertigines, oculorum lippitudines & gutta serena, consequi solent. Interdum ad alias inferiores partes serum excrementitium retentum defertur, & dolores arthriticos aliaque symptomata luis venereæ naturam æmulantia excludit. Quin nonnunquam pleuritis, peripneumonia, hæmoptysis ac phthisis inducitur.

Ex abscissa plica Polonica.

§. XVIII.

Scabies foedum quidem est atque molestum malum; corpus tamen à falso, acri & corrupto humore liberat, & præpostera medicatione repulsa, vel quo minus efflorescat impedita, gravi damno maclat, quod differt, prout maligna interiora repetens materia, diversas impetit partes in iisdemque sedem figit. Quod si enim ad caput defertur, periculosissimi morbi ibi suscitantur, apoplexiæ, epilepsiæ, vertigines, sopores sensuumque vitia. Sic *Misc. nat. cur. Dec. I. Ann. I. obs. 58.* ex hac scabie imprudenter abacta, lethalem apoplexiam annotarunt, quod etiam *Moebius instit. pag. 65.* testatur. Cæcitatem exinde perfectam identidem *Misc. nat. curios. D. II. A. VIII. pag. 255.* & *Sennertus prax. part. 3. f. 2. c. 44.* fidem faciunt. Et *Riedlinus in lin. med. ann. 1696. mens. Mai. obs. I.* narrat de ancilla, quæ sordidissima scabie laborans, post inunctionem, bis factam, in epilepsiam incidit, cui affurgit quoque *Sennertus l. c.* Potissimum in infantibus perniciosum est conamen scabiem abolere, quandoquidem hoc factò, præter suffocationem aliosque gravissimos morbos, sæpius epilepsiam succrevisse, auctor est *Hildanus Cent. III. obs. 10.*

Ex scabie siccata graves capitis morbi.

§. XIX.

Quando scabiosa materia relabitur ad pectus, periculosum asthma oboritur, quod in juvene viginti annorum à scabie intempestive & empirice externis inunctionibus deleta, vidit *Hildanus Cent. III. obs. 39.* ubi ægrotus tanta pectoris angustia affectus est, ut vix spiritum trahere posset & pulsus vix appareret, tandemque catarrho suffocativo exstingueretur. Frequentissime vero à retrocedente scabie febris continua in corde & genere vasculoso accenditur, cum magna virium prostratione. Vidimus, hac cessante, septimo

Asthma.

Febris.

septimo die scabiē rursus ad habitum corpō-
ris salutariter fuisse propulsam. Senes scabies,
maxime sicca, infestat, quæ si reprimatur, quar-
tana fieri potest: & porriginē rursus apparente, hæc
cedit. Hinc perite *Langius in Epist. 16. Lib. I.* in-
quit: *ego scabiē & crurum œdemata, cum post*
aliarum febrium, tum præcipue quartanæ febris
crism̄ obortam, sponte exolescere, circa omne
medicamentorum subsidium pluries centies vidi

§. XX.

Sæpius virulenta scabiē materia è cortice cor-
poris ad interiora retrusa, tumores œdemato-
sos, hydropicos & tympaniticos, in pueris præ-
sertim cum tumore scroti, quod aliquoties ob-
servavi, affert. Notavit etiam idem jam *Hip-
pocrates in epidemicis*, idque luculento exemplo
confirmat. *Erat, inquit, Athenis homo quidam*
fætidissima scabiē laborans, atque ut sanaretur
accessit Milos, ubi calidæ sunt thermæ, quarum
usu convaleuit à scabiē, sed paullo post incidit in
hydropem & exinde mortuus est. In intestinorum
membranas si recumbit, gravia ventris tormina
vel etiam dysenterię fieri possunt. Notabile
hac de re exemplum existat in *Riverio Cent. III.*
Obs. 85: ubi arthriticus, ab usu aquarum medi-
catarum, magnam stomachi refrigerationem pas-
sus est, ac deinceps scabies pruriginosa, admo-
dum molesta, totum corpus invasit, quæ confestim
curata est unguento quodam mercuriali, carpis
manuum & plantis pedum admoto, quam inun-
ctionem mox secuta est ingens diarrhœa, per vi-
ginti dies perseverans, cum gravissimis ventris
tormentis, ita, ut ab iisdem alvi fluxus dysente-
ricus apparuerit.

§. XXI.

Quemadmodum igitur scabiosæ cutis defœda-
tiones præpostere topicorum usu deletæ, ob acrem
causticam materiam, internas nobiles partes repe-
tentem, plures perníciales morbos adducunt; ita
pariter, ulcera antiqua subito consolidata, ean-
dem ob causam detrimento sunt & quando-
que exitio. Nam *Misc. nat. curios. Dec. III. An.*
II. obs. 29. ulcus in crure sanatum epilepsiam in-
duxisse, perhibent. Et *Tulpius obs. lib. I. cap. VIII.*
binos infantes per manantia capitis ulcera ab
epilepsia liberatos, iisdemque improvide sicca-
tis, diris iterum nervorum tractionibus correptos
esse, testatur. Neque minus ex ulcere in crure
consolidato, epilepsiam accessisse, eodemque
rursus aperto cessasse, consignatum legimus ab
Amato Lusitano Cent. II. hist. 6. Bartholino Cent.
III. hist. 20. Hildano Cent. II. obs. 10. Misc. nat.
curios. Dec. III. An. II. obs. 29. Lentilio miscell.
Part. I. pag. 3: Pedes quoque ulcerosos præsan-
tos guttam serenam adduxisse, auctor est *Timæus*
in *oper. posth.* item *Forestus lib. I. obs.* Et *Hilda-*
nus Cent. III. obs. 39. vetus purulentum apostema
coalitum, atrocem capitis dolorem & cæcitatem
induxisse, putrida materia tussi rejecta, prodidit.

§. XXII.

Idem porro auctor *l. c.* præter alia adhuc ex-
empla memorat: quod vir sexagenarius, quum
ulcus quod per plures annos gestarat, ab Empi-
rico ad consolidationem perductum fuisset, post
aliquot menses in sinistro latere pleuritide, cum
maximis doloribus & punctationibus correptus
sit, talemque saniem sputo rejecerit, qualis ex
ulcere antea manarat. Nec non *Cent. V. obs.*
91. historiam narrat: quod quispiam curato
per thermarum usum veteri ulcere, in maximam

Frid. Hoffmanni Oper. Tom. I.

virium prostrationem non modo, sed & natu-
ream & frequentem eructationem inciderit, ac iis-
dem pathematibus, quam si venenum sumsis-
set, attentatus sit. Nobis inter exempla inprimis
est vir generosus, Principi à consiliis, qui quum
singulis fere annis, verno maxime tempore, sal-
sam acrem defluxionem cum excoriatione cir-
ca malleolum dextri pedis experiretur, molestia
pertæsus, ex chirurgi consilio, ut applicato cam-
phorato vini spiritu reprimeretur, permisit, sed
non ita multo post ingentia tormina & dolo-
res in hypochondrio sinistro, cum lenta febre,
inquietudinē, anxietate & alvo pertinacissime
obstipata, eundem invaserunt, quæ tamen tan-
dem pulverum cinnabarino-nitrosorum & insu-
si usu, cessarunt. Et quum fonticuli sint quasi
ulcera artificialia, quæ ad impuram noxiā ma-
teriam nervosis maxime partibus subtrahendam
in capitis morbis egregii usus: hinc quoque iis-
dem oculis, priores morbos rediisse, vel novos
accessisse, multarum observationum fide constat;
quæ evolvi possunt in *Misc. natur. curios. Dec.*
II. An. III. obs. 213. An. VI. obs. 201. nec non
apud *Pechlinum lib. II. obs. 30.*

§. XXIII.

Dum etiam adhuc de noxa, quæ post efflores-
centias & exulcerationes in corporis cortice præ-
postera per topica medicatione exceptas, in cor-
pus redundat, sermo est: adjungenda iisdem etiam
sunt exanthemata, quæ in acutis morbis compa-
rent, quippe quæ, si ad interiora retrocedunt,
eo deteriora magisque funesta mala invehunt,
quo magis materia repulsa virulenta est ac putri-
da. Sicuti enim vigorem naturæ indicat prom-
ta ad partes externas variolarum, morbillorum,
petechiarum, purpuræ & bubonum, sive car-
bunculorum, in peste secessio; ita res periculi
plenissima est, si deficiente hoc robore, vel non
prodeunt, vel relicta in cortice statione, redeunt.
Contingit id facillime à refrigeratione, à potu
frigido, terrore, animi affectu, vel erecto corpo-
ris situ, in corporibus præsertim, quæ viribus
destituta, & ubi pulsus ac renisus cordis, arteri-
um & motus à centro ad peripheriam languet.
Et plerumque hanc fatalem repulsionem fu-
nesta consequitur mors; eo quod maligna mate-
ria ad meningē cerebri, vel ventriculi & inte-
stinorum membranas, aut præcordiales nervos si
transfertur, harum partium inflammationes, spas-
mi, vel convulsiones, imbecilla jam à morbo
corpora adoriuntur. Quod vero materia exan-
themata repulsa majorem quam antea virulen-
tiam exferat, hæc videtur subesse causa, quod
quamdiu humor, sive putredine, sive caustica
natura alienus, succis & sanguini immixtus est,
involutus & quasi coercitus, ingenti noxa vacet,
quando autem sui juris factus & ab involucro
sanguinis liber, tunc naturam suam pernicialem
prodat & veneni similem in corpus edat effec-
tum. Accedit etiam quod hæc materia, dum in
glandulis cutis diu hæret, sub mora, ob perpe-
tuam & intestinam fluidi ætherei agitationem &
transfluxum, subtilior & malignior reddatur, ut
postea repulsa, penitus respiciat illud quod ante
habuit cum lymphæ & sanguine connubium, &
potius instat veneni subtilis, nervosis sese partibus
insinuet ibique spasticas atroces stricturas efficiat.

§. XXIV.

Jam si experientiam consulimus, nihil certe
frequentius, quam quod post inconsultam lin-
teaminum frigidorum & loturam adhuc redolen-

F f

tium,

Tormina
ventris
&c.

Ex fœtidissima
scabiē

Exanthema-
tum re-
troceden-
tium noxiā

Quam se-
stat ex-
perientia

tium, corpore sudore diffuente mutationem, nec non aëris in alium perfrigeratum lectum translatis, exanthemata, variolæ, morbilli, petechiæ ac purpura dispareant, & rebus extemplo conversis, in pejus abeant symptomata, anxietates, inquietudines, deliria, tremores & convulsiones accedant, quin ipsa paullo post mors subsequatur. Inprimis etiam crebrioris observationis est, ægros, acutis exanthematicis morbis laborantes, post diuturniorem erectum in lecto, vel etiam extra illud situm, mox in virium languorem, animi deliquium, extremorum refrigerationem & cutis horrorem cum pulsu debili incidere, ac evanescentibus in cortice efflorescentiis, delirio, convulsione vel epilepsia correptos, interire. Rarius quidem, quod mirandum, hoc phænomenon à Practicis annotatum, ratio tamen effectus in proclivi: quandoquidem dejecto in ejusmodi morbis robore, cordis etiam systole minuitur, & sanguis corpore erecto difficulter ad superiora maxime & caput expulsum, cor obruit, segnius quoque per cerebrum ejusque membranas fertur, & hinc tam truculentorum symptomatum origo. Huc quoque referenda memorabilis observatio, quam *Alpinus de medic. Egypt. pag. 76.* consignavit, memorans: foeminam in peste tumore inguinis laborasse, quo minuto, delirium accesserit, & per cucurbitulas iterum revocato, cessarit.

§. XXV.

Ex erysipelate repul.

Lethargus.

Ventriculi inflammatio.

Idem periculum, eademque, si non major, noxa est metuenda, quando in affectu arthritico, in podagra vel etiam erysipelate, materia, quæ in vitio est, corrupta vel acris, ex habitu corporis, vel ex artubus, ad interiora repellitur. Ac de erysipelate quidem sapienter *Hippocrates Lib. VI. aph. 25.* pronunciat: quod malum sit foris introverti. Novimus senem fere septuagenarium, qui erysipelate totam tibiam & femur occupante correptus, applicatis exterius saturninis & camphoratis epithematibus, in lethargicum affectum incidit, quem quum medicus calidioribus cephalicis & balsamicis interius & exterius adhibitis exciperet, febris accensa est, cum magnis maculis purpureis, accessit delirium ipsaque mors. Vidi quoque accessionem erysipelatis, quæ cum horrore & subsequente intenso æstu contingere solet, in viro erysipelaceis inflammationibus crebrius obnoxio, medico imposuisse, ut paroxysmum intermittens esse putaret, & ad eandem præscindendam postera die vomitorium porrigeret, quo oblato, æger quidem strenue vomuit, sed sequuta est inflammatio ventriculi, quinto die lethalis.

§. XXVI.

Ex arthritide, podagra &c. repulsa, symptoma.

Frequentioris observationis est damnum, quod imprudens medicatio per topica in morbis articulorum & arthritidis speciebus, arcessit. Quam gravia autem quamque multiplicia pathemata morbosa inde resultent, compendiose, graphice tamen arthritidis vagæ scorbuticæ exemplo tradit *Drawizius* in vernacula lingua ante C. jam annos de scorbutio, conscripto libello, verbis pag. 62. seqq. latine redditus sic habentibus: maxima cautione opus est, ne dum dolores leniuntur atque sedantur, gravius & magis perniciosum malum ingruat: quod quidem inprimis facile contingit, quando volatile scorbuticum sal in corruptione sua eo processit, ut virulentam indolem contraxerit. Hoc enim si factum fuerit, arthritidis scorbutica maximam cum erysipelate in-

duit convenientiam, & haud secus quam in erysipelate, levi tantum percussione, virulentum volatile sal ad interiora corporis recedit, ibique longe periculosiorem statum, quam in externis artubus inducit. Nimirum quando hoc sal intestina adurit, exquisita ventris tormina, quin ipsa passio iliaca, non facile decurrit. Si ad cerebrum scandit, æger vertiginem, epilepsiam, apoplexiam aliosque truculentos capitis morbos incurrit. Ubi cor opprimit, illico lipothymia adest, vel subita plane mors sequitur. Ad diaphragma & pleuram quum vergit, periculosus pleuriticus sese exserit morbus. Ad pulmones delatum, spirandi angustiam, anxietates præcordiorum, ferinas & suffocatorias tusses, hæmoptyses &c. affert. Verbo: quæcumque perniciem in genere alias venenum in internis corporis partibus suscitare valet, eandem etiam pessimum hoc & virulentum sal creare aptum est. Novi etiam, si sponte recessit, aut incongruis medicamentis exterius exceptum fuit, quod totum corpus brevi horarum spatio cum omnibus partibus sub magno cordis angore intumuerit, eodem modo ac in Hungarica febre aliisque ex corruptis succis oriundis morbis nonnunquam contingere solet.

§. XXVII.

Mala itaque, quæ metastasin materiæ arthriticæ consequuntur, sunt plura, & tantum pro natura corporum ægrotantium & partium, quas illa invadit, & periculo & indole valde differunt. Quando enim ad supremam capitis regionem vergit materia retropulsa, perquam facile suscitatur epilepsia, sicuti hac de re egregium exemplum prodidit *Riverius Cent. III. Obs. 85.* ubi quidam, doloribus arthriticis cessantibus, correptus fuit insultibus epilepticis, qui per stata intervalla redibant, & post exactum biennium, prorsus desinebant; cum eodem tempore dolores arthritici reverterentur, qui per totum illud tempus, quo insultus epileptici sæviebant, omnino delituerant. Ex podagra emanante apoplexiam fieri, auctor est *Wepferus in Lib. de apoplexia pag. 2. & 3.* Et *Simon Pauli in Quadrip. Botanico pag. 215.* refert historiam, ubi quidam in levicula podagra, spretis medicamentis internis, repellentibus usus est, qui mox de dyspnœa conquestus & cordis palpitatione ac lipothymiis correptus est, insequente epilepsia, quæ tandem in apoplexiam lethalem abiit.

§. XXVIII.

Ubi arthritica materia intempestive retroagitur & pectus invadit, convulsivum asthma excitatur, quod à linimento alias egregio, ex camphora, opio, spiritu vini rectificato composito, vel solo etiam camphoræ pulvere exterius applicato, in cachecticis non semel observavimus; accessit quippe præcordiorum anxietas & summa spirandi difficultas atque angustia, ut strangulari sibi ægri viderentur, quibus postea tumor pedum successit & hydrops. Crato in *Consiliis pag. 1015. Consil. 367.* ex abusu narcoticorum & stupefacientium podagram transiisse in asthma refert. Et *Trincavellius de rat. cur. part. hum. corp. Lib. XII. cap. 1.* scribit: nihil gravius est, quam usu adstringentium & repellentium, præcavere in podagra consuetam fluxionem, inde asthma gravissimo cum febre continua duo nobiles Veneti affecti, cum tremore totius corporis & omnium sensuum stupore. Id quod etiam pluribus exemplis docui in dissertatione: de podagra retrocedente in corpus pag. 12.

§. XXIX.

§. XXIX.

*cardial-
ia, singul-
us, stom-
achi inflam-
mationes.*

Eadem vitiosa materia incumbente ventriculi membranis, singultus, cardialgiae, lipothymiae & lethalis ventriculi inflammatio sæpiissime sequuntur. Ita *Cramerus Diss. de podagra* memorat: quendam podagricum nudos pedes ventis frigidis exponentem continuo & lethali affectum esse singultu. *Mænichen in Obs. 8. pag. 245.* prodidit; dolore arthritico per frigida repulso, cardialgiam & lipothymiam accidisse, & post frictiones & vesicatoria genubus applicata, cessasse. Et in *Misc. Nat. Curios. D. III. A. VII. Obs. 147.* casus affertur, de quodam, qui frigida aqua pro potu dolores arthriticos supprimens, emetico assumpto, integro mense enormes vomitus expertus est, intercurrente singultu, appetitu abolito, siti aucta, febre continua, urina suppressa: post mortem ventriculus inflammatus repertus. Anno ab hinc & quod excurrit accidit, ut foemina generosa quinquagenaria podagrica, ipso in paroxysmo ad levandam dolorum atrociam, pulverem ex camphora & minio dolenti parti applicans, discusso dolore, illico incideret in maximam virium jacturam, cum æstu febrili, appetitu prostrato, ingenti anxietate circa præcordia, vomitione & inquietudine, quam tamen propinata emulsione ex semine papaveris & amygdalis dulcibus, oblato quoque pulvere nitroso cinnabarino, adjuvante Deo ex ancipiti levavi, repetente simul pedes podagra. Sic quoque novi malum ischiadicum balneis adstringentibus repulsum, ventriculum & pectus invasisse, & cardialgias, febrem lentam, hecticam & tussim siccam, tandem lethalem, suscitasse.

§. XXX.

calculus.

Næque minus multiplici compertum est experientia, materiam arthriticam tartaream, in senibus præsertim, sæpius ad renes & urinarias vias transire, & sic arthritidem in calculum mutari. Unde *Solenander Sect. I. cons. 20.* perite, qui uno, inquit, laborat ex iis, alterum vix effugere potest, & pauci arthritide affecti sunt, qui non in renibus calculum ingenerant. Et *Stisserus in Tr. de podagra* testis est, podagricos dolores in nephriticos, colicos æmulantes, hos vero, vice versa, in arthriticos & podagricos, non semel abiisse. Facilis quoque arthritidis, vel podagræ retropulsæ in acerbum colicum dolorem est transmutatio. Nam materia arthritica, propter affinitatem texturæ & ad stricturas dispositionis, quam ligamenta articulorum nerveo-tendinosa ac glandulosa, cum membranis intestinorum invicem alunt, expedit ex articulis ad intestina, & ex his rursus ad articulos, promptissime transfertur. Meminit hujus metastaseos jam *Hippocrates Lib. VI. epid. Part. IV. text. 30.* scribens: qui articulari morbo detentus intestini dolore vexabatur, quietior erat, hoc autem curato, magis dolebat. Quod etiam *Solenander in Consil. pag. 77.* confirmat, dum inquit: foemina arthritide semper laborabat, quando à doloribus coli libera erat, & cessantibus coli doloribus, misere ex juncturis afficiebatur. Et *Raygerus in Misc. Nat. Curios. D. I. A. VI. & VII. Obs. 208.* scribit: notus est mihi quidam, qui colica immuni torquebatur, superveniente autem podagra, nihil penitus sentiebat. Et quæ plura adhuc exempla memoriæ prodita sunt in *Miscell. Nat. curios. Dec. II. A. IV. obs. 42.* item à *Drawizio in Tr. de scorbuto pag. 244.*

§. XXXI.

Quandoque etiam accidit, ut podagricum recrementum, in senibus, vel fracto per varias animi afflictiones aliisque de caussis corporis robore, ad exteriora salutari motu propelli nequeat, sed resistit ac partibus nervosis insidens, capitis dolores, ingenii ac memoriæ debilitatem, virium & appetitus prostrationem, anxietates, spasmos ac dolores varios, stranguriam & crebriorem ad urinam stimulum cieat. Ejusmodi exemplum notavimus in primario hujus civitatis viro quinquagenario, qui tamen externo & interno Carolinarum usu, relegata ad pedes iterum podagrica materia, perfecte curatus fuit. Hinc ex vero *Hoffmannus instit. lib. III. pag. 107.* scribit: videmus podagricos mori tum, si humores influentes repellantur ad viscera, aut si viscera tam sunt debilia, ut humores ad superficiem pellere non possint.

*Damna
podagræ ob
imbecilli-
tatem*

§. XXXII.

Pariter à sanguinis missione in corpore minus plethorico intempestive administrata, podagram repressam novi, & res certe magnæ prudentiæ medicæ est, venæ sectione recte uti posse, in morbis quos salutaris quædam & critica ad cutim excretio stupat. Nam uti nimia sanguinis redundantia quandoque vires naturæ opprimere & expulsionem materiæ ad corporis corticem impedire potest: ita etiam, si sanguis non redundans præpostere exantlatur, pariter naturæ robur infirmatur, ut excrementitiæ sordes ad minima vascula cutisque poros pelli nequeant, sed retentæ gravissima cieant parhemata. Quare perite *Jo. Langius lib. I. epist. 16.* inculcat: ne, quando natura, per habitum corporis materiam peccantem ut propellere velit, intenta est, phlebotomiam administremus, aut pharmaca exhibeamus, ne ingens inde periculum enascatur, nec per eas venas, per quas materia morbi expulsa fuit, rursus ad interna viscera retrahatur. Quod quidem monitum inprimis nostro hoc ævo probe observandum, ab iis, qui tam prompti & liberales in sanguine mittendo, quasi vero tantum non omnes morbi à plethora, & hæmorrhoidum vel mensium fluxu imminuto, aut deficiente, ortum traherent.

*Vel intem-
pestivam
venæ sectio-
nem retenti-
a.*

§. XXXIII.

Præterea saluberrima in quibusdam sudoris foetidi in pedibus & sub axillis succedit excretio: qua quum corpus, pædore teste, ab exteriori & putrido humore liberatur; patet utique sanitati maxime obesse, si imprudenti consilio eadem supprimatur; licet id frequentius linatura ferri, aurichalci & terris calcareis ustis inspersis, perficiatur. Novimus enim inde vertiginem aut capitis gravitatem, aurium tinnitum, difficilem respirationem, ventris tormina atque vagos artuum dolores subortos, nulla arte nulloque consilio expugnabiles. Id quod etiam *Simon Pauli quadripart. botan. pag. 215.* memorabili exemplo confirmat, narrans: quendam delero pedum foetido sudore, in gravem primum cordis palpitationem, ac postea atrocem & nodosam podagram incidisse. Eadem ratio est critici quorundam noturni sudoris, quem per multos annos largiter cum singulari valetudinis commodo manasse, postea vero vel ob naturæ debilitatem retentum, vel præpostero consilio siccatum, atrocia parhemata, affectus soporosos maxime cum sensuum & memoriæ debilitate, rheumaticos affectus, erysipelata, asthinata, febres lentas & lan-

*Sudoris
axillarium
& criticæ*

*Nec non
umorium
repulso-
rum noxa.*

guores, invexisse, experientia compertum habeo, neque symptomata prius cessarunt, quam saluberrima hac excretionem integre restituta. Eundem adhuc in censum referendi diuturni pedum tumores, variis artificii compressi & ad interiora coacti. Hoc quippe facto, asthma & catarrhum suffocativum, diabetem & febrem lentam, summa cum virium prostratione accidisse aliquot exemplis confirmatum habemus.

§. XXXIV.

*Bubones
repulsi.*

*Et gonorrhoea sup-
pressa quid
noceant.*

Accedunt pathemata, post conceptum inquinamentum venereum, praepostera medicatione tractatum & intro coactum, conspicua. Nimirum bubones venerei, ubi glandularum ductus tenaci caustica lympham infarcti sunt, quando imprudenter à chirurgis vel medicis adstringentibus & repellentibus excipiuntur, humor ex mora & stagnatione virulentior redditus, & cum lympham ad vasa lymphatica translatus, universam ejus massam inquinat, ut hinc non modo ulcera & pustulae in facie efflorescant, sed & atrocissimi dolores in perioestio aliisque sensu exquisito praeditis partibus suscitentur. Idem fit, quando gonorrhoea impuri coitus soboles, nimis cito adstringentibus cohibetur. Adstringentibus enim miasma venereum corpore expellendum reprimatur; acrioribus autem, calidis sudoriferis & balsamicis intestina agitatio suscitatur, & fibrillae stringuntur, quo fit, ut virulenta materia agilius reddatur, non tamen eliminetur: & sic utroque modo universus lymphaticus latex inquinatur, corrumpitur atque maximus hujus luis gradus inducitur. Hinc saepius certe vidimus, gonorrhoeam malignam, nimio balsami Peruviani, vel de Copaiva usu cohibita, pustulas in facie, ossium dolores & in inguine bubones successisse.

§. XXXV.

*Mala ex
coryza re-
pressa.*

*Et fluore
albo cohi-
bitio.*

Denique non praetereundum est damnum, quod ex turbata & intercepta feri vitiosi per glandulosam emunctoria, praesertim in naribus & faucibus existentia, in coryza & catarrhis, in foeminis vero sub fluore albo per uteri & vaginae glandulas evacuatione, in sanitatem redundat. Quod si enim coryza à frigore incautius admissio reprimatur, serosa materia in capite obhaerescit & dolores acutos ac vehementes circa radicem nasi in ossibus frontis parit, cum vertigine & aurium tinnitu, ac lassitudinem totius corporis, torporem & febrem lentam adducit. Vel si etiam per assumpta purgantia successus turbatur & ad intestina acre serum allicitur, dolores & anxietates ventriculi, cum inappetentia, abdominis tormina & incompossibiles diarrhoeae subsequuntur. Pariter à fluore muliebri per suffumigia mercurialia sublato, pathemata hypochondriaco-hysterica, asthmatica observavi; vidi quoque febrem cum purpura, repetente, hac sanata, albo fluore. Et *misc. nat. curios. Dec. I. An. IIX. obs. 331.* à fluxu albo per balnea vitriolacea suppressio, phthisin insanabilem sequutam referunt. Quae certe omnia, quam grave damnum excretionum, & maxime cuticularis suppressio, injungat, confectius testantur.

CAPUT IX.

*De vitiis ex turbatis sanguineis aliisque
evacuationibus.*

§. I.

*Nimia
succorum
copiam sani-
tati insensu.*

ITa comparatam esse artificiosissimam corporis nostri structuram, ut boni laudabiles &

alimentares succi per varia organa ad usum discernantur, inutiles vero, effocti atque corrupti per tot vasorum excernentium emissaria, in vitae sanitatisque tutelam jugiter eliminantur, antecedenti capite pluribus est assertum. Potissimum tamen & rationibus & exemplis evictum dedimus, eam sordium excretionem, quae per corporis corticem succedit, esse omnium saluberrimam; sufflaminatam vero plurium & gravissimorum morborum causam. Quum autem non solum perversa qualitas, sed etiam quantitas, naturae microcosmicæ adversa sit: saepius contingit, ut ipsi benigni, temperati & utiles succi, ut lympham & sanguis, nimia copia delinquentes & solidorum tono, motui ac systoli ipsique progressui fluidorum mole sua obsistentes, perniciem intentent, & cacoehymiam ingignendo, vasa & viscera obstruendo, ac spasmos in nervosis partibus suscitando, sanitatem gravius labefacient. Quod ne eveniat, providentissimo idemdem consilio, in machina animali ejusmodi organa ac viscera fabrefacta sunt, quae redundanti maxime cruori diverticulum praebant, donec nimis demum in iisdem accumulatus, per aperta arteriolarum oscula, sufficiens & quae redundabat copia exsolvatur.

§. II.

In sexu quidem sequiori, à decimo quarto ad quinquagesimum usque ætatis annum, ordinaria ejusmodi superflui sanguinis evacuatio singulis mensium periodis succedit per uterum. Hujus enim ea fabrica est atque textura, ut ex fibris mira expansili & contractili virtute praeditis, numerosissimis quoque tortuoso ac serpentino ductu excurrentibus vasis, penitus coagmentatus sit, eamque ob causam eximiam cruoris copiam recipere & recondere possit. Increcente autem successive nimis mole, sanguis in curvatis venarum alveis tarde progreditur, moram nectens latera extrorsum in varices quasi urget, donec denum appulsus semper per arteriolas, pracluso in venas transitu, distentos canales perumpit, & sola mechanica ratione, sine concursu principii interni dirigentis, cruor superfluum ex apertis osculis manat.

§. III.

Hæc critica atque solennis sanguinis excretio, si sufficienter & rite succedit, nimiam quæ in vitio est molem evehendo, sanitati egregie patrocinatur: contra vero quando vitium capit, & vel excedit, vel deficit, vel etiam perperam cohibetur, damno maculat gravissimo, quod ut testatius pateat, luculentas nonnullas adducemus observationes. Et primo quidem multiplici experientia constat, menstruum sanguinis profluvium, quacunque ex causa suppressum, insolitas quærere vias & facile in alias insuetas hæmorrhagias transire. Nam *Horstius in præfat. ad Part. II. obs. Schenckii lib. IV. pag. 698.* sanguinem à mensium regurgitatione ex auribus, & *Hollerius Comment. in lib. II. Sect. II. Coac. §. 18.* nec non *Jo. Rhodius Cent. III. obs. 51.* ex gingivis & dentis alveo, critice excretum testantur. Inprimis frequentioris observationis est, sanguinem, qui per uterum eliminari debebat, per vomitum, ruptis ventriculi venosis vasis, brevibus dictis, rejectum fuisse, quod *Hippocrates lib. I. de morb. §. 32. Forestus lib. XVI. obs. 25. Panarolus Pente-cost. I. obs. 6. Rodericus à Castro de morb. mulier. lib. I. cap. III. Hæchstetterus obs. Dec. II. cas. 7. Stahlpart van der Wiel Cent. II. obs. 17.* alique plures passim exemplis confirmant. Neq; adeo rarum est,

est, sanguinem præcluso per uteri vasa exitu, majori vehementia ad pulmones delatum, per-raptis ibi vasis tussi rejici, sicuti ejusmodi casus *Hollerius lib. I. de morb. intern. cap. 29. Rhodius Cent. III. obs. 30. Salmuthus Cent. II. obs. 18.* narrant. In foeminis quoque annosioribus, quando menstrua cessat purgatio, cruenta non raro oboritur mictio, ita prorsus, ut exempla prostant, ubi singulis mensium periodis cum urina, sanguis partim fluidus, partim grumosus, redditus fuit.

§. IV.

Quæ vero
periculosa.

Quisque vero peritior Medicorum redundantis sanguinis per hæc minus congrua loca exclusionem, non adeo tutam, sed ancipitem & haud levi discrimini expositam esse facile judicabit. Quo enim pars corporis nobilior & vitæ tuendæ aptior magisque necessaria, eo perniciosior est ejus læsio eoque plus periculi alit. Quare si pulmonum vitale viscum à sanguine stagnante labem accipit ac laceratur, facile ulcerosa pulmonum affectio phthifica nascitur. Exstat de hac noxa dignus memoratu locus in *Alpini medic. method. pag. 273.* dum ait: *ob immoderatam sanguinis evacuationem, vel diuturnum morbum menses supprimuntur, quod si diu durat, mulieres graves morbos incidunt, aliquæ in sanguinis spuitum, ex quo deinceps phthisi intereunt, quod proximo anno Æmilie nobili virgini accidit, cui quum menstruæ purgationes ex mænore assiduo defecissent, cum sputo sanguinis & assidua tussi orta est febricula, qua paucos post menses interiit.* Et *Hippocrates lib. I. de morb. mul. §. 6.* eandem in rem egregie scribit: *quibusdam mulieribus menses bimestres in uteris existentes ad pulmonem recedunt, & ubi recepti fuerint, omnia patiuntur, quæ in tabe dicta sunt.* Si vero inter ventriculi exquisitissimi sensus membranas forte subsistit cruor & ibi corrumpitur aut coagulatur, periculosa ejus inflammatio, vel hæctica febris emergit. Aut si etiam erumpit, vasa tamen brevissima ante distenta, tam enormi laceratione, inprimis si lien male affectus, dehiscunt, ut iterum coalescere nequeant, & vomitus copiosus sæpiusque repetens mortem inferat.

§. V.

Alia damna ex sup-
pressis
menstruis.

In capite.

Pectore.

His non minora, sed longe graviora ac plura sunt mala, quæ si sanguis neque per uterum, neque alia loca exsolvitur, pullulant; quæ tamen non tantum pro diversa corporum natura, verum etiam partium, quibus restagnans cruor incumbit, discrepant. Nam quandocumque ad caput sanguinis impetus vergit, atroces, quin funesti, in eo morbi subsequuntur, hemicrania, vertigo, cephalalgia, melancholia, mania & apoplexia. Ipse *Hippocrates* mentis turbas inde cieri testis est, & *lib. de virgin. morb. §. 102.* quando, ait, *sanguis in uterum confluit & osculum exitus non fuerit apertum, tunc non habens effluxum, præ multitudine resilit ad cor & ad septum transversum, & quum hæc repleta fuerint, cor fatuum fit, deinde ex fatuitate torpedio, ex torpedine delirium.* Epilepsiam quoque ex retentis mensibus describunt *Misc. nat. cur. Dec. I. An. I. obs. 85.* Et obstinatam inde inductam oblivionem *Acta Hassniensia Vol. II. obs. 78.* memorant. Quando porro ad thoracem regurgitans sanguis cor & pulmones opprimit, syncope, cordis palpitatio, polypi, asthmata, pectoris angustia ejusque hydrops producuntur. Ubi in visceribus abdominis viscerum sanguinis copia restagnat, inde fit malus habitus, ictertia, tumores pedum œdematosi ipse

Frid. Hoffmanni Oper. Tom. I.

que dirus hydrops, prout maxime auctor est *Hil-danus Cent. V. obs. 41.*

§. VI.

Quod si autem ad ventriculum & intestino-
rum canalem sanguis congeritur, exsurgunt inde
anxiæ & molestæ ventriculi inflationes, cardial-
giæ & spasticum ac flatulentum gravissimum ma-
lum, quod totum genus nervosum exagitat, &
hystericæ passionis nomine innotuit. De hac lucu-
lenta sunt *Hippocratis* verba *lib. I. de morb. mulier. §. 5.* *quum uteri, (per quos menses intelligit) ad stomachum qui nervosus est allapsi fuerint, & ad ventrem irruerint, dolet spina & totum dorsum, & lingua ipsius refrenatur, & hanc non claram habet, & animi deliquium adest, aliquibus etiam vocis privatio, & stomachus mordet, & flava bilis urget & amara est, & jactat se & ardet.* Ipse quoque uterus à cohibitis mensibus subinde gravem patitur labem. Sic eundem hæc de causa hydropis inundatum in *Misc. nat. cur. Dec. II. An. I. obs. 79.* relatum legimus, pariterque ingentes uteri tumores, eosque scirrhosos, cum exulcerationibus succrescere, experientia edocemur. In ferosioribus etiam & phlegmaticis retentus mensium fluxus, crebrius in copiosum ferri albi stillicidium transit. Neque denique sufflaminata saluberrima uterina purgatione, externæ partes à vitiis immunes manent, sed easdem sæpius scabie, elephantiasi, furunculis, erysipelaceis affectibus, vel scirrhosis tumoribus infestari, experientiæ testimonio constat.

Aliisque
corporis
partibus.

§. VII.

Quæ omnia truculenta pathemata, sicuti sup-
pressam in junioribus menstrua evacuationem
presso subsequuntur pede: ita pariter nihil frequen-
tius in artis exercitio obvium, quam quod subsi-
stente penitus ob ætatis rationem critico hoc fluxu
in annosioribus, eadem afflictiones ingruant. Ego certe multiplici experientia compertum habeo, post annum quinquagesimum, foeminas, præsertim quæ sanguineæ & largius alias profluvium expertæ sunt, vitam præterea sedentariam, otium & unctius vivendi genus sectantur, à sanguinis tamen missionibus abstinent, dolores cardialgicos, cum summo circa præcordia ad dorsum usque & scapulas excurrente æstu ac dolore, noctu præsertim, incurrisse. Alias phlogosi, doloribus artuum & erysipelaceis febribus correptas, alias nephritidi cum lumborum tormentis, in calculosas concreciones desinenti, implicitas vidi. Nonnullas post sexagesimum annum mictio cruenta, vel incompefcibilis mensium fluxus, qui demum in hæcticum calorem concessit, infestavit. Quasdam, inprimis diuturno incero-
re confectas, incessit dolor sinistri hypochondrii, cum anxietate & æstu præcordiorum, qui postea in vomitum cruentum enormem, sive morbum sic dictum nigrum Hippocratis funestum, erupit, ubi lien, dissecto post mortem cadavere, magnus & putridus, vasa brevissima ventriculi mirum diducta & late hiantia, sanguis quoque vasis elapsus in ileo comparuerunt. Nonnunquam & haud ita pridem in Serenissima persona, à cessante quinquagesimo tertio anno menstrua purgatione, continuas anxias vomitiones annotavimus, per dimidium anni affligentes, quibus successit tumor pedum & manuum; quæ tamen sanguinis missione aliisque congruis præfidiis fortunante Deo egregie levata.

Ex emen-
tente men-
struo fluxu.

§. VIII.

*Ex lochiis
retentis.*

Est vero præter menstruum sanguinis fluxum, alia adhuc sanguinea evacuatio foeminis propria atque solennis, quæ sub partu & post eum succedit, lochialis nempe. Hac quum pariter sanguis, sub graviditate in uteri vasis mirum distentis collectus & impurus factus, utilissime exsolvatur, non potest non ejus suppressio maximum inferre damnum, ita prorsus, ut plures inde occumbant. Etenim quò major in puerperis, ob graves partus labores superatos, totius corporis, maximeque generis nervosi debilitas; eo gravius periculum à stagnante lochiali sanguine & metuendum est & expectandum: licet symptomata, prout regurgitans cruor varia loca variasque partes occupat, vel ipsa corporis natura differt, diversimode incedant. Videlicet quando impurus ab utero sanguis ad caput ruit, vertigo, paralysis & apoplexia præsto est, uti præ aliis *Fontanus in Respons. lib. I. pag. 25.* confirmat. Quando ad pectus concedit, anxietas, spiritus difficultas, lipothymia accedunt, vel tussis, phthisis & totalis pulmonum exulceratio inducitur.

§. IX.

*Malum
hysteri-
cum.*

Nihil tamen frequentius accidit, quam quod gravia pathemata hysterica, febre stipata, lochiorum suppressionem consequantur, quando nempe congestus in abdominis visceribus & meseraicis vasis sanguis, nervosos ibi plexus moleste afficit & ad spasmos sollicitat. Notabilis in primis hanc in rem est observatio *Binningeri Cent. II. obs. 45.* de puerpera, quæ paucis à partu diebus, mediocriter à lochiis purgata, lectum deseruit & rigido se commisit caelo, ex quo penitus suppressis uteri purgamentis, diversa pro differentia partium accesserunt symptomata; in capite ejus gravitas & ad somnum propensio, in thorace sputum sanguineum, subflavum pituitosum, noctu maxime longis intervallis cum levi tussi ægram exercens. In collo quasi suffocantis globi sensus fuit. In corde & universo vasorum genere febris continua, cum pulsu debili & celeri ac siti inexhausta nec non animi deliquio, excitata. In abdomine alvus dura & laboriosa facta. In partibus externis dolor lateris dextri & scapularum pungitivus ac vagus concitatus. Post sanguinis vero missionem, alvi solutionem & assumpta antihysterica, omnia hæc pathemata conquieverunt. In nostris quoque regionibus nihil frequentius accidit, quam quod lochiis non rite fluentibus, sub alvo præsertim duriori, febres continuæ, cum purpura rubra & alba mali moris, accendantur, magna certe circumspeditione tractandæ; quandoquidem si retrocedit purpureum exanthema, vires penitus dejicit non modo, sed & in dispositis sæpe hecticam febrem ciet & universum sanguinem in excrementa pituitosa & falsa, quæ copioso sputo, urina crassa, sudore multo & alvo laxiori ejiciuntur, sensim convertit.

§. X.

*Excretio
hemor-
rhoidalis
salutaris.*

Verum enim vero quum non solum in sexu foeminino, sed etiam virili & nobiliori sæpe eveniat, ut sanguis & benigni laudabiles succi nimium copia incrementum, vitæ ac sanitati perniciem intentent; admirando pariter divinæ providentiæ beneficio in acceptis ferendum, quod in viris etiam via pateat, qua cum egregio valetudinis emolumento, superfluous & noxam minitans sanguis ejici queat. Videlicet dicatum est huic saluberrimo negotio vas peculiare abdominis

venosum, portæ vena dictum, quod venæ pariterque arteriæ munus explet, & sanguinem à plurimis abdominis visceribus, non modo revehit, sed & postea in hepatis viscus adducit. Quia enim hæc vena manifesta systole & diastole, si ve pulsu, destituitur, eamque ob causam sanguinis trajectory per hepar, ejusdemque regressus ex liene, pancreate, mesenterio & intestinis admodum tardus ac difficilis est: non potest non fieri, quam ut ex mechanica & hydraulica necessitate, ob restagnantem in alveis ramorum hujus venæ cruorem & maxime in vena splenica ejusdemque propagine hæmorrhoidali, in qua ob situm perpendicularem & à corde longius remotum, difficilior adhuc redditur regressus, major appulsio ad minimas arteriolas earumque extrema fiat, ac demum accedente sub alvi egestionem nifu, in tunicis intestini recti canales dehiscant & cruorem effundant.

§. XI.

Dici solet hic fluxus hæmorrhoidalis, & ordinarie non per externas, sed internas venas hæmorrhoidales succedit, sique non est nimius, vel symptomaticus, à multis morbis ex plethora oriundis defendit, ac salutaris est; unde etiam non sine ratione germanico idiomate vocatur *die guldene Ader*, quasi auro æquiparandus, vel non redimendus fluxus. Interim licet hæc sanguinis evacuatio, à natura per sensibiles quosdam præcedentes motus in abdomine, ossæ sacro & cruribus perficiatur: tamen non secundum, sed præter naturæ rationem & ordinem contingit, & ut plurimum tantum in iis viris obvius est, qui spongiosioris, laxioris & plurimis exilibus vasculis donati, adeoque muliebris corporis habitus sunt, qui motu, labore ac sudore secundum universale & primum præceptum nimium sanguinem non consumunt, sed desidiosam in luxu agunt vitam, sanguinemque copiosum gignunt, qui præterea in puerili ætate largas per nares experti profusiones & in adolescentia hæmoptica molimina passi. In his inquam ætate demum virili per sedis venas, idque frequentissime, redundans sanguis exsolvitur salutari modo.

§. XII.

Neque etiam ipsæ foeminæ, quæ eandem vasorum abdominis & venæ portæ conformationem habent, ab hoc sanguinis per sedales venas profluvio sunt plane immunes, sed frequenti experientia compertum est, naturam, in primis in suppressis mensibus, sæpe per hæmorrhoidalia loca abundantem sanguinem emittere. Observavit id ipsum *Hippocrates in Coac. & lib. IV. epid. cap. 20.* exemplo confirmat: *filia*, inquit, *Ædilis mensibus non prodeuntibus per duos annos hieme habuit hæmorrhoides.* Et *Heurnius comment. in aph. 10. lib. VI.* disertis verbis scribit: *novi mulieres, quæ mensum vice hæmorrhoides fundebant.* Pariter in gravidis sanguineis, ubi menses restitant, sæpius vidimus hæmorrhoides salutariter vel fluxisse, vel protuberasse in ano, quin in puerperis quandoque cum ipsis lochiis manasse. Commemorabilis hanc in rem est *Hollerii de morb. intern. lib. I. cap. 55.* observatio, ubi mentionem facit duarum foeminarum gravidarum, quibus salutariter stillarunt hæmorrhoides, partu consequuto saluberrimo, & quod mirum, si sanguinis per ani venas fluxus tempore graviditatis substitit, pessime habuerunt, eodemque erumpente, mirifice allevatæ sunt. Mihi quoque plurimi suppetunt casus, quod foeminæ sanguineæ, & men-

*Præternaturalis tamē
men nec
universa
lis.*

*Foemina
etiam
quandoque
accidit.*

menstruo, & hæmorrhoidali fluxui obnoxia fuerunt, quæ subsistente per hæmorrhoides profluvio, symptomatibus hypochondriacis & hysteri-
cis afflictae sunt, licet sanguis per menses largiter exsolveretur.

§ XIII.

Cur hæ-
morrhoides
jam adeo
familiares

Quamvis vero hic hæmorrhoidum fluxus non omnibus naturis, sed sanguineis potissimum & vitæ sedentariæ addictis solennis, quin secundum Hippocratem de aër. & locis cap. IV. §. 7. meridionalibus magis locis familiaris, in borealibus autem rarior sit; nostris tamen temporibus in hisce aquilonariis etiam regionibus, longe familiarior est & frequentior, quam olim; ut ipse testari possim, perpauca, quum ante quadraginta annos medicinæ exercendæ manum primum admoverem, sanguinis per ani venas stillicidio, vel moliminibus ad istud, fuisse affectos. Si in causam inquirimus: mea quidem sententia culpa potissimum rejicienda in vitæ genus, ex ope-
roso ac laborioso, ob perditos hominum mores, in desidiosum ac otiosum mutatum, quo non solum major quam par est sanguinis copia ingignitur; sed etiam ipsum corporis robur languescit, ut non mirum sit, effeminato corpori foemineum quoque accidere sanguinis fluxum. Deinceps hæmorrhoidum profluvium, teste experientia, hæreditarium & hinc certis familiis solenne est, quumque sic hæmorrhoidibus obnoxius hæmorrhoidarium gignat filium, propagatur latius dispositio & plures fluxum experiuntur. Accedit & hoc, quod nostro tempore medici in omnibus fere morbis hæmorrhoidum anomalias subesse perperam putent, & crebriori pilularum, præsertim aloeticarum, usu, sanguineum fluxum proritare, etiam si natura ad eundem plane non inclinet, nitantur. Recte enim jam *Fonsæca tom. I. conf. 57* censet: quod & tumor lienis, qui Italici familiaris, & multiplex purgantium & aloeticorum usus, sit frequentissima fluxus hæmorrhoidalis causa, & adjicit: *caveat quisque omnino à pilulis de aloe, aloe enim aperit ora venarum & hæmorrhoides adeo inducit, ut ex centenis his pilulis uentibus, nonaginta hæmorrhoidibus laborent.*

§ XIV.

Hæmor-
rhoidum
turbæ de-
trimento-
sa.

Quemadmodum itaque in iis, qui dispositi sunt ad hæmorrhoides, nihil salubrius est eorum fluxu, si rite succedit: ita vicissim nihil perniciosius, quam si deficiunt, vel plane perperam cohibentur; quod argumentum jam paulo uberius excutere placet. Memoratu certe dignus hanc in rem est *Celsi lib. VI. cap. 18. locus, in quibusdam, inquietis, hæmorrhoidum fluxus parum tuto supprimitur, qui sanguinis profluvio imbecilliores non fiunt, habent enim purgationem hanc non morbum, ideoque curati quidam, cum sanguis exitum non haberet, inclinata in præcordia materia, subitis & gravissimis morbis correpti sunt.* Nam quando sanguis superfluous, & qui vitalibus conservatoriis motibus, nempe circulari & liberiori secretorio & excretorio remoram injicit, per solennes has vias minus excluditur, ejus regurgitatio vel metastasis fit in varias alias corporis partes, cum summo vitæ ac valetudinis discrimine. Quandoque concedit ad caput, & maniam, melancholiam vel etiam apoplexiam parit. Nonnunquam in pectus dilabitur, & pleuritidem, peripneumoniam, phthisin vel asthma inducit. Sæpius hepati incumbit, & scirrhum ac hydro-
pem dirum producit. Sæpius quoque in vasis me-

seraicis & intestinorum membranis sanguis crassior & impurior congeritur, ibique spastica & hypochondriaca flatulenta symptomata & atroces dolores colicos ciet. Si porro ad renum viscus sanguis hæmorrhoidalis suppressus regurgitat, nephritis & calculus, mictus quandoque cruentus, nascuntur. Et quando denique in habitum corporis impetuose protruditur, ibique subsistit, phagedæna & mali moris ulcera exoriuntur.

§ XV.

Quæ quod ita sint, passim auctores luculentis testimoniis ac observationibus confirmant. Et quidem Hippocrates hæmorrhoidum in melancholia & mania salubritatem disertis verbis asserit *lib. VI. aph. 26.* inquit: *melancholicis, id est, si qui sine febre insanunt, si varices aut hæmorrhoides superveniunt, insaniam solvunt.* Et *aph. IV. com. 25.* hæmorrhoidum moderatum fluxum maniam prohibere dicit. Porro etiam ad curandam nephritidem hæmorrhoides, ceu summam medicinam commendat, dum *lib. VI. aph. II.* ait: *nephriticis hæmorrhoides supervenientes magnam opem ferunt.* Præterea & *lib. de humoribus* earum fluxum ad præservationem pleuritidis & morborum, qui cutim defœdare solent, dilaudat; potissimum *epid. lib. VI. Sect. III. text. 37.* scribit: *varicis laborantes, neque morbo laterali, neque pulmonario, neque phagedæna, neque furunculis, neque thermitis fortasse, neque alphis laborant.* Utilem quoque ad sublevandam molestissimam illam hypochondriorum tensionem idem gravissimus auctor in *Coacis* dijudicat: quibus, inquit, *dolores hypochondriorum, oris ventriculi, hepatis & partium circa ventriculum sunt, hi sanguine per inferiora excreto, sanantur.* Et quæ plura ejus huc referri possent effata.

Quod est
Naturæ Hippo-
crates

§ XVI.

Neque deficiunt aliorum gravissimorum medicorum auctoritates, quæ idem adstruunt. Sic *Galenus lib. VI. com. 29.* qui clausis hæmorrhoidibus in insaniam inciderunt, sæpe referatis his venis, ab iisdem evasisse perhibet. Et *lib. III. de humor. com. 26.* melancholiam ex suppressis hæmorrhoidibus ortam, annua evacuatione curatam, refert. *Hildanus Cent. VI. obs. 28. pag. 531.* ita differit: *ego sincere scribere possum: experientia me comprobasse, eos rarissime apoplexia, epilepsia, aut vertigine, aut oculorum inflammatione, correptos fuisse, quibus hæmorrhoides fluebant; immo apertione hæmorrhoidum gravissimos sublatis esse morbos, & in aliis & in me ipso sum expertus.* Porro *Ronsæus de scorbuto pag. 72.* non paucos, ait, novimus, quos profusio sanguinis ex hæmorrhoidibus à scorbuto præservavit. *Petrus Monavius* de se ipso ad *Cratonem Epist. 236.* conqueritur: se à suppressis hæmorrhoidibus, quæ antea fluxerant, arthritidem incurrisse. *Forestus lib. XXIII. obs. 4.* ab arthritico dolore quendam erumpentibus hæmorrhoidibus liberatum; & alii cardialgia laboranti cum commodo easdem apertas esse testatur. *Amatus Lusitanus Cent. V. conf. 3.* hæmoptysin referatis his venis curatam, memorat. Et *Alpinus in medicin. method. lib. II. pag. 371.* hæc præclara de hæmorrhoidibus habet: *in melancholia incipiente sæpius hæmorrhoids profuisse visa est, & perfectam quoque sanavisse: contra, si cohibeatur, homines in gravissimos morbos labuntur. Solet in hepate ac liene fieri scirrhusitas & refrigeratio caloris nativi, unde aqua intercus, præterea vertiginosi ac melancholici fiunt, quibus dicta venæ cohibentur.* *Illustrissimus Senator Venetus, proximo*

Aliique
auctores

anno à suppressis hæmorrhoidibus, quas multos annos habuit, in affectum scotomaticum incidit.

§. XVII.

Et obser-
vatores.

Quandoque etiam suppressa vel deficiens in senibus hæmorrhoids in nephritidem vel mictum cruentum concedit. Quare non sine ratione *Mercurialis* in *Praxi* lib. III. c. 31. & *Sennertus* instit. lib. III. P. I. Sect. III. c. 5. mictum cruentum renum hæmorrhoides appellarunt. Et certe præstant exempla, ubi in senibus sanguis singulis mensium intervallis cum urina partim fluidus, partim grumofus redditus fuit, qui equitatione vel vini generosi potu facile prolectus est. Ejusmodi sanguinolentam miCTIONEM *Hildanus* in sene Cent. II. obs. II. observavit. Idem confirmat *Heurnius* comment. in aph. X. L. VI. vidi, inquit, qui, cum hæmorrhoidibus tentari solebant, cum urina sanguinem effundebant certis spatiis, sine noxa. Interdum fit, ut loco sanguinis liquor albus viscosus & albumini ovi similis per anum prodeat, non secus ac menstruus fluxus quandoque in fluorem album concedit, ut hinc recte *Platerus* albas has hæmorrhoides cum menstruis albis mulierum comparaverit, de quibus pluribus videatur *Fernelius* lib. VI. pathol. c. 10. & *Sennertus* in praxi lib. III. Part. II. Sect. II. cap. 12. nec non *Misc. nat. curios.* Dec. I. An. I. obs. 75. Et mihi nota complura sunt exempla, quosdam tubercula in ano gestasse, quæ ob exquisitum dolorem totum corpus in consensum pertraxerunt, sponte autem rupta, aliquot cochlearia feri acris corrosivi fuderunt, quo evacuato, pathemata conquieverunt.

§. XVIII.

Nec non
notabile
exemplum.

Nobis quoque in proclivi foret, plura de noxa suppressarum hæmorrhoidum in confirmationem adducere exempla, sed instar omnium esse potest illud, quod ante aliquot annos notavimus. Nimirum generosus quidam vir fere quinquagenarius, ex suppressis per potum aquarum salubrium frigidum & balnea hæmorrhoidibus, podagram & malum hypochondriacum spasticum sibi contraxerat, & huc cum familia concedens, me in consilium ascito, fortunante Deo multum levabatur, ut etiam hæmorrhoides, quæ diu substerant, redirent. Quum vero paulo largius fluerent, enixe à me petiit, ut profluvium compescerem, quod tamen constanter renui, ac potius ut sibi gratularetur & in sinu gauderet de redeunte fluxu, regessi. Sed æger inde magnum periculum ac debilitatem metuens, moniti immemor, ab extraneo medico, me inconsulto, medicinas fluxum suppressantes, quibus opiata & martialia immixta, impetravit, iisdemque crebro usus est. Jam pulcherrime omnia succedere videbantur, fluxus quippe tertio die subsistebat, æger obambulabat sanus nihilque damni metuebat, ac residua pharmaca per quatuor adhuc dies ingerebat; sed nocte concubia lethalibus opprimebatur symptomatibus, ac incredibiles primum præcordiorum anxietates, inquietudinem & atrocissimos ventris dolores persentiebat cum arctissima alvi constrictione, quæ nec clysteres admittebat, tantaque erat vis morbi, ut omnia antispasmodica, cinnabarina & clysteres oleosos eluderet, ac tertio die, posteaquam æger adhuc ira correptus esset, aphonia, delirio & convulsionibus funestum sortiretur eventum. Facta postridie sectione, vidimus cum stupore, non modo intestinum rectum, sed & totum coli tractum in sinistro latere ita contractum, ut digiti crassitiem

vix superaret, ventriculum inflatum & in quibusdam locis inflammatum, ejusque cavitati serum sanguinis putridum innatans, reliqua omnia viscera optime constituta. Neque dubium est, quin, si capitis fuisset apertio concessa, celeris mortis causa ibi detecta fuisset, videlicet sanguinis extravasatio, aut inflammatoria stasis, quia fortissima intestinorum & nervosarum partium strictura, sanguis ad membranas ventriculi & cerebri delatus, hanc funestam catastrophem procul omni dubio induxit.

§. XIX.

Quare sicuti nunquam hæmorrhagia, licet fuerit enormis, quando à causa interna proficiscitur, fortiori medicina styptica reprimenda est: ita multo magis id in hæmorrhoidibus nimium fluentibus observandum, siquidem non modo secundum allegatum *Hippocratis* testimonium, inde hydropis vel tabis metus, sed & aliorum gravissimorum affectuum, de quibus supra facta mentio, periculum nascitur, idque eo magis in iis accidit, qui jam per ipsum copiosum fluxum, vel aliis ex causis imbecilliores facti sunt. Et enim hanc regulam practicam quisque Medicorum, ut curæ cordique habeat, vehementer optarem, videlicet, nihil ad perniciem magis perducere, quam valde debilitatis corporibus adstringentia, opiata vel alia fortiora remedia exhibere. Neque corporis humani natura à validiori sanguinis effusione unquam tantum patitur, quantum damni ab importuna sistente medicina accipit. Deinceps & illud utile monitum prudens Practicus inde capere debet, quod in ejusmodi affectibus, qui retentis hæmorrhoidibus supervenire solent, nihil prius antiquiusque habeat medicus, quam ut iis aperiendis, sive per interna, sive per externa, ut hirudines, invigilet. Præclara sunt, quæ hac de re prodidit *Baglivus* in praxi Lib. I. pag. 124. plurima, ait, adducere possem exempla, quam utilitatem, non obstante sanguinis circulatione, apertio venarum hæmorrhoidalium, præ aliarum venarum apertione, asferre soleat iis, qui hypochondriorum morbis, doloribus scilicet, caloribus, lumborum gravitate, flatibus, tensionibus, borborygmis laborant. Quandounque vero harum venarum apertio non succedit, aut difficulter perficitur, tum naturæ institutum in ejusmodi morbis medicis imitandum & sanguini in inferioribus, pertusis pedum venis, exitus parandus. Ita novimus ischiadicum dolorem, ex hæmorrhoidibus suppressis, aperta in pede vena, protinus ex toto sublatum fuisse, neque minus recordamur, in atrocibus, totum abdomen, ob male fluentes hæmorrhoides, affligentibus doloribus, venæ sectionem in pede institutam, pariter & nitrosa atque emollientes clysteres, omne curationis punctum tulisse.

§. XX.

Jam itaque non quidem negandum, sed constanti experientia, inde à primis artis medicæ initiis confirmatum habemus, sanguinis & menstrui & hæmorrhoidalium fluxum saluberrimum, tam valetudini conservandæ, quam avertendis plurimis morbis prodesse, eumque in assuetis turbatum, vel imprudenter ehibitum, multas & graves ægrotudines pro diversitate corporum & locorum, quæ à sanguine redundante & refluxante occupantur, progignere, quæ ad debitum successum reducto sanguinis stillicidio, si non ex toto tolluntur, tamen multum minuuntur ac levantur. Neque etiam inficiandum, *Cl. Stahlianum*, collegam

Hinc nun-
quam va-
lide com-
primenda
hæmor-
rhoides.

Hæmor-
rhagiarum
considera-
tio necessa-
ria qui-
dem.

collegam meum honorandum, non mediocrem laudem mereri, quod in scriptis suis, ut medicus maxime omnium in pathologicis mensitui & hæmorrhoidalis fluxus rationem habeat, serio ac crebro inculcarit, & sic vetustissimum hoc ac verissimum dogma, à recentiorum tot potentiis chymicis salino-sulphureis penitus ferme obscuratum, postliminio quasi revocare & pristino nitore reddere connixus sit. Interim tamen nequitiam celeberrimi hujus viri, vel potius affectatorum ipsius placitis assensum præbere possum, qui hanc doctrinam nimium & abusive extendunt, ac universam fere morborum genealogiam primario ex plethora, & inde enata sanguinis spissitudine; ac prohibita ejus per uterum vel sedis venas excretionem, atcessere, ac operosa quidem, sed frustranea contentione, vel spissis voluminibus conquirere, sibi sumunt. Neque injuriam fecero, si hanc hypothesin, modo ita eam dicere liceat, ex insufficienti minusque attentâ experientia, sive observationum circa morbos, præsertim chronicos, defectu, enatam esse dixero.

§. XXI.

Quod ne gratis vel gravius dictum videatur, exemplo sit frequentissimum illud nostro tempore malum sic dictum hypochondriacum. De hoc multus quidem ubique apud eos est sermo, ejusque natales unice ex stagnatione sanguinis hæmorrhoidalis in ramis venæ portæ petendas esse, acriter contendunt. At vero si curatius paulo in primam hujus morbi originem inquirimus, ejusque genesin ubi numerosa confluit misera hypochondriacorum cohors, ad fontes nempe soterios, rimamur; clarissime patet: pertinacem hunc affectum esse non plethoræ, sed imbecillis naturæ prolem, solennem ac proprium iis, qui naturam corporis sui & systema nervosarum partium, in primis ventriculi vim digestivam, tonum ac robur, variis de causis graviter labefactarunt. Videlicet instituto coram à me scrutinio, alii vitam sedentariam, diuturnum mœrorem, terrorem & vehementem iram, ingestis paulo post desuper cibis aut potu frigido, inculcarunt; alii in nimias mentis per intempestiva studia & lucubrationes, fatigationem, potionem largam vel frigidam, sudanti corpori ingestam, abusum purgantium, opiatorum nec non acidorum & vinorum, culpam rejecerunt. Quidam, neglectum sub usu fontium mineralium, vel post purgantia aut emetica, regimen, febris intermittens, diarrhœa aut dysenteria perperam institutam medicationem, aut præposteram sudoris foetidi resiccationem, primam morbo occasionem dedisse, confessi sunt. Quæ certe omnia ita sunt comparata, ut robur naturæ atterant nervosisque partibus maximam inducant debilitatem, tantum abest, ut sanguinis, virium custodis, abundantiam arguant.

§. XXII.

Et licet tantisper largiamur, deficientem vel suppressum per animi pathemata, frigus & imprudentes medicationes menstruum aut hæmorrhoidalem fluxum, quandoque causam atque originem hypochondriaco malo posse suppeditare: eandem tamen non semper subesse causam ex eo luculenter patescit, quod crebrius inter exempla sint, qui largiter & sufficienter etiam fluentibus hæmorrhoidibus, hypochondriacis tamen excruciantur pathematibus, utut interdum eorum vehementia inde decrescat. Notabilis profecto hanc in rem est observatio, quam habet Sennertus in praxi lib. III. Sect. II. cap. 23. novi,

inquiens, *fœminam nobilem constitutione sanguineam, affectioni hypochondriacæ obnoxiam, quæ singulis mensibus ordinario, & quidem die post menstruum fluxum decimo quarto, hæmorrhoides patiebatur.*

§. XXIII.

Accedit & hoc, quod firma & irrefragabili experientia in comperto sit, adolescentes, juvenes ac viros, qui nunquam antea vel levissimum fluxus hæmorrhoidalis indicium observarunt, subito malum hoc incurrere spastico-flatulentum, & demum si diutius eodem detinentur, dolorem dorsi, in abdomine circa hypochondria, & stagnationes experiri sanguinis, qui intercepto per spasmos libero per viscera abdominis motu, per ani venas exitum molitur, eodemque denegato, atrociora suscitât pathemata; ut adeo pateat, tam fluxum hæmorrhoidum, quam molimina ad eum, effectum & productum esse mali hypochondriaci. Quin innumera memoria teneo exempla, quod affectio illa ventriculi & generis nervosi spasmotico-flatulenta, quæ malum hypochondriacum audit, in homine perfecte sano nunquam antea hæmorrhoidibus vel moliminibus ad eas obnoxio, ex animi affectu, & maxime ab ira, cui mox subjuncta medicamenta sudorifera calida, aut cibus vel potus superingestus, enata sit, quam demum copioso, ut fieri affolet, multiplicium purgantium & pilularum polychrestarum, quæ alœen recipiunt, usu, à medicis tractatam, ejusmodi motus, sive sic dicta molimina ad hæmorrhoides, dolores nempe in lumbis & ossæ sacro exceperunt. Quumque medici fluxum importunius iisdem medicamentis & venæ sectionibus in pede proritare niterentur, factum quidem, ut nonnunquam aliquot guttæ sanguinis stillarent, crebrius vero humores viscidæ albi, instar albuminis ovi, sæpius magna copia, excernerentur, sed sine ullo pathematum levamento. Et in his quidem crebriori purgantium usui merito tribuendum esse censeo, quod propter spasmus ab iis sub operatione inductum, & relictam postea in intestinis atoniam, libera impedita sit circulatio, & in meseraicis ac hæmorrhoidalibus vasis stagnationes atque decubitus contracti.

§. XXIV.

Deinceps novæ & *κατ' ἐξοχήν*, ut perhibent, veræ pathologiæ conditores, id volunt & urgent, & calculum, & podagram, ex hæmorrhoidali fluxu deficiente, vel minus rite succedente, exclusâ omni acri, salsa, tartarea intemperie ac humorum dyscrasia, pullulare. Utut autem non negandum sit, quod quandoque hi affectus chronici à retento hæmorrhoidum, vel in mulieribus mensium fluxu, primam petant originem, eaque propter observante etiam Hippocrate, prodeunte sanguinis profluvio mitigentur: ex eo tamen minime sequitur, ergo semper ab hac causa dependent; quandoquidem à particulari causa ad universalem nullam plane valere consequentiam, notissimum est philosophicum axioma. Ego certe sæpius vidi, succedente etiam, quin sub ipso hæmorrhoidum stillicidio, & calculum, & podagram, tyrannidem suam exercuisse, de quo quidem omni dubitatione majus est exemplum Cl. B. Dolæi, qui sæpius per litteras apud me conquestus est, quod per viginti annos, licet hæmorrhoides fluxerint, mire calculi & podagræ doloribus divexatus sit, à quibus tamen diæta lactea utens, per biennium liber egit, sed ad pristinum victum & potum postea concedens, incidit in dys-

Et hæmorrhoides spasmos hypochondriacos.

Vel finis stram mædicationem sequuntur.

Calculus quoque & podagra hæmorrhoidum a nomatiis non acceditur.

Non tamen ad omnes morbos extendenda.

Nec malum hypochondriacum earum suppressio;

Sed imbecillitati naturæ tribuendum.

Unde sæpe fluentibus hæmorrhoidibus affligit.

Neque in-
sanis.

dysuriam, demum funestam. Tacemus, ple-
rumque podagram & calculum esse morbos hæ-
reditarios, ac illam maxime ab immodica Ve-
nere, Bacho & ira, & generari, & foveri. Ne-
que semper insanis à plethora vel hæmorrhoi-
dum fluxu suppresso incunabula trahunt, sed pa-
riter affectibus hæreditariis accensendi sunt: &
uti mania plerumque à continua præsertim cohi-
bita ira ac impensis desideriis venereis accedit,
ita melancholia à terrore & diuturno mœrore ex-
cluditur, vel etiam ab usu narcoticorum & stu-
pefactivorum contrahitur, sine plethoræ concur-
su. Et sic etiam de aliis morbis, quorum ortum
ad plethoram & retentas sanguineas evacuationes
hujus theoriæ assertores unice referunt, sentien-
dum.

§. XXV.

Nulla et-
iam dan-
tur hæmor-
rhoides
certo mo-
ventia me-
dicamen-
ta.

Denique quo magis hi tam magni hæmorrhoi-
dum patroni earundem successum urgent, & eo-
dem sanitatem & conservari, & amissam revo-
cari, confidenter asserunt; eo magis certe mi-
randum, ipsisque objici potest, quod nulla adhuc
idonea, congrua remedia excogitarint ac norint,
quibuscum potissimum hoc therapie suæ momen-
tum conficere, ac mensium, vel hæmorrhoidum
fluxum, cum certa ratione procurare, promove-
re, vel moderari queant. Nam intuta profecto,
fallax & sæpe frustranea est hirudinum apposi-
tio, neque ab omnibus admittitur. Elixirium
quoque proprietatis, cum, vel sine acido, &
pilulæ quæ aloen capiunt, vel balsamicæ ad men-
tem Becheri concinnatæ, licet certe commoveant,
non tamen eadem ratione sanguinem emoveant
ac intentioni respondent. Et suppositoria, pedi-
livia & venarum sectiones, pariter spem atque
expectationem destituunt, vel dubiam saltem
ostendunt. Quid? quod magis mirandum, vel
potius dolendum est, dum impensius frustranco
plerumque labore hæmorrhoidum fluxum prori-
tare nituntur, ea remediorum genera, quæ in-
terceptum liberum sanguinis per abdominis vis-
cera progressum restituunt & afflictas nervo-
sas partes solantur, thermas videlicet, acidulas
omnesque soterios fontes, salia volatilia oleosa,
martialia bene præparata, lactis quoque asinini,
vel feri lactis & infusorum theiformium utum,
balnea aquæ dulcis cum mutatione aeris, vel pla-
ne negligunt, vel oscitanter spernunt, vel non
satis pro dignitate commendant.

§. XXVI.

Ex suppress-
is narium
hæmorrha-
gis.

Post mensium ac hæmorrhoidum saluberrimam
evacuationem, sunt adhuc aliæ criticæ, tam san-
guinis redundantis, quam aliorum superfluatorum
ac inutilium humorum insuetæ sæpe atque extra-
ordinariæ excretiones, eum omnes in finem à na-
tura institutæ, quo sub exquisita æquabilitate at-
que proportionem, corporis integritas illibata ser-
vetur. Videlicet in puerili ætate ante pubertatis
annos, quin etiam adhuc adolescentiæ ætate,
valde familiares & salutare per narium venas
sanguinis profusiones succedunt, quæ interdum
satis crebræ & largæ sunt, solennes maxime iis,
qui mollioris texturæ, succulenti & spongiosi
corporis habitus sunt, multumque sanguinis ge-
nerant, quos sanguineæ vulgo dicunt comple-
xionis. Hæc saluberrima redundantis sanguinis
diminutio, ubi subsistit vel compescitur, protin-
us capitis gravativi dolores, cum oculorum ar-
dore, facie inflata & rubicunda, oris & narium
siccitate atque æstu, vasorum circa tempora forti
pulsatione, accedunt, eo quod sanguis exitum

Capitis do-
lores.

moliens, in vasis capitis congeritur ac distensio-
ne & compressionem, ejusmodi dolorificam sensa-
tionem excitat, sanguinis autem è naribus stilli-
cidium, vel sponte factum, vel arte prolectum,
mox gravem istum dolorem solvit atque discu-
tit; id quod conceptis verbis etiam *Hippocrates*
Sect. III. aph. 10. testatur, eaque propter, quan-
do non sponte procedit sanguinis fluxus, *Sect. V.*
aph. 68. venam in fronte secandam jubet.

§. XXVII.

Quando porro sanguis segniter per caput cur-
sum conficit ac in venarum alveis stagnat, ne-
que per vasculorum in naribus oscula stillat, in
pueris decem annorum graves diuturnas ac
valde acres dolorificas oculorum defluxiones, cum
rubore & æstu, quæ lippitudinem & suffusiones
inducebant, sæpius vidi, juncto interdum etiam
aurium tinnitu, memoriæ stupore, quæ prius non
evanuerunt, quam per largam hæmorrhagiam,
aut alvi fluxum, sponte vel arte productum, aut
etiam per vesicatorium, non capiti, sed dorso ad
revulsionem applicatum, id quod in vitio erat
discessit. Sæpius quoque à me observatum, vir-
gines sanguineæ complexionis & floridi vultus,
ante annos pubertatis non tantum capitis dolori-
bus tentatas, sed & subito in terram collapsas &
convulsionibus epilepticis, non raro sævissimis,
esse correptas, quæ tamen omnibus aliis frustra
tentatis, prolecto per intrusum in nares stilum
largiter sanguine, mox conquieverunt, & utur
rursus aliquot vicibus recurrerent, penitus tamen,
erumpente circa annos pubertatis mensium proflu-
vio, cessarunt.

Oculorum
defluxio-
nes.

Epileptic
motus.

§. XXVIII.

Simili ratione novi virginem, quæ primis ætatis
annis largas narium hæmorrhagias experta, in-
crescente post pubertatis annos sanguinis copia,
eademque non sufficienter per menses diminuta,
non modo capitis dolorem, sed & cum sensuum
turbis & aponia, levem quasi insultum apople-
cticum incurrisse, quo discussio, mansit loquela
suspensa, sanguinis autem in pede missio egre-
giam tulit opem. Neque infrequenter in adoles-
centibus summum capitis dolorem, cum somno
phantasmatis pleno, auditus difficultate & per-
versa phantasia annotavi, nullam aliam ob caus-
sam, quam quod sanguis redundans & per nares
non exsolutus, tardius per cerebri vasa trajiciatur
eademque nimium oppleat, hinc secta postmo-
dum circa æquinoctia vena in pede, adhibitis pe-
diluvii & alvo laxiori reddita, disparuerunt pe-
nitiusque pathemata sublata fuerunt.

Leviore
apoplexia.

Mentis
turbæ.

§. XXIX.

Notus mihi est magni nominis Theologus, *Exempla*
sanguineæ complexionis, qui non modo in juven-
tute, sed & adulta ætate, maxime circa æquino-
ctia, largas passus est hæmorrhagias narium, ea-
que propter meo ex consilio bis per annum ad-
misit venæ sectionem. Hinc autem alio conce-
dens, à medico ut sanguinis missionem omitte-
ret induci se passus est, quo facto, subsistente pa-
riter narium stillicidio, in capitis dolores, verti-
ginem, tinnitum aurium & surditatem paulo post
incidit, cum præsentaneo insultu apoplectici me-
tu, ad quem præscindendum venam aperiri suasi,
qua etiam, licet surditas non sublata, apoplexia
tamen discussa est. Aliquot etiam elapsi anni,
quum ab honestissimo viro, aliquot abhinc mil-
liaribus degente, antea sano, vegeto ac robusto,
quingenta aliquot annorum, constitutionis san-
guineæ,

guineæ, in consilium adsciscerer. Hic quum currente puerili ac juvenili ætate, liberales sanguinis profusiones expertus esset, posteaque singulis annis semel vel bis sanguinem utiliter emitti curasset, verno tempore idem omittens, circa exitum Martii, post corporis refrigerationem & ingestos largiter difficilioris solutionis cibos, præter omnem opinionem sensu & motu privatus, nullius rei conscius concidit, emissio autem post aliquot horas è vena brachii per amplam aperturam sanguine, mox ad se rediit quidem & paulatim loquelam, sensum ac motum recepit, capitistamen ingentem imbecillitatem & memoriæ defectum ab hoc insultu passus est, adeo, ut ex moderato etiam vini usu valde offendatur.

§. XXX.

Apoplexia.

Nonnunquam tamen à sanguine in alveis canalium cerebri nimium congesto, subtiliora plexus choroidei vascula disrumpuntur, & propter immedicabilem extravasationem, funesta consequitur apoplexia. Et certe plura in observatis medicorum consignata sunt exempla, quod post hæmorrhagiam suppressam apoplexiæ lethales obortæ, ubi post mortem sanguis è naribus largiter manavit, uti *Hildanus Cent. III. obs. II.* perhibet. Aliquot porro exemplis confirmatum habeo, circa annum vigesimum primum, qui etiam est climactericus, retento narium stillicidio, post stagnationem sanguinis in cerebri vasis, qualis sub leviori apoplectico insultu esse suevit, phrenitidem accessisse, ad quam discutiendam laudatissimum effectum præstitit larga sanguinis in brachio subtractio. Dignum est, ut huc referatur à *Bohno de offic. Med. dupl.* adductum exemplum de juvene, qui phrenitide laborans, forti inflicta alapa, & facto post eam larga sanguinis è naribus profluvio, sanatus. Denique frequentioris etiam observationis est, cohibita narium hæmorrhagia, sanguinis impetum in asperam arteriam ruere illumque tussi rejici; quod vero, si paulo major est copia, non sine mortis periculo contingit, quale exemplum à *Gabelchovero Cent. IV. curat. 37.* annotatum.

§. XXXI.

De salubri feri vitio excretionis.

Tam grave, varium & multiplex est damnum, quod ex suppressa sanguinis redundantis evacuatione in corporis integritatem redundat. Jam quum serum etiam, plus vel minus in purum, & maxime quidem in corporibus quæ complexionis phlegmaticæ, vel sanguineo-phlegmaticæ, magis quam par est, increseat & sanitati insidias struat: pariter egregie pro sanitate est, si quando à natura, per quam nihil aliud quam admirandum istud corporis ejusque partium structuræ artificium, ad vitalem sanguinis circulum cum excretionibus perficiendum, à divina providentia destinatum, intelligo, à nimia ejus copia, etiam præter & extra ordinem per insuetas excretiones, corpus liberatur. Videlicet præter eam vitiosi feri diminutionem, quam quibuscumque per spontaneos largos nocturnos sudores utiliter succedere, & cum præsentaneo detrimento compesci, supra jam meminimus: in plurimis adhuc utriusque sexus hominibus obvium est, singulis fere annis, vere & autumnis, per tussim & coryzam, cum levi febricula serosum humorem rejici. Contingit hoc maxime à perspiratione tum sufflaminata sæpiusque ab aëris injuria interturbata, nec non post ingestos multos incongruos cibos, ac tanta sæpe, in senibus potissimum, tussis est vehementia ac pertinacia, ut per aliquot

menses corpus quatiat & incredibilis humoris viscidit copia, cum virium languore, inappetentia, inquietudine ac interno æstu eliminetur; quod tamen, si non imprudenter sistitur, sed leniter temperantibus & laxantibus tractatur, egregie cedit in sanitatem; quum contra adhibitis pectoralibus, dulcibus ac resolventibus, tussis exasperetur longiusque extrahatur. Quibusdam quoque mucidæ sordes in puerili ætate largiter per nares expurgantur cum valetudinis comodo; si autem incrementibus annis retinentur, oculi hebescent, defluxionibus acerbis tentantur, dolor capitis gravativus cum vertigine adest, nec non torpor; quæ omnia restituto mucis debito effluxu, discutuntur.

§. XXXII.

Porro solenne est, ut serum acre biliosum redundans, sæpe salutariter admodum per ductus biliarios; glandulas intestinorum & tunicas glandulas, sub crebris dejectionibus, quæ in senibus ob perspirationem imminutam & copiam feri excrementitii interdum diutius durare solent, eliminetur. Hæc quando largius & paulo longius succedunt, infirmant quidem; egregium tamen postea commodum afferunt, præsertim si vitæ victusque exquisita habeatur ratio. Vera enim *Celsi de ventris fluxu lib. IV. cap. 19.* est sententia, uno, inquietis, *die fluere alvum sæpe pro valetudine est, atque etiam pluribus, dum febris absit, & intra septimum diem id conquiescat. Pur-gatur enim corpus, & quod intus læsum erat utiliter effunditur.* Quando vero hæc salubriter instituta evacuatio imprudenti consilio adstringentibus sistitur, vel nimis calidis balsamicis compescitur, magna excipit virium imbecillitas, inappetentia & febricula quædam, ipsumque profluvium, licet aliquandiu subsistat, repetit tamen, cum tenesimo; borborygmis ac torminibus. Interdum etiam, ut perite *Sanctorius* meminit, per urinæ largius profluvium, quandoque, singulis mensibus, superfluum & quod naturæ oneri erat eliminatur, dum *Secl. I. aph. 65.* scribit: *corpora quoque virorum sana & moderatissimo victui utentia singulis mensibus fiunt solito ponderosiora, unius scilicet duarumve librarum ponderè, & redeunt ad consuetum pondus circa finem mensis ad instar mulierum; sed facta crisi per urinam paulo copiosiore, vel turbidiorè.* Ipse quoque compluries observavi, quod circa causam externam, quibusdam urina effusa prodeat, alvo segniore & perspiratione imminuta.

Copiose diarrhœa

Urinæ largius perfluvium.

§. XXXIII.

Quandoque evenit, ut excretiones succedant insolitæ & præternaturales feri falsi acris per varia loca, ut per ulcera circa malleolum pedis, per glandulas axillares, per scrotum, vel oculorum glandulas, per herpetem & impetiginem in manibus ac pedibus, statis anni temporibus redeuntem, vel etiam per fonticulos, cum egregio sanitatis emolumento; quæ si remanent, aut im-provide medicamentis præsertim externis, cohibentur, non modo ingens lassitudo, anxietas & inquietudo corpus corripit, sed & sæpe dolores ac spasmi artus ipsasque internas partes, præsertim intestina, infestant, non sine periculo. Memorat *Riedlinus lin. med. an. 1696. pag. 133.* Ex hæmorrhoidibus fistulam ani natam & ultra septimum annum fluentem, postea vero desiccata, in quodam mercatore primum respirationem difficilem & pedum tumorem cum levi exulceratione, deinceps ardorem ventriculi dorisque cum

Ac p. ii. per insolitas vias.

alvi

Per sudores.

Tussim & coryzam.

alvi obstructione & febre, tandem lethalem induxisse apoplexiam. Eandem quoque in rem aptissime facit exemplum nobilis, cuius *Timæus à Güldenkleee de aff. capit. cas. 28.* meminit. Hic enim quum ab ulcere, quod multos annos gestarat, paucos intra dies consilio vetulæ liberatus esset, elapso mense, incidit in tam vehementes capitis dolores, ut de vita desperarent, ac paulo post occæcatus est. Horis autem inatutinis à somno multum viscidæ ac flavescentis foetidæque materiæ frequenti exspuitione citra tussim rejecit, ac conquestus est, se quamdiu jejunos esset, eundem foetorem in ore percipere, quam qui ex ulcere pedis spirarat.

§. XXXIV.

Conclusio.

Quæ quum ita sint, quis jam dubitabit, valetudinis integritatem excretionum successu maxime niti atque foveri, easdemque licet extraordinariæ ac insuetæ sint, si tamen diu cum sanitatis emolumento successerunt, non sine periculo suppressi. In quo quidem maximopere cavendum non solum ab omnibus animi affectibus, præsertim terrore ac ira, medicamentis constringentibus ac sopientibus, sed etiam ab intempestivis evacuationibus, quibus ex facili evacuationes turbantur, vel minimum cum discrimine alio divertuntur. Quod si vero natura in perficiendis saluberrimis omnis generis excretionibus vacillare aut deficere videatur, medentis est, eas quavis ratione promovere earundemque successum levare, quem in finem egregiæ sunt utilitatis venæ sectiones, laxantia lenia diaphoretica, curationes sic dictæ vernaes & quæ reliquis fere omnibus hac in re præripiunt palmam soteriæ aquæ, tam thermæ, quam acidulæ, vernali & autumnali tempore prudenter usurpatæ, quibus non solum gravissimi morbi præscinduntur, sed etiam pertinaces atque rebelles expugnantur ac abiguntur. Sin autem subito interceptam aut cohibitam esse excretionem quandam contigerit, minime cunctandum est, sed prompta ope eo annitendum, quo revocetur, priusquam quod retentum in nobilioribus sedem figat, latius noxam diffundat & difficilem ancipitemque medicationem faciat.

CAPUT X.

De generatione morborum ex morbis.

§. I.

Imbecillitas expræcipuis morborum causis.

Quum vera & rationalis therapia, sive mendi morbis scientia, maxime omnium accurata morborum diagnosi eorumque ex causis suis ortus ac incrementi cognitione nitatur, atque etiam à nobis in prioribus de earum ægritudinum genesi actum sit, quæ à mole & qualitate humorum perversa eorumque evacuatione deficiente, vel cohibita, originem trahunt: nunc porro ad earum contemplationem accedendum, quæ à solidorum vitio, virtute ac robore dejecto, sive imbecillitate, quam plerumque præcedentes morbi relinquunt & ingignunt, incunabula trahunt; quo sic manifesto dilucescat, non modo fluidorum, sed & solidorum vitiosam ac præternaturalem constitutionem, ad gignendos morbos magnæ virtutis, eaque propter à perito medico magnopere esse considerandam. Nam quandocunque plenas & accurate consignatas mor-

borum historias paullo accuratius lustramus, animadvertimus, non robustos, firmos & valentes, sed maxime eos, qui vel natura imbecilliores sunt, vel ob adversam præcedentem valetudinem tales redditi, cum morbis conflictari & medicam opem poscere, difficulter tamen sanationem recipere, atque etiam summa cum circumspectione prudenter & lenissime esse curandos. Hinc quanto minus sani & robusti, diætæ ad leges sanitatis exquisitè composita, medico aut medicina egent: tanto magis certe debiles & imbecilles eadem desiderant; ut adeo verissimum sit sanctissimi Salvatoris edictum: non firmos, sed languidos medico indigere; eo quod, ut recte pridem observavit *Celsus lib. I. cap. 3.* omnibus morbis obnoxia est infirmitas.

§. II.

Quæ quum ita sint, haud postremus certe medici labor eo dirigendus, quo corpora valentia & firma, ab infirmis & minus valentibus, probe distinguere discat. In quo quidem recte perficiendo, tenendum, quod quemadmodum in universa rerum natura omnis vis, virtus & robur ad efficaciam motus referri debet, ita quoque robusta natura corpusque firmum habendum sit illud, ubi efficaciam motus, tam in actionibus naturalibus, quam vitalibus & animalibus, vivida sese exerit. Vigent autem animales functiones in iis, qui mente & corpore duos etiam labores ac diuturnas fatigationes sine noxa sustinere possunt; ac vitales & naturales vigent in iis, qui pulsu gaudent magno pleno ac robusto, bene appetunt, digerunt ac egerunt, & solida habent corporis membra, neque facile animo moventur, aut à causa quadam externa læduntur. Quæ omnia in languidis ac debilibus secus eveniunt, utpote qui, & facile fatigantur, & à levi animi affectu, intemperie aeris, aut vitio in diætâ commissio, offenduntur, vel à quadam medicina purgante aut alterante facile moventur aut læduntur, verbo, qui sunt, ut ita loqui liceat, sensibilissimæ naturæ, perquam facile in morbos incidunt, diu cum iis conflictantur ac tardius vigorem pristinum recipiunt.

Virium et
tio ex effi-
cacia mor-
tus.

§. III.

Deinde quoad ipsam naturalem partium solidorum dispositionem & structuram, robore & viribus præ aliis valent morbisque minus obnoxii sunt, qui majora obtinent vasa, strictiores fibras carneas, robusta ligamenta, nervos & tendines magnos; imbecilliores vero & morbidi merito habentur, qui obesi, laxioris & spongiosioris sunt carnis, tenuia & exigua gerunt sanguinis vasa, exiles nervos tenerasque membranas. Nam sub robore solidorum, quæ fluida impellunt, & canalium amplitudine, longe majori facilitate & promptitudine contenti humores circumaguntur, & secretiones utilissimorum ad vitam succorum, & excretiones inutilium, longe melius vigent, quam sub copia ac exiguitate vasorum, fibrarum laxitate & nisu ac renisu languido; & hinc omne id, quod lædit ac morbos efficere aptum est, promte removetur ac eliminatur, & illibata servatur corporis integritas. Neque male huc referri poterit *Hippocratis aphorismus, Sect. II. p. 44.* quo perhibet: spongiosos natura & obesos, magis cito mori, quam graciles & strictioris habitus.

Et solidorum dis-
positione di-
judican-

§. IV.

§. IV.

Jam quum sexus foemininus ordinario ejusmodi molli, laxo, tenero & succulento corporis habitu incedat: in proclivi est judicare, eundem longe imbecilliozem, morbis quoque magis expositum esse, quam virilem nobiliozem, quin, si menses, qui pro valetudine foeminarum sunt, non rite manant, Hippocratis effato, omnem morbum bis pati. Deinde ratione ætatis infantes & senes maxime omnium imbecilles variisque morbis obnoxios esse, difficilius etiam convalescere ac facile succumbere, experientia constat. Nimia enim fibrarum in infantibus est laxitas, adeoque quam maxima ad stagnationes & decubitus humorum proclivitas: in senibus vero magna fibrarum rigiditas, pororum strictura & vasorum capillarium angustia, quo fit, ut utiles succi difficilius fecernantur, & inutiles minus sufficienter ejiciantur. Pariter id crebriori observatu in comperto est, firmos & robustos corpore ac animo parentes, valentes ac sanos; imbecilles contra, valetudinarios; senes quoque & ebrios, debiles, teneros ac morbosos gignere infantes. Nam certe præcipuæ atque difficiles quæ homines affligunt, medicisque plurimum negotii faceffunt ægritudines, sunt hæreditariæ, & non tam à fluidorum, quam potius congenitis solidorum vitiis dependent. Inter capitis quidem affectus, maniam, melancholiam, apoplexiam & epilepsiam, inter pectoris morbos, hæmoptysin & phthisin, quoad partes in imo ventre contentas, affectum hypochondriacum spasmodico-flatulentum, renum & vesicæ calculum, anomalum fluxum hæmorrhoidalem, in foeminis malum hysteriæ, & quod partes externas, dolores rheumaticos & arthriticos, in liberos per nativitatem transire, constantis semper & perpetuæ fuit experientiæ.

§. V.

Præter hanc, quæ ob sexus, ætatis & nativitatæ rationem accidit imbecillitas, sunt adhuc aliæ causæ, quæ corpus sanum antea ac robustum infirmare & solidarum partium virtutem, tonum ac robur imminuere, frangere atque prostrernere, corpusque ad graves morbos ingenerandos disponere possunt. Horum in censum, præter diuturnos & graves animi affectus, immoderatas mentis in studiis fatigationes atque meditationes, abusum quoque Veneris & Bachi, diætam pravam, assiduas vigilias, & dueros labores, maxime omnium referendi morbi, præsertim, si ægrorum culpa longius extrahuntur, vel ob medicorum errorem perperam tractantur. Ea enim est motuum morbosorum ac inprimis febrium indoles, ut non solum succos vitales absument atque totam sanguinis & humorum massam vitient & corruptam ac impuram reddant; sed etiam solidis partibus omne robur motusque potentiam subducant, quo ex facili denuo stagnationes, stases & corruptiones conciliantur, morbi que contrahuntur. Inprimis tamen ingens ventriculo & intestinis accidere solet imbecillitas, unde aucta post morbum ciborum appetentia, digestionem autem vacillante, alvinæ sordes retinentur, crudiatum sentina colligitur, quæ si non repetita evacuatione, subjunctis ventriculi tonum roborantibus, tempestive submovetur, nova morborum minera conflatur, quæ sensim fanitatem subruit, tandemque ipsa mora vel prima data quavis occasione, in graves morbosas afflictiones conspectius transit.

§. VI.

Hæc ut eo testatius patefiant, per classes & varias causarum series eundo, morborum ex morbis generationem dilucide evolvam. Et primo quidem loco nihil frequentius evenit, quam quod post enormes & tantum non incompossibiles hæmorrhagias, e. g. in abortu, puerperio, gravi vulneratione, aut etiam post largius menstrui vel hæmorrhoidalis sanguinis profluvium, frigidi sic dicti morbi, ut cachexia, pedum oedemata, anasarca & aliæ funestæ hydropis species, vel etiam atrophia, summus virium languor, febris lenta & hæctica, enascantur aut præcedentes morbi longe pertinaciores reddantur. Nimium enim exhausto virium, & fluidi, quod motum ac robur solidis foenerat, fonte, sanguine, ventriculi & canalis qui vitali machinæ alimentum conveniens parat, actio atque digestio non modo minuitur, sed & robur quo solidæ partes gaudent, & quo inutile ejicitur, utile vero intus permiscetur & ad usum servatur, admodum labefactatur, ut non possit non ingens & crudiatum in primis viis, & impurorum succorum in venis, fieri proventus, quem urinæ copiosæ, plus minus turbidæ & albæ, luculenter manifestant. Accedit quod ob languidum humorum circuitum & interceptam sordium exclusionem, passim in visceribus stagnationes, obstructions & stases gignantur, & vitales corporis succi inquinantur, eoque pacto, tam ad longas, quam acutas & periculi plenas afflictiones, via sternatur. Quæ omnia non solum & majora & deteriora fiunt, si animi perturbationes complicantur, vel in diætâ committitur vitium, aut impensior corporis refrigeratio contingit, sed etiam eo certius funestum sortiuntur eventum, si medentes ejusmodi infirmos validiori & crebriori evacuatione adhuc exercent, aut nimis calidis exagitant.

§. VI.

Hæc ut eo testatius patefiant, per classes & varias causarum series eundo, morborum ex morbis generationem dilucide evolvam. Et primo quidem loco nihil frequentius evenit, quam quod post enormes & tantum non gravi vulneratione, aut etiam post largius menstrui vel hæmorrhoidalis sanguinis profluvium, frigidi sic dicti morbi, ut cachexia, pedum oedemata, anasarca & aliæ funestæ hydropis species, vel etiam atrophia, summus virium languor, febris lenta & hæctica, enascantur aut præcedentes morbi longe pertinaciores reddantur. Nimium enim exhausto virium, & fluidi, quod motum ac robur solidis foenerat, fonte, sanguine, ventriculi & canalis qui vitali machinæ alimentum conveniens parat, actio atque digestio non modo minuitur, sed & robur quo solidæ partes gaudent, & quo inutile ejicitur, utile vero intus permiscetur & ad usum servatur, admodum labefactatur, ut non possit non ingens & crudiatum in primis viis, & impurorum succorum in venis, fieri proventus, quem urinæ copiosæ, plus minus turbidæ & albæ, luculenter manifestant. Accedit quod ob languidum humorum circuitum & interceptam sordium exclusionem, passim in visceribus stagnationes, obstructions & stases gignantur, & vitales corporis succi inquinantur, eoque pacto tam ad longas, quam acutas & periculi plenas afflictiones, via sternatur. Quæ omnia non solum & majora & deteriora fiunt, si animi perturbationes complicantur, vel

De damnis
ex debilitate
universali,
per
hæmorrhagias

De damnis
ex debilitate
universali,
per
hæmorrhagias

in diæta committitur vitium, aut impensior corporis refrigeratio contingit, sed etiam eo certius funestum sortiuntur eventum, si medentes ejusmodi infirmos, validiori & crebriori evacuatione adhuc exercent, aut nimis calidis exagitant.

§. VII.

Et puerperium inducit.

Deinceps ex omnibus quæ universi corporis firmitudinem atterunt, idque ad morbos suscipiendos præparant, vix quicquam efficacius est, quam puerperium; utpote quod multas varias, easque graves affectiones, non raro inducere observatur. Vidimus post illud spasticas hypochondriorum & diurnas hystericas passiones; vidimus multas in melancholiam, hemicraniam, abdominis perpetuam flatulentiam, tumorem, cachexiam, delapsas; annotavimus sterilitatem, fluorem album, corporis languorem, cum lento calore, & quæ plura alia sunt. Præterquam enim quod cum sanguine largius ex fauciatas vasis effluente multum virium effundatur, ipsi graviores partus labores corpus admodum exhauriunt ejusque partes vigore ac robore privant, quibus accedit, quod ipse uterus perquam facile labem patiatur, ut excluso foetu, post tam ingentem extensionem, naturali tono non redditus, sanguis per contorta ejus vasa minus expedite trahitur, sed passim subsistat universumque corpus inde graviter luat. Et hinc omnia illa quæ memoravi mala subnascuntur, quæ mirum quantum gravior animi ex affectibus commotio accelerat, frigidus autem potus, improvida corporis refrigeratio, parva victus ratio & valentiora pharmaca pariter advocant, augent & exacerbant.

§. VIII.

Ex particulari debilitate per apoplexiam paralyfis.

Neque vero tantum universalis corporis ex morbo debilitas, ad novas & alias concipiendas ægitudines aptissima existit; verum etiam sæpenumero à morbis quibusdam peculiaris & certæ cujusdam partis imbecillitas, alium morbum invehens, remanet. Atque ut ordiamur à capite, multiplici idemidem observatione constat, quod discussa apoplexia, dextri vel sinistri lateris paralyfis relinquatur, ubi brachium & pes, resitante quidem debiliore sensu, motu privantur, conjuncta oris tortura & linguæ balbutie. Ratio hujus effectus & modus quo generatur tam grave malum in expedito est. Scilicet in apoplexia meningum vasa à sanguine copiosius eo ruente, admodum expansa & distenta sunt, ut intercepto ejus libero itinere, serosa pars secedat, in posticam cerebri partem & spinalis medullæ principium descendat, unde fluidi quod nervi vehunt influxus sufflaminatur & membra subjacentia pristinam tensionem pristinumque ad motum & sensum necessarium vigorem amittunt. Quin immo quia cerebri & medullæ oblongatæ fibræ, exuberante serosi humoris copia ita perfusæ, nimium flaccescunt, fit, ut intercidente earundem debita tensione, apoplecticum insultum ut plurimum stupiditas, ingens memoriæ debilitas, somnolentia & ad obundas actiones summus languor consequatur.

§. IX.

Post epilepsiam oculorum vitia.

Epilepsiam cerebrum ac nervos præsertim opticos mire debilitare, vel ex eo clarum atque perspicuum fit, quod hanc ipsam in repentinam cœcitatem transiisse *M. N. C. Dec. I. An. III. obs. 161. it. Cent. I. An. II. obs. 130.* fidem faciant. In graviore enim epilepsia sanguis impetu, ob fortes spasticas in abdomine stricturas ad ca-

put urgetur, ubi tardius circumactus & stagnans, serum dimittit, quod in anteriora cerebri & nervorum opticom thalamos destillans, eas obstruendo, guttam serenam producit. Et quia in paroxysmis epilepticorum nervi, qui oculis motum præstant, simul distorquentur, oculorum situs interdum pervertitur, unde strabismus, quem *Seegerus* in *M. N. C. Dec. I. An. III. obs. 162.* in infante ex paroxysmo epileptico se observasse memorat.

§. X.

Maniæ in melancholiam, ac vicissim melancholiæ in maniam, facilem admodum fieri transitum, crebra testatur experientia; quandoquidem in utroque affectu meningum vasa viscerum sanguinis copia infarcta sunt, cujus in melancholia tardior & difficilior, celerrimus vero in delirio maniaco est progressus, propter auctam meningum stricturam, sanguinis citatiorem cursum efficientem. Quemadmodum vero fortio- rem spasmus semper fere ejusdem partis atonia & flaccidus languor excipit: ita etiam cessantem, quæ in paroxysmo maniaco præsto est, nimiam membranarum & vasorum cerebri contractionem, eorundem relaxatio & debilitas subsequitur, qua postea sanguinis difficilior & tarda per has partes fit progressio; ex qua melancholicorum phantasmata sua trahunt incunabula.

§. XI.

Ex febre acuta, caput & nervosum genus occupante, cujus generis solet esse dicta Hungarica, quam delirium, vel stupor quidam, aut acerbissima cephalalgia comitatur, sæpenumero surditas, vel minimum difficultas auditus, resultat, quæ per totam quandoque vitam persistit. Non quidem malum alias indicium, sed salutaris criseos notam præbet, si in acutis febribus, circa critica tempora, hebetudo auditus accedit, neque sine ratione. Nam si crisis perfecta est, strictura solidorum, quæ tamdiu quam febris impetus durat, remittit, eoque facto, pulsus celeritas & cutis tubulos redit evacuatio, & meatus jam magis patuli facti, non tantum tenuem serosum humorem, verum crassiores etiam feculentias dimittunt. Verum tamen quia in acutis capiti infestis febribus, laxato meningum spasmio, fibris remissioribus factis, sanguis tardius iter conficiens serum deponit, quod ad principium nervorum acusticorum descendens, difficilem auditum producit; is neglectus, ex facili in perpetuam & immedicabilem surditatem transit. Quippe si caput tum improvide frigori exponitur, vel medentes discussioni stagnantis humoris per convenientia cephalica & sudorifera minus invigilant, partium cerebri quæ ad auditus organum pertinent, à subsistente sero fit compressio, corruptio aut magna læsio.

§. XII.

A capite, seu suprema corporis regione, ad mediam nempe thoracem, progressum facturi, deprehendimus multos esse pectoris morbos, qui magnam imbecillitatem vastissimo pulmonum visceri inferendo, illud ad varios affectus morbosos disponunt. Nihil enim frequentius in praxi observatur, quam quod hæmoptysin, præsertim perperam curatam, presso pede phthisis insequatur, idque eo magis, quando nimis celeriter exitum affectans sanguis, adstringentibus vel narcoticis, vi quasi cohibitus fuit. Videlicet quemadmodum veræ omnium hæmorrhagiarum causæ non

Post maniam melancholiam vice versa

Ex febre acuta diutius.

Post hæmoptysin phthisis

non aliæ sunt, quam fortes spasticæ vasa simul comprimentes in abdomine aut remotis aliis partibus stricturæ, quibus liber sanguinis circuitus intercipitur, ita ut is coarctatus alibi meatibus, in alias partes cum impetu ruat, ibique perrumpat: ita pari ratione si ad pulmones ejus appulsus urgetur, eorum vascula, quæ hiant in tracheam, mirum distenduntur & ingens ejus in hanc fit effusio. Quod si igitur neque spasmodorum, neque inæqualis circuitus ratione habita, adstringentia præpropere dantur, sanguis tenuis ac floridus crassescit, in coagulum abit & effluere nescius, vel putredinem concipit, vel secedens serofus humor tubercula ingenerat, ut vomicae vel ingens exulceratio oboriantur. Etenim quando ob humoris acrimoniam, vel distendentem nimis ejus copiam minutissimæ pulmonum vesiculæ disrumpuntur, ex pluribus una, vel plures amplæ cavitates resultant, extrema vero vasorum capillamenta exesa magis patula redduntur, ut multum succi chylosi in cavernulas influat, qui ob hiantia capillaria & lymphatica vasa non resorptus, sed stagnans, lentorem contrahit, spissescit & turbidus ac glutinosus fieri, ac si longius moram necit, foetere incipit.

§. XIII.

Ex pleuride abscessus pulmonum.

Pleuritidem in abscessum vel empyema transire, dudum gravissimus auctor Hippocrates, passim in monumentis suis tradidit, in primis aph. 8. & 15. Sect. V. perhibet: pleuritidem in empyema, (quo nomine, ut auctor est Galenus, quamlibet in pus mutationem insignit) degenerare, si purulenta non intra quatuordecim dies excludatur materia, & quando hæc in empyemate non definit, intra quadraginta dies fluere, phthisin fieri; id quod etiam experientia confirmatur atque expedita ratione nititur. Nam in pleuritide vera haud absimili ratione ac in peripneumonia, ipsius pulmonis exterior substantia, non vero quæ tantum costas succingit membrana, inflammatorio & dolorifico ex sanguinis stasi tumore est affecta. Hæc itaque inflammatio si penitus dissipatur, morbus perfecte sanatur; at si discuti renuit, in purulentam abit materiam, è pectore rejiciendam. Quod si vero intra quatuordecim dierum intervallum nec febris decedit, nec puris excretio sequitur, tunc justa est suspicio, materiam inhaerentem formare vomicam, qua demum rupta, si puris scretus intra quadraginta dies non cessat, phthisis præstolatur: certum quippe tunc est indicium, vomicam ulterius serpere & acre pus totam pulmonum substantiam in exulcerationem trahere, unde tabes & phthisis.

§. XIV.

Quod testimonio Aureliani

Et certe pleuritis longe facilius in empyema cedit, quam quidem peripneumonia, quia recte monente Celio Aureliano p. m. 420: peripneumonia est, tumor in toto pulmonum corpore, pleuritis vero tantummodo in ejus parte, vel potius, pleuritis est inflammatio magis superficialis, peripneumonia vero altior & profundior: in hac sanguis magis serofus, in illa cruor crassus stagnat. Quare sicuti sanguinis chylosi & gelatinosi facilis est in purulentam materiam transitus: ita cruor crassus difficilior in pus mutatur, sed magis in corruptionem vel sphacelum abit, aut vasa obturat: & hinc peripneumonia est morbus valde acutus, qui nisi intra paucos dies discutitur, funesta sphacelatione vel suffocatione per-

Frid. Hoffmanni Oper. Tom. I.

imit. Dignum videtur quod hic interferatur exemplum Mindæ Westphalorum olim à nobis observatum, de viro, qui superata pleuritide incidit in tussim, maciem, febrem, inquietem & spirandi angustiam, exactis autem sic duobus mensibus, præter omnem expectationem, pus album & congelatum, sed minime foetens, ad aliquot libras, trium circiter hebdomadum spatio, rejecit, eodemque evacuato, pectoralis balsami & lactis usu, perfecte sanitati redditus est. Neque minus memorabilis est casus in dissertatione de rarissimo succi nutritii ex thorace stillicidio, expositus, ubi pleuritis tandem in empyema, sinistrum totum pulmonis lobum, teste sectione, consumens, degeneravit, erosio simul & apertis ductus thoracici ramulis, quia succus chylosus, sapore dulcis, aspectu lacteus, odore spirituosus, cujus ego locuples ἀντίπτης testis sum, per multos annos ad aliquot uncias quotidie; ex thoracis apertura, quæ ad empyematis exclusionem acu facta fuerat, stillavit.

§. XV.

Quod vero tam sinistre pleuritidis curatio nonnunquam succedat, in culpa sapissime est imprudens & præpostera medentium methodus, qui in sanguine detrahendo vel nimis parci sunt, vel interdum nimis liberales & effusi. Utrumque malum. Recte enim Verzascha obs. 8. confirmat, ex neglecta venæ sectione empyema facillime subsequi, præsertim in spongiosi habitus corporibus. In cujus confirmationem Heurnius comment. super aphor. VIII. Sect. V. sequentem affert historiam: vidi, ait, juvenem triginta annorum succi sanguinisque plenum, qui, cum ruri esset, humi dormivit ac in pleuritidem incidit. Tardè huic à Medico parumque sanguinis detractum fuit, dolor perseverabat, decimo quarto in empyema versum fuit malum, dein expiratum, tandem cum fœda multa expectorasset ac extabisset, obiit. Idem tamen evenit & empyema dignitur, quando vicissim nimium sanguinis, per iteratas missiones evocatur, eo quod his repetitis puris rejectio supprimitur. Hinc perite Ballonius lib. I. epid. pag. 226. prodidit: revera graviter ab iis peccatur, qui in pleuritide naturam multo detractò sanguine exinaniant. Et hæc quoque dubio procul causa fuit, quare in juvene viginti annorum, in quo decies phlebotomia celebrata, pleuritis in empyema concessit, teste Riverio Cent. I. obs. 79.

§. XVI.

Porro ingens humorum decubitus ad pectus, in iis præsertim, qui pituita abundant & mali habitus sunt, diurnam humidam tussim cum spirandi angustia suscitatur, qua demum ita læditur pulmonum substantia, ut copiosissima materię purulentæ & chylosæ contingat rejectio. Tono namque vasculorum & membranarum pulmonalium destructo, humores ibi cum sanguine congesti hærent, & aciores redditi, distendendo & erodendo ingentes cavitates efformant, ad quas perpetuus succorum est affluxus, stagnatio & extravasatio. Quam vero difficile sit hunc humorum motum à pectore ad alia loca divertere pulmonumque deperditum tonum restituere, ii norunt, qui in artis operibus cum solertia versantur. Non vero solum medici imprudenti medela, sed etiam ipsi agrotantes, perverso victus regimine, sæpenumero multum conferunt, ut humida diurna tussis, tandem in phthisin, vel etiam asthma & hydropem, con-

G g 2

cedat.

cedat. Pessimus enim Practicorum mos est, ut in tussi, cujuscunque generis vel originis fuerit, dulcia, incrassantia, emollientia liberali manu propinent, quibus tam pulmonum, quam ventriculi & intestinorum robur amissum plus adhuc dejicitur, cui potius convenienti stomachica & balsamica medicina erigendo, & superfluis humoribus evacuandis, in curatione unice intenti esse deberent.

§. XVII.

*Ex asthma-
tismo
res ac hy-
drops.*

Ex spirandi angustia atque difficultate, quæ orthopnoæ, vel asthmatis nomine insignitur, tumores oedematofos & hydropes, tam thoracis, quam abdominis, progigni, in praxi sæpe sæpius animadvertitur. Et quo magis asthma urget, ut est spasmodicum & convulsivum, eo facilius funestum thoracis hydropem, vel etiam ipsum ascitem producit: sicut contra lentum & diuturnum asthma, paulatim cachexiam & oedemata pedum conciliat. Qua vero ratione horum affectuum generatio procedat, explicatu non adeo arduum est, quandoquidem vel ob meatuum non infrequenter à polypo obstructionem, sanguis ex uno cordis ventriculo ad alterum ægerrime per pulmones traducitur, sed ad cavitatem dextram & hinc ad universum venarum genus, propter obicem positum, regurgitat. Et quia tardissimus inde fit sanguinis ex venis in arterias transgressus, hinc serosi humores quam facile in venis repletis secedunt inque porosam maxime inferiorum partium substantiam ingrediuntur. Longe vero celerior hæc feri à sanguine secessio tam in pericardium, per auriculæ dextræ poros, quam in thoracis cavum, per aperta vasa lymphatica peragitur, ubi vel polypo vasa pulmonalia infarcta sunt, vel convulsivum, longiori temporis spatio affligens, asthma, liberum sanguinis iter per pulmones intercipit; quippe tunc feri per meatus patulos in cavitates expressio urgetur ac promovetur.

§. XVIII.

*Malum
hypochondriacum*

Nunc à media corporis regione ad infimam descendendum est, ubi eos morbos, qui ex visceribus abdominis à præcedenti morbo debilitatis, prodeunt, spectabimus. Ex iis vero, qui in ventriculo ac intestinis sedem suam atque domicilium habent, vix ullus frequentior est, quam spastico-flatulentus, multis & variis pathematibus conspicuus, quem nostro ævo mali hypochondriaci, vel hysterici, si foeminas affligat, nomine efferre solent. Nam quando universus, à faucibus usque ad anum elongatus nerveo-membranaceus exquisitissimæ sensationis canalis, à morbo præcedente læsus fuerit, adeo ut ejus tonus ac motus peristalticus destructus, vel crusta villosa, quæ colatorii munere fungitur, obstructa, aut glandulæ, quæ solventem & fermentalem succum præbent, obstipatae fuerint, aut bilis quæ chymi correctorium & optima veluti medicina est, intemperata evaserit: nihil aliud efficitur, quam ut abolita digestionem & fecum debita expulsione, multi humores crudi, viscosi, corrosivi ibi consistentes, nervosas partes exagitando, spasmos, convulsiones & flatus proferant. Quæ cuncta ob consensum generis nervosi, anxietates, dolores, inquietudines maximasque molestias in capite, thorace, hypochondriis & abdomine creant. Jam vero diligenti & attenta observatione practica constat, hypochondriacum hunc morbum non frequentius ingenerari, quam ab intermittentibus, præsertim tertianis, male cu-

*ab inter-
mittenti-
bus male
curatis.*

ratis. Nam si ante correctionem vel evacuationem materiæ, quæ febrilis commotionis causa est, paroxysmi variis artificiis constrictoriis nimis propere reprimuntur, ea in visceribus & ductibus excretoriis remanet, & ex mora deterior facta, alias periculosiores stricturas & meatuum obstipationes, cum offensione ventriculi & intestinorum, efficit: idque eo magis, si diætæ vitium aut intemperantia affectuum, quibus in passionibus spasmodicis concitandis nihil potentius est, accedat. Intermittentes enim febres quum fomitem & mineram suam in ductibus biliaris, pancreaticis atque etiam ventriculi ac intestinorum valvulis, plicis atque flexuris habeant, in exquisita sentiente hoc canali suam potentiam, quæ vix ullis aliis quam spasticis tensionibus absoluitur, exserunt.

§. XIX.

Simili ratione diarrhoeæ & dysenteriae neglectæ, vel perperam tractatæ, immedicabilem sæpe in intestinis erosionem ac læsionem relinquunt. Nam quid frequentius est, quam quod ab intempestivo adstringentium in hisce morbis usu, vel vitæ periclitetur, vel diuturna fere insanabilis tabescentia, lenta febris, cachexia, vel spasticus hypochondriacus remaneat morbus, qui mala diætæ & inordinatis animi affectibus multo pertinacior fit & ingravescit. Laborabat ante annum honestissima foemina post male curatam dysenteriam acerbæ & graviter variis symptomatibus, inappetentia, macie, phlogosi, atroci dorfi, lumborum & abdominis rosione, cum ingenti anxietate & alvi segnitie, quam nonnunquam copiosissima dejectio sequebatur, hisque malis ultra sex menses eadem cruciabatur, tandem, divina adspirante gratia, antispasmodicis, roborantibus & leniter evacuantibus, à me curata, perfecta sanitate jam fruitur.

§. XX.

Deinceps ex intermittentibus diuturnior quartana plerumque infimi ventris viscera, ut hepar, lienem & pancreas, adeo lædere solet, ut funestus hydrops subsequatur: siquidem hæc febres altius ut plurimum fomitem suum in viscerum tono destructo, eorumque à sanguine crasso infarctu, repositam habent, unde etiam magnam prudentiam, & sufficiens quoque tempus ad sanandum, desiderant. Nisi enim obstructio illa viscerum expediatur & sanguini ac humoribus per vasa abdominis venosa liber circulus restituatur, supervacanea, vel plane noxia, omnis febrilem impetum sistens medicina est. Tum quoque nihil est inconsultius, quam posthabita sanguinis missione, vel viscerum obstructorum resectione, aut alvi subductione, specificis sic dictis, ex quorum numero sunt cortex chinæ, fraxini, radix tormentillæ, plantaginis, alumen & vitriolacea, motus febriles reprimere. Hæc enim incrassando & coagulando humores, infarctum & indurationem viscerum adaugent, quo fit, ut ibi, intercepto sanguinis cursu, serum in vasa lymphatica magna copia secedat, unde in hydatides abeunt, quæ postea disruptæ, serum in abdominis cavum funesto effectum effundunt.

§. XXI.

Optime hunc generationis hydropis modum, jam olim Galenus in Cap. VII. aph. 55. & Lib. IV. aph. 11. tradidit dum inquit: si aliquando contingit, hydatides, sive vesicæ hepatis aqua, plenas disrupti, effunditur aqua ad locum membranæ

*Ex alvi
fluxibus
tabes*

*Ex quartana
hydrops.*

*Quod testis
monitis
confirmatur.*

branae abdominis interioris, epigastrio respondentem, in quo etiam hydropicorum aqua congregatur. Idem gravissimus auctor Lib. III. in loc. affect. Cap. III. de hydropo, quartanis male curatis succedente, conqueritur, dum ait: quartanae male curatae hydropem accedere crebro vidimus, praesertim si aegrotus in victu aberraverit & intempestivo frigido potu caloris levamen quaesiverit, quo humores incrassantur, obstructions & scirrhus in hepate ac liene pariuntur, & tum praecipue, si dejecti in paroxysmo particulari, caloris putridi exhalationem externo quaesio frigore cohibuerint: qui impulsus, utrumque hypochondriorum viscus adurit & indurat. Et Joh. Langius in epist. 48. pag. 175. & epist. 39. pag. 142. hunc in modum disserit: nisi in febribus putridi humoris copiam ademeris, tum non modo tantam crudi humoris copiam calor naturalis concoquere non poterit, sed praecipue in statu & morbi declinatione resoluta per calorem febrilem & sudorem subtili humorum substantia, faeculentior pars (Germ. der Fieber-Kuche) derelicta, fungosam ac raram hepatis ac lienis substantiam ita infarciat & obstruet, ut tandem, utroque viscere, vel altero scirrhis obsessio & indurato, hydrops aut crurum oedema febrem excipiat. Quod tum maxime accidet, si alterantibus frigidis, cura evacuationem lenitivam aut evacuativam, usus fueris, quae materiam plus ingrossant, quam resolvunt. Quare, ne in febribus interpolatis nimis diu frigidus potu utaris, diligenter caveto.

§. XXII.

Ex renum debilitate inflammatio, calculus, ulcera &c.

Praeterea renes à praecedente morbo debilitati, tono eorum destructo, non modo facile inflammantur, exulcerantur, sed & ad calculorum generationem proni ac dispositi evadunt. Evenit id maxime in plethoricis, vel quibus redundans sanguis per uterum aut ani venas non expurgatur, vel vacuari cessat, hinc ipse, circa vasa in lumbis stagnans, gravativum ibi dolorem aestumque efficit, quem dolorem, si imprudenter medici calculo adscribunt & calidiora, quae urinam movent & calculos pellunt, propinant, gravia dicta renum vitia pleno scaturiunt alveo. Nam renalium glandularum & vasculorum tono, ob nimiam distensionem, destructo, tardius procedit urinalis laticis secretio & descensio ad vesicam, ut in syphunculis urinariis stagnans, tartarum, qui calculi est materia, sponte deponat. Deterior adhuc res est, si inflammatio, & ex hac apostema, aut ulcus, generetur. Quam optime autem hi renum morbi arcentur matura sanguinis missione, quam etiam Riverius Cent. II. Obs. 15. item Grölingius in praxi Tr. de calculo pag. 16. ad hunc scopum obtinendum magni faciunt. Et hæc quoque est ratio, quare hæmorrhoides supervenientes nephriticis, seu salutiferum remedium summopere Hippocrates aph. II. Lib. VI. dilaudat. Hoc itaque naturæ consilium in avertendis his morbis medici merito imitari debent, & vel hæmorrhoides ad fluxum perducere, vel pedum venas aperire.

§. XXIII.

Ex calculo renum vomitus.

At si calculus diutius & firmitus principio uretheris impactus hæret, nec ex sede hac dimovetur: nervosas has partes perpetuo vellicando, ingentem in ventriculo nauseam & ad vomitionem suscitatur irritationem, adeo, ut si quando nec natura, nec ulla arte peregrinus hic hospes cedere velit, perpetua ventriculi subversio, cum anxietate, inappetentia, macie & tandem

Frid. Hoffmanni Oper. Tom. I.

mors subsequantur; quale triste exemplum non ita pridem in præclaro hujus urbis medico confestim. Nam magnum & arctius est renibus cum ventriculo consortium, hinc Langius in Epist. 45. pag. 168. scribit: plures calculo renali affectos, plusquam annuo ciborum fastidio tabescere vidi, nec unquam esurisse: in quorum cura alii Medici ventriculi imbecillitatem, alii venarum mesenterii & hepatis vel splenis obstructions, incusarunt. Spalinus quoque à calculo suscitatus, usque ad ventriculum, & sæpe etiam ad duodenum, propagatus, molesta constrictione hujus peristalticum motum validissime invertit, unde patet etiam ratio, quare calculosi facile fiant icterici. Neque prætereundum est, quod colica crebra ex calculo afflictio ita ventriculi atque intestinorum tonum ac robur imminuere ac labefactare possit, ut colica tormina & flatuum proventus calculi obnoxios levi data occasione vel causa graviter exerceant. Ex renali vero calculo, si quando in vesicam prolapsus, ob magnitudinem non foras ejicitur, continua tartari urinalis accretione, calculum vesicalem generari, extra dubitationem est. Igitur periti est medici, calculum qui ex renibus in vesicam descendit, quantum fieri potest comminuere, ejusque exclusionem per urethram omni modo promovere, cui scopo obtinendo diuretica utique proficiunt.

icterus.

colica.

& vesicae calculus.

§. XXIV.

Ex utero quoque male antea affecto plures prodire novos morbos ac vitia, longa experientia ac usu compertum perspectumque est. Observamus id maxime post abortum vel partum, quem varia mala, quibus virgines non obnoxiae sunt, insequi solent. Quid enim frequentius visitur, quam post puerperium, vel abortum, enormia sanguinis vel feri viscidum albi fieri profluvia, & abortus, nulla etiam comparente causa, de novo facile contingere, unde in mentem mihi redit aurea illa nunquam satis laudandi senis Lib. V. aph. 45. sententia: quaecunque, corpore bene constituto, bimestres atque etiam trimestres abortiunt, nulla incidente abortionis causa, his sane cotyledones, i. e. venarum ac arteriarum orificia, plena mucoris sunt, & non possunt expandere foetum, sed disrumpuntur. Causa tam frequentis abortionis sine ulla externa occasione nulla alia est, quam intermissa sanguinis detractio, vel alvi ductio neglecta. Hinc ante ingravitationem, vel etiam commodis mensibus, purgatio ex lenioribus, quae veteres ob eximium usum benedicta vocarunt, vel temperate aloëticis balsamicis pilulis, instituatur. Matrona, inquit Heurnius in Comment. ad hunc aphorism. quædam sæpius abortierat & pituitosa natura erat, cum vero medicinarum (puta) laxantium usum inivit, feliciter gestationem perfecit. Suadeo igitur cum Platero in Obs. Lib. I. pag. 86. ut puerperæ post partum bene purgentur, ne graves fiant morbi. Neque tantum purgandum est, sed etiam convenienti diæta vitæque regimine & aliis internis & externis roborantibus pristinus utero tonus reparandus: quo salvo ac vigente, & mensium fluxus recte & ordine procedit, quo destructo, inordinati fiunt menses, & inde universa corporis oeconomia detrimentum patitur.

Ex uteri vitio hæmorrhagia, abortus &c.

§. XXV.

Ad partes quod attinet genitales; & hæc facile vitium contrahunt ab antecedente morbo, quod ad nova mala suscitanda idoneum est. Animadvertimus

Ex gonorrhœa male curata bubones &c.

timus id frequentius in gonorrhœa, cui, siue malignæ, siue benignæ, si nimis cito adstringentibus cohibetur, multa ac varia mala superveniunt. Ex intempestivo enim constringentium usu, tam lacunæ glandulosæ urethræ, quam glandulæ, quæ prostatæ appellantur, & genuinam gonorrhœæ sedem constituunt, facile indurantur, exeduntur atque exulcerantur, hinc continuo foetida sanies profluit & insanabile laticis ex urethra fit profluvium. Et quia hæc subtilis acredinis materia conterminas partes, vesicæ nempe sphincterem, non raro simul afficit, unde successive ejus fit erosio, quæ ægre consolidata, perpetuam fere ischuriam & dolorificam stranguriam caussatur.

§. XXVI.

Postdolo-
res atro-
ces.

paresis.

Neque postremo loco prætermittendum est, quod dolores, si atrociores fuerint & diu perseveraverint, universum nervorum genus adeo debilitent & tono suo partes sensui & motui dicatas exuant, ut paralytici, vel alii nervorum affectus, etiam epilepsiæ, inde propullulent; cujus rei clarissimum documentum edit gravis intestinorum dolor, qui colica communiter convulsiva vocatur, cui non raro paresis succedit, quemadmodum id per experientiam uberius constat & multi auctores observationibus idem confirmant. Inprimis egregius hanc in rem exstat locus in *Paulo Ægineta lib. III. pag. 251. Colica*, ait, *affectio pestifera cujusdam luis modo est grassata, ex qua plerique in morbum comitiales, alii in artuum resolutionem, sensu incolumi, nonnulli in utrumque sunt prolapsi, ac eorum qui in comitiales morbum inciderunt, plures interiire, ex iis vero, qui in resolutionem, plures evaserunt.* Sequitur autem gravem coli dolorem resolutio paralytica, quia ordinario post nimiam partium spasticam constrictionem, postea atonia & debilitas excipere solet, ad quam promovendam multum valent opiata, quæ ad infringendos dolores, larga & repetita sæpius dosi, Practici propinare consueverunt, quum periti medici horum usum serio & sedulo dissuadeant, & præsertim *Baglivus in praxi med. Lib. I. §. I. de colica* apposite ita scribat: *nihil familiarius colicæ supervenit, quam paralytis, cave igitur ne opiata copiosius in ea exhibeas, solet enim post opiata magnus sudor supervenire & exinde paralytis.* Hanc ob causam quoque *Raygerus Obs. 50.* in crudeli intestinorum dolore pilulas *Wildegansii* rejicit, quia facile in somno sudor & paresis succedit. *Epilepsiæ* fiunt, quando ob vehementem intestinorum spasmum & vasorum constrictionem, sanguis urgetur ad caput, & spasmus quoque ad meninges penetrat, hinc *Thonerus Cent. II. Obs. 3.* idem tamen post colicam notavit epilepsiam, & quod omnia duplicata conspecta fuerint, humore crystallino quasi è sede sua dimoto. Colicis vero & calculosis, vel etiam tertianis, quod facile icteri superveniant, ratio est, quia spasmus in his morbis ad duodenum & vasa biliaria pertingens, ea valide constringit, ut bilis liber ad intestina descensus amplius fieri nequeat, sed ipsa per vasa lymphatica resorpta & sanguini infinuata, foedum colorem inducat.

§. XXVII.

De morbis
ex priorum
reliquiis
testimonia.

Vidimus hæcenus morborum aliis supervenientium primordia atque origines, quæ potissimum destructo partium quibus infedit morbus tono, debentur. Jam propositum est breviter

strictimque ea considerare vitia, quæ ex morborum reliquiis proveniunt. Primum vero placet hanc in rem divinum nostrum senem audire, qui *aphor. 32. Sect. IV.* hunc in modum scribit: *quibus à morbo restituitis quippiam est infirmum, ibi abscessus fiunt.* Quem aphorismum *Heurnius* optime sic explicat: *quando post morbum infirmitatis aliquid superest, quæ ex lassitudine & imperfecta crisi judicatur, ita, ut supersint materia febrilis reliquæ, aut, si liberalius se potu & cibo ingurgitent, quam immutata ventriculi actio, temperamentum & habitus perferre possunt: tunc in discrimen venit homo, quia partes internæ & externæ labefactatæ sunt, hinc, si non accurata diæta accesserit, hepatis & lienis scirrhi, vel cephaleæ, vel foras in artus, si ibi imbecillitas, abscessus effunduntur.* Quare, ne quid coacervetur, datur pilulæ *alæphanginæ*, *masticinæ*, vel *Rufi*, vel tale quid. Spectat huc quoque *Aph. XII. Sect. II. morborum reliquæ, quæ à crisi supersunt, reciduos morbos parere consueverunt.* Fit hoc maxime, quando ob fractam naturæ virtutem, sicut rursus bene id explicat *Heurnius*, materia morbifica non tota fuerit exclusa, neque in declinatione alvus purgante sollicitata. Notæ vero inquit, *reliquiarum morbi sunt oris siccitas, inappetentia, agrypnia, languor.* Quare recte concludit idem auctor: *plerumque jubemus, ne fiant recidivæ, ut quinto vel sexto die, cum jam convalescunt, assumant tres vel quatuor pillulas de hiera cum agarico, vel masticinas, vel syrupum laxativum, aut pillulas Rufi, vel aliquid rhabarbari, aut passularum purgantium.*

§. XXVIII.

Profecto cedro digna sunt hæc saluberrima monita, quæ inculcant, ut quiescente nunc morbo, omne, quod adhuc noxium & morbificum est, siue in ventriculo, siue in venis substituerit, excludatur, & corpus ab omni perniciali & excrementitio succo liberetur, eo, quod hic facile pabulum ac fomentum recidivæ subministrare, vel novum morbum inducere potest. At vero in hoc & graviter & communiter medici peccant, quod in fine morbi, ægris convalescentibus ac morbofo spasmo remittente, noxias reliquias, neque evacuantibus neque sudoriferis, educant, neque robori naturæ atque ventriculi per congruam diætam & proba stomachica debite succurrant. Nam, quo languidius medentis auxilium est in impetu & statu morbi, eo certius & efficacius in ejus principio atque in declinatione; & quidem ineunte morbo, ut natura adhuc valente obstacula removeat & materiam quæ in vitio est exturbet. Verum quippe est *Hippocratis* effatum, *aph. XXIX. Sect. II.* ita differentis: *quum morbi inchoant, si quid videtur movendum, move; quum vero consistunt ac vigent, melius est quietem habere.* Sub declinatione vero ejus opera necessaria est, quo corpus debilitatum rursus confirmet, vires fractas erigat, quod restat adhuc noxium expellat, & hac ratione novi morbi, plerumque deterioris, generationem impediat.

§. XXIX.

Si vero ullo in morbo, certe in variolis & morbillis, reliquæ morborum ut expellantur necessarium est, quod si non perficitur, gravissima symptomata & morbi succrescunt. Inprimis etiam per experientiam constat, lympham peccantem acriorem, in variolis & morbillis, nervis pneumonicis maxime esse molestam, teste *russi*, quæ

Quæ pro-
pierea sub-
movenda.

De damnis
ex variola-
rum &
morbillorum
reliquiis.

quæ indivulsus utrorumque plerumque est comes, & morbillos sigillatim subinde catarrhum excipere suffocativum. Relinquitur enim in hoc viscere, fracto morbi impetu, magna atonia, ob quam coacervati viscosi humores ibi hærent, & suffocationem, nisi cita ope succurramus, inferunt. Porro quemadmodum in his morbis lymphæ universi corporis, veluti fermento quodam maligno, inquinata, corrupta, vappescens & corrosiva redditur: ita multo magis id accidit, si dissipata per antecedentem æstum sulphurea & balsamica sanguinis portione, fermenti virulenti portio resistat, quæ tam acrem ac corrosivum reddere potest lymphaticum laticem, ut non modo in externis, etiam ossibus partibus, sed & in visceribus, præsertim pulmonibus, ingentes erosiones, exulcerationes vel etiam apostemata fiant. Recte hinc ac perite *Derebecque obs.* 104. perhibet: *quotquot variolis siccatis non purgati fuerunt infantes, in graves morbos inciderunt, hydropem, tabem, scabiem, phthisin, cæcitatem, ossium cariem & alios innumeros.*

§. XXX.

Ubius certe hæc ex variolarum maxime reliquiis noxam restantur medicorum observationes, quarum ut nonnullas adducamus haud abs erit. Sic *Hildanus Cent. VI. obs.* 82. post variolas non exacte curatas corneæ erosionem, tubercula & apostemata circa juncturas vidit. Catarrhos suffocativos & aphoniam notavit *Albrecht in Misc. Nat. Curios. Dec. III. A. III. Obs.* 126. memorans: quosdam post variolas, indolentibus tumoribus, qui postea in abscessus fistulosos ipsi ossium compagi haud parcentes, mutati sunt, in tibiis & brachiis affectos esse, & scite addit: *hoc fateri cogor, vix iis, qui reliquias morbi purgantibus, præsertim mercurialibus, sedulo everrebant, vel earum virus aliis idoneis præsidii destruebant, tale quid obtigisse.* Pariter quanta corrosio lymphæ, post variolarum morbum non bene curatum, sit, variæ observationes docent, de quibus *M. N. C. Dec. III. A. IV. Obs.* 1. consulantur. Vidi, scribit *Franckius*, qui per variolas in tussim ferinam in tabem, hæticam & phthisin inciderunt, vidi qui in ophthalmias, cæcitatem, varia ulcera, scabiem malignam & abscessus inciderunt. In filio *Bregensi*, post variolas, pædathreace in manibus, pedibus & spina dorsi ac tandem mors. Et horrenda ulcera post variolas emergentia *Tulpius Cap.* 52. & 54. quam optime describit. Ulcera mala, pus acerrimum fundentia, notata quoque sunt à *Collectoribus Actorum Ura-tislav. anno MDCC. p.* 6. Phthisica quoque ulcera & apostemata, post variolas relicta, & nos in praxi annotavimus, & tristissimo exemplo & casu *Serenissimi Saxonie principis*, ante aliquot annos hic placide defuncti, id confirmatum habemus: ubi in thorace aperto integer pulmonis lobus, vasorum ramificationibus relictis, penitus corruptus & consumtus, foetidissimo & copiosissimo pure in thoracis cavitatem effuso, visus fuit. Quin in virgine nobili, quæ, sine evacuatione, post variolas nimis cito corpus frigido aëri exposuerat, omnium partium contracturam, eamque insanabilem, conspeximus.

§. XXXI.

Deinceps, vix unquam tam utiles ac necessariae primarum sic dictarum viarum evacuationes sunt, quam in puerperis. Nam non modo tempore gravidationis, sed & ipso in puerperio, magna colluvies impurorum humorum colligitur,

quos nisi cito & clementer subtrahas, complura mala, non sine periculo inde nascuntur. Pessima itaque & detestabilis nostris temporibus opinio invaluit, puerperas, præsertim primis septimanis, plane non esse purgandas, sed ab omni evacuatione abstinendum. Verum magna damna hinc subinde experiuntur, nam exanthema illud, quod purpura vocatur, & in nostris regionibus puerperis familiarissimum est, vix ulli alii causæ, quam neglectæ primarum viarum repurgationi & lochiorum defectui, adscribi debet. Nam impuri ex venis affluentes ad intestina humores biliosi & salivales diuturna mora putrescunt, qui, rursus delati ad sanguinis massam, exanthemata purpurea hæc, vel quandoque erysipelacea, efficiunt. Ad quæ præcavenda nihil consultius est, quam altero vel tertio à puerperio die, postquam omnia rursus sedata sunt, balsamicas pilulas singulis tribus diebus exhibere, qua methodo non modo lochiorum fluxus promovetur, sed & à purpura aliisque gravioribus damnis puerperas immunes persistere, indubitata & creberrima experientia confirmati sumus.

§. XXXII.

Ejusdem exanthematis purpurei malum, in nostris oris, compluribus acutis morbis, ut variolis & morbillis, febribus continuis, etiam malignis, in declinatione, non sine summo vitæ discrimine, sæpius supervenire solet. Rationem vero nullam aliam invenio, quam quod pessima opinio apud nonnullos medicos usque eo regnavit, alvi subductionem dictis in morbis periculi esse plenissimam: unde per quinque vel sex dies & ultra, ægrotantes sine hac relinquunt, quod non potest non pessime cedere. Nam perpetuus quum sit succorum in morbo à corpore ad intestina affluxus, non potest aliter fieri, quam ut, si non excludantur, mora & æstu plane alienam & malignam naturam induant. Hinc aliorum morborum fomitem præbent, eoque magis, ubi sudorifera calida adhibentur, quæ exagitatione putredinem humorum auctam intimius corporis penetralibus insinuant. Quare saluberrimum consilium est, alvum nunquam diu adstrictam retinere, sed enematis vel blandis vacuantibus eam liberam servare. Recte enim *Riverius in praxi med. Lib. XVII. Cap. I. de variolis* præcipit: enemata, non solum in morbi principio, sed etiam toto morbi decursu, usurpanda esse, si alvus sponte non fluat, idque singulis vel alternis diebus; & hoc præclarum præceptum merito in omni febrium curatione locum invenit ac servandum est.

§. XXXIII.

Quemadmodum itaque ex reliquiis superati morbi & debilitate ab eodem solidis inducta, novæ passim succrescunt morbosæ passionis: ita frequentius quoque accidit, ut morbus jamjam sanatus recidiverit ac denuo repetat, quando videlicet prior pariter non perfecte à natura judicatus vel curatus fuit, neque materia morbifica, medici aut ægrotantis culpa, penituseducta, vel nova mox ingenita. Nam quicumque morbus subito sine ratione & bonis signis discessit, is plerumque revertitur; ita tamen, ut quo citius redeat, vel quo vires debiliores sint, eo plus periculi alat, eo quod natura à primo morbo fatigata, secundum vix suslinere potest. Hæc autem morbi reversuri sunt indicia, si convalescens manet imbecillis, nec cibum appetit, nec rite concoquit, sed multa nausea & ructu nidoroso vel

acido afficitur, si spiritus male olet, præcordia inflata sunt & facies livida, si interior cum siti percipitur æstus, quippe quæ depravatam ventriculi coctionem arguunt, qua præsentem morbum adhuc vel intus delitescit, vel nova ad eundem resuscitandum colligitur minera. Interim tamen minori discrimine stipatur recidiva, quæ ex mala victus ratione post morbum, quam quæ ex relicto vitio excluditur.

§. XXXIV.

*Febrim
intermit-
tentium.*

Inprimis autem facillime febres intermittentes redeunt, tum maxime, quando febriles motus, antequam materia quæ in vitio est, penitus correctæ & educæ, nimis cito adstringentibus supprimuntur; quandoquidem hoc factum, ex facili in disposito adhuc ad spasticas commotiones nervorum ac fibrarum genere, denuo stricturæ & motus pristini recrudescunt. Nihil vero ad inducendam febris recidivam tam promptum paratumque esse observatur, quam, si superata illa, quis ventis borealibus corpus objicit, aut in loca frigida humida, subterranea aut templorum concamerationes concedit, quo illico horror, dolor dorfi, languor, ipsaque febris contrahitur. Forte quoque purgans quam facile, si reliquæ febriles adhuc in penetralibus corporis latitant, febris redditum proritare potest; nullam aliam ob causam, quam quod subtile illud acre virus redolens eorum principium spasticas in genere nervoso provocet constrictiones. Acutas etiam, præsertim inflammatorias febres, sæpius magno cum vitæ discrimine redire, experientia constat, id quod facile accidit, si convalescentes nimis cito ante primarum viarum repurgationem iusculis nutrentibus, ex carnibus & ovis, nimis se replent, aut liberalius vinum ingurgitant, vel gravioribus animi affectibus indulgent.

§. XXXV.

*Capitis
morborum.*

Vix quoque ullus tam facile repetit morbus quam gravior capitis, ut apoplexia, paralytis, epilepsia, hemisphæria & insania, eo quod hi morbi in parte affecta ingentem imbecillitatem & pravam dispositionem relinquunt, quæ accedente animi affectu, immoderata refrigeratione, admixta ebrietate, vel gravi alio in diætâ vitio, eundem subito ciet ac denuo concipit morbum. Pariter observavi abscessus pulmonum, hydroperem abdominis & pectoris, nec non colicam, eos, qui vix ab iisdem liberati, vitæ victusque ratione minus valetudinem curarunt, denuo corripuisse. Longe frequentius & crebrius renum calculus, podagra & arthritidis resultant, ob maximam, quam partibus quibus incumbunt quosque dolorum atrociam delassant, inducunt laxitatem ac debilitatem, ita prorsus, ut qui semel iisdem affectus fuit, sæpius eorum insultus experiatur, ac rarius, vel plane non, ab iisdem penitus liberetur. Haud postrema itaque medici cura eo dirigenda, quo abacto morbo, ejusdem recidivam avertat, eumque in finem cum valetudine in gratiam redeuntibus exactas leges ac regulas diæteticas præscribat, has ut observent serio inculcet, & congruis laxantibus ac roborantibus, aut etiam decenti sanguinis missione, imminens periculum prudenter arceat atque præscindat.

colicæ &c.

*calculi &
arthritidis.*

CAPUT XI.

*De commutata morborum, seu potius
causarum morbosicarum sede, sive me-
tastasi.*

§. I.

Vocabulum abscessus apud HIPPOCRATEM & priscos valde usitatum est, & humorem vitiosum ex una parte in alium decumbentem denotat. Huc spectat locus modo citati Senis, *libr. de hum. §. 3. quibus ex morbis se erigentibus statim in manibus aut pedibus dolores fiunt, in his abscessus contingunt.* Sunt autem potissimum apud gravissimum Auctorem duo abscessuum genera; unum fit per excretionem, sub quo omnes criticæ evacuationes continentur; aliud fit per repositionem, ubi materia ab una parte in aliam decumbit; atque hoc posterius genus proprie & *κατ' ἐξοχὴν* dicitur abscessus, Græce metastasis vel palindrome; sub hac tamen differentia, ut, quando materia vitiosa à partibus exterioribus introvertitur, sicuti in morbis exanthematicis, variolis, morbillis haud raro contingit, hæc translatio palindromes nomen obtineat; quandocunque vero five ex superioribus ad inferiores & vice versa, five ab interioribus ad exteriores partes & rursus ab his ad internas, cujuscunque morborum indolis humor movetur, metastaseos notio familiarior est.

*Varie de
nomina-
tiones.*

§. II.

Sed per metastasin volumus perfectam & plenam intellectam, quæ est, quando materia vitiosa & morbifera è sede sua appropriata ad aliam transfertur, & partem suam quam semel occupavit consuetam deserit, funestoque plerumque eventu ad nobiliores & internas partes transponitur. Dari tamen etiam salutiferam metastasin, quæ tum conspicitur, quando materia morbi, à partibus nobilioribus ad ignobiliores, ab interioribus ad exteriores partes propellitur, rectissime animadvertimus. Ita, juxta HIPPOCRATEM *L. VI. aph. 17.* inflammatione oculorum laborantem alvi profluvio corripere bonum & salutare est, quod materia quæ ad oculos ferebatur jam ad alvum descendit. Pertinet huc quoque CELSI, *L. VI. c. 7.* observatio, quæ hæc est: *nonnulli qui mytriast oculorum laborant, ubi pupilla dilatatur aciesque hebescit ac pene caligat, & aliquando nihil viderunt, repentina alvi profusione lumen receperunt.* Similiter valde salutiferum est, quando juxta aphorismum XVI. HIPPOCRATIS *L. VI.* in hydropicis aqua per ventrem purgatur; quod utique intelligendum est, viscera, si nondum sunt vitiosa sed integra, & virium adhuc robur suppetit. Salutaris quoque dicenda est metastasis, quando gravem capitis dolorem ichorosa vel purulenta materiei profusio è naribus sequitur, vel quando in phrenitide narium fit hæmorrhagia, dum sanguis meningibus impactus & congestus per narium venas exitum invenit; vel ubi gravi affectu soporoso oppressis sanguis per sedis venas confertim erumpit, quod non ita pridem ego in generosa persona salutariter evenisse observavi. Pertinet huc quoque *aph. 28. Sect. IV.* HIPPOCRATIS: *surditas biliosis egestionibus contingentibus cessat.* Neque minus attentionem meretur quod BAGLIVUS in *praxi L. I. cap. de phrenit.* scribit: *quando in delirio super-*

*Quid m-
tastasis
perfecta*

Salutaris

venis

venit alvi fluxio, morbo ad coctionem tendente, solvit illud. Sæpius vidimus ægros debiles inquietos anxiosque, diarrhoea superveniente, sequenti die se melius habuisse: & docet experientia alvum strictam capitis ægritudines exacerbare, lubricam vero easdem alleviare.

§. III.

Longe vero deterioris & minus salutaris genii sunt illæ metastases sive translationes morbificæ causæ, quæ naturæ, sive clarius, motibus ordinatis vitalibus admodum infensæ, à partibus exterioribus ad nobilioris functionis internas contingunt & plus periculi habent multumque difficultatis in medendo pariunt. Nullam vero in universo corpore animadvertimus partem, quæ metastasibus perniciosius magis pateat & obnoxia sit quam summa cutis, quæ universale quasi & publicum materiæ ex sanguinis & humorum massa superflua & effusa excernendæ emunctorium est. In hac uti prompta & facilis fit noxii humoris secretio atque abscessio, ita etiam nihil facilius & familiarius contingit, quam, ut ob texturam ejus tendineo-nervosam insigni elatere sive virtute expansiva & constringente donatam, materia vitiosa ibi subsistens introrsum valide reprimatur & retropellatur, quod nunquam non cum perniciæ & periculo fit. Nihil certe in artis opere occurrit frequentius, quam quod fœdus & ulcerosus capitis morbus, qui tinea vocari solet, in infantibus intempestive exsiccantibus reperculsus, varii generis & potissimum exitiales in partibus quas infestat ægritudines concitet. Nam & epilepsiam & oculorum inflammationem, quam in suppurationem & plenariam cœcitatem abiisse vidimus, & sordida narium vel aurium ulcera, in quibusdam etiam, quando maligna ad ima usque thoracis descendit materia, asthmata convulsiva inde fuisse producta, non semel sed sæpius observavimus. Sordidus ille plicæ Polonicæ morbus quibusdam locis endemius, si improvide hæc abscinditur & frigidus aer ad interiora repellit glutinosam impuram lympham, dici vix potest, quam sæva post se relinquat mala, siquidem immanes cephalalgias, epilepsiam, cœcitatem, insaniam quoque furibundam inde obortas fuisse, fide dignis Auctorum constat testimoniis. Gutta sic dicta rosacea, quæ molesto pruritu, ardore & ulceratione faciem defœdat atque deformat, cosmeticis præsertim quæ mercuriale quippiam ingreditur sublata, vel ophthalmiam vel palpebrarum aut labiorum oristumorem valde molestum, vel altius si in pectus se insinuat materia, raucedinem cum difficili spiratione concitat frequentissime.

§. IV.

Quam periculosa mala capitis erysipelas incaute tractatum, retrocedente ad interiora pravo humore, proferat, experientia in dies fere edocemur. Phrenitidem enim, anginam, linguæ paralyfin, lethalem hemiplegiam, catalepsinque insectam fuisse, Scriptorum probatissimæ fidei observationibus passim consignatis, luculenter satis confirmamur. Et quid porro frequentius evenit, quam quod à colli & pone aures locatis glandulis tumefactis induratis, insanabiles fere oculorum morbi, lippitudines, cataractæ spuria & veræ, cutis quoque capitis excoitationes, transmissio illuc falso acri latice, dum per obturatos tubulos ipsi liber transitus denegatur, oriantur. Pejoris vero genii solent esse illæ affectiones quæ inveteratos valdeque duos parotidum

tumores insequi solent; vidimus aliquoties, ab applicatis variis externis, gravia & vix sanabilia pulmonum vitia, asthma, phthisin, tabem & hæcticam producta fuisse, dum noxius valde & causticus à diuturna incarceratione humor, è sede sua expulsus per poros & interstitia usque ad pulmonem penetraverat, cujus membranæ & vesiculis firmitus inhærescens acrimonia sua hostili tantorum malorum causam dedit. Vidimus insuper funesta oris & linguæ ulcera à parotidibus perverse tractatis & induratis suborta. Idem observatum legimus de glandularum subaxillarium tumore, si minus perite à chirurgis, quando videlicet, vel suppurationem supprimunt, vel nimium humorum affluxum celeriter comprimunt & restringunt, tractatus fuerit: nam & præcordiorum angustia & pectoris oppressiones & ferina tussis cum lento calore, inde generantur.

§. V.

Sed à cutaneo superiorum partium involucro pervenimus jam ad extimam & summam quæ inferiores partes tegit cutem, identidem, ob fibroso-nerveam qua gaudet texturam valde mobilem, sive, ut nonnulli loqui amant, sensibilem; qua de causa, dum varias & subitas imo sæpe contrarias relaxationes & constrictiones suscipit, metastasibus humorum & transmutationibus morborum admodum patet atque obnoxia est. Crebriori enim & quotidiana fere practica observatione discimus, in cute subsistentes maculas, pustulas, aliaque exanthemata, sæpius ex levi externa causa, ubi eorum materia retrocedens ad interiora, nobiliores motrices maxime partes infestat, multas & truculentas passiones suscitare. Variolas aliquot jam dies in cute apparentes, ceteris rebus omnibus bene constitutis, à terrore solo, ab improvide admissio frigore, vel corpore diutius in situ erecto detento, subito disparuisse & intra aliquot horas lethales convulsiones secutas fuisse, nos & adstantes cum stupore animadvertimus. Variolis, qui se frigido exposuerunt aëri, subito extinctos, inemorat FORESTUS lib. VI. obs. 46. Nam leves sæpe sunt causæ, quæ, ut materia variolosa intro cum magno vitæ periculo recipiatur, efficiunt, & hinc fit, ut nullus fere morbus, majorem diligentiam & circumspeditionem, ne corpori admittatur quippiam noxii, desideret. De noxia variolarum, in puero quatuor annorum repulsionem legi meretur obs. 42. Dec. III. an. III. M. N. C. ubi post improvidam, ad avertenda variolarum vestigia, inunctionem cum lardo, accedente simul aëre frigido, non modo febris ardens per quatuor septimanas secuta, verum etiam pedum ac membri virilis tumor ortus fuit. DIEMERBROCCIUS lib. de variol. & morbil. Hist. IV. p. 293. perhibet, à dato purgante variolas jam apparentes protinus delituisse, & aucta cordis anxietate, gravique diarrhoea cum summa virium prostratione superveniente, puerum sequenti nocte diem supremum obiisse.

§. VI.

Neque minoris periculi res est morbillorum retrocessio, à quacunque etiam causa contingat; id enim plane peculiare hæcce schematis species habet, ut vitiosa materia præ omnibus aliis pectus petat atque infestet, unde valida sicca & convulsiva tussis statim in principio morbi adoritur, & qui hoc morbo ob recessionem malignæ materiæ intereunt, asthmate vel catarrho suffocativo opprimi solent. Commemoranda huc merito veniunt observatio,

Minus salutaris.

Damna ex tinea capitis retro-pulsa.

Ex gutta rosacea.

Ex erysipelate capitis.

Parotidibus.

Variolæ.

Morbillæ.

observatio, cujus B. HAGENDORNIUS *Cent. I. hist. 77.* mentionem facit, morbillos nimirum in pago quodam epidemice grassatos, infantes ætate minores ambulare adhuc nescios maximam partem invasisse, sed quum ex illis, maculis nondum evanescentibus, inclementiæ aëris sua exposuerint corpora, capite ac pedibus nudatis incedentes, ut solet plebs rustica, complures febre ardente tussi & asthmate convulsivo tentatos occubuisse, reliquos vero evasisse. Novimus sane exempla, ubi à virulentæ materiæ discessione ad interiora, in adultioribus à mutatione lecti paulo frigidioris, lethalis ventriculi inflammatio cum lipothymia fuit infecuta.

§. VII.

Ex prohibita post morbum transpiratione.

Non possumus autem hoc loco, quin utilissimam observationem amplissimi sane in praxi usus insinuemus atque sedulo inculcemus, quod videlicet non tantum ex morbillorum & variolarum discessione in corpus, sed etiamnum pustulis & maculis evanescentibus, à prohibita per cutim transpiratione materiæ vitiosæ, summum sit periculum metuendum. Vidimus sæpenu-mero, ubi declinante vel finito jam morbo, cibis affatim assumptis, nimis cito auræ frigidiori exposuerunt corpora, plura & periculosa infecuta symptomata, & dum peccantis materiæ variolarum ea indoles ac natura est, ut oculis quam maxime eorumque membranis sit infesta, non modo maculas, pelliculas, vesiculas, ipsis oculorum tunicis inhæsisse, sed & graves ac diuturnas epiphoras & lippitudines, quas interdum cæcitas secuta, obortas fuisse: in quam rem observationes ex *M. N. C. Dec. III. an. VII. obs. 97. ex HILDANO Cent. VI. obs. 82. it. Cent. III. obs. 99. & ex HAGENDORNIO histor. 71. & 72.* legi & conferri merentur. Neque obscurum aut absconditum est, sed res & experientia crebra docent, ab eadem, quam modo proposuimus causa, variolarum morbum, pressio sæpius pede, pessima & difficilioris sanationis ulcera sequi, quæ articulos, quæ ossa invadunt cum summo dolore & carie, atque etiam, frustra optimis alias præstidiis adhibitis, superveniente lento æstu, universi corporis vires fataliter consumunt. Atque idem monitum de morbillis memori mente tenendum esse censeo, quod videlicet statim à morbo non nimis nutriendi sint ægri, frigidius & asperum coelum, ne difflatio liberior corporis impediatur, vitandum; qua posthabita observatione, dum materia impurior in corpore remanet, vel ex summa cute in corpus retroagitur, exulcerationes pulmonum, empyemata, asthmata suffocativa, atrophiam cum tussi & lenta febre, artuum quoque contracturam inde subnasci tristissimis subinde exemplis omnino edocemur. Purpuram tam benignam chronicam, quam malignam & acutam nostris temporibus, ob immoderatiorem calidiorum potuum in scorbuticis maxime usum, familiarissimam esse satis cognitum compertumque est: quam periculosa vero & vitæ insidiosa sit, quando materia exanthematica ex summa cute ad nervosas & nobiles internas partes relegatur, sæva quæ sequuntur symptomata, ut lipothymia, cardialgica anxietates, inquietudines, pectoris oppressiones cum ægra spiratione, agrypnia, lenti quoque & alternantes cum frigore & tremore partium æstus, abunde satis planum atque testatum reddunt. Inter acutos exanthematicos atque extremi periculi morbos pestilentiam eminere inter omnes notum est; quorum plerique qui ea affliguntur, ubi bubones vel carbunculi retroce-

Purpura.

ex carbunculis in peste.

dunt, vel ob imbecillitatem naturæ venenum non foras è corpore expellitur, misere intereunt.

§. VIII.

Quam grave & luctuosum subinde, à scabie retrocedente vel malis artificiis retropulsa, corpori humano accedat damnum, res adeo in vulgus usque est in praxi cognita. Pro differentia vero locorum, quæ corrupta materia interius occupat, alia atque alia majoris vel etiam minoris periculi prodire symptomata omnino animadvertimus, & observationibus Auctorum fide dignorum passim confirmatum legimus. Potissimum vero pectus & pulmonem petere infestam materiam observamus; unde dispnoeam, asthma convulsivum & suffocativum, ex quo, si diuturnius malum est, tandem hydrops nascitur, scabiem sive siccam sive ulcerosam improvide tractatam excipere compertissimum est: quando vero ventriculi vel intestinorum tunicas prava adortur materia, vomitus, cardialgia, ventriculi inflammatio, diarrhœæ interdum etiam cruentæ proveniunt; febres quoque varii generis tam acutas quam continuas & lentas inde proficisci non novum & insolens est: quod nostro quidem iudicio exinde fieri arbitramur, quia vitiosa materia, ad arteriarum tunicas nervoso-musculosas quando fertur, earum ordinatam systolen atque diastolen pervertit, turbat, atque nimium intendit.

Scabies.

§. IX.

Quod de scabie ejusque materia à cute in corpus retroacta, & perniciosius inde secutis effectibus jam diximus, id de aliis quoque & subinde foedioribus cutis vitiis & exulcerationibus vel corruptionibus, cujus generis sunt herpetis & lepræ species, intellectum volumus. Neque enim artem facientibus ignotum est, quam graves ægri tudines ab ulceribus extremarum partium præsertim antiquioribus subito & citra præviam humorum correctionem consolidatis subsequantur: qua de materia cum pleni sint observationum medicarum libri, eam ob causam, perpauca saltem & notatu digniora huc allegare suffecerit. TIMÆUS à *Guldenklee in consil.* meminit nobilis, qui, cum ab ulcere multis annis durante vetulæ consilio liberaretur, in tam vehementes incidit capitis dolores, ut de vita desperaret & materiam foetidam mane rejiceret, eundem quem ex ulcere foetorem percipiens. Ita quoque sanato pedis ulcere sanguinis sputum successisse à RHODIO *Cent. 2. obs. 37.* notatum conspiciamus: ad quam rem dilucidius illustrandam pertinet historia illa quam B. WALDSCHMIDIUS *Eph. N. C. an. 2. Dec. I. obs. 213.* recenset & nos hic inferere non tædet. *Vir quadragenarius, inquit, diu domi detentus fuerat ulcere pedis dextri; mali pertæsus illud consolidari curavit; quo facto statim incidit in dysenteriam lethalem, tanto cum egestorum foetore, ut vix illum invisere potuerim. Paulo ante obitum excernebat sanguinem putridum coagulatum, parenchyma disruptum representantem. Vidi & in septuagenario ex ulceribus pedis intempestive sanatis epilepsiam.*

Herpetis, lepra &c.

§. X.

Fonticulos velut ulcera arte medica, ad derivandum maxime noxium à parte affecta humorem, inducta, inconsulto, nulla habita ratione corporis, an firmum an debile, puris an impuris scateat succis, sanatos, vel priorem affectum sub deteriore plerumque facie, vel longe alias adhuc gravio-

Fonticulus.

graviores passiones, ut contumacem dispnoeam quæ celerrime hydroperem ascitem progignit, subsequi omnino planum atque apertum est.

§. XI.

Arthritide.

Nullus vero ex morborum classe est, qui tam expedite prompte ac facile stationem suam deserit atque ab exterioribus ad interiores corporis & plerumque principes partes, idque non sine periculo remeat, quam arthritis, sive dolor & spasmus articularis, quascunque etiam partes sive pedes, manus, genua, sive ischii & coxendicis ossa occupaverit: verum non tantum ex una parte externa in alteram transit & vagatur, sed etiam interiora infestat. Neque hujus morbi genus ullus ex antiquis medicis rectius ipso ARETÆO perspexit: ita enim, *Lib. II. cap. 12. De arthritide*, scribit: *quibusdam in omnem corporis ambitum vagatur & deinceps transitus quoque in dorsi thoracisque musculos fit, incredibile est, quam late malum serpat; vertebrae dorsi cervicisque dolent & in summo sacri ossis dolor inhærescit, & paulo post cum renibus & vesica communicatur; cui DEMETRIUS inter recentiores Græcos assentitur lib. de podagra: non tantum, inquit, in manus, pedes, omnes articulos tales ferri fluxiones, verum etiam in cerebrum, jecur atque adeo in ipsam cor, easque teterrimas esse liberatque difficillimas.* GALENUS quoque in *Hippocratis librum de natura homin. comment. 2.* differte scribit: *aspeximus sæpe in his qui articulari morbo aut podagræ obnoxii erant, quod repulsis ab artubus humoribus eo delatis, illi in principem aliquam partem tendentes, homini interitum attulerint, cui ea sola relinquebatur spes salutis, si iterum possent ad artus reverti.* Varios vero morbos variaque symptomata à retropulsa arthritidis materia subnasci, pro differenti partium ratione & natura quas infestat, animadvertimus. Inter alia hæc observatu digna sunt, quod malum ischiadicum vicinas partes nempe vesicam, urethram, feminales vesiculas & rectum intestinum simul in consensum trahat, adeo ut in emittenda urina ingens cum ardore difficultas, interdum etiam intolerabilis vesicæ dolor & spasmus cum metu inflammationis & exulcerationis inde proveniat. Vidimus quoque ab eodem fonte crebras nocturnas pollutiones, vires quæ enormiter frangunt, ortum duxisse; vidimus non minus benignum seminis profluvium, atque circa anum & sedis venas, permolesta incommoda, à perversa mali ischiadici curatione producta.

§. XII.

Podagra.

Id vero est quod magnam movet admirationem, extremis pedum partibus inhærescentem dolorem, intro repulso vitioso humore, supernas maxime partes petere & graviter subinde affligere: ita novimus à perperam tractata podagra, atroces capitis dolores, vertiginem, apoplexiam sanguineam, serosam, hemiplegiam, paralytin, memoriæ abolitionem, sævam odontalgiam, aphoniā, guttam quoque serenā, epiphoram cum subsequente cataracta & luminum amissione, aliasque graves hujusmodi ægri tudines secutas: id quod etiam infinita exempla hinc inde à probatæ fidei scriptoribus consignata diserte & luculenter satis confirmant. Alia vero mala prodeunt, quando vitiosa materia ad thoracem & ibi contenta viscera deferitur: nam si externas partes infestat, pleuritis spuria, quæ non nisi arthritidis species est, si in ipsos pulmones descendit, serena & chronica tussis, si nervos intercostales

ipsumque diaphragma tangit dispnoea, asthma spasmodicum, cum suffocationis metu inde propullulant. Sæpenumero dolor arthriticus & podagricus evanescens, graves & summe periculosas in ipso ventriculo seu valde nervosa parte, materia hostili ad ejus tunicas delata, concitat ægri tudines; cujus generis sunt totalis appetentiæ prostratio, nausea, gravativus dolor, præcordiorum anxietas, inquietudo, vomitus quandoque cruentus, & conatus ad vomendum cum faciei pallore, cephalalgia, crebra & importuna eructatio. Quandocunque verò ad intestinorum canalem valde nervosæ & sensibilis texturæ, arthriticus delabitur humor, immanis intestinorum dolor, qui, in tenuibus iliacis, in crassis colicis appellatur, valde solennis est: nam ad nullam fere corporis interiorē partem tam primum & expeditum feri arthritici subtilis causticæ indolis iter est, quam ad intestinorum tunicas, quibus si inhærescit paulo contumacius, non modo intolerabiles dolores, sed etiam interdum diarrhœæ, imo cruentæ dejectiones cum summa virium prostratione, extremorum frigore, pulsu debili & languido, facie Hippocratica, contractura etiam quandoque manuum, insequuntur. Neque renes & viæ urinariæ à metastasi humoris podagrici immunes sunt. Nihil certe in praxi occurrit frequentius, quam quod podagra transmigret in calculum renalem, & is rursum in podagram, præsertim in paulo provectioris ætatis hominibus, ubi fixiorem insensus humor magisque tartaream indolem acquirit, cum tamen dolor ex calculo non confundi debet cum eo, qui vertebriis lumbaribus quandoque satis diuturnus inhærescere solet, & rectissime à veteribus arthritis lumbaris vocatur; arthritis vero cum multum habeat ratione indolis & materialis causæ affinitatis cum erysipelate, quod summam in extremis partibus obsidere consuevit cutem, non mirum est, ab eo, per incautam maxime curationem vel ob robur naturæ dejectum, retrocedente, teterrimas, præsertim in partibus interioribus & nerveis, suscitari sæpenumero ægri tudines, ad quarum genus cardialgiæ, inflammationes ventriculi & intestinorum, continuæ, item lentæ & hæcticæ febres referendæ sunt.

§. XIII.

At vero non modo humores tenues & facile *Hydrope.* mobiles id habent peculiare, ut ex appropriato suo loco in alienum, atque ab externis partibus in internas transeant atque deferantur, sed & de insignis molis tumoribus id fieri posse, ut crassi & tenaces extremis partibus inhærescentes humores ad interiora, non sine periculo relegentur, est, quod admirationem quandam excitare potest. Ita vidimus non semel sed aliquoties, in cachecticis vel etiam in hydropicis, pedum tumores, accessu intermittentis febris, quæ epidemice grassabatur, tempore frigoris & horroris evanuisse, sed non multo post difficillimam spirationem ad suffocationem usque invasisse, adeo ut sub tertio paroxysmo præter omnium opinionem ægri, suffocatione interierint. Prostant quoque nobis ejusmodi exempla, ubi hydrope laborantibus erysipelas pedum, quod ordinario cum ingenti frigore adoritur, supervenit, eos, materia serosa inde à partibus extimis ad interiora & maxime pectus coacta, brevi post suffocativo catarrho extinctos fuisse: præterea nobis casus summi sunt noti, ubi scabie vel pravis ulceribus laborantibus, quando accessit tertianæ paroxysmus, subito sæpe & ex improvviso gravia circa præcordia

dia symptomata, cum febre inflammatoria dis-
pnoea & virium oppressione irrepperunt, quæ vix
ullis in medicina præsidii alias optimis superari
poterant.

§. XIV.

*Rationalis
metasta-
sum expli-
catio.*

*Ejus, quæ
in cutis fit.*

In genere sic maxima ex parte, graviori-
bus symptomatibus, quæ metastases humorum
vitiosorum ad interiora comitari & insequi con-
suecunt perlustratis, veniendum nunc esse ad ra-
tionalem quandam harum rerum quæ in verita-
te facti fundatæ sunt cognitionem & considera-
tionem censeo. Primum vero quod dignam me-
retur attentionem, est, quod cutis non modo,
sed etiam articuli, quam maxime sint metastasi-
bus obnoxii, quando videlicet has partes mor-
bus occupat, vel potius causa ibi hæret, morbum,
præsertim, dolorem, spasmus, exulcerationem
aut inflammationem movens. Notum enim ex
anatomicis est, cutem ex fibris nervoso-tendino-
sis, quam maxime elasticis, expansilibus & con-
tractilibus, nec non infinitis tubulis ac poris esse
contextam & ad toni seu motus intensiorem si-
ve remissionem valde aptam, adeo ut ad saluber-
rimam perspirationem conservandam eminentis-
simi & maximi sit usus, siquidem hujus benefi-
cio, quod superfluum est, quod effœtum & inu-
tile, foras in magnum commodum eliminatur.
Quandocumque itaque ejus moderatior ac æqua-
bilis motus & tonus læditur, quod fit vel ni-
mia constrictione & angustia pororum in spasm-
o, vel extraordinaria relaxatione in atonia, sa-
lutare hoc excretionis negotium multum perva-
ritur, in magnum sanitatis detrimentum.

§. XV.

*In liga-
mentis ar-
ticulorum.*

Quod si itaque humor plane heterogeneæ
indolis in tubulosa cutis substantia excluden-
dus hæret in morbis sic dictis cuticularibus, acri-
monia sua hostili fibras in spasticas adigendo
stricturas, non modo sui exclusionem impedit,
sed & id sæpius contingit, ut reniso & conver-
so motu ad interiora in poros vasorum infesta ma-
teria rursus repellatur & recipiatur. Simili ratio-
ne id cum ligamentis articulorum nerveo-tendi-
nosis ac glandulosis contingere arbitramur; quæ
identidem valde sensibilis naturæ, tam ad mo-
tum relaxatorium, quam spasmoticum subeun-
dum, admodum prompta ac facilia sunt.

§. XVI.

*Causæ dis-
ponentes:
natura in-
firmior.*

Jam quod attinet ad causas sic dictas naturales,
ad periculosas ejusmodi metastases disponentes &
præparantes, videmus & observamus eos qui na-
turæ infirmioris sunt, sive ea ab ætate præsertim
infantili & senili, sive à parentibus trahat origi-
nem, sive à morbo vel diætæ vitio, aut gravi
animi affectu fuerit profecta, quam maxime ejus-
modi affectibus retrogradis obnoxios esse; nam
uti debilitas corporis, juxta CELSI judicium,
omnibus fere morbis, ita omnino etiam iis qui ex
anomalis motibus & spasticis stricturis, quæ so-
lenniter in partibus externis fiunt, patet & subjec-
ta est.

§. XVII.

Frigus.

Enim vero frigidum non adeo nocere, sed
magis prodesse podagricis, gravissimus noster Se-
nex *Sect. V. aph. 25.* affirmare videtur, dum,
dolores podagricos mitigare & levare plurimam
frigida copiose affusam aquam, innuit; sed in
nostro hæc experientia climate minime correspon-
det, neque huic sententiæ ulla sana & physica

ratio patrocinatur. Animadversione digna sunt,
quæ hunc in aphorismum, à Celeb. PASCOLIO
Romano Professore, in Opere suo: *de homine
Lib. III. Sect. III. Cap. 3.* notantur, ita se habentia:
*quod hætenus vidimus arthritide laborantes,
ea methodo tractatos, tot quoque vidimus aut apo-
plecticos, aut pleuriticos, aut asthmaticos, aut hy-
drope pectoris, aut colica vel affectione iliaca cor-
reptos, propediem discessisse; idcirco alieno edocti
exemplo, ubi arthritis, quod DEUS avertat, nos
unquam tentet, id præsidii genus nolumus utique
experiri.* Huic observationi adstipulantem quo-
que videmus Cl. MUSGRAVIUM in *tr. de ar-
thrit. anom. p. 254.* tali modo differentem: *recur-
rente podagra, aqua frigida pedes media hyeme
immersit æger: itaque temere tumoris arthritici ma-
teriam percussit; pectore, capite subito grava-
tus, primo tussit & cum impedimento spiritum
traxit, mox sensus omnis, ipsa etiam mens defe-
cit, & tota undique adstantium mirante turba,
non tam excessit, quam e medio surreptus est.*

§. XVIII.

Deinceps inæqualitatem subitamque aëris,
quod maxime fit autumnali tempore & circa æ-
quinoctia, mutationem, ex calido vel humido in
frigidum, & vice versa, vehementer satis ac re-
pente cutis tonum vitare & ad retrocedentes à
partibus extremis ægritudines causam submini-
strare, ipsa quotidiana fere experientia docemur;
qua constat & catarrhales, & rheumaticas, &
arthriticas affectiones hisce temporibus non modo
esse familiarissimas, verum etiam quam facile,
repercussa materia, fieri anomalas, atque in in-
ternas valde difficiles passiones transmigrare. Ex
omnibus vero nihil propemodum est, quod tan-
topere & tam subito motum humorum à super-
ficie corporis versus interiora convertere & re-
primere valet, ac gravis terror, qui uti plurimum
sævissimorum in capite, in pectore, morborum
causa existit validissima, ita omni modo ac stu-
dio terrorem qui tales procreat in arthriticis af-
fectus evitare oportet.

§. XIX.

Postremo, quantum noxæ & damni incon-
sulta morborum & vitiorum, quæ cuti, articu-
lis & partibus externis inhærescunt, per topica tra-
ctatio repellentia inferat, relegando materiam vi-
tiosam ad nobiliores & principes corporis par-
tes, noto notius est. Famosa hoc nomine sunt
cataplasmata, epithemata, linimenta & empla-
stra adstringendi facultate pollentia, cumprimis
quæ mercurialia, saturnina, sulphurata in-
grediuntur, quorum sinistra applicatio, quam
sensibilis cutis humana pars fit, & quam exitiales
morbi ab ejus functione læsa pendeant, luculen-
ter satis demonstrat: quin imo in quibusdam
personis tam exquisitæ sensationis cutaneum hoc-
ce corporis integumentum est, ut etiam spirituo-
sa & camphorata, quorum ope alias egregie do-
lores discutiuntur, ferre nequeant, insigni docu-
mento, etiam cum hisce medico agendum & mer-
candum esse quam cautissime. Atque hæc ipsa
animadversio veteribus quoque medicorum haud
fuit ignota: TRALLIANUS enim *Lib. II. Cap. I.*
sapienter monet, ut adstringentibus & repel-
lentibus in articulorum vitiis non utamur, nisi
totum prius corpus recrementis liberatum fuerit;
nam, quod articulis influit, ne ad principales par-
tes recurrens suffocationis causa fiat, periculum-
que mortis afferat, metuendum est; & in seqq.
*multos attonitos, ait, fieri conspiciamus, ubi pedes
fluxionibus tentari desierint.*

§. XX.

§. XX.

Purgantia. Neque tantum externa, sed & interna improvide administrata remedia ad exitialem humorum in articularum & cutis vitiis retrocessionem, occasionem & ansam subministrare possunt; id quod maxime, de purgantibus præsertim paulo validioribus, notandum venit: De horum noxa suffecerit tantum unum & insignem locum, ex modo commemorati PASCOLII *Perusini Prof. & Proto-Medici Romani Opere*, qui *Lib. 3. Sect. III. p. 182.* extat, allegare: *purgantia*, nimirum inquit, *in podagra, fortiora omnino vitentur, quæ ab articulis affectis humores pravos non raro subduxerunt; qui proinde intus, aut per alios adhuc occultos meatus retrocedentes, pervicacissimum asthma, aut pleuritidem, aut colicam, aut etiam apoplexiam frequentissime pepererunt.*

§. XXI.

Nimia & intempestiva Venæ Sectio. Nimiam & intempestivam sanguinis detractio- nem ad retrocessionem exanthematum, neque minus erysipelacei & arthritici humoris plurimum conferre posse, experientia æque ac ratio confir- mant. Improvidum quoque medicamentorum, quæ valide urinam cient usum, in morbis qui ex- tremas corporis partes occupant, divertendo hu- morum motum ad interiora, eorum schema pla- ne cum dispendio vitæ & sanitatis immutasse; per aliquot nobis exempla non incognitum est. Id vero majorem fortassis admirationem mo- vere potest; situm corporis paulo diutius erec- tum, tanta pollere efficacia, ut exanthemata in cute apparentia; summo cum vitæ discrimi- ne disparere faciat, quod aliquoties in variolis & morbillis, petechiis quoque, præsertim ubi vires valde fractæ fuerunt observavimus: cujus rei in *Diff. de situ corporis erecto in morbis noxiis*, uberio- rem mentionem injecimus.

§. XXII.

Morbi aliis super- venientes. Neque inter causas quæ periculosas morbo- rum efficiunt metastases recensendas, morbi aliis supervenientes silentio involvendi sunt: Quantam catastrophæ, tumoribus œdematosis, cachecticis; foedo ulcere tactis membris, frigus, quod sub ac- cessione febris tertianæ fit, inducere possit, ad in- teriora repellendo noxium humorem, jam su- pra retulimus. Inest vero suffimentis quoque tu- mores varii generis repellendi satis sæpe obvia efficacia; quare non novum vel insolens est ab iis, si perperam adhibentur morbis cutaneis; damnum accedere non minimum.

§. XXIII.

Ventriculi & intesti- norum de- structio. Præter jam dictas, sunt adhuc aliæ causæ, quæ ad morbosas metastases, sive perniciosas humoris vitiosi in interioribus partibus secretiones dispo- nunt; & hujus generis sunt, quæ viscerum & in- teriorum partium tonum ac robur valde affligunt & debilitant, ut deinde humores in has partes, ubi minorem resistantiam & renisum inveniunt, facilius irruant: ita inordinata victus ratio & abu- sus fructuum horæorum, ex affectibus, animi tristitia, ira, ventriculum & intestinorum ca- nalem labefactando, ad diarrhœas, dysenterias, cardialgias, vomitus & inflammationes, à retro- pulsa materia arthritica proficiscentes, valde dis- ponunt. Nimius vero dulcium, sive ex alimen- torum sive ex medicamentorum classe, usus, facile efficit, ut serum acre arthriticum in pectus decumbat; & frequentior usus errhinorum, anodynorum, crebrior quoque ebrietas, Spiritus

Frid. Hoffmanni Oper. Tom. I.

vinis, aut importuna mentis fatigatio à quacun- que etiam causa proveniat, ad capitis morbos pro- gignendos viam præparant expeditissimam.

§. XXIV.

Expositis itaque varii generis causis, quæ minus salutarem humorum in morbis è partibus externis & ignobilioribus ad nobiliores interiores *Modus metastasium* efficere solent metastasin, nunc disquirendum non sine usu venit, quomodo ejusmodi meta- stases ad interiora corporis promoveantur, ut tam tetri & magno cum periculo juncti effectus inde sequantur. Quibus placet, corporis nostri motricibus partibus principium quoddam inter- num sensu vitali & morali præditum motusque secundum & præter naturam dirigens adscribere, illi ejusmodi metastases pro actibus naturæ defensoriis, dum hæc infensam materiam alior- sum transferre vult, erroneis tamen, cum natu- ra ratione inventionis & colatoriorum aberrer, habent. Verum, cum omnia naturæ microcos- micæ phænomena, ex evidentibus & in sensus ac rationem incurrentibus mechanicis & phy- siccis causis, optime & rectissime explicari pos- sint, non videmus, quare his relictis & insuper habitis, ad causas abditas, quæ nec concipi nec probari possunt, confugere velimus. Neque et- iam admittere possumus, id quod in se & sua na- tura est vitæ adversum, intentione bonum esse: nunquam enim res morales & spirituales, quæ ex arbitrio peraguntur, cum rebus physicis quæ ex necessitate mechanica fluunt, ad confusio- nem foecundam errorum matrem evitandam, commiscere volumus.

§. XXV.

At vero illud videtur accuratiorem disquisitio- nem & examen mereri, qua ratione videlicet ma- teria stupendæ exilitatis & tenuissima, ut videmus in morbis exanthematicis, petechiis, morbillis, purpura, à vitali humorum consortio non ita pri- dem exclusa, tam sævas in universam vitalem œ- conomiam mutationes efficere possit, item quare infesta hæc materia non tam expedite & tam fa- cile per easdem, quas retrocessit vias, in corpo- re, ope præsertim convenientium remedium ad corporis ambitum rursus protrudi possit. Ad priorem quæstionem quod spectat, dicunt humo- rem à benigno sanguinis & humorum vinculo segregatum, in angustioribus cutis tubulis ex pau- lo diuturniori mora corruptam & interdum vi- rulentam indolem assumere, unde funesta in in- terioribus præsertim nervosis partibus sympto- mata derivanda esse contendunt. Quamquam vero hæc sententia non plane fundamento suo careat, tamen non in totum rei discernendæ satis- facere videtur: quippe nostro quidem judicio, tenuissimus ille qui ex ambitu corporis retroce- dit pessimæ naturæ humor, tantorum sympto- matum non est sola causa, sed potius ipse ille mo- tus ex superficie corporis ad interiora conver- sus, cujus indicium saltem est evanescencia ma- teriæ sive exanthematicæ sive pustulosæ, quæ in cutis substantia hæret, symbolum suum hic quo- que confert. Nam sicut fluidorum motus pro- gressivus, qui ab interioribus vi & nisu cordis ac arteriarum ad superficiem corporis extimam fertur, unice vitalis & salutaris dici meretur, quia hujus beneficio structum & mixtum corpus, à materia inutili effœta & corruptionem mo- liente, jugi difflatione & perspiratione libera- tur; ita vix aliud quippiam existit, quod interitum minetur, ac, quando motus hic humorum inimi-

Quomodo humor res impulsus tam sevit- ter agere possit.

nuitur, sistitur, imo resistentia & renisu in fibris & angustissimis subcutaneis vasis facto, resistit quasi & intus convertitur, ubi non tantum, quod superfluum & naturæ humanæ infestum est, intus remanet, sed & ad viscera major humorum affluxus & congestio fit; ex qua, quæ deum mala, ut obstructions, oppilationes, corruptiones, spasmi, dolores, extravasationes, cetera, exsurgant, is deum qui solidis pathologiæ fundamentis instructus est, recte judicare poterit.

§. XXVI.

*Cur idem
tam diffi-
cilius ad
pristinum
locum
amande-
tur?*

Ex hoc fundamento quæstionem posteriorem, quæ est: cur tam difficulter, interiora qui petit humor morbosus, ad pristinum locum relegari possit? solvere non adeo erit difficile. Nam quando- cunque ipsa materia corrupta & exanthematica, ex partibus extremis per tonum ac motum cutis quasi peristalticum inversum ad viscera translocatur, tunc ad vasorum & vasculorum angustias, circumvolutiones, humorum per ea difficiles circuitus, ac motuum retardationes si respicere velimus, non tam facilem esse horum humorum stagnantium & spissescentium dissolutionem, meatuum apertionem, atque motuum ad peripheriam corporis restitutionem, cuique animadvertere integrum erit. Ex quibus nunc facile petenda est ratio, quare tanti periculi res sit, *quando*, secundum aphor. 25. lib. VI. HIPPOCRATIS, *erysipelas ab exterioribus fertur ad interiora; bonum vero & salutare, si ab interioribus ad exteriora vertatur*; quod etiam Galenus comment. in Hippocr. libr. de natur. homin. confirmat, satius esse, ducens, ut humores pravi, relictis principalioribus partibus, in ignobiliores, quam quod ab ignobilioribus in principes ferantur; imo ipse GALENUS & MERCURIALIS, in not. ad hunc aphorism. rectius innuunt, Hippocratem hic erysipelatis nomine omnium externorum & cutaneorum vitiorum inculpasse introversionem.

§. XXVII.

*Metastases
non æque
periculo-
sæ.*

Non possumus tamen, quin etiam hac occasione moneamus, non æque periculosa semper, multo minus funestam esse omnem in morbis humorum vitiosorum ad interiora retrocessionem, sed ad corporum naturam, an robusta, valida vel valde imbecillia sint, ad anni quoque tempus, ad ætatem, ad vitæ genus, ad humorum conditionem & intemperiem, vel etiam corruptionem & spissitudinem sedulo respiciendum esse hortamur: res enim utique periculi plenissima est, si vires corporis valde fractæ, si ætas senilis vel infantilis, si viscera jam ad labem vel per ipsam etiam nativitatem sint disposita, sique humores corrupti, causticæ & acris indolis, vel retroacta prava materia nervosas ventriculi, intestinorum aut cerebri tunicas, aut præcordiales nervos occupat.

§. XXVIII.

*Regule
prognosti-
cæ.*

Ceterum ad rectum & prudens de hisce morbis, ratione eventus, iudicium formandum, in genere quasdam regulas insignis in praxi usus annectere non dubitavi; quas inter primum merito locum tenere hæc debet: corpora quo infirmiora, viribusque valde exhausta sunt, eo plus morbosæ metastases periculi & vitæ discriminis habent. Id liquido apparet, quando petechiæ, variolæ, morbilli, vel etiam purpuracea exanthemata, ipso in febris vigore vel post eum retrocedunt, ubi jam tantum virium per assiduas vigilias & vehementem solidorum & fluidorum motum deper-

ditæ sunt, ut non sufficientiam humorum ad principes vitæ partes, cerebrum, cor, pulmones, nimis congestionibus superandis & rursus extrorsum propellendis; quod vero, si non accidit, convulsionem, deliria, syncopes supervenientes mox vitæ finem faciunt. Deinceps observatione constat: corpora valde imbecillia & quæ viribus defraudata sunt, facillime, minima saltem ex causa, exitalibus morborum translationibus esse obnoxia. Quid enim frequentius accidit, quam quod à sola corporis vel pedum refrigeratione, à solo secessu è temperate calido lecto in paulo frigidiora, & situ corporis paulo diutius erecto, vel ex levi animi perturbatione exanthemata, præsertim circa IX. vel XI. diem, retrocedant, & non multo post, præter adstantium opinionem, placida morte ægri quasi obdormiscant. Id quoque in aliis morbis in phthisi, hydrope, hectica, animadvertimus, dum ex levi in diætâ errore, conversis humoribus & motibus ex peripheria ad centrum sive interiora, non raro funesti affectus insequuntur.

§. XXIX.

Observamus præterea frequentes alvi dejectiones, cutaneis morbis, præsertim acutis & exanthematicis si accedunt, pessimum omen exhibere: neque ratio inventu difficilis est; nam alvi fluxus causa, ut plurimum est motus humorum ab extra ad intestina conversus, qui impeditam excipit perspirationem; hinc multæ serosæ, excrementitiæ, falso-acres itemque aëreo-elasticae & orgasticæ partes, quæ per poros diffilari debebant, non modo massam sanguinis & humorum inquinant, sed per glandulas etiam in cavitatem intestinorum influunt atque in sanguine præternaturalem orgasmum, in intestinis autem flatus, ac spasmos excitant, pessimorum certe pathematum fontes atque origines: accedit quod sub omni diarrhœa etiam à causis internis prognata, derivando humores ad interiora, corporis extremæ partes, maximeque cutis tubulosa & porosa succis influentibus orbata, propius ad se invicem accedant, coangustentur & comprimantur, hocque ipso, adeo salutaris illa perspiratio inhibeat.

§. XXX.

Dum circa hanc materiam versamur, haud infructuosum sed operæ pretium fore putavimus, si generalem morborum à retrocessione vel translatione morbosæ materiæ ortorum curationem hoc loco suppeditaremus. Primo autem omnibus modis, vitalis ille humorum motus ad exteriora qui tendit, conservandus est, & omne illud quod invertit hunc motum ad interiora fugiendum: nam sicut, ille ordini naturæ, principi morborum medico optime conveniens est, ita hic ad ejus destructionem tendit certissime. Qua propter ea quæ jam supra inter causas hos affectus excitantes retulimus omni cura & sollicitudine evitare oportet, & nulli rei magis invigilare, quam ut tonus cutis æquabilis & moderatus, ac ab eo maxima parte dependens transpiratio, semper conservetur; quod fit, si moderatio sive aurea mediocritas in rebus quæ dicuntur non naturales, verbo, diætetica observetur, & omne nimium, quod naturam & ejus motus salutes mirifice pervertit, vitetur. Maxime omnium vero curandum est, ut in æquabili calore & perspiratione subcutaneum illud cribrum conservetur, caloris enim temperies, tam quoad conclave, quam lectum & lintea-

*Diarrhœa
malum
genum.*

*Curationes
generales.*

lindeamina, nunquam non in hisce affectibus utilissima est, cum contra excessus frigoris vel caloris sit perniciosissimus. Multum quoque juvat, animum in placido & tranquillo statu servare, quia ejus nimia fatigatio vel perturbatio, omnia, etiam ordinate quæ fiunt in corpore, multo magis ubi inordinatio motuum jam adest, pervertere potest.

§. XXXI.

In nullis vero quæ nocere possunt rebus major cura & observatio adhibenda est, quam in applicatione topicorum, quæ leniendi doloris vel exulceratas partes consolidandi causa potissimum usurpantur. Et nos sane consultius ducimus ab eorum usu, quoad fieri potest, se retrahere, præsertim in principio & ubi inflammatio subest, quia plus detrimenti quam emolumenti hæc ipsa præstare quotidianis fere experimentis perspicimus: attamen minori cum periculo & desiderio magis cum effectu, quando corpus probe à copiosiorum & impurorum humorum copia prius vindicatum est, sique malum in declinatione fuerit, ad robur partium affectarum restituendum, ea in usum ducuntur. Postremo quoque primarum viarum, per quas ventriculorum & totum intestinorum tractum intelligimus, in ejusmodi morbis sanandis ratio habenda est, ne, quod flatus, quod tormina ciere & alvi fluxum sollicitare vel eum comprimere potest, admittatur; vix enim dici & comprehendere potest, quanta inter partes externas cutem, inque primis pedes & intestina, consensio & mutua motuum conspiratio intercedat: nam si ingens dolor vel spasmus intestina affligit, mox etiam cutis contrahitur & libera transpiratio impeditur; alvus vero nimis compressa vel obstructa felici curationi identidem infensa est, quia id efficit, ut impuritates quæ excerni per eam debebant, ad corporis ambitum protrudantur.

§. XXXII.

Quod si vero jam facta fuerit metastasis, totum curandi ministerium in eo consistit, ut quam fieri potest citissime, tutissime tamen, corruptus humor ad appropriatam sedem reducat: id quod facilius & magis auspiciato fit effectu, quando recens est metastasis, quando vigor adhuc & robur virium respondet, & quando materia non adeo corrupta & maligna indolis est, neque pravorum succorum copia corpus refertum est. Hanc curandi methodum & ipsa natura & crebra experientia atque sana ratio dicitur; siquidem anomala & prava illa symptomata, quæ excipiunt morborum transpositionem in interiora, non nisi apparentibus rursus doloribus, spasminis aut exanthematibus, in locis ante affectis, conquiescunt, idque natura sæpius sponte, nulla singulari arte adjuncta, negotium exsequitur. Atque in hanc rem attendi utique meretur aphorismus ille amplissimi usus practici, qui est XXI. Sect. I. HIPPOCRATIS: quæ ducere oportet quo maxime vergunt, per loca convenientia ducamus; quæ in hisce morbis partes externæ, per quas noxium è corpore exhalare & diffilari debet, constituunt. Quare præcipua medentis intentio huc collinearè debet, ut convenientibus remediis naturam quæ optima & expeditissima morborum etiam subcutaneorum sanatrix est, in hoc negotio adjuvet; quod fit, si ex tanta materiae medicæ farragine & plerumque indigesta mole, cum ratione, in experientia fundata seligat primum ea, quæ humorem ad excretio-

nem cuticularem mobilem & idoneum reddunt; tum quæ internum viscerum robur, si torpidum fuerit, excitant, & meatus per quas excretio fit patulos atque apertos reddunt, neque minus quæ impedimenta salutaribus ejusmodi excretionibus resistentia, tollunt.

§. XXXIII.

Nolumus autem innumera alia ab Auctorebus hunc in finem commendata afferre atque recensere remedium genera; neque enim consuetudinis, nec instituti & loci ratio id permittere videtur; sed tantummodo ea, quæ ex inmultiplici experientia, convenienti ordine & methodo usurpata, à nobis salutaria deprehensa sunt, commemorabimus. Ex compluribus autem probatae virtutis remediis, ea, quæ leniori diaphoretica & roborante virtute splendent commendamus, uti sunt: aqua cardui benedicti, scordii, florum sambuci, melissæ, cerasorum nigrorum, acetum vini, cancrorum lapides, diaphoreticum antimonium, mixtura simplex, cinnabaris præparata, theriaca coelestis, in refracta dosi, pulvis Marchionis cum nitro & cinnabari mixtus, nec non emulsionem: item pulvis bezoardicus Sennerti vel noster, si cum tertia vel quarta parte nitri & octava cinnabaris misceatur, addito interdum camphoræ, si metus internæ inflammationis est, momento. Mirabilem præterea efficaciam semper præstitit, sic dictus liquor anodynus mineralis noster, quando vel solus vel cum pulvere præcipitante mixtus, una cum aquis diaphoreticis modo recensitis, in usum ducitur. Si sudorem paulo largiorem movere expedit, liquoris anodynus mineralis partibus quatuor, una pars liquoris bezoardici Bussii, vel spiritus cornu cervi succinati addenda erit.

§. XXXIV.

Alia vero curandi ratio ac methodus ineunda est, quando pessimæ indolis morbi, ex pustulosis & ulcerosis cutis defæcationibus sanatis & retropulsis, oboriuntur: tunc enim majori sæpius natura stimulo diaphoretico vel sudorifero eget. Et res mihi videtur hoc loco notatu valde digna, quod hæc ipsa, quæ exterius cuti applicata noxiam faciunt retrocessionem medicamina, ut sunt, quæ ex mercurio, quæ ex sulphure vivo parantur, interne cum prudentia sancta, propellendo ad exteriora morbiferum humorem, sanandi quoque facultatem possideant. Nam pulveres ex floribus sulphuris, æthiope minerali, vel antimoniali (secundum methodum Excell. D. D. ELLERI Colleg. Med. Berol. Assessoris, qui ex antimonio crudo & mercurio vivo invicem tritis & mixtis constat,) antimonio crudo; regulo antimonii medicinali, cinnabari, item croco martis subtilissime pulverisato, cum aliis diaphoreticis mixti, miram certe in hujusmodi affectibus præstant efficaciam, præsertim quando usus horum, decoctis diluentibus, temperantibus, inque primis sero lactis caprini, vel macris carniū brodiis, quibus incoctæ sunt radices aperiente & transpirationem promovente virtute donatæ, ad quarum genus spectant, radix scorzonerae, graminis, petroselinis, asparagi, sceniculi, taraxaci, cichorei, secundatur: in quo etiam casu, præsertim si tormina in imo ventre urgent, aliquot cochlearia olei amygdalarum dulcium in recensitis his jusculis propinari possunt. Sicut in his affectibus utilis quandoque sanguinis missio, per scarificationem vel venæ sectionem deprehenditur. Atque salutare quoque in-

Diaphoretica & leniora sedativa laudantur.

At methodus ubi ex pustulosis & ulcerosis materia morbi propulerunt.

terdum est, noxios ferofos & putridos è corpore humores, tuto, leniter & successive per alvum educere, quo postea & tutior & felicior eorum quæ per cutim pravos humores evacuant, evadat operatio. Insigni autem selectu & circumfpectione hic opus est: omnia enim quæ valide alvum stimulant, quæ acria sunt, quæ tormina cient, item aloëtica quæ sanguinem commovent & impetuose ad interiora & intestina compellunt, penitus exulare debent: mannata vero, tamarindinata, rhabarbarina, passulata & tartarea, si recte miscentur & usurpantur, omne punctum absolvunt.

§. XXXV.

Topica
quando
adhiben-
da.

Quod attinet ad topica, varii sunt generis quibus hæc, materiam corruptam in pristinum locum revocandi, virtus adscribitur, e. g. frictiones cum pannis asperis, urticationes, sicca cucurbitulæ, phænigmi, antispastica, fonticuli & vesicatoria: sed nos his posterioribus, si remporiora, ut sine dolore operatio fiat, recteque applicata & diutius detenta fuerint, præ omnibus aliis, crebra experientia edocti, eximiam atque insignem vim & efficaciam adscribimus. Ad revocandos vero dolores podagricos pediluvia temperata ex aqua pluviali vel fluviali, fursuribus tritici & lacte admixtis, singularis & eximie virtutis ac fructus fuisse non semel à nobis observatum est. Neque enim sobrius & circumspectus dictorum externorum, quæ ingenti humores noxios ad partes externas & minus nobiles derivandi vi pollent, usus, sua laude caret. Etenim emplastrum nobis usitatum valde temperatum vesicatorium, quod citra dolorem & inflammationem, insignem feri vitiosi quantitatem extrahit, ac per mensem & ultra usurpari potest, in affectibus capitis nuchæ, in retrocedentibus petechiis carpis manuum, in cardialgia vero, colica arthritica & scorbutica pedum malleolis applicandum præclaros sæpenumero effectus præstitit. Constat etiam phænigmi sua virtus quæ, ex allio, cepis, raphano rusticano, fermento panis & aceto præparari possunt: moderatioris enim ac vesicatoria sunt operationis, atque dum subtili acrimonia vividiorum motum fibrarum motricibus conciliant, stimulo majorem affluxum sanguinis & humorum ad partes invitant. Emplastra vero epispastica ex pice Burgundica & terebinthina confici solita, in morbis anomalis à Cl. MUSGRAVIO quidem, in eleganti suo libro *de arthritide anomala* laudantur & in usum trahuntur, sed cum nobis certa eorum efficacia plane ignota sit, neque vituperare hoc remedii genus neque commendare volumus.

CAPUT XII.

De rationali pulsuum explicatione & judicio in morbis recte ex iisdem formando.

§. I.

Veteres mi-
nus recte
pulsuum
doctrinam
tradide-
runt.

IN superioribus potiora fundamenta & capita veræ & rationalis pathologiæ, quæ resolvendis morborum historiis apprimè inserviunt, concise quidem, sed satis solide, ut arbitror, tradidi: nunc ad doctrinam à Veteribus maximi semper habitam & celebratam veniam, quæ ad penitiorem morborum diagnosin & ipsam quoque prognosin necessaria, ad certitudinem artis,

existimationem & famam apud doctos & vulgus medico conciliandam, maximum utique confert momentum. Utut vero inter Veteres, antiquissimus nostræ artis parens *Hippocrates*, in hac medicinæ parte admodum diffusus & operosus fuerit, ut plures etiam de prædictionibus & prognosticis libros conscripserit; nihilominus tamen permulta, ut ingenue fatear, in iis comprehenduntur, quæ in nostris præcipue regionibus, usu & applicatione carent. Nam regulæ istæ & aphorismi prognostici magna ex parte particulares sunt, ad certos casus & peculiare circumstantias, quæ tamen deficient & non adjectæ, restricti, tantum abest, ut perpetuæ sint observationis & applicationis. Quumque in diagnosticis & prognosticis vix ulla sit excellentior magisque necessaria doctrina de pulsibus; mirandum certe est, in *Hippocratis* monumentis nullam, vel plane exiguam, ejus reperiri mentionem, quum tamen in disquisitione de urinis, plus quam par est & usus exigit, diffusus sit atque occupatus. Quam breviter vero & concise ipse *Hippocrates*, tam late & prolixè *Galenus* de pulsibus sermonem fecit, quippe qui innumerabiles fere pulsuum finxit differentias, quæ nec mente concipi possunt, nec re ipsa, ut recte animadvertit *Montanus*, observantur. Hunc postea, ceu ducem, cæco studio plures ejus affectuæ sequuti sunt, & fideliter tam numerosas, confusas, vix explicabiles & conceptibiles pulsuum species in scripta sua transfulerunt, quæ nonnisi ad ingentem tironum medicinæ confusionem facere possunt.

§. II.

Veteribus quidem facile condonandum, quod in pulsuum dignotione & evolvenda eorumdem natura atque origine, tot hallucinationes admiserint, eo quod sanguinis circuitum, veram & genuinam pulsuum causam, ignorarunt; quo utique factum est, ut verum usum pulsuum, nec in diagnosi, nec prognosi, tam in statu sano, quam præternaturali, cognoscendo, recte intellexerint. Recentioribus vero, qui nobilissimum hoc inventum norunt, merito vitio vertendum, quod multi adhuc eadem chorda oberrent, & ex tanta à Veteribus conficta pulsuum multitudine & multifaria denominatione, velut ex labyrintho, cum certa ratione sese extricare nequeant. Si causam quærimus; hæc præcipue subest: quod plerique hanc de pulsibus doctrinam non ad mechanicam scientiam, siue regulas motuum, ad quam tamen proprie spectat, examinaverint. In quo quidem doctrinæ genere *Bellino* melius versatus est nemo, quem si inspexissent quibus mechanica sordent, perspicuum sane conceptum de arteriarum & sanguinis per eas motu adepti essent; sed qui præjudiciis occæcati sunt, nunquam volunt discere, quæ nunquam didicerunt.

§. III.

Quod vero magis adhuc mirandum, adeo quidam in luce caligant, ut dubitent, num in arteriis systole, siue motus contractorius succedat, cujus beneficio sanguis ex ipsis in venas, & ex his versus cor refluus propellatur? Sed quis putarit, hos ipsos ignorare motum tonicum, de quo tam frequens ipsis sermo est, in reciproco motu constrictionis & relaxationis consistere, & hunc non tantum musculis & fibris, sed maxime omnium canalibus, qui ex tunicis nervosis & fibrosis elasticis conflati sunt, omnibus esse proprium, adeo, ut nullum quod fluidum vehit in corpore animali

Quos re-
centiorum
quidam
perperam
sequuntur

Qui systole
sicut arte-
riarum
motum na-
gant maxi-
me errant.

vas hoc ipso sit destitutum. Deinceps nostri utique scire debuissent, quod horum simplicissimorum motuum vere vitalium ea sit natura ac indoles, ut unus semper alterum sequatur atque proritet, ita quidem, ut systole suscitet diastolen, & diastole rursus systolen, unde motus exsurgit perpetuus, & cor in machina animali recte dicitur perpetuum mobile, quod argumentum latius in *tomio primo medicinae rationalis systematicae* deduximus & illustravimus. Tum apud omnes in confesso est, pulsum, qui tactu in arteriis percipitur, esse nonnisi expansionem & elevationem arteriarum, à contractione cordis, qua sanguinis portio in alveos intruditur, productam; nisi itaque arteriae post expansionem iterum in priorem statum & dimensionem se restituerent sub contractione, neque nova receptio sanguinis & iterata ampliatio, neque etiam progressus in vasa reducentia, posset contingere. Porro systolen sive activam laterum contractionem licet tactu vix perceptibilem, in arteriis vigere, apertius testatur, sanguinis per arterias vulneratas vel abscissas saliens effluxus, ita succedens, ut in diastole quiescat, in systole vero cum impetu elidatur. Tacemus, quod figura valvularum semilunarium idem luculenter arguat, quippe quae orificiis arteriarum è corde egredientium admirabili artificio eum in finem appositae sunt, ne sub systole arteriarum, quae diastolen sequitur, sanguis ad cor refluat ac reprimatur. Neque denique sublata arteriarum systole, sive potentia elastica, quae dilatatione & reciproca contractione absolvitur, intelligi potest, quo modo tota non solum sanguinis, sed etiam humorum universi corporis massa, quae exacte posito calculo, pro diversitate individuorum, in grandi corpore & robusto ad LXX. vel LXXX. libras accedit, intrusa una vice à corde in principium arteriae ad summum sanguinis uncia, possit dimoveri & in circulum agi. Et certe nequaquam sufficit dicere, arteriosa vasa cum venosis reducentibus non esse continua, sed arteriarum extrema in porosam partium substantiam sanguinem à corde advectum fundere, & effusum mediante motu tonici vi ac potentia in venas & per has ad cor trudi, sicque cruorem in motu progressivo resuo eximie adjuvari. Nam supposita illa humorum in poros & interstitia fibrarum extravasatio, commentum & haud levis error anatomicus est, cui partium & totius corporis mere vasculosa, exceptis filamentis fibrosis, compages, uberrime illustrata & confirmata artificiosissimis *Ruysschii* injectionibus, quibus etiam docemur, nutritionem corporis nonnisi insigni expansione substantiae vasculosae partium à contentis succis fieri, apertissime repugnat.

§. IV.

Eandem censuram meretur quorundam sententia, qua nostris temporibus, quum à sagacioribus medicis jam dudum istae multiplices & inexplicabiles pulsuum Galeni species explosae, antiquum recoquunt & tantum non omnes illas ad fastidium usque inculcant. Videas nonnullorum scripta, in quibus pulsus fortis, vehemens, magnus, plenus, longus, brevis, durus, mollis, parvus, vacuus, debilis, humilis, frequens, rarus, celer, tardus, serpentinus, vermicularis, formicans, caprizans, tremulus, undulatorius, myurus, ferratus, dicrotus, manifestus, obscurus, intermittens, inaequalis, ceu vere & distincte existentes supponuntur, ex variis mentis praefigurationibus explicantur, & ad prognosin formandam

Frid. Hoffmanni Oper. Tom. I.

sterili plane molimine applicantur. Quo quidem nihil aliud faciunt, quam ut pulsuum disquisitioni tenebras inducant, & vel suo exemplo effatum, quod ipse *Galenus lib. I. de pulsuum doctrina* pronunciare non veritus est, confirmant: tantam in pulsibus solis addiscendis esse difficultatem & obscuritatem, ut tota hominis vita illi cognitioni atque exercitationi tribuenda videatur.

§. V.

Ego potius hoc loco pulsuum scientiam ac differentiam secundum mechanicas rationes & leges breviter proponam, quo liquido appareat, quam pauca pulsuum sint & revera existant species, unde suam petant originem, & quam eximum usum eorum exactior notitia in praxi medica obtineat. Quemadmodum itaque in mechanicis nonnisi duae simplices & genericae motuum species dantur, motus nempe magnus & celer, cui parvus & tardus opponitur: ita etiam duo tantum in genere pulsus, magnus scilicet & celer, hisque oppositi tardus & parvus, praesto sunt. Magnitudo & parvitas in motu, de mole quae movetur, magna, vel parva, dicitur; celeritas vero & tarditas, de spatio, quod mobile longiori, vel breviori tempore, emetitur. Pulsus igitur magnus is appellandus, quando ab insigni copia sanguinis, à contractione cordis in arterias intrusa, arteria amplius diducitur ac elevatur; parvus vicissim, ubi ab exigua portione immixti cruoris non adeo ampliatur. Et celer pulsus is dicendus, quando brevi temporis spatio arteriae dilatatio perficitur, tardus contra, si longior temporis intercapedo ictus intercedit. Deinde ex binis his speciebus compositis alia emergit, vehementia nempe atque debilitas, ita quidem, ut celeritas cum magnitudine conjuncta vehementiam, parvitas vero & tarditas, debilitatem constituat, quod motuum genus utique etiam in pulsibus locum habet.

§. VI.

Frequentia vero & raritas, item aequalitas & inaequalitas, non sunt essentialiter affectiones motus, eo quod non de singulis motibus, sed tantummodo de successu & serie eorundem praedicari queunt, & frequentia quidem de numero majori, raritas de minori, aequalitas & inaequalitas, item intermissio, de ordine & successu motuum. Neque etiam durities & mollities de essentia motuum est, sed tantummodo dispositionem corporis, quod movet, vel movetur, denotat. Reliquae omnes pulsuum species sunt fictitiae, quae revera non dantur, neque mente concipi, neque explicari possunt; licet minime negandum, diversos magnitudinis & parvutatis, item celeritatis & tarditatis, vehementiae quoque & debilitatis, esse gradus. Proinde vehementer utique ii errant, qui discrimen comminiscuntur inter pulsum parvum, humilem, contractum, obscurum, latentem, vacuum, angustum, concisum, profundum, quum nonnisi una species sit, & à parva elevatione arteriae proveniat, & si quidem distinctio facienda, parvus, minor & minimus, rectius diceretur. Eiusdem notae est discrimen, quod nonnulli inter magnum, plenum, amplum & manifestum pulsum, nec non vehementem, impetuosum, robustum, fortem & valentem esse volunt, utpote priores denominationes omnes nonnisi magnam vel majorem arteriae expansionem, & posteriores amplam cum celeritate factam dilatationem, produnt. Illi vero Galenicorum pulsus myurus,

H h 3 formi-

*Ad motus
essentiam
quatuor
tantum
species
pulsus perti-
nent.*

*magnus &
parvus*

*celer &
tardus*

*Et ex his
compositus
vehementia
&
debilitas.*

*Reliqui vel
non ad es-
sentiam
motus perti-
nent,*

*vel fictitiae
sunt.*

*Nec non
qui mul-
tas pul-
suum spe-
cies nume-
rant.*

fornicans, vermicularis, tremulus, caprizans, ferratus, dicrotus, nonnisi species sunt pulsuum magis vel minus inæqualium, qui pro varia mixtione, ordine & successu variant, ita, ut mox parvus, ut mox magnus, post celer & tardus ictus, percipiatur.

§. VII.

Pulsus celer & frequens separatum percipi nequit.

Majoris momenti quæstio est: num pulsus celer & frequens, tardus & rarus, inter se differant? an vero pro uno eodemque haberi possint? Nolo hoc loco repetere, quam acrem contra omnem expectationem mihi celeberrimus vir moverit olim controversiam, quum celerem & frequentem pulsum in praxi medica pro uno pulsu haberi posse scripto assererem. Is enim hanc meam assertionem suæ de febribus doctrinæ directe adversari putans, quod ingens inter pulsum celerem & frequentem intercedat discrimen, propugnare & integro scripto defendere sibi sumfit. Ego vero in *dissertatione de pulsuum natura & usu*, nec non in schediastmate apologetico clarius, & quod sciam primus, detexi: celeritatem quidem & frequentiam in motibus mirum differre, dum illa de intensione & tempore motus, hæc vero de numero motuum prædicatur, qui tamen proprie non spectat ad essentiam motuum. Quandocunque vero sermo est de motibus, ubi semper unus alterum una serie sequitur, ut fit in pulsibus, hæc est quæstio: an non frequentia à celeritate singulorum motuum oriatur? & an non hæc ipsa certus index sit celeritatis singulorum? quod ego quam maxime merito affirmavi. Etenim nulla certe alia suppetit ratio, singulorum ictuum celeritatem, vel tarditatem accurate, ratione temporis dijudicandi ac determinandi, quam ex frequenti & repetita vibratione, ita quidem, ut si e. c. eo temporis spatio, quod vocant minutum, in uno centum pulsus numerentur, & in alio quinquaginta, priores duplo majori celeritate quam posteriores contigisse, demum constet. Quapropter nec pulsus celer, nec frequens, mente, multo minus re ipsa, ullo in morbo ut distinctus demonstrari potest, nisi pulsum, qui fit in arteria dura & constricta, celerem dicere velimus.

§. VIII.

Quod testantur auctores.

Et hanc eandem de imaginaria pulsus celeris & frequentis differentia sententiam, medicorum celeberrimi profitentur. Disertis sane verbis *Sylvius prax. lib. I. cap. 26. celeritas*, ait, *pulsui adscripta, mente quidem concipi potest, non item digitis tangi ac percipi.* Id quod etiam confirmat acutissimus medicus & Mathematicus *Bellinus in tr. de pulsibus p. 75. celer*, inquit, *pulsus, quia digito minimo temporis persistit, in statu à naturali parum recedente, vel non datur, vel tactu distingui non potest, quum naturalis motus extrorsum arteriæ vix punctum temporis duret, multo minus in statu præternaturali id sensibile erit.* Egregie quoque eandem in rem scribit *Schelhammerus de pulsibus pag. 73. pulsum frequentem non citra celeritatem observari.* Et hinc etiam est, quod nunquam in observationibus medicis, pulsus tardus & frequens, celer & rarus, conjuncti deprehendantur. Non sine ratione itaque in consideratione medico-practica celeritas pulsuum pro frequentia, & frequentia pro celeritate, ponitur. Et quia unius ictus celeritas tactu per se non potest dignosci atque percipi, eo quod vix temporis punctum complet, consultius est, numerum ictuum beneficio horologii quod minuta secunda monstrat, metiri atque determi-

Ideoque sane errore unus pro altero ponitur.

nare, quali instrumento insigni cum fructu in artis exercitio usque eo usus sum.

§. IX.

Longe aliter de pulsu duro ac molli sentiendum. Hic enim licet ipsius motus essentiam non tangat, sed tantum talis dicatur respectu ipsius arteriæ, prout nempe ea plus vel minus tensa, renitens, dura, vel flaccida, mollis & relaxata est; nihilo minus tamen multum sane refert nosse, qualis sit constitutio & dispositio instrumenti mobilis & moventis, ratione texturæ strictioris, vel laxioris, adeoque num constrictæ, vel laxæ sint cordis fibræ & arteriarum tunicae, utpote quò major solidorum tensio & constrictio, eo major est nifus, intensio, renifus ac renitentia in motibus, & contra. Hæc vero tensio & durities arteriarum & fibrarum universi corporis nervearum & carnosarum, deprehenditur vel in statu naturali, à conformatione nativa in ætate juvenili, cholericis, item senibus, ubi arteriarum pulsus valde tensus ac durus est, mollior vero textura in sanguineis, phlegmaticis, item in pueris: vel obvia etiam est in statu præternaturali, & nil nisi spasmi quædam species est, quæ quam maxime tangit tunicas arteriarum, ex fibris nerveis & musculosis compositas. Et quoniam sic ipsa dispositio arteriarum, ceu instrumenti motus, plurimum confert ad pulsum mutationem, in proclivi est ratio, quare non semper unus idemque pulsus teste *Ballonio*, in utroque brachio observetur, id quod etiam nos in hemiplexia aliquoties observavimus. Et apprime huc facit luculenta observatio *Raygeri pag. 20. qui scribit: in quamplurimis militibus sauciatis & male curatis, notabilem differentiam inter pulsum sani & læsi lateris observavi.*

Pulsus durus ac molliis dicitur respectu arteriæ.

§. X.

Supereft adhuc in pulsuum classe is, qui maxime omnium memoratu dignus, convulsivus meo quidem iudicio merito dicendus. Hic pariter non à sanguine arteriosum alveum perlabente, sed potius ab ipsa nervoso-musculosa ac membranosa arteriæ substantia proficiscitur, & tractorio ac tremulo subsultorio motu, quasi arteria ad superiora raperetur, sese prodit, atque in febribus acutis mortis præsagium præbet, eaque propter recte dici potest pulsus morientium, cui plerumque inæqualis vel intermittens jungitur. Nam sicut circa mortis confinia in toto systemate nervorum & nervosarum partium confusio & irregularitas motuum cum convulsione percipitur; ita etiam id ipsum contingit in arteriarum tunicis nervosis, & tactu sentitur.

Nec non convulsivus.

§. XI.

Constitutis sic pulsuum differentiis & genuinis speciebus, evolvendæ sunt eorundem causæ, inquirendo maxime, quomodo iidem pro diversitate corporum, atque etiam rerum non naturalium usu, differant. Ad pulsum itaque causas quod attinet, originaliter iidem à cordis motu systaltico & diastaltico deducendi sunt. Hic enim cordis motus maxime omnium dici debet vitalis, & cor primum movens ac ultimum moriens. Scilicet cordis structura ex fibris quamplurimis firmis, tensis, expansilibus & contractilibus, sive elasticis, longe artificiosissime est contexta, & ex harum vi ac potentia, vel dum contractionem, seu motum activum, sortitur, qui à sanguinis aëreo-elastici valde spirituosissimi (qualis fit ex brevissimo illo circulo ex cordis substantia in pul-

Pulsuum causa cordis motus systalticus.

mones,

De rationali pulsuum explicatione & judicio &c. 367

mones, & ex his in hanc, dum portio sanguinis ex pulmonibus subtilioris facti, per substantiam cordis musculosam transit, & mox rursus beneficio arteriæ pulmonalis ad pulmones fertur, tenuior rediturus) per vasa coronaria transeuntis influxu animatur, & potentia ac virtute fluidi subtilissimi quod ex pari octavo & intercostali nervorum affertur, magis augetur.

§. XII.

Deinde quum motus cordis non uno illo contractorio, sed reciproco altero diastaltico absolvatur, posterior quidem respectu cordis, quod patitur dilatationem, dici solet passivus; nihilo minus tamen hic quoque motus dilatatorius, qui fit à contractione arteriarum & impulsu sanguinis in venas, necessarius est ad systolen sive vim elasticam contractoriam. Etenim quia corporum elasticorum ea natura est atque conditio, ut post dilatationem sese rursus contrahant, & post nimiam contractionem iterum amplient ac in pristinum statum restituant: in corde quoque tanquam parte mira elastica virtute instructa, post expansionem ejus contractio de novo suscitatur, ita, ut experimentis constet, quo major & quo crebrior diastole & expansio, eo majorem fieri systolen & consequenter pulsum arteriarum. Confirmatur hoc luculenter ex eo, quod affluente copiosius & velocius sub motu laboriosiori, vel ascensu scalarum; intensiori & longiori sermone; ad cor sanguine, non modo ejus motus intendatur, sed & pulsus major & crebrior micet & corpus plus incalescat; contra vero si debita sanguinis quantitas cordi vel per largiores hæmorrhagias, vulnerationes, aut venarum incisiones subtrahitur, systoles ejus cum pulsu & sanguinis circulo vel valde imminuitur, vel penitus perit ac vita intercidit. Notavimus paucis abhinc diebus ejusmodi exemplum in fœmina, quæ, cur nescio, subito enorme sanguinis experta est profluvium, ut animo primum deficeret, demum tamen refocillaretur. Sed quum è lecto cruore conspurcato levaretur & paullo diutius erecta sederet, subito exanimis concidit atque extincta est, nullam aliam ob causam, quam quod sanguine ob situm perpendicularem cordi detracto, systoles periit & sic totus sanguinis circulus substat, qui forsan prompto revocari potuisset auxilio.

§. XIII.

Sicut itaque æquabilis & moderatus influxus sanguinis in vasa coronaria, & conveniens ejus quantitas in cordis thalamos effusa, motum cordis naturalem; æquabilem & moderatum efficit; ita pariter æqualis & temperata sanguinis in arterias propulsio, & ipsi cordis motui respondens, à moderato sanguinis & fluidi elastici in arteriarum tunicas appulsu dependens arteriarum renisus ac systole, pulsum facit naturalem, vicissim præternaturalem, quando ab hoc temperamento recedit. Et pulsus quidem magnus, sive ampla arteriæ dilatatio, indicat copiosorem sanguinis ad cor affluxum & similem etiam in arterias effusionem. Parvus vicissim parciolem sanguinis in cordis ventriculos confluxum & exiguam ejusdem diastolen, idemque in arteriis contingere notat. Quando porro arteriæ celeriter micant; citatiorem sanguinis ex partibus ad cor succedere refluxum indicio est, si tarde, tardum. Vehemens pulsus adest, ubi celerius ingens sanguinis copia ad cor per venas appellitur; debilis contra, quum pauca quantitas tarde. Inæqualis vero arteriarum pulsatio, sive mox magna, mox parva;

mox celeris; mox debilis, intermittens quoque; fit, quando liber sanguinis transitus per vasa coronaria, vel etiam ventriculos cordis, à quodam obstaculo impeditur, ac vel sanguis grumefactus crassus in vasis coronariis, vel fibrosus aut polyposus concrementum in auriculis vel cavitatibus ventriculorum vel vasorum cordis hæret, vel etiam fit, quando sanguis crassus & copiosus celeriter ad cor truditur & systolen ejus ad tempus opprimit.

§. XIV.

Jam quum pulsus cordis & arteriarum vitalem illum sanguinis circulatorium motum regat ac tueatur; ac is vicissim ab hoc sustentetur; quæstio disquisitione haud certe indigna incidit: quoties una hora universa sanguinis & humorum massa mediante illo perpetuo circulo per cor transeat? In hac autem decidenda, ingens inter medicos est sententiarum divortium, dum non solum in determinanda sanguinis & humorum quantitate in universo corpore, sed etiam ea, quæ uno ictu è corde ejicitur, mirum discrepant; ita quidem, ut omnem humorum in corpore fano; adulto ac robusto apparatus, alii ad XXX, alii ad XXIV, XX, & XVI libras accedere autument; pondus autem cruoris, una systole è corde pulsi, quidam unam unciam, quidam dimidiam, pondere æquare, censeant. Verum mihi certe vehementer errare videntur ii, qui tam exiguam molem & portionem humorum per cor & vasa omnia ferri affirmant, & in eo plerumque decipiuntur, quod tantummodo sanguinis rationem ineunt, quasi ille solus circumagatur; quum tamen longe major sit quantitas lymphæ, feri, chyli & succi alibilis, quos omnes humores innumera vascula & tot canaliculi, è quibus maxima ex parte compages corporis nostri ejusque partium coagmentata est, continent; & qui pariter non subsistunt, sed jugi etiam motu circumaguntur, id quod etiam de succo cerebri, medullæ spinalis ac nervorum dicendum. Deinde illi quoque admodum falluntur, qui quantitatem omnem sanguinis ex ejus per vasa aperta effluxu metiuntur, eo quod, hic tamdiu tantum, quam cordis & arteriarum motus, succedit; hoc autem, post interceptum à subtracto sanguine ad cor affluxum & sublata diastolen, pereunte, subsistit, restitanti adhuc in vasis minoribus & inferioribus magna cruoris copia:

§. XV.

Proinde alia potius via ac methodus excogitanda, qua proportio liquidi ad solidum in corpore humano clare & certius possit detegi: id quod mea quidem sententia commodius perfici nequit, quam si fluidarum æque ac solidarum partium non nihil lance prius libratum calori exponitur, quo humidum aufugiat, & exsiccatum postea rursus ponderatur; videndo, quantum perdidit ponderis, & inde calculum subducendo. Varia hunc in finem institui experimenta, & sæpius quidem cum sanguine è vena missio, ac deprehendi, quatuor ejus uncias, facta exsiccatione, unam ut plurimum unciam solidæ materiæ reliquisse, ut adeo tres sint fluidæ, & una tantum solida in cruore portio. Deinde frustum carnis bubulæ recentis, duodecim unciarum pondere, in clibano non adeo acri & vehementi calore siccati, & aridæ substantiæ uncias quatuor obtinui, reliquis octo uncias, partim sub vaporum forma diffatis, partim cum pinguedine liquefactis & exstillatis. Ossâ quoque, quæ sunt solidissimæ & maxime compactæ partes, decoxi ad

Et diastalticus à sanguine appulso.

Major quam vulgo putatur fœccorum in corpore est quantitas.

Hinc cordis motui respondet pulsus: ac si

magnus vel parvus.

celer vel tardus.

vehemens ac debilis.

vel inæqualis ac intermissus.

Fit major fluidorum quam solidorum.

aliquot horas cum aqua, exempta postea arefeci, & dimidium ponderi eorundem decessisse compertum habui. Licet autem pondus & quantitas tot membranarum, cartilaginum omniumque solidarum partium in corpore humano, exacte determinari nequeat; illud tamen ex hac computatione recte elicitur: fluidam corporis substantiam in genere longe superare solidam.

§. XVI.

Inde eliciendum quoties sanguis circuletur.

Ponamus itaque corporis molem attingere CLX. libras, minimum LXXX. libræ humoris in eo erunt. Ponamus porro, quod etiam ferre semper in sano homine evenit, quod uno in minuto septuaginta pulsus, adeoque in hora, quæ sexaginta minutis absolvitur, quater mille & ducenti pulsus numerentur, & quod ea sit arteriæ magnæ cordi concretæ amplitudo in robusto, isque diameter, ut quovis cordis ictu, unciam unam sanguinis quam cominode recipere possit; calculo subducto, patebit, minimum ter intra horæ, ac septuagies & bis intra XXIV. horarum spatium, humorum microscopiorum pelagus cursum conficere & cor in circulum abeundo perlabi. Et tam crebra liquor corporis per cor & omnia vasa circulatio, eam maxime ob causam necessaria est, quo succus ille, qui ex ingestis esculentis & potulentis extrahitur, ac in mediocriter robusto & non valde agili vitæ genere minimum ad sex libras accedit, cum sanguine intime misceri, ad minima vascula per universam compagem pelli, iterumque per subcutaneos maxime & urinarios tubulos exire possit; quandoquidem observationibus staticis liquido constat, corporis adulti idem semper fere manere pondus, & egesta æqualiter respondere ingestis.

§. XVII.

De causis quæ pulsum mutant.

Ut autem ad pulsus eorumque causalem disquisitionem redeamus, probe tenendum est, pulsum tam quoad celeritatem, quam magnitudinem, non in omnibus omnique tempore unum eundemque observari, sed ratione magnitudinis cordis & vasorum, copię & temperiei sanguinis, nec non virtutis elasticæ canalium, multum differre, & hinc quoque pro ratione sexus, ætatis, temporum anni, aëris, motus, victus, somni, vigiliæ, animi pathematum admodum discrepare. Si sexum spectemus, viri plerumque mulieribus pulsum majorem & citatiorem, foeminæ tardio-rem & debiliorem obtinent, quippe viri, corde majori & ampliori, cui, ut ego in quamplurimis sectionibus observavi, semper vasorum amplitudo respondet, firmioribus quoque fibris & sanguine magis calido turgescere, quam foeminæ instructi sunt, quæ vasa habent exiliora, laxiora & copiosiora. Deinceps in choleris & sanguineo-choleris, arteriæ validius & celerius micant, quam in iis, qui phlegmatici & melancholici sunt temperamenti. Nam choleris sanguis majori copia partium sulphurearum, quæ fons & matrix motus intestini calidi & orgastici sunt, scatet, hinc tenuior, fluxilior magisque coccinei coloris est, citatius cursum conficit & excretionibus promptiores facit. Quoad corporis habitum macilentiores & qui fibras strictiores & ampliora vasa habent præ obesius, qui laxius fibris dotati, vasaque gerunt angusta, majorem & validiorem arteriarum pulsationem experiuntur; unde etiam saniores, robustiores ac ad perferendos labores aptiores sunt illis.

Si quidem sexus.

temperamentum.

corporis habitus.

§. XVIII.

Porro ætas multum ad modificandum arteriarum motum confert. Nimirum infantes insignem succorum copiam ad alimoniam & incrementum necessarios alunt, unde crebriores fiunt diastoles & pulsus, qui tamen ob fibrarum teneritudinem & laxitatem, molliter tangentis manum feriunt. In juvenibus ac viris maximus corporis vigor, sanguis calidus & fibræ strictiores, & hanc ob causam in iisdem pulsus strictior, major & vehementior observatur. Senes vero fibras gerunt rigidiores, & sanguis ob cessantem nutritionem redundans, angustatis nimium minimis canaliculis, in majoribus vasis ipsoque corde majorem dilatationem, adeoque pulsum magnum & quodammodo durum facit, qui tamen ob cruorem, deficientibus particulis calidis sulphureis, crassum ac spissum, tardior est. Labor, motus & exercitatio corporis, & pulsum, & circulum sanguinis, & excretionibus præsertim perspirationem, augent; quies autem & otium & tardio-rem, & debiliorem, sanguinis progressum, adeoque etiam arteriarum motum efficiunt. Eundem cum motu præstat effectum respiratio, per sermonem excitatum, vel ascensum acclivium intensior facta, qua sanguis non solum velocius per pulmones, sed etiam universi corporis canales agitur, ac pulsus magnitudine & celeritate incrementum accipit. A vigilia evidentior arteriarum percussus sentitur, in somno vero tardior & languidior est. Post potum sumtum calidum v.g. infusi Caffee & Thee, vel etiam aquarum thermalium, statim frequentiores vibrant pulsus, nec non post ingestum cibum, adeo ut sæpius experimentum ceperim, & quum ante prandium in minuto arteriæ septuagies, in quibusdam sexagies quinquies pulsarent, post illud ad LXXV. vel LXXX. quin C. pulsus ascenderent. Nihil vero tam subito pulsum cordis & arteriarum mutare valet, quam animi affectus; & à terrore quidem pulsus fit inæqualis, parvus & contractus, à gaudio frequens & magnus, ab ira celer ac durus, à tristitia tardior, minor, profundior ac debilis, & post impensas meditationes, languidus ac debilior, neque dubium est, quin in desideris & affectibus venereis crebrius pariter turbetur.

§. XIX.

Quam eximia præterea aëris circumflui ac tempestatum sit efficacia ad sanguinis per arterias motum earundemque percussum conturbandum, quotidianis experimentis inclarescit. Inprimis experientia compertum habemus, quod simul ac post diu in atmosphæra regnantes zephyros, vel austros, aquilo, vel eurus flare incipit, mox major tensio arteriarum fiat, major quoque vigor & magnitudo in pulsibus, quod etiam observatur, quando argentum vivum in barometro situm suum humilem mutat & ad superiora scandit. Contra ea, si atmosphæra & densa, humida, pluviosa & diuturna austrina ejus constitutio, sub vita præsertim sedentaria, longiori somno, & autumnali tempore, languescit pulsus & minor redditur, simul quoque sanguinis circuitus cum excretionibus, inprimis perspiratione impeditius succedit. Ex eodem fonte derivandum, quod pulsus in arteriis pro anni temporibus mirum variet. Videlicet vere medio, ut Maio mense, maximus vigor corpori inest, & pulsus magnus, interdum vehemens percipitur. Æstate media arteriæ celeriter, sed debiliter,

Ætas.

Labor.

quies.

Sermo intensus.

Vigilia.

Potus calidus.

cibus.

animi affectus.

Ætas.

Anni tempora.

De rationali pulsum explicatione & judicio &c. 369

biliter, percutiuntur, quoniam ob æstum major intestinus & calidus partium sulphurearum fit motus, spirituosæ autem elasticæ exhalant. Autumno pulsus tardi, molles & debiles percipiuntur; & hieme duriores ac majores micant.

§. XX.

Medicamenta purgantia & emetica. Accedunt medicamenta, quibus identidem peculiaris vis atque virtus inest, motum cordis & arteriarum pulsum variis modis immutandi. Etenim quotidianæ observationis est, à drastico sumto purgante, quod spasmodis ventrem exercet & plures dejectiones movet, pulsum duriores, citiores & debiliores, cum virium languore reddi; qualis effectus etiam ab assumpto fortiori emetico sequitur. *medicamenta martialia.* Medicamenta ex marte parata id servant singulare, quod sulphure suo metallico egregie fibrarum & canalium elaterem firment atque intendunt; unde post eorum usum pulsus major & robustior percipitur, color faciei vividior conspicitur & calor corporis adaugetur; quæ si observantur phænomena, indicium sunt boni à medicamento dato effectus, ad expediendas maxime obstructions in corpore cachectico. Quumque Lauchstädienses medicati fontes eximiam martialis elementi copiam in sinu foveant, exquisita utique ratione nititur, quod sæpius expertus sum, ab eorum potu pulsum languidum antea & minorem, in sexu potissimum sequiori, majorem & frequentiores reddi ac intendi. Idem quoque ab usu corticis Chinæ in intermittentibus adverti: quippe die vacuo, quo arteriarum percussus solet esse valde tardus, parvus & debilis, hoc propinato, vegetius & robustius micare cœperunt, indicio, auspiciatam hujus remedii cæteris paribus esse operationem.

§. XXI.

Volatilia. Pharmaca, quæ sale volatili, acri & oleoso turgent, ut essentia & spiritus bezoardici, alexipharmaci, ordinario amplificant & exaugent pulsum atque cordis & arteriarum diastolen, ob principium sulphureum volatile, expansivum orgasticum; & quia sanguinis circuitus inde promovetur, non modo perspiratio, sed & debito adhibito regimine, sudor largior subsequitur. In enormi virium defectu & imminente animi deliquio, arteriarum motus languidus, tardus & parvus, vix interdum perceptibilis observatur, adhibitis autem interius & exterius balsamicis & spirituosis aromaticis, mox immutatur & augeatur, qualem effectum etiam vinum generosum præstat. *Acida & nitrosa.* Acida vicissim & nitrosa, peculiari ratione sulphur sanguinis, à quo intestinus ejus calidus motus dependet, figendo & refrenando, corpus refrigerant & simul semper reddunt arteriarum motum pacatiorem; quare etiam eorum usus, ubi pulsus ratione magnitudinis & celeritatis nimium est adauctus, ut in æstu febrili, præsentissimæ est efficaciam.

§. XXII.

oporifera & narcotica. Quæ sulphure quodam vaporoso, naturæ adverso, ut sunt, quæ somnum inducunt, ex opio potissimum parata pharmaca, multo magis quæ narcosin & stuporem conciliant, quo nomine hyoscyamus maxime & ex eo concinnata celebrantur, imbuta sunt, pulsus percussus valde parvus & debilem efficiunt ac vires prosternunt. Et mirandum certe est, quam subito hæc ipsa medicamenta, exigua etiam dosi oblata, vires dejiciant, elaterem solidorum & potentiam motricem minuunt, nullam aliam ob causam, quam

quod principio suo subtili, sulphureo, valde expansivo, intima nervorum penetrent, & liquidum quod vehunt purissimum, magnæ ad movendum efficaciam, adverso suo vapore contaminent; eodem modo ac versa vice, quæ amico, fragranti sulphure scatent, motum cum viribus erigunt atque adaugent. Pariter experientia constat, ab assumtis aliis venenis corrosivis; quorum notissimum arsenicum, pulsum minorem, contractum, durum atque frequentem fieri, qui ante mortem aliquot horis deficere solet, ut percipi plane nequeat.

§. XXIII.

Si ob nimiam sanguinis redundantiam & ampliore alveorum diastolen, cordis systoles non sufficienter respondet, & pulsus ea propter minor fit ac deprimitur; factò per sufficientem sanguinis missionem spatio, arteriæ vegetius & celerius saliant, ipseque sanguinis progressus promptior fit atque liberior. Et quia mensium vel hæmorrhoidum fluxus sæpe ob nimiam plethoram supprimitur, evenit, ut post sectam venam, ob celeriore sanguinis cursum, brevi tempore post insigni valetudinis cum emolumento restituatur. A balneis tam siccis & vaporosis, quam humidis, pulsum vehementer augeri certissimum est, adeo, ut si paulo calidius adhibeantur, febrilis evadat, quem universi corporis æstus, cordis palpitatio & capitis dolor sequitur. Etenim in ejusmodi balneis à calore externo humido major sanguinis humorum proritur expansio, quæ, si nimius balnei æstus est, tantopere augeri potest, ut systolen cordis nimia resistentia suspendat, & lipothymia balneantibus, ut crebrioris observationis est, accidant. Quin pediluvia tantum, circa lecti introitum recte usurpata, & sanguinis & arteriarum motum intendere, multiplici constat experientia.

§. XXIV.

Hæc itaque omnia uberius hætenus excussa, *Magna itaque rerum corporearum vis.* evidentissime confirmant: magnam ac præsentaneam rebus externis corporeis, quibus ad vitam tuendam quotidie utimur, inesse facultatem, cordis motum & arteriarum pulsum, adeoque universam actionum vitalium, naturalium & animalium œconomiam, in melius, vel deterius mutandi. Quibus certe effectibus, quasi totidem argumentis, apertissime erroris convincuntur, qui physicis hisce rebus omnem omnino in corpus agendi illudque movendi potentiam denegant, & principio cuidam rationaliter & moraliter agenti, motuum causam & directionem modo plane non intelligibili tribuunt. Quumque adeo *Ad pulsum mutandum.* pulsus multis variisque causis mutari possit, periti omnino medici est, ut easdem curate expendat omnes, ne in promendo ex iis judicio fallat ac fallatur. Nam pulsus quidem certum signum & index motus cordis & circuli sanguinis est, sed si solus is spectetur, & non aliarum simul circumstantiarum, vel causarum externarum, ratio habeatur, in judicando admodum decipere potest. Exemplo sit pulsus intermittens. Hic plerumque pro periculi pleno, quin lethali, habetur quidem; experientiæ tamen fide constat, eundem sæpe in sanis, frequentius in hysteris, nec non colica, sine exitio, observari. *Hinc cautum judicium.* Riverius Cent. III. obs. 3. intermittentem pulsum notavit à lumbrico, quo excreto, arteriarum motus ad naturalem statum rediit. Idem auctor cent. II. obs. 77. pulsum diu & sæpe, ob polypum, superflite longius vita, intermittentem, se tetigisse, testis est.

Et

Et Kerkringius in *spicileg. obs.* 78. systolen cordis interceptam adeoque pulsum sufflaminatum, sine funesto eventu, se vidisse confirmat. Flatus quoque pulsum suspendere, *Pechlinus lib. II. obs.* 8. confirmat exemplo cujusdam, cui flatuum exurgentium copia mirifice cor constringebat & interturbabatur pulsus, statim vero ac copiosi ructus exirent, liberabatur. Et *lib. cit. obs.* 7. pag. 214. disertis verbis testatur: se pulsum subinde intermittentem in scorbuticis, in foeminis junioribus male menstruatis, sine ullo majori incommodo, spectasse.

§. XXV.

Testimo-
nia.

Quare egregium Fernelii est monitum, quod *lib. III. de puls.* pag. 160. inculcat: quotidiana, inquiens, corporis affectiones pulsus immutant, sine quarum animadversione, non certo potest pulsus percipi, nec quantum per morbos à naturali distet. Eandem quoque in rem quam maxime memorabilis Celsi locus *lib. III. cap. 6.* & dignus, qui totus transcribatur, dum ait: *venis maxime credimus fallacissimæ rei, quia sæpe istæ lentiores celerioresque sunt, & ætate, & sexu, & corporum natura. Et plerumque satis sano corpore, si stomachus infirmus est, nonnunquam etiam incipiente febre, subeunt & quiescunt: ut imbecillus is videri possit, cui facile laturo gravis instat accessio. Contra sæpe eas concitat & resolvit sol, & balneum, & metus, & ira, & quilibet alius animi affectus, adeo ut, cum primum medicus venit, sollicitudo ægri dubitantis, quomodo ille se habere videatur, eas moveat. Ob quam causam periti medici est, non protinus ut venit, apprehendere manu brachium: sed primum residere hilari vultu, percunctarique, quemadmodum se habeat; & si quis ejus metus est, eum probabilis sermone lenire; tum deinde ejus carpo manum admove-
re. Quas venas autem conspectus medici movet, quam facile mille res turbant!*

§. XXVI.

De pulsus
mutatione
in morbis.Et quidem
febris.quorum
signum
frequentia.

Atque hæ sunt causæ, quæ arteriarum motum variare & multis modis in statu naturali mutare possunt: proximum nunc est, ut quomodo quibusque rationibus, pulsus præter naturam in variis morbis immutationem subeat, exponamus; quo medicus ex hac pulsuum dignotione, ad cognitionem causarum internarum & effectuum eo melius pervenire, & sic ex iisdem, & morborum, & causarum morbificarum, signa atque indicia cum certa ratione petere possit. Quum vero ex omni morborum classe præcipuus, immo quasi universalis sit febrilis, qui nulli ætati, sexui & temperamento parit, plurimis morbis sese complicat, multos etiam interimit ipsique medicis plurimum negotii in curando & præservando faceffit; maxime omnium è re fore arbitror, ut paullo accuratius dispiciamus: an certo pulsu, & quonam, febris, cujusunque sit generis, certo dignosci possit? sive quinam pulsus signum pathognomonicum febris præbeat? Jam quidem non levem hac de re inter medicos tam veteres, quam recentiores, vigere dissensum, videmus, dum alii pulsum celerem, alii frequentem, alii cum Galeno pulsum celerem & frequentem simul, pro pulsu febrili, sive febris genuino signo, venditant. Ego vero jam supra clarius ostendi, controversiam hanc nullius fere esse momenti & facile hac ratione dirimendam, si ex vero ponamus: frequentiam proprie non esse de natura nec motuum, nec pulsuum, celeritatem autem singulorum pulsuum non posse judicari

& exquisitè determinari, quam per ictuum numerum frequentior, sive sæpius repetentem. Hinc quando quæstio est de pulsu febrili, celer quidem proprie is est, qui febribus jungitur eademque indicat; quia tamen frequentia à crebrius repetita vibratione magis in sensus incurrit, & celeritatem comprehendit, rectius utique ii medicorum sentiunt, qui pulsum frequentem pathognomonicum febris signum esse asserunt.

§. XXVII.

Et sane quamplurimi ex recentioribus quoque non infimi subsellii medici, hoc assertum calculo suo comprobant. Audiamus *Sylvium*, qui in *praxi lib. II. pag.* 460. ita differit: *hoc unicum febri omni soli & semper competens signum est, adeoque pathognomonicum, pulsus scilicet præter naturam frequentior, quo præsentem, febrem adesse, absente autem, abesse, certo pronunciari queat. Nec enim aliud signum quod competat omni febri innotuit Practicis, reliqua enim signa omnia, non tam febrem, quam febris speciem, gradus & tempus indicant aut demonstrant.* *Sylvio* assurgit diligentissimus observator *Ettmüllerus*, in *tomo pract. p. m.* 248. pulsus, inquiens, naturaliter frequentior recte statuitur signum pathognomonicum febrium à *Sylvio*, tam in dissertatione de natura febrium, quam in praxi, quicquid in contrarium scribat *Deusingius*, *Tract. disquisitione Anti-Sylviana.* Idem confirmat clarus *Belgarum Practicus Deckerus*, in *notis ad Barbette p.* 102. ubique, scribens, pulsus præter naturam frequentior observatur, ibi febris est. Et *Schelhammerus* in *tr. de puls.* p. 27. frequentem in omni febrium genere nunquam non sese offerre scribit, & cum calore earum esse signum pathognomonicum.

§. XXVIII.

Monendum vero est, quod licet in omni febre pulsuum præsto sit frequentia, minime tamen ex eo concludere liceat, ubi pulsus frequens, ibi febris. Nam superius jam in causarum evolutione ostensum est, in pueris & cholericæ temperaturæ viris esse, & à motu fortiori corporis in balneo, assumpto sudorifero, ab animi pathematibus, post epilepsiam & vinum potum, naturalem arteriarum motum fieri frequentior; quum tamen febris absit. Quapropter hæc cautio à medico, ne decipiat, adhibenda est, ut prius studiose exploret: an forsitan à causa externa hæc pulsuum frequentia fuerit orta; ac deinceps ut inquiret: num etiam alia febris essentialia signa, ut horror & refrigeratio extremorum, adsint. Porro etiam probe notandum id, quod à paucis notatum, quod scilicet in febribus omnibus frequens non modo sit pulsus, sed & simul ob tensionem arteriæ, plus renitens & naturali durior. Nam certe paucissimæ sunt febres, in quibus pulsus non solito durior observatur, exceptis modo quibusdam vere malignis febribus sudoriferis, è quarum numero maxime sudor sic dictus Anglicus & colliquativus, quæ potius undoso pulsu ac summa virium dejectione indicantur. Febris quippe, secundum nostram rationalem demonstrativam explicationem, est affectio systematis nervosi & vasculosi, universali spasmo quodammodo constricti, qui non modo nervosæ & musculosæ fibras, sed & ipsa arteriosa vasa eorumque tunicas, quæ ex fibris nervosis & musculosis conflata sunt, afficit. Et ab hac tensione & constrictione partium, quæ sic proprie de essentia febris est, dependet non modo tensio & durities, sed & frequentia pulsuum aliaque

Quod se-
stantur
auctores.In febrili-
bus quoque
adeo pul-
sus durior.

que symptomata febris juncta; quandoquidem spastica hac fibrarum strictura, dum vasa capillaria nimium angustat, angustia celeritate compensatur, & sanguis citatori mutuo attritu incallescit; à priori frequentia, à posteriori, corporis æstus.

§. XXIX.

Ut autem paullo specialius innotescat, quomodo in variis febrium generibus pulsus sit comparatus, primo tenendum est loco: eundem quoad tempora decursus morbi febrilis, eximie differre. Nimirum in principio continuæ, vel paroxysmo intermittentis, plerumque tensus esse solet, parvus & frequens, deinde augescit & paullo major fit, tum in statu, sive vigore æstus, in magnitudine adhuc crescit & vehementius ferit, & tandem circa declinationem, & tensio, & celeritas remittit, simulque secretiones & excretiones in cute, perspiratio nempe & sudor succedere incipiunt. Malum contra indicium est, si in febribus continuis, circa dies criticos, septimum scilicet, nonum & undecimum, cum horrore & refrigerio extremorum, pulsus sit parvus & celer, vel etiam celer & vehemens, cum urina aquosa & tenui, eo quod spasmos in extremis augeri & sanguinem impetuosè ad caput agi, ob fractum robur ibi exitialem phrenitidem induciturum, nunciat. Pessimi autem præ sagii est parvus, frequens & debilis, quippe qui, virium summam prostrationem & internam inflammationem in sphacelum concedere subindicat, cui si complicatur inæqualis & intermittens, mortis periculum prodit.

§. XXX.

Deinceps in principio quartanæ pulsus parvus, durus, frequens & inæqualis esse suevit, & in statu tertianæ, item ardentis, vehemens. In febre synocha magnus quoque & celer articularum percussus, qualis maxime venæ sectionem indicare solet. Ante eruptionem exanthematum in variolis & morbillis, arteriæ quoque frequenter pulsant, post eruptionem autem & tensio & frequentia exspirat, tempore vero suppurationis rursus pulsus frequens fit sub febre sic dicta secundaria, & sub declinatione iterum successive redit ad statum naturalem. In malignis & petechialibus frequens quidem, parvus & debilis, sed contractus micat pulsus, cum magna virium prostratione, qui, si in mollem & undosum transiit, cum multo sudore & urina sanorum simili, non remittentibus symptomatibus, mortem præ sagit. In febribus inflammatoriis, & ubi dolores juncti sunt, ut peripneumonia, ordinario durus & frequens, quandoque etiam magnus percipitur. Et catarrhales denique febres ipsasque lentas, pulsus vesperti ingravescentis & celerius succedens stipat & indicat.

§. XXXI.

Ad reliquos porro morbos quod attinet & ad pulsus in iis habitudinem, in his quidem qui caput obsident, ut mania, phrenitide, melancholia, multum quoque variare solet, & modo celer, modo tardior, modo languidus, modo robustus, nonnunquam inæqualis, tangitur, plerumque vero in his morbis intra caput fortiter arteriæ pulsare solent, à sanguine copiosius ibi congesto, cum dolore tractorio & lancinatorio, luculento indicio, multum ad cordis & articularum ipsiusque sanguinis motum turbandum conferre cerebri membranarum & nervorum constitutionem.

In aliis, ut epilepsia, apoplexia & hemiplexia, præsertim, si major sanguinis copia præsto fuerit, durus plerumque & frequens, quandoque etiam magnus, deprehenditur. Vicissim ubi resolutum genus nervosum viresque prostratæ, in lethargo, sopore & dispositione ad syncopen, mollis, rarus & languidus tangitur, qui, si demum adeo gracilescit, ut vix percipi queat, corpus interea frigido sudore perfunditur, lethalem ingruere catastrophem per ipsam constat experientiam. Quando pectus & partes in eo contentæ vitales pariuntur, pulsus ut plurimum frequens, languidus & inæqualis esse solet; qualis potissimum deprehenditur in cordis palpitatione, nec non in asthma convulsivo, ubi tamen plerumque intermittens jungitur, præsertim si uterque morbus à polypo concreto, intra cor vel ejus vasa, fovetur.

§. XXXII.

Quod si porro sanguis redundans exitum moliri incipit v. c. per menses aut hæmorrhoides, creber, parvus & quodammodo durus articularum est motus, ob spasmos, quibus sanguis ad locum excretorium congeritur; quum vero perrumpit, increbescit & in magnitudine augetur. Affectus spasmodici, hypochondriaca & hysterica pathemata, dolores coli & calculi, nec non qui caput aliasque externas quoque partes infestant, sub pulsu crebriori ac duro, affligunt, qui, si mollescit & amplior fit, spasmos in systemate nervosarum partium conquiescere & sanguinis motum ad naturalem ordinem redire portendit. In dysenterico alvi fluxu ut plurimum articularum pulsatio frequens & parva; ubi vero febris complicatur, frequentia magnitudo jungitur. Lues denique venerica, scorbutus, cachexia & hydrops, pulsu languente ac debili stipantur.

§. XXXIII.

Atque hæc sunt, quæ de pulsibus & iudicio recte ex iisdem formando, in amplissimum usum breviter dicta sunt. Interim tamen, quia hæc doctrina ita comparata est, ut apprimè in eandem quadrèt, quod Celsus de medicina generatim edixit, plura esse, quæ nec dici possint, nec scribi; monendi utique sunt artem exercitaturi, ut experientia duce eandem mature addiscere laborent, & exquisito studio in cognoscendis ac dijudicandis pulsibus versentur. Mirandum autem certe est, nostros medicinæ practicos ad ægrorum lectos accedentes pro more tantum pulsum contrectare, tam levi brachio, ut vix duos ictus expectent, quum tamen sæpenumero post decem demum vibrationes, inæqualitas vel intermissio percipitur, maxime, quando sanguis inæqualiter mixtis partibus refertus cordis penetralia pertransit. Neque etiam sufficit, pulsum in uno tantum carpo tangere, sed in utroque id faciendum, quin in collo quoque & temporibus; eo quod experientia testatur, discrepare sæpius pulsum in manuum carpis, & in uno loco commodius quam in altero explorari. Quumque non minus multum interfit, ut pulsum numerus atque celeritas exactè distinguatur ac determinetur; apprimè ex usu esse poterit ad normam horologio, quod minuta secunda indicat, singulos ictus accurate numerare ac definire.

CAPUT XIII.

De judicio ex sanguinis inspectione & examine recte eliciendo.

§. I.

*In medicina
judicio
opus.*

*maxime in
semioticis.*

Vix ulla datur disciplina, quæ tanto judicio opus habet, ac ipsa medica, ita prorsus, ut omne medici officium in recto & sano judicio consistere videatur. Nam ad corporis ægrotantis naturam pernoscendam, ad morbi genium, causas ejus, progressum, successum & eventum indagandum, ad congrua quoque remedia inveniendâ, eaque certo ordine & tempore applicanda, itemque si ad valetudinem tuendam, & morbosas varii generis, pro differenti corporum natura arcendas afflictiones, consilium, quæ salubria, vel insalubria sint, promendum, exquisito semper maxime opus est judicio. Hinc certe quo magis medicus perspicaci judicio excellit, eo præstantior merito habendus est. In nulla tamen medicinæ parte, si famam & existimationem suam tueri velit artifex, tam caute & circumspecte se gerere debet, & attentiori omnium circumstantiarum pensitatione ac perita deliberatione sua perficere, quam in ea, quæ semiotica dicitur, & in dignoscendis morbis eorumque successu atque eventu prædicendo occupatur.

§. II.

*Prognosis
optime ex
sanguinis
circulo de-
sumitur.*

Quemadmodum vero omnes prænotiones & prædictiones certis quibusdam signis atque indicis nituntur; ita prognosis pariter medica nec hisce est destituta. Certissima tamen ac optima ad rectam ac fidam prognosin formandam ratio est, qua medicus ex eo fundamento, quo vita & integritas omnium actionum continetur, tanquam optimo criterio, judicandi rationes petit atque elicit. Jam vero omnium consensione, progressus ille & vitalis sanguinis & humorum, beneficio motus solidorum succedens circulus, uti universæ medicinæ, ita etiam Semiotices, principium est atque fundamentum. Ex quo quidem liquido primum patescit, pulsuum exactiorem doctrinam & rationalem explicationem, quam antecedenti capite persequuti sumus, medico scitu maximopere esse necessariam.

§. III.

*Per pul-
sum & in-
spectionem
sanguinis.*

Quumque adeo sanguis princeps ille humor sit, à quo vita, seu conservatio corporis nostri vitalis & omnium functionum integritas, item secundum Hippocratem prudentia ipsius mentis, dependet, & sine quo anima nihil efficere potest: post pulsuum, sive sanguinis per cor & arterias motus disquisitionem, in quæstionem merito cadit: annon ex ipso sanguine ejusque examine & inspectione, de integro vel morboso corporis statu indicia promi, & remedia quoque, quæ utilia, vel noxia, desumi queant? Vulgus quidem ea in opinione versatur, & à medico æque ac Chirurgo quam maxime urget, ut ex sanguine è vena misso, de statu sanitatis vel morbi, judicium proferat. Neque desunt medici, qui multa & mira ex inspecto sanguine hariolantur, quo morbo nempe æger laboret, quæ causa morbi sit, & quibus remediis ad sanguinem emendandum utendum. At vero utut non penitus hanc doctrinam repudiare aut rejicere velimus; multis

*quo tamen
fallax.*

tamen eam difficultatibus laborare & admodum infidam esse, non sine ratione profiteamur.

§. IV.

Videlicet nondum res inter medicos confecta est, quinam optimus habendus sit sanguis, dum alii tenuem, fluidum & rubicundum, alii talem qui mox post emissionem in gelatinam rubram concrevit, quidam, qui coagulum crassum in fundum deponit, & fluidam in superficie mediocrem feri quantitatem monstrat, pro optimo agnoscunt. Quisquis vero optimus sit, illud tamen certum, vitalem hunc purpureum liquorem ratione ætatis, ratione victus & vitæ generis, ratione regionum & anni temporum, etiam in sanitatis statu magnopere variare, adeoque universali normæ penitus non esse locum. Deinceps corpora quæ integro & gelatinoso nitide rubicundo gaudent sanguine, ut sunt sanguineæ complexionis hominibus, multis & gravibus sæpe morbis attemptari, non facile quispiam peritus medicus negabit, multo minus ii, qui sanguinis abundantiam pro frequentissima morborum causa æstimant, dubitabunt.

§. V.

Tum etiam hoc per experientiam curiosiorem obscurum esse nequit, sub sanguine, qui aspectu pravus videtur, nihil tamen incommodi percipi; & vicissim optimum quoad sensum sanguinem, ex ægro & graviter decumbente corpore extrahi. Notatu hanc in rem digna sunt quæ prodidit *Bal- lonius obs. II. Ephemerid. pag. 91.* dum ait: *plurimis impurus sanguis detractus, quibus mortuis & sectis, partes integræ deprehensæ; aliis purus, quibus viscera & pulmones putres sunt inventi, & formosissimis mulieribus semper fere impurus detrahitur.* Idem testatur *Mauritius Hoffmannus in instit. diss. VII. impurus*, inquit, *sanguis, sæpe præ puro vitam diutius promoveret, & in quibusdam corporibus optimus ad sensum pessimus est.* Ego quoque sæpius observavi, in scorbuticis, hecticis, sanguinem eleganter rubicundum ac fluidum emitti, in sanis vero & robustis corporibus, densum, glutinosum, nigrum & facile coagulabilem. Inprimis Westphali, qui duriori & falso victu cum pane grossiori utuntur, citra incommodum quoddam, multo minus morbum, sanguinem valde densum alunt, & qui crebrius, si refrigescit, in superficie serum instar glutinis concrevens & variegatum exhibet. In apoplecticis pariter, paralyticis, item morbis spasmodicis, convulsivis, sæpe optimum ratione coloris & consistentiæ deprehendi sanguinem. Quin vidi, ax arteriolis in virulento carcinomate disruptis, sanguinem fluidum & nitide rubicundum stillasse, qui exterius nihil plane vitii habuit.

§. VI.

Fallax itaq; atq; infidum omne ejudicium, quod ex sola sanguinis inspectione arcessitur; unde etiam procul dubio factum, quod antiquissimi artis nostræ antistites, *Hippocrates & Galenus*, qui omnes sanguinem ceu vitæ thesaurum agnoverunt, de judicio in morbis ex ejus aspectu ferendo parum admodum prodiderint. Sane sanguis, etiam si vitiosus, quamdiu promte & expedite per corporis meatus movetur, non facile lædit; & optimus contra, si vel stagnat, vel firmiter impactus hæret, aut extra vasa effunditur, non modo morbi, sed & ipsius interitus causa fit. Nam qui morborum & symptomatum genealogiam probe callet, is facile perspiciet, eorum originem, non tam

*Quia san-
guinis be-
nitas ne-
cessaria
evicta
in omni
una.*

*Sanguis
aspectu
pa malus
in sanis
vice versa*

*Et tum de-
mum no-
cet.*

De iudicio ex sanguinis inspectione & examine &c. 373

tam à crassi viciata fluidorum , quam potius à vitio solidorum , vitio loci maxime & motus , esse arcessendam. Optimæ certe notæ sanguinis portio, quando vasis elabitur, putrescit & funesta excitat symptomata, in cerebro apoplexiam, febrem, convulsionem epilepticam & lege consensionis vomitum in ventriculo; intra cavitatem thoracis, vel abdominis paullo majori quantitate effusus, in foedam & lethalem abit putredinem. Si vasis adhuc contentus cruor membranis cerebri firmitus impactus hæret, phrenitidem, in tunicis ventriculi & intestinorum funestam inflammationem, in sphacelum abeuntem, ciet. In cordis thalamis & vasis majoribus ubi congruatus hæret, syncopen vel subitam mortem producit. In substantia musculorum quum firmam concipit statim & in motu progressivo sistitur, in sphacelum, sive mortiferam concedit putrilaginem.

§. VII.

Neque ullum amplius præterire poterit, viscerum à sanguine vel sero infarctum, obstructionem & indurationem, gravissimas chronicas passiones, cachexiam, hydropem, hæticam ingignere, in quibus sæpe sanguis è vena missus vitio carere videtur. Et sicuti venenum datum exigua mole, sanum & qui integrum sanguinem habet cito necare valet; ita etiam miasma in peste & aliis contagiosis morbis, vel materia in podagra, arthritide, & scabie retropulsa, sævis spasmodicis, citra vitium in sanguine, homines perimit. Quin, licet pluribus nostro tempore solenne sit, in affectibus chronicis spasmodicis, qui in viris mali hypochondriaci, in sequiori sexu hysterici nomine veniunt, sanguinis spissitudinem ceu causam accusare; nihilo minus tamen sanguinem hoc morbo affectis è vena consistentia & calore bonum ac laudabilem detrahi, crebriori experientia convincimur. Nam spasmi tam universales, uti sunt febriles, quam certarum partium, gravissimorum symptomatum auctores quidem sunt; rarius tamen à denso & crasso sanguine, sed potius ab ejus copia, nimia expansione, vel etiam subtili in eo latente acrimonia, exsuscitantur.

§. VIII.

Quamvis autem ex sanguinis aspectu præsagium admodum fallax, & plurimi morbi ex eodem plane non deduci queant: ejus tamen inspectio & paullo curatius examen non plane usu caret, qui vero plus ad præscindendos, quam ad sanandos morbos, pertinet. Placuit mihi quam maxime hanc in rem insignis locus *Celsi lib. II. cap. 10.* ita differentis: *è vena sanguis cum erumpit, colorem ejus habitumque oportet attendere. Nam si is crassus & niger est, vitiosus est, ideoque utiliter effunditur. Si rubet & pellucet, integer est, eaque missio sanguinis adeo non prodest, ut ea noceat, protinusque est supprimendus.* Gravis hic auctor sanguinem tenuem & rubentem, integrum, crassum vero & nigrum, vitiosum pronunciat; quod licet non sit perpetuum, magni tamen hoc monitum in administranda venæ sectione usus est. Nam quum ejusmodi crassus, niger & mox in coagulum abiens sanguis, ægre admodum per minima & capillaria partium vascula cursum absolvat; facile ibi hæret, & obstructiones, quæ foecundæ chronicarum passionum matres sunt, excitat. Vel si quando ejusmodi sanguis, fortiori corporis aut animi commotione, aut intenso frigore, aut etiam propter dolorifi-

Frid. Hoffmanni Oper. Tom. I.

cas & spasmodicas internarum partium contractiones, vi & imperu quodam in vascula, quæ secundum naturam non sanguinem, sed tenuiorem lymphaticum humorem vehunt, truditur, ibi quam facile firmitus impactus hæret, & graves ac funestas inflammationes conciliat. Id quod etiam quotidiana fere docet experientia, dum in pleuritide vera, peripneumonia, semper fere sanguis, cui serum instar glutinis tenax innatat, è vena emittitur. Igitur quam maxime salutare est, talem sanguinem ubi offenditur, ad pessima mala avertenda detrahere, quo reliquus deinde cruor eo melius subigi, circulari & congruis eum in finem adhibitis alcalinis, volatilibus, diluentibus, aqueis, aquis salubribus attenuari & subtilisari possit.

§. IX.

Sanguis vero nimis tenuis, floridus, coccinei coloris, non semper boni quippiam præsagium, præsertim si sero sit destitutus & in fundo nullum obscuri coloris coagulum ponat. Nam talis color vel à salibus largiter admixtis alcalinis, in arthriticis & scorbuticis, gignitur, vel nimium intestinum calidum motum arguit, ut in lentis & hæticis febribus, vel etiam partium sulphurearum exuberantem copiam, à liberaliori vini & aromatum usu, præsertim in cholericæ constitutionis hominibus, subindicat. Nonnunquam tam tenuis ac floridus sanguis observatur, quando viscera, inprimis sanguinea, crassiore cruore infarcta sunt, quandoque etiam à spasmodicis convulsivis partium internarum motionibus, qualem nos sæpius in ejusmodi spasticis & convulsivis motibus vidimus. Hac igitur consistentia & colore præditus sanguis, pro diversitate causarum quibus ortum debet, magis vitiosam qualitatem corrigentia, ut gelatinosa, mucilaginoso, nutrientia, acrimoniam tenuem salino-sulphuream contemperantia, vel etiam acidula, calorem exstinguentia & sedativa, quam evacuationem & imminutionem desiderat. Digna est quæ hic inferatur *Paullini* observatio in *M. N. C. Dec. II. An. VI. obs. 64.* de juvene febre maligna correpto, cui sanguis è vena missus, valde roseus elegantissimi coloris, sed sero maxime destitutus, subsequente morte. Et nos sæpius annotavimus, motus & insultus epilepticos aliosque spasmodicos morbos, evacuato tali sanguine fuisse exacerbatos. Unde utique *Celsi* præceptum, quod raro, præsertim copiose, ejusmodi sanguis mittendus sit, exquisita nititur veritate.

§. X.

Porro vitiosus merito is censendus est sanguis, qui sero nimium redundat & exiguam massæ rubicundæ portionem in complexu fovet, eo quod læsam sanguificationem & parciolem perspirationem, imminutum quoque urinæ fluxum prodit, ac utique cachexiam & tumores œdematosos hydropicos minatur. Quando serum intenso flavo colore tinctum est, ut linteamina inficiat, biliosa recrementa, aut minus à sanguinis connubio segregari, aut propter obstructos biliarios ductus à lymphaticis vasis reserberi, indicio est. In scorbuto, scabie, cachexia & mensium suppressione, serum plerumque variegatum, lividum atque cæruleum colorem monstrat, plus minus turbidum vel albicans, vel tunica spissa, lactea candescente obductum est, & in ipso coagulo subsidente grumi & color niger cum bruno intermixto comparent. Si in lue venerea & scorbuto consummato sanguis emittitur,

li serum

Sanguis floridus nimis vitiosus.

Quid indicet sero- sus nimis

Sero flavo

livido

limosa imbutus.

quando ex- trava- sur.

aut subsi- stit.

Multis- que morbis sine vitio san- guinis ac- cidunt.

Utilis ta- men san- guinis as- pectus & exploratio.

ac non con-
crefcens.

serum ut plurimum supernatat copiosum, limosum ac turbidum. In febribus ardentibus parum feri dimittit, ac ut sæpe spectavi, color est coccineus cum magna spuma. In variolis, morbillis, item acutis & continuis febribus, sanguis fluidissimus compareret, plane non in coagulum concrefcens; eo quod vehementi illa intestina calida motione omnis gelatinosa substantia absumitur & salinum principium quasi in alcali convertitur, quod omne coagulum arcet. Confirmat hoc *Wepferus in histor. apoplect. XVI. in schol.* fidem faciens, se sanguinem in cordis ventriculis & vasis majoribus fluidum, nec post obitum grumescentem, in cadaveribus febre continua defunctorum reperisse.

§. XI.

De sanguinis
examine
per ponderationem.

Et hæc sunt potiora quæ ex sanguinis aspectu probabili conjectura prælagire licet; quæ tamen ita sunt comparata, ut neutiquam universalia sint, sed pro circumstantiarum & individuorum ratione discrepent. Jam etiam de diversis modis sanguinem humanum examinandi nonnulla adjicienda. Sunt hi varii, & primo quidem is, quo ejus gravitas specifica respectu aquæ simplicis exploratur. Perficitur hoc instrumento statico, quo ego etiam urinam, lac, falsos & medicatos fontes, ponderare soleo. Tum quidem immissa, sanguini oblongo vitro excepto, lance, patet, ejus libram, tantundem aquæ pluvialis, unius & dimidiæ tantum unciae pondere, specifica superare gravitate. Alter sanguinem examini subjiciendi modus est, quo proportio solidi & fluidi indagatur; quando nimirum calori exponitur, quo siccescat & in pulverem fatiscat, quo, uti superius meminimus, constat: tres fluidæ substantiæ partes, & unam solidæ, in sanguine sani hominis contineri.

Et exsiccationem.

§. XII.

Sanguis de quo judicandum in patinam

Porro solenne mihi est, si judicium de sanguine ferendum, ut jubeam, quo portio ejus, sive è vena brachii, sive pedis, educatur, in patinam, & alia in aquam immittatur. Is enim qui in patellam effusus, copiam & coagulum sanguinis ac feri exhibet, simulque affusis variis liquoribus chymicis tentari potest. Tum quippe conspiciere licet, quam promte à spiritu acido, salis nempe vel vitrioli, coagulum subeat, qualis consistentia, admixto saturato corticis chinæ decocto, eidem inducatur; tum quoque jucundo compareret spectaculo, ab affusis liquoribus alcalinis, fixis & volatilibus, cruorem fluiditatem recipere & rubedinem ejus mirum intendi, quum contra instillata aqua forti, serum lactescente, & cruor gryseo colore, inficiatur. Pariter sæpius experimentum cepi, & nitri pulverem, vel potius ejus solutionem, sanguini addidi, ac eundem inde semper fluidiorem redditum & coccineo colore imbutum vidi, ut hinc satis mirari nequeam paradoxon assertum, quod in clarissimorum virorum scriptis, qui nitri virtutem in morbis summis concelebrant encomiis, me aliquoties legisse memini, sanguinem scilicet à nitro inspissari potius & coagulari.

§. XIII.

Et aquam mittendam.

Ex illa vero portione quæ in aquam profiliit, variæ sanguinis & feri substantiæ optime cognoscuntur. Nimirum pars sulphurea, quæ matrix coloris est, aquam rubedine inficit, & hac ex tinctura, prout magis vel minus saturata est, copia sulphuris, aut tenuioris, aut crassioris, recte

colligitur; ubi tamen notandum, quod quo diutius aqua sanguinolenta in libero aëre stet, eo magis color austerus ac brunus reddatur. Deinde hac etiam ratione non solum in conspectum veniunt partes nutritiles chylosæ, quæ instar flocculorum fundum petere solent, sed sæpius etiam ingens portio gelatinæ, ut manibus eximi possit, quod sæpius conspexi in plethoricis sanguineæ complexionis, præsertim foeminis spongiosi habitus, quibus labor, abstinencia à largiori & lauto cibo, potissimum in coena, maximo est præsidio. Denique hoc modo commode indagari potest, num sanguis sit fibrosus? hoc est, multis filamentis & quasi fibris carneis refertus, quæ mutuo coeunt & in superficie sparsæ hærent. Talem sæpe vidi in epilepsia, palpitatione cordis & anxia pectoris oppressione laborantibus, & certum polypi, vel præsentis, vel futuri, præbet indicium. Qui ut corrigatur & noxa arceatur, sæpe sæpius insigni cum emolumento crebriorem usum medicamentorum fontium, præsertim Selteranorum, qui purum alcali vehunt, suasi, interdicens penitus potum frigidum, spirituosum, crassum & acidum, & injungendo potum dilutum largum, cum motu & exercitio corporis.

§. XIV.

Ultimo loco dum de sanguine educto fermo est, subjungenda adhuc quædam sunt de vulgari illa, sed erronea sententia, ac si sanguis sub scarificatione per cucurbitulas extractus, longe tenuior ac fluxilior sit eo, qui è vena brachii vel pedis mittitur. Ego certe sæpius periculum feci, & sanguinem scarificando evocatum siccavi, ac deprehendi, tres pariter tantum fluidi partes aufugisse & quartam restitasse solidam, modo cautio adhibeatur, ne dum spongia madida sanguis abstergitur & cucurbitulæ eluuntur, aqua eruori admisceatur. Et sane quum unus idemque sanguis per minima & magna vasa feratur, incisis quoque minoribus in cute, idem consistentia & indole, quam qui majoribus effluat, necesse est. Porro etiam non leve sed crassus error est, quem Chirurghi, ut imperitiam velent, de industria sæpe admittunt, dum, si vena minus rite pertusa sanguis non effluit, cruorem crassum, qui incisionem obstruat, incusant, quum tamen is per exilissimos & capillares innumeros in corpore canales transire possit. Et licet non inficiandum, à terrore quandoque, præsertim in pedibus, cutem constringi & fluxum quodammodo retineri posse; remittente tamen strictura, sanguis postea liberaliter manat, operatione autem sinistre administrata, plane non effluit.

Idem sanguis scarificatione ac V.S. extrahitur

Nec crassus effluxum impedit.

§. XV.

Et hæc de judicio ex sanguine brevibus dixisse sufficiat; quæ tamen, quum non ex speciose incrustatis fictionibus, quas in arte nostra quam maxime detestor, sed attenta, sincera atque multiplici experientia scripta sint; eximio usui fore iis, qui in artis operibus dextre ac perite versari nituntur, certissime confido. Sæpius autem cum tædio profecto conspicio, in libris sic dictis practicis & semioticis, citra experientiam, dogmata proferri, quæ veritati minus sunt consentanea, atque ex luxuriante imaginatione, vel minimum possibili speculatione, fluunt, quasi vero omnes morbi ex sanguinis inspectione cognosci & curandi indicationes inde elici queant.

Conclusio

CAPUT XIV.

De judicio in morbis ex urina aliisque excretis rite ferendo.

§. I.

QUUM vitalis corporis nostri conservatio & omnium ejus functionum integritas, non modo in perenni sanguinis & humorum circuitu consistat, sed & maxima ex parte à debito excretionum successu dependeat; Medicus utique non tantum ex pulsu, qui genuinus circulationis index est, atque etiam ex ipsius sanguinis aspectu & subtiliori indagine, verum etiam ex iis quæ quotidie per varia emunctoria foras è corpore secedunt & evacuantur, status tum sani & ordinati, tum morborum & præternaturalis, signa & indicia petere, atque ex istis judicia ac prædictiones formare debet.

§. II.

Utut autem multa & varia, è corpore ad tuendam valetudinem proscribantur; nullum tamen est, quod magis sensibus manifestum & commodius aspici & tractari possit, quam urina. Quo etiam factum est, ut ab antiquissimis artis nostræ auctoribus, *Hippocrate* præsertim & *Galen*o, nulla in semioticis doctrina tam cumulare & diffuse in relictis monumentis excussa deprehendatur, ac ea, quæ de urina & petendis ex ea signis, quibus sanitas & periculum prædici possit, tractat. Quin non modo plebem, sed & alios non indoctos, constans tenuit opinio, ex solius urinæ inspectione, universum corporis & ejus partium internum statum ejusque integritatem, vel vitia, quam optime cognosci posse ac detegi; qua erronea credulitate, plures ex idiotis & lucripetis medicastis, ad decipiendum miserum & ad judicandum ineptum vulgus, hodiernum pessime abuti solent. Quia autem multa in medicorum, tum antiquorum, tum recentiorum, monumentis tradita prostant, quæ veritati & experientiæ minus respondent, ratione & fundamento carent, neque intelligi aut explicari possunt, plura quoque ad urinam, tam sani, quam ægroti hominis, penitus cognoscendam deficiunt; utilissimum fore duxi, si hoc argumentum, in praxi scitu necessarium, paullo curiosiori indagine perquirerem, hanc de urina doctrinam in meliorem & rationalem ordinem redigerem, à confusione & obscuritate liberarem, atque adeo eam magis intelligibilem & explicabilem efficerem.

§. III.

Prius vero quam ad præternaturalem urinæ in morbo affectis constitutionem atque naturam indagandam accedamus; è re fore existimo, ut urinam sani hominis, quoad suam essentiam, elementa, originem & quantitatem, curatori examini subjiciam. Primo igitur sciendum est, ejus originem & materiam ab assumptis potissimum liquidis esse repetendam, quæ quo majori copia hauriuntur, eo plus lotii reddi perpetuæ est experientiæ. Deinde & hoc observatu dignum, quantitatem urinæ, in nostris præsertim regionibus, reliquorum, quæ perspiratione, alvo, aliisque egestionibus educuntur, quantitatem & pondus excedere. Nam licet secundum

Erid. Hoffmanni Oper. Tom. I.

Sanctorii calculum & assertum, communis fere usque eo invaluerit opinio, materiam quæ distillatione perpetua è cute exit, reliqua omnia excrementa copia superare, atque etiam in Italia & locis præcalidis id fieri non negandum sit; accuratiori tamen, à me etiam instituto examine, in nostris his frigidioribus ad septentrionem magis vergentibus oris, hoc non ita contingere patet. Notavit idem quoque *Jacobus Keilin tentamin. physico-med. pag. 173.* qui multa experimenta statica eum in finem adornavit, ac deprehendit: urinam unius diei, vel viginti quatuor horarum, esse duarum librarum & unciarum fere sex; perspirationis autem quotidianæ pondus tantum ad uncias triginta plus una affurgere & quod per alvum excernitur in uno die, esse communiter ponderis unciarum quinque.

§. IV.

Ego veritatis cupidus, quæ non ita pridem in proprio corpore eum in finem feci experimenta & quid observarim, fideliter communicabo, quæ certe non sine usu & fructu erunt. Per duos nempe hebdomades diebus singulis certam potus & ciborum portionem assumsi, & exeuntem postea urinam ponderavi. Videlicet cerevisiæ *Loebejunensis* tenuioris, cujus libra teste hydrometere drachmas quinque & dimidiam solidæ materiæ continet, duas quotidie mensuras, quæ minimum quatuor civilium librarum pondus æquant, bibi; deinde mane decocti coffee quinque pocula, quorum unumquodque duas capit uncias, adeoque decem uncias, forbillavi; jusculorum porro in prandio & coena, decem circiter, & vini Hungarici in prandio quinque assumsi uncias; quibus demum accedunt uncia circiter sex liquidi cum solidis cibis apparatus ingesti: ut adeo subducto calculo, sex minimum liquorum libras corpus quotidie subiisse pateat. Solidorum autem, panis nempe, carniæ & obsoniorum pondus, quotidie non facile libram excessit. His ita assumptis, urina interdum & noctu emissæ ad libras quatuor, interdum aliquot uncias plus, interdum minus, accessit. Alvi excrementa, aspectu judice, non facile octo unciarum pondus excefferunt. Adeoque quum ex septem ingestorum libris, per urinam & alvum circiter libræ quatuor & uncia duodecim secesserint, superest pondus librarum duarum cum quatuor uncis, quod corpore non graviore interea facto, per cutis spiracula, halitum oris, mucum narium, faucium & salivam, procul dubio rejectum.

§. V.

Hæc per aliquot hebdomades capta tentamina & eadem quotidie fere à me observata, quum in eodem vitæ genere & corporis agilitate mense Decembri domi me continerem: neque tamen dubium est, quin in aliis, pro diversitate temperamentorum, motus & exercitationis, anni etiam temporum, pro diversa quoque qualitate & indole assumptorum, variare possint, adeo, ut vel perspiratio auctior urinæ quantitatem minuat, vel alvus etiam solutior reliquas omnes excretiones modificet. Id vero minimum in genere valde vero simile, nostris in regionibus, nisi extraordinariæ aliæ causæ externæ accedant, urinæ copiam in sanis quantitatem materiæ perspirantis superare.

§. VI.

Deinceps ad accuratorem hujus doctrinæ notitiam pertinet etiam, ut medicus perspectum

Li 2

habeat:

Experimenta insimul.

Observata tamen variare possunt.

De quantitate solidi in urina.

Excreta quoque indicia medicoprebeni.

Inprimis urina.

Urina sit. perat omnes excretiones.

habeat: quantum solidæ materiæ in libra una lotii sanorum contineatur. Quemadmodum vero ad explorandam specificam gravitatem fluidorum, five quantitatem solidi in fluido contentam, nihil aptius est, cylindri statici hunc in finem artificiose confecti usu; ita etiam medicus commodissime ejusmodi instrumento non modo ad contenta liquidorum quæ ingeruntur, ut cerevisiæ, vini, aquarum & lactis, sed & urinæ, uti potest; de quo tamen nemo fere hæcenus cogitavit. Altum enim de ponderatione urinæ in scriptis medicis est silentium, ac de ejus quantitate, colore, sedimentis, item an turbida, vel pellucida sit? sermo duntaxat habetur; quum tamen nihil solidi deglutiamus, cujus partes non quotidie ex massa sanguinis secedant & cum urina eliminantur: in quo etiam maxima in statu sano & præternaturali deprehenditur diversitas. In genere vero id perpetuæ observationis est, quod quo major est in corpore perspiratio & interior calor, quo minus fluidi aquei, quo plus potus spirituosus assumitur & corpus motu agitur, eo gravior semper est urina, levior vicissim, si hæc dicta contraria sunt. Ego itaque per aliquot septimanas memorata victus ratione utens & tempore brumali domi degens, sanus ceterum & valens, emissam posteaquam surrexissem urinam ad lancem hydrometricam exegi, ac notavi, libram ejusdem minimum unciam dimidiam, interdum etiam drachmas quinque solidi, complecti, & facta aliquoties evaporatione, pariter ex libra dimidia drachmas duas, vel dimidiam adhuc, obtinui. Eandem quoque solidæ in urina substantiæ esse quantitatem notavit *Antonius de Heyde obs.* 89. qui ex urinæ uncis tribus, per evaporationem drachmam unam materiæ siccae eduxit.

§. VII.

Experi-
mentum
residuo in-
stium

Ut vero porro ad penitiorem & uberio-rem materiæ ab evaporatione relictæ cognitionem pertingerem, complura institui curiosa experimenta, quæ hoc loco recensere haud abs re erit. I. Vel solus aspectus testatum facit, materiam ex urina restibilem, penitus differre ab ea, quæ exhalata cerevisia restitat: ex quo utrique conficitur, liquidum quidem ex potu transire in urinam, sed non solidum, quod magis ortum suum ex humoribus interioribus vitalibus, sanguinis & feri massa, trahit. II. Massa post urinæ exhalationem relictæ non facile ad siccitatem constantem deducitur, sed quantumvis arida in aëre tamen liquefit, haud secusquam omnia salia neutra, quibus multæ particulæ oleosæ sulphureæ admixtæ sunt, ut terra foliata tartari & salia vegetabilium essentialia. III. Drachmæ hujus cramatis affudi unciam unam spiritus vini rectificatissimi, qui promte extraxit tincturam ex bruno rubicundam, saporis falsi paulisper amaricantis, relicto in fundo scrupulo minimum materiæ gryseæ spongiosioris terreæ, quæ nec aqua calida, nec spiritu amplius poterat dissolvi. IV. Essentiam sive potius tincturam hanc in cochleari argenteo admovi flammæ candelæ, & post evaporationem remansit instar mellaginis magma falso-amaricans, cui aliquot guttulas olei tartari per deliquium plenius saturati instillavi, & mox odor volatilis urinosus, instar falsi ammoniaci, nares feriit. V. Eandem tincturam accendi, & deflagrato primum vini spiritu, postea flamma successit, plane alius coloris atque naturæ, instar ignis, qualis emergere solet, quando oleum destillatum in spiritu vini solvitur, & deflagratione instituta, post vini spiritum com-

bustum, oleum ardet. VI. Partem magmatis ab evaporatione urinæ relictæ miscui cum oleo tartari per deliquium, & penetrans urinosus, volatilis foetor mox diffusus est. VII. Ejusdem massæ nonnihil igne cremavi, & cineres relictæ sunt nigri, qui saporem salis communis linguæ inprimabant. VIII. Cineribus his affudi quicquam aquæ, ut sal in se reciperet, & liquamen instillavi solutioni lunæ, unde facta præcipitatio. IX. Alii hujus residui portioni in vitro affudi oleum vitrioli, & vehemens facta est turgescencia & ebullitio, cum denso & albo ascendente vapore, odoris penetrantissimi, qualis solet emergere, quando oleum vitrioli admiscetur sali communi, vel sali ammoniacali. Denique hisce à me institutis tentaminibus addere placet ea, quæ *Barchuysen* adornavit & in *pyrosophia* recenset: uncia nempe sex urinæ sani hominis, destillatione dederunt uncias quinque & drachmas sex phlegmatis, residui in cucurbita scrupulos quinque & semis, ulterius igne rite tractati, salis volatilis drachmam semis, olei empyreumatici scrupulum semis, tantundem salis fixi & terræ grana octodecim præbuerunt.

§. VIII.

Ex hisce commemoratis experimentis facillimum jam erit, genuina urinæ elementa erueri ac sistere. Hæc inter primum & potissimum locum obtinet aqua, quam ex ingesto maxime potu accipit, & cujus partes triginta ad unam partem solidi remixtæ deprehenduntur. Post humidum urinæ principium commemorandum sal, quod triplex in ea hospitur, culinare nempe, acidum & volatile. Et culinare quidem cum alimentis ad massam sanguinis transit, ac per renes, ceu congruum salium emunctorium, cum urinoso sero colatur. Quod vero sal urinæ ad communis naturam accedat, ex eo patescit, quod non solum urina inspissata cum oleo vitrioli spiritum & vaporem salis communis volatilem in auras emittat, sed etiam lixivium ex cineribus combusti residui cum aqua factum solutionem argenti præcipitem det, itemque per destillationem, quod sæpius à me factum, sal enixum culinari in omnibus quoad effectus simile, educi queat. Alterum in urinoso latice comprehensum sal, est acidum, quod etiam per alimenta, quæ multum acidi foveant, in ipsius connubium transit. Hoc autem purum obtineri nequit, sed partim cum particulis terreis alcalinis, partim cum tertia salis in urina specie, volatili nempe urinoso, quale in sanguine largius hospitur, sese miscet, & salis ammoniacalis genus habet. Hinc enim est, quod addito oleo tartari per deliquium, acidum figatur & spiritus volatilis urinosus avolet, cujus ortus non ex alimentis, sed ex ipsius sanguinis massa derivari debet.

§. IX.

Accedit oleum, quod urina in complexu fovet, duplex iterum, temperata nempe pinguedo & oleum valde subtile calidum. Illa ex alimentis & chylo, quæ multum pinguis substantiæ complectuntur, ortum trahit, & si largius immixta, non modo innatat urinæ, sed etiam matulæ parietibus adhærescit, uti sæpius fit in nimio æstu, qui pinguedinem colliquat; hoc vero valde tenue, evaporabile & inflammabile, ex intestina partium sanguinis sulphurearum agitatione gignitur, & in destillatione oleum empyreumaticum largitur, ac in tincturam redactum,

Urina elementum continet aqueum & salinum.

Oleosum ac terrefactum.

Etum, post deflagrationem spiritus vini, instar olei ardet. Quod enim urina ex sanguine recipiat particulas sulphureas, calidas, oleosas, ex eo patet, quia ab assumptis suaveolentibus oleosis, ut oleo juniperi, ligni sassafras, nucis moschatae, balsamo de capaiua, urina suaveolentem & quasi violaceum odorem; inficetum vero ac foetidum ab allio, balsamo sulphuris, asa foetida acquirat. Quartum elementum est ipsa terra, quae rursus vel tenuis valde, vel crassior & fixior est. Fixior & crassior, cum alimentis, praesertim aqua, quae semper multum calcareae fixae terrae continet, corpus subit, ac praecipuum fundamentum tartari qui matulis accrescit, nec non concretionibus calculosis praebet, & instillato oleo vitrioli, effervescentiam suscitatur. Tenuior sanguinis soboles est, & cum aqua & oleo pingui mixta, mucilaginem constituit, quae instar nubeculae descendens oculis conspicitur, vel etiam, si ejus major quantitas, in fundum secedit, nec vini spiritu, nec vitrioli oleo, solvitur.

§. X.

Color urinae dependet maxime ab oleo calido subtili, quod, quo magis cum salibus miscetur, eo saturatior fit color; eo quod ea omnium salium natura, ut principium sulphureum, quod matrix coloris & odoris est, mirifice exaltando eum intendunt. Et licet oleum & terra alias non bene & intime misceantur: fit tamen hoc in urina, tam cum neutro, quam alcalino volatili. Quumque adeo salinum elementum cum sulphure & oleo intime permixtum sit, patet ratio, quare illud à purissimo vini spiritu, qui consortium puri salis alias respuit, sulphure autem admixto amat, absorbeatur, haud secus ac videmus in tinctura sulphuris, scoriarum antimonii & antimonii acris, item quando spiritu vini rectificato nitrum artificiale valde sulphureum, ex aqua forti & sale ammoniaco, plene solvitur.

§. XI.

Et haec omnia ita observantur in urina humana; dispar autem urinae jumentorum est ratio. Ita non semel evaporari jussi urinam vaccinam, quae reliquit magma valde salinum flavum, amaricantis saporis, cui infudi spiritum vini purissimum & extraxi tincturam flavam, instar bilis amarissimam, eoque facto, remansit sal, cui affudi aquam pluvialem & solutionem filtratam rursus coagulavi, ita obtinui sal tartariforme neutrum, instar salis plantarum essentialis, quod originem suam ducit ex ipsis herbis quibus vescuntur, nullum vero vestigium fuit salis communis. Ex quo etiam apparet ratio, quare urina vaccina tempore verno collecta, & interius ad aliquot hebdomades, quotidie ad majorem quantitatem ascendendo, pota, saepius, uti aliquoties Berolini maxime apud Gallos vidi, mirum effectum in affectibus chronicis, maxime cachecticis, ictero, principio hydropis & mensium suppressione, praestiterit. Discimus etiam exinde, partes in urina sulphureas multum affinitatis habere cum iis, quae in bile continentur.

§. XII.

In conspectum sic ductis genuinis urinae humanae in statu sano elementis; faciliiori nunc & leviori modo in phaenomenorum, quae in lotio aegrotantium subinde praesto sunt, meliorem explicationem & notitiam, unde proveniant & quas causas agnoscant, pervenire poterimus. In quo

Frid. Hoffmanni Oper. Tom. I.

quidem perficiendo, ordinis & brevitatis causa, observationes, quas in praxi subinde per crebriorem experientiam annotavi, & quae regulae vim habere possunt, proponam & rationes postea subjiciam. Et primum quod attinet ad urinas pondere leves, consistentia tenues, instar aquae saepe pellucas, eas quam maxime in gravioribus internarum & membranarum partium spasmodicis, pathematibus hystericis, hypochondriacis atrocibus, in cardialgia, affectione calculosa, nephritica, convulsiva, apparere, crebriori edocti sumus experientia. Pariter in gravioribus capitis morbis, ejus nempe doloribus, in vertigine, phrenitide, mania, melancholia, epilepsia, valde tenues & leves emitti urinas, idem tamen perpetuae est observationis. Idem contingit in gravioribus nervosarum partium affectionibus, quae à caustico veneno, vel à vermibus tunicas intestinorum rodentibus, in convulsionibus, concitantur. Et quod probe notandum est, tenues & aquosae ejusmodi urinae non modo in ipso statu & exacerbatione horum morborum prodeunt, sed & aliquot dies ante ac paroxysmos imminentes nunciant. Unde non mirum est, quendam apud *Tulpium lib. II. obs. 19.* ex tenui lotio, triduo ante praesagire potuisse cordis palpitationem.

§. XIII.

Tenues quoque, aquosae & perpetuo albae ejusmodi urinae in diuturnis morbis difficulter judicant & securae non sunt; in vigore autem febrilium si copiosae fluunt & ante dies criticos, multum alunt periculi & phrenitidem imminentem praesagiunt, teste jam *Hippocrate sect. II. aph. 22. sect. IV. aph. 70.* qui *lib. epid. sect. II.* id confirmat exemplo aegri, qui secundo die surdus, circa meridiem deliravit & quinto die mortuus est, & alius *sect. III. ibid.* qui quarto die obiit phreniticus. Idem auctor saepenumero etiam observavit: easdem urinas, si in inflammationibus gravioribus internis, uteri, pulmonum, ventriculi comparent, nunquam periculi esse expertes praesertim si creber stimulus sit ad matulam & copiosissimae ac tenues reddantur. Nam dilutae ejusmodi aquosae, pondere leves, omnis sedimenti expertes & quae paucillum solidi habent urinae, à nimium per spasticas stricturas coarctatis & angustatis ductibus renum secretoriis & excretoriis proveniunt, & luculentum totius generis nervosi spasmodici affecti testimonium ferunt, quum lege consortii & consensionis, renes etiam & ductus urinosi simul compatiuntur. Albae autem prodeunt & pellucidae hanc maxime ob causam, quod strictiores tubuli, plerumque nonnisi id quod valde tenue est & diametro canaliculorum respondet, admittunt, undae crassae & sulphureae moleculae remanent. Et copiosae ut plurimum profluunt, quia in affectibus spasmodicis, ob tubulos subcutaneos constrictos, parum humidi perspirat, sed ad renes eo copiosius fertur ac urinae insinuat. Quod vero in acutis morbis ejusmodi tenues & aquosae urinae inflammationem, vel jam praesentem, vel certo futuram, in ventriculo aut capite, subindicent, haec subest ratio: quia ob spasticas stricturas, sanguinis impetus urgeatur ad interiora ac superiora, quo fit, ut is in tunica cerebri & ventriculi, praesertim viribus jam fractis, firmius impactus subsistat & inflammationes praecipitis periculi pariat.

§. XIV.

Monendum tamen est, quod tenues, aquosae, Aliisquo

I i 3 plus

Quid portendat in febribus.

Debetur spasmis.

Color urinae unde?

Urina jumentorum differt.

Praesagia ex urina tenui aquosa.

plus minus turbidæ urinæ, non semper à spâsinis ortum trahant, sed aliam etiam agnoscant causam, & vel vires valde fractas, vel partium sulphurearum in sanguine, à quibus & eorum motu calor & spiritualescentia dependet, defectum, vel vim ventriculi digestricem imbecillem, vel etiam sanguificationem læsam & copiam cruditatum, tam in primis viis, quam massæ sanguineæ admixtarum, prodant. Quare qui novissime à morbo diuturniori convaluerunt, v. c. à dysenteria, à febre acuta exanthematica, morbo Hungarico, variolis, si nimium præsertim indulgent appetentiæ, ex defectu caloris & spiritualescentiæ in fluidis, facile multas colligunt cruditates aqueas, quæ quum minus commode per cutem diffilari possint, subsistunt, intus remanent & per urinam secedunt. Et hæc utique est ratio, quod etiam in cachexia, leucophlegmatia, enormibus hæmorrhagiis, in principio anasarcae, in chlorosi virginum, in mensium suppressione, tales urinæ crudæ, turbidæ, pallidi, subviridis, vel tenuis citrini coloris, copiose mingantur. Notavit hoc jam Hippocrates, qui ejusmodi urinas tenues & aqueas spleneticas appellat, quia in iis, quibus facies coloris luridi est & lien laborat, observantur. In fluore quoque mulierum albo, qui soboles ut plurimum cachexiæ & mensium suppressionis, plerumque urina pallida & turbida, quandoque cum sedimento squamarum instar visitur.

§. XV.

Urinæ rufa sine sedimento unde?

Porro in omni calore præter naturam aucto & æstu febrili, urinæ pauciores & coloratiores, flavo & rubro colore plus minus saturato tinctæ, profluunt, eo quod internus accensus calor, partes sanguinis sulphureas, à quibus color, valde exaltat, auget & humidum insensibiliter consumit ac dissipat. Tales urinæ febricitantium plus minus rubicundæ, vel tenues & leves, vel crassæ & pondere graves, tam in intermittentibus, quam etiam continuis, manant. Scilicet ipso in paroxysmo, sive motuum febrilium, & intermittentium, & continuarum, exacerbatione atque vigore, urinæ redduntur tenues, perspicuæ, sine sedimento, uti obvium est in tertianæ continuæ aut intermittētis paroxysmo, in ardente, item cholericæ febre, ubi ordinario urinæ pellucidæ, sed flammeo colore, qualis in destillatione spiritus nitri apparet, tinctæ conspiciuntur. In intermittētibz vero, aliquot horis post intermissionem & die à febre vacuo crassiores secedunt, & quam facile, si quiescunt, vel levi tantum frigori exponuntur, sedimentum dimittunt, quod etiam si fit in febribz continuis, circa dies præsertim criticos, febrem solutam & salutem portendit.

§. XVI.

Sedimentum quid indicet.

Hoc sedimentum, pro copia, diversa conditione ac temperie partium in sanguine, parcius vel copiosius, & differentis quoque coloris esse solet. Si color est roseus & purpureus, sanguinis copiam peccare, uti obvium in febribz synochis sive continentibus, indicio est. Quando sedimentum intense flavum, bilem, fusci autem coloris & atrii, copiam bilis atræ, sive secundum Recentiorum explicandi modum, copiosas sulphureas calidas particulas, acido-terreis intine per calorem immixtas, designat, quale in febre scorbutica purpurata, in quartana etiam, minus fausti est ominis. Si id quod subsidet ad modum copiosum, magnam viscidorum & crudorum humorum copiam in corpore prodit,

atque in corporibus repletis, obesis, spongiosioris habitus, febris intermittētis pertinciam portendit. Et recte hinc scribit Galenus; lib. I. de cris. cap. 12. qui ex otio & repletionē febricitant, si sanitati restitui debent, necessario in urina subsidet.

§. XVII.

Quemadmodum vero boni ominis signum, si urinæ febricitantium crassiores fiunt & sedimentum ponunt: ita contra quæ in febribz intermittētibz extra paroxysmum nullam exhibent subsidentiam & pellucidæ diu stillant, nec frigoris accessu in fundum quid dejiciunt, pejoris sunt notæ. Inprimis crebriori experientia compertum habeo, quando in tertiana vel quartana febre, finito paroxysmo, urina non turbatur & crassamentum rejicit, pessimi esse prælagii, præsertim si ab imperitis medicis improvide tractetur iis remediis, quæ motus febriles intempestive supprimunt & sufflaminant. Non semel enim sed aliquoties hac ratione in pueris ingruente paroxysmo lethalem epilepticum insultum accessisse vidi: senes autem non facile convalescunt, sed demum viribus fractis, sub frigore & spâsmis, nullo succedente calore intereunt. Quod si porro in febribz inflammatoriis pleuritide, peripneumonia, inflammatione ventriculi, mesenterii, uteri, urina vel tenuis perspicua & purpurei coloris, vel bruno & austero colore imbuta exit, cum spuma, sine omni sedimento, non faustum præbet signum. Antiquissimum hanc in rem Hippocratis est testimonium prænot. §. XI. ita differentis: si in febribz urina fulva est & tenuis, materiam incoctam significat, si vero diuturna fuerit talis, periculum est, ut homo sustinere possit, nisi concocta fuerit. Pariter id etiam perpetuum est, turbidam in febre continua urinam, quæ nec igne, nec quiete clarescit, aut sedimentum ponit, multum periculi minari: malum tamen etiam est indicium, quando in continuis urinæ primis diebus crassescunt, reliquis vero & maxime criticis, tenues & sine sedimento manant.

§. XVIII.

Ratio vero quare in febribz æstuosis urinæ claræ tam anticipitis & periculi pleni ominis, contra, quæ multum coctæ materiæ deponunt in fundum, salutiferæ putentur, in procinctu est. Nam tenues ejusmodi & rufæ urinæ magnum æstum & vehementem partium internam agitationem, simul etiam solidarum & nervosarum partium spâsticam ingentem affectionem significant, quæ spâsmorum diuturnitas atque vehementia multum certe periculi alit. Crassior vero urina si prodit, certum præbet signum, spâsmi tam nervosarum, quam vasculosarum partium, vehementiam remittere, ampliari ductus secretorios & excretorios & excrementa crassioris substantiæ transmittere, quo fit, ut non solum urina cum sedimento copiosior fluat, sed & totum corpus æquabiliter sudore, idemtidem crasso, foetido ac viscido perfundatur & alvus antea adstricta solutior fiat. Ex quo quidem dilucide patescit, multum interesse, ut medicus critica illa in morbis tempora, quæ Veteribus coctionis dicuntur, ex urinæ inspectione cognoscat, & sic cum certa ratione verax de morbi eventu judicium interponere queat.

§. XIX.

In declinatione febrium catarrhalium, item variolarum & morbillorum, urinæ in vigore morbi & febre pellucidæ & aquosæ, crassiores etiam & colo-

Si nullum sedimentum malum omen

Cur sit malum?

In declinatione febrium catarrhalium.

Urina diu
crassa ma-
la.

coloratiores cum sedimento secedunt, certo iudicio, morbum, id est spasticas constrictiones parium, solvi atque remittere, ut ductibus urinarum iterum patulis redditis, impuritates salinae sulphureae viscidae feri, quae ipso morbi tempore progentae, liberum jam habeant ingressum atque exitum. Quandocunque vero post phthysicum aut alium vehementem ac diuturnum morbum, urina diutius fertur crassa, pauca, saturate & obscure rubra, cum copioso sedimento, pinguedo supernatans vitri urinarii parietibus adhærescit corpusque interea tabescit; morbum in febrem lentam & hecticam concessisse testatur, qua rarissime aeger servatur, eo quod corrupta ex laeso viscere materia sanguini & lymphæ intimius nupta, instar fermenti motu intestino calido mixtionem & crasin sanguinis temperatam dissolvit, & optimum etiam alibilem succum in excrementitias falso-sulphureas sordes convertit, simulque pinguedinem corporis colliquat. Idem metuentum periculum, quando in hydropicis urina hecticorum similis profluit. Nam parcum ejus stillicidium, lympham ex ruptis vasculis lymphaticis in cavitatem vel porosam partium substantiam secedere, & color obscure rubicundus crassiusque sedimentum, partim motum intestinum calidum sanguinem dissolutorium, partim etiam obstructum hepatis emunctorium, quo sordes biliosae separari solent, arguit.

§. XX.

Urina
crassa sine
febre.

Dantur tamen etiam in morbis chronicis, citra febrem & calorem internum auctum, urinae crassiores, valde saturato colore rubicundo bruno tinctae, pondere admodum graves, adeo ut interdum libra una, teste cylindro statico & evaporatione, uncias tres, vel quatuor, solidescens materiae in complexu foveat. Obvium hoc est quam maxime in scorbuto confirmato, in arthritide & paralyti scorbutica, senectute extrema, quandoque etiam in passione nephritica, conquiescentibus dolorum tormentis, nec non in ictero flavo & atro. Laesam autem in ejusmodi urina esse proportionem elementi aquosi & salino-sulphurei, exinde patescit, quod affusa sufficienti aquae solius simplicis copia, ad naturalem tincturam reduci possit. Crassities quippe & color ille fuscus ab excrementitiarum salinarum & sulphurearum partium in sanguinis & humorum massa hospitantium copia, ortum trahit, quae propter hepatis obstructionem, à succorum vitalium connubio non rite segregantur. Nam jecoris viscus, cum in omnibus chronicis morbis, tum maxime in scorbuto patitur, ut etiam *Willisus* in *tr. de febribus* fidem faciat: se plurima scorbuto defunctorum cadavera secuisse, & observasse, quod in culpa fuerit in nonnullis hepar prorsus exsangue & instar uberis vaccini exsuccum, in aliis vesica biliaria, aut vacua, aut lapidibus obessa, aut amurca minime amarescente repleta.

§. XXI.

Urina flava
& nigra.

Quando porro ejusmodi crassiores mirum austeri coloris urinae, (*wie dickes braunes Bier*) crocea tinctura immersa linteamina inficiunt, certum est indicium, bilem propter obstructos, vel spasmo constrictos ductus hepaticos & cysticos & denegatum in duodenum influxum, per vasa lymphatica regurgitare ad sanguinis & lymphæ massam, & icterum adesse. Ubi vero color in atro-brunum vergit, icterum designat nigrum, qui non tam à bile reflua, quam potius ab ejus

secretione in hepate plane impedita nascitur. Nigredo autem acido admixto tribuenda; eo quod ob defectum bilis, quae alcalino suo elemento, acorem qui ingestis inest, temperat atque obtundit, succi acetosi ad sanguinis massam transeunt, ibique sulphureis, oleosis ac biliosis particulis unitae, atrum excludunt colorem, haud secus ac videmus, acido liquore bili affuso, post digestionem eandem primum viridescere ac deinde nigrescere. Quumque in profectioni senectute, ob angustationem, contractionem & collapsum tubulorum excretoriorum in hepate, nec non in cute, multae salinae sulphureae & viscidae sordes, retineantur: urinae solenniter in ætate gravibus crassiores, graviores magisque tinctae redduntur, praesertim si paullo liberalius vino utantur, inprimis spirituofo, ut Hungarico, quod oleosum est multum atque sulphureum.

senectute.

§. XXII.

Nonnunquam redduntur urinae copiosa materia pingui imbutae, sive oleosae, quae sine strepitu mittuntur, in superficie cutem variegati maxime caerulei plerumque coloris exhibent, ac vitri urinalis parietibus tam firmiter adhærescunt, ut nonnisi lixivioso liquore detergi possint. Origine harum procul dubio calori interno nimio, ipsam pinguedinem colliquanti tribuenda, quae liquefacta & postea in sanguinem recepta, sese miscet cum sanguine & fero, ac humore falso muriatico demum dissoluta, per renum colatorium in urinam defertur. Annotavit *Sylvius* exemplum foeminae juvenulae, cujus urinae tam copiosa innatavit pinguedo, ut in perfrigerata superficie butyri instar aut olei frigidi concreti comparuerit. Et memorabilis quoque est *Fernelii* lib. III. cap. de urina historia, de bibulo quodam optimi corporis habitus, qui diebus circiter octo, ex ingenti corporis mole ad summam gracilitatem, citra ullam morbi vim, traductus est. Potissimum tamen tales pinguiusculae urinae in consumptione corporis, atrophica, phthisi, hectica observantur; quinimmo in omnibus febribus, urinae quando profluunt crassioris substantiae, multum pinguedinis secum evehunt, quae eo copiosior est & diutius durat, quo corpus est pinguius.

Quid indicent oleosae?

§. XXIII.

Supra quoque cum de analysi urinae naturalis actum fuit, mentio facta est, quod sal acidum, cum alcali, sive volatili, sive fixo mixtum, sive neutrum & tartariforme, ordinarium sit urinae ingrediens, quod dubio procul ab excessivo acido per alimenta ingesto & in sanguine contento, oriatur. Hoc autem sale tartareo si urinae nimium refertae sunt, quod cognoscitur, quando matulae parietes & fundus copioso tartaro incrustantur, indicium est dispositionis ad calculum renum & vesicae. Majoris periculi est, ubi crassum, rubrum & friabile sabulum, mox emissae urinae, fundum petit; quippe quod morbum nephriticum adesse, plane evincit. De quo luculentum *Hippocratis* suffragium *aph. 79. Sect. IV. quibus, perhibentis, in urina subsident sabulosa, iis vesica calculo laborat.* Interdum quoque crystalli micantes fulvae copiose sese apponunt lateribus matulae, quae doloris arthritici, rheumatici, plus minus fixi vel vagi, indicium praebent. Quando urina mingitur mox cruenta, mox ob puris miscelam lactescens, interdum glutinosa, crassa tenaci materia mali odoris onusta, quae fundo adhæret, nec vitri agitatione dissolvitur, certum exulcerationis renum vel vesicae documentum praebet.

Tartaro refertae?

sabulosa.

cum crystallis, purulentis, glutinosa &c.

præbet. Quin ipse in calculo & ulcere vesicæ sæpius lotium tam tenax vidi, ut instar albuminis ovi cohæserit, nec guttatim aut per vices potuerit effundi, sed inclinata matula, omne simul massæ instar elapsum sit. Eandem quoque in rem facit notabilis observatio, in *M. N. C. Dec. III. A. IIX. obs. XI.* consignata, de urina crassa glutinosa, quæ ad ulnæ longitudinem potuit extendi, & filtro imposta, ne guttulam transmisit.

§. XXIV.

*Qualis in
gonor-
rhœa.*

vesicæ scabie.

stranguria.

*et mictu
cruento.*

In gonorrhœa, præsertim chronica & maligna, non solum prostrata, sed plerumque vesica etiam exulcerationem patiuntur; unde urinæ turbidæ & crassæ, *wie Kraut-Lacke*, emittuntur, quæ sedimentum copiosum rejiciunt mucosum, quod exsiccatum & carbonibus injectum, foetidissimum odorem spargit. Alias semen purum, propter levitatem, urinæ innatat. Pariter sæpissime in calculo vesicæ, hæc ipsa vel ejus sphincter erosus est, ac tum urina crassa furfuracea mingitur, cum exiguis carunculis & fibrillis, quæ à vulgo pro vermibus habentur; id quod confirmat *Hippocrates sect. IV. aph. 66. 67. quibus*, inquit, *in urina crassa existente, carunculæ parvæ, aut veluti capilli, aut furfuracea quedam, simul exeunt, his vesica scabie laborat.* In stranguria crebrius ad mingendum est stimulus, sed parum mittitur, idque turbidum, valde salsum & acre, cum filamentis, identidem fundum petentibus, & tunc sphincter plerumque spasmodici quippiam patitur. Si sanguis lotio est admixtus, instar loturæ carnis, seu vini rubri compareret, sed postea cruor ima petit, & purpureum colorem, quando ex renibus, atro-fuscum vero, ubi ex adaperitis vesicæ venis prodiit, refert. Talem sanguinolentam urinam in sene vegeto octogenario, qui jugiter dolorem prefforium in regione pubis sentiebat quotiescunque equitabat, vidi.

§. XXV.

*Uroman-
tiæ utilitas
in patholo-
gicis.*

Et hisce quæ jam attulimus, liquido elucescere arbitror: uroscopiam & uromantiam haud exiguæ utilitatis esse in praxi medica, nec ceu inutilem & fallacem floccipendendam, multo minus despectui habendam: eo quod non modo fluidorum, sed & solidorum conditio, habitus & status hoc ipso adminiculo perspicui potest ac erui. Nam ex urina levi ac tenui, præternaturaliter & spasmodice affectum esse nervosarum partium systema patet; ex crassiori vero & ponderosa, ductuum urinariorum nimis relaxatus tonus, seu atonia elucescit. Deinceps hoc subsidio depravatam esse sanguinis mixtionem, sive ejus dy-crasiam & impurarum salino-sulphurearum partium copiam, optime cognoscimus, maxime in morbis chronicis & qui à caco-chymia nascuntur. Porro viscerum sanguinis depurationi inservientium, præsertim hepatis, constitutionem lotium prodiit. Tum proportio & vinculum feri ac sanguinis, quale sit in morbis, sive acutis, sive chronicis, inde elici potest. Præterea gradus interni caloris, sive intestinæ partium sanguinis sulphurearum commotionis, hac ratione paullo clarius, præsertim in æstu febrili, dignoscitur. Defectum quoque caloris naturalis, virium ac spiritualescentiæ, quæ ad digestionem ingestorum & mutationem in succum & sanguinem necessariæ sunt, inspecta urina quadantenus comperimus. Maxime vero urinæ solertiori consideratione & examine viarum & ductuum urinariorum ac seminalium, ut renum, ureterum, vesicæ, ejus sphincteris, urethræ, vesicularum seminalium & pro-

statarum dispositio ac constitutio manifestatur. Neque minus in febribus, tam continuis, quam intermittentibus, urinæ inspectio eximio pollet usu, eo quod ex hac non modo massæ sanguineæ conditio, sed & an materia febrilis cocta vel incocta sit? an crisis morbi completa vel incompleta? qualis spes valetudinis? num funesti quippiam immineat? an recidivæ vel alius morbi metus? planum fit ac innotescit.

§. XXVI.

Tandem urinæ etiam consideratio in therapeutica haud spernendum præstat usum. Quia enim vera pathologia sive exquisitior cognitio status morbi, quem uroscopia patefacit, basis est rationalis therapie: multum utique adjumenti ad hanc dextere suscipiendam ac perficiendam illa afferre videtur. Et aquosa quidem urinarum tenuitas si præsto est, probe inquirendum, num à spasmis? an vero defectu virium & spiritualescentiæ ortum trahat? Ubi hoc, spirituosæ, analeptica, balsamica, aromatica quæ balsamum sanguini foenerant, adhibenda; si illud, fugienda sunt hæc, & potius leniora diaphoretica, cum antispasmodicis, nitrosis, cinnabarinis permixta, locum inveniunt. Quando porro in febribus intermittentibus tenues, leves & flammeo colore apparent, nihilque deponunt, à cortice chinæ & quæ parem cum ipso, maxime constipandi & febriles motus supprimendi facultatem habent, penitus abstinendum est, quorum usus, quum urinæ crassiores secedunt, prævia evacuatione alvina, tutissimus est. Intensio-rem urinæ colorem in febribus, humectantia, acidula, nitrosa exposcere, quisque judicabit; crassas vero & rubicundas, quæ citra calorem in affectibus chronicis minguntur, diluentia, inque primis emuntoriorum tubulos obstructos referantia, aquarum mineralium, acidularum, thermalium & martiatarum convenientem, nec non feri lactis dulcis usum, exigere. Ubi ex viarum urinariorum vel spermaticarum vitio urinæ turbidæ, & larga crassa mucosa tartarea substantia foetæ redduntur, nil præsentius & efficacius est fontibus medicatis temperatioribus, ut aquis Spadanis, Wildungensibus, Selteranis, thermis Piperanis & Emsensibus; ad eluendas ac detergendas fordes, acrimoniam diluendam & partes afflictas consolidandas, adjunctis simul exterius balneis temperatis. Calculosa tartarea concrementa & mucidum ex ulcerata renum substantia prodiens lotium, apertius omnium efficaciter diureticorum, salinorum, ipsarum quoque Carolinarum, quæ propter calcareum salinum elementum fortiter nimis pellunt, usum interdunt, & potius traumatica, leniter roborantia & demulcentia injungunt, ut sunt emulsiones seminum quatuor frigidorum, dauci cum lycopodio, infusa, vel decocta ex hedera terrestri, equisetio, virga aurea, fragaria, veronica, radice althææ, aliisque id genus pluribus.

§. XXVII.

At vero non solum ex urina, sed etiam ex aliis excretis, inter quæ subtiles excretionis cuticularis fordes potissimum fere locum tenent, de statu integro nec non vitiato, ac præcipue de salutari, vel infausto morborum eventu, medicus tanquam ex certis signis indicium petere debet. Veteres, ut refert *Jo. Langius in epist.* tam in cognoscendis, quam dijudicandis morbis, plus, sudoris calorem, odorem & saporem, quam lotii differentias observarunt: quare etiam moris fuit, sudores

sudores in balneo strigili exceptos & olfacere & degustare. Sudor enim, ut *Galenus de salubr.* ait, omnium humorum per universam corporis compagem index est: urina vero tantum eorum, quæ in conceptaculis venarum continentur. Neque hæc assertio fundamento destituitur. Nam urina potissimum potui, cui etiam proportionalis est, materiam debet; & crassiores aqueas, & maxime varii generis salinas, quæ per alimenta assumptæ fuerunt, atque in ipso sanguine progeneritæ sunt, recrementitias materias è corpore evehit; quandoquidem renes & viæ urinariæ congruum salium emunctorium constituunt, quin omnis generis salia, sive alcalina, sive acida, sive neutra, volatilia, sive fixa fuerint, vel etiam caustica, item nitrosa, singulari plane ratione ad renale illud vasculosum cribrum feruntur, & urinam quoque movendi facultate pollent. Per fibrosam vero ac poroso-tubulosam cutis texturam, corpus magis à partibus aqueis tenuioribus, & maxime sulphureis, sub forma vaporis, vel madoris, expurgatur.

§. XXVIII.

Perpirationis & sudoris differentia.

Diligenter tamen hoc loco observandum est: ingentem inter perspirationem & sudorem intercedere differentiam. Scilicet perspiratione, insensibilis halituum è corporis cortice succedit diffusio, adeoque tantummodo particulæ tenuissimæ aqueæ & sulphureæ salinæ magna quotidie in copia in auras mittuntur, lintheaminibus corpori circumvolutis siccis remanentibus: in sudore vero particulæ aqueæ & sulphureæ magis crassiores, peculiaris saporis & odoris, vel foetoris prodeunt, quæ cutem & indusia conspectius humectant, adeo, ut interulæ interdum post sudorem quinque vel sex uncias graviores quam antea deprehendantur, quum contra in perspiratione, pondus indusii per hebdomadam gestati vix uncia una increseat, ob materiam mucidam oleosam crassiorem in poris obhærescentem. Deinde observamus, perspirationem in robusto, sudorem vicissim magis in imbecilli corpore fieri, & plus etiam materiæ excrementitiæ illa, quam hoc excludi, ut hinc probe notante *Sanctorio* in aureo *de Medicina statica* libello, corpus à perspiratione longe agilius & levius, à sudatione vero debilius & gravius reddatur. Porro saluberrima illa minus in sensus cadens sordium per corticem corporis excretio magis à vegetiori sanguinis progressivo motu & circulo, atque vigore motus cordis & arteriarum oboritur; sudor autem potius à calore & motu intestino partium sulphurearum, quæ in mixtione sanguinis continentur, & à fibrarum & tubulorum cutaneorum majori relaxatione, provenit. Tum frequenti constat observatione, sub constitutione aëris sicca & ventis ex euro & borea flantibus, expansiva elastica reddita, & scandente altius in barometro argento vivo, insensibilem in corpore perspirationem quam maxime vigere: contra vero sub aëre levi & rarefacto, humido, flante potissimum zephyro & austro, nec non sub lapsu mercurii, corpus ad sudationem mirum dispositum esse. Quin ipse multiplici observatione confirmatum habeo, quod sub debilitate, à morbo potissimum relicta, & atmosphæra existente admodum levi, humida & pluviosa, sudores ex cutis tubulis largiter profluant, cum urina simul crassiore, multum sedimenti ponente; inducta autem per mutationem ventorum è contraria plaga spirantium aëri alia constitutione, protinus sudores resiccantur & cohibeantur, urina quoque largior & tenuior sece-

dat, corpusque longe agilius, somnus quietior, animus ad labores magis dispositus & erectior reddatur. Ex quo satis clare intelligitur, tam insignem atque conspicuam esse fluidi aërei & ætherei ad mutandos excretorios in corpore motus potentiam, ut supervacaneum & sterile molimen foret, ad occultum quoddam & vere imaginarium principium motus in corpore, in explicandis hisce phænomenis, tanquam ad asylum confugere.

§. XXIX.

Hæc autem materia, quæ per subcutaneos tubulos ex intimis corporis penetralibus foras amandatur, quod valde sulphureæ naturæ, & cutis præcipuum sulphuris excrementitii, haud secus quam renes salini excrementi, sit emunctorium, plura evincunt. Etenim sudor peculiarem & odorem, & colorem, & pinguedinosam quoque substantiam, quæ phænomena, secundum Chymicorum doctrinam, principii sulphurei soboles sunt, exhibere solet. Et mirum certe, quam eximie effluvia, quæ è corpore halant, immo etiam ipse sudor, pro ratione ætatum, temperamentorum & ingestorum, differant. Nimirum qui allio & cepis frequenter utuntur, inficetum dispergunt odorem, contra vero quibus suaveolentia balsamica, item moschus & ambra, in frequentiori usu, gratum spirant. Sic etiam odor sudoris ratione anni tempestatum discrepat, ac æstate potissimum acidum, sæpe instar aceti vini penetrantis, redolet. Peculiarem quoque sudor in nonnullis morbis & specificum quasi obtinet nidorem, ut in scabie, lue venerea, variolis, morbillis & maxime omnium purpura, adeo ut vel solo odore, ægotantes ejus præsentiam dignoscere queant. Quod quidem quemadmodum de odore in propatulo est, ita pariter observationibus constat, quod sudor indusia vario colore tingere soleat. Placet in hujus confirmationem quædam in *Miscellaneis naturæ curiosorum* consignata recensere exempla, dum *Dec. I. An. VI. pag. 20.* atrii, *Dec. II. An. III. pag. 83.* sub axillis miniati, *An. IV. pag. 203.* cærulei, *An. VI. pag. 45.* cruenti, *An. IV. pag. 329.* crocei, *An. VI. pag. 5.* rubicundi, *pag. 29.* viridis, *Dec. I. An. VI. & VII. p. 110.* lutei sudoris, mentionem injiciunt.

Sudoris materia sulphureæ indolis est.

quod testatur odor

& color.

§. XXX.

Maxime omnium tamen illud notatu dignum, quod sudor non unius ejusdemque naturæ ubique è corpore manet, sed pro diversitate partium varius. Ita specifici odoris est, qui profluit ex capillitio, & peculiaris odor percipitur, quando regio pone aures digito asperius fricatur. Sub axillis graveolens sæpe offenditur ex sudore nidor, nec non inguine, item in scroto & osse sacro gravem & discrepantem spirat pædorem, qui adhuc differt ab eo, qui inter digitorum pedum interstitia prodit. Ipse quoque sudor copiosior in una, quam in altera corporis regione manat. Nam in partibus superioribus, ut capite, collo, dorso & pectore, item in posterioribus liberalius, parcius vero in inferioribus & anterioribus, erumpit. Jam quidem mirum videri posset, qui ex uno fonte & materia, sanguinis nempe sinu, tam diversus & alius sudor secedat; sed mirari desinet, qui considerabit, ita comparatam esse corporis ubique machinam, ut vel viginti, quos facile numerare liceret, diversæ indolis, qualitatis & virtutis succi utiles atque inutiles, ex una sanguinis massa, secernantur & excernantur: haud secus ac in nutritione vegetabilium, ex sola aqua

sudor quoque varius & quoad loca differens erumpit.

aqua pluviali, pinguiuscula terrestri materia foeta, diversae formae, saporis, coloris, virtutis, consistentiae germina, ut folia, cortices, flores, fructus, succi, gummata generantur ac producuntur. Quod mirabile naturae tam in regno vegetantium, quam animantium negotium, non, ut quidam somniant, spiritui peculiari architectonico, plastico, aut alii omnia moraliter & rationaliter dirigenti, vel peculiari partium virtuti attractrici, splendidis certe ignorantiae terminis, in acceptis ferendum, sed à sola diversa mechanica structura, flexura magnitudine & figura minimorum tubulorum, quae apparet maxime in glandulis, duci ac derivari debet. Neque ea propter est quod dubitemus, quin sola tubulorum structura & ductu, ita motus fluidorum dirigantur, ut crasis, mixtio & unio partium corpus constituentium mutetur ac invertatur, & ex emergente inde nova combinatione & unione partium, alius formae virtutis & qualitatis substantiae gignantur.

§. XXXI.

*Sudoris
caussa in-
testina
sanguinis
commotio.*

Jam si porro in causam sudoris & largioris & frequentioris, sive praeternaturalis, inquiremus, illa duplex merito asserenda. Prima est partium sulphurearum, quae mixtionem sanguinis ingrediuntur, intestina valde agitata commotio & evolutio, qua ipsa massa sanguinis & feri tandem in excrementitium salino-sulphureum humorem dissolvi incipit. Altera est tubulorum subcutaneorum nimia relaxatio, sub qua humores serosi facile secedunt à crassioribus sanguineis, ac sensim protrusi eliminantur. Quibus jam positis, facile apparebit ratio, quare omnia ea, quae ad intestinum partium sanguinis sulphurearum motum augendum faciunt, ad sudorem movendum aptissima sint. Horum in numerum referenda cholericæ corporis constitutio, ætas juvenilis, macilentus corporis habitus, tempus æstivum, paullo vehementior corporis motus, aer calidus-humidus australis, vini, praesertim oleosi & spirituosus, ut Hungarici, potus, & medicamenta, quae oleo subtilissimo evaporabili imbuta sunt, quo nomine nota sunt ex vegetabilibus radix enulae, petasitidis, ostruthii, levistici, angelicae, imperatoriae, crocus, flores sambuci, ex animantibus, omnes spiritus & olea destillata, ex mineralium classe flores & lac sulphuris, regulus antimonii medicinalis, sulphur antimonii, nostro modo præparatum & fixatum. Vicissim in procinctu quoque erit ratio: quare infantes, senes, obesi, humoribus repleti, otio & somno nimium indulgentes, parum ad sudorem dispositi sint, quippe qui spissos non modo & viscidos in vasis humores, qui difficilius per minimos cutis tubulos feruntur, alunt, sed imminutam partium sulphurearum in sanguine experiuntur intestinam agitationem.

§. XXXII.

*Et cutis
dispositio
laxior.*

Requiritur vero etiam ad proliciendum sudorem certa dispositio in cute, quae consistit in convenienti ejus relaxatione & pororum ac tubulorum apertione, ut sudoris materia sufficienter adduci & secerni queat. Nam si in ulla corporis parte vis expansiva & elastica eminens est, certe in ipsa cute conspicitur, quae, ut gravidæ & hydropici testantur, mirum sese diducere atque expandere, iterumque in pristinam dimensionem contrahere potest. Et elastica hæc cuti propria virtus, non aliter quam in omnibus inanimatis elasticis corporibus, ut chordis, funibus, tabulis

ligneis, comparata est, ac non modo pro diversa aeris constitutione, ut humidus & levis, remittitur, sicci vero & frigidi iterum adducitur, sed & à causis internis, fluidi tenuissimi, quod est in sanguine ac nervis, motu, varie in relaxatione & constrictione modificatur. Hinc enim est, quod in omnibus gravioribus doloribus, in affectibus spasmodicis, ira, nimio sanguinis fervore, cutis plane sicca, aspera & arida ostendatur, adeo ut facilius sit è pumice aquam, quam ex ejusmodi corpore sudorem elicere. Secus vicissim fit & facillima ad sudorem proclivitas, in declinatione paroxysmorum febrilium, spasticorum, item in imbecillitate virium à morbis restitantes, ab atmosphæra humida & calida, pluviosa, balneo vaporoso, vel à medicamentis quae dolores ac spasmos sistunt ac sedant, ut nitrosis papaveraceis assumtis, præsto est, eo quod hæc omnia mirifice relaxant & ampliant cutis poros ac tubulos. Quin diuturnus etiam animi mœror peculiarem hunc pariter exserit effectum, quod cutis, praesertim pedibus inductæ, tonum solvat ac remissiore reddat, ut hinc, quod sæpius observavimus, sudore largiter diffuant.

§. XXXIII.

Postquam igitur causas, viam & modum, quo cuticularis excretio perficitur, paullo curatius pervestigavimus; haud difficile nunc erit, ex sudoris natura atque eliminatione in statu morbooso & praeternaturali, praesertim febribus, ratione eventus indicium & judicium desumere. Quum vero vetustissimus artis nostrae parens *Hippocrates* passim in scriptis suis, maxime *aphorismis, prænotionibus & coacis*, multa eximia & veritati apprime consentanea præcepta & axiomata prognostica, ex sudoris natura & modo excernendi petita proposuerit: hæc in pauca conferre & sic in compendio exhibere, operæ duxi pretium. Affirmat quippe hic medicorum princeps, boni ominis sudores esse, qui circa dies criticos, ut dimidium quarti, septimum, undecimum, decimum quartum, decimum septimum, vigesimum primum erumpunt, qui porro per universum corpus, nec in una tantum parte, nec parce & interrupte, sed copiose & sufficienter manant, quos alleviatio symptomatum & virium erectio sequitur, & qui cum signis coctionis in urina, alvi secessu, vel præcedente, vel comite, succedunt. Nos maxime illos judicamus salutiferos, qui fiunt, quando pulsus præter naturam celer, vehemens, vel durus, in molliorem & sedatiorem transiit.

§. XXXIV.

Contra vero omnes sudores, qui in febribus statim in principio & extra dies criticos contingunt, symptomata non levant, sub alvo congesta, cum urina tenui sine sedimento, ac pulsu praeternaturali, nec immutato prodeunt, à docta antiquitate, cui etiam experientia firma & constans suffragatur, semper pro malis & symptomaticis merito habiti fuerunt; eo quod ingentem virium imbecillitatem, partium solidarum atoniam, mixturæ sanguineæ dissolutionem atque etiam causam morbi adhuc nobilioribus nervosis partibus firmiter insidentem produunt, & multiplici experientia constat, plures sub & in ejusmodi sudore occumbere. Infausti etiam praesagii sunt, qui tantum unam corporis partem occupant, & recte utique *Hippocrates* *sect. IV. aph. 38.* prodidit: *qua parte corporis sudor manat, morbum illius partis arguit.* Nam in morbis capitis, apoplexia,

plexia, phrenitide, affectibus soporosis, caput sæpe totum sudore diffuere, pedibus frigidis, observamus. In asthma convulsivo, catarrho suffocativo, peripneumonia, pectus multo sudore perfunditur, & plerumque omnes, qui in peripneumonia primis mox diebus citra levamen sudant, pereunt, ac sphacelosa plerumque subest inflammatio, vel in suffocativo asthma polypus absconditur. Quin id quoque observatione compertum est, quando symptomata post sudorem non levantur, plerumque subsequi recidivam, vel morbum diu extrahi. Quam in rem egregium est Martiani in comment. ad coac. testimonium: *si sudor non tollit febrem, sed hæc remanet, tunc symptomaticus est, & morbi recidiva, vel ejus longitudo expectanda.* Omnium tamen pessimi sunt frigidi, præsertim quando interiora ex inflammatione ardent; unde Hippocrates Sect. IV. aph. 37. it. in prognost. cap. 2. frigidos sudores cum febre acuta mortem indicare affirmat, in mitiori autem morbo ejus longitudinem.

§. XXXV.

Porro quotidiana docet experientia, ipso in paroxysmo & vigore febrium, item dolorum & motuum spasticorum, in gravi cephalgia, cardialgia, dolore intestinorum, colica, epilepsia, in nimia etiam feri profusione per alvum, salivam aut urinam, vel etiam nimis hæmorrhagiis, cutem aridam, siccam & frigidam esse, ac sudore penitus destitui, simul ac autem sæva hæc pathemata de vehementia remittunt, vel penitus intermittunt & morbus est in declinatione, sudor protinus ex toto corpore evocatur, id quod maxime obvium, in declinatione intermittentium. Incidit quoque sæpius, ut post febres, tam acutas, quam chronicas, curatas, ingens dispositio & habitus corporis ad continuos & largos sudores remaneat, qui etiam facili de causa, levi externo calore, vel si oculos claudant & somnus obrepat, provocantur. Causa hujus largæ sudationis vel ex regimine in sudoribus criticis minus curate ab ægris servata repetenda est, vel quod nimis cito auræ frigidiori se committant, ut remanens intus excrementitia quæ sudore diffatur materia, mixtionem sanguinis ad dissolutionem quendam motum disponat, vel etiam quod superato morbo avidius & largius cibum ingerant, qui ob imbecilliorē à morbo redditam digestivam ventriculi & intestinorum vim, non bene solvitur & subigitur, unde copiosus & crudus chylus sanguini affusus, non bene cum eo miscetur, sed quam facile per emunctoria ab eo secedit.

§. XXXVI.

In nullo tamen morbo profusiores manant sudores, quam in purpura, sive rubra scorbutica, sive alba cum febre juncta; certo indicio, à fermentali quodam impuro succo totam sanguinis & humorum massam in colliquativam dissolutionem esse conjectam. In malignis morbis, quorum causa interna partium sphacelatio, cum summa virium jactura, sub pulsu sæpe debili & minus frequenti, urina quoque non adeo colorata, sed sanorum simili, manant sudores copiosi, foetidi, sæpe frigidi, & lethales, qui de putrida sanguinis resolutione testimonium exhibent. Solennes quoque sunt hæcticis & ubi partes nobiliores abscessum vel ulcus alunt, copiosi & valde debilitantes sudores, qui in scholis medicis colliquativi vocantur, & idemtidem à materia purulenta corrupta, quæ sanguinem in intestinum

fermentativum motum ciet, proficiuntur. In scorbuticis quando ex hepatis vitio & sub deficiente biliosarum partium separatione, lymphæ multis sulphureis excrementitiis scatet partibus, sudores etiam nimii valde molestant, præsertim si alvus simul observatur.

§. XXXVII.

Et in hac quidem effusa nimis sudatione, perquam utilia deprehendi alvum laxantia ex manna, tamarindis, item serum lactis dulce, cum pulvere nitroso præcipitante datum. In aliis autem longis & largis sudoribus, quorum causa nimia cutis atonia & interna partium sulphurearum in sanguine resolutoria commotio, egregie ex usu fuerunt analeptica, cum roborantibus & leniter constringentibus, item acidula, quippe quæ non modo partium solidarum tonum ac robur firmant, sed & unionem ac mixtionem partium sanguinis vinciunt & servant, quorum classis liquor meus anodynus mineralis, spiritus salis dulcis, spiritus sic dictus regius Michaëlis, ex spiritu rosarum, salis dulcis, cum moscho, ambra & confectioe alkermes paratus, tinctura rosarum cum phlegmate vitrioli acidulato confecta, saccharum rosaceum, tinctura coralliorum, vel earum solutio cum succo citri facta, ducunt. Alii eundem in finem species de hyacintho valde extollunt, quarum virtus sine omni dubio ab ingredientibus, quæ sunt leniter constringentia, idem ab admixta camphora, ambra & moscho, licet horum dosis exigua sit, minime vero à sterili & effoeto gemmarum pulvere minus solubili, petenda est ac derivanda.

§. XXXVIII.

Hactenus de excretionē, quæ per urinarias vias & universale cutis emunctorium succedit, indole & promendo inde iudicio egimus: superest jam, ut etiam de ea, quæ per alvi secessum contingit, nonnulla addamus. Quemadmodum autem per urinam maxima & superflua liquidi ex potu portio, una cum salinis crassioris texturæ partibus, secedit, & per cuticularem evacuationem salino-sulphuræ, intestino calido motu ex intima sanguinis mixtione evolutæ fordes, profcribuntur: ita per alvum non modo relictæ post chylum ex alimentis extractum fœculentiæ & fursures, sed & crassiores sulphuræ biliosæ, in amplissimo hepatis viscere segregatæ ac per peculiare canales intestinæ insinuatæ scoræ, una cum lymphaticis fermentalibus, ex pancreate, glandulis & tunicis glandulosis intestinorum stillantibus succis, foras ejiciuntur; eum pariter in finem, quo reliqui vitales corporis humores à sordibus pernicialibus repurgentur, nec unquam à temperata ad integritatem necessaria indole desciscant.

§. XXXIX.

Non quidem negandum, eam alvinæ excretionis esse rationem, ut interceptus ejusdem legitimus naturalis successus, non tam præsentaneo damno sanitatem afficiat, quam si perspiratio aut urinæ fluxus cohibetur, sed sæpius diu sine vitæ vel manifesto valetudinis periculo retineri potest. Quia enim sanguinis massa per cutis tubulos, & maxime renale cribrum, à recrementis salinis & sulphureis liberaliter depuratur, his rite & sufficienter secedentibus, non illico noxa metuenda, licet fæces crassiores aliquandiu in longo & amplo intestinorum tractu moram nectant, modo tonus hujus canalæ non adeo sit labefactatus,

scorbuticis.

Quomodo resiccandus.

Alvinæ excretio ad conservationem corporis necessaria.

Licet aliquandiu sine noxa supprimi possit.

ut flatibus cedat, sed iisdem elidendis ac demum scybalis egerendis sufficiat. Et certe complura in observatis medicorum commemorantur exempla de diuturna alvi obstructione indemni, ut apud *Rhodium Cent. II. obs. 81. Mænichen obs. serv. 5.* nec non in *M. N. C. Dec. I. An. III. obs. 25. Dec. II. An. III. obs. 83.* quo etiam referenda, quæ *Listerus in comment. ad Sanctorii Medicin. static. pag. 150.* memorat, de fene quodam, octogesimo & sexto ætatis anno adhuc perfecte sano, qui, licet multum cibi carnesque pariter subcrudas ingereret, a pluribus tamen annis rarissime, & nonnisi semel per hebdomadem, alvum deposuit.

§. XL.

Hinc recte
ex eadem
judicium
petendum.

Nihilominus tamen ex solennioribus ac eminentioribus excretionibus est alvina, ac non solum vitali corporis conservationi, sed etiam morborum solutioni, quæ nonnisi evacuatione absolvitur, quam maxime inservit. Quare ejusdem consideratio, utique tam ad sanum, quam morbosum corporis statum cognoscendum, ac ferendum de eo judicium, utilis admodum est atque necessaria. Potissimum tamen ex eorum quæ alvo secedunt copia, habitu & modo excernendi, medicus non tantum de alimentorum digestionis & chyli elaboratione, nec non de humoris biliosi ac pituitosi secretionis atque excretionis, verum etiam de motus intestinorum peristaltici, immo totius generis nervosi constitutione, indicia sumere ac certior reddi potest.

§. XLI.

Excrementa
alba bilis
defec-
tum indi-
cant.

Jam itaque quum feces colorem flavum naturalem ab admixta bile mutentur; his albis, vel gryseâ tantum tinctura infectis secedentibus, in proclivi est judicare: biliosi humoris in intestinis esse defectum. Hic autem defectus, vel ab obstructis, aut constrictis biliferis ductibus, ut in ictero, proficiscitur, vel ab exsuperante acidorum succorum prima in regione copia, qua bilis obtunditur ejusque color extinguitur, ortum trahit, uti obvium est in senibus, hypochondriacis, infantibus, si lac in ventriculo coalescit, omnibusque, qui paullo largius potum, multum acidi in complexu fœventem, ingerunt. Ac tum quidem candescens feces, minus fœtentes, cum doloris sensu, præsertim in recto, ac tenesmo secedunt. Quandoque etiam eandem ob causam difficilior est ac rardus alvi secessus & varia in abdomine accidunt pathemata ac tormina, inprimis tamen molesta nauseabunda circa præcordia adest sensatio, quam nostri *das Ubelseyen* appellant, quæ mane potissimum & absoluta digestionis percipitur. Ac in his quidem omnibus nullum præsentius datur remedium pulvere acidum absorbente, cum diluente & leniter carminativo vehiculo assumpto. Cessant quippe hoc facto dolores & alvus ad officium redit. Quod vero absorbentia & sic dicta præcipitantia, quo etiam referenda magnesia, nec non pulveres bezoardici terrei, sedes uti crebrioris observationis est, moveant, hæc utique subest ratio, quod alcali terreum acidis prima in regione succos imbibens, convertitur in sal neutrum, nerveas intestinorum tunicas ad excretionem sollicitans. Notabilis hanc in rem est observatio *Schelhammeri* in *M. N. C. Dec. II. An. V. p. 30.* de puero, qui convulsivis motibus simulque alvo pertinacius obstructa laborans, propinata ex aquis refrigerantibus cum absorbentibus mixtura, & purgatus est, & convaluit.

§. XLII.

Vicissim quando scybala austero, bruno, vel fusco colore infecta alvo feruntur, largius in sanguine progigni & copiosius ab eodem separari biliosas fordes, indicio est. Excluduntur autem biliosa ejusmodi excrementa solenniter tempore æstivo, quo ob vehementem calorem multum bilis generatur & ad intestina fertur. Observantur quoque in cholericæ constitutionis hominibus, nec non in iis, qui corpus crebrius motu exercent, vini ac spirituosorum potui nimis indulgent & in iram proclives sunt. Potissimum tamen in febribus biliosis, cholericis, tertiana continua & intermittente, febre quoque ardente si ve causo, fordes alvinæ multæ, bile largiter refertæ, maxime sub declinatione & perfecta morbi solutione, secedunt. Quia enim hi morbi partim ab ipsa bile stagnante & corrupta natales ducunt, partim etiam sub ipsis per motum intestinum calidum adauctum largus bilis est proventus: ratio utique patet, cur tam biliosa egerantur scybala, ac remittente demum sub declinatione febris spasmo, copiose, insigni tamen cum emolumento, prodeant, ipsumque morbum solutum haud raro indicent. Pariter in melancholia hypochondriaca, mania, cachectico morbo & hysterico malo, alvus non solum segnis est & tarda, sed fœces etiam duræ ac intensius flavo ac fusco colore, quin nigricante conspicuæ, exsolvantur, nullam plane aliam ob causam, quam quod ob acidi uberiorem in canale alimentorum proventum, adstringitur excretio, ac bilis acido commixta, ob diuturnam moram, nigredinem contrahit.

§. XLIII.

Ex eodem fonte, bilis nempe constitutione; viridescentium excrementorum origo repetenda. Sunt hæc quam maxime familiaria infantibus lactentibus & plerumque atrocibus ventris torminibus, inquit, jactatione corporis, febre, insequente crebro convulsione epileptica, stipantur. Mali igitur sunt indicia, & lac acidum factum & cum bile quasi confermentatum, viridem colorem & corrosivam indolem contraxisse, producit. Excluduntur tamen interdum etiam in adultis virides per alvum fordes, ut in passione cholericâ laborantibus, præsertim quando post vehementem iram copiosa bilis ad tenuia intestina, acidis succis referta, propellitur. Neque minus in hypochondriacis & hystericis, sæpius non solum per vomitum, sed etiam alvum, viridia, sub gravissimo pathematum spasmodicorum insultu, excernuntur. Sæpe etiam ipsa natura per biliosas & copiosas defectiones, sponte repurgat corpus à redundantibus salino-sulphureis scoriis, quæ æstate nimis fervida progenitæ, cohibita, ab aëre frigido & humido, ineunte maxime autumno, perspiratione, partim ad hepar, partim etiam ad glandulosas intestinorum tunicas relabuntur, ac demum in ipsum canalem delatæ, molesta tormina & spasmos excretorios producant. Quod si tamen acres hi succi diutius per intestina feruntur, tonus non solum eorundem nimium destruitur, sed ipse demum etiam tunicae exeduntur, ut atrophica, hæctica, tormina continua, affectus hypochondriacus flatulentus, tumores œdematosi ipseque hydrops, accedant.

Viride
cremen-
tum co-
etiam
le.

§. XLIV.

Ut color, sic quoque fœtor excrementorum bili iisdem immixtæ plerumque debetur, quæ

Fœtor ex-
crement-
um una

§. XLVII.

quæ quo parcius inest, ut albis, eo minor est nidor, eo gravior, quo largius. Quod si igitur fæces mirum foetent, aut cadaverosum plane pædorem diffiant, indicium est vel bilis copiosæ & corruptæ, vel sphacelosæ in intestinis corruptionis. Hinc quando in malignis vel dysenteria scybala foetidissima secedunt, putredinis lethiferæ ipsiusque mortis præsagium præbent. Putent tamen etiam sæpius scybala infantum à vermibus, si in putrilaginem fatiscunt, ac tum simul adsunt vagi in abdomine dolores & corporis æstus cum virium languore. Ubi vero alvus foetida non solum, sed etiam spumosa, crebra & varii coloris fertur, cum ardente dolore & contiuo ad desidendum stimulo, ut in dysenteria, humores valde acris & corrosivæ naturæ ad intestina ferri, & talem quoque rodentem ad recti glandulas amandari, haud fallax suppeditat indicium.

§. XLV.

Fæces mi-
de quid
indiciem?

Porro sæpius contingit, ut fæces admodum mucidæ, pituita crassa tenaci scatentes, exsolvantur. Ex his de imbecilli ventriculi & intesti-
norum digestrice virtute, nec non de alimentorum crudorum ac difficilioris solutionis, potus quoque minus salubris usu, iudicandum; id quod sæpius obvium est in iis, qui novissime à morbo convaluerunt & avidius cibos ingerunt, in senibus ac his, qui vitæ genus agile, cum otioso, & victum calidum, cum frigido, commutant. Quando vero major muci pellucidi, vel qui albumini ovi similis est copia, cum tenesmo ac molestissimo recti dolore excernitur, certo ut plurimum argumento est, sanguinem exitum molientem in fine recti obhærescere, ac mora in glandulis largiter deponere mucum, pressione vero dolorem cum tenesmo ciere.

§. XLVI.

cremen-
liquida
copiosa.

Nonnunquam etiam excrementa liquida prodeunt & copiosa, appetitus simul viget, corpus tamen emaciatur magis, quam increscit. Quod si contigit, exiles villosæ in intestinis tunicae ductus muco obfessos & inviscatos esse arguit, ut nonnisi tenuis & aquæa chyli portio à minus patulis osculis recipi queat, pinguis vero, gelatinosa & nutritibilis portio ingressu exclusa, fæces dilutiores & sic diarrhœam reddat chylosam. Merito quoque ab obstructione lacteorum lævitas intesti-
norum senibus familiaris repetenda, eo quod ætate ingravescente alvei minutissimorum in corpore canalium sensim angustantur, corrugantur ac concidunt, ut hinc nutritio intercitat ac multum alibilis liquidi per anum effundatur. Vicissim quando scybala durissima, instar lapidis compacta, magna cum difficultate egeruntur, haud fallaci indicio concludendum: ob mucosas intesti-
norum glandulas obstructas aut plane induratas, vel nimium calorem, excrementa ficescere, & labascente simul motu peristaltico, diutius retineri. Quin non raro ea intesti-
norum siccitas alvi-
que est durities, ut nonnisi injecto clysmate, aut sumto pharmaco, quicquam exsolvatur, quam in rem memoratu dignus casus à *Bal-
lino lib. epidemior. pag. 58.* enarratur, ubi post insuperabilem alvi siccitatem, facta sectione jejuni-
um ita angustum & cartilaginofum deprehensum est, ut vix per illud chylus deflueret. Et hinc quoque est, quod nulla medicamenta purgantia calidiora, præsertim si humidum jam deficit, excretorios in intestina hiantes ductus stringendo, alvum potius obstruant, quam solvant.

Exit præterea cum fecibus quandoque sanguis sincerus, quod, si sine torminibus exquisitis succedit, ex ani venis stillat, ubi autem dolores circa umbilicum gravissimi & crebriores dejectiones simul urgent, ex erosione ab acri humore tenuium vasis manare & dysentericum morbum adesse, testantur. Et sicuti prius plerumque pro sanitate est, ita posterius, si longius extrahitur, affectum hypochondriacum flatulentum, tormina, hydropem, tumores oedematofos, atrophiam & hæticam, ob exesas sensim intesti-
norum tunicas, inducit. Cruori quoque admixto debentur excrementa instar picis nigra, quæ cum summo virium lapsu & mirifico foetore dejiciuntur, ac de morbo sic dicto nigro documentum ferunt, præsertim si vomitus simul sanguineus accedit; eo quod sanguis post diuturnam in vasis mesaraicis stagnationem, demum in ileum tenuissima membrana obductum perrumpit, & ad crassa descendens, cum fecibus quasi confermentatus, nigrorem & foetorem ipsis conciliat. Et de ejusmodi dejectione intelligendus utique *Hippocratis aph. 21. Sect. IV. dejectiones nigrae, qualis est sanguis niger, sponte venientes, sive cum febre, sive sine febre, pessimæ; & quanto colores magis pravi fuerint plures, pejus.*

De scyba-
lis sanguis
nolentis.

& nigra.

§. XLVIII.

Præter hæc, de bilis aliorumque in intesti-
nis succorum indole, signa, alvina quoque excretio de motus peristaltici & universi nervosarum partium systematis constitutione indicium suggerit. Quemadmodum enim alvi facilis & conveniens successus, reciprocum relaxatorium & constrictorium motum in tunicis intestinalibus ordinate & æquabiliter succedere testatur: ita contra simulac hæc motio virium patitur, & nimia adest vel adstrictio, vel dilatatio, seu atonia, alvus aut supprimitur, aut effuse fluit. Nervosarum autem partium constitutio, eo certius ex alvina evacuatione cognoscitur; quo major inter has & intestina viget consensio, qua vitium ex illis ad hæc, & ex his ad illas, mutuo propagatur.

Alvi ex-
cretio de
motu inte-
stinorum
testatur.

§. XLIX.

In genere igitur tenendum: legitimum intesti-
nalis excretionis successum, illibatae sanitatis; turbatum vero, adversæ valetudinis certum esse indicem. Alvi enim torpor vel plenaria suppressio recte sentiente *Sponio aph. 27. Sect. II.* omnium conturbationem & vasorum impuritatem affert, eaque propter merito inter signa imminenti morbi refertur, eo quod sensibiles corporis partes gravius affectas esse & spasmò jam stringi subindicat. Inprimis teste eodem *Sponio l. c. aph. 28.* & per experientiam compertum est, obstructo inferiore ventre, flatus in universum corpus discurrere, ut distentis postea nimium ab iis intestinis cum ventriculo, sanguinis liber progressus impediatur, & ad alia superiora maxime loca conversus, varia, eaque gravia pathémata, cieat. Nimis effusa autem per alvum secessio indicio est, post vehementiorem sub crebriori dejectione strictionem, succedere nimiam fibrarum remissionem & laxitatem, qua fit, ut copiosior humorum affluxus eo contingat, quibus denovo spasmi ac tormina cum dejectione proritantur. Haud absimilis ratio est, quando alvus aliquandiu fluit, postea vero per aliquod tempus tensa est ac stricta; quippe quod pariter vitiosum peristalticum motum, ac intestina mox spasmò, mox atonia, detineri, arguit. Quumque adeo

In genere
mala al-
vus tarda.

nimis fluxus.

inordinata

reciproci hujus in intestinorum volumine motus conservatio, magnum conservandæ valetudinis sit præsidium, destructio autem multorum morborum & symptomatum mater; omni utique studio, in statu naturali, ea vitare decet, quæ eundem turbant ac lædunt, ut sunt inprimis ira, terror ac mœstitia, frigida potio largius sudanti corpori ingesta, omnia austera, acida, adstringentia & duræ compagis alimenta, cibi nimis pingues & flatulenti, nimius cerevisiæ, vini & spiritus vini potus, omne frigus, nimia vigiliæ & mentis fatigatio, ex medicamentis, creber usus purgantium inprimis drasticonum, opiata, mercurialia, saturnina, item acida stiprica.

§. L.

*Alvina ex-
cretio in
capitis*

Ad morbos quod attinet & judicium ex alvina egestione in iis petendum, in omnibus capitis & nervorum affectibus, propter mutuam partium nervosarum consensionem, alvus stringitur, & omnis ipsius constipatio, ingignit, fovet & exacerbat capitis & nervorum morbos. Obvium hoc est in vehementiori cephalalgia, hemi-crania, epilepsia, mania, melancholia, affectibus paralyticis, ophthalmia & auditus quoque difficultate, qui omnes morbi optime solvuntur alvi fluxu paullo diuturniori, quippe qui sedatos esse primis in viis spasmos, humores ad caput urgentes, & materiam peccantem ad inferiora descendere ibique exsolvi testatur. Hinc ex vero *Celsus lib. IV. cap. 3.* alvum fluxam superiores partes sæpe resolvere; & *Hippocrates Sect. VII. aph. 5.* dysenteriam in insania bonam esse, asserunt. In reliquis quoque chronicis passionibus spasmodicis, pathematibus nempe hypochondriacis & hystericis, alvus ut plurimum constipata pedesque frigidi observantur. Quæ ambo ubi præsto sunt, certo prædici possunt variæ ac multæ in superioribus afflictiones, ut præcordiorum anxietates constrictivæ, cardialgia, difficilis spiratio, melancholia, cephalalgia, vertigo, cordis palpitatio, ructus, digestio abolita, dolor flatulentus in hypochondriis, eo quod hæc omnia post inæqualem redditum per spasmos in inferioribus humorum cursum, eundemque ad superiora coactum, subsequuntur.

*aliisque
spasmodi-
cis morbis
qualis?*

§. LI.

*In febribus
quæ
bona vel
mala?*

Accedunt febres, de quibus pariter experientia compertum est, nullam earundem, sive sit continua, sive intermittens, inflammatoria, vel exanthematica, lymphatica, lenta aut hectica, sine prævia alvi adstrictione accedere, quæ etiam sæpius diu in morbi decursu perdurat, eundemque eo graviores reddit. Quod si vero alvus secundum naturam ferri incipit, tam quoad qualitatem, quam quantitatem, haud fallaci spe sanitatis restitutio expectanda, eo quod hoc facto, certum est, spasmos qui morbum proxime faciunt, in nervosis partibus solvi atque remittere. Quin multæ febres, præsertim putridæ & malignæ, item biliosæ, oborto justo tempore alvi fluxu solvuntur, & ex eodem, reliquis quoque concurrentibus, salutis petendum est indicium, quod pluribus in *dissert. de diarrhœa in febribus malignis salutari*, excussi. Monendum tamen, quod si in principio febrium & extra dies criticos intempestive alvus largius secedat, malum & infausti decursus præbeat indicium.

§. LII.

*Alvina
excretio
quomodo
in chroni-
cis*

Quum igitur in omnibus affectibus chronicis spasmodicis, convulsivis, hypochondriacis &

hystericis, alvus segnis, adstricta & dura admodum noxia sit: artis utique est ac prudentiæ, utilissimæ hujus excretionis successum conservare, quod tamen minime acrioribus stimulantibus perficiendum, sed potius apprime ex usu sunt salina, abstergentia, nec non absorbentia & balsamica pilulæ, quas extracta amara, resinæ temperatæ, extractum rhabarbari & aliquot grana aloes rite præparatæ ingrediuntur, unacum clysteribus emollientibus, carminativis & oleosis. In febribus autem, quia æque strictura nimia, quam laxitas, periculosa, eo magis artificii providendum, ne in alterutro delinquat, sed potius accommodata diætâ ac regimine, & congruis tam internis, quam externis præsidiis, alvinæ excretionis successum perite moderetur. Hinc ubi alvus subducenda, neutiquam drastica, acrioribus & stimulantibus utendum, sed leniora propinanda, mannata scilicet, tamarindinata, tartarea atque nitrosa, cum clysteribus lenientibus ac oleosis. Neque etiam dejectiones, licet nimia videantur, adstringentibus, opiatis & narcoticis vi sunt comprimendæ, ac potius blanda diaphoretica fixiora, mitigantia, cum aliquot granis nitri, vel uno & altero corticis chaccarillæ, nec non succino præparato, vel floribus sulphuris & dimidio grano theriacæ cælestis, omne ferunt punctum.

CAPUT XV.

*De crisi-
bus & criticis diebus in experien-
tia rationali fundatis.*

§. I.

AD prognosin medicam, sive judicium de morbis, præsertim acutis, eorumque fausto vel infausto eventu ferendum, referenda etiam doctrina de crisi-
bus, à plurimis Veterum maximi habita & passim in scriptis celebrata, à multis vero Recentioribus, quibusdam etiam Priscorum, partim in dubium vocata, partim neglecta. Primus autem omnium qui de crisi scripto mentionem fecit, est vetustissimus medicinæ antistes *Hippocrates*. Is enim serio inculcavit, septimi cuiusvis & dimidiati septeni diei, in acutis morbis medico rationem esse habendam, eo quod iisdem per sudorem maxime, alvum aut hæmorrhagiam, à natura instituantur excretiones, quarum successu absoluto, ipsæ febres demum solvantur. Et hos dies vernacula sua criticos, sive decretorios, nuncupavit, quia judicium de morbi eventu ferrent. Per crisin vero, quod vocabulum erat *κρίσις*, prisci vel noxiorum è corpore excretionem, (qui *Hesychio* & *Suida* auctore, notante *Langio lib. I. ep. 37.* τὸ κρῖν, sequestrare & veluti per cribrum aliquid excernere, denotat) intellexerunt, vel ipsam morbi solutionem criseos nomine insigniverunt, (uti effert *Hippocrates lib. I. de præception. κρίσις ἐστὶν ἀπὸ χυμῶν νέου,*) vel etiam crisin pro ipsius naturæ motu & pugna cum morbo habuerunt. Alii quoque crisin judicium medici, quod format, vel formare debet ex morbi circumstantiis de ejus eventu, esse voluerunt.

§. II.

Ut autem genuinus criseos sensus & criticorum dierum ratio eo luculentius pateant, ex his, qui multum iisdem detulerunt, maximeque *Hippocrate*, tanquam primo fonte hausta, adducemus

*bus p
dente
vend*

*ni
compe
da*

*Ad pr
sin ref
da cry*

*quid p
eam in
lexerin
veteres*

*Crisis
nario
mi sepi
rio com
tandae*

ducemus præcipua testimonia. Primum esto, quod exstat de dieb. judicat. §. 9. ita habens: judicantur febres quarta die, septima, undecima, decima quarta, decima septima & vigesima prima, quædam etiam trigesima & quadragesima. Et Sect. II. aph. 23. & 24. criseos lūcessum sic conceptis delineat verbis: acuti morbi in quatuordecim diebus judicantur, septimæ quarta index est. Alterius hebdomadis octava principium est. Consideranda vero est undecima; hæc enim quarta est secundæ hebdomadis. Deinde rursus consideranda decima septima; ipsa enim est quarta quidem à decima quarta, septima vero ab undecima. Porro lib. III. præfag. §. 7. & 8. perite monet: morbos advertere à prima die oportet, atque singulos dierum quaterniones observare; sic enim haud obscure scies, quo se conversurus sit morbus. Nam febres ardentes epidemicæ judicantur bono ordine in septem ac decem diebus. Huc etiam referenda, quæ lib. de prænot. §. 20. prodidit: placidissimæ febres & signis securissimis nitentes, quarto die desinunt, aut prius; malignissimæ vero & signis horrendissimis oborientes, quarto die aut prius occidunt. Eandem cum Hippocrate sententiam ruetur Galenus, qui integrum de diebus decretoriis concinnavit librum, in quo principes dies criticos vocat septimum, decimum quartum & vigesimum primum, ac in iisdem plures sanari, quam mori declarat.

§. III.

Septenos itaque & semiseptenos dies Veteres crisi dicarunt, quibus acutæ & continuæ febres in salutem terminentur. Ipsam vero crisin his diebus per excretionem, sudorem potissimum, alvum, vel hæmorrhagiam succedere idemdem tradiderunt, omnesque evacuationes, quæ extra criticos hos dies contingunt, pro minus salubribus, sed symptomaticis censuerunt. Et de sudore quidem perspicuis id testatur verbis Hippocrates Sect. IV. aph. 36. sic scribens: sudores febricitanti si inceperint boni, sunt tertia die & quinta, & septima, & nona, & undecima, & decima quarta, nec non decima septima & vigesima prima, porro vigesima septima & trigesima prima & trigesima quarta. Hi enim sudores morbos judicant, qui vero non sic sunt, dolorem significant, & longitudinem morbi & recidivas. Idem confirmat Galenus de dieb. decretor. qui sudores, inquit, manant diebus indicantibus, non criticis, laborem significant, & diuturnitatem morbi: nam judicatoria, non judicantia, aut sunt funesta, aut certe sinistri judicii. Ac in eodem libro de sudoribus extra periodos crimosos fluentibus sic prodidit: in sexto judicantur ægri cum difficultibus symptomatibus & periculo non mediocri, imperfecte & obscure.

§. IV.

Perficitur vero etiam solenniter crisis per sanguinis stillicidium & alvi fluxum. De utroque in procinctu sunt testimonia. Nam de hæmorrhagiis criticis egregius est locus Hippocratis lib. I. epist. §. 115. in febribus, inquit, ardentibus populariter grassantibus, quibus bene ac largiter sanguis per nares erupit, per hoc maxime servabantur, & nullum novi, qui in hac constitutione mortuus esset, si recte sanguis profluxisset. In Philisco enim, Epaminone ac Sileno, quarta ac quinta die parum de naribus stillavit, & moriebantur. Sanguis autem plurimus erupit, maxime adolescentibus & in vigore constitutis, & talium plerique perierunt, quibus sanguis non erupit;

Frid. Hoffmanni Oper. Tom. I.

senioribus vero ad morbum regium res devenit, aut alvi ipsis turbata sunt, aut dysenterici facti sunt. De salubritate autem liberalioris alvinæ in morbis excretionis passim apud Hippocratem exstant effata, ut Sect. IV. aph. 28. Sect. VI. aph. 17. Sect. VII. aph. 29. inprimis tamen huc referendum quod de febribus inculcat, dum lib. de judicat. §. 4. ardentes febres biliosæ, ait, solvuntur plerumque septimo, aut decimo-quarto die, sudore, aut alvo liberiore.

§. V.

Tam magnifice de crisi & criticis diebus senserunt Hippocrates atque Galenus, quorum tamen fidem sublestem reddere & hanc doctrinam plane in dubium vocare haud veriti sunt antiquorum medicorum nonnulli. Hos inter primus fuit Asclepiades, qui teste Cælio Aureliano lib. I. cap. 14. p. 37. asseruit: non esse in passionibus statos dies, quos crimosos appellat, nec certo aut legitimo tempore ægritudines solvi. Idem cum Asclepiade professus est Celsus lib. III. cap. 4. est, inquit, de diebus ipsis dubitatio, quoniam antiqui potissimum impares sequebantur, eosque tanquam tunc de ægris judicaretur, propriis nominabant. Id Asclepiades jure ut vanum repudiavit. Neque in ullo die, quia par imparve esset, ægris majus vel minus periculum esse dixit. Interdum enim peiores dies pares sunt. Nonnunquam etiam in ipso morbo dierum ratio mutatur, fitque gravior, qui remissior esse consueverat. Et paucis interjectis sic pergit; Verum in his quidem antiquos tunc celebres admodum Pythagorici numeri fefellerunt; cum hic quoque medicus non numerare dies debeat, sed ipsas accessiones intueri. Ex recentioribus Comes de Flisco, vanitatem criticarum periodorum adstruxit, lib. de fato perhibens: in praxi numerum hunc dierum non semper observari, & sæpius aliis etiam diebus crises fieri. Ut mittamus, quæ Helmontius lib. de tempor. it. de febrib. nec non Christianus Langius in Misc. natur. curios. & Faber in panchymagogico, contra observationem crimum in medium attulerunt.

§. VI.

Mitior hac de criticorum dierum existentia sententiam fovit ii, qui licet non penitus eosdem negent, autumant tamen, in Græcia tantum, minus in nostris regionibus, succedere crises. Hunc in sensum scribit Waldschmidius fundam. medic. pag. 113. nihil opus, nos adeo curiosos esse debere in causis crimum rimandis, quum in nostris regionibus & nostro hoc tempore, tales crises non amplius fiant, nec prædictiones nostræ in morbis acutis adeo certæ, nec indubitata fidei, prout apud Hippocratem inveniuntur. Eidem sententiæ pollicem premit Eustadius de die astrenom. in nostræ, inquit, Germaniæ regionibus, & præsertim sub nostro polo & in solo nostro, rarius crises perfectæ ad salutem veniunt. Et Hollerius comment. in aphor. Hippocr. testatur: in frigidis & borealibus regionibus rarissime expectari criticas exactas evacuationes. Neque ab his dissentire videtur Baglivus Prax. pag. 140. asserens: in Græcia perfecte succedere crises in acutis morbis; non vero ita in nostris septentrionalibus regionibus, idque adscribendum putat aëris puritati & tenuitati illius regionis & adjacentis orientis valde elastici, quum noster aër aqueis & crassis impuritatibus foedatus, humores quoque corporis magis impuros faciat, ut ad debitum criseos, sive despumationis officium, nunquam pervenire possint.

K k 2

§. VII.

Crises repudiaverunt veteres quidam & recentiores.

Nonnulli in Græcia tantum succedere putant.

Ac si cum excretionem

vel per sudorem.

Hæmorrhagiam aut alvi fluxum.

§. VII.

Quid per
experien-
tiam con-
stat de crisi

in epheme-
ra.

Synocha,

causa,

tertiana.

catarrha-
libus.

In hisce tam diversis auctorum opinionibus & objectis tot difficultatibus, non expeditior ad veritatem inveniendam via, quam ipsa experientia (quæ facta ingenue sistit ac optima veritatis & ratiocinationis medicæ parens est,) ducere patet, prudenter in consilium vocatis observationibus practicis. Quare in exponenda hac crifium ratione ac natura, instituto me apprime satisfacturum confido, si, exuto omni auctoritatis præjudicio, ea, quæ per institutum, à quadraginta & quod excurrit annis, artis exercitium, mihi iterato de febrium solutione, quomodo? & an certis ac statis diebus eandem contingat? innotuerunt, candide tradam, & postea rationes adæquatatas subijciam. Scilicet frequentius observavi, febres quasdam viginti quatuor horarum spatio perfecte terminari, quas Veteres ea propter dixerunt ephemeræ. Synocham mitiorem quarto, graviolem septimo die, vel per narium stillicidium, cum proclivitate ad somnum, vel per largum sudorem cedere; ardentes vero & biliosas febres, causas dictas, nisi funestum fortiantur exitum, ut plurimum tertio vel undecimo die, liberali sudatione, plerumque cum alvi fluxu, ad finem pertingere, expertus novi. Ipsæ tertianæ sæpius intenso cum æstu aggrediuntur; circa tertium autem & quartum diem remittit insultus, ac in intermittentis typum transit. Compluries quoque & maxime anno MDCCX. Berolini observavi catarrhales & epidemicas febres cum gravibus symptomatibus ingruentes, quarta autem die solutas, excretionem facta pustulari circa nares & labia, cum sudore pruriginoso.

§. VIII.

Pleuritide
vera & pe-
ripneumo-
nia.

pleuritide
spuria &
hepatitide.
erysipela-
cea.

& pesti-
lentis febre.

In pleuritide vera & peripneumonia leviori, inter tertium & quartum diem per tussim cum levamine ejici materiam cruentam, hanc in junioribus & sensibilis naturæ septimo, in adultioribus vero & ubi inflammatio paullo profundior, demum circa decimum quartum diem, inflammationis sequi discussionem, cum largo sudore & liberali sreatu, respiratione quoque liberiori, idemtidem experientia compertum habeo; edoctus id crebrius, quum Mindæ Westphalorum, ubi morbus quasi endemius, artem primum factitarem. Pleuritidis autem spuria & hepatitidis decursus atque solutio, plerumque septimo, vel undecimo die, per sudorem, aut alvi profluvium, multoties à me annotata. Febris quoque erysipelacea, quæ sæpe cum gravibus symptomatibus, horrore, frigore, vehementi æstu, interdum etiam delirio invadit, intra diem tertium & quartum conquiescit, amandata ad summam cutim materia acri biliosa, cui nonnunquam tumor glandularum inguinalium jungitur. Qui de pestilentia vera scripserunt observatores, confirmant, febrem pestilentem nonnisi erysipelaceam malignam esse, ac in ea salutis præbere indicium, quando circa tertium, quartum, vel etiam septimum diem, in partibus carnibus carbunculi, aut in glandulis bubones, apparent.

§. IX.

Variolis
morbillis.

Vix tamen in ullo morbo tam conspicua sunt critica tempora & naturæ ordo, quam in variolis. Hæ enim eodem modo ac morbilli cum truculentis symptomatibus adoriuntur plerumque, quæ facta circa dimidiatum septimum exanthematum eruptione, una cum febre eximie remittunt, idque durat in variolis ad septimum usque,

quo succedente primum in facie, postea in pectore brachiis & manibus ac demum infimis partibus suppuratione, febris denuo accenditur sic dicta secundaria, quæ ad undecimum usque diem protrahitur, donec pustulæ, eodem ut suppurari inceperunt ordine, à suprema ad infimam corporis regionem siccentur ac demum frustulatum decidant. Et sic in salutem decurrit variolarum morbus, ubi vero vires ferendis symptomatibus non sufficiunt, nono vel undecimo die lethalis accidit catastrophe. Aliud periculosum exanthematum genus sunt petechiæ, quæ quarto, vel septimo die, in corporis cortice comparere, & prodeuntes levamen cum liberiori respirationis successu inferre solent. Tandem multiplici quoque experientia perspectum teneo: febres multas epidemice grassantes continuas putridas, petechizantes, solvi & salutarem sortiri eventum circa undecimum diem, per copiosum alvi profluvium: de quo pluribus egi in *dissertat. de diarrhæa in febribus malignis salutaris*.

§. X.

Quamvis igitur nihil dubii sit, quin in nostris etiam regionibus, in febribus præsertim acutis, septenarius dierum numerus, magnas mutationes in morbis adducat, ac eodem non modo symptomatum, sed & totius morbi cessatio, cum evacuationibus incipiat & successive absolvatur; nihilo minus tamen non semper circa septenos dies crises, sive mutationes in pejus, vel deterius, sed extra dies quoque hos decretorios, paribus scilicet, octavo, decimo & duodecimo, contingere, per experientiam constat. Potissimum in hominibus plebeiis, rusticis, simplici & populari victu fruuentibus, & qui neque inordinata vitæ ratione, neque affectuum impetu, sanguinis massam impuram reddiderunt, parum quoque medicamentis utuntur, crises cum sufficienti evacuatione perfectas fieri, idemtidem à nobis observatum est. Pariter multiplici experientia confirmatum teneo, hos, qui corpore præditi teneriori cum cute valde perspirabili, naturæ agilioris & sensibilibioris, ætate juvenes vel viri sunt, & febribus acutis, inflammatoriis & ardentibus laborant, citius crises, quibus morbus ad salutem, vel mortem, terminatur, experiri, quam ii, qui torpidiores natura, temperamento phlegmatici ac succulenti, quippe qui diutius cum morbis conflantur, protracto ad tres & longius septimanas, febrium discessu.

§. XI.

Monendum vero, quod non omnes largæ evacuationes, præsertim, quæ per cutem diebus ordinariis criticis succedunt, salutem spondeant, sed illæ tantum, quas symptomatum notabilis remissio, pulsus duri & celeris in molliorem & sedatorem mutatio, liberior & minus anxiosa respiratio, animus erectior, urina crassior consistentia cocta, corporis quies, somnus placidior, ac ut verbis Hippocratis Sect. II. aph. 13. utar, nox placidior, comitantur & consequuntur. Nam aliquot certe ipsis criticis diebus, sub largis sudoribus occumbere vidi. Neque etiam omnis pathematum remissio, quæ sæpe etiam diebus paribus accidit, crisis censenda, sed ea tantum, cui arteriarum motu magis naturali & respiratione liberiore facta, evacuationes aut junguntur, aut postea accedunt.

§. XII.

Et certe præclare monet Galenus lib. I. de *In crisi dieb. decret.* quod crisin cognituro noscenda sit ætas, sanitas,

ætas, natura, anni tempus, locus & pulſuum micatio. Sicut enim hæc omnia de craſi & mixtione humorum, nec non diſpoſitione ſolidorum ad motus vegetos & promptos, aut imbecilles & tardos teſtantur: ita pro eorundem differentia, ipſæ non modo corporum naturæ variant, ſed & operationes & effectus qui in corporibus contingunt, diverſi comparent in morbis. Hinc perpetuæ fere obſervationis eſt, quod ſi ſudores largi in febribus inflammatoriis, etiam exanthematicis, ſtatim in principio & ante debi-
temporis tum eruptionis tempus manant, veletiam materia variolacea ordinario termino citius expellitur & exanthemata comparent, nec poſt eruptionem pulſus ſedatior fit, ſignum peſſimi præbeat ominis. Ego quoque frequentius annotavi; quod febres epidemice grâſſantes, ſive catarrhales, ſive rheumaticæ, ſive exanthematicæ, ſub ordinatis & conſtantibus anni conſtitutionibus prognatæ, ſtatas magis & tempeſtivas obtineant crifeſ ac ſolutiones, quam quæ præſto ſunt, ubi aëris temporum que viciffitudines præternaturales admodum præceſſerunt, quippe quæ, non tam exacte ſervant tempora, ſed difficilioris ſunt ſolutionis, quod ſcire innuit *Hippocrates* *ſect. II. aph. 8. in conſtantibus*, inquiens, *temporibus, ſi tempeſtiva reddantur, morbi conſtantes & judicatu facilimi ſunt, in inſtantibus autem inſtantes & qui difficulter judicantur.*

§. XIII.

Deinceps medentum ſagacioribus apprime cognitum eſt, ordinatos & criticos ad excretionem cum ſalute tendentes in febribus naturæ motus, imprudenti medicatione mirum turbari, perverti poſſe ac plane impediri. Egregia ſunt quæ hanc in rem affert *Proſper Martiſanus in comment. in lib. II. de morb. Hippocrat. ſect. II. pag. 174. continuo*, inquiens, *medicamentorum refrigerantium uſu propter febrem, increaſſatis humoribus corporibusque denſatis, ſpontaneæ evacuationes ſæpe prohibentur, ut hæc non ſit levis cauſſa, cur noſtris temporibus tam raro ſiant crifeſ, quæ frequentiffimæ erant antiquis.* Neque minus luculentum eſt *Baglivi* teſtimonium, qui in *prax. pag. 254. mirari deſinant*, ait, *præctici, ſi hodie nec frequentes, nec perfectæ ſuccedant crifeſ, uti olim in Græcia, ſiquidem illi Græcarum legum vel ignari, vel obtreſtatores, à principio morbi ad declinationem uſque purgantibus, diaphoreticis, phlebotomiis, ſpirituofis aliifque imprudenter & intempeſtive exhibitis medicationis, ægrotantes fere conſciunt; ideo impoſſibile eſt, ut humores per tam diverſas remediorum ſeditiones diſtracti, ad critica deſpumationis negotium ſtato tempore diſponantur, ſed aſſiduif confuſionibus agitati, loco crifeos perfectæ in me-
Crifeſ per imprudentem medicationem turbari poſſe. taſtaſes præternaturales deſinant, atque hac de cauſſa nec crifeos, nec dierum criticorum, nec aliorum demum naturæ motuum regulas ab antiquis traditas, in febribus obſervabimus.* Quapropter exquisita nititur veritate quod idem auctor *l. c. tradit*; ruſticis & qui medicorum opera non utuntur, crifeſ per ſudorem, alvi fluxus aliasque naturæ vias perfici & motu prorſus ordinato fieri.

§. XIV.

In nulla vero ut ſupra meminimus febre, tam ſolenniter obſervatur crifeos ſucceſſus, quam in exanthematica illa fere toti generi humano communi, variolarum nempe & morbillorum; interim non deſunt, qui, quod certe mirum, ſine ulla ſolida ratione illum negare audent, aut mi-
Inprimis in variolis & morbillis. Frid. Hoffmanni Oper. Tom. I.

nimum eundem minus curant, quum tam merito nobis in febribus ſit crifeſ, quando circa ſtatum quoddam tempus, cum notabili quadam evacuatione, vel etiam excretionem per cutem, ſymptomatum fit remiſſio, immo ceſſatio, cum meliori pulſu & reſpiratione, quod certe poſt eruptionem variolarum & morbillorum conſpectus obvium, licet poſtea tempore ſuppurationis nova ſecundaria febris, magis ſymptomatica, accendatur. Quare graviffimum utique in hoc morbo per imprudentem medicationem conciliatur ab ignaris damnum, dum vel nimis expellentibus & calido regimine intempeſtive inſtant, vel etiam in contrarium eruptionem cohibent nimis refrigerantibus, ut valde nitroſis, quorum alias præſtantiffimorum etiam noſtro jam tempore peſſimus paſſim invaleſcit abuſus, ut per eoſdem motus ordinatos ſalutares turbatos multoſque, qui revera potuiſſent ſervari, periſſe, obſervarim. Quin
quin omni- bus mor- bis. omnes evacuationes in morbis critica, maxime tamen per ſudorem, ſi ſupprimuntur imprudenter, vel minus ſufficienter ſuccedunt, morbi recidivas, vel pejorem priori, & ſolenniter febrem lentam invehere ſolent, de quo notandus *Hippocratis aphoriſmus 12. ſect. II.* ita habens: *quæ re-
purpura non ſervat crifeſ. linquuntur in morbis poſt judicationem, recidivam facere ſolent.* In exanthematica autem illa febre, quæ ſeculo abhinc noſtris plane incognita, jam vero admodum familiaris, in expulſione materiæ cauſticæ ad corporis corticem critica, ſtati dies non tam certo obſervantur, ſymptomata tamen, quando eadem contingit, ſemper complacantur. Neque denique in recensendis obſervatis criticis omittendum, quod nulla dies in febribus continuis & acutis, etiam exanthematicis, maxime variolis, magis fatalis ſit, quam nonus & undecimus, quorum alterutro plurimi occumbunt, utut reliqui etiam non omni careant periculo.

§. XV.

Poſtquam igitur in conſpectum ea produxi-
Critica numero ſeptenario adſcripta miſtiones. mus, quæ circa crifeſ & dies criticos in certa experientiæ veritate ipſoque facto fundata ſunt; nunc, quam nihil ſine ratione ſufficiente in rerum natura fiat, paullo curioſior incidit quaſtio: cuiam ſcilicet cauſſæ illa obſervatio, quod ſeptenario numero, tam magna, vel in melius, vel deterius fiat mutatio, tribuenda ſit? Veretes, qui-
non à principio interno. bus corporis noſtri mechanico-organica ſtructura, & rerum corporearum natura, proprietates & operationes, motuumque regulæ, plane erant incognitæ, naturæ, tanquam agentis cuidam & principio rationali omnia ſecundum ordinem, numerum, meſuram & tempus in corpore noſtro producenti adſcripſerunt, in auxilium etiam vocatis cœleſtium ſiderum, ſolis & maxime lunæ influxibus, quam Priſcorum ſententiam, plures etiam ex noſtris ſola credulitate ſequi video. Sed qui in philoſophicis erroneam per petitionem principii argumentationem norunt & nihil in rationali explicatione & deductione, niſi quod clare & diſtincte concipi, deſiniri, vel ſufficientibus argumentis probari & adſtrui poteſt, admittunt, fictiones quoque à claris & diſtinctis conceptibus, ſterilia nomina, à cauſſis realibus diſtinguere didicerunt, minime hac philoſophandi, quæ pigris, non vero ſagacioribus ingeniis accommodata admodum, ratione contenti ſunt, eo quod ex gratis ſuppoſito tali principio, nullum naturæ phænomenon commode explicari & intelligi poteſt, tantum abeſt, ut vel leviffimus uſus in applicatione ad praxin inde ſperandus.

§. XVI.

*Sed moti-
bus in cor-
pore.*

Neque enim crisis pro actu quodam mentali aut ideali, quales quidem etiam dantur in corpore, haberi potest, sed potius pro mechanico, sive certo effectu motuum, qui fiunt in corpore nostro, à causis potissimum corporeis & physicis. Nam quia omnes in rerum natura effectus & mutationes, ad quas vita, conservatio, nutritio, mors, morbus, medicamentorum operatio & sanatio spectant, nonnisi à certis motibus dependent, qui à certa rerum corporearum figura, magnitudine, nexu, situ & vi agente, resistente proveniunt, & omnes inde resultantes effectus certum etiam gradum ac numerum, sive quantitatem motuum, desiderant; necesse utique est, ut notabiles effectus certo quodam absolvantur tempore, quia hoc nihil aliud est, quam certus motuum sibi invicem succedentium ordo & numerus. Quod vero solennissimæ naturæ operationes in toto universo, & maxime microcosmo, potissimum ad septenarii numeri terminum, uti ex diversis ætatum periodis & annis climactericis, de quorum rationali explicatione egi peculiari differtatione, patet, succedant atque contingant, clarissime sapientissimi divini opificis, summam & infinitam in structura universi & præcipue corporis exhibitam artem arguit, eaque propter ordinati hi omnes septenario numero adstricti & comprehensi universales & in sacris quoque obvii effectus, longe rectius à prima, una & infinita causa, Deo, quam à multis particularibus principiis rationaliter & moraliter agentibus, deducuntur.

§. XVII.

*Et sic quæ-
que crisi-
sum in
morbis ra-
tio reddenda.*

Ut itaque clarum etiam ac verum conceptum habeamus de crisi in morbis, illa nobis nihil aliud est, quam morbi & symptomatum successiva cessatio, quæ propter ipsam universalem illum, qui in febribus omnes nervosas & vasculosas partes occupat, maxime in emunctoriis resolutum & causam quæ ipsum produxit correctam, vel expulsam, contingit. Jam quum ipsæ febres acutæ, pro causa, vel stases sanguinis & humorum inflammatorias, vel humorem quandam causticæ corrosivæ indolis, partibus nervosis inhærescentem, habeant; ad stases vero sanguinis in vasis præternaturales expediendas & materiam causticam nervis inimicam corrigendam & ab interioribus ad exteriora emovendam, certi partium solidarum motus & fluidorum appulsus requirantur: aliter sane fieri & res concipi nequit, quam ut certis etiam temporibus cessatio morbi & symptomatum sequatur atque eveniat; quam evacuationes liberaliores, remittentibus ipsaminis, per cutem, alvum, urinam, potissimum vero pullus & respiratio melior & magis naturalis, testantur. Quod si itaque hæc omnia non observantur, neque evacuationes junctæ sunt, certum indicium est, morbum, vel ejus causam, nondum per naturam, hoc est motus naturales, victam esse & subjugatam, sed ingens adhuc periculum corpori imminere, quod cum tempore semper ingravescit.

§. XVIII.

*Porismata
ex crisi
practica.*

Reddita sic crisi rationali explicatione, multo rectius nunc medicus de crisi Veterum perfecta, imperfecta, evacuatione critica salutari & symptomatica, judicare poterit atque decernere. Inde etiam ratio patebit, cur circa sic dictos criticos dies, rectissime monente Hippocrate,

nihil moveri debeat, ne motus naturæ ordinati & salutare, quibus materiam peccantem per convenientia organa ejicit, turbentur & ad alia incongrua loca non sine periculo divertantur. Denique prona quoque elucescet consequentia, evacuationes istas salutare, quibus partim materia, quæ morbum fecit, partim etiam noxii humores, qui sub ipso morbo geniti & accumulati fuerunt, excluduntur, non imprudenter cohibendas esse, ne vel recidivæ, vel lentæ febres, aut aliæ chronicæ affectiones, ingignantur, sed potius eo respiciendum, ut, si motus evacuatorii paullo segniore sint ob debilitatem virium, roborantibus & analepticis iidem adjuventur ac promoveantur.

§. XIX.

Quæ quidem omnia sicuti de febribus acutis, continuis & ardentibus in propatulo sunt: ita jam quæstio indagine haud indigna emergit: num etiam in intermittentibus febribus crises dentur? quod utique certo respectu affirmamus. Licet enim in iisdem dies certi & statim, qui etiam ad essentiam crisi non pertinent, minus obvii sint: ubi tamen solutio morbi & symptomatum successiva fit, junctis largioribus evacuationibus, ibi recte nostra sententia crisi fieri asseritur, eaque propter quum in omnibus paroxysmis febrium id eveniat, ac sub declinatione largi sudores fluant, urinæ cocta & cum sedimento appareat, non raro etiam vehementia symptomatum in tertianis per excretionem purulentam circa labia, item in quartanis per pustulas scabiosas & ulcerosas, humore quodam acri corrosivo à partibus interioribus nervosis ad exteriores propulso, mitigetur atque discedat, crises in iisdem contingere nequitum erit negandum.

§. XX.

Neque etiam in aliis chronicis morbis insolentes adeo sunt critica solutiones. Nonnulli enim morbi, quantumvis diuturni ac rebelles, ita sunt comparati, ut cum die & tempore, maxime circa diversas novas ætatis periodos, sponte solvantur ac cedant. Ac de epilepsia quidem notum, quod infanti & juniori ætati, quam maxime sit infesta, pubertatis autem tempore ac erumpente in virginibus mensium fluxu, sæpissime discedere solet. Ut adeo experientiæ respondeat aph. 28. Sect. III. Hippocratis: plurimæ affectiones pueris judicantur partim in quadraginta diebus, partim in septem mensibus, partim in septem annis, partim ad pubertatem accedentibus. Deinceps omnes dolores graviores, cephalalgia, cardialgia, atroces colici, nec non paroxysmi epileptici & spasmotico-convulsivi, crises suas servant, quibuscum complacantur. Ipse porro crebrius observavi, quod graves nervorum & capitis morbi, motus convulsivi ac epileptici, item vertigines & insanie, quin pathemata spasmodica, quæ hypochondriacam melancholiam referunt, propulsi ad corporis superficiem purpureis efflorescentiis, aut erumpentibus pustulis ulcerosis, felicissime terminentur, præsertim si medicus congrua medicina salutarem hanc crisi prosequatur ac tueatur. Nam sæpius hi morbi à caustica quadam scorbutica materia, nervosis partibus firmiter inhærescente, natales ducunt, quæ, si ad exteriores partes robore naturæ amandatur, graves istæ internarum partium affectiones conquiescunt. Sennertus quoque, Rhodius, Tulpius & Pechlinus multa consignarunt exempla, maniam, melancholiam & epilepsiam, diar-

*Crisis quæ præ-
sunt in
intermittentibus.*

*Nec non
aliis ch-
ronicis m-
bis.*

epilepsia

doloribus

*nervorum
& capitis*

diarrhoea, excretionibus cutaneis & abscessibus discessisse. Sopores profundos, vertiginem, mentis turbationem, nec non asthma convulsiva, accedente dolore podagrico, vel erumpente hæmorrhoidum fluxu, judicatos fuisse ac penitus sublato, sæpius vidi. Hydropem anasarcam, oborta spontanea diarrhoea, *Forestus lib. X. obs. 31.* & largissima narium hæmorrhagia *Hildanus Cent. I. obs. 50.* sine medicamentis subsedisse ac evanuisse, testantur. Et quæ plura hanc in rem facientia, in superioribus jam *cap. VIII. & IX.* nec non antecedente *XI. ac XII.* sparsim inferuimus.

CAPUT XVI.

De certis imminentis in morbis periculi ipsisque mortis indiciis.

§. I.

Prognosis
utilis &
necessaria.

Quamvis non negandum sit, nobilem illam de morborum decursu & maxime eventu perite judicandi scientiam, non directe ad finem artis obtinendum pertinere: nullum tamen dubium est, quin eadem utilis admodum & scitu necessaria sit, & quam maxime ad evincendam certam artis nostræ rationem ipsiusque medici existimationem servandam conferat. Nam præclare pro more suo *Hippocrates*, artis prognosticæ facile princeps, statim in limine prænotionum tradidit: *Medicum prænotionem adhiberi optimum esse mihi videtur. Prænotens enim & prædicens apud ægrotos, & præsentia, & præterita, & futura, & quæ ipsi ægroti delinquant exponens, fidem utique fecerit, quod ægrotorum res magis cognoscat; quare audebunt homines seipsum medico committere.* Idem *lib. prædict. Sect. III.* inculcat, in prædictionibus inquiring, *medici illius probe memores esse debent, quod si cui successerit prædictio, is apud ægrotum intelligentia præditum admirationi fuerit; si vero quis aberraverit, supra hoc quod odio habetur, fortasse etiam insanire videbitur.*

§. II.

Ardua tam
non &
difficilis.

Dolendum modo, excellentem hanc & divinam fere in morbis prælagendi scientiam, tam arduam, tam infidam, incertam & dubiam deprehendi, ut non immerito iudicium de morborum eventu ex vero formandum sit in difficillimis, & medici etiam periti sapissime in hoc delinquant. Nam quia Veteres non ex integris morborum historiis, sed paucis duntaxat circumstantiis, regulas prognosticas desumerunt; neutiquam certe mirum est, parum certi iisdem inesse ac easdem sæpius experientiæ non respondere. Accedit, quod, quum primi medicinæ auctores, neque vitæ, neque morborum aut mortis, in quo posita sit, naturam & rationem intellexerint, structuræ quoque corporis humani atque ex ea pendentium motuum plane ignari fuerint, ex observationibus etiam plenis veras causas & notas futuri in morbi eventus, conveniente & rationali modo elicere haud potuerint, sed potius etiam hanc artis nostræ partem empirice tantum coluerint, eaque propter symptomata, sub quibus aliquoties ægros mortuos observarant, pro funestis illico declararint, quum tamen eadem pro diversitate corporum, morborum, regionum, morbi etiam temporum, mirifice varient, ut hinc derivata prognostica præcepta rarius veritati &

experientiæ sint consentanea. Recentiorum autem quamplurimi vix alia incedunt via, & simul ac artem salutare opificii instar addidicerunt, ad ejus exercitium, minus instructi iis subsidiis quæ rationalem efficiunt medicum, properant, aut statim inter initia morbi præcipitanter nimis, antequam certas notas habere possunt, iudicium interponunt, eaque propter non possunt non in prognosi formanda graviter delinquere & falli, ut tanquam moribundum deferant, qui postea convalescit, aut vicissim vel juramento, ut novi, fidem faciant, convaliturum, qui elapsis vix aliquot horis, occumbit.

§. III.

Sed quo magis difficilis & ardua hæc prælagendi ars est, eo magis laborandum medico, quo eandem addiscat & potissimum certa ratione & experientiæ subnixæ imminentis in morbis signa, acquirat, de quo etiam non est quod desperemus. Nam illud negari nullo modo potest, omnes eventus, sive ad salutem, sive interitum referendi sint, à certis, adæquatis & proportionatis causis proficisci, nec sine his contingere posse. Quod si itaque causas, cur æger necessario ex morbo mori debeat, quis probe noscat; nullum sane est dubium, quin ex earum præsentia futurum interitum conicere possit atque prædicere. Vicissim quando artifex exacte caller, quo modo, quo tempore, quibus viis aut excretionibus morbus solvatur & æger ad sanitatem traducatur: ex his utique confidenter & cum certa ratione de salute futura iudicium promere poterit. Proinde quum in superioribus, & maxime capite quarto, genealogiam causarum, quæ sanitatem immediate pervertunt, & proxime antecedentibus ea, quæ de cognoscenda morborum ex variis signis solutione, scitu necessaria, solide & rationali modo exposuerimus: expedita jam via est, ad eruenda ac sistenda futuri in morbis vitæ discriminis signa atque indicia, quibus tuto in edendo prælagio inniti queat artifex.

Addiscenda tamen
ex certis
signis.

Institui
ratio.

§. IV.

Quod igitur ad morbos acutos, sive febres, attinet, ex antecedentibus ut notum supponimus, in quavis harum duplicem obvium esse motum, probe invicem discernendum, alterum summe perniciosam & vere morbosum spasticum, qui à circumferentia ad centrum tendit, alterum salutarem, post spasmus à centro ad circumferentiam directum, cujus beneficio exitiales illæ spasticæ partium stricturæ laxantur, inflammatoriæ stases discutuntur & tubuli excretorii, stricti antea & clausi, felicissime adaperiuntur. Jam quicumque binorum horum sibi oppositorum motuum genium, potentiam, effectus & mutuas eorum actiones & relationes penitus novit: is utique magna cum ratione & prudentia in omnibus agere, pericula prudenter prædicere & faustos eventus quam optime prænunciare poterit. Nam si infesti spasmi ac inde dependentes inflammationes, congestiones ac stases sanguinis, à motu calido resolutorio febrili, certo interposito tempore, non digeruntur ac discutuntur, sed firmiter persistunt, in proclivi est judicare: demum succubituram naturam, putredinem insequuturam ipsamque mortem certo futuram; id quod eo magis metuendum, quando spasticæ stricturæ circa dies criticos, corpore à morbo jam debili reddito, non conquiescunt, sed potius incrementa sumunt.

De indicibus
periculi in
acutis, sive
febris.

in genere

§. V.

Indicia ex

spasmo cutis.

excretoriorum.

Fibrarum cordis & tunicarum arteriarum.

nervorum pneumoniarum.

oesophagi & ventriculi.

In universo nervoso genere.

Ut autem lethiferi spasmodorum effectus eo clarius innotescant, breviter strictimque indicia exponemus haud fallacia, è quibus de illorum præsentia ac vehementiæ gradu conjiciendum. Tenendum igitur: exitiales has spasmodicas stricturas, non unam sed plures in corpore, cum majori, vel minori discrimine, adoriri partes, eaque propter prout partes variant, variis quoque dignosci signis. Nimirum quando rigor cum frigore circa morbi vigorem observatur, vel sæpius recurrit, si corpus non æqualiter molle, sed durum, calidum & asperum est, si exanthemata retrocedunt, vel tantisper absconduntur, exteriora horrent & frigent, fonticuli quoque vel ulcera antea manantia siccantur; nihil boni portendunt, sed summum mortis periculum minantur, quia propter spasmos in superficie corporis, sanguinis & humorum motus ad interiora coactus, pessimas inflammatorias congestiones facile suscitatur, & impedit, quo minus morbida materia perspiratione corpore possit expelli. Pergunt quoque in acutis spasmi plerumque ad excretoriorum emissaria, urinarios nempe tubulos & ani ostium, ut urina tenuis aquosa reddatur & alvus plane dura, tensa & occlusa sit. In quibusdam etiam, ob urgentem reciprocam stricturam, frequens meiendi & desidendi adest stimulus.

§. VI.

Longe gravius periculum imminet, si quando spastica contractiones interiores ac nobiliores, quæ motibus vitalibus vacant partes, infestant. Nam pulsus parvus, contractus, celer & durus, item inæqualis & intermittens, non aliunde, quam à spastica & convulsiva strictura nervorum, qui cordis fibris & tunicis arteriarum implantantur, proficiscitur, & semper in statu morbi plurimum periculi portendit. Eiusdem notæ respiratio crebra, anxiosa & difficilis est, ubi in critica tempora incidit; quandoquidem sicut sapienti Hippocratis effato in prognosticis, facile spirare magni momenti est ad salutem in omnibus morbis, ita crebrior & ægra spiratio in acutis, minus fausti semper est ominis. Nervis præcordialibus spasmo affectis, summæ urgent anxietates, inquietudo corporisque jactatio, ac ægri crebrius lectum situmque mutant. Oesophagi & ventriculi membranae nerveo-musculares quum stringuntur, vomendi adest conatus, potus regurgitat, non infrequenter è faucibus limpidum serum stillat, deglutitio difficulter perficitur ac inexhausta sitis, cum oris & linguæ ariditate affligit, quibus raptò in consensum simul duodeno, flavus corporis, maximeque faciei, color jungitur.

§. VII.

Ubi vero atrocior spasmi latius diffunditur ac universum nervosum genus graviter concutit atque convellit, ad ultima jam ventum esse indicio sunt nares acuminatæ, tempora collapsa, aures frigida & languida, oculi concavi, cutis circa frontem dura ac tensa, color fuscus aut perpallidus, quibus facies Hippocratica, certus mortis nuncius, describitur. Huc quoque referenda nervorum distensio, quæ semper in acutis terroris & periculi plena, juxta aph. 6. Sect. IV. ac potissimum cognoscitur, quando æger supinus cubat, genua contrahit, pronus subinde ad pedes ruit, brachia & pedes nudos exporrigit & inquietus jactitat, ungues ac digitos pallidos habet, ma-

nibus floccos legit fimbriasque diducit, vel in vicino pariete, si qua minuta eminent, carpit, quibus si demum tendinum subsultus accedunt, hora adest decretoria.

§. VIII.

Quamvis autem plurimi ex acutis morbis ex inflammatione interna primam trahant originem, eaque propter periculo non careant; sæpissime tamen in ipso vigore morbi novæ superveniunt, vel in ventriculo, vel cerebri membranarum inflammationes, quæ nunquam non gravissimi sunt discriminis ac mortis prænunciæ. Atque hæc inflammationes, si alterutra earundem, si ambæ simul adsint, non modo in malignis, petechialibus, contagio infestis & castrensibus febribus, sed & in aliis acutis, synochis, ardentibus, purpuraceis, variolis & morbillis, circa septimum, nonum vel undecimum diem accedentes, ægrum certissime perimunt. Et stomachi quidem inflammationis signa sunt, quando intensus æstus & ardoris exquisiti sensus, cum acuto circa præcordia dolore urget, & circumscripta ibi regio tactu durior percipitur, extrema algescunt, summa anxietas & inquietudo affligit, sique omne, quicquid vel medicamenti, vel potus assumptum, aut protinus vomitu rejicitur, aut retentum maximam creat molestiam ipsamque anxietatem adauget. Quandoque tam late inflammatio serpit, ut per oesophagum ad ipsas fauces propagetur, quæ inde ardentibus dolorificis pustulis obsidentur & viscido corrupto mucro jugiter obducuntur, ex quo mortis præsagium petendum. Periculosior hac, licet sæpius ipsi jungatur, est illa mortem brevi antecedens membranarum cerebri inflammatio, Græcis phrenitis dicta, quæ plerumque assiduam & pertinacem vigiliam impensumque capitis dolorem excipit. Hanc futuram rigor, urinæ copiosæ ac tenues, aurium tinnitus, fortis pulsatio in capitis interioribus & paucæ stillantes è naribus sanguinis guttæ nunciant: præsentem autem produnt oculi rubicundi, scintillantes & torvi, mentis alienatio, sermo inconditus, male cohærens, lacrymarum involuntarius sæpe effluxus, dentium stridor cum abolita humidi apparentia, quæ si convulsionibus demum stipantur, mortis ferunt significationem.

§. IX.

Atqui hæc sunt præcipua pathemata & signa, quæ vitam in discrimen adduci in acutis testantur, obvia maxime in iis, qui temperamento cholericis, sanguinei vel sanguineo-cholericis, ætate juvenes & viri, exquisitiori sensu præditi, ad iram proclives, habitu corporis macilenti & qui spirituosius nimium indulserunt. Secus vero evenit in his, qui succulenti & spongiosi sunt corporis, phlegmatici, ac vires vel per morbos, inedia aut diuturnam mœsticiam, vel enormes sanguinis profusiones perdididerunt. Nam hi non tam per vehementes spasmos & gravia dolorifica pathemata jugulantur, quam potius ex motuum imbecillitate atque defectu partiumque atonia mortem oppetunt, & ad stagnationes ac stases sanguinis atque humorum statim in principio in putridam corruptionem inclinant. Et licet sic dispositi ægri non sine ventriculi & cerebri membranarum inflammatione pereant: hæc tamen non tam gravibus spasmodis & symptomatibus stipatur, sed sub mitiori insultu in corruptionem concedit. Hinc quia morbus plerumque lenioribus incedit symptomatibus, sæpius medicis imponit, ut in prælagio ferendo fallantur, quum tamen ob occultam

cultam perniciem eo difficilioris sit iudicii eoque majorem foveat malignitatem. Cognoscuntur autem maligni ejusmodi morbi his indiciis: cum levi frigore & horrore accedunt, vires statim mirum prostratae sunt, pulsus languidus & frequens simulque contractus micat, in situ erecto facile animo deficient aegri, somnus nullus, perpetua tamen ad eum adest inclinatio, & si obrepit, major virium postea percipitur languor & mens ipsa emovetur, decumbentes de nullo dolore, siti, vel magna molestia conqueruntur, inquieti tamen sunt & sese jactitant, sique demum extrema algescunt ac pulsus deficere incipit, nec in carpo amplius percipitur, lethalis imminet catastropha.

§. X.

Quumque porro omnis inflammatio demum in necrosin sive sphacelosam putredinem transire soleat: noscenda quoque sunt signa, quae factum hoc esse subindicant. Ac tum quidem internus frigoris percipitur sensus, dolor acutus antea & acerbus, circa caput vel inferiores partes, subito conquiescit, mens delira quodammodo ad se redit, virium vero defectus increfcit, pulsus penitus deficit, vel valde inaequalis, angustus & intermittens est, alvus stricta laxatur & vel praeter voluntatem fertur, vultus foedus ac pallens compareret, tempora, cervix & pectus gelido sudore madent, extrema corporis frigescent, borborygmi ac sonitus in ventre exaudiuntur & liquida immissa sonitum quando descendunt emittunt, *als wenn sie in einem hohlen Topf fielen.* Quae omnia si praesto sunt, mortem adesse manifesto produnt, eo quod ob sphacelum vires fumentem, partium atonia & virium lapsus adeo increfcit, ut omnis in corpore motus, & cum eo vita, expirent.

§. XI.

Sunt vero adhuc alii affectus, qui & inflammatione, & atrocioribus spasmodis perimunt, in quibus non minus instans vitae discrimen ex obviis phaenomenis conjici potest. Nimirum febris cum purpura alba, quae lymphae valde vappescens & corruptae soboles est, si in fine affociatur aliis acutis febribus, item variolis, morbillis, vel etiam in puerperio post lochia suppressa accedit, nunquam periculi expers est, ac ut plurimum per inflammationem interiorum partium, praesertim ventriculi & intestinorum, necat. Funestum autem suggerit indicium, si aestum praecordiorum summamque anxietatem internus frigoris sensus, cum pulsu parvo, debili & inaequali excipit, purpura disparet, animi defectio, mens turbata & spiratio difficilis adsunt. Eundem in censum referendae variolae, quae ubi statim primis diebus cum gravi dolore lumborum & delirio ingruunt & praemature secundo mox die exanthemata, in cute aspera instar purpurae cum maculis, comparent, ac die quinto & sexto, post plenam eruptionem pulsus non sedatior fit, sed celer micat totumque corpus pustulis obsitum est, raro quenuquam in juvenili aetate evasisse scio. Neque minus periculi metuendum, ubi circa nonum diem gravissimus ex suppuratione dolor accedit, qui sapissime omnia, quae salutis spem ostendere videntur, pervertit atque immutat. Hic enim ardente sua vehementia, universum genus nervorum spasmodis afficiens, summas parit anxietates, corporis jactationem, pustularum subfidentiam, donec respiratio difficilis, mentis turbatio, convulsio, pulsus languidus & parvus supervenientes, brevi vitam eripiant.

§. XII.

Quicumque a veneno vel validissimo emetico aut purgante sumto moriuntur, hos idem talem inflammationem sphacelosa, teste anatome practica, e medio tollit. Mortis autem praesagium serunt ardores interni & summae anxietates, pulsus valde parvus & inaequalis, vel plane deficiens, cum sudore frigido, delirio & convulsione, quam, a pharmaco purgante concitatam ipse Hippocrates Sect. VII. aph. 25. & passim alibi, mortiferam pronunciat. Qui ex dolore a calculo decedunt, in his plerumque inflammatio lethalis ventriculi & meningum supervenit. Quod si enim vomitum & acutissimum dolorem febris sequitur, cum magna anxietate & siti vehemente, postea singultus & delirium cum extremorum frigore accedit, aeger non diu amplius erit superstes. Illud vero atrocissimum dolorum in intestinis genus, quod colicae convulsivae nomine notum, saepius quoque perimit, dum intestinum rectum ob exquisitissimum saepe ex stagnante cruore doloris sensum, & inflammatione & sphacelo afficitur, sub quo ex putrescente intestino foetidissima prodeunt excrementa, pulsus frequens & debilis, cum summo virium lapsu, sequitur, & sphacelosa corruptio quandoque ad extremas partes ipsumque scrotum serpit, ut obrepente animi tandem defectione, mors ipsa succedat.

§. XIII.

In passione iliaca, ubi acutissimi infestant dolores, cum contumaci alvi constipatione & vomitu assiduo etiam male olente, accedente singultu, delirio, gelido sudore, extremorum frigore nervorumque distensione, certos adesse mortis prodromos censendum, observante id dudum Hippocrate Sect. VII. aph. 10. sic perhibente: *ab ileo vomitus, singultus, convulsio aut delirium, malum.* Cholericus morbus quando stipatur intensiori dolore & torsionibus, tam superius, quam inferius, magno impetu humores, praesertim virides, eliduntur, sitis vix extingibilis urget, facies flavescent vel pallescent & pulsus parvus & concisus deprehenditur, in ancipiti aegrum versari significant. Ubi vero articularum motus sensim gracilescit ac plane deficit, crura contrahuntur, sudor frigidus prodeit animoque linquantur aegri, inflammationem in sphacelum jam concessisse indicia confirmant. Dysenteria quoque si languentem adhuc a priori morbo corripit, raro servatur aeger, quia facilis tunc ad putridam corruptionem aditus, quam praesentem torminum acutissimorum subita remissio, exteriorum refrigeratio cum summa virium jactura indicant, futuram autem, singultus, cardialgia, praecordiorum aestus atque anxietas, pernicialis in ventriculo inflammationis signa nunciant.

§. XIV.

Accedunt signa, quae suffocationem ipsiusque mortis periculum minantur & antecedunt, conspicua in iis, qui gravibus pectoris morbis, angina, peripneumonia, empyemate, catarrho suffocativo, asthma convulsivo, thoracis hydrope detinentur ac tandem pereunt. Nam omnes hi affectus non modo liberum aeris in pulmones ingressum & ex iis egressum intercipiunt, sed & sanguinis per pulmonum vasa, ex uno in alterum cordis ventriculum, sufflaminant & tollunt, ac sic jugulant. Angina quidem, quae musculos laryngis internos occupat, & Graecis cynanche dicitur, ubi neque in cervice, neque in faucibus,

Sumto veneno aut drastico.

dolore calculi

colica convulsiva.

Passione iliaca.

cholera.

Dysenteria.

signa periculi.

in cynanche

quic-

Transitus inflammationis in sphacelum indicia.

In purpura alba,

variolis

peripneu-
monia.

quicquam vel tumoris, vel ruboris, conspicitur, exquisitissimus tamen dolor ac vehemens febris affligunt, citissime per suffocationem necat. Ac tum quidem, ut verbis utar *Lommii observat. medicinal. lib. II.* oculi vertuntur & rubent & veluti iis qui strangulantur prominent, vox impedita nihil significat & qualis catulorum est tenuis editur, os apertum hiat frigidi aëris cupidum, ex eoque spumans saliva movetur, lingua exseritur, potui datus liquor per nares remeat, ipse aeger totus inquietus est, crebro è cubili exsilit, tandem vero strangulatu atque syncope oppressus perit. Ita etiam præfocatione occidit peripneumonia, in qua si nihil plane excreatur, sed anxiosa adest spirandi difficultas & magna angustia, inquietudo, sputum intus in pectore strepit, pulsus inæqualis & intermittens ferit, alvus infirmis jam viribus sponte fertur, quod screatu operose ejicitur spumofum, modo flavum, modo cruentum est, continua simul urget vigilia, phrenitis jungitur, ægri cupidissime frigidam auram captant, proni & erecti cubant & reclinati præfocari videntur, quinto, vel ad summum septimo die, certo jugulantur.

§. XV.

Asthmate
convulsivo

Qui asthmate sic dicto convulsivo, idem tamen suffocatione pereunt. Nascitur enim hoc malum plerumque ex hydropem thoracis, dum ruptis hydatidibus, humor effusus pulmonum impedit liberam expansionem, ut nec aër ingredi, nec sanguis per eos cursum conficere queat. Oritur quoque ubi interior bronchiorum tunica, multis & magnis glandulis obsita, ita angustatur, ut nec spiritum in pulmonibus elidi, nec novum recipi patiatur. Quandoque convulsivus quidam spasmus tam fortiter bronchia concutit atque coarctat, ut ægri strangulatione misere intereant. Hinc in omnibus hisce afflictionibus summa anxietas & inquietas cum tremula spiratione, pulsus inordinatus & inæqualis, nec non sibilus ac strepitus in pectore præsto sunt, ægri crebrius locum situmque mutant & nihil nisi spumosi aut cruenti quippiam extunditur, tandemque inalgescantibus corporis extremis, syncope & suffocatione opprimuntur.

§. XVI.

Catarrho
suffocativo.

Idem contingit in catarrho sic dicto suffocativo, qui maxime senes, imbecilles atque infantes perimit, ac plerumque paralyti nervorum pneumonicorum ortum debet. Trahitur in hoc pariter summa cum difficultate & anxietate spiritus, & quia bronchiis, secedente à sanguine humore viscido seroso, repletis, nihil tamen sputi ejicitur, aër admissus strepitum & ronchum in fistulis edit, donec præcluso penitus aëre aeger suffocetur. Quod antequam evenit, pulsus aliquot sæpe ante horis intermittit, sensim gracilescit penitusque intercidit, nonnunquam etiam mentis turbatio cum extremorum frigore supervenit. Pari quoque ratione phthisici, si ob virium plenarium lapsum humor purulentus, copiosus, in exesa ampla cavitate reconditus, non eliditur, sed exspitio cessat, præcluso spiramento, exspirant, ita tamen, ut periculum & funestus eventus diu ante colligi possit, quando totum corpus tabe consumitur, assidua hæctica febris urget, genæ rubent, alvus nimis fluit, ungues pallent, pedes intumescunt, oculi concavi & nares acuminatæ apparent.

Phthisi.

Ex morbis autem chronicis eminentissime hydrops, scorbutus, cachexia, marasmus, hæctica & tabes, quorum periculum & futurus lethalis exitus pariter certis quibusdam signis potest dignosci. Scilicet qui iisdem decumbunt, lento gradu ad mortem procedunt, propter successive incrementem & latius serpentem viscerum ex humorum stagnatione & extravasatione corruptionem, quæ, quoniam nulla arte arceri aut persanari potest, certo mortem ingenerat. Indicia vero viscerum in inferiori ventre corruptorum adeoque sequuturi interitus sunt, appetitus penitus prostratus, cum fastidio etiam eorum alimentorum, quibus sani mirum delectati fuerunt. Deinde lenta febris si incrementa sumit & pulsus etiam mane post somnum celer est, nunquam non internam corruptionem produnt. Denique summus virium cum respiratione difficili lapsus, somnus valde laboriosus & plus debilitans, quam reficiens, in pessimis sunt. Hæc enim si diutius affligunt nullisque remediis mitescunt, certo mortem præfagiunt, maxime si corpora sunt senilia, vel ex morbo præcedente chronicis ejusmodi passionibus implicata.

In mor-
chronicis
ex corrup-
tione
cerum

§. XVIII.

Quod speciatim ad hydropem attinet, si is post asthma diuturnum cordisque palpitationem, vel ex induratione hepatis post quartanam sequitur, ægrum non facile servari posse, confidenter pronunciandum, sique urina pauca, turbida & rufa redditur, omen est admodum periculosum, & simul ac superiora contabescunt faciesque flavescit, mortem, aliquot menses antequam accedit, haud dubie præfagire licet, quæ etiam certissime, febre aucta & respiratione difficili reddita, sequitur. Pariter his, qui sæpius, & maxime post motum corporis & animi vehementiorem, gravem ac contumacem cordis palpitationem sentiunt, ac postea asthma convulsivum, hæmoptysin, aut hydropem incurrunt, diu mortiferum discrimen prædici potest. Nam horum omnium causa polyposa in cordis vasis concretio est, quæ nulla ope submovenda, tandemque concursantibus aliis causis, funestum ingenerat morbum, cujus periculum eo certius & gravius, si subito & sine manifesta causa sæpe anima deficit, quod certissimam reddit polypi suspicionem, qui repentinam mortem inferre solet, confirman- te id jam *Hippocrate, Sect. II. aph. 41.* quisquis sæpe multumque sine causa animo linquitur, is subito mori consuevit.

Speciatim
hydropem

§. XIX.

In cachexia quando totum corpus intumescit ac pallidum fit, ciborum fastidium adest & crebrior male olens vomitus urget, per alvum pauca feruntur, urina cruda & pauca secedit, spiritus difficulter trahitur, & è corpore adversus odor spirat, accedente postremo pulsu frequenti, mortem aliquot mensibus ante prænunciare licebit, quæ eo certius insequitur, quo ægrotans majora in victu nimioque potu errata admisit, vel diuturna animi moestitia fatigatus fuit. Hepar amplissimum illud abdominis viscus, ubi mortifera corruptio occupat, fastidium cibi adest, maximeque carniū nausea, frequens & multa urit sitis, febris urget, vires prosternuntur, singultus quassat subinde diaphragma, vomitu quoque excutitur serum vel flava bilis, ipsumque corpus tabe penitus sensim macrescit, & sæpissime certe

Cachexia

corruptio
hepatis

& stomachi exulceratione. in pathematibus defunctis, jecur sphacelolum plane nigrum sectione deprehendi. Pariter ventriculi exulceratio longum & lethalem adducit morbum, & cognoscitur, quum summa anxietas & vomitus cibum assumptum excipit, quæ oblata acri salina aut spirituosâ medicina augetur, corpus interim contabescit, pulsus celer jugiter vibrat, extrema rigent & quandoque horrent, fonticuli siccescunt & ad cicatricem ducuntur, somnus accisus est & laboriosus. Et his feralibus qui detinentur passionibus, tertio vel quarto plerumque post mense expirant, ac diu ante mortis signa circumferunt.

§. XX.

Cancro exulcerato.

retrocedente erysipelate &c.

carbunculis

nimiis hæmorrhagiis.

Cancro exulcerato nemo facile servatur, propter summam corruptionem, quam sanies nigra, tenuis, odore abominabilis prodit, & lenta febris cum virium defectu, somno anxio, laborioso vel nullo comitatur, donec ultimo animi defectio & mors sequatur. Porro accidit interdum, ut inflammationes in exterioribus partibus consistentes, cujus generis sunt erysipelata, podagra & chiragra, retrocedant ad interiora & cito vitam eripiant, non alia ratione, quam inflammatione & sphacelatione ventriculi, aut intestinorum. Majus discrimen est, si in peste carbunculi vel bubones interiora repetentes disparent, vel non rite prodeunt. Hoc enim si contigerit, horrore æger concutitur, summa anxietate & inquietudine affligitur, æstus cum exteriorum refrigeratione regioni ventriculi insidet, ad vomendum est conatus, vel etiam singultus accedit, donec ultimo sub mentis turbatione & syncope, æger animetur. Qui ex nimia sanguinis profusione, ut infelici abortu, hæmoptysi, vomitu cruento, vel morbo nigro Hippocratis, aut gravi hæmorrhagia in febribus obeunt, ex animi quidem defectione & syncope pereunt, notabile tamen est, quod plerumque vehemens fitis, inclinatio ad vomitum & pulsus cum debilitate frequentia, nec non artuum distensio, præcedant, indicio, sanguinem in partibus interioribus, ventriculo & capite subsistentem, quosdam adhuc movere spasmos.

§. XXI.

Parturientibus.

Supersunt signa mali ominis in-partu ac puerperio, quibus plures foeminae discedunt. Nimirum quando mulieres vel ob incongruum foetus, præsertim grandioris, situm, continuis spasmis, doloribus ac laboribus per aliquot dies assiduis, junctis simul ardoribus internis vehementissimis, quos pulsum celeritas arguit, defatigatae sunt, accidit sæpius, ut parturientes, vel partu brevi defunctæ, dejectis repente viribus, in forte animi deliquium, vel affectum apoplexiæ similem incidant, nullaque arte vel ope vires & vitam recipere possint. Hic autem affectus, ubi aliquot horas perdurat, nec penetrantissima medicina, qualis est spiritus salis ammoniaci cum calce viva paratus & oleo rutæ essentificatus, naribus intrusa, anima revocari potest, lethi signum est. Si facies sub syncoptica hac affectione colorata manet, sanguinem ex vehementioribus spasmis impetuosè ad cerebrum coactum, hoc, apoplectico per omnia simile malum, produxisse subindicat, ac plerumque post obitum ex ore & naribus ferum sanguineum foetidum effluit. Sæpius etiam evenit, ut foetus, expirante sub partu matre, post mortem demum, ob relaxatas tum vias & interiorum fermentativum motum, foras ex utero mortuus pariter propellatur.

§. XXII.

Puerperis. Quæ in puerperio decedunt foeminae, ut plurimum ex retento impuro sanguine, qui enixo partu ex utero salutariter per aliquot dies manare solet, graves primum patiuntur dolores, quos, si non excipit effusio lochialis sanguinis, sed fluxus magis obstipatur, uteri plerumque inflammatio & febris valde exitiosa sequitur. Testatum facit febrilem hunc morbum incendium ab inferioribus locis usque ad cordis regionem vergens, cui si magna anxietas, virium prostratio, inquietudo & omnis appetitus dejectio junguntur, postea sensus internus frigoris cum horrore accedit, pulsus frequens, parvus & debilis micat, visus quoque obscurari incipit, mortem ex sphacelo instare, haud dubia est significatio. Plurimæ ex puerperis integra mente obire solent, & licet hæc antea turbata fuerit, paucis tamen ante mortem horis sæpe ad se redit, ut imperitiores rem penitus in vado esse sibi persuadeant, pulsus tamen moribundus proximi interitus semper certus est index. Alia phaenomena præsto sunt in puerperis, quæ ob nimium sanguinis post partum & in puerperio profluvium, pereunt, quippe tunc lentus cum pulsu frequenti & debili calor assidue urget, neque etiam mane post somnum sedatur, juncta præterea est inappetentia viriumque plenaria dejectio, & circa exitum puerperii, hoc est sexta post hebdomade, syncoptica plerumque mors succedit.

§. XXIII.

Ac infantibus. Denique morbi, quibus infantes decedunt, ut plurimum spasmodici sunt & convulsivi, inflammationem & sphacelum, præsertim ventriculi, intestinorum, aut capitis, inducentes. In teneriori enim ætate, ob dolores ex dentitione & abdominis ex lacte corrupto tormina acutiora, facilis in epilepsiam & convulsionem, febres quoque & asthmata est lapsus. Quod si vero epilepticus paroxysmus unus alterum crebro consequitur, & alvus antea fortiter clausa, sponte jam dimittit excrementa, mirum foetida & nigra, vox simul clangosa fit ac singultuosa, totumque corpus ardet, haud dubie augurandum, imminere funestum finem.

§. XXIV.

In formanda prognosi distinguenda. Hæc itaque sunt potiora & certiora signa, quæ in varii generis morbofis afflictionibus periculum, aut plane interitum nunciant: ita tamen comparata, ut in applicatione eorundem ad prognosin, magnum judicium, curata distinctio omniumque circumstantiarum pensitatio accedere debeat; quo eventus formato ex iis judicio respondeat. Et primo quidem sollicite distinguenda sunt pathemata, in morbis spasmodicis chronicis obvia, ab iis, quæ in acutis comparent. Nam sæpissime in hypochondriacis & hysteris ejusmodi truculenta occurrunt symptomata, quæ in acutis lethalem effectum minantur, in illis vero minus periculi alunt. Et quid frequentius est? quam quod hypochondriaco & hysterico malo laborantes sub paroxysmis maximas anxietates, spirandi angustias, cum extremorum frigore & urina aquosa, pulsu existente debili & parvo, patiantur, quin plane vehemens animi deliquium persentiscant, quæ tamen omnia brevi remittunt, expirant & sine periculo transeunt.

pathemata chronicorum & acutiorum.

§. XXV.

Tempora morbi. Deinde probe discernenda sunt morborum tempora. Nam ex omnibus, quæ modo attulimus indicibus

diciis funestis, si quædam, vel etiam plura sub initio & primis morbi diebus apparuerint, præcipitanter nimis ageret, qui statim mortem instare exinde judicaret. Alia vero ratio est, quando viribus nimio calore, vigilia assidua, inappetentia, anxietate, dolore, per plures dies instante, fractis & exhaustis, funesti ejusmodi spasmi & ab iis oriunda symptomata prodeunt; maximeque iis temporibus, quibus morbus alias salutariter solvi solet. Inprimis etiam primus impetus & vehementia morbi invadentis curate expendenda; quæ, si statim in principio vires de-jicit, pulsu valde frequenter feriente, nil boni portendit, sed potius imbecillitatem ferendo morbo imparem, succorum impuritatem & ad corruptionem proclivitatem, luculenter arguit.

§. XXVI.

Corpora.

Porro exquisita etiam semper habenda est ratio corporum quæ ægrotant, & maxime perquirendum: utrum ex imbecilibus, an robustis sint? eo quod illa nunquam non in morbis magis, quam quæ robustioris & validioris sunt constitutionis, periclitantur, ac potissimum facili negotio ex doloribus vel inflammationibus sphacelo corripuntur mortifero. Imbecilibus vero ratione ætatis, senes & infantes, ratione corporis structuræ, qui repleti multisque & exilibus vasis instructi sunt, annumeramus, neque minus eos, qui à parentibus debilibus ac morboris procreati sunt, item, qui præcedente diuturno morbo, vel immodicis sanguinis profusionibus ac diuturna inedia, aut impenso animi affectu, mœstitia, cura & graviori meditatione, vires attriverunt ac consumserunt. Eundem quoque in censum referendæ puerperæ & qui ex vitio diætæ aut vitæ regiminis, nec non excretionibus suppressis, ingentem impurorum succorum copiam sibi contraxerunt.

§. XXVII.

Et causæ.

Neque tandem omittendum, quod in signorum consideratione, studiose semper attendendum sit artifici: num à causis quibusdam externis nocentibus, per iram, terrorem, corporis refrigerationem, aut cibum insalubrem, vel pharmacum vehemens & virulentæ indolis, atrociam conspicua suscitata sint symptomata? Quæ quidem in morbis per se periculosis corporibusque infirmis, in vitæ discrimen ægros adducere, vel ipsam mortem accelerare possunt; in morbo vero minus ancipiti & corpore valente, non adeo extimescenda.

CAPUT XVII.

De causis mortem in morbis gignentibus.

§. I.

Mortis
causæ co-
gnoscenda.

Quum princeps ac præcipuus salutari arti præfixus sit scopus, ut in curandis morbis quibus ad interitum facilis & ordinarius fere est transitus, corpus à morte modis defendat omnibus, idque medicus cum certa firma & fundata ratione facere debeat: necesse utique est, quo proximas & adæquatas mortis causas & quomodo eadem in & ex morbis gignantur, medentum quilibet studiose scrutetur atque pernoscat. Jam vero non melior magisque apta ad perquirendas quæ mortem in morbis inferunt causas suppetit via, quam per dissectionem corporum in morbis defun-

ctorum, qua clarissime, quid mors & quænam formalis ejus ratio, vel sensuum ministerio, palpari potest ac perspicui. Nimirum ex omnibus consignatis observationibus & historiis anatomico-practicis, planum fit atque testatum: mortem nihil aliud esse, quam sublatam penitus progressivam & vasorum motionem, quam vel canalium, præsertim circa cor & pulmones, à polyposis concrementis obturationes, vel largiores feri & sanguinis in cerebro aut nobilioribus aliis partibus extravasationes, vel succorum in partibus eminentioris usus nervoso-musculosis inflammatoriæ in sphacelofam putredinem transeuntes stases, vel etiam putridæ viscerum corruptiones, proxime gignunt & immediate produciunt. Quapropter è re utique erit, ut quæ ex his in variis morborum generibus post mortem deprehendantur causæ ex fide dignis qui instituerunt sectiones auctoribus delibemus, & ea qua fieri potest brevitate, hoc loco commemoremus; eum maxime in finem, quo medentes mortiferas has causas congruis remediis tempestive averruncare corpusque ab interitu tueri possint, nec unquam imprudenti medicatione ad earundem genesin quicquam conferant.

§. II.

Incipiemus autem à funestis capitis morbis, quorum in numero potissimum apoplexia, lethargus, epilepsia atque phrenitis sunt, & primo loco dispiciemus: cur sæpius sani & robusti, in optimo ætatis & virium vigore constituti, ex apoplexia tam repentina morte pereant? Et de hac quidem curatior eadem defunctorum anatomie clarissime confirmat, quod sanguinis vel feri extravasatio in cerebro ejus sit causa. Potissimum *Wepferus*, quo nemo majori solertia in hujus mali generationem inquisivit, in eximio de *historiis apoplecticorum* libro, testatur: se semper fere effusum ex plexu choroideo cruorem, in cerebri penetralibus reperisse. Deinde *Willisus lib. de anim. brutor. cap. IX. p. 222.* refert historiam de juvene sanguineo, plethorico & vino indulgenti, in cujus aperto capite, anterior cerebri cavitas sanguine grumoso cum feri copia impleta visa est. Et *Warthonus in adenograph. cap. 2.* fidem facit: se in iis, quos apoplexia subito abstulerat, ventriculos cerebri sanguine refertos deprehendisse. Haud dissimilis observatio legitur in *Misc. nat. curios. Dec. II. An. X. obs. 161.* dum dissecto apoplectico, multum saniosi feri ex cerebro diffluit, sinus falcatus cruore turgidus & ventriculi lympa referti, fuerunt offensi. Alius apoplexia interemtus, ut *l. c. Dec. II. An. I. obs. 154.* proditum est, in ventriculis sanguinem serosum extravasatum copiosum exhibuit, & grumos sanguinis, ovi columbini forma, nec non quartus ventriculus cum infundibulo sanguine turgidus repertus.

§. III.

Et quemadmodum apoplexia ob sanguinem vasorum alveis elapsam inducitur; ita in lethargo, paralyti & hemiplexia, quæ sæpe diuturnis cephalalgis, scorbutis aliisque gravioribus affectibus chronicis, lethali eventu superveniunt, ingens feri copia in cerebro conspicitur. Sic *Willisus l. c. pag. 155.* in cephalalgia diuturna ex lethargo demortuo, cerebri anfractus, tam exteriores, quam cavitatem internam, aqua limpida repletos offendit. Puer trium annorum, teste eodem auctore *l. c. cap. IX. pag. 225.* post ophthalmiam & faciei exanthemata soporosis fa-

qua fin
genere.Speciat
in apop
xia.Letharg
paraly
hemipl
xia.

ctus, largam copiam limpidæ aquæ sub menin-
gibus stagnantis exhibuit, cujus copia etiam ven-
triculos & thalamos opticos implevit, eodemque
comprimendo cæcitatem intulit. Ex cephalal-
gia scorbutica demortuum, ventriculos cerebri
copiosiori & acriori lymphâ tam turgidos gef-
tasse, ut uncia decem effluerint. *Misc. nat. cu-
rios. Dec. II. An. X. obs. 3.* testantur. Paralyticum
quoque sectum, vasa cerebri atro sanguine quam
maxime turgentia & ventriculos largo sero dis-
tensos ostendisse. *Pezoldus obs. 60.* auctor est.
Idem confirmat *Harderus obs. 34.* exemplo paraly-
tici à longo tempore cachectici, quo post mortem
secto, versus ventriculos & prope basin cerebri
ac cerebellum, exundans serum occurrit, poly-
pus quoque oblongus ex eodem loco extractus est.

§. IV.

*Epilepsia
& phreni-
tie.* Ex epileptico malo qui intereunt, in capite
vasa plerumque cruore turgida obtinent, & se-
rum quod à sanguine secessit in inferiore cerebri
parte stagnans. Idem fit, quando quis ex phre-
nitide moritur, cui etiam funesta epilepsia ordi-
nario solet supervenire. Confirmat hoc *Harde-
rus obs. 34.* casu epileptici quatuordecim anno-
rum, qui sanguine diducta habuit cerebri vasa,
protuberantibus instar vesicæ aquæ repletæ ante-
rioribus ventriculis, è quibus facta incisione, ichor
copiosissime profluxit, qui in tertia & quarta ca-
vitate non minori quantitate delituit. Eandem in-
rem facit observatio *Willisi lib. de morb. convuls.*
pag. 504. ubi in femina, motibus convulsivis &
epilepticis mortua, vasa meningum adeo sangui-
ne farta fuisse narrat, ut quasi tota sanguinis mas-
sa in capite aggesta visa sit, cerebri vero substan-
tia humore aquoso redundantius irrigata fuit &
ventriculi aqua limpidâ repleti. Similem historiam
idem auctor *l. c. pag. 542.* consignavit: de fe-
mina, pathematibus convulsivis & hysterice op-
pressa, cujus vasa cerebri mirum sanguine disten-
ta fuerunt, ut ejus vix quicquam in reliquo cor-
pore effluerit, cerebri cavitatibus ac recessibus
serosa colluvie plenis. Simili ratione *Petr. Pavv.*
obs. 8. commemorat, in epileptico & phrenitide
demortuo, vasa meningum sanguine atro &
adusto fuisse distenta & in cerebello putridum
humorem repertum. Et *Joh. Rhodius Cent. I. obs.*
39. in phrenitide membranas cerebri cum rubo-
re adeo tumentes invenit, ut venæ à cerebri sub-
stantia potuerint separari, in alio autem *obs. 40.*
piæ matris vasa inflammata fuisse, scripto confir-
mat.

§. V.

*Unde tam
subita
mors.* Sanguinis itaque vel feri in capite exundan-
tiam atque effusionem subito mortem inferre
testatur experientia, neque etiam ratio deficit,
cur id contingat, luculenter demonstrans. Ni-
mirum cerebrum sanctius animæ domicilium &
tenuissimi ac purissimi liquidi, quo vim, robur,
tonum ac motum fibræ & solidis corporis parti-
bus præstat, secretorium ac officinam esse, &
saniorum Veterum tulit sententia, & diligentior
Recentiorum observatio anatomica confirmat.
Nam spirituosum summæque activitatis liquorem
in vasculoso cerebri cortice fecerni, per medul-
laris substantiæ mæandros ad oblongatam medul-
lam pergere, & ex hac, nec non spinali, per ap-
pendos nervos ad subjectas partes derivari, ex eo
clarissime patet: quod constricto vel dissecto
membri cujusdam nervo, protinus ejusdem sen-
sus & motus expiret, diffracta vero vel discissa
spinali medulla, partes infra læsionem illico om-
ni sensatione ac movendi potentia priventur, &

Frid. Hoffmanni Oper. Tom. I.

cervice fracta, nec non læso vel obturato spinæ
principio, animans extemplo penitus exanime-
tur. Quumque ex oblongata in basi cerebri me-
dulla, novem illa nervorum paria oriantur, quæ
sensoriis maxime præsumt & ad præcipuas vita-
les partes cor & pulmones abeunt, in proclivi est
judicare: hac à sero vel sanguine extravasato ob-
structa, aut compressa, hunc mobilissimi nervei
liquidi influxum quam maxime intercipi, ut non
mirum sit, animam nihil amplius percipere &
cor atque arterias activo & vitali systoles motu
orbari ac ita mortem subito conciliari.

§. VI.

A morbis capitis progredimur ad eos, qui *Causa
mortis in
pectoris
morbis
plerumque
polypus.* in pectore sedem ac domicilium suum habent,
ac mortem cient, quorum in numerum referen-
di syncope, à Veteribus sic dicta cardiaca, asth-
ma & catarrhus suffocativus, peripneumonia &
phthisis. De hisce etiam experientia anatomica
edocemur, quod non alia ratione internecioni
dent hominem, quam quod liberum circuitum
& transitum sanguinis per cor & pulmones sistant
ac intercipient; id quod testatum faciunt polypo-
sæ concretiones canalium alveos obturantes, neque
minus scirrhusi tumores & corruptiones sanio-
sæ ac sphacelosæ, quæ pulmonum substantiam
in hisce vitiis infestant. Ad syncopen quod atti-
net, qua sæpius subito & præter omnem opinio-
nem plures extinguunt, immo in lecto, quem sani
firmique conscenderant, mane exanimis offendi,
non novum, sed res crebræ experientiæ est, caus-
sa tam repentinæ mortis non alia, quam viscidior
& coagulata membranacea massa, quam polypum
vocamus, & quæ prius cordis columnis & lacer-
tis, quasi radicitus implantata, tandem vi dimo-
ta, ostia majoris vasis obturans, liberum iter ac
motum sanguinis penitus intercludit, unde pro-
tinus tota sanguinis circulatio sistitur ac perit. Plu-
ra ejusmodi exempla memoriæ prodita sunt in
Boneti anat. præct. lib. I. Sect. II. Malpighii diss.
de polypo, Bergeri disp. de polypo cordis & nostrâ
de subita morte præcavenda. Inprimis etiam huc
referti meretur *Bartholini lib. de lacteis thoracis*
cap. 14. per testimonium, fidem facientis: se in iis
quos subito fato extinctos aperuerit, majora cor-
dis vasa sanguine concreto repleta invenisse. So-
lent vero polypi plerumque dextram cordis cavi-
tatem eique annexa vasa occupare & grandiores
quoque ibi delitescere, quam in sinistra, for-
tasse quia non solum redux à nutritionis & per-
spirationis negotio sanguis, multis particulis tenui-
bus liquidis, sulphureis & salinis castratus, visci-
dior est & facilius concrefcens, sed etiam à chy-
lo ex ducto thoracico affuso, facile in coagulum
filamentosum præcipitatur, quod in auriculæ fini-
bus, vel amplis dextri ventriculi columnis obhæ-
rescens, ex agglutinis viscidis præterfluentis feri
moleculis, sensim paulatimque in majorem mo-
lem excrescit.

§. VII.

Sæpius etiam polypus aliis gravibus & peri-
culosis in pectore malis sese associat & cita suffo-
catione trucidat. Nam in iis, qui asthmate &
catarrho suffocativo jugulantur, plerumque po-
lyposas in vasis cordis & pulmonum concretio-
nes repertas fuisse observationum fide constat.
Testatur id maxime *Greifelius in Misc. nat. curios.*
An. MDCLXX. obs. 74. quotquot, inquit, *ca-*
tarrho suffocativo, quo homo frequentius morte
decedit subita, mortuos aperui, in omnibus cor-
pora callosa, viscida ac glutinosa in corde depre-
bendi.

*Ut in asth-
mate &
catarrho
suffocativo.*

bendi. Sic quoque *Pezoldus obs.* 61. in asthma suffocativo & pectoris hydrope cor magnum, polypo solido repletum, cum magna in vasis atri coagulati cruoris copia, observavit. Pariter *Misc. nat. curios. Dec. II. An. X. obs.* 174. asthma ex polypo cordis & pulmonum, cum duro sinistro pulmonali lobo, descriptum tradunt. Potissimum vero notabile est, quod adduxi in dissertatione *de asthma convulsivo*, Grætzium, scilicet medicum quendam castrensem, vel quingentos milites asthma suffocatos incidisse, atque semper vel hydropem pectoris, vel polypum cordis ventriculos & vasa obsidentem, adinvenisse. Ipse non minus confirmatus asseverare possum, me, quotiescunque copia fuit asthma defunctos dissecandi, polypum in vasis pulmonum & cordis, nec non serum foetidum effusum in thoracis cavo offendisse, cujus origo merito difficiliore sanguinis cursui per pulmones debetur, unde serum per lymphatica vasa rupta exprimitur inque pectus descendit, ut hinc perpetuo fere gravi asthma junctus sit pectoris hydrope, de quo egregias observationes prodidit *Carolus Piso lib. de morbis ex feros. colluv. pag.* 217. nec non *Baglivus in Praxi pag.* 107.

§. VIII.

Peripneumonia.

In peripneumoniis non modo pulmones materia crassa & cruore repletos ac inflammatos, sed & sæpissime polyposa in vasis concretamenta deprehendi, anatome idemtidem confirmamur. Recensui tale exemplum in dissertatione *de peripneumonia* §. 10. juvenis, hoc morbo vita functi, cujus exempti pulmones admodum duri apparuerunt instar carnis, & libra examinati, quinque pondo graves fuerunt, aquæ autem injecti submersi sunt. Ipsæ vesiculæ quasi carnea crassa rubicunda substantia fuerunt infarctæ, ac difficillæ, parum putridi sanguinei ichoris, nihil vero puris, fuderunt. Aspera arteria spumosa & tenacem materiam recondidit, pulmonalis autem & arteria & vena, circa confinia cordis obseffa fuit polyposis concretionibus, quæ cordis columnis & fibris firmiter connexæ, ex hoc, auriculis, ramisque appensorum canalium extractæ, unciarum duarum pondus excefferunt. Cordis etiam ventriculi cruore crasso nigricante penitus fuerunt constipati, & in pericardio sex ad minimum cochlearia aquæ, instar loturæ carnis, comparuerunt.

§. IX.

Hæmoptysi.

Rara quidem sunt exempla eorum, qui hæmoptysi pereunt: notavi tamen hic ante aliquot annos memorabilem ejusmodi casum. Videlicet virginem octodecim annorum, teneræ constitutionis, ex mensium obstructione diu respirandi difficultate pressam. Inopinato enormis sanguinis profusio cum tussi ex pulmonibus, iteratis aliquot vicibus incessit, & tertia vice tanta copia erupit cruor, ut aliquot vasa eodem replerentur, simul quoque frusta dura, magna, carnea & faucibus protracta sunt, quæ aqua calida elota, examine instituto, nonnisi polyposa & fibrosa membranacea concretamenta fuerunt deprehensa, & ponderata, quatuor unciarum gravitatem superarunt. Quo tam immani sanguinis profluvio, omnes penitus consumptæ sunt vires, ut tertio post die honestissima virgo placide animam efflaret. Id vero ex hac singulari historia merito elicetur: polyposa hæc corpora excreta aneurismatibus, vel varicosis pulmonum vasis insedisse, unde illis disruptis, in majores bronchiorum ramos

simul apertos penetrarunt. Neque dubium est, quin gravis hæmoptysis sæpissime ex magna obstructione, à polypo vel scirrhescentia lobi cujusdam pulmonalis proveniat, unde libero sanguinis itinere impedito, ipse impetuosè ruit ad alia vasa, quæ nimium distendendo, tandem aperit funestumque ciet fluxum. Confirmat idem notabili observatione *Willisus in op. posth. Sect. I. cap. VII.* fidem faciens: totum finistrum lobum à tumore scirrhuso ita obriguissè, ut penitus constrictus & quasi lapideus apparuerit, ac plane non mirum fuerit, quod cruor per pulmones rapidissime trajiciendus, alicubi è vasis eruperit.

§. X.

Qui palpitatione cordis detinentur, eos polypus cordis plerumque interficit. Egregie hanc in rem prodidit *Baglivus Prax. med. lib. II. pag.* 229. sic scribens: *sectis cadaveribus plurimis, observavimus in cordis ventriculis polypos, aneurismata, grumos sanguinis ingentes & consimilia, inter quæ elapso quinquennio annotavimus in cadavere sexagenarii, palpitatione demortui, aneurisma ingentis magnitudinis in aorta ascendente, ubi proxime à corde exoritur, & in cavitate aneurismatis, polypum magnitudine ovi anserini.* Jam facile patebit ratio, quare palpitatio sola corporis incurvatione, vel capitis ad terram inclinatione, quoties impetit, cohiberi possit, & pro vario in latus, vel dextrum, vel finistrum, decubitu, exacerbatur aut complacetur, de quo memoratu digna observatio de juvene, qui, quoties in lecto lateri dextro incumbere, spirandi difficultate, cum suffocationis metu cordisque tremore laborabat, quæ mutato in latus finistrum decubitu, protinus cessabant. Tandem mortuus reperiatur, & dissectus ingentis magnitudinis polypum auriculæ dextræ impactum exhibebat. Observatur vero etiam in iis qui palpitatione pereunt, solenniter ingens feri copia in pericardio, testantibus id *Pisone de morb. à feros. colluv. pag.* 170. *Olao Borrichio in Act. Hafniens. pag.* 173. *Tulpio lib. IV. cap. XX. & Fernelio lib. V. pathol. cap. XI.* Neque alia hujus extravasati feri origo est, quam difficillimus sanguinis per cordis thalamos transitus, unde serum per poros auriculæ dextræ nimium dilatatos expressum, in pericardii conceptaculum descendit.

§. XI.

Accidit quoque interdum, ut quidam asthma intereant, ubi pulmonum moles amplissima & sensu integra, totam thoracis cavitatem replet. In his mortis causa quærenda est in tunica illa glandulosa, interius universum bronchiorum tractum investiente, quæ tumida, vel scirrhusa impedit, quo minus aer intrare iterumque exire possit, unde sanguinis quoque liber per vasa pulmonum circuitus intercipitur. Notavimus talem casum aliquot ante annos in Theologo primario Cizensi, qui multos per annos ex difficili respiratione laboravit, tandem quoque eadem decessit. Aperto post mortem thorace, pulmones omnem ejus cavitatem occupabant & nihil præternaturale ibi visibatur, præterquam quod multa scirrhusa tubercula & granula in ramis internis bronchiis eminerent. Huc quoque referendam censeo *Ruysschii obs. XIX.* qua casum proponit de virgine, quæ postquam per multos menses orthopncea suffocativa laborasset, extincta est, in cujus cadavere aperto culter anatomicus in parte pulmonis magnum pellucidarum vesicularum acervum detexit, quæ aere ita expansæ erant ac infartæ, ut is

ut is nonnisi validiori compressione elideretur, neque immixtus per asperam arteriam flatus ullum cum expansis hisce vesiculis habuit commercium. Similes historias idem auctor *obs. XX. & XXI.* refert, de viro ac puero dyspnœa mortuis, in quibus totum malum hæsit in obstructa pulmonis parte, cujus omnes vesiculæ oppilatae & extensæ apparuerunt. In demortuo Principe, qui orthopnœa & hæmoptysi obierat teste *Verzascha observatt. pag. 307.* pulmo stupendum in modum fuit inflatus ac universam thoracis cavitatem implevit, aspera autem arteria sanguine grumoso & florido referta, & exterior pulmonis superficies innumeris ulcusculis obfessa.

§. XII.

Phthisis.

Ex affectibus chronicis ipsa phthisi pectorali & consummata nullus facile majoris periculi est, dum hominem lento gradu omnibus viribus exuit ac demum inopinato suffocat. In defunctis culter anatomicus sequentia detegit. Primo in omnium fere, qui phthisi decedunt, pulmonibus ingentes scirrhotitates, vel dura tubercula, quæ partim pure scatent, partim instar steatomatum sebaceum concrementum recondunt, reperiuntur, de quo exempla prodita in *Misc. nat. curios. Dec. II. An. III. obs. 188. Actis Hafn. P. I. A. 1673.* nec non apud *Pezoldum obs. 64. 74. & Harderum obs. 46.* Deinde in nonnullis pulmonum lobi penitus abscessu & pure consumti, in quibusdam exsiccati nullum amplius pus fundentes visuntur, & propagines asperæ arteriæ, nec non sanguinea vasa albescunt, & à pulmonum exesa substantia, sine ulla dilaceratione, soluta cernuntur, fidem potissimum faciente *Pavv. obs. 22. & 25. Hardero obs. 51. & Bartholino Cent. V. obs. 7.* Porro nonnunquam in pericardio, item thorace, ingens feri impuri foetidi copia offenditur, id quod quamplurimis exemplis confirmatur in *Misc. nat. cur. Dec. I. An. I. obs. 15. Dec. II. An. III. obs. 199. Harderi anatom. pract. obs. 41. 45. 47. 51. & 52. Blancardi anatom. pract. pag. 189. Pezoldi obs. 74. & 92. Plateri observatt. lib. III. pag. 689.* Præterea in omnibus fere observationibus quæ anatomen phthisicorum sistunt, obvium est, quod pulmones firmissime costis itemque diaphragmati adhæreant. Tum quoque crebriori observatu constat, polyposas massas, vel cruorem coagulatum, in corde vel pulmonum vasis phthisico malo extinctorum offendi, de quo phænomeno inprimis consuli potest *Harderus obs. 45. 49. & 52. Bartholinus histor. cent. V. obs. 7.* item *Misc. nat. curios. Dec. II. An. V. obs. 65.* Denique concrementa calculosa tartarea interdum in exulceratis pulmonum sinuositatibus reperiuntur, uti constat ex *Harderi anatom. pract. obs. 45. Misc. nat. curios. Dec. II. An. IV. obs. 35. Dec. III. An. III. obs. 188.*

§. XIII.

Unde phthisis & cur necet.

Hæc autem omnia & singula in cadaveribus phthisi demortuorum conspicua phænomena, tum morbi genium & symptomatum rationem, tum interitus causam satis perspicue declarant. Nam qui prima phthiseos incunabula atque originem ex obstructis minimis pulmonalibus vasculis tumefactis ac induratis deducunt, recte, mea quidem sententia, judicant. Hæc quippe tubercula, quæ, cum vesiculas pulmonales, tum bronchiales fistulas occludunt, impediunt, quo minus aer pulmonum compagem sufficienter elevare atque distendere possit, unde intercepto libero sanguinis itinere, cum dif-

ficultate, angustia atque anxietate fit respiratio, eoque gravior, quo majorem pulmonis partem scirrhotitas occupat. Hæc quoque tubercula, & mole sua, & acrimonia lymphæ, vel purulentæ quam recondunt materiæ, nervosas bronchiorum partes perpetuo irritando, continuæ, siccae & ferinæ tussis causam subministrant. A libero vero sanguinis per pulmones præpedito circuitu, is regurgitat ad cor, quod nimium ampliando ac opprimendo, maximas anxietates, phthisicis admodum solennes, parit, ubi etiam facta nimia accumulatione, in polyposam massam successive coalescit, qua postea sanguinis iter magis adhuc per cor atque pulmones sufflaminatur, ut hinc in universo venarum systemate circulatio fiat tardissima. Quin serum secedens inque porosam partium substantiam concedens, tumores pedum & abdominis gignit, qui subinde phthisicis accidunt & mortis significationem ferunt. Idem quoque serum à sanguinis connubio dilapsum, in cordis conceptaculo hydropem pericardii ciet, ac tandem etiam perruptis lymphaticis vasis, in thoracem exundat. Frequentior vero pulmonum ad pleuram adhæsiō, fero, quod ex poris pulmonum, sub difficili transitu exprimitur, tribui debet. Hoc enim, exhalantibus partibus tenuioribus, tenax fit, quo partes conterminæ conglutinantur. Igitur quo gravior est læsio pulmonum, consumptio, scirrhotitas & obstructio, eo majus, ob difficiliorem sanguinis com meatum, suffocationis periculum imminet, qua plures phthisicorum intereunt. Ac demum phthisi perpetuo fere hæcticus calor, cum ingenti virium defectu, jungitur, qui liquido nerveo à putredine inquinato, jure est adscribendus. Quumque sub continuo hoc aestu interno succi & vires successive consumantur, lente cordis motus fatiscit, tandem exstinguitur, atque mors sine ulla turbatione mentis plerumque inexpectata & ex improvviso quasi obrepit.

§. XIV.

Ex chronicis porro malis vix ullum frequentius hydrope perimit, qui plerumque aliis gravibus affectionibus, ut asthmæ, quartanæ, cachexiæ & scorbuto supervenit. Causam mortis si inquiramus; inspectione cadaverum diligentiori, ingentem copiam feri putridi, tam in abdominis cavitare, quam sæpissime etiam in pectore & pericardio, deprehendimus, quod interiora, præsertim omentum (quod nunquam non consumtum & putridum visitur, aliaque viscera corrupta, & ipsa adeo intestina, livida ac sphacelosa reddit, confirmantibus id *Bartholino Cent. III. hist. 81. Misc. nat. cur. Dec. II. An. VII. obs. 187. it. obs. 188. Dec. III. An. III. obs. 161. Dec. I. An. IV. obs. 3. Dec. II. An. VI. obs. 73. Dec. I. An. VI. obs. 165. Pezoldo obs. 77. 88. 65. Hardero obs. 72. Petr. Pavv. obs. 5. it. 28.* Et ubi hæc feri extravasatio in hydrope decumbentibus non præsto est; ibi etiam nondum omnis spes salutis evanuit. Quod vero ut plurimum paracenthesin factam mors subsequatur, in causa est aer admissus, quo accedente, feri putrefactio multum promovetur, quæ ubi incipit, non modo omnis appetitus tollitur & quicquid virium adhuc restat consumitur, sed & calor præternaturalis, sine quo non facile hydropicus moritur, supervenit atque incenditur, qui penitus omnes vires & superflites vitales succos ita exhaurit, ut cordis musculus à motu suo vivifico in totum dejiciatur.

In hydrope vel aliis morbis superveniente.

§. XV.

Vel ex
asthmate.

Fit quoque hic morbus sæpissime ex asthmate, asthma vero ex polypo cordis, in cavitatibus ejus detento, aut minimum tumore nodoso majorum vasorum ostia coarctante, qualis etiam in hydropicis dissectis non raro in conspectum prodit, uti patet ex *cent. III. Misc. nat. cur. obs. 117. Dec. III. An. III. obs. 161. it. obs. 65. Pezoldi obs. 77.* nec non *Boneti Sepulchreto*. Neque rationem difficile est invenire, siquidem retardato sanguinis per pulmones motu, is regurgitans ad venarum systema, ibi tardius movetur atque subsistit: unde feri in partibus inferioribus, per quas semper adscensus sanguinis, quia perpendicularis, difficilis est, secessio fit magnaque collectio.

§. XVI.

Vel ex hepate.

Quin naturalis illa difficilior sanguinis in hepate, ex vase portæ venoso in venam cavam trajectio, multarum chronicarum passionum, & quam maxime hydropis, causa potentissima utique recte censetur. Nam sanguis ex hoc vase per connexos eidem canales regurgitans in pancreas, lienem, mesenterium, intestina, hæc viscera multum infarcit tumidaque reddit, & minimos glandularum ductus occludendo, hæc omnia scirrhusa ac dura efficit; quæ etiam viscerum vitia semper fere, facta inspectione, oculis sese ingerunt, multisque exemplis comprobantur à *Misc. natur. cur. Dec. III. An. III. obs. 161. Dec. II. An. VIII. obs. 100. it. An. VI. obs. 73. An. VII. obs. 187. An. I. obs. 2. An. V. obs. 73. Dec. I. An. VI. obs. 68. it. obs. 165. & 221. Hardero obs. 71. & 72. Petr. Pavv. obs. 5. & obs. 28. Pezoldo obs. 88. Bartholino Cent. III. Hist. 81. Riverio Cent. II. obs. 53. Ruyfchio in obs. 45. & 46.* Per indurata sic & obstructa vero viscera, libero sanguinis cursu præpedito, inducitur ejus stagnatio in vena portæ, & inde serum secedens ad vasa fertur lymphatica, quæ nimium distenta & à tono suo dejecta, diducuntur in hydatides, (quarum ingens sæpe copia in dissectis visitur,) quæ disruptæ, illam exitialem feri extravasationem efficiunt.

§. XVII.

Aut utriusque
vitiis.

Ratione haud dissimili hydropis origo ex sanguinis circulo per uterum, vel ob vasa, à materia polyposa aut cruore coagulato varicosa reddita, vel ob ipsius uteri substantiæ scirrhuscentiam, impeditiori facto. Nam obice sic posito, sub lentiori progressu atque stagnatione, serosus humor à vinculo discedit & copia ac impetu in vasa lymphatica confluit, eorum latera ampliat, ut interjecta valvulis spatia in hydatides abeant, quæ tandem divelluntur & contentum humorem effundunt; cujusmodi exempla passim in observatis medicis & maxime in *Misc. nat. curios. Dec. II. An. IX. obs. 99.* nec non apud *Harderum in apiario obs. 87. Vesalium lib. V. de corp. human. fabrica Cap. IX. & Mauritium Cordæum Comment. in lib. I. Hippocr. de morb. mulier.* consignata reperiuntur.

§. XVIII.

In cachectica & heptica aliis morbis supervenientibus.

Præterea sæpissime mors in cachecticis, tabidis & diuturna lenta ac heptica febre detentis, ex ingenti abscessu interno rupto natales trahit. Effusum enim foetidissimum pus, non modo viscus cui insidet penitus consumit, sed & vicinas quas tangit partes labe inficit atque corrumpit, simul quoque foetore suo tenuissimum illud fluidum, quod fibris vim motricem confert, admix-

tione sua contaminat; unde verum *Hippocratis* effatum *Sect. VII. aph. 8. ex tuberculi intus ruptione exsolutio, vomitus & animæ deliquium fit.* Occupant autem ejusmodi abscessus maxime mesenterium, hepar, uterum ac renes, ac pariter fiunt ab intercepto, propter insuperabiles obstructions & compressiones vasorum viscerumque scirrhusitates, libero sanguinis circulo, unde cruor stasin concipiens vasorum tunicas perforat, ac cavitates sibi efformans, tandem in pus foetidum convertitur. Junguntur his abscessibus teste observatione anatomica, plerumque tumores atque duri scirrhi, prout fidem facit *Paræus lib. XXIII. cap. 36.* exemplo foeminæ, cujus mesenterium penitus scirrhusum observavit, tantæ molis, ut libras decem cum dimidia pondere æquaret, adhærescentibus quamplurimis abscessibus, sua quoque cystide incluso. Pari ratione *Hildanus Cent. I. obs. 7.* meminit puellæ, cujus mesenterium tumoribus duris scirrhusis & steatomatibus refertum fuit, præcipue circa venas, quæ ad portam tendunt. Et *Coiterus observatt. anatom.* in hydropico tumorem & magnam colluviem puris foetidi, quod hepar putredine infecerat, animadvertit. Et quæ plures huc referendæ observationes memoriæ proditæ sunt in *Warthoni tr. de glandul. pag. 50. Raygeri observatt. & Misc. natur. curios. Dec. III. An. III. obs. 73. & 131.* Speciatim de iis abscessibus quæ renes & hepar occupant consuli merentur, *Misc. nat. curios. Dec. I. An. IV. obs. 114. Dec. III. An. III. obs. 72. Hildanus Cent. II. obs. 39.* nec non *Harderus obs. 76.* Frequentius tamen abscessus in musculis abdominalibus, præsertim à causa externa, residet, quo interiori rupto, mors ut plurimum sequitur, de quo digna sunt quæ evolvantur in *Misc. nat. curios. Dec. II. An. I. obs. 88. Hildano Cent. II. obs. 37. Riverio Cent. I. obs. 92.* Quod vero apostema mortem inferat, causa subest, quia febre lenta, quæ abscessus nunquam non stipat, omnes paulatim vires exhauriuntur, & tota humorum massa successive in excrementa resolvitur ac consumitur.

§. XIX.

Qui ex calculo renum & vesicæ moriuntur, hos non minus corruptio putredinosa, vitali moventi insensibilissima, necat. Nam si quando calculus in vesica vel uretere hæret, efficit, ut colatum per renale cribrum serum falsum immane quantum & ureteres & renes distendat, quæ vehementi distensione & vasorum compressione, renum substantia inflammatur atque in abscessum vel putrilaginem, qua penitus tandem exeduntur ac consumuntur, concedit. De hoc frequentissima apud observatores est mentio, è quibus adduxisse sufficiet *Misc. nat. curios. Dec. II. An. VIII. obs. 53. An. II. obs. 13. Dec. I. An. II. obs. 81. An. IV. 23. Bartholini hist. 35. Cent. III. Petr. Pavv. obs. 3. Verzaschæ obs. 2. cent. I. Fernelium de part. morb. & symptomat. lib. VI. cap. 12. pag. 316. Riolanum lib. II. cap. 29. Tulpium lib. III. observatt. cap. 6. Pancirollum Pentec. quart. obs. 31.*

§. XX.

Insuper compluries in iis, qui ex calculi tormentis & ischuria diem obierunt, ventriculi inflammationem, ex suis signis dignoscendam, nec non epilepticas convulsiones supervenientes, animadvertimus, procul omni dubio ob atrocissimos spasmos, in ventriculum, vel ipsum caput, per consensum derivatos. Nam licet in iis quas perlustravi observationibus, parum hujus phænomeni mentionem invenerim, sed sectores

Etotes plerumque reperto calculo, tanquam mortis causa, aliarum partium inspectionem supervacaneam crediderint; nullus tamen dubito, quin, si in dissectione cadaverum etiam ventriculi & intestinorum constitutio curatius investigetur, proximior ibi, maxime in senibus & debilitatis, mortis causa inflammatio nempe & sphacelatio, sit comparitura.

§. XXI.

In morbis
acutis &
malignis.

Eadem ventriculi & intestinorum inflammatio & sphacelatio, qua plerique, qui morbis acutis malignis decedunt, item ex veneno, vel validiori pharmaco, nec non peste, morbo Hungarico, dysenteria, colica vel iliaca passione, aut acuta vel omnia alia febre succumbunt, tanquam praesentissima mortis causa, in dissectionis reperitur. Etenim in nullis certe corporis partibus, inflammatio vel sphacelatio periculosior est, quam in iis, quae nervosae ac membranosae sunt texturae & exquisitiore sensu ac motu gaudent, neque minus cum universo nervorum genere consensionem alunt; cujus generis ventriculum & totum intestinorum canalem esse, vix ullus addubitabit. Venena vim suam maxime exferre in ventriculum & vicina tenuia intestina, sphacelo eadem corripiendo, sectiones & observationes passim prostantes luculenter declarant, in cujus confirmationem instar omnium allegari meretur *Wepferus*, in *tr. de cicuta aquatica*, qui plura experimenta instituit, & quae in animantibus observavit, collegit.

§. XXII.

Post frigidum potum.

Aquae aut alius liquoris frigidum potum, corpori calefacto copiose ingestum, vel brevi mortem, vel alias ad mortem tendentes afflictiones invehere, res certae, quotidianae & indubitatae experientiae est. Neque alia tam subitae ac funestae catastrophes suppetit ratio, quam quod frigidus potus celeriter ipsum sanguinem in vasis ventriculi & intestinorum coagulet ac in circulari motu sistat, unde, nisi mature discutatur, ut in sphacelum concedat, necesse est. Digna est, quae hic interferatur observatio, quam ante aliquot annos notavi. Princeps erat excelsa non minus indole, quam corporis forma gratiosissimus, sanguine & succis redundans, obesior paulo, nec tum vigesimum quintum aetatis annum egressus, qui perfecte antea sanus, quum vehementi motu corpus exaestuasset, ac postea liberalem cerevisiae frigidae haustum ingessisset, simulque frigidus & aperto aeri sese iterum exposuisset, mox de languore, horrore, calore intensiori & vigilia conqueri coepit. His succedebant atrociora pathemata, immensa quippe virium prostratio, lipothymiam erecto tantisper corpore statim minitans, pulsus languidus, inaequalis & celer micabat, conatus ad vomitum erat perfrequens, anxietas perpetua, tantopere subinde increfcens, ut non modo huc & illuc membra agiteret, sed & in uno loco diu contineri non posset, habitum exspirabat foetidum, ac die morbi septimo inter maximum suorum luctum mortem cum vita commutabat. Concedebatur sequenti die medicis facultas corpus aperiendi, eaque instituta, ventriculus totus propemodum inflammatus comparuit, ac quod rarum observatu, aliquot cochlearia foetidi & corrupti sanguinis in ejus cavo. Lien admodum fuit distentus, flaccidus, sanguine lividi coloris refertus & corruptioni tam propin-

Frid. Hoffmanni Oper. Tom. I.

quus, ut ad levem contactum ipsa substantia ejusdem dissolveretur. Totus sinister pulmonis lobus niger deprehensus est, corruptus ac foetidissimus, è quo humor putridus mirifici nidoris in thoracis cavum destillaverat, tam erodentis indolis, ut spongiam qua detergebatur, atro inficeret colore, nec inusta ei macula ullo artificio posset deleri ac elui. Vasa de reliquo sanguinea maxima ex parte inanita, ipsumque cor minoris magnitudinis offendeantur. Eundem cum gelido potu in senio confectis & viribus orbatis effectum praestare fructus refrigerantes, ut melones & persica mala, avidius devoratos, observationum medicarum fide constat. Nam notum est, quam pronus senum, quin etiam scorbuticorum & imbecillium sanguis sit in sphacelofam corruptionem, quae hinc accedente levissima saepe causa, quam facile suscitatur.

§. XXIII.

Quos pestilentia & febres malignae tollunt, in his ventriculus & intestina nunquam non sphacelata conspiciuntur: id quod etiam de omnibus ferme febribus acutis, ardentibus, cholericis, semitertianis, variolis aliisque intelligendum est. Ego certe plena testari possum fide, quod omnes eos, quos ex febre quadam acuta obiisse novi, ex inflammatione ventriculi, intestinorum, vel meningum superveniente, decessisse deprehenderim: idque non modo ex symptomatibus dijudicavi, sed & dissectionibus, quas administra- vi, & de quibus alii fidem mihi fecerunt, compertum habui. Potissimum memoratu dignus videtur casus foeminae annorum XXVI. sensibilibioris naturae, quae ex vehementi iracundia febre ardente biliosa, juncta cum crebris alvi dejectionibus, correpta fuerat. Haec quidem adhibitis congruis remediis, ex ancipiti tantisper levata videbatur, post impensam vero denuo ex ira animi commotionem, priora non solum, sed pejora etiam redibant pathemata, quae licet alvi fluxus erumperet, undecima tamen die agram jugulabant. Dissecto post mortem cadavere, totus intestini jejuni & ilei tractus, partim inflammatus, partim sphacelatus & niger cum foetore in conspectum prodit, luculento indicio, inflammationem intestinorum diarrhoeae quoque in febribus, & in sphacelum concedentem, mortis esse causam. Eandem in his morbis mortis causam testatam faciunt consignatae passim in commentariis medicis historiae, ut apud *Forestum lib. VI. obs. 13. Diemerbroccium pag. 273. Helmontium pag. 887. Bartholinum Cent. III. hist. 68. Cent. V. obs. 4. item Cent. III. ep. 92. & 29. Misc. nat. curios. Dec. III. an. III. obs. 100. Dec. I. An. VI. obs. 161. Pezoldum obs. 87. Blancardum obs. 67. nec non in dissert. quam ipse de inflammatione ventriculi, ante aliquot annos evulgavi.*

In febribus pestilentialibus & malignis.

§. XXIV.

Neque alia internectione diarrhoea vel dysenteria correpti, quam intestinorum sphacelatione, perimuntur, id quod pariter non solum signa, sed etiam sectiones manifestant. Laborant vero maxime his in morbis crassa intestina putrida ex sphacelo corruptione, multisque simul tuberculis obsidentur, fidem facientibus *Misc. nat. curios. Dec. II. An. VI. obs. 104. Aët. Hafn. P. II. obs. 17. Platero lib. III. pag. 821. Bartholino Cent. VI. hist. 2. Cent. IV. obs. 48. Eadem ratio-* colica & ileo.

Lil 3 tis, ex

ris, ex intestinorum sideratione & corruptione mors accedit, uti patet ex *Misc. nat. curios. Dec. II. An. III. obs. 65. & 193. Blancardo anat. pract. Cent. V. obs. 1. Hildano Cent. II. obs. 61. Kerkringio obs. 42. Willisio de medic. oper. pag. 28.* Idem fatum ex intestinorum sphacelosa affectione subeunt infantes, quos vermes enecant, de quo casus consignati in *Act. Hafniens. tom. II. pag. 88. & Lentilii Miscellan. medico-pract. pag. 365.*

ex vermi-
bus.

§. XXV.

In colica
quandoque
coalescunt
intestina.

Id vero adhuc notatu perquam dignum est, quod in iis qui colica spasmodica, vel veneno non adeo præcipiti internectione occidente, aut aliis atrocioribus in intestinis tormentis, pereunt, intestina plerumque connexa atque mutuo coalita offendantur. Et licet ipse hanc intestinorum præternaturalem concretionem nunquam observarim, fidem tamen mihi fecerunt viri, quibus sæpius corpora his morbis ubi crebro occurrunt defuncta incidendi occasio fuit; & similes quoque casus memoriæ proditi à *Rhodio Cent. II. obs. 32. Petr. Pavv. obs. 5. Bartholino hist. anat. cent. III. hist. 6. Hochstettero Dec. X. cas. 6. Misc. nat. curios. Dec. II. An. VII. obs. 15.* Causa hujus peculiaris phænomeni vix alia poterit suppeditari, quam quod serum ex intestinorum tunicis glandulosis & vasculis minimis sub arcibus illis spasmis exprimitur, quod avolantibus fluidis tenerioribus partibus, glutinosum & tenax redditum, illam coalescentiam efficit, haud secus ac superius de coalitu pulmonum cum pleura & contiguis partibus, in pectoris affectibus, meminimus.

§. XXVI.

Puerperis
& infantibus.

Accedunt puerperæ, febre inflammatoria per-euntes. Has simili ratione uteri sphacelo tolli, & symptomata in iis obvia, & sectiones post mortem administratæ, commonstrant, cujus generis plures continentur in *Misc. nat. curios. Dec. I. An. II. obs. 85. An. IV. obs. 195. Dec. II. An. IV. obs. 94. Dec. III. An. I. obs. 22. An. III. obs. 123.* Infantes denique pusillos & uberibus adhuc victitantes, ex torminibus ventris, nec non epilepticis convulsionibus, ab acrimonia humorum caustica, abripi, res vulgo notissima est. Neque dubium est, quin etiam in his, intestina, è quibus non raro antequam expirant, nigra excrementa secedunt, sphacelata in dissectionibus reperiantur, modo frequentius à medicis corporum infantilium & omnis ætatis exanimatorum dissectio instrueretur & à cognatis concederetur.

§. XXVII.

Mortis non
cum morbi
causâ con-
fundenda.

Hæc itaque sunt observata, quæ per cadaverum sectiones, tanquam veræ interitus in morbis causæ, innotescunt. Monendum tamen est, id quam maxime hoc in negotio esse vitandum, ne mortis causæ cum morborum causis perperam confundantur, quod certe sæpissime animadvertimus. Id enim quamplurimis medentum in more positum est, ut ægro periculoso ex morbo decedente, cadaveris incisionem suadeant, & inventis sub ea internis partibus sphacelatis atque corruptis, adstantibus mortiferam labem monstrent, speciose differentes, jam defunctum, ob tam ingentem & immedicabilem læsionem, nullo plane modo servari potuisse ac perfanari. At vero hi gravissimum admittunt errorem, ac

mortis causam, apertissima fallacia pro morbi causa venditant, quum potius id in quæstione sit: an non ipsæ hæ quæ mortem induxerunt causæ, convenientibus & tempestive adhibitis auxiliis præscindi potuissent atque averti. Sed hæc medicorum techna, qua ignaris speciosum fucum faciunt, & famæ servientes, delicta, si quæ forsan in medicatione commiserunt, callide atque astute obvelare student.

§. XXVIII.

Jam perspectis sic adæquatis exitii causis; id utique in futurum usum inde eliciendum erit medico: ut ejusmodi medendi rationem ineat, qua easdem opportune prima in herba submoveat & averruncet. Scilicet stagnationes, stases & extravasationes sanguinis atque humorum in capite præcipitem afferunt interitum, plerumque vero à nimia congestione sanguinis, ab extremis & inferioribus partibus per spasmos ad caput, maxime in plethoricis, facta, subnascuntur, quæ eo gravior est eoque facilius contingit, quo magis ipsum caput à causis antecedentibus fuit debilitatum. Quamobrem prudentis atque periti est medici, imperum & accumulationem humorum à capite arcere ac divertere, id quod commodissime convenienti sanguinis missione in inferiori corporis regione, pediluvii, clysteribus emollientibus, alvum leniter ducentibus & antispasmodicis ac carminativis perfici potest, cavendo omnia vaporosa medicamenta, spiritiosa, absynthiaca, ac interdicens refrigerationes, animi affectus, impensas meditationes & inebriationes, omniaque quæ caput infirmare ullo modo possunt.

Qua ra-
tione hæ
causæ re-
movenda

Et quid
extravas-
ationes.

§. XXIX.

Deinceps polypi multarum chronicarum, gravium ac lethaliū afflictionum causam constituunt, quorum vero ea est ratio, ut nulla ope aut medicina tolli possint iterumque dissolvi, & hinc medicus in eorundem medela id tandem agere debet, ut vel mature eorum generationem impediat, vel si jam adfuerint, incrementum præscindat. Jam vero experientia confirmamur, polyporum generationi admodum accommodos atque obnoxios esse eos, qui otio indulgent, spongiosi habitus sunt, venas gerunt exiliores, ac vel nimis calidis esculentis & potulentis, vel etiam acidorum liberaliori usu, tenuiorem aqueam partem, quæ sanguini fluiditatem conciliat ejusque motum intestinum custodit, absument, hisque simul efficiunt, ut crassiores terrestres molecule à fluidi sinu discedant atque concrecant. Quare injungenda utique exacta vitæ victusque ratio, & ejusmodi diæretica maxime præsidia commendanda, quæ vitiosam hanc sanguinis dispositionem corrigunt ac tollunt, inter quæ principem merito obtinent locum, motus & exercitatio corporis cum aëris mutatione, potus tenuis, nec non conveniens aquarum mineralium usus, præsertim earum, quæ temperiores indole & sal alcali vehunt, ad dissolvendas fibrosas ad concretionem pronas in sanguine partes, accommodatissimum.

Polyporum
generatio

§. XXX.

Porro, quia illæ morbis diuturnis obviæ vitæ indurationes, corruptiones, ulcerationes

viscerum
corruptio-
& nes.

& abscessus, non nisi à stagnatione & quiete humorum circumagendorum natales ducunt: tutiori longe & certiori ratione hæc pariter mala præcaventur, quam perianantur; cui fini obtinendo idem idem quam maxime inserviunt, deprompta ex diata & bono vitæ regimine subsidia. Temperies quippe & mediocritas in rebus sic dictis non naturalibus, est efficacissimum auxilium, quo & corporis integritas servatur & morborum causæ averruncantur; omne autem nimium, peritissimo Hippocratis effato, naturæ inimicum, dum sanitatem labefactat, ac destruendo humorum vitales in corpore motus, causas morborum præparat atque ingignit. Potissimum ad chronicorum morborum genesin faciunt nimia voracitas, otium atque desidiosa, animi moeror, aer densus, humidus, impurus minusque elasticus, potus intemperior, cibi insalubres semiputridi, quæ omnia ea propter summo evitare debet studio, is, qui corpus à gravi vel plane lethifera labe immune præstare nititur.

§. XXXI.

Inflam-
mationes
& sphace-
lationes.

In acutis vero morbis, qui inflammatione, eaque in sphacelum concedente, necant; summa opus est prudentia, quo in eorundem curatione omnia ea evitentur, quæ inflammatoriam statim ipsamque putredinem conciliare possunt. Nam profecto, si in ullo, certe in acuto, qui præcipitis est periculi morbo, perquam leves etiam commissi errores, tam perniciosi sunt effectus, ut in summum discrimen ægros adducant, præsertim si jam per aliquot dies symptomatum vehementia, continuo æstu, assidua vigilia corpus exhaustum viresque infirmatæ fuerint. Compluries certe observavi, à situ paullo diutius erecto, ab improvida linteaminum mutatione, à pedum refrigeratione, ab ira, timore vel terrore incusso, à potu spirituosissimo, nimis calido, ab assumpto vino, à cibo etiam morbo declinante largius ingesto, multo magis à medicamento nimis calido, opiato, purgante aut clystere acriori, omnia in pejus mutata & lethiferam contractam fuisse inflammationem. Hinc licet ipsa natura acutas has & difficillimas passiones quam optime sanet; verum tamen quia plurimæ dantur causæ, quæ naturam in opere suo impedire, turbare & motus salutes pervertere possunt, medici, ceu naturæ ministri est, omnes has causas probe tenere perspectas modisque declinare omnibus; unde etiam præsentia sua decumbentibus crebro adesse debet, ne vel ipsi, vel adstantes, damnum procurent; id quod sapienter etiam præcipit Hippocrates Sect. I. aph. 1. oportet, inquiens, non solum se ipsum exhibere quæ decent facientem, sed etiam ægrotum, & præsentem, & quæ externa sunt.

§. XXXII.

Mortis na-
turalis
causæ,
quæ?

Non autem alienum erit, si huic de generatione mortis in morbis disquisitioni, nonnulla de vera inevitabilis omnibus moriendi necessitatis causæ, subnectamus. Hanc omnibus ex æquo incumbere nemo non novit; in quo vero ejus genuina & adæquata ratio posita sit, tantum non omnes & Medicorum & Philosophorum libri sicco plane prætereunt pede. Ego vero Medicinæ rationalis systematicæ Tom. I. pag. 62. seq. nec non Tom. II. pag. 54. seq. in mortis naturalis genuinam causam inquirens, eandem non tam in fluidarum, quam potius solidarum corporis no-

stri partium depravata constitutione, fibrarum nempe & membranarum incrementum cum ætate crassitie, duritie & compactiore textura constituendam esse, primus fere merito asserui. Nam quia temporis diuturnitate cartilagine in ossa densantur, hæc magis magisque indurantur, tendines cum fibris musculosis obrigescunt omniumque anhosiorum animantium carnes longe solidiores & compactiores sunt quam juniorum, ac proinde coctione ægrius mollescent, nullum etiam dubium est, quin tunicæ vasorum, è quibus corpus penitus coagmentatum est, crassescant, alvei canalium his angustentur, occludantur, ut minimi eorundem demum concidant, ac nihil plane fluidi transmittant. Hoc autem si contigerit, intercipitur non solum vitalis ille humorum per universum corpus circulus, sed etiam secretiones cum excretionibus per minimos tubulos non rite perficiuntur, succi vitales spissescunt & sordescunt, vires concidunt, digestio perit, nutritio deficit, & sic sensim sensimque ad morbos paratur aditus ipsaque mors obrepit.

§. XXXIII.

Quod si itaque vita diutius conservanda & fene-
nectus à familiaribus ipsi morbosus insultibus vindicanda, eo quam maxime in vitæ victusque ratione dirigendum est consilium, quo partes solidæ flexiles, canales patuli & humores fluxiles, tenues ac puri servantur. Hinc evitanda merito omnia qualitate & quantitate excessiva, senili corpori insensibilissima, omnia acida, adstringentia, salsa, cibi nimii flatulenti, duri, difficilis concoctionis, præsertim ex mari desumpti, potus nimium spirituosus, frigidus & crassus, otiosa quies, frigus, patheticæ animi impensiores commotiones, veneris intempestivum exercitium, diuturna vigilia, excessiva corporis agitatio, aer vappidus, impurus ac nubilus. Vicissim temperiei & moderationi in rebus sic dictis externis non naturalibus sollicitè studendum, animus ad hilaritatem & tranquillitatem componendus, cibus paucus, mollis & facilis concoctu cum potu tenui & expedite transeunte usurpandus, vinum moderate, non acidum, sed dulce & spirituosum, bibendum, juscula analeptica forbillanda, balnea & pediluvia subinde admittenda, venæ sectio crebrior sed parca instituenda, corpus moderate exercendum & in aëre puro ac sereno, rurali maxime, commorandum, corpus subinde blando calore fovendum, alvus nonnunquam clementer subducenda, & quæ plura eundem in finem præcepta in dissertatione, de tuenda senum valetudine, tradidimus.

Et quomodo
diu ar-
cenda?

§. XXXIV.

Neque postremo alia, quam in morbis & ex
naturalis necessitate, ratione, motuum nempe vi-
taliū, tam in solidis systaltici & diastaltici, quam
in fluidis circulatorii & progressivi, plenaria de-
structione atque extinctione, mors à gravi per
violentas causas externas læsione evenit. Nimi-
rum pleræque mortiferæ per externam quan-
dam vim illatæ læsiones, enormi sanguinis pro-
fusione atque extravasatione trucidant, dum, ex
fauciatis tam in, quam extra amplissima corpo-
ris viscera, majoribus vasis, cruor nulla ope com-
pescendus manat, ac demum cum viribus vita,
exhausto penitus liquore vitali, concidit. Aliæ
lethales violationes ita sunt comparatæ, ut vitalem

Lethifera-
rum læsio-
num ratio.

illum systoles atque diastoles motum extinguant, hinc si cor ampliore vulnere sauciatur, illico examinatur læsus, non solum ob extravasationem, sed maxime quod circularis sanguinis progressus, pereunte in corde, tanquam centro, recipiente & expellente motu, sistatur atque cesset. Idem fit, quando principium nervorum, quod in medulla oblongata cerebri est, sive per vulnerationem, aut ab incumbente gravius humore, offensam patitur, eo quod sufficiens liquidi nervei

influxus, à quo motus cordis & vasorum contractorius & relaxatorius ad vitam necessarius, dependet, intercipitur penitusque aboletur. Aliæ denique inflictæ vulnerationes putredinem sphacelosam & corruptionem post se trahunt, eademque latius serpente ipsosque vitales succos contaminante lethum inferunt ægrumque lente conficiunt. Ac in his omnium absolutæ lethalitatis læsionum ratio fundata est & continetur.



SECTIO SECUNDA.

DE

*METHODO, ORDINE ET LEGIBUS
medendi, tam naturæ, quam artis, nec non de remediis,
eorum quatuor generibus, operandi & recte applicandi
modo, una cum cautelis, observationibus & medicamentis
compositis selectissimis.*

CAPUT PRIMUM.

De optima naturæ morbis medendi metho-

§. I.



Uod plurimi, præsertim ex plebeiis, rusticis & qui simplici ac populari victu fruuntur, & tranquillioris quoque ab intemperantia affectuum vacui sunt animi, a febribus acutis, etiam gravioribus, pestilentibus, malignis, sine omni medicamento & sine singulari artificiosa medici ope, sola abstinentia & quiete, qualicunque evitacione nimiarum refrigerationum, tutius & felicius solius naturæ, quæ pollent energia, robore ac viribus sponte liberentur, & tutius, felicius ac certius, quam multi alii, divites quoque & magnates, qui famigeratissimis medicis eorumque pretiosis arcanis utuntur, convalescant, tam evidens & notum est, ut nulla plane egeat probatione. Quin ad unum fere omnes ex antiquissimis & recentioribus medicis in eo consentiunt & cum *Hippocrate lib. VI. epid. 5.* fatentur: quod natura optima sit morborum medicatrix, quæ suis viribus usa, juxta *Galenum*, noxia è corpore expellat & utilia salutis causâ retineat, ut sine ejus auxilio etiam medicus nihil solidi præstare possit.

§. II.

Quid vero per hanc naturam, quæ tam effaciter vitam & sanitatem tuetur, hominemque à præsentem mortis & morborum periculo defendit ac liberat, intelligendum sit, obscura inde ab omni ævo fuit quæstio, quam maxime tamen evolvenda. Veteres, quorum sapientia in physicis plus inanibus nominibus, quam rebus & veris causis occupabatur, naturam corporis humani dixerunt omnis motus in eo principium & causam: qua vero definitione nihil aliud egerunt, quam ut id quod in quæstione erat repeterent, sive idem per idem explicarent. Quidam non incelebres nostri ævi viri paullo pressius naturæ vocem exposituri, perhibent: omnium actuum, tam mentalium moralium, idealium, quam physicorum & mechanicorum in corpore nostro, unam & primam causam, unum agens & principium esse, nempe animam, ratione & interna

cognitione instructam, omnesque motus ad certum finem & salutem corporis dirigentem. Hanc, quando vitaliter agat, id est, motus ad vitam conservandam administret, naturam appellandam, quæ quidem non actu & contactu quodam physico, absolutæ necessitatis, sed tantum morali quadam causarum nocentium & læsionum imminentium æstimatione, motus ad eas removendas ac ejiciendas corpore, quamvis sæpius erronee, instituat, adeoque omnes hos motus & conatus, quum in salutarem finem, nempe conservationem corporis tendant, in se & sua natura semper bonos & salutare esse, eamque ob causam perperam noxios & morbosos à vulgo medicorum haberi.

§. III.

Nova hæc est ac ingeniose excogitata hypothesis, quam tamen examini subicere & pluribus ac evidentibus argumentis infirmare jam nec loci est, nec nostri instituti, inprimis quum etiam jamjam de eadem abunde in *Medicinæ hujus systematicæ tomo I.* à nobis actum, & alii quoque, quos inter eminet *D. Burchardus*, Professor Rostochiensis celeberrimus, in *tr. de principio movente primo in animatis*, id docte satis & solide præstiterint. Id saltem hoc loco monendum esse duxi: quod triplices in homine observentur actus, in se & sua natura distinctissimi, nempe mentales, quæ intellectu & voluntate absolvuntur, ac homini proprii sunt, ideales, qui in receptione idearum ex objectis & inde emergente certa sensatione & perceptione fiunt, quos cum brutis animantibus communes habemus, & denique actus pure physici, sive motus, qui ex operatione & mutua actione rerum corporearum resultant, & pro diversa structura, situ, nexu, dispositione, magnitudine & figura solidorum & fluidorum, certo numero, ordine & fine etiam eveniunt, ac à Philosophis dicuntur mechanici, & neque principium illud quod intellectu prædictum, neque illud quod ideas format, sed vim motricem, quæ omnibus rebus corporeis essentialis est, varie modificatam, pro causâ vera, proxima & immediata agnoscunt. Et tales actus physici sunt verum medici & medicinæ objectum, eo quod vita, sanitas, læsio actionum, sive morbus, eorum extinctio, sive mors, præservatio & restitutio à morbis, item vis & virtus rerum quæ nocent & prosunt corpori humano, ab his primo, proxime & immediate dependent,

*Actus vero
in corpore
triplices.*

*Et his me-
chanici
medicinæ
objectum.*

utut

*Natura sola
sepe
morbos sa-
nat.*

*Quid per
eam intel-
ligant Ve-
teres.*

*Et quidam
recentiores.*

utur non negari possit, ex divina commercii & consortii lege, quam summus opifex inter actiones vitales, sensuales & mentales sancivit, cogitationes ac phantasias hominis limitatam & determinatam quandam habere potentiam, actus istos pure phycos, non causaliter efficiendi, sed potius turbandi & quadantenus disponendi.

§. IV.

Horum motuum æconomia natura.

Ut itaque paullo clarius & specialius mentem nostram promamus, per naturam corporis humani, quæ secundum *Hippocratem* omnis sermonis & ratiocinationis in medicina principium esse debet, nihil aliud intelligimus: quam progressivum & in circulum abeuntem sanguinis & omnis generis humorum motum, à cordis & vasorum, quibus fluida continentur, aliorumque solidorum motu contractorio & dilatatorio reciproco, dependentem, quo solidorum & fluidorum decenti motu, tam partium utilium & qui in usum retineri debent, continua secretio, quam etiam variæ indolis inutilium, per convenientia emunctoria & cribra excretio, perficitur. His motibus recte & ordine succedentibus, vita & integritas corporis conservatur ac morbidæ læsiones arcentur, iisdemque inordinate se habentibus, partium & actionum læsiones, sive morbi, oriuntur, quorum sanatio illis in ordinem per convenientia auxilia reductis, evenit atque conficitur. Hic autem activus, vegetus systoles & constrictionis solidorum motus, tanquam vera causa, quæ recte dici potest anima, actionum vitalium, non à principio quodam spirituali, morali & metaphysico, sed partim à solidorum & vasorum structura organica & virtute elastica, partim à fluidi tenuissimi, magna potentia movendi instructi, ac sanguine arterioso & nervis contenti, in motrices omnis generis partes maxime tubulosas influxu dependet.

§. V.

Methodus naturæ in causarum remotione consistit.

Jam quum clarissime constet, quid sit natura illa corporis conservatrix & medicatrix; nunc discipendum erit: qua methodo, qua via, hæc ipsa natura, cujus plane mirabilis in liberando corpus à præsentibus morbi & mortis periculis vis est ac energia, hoc solenne negotium perficiat. Nam certe cognitio hujus methodi, qua natura, quæ infinite sapientem architectum pro auctore habet, utitur, merito vera ac firma cynosura est artis medicæ, quæ secundum hanc leges & regulas suas medendi construere debet, ut naturam recte agentem non turbet, vel pervertat, sed potius sequatur & imitetur, vel deficientem & impeditam adjuvet atque in ordinem reducat. Palmarium vero momentum, in quo methodus & ordo, tam naturæ, quam artis in medendo, quam maxime conveniunt, in eo versatur, quod utroque causæ morborum, quæ æconomiam motuum secundum naturam turbant & corrumpunt, removeantur atque corpore ejiciantur. Hinc recte docet *Galenus lib. I. method. medend.* perfectam curationem à causis exordiri. Et ex *Celsi* mente is recte curat, quem causæ origo non fallit; quia causæ investigatio ejusque primordia & occasio, in affectionis & remediorum cognitionem amplissimam deducunt. Idem confirmat *Fernelius lib. I. cap. 4. method. med.* asserens: morbos absque causarum præcognitione, nec præcaveri, nec feliciter curari posse.

§. VI.

Causæ quæ sunt?

Quod si itaque sola natura sponte & suis viri-

bus usa, sine ope & arte medici & sine pharmacorum apparatu, morbos subinde sanat, idque causas morborum penitus removendo præstat, jure meritoque quæritur: quænam sint illæ morborum causæ, & quomodo, quo ordine ac methodo eadem à natura vincantur ac submoveantur. In hac autem decidenda tenendum est: quod sicuti, uti jam monuimus, ad conservationem corporis nihil magis necessarium, quam motus tam progressivus, quam excretorius: ita nihil naturæ infestius & ad destructionem invehendam aptius, quam sanguinis & humorum quies, stagnatio, stasis, extravasatio, vasorum occlusio, sordium retentio & viscerum induratio. Hæ enim efficacissimæ sunt causæ ad inducendos motus febriles, spasmodicos & convulsivos, quibus maxime motuum morbosorum apparatus continetur, hæ quoque putredinem, quæ & mixtioni & structuræ solidorum insensibilissima est, inferunt, quam recentiores medicorum malignitatis nomine insigniunt.

§. VII.

Has igitur morbificas causas subigere ac remove debet natura, si officio suo recte perfungi velit. Ad hoc vero exsequendum non convenientius ac efficacius excogitari poterit medium, ipso motu, tam solidorum, quam fluidorum, auctiori facto. Hujus enim indoles & præcipua virtus est, ut humores subsistentes eorumque stases & stagnationes concutere, latibulis extundere, resolvere, iterum in motum ciere & sic obstructions vasorum referare possit. Hic quoque motus spissos, immobiles impactosque humores fluxiles ac progressu idoneos reddit, pariterque copia delinquentes succos ipsumque sanguinem per congrua loca exonerandos, nec non excrementitios, serosos, falsos per diversi generis emunctoria proscribendos, quam maxime idoneus est, biliosos quidem & viscidos per alvi secessum, falsos aquosos per urinam & subtiliores aqueas salino-sulphureas sordes per universalem cutis emunctorium exonerando.

Ad eas vires movendas inservit motus solidorum & fluidorum.

§. VIII.

Jam vero memoratu admodum dignum est, omnem morbificam causam, sive quantitate seu mole, sive intemperie & activitate infensa sit, principaliter actione sua afficere partes subtiliori motu & sensu præditas, quales nervoso-membraceæ & musculosæ sunt, & ex illis maxime compositi omnes canales & tubuli qui fluida vehunt & motu systoles atque diastoles pollent, quos moleste vel distendit & comprimit, vel lacinat, irritat aut erodit, quod dum efficit, vigore legis mechanicæ microcosmicæ, molesta quædam spastica tractoria motio, sive reactio, universum sæpe systema partium nervosarum & fibrosarum in similem motum per consensum abripiens, suscitatur, quæ spastica motricium, musculosarum & nervearum partium constriction, evidentem, primam & proximam motuum morbosorum causam unice constituit atque absolvit. Hæc quippe est, quæ omnibus motibus, qui alias secundum naturam ordinate fiunt, turbandis & pervertendis apta est, hæc functiones partium lædendi ac invertendi potentia pollet, & ex hac omnium in morbis obviorum symptomatum origo merito petenda est. Quod vero mirandum, idem hic spasticus motus, est instrumentum ac medium, quo natura utilissime utitur ad ipsam morbi causam, quæ motus hos morbosos concitat, superandam ac præscindendam, ut adeo infen-

Qui auctior factus & morbos citius & eo solvit.

nita

nita summi architecti sapientia & providentia in construenda corporis humani machina merito admiranda sit, qua factum, ut morborum motus subinde remedio sint, ipsis morborum causis corrigendis ac removendis.

§. IX.

In quo quidem quum magnum naturæ medicatricis arcanum & res maximi momenti contineatur: scopo nostro quam maxime erit consentaneum, ut mentem nostram circa hoc negotium paullo clarius exponamus. Videlicet observatur, ut passim inculcavimus, in omnibus motibus & paroxysmis spasmus, qui recte primo in universalem & particularem, deinde in salutarem & perniciosum dispefcitur. Universalis, si totum vasorum genus, præcipue vero cor & arteriarum ac fibrarum systema affligit, & facta præternaturali in iis constrictione, systoles & diastoles intenditur sanguinisque progressus acceleratur, febris recte dicitur, cujus pulsuum frequentia certissimus index est. Alter particularis, in certis tantum corporis partibus consistit, quas constrigendo coarctat, sanguinisque liberum progressum intercipit, adeoque inæqualem commeatum efficiendo, sanguinis copiam ad alias partes minus strictas impetuosè urget. Potissimum spastica hæc affectio particularis nervosas & membranaceas partes exagitat, ut sunt ventriculus cum toto intestinorum volumine, in quo scenam sæpe adornat, quod morbus ille spasmodicus, qui mali hysterici vel hypochondriaci nomine notus, pathematum & varietate atque atrociam planum facit testatumque. Præsto quoque est hic spasmus in omnibus hæmorrhagiis, nimis sanguinis ad certa loca congestionibus, humorum decubitu, in omnis generis doloribus, cunctis anxietatibus & excretionibus suppressis. Quod si verò hic vehementior spasmus duram matrem, quæ totum cerebrum ac cerebellum involvit ac nervorum omnium immo ossium membranis ortum præbet, tangit, non modo celerrima fluidi nervei per totum membranarum & nervorum systema fit trajectio, sed & citra voluntatem artus vel stringuntur, vel distorquentur, aut validissime agitantur, & sic epilepsia, sive convulsio universalis, nascitur, quum contra convulsivi motus ex spasmis membranarum ac nervorum spinalis medullæ originem fortiantur.

§. X.

Hi sunt præcipui illi naturæ motus, qui in morborum insultu vel paroxysmo nunquam non advertuntur; jam disquirendum: quinam ex iisdem saluti & causis morborum removendis apti sint, & quinam vicissim ad perniciem ipsamque mortem tendant? Salutares itaque eos in morbis motus ac spasmos dicimus, qui ita sunt comparati, ut causam morborum sive spasmodicorum motuum auferant, & tam humores stasin vel stagnationem concipientes expediant iterumque in motum cieant, quam & acres causticos corrigant atque contemperent, simulque ad excretionem materiæ peccantis vergant. Exitiosos vero multumque periculosos censemus eos, qui cutim & omnis generis emunctoria constringunt, materiam quæ in vitio est ipsamque morbi fomitem intus detinent & ad ima viscerum ac interiora vitæ penetralia pellunt, neque evacuant. Illos sanitas, hos mors, excipit.

§. XI.

Ea quidem omnium spasmodorum indoles est

isque effectus, ut sanguinem & humores à corporis ambitu ad interiora agant, ac emunctorium minimos ductus stringendo, evacuationes quodammodo sufflaminent: nihilo minus tamen salutare sæpe fiunt, quando scilicet interposito certo temporis spatio, excernicula antea occlusa laxantur, crispati tubuli adaperiuntur & postea major succorum ad corporis superficiem partemque externas succedit appulsus, cutanea excretio augetur, sudor manat, urinæ crassæ minguntur & alvus biliosa ac viscida copiose dimittit. Et ex his excretionibus, quæ morbos & spasmos certo præsertim tempore subsequuntur, salutaris effectus & auspiciatus eventus merito dijudicandus, unde etiam medici easdem criticas, sive morbum judicantes, appellare suefcunt. Solent autem hæ ipsæ, si cum salute contingunt, die maxime impari, critico ea propter dicto, succedere, dimidiato scilicet septimo, nono; undecimo ac decimo quarto, & his diebus vel ad mortem, vel ad salutem morbus concedit. Ubi enim hisce diebus notabilis symptomatum fit remissio & evacuationes eveniunt, optima salutis est significatio; quando vero symptomatum atrociam persistit, spasmi urgent nec evacuationes animadvertuntur, gravissimum imminet discrimen, ac mors ut plurimum morbum terminare observatur. Quare licet plures motuum morbosorum in se & sua natura à norma ac ordine deflectant, dirigente tamen sic divina in artificiosa solidarum & fluidarum machinam nostram constituentium partium dispositione, structura & motibus inde resultantibus, providentia, sæpissime sunt salutare causis morborum expugnandis idonei, ipsisque morbis sic optime medentur, quo etiam sensu recte à Veterum sapientioribus natura dicta est morborum medicatrix.

§. XII.

Igitur genuina, tuta ac saluberrima corpori à summo conditore jam insita methodus, lex ac norma, qua, & secundum quam, ipsa natura morbos percurat, in eo maxime versatur, ut à causa morbi, sive mole, sive qualitate peccet, spastici motus in genere vasculoso & membranosum etiam suscitentur, qui ad ipsam causam morbi removendam, vel convenienti tempore eliminandam, tendant. Hi quando ex voto succedunt, sola natura morbos sanat & medicus tantum spectatorem agit; quod si autem hæc sola id præstare nequit, artifex eidem viæ ac methodo insistere, naturam adjuvare, impedimenta tollere, motus moderari, vel intendere, materiam ad congrua loca ducere, ab incongruis divertere, variis debet accommodis remedium generibus. Ut adeo in eo jam unice omne medentis auxilium, omnis intentio ac sanandi ratio fundata esse & consistere debeat, quo methodum naturæ, si in materia subsistente dissolvenda atque expedienda, acriter emendanda & temperanda demumque debito tempore, per convenientia loca expellenda, occupata est, observet, sequatur, adjuvet ac in rectam viam ad salutarem finem traducat.

§. XIII.

Sed necessarium æque ac utile erit, quo mentem nostram paullo clarius exponamus & hanc naturæ methodum in variis morbis investigemus, ostendendo, qua ratione in iisdem corpus sæpe à præsentanea noxa vindicet. Ex horum numero potissimum sunt febres, tam acutæ, quam chronice. Acutarum quidem pleræque sunt inflammatorie

quomodo
fiat saluta-
ria?

Natura
causam
tollendo sa-
nat mor-
bos.

Natura
processus in
febris
acutis.

Quatuorplex
hic motus
hic.

Qui ex iis
ad salutem

qui ad in-
teritum
undant.

Spasmus

matoriae & fixam sanguinis stasim in tubulosa partium aut viscerum substantia pro causa agnoscunt, quæ dum spasmus in universo genere fibroso & vasculoso suscitatur, sanguinem per totum systema vasorum celerius agit & majori copia ad partem affectam appellit, quo fit, ut sanguis subsistens & firmitus inclusus, successive abstergetur, eluatur, resolvatur ac in motum redigatur, quod plerumque circa septimum diem contingit. Et si tunc spasmus cum omnibus symptomatibus etiam ipsa febre remittit, cortex cutis glandulosus laxatur, exhalatio repetit, sudor liberius manat, generatae sub febrili commotione multae recrementitiae salino-sulphureae sordes, solius naturae beneficio utiliter evacuantur, ipsa febris ex voto solvitur, qua certe naturae methodo plures, praesertim plebei, sine ullius medici ope, saepe feliciter, ex febribus inprimis continuis, evadunt.

§. XIV.

Medici officium.

Hæc naturae methodus curandi quam maxime medico monstrat viam, quid in hujus generis febribus facere vel omittere debeat. Lex enim curandi hæc est: impactus tubulis sanguis successive & paulatim citiori sanguinis appulsu resolvendus est. Ex quo facile colligitur, quia à sanguinis abundantia, qua nimium vasa distenta sunt & turgent, impeditur sanguinis per partem inflammata liberior transpulsum, ut potius exinde major sanguinis in eadem fiat stagnatio ipsaque inflammatio incrementum capiat, tali in casu nihil praesentius esse, quam sanguinis detractionem provide institutam, partim quo major stasis & inflammatio impediatur, partim etiam ut liberior cursus universo sanguini & transpressio per partem affectam concilietur. Vicissim & illud ex prima & principe morbis medendi lege naturae addiscimus, non valde nimiam esse sanguinis quantitatem exhaustiendam, siquidem detracta, nimia sanguinis copia, non sufficiens sit ad partem affectam ejus appulsus, quo tamen stasis, quæ causa morbi est, dissolvi debet. Quare graviter ii peccant medici, qui in febribus inflammatoriis quando sanguis deficit, repetitas venæ sectiones moluntur, quibus nihil aliud perficiunt, quam ut inflammata partem celerrime ad sphacelum perducant. Et dum in minimis & capillaribus vasculis sanguis & humores stasim ac inflammationem concipiunt atque ex his ipsis eluendi sunt, per hæc tamen sanguis crassus & densus difficillime transit, facile apparet, ea omnia, quæ humores fluxiles reddunt, quæ diluunt, humectant & immodicum calorem, quo serum tenue absumitur, contemperant, remedia convenientissima esse: contra omnia, quæ humores incrassant, quæ calorem augent, humidum absumunt, uti opiata & calidiora sudorifera, in omni inflammationum genere noxiosissima esse.

§. XV.

In exanthematicis febribus quid natura faciat.

In acutis gravissimis febribus, quæ jungi solent variolis, morbillis, purpuræ, petechiis, bubonibus pestilentialibus, serum sanguinis causticum, acre, tenue, in partibus nervoso-membraneis, praesertim ventriculo & intestinis, acerbis spasticis constrictiones, nec non humorum ad varias partes congestiones efficit, simulque febre accendit, cujus beneficio sanguis, à partibus exterioribus ad interiores, ubi materia peccans hæret appellitur, ut copiosioris lymphatici humoris & sanguinis affluxu materia acris caustica temperetur, corrigatur, resolvatur & apta ad

excernendum fiat. Quod si naturae beneficio id feliciter accidit, spasmodorum omniumque fere symptomatum fit remissio, pori & tubuli subcutanei relaxantur & sanguinis ad summam cutem & ambitum corporis fit major affluxus, unde materia morbifica caustica ibi fecernitur atque sub forma exanthematum, pustularum, bubonum excernitur. Et sic saepe naturae solius beneficio pestis, variolæ & morbilli, citra singularem apparatus medicamentorum, sanantur. Nam perspicuis certe verbis *Sanctorius sect. I. aph. 139.* confirmat: plebeios magis liberari à peste, quam divites, qui multis medicamentis utuntur; & *Sydenham* in limine *acut. morb.* ita differit: *ipsa pestis quid obsecro est aliud, quam symptomatum complicatio, quibus utitur natura ad inspiratos una cum aëre particulas miasmodes perem unctoria apostematum specie, vel aliarum eruptionum opere, excutiendas.*

§. XVI.

Quod si igitur hac via, natura sola hos gravissimos morbos curat, utique etiam medicus, qui naturae minister audit, huic viæ insistere debet, si natura sola id perficere impeditur. Regula namque exanthematicis hisce febribus medendi hæc est: materia acris, caustica, vitalibus partibus inhærens, uberiori sanguinis & lymphæ benignæ appulsu contemperanda est, ut apta ad excretionem per ambitum corporis fiat. Ex quo jam conficitur: omnia ea, quæ ad contemperandam materiam acrem faciunt, & quæ succos sanguini dulces, gelatinosos, benignos ingenerant, naturae vacillanti egregie opitulari. Hinc patet, praestantissimum in his morbis usum esse decoctorum, quæ leniunt & demulcent acrimoniam, qualia parari solent ex dactylis, ficibus, radice glycyrrhizæ, floribus papaveris rhæados, semine foeniculi. Patet quoque porro, planè eximium esse usum bezoardicorum, quæ fixioris indolis sunt & acrimoniarum humorum temperandæ egregie serviunt. Neque ex dictis amplius obscurum esse poterit, quam valde graviter & perverse in curando procedant ii, qui statim ab initio, antequam materia cocta, temperata & ad exclusionem apta reddita fuit, sudoriferis valentioribus & expellentibus hos morbos tractant, quibus certe nihil aliud efficiunt, quam ut acerbiora symptomata ipsumque funestum exitum accersant. Denique ex allatis id quoque patet: quod quum materia per cutem sit eliminanda, nefarii sint eorum ausus, qui eo tempore, quo ipsa ad hoc in superficie corporis emunctorium transmitti debet, valentiora purgantia, diuretica, aut emetica, vel etiam acida refrigerantia, aut opiata, vel nimia quantitate nitrosa, praesertim in infantili ætate, propinant, aut corpora liberiori aëri exponunt.

§. XVII.

Febres quoque intermittentes remedii & praesidii quippiam complectuntur, & haud raro sine medici auxilio cum insigni subsequente emolumento discedunt. Quum enim contumaces ex iisdem, ut sunt quæ autumnis, vel hieme accedunt, nec non quartanæ, focus ac fomitem plerumque altius in abdominis visceribus, hepate, liene vel pancreate constitutum habeant, eaque propter corpora sanguine crasso facta crebrius infestare soleant, ac nonnunquam vel sponte, vel per imprudentem medicationem, in icterum, anasarcam, ascitem, pedum oedemata, aut lienis tumorem concedant: nihil certe efficacius magisque

Quid dico facienda

Febris intermit- tentium naturalis decursum

De optima naturæ morbis medendi methodo. 409

que aptum ad obstructa & infarta hæc viscera referenda excogitari poterit, quam citatior atque validior sanguinis ad oppilatos tubulos appulsus ac motus, quo utique succi crassi & inipaciti urgentur, latibulis eliduntur iterumque in motum percipientur, ut hinc solutis obstructionum repagulis, ipsa febris, vel sponte sæpe, vel exigua artis ope, felicissime desinat.

§. XVIII.

Artificis officium.

Quia vero graves à sanguine nimis copioso & crasso oppilationes, minus ex voto à sola natura expediri queunt, sed potius recurrentibus tam crebro paroxysmis, sanguinis massa admodum consumitur, intemperiem calidam biliosam contrahit, ipsæque vires simul exhauriuntur; omnino artificis est, optimum naturæ processum opera sua, quantum fieri potest, secundare, omniaque auxiliorum genera eo dirigere, quo facti obstructione viscerum meatus referentur. Quo pertinet maxime prudens & circumspectus pro diversitate corporum usus salium aperientium, spissos succos colliquantium & abstergentium, decocta & infusa ex radicibus & herbis amaris aromaticis incidentibus balsamicis concinnata, accommoda evacuantia, ut sunt balsamicæ nostræ pilulæ, item mercurialia rite præparata; quæ omnia debito ordine ac tempore administrata, utique ad debellandas has contumaces febres & corpus ab imminente periculo tuendum, præstantissimæ sunt efficaciam. Contra vero nefaria sane & perversa rebelles intermittentes sanandi est methodus, qua mox in principio purgantia validiora & emetica, item sudorifera, opiata & adstringentia, liberaliori præsertim manu, propinquantur, eo quod hoc facto, obstructiones potius obfirmantur, & pessimæ recidivæ, vel alia longe graviora mala arcessuntur, quæ nullam sanationem admittunt.

§. XIX.

natura
ethodus
lym-
phæ
viciis
tribus.

Accedunt arthriticæ, rheumaticæ & catarrhalles febres, in quibus maxime peccat serum copiosum excrementitium, tenue, falsum, quod languesciente perspiratione retentum, & ad interiora, atmosphæra præsertim à ventis borealibus compressa, repulsum, in glandulosis asperæ arteriæ vel faucium locis, aut membranis articulorum vel musculorum hærens, spasticas ibi stricturas movet, unde extremorum horripilatio, refrigeratio, lassitudo corporis gravativa, appetitus prostratio, alvi constriction, frequentior ad urinam stimulus, calor sub vesperam & noctem auctior, sternutatio, tussis, dolor artuum, subsequuntur. Nihilo tamen secius sub hisce naturæ contrariis ab ambitu ad interiora motibus, subsidium latitat atque remedium; quandoquidem dum sanguis & temperatior lymphæ ad partes stimulo salino exagitatas largius advehitur, tubuli antea contracti ampliantur & materia caustica contemperatur, sive coquitur, atque adeo ad excretionem cum copioso humore viscido in tussi & coryza, vel ad exhalationem per cutis spiracula in arthritide & variis rheumatismi speciebus apta redditur. Et hic naturæ processus medico planius monstrat, quid in ejusmodi morbis prodest, vel obest, & quid ipsi faciendum, vel omittendum. Prima enim atque palmaria ejus intentio esse debet, quo congruis præfidiis, acrem & falsam materiam corrigat, altera, ut non prius quam coacta & rite præparata fuerit, ejusdem ejectionem molietur, tertia, quo per convenientia loca & emunctoria excretionem proritet, minime vero

artis ejus
inini.

ad alia incongrua excretoria per improvide adhibita inoventia, purgantia aut emetica, pertrahat, vel plane eliminationem, quæ exhalatione perficitur, præpostero topicorum, adstringentium ac repellentium usu, impediatur aut cohibeat.

§. XX.

Quemadmodum igitur naturæ febres, causam earundem per motus auctiores subigendo ac ejiciendo, sola sæpe per sanat: sic quoque eadem methodo per varii nempe generis excretiones alios morbos & arcet & percurat. Animadvertimus videlicet sanguinem in vasis, præsertim in sexu sequiori, ætate juvenili, habitu corporis spongioso, molli, vitæ genere delicatiori & quietiori, stasis temporibus vel temporum periodis redundare, stagnare & hinc inde in vasis majoribus impeditius moveri, quo fit, ut spasmo, qui ima abdominis maxime petit, atque ex dolore circa lumbos, flatulentia in abdomine, alvi adstrictione, extremorum refrigeratione, urinæque tenuitate cognoscitur, oborto, venæ in mesenterio & abdomine, comprimantur, & hinc sanguis majori nisu & impetu in foeminis ad uterum, in sexu nobiliori & provectiori ætate ad hæmorrhoidales venas, in adolescentia ad caput & nares urgeatur, ac majori ibi facta collectione, vasa extrema intra tunicas teneriores narium, ani vel uteri jacentia, nimium distendantur, tandem aperiantur atque notabilem sanguinis copiam effundant. Ecquis est, qui hic non animadvertat, salutarem & utilissimam esse hanc sanguinis excretionem, quæ liberat corpus à copia, libero vitalis hujus liquoris progressui contraria & ingens corporis periculum minitante.

§. XXI.

Et salutare hoc negotium ubi natura recte in movendo & excernendo exsequitur, nihil moliri debet medicus. Imprudens enim ipsique rationi contrarium molimen foret, si has excretiones salutiferas externis vel internis constringentibus, aut motus sistentibus, opiatis, narcoticis, cohibere niteretur. Quando vero natura in opere deficit, & vel motus isti spastici non sunt sufficientes ad sanguinem expellendum, vel sanguis nimis crassus, tenax ac viscidus est, vel viæ, per quas debet fieri evacuatio, obstructæ aut nimis spasmo contractæ sunt: ejus vestigiis merito insistendum & sanguinis exolutio facilitanda ac promovenda, eumque in finem emmenagogorum moderatiorum cum sufficienti humido, item potus theæ, coffeæ, balneorum, aquarum mineralium, nimiam spasmodum vehementiam sedantium, foruorum, frictionum, eo tempore quo exitum affectat sanguis, usus longe est efficacissimus.

Medica eadem
rundem
tractatio.

§. XXII.

Sæpe etiam fit, ut provida solius naturæ ope, graves & vix ulla arte sanabiles morbi, sanguinis profluvio solvantur & finiantur felicissime. Ut enim mittamus criticas illas in febribus acutis maxime obvias hæmorrhagias, de quarum salubritate frequens apud Hippocratem aliosque Veteres est mentio; multiplex certe experientia compertum est: insaniam, vertiginem, convulsivum asthma, colicam convulsivam, affectus soporosos, item paralyticos, hemiplegias, arthriticos & rheumaticos dolores, pathemata hypochondriaca, exsoluto per ani venas sanguine, motu & exercitatione corporis, remisisse ac cessasse. Sæpius quoque à me observatum est, epilepticas convulsiones & convulsivas artuum tractiones,

Hæmorrhagia sol-
vunt mor-
bos.

quæ per multos annos juvenculas affligerant, accedente mensium tempore ac prodeunte fluxu, sponte conquieville. Pariter experientia constat, cephalalgias, tinnitus aurium, vertiginem aliaque gravia capitis mala, tempestivo narium in juvenibus stillicidio, egregie levare ac abigi. Et quæ plura *Sect. I. cap. VI.* de damnis ex cohibitis sanguineis evacuationibus in medium adduximus. Ut adeo in ejusmodi casibus nihil satius magisque pro sanitate sit, quam ut artifex naturæ ductum sequatur, successum evacuationis tueatur atque faciliat, nec ullo modo eundem interturbet.

§. XXIII.

Natura san-
nitatem
suetur

per catarr-
hales de-
fluxiones,

diarrheas

sudores

Ex urinae
proflu-
vium.

Tam salubri eventu adornantur à natura evacuationes sanguinis; præter quas tamen plures adhuc aliorum humorum aliarumque materialium quæ corpori perniciem intentant, ab eadem per varia loca instituuntur excretiones. Nimirum serosus quoque humor, tam quantitate, quam qualitate quandoque morborum causam constituit, eaque propter cum insigni sanitatis emolumento, natura administra, corpori subtrahitur. Obvium hoc est vere maxime & autumnus, ubi per glandulosam narium & sinuum capitis tunicam, pituitariam dictam, item per glandulosas bronchiorum pulmonalium tunicas, serosomucidus humor copiose sub coryza, tussi aliisque catarrhalibus ac rheumaticis affectionibus eliminatur. Pariter accumulatis nimium in corporis penetralibus serosis, acribus, biliosis, falsis fucis, sponte sæpe oboritur alvi profluvium, quo iidem egregio cum levamine ejiciuntur, morbisque inde oriundis minera subtrahitur. Sæpe quoque per cutis spiracula natura molitur exitum & sudorem movet copiosum, tam acrem & mordacem, ut ipsam cutem excoriet, cum molestissimo ad scalpendum pruritu, quo vidimus scorbuticam diathesin sublatam. In aliis, suppressa inprimis cuticulari excretionem, exsuperantem serosum humorem per urinarios tubulos emittit, corpusque per copiosum urinæ fluxum ab eo liberat.

§. XXIV.

Per vomitum

cutis defæ-
cationes

Ex podagra
gramse-
num.

Singulari porro naturæ vigori & beneficio tribuendum: quod si ventriculus à copia ingestorum, præsertim incongruorum, vel crudorum & semicoctorum ciborum sarcina oppletus est, vomitu cito citius eum depleat, quod certe apprime pro sanitate est, quippe ubi moles illa relicta stomachum aggravat, protinus ructus, flatus, borborygmi, hypochondriorum dolores, sanguinis ebullitiones, cum pulsu magno & celeri somnique defectu accedunt. Hinc etiam de lactentibus pusillis pervulgatæ opinioni non sine ratione creditur, quod in crebriori vomitu magnum ad sanitatem eorum momentum sit repositum. Idem sentiendum de iis egestionibus, quibus natura delitescens intus & noxam minantes morbosas causas ad habitum corporis utilissime protrudit, quod subinde evenit in variis cutis defæcationibus, scabie, lepra, tinea capitis, achoribus, varis, maculis cutaneis, tumoribus erysipelaceis & serpiginosis ulcusculis aliisque in cute efflorescentiis. Inprimis quoque de podagra senes invadente experientia & rationi subnixæ fert sententia, eandem longævam præstare vitam, de quo scitum Sydenhami effatum: quid podagra, inquietis, nisi naturæ providentia ad depurandum senum sanguinem, atque ad expurgandum corpus profundum, ut cum Hippocrate loquamur.

Quæ quidem omnes hæcenus enumeratæ criticæ egestionem, quum sanitatem tueantur & morbos mineram ejiciendo arceant, neutiquam intempestiva ac præpostera ope sunt compescendæ, aut materia ad corticem critice amandata, infido artificio repellenda, ne eo majus eoque gravius in corpus redundet detrimentum.

§. XXV.

Quod vero quam maxime mirandum, is sæpe naturæ in tuenda corporis integritate est processus, ut uno illo fluidorum & solidorum motu auctiori facto, binas morbosas causas tollat & sic morbos per morbos expugnet. De febribus, quod convulsiones solvant, prisca est Hippocratis *sect. V. aph. 17.* sententia. Quin quartanam illud medicorum scandalum convulsiones ipsamque epilepsiam abigere, non modo idem auctor *sect. V. aph. 70.* nec non *Coac. III. 80.* perhibet: sed etiam exemplis confirmatur à Bartholino *Cent. II. hist. 68. Salmutho Cent. II. obs. 84.* Ipse quoque compluries observavi, motus convulsivos ex vermibus, accedente febre vermibusque per æstum vel bilem acrem enectis, sponte cessasse. Pathemata hypochondriaca adolescentes ac juvenes diu exagitantia, nec ulla medica ope expugnabilia, superveniente quartana, vel tertiana, evanuisse, idem tamen novi. Neque minus insanias & passiones spasmodicas, prodeunte in conspectum purpureo in cortice corporis scorbutico exanthemate, remisisse ac penitus discessisse, compertum habeo. Coryzam in aurium tinnitu, cephalalgia rebelli & oculorum vitiis, cum bonis ægrorum rebus oboriri, experientia uberius constat. Dysenteriam ac diarrhœam hypochondriacis & melancholia hypochondriaca laborantibus, podagricis etiam, subinde tulisse suppetias, & recentiorum & Hippocratis testimoniis confirmatum est. Aliquot etiam mihi innotuerunt exempla, quod anasarca, item hydrops pectoris, cum cordis magno tremore & suffocationis metu, succedente post pilularum balsamicarum & salis aperitivi usum ingenti per uterum aquosi humoris fluxu, subsederit atque cessarit. Idem per largum alvi profluvium, per lenem stimulum procuratum, contigisse, & ipse vidi, & testatur *Balloonius lib. I. epid. pag. 6.* Hydropem quoque saccatum, suscitato per lapsum ex improvviso copioso urinæ stillicidio, disparuisse, ac feliciter fuisse sublatum uberius enarratur in *dissert.* haud ita pridem hæc habita, *de hydropica lapsu integro abdomine curata.* Et quæ plura rariora exempla passim in observatis medicorum sunt consignata.

§. XXVI.

Sic quidem natura sola optima his morbis medetur, & ineffabili sæpe prorsus modo corporis integritatem tuetur; alia vero ratio est morborum chronicorum, quos natura sola non vincit, sed qui utique artificis operem atque accommodam medendi methodum per efficaciam præsidia exposcunt. Nam recte in præfatione *Celsi Aureliani* asseritur: *celeres passiones sua sponte solvuntur, nunc fortuna, nunc natura favente, fluore sudoris, sanguinis, vel ventris: chronici vero solius medici peritiam poscunt, quum neque natura, neque fortuna solvantur.* Et *Celsus* scite non minus quam ex vero, *lib. III. cap. 1.* eandem in rem disserit: *magis ignoscendum est medico parum proficiente in acutis morbis, quam in longis. Id enim breve spatium est, intra quod si auxilium non profuerit, æger extinguitur. Ibi & deliberationi*

& mutationi remediorum tempus patet, adeo ut raro, si inter initia medicus accessit, obsequens æger illius vitio pereat. Scilicet longe dispar chronicorum & acutorum morborum est ratio; dum non solum in illis vehementes spastici motus, qui morbi causam impetuose aggrediuntur celeremque exitum gignunt, adfunt; in his vero rarius, neque continuo, sed cum notabili intermissione præsto sunt, sed etiam illi ut plurimum celeriter corpori valenti accedunt, hi vero successive generantur & lentis adolescunt incrementis. Accedit, quod eorum qui diutius trahuntur morborum causæ plerumque sunt obstructions & indurationes minimorum vasculorum in emunctoriis & glandulosis visceribus, inutilium & superfluum tam se- quam excretioni dicatis, quibus oppilatis, non potest non ingens vitalibus succis conciliari impuritas, ac demum ipsa viscera & glandulosa excernicula penitus opplata, indurata & tumefacta in putridam corruptionem, exulcerationem cancriformam vel in abscessum concedere, aut funestis lymphæ effusionibus ansam suppeditare. Adeoque quum in his causæ morbi ipsa mora firmissimas agat radices, & labe latius serpente, vires exhauriat, motus supprimat ipsamque naturam mirum debilitet: non mirum est, naturam in expugnandis iis languere, motibus auctis raro eosdem aggredi, nec dispellendis iis sufficere, sed artis potius hic vigere opus, naturæ vacillanti succurrere idque perficere in quo ipsa deficit.

§. XXVII.

Hoc autem ex voto exsequendi, nulla itidem alia suppetit methodus, quam qua vitalis ille, vitæ sanitatisque auctor, sanguinis & humorum per omnia vascula itus ac reditus liber redditur, sordiumque per omnis generis excernicula evacuatio integra præstatur, adeoque obstructions, ubicunque consistent, citissime expediuntur atque humores qui in vitio sunt per congrua emunctoria educuntur. Jam vero ipsa dicitur ratio, vasculorum obstructions nec prius solvi, nec succos vitiosos eliminari posse, quam mobiles, fluxiles & ad excretionem apti redditi fuerint. Hinc utique omnis per longos morbos sanandi methodus in eo continetur, ut humores crassi mobiles ac fluidi efficiantur, dura emolliantur, stricta laxentur & postea validiori facti sanguinis impulsu, per intensam solidorum actionem, impacti humores concutiantur, dissolvantur, eluantur & sic obstructionum repagula referantur. Ex quo quidem clarissime patet, efficacissimum ad hunc scopum obtinendum esse thermarum, acidularum & aliarum medicatarum aquarum, infusorum, decoctorum, fotuum, balneorum & omnium, quæ incidente & aperiente virtute polent, tempestivum usum; contra vero ante debitam materiam quæ in vitio est præparationem, damnosam ac præposteram validiorum purgantium, diureticorum, sudoriferorum, salivantium, mercurialium & metallicorum oblationem, ut certe nihil imprudentius sit, quam intestinis fecibus duris confertis forte purgans exhibere; vel calculum impetuose pellere, ubi à doloris & spasmi atrocia ureteres cum ductibus urinariis stricti, calculusque impactus; aut aquas hydropicorum purgante exturbare niti, ubi succi viscosi adhuc intra membranarum tunicas obhærescunt, vel denique sudorem elicere velle, ubi spiracula cutis spasmo stricta atque compressa.

§. XXVIII.

Neque vero tantum natura quandoque in

opere deficit, verum etiam nonnunquam alienos plane ac perniciosos in corpore concitat motus, qui causæ removendæ neutiquam accommodi sunt, sed potius exacerbationi favent. Hunc incensum referendæ sunt illæ sanguinis evacuationes, quæ si non sanguinis copia delinquit, sed serum acre causticum nerveo membranosis partibus insidet & enormes profusiones in impuris cachecticis corporibus suscitatur, ut sæpius contingit in purpura, variolis, morbillis, scorbuticis & arthriticis minus plethoricis, eveniunt, sub quibus sanguis, qui potius servari debebat, una cum viribus effunditur, nec ullo modo tenuissima acris materia morbi causa ejicitur. Hinc utique in tali casu medico opera danda est, ut qua fieri potest celeritate, has perniciosas ejectiones compescat, quod tamen non violentis stipticis & constringentibus expedire consultum est, sed spasticæ multo magis stricturæ laxandæ, humor acris temperandus & discutendus, quod commodissime diaphoreticis sedativo nuptis præstatur. Eadem ratio est hæmorrhagiarum, quæ ex obstructione, induratione, vel infarctu viscerum, subnascuntur in cachecticis atque hydropicis. Tunc enim sanguinis evacuationes per nares, hæmorrhoides, vel etiam vomitum frequentiores, maxime detriméntosæ esse solent, quia mali causam non tollunt, sed potius vires consumendo, fatalem morbi exitum procurant.

§. XXIX.

Ex febribus, sive febrilibus spasticis generis nervosi & vasculosi commotionibus, minus salutare sunt, quæ à sphacelo interno, ut sunt malignæ, vel à corruptione lenta viscerum aut apostemate, ut sunt hæcticæ, oriuntur, & phthisicis, cachecticis atque hydropicis superveniunt, quippe quæ reliquias boni sanguinis ipsasque vires penitus consumendo certissime ad mortem ducunt. Ab assumpto veneno caustico, à læsione vel punctura externa partium nervosarum ac tendinosarum, à calculo ureteribus infixio, bile caustica, vermibus, herniâ incarcerata, ardore ex concedentibus in exulcerationem confluentibus variolis, omnibusque gravissimis doloribus, febres fieri acutas, quas Veteres dixerunt symptomáticas, experientia indies edocet. Sed omnes sic accedentes febres, nihil boni, sed plus damni minantur, & merito qua fieri potest celeritate & dexteritate exorbitantes hi motus sunt sistendi; quandoquidem frustra causis à quibus pendent opponuntur, nec easdem ullo modo subigere & abigere possunt, sed potius dum ad affectam & irritatam partem sanguinis majorem affluxum proritant, inflammationem ipsamque postea sphacelationem inducunt. Haud dispar indoles est quarundam intermittentium, earum scilicet, quæ à prohibita perspiratione, iracundia graviore, cibo cum nausea sumto & male digesto, saburra vitiosorum prima in regione fucorum & bile acri caustica proficiunt. Hæ enim si subsunt causæ, febriles impetus atque commotiones ad illarum emotionem parum omnino faciunt, quin potius expedit, vel emetico, vel salibus deterfivis, aut conveniente laxante & acrimoniam temperantibus, causas aggredi, ac postea, ubi febriles motus sponte penitus conquiescere renuunt, roborantibus ac tonicis eosdem sistere atque componere.

§. XXX.

Iisdem minus salubribus naturæ motibus accensendi sunt, qui tam membranas cerebri, quam

cordis pal-
pitatione

singultus
vomitum

tussis ferina

dejectioni-
bus

post animi
affectus.

spinalis medullæ, infesto fortiori spasio exagitant, totumque nervorum & muscutorum systema in consensum pertrahunt. Horum classem ducunt epileptici & convulsivi insultus, qui ex dolorum atrocitas in dentitione difficili, torminibus infantum, calculi cruciatibus, vermium morfu, læsione cerebri, fractura cranii, punctura duræ matris à festucis, nec non in variolarum principio vel fine accedunt, necullo modo superandis his causis accommodi sunt. Neque cordis palpitatio, cujus causa ut plurimum est polyposum in cordis thalamis hærens concrementum, bono & salutari fine contingit, eo quod validissima hæc quassatio, causam minime vincere valet. Pariter inanis ille singultus & vomitus à ventriculi inflammatione & insidente virulenta materia, omni utilitate destituitur, tanto magis quando materia vellicans intra stomachi membranas, ut in purpura, variolis & morbillis percussis solenne, hæret. Tussis quoque sicca ferina, quam dura pulmonis substantiam obsidentia tubercula cient, nullius plane usus est, sed potius vires consumit, somnum arcet & stomachum ad vomitum sollicitat. Ita etiam copiosæ cum sævis torminibus in diarrhœa ac dysenteria, vel post acre purgans assumptum dejectiones, nec quicquam ad salutem conferunt, eo quod non humorum copia, sed maligna qualitas in vitio est, cui frustra tanta sanguinis & feri egestio opponitur, qua vires magis exhauriantur & boni ac temperati humores cum detrimento subtrahuntur. Idem tenendum de diarrhœis, quæ nonnunquam inflammatoriis febribus symptomaticæ accedunt, quippe quæ pariter neutiquam discussioni staseos inflammatoriæ favent, sed plerumque in causa sunt, ut inflammatio latius, etiam ad intestina serpat eoque citius necet. Denique omni etiam usu ac fructu carent motus isti fortiores, qui graviores animi affectum, iracundiam vel terrorem excipiunt, qui certe adeo intempestivi sunt, ut vitam in summum subinde adducant discrimen. Ut adeo pateat perniciosos hos naturæ motus ab iis qui ad salutem tendunt provide atque solcite esse distinguendos, & quum non solum fructu destituantur, sed succos viresque exhauriendo etiam noceant, tempestive compescendos, ita tamen, ut simul causæ morbi per congrua præsidia removendæ exquisita habeatur ratio.

§. XXXI.

Hinc genuina methodus noscenda & custodienda.

Vidimus itaque naturam solam sæpe sponte morbos egregie percurare, arcere & corporis integritatem tueri, vidimus ejus vires non omnibus morbis expugnandis sufficere, sed artis juvamine indigere, vidimus quoque eandem sæpius incongruos moliri motus corpori damnosos, eaque propter ab artifice hos prudenter esse emendandos ac componendos. Jam vero vehementer utique optandum esset, ut omnes qui salutarem artem exercent, genuinam illam & probatissimam naturæ methodum, qua morbos feliciter sanat, intimius perspectam tenerent & molimina sua ad ejus præscriptum adornarent. In quo quidem laudanda merito Veterum sententia, qui ad unum fere omnes professi sunt, medicum esse naturæ ministrum, spectatorem, imitorem & adiutorem; ita ut Hippocrates passim prodiderit: naturam impulsam artis peritis quæ facienda sunt monstrare, nec quicquam salutariter fieri posse, nisi quod ipsi naturæ convenienter fiat, id quod etiam Duretus, optimus Hippocratis commentator, lib. de hum. purg. pag. 17. urget, præstantissimum, asserens, artis magistrum illum esse & dici

debere, qui fidelissimus naturæ imitator, observator & adiutor. Neque minus scite hanc in rem scripsit Fernelius in præfat. lib. I. therapeut. medicinæ, inquiens, leges, naturæ legibus debent esse consentaneæ. Et felix medicatio, cui adiutrix natura succurrit, irrita vero, quæ repugnante natura tentatur; cui assurgit pariter Henr. ab Heer obs. 5. perhibens: medicum motum naturæ dominæ suæ observare debere, & nihil ea operante temere mutare, nisi, ut vel infrenem frenet, vel ut pigriorem excitet.

§. XXXII.

Sed dolendum omnino plurimis ignoram esse optimam & securissimam naturalem morbos sanandi rationem. Plures quidem præposteronis arcana ad certos, immo universalis ad omnes morbos curandos, magno studio undique conquirunt, quæ accuratius perpensa re, spem plerumque fallunt & manifesto ignorantiam arguunt medentum, quasi in tanta corporum causarumque morbificarum diversitate, unum idemque omnibus aptum esset atque accommodum: pauci autem de simplici, facili & compendiosa naturæ methodo cogitant, quum tamen non tantum medicamenta curent, verum ipsa potius natura, per remedia convenienter adjuncta. Et licet sint, qui naturam mirum extollunt, ut præter eam nihil sapere videantur: teste tamen experientia, haud raro in eo delinquant, quod nec ipsas naturas, nec motus naturæ, qui in salutem, ab iis, qui ad perniciem tendunt, solcite distinguant, & naturæ opus, ad salutarem, uti putant, finem, licet incongrua ratione, directum, interpellare nolint.

§. XXXIII.

Proinde è re utique erit, ut ultimo loco quodammodo naturarum differentias delineemus, disquirendo maxime, quæ ad spontaneam medicationem aptæ sint ac dispositæ, quæ minus. Jam naturæ vel robustæ sunt, vel debiles. Robustam quidem sic describit Aretæus lib. II. cap. 3. quod sit, quæ est probe temperata, quæ omnia superat, omnibus dominatur, ac per humorem & spiritum ac solida, horumque omnium convenientem ordinem ac methodum, hominis vitam administrat. Quæ certe definitio ut antiquissima, ita elegantissima & principiis naturæ mechanicis quam maxime accommoda, utpote in æquabilitate & temperie, ordine ac motu solidorum æque ac fluidorum, consistit utique administratio vitæ & sanitatis, & hunc quæ imperturbatum servat natura successum, jure robusta dicitur ac valens. Sunt vero maxime plebei, pauperes & rustici, qui simplici & populari victu fruuntur, à robustis parentibus geniti, nec robur affectuum intemperie ac impetu, vel immoderatis animi fatigationibus atterunt, ætate juvenes ac viri, qui naturæ robore pollent. Vicissim languet plerumque ac debilis est natura in nobilibus, opulentis, laute ac inordinate viventibus, à parentibus morbidis prognatis, patheticis commotionibus crebro obnoxiiis, meditationibus studiisque nimium indulgentibus, senibus ac infantibus, post morbos perpeffos, aut ubi occulta labes fluidis vel ipsis visceribus inhæret, in quibus motus solidorum & fluidorum anomali sunt inordinati atque remissi.

§. XXXIV.

Valens igitur ac robusta natura, ad tuendam & revocandam corporis integritatem apta est, debilis

Ipsæque naturæ singuentur.

valentissimæ sunt & non debiles

De methodo , ordine & legibus artis in medendo. 413

debilis autem & infirma minus , sed in præstando saluberrimo hoc negotio languet. Illa morbos gravissimos sæpe sola , vel levi saltim arte adjuta , remotis nonnunquam tantum obstaculis , percurat , hæc vero difficilis est ad sanandum , non sola sufficit , sed opportuno medici consilio & auxilio indiget , quin omnem sæpe exquisitissimam medentis eludit artem. Hinc utique multum interest , quo medicus naturam ægri curate noscat , & felix sane censendus , cui fortuna in eo favet , ut natura valente pollentes sanandos nanciscatur , fortunatior adhuc , si sint genere , honoribus atque divitiis eminentes , qui ipsum illustri præconio nobilitare simulque muneribus excipere possunt amplissimis.

CAPUT II.

De methodo , ordine & legibus artis in medendo.

§. I.

Natura in medendo magna virtus.
IN superioribus satis , ut puto , evidenter ostendimus , à benignissimo & infinitæ sapientiæ corporis humani opifice ita constructas & coagmentatas esse machinæ animalis varii generis partes , ut certi ac determinati motus solidorum & fluidorum progressivi simulque secretorii , depuratorii & excretorii contingant , qui non modo ad vitalem conservationem & durationem corporis in se corruptibilis vergant , sed etiam summo artificio ita instructi sint , ut ubi à nocentibus rebus & causis inordinati sive morbidi fuerint redditæ , illi ipsi ad submovendas & destruendas illas causas à quibus pendent , conspirent. Et hoc est quod Veteres voluerunt , & quod etiam ipsa attentata confirmat experientia , plures nempe & graves etiam ægitudines , sponte solius naturæ viribus , sine peculiari medici auxilio , sanescere , & naturam optimam morborum esse medicatricem.

§. II.

Arte tamen opus est quia natura sæpe debilis.
Possæt itaque quispiam facile inde hoc elicere dubium : quod quum tam eximia sit naturæ virtus atque potentia , vana & supervacanea censeretur mereatur in morbis tollendis omnis medici ars & opera. At vero licet hoc de valente & robusta corporis humani natura , neque adeo corrupta vel debilitata , locum habere possit ; quum tamen mirum quantum naturæ & corpora quæ morbis affliguntur inter se differant , alia firmiora , & valentiora , alia imbecilliora & vitiata sint , adeoque non sufficiant ad negotium sanationis recte conficiendum , utique necessarium est , ut artis opus ipsis subveniat & congruis auxiliis succurrat. Quin experientia subinde docet , ipsam robustam & idoneam alias ad sanandum corporis morbum naturam , non solam semper sufficientem esse ad sanandum , sed indigere simul variis adminiculis externis , ne impediatur , vel plane invertatur salutare , quod molitur negotium ; quorum si non adhibetur observatio , plures , quibus robusta etiam natura , in variolis , morbillis & febribus continuis , etiam inflammatoriis levioribus , pereunt , qui potuissent servari , dum regimine nimis calido in lecto , & conclavi , vel refrigeratione intempestive admissa , potu frigido , vel etiam spirituofo , cerevisiæ vel vini , cibus improvide in vigore morbi datis valde nutrientibus , situ cor-

Frid. Hoffmanni Oper. Tom. I.

poris nimis diu erecto , improvida lintheaminum mutatione , iisque rebus & occasionibus , quæ animum ad iram & terrorem movere possunt , damnum & noxa procuratur , ut hinc omnino opus sit quo prudens medicus , si non pharmaceuticis , minimum diætheticis , utilem opem & operam præstet.

§. III.

Obstacula remove.
Deinceps sæpe in ægotantibus præsto sunt obstacula , quæ si non remonentur , totius naturæ negotium in curando plane turbatur , vel pervertitur , nec tamen sine medici auxilio & consilio eadem removeri possunt. Exemplo sit : quando corpus sanguine redundans atque repletum morbis tentatur acutis , præsertim inflammationibus , natura sine superflui cruoris per venæ sectionem imminutione , eosdem superare & curare nequit. Vel etiam si sordibus & scybalis copiosis ac duris canalibus intestini crassi invadente morbo refertus est , hunc vacuare & recrementa protinus in principio educere expedit , ut felicius & debito ordine motus causam morbi expugnantes succedant , & ad eum , cui destinati sunt finem , perungere queant. Aut quando etiam evenit , ut prima regio colluvie vitiosorum & semiputridorum conferta sit , idque statim in morbi , sive sit acutus , sive chronicus , invasione , quam maxime proficuum est , convenientibus auxiliis , vel per superiora , vel inferiora , eam prius exturbare , ne vis morbi & symptomatum inde augeatur & exacerbetur.

§. IV.

Et succos vitiosos alterare potest.
Porro licet non negandum , naturam firmam & præstans suggerere subsidium , in emovendis iis morbificis causis , quæ motibus obsecundant & expugnari possunt , in alteratione tamen & correctione humorum nocentium non minus necessaria , eadem parum vel nihil opitulatur. Sic quando acidi , pontici & corrosivi humores primas vias obsident , qui vehementes dolores , spasmos ac tormina , uti apparet in infantibus , concitant , item in hypochondriacis , in quorum ventriculo omnia coalescere solent , plus certe commodi & utilitatis ab acidum absorbentibus expectandum est , quam ab omnibus naturæ motibus. Idem sentiendum , si bilis exsuperat præcalida , eaque acris caustica inflammans est , tum certe natura sola non sufficit , sed medicamentum demulcens , orgasmum bilis acris deprimens , v. g. nitrosum & absorbens , omne fere curationis punctum absolvit , quemadmodum id luculenter patet in affectibus cholericis & ex gravi iracundia enatis. Neque etiam venena quæ paucis temporibus necant assumpta , solius naturæ ope cicurantur & noxa eorundem abigitur , quum experientia testetur , sub vehementibus à natura suscitatis vomitibus & purgationibus , mori ægros , qui demulcentibus , oleosis & lacticiniis potuissent servari.

§. V.

Nec sufficienter emovet.
Præterea in multis morbis , præsertim acutis , natura evacuationes per hæmorrhagias , sudorem & alvum molitur , quæ tamen sæpe non sufficiunt , sed imperfectæ sunt , ideoque arte adjuvari & promoveri debent ; vicissim crebrius nimias profusiones sanguinis & humorum suscitatur , quæ quia vires adimunt corpus nimium exhaustum , componendæ sunt atque sedandæ. Nihil quoque fere evenit frequentius , ac ut motus vehementes ad destructionem potius vitæ , quam expugnationem causarum morbificarum & vitæ

conservationem tendentes, instituat, uti in atrocioribus moribus epilepticis, convulsivis, doloribus, præcipue qui per consensum partium nervosarum subnascuntur, ubi sedativis quam maxime opus est. Chronicas jam prætereo passiones, ut scorbutum, luem veneream, cachexiam, hypochondriacam affectionem, quæ à sola natura sine medici ope, plane non superari possunt. Quid præterea crebrius evenit, quam quod ex uno morbo, quantumvis egregie sanato, propter imbecillitatem partium relictam, alter sæpe deterior, nisi per artem roborantibus in declinatione cito ac tempestive occurratur, ingenere-tur. Neque denique dubitandum est, quin morbus, qui à sola natura temporis beneficio demum superari posset, longe citius atque felicius opitulante arte tolli queat. Quod utrumque disertis verbis inculcat *Celsus lib. II. cap. 14.* dum ait: *potest morbus etiam, qui per se finem habiturus est, citius tamen adhibito auxilio tolli, quod duabus de causis necessarium est, ut quam primum bona valetudo contingat, & ne morbus qui remanet, iterum, quamvis levi de causa exasperetur. Potest enim morbus minus gravis esse quam fuerit, neque ideo tamen solvi, sed reliquiis quibusdam inherere, quas admotum aliquod auxilium discutiat.*

§. VI.

*Transitus
ad institutum.*

Ex quibus omnibus adductis observationibus utilitas & necessitas artis medicæ clarissime elucescit, iisdemque, quasi totidem argumentis uberime confirmatur, sive natura in morbis languida, sive robusta fuerit. Interim tamen id certum manet ac firmum, quod ob imperitiam & temeritatem medentium, qui ductus naturæ non sequuntur, sed crebrius pervertunt, satius sæpe sit, soli naturæ negotium relinquere, quam imprudentis ac imperiti auxilio uti. Ne igitur in hoc tanti momenti negotio peccet medicus, sed firmam habeat regulam, normam ac legem, ad cuius præscriptum consilia & molimina sua instituere atque dirigere queat, non utique alienum, sed convenientissimum erit, ut universales quædam regulæ & medendi leges, jam præscribantur, quibus summo cum fructu in medendo uti possit artifex.

§. VII.

Lex I.

Ex his prima est: *omnibus in morbis ordinem & successum actuum motuumque spontaneorum, immo ipsa tempora, quibus natura sola medelam in salutem agrotantium molitur atque absolvit, curate & perquam solícite observare decet.* Vix vero ullus è morborum classe est, in quo tam conspicua naturæ methodus tamque distincta decursus tempora, quam in variolis. In variolarum enim morbo observatur, naturam primo certo temporis spatio uti ad materiam illam causticam partibus nervosis inhærescentem, tamque læva in principio concitantem symptomata, attemperandam, quo mobilis & disposita fiat ad evacuandam, hoc facto, deinde excretionem ordinario intra tertiam & quartam diem auspiciari, eidemque iterum certum, duorum vel trium dierum tempus impendere, ita quidem, ut à superioribus ad inferiores descendat partes, & corporis corticem per omnem ambitum successive exanthematibus conspergat. Absoluta eruptione, rursus determinatam periodum insumit suppurationi & materiæ evacuatae maturationi, eaque confecta, interposito certo temporis spatio, ulcuscula siccant atque consolidant, incipiendo pariter in

superioribus, ac desinendo in inferioribus. Et hic est solennis ille naturæ hoc in morbo processus, hic ordo, hæc tempora, quæ artifex studiose notare debet, quo tempestive fatiscenti naturæ succurrere possit, nec unquam adversi quippiam huic inethodo præpostere moliat. Idem vero etiam in aliis morbis obvium est, adeo, ut cardo medendi rationis, qua natura utitur, in eo potissimum vertatur, ut primo semper materiæ hostilis & vitiosæ correctioni studeat, eandemque ad evacuationem disponat atque præparet, idque fere in omnibus morbis, febribus non tantum exanthematicis, verum etiam inflammatoriis, immo chronicis; quæ proinde methodus pari studio servanda est ac imitanda. Quumque hoc præparationis negotium nonnisi certo temporis spatio absolvi possit, utique ut maxime omnium tempus exspectet, nec cursum præcipitet medicus, necesse; quæ certe prudens expectatio in medicina summum arcanum est, de quo non inelegans est *Gideon. Hervæi libellus de morbis expectatione curandis*, cui addi possunt ea, quæ in *dissertatione de curatione morborum in tempore* inculcavi.

§. VIII.

Secunda lex sic præcipit: *tempestive & statim in principio morbis occurrendum est, & materia quæ in vitio brevissima via evacuanda.* Scilicet ex præstantissimis medendi regulis est illa Hippocratica, *sect. II. aph. 29.* ita habens: *incipientibus morbis, si quid movendum videtur, move, vigentibus vero, quietem agere melius.* In qua quidem gravissimus auctor merito utique rejicit omnem illam medendi rationem, quæ in morbi vigore, hoc est, statu, impetu & exacerbatione ejus, ubi omnia in vehementissimo motu, per fortiora medicamina, maximeque evacuantia, suscipitur: vicissum vero accommodatissimum, ad medicinas quæ movent & evacuant, porrigendas, morbi esse initium, serio inculcat. Rationem hujus canonis divinus senex in sequente *aph. 30.* subjicit, dum ait: *circa principia & fines omnia debiliora sunt, circa vigores vero fortiora.* Nimirum quia sub vehementia atque vigore morbi omnia in motu intensiori statuque turbulento constituta, partesque motibus vacantes musculosæ ac nerveæ spasmo obnoxia; in proclivi est ratio, quare tum omnia stimulantia & moventia locum non invenient, nihilque agendum, sed potius quiescendum sit, neque alia quam humectantia, temperantia & effrenes motus quodammodo placantia usurpanda. Contra ea inchoante & declinante morbo, omnia sunt debiliora, id est, spasmi & motus intensi nondum in tanto gradu adsunt, vel vehementiam posuerunt; ideoque omnino, si opus est, materia & causa morbi statim in principio exturbanda, vel alienus qui sub morbi decursu genitus est humor, sub declinatione expellendus est. Si experientiam consulimus, hæc pariter hanc medendi legem uberime confirmat. Nam profecto ad graves ipsa in herba jugulandos morbos, præsertim qui contagio debentur, ut sunt pestis, dysenteria, castrenses & mali moris febres miasmata susceptæ, non efficacius occurrit remedium, quam lene emeticum, simul ac corpus iisdem inceserint oblatum, quo colluvies vitiosorum humorum una cum miasmate, quod cum saliva in ventriculum descendit, antequam ad sanguinis massam & nervorum genus deferatur, statim eliminetur. Variolæ quoque, morbilli, purpura & continuæ plures febres, biliosæ etiam & ardentes, nec non quæ arthriticis & podagricis insultibus associantur, longe

facilius

De methodo, ordine & legibus artis in medendo. 415

facilius sanationem recipiunt, si mox in principio, simul ac æger conqueri cœpit, prima regio, vel leni emetico, vel clementi purgante, à sentina vitiosorum humorum fuerit depleta: eo quod crescente morbo, spasmi augescunt, quibus hæ sordes intus retentæ morbi & symptomatum vim mirum exacerbant. Et quia intermittentium febrium, tam tertianæ, quam quartanæ, fomes, initio plerumque in ventriculi & intestinorum plicis ac glandulis hæret; è re est, ut statim sub auspicio primæ viæ à sordibus sive per mitiora emetica, sive salia deterfiva, sive comoda laxantia, repurgentur. Confirmat hoc luculentis verbis *Hippocrates lib. de affect. si*, inquiens, *quartana deprehenderit, vomitorium in principio exhibendum, rursus aliquo intervallo, aliud infra purgans medicamentum. Quod si per hæc non sedatur, medicamenta febrifuga dare oportet.* Neque tamen purgantia fortiora, quæ ipse *Hippocrates lib. de purgant. §. 5.* rejicit propinanda, quippe quæ nunquam in febribus tuta, quoniam spasticas exacerbant motiones, vel easdem, si conquieverint, revocant & recidivas pariunt. In lentis febribus, quæ maxime intermittentes male curatas sequuntur, in principio & laxantia, & leniora emetica tutissima, quousdem alimentaris canalis à saburra acida viscida liberetur; quod, si negligitur, diuturniores paroxysmi ingentem & fluidis partibus & visceribus labem affricant, & lentæ febres ex facili in hecticas concedunt. Periculi plenæ inflammationes internæ, ut pleuritis, peripneumonia, angina, matura sanguinis missione & subjuncto infuso diaphoretico, feliciter in principio discutiuntur; hoc autem neglecto, curatio, ob febrem ac intensiorem inflammationem, difficilis admodum fit & anceps. Ipsa quoque ventriculi inflammatio sæpissime ex potu frigido corpori sudanti copiosius ingesto, natales trahit, omne tamen periculum mox declinari potest, modo infusum ex herbis diaphoreticis cum aqua calida factum statim sorbilletur. Quod sphacelus exteriora occupans præsentaneo subsidio, simul ac primordia cepit, suffocari & arceri queat, res in vulgus nota est, quum elapso hoc medicandi tempore, mors sequatur certissima. Atque ex his omnibus clarissime innotescit: tempestive morbis esse succurrendum & occasionem medendi solícite captandam, in qua, ut ait *Hippocrates lib. de præcept. §. I.* non multum temporis. Quare vehementer certe optandum foret, ut & medici opportunitatem temporis in morbis sanandis curatius observarent & aucuparentur, & ipsi quoque ægrotantes mature medicam opem implorarent, eo quod in tempore curare & morbo occurrere, palmarium in sanationis negotio momentum est, & justa temporis observatio, merito curandi & methodi medendi anima dicenda.

§. IX.

Lex III.

Accedit tertia lex: *Evacuationes nunquam in morbis moliendæ, nisi materia excretioni apta & viæ patulæ fuerint.* Summa hujus præcepti *sect. II. aph. 9. Hippocratis* continetur, sic perhibentis: *corpora quæcunque quis purgare voluerit, fluida facere oportet.* Nam ipsa sana ratio suggerit, frustra materiæ commotionem & expulsionem tentari, nisi ipsa ad motum ac emotionem disposita sit reddita. Primo itaque omnis scopus, omnis intentio medentium in sanandis perlongis morbis eoque tendere debet, ut humores crassi fluxiles & mobiles efficiantur, durities molliatur, viæ adstrictæ relaxentur, & post-

ea validiori facto sanguinis impulsu & strictura solidarum intentæ, impacti humores excutiantur atque obstructions referentur. Ex quo jam elucescit, quam incomparabilis sit usus ad hunc finem consequendum thermæ, acidulæ & aliæ aquæ salubres, infusæ, decoctæ, foras, balnea, & omnia, quæ emolliente & diluente virtute prædita sunt. Patet quoque exinde, quod ante præparationem & mobilitatem materiæ, nunquam validiora purgantia, emetica, diuretica, sudorifera, mercurialia ad salivæ fluxum eliciendum, locum inveniant. Communis fere, sed pessimus hinc error est, quando deficiente mensium vel hæmorrhoidum, aut subsistente lochiorum fluxu, pellentia fortiora, sic dicta emmenagoga, uti sunt myrrhata, succinata, crocata & alia adhuc calidiora, in usum præmature vocantur; siquidem hæc sine præmissa venæ sectione sine primarum viarum expurgatione, sine antea adhibitis medicamentis fluiditatem sanguini conciliantibus, potius noxam afferunt & malum augent, tantum abest, ut juvaminis sint exoptato. Observationes enim docent, ab eorum intempestivo usu febres, capitis dolores, vertigines, anxietates, hæmorrhagias per incongrua loca, deliria, melancholiam, & mille alia symptomata, fuisse exorta. Præstat itaque potius prius plethoram demere, alvum laxantibus lubricare, sanguini fluiditatem decoctis & infusis appropriatis conciliare, vasorumque obstructions balneis, vel aliis convenientibus remediis, amovere, & tunc pellentia cum cura subungere, & sic demum exoptatus consequetur effectus. Hæc lex medendi & regula in sanandis morbis chronicis, præsertim scorbuto, lue venerea, hydrope, quartana, melancholia hypochondriaca, calculo, asthmate, amplissimi non solum est usus, sed etiam in acutis egregia & curate observanda. Nam in his pariter extracrisin & ante materiæ maturationem, & ut Veteres loqui amant, coctionem, in vigore paroxysmi, nunquam evacuantia cum fructu exhibentur. Hinc probe monet *Hippocrates Sect. I. aph. XXII. quæ matura coctæque sunt, medicamento purgante educere oportet ac movere, non cruda.* Natura ipsa huic methodo insistit, quippe quæ in omnibus fere febrilibus commotionibus, primos dies materiæ hostilis attemperationi & resolutioni stasium, in inflammatoriis & aliis acutis febribus, impendit, quam felicissime exsequitur motu & appulsu auctiori sanguinis ad loca affecta, quo non modo sensim ac sensim sanguis & viscidus humores impacti solvuntur, sed & discutiuntur. In aliis quoque morbis, motu tam intestino, quam progressivo intensiori, crassi viscidus humores attenuantur, dissolvuntur fluidique redduntur, falsi quoque & acres cum oleosis viscidis & terreis implicantur & temperantur, nimisque fluxiles & tenuis inspissantur: quem proinde naturæ ductum merito artifex sequi debet.

§. X.

Quarto inter præstantissimas medendi leges *Lex IV.* hæc connumeranda: *Evacuationes per loca humori excernendo convenientia fiant.* Aureum hoc præceptum *Hippocrates S. I. aph. 21.* his inculcat verbis: *quæ ducere oportet, quo maxime repunt, eo ducere oportet per convenientes locos;* idque merito à medentibus maxima cura atque diligentia observandum. Etenim si medicus humorum, qui in vitio sunt, excretiones stimulo quodam promoveri debet, probe omnino disquirendum, cujus conditionis ac indolis sit materia hostilis evacuanda, & quo in loco & parte

etiam corporis sit constituta, ut brevissima via commode educi possit. Sunt quippe diversi generis excrementa, ideoque iis eliminandis non quælibet accommodata sunt emunctoria, sed quodvis excrementum, peculiare & proprium quasi habet excerniculum. Hinc si in ventriculo & prima regione stabulatur & fixam sedem habet vitiosorum corruptorum biliosorum humorum sentina, quæ anxietates, ructus, tensiones & dolores gravativos parit, ciborum appetentiam prostermit, somnum placidum impedit, phlogosin excitat, vel etiam febres minatur; tum utique emetica, deplendo hac saburra ventriculum, utilissimam præstabunt operam, & hac ratione magnus & periculofus morbus præscindi poterit. Si in principio morborum intestina infarcta, vel ex male adsumtis & male concoctis eduliis multas recondunt cruditates, facile patet, ea, quæ clementer intestinalem regionem expurgant, omnium opportunissima esse. In hypochondriacis prima regio, ac potissimum duodenum, ingenti cruditarum acido-biliosarum colluvie subinde refertum est, quam si quis diureticis vel sudoriferis præposere veller eliminare, næ, is non leve damnum allaturus esset. Nam ejus generis humores temperantibus obtundendi & per ventrem evacuandi, unde etiam ex thermis & acidulis aliisque medicatis aquis, quæ alvinas sordes liberaliter emoveant, convenientissima in hoc malo sunt præsidia. Graviori iracundiæ affectu motus canalium biliosorum peristalticus auctus ingentem bilis sæpe corruptæ & acris copiam in tenuia intestina effundit, quæ parit anxietates, nauseam, ciborum fastidium, compressiones circa præcordia: interdum etiam cardialgias & inflammationes subortas notavi, ut & cholera; quibus gravissimis pathematibus si fortiori emetico vel sudorifero, quis veller succurrere, is certe pestilentem errorem committeret; de quo complures lugubres evenus propter inflammationes subortas notavi, & ut quisque sibi caveat, serio hortatus sum in *dissertatione de medicina emetica & purgante post iram veneno*. Nam quia congruum humoris biliosi excretorium est venter, longe tutius & consultius bilis ab ira commota per rhabarbarina, cum nitro & pulvere præcipitante nupta, vel per alia mitiora laxantia, educitur. Quin sunt inter exempla quidam, qui ex gravi ira male habentes in balneum se demiserunt & fortiter fudarunt, hoc eventu, ut lentæ febres, artuum tremores, arthritides, immo hypochondriorum spasmi & contracturæ, sequutæ fuerint. Nihil quoque magis noxium vel intempestivum est, quam alvo per quinque vel sex dies clausa, sudorifera, vel alia calida spirituosa, offerre, aut emeticum præbere; nihil inconsultius, ac serum in habitu corporis hydropici obhærescens per sudorem velle educere, quum potius, per urinarias vias & alvinam regionem ejus educationem moliri è re sit. Pessime pariter ægrotantium saluti prospiciunt, qui circa illud tempus, quo variolæ, morbilli, purpura & alia exanthemata, vel inflammationes erysipelaceæ prodire debent, purgantibus, vel emeticis eos exagitant, sicque materiam illam acrem ad interiora nobiliora loca alliciunt, gravius damnum certo allaturam. Ubicunque vero unius ejusdemque indolis humor per diversa emunctoria excludi potest, tunc certe non alienum est, excretiones in aliis etiam quam ipsi proprie dicatis excretoriis movere, quo divertatur affluxus humoris, qui partem diu infestavit. Ita in tussi valde humida, qua mucosa in maxima copia & immoderatus sreatu ejiciuntur, opportune purgantia

offeruntur, quia mucum ex pectore in glandulas mucosas crassorum pertrahunt. Quod etiam valet in fluore albo & gonorrhœa, ubi sæpius ingens viscidorum humorum copia ad has partes affectas affluens excernitur, & purgantia eam ob causam, ut divertatur nempe humorum nimius appulsus, optime præscribuntur. Manet itaque firmum ac stabile, naturam semper in opere evacuatorio, si deficit, ut humores evacuandi commode per congrua emunctoria duci ac ferri possint, adjuvandam esse.

§. XI.

Non minus universalis ac utilissima est quinta *Lex V.* hæc lex: *nunquam vi morborum curationes aggre-diendæ, vel evacuationes molendæ, sed paulatim & successive agendum & tempus expectandum.* Sane si ullus ex aphorismis Hippocratis memoratu dignus & in artis exercitio inmemori mente tenendus, certe est *Sect. II. §1.* sic præcipiens: *plurimum & repente vacuare aut replere, vel refrigerare, aut omnino quomodocumque corpus movere, periculosum est. Et omnis multitudo naturæ contraria est. Quod vero paulatim fit, tutum est, tum alias, tum si ex altero in alterum transitus fit.* Sicut enim omnes in rerum natura operationes per gradus, non per saltus, paulatim & successive, non vero cum impetu & violentia quadam, perficiuntur; ita eadem quoque via in sanandis morbis, in castigando & expellendo noxio humore, in obstructionibus referendis, procedit natura & temporis beneficio utitur. Quapropter etiam medicus suo satagens officio naturam imitari & nunquam violenter agere, multo minus impetuosè evacuationes urgere debet. Nam certa & diuturna experientia compertum habemus, non majus periculum ex errore & temeritate medici ægrotantibus accedere, ac ab emeticis & purgantibus validioribus, neque minus ab iis remediis, quæ vi sudorem pellunt, aut urinam & salivam movent & corpus fortiter calefaciunt. Neque etiam tam subita & ingens mutatio, quam corpus à validissimis & magna dosi exhibitis remediis patitur, utilis, sed potius valde noxia esse potest, quia omnes vehementes motus in eorum numero, qui naturæ insensui sunt, qui præternaturales, morbosus & corpori vim inferunt. Hinc quando emeticum porrigendum, consultius est pariori, quam liberaliori manu propinare illud, eo quod ubi humores ad ejectionem anotericam inclinant, operatio erit sufficiens, & si non fuerit, iterato vel auctiori dosi, pharmacum offerre præstat, ac uno impetu exturbare. Ubi per inferiora subducendi sunt humores peccantes, longe magis è re est, id clementioribus & repetito, quam simul & semel validioribus perficere: eumque in finem apprime ex usu sunt pilulæ secundum Becheri exemplum confectæ, quæ aloë probe cicuratum & extractum hellebori, cum temperatis balsamicis gummatibus & extractis amaris, habent, ita ut una dosi vix tria purgantium grana capiat, eaque propter tonum ventriculi & intestinorum, quem purgantia labefaciunt, firmannt potius & conservant, aliquoties tamen datæ, alvum saluberrime vacuant. Idem faciunt infusa ex radicibus & corticibus antiscorbuticis, aromaticis, atque ex rhabarbaro & agarico, addito stimulo salino-tartareo, per extractionem cum vino confectæ, quæ tam ad præcavendos morbos vere & autumno, quam ad sanandos rebelles chronicos affectus, egregii sunt usus. Quod si porro per corticem corporis halituolæ sordes excludendæ, nunquam in usum trahenda ea, quæ sudorem,

dorem, universam sanguinis & humorum massam commovendo, fortiter pellunt; sed potius infusa & decocta diapnoica, vel etiam pulveres fixioris naturæ, nec non temperata balnea, quæ omne punctum in sanatione etiam rebellium morborum chronicorum, præter acutas passiones, ferunt. In lue venerea affectis, si salivæ fluxus proritandus est, nunquam impetu & larga mercurialium oblatione id efficere oportet, præsertim in iis, quibus genus nervosum debile & humores impuri ac intemperati, nisi feralia symptomata vel incompefcibile salivæ stillicidium ciere velimus. Pariter in efferatis motibus componendis doloribusque sedandis, proficuum magis est semper anodyna refracta, quam plena & magna dosi adhibere, & sistentibus amico temperamento quædam stimulantia adjungere, quo nomine theriaca cœlestis, massa pilularum Starckii, Wildegansii, vel tinctura antimonii tartarifata, aut acris, cum pauxillo extracti opii remixta, commendari merentur. Quando denique roborandum, & partes nerveæ, ne consuetos spasticos motus repetant, firmandæ, quod fit maxime in reprimendis paroxysmis intermittentium, & quidem familiarissime per famigeratissimum illum chinæ corticem & alia roborantia; tutius semper est, causâ febrili prius subacta & evacuata illud efficere, in accisa & repetita, quam magna & continua dosi, & antequam causâ prospectum fuerit; eo quod hoc neglecto, experientia teste, phthisis, hydrops, asthmata, hæctica & pathemata spasmodico-hypochondriaca conciliantur. Quapropter omnes qui artis operibus manum admoveere gestiunt, cum cura monendi sunt, ut quantum fieri potest, ab omni validiori medicina, multo magis plena manu oblata, abstineant, sed potius temporis beneficio utentes, nunquam nimis festinent, & sic demum tuto, sine noxa & periculo, sua conficiant.

§. XII.

Lex VI.

Convenit interdum motus effrenes morbosos compescere, relictâ ad tempus eorum causâ. Sexta hæc lex est, amplissimi in praxi recte instituenda usus. Quemadmodum enim ii motus in morbis, qui à centro ad circumferentiam abeunt, qui comitem habent pulsum citiorem, cutem relaxant, spasmos cum causâ morbi tollunt & sic in salutem machinæ labefactatæ tendere solent, nunquam à prudenti medico sistendi, sed potius pro circumstantiarum ratione conservandi, vel tantum moderandi sunt: ita è contra illi, qui vergunt à circumferentia ad centrum, quales sunt maxime spasmodici, qui omnia turbant in corpore, & dum liberam dispensationem & motum humorum ac debitam secretionem & excretionem impediunt, interitum minantur, vel nisi ad causâ remotionem directi sunt, interdum provido consilio protinus compescendi sunt, licet causâ materialis efficiens eorundem adhuc intacta relinquatur. Quod ut testatius pateat, exemplo sit acerbissimus ex calculo dolor. Nimirum dimoto ex renum conceptaculo ac in uretere ob majorem molem vel aspritudinem firmitus obhærescente calculo, nerveo-membranaceus hic canalis ob vim illatam arctius constringitur, non solum dolor suscitatur exquisitus, & inflammatio cum febre accenditur, sed etiam per consensum simul ventriculus & duodenum afficitur, & inverso motu peristaltico, vomitus proritatur, quin toto tandem genere nervoso in consensum rapto, deliria, tremores, convulsiones & epilepsiæ excitantur, quæ, ut vidimus, quandoque mors fune-

sta excipit. Sub hoc igitur motuum exorbitantium & symptomatum choragio, si quis velit causâ, calculum, vi emoliri, nec prius vias laxare; is sane nihil aliud efficeret, quam ut spasmodicas constrictiones augendo, lethalem morbi catastrophem induceret. Quin potius longe consultius causâ morbi tantisper relinquitur & motus quavis arte complacantur, atque his demum ad temperiem reductis viisque ampliatis, faciliiori negotio causâ amolitio tentari poterit. Pariratione in colica passione, primum esse decet, ut vehementia spasminorum deliniatur clysteribus oleosis & unguentis & axungia humana, pinguedine taxi, castoreo, zibetho & hujus generis aliis, & interius quoque ejusdem virtutis medicamenta adhibeantur, ut sunt oleum amygdalarum dulcium, antispasmodica, inque primis liquor noster anodynus mineralis, qui dolores & spasmos effrenes sistit, vomitus compescit, sine stupore tamen & sine omni noxa; hoc autem facto, facile ac tuto causâ materiali, siue illa hæreat intra canalem intestinorum, siue intra membranas ejus, appropriatis remediis poterit succurri eademque expelli. In hæmorrhagiis quoque nimis, quarum eruptio semper à spasmis, sanguinem ad certam quandam partem adigentibus & vasa venosa eo excurrentia distendentibus, proficiscitur, vel potentissimis stipticis, constringentibus sanguinemque cohibentibus fluxus non cohibebitur, delinitis autem spasmis, vel sponte cessabit, vel facilissima ratione coerceri poterit. Tacemus plurimos alios spasmodicos, convulsivos & cum magna dolorum atrociam junctos affectus, in quibus semper expedit paroxysmos sedantibus prius invigilare, quam causâ abolitionem urgere. Cavendum tamen quam maxime est, ne in ejusmodi morbis, ubi motus nimii perniciem minantur, ad eos sistendos opiata vel adhuc fortiora sedativa & narcotica adhibeantur. Testantur enim observationes Practicorum celeberrimorum, hoc perperam facto, spasmodicam colicam sæpius in paresin, aut etiam veram paralytin, transiisse, aut calculum ureteri remisso nimis eo diutius inhæsisse, ac in universum, lethales inde subsequutos esse effectus, quales annotavit & exemplis confirmavit *Stablius in dissertatione de impostura opii.*

§. XIII.

Excipit septima lex: *vigente paroxysmo & Lex VII. quando natura jam movet, à fortioribus commoventibus & evacuantibus desistendum, ac potius excedentes motus moderantibus & ad temperiem reducentibus, utendum.* Ipse Hippocrates quum observasset, quantam noxam afferat, si quis in illis morbis, ubi sanguis cum impetu circumagitur & morbi vehementia est maxima, fortiora medicamenta, quæ majorem sanguinis cient orgasmum, propinare, aut purgantia exhibere audeat, sapienter *sect. II. aph. 19.* præcepit: *vigentibus morbis, quiescere multo præstat:* ac potissimum valentiora ejusmodi pharmaca tempore paroxysmi febrilis non præscribenda esse serio in *libr. de purgantibus* suavit: quicumque inquit, à febribus fortioribus corripuntur, his medicamenta purgantia dare non oportet, donec remiserit. Etenim quando vehementes motus vel spasmi intensiores præsto sunt, ut plurimum exteriores corporis partes cum summa cute constrictæ sunt, & sanguis à circumferentia ad centrum urgetur, alvus, renes, poruli cutis & reliqua emunctoria, propter nimiam constrictionem, non rite munere suo funguntur & excretionibus subsistunt; eaque

eaque propter nihil certe imprudentius poterit excogitari, quam tum motus ciere vel augere, & præsertim purgante, vel vomitorio, aut sudorifero valido, humores naturæ corporis nostri inimicos exterminare niti, eoque symptomatum vehementiam magis exacerbare. Quiescendum potius tunc temporis est, vel parum agendum, & magis effrenes motus moderandi ac cum violentis spasminis blande componendi. Hanc ob causam rectius procedunt ii, qui in morbi paroxysmorum vigore atque impetu, si quid arte tentandum, tantum diluentia, blandam diaphoresin conciliantia & moderate nitrosa ac sedativa naturæ amica exhibent. Ubi vero movendum, accommodatissimum tempus est in acutis principium, vel quando vehementia remisit; in chronicis extra paroxysmum & conquiescentibus spasmodicis motibus, quo etiam evacuantia congrua operationem suam bene exsequuntur. Egregium hanc in rem *Cælii Aureliani lib. II. cap. VIII. pag. 217.* est monitum, dum ait: *nec phlebotomia, nec aliis medicamentis, quæ cito & copiose peccantes humores detrahunt, unquam utendum in augmento passionis, sed potius tempore dimissionis. Unde, pergit, in accessione simpliciter mitigantibus utimur adiutoriiis.* Sed dolendum profecto, toties totiesque contra hanc impingi legem. Nam communis tam vulgi, quam medicorum non incelebrium, olim fuit & adhuc est opinio, variolarum, morbillorum, purpuræ atque pestis morbum, expellentibus & alexipharmacis fortioribus esse excipiendum, quo illud quod vitæ est inimicum, cito & sine mora per corporis peripheriam proscribatur, unde tot in officinis prostant tincturæ bezoardicæ, spiritus volatiles, salia volatilia, essentia antipestilentiales ac pulveres varii generis sudoriferi & alexipharmaci, olea calidiora aliaque id genus plura. At vero sic calor fovetur, ignis igni additur, ipse sanguis quasi accenditur, mixtio ejus naturalis & temperata crasis dissolvitur & destruitur, ac in universum nihil aliud efficitur, quam ut anxietates, inquietudines, deliria, epilepsia & convulsiones concitentur, placida & successiva eruptio impediatur, ipsaque materia exanthematica deleteria, plus augeatur, quam imminuatur. Longe tutiora certe in expellendis variolis, morbillis, purpura & omnibus morbis, in quibus aliquid per corporis corticem excerni debet, sunt illa medicamentorum genera, quæ nimias & turbulentas commotiones cum stricturis superficialibus amabiliter placant, & impedimenta removendo, eruptionem blande adjuvant. Quod quidem, quemadmodum de fortioribus sudoriferis in propatulo est; ita eadem cautio de eorum quæ per os vel alvum vacuant usu, studiose tenenda. Neque enim unquam convenit, emetica vel purgantia, quin salia, majori dosi tempore paroxysmi tertianæ, vel quartanæ, aut non multo ante ejus accessionem, propinare: quippe per experientiam cognitum est, insultum inde longe reddi acerbiorum maximasque cum cardialgia anxietates laborantes affligere. Ratio in proclivi est. Scilicet hæc medicamina non alia ratione quam spasmus agunt, & partes nerveo-membranosas subtili sale acri caustico vellicando à stimulando, ut validiori crebriusque repetita strictura & separetur & exturbetur quod in vitio est, efficiunt; in omni autem febre ejusque paroxysmis, jam tum teste nausea, dorsi dolore, pandiculatione, conatu vomendi, flatibus in abdomine, anxietate præcordiorum, horripilatione, cutis refrigeratione, alvi que adstrictione, adsunt spasmi & formalem

ejus rationem absolvunt, ideoque dum sic spasmus spasmu accedit, & stricturæ intenduntur, non possunt non pathemata exacerbare & paroxysmus longe gravior reddi. Ubi vero impetus resedit, nervosum genus tranquillum & partes spasmu prius exagitatae languent ductusque patuli sunt, tutissime ac utilissime fomes & vitiosa materia artis ope laxantibus, purgantibus vel emeticis è latibulis evocatur atque proscribitur. Quæ certe prudens temporis opportuni expectatio, tum in morbis, tum in omnibus moliminibus, tam necessaria est, ut sine ea frustraneus sit omnis conatus, de quo scite cecinit *Ovidius*:

*Dum furor in cursu est, currenti cede furori,
Difficiles aditus impetus omnis habet:
Aggrediar melius tunc, cum sua vulnera tangi
Jam sinet & veris vocibus opus erit.*

§. XIV.

Octava lex sit: *ubi motus jam languent, anodyna & sedantia summa cum cura sunt evitanda, ac potius vires resicientia motusque excitantia usurpanda.* Quemadmodum si non potior, certe haud postrema, dexteritatis atque peritiæ medicæ pars in eo versatur, ut artifex exorbitantes motus opportune complacare noscat: ita profecto præposterum ac damnosum est molimen, quando opprimuntur ac sopiuntur, ubi potius provocandi sunt & excitandi. Etenim anodyna & sopientia pharmaca & ex his frequentissimi usus opiata, ex heroicorum numero sunt, quæ magna pollent efficacia, & tam ad juvandum, quam nocendum parata, ideoque cautissime, ac ut *Celsus lib. V. cap. 25.* monet, non nisi nimia necessitas urgeat, usurpanda. Pessimus quidem quorundam mos fert, ut in quovis dolore aut somni defectu, imprudenti consilio, sine circumstantiarum perita pensitatione, ad anodyna ceu sacram anchoram confugiant, & doloris mitigationem cum quiete procurare nitantur, quum tamen sapienter præcipiat idem *Celsus lib. III. cap. 18.* quod hæc moderatio semper sit adhibenda, ne quem obdormire volumus, postea excitare non possimus. Semper igitur ante sedativæ virtutis remedium usum exquisita virium ratio habenda, eademque nunquam in usum vocanda, ubi virium, sive ob ætatis, sive aliam causam, adest imbecillitas, quæ ex impotentia membra movendi, pulsu debili parvoque, item actionum animalium torpore atque segnitie, sufficienter cognoscitur. Hoc autem neglecto quam maxime detrimentosa sunt, senes ad affectus soporosos disponunt, plethoricis sanguinis excretiones supprimunt, quibusdam mentis abalienationem conciliant, in febribus autem malignis aliisque morbis, dum vires penitus prosternunt motusque ad expugnandum morbum necessarios sopiunt, sphacelum ipsamque mortem inducunt. Et certe frequentissima est in observatis medicis mentio noxæ ex improvido sedantium & opiatorum usu, ut apud *Sanctorium de methodo vitandi errores lib. VII. cap. 12.* *Willisum in pharmacia rationali P. I. pag. 392.* *Sennertum Prax. lib. VI. cap. I. pag. 7.* & *Forestum lib. IX. obs. 14.* qui narrat, cacoehymicum, cui imperitus medicus præscriperat in dolore calculi opium, somno sepultum esse perpetuo. Ipse quoque novi, quendam febre ardente laborantem, ad sopiendam diuturnam vigiliam aliquot granis laudani sumtis, æternam sibi conciliasse quietem. Quin non desunt exempla, ubi opium in forma suppositorii immissum mortem induxit, cujus generis plura scripto reliquerunt *Tilingius*

Lex VIII.

De methodo, ordine & legibus artis in medendo. 419

Tilingius lib. de opio pag. 46. Sennertus l.c. Marcellus Donatus hist. mirabil. lib. IV. cap. 18. Et licet aliquando dolorem primum quodammodo mingare videantur ejusmodi sopientia, attamen infidus est effectus & non ita multo post acerbiora ingruunt pathemata, morbus pertinacior fit ac peior, ipsaque mors haud raro succedit. Conceptis id de colico dolore testatur verbis *Trallianus lib. X. cap. 1.* sic perhibens: *qui ex opio & alterco parantur, in colica non temere admoveere oportet. Etsi enim doloris levationem asferre videantur, tamen efficiunt, ut postea dolor diutius permaneat, putoque bona ratione ipsa non conferre.* Et paucis interjectis sic pergit: *multi igitur, quum in ejusmodi affectibus iterum atque tertio dedissent, effecerunt, ut partes læsæ emorentur resolverenturque, interdum vero etiam mortem omnino induxerunt.* Præstat igitur potius antispasmodicis, balsamicis, corroborantibus, analepticis, itemque bezoardicis paulo fixioribus & accuratiori insuper diætæ ratione languenti naturæ succurrere, ac motus conservare atque erigere, sique vel maxime, ob urgentes atroces dolores, ad complacationem aliquid videtur molendum, non opiaris & vehementioribus sedativis, sed blandissimis anodynis, cum balsamicis naturæ amicis nuptis, utendum, qua virtute non possum non commendare liquorem meum anodynum sic dictum mineralem, qui vires non prosternit, sed custodit, ac tutissime sine metu omnis noxæ potest usurpari; cui interdum refracta dosi balsamum vitæ, vel spiritus bezoardicus ad mentem Bussii paratus adjungi poterit.

§. XV.

Lex IX.

Ad nonam jam progredimur legem: *excretionibus criticis & salutaribus promovere, non intercipere, decet.* Criticæ Veteribus dicuntur illæ evacuationes, quæ in acutis morbis, cujus generis maxime sunt febres, sponte à natura, sine ulla etiam arte, certis diebus, ut sunt medius inter tertium & quartum, septimus, nonus, undecimus, plerumque cum bonis ægri rebus eveniunt. Ita enim, ut antecedenti capite docuimus, à sapientissimo opifice coagmentata est corporis humani machina, ut inordinati in ea motus, qui à causâ morbifica excitantur, sapientissime in medicinam cedant, ac per eodem ipsa morbi causâ summe pernicialis corrigatur & correctæ è corpore expellatur. Et quum hæc materiæ correctio certum & determinatum temporis spatium requirat, antequam commode è corpore eliminari possit, atque huic negotio divina sapientia septenarium maxime numerum dicaverit, ex eo fit, ut evacuationes, quæ circa septenos, vel semiseptenos dies succedunt, in salutem corporis maxime vergant & naturam ordinata sua perficere indicent. Duplici vero modo excretiones illæ salutaris sunt. Vel enim ipsam causam, quæ functiones corporis turbavit, fecernunt atque evacuant, ut fit in variolis, in morbillis, in febre erysipelacea, pestilente, quibus in morbis, ubi ad summam cutim, vel glandulas, nocens materia propulsa fuit, mox sævissima illa symptomata mitiora fiunt, aut plane conquiescunt. Vel criticæ evacuationes hoc nomine saluti sunt, quia effectum morbi perniciallem à corpore separant atque remonent, siquidem sub ipso morbo & motu concitatorum febrili, sanguinis & humorum massa in multas excrementitias falsas, sulphureas sordes dissolvitur, quæ, dum morbus in vigore & impetu est, non commode secedunt & expelluntur, simul ac vero

causâ morbifica est sublata, ac v.g. in inflammationibus stases sanguinis discussæ, spasticæ constrictiones corpus deserunt, tubuli excretorii relaxantur & omne alienum atque excrementitium, quod sub ipso morbo motu generatum fuit, utilissime propellitur, ut sudor largiter profluat, alvus sua sponte descendat & copiosa excrementa mucida biliosa diutius, urina quoque crassior secedat atque copiosum deponat sedimentum, vel etiam humor crassus viscidus, in pectoris præsertim morbis, maxime acutis, uberius collectus per expectorationem educatur. Jam quisque facile perspicit, nihil perniciosius esse, quam salutiferas has excretiones temere sistere ac intercipere. Sane, quam gravia, immo sæpius funesta mala, non modo à variolis, morbillis, purpura, crusta lactea, scabie, erysipelate, podagra, arthritide repulsis & ad interiora percussis eveniant, plurimis observationibus atque experimentis in praxi medica quotidie innotescit. Perquam nota sunt etiam illa damna, quæ ex antiquis ulceribus sanatis & diu gestatis fonticulis, præpostere consolidatis, pullulant. Pessime non minus ægrotantium saluti consulunt, qui alvi fluxus in febribus continuis, immo malignis, quibus sæpe salutariter morbus terminatur, noxios censent, eosdemque ea propter imprudenter cohibere ac sistere audent. Pariter exitiale molimen est, hæmorrhagias, quæ sæpe febribus continuis superveniunt, siue in criticis diebus, siue extra eas obveniant, vi quadam compescere, ex quo certe nunquam non capitale notavi damnum: quæ tamen omnia jam tum *Sect. I. cap. 8. de damnis ex cohibita cuticulari & cap. 9. sanguineis aliisque evacuationibus, nec non cap. 15. de crisi in experientia rationali fundatis*, fusius exposui. Interim si forsitan excretiones etiam salutaris nimis & excedentes fuerint, ut vires iisdem gravius pessundentur, non tam directe sedativa & sistencia adhibere è re est, quam potius ea, quæ appulsum humorum ad alias partes divertunt & motuum impetus blande demulcent atque placant.

§. XVI.

Decima lege præcipiendum: *ut morbo, vel Lex X. paroxysmo finito, artifex roborantibus utatur, quo recidiva vel novus morbus arceatur.* Qui saniorum medendi rationem sequuntur, eos non latet, paroxysmos morborum, præsertim spasmodicorum vehementiores, subsequi magnam atoniam ac debilitatem corporis, & illius inprimis partis, in qua causâ morbi inhærens vehementiam suam exercuit, quæ relicta debilitas, non modo facillime paroxysmos priores impetu longe fortiori revocat, sed & ob sanguinis circulum ibidem factum impeditiorem & vigorem deperditum, humores noxii eo decumbere consuecunt, ibique stagnationem subeuntes, chronicis diuturnis & maxime lentis morbis amplissimam subministrant occasionem. Perite idem inculcavit artis nostræ parens *Hippocrates aph. 32. sect. IV.* hunc in modum differens: *quibus à morbo restitutis quippiam est infirmum, ibi abscessus fiunt.* Quem aphorismum *Heurnius* ita exponit: *quando post morbum infirmitatis aliquid superest, quæ ex lassitudine & imperfecta crisi judicatur, ita ut supersint materiæ febrilis reliquæ, aut si liberalius se potu aut cibo invitent, quam immutata ventriculi actio, temperamentum & habitus perferre possint, tunc in discrimen venit homo, quia partes internæ & externæ labefactæ sunt; hinc si non accurata diætâ acceperit, hepatis & lienis scirrhi, vel cephalæ, vel foras in artus, si ibi imbecillitas, abscessus*

effunduntur. Quare ne quid coacervetur, dentur pilulæ aloëphanginæ, mastichinæ vel Rusi, vel tale quid. Huc quoque referendus, aph. XI. sect. II. morborum reliquiæ, quæ à crisi supersunt, recidivos morbos parere consueverunt, quod potissimum, sicut rursus id optime explicat Heurnius, contingit, quando ob infirmatam naturæ vim, materia morbifica non tota fuerit exclusa, neque in declinatione alvus purgante sollicitata. Quæ quum ita sint & experientiæ quoque testimonio uberius consent, utique manifesto apparet, nihil esse finito motu morbo ad reliquias mali extirpandas accommodatius, quam ut omne noxium & morbificum, quod adhuc hæret in corpore tacitasque ipsi fruit insidias, sive in ventriculo, sive in venis subliterit, mature excludatur & corpus ab omni excrementitio succo liberetur. Graviter vero in hoc errare ut plurimum solent medici, quod in fine morbi & ægris ad sanitatem redeuntibus, morbiferas reliquias neque evacuantibus, neque diaphoreticis eliminant, neque robur perditum naturæ atque ventriculi per congruam diætam & probata stomachica apte restituant. Etenim quo minus medicus utilem opem conferre potest morbo in vigore constituto, eo majus eoque præstantius in principio atque in declinatione ipsius est auxilium, siquidem initio, natura adhuc valida existente, multum proderit, si omnia congruis subsidiis obstacula, quæ motus salutes sufflaminant, dextre removeat & materiam vitiosam diminuat; in declinatione vero, si corpus debilitatum, rursus confirmet, vires languidas erigat, & quod restat adhuc noxium, expellat, & sic non modo recidivas peiores, sed & novos longe periculosiores morbos plerumque succedentes felicissime avertat. Ad subigendas igitur morborum reliquias & reparandum universi corporis robur, egregia virtute splendent pilulæ balsamicæ ut Becherianæ & ad harum exemplar paratæ Stahlianæ, vel nostræ, quippe quæ aliquoties oblata, noxia clementer expurgant, ac ventriculo cum intestinis robur iterum conciliant, præter quas commendanda etiam stomachica, quæ digestionem promonent, motum peristalticum infirmum egregie fulciunt & succis vitalibus tenuitatem ac spirituscentiam denuo conciliant, quæ tanto utiliora sunt, quanto minori, continuata tamen sæpiusque repetita dosi, assumuntur. Quod si autem ullo in morbo, certe in variolis & morbillis, reliquiæ morborum ut proscribantur, corpus firmetur & ab insultibus morbofis defendatur, necesse est, quandoquidem hoc neglecto, ex facili varias exulcerationes, abscessus quoque viscerum aliaque gravissima mala subsequi, experientia planum facit testatumque. Deinde post partum, immo abortum, vel puerperium etiam, uterus valde enervatus & à tono suo dejectus ad pristinum robur commoda medicina reducendus est, ne magnæ contumaces ac diuturnæ inde resultent affectiones, cui scopo eximie pilulæ nostræ balsamicæ, vel infusa laxantia leniterque purgantia, cum nervinis & uterinis mixta, una cum exquisito in vitæ victusque ratione temperamento, satisfaciunt. Mirum quoque tonum ventriculi & intestinorum labefactare solent diarrhœæ ac dysenteria, qui si non cito reparatur, lentæ inde febres, pedum œdemata, status cachecticus, spasmi hypochondriaci aliaque redundare possunt, ad quæ arcenda egregio usui, præter exactam diætam, est vinum generosum, uti Hungaricum, vel Gallicum Pontack, parcius inter cibandum potum, nec non elixir stomachicum, vel balsa-

num sic dictum vitæ, accisa dosi, sed diutius, usurpatum. Semper autem præstat hæc successive perficere, ac vires potentissimum fractas atque depressas sensim analepticis reficere ac refo-cillare.

§. XVII.

Eadem cura tenenda lex undecima: *debilibus*, Lex debilia, valentibus, valentiora conducunt. Hanc totidem fere vere verbis consignavit Celsus lib. II. cap. 20. scribens: *Imbecillis hominibus rebus infirmis opus est, mediocriter firmos, media materia optime sustinet, & robustis apta validissima est.* Et Hippocrates lib. de loc. in hom. §. 55. eandem sic conceptis verbis inculcat: *medicamenta fortiora à natura in debilibus morbis dare non oportet*; ac paullo post: *medicamentum singulis secundum naturam, debilibus debilia à natura, fortibus vero, fortis naturæ pharmaca exhibenda sunt.* Ut autem hic practicus canon eo clarius pateat, exponendum quid per debilia & valentia; tam corpora, quam pharmaca, sit intelligendum. Debilitas igitur ejusque oppositum firmitas & fortitudo, dicitur in genere à viribus, quæ valore effectus, id est, potentia movendi, ut in microcosmo, sese produnt. In homine quidem vires secundum functiones in quibus sese exerunt, optime in animales, naturales & vitales dispesci possunt, singulæ vero influxu subtilissimi, purissimi & mobilissimi, quod cum sanguine mixtum & in cerebro segregatum per nervos vehitur, tanquam causa & fundamento nituntur & continentur. Quod summæ activitatis liquidum, quum ex puriori aëris & alimentorum substantia ortum trahat; facile patet, quod qui bene appetunt, digerunt & egerunt, robustioris sint naturæ; contra ea quibus appetentia prostrata, ingestio, digestio atque egestio vacillat, debiles & languidi; eo quod in illis humores puri & temperati, in his vero impuri & intemperati redundant. Infirmi vero etiam dicendi, qui sensibilibus animi & corporis & quorum nervosæ partes levi etiam ex causa ad suscipiendas anomalas motiones promptæ sunt atque dispositæ; valentes vicissim, qui animi compositi, nec tam facile à rerum externarum insultu afficiuntur aut læduntur. Atque adeo in procinctu est ratio, quare infantes, ætate graves, vel valde decrepiti, qui spongiosum fibrarum habitum obtinent, vasa, nervos ac tendines exiliores gerunt, vigiliis, animi affectibus, mentisque fatigationibus nimium indulgent, morbo graviore acuto, vel chronico laborarunt, aut nimium sanguinis profuderunt, in debiliū numerum merito referantur, una cum iis, qui morbo, multoque magis ejus paroxysmo, jam detinentur. Per fortiora autem medicamenta intelligenda ea, quæ parva dosi magnis agendi viribus instructa, evacuandi sc. & adstringendi, commovendi & sistendi, calefaciendi & refrigerandi, imprimis ex minerali regno petita: lenia contra ac debilia nuncupanda Galenica vulgo dicta, quæ non vi, sed blande ac successive operationem suam exsequuntur, nec majori etiam dosi facile nocent, ut sunt clementia & per epicrasin laxantia, clysteres, infusa theiformia, lac asininum, serum lactis, temperantia, diaphoretica fixa absorbentia, liquores fixi alcalini cum balsamicis & amaris extractis conditi, nec non plura arcana illa universalia, panaceæ, essentia quoque solares dulces, quæ innocenter pariter in omnibus morbis, firmis æque ac infirmis præberi possunt, nec quicquam comprehendunt, quod conspicuam in morbis inducere possit

possit mutationem. Jam quum ad omnes salutare in corpore humano perficiendos effectus exquisita inter agentis & recipientis vires requiratur æquabilitas atque proportio, & natura humana ab omni excessiva, ut ait *Hippocrates*, qualitate lædatur, clarissime innotescit, in omni medicamentorum oblatione corpora curate esse distinguenda eorumque vires cum pharmacorum facultate solícite comparandas, & sic accommodam medendi rationem ineundam. Qui secus procedit, is certe graviter nocet, & debilibus fortia porrigens, vires iisdem opprimit penitusque prosternit, vel plane cum vita extinguit, debilia autem fortibus offerens, frustraneam prorsus locat operam, aut commovendo, nec emovendo quod in vitio est, malum exacerbat. Potissimum tamen cavendum, ne infirmos unquam validioribus pharmacis aggrediamur, sed hi semper magis diæteticis, quam pharmaceuticis sunt tractandi, & nullum medicamentum, ipsis sæpe est optimum. Quumque inprimis debiliu numero accensendi sint infantes ac senes: patet certe, quam temerarium & imprudens sit molimen, infantibus dimidii vel unius anni lactentibus, epilepsia ex dentitione difficili correptis, acriora purgantia, ut pulverem ex resinæ jalappæ grano uno aut duobus, & mercurii dulcis binis, vel tribus granis, crebrius propinare, iisdemque demortuis, tamen de securissima medicatione, cum summa alterius contradicentis injuria, gloriari. Pariter ætate proVectis tam fortia purgantia damno sunt gravissimo; quippe quæ teste *aph. 36. sect. II.* sana etiam corpora cito exsolvunt, multo magis senilia & imbecillia labefactant & detrimento mactant. Neque etiam infantibus, senibus aliisque imbecillibus, spirituosa calida, sic dicta confortantia, tam proficua & amica sunt ut vulgo putatur, eo quod hæc, ipsumque, ut audit, lac senum, vinum potens, largius haustum, intestinum calorem in succis accendunt eosdemque per hunc exhauriunt penitusque consumunt; moderate vero & medice cum optimi succi cibus asumptum vinum, acido destitutum & generosum ac purum, ut Rhenanum vetustum, vel Hungaricum, stomachi vires totamque naturam egregie reficit atque custodit. Neque vero tantum validiora pharmaca, verum etiam alimenta valentis, ut *Celsus* dicit materiæ, invalidis minus accommodata sunt atque proficua, licet & medicorum & aliorum vulgus erroneam hanc foveat sententiam, debiles & à morbo languidos, cibo, potu & jusculis confortantibus ac nutrientibus esse subinde reficiendos. Recte enim jubet *Hippocrates Sect. I. aph. II. in ipsis exacerbationibus cibos adimere oportet: nam præbere noxium, & cum per circuitus redeunt morbi, in ipsis accessionibus, abstinendum est*; eo quod corpora, ut impura, sic etiam imbecilla, monente eodem auctore, quo magis nutritiveris, eo magis læseris, & vires in morbis non meliori ratione reparantur, quam prudenti medicatione & successiva causarum morborum remotione. Quamobrem memori utique mente nunquam non reponendum: inter vires corporis & medicamentorum, mensuram quoque alimentorum ipsuque laborem & motum, exquisitam semper servandam esse proportionem, eumque in finem, ut perite vult *Hippocrates lib. de morb.* curate expendendam hominis naturam, corporis staturam, ætatem, anni tempus & constitutionem, situm regionis aliasque id genus plures circumstantias.

§. XVIII.

Ad duodecimam nunc pergimus legem: *per paucis selectis medicamentis, ad morbos & sanandos, & arcendos, utendum.* Sane nihil magis medentem perturbat atque confundit, quam ingens illa remediorum multitudo atque varietas, qua libri botanici, pharmaceutici, chymici & practici referti sunt, ut non sine fastidio perlustrari possint, & parum absit, quin artem ipsam exhorreat diffusissimum hunc campum ingressus. Tam innumera enim sunt remediorum genera, tot compositiones, tot medicaminum vulgo adscriptæ virtutes, ut ne quidem memoria his omnibus capiendis sufficiat, tantum abest, ut quæ de singulorum usu & perita applicatione scitu perquam necessaria, animo teneri queant infixæ. Celebrandum quidem in eo merito summi conditoris est providum institutum, quo benigna parens natura affluenter ex inexhausto suo penu varia & multiplicia in sanorum æque ac ægrotorum usum supeditat præsidia, neutiquam tamen opus est, ut omnia in usum vocentur, sed natura, ut in alimentis, sic etiam iis quæ in medicinam cedunt, paucis contenta est. Paucae quippe & simplicissimæ sunt morborum causæ, ideoque iis etiam removendis pauca sufficiunt adminicula, & ex vero scribit *Jo. Langius ep. 76. ego dico, desipere eos medicos, qui pluribus medicamentis aliquid expediunt, quod paucioribus transigi potest.* Quin potius ipse ego scio & experientia edoctus sum, nunquam medicum, qui immenso isto pharmacorum, quæ in pharmacopoliis asservantur & plerumque sine ratione & fide mirificis encomiis celebrantur; apparatu, utitur, crebrius ea mutat & affatim ægris ingerit, ad veram, certam & intimam eorundem cognitionem, pertingere, in qua tamen præcipuum felicitis medendi rationis momentum est repositum. Hic egregium profecto *Damasceni aph. 34.* est consilium: *pharmaca pauca tibi tenenda sunt, & quorum operationes ac potestates jam multoties expertus es.* Totius enim multitudinis notitia incomprehensibilis est, ac quum per singulas volueris inquirendo discurrere, multiplici diversitate distentus, nescies, cui debeas fidem adhibere. Artis igitur atque prudentiæ est, ex tam numerosa suppellectili pauca & certæ virtutis quædam deligere ac per longam atque attentam experientiam quid in tot diversis, ut offeruntur quotidie, casibus & circumstantiis præstare queant, quid minus, addiscere, ac tum demum perspectis penitus eorundem viribus ac operationibus, iisdem uti ac in medicatione cum certa ratione inniti. Nam scite hanc in rem scribit *B. Wedelius de medic. facult. cogn. & applic. pag. 25. res se habet hæc instar amicorum. Magis æstimamus unum vel alterum amicum, quam centum notos. Multi etiam amicitiam offerunt, pauci merentur. Ita etiam curiosum, selectum & expertum medicamentum reliquis omnibus præferendum est. Qui omnes habet amicos, neutrum habet, qui omnia novit, neutrum novit.* Qui vero artem speculando tantum agitant & experientia destituuntur, hi certe fluctuant & hallucinantur, nec firmum, solidum & eventu comprobandum interponere possunt consilium, multo minus quamdiu usui insistendum, quando desistendum, qua dosi offerendum & quæ alia sigillatim circumstantiis accommodata, ex vero præcipere.

§. XIX.

Ex præcipuis præterea medendi legibus est decima tertia: *Medicus in juvando naturæ curatricis opere, plus utatur remediis diæteticis, lenioribus*

Lex XII.

Lex XIII.

ribus & simplicibus, quam pharmaceuticis activioribus & compositis. Per diætetica ea intelligimus, quæ ex iis rebus, quibus ad vitæ & sanitatis tutelam nemo non indiget & quæ recepta in scholis denominatione rebus non naturalibus accensentur. Nam quemadmodum ex harum perverso & inordinato usu prima fundamenta & proximæ morborum origines pullulant pariterque vehementia augescunt: ita ad morbosas varii generis afflictiones arcendas & subigendas, legitimo illarum usu & exquisita victus & vivendi ratione aptius & accommodatius est nihil, nec ipsa natura sine hac quicquam boni in sanando præstare, nec medicina optatum exserere potest effectum. Unde vera sunt quæ Galenus tradit: *nullum efficax remedium medicina habet, quod solidum auxilium afferre possit, si ei victus ratio resistat, vel illud non adjuvet.* Sane ipse ego sancte asseverare possum, quod remediis diætetis, quo aëris & coeli mutatio, corporis conveniens motus, accommodatus cibus & potus, nec non feri lactis, vel aquarum mineralium prudens usus, item abstinentia & quies, referenda, in expugnandis rebellibus chronicis morbis, qui maxime in imbecillius nervosarum partium systemate longam & fixam sedem habuerunt, ut affectus spasmodici & convulsivi, hypochondriaci & hysterici, id præstiterim, quod frustra artificiose compositis & concentratis medicaminibus tentant alii, & ipse à magnæ famæ medicamenti expectaram. Diætetica quippe remedia humoribus & motibus vitalibus affinia sunt, & blande, successe & cum tempore laudatissimam suam exserunt operationem, naturam imbecillem & morbidam in meliorem statum reducendo. At vero quo major est horum simplicium in medicina utilitas, eo pauciores ex medicis eorum cognitioni, multo minus dextro usui debitum constituunt pretium ac utilissimam dant operam, sed plerique pensis habitis diætetis præceptis, non nisi operose concinnatis è pharmaceutico fonte petitis subsidiis morbos oppugnare contendunt, quo tamen plerumque nihil aliud efficiunt, quam ut naturam in saluberrimo sanationis ordine, progressu & tempore turbent, vel festinatione opprimant. Hinc citante Langio lib. I. ep. 76. multiplices medicamentorum ex simplicibus numerosis confarctas compositiones falsæ jam pridem irrisit Plutarchus in sympos. Dec. IV. Cui Plinius H. N. lib. XXIV. cap. I. his verbis perbelle suffragatur: *ex terra nascentibus nata medicina. Hæc sola naturæ placuerat esse remedia parata vulgo, inventu facilia ac sine impendio, ex quibus vivimus. Postea fraudes hominum & ingeniorum captura officinas invenere istas, in quibus sua cuique venalis promittitur vita. Statim compositiones & mixturæ inexplicabiles decantantur. Arabia atque India in medio æstimantur ulcerique parvo medicina à rubro mari importatur, quum remedia vera pauperrimus quisque evenet. Ita est profecto, magnitudo populi Romani perdidit ritus, vincendoque victi sumus, paremus exteris & una artium medicina imperatoribus quoque imperat.* Longe prudentiores in eo se gesserunt vetustissimi medicorum, ut peritissimus Celsus, Celsus & methodici, qui, re probe perpensa, quicquid in arte præstiterunt, solius naturæ ordine & ductu & ignobilibus hisce auxiliis ac diætæ beneficio effecerunt. Nam pharmaceutice quidem confecta priscorum medicamenta, magna ex parte incondita sunt ac nullius fere pretii; contra vero in eorum monumentis longe meliora & utiliora in regimine diætetico recte adhibendo in morbis & extra eos reperire quispiam poterit

præcepta, quam in ullo fere recentiorum scripto. Laudandus tamen merito hoc in genere Montanus ejusque optimus discipulus Crato, è quorum scriptis & ego multum profeci; quumque ipsa experientia de præstantia magis confirmarer, utilissimam me collocaturum operam putavi, si neglectui datam hanc potissimam artis salutaris partem omnibus modis excolere atque splendori suo reddere anniterer, evulgatis hunc in finem quamplurimis latino idiomate & Germanice reditis iterum iterumque recensis schediasmatibus, non sine luculento peritiorum applausu. Accedit & hoc, quod in universa rerum natura nullum purum detur simplex, sed omnia, quæ ad medendum tria sic dicta regna suppeditant, ex variis & diversis jam tum mixta sint, nec etiam hoc nomine artificiali mixtione & compositione opus sit; præferenda tamen maxime ea simplicia sunt compositis, quæ non uni, sed duplici, immo sæpius triplici, indicationi curandi satisfaciunt. Ita v. g. manna præter facultatem alvum stimulantem, aliam adhuc, videlicet acidos, ponticos humores demulcentem & simul spasmis constrictas fibras intestinales relaxantem, obtinet, unde in hypochondriacis & pectoris affectibus, omnibus aliis purgantibus palmam præripit. Rhabarbarum præter vim stimulantem custodit etiam principium subadstringentis & roborantis virtutis, unde tutissimum in diarrhœis ipsisque dysenteris est laxans. Cortex chinæ quoniam non modo amaritiem, qua acidum vitiosum in intermittentibus corrigitur & blandior spirituscentia sanguini conciliatur, habet, sed & elementum genus nervosum valde imbecille & ad novam febris materiam progignendi pronum roborandi aptum obtinet, aliis antifebrilibus & compositis recte antepositur. Pulvis florum chamomillæ vulgaris propter oleum virtutem anodynæ & antispasmodicæ, ac propter amaritiem subtilem vim aperientem & corrigentem recondit. Mentha custodit oleum subtile roborantis pariterque anodynæ virtutis, simul quoque elementum adstringens terreæ fixioris naturæ, ideoque in vomitu non datur ea præstantius. Neque tamen omnem omnino simplicium sic dictorum compositionem, multo minus cum ratione institutam miscelam, rejiciendam, sed potius quandoque proficuum admodum, immo necessariam esse, arbitror. Sic nitrum est simplex, si ullum, certe hoc præstantissimum, quod calorem intestinum sedat, acrimoniam biliosam temperat, alvum simul laxat & urinæ fluxum promovet; quod si vero intentio est medici præter has virtutes aliam addere, nempe acidum in primis viis corrigendi, commodissime ipsi pulvis ex lapidibus cancrorum absorbens adjicitur. Pari ratione opium, ne nimium sistat excretionem, non inutiliter miscetur cum purgantibus, ut aloe, in pilulis Wildegansii, cum extracto hellebori & oleo terebinthinæ in pilulis Starckii, sive Anglicanis, cum alexipharmacis in theriaca coelesti. Neque etiam laude sua defraudanda chymica & ex metallorum censu deprompta pharmaca, maxime ubi periculum in mora & efficaciter morbi causa & aggredienda & exterminanda; semper tamen leniora, quæ secuta, natura amica, & non tam exquisitam exposcunt circumspeditionem, præferenda activioribus, quin prudentiæ, ut scite monet Mesues, granum est, ad valentiora nunquam descendere, si debiliora sufficiunt.

§. XX.

Addenda denique restat lex decima quarta: *de crebra mutatione medicamentorum abstinendum*

& securis atque probatis remediis insistendum, licet non statim conspicuum afferant levamen. Est hæc ex præcipuis, quam Veteres ipsa experientia edocti solícite inculcarunt. Hos enim medicamentorum continuationem maximi fecisse, præter alios auctor est *Seneca ep. 2.* egregie ex ipsorum mente perhibens: *nihil æque sanationem impedit, quam remediorum crebra mutatio.* Hinc etiam medicamenta annalia, quæ per integrum annum usurpabantur, Priscis dicta sunt, quorum meminit *Cælius Aurelianus lib. de passion. chron. cap. 2.* his verbis: *Veterum quidam in passionibus arthriticis annalia medicamenta potanda præbuerunt, ut est diacentaurium & diascordium, bibenda anno continuo judicantes iis, qui longo tempore fuerunt passione vitati.* Et profecto prostant incomparabilis adversus multos morbos virtutis præsidia, quæ sine continuato & repetito usu, parum, vel nihil juvant. Luculento exemplo sunt foteriæ aquæ, inprimis Carolinæ thermæ, quarum in debellandis chronicis & rebellibus morbis mira certe efficacia, sed nonnisi per longum tempus & larga copia iisdem potis, expectanda aut impetranda. Digna est quæ hic interferatur observatio ex *M. N. C. Dec. II. Ann. I. obs. 179.* Reverendus Pater multis ventris torminibus & compressionibus pectoris vexatus, suasu quorundam ad thermas Carolinas se contulit, & bibere cepit thermæ aquas tanta in copia, ut fidem superare videretur: bibebat nempe sexaginta quatuor diebus 26089. sextarios, sextarius autem unus erat duodecim unciarum. Et additur: si citius discessisset & humores commoti non expurgati fuissent, in pejorem corporis statum incidisset, & omnia media adhibita incassum abiissent. Ab eo autem tempore curatus egregie fuit, & ter quaterque in anno thermas istas invisit, sex septimanarum spatio ibi commoratus. Quo etiam referendum Cælii Aureliani l. c. monitum; in articulorum passione usus adhibendus aquarum, tum calidarum, tum frigidarum, ut sunt *Abuleæ & Catiliæ*, sed affectanda repetitio. Pariter in lacte, inque primis asinino, quam maxime præstabiles adversus chronicas passiones, phthisin, atrophiam, podagram, arthritidem & scorbutum reconduntur virtutes quidem; quas tamen non brevi & parco, sed diuturno demum & largo usu, exserit. Quam in rem instar omnium esse poterit *Pechlinii* testimonium *obs. 23.* ita differentis: *lac est summum remedium, sed continuato id efficit usu, quo nempe per iteratas circulationes salis arthritici aculei obtundantur, & parato per alvum aut renes tartareo fermento, velut positis redurviis, novus recoctusque sanguis emergat.* At, recte subjungit, hanc ego curam eo absolutiorem fore confido, quo lactis usus diuturnior est & dieta in ceteris morosior. Verum cum deficiant statim ad prima experimenta delicatuli nostri, nec lactis usum cum decenti dieta, quæ tamen hic omne fert punctum continuent, mirum non est, si desideratus se non sistat effectus, aut plane sinister inde emergat eventus. De quo etiam argumento plura attulimus in dissertatione: de mirabili lactis asinini usu in medendo. Serum quoque lactis, præsertim secundum nostram inventionem recenter & dulce præparatum, spectatissima certe in morbis longis & rebellibus splendet efficacia, sed opus est, ut potatio ad unum vel alterum mensem extrahatur, ac eodem modo sub iisdemque cautelis in vitæ victusque regimine instituatur, quam cum acidulis vel thermis solenne est, prout latius exposuimus in dissertatione de feri lactis virtute longe saluberrima. Decocta medicata, præsertim temperatiora, quicquid

Frid. Hoffmanni Oper. Tom. I.

in lue venerea ad sanguinem purificandum, & ex traumaticis, aperientibus & consolidantibus speciebus concinnata, quicquid in phthisi & internis atque externis abscessibus præstant, id omne longo & continuato usui in acceptis ferendum, si ne quo nulla fere virtus nullusque effectus conspicitur. Quin in plurimis chronicis affectionibus, ut malo hypochondriaco, hysterico, cachexia, chlorosi virginum, mensium suppressione, inque primis affectibus uterinis, parum, vel nihil, solidi levaminis afferre poterit medicus, nisi paulo diutius appropriatis & accommodis remediis, ut sunt elixirium nostrum balsamicum temperatum alcalisatum, pilulæ polychrestæ balsamicæ, deterfiva, balnea, elixir stomachicum in notis ad Poterium descriptum, per aliquot menses insistat. Cinnabarina, ceu arcanum antepilepticum, à Chymiatriis potissimum magnis laudibus extolluntur; sed vix respondet effectus, nisi in paullo largiori, ad grana decem, & repetita ad aliquot dies dosi, usurpentur. Qua quidem ratione, non modo in epilepsia à causâ interna, sed etiam externa, à gravi nempe capitis percussione producta, vertigine, motibus convulsivis, præsentaneam & incomparabilem eorum facultatem olim sæpius expertus sum, licet non eo, ut vulgo moris est, sine, ceu sedativum & anodynum, sed potius ut medicamentum, quod humorem alveis elapsum & membranis cerebri vel nervis in hærentem, resolvit & colliquat, adhibuerim. Nec mercurius dulcis, nec æthiops mineralis, curat luem veneream, vel defœdationes aut exulcerationes cutis, nisi usus ejus continuetur. Neque etiam chinæ cortex intermittentes tollit, nisi ejusdem usui aliquandiu sub debitis cautelis insistatur. Neque denique fluor foeminarum albus facile abigitur, quam balneis, laxantibus & roborantibus diutius paullo usurpatis. Et quæ plura hac de re exempla & monita in dissertatione de prudenti medicamentorum continuatione, attuli. Igitur non possum non omnibus, qui cum laude in artis exercitio versari gestiunt, pauciora, sed selectiora, eaque leniora potius, quam activiora remedia, de meliori commendare, ac ut iisdem cum prudentia & constantia uti addiscant, quam maxime suadere. Nam vere dixit *Helmontius*: *pauci sunt, quæ medicum nobilitant*, sed hæc, addo, pauca paucissimis sunt cognita, & apparatu quidem ac copia medicamentorum non destituimur; at perita & in experientia fundata eorundem applicatio, cum dexteritate adhuc semper & ubique est in desideratis.

C A P U T III.

De medicamentorum viribus & causis ignorantia earum.

§. I.

Quando medicus naturam, cui principem in sanando locum merito vindicamus, dextre adjuvare ac imitari nititur; nihil ei prius, nihil posterius esse debet, quam ut non modo juxta *Hippocratem lib. de flat.* causas corporis affecti, sed & remediorum, quibus tanquam instrumentis omnia ipsi perficienda; vires & facultates penitus cognitas habeat atque perspectas. At vero quo magis in artis exercitio utile est ac necessarium, veras & non fictas medicamentorum, pro tam diversa corporum & morborum ratione vires,

Remediorum vires parum cognite.

intimius nosse; eo magis utique dolendum, immo mirandum est, quod, si dicere licet quod res est, perpauca sint remedia, quorum virtutes & operationes certæ ac recte perspectæ, sed pleaque spem atque expectationem curantis frustrantur, quin veræ pharmacorum facultates in *Democriti* quasi puteo adhuc latent. Quod quidem assertum paradoxon & plane à veritate alienum videri posset, quum tam numerosi libri practici, botanici, chymici & pharmaceutici, medicamentorum, tam simplicium, quam compositorum Galenicorum & chymicorum copiam, non modo recenscant, sed & eorum laudes atque efficaciam miris concelebrent encomiis, nec tamen satis deprædicare possint: nihilo minus tamen re accuratius expensâ & adhibita ad tam magnificas laudes & tantopere decantatos effectus explorandos circumspecta observatione, pauca certe supersunt, quæ fidæ & expertæ virtutis, plurima vero infida, suspecta, fallacia, ficta & energiæ egentissima; licet in nullo mendaciò secundum *Plinium lib. XXIX. cap. 1.* majus sit periculum quam in medico.

§. II.

Quia eorum multitudo nimia.

Si causam hujus tam perniciosæ ignorantie medicamentorum quoad veras suas vires & facultates disquirimus, sunt quidem plures, inprimis tamen ipsa immensa illa per ignorantiam pariter adeo accumulata moles & farrago remediorum, quibus ars salutaris referta & tantum non oppressa est, impedit, quo minus recte in exquisitam singulorum notitiam pervenire possimus. Nam quum tam mirifice dilaudatis pharmacis Practici uterentur, nec tamen expectatus effectus sequeretur, mox ad alia delapsi, nova condere, vel ab aliis recenter condita, in usum vocare cœperunt, quæ quum eodem modo ipsorum votis non responderent, sed ubique inertiam atque defectum arguerent, alia rursus consilii inopes quæsiwerunt, immo ad chymica, panaceas & ipsa exotica, quorum modo fama afferebatur, conversi sunt. Hinc nata est tanta medicamentorum sylva, qua certe nihil ad distinandam ægrotantium salutem & ad praxeos rationalis & efficacis incrementum remorandum, deterius inveniri potest. Nam profecto sub tanto numero medicamentorum, quibus nostro tempore pharmacopolia referta & plane onusta sunt, genuini & proprii cujusvis effectus & operationes, in tot differentiis naturis, morbis eorumque causis, recte haberi & cognosci non potuerunt, neque etiam unquam cognitio intimior speranda, aut virium exploratio cum successu molienda, nisi prius ad paucorum & selectorum numerum redigatur innumerabilis apparatus.

§. III.

Pathologia vera ignota.

Altera causa, ob quam veræ remediorum in medendo proprietates adeo ignotæ atque abstrusæ, est veræ pathologiæ ad hæc usque tempora neglectus. Nam sicut secundum *Hippocratem lib. cit. de flat.* si quis causas corporis affecti probe cognovit, potens est valde ea afferre, quæ corpori commodant, nimirum contraria morborum natura perspecta: ita omnis qui hac cognitione destituitur, vel erroneam hausit, neutiquam etiam accommodata remedia invenire atque in usum proponere potest. Quapropter pathologiam veram veræ therapiæ primum & præcipuum fundamentum habendam esse recte ducimus, & hinc etiam non sine ratione & sine in priori sectione copiosius & accuratius ad eam stabiliendam valde

utilia capita adduximus. Quumque ex hac solida morborum philosophia planius innotescat, non multiplices & valde abditas atque abstrusas, sed simplices & manifestas esse multorum & magnorum morborum ac symptomatum causas, quæ maxime pro differentia locorum quibus insident, valde differentes læsiones & effectus producant: in proclivi omnino est judicare, non pluribus, sed paucis pariter ad removendas has causas opus esse remediis.

§. IV.

Accedit tertio & inter ea, quæ defectum in perquirendis & cognoscendis veris remediorum facultatibus arguunt, merito referendum & illud est: quod non modo vulgus, sed & ipsi medici, qui doctis accenseri volunt, noxiam hanc foveant opinionem, quasi ipsis medicamentis formaliter inhærent noxii, vel salutares effectus, qui ipsorum usum sequuntur. At vero hæc assertio non solum erronea, sed etiam perniciosa est, ac tum in physicis, tum medicis rebus ingentem sterilitatem affert. Etenim omnes omnino corporum in rerum natura vires neutiquam sunt absolutæ, sed relativæ & conditionatæ, certis respectibus & circumstantiis limitatæ. Nimirum omnes effectus & operationes, quæ in corpus male affectum redundant, non nisi motu accedunt; jam vero ex physicis & mechanicis patet, non in uno & simplici corpore motum existere, sed demum ex duorum congressu & reactione emergere, ipsamque vim motricem unius corporis ab alterius reagentis mirifice modificari: adeoque de nullo etiam medicamento in se considerato, certus quidam effectus, qui species motus, salutaris, vel minus talis, prædicari potest, licet eidem vis quædam ad actionem exserendam insit. Quapropter recte omnino colligitur, ut corpora, sic etiam medicamenta, agere non tam secundum receptivitatem, & remediorum effectum non modo ad causas morbificas, sed & individua quæ varia sunt, & sine quorum cognitione fallax omnis medicinæ operatio, recte simul referri. Hæc autem accuratior circumstantiarum cognitio ex parte difficilem & conjecturalem artem nostram quidem reddit, sed rationalem ab empirica quam optime distinguit: quandoquidem prudentis & cum ratione agentis medici est, in sanando quovis morbo, omnes tam prævios, quam concomitantes circumstantias probe inquirere, ponderare, naturam medicamenti cum genio morbi, & quidem sub tali corporis constitutione, probe comparare; hoc autem prætermisso, præter futilem, cœcam & temerariam Empiriam expectandum nihil. Et quamvis post cœco tantum ausu adhibitam medicinam interdum per accidens & casu, vel declinante jam morbo, salutaris succedat eventus, eo tamen, si non alio nomine, culpandum erit ejusmodi molimen, quod semper periculum sit, ne gravi damno, quod prudenti adhibita observatione evitari poterat, ægrotantes macet.

§. V.

Res clarius patebit exemplis. Nimirum lip-
pis notum est atque tonsoribus, jalappæ purgantem inesse facultatem. Hæc autem si eadem dosi, ad drachmam dimidiam, vel decem corporibus sanis, etiam ejusdem ætatis, mane offeratur, mirum certe erit, quam diversus effectus ratione temperamenti, constitutionis corporis, partium nervosarum, immo virium, inde resultabit: in hoc vel decem sedes cum vomitu, in illo quin-
que

Vul-
gus
dicit
abso-
lutè
ines-

Quod
men-
ci-
experi-
tiam.

que tantum, in alio paucas valde, sed anxietates simul junctas cum inappetentia, movebit, in hoc vehementia tormina, in illo nulla, excitabit. Et eadem operationis diversitas, non modo in reliquis purgantibus, sed & aliis evacuantibus, emeticis, sudoriferis & diureticis animadvertitur. Neque etiam in artis exercitio versantibus obscurum esse poterit, quantopere medicamentorum efficacia secundum clima, regiones, anni tempora & tempestatum constitutiones, victus & vivendi genus discrepet: unde recte *Celsus* dicit: *aliud medicamentum Romæ, aliud in Græcia adhibendum*. Certe Westphaliæ, Pomeraniæ & septentrionalium regionum incolæ, purgantia, emetica & alia fortiora, experientia teste, quam optime ferre possunt, quæ Italis pestifera & tantum non venenata sunt. Hoc vero discrimen longe magis in statu morbofo obivium, dum unum medicamentum eodem modo & regimine, tempore ac dosi, eodem in morbo exhibitum, uni prodesse, alteri non convenire, sed nocere, per attentam observationem confirmatur. Expertus id nuperius admodum sum in binis puellis gemellis quinque annorum, quæ eadem victus & vivendi ratione usæ, eodem tempore variolis corripiebantur, & decumbentes iisdem medicamentis eademque methodo tractabantur, diverso tamen plane eventu, dum altera gravioribus longe symptomatibus conflictata, inter decimum & undecimum diem exspiraret, altera vero eadem pustularum copia obsita, mitius laboraret & feliciter evaderet, ac in eo tantum diversa esset corporis constitutio, quod quæ moriebatur laxioris & succulentioris, altera vero strictioris & firmioris esset habitudinis. Pariter chinæ cortex circumspicte adhibitus divinum certe in intermittentibus est remedium; sed quam noxius inde etiam in iisdem febribus propulset effectus, notissimum est. Martialia in cachexia, chlorosi, in affectione hypochondriaca, effectum persæpe præstant longe saluberrimum, nonnunquam vero plus noxæ, quam emolumenti afferunt. Quam diversa remediorum, quæ sedativa virtute prædita, ut opiatorum, sit operatio, noxia & salubris, nemo non novit. Sulphura ex mineralibus, maxime ex antimonio, item medicamenta ex mercurio rite parata, incomparabili polent virtute in chronicis & rebellibus morbis debellandis, in primis lue venerea, sed nisi circumspicte pro circumstantiarum ratione usurpentur nocentissima sunt. Superfedeo plura alia adducere exempla, quum ex allatis abunde elucescat, verissimum esse *Hippocratis lib. de arte §. 7.* effatum: *quæ profuerunt, ob rectum usum profuerunt, quæ vero nocuerunt, ob id quod non recte usurpata sunt, nocuerunt*. Et *Celsum lib. III. cap. 1.* egregie ad veritatem sentire, dum asserit: Medicum non semper posse præstare artis effectum, licet sit perpetuum in arte medica, quid fieri debeat, tamen non esse perpetuum, quod sequi convenit.

§. VI.

Accedit quarta tam supinæ ignorantie in propriis & veris medicamentorum facultatibus cognoscendis causa frequentissima, quod nimirum medentes naturæ, morbi & medicamentorum vires atque effectus non curate invicem distinguant, sed sæpissime fallaciam causæ ut causæ admittant, quæ frequens & quasi propria est in medicorum scholis, ut nullus facile sit, qui cum hoc non colluctetur vitio. Nihil enim frequentius, quam quod naturæ, immo morbi effectus, à vulgo & ignaris medicis pro operatione medica-

mentorum habeantur ac falso venditentur. Sane qui atrociam illam in variolarum initio obvia symptomata, delirium, epilepsiam, applicato antea clysteri vel interius assumpto medicamento adscriberet, is certe plurimum erraret, cum illo, qui vicissim medicamento diaphoretico, circa quartum diem, quo sponte omnia pacatiora fiunt, propinato, pathematum cessationem tribuere vellet. Plures vero ex idiotis sæpe hac ratione immeritam plane quandam famam callide aucupantur, ut oblato ab ipsis circa dies criticos, quibus sponte solvitur morbus, vel etiam sub declinatione medicamini, subsequenter salutarem effectum tribuant & ignaris imponant. Interim tamen non negandum, remediorum, naturæ & morbi effectus non semper à priori distinctos satis comparare, sed prudentissimos etiam sæpe in cognitione falli, & recte dixisse *Galenum de medicament. facult. lib. II.* sæpe propriam cujusque medicamenti vim obscurari necesse est, ubi fallentem aliunde qualitatem acceperit. Quo etiam apprime facit elegans *Pechlini in observatt. testimonium: aliquando, inquit, in medicina eveniunt, quæ evenire nec posse, nec debere, juratus crederes, adeo aliena illa sunt, cum à scopo medici, tum medicamini effectui. Nunc etiam quæ speras & fingis animo futura, non eveniunt, & cum eveniunt aliter quam oportet.*

§. VII.

Neque porro prætereundum, multum omnino ad hanc medicorum circa medicaminum vires ignorantiam contulisse, quod perpauci iis adminiculis instructi sint, quorum ministerio elementa & principia, quibus medicamenta agunt & in corpus operantur, indagari & cognosci possunt, philosophia nempe experimentalis chymico-mechanica, quæ variis mixtionibus, destillationibus, extractionibus, solutionibus, corporum texturam, ingredientia, crasin, à qua eorum qualitates, proprietates & affectiones dimanant, detegit atque recludit. Ob hujus itaque scientiæ defectum, turpe dictum est, per multa sæcula tota cana vetustas & recentiores quoque in pernoscendis medicamentorum agendi principiis summa in ignorantia versati. Antiquiores enim commentitiis quatuor elementis, qualitibus, humoribus & temperiebus tanquam saxo adherentes, nil nisi sterilia & futilia circa hanc rem proposuerunt. Post hos Philosophiæ Cartesianæ adducti nimis subtiliter de actione medicamentorum in corpus differere, & eorum operationes ex varia particularum figura, magnitudine, nexu derivare voluerunt, sed parum ad usum. Et nostro jam ævo prodeunt, qui hæc omnia rejicientes, asserunt: aliam esse actionem medicamentorum & corporum physicam, juxta physica principia explicabilem, aliam vero medicam, ad vivum corpus relatum. At licet nemo unquam negaverit, vivo, non mortuo corpori offerenda esse medicamenta; in obscuro tamen evolvendum manet, quomodo hæc agant in corpore vivo. Et licet porro contendat, per vivum corpus intelligendum esse corpus principio interno activo, motus & omnem quoque medicamentorum actionem ad arbitrium & moraliter certum in finem dirigente, instructum, eaque propter supervacaneum penitus censeant illum conatum, quo principia & modus agendi remediorum investigantur: hæc tamen omnia sunt mera supposita, quæ nulla firma demonstratione nituntur, nec etiam quicquam utilitatis ad rationalem therapiam conferunt, ut potius cœcæ Empiriæ apprime faveant.

Pauci norunt principia indagare.

§. VIII.

Per Philo-
sophiam
experimen-
talem.

Igitur certum interea sit, pro diversa natura & indole medicamentorum, quæ etiam ex parte ipso odore & sapore cognoscitur, aliam atque aliam esse ipsorum operationem, v. g. refrigerandi, calefaciendi, sudorem, urinam & alvum movendi, motus sedandi & intendendi. Certum quoque ac firmum sit, omnes in corpore nostro effectus, à causarum suarum nexu indissolubiliter dependere, adeo ut remedia, si sub certis conditionibus applicentur, certum etiam activitate sua edant effectum. His autem ceu veris, ut sunt, tantisper suppositis, nullum dubium est, quin mediantibus experimentis variis chymicis & mechanicis, à priori quam optime in principia & vires medicamentorum quispiam inquirere & penetrare possit. Clarissimo sunt documento soteriæ aquæ, thermæ nempe & acidulæ, de quarum ingredientibus Veteres ex defectu scientiæ physiciæ & chymicæ nonnisi fabulas & commenta in conspectum produxerunt, ego vero, quod citra arrogantiam dixero, primus fere in plurimis Germaniæ fontibus experimentorum ope genuina erui elementa, ut jam de eorum effectu judicare & quid in hoc vel illo morbo præstare possint, verum judicium ferre sit in proclivi. Neque minus ejusdem Philosophiæ experimentalis beneficio & mediante quoque sapore & odore, veras & genuinas in vegetabilibus detegi posse vires arbitror, ut pluribus asserui in exercitatione *de methodo compendiosa vires plantarum indagandi*, inserta tomo primo opusculorum physico-medicorum. Quin tentaminum chymicorum adminiculo, multorum certe arcanorum, inprimis quæ ex auro suintuose præparari jactitarunt, ingredientia, quantumvis occultata, sunt evoluta ac magnificæ ipsis falso & fraudulenter adscriptæ virtutes manifestatæ.

§. IX.

Et experientiam.

Monendum tamen est, non omnes medicamentorum facultates & proprias virtutes, hac ratione solius experimentalis studii subsidio elici posse atque detegi, sed easdem demum à posteriori, sive effectu & experientia, melius in conspectum venire. Ecquis enim est, qui solis experimentis physico-mechanicis argenti vivi vim tam vehementer salivam moventem, nitri virtutem refrigerantem & antispasmodicam, arsenici exitialem venenatam, seminis hyoscyami narcoticam, rhabarbari purgantem, cantharidum diureticam, antimonii emeticam, à priori per ejusmodi experimenta, nisi accedat experientiæ suffragium, conjicere, vel certo determinare poterit. Neque etiam virtutem quandam medicamenti semel aut bis expertam pro certa & probata venditare licet, sed iterata demum & aliquoties sine suspitione alius causæ confirmata experientia verum esse effectum evincit. *Multi siquidem, ut perite monet Baglivius Lib. I. prax. cap. 5. §. I. & 8. ob faustos eventus, semel vel bis observatos, ex aliquo remedio, vel potius ob innatam quandam proclivitatem, tum laudandi, tum fingendi ad lubitum medicamentorum vires, ita erga remedium aliquod afficiuntur, ut putent, illud unum ad curandos quosque morbos, summam vim ac veluti imperium obtinere, sed progressu temporis re melius perspecta, illud particulare & instabile, non vero commune ac perpetuum fuisse, animadverterunt.*

§. X.

Cognitioni
obstat com-

Denique etiam haud leve obstaculum penitiori

virium in medicamentis cognitioni objicit, tum quod rarissime simplicia, ac ut plurimum composita, nec hæc sola, sed aliorum usu interpolata, usurpentur, tum etiam quod pleraque medicorum turba animo fluctuet, nec uti quidem decebat, insistat usui, sed juvante non illico oblato medicamento, aliud promat crebriusque mutet. Etenim adhibitis multis simul simplicibus, dubium utique est, cui potissimum adscribendus effectus, multo magis si adjecta ita sunt comparata, ut virtutem vel infringere, vel intendere, possint. Et licet simplicia non semper omni indicationi satisfaciant, sed connubio eorum sæpe opus sit; tamen compositorum etiam genuina virtus nunquam innotescere potest, quando subinde alia atque alia interponuntur ac ipsa adhibendi methodus pluries variatur. Longe magis vero huic cognitioni obest crebra mutatio, quandoquidem remediorum effectus nonnisi certo tempore perfici potest & cognosci, quod nisi expectetur ipseque usus aliquandiu continuetur, neutiquam de virtute certi quippiam poterit asseri, sed quantumvis egregium pro sterili habebitur. Eximium hanc in rem est *Celsi præceptum lib. III. cap. I. non statim, iniquentis, condemnetur, si quid non statim profuit; minus vero removeatur, si quid paulum saltem juvat, quia profectus tempore expletur.* Et idem etiam jam præcedenti capite lege XIV. pluribus inculcavimus. Atque hæc sunt potiora impedimenta solidæ cognitionis virium in medicamentis; quæ qui superat ac removet, pariterque tempus exhibitionis, dosin & modum cum congruo vehiculo propinandi curate annotat; is omnino genuinas facultates & operationes explorabit & cum certa ratione habebit perspectas.

CAPUT IV.

De medicamentorum quatuor summis generibus & operandi modo, speciatim alterantibus.

§. I.

Quum omne fere medici officium in eo contineatur, ut, quæ tum ad tuendam, tum redintegrandam labefactatam valetudinem, nec non levanda & mitiganda urgentia pathemata faciunt, tempestive offerre, & vicissim, quæ insalubria & fugienda, perite arcere noscat; in proclivi est judicare: ad hoc ex voto perficiendum nihil æque necessarium esse, ac distinctam & curatam sanitatis præsidiorum notitiam. Hæc autem cognitio supponit non solum notitiam virium, sed etiam elementorum & operandi rationis; quo medicus solido dijudicare queat ratiocinio, quid ex omni apparatu in hoc vel illo morbo, hoc vel illo individuo, hoc vel illo tempore & pro diversa aliarum circumstantiarum ratione, obsit, aut proficiat. In quo quidem ut recte versetur artifex & habeat, unde cuivis casui accommodum expedite promere & cum fructu asserre queat; nihil aptius magisque proficuum est, quam si omnia hæc sua instrumenta, secundum ipsorum principia, modum operandi & effectus quoque quos sub certis conditionibus præstare possunt, in certas classes perite & compendiose dispescat.

§. II.

Jam quidem quamplurimi ejusmodi syllabi & catalogi materiæ medicæ, à doctis etiam viris concinnati, passim circumferuntur: sed si verum fateri

Medica-
mentorum
in classe
distribui
necessari-

Que mi-
nus recte
huc usque
adornata

fateri licet, ita ut plurimum sunt comparati, ut solidæ & rationali therapie inde adornandæ, plus obsint quam profint, & à peritis ac in ipsa arte exercitatis vix sine indignatione perlustrari queant. Etenim obviæ in iis sunt longe plures quam par est & innumeræ fere remediorum classes, ut non ita pridem in ejus farinæ libello vel quinquaginta numerarim, prout nempe ratione partium quas afficiunt, ratione morborum in quibus conveniunt & ratione effectuum quos interne & externe edunt, variant. Ipsæ vero consignationes diffusæ & tam variis diversæ ac plane contrariæ indolis medicaminibus refertæ sunt, ut qui confidenter, sine nova curata distinctione, earum ductum in conficiendis pharmacis sequi velit, non possit non in ingentem errorem atque confusionem perducere.

§. III.

Quapropter summa medicamentorum genera compendiose & longe rectius sic describi posse censeo, ut quum omnia quæ medendi scopo offeruntur, ad removendas morborum causas quoad modum agendi dirigantur, in omni vero morbo vitium vel sit in motu, vel in materia, quæ movetur, immo ad motum disponit, motus porro vel nimis, aut in universo corpore, aut in certa tantum parte, intensus, vel imminutus sit, materia autem vel quantitate, vel qualitate delinquat, cuncta remedia vel circa motum, vel materiam operatione sua in genere occupentur. Et materiæ quidem qualitate vitiosæ corrigendæ dicata sunt alterantia, quantitate peccanti evacuantia, motui vero si deficit, imminutus est & partes atonia laborant, excitando & procurando roborantia, si vero intensus nimis est & adaugetur ac partes spasmo exercentur, componendo ac remittendo, sedativa inserviunt. Hæ sunt generales quatuor medicamentorum classes, ad quas omnia quæ naturæ promtuarum ad medicum usum suppeditant, commodissime possunt reduci. Quin etiam omnes artis in medendo operationes, his adminiculis & hac ratione quam optime perfici possunt, & Hippocrates elegantissime hinc & vere mechanice medicinam definivit lib. de flat. §. 3. scribens: *Medicina nihil aliud est, nisi ablatio & appositio. Ablatio quidem eorum quæ excedunt, appositio vero eorum quæ deficiunt. Qui autem istud optime facere potest, is optimus medicus censebitur, quantumque quis ab hoc præstando deficit, tantum deficit quoque ab ipsa arte.*

§. IV.

Deinde quod ad causalem influxum ipsamque remediorum actionem attinet; agunt ipsa immediate & proxime vel in fluidas, vel solidas partes, ita quidem, ut alterantia & evacuantia dicata sint fluidis, roborantia & sedativa solidis. Verum quia tam liquida, quam solida, diversæ naturæ sunt, diversis etiam rationibus succedunt operationes. Quippe nonnulla ex medicaminibus proxime actione sua afficiunt tenuissimum ac mobilissimum illud fluidum, quod in cerebro ac nervis hospitatur, & motum præcipue & sensum partibus præstat, illud vel augendo ac in motum magis ciendo, ut analeptica, cordialia & suaveolentia, vel intensiorem ipsius motum sedando, ut vaporosa, anodyna, opiata & graveolentia, quæ exigua etiam dosi assumpta, præsentaneam exserunt virtutem. Alia medicamentorum immediate operantur in sanguinem & qui ipsi serviunt succos, ut diluentia, incrassantia, attenuantia, item absorbentia & acrimoniam

causticam vel sulphuream contemperantia.

§. V.

Quæ in solidis effectum præstant, ut plurimum immediate & proxime eundem in nervosis partibus exsequuntur, præsertim ventriculo & intestinis, quæ sensationis exquisitissimæ. Hunc incensum veniunt pharmaca ex mineralium classe potissimum petita, quæ exigua in dosi operantur & in tenuissimas ac stupendæ exiguitatis moleculas integra virtute & textura dissolvuntur ac intimæ admissionis ad nervosas partes sunt, nec tam facile elui possunt, ut ex vomitoriis tartarus emeticus, ex salivantibus mercurius præcipitatus albus, ex sulphuribus, sulphur antimonii nostra methodo paratum & salia volatilia. Alia vero sale subtili caustico nervosas has partes adoriuntur, ut ex venenis arsenicum, ex purgantibus helleborus albus & niger, gummi guttæ, resina jalappæ & id genus alia, cum omnibus insectis, imprimis cantharidibus. Notandum tamen quod ex his nonnulla unam præ altera nervosa parte magis afficiant, uti mercurialia glandulas, lymphatica vasa ipsasque fauces, antimonialia emetica ductus biliaris, colocynthiaca nerveas intestinorum tunicas, helleborus oesophagum, laryngem & asperam arteriam, cantharides & insecta nerveos urinarios & feminales ductus, salia volatilia oleosa & sudorifera ex sale volatili regni animalis confecta tunicas vasorum arteriosorum. Alia denique ex iis quorum operatio solidis dicata, plus musculo-fibrosis, quam nerveis & membranaceis partibus facultatem suam insinuant, quorum è numero sunt roborantia, quæ vel leniori principio constringente fixiori terreo, vel sulphureo pollent.

§. VI.

Sic igitur in genere recte distinguenda medicamentorum suppellex, & sic quoque in compendio eorum actio & operandi ratio concipienda: jam de singulis seorsim. Quemadmodum vero medicina rationalis ab evidentibus maxime causis, obscuris omnibus, ut loquitur Celsus, non à cognitione artificis, sed ab ipsa arte rejectis, instrui debet: ita etiam illam scientiam, quæ medicamentorum facultates pandit & ad rationes revocat, non ex causis obscuris nimisque remotis, vel principiis atomisticis & secundum magnitudinem & figuram particularum geometricis, quæ revera incomprehensibilia, sed ab evidentibus, proximis, in sensus cadentibus & comprehensibilibus, immo maxima ex parte ipsa experientia petendam & hauriendam esse judico. Cui proinde methodo etiam in præsentiarum insistam, & in hac facultatum, & proprietatum medicamentorum explicatione, plana admodum, simplici & facile concipienda ratione procedam, ita quidem, ut non omnes, sed selectas tantum & usu comprobatas ex quavis classe species recenseam atque quoad agendi modum atque usum nervose explicem.

§. VII.

Sermo autem primo erit de ALTERANTIBUS, quæ primam remediorum classem constituere & maxime circa correctionem materiæ quæ qualitate in vitio est occupari, superius dixi. Jam vero quia materia emendanda in morbois corporis afflictionibus variis modis delinquere potest, varias etiam alterantium species inde resultare elucescit. Nimirum succis corporis nostri, qui secundum naturam blandi, dulces ac tempe-

rati esse debent, vel salino-acidam & corrosivam naturam induerunt, vel intemperie calida, subtili sulphurea infecti sunt, vel nimis viscidam, tenacem & crassam, vel valde acrem & corrosivam indolem contraxerunt. Hinc ut quadruplex hæc vitiosa qualitas corrigatur, quadruplex etiam alterantium genus esse debet. Et quidem ad acidum imbibendum ac obtundendum, absorbentia, ad exæstuantem & biliosam intemperiem contemperandam & refrenandam, temperantia, ad viscidum & spissum dissolvendum ac colliquandum, incidentia & denique ad acrimoniam urentem & corrodentem involvendam ac mitigandam, demulcentia apta sunt atque accommodata.

§. VIII.

Absorbentia.

Primum itaque alterantium genus complectitur ABSORBENTIA. Horum classem ducunt ex marinis mater perlarum, concharum, cochlearum & ostracodermatum variæ species, corallia rubra & alba, nec non os sepia; ex animantibus desumpta cornua & ossa, sive per vaporem subcoctione emollita, ac ut in pharmaciis audit, philosophice præparata, sive aperto igne usta, dentes & ungulæ, testæ ovorum, chelæ & lapides cancrorum, mandibulæ piscium, item unicornu animale & fossile; ex subterraneis lapis specularis, creta, crystallus præparata, osteocolle & omnes lapides calcinati & usi, varia bolorum, argillarum & terrarum sigillatarum genera; ex metallis limatura martis; ex chymice confectis omnia salia per incinerationem parata, cineres clavellati, sal tartari, nitrum fixum, spiritus salis ammoniaci urinosus, sal volatile ammoniacum, magnesia alba, tinctura salis tartari, item antimonii acris.

Theoremata.

Absorbentium horum omnium ea ratio est ac indoles, ut cum obvio quocunque acido promte congregiantur, illud imbibant, quantumvis corrosivum hebetent ac destruant & cum eo in tertium quoddam innoxium corpus commigrent. Patet hic effectus exemplo spiritus nostri fumantis & inflammantis quam maxime corrosivi, olei vitrioli, mercurii sublimati, aquæ regis, fortis aliorumque summe causticorum, quæ adjecta ferri scobe, vel commixto alcalino sale, aut absorbente terreo, omni rodente facultate orban-
tur, ut nec quicquam acidi aut arrodentis superfit. Quamvis vero cuncta alcalina salina & terrea in eo convenient, quod acidum quodvis cirent ac in tertium quoddam commutent: in eo tamen quædam intercedit differentia, quod salia alcalinæ indolis, sive lixiviosa, non solum à quovis acido, sed etiam liquore aqueo in corpore celerrime & ex toto solvantur, terrea vero non tam facile penitus liquecant, uti conspicuum est in coralliis, martis limatura, calce viva, quæ nec ab acido, præsertim vegetabili, prorsus dissolvuntur, sed semper fixior quædam terrestris substantia restitat. Deinde alcalina salia præter vim absorbentem, suscepto in connubium acido, novam acquirunt medicamentosam virtutem, viscidos nempe, limosos & tenaces succos incidentem & colliquantem, leniter stimulantem, ac vel alvum, vel diuresin, vel etiam diaphoresin movent, & promte quoque per excretoria transeunt: plurima vero alia ex corporibus alcalinæ naturæ non tam expedite excretiones proritant, sed potius quandoque adstringentem relinquunt effectum, uti solenne est limaturæ martis, coralliis, bolis & terris sigillatis.

Corollaria practica.

I. Quia igitur alcalina terrea nonnisi ab acido dissolvuntur, hinc utique cavendum est, ne in iis morbis, ubi primam regionem, in qua absorbentia maxime operationem suam exsequuntur, magna crudorum & viscidorum succorum colluvies obsidet, ne indissoluta ibi hæreant, stomachum gravent, appetitum & digestionem destruant alvumque reddant adstrictiorem; id quod sæpius in febribus ardentibus, biliosis, hæcticis & ubi languor motus peristaltici & constrictorii in ventriculo præsto fuit, factum fuisse observavimus.

II. Vicissim quia hæc absorbentia acidum tam promte absumunt atque invertunt, acor autem purgantium & vomitoriorum efficaciam quam maxime impedit atque infringit, utilissime digestivi loco, ubi iusta acidi est superantis suspicio, horum usui præmittuntur.

III. Utut omnia terrea absorbeant & obtundant acidum; ob diversam tamen singulorum texturam & naturam, quandoque fit, ut productum ex ipsis valde differat, ac diversum sæpe intentioni non respondentem in corpore effectum exsequatur, & hinc exquisitus in oblatione servandus delectus. Quando scilicet medicus præter virtutem absorbentem, etiam quandam roborantem & adstringentem desiderat; expedit marina potissimum, & ex his corallia & ostræas, nec non testas ovorum, item varias margarum species, inprimis quæ sigillari solent, in usum vocare. Si lenius adhuc subadstringendum, perlarum mater & conchæ, ac speciatim ad cohibendum feminis fluxum, os sepia, ex usu esse poterunt. Ubi per absorbens laxans simul effectus perficiendus, magnesia, quæ ex lixivio nitri debita enchiresi paratur & nonnisi tenuissimus calcis vivæ flos est, offerenda, quæ tota ab acido soluta, in sal medium amarum, alvum promte stimulans transit, eaque propter in hypochondriacis & ubi prima regio acidis succis scatet alvusque strictior est, eximiam certe exserit efficaciam. Quum diureticus simul effectus præstandus, cancrorum lapides, cochleæ vel corallia usta, nec non osteocolle, utilissimam locant operam. Ad perspirationem una in morbis liberiores reddendam animalium ossa usta, vel philosophice præparata, commodissime inserviunt. Et denique quo stagnantes & densati humores ipseque coagulatus sanguis resolvantur, nihil certe domestico illo remedio præstantius, quo cancrorum lapides in aceto liquati propinantur.

IV. Absorbentia licet sint medicamenta admodum simplicia, fere domestica & facile parabilia, eorum tamen virtus & efficacia omnibus ferme aliis remediis superior, nec satis dilaudari potest. Nihil enim tam expedite ac promte noxios succos cicurandi & invertendi facultatem ex omni alterantium censu exserit, quam absorbens, neque tamen facile tam securum ullum aliud & innoxium est, nisi majori quam par est copia ingeratur. Adhæc uber admodum acidi in corpore est proventus, maxime in his, quibus bilis deficit, ut senibus ac foeminis, nec non qui sedentariæ vitæ nimium indulgent, & potum, qui multum acidi recondit, largius assumunt, immo in multis morbis, præsertim affectione & melancholia hypochondriaca, enormis plane; acidum autem toti animantium naturæ, & coagulante effectum, libero succorum vitalium progressui admodum inimicum est, & gravissimorum, præsertim chronicorum morborum, primam & originalem causam

sam suppeditat : ideoque clarissime innotescit , optima & præstantissimæ virtutis immo polychrestæ esse hæc absorbentia , quorum tamen usus Veteribus parvus admodum fuit vel plane nullus , ac demum *Helmontio* , *Tackenio* , eorumque in Belgio maxime affectis *Sylvio* & *Bontekoe* in acceptis ferendus , qui acidum multorum morborum causam esse perhibuerunt & primi his acido oppositis usi sunt præsidiiis.

§. IX.

Temperantia.

Secunda alterantium classis complectitur TEMPERANTIA , quæ non modo intestinum calidum partium sulphurearum in sanguine motum , sed & ipsum fervidum , urentem biliosum humorem in intestinis , contemperant , cicurant & hac ratione refrigerant. Hac virtute ex vegetabilium censu splendent , radix & herba acetosæ , acetosella , poma citria , aurantia , Chinenfium , granatorum , ribesia , fraga , berberes , baccæ rubidæ , cerasa & ex iis parati succi , syrupi item aquæ ex recentibus his destillatæ , nec non semina quatuor frigida majora & decoctum avenaceum ; ex animantium regno serum lactis , lac ebutyratum , succus cancrorum fluviatilium , testudinum decoctum , decoctum dilutum rasuræ cornu cervi & scorzonæræ , cum vel sine hordeo , gelatina cornu cervi , aqua etiam à rasura cornu cervi destillata , hoc nomine commendanda : ex mineralium familia omnibus palmam præripit nitrum , bene purificatum , melius adhuc regeneratum , ex aqua forti per additionem salis tartari ; ex chymicis denique & pharmaceuticis sal essentielle acetosellæ , cremor tartari , phlegma vitrioli , clyffus antimonii sulphuratus , tincturæ rosarum , florum bellidis , violarum cum spiritu vitrioli philosophice præparatæ , quam optime temperant.

Theoremata.

Temperantia agunt triplici ratione. Vel enim sale acido , particulas volatiles sulphureas ligant & motum earum calidum vorticosum intestinum figendo & illas coagulando , quodammodo minuunt. Vel operantur expansiva aëreo-elasticâ quadam virtute , qualis delitescit maxime in nitro , quod sal acidum & alcalinum , ingentem partium sulphurearum nec non liquidi aëreo-ætherei copiam involutam recondit , eodemque materiam calidam in vehementi motu vorticoso calido constitutam dispellit & à centro quasi ad peripheriam dispiodit , sale vero neutro materiam crassam , quæ caloris & sulphuris matrix , attenuat , resolvit , disparat , & subtili simul suo acido partes sulphureas in celerrimo motu sistit. Vel etiam partes sulphureas diluendo & disjungendo , humidum calore absumtum restituendo , simul etiam nimiam vasorum elasticitatem , à qua calor pendet , remittendo , operationem suam exsequuntur , uti potissimum observatur , ab aqueis , sero lactis , decocto cornu cervi & avenaceo.

Corollaria practica.

I. Hæc certe temperantia multi & magni usus sunt in medicina , ubicunque calor præternaturalis exstinguendus , eaque propter in febribus omnis generis , item inflammationibus & gravioribus spasmodicis ac doloribus , qui perpetuo fere nimia & calida sanguinis commotione stipantur , iisdem nullo modo carere possumus. Sed acidis , quæ figendo & coagulando agunt , merito præferenda nitrosa. Nitrum enim non tantum refrigerantem , verum etiam rigidas & spasmodicis afflicta partes relaxantem , sive antispasmodi-

cam , item urinæ & alvi excretionem promoventem virtutem possidet. Quin quum alia refrigerantia & acida fluida magis condensent & coagulent , nitrum potius colliquat , rarefacit , attenuat humores densos & viscidos , ita prorsus , ut si vel in pulverem redactum , vel in aqua prius solutum , sanguini nigro coagulato inspergatur eum & floridiorem efficiat. Quare non solum in inflammationibus ipsisque febribus inflammatoriis , quæ à sanguine nigro , coagulato & incarcerato nascuntur , acidis longe præstantius , sed etiam quia tenacem & spissam seri materiam , quæ affluens in sanguine inflammationi subjectorum apparet , tam efficaciter fundit ac dissolvit , ad corpus ab inflammatione defendendum quam maxime proficuum.

II. In febribus chronicis , ut lenta , hæctica , quæ ut plurimum ex labe vel corruptione quadam viscerum natales trahunt & quando tussis aut hæmoptysis juncta est , ipsique pulmones vitio laborant , non acida , sed nitrosa & diluentia , præsertim ex regno animalium petita , ut serum lactis , aqua & decoctum , nec non gelatina cornu cervi , in usum vocari debent. Ubi etiam diarrhœis , dysenteriiis , cholæræ , calor febrilis associatur , idem idem abstinendum ab acidis , refrigerantibus , & potius diluentibus , gelatinosis , mucilaginosiis , adjecto pulveribus temperantibus & absorbentibus uno vel altero nitri grano , utendum. De quibus laudatissimis virtutibus pluribus videri potest , differt. nostra *de nitri usu* , nec non ea , quæ *observationes circa nitrum* tradit.

§. X.

In tertia alterantium classe comprehenduntur *Incidentia*. INCIDENTIA five ATTENUANTIA. Horum in censum veniunt radices : pimpinellæ albæ , ari , acori , asari , armoraciæ , enulæ , cichorii , iridis Florentinæ , sigilli Salomonis , vinetoxici : herbæ : arnica , beccabunga , cochlearia , nasturtium aquaticum & Indicum , piperitis , ros solis , fumaria , trifolium fibrinum , centaureum minus , hyssopus , scordium , chærefolium , carduus benedictus , sedum minus , alliorum , porrorum & ceparum species ; lignum guaiacum & ejus cortex ; aromata piper & zingiber ; semina : sinapeos , cochleariæ & nasturtii ; gummata : ammoniacum , galbanum , sagapenum , opoponax , myrrha & benzoe ; chymice & pharmaceutice confecta : mercurius dulcis , æthiops mineralis , flores sulphuris , salia alcalia fixa & vegetabilium per incinerationem parata , speciatim sal tartari , absynthii , porro media , ut digestivum Sylvii , nostrum aperitivum , ammoniacum , polychrestum , Ebshamenfè , Sedlicenfè , tartarus vitriolatus , terra foliata tartari , arcanum duplicatum , solutio oculorum cancri , nitrum & sal ammoniacum , volatilia , ut sal volatile salis ammoniaci , spiritus salis ammoniaci urinosus , oxymel præterea squilliticum , tinctura antimonii acris , essentia gummi ammoniaci , piperis Indici , resina Guaiaci , syrupus nicotianæ , de erysimo , feculæ aronis &c. Fontes quoque medicati , qui præter diluentem & aperitivam virtutem incidente etiam pollent , ut acidulæ Egranæ , Sedlicenfes , thermæ Carolinæ , nec non infusa theiformia , quæ propter copiosum aqueum elementum , maxime vim suam attenuantem & coalescentes moleculas disjungentem edunt , ac demum serum lactis dulce , quod ob dulce ac subtile quod custodit sal , deterfiva simulque ductus excretorios aperiente facultate splendet.

Theoremata.

Ex his nonnulla in fluidas, nonnulla in solidas corporis partes agunt. Quæ fluida immediato contactu afficiunt sunt perpauca, idque non aliis quam diluentibus aqueis, quorum magna certe ad colliquandos glutinosos ac viscidos humores est efficacia, nec non salibus alcalinis fixis & volatilibus ac nitrosis, quæ præsertim in forma liquida sanguini aut humoribus spissis ac densatis admixta, eosdem vel ad oculum liquefaciunt atque attenuant, tribuendum. Reliqua omnia in solida operantur, eorum tonum, robur, contractilitatem, vasorumque elasticitatem atque potentiam systolicam augendo & intendendo, quo fit, ut contentos succos validius premant, concutiant, motum progressivum citiorem & intestinum auctiorem reddant, & fortius crebriusque sic trajecti per vasa capillaria tenaces & spissescences succi, in minores globulos, à quibus fluiditas pendet, discerpantur ac dividantur. Hanc autem in solida actionem nonnulla sale acri fixiori exsequuntur, ut radices: ari, pimpinellæ albæ, asari, iridis Florentinæ, sigilli Salomonis; herbæ: arnica, piperitis, ros solis, ipsumque piper & zingiber, quæ acuti quidem saporis, destillatæ autem cum aqua per vesicam, nec oleum volatile acre, nec aquam acris saporis largiuntur, sicque fixam suam testantur indolem. Vicissim alia effectum suum perficiunt sale acri subtili volatili, quorum è numero armoracia, enula, nasturtium, cochlearia, sinapi omniaque ceparum, alliorum & porrorum genera. Quædam agunt sale medio stimulante, cujus indolis sunt salia illa neutra, quorum acrimonia & irritans facultas non solum sapore innotescit, sed etiam ex effectum, quo majori dosi oblata, alvum vel diuresin movent, patefcit. Alia sale acri multis particulis sulphureis imbuta, effectum edunt, quod obvium in gummi ammoniaco, sagapeno, opopanace, nec non guajaco & ejus resina; quæ præter sal acre, oleum quoque completi, destillatione, qua copiosum hoc fundunt, manifestatur. Aliqua demum sale penetranti subtiliori metallico operationem absolvent, uti est mercurius, inprimis dulcis, item æthiops mineralis.

Corollaria practica.

I. Attenuantium & incidentium virtus latissime pater, ut ob multiplicem quem præstant effectum, variis denominationibus passim insigniantur. Quod si enim tenaces & viscidos in corpore humores non modo in cavitatibus & vasorum alveis stagnant, sed & minimos viscerum & emunctoriorum tubulos farciunt & obstruunt: hæc præsidia incidente & attenuante sua facultate impactos humores expediendo & obstructions referando, aperientem præstant effectum, & ob id recte dici possunt aperientia. Merentur etiam nomen antiscorbuticorum & sanguinem depurantium. Nam quia puritas & temperies succorum vitalium à legitima inutilium ac superfluum se- & excretionem dependet; hæc autem oppilatis ab humore spisso & viscido emunctoriorum & glandularum minimis canaliculis, intercipitur; facile patet: ea quæ lentos succos incidendi & obstructions removendi virtute polent, optima esse sanguinem depurantia, nec non adversus scorbutum præsidia, in quo humores maxime intemperati, & variis heterogeneis, viscidis, falsis, sulphureis, acris particulis referti sunt. Quumque adeo diversum edant effectum, quæ cuique potissimum accommoda, sciendum.

II. In affectibus itaque ventriculi & primarum viarum, ad dissolvendas & incidendas viscidas cruditates egregie faciunt radix ari, pimpinellæ albæ, calami aromatici, piper, zingiber, sal ammoniacum depuratum, tartarus vitriolatus, arcanum duplicatum, sal digestivum Sylvii, nostrum aperitivum, sal absynthii, spiritus salis simplex, vel dulcificatus, nec non tinctura aperitiva Mœbii. Et si per alvum simul crudi & male cocti succi exturbandi, præstans utique virtus est salium mediorum, inprimis salis Sedlicensis, Ebshamensis & polychrestii, pleniori dosi & cum sufficienti aqueo vehiculo propinatorum.

III. Ubi humores viscosi in pectoris affectibus resolvendi & per sreatum rejiciendi, commodissimam locant opem, radix enulæ, iridis Florentinæ, ros solis, hyssopus, scordium, capillus veneris, gummi ammoniacum, myrtha, benzoe, sulphur, balsamum Peruvianum, nitrum antimoniatum, terra foliata tartari, oxymel squillicum, solutio lapidum cancrorum cum aceto destillato, syrupus nicotianæ, nec non de erysimo.

IV. Quando spissa & tenaci impuritate sanguis infectus ac inde emunctoria oppilata & dyscrasia falso-sulphurea scorbutica humores conspurcati, apprime ex usu sunt, radix armoraciæ, cochlearia, nasturtium aquaticum, Indicum, piperitis, beccabunga, centaurium minus, trifolium fibrinum, carduus benedictus, fumaria, sedum minus, sinapi, gummi ammoniacum, sagapenum, myrrha, liquor nitri fixi, oleum tartari per deliquium, solutio nitri, elixir nostrum temperatum, tinctura antimonii acris, essentia lignorum, spiritus salis ammoniaci, sal absynthii cum succo citri, nec non ex aquis medicatis Sedlicensis & Egrana.

V. Quando sanguis congrumatus post contusiones & suffusiones dissolvendus iterumque fundendus, eximiam laudem merentur radix sigilli Salomonis, herba arnicæ, chærefolii, acetum destillatum cum lapidibus cancrorum, terra foliata tartari, nitrum antimoniatum.

VI. In morbis ubi lymphæ spissitudinem contraxit, maximeque à miasmate venereo, palmam ferunt guaiacum, saponaria, tinctura antimonii acris, mercurius dulcis & æthiops mineralis, qui prudenter usurpatus, ad lentos in glandulis & hepate obhærescentes succos colliquandos & resolvendos, usus est longe præstantissimi.

§. XI.

Accedit quarta alterantium classis, continens EMOLLIENTIA & DEMULCENTIA. Hæc inter eminent radices: althææ, liliorum alborum, liquiritiæ, scorzonæræ; herbæ quinque emollientes, lactuca, branca ursina, parietaria; flores: sambuci, meliloti, malvæ, verbasci, millefolii, chamomillæ vulgaris, liliorum alborum, borraginis, papaveris rhœados, tiliæ, acaciæ, violarum & maxime omnium crocus; semina lini, foenu græci, anisi, cydoniorum, psyllii, papaveris albi, quatuor frigida majora & minora, filiqua, amygdalæ dulces, ficus, pineæ, pistacæ, gummi cerasorum, Arabicum, tragacantha, rasura cornu cervi & ejus gelatina, axungia humana, canis, caponis, medullæ ossium, pinguedines circa omentum, ossa & mesenterium, olea nativa animalium, butyrum recens, lactis cremor, lac ipsum, saccharum lactis, sperma ceti, mel, vitellus ovi, ejus albumen exsiccatum & in pulverem redactum. Ex præparatis oleum amygdalarum dulcium, lini, raparum, momordicæ, decoctum cornu cervi citratum & scorzonæræ

Demulcentia.

neræ citratum, prîsana, serum lactis dulce, syrupus è dialthæa Fernelii, unguentum dialthææ, emplastrum diachylon simplex, de meliloto, spermatis ranarum.

Theoremata.

Virtus horum remedium duplex est, solidis, vel fluidis dicata. In solidis quidem hanc ita exsequuntur, ut rigidas, duras ac tenfas fibras laxent, molliant easque mobiles & flexiles reddant, simulque adductos per strîcturas minimorum vasorum alveos ampliènt atque dilatent: in fluidis vero viscida sua mucilagîne præstringunt, involvunt & quasi capsulæ includunt acies & spicula salium acrium rodentium, & sic quam optime demulcent. Exterius autem applicata, humorum vasorum alveis elapsum, nec amplius resolvendum, aut per lymphatica vasa resorbendum, in pus convertunt, ita quidem, ut disiecto per calorem temperatum subtilissimo liquido, remanens viscosa materia, oblinitis blande poris ne nimium humidi exhalet, & prolecto majore succi nutritii, ex quo pus maxime conflatur, per relaxatos tubulos affluxu, ad coctionem & maturationem traducatur.

Corollaria practica.

I. Maximæ hæc demulcentia sunt efficaciæ, si venenum causticum assumptum, & vix sane melior datur his antidotus, ad perniciosam toxicum ex animalium, vegetabilium & mineralium censu vim cicurandam & infringendam, lacte præsertim & pinguedinibus copiose ingurgitatis, quæ non modo acerrima venenorum spicula obtundunt atque involvunt, sed & constrictas per virus à validissimo spasmo membranas laxant, & hac ratione veneni evacuationem, sive per vomitum, sive secessum, adjuvant.

II. In omnibus longis morbis & valentibus, præsertim qui ab acrimonia humorum ortum trahunt & nervis potissimum insident, simplicissima hæc emollientia in infusis & decoctis oblata, usum præstant longe saluberrimum. Sæpius certe convulsiones infania stipatas & scorbuticas artuum tractiones cum acerbis ventris torminibus, curatas novi decoctis, ex radice pœoniæ, althææ, herba malvæ, parietariæ, brancæ ursinæ, floribus verbasci, liliorum alborum, sambuci, borraginis, chamomillæ, papaveris rhoeados, ficubus & semine fœniculi, cum aqua vel sero lactis paratis, largiori tamen ac diuturno usu, & adjecto interdum uno vel altero cochleari olei amygdalarum dulcium & interposito balneo ex aqua dulci cum lacte remixto.

III. Axungia & pinguedines animantium recentes, maximeque ossium medullæ, quæ subtilissimam recondunt pinguedinem, in scorbutica acri humorum diathesi interne cum fructu usurpantur.

IV. In aridura partium & ubi articuli vix sine strepitu moveri possunt, nec non in doloribus arthriticis, eadem demulcentia, ut radix scorzonæ, flores sambuci, millefolium, chamomilla vulgaris, semina quatuor frigida majora, imprimis vero serum lactis dulce, pinguiusculis cremoris partibus adhuc refertum, vel etiam pinguedines cum quodam alcali in saponis texturam redactæ, mirabilem præstant effectum, sed opus est, ut pingua hæc jejuno ventriculo, non adeo magnis, sed repetitis dosibus assumantur, superbibendo haustum calidum convenientem.

V. In exulceratione renum & mictione cruenta, quæ ob acredinem humorum quandoque in-

cidit in variolarum morbum, gummi cerasorum, vel etiam tragacantha, aut albumen ovi siccatum, in sero lactis soluta, præstabilem locant operem. In pectoris vero affectibus, ad acredinem tussis causam obtundendam & materiam ad evacuationem præparandam, specifica quasi virtute laudantur decoctum avenaceum, sperma ceti, liquiritia, oleum amygdalarum dulcium, filiqua dulcis, saccharum lactis, crocus, ficus, syrupus violarum, flores papaveris & sambuci.

VI. Hecticus jugis si affligit calor & succi dulces continua lenta febre acrimoniâ falso alcalinam contrahunt, in cremore lactis & butyro recenti, ob demulcentem effectum, egregia reconditur virtus.

VII. Pariter in cholera, dysenteria, scorbuto, atrophia scorbutica, phthifica & ubicunque acido succorum in vitio est, decocta gelatinosa, carniurn, ossium, præsertim cornu cervi, item pedum vituli & vervecis, tam interius potu, quam exterius ano mediante clystere infusa, eximii sunt usus.

VIII. Quando intestina infesta detinet strîctura & alvus cum flatibus retinetur, egregium præstant effectum emollientia ac demulcentia, ut oleum amygdalarum dulcium, serum lactis, decoctum avenaceum, cornu cervi, non tam per os assumpta, quam potius per clysterem inferius injecta.

IX. Flores & herbæ emollientes, si admixto croci momento decoquantur & vesicæ inclusæ dolente interna parte exterius applicantur; ut in pleuritide, hepatitide, colica, vel ano in dolore ex hæmorrhoidibus cœcis, conspicuum torminum conciliant levamen.

X. Quando humor quidam extravasatus & impactus in pus convertendus, egregie inserviunt linimenta & cataplasmata ex pinguedinibus emollientibus & lacte parata, & maxime quidem floribus & foliis liliorum alborum, croco, ficubus, cepis tostis, farina fabarum, vitello ovi ac melle; abstinendum vero ab his, ubi in induratis & scirrhis partibus materia continetur, ac in pus converti nequit, ni funestam ciere velimus putredinem.

XI. Mucilagines, quæ ex semine cydoniorum & psyllii cum aqua rosarum vel spermatis ranarum conficiuntur, in erosis atque exulceratis partibus, quibus dolor & ardor jungitur, ut aphthis ulcerosis faucium, cœcis & dolentibus hæmorrhoidibus, tenesmo, dysenteria, gonorrhœa, vel fluore albo erodente, præsentaneam sæpe ferunt opem.

CAPUT V.

De Evacuantibus.

§. I.

Evacuantium operatio occupatur maxime circa humores qui copia in vitio sunt, eamque ob causam in sanitatis tutelam vel naturæ motibus, vel his non sufficientibus, aut plane deficientibus, artis ministerio, per congrua emunctoria expelli debent. Jam vero vitiosi succi non unius ejusdemque naturæ, craseos atque texturæ, nec etiam excernicula per quorum emissaria quilibet exturbandus, ejusdem strîcturæ atque dispositionis sunt; ideoque etiam instrumenta quibuscum eorum expulsio adornatur, varia erunt ac multiplicia. Scilicet quæ stabulantem in ventriculi

Evacuantes sunt variæ

& primorum intestinorum cavo vitiosam faburam superius per os eliminant, emetica, quæ ex inferiori canalis alimentaris regione per ani secessum, laxantia aut purgantia, quæ per tubulosum cutis emunctorium, diaphoretica & sudorifera, per renale cribrum & urinarias vias, diuretica, per glandulas & ductus salivales, salivantia, per asperam arteriam ex thoracis cavo, expectorantia, per narium & faucium glandulosam substantiam, errhina, sternutatoria & apophlegmatizantia ac denique quæ ipsum superfluum sanguinem evocant, emmenagoga & hæmorrhoides cientia vocantur. Sed de singulis jam seorsim.

§. II.

1. Emetica.

Primum inter evacuantia locum obtinent EMETICA sive VOMITORIA, quæ duplicis sunt generis, mitiora scilicet, vel fortiora. Lenioribus accensenda merito aqua simplex tepida, adjecto pauxillo salis & portione mellis, vel olei expressi aut pinguedinis, vel decocta cum semine vel cortice raphani rusticani, aut semine anethi, vel etiam aqua thermalis, simul & semel largis haustibus copiose ingurgitata. Validiorum in numero ex vegetabilium classe sunt folia & radix asari, helleborus albus, succus corticis medii sambuci, immo omnia cathartica validiora majori dosi data, nec non quæ ab exteris asportantur gummi guttæ & radix hypocistidis; ex metallorum & mineralium familia, quæ venereæ prosapia, ut vitriolum cyprium album, Gilla Paracelsi & Angeli Salæ, ex capite mortuo olei vitrioli Goslariensis, quod venereæ indolis, crystalli viridis æris, sal emetico-diaphoreticum Mœbii, ex vitriolo Goslariensi & nitro anaticis partibus paratum, nec non quæ ad regulinam stibii substantiam ortum referunt, ut tartarus emeticus, vitrum antimonii & ex parata aqua benedicta Rulandi, mercurius vitæ, maxime ex butyro antimonii rectificato cum præcipitatione aquæ simplicis, vel olei tartari per deliquium confectus, pulvis Monckii, ex duabus partibus reguli antimonii martialis & una nitri paratus, sulphur sic dictum auratum antimonii, idque correctum, panacea sic dicta Glauberiana, Conerdingiana, ad grana quinque vel sex oblata.

Theoremata.

I. Mitiora emetica & maxime diætetica à Galeno & veteribus potissimum sunt usurpata, quippe quæ admodum secura ut plurimum copia sua, non fecus ac clysteres ex iisdem ingredientibus concinnati, intestina, ventriculum, inprimis si jam debilis & ad motum excretorium, teste nausea, ructibus, oris amaritie, anxietate, proclivis est, ad vomitum exfolitant: sed non agunt ultra limites ventriculi, ex quo utique humores crudos, pituitosos & biliosos ex male ingestis & digestis collectos non sine fructu evacuant.

II. Emetica validiora tenuissima sua caustica salino-sulphurea acrimonia, exigua etiam dosi, non modo in tunicam ventriculi & intestinorum nerveam eam spasmodice convellendo agunt, sed & si paullo majori dosi præbentur, ultra stomachum, in ductus maxime nervosos biliarios, item in glandulas intestinorum, mesenterii, pancreaticas ipsumque hepar penetrant & projectos ex his biliosos & salivales humores expellunt, quandoque vero si universum genus nervosum afficiunt, hostiliter etiam agunt & gravissime nocent.

I. Veteres albo veratro, ceu summe drastico, emetico scopo utebantur, uti auctor est Celsus lib. II. cap. 13 & quidem in comitiali morbo, in insania & in valentibus aliis morbis sine febre, sed idem perite monet, ut ante hujus pharmaci usum, corpus probe humectetur. Nostro vero tempore, quo habemus securiora, merito à violento hoc medicamine abstinemus & ex supra recensitis tantum ea seligimus, quæ naturæ & nervosis partibus crasi & textura sua non adeo inimica, nec cum ancipitis periculi metu propinantur. Hæc inter primo loco merito connumeranda radix illa Americana Ipecacuanha, ad drachmam dimidiam & ultra oblata, quæ præter salinum subtile acré principium, etiam balsamicum ac roborans custodit, & id peculiare plane servat, ut omnium celerrime operationem suam exsequatur, eaque propter ubi periculum in mora & promte vomitus ciendus, quam optime adhibetur. Et quoniam vomitu invertitur in ventriculo motus peristalticus deorsum tendens, per consensum etiam in intestinis, si in diarrhœa vel dysenteria nimis intensus est, sufflamatur & alvi fluxus ad tempus sistitur; unde Celsus lib. I. c. 3. recte perhibet: vomitum ventrem, solutum comprimere, compressum solvere. Ipecacuanhæ commodissime substituitur asarum, cujus radix & folia pariter subtili, acri volatili caustico elemento, quod coccione prompte exhalat, simul quoque roborante & balsamico pollent, & in febre antiqua quartana, tertiana, hydrope, ictero egregium suppeditant auxilium. Ex antimonialibus præferendus tartarus emeticus, ex croco metallorum, non vitro antimonii, qui duplo validior, præparatus, qui vel solus ad tria aut quatuor grana, vel refracta dosi cum radice ipecacuanhæ mixtus, egregie suum facit officium; & si quis effectum emetico-purgantem desideret, decocto mannæ duo vel tria tartari emetici grana adjici poterunt. Pariter usu esse potest panacea Glauberiana, ad quinque vel sex grana cum cremoris tartari scrupulo oblata, nec non in asthmate pituitoso interdum oxymel squilliticum, ad duas vel tres uncias datum. Emeticis vero venereis, quorum vis constringens gravius & diutius exagitat nervosas ventriculi & aliarum partium tunicas, item pulveribus istis regulinis antimonii, pulvere Monckii, vitro antimonii, mercurio vitæ, quæ infidæ operationis, & vel fortissime, vel insufficenter operantur, pro majori vel minori humorum in ventriculo dispositione, carere & tutius ab iis abstinere possumus in medicina.

II. Non modo utilis, sed & quandoque admodum necessarius est emeticorum paullo valentiorum usus, ad venena, præsertim quæ narcotica sunt indolis, item miasmata, quæ ex contagiosis & malignis morbis decumbentibus exhalant, in ventriculum descendunt, ibique humoribus fermentantibus sese insinuant, cito, ne ad penetralia serpent, expellenda. Pari ratione ad humores ex commixtione heterogeneorum ingestorum, bilis humorumque fermentantium salivalium prodeuntes, corruptos & valde vitiatos, qui in ventriculi & intestinorum, præsertim duodeni, cavo stagnant, mora corrumpuntur & frequentissime febri lentæ, quotidianæ, quartanæ, item ruffi chronicæ, nec non gravioribus morbis capitis, melancholiæ, hemicranii, quandoque etiam comitiali, item apoplexiæ, ortum præbent, exturbandos, efficaciter agentia ex usu esse possunt.

III. In morbis qui à bile spissa, in gypseum sæpe

sæpe & viscidum coagulum abeunte & ductus biliosos obstruente oboriuntur, ut ictero tam flavo, quam nigro, cachexia aliisque, emetica non sine fructu, reliqua aliis nihil juvantibus, propinantur, eisdemque, exturbata biliosa copiosa sentina, felicissime abigunt.

IV. In anasarca, leucophlegmatia, tumoribus partium œdematosi & ascite curabili, emetica paullo majori etiam dosi data, vehementer quidem ex ductibus & glandulis intestinum, mesenterii, pancreatis, hepate serum aquosum eliciunt ac per inferiora, rarius vero superiora, ejiciunt.

V. In omni accessione & paroxysmo febrili, inflammatione ventriculi, vel ubi stomachus spasmodice afficitur, ut in cardialgia, item vehementi ira, in spasmodicis hystericiis, hypochondriacis & ubi ad hæmoptysin, nimium mensium vel hæmorrhoidum fluxum, dispositio præsto est, item ubi morbi a congestione humorum ad caput orti sunt, uti apoplexia, paralyxis, auditus vel visus deperditus, vertigo, nec non ubi dolores atroces urgent, vomitoria plane exulent, nec unquam etiam plethoricis, nisi plethora per sanguinis missionem soluta, nec quibus intestina fecibus infarta & alvus obstrata, quam his prius expurgatis exhibeantur.

VI. Præstat semper emetica ad faciliorem operationem in liquida forma, vel etiam cum sufficienti vehiculo humectante & relaxante pingui offerre; siquidem vomitio non tantum validiorem pilori & fundi ventriculi constrictionem, sed simul etiam relaxationem orificii superioris oesophagi desiderat.

VII. Sub emeticorum operatione & post eam abstinendum ab omni refrigeratione, frigido potu, ab omni commotione animi, ab omni calidiori & stimulantem medicinam, acri & falso cibo, ac potius demulcentibus cibisque boni succi & qui facile solvuntur utendum. Inprimis apprime ex usu est lac asininum, si haberi potest, tres vel quatuor horis post ad aliquot uncias potare. Et quæ plura hanc in rem ex instituto tradidi in *dissertatione de cauto & præstantissimo vomitoriorum usu*.

§. III.

Laxantia Emeticis succedunt ea, quæ per inferiora vitiosam materiam eliminant, quæ pariter duplicis sunt generis, vel leniora, vel validiora. Inter ea vero quæ alvum clementer, tuto & sine stomachi & systematis nervosi læsione movent, & Latinis LENIENTIA & LAXANTIA, Græcis ecoprotica vocantur, præcipuum locum tenent, ex vegetabilibus manna, rhabarbarum, cassia, agaricus, tamarindi, folia fennæ, aloë, baccæ spinæ insectoriæ, passulæ minores, polypodium, flores persicorum, acaciæ, violarum earumque semen: ex salibus culinare, borra, & nitrum, item ex fontibus mineralibus, ut Ebshamense, Egranum, & Sedlicense, nec non ex Carolinis paratum: ex animantium regno lac, præsertim asininum, serum & saccharum lactis; ex præparatis chymicis, terra foliata tartari, tartarus vitriolatus, cremor tartari, sal ex alumine & sale tartari concinnatum, sal essentielle acetosellæ, magnesia, sal polychrestum, aurum fulminans, mercurius dulcis, fl. benzoë; nec non composita, ut pilulæ de succino Cratonis, aleophanginæ, marocostinæ, tartareæ Schrœderi, essentia, extractum & syrupus rhabarbari, syrupus rosarum solutivus, aqua laxativa Viennensis, elixir purgans Thomfoni.

Frid. Hoffmanni Oper. Tom. I.

Theoremata.

Laxantia hæc placide, sine magna commotione & labefactione motus peristaltici ventriculi & intestinum, non modo sordes alvinae, sed & quando liberalius propinantur, ex intestinum glandulis serum, satis largiter evehunt. Neque tamen sale acri subtili caustico, nervosis partibus inimico, ut purgantia, operationem suam perficiunt, sed substantia plane innocenti, quæ vero tenuissimæ salinæ stimulantis indolis est, & haud secus quam emeticorum & purgantium, diuturna coctione avolat & perit, uti patet exemplo mannæ, rhabarbari, aloës, foliorum fennæ, quæ ea propter rectius infunduntur, quam decoquuntur. Sigillatim vero agunt hæc laxantia vel principio quodam salino-stimulante dulci, ut manna, cassia, passulæ, polypodium; vel sale quodam subtiliori sulphureo amaricante terreo, ut aloë & rhabarbarum; vel sale acido fibras vellicante, ut tamarindi, cremor tartari, sal acetosellæ; vel sale neutro, ut nitrum, borra, sal gemmæ; digestivum Sylvii, arcanum duplicatum, tartarus vitriolatus, salia ex medicatis aquis producta & herbarum essentialia; vel sale quodam calcario amaricante, ut Sedlicense, Ebshamense, Egranum; vel denique terra calcaria, ut magnesia, quæ ab acido primarum viarum soluta, in sal neutrum acre & stimulans transit.

Corollaria practica.

I. Polychresta hæc & præstantissimi multis in morbis usus simulque tutissima laxantia medicamenta, quæ nonnullis ob id benedicta audiunt, Veteribus parum cognita fuerunt, in quorum monumentis aloës, rhabarbari, tamarindorum, foliorum fennæ, agarici, nulla, quantum quidem novi, fit mentio, sed cassiæ tantum & polypodii ex mitioribus, ac prius *Dioscorides* aliquid de rhabarbaro & aloë prodidit, ex quo deinde *Plinius* & *Galenus* quæ habent desumserunt, manna vero, tamarindi & folia fennæ, Arabibus & Ægyptiis medicis demum innotuerunt. Ut vero omnium laxativorum virtus in eo conveniat, quod sine noxa, impetu ac commotione alvum subducant: pro differentia tamen morborum, vel etiam individuum, utique distinctio circa eorum usum utilis & necessaria est. Scilicet manna, cassia, passulæ, polypodium, in affectibus pectoris, tussi, hæmoptysi, pleuritide, phthysi, neque minus in morbis, qui a sero falso, acri, scorbutico nascuntur, ut arthritides, rheumatismi, scabies, purpura, cum insigni fructu adhibentur aliisque merito præferri debent, quippe quæ non tantum alvinae sordes emoveant, verum etiam simul acrimoniam salis temperant & corrigunt. Acidula, ut tamarindi, cremor tartari, sal acetosellæ, item salia essentialia ex herbis nitrosis, sal polychrestum, nitrum antimoniatum, in regionibus præcalidis; corporibus cholericis atque tempore æstivo, nec non in morbis ubi copiosa bilis delinquit & vehementior æstus præsto est, tertiana continua, duplici, æstiva, in causo, cum inexhausta siti, quam maxime conveniunt & aliis anteponenda, eo quod præter facultatem vacuantem, motum quoque intestinum partium sulphurearum sanguinis & bilis ferociam componunt & cicurant. In morbis qui ex defectu bilis & sulphuris in sanguine balsamici nascuntur, ut sunt cachexia & omnes fere chronicæ passionnes, in quibus succorum spissitudo & viscerum infarctus adsunt, laxantia amara, ut rhabarbarina, aloetica correctæ, omnibus utique palmas præri-

piunt. Ubi vero humores tenaces, visceri in vitio sunt & primam regionem occupant, ac inappetentiam, tensiones hypochondriorum, ructus, flatulentias caussantur, salia omnia neutra, tam arte chymica præparata, quam nativa fontium medicamentorum, si paullo majori in dosi & cum sufficienti liquido offeruntur, efficaciter alvum solvunt & recrementa spissa & visceri everrunt. Quando acidum, ut solet fieri in hypochondriacis, melancholicis & quartanariis, nimium redundat & omnium aliorum, etiam acriorum, purgantium virtutem infringit atque eludit, præter mannata, magnesia apprime ex usu est, quæ sicuti à spiritu vitrioli ex toto solvitur, atque in sal neutrum amaricantis saporis & virtutis purgantis transit, eandem pariter, si in ventriculo offendit acidum, induit naturam atque efficaciam, contra ea deficiente in corpore solvente succo, parum vel nihil operatur, & plus incommodi, quam commodi creat.

II. Aurum fulminans & mercurius dulcis inter laxantia quidem referri solent, sed eorum usus certe non adeo tutus est. Nam si illud penitus edulcoratum fuerit, parca vel plane nulla ejus operatio; si vero salino-nitrosi spiculis adhuc uberius refertum, quia ob gravitatem suam firmiter inhærescit parti ventriculi & intestinorum, alvum quidem movet, sed in sensibilibus subjectis atrocia tormina cum flatulentis aliisque mala parit, quin magis nocet, ubi humorum acidocorrosivorum, vel bilis causticæ, in ventriculo aut duodeno copia hospitatur. Mercurius autem sic dictus dulcis, qui solus, nisi associetur purgantibus, non facile purgantem exserit effectum, accessu vero bilis corrosivæ in duodeno, deleteriam facile rursus induit indolem ac generi nervoso vim ac læsionem infert. Et licet ad enecandos & expellendos vermes passim commendetur; nihilo minus tamen quum infantibus mercurialia admodum sint inimica, atque ego subinde gravem noxam & insignem debilitatem ea attulisse observavi, non facile, nisi summa cautione & sub certa methodo certoque regimine eorum usum hoc quoque fine suaserim. Plures porro ad acuendam vim auri fulminantis purgantem admiscere solent salia neutra, ut arcanum duplicatum, tartarum vitriolatum, nec negandum, ejusmodi sal ad drachmam dimidiam, cum duobus granis auri fulminantis sic contritum, metallicum quendam saporem nancisci & quoque intestina stimulando sedes movere, rarius tamen sine torminibus succedit effectus. Longe magis vero cavendum, ne mercurius dulcis cum salibus, præsertim alcalino vel ammoniacali, attritu subigatur, eo quod hac ratione ejus vis corrosiva resuscitatur, qua agit in glandularum & nervosarum partium systema & molestissimam sæpe movet salivationem.

III. Omnia salia, præsertim neutra & amaricantia superius recensita, majori dosi ad unciam dimidiam vel unam cum sufficienti liquido soluta & exhibita, insignem vim alvum vacuantem, sine commotione sanguinis, vel appetitus & virium prostratione obtinent, & longe tutius, immo majori cum efficacia, iis utimur, ac validioribus purgantibus ex regno vegetabilium; præsertim in morbis & corporibus ubi humorum spissorum & tenacium copia, vel in primis viis, vel in vasis delitescit. Atque etiam fontes medicati, calidi & frigidi, qui acidularum nomine veniunt, quorum magna certe in morbis longis & valentibus cum arcendis, tum depulsandis est efficacia, vim suam aperientem, deterloriam purgantem, præter aqueum, ad salinum potissimum quod recondunt

elementum referunt, uti id à me latius variis dissertationibus in *tomo II. opusculor. physico-medico-rum* collectim editis, expositum est.

IV. Inter flores qui laxante facultate pollent, acaciæ, persicorum, violarum, rosarum eminent, sed recentes sint & tantummodo infundantur, non coquantur. Optime hi exhibentur cum sero lactis dulci, vel lacte asinino, tempore præsertim verno, & ita quidem, ut per aliquot hebdomades medicata ejusmodi potio mane ad mensuram dimidiam ad purificandum sanguinem, imprimis si corpora teneriora & sensibilibus naturæ, potetur. Habet enim serum lactis & lac quoque asinum jam tum vim quandam laxantem, ut etiam auctor est *Celsus lib. II. cap. 12.* ita differens: *sunt valetudinis genera, quibus ex lacte purgatio convenit. Antiqui, pergit paullo post, lac vel asinum, vel bubulum, vel caprillum, sumebant, eique salis pauxillum adjiciebant decoquebantque id, & sublati his quæ coiverant, quod quasi serum super erat, bibere cogeant.*

V. Ex aloe, five hepatica, five foccotrina, præparata laxativa magnæ efficaciam sunt præstidia, si probe prius à principio sulphureo volatili, valde peregrino & à resina tenaciter intestinorum tunicis adhærente debita enchiresi ipsa liberetur, & non in magna, sed refracta & exigua dosi, cum extractis amaris & temperatis balsamicis ingredientibus misceatur, quo nomine utique pilulæ, casu forsan à *Bechero* inventæ, & secundum ejus methodum ex aptioribus concinnatæ speciebus, utique commendationem merentur, sine non solum blande alvum movendi, sed & intestinorum tonum, qui plurimis in morbis labefactus & à purgantibus etiam læditur, firmandi. Et utut tales pilulæ in corporibus robustis & sanguine abundantibus parum efficiant, eo præsentior tamen earum virtus in natura & à morbo infirmis, imbecilibus, in puerperio & quando ex uteri vitio menstrualis purgatio non recte succedit. Conveniunt quoque ubi digestio à morbo quocunque etiam convalescentibus vacillat, ad crudos succos corrigendos & evacuandos, item in hypochondriacis, quorum ventriculus jugiter excludit cruditates acidas. Contra ea aloetica incorrecta & majori dosi data magnopere commovent sanguinem, eamque ob causam, plethorici, sensibilibus naturæ & in sanguinis excretionibus proclives recte ab iis penitus abstinere, quia id incommodum proprium servant aloetica præpostere data, quod hæmorrhoides cœcas molestissimæ sensationis excitent & sanguinem ad regionem lumbarem & partes in pelvi contentas urgeant. Inter pilulas autem quæ aloem cum aliis aptis ingredientibus habent, præter *Becherianas*, tartaræ *Schrœderi*, aleophanginæ, marocostinæ, de succino *Cratonis*, *Solenandri*, usu & utilitate sua non defraudandæ.

§. IV.

Longe efficacius autem & validius alvum vacuant PURGANTIA; eoque nomine ex vegetabilibus potissimum innotuerunt radices: mechoacanna alba & nigra, five jalappa, helleborus niger & albus, iris nostras, bryonia, esula; herbæ: soldanella, gratiola, linum catharticum Anglicanum, pomum colocynthidis, grana tili, semen cataputiæ, turbit vegetabile, cortex medius sambuci, nec non gummi guttæ, elaterium & scammonium, unacum iis quæ artis pharmaceuticæ ministerio ex his conficiuntur, trochisci alhandal, extractum colocynthidis, esulæ, panchymagogum Crollii, resina jalappæ, diagrydium

dium sulphuratum, pulvis Cornachinus, sive Comitidis de Warwich.

Theoremata.

Elementum quo cum draſtica hæc phar­maca operationem ſuam perficiunt, eſt utique virulentiæ indolis ac tenuiſſimum ſal cauſticum inflammatorium, quod nerveas non ſolum ventriculi & inteſtinorum, ſed etiam univerſi corporis membranas, exili etiam doſi, haud ſecus ac venenum, adori­tur, in eaſdem cum violentia agit & ſpaſticas conſtrictiones, præcordiorum anxietates, cardial­gias, ventris tormina, cum crebris dejectionibus, ſingultus, ventriculi & inteſtinorum inflamma­tiones, cum extremorum frigore, immo convulſiones, excitare ſolet. Nam ſummæ tenuitatis & activitatis eſſe ac in univerſam humorum maſſam ſuam vim diffundere ſal quod purgantia hæc re­condunt, ex eo patet, quod infans ex lacte nutricis quæ purgans aſſumſit purgetur, & iisdem exterius tantum applicatis, purgans validiſſimus & per­nicialis quandoque ſubſequatur affectus. Sic Ve­teres pedes decocto hellebore lavantes, ſe purga­bant, ut habet *Heurnius in comment. in aph. Hippo­cratis*. Globulum ex hellebore fonticulo ad mundificandum impositum & vomitum & ſedes moviſſe auctor eſt *Walæus de meth. med. pag. 124*. Unguentum quoque quod habet colocynthidem umbilico illitum, purgat non modo infantes, ſed & adultos. Cauſtica vero & inflammantis vir­utis catharticorum indoles ex eo clariſſime pateſcit, quod exterius tantum applicata, cutim inſtar veſicatorii adurant & veſicas excitent, lac eſulæ verrucas conſumat, & eſſentia ex purgantibus, ut jalappa, mechoacanna, ſcammonio extracta & deglutita urat & arrodat fauces cum œſopha­go, aphthasque & puſtulas ardentes producat. Et certe virulentam ac veneni æmulam draſtico­rum eſſe facultatem, *Wepferi* experimenta uber­rime evincunt, qui in *tract. de cicuta aquatica* me­morat: ſe catellis varii generiis purgantia certa doſi ingeſſiſſe, eoque facto, mox vomitus, con­vulſiones ac demum mortem ſucceſſiſſe, factaque poſtea ſectione, ventriculum & tenuia inteſtina inflammata & maculis rubicundis, non ſecus ac ſi arſenicum datum fuiſſet, conſperſa comparuiſſe. Et quod memoratu digum, eadem phænomena, eoſdemque effectus, à reſina jalappæ, cujus uſus noſtris temporibus frequens admodum eſt, obſervari, idem auctor conceptis teſtatur verbis.

Corollaria practica.

I. Quum itaque tam vehemens, periculofa, quin damnoſa acriorum & validiorum cathar­ticorum ſit actio; rectius omnino ab eorum uſu prudens, rationalis & circumſpectus medicus pe­nitus ferme abſtinet. Certe experientiæ teſtimo­nio uberius conſtat: à nullo per omnia ſæcula phar­maco majorem perniciem, immo tam funeſtos effectus, productos fuiſſe, quam per minus provide data draſtica, ut vel ego, ex quo à qua­draginta quinque & quod excurrit annis medici­nam exercui, innumera fere obſervavi exempla eorum, qui ſolis purgantibus fortioribus immedi­cabilem noxam ſibi contraxerunt, vel plane occu­buerunt. Neque etiam ullum aliud ex remedio­rum pharmaceuticorum ſupellectile tam celeriter ac potenter vires proſternit, pulſum immutat, ſto­macho infeſtum eſt ejuſque & inteſtinorum natu­rale robur & motum lædit atque pervertit, quam acre ejuſmodi phar­macum. Plures novi, qui cre­briori horum uſu morbum cachecticum, hydro­picum & hypochondriacum naſti ſunt, qui lethar-

Frid. Hoffmanni Oper. Tom. I.

lem inflammationem ventriculi cum febre, dy­ſenteriam & cholericam paſſionem incurrerunt, quin paralyſin dextri vel ſiniſtri lateris experti ſunt. Id quod tamen fuſius jam evolvi & rationibus demonſtravi exemplis­que ex auctoribus collectis confirmavi in *difſertat. de purgantibus fortiori­bus è foro medico ejiciendis*. Veteres quidem, qui­bus clementia laxantia maxima ex parte una cum ſalium uſu erant ignota, frequentius his draſticis uſi ſunt, ipſe­que *Hippocrates* elaterio potiſſimum at­que hellebore purgationes molitus eſt; ſed ſi eo­rum ſcripta curatius perluſtramus, nonniſi neceſ­ſitate urgente ea propinarunt, & tum quidem provido certe conſilio, & ante, & poſt elaterium, cui plurimum deferrebant, lac potui præbuerunt, helleborum vero admixtione mulſi, olei, vel lac­tis cicurarunt, ne dicam ipſos non promiſcue ea­dem in uſum traxiſſe, ſed morbos curate diſtinxiſ­ſe, & *Hippocratem* maxime *lib. de purgant.* in om­ni febre & inflammatione eorum uſum ſerio inter­dixiſſe. Quin peritiſſimos in arte priſcos damna ex purgantibus neutiquam latuiſſe, uberius teſtantur reperiunda paſſim in eorum monumentis præce­pta atque effata. Luculentis certe verbis teſtatum hoc facit *Sect. II. aphor. 57.* ita habens: *qui ſunt ſano corpore dum purgantur, celeriter exſolvuntur;* & *Sect. IV. aph. 16.* purgationem periculofam pronunciat iis, qui ſunt integra valetudine: *Cu­jus aphoriſmi veritatem Heurnius demonſtraturus addit: vidi ſanos, quos in perniciem traxit ſolum ſimplex apozema purgatorium ex fumaria cum ſennæ foliis, temere exhibitum.* Neque minus *Celfus lib. I. cap. 3.* inculcat: *purgationes, ut inter­dum neceſſariæ, ſic ubi frequentes, periculum affe­runt.* Et *lib. II. cap. 12.* ita ſcribit: *medicamenta, (intelligit purgantia) ſtomachum fere lædunt & hominem infirmant, & nunquam in adverſa vale­tudine recte dantur, niſi morbus ſine febre eſt.* Eadem *Dioſcoridis* eſt ſententia qui *lib. IV. cap. 178.* prodidit: quod ſtomachum offendant eidem­que ſupra modum adverſentur. Præ omnibus ta­men graphice & copioſe de purgantium venenata qualitate & noxa egit *Campegius* in peculiari libel­lo; ut mittamus *Helmontium* ejuſque ſequaces, nec non *Bontekoe*, purgantia mortifera plane ap­pellaffe, & *Montanum*, *Cratonem* & *Solenandrum*, peritiſſimos ac in arte verſatiſſimos viros, eorum uſum mirum reformidaſſe & pilulas ex extractis amaris, gummatibus & aloë in uſu habuiſſe fre­quentiſſimo. Inprimis vero quam maxime perni­cioſa atque infeſa ſunt ejuſmodi draſtica corpori­bus infirmis, infantibus, ſenibus, à morbo vix convaleſcentibus, quique valde imbecillum ſtoma­chum ac motuum ataxiam proclive nervoſarum partium ſyſtema obtinent. Neque etiam ulla infe­ſtior medicina reperitur in cholericæ & ſenſi­bilioris naturæ hominibus, poſt gravem iræ affec­tum, ut plures hac ratione ſublatoſ viderim, in­flammatione ventriculi unacum cholera ſubſe­quuta. Qui colica hæmorrhoidali & ſpaſmis hy­pochondriacis atque hyſtericis patent, omni et­iam cura hæc draſtica evitare debent, niſi grave damnum incurrere velint, de quo quidem plura triſtia exempla enumeravi in *difſertat. de inflam­matione ventriculi*. Et quam detrimentoſa ſint purgantia draſtica infantibus, præſertim ſi ſimul dentitione difficili laborent, memorabilis utique eſt obſervatio, copioſe admodum & ſolide certis de cauſſis evoluta ac *tomo I. Medicinæ conſultat. Dec. V. Caſ. VIII. p. 262. ſeqq.* inſerta.

II. Utut vero magna & gravia damna abuſu purgantium draſticorum metuenda: nihilo minus quia venenum quoque diligenti circumſpectione

adhibitum transit in medicinam, uti mercurialium & emeticorum antimonialium exemplo constat; sunt etiam utique casus, rariores tamen, ubi valida cathartica commodam locare possunt operam. Nimirum in hydropse anasarca, praesertim si is non ex induratione vel scirrhotate viscerum & glandularum, sed subito ex stagnatione aquarum, ob menstruaalem vel haemorrhoidalem sanguinis fluxum suppressum, aut ex nimia voracitate in & post morbum, enatus, vidi nonnunquam cum fructu adhibitum fuisse succum iridis nostratis ad aliquot uncias, item gummi guttae, elaterium, extractum esulae, cum mensura dimidia lactis, repetito etiam aliquoties usu. Mirre enim inde funduntur aquae non modo per alvum, sed & in foeminis per uterum, quin bina memoria teneo exempla, ubi paucas quidem sedes haec cathartica, sed largissimum & valde salutare urinae stillicidium excitarunt. Hydropici quippe ob nimiam laxitatem & torporem fibrarum intestinalium commodius ejusmodi drastica ferre possunt, ac egent haec omnino paullo validiori stimulo, quo ad motum excretorium animentur. Pariter acriora haec purgantia utiliter in usum vocari possunt in paralytica membrorum resolutione, affectibus soporosis & ubi ob languores efficaci medicina opus est, nec non in amentia, ut veteri proverbio constat, quo etiam referendum *Celsi* effatum *lib. II. cap. 12. veratrum nigrum*, inquit, *aut atra bile vexatis, aut cum tristitia insipientibus, aut iis quorum nervi parte aliqua resoluti sunt, datur*. Neque minus experientia comperit habeo, in acerbo ischii & coccygis dolore, ad femora per intervalla excurrente, ea quae validius alvum ducunt suppetias tulisse, & exturbatis septem vel octo sedibus biliosorum & male coctorum succorum saburra, tormina conquievisse.

III. Paullo robustioris etiam naturae homines, qui septentrionales regiones inhabitant & duriore ac crassiore victu fruuntur, purgandi scopo, si necessitas exigit, ea quae fortiter alvum vacuant assumere possunt; hac tamen, quam serio inculco cum cautela, ut refracta dosi, vel in pulvere unacum salibus, ut cremore tartari, vel tartaro vitriolato, adjectis aliquot antimonii diaphoretici granis, dentur, vel ut ipsa v. c. extractum hellebori nigri, trochisci alhandal, scammonium, resina jalappae aliaque in formam pilularum redigantur, nupta iis, quae virulentam vim infringunt & castigant, ut sunt cinnabaris, vitriolum martis, crocus, castoreum, sal succini, succinum, myrrha, quibus si extractum panchymagogum Crollii, quod valde acria habet purgantia, convenienti dosi miscetur, pilulae utique emergunt, quae ubi acrior stimulus admovendus, egregie officio satisfaciunt. Nihilominus tamen memori nunquam non mente tenendum: quod si validiori evacuatione opus, longe magis è re sit, aucta leniorum dosi eandem proritare, quam acrioribus & virulentis urgere.

§. V.

IV. Sudorifera.

Aliud evacuantium genus est, quod per cutis spiracula liberaliter & conspectius, vel leniter modoque minus sensibili, sordes subtiliores emovet. Quae largius id faciunt SUDORIFERA, Graecis dicta hydrotica, sunt remedia, quorum virtute sensibilis mador per cutis tubulos lymphatico-arteriosos fertur. Hac virtute ex vegetabilium prosapia eminent radices saporis admodum acris & penetrantis oleosi, angelicae, imperatoriae, ostruthii, petasitidis, helenii, levistici, vinceto-

xici, dictamni, valerianae, contrayervae, serpentariae Virginianae, lignum guajacum & sassafras cum corticibus. Ex mineralium familia antimonium crudum, regulus antimonii medicinalis, tinctura sulphuris volatilis, ex calce viva, sale ammoniaco & sulphure parata, sulphur antimonii correctum & fixatum, nec non mixtura simplex. Theriaca quoque, ejus essentia, spiritus & aqua, omnes spiritus & salia volatilia ex partibus animantium parata, praesertim cornu cervi, eboris & lumbricorum terrestrium, spiritus Bussii, tartari, serici, fuliginis, essentia lignorum, item olea destillata foetida, ut oleum cornu cervi foetidum, in spiritu vini solutum.

Theoremata.

I. Famigeratissima haec ex sudoriferis remedia, non alio modo virtutem suam exercent, quam quod principio quo pollent cordis vim systolicam & arteriarum elasticitatem, quoad numerum & virtutem ictuum augeant, & majori facta circuli velocitate, ad cutis extimam & cribrosam substantiam, ex qua prodit sudor, adducant. Hanc vero exsequuntur vel subtili acri calido oleo, ut radices superius enumeratae, quae etiam vocantur alexipharmae; vel sale volatili empyreumatico igneae naturae, ut omnes spiritus salia volatilia & olea ex animantibus; vel sale acriori fixo plus minus resinoso, ut radix pimpinellae albae, guajacum & ejus cortex, contrayerva, serpentaria Virginiana; vel denique actionem suam & quidem satis potenter edunt, sale & sulphure minerali tenuissimo, quo nervosas maxime fibrillas in motum vehementem cient, atque adeo in exili admodum dosi magnam vim possident, hinc uno grano mercurii nostri diaphoretici, item duobus vel tribus granis sulphuris antimonii fixati, sudor per universum corporis ambitum elicitur, qualem effectum etiam decoctum lignorum & antimonii crudi cum lignis, nec non regulus antimonii medicinalis, praestant.

Corollaria practica.

I. Valida haec sudorifera, licet in majori dosi offerantur, sudorem minime tamen eliciunt, nisi corpus sit dispositum; id est, nisi cutis tubulosa substantia satis patula sit & relaxata, nisi etiam sufficiente humoris quantitate sanguis sit dilutus. Quare si quis in morbis sanandis utilem judicat sudoris profectionem, necesse est, ut quae recensuimus sudorifera, ad diluendum sanguinem cum sufficiente liquido sumantur, v. g. aqua calida, infuso theae, decocto hordei, atque ut ad cutis fibras remittendas in lectum & hypocaustum calidum, vel etiam balneum, praesertim vaporosum, concedat sudaturus, ac ita sudor satis largus manabit.

II. Sudorifera haec activiora rarius locum inveniunt & cum insigni etiam prudentia adhibenda sunt. Etenim sudor in statu sano & naturali, nisi in motum extraordinarium cicatur sanguis, non profluit, nec ea propter salubritatis indicium est, ut perspiratio insensibilis, cujus etiam materia, quae blanda, lymphatica, nutritia, nullius fere saporis est & odoris, à sudoris, quae saporis salii, odoris foetidi & ad urinae naturam accedit, admodum differt. Deinde sudorifera haec ingentem commotionem & orgasinum efficiunt insignem, nec moderate, sed nimis celeriter agunt, inque sanguine vel sero impuro refertis corporibus majori impetu cruorem ad vasa minima & angustiora impellendo, periculosas acutas afflictiones, ex inflammatione & humorum congestionem oriundas, concitare valent. Nocentissima vero

vero sunt, ubi sabutra vitiosorum humorum primæ viæ repletæ, alvus constricta & si statim post ipsam propinantur. Vidi non semel hac perverſa methodo, dolores arthriticos, rheumaticos, lentas quoque & heclicas febres, diutius non sine periculo affligentes, inductas.

III. In omnibus acutis morbis, febribus, inflammatoriis, etiam exanthematicis, sudoriferorum usus plane exulet, & nonnisi quam maxime moderatus minusque creber admittatur. Nam sæpius certe ab essentia alexipharmaca promiscue, ut jam mos invaleſcit, oblata, calorem, anxietatem & symptomatum atrociam increviſſe, observavi. Dicuntur quidem hæc remedia alexipharmaca, ut & ipsa theriacalia, quasi venenis & malignitati humorum resisterent, adeoque in morbis contagiosis grassantibus ipsaque peste, à medicis mirifice commendantur; at vero plus valent ad horum morborum præſervationem, quam curationem, præſertim si epidemii ejusmodi maligni morbi à tempeſtate nimis humida, vappida, nebulosa diuturna, ventis ex euro & borea flantibus destituta, vel etiam à diluvio & inundatione aquarum graviore originem suam trahunt; certius tamen & tutius etiam hoc fine, cum aceto vini aqua diluto propinantur, vel radices alexipharmacæ cum aceto infunduntur, quod deinde alexipharmaca vi imbutum ad aliquot cochlearia cum ſufficienti aqueo vehiculo propinandum, quo pertinet etiam eximius usus aquæ prophylacticæ Sylvii, eo nempe tempore, quo ejusmodi morbi grassantur.

IV. Sudor vero utiliter evocatur in iis morbis, qui à frigore externo & perspiratione prohibita, ut sunt catarrhi, rheumatismi, alvi fluxus, gravedines, tusses, tumores glandularum, oriuntur, item quando à frigido potu sudanti & calefacto corpori largius ingesto periculum metuentum; sed opus est, ut inter initia statim offerantur: ac tum quidem tinctura bezoardica, vel spiritus bezoardicus Buſſii, cum liquore nostro anodyno remixtus, egregii usus. Neque minus suscepto morbi inficientis miasmate, statim post lene assumptum emeticum, sudoriferum conducit, & quidem acetum bezoardicum, vel pulvis bezoardicus, cum camphoræ, quæ princeps alexipharmacorum, momento.

V. In iis porro morbis, qui in tubulosa & fibrosa cutis substantia consistunt & ab acri viscida materia texturam cutis destruente ac defœdante, ut scabie, etiam mali moris, herpes, lepra, pustulis & ulceribus venereis, sudor cum fructu accommodatis remediis liberalius movetur. Idem fit in arthriticis rheumaticisque omnium partium doloribus, dum serum viscidum stagnans acre & membranis nerveis inhærescens, hac ratione discutitur ac eliminatur. Pari ratione in morbis omnibus sic dictis frigidis, anasarca, leucophlegmatia, scorbuto frigido, lue venerea, arthritide fixa, malo ischiadico, paralyſi, ceteris partibus, sudorifera magnæ sunt efficaciam, quia elasticitatem & vim contractilem cordis & vaſorum, quæ in ejusmodi affectibus admodum depressa est, intendunt, restituunt & sanguinis circuitum, ad meliorem impurorum succorum sequeſtrationem, efficaciter augment. Sed insistendum est aliquandiu hisce præſidiis.

VI. Sudorifera semper meliorem operationem exserunt, si cum ſufficienti & calido liquido assumuntur. *Celsus* jam lib. III. cap. 6. hoc fine commendat potum calidum his verbis: *si nota est sudoris venturi, tum demum calidam aquam potui dare oportet, cujus salubris effectus est, si sudor.* *Frid. Hoffmanni Oper. Tom. I.*

rem per omnia membra effundit. Et idem uberius testatum faciunt decocta lignorum, quorum usus in lue venerea aliisque frigidis morbis sane laudatissimus. Vidi quoque febres intermittentes, tertianam, quartanam, in plebeiis feliciter sublata, si præmiſſo emetico, aliquot horis ante accessionem, sumtum sudoriferum, cum regimine, ex rob sambuci, sale tartari & piperis quibusdam granis, cum aliquot spiritus vini cochlearibus confectum.

§. VI.

Sudoriferis potentia agendi inferiora, sed salubri effectu longe superiora sunt DIAPHORETICA, quæ placide tantum augment & movent perspirationem. Ex his inter ea quæ vegetabilium regnum suggerit, præcipua sunt radix chinæ, ſarſaparillæ, carlinæ, gentianæ; ex herbis: carduus benedictus totus, ejus semen omniaque ex eo parata, essentia, aqua, extracta, sal, porro scordium, sambucus, isque humilis ebulus, ejusque flores, rob, aqua, item fumaria, scabiosa, crocus, flores calendulæ, opium quoque; ex regno animalium: omnia ossa, cornua ac dentes animantium, tam rafa, quam in cineres usta & philosophice præparata, maxime omnium quæ cervus suggerit, lapides, testæ & chelæ cancrorum; ex terreis: omnes terræ sigillatæ & margarum species, bolus fabrilis; ex salibus: salia herbarum per incinerationem parata, item nitrum; ex pretiosis & exoticis: petra di porco, lapis bezoar orientalis & occidentalis; ex mineralibus & chymicis: flores & lac sulphuris, cinnabaris tam nativa, quam vulgaris & antimonii, antimonium diaphoreticum, ceruſſa antimonii, magisterium antimonii, sive materia perlata Crügeneri, bezoardicum minerale, tinctura antimonii temperata, ex regulo & sale tartari, antihecticum Poterii; ex compositis: lapis de Goa, qui ex lapide bezoar orientali, tragacantha & ambra conficitur, pulvis bezoardicus Sennerti, Anglicanus, Pannonicus ruber, cordialis Dorncrellii, liquor noster anodynus mineralis, acetum quoque vini, vel etiam destillatum & floribus sambuci superinfusum, aut cum lapidibus cancrorum, pulvis noster polychrestus diaphoreticus, theriaca cœlestis, laudanum liquidum, pilulæ Wildegansii.

Theoremata.

Actio diaphoreticorum varia est & multiplex. Velenim privative agunt & acidum primarum viarum, quod ad sanguinem delatum ejus spiritus ascensionem, fluiditatem & motum intestinum deprimit, absorbent atque invertunt, cujus indolis sunt omnia terrea alcalinæ naturæ: vel nimiam humiditatem imbibendo & remiſſas nimis fibras adducendo, ut terræ sigillatæ, boli & margæ, item ossa & cornua, tam usta, quam philosophice præparata, nec non unicornu fossile: vel sulphure anodyno blando vaporoso strictiones superficiales cutis in doloribus laxando & complacando, ut sunt sambucina, præſertim flores, crocus, ejus extractum, flores papaveris rheados, liquor anodynus mineralis noster, emulsiva ex semine papaveris, opiata correctæ, potissimum theriaca cœlestis, pilulæ Wildegansii; laudanum liquidum Sydenhamii methodo paratum; vel motum intestinum sanguinis ferociorem componendo ac figendo, uti nitrosa, refracta dosi fixioribus diaphoreticis nupta, nec non spiritus nitri dulcis, emulsiones ex seminibus quatuor frigidis majoribus, acidulata, succus limonum ipsumque acetum, vel denique positive elemento subtili acri fibras

& vasa languentia leniter exstimulando, prout carduus benedictus, scordium, fumaria, china, sarsaparilla, centaurium minus, scabiosa, carlina & gentiana.

Corollaria practica.

I. Quemadmodum illa subtilissimarum for-
dium per cutis poros insensibili modo succedens
evacuatio, omnium est saluberrima, eademque
intercepta, plures succrescunt morbosæ afflictio-
nes: ita diaphoreticorum, quæ cutaneam hanc
excretionem eliciunt, usus certe est amplissimus,
universalis & fere polychrestus, in omnibus fer-
me affectibus, etiam ex præsentibus signis non-
dum satis perspectis & cognitis, ut iis medicus
modo carere possit plane nullo. Circulus enim
sanguinis & perspiratio auctior, solennia illa na-
turæ media sunt ac instrumenta, quibuscum ma-
teria quæ in morbis in vitio est, corrigitur, di-
geritur, resolvitur, discutitur ipseque morbus
tutissime sanatur. Potissimum tamen in omnibus
morbis & febribus acutis, inflammationibus cu-
juscunque generis sint, sola hæc, pauca & con-
tinuata dosi, cum convenientibus vehiculis data,
omne sanationis punctum absolvunt & revera op-
tima sunt discutientia & sanguinis massam de-
purantia.

II. Quia excessivus, præsertim tempore æsti-
vo & in cholericis ac biliosis corporibus, æstus,
nec non qui febribus cholericis & biliosis jungi
solet, nimis exsiccat, humidum absument & per-
spirationem impedit; acidula & nitrosa, ac in-
primis lapides cancrorum cum nitro, exhibiti in
julapio ex aquis diapnoicis & cum syrupo ace-
tositatis citri condito, contemperando nimiam
exæstuationem, cum bonis agrorum rebus ex
voto diaphoresin movent.

III. Ubi ob dolorum atrociam arida & ex-
succa cutis ejusque tubuli angustantur & coar-
ctantur; præstat semper leniora anodyna & an-
tispasmodica diaphoreticis jungere, qua virtute
maxime splendet liquor noster anodynus mine-
ralis, ad tres partes, cum una spiritus bezoardi-
ci Bussii parte remixtus, item pulvis diaphore-
ticus fixior, leniter nitrosus, cum cinnabari &
uno vel altero pilularum Wildegansii grano, id
quod etiam pluribus testatur *Ettmüllerus* in *dissert-
atione de virtute opii diaphoretica*.

IV. Pulveres diaphoretici id servant peculia-
re, quod non solum perspirationis successum in-
tendant, sed etiam sæpe virtutem laxantem & in-
signiter diureticam, exserant. Certe de pulvere
nostro sic dicto bezoardico polychresto, multi-
plici experientia compertum habeo, eundem si
mane vel post meridiem propinatur & prima in
regione offendit acidus succos, quatuor vel quin-
que sedes movere, quod in senibus & hypochon-
driacis cum eximio sanitatis commodo succedit.
Idem quando circa lecti introitum offertur, nec
tamen cutis ad sudorem satis disposita, ut in
principio catarrhorum, largum urinæ movere so-
let fluxum, ubi vero ad diapnoen cutis apta, lar-
giter sæpe fluit sudor.

V. In morbis acutis & febribus, ubi parum
acidi in primis viis præsto est, tutius & majori
cum efficacia, fixa & terrea diaphoretica paullo
minori dosi offeruntur, ac optime miscentur cum
syrupo acetositatis citri, nec non aceto vini, quip-
pe solum acetum cum aqua non coagulat, sed
sæpe resolvit & discutit sanguinem impactum,
multo magis si diaphoreticis jungatur.

§. VII.

Sudoriferis ac diaphoreticis succedunt ea, quæ
serum falsum, crassioribus terrestribus recremen-
tis refertum, per urinarias vias eliciunt, DIU-
RETICA dicta. Horum apparatus *Celsus lib.*
II. cap. 31. sistit: *urinam*, inquit, *movent que-
cunque in horto nascentia boni odoris sunt, ut*
*apium, ruta, anethum, ocimum, mentha, bysso-
pus, anisum, coriandrum, nasturtium, eruca,*
*foeniculum, præter hæc asparagus, capparis, ne-
petha, thymum, satureia, lampfana, pastinaca,*
sifer, cepa. Nos quæ hunc in finem commen-
demus, habemus ex vegetabilium numero radi-
ces: petroselini, feleri, asparagi, graminis, liqui-
ritiæ, rubiæ tinctorum, pastinacæ, ranunculi es-
culenti & quæ exteris debentur bareiræ bravæ &
acmellæ; herbæ: petroselinum, hederæ terrestris,
equisetum, chærefolium, urtica, omnesque porri
& allii species; flores: genistæ, cyani; semina:
dauci, petroselini, feleri, foeniculi, milii solis, ur-
ticæ, violarum, semina quatuor frigida majora,
lycopodii, fructus alkekengi, cynosbati, juniperi
& fraga; lignum juniperinum, sassafras & ejus
cortex; resinæ & balsama: mastix, succinum,
balsamum de Mecca & de Copaiva; ex anima-
lium familia: cantharides, millepedes, vermes
Maiales, scorpiones, bufones, lumbrici terre-
stres, cochinellæ, nec non serum lactis: salia por-
ro omnia alcalia per incinerationem parata, sal
quoque succini, arcanum duplicatum, solutio
oculorum cancri ipsumque nitrum; ex præpara-
tis & compositis: lixivium benedictum Myn-
sichti, tinctura tartari, antimonii acris, terra fo-
liata tartari, liquor filicum, lithontripcticus Mi-
chaelis, tartarus solubilis, spiritus terebinthinæ,
mastichis, succini, balsamum sulphuris terebin-
thinatum, juniperinum, oleum juniperi, malva-
ticum juniperinum, syrupus è dialthæa Fernelii,
trochisci alkekengi.

Theoremata.

Quemadmodum parcius & imminutus, vel
difficilis urinæ fluxus à variis proficiscitur causis,
& vel 1) ab humidi in sanguine defectu; vel 2)
à tenacibus spissis urinarios renum tubulos ob-
struentibus succis; vel 3) à vehementi canalicu-
lorum renalium spasmo & strictura; vel deni-
que 4) à nimia eorundem laxitate atque reso-
lutione: ita etiam remedia quæ debitum urinæ
fluxum revocant & eliciunt, diversis ad has caus-
sas relatis modis effectum exsequuntur. Videli-
cet nonnulla fluidum sanguini spissescenti infun-
dendo urinæ stillicidium augent, quæ inter con-
numeranda omnia diluentia aquea, largus aquæ
dulcis tam calidæ quam frigidæ, eo magis her-
bis diureticis infusæ, potus, ipsumque infusum
thee ac decoctum coffee. Hac quoque virtute
splendent soteriæ aquæ, tam calidæ, quam frigi-
dæ, quippe quæ præter humoris copiam, qua
sanguinem diluunt, eximia simul virtute pollent,
alcalino quod recondunt elemento, viscidos &
tenaces humores dissolvendi & renale cribrum ab
obstructione liberandi. Idem præstat lactis serum
pariter & aquoso largo & sale dulci nitroso, ab-
stergente blandæque stimulante elemento instru-
ctum. Alia humores lentos ac spissos renalis co-
latorii ductus farcientes ac oppilantes dissolvunt
eosdemque secretioni aptos reddunt, qua quidem
virtute conspicua sunt salia omnia fixa & ex iis
parata lixivia, item tinctura tartari, antimonii
acris, liquor filicum, terra foliata tartari, tarta-
rus tartarizatus, arcanum duplicatum, solutio
oculo-

oculorum cancri, ipsaque magnesia alba, cum primæ regionis acido in sal aperiens degenerans, neque minus tinctura calcis vivæ, mater perlarum & corallia succo citri maritata, una cum salibus, quæ ex medicatis aquis exhalationis ope eliciuntur. Nonnulla spasticas in renali emunctorio stricturas debitam urinæ sequestrationem sufflamantes & intercipientes mulcent atque relaxant, eoque nomine laudem merentur præter nitrum, semina quatuor frigida majora & ex iis paratæ emulsiones, semen papaveris albi, dauci, milii solis, lycopodii, item fructus alkekengi & ex iis artificiose confecti trochisci. Eadem facultas inest liquori nostro anodyno minerali, tutissimo certe & tamen efficaci remedio, croco ejusque essentia, nec non ob nitrosum sal succo graminis, decocto radicis graminis, asparagi, & quod etiam egregie demulcet oleo amygdalarum dulcium. Quædam remissum renalis cribri robur firmant atque adducunt, idque vel oleoso, tenui & subtili balsamico principio, ut mastix, succinum, balsamum de Mecca, de Copaiva, terebinthina, juniperus, ejus lignum & baccæ, sassafra, petroselinum, pastinaca, fœniculum, anisum, ranunculus hortensis, seleri & quæ ex his confici possunt olea, essentia, spiritus, decocta & infusa; vel roborante quodam fixiori terreo sulphureo elemento, cujus generis sunt fructus cynosbati, rob juniperi & ex eo malvaticum juniperinum, fraga exsiccata, bareira brava, hederæ terrestris, cortex radicis acaciæ, equisetum, veronica, chærefolium. Aliqua demum potenti stimulo efficaciam edunt in tubulos renales, quando eorundem robur propter debilitatem summam penitus exsolutum, ipsaque hinc eorundem functio cessat. Propria hæc est facultas infectis fere omnibus, præsertim cantharidibus, millepedibus, araneis, scorpionibus, vermibus Maialibus, bufonibus exsiccatis, nec non ex vegetabilium genere porri & allii speciebus.

Corollaria practica.

I. Quum itaque tam conspicua inter diuretica ratione principiorum & operationis intercedat differentia; discrepans quoque eorundem erit usus & cum exquisito discrimine pro circumstantiarum ratione administrandus. Quod si enim redundante in corpore sanguine, ante ejus immutationem calculo laborantibus exhibere quis vellet calidiora, oleo subtili balsamico perfusa, ut terebinthinata, succinata, juniperina, vel balsamum de Mecca, Copaiva aut Peru; vel etiam acriora, caustico sale pollentia ex infectis, allio, cepis & porro: is profecto gravissime noceret & inflammationem renum induceret, vel calculorum generationem promoveret. Contra ea in corporibus humidioribus, minus sentientibus, plebeiis & qui crasso victu fruuntur, nec non in morbis, qui à copia feri impuri natales trahunt, fluore foeminarum albo, gonorrhœa, dispositione ad anasarcam & leucophlegmatiam, efficaciora hæc remedia magno sunt usui.

II. Multo magis vero acria & stimulantia detrimento sunt, si ob dolores, ut ex calculo, vel spasticas constrictiones, urinæ fluxus sufflamatur; & tum quidem longe rutiliora ac utiliora sunt, quæ stricturas relaxant & dolores leniunt, ut faciunt fructus alkekengi, semina dauci, lycopodii, papaveris albi, milii solis, quatuor frigida majora, emulsiva, trochisci alkekengi cum opio, nitrum antimoniatum, depuratum, aquæ florum ulmaria, tiliæ, acaciæ, oleum amygdalarum dulcium, spiritus nitri dulcis, liquor noster anody-

nus mineralis, serum lactis, nec non exterius balnea, infusus & foci emollientes, quorum omnium tam egregia virtus est, ut placando dolorificos spasmos, non modo suppressum urinæ fluxum restituant, sed & ipsius calculi progressum per ureteres & exitum eximie faciliunt atque promoveant.

III. Quando feri falsi, tartarei copia, quæ dolorum tam arthriticorum, quam rheumaticorum ut plurimum genitrix est, peccat, utiliter eadem per lenia diuretica expurgatur atque subducitur, non vero calidiora, ne iisdem salium spicula in motum intensiorem abripiantur partesque quibus insident gravius exagitent. Commendari autem hunc in finem quam maxime merentur radix sassaparillæ, pareiræ bravæ, sassafra, chinæ, liquiritiæ, asparagi, rubiæ tinctorum, cichorii, fœniculi, petroselini, graminis, lignum juniperinum & parata ex his cum brodio carnis vel aqua decocta, nec non serum lactis, ac potissimum acidulæ & thermæ temperatiores.

IV. Ubi vero vitiosi, visceri ac tenaces humores in vesica urinaria hærent & cum primis calculi rudimentis excludi debent; acrioribus utique opus est magisque potentibus, cui scopo alium cum spiritu juniperi sumtum, pulvis millepedum, vermes Maiales, essentia cantharidum, tinctura antimonii acris, liquor silicum cum tinctura calcis vivæ satisfaciunt, quæ pariter in gonorrhœa virulenta, quando in prostaticis, vesicæ collo & urethra obhærescens tenax materia per urinam educenda, prudenter adhibita ex usu sunt.

V. Omnium aptissima, tutissima & utilissima ad eliciendum urinosum laticem præsidia, sunt salia, tam alcalia fixa, quam neutra omnis generis, quippe quæ viscidos ac lentos succos siphunculos urinarios oppilantes dissolvunt, simulque blando stimulo excretionem proritant. Quo quidem effectu egregie splendent liquor salis tartari, cinerum clavellatorum, nitri fixi, tartarus vitriolatus, sal absynthii, arcanum duplicatum, solutio oculorum cancri, tartarus solubilis, terra foliata tartari, nitrum antimoniatum & sal polychrestum.

VI. Sed hæc hæcenus recensita remedia non tantum ad eliciendum deficientem urinæ fluxum faciunt; verum etiam alios eximie utiles in morbis præstant effectus. Dum enim plura ex iis aperiente & incidente, alia roborante, tonica & balsamica, nonnulla anodyna facultate pollent, in longis utique omnibus affectionibus, quæ ab obstructione glandularum viscerum & emuncto-riorum incunabula ducunt, nec non quæ ab impuritate & copia feri falsi acris tartarei proficiuntur, ex voto ferunt suppetias. Et certe si ulla medicamenta ab hydrope, tumoribus œdematosis, calculosis concretionibus, podagra & arthritide defendunt; certe à prudenti diureticorum usu id erit expectandum. Cavendum tamen merito ab omnibus calidis, acris & causticis, & potius utendum lenioribus magisque diætetis, cujus generis sunt vinum Mosellanum tenue, acidulæ Selteranæ & cerevisiæ vel decocta quæ diuresin blande movent.

§. VIII.

Ad salutes & criticas excretiones, quæ ad vitæ & sanitatis tutelam faciunt, pertinent etiam illæ, quibus bonus & sincerus sanguis, si copia peccat, non solum in foeminis post annum decimum quartum singulis mensibus per uterum atque etiam post partum & abortum emittitur; sed in viris etiam nimium cruore redundantibus per

VII. Men-
ses & hæ-
morrhoides
moventia.

extimas ani venas, quæ hæmorrhoidales vocari solent, sponte à natura per vices effunditur. Hæ itaque saluberrimæ hæmorrhagiæ, quando modo, quantitate, vel tempore peccant, plane deficient, aut vi quadam cohibentur, aptis remediis revocandæ iterumque in ordinem reducendæ sunt, ne gravissima inde in valetudinem redundet noxa, vel etiam ut enatus jam morbus abigatur. Inter ea vero quæ ad obtinendum hunc scopum ex usu sunt, connumeranda inprimis ex vegetabili regno: radix aristolochiæ, zedoariæ & quinque aperientes; herbæ: artemisia, calamintha, matricaria, pulegium, melissa, sabina, polium montanum, ruta, majorana, rosmarinus; flores cheiri, crocus, baccae lauri, juniperi; gummata bdellium, myrrha, galbanum, opopanax, fagapenum, succinum; ex purgantibus aloë, rhabbarum, bryonia, itemque aromata; nec non quæ animalibus debentur salia cum castoreo & quæ ex mineralibus & chymicis omnibus præferenda martialia.

Theoremata.

I. Quo major sanguinearum evacuationum ad valetudinem tuendam utilitas est atque præstantia; eo magis utique, ut dudum fecit *Hippocrates*, optandum foret, quo suppetere certa & efficacia ejusmodi præsidia, quibuscum medicus illas quotiescunque è re est cum certo successu regere, evocare aut moderari, sicque tempestive plures graves ægritudines & præscindere & expugnare posset. Verum quia hæc sanguinis excretio maxime ipsius naturæ est opus, quod in foeminis certæ temporis periodo, qua erumpit, succedit & definit, adstrictum, in viris autem nec omnibus solenne, nec adeo periodicum, ac præterea certam cruoris redundantis portionem, nec non vascula uteri & ani patula, laxa & ad spontaneum fluxum disposita exigat, pariterque à multiplicibus causis sufflaminari vel plane intercepti potest; in proclivi est judicare: arduum utique nec tum expeditum esse negotium, resistans vel deficiens cruoris profluvium iterum procurare, quin nunquam perficiendum, nisi causarum defectus ratio habeatur exquisitissima.

II. Posito vero quod sanguis supra proportionem & modum in corpore redundet, quod præcipua fluxus causa, posito etiam quod vascula uteri & ani ita disposita sint, ut ab affluente copioso sanguine distendi & exitum ipsi præbere possint; neque tamen excretionis negotium rite succedere, vel propter vascula arteriolarum lateralia, quæ secundum naturam non vehunt sanguinem obstructa, aut spasmo contracta, vel etiam ob imminutam sanguinis spiritusascentiam & cordis atque arteriarum vim elasticam contractilem: tunc omnino quæ supra adduximus remedium genera exoptatissimam ferunt opem. Ad vasa quippe minima referenda & obstructions expediendas egregie præter radices quinque aperientes, aristolochiam, rhabbarum, bryoniam, flores cheiri, præsertim si in decocto cum salino stimulo, ut borrace, offerantur, inprimis etiam conferunt gummata, cum aloë & purgantibus in forma pilularum exhibita. Ad tubulos infesto spasmo contractos nimis & coarctatos adaperiendos, artemisia, quæ demulcet, millefolium, crocus, castoreum, plurimum valent. Et ad deficientem sanguinis spiritusascentiam recoillandam, robur solidis addendum & fibrarum vasorumque tonum firmandum, roborantia, quæ sale volatili oleoso tenui operationem suam exsequuntur, ex usu sunt, quo referenda omnia aro-

mata, myrrha, baccae lauri & juniperi, rosmarinus, pulegium, melissa, fatureia, sabina, flores cheiri, calamintha, succinum, limatura martis & tincturæ ex marte paratæ, item salia volatilia oleosa.

III. Quando nimia sanguinis copia, quæ elasticitati vasorum valde resistit, retardati, vel imminuti fluxus causa est, neutrquam emmenagoga jam dicta, præsertim calidiora, locum habent. Sanguis enim hisce vehementius commotus pessima sæpe concitat mala. Sed opus tunc est sanguinis missione, quæ per sectam in pede venam instituta, saluberrimum hoc & criticum profluvium, sola sæpe restituit.

IV. Neque etiam hæc quæ enumeravimus emmenagoga conducunt, ubi sanguinis & succorum benignorum est defectus, ut in iis, qui mox à morbo convalescerent, & quando primæ viæ fordibus viscidis fartæ, tunica villosa lento mucro inviscata & bona digestio & chylicatio vacillat. Tum potius id præcipue agere debet medicus, ut tam deficientem bonum sanguinem nutrientibus gelatinosis, jusculis & quæ facile in succum & sanguinem convertuntur, denuo ingeneret, quam labefactatam ciborum digestionem & chyli elaborationem congruis remediis, si opus est emeticis, vel lenioribus purgantibus, salinis aperitivis, amaris stomachicis, refarciat & debito ordini reddat.

V. Sæpe sanguinis effluxum impedit oppilatio ac infarctus vasculosa colli uteri interni & exterius vaginæ, nec non in viris ani substantiæ, ut nullum sanguinem, quantumvis valide appulsum, admittat. Quod si contigerit, supervacanea & irrita sane sunt quæcunque pellentia, nisi prius per congrua auxilia relaxata & emollita fuerit, obstitata & indurata tubulorum compages. Quod quidem non meliori magisque præsentanea ratione perfici potest, quam balneis, vel fotibus, seu balneis vaporosis, ita parandis, ut vas calida aqua, cui herbæ artemisiæ, pulegii, flores chamomillæ infusæ, repletum, in hypocausto calido, recto bene corpore, abdomini, quo vapor ad interiora uteri & partium inferiorum ascendat ac penetret, supponatur, & ad calorem aliquandiu conservandum, subinde candentes filices aquæ injiciantur. Eundem quoque in finem multum conferunt frictiones calidæ pedum usque ad inguina, præsertim mox à balneo aquæ dulcis cum pannis calidis institutæ.

VI. In iis autem malis, quæ à suppresso, deficiente, vel minus recte succedente, mensium, vel hæmorrhoidum fluxu, pendent, non certius, non securius, non efficacius præsidium deprehendi, prudenti aquarum mineralium, inprimis thermarum Carolinarum mitiorum interno, & Tœplicesium externo usu, qui omnibus medendi indicationibus apprime satisfacit. Potu quippe thermalis aquæ humores lenti inciduntur & evacuantur, obstructions minimorum tubulorum expediuntur, balneo vero aquæ Tœplicesis, quæ omnium levissima, constringente terreo principio orbata, stricturæ remittuntur ipsaque vasa ampliantur, ut sanguinem affluentem promte admittere, capere iterumque eructare possint.

VII. Quemadmodum res admodum ardua & difficilis est in medendo, recte curare & procurare mensium in foeminis profluvium; ita longe majoribus adhuc difficultatibus stipatus est excretionis hæmorrhoidalis successus, si copia sanguinis per venas ani exitum molitur, nec tamen ibi dispositionem ad exitum invenit. Nam licet ad

ciendum

ciendum sanguinis ex ani venis stillicidium pilulæ ex aloe paratæ singularem plane præ omnibus aliis possideant facultatem, dum non modo particulis suis resinosis sulphureis, valde subtilibus, in universa sanguinis & humorum massa insignem orgasmum concitant, sed & tenaci viscosa ac resinosa sua parte intestini coli & recti tunicis firmitus inhærendo, continuo stimulo majorem sanguinis proritant affluxum; nihilo minus tamen quando cruor ita exæstuat ac eo copiosus allectus, ob vascula perruptioni minus apta exitu præcluditur, partim extrema canalium ora cum exquisito dolore in ano tuberculorum instar protrudit, partim inter nerveas intestinorum tunicas stagnans easdemque premens, vehementes inflationes, spasmos & varia truculenta in abdomine pathemata, ingignit, quæ frequentissimæ certe sunt observationis nostro hoc ævo, quo omnes fere passiones ex fluxus hæmorrhoidalis anomaliis, tanquam caussa, repetere, clari etiam viri haud verentur, & pilularum ad mentem Beccheri concinnatarum crebrior nimisque liberalis usus, seu potius abusus invalescit, quarum alias prudens usus laudem meretur.

§. IX.

VIII. Expectorantia.

In evacuantium classe etiam ea locum obtinent, quæ lympham mucidam in glandulis, vel potius glandulosis tunicis, ex arterioso sanguine secretam & in emunctoriis hærentem, evocant. In nullo vero corporis organo mucositatis copiosior succedit sequestratio, quam in interioribus canalis asperæ arteriæ ipsisque pulmonum bronchiis, quæ interius tunica glandulosa obducta sunt, unde per tussim copiosa per sæpe serosa, pituitosa, viscida, interdum etiam purulenta materia, in morbis præsertim qui pulmonum compagem afficiunt, tam acutis, quam chronicis, rejicitur. Et hanc è thoracis cavo evacuationem quæ promovere solent, vocantur, **EXPECTORANTIA**, in quorum numero è vegetabilium familia sunt maxime radix helenii, ari, iridis Florentinæ, liquiritiæ, herba veronicæ, chærefolii, scabiosæ, pilosellæ, scordii, hyssopi, dracunculi esculenti: flores violarum, crocus, malvæ, papaveris rhœados, semen anisi, fœniculi, cortex ligni assafras, ex gummatibus resinosis gummi ammoniacum, benzoe; ex fructibus passulæ, ficus, jujubæ, nuclei pini, mel, succus liquiritiæ, oleum amygdalarum dulcium; ex animalibus: sperma ceti & pinguedines; ex mineralibus: sulphur, ejus flores & lac; ex compositis balsamum sulphuris anisatum, spiritus salis ammoniaci anisatus, lohoch sanum & expertum, syrupus pulmonum vulpis, elixir nostrum pectorale, balsamum pectorale Meibomii, spiritus asthmaticus Michaelis.

Theoremata.

Quemadmodum omnia quæ excretiones adjuvant, non uno eodemque modo suam edunt operationem, sed vel materiam mobilem reddunt & ad evacuandum præparant, vel vias emunctoriorum referant, ut à succorum connubio segregari possit, vel denique vasa & canales ad motum excretorium extimulant: ita ratione haud absimili etiam expectorantium agendi succedit modus. Nimirum si humor secretus est valde tenuis, acris & tubuli ac pori glandularum è quibus ejiciendus nimis contracti, aptissima sunt ea quæ vias emolliunt, acrimoniam hebetant & nimis tenues & fluxiles coagulant, qua

virtute ex jam nominatis splendent succus radicis liquiritiæ, crocus, sperma ceti, flores violarum, malvæ, papaveris rhœados, cremor lactis, oleum amygdalarum dulcium, axungia, syrupus pulmonum vulpis, violarum, papaveris albi, massa pilularum de stirace, præsertim si cum liquido diluente, ut est decoctum avenaceum, vel decocto ex rasura cornu cervi gelatiniformi, assumantur. Quandocunque vero materia spissa & copiosa in bronchiis pulmonum hæret & respirationi obest, eaque propter stimulo quodam ad expectorationem opus est, tunc tenacem & viscidam materiam quam optime resolvunt infusa ex herba veronicæ, hyssopi, scabiosæ, scordii, terra quoque foliata tartari, solutio oculorum cancri & nitrum antimoniatum. Et tunicas bronchiorum nerveas principio quodam acri tenui oleoso, ad motum excretorium animant, gummi ammoniacum & ejus essentia, spiritus salis ammoniaci anisatus, myrrha, benzoe, pulvis radicis helenii, iridis Florentinæ, sulphur stillatitium, ejus lac, balsamum sulphuris; aut ubi acrius adhuc calcar admovendum, ut in asthmate pituitoso & catarrho suffocativo, oxymel squilliticum & spiritus asthmaticus Michaelis, qui ex gummi ammoniacico & crystallis viridis æris paratur, adhiberi poterunt.

Corollaria practica.

I. In expectorantium usu, ob diversa quibus agunt principia ipsumque varium operandi modum, prudenti discrimine opus est, & qui promiscue nulla habita differentia temporis, vel materiæ peccantis, iisdem utitur, is certe plus damni, quam commodi inducit. Hinc quando tussis epidemice grassante, vere vel autumnus, antequam materia tenuis & acris attemperata, propinantur quæ stimulo agunt expectorantia, vel vicissim, ubi materia latis cocta & præparata, emollientia & relaxantia offeruntur, præposterum utique & damnosum est molimen.

II. In tussi chronica, humida, asthmate quoque pituitoso, in quo multum pituitæ in bronchiis pulmonum illabatur, dulcia, linctus, syrupi & oleosa ventriculum, qui in morbis jam tum languidus & à tono dejectus est, plus labefactant, appetentiam, digestionem & chylicationem minuunt ac non modo uberiori recrementorum proventui ipsiusque morbi incremento favent, sed & ad cachexiam, tumores œdematosos, immo hydropem, disponunt. Præstat tunc potius uti medicamentis pectoralibus balsamicis, quæ grata simul ventriculo, ut elixirio nostro pectorali, essentia myrrhæ, gummi ammoniaci, corticis assafras, nucistæ, spiritu salis ammoniaci anisato, tinctura tartari aliisque similibus.

III. Cautissimus quoque expectorantium debet esse usus in dispositione phthisica, vel hæmoptica, si tussis sicca, spiratio angusta & difficilis, dolor pectus comprimens, quæ potius à sanguinis congestione, quam materia expectoranda accidunt; quandoquidem sive emolliendo, sive stimulando agant, affluxum & congestionem sanguinis & humorum augent, tantum abest ut removeant.

IV. In morbis acutis pectoris, ut pleuritide vera & peripneumonia, provide pariter excretioni pectorali dicatis, præsertim in principio, utendum, ne stasis & stagnatio sanguinis inflammatoria inde augetur; inclinante vero morbo & ubi maxima inflammationis pars discussa, ad materiam coctam lentescentem ex fistulis pulmonum evocandam, commodum habent locum.

§. X.

§. X.

IX Errhi-
na & ster-
nutatoria.

Porro ad excretionem, sequestratæ in obducta narium antris & duodecim cranii sinibus glandulosa pituitaria dicta tunica, mucidæ lymphæ, plurimum possunt ERRHINA & STERNUTATORIA, quorum illa leviter, hæc vero validius, has exquisitiori sensu præditas tunicas stimulo, & ad motus excretorios sollicitando agunt. Inter leniora quidem errhina dicta, locum quam commode tuentur, majorana, basilicum, thymus, hyssopus, satureia, marum Syriacum, origani summitates, flores liliorum convallium, benzoës, resina guaiaci, quæ ex decocto post inspissationem remanet, rasura tenuissima ligni aloës, sal volatile salis ammoniaci ficcum, cum oleo majoranæ essentificatum, nec non vitriolum album; sternutamentum vero movent & quidem validissime euphorbium & pulvis hellebori albi, paullo mitius variæ species tabaci, mercurius præcipitatus, piper.

Theoremata.

Sternutatoria non alia ratione humorem è narium tunicis eliciunt, quam purgantia ex tunicis intestinorum glandulosis, sale nempe tenui acerrimo, tunicas has irritando & ad crispaturam adigendo. Sed uti acriorum purgantium, ita etiam sternutatoriorum, rarior debet esse usus, eo quod natura non facile in evacuationibus vult cogi, sed tantum duci. Errhina vero, sive ptarmica, naturæ & nervis magis amica, sale subtili acri volatili oleoso, tunicam pituitariam blande irritant, stimulant & mucidum liquorem evocant, longeque sternutatoriis sunt tutiora, eo quod hæc motum quendam convulsivum in nervos & per consensum etiam totum pectus invehunt, illa vero roborando potius nervos & nervosas tunicas, officio suo defunguntur.

Corollaria practica.

I. Pulveres errhini, ex herbis cephalicis, præsertim majorana, maro Syriaco, floribus benzoës, liliorum convallium, rasura ligni aloës, grano uno vel altero ambræ adjecto compositi, in capitis gravativis doloribus, hemicrania, affectibus soporosis, memoriæ debilitate, gravedine, coryza, auditus difficultate, cephalalgia pituitosa, præsertim ea quæ in ossibus frontis subsistit & plerumque à coryza suppressa oritur, oculorum mucosa defluxione, somnolentia, vertigine & si quippiam humoris maligni à lue venerea in narium membranis hæret, egregii sunt usus, & præter evacuationem, vigorem quendam addunt actionibus animalibus. Neque minus hoc nomine laudem meretur sal volatile salis ammoniaci cum balsamo nostro mixtum, quod ad aliquot grana naribus inditum, spectatæ est virtutis in auditus & visus difficultate, affectibus soporosis & in sensibilibus sternutationem ciet, sæpe proficuum, ubi motus in capite excitandi, in paralyticis & apoplecticis.

II. Nostris temporibus, uti fumi tabaci, ita etiam pulveris pro sternutatione, luxurians abusus maxime invaluit, valetudini minus conducibilis. Etenim jugi hoc pulverum attractu, non modo odoratus, propter obstructas & quasi induratas inde papillas nerveas membranarum quæ ossa squamosa & nares investiant, læditur, sed & ob nimium infarctum ab allecto humore clara vox raucescit. Id quod pluribus inculcavi in *dissertatione, de usu & abusu sternutatoriorum.*

§. XI.

Haud absimili ratione ac errhina vellicando & irritando narium tunicas mucum ex ipsis eliciunt; **APOPHLEGMATIZANTIA** salivalem & mucosam materiam ex tota faucium compage glandulosa, uvula & ductibus salivalibus evocant. Quin omnia, quæ errhina & ptarmica facultate gaudent, ori, vel per masticationem, vel gargarifationem admota & indita, phlegma & liquorem salivalem evehunt. Quippe tabacus in pulverem comminutus inter errhina, ac fumus ex ipso inter apophlegmatizantia, principem sibi vendicat locum. Præter nicotianam autem radix pyrethri, ostruthii, angelicæ, zedoariæ, pimpinellæ, galangæ, myrrha, masticata fundunt & egregie colliquant salivam. Usus masticatoriorum eximius ad arcenda miasmata quæ in morbis contagio infestis inspirato aëre hausta, facile se apponunt faucibus, salivæ immiscent & deglutita demum morbum invehunt, si quis forsan in locis infectis & suspectis versetur, ubi etiam tabaci fumus conducit. Decocta vero ex radice pyrethri, pimpinellæ albæ, caryophyllis, herba majoranæ, saturejæ, angelicæ, cum vino vel spiritu vini, qui solus etiam salivam fundit & fibras ductuum stringit, confecta, in vitiis oris & linguæ, dentium, gingivarum nec non aurium, difficili auditu, vel tinnitu, quando orificium tubæ Eustachianæ, quod in interioribus non procul ab uvula hiat, obstructum est lento muco, egregiam locant operam, quæ non minus in uvulæ relaxatione, aphonia, paralyfi linguæ, addito sale ammoniaco, vel spiritu salis ammoniaci, apprime inserviunt.

§. XII.

Neque prætereunda in evacuantium enarratione sunt sialagoga, sive **SALIVANTIA**, quæ lymphaticum & salivalem laticem fortiter movent & per os evacuant. Utut vero in regno vegetabilium plura sint, quæ ore assumta, ut emetica, vel dentibus, ut modo meminimus, manducata, salivalem humorem è faucibus & glandulis evocant; vix tamen in tota rerum natura suppetunt, quæ tam vehementer totam lymphæ massam in motum concitant atque in salivales glandulas & ductus tam fortiter agunt, ut non tantum per aliquot hebdomades, verum etiam menses, continuus satisque largus succedat salivæ fluxus, quam quæ regnum minerale suppeditat pharmaca, & maxime quidem mercurialis & regulinæ profapiæ, arte chymica præparata. Nam argenti vivi ea propria laus & peculiaris plane virtus est, ut exterius inunctum, vel parva etiam dosi interius assumptum, liberalissime moveat salivationem, cujus, si recte administretur, beneficio, affectiones ceteroquin insanabiles & contumacissimæ, ex impuritate feri & lymphæ ortæ, lues venerea, herpes, scabies maligna, ulcera cacothæa & serpentina, sanari funditusque expugnari possunt. Et hac singulari ac quasi propria facultate, pollet non modo ipsum argentum vivum cum saccharo probe contritum & cum conserva interius propinatum, sed & omnia ex eo artificiose confecta, ut mercurius dulcis, præcipitatus ruber, albus, cum spiritu salis ammoniaci, ex solutione mercurii in aqua forti præcipitatus, turpethum minerale, arcanum corallinum, mercurius diaphoreticus jovialis, solaris, æthiops mineralis ipsaque cinnabaris, tam nativa, quam antimonialis, vel communis, ex sulphure cum mercurio parata, nec non antiquarium Riverii. Ex

iis vero quæ ad regulinam antimonii substantiam ortum referunt, commemorari merentur, crocus metallorum, pulvis Monckii, sulphur sic dictum auratum, vulgari modo per præcipitationem cum aceto vel solutione martis, vel etiam solis concinnatum, vel singulari modo præcipitatum, ut panacea Glauberiana, in pharmacopœis Brunsvicensibus Conerdingiana vocata.

Theoremata practica.

I. Quæ jam memoravimus salivantia optime in duas classes possunt dispesci, mitiora scilicet, & fortiora. Ex mitioribus quidem & mercurialibus, æthiops mineralis & cinnabarina, modo in plenior & continuata dosi offerantur; etiam salivæ fluxum proritant & humores lymphaticos in motum cient, atque cum fructu in iis morbis, qui ab obstructionibus glandularum, vel feri coagulo, aut extravasatione in capite oriuntur, resolvendo & fundendo coagulatos succos, usurpantur. Deinde quoque antimonialia, quia sulphur regulinæ in iis substantiæ quodammodo nuptum, etiam lenius agunt, nec ab iis tantæ turbæ & sæva symptomata timenda sunt, ac à plerisque mercurialibus chymica arte præparatis. Inter leniora quoque mercurium dulcem bene elotum & præparatum, item ipsum argentum vivum rite depuratum, in formam solidam & pulverem arte conversum, referimus, excepto mercurio vivo exterius applicato, quippe qui cum unctuosus in unguentum redactus, & partibus nervosis inferioribus pedum, poplitibus, genibus, multo magis spinæ dorsali, illitus, validissime sæpe & subito vix coercibile salivæ exprimit stillicidium.

II. Modus autem operandi ita evolvendus & concipiendus videtur. Videlicet argentum vivum 1) omnium fluidorum est gravissimum corpus, cujus minimæ etiam particulæ solutæ & divisæ, specificam suam gravitatem, respectu omnium fluidorum superiorem, semper servant, & 2) ipse mercurius ab omnibus salinis menstruis solvi & in infinite parvas & subtiles moleculas redigi potest, quæ ob vim corrodentem & simul gravitatem specificam intima vasorum & pororum in corpore humano penetrant. Mirum enim diffundi posse argenti vivi, & partes, & vires, ad oculum patet ex eo, quod sublimati mercurii unum tantum granum in aqua dissolutum, vel duas aquæ uncias conspicuo non solum metallico irritante sapore possit inficere, sed etiam tam efficaci virtute imbuere, ut mercurialis hæc aqua interne & externe adhibita, excretiones per salivam, sudorem, alvum, immo vomitum, pro dispositione subjectorum & humorum, potenter moveat, & exterius admota, scabiem & omnes cutis defœdationes repente ficit ac reprimat. Quandocunque itaque mercurialia, vel exterius applicata per fumum, emplastrum aut unguentum, vel interius sumpta, ab humoribus corporis nostri bilioso-alcalinis solvuntur, sive in minimas partes discerpuntur, promte & efficaciter in nervos & nervosas maxime fibras glandularum conglobatarum & conglomeratarum, immo in ipsas tunicas lacteorum & lymphaticorum vim suam exercent, & earum systolen atque contractionem augendo, motum lymphæ concitatiorem reddunt, quo intensiori facto, consistentes in glandulis & minimis vasis humorum obstructions, stagnationes & stases lymphæ coagulata tandem resolvuntur atque expediuntur.

III. Hac utique ratione lues venerea & qui cum hac affinem naturam habent morbi feliciter

extirpantur, nec ea propter semper in curandis his cum Gallica lue morbis opus est salivatione, sed qui arcanum novit, dextro mercurialium & antimonialium bene præparatorum usu & applicatione, sine salivatione, ut olim peculiari dissertatione adstruxi, has rebelles ac pertinaces affectiones sanare potest. Neque enim, quod omnes periti & usu exercitati medici ultro confitebuntur, salivæ fluxus causa est curationis luis venereæ, sed potius illa sublata glandularum & minimorum vasculorum obstructio & colliquatio humorum viscidorum ibi stabulantium, quam deinde per accidens sequitur largior salivæ humoris profusio.

IV. Sub salivatione mercurio excitata, ut sæpius observavi, exteriores, præsertim inferiores partes, ut pedes, ordinario frigent & contractæ sunt, alvi etiam & urinæ fluxus retinetur, sublato autem per hanc partium inferiorum stricturam libero lymphæ & feri, nec non sanguinis in vasculis minimis circuitu, necesse est, ut humores serosi & lymphatici cum impetu ruant ad partes superiores, & maxime solennia in faucibus glandulosa conceptacula, è quibus qua data via jugi postea feruntur rivo, & cibum, & somnum impediunt. Vidi quoque in iis, quos enormis & ad tres vel plures menses durans salivatio demum lipothymia & catarrho suffocativo è medio sustulit, partes externas tam frigidas fuisse, ut nullo auxilio, neque balneo, neque frictione, ad calorem reduci potuerint. Equabilem autem & liberum lymphæ ipsiusque sanguinis per omnes corporis partes interceptum progressum, salivam movere, continua illa sputatio testatur, solennis hypochondriacis ac melancholicis, in quibus pariter ob contractas partes inferiores, lymphæ & saliva majori nisu fertur ad glandulosam faucium & oris compagem.

V. Quod vero profluens sub salivatione, præsertim in iis qui impura venere infecti sunt, humor, tam foetidum & putridum spiret niderem, hæc reddenda videtur ratio: quod mercurii tenuissimæ partes, reliquos omnes humores gravitate superantes, ab illis in connubium susceptæ, motu suo circumvolutorio, mixtionem, crasin atque texturam sanguinis, haud secus ac in putredine, dissolvere incipiant, ut hanc ob causam foetor sulphureus, volatile quippiam spirans, exhalet & ipsi dentes nigredinem contrahant.

VI. Omnes magnopere à Chymicis celebratæ panaceæ maximeque solares, quæ potioris suæ facultatis partem ad metallicum & mercuriale elementum referunt, si rite præparantur & dextre usurpantur, non defraudandæ sunt sua laude, in morbis ubi cuneo & vecte quasi opus est. Nam summa activitate pollent, ac in exili admodum dosi in systema partium nervosarum potenter agunt magnosque effectus præstant. Quin innotuerunt mihi ejusmodi medicamenta, antimonialia imprimis, quæ pro diversa dosi & regimine juncto, item pro diversa subjectorum ratione, in exigua mole, vomitum, alvum, immo salivam, movere possunt, sed perpauca medici eorum rectum usum & peritam administrationem norunt.

CAPUT VI.

De Roborantibus.

§. I.

I. Analep-
tica.

Tertium nunc ex summis remedium generibus sequitur, complectens ea, quæ solidis dicata sunt, ita quidem, ut circa eorum vires ac potentias motrices, easdem refocillando, firmando ac intendendo, occupentur, & desumpta à robore generali denominatione, audiunt **ROBORANTIA**. Horum pariter maxima in arte medica utilitas est atque necessitas; eo quod robore ac inde pendente motuum exercitio, vita omniumque actionum integritas & continetur, & absoluitur; eaque propter ubi sanitas offensam patitur, roboris maximum momentum ac non nisi motu labefactatæ functiones ad pristinum ordinem reducuntur. Jam vero plura, quoad vires & usum specialius distinguenda, hunc censum subeunt, & primum merito locum obtinent **ANALEPTICA**, quo quidem nomine insigniuntur, quæ vires imminutas & depresso erigunt, restituunt & confortantem, uti vocant, vim habent, & passim etiam cordialia & cardiaca dici solent. Huic scopo obtinendo serviunt ex vegetabilibus: flores rosarum, citri, aurantiorum, jasmini, liliorum convallium; herbæ: melissa, origanum, marum, poma citri, Chinenfis recentia & ex aromatibus cinnamomum; ex resinosis ipsa ambra; ex animalibus moschus; & quæ ex his omnibus præparata prostant, ut oleum de cedro, melissæ Turcicæ, rosarum verum, canange, quod ex floribus tiliæ in Persia elicitur, pomorum Bergamotte, essentia ambrae rite præparata, oleum cinnamomi in elæosaccharum reductum, quod in pulvere sic dicto solari Cellensi præcipuum, aqua melissæ citrata, liliorum convallium, cinnamomi cydoniata. Referri huc quoque possunt fructus fragorum, ribii, rubi idæi, ceraforum eorumque nuclei, & ex iis recentibus paratæ aquæ, succus limonum & exinde confectus syrupus.

Theoremata.

Cordialia hæc fragranti suavissimo subtili oleo principio agunt & in nervos eorumque liquidum immediate fere penetrant, ipsique motum naturæ blandum & amicum insinuant. Est enim hæc indoles omnis substantiæ sulphureæ, tenuissimæ & halituosæ, ut interiora partium nervosarum promptissime pervadat, ac celeriter effectum edat, quod graveolentia ipsaque suaveolentia, si quis ex idiosyncrasia eadem ferre nequeat, planum faciunt testatumque. Hinc etiam solo odore, ut in animi deliquio & syncopis, subito roborantem suam vim exserunt & vires erigunt, eo quod in nulla corporis parte, & nervorum, & vasculorum sanguineorum extremitates, tam nudæ minusque tectæ, quam in narium amplo & cavernoso ductu occurrunt, & admota fragrantia expedite ibi nervos & spiritus afficere possunt.

Corollaria practica.

I. Utut hisce dictis analepticis in refocillandis viribus non deneganda sit sua virtus; ea tamen valde restricta & limitata est. Optandum quidem esset, ut in rerum natura certæ ejusmodi virtutis proflarent remedia, quæ, ut vulgus purat & à

medentibus etiam semper exigit, efficaciter vires in omni fere morbo, præsertim vero acutis & malignis, depresso & deficientes redintegrarent; sed quia in morbis vires non rectius & certius restituuntur, quam caussis morbificis quæ eas frangunt, sublatis & noxiis rebus è corpore expulsis, nisi hoc exsequatur medicus, omnis analepticorum usus erit frustraneus.

II. Neque etiam existimandum est, restorationem virium veram & constantem tantum procurandam esse medicamentis, quæ motum in spiritibus & partibus solidis concitant. Nam in plurimis morbis, præsertim febribus & convulsionibus, magna quidem vis & potentia motrix cordi, arteriis & membranis nervosis inest, & tamen vires naturales sunt languidæ & valde infirmæ. Proinde potius verum virium naturalium robur maxima ex parte dependet à congruis alimentis, esculentis & potulentis, in bonos succos & sanguinem conversis, ex quibus postea tenuissimum illud, quod in cerebro separatur fluidum, & per nervos ad musculos & tunicas musculosas delatum, potissimum corpori & ejus partibus vigorem ac firmitudinem largitur, denuo ingeneratur.

III. Optimæ igitur materiæ nutrientia sunt optima analeptica, cujus generis sunt juscula ex carnibus gelatinosa, caponum, ossibus & eorum medulla, per decoctionem cum aqua, pauxillo vini, adjectis aliquot taleolis pomi citri, tantillo salis, pulveris macis & caryophyllorum, in clauso vase parata, item quæ ex pane nigro Westphalico, aqua & vino cum ovis conficiuntur, decoctum quoque succolade, cum vel sine lacte, lac ipsum asinum, aqua panis grossioris cum corticibus citri destillatum, & vinum, maxime Rhenanum generosum & annosum, item verum Hungaricum. Hæc tamen præsidia alimentosa & nutrientia ad vires erigendas, non in ipso morbo, neque ubi tota massa sanguinis & humorum valde impura est, sed inclinatis morbis & ubi à præcedenti morbo, vel animi affectu, diuturna vigilia, corporis & animi labore ac fatigatione, vel nimis hæmorrhagiis, vires exhaustæ sunt & attritæ, optime conveniunt, quin etiam tunc perita adhibenda moderatio, eo quod celeriter admodum in sanguinem transeunt ejusque copiam augent.

§. II.

Analepticis in roborantium classe succedunt **BALSAMICA**, quæ calidioris & acrioris sunt indolis. Comprehendunt hæc medicamenta sic dicta cephalica, nervina, aut apoplectica, antiparalytica, cordialia spirituosa & hujus generis alia, & ex eorum censu quam maxime eminent lignum aloes, ejus resina atque essentia, agallochum album, santalum citrinum & ejus essentia, in balsamum liquidum concentrata, ambra grysea, liquidambra, opobalsamum, succinum, benzoe, styrax calamita & ejus resina, styrax alba, ladanum & ejus resina, balsamum Peruvianum, de Copaiva, Americanum rubrum, Tolutanum, cortex Peruvianus verus, costus amarus, chaccarilla, cinnamomum, caryophylli, cardamomum, cubebæ, macis nucista, tatureia, thymus, ruta, serpillum, lavendula, spica, origanum nostras & Creticum, majorana, melissa Turcica & nostra, chamomilla Romana, marum Syriacum, basilicum, abrotanum, spica Indica, schoenanthum, folia lauri, myrthi, & ex his destillata olea fragrantissima vera non adulterata. Ex compositis balsamum apoplecticum Crollii,

Crollii, Cellense, Scherzeri, nostrum liquidum vitæ, spiritus balsami Peruviani nostra methodo paratus, spiritus succini, mastiches, aqua apoplectica Sennerti, Anhaldina, essentia ambræ vera, spiritus volatiles oleosi, cum oleo cinnamomi, macis, de cedro essentificati.

Theoremata.

Enarrata hæc simplicia & ex iis præparata tenui æthereo & subtili volatili oleo, naturæ admodum blando & amico, in fluida non minus ac solida corporis nostri agunt virtutemque suam diffundunt, & partes sulphureas calidas & æthereas in sanguine & humoribus deficientes, restituunt, augent atque motum intestinum calidum & spiritus ascensionem vitalibus humoribus foenerant. Pollent vero etiam sale subtili acri balsamico, eodemque cordis, arteriarum & fibrarum musculosarum vim & potentiam elasticam intendendo, sanguinis & humorum progressum ac circulum egregie promovent, quo postea fit, ut humores crassi & viscosi attenuentur, obstructions solvantur & saluberrimum perspirationis negotium, quo optime morbi arcentur, integrum fervetur ac illibatum.

Corollaria practica.

I. Igitur in omnibus morbis capitis, nervorum, spinalis medullæ, stomachi & cordis, qui à causâ secundum Veteres sic dicta frigida foveantur, humorum nempe spissitudine, condensatione & ab atonia nervosarum & musculosarum partium, ut in apoplexia, paralyfi, stupore & torpore sensuum, memoriæ debilitate, auditus difficultate, lipothymia, ingenti virium debilitate, provido, tam interno, quam externo usu, suppetias ferunt exoptatissimas.

II. Stomachi quoque & intestinorum vitiis, quæ ex atonia, copia cruditarum acido-viscidarum, depravata digestionem, natales ducunt, ut inflationi, item diarrhœæ, colicæ flatulentæ, vomitioni mirifice subveniunt, & maxime quidem conducunt ætate senibus & omnibus imbecillis & debilitatis, nec non qui laxioris sunt habitus & constitutionis phlegmaticæ.

III. Cum fructu etiam usurpantur, si à diuturna anni constitutione præhumida & frigida, tempore præsertim autumnali & hiemali, ac imprimis in regionibus septentrioni vicinis, tussis humida, diarrhœæ, asthmata pituitosa, tumores œdematosi, coryzæ, rheumatismi, intermittentes quoque febres & à scorbutica impuritate provenientes ægrotudines regnant, vel metuendæ sunt sine potissimum præservatorio.

IV. Cavendum vero ab eorum liberaliori doli est, quando corpora succis & sanguine plena, alvinæ sordes restagnant, juvenibus & cholericæ sensibilibus indolis subjectis.

V. Ego medicamentum liquidum balsamicum, quod vulgo vocant balsamum vitæ, ex optimis his & maxime oleis veris non adulteratis conflatum, per viginti & quod excurrit annos in usu habui, cujus tam spectata virtus, ut reliquis omnibus roborantibus & balsamicis quisque facile carere possit, si unico hoc interne & externe recte uti norit. Et hoc suavissimum efficacissimumque medicamentum, eximia roborante & restaurativa facultate toties totiesque nobilitatum, late quidem jam innotuit; sunt vero, qui assimilatum huic, ex adulteratis maxime oleis, non tam concinnatum, quam confusum, nefario dolo meo sub nomine incautis venditant, quod tamen virtutem & famam suam neutiquam sustinere potest.

Frid. Hoffmanni Oper. Tom. I.

§. III.

Sequuntur stomachi & intestinorum tonum ^{III. Stomachica.} roborantia, quæ simul carminativa complectuntur, eoque nomine laude digna ex radicibus: galanga, gentiana rubra, zedoaria, pimpinella, calamus aromaticus, arum; ex corticibus: canella alba, saffra, citri aurantiorum & pomorum Chinesium recentes, cortex Africanus, Winteranus, chaccarilla; ex aromatibus: piper, zingiber, caryophylli, cinnamomum, cardamomum, macis; porro chamomilla Romana & vulgaris, absynthium, mentha, carduus benedictus, femina quatuor carminativa; ex præparatis, oleum de cedro, aurantiorum per expressionem paratum, oleum chamomillæ, vulgaris, dauci cretici, anisi stellati, cymini & carvi verum, mentha, absynthii, spiritus salis, nitri dulcis; ex compositis sal volatile Sylvii, elixir stomachale nostrum, Michaelis essentia carminativa Wedelii, pulvis stomachicus Birckmanni, essentia corticum aurantiorum cum spiritu nitri dulci, tinctura tartari & olea aurantiorum per expressionem parata, essentia composita absynthii Conerdingii, aqua carminativa Dorncrellii, spiritus de tribus.

Theoremata practica.

Ut plurima ex adductis superius cephalicis & nervinis, in morbis ventriculi & intestinorum, præsertim, qui à tono eorum dejecto, vel debilitato proveniunt, egregio etiam sint præsidio; suppetunt tamen adhuc alia, quæ vitiis harum partium amovendis, pro passionum differentia, specifica quasi efficacia sunt accommodata. Scilicet ad appetitum, ob saburram viscidorum & acidorum in ventriculo cruditarum vacillantem, redintegrandum, præter amara, ut radicem gentianæ rubræ, herbam absynthii, cardui benedicti & aromata, radix maxime galangæ, pimpinellæ, canella alba, piper, zingiber, arum cum fructu usurpari possunt. Ad nauseam, vomitionem & inversionem ventriculi compescendam, nil mentha, ejus aqua spirituosa & oleo probe destillato, item mastiche & ejus spiritu, nec non qui ex balsamo Peruviano & sale tartari paratur, item liquore nostro anodyno minerali, præsertim & efficacius est. Ad doloris cardialgici, colici & torminum atrociam levandam, cortices aurantiorum recentes & ex iis rite extracta essentia, aqua & oleum cymini Æthiopici, oleum non adulteratum florum chamomillæ vulgaris, spiritus nitri dulcis bene præparatus, remedia sunt expeditissima. Ad intestinorum nimiam levitatem & nimias dejectiones moderandas, cortex chaccarillæ peculiari splendet efficacia. In intestinorum inflatione ad elidendos flatus, aqua carminativa Dorncrellii, essentia carminativa Wedelii, item spiritus de tribus cum spiritu nitri dulci nuptus, essentia & aqua zedoariæ, cardamomum, oleum carvi & cymini verum destillatum, omnibus facile palmam præripiunt.

§. IV.

Proximum est ut roborantia VISCERALIA, ^{IV. Visceralia.} quæ nempe visceribus sanguineis, ut hepati, lienii, utero, renibus, pulmonibus firmandis & roborandis, quo eo expeditius officio suo fungantur, dicata sunt, adeoque ad horum classem hepatica, splenetica, pneumonica, uterina, cachectica, antihydrica, antiicterica, antihysterica, antiphthifica commode referri possunt. Sunt vero hunc in usum commendabiles radices: gentianæ rubræ, aristolochiæ longæ & rotundæ, cichorii,

chorii, zedoariae, filicis, rhabarbari veri & rha-
pontici, curcumae, ononidis, cortex chinae, chac-
carillae, Winteranus, tamarisci, fraxini, cappa-
rum, cassia caryophyllata herbæ: absynthium,
centaurium minus, fumaria, carduus benedictus,
trifolium fibrinum, hepatica nobilis, melissa,
pulmonaria maculosa, scolopendrium, agrimonia,
marrubium, cuscuta, veronica, scabiosa, epithy-
mum, capillus veneris, pilosella. Neque minus
laudanda hac virtute ex gummatibus & resino-
sis succinum, myrrha, aloe, bdellium, gummi
hederæ, ammoniacum, olibanum, sagapenum,
opopanax, asa foetida; ex mineralibus sulphur
commune purum stillatitium, limatura martis
& omnia ex marte parata, & quæ Chymia sug-
gerit varia præparata, ut salia herbarum per in-
cinerationem parata, arcanum & terra foliata
tartari, ejus cremor, sal polychrestum, nitrum
antimoniatum, spiritus salis ammoniaci, tinctura
martis, ex floribus salis ammoniaci cum hæmati-
te præparatis, spiritu vini extracta, tinctura tarta-
ri, antimonii alcalifata, elixir proprietatis cum
lixivio paratum, essentia fuliginis, elixir nostrum
viscerale cum menstruo aqueo salino confectum,
antimonium martiale cachecticum, massa pilu-
larum Becherianarum & similia. Pertinent
huc quoque fontes medicati sic dicti minerales,
præsertim qui subtile quoddam martiale elemen-
tum custodiunt, ut Pyrmontanæ, Spadanæ &
Schwalbacenses, multo magis qui largius martia-
li ochra imbuti sunt, ut Lauchstadiensis, Rade-
bergenses, Bebranæ & Freyenwaldenses.

Theoremata.

Balsamica hæc visceralia principio & ele-
mento, partim sulphureo, balsamico & terreo,
paullo fixioris naturæ, partim etiam sale alcalino
sulphureo, sive saponaceo, item amaricante,
operationem suam in viscera, quorum vasa hu-
moribus tenacibus crassis infarcta & obstipata sunt
edunt, succos lentos incidendo, dissolvendo &
simul ipsis vasis & fibris à robore & tono dejectis
vim contractilem & elasticam conciliando; adeo-
que in omnibus iis morbis longis, qui ab horum
viscerum labe nascuntur, tum ad præservationem,
tum ad curationem, polychresta & certæ effica-
ciæ sunt medicamenta.

Corollaria practica.

I. Licet omnia sic dicta visceralia in genere
convenient in eo, quod tonum viscerum robo-
rent & infarctus atque obstructions expediant;
nihilominus tamen pro viscerum & morborum
differentia, eorundem discrimen & selectum
probe servare necessarium. Ita exempli gratia,
si hepar laborat obstructione, & inde morbi, ut
icterus, cachexia & scorbutus, propullulant,
quæ amaritie quadam saponacea & deterfiva vim
suam exserunt erunt efficaciora, nominatim radi-
ces quinque aperientes, rhabarbarum, curcuma,
opopanax, bdellium, sapo venetus, elixir pro-
prietatis sine acido, essentia rhabarbari cum
sale tartari parata, essentia trifolii fibrini & om-
nia ex marte bene præparata. Quando pulmo-
num nimia præsto est laxitas & infarctus, ac in-
de nati, vel nascuntur morbi, myrrha, gummi
ammoniacum, sulphur stillatitium, herba veroni-
cæ, scabiosæ, chærefolii, pulmonariæ, pilosel-
læ, marrubii, capilli veneris, magis ex usu sunt.
Ubi lien magnus & sanguine farctus gignendæ
impuritati sanguinis, ac præsertim cachexiæ, ad-
modum velificatur, cortices tamarisci, cappa-
rum, fumaria, scolopendrium, cuscuta, epithy-

num, radix ononidis, ipsaque martialia aliis præ-
ferenda. Quum ex imbecilli & nimium remisso
renum tono nephritis & calculi progignuntur,
cortex radices acaciæ & ejus infusum, item rob
cynosbati & juniperi, specifica quadam activita-
te succurrunt. Ex labefactato uteri ejusque vaso-
rum robore & retardatis in debito progressu san-
guine & humoribus, longæ & multiplices, præ-
sertim post abortum, passionibus pullulant, qui-
bus utique singulari quadam efficacia medentur
aristolochia tam longa, quam rotunda, artemi-
sia, myrrha, matricaria, galbanum, bdellium,
opopanax, succinum, massa pilularum Becheria-
narum & aliæ quoque ad earundem exemplar
concinnae. Si intestina & quæ spectant ad ea
glandulæ & tubuli secretorii & excretorii, bilia-
rii, pancreatici, lactei, robore debito destituun-
tur, ut à copiosiori humorum decubitu fiant ni-
mii alvi fluxus, vel subsistentes in vasis humores
motibus, insultibus & paroxysmis febrilibus,
fomitibus & occasionem præbeant, rhabarbarum,
cortex chinae, Winteranus, chaccarillæ, martis
tenuissimi croci atque essentiae, præstabunt id,
quod non facile aliis obtineri poterit.

II. Circa usum tamen roborantium id in ge-
nere tenendum est: quod longe meliorem effe-
ctum atque utilitatem præsent, quando non so-
lum ante eorum oblationem sanguis nimis re-
dundans subtrahitur & congruis laxantibus
primæ regionis recrementa eliminantur, sed
etiam si ipsa ad meliorem humorum fluxilita-
tem & mobilitatem conciliandam, in decocto,
vel infuso, propinantur, vel adhuc rectius, cum
potu acidularum, thermarum, aut feri lactis con-
junguntur, quo certe horum roborantium, quæ
adstringentis naturæ, operatio egregie adjuvatur
atque intenditur, ad tollendos magnos chroni-
cos & inveteratos morbos, imprimis quando paul-
lo diutius continuantur & corpus simul conve-
nienti motu, equitatione, vectura aut ambula-
tione exercetur.

§. VI.

Excipiunt ADSTRINGENTIA & VUL-
NERARIA, Græcis traumatica dicta, quæ fi-
xiori quodam leniter constringente elemento, la-
xas nimis, eliquatas, erosas ac læsas partes & fi-
bras adducunt, stringunt, consolidant & conglu-
tinant. Atque ex horum censu præcipua sunt ra-
dix caryophyllatæ, tormentillæ, bistortæ, conso-
lidæ majoris, pentaphylli, plantaginis, rha-
pontici; ex herbis: vinca per vinca, fanicula, pyrola,
consolida major, media, Saracenica, uva crispa,
agrimonia, hypericum cum floribus, millefolium
cum summitatibus, equisetum, veronica, fraga-
ria, verbena, pilosella, teucrium, plantaginis
species, folia quercus, botrys, melissa, mentha,
betonica, urtica mortua, flores rosarum, balau-
stiorum, cortex chinae, granatorum, radices aca-
ciæ, succus acaciæ, catechu, sanguis Draconis,
fructus myrtilorum, cydoniorum, ex aromati-
bus nucista, ex mineralibus hæmatites, alumen &
omnes terrarum & margarum species; ex chy-
micis flores salis ammoniaci martiales, liquor
martialis ex capite mortuo florum salis ammoniaci
martialium paratus; inter præparata essentia trau-
matica Wedelii.

Theoremata.

Species quas jam recensuimus ex principio
paullo fixiori terrestri cum acido juncto agen-
di facultatem habent, ac dum nimis relaxatas fi-
bras paullo strictiores reddunt, à decubitu &
stagnatione

stagnatione nimii liquidi eas liberant, simulque coeuntibus propius fibris solutis, consolidationem & coalescentiam promovent. Differt tamen constrictiva in ipsis virtus gradu; siquidem in radice tormentillæ, bistortæ & ejus extracto, floribus balaustiorum, corticibus granatorum, foliis quercus, alumine, liquore martiali, fructibus & cortice acaciæ, fructibus cydoniorum, & bacis exsiccatissimis myrtillorum, longe eminentior est, quam in herbis sic dictis vulnerariis, quæ subtiliori terreo alcalino principio, quod partibus sulphureis balsamicis fixioris indolis intermixtum, imbutæ, lenius & tutius operantur, & multi ac præstantis in praxi medica sunt usus. Quod autem hæc tam vulneraria, quam adstringentia, subtilius, solubile, terreum, constringentis facultatis elementum recondant, ex eo planius facile innotescit, quod infusum eorundem paullo saturatius, ad mixturam vitrioli martis, immo omnium liquorum martialium, non secus ac cum gallis fit, nigrum & atramentosum colorem recipiat.

Corollaria practica.

I. Si ullus remediorum usus cum prudentia & exquisita providentia instituendus, certe adstringentium. Nam quum vita & integritas totius corporis omniumque ejus partium in perpetuo & progressivo circulari motu humorum tenuium & fluidorum, per compagem corporis penitus ferme vasculosam & ex minimis prorsus tubulis coagmentatam, contineatur & absolvatur; constringentium vero ea vis atque facultas sit, ut fluidis mixta, ea increassent, poros vero & tubulos solidorum coarctent atque angustent; in proclivi est: hujus virtutis remedia, naturæ animantium & vitalibus motibus minus favere atque amica esse, adeoque nec satis fida, nec securæ, nisi magna cum prudentia adhibeantur. Experientia enim indies docet, ab ejusmodi improvide datis constringentibus, in compescendis nimis sanguinis, vel alvi fluxibus, innumera damna & noxas induci, ac perquam facile inde ægrotantes lentas febres, cachexiam, tumores oedematosos, affectus spasmodicos, colicos & hypochondriacos incurrere. Et huc etiam referendus imprudens corticis chinæ usus, in profligandis intermittentium paroxysmis, quando hujus videtur idemtidem constringente, sordes viscidæ, biliosæ, salivales, quæ tubulis viscerum primæ sic dictæ regionis inhærescunt & excerni debebant, retentæ, ibi diutius detinentur, & deteriorem morbum excludunt.

II. Si necessitas ejusmodi constringentia postulat, non simul & semel, sed successive atque in remissiori dosi & cum sufficiente liquido, subjuncto etiam corporis motu, propinari debent; id quod etiam perpetuo, quando cortex chinæ, vel etiam martialia, in usum trahuntur, injungere soleo.

III. Infelix, intuta & periculi plena est cura, qua nimiae vomitiones, mictio cruenta, narium, uteri, aut ani hæmorrhagiæ nimiae, item hæmoptysis, adstringentibus compescuntur, quod certe nunquam cum bonis ægrorum rebus perficitur, nisi prius spasmi, à quibus plerumque seu causis proximis sanguinis fluxus pendet, complacati, nimia motuum ferocia sedata & humores copiosius affluentes ad alia loca derivati.

IV. Herbæ sic dictæ traumaticæ, seu vulnerariæ, atque earum decocta, non modo in vulneribus, erosionibus & continui solutionibus, sed & in quibusdam longis & valentibus morbis, ut phthisi, scorbuto, cachexia & calculosis passio-

Frid. Hoffmanni Oper. Tom. I.

nibus, quando nempe à tono viscerum & glandularum dejecto & humorum hostili stagnatione vel stasi oboriuntur, insignem & commendabilem ferunt opem. Semper tamen cavendum, ne ubi nimia vasorum obstructio & fibrarum constrictio, ac pulmones in phthisi tumoribus ac tuberculis duris obsessi, iis utamur. Alias certe vulnerariorum & leniter adstringentium usus in infuso longe saluberrimus, ad præscindenda calculosa in renibus concrementa molestissima, quæ ex nimis laxis vel ulceratis renibus potissimum natales ducunt, de quo lectu digna Cl. *Heucheri* dissertatio de adstringentium usu in calculo. Et hoc nomine infusum millefolii & ejus summatum, veronicæ, hederæ terrestris, fragariæ, agrimonie, corticis radices acaciæ, egregii usus. Pariter in involuntario urinæ stillicidio, tam in pueris, quam senibus, à nimia laxitate sphincteris suborto, ejusmodi infusa expertæ & desideratæ virtutis deprehendi, admoto simul exterius spiritu vini rectificato.

V. Efficacissimæ virtutis in externis læsis & vulneratis partibus traumaticum, quod sanguinis & humorum fluxiones promte compescit, est solus spiritus vini, probe rectificatus, quo certe nihil præstantius, si partes nervosæ, tendinosæ sensibiliores, cum nimia sanguinis profusione sauciata. Nam spirituosæ non solum succos, ut videmus in sanguine & lymphæ, coagulant, sed etiam nimium humidum absorbendo, fibras tensas & strictas reddunt, eademque arctius adducendo & sanguinis stasim atque stagnationem removendo, dolores atque inflammationes arcent atque avertunt. Nec ingloria est traumatica facultate nostro tempore aqua spirituosæ l'eau d'arquebuse dicta, quæ ex optimis herbis vulnerariis destillatione cum vino Rhenano in balneo Mariæ paratur, cujus tamen virtus spiritui ac vino potius, quam herbis, quarum effectus in fixiori terreo elemento reconditur, quod alembicum non transcendit, tribuendus.

C A P U T VII.

De sedantibus.

§. I.

Consideravimus hæcenus succincte ea remedia genera, quæ roborando agunt, ubi motus solidorum systaltici deficiunt, eorum tonus dejectus & partes nervosæ ac fibrosæ ipsaque vasa nimis resoluta & relaxata sunt: nunc transeundum ad eorum classem, quæ nimis & effrenibus solidorum & fluidorum motibus componendis, sistendis atque sedandis, & spasticis partium stricturis dolorificis remittendis & solvendis, virtute qua gaudent dicata sunt. Quumque adeo multiplex & late patens sit effectus, ad hanc classem referenda quam optime paregorica, quæ laxant blande & demulcent rigidas fibras simulque acrimoniam obtundunt, anodyna, quæ dolorum ferociam levant, aptis spasmodica, quæ spasticas stricturas leniunt ac solvunt, antepileptica, quæ motus convulsivos sistunt, hypnotica, quæ somnum conciliant, & narcotica, quæ conspicuum sensationibus stuporem ac motibus torporem inferunt.

§. II.

Hac itaque sedativa generali & speciali facultate splendent, radices: pœoniæ, valerianæ, *Apparatus*

artemisiæ; herbæ: horminum, basilicum, solanum, paris; flores: salviæ, fraxinellæ, acaciæ, ulmariae, sambuci, tiliæ, pœoniæ, papaveris rhœados, chamomillæ vulgaris, millefolii, rosarum, malvæ, liliorum convallium, primulæ veris, liliorum alborum & omnia ex planta papaveris, semen, cortices, flores, succus, opium & ex hyoscyamo albo ejus semen, semen anethi, pœoniæ; cortex quoque sambuci, tiliæ & thymiamatis; ex aromatibus: crocus, nucifla, macis; ex fructibus nuclei ceraforum, persicorum, amygdalæ amaræ, nux vomica. Porro asa foetida, camphora, nitrum depuratum & artificiale, cinnabarina, nec non ex animalibus depromta castoreum, moschus, zibethum, axungia canis, humana, taxi, vulpis, lac, cremor lactis, vitellus ovi, lumbrici terrestres, rasuræ ossium, ut cornu cervi, dentis hippopotami, ungulæ alcis, unicornu animalis, eboris, lapidis manati, corii humani. Ex chymicis denique & præparatis: liquor noster anodynus mineralis, spiritus nitri dulcis, tinctura sulphuris volatilis, laudanum opiatum, Sydenhami, cydoniatum, hystericum, theriaca, diascordium Fracastorii, theriaca coelestis, massa pilularum de cynoglossa, de styrace, pilulæ Wildegansii, Starckii, sirupus papaveris rhœados, chamomillæ, millefolii, oleum hyoscyami, lumbricorum terrestrium, pulvis antepilepticus Dresdensis, cujus basis carbo tiliæ, item artemisiæ, specificum cephalicum Michaëlis, pulvis Marchionis, aqua antepileptica Langii & aquæ ex floribus superius recensitis destillatæ, nec non unguentum populeonis.

Theoremata.

Sedantia hæc variis modis efficaciam suam tam in fluida, quam solida perficiunt. Pargorica quidem blandis mucosis, sulphureis, tenuibus partibus, fibras à spasmis duras & strictas, ipso contactu relaxant, spicula vellicantia involvunt atque obtundunt, adeoque in doloribus, tumoribus dolentibus, acribus fluxionibus, in cataplasmate, emplastro, vel unguento apprime ex usu sunt, ut crocus, flores chamomillæ vulgaris, meliloti, liliorum alborum, sambuci, malvæ, papaveris, folia hyoscyami, lac, cremor lactis, vitellus ovi, unguentum populeonis, adambusta, quod optime paratur ex malva, cortice arboris tiliæ, sambuci, oleo lini, ceræ.

Antispasmodica, quia plurimi morbi & symptomata, ut in sectione prima pluribus ostendimus, à spasticis stricturis & crispaturis vasorum & fibrarum nervearum tanquam causa proxima gignuntur, amplissimi in arte usus sunt, non vero una eademque ratione munere suo defunguntur. Vel enim ipsas fibras tensas, duras & contractas immediato contactu molliunt atque remittunt, ut lac, præsertim asininum, oleum amygdalarum dulcium, emulsionem ex seminibus quatuor frigidis, amygdalis, pinguedines animantium, cremor lactis: vel blando sulphure vaporoso fluidi in nervis motum ferociorem complacant, qua virtute imbutæ aquæ ex floribus salviæ, fraxinellæ, acaciæ, tiliæ, sambuci, ulmariae, persicorum, liliorum alborum, chamomillæ vulgaris, primulæ veris, millefolii, nucleis persicorum, ceraforum, malorum Armeniacorum, cum aqua pluviali vel rore Majali destillatæ, quæ ob vim antispasmodicam, in convulsivis & epilepticis insultibus cum fructu adhibentur. Vel etiam quædam antispasmodica sulphure quodam tenui vaporoso ex regno animali, adeoque magis amico, effectum exsequuntur, ut lumbrici terrestres,

castoreum, pulvis secundinæ humanæ, intestini lupi, viperarum, rasura corii & cranii humani, ungulæ alcis, dentis hippopotami, lapidis manati, nec non moschus & zibethum, quæ in convulsivis & epilepticis motibus ac in ipsa etiam chronica epilepsia insigni cum fructu usurpantur.

Anodyna & ad dolores leniendos somnumque inferendum accommodata facultate instructa sunt papaveracea & quæ ex opio & croco, nec non cynoglossa parantur, quæ vaporosa sua sulphurea exhalatione nervorum & membranarum tubulos pervadendo impetuofum fluidi nervei motum compescunt, & sic non modo in parte affecta, sed & universo corpore motus cordis quoque & arteriarum sedatiores faciunt. Nam uti sub nimio motu & agitatione membranarum cerebri & nervosarum partium vigilia præsto est; ita sub earum quietiori & pacatiori statu somnus obrepit.

Narcotica vero quæ torporem & stuporem sensibus ac profundiores somnum inferunt, vapore sulphureo ingrato & adverso, quo motus fluidi nervei fere extinguitur, minus amice operantur, adeo ut in imbecillis lethalem somnum, in aliis etiam insaniam excitent. Infamata hoc sunt nomine omnia quæ ex hyoscyamo tam nigro, quam albo, stramonio & ejus specie datura, solano ipsiusque pomis concinnantur.

Nonnulla etiam ex sedativis spasmos & dolores sopiunt somnumque conciliant, causas impediendo, qua virtute eminent quam maxime nitrum, purificatum vel artificiale, item cinnabarina & camphora. Nitrosa quippe tum æstum, tum motum intestinum calidum partium sulphurearum in sanguine, componunt solidas partes humectant motusque in iis exorbitantes quietiores reddunt, adeoque virtutem possident, refrigerantem, humectantem, anodynā antispasmodicā egregiam. Cinnabarina dextre usurpata in compescendis motibus epilepticis & convulsivis, qui à lymphâ subsistente viscida in cerebro & ejus ac membranis spinalis medullæ oriuntur, egregii usus, quia eandem longiori usu potenter liquant. Camphora, præsertim cum nitro mixta, egregie discutit inflammationes, quibus semper vigiliæ, dolores, quandoque etiam deliria juncta sunt, & sic virtutem antispasmodicam & sedativam exserit. Asa denique foetida & sagapenum, quæ gummata graveolentem spirant vaporem, in spasmodicis intestinum sedandis, qui foeminas in malo sic dicto hysterico mire excruciant & affligunt, duplici modo suam efficaciam exserunt, partim quod spasmos ac dolores sopiant, partim etiam quod saponaceo gummoso acri sale humores tenaces resolvant & obstructions glandularum & minimorum tubulorum referent.

Corollaria practica.

I. Magnæ igitur sunt efficaciam hæc sedativa, quæ subito etiam in exili mole sua perficiunt, ob agilissimum elementum, dum sulphurea vaporosa exhalatione, penitus in interiores poros & partium solidarum tubulos pervadunt & insignem in mobilissima, quæ sensum & motum partibus foenerat lymphâ, mutationem, ad motus effrænes complacandos, efficiunt. Sed uti in omni remediorum genere, leniora & mitiora, ceu securiora & naturæ magis amica, fortioribus magisque activis præferenda sunt: ita eadem cautio in antispasmodicorum, anodynorum & sedantium usu sollicitè tenenda & serio inculcanda; nec unquam facile ad validiora, ut opiata, descendendum.

cendendum est, ubi leniora, aquæ ex floribus suaveolentibus hypnoticæ, vel emulsiva ex semine papaveris, vel etiam nitrosa, cinnabarina & castorina sufficiunt.

II. Et licet opiata, per adjecta purgantia & balsamica, ut in pilulis Starkii, Wildegansii, vel per alexipharmaca, ut in theriaca coelesti, diascordio Fracastorii, vel per analeptica, ut in laudano liquido Sydenhamii, correctæ, cum prudentia adhibita, virtute & usu eximio non destituantur; attamen si alia suppetunt securiori modo operantia præsidia, quibuscum idem effectus obtineri potest, præstat ab illis abstinere, præsertim ubi debiliâ corpora, ætas senilis, infantilis & vires variis de causis prostratæ. Longe autem magis ab his cavendum, quibus narcotica admixta, ut sunt pilulæ de cynoglossa præter opium etiam semen hyoscyami habentes, quibus tamen nostro tempore frequentius utuntur quibus opiata alias mirum exosa; ego vero non semel etiam ab harum usu pessimum notavi effectum.

III. Ut ut olim opiatis correctis ipse quoque frequentius usus sum; ex quo tamen, divina benignitas mihi concessit inventionem liquoris penetrantis & fragrantis aromatici saporis & odoris, ex ipsius vitrioli portione sulphurea, quæ etiam à veteribus Chymicis pro anodyna habitata est, singulari quadam chymica encheiresi præparandi, ab omnibus aliis tuto abstinui. Hic quippe spiritus, quem liquoris anodynæ mineralis nomine insignire soleo, totus sulphureus est, subito & flagrantissime ardet atque absumitur & ocyssime à flamma candelæ, etiam tribus adhuc digitis remotus, flammam concipit, atque in calido conclavi subito in auras avolat; tactu tamen instar glacie est frigidissimus, ac probe destillatus & rectificatus, omni aquæ instar olei supernatat. Usus vero hujus remedii amplissimus est & virtus multiplex, dolores quippe egregie levat & somnum conciliat, unde summo cum fructu in atrocibus colicæ, calculi, cardialgiæ & podagræ, capitis & dentium doloribus usurpatur. Sudorem quoque movet, ac licet ipse sit calidissimus, non tamen sanguinem commovet. Nullum præterea torporem nullamque debilitatem in capite relinquit, eamque ob causam omnibus imbecillis, ubi vires summe prostratæ, ut in hæctica febre, non sine fructu, & quod mirum, virium incremento, dari potest. Et quia ejus actio prima & præcipua in stomachum, in omnibus ventriculi morbis, nausea, inflatione hypochondriaca, asthmatica, cardialgia, incomparabilem flatibus exitum parando, edit virtutem.

C A P U T VIII.

De specifica quorundam remediorum in certis morbis efficacia.

§. I.

Recensuimus hætenus omnis generis quæ ad præservandum & curandum faciunt remedia selecta & optima, eaque succincte in certas classes ratione virium quas exserunt & elementorum quibus agunt in genere redegimus. Quum vero attenta in artis exercitio observatione compertum habeamus, nonnulla sanitatis præsidia peculiarem, specialem, sive specificam præ aliis in certis affectibus possidere facultatem, eaque

Frid. Hoffmanni Oper. Tom. I.

propter etiam usu & utilitate reliquis jam notis merito esse præferenda: utilem & gratum me præstiturum laborem judicavi, si ea, quæ longo usu exploratæ & in certorum morborum curatione spectatæ virtutis auxilia, enumerem & paulo specialius evolvam. Non autem, ut vulgi medicorum opinio fert, specifica nobis audiunt ea remediorum genera, quæ semper, in omnibus subjectis, certo & indubitato salutarem in morbis exserunt effectum, & nunquam medentis spem eludunt. Ejusmodi enim virtutis medicamenta nullibi sunt reperiunda, & falsa utique est persuasio, quasi operationes atque effectus formaliter insint pharmacis & ab his tantummodo perficerentur, qui demum ex actione medicaminis, & reactione sive synergia ipsius corporis, resultant. Omnia quippe medicamenta agunt non tantum secundum sphaeram activitatis suæ, verum etiam receptivitatem subjecti, ut, si idem remedium, eodem morbo decumbentibus decem personis obtuleris, alius atque alius & differens in singulis consequatur effectus.

§. II.

Fallax igitur, inanis & dubia est vulgaris illa de panaceis, arcanis & specificis contra hunc vel illum morbum præsidii dolosa jactatio: & potius per specifica sic dicta medicamenta nulla alia intelligenda esse inculcamus, ac ea, quæ ejusmodi agendi viribus instructa, ut ad hunc vel illum morbum sanandum efficaciora sint magisque proficua. Nonnulla quippe ejus indolis elementa complectuntur, quorum singula ad expugnandam morbi causam aliquid conferunt, ut ex iis mixtum pluribus simul in morbo curandi indicationibus satisfaciat. Exemplo sit rhabarbarum, quod aliis laxantibus omnibus in diarrhoeis palmam præripit, eo quod non modo evacuat, sed & amaritie balsamica acidis & causticos succos cicurat atque contemperat, ac demum cessante purgatione, tonum intestinorum laxum nimis atque remissum, ob terreas subadstringentes quas recondit particulas, firmat iterumque adducit. Pariter manna in pectoris affectibus & tussi stomachali, quæ à cruditatibus acidis ortum trahit, ad repurgandam primam regionem, ob insitam, præter laxantem virtutem, ipsi dulcedinem copiosam, corrosivos, acidos & acres humores obtundentem ac demulcentem, omnia alia alvum subducentia longe antecellit. Alia remediorum hanc ob causam dicuntur specifica, quod eorum virtus in certo morbo ad certum edendum effectum, longa experientia innotuit & abunde confirmata est. Hinc cortex chinæ specificum in sistendis intermittentium paroxysmis, opium in doloribus levandis, mercurialia in expugnanda lue venerea. Quædam specificorum nomen gerunt, quia partibus morbo affectis magis amica sunt eademque virtute sua quam maxime afficiunt. Sic partes nervosæ & membranaceæ cum ipsis nervis medicamenta subtili, aromatico, fragrante oleo imbuta quam optime ferunt, minus vero narcotica, opiata & constringentia. Ventriculus acidis delectatur, ut iis perfusus melius appetat & digeratur; contra ea pulmonum bronchia ab iis offendentur & ad spasmos exstimulantur. Cantharides & insecta fale volatili caustico prædita, nec ventriculum, nec intestina afficiunt; renum autem tubuli urinarii, ureteres cum vesica ipsaque urethra, ab iisdem vellicantur & spasticis agitantur stricturis.

Quo sensu intelligenda.

§. III.

*In febris
intermittenti-
bus in gene-
re.*

Sic concipienda virtus specificorum, quorum usus medico frequens & in pretio esse debet: jam specialius paullo quæ ex ipsis his vel illis vitiis dicata sint & magis appropriata dispiciemus. Et ad febres quidem intermittentes, maximeque earum paroxysmos compescendos, cortex chinæ nostro adhuc tempore quam maxime celebratur, hanc ob rationem, quia præter adstringentem & febriles motus sistentem virtutem, quam cum aliis pluribus, ut vitriolaceis, aluminosis, radice tormentillæ ac bistortæ, communem habet, ob amaricans balsamicum elementum, morbificam materiam corrigente & solida languentia firman- te efficacia, splendet. Potest autem hic cortex vel in substantia propinari, vel in essentiam aut elec- tuarium redigi, vel etiam, quod optimum vino Rhenano infundi & leniter decoqui. Pariter ad specifica intermittantium referri solent flores chamomillæ vulgaris, à *Baglivo* mirum dilauda- ti, dum ob insitam amaritiam & oleum, & vim antispasmodicam in febribus quam maxime pro- ficuam, & leniter etiam constringentem tonicam obtinent. Quod si vero pertinaces sunt hæ febres & mirum refractariæ, in causa plerumque ma- gnæ istius glandulæ pancreaticæ obstructio, ad quam tollendam mercurio dulci, regulo antimo- nii medicinali & sulphure antimoniali correcto, dextre ac prudenter usurpatis, nihil efficacius.

§. IV.

Quartana.

Speciatim in quartana peculiari quadam effi- cacia splendet essentia rhabbarbari & gentianæ, cum lixivio salis tartari & spiritu salis ammoniaci urinoso parata. Etenim in hac febre hepar & ejus vasa sanguine crasso, ductus biliarii spissa & len- tescente bile, ac primæ viæ cruditatibus acidis eminentius confertæ sunt, eaque propter hoc me- dicamentum dum acidos succos contemperat & quasi dulcificat stagnantem cruorem cum lentef- cente bile resolvit atque attenuat, inertem quo- que bilem debita balsamica indole imbuit & simul blande alvum vacuat, omnibus aliis merito ante- ponendum. Quando autem hæc febris adeo ob- firmata & contumax est, ut omnia alia remedia eludat, mercurius dulcis, vel diaphoreticus, rite præparatus, efficacissimæ virtutis medium, nec non antiquarium Riverii, quod pariter mercurio virtutem debet. Ac licet mercurialia exhibita et- iam salivationem moveant, eadem tamen non pertimescenda, aut periculosa est, sed potius ipsa succedente febris sæpe conquietur.

§. V.

*Inflamma-
tionibus.*

Inflammationibus omnibus, quæ semper fe- bre stipantur, nunquam periculo carent, & ple- rumque in partibus nervoso-membranaceis, pleu- ra, bronchiis pulmonum, singulari quadam effica- cia medentur nitrum purificatum cum momento camphoræ permixtum, demulcentia, leniter ano- dyna, emulsiva & diaphoretica fixiora. Inprimis nitrum in omni æstu febrili restinguendo omnia alia antecellit, eo quod præter virtutem, qua mo- tum intestinum partium sulphurearum in sangui- ne figit ac complacat, obhærescentem quoque in vaforum angustiiis spissescentem sanguinem ac lympham solvit & fluxilem reddit & simul fibras rigidas & tensas humectando relaxat, adeoque antispasmodicam exserit virtutem.

§. VI.

Malignis.

Ubi maligna, hoc est in putredinem prona,

humoribus inest dispositio, vel etiam per conta- gium ejusmodi miasmata illata, quæ ad inducen- dam corporis succis putridam corruptionem aptis- sima, in acutis non minus, quam chronicis, ego quidem camphora, præsertim nitro nupta, nihil deprehendi præstantius. Hæc quippe balsamica sua vi, crasin & mixtionem conservat atque tu- etur, vim fermenti infringit, & perspirationem sine sanguinis exæstuatione intendendo, elimina- tionem sordium per cutis spiracula egregie promo- vet. Quod si febris vel inflammatio malignitati complicata, camphora nunquam sola, sed sem- per nitro remixta exhibenda. Ad vires autem in omnibus fere, ac potissimum malignæ indolis morbis, penitus prostratas, refocillandas, cortice citri, ob oleum quod complectitur, vix datur præstabilius, nec non cinnamomo ejusque aqua, non tamen spirituosam, sed cum succis fragrantibus, ut fragorum, rubi idæi & cerasorum, destil- lata. Ubi febris abest, oleum cinnamomi & cum eo artificiose confectum elæosaccharum, ad reparandas vires egregii usus. In ipsa peste, morbo- rum maxime maligno, summum alexiterium dici meretur acetum, vel simplex, vel cum radicibus alexipharmacis & cordialibus artificiose præpara- tum. Succus quoque limonum, item pomorum citri, syrupus acetositate citri, cum oleo de cedro conditus, ut acida, potenter resistunt putredini, cujus matrix & fomentum est principium alcalino- sulphureum exaltatum, ad humorum & propor- tionis mixturæ in iis dissolutionem corruptivam tendens.

§. VII.

Accedunt dolores, qui si ex spastica strictura oboriuntur, ut cardialgia, colica & ex calculo, liquor noster anodynus mineralis omnibus pal- mam præripit, utpote qui non solum blande ano- dynam & discutientem, sed etiam, quod aliis se- dantibus plane negatum, roborantem egregiam facultatem custodit. Ubi flatus restagnant & in- carceratis iis nerveæ ventriculi & intestinorum tunicæ cum exquisitis torminibus distenduntur, corticibus aurantium, floribus chamomillæ, carvo & cymino, salubri discutiente effectu nihil superius, eo quod propter subtile vaporosum quod recondunt oleum, anodynum & mitigantem, ac propter amarum, aromaticum, acre, fragrans elementum, roborantem & tonicum effectum ex- sequuntur, quo fit, ut postea flatuum causa & minera, cruditates scilicet, commodissime possint ejici.

§. VIII.

Neque etiam in aliis dolorum generibus pro- batissimæ virtutis auxilia deficiunt. Sic cru- ciatus artuum scorbuticos, rheumatismos, arthri- tidem vagam egregie levant lumbrici terrestres, vel succus ex ipsis expressus, vel pulvis illorum, præsertim cum absorbentibus, cinnabari & nitro remixtus, ac cum lacte asinino, vel sero lactis, largius & diutius usurpatus. Pulvere quoque an- timonii crudi, si successive à minori ad majo- rem dosin ascendendo, à granis circiter decem ad drachmæ dimidiæ pondus, quotidie assumatur, in- terposito leniori ex temperatis lignis decocto, diu- turnas rheumaticas passiones & tractoines artuum molestissimas vidi sanatas. Ad podagram porro expugnandam commendabilis quam maxime lac- tis asinini usus, priscis etiam teste *Plinio* & *Dioscoride* frequentissimus. Neque minus po- dagricos egregie solatur decoctum ex radice arte- misis, scorzonæ, sassaparillæ, chinæ, liquiritiæ, polypo-

Odontalgia. polypodii & hermodactylis, liberalius & aliquandiu haustum. In odontalgia rob sambuci interius ad unciam unam cum juscule ad diaphoresin proritandam assumptum, & exterius in cerevisia solutum, qua cum os subinde colluitur, specificam certe & praesentaneam opem vexatis confert.

§. IX.

Pathemata hypochondriacis & hystericis. Pathemata hypochondriaca & hystERICA multum affinitatis alunt, & atrociam suam exserunt maxime inflando & spasmodice contrahendo intestina ac demum universum nervorum systema in consensum pertrahendo: habent tamen spectata & experta quibus complacantur praesidia. Haec inter praeter thermas & acidulas, cum balneis & motu corporis, tanquam potissima, connumeranda etiam gummata & medicamenta inficeti odoris, ut asa foetida, sagapenum, opopanax & castoreum, quae vel sola in pilularum formam compacta, vel melius cum purgantibus, ut aloë correctae, extracto rhabarbari, hellebori nigri, myrrha etiam & croco remixta, & crebrius, moderate tamen, usurpata, mirifice obvios spasmos complacant, tonum nervearum partium firmanant & simul viscidos, tenaces humores colliquant & blande evehunt.

§. X.

In affectibus capitis & maxime nervorum. In affectibus capitis & maxime nervorum, qui ex imbecillitate cerebri & totius systematis nervosi viriumque languore ortum trahunt, in hemiplexia scilicet, paralyfi, sensuum imminutione, torpore & stupore actionum animalium, auditus difficultate, aurium tinnitu, syncope, vertigine, ventriculi & intestinorum debilitate, nec non diarrhoea & vomitu, nullum certe praestantius & praesentius mihi innotuit remedium, quam quod ex oleis cephalicis & aromaticis genuinis concinnatur balsamum liquidum, vitae dictum, usu tam interno, quam externo, longe spectatissimae facultatis.

§. XI.

Sania. Praeterea insaniae, tam furibundae, quam melancholicae, praeter sanguinis missiones, acidularum & thermarum usum, nec non emetica, nonnulla speciali quadam efficacia dicata celebrantur. Prisci ipsaeque Hippocrates hunc in finem utebantur quam maxime helleboro albo, cujus virulentiam *Alpino lib. de Med. method.* teste, ita cicurabant, ut eundem cum oleo vel etiam oxymelite decoquerent & antequam propinarent lac largius potui praebere: sed exolevit jam penitus hic helleborismus, hanc forsan ob causam, quod recentiores helleborum colligendi & exhibendi genuinum modum ignorarint, de quo videatur *Schulzii dissertatio de elleborismo Veterum.* Neque tamen negandum, quod in helleboro lateat adversus deliria ipsamque insaniam virtus, inprimis si ejus venae sectione & balneis ex aqua dulci, in omni amentia proficiis, secundetur. In ea vero mentis emotione, quae potius ab animi affectuum vehementia, quam hypochondriorum obstructione oborta, lac asininum, nitrum & sanguis asininus, in pulverem tritus, eximiam demulcentem, effrenes nervearum fibrarum stricturas sedantem possident facultatem, & inter initia saluberrimam praestant opem, eo certiore, si clima mutetur & occasiones ad animum exastuandum sollicitate evitentur.

§. XII.

Epilepsia. Epilepticum malum quo truculentius & vel aspectu horribilius, eo magis medentes solliciti fuerunt de praesidiis ad abigendum illud. Et certe quamplurima passim quidem circumferuntur specifica antepileptica; sed an meliora ac certiora suppetant pulvere lumbricorum terrestrium, cinnabari, pulvere secundinae humanae, rasura cranii humani, ungula alcis & corio humano, ego quidem vix crediderim. Haec autem sicuti in epilepsia idiopathica & chronica conducunt; ita in symptomatice, palmam utique fert liquor noster anodynus mineralis, epilepticos egregie componens insultus.

§. XIII.

Asthma. Ubi vesicularis & vasculosa pulmonum compages crassa, tenaci pituita firmiter inhærescente farcta & obstipata in asthma, gummi ammoniacum, Balsamus Peruvianus, crocus, opopanax, vel in pilularem consistentiam, vel cum tinctura tartari in essentiam redacta, usum atque utilitatem praestant incomparabilem. Quando autem pulmones phthisica labe affecti, si quae salutis spes, eadem quam maxime à lacte asinino, vel solo, vel fonti Selterano, qui idemtidem pulmonum vitiis apprime proficius, confuso, expectanda. Neque minus hoc nomine commendationem meretur sulphur stillatitium purum, inprimis si cum pinguedine animantium, ut axungia humana, vel pinguedine canis recentis, item spermate ceti dissolvatur, & ad stomachum roborandum aliquot balsami de Copaiva, olei ligni sassafras & foeniculi guttulæ, adjiciantur. Ea quippe sulphuris facultas, ut non modo partibus languentibus robur addat, sed & simul dissolvat & discutiat spissescences succos, qua certe in pulmonum affectibus, exulcerationibus, tuberculis, vomitibus, ex stasi & condensatione viscosi & caseosi mucilaginosi, ex chylo praecipitati succi, obortis, egregie opitulatur.

§. XIV.

Hydropes. Praeter phthisin hydropes difficillimis & ferè insanabilibus morbis annumerantur, si tamen sanationem adhuc admittunt, elaterium certe apud Veteres magnae famae medicamentum, quod per superiora & inferiora, si recte adhibetur, aquas educit, & corpore prius rite praeparato humoribusque fluidis redditis, praemissis quoque & sub ejus usu exhibitis emollientibus ac oleosis, vix efficacia par obtinet. Quia vero etiam urinae fluxu hydropicus tumor absimitur atque abigitur; pulvis cantharidum cum sale tartari mixtus, additis aliquot ad arcendam inflammationem nitri depurati granis & uno camphorae, diuresi movendae largissimae apprime inservit, modo humores ad hanc dispositi sint excretionem. Icterus quoque malum saepe valde contumax est, sed praeter emetica, quae efficaciter in ductus biliosos agunt, congrua dosi & opportune adhibita, rhabarbarum, radix curcumae & rubiae tinctorum, praesertim si in aqua & vino, adjecto nitro & sale tartari, decoquantur, in regio morbo singularem prorsus edunt effectum, quem etiam infusum corticis medii sambuci, nisi corpus nimis debilitatum, viscidam bilem colliquando & calculos ex canalium biliariorum alveis eliciendo, exsequitur.

§. XV.

In calculosa renum dispositione spectatissima *Calculi.*

infusi summitatum millefolii est facultas, quando quis eo crebrius & diutius utatur. Nec eximia deneganda virtus fragis exsiccatis, fructibus alkekengi, cynosbati, semini dauci, ac potissimum cortici radices acaciæ, si vel cum infuso ex aqua, vel cum spiritu juniperi temperationi, sumantur. Inest enim ipsis virtus quædam traumatica, leniter balsamica & subadstringens, qua remissum tubulorum renalium tonum egregie firmant, substantiam renum exulceratam & ex parte dissolutam conglutinant atque percurant. Amygdalis autem amaris, ob anodynum oleum, nec non oleo amygdalarum dulcium, sub ipso cruciatuum paroxysmo demulcens & mitigans longe eximia inest virtus.

§. XVI.

Mensium.

Affectus sequiori sexui solennes, ex uteri & maxime mensium vel lochiorum vitio, præter aloen correctam, myrrha, croco, succino, castoreo & aristolochia rotunda, debita ratione in pilularem formam reductis, optime excipiuntur, eamque ob causam in iisdem nostro jam tempore maximam hoc nomine adeptæ sunt famam pilulæ Becherianæ & omnes ad earum exemplar paratæ. In virili autem sexu ad corrigenda hæmorrhoidum vitia, post mannam, infusum vel decoctum summitatum millefolii saluberrimi effectus; eo quod hæc planta subtile, spasmos leniens atque demulcens oleum recondit, quod multum ratione saporis, odoris & maxime coloris cærulei, convenientiæ alit cum oleo chamomillæ.

Et hæmorrhoidum vitis.

§. XVII.

Dysenteria

Intestinorum canalem graviter exagitat ipsumque corpus innumeris pæne sedibus ferme exhaurit dysentericus morbus, contagio infestus & ingentem sæpe stragem edens, qui pariter non quibusvis in alvi fluxibus proficuis, sed singularibus plane abigitur penitusque extirpatur auxiliis. Nimirum radix illa Americana ipecacuanhæ, experientia teste maximum antidysentericum, si modo initiante adhuc morbo, iusta dosi, semel, vel bis, aut ter exhibeatur. Postea vero præter alia acrimoniam obtundentia, blanda diaphoretica & temperantia interne & externe adhibita, itemque rhabarbarum, ceu optimum laxans, cortici chaccarillæ certissima flaccidas intestinorum fibras roborandi & motus effrenes sedandi inest efficacia.

§. XVIII.

Vermibus.

In intestinis quoque vermes varias ludunt tragoedias & horrenda sæpe excitant symptomata, quibus extirpandis nonnulla peculiari quadam dicata sunt virtute, Græcis ob id anthelmintica vocata. Sed licet horum eximius circumferatur apparatus, non omnia tamen æque expectationi respondent, & nulla magis probatæ efficaciam sunt ipsa asa foetida & sagapeno, præsertim si hæc cum purgantibus, ut mercurio dulci & extracto rhabarbari, in pilularum forma dentur, hac cum cautione, quo ante & post hujus virtutis pilularum usum, aliquot cochlearia olei olivarum, vel amygdalarum dulcium ingerantur, quod certe vermibus, ut omnia oleosa, quam maxime infensum, & fibras intestinales à vermium arrosione spastica strictura affectas, egregie mulcet, ac efficit, ut verminosa progenies per ani secessum exturbetur. Asa quippe foetida & sagapenum nidore suo quem dispergunt adverso, vermes fugant, haud secus ac de alio domesticis & agrestibus experimentis constat. Semen

autem cinæ, item fantonici & herba tanacetii, utiliter etiam contra vermes quidem usurpantur, sed non aliter agunt, quam quod putredinosæ colluviei, quæ vires frangit lentumque infert calorem & languorem, resistent & simul tonum intestinorum firmando expulsionem faciliunt ac juvent.

§. XIX.

Quando nimium sanguinis, ubicunque sit, ex apertis vasorum osculis effunditur, prompta ope & præsentaneis remediis opus est, ne graves insequantur passionēs. Ac tum quidem ad compescendum cruoris stillicidium nitro in aqua communi soluto & successive oblato, nec non ad arcendam novam hæmorrhagiam, pulverem dentis hippopotami, repetitis maxime vicibus, vix quicquam præstabilius. Prodest tamen etiam massa pilularum de cynoglossa, ad grana sex vel octo, oleum & semen hyoscyami narcotica virtute pollet, ac sensum solidorum exquisitiorem obtundendo, efficit, quo minus per spasmos sanguis impetuose ad certum quendam locum urgeatur ibique exprimitur. In feminis fluxu, præsertim virulento, vix melius & præsentius suppetit præsidium terebinthina Veneta ejusque oleo æthereo, vel loco hujus balsamo de Copaiva aut Mecca, quæ si cum vel sine camphora, in emulsione ex seminibus quatuor frigidis, lacte, vel sero lactis, post congruorum purgantium, præsertim mercurialium usum, propinantur, incomparabilem præstant efficaciam.

*Nimium morrhægiis.**Seminum fluxu.*

§. XX.

Excipiunt morbi ex humorum impuritate oriundi, quæ maxima in scorbuto. Est hoc malum maxime endemium, à pravo victu, sub cælo frigido & humido, prognatum, & à vita sedentaria atque mœrore maxime exacerbatur; longa tamen experientia comprobata adversus illud remedia sunt sic dicta antiscorbutica, trifolium fibrinum, cochlearia, beccabunga, nasturtium, radix armoraciæ, quorum effectus eo magis exoptatus certusque, quum succus ex ipsis expressus cum sero lactis ex nostra præparatione dulci, vel etiam lacte caprillo, disposito prius corpore, assumitur. Quod si scorbutus jam inveteraverit & doloribus stipetur, strobilos pini in sero lactis decoctos, addita medulla & pinguedine ex ossibus boum & vitulorum, continuato aliquandiu usu, eximie suppetias tulisse novi.

Scorbutus.

§. XXI.

Truculentus ille luis venereæ nomine qui insignitur morbus, vix funditus ex interioribus quibus insidet partium latibulis eradicari poterit, nisi admissis specificis, inter quæ argentum vivum, lignum guajacum cum cortice ipsumque antimonium rite præparatum primas tenent. Nul- lum enim in toto rerum naturalium censu suppetit pharmacum, quod tam potenter universam lymphæ & humorum massam in motum cieat & largissimum salivæ ad aliquot interdum hebdomades durantem fluxum cieat, quam ipse mercurius, qui corpus subiens, ob specificam in minimis etiam moleculis omnibus succis superiorem gravitatem, ad intima corporis pervadit & per angustias tubulorum strenue eluctans, obstructions in iis solvit, simul quoque humorum corporis crasin penitus immutat eisdemque intestino quodam motu putredinosam quasi inducit colli- quationem, & hac ratione, licet non sine summa molestia & quandoque etiam periculo, gravissimum

Luis venerea.

vissimum hunc morbum aliasque chronicas contumaces, ex feri spurcitie ortas passiones, expugnat. Tutissimum autem ex mercurialibus salivandi scopo usitatis est ipse mercurius dulcis, si absorbentibus nuptus, per aliquot dies exhibeatur, ascendendo à minori, ut quinque granorum dosi, ad majorem, duodecim scilicet granorum, donec saliva liberaliter fluere incipiat, observato simul convenienti diætetico regimine. Guajacum sale subtili acri resinoso, quo aquam cui incoquitur imbuat, fibras vasorum & tunicas vellendo, totam humorum & lymphæ massam ad auctiorem progressum adigit, quo tenaces succi resolvuntur & obstructions referantur.

§. XXII.

Ad lepram, herpetem & scabiem mali moris, nec non alias cutis defœdationes & ulcerationes, optimum auxilium ex viperis earumque decocto, nec non antimonio, ac præcipue ejus sulphure diaphoretico, peculiari enchiresi confecto, sperandum. Plica quoque sic dicta Polonica, resistans aut præpostere abscissa, gravia invehit pathemata, ad quæ abigenda laudata virtus decocti herbæ & feminis lycopodii, quo caput sæpius tepide abluendum; quandoquidem hac ratione serum illud viscidum excrementitium, cerebrum & caput moleste afficiens, per cutis qua caput tegitur tubulos ipsosque crines salutariter ejicitur. Oculos si infestat falsa & calida defluxio, cui rubedo juncta, in sic dicta epiphora, & noctu præsertim palpebræ à viscoso humore conglutinantur, pauxillum, & vel unum granum, vitrioli albi, cum butyro recenti subactum & orbitæ oculi majori inditum; admirabilem fert opem & promte vitium abigit. Pelliculam visum intercipientem recens viperarum pinguedo oculo instillata promte abstergit; & guttam serenam incipientem egregie discutit sulphur antimonii interiorius assumptum.

§. XXIII.

Quando partes contractura & rigiditate afficiuntur, nihil præsentius est; quam membra afflicta crebrius in animalia recenter dissecta & adhuc calentia immittere, quo blando, oleoso & naturali calido vapore foveantur fibræ tensæ & molliantur. Ubi post lapsum aut gravem contusionem ac percussione partium externarum, stagnantes & coeuntes humores & sanguinis varia creant incommoda, decoctum vel infusum arnicæ omne fere curationis punctum absolvit, ob singularem qua pollet incidentem, solventem & discutientem efficaciam.

§. XXIV.

Ultimo loco dum de specificis sermo est, non prætermittendum laudatissimum illud & admirandæ prorsus ad valetudinem tuendam & longævitatē consequendam præsidium diætetikum, Veteribus tantopere celebratum, lac asininum. De hujus efficacia longe saluberrima peculiari egi dissertatione *de mirabili lactis asinini usu in medendo*, in qua pluribus, quibus morbis debellandis ejus potus proficius sit atque commodus, & rationibus & exemplis exposui. Quam singulari autem virtute ad prolongandam vitam polleat, luculentum est *Patini* testimonium. *tom. II. epistolar. pag. 213.* & dignum quod totum verbis latine redditis transcribatur: *precor*, ait, *Summum Numen, velit conjugi Tuae perfectam largiri sanitatem. Elapso decennio, lac asininum erit admodum salubre, quod ut ipsi ex voto proficiat,*

opto. Si ipsam ad sanitatem reducere possem, cras statim Lugdunum properarem, quod vero nimis procul remotum. Galenus quidem ad Scabiæ montem ægrotos suos ablegabat, unde sani redibant, id quod confirmatum habeo nummo Imperatoris. Geriæ, quem Carolus meus asservat, signato imagine vaccæ, qua hujus montis accolæ lactis præstantiam indicare voluerunt. Suppetit etiam nobis Luetiæ lac asininum optimæ notæ. Socrus mea, quæ octogesimo quarto anno apoplexia interiit, hoc per integros sexaginta annos usa est. Pariter à vigesimo secundo ætatis anno hoc lac potavit Domini consilarii Laurentii mater, elapso anno, octogesimo septimo anno denata. Hujus soror, viduâ Andreæ Laurentii, Anatomici, idem fecit & ad octogesimum quintum annum pervixit. Et certe apud nos egregiam præstat opem, vere maxime & autumnis, imprimis ad arcendos morbos. Ego tamen ejus usum nemini suadeo, nisi viscera clementi & accommoda purgatione depurata prius fuerint ac præparata.

§. XXV.

Atque hæc sunt selectissima & usu comprobata ex omni remediorum censu. Monendum tamen, quod quum hæc ipsa, ut supra jam inculcavimus, neutiquam viribus polleant absolutis, sed relativis & certis conditionibus ac circumstantiis limitatis, in eorum usu harum imprimis exquisita habenda sit ratio, quo speratus respondeat effectus. Deinceps singularis efficaciam hæc quidem recte usurpata sunt remedia, sed nihil certe juvant, nisi prius corpus probe fuerit præparatum, & obstacula, quæ virtutem infringere aut impedire possunt, remota. Hinc quando sanguis in venis redundat & primæ viæ sentina sordium obsestæ, necesse est, ut sanguis prius subtrahatur, & prima corporis regio à crudorum, biliosorum & recrementitiorum succorum saburra repurgetur ac depleatur.

§. XXVI.

Neque etiam existimandum, specificis usurpatis, nullis plane aliis internis vel externis mediis, ad corrigendam humorum vitiosam qualitatem & evacuationem destinatis, opus esse. Etenim hæc specificæ virtutis medicamina, efficacia sua non tam materiam quæ in vitio est, quam potius ipsum motum afficiunt eumque ad naturalem successum reducendo juvant, quod tum demum quam optime perficitur, quando causæ morbificæ materiales sublatae, & præmissis, quæ temperando, resolvendo, discutendo & obstructiones expediendo humorum corrigunt vitia, appropriata debita proportionē, opportuno tempore & modo convenienti in usum vocantur. Imprimis eo cura dirigenda, quo primæ viæ vacuæ sint succis viscidis impuris, quibus oblatis medicamenti vis quam maxime obtunditur, vel plane suffocatur, quum his expurgatis, integræ & salva sua textura ex voto agat & in ventriculi ac intestinorum substantiam nervosam virtutem suam edat, eodem modo ac de emeticis, purgantibus, opiatis, analepticis omnibusque quæ exili mole magnum edunt effectum, constat.

§. XXVII.

Denique in specificorum usu accommodanda servanda methodus, ita quidem, ut artifex non solum tempus, dosin ac regimen teneat, sed etiam quamdiu iisdem insistendum & quæ vitæ ac vivendi ratio simul injungenda, exacte calleat. Etenim methodus medendi specialissima, quæ

specificæ non promiscue juvant.

Et corpus præparandum.

Materia vitiosa corrigenda.

Primæ viæ repurganda.

Et congrua methodus servanda.

quæ unice in medentis prudentia, judicio, diligenti attentione, meditatione & observatione naturæ ægrotantis consistit, tanti ad ipsum effectum est momenti, ut ipsis specificis & appropriatis solis longe sit anteponenda, & sine ea remedia, quantumvis egregia, alienæ & infructuosæ sint operationis, nec quicquam solidi in arte præstari queat. Et hæc quicunque studiose observat omnia, is certe desiderato potietur fine, quantum scilicet malo plus valet ars nostra salutaris.

CAPUT IX.

De venæ sectione aliisque sanguinem subtrahendi modis.

§. I.

Posteaquam igitur plura & selecta remedia, quæ interno usu, cum in præcavendis, tum sanandis morbis, rite adhibita egregium præstant usum atque utilitatem, fusius exposuimus: ordo rerum dicendarum exigere videtur, ut jam etiam de illis agamus præsidis, quorum usus legitimus externus plurimum in medendo valet. Inter hæc vero primum atque præcipuum locum jure obtinet sanguinis subtractio, sive per venam sectam, sive alios modos facta. Et venæ sectionis quidem tanta certe est efficacia atque utilitas, ut si effectum celerem & egregium quem præstat, spectemus, re vera omnia interna in morbis tam avertendis, quam sanandis, longissime exsuperet. Neque ullum remedii genus est, quod & operationis celeritate & tolerantia facilitate se ita commendet, & quod à primis fere medicinæ incunabulis tam frequentis & laudati fuerit usus, quam sanguinis per venam sectam evacuatio. Antiquissimus artis nostræ parens *Hippocrates* eam nullo in morbo intermisit, & Veteres fere omnes æque ac recentiores medici, qui non vanis & inanibus in praxi præceptis innutriti, ea carere nequeunt, ut adeo merito inter heroica & summæ virtutis remedia locum præcipuum mereatur. Sed quemadmodum nulum efficax remedium, nisi provide & dextre usurpetur, juvat, imprudenter vero administratum nocet: ita etiam hoc ipsum auxilium cautionem, observationem & prudentiam in usu exigit atque desiderat. Quare è re utique erit, ut quæ tam de venæ sectionis, quam reliquarum sanguinis missionum, genuino ac salutari usu tenenda, edisseramus, & quidem concisis theorematibus, per subiecta scholia illustratis.

Theorema I.

Non excellentius, non præsentius, ad plurimos morbos, & acutos, & longos, arcendos, suppedit auxilium, ipsa sanguinis prudenter instituta missione.

Scholion.

In priori jam sectione ex instituto docuimus, quam graves & periculosæ passiones, ex nimia sanguinis redundantia, item ex evacuationibus ejus criticis, quæ fiunt in feminis per uterum, & in utroque sexu, maxime virili, per venas hæmorrhoidales, deficientibus, vel etiam suppressis, proveniant. Evidenter namque deduximus, quod plethora, tum ad vasa, tum ad vires, liberum & æquabilem sanguinis circulum retardando & impediendo, ad colligendas impuritates hu-

morum, ad hostiles stagnationes, infarctus, obstructions & funestas stases, imo extravasationes & vasorum ruptiones, occasionem & causam præbeat efficacissimam. Scilicet dum sanguis copia sua virtuti contractili & elasticæ cordis, artiarum & reliquorum vasorum fortiter obnititur, non modo progressivum per universum corpus motum remorando, ut cruor spissus & ad infarctus, obstructions, fecundas morborum chronicorum matrices, aptissimus, evadat, efficit, sed & in sensibilibus subjectis atque in locis valde nervosis, spasticas ciendo stricturas, inæqualitatem in sanguinis progressu & magnas ac impetuosas congestiones ad has vel illas nobiles partes caussatur, quæ gravissimos in pectore, capite & præcordiis morbos inducunt. Hos igitur omnes ancipites afflictiones venæ sectio, tempestive & prudenter instituta, in iis præsertim corporibus, quæ sanguine abundant, vasa plena & ampla habent & quibus sanguis, nec per hæmorrhoides, nec menses fertur, præsentissime prævertit. Quumq; copia collecti sanguinis vere, & quidem circa tempus æquinoctiale, ubi ob solis propiorum ad nostrum clima situm, aer tenuior & rarior majorem in sanguine expansionem efficit, quam maxime periculum minetur, & morbos à plethora oriundos, teste etiam *Hippocrate*, proferat, utique convenientissimum est, ante illud tempus decenti sanguinis emissionem ipsius redundantiam imminuere & sic futuris imminentibus morbis opportune occurrere eosdemque præscindere. Neque vero semper opus est, ut adeo accurate illud æquinoctiale tempus observemus. Nam quando congesti sanguinis copia citiorem & celeriore vacuationem desiderat, vel quando mox sub finem Februarii & initium Martii serenum & tepidum cælum expansionem ac turgescentiam sanguini, motui progressivo infensam, infert, non adeo rigoroſe constitutus æquinoctii terminus expectandus, sed præstat tum anticipare eundem. Aliquot mihi nota sunt exempla eorum, qui ne à recepto discederent more ad æquinocrium usque distulerunt hoc auxilii genus, sed crescente nimis plethora, apoplectico insultu ante illud tempus perierunt. Neque etiam audiendi sunt illi, qui vel lunam decreſcentem, vel certam siderum constellationem, ut plurimum fallacissimam, quoad tranquillos & salutiferos in aere effectus, opperiantur, sed mittendus est sanguis urgente plethora quocunque tempore, maxime si cælum serenum & tranquillum, sub quacunque lunæ phasi, vel siderum conjunctione. Pari ratione pro valetudine eorum, qui sanguinem copiosum in venis alunt, est, ut circa æquinoctium autumnale iterum sanguinis detractionem admittant, ne cruor, accedente frigida hyemali aura, nimis spissescat & excretionum successu ob aeris varietatem & inclementiam feriente, fordescat, morbisque ex humorum impuritate & stagnatione oriundis occasio suppeditetur. Quin nonnullis eminentius sanguine repletis conducit, quo ter quotannis venam incidi patiantur, incipiente scilicet Martio, adulto Majo & Septembri, & sic corpus à morbis defendant.

Theorema II.

Uti copia sanguinis ejus detractionem exigit; ita ejus inopia & virium defectus eam interdicit.

Scholion.

I. Sanguinis copiam vasorum repletio pulsumque magnitudo, victus solennis lautus & vinosus,

vinosus, quietum & tranquillum vitæ genus, & intermissio vel naturalis criticæ aut artificialis consuetæ evacuationis luculenter produnt; & hæc ubi præsto sunt, tuto & confidenter sanguinis detractio admitti potest. Contra ea quando corpus infirmum, emaciatum, pulsus debilis, ex inopia maxime sanguinis & virium, penitus est interdicens, nisi præsentaneam noxam inferre velimus. Nam pulsuum in arteriis robur dependet maxime à copiosiori & vegetiori sanguinis ex sinistro cordis ventriculo in magnum arteriosum tubum impulsu; robur vero illud cordis ad expulsionem, à libero & sufficienti sanguinis per vasa coronaria in cordis substantiam, nec non fluidi nervei in fibras cordis influxu, proficiscitur; ideoque ubi pulsus parvus, debilis ac languidus ex fluidi nervei sanguinisque boni pariori influxu & ex ventriculis in arterias impulsu, nocentissimum est venam pertundere in quocunque subjecto & morbo, quia plus sanguinis & virium, quæ tamen jam tum deficiunt, exhaurit atque absument.

II. Peccant subinde in eo medici, qui vel in morborum declinatione, vel si morbis præcedentibus, ut febribus aut enormibus hæmorrhagiis, alii morbi superveniunt, prompti ad sanguinem emittendum sunt. Nil frequentius occurrit in praxi, quam quod foeminis, superato qui sanguinem & vires consumsit morbo, mensium fluxus subsistat; quibus certe pessime consulunt, qui ad eum provocandum, vel pellentia, vel sanguinis evacuationes, administrant; quum potius in id incumbendum sit, quo & analeptics, & lautiori diætâ, sanguis & laudabiles humores prius de novo ingenerentur.

III. Virium defectio quandoque non à defectu, sed nimia copia sanguinis fit. Observamus sæpius in plethoricis juvenibus & viris pulsum, qui antea fuerunt celeres, tarditatem & debilitatem; videmus quoque universi corporis & animi languorem insuetum & somni defectum, sub magna tamen arteriarum expansione. Hæc autem ubi subest causa, superfluum & arteriarum systolen ac motum mole sua impediens cruorem subtrahere omnino expedit, & hoc facto, pulsus illico crebrius atque validius micat. Sed prudentis utrique & periti est medici, talem virium oppressionem à copia sanguinis, etiam morbo præsentem, probe discernere ab ea, quæ virium & sanguinis inopiæ ortum debet.

Theorema III.

Post venæ sectionem, sæpe excretiones salutaris sanguinis, imo alvi, sudoris, urinæ evacuationes melius & liberius quam ante eam succedunt.

Scholion.

I. Quia salutiferæ omnis generis excretionis sanguinis circulum, prout ille celerior vel tardior, vegetior vel languidior est, sequuntur; facile patet, si ob nimiam sanguinis copiam ipsius motus progressivus una cum excretionibus fuerit retardatus, imminuta vasorum plenitudine, augeri sanguinis circulum, ipsum hac ratione reddi fluidiorem, excretoriorum & colatoriorum vias ab obstructionibus liberari, & cruorem liberius & largius ad emunctoria pro subeundis excretionibus appellere.

II. Hinc sæpissime annotavi, suppressum in foeminis mensium fluxum, brevi post venam in pede sectam sponte repetiisse. Plura etiam mihi nota sunt exempla, pertusa paullo ante vena sanguinem ex ani venis profluxisse, qui antea vel

plane nunquam prodierat, vel per longum tempus resistebat.

III. Frequenti porro observatione comperitum est, in plethoricis non modo, sed & iis qui spasticis detinentur affectibus, urinam difficulter reddi valdeque aquosam & limpidam mingi, sed protinus post emissum sanguinem, urinosum laticem copiosorem stillare magisque tinctum. Idem jam pridem notavit antiquissimus *Cous Sect. VI. aph. 36.* inquit: *difficultatem urinæ phlebotomia solvit, secare vero oportet interiores*; id quod etiam confirmat *Riverius Cent. I. obs. 1. item obs. 45. & 89.* fidem faciens: admissa venæ sectione, urinas, quæ antea prorsus aqueæ, redditas fuisse colorationes.

IV. Neque minus experientia aliquoties edoctus sum, in hypochondriacis, quibus alvus solenniter tarda atque compressa, post sanguinis missionem, eandem esse solutam & ad officium rediisse. Ratio hujus effectus procul dubio hæc est: in passione sic dicta hypochondriaca ob difficiliorem sanguinis per mesenterium & hepar transitum, vasa nimium cruore replentur, ob distensionem in eorum tunicis fit spasmus & motus peristalticus læditur, quo læso nec flatus, nec excrementa, per alvum rite secedunt ac evehuntur; à vena autem tempestive in pede pertusa, vel etiam quod non semel, sed sæpius observavi, evocato per hirudines ex ani venis cruore, restituto inde libero per tunicarum intestinalium vasa transitu & progressu, & reddito intestinis debito motu ac robore, melius alvina quoque succedit evacuatio.

Theorema IV.

Venæ sectio sæpius senibus utilissima, imo ad longævam vitam confert.

Scholion.

I. Communis, sed pessimus error est, ætatem senilem plane non ferre sanguinis subtractiones, quasi vero in grandævis non redundaret sanguineus latex, ut potius ejus & virium defectu laborarent. Jam lubens equidem concedo non omnes senes esse plethoricos, & hinc sanguinis detractio indigere, nec etiam ætas per se ad repletionem vasorum quicquam confert. Verum sunt utique senes valentes, sani, firmi, vasis capacioribus instructi, qui bene appetunt, comedunt, & non tantum concoctu faciles, sed & difficiles cibos probe ferre & digerere possunt, ideoque neutiquam etiam dubitandum, quin ex bene concoctis alimentis copiosum chylum & copiosum sanguinem gignant & colligant, cujus florida facies & vasa sanguine turgida luculenti sunt indices. Accedit, quod non modo in virili, sed & in extrema ætate constituti, non raro modicum sanguinis per sedis venas profluvium cum constanti virium duratione commodissime ferant, ac ipse aliquot octogenarios novi, qui copiosum mictu sanguinem sine notabili virium decremento emisissent. Quin potius quum senectus non adeo ad labores, exercitia & motus corporis apta sit & proclivis, eaque propter non æquali mensura & proportionem egesta ingestis respondeant, sanguisque motu & calore minus consumatur, necessario nimia humorum succrescit abundantia, viscerum infarctus vasorumque plenitudo, quæ, nisi mature solvatur, in morbos senibus familiares foecundo gignit germine, marasmos, tusses, coryzas, rauces, artuum dolores, renum & vesicæ calculos, paralyses, urinæ difficultates, pruritus, scabiem siccam, quæ afflictiones, utut proxime

me non à copioso sanguine, sed potius ab impuritate feri proveniant, hæc ipsa tamen à succorum copia, qua excretiones impuritatum interceptiuntur, natales trahit.

II. Complura certe memoria teneo exempla senum, qui ad nonagesimum annum fere, salvi, incolumes & à morbis ætate provectis familiaribus immunes vixerunt, solo venæ sectionis remedio, bis per annum admissio. Et quod fenectuti non adversa sit sanguinis per venam vacuatio, universa Helvetiorum gens testatur, qui vel octogenarii, immo nonagenarii, singulis adhuc annis venæ sectionem patiuntur: quam in rem *Wepferus lib. de apoplexia* legi potest. *Primerosus etiam lib. IV. de vulg. error. cap. 23.* tribus exemplis confirmat, quod senes octoginta annorum sanguinis è vena missionem commode ferre possint, in gravibus, tam ab internis, quam ab externis causis pendentibus vitiis, id quod etiam à me in peculiari dissertatione, *de magno venæ sectionis ad vitam sanam & longam remedio*, assertum est ac demonstratum. Neutiquam tamen ex his eliciendum: senibus debilibus & languentibus, qui appetentia ciborum carent magnaue debilitate ventriculi & intestinorum laborant, suadendam vel commendandam esse venæ sectionem, minime omnium vero, si cum morbo diuturno chronico conflictantur.

Theorema V.

Venæ sectio in febribus continuis & acutis ut plurimum & necessaria & utilis admodum est.

Scholia.

I. Miror sane haud exigui nominis viros venæ sectioni alias eximie patrocinant, confidentius tamen asserere: eandem in omnibus febribus acutis, benignis & malignis, exanthematicis, vel minus talibus, nunquam esse necessariam, sed semper fere noxiam unica tantum synocha excepta, nec in hac etiam absolute, sed tum demum, quando eminens plethora orgasmo stipata eandem exposcat. Dicunt quidem: frequentius observatum esse, admissa sub initium hujus febris sanguinis missione, periculosas circa statum sanguinis metastases & congestiones ad caput esse consequutas, lethalem phrenitidem cum convulsionibus inducentes. Autumant quoque, naturam corporis humani œconomiam magna semper cum sapientia regentem, his in febribus non sanguinis mole peccantis vacuationem, sed potius ejusdem per intensiorem calorem in serum excrementitium resolutionem cum materiæ noxiæ sequestratione, intendere; eaque propter contra naturæ institutum ac finem sanguinis educationem adornari, & naturam in saluberrimo secretionis negotio turbari. At vero & ratio & constans experientia huic asserto refragatur. Plures certe novi juvenilis & virilis ætatis vegetos & sanguine plenos hisce febribus correptos, qui ommissa venæ sectione, intra paucos dies phrenitide, inflammatione ventriculi, faucium, vel etiam peripneumonia obierunt; ubi post mortem totum corpus mirum intumuit & ipse ichor sanguineus largiter è naribus manavit, foetor quoque mox gravissimus cum putredine successit, nullam aliam ob causam, quam ob inflammatoriam sanguinis in partibus stasim. Vicissim multiplici observatione confirmatum habeo, unicam vel etiam repetitam sanguinis in acute febrientibus missionem, non modo anxietates, sed & alia sæva symptomata imminuisse, vel plane sustulisse. Ut taceam Gallorum morem, qui in omnibus febribus

non semel, sed bis vel aliquoties, venam cum bonis ægrorum rebus pertundunt. Metastases vero sanguinis ad caput circa tempora critica venæ sectionem ciere, fallacia causæ ut causæ videtur. Nam licet phrenitides & convulsiones malo successu febre acuta laborantibus sæpe accendant, eodem tamen modo, immo frequentius id evenit, ubi venæ sectio ommissa, quam ubi admissa. Et quum omnes fere in febribus acutis, phrenitide & convulsione pereant: certe si venæ sectio horum causa, intermissa eadem, non facile quemquam acute febricitantem interire, prona fluit consequentia.

II. Ego potius neutiquam asseverare dubito, sanguinis missionem in febribus acutis sapissime utilem esse admodum ac necessariam. Etenim qui acutis corripuntur omnes plus sanguinis & humorum abundantia, quam defectu laborant. Jam vero in comperto est, febris essentiam maxime in intensione toni & spastica quadam constrictione universi generis vasorum & fibrarum, à qua etiam & progressus sanguinis & caloris ac æstus incrementum dependet, consistere, notum porro est, spasmo vasorum alveos angustari, calore autem succos expandi majusque spatium affectare; ideoque redundans & exæstuans cruor libero per sanguifera vasa transitu exclusus, non potest non impetuosè huc & illuc agi & ad vasa minoris diametri, quæ sanguinem secundum naturam non admittunt, tanquam loca incongrua pelli inque eorum angustis obhærescere ac stasim concipere, unde periculosæ inflammationes, nonnisi tempestitiva sanguinis detractione felicissime præscindendæ. Uberius hoc patet peritissimorum in arte virorum testimoniis. Ipse artis parens *Hippocrates, de vict. acut. §. 5.* in acutis sanguinis missionem serio commendat. Quin Vereres in ejusmodi præcipitis periculi morbis sanguinem ad animi usque deliquium subtrahebant, uti potissimum auctor est *Galenus lib. I. de rat. vict.* perhibens: hujusmodi missionem sanguinis non tentandam esse nisi in acutissimis morbis, iisque in quibus robustæ vires, florens ætas, plurimus sanguis, regio, aer & anni tempus bene temperata, quales morbi existunt febres ardentissimæ, dolores sævissimi maximæ viscerum inflammationes, carbunculi, synochus, lassitudo phlegmonosa, dolores articulorum vehementissimi. In his enim omnibus multo sanguine semel vacuato, statim quiescit calor, quibusdam alvus cietur, aut sudores moventur, & ita solvitur, aut saltem minuitur morbus, teste *Hollerio Comment. ad aphor. 3. sect. 1. Hippocr.*

Theorema VI.

In febribus etiam exanthematicis, petechialibus, purpuratis, variolis, morbillis, quin ipsa peste, venæ sectio non prorsus intuta, sed prudenter adhibita, magno interdum præsidio.

Scholia.

I. Haud levis momenti inter medicos viget dissensus: an in iis febribus, ubi pernicialis materia ad cutis superficiem appellitur, sanguis utiliter possit subtrahi? Complures affirmant, alii prorsus pernegant, utrique experientiam in partes advocant. Sed distinctio utrique facienda & circumstantiarum rationi hujus remedii usus accommodandus. Nimirum ubi succi deficient, vires statim in principio elanguescunt, pulsus debilis, durus & parvus, vasa copiosa, sed angusta, vel etiam robur per animi afflictionem dejectum,

dejectum, verbo: ubi malignitas humorum, ut cum scholis loquar, præsto est, damnosum magisque ad perniciem, quam salutem ægri vergens molimen est, sanguinem evocare. Etenim ad materiam non tam mole gravem, quam causticam, subtilem & virulentam, nervosis partibus infestam, eliminandam, valida cordis & arteriarum motrix vis requiritur, quæ à sufficienti sanguinis & fluidi nervei influxu expectanda. Deinde ipsa hæc pernicialis materia expellenda nonnisi beneficio sanguinis & humorum ad superficiem corporis advehitur, ubi vasa minoris diametri sunt, facile concidunt & nonnisi vegeto appulsu replentur. Quod si igitur quis succos & sanguinem ubi jam deficient & robur languet adhuc subtrahere vellet: is certe grave afferret damnum & nihil aliud efficeret, quam ut materia hostilis intus remanens, instar veneni solidorum & fluidorum motum perverteret ipsamque mortem inferret.

II. Longe alia ratio est, si ob nimiam sanguinis copiam ejusque ab æstu febrili rarefactionem, cordis & arteriarum tunicae tam vehementer distenduntur, ut systole earum imminuatur ac sufflaminetur, eaque propter sanguis non vegete ac libere ad minimos cutis tubulos appellat ibique materia quæ in vitio est se- & excerni queat. Tunc utique ipsa ratio dicitur, evocata quadam sanguinis portione, residuo ad validiorem circuitum viam pandi, resistantiam tunicarum succorum impulsui æquabilem ipsumque systalticum & diastalticum reciprocum motum revocari, quo fit, ut sequestratio & evacuatio noxii quam optime & ex voto succedat. Obvium hoc est sæpissime in corpore juvenili & plethorico, sanguineæ constitutionis, sub diætâ lauta & vinosa, tranquillo etiam & quieto vitæ genere, aut ubi etiam ob intemperantiam animi affectuum excretiones imminutæ succorum abundantiam genuerunt. Hujus habitudinis corpora, quando purpura, petechiis, catarrhali benigna aut maligna febre, vel etiam variolarum morbo laborant, intermissa venæ sectione certo in discrimen adducuntur; contra ea omnia ex voto succedunt, si plethora demta, liberior sanguini conciliatur progressus.

Theorema VII.

Non perniciofa, sed quandoque admodum proficua est sanguinis missio in febribus, apparentibus jam in cute exanthematibus.

Scholion.

Per manus quasi tradita est opinio: efflorescentibus jam in corporis cortice petechiis, purpura, variolis & morbillis, nec sanguinem mittendum, nec alvum subducendam esse, ne maligna ad habitum corporis relegata materia irreparabili cum damno ad interiora retrahatur. Quamvis vero hæc observatio non exigui sit momenti, ipsaque experientia nitatur, non tentandam esse sanguinis subtractionem, ubi natura, ut sic dicam, in opere excretionis occupata, & ubi exanthemata non longam & fixam sedem in cute habuerunt: nihilo minus tamen dantur casus, ubi venæ sectio comparentibus etiam efflorescentiis utilis est ac necessaria. Observavi enim in iis, qui purpura, sive primarius, sive secundarius morbus fuerit, variolis vel morbillis perierunt, vehementes spasmos, tam in artubus & partibus extremis, quam etiam abdomine, quos ob cutim contractam, non modo exanthematum retrocessio, sed & summa anxietas, corporis jactatio

Frid. Hoffmanni Oper. Tom. I.

& sæpius delirium cum animi deliquio fuerunt insequuta; quæ omnia lethifera symptomata non tam, ut vulgaris fert sententia, à materia exanthematica interiora repetente, quam potius à sanguinis impetu & congestione ad cor ac cerebrum facta, accesserunt. Hinc sola ratione ductus, quatuor intra anni spatium puerperas, purpura laborantes, conclamatis propemodum rebus, sola sanguinis à vena brachii emissionem, per DEI gratiam à præsentaneo mortis periculo vindicavi. Simul ac enim sanguini exitus concessus, protinus præcordiorum anxietas animique defectio evanuerunt & melius sese habuerunt ægrotautes, summa cum Chirurgi & adstantium, mortem sub ipsa operatione præsagientium, admiratione. Eadem ratione in juvene, periculose variolis laborante, cum imminens delirium & ingens præcordiorum angustia mortem prænunciarent, venæ sectionem in brachio summo cum sanitatis emolumento institui jussi. Neque hæc assertio clarissimorum medicorum destituitur consensu, quos inter primo loco memorandus summus venæ sectionis patronus, *Botallus*, qui *lib. de venæ sect. pag. 150. seq.* testatur: se in bubonibus pestilentialibus & aliis exanthematibus, si febris non remiserit, summo cum fructu sanguinis missionem suasisse; ut *Muraltum*, qui *Dec. II. Ao. VII. obs. 115. M. N. C.* venæ sectionem in febre epidemia, papulis per corpus sparsis, salutarem annotavit, aliosque prætereamus.

Theorema VIII.

In morborum & febrium paroxysmorum atque exacerbationibus venæ sectio non sine periculo, die autem intercalari vacuo utiliter instituitur.

Scholion.

In paroxysmis febrium intermittentium, in epileptico, hysterico, nec non hypochondriaco insultu, & quodcumque extrema frigent, vel interni calores & anxietates ægrum exagitant, admissa venæ sectio symptomatum vehementiam non modo acuit, sed & mortis periculum arcessit. Ratio hujus phænomeni in proclivi. Etenim morborum & symptomatum exacerbationes nunquam non spasmi partium, præsertim externarum, ventriculi quoque & intestinorum comitantur, quibus sanguinis liber cursus intercipitur isque majori impetu ad vasa majora, pectus præsertim & cor urgetur. Si quis itaque in brachio vel pedibus, ubi omnia spasmo contracta sunt, sanguinem evacuare instituat; is certe vehementiam spasmodum his in partibus augebit. Nam quo largius atque uberius sanguis his partibus subtrahitur, eo plus incrementi capit spastica fibrarum contractio; quum nihil sit, quod spasticæ huic crispaturæ & regurgitationi sanguinis ad interiora magis resistat, quam validus cordis & arteriarum impulsus & liberalis sanguinis renitentis ad partes affluxus. Hinc utique differre oportet sanguinis subtractionem in diem intermissionis, vel remissionis, quo spasmus conquievit & liberior sanguinis ad partes affluxus restitutus. Est tamen ubi etiam ipso in paroxysmo spastico venam aperire insigniter conducit, non quidem in partibus spasmo affectis, sed iis ad quas sanguis maximo impetu grassatur. Sic sæpissime contingit, ut à spasmo partium abdominis, immo pedum, qui frigore horrent, ob incussum terrorem, aut aliam causam, sanguis ad pectus & caput impetuose agatur ipsamque apoplexiam vel suffocationem minetur; quo in casu utilissime & cum præsentaneo levamine

vena non partium inferiorum, sed superiorum in brachio, pertunditur.

Theorema IX.

Datur levior apoplexiæ species, quam sola tempestiva sanguinis missio discutit.

Scholia.

I. Quando vel ex vehementiori animi affectu, præsertim terrore, vel graviori inferiorum partium spasmio, sanguis cum impetu ad caput latus, vasa membranarum cerebri arteriosa copia ita distendit, ut motus eorum systolicus sufflaminetur, species fit apoplexiæ levioris. Est hic affectus foeminis sic dictis hysteris, sanguine plenis & sensibilibus corporis ac animi admodum familiaris, & à vulgo & imperitis medicis pro animi deliquio venditur, à quo tamen longe multumque differt. Etenim sub animi defectione cordis & arteriarum pulsus filet, facies pallida est & spiritus plane interclusus: in apoplectico autem hoc leviori insultu, omnis, sensuum tam interiorum, quam exteriorum, usus perit, membra immota jacent, cor vehementi palpitatione concutitur, pulsus magnus & celer micat & facies intumescit ac rubore suffunditur. Neque tamen mitior hæc apoplexia oritur à disruptis vasis, quod incurabile malum, neque à feri secessu, qui in paralyfin terminatur, sed à sola stagnatione sanguinis in canalium nimis distentorum alveis subnascitur. Compertum enim ex anatomicis est, arterias carotides & vertebrales etiam, quamprimum calvariam subeunt & per cerebri membranas excurrunt, crassiores suas tunicas, quibus alias in toto corpore arteriosa vasa vestita sunt, deponere; eaque propter non mirum est, à copia & impetu sanguinis ad cerebrum delati, vim eorum contractilem elasticam, cujus beneficio sanguis ulterius in venosos capitis sinus protruditur, minui & solvi, sicque sublata carotidum systole, cruorem in vasis membranarum cerebri plexuque choroideo nimium distentis stagnare & hinc sequestrationem atque influxum liquidi nervorum, à quo motus & sensus, intercipi istudque in motu sisti. Quæ quum ita sint, jam facile liquet, ad restituendam systolen, sanguinis per caput liberum progressum & liquidi in nervos influxum revocandum, vix præstantius & aptius dari auxilium, sanguinis sufficiente, ex aperta amplo foramine brachii vena, detractio; ita enim intra breve temporis spatium mens, sensus motusque corporis ad officium redeunt.

II. Perperam autem ægrotantium ita affectorum rebus & saluti consulunt, qui ob minus perspectas hujus mali causas, venam in extremitatibus inferioribus aperire suadent, quia hæ partes plerumque in ejusmodi accessione spasmio contractæ, frigida & à loco affecto nimis remotæ sunt, quo ipso impeditur, quo minus sanguis commode derivari queat. Quin aliquoties observavi, in corporibus, ubi totum nervorum systema ad spasticas contractiones valde proclive & extrema semper erant frigida, à venæ sectione, eaque pariori, intra aliquot horarum decursum vehementiam spasmodum in inferioribus magis increvisse; qua postea sanguis ad caput impetuosè propulsus, insultum quem descripsimus, apoplecticum peperit, adeo subinde invalescentem, ut nisi tempestiva sanguinis missione fuerit discussus, ægrum jugularit, aut minimum paralyfi memoriæque debilitate affecerit.

Theorema X.

Morbi capitis à sanguinis congestione vasorumque distensione oborti exigunt venæ sectionem, in vicinis tamen partibus instituendam.

Scholia.

I. Vehemens & contumax capitis dolor, narium frequens stillicidium, insania melancholica, vertigo, ophthalmia, capitis erysipelas, nec non laryngis & pharyngis inflammationes, sæpissime ortum trahunt à spasmis, nimia sanguinis ad superiora congestione & gravi vasorum distensione, præsertim in hypochondriacis, vel ubi ventriculus cum intestinis flatibus & scybalis turgent, vel spasticis constrictionibus laborant, quibus liber & æquabilis sanguinis circuitus intercipitur, ut magna copia & impetu ad alias partes, maximeque caput, ruat ibidemque morbos hos inducat. Et tum quidem ad derivandum sanguinis impetum omneque arcendum periculum, in loco capiti vicino, fronte scilicet, temporibus, sub lingua, item in collo, secare expedit.

II. In gravi quidem cephalalgia, ophthalmia, angina, venæ sectio sub lingua semper utilissima; in phrenitide vero, melancholia & capitis à causa interna dolore, venâ jugularis externa commodissime aperitur, aut si hæc ab imperito Chirurgo inveniri non potest, vena secundum longitudinem frontis exporrecta, quæ jugularis externæ ramus, collo prius sub mento contracto & spiritu retento, pertundenda. Solennis jam fuit hujus frontalis venæ incisio antiquissimis temporibus, teste Hippocrate, Sect. V. aph. 68. sic perhibente: *parti capitis posteriore laboranti in fronte excurrens vena incisa prodest.* Confirmat hoc Hollerius comm. in h. a. constat, inquit, experientia, quod hac phlebotomia multi derrepente à capitis dolore liberantur. Alexander quoque Trallianus lib. I. cap. 13. mirifice in phrenitide sanguinis è vena frontis missionem commendat, eademque phreniticum momento securasse testatur: & cap. 16. de melancholia scribit: *si humoris sanguinei materia cerebro impacta fuerit, tunc audacter vena in fronte secatur: nam obtotius corporis vacationem, si loco jam remedia adhibeas, nihil nocebis.*

III. Licet sectio venarum capitis, in fronte, pone aures, jugularis externæ, sublingualis, in morbis qui caput gravius offendunt, experientia teste, eximiam conferat opem; id tamen non universale est, neque omnibus omni tempore convenit, sed simul consideranda est ipsius corporis constitutio. Nam si ejusmodi capitis morbis magna vasorum plenitudo juncta, vel etiam spasmii vehementiores in inferioribus, sanguinem ἀπορῶς & cum impetu ad caput urgent, verendum est, ne dato per apertam ibi venam vacuo spatio, major cruoris copia eo invitetur. Quapropter Veterum peritissimi, unanimi suffragio ut vena simul in brachio vel pede solvatur, suadent. Sic Trallianus lib. I. cap. 16. si, præcipit, *circa caput aliquid moliri cogites, priusquam totum corpus recrementis liberum reddideris, offendes magis, quam juvabis, copiosorem materiam ad locum affectum attrahens.* Neque minus Hollerius comment. in alleg. aphorism. si dolor est, ait, in capite cum corporis plenitudine, oportet primum cubiti venam aperire, deinde secare venam frontis; si nulla adest plenitudo, tuto venam frontis statim secabimus; sique dolor capitis est per consensum, v.g. à suppressis mensibus, primum secanda est vena malleoli,

malleoli, deinde cubiti, tum frontis; si cœperit dolor à diaphragmate aut hepate, aperienda vena cubiti, post veniendum ad frontem; & quas plures adhuc de incisione ipsa tenendas cautiones subjicit.

IV. Ad sectionem venarum, quæ linguæ substratæ sunt, in angina, quod attinet; pariter notandum, & eandem cum periculo in corpore plethorico tentari, nisi plethora prius per apertionem venæ in brachio soluta fuerit. Obsequendum itaque est consilio *Tralliani*, quod *lib. IV. cap. I. de angina*, proponit: ego inquit, *sane novi, cum usus valde urgeret, me venam cubiti mane aperuisse, diluculo linguæ subjectas secuisse, & vesperi ex cremore ptisanæ lacrimam scammonii exhibuisse, atque ita anginam percuravi. Pergit deinde: novi etiam jugulares venas à me sectas esse, cum linguæ subjectas non invenirem, ac plurimum adjuvisse.*

Theorema XI.

In morbis pectoris, ut pleuritide vera & peripneumonia, incisio venæ in brachio sæpe summe est necessaria.

Scholia.

Vtut pleuritis spuria, quæ rheumatismi, sive doloris arthritici species est, à sero acri intra membranam pleuræ, costas cingente suborta, non semper sanguinis missionem poscat, sed sæpe sola diaphoresi felicissime tollatur; longe tamen alia ratio est pleuritidis veræ & peripneumoniæ, quarum illa nonnisi levior, hæc profundior pulmonum inflammatio est, à stasi sanguinis firmitus impacti pulmonum vasis prognata. In his enim utique sanguinis subtractione, quin non una, sed quandoque si corpus sanguine diffluit & plethora urget, reiterata opus est, ad incrementum inflammationis impediendum, quod fit, quando sanguis nimium in vasis congestus, stagnans & progressu libero exclusus, per proximum locum ad meliorem derivationem ex incisa vena evocatur, & quidem facta paulo ampliori incisione, quo eo citius & promptius impetu acquisito descendere & à pulmonibus derivari possit.

Theorema XII.

Triplex venæ sectionis eximius usus, evacuatorius nempe, revulsorius & derivatorius.

Scholia.

I. Evacuatorius venæ sectionis usus dicatus est minuendæ sanguinis plenitudini, & hoc proposito, nihil interest ex quacunque parte ipsum detraxeris. Derivatio ex usu est ad sanguinis fluxum ex parte affecta in alia loca opportuna adducendum & invitandum, quo ibi evacuetur. Sic in affectibus qui abdomen excruciant spasticis, flatulentis & qui à fluxu mensium & hæmorrhoidum impedito vel suppresso eveniunt, tutius secatur vena pedis, quam brachii, ad derivationem. Hinc recte *Hippocrates lib. de nat. hum. §. 20.* inculcat: *oportet venæ sectionem in doloribus dorsi & coxendicum in poplitibus & malleolis efficere.* Et *Severinus de efficaci medic. cap. 26. p. 62.* tradit: in dolore nephritico præcavendo, in promovendis hæmorrhoidibus, purgatione lochiorum, in ani inflammatione & prolapsu, in sanguinis vomitu, in ischiatide venam pedis secari quam felicissime. Contra ea in affectibus capitis, apoplexia, lethargo, mania, melancholia, phrenitide, catarrho suffocativo, asthmate sanguineo, hæmoptysi, pleuritide, peripneumonia, inflam-

Frid. Hoffmanni Oper. Tom. I.

matione hepatis spuria, sanguis mole & influxu peccans ac cito derivandus felicius & utilius ex proximiori loco, brachio nempe, exantlatur. Revulsio vero, seu potius avulsio, fit, quando sanguinis impetus ex partibus inferioribus ad superiores, sursum quasi retrahitur, sive revellitur. Ita in nimio mensium vel hæmorrhoidum fluxu utiliter vena secatur in brachio. Idem commode fit in gravidis ad abortum præcavendum, si vasa uterina à sanguine nimium infarcta & distenta sunt, ut pondus uteri deorsum tendentis, inferioribus quodammodo molestum fiat & onerosum.

II. Usus venæ sectionis derivatorius & revulsorius caute atque prudenter administrandus. Nam si obstructions vasorum à sanguine impactu submovendæ, non adeo largam, sed parcio rem ex loco vicino portionem subtrahere expedit, quod reliquus ad partem laborantem majori impetu ruat, & obhærescentem in minimis vasculis elidat; eo quod à parciori sanguinis missione resistans in venis majorem à celeritate vim acquirit. Hinc est, quod apertio venæ saphænæ non raro mensium fluxum in momento restituat & hæmorrhoidale stillicidium segnius incisione venæ in pede promoveatur & expeditius reddatur; quum contra subtracto in manu vel etiam in pede nimio sanguine, sæpe effectus obtinendi deficient. Si morbus vero est inveteratus & tanta vasorum obstructio, ut tolli nequeat; tum in corpore plethorico apertio saphænæ plus nocet, quam prodest, quia sanguinem versus uterum uberius allicit, ut major vasorum obstructio inde nascatur. Neque in hemicrania, seu capitis dolore contumaci, vertigine chronica, melancholia, venæ sectio in fronte quippiam adjumenti afferre potest, quia major inde sanguinis ad caput affluxus proritur & vasa membranarum cerebri obstructa magis infarciuntur, sed præstat tunc sanguinem ex inferioribus ducere. In malo ischiatico recenti venæ sectio in pede præsentaneum sæpe conciliat levamen, in diuturno vero malo neutiquam, sed incremento favet. Tutius itaque, si corpus succis & sanguine farctum, cum *Höllerio Commentar. in Sect. IV. aphor. 36.* primum venam secamus in brachio, deinde ischiaticam, ut non in uno, sed in diversis locis sanguis revellatur. Ac ibidem apprime ad veritatem hic auctor scribit; quod in dysuria, si fit ab infarctu renum à sanguine, item in inflammatione vesicæ, primum incidenda sit vena brachii, deinde etiam statim subjungenda saphæna in malleolo, aut poplite. Ex quibus omnibus plenius innotescit: in loco admodum vicino sectionem fieri posse, si morbus est recens & causa mobilis, neque adeo magna vasorum plenitudo; ubi vero diutius traxit ægrum, vel corpus nimium sanguine redundat, tum prius in remotioribus partibus, deinde in vicinis, venas aperire convenit.

Theorema XIII.

Multum interest ut iusta sanguinis quantitas evacuetur & quandoque reiterata venæ sectione opus est.

Scholia.

Aetate adolescentes, vel tenerioris texturæ homines vasisque tenuioribus præditi, & feminae quæ facile incidunt in animi deliquium, ob largiorem sanguinis missionem abstinere ab ea debent, sed potius, si venæ sectione opus angustiore foramine, neque simul & semel, sed plaga aliquoties digitis compressa, gradatim sanguis

mittendus his est. Foeminae vero post annum quinquagesimum, quo ordinario mensium fluxus desinit, largiorem postulant sanguinis extractionem, quod etiam valet in viris robustis, qui magna habent vasa, & ubi sub lauto vitae genere consuetus haemorrhoidum fluxus cessare incipit. Vernali tempore, praesertim Majo, corpora largiorem sanguinis e vena fluxum ferre possunt, quam tempore aestivo, vel autumnali: parcius vero sanguis venis eximendus est, in nimis haemorrhagiis, ut haemoptysi, in enormi mensium vel haemorrhoidum fluxu; neque etiam ante mensium ordinarium tempus multo sanguine corpus spoliare consultum, ne subsequatur fluxus, vel plane cesset, vel imminuatur.

II. In febribus omnibus inflammatoriis, item exanthematicis, si ob nimiam sanguinis copiam opus est ejus missione, curatius paullo circumspiciendum est, ut iusta emittatur quantitas. Nam si sub nimia ejus abundantia tantum parva portio educitur, ad unam vel alteram unciam, expansione sanguinis organica inde magis saepe incrementum, nihil juvat, ut potius plus obsit, inflammatio inde augeatur & exanthematum eruptio minime promoveatur; si vero supra modum & magis quam par est sanguis e vena hauritur, tunc pariter plus detrimenti, quam emolumenti affert; siquidem expulsio exanthematum, quae per sanguinem ad summam cutim delatum fieri debet, impeditur, ut materia corrupta summa cum perniciem intus maneat. In peripneumonia & pleuritide nimia sanguinis detractio impedit expectationem & discussionem inflammationis, quae etiam mediante sanguine fieri debet. In rheumatismis, erysipelate, doloribus arthriticis vagis & fixis, etiam haec observatio, ut iusta sanguinis quantitas ad morbum curandum relinquatur, necessaria, id est, ne vel nimium vel adeo exiguum evacuetur.

III. Si plethora, tam ad vasa, quam ad vires, nimis urget, magna saepe sanguinis portio, interdum ad libram unam medicam, ex venis exantlanda est, si vero parum extrahitur, sanguine majus spatium inveniende, plus ejus elater intenditur, magis expanditur, & saepe majori cum impetu in affectam partem irruit. Obversantur adhuc animo nostro exempla, ubi in eminenti plethora per parvum foramen duabus tantum circiter uncias educitis, intra paucas horas insultus apoplecticus sequutus fuit, qui largiori venae sectione in brachio, ad uncias octo, feliciter sublatus. Memini quoque a fluxu haemorrhoidali, vehementia frigoris suppresso, in Principe plethorico summas praecordiorum anxietates fuisse subortas, ubi secta fuit vena in pede, qua non ultra quatuor uncias sanguinis emissum, consequente symptomatum exacerbatione, anxietatis scilicet praecordiorum, vigiliarum, inquietudinis, spirandi angustiae, quae tamen omnia repetita ad septem uncias sanguinis missione, & quidem in altero pede, protinus conquieverunt.

Theorema XIV.

Rheumatismos, catarrhos, coryzam, tussim, venae sectio improvida saepe gignit; tempestive autem admissa egregie arcet.

Scholia.

I. Observatio in praxi medica attenta saepius nos docuit, a vena secta praesertim vere & autumnno, tempestate non adeo placida & serena, complures post aliquot dies in graves catarrhos, coryzas, tusses, passiones rheumaticas & febres catarrhales incidisse, idque familiarissime,

si non probe vestiti, corpus aerae frigidiori & humidiori, maxime vespertinae, objecerunt. Id enim fere perpetuum est, sub paullo largiori sanguinis missione perspirationem minui, adeoque humores per tubulosum cutis corticem sub forma vaporis evehi solitos in interioribus quodammodo remanere: id quod frequentius evenit, si corpora sunt spongiosiora & vasis exilioribus praedita. Neque ratio hujus effectus adeo latet. Nam detracta notabili sanguinis portione, vascula, praesertim minora & extrema, antea sanguine distenta, nunc detumescere & vacua fieri incipiunt. Et quum exquisitus admodum & sensibilis tonus in subcutaneo integumento vigeat, fit, ut sub aerae frigidioris accessu, fibrae cutis elasticae contrahantur ipsique tubuli sudoriferi sic occludantur, unde recrementa sudoris non modo in corpore remanent, sed & ab exterioribus ad interiora, praesertim faucium & bronchiorum loca glandulosa, vel etiam ad articulorum glandulas mucilaginosas, vel ad eorum ligamenta glandulosa, feruntur, ubi serum valde acre, falsum stagnans, molestas irritationes vasorumque constrictiones efficiens, cursum humorum liberum impedit, unde secessiones feri, dolores, ardores & copiosi humoris affluxus suscitantur.

II. Quemadmodum vero ex improvida vel nimia sanguinis emissionem catarrhorum fons & origo promanat: ita crebriori observatu constat, venae sectionem prudenter vere & autumnno institutam & quotannis repetitam, complures a coryza, gravedine & tussi anniversaria liberasse; maxime eos, qui antea sanguinis copia laborarunt, nunquam tamen venae sectionem admiserunt. Vernali enim tempore, ob majorem aeris rarefactionem & elasticitatem, turgent maxime sanguinea vasa, propter sanguinem a subtilioris aetheris accessu magis expansum. Si itaque omittitur sanguinis, vel a natura, vel arte facta vacuatio, sanguinis & humorum in locis maxime laxis, mollibus, glandulosis promptae ac faciles fiunt stagnationes, decubitus & feri secessiones; quae omnia mala per opportunam sanguinis ventilationem praescindi possunt.

Theorema XV.

Colica flatulenta uti a venae sectione nonnunquam exacerbatur; ita convulsiva & haemorrhoidalis eadem saepe levatur & abigitur.

Scholion.

Origo flatuum, qui intestina obsident atque moleste distendunt, pendet frequentissime ab intestinorum atonia, sive labefactato eorundem peristaltico motu. Nam sicut vigore hujus motus, & flatus, & alia in intestinis contenta, inferiora versus pelluntur: ita imminuto, vel destructo eo, ingens flatuum, praesertim in flexuris coli, circa hypochondria, proventus fit atque stagnatio. Haec vero intestinalis atonia maxime originem suam ducit a defectu laudabilis fluidi nervi & sanguinei, quare senes itemque a morbo convalescentes, vel affectu animi diuturno debilitati, nec non homines phlegmate abundantes & infrigidantibus admodum cibis vescentes, colica frequentissime laborant, quae non sanguinis imminutione, sed medicamentis carminativis, balsamico & aromatico elemento instructis, quam feliciter sanatur. Alia vero ratio est colicae sic dictae spasmodicae, sive convulsivae, quae a sanguine inter tunicas intestinales haerente easdemque cum vehementia distendente nascitur, ubi sanguinis tempestiva e pede missio, non modo ab hoc calamitoso malo praeservat, sed & illud

ipsum præsentissimè mitigat, quod etiam *Riverius* jam *Cent. I. obs. 44.* recte annotavit.

Theorema XVI.

Tam ante, quam post venæ sectionem, quædam utiles tenendæ cautiones.

Scholia.

I. Non facile, nisi summa necessitate urgente, in ipso æquinoctio vel solstitio, in plenilunio etiam & novilunio, vel die pluvioso & turbido, venarum sectio celebranda est; sed consultius est, aliquot dies ante hæc tempora & die sereno præservationis causa hoc institutum perficere, hanc maxime ob rationem, quia circa hæc tempora mensium fluxus ordinario incidunt & plures ex morbis spasmodicis, paroxysmi epileptici & qui hypochondriacis & melancholicis sunt familiares, redire solent, ante quorum accessionem corpus à superflua sanguinis redundantia per venæ sectionem liberare præstat.

II. Consultius semper est, præsertim si quis facile animo deficiat, non ventriculo vacuo, sed jussulo sumto, factoque paullo angustiori foramine, venæ sectionem administrare.

III. Post sanguinis per sectam venam decessum, nec potu, nec cibo onerare ventriculum oportet, multo minus se inebriare, aut corpus frigidum, vel humido aëri objicere. Crebra enim docuit experientia, plures hac ratione, Martio præsertim & Octobri, imprimis si corporis habitus fuit spongiosus, in coryzas, tussis, rheumatismos, febres catarrhales & pleuritidem spuriam incidisse; utpote per sanguinis missionem eamque largam, perspiratio non parum minuitur, eo quod subcutaneos & sudoriferos tubulos fluidum eximie exhaustum tanta mole non amplius accedens, eos non ita patulos atque apertos ut antea servat. Hinc aër frigidus accedens eos facile claudendo, humorumque cursum à superficie corporis ad inferiora reflectendo, jam memoratos morbos inducit.

IV. Magis pro sanitate est, primas vias ipsumque ventriculum à cruditate copia & sentina humorum, non per forte purgans, sed laxativum, ante usum venæ sectionis liberare. Cavendum vero maxime in plethoricis à fortibus purgantibus tanquam veneno, eo quod operationem suam vehementiori intestinorum spasmo exserunt, eoque liberiores sanguinis progressum valde turbando, perniciosas congestiones hinc inde in partibus sæpe efficiunt.

V. In foeminis ob mensium fluxum, & viris hæmorrhoidum stillicidio obnoxiiis, præstat semper venam pedis aperire, ne sanguis ab his emuntoriis divertatur: viri vero hæmorrhoidibus vacui, venæ sectioni in pede non in totum afflueant. Non semel enim observavimus, hæmorrhoides inde cæcas sine fluxu fuisse proritas, ad quas removen- das venæ sectio in brachio debuisset institui.

VI. A misso sanguine exquisitior victus ratio tenenda est, neque protinus æger ad pristinam diætam, perinde ut canis ad vomitum, redeat. Hinc majorem in modum detestandus est mos Germanorum, qui nunquam lautius edunt ac bibunt, quam ubi venæ sectione perfuncti sunt.

Theorema XVII.

Cucurbitulæ cum scarificatione vicariam sæpe præstant venæ sectionis operam.

Scholia.

Placet insignem locum ex ipso *Celfo lib. II. Frid. Hoffmanni Oper. Tom. I.*

cap. 10. de usu cucurbitularum cum ferro adducere, sic habentem: usus cucurbitulæ præcipuus est, ubi non in toto corpore, sed in aliqua parte vitium est, quam exhauriri ad confirmandam valetudinem satis est. Idque ipsum testimonium est, etiam scalpello sanguinem, ubi membro succurritur, ab ea potissimum parte, quæ jam læsa est, mittendum; quod nemo cucurbitulam diversæ parti imponit, nisi cum profusionem sanguinis eo avertit, sed ei ipsi, quæ dolet, quæque liberanda est. Quare in rheumatismis, præsertim quæ dorsum, scapulas & brachia occupant, in doloribus quoque artuum utiliter scarificatio fit sat profunda, & ubi dolor pressorius & constrictorius frigidus occupat, sed quod notabile est, parcior semper sanguinis quantitas ex læsa, quam ex sana parte educitur. Ad dolores podagræ avertendos, nonnulli singulis mensibus, non sine utilitate, scarificationem in planta vel dorso pedis admittunt. In efflorescentiis & deformitate faciei etiam utiles sunt scarificationes cum cucurbitulis, ad eliciendum & derivandum sanguinem à facie. In cutis defœdationibus, scabie, non inutiliter in obesis & spongioso corporis habitu præditis, identidem adhibentur.

Theorema XVIII.

In acutis, ubi vires non patiuntur sectionem venæ & celerem sanguinis emissionem, præstat paulatim & successive eum, si opus est, per scarificationes & cucurbitulas evacuare.

Scholia.

Præclaræ sunt hanc in rem monita apud *Celsum* qui *lib. II. cap. XI. opus est, inquit, cucurbitula in acutis quibusdam, si & levare corpus debet & ex vena sanguinem mitti vires non patiuntur. Idque auxilium, ut minus vehemens, ita magis tutum, nec unquam periculosum, etiam si in medio febris impetu, etiam si in cruditate adhibeantur; ideoque ubi sanguinem mitti opus est, si incisa vena præceps periculum est, aut nobili in parte corporis vitium est, etiam huc potius confugiendum est; cum eo tamen, ut sciamus, hic, ut nullum periculum, ita levius præsidium esse, nec posse vehementi malo, nisi æque vehemens auxilium succurrere. Ego in experientia fundatum quam maxime egregium hoc *Celsi* monitum deprehendi. Non semel enim, sed sæpius observatum à me est; morbos capitis, ut epilepsiam, vertiginem, insaniam, motus artuum convulsivos, à secta vena ac celeriori & paullo largiore sanguinis emissionem, incrementum cepisse, & paroxysmos sequentes graviores redditos, idque maxime annotavi in sensibilibus corporibus, juvenibus; contra vero educationem sanguinis per cucurbitulas quam optime ferre potuerunt & cum levamine malorum. Ratio mihi hæc videtur: quod vehementia spasmorum in partibus affectis, cui valde sanguis interius in vasis resistit, increseat, si subito ipsis detrahatur. In acutis febribus, quando à congestionem sanguinis in capite metuenda est phrenitis, consultius etiam est per cucurbitulas occipiti appositæ sanguinem detrahare, quam per venam cubiti sectam. *Ægyptiis* medicis olim, ut refert *Alpinus de Medic. Ægypt. pag. 79.* frequenti in more positum erat, in omnibus acutis febribus, ubi ex rubore in facie, assiduis vigiliis, phrenitidem metuebant, venas intra nates scarificare, maxime in diebus criticis atque ab iis tepido aquæ dulcis balneo educi. Ubi vero in morbis celeri opus est auxilio & derivatione sanguinis à parte laborante, v. g. in insultu apoplectico, peripneumonia, inflammatione uteri, syncope cardiaca,*

quæ ab infarctu sanguinis in corde fit, aut suffocationis periculo, parum opis præstant cucurbitulæ, sed potius circa locum affectum propius infligenda est plaga paullo amplior & sanguis celeriter educendus.

Theorema XIX.

Cucurbitulæ locum habent, ubi à sanguine vel fero in parte quadam externa stagnante dolores, tumores, inflammationes vel alia vitia fiunt.

Scholion.

Hanc veritatem quoque egregie confirmat *Celsus l. c.* dum ait: *usus cucurbitulæ præcipuus est, ubi non in toto corpore, sed in parte aliqua vitium est, quam exhauriri ad confirmandam valetudinem satis est.* Usus enim scarificationis duplex est, vel evacuatorius, vel derivatorius, ille ad minuendam plethoram, hic vero ad extrahendam materiam corruptam & infixam utilis. Multi ex Veteribus & præcipue Ægyptii negabant, cucurbitularum usum ad solvendam plethoram aptum esse remedium, sed certis tantum locis & partibus afflictis imponebant cucurbitulas. Verum quando illæ ipsæ omnium regionum partibus, dorso, brachiis, femoribus, cruribus apponuntur & paullo profundiores ac repetitæ fiunt incisiones, ad uncias sæpe duodecim educi potest sanguis, ejusdem ponderis, consistentiæ, quam qui è vena extrahitur. Nam aliquoties fecimus experimentum, siccando sanguinem per cucurbitulas elicatum, & invenimus tres partes ut in sanguine per venam emissio fluidi, ad unam partem solidi, ut adeo vulgaribus in Medicina erroribus id accensendum sit, sanguinem tenuiorem per cucurbitulas, crassiorem autem per venas evacuari. Interim ad exhauriendam & divertendam materiam vitiosam, cucurbitulæ præ venæ sectione eximio rem habent usum. In mentem mihi veniunt aliquot exempla, ubi in dolore vehementi scapularum, in oculorum doloribus & fluxionibus acribus, gutta rosacea, tumore capitis erysipelaceo, venæ sectio in pede vel brachio admixta, nihil profuit, scarificatio vero in collo, occipite & pone aures, item appositio cucurbitularum in dorso, egregium attulit levamen. Ægyptii in capitis, oculorum, aurium doloribus & fluxione, ophthalmia, lippitudine, item ad procurandum somnum, occipiti, collo & pone aures cucurbitulas applicabant, & profundioribus scarificationibus sanguinem eliciebant, ut refert *Alpinus l. c.* sed prius semper venam cubiti jusserunt aperiri; quod consilium utique in plethoricis non spernendum, sed magni æstimandum, etiam tunc ubi venæ faciei aut narium scarificandæ, in capitis vehementibus doloribus, vel insania, ne scilicet major dato spatio ad has partes proritetur affluxus. Ad dolores podagricos avertendos scarificatio singulis mensibus in planta pedum egregie ex usu est, ut vel in ipsa podagra scarificationis utilitatem *Cardanus lib. de art. parv. p. 113.* & *Platerus lib. II. prax. med. pag. 717.* aliquot historiis curatorum confirmet. Cæterum ad sphacelum abigendum, ne ulterius serpat, ulcera quoque pessima curanda, quam optime adstruit *Severinus de efficac. Medic. lib. I.* scarificationis usum. In mensibus & hæmorrhoidibus suppressis, etiam crurum scarificationes *Galenus de sanguin. mission.* plurimum commendat, quæ locum habere possunt in iis, qui averfantur venæ sectionem, vel ob vires cordis languidas, dispositionem ad lypothymiam, & teneritudinem ætatis sanguinis celerem ex aperta vena extractionem ferre non possunt.

Theorema XX.

Alius adhuc datur sanguinem extrahendi modus per hirudines, sive sanguisugas, à quibusdam medicis mirum æstimatas.

Scholion.

Antiquissimis medicorum hic sanguinem per hirudines evocandi modus minus cognitus fuisse videtur; meminit tamen ipsius *Plinius hist. nat. lib. XXXII. cap. 10. diversus*, inquit, *hirudinum, quas sanguisugas vocant, ad extrahendum sanguinem usus est, quippe eadem ratio earum, quam cucurbitarum medicinalium, ad corpora levanda sanguine, spiramenta laxanda judicatur.* Ex Arabibus quoque *Rhasi* sanguisugarum usus innotuit, & ex superioris ævi medicis *Zacutus* maxime *Lusitanus*, nec non *Amatus Lusitanus* & *Mercatus* earundem appositionem mire collaudarunt, inprimis in morbis qui caput infestare solent, ut gutta rosacea, pustulis faciei, capitis doloribus, præcipue rheumaticis, in vertigine, melancholia, angina & dentium dolore, in quibus easdem occipiti, collo & pone aures apposuerunt. Neque etiam ipse de salubritate evacuationis sanguinis per hirudines dubito, sed an major ab his, quam cucurbitulis scarificatis exspectanda sit utilitas, ego quidem non sine ratione dubito.

Theorema XXI.

Hirudinum applicatio orificio ani in hæmorrhoidibus suppressis ac inde pullulantibus morbis, valde commendari solet.

Scholion.

Hic modus sanguinem eliciendi ex venis ani per appositionem hirudinum, aliis mittendi sanguinem methodis in morbis, qui ab hæmorrhoidibus suppressis proveniunt, ut pathematibus hypochondriacis & quos secundum Hippocratem hæmorrhoidum fluxus solvit, ut phreneticis, melancholicis, hypochondriacis, nephriticis, ischiadicis, his à quibusdam præfertur de causis, quod hi morbi à stagnante in vasis intestinorum, quorum exitus est in hæmorrhoidalibus, oboriantur sanguine, qui longe facilius & propinquius evacuari possit & pars affecta liberari & levare per hirudinum ex ani venis suctum, ac si sanguis in aliis locis mittatur. Neque etiam ego negaverim, quod hirudines dictis in morbis præstiterint quendam usum, præsertim si *Zacuti Lusitani*, nec non *Amati Lusitani* & *Mercati* observationibus fides habenda; an vero à sanguisugis effectus præstantior exspectari possit, quam vena secta in pede, vel scarificationibus profundis in cruribus, ego experientia destitutus certa fide asseverare nequeo. Nam vidi multoties in vehementibus & inveteratis hypochondriorum spasmodicis, hirudines sine effectu applicatas, vidi easdem levamen tantum ad tempus attulisse, vidi quoque ab earum appositione ad hæmorrhoides cœcas mali moris ulcera & fistulas procreatas. Deinde ingens ratio dubitandi, quod ex parte affecta sanguinem hauriant hirudines, hæc est: quod ipsæ ex hæmorrhoidalibus externis, quum internæ lateant, sugant, quæ exiguum, vel plane nullum commercium cum vasis intestinalibus, mesaraicis & portæ ramis, in quibus tamen sedes pathematum spasmodicorum & hypochondriacorum, habent: in fluxu vero hæmorrhoidali, hæmorrhoides internæ sanguinem stillant, & ob id si convenienti modo & tempore fluunt, vitiis ex stagnatione in ramis venæ portæ oriundis, apprimè opitulatur.

CAPUT X.

De balneorum, pediluviorum & clysterum usu medico.

§. I.

Aqua simplex optima medicinalis. **T**anta est divini Numinis in procuranda hominum afflictorum salute benignitas, ut inter alia innumera, quæ in auxilium prompta sunt remedia, simplicissima & ubivis fere obvia profent, quæ & securitate, & efficacia, tum in morbis avertendis, tum expugnandis, aliis pretiosis, raris, arte etiam chymica operose elaboratis arcanis, longe superiora sunt; id quod omnes ingenui & periti in arte nostra viri ultro confitebuntur. Exemplo sit aqua communis. Hæc certe pura, omnis etiam materiæ salinæ vel terreæ expers, longe magis quam ullum aliud medicinæ universalis meretur nomen, utpote quæ in omnibus individuis, omnibus morbosis afflictionibus, tam internis, quam externis, acutis & chronicis, tam incomparabilem affert opem, ut nulla alia medicina huic æquiparari possit. Ipsi fontes calidi & frigidi salutiferi, quos provida & benigna natura nobis sponte largitur, laudatissimam suam quam exserunt in morbis, præsertim chronicis, debellandis efficaciam, humoris aquei bonitati, subtilitati & largiori hujus potui potissimum debent. Illa vero varii generis salia, quæ in sinu suo recondunt, tam neutra, quam alcalia, cum tenuissimo martis principio, vix aliud quippiam efficiunt, quam ut stimulum addant solidis corporis nostri partibus & tubulis, quo liquidum ingestum expeditius per vasa minima & excretoria ferri, humores tenaces, spissos dissolvere & excrementitias impuras salino-sulphureas partes temperare, diluere & è corpore evehere possit. Infusa quoque theiformia ex appropriatis pro ratione morbi speciebus confecta, quæ nostro tempore familiaris usus sunt, nec non lignorum & radicum decocta ex aqua, quæ in expugnandis longis & rebellibus morbis plurimum valent, præcipuam certe suam efficaciam ad fluidum illud aquæ elementum referunt, eo quod nec radices, herbæ & ligna in pulvere vel sub alia forma assumpta, nec ipsa decocta, nisi diluta satis & diutius usurpata, salutarem exserunt effectum. Pariter ptisanæ, quas olim *Hippocrates* maximi fecit in morbis acutis, & lactis vel feri lactis cura in iis morbis, qui ex acrimonia succorum proveniunt, egregii omnino sunt usus; præcipuam autem suam virtutem à diluente suo humore unice mutant.

§. II.

Aqua ex-
terni usus. Veterum
testimonio. Quod quidem quemadmodum de interno aquæ usu in propatulo est; ita eadem hæc aqua non minus externe etiam adhibita mirabiles plane & maxime salutes exserit effectus. Testatum id faciunt balnea & pediluvia, quorum præcipuum ingrediens & basis est simplex quidem aqua; nihilo minus tamen hæc sola, sine ullo alio additamento, modo aqua sit pura & levis, medicinalem longe saluberrimam præstant virtutem. Et certe balneorum aquæ dulcis usus in morbis præcipue internis & gravissimis, priscis jam tum temporibus fuit quam maxime solennis, ut ex *Hippocratis*, *Galenii*, *Cæli Aureliani*, *Aretæi*, *Celsi* & *Tralliani* scriptis luculenter patet. Potissimum in gravissimis capitis morbis, ut insania, sive cum tristitia, sive cum furore juncta, in atroci capitis dolore. Veteres summo cum fructu his uteban-

tur balneis. Et *Alexander* quidem *Trallianus* lib. I. pag. 107. sic prodidit: *aquarum dulcium balneum, si quid aliud, melancholicis opitulatur, sed diutius in eo morentur atque desideant, si etiam æstus fuerit.* Idem confirmat *Aretæus* lib. VII. pag. 134. qui melancholicos in aquis sponte calidis sæpe commorari jubet, hanc subjungens rationem, quia raræ & molles carnes ad hujus ægritudinis remissionem maxime faciunt, quæ tamen siccae & tensæ in melancholia laborantibus sunt. *Cælius* quoque *Aurelianus* lib. I. de morbis chronicis pag. 134. maniacis aquarum naturalium usum plurimum commendat. Et *Prosper Alpinus de Medicina Ægyptiorum* pag. 115. commemorat: melancholicos plurimos tepidis balneis perfecte sanatos esse. Pariter in renum calculo *Alexander Trallianus* pag. 543. 547. it. *Aretæus* pag. 118. si dolores valde urgent, infusus ad umbilicum usque mirifice commendant.

§. III.

Et auctoris
experien-
tia. Ipse etiam multiplici experientia edoctus, plena testari possum fide, quod in morbis capitis gravissimis debellandis, ut mania, melancholia, mentis stupore & torpore, somno inquieto cum terrificis insomniis, in hemicrania, vertigine, scotomia, dentium quoque atroci dolore & in gravioribus aliarum nervosarum partium doloribus, ut ventriculi cardialgicis, intestinorum iliacis & colicis, & qui à calculo renali proveniunt, balnea aquarum *Toeplicensium*, item infusus in aquam puram temperate calidam, etiam sub ipso paroxysmo & pathematum afflictione, præsentissimum attulerint levamen. Tam efficax enim balneorum in complandis doloribus & relaxandis spasticis stricturis est efficacia, ut quamdiu iisdem afflicti insident, omnes cruciatus & spasmi fileant, relictis autem illis, iterum accedant. Neque minus Veteres, teste *Celfo*, & *Ægyptii* teste *Alpino* l. c. pag. 114. in omnibus febribus, tam continuis, quam intermittentibus, exceptis pestilentibus, familiariter & utiliter adhibuerunt balnea, non tamen in principio & statu, sed declinante impetu. Ipse quoque in quartana serum, diebus vacuis, emollientibus & nervinis balneis non semel sine fructu usus sum.

§. IV.

Humores
derivantes.
Per
spiratio-
nem mo-
ventem. Præter hanc autem fibras rigidas, tensas & spasmo contractas emollientem & humorum ac sanguinis motum à capite & partibus superioribus ad alia loca determinantem & derivantem virtutem, balnea aquæ dulcis etiam egregie circulum sanguinis & humorum atque perspirationem per summam cutim promovent. Nam humiditate relaxant fibras & poros cutis, & calore suo expandunt sanguinem, majorem quoque cordis & arteriarum diastolen, quam in eadem proportionem & gradu sequitur systoles, efficiunt, unde pulsuum & magnitudo & celeritas crescit & circuitus humorum acceleratur, hoc aucto, sanguis fluxilior fit & tenuior, ad extimos tubulos corporis summamque cutim promptè fertur & diffusio atque exhalatio subtilissimarum sordium promovetur, quæ adhuc largior succedit, si quis statim à balneo concedit in lectum; eo quod circumfusæ aquæ gravitate vapores per spiracula exituri in balneo quodammodo coercentur ac reprimuntur, hac autem remota & absterfa, in lecto ex apertis atque expansis tubulis magna feri copia prorepat, ut universum sæpe corpus sudore perfundatur.

§. V.

Et heroico-
rum opera-
tionem se-
cundan-
tem.

Porro balnea sive semicupia in eo peculiarem sibi vindicant efficaciam, quod usum & virtutem medicamentorum sic dictorum generosorum, in persanandis gravibus morbis, mirifice secudent. Notissimum enim est, thermarum, acidularum vel aliarum aquarum salubrium in longis & valentibus morbis potum, longe feliciorum effectum & successum sequi, quando interposito usu balneorum, quam si solus instituitur. Non minus, mirabilis thermarum Carolinarum & acidularum Egranarum indies conspicitur in affectibus, præcipue spasmodico-hypochondriacis & ubi systema nervorum valde imbecille & afflictum est, efficacia, quando finito potu, in thermas Tœplienenses laborantes concedunt, & iis temperatis convenienti modo & tempore utuntur. Sunt enim hæc valde leves subtiles & puræ, quod partim per explorationem cum instrumento statico, partim etiam per evaporationem, qua nihil fere solidi relinquitur, innotescit, eaque propter ob insitam hanc puritatem atque subtilitatem, magnam vim penetrandi in intima solidarum partium & fibrarum quæ tensæ & constrictæ sunt habent, easdemque relaxando & emolliendo ad naturalem statum reducunt.

§. VI.

Ut mercuri-
vialium.

Decoctio-
rum sudo-
riferorum.

Purgan-
tium.

Emetico-
rum.

In atroci lue Gallica ejusque immanibus symptomatibus abigendis, præparato prius per venæ sectionem, laxantia & sanguinem edulcorantia corpore, ex mercurio bene præparata & dextre applicata medicamenta, sive ad salivæ fluxum, sive ad sudorem movendum data, miræ sunt efficaciam, quando sub eorum usu laborantes in balneum aquæ dulcis indies fere descendunt, postea lecto se committunt & sudorem expectant. Decocta etiam radicum, lignorum & sanguinem depurantium ex aqua, in morbis cutaneis, doloribus, exulcerationibus & qui ab enormi humorum acrimonia oriuntur, longe feliciter & citius desideratam exhibent operationem, si balneis interpolantur. Et certe dici vix potest, quam copiosas, crassas, pingues aquæ innatantes fordes mali odoris sæpenumero balnea ex intimis cutis tubulis eliciant. Si validioribus forsitan etiam opus est purgantibus, vel etiam acrioribus urinam cientibus, tutius omnia illa præmissis balneis usurpantur. Veteres quidem in rebellibus admodum morbis multum ellebori albi usu præstitisse constat, sed nunquam eum facile adhibuerunt, nisi prius in balneum corpus fuisset demissum. Hoc enim modo non solum succi fluidiores & magis mobiles fiunt tubulique excretorii relaxantur, ut eo melius & minori cum molestia peccans materia educatur, sed etiam remissis solidorum fibris, omnis noxa drastici ejusmodi vehementes spasmos & stricturas inducentis pharmaci arcetur. Idem ex usu est assumtis vomitoriis, quibus Ægyptii, teste *Alpino de med. meth.* singulis mensibus ad præservationem, sed nonnisi in balneo, utebantur.

§. VII.

Uterino-
rum.

Quando morbi ex uteri vitio & ejus vasorum nimia atonia ac distensione orti curandi sunt, ut fluor albus, vel præcavendus abortus, vel concrementa carnea, polypum referentia, vel molæ, quæ crebrioris abortus causæ sunt, expelli debent, vel etiam si menses sufficienter fluunt ideoque in ordinem reducendi, certe ego nunquam non congruis internis remediis uterinis, emmenagogis, balsamicis & purgantibus, frequentem balneorum jungendum usum suadeo, cum exoptato

semper successu. Medicamenta ex marte dextre præparata, liquida præsertim, item chinæ cortex, in infuso, vel decocto cum vino, leni sua balsamica adstrictione, tonum partium roborando in cachexia, in inveteratis intermittentibus febribus, in malo hypochondriaco, si ex motus peristaltici intestinorum debilitate provenit, eximium & saluberrimum præstant effectum; longe tamen tutior, longe felicitior ab iis expectanda erit operatio, quando corpus sub eorum usu movetur, aut crebrius balneo immisum mulcetur. Et hæc omnia multiplici experientia edoctus scribo.

§. VIII.

Ad ejusmodi vero balnea non adhibendæ fontanæ, asperæ, graves & calcarea terra onustæ, sed leves, subtiles aquæ, cujus indolis est pluvialis, nec non fluvialis, post imbres maxime hausta. Optimæ quoque ad instruenda balnea aquæ censendæ, quæ promte sub lotura maculas ex linteis abstergunt, ex quibus legumina & olera facile penitusque mollita coquuntur, quæ parum vel nihil materiæ post evaporationem relinquunt, & herbæ thee aliisque fervide infusæ easdem expedite recludunt & extrahunt. Quod si vero tales haberi nequeunt, utique arte illas corrigere & molles efficere oportet, id quod optime fit, adjecta portione lixivii, vel saponis Veneti, aut affusa quantitate lactis, aut quando decoctum furfurum triticeorum, item florum chamomillæ, nec non foliorum, florum & radicum liliorum alborum, ipsis commiscetur. Veteres uti patet ex *Cælio Aureliano pag. 575.* olea adjiciebant, & ad sopiendos dolores, item ad ischuriam curandam, quæ fit à spasmō & strictura orificii sphincteris vesicæ, ejusmodi balneis utebantur. Et sic concinnata emollientia balnea egregiam profecto opem ad facilitandum partum, præsertim in primiparis, ætatis paulisper adultæ & siccoribus, ultimis gestationis mensibus adhibita, conferunt. Pariter in atrophia dorsali infantum, item in rachitide eximia splendent facultate, eo quod, tubulos partium obstructos & constrictos adaperiunt, succum nutritium fluidiorem ac ut ejus æquabilis & liberior fiat ubique dispensatio, efficiunt.

§. IX.

Alia illorum naturalium balneorum est ratio, quæ ob principium martiale subtile quod recondunt, non emolliunt, sed potius partes roborant ac firmant. Innotescunt jam passim in Germania ejusmodi martiatæ aquæ, eoque nomine haud exiguum celebritatem nactæ sunt Freyenwaldenses in Marchia, Bebranæ in Thuringia, Raderbergenses & à nobis detectæ Lauchstadiensis in Misnia, Eppacenses & Weissenburgenses in Franconia. Omnes hi fontes levem quidem atque subtilem aquam vehunt, ob tenuissimum tamen martis sulphureum crocum, quem etiam si diutius quiescunt deponunt, & cum quo lintea in balneis, nec non injecta ova, flavo colore imbuunt, saporis sunt paullo adstrictivi & interne etiam in iis morbis in quibus martialia locum inveniunt, à perito medico cum fructu possunt usurpari. Longe tamen magis externus eorum usus in balneo celebratur, quam maxime proficius iis, qui corpora habent phlegmaticæ constitutionis, spongiosi fibrarum sunt habitus, vasaque copiosa & exilia gerunt. Sunt quoque ex usu ubi humores ob lentiores sanguinis cursum facile spissescunt, fordescunt & scorbuticam impuritatem contrahunt, unde languores, dolores rheumatici, arthritici, item tumores œdematosi, contracturæ quoque & imbe-

imbecillitates ac refrigerationes artuum, foecundo pullulant germine, quibus omnibus hæc roborantia balnea, ob principium tenue sulphureum martis, quo tonum ac robur languentibus partibus addunt & fibras laxas nimis adducunt, egregie opitulantur. Et licet ea adstringentium horum martialium balneorum natura sit atque conditio, ut nonnisi tepida & admodum temperata adhiberi debeant, & calore intensiori corpus mirum offendant, sanguinem commoveant & dolores capitis partiumque languores inferant; nihilo minus quando corpus post tepidum ejusmodi lavacrum, in quo superior ejus pars plus friget, quam calet, illico lecto committitur, incalescit, pulsus validius vibrat & sæpe ex toto corpore, cum insigni virium incremento & externarum partium robore, sudor diffluere solet.

§. X.

De balneis
roboranti-
bus artifi-
cialibus.

Accedunt balnea mitius roborantia artificialia, quæ nempe injectis & incoctis aquæ levi ac puræ speciebus cephalicis & nerveis amicis concinnantur & pariter eximia splendent efficacia. Usurpantur ad hæc balnea conficienda, inprimis folia lauri, herba melissæ, abrotani, majoranæ, origani, serpilli, thymi, rorismarini, hyssopi, hormini, menthæ crispæ, nepethæ, pulegii, matricariæ, flores chamomillæ vulgaris & Romanæ, quæ omnia sacculo inclusa, adjectis aliquot salis communis & cinerum clavellatorum manipulis, cum aqua leniter decoquuntur. Medicata ejusmodi corporis in folio lavacra saluberrima sunt in affectibus paralyticis, impotentia atque imbecillitate artuum, corporibus imbecillioribus, cachecticis, frigidis, senibus, ubi vires à morbis fractæ & nervi & ligamenta artuum quadam laborant atonia. Neque minus insigni cum fructu usurpantur in omnibus uteri morbis, qui post abortum, partum difficilem vel etiam puerperium impetunt, nec non quando uterina compages nimia humiditate diffluit, vel plane liquor viscidus albus ex muliebri sinu stillat & inde sterilitas est; promovent quoque egregie cohibitum menses, & in viris hæmorrhoidum fluxum.

§. XI.

Et vapores.

Aliud genus balneorum est, quæ audiunt vaporosa, sive Laconica. In his vapores, sive sicci calidi, ex accenso vini spiritu halantes, sive calidi humidi, ex decoctis herbarum cum vino vel aqua surgentes, immediate ad universum corpus, vel ad certas duntaxat ipsius partes, admittuntur. Est autem calidorum ejusmodi halituum maxima vis ad eliciendum sudorem, tubulos subcutaneos aperiendos, partes duras emolliendas rigidasque ac tensas laxandas, nec non tenaces viscidos humores dissolvendos, & solis calidis aqueis tantum vaporibus durissima animantium ossa & cornua emolliiri posse, vel coquis & pharmacopœis notum est. Hinc vaporosorum balneorum usus longe eximius in frigidis morbis, anasarca, tumoribus œdematosis, membris paralyti tactis, atque etiam lue sic dicta Gallica, item in tumore testium, ad prolapsum uteri, vel ani reprimendum, & pro diverso morbi statu & conditione ex variis concinnantur speciebus. In molestissimo illo dysenteriae fere perpetuo comite, tenesmo, vapores ex lacte & floribus sambuci præsentaneum afferunt levamen. Utiles quoque sunt ejusmodi vapores seu foci ad hæmorrhoidum fluxum proritandum, ante hirudinum appositionem necessarii. Et quia egregie orificia venarum uterinorum mucosæ obfessa expediunt, ubi

menses difficulter exsolvuntur, summo cum fructu adhibentur.

§. XII.

Quemadmodum vero unumquodque, quantumvis præstans remedium, imprudenter minus, que circumspicte usurpatum, salubri destituitur effectu; ita etiam balneorum improvidus & sine exquisita cautione administratus usus, plus nocet, quam prodest. Galenus quidem tria hanc ob causam in balneis observanda præcipit, ne qui balneantur aliquo pacto horreant, ne ullum viscus imbecille habeant & ne multitudo crudorum humorum in primis viis adsit. Potiora autem in balneorum usu tenenda momenta huc redeunt. Nimirum antequam eadem administrantur, semper prius solvenda est plethora alvusque libera reddenda; alias ab æstu lavacri gravia damna à congestionibus sanguinis ac humorum ad pectus & caput inde metuenda. Deinde cavendum maxime, ne nimio lavacri calore corpora adeo exæstuentur & quasi elixentur, ut sudore prorsus diffuant; hoc enim facto, ingruit animi deliquium, capitis dolor, lassitudo totius corporis, mentis torpor, oris siccitas & sitis, quam si quis frigida potione restinguere velit, facile gravius malum sibi poterit arcessere. Tempus balneo commodissimum est matutinum, post somnum, concoctione peracta & vacuo ventriculo, præsertim si alvus ante soluta. Expedit etiam corpus in balneum non statim totum immittere, sed successive, primo pedes, deinde femora, postea abdomen usque ad cordis scrobiculum, augendo etiam paulatim aquæ calorem. Neque nimis diu in balneo calido, præsertim martiali, commorandum est, ne vires debilitentur. Post balneum corpus committendum est lecto, quo sudor proliciatur, qui cum jussulo, vel decocto, aut infuso appropriato promoveri potest. In balneis vero nativis temperatis, ut sunt in Misnia Wolckensteinenses & Wisenbadenses, per aliquot sæpe horas desidendum est, præsertim si morbus est gravis & contumax ex vitio nervosarum partium spasmus constrictarum, si mens ex hypochondriorum vel uteri vitio laborat, si contracturæ adsunt partium, ex nimia rigiditate ligamentorum & nervorum.

§. XIII.

A balneis caveant, quibus caput debile, qui catarrhis & coryza affliguntur, qui ad asthmata & ad animi deliquia proni, vel lento hectico calore tabescunt, tanto magis à vaporosis, præsertim quæ cum spiritu vini accensio apparantur, quippe quæ valde commovent sanguinem & plethoricis atque cacochymicis insensibilissimum, ac ut experientia constat, imprudenti usu morbos capitis, affectus soporosos, apoplexiam, epilepsiam, scotomiam, guttam serenam inducunt. Simili ratione detrimentosa sunt balnea iis, qui ira graviter excanduerunt, & ipse aliquot memoria teneo exempla, quod usurpatis tum iis, febres hecticae, immedicabiles partium dolores & paralyse accesserint. Et quia dolor colicus sæpe à sanguinis per ani venas exitum molientis intra intestinorum tunicas stagnatione oboritur, sæpe etiam sub immanibus à calculo doloribus præsto est plethora, hoc casu, cautissime utique mercandum est cum ejusmodi calefacientibus balneis, quæ nonnisi plenitudine subtracta, adhibenda sunt.

§. XIV.

Balnea universi corporis sequuntur pediluvia, quorum quoad ingredientia eadem ratio, minor apparatus & ob id frequentior usus & balneorum vicarius.

Cautela in
balneorum
usu.

A balneis
quibus ca-
vendum.

De pediluvio
vitiis eorum
que opera-
tione.

vicarius. Vel enim ex sola aqua levi & pura, sine aliorum additamento magnoque apparatu, parantur, vel ad corrigendum aquarum gravium & asperarum vitium, lixivium, aut furfures triticei & chamomillæ flores adjiciuntur, vel etiam lac ipsis confunditur. Licet autem pediluvia tantum infimis & extremis corporibus admoveantur, eorum tamen virtus longe lateque se diffundit & graves in remotis etiam partibus morbos levat. Dum enim humore illo calido fovetur pedes, nervosæ, tendinosæ ac musculosæ in iis fibræ ex quibus intercurrentibus vasis coagmentati sunt, laxantur, remittuntur, pori & tubuli antea contracti ampliantur, sanguini aditus humoribusque debitus redditur commeatu; quo fit, ut impetus aliis partibus incumbens divertatur ac cum insigni levamine ad inferiora derivetur. Deinceps pediluvia etiam temperato suo calore agunt in sanguinem & humores sub eorum usu per pedum vasa transeuntes, eosdemque tenuiores ac dilutiores reddunt, quo longe expeditius per omnis generis in corpore tubulos cursum conficiant & quaquaversum promptius excurrant, quo etiam fit, ut si paullo calidiora adhibeantur, arteriarum pulsus augeant & sudorem per universum corpus eliciant. Adhæc ingens est pedum, ceu partium exquisitæ sensationis nervoso-tendinosarum, cum omnibus nervosis universi corporis maximeque in inferiore ventre sitis partibus, consensus, adeo conspicuus, ut si tantum perfrigerentur, illico dolores colici exoriantur, alvus stringatur, cutis horreat, perspiratio intercipiatur & mensium ac hæmorrhoidum fluxus sistatur. Quare non dubitandum, quin, si tepido humore mulceantur & spastica in iis strictura tollatur, salubris effectus ad remotiora ipsis annuentia organa propagetur ibidemque sese exferat.

§. XV.

Et certe pediluvia laudatissimi ad derivationem usus sunt in morbis, qui à congestionibus ad caput & pectus, per spasmos inferiorum maximeque hypochondriorum factis, subnascuntur, ut præter soporosos affectus omnes fere capitis morbi sunt, insania, mania, melancholia, cephalæa, hemicrania, clavus hystericus, vertigo, odontalgia, otalgia, gutta rosacea, ophthalmia, defluxiones oculorum falsæ, narium hæmorrhagiæ nimix & diurnæ vigiliæ, nec non quæ pectus affligunt asthmata convulsiva, dyspnœæ à copia sanguinis, cordis palitationes, tussis siccæ, hæmoptysis. Porro ob insignem qua pollent spasmos remittentem ac solventem efficaciam, egregie opitulantur in morbis spasmodicis convulsivis & doloribus, in cardialgia, dolore colico, præsertim hæmorrhoidali, torminibus ex calculo, ventriculi inflatione cum præcordiorum anxietate. Præterea etiam excretiones saluberrimas, perspirationis nempe, urinæ, alvi & sanguinis quoque sinceri, per menses & sedis venas, efficaciter pediluvia promovent, sanguini liberum com meatum conciliando, eundem attenuando & ad excretoriorum tubulos alliciendo. Neque minus graves capitis pectorisque affectus arcent & præscindunt, maximeque eos, qui per periodos accedunt, quin quotidianum eorum usum truces periodicas cephalalgias abegisse, ipse expertus novi. Sunt quoque qui in febribus intermittentibus pediluviorum usum suadent, die quidem intercalari vacuo, nec sine salubri effectus, uti patet ex *Obs. 144. Dec. II. An. VI. Misc. nat. curios.* de quartana pediluvio sanata & quæ *Kozack de salib. Sect. XII. cap. 10.* plura hanc in rem habet.

Quibus
conve-
niant?

§. XVI.

Monendum tamen, quod longe felicius succedat pediluviorum operatio, si plenitudo sanguinis per venæ sectionem in pede prius immittitur, si circa tempus somni administrantur, nec pedes post eorum usum refrigerantur, sed calidi servantur & in lectum transferuntur, eoque facto, auctior per universum corporis ambitum redditur perspiratio. Cavendum vero est, ne pedes lavacro immittantur eo tempore, quo mensium fluxus imminet, aut jam exsolvitur, eo quod divertendo ab utero & ad inferiora invitando sanguinis appulsus, ut ipsum profluvium vel sistatur, vel intercipiatur, efficiunt; contra ea aliquot ante statam menstruam periodum dies, ad promovendum fluxum egregie faciunt, præsertim si temperata emmenagoga vel pilulæ ad mentem Beccheri paratæ, simul in usum trahuntur. Abstinentium quoque quam maxime à pediluviis constringentibus, aluminosis, sulphureis, ad resiccandum molestum pedum sudorem, œdemata discutienda, ulcera abigenda, item si doloribus podagricis pedes exercentur; siquidem iisdem non sine periculo materia illa virulenta ad interiores nobiliores partes retropellitur. Et quoniam communis fervidus in Carolinis fons, vulgo *der Prudel*, virtutem quam maxime repellentem possidet; providus utique lavacri ex eo usus esse debet, in omnibus passionibus, ubi materia vitiosa externo corporis cortici incumbit, ac præsertim in doloribus arthriticis & podagricis.

§. XVII.

Inter remedia externa, domestica & facile parabilia connumeranda etiam clysmata, sive enemata, quæ nihil aliud sunt, quam decocta ex certis speciebus confecta & per syringam ano pro vario scopo & usu infusa. Habent hæc multum cum balneis affine atque commune. Balnea quippe lavacra sunt partium externarum, clysteres vero intestinorum quæ crassa vocantur, quæ eluunt, abstergunt & à contentis repurgant. Balnea velemollientia sunt, vel roborantia, clysmata pariter pro varia ingredientium ratione, solidas, rigidas, tensas & strictas partes molliunt & laxant, vel flaccidas & à tono dejectas firmant atque adducunt. Deinceps sicuti balnea sola applicatione externa tori sanguinis & humorum massæ virtutem insinuant, ut liberiores & expeditiores eorum progressum faciant simulque salutares excretiones faciliunt: ita etiam enematum operatio non solum in sanguinis & humorum circuitum, ex immutatione pulsus, sed etiam ad excretionem movendas, præter alvi subductionem, ex perspirationis & urinæ uberiori successu, luculenter patet. Balnea porro vi pollent insigni antispasmodica eandemque in dissitas spargunt partes: clysteres non minus hac pollere virtute, qui artis exercitia tractant quam optime norunt. Et denique quemadmodum immisso in lavacrum corpore, congesti præter naturam & non sine periculo in certa loca humores, ad alias externas & inferiores partes derivantur, quo æquabilis ipsis reddatur ubique com meatu: sic etiam clysmata ad divertendas à pectore & capite sanguinis congestionem, gravium pathematum genitricem, insigni & laudatissimo usu plurimum valent.

Clysteres
affines
neis.

§. XVIII.

Solent vero clysteres pro diverso medicationis scopo ex variis concinnari speciebus. Et sicuti indicationes in medendo ad quatuor potissimum fines directæ sunt, alterantem nempe, evacuan-

Et sunt

tem,

tem, roborantem & sedativum: ita eadem etiam clysterum ratio, ut iisdem vel indurata stercora emolliantur, aut qualitate infesta acria, acida & falsa recrementa attemperentur, vel contenta in crassorum canali evacuentur, vel languentes intestinorum fibræ & delassatus peristalticus in iis motus roborentur, vel denique spasmi tunicarum intestinalium remittantur & fibræ strictæ nimis laxentur. Quod si igitur intentio est duras fæces & stercora arida humectandi, vel etiam succos acres, falsos, corrosivos, acidos, biliosos in crassis obhærescentes obtundendi, clysteres optime parantur ex emollientibus & demulcentibus, cujus generis sunt lac animantium, decoctum rasuræ cornu cervi, pedum vervecinorum & vitulinorum, avenaceum, juscula carniū pingua, pinguedines animantium, butyrum insulsum, decoctum ficuum, mel, manna, saccharum, decoctum radicis altheæ, liliorum alborum, seminis lini, foenu græci, florum chamomillæ, verbasci, meliloti. Quæ quidem ingredientia, quum simul eximiam spasmos relaxandi virtutem obtineant, in omnibus affectibus spasmodicis, doloribus, febribus, sanguinis congestionibus, & ubi alvus sive propter spasmos obstipata, sive stercora indurata obstructa, commodam & utilissimam locant operam.

§. XIX.

Ubi alvum simul evacuare & fæces atque humores stagnantes subducere constitutum est, falia ejusmodi decoctis adjecta omne ferunt punctum, ut sunt sal commune, gemmæ, Ebshamenise, Sedlicense, digestivum Sylvii, nec non ammoniacum. Et certe dimidia salis uncia clysteri adjecta in evacuando majoris efficacis est, quam aliquot uncias electuariorum ex purgantibus concinnatorum. *Celsus* jam hunc in finem muriam alvo infundendam suadet, id quod etiam cum nostra muria, quæ & pota & per clysterem injecta potenter purgat, nec non cum Sedlicensi aqua, optime succedit. Huc quoque referenda enemata, quæ ex urina humana, vel animantium parari solent, ad educendas alvo viscidos ac lentos succos. Neque minus sapo Venetus solutus egregie pro clysteribus inservit, tum maxime, quando acida, viridis & corrosiva bilis tenellorum adhuc lactantium infantum intestina gravius exagitat. Quando vero fortiori stimulo opus est, tutius emetica, quam drastica & acriora cathartica clysteribus commiscantur, eamque ob causam *Derebeque in observatt.* vinum emeticum clysmatibus in hydrope & apoplexia indendum commendat.

§. XX.

Roborantes clysteres virtute sua non modo intestinis, sed & aliis partibus atonia laborantibus dicata sunt, & ob id varia etiam recipiunt. Quum quidem tunicæ intestinorum languentes roborandæ, carminativa sic dicta ex usu sunt, quæ flatus discutiunt & recrementorum evacuationem secundant, & ex his maxime semina quatuor carminativa majora & parata ex ipsis olea, baccæ lauri & juniperi. In gravioribus capitis morbis, ut apoplexia, paralyti, affectibus soporosis, auditus & visus debilitate, utiliter herba rutæ, majoranæ, rorismarini, satirejæ, thymi, salviæ, flores laven-
dulae, spicæ adjiciuntur. Ubi passionibus ex uteri vitio, maximeque ejus atonia oriundæ, affligunt, ob peculiarem & specificam quasi facultatem cum fructu adhibentur herbæ pulegii, artemisiæ, matricariæ, fabinæ, menthæ, flores cheiri, calendulae, radices aristolochiæ, nec non myrrha & galbanum, & ex his concinnati clysteres crebrius

injecti in restituendo mensium fluxu & expellendis molis eximia pollent efficacia.

§. XXI.

Ego quoque experientia edoctus in chronicis ex succorum impuritate, viscerum prava constitutione, infarctu humorumque stagnatione, affectibus, præsertim cachexia, scorbuto, malo hypochondriaco, mensium vel hæmorrhoidum suppressione, maximi facere soleo clysteres, quibus admixta amara & balsamica, cujus generis sunt trifolium fibrinum, summitates centaurii minoris, carduus benedictus, radix gentianæ, scolopendrium, rhabarbarum, essentia rhabarbari, elixir proprietatis, essentia fuliginis alcalisata, spiritus cornu cervi & massa pilularum balsamicarum. Et solo ejusmodi clysterum usu, desperatos se ad sanitatem reduxisse hypochondriacos testatur *Hercules Saxonia lib. I. prax. cap. 16.* Neque minus roborantia apprimè proficua clysmata confici possunt ex vino, quibus etiam ubi vires admodum languidæ nec corpus nimis sensibile, addi potest balsamum nostrum vitæ dictum. Hinc in *Actis Anglic. pag. 598.* mentio injicitur clysteris ex vino Hispanico, pipere & vitelle ovi, egregiæ virtutis, quod tota nocte retentum, viscera calefaciat & aliquot horis post sudorem moveat. Quin tam conspicua clysmatum ad corroborandum universum nervorum systema est virtus, ut ipsos febriles in intermittentibus insultus compe-
cant. Etenim *Helvetius* in peculiari tractu, de methodo febres sine interno medicamentorum usu curandi, perhibet; febres sola clysterum injectione ex decocto corticis chinæ cum aqua, vel etiam addito tantillo vini, optime posse persanari, id quod etiam *Albrecht, in Misc. nat. cur. Dec. III. An. III. obs. 127.* quinque confirmat exemplis. Et *Ægyptii* in quartana pro secreto habent clysterem ex decocti majoranæ libra una & tribus olei laurini uncias, uti auctor est *Alpinus de Medic. method. pag. 189.* addens: hoc clystere, & in meipso olim quartana vexato summa cum utilitate usus sum, & nonnullos tribus solummodo hisce clysteribus usos, sanatos fuisse, vidi.

§. XXII.

Superfunt denique clysteres sedantes, doloribus complacandis & spasimis solvendis inservientes. Horum in numero sunt clysteres ex meris oleis, pinguedine animantium & butyro insulso conflati, qui, ubi tunicæ coli à vehementi spasmo obsidentur, ut ipsius cavum angustetur, flatus retineantur & dira oboriantur tormina, uti obvium est in colica convulsiva spasmodica, præsertim hæmorrhoidali & quæ ab inhærente acri caustica à superficie corporis repulsa materia suscitatur, laudatissimæ sunt virtutis. De his magnifice admodum ex Veteribus sentit *Ætius*, qui *lib. IX. cap. de colica* clysterem antispasmodicum parari jubet, ex butyro recenti, adipe anserina, gallinacea, medulla cervina, adipe ursina, cumino, foliis rutæ, nardo Celtica, castoreo & oleo rutaceo, addito hoc præcepto: *utere hoc ipso in vehementibus doloribus, evacuatione tamen prius per alium clysterem facta, & post horæ spatium mensuram unam mediocris poculi trepescantam infunde & jube quiescere ac aliquandiu pharmacum retinere, atque ita divinam ejus videbis facultatem.* Quod si vero spasimis nimius æstus sanguinisque orgasmus jungitur, ut in doloribus capitis, articularum, hæmorrhagiis, clysteres cum sero lactis, vel lacte ex emollientibus & anodynis quam optime injiciuntur, floribus scilicet chamomillæ vulgaris, sambuci, verbasci, meliloti, nec non croco, nitro depurato & oleo amygdalarum dul-

cium. Non minus in pathematibus spasmodicis, epilepticis & convulsivis motibus, ut specifica ad-
dantur ex usu est. In hysteris quidem pathema-
tibus sagapenum, asa foetida & castoreum ac-
commoda sunt. In epileptico & convulsivo in-
fultu, radix, semen & flores pœoniæ, succus
lumbricorum terrestrium, liquor cornu cervi suc-
cinatus, utiliter commiscuntur; cuius generis cly-
stere ex antepilepticis & tinctura castorei parato
primiparam epilepsia tentatam egregie esse leva-
tam testatur *Harderus in Misc. nat. cur. Dec. III.*
A. II. obs. 100.

§. XXIII.

*Clysterum
usus va-
rius.*

Hi itaque clysteres pro varia medentis inten-
tione amplissimi in praxi medica sunt usus, quem
Celsus lib. II. cap. 12. sic in compendium sistit :
*alvi ductio per lotiones semel vel summum bis non
omittatur, si caput grave est, si oculi caligant; si
morbus majoris intestini est, quod Græce κόλον no-
minant; si in imo ventre aut in coxa dolores sunt;
si in stomachum quædam biliosa concurrunt, vel
etiam pituita eo se, humorve aliquis aquæ similis
confert; si spiritus difficiliter redditur; si nihil per
se venter excernit; utique si juxta quoque stercus
est & intus remanet, aut si stercoris odorem nihil
dejiciens æger ex spiritu suo sentit; aut si cor-
ruptum est quod excernitur; aut si prima inedia
febrem non sustulit; aut si sanguinem mitti, quum
opus sit vires non patiuntur, tempusve ejus rei
præterit; aut si multum ante morbum aliquis po-
tavit; aut si is, qui sæpe, vel sponte aut casu pur-
gatus est, subito habet alvum suppressam. Præ-
ter ea autem quæ in superioribus de enematum
in variis morbis utilitate passim inferui, tenen-
dum adhuc, quod in genere quam maxime con-
ducant his, quibus venter ægrius descendit &
stomachus imbecillis medicamenta ad subducen-
dum efficacia sustinere nequit. Pariter in febris
continuis & exanthematicis præstat semper
clysteribus & venæ sectione, si opus est, cura-
tionem auspiciari, & sub eadem etiam si alvus
clausa, clysteribus insistendum. *Christianus* quo-
que *Langius in Misc. natur. curios.* omnibus vul-
neratis serio commendat clysmatum usum, ne
alvi suppressio inflammationes vel sanguinis sta-
gnationes augeat. Possunt etiam clysteres aliis
adhuc quam quorum meminimus usibus, pro va-
ria morbi ejusque causæ conditione, adaptari,
quo inprimis referendi illi, qui in diarrhoeis, dy-
senteris & intestinorum erosionem, tam ad acrem
humorem contemperandum, quam exesas partes
consolidandas summo injiciuntur cum fructu,
conficienda ex decocto pedum vitulinorum, vi-
tello ovi, sevo hircino, bolo Armena, tragacantha,
succo cancrorum fluviatilium, spermate ceti,
balsamo de Copaiva & sulphuris therebinthi-
nato.*

§. XXIV.

*Ec late pa-
rens vir-
tus.*

Et licet clysteres efficacia sua proxime affi-
ciant intestina & in substantia & materia crasso-
rum limites non transcendunt; nihilo minus ta-
men eorum virtus, non modo ex intestinis, tan-
quam partibus nervosis & quæ cum reliquis ner-
vosis corporis partibus exquisitum consensum
alunt, ad alias & remotas etiam propagatur,
sed & ipsi sanguini ac lymphæ insinuatur. Prius
ex eo patet, quod clysmata, si nimis acria, te-
ste *Avicenna can. med. lib. I. Sect. IV. cap. 17.* fe-
brem accendant, emeticis imbuta vomitum mo-
veant & dolores vel in suprema corporis regione
complacent; posterius vero nutriendum, confortans
& stupefaciens eorundem facultas testatum facit,
& quod, ut quidem fidem faciunt *Act. Angl.*

pag. 598. spiritus vini per inferius os injectus,
longe magis inebriet & infatuat, ac si eadem
mensura per œsophagum ingurgitetur. Potissi-
mum tamen conspicuus est clysterum in intesti-
nis tenuibus doloribus & spasticis constrictionibus
laborantibus effectus, hanc maxime ob causam,
quod illud crassorum amplissimum colon tenuia
cingat iisdemque ubique sit circumvolutum, ea-
que propter infusum eidem emolliens & pare-
goricum clysmata, blando tepore suo, contigua
tenuia simul afficiat, & penetrante per tunica-
rum poros vapore, iisdem facultatem insinuet,
haud secus ac vesica decocto emolliente repleta
extrinsecus apposita, in magnis internarum par-
tium doloribus, spasms & inflammationibus le-
vamen affert præstantissimum.

§. XXV.

Ut autem saluberrimus clysterum effectus eo
certius obtineatur, utique in eorum, haud se-
cus quam in aliorum sanitatis præsidiorum usu,
circumspectio adhibenda & necessariae quæ-
dam cautiones tenendæ. Nimirum sunt quidam
adeo sensibilis naturæ, ut intestina clysteres pla-
ne ferre nequeant, & ipse viderim, colicos alio-
que dolores eo magis increvisse, quo plura clyf-
mata injecta, qui postea solo interno conveni-
ti laxante eximie levati. Et sicuti in his clyf-
terum injectio non urgenda; ita etiam acres non
statim applicandi, quando alvi excrementa diu-
tius retenta, ne plus trahant ad infarcta intesti-
na & obstructionem obfirmant, sed potius præ-
mittenda his enemata, quæ laxant, lubricant,
stercora emolliunt & evacuationi viam pan-
dunt, uti perite monet *Mercatus lib. I. pag. 64.*
Post pastum quoque clysterum usus tempestivus
minusque proficiuus, eo quod ciborum concoctio-
nem atque digestionem inturbat; chyli elabo-
rationem & extractionem impedit ac nimis cele-
rem ingestorum evacuationem proritat.

§. XXVI.

Neque etiam alvum crebro nimis & jugiter
clysteribus sollicitare expedit; tum quia virtu-
tem intestinorum expultricem sequiorem reddunt,
ac ut natura iis affuefacta officii spontaneæ ex-
cretionis obliviscatur faciunt, tum etiam, quod
subita & repetita crebrius liquoris clysmatici vel
nimis calidi, vel perfrigerati infusione, ordina-
ta illa & naturalis fibrarum intestinalium ten-
sio lædatur & inordinati motus provocentur, ac
quum nullum enema applicari possit, quocum
non simul flatu intrudatur, flatuum metuendus
sit proventus. Præterea quia intestina etiam cras-
sa partes sunt admodum nervosæ, omnia quæ
nervis sunt inimica, frigida scilicet, acida, au-
stera, drastica virulenta & salia acriora, opiata,
narcotica, item adstringentia, penitus ex clyf-
teribus debent excludi, ne motus intestinorum
peristalticus inde lædatur, vel destruat, quo
salvo, ciborum digestio cum saluberrimis se-
cretionibus & excretionibus ex voto succedit, quo
destruendo, intestina spasms, flatibus & fecibus
multis cum molestiis obsidentur. Quibus denique
addi etiam merentur prælara *Celsi l. c.* monita,
servanda, inquit, illa sunt, ne ducatur ulla
cruditate substante; ne in corpore infirmo, diuque
in adversa valetudine exhausto; neve in eo, cui
satis alvus reddit quotidie, quive eam liquidam
habet; neve in ipso accessionis impetu, quia quod
tum infusum est, alvo continetur, regestumque in
caput, multo gravius periculum efficit.

*Cause
ipso-
plicas
serva-*

Es mor-

CAPUT XI.

De aquæ frigidæ potu salutari.

§. I.

IN hac de salubritate frigidi; imprimis aquæ puræ, potus, disquisitione, duplex potissimum nobis agitandum est argumentum. Unum, quo demonstramus, quid ab humido potus, utilitatis, ad sanitatem, vel integram conservandam, vel labefactatam recuperandam, sit expectandum. Alterum, ut evictum demus, potum ejusmodi, ob id etiam quod frigidus est, peculiare saluberrimas exserere virtutes & medicinæ præstabiles gerere vicem.

§. II.

Utilitas humido-
rum in cor-
pore hu-
mano de-
monstra-
tur. I. ex
structura
corporis.

Sane perutile ac necessarium esse, humidum ac diluens potus elementum, ad conservandos vitales machinæ animalis motus, comprobant multa. Omnis enim corporis humani structura fibrosa est & vasculosa. Singulæ ipsius flexiles partes ex innumeris majoribus, minoribus, minimis & tantum non infinite parvis canaliculis coagmentatæ. Atque per horum alveos fluida perpetim feruntur, progrediuntur & circumaguntur. Docent hæc omnia uberius anatomica, maximeque immortalis nominis RUYSCHII, injectiones & observationes exquisitæ. In hoc autem fluidorum per solida progressu continetur vita, atque illo per tenuissimos tubulos cursu absolvitur nutritionis, secretionum atque excretionum negotium; sine quo nec sanitas, nec partis ullius functio potest consistere.

§. III.

ndem
bat II.
tura
guinis.

Quod igitur per tubulos adeo exiles in corpore vivo & sano decurrit fluidum; utique esse debet valde tenue. Atque etiam sic esse evincit experimentum nostrum, quo constat, sanguinem sani hominis è vena missum, libratum & in vase amplo fornaci calidæ impositum, facta successive humidi exhalatione, tres partes amittere, restitante tantum una sicca & solida. Neque tamen venosus sanguis genuinum de subtilitate & fluiditate omnis in corpore sanguinis fert testimonium, sed is, qui corde & majoribus arteriarum ramis continetur, longe tenuior, eundemque vel triplo majorem humidi quantitatem habere, haud est improbabile. Nam si quis potum & cibum, à sano & operoso homine assumi solitum, ad siccitatem reducet, computatione facta, novem circiter liquidi partes, ad unam solidi, inesse, patebit. Lac quoque, quod nihil aliud, quam extractus ex alimentis succus, ex quocunque fere animali depromptum, per distillationem, minimum septem liquidi partes largitur, relicta duntaxat una solidioris massæ parte. Lymphaticus quippe & chylosus liquor, qui subclaviæ venæ successive copiose infunditur, sanguinem diluit insigniter. Sanguis autem humido sic imbutus, pergit ad dextrum cor, ex quo mittitur in pulmones, in quorum vasculis & vesiculis, hausto per inspirationem aëre, conquassatur, atteritur & quoad minima intime miscetur. Quo floridus & fluidissimus redditus, venit in sinistrum cor, & ex hoc in universum corpus diffunditur, pro subeundis secretionibus & excretionibus obeundisque functionibus variis, quibus factis, per venas tandem iterum confluit in cor.

§. IV.

Uterius
evincitur
III. ex cau-
satione
gravissi-
morum
morbosorum
per aquam

Patefcit jam, quam necessarium sit ad mixturem & vitalem sanguinis motum, humidi elementi, multis modis solidum superantis conubium. Ex quo porro facile colligitur, non tam adversum esse vitalibus humoribus humidi, per potum, nisi fuerit insalubris, assumpti excessum, quam illum, qui in cibis solidioribus admittitur. Vicissim expedita est ratio, quare ex defectu potus, foeminis & vitæ sedentariæ addictis, multæ longæ & graves passionēs, à succorum spissitudine & facta inde minorum tubulorum obstructione, accidunt. Innotescit quoque, cur ad arcendas & persanandas, acutas æque ac chronicas passionēs, non certius, tutius & magis præsens sit remedium, quam humectantia & diluentia. Quorum in numero sunt Veterum pisanæ, serum lactis, aquæ minerales & medicatæ, thermæ & acidulæ, decocta & infusa vegetabilium cum aqua. Neque minus in promptu est causa, qui fiat, ut pharmaca maximarum virium, ex minerali regno petita, in gravibus rebellibus & diuturnis passionibus nihil fere eximii præstent, nisi accesserit humidum sufficiens, virtutem in venas omnes diducens.

§. V.

Pluvialis
aqua ceta-
ris præ-
stata.

Permoverunt me hæc omnia, cum aliis rationum momentis, ut jam ante viginti & quod excurrit annos peculiari dissertatione assererem: aquam esse medicinam universalem. Non tamen omnem. Sunt enim variæ, sæpe non salubris indolis aquæ. Sed quæ panaceæ nomine digna, levissima est & purissima, heterogeneis, terrestribus & salinis particulis destituta. Quibus dotibus splendet potissimum pluvialis, ruri in aëre libero, non ex stillicidiorum compluviis collecta, nec non destillata. Talis enim subtilis, pura & levis aqua subit expedite corporum intima, quæ dura & rigida mollit atque mulcet, firmioremque ipsorum compagem eliquat atque dissolvit. Unde, uti œconomis notum est ac coquis, ad promptiorem ciborum, qui compactioris texturæ, coctionem, item ad eluendas maculas abstergendasque sordes, adhibetur utiliter. Neque ea propter dubium est, quin in humano corpore, rigidas præter naturam fibras mulceat atque adeo adversus inde oriundos multos & difficiles morbos, præsidium sit certe probatissimum.

§. VI.

Damna
potus frigidi.

Quæ quum ita sint, de salubritate potus aquosi dubitabit quidem nemo; sed quod etiam actu frigidus conducatur & ipsis in morbis sit præsidio, certe arbitrantur non omnes. Grave de noxa potus frigidi est artis nostræ parentis, HIPPOCRATIS, jam testimonium, quod lib. de intern. affect. V. §. 18. sic habet: *frigido potu, si quis inconsiderate utitur, spasmos & rigorem inducit. Nam exiit inquinamenta prohibet, & ossibus & cerebro bellum indicit.* Et sane calidi sunt in omni animante humores. Frigus autem, vitæ ipsique servientibus motibus, censetur insensissimum. Nam succos densat, fibrasque & ex his coagmentata tenuissima vascula constringit. Quo secretionum & excretionum successus inturbatur, ipsique libero sanguinis progressui, in quo maxime vitæ sanitatisque ratio est posita, ponitur obex. Docet præterea experientia: graves, immo funestas, multas, chronicas & acutas passionēs, à frigido potu fuisse inductas. Inflammationes scilicet ventriculi, intestinorum & pulmonum, morbos spasmodicoconvulsivos, asthmata, phthisin, hydropem, hecticam, hypochondriacum malum, menstrui & hæ-

morrhoidalis fluxus suppressionem, indeque ortas gravissimas totius systematis nervosi passiones & quæ id genus plura.

§. VII.

Usus frigidorum in corpore humano.

Licet autem hæc negari omnino nequeant; neutrquam tamen ea propter frigidum potum penitus esse damnandum censemus. Dabimus potius rationis & experientiae suffragio evictum: eundem quandoque medicinam præbere, efficacem non minus, quam salubrem. Frigus enim ipsum naturæ humanæ non adeo adversum est ac inimicum, uti vulgo putatur. Observamus certe, homines & animalia frigidarum septentrionalium regionum, frigus non modo ferre innoxie, sed & longe robustiora, vivaciora & foecundiora esse iis; quæ sub calido cælo vivunt & aluntur. Tempore hiemali, sub constitutione aëris quantumvis gelido, epidemici morbi gravissimi, nec non anomalæ febres, rariores sunt minusque infestæ, quam æstate & cælo regnante æstuoso. Experti sumus id jam per aliquot annos, quibus ob æstatis fervorem nimium insolitamque siccitatem, ubivis fere, varii generis anomalæ febres, acutæ & chronicæ, nec non dysentericæ, populares habuerunt circuitus & stragem ediderunt haud levem. Atque etiam huic insalubri aëris & temporum constitutioni siccæ nimisque calidæ, illud haud immerito videtur tribuendum, quod ab aliquo tempore, major semper mortuorum fuit numerus, quam natorum. Nemo porro non novit, sub cælo sereno frigido, spirantibus ex oriente & borea ventis, vires esse vegetiores, ciborum appetentiam cum digestionem promtiorum ipsumque somnum suaviorem, ac æstate & sub atmosphæra levi ac calida, cujus indicium fert mercurii in barometro descensus. Frigidus enim aër elasticus est & expansivus, fibrasque stringendo, robur ipsis addit, eaque propter cordis omniumque vasorum systolicum motum intendit. Cujus in confirmationem facit præterea domesticum, sed curiosum experimentum, quo exemptum carpinis majoris cor adhuc palpitans, simulac aquæ tepidæ injicitur, illico motum intermittere, in frigidam projectum eundem repetere, iterum calidæ commissum, amittere, & in frigida postea aliquandiu adhuc concuti cernitur. Ne dicamus, pisces in aëre frigido aliorum delatos, diu vitam servare, in calido autem brevi exspirare.

§. VIII.

Potus aquosus frigidi saluberrimus.

Ad ipsum frigidum aquosum potum quod attinet; est is utique, uti antiquissimus & communissimus, ita etiam saluberrimus. Non levis enim hanc in rem momenti est observatio, quod qui potibus spirituosis, cerevisiis inebriantibus, vino & aquis sic dictis vitæ liberalius utuntur, gravissimis morbis frequentius afficiantur, apoplexia scilicet, paralyfi, suffocativo catarrho, capitis doloribus, phthisi, hæmoptysi, peripneumonia, hydrope, calculo, podagra, hæmorrhoidum turbis & inde oriundis pathematibus, nec non internorum æque ac externorum sensuum vitiis. Illi vero qui frigidum & simplicem aquosum potum bibunt; longe rarius omnibus his diris malis sunt obnoxii, sed corporis & animi vires habent integras, appetitu pollent meliori, albos etiam & compactos, nec exesos dentes gerunt. Nec ea propter ratione caret illud Turcarum præceptum, quo vini potus ipsis serio interdictus, tum, ut occasio præscinderetur ebrietatis sensusque interni sibi constarent semper, tum etiam, ut in calido sub quo degunt cælo, vita & sanitas servaretur integra. At-

que etiam in Italia & Hispania, ubi calidior atmosphærae habitudo, solennis est frigidus, quin glaciatus, potus, quo æstus restringunt tam utiliter, ut, sine eo, vix sanos esse incolas, optimates præsertim, vini potui simul indulgentes, per experientiam constet. De quo testis gravis est RAMAZZINI, de *tueud. princip. valetud. cap. V.* perhibens: *pro singulari beneficio à divina bonitate, ad repellendam aëris æstuantis violentiam, nix est accipienda, in regionibus præsertim calidioribus, ut in Sicilia, regno Neapolitano ac tota fere Italia, tum pro sanis, tum pro ægris corporibus. Ubi enim, uti aliquando evenit, cum per hiemem vel pauca nives, vel nullæ delapsæ fuerint, ac propterea nivalis annonæ caritate laboretur, annus ille pro nefasto habetur. Nec observatione caret, quod in hujusmodi casu, longe plures & graviores morbi vagati fuerint, quam ceteris temporibus.*

§. XI.

Quod si autem in modum, quo frigus in potu salutarem exsequitur effectum, inquiremus; præter id, quod motum intestinum partium in sanguine, intensiorem, cum inde pendente calore attemperat, à roborante facultate eundem potissimum repetendum esse censemus. Enim vero robur & imbecillitas in genere, quæ partibus corporis vivi & sani insunt, non secus ac in universo, ad virium motricium quantitatem, vel auctam, vel imminutam, referri debent. Deinceps robur animantium vitale, certam in fluidis & solidis dispositionem requirit. Quo magis quippe solidæ partes tensæ, strictæ & compactæ, quo copiosior liquidi tenuissimi, quod in sanguine præsertim arterioso & poroso nervorum contextu continetur, est in partes influxus: eo validior solidorum, eoque expeditior liquidorum crassiorum per canales est motus. Contra ea, quo remissiores fibræ, solidas corporis partes componentes, quo parcius fluidi mobilissimi arteriosi & nervosi influxus, eo major ad motum imbecillitas & in circumagendis liquidis defectus. Plurimi porro morbi vel à stasi, sive quiete perfecta, vel à stagnatione, sive lentiore humorum progressu, & ingignuntur, & sustentantur. Et hæc morbosæ causæ pendent ab elatere & motrice solidorum vi imminuta. Frigoris autem in universum is in corpore effectus, ut fibras stringat atque adducat. Igitur, quando potus corpus subit frigidus, laxatas solidas partes moderate constringendo firmat, quo dum non modo vasorum diameter minuitur, sed & impensior fibris conciliatur resistantia, humorum etiam motus partim liberior redditur & expeditior, partim quoque alio determinatur. Ex quibus utique fit planum, frigidum potum, ob roborantem hanc suam facultatem ad præscindendas humorum stagnationes & excutiendam quæ in vitio est materiam, adeoque morbos & arcendos, & persanandos, usus esse longe saluberrimi.

§. X.

Jam, ut propius accedamus ad scopum, omnis medicatio eo dirigenda, ut non tantum temperata mixtio in humoribus, verum etiam symmetria & legitima proportio in vitalibus motibus, conservetur. Ad hanc autem obtinendam, transeundum interdum ad extremum contrarium: Et ipsa illa generosa remedia, quibus magna juvandi virtus inest, à temperie desciscunt & ad extremum quoddam inclinant. Nam scite non minus, quam vere, tradidit MARTIANUS *Comment. in Hippocr. de humid. usu, pag. 128.* mediocritas, inquiens, in calefaciendo & frigefaciendo,

ciendo, sicuti extra noxam est, ita etiam parum prodesse potest. Quippe remedium temperatum, ut aliquando CELSUS dixit, æque tutum, æque debile est. Quæ vero extra mediocritatem sunt, ea, ut lædunt, quibus non conveniunt, ita opem ferunt, quibus convenientia existunt. Et is etiam sensus est prisca illius canonis medico-practici: similia similibus conservantur, & contraria contrariis curantur. Etenim sanitati, cujus ratio in humorum temperie motuque æquabili reposita, amicissima similia, quæ temperiem hanc servant atque tuentur. In morbis autem, quia ab immoderata humorum qualitate nascuntur & motus ab æquabilitate deflectunt, desiderantur in curatione contraria, quæ excessum, aut defectum ad legitimam proportionem, temperiem & symmetriam reducant. Sic ubi redundans sanguinis & humorum copia morbos ingenerat, tollenda hæc est contrariis, famæ, sanguinis missione & evacuantibus. Vicissim, quum succorum laudabilium roscidorum sit defectus, necessaria nutrientia, quæ sanguinem & humores refarciunt. Calor excedens, exigit refrigerantia, humiditas nimia, exsiccantia; motuum languor roborantia; impetus motuum, sedantia.

§. XI.

Inde nunc etiam patescit, quando, & qua ratione, frigus in potu salutarem edere possit effectum; de quo specialius porro agendum. Atque ut initio dicamus de illa corporis humani præter naturam constitutione, in qua æstus immoderatus fervidusque intestinus partium sulphurearum motus præsto est, uti potissimum accidit in febre; tum certe ad æstum restringendum & calidum motum componendum, potus apprimere ex usu est frigidus. Citabimus hujus in confirmationem aliquot probatissimæ fidei testes. Ille artis nostræ dictator, HIPPOCRATES, *epid. lib. VI. Sect. IV.* sic præcipit: *calida naturæ refrigeratio confert, aqua potus & quies.* GALENUS ad ardorem in febribus temperandum, præbuit aquam frigidissimam ad satietatem. CELSUS in præfatione meminit medici cujusdam CASSII, qui febricitanti cuidam & magna siti affecto, frigidam aquam ingessit, eoque, protinus febrem somno & sudore discussit. PRIMERO-SIUS de vulg. error. lib. I. cap. XL. in febre, inquit, si julepi aut denegentur, aut parcius exhibeantur, corpus à calore febrili emaciatur ac marcescit, unde non parum damni ægrotantibus imminet. Sed potius talibus febribus laborantibus copiosius & sæpius præberi debent, ad calorem febrilem temperandum, naturam recreandam; eoque audacius, si coctio præcesserit. Naturales enim evacuationes criticæ, per sudorem, alvum vomitumque adjuvant.

§. XII.

Potissimum in ardente & biliosa febre, ceu præstantissimus commendatur frigidus potus. Sic HIPPOCRATES jam lib. II. de morb. §. 36. tradidit: in febre biliosa, quæ hominem quotidie corripit, & os amarum jungitur, & vomitio juncta, & ad lumbos cruraque gravitas, ea die qua febris detinet, quantum quis bibere volet, aquam frigidam sumere oportet. Et lib. de affect. intern. §. 2. idem auctor prifanæ succum bis de die frigidum assumere suadet. Neque minus in ardente febre dare jubet potiones frequentes & paullatim quam frigidissimas GALENUS meth. medend. lib. IX. cap. V. præter venæ sectionem, potionem frigidam impense laudat, adjecta ratione, quia extinguit febrem & naturam robustam reddit, ut dein per alvum & sudorem ex-

pellat, quæ noxia sunt. CELSUS lib. III. cap. XII. perhibet: Si in summo incremento est morbus ardens, utique non ante diem quartum, & magna siti accedente; frigida aqua copiose præbenda est & ad satietatem danda, quia pro medicamento utuntur. Idem sentit ALPINUS de medic. method. lib. II. in continentibus, scribens, febribus, vehementer æstuosis, medici omnes largum potum algida aquæ exhibere suescunt, quia calorem nativum concentrat, ut statim inde suis & calor cesset; roboratur inde totum corpus, & aqua epota digeritur morbus, & plerumque largissimos sudores frigida aqua potus suscitatur, nonnunquam vomitus biliosi fiunt, & aliquando per alvum copiosi profluunt & urinam copiosam excitat. Mirabile est, concludit, quomodo tale præsidium has febres expugnet. Nam excretionibus, quas aqua suscitatur, hæc febres finiuntur. Neque minus apprimere hanc in rem idem auctor de medic. Aegypt. lib. IV. c. XV. prodidit: aliqui, ait, pro secreto habent synochas & ardentes febres, multam aquam angariæ, (quæ cucumeris species) ægrotis propinantes, sanare; si modo febricitantes ea multis diebus in cibo ac potu sola utantur. Alii, tempore vehementioris æstus, largius frigidam potandam concedunt, qua epota, ægros multis pannis contingentes, sudorem procurant, quo non paucos audio sanatos fuisse.

§. XIII.

Nosmet ipsi de saluberrimo hoc potus frigidi effectu, in febribus sic dictis biliosis ardentibus, in synocha biliosa, nec non catarrhali illa synocha, quæ elapso anno hic & alibi grassata, item in tertiana continua & duplici, ex longa & attenta nostra experientia, confirmatius testamur. Novimus enim, quod urgentibus in hisce vigiliis assiduus, impenso succos & corpus consumente ardore; siti inexhausta, cum cutē arida & exsucca, decoctum cornu cervi & scorzonearæ, cum syrupo acidi citri & nitro conditum, frigidum, crebro; sed minutis haustibus, ad duas vel tres mensuras quotidie potum, emolumentum attulerit summum, somnum & largum sudorem induxerit, anxietatem autem viriumque languorem strenue discussit. Et mirum utique videtur, eas frigida aqua, aut frigidus alius diluens potus, sudorem moveat valide. Sed ubi æstu interno uruntur in corpore cuncta & intestinus partium sulphurearum motus est vehementissimus, frigidus intus susceptus potus eundem non modo attemperat, sed & calore interius tepidatus, fibras & canales subcutaneos laxat, ut sudor erumpat largissimus. Tanto magis vero & certius hic respondet effectus, si sufficienti aquæ quantitati indantur simul refrigerantia, acida & nitrosa. De quorum virtute sudorifera notabilis est RIVERII observatio, quam inferuit Cent. I. obs. XIX. sic habentem: observandum, à spiritu sulphuris, vel ejus loco spiritu vitrioli, cum aqua exhibitio, sudores copiosos fuisse provocatos, quod multis nobis experimentis innotuit, qui plures tertianas curatas vidimus eodem remedio, in summo accessionis æstu & urgente siti exhibitio; unde copiosi sudores provocabantur, à quibus non solum paroxysmus, sed etiam totus morbus integre solvebatur.

§. XIV.

Quo magis semper improbavimus & improbandum censuimus, illum perversum, tum medicorum quorundam, tum adstantium morem, qui urgente mordaci æstu, in febribus, exanthematicis etiam, variolosa; morbillosa, purpurea, nec non synocha, ægris frigidum potum penitus denegant, ac nisi calidum infusi theæ,

Ipsius Auctoris experientia.

In febrili etiam æstu an potio frigida deneganda?

aut decocti caffee, concedunt, eosque præterea tricliniis & lectis calidis includunt atque ob-ruunt. His enim nihil aliud efficiunt, quam ut anxietates augeant, vires exsolvant, inquietudinem accersant, quin sæpe expulsionem materiæ ad summam cutim magis impedian, quam juvent. Frigidus potius potus, modo si dextre & perite ministretur, vires mox reficit facilioremque reddit ipsius morbi decursum. Sanguinis enim & humorum texturam, quam calor dissolvere nititur, firmat ac servat, fibrasque ab impetuoso motu & æstu labefactatas, roborat & adducit, quo id quod in vitio est eo promptius excutiant.

§. XV.

*Ufus ejus-
dem in
morbis à
cruditati-
bus biliosis
oriundis.*

Præterea spectatæ quoque medicæ virtutis frigidus est potus iis in morbis, quorum sedes & fomes primis in viis, ex cruditatibus acidonidorosis viscidis stomachi ac duodeni, ex bile corrosiva nerveas tunicas arrodente, nec non ex atonia & motus defectu indeque oriundis flatibus molestis. Inter hos autem præcipuus fere ille morbus sic dictus cholericus, crebris alvi dejectionibus, vomitionibus, nausea, præcordiorum anxietate, ardente circa præcordia dolore, virium prostratione, corporis jactatione & frigido sudore stipatus. Qui, quia natales trahit ex decubitu & congestione sordium acrium biliosarum, partim ex sanguinis & humorum massa ad intestina delatarum, partim ex male ingestis & egestis heic collectarum; optime utique fert frigidas, aquæ inprimis puræ, portiones, vel solas, vel etiam idoneis aliis remediis nuptas. Hæ enim humorum acredinem diluunt, orgasticam commotionem minuunt, fibras simul firmant tunicasque roborant, eoque faciunt, ut, quæ præfens est excrementitia materia, promte & minori cum dolore expurgetur, novus autem affluxus impediatur, ac potius ad corporis habitum aliaque congrua emunctoria divertatur.

§. XVI.

*Experien-
tia Aucto-
ris confir-
matur.*

Confirmatum id habemus memoratu digno foeminæ generosæ exemplo. Erat hæc constitutionis sanguineo-cholericæ & biennio abhinc ex ira & eduliis variis incongruis passione corripiebatur cholericæ. Intra diem enim & noctem plus quam trigiesies per superius & inferius os dejiciebat viridia, assumpta quævis vomitu reddebat, præcordia angebantur cum sudore frigido, vires languebant insigniter, vigilia urgebat assidua & aderat præterea febris, alternis semper diebus ingravescent, sub cujus accessione ipsa mens emovebatur. Accitus ego, illico ptisanam, ex rasura cornu cervi, scorzonera & hordeo excorticato, conficere, ac hujus quatuor cochlearia, cum decem liquoris anodynæ mineralis guttis, singulis binis horis frigide sumere jussi. Pedes dein qui admodum erant frigidi, calidæ immittere, ventremque balsamo vitæ inungere, præcepi. Tum sedato quodammodo vomitu ac dolore, suavi liberaliorem ptisanæ potum frigidum & usum pulveris, ex glacie Mariæ præparata, cornu cervi philosophice præparato, conchis, cancrorum lapidibus & aliquot olei macis guttis. Quibus intra quâtriduum substituerunt vomitus & dejectiones, febris facta mitior, sequutus somnus & sudor validus, ac morbus solutus. Quam in rem conferri etiam potest observatio, quam in *tom. IV. medic. system. Sect. II. cap. V. de mirabili potus aquæ frigidæ in cholera succellu & cura attulimus.*

§. XVII.

Nec alienum erit, in uberiores confirmationem, adducere nonnulla auctorum testimonia luculenta. Optimam & huic nostræ omnino conformem choleram sanandi methodum tradit ARETÆUS, *lib. II. de curat. acut. passion.* Præcipit enim: ne in principio supprimatur, sed potius promoveatur humorum vitiosorum exitus, sorbendo aquam tepidam assidue, sed paucam: Dein si torquentur intestina & pedes frigescent, alvum irritandam esse calido unguento monet. Si autem biliosi humores per inferiora dejecti, biliosus tamen vomitus adhuc adsit, cum fastidio, anxietate, virium lapsu, vult, ut frigidæ aquæ cyathi duo, aut tres propinentur, ad ventris adstrictionem, quo retrogradus humorum cursus prohibeatur & stomachus ardens refrigeretur. Si vero arteriarum motus ad parvitatem lapsi fuerint, sudor circa frontem & alias partes stillatim decidat, & alvi profluvium & vomitus sistatur, præfente animi deliquio, tum parum odorati & adstringentis aquæ frigidæ esse infundendum. CÆLIUS AURELIANUS, Methodicorum facile princeps, in choleric morbo frigidam aquam per intervalla sorbere suadet, & catapotia ex ononide composita cum duobus cyathis aquæ frigidæ assumere. ALEXANDER TRALLIANUS recte quidem externum frigidorum usum prohibet in cholera, *lib. VII. pag. 376. sed pota, scribit, aqua frigida maxime omnium convenit, quæ paullatim bibatur; si virium summa imbecillitas, parum vini addendum.* Perite tamen *l. c. pag. 475.* monet, tum utilem esse frigidam: *si biliosa per alvum & vomitum egeruntur; si æger vehementer sitit & linguam scabram habet; si æstas fuerit, æger juvenis & calidiori victu primum usus.*

§. XVIII.

Ex quibus jam recte per analogiam concludendum: in illo choleric admodum affini intestinorum affectu, quo cum intolerandis fere torminibus ac tenesmo, biliosa & cruenta deji- ciuntur creberrime, non minus proficuum esse frigidum aquosum potum, easdem etiam ob causas. De quo saluberrimo effectu frigidi potus in dysenteria, uberius præterea testatur experientia. Sic DIEMERBROECK *Observ. XXIX.* meminit dysenteriae desperatæ, potu frigido sanatæ. In *M. N. C. Dec. II. ann. IX. Observ. 53.* memoratur: cruentas dejectiones, cum febre continua, acerbis torminibus, siti inexplebili, aquæ Nuceriænæ frigidæ ad plures cyathos potu, fuisse percuratas. Nos ipsi testamur experti, diluentes potus, ut lactis serum, lac lymphatum, ebutyratum, aquam simplicem, aut mineralem leniorem, Selteranam scilicet, aut Swalbacensem, in dysenterico morbo profuisse eximie. Vidimus id maxime in illa dysenteria, quæ ante aliquot annos, ex calida diuturna insolita æris æstate constitutione infestavit epidemice, nec paucos sustulit è medio. Qui enim domesticis his remediis ac diætetis usi, melius habuerunt & sæpius convalescerunt iis, qui pharmaceuticis, quantumvis pretiosis antidysentericis, à morborum artificibus sunt tractati.

§. XIX.

Accedit vomitus biliosus & diuturnus, in quo compescendo pariter præstans est frigidus aqueus potus. In hoc certe vidimus multoties saluberrimum effectum, non modo à potu acidu- larum

larum Antonianarum frigidus, sed & pituitosa, nec non aquæ frigidæ simplicis, cui aliquot spiritus vitrioli, aut liquoris anodynæ mineralis guttæ instillatæ. Licet etiam potus liberalius acidulis, primum crebriores per os & anum sequutæ dejectiones biliosæ, remisit tamen brevi vomitus, nec postea infestavit amplius. Digna est quæ hanc in rem notetur observatio in *M. N. C. Dec. III. An. pag. 166.* de sacerdote temperamenti cholericæ, qui per multos annos in more habuit, ut, quotiescunque se, tempore præsertim æstivo, bile repletum sentiret, frigidam jejuno stomacho copiose hauriret, eoque ingentem bilis copiam per superiora & inferiora egeret. Hæc autem evacuatio, haud immerito partim humiditati & copię aquæ, quæ quasi foridum præbet vehiculum, partim etiam ipsi frigori, quod delassatam motricem in fibris stomachi & intestinorum vim revocat & intendit, videtur tribuenda.

§. XX.

dejectione
viscida
crudum.

Non dispar ratio est, illius materiæ viscidæ vomitus, aut minimum conatus vomendi, qui a collectis crudis & male coctis in stomacho succis, matutino tempore, nonnullis, præsertim senibus, cum pectoris angore & magno egerendi nisu, accidit. Nam licet ad hunc præscindendum quidam ex usu esse putent, haustum aquæ cujusdam destillatæ spirituosæ, aut, ut vocant vitæ, vesperi assumptum, tantum tamen abest, ut speratus respondeat effectus, ut potius alvus obliviscatur officii eoque malum ingravescat. Nos potius secunda & explicita ratione suppetias tulimus multis consilio: ut abstinerent à spirituosiss, ac circa somni tempus quartam mensuræ partem aquæ frigidæ biberent, mane vero infusum thæe, vel melissæ, aut veronicæ, corticibus citri conditum, calide in lecto sobillarent, ac postea lenem madorem expectarent.

§. XXI.

passione
ca, co-
Hæ-
hoidi-
sup-
ss.

Quæ porro intestina detinent tormina, tam colica, quam iliaca, sive à biliosis mordentibus succis, sive etiam à sanguine in vasis tunicarum intestinalium hærente oriantur, optime & certo levantur liquido, maximeque aquoso, frigide & copiose sumto. Oritur enim dolor hic à causa, ut Veteres loqui solent, calida; eaque propter ipsi optime occurritur contrarius, frigidus potus. Scilicet incidit sæpius, in primis post iram suppressam, ut in corporibus juvenilibus, nec non virilibus, exquisitoris sensus & cholericæ constitutionis, acres biliosi humores in cavo & flexuris intestinorum hærentes, ipsaque mora aciores reddit, non modo acredine sua nervosas intestinorum tunicas mordeant, sed & in vapores resoluti, easdem distendant nimium, eoque doloris sensum inferant acerbissimum. Neque etiam insolens est, in iis maxime, quibus suetus hæmorrhoidum fluxus suppressus, quod sanguis redundans, lentius per portæ venam & hepatis viscus means, in connexis tunicarum intestinalium vasis subsistat, illa distendat, has premat & ad spasticam stricturam exstimulet, qua flatibus prohibetur transitus & passim proritatur distensio, ac propter pressionem æque ac distensionem, tormina suscitantur fere intoleranda. Potus autem aquosi frigidi diluens, temperans & roborans est facultas. Hinc mordentes biliosos succos, diluendo ipsorumque intestinum motum compefcendo, ita obtundit atque cicurat, ut vellicatione non amplius doloris sensum inferant. San-

guineum quoque crassum obhærescentem fluxilem reddendo, liberum facit ipsius per intestina com meatum, quo sublata à distentis vasis pressione, tollitur & dolor. Fibris præterea ob nimiam expansionem à robore dejectis, robur reddit, ut iterum sese contrahant, flatusque ad anostium protrudant, quo pariter doloris conciliatur levamentum.

§. XXII.

Qui salutaris aquæ frigidæ in doloribus intestinorum effectus, sicuti firma omnino nititur ratione; ita non minus per experientiam certus est atque probatus. Exstant enim de eo passim in medicorum commentariis luculenta & testimonia & exempla. E quibus instar omnium id, quod consignavit LUDOVICUS SEPTALIUS, *animadvers. lib. VII. pag. 248.* dignum quod inferatur totum. *Contingit, scribit, aliquando, ut colici dolores adeo vehementes sint, ut omnem medicamentorum operam eludant, ac quocunque auxilio adhibito, potius augeantur. In quo casu erit ad contraria transeundum. Quum enim colici dolores majori ex parte à materia fiant, aut à flatibus distendentibus; fit aliquando, ut aut ratione dolorum, vigiliarum, aut mororis ob contumaciam, aut invalescant nimium, aut intestina, accedentibus etiam calidis & foris apposis remediis, aut phlogosi quadam tententur, aut etiam vera inflammatione incipiant affici, aut multa præexistens bilis ibidem transfundatur. Unde ad contraria erit transeundum & insigniter refrigerandum. Quod mihi præterito anno contigit, in nobili quodam Hispano, qui cum colicis doloribus per aliquot dies acerrime fuisset conflictatus, & jam jam mors esset præ foribus, nulli persentirentur arteriarum pulsus, sudores essent resolutorii, nulla denique superesset spes salutis, ne quidem apud Medicos, etiam præstantissimos; accersitus & ego, cum fuim inextinguibilem, linguæ scabritiem, nigrorem atque duritiem, pertactis autem hypochondriis & ventre inferiori, calorem in partibus illis æstuantem adesse observassem; Hispano aquam multam, nive etiam refrigeratam, bibendam exhibui, cum natura abstemius esset. Et multæ aquæ potator in somnum prolapsus est, & quatuor horarum spatio cum dormisset, dolore quodam inferioris ventris, à primo maxime, ut ipse referebat, diverso, excitatus à somno, miram bilis flavæ copiam evacuavit & à doloribus liber evasit. Unde collegi, medicos, qui illius curationem susceperant, in causa morbi illius longe deceptos fuisse, cum calidis remediis curationem instituissent, à frigida materia morbum factum judicantes. Ut brevitati studentes mittamus illam AMATILUSITANI historiam, quam Cent. I. curat. II. de muliere colica ex causa calida laborante, quæ ex potu aquæ frigidæ subito incantamenti instar dolore levata est, nunquam redeunte, habet, nec non illam, quæ in *M. N. C. Dec. II. ann. X. obs. 139.* reperiunda. Nos quod in confirmationem adducamus, habemus potissimum exemplum Serenissimi Principis, qui colicæ biliosæ sæpissime patitur insultus, contra quam præsentissimum ipsi remedium Schlangebadenis aqua, qua ad duas vel tres mensuras subfrigide hausta, illico dolor levatur ac cessat.*

Probatum
exemplis

§. XXIII.

Pari ratione in spasmodicis & anxietatibus præcordiorum, in sic dicto dolore cardialgico, stomachi ardore & foda, præstans est potus frigidus facultas. Oriuntur enim ut plurimum hæc passiones

In stomachi
vitiis,
spasmo,
ardore &c.

à colluvie acrium biliosorum, vel etiam acidorum humorum in primis viis, maximeque ventriculo, hospitantium, & mutua quasi fermentatione majori acrimonia imbutorum. Quibus dum nervosum os stomachi superius male afficitur, oritur inde strictura spastica, dolor, ardor & anxietas. His autem certo & cito succurrere aptus est frigidus potus, succos mordentes diluens motumque in ipsis suppressens, quo minus vellicent. Hinc recte MARTIANUS in ardore stomachi cardialgico hoc remedium plurimum commendat. Et CELSUS lib. I. c. VIII. ex vero scribit: *qui tarde concoquunt & quorum illico præcordia inflantur, quique propter ardorem, cum noctu sitire consueverunt, antequam conquiescant, duos vel tres cyathos aquæ frigidae, per tenuem fistulam potent.* Idem nosmetipsi experti testamur, qui sæpius observavimus, aquam frigidam, vel solam, vel liquore anodyno mixtam, opem tulisse præsentissimam.

§. XXIV.

In malo
hypochondriaco.

Inter morbos, quorum sedes in prima corporis regione, est adhuc pervicax illud hypochondriacum malum. Sane qui hujus ortum & causas habet perspectas; is ultro fatebitur, aquæ potum frigidum adversus illud esse apprimè utilem. Fundamentum enim hujus passionis atonia est stomachi & intestinorum. Hanc excipiunt sanguinis in vasis, & succi chimosi, nec non excrementorum, in cavo intestinorum stagnationes. Hæ porro occasionem dant flatibus & spasmis, è quibus demum symptomata reliqua cuncta. Sed frigida aqua fibras remissas firmat & motum peristalticum æquabilem reddendo, flatus dissipat, atque id, quod in substantia æque ac cavo intestinorum moram necit, in motum ciet; unde morbus totus abigitur. Quæ salutaris aquæ frigidae virtus, CELSO jam cognita fuisse videtur; qui lib. I. Cap. VIII. frigidas potiones commendat, si stomachus infirmus est, quem pallor, macies, præcordiorum dolor, nausea, vomitus, in jejuno dolor capitis, indicant, suadens porro, ut omnes potiones aqua frigida includantur; & ubi cibus acëscit, ante bibendam aquam egelidam, & hac ratione, & vomitum, & frequentem dejectionem, promoveri, si alvus subsistat. Inprimis autem habeo, quod dilaudem, aquæ frigidae usum in malo hypochondriaco. Plures enim novi vegetæ & sanguineæ constitutionis, qui huic morbo, partim ex retenta purpura chronica, partim etiam ex neglecta consueta sanguinis missione, vitæ genere ex laborioso simul in sedentarium mutato, cum vehementi melancholia impliciti; adhibitis incassum pharmaceuticis remediis cunctis, potu acidularum frigido, per mensem & longius continuato, habuisse optime, erumpente etiam ipsa purpura. Si etiam postea nonnulla symptomata spastico - flatulenta recruderunt, dedi consilium, ut quotidie ante lecti introitum, quarta pars mensuræ aquæ frigidae, cum quindecim, vel viginti guttis liquoris anodyni mineralis, assumeretur & quandoque pulveris nitrosi & pilularum balsamicarum usus interponeretur. Et sic sæpissime hoc medicorum scandalum sustulit feliciter.

§. XXV.

Pariter in
affectu hysterico.

Quod in viris hypochondriaca, id in foeminis hysterica pathemata; unde in promptu est colligere: in his non minus, quam illis, accommodatum esse frigidum potum. Quam atrocita-

sint in hysterica passione symptomata, præcordiorum angores, ventris tormina, doissi dolores, artuum convulsivæ tractiones, tendinum subinde subsultus; animi deliquia, pulsuum debiles & inæquales ictus, faucium præfocationes, conatus ad vomendum, cordis tremores & spiritus interclusus, per ipsam experientiam uberius constat. Quam difficile malum hoc penitus extirpetur, ita, ut sæpe omnium efficacissimorum alias pharmaceuticorum remediorum virtutem eludat, pariter est notum. Multiplici tamen experientia confirmatum habeo, à nullo tam præsentaneum & certum adversus illud auxilium esse expectandum, quam ab aqua frigida, qua ad uncias sex, vel sola, vel cum tertia parte aquæ cerasorum nigrorum remixta, instillatis simul quindecim liquoris anodyni mineralis guttis, pota, pathemata discutiuntur cuncta. Vidi id nuperius admodum in foemina venusta, quæ per tres integros menses ante connubium laboravit hoc malo graviter, & tertio post nuptias mense in illud recidit, solo autem hoc remedio, cum mariti & propinquorum gaudio, facili & explicata ratione ad sanitatem reducta.

§. XXVI.

Neque tantum in prima corporis regione frigidum humidum efficaciam suam exserit; sed eandem etiam longius in alias remotas corporis partes diffundit. In tussi enim quæ ferina, sive convulsiva audit, eximie quoque prodest. Tussis hujus causa non humor copiosus lentescens ejiciendus screatu, sed acris quædam subtilis materia. Neque sedes ipsius in ipsa vesiculosa pulmonum substantia, sed in pneumonicis nervis, qui ab inhærente vellicante materia, cum totius pectoris musculis, ad vehementem molestissimum motum succussatorium exstimulantur. Quare frustra penitus in hoc tussis genere dantur sic dicta expectorantia, laxantia & pituitam incidentia. Sed quæ causæ inprimis accommodata, sunt ea, quæ placide diaphoresin sine æstu interno excitant. Inter quæ haud immerito locum tenet diluens potus, propter frigus simul roborans & ulteriorem affluxum & decubitus impediens. Unde saluberrimum esse potum ejusmodi frigidum innotescit. Quem etiam nosmetipsi utiliore deprehendimus, quam calidum, in adultis, æque ac infantibus sic tussientibus.

§. XXVII.

Quod vero magis videtur mirabile, in externarum quoque partium vitiis frigidus potus opitulatur eximie; quorum in numero sunt dolores, qui tam articulos affligunt, quam etiam membranis musculorum insident. Ad præservationem enim articularium morborum perutilem esse aquosum potum testis est BRUYERINUS de re cibarij lib. XVI. c. III. ex hydropotis, inquit, nemo facile est, qui hunc in morbum (arthritidem scilicet) prolabitur. Quam salutaris vero sit ad curationem passionum in articulis, fidem facit LANZONI, in M. N. C. Dec. III. Ann. III. obs. XXV. memorans: sacerdotem quendam, doloribus articularum continuis misere afflictum, abstinentia à vino & solo potu aquæ simplicis, sic feliciter convaluisse ut arthriticus esse plane desierit. Eundem felicem potus aquæ successum POTERIUS Cent. III. cap. 39. prodidit; sic perhibens: Dn. CÆSAR LEVANTE in juventute pessima arthritide vexabatur, cujus causa quinque vel sex menses in lecto decumbebat. Primi dolorum insultus adeo efferati erant, ut ad duos menses

mensēs nullo pacto quiescerent. Primis diebus ad eum vocatus, pilulas catholicas alternis ipsi diebus præscripsi, ubi contumax erat dolor, laudinas ipsi miscui. Ad totalem autem curationem ipsi indicavimus, ut bis in mense de dictis assumeret & loco vini in potu biberet aquam perpetuo. Quod præstitit per decennium, quo tempore perfectam adeptus est sanitatem, scipiones & cruces, quibus in ambulando utebatur, primo abiecit, tandem baculum, & modo rectus, sine auxilio incedit, modo agit sexagesimum annum, optimo robore donatus & optima valetudine fruens.

§. XXVIII.

In doloribus arthriticis, podagricis &c.

Salutarem hunc aquæ potus effectum etiam multiplici experientia habemus confirmatum. Quam præstabile enim sit adversus podagricos dolores remedium, fuisse docui in dissertatione de remedio doloris podagrici genuino & simplicissimo. Arthriticos vero quoque dolores cum orta inde contractura, aquis in Germania passim obviis medicatis quidem dictis, sed indole tantum levibus ac puris & nonnihil de martiali elemento habentibus, liberaliter, ad unam, vel duas mensuras, quotidie aliquandiu potis, penitus abactos esse sæpius novi. Memini potissimum viri, qui per novem & quod excurrit annos manuum pedumque contractura, ex dolore post tertianam male curatam affectus fuerat. Is enim posteaquam salubrem nostratam aquam, quæ ante suburbium Glauchense, in via qua itur Boelbergam salit, ac præter tenuia nonnulla martis ramenta, à fontana pura & levi non differt, per aliquot hebdomades, quotidie ad sex vel octo mensuras potasset, urinam excrevit copiosissimam, manus & pedes successive redierunt ad officium & cum maxima omnium qui ipsum ante noverant admiratione, perfectam omnino recuperavit sanitatem. Ut silentio prætereamus plura alia exempla: doloris rheumatici, ischiadici, per frigidum Egranarum aliarumque mineralium aquarum potum & balneum ex aqua martiata Lauchstadiensi, feliciter expugnati.

§. XXIX.

Cephalalgia.

Nec minus in capitis dolore, tam idiopathico, quam symptomatiko, spectatæ virtutis est frigidus aquæ potus. Symptomatica enim cephalalgia sæpius oritur ex ventriculi vitio, à biliosis, acribus, acidis & male coctis succis, in hypochondriacis maxime & hystericis, juncta cum lento circa vesperam increbescente calore. Et in hac utique saluberrimum sæpius deprehendimus simplex nostrum remedium, ita, ut pota ad quartam, vel dimidiam mensuræ partem aqua fontana, cum tertia parte aquæ ceraforum nigrorum, aut florum tilia, circa lecti introitum, dolor extemplo sit dissipatus; uti noviter admodum compertum habemus exemplo foeminæ honestæ Islebiensis. In idiopathico vero etiam capitis dolore, cujus causa & sedes in ipsius capitis & cerebri membranis, aquam frigidam potam prodesse, hæc testatum facit historia. Vir erat Hebræus, circiter quadragenarius, strictioris corporis habitus, qui ab iracundia & superingesto cibo, contraxerat dolorem in vertice capitis fixum, spatium occupans magnitudine imperialis. Sensus hujus doloris quidem non adeo erat acutus, vibratorius, lancinatorius, aut pulsatorius, uti alias in cephalalgia esse solet, sed magis pressorius & gravativus sub cranio; neque erat perpetuus, sed subinde, maxime circa vesperam & noctu, ingravescibat. Nihilo minus tamen adeo gra-

viter inde luebat universum corpus, ut appetitus concideret, somnus abesset, vires mirifice deficerent, pulsus inordinatus, modo celer, modo rarus & languidus micaret, ipse quoque animus abjectus esset & sub paroxysmo quandoque plane turbaretur. Pugnatum fuerat adversus hunc dolorem ab aliis strenue & efficacissimis alias remediis. Sed licet quandoque inde remittere per aliquot dies videretur, levi tamen accedente occasione, ex ira, aut aliis externis injuriis, iterum vehementia recrudescibat priori. Exactis inter hæc duobus circiter mensibus, in consilium simul vocatus est medicus certus. Is purgato prius per aquam Sedlicensem corpore, dedit consilium, ut æger mane & post meridiem biberet dimidiam mensuram aquæ fontanæ frigidæ in lecto. Inde primum quidem factum refrigerium & symptomata visa exacerbata, sed elapsa hora, pulsuum magnitudo increvit & sudor erupit largissimus, cum doloris levamine. Hinc per septem dies potum continuare præcepit; tam felici successu, ut successive dolor evanesceret omnis. Ac licet elapsis aliquot hebdomadibus, post iram dolor hic repeteret, eodem tamen remedio per triiduum usurpato, iterum feliciter est discussus, & æger sanus jam est ac vegetus.

§. XXX.

Revocat hæc historia in animum aliam de singulari effectu potus aquæ frigidæ in affectu atroci spasmodico convulsivo, quam heic inferere non erit alienum. Puer hebræus duodecim annorum, à terrore & frigore, incidit in ingentes præcordiorum anxietates, cum tussi, virium lapsu, extremorum tremore, intercurrente horripilatione & interno æstu. Tertia die post manus & pedes convulsivis motibus & subsultibus agitati, per horæ dimidium insistentibus. Inde magis magisque increverunt convulsivi hi motus, ut dorsum & collum aspectu horrendis incurvationibus & contractionibus quassarentur, idque aliquoties quotidie. Sub paroxysmo pedes frigebant, thorax elevabatur, respiratio erat crebra, pulsus celer & durus, sensus tamen constabant. Post paroxysmum languebat corpus universum, appetitus vero cum somno erat integer. Adhibiti in consilium medici multi, exterorum etiam consilia conquisita. Plurimi verminosam progeniem subesse causam rati, aliqui per terrorem invecum esse malum putarunt. Sed data, tam ex illorum scientia anthelmintica, quam ex horum præscripto antepileptica, adhibitis simul balneis, fuerunt prorsus frustranea. Malum potius perstitit idem, quin subinde factum acerbius. Tandem miser aquam fontanam frigidam, ad unam, vel dimidiam mensuram, quotidie per vices bibere iussus est. Quo intra quatuordecim dies motus isti convulsivi paullatim compositi, nec in hoc usque tempus iterum infestarunt.

In convulsione.

§. XXXI.

Singulares certe & mirabiles sunt hi aquæ frigidæ effectus; quin inter fortuitos casus eodem referendos esse, nonnullis forsan videbitur, quia ratio eorum non adeo obvia. Nos autem censemus, causam reddi posse haud adeo difficulter. Arbitramur quippe: frigidæ potum interdum artificialem quasi febrem & motum febrilem autum efficere, cujus in resolvendis minimorum obstructionibus & discutienda alicubi hærente vitiosa materia, magna vis est. Nulla enim febris fit sine rigore partium externarum; hoc sanguis intror-

Ratio hœrum effectuum.

introrsum ad vasa majora congeritur ; inde horum fit major diastole ; quæ in corporibus adhuc valentibus æqualem proritat systolem intensiorem ; hinc universus sanguinis circulus fit auctior & celerior, atque per motus sic intensos causa morbum ingignens concutitur simul & discutitur. Quare prisca medicinæ parentes, HIPPOCRATES & CELSUS, febrem jam habuerunt medicinam, quo magni etiam morbi curantur, paralyse, epilepsiæ, convulsivi motus & affectus spasmodici hypochondriaci. Quin consultum duxerunt, suppressa citius febre, novam accendere. Qua de re pluribus videnda dissertatio de *salubritate febrium*. Atque ex his etiam in promptu ratio : cur balnea frigida, in persanandis chronicis morbis, hydrophobia, paralyfi aliisque, mirabilem sæpe ferant opem ; quod vero argumentum peculiari forsan dissertatione uberius excutietur.

§. XXXII.

*Eamela
circa usum
aquæ frigi-
dæ.*

Atque hi sunt illi morbi, in quibus aquæ frigidæ potum conducere certum est. Longe plures etiam enumerantur in libro, de *virtutibus medicinalibus aquæ communis*, anglice, auctore SMITH conscripto, & gallice Parisiis edito, in quo potissimum ceu febrifugum magnum & antipestilentiale dilaudatur, & vix morbus est, in quo non prodesse asseritur. Sed nobis sufficit, attulisse illos effectus, quos ipsi spectavimus & propria experientia certos esse novimus. Id vero necessarium erit, ut ultimo loco subjungamus monita quædam, ad obtinendum salutarem effectum servanda. Igitur quando ex vehementi corporis commotione, interiora æstuant & corpus sudore perfunditur, frigidus potus, præsertim largus, utique nocentissimus, & nunquam præbendus est. Idem tenendum, quum per vehementem iracundiæ affectum animalis œconomia & motuum vitalium successus exagitur ac turbatur. Ubi interiores partes, inprimis stomachus cum intestinis, ipso in paroxysmo atrocibus spasmis & doloribus torquentur, cum extremorum frigore, pulsu duro & inæquali, potum actu frigidum propinare est inconsultum. Majori adhuc cautione opus est, si internæ cujusdam inflammationis signa adsunt, quæ frigore omni, quod stas in obfirmat, non potest non exacerbari & ad sphacelum disponi. Neque etiam frigidum humidum sine noxa dari potest senibus & ubi longa valetudine vires admodum languent; neque ubi crudis vitiosis humoribus prima regio obsessa, & in foeminis, præsertim ex criticarum sanguinis evacuationum defectu, metus est cachexiæ. Spectanda potius in omni hujus remedii, simpli-

cis quidem, sed effectu heroici, usu, ætas, structura solidorum, temperies humorum, morbus, ipsius causa & tempus. Quod si enim corpus juvenile, biliosum; si morbus ex acrimonia & copia bilioforum humorum enatus; si vires adhuc constant; si morbi non est impetus & paroxysmus; corpus totum æqualiter calet, neque sanguinis, vel humorum propter spasmos præsto sunt congestiones: frigidus aquæ potus utique non reformidandus est, sed commendandus.

§. XXXIII.

Ultimo loco quædam adhuc de perniciali hujus remedii abusu ad §. VI. illustrandum merentur adduci. Posteaquam ante aliquot annos compluribus locis varia de excellenti aquæ frigidæ usu mepico, & Gallico & Anglico idiomate scripta, prodierunt, & quidam medicorum non levem in praxi inde experti erant fructum, mox ut fieri ab imperitis solet, ceu universali ad omnis generis morbos tum arcendos tum sanandos remedio empirice sine ullo habito discrimine morbi ejusque causæ, individui & naturæ corporis aquæ frigidæ potu uti cœperunt, & sæpius non sine exitiali damno. Ex compluribus exemplis saltim quædam attingam: Juvenis isque medicus ad seminium purpuræ scorbuticæ, cui sæpius obnoxius fuit, delitescens penitus delendum loco cerevisiæ quotidie tres vel quatuor aquæ frigidæ mensuras hausit. Sed exacto aliquot septimanarum spatio magna increvit sitis, quæ, quo majori aquosi potus copia ad eam sedandam utebatur, eo minus extinguibilis reddita fuit, ut nec decem mensuræ illi compescendæ suffecerint: defuit illi omnium ciborum appetentia, secuta est macies cum æstu universi corporis, virium consumptio, & tandem mors; promte aquæ copia per urinam & alvum secedebat, sed ne quicquam madoris in cute, quæ rigida dura & stricta erat, apparuit. Novi etiam aliquot exempla hypochondriacorum, qui præscripto frigidæ ad tres vel quatuor mensuras singulis diebus potu misere gravibus symptomatibus cruciati fuerunt, sufflaminata identidem perspiratione, partes nervosæ tum internæ tum externæ doloribus spasmis & convulsionibus agitabantur, tam atrociter, ut vix ulla remedia locum invenirent commodum; & quod notabile erat, ab enormi hoc frigidæ potu partes musculosæ nervosæ & fibrosæ aspectu & tactu rigidiores duriores & crassiores redditæ fuerunt. Pulsus quoque arteriarum longe durior erat naturali. Longiori vero ex meo consilio balneorum temperatorum & remediorum diluentium & demulcentium usu in meliorem quodammodo valetudinis statum pervenerunt.

F I N I S.

INDEX

LOCUPLETISSIMUS

RERUM OMNIUM

in toto hoc Volumine contentarum.

A



ABORTUS periculosior partu. Pag. 79. quandoque salutaris. *ibid.* quomodo fiat. *ibid.* abortum passæ facile in eum recidunt. *ibid.* quæ faciant. *ibid.* à terrore procreatus. 191. non sine convulsione succedit. 306. ex uteri atonia. 307. post abortum & puerperium. 353. præcaveretur venæ sectione in brachio. 457.

Abcessus uteri unde. 167. 168. a fortioribus emeticis coorti. 166. ex morbillis & variolis. 164. seq. differt ab ulcere. 326. interni signa. 325. in abdominis integumentis quandoque subsistit. *ibid.* in thorace. *ibid.* post variolas. *ibid.* in mesenterio. *ibid.* musculorum dorfi. *ibid.* uteri. *ibid.* renum. 326. in parotidibus. *ibid.* sinubus frontis. *ibid.* pulmonum facile recidivat. 356. interni rupti mortis causæ. 400. quid denotet, & quodnam genus illius proprie sic dicatur. 356.

Aborbentia veteribus ignota. 429. eorum apparatus. 428. differentia. *ibid.* amplissimæ utilitatis. *ibid.* correctioni materiæ dicata. *ibid.* cum acido in tertium cedunt. *ibid.* præmittenda purgantibus. *ibid.* naturæ opus juvant. 413. quædam adstringunt. 428. cur alvum ducant. 384.

Aborbentium terreorum usus. 139. efficacia in aver-tendis morbis chronicis. 253.

Abstinencia & motu prius tentandi morbi quam medicamentis. 139.

Acaciæ fructus adstringunt alvum. 261.

Acetum antidotis annumeratur. 201. alvum adstringit. 261. vini optimum alexipharmacum. 204. poly-sarkia laborantibus commendatur. 252. specificum in peste. 450.

Acicula deglutita quæ mala genuerit. 237. deglutita atrociam ciet pathemata. 312.

Acida ad sanguinem delata fiunt salsa. 69. 38. feces alvinas reddunt albas. 66. primis viis sunt infesta. 107. tenesmus concitant. 66. Senes lædunt. 134. arcendis miasmatis aptissima. 204. cur inimica corpori humano. 185. 189. quibus noceant & cur. 178. temperant. 429. pulsum mutant. 369. sanguinem coagulant. 374. optima alexiteria. 450. infensa humorum progressui. 428. nitrosis postponenda. 429. clysteribus non indenda. 468.

Acido in primis viis copioso, qui cibi vitari debeant. 111.

Acidum & Alkali nec non viscidum, non universales morborum causæ. 17. seq.

Acidulæ præstantissimum sanitatis præsidium. 139.

Frid. Hoffmanni Oper. Tom. I.

non semper curant malum hypochondriacum. 153. foeminis commendantur. 243.

Aconitum venenatæ est naturæ. 210.

Actiones naturales quæ sint. 54.

Acuta febris in quo consistat. 407. seq. plerumque inflammatione stipatur. *ibid.* cur recidivet. 356. à natura sanatur. 407. quomodo per artem. 408. venæ sectionem polcit. 456. symptomaticæ malæ. 411.

Acuti morbi quomodo differant à chronicis. 410. caute tractandi. 403. funesti signa. 391. seq. causa mortis in iis sphacelus ventriculi & intestinorum. 400. seq.

Adolescentia quibus morbis exposita. 184.

Adstringentia interna retropellendi pollent facultate. 207. eorum indoles & effectus in genere. 260. quatenus adjuvent excretiones. *ibid.* fortiora appetita naturæ inimicissima. 261. adeoque caute adhibenda. 262. quæ sint. 446. quomodo agant. 447. qua methodo exhibenda. *ibid.* infecura. *ibid.* debilibus noxia. 344. hydropem gignunt. 352. nocent in alvi fluxibus. *ibid.* hæmoptysi. 354. intermittentibus. 350. hæmorrhagiis. 344. gonorrhœa. 354. clysteribus non indenda calculum præscindunt. 447.

Ægri statim à morbo non nimis nutriendi sunt. 358.

Ægroti aliquid concedant consuetudini. 138.

Æquinoctium venæ sectioni cur opportunum? 454. quanam affectiones circa illud familiares. 360.

Ær multum à se differt. 103. sanitatem dispensat. 101. quid in sanguine efficiat. 45. inspiratione non subit ipsum sanguinem. 46. corpus tamen valde alterat. *ibid.* tonum fibrarum diversimode afficit. 35. calidus debilitat. 104. quid sub eo imperandum. 105. frigidus contrahit fibras. 35. quibus cavendus. 134. temperate frigidus præstat calidiori. 104. humidus nocet. 105. humidus & calidus expandit fibras corporis nostri. 35. inconstans repletionem interdicat. 106. purus qualis. 104. serenus excitat vires. 33. 104. temperatus qualis. 104.

Æris detractio quomodo necet. 31. ingressu in pulmones quare opus. 45. ad sanitatem usus. 104. impuri noxæ quomodo avertantur. *ibid.* intemperati noxæ. 105. quomodo avertendæ. *ibid.* subita mutatio nocet. *ibid.*

Ær magna pollet vi ad immutandum corporis habitum. 156. duplex necessarius ad vitam & sanitatem. 264. multa continet corpori humano insensa. 207. nocivis exhalationibus quandoque scatet. 224. in omnibus animantium succis reperitur. 264. per quas vias se corpori humano insinuet. 211. quomodo in sanguinem venire possit. 264. valde frigidus & humidus cur noxius. 189. vespertinus & nocturnus nocet. 211. universale menstruum. 210.

Æris natura. 228. seq. naturam & vires nosse debet

- medicus. 158. cur tanta ad vitam animantium conservandam sit necessitas. 156. repentina mutatio corpori inimica. 185. 267. vis in corpus humanum. 158. 263.
- Aër* mutat corporis functiones. 291. pulsum. 368. excretiones. 381. morborum epidemiorum causa. 291. 334. purus & temperatus salubris. 287. crassior impurus insalubris. *ibid.* perspirationem mutat. 288. 334. frigidi effectus. *ibid.* humidi. *ibid.* calidi. *ibid.* frigido-humidus perspirationi obest. *ibid.* subitanea illius mutatio quid cutis tono noceat. 360. frigidus qualis sit. 470.
- Æstas* quos proferat morbos. 266. quos gignat morbos. 334. qualis in eo pulsus. 368.
- Æstate* abstinendum à tabaco. 136. ut & venere. *ibid.* quali victu utendum. *ibid.*
- Ætas* in historiis morborum necessaria. 286. ad morbos facit. 308. 349. pulsum mutat. 368.
- Affectus animi* alterant corpus. 97. consueti minus nocent. 138. gravidæ tangunt fœtum. 79. sanitatem affligunt. 102. senes valde lædunt. 135. turbant negotium mensium. 136. eorum noxæ à medico indagandæ. 102. seq. iis assueti viscerum labe plerumque affecti sunt. 103. ex iis multi mortui. 102. animi sunt causæ morborum proximæ. 173. æque nocent, ac venena, & cur? 189. 195. cur eos gravia symptomata comitentur. 158. retropellendi facultate pollent. 207.
- Albinus*. 17.
- Alcali & Acidum* non universalis morborum causa. 17.
- Alcalinorum usus* ad sanitatem tuendam. 139.
- Alcalinum sal* urinam subit. 69.
- Alcalina* sanguinem fluidiorem reddunt. 374. terrea absorbent. 428. non soluta stomachum gravant. *ibid.* non penitus ab acido solvuntur. *ibid.* alcalina salia celerrime solvuntur. *ibid.* soluta in tertium degenerant. *ibid.*
- Alexipharmaca* in malignis minus proficua. 437.
- Alimenta* acida nutritioni non quadrant. 108. sanitatem oppugnant. *ibid.* coagulo obnoxia vitanda. 109. commoda vigorem præstant. 33. constringentia nocent. 109. cruditatem generantia. *ibid.* duriora sunt incongrua. 108. à quibus facile vincantur. 109. in primis viis fermentationem subeunt. 59. mucida viscosa nocent. 109. noxia quænam. *ibid.* optima quænam. 105. etiam non optima parum nocent, nisi quantitate peccetur. 111. sanitatem dispensant. 105. senibus quæ incommoda. 134. villosam tunicam obstruentia. 109.
- Alimenta*, cur homini tantopere necessaria. 157. 246.
- Alimenta* nocent in morbis spasmodicis. 320. valentis materiæ debilibus noxia. 421. superato morbo parcenda. *ibid.*
- Alimentorum* facultates ad tres classes commode referuntur. 107. usu quotidiano egemus. 106.
- Alimentorum* naturam nosse debet medicus. 158. sufficiens quantitas, cur requiritur. 246. vitia quos generent morbos. 245.
- Allium* remedium contra dysenteriam. 232. ex lacte coctum remedium contra vermes. 236.
- Aloe hæmorrhoides* movet. 343.
- Aloes* virtutes. 215.
- Aloephanginarum* pilul. insignis usus. 216.
- Aloetica* quibus & quando convenient. 434.
- Alpinus* (Prosper) 21.
- Alterantia* materiæ correctioni dicata. 427. quadruplicis generis. *ibid.* pro materia corrigenda variant. *ibid.*
- Alteratio* à natura non perficitur. 413.
- Altiora loca* aërem salubriorem habent. 104.
- Alvi* crebrior depositio salutaris. 120. excrementa variant. 66. laxitas nimia nocet. 118. libertati studentum. 139. quæ huc faciant medicamenta. *ibid.* plus
- justo retentæ, noxæ. 64. 66. adstrictio à dolore dentium. 168. ex difficili dentitione. 237. à potu frigido. 233. à terrore oriunda. 191. incommoda capiti. 262. dejectio cur turbetur à diuturnis meditationibus. 158. fluxus à vermibus. 235. temere suppressus quæ pariat incommoda. 262. iusta successio multum confert ad tuendam valetudinem. 157. suppressio plurium morborum matrix. 203. obstructio spasmis intestinorum. 304. succos inquinat. 320. varia pathemata inducit. 304. in febribus noxia. 355. cur aliquamdiu indemnis. 383.
- Alvina excretio* non supprimenda. 118. in morbis consideranda. 288. 289. 384. multum ad sanitatem facit. 288. 384. motus intestinorum index. 385. quæ evehat. 383. sub doloribus & spasmis supprimitur. 320. nec non, in capitis & nervorum morbis. 386. sine noxa aliquamdiu supprimitur. 383. in morbis prudenter movenda. 386. tarda ex bilis defectu. 384. mala. 385. suppressa morbos inducit. 288. involuntaria unde. 307. nimia & inordinata quid indicet. 385. seq. nimia quomodo compescenda. 386. 443. Vid. *Purgatio*.
- Alvinae faeces* motu peristaltico expelluntur. 67. multum humidi habent. 66. earum examen chymicum. *ibid.* Vid. *Excrementa*.
- Alvum* adstrictiorem habentibus quid faciendum vel fugiendum. 131. quæ suppriment. 118. nimis fluxam habentes quid juvet. 131.
- Alvus* quæ dimittat. 66. infantum sit aperta. 133. pendet à conditione motus peristaltici. 67.
- Amarorum* usus. 139.
- Amnios* quid & ubi. 78. 80.
- Amygdalæ* amaræ volucris & canibus venenata. 198.
- Amygdalarum* dulcium oleum certissimum contra venena auxilium. 201. oleum in doloribus & spasmis utile. 318.
- Analeptica* quæ sint. 444. quomodo agant. *ibid.* limitatæ virtutis. *ibid.* pulsum mutant. 369. motum refocillant. 321. optima nutrientia. 444.
- Anasarca* à potione frigida. 234. ex asthma gignitur. 352. balneis vaporosis discutitur. 465. purgantibus curatur. 436.
- Anatome* medico necessaria. 15.
- Anatomes* & physices neglectus peperit sectas. 15. seq. peritia medico necessaria. 149.
- Angina* ejus species. 295. quomodo gignatur. 302. spasmis debetur. *ibid.* suffocatione perimit. 394. vena sectione sub lingua levatur. 458. 459.
- Angustia vasorum* considerabilis. 27.
- Anima* distinguit nos à brutis. 88. cum sensitiva non confundenda. *ibid.* seq. cum corpore qua lege unum. *ibid.* corpus alterat. 97. an sit causa motuum vitalium. 33. non efficit omnes motus. 97. utitur ministerio corporis. 96. in vitales & naturales actiones absolutum jus non habet. 97. motus vitales ac naturales afficit. 102. sensitiva à rationali distinguenda. 88. quid sit. *ibid.* perperam à veteribus omnium motuum causa venditata. 150. 155. rationalis & consilii particeps non est constituendum principium medicinæ. 152. sed est commentum. 151. non est medicinæ principium. 300. perperam dicitur natura. 405.
- Animalia* viva discissa imponenda morsis à cane rabido. 179.
- Animalium partes* quænam difficilius concoquantur. 109. seq.
- Animantia munda* lege Israëlitarum qualia. 106.
- Animi inclinationes* multum pendent à circulo sanguinis. 52. mores sequuntur temperamenta. 29. pathemata quomodo corpus alterent. 36. tranquillitas vitam sanam præstat. 97. Vide *affectus animi*. pathemata proxime afficiunt nervos partesque nervosas. 310. effectus mere corporeos præstant. *ibid.* eorum effectus

effectus. 287. functiones corporis turbant. 310. morbos pariunt. 287. mutant pulsum. 368. vires debilitant 349. humores corrumpunt. 319. ventriculū afficiunt 313. 319. excretionē criticā sistunt. 288. ad colicā faciunt 297. curationi obsunt 287. nocent in morbis exanthematicis. 315. nec non inter & post partum. 319. post eas motus insalubris. 412.

Animus in morbis considerandus 287. conspirat cum corpore. *ibid.* ejus inclinationes à corporis structura. *ibid.* & progressu humorum per caput 305. nimis fatigatus ventriculū debilitat. 313. stupidus ex apoplexiā unde? 350. ejus morbi hæmorrhoidibus solvuntur. 343.

Anni humidi & pluviosi valde insalubres 209. tempora peculiare gignunt morbos. 177.

Anniversarii morbi. 183.

Anodyna sitim sedant. 60. eorum usus in progressu calculi per ureteres. 71. Vid. *Soporifera* & stupefactiva mitiora. 216. quæ sint. 448. quomodo agant *ibid.* quomodo utiliter adhibenda. 416. diaphoreticis in doloribus miscenda. 438.

Anodynus liquor celeriter operatur. 317. optimum sedans. 449. in doloribus maxime 419. specificum in epilepsia symptomatice. 451.

Anorexia ex nimia aquarum ardentium potatione 255. seq. unde. 306.

Anthelmintica num tantum circa novilunium porrigi debeant. 236. quæ optima. 452.

Antidotum universale veterum. 201.

Antidotus optima oleosa 312. & pinguis. 430.

Antimonium crudum specificum in passionibus rheumaticis. 450. sulphur in acris salis defluxionibus utile. 318. specificum contumacium intermittens 450. & guttæ serenæ. 453. regulus medicinalis acres & salas defluxiones arcet. 318. specificum in contumacia intermittens. 450.

Antispasmodica quæ sint 448. quomodo agant *ibid.* hæmorrhagias sistunt. 417. non sola curant malum hypochondriacum. 317.

Anus prolapsus balneis reprimatur. 464. resolutus involuntariam facit excretionem. 307.

Aorta fabrica cur notabilis. 41.

Aphonia unde. 187. à vermibus genita 235. à spasmo nervorum lingualium. 305. & paralyfi 306. in verminantibus obvia. 305.

Aphthæ differunt ab angina. 295.

Apophlegmatizantia quæ sint & quando adhibenda. 442.

Apoplexia cur non adeo frequens. 185. pueris rarior *ibid.* à terrore oriunda. 191. cur præsentissimæ mortis causa. 160. ex copiosius sumta aqua Matthioli. 256. ex pathematibus animi. 182. nonnunquam hæreditaria 183. 349. quandoque mercurialium progenies 220. sanguinea & spasmodica unde 165. ab ira vehementiori producta. 191. senum unde. 242. 262. vera vel spuria 299. 327. facile recidivat. 359. in paralyfin transit. 350. à spasmo duræ matris. 305. differt à catalepsi 299. syncope *ibid.* stuporem animi gignit. 350. ex scabie repulsa 336. podagra emanente 338. suppressione mensium. 341. lochiorum 342. hæmorrhoidum 343. narium hæmorrhagiæ. 346. seq. qualis in ea pulsus 371. lethale in ea signum thoracis convulsio. 306. spasmi stipatur. 302. causa mortis in ea 396. clysteribus sanatur. 467.

Apoplexiæ veræ causa extravasatio. 299. 302. 327. spuria causa stagnatio. 299. 302. 305. 327. vitam non adimit 299. 305. hystericis familiaris 299. 305. venæ sectione discutitur. 458.

Apostematum generatio. 165.

Appetitus & digestio in omni fere morbo læduntur. 60. ejus causa mechanica. *ibid.* quibus destruat. *ibid.* dejectio periculosa. 246. quibus revocandus. 445.

Frid. Hoffmanni Oper. Tom. I.

Aqua pluvialis subtilior reliquis. 112. medicina universalis. 254. simplex optima medicina 463. ad balnea quæ optima. 464. quomodo emendanda. *ibid.*

Aquæ bonæ quales. 112. calidæ potæ commoda. 111. corriguntur coctione. 112. insalubres quænam. *ibid.* potus commoda. *ibid.* seq. cerevisiæ merito antepōnitur. *ibid.* potores sani & longævi. *ibid.* quomodo explorandæ. *ibid.* salubres, cur principio quosdam offendere videantur. 64. stagnantes & putrescentes noxia evibrant effluvia. 207. seq. cur acrimoniam ingenerant plantis 210. paludinosæ levissimæ. 209. ardentium abusus quam noxius. 255.

— minerales infarctus & obstructions tollunt 321. excretionē promovent 348. succos depurant. 321. specificum in hypochondriaca & hystericā passione. 451. continuato usu juvant 423. potissimam facultatem aquæ debent. 463. balneis socianda. 464. ingredientia ab auctore detecta. 426. martiatæ interius & exterius proficua. 464.

— pluvialis aquæ præstantia & quænam tanquam universalis medicina inserviat. 469. 476. experimentum de corde carpionis aquæ tepidæ & frigidæ injecto. 470. frigidæ ad curandos morbos facilitas *ibid.* frigidissima in febribus ad ardorem temperandum à Galeno est porrecta. 471. frigidæ usus in morbo cholerico atque dysenteria 472. in vomitu bilioso diuturno *ibid.* in ejectione viscidarum cruditatum 473. in passione iliaca, colica, hæmorrhoidibus suppressis *ibid.* in doloribus intestinorum *ibid.* in stomachi vitiis, spasmo, ardore &c. *ibid.* malo hypochondriaco 474. ut & affectu hystérico *ibid.* it. in pectoris affectibus, tussi &c. *ibid.* in vitiis partium externarum, ut arthritide, podagra &c. 475. in capitis dolore tam idiopathico, quam symptomatice *ibid.* it. in affectu spasmodico-convulsivo. *ibid.* monita quædam Auctoris ad usum illius pertinentia. 476. imperite à nonnullis medicis fuit adhibita. *ibid.*

Aquarum infessus. 140. cohibet nimiam transpirationem. *ibid.*

Arabes quædam chymica reliquerunt. 21. argenti vivi usum externum docuerunt. *ibid.* bona remedia invenerunt. *ibid.*

Arcana adversus morbos specifica non dantur. 153. non semper effectus præstant. 290.

Archeus Helmontii figmentum. 17.

Ardens febris qualis in ea pulsus. 371. sanguis. 373. seq.

Argentum vivum olim annumeratum venenis 197. nullam exeret in corpus operationem, nisi solum 218. ex quo veri veneni naturam induit 197. 219. ut ex communibus veneni notis patet. 219. glandulas faucium afficit & salivalem laticem copiose ex iis ducit *ibid.* cur tam vehementem producat in corpore humano effectum. 220.

Aridura quibus tractanda. 431.

Arnica specificum ad sanguinem congruatum. 453.

Arnoldus Villanovanus. 21.

Aromata insalubritatem alimentorum corrigunt. 110.

Arsenica veteribus incognita 197. ipsorum patria. *ibid.*

Arsenicalis aqua infamatum venenum. 198.

Arsenicum album venenum fortissimum 196. cum butyro capiti illitum funesta peperit symptomata. 199.

Arsenicum externe applicatum nocet. 310.

Arteriæ asperæ usus. 45.

Arteria partis ligata motus impotentiam facit. 36.

Arteriarum carotidum & vertebraliū communicatio ad secretionem fluidi nervei facit. 84. cerebri fabrica. 47.

Arteriæ motu sunt instructæ. 41. tunicas crassiores intra cranium deponunt. 84. sunt venarum & vasorum lymphaticorum radices. 57. cur minores & patiores venis. 41. uni in pedibus duæ venæ respondent. *ibid.* systolico motu gaudent. 365. venis continuæ. 366.

Ss 2 *Arteriæ*

Arteria aspera spasium patitur 305. causa oppressio-
nis pectoris. *ibid.*
Arthritidis causæ & incunabula. 174. 179. 262. ab
acidis 253. haud repente reprimenda. 263.
Arthritis benigna quomodo fiat maligna 181. quan-
doque anniversaria. 183.
Arthritica febres unde 409. methodus sanandi eas.
ibid.
Arthritis differt à rheumatismo 298. hæreditarius mor-
bus. 349. ejus signa, causa & sedes 298. quomodo
gignatur 302. facile recidivat 356. spasimis stipatur
302. topicis exacerbatur 298. 337. seq. curatu cur
difficilis 298. hieme magis affligit 336. transit in
calculum 339. hæmorrhoidibus præservatur & sol-
vitur 343. retrocedens necat. 395. balneis martia-
tis levatur. 465. omnium morborum facillime sta-
tionem suam deserit atque ad alias corporis partes
transit. 359. Vid. & infra *voc.* morbus articularis.
vagæ specificum lumbrici. 450.
Articulorum morbi quomodo gignantur 302. à spaf-
mis ligamentorum 303. topicis perperam tractantur
338. diureticis arcentur. 439. scarificatione levantur.
464. ligamenta nerveo-tendinosa cujus naturæ, &
quænam ob humorem heterogeneum in iis fiant. 360.
Artus imbecilles balneis firmanur 465. eorum dolor
singularis epidemice grassans 298. ab arthritide di-
stinctus. *ibid.*
Aşa fætida duplici nomine in hysteris salutaris 448.
specificum anthelminticum 452. clysteribus utiliter
commiscetur. 468.
Ascarides crassa incolunt. 332. eorum indicia. *ibid.*
Ascitis ortus. 168.
Assueta senibus non mutanda temere. 134. seq.
Assumpta excretis debent respondere. 101.
Asthma convulsivum unde. 45.
Asthmatum spasmodicorum sedes 168. ex potione fri-
gida. 234. spasmodicum cur rarius. 185.
Asthmatum incunabula. 166. 168. 186. 187.
Asthma ejus variæ species 298. causa mortis in eo 397.
ex retropulsa scabie 336. arthritide & podagra 338.
suppressis mensibus. 341. hæmorrhoidibus 343. à
tumore & scirrhescentia tunicæ bronchiorum. 398.
specifici ejus. 451. flatulentum quid & unde. 298.
hypochondriacis familiare. *ibid.* convulsivum differt
à sanguineo & humerali 298. à catarrho suffocati-
vo 299. à polypo *ibid.* 329. hydropem thoracis. 299.
ex repulsis favis & achoribus. 336. à variis causis.
394. hydropem gignit 320. 352. qualis in eo pulsus.
371. funesta in eo signa 394. suffocatione perimit
393. unde sæpius producta. 357. suffocativo qui-
nam opprimi soleant. *ibid.* pituitosum à pulmonum
atoniam. 307. spasmodicum à spasmo diaphragmatis.
305. quomodo hydropem & œdemata pariat. *ibid.*
Asthmatici balneis læduntur.
Astronomia an sit oculus medicinæ. 14.
Atonia quid 164. quoduplex *ibid.* multorum morbo-
rum causa. *ibid.* glandularum, quos edat effectus
168. solidorum turbat functiones 167. quæ spasmos
excipit plurium phænomenorum causa. 169. quid
sit 306. sequitur paroxysmos 289. 321. spasmo de-
terior. 307. spasium ingignit. 308. multorum mor-
borum causa. 306. humores corrumpit 320. novo-
rum paroxysmorum causa. 321. balneis emendatur.
465.
Atrophia ex scirrho hepatis 329. induratione pancrea-
tis 328. nimis hæmorrhagiis 349. male curatis alvi
fluxibus 352. balneis curatur. 464.
Attenuantia quæ sint. 429. quomodo agant 430. va-
riæ virtutis sunt. *ibid.* cautiones in eorum usu. *ibid.*
Attractio non datur. 47.
Auditus quid 91. ubi fiat & quomodo succedat 89.
91. seq. ejus organon auris 91. gravis unde 92. seq.
gravitas apud senes unde. 242. difficilis clysteribus

revocatur. 467.

Avicennæ laudes. 21.

Auriculæ cordis motus in jam mortuis potest restitui.
31.

Auris auditus organon. 91. ejus anatomica considera-
tio *ibid.* seq. à quibus recte explorata. 20.

Auripigmentum veteribus arsenicum dictum. 197. sed
pessime pro veneno venditur *ibid.* non confunden-
dum cum arsenico citrino. *ibid.*

ex *Auro* parata remedia corrosiva non omni vacant
noxa.

Aurum fulminans cur tutius in pilularum, quam pul-
veris forma exhibeatur 227. salibus solutum veneni
naturam induit. *ibid.* infantibus quando perniciosum.
ibid. fulminans intutum laxans. 434.

Autocratia naturæ, non nimis extendenda in meden-
do. 153.

Autumnus easdem cautiones habet, quas ver 135. cur
adeo morbosus. 266. quos gignat morbos? 334.
qualis in eo pulsus? 369.

B.

B *Aglyvus* 17. tonum fibrarum praxi accommoda-
vit 36.

Ballonius 21.

Balnea, quando convenient 140. quibus noceant *ibid.*
eorum usus nostris parcius adhibendus *ibid.* com-
mendantur veneno tactis. 201. in morbis contagio-
sis, præsertim chronicis 205. calculo laborantibus.
236. frigida perspirationem cohibent. 261. pulsum
mutant. 369. post iram noxia 416. 465. cautiones
in eorum usu. 465. aquæ dulcis quomodo paranda.
464. spasmos laxant *ibid.* humores derivant 463.
perspirationem secundant *ibid.* insaniam percurant
ibid. partum faciunt 464. heroicorum operatio-
nem secundant *ibid.* in rachitide profum. *ibid.* fri-
gida ex qua ratione in chronicis morbis mirabilem
ferant opem. 476. nativa roborantia martialia quæ
& ubi profint. 464. artificialia roborantia eorum-
que usus. 465. vaporosa quæ & quando utilia. *ibid.*

Balsamica arcendis contagiis inserviunt. 212.

Balsamica quæ sint 444. quomodo agant. 446. varii
usus. *ibid.*

Balsamicorum usus 139. bene temperatorum utilitas.
176.

Balsamum vitæ præcipuum ex balsamicis. 445. vires
egregie refocillat 318. 321. specificum in affectibus
ex debilitate cerebri nervorumque. 451.

Barometra commendata 105.

Bartholinus 19.

Beccherus 21.

Bellinus 17. & 21.

Berengarius (Jacobus) 21.

Bergerus 17.

Bezoardica utilia in exanthematicis 408. præferenda
sudoriferis. 416.

Bezoardicus pulvis in principio pestis commendatur.
204.

Bianchi. 17.

Biliarii ductus motu gaudent peristaltico 304. spasmo
affecti morbos gignunt 304. 320. consentiunt cum
ventriculo 320. convulsi diarrhœæ & cholæræ cau-
sa. 306.

Bilis quid sit 61. ad elaborationem chyli facit *ibid.*
alcalinæ est indolis *ibid.* seq. cystica differt ab he-
patica 62. qua differentia utraque effluat 63. cy-
stica usus 62. corpori venenum qui fiat 63. cum
urina secedit 69. deficiens quomodo suppleatur 63.
& 118. examen ipsius 61. exsiccata flammam con-
cipit *ibid.* humor excrementitius idemque utilissimus
62. inspissata æque in aqua & spiritu vini solvitur
61. motum ejus quæ adjuvent *ibid.* officina hepar 61.
quan-

quantitas 62. sanguine ponderosior est 61. sapo animalis *ibid.* ad secretionem ejus quæ faciunt *ibid.* & seq. usum quæ probent. 62. quibus corrigatur remediis 190. atra unde ortum trahat. 252. Æstate copiose generatur 384. ab acidis nigrescit 379. 384. coloris & foetoris excrementorum causa. 384.

Bistorta radix alvum adstringit. 261.

Blancardus 17.

Boerhaaven 17.

Bohnius 17

Boli alvum adstringunt 261. absorbent 428. adstringunt simul. *ibid.*

Bonitas cerevisiæ unde pendeat 113.

Bontekoe 17.

Borellus 17. & 20.

Botallus 21.

Brassica crispa, *Braunkohl*, cur nonnunquam inficiat. 232.

Braunius 17.

Bronchia. 45. eorum tunica glandulosa. *ibid.*

Brunnerus 17.

Bruta cur minus frequenter ægrotent, quam homines. 180.

Bubones venerei retrogradi. 187. ex calidioribus tractata gonorrhœa. 340. repulsi gravia inferunt mala *ibid.* pestilenciales retrocedentes necant. 395.

Butyrum quale alimentum. 107. seq.

C.

C*Acheſtici* sibi caveant à frigore. 267.

Cachexia unde 262. apud senes 241. & vetulas 243. ex infano amore 194. ex potione frigida 234. non juvatur natura, sed sola arte curatur 153. cur senibus magis familiaris quam juvenibus 170. 184. scorbutica ubi insanabilis 184. ubi resideat. 167. ex atonia hepatis & lienis 307. 320. suppressis mensibus. 341. nimis hæmorrhagiis 349. puerperio 350. asthma 352. alvi fluxibus male tractatis *ibid.* qualis in ea sanguis 373. pulsus 371. funesta signa 394. ejus lethalis causa 400. num in metu cachexiæ ex defectu criticarum sanguinis evacuationum usus potus frigidi sit commendandus. 476.

Cacochymia cur hypochondriaco & hysterico malo accedat. 320. quomodo inducatur à plethora. *ibid.*

Cacochymia medicatio à venæsectione inchoanda. 139. generatio. 164. 176.

Cacochymici sibi caveant à frigore 267. pluribus morbis patent. 188.

Cælius Aurelianus 21.

Caffè potus utilitas 110. infusi usus frequentior foeminis dissuadetur. 254.

Calcis vivæ vapor quænam accersat symptomata. 230.

Calculi moventur à frigore 267. nascuntur ab acidis. 252. Helvetiis & Batavis familiares. 253. dolor cur vomitiones pariat, 168. in cystide generantur ab ira 197. ob invadentem mœstiriam sævissima concitant symptomata. 193. 236. quibus remediis ejiciendi. 236.

Calculus renum facile recurrit. 244. inveteratus insanabilis 184. primæ senectæ familiaris 183. vesicæ in senibus proventioribus insanabilis 184. cur rarior. 185.

Calculus hæreditarius morbus 349. ex arthritica materia 339. hæmorrhoidum & mensium suppressione 345. uretheribus impactus facit dolores 331. urgente dolore non expellendus 417. diureticis præcaveatur 439. curatur. *ibid.* specifica in eo. 452. causa mortis in eo plerumque renum corruptio 400. nonnunquam ventriculi & intestinorum sphacelus. *ibid.* renum ex atonia eorum. 307. 352. ejus signa 330. ex rene pulsus dolorem facit. *ibid.* quomodo vomitum, colicam, icterum & vesicæ calculum gignat.

353. vesicæ ex ipsius atonia 307. ejus signa 331. ex renali quomodo fiat. 353. vesicæ felleæ signa 331. quæ pariat symptomata. 314. per ductus bilarios transeuntis signa. 331.

Calculi dolor differt à colica 302. 331. cum colica cur sæpe complicitur. 297. 330. nec non vomitu 315. à spasmio uretherum 303. in consensum rapit ventriculum 315. à refrigeratione abdominis irritatur. *ibid.* accedunt demum inflammationes lethales. 393. specificum ejus liquor anodynus 450. funesta ejus signa. 393.

Calculi per alvum excreti. 331.

Calculosæ concretiones unde. 167. 168.

Calculosi cur frequenter fiant icterici 353. 354. colicæ & flatibus cur pateant. 353.

Calendarium perpetuum in corpore habere. 35.

Calidiora sunt cavenda juvenibus. 134. morbum benignum in malignum convertere possunt. 207.

Calidum innatum veterum 33.

Calor quid sit & efficiat 33. auget proventum salium 69. corporis quid sit 51. est à circulo sanguinis *ibid.* quibus augeatur *ibid.* corpori necessarius est 33. consumit succos 56. exhalationes concitat 67. juvat sanguificationem 50. vitæ necessarius 51.

Camerarius 17.

Camphora alexipharmacis accensetur. 205. quandoque antispasmodicis 448. cum nitro specificum in inflammatione 450. in malignis. *ibid.*

Cancer quomodo necet 34. exulceratus cur tam facile perimat 178. est insanabilis. 184. exulceratus quando funestus. 395.

Cancrorum chelæ & lapides absorbens. 428. diæresin simul movent. *ibid.* cum acido sanguinem resolvunt. *ibid.*

Candelæ sebaceæ extinctæ exhalatio quam gravis. 230.

Canes Bononienses, qui minimæ staturæ permanent. 252.

Canon medico-practici cujusdam canonis sensus. 471.

Cantharides specificum in hydrope. 451.

Cantharidum natura & indoles venenosa. 225.

Capillamentum incaute demtum capitis morbos gignit. 336.

Capitis lotiones qua cautela institui debeant 140. declivior situs quid efficiat 48. dolores infantili ætati familiares. 241.

Caput consentit cum ventriculo. 313. debile morborum infantilium 308. & impuritatis succorum causa 320. ad capitis dolores exacerbatos quænam faciunt. 357. quænam damna ex tinea retropulsa illi obveniant. *ibid.*

Capsulæ lumbaris lympham recipit. 58.

Carbones igniti in conclavi clauso vitam possunt extinguere 34. 105. fossiles aërem inficiunt fumo non saluberrimo 105. fossiles aërem purgant. 212.

Carbonum exhalationes maxime noxiæ 229. lethiferos producunt effectus. *ibid.* præsertim coarctatæ *ibid.*

Carbunculi pestilenciales retrocedentes necant. 395.

Cardialgiæ generatio 174. 186. 262. Sedes. 163. 179.

Cardialgia à frigida potione. 233. à vermibus 235. ab acidis. 252. quid? 297. distinguenda ab inflammatione & inflatione ventriculi. *ibid.* 294. ejus variæ causæ. 297. seq. à spasmio ventriculi 303. ex præpostero topicorum usu in morbis articulorum 341. mensium emanatione 338. foeminis familiaris 297. quibus levanda *ibid.* 445. specificum ejus liquor anodynus. 450. in ea hæmorrhoides salutare. 343.

Carminativa quando clysteribus addenda. 467.

Carnes assæ ab elixis in quo differant 108. augent partem sanguinis sulphuream *ibid.* ferarum, quo differant à domesticorum carnibus *ibid.* dant multum chylum 63. plus nutriunt vegetabilibus 106. quæ nutriendo optimæ 56. in morbis putridis nocent

109. earum usus senibus circumcidendus 135. seq. animalium ex morbo mortuorum aliquid virulenti continent. 232.
- Caro* plus fluidi quam solida habet 367.
- Carolinas thermas* potantium urina qualis 69.
- Carolina* utilissima ad hæmorrhagias promovendas 440. in calculo obsunt 380. cur in balneo gignant febres. 335.
- Cartesii* secta in medicinam redundavit. 17.
- Caseus* quale alimentum. 107.
- Casseri* 19.
- Castoreum* non semper est antihystericum 153.
- Castrensum* morborum causæ. 210.
- Catalepsis* ejus signa 299. ab apoplexia differt *ibid.*
- Cataplasmata* externa retropellendi pollent facultate 207.
- Cataracta* incipiens, spuria & vera unde & quid? 91. incipiens ex ventriculo. 314.
- Catarrhales* febres unde 173. nonnunquam anniversariæ 183. cur maxime generentur tempore verno. 266.
- Catarrhalis febris* distinguenda à maligna. 293. ejus origo 409. ex subita mutatione aëris 335. crises servat 388. qualem habeat pulsum 371. methodus naturæ & arcentis in sananda ipsa. 409.
- Catarrhi* & coryza salutare quandoque motus 120. unde 165. à terrore 191. cur frequentiores 185. suffocativi unde. 187. ætati infantili familiares 241. vetularum unde. 243. ex subita mutatione aëris & perspiratione suppressa. 335. venæ sectione quandoque gignuntur 460. & arcentur *ibid.* balnea non ferunt 465. sæpe salutare 410. suppressi nocent. 340.
- Catarrhus suffocativus* distinguendus ab asthma 299. signa & symptomata *ibid.* quibus familiaris *ibid.* à paralyfi nervorum pneumonicorum 306. à polyppis vasorum pulmonalium 330. post morbillos variolas 355. suffocatione perimit. 394. funesta ejus signa. *ibid.* causa mortis in eo. 397.
- Causa proxima* omnium, quæ in corpore humano fiunt, est motus. 24.
- Causarum* metaphysicarum usus nullus in pathologia 171. morbificarum ordines non confundendi. 173.
- Causæ morborum* quæ sint 406. simplices & manifestæ 424. rebus externis maxime continentur 291. plerumque ignorantur 322. in nervosas maxime partes agunt 308. 406. sectione patefcunt 290. 322. plures concurrunt ad proximam 291. quorundam ineptæ 322. non confundendæ cum causa mortis 290. 402. Medico noscendæ 286. 321. seq. in prognosi distinguendæ 396. certa auxiliorum genera indicant 322. difficulter cognoscuntur *ibid.* cognitæ non sufficiunt ad curandum 290. 322. faciunt ad famam medici 322. remouentur motu solidorum & fluidorum 406. in earum remotione methodus medendi posita 406. 407. ex præcipuis imbecillitas. 348.
- Causæ mortis* medico noscendæ 396. sectione patefcunt *ibid.* non confundendæ cum causa morbi 290. 402. quæ sint in genere 396. in variis morbis. *ibid.*
- Causus* ejus signa 293. differt à tertiana continua *ibid.* in ea crisis fit. 388.
- Cautica* in nervosis partibus atrocia cient pathemata. 310. 311.
- Cautele* in therapia necessaria. 286.
- Cephalalgia* ortus 163. 174. adolescentibus familiares 184. cur frequentiores 185. periodicæ unde 186. procreatio à vermibus. 235.
- Cephalalgia* spasmi pericranii debetur 303. ejus variæ causæ 296. ex abscessu in sinibus frontalibus 326. vino in ventriculo 314. polypo sinuum cerebri 303. coryza per frigus suppressa 340. mensium suppressione 341. narium hæmorrhagia 346. ventriculum per consensum afficit 314. 319. narium stillicidio mitescit 346. symptomaticæ & idiopathicæ origo. 475
- Cephalica* spirituosa in affectibus capitis ex resolutione pedibus applicanda. 318.
- Cerebri* humani moles 84. substantia corticalis 83. sine glandulosa *ibid.* ejus usus secretorius *ibid.* vulnera quæ lethalia 85. cum reliquis corporis partibus mira est consensio 158. tunicis quænam infesta. 224.
- Cerebrum* consentit cum ventriculo & intestinis 287. cum corde 289. ejus dispositio in morbis & quomodo cognoscenda *ibid.* extravasatio in eo cur lethalis. 397.
- Cerevisiæ* pravæ effectus 112. quænam optimæ *ibid.*
- Cerevisiæ* tenuis liberalior potus commendatur mulieribus. 243.
- Cerevisia* inebriativa insalubris 257. triticea noxia infirmis 252. quæ insalubris 288.
- Cerumen* quid & unde. 91.
- Cerussa* venenata est naturæ. 228.
- Chamomillæ flores* peculiaris virtutis 422. sistunt febriles motus. 318. 450.
- Charlottenburgum* febribus obnoxium. 208.
- Chinæ* cortex cur sit efficax antipyreticum 170. non tamen infallibile 153. 154. alvum adstringit 261.
- China china* pulsum mutat 369. febriles motus sistit 318. cur aliis antifebrilibus præferenda 422. quando profit in febribus 380. continuato usu tollit febres 423. specificum intermittentium 450. quas inducat mutationes 321. balneis secundantur. 464.
- Chiragra* à spasmi ligamentorum 303.
- Choledochus ductus* spasmo corripitur 304. unde icterus. *ibid.*
- Cholera* quid 306. ex bile caustica 316. à convulsiva affectione ductuum biliariorum & intestinorum 306. genus nervosum in consensum trahit 316. funesta signa 393.
- Cholerici* qui sint 44. habent fibras tensas 36. eorum proprietates 131. & diætæ *ibid.* in quos morbos facile incident. 243. cur doloribus magis sint expositi. 180.
- Chorion* utero continuum 79.
- Chronici* morbi non juvantur natura, 153. quomodo curandi. 260. causæ eorum frequentissimæ obstructions 411. quæ ad generationem ipsorum faciant 403. quomodo arcendi *ibid.* à sola natura non curantur 410. optima eos sanandi methodus 411. continuato medicamentorum usu tolluntur. 423.
- Chronicarum* passionum fundamentum 158. 164. 174.
- Chyli* albedo unde 63. elaboratio perficitur in intestinis 61. progressum quæ juvent 65. secretionem juvant valvulæ conniventes diætæ. *ibid.* natura. 237.
- Chylus* quid sit 63. differt à sanguine 50. non est proxima nutritionis materia 56. quomodo fiat sanguis 50.
- Chylum* copiosum quæ alimenta suppeditent 63.
- Chylificationem* quæ servant 139.
- Chymi* in ventriculo reliquiæ acidæ juvant digestionem. 60.
- Chymica* scientia medico opus 14. & 20. quando periculum in mora profunt. 422.
- Cibi* crudiores quas noxas inferant 115. ordine assumendi 110. non simul & semel. 115.
- Ciborum* optimorum abundantia nocet 114. quantitas differt secundum individua *ibid.* seq. sumendorum regula 115. varietas facit voraces *ibid.*
- Cibos* loco salubri oportet capere 104.
- Cibi* abstinentia in dolore graviore utilissima 237. corrupti & alieni cur noxii 197. sumendi in aëre puro & sereno. 264.
- Cibi* multum faciunt ad sanitatem 287. ingesti mutant pulsum 368. viscosi inflationem ventriculi 297. flatulenti colicam *ibid.* avidius ingesti recidivas pariunt 289.
- Ciborum* nimietas sanitati inimica 246. non tamen æque nocet robustis ac imbecilibus. 247.

- Cibus* non assumendus in locis contagio infectis. 204. paucior alvum adstringit. 261.
- Cibus* ad illorum promptiorem coctionem quænam aqua adhibenda. 469.
- Cicuta* exterius incaute usurpata pernicialia concitat symptomata. 199. quo pacto vim suam funestam exerceat. 198. terrestris cocta furorem parit. 200. ejus natura venenosa. 197.
- Cinnabaris* arcanum antepilepticum. 423.
- Cinnabarina* quomodo antispasmodica. 448.
- Circulus sanguinis* est ipsa natura veterum, morborum medicatrix. 52. est causa agilitatis & roboris. 51. caloris. *ibid.* chyliificationis. 50. secretionum & excretionum. 51. difficilis per caput. 47. per hepar. 48. venam portæ. 49. omentum lien. 48. colon. *ibid.* vasa spermatica. 49. uterum. *ibid.* celer per pulmones & renes. 50. liber præservat à morbis. 52. inæqualis quid efficiat. 43. sanguinis inæqualis in quo consistat. 165. sanguinis totius medicinæ fundamentum. 372. quoties hora succedat. 368. creber cur necessarius. *ibid.*
- Citri* succus optimum alexipharmacum. 204.
- Clavus* periculose excinditur. 311. *hystericus* à spasmo pericranii. 303.
- Clima* mutat ingenia. 97.
- Clopton Havers* laudatus. 20. & 72.
- Clysteres* antifebriles & nutrientes secretionem in crassis fieri confirmant. 64. emollientes commendantur calculo laborantibus. 236. quoduplices. 466. affines balneis. *ibid.* varii quomodo parandi. 467. tenuia potissimum afficiunt. 468. late vim diffundunt. 318. 468. quidam ferre nequeunt. 468. post pastum minus proficua. *ibid.* non nimis crebro injiciendi. *ibid.* varii in morbis usus. *ibid.* in febribus utiles. 355. nervis inimica non capiant. 468. acres non statim applicandi. *ibid.* antifebriles. 467. ex urina. *ibid.*
- Cobalti* nativi vis venenosa. 196.
- Cocculi* piscibus mortiferi. 198.
- Coecitas* ex repulsa tinea capitis. 336. scabie. *ibid.* consolidatis antiquis ulceribus. 337. ex epilepsia. 350.
- Coelum* asperum & frigidius quare ab ægro vitandum. 358.
- Coena* qualis optima. 110. senum sit levis. 134. in ea quæ non sint apta. 115.
- Cogitatio* intensior quid efficiat. 102.
- Cogitationes* profundæ corpori nocent. 194. limitatam habent vim in actiones mechanicas. 405.
- Coitus* multos foeminarum morbos aufert. 78. post gravem affectum non celebrandus. 196.
- Coitum* sæpe celebrantibus, quæ sint tenenda. 119.
- Colchicum* venenatæ est naturæ. 210.
- Colica* unde. 163. ejus sedes primaria. 164. à frigida potione. 233. flatulenta primæ senectæ familiaris. 184. spasmodica interdum ex tertiana intermittente oritur. 164. senum unde dependeat. 241. differt à dolore calculi & hypochondriorum. 297. à spasmo intestinorum. 303. ex arthritide præpostere tractata. 339. suppressis mensibus. 345. hæmorrhoidibus. 345. 374. calculosis cur familiaris. 353. nonnunquam nephritica. 297. parit icterum. 314. 354. facile recidivat. 356. paresin relinquit. 354. sphacello necat. 401. venæ sectione sæpe tollitur. 344. quibus levanda. 445. anodynus primum excipienda. 417. ejus specificum liquor anodynus. 450. in hac curanda interdum ad contraria remedia transeundum. 473. *flatulenta* quæ & unde. 297. 332. venæ sectione exacerbatur. 360. *hæmorrhoidalis*. 297. *biliosa*. 297. à spasmo ilei. 304. *hysterica*. 297. *convulsiva*. 297. consensus intestinorum testis. 316. venæ sectione curatur. 460. *spasmodica* metallurgis solennis. 316. vehementissima. 297. ejus signa & causæ. 297. seq. levatur clysteribus oleosis. 467. in ea coalescunt quandoque intestina. 402.
- Colocynthiacorum* virtus. 215.
- Colocynthis* cocta vim purgativam perdit. 214.
- Colon* flatibus sæpe distenditur. 332.
- Composita* veterum incondita. 422. non omnia spernenda. 422. virtus simplicium ex iis non patescit. 426.
- Conchæ* absorbent. 428. subadstringunt. *ibid.*
- Confortantia* spirituosæ debilibus non proficua. 420.
- Conclavia* hyeme non sunt nimis calefacienda. 135. eorum usus. 110.
- Condimenta* acida. 110. falsa *ibidem*. sale acri & oleoso prædita. *ibid.*
- Consensio motus* fluidorum. 62. partium membranarum & nervosarum. 25. & 29.
- Consensus partium* magni momenti. 286. 309. non fabula. 319. ex partium nexu. 309. à nervorum distributionibus. *ibid.* inter quas partes maxime vigeat. *ibid.* symptomatum suggerit rationes. *ibid.* ex medicamentorum operatione patet. 317. ex principii vitalis concursu non petendus. 310. nullus inter nervosas partes & sanguinea viscera. 316.
- Consuetudo* quid. 137. ejus magna vis. *ibid.* altera natura jure dicitur. *ibid.* facit, ut res perniciosæ non noceant. *ibid.* seq. promptitudinem motuum efficit. *ibid.* non temere mutanda. 138. in morbis exploranda. 288.
- Continua febris* ex repulsa crusta lactea. 336. scabie. *ibid.* restagnante sanguine lochiali. 342. malus in ea pulsus. 370. in ea profunt clysteres. 374. venæ sectio. 456. corruptionis viscerum comes. 324.
- Contractura* balneis martiatis tollitur. 464. seq. specificum ejus. 453.
- Convulsiones* differunt ab epilepsia. 299. sedes in spinali medulla. *ibid.* earum signa. *ibid.* minus salutaris naturæ motus. 411. varias partes quatunt. 305. à spasmo membranarum spinalis medullæ. *ibid.* 393. miræ ex vermibus. 332. prodeunte mensium fluxu cessant. 409. accedente febre solvuntur quandoque. 410. scarificationem melius quam venæ sectionem ferunt. 461. clysteribus placantur. 468. certæ infantibus propriæ ex ventriculo. 314. seq.
- Convulsiivi motus* in quo consistant. 306. in quibus morbis obvi. 305. eorum origo & sedes. *ibid.*
- Cor* machina motoria composita. 30. perpetuum mobile. 31. motum habet reciprocum. 30. ex quatuor musculis constat. 40. sanguinis circulum impellit. *ib.*
- Cor* perpetuum mobile. 365. ipsius systole quomodo contingat. 366. pulsus causa. *ibid.* imbecillis lipothymiam. 306. ad tempus intercepta syncopen parit. *ibid.* ipsius motus unde. 367. pulsui respondet. *ibid.*
- Cordis arteriæ* insignes & nervi. 33. auricula sinistra, cur minor dextra. 40. structura musculosa. 20. vasorum sanguiferorum peculiaris structura. 33. vasorum valvulæ. 40. & vasorum proportio mutua. 43.
- Cor piscis* in aqua calida motu privatum frigida injectum reviviscit. 155.
- Cordis læsio* cur lethalis. 160. palpitatione ex polypo insanabilis. 184. tremorum & palpitationum sedes. 179.
- Corallia* absorbent. 428. subadstringunt. *ibid.*
- Cornarius* sobrietate vitam produxit. 114.
- Cornelius Celsus*. 20. & seq.
- Corporeæ res* magnam vim in corpus habent. 369.
- Corpus humanum* est machina perfectissima. 29. jure dicitur machina. 27. est instrumentum ac domicilium mentis. *ibid.* corpus omne est agens. 18.
- Corpus humanum* machina artificiosissima. 309. hydraulica & vasculosa structura. *ibid.* vivum & physicum gratis distinguitur. 425. ex quo consistat vere sensit Hippocrates. 300. in morbis considerandum. 289. in prognosi. 396. medicamentorum oblatione distinguendum. 421. partes ipsius conspirant. 309. ad conservationem vitæ constrictum. 413. impurum periculosius à febribus prehenditur. 319.

Corpora quævis sunt substantiæ activæ. 97. organica, habent virtutem generandi. 75. gracilia, quid iis quadret. 131. impura non bene nutriuntur. 57. juniora facile nutriuntur. *ibid.* quæ motu plus egeant. 124. robusta quænam. 53. facile corrigunt alimentorum noxias qualitates. 110. singulis mensibus increscunt, sed per urinæ fluxum copiosiores iterum minuuntur. 120.

Corporis humani mixti principia. 26. partes solidæ & fluidæ. 27. machina est destructibilis. 29. natura salium genitrix. 220. mirabilis œconomia. 245. seq. habitus laxis & spongiosus multum facit ad morbos. 242.

Corporibus sintne vires tantum occasionales. 17.

Corporum vires non sunt absolutæ, sed relativæ. 7. motrices mensurat mechanicus. 18.

Corpora cur æstate minoris ponderis quam hieme. 265. imbecilliora gravius à causis nocentibus afficiuntur. 178.

Corporum naturæ medico debent esse cognitæ. 245. 273. differentia. 239. maximi momenti in arte medica. 240. virilium crisis. 259.

Corruptio non semper causâ mortis. 31. & seq. putredinosa unde. *ibid.* viscerum quomodo arcenda. 403. ex mortis causis. 396.

Coryzæ cur frequentiores. 185. adolescentibus & infantibus familiares. 184. 186. unde debeant apud senes. 242.

Coryza salutaris sæpe excretio. 288. 410. 347. spasmis stipatur. 302. solvit quosdam morbos. 410. venæ sectione arcerur. 460. quandoque adducitur. *ibid.* suppressa à frigore nocet. 340. purgantibus exacerbatur. *ibid.*

Cortex Chinchina non universale febrifugum. 14.

Costarum fabrica. 44.

Cowperus. 19.

Craanius. 17.

Crato. 21.

Crinonum generatio unde derivandi. 212.

Crisis ad prognosin spectat. 386. ipsius signa. 302. spasmis remittente sequitur. 303. fit per excretiones. 387. quid sit veteribus. 386. septenario & semiseptenario numero computanda. *ibid.* seq. extra septenos etiam dies contingit. 388. quibus solennis. *ibid.* unde repetenda. 389. quomodo rationaliter explicanda. 390. non turbanda. *ibid.* melius succedit ordinatis temporibus. 389. autorum variæ de ea sententiæ. 387. quæ sit in acutis. 388. & chronicis morbis. 390. in purpura non obvia. 389. per imprudentem medicationem turbatur. *ibid.* pro circumstantiarum ratione distinguenda. 388. non omnis larga evacuatio & symptomatum remissio crisis. *ibid.*

Crocus metallorum veneni naturam æmulatur. 213.

Cruditates quid generet. 116. non sunt prima mali hypochondriaci causa. 317. viscidas quæ dissolvant. 430.

Crurum inflatio & tumor in gravidis unde. 168.

Crusta infantum lactea salutaris. 120.

Crusta lactea unde dependeat. 183. 241. ætati infantili familiaris, retrograda. 178. repulsa febrem facit continuam. 336.

Cubacula quænam noxia. 104.

Cucurbitulæ vicariæ venæ sectionis. 461.

Curæ anxietatis cur turbent egestionem alvinam. 241. 261. senibus noxiæ. 170.

Cursus vehementior motus. 122. quibus noceat. *ibid.*

Cuticula tactum moderatur. 94.

Cutis structura qualis. 67. ejus tonus modificat transpirationem. 68. est tubulis pervia. 67. tactus organon. 94. vitia unde ortum habeant. 168. universi corporis emunctorium. 258. sulphurearum sordium excretorium. 381. elastica. 382. consentit cum ventriculo. 315. ad sudoris successum facit. 382. spasmis affecta perspirationem cohibet. 303. varia mala gi-

git. *ibid.* seq. pessimi ominis in acutis arida. 391. resoluta imbecillitatem prodit. 307. sudoris frigidi & colliquativi causâ. *ibid.* summa metastasibus pernitiosis maxime obnoxia est. 357. cujus tonus & aëris mutatione repentina vitatur. 360. hinc æqualis & moderatus conservandus. 362.

Cynanche anginae species. 295. differt à spasmis faucium. *ibid.* quid? *ibid.* signa ejus. *ibid.* funesta. 393. suffocatione perimit. 394.

Cynicus spasmus post podagram. 315.

Cynoglossæ pil. caute adhibendæ. 223.

Cystici ductus spasmis affecti diarrhœas & vomitus biliosos movent. 304.

D.

D*atura*, Indica semen cujus indolis. 172. 197. quæ gignat symptomata. 200.

Deambulatio levissima motus species. 121.

Debiles quomodo nutriendi. 116. qui sunt. 396. 420. quomodo dignoscendi. 348. medicina egent. *ibid.* fortiora medicamenta non ferunt. 420. nec valentia alimenta. 421.

Debiliores fugiant edacitatem. 115.

Decocta continuato usu juvant. 423. lenientia profunt in exanthematicis. 408. sudorifera balneis nupta juvant. 464.

Decubitus in latere dextro, quando conveniat. 128. in lecto qualis optimus. *ibid.* supinus reprobat. *ibid.*

Defædationes cutis cum salute sæpe fiunt. 410. specifica in iis. 453.

Deglutitio difficilis unde. 306.

Dejectio nigra, foetida, per alvum unde proveniat. 167.

Deliria cur ex læsione nervi oriantur. 158.

Delirium à vermibus excitatum. 235. ex dentium dolore. 236. ex acicula deglutita. 237.

Demulcentia materiæ correctioni dicata. 428. eorum supellex. 430. operandi ratio. 431. usus in variis casibus. *ibid.* externus & internus. *ibid.*

Dentes meliores habent, qui aquam potant. 112. cur nigredinem contrahant à dulcibus. 254.

Dentium dolor etiam adultioribus gravia parit mala. 236. quo pacto omnium facillime sistatur. 237.

Dentitio difficilis, quæ pariat symptomata. 236. cur epilepsiam quandoque excitet. 163. spuria, remedia contra eam. 237. ejus symptomata unde. 314. 319.

Derivantium ratio. 43.

Desiderii vehementis effectus. 102.

Desiderium ventriculo nocet. 313.

Diabetes ex atonia renum. 307.

Dieta non omnibus una convenit. 129. variat secundum ætatem. 132. secundum virium diversitatem. *ibid.* temperamenta. 131. sexum. 136. anni tempora. 135. foeminarum. 136. gravidarum. 79. 136. seq. juvenum. 134. senum. *ibid.* sanationi servit. 422. à priscis optime commendata. *ibid.*

Dietetica medicina, quam sequatur regulam. 129.

Diagnosis scitu necessaria. 292. ex observationibus haurienda. 293. nititur signis. *ibid.* plerumque negligitur. 292. ad eam referendus pulsus. 364. erronea medicum ludibrio exponit. 292.

Diaphoresis movetur quandoque acidulis & nitrosis. 438.

Diaphoretica fixiora porrigenda in morbis incognitis. 187. morbos contagiosos in prima herba tollunt. 205. polychrestâ. 437. sudoriferis præferenda. *ibid.* ipsorum apparatus. *ibid.* modus agendi. *ibid.* usus in morbis. *ibid.* & seq. in pulvere alvum sæpe movent. 438. in doloribus anodynis miscenda. *ibid.* fixa ubi acidum deest parce danda. *ibid.* quibus malis conducant. 363.

Diaphragma spasmis patet. 304. consentit cum ventriculo. 315. convellitur quandoque. 306. in ster-
nuratione per consensum afficitur. *ibid.* titillatione
commotum cachinnos movet. *ibid.* spastice affectum
asthma. 304. 306. 320. & hepatis obstructionem
causatur. 320. convulsus asthmatis & singultus
causa. 306.

Diarrhœa incunabula. 168. 175. 179. 187. 241. non-
nunquam anniversaria. 183.

Diarrhœa quomodo succedat. 385. per spasmos. 302.
sæpe salutaris excretio. 288. 302. 347. 384. 386.
410. in febribus etiam malignis. 386. critica quan-
doque. 387. solvit morbos. 416. inprimis capitis.
386. à convulsiva affectione ductuum biliariorum
& intestinorum. 306. ex pedum refrigeratione. 315.
à villosa obstructa. 385. quandoque minus salutaris
naturæ motus. 411. seq. sphacelo intestinorum ne-
cat. 401. intestina debilitat. 420. suppressa nocet.
288. 347. inprimis per adstringentia. 352. clysteri-
bus levatur. 468. post eam roborantibus utendum.
420. symptomatice noxia. 412. quomodo compes-
cenda in febribus. 386. biliosa diuturna nocet. 384.
ex purgantium usu in catarrhis incompefcibilis.
340. quare malum signum. 362.

Diastole cordis & arteriarum. 30. systolen sequitur &
proritat. 365.

Digestio prava quos morbos generet. 185.

Digestionem calor adjuvat. 60. turbant affectus. 102.
seq.

Dissectionum utilitas. 176.

Diuretica evacuantium genus. 438. eorum apparatus.
ibid. modus agendi. *ibid.* seq. usus pro ratione cir-
cumstantiarum discrepans. 439. in doloribus arthri-
ticis & rheumaticis proficua. *ibid.* quæ optima. *ibid.*
in compluribus morbis proficua. *ibid.* seq. calidiora
profunt humidioribus. *ibid.* & ubi viscidæ sordes in
renibus. *ibid.* nocent plethoricis. *ibid.* renibus debi-
litis. 353. & ubi dolores adsunt. 439.

Dolor perceptionum species. 94. ejus subjectum mem-
branæ. *ibid.* varius est. *ibid.* quibus sopiendus. *ibid.*

Dolores atroces gravium morborum causæ. 236. gra-
vativi unde. 166. alvum & vias ordinarias con-
stringunt. 261. variæ species. 296. 303. spasmis in
nervosa parte debentur. *ibid.* pro locorum differen-
tia variant. *ibid.* succos inquinant. 319. excretiones
cohibent. 320. partes tono privant. 354. critice quan-
doque solvuntur. 390. levantur liquore anodyno.
317. oleo amygdalarum dulcium. 318. balneis. 463.
fotibus emollientibus. 431. specifica in iis. 450. in-
testinorum, Vide colica, capitis, Vide cephalalgia
&c.

Doloris sistendi scopi. 225.

Dolorum effectus veneni effectibus non ab similes. 237.

Dubitatio medico præcipue commendanda. 154.

Dulcia indoli sanguinis non conveniunt. 108. cum fer-
mentescibilibus non jungenda. 111. cum acidis sum-
ta fiunt noxia. 252. multum nutriunt. *ibid.* lym-
pham corrumpunt. 254. stomacho infirmo aliena.
ibid. jejuno ventriculo haut sumenda. *ibid.* cur mor-
bos exasperent. *ibid.*

Duodenum ventriculus parvus. 61. 63. plurimorum
morborum sedes. 179. ejus flexura febrium fons &
origo. *ibid.* ventriculus succenturiatus. 307. sedes
morborum multorum. *ibid.* atonia affectum quæ
pariat mala. *ibid.* inflammati & sphacelati signa.
324. erosi indicia. 333. scirrhi in eo signa & effe-
ctus. 329.

Dura mater habet systolen & diastolen. 85. ejus stru-
ctura & officium. *ibid.* ejus sinus. *ibid.* læsiones gra-
ves noxas inferunt. *ibid.* membranarum nervosarum
origo. 305. motu tonico gaudet. *ibid.* sanguinis pro-
gressum per caput moderatur. *ibid.* spasmos patitur.
ibid. consensum alit cum omnibus membranis. 305.

Frid. Hoffmanni Oper. Tom. I.

seq. ab ejus spasmis mentis & capitis morbi. *ibid.*
epilepsia. *ibid.* seq. ejus atonia gravium cerebri mor-
borum causa. 306.

Duratio quid sit. 26.

Diretus. 19. 21.

Dysenteriae incunabula. 179.

Dysenteria maligna quo pacto facillime juguletur. 204.
cur contagiosa sit naturæ. *ibid.* epidemia proles ro-
ris corrosivi. 211. non indistincte curatur ipeca-
cuanha. 153. non sine periculo adstringentibus sisti-
tur. 262. quo pacto caute curanda. *ibid.* minus sa-
lutaris naturæ motus. 412. rubra & alba. 296. di-
stinguenda ab hæmorrhoidibus. *ibid.* ex scabie re-
tropulsa. 336. solvit quandoque morbos. 410. in-
flammatione & sphacelo afficit intestina. 324. genus
nervosum afficit universum. 315. excrementa in ea.
385. qualis in ea pulsus. 371. sphacelo necat. 401.
adstringentibus perperam curatur. 352. funestæ si-
gna. 393. laudanum prodest in ea. 318. levatur fo-
tibus. 465. clysteribus. 468. ejus specifica. 452. post
eam intestina roboranda. 420.

E.

E *Clegmatum* usus nimius nocivus. 254.

Egestionem respondere debent ingestionibus. 246.
257.

Elasticitatis insignia exempla in corpore humano. 35.

Elasticum quid. 35.

Elaterii virtutes. 215.

Elaterium coctum vim purgativam amittit. 214. quo-
modo aquas hydropicorum evehat. 316. veteribus
specificum ad hydropem. 451.

Electuarii de ovo efficacia in peste. 226.

Elephantiasis origo. 202.

Ellebori virtutes. 215.

Ellychnii extincti fumus quam noxius. 230.

Emetica veneni naturam imitantur. 212. perperam e-
foro medico eliminantur. 154. contra venena stu-
pescitiva remedia. 201. locum non habent in affe-
ctibus periodicis. 187. & retrogradis. *ibid.* in prin-
cipio pestis commendantur. 176. 204. ubi vitanda.
213. in affectionibus ab ira productis. 190. duplicis
generis. 432. eorum apparatus. *ibid.* modus agendi.
ibid. icterum gignunt. 314. post iram noxia. 313.
416. pulsus mutant. 369. ad morbos præscinden-
dos in principio optima. 414. 415. melius in forma
liquida. 433. & pariori doli propinantur. 416.
quando noceant. 433. in hydropicis per inferiora
agunt. 432. balneis utiliter fociantur. 464. clysteri-
bus in apoplexia & hydrope indenda. 467. tempore
paroxysmi non danda. 418. in erysipellate data in-
flammationem ventriculi gignunt. 337. necantia
quæ habeant signa. 393. valentiora quando condu-
cant. 432. seq.

Emmenagoga quæ sint. 439. seq. quomodo perite ad-
hibenda. 440. nonnisi præparatis viis & humoribus
offerenda. 415.

Emollientia quæ sint. 430. quomodo agant. 431. usus
internus & externus. *ibid.*

Empiria differt à rationali medicina. 424. ei favet sen-
tentia de principio interno activo. 425.

Empiricorum πῦρον ψυδός. 14. vetus secta in quo
laudanda. 16. in quo defecerit. *ibid.*

Emplastra constringentia retropellendi facultate pol-
lent. 207.

Emplastrum strobilbergeri paroxysmos intermitten-
tium sistit. 318. anodynum capitis dolores & vomit-
us placat. *ibid.*

Empyemata pulmonum ex pleuritide quandoque oriun-
tur. 165.

Empyema ex pleuritide quomodo. 351. facilius gene-
ratur ex pleuritide quam peripneumonia. *ibid.* ex im-
prudenti

prudenti venæ sectione in pleuritide. *ibid.*
Endemii morbi quinam. 181. unde oriuntur. 209. quo pacto avertendi ab urbibus. 212. aëris vitio debentur. 335.
Ephamera ejus signa. 293. in ea crisis succedit. 388.
Epidemiorum morborum causæ. 207. 267. 209. diversissimus habitus unde. 210. historiæ accuratius annotandæ medicis. 267. seq.
Epilepsiæ incunabula. 179. subiectum. *ibid.* cur non adeo frequentes in brutis. 180. ex animi pathematibus oriuntur. 185.
Epilepsia à calculis. 236. à dolore dentium. 168. 236. à terrore oriunda. 191. à vermibus. 235. infantili ætati familiaris. 241. symptomatice & idiopathica. 182. cur ex nervi læsione oriatur. 158. cur facile recurrat. 244. non indistincte curatur lumbricis terrestribus. 153. non nunquam mercurialium progenies. 220. in adultioribus periculosior quam infantibus. 183. nonnunquam hæreditaria. 243. quæ incurabilis. 244. senibus rarior. 185. cur maxime generetur tempore verno. 266. universalis convulsio. 306. differt à convulsione. 299. ejus signa. *ibid.* minus salutaris naturæ motus. 411. seq. spasminis stipatur. 302. sedes in cerebri membranis. 299. à spasmo potissimum duræ matris. 306. 407. ex repulsa crusta lactea. 336. scabie. *ibid.* consolidatis ulceribus. 337. podagra præpostere tractata. 338. retentis mensibus. 341. suppressa narium hæmorrhagia. 346. post atroces dolores cur oriatur. 354. hæreditarius morbus. 349. facile recidivat. 356. per crisin quandoque discedit. 390. febre nonnunquam solvitur. 410. mensium fluxu prodeunte sæpe cessat. 409. ex pollice pedis sæpe ortum sumit. 315. qualis in ea pulsus. 371. cur inducat oculorum vitia. 350. scarificationem melius quam venæ sectionem fert. 461. clysteribus abigitur. 468. specifica ipsius. 451. causa mortis in ea. 396.
Epiphora ejus specificum. 453.
Epubemii morbi quibus causis debeantur. 291. seq. ab aëris subitaneis mutationibus oriuntur. 334. quomodo observationes de iis instituendæ. 291. seq.
Equisetum palustre venenatæ naturæ. 210.
Equitatio motus species. 121. quibus conveniat. 122. ejus gradus. *ibid.* quibus morbis averendis prodest. *ibid.*
Erdenkopf cum pane comestum quænam producat symptomata. 230.
Errhina quæ sint. 442. quomodo agant. *ibid.* usus & noxa. *ibid.*
Eruclationes ab acidis. 252.
Erysipelacea febris ex mensium emanatione. 341.
Erysipelas intro versus lethale. 187. iram quandoque subsequitur. 190. haut repente reprimendum. 263. quibus cognoscatur signis. 295. seq. quomodo gignatur. 302. differt à phlegmone. 295. seq. spasminis stipatur. 302. repulsum nocet. 337. retrocedens necat. 395. capitis incaute tractatum multa mala profert. 357. quando res magni periculi habeatur. 362.
Erysipelata retrograda. 187. salutariter per iram excitata. 190. gravidarum unde deducenda. 243. periodica capitis unde. 186.
Esculenta veneni naturam induentia. 230. venenosa. *ibid.*
Essentia humana naturæ in quo consistat. 26.
Esula cocta vim purgativam perdit. 214.
Evacuantia varii generis. 431. seq. operantur ratione circumstantiarum. 425. præparata materia. 415. in principio & fine morbi offerenda. 414.
Evacuatio per congrua loca. 415. brevissima via. 414. & præparata materia suscipienda. 415. non impetuose urgenda. 416.
Eunuchorum qualia corpora. 76.
Exanthemata unde. 174. repulsa à terrore. 191. sudo-

riferis non expellenda. 418. venæ sectionem non semper interdiciunt. 457. repelluntur per spasmos. 302. refrigerationem. 337. seq. purgantia & emetica. 416. sub situ erecto disparent. 338. repulsa perniciose. 302. 315. 337. faciunt oppressionem pectoris. 305. citice solvunt quandoque capitis & nervorum morbos. 390.
Exanthematica febris naturæ & artis processus in sanandis iis. 408. quæ noxia in iis. *ibid.* clysteres faciunt. 468. necnon venæ sectionem. 456. sed justam. 459.
Exanthematica materia repulsa veneni vim habet. 336. cur tam graviter noceat. 337. facit oppressionem pectoris. 305. resistans quæ pariat symptomata. 315.
Excrementa nigra à vitriolaceis aut martialibus. 66. Vid. *Alvus*. non evacuata fiunt venena. 206. alvi inspicienda in morbis. 384. signa ex iis. *ibid.* foetor unde. *ibid.* unde viridia. 319. 384. alba ex bilis defectu. 384. fusca & bruna ex bilis copia. *ibid.* nigra à sanguine. 385. liquida copiosa ex obstructione villosæ. *ibid.* unde mucida. *ibid.* dura nimis. *ibid.* sanguinolenta. *ibid.*
Excreta indicia præbent. 375. respondere debent ingestis. 288. 333.
Excretiones pendent à circulo sanguinis. 54. respondere debent ingestionibus. 66. 117. sunt variæ. 66. earum successus medico curæ esto. 139. æquales debent esse ingestionibus. 157. cur sine iis homo vivere non possit. *ibid.* diminutæ ante omnia restituendæ. 260. quomodo ciendæ in corporibus tum macilentioribus, tum spongiosis. 260. prudenter moderandæ à medico. 259. suppressæ plurimum morborum causæ. 176. rite peractæ non unica vitæ ac sanitatis causa sunt. 152. iis vigentibus totum viget corpus. 258. ad sanitatem necessariæ. 288. 333. à medico considerandæ. *ibid.* variæ. 333. in morbis salutare. 407. præcipua perspiratio. 334. evacuationibus turbantur. 348. natura deficiente promovendæ. *ibid.* suppressæ nocent. 334. 348. & mox revocandæ. 348. critica salutare. 288. duplici modo. 419. septenario numero adstrictæ. *ibid.* non interceptiendæ. *ibid.* etiam si fuerint nimix. *ibid.* suppressæ nocent. 288. 389.
Exhalationes ex aquis stagnantibus venenosæ sunt. 207.
Exhalationum copia è corpore humano. 265.
Expectorantia quæ sint. 441. quomodo agant. *ibid.* cum discrimine usurpanda. *ibid.*
Experientia medica qualis. 14. seq. sola non est sufficiens. *ibid.* effectum remediorum docet. 426. non tamen una sufficit. *ibid.*
Experimentum probans vivusne an mortuus fuerit infans. 80.
Expectatio arcanum in medicina. 414.
Exspiratio quid. 44.
Externorum usum cur non omnes æque ferant. 89.
Extravasatio lethalis in capite quomodo arcenda. 402. sanguinis inter fibrarum interstitia commentum. 365. ex choroideo plexu apoplexiæ causa. 324. ovarii ex vasis. 327. ex liene disrupto. 329. feri. 328. sanguinis vel feri quomodo necet. 397.
Exulcerationum foedarum ortus. 168.
Exulcerationes pulmonum fistulosæ insanabiles. 184.

F.

F *Aciei* color vivus unde mutetur. 166.
Facies color ipsius ad historiam morbi. 287. indicia ex florido. *ibid.* livido. *ibid.* Hippocratica quæ & unde. 392.
Fallacia causa ut causa frequens in medicina. 425.
Fames ingens à vermibus. 235. canina à scirrho pancreaticis. 328.
Fastidium ciborum in gravidis unde. 243.

Favi

- Favi repulsi asthma gignunt.* 336.
Febris lactea. 80. ea laborantes nutrices lac sanum infanti præbent. *ibid.* & seq.
Febres ex acicula deglutita. 237. ex dentitione difficili. 236. à dolore dentium. 168. ex lacte stagnante. *ibid.* à vermibus ortæ. 235. ardentes ex animi pathematibus oriuntur. 185. cur ex læsione nervorum oriantur. 158. intermittentes cur frequentiores. 185. benignæ quomodo fiant malignæ. 181. lentæ & mesentericæ unde generentur. 167. pestilenciales & petechiales cur tam malignæ. 161. quando salutares. 170. seq. quare facile patiantur recidivam. 169. quare non adeo frequentes in brutis. 180. quo pacto facillime arcendæ. 260. quo pacto fiant juxta Hippocratem. 167. rheumaticæ cur frequentiores. 185. tertianæ incongruæ pertinaciores. 183.
Febris quid sit? 370. seq. denominatio multis communis. 293. ipsius species distinguendæ. *ibid.* formalis ratio spasmo continetur. 302. spasmus universalis. 407. duplici motu absolvitur. 301. 407. sæpe perniciofa. 411. per se non salutaris. 303. succos vitales corrumpit. 319. vires destruit. *ibid.* ad chronicas passiones disponit. *ibid.* in corpore impuro pejor. *ibid.* ex cohibito fluore albo. 340. ex vermibus. 332. ex refrigeratione post iram & calorem. 335. soluto spasmo remittit. 301. 303. in Carolinis ex tempore gignatur quomodo. 335. convulsiones & epilepsiam solvit. 410. ejus signum pathognomonicum pulsus frequens. 370. pulsus habet durum. *ibid.* mala signa. 391. naturæ & artis methodus in sananda ipsa. 407. in principio optime fert laxantia vel emetica. 415. clysteribus sistitur. 467. quænam aqua in illa conducat. 471. nulla fit sine rigore partium externarum. 475. quare à priscis medicis pro medicina sit habita. 476.
Febriles motus sedem habent in spinali medulla. 305. quibus sistantur. 318.
Fœminæ alunt plus sanguinis quam viri. 73. viris imbecilliores. 136. 287. 349. valent purgatione menstrua recte procedente. *ibid.* iis motus commendandus. 124. cur morbis plus expositæ quam viri. 243. earum morbi unde potissimum deducendi. *ibid.* quo pacto præcavendi. *ibid.* morbis magis obnoxia. 349. peculiaribus etiam. 287. qualem habeant pulsus. 368. experiuntur quandoque hæmorrhoides. 342. seq.
Fermentum morbificum falso pro omnium morborum causa venditur. 151.
Fernelii laudes. 21.
Fibræ motrices. 27. habent duplicem motum. 87. earum constitutio robur præstat. *ibid.* musculorum tensio, quid efficiat. 36. motrices causarum morborum subjectum. 179. in senibus nimis duræ & solidæ fiunt. 162. densiores & laxiores non tam acerbis doloribus sunt expositæ quam teneriores. 180.
Fibrarum structura multum tribuit ad æquabilem sanguinis motum. 156.
Fibris quo pacto robur aut imbecillitas corporis metiendi. 240.
Fistula ex variolarum reliquiis. 355. ani consolidata apoplexiam gignit. 347. seq.
Flammula Jovis venenata est naturæ. 210. vitalis terminus nihil significans. 151.
Flatus unde generentur. 67. quomodo generentur. 332. à cibis viscosis. 297. intestina & abdomen distendunt. 332. colon sæpissime obsident. *ibid.* causa atrocium pathematum. 332. inflationis ventriculi. 297. 332. doloris in sinistro hypochondrio. 332. pulsus quandoque suspendunt. 370. cur calculosis familiares. 353. quibus discutiendi. 445. 450.
Fluida crassiora. 27. vel subtiliora. *ibid.* tenuiora maxime expanduntur à calore. 33.
Frid. Hoffmanni Oper. Tom. I.
Fluida non nisi motus expertia morbum faciunt. 174.
Fluida corporis humani solida quantitate superant. 367. ex solidis vitium capiunt. 319. depravantur in febrilibus. *ibid.* animi affectibus. *ibid.* doloribus. *ibid.*
Fluidorum temperies continua agitatione tandem destruitur. 28.
Fluidum nerveum ex tenuissimis partibus chyli, lymphæ & sanguinis delibatur. 83. illud dari probatur. 27. duplicis est substantiæ. 83. veteres dixere spiritum animale. 83. an sit lucidæ igneæ naturæ. *ibid.* est causa motuum. 86. dat musculis instinctum ad motum. 88. quod experimento probatur. 84. facit ad sensationem. 89. ad robur partium requiritur. 36. salivam subit. 59. lac subit. 81. in generatione multum efficit. 75. sanguini partim redditur, partim expirat. 86.
Fluidum cur in sanguine prævalere debeat solido. 157.
Fluor albus excretio salutaris unde. 242. suppressus quæ mala pariat. 263. à suppressis mensibus. 341. ex puerperio. 350. post abortum & puerperium. 353. præpostere cohibitus nocet. 326.
Fluviorum inundationes morborum epidemiorum causa. 208.
Fœsus laudatus. 19. & 21.
Fœtor excrementorum alvi unde. 66. in violenta morte peremtis haud deprehenditur. 160.
Fœtus an per os nutriatur. 80. an per ultimos saltem menses. *ibid.* humanus cystidem bile repletam habet. 63. non respirat. 80. nutritio quomodo fiat. 79.
Fontes salubres præstantissima sunt medicina. 139.
Fonticuli in morbis contagiosis commendantur. 205. sæpe salutari serviunt excretioni. 347. occlusi obsunt. 337. qua ratione damnosissimi. 358. seq.
Foramen ovale. 80.
Fotus profunt in dysenteria. 465. ad eliciendas hæmorrhoides. *ibid.*
Friktiones juvant corpus. 123. quales esse debeant. *ibid.* senibus utiles. 135.
Frictio facit ad progressum sanguinis. 321. in syncopis utilis. 318.
Frigida potio cur adeo nociva. 178. quatenus noxia, quatenus salubris. 233. copiosius in calefactum corpus ingesta deliquium parit. *ibid.* vitam tollit. *ibid.* adversa maxime ventriculi & intestinorum texturæ. *ibid.* febrili æstu correptis exitium infert. 234. cur corporis excretiones sistat. *ibid.* imprimis pestiferas ubi ventriculi imminet quædam inflammatio. *ibid.* maxime infensa senibus. 235.
Frigus intensum infantes lædit. 133. quid in corporibus efficiat. 105. quibus partibus maxime noceat. *ibid.* nocturnum, quo tempore maxime sit cavendum. 106. purgationem menstruam turbat. 136. quomodo hominem perimat. 30. senes lædit. 134. unde corpori oboritur. 50. seq.
Frigus corpori inimicum. 185. humidum plus valetudini infensum quam siccum. 267. siccum boreale ubi & quibus noceat. 266. externum perspirationem cohibet. 261. post calorem noxium. 335. excretiones criticas sistit. 288. exanthemata repellit. 302. colicæ causæ. 297. in febribus à spasmo cutis. 302. an & quomodo podagricis levamento fit. 360. illius in corpore effectus. 470. qua ratione in potu salutarem edere possit effectum. 471.
Frigore ambusta non sunt nimium & subito calefacienda. 106. enecatis, quomodo succurrendum. 31. ex frigore in magnum calorem concedere periculosum. 106. sub frigore intenso, quibus utendum. 105.
Frigoris & sicci & humidi natura atque efficacia. 266. seq.
Frontalis vena utiliter in capitis morbis secatur. 458. non tamen semper. 459.
Fructus horæi. 109.

Fruentacea terream sanguinis partem augment. 108.
Functiones triplices in homine. 405. in morbis læduntur. 289. mechanicæ medicinæ objectum. 405. læsæ quomodo explorandæ. 289.
Fungi facultate pollent deleteria. 231. quænam exci- tent symptomata. *ibid.* unde veniant tristitia illa symptomata. 232.
Funiculus umbilicalis. 78.

G.

G*alenus* Aristotelis principia in medicinam intru- lit. 16. nimis multas finxit pulsum species. 364.
Galen merita. 21.
Galenici cum chymicis jungendi. 22.
Galli cur venæ sectionem facile tolerant. 37.
Gangrænæ indicia observata in rustico, canis rabidi morfu extincto. 200.
Gangræna quid. 296. differt à phlegmone. *ibid.*
Gelatinosa proxime in sanguinem vertuntur. 37.
Generatio quid sit. 55. 75. pertinet ad actiones natu- rales. 75.
Genus nervosum in morbis omnibus affectum. 308. à causticis & venenis ad anomalos motus abripitur. 310. universali spasmo affectum mali ominis. 392.
Gestationis commoda. 123.
Gialappæ resinæ virtutes. 215.
Gist-mehl. 196.
Glacies deglutita dysenterias parit. 233. seq.
Glandularum & secretionis intimior cognitio, quibus debeatur. 19. conglobatarum vitio enata corpori damna. 58. colli tumores ætati infantili familiares. 241. unde dependeant. *ibid.* laxitas & atonia quid causentur. 168. quid earum obstructio & tumefa- ctio. *ibid.* tumores unde. 183.
Glandulæ sunt simplices vel compositæ. 54. continuati ductus arteriarum. 55. simplices nihil separant. 54. conglobatæ dant lymphæ impulsus. 58. Cowpe- rianæ. 72. juncturarum. 20. lenticulares intestino- rum mucis emunctorium. 71. mucilaginosæ junctu- rarum. 72. mucosæ erosæ quid faciant. *ibid.* vaginæ uteri. *ibid.* vesicæ urinariæ. *ibid.* spasmo afficiuntur. 304. seq. mammarum spasmo affectæ secretionem lactis impediunt. 304. tumores & ulcera gignunt. *ibid.* faucium & palati contractæ sitis. *ibid.* iterato strictæ & laxatæ salivationis causa. *ibid.*
Glauberus. 21.
Glaucoma unde. 91.
Gonagra unde. 163. senibus familiaris. 183. à spasmis ligamentorum. 303.
Gonorrhœa unde. 168. cur contagiosæ sit naturæ. 210. inveterata insanabilis. 184. virulenta quo pacto in prima herba tollenda. 205. inconsultè adstringenti- bus tractata quæ mala pariat. 263. adstringentibus perperam tractatur. 353. seq. cohibita & calidiori- bus excepta lûem veneream gignit. 340. ex male curata scirrhus prostatatum. 329. qualem habeat urinam. 380. ipsius specifica. 452. benigna ab ato- nia vesicularum feminalium. 307. virulenta diure- tica fert. 439.
Graafius. 20.
Grammanni tinctura antiphthifica periculosa. 228.
Gravedines infantibus & adolescentibus maxime fa- miliares. 183. 241. cur frequentiores. 198. cur ma- xime generentur tempore verno. 266. fenum unde dependeant. 241. causa generalis. 168.
Graveolentia specificum in hysterica passione. 451.
Gravidæ hæmorrhoides salutariter ferunt. 342.
Gravidas oportet studere liberæ transpirationi. 137. & fugere animi commotiones. *ibid.* iis nocet vita sedentaria. 79. prodest venæ sectio tempestiva. 137. & seq.
Graviditas à scirrhus mésentieri quomodo distinguenda.

329.
Griebel-Kranckheit ejus causa. 230.
Gustus ejus organon lingua. 93. in papillis nerveis residet. *ibid.* quomodo fiat. *ibid.* & seq. cum odore sympathiam alit. 305. à spasmo tunicæ pituitariæ impeditur. *ibid.*
Gutta rosacea haud repente reprimenda. 263.
Gutta serena unde. 187. ex paralyfi nervi optici. 306. consolidatis antiquis ulceribus. 337. ex epilepsia quomodo. 350. ejus specificum sulphur antimonii. 453. rosacea raucedinem cum difficili spiratione concitat. 357.

H.

H*abitus corporis* qui morbosus, qui sanus? 287. 348. facit ad pulsum. 368. in historiis morbo- rum exponendus. 286.
Hæmatitis tinctura alvum adstringit. 261.
Hæmoptyses unde. 166. ex animi pathematibus. 185. à terrore ortæ. 191. menstruæ. 186. nonnunquam hæreditariæ. 183. pueris & senibus rariores. 185.
Hæmoptysis ex disruptis vasis pulmonalibus. 49. ejus dif- ferentiæ & signa. 296. quomodo succedat. 301. hæ- reditarius morbus. 349. spasmis debetur. 302. à po- lypis vasorum pulmonalium. 329. 398. ex mensium suppressione. 340. ingignit phthisin. 350. præcipue in foeminis. 341. causa mortis in ea. 398.
Hæmorrhagia narium salutaris. 120. uteri cum mensi- bus non debet confundi. 79.
Hæmorrhagiæ unde. 165. ex animi pathematibus. 185. narium menstruæ. 186. repente cohibita quæ mala pariant. 263. terrore cohibita. 192. cur maxime ge- nerentur tempore verno. 266. earum differentiæ. 296. salutare. 288. 409. quomodo succedant. 301. debentur spasmis. 342. 301. considerandæ. 344. 288. solvunt morbos. 409. si deficiunt promovendæ. *ibid.* qualis ante & post eas pulsus. 371. quibus præsidiiis & quomodo movendæ. 439. seq. antispasmodicis rectius sistuntur quam stipticis. 417. & adstringen- tibus. 447. earum specifica. 452. pilulis de cynogl. & martiali liquore compescuntur. 318. critica quan- doque. 387. à spasmis supprimuntur. 302. suppressæ nocent. 288. 302. non tamen omnium morborum causæ. 345. nimia debilitant. 349. exitiosæ. *ibid.* fu- nesta signa. 395. ex incongruis locis suppressis men- sibus. 340. ex præputio rariores observatæ. 296. Vid. *narium & uteri hæmorrhagia*.
Hæmorrhoidales venæ internæ lethalem rupturam passæ. 327. à sanguisugis non evacuantur. 462.
Hæmorrhoidalis fluxus. 19. seq. 49. excretio salutaris. 120. suppressa nocet. *ibid.*
Hæmorrhoidalis dolor unde. 163.
Hæmorrhoidarii abstinere debent ab emeticis. 213. seq. cur tam atroces sentiant dolores. 167.
Hæmorrhoides primæ senectæ familiares. 183. cur se- nibus magis familiares, quam juvenibus. 170. præter- naturale quid. 342. salutaris excretio. 288. 342. ea- rum signa. 296. distinguendæ à dysenteria. *ibid.* quomodo erumpant. 301. 342. spasmis debentur. 301. inprimis hypochondriorum. 345. hæreditariæ. 343. quibus solennes. 342. foeminis quandoque ac- cidunt. *ibid.* gravidis quoque. *ibid.* mensibus sup- pressis sæpe manant. *ibid.* nonnunquam cum lochiis fluunt. *ibid.* cur adeo familiares. 343. solvunt mul- tos morbos. 409. mentis morbos solvunt & præser- vant. 343. nephritidem curant. *ibid.* præservant ab hæmoptysi. *ibid.* arthritide. *ibid.* pleuritide. *ibid.* cu- tis defædatione. *ibid.* hypochondriaco malo. *ibid.* scorbuto. *ibid.* scotomia. 344. in morbis ab earum suppressione aperiendæ. *ibid.* certa ad revocandas ipsas non dantur remedia. 346. intempestive pulsæ nocent. 345. 346. nonnisi præmissis præparantibus pellendæ.

- pellendæ. 415. quibus præfidiis & quomodo movendæ. 440. foribus revocantur. 465. specifica in vitiis earum. 452. spasms supprimuntur. 303. nunquam vi comprimendæ. 344. earum dolor à spasmio. 303. albæ quid & unde. 342. suppressæ. 288. 302. 343. colicæ causa. 297. in ipsis quomodo sanguis mittendus. 459. nimiae funesta signa. 393. venæ sectione in brachio sistuntur. 459. ex hepatis & lienis vitio. 320.
- Hæmorrhoidum* fluxus causæ. 74. commoda. *ibid.* est naturalis & præternaturalis. *ibid.* fluxus. 157. curat vel lenit morbos chronicos. 260. repressus difficulter revocatur. 263. stagnatio quas pariat ærumnas. 175. suppressio quos morbos generet. 185. ex animi pathematibus oritur. 185. à terrore. 191. turbatio morbos gignit. 157.
- Hæreditaria dispositio* multum facit ad morbos. 287. 349. morbos difficiles gignit. *ibid.* in historiis morborum recensenda. 287.
- Hæreditarii morbi* qui sint. 349. à solidorum vitio pendent difficiles sanatu. 287. 349.
- Hamech* confectionis vis purgativa. 214.
- Harvæus* in quo medicinæ profuerit. 19.
- Hæctica* ex nimia aquarum ardentium potatione. 255. quare insanabilis. 184.
- Hæctica febris* differt à lenta. 294. signa. *ibid.* nunquam salutaris. 411. à viscerum corruptione fovetur. 323. ex suppressione mensium. 341. lochiorum. 342. nimiiis hæmorrhagiis. 349. sudor largus in ea unde. 383. causa mortis abcessus ruptus. 400.
- Histerus* laudatus. 79.
- Hellebori* albi succus, telis illitus, necat. 187.
- Helleborus* coctus vim purgativam perdit. 214. specificum Veteribus ad insaniam. 451. albus Veterum emeticum. 432.
- Hellmontius* 17. 21.
- Helveti* unde proceri. 107.
- Hemicrania* quid. 303. à spasmio pericranii. *ibid.* ex mensium suppressione. 341. puerperio. 350. facile recidivat. 356.
- Hemiplexia* quid & unde. 307. pulsus in ipsa. 371. causa mortis. 396.
- Hepatis* vasa sanguinea. 48.
- Hepar* cur omnium difficillime sanguinem transmittat. 167. unde augeatur. 227. scirrhum fit ab ira. 218. non alit consensum cum nervosis partibus. 317. ad atoniam cur pronum. 307. atonia laborans multorum morborum causa. 307. 317. 320. scirrhus facile afficitur. 329. maxime affectum in scorbuto. 379. ejus constitutio in morbis consideranda. 289. unde cognoscenda. *ibid.* lethalis corruptionis signa. 394. labe affectum quibus curandum. 446.
- Hepatici ductus* spasmio correpti diarrhoeas & vomitus biliosos causantur. 304.
- Hepatitis* distinguenda ab inflammatione ventriculi. 294. ejus signa 294. seq. differentia. 295.
- Hernia* intestinalis ex fortiori emetico. 213.
- Herpetis* ortus. 168.
- Herpes* sæpe annua & salutaris. 347. scabiei assimilat & ea propter ejusdem est effectus. 358.
- Heucherus* laudatus. 70.
- Heurnius*. 19. 21.
- Hieme* studendum liberæ transpirationi. 135. victum duriores facile toleramus. *ibid.* vini & cerevisiæ generosioris potus commendabilis. *ibid.*
- Highmori* antra. 71.
- Hippocrates* medicinæ rationalis parens. 16. anatomen coluit. 18. chirurgiæ navavit operam. *ibid.* circum sanguinis an cognoverit. 19. corporum & naturarum diversitatem considerare jussit. 18. ignem fecit primum motorem. 33. mechanicis rationibus studuit. *ibid.* morum & decori doctrinam non neglexit. *ibid.* in morbis dijudicandis excelluit. *ibid.*
- motus prudenter dijudicavit. *ibid.* observationes condidit. *ibid.* physicam coluit. *ibid.* præservationem à morbis commendavit. *ibid.* regulas ex observationibus formavit. *ibid.* tonum partium indigitavit. 36. qua ratione imitandus. 19. ad ipsius lectionem subsidia. *ibid.* quid ex eo capiendum eclecticis. 20. ipsi non satis patuit natura humani corporis. 26. ipsius successores à more ejus desciverunt. 19. optima jecit artis fundamenta à posteris relicta. 299. seq. potiora & præstantiora ipsius dogmata. 300. parum meminuit signorum ex pulsibus. 364.
- Hippocratis* morbus niger unde. 166.
- Hirudines* unum ex præcipuis morborum remediis. 260. evacuationi sanguinis serviunt. 462. non plus quam scarificatio vel venæ sectio præstant. *ibid.*
- Hispani* atque *Itali* quare frigidus potu utantur. 470.
- Histeriæ morborum* præcipuum pathologiæ & therapiæ fundamentum. 147. quid ad integram morbi historiam requiratur. 148. therapiæ fundamentum. 286. perfectæ sint. *ibid.* quomodo consignandæ. *ib.* ad hypotheses examinandas utiles. 291.
- Hollerius*. 19. 21.
- Hominis* definitio. 26. ortus ex ovo. 77.
- Homini* tria distincta insunt principia. 77. 95.
- Homo* cur crebrioribus & gravioribus morbis expositus, quam bruta. 180. cur tamen diutius iis vivat. *ibid.* triplices in eo actus obvi. 405.
- Horripilatio* unde. 166. omnibus doloribus atrocioribus juncta. 167.
- Horroris* vis in corpus. 194.
- Humidum* cur corporis conservationi adeo inimicum. 267. quare corpori humano utile. 469. frigidum an senibus, sine noxa dari possit. 476.
- Humor* quando propter illum infesta materia rursus repellatur. 360. quidnam illius motum omnium maxime reprimere valeat. *ibid.* retropulsus, num funestorum symptomatum sola causa existat. 361. quare difficulter, etiam ope convenientium remediorum, ad pristinum locum relegari possit. 362. humorum motus quinam conservandus. *ibid.* corruptus, quomodo ad appropriatam sedem reducendus. 363.
- Humores* boni si nimii evacuandi. 119. superflui ubi excernantur. 118. utiles quinam. 51.
- Humores* proportio elementorum. 287. quantitas. 365. 367. non extravasantur inter fibrarum interstitia. 365. cur tam varii ex sanguine. 381. ad crasin eorum facit potus. 288.
- Hungarica febris* à qualitate cœli derivanda. 335.
- Hydrocephalus* quid sit. 328.
- Hydrophobia*, ex morfu canis rabidi nascitur. 199. quo pacto sananda. 201. ejus signa. 295. differt à phrenitide. *ibid.*
- Hydropici* sibi caveant ab humiditate frigida. 267.
- Hydropis* ortus. 166. seqq. 175. 243. 255. sedes. 167.
- Hydrops* ascites insanabilis. 184. cur facile recurrat. 244. cur rarior. 185. cur messis tempore homines afficiat. 234. cur senibus magis familiaris, quam juvenibus. 170. nonnunquam comitatur quartanam. 164. pectoris insanabilis. 184. pericardii cur semper jungatur asthmatis spasmodico. 166. quandoque congenitus. 183. à scirrhus mesenterii distinguendus. 329. ex atonia hepatis & lienis. 307. 320. suppressis mensibus. 341. hæmorrhoidibus. 343. uteri vitio. 400. quartana. 352. nimiiis hæmorrhagiis. 349. obstructione hepatis, viscerum & glandularum. 400. pulsus in eo qualis. 371. funesta ipsius signa. 394. causa mortis. 399. facile recidivat. 356. ex asthmate quomodo gignatur. 305. 320. 400. intra duplicatam peritonæi paracenthesin admittit. 326. diureticis optime arcetur. 441. ejus specifica. 451. uteri fluxu sponte sanatus. 410. ambulatorius est ab una parte corporis ad alias, etiam internas. 359. *subitaneus* ex ruptis tumoribus serosis in abdomine. 326.

- saccatus* lapsu curatus. 410. *uteri* à polypis. 330. ex suppressione mensium. 341. *pectoris* ejus signa. 328. quibus solennis. *ibid* à polypis vasorum pulmonalium. 330. ex suppressis mensibus. 341. asthmate quomodo. 352. *uteri* fluxu sponte quandoque sanatur. 410.
- Hyems* quos producat morbos. 266.
- Hygieine* quid. 14. debet niri principiis certis. 99. proximum à physiologia locum tenet. 14. 99. qualis scientia. 99. quid supponat. *ibid*.
- Hygrometra* commendata. 105.
- Hyoſcyamus* venenis annumeratur. 200. facile mentem alienat. 223.
- Hypnotica* ubi tentanda. 225. Vide *Soporifera*.
- Hypochondriaca* passio ex pluribus causis enascitur. 177. quandoque ex tertiana intermittente. 164. quandoque hæreditaria. 183. 244. non indistincte curatur acidulis ac martialibus. 153.
- Hypochondriaci* flatulentia vexantur. 67. in melancholicam proni. 103. cur phantasia corrupta laborent. 200. abstinere debent ab emeticis. 214. & anodynis. 224. caveant sibi ab iracundia. 150. cur adeo voraces. 248. ad omnem cibum male se habent. 253. spasmi cur æstate conquiescant. 265.
- Hypochondriacum* malum testatur consensum partium membranarum. 29. affectio generis nervosi. 317. imbecillis naturæ proles. 345. in quo consistat. 352. differt à colica. 297. signa. *ibid*. radix & sedes in ventriculo. 313. 317. variæ causæ. 345. causa prima non cruditates. 317. nec unica stagnatio sanguinis in vasis venæ portæ. 345. ex animi pathemate. 313. potu frigido post iram. *ibid*. sanguinis stagnatione in visceribus abdominis. 317. ex hæmorrhoidibus suppressis. 343. male curata intermittente. 352. alvi fluxu. *ibid*. hæreditarius morbus. 349. fluentibus hæmorrhoidibus affligit. 345. hæmorrhoidalia molimina gignit. *ibid*. hæmorrhoidibus levatur. 343. efflorescente purpura quandoque discedit. 410. clysteribus levatur. 467. cura fundamentalis. 317. specifica in eo præsidia. 451. sedes illius & qua medela curandum. 474. unde ortum trahat. *ibid*.
- Hypotheses* medicæ non omnes quidem rejiciendæ. 150. quia tamen discordiarum sunt progenitrices, ex iis emergere studeat philater. 154. earum tria genera. 151. multæ in medicina. 291. quomodo examinandæ. *ibid*.
- Hypothesum medicarum* lapis lydius. 14.
- Hysterica* symptomata ex terrore. 191.
- Hysterica* flatulentia vexantur. 67. abstinere debent ab emeticis. 213. passionibus periodicæ. 186. non indistincte curantur castoreo. 153. earum causæ internæ atque externæ. 173. sedes primaria. 164. cur suaveolentia ferre nequeant. 305. apoplexia leviori corripiuntur. *ibid*. 299. 458.
- Hysterica* passio hæreditarius morbus. 349. sedes non in utero, sed ventriculo & intestinis. 316. non à nervis, sed sanguine restagnante derivanda. *ibid*. ex puerperio. 350. atonia uteri. 307. mensium defectu. 316. 341. cohibito fluore albo. 340. restagnante sanguine lochiali. 342. levatur laudano. 318. clysteribus. 468. quæ prosint. 316. specifica in ea. 451.
- I.
- I** *Acotius*. 21.
- Jacobus Berengarius Carpenſis*. 21.
- Jalappa resina* cur atrocia cieat pathemata. 316.
- Icterus* cur ex ira progignatur. 190. ex nimia aquarum ardentium potatione. 255. cur facile recurat. 244. niger cur rarior. 185. primæ senectæ familiaris. 183. unde. 175. periodicus unde. 186. flavus & niger unde? 379. à spasmo orificii choledochi. 304. ex atonia hepatis. 307. spasmo ventriculi. 314. purgantibus. *ibid*. venenis. *ibid*. vomitoriis. *ibid*. retentæ mæconio. *ibid*. colica. *ibid*. ira. *ibid*. febre intermittente. *ibid*. retentis mensibus. 341. calculosis cur familiaris. 353. & colicis. 354. qualis in eo urina. 379. specifica in eo. 451.
- Jejunium* cur tolerabilius senibus. 247.
- Ignavia* cur debilitet vires. 245.
- Ignes* pollent medica pestilentia vis. 212.
- Ileon* intestinorum tenuissimum & maxime sensibile. 304. lumbricorum nidus. 331. spasmo affectum causa doloris circa umbilicum. 303. & colicæ biliosæ. 304.
- Iliaca passio* à frigida potione. 233. ab inverso peristaltico motu. 304. funestæ signa. 394. sphacelo intestinorum necat. 401.
- Imaginationis* vis in corpus. 194.
- Imbecilles* cur parum alimenti desiderant. 247. quinam sint. *ibid*. caveant sibi ab humiditate frigida. 267.
- Imbecillibus* quomodo succurrendum. 130. stricta diætata opus. *ibid*.
- Imbecilliora corpora* quænam. 130.
- Imbecillitas* corporum morbis obnoxia. 178. 240. quoruplex. 241. ex præcipuis morborum causis. 348. quibus inducatur. 349. quibus cognoscatur signis. 348. 420. ipsius specifica. 466.
- Impetigo* annua & sæpe salutaris. 347.
- Imprægnatarum* incommoda. 78.
- Inappetentia* cur malum in cachecticis & hydropicis signum. 324.
- Incidentia* materiæ correctioni dicata. 428. quæ sint. 429. quomodo agant. 430. & usurpanda. *ibid*. aperiant. *ibid*. sanguinem depurant. *ibid*.
- Incubi* ratio. 128.
- Indusia* in morbis exanthematicis non mutanda. 315. à sudore tinguntur. 381. pondere increſcunt. *ibid*.
- Inedia* fracti non subito sunt replendi. 116. quæ iis noceant. *ibid*. quibus conveniat. *ibid*. sæpe nocet. *ibid*.
- Inedia* longioris noxæ. *ibid*.
- Infantes* calore non sunt nimis fovendi. 133. crebro, sed modice cibum capiant. *ibid*. diætata eorum. 132. divitum cur rarius adolescant quam pauperum. 82. firmitate & teneritudine differunt. 132. multi matantur à suis nutricibus. *ibid*. primis mensibus leviter nutriendi. 82. quamdiu sint lactandi. 133. cur difficulter sudent. 382.
- Infanti* quis cibus conveniat. 133. lactenti nocet repletio. 132.
- Infantia* quibus morbis afficiatur. 183. 241.
- Infantibus* dentientibus lac copiosum non est ingerendum. 133. medicinæ multæ & validiores non conveniunt. 134. nocet vinum & spirituosum. 133. tenerioribus lac tenue præbendum. 132.
- Infantium diætata* sit circumſpecta. *ibid*. sanitas pendet à sana nutricis constitutione. 133. sanitas periclitatur matrum & nutricum delictis diæteticis. 132.
- Infantium* morbi unde dependeant. 241. quomodo præcavendi. 186. quæ signa eorum. 395. quæ causa mortis. 402.
- Inflammationes* quomodo gignantur. 302. aliis superveniunt lethales. 392. in sphacelum demum concedunt. 393. periculosiores quandoque si mitiora adsunt symptomata. 392. in principio quomodo discutendæ. 415. venæ sectione discutuntur. 408. nimia exacerbantur. *ibid*. earum specifica. 450.
- Inflammatoriæ febres* earum species & differentia. 294. ex suppressis mensibus. 342. recidivant quandoque. 356. medicatio earum. 408. qualis in iis pulsus. 371. nimia venæ sectione exacerbantur. 408. iusta levantur. 460.
- Infusa calida* corrigunt ciborum noxas. 110.
- Infusa* vinosa laxantia præferenda purgantibus. 416. diapnoica præferenda sudoriferis. 417. theiformia potissimam facultatem aquæ debent. 463.
- Infuso-*

Infusorum usus liberalior ad arcenda contagia commendatur. 212.
Ingestiones debent respondere egestionibus. 66.
Ingestorum natura, modus & ratio probe examinanda. 257.
Inquietudo senum unde. 241.
Insalubrium rerum indoles. 185. scientia medico maxime necessaria. 188.
Insania hæreditarium malum. 346. perperam promissæ ab hæmorrhoidibus repetitur. 347. ex suppressa narium hæmorrhagia. 346. facile recidivat. 356. hæmorrhoidibus solvitur & præservatur. 343. balneis levatur. 463. scarificationem melius quam venæ sectionem fert. 461. specifica ipsius. 451.
Insaniæ subjectum. 179. cur maxime tempore verno generentur. 266.
Insecta quomodo venenosam naturam induant. 195.
Insectorum ingens copia Romæ. 211. in locis calidis venenosior. 195. morbos malignos præfagit. 210.
Insomnia terrificæ & dæmoniæ, unde. 166.
Inspiratio quomodo fiat. 44.
Intemperantia corpori inimica. 185.
Intermittens febris thineræ prima in regione. 313. unde symptomata eorum. *ibid.* quandoque salutare. 408. seq. quandoque exitiosa. 411. etiam habet crisin. 390. facile recidivat. 367. quibus proriteretur recidiva. *ibid.* recta eam sanandi ratio. 409. & sinistra. *ibid.* optime præscinditur emetico vel laxante. 415. specifica ad curandam ipsam. 450. male curata gignit hypochondriacum malum. 352. contumacis formes. 408. & specifica. 450.
Intermittentium phænomena explicata. 169.
Intestina crassa etiam ad sanguinem aliquid dimitunt. 64. quare tam gravibus stricturis spasticis sint obnoxia. 164.
Intestina in morbis maxime debilitantur. 349. confertum alunt cum ventriculo. 314. cum membranis universi corporis. 315. flatibus obsidentur & distenduntur. 332. coalescunt quandoque in colica convulsiva. 402. quid patiantur à spasmo. 303. seq. inflammatione & sphacelo corripuntur in dysenteria. 324. eorum atonia quæ pariat mala. 306. quibus sub moveatur. 446. ab eorum convulsiva affectione diarrhœa & cholera. 306. erosione eorum quæ signa. 333. labem patiuntur male tractatis alvi fluxibus. 352. spasmus eorum quibus tollendus. 431. eorum inflatio quibus curanda. 445. languentia clysteribus firmantur. 467. erosa clysteribus consolidantur. 468. *crassa* ascaridum habitaculum. 332. *tenuium* inflammationis & sphaceli signa. 324. *rectum* à dolore ex hæmorrhoidibus sphacelum patitur. 324.
Intestinorum fibræ causa motus peristaltici. 64. sensibilitas. 29. villi sunt cavi. 64.
Inturationes unde. 164.
Inventa physico-chymica medicinam juvant. 20.
Joubertius. 21.
Ipecacuanha non semper est antidysentericum. 153. ejus radix in principio pestis commendatur. 204. specificum in dysenteria. 452. ejus virtus & prærogativa. 432.
Ira agit in ventriculum & intestina. 190. ubi inflammationes periculosas producit. *ibid.* succos veneno imbuunt. 195. seq. quibus sit remedio. 190. effectus ipsius in corpus. 287. 313. 319. facit ad colicam. 298. ad Cardialgiam. 319. ad vomitum. *ib.* ad icterum. 314. ad febres biliosas cholericas. 319. atrociam ciet pathemata si calculus in cystide fellea. 331. quæ post eam damnosa? quæ utilia? 416.
Iracundiæ effectus. 35. 102. noxas quid augeat. 103. quid easdem avertat. *ibid.*
Ischiadicum malum quandoque anniversarium. 183. senibus familiare. *ibid.* quomodo gignatur. 302. à

spasmi oritur. 303. spasmi stipatur. 302. ex mensium emanatione. 344. differt à nephritide. 295. ex hæmorrhoidum suppressione venæ sectione levatur. 344. repulsum nocet. 339. quando in eo venæ sectio instituenda. 459.
Jugularis vena in melancholia & phrenitide incidenda. 458.
Juscula carniū gelatinosa. 106.
Juvenili ætati commendanda mediocritas. 134.
Juventus prima debet indurescere. *ibid.* quibus morbis afficiatur. 183. quid peculiare servet. 287. quibus morbis pateat. 308. qualis in ea pulsus. 368.

K.

K *Orn-Mutter* quænam producat symptomata. 230.

L.

L *Abor* augeat circulum sanguinis. 47. mox à partu nocet. 66. sanitati conducit. 157. mutat pulsum. 368. Vid. *Motus*.
Lac quid sit. 80. alimentum universale. 107. crassum; quas noxas ferat. 132. ex chylo & sanguinis gelatinosa parte separatur. 81. optimum alimentum. 80. pessimum quale. 132. tenue minus lædit crasso. 82.
Lac copiose haustum veneni & purgantium vim frangit. 215. cur promptissimum contra venena remedium. 201. non semper est antiphthysicum vel antipodagricum. 153. qui convertatur in venenum. 252.
Lac optima antidotus. 431. à spasmi secretio ipsius intercipitur. 304. quando in flatu explicetur. 297. concretum venenum æmulatur. 312. seq. inflationem ventriculi causatur. 297. continuato usu juvat. 423. Vide *Serum lactis*: ex animali depromptum quale sit. 469.
— asininum specificum in podagra. 450. in phthysi. 451. ad longævitatē. 453.
Lacte nutrimentum gravissima mala in infantes transferuntur. 189.
Lacticia noxia. 109. senibus non conveniunt. 134. corpori inimica. 185.
Lactis bonitas unde pendeat. 81. quomodo cognoscatur. *ibid.* examen. 132.
Lactis copia infantibus noxia. 248.
Lactiferi ductus spasmos patiuntur. 304. spasmo affecti interceptæ lactis secretionis & tumorum causæ. *ibid.*
Læsio unius partis in plures redundat. 27.
Læsiones externæ lethales quæ sint. 403. seq. earum ratio in intercepto humorum circulo. *ibid.*
Lamiarum unguentum unde conficiatur. 172.
Lancisus. 17.
Lapis in vesica non fit post annum XCII. 183.
Larynx spasmo afficitur. 305. spasmo affecta constrictioni in gula sensus causa. *ibid.* irritata facit tussim ferinam. 306.
Laudanum liquidum prodest in dysenteria & hysterica passione. 318. in febre ardente mortiferum. 418.
Laxantia juvant gravidas. 136. initio pestis commendantur. 232. Veteribus minus cognita. 433. qualia sint. *ibid.* quomodo agant. *ibid.* præferenda purgantibus. 416. pro ratione circumstantiarum in usum vocanda. 433. profunt in principio morborum. 416. ad præcavendum abortum utilia. 354. in tussi cur conducant. 316. 416.
Lenta febris signa ipsius. 294. differt ab hectica. *ibid.* ex debilitate ventriculi. 321. nimis hæmorrhagiis. 349. alvi fluxibus male tractatis. 352. suppressis criticis evacuationibus. 389. quomodo statim præscindenda. 415. quæ in ea pro sint. 431. causa mortis in ea. 400.

Lepra

Lepra unde. 168. 202. cur rarior. 185. retrograda perniciofa. 206.
Lethargus unde. 145. ex erysipelate repulso. 338. cephalalgia & scorbuto lethali supervenit eventu. 396. qualis in eo pulsus. 371. causa mortis in eo. 396.
Lien juvat sanguificationem. 50. mere vasculosum. 49. facile læditur. *ibid.* melancholiæ sedes. 327. non alit consensum cum nervosis partibus. 317. labem contrahit ex tristitia. 327. atonia laborans quos pariat morbos. 307. 320. 317. ei perperam dolores in latere sinistro tribuuntur. 317. 332. post vomitum cruentum magnus & putridus reperitur. 341. schirrhii in eo signa. 329. labe affectus quibus tractandus. 446. ejus ruptura lethalis. 328.
Lienis structura à quibus exposita. 19. excisi effectus. 49. fabrica cur ferme tota ex canaliculis minimis constructa. 156.
Lingua gustus organon. 93. ejus structura. *ibid.*
Lintea recentia perspirationem cohibent. 261.
Lipothymia ex fortiori emetico. 213. à terrore. 191. cur ex nervi læsione oriatur. 158. atoniæ debetur. 306. ex imbecilli cordis systole. *ibid.* ex præpostero topicorum usu in morbis articulorum. 338. restagnante sanguine lochiali. 342.
Lippitudines unde. 183. cur maxime generentur tempore verno. 265.
Liquida in corruptionem proniora solidis. 28. vitæ necessaria. 111.
Liquidum nerveum tenuitatem succo nutritio conciliat. 57.
Lithargirii indoles. 172. fumus torquet figulos. 228. perperam olim pro veneno habitum. 197.
Litterati plerumque imbecilles. 130. quo vitæ regimine egeant. *ibid.*
Litteris quo tempore opera sit danda. 130.
Loca multum faciunt ad morbos endemios & epidemios. 292. altiora salubria. 287. humilia insalubria. *ibid.*
Locorum proprietates nosse debet medicus. 149.
Lochia non nisi præmissis præparantibus pellenda. 415. à spasms supprimuntur. 302. suppressio eorum cur adeo noxia, quæ inducat pathemata. 342.
Lochiorum sufflaminatio unde. 168. profusio repente cohibita quæ mala pariat. 262.
Locustarum multitudo morbos malignos præfagit. 209.
Lolium avenaceum temulentum quænam exciter symptomata. 230.
Longævitæ ejus præsidia. 453.
Lowerus. 20.
Lucubrationes nocent. 126.
Ludovici. 22.
Lues venerea non semper curatur mercurialibus. 153. non juvatur natura. *ibid.* quo pacto in prima herba suffocanda. 180. retropulsa cur adeo periculosa. 166. 206.
Lumborum dolor unde. 186. 235.
Lumbrici terrestres non semper sunt antepilepticum. 153. lumbrici ex dulcibus. 254. senibus cur rariores. 185. in ileo hospitantur. 332. eorum indicia. *ib.* pulsus reddunt inæqualem. 369. pleuritidem mentiuntur. 332. *terrestres* specificum in doloribus artuum scorbuticis. 450.
Luna ad venæ sectionem nihil facit. 454.
Lycopodium specificum in plica Polonica. 453.
Lympha cur sanguini reaffundatur. 17. quid sit. 57. ubi sanguini reaffundatur. 17. spissa quibus dissolvatur. 430.
Lymphæ cursum quid adjuvet. 58. motus pendet à motu sanguinis. 17. spermaticæ in sanguinem refluæ utilitates. 76. circulus à stricturis spasticis impeditur. 166.
Lymphatica vasa ubi se exonerent. 58.
Lymphaticorum vasorum origo duplex. 57.

M.

M *Achina* quid sit. 27. est compositum. *ibid.* Papi-niana illustrat effectum caloris in concoctione. 60.
Macilenti ac debiles motui minus sunt apti. 124.
Macilentiores cur facilius convalescant, ac spongiosi habitus homines. 162.
Magnesia absorbens. 428. hypochondriacis utilis. *ibid.* ab acido soluta fit laxans. *ibid.*
Maius ac September menses saluberrimi. 104.
Mala Cotonea adstringunt alvum. 261.
Maligna febris differt ab aliis. 293. κατ' ἐξοχὴν quæ. *ibid.* qualis in ea pulsus. 371. qui malus. *ibid.* in ea sanguis quandoque roseus. 373. sudor largus in ea malus. 352. causa mortis sphacelus. 401.
Malignitas viribus infensissima. 323. ejus signa. 289. 323. 392. non ex fictis terminis exponenda. 323. ejus causa putredo. *ibid.* medicis sæpe imponit. 392.
Malpighius. 17. 19. 22.
Mammæ lactis colatorium. 81. terrore afficiuntur in gravidis. 191. spasmus experiuntur. 304. tumores & abscessus earum unde. *ibid.*
Mandibulæ piscium absorbens. 428.
Mania ex tristitia. 176. inveterata insanabilis. 184. non indistincte curatur sanguine asinino. 153. hæreditarius morbus. 349. à spasmò duræ matris. 305. ejus signa & differentiæ. 295. ex mensium. 341. & hæmorrhoidum suppressione. 343. cur sæpe melancholiam excipiat. 305. 350.
Maniacus incusso terrore sanatus. 192.
Manna triplici gaudet virtute. 422.
Marasmus senibus familiaris. 183. 324. unde dependeat. 242. est insanabilis. 186. ejus signa. 324. viscerum corruptione nititur. *ibid.*
Mars limatus absorbens. 428. adstringit simul. *ibid.* ejus liquor compescit hæmorrhagias. 318. ejus crocus sistit febriles motus. *ibid.*
Martialia non semper sunt antihypochondriaca. 153. alvum adstringunt. 261. pulsus mutant. 369. balnearum usu secundantur. 464.
Martianus (Prosper) 19.
Martins - Korn quænam producat symptomata. 230.
Masticationis neglectus nocet. 115.
Masticatoria ad arcendum miasma profunt. 442.
Materia an in se & sua natura sit passiva. 18. corruptibilis, quæ dicatur. 26. morbi indoles ipsius ex quo cognoscenda. 289. coctæ signa. 303. etiam tenuissima maximas mutationes in vitali œconomia efficere potest. 361.
Matres prægnantes diætam probe observent. 136.
Mechanica scientia medico opus. 14. tradit doctrinam de motu. 17.
Mechanicæ artis scientia artis medicæ alterum fundamentum. 149. 150.
Mechanices notio evoluta. 24.
Mechanici medici non turbant disciplinam medicam. 17. qui fuerint. 29.
Mechanicus mensurat vires motrices corporum. 18.
Mechanismus quid sit. 27. etiam in animum jus habet. 24. corporis ejus notitia fundamentum therapie. 286.
Medendi leges. 414. methodus à medico tenenda. 286. consistit in remotione causarum. 406. seq. naturæ optima. 406. quæ sit in variis morbis. 407. in specificorum usu servanda. 453.
Medicamenta certis morbis specificè accommodata non dantur. 153. metallica venenis annumerantur. 226. præcipua quænam. 260. veneni vim habentia. 212. scienda. 426. quæ fortia. 420. quæ lenia. *ibid.* pauca & selecta usurpanda. 421. non crebro mutanda. 426. aliquamdiu continuanda. 423. 426. in eorum usu corpora

- corpora distinguenda. 421. Veterum annalia. 423. vires eorum non una experientia cognoscuntur. 426. ægrius à priori perspiciuntur. 425. à medico noscendæ. 423. plerumque tamen ignorantur. *ibid.* multitudo eorum causa ignorantia virium. 423. 426. arti noxia. 423. Vid. *Remedia*.
- Medicatio* in morbis tempestive instituenda. 414. imprudens morborum causa. 289.
- Medicina* est scientia. 13. nominalis & realis. 16. theoretica & practica. *ibid.* quo differant. 13. in theoreticis & practicis innititur mechanismo. 97. eclectica, quid ex omnium ætatum & sectarum auctoribus boni capiat. 20. ab opinionibus & hypothesebus sit immunis. 150. universalis num detur. 153. & quomodo debeat esse comparata. 260. ob circumstantiarum differentiam difficilis. 424. iudicio opus habet. 372. naturam juvat. 413. naturæ errores emendat. 414. hypothesebus & opinionibus referta. 291. ejus partes sunt connexæ. 285. ejus objectum actus in corpore mechanici. 405. ejus principium non est anima. 300. neque spiritus. 301. sed natura corporis. *ibid.* recte ab Hippocrate definita. 300. ejus incrementa quæ retardarint. *ibid.* rationalis quomodo differat ab empirica. 424.
- Medicinæ* definitio. 13. duo subsidia, ratio & experientia. 8. existentiam quid probet. 14. finis. 22. fundamenta. 14. incrementa ab observationibus, anatome & physica expectari debent. 19. partes. 14. potissima cura sit præservare. 25. quid fuerint detrimento. 19. subjectum est corpus humanum vivum. 26. partium nexus. 147. certitudo unde patescat. *ibid.*
- Medici* officium. 14. 160. 171. 173. 407. potestas. 22.
- Medicum* & medicamenta fugere qui debeant. 138.
- Medicus* quid sit. 13. acquiescat in causis proximis & adæquatis. 24. auxilio & consilio juvet. 22. eclecticus sit. 20. inniti debet certis principiis. 23. naturæ minister. 22. nocere non debet. *ibid.* pernoscat naturam humani corporis. 26. philosophus per cultum & ignem. 14. ejus functio purè mechanica. 97. imitari debet astronomos. 147. beatus quis. 245. naturam imitari debet. 407. 412. naturas distinguat. *ibid.* iudicio excellat. 285. 372. in morborum principio & fine opem ferat. 354. in febricitantibus cautè se gerat. 372. felix qui. 413. prognosi existimationem consequitur. 292. quanam illius primaria intentio in materia morbifica ad propriam sedem reducenda. 363. mos quorundam medicorum perversus in febre curanda. 471. & potu frigido ægris propinando. 476.
- Mediocritas* commendanda juvenili ætati. 134.
- Meditationes* nimia sanitatem labefactant. 287. corpus debilitant. 349. ad capitis morbos disponunt. 287.
- Medulla* oblongata nervorum radix. 84. pars à corde princeps. 85. ejus læsio lethalis. *ibid.* spinalis ejus membranæ sedes motuum febrilium. 305. convulsio-num. *ibid.* resolutæ cum nervis suis hemiplexiæ & paresis causa. 307.
- Melithæ* ejus natura venenata. 232.
- Melancholia* hæreditarius morbus. 349. ejus differentiæ & signa. 295. à spasmo duræ matris quomodo. 305. ex suppressis mensibus. 341. hæmorrhoidibus. 343. ex puerperio cur in maniam transeat sæpe. 305. 350.
- Melancholici* quoniam. 242. in quos morbos facile incidunt. 243. cur adeo voraces. 248.
- Melancholicorum* natura & diætæ. 131. temperamentum. 44.
- Mellita* stomacho infirmo aliena. 254.
- Melonum* insalubritas quomodo coerceatur. 255.
- Membrana nervosa* sensuum instrumentum. 89. tensa acutius. *ibid.* laxa remissius sentiunt. *ibid.* ad sensum fluido animandæ. *ibid.* nimis duræ ac solidæ fiunt in senibus. 162. spasmis patent. 301. nervosæ spasmo affectæ dolorem faciunt. 303. capitis externæ
- Frid. Hoffmanni Oper. Tom. I.*
- cephalalgia sedes. *ibid.* cerebri spasmo affectæ melancholiciæ, mania, apoplexia & epilepsia sedes. 305. sensorii auditus susurrum & tinnitum gignunt. *ibid.* spinalis medullæ sedes motuum febrilium. *ibid.* convulsionum. *ibid.*
- Membranosæ* partes plurimorum morborum sedem constituunt. 179.
- Memoria* abolita ob atoniam duræ matris. 306. ex apoplexia quomodo. 350.
- Mens* quid sit. 88. 95. considerationem medicam poscit. *ibid.* est spiritus ad imaginem Dei conditus. 96. & natura non debent confundi. 88. 95. in corpus agit. 18. *ib.* utitur ministerio corporis & animæ. 96.
- Menses* Majus ac September saluberrimi. 104. October vero & November cur morbos multos generent. 105.
- Menses* salutaris excretio. 288. 340. spasmis debentur. 301. eorum mechanica ratio. 340. solvunt convulsiones. 409. quomodo movendi & quibus. 439. seq. non nisi præmissis præparantibus pellendi. 415. specifica in vitiis eorum. 452. à spasmis supprimuntur. 302. eorum loco fluunt sæpe hæmorrhoides. 342. suppressi nocent. 288. 320. 340. & cur. 302. quæ symptomata inducant. *ibid.* per incongrua loca exitum moliantur. 340. causantur vomitum & mictum cruentum. *ibid.* fotibus revocantur. 465. & clysteribus. 467. quomodo venæ sectionem ferant. 459. nimium fluentes unde. 307. ex hepatis & lienis vitiis. 320. venæ sectione in brachio sistuntur. 459. emanantes ob ætatis rationem, quæ gignant mala. 341.
- Mensium* negotium turbant animi affectus. 136. foemineorum fundamentum. 157. fluxus curat vel lehit morbos chronicos. 262. repente cohibitus quæ mala pariat. *ibid.* difficulter revocatur. 263. iusta vacuatio magna pars sanitatis. 258. suppressio unde generetur. 167. 168. à terrore. 191.
- Menstrua purgatio* cur prodeat ab utero. 73. est salutaris. 119. læsa, quid efficiat. 20. pertinet ad actus naturales. 72. post coitum foecundum cessat. 78. quibusdam gravidis durat. 79. quibus parcius fluat. 72.
- Menstruæ purgationis* finis. 74. tempus ordinarium. *ib.*
- Menstruæ* evacuationes in senili ætate periculosæ. 183. haud rite factæ quæ pariant mala. 270.
- Menstruam purgationem* quæ turbeant. 119.
- Menstruus sanguis* non est corruptus. 74.
- Mentha* cur optimum in vomitu. 431.
- Mercurialia* cur tam vehementem producant effectum. 220. minime conveniunt, ubi succorum est magna dyscrasia salino-sulphurea. *ibid.* in horum usu & individui & morbi & regiminis ratio habenda. 221. cur insensibilissima infantibus tenellis. *ibid.* cur magnam efficiant feri profusionem. 166. instar venenorum suas perficiunt operationes. 220. non semper curant luem Gallicam. 153. perspirationem cohibent. 261. quomodo salivationem moveant. 442. seq. secundantur balneis. 464. in dentitionis difficultate noxia. 314. minus recte parata & data nocentissima. 312.
- Mercurialis* (Hieronymus.) 21.
- Mercurialis* aqua usurpata in scabie lipothymiam excitat. 199. inunctio magis noxia, quam remedium mercuriale intro sumtum. 223.
- Mercurialium* indoles. 172. noxia. 218.
- Mercurii* corrosivi natura. 198.
- Mercurius vivus* in iliaca passione cum fructu datur. 65.
- Mercurius* cum aqua coctus vermes necat. 198. diaphoreticus alexipharmacis annumeratur. 205. dulcis expellendis vermibus aptus. 236. vivus omnis virulentia expers. 197. solutus veri veneni naturam induit & æmulatur. 197. 212. Vid. *Argentum vivum*. diaphoreticus singularis. 318. dulcis tutissimum salivans. 453. sed minus tutum laxans. 434. specificum in contumacibus intermittentibus. 450. non cum salibus miscendus. 434.

Mesenterica febris distinguenda à malignis. 293. ejus signa. *ibid.*
Mesenterium scirrhis tumoribus afficitur. 323. abscessus patitur. 325. scirrhus ejus differt à graviditate, mola, hydropo. 329. ex ejus induratione atrophia. *ibid.* abscessus in eo contenti signa. 325. rupti signa. *ibid.*
Metallurgia morbifica. 228.
Metastasis perfecta & salutaris quænam. 356. illius rationalis explicatio. 360. quinam causas illam disponentibus obnoxii. *ibid.*
Methodici quales fuerint. 16. in quo defecerint. *ibid.*
Methodicorum disciplina quid eclectico suggerat. 20.
Methodus geometrarum optima. 23. geometrica est syllogistica. 15.
Miasmata maxime per salivam hauriuntur. 202. non per cutis spiracula. *ibid.* veri veneni naturam æmulantur. 203. quo pacto facillime pellantur. *ibid.*
Miasmatum virulentorum natura. 202.
Mictionum cruentarum causa. 166. seq.
Mictus cruentus ratione causarum distinguendus. 296. spasmis debetur. 301. seq. differt à stillicidio ex præputio. 296. quandoque ex vesicæ venis. 380. renum hæmorrhoides recte dicitur. 344. senibus familiaris. 296. ex hepatis & lienis vitio. 320. ex mensium suppressione. 341. emansione. *ibid.* hæmorrhoidum suppressione. 343. maxime in senibus. 344. quandoque menstrualis. 341. & periodicus. 344. qualis in eo urina. 380. præsidia in eo. 430. perperam adstringentibus cohibetur. 447.
Millefolium specificum in calculosa renum dispositione. 452. in hæmorrhoidum vitiis. *ibid.*
Missio sanguinis præservat ab abortu. 79. ad præcavendos mulierum morbos commendatur. 243. cur mollioribus corporibus noxia. Vid. *Venæ sectio*. 175.
Mixtio corporis nostri. 26. facile potest destrui. *ibid.*
Modicus cibus modicus medicus. 114.
Mæconium retentum icterum facit. 314.
Mæror ejus effectus in corpore. 287. 319. lienī maxime noxam affricat. 327. largum pedum sudorem facit. 382.
Mæroris effectus in corpore noxii. 102. ejus noxas quid avertat. 103.
Mæstitia senibus noxia. 170.
Molæ foeminarum unde. 243. 262. 307. earum indicia. 330. distinguendæ à scirrho mesenterii. 329. à polyposis concrementis differunt. 330. clysteribus ejiciuntur. 467.
Montanus. 21.
Morbi definitio nominalis. 162. realis. *ibid.* immateriales. 173. acuti & longi. 183. benigni & maligni. 181. epidemici sporadici. *ibid.* epidemii & pandemii. *ibid.* contagiosi & chronici. 182. simplices & compositi. *ibid.* idiopathici & symptomatici. *ibid.* genuini & corrupti. *ibid.* recidivantes. *ibid.* recentes & antiqui sive habituales. 183. hæreditarii & adventitii. *ibid.* congrui & incongrui. *ibid.* ætatum. *ibid.* ubi habeant suum fundamentum. 184. sanabiles & insanabiles. *ibid.* salutare & exitiales. *ibid.* frequentiores & rariores. *ibid.* certis locis peculiare. 185. rariores. *ibid.* hujus differentię usus in therapia. *ibid.* periodici & simplices. 186. retrogradi. 187. manifesti & occulti. *ibid.* epidemii *Θείον τι* habent. *ibid.* acuti non transeunt in liberos. 243. causa ut fiat activa quid requiratur. 177. continui periculosiores intermittentibus. 181. cur non sint multo frequentiores. 177. ex inæquali ingestionum & excretionum proportionem gignuntur. 157. genus, genium & causas indagare debet medicus. 148. hæreditarii unde. 156. non eodem semper modo curantur. 153. quo pacto ut plurimum solvantur. 184. salutare longe frequentiores quam exitiales. 185. temperamentorum unde deducendi. 242. vis ac vehementia unde

dijudicanda. 165. omnes generis nervosi affectiones. 308. eorum quatuor genera. 301. debentur spasmis. *ibid.* atoniæ. 306. motibus convulsivis. 304. probe discernendi. 292. variant ratione subjecti. 286. ætatis. 286. 308. sexus. 287. habitus corporis. *ibid.* vitæ. *ibid.* climatis. *ibid.* vitæ generis. 288. temperatum constitutionis. 334. per hæreditatem propagantur. 287. Vid. *Hæreditarii morbi*. recidivant. Vid. *Recidivæ*. sæpe complicantur. 289. affinitatem alunt. 292. habent sensibiles remissiones. 289. per observationes dignoscuntur. 291. per se non sunt salutare. 303. corpus debilitant. 349. sæpe sine sanguinis vitio accidunt. 373. à læsione motuum in corpore pendent. 301. ex perversa medicatione. 288. ægri incuria. *ibid.* morborum reliquiis. 354. ex nimis hæmorrhagiis frigidi. 349. à solidorum vitio maximeque imbecillitate. 348. eorum fundamentum ex mente Hippocratis. 300. remittente spasmis solvuntur. 303. spontaneus ipsorum decursus observandus. 290. tempora morborum in prognosi distinguenda. 395. seq. eorum effectus medicamentis sæpe tribuitur. 425. per morbos quandoque curantur. 410. iis tempestive occurrendum. 414. Vide *Causæ morborum*.

Morbi acuti curantur potius naturæ, quam artis beneficio. 99. animi mutant actiones. 97. *chronici* tentandi prius motu quam medicamentis. 138. *chronici* expugnantur usu fontium salutarium. 139. quando optime curentur. 104. *oculorum* unde derivandi. 90. & seq.

Morbi ætatum eorum fundamentum. 308. *anni* temporum unde? 334. *complicati* curatu difficiles. 289. *contagiosi* optime emeticis præscinduntur. 415. *maligni* medicis sæpe imponunt. 392. seq. quibus signis cognoscantur. *ibid.* funesta in iis signa. *ibid.* causa mortis in iis. *ibid.* Vid. *Malignitas*. *Periculosi & ferales* à putredine interna. 323. Vide *acuti*, *chronici morbi*, *morborum origo*.

Morbifica causæ quæ. 172.

Morbilli cur frequentiores. 185. cur maxime generentur tempore verno. 266. retropulsi cur tam periculosi. 166. sunt retrogradi. 187. incongrui periculosiores. 183. distinguendi ab aliis exanthematibus. 293. eorum signa. *ibid.* maligni vel benigni. *ibid.* crises servant. 388. oborto spasmis recedunt. 302. qualis ante & post eruptionem pulsus. 371. in principio requirunt emetica vel laxantia. 415. reliquæ eorum gignunt morbos. 354. seq. hinc curate submovendæ. 420. inprimis alvi subductione. 354.

Morborum multorum causæ ex aëre. 103. causa efficiens non est anima. 172. causæ naturales non sunt saltem occasionales. 152. plures quandoque concurrunt. 173. causa proxima. 163. procatarectica. 176. spuria. 151. effectus differentes unde petendi. 180. differentia exquisita scitu necessaria medenti. *ibid.* seq. causæ virulentæ certis tantum partibus insensæ. 172. malignitas unde æstimanda. 161. materia ubi quærenda. 258. origo quandoque repetenda, ex ingestis. 152. aut nimia repletionem. 269. periodicorum fundamentum ubi. 186. recursus. 244. remissiones & exacerbationes unde. 169. vis quo pacto commode præscindatur. 259. origo non tam à fluidis quam solidis repetenda. 372. ex observationibus ad discenda. 291. cognita utilis ad præservationem. 291. 301. & curationem. 301.

Morbos incurrunt edaces. 114. præcavere facilius quam curare. 22.

Morbus metastasium morborum modus. 361. num illorum metastases semper periculosa. 362. morborum à retrocessione vel translatione materiæ ortorum curatio generalis. *ibid.* methodus morborum ex pustulosa & ulcerosa materia provenientium. 363. quando in curatione morborum contraria desiderantur.

471. quibusnam morbis potus frigidus utilitatem præster. 472. quorundam, qui sedem in prima ventris regione habent, exempla. 474. in articulati curando quonam remedio utendum. *ibid.* quinam morbi à febre repelluntur. 476. chronicis balnea frigida opem ferunt. *ibid.*
- Morbus niger* cur tam subito necet. 206. spasmi debetur. 302. quomodo succedat. *ibid.*
- Morsus* animantium quando virulentus. 195. animantis rabiosi cur aliquando interjecto demum tempore in actum deducatur. 196. hominis iracundi lethalis. *ibid.*
- Morsu* animantium tacti quo pacto curandi. 200.
- Motionis* & laborum fructus. 88.
- Motus* quid sit? 24. causa mutationum in rebus corporis. 17. præservat à corruptione. 28. ejus species systole & diastole. 24. ipsius causæ corporeæ sunt. 32. & seq. in arteriis & nervis quæri debent. *ibid.* animalis quis. 86. & seq. corporis à cibo noxius. 124. ante cibum laudatur. 124. alvum siccat. *ibid.* à morbis præservat. 121. augendo circulum sanguinis excretionem promovet. *ibid.* medicina universalis. *ibid.* sanitatem præstat. *ibid.* multa præstat beneficia. 121. ordine suscipiendus. 124. salubri loco adornandus. *ibid.* qua cautione intermittendus. 140. quando suscipiendus. 124. quousque intendendus. 125. elasticus quid & ubi. 35. mechanicus quis. 87. peristalticus quis dicatur & ubi sit. 64. placidus est. *ibid.* & successivus. 65. in una intestini parte actus universum canalem afficit. *ibid.* indiget fluidi nervei affluxu. *ibid.* est præcipua causâ secretionis chyli. *ibid.* ejus integritas conservanda. 65. tria principia. 67. tonicus intensior impedit transpirationem. 68. vitales & animales inter se communicant. 32. earum causæ. 29. voluntarii organa. 86. adsuæfacti facile revocantur. 187. ab iis vita, sanitas & morbi pendent. 163. epilepticus quis. *ibid.* febrilis quis, & unde cognoscatur. *ibid.* fluidorum introrsum vergentes cur κατ' ἐξῆς morbofi. 163. peristalticus. *ibid.* salutes probe discernendi à pernicialibus. 184. systalticus glandularum conglobatarum. 163. ex partium structura. 309. sine sanguinis & liquidi nervei affluxu persistere nequeunt. 301. solidorum & fluidorum œconomia natura. 406. & medicinæ principium. 300. ejus causæ remotæ non referendæ ad medicinam. *ibid.* quæ proximæ. *ibid.* solidorum systalticus unde. 406. fluidorum à centro ad peripheriam salutaris. 301. 407. à peripheria ad centrum morbosus. *ibid.* solidorum & fluidorum auctior facit & solvit morbos. 406. ab iisdem pendet sanitas. 301. à læsis morbi. *ibid.* quadruplici modo læduntur. *ibid.* non valide sistendi. 418. sub eorum impetu non movendum. *ibid.* mechanici medici & medicinæ objectum. 405. morbofi in nervosis partibus sedem figunt. 308. 406. eorum quatuor genera. 301. per se non salutes. 303. quo sensu salutes. 303. 406. 407. in solidis & fluidis damnosi. 349. ad prognosin scitu necessarii. 286. quandoque sistendi. 417. corporis ad progressivum sanguinis motum facit. 321. pulsum mutat. 368.
- Motum* antecedit alvi depositio. 124. fortiozem cibus non statim excipere debet. 125. peristalticum quæ turbent. *ibid.* quæ excitent. 118. ad motum & mobile respiciendum. 17.
- Motu* corpora leviora fiunt. 121. fatigatis qualis conveniat cibus. 125.
- Motuum* & exercitationum prudens sit moderatio. 123. cuius eligendum motus conveniens genus. *ibid.* varia genera. 121. & seq. leges ex staticis. 20. mechanicorum organa. 86. quantitas debet ingestorum moli respondere. 123. est communicatio in corpore. 26. febrilium indoles. 167. intestinorum duæ species. 155. microcosmicorum leges. 169. eas nosse
- debet medicus. 165. morbosorum indoles. *ibid.* morbificorum tres classes. 193. scientia medico maxime necessaria & utilissima. 149.
- Mucilagines* ubi profint? 431.
- Mucilaginosa* copiose hausta veneni & purgantium vim frangunt. 215.
- Mucus* 71. ejus colatoria. *ibid.* intestinalis. 72. unde spissescat. 71. ejus emunctoria conspirant. 72. excretio copiosior unde obtingat. *ibid.* separatio diversis temporibus varia. *ibid.* salutariter excernitur. 347. pellucidus per alvum secedens unde? 385.
- Muria* purgat & clysteribus admiscetur. 467.
- Murorum* recentium exhalationes gravia gignunt symptomata. 230.
- Musculi* sunt organa motus voluntarii. 86. eorum structura à quibus investigata. 20. qualis. 86. color rubicundus ipsis non est naturalis. 56. abdominis abscessum quandoque continent. 325. item dorfi. *ibid.*
- Musculorum fibrarum* vis motrix unde. 87.
- Mustum* stomacho infirmo alienum. 254.
- Mutatio* quævis lento procedat gradu. 138. subita sanitatem lædit. *ibid.*
- Mutus* ira loquens. 190.

N.

N Aboth ovarii novi inventor. 77.

Napelli vis virulenta. 198. seq.

Narcotica qui tam cito necent. 178. quo pacto operentur. 198. 222. seq. volatilis & penetrantis sunt indolis. 222. quæ sint & quomodo agant. 448. pulsum mutant. 369. nocent. 417. cur vires dejiciant. 369.

Narcoticorum operandi ratio. 48. noxæ. 35.

Nares olfactus organon. 92. earum structura. *ibid.*

Narium hæmorrhagia spasmi debetur. 301. quibus solennis. 346. salutaris excretio. 291. 346. suppressa nocet. *ibid.* solvit in juvenibus capitis morbos. 409.

Natura quid sit? 28. 88. 301. 406. & anima sunt res distinctæ. 88. 95. studet eliminandis noxiis. 119. hunc in finem extraordinarios motus concitat. *ibid.* assuescit medicamentis. 137. secundum Veteres quid. 405. non est anima. *ibid.* verum medicinæ principium. 301. quid ei tribuerit Hippocrates. 300. sola sæpe sanat morbos. 290. 405. quo sensu morborum medicatrix. 303. sæpe minus salutes motus adornat. 411. optimam servat medendi rationem. 406. 412. non omnibus morbis expugnandis sufficit. 410. medici opem non excludit. 413. obstacula remove nequit. *ibid.* succos vitiosos alterare non potest. *ibid.* sæpe non sufficienter emover. *ibid.* externis in sanando impeditur. *ibid.* ejus pugna cum morbo quid. 303. ejus methodus in variis morbis. 407. seq. effectus ipsius quandoque perperam medicamento tribuitur. 425. una ab altera distinguenda. 412. quæ debilis, quæ robusta? *ibid.*

Naturæ definitio Aristotelica. 32.

Naturæ vox πολύσημος. 153. obscurissima. 162. autocratia non nimis in medico extendenda. 153. natura prudens morbos studio instituens est commentum & terminus nihil significans. 151. 152. robusta & imbecillis unde æstimanda. 240.

Naturarum est differentia. 129.

Navigatio unde pathemata in insuetis. §10.

Nausea quibus abigenda. 445.

Nebelius. 17.

Nephritis non indistincte curatur alemella vel bareira. 153. differt à malo ischiadico. 295. quomodo gignatur. 302. spasmi stipatur. *ibid.* ex mensium emanatione. 341. & suppressione. 343. maxime in senibus. 344. ex atonia renum quibus tractanda. 446. eam prohibent hæmorrhoides. 344. simplex quid? 295. ejus signa & differentia. *ibid.* calculosa

quid? 295. ejus signa. *ibid.*
Nervi quid sint. 85. an cavi. *ibid.* an materiam nutritionis advehant. 86. faciunt ad cordis motum. 42. ad sensum, motum & nutritionem. 86. omnis generis glandulas intrans. *ibid.* in paralyti non tam obstruuntur quam comprimuntur. 85. poris sunt pervii. 86. in nulla corporis parte adeo aperti ac in naribus. 94. non sunt sensus sedes. 92. aurium. 89. linguae. *ibid.* narium. 93. pulmonum & diaphragmatis. 45. oculorum. 90. optici unde procedant. 84. causa motus partium. 309. consensus. *ibid.* nullam violentiam ferre possunt. 310. ab animi pathemate proxime afficiuntur. *ibid.* eorum distributio scitu necessaria. 309. constitutio in morbis considerata. 289. distensio in acutis periculosa. 392. læsi atrociam pathemata. 311. eorum principium commotum atrocium pathematum causa. 310. præcordiales spasmi affecti quæ pariant mala. 392. pneumonici spasmo correpti respirationem faciunt difficilem. *ib.*
Nervina clysteribus quando indenda. 467.
Nervorum paria novem ex cerebro prodeunt. 84. eorum cognitio à quibus petenda. 20. datur continuïtas. 86. cum progressu fluidorum magnus consensus. 29. continuïtas facit consensum partium. 86. fluidum facit ad motum. 87. Vide *fluidum*, *liquidum nervorum*.
Nervosæ partes consensum alunt. 309. seq. nullam ferunt læsionem. 311. à minimæ molis materiis præter naturam motus efficiunt. 310. ab animi pathematibus proxime afficiuntur. *ibid.* in morbis potissimum patiuntur. 308. in eas maxime agunt morborum causæ & medicamenta. 308. 406. earum constitutio ex urina patescit. 380. Vid. *genus nervosum*.
Nervosarum partium cum universo corpore mira consensio. 158.
Nervoso - membranaceæ partes motuum morbosorum subiectum. 178. paullo vehementius agitatur motus animi & corporis insigniter turbant. 179.
Nervosum systema probe cognitum esse debet medico. 180.
Nevrologiam explicavit Vieussien. 20. 86. ejus ad pathologiam usus. 86.
Nili exundatio pestem gignit. 208.
Nimium naturæ inimicum. 246.
Nitrum fixum absorbens. 428. optimum temperans. 429. præferendum acidis. *ibid.* quos præster effectus. 318. calorem extinguit. 321. pullum mutat. 369. sanguinem fluidiorem & rubicundiorem reddit. 374. 429. specificum in nimis hæmorrhagiis. 452. commode miscetur absorbentibus. 422. quomodo sit antispasmodicum. 448. cum camphora specificum in inflammationibus. 450.
Nonnaturales res morbos ingignunt. 422. ad morbos sanandos egregii usus. *ibid.*
Nostalgia qualis morbus. 313.
Nuckius. 19.
Nutrientia analeptica optima. 444.
Nutritio quid sit. 55. solidis æque ac fluidis necessaria. *ibid.* cur pereat in senibus. 162.
Nutritio cur sit opus. 28. ad eam plura debent concurrere. 56. quiete opus est. 57.
Nutrix quæ optima. 138. cum cura danda. 82. quomodo lac possit corrigere. 132.
Nuces alvum adstringunt. 261. vomica duplicis generis. 226. non sine periculo in usum promiscuum vocandæ. *ibid.* in quibus morbis auxilium ferant. *ibid.* felibus & canibus mortiferæ. 198.
Nyctalopia excitata ab usu panis loliacei. 230.

O.

Obesa corpora quæ sint. 130. non sunt in tuto collocata. *ibid.* quid tenere debeant. 131.

Obesi sibi caveant à frigore. 267. cur difficulter sudent. 382.
Oblivio obstinata à suppressis mensibus. 305. Vid. *memoria*.
Observationes præcipuum pathologiæ fundamentum. 147. eorum usus amplissimus. 291. ad perspicendas remediorum vires proficiuæ. 289. seq. de morborum spontaneo decursu utiles. 291.
Observationum medicarum tenor. 148.
Oculus visus organon. 90. refert cameram obscuram. *ibid.* ejus anatomica consideratio. *ibid.* à quibus exposita. 20.
Oculorum morbi unde deducendi. 91.
Oculi defluxionem & morbos experiuntur à suppressa narium hæmorrhagia. 346. & mucicretione. 347.
Odontalgia quid. 303. à spasmo ligamentorum dentium. *ibid.* ejus specificum. 451.
Odontalgia periodicæ unde. 186.
Odoris sedes & objectum. 93.
Odorum ingens in nervosas partes potentia. 178.
Odor cur pereat. 306. à spasmo tunicæ pituitariæ impeditur. 305. errhinorum abusu læditur. 442. cum gustu alit sympathiam. 305. *suaveolentium* cur hysterics infestus. 305. unde pathemata ex eo. 310.
Odorifera cur prompte agant in cerebrum, ejus membranas & nervos. 94.
Oedemata à spasmo diaphragmatis quomodo? 305. ex scabie repulsa. 337. suppressis mensibus. 341. nimis hæmorrhagiis. 349. asthma lento. 352. balneis martiatis abiguntur. 464. nec non vaporosis. 465. spasmo exterioribus inducto disparent. 302. repulsa graviter nocent. 339. suffocationis causa. 302.
Oedematum ortus. 167. 175. cur ad interiora repellantur. 166.
Oesophagus consentit cum ventriculo. 314.
Oleosa ad arcenda contagia commendantur. 212.
Olera dant humidum alimentum. 108.
Olfactus ubi perficiatur. 89. ejus organon nares. 92. quomodo fiat. 93. cum gustu cur conspiret. *ibid.*
Olla carbonibus repletæ non sine noxa mulierum pedibus subjiciuntur. 230.
Omentum cur difficulter sanguinem transmittat. 49.
Ophthalmia quomodo gignatur. 302. spasimis debetur. *ibid.*
Opiata quomodo agant. 48. infantibus nocent. 133. Persis cur non noceant. 137. locum non habent in affectibus periodicis. 186. alvum adstringunt. 261. Vid. *anodyna* & *stupefactiva*; retropellendi pollent facultate. 152. ex heroicorum numero. 418. tutius omittuntur. 449. debilibus exitiosa. 344. in calculo mortifera. 418. nec non febre ardente. *ibid.* non offerenda ubi motus languent. 418. seq. iis perperam sistuntur hæmorrhagiæ. 344. in colica gignunt paralyticos affectus. 354. 418. clysteribus non indenda. 468. Vid. *Laudanum*.
Opii indoles ac virtutes. 172. 223.
Opium quibus utiliter societur. 422.
Organa ad edendum motum per se non sunt idonea. 155. exteriora & emunctoria cur tam copiose sint constituta. 156. sensoria & motoria quare in senibus amittant robur suum. 162.
Ossa dimidiam fluidi partem habent. 367. calcinata absorbent. 428. diaphoresin simul movent. *ibid.*
Osteocolla absorbens. *ibid.*
Otalgia quid & unde. 303.
Ova probum dant alimentum. 107. senibus & debilitatis conveniunt. *ibid.* quibus noceant. *ibid.*
Ovarium vulgare an sit verum. 77. rectius intra uterum quæritur. *ibid.* vasa in eo disrupta mortis causa. 327.
Ovorum testæ absorbens. 428.
Ovulum foeminæ describitur. 77. qua ratione masculum producat. *ibid.*

P.

- P** *Alpiatio cordis* minus salutaris naturæ motus. 412. convulsione species. 306. ex suppressis mensibus. 341. causa mortis in ea polypus. 398. qualis in ipsa pulsus. 368.
- Palpitationes* cordis unde. 168. ex animi pathematibus. 185.
- Palustria* loca insectorum seminarium. 209. 211. valde insalubria. 208. ideo circa ea non indormiendum. 211. eorum exsiccatio facit ad averfionem morborum epidemicorum. 212.
- Panacea* recte usurpatæ admittendæ. 443.
- Pancreas* scirrhus obsidetur in hypochondriacis & diuturna quartana. 329.
- Panis* alimentum universale. 107. quis optimus. *ibid.* calidus nocet. 109. turbat negotium menstruum. *ibid.*
- Papaveraceorum* operandi ratio. 48.
- Paracelsus* ejusque nova dogmata. 16. an multum profuerit medicinæ. 17.
- Paracenthesis* in hydrope saccato proficua. 326. in ascite noxia. 328. & cur. 399.
- Paracynanche* quid sit. 295. distinguenda ab aliis faucium inflammationibus. *ibid.*
- Paralysis* unde. 166. à terrore oriunda. 191. ex tristitia. 193. ex nimia aquarum ardentium potatione. 255. inveterata insanabilis. 184. incendii terrore cessat. 192. iræ beneficio sanata. 190. atoniæ gravior species. 306. vera vel spuria. 299. utriusque signa & sedes. *ibid.* spasimis stipatur. 302. quomodo gignatur. *ibid.* sæpe oritur a sanguinis stagnatione. 299. ex lochiorum suppressione. 342. ex apoplexia quomodo. 350. post dolores atroces. 354. post colicam. *ibid.* cephalalgias & scorbutum lethali eventu supervenit. 396. facile recidivat. 356. levatur balneis roborantibus. 465. & vaporosis. *ibid.* nec non clysteribus. 467. causa mortis in ea. 397. *nervi optici* guttæ ferentis causa. 306. *nervorum pneumonicorum* catarrhi suffocativi causa. *ibid.* *nervorum causticorum* surditatis causa. *ibid.* *nervorum lingualium* aphoniæ causa. *ibid.*
- Paregorica* quæ dicantur. 448. quomodo agant. *ibid.*
- Paresis* quid & unde. 307. post colicam frequens. 354.
- Paronychia* à spasmo periostii. 303.
- Parotides* unde. 183. quæ habeant signa. 326. quænam affectiones illas insequi soleant. 357.
- Paroxysmi* cur tam facile revertantur. 169. cur redeant stasis temporibus. *ibid.* intermittentium unde. 186.
- Paroxysmus* relinquit atoniam. 320. seq. recrementa gignit. 321. quid in & extra eum agendum. 289. extra eum evacuandum. 321. sub eo non movendum. 417. nec venæ sectio instituenda. 457. ante eum urina cur tenuis & post eum crassa. 378. *febrilis* nonnisi sublata causa sistendus. 417.
- Partes corporis* fluidæ & solidæ. 27. genitales à Graafio descriptæ. 20.
- Partes corporis* conspirant. 309. ex earum structura motus & nexu consensus. *ibid.*
- Partium consensus* conspicuus. 28. diversitas variat circulum sanguinis. 47.
- Partus* legitimus tempus. 80. quid fiat post eum. *ibid.* non sine convulsione succedit. 306. sæpe post mortem matris fit. 395. balneis facilitatur. 464. funesta gravioris signa. 395.
- Passio*, quænam passiones humectantiis & diluentiis depellantur. 469. à frigido potu autem inducantur. *ibid.* colica & iliaca passio unde oriuntur & quibus mediis curantur. 473. stomachalium passionum origo. 473. seq. hysterice passionis symptomata quænam. 474. curatione difficillima sunt. *ibid.*
- Pathologia* altera medicinæ pars. 14. non potest carere neurologia. 86. ex motuum non humorum vitio petenda. 308. nexu gaudet cum reliquis medicinæ partibus. 285. therapie fundamentum. 424. minus recte plerumque traditur. 300. ejus synopsis. *ibid.* ignorata causa ignorantie vitium in medicamentis. 424.
- Pathologie* objectum. 147. definitio. *ibid.* veræ & fictitiæ discrimen. *ibid.* veræ fundamenta. *ibid.* progressum quid hactenus impediverit. 150. veritates fundamentales ex physiologia repetendæ. 154. pathologia veterum curtam manca fuerit. 163.
- Paulli*. 17.
- Pectoralium* usus nimius ventriculo alienus. 256.
- Pectoris* convulsiones à potu frigido. 254.
- Pedes* cur facilius intumescant quam aliæ partes. 269. seq. consentiunt cum ventriculo. 315. earum refrigeratio cutim stringit, tormina & diarrhoeam movet. *ibid.* quando vena in iis incidenda. 459.
- Pedum* frictiones utiles. 140.
- Pedum* refrigeratio cur ventris dolores excitet. 168.
- Pediluvia* quem habeant effectum. 140. æstivo tempore profunt. *ibid.* eorum tempus commodissimum. *ibid.* quomodo paranda. 465. seq. pulsus mutant. 369. amplissimi usus in variis morbis. 466. inprimis spasimis & capitis morbis. 318. late virtutem diffundunt. 466. humores derivant & fluidificant. *ibid.* excretiones promovent. *ibid.* nocent si mensium fluxus imminet. *ibid.* à constringentibus abstinentium. *ibid.*
- Perceptio* quid ratione animæ. 89. & corporis. *ibid.* non in nervis, sed membranis nervosis fit. *ibid.*
- Peregrinatio* quando sanitatis causa instituenda. 104. quibus commoda. 122.
- Pericardium* sero repletum in iis qui palpitatione cordis pereunt. 399. seq.
- Pericranium* ejus spasmus efficit cephalalgiam. 303.
- Periostium* ab ejus spasmo dolores. 303.
- Peripneumonia* unde. 166. 168. ex potione frigida. 234. juvenibus familiaris. 183. & Westphalis. 185. non fit ante pubertatem. 183. ejus signa. 294. differt à pleuritide. *ibid.* quomodo gignatur. 302. spasimis debetur. *ibid.* sæpe post colicam accidit. *ibid.* ex hæmorrhoidum suppressione. 343. crises servat. 388. venæ sectionem poscit. 459. tempestive discutienda. 415. non tam facile in empyema concedit ac pleuritis. 351. providum expectorantium usum desiderat. 441. funesta in ea signa. 394. causa mortis. 398.
- Peristalticus* motus. vide *motus*. multum confert ad tuendam valetudinem. 157. ad sanitatem necessarius. 385. quibus destruitur. 385. seq. à spasimis invertitur 304. clysteribus crebrioribus læditur. 468. labefactatus. quæ pariat mala. 307. inversus facit iliacam. 304.
- Perlary mater* absorbens. 428. subadstringit. *ibid.*
- Persæ* opio affluenti ab illo non læduntur. 137.
- Perspiratio* libera prodest. 52. infusis calidis promovetur. 139. nocturna non est subito repellenda. 127. liberior quibus adjuvetur. 250. omnium excretionum præcipua. 334. minor quantitate urina. 375. differt à sudore. 380. sordes evehit maxime pernicioles. 334. & tenuissimas. 381. corpus agile reddit. *ibid.* balneis movetur. 463. in morbis exploranda. 288. ex quo cognoscenda. *ibid.* ab aëre mutatur. *ibid.* sub quo aëris statu optima. 381. à frigido - humido sufflaminatur. 334. mutata epidemicorum morborum causa. 334. seq. sub doloribus & spasimis supprimitur. 319. *suppressa* omnium maxime nociva. 334. morbos gignit. 288. recidivas parit. 289. varia pathemata ciet. 304. succos inquinat. 320.
- Perspirationis* causa & ratio duplex. 265. æquabilis commodum. *ibid.* cohibita quæ mala gignat. *ibid.*
- Peste* laborantes facilius alios afficiunt, quam qui ea occubuerunt. 208.
- Pestis* signa pathognomonica. 175.
- Pestilens febris* in ea crisis succedit. 388.
- Pestilentia* causa mortis in ea sphacelus. 385. specificum in ea. 450. extrinseci periculi morbus quare plerisque exitialis. 358.

Petechiæ distinguendæ ab aliis exanthematibus. 293. crises servant. 388. qualem habeant pulsum. 371. qui malus. *ibid.* per spasmus cum damno repelluntur. 302.

Phagadenæ ex hæmorrhoidibus suppressis. 327.

Phantasia in actiones naturales operatur. 97. non agit sine causis mechanicis. 24. ejus effectuum exempla. 97. limitatam in actus mechanicos vim habet. 406.

Pharmaca, maximarum quoque virium ex qua causa absque humido sufficienti nihil eximii præstent in curatione. 469.

Pharmaceuticæ studium utile. 20.

Pharynx spasmus patitur. 305. spasmio affectus restrictivi in gula sensus. *ibid.* & laxatus nimis deglutitionis vitiatæ causa. 306.

Philosophia experimentalis vires remediorum recludit. 426.

Philtræ unde parentur. 196.

Phlebotomia infelix. 239.

Phlegmatici quinam. 242. in quos morbos facile incidunt. 243. cur non adeo acerbis doloribus expositi ac cholericis. 180.

Phlegmaticorum natura. 131. diætæ. *ibid.* alvus laxa. 67.

Phlegmaticum temperamentum quale. 44.

Phlogosis unde. 166. 242.

Phrenitis ortus. 166. ex affectu iracundiæ. 190. symptomata lethalis. 182. 184. ejus signa & differentia. 295. quomodo gignatur. 302. ex suppressa narium hæmorrhagia. 347. jugularium sectione levatur. 458. ex ea fit sphacelus. 324. signa futuræ & præsentis in acutis. 392.

Phthisici in iram proni. 103.

Phthisis cur messis tempore corpora afficiat. 234. juvenibus familiaris. 183. nonnunquam congenita. *ibid.* ideoque incurabilis. 244. non indistincte curatur lacte. 153. quandoque gignitur ex hæmoptysi. 164. vel ex nimia aquarum ardentium potatione. 255. quare magis vexet juvenes quam senes. 170. senibus cur rarior. 185. hæreditarius morbus. 349. à pulmonum atonia. 307. obstructis & tumefactis pulmonum vasculis. 299. ex cohibito fluore albo. 340. mensium suppressione & inde orta hæmoptysi. *ibid.* variolarum reliquiis. 355. hæmorrhoidum suppressione. 343. restagnante sanguine lochiali. 342. ex hæmoptysi quomodo. 350. ejus specifica. 451. funesta signa. 394. quomodo necet. 399. suffocatione perimit. 393. causa mortis in ea. 399.

Physica cur opus sit. 15. qualis esse debeat. 14.

Physicæ & anatomes neglectus peperit sectas in medicina. 16.

Physices peritia medico maxime necessaria. 150.

Physiologia prima medicinæ pars. 14. quid tractet. 285. cum aliis medicinæ partibus connexionem alit. *ibid.*

Pietatis studium facit ad vitam longam. 102.

Pilæ parvæ lusus vehementior motus. 122.

Pilule balsamicæ ad præservandum utiles. 139. aloeticæ præferendæ purgantibus. 416. hæmorrhoides movent. 343. caute tamen usurpandæ. 441. quibus & quando convenient. 434. intempestivus earum usus noxius. 345. *balsamicæ* non modo intestina, sed confines & partes afficiunt. 318. post morbos adhibendæ. 420. egregii effectus in uteri affectibus. 318. puerperis. 355. 420. hypochondriaco malo. 318. de *cynoglossa* in hæmorrhagiis profunt. 318. 452. de *styrace* in tussi egregiæ. 317. *Wildegansii* in colica paræsin gignunt. 354.

Pinguedines quæ praviore. 109. optima antidotus. 430.

Pinguedo unde & quid. 56.

Pinguia affligunt ventriculos acido gravatos. 109. non facile in ventriculo subjugantur. *ibid.* copiose hausta veneni & purgantium vim frangunt. 215. acidis mixta quæ symptomata excitent. 252.

Pira immatura alvum adstringunt. 261.

Pisa alvum adstringunt. 261.

Pisces dant alimentum humidum. 108. febri laborantibus concedendi. *ibid.* morbidis vel mortui corpori perniciem creant. 232.

Piso (Carolus) 21.

Pitcarnius. 17.

Pituitaria tunica vide *tunica*.

Placenta uterina. 79. ejus officium. *ibid.* supplet defectum respirationis in embryone. 45.

Placentæ noxiæ. 109. insalubres. 255.

Plantaginis radix alvum adstringit. 261.

Plantæ in stagnis natæ virulentæ sunt naturæ. 210.

Plethora gravidarum facit cacochymiam. 136. plurium morborum causa. 188. 259. non tamen omnium. 154. morbida quæ. 268. cacochymia fundamentum. 271. cordis & vasorum tonum imminuit. 320. nociva. 409. non omnium morborum causa. 347. multorum morborum causa. 347. senibus etiam familiaris. 455. cacochymiam gignit. 320. in acutis & continuis damnosa. 456. ad vires ex atonia vasorum. 307. per hæmorrhagias salutariter imminuitur. 409. scarificatione absumitur. 462.

Plethoræ generatio. 164. 176. effectus. 182. ejus nomine quid veniat. 268.

Plethorici sibi caveant à frigore. 267.

Pleuritis unde. 166. 262. ab ira progenita. 190. vera à spuria distinguenda. 294. utriusque signa. *ibid.* non confundenda cum pathematibus ex vermibus. 332. debetur spasmis. 302. inprimis pleuræ nervosæ. 303. ex consolidatis antiquis ulceribus. 337. hæmorrhoidum suppressione. 343. crises servat. 388. arcetur hæmorrhoidibus. 343. gignit empyema. 351. facilius concedit in empyema quam peripneumonia. *ibid.* quomodo tempestive discutienda. 415. venæ sectio caute in ea administranda. 351. quæ in spuria quandoque in vera semper utilis. 459. expectorantia caute adhibenda. 442.

Plica polonica abscissa multos morbos infert. 336. specifica ipsius. 453.

Podagra fixa senibus familiaris. 183. hæreditaria insanabilis. 184. iræ beneficio sanata. *ibid.* introversa exitialis. 206. non indistincte curatur lacte. 153. non venit ante pubertatem. 183. 185. ob ingentem tristitiam sævissima concitat symptomata. 193. quandoque anniversaria. 183. hæreditarium plerumque malum. 346. quomodo gignatur. 302. à spasmis. *ibid.* & maxime ligamentorum. 303. hieme cur gravius affligat quam æstate. 336. transit in calculum. 239. non semper ab hæmorrhoidum suppressione repetenda. 345. facile recidivat. 356. senibus salutaris sæpe. 410. ob imbecillitatem cum damno retinetur. 339. scarificationem poscit. 461. venæ sectione intempestiva cum damno reprimatur. 339. specifica in ea. 450. seq. præpostere topicis tractata varia infert mala. 337. seq. retrocedens quomodo necet. 395. quænam mala à perperam tractata propullulent. 359.

Podagræ incunabula. 163. 179.

Podagrici tumores retrogradi. 187.

Pollutio nocturna ab atonia vesicularum seminalium. 307.

Poloni insignem spiritus vini copiam leviter ferunt. 137.

Polypus cur necare possit. 31.

Polypi cordis ex nimia sanguinis abundantia. 188. inveniuntur plerumque in subita morte extinctis. 270. in quibus corporibus maxime generentur. *ibid.*

Polyporum generatio. 168. à potu frigido. 234. ex tristitia. 193. effectus. 156. indicia. 270.

Polypus frequentissima morborum & mortis causa. 329. seq. 397. plerumque in pectoris morbis. 397. quibus familiaris. 402. dextrum cur plerumque occupet cordis ventriculum. 397. signa inchoantis & consummati.

summati. 330. index sanguis fibrosus. 374. ex sup-
pressis mensibus. 341. quomodo arcendus. 402.
Polypi uterini hæmorrhagiis causantur. 330. causa hy-
dropis uteri. *ibid.* distinguendi a molis. *ibid.*
Potentia generandi in foeminis, quo tempore ordinario
circumscribatur. 78.
Potus copia nocet. 117. minus lædit quam ciborum.
111. copiosus alvum laxat. 118. ejus defectus no-
cet. 117. præsertim foeminis. *ibid.* frigidus quibus
cavendus. 134. incongruus, qualis. 117. parcius quas
ferat noxas. 117. liberalior commendatus. 257. mul-
tum facit ad sanguinis crasin. 288. in morbis con-
siderandus. *ibid.* calidus mutat pulsum. 368. frigidus
sanitati obest. 288. mortem inducere potest. 401.
spirituosus largus nocet. 288. item paucus. *ibid.* fœ-
culentus & frigidus colicæ causa. 297. illius defec-
tus quare nonnullis graves passiones pariat. 469. fri-
gidus quandoque salubris. 470. aquosi frigidi salu-
britas. *ibid.* modus operandi in potu frigidiori. *ibid.*
frigidus potus etiam in ardente & biliosa febre est
præstantissimus. 471. nec in febrili æstu denegan-
dus. *ibid.* seq. ejusdem usus in choleric morbo. 472.
frigidi facultas in spasimis & anxietatibus præcordio-
rum, dolore cardialgico, stomachi ardore & soda.
473. quando nocentissimus. 476. potus aquæ frigi-
dæ non imperite, sed circumspicte à medicis est appli-
candus. *ibid.* plura de hoc vide supra *voc.* aqua.
Potulenta veneni naturam induentia. 233. valetudini in-
fensa. 255.
la Poudre de succession saturninæ fertur esse indolis.
228.
Præctici parum plerumque causas norunt. 322.
Præcordiorum anxietates periodicæ unde. 168. 186.
Pregnantes diætam peculiarem possulant. 136. vide
gravidæ.
Præservare à morbis in medici potestate situm magis
quam curare. 99.
Præservatio in quo potissimum sita sit. 30. nobilissima
medicinæ pars. 291. ex origine morborum discen-
da. *ibid.*
Primæ viæ earum constitutio in morbis exploranda. 289.
Principia hominis tria sunt conjuncta. 88. 95. seq.
Principium medicinæ quale esse debeat. 23. causa pro-
xima sit sanitatis morborum, vitæ & mortis. *ibid.*
clarum esse debet. *ibid.* in corpore nostro existere
debet. *ibid.* non potest esse res spiritualis. 24. aut sen-
sitiva. *ibid.*
Prognosis medica quo pacto acquiratur. 149. ex diffi-
cillimis. 391. multum facit ad famam medici. 291.
364. ad finem artis proprie non spectat. 391. unde
petenda. 372. 391. maxime ex observationibus. 291.
veteribus maxime culta. 364. licet empirice. 391.
in ea distinguenda pathemata, tempora & corpora.
395. ad eam referendus in primis pulsus. 364. ex san-
guinis inspectione fallax. 372. utilis tamen. 370.
Prolapsus ani & uteri balneis reprimuntur. 465.
Prostatæ mucidæ lymphæ secretorium. 72.
Prostratæ ulcere quandoque obsidentur. 327. scirrhii in
iis signa & effectus. 329.
Prunella quid? 295. distinguenda ab aliis faucium in-
flammationibus. *ibid.*
Pubertatis tempore corpora mutantur. 76.
Pueri sæpe, sed paucum cibum assument. 134. qui ip-
sis noceant cibi. *ibid.*
Pueritia quid ratione structuræ peculiare habeat. 287.
349. peculiaribus morbis obnoxia. 349. quibus mor-
bis pateat. 308. qualis in ea pulsus. 368.
Puerperium ad morbos disponit & cur. 350. in eo uti-
les purgationes. 355. mortis in eo signa. 395. causa
sphacelus. 402.
Pulmones juvant sanguificationem. 50. eorum fabrica.
44. officium est usus. 45. eorum constitutio in mor-
bis considerata & quomodo. 289. læduntur à tussi

humida diuturna. 351. à reliquiis variolarum &
morbillorum labem patiuntur. 354. seq. cum pleu-
ra cur in phthisi concrecant. 399. si hacelo correpti
quæ habeant signa. 324. atonia affecti quæ gignant
in mala. 307. labe affecti quibus sanandi. 446. quan-
doque inflammantur. vid. *peripneumonia.*

Pulmonum fabrica cur ferme tota ex canaliculis mini-
mis constructa. 156. tubercula unde. 168. vomicae
juvenibus familiares. 183.

Pulsus quid sit. 42. 364. quid indicet. *ibid.* in utraque
manu explorandus. 43. causa ejus motus cordis. 366.
seq. mechanice examinandus. 364. experientia ad-
discendus. 371. aliquamdiu in utroque carpo tan-
gendus. *ibid.* horologii norma numerandus. *ibid.*
quot in minuto. 368. non semper unus in utro-
que brachio. 366. ejus tantum quatuor species. 365.
quid ex eo cognoscendum. 389. facit ad dia-
gnosin & prognosin. 364. ejus usum verum Ve-
teres ignorarunt. *ibid.* Hippocrates parum ex-
posuit. *ibid.* Galenus nimis multas ejus finxit spe-
cies. *ibid.* immutatur à variis causis. 368. variat pro
tempore febris. 371. cautum ex eo judicium. 369.
seq. variat in capitis morbis. 371. in catarrhis vesperi
ingravescit. *ibid.* spasmio remittente mollescit. *ibid.*
æqualis non pertinet ad essentiam pulsum. 365. *am-
plus* non differt à magno. *ibid.* *angustus* idem ac par-
vus. *ibid.* *caprizans* inæqualis species. 366. *celer* quid.
365. respectu cordis. 367. & *frequens* separatim
percipi nequit. 366. sine errore unus pro altero po-
nitur. *ibid.* febribus jungitur. 370. ac *durus* in mor-
bis spasmodicis ac doloribus. 371. *parvus ac durus*
sanguis si exitum molitur. *ibid.* *concisus* idem cum
parvo. 365. *contractus* & parvus idem. *ibid.* *convul-
sivus* dicitur respectu arteriæ. 366. & morientium
est. *ibid.* *debilis* quid. 365. ratione cordis. 367. in
lue venerea, scorbuto, hydrope. 371. *dicrotus* inæ-
qualis species. 366. *durus & mollis* dicitur respectu
arteriæ. *ibid.* & *frequens* in febribus. 370. inflamma-
tionibus & doloribus. 371. plerumque in apople-
xia & epilepsia. *ibid.* *formicans* inæqualis species.
366. *fortis* idem ac magnus. 365. *frequens* non est
de essentia pulsum. *ibid.* febrium pathognomoni-
cum signum. 370. non tamen semper. *ibid.* ante eru-
ptionem exanthematum. 371. & sub febre secunda-
ria. *ibid.* *parvus, debilis & contractus* in malignis &
petechialibus. 371. *languidus & inæqualis* in pectoris
morbis. *ibid.* *humilis* idem cum parvo. 365. *impe-
tuosus* & magnus unus. *ibid.* *inæqualis* non de essen-
tia pulsum. *ibid.* variæ ejus species. *ibid.* jungitur
plerumque convulsivo. 366. *intermittens* quando &
cur sit. 367. jungitur plerumque convulsivo. 366.
sine exitio quandoque observatur. 369. à lumbrico.
ibid. *latens* idem ac parvus. 365. *magnus* quid. *ibid.*
respectu cordis. 367. & *celer* in synocha. 371. &
creber in hæmorrhagiis. *ibid.* manifestus idem ac
magnus. 365. *myurus* inæqualis species. *ibid.* *obscu-
rus* & parvus idem. *ibid.* *parvus* quid. *ibid.* respec-
tu cordis. 367. & *celer* in continuis malus. 371. &
frequens in dysenteria. *ibid.* *frequens & debilis* in
continuis pessimus. *ibid.* *durus, frequens & inæqua-
lis* in principio quartanæ. *ibid.* *profundus* non differt
à parvo. 365. *rarus* non de essentia pulsum. *ibid.*
& *mollis* in lethargo & sopore. 371. *robustus* idem
ac magnus. 365. *ferratus* inæqualis species. 366.
tardus quid. 365. respectu cordis. 367. *tremulus*
inæqualis species. 366. *vacuus* idem cum parvo.
365. valens & magnus unus. *ibid.* vehemens quid.
ibid. ratione cordis. 367. in statu tertianæ & arden-
tis. 371. *vermicularis* inæqualis species. 36.

Pulsum multa variant. 42. & seq.

Pulsum celeritas mensuranda horologio. 42. differen-
tiæ. *ibid.* exploratio utilis. *ibid.*

Pulvinar moribundis subtractum, quid efficiat. 48.

Purgantia

Purgantia fortiora fugienda. 138. lædunt gravidas. 137. senibus nocent. 135. validiora infantibus nocent. 133. fortiora quænam. 214. alvinam excretionem turbant. 216. atque hinc tenellos & lactentes infantes graviter lædunt. 217. maxime vero nocent, ubi ventriculi inflammatio imminet. *ibid.* & ubi dolores sunt sanguinisque profusiones metuendæ. 218. vel vires jam sunt fractæ. 218. drastica importunius data quæ mala gignant. 214. mortem inferunt. 215. non sunt propinanda post iracundiam. 190. venenis causticis annumerantur. 214. eorum vis quo pacto destruitur. 214. improvide sumpta quid causentur. 168. locum non habent in affectibus periodicis. 187. singula propriam habent virtutem. 215. retropellendi facultate pollent. 215. semper reformidata à sanioribus medicis. 216. & nisi difficilioribus morbis & magna cum cautione adhibita. 216. lenientia. 216. quæ sint. 434. quomodo agant. 435. intestinorum consensum testantur. 316. pulsum mutant. 369. ubi proficua. 436. robustioribus danda. *ibid.* in fluore albo & gonorrhœa usurpanda. 416. balneis utiliter fociantur. 464. postponenda laxantibus. 416. virulento elemento imbuta. 435. veneni æmula facultate pollent. *ibid.* nocentissima. *ibid.* nocent post iram. 313. 435. in dentitionis difficultate. 314. 421. 435. in morbis exanthematicis. 315. in catarrhis. 340. in febribus. 415. senibus. 421. 435. sanguinis circulum per vasa abdominis turbant. 345. gignunt icterum. 314. alvum cur postea adstringant. 385. recidivas proritant. 356. tempore paroxysmi intermittentium non danda. 418. clysteribus non indenda. 468. quando necant quæ habeant signa. 393. Vide *excrementa alvi*. quid de illis ob humorum retrocessionem notandum. 361.

Purgatio menstrua quibus offendatur. 136. Vide *menfes & menstrua purgatio*. vernalis non est repudianda. 139. naturæ opus juvat. 413. necessaria post morbos. 354. puerperis prodest. 355. necessaria in febribus. *ibid.* & ante balneorum usum. 465. neglecta purpuræ causa in puerperis. 355. nec non in acutis. *ibid.*

Purpura retrograda. 187. cur adeo periculosa. 166. rubra vel alba in morbis acutis unde. 164. salutaris ira excitata. 190. distinguenda ab aliis exanthematibus. 293. puerperis cur familiaris. 355. ex cohibito fluore albo. 340. suppressis lochiis. 342. crises non servat. 389. acutis ob purgationem neglectam accedit. 355. lethali eventu. 393. in principio admittit emetica vel laxantia. 415. sudor largus in ea unde. 352. per spasnum cum damno recedit. 302. utraque quare nostris temporibus frequentatissima. 358. *scorbutica* efflorescens solvit hypochondriacum malum. 410.

Pus post inflammationem ex sanguine quandoque generatur. 325. effusi in thoracem signa. *ibid.*

Pustularum generatio. 174. ex potione frigida. 234. haud repente reprimendæ. 263.

Putredo extinctum circulum sanguinis sequitur. 34. in quo consistat. 28. vires motrices destruit. 34. causa mortis. *ibid.* unde proveniat. 160. præsertim mortifera. 161. non est ratio formalis mortis. 159. corpori tamen humano maxime adversæ. 178. 206. visceris interna. 161. gradu differt. 323. viribus infensa. *ibid.* malignitatis causa. *ibid.*

Pylorus scirrhus quandoque afficitur. 329.

Q.

*Q*uartana familiaris primæ senectæ. 183. & Westphalis. 185. iræ beneficio sanata. 190. contumax cur æstate minuatur vel penitus expiret. 265. ea laborantes cur tam voraces. 248. febris ejus differentia & signa. 294. ex scabie retropulsa. 337. laxantia

& emetica in principio fert. 415. balneis levatur. 463. specificum in ea. 450. perperam tractatur adstringentibus. 352. in diuturna pancreas induratum. 329. in principio qualis pulsus. 371. convulsiones & epilepsias quandoque solvit. 410. quomodo gignat hydropem. 371.

Quies disponit liquida ad putredinem. 28. nimia quas noxas ferat. 125. nutritionem promovet. *ibid.* post cibum laudatur. *ibid.* quibus maxime conveniat. *ibid.* animi liberam reddit transpirationem. 102. corporis nimia cur noxia. 261. mutat pulsum. 368.

Quiete corpus habet opus. 125.

Quietis & laborum sit justa proportio. 125. conveniens usus commendatus. 158.

Quinquefolii radix alvum adstringit. 261.

Quotidiana intermittens ejus signa. 294. differt à continua & tertiana duplici. *ibid.*

R.

*R*amazzinus. 17.

Ratio quid in medicina denotet. 15.

Rationalium secta verus. 16. quid eorum conatibus obfuerit. *ibid.*

Raucedines fenum unde dependeant. 242.

Raymundus Lullus. 21.

Recentiores ubi præferendi veteribus. 22.

Recidiva eorum indicia. 355. quomodo excludantur. 289. per spasmos inducuntur. 302. unde. 355. ex suppressis criticis evacuationibus. 289. 389. palliativa cura. 289. ægri incuria. *ibid.* reliquiis morborum. 354. intermittentium cur tam frequentes. 355. quomodo arcendæ. 356. 420.

Recidivantes morbi. 182. quo pacto differant à periodicis. 186. cur easdem partes rursus affligunt. 169.

Regius Cartesius. 17.

Regula prognostica de morbis observandis insignes. 362.

Reliquia morborum novos pariunt morbos. 354. tempestive submovendæ. *ibid.*

Remedia in classes distinguenda. 427. quatuor summa genera. *ibid.* circa materiam, vel motum occupantur. *ibid.* in fluida vel solida agunt. *ibid.* principia eorum paucis cognita. 425. per chymiam recluduntur. *ibid.* eorum operandi ratio scitu necessaria. 286. plures latet. 425. seq. vires eorum non absolutæ. 290. 424. eorum effectus à priori indagandus. 425. non tamen semper cognoscitur. *ibid.* quomodo cognoscendus. 289. seq. operatio eorum observanda. 289. ex causis proximis & experientia petenda. 426. actio in corpus physicum & vivum gratis distinguitur. 425. in nervosas partes maxime & proxime agunt. 308. non semper morbos sanant. 290. sub initium & finem morbi propinanda. 414. eorum multitudo singulorum cognitioni obest. 421. Vide *medicamenta*. *Remedia dietetica* præferenda pharmaceuticis. 422. fortia debilibus exitiosa. 344. in vigore morbi non offerenda. 414. à liberaliori eorum usu cavendum. 417.

Remediorum vires sunt tantum occasionales & relativæ. 153.

Remedium effectum heroicum quodnam dicendum. 476.

Remittentes morbi non confundendi cum periodicis. 186.

Renes tono suo instructi sunt. 70. eorum atonia quid efficiat. *ibid.* structura & usus. *ibid.* consentiunt cum ventriculo. 315. 353. abscessibus patent. 326. atonia affecti quæ pariant mala. 307. debilitati gignunt calculum. 353. inflammationes, ulcerationes. *ibid.* signa puris in iis. 326. labefactati quibus firmandi. 446. ulcerati quomodo tractandi. 430.

Res non naturales sanitatem dispensant. 100. & seq.

Respiratio quid sit. 44. auctior auget circulum sanguinis. 47. sanguini calorem affert. 46. promovet chyli progressum. 66. ejus usus secundarii. 47. impeditur pravi effectus. 46. difficilis ex resurgente sanguine lochiali.

lochiali. 342. anxia à spasmò nervorum pneumo-
nicorum. 392. in acutis mala. *ibid.*
Respirationis difficilis ortus. 168. oppressio unde. 166.
Rhabarbarina in principio pestis commendantur. 204.
Rhabarbarum coctum vim purgativam perdit. 214.
cur tutissimum laxans in dysenteria. 422.
Rhachitis in ea profunt balnea. 464.
Rheumaticæ febres unde. 409. naturæ & artis metho-
dus medendi in ea. *ibid.*
Rheumatici dolores balneis martiatis levantur. 464. seq.
Rheumatismi unde. 164. 165. 174. 175. 254. cur ma-
xime generentur tempore verno. 266.
Rheumatismus hæreditarius morbus. 349. ejus causa.
298. quomodo gignatur. 302. à spasmis nervosa-
rum membranarum. 303. ejus signa. 298. differt ab
arthritide. *ibid.* venæ sectione gignitur quandoque.
460. quandoque arcetur. *ibid.* scarificatione curatur.
461. ejus specificum lumbrici terrestres. 450.
Riverius. 22.
Roborantia in calculo profunt. 70. cur sint efficacia
remedia contra febres. 170. eorum usus aperitivus.
260. varia eorum genera. 444. sublata morbi cau-
sa. 416. seq. & finito morbo usurpanda. 420.
Robur fibrarum multum pendet ab assumtis. 35. 129.
à solidarum partium textura. 87. 129. vitale in quo
consistat. 242. unde pendeat. 444. ex vigore motus
cognoscitur. 348. solidorum sanitatem fulcit. *ibid.*
analeptici minus restauratur. 444. Vide *vires*.
Robusti se nulli diætæ mancipient. 130. quid cavere de-
beant. *ibid.* non egent medicina. 240. qui sint. 348.
Robustum corpus cum animi robore pari passu ambu-
lat. 129.
Robustus quisnam dicatur. 129.
Roris vitiosus effectus. 211.
Rubefacientia morbos capitis levant. 318. narium hæ-
morrhagias compescunt. *ibid.*
Ructus hypochondriacis familiares. 306. per convulsi-
vum motum eliduntur. *ibid.*
Rudbeckius. 19.
Ruyschius 19. 20.

S.

S*Aburra* ventriculi quomodo exoneranda. 250.
Sachsus laudatus. 31.
Sagapenum cur hystericis utile. 448. specificum anthel-
minticum. 452. clysteribus commiscendum. 468.
Sal saporis objectum. 93. commune corpori amicum.
69. sed ejus mixtionem non subit. *ibid.* in corpore
generatur. 69. universale aëreum. 227.
Salia volatilia ad arcenda contagia commendantur. 212.
vitiosa multorum morborum causæ. 254. quo pacto
facillime corrigantur. 256. eorum usus intemperatus
noxius. 253. optima laxantia. 434. præcipuum in-
grediens aquarum medicatarum. *ibid.* clysteribus uti-
liter commiscuntur. 467. tempore paroxysmi in-
termittentium non danda. 418. *fixa & neutra* op-
tima diuretica. 439. *per incinerationem parata* absor-
bent. 428.
Salium intemperies non universalis morborum causa.
151.
Salita alimenta nutritioni incongrua. 108.
Saliva distinguì debet à muco faucium. 59. est liquor
subtilissimus. *ibid.* fermentescibilis. *ibid.* est ferment-
tum. *ibid.* facit saporem. 61. habet vim medicamen-
tosam. 59. dirigit appetentiam liquidorum. 60. men-
struum microcosmi. 59. sale est imbuta. *ibid.* ex qui-
bus glandulis veniat. *ibid.* iracundorum venenatam
induit naturam. 196. non deglutienda in locis con-
tagio infectis. 204. per eam gravissima mala trans-
ferri possunt. 189. ex glandulis. 304. per spasmos
nimium elicitur. 305. sub salivatione cur foeteat. 443.
Salivæ profusiones unde. 168. profluvium à mercuria-
libus. 219.

Salivantia potentissima chymica. 442. quæ sint. *ibid.*
quomodo agant. 443.
Salivatio noxia summe hypochondriacis. 220. alvum
comprimit. 263. quomodo succedat. 442. median-
tibus spasmis fit. 302. 304. 442. à mercurialibus.
304. ab acri humore. *ibid.* non impetuose movenda.
417. non semper ad curam luis venereæ necessaria.
443.
Saltatio vehementior motus. 122.
Sambuci cortex medius specificum in ictero. 451.
Sanctorius. 22. 68.
Sanguificatio non perficitur peculiari spiritu vitali. 50.
non est unius visceris opus. *ibid.* eam juvant calor.
ibid. lien. 56. pulmones. *ibid.* arteriæ & venæ. 50.
Sanguificationis ratio. 50.
Sanguinei quinam? 242. in quos morbos facile inci-
dant. 243.
Sanguine recte constituto viget sanitas. 101.
Sanguinem quæ alterant, in animum jus habent. 96.
Sanguineo-cholericis quinam. 43.
Sanguineo-melancholicis. *ibid.*
Sanguineorum natura & diætæ. 131. & seq.
Sanguineum temperamentum. 43.
Sanguini inest terrestre. 38.
Sanguinis boni copia præstat robur. 33. calor à sulphu-
rea parte pendet. 38. *circulationem*, Harvæus in
lucem proposuit. 39. circulatio est indubiæ veritatis.
40. circulus animam cum corpore connectit. 16. est
caussa vitæ. 24. nutritionis. 51. conservat corpus. 52.
est principium, ex quo medicinæ omnes partes
fluunt. 25. fit ad leges motus. 40. per pulmones. 47.
in embryone abest. 44. turbatus & sublatus morbo-
rum & mortis causa. 25. vigorem & robur dat ani-
mo. 52. ejus apud Hippocratem indicia. 39. Vid.
circulus sanguinis. color purpureus unde. 38. in mi-
nimis ductibus evanescit. 41. *conditio* animæ actio-
nes alterat. 96. *constitutio* iusta eget proportionem &
qualitate. 101. *consistentia* ab intestino motu læditur.
39. *copia* animum afficit. 52. definitio. 36. *differen-
tia* est quoad individua. 37. differentias medicus per-
spicere debet. 38. *humiditas* facile evaporatur. 37.
fere tertia pars cerebrum petit. 84. *inspectio* sola an
medicum de hominis statu satis edoceat. 39. massa
quam cito corpus totum pervadat. 42. menstrui flu-
xus periodicus causas habet mechanicas. 74. Vide
menstrua purgatio, motus ordinatus sanitati præsi-
det. 100. pars subtilior motum tribuit cordi & arte-
riis. 33. portio diaphana nutrit. 56. productio non
æque copiosa in omnibus corporibus. 51. quantitas
diversa. 38. & seq. iusta quænam. 101. reditus ex
pedibus difficilis. 49. regressus per venas quibus ad-
juvetur. 41. resolutio chymica. 37. temperiem quo-
modo veteres intellexerint. 101. terrestitas cum
sulphurea parte indolem acquirit abstersivam. 38.
transitus difficilior ex colo sinistri lateris ad mesen-
tericum sinistrum. 49.
Sanguis ad caput difficiliter movetur. 47. aqua specie
gravior. 37. continuo eget supplemento. 101. cur
cito putrescat. 38. est mixtus liquor. 36. gelatina pur-
purea. 37. habet innatantes partes solidas. *ibid.* ha-
rum mutua proportio. *ibid.* partes sulphureas. *ibid.*
idem an semper in corpore fit. 39. menstruus ex uteri
pariter & vagina vasis profluit. 73. an ex arteriis vel
venis exstillet. 74. motu consumitur & alteratur.
107. microscopio conspectus. 39. per renes celeri-
me fertur. 50. qualis optimus. 39. respiratione in-
calescit. 46. siccatus inflammabilis est. 37. tempera-
tus qualis. 101. tenuis & parvus facit timidos. 53.
thesaurus vitæ. 34. velocius movetur per vasa angu-
stissima. 42. vilipenditur, quia est res obvia. 34.
unde suppleatur. 102.
Sanguinis circulatio retardata morborum causa. 164.
circulus liber & æquabilis quis. 155. cursus immo-
deratus

- deratus & impeditus cur morbum formet. 163. effusiones consuetæ, interceptæ multa gravia creant symptomata. 244. ex plethora tardior progressus quas gignat ægitudines. 270. graves congestiones & periculosæ stases ex intestinorum spasmodis. 269. elementa prima. 156. infarctus & congestio quos effectus producat in vasis abdominis. 166. fluxus quo pacto præsentissime cohibendus. 255. profusio excretionem diminuit. 260. 261. male fortioribus constringentibus compescitur. 262. impetus varius ratione ætatis & indolis. 170. impuri indicium. 271. magna inopia quas pariat ærumnas. 175. missiones fugiendæ in affectibus retrogradis. 187. motus interceptus gravia parit symptomata. 166. nimia redundantia non universalis est morborum causa. 151. triplex substantia. 269.
- Sanguis* calefactus potu frigido detisatur. 233. 234. cur debeat esse temperatus & depuratus. 157. stagnans inclinatur ad corruptionem. 272. cur facile stagnet in intestino recto & colo. 269. quatenus mortem inferat. 268.
- Sanguis* præcipuus corporis humor. 372. gravior aqua. 374. proportio solidi & fluidi in eo. 367. ab acidis coagulatur. 374. ab alcalinis & nitro funditur magis & rufescit. *ibid.* quomodo examinandus. 374. qui bonus nondum evictum. 372. differt ratione temperamentorum. 368. qualis plethoricorum. 320. cholicorum. 368. hysteriarum. 320. scorbuticorum. 373. malus aspectu sæpe in sanis. 372. & bonus in ægris. *ibid.* non solum qualitate, sed etiam quantitate peccat. 340. Vide *plethora*. cur ex eo tot separentur humores. 381. quoties una hora circumvolvatur. 368. inter interstitia fibrarum non extravasatur. 365. in febribus corrumpitur. 319. dyscrasia ipsius ex urina patescit. 380. ejus intestina commotio sudoris causa. 382. idem venæ sectione & scarificatione elicitur. 374. ex eo prognosis sumenda. 373. quæ tamen fallax. 372. Vide *Circulus sanguinis*. natura illius & qua ratione efficitur atque circumagitur. 469. ejusdem circuitus quare in febre fiat auctior & celerior. 476. *congrumatus* quibus dissolvendus. 430. 453. *plang non concref- cens* unde. 374. *crassus & niger* vitiosus ad stagnationes & inflammationes pronus. 373. *extravasatus* nocet. 373. mortis causa. 327. in cerebro quando necet. 397. *fibrosus* malus. 374. *floridus* nimis malus & unde? 373. in febre maligna & spasmodicis morbis. *ibid.* non largiter extrahendus. *ibid.* *serosus* nimis cur vitiosus. *ibid.* *spissus & impurus* quibus corrigatur. 430.
- Sanguinis dejectio* per alvum funesta ex ruptura hæmorrhoidalium. 327. *motus* Hippocratis de eo sententia. 300. in plerisque morbis læsus est. 301. à peripheria ad centrum morbosus. *ibid.* à centro ad peripheriam vitalis. *ibid.* *progressus* motu corporis promovetur. 321. quadruplici modo intercipitur. 301. interceptus quæ pariat mala. 307. per caput à duræ matris tono pendet. 305. impeditus in capite quos gignat morbos. *ibid.* quid per venam portæ interceptus. 317.
- Sanitas* quid sit. 100. ejus causæ à medico investigandæ. *ibid.* indicia. *ibid.* proxima causa circulus sanguinis. *ibid.* foeminarum pendet à menstruis recte fluentibus. 119. à solidorum & fluidorum motibus pendet. 301. in quo ejus fundamentum. *ibid.* ex mente Hippocratis. 300.
- Sanus* quisnam. 100. à medicamentis abstineto. 138.
- Saphena* incisa nocet & prodest. 459.
- Sapo* Venetus clysteribus commiscetur. 373.
- Sapor* ubi perficiatur. 89. fit in lingua. 93. ejus objectum sal. *ibid.* ratio. 61. cur differat. 94.
- Satietas* morborum genitrix. 249.
- Saturnina* medicamenta tristibus exemplis infamata. 228. alvum adstringunt. 261. inimicissima præsertim intestinis. 228. quæ producant symptomata. *ibid.* cur à veteribus annumerata venenis. 228. ab iis abstinentum. *ibid.*
- Scabies* excretio salutaris. 120. unde. 168. 202. haud repente reprimenda. 263. sicca apud senes unde dēpendeat. 242. humida contagiosæ est naturæ. 20. introversa perniciosæ. 206. maligna quo pacto prima herba suffocanda. 205. retropulsa cur adeo periculosa. 166. à suppressis mensibus. 341. per spasmos topicis inductos repellitur. 302. repulsa nocet. 303. præpostere siccata quos gignat morbos. 336. malis artibus retropulsa quænam damna afferat. 358.
- Scammonii* virtutes. 215.
- Scarificatio* vicaria venæ sectionis. 461. eundem quam venæ sectio evehit sanguinem. 374. 462. plethoram etiam minuit. *ibid.* evacuatoria & derivatoria *ibid.* quibus in morbis utilis. 461.
- Schaperus*. 17.
- Scheuchzerus*. *ibid.*
- Scirrhi* viscera & glandulas occupant. 328. pancreas. *ibid.* pylorum & duodenum. *ibid.* lienem. 329. hepatis. *ibid.* ex hæmorrhoidum suppressione. 343. mesenterium. 329. prostratas. *ibid.* uterum. *ibid.* ex mensium suppressione. 341. vesicam. 328. seq.
- Scorbuticorum* urina salibus saturata. 69.
- Scorbutus* septentrionalium cerevisiæ ex parte debetur. 112. unde. 175. cur jam rarius conspiciatur Halæ. 254. maris incolis familiaris. 185. & senibus. 166. retropulsus cur adeo periculosus. 166. senum unde. 242. sola arte curatur. 153. in borealibus cur endemius. 335. ex male affecto hepate. 379. ejusque & lienis atonia. 307. 320. qualis in eo pulsus. 371. urina. 379. sanguis sero livido scatens & limosus. 373. hæmorrhoidibus arcetur. 343. quæ in eo profint. 430. ejus specifica. 452.
- Scrobiculi cordis* percussio cur lethalis. 312.
- Secale* corruptum nigrum quænam producat symptomata. 230. sale scatet subtili venenato. 231.
- Secretio liquidorum* fit, vel per glandulas, vel sine illarum ope. 55.
- Secretiones* alterantur atonia & spasmis. *ibid.*
- Secretionis* ratio. *ibid.*
- Sectio morbis defunctorum* est utilis. 15. *cadaverum* utilis. 290. ad observationes necessaria. *ibid.* causas morborum & mortis detegit. *ibid.* 322. 396. cum judicio instituenda. 290.
- Sectionis* cadaverum utilitas. 149. medicinam apprimere illustrant. 270.
- Secundina* quid sit. 78. succum alibilem ex matre attrahit. *ibid.*
- Sedativa* quæ dicantur. 447. quotuplicia. *ibid.* eorum apparatus. 447. seq. optimum auctoris liquor anodynus. 449. quomodo agant. 448. magnæ efficaciam. *ibid.* caute usurpanda. *ibid.* virium ratione inprimis habita. 418. dolores palliative abigunt. *ibid.* præpostere data graviter nocent. 419.
- Sedentaria* vita corpori inimica. 213.
- Sedimentum urinae* unde. 70.
- Selterana acidula* ad emendandum fibrosum sanguinem utiles. 374.
- Semen* continet totum corpus organicum. 75. in eo per microscopium viva animalcula apparent. *ibid.* vide *sperma*.
- Semina* farinacea dant multum chylum. 63. quæ nutriant. 107.
- Seminales vesiculæ* earum atonia pollutionis & gonorrhoeæ benignæ causa. 307.
- Seminis* immoderata profusio nocet. 119. nimia copia nocet. *ibid.*
- Semiotica* quo pertineat. 14. fundamentum ejus circulus sanguinis. 372. caute colenda à medico. *ibid.*
- Seneclutis* ratio. 29.
- Seneclutis* cur ipsa morbus. 162. quibus morbis adficiatur. 183. quid peculiare habeat ratione structuræ. 287.

287. 349. qualis in ea pulsus. 368. quibus morbis pateat. 308. 349.
- Senem* lædunt affectus graves. 135. parcius oportet vesci. 57.
- Senes* nimis laute viventes quibus morbis conflictentur. 242. sibi caveant ab humiditate frigida. 267. venæ sectionem utiliter ferunt. 424. sanguineas excretiones salubres experiuntur. *ibid.* cur difficulter fudent. 382. morbi eorum unde. 455. cur morbis ex impuritate obnoxii. 336. 349.
- Senibus* non temere discedendum à consuetis. 134. circulus sanguinis tardus. *ibid.* commendanda medicritas. 134. cur familiaris cœcitas. 89. 91. vitandum vinum quale. 134. quæ diætâ conveniat. *ibid.*
- Senium* inmedicabile. 244.
- Senum* morbi unde. 241. morbis quo pacto iis obviam eundum. 242. quibus medicamentis alantur. 242.
- Sennertus* primus eclecticus. 17.
- Sensatio* duplex. 88. intensior, vel remissior unde. 89. non in nervis. *ibid.* in partibus tantum nervosis. *ibid.*
- Sensibilitas* imbecillitatis corporum index. 241.
- Sensus* quinque numerantur. 89. mentis ideas exhibent. 90. eorum organa varia. *ibid.* à spasmis sensoriorum læduntur. 305. ab atonia duræ matris abolentur. 306.
- Sepiæ os absorbens.* 428. specificum in gonorrhœa. *ibid.*
- Septentrionis* incolæ cur sana, robusta & quadrata habeant corpora. 266.
- Septica* tendinosis & nervosis partibus inimica. 310.
- Sermo* intensior motus species. 122. circulum sanguinis accelerat. 123. hypochondriacis & literatis utilis. *ibid.* mutat pulsus. 368. intensior quomodo circulum sanguinis promoveat. 321.
- Seri* viscidum albi fluxus quo pacto concitetur. 167. coluvies cur in abdomine veneno interemtorum repariatur. 166. profusio cur gignatur à mercurialibus. 167.
- Serpentes* nostri cur innoxii. 195.
- Serum* viscidum stagnans quæ producat symptomata. 175. impuritatem contrahit. 320. redundat sæpe. 347. 410. sæpe extravasatur. 328. superfluum salutariter excernitur. 347. 410. extravasatum in cerebro quomodo necet. 397. flavum vel lividum sanguini innatans quid indicet. 373. limosum copiosum in lue venerea. *ibid.* paucum in ardentibus. 374. falsum tartareum diureticis expurgatur. 439.
- Serum* lactis dulce egregium. 423. continuato usu juvat. *ibid.*
- Sessio* perquam noxia in morbis acutis. 161.
- Sevi* hircini exhalatio quam gravia excitat symptomata. 230.
- Sexus* facit ad morbos. 349. mutat pulsus. 368. in historiis morborum recensendus. 287.
- Simplicia* pure talia non dantur. 422. præferenda compositis. 421. seq. Veteribus maximi usus. 422. à medicis perperam spernuntur. *ibid.* quæ ex iis præferenda. *ibid.* usurpanda quando vires indagandæ. 426.
- Singultus* à convulsione diaphragmatis. 45. unde. 187. 262. enormior iræ beneficio curatus. 190. item terrore subitaneo. 192. à convulsione diaphragmatis. 306. refrigeratione stomachi. 314. præpostero topi-
corum usu in morbis articularum. 339. inflammationi ventriculi accedens malus. 412.
- Sinus* ossium capitis mucis emunctorium. 71. duræ matris. 48. *frontales* quandoque abscessum foveant. 326.
- Sitis* ratio. 60. eam facit defectus humidi in faucibus & œsophago. *ibid.* levant somnus & anodyna. *ibid.* cum ariditate linguæ unde. 186.
- Situs erectus* in morbis acutis cur tam noxius. 338.
- Soda* ab acidis. 252.
- Solanum* verum cur audiat furiosum. 200. qui tam cito necet. 178.
- Solida* agunt in fluida eademque corrumpunt. 319.
- Solidorum motus* pendet à fluido nerveo. 101. & influ-
xu sanguinis arteriosi. *ibid.* duplex. 155.
- Frid. Hoffmanni Oper. Tom. 1.*
- Somni* ratio. 94. 127. parati arte æstimatio. 128. quæ commoda. 127. quis modus. *ibid.* largiori quibus sit opus. *ibid.* ei nox convenit. 128. salubri loco indulgendum. 104. sub eo perspiratio educit crassiores & mucidas particulas. 127. quædam excretiones me-
lius procedunt. 95.
- Somnolentia* à vermibus procreata. 235. ex tono duræ matris deperdito. 306. ex apoplexia quomodo gignatur. 350.
- Somnus ac vigilia* sanitatem dispensant. 102. ante me-
diam noctem melior. 126. cur fibras relaxet. 36. infantum sit longior. 133. immoderatus unde. 128. inquietus quid denotet. 129. meridianus nocet. 128. qua conditione tolerari possit. *ibid.* quibus in terris minus noceat & quibus ætatibus. *ibid.* nimius cavendus. *ibid.* pendet à circulo sanguinis. 95. perspi-
rationi favet. 127. post diurnas vigilias impedi-
tior. 129. quæ commoda afferat. 126. qualis pro-
fit. 127. quando protrahendus. *ibid.* quibus arcea-
tur. *ibid.* quibus profundior. 128. quibus turbe-
tur. 127. quid sit. 94. quietus qualis. 127. si-
tim sedat. 60. statim à cibo non laudatur. 128. turbatur ab affectibus. 102. ubi capiendus. 128. vires instaurat. 95. viscera roborat. 126. vitæ neces-
sarius. 94. longior cur noxius. 261. ciborum cor-
ruptela interturbatur. 249. malæ concoctionis vitia dispellit. 250. convenienter somno utendum. 158.
- Sonus* quid. 91. auditu percipitur. *ibid.*
- Soporifera* quænam. 222. venenis annumerantur. *ibid.* cur naturæ tam infensa. 222. ubi tentanda. 225. Vide *anodyna* & *stupefactiva*.
- Soporosi affectus* unde. 166. Vide *lethargus*.
- Sordes* subtilioris naturæ æmulantur venena. 174.
- Spasmi* febriles unde. 175. ex repletione. 269. fortioris vis. 166. hypochondriaci cur senibus rariores. 185. naturæ & vitæ humanæ infensissimi. 170. 199. par-
tibus inducunt habitudinem ac debilitatem. 169. continuatio per totum genus nervosum. 168.
- Spasmus* quid & quotuplex. 163. quandoque in epi-
lepsiam transit. *ibid.* universalis quos morbos gignat. 167. morbosus motus. 301. 407. quadruplex. 407. quomodo cognoscendus. 392. effectus in corpore. 407. rarius à denso & crasso sanguine suscitatur. 373. multorum morborum causa. 301. sanguinis cursum intercipit. 305. perspirationem sufflaminat. 304. hæmorrhagias supprimit. 303. alvum adstrin-
git. 304. 392. motum peristalticum invertit. 304. secretionem lactis intercipit. 304. gignit strangu-
riam. 303. 304. atrophiam. 304. sitim. *ibid.* pulsus convulsivum. 455. salivationem. 304. asth-
hma. *ibid.* faciem Hippocraticam. 392. nervorum tensionem. *ibid.* oppressionem pectoris. 305. constri-
ctivum in gula sensum. *ibid.* mentis capitisque mor-
bos. *ibid.* seq. respirationem anxiam. 392. anxietates. *ibid.* vomitus. *ibid.* dolores varios. 303. febrium accessiones. 305. sensus lædit. *ibid.* succos inquinat. 319. excretiones turbat. 320. 392. tenues reddit uri-
nas. 378. 377. 392. in cute quæ pariat mala. 391. febrium formalem rationem absolvit. 301. adest in hæmorrhagiis. *ibid.* inflammationibus. 302. capitis morbis. *ibid.* catarrhis, diarrhœis, recidivis. *ibid.* retro-
cessione exanthematum. *ibid.* in acutis mali omi-
nis. 391. relinquit atoniam. 308. non tam noxius quam atonia. 307. à venæ sectione increfcit. 457. morbos facit & solvit. 406. remittens morbos solvit. 303. utilem quandoque effectum præstat. 307. sa-
lutaris quomodo dignoscendus. 407. levatur liquore anodyno. 317. oleo amygdalarum dulcium. 318. balneis. 463.
- Spasmodici morbi* multæ eorum species. 298. qualis in iis pulsus. 371.
- Specificæ* dantur. 449. quo sensu intelligenda. *ibid.* quæ sint in variis morbis. 450. operantur per consensum.

318. non sola juvant. 453. certa methodo usurpanda. *ibid.* ante eorum usum corpus præparandum. *ibid.* maxime locum habent ubi genus nervosum à virulenta causa n. commotum. 311.
- Sperma* dilutius & debile. 77. masculinum quid. 76. unde elaboretur. 77. vide *semen*.
- Spermatis* consideratio. 76. maturitas. *ibid.* quælibet portio est organica. *ibid.* virilis in utero foeminae effectus. 78.
- Sphacelatio* visceris nobilioris fit mortis causa. 34. frequentior. 161. præsertim in partibus internis. 185. in plurimis morbis acutis & chronicis deprehenditur. 206. mortiferum corporis venenum. 206.
- Sphacelus* quomodo necet. 35. unde proveniat. 169. 206. à causa interna insanabilis. 184. cur tam cito perimat. 178. ex inflammatione fit. 393. mortis plerumque in morbis causa. 289. 323. signa facti. 393. in ventriculo ex veneno. 323. duodeno. 324. tenuibus. *ibid.* recto & visceribus abdominis. *ibid.* utero. *ibid.* marasmo. *ibid.* membranis cerebri. 325.
- Sphincteres* sunt instrumenta motus mechanici. 87. eorum & valvularum magna sensibilitas. *ibid.* structura. *ibid.*
- Sphincterani* resolutus feces involuntarie dimittit. 307. vesicæ urinariæ spasmo affectus urinam retinet & stranguriam facit. 304. resolutus urinam involuntarie fundit. 307. exulcerat male tractata gonorrhœa. 353. seq.
- Spinczismi* fundamentum. 18.
- Spirandi* angustia ac difficultas unde. 166.
- Spiratum vini* quando vitare deceat. 111.
- Spirituosa* indoli sanguinis repugnant. 108. 112. cur & quando noceant. 178. fluida coagulant & solida stringunt. 447.
- Spiritus* non sunt medicinæ principium. 301.
- Sporadici* morbi quinam. 181.
- Sputum cruentum* ejus signa. 296. differt ab hæmoptysi. *ibid.*
- Stagnationes* sanguinis morborum causæ. 174. minus periculosa ejus stases. *ibid.* feri & aliorum humorum quænam gignant incommoda. 175. spasmodorum sunt genitrices. 174. earum causæ antecedentes. 176.
- Stablius* usum motus tonici ostendit. 36. laudatus. 344. seq.
- Stases* sanguinis magis periculosa, quam ejus stagnationes. 174.
- Statio* diuturna morbos gignit. 126.
- Steno*. 20.
- Sterilitas* unde. 243. unde. 307. ex puerperio. 350.
- Sternutatio* quomodo succedat. 93. quomodo contingat. 306. à convulsione fibrarum nervosarum in naribus. *ibid.*
- Sternutatoria* cur in morbis capitis proficiant. 93. quæ sint & quomodo agant. 442.
- Stomachicorum* usus perversus in infirmis. 248.
- Stomachica* quæ sint. 445. eorum usus in variis casibus. *ibid.* seq.
- Strabismus* ex epilepsia quomodo. 350.
- Stramonium* qui tam cito necet. 178.
- Strangulatio* cur tam celeriter necet hominem. 160.
- Stranguria* quid. 303. ex spasmo sphincteris vesicæ. 303. 380. & urethræ. 304. qualis in ea urina. 380.
- Strepius ossium* in scorbuticis unde. 78.
- Structura corporis humani* maxime considerata. 27. est maxime hydraulica. *ibid.* ejus scopus primarius est duratio corporis humani. *ibid.* & seq. quæ sana? quæ morbida. 348. in senibus & infantibus peculiaris. *ibid.* Vid. *Corpus*.
- Studia* debilitant ventriculum. 313. 287. corpus. 349. alvum segnem reddunt. 287. malum hypochondriacum cient. *ibid.* disponunt ad capitis morbos. 287. Vide *Meditation s.*
- Suaveolentia* cur ferre nequeant hysterica. 305. cur tam
- atrocia pathemata cieant. 310.
- Stupefactiva* annumerantur venenis. 222. operatione tamen differunt à venenis causticis. 222. quando ab ipsis abstinendum sit. 224. cur antiquis fuerint suspecta. 223. cur infantibus & senibus exitiosa. 224. ut & debilibus. 225. nunquam utilia in morbis chronicis & cacochymicis. 225. quatenus adjuvent excretiones. 260.
- Subiectum* sanitatis quodnam. 99. ejus cognitio ad historiam morbi necessaria. 286.
- Sublingualis vena* in cephalalgia & ophthalmia utiliter inciditur. 458. in angina cum periculo pertunditur. 459.
- Submersis* quomodo subveniendum. 31.
- Substantiæ* sunt viribus activis præditæ. 18.
- Succorum* nimia copia nocet. 114. abundantia morbis exponit corpus. 269. temperies vires conservat. 245. etiam utilium copia offendit. 258.
- Suctio* proprie non datur. 47.
- Succus pancreaticus* ad elaborationem chyli facit. 61.
- Succus* qualis esse debeat corpori nutriendo. 56.
- Sudor* nimius vires consumit. 68. in eo eliciendo cautela. *ibid.* differt à perspiratione. 381. unde. 381. ejus causæ. 382. subtiliores sanguine fordes. 381. & sulphurea recrementa evehit. *ibid.* odore & colore præditus. *ibid.* cur pro differentia locorum varius. *ibid.* seq. sub quo aëre prodeat. *ibid.* sæpe salutaris. 288. 410. in paroxysmis nullus. 383. post eos multus sæpe nimius. *ibid.* quandoque criticus. 387. corpus debilitat. 381. pedum largus à mœrore. 382. quibus moveatur. *ibid.* Vid. *sudorifera*. prælagia ex eo. *ibid.* nimius quomodo compescendus. 383. suppressus nocet. 288. acris scorbutum præscindens. 410. axillarum & pedum non siccandus. 339. frigidus & colliquativus unde. 307. nocturnus salutaris. 347. cohibitus morbos gignit multos. 339. 347.
- Sudores* quibusdam statò tempore copiosius fluunt. 120. critici cohibiti fiunt venenosi. 206.
- Sudoris* utilitas in morbis contagiosis. 206.
- Sudorifera* quæ sint. 282. evacuantium genus. 436. eorum suppellex & modus agendi. *ibid.* seq. rarius locum inveniunt. 436. quibus in morbis proficua. 437. cum sufficienti vehiculo propinanda. 436. 437. in contagiosis vitanda. 437. in exanthematicis ad pellendum non danda. 418. 437. post iram & alvo clausa noxia. 416. 437.
- Suffocatis* laqueo vel undis, quomodo succurri possit. 31.
- Suffusionis* species unde. 91.
- Sulphur* artificiale. 210. aurarum veneni naturam æmulatur. 213. narcoticum cur tam celeriter necet hominem. 160. specificum in phthisi. 451.
- Suppuratio* quibus promovenda. 431.
- Surditas* unde. 92. 166. antiqua insanabilis. 184. unde oriatur. 306. in febre acuta quandoque critica. 350. seq.
- Susurrus aurium* à spasmo membranarum sensorii auditus. 305.
- Sydenham*. 22.
- Sylvius*. 17. 22.
- Symptomata* haud confundenda cum morbis. 164. quoduplicia. *ibid.*
- Synanche* anginae species. 295. quomodo distinguenda ab aliis inflammationibus. *ibid.*
- Syncope* unde. 31. ab apoplexia distinguenda. 299. atoniae debetur. 306. causa systole cordis intercepta. *ibid.* ex suppressione mensium. 341. qualis in dispositione ad eam pulsus. 371. lethalis in parturientibus signa. 395. causa mortis in ea. 397.
- Synoptici* quomodo excitandi. 31.
- Synocha* à veteribus continens dicta. 293. ejus signa. *ibid.* qualis in ea pulsus. 371. crises servat. 388.
- Systole* cordis & arteriarum. 31. & diastole quomodo fiant. 34. suscitatur diastolen & à diastole suscitatur. 364. viget in arteriis. *ibid.* cordis pulsuum causa. 366.

T.

T *Abaco* æstate parcius utendum. 136.
Tabacus insuetis cur fumo infestus. 310. cur alvum stimulet. 314.
Tabes cur inessis tempore homines maxime afficiat. 234. senum unde. 242. ex nimia aquarum ardentium potatione. 256.
Tackenius (Otto) 17.
Tactus organon cutis. 94. & speciatim ejus papillulæ nerveæ. 89. quomodo fiat. 94. à cuticula temperatur. *ibid.*
Tarantularum ictus quæ producat symptomata. 172. 200.
Tartari emetici natura. 213. *sal* absorbens. 428. *tinctura* absorbens. *ibid.*
Tartarus in urina unde. 379. vide *urina*.
Temperamentum quid sit. 131. facit ad mutationem pulsus. 368.
Temperamentorum doctrina quomodo sit exponenda. 43. ratio in quo consistat. 158. cognitio medico necessaria. 189. 243.
Temperantia gravidis commendatur. 137. præstantissimum in contagiosis morbis præsidium. 204. eorum virtus & apparatus. 429. triplici agunt ratione. *ibid.* cautelæ in eorum usu. *ibid.*
Tempestatum vicissitudines morborum epidemicorum causæ. 334.
Tendo læsus atrociam parit pathemata. 311.
Terebinthinæ oleum exterius in suppressione urinæ utile. 318.
Terra sigillata absorbens. 428. adstringit simul. *ibid.*
Terror cur in sudorem & calorem corporis terminetur. 167. partes externas constringit. 191. & perspirationem cohibet. 261. evacuationes retardat ac penitus fitit. 191. fluxum sanguinis quandoque suscitatur. *ibid.* gravia excitat symptomata. 191. in corporibus præfertim imbecilibus. 192. senibus maxime insensibus. 170. 192. quin & subitæ mortis causam præbet. 192. in certis tamen morbis est remedium. 192. quo pacto salutariter solvatur. 192. & symptomata ab ipso excitata avertantur. 192. retropellendi pollet facultate. 207. succos veneno imbuunt. 196. ejus affectus in corpore. 287. facit ad colicam. 297. gravis sævissimorum morborum causa existit validissima. 360.
Terrore percussis quid noceat. 103. quid noxas avertat. *ibid.*
Terroris effectus. 36. 103.
Tertiana febris ejus species, differentiæ & signa. 294. convulsiones & epilepsias quandoque solvit. 410. in statu ejus qualis pulsus. 371. laxantia & emetica in principio admittit. 415.
Testes muliebres, an sint verum ovarium, dubium. 77.
Testium virilium fabrica. 76. non multum abludit à corticali substantia cerebri. *ibid.*
Theophrastus Paracelsus. 21.
Theoreticus bonus, an sit malus practicus. 15.
Theoria cum praxi jungatur. 22. medica vera quænam. 13. quis ejus character. 15. indiget anatomes & physices studio. 14. vera rationalis quænam. 15.
Therapeutica medicinæ pars. 14.
Therapiæ cardo in quo versetur. 171. veræ fundamentum. 149. objectum. 147.
Therapia quid sit. 285. consistit maxime in judicio. *ib.* ejus cardo in quo vertatur. 289. 290. 292. nititur morborum cognitione. 348. ejus fundamenta. 285. 292. præcipuum pathologia vera. 424. nexu gaudet cum physiologia & pathologia. 285.
Theriacalia medicamenta spasmos vomitorios coercent. 214.
Thermæ quæ dicantur. 139.
Thermarum usus foeminis conducit. 243. est aperitivus. 260.
Thermometra commendata. 105.

Timor qui corpora ad contagium recipiendum disponat. 203. ejus effectus in corpore. 287.
Tinea capitis salutaris excretio. 120. unde. 168. 183. infanti ætati familiaris. 183. retropulla cur tam periculosa. 166. repulsa epilepsiam & capitis morbis cœcitatem & ophthalmiam gignit. 336. quisnam morbus ita vocatur. 357. & quænam damna ex capitis repulsa. *ibid.*
Tinnitus aurium unde. 92. à membranarum sensorii auditus spasmo. 305. & nimia humiditate. 306.
Tiraquellus illustris hydropota. 112.
Tonicus motus viget etiam in arteriis. 365.
Tonus est partium fibrosarum elasticitas. 35. in cute modificat transpirationem. 68. partium requiritur ad bonam nutritionem. 57.
Tophi arthriticorum ubi nascantur. 72.
Topica in morbis articulorum præpostere adhibita graviter nocent. 338. cutis efflorescentias repellunt. 294. in arthritide cur noxia. 298. quomodo in applicatione cum illis procedendum. 360. 363. ad materiam corruptam in priorem locum restituendam varii generis adhibentur. 364.
Tormentillæ radix alvum adstringit. 261.
Tormina ventris atrociam unde. 187. ex dentitione difficili. 236. intestinalia unde. 174.
Tranquillitas animi sanitati confert. 102.
Transpiratio auctior etiam crassiora excernit. 68. conservanda. 119. impedita valde nocet. 68. in senibus procuranda. 135. libera infantibus servanda. 133. plus quam reliquæ omnes excretiones evacuat. 68. prohibita vere maxime nocet. 135. ubi copiosior succedat. 68. quibus cohibeatur. 68. quibus promoveatur. 119. à prohibita post morbum transpiratione summum periculum metuendum est. 358.
Transpirationis imminutio à terrore. 191. semper debet esse salva in corpore. 258. Vid. *perspiratio*.
Traumatica quæ sint. 352. quomodo agant. 446. qua ratione iis utendum. 447. optimum spiritus vini. *ibid.*
Tristitia solvit vires corporis. 193. obstructions gignit. 193. ideoque graves producit morbos. 193. morbos alios benignos facit lethales. 193. quo pacto hujusmodi morbi sint præcavendi. 194. ejus vis in ventriculum & intestina. 170.
Tristitiæ effectus. 36.
Tsæmer morbus Hungaricus. 249.
Tumores in mesenterio, dorso, duplicatura peritonæi utero & ovario gignuntur. 326. rupti subitanei hydropis causa. *ibid.* *seroso-lymphatici* intra membranarum duplicaturas colliguntur. *ibid.* difficulter à priori cognoscuntur. *ibid.*
Tunica intestinorum villosa quid. 63. *pituitaria* narium. 72. 94. spasmo affecta muci excretionem impedit. 305. & odorem cum gustu lædit. *ibid.*
Turcæ quare vini potus illis interdictus. 470.
Tussis auget circuitum sanguinis. 47. salutaris quandoque excretio. 120. ejus variæ species probe discernendæ. 298. quandoque salutaris. 288. 410. 347. spasmis stipatur. 302. ex variolarum & morbillorum reliquiis. 354. seq. quandoque à venæ sectione gignitur. 466. pectoralibus caute excipienda. 347. 441. in ea utilis massa pilularum de styrace. 317. vide *expectorantia*. *convulsiva* ab irritatione laryngis & tunicæ bronchiorum. 306. & ventriculi cruditatibus. 315. infantibus cur familiaris. 298. cur ei complicitur vomitus. 315. *ferina phthisica* minus salutaris naturæ motus. 412. *ferinæ* sive convulsivæ causa & sedes. 474. *humida* à pulmonum atonia. 307. 351. difficilis curatu. *ibid.* dulcia non fert. 352. *pulmonalis* quæ. 298. *phthisicæ* signa. 298. *stomachalis* sicca vel humida. *ibid.* ejus materia latet quandoque in duodeno. *ibid.*
Tusses unde. 166. 175. à vermibus. 236. cur maxime generentur tempore verno. 266. convulsivæ periodicæ unde. 186. unde ferinæ. 187. humidæ cur frequentiores.

tiores. 199. fenum unde dependeant. 242. siccae juvenibus familiares. 183.

Tympanitis quid? 332. à flatibus intestina distendentibus. *ibid.*

V.

Vacuatio una aucta supprimit alteram. 231.

Vacuationes plures prohibita morborum initium.

259. non ita facile in ordinem restituuntur. 259.

Vacuum cur necet animantia. 264.

Valetudinarii læduntur à cibo nimio. 114. & seq.

Valetudinis servandæ optimum consilium. 258.

Valsalva. 20.

Valvula coli. 87.

Valvula venarum cujus usus. 41. *vasorum lymphaticorum*. 58.

Valvularum magna sensibilitas. 87.

Vaporosorum effectus. 95.

Varicum ratio. 49.

Variolæ cur frequentiores. 185. cur non in omnibus æque benigne procedant. 172. incongruæ periculofiores. 183. in Turcia per impositionem producuntur. 205. retrogradæ. 187. retropulsæ cur tam periculosa. 166. salutariter per iram excitata. 185. senibus rariores. 190. cur maxime generentur tempore verno. 266. distinguendæ ab aliis exanthematibus. 293. quotuplices. *ibid.* crises servant. 388. qualis in iis sanguis. 374. ante & post eruptionem pulsus. 371. per spasmus cum dispendio recedunt. 302. naturæ methodum & ordinem quam maxime fiunt. 414. in principio postulant emetica vel laxantia. 415. earum reliquæ multos gignunt morbos. 354. & seq. hinc solicite everrendæ. 355. 420. funesta in iis signa. 393. mala ex illis provenientia. 357. indoles ac natura illarum. 358. ex illis difficilioris sanationis interdum ulcera sequuntur. *ibid.*

Vasa fœtus & secundinæ vasis uteri non sunt continua. 79. *lacteæ* quænam recipiant. 64. *sanguinea* minima cur inter membranas decurrant. 41. cur inter musculos & membranas sita sint. 36. *corporis* cum corde æqualem habent proportionem. 242. *brevia* facile rumpuntur. 327. rupta vomitum cruentum faciunt. *ibid.* sæpe lethalem. 341. *sanguifera* eorum atonia causa morborum. 307. rumpuntur quandoque & mortem gignunt. 327.

Vasorum ventriculi & intestinorum reptatus & anastomosis. 48.

Vectura quibus conveniat. 122.

Vegetabilia alimenta seni proba. 135. cruda ægre concoquuntur. 109. flatulentiam excitant. *ibid.* non habent sexum. 76.

Vena portæ. 48. causa est multorum affectuum chronicorum. *ibid.* peculiaris structuræ & officii. 342. atonia affecta morborum causa. 307. fluxus hæmorrhoidalis causa. 342. impedito per eam progressu sanguinis morbos creat. 317.

Venæ portæ cum cava in hepate concursus. 62. evoluta quoad structuram in pathologicis utilis. 20.

Venæ umbilicalis fabrica. 79.

Venæ & arteriæ sunt ductus continui. 41. habent tunicam muscularem. *ibid.* juvant sanguificationem. 50. arteriis continuæ. 365.

Venæ sectio abortum præcavet. 136. juvenibus prodest. 134. quando tempestive instituatur. 139. senes juvat. 135. ad vitam longam præsidium. 242. & unum ex præcipuis remediis. 260. quid in ea respiciendum. 215. temere reformidatur. 154. cur præsentē convulsione aut spasmo sit noxia. 175. intempestiva retropellendi pollet facultate. 207. cur vere utiliter instituatur. 454. non semper ad æquinoctium differenda. *ibid.* ter in anno quibusdam celebranda. *ibid.* pulsus mutat. 369. systolen cordis & vasorum auget. 321. eundem quam scarificatio elicit sanguinem. 374. naturæ opus in morbis juvat. 413. hæmor-

rhagias sæpe promovet. 455. urinam elicit. *ibid.* cur alvum quandoque moveat. *ibid.* ad longævitatē confert. *ibid.* multa plethoricis præstat emolumenta. 321. utilis est hysteriis. 317. hypochondriacis. 317. senibus. 455. in morbis ex suppressione hæmorrhoidum. 344. in renum vitiis. 353. ad præcavendos morbos. 454. & ad præcavendum abortum. 353. si sanguis crassus & ater. 373. in inflammationibus. 408. in febribus continuis & acutis. 456. in exanthematicis. *ibid.* in apoplexia leviori. 458. in morbis capitis à congestione. *ibid.* in pleuritide & peripneumonia. 459. in colica convulsiva. 460. quibus cautelis administranda. 461. sit sufficiens. 460. quando in pede vel brachio instituenda. 459. ubi in paroxysmis. 457. in sensibilibus quomodo perpetranda. 459. in exanthematicis cum distinctione administranda. 456. podagram quandoque cum damno reprimat. 339. perperam superato vix morbo adornatur. 458. in pleuritide quandoque empyema ciet. 354. in paroxysmis morborum noxia. 457. catarrhos quandoque advocat. 460. in colica flatulenta nocet. *ibid.* quibus indicetur & interdicator. 454. sub lingua in cephalalgia & ophthalmia utilis. 458. sed in angina periculosa. 459. in fronte, jugulo & pone aures non sola semper sufficit. 458. seq. nimia & intempestiva quibus morbis ansam præbeat. 361. *evacuatoria, revulsoria & derivatoria* quæ. 459. nimia in inflammationibus. 408. & si sanguis tenuis & floridus noxia. 373.

Venena quid? 195. eorum tres notæ essentielles. 195. 203. variant juxta regna naturæ. 195. caustica cur celeriter perimant hominem. 160. certis tantum animantibus noxia. 198. corporis humani. 201. in aëre contenta. 207. ex regno animali. 195. ex minerali. 196. in quas partes corporis vim suam funestam exercent. 198. cur intra cutim admissa plus noceant, quam majori dosi intus sumta. 199. mineralia vera veteribus incognita. 197. summa partium tenuitate suas præstant operationes. 148. celerrime totum nervosum systema afficiunt. 317. pulsus mutant. 369. per spasmus necant. 306. 312. sphacelum ingignunt. 324. 393. non proxime inflammationem inducunt. 312. signa funesta. 393. causa mortis ex iis sphacelus ventriculi & intestinorum. 400. seq. eorum antidota oleosa. 312.

Venenorum classis late patet. 174. 207. corrosivorum ac drasticorum remedia. 201. operatio quomodo rectissime explicetur. 235. aliarum causarum morbidarum indolem declarat. 172. vis quo pacto externe coercenda. 201. coctione destruitur. 214. vis multiplicativa in quibus corporibus sese maxime exferat. 203.

Venerea medicamina virulentam habent naturam. 227. ideo ab iis cavendum in corporibus infirmis. 228. quem usum habeant circumspicte usurpata. 228.

Venerea lues ex gonorrhœa male curata oriri potest. 340. dolores quibus stipatur distinguendi ab arthritide. 298. pulsus in ea languidus. 371. serumque sanguinis limosum. 373. seq. non semper salivatione eget. 443. balneis vaporosis levatur. 427. ejus specifica. 423. seq.

Venter natura apertus magna sanitatis pars. 258.

Venti orientales & septentrionales egregie purgant aërem. 212. salubres & insalubres. 264.

Ventriculi actio systematica. 60. cordis. 41. expansio bilem exprimit. 62. sensibilitas. 29. sinistri robur. *ibid.* vasa. 48. inflammatio exitialis. 185. cum partibus nervosis maxime consensus. 158. inflammationes ructuosæ unde. 186. *atonia* quæ pariat mala. 306. 321. quibus fulcienda. vide *stomachica*. *erosio* differt ab ejus inflammatione. 294. quæ habeat signa. 333. *inflammatio* differt ab ejus erosione, cardialgia & aliis inflammationibus. 294. ex mensium suppressione. 341. erysipelate male tractato. 338. præposito topicorum usu

- usu in morbis articularum: 338. potu frigido mitior. 295. feralis in acutis signa. 392. *inflatio* differt à cardialgia. 297. ejus signa. *ibid.* 332. ab atonia ipsius oritur: 306. ex suppressione mensium. 341. in infantibus & hypochondriacis solennis. 297. 332. *spasmus* parit cardialgiam. 303. inflationem nec non vomitum. 304. *sphacelus* quæ signa habeat. 324. ex veneno. *ibid.* 401. *ulcus* observatum. 326. quæ signa ipsius. *ibid.*
- Ventriculus* cur non ipse à calore & fermento salivali consumatur. 60. cur plurimorum morborum officina. 179. cur tam gravibus stricturis spasticis sit obnoxius. 164. robustus plus ferre potest nutrimenti. 247. in omnibus fere morbis ejus actio læditur. 312. à nimis studiis. 313. & morbis maxime debilitatur. 349. ab animi pathematibus afficitur. 313. à vermibus obsidetur. 331. consensum alit cum omnibus nervosis partibus. 312. cum capite. 313. oesophago. 314. diaphragmate & pulmonibus. 315. ductibus biliariis. 314. intestinis. *ibid.* renibus. 315. 353. pedibus. 315. cute. *ibid.* illius destructio ad quænam mala disponat: 361.
- Ventris* dolor à vermibus. 235. rosionum sedes. 179.
- Venus* immodica debilitat. 76. moderata fit. 119. æstate vitanda. 136. qualis optima. 119. nimia corpus debilitat. 349. & intempestiva facit ad colicam & cardialgiam: 298.
- Vere* cibus detrahendum, potus augendus. 135. est aër temperior. 104. febres generantur alique morbi. 135. oportet corpus munire adversus vicissitudines aëris. *ibid.* transpiratio impedita maxime nocet: *ibid.*
- Ver* quos gignat morbos. 334. qualis in eo pulsus. 368.
- Vermes* non semper purgantibus expelluntur. 236. quos morbos procreant. 235. & quæ symptomata exciunt. 235. eorum varia genera. 331. in ileo lubenter hospitantur. 332. ob consensum intestinorum atrociam cient pathemata. 315. quæ si in ventriculo. 332. ileo. *ibid.* vel crassis. *ibid.* suscitant convulsiones, insolita pathemata & febres. 332. præsidia adversus eos. 452. quo demum necent. 402. Vide *Ascarides*, *lumbrici*.
- Vermiculorum* in aëre copia morborum malignorum causa & præsagium. 210.
- du Verney*. 20.
- Vertiginum* incunabula. 179.
- Vertigo* causa proxima quæ. 306. quandoque ex ventriculo. 313. ex crusta lactea repulsa. 336. lothiorum suppressione. 342. scarificationem melius fert quam venæ sectionem. 461.
- Vesica* scirrhus afficitur sæpe. 328. & ulcus contrahit. 327. atonia affecta calculum concipit. 307. vesicæ sphincter. Vide *Sphincter*.
- Vesicæ urinariæ* structura & functio: 71.
- Vesicatoria* lippitudinem discutiunt. 318. in apoplexia & capitis morbis utilia. *ibid.* asthma ex repulsis achoribus tollunt. 336. intermittentium paroxysmos sistunt. 318. vide *cantharides*.
- Vesiculæ fellis* situs. 62. structura. *ibid.*
- Vespe* punctio gangrænam parit. 250. punctura atrociam cient pathemata. 311.
- Veteres* cum recentioribus jungendi. 22. quid probi habeant. *ibid.*
- Veterum* lectio quatenus commendanda. 150.
- Victus* moderatus sanitati confert. 114. mutat ingenia. 97. simplicissimus senem juvat. 137. qui insalubris. 287. facit ad morbos epidemicos. 292. in historiis morborum enumerandus. 287. durior facit ad scorbutum. *ibid.*
- Vieussens*. 20.
- Vigilia* quid sit & unde. 95. mutat pulsum. 368.
- Vigiliæ* diurnæ cur corpori noceant. 95. emaciant. 126. absument vires. 129. earum noxæ. *ibid.* quibus inducantur. 95.
- Villanovanus* (Arnoldus) 21.
- Villi intestinorum* gaudent tono. 64. eorum obstructio nem quid impediat. *ibid.* quibus obstruantur. *ibid.*
- Villosa tunica* vasculosa & cellulosa. 304. obstructa diarrhœæ. 385. spasmò affecta diarrhœæ causa. 304.
- Vina dulcia* plethoram inducunt. 113. *Mosellana* & *Rhenana* alvum laxant: *ibid.* nutritioni non sunt apta. *ibid.* quænam optima: *ibid.* senibus quæ noceant. 134. seq. sunt potius medicamenta quam alimenta. 113.
- Vini spiritus* moderatus usus probatur. 114. rectificatus felibus venenosus. 198. optimum traumaticum. 447. clystere injectus inebriat. 468.
- Vino* nivem aut glaciem miscere perniciosum. 113.
- Vinum* acido-spirituosum quibus conveniat. 113. aqua temperare bonum. *ibid.* concoctionem juvat. *ibid.* Hungaricum quibus prodest. *ibid.* quibus noceat. *ibid.* calidum veneno infectis commendatur. 201. fortius lædit caput. 256. lymphatum præstat cerevisia. 257. stomacho laborantibus mane bibendum. 250. potens & generosum morbis epidemiciis avertendis aptum. 212. Rhenanum optimum alexipharmacum. 204. immoderatus haustum quæ mala generet. 257. clystere injectum roborat. 467.
- Viperæ* decoctæ specificum in cutis defœdationibus. 453. eorum pinguedo specificum in pellicula oculi. *ibid.*
- Vires* agendi in corporibus omnes sunt conditionatæ & relativæ. 148. corporis quibus rebus debilitentur. 245. corpori insunt motrices. 323. unde dependant. 323. 420. eorum causæ manifestæ. 323. ex quo cognoscendæ. 420. multum faciunt ad sanitatem & morbos. 287. in morbis considerandæ. *ibid.* cum remedium efficaciam comparandæ. 421. à copia sanguinis quandoque depressæ prostratæ malignitatem indicant. 289. 323. analeptici minus reficiuntur. 444. in malignis quibus refocillandæ. 450. clysteribus refocillantur. Vide *Robur*.
- Viribus deficientibus* decubitus corporis est utilis. 47.
- Virium* naturalium defectus unde æstimandus. 240.
- Virili ætati* commendanda mediocritas. 134.
- Virilis ætas* quibus morbis pateat. 308. qualis in ea pulsus. 368.
- Virtutes veræ* sanitatem stabiliunt. 102.
- Virtus multiplicativa* in quo fita sit. 76.
- Vis elastica* succum nutritium apponit. 57.
- Viscera* eorum constitutio in morbis consideranda. 289. ex urina patescit. 380. eorum corruptio in hectica præsto est. 323. quibus cognoscatur lethalis. 394. quomodo arcenda. 403. sphacelo correpta quæ habeant signa. 324.
- Visceribus* læsis turbatur sanguificatio. 50.
- Visceralia* quæ sint. 445. seq. quomodo agant. 446. varii sunt usus. *ibid.*
- Viscerum structuram* qui declarent. 19.
- Viscidum* non causa morborum universalis. 17.
- Visus* organon oculus. 90. ejus sedes retina. 89. quomodo fiat. 90. amissio ex dentium dolore. 236. hebetudo apud senes unde. 214. à spasmò nervi optici læditur. 305. à vermibus perit: *ibid.* clysteribus illustratur. 467.
- Vita* est in ipso sanguine. 34. & mors mechanice fiunt. 32. plantis improprie tribuitur. 30. *sedentaria* ad quos morbos disponat. 121. 125.
- Vitæ* causa cordis motus. 30. definitio. *ibid.* desidii incommoda. 125. definitio. 159. pathologiæ præcipuum fundamentum. 154. *genus* quodlibet peculiaris alit morbos. 288.
- Vitam* quæ prolongent. 32.
- Vitriolum album* specificum in epiphora. 453.
- Ulcus* in quo differat ab abscessu. 326. seq. serum sæpe utiliter evacuat. 347. ex hæmorrhoidum suppressione. 343. variolarum & morbillorum reliquiis. 355. quæ

quæ signa si in ventriculo. 326. vesica. 327. prostratis. 327. antiquum præpostere consolidatum varios gignit morbos. 337. cœcitatē. 348. vide *abscessus*.
Ungues cur & quid sint. 94. nigri cur mortis indicium. 150.
Unguium resectio infelix. 237.
Unicornu animale & fossile absorbens. 428.
Vocabula nihil significantia non possunt esse principium medicinæ. 23.
Vociferatio auget circulationem. 47.
Vocis exercitia sanitatem conservant. 122. ventriculum juvant. *ibid.* quibus commendanda. *ibid.* intensio nimia nocet. 123. quibus maxime cavenda. *ibid.*
Volatilia pulsus mutant. 369.
Vomica quid sit. 325. quibus signis cognoscenda. *ibid.*
Vomitus gracilibus non convenit. 130. à vermibus. 235. cruentus pueris rarior. 185. periodici unde. 186. symptomaticus & idiopathicus. 182. convulsionibus accensendus. 305. à spasmo ventriculi. 304. quomodo succedat. 306. salutaris sæpe excretio. 410. lactentibus proficiuus. *ibid.* ex calculo quomodo. 353. à bile acri biliosus. 304. ex calculo quandoque letalis. 353. inflammato ventriculo superveniens minus salutaris naturæ motus. 412. quibus movendus. vide *emetica*, quibus compescendus. 445. quænam potio vomitui bilioso diuturno conducatur. 472. seq. *cruentus* differt ab hæmoptysi. 296. signa ejus. *ibid.* 327. quomodo succedat. 301. 327. fit ex vasis brevibus. 327. ratione caussarum differt. 296. ex hepatis & lienis vitio. 320. 327. mensium suppressione. 340. seq. & emanatione. 341. ex induratione lienis post paralyin funestus. 329. perperam adstringentibus cohibetur. 447.
Vox clara crassos humores dissolvit. 260. vide *Vocis*.
Voracitas quibus familiaris. 115. facit masticationis neglectum. *ibid.* corpori inimica. 185. imbecilibus familiaris. 247. sed noxia. 248.
Uretheres motu peristaltico præditi. 71. spasmis patent. 304. motu peristaltico gaudent. *ibid.* ab urina cum dolore distenduntur. *ibid.*
Urethræ tunica glandulosa. 72.
Urethra spasmus patiens facit stranguriam. 304.
Urina quid. 68. acida non datur. 69. cur facile putrescat. 70. quænam optima. 118. sæpe muco infecta redditur. 70. habet sal tartareum & ammoniacale & fixum. 69. excretorum præcipuum. 375. perspirationem quantitate superat. *ibid.* ejus examen. 376. elementa. *ibid.* proportio solidi. *ibid.* color unde. 377. quantitas unius diei. 376. ex liquidis potissimum generatur. 375. ex potu non recipit solidum. 376. ex sanguine suscipit particulas sulphureas. 377. nec non crassiores sordes. 381. largiter fluens sæpe salutaris. 410. 347. supprimitur sæpe. 438. à spasmis urinariorum ductuum. 304. uretheres distendit quandoque. *ibid.* involuntarie cur fluat. 307. difficulter in scirrho vesicæ redditur. 329. in morbis inspicienda. 289. vide *uromantia*. qualis in calculo. 331. scorbuto. 379. ictero. *ibid.* senibus. *ibid.* alba in hypochondriacis unde. 315. aquea quibus in morbis. 377. unde. 377. seq. in febribus quid portendat. 377. quæ poscat medicamenta. 380. crassa morbis declinantibus. 378. seq. post febrium paroxysmum. 378. nimis diu fluens mala. 379. *crystallis referta* ubi? *ibid.* *furfuracea* in vesica erosa. 380. *jumentorum* differt ab humana. 377. *oleosa* unde & quid indicet. 379.

parca in stranguria. 380. *purulenta* in exulceratione renum & vesicæ. 379. *rufa* sine sedimento quando & unde. 378. in inflammationibus mala. *ibid.* quæ poscat medicamenta. 380. *fabulosa* in nephritide. 379. quæ requirat media. 380. *sanguinolenta* ubi & unde? *ibid.* Vide *miætus cruentus*. *Spissa & glutinosa* ubi. 379. *tartaro referta* in dispositione ad calculum. *ibid.* quibus tractanda. 380. *tenuis* in omnibus spasmodicis morbis. 320. in paroxysmis febrium. 378. *turbida & crassa* in gonorrhœa. 380. *vaccina* interne utiliter bibitur. 377.
Urina color unde. 70. examen. 68. largior fluxus quandoque salutaris. 120. largior fluxus menstruus à Sanctorio observatus. *ibid.* limpidæ unde. 70. necessaria est inspectio. 71. retentæ noxæ. *ibid.* largior fluxus salutaris. 259. unde fiant coloratiores. 254. immodicæ unde. 168. incontinentia à vermibus. 235. retentio cur noxia. 169. suppressio à calculis. 236. *sedimentum* quid indicet. 378. nullum in febribus post paroxysmos malum. *ibid.* *tartarus* unde. 379.
Urinam moventia. 118. quæ reddant copiosiores. 70. subeunt particulæ sulphuræ pingues. 69.
Urinarii ductus motu peristaltico gaudent. 304. spasmo corripiuntur. 304. atonia affecti ex urina crassa dignoscuntur. 380.
Uromantia reprobata. 71. utilis ad cognoscendos & curandos morbos. *ibid.* abusu obnoxia. 375.
Uteri vasorum structura. 73. ejus notitia anatomica in pathologicis utilis. 20.
Uteri hæmorrhagiæ probe distinguendæ. 296. quæ periculosæ & abortus nunciæ. *ibid.* quæ salutaris. *ibid.* post abortum & partum ex uteri labe. 353.
Uterina balneorum usui socianda. 464.
Uterus mutationes ab imprægnatione subit. 78. copiosis constat vasis. 167. prolapsus terrore sanatus. 192. partibus nervosis non annumerandus. 316. atonia afficitur quid inde. 307. 320. sphacelo corripitur. 324. apostemate afficitur. 325. scirrhum contrahit. 329. sub partu quandoque rumpitur. 328. ex puerperio facile labem contrahit. 350. à suppressis mensibus varia patitur mala. 341. non est sedes mali hysterici. 316. ejus structura causa fluxus mensium. 340. ejus hydrops à polypis. 330. ex ejus debilitate varii morbi. 353. ejus inflammatio letalis in puerperis quibus cognoscenda. 395. labefactatus quibus firmandus. 446. ejus morbi curantur balneis. 465. nec non clysteribus. 467.
Uvæ cur bonum præbeant alimentum. 254.
Vulnera vide *læsiones*.
Vulneraria quæ sint. 446. quomodo agant. 447. in longis quibusdam morbis utilia. *ibid.* optimum spiritus vini. *ibid.*
Vulnerati facile syncopen patiuntur. 33.

W.

Whartoni merita. 19.

Willisus 21.

Z.

Zwingerus (Theodor.) 17.

F I N I S.

FRIDERICI HOFFMANNI

CONSILIARII REGIS BORUSSIÆ INTIMI,
ET ARCHIATRI,

PROFESSORIS MEDICINÆ PRIMARI IN ACADEMIA HALENSI,

OPERA OMNIA PHYSICO-MEDICA

Denuò revisa, correcta & aucta,

IN SEX TOMOS DISTRIBUTA;

QUIBUS CONTINENTUR

DOCTRINÆ SOLIDIS PRINCIPIIS PHYSICO-MECHANICIS,
& anatomicis, atque etiam observationibus clinico-practicis superstructæ.

*METHODO FACILI AC DEMONSTRATIVA DEDUCTÆ,
& per experientiam LVII. annorum stabilitæ.*

CUM VITA AUCTORIS,

Et ejus PRÆFATIONE de differente medicinæ & medicorum statu atque conditione,
& criteriis boni ac periti medici.

TOMUS SECUNDUS.



GENEVÆ,

Apud FRATRES DE TOURNES.

M. DCCXL.

1112-1113
1911/12 1113-1114
1115-1116 1117-1118

1119-1120 1121-1122
1123-1124 1125-1126
1127-1128 1129-1130

1131-1132 1133-1134
1135-1136 1137-1138
1139-1140 1141-1142

1143-1144 1145-1146
1147-1148 1149-1150
1151-1152 1153-1154

1155-1156 1157-1158
1159-1160 1161-1162
1163-1164 1165-1166

1167-1168 1169-1170
1171-1172 1173-1174
1175-1176 1177-1178



CONSPECTUS TOMI SECUNDI.

Medicinæ Rationalis Systematicæ Tomi Quarti Pars Prima.

De omnis generis Febris.

Ejusdem Tomi Quarti Pars Secunda.

De Hæmorrhagiis & Doloribus.

FRIDERICI
HOFFMANNI
MEDICINÆ
RATIONALIS SYSTEMATICÆ
TOMUS QUARTUS,

IN QUO
SPECIALIS MORBORUM PATHOLOGIA
& huic superstructa solida Therapia cum
medendi methodo,

CAUTELIS CLINICIS ET MORBORUM
ENARRATIONIBUS ADJUNCTA EPICRISI EXHIBENTUR.

PARS PRIMA,

DOCTRINAM DE OMNIS GENERIS FEBRIBUS
*tam intermittentibus quàm continuis & acutis inflammatoriis, perspicua
& demonstrativa methodo tradens.*

JUVENI EGREGIO
FRIDERICO HOFFMANNO

DOCTORI ARTIS MEDICÆ EXPERIENTISSIMO
STRENUO ET SOLERTI RERUM PHYSICARUM
MATHEMATICARUM ET MEDICARUM
CULTORI

FILIO SUO DILECTISSIMO

NEC NON
OMNIBUS DISCIPLINÆ SUÆ ALUMNIS
DOCTIS ET SEDULIS UTILISSIMUM HUNC LIBRUM
DICAT ET PLURIMUM COMMENDAT

AUCTOR.

P R Æ F A T I O.



ANDEM prodit in lucem promissus diu & expectatus quartus Medicinæ rationalis systematicæ tomus, qui morborum pathologicam & practicam specialem disquisitionem, cum cautelis & observationibus clinicis, nec non morborum curationumque historiis complectitur, & quidem prima ipsius pars, de omnis generis febribus. Multa quidem scripsi & plura edidi, ex quo per triginta & septem fere annos Professoris munere hac in Academia functus sum; sed à primo statim tempore firmum cepi propositum, maturæ tandem ætati reservare medicinæ systema, non quod nutanti hypothesium sustentaculo, sed veritatibus inter se connexis & methodo demonstrativa propositis, niteretur, ad artem nostram, multis, in pathologicis præsertim & medendi methodo, laborantem imperfectionibus, perficiendam, & certam ipsius rationem adstruendam. Ante decem igitur annos evulgavi primum hujus operis systematici tomum, qui philosophiam corporis humani vivi & sani, & doctrinam sanitatem tuendi vitamque conservandi tractat, ac haud ita pridem auctior & emendatior recusus est. Successit dein secundus tomus, quo philosophiam corporis humani ægrotantis tradidi, & varii generis causas, quibus functiones in corpore varie læduntur, congruo ordine, accurate & copiose exposui, ut Medicus rerum insalubrium, quæ morbis ingenerandis velificentur, cognitionem haberet exquisitam. Novissime in tertio tomo id egi, ut viam sternerem, ad recte ac penitus percipiendam, & pathologiam, & therapiam. Hinc docui, quo pacto morborum historiæ colligendæ, morbi dignoscendi & perite de iis judicandum, genuinam medendi methodum, ex naturæ legibus, arti imitandis & exsequendis, monstravi, & redactis in generales quatuor classes remediis cunctis, longo usu probata selegi, eorumque physico-mechanicum in corpus operandi & dextre applicandi modum, candide exposui. Restitit itaque adhuc quartus tomus, specialissimam morborum ætiologiam & therapiam, pro tot individuorum & causarum morbificarum varietate, exhibiturus, cujus nunc primam partem, febrium doctrinam habentem, eruditorum & saniorum Medicorum judicio publice expono, in non pœnitendum, uti spero, usum eorum, qui in artis operibus versantur. Neque vero me pœnitet, editionem practici hujus operis diu & ad hoc usque tempus distulisse, quo longa & sufficienti experientia instructus, certa ubique cum ratione id elaborare possum. Ego enim non sine animi indignatione & ægritudine vidi, quam temere ludant de hominum corio medentum imperiti, & quot quantaque damna inconsulta medicina inferant. Tædet etiam prorsus multorum, immo plurimorum practitorum librorum, qui immaturo adhuc judicio, & insufficiente, aut plane nulla experientia, ex aliis compilati conscribuntur, erroribus decumanis referti, qui sic cum magno ægrotantium detrimento in vulgus emanant. Ad condendum vero practicum systema, quod firmis & demonstrativis principiis nitatur, ante omnia amplissimo observationum practicarum apparatu opus esse, quisque judicio pollens intelliget facile. Vera enim pathologia, quæ generationem morborum ex concurrentibus variis causis tradit, genuinum & therapie certæ, in curandis & arcendis morbosæ afflictionibus occupatæ, fundamentum ac basis. Sanare quoque nihil aliud est, quam causas morborum proximas earumque effectus tollere, & præservare à morbis idem, ac primas morborum origines earumque antecedentes causas, avertere, vel per congrua remedia remove. Ideo necessarium quam maxime est, ut causæ nocentes morbificæ, quæ innumerabiles & mirum natura ac operatione differunt, sufficienter & penitus cognoscantur, ut deinceps, remediorum, causis morborum ceu contraria opponendorum, quæ innumera pariter sunt & natura ac efficacia, pro corporis dispositione, admodum diversa, vires & facultates indagentur, & intime perspiciantur. Ad obtinendam autem hanc cognitionem, via datur alia nulla, quam per numerosa observata clinica, cum cura notata in tot individuis, ratione ætatis, sexus, nativitatis, hæreditariæ dispositionis, consuetudinis, victus & vitæ generis, sensibilitatis, valetudinis perpessæ,

differentibus, & quod maximum in morbis non tantum simplicibus & solitariis, verum etiam, qui frequentissimi, complicatis. In ipsa curatione id utique certum non ullum morbum curari posse eadem methodo in genere, sed quemvis, propter differentem causarum & individuorum indolem, curandi rationem poscere diversam individualement scilicet & specialissimam. Quæ quum firmum requirat iudicium, quod observatis & expensis curate circumstantiis singulis, quid de morbo sentiendum quomodo curatio instituenda, quibus auxiliis utendum, & quo ordine ac dosi hæc adhibenda; omnino necessarium est, ut ex numero pluribus observationibus adducatur hæc & colligatur. Interim solæ observationes, etiam curatissime conscriptæ neutiquam sufficiunt, ad evitandos tam in iudicando, quam usu remediorum errores, sed clave opus est, qua rerum in historiis obviarum facti causas eruere, detegere, aperire, clare demonstrare, tandemque ex observatis particularibus plurimis axiomata universalia, magnæ ad pathologiæ & therapiæ incrementa utilitatis, elicere possimus. Jam hæc clavis nihil aliud est, quam illa rerum medicarum scientia, quæ deprompta est ex principiis in sensum & conceptum cadentibus, anatomicis nempe & physico-mechanicis, ita, ut illorum ope ea, quæ ad corporis humani ejusque partium intimam structuram & ex hac dependentes singularum functiones pertinent, & horum beneficio, indoles & facultates rerum corporearum, quæ non pro arbitrio, sed ex necessitate à summo creatore indita immutabili, in corpus agunt ac unice vitam, sanitatem, mortem & morbos, horumque & præservationem, & curationem, dispensant, cognoscantur. Præ omnibus tamen opus est deducta ex his principiis pathologia vera, qua si quis destituitur, nihil solidi, nihil recti, de medicamentorum viribus, an in hoc vel illo morbo & individuo, salubria sint, vel insalubria, judicare valet. Quam manca autem & hiulca sit, quamque infirmis fundamentis nitatur, & veterum & recentiorum plurimorum pathologia, nemo qui penitus eandem sine præjudicio expendit, inficias ire poterit, sed dicere illud & palam scribere, tam odiosum est, quam veritatem eloqui. Ita tamen omnino est. Et ne gravius aut ex affectu forsan scriptum videatur, exemplo sint definitiones, ubivis obviæ. Veras has & reales, genuinum ac firmum esse principium, ex quo conclusiones & demonstrationes, de essentia, causis & differentiis definiti formandæ, accuratiores Philosophi, profitentur & asserunt omnes. Quæ autem in medica disciplina passim circumferuntur, de arte inprimis medica, de vita, sanitate, morbis, morte, de febre, inflammatione, morbo spasmodico hypochondriaco definitiones, ita sunt comparatæ, ut vix ulla sit, in qua non multum desiderari queat. Quin, quum in physiologicis cerebri & systematis nervosi functio & usus pensi habeatur, & à plurimis tantum non ignoretur; ultro innotescit, morbos ex horum vitio etiam ignorari, & mutilam præterea admodum esse, non modo morborum, sed & symptomatum ætiologiam. De therapiæ porro, nostro tempore receptæ, imperfectione, testimonio est indubio, illa propudiosa inter Medicos vicens dissensio, de remediorum viribus & usu. Lacerantur hac passim maximæ virtutis auxilia, venæ sectio, fonticuli, vesicatoria, purgantia, emetica, martialia, adstringentia, inprimis chinæ cortex, camphorata, volatilia, opiata & mercurialia, quæ nonnulli in totum, nonnulli sub certa tantum conditione rejiciunt, alii vicissim mire laudant ac concelebrant. Luculentius hanc in therapeuticis ignorantiam prodit ingens illa remediorum supellex atque farrago, simplicium & compositorum, Galenicorum & Chymicorum, quam tamen plurimi necessariam judicant ad oppugnandos tam multos & varios morbos. Alii contra universalia tantum crepant, & paucissima numero in usum vocanda esse, contendunt. Ab utraque vero parte diætetica & quasi domestica, illa maximarum in chronicis morbis virium præsidia, quibus Veteres, Chymicæ & Pharmaciæ ignari, gravissimos morbos debellarunt, aqua nimirum, vel pura fontana, vel mineralis, lac, serum lactis, ptisanæ, decocta & infusa specierum vegetabilium, balnea, frictiones; abstinencia quoque & inedia, vel plane ignorantur, vel minimum negliguntur, neque ex merito æstimantur. Sed sic obvios nævos atque defectus Medicinæ, uti hodie fere est, tetigisse sufficiat & iterum inculcasse, quæ satis inculcari possunt nunquam. Jam quo pacto lapsus huius vitandi, & quam ego ob id hoc in opere servaverim tractationis rationem, ostendam. Sane quum vita & sanitas res sit adeo pretiosa & inæstimabilis, princeps & præcipua omnino est cura, ne quippiam admittatur, quod eandem ullo modo labefactare, multo minus destruere, queat. Eo potius summo enitendum est studio,

ut morbi & præmatura mors arceantur. In hoc enim præcipuum medentis positum est officium, tum quod magis in ipsius potestate situm, tum quod ex centum, vix unus eam attingit ætatem, ut ex scientia rerum salubrium & insalubrium, præsentem morbum depellere tuto & certo norit. Ut itaque officio suo recte satisfaciat artifex, per remedia, quæ ipsius manus & instrumenta, nihil plane agere debet ex opinione, quæ secundum *Hippocratem de decent. orn.* in crimen verti debet eam adhibentibus, sed simplex sectanda veritas, cujus genuinus character, si ex indubiis & inconcussæ veritatis principiis, apta connexionem ita potest deduci & demonstrari, ut animum convincat, nec dubitatio amplius supersit. Urfit hanc demonstrationem serio jam primus artis conditor, *Hippocrates*, passim. Sic enim graphice scribit *epist. XXVII. ad Athen.* oportet non solum dicere, sed etiam demonstrare, quod verum est in Medicina. Idem *lib. de art. pag. 9.* vult, ut morborum tam manifestorum, quam obscurorum, certæ & infallibiles medelæ sint. Et *lib. de loc. in hom. pag. 398. constans*, ait, & infirma est tota Medicina & doctrinæ optime in ea compositæ, minime fortuito casu egere videntur. Atque etiam ego existimo, medicam disciplinam ad demonstrationes conficiendas omnium esse aptissimam. Magnus enim est numerus causarum naturalium, non naturalium & præternaturalium, quæ concurrere debent ad proximam causam, à qua functiones læduntur immediate & morbus fit. Quo vero major rerum vel causarum series & ordo; eo pulcriores, pleniores & perfectiores conficiuntur demonstrationes. Jam, uti supra dictum, secundum optimos demonstrandi magistros, definitiones reales sunt illud principium & fundamentum, ex quo conclusiones firma argumentatione deducendæ, & in quod veritates singulæ tandem resolvuntur. Quare in adornanda hac morborum pervestigatione, hanc mihi præfixi methodum, ut primo loco veram morbi definitionem collocarem, per quam ipse morbus ejusque causa cognosci & ab aliis ratione suæ essentiæ dignosci possit. Dein subjunxi statim generalem morbi historiam, completam cum omnibus necessariis circumstantiis, depromptam partim ex propria, partim aliorum peritissimorum Medicorum experientia, eumque in finem magno cum fructu usus sum ex antiquissimis *Hippocratis & Aretæi*, neque minus *Celsi, Cælii Aureliani & Tralliani* scriptis, qui accuratius recentioribus morborum consignarunt historias, è quibus ob id eximiora loca passim inserui. Enarrata historia, in proximam & adæquatam cujusvis morbi causam, quæ symptomatum genitrix, inquisivi, & simplici simul ac facili methodo cum hac connexi causas antecedentes remotas, item naturales, nonnaturales & præternaturales, ostendendo apte & intelligenter, qua ratione hæ ad primam in effectum traducendam conspirent. Tum exposui signa, è quibus de morbi eventu judicandum perite, ac, ut sedes morbi & mortis causa innotesceret, addidi demum, quæ in cadaveribus defunctorum reperiantur. Sic tradita morbi theoria, accessi statim ad medicationem & curatorias indicationes, quæ perperam plerumque seorsim tractantur. Curatio enim & medendi methodus opponi debent causis, ideoque etiam proxime cum iis connecti, quo eo melius in oculos incurrant & animo infigantur. Prisca hæc fuit *Hippocratis* sententia, quam *lib. de flat. pag. 400.* sic prodidit: si quis causas corporis affecti probe cognovit, potens est valde ea afferre, quæ corpori commodent, nimirum contraria, morborum natura perspecta. Est enim secundum naturam Medicina, id est, Medicina in naturalem statum debet reducere ægrotum. Sed in medicatione merito tenendum: nec Medicum, nec medicamenta, sed ipsam naturam, per quam nihil aliud intelligo, quam corporis machinam potentiis motricibus in solidis & fluidis, nec non ex variis secretoriis & excretoriis artificiosissime constructam, solam sæpe morbum sanare, causasque ipsius debito tempore & ordine per congrua emunctoria eliminare. Hanc itaque methodum, hunc ordinem naturæ & leges, Medicus, seu peritus ipsius minister, cum cura observare & imitari, ac si deficit, in motibus eandem juvare, vel si excedit, ad moderamen & æquilibrium reducere debet. Quod, quo pacto recte sit faciendum, leges quasdam, naturæ legibus conformes omnino, tradidi & uberius exposui in *Med. ration. system. tom. III. Sect. II. cap. I. & II.* quæ tam in ratione, fundatæ, quam multiplici experientia sunt comprobatæ. Has qui in medicatione omni observabit curate, peccabit nunquam; qui autem deliquit, certissime contra harum præceptum impegit. Quare omnibus & singulis qui artis exercitio manum admoveere volunt, aut jam in eo versantur, sedulo legenda, perpendenda & probe tenenda commendo etiam atque etiam, quæ in ci-

tato *tomo tertio*, maximeque *Seçt. II. cap. I. II. III. & IV. seqq.* attuli. Inde enim amplissimum fructum ad resolvendas morborum historias & danda salutaria consilia percipient, & intelligent, specialia hoc in opere practica præcepta, niti universa libus illis omnia. Habeant præterea disciplinæ meæ alumni sibi commendatos casus, quos cuivis capiti subjunxi cum addita epicrisi. Heic enim, ubi recte actum perspicient applicationem præceptorum, ubi secus factum esse, candide sine ullius injuria dixi, aliorum damno sapere & cautiores fieri discent. Videbunt etiam ex historiis deprompta salutaria monita, amplissimi in similibus casibus usus. Omnium autem erunt incitamento, ut diligentes sint in annotandis curate morborum historiis, è quibus, ope theoriæ solidæ, ad usum accommodæ, ipsi eruere poterunt canones atque cautelas ad incrementa & pathologiæ & therapiæ longe utilissimas. Nolo tamen, ut mea tantum sectentur, sed ut ex aliis etiam decerpant, quæ veræ & ad usum scripta, eademque cum prudentia sibi imitanda proponant. Quem in finem habeo ut commendem *Hippocratem, Aretæum, Trallianum & Celsum*, ex veteribus, ex recentioribus Gallis, *Ballonium*, & felicissimum *Præcticum Riverium*; ex Italis optimum *Hippocratis scholiasten, Mercurialem* nec non *Lancisium & Baglivum*; ex Anglis *Willisium, Sydenhamum & Mortonem*; ex Belgis *Sylvium & Boerhaven*; ex Germanis *Sennertum, Hildanum ac Ettmullerum*, non neglectis eorum laboribus qui novissime in nostra æque ac aliis Germaniæ Academiis, veris principiis & sufficienti experientia instructi, scripserunt. Hæc tam in genere, quam de scribenda ratione & usu hujus libri monuisse sufficiat. Optassem quidem, ut practicum opus universum, uti animo concepi, luci publicæ simul exponere potuissem, sed late nimis patuit campus, quam ut uno semestri, in tanta ægrotorum, & domi, & foris consilium & opem exquirentium, in tanta negotiorum & causarum, ex magistratu, quem gero academico, multitudine, & sub valetudine adversa, qua sub initium anni longius quam per mensem fui detentus, eundem potuerim emetiri. Selegi igitur potissimam de febribus doctrinam, eandemque in prima hac parte mihi sumpsi explanandam. Dabo tamen operam, ut quam primum fieri poterit, reliquorum adhuc morborum, eodem modo instituta tractatio, si Deus vitam viresque concesserit, vertente forsan anno, lucem aspiciat. Interim ut hic noster labor in medentium & ægrotantium fructum cedat amplissimum, voveo. Scribebam Halæ Magdeb. Idibus Maii anni cIdcccxxix.



C O N S P E C T U S
P A R T I S P R I M Æ
S E C T I O I.

De Febribus Intermittentibus tam simplicibus quàm com-
positis & anomalis Catarrhalibus, item
Exanthematicis & Malignis nec
non Erysipelacea.

P R O L E G O M E N A.

De Febrium natura in genere.

- CAPUT I. *De febre tertiana.*
 II. *De febre quartana.*
 III. *De febre quotidiana.*
 IV. *De febribus intermittentibus epidemicis anomalis mali moris.*
 V. *De febre semitertiana.*
 VI. *De febre catarrhali benigna.*
 VII. *De febre variolosa.*
 VIII. *De febre morbillosa.*
 IX. *De febre purpurata rubra & alba miliari.*
 X. *De febribus epidemicis exanthematicis catarrhalibus sive petechizan-
tibus.*
 XI. *De febribus petechialibus veris.*
 XII. *De febre pestilentiali.*
 XIII. *De febre erysipelacea.*

S E C T I O II.

De Febribus acutis inflammatoriis, item lentis putridis heceticis
nec non symptomaticis.

- CAPUT I. *De febribus inflammatoriis in genere, speciatim de febre acuta sangui-
nea, Græcis synocha.*
 II. *De febre ardente, nec non cholericæ.*
 III. *De febre stomachica inflammatoria.*
 IV. *De angina.*
 V. *De febre phrenetica sive phrenitide.*
 VI. *De febribus pneumonicis, sive pleuritide & peripneumonia.*
 VII. *De febre hepatica, sive hepatitide.*
 VIII. *De febre nephritica.*

- IX. De inflammatione vesicæ.
X. De inflammatione & febre uterina.
XI. De inflammatione oculorum, cum & sine febre.
XII. De febre intestinorum inflammatoria ex mesenterio.
XIII. De febribus lentis & hecticis.
XIV. De febribus symptomaticis.





SECTIO PRIMA

D E

FEBRIBUS INTERMITTENTIBUS,
tam simplicibus quam Anomalis atque compositis,
item Catarrhalibus, Exanthematicis &
Malignis, nec non Erysipelacea.

PROLEGOMENA

De Febrium natura in genere.

§. I.



S nullus morbus recte meretur appellari universalis, certe est ipsa febris. Hæc enim universum nervosarum partium genus vehementer exagitat, omniumque in corpore partium functiones graviter pervertit, ut nec solidorum, cordis & arteriarum motus, æquabilis sit atque legitimus, nec sanguinis reliquorumque humorum progressus liber & naturalis, nec saluberrimæ secretiones & excretiones recte succedant, neque etiam ipse animus sibi omnino constet, sed quandoque febrili impetu turbatus, delirer plane. Deinceps omnibus omnino hominibus ex æquo incumbit hic morbus, cujuscunque sint ætatis, sexus & temperamenti, quocunque sub cælo vivant & quocunque etiam victu & vitæ regimine utantur. Quin epidemice haud raro grassatur multosque simul magna corripit atrocitas ac medentibus multum facessit negotii. Neque tantum per se sanitatem subvertit & morbus est primarius, sed sæpe etiam aliis passionibus, uti cachexiæ, scorbuto, phthisi, lvi venereæ, hydropi, accedit ceu symptoma, easdemque acerbiores reddit & periculosiores: Ut adeo, calculo exactius subducto, decima mortalium pars, morbo vix alio tollatur è medio, quam febrili.

§. II.

Licet autem febris humano generi tam infestus & perniciosus sit morbus; hanc tamen peculiarem obtinet facultatem, ut motu intestino & progressivo, quo absolvitur, auctiori, cau-

sam suam destruat ac se ipsum sanare possit, immo aliis gravibus & longis morbis superveniens, eosdem vincat atque expugnet. Ipse Hippocrates & Celsus febrem habuerunt medicinam & morborum præsidium, quo magni etiam morbi curantur, paralytes, epilepsiæ, convulsivi motus, affectus spasmodici, sic dicti hypochondriaci; quin consultum duxerunt, suppressa citius febre, novam accendere. Et testantur etiam observationes, quod valetudinarii, post febrem, firmam & longam sanitatem fuerint adepti, quin, quod temperamentum & mores fuerint immutati, qua de re latius videri potest, dissertatio nostra *de febrium salubritate*.

§. III.

Quum igitur febris tantam potentiam, tam ad mortem, quam sanitatem habeat; in pro- *Febris descriptio.* clivi est judicare: ipsius veram & intimam, quoad indolem, generationem atque effectus cognitionem, utilem esse medico & scitu necessariam. Jam, secundum logicas regulas, vera rei cujuscunque definitio, naturam, differentiam & causas ipsius comprehendens, verum & optimum est demonstrandi principium, ex quo reliqua phænomena apte deducenda. Hinc omnino etiam de vera, adæquata & reali febris definitione debemus esse solliciti. Sed pudet & tædet dicere, tam multas tamque varias veterum æque ac recentiorum proflare febris definitiones; & tamen vix ullam, ullius, aut non nisi exigui esse momenti, ad genuinam ipsius indolem verasque causas exponendas. Mihi itaque ad veritatem accommodatè sic definienda videtur febris: quod sit spasmodica universi systematis nervosi & vasculosi affectio, juncta cum omnium in corpore functionum læsione, orta à causa nervosas partes ad intensiorem contractionem irritante, ita quidem, ut accedente ipsa, fluida vitalia primum ad interiora, cor & majora vasa ab externo ambitu agantur, & postea, aucta cordis & arteriarum systole, celeriter cum æstu per strictiora vasa iterum extrorsum

trorsum pellantur, donec spasmo laxato excretiones succedant & febris definat.

§. I V.

Causa formalis.

Affero igitur, formalem febris rationem, si-
ve, ut ita loquar, fundamentalem causam, con-
sistere in spasmodica universi generis nervosi &
fibrosi affectione, quæ maxime ex spinali me-
dulla procedit, & successive ab exterioribus ad
interiores partes vergit. Docui id pluribus &
momentosis rationibus in *dissertatione, de ve-
ra motuum febrilium indole ac sede*. Idem ve-
ro etiam luculenter arguunt omnia, quæ in fe-
bre præsto sunt pathemata atque phænomena,
dolor scilicet dorsi, præsertim circa lumbos,
horror, rigor, frigus, præsertim extremorum
tremor, unguium livor, vasorum in manibus
& pedibus detumescencia, cutis contracta &
arida, oscitatio, pandiculatio, pallidus & livi-
dus faciei color, tremens & palpitans cordis
motus, præcordiorum anxietas, spiratio ægra,
inquietudo, corporis jactatio, sensus ebullientis
circa præcordia sanguinis, pulsus contractus,
parvus ac debilis, nausea & inclinatio ad vo-
mitum, alvi & perspirationis suppressio, cum
urina tenui & aquosa.

§. V.

Causa ma-
teriales
varia.

Hinc prona jam fluit consequentia, quod om-
nia, quæ totum nervosarum & vasculosarum
partium systema ad spasmos irritare & sollici-
tare possunt, ad ingenerandam febrem sint ap-
tissima. Horum classem ducunt, vehementes
animi commotiones, terror in primis & ira, ma-
teria venenata & subtilis caustica, vel intus ge-
nita, vel per contagium suscepta, intercepta
perspiratio, sudores critici cohibiti, exanthema-
ta retropulsa, materia purulenta ulcerosa, pas-
sim in partibus obhærescens, alimenta nimis
acria, corruptæ & biliosæ primis in viis hæren-
tes cruditates, nimis vigilæ, dolor vehemens
ac nervosarum partium tensio, in inflamma-
tionibus, tumoribus & abscessibus, læsiones ner-
vosarum partium ab acuto instrumento, ab acri
& corrosivo pharmaco, balnea frigida & vi-
cissim nimis calida, aut adstringentia. Sed pro
differentia harum causarum indole & vario, quo
nervosum genus infestant, modo, differunt
etiam prognatæ inde febres, ut nonnullæ sint
benigniores, nonnullæ maligniores, aliæ inter-
mittentes, aliæ continuæ, simplices, vel com-
positæ, regulares, vel anomalæ, exanthemati-
cæ, putridæ, hæcticæ, vel lentæ, ut porro quæ-
dam facilius, vel difficilius sanationem admit-
tant, quædam cito decurrant, quædam longius
extrahantur, quædam etiam hominem perimant.
De qua febrium origine earumque causis & dif-
ferentiis, pluribus egi in *dissertatione, de gene-
ratione febrium*.

§. VI.

Febris du-
plici motu
absolvitur.

Neque vero omnis celerior cordis & arteria-
rum systole, ex pulsu frequentiori cognoscen-
da; nec auctus cum calore intensiori sanguinis
circuitus febris est. Sæpe enim talis à vehementi
corporis exercitatione, vel sanguinis percalida
& spirituosâ commotione accidit. Sed ille tan-
tum intensior fluidorum circuitus & illa auctior
cordis & arteriarum systole, febris dicenda,
quæ à causis internis inducitur & sequitur hor-
rorem, rigorem & frigus partium externarum.
Duplex enim in febre sociatus motus, unus qui
à peripheria ad centrum, si-ve à partibus exter-
nis ad internas, cor & pulmones, vergit; al-
ter qui hunc sequitur contrarius, à centro ad

corporis peripheriam. Illi junctus pulsus par-
vus, contractus, debilis cum præcordiorum an-
xietate & spirandi angustia; huic auctior arte-
riarum motus, pulsus magnus & æstus, extre-
mas etiam corporis partes occupans. Duplicem
hunc febrem absolvere motum pridem jam no-
tavit primus artis nostræ parens *Hippocrates*,
eundemque disertis verbis fuscè descripsit *lib. de
flat.* hunc in sensum: *in febre per horrorem
sanguinem ab extremis corporis partibus, quæ
exsanguis & propter frigus palpitant, decedere
& concurrere ad locos maxime calidos, & ob
sanguinis ibi collecti abundantiam suscitari
calorem, ad externa demum transeuntem.*

§. VII.

Duplex hic motus diversæ plane indolis at-
que virtutis est. Primus ille, à peripheria ad
centrum, minus salutaris, sed κατ' ἐξοχήν mor-
bosus, quin interdum mortifer. Quin enim mo-
riuntur ex Febre, si-ve continua sit, si-ve in-
termittens, acuta, si-ve chronica, pereunt sub
spasmo, frigore, horrore & rigore partium ex-
ternarum convulsionibus, quia cor, pulmones
& cerebrum, sanguine intus congesto nimium
obruta, eundem ob debilitatem amplius repe-
lere nequeunt. Alter vero ab interioribus &
centro, ad circumferentiam & minima vascula
motus, salutaris est & vitalis, inmo medici-
nalis & conservatorius. Sub hoc enim & per
hunc, ipsa materia, spasmus febrilem ciens,
successu temporis corrigitur, discutitur, ejicitur
& ipsa febris solvitur.

§. VIII.

Nimirum quum causa motus febrilis sit spaf-
mus universalis, nunquam penitus cessat ille,
nisi hic fuerit solutus. Hunc autem solutum esse
indicatur, si perspiratio sit liberior, mador,
vel sudor in cute apparet, pulsus antea durus,
impetuosus & celer, mollior fit, moderatus ac
tardior, si urina sedimentum ponit & vires suc-
cessive redeunt. Hæc junctim apparentia, mor-
bi solutionem nunciant, & crisis nomine ve-
niunt, quia ex iis medicus judicium de morbo
ferre potest. Hoc etiam sensu exponenda est
veterum definitio febris; quod sit lucta cum
morbo. Quod si scilicet spasmus, succos ad in-
teriora urgens; cordis & arteriarum motu, ad
externa repellente validior est, morbus vincit &
mors incidit. Si autem motus per spasmus re-
trogradus superatur à vitali cordis & arteriarum
systole extrorsum sanguinem trudente, morbus
abigitur & sanitas redit. Quæ quidem naturæ
post luctam hanc victoria, certis, septenario
potissimum numero computatis, diebus accidit,
qui ob id vocantur critici, quibusque medico
de morbi eventu judicandum.

§. IX.

Ineffabilis igitur divina providentia merito ce-
lebranda, quæ corporis nostri machinam ani-
malem, tam sapienter potentiis & facultatibus
instruxit motricibus, ut ipse morbus, qui nun-
quam non cum læsione functionum partium &
vitæ sanitatisque periculo accidit, ad expugnan-
dam ipsam suam causam sui-que curationem sæ-
pissime vergat & vergere possit. Atque adeo,
quum ipsa natura sit optima morborum, etiam
ipsius febris, medicatrix, perniciosum omnino
est molimen, febriles in salutem tendentes mo-
tus, imprudenter medicina suspendere, suppri-
mere, aut plane tollere velle. Secundandum
potius naturæ saluberrimum opus, quod per
auctiorem progressivum humorum motum, ad
cor-

correctionem & resolutionem materiae morbificae ipsiusque tandem excretionem dirigitur. Id quod optime perficitur diluentibus, humectantibus, temperantibus, aperientibus, roborantibus & nitrosis, nec non iis, quae, tempore praesertim intermissionis, congruas excretiones promouent.

§. X.

Hæc est nostra sobria & rationalis febrium theoria, causis manifestis, intellectui obviis & ex necessitate agentibus, physico-mechanicis, nitens, ex qua omnia, quae circa febrilium motuum negotium occurrunt, phaenomena, symptomata & effectus, ordine concinno & apta connexione deduci possunt & explicari. Quod quo pacto sit faciendum, & qua ratione etiam ex hac theoria methodus medendi congrua elicienda, causisque opponenda remedia, uberius patebit ex iis, quae in speciali quarumvis febrium tractatione jam dicemus.

CAPUT I.

De Febre tertiana.

THESES PATHOLOGICÆ.

§. I.

Nulla febris est, quae tam exacte motus febrilis in genere, qui & vasa, & nervositas partes infestat, & Hippocrati Græcisque rigoris nomine quasi per excellentiam venit, naturam ac genium manifestat, & quae tam frequenter affligit, nec ulli ætati, temperamento vel sexui parcat, quam quae alternis diebus cum rigore & horrore invadit, subsequente celeri, qui ex frequentia cognoscitur, pulsu, nec non anxio & ardenti calore, ac tertiana dicitur.

§. II.

Hæc, praesertim si regularis & legitima, his incedit symptomatibus. Caput primum dolet, artus languent, lumborum percipitur dolor circa primam dorsalem vertebra, qui per dorsi longitudinem versus epigastrium ascendit, cum dolorifico tensionis in hypochondriis sensu, alvique strictura: accedit partium externarum, praesertim narium & aurium, refrigeratio, pandiculatio, oscitatio & horror, membra saepius graviter concutiens, pulsu simul parvo, contracto & debili, interdum quoque agro sitiente. Sequitur dein nausea, cum inani ad vomendum conatu, vel etiam ipsa vomitio materiae biliosae & pituitosae, quandoque viridis, juncta saepius tussi molesta cum pituitae rejectione, ex stomachi cruditatibus acido-viscidis oriunda. Tum universum corpus fervor, sive anxius, ardens & siccus calor occupat, facies antea collapsa & pallida, cutis contracta & rigida, vasaque in manibus ac pedibus inanita resurgunt, rubescere ac tumescere incipiunt, arteriarum quoque pulsus major, plenior & citatior micat, inquietudo intensior spiritusque difficilior fit, & ægri oculis vix clausis aliena multa loquuntur. Decrescunt postea sensim hæc symptomata, ætus mitescit, cutis laxatur & madescit, urina emittitur flammæ coloris, qualis comparet in destillatione spiritus nitri, vel aquae fortis, sine sedimento tamen; arteriae simul mollius tangentis manum feriant & sudore prorumpente pa-

roxysmus discedit; qui tamen pro differentia naturarum & causae morbificae quoad durationem varius, ita quidem, ut in quibusdam ad decem vel undecim, in quibusdam ad viginti horas protrahatur. Subsequenti intercalari die, corpus quidem adhuc languet, frigidiusculum est, facileque inhorrescit, pulsus tamen sub febris impetu citatus & vehemens, tardius jam & debilis undulat, & urina quoque crassior mingitur, ac sedimentum ponit, vel minimum nubeculam, quae dispositio ad sedimentum, exhibet.

§. III.

Sic decurrens paroxysmus febrilis, ipsa symptomatum ratione teste, quam-optime ad motus nervosarum partium universi fere corporis spasmodico-convulsivos referri meretur; quo etiam fit, ut omnia ea, quae nervosas partes ad motus anomalos irritant, uti quidem faciunt animi affectus, fortiora cathartica, nec non cum cibis vel aëre susceptae materiae acres, causticae & venenatae, item omnia adstringentia, frigida & quae nervis inimica sunt, quin clysteres acres, quos purgantia validiora ingrediuntur, tum ad generationem, tum recidivam, vel minimum exacerbationem febris, plurimum omnino conferant.

§. IV.

Causam horum motuum febrilium in tertiana veteres quidem bilem intemperatam, ab aliis humoribus separatam & extra venas in imo ventre nidulantem, esse censuerunt: est vero potius materia, quae illos excitat & fovet, excrementitia salino-sulphureae & activae indolis, quae nostro quidem iudicio, sedem potissimum habet prima in regione, partim in biliariis hepatis ductibus, partim in flexura duodeni. Scilicet hoc in cavo humores biliosi, salivales, praesertim pancreaticus, jam tum vitati, mutua cum cruditatibus ex prava digestionem confermentatione ipsaque diuturniori mora & stagnatione, ejusmodi virulentam gignunt materiam, quae huic successive per vasa lactea ad sanguinem & cum hoc ad nervosas capitis, medullae spinalis, ventriculi, intestinorum & nerveas aliorum ductuum secretoriorum & excretoriorum tunicas sufficienti quantitate delata, universalem ejusmodi spasmus ciet, sub quo sanguis ad interiora & vasa majora primum urgetur, postea vero aucto systaltico cordis & arteriarum motu, totius massae sanguineae & humorum progressus intenditur, obstructions in minimis nervosarum partium canaliculis expediuntur, & remittente spasmio relaxatisque excretoriis, febrilis, quae insedit, materia per cutis spiracula, perspiratione, aut sudore opportune ejicitur, insultusque cessat, donec par rursus hujus excrementitiae materiae quantitas ex primis viis ad sanguinem tunicasque nervosas denuo fuerit translata, novumque inducat paroxysmum.

§. V.

Expedita autem hujus materiei ipsiusque tertianae genesis est in corpore exquisitoris sensus, cholericae constitutionis, ad spasmos animique motus proclivi, in ætate plus consistente, quam infanti & senili, regnante æstate nimis fervida & flantibus ex austro & euro ventis; praesertim si potio frigida fuerit ingurgitata, vel corpus tempore vespertino, aut nocturno, aëre frigidiori & humidiori, aut plane insectorum minimorum copia circa compluvia & stagna refertæ, diutius expositum; multo magis quando venter cruditatibus oppletus, vel cibi-gravis materiae,

materiae, aut adstringentis facultatis, & maxime omnium cum nausea, assumti.

§. VI.

& proca-
sartica.

Neque minus frequenti experientia confirmatum habemus, corpora spongiosiora tempore vernali, post largiorem sanguinis missionem, facile in febres tertianas nothas, vel catarrhales incidere, eo facilius, quando, praesertim grassantibus jam febribus, pluvioso & humido coelo committuntur, & stomachus cibo minus solubili infarcitur. Novimus quoque à purpura frigore externo repulsa, scabie linimentorum mercurialium & sulphureorum ope intempestive ficcata, ab improvido acidularum & aquarum mineralium, neglecto simul regimine & assumtis rudioribus alimentis, potu, nec non à percalido Carolinarum, quae adstringentis virtutis sunt, thermarum, in corpore praesertim plethorico, impuro & cruditatibus referto, balneo, febrem tertianam, interdum continuam, interdum duplicem & anormalam, accessisse.

§. VII.

Dividitur
in legiti-
mam &
notham.

Ex his incunabulis prognata tertiana, non semper una eademque facie incedit, sed discrepat, ideoque merito à medicis in varias dispescitur species. Est quippe vel legitima, vel notha. Illa potissimum adoriri solet homines biliosae constitutionis & sensu exquisitiori polentes, inprimis sub praecalida aëris aestivi intemperie, acerbioribus etiam slipatur symptomatibus, horrore scilicet, calore, capitis dolore, siti, vomitu & anxietate, urina secedente intensius flammea, breviori tamen temporis spatio solvitur atque discedit. *Hippocrates* quidem exquisitam hanc duodecim horis deferre & septimo paroxysmo finiiri, passim asserit, sed tam exactae periodi febres in septentrionalibus nostris humidioribus & frigidioribus regionibus non observantur, & recte hinc perhibet *Mercurialis praefat.* Bonon. pag. 190. rarissime tertiana exquisita *Hippocratis* invenitur, neque ego vix vidi, & jam quadraginta anni sunt, quod praxin exercui; id quod ego ipse etiam asseverare possum. In notha autem, sive spuria, mitiora quidem praesto sunt pathemata, calor non tam ardens, vomitus non ita frequens, urina non adeo flammei coloris, & vacuo etiam die virium languor, artuum lassitudo cum inappetentia relinquitur. Ad hæc, segnioris magis naturae homines, sequiorem sexum & qui spongiosioris sunt habitus, autumnali maxime tempore, infestat.

§. VIII.

Regula-
rem & ir-
regula-
rem.

Regularis dein est, vel irregularis, sive anomala & confusa. Illa typum servat æqualem, tam ratione temporis invasionis, quam solutionis, longitudinis ac brevitatis paroxysmi & fuetis ceterum incedit symptomatibus. In hac tempus accessionis inordinatum, mox ante, mox post meridiem, jam circa vesperam, quin mediam noctem, ipse paroxysmus, modo brevior, modo longior, urina, remissionis, vel intermissionis tempore, nihil dimittit, sudor vel nimis parvus, vel nimis largus, vacuo etiam die adest, & passiones complicantur insolitae, pro naturarum diversitate diversae, ut vel alvi fluxus, vel narium hæmorrhagiæ, vel enormes stomachi etiam subversiones, aut graves capitis dolores, mentis alienationes, anxietates cardialgicæ summae, artuum dolores ventrisque tormina praesto sint. Et tales irregulares febres, quae typum non servant, sunt plerumque epidemicae, ex

præternaturali & insolita æstatis vel autumnali constitutione provenientes, ut plurimum continuæ, quales etiam elapso MDCCXXVII. anno per universam fere Germaniam, post intensam atmosphæræ per multos menses siccitatem & caliditatem, populares habuerunt circuitus.

§. IX.

Nonnunquam porro simplex, nonnunquam duplex observatur. Simples paroxysmi alternis diebus recurrunt, duplex autem quotidie accedit, interdum quoque bis, uno die vacuo. Distinguenda tamen duplex à quotidiana, quæ accessionis tempora quotidie servat æqualia, quum in illa paroxysmi recursus alternis diebus respondeat.

§. X.

Continua quoque occurrit tertiana, his dignoscenda signis: adoritur cum horrore, anxietate, vomitu, æstu & ingenti languore, nec sequenti die symptomata hæc prorsus intermittunt, sed tantum remittunt, pulsuumque manet adhuc frequentia, cum æstu & languente debilitate; paroxysmi autem die, præcedente levi externorum refrigeratione, omnia iterum exasperantur & ingravescent. Et talis febris, si epidemia, durat quandoque per duas vel tres hebdomades, antequam in legitimam intermittentem concedat; fit autem crebrius, ut tertiana primum per aliquot dies sit continua & postea in intermittentem bono transeat omine, malo contra, ex intermittente in continuam.

§. XI.

Plerumque tam simplices & regulares, quam duplices & anormales, sunt epidemicae & ex insolita temporum tempestatumque, æstate inprimis, constitutione, proficiscuntur. Endemicae quæ audiunt, familiares & quasi propriae sunt certis quibusdam locis, depressioris scilicet situs, uliginosis, piscinis paludibusque cinctis, culicum & insectorum proventu infestis, ita prorsus, ut incolæ rarius annum à febre immunes transigant & advenæ crebrius eadem exerceantur ac difficulter ex toto liberentur.

§. XII.

Omnia hæc febris tertianæ genera mitius primum accedunt, repetentibus autem paroxysmis vehementia invalescent, manifesto indicio, inordinatis istis, solidorum & fluidorum sub impetu motibus, magis adhuc inquinari magisque intemperatos reddi corporis succos, qui immutato intermissionis diebus perspirationis & excretionum successu, pejorem adhuc successive indolem contrahunt.

§. XIII.

Singuli paroxysmi, laxata jam cutis compage, madore, vel sudore solvuntur, urina die intercalari crassior mingitur & nubeculam exhibet, vel plane sedimentum ponit, quod eo copiosius, quo plus corpus sanguine & succis abundat. Si vero sub declinatione sudor non prodit, urina etiam tenuis & aquosa die vacuo secedit, alvi que siccitas impensior, uti hypochondriacis maxime solemne, adest; valde affectum esse spasmi à materia rebeli febrili nervosarum partium systema arguunt.

§. XIV.

Tertio ut plurimum vel quarto paroxysmo ulcuscula circa labia prodeunt & lotium cum ardore quodam redditur, tumque symptomata notabiliter mitescent. Optime autem & secu-

Simpli-
cem &
duplex

Conti-
nuam.

Epidemiam
endemicam

Tertianam
mitior
cedit.

Paroxysmus
quodammodo
variatur

Febris
initio
sana.

De Febre Tertianâ.

13

securissime hæc febris à natura vel sola, vel arte adjuncta, ex toto solvitur, erumpente bilioso copioso alvi fluxu & auctiori excretionis cuticularis, die à febre immuni, successu, quod ex magnitudine & vigore pulsus viriumque incremento cognoscitur. Qui tamen epidemicis & anomalis laborant, soluta licet febre, difficilius convalescunt & vires recuperant, ideoque diætâ exactiori indigent.

§. XV.

Nulla ex febrium genere, calore & auctiori sub paroxysmo motu interno, tam celeriter corpus succulentum exsiccat & obesum emaciat, tantamque biliosorum recrementorum, quæ per vomitum, alvum & urinam secedunt, copiam ingignit, ac tertiana, intensiori ac diuturniori æstu stipata. Et hæc fuit procul dubio ratio, quod veteres febrem hanc à bile intemperata, exsuperante derivarint, licet hæc redundantia effectus potius quam causa sit.

§. XVI.

Longiores & contumaciores sunt autumnales & hyemales tertianæ, tum maxime, quando viscera male constituta, prima regio spasmi & flatibus referta, alvus strictior, æger vorax, multumque, præsertim ante accessionem, ingerit, nec non ubi conveniens regimen in paroxysmo & post eum, supprimendo sudorem, negligitur, vel etiam medicatio perperam instituitur, uti plerumque evenit in plebejis & qui manuum ministerio victum parant, confirmante hæc ipso Hippocrate Sect. I. aph. IX. Breviores contra minusque ancipites sunt, si æstate incidunt, prima regio & viscera ad sanitatem disposita & regimen diæticum æque ac diaphoreticum tempore vacuo rite observatur.

§. XVII.

Licet omnis intermittens non adeo periculosa sit, vix tamen ulla circumspeditione diætæ ratione & tam provida methodo excipienda, quam tertiana & quartana. Quod, si non servatur, in truculentos & immedicabiles morbos adducit ægrotantes, febrem nempe lentam, hecticam, subitum pedum tumorem & hydropem, contracturas & acerbos dolores artuum, malum flatulentum & hypochondriacum variique generis morbos spasmodico-convulsivos, infantes in lethalem plane epilepsiam, qui omnes morbi facile succrescunt post præposterum ac nimium adstringentium, ante sufficientem materiæ excrementitiæ correctionem & evacuationem, usum. Hinc apprime ad veritatem Trallianus lib. XII. cap. 6. tradit: *tertiana*, inquit, *facilis quidem curatu, quum autem à medicis illis, qui non recta ratione & via utuntur, male tractatur, non modo difficilis curatu, sed & insanabilis interdum redditur.*

§. XVIII.

Ex facili quoque tertiana per medici & laborantis errorem in aliam febris speciem transit, simplex scilicet in duplicem, quandoque triplicem, immo in quotidianam & lentam, vel plane continuam, aut cholicam.

§. XIX.

Crebrius demum & facilius quam ullus alius morbus redit tertiana & quartana, inprimis præpostera medicatione suppressa. Simul ac enim corpus à febre haud ita pridem liberatum aeri paullo frigidiori & humidiori ventoque asperiori ex septentrione spiranti exponitur, vel stomachus copioso, aut insalubri cibo plus justo aggravatur, vel quidam animi motus, ira potissimum

Frid. Hoffmanni Oper. Tom. II.

aut terror, incidunt, vel etiam purgans paullo acrius propinatur; protinus spasmi febriles, dolor in capite, cum partium ipsius externarum, aurium & narium refrigeratione, oscitatio, pandiculatio, dolor circa primam lumbarem vertebra, languor artuum, hypochondriorum cum anxietate & alvi strictura tensio, horripilatio & refrigeratio, cum subsequente æstu, accedunt, quamvis sub prima reperentis morbi accessione, non secus ac in principio omnis febris intermittens, mitiora sint hæc, & sequentibus paroxysmis exacerbentur.

METHODUS PRÆSERVATORIA.

§. I.

Quum itaque febres tertianæ plerumque epidemicæ sint & populariter grassentur, earumque causa antecedens febrem ingignens, potissimum in aëris vitio, vel diuturna intemperie, nec non in cohibita excretionem per cutim & cruditatibus prima in regione sentina, contineatur; facile patet, tempore, quo circumeunt, intemperatum, impurum & vappidum aërem esse fugiendum, vitando maxime omnium vespertinam humidiores auras, neque cibo copioso aut gravi stomachum onerandum, neque potum largiorem, multo minus spirituosum, vel acrescentem ingerendum, necque etiam animi affectibus indulgendum.

§. II.

Inter remedia quæ à febrium insultu defendunt, æstate nimis fervida ex usu sunt pulveres leniter nitrosi, absorbentes & diaphoretici, decocta etiam temperata & diluentia, ex radice cichorii, scorzonæ, rasura cornu cervi, hordeo mundo, ad potum ordinarium proficua, nec non acidulæ Selteranæ, vel Wildungenfes, quæ simul alvinam excretionem liberam reddunt. Expedit porro quoque, mane infuso theiformi, ex herba sanguinem depurante, ut scordio, veronica, post somnum excretionem per cutis poros elicere ac promovere. Neque enim facile febris alvo soluta & perspiratione libera accedit, ut potius, quandocunque illa præter morem adstringitur, corpusque languens & frigidiusculum est, febrem præstolari, haud fallaci judicandum sit augurio.

INDICATIONES CURATORIÆ.

§. I.

In curatione vero omnis medentis intentio ad causarum proximarum remotionem dirigenda. Atque adeo, quum potissimum tenuis, acris mobilis & biliosus humor, nervosarum partium & tunicarum vasorum systema universum, ad universalem spasmum & stricturam exstimulans in causa sit; recte utique colligitur, generales medendi intentiones his contineri momenti: 1) ut subtilis illa & caustica acrimonia temperetur & emendetur; 2) ut correctæ & præparatæ materia peccans, quæ à perspiratione intercepta in corpore & genita fuit & relicta, per cutis imprimis spiracula leniter diffletur & evacuetur; 3) ut vehementia spasmodorum, qui præsertim sub frigore & horrore sæva concitant symptomata, mitigetur; 4) ut cruditates acido-viscido-bilioas, in duodeno potissimum stabulantes, quæ nidum & hospitium materiæ febrili præbent, tempestive

B

ve

ve invertantur & expurgentur; 5) ut vigor motuum post paroxysmum corpori reddatur & excretionum successus servetur, ne, uti quidem post omnem vehementem morbi impetum & partium nervoso-musculosarum spasmus solenne, atonia & motuum languor succrescat, nec inde sanguinis & humorum progressus una-cum secretionibus & excretionibus elanguescant, & hac ratione de novo materia febrilis generetur, foveatur & accumuletur; & denique 6) ut, quum hæc febris ex facili redeat, cessante jam hac ipsa, novæ materiæ ad inducendam recidivam aptæ generatio, summo studio impediatur & præcaveatur.

§. II.

Humores biliosi temperandi.

Ad obtinendum itaque primæ indicationis scopum, acrimoniam nempe biliosam, quæ ob intensiorem æstum succos successive collutulat omnes, contemperandam, nihil efficacius nitro, vulgari tantum rite depurato, quippe quod sulphur volatile, à quo motus intestinus cietur, figendo, æstum extinguit & longe præstantioris effectus est acidis, quæ calorem quidem reprimunt, sed humores simul inspissant, quum illud eosdem fluxiles potius servet ac tenues. Egregie quoque acrimoniam sulphuream biliosam obtundunt diluentia & humectantia, potui destinanda, cujus generis sunt ptisanæ ex hordeo, radice scorzonæræ, rasura cornu cervi, succo & corticibus citri, ex aqua pura debito modo decoctis, item decoctum avenaceum, vulgo *der Haber-Tranck*, serum lactis dulce, aquæ Selteranæ, vel etiam cerevisiæ tenues, bene coctæ ac diureticæ. Et hæc quidem in paroxysmo potissimum ex usu sunt.

§. III.

Per poros evacuandi.

Ex præscripto secundæ indicationis id agendum medenti, quo humores tenues, excrementitios, biliosos, præparatos nunc & correctos, laxata post paroxysmum porosa & cribrosa cute, blande educat. Perficitur hoc apprime diaphoreticis lenioribus, cerussa scilicet antimonii, antimonio diaphoretico, cornu cervi usto & philosophice præparato, nec non infuso theiformi, quod scordium, vel carduum benedictum & cortices citri habet, item essentia scordii, vel cardui benedicti, probe quidem saturata, non tamen adeo spirituosæ, cum liquore nostro anodyno minerali permixta.

§. IV.

Spasmi in paroxysmo mitigandi.

Tertia indicatio vehementiæ spasmodum ipso in paroxysmo mitigandæ dicata est. In qua quidem explenda præstans utique jam laudatus usus nitroforum refrigerantium, lenium diaphoreticorum & diluentium blandumque madorem elicientium. Inprimis egregia hoc nomine virtus liquoris nostri anodynii mineralis, vel qui ipsi surrogari potest, spiritus nitri dulcis bene præparatus, quippe qui blando suo & naturæ amico anodyno sulphure effrenes fluidi nervei & solidarum nervosarum & musculosarum partium motus compescit, eo felicius, quando is vel cum pulveribus fixis, vel essentiis diaphoreticis maritatur & cum aquis, quæ pariter sedativæ virtutis, florum scilicet sambuci, tilia, primula veris, liliorum convallium, chamomillæ vulgaris, rosarum, acaciæ, ulmaria, item cerasorum nigrorum, propinatur.

§. V.

Sordes primæ regionis acidæ obundantes.

Quumque prima corporis regio sordibus maxime excrementitiis & biliosis scatens mineram & fomitem materiæ febrili præbeat, co, ut quar-

ta præcipit indicatio, quam maxime annitendum, ut confluentes huc ex universo corpore intemperati & vitiosi succi attemperentur, & eliminentur. Hinc ubi acidæ cruditates exuberant, sola absorbentia, tam terrea alcalina quam salina, utramque absolvunt paginam; & inter hæc spectatæ potissimum & securæ virtutis lapides & chelæ cancrorum, nec non testæ ovorum; quæ ut teneriora & facile solubilia, merito anteferenda marinis, rudioribus & ægrius liquescentibus cumque acido in adstrictivam plane facultatem transeuntibus.

§. VI.

Quando biliosa porro præsto est acredo, nitro, uti meminimus, nihil superius; si vero lenti ac tenaces, viscidum succi intus consistunt, salium neutrorum laudata virtus, tartari quippe vitriolati, salis digestivi Sylvii, ex capite mortuo spiritus salis ammoniaci, ex æquali parte salis tartari & salis ammoniaci, confecti, salis quoque ipsius ammoniaci depurati. Qui certe, maxime in robustioribus & victui crasso, duro, marino assuetis, Suecis, Batavis, Westphalis, quibus ut plurimum diuturnæ esse solent febres, commendari merentur; opus autem est, ut cum sufficienti aqueo vehiculo diluta exhibeantur. Hæc quippe, si repetita, vel majori dosi præbentur, præter effectum incidentem, alvum quoque movent & fordes efficaciter evehunt, eoque nomine nostro jam tempore haud mediocrem salubritatis laudem adepta salia, ex aquis medicatis parata, Sedlicense scilicet, Egranum, & ad horum imitationem confectum sic dictum Ebshamense sal, quæ ad unciam dimidiam & plus in aquæ mensura liquata, viscidas & excrementitias primarum viarum fordes detergendo & exturbando, spectati adversus intermittentes & qui ex ventriculo oriuntur morbos sunt usus. Idem præstat detecta à nobis aqua Sedlicensis amara, ad mensuram dimidiam, diebus intercalaribus ter vel quater hausta, ut vel hac sola tertianas sæpe curatas viderim. Quandoque tamen tenerior ventriculi constitutio & spasmodum in ipso cum acidis ponticis succis frequentia, uti solenne in infantibus, senibus & passione hypochondriaca & cardialgica affectis, salium, præsertim copiose datorum, usum interdicit; eaque propter, mannæ tantum ad unam vel duas uncias, cum, vel etiam sine rhabarbaro, adjecta una vel dimidia terræ foliatæ drachma & aliquot olei de cedro guttis, potius offerre expedit.

§. VII.

Ubi demum ipsum duodenum copioso, bilioso & vitioso humore oppletum, vel plane biliarii ductus lentis & pravis succis fæcti sunt, è re est, ut per superiora emeticorum ope evacuatio instituat; hunc in finem tenerioribus exhibenda radix ipecuanha nodosa, robustioribus autem hæc, tartaro emetico ad granum unum vel duo admixto, ipse quoque tartarus emeticus solus, vel, qui melius adhuc, julepus noster emeticus, ex aqua corticum citri spirituosæ, julepo rosarum & tartaro emetico soluto confectus dandus. Quod si vero non tantum superiora, verum etiam inferiora intestina à recrementis liberare, in ingluvie maxime deditis, necessarium; utrumque commode obtineri potest infuso mannato, quod unciam unam vel unam cum dimidia mannæ, terræ foliatæ tartari drachmam & tartari emetici unum vel duo grana habet.

§. VIII.

Correctis sic & evacuatis noxiis per varia ex-cernicula humoribus, ad quintæ indicationis normam

Biliosa & viscida cor-rigenda.

Et evacuanda per inferiora.

Superiora

vel inferiora

Debiles partes corroboranda.

nam eo dirigenda medicatio, quo universum solidarum partium, maximeque ventriculi & intestinorum systema, ob diuturnos spasmos & paroxysmos à robore dejectum firmetur iterum. Versatur in hoc rite perficiendo præcipuum curationis intermittentium momentum, ita prorsus, ut usurpatis quantumvis diu alterantibus, aperientibus, amaris & evacuantibus, paroxysmus tamen nihilo secius persistat, accommodis contra roborantibus debito modo usurpatis, remittat ac cesset. Scilicet reddito nervosis, vasculosis & musculosis partibus robore, non tam pronæ ac promptæ sunt ad concipiendas humorum stagnationes, spasmodum insultantium causas, sed liberior potius sanguinis omnisque generis succorum fit circuitus, pulsus auctior & respiratio cum secretionibus & excretionibus vegetior, ut non modo paroxysmi sistantur, sed & nova febrilis spasmi minera dispellatur, quæ alias, languente vacuo die perspiratione pulsuque tardo, succrescit.

§. IX.

Ex omnibus vero, quæ hucusque innotuerunt specificis antifebrilibus, adstrictiva vi agentibus, corticibus nempe & radicibus adstringentibus, nec non ex marte vel alumine confectis, quin etiam paullo calidioribus, nullum quod magis accommodatum, temperatum, omnibus ætatibus, temperamentis & sexui idoneum ac vel mille auspiciis experimentis comprobatum, quin tota, ut aiunt, substantia medicatum pluribusque indicationibus satisfaciens, quam cortex ille Peruvianus, Chinæ Chinæ nomine notus, quippe qui, si convenienti tempore, modo ac regimine usurpatur, ut excretiones naturales non sufflaminet, sed potius promoveat, propter terreum lene adstringens elementum & balsamicam amaritiam, omnibus aliis palmam præripit, & aliquot dosibus tantum, vel ad miraculum, febriles compescit paroxysmos. Longe tamen efficacior est in pulvere & substantia, quam in decocto, infuso, essentia aut extracto, ipsoque sic ceteris paribus tempore vacuo exhibito, pulsus fit vividior, calor cum perspiratione auctior, alvus, præsertim in cholericis, fluidior, manifesto faustæ operationis indicio. Mihi quidem in frequenti usu est electuarium, cujus ope innumeros febrientes persanavi, hac ratione concinnatum: Recipe rob sambuci unciam dimidiam, corticis chinæ drachmas sex, pulveris florum chamomillæ vulgaris drachmas duas, extracti centaurei minoris, pulveris caryophyllorum ana drachmam semis, syrupi acetositis citri unciam unam semis. M. f. electuarium. D. Admiscere etiam quandoque ad facilitandum perspirationis successum soleo antimonii diaphoretici, theriacæ veteris, vel etiam salis ammoniaci drachmam dimidiam, & finito paroxysmo, singulis binis horis, ejusmodi electuarium ad drachmæ dimidiæ pondus exhibere. Iis autem, qui tenerioris naturæ & stomachi, cortex in formam liquidam redactus, propinandus, hunc in modum: Recipe corticis chinæ unciam unam, corticis chaccarillæ, cinnamomi acuti, salis tartari singulorum drachmam unam, aquæ florum chamomillæ vulgaris libram unam, vini tantundem; digerantur leni calore, colat. adde syrupi corticum aurantium unciam semis. M. D. S. Potio antifebrilis, binis quibusvis horis ad unciam unam vel duas sumenda.

§. X.

Ad præscindendas, qui sextæ indicationis scopus, admodum frequentes intermittentium & maxime quidem tertianæ recidivas, certior vix datur ratio, quam qua omnia, quæ ad generationem fe-

Irid. Hoffmannii Oper. Tom. II.

bris faciunt, evitantur, ac monita superius in præservatione inculcata curate observantur. Et quum exhausto per febrem corpore, appetitus hac discedente impensior esse soleat, ventriculus autem & natura adhuc imbecillior, sapius certe evenit, ut novus cruditarum primis in viis fiat proventus, & febrî vel lentæ, vel superatæ recidivæ ortum præbeat. Hinc consultum omnino ducimus, ut qui mox à febre convaluerunt, leviolem coenam & facilis digestionis cibos assumant, ac præterea ad succiendum ventriculi robur, ad ducendas prima ex regione sordes, nec non detergendas, si quæ supersunt, morbi reliquias, efficacibus urantur præfidiis. Nos quæ hunc in finem commendemus habemus potissimum moderatum, sed eo crebriorem usum pilularum nostrarum balsamicarum confortantium, deglutendo alternis diebus mane, vel vespere, novem, vel undecim earundem. Totum quippe corpus inde robur nanciscitur, flatus summa cum euphoria discutuntur, & alvus clementer movetur, aucta subinde sub pulsu vegetiori ipsa perspiratione. Deinde egregii etiam usus elixirum stomachum roborans, de quo ante prandium XXX. vel XL. guttæ sumendæ, eamque in rem elixir nostrum balsamicum, in notis ad Poterium descriptum, elixir stomachale Michaëlis, in adjuncto clavi Schroederianæ thesauro pharmaceutico inveniendum, vel nostra methodo præparata essentia stomachica, aut etiam essentia gentianæ rubræ, salî volatili oleoso nupta, item elixir viscerale nostrum apprime proficiunt.

METHODUS MEDENDI SPECIALIS.

§. I.

Quando saburra vitiosorum humorum in stomacho ac duodeno efficacem postulat depletionem, quod ex prægressa ingluvie, præcordiorum anxietate, nausea, ructibus & oris amaritie conjiciendum, mox in principio, finito primo vel secundo paroxysmo, die vacuo offerendum emeticum, quale supra commendavimus. Vel, si firmior ventriculus & non modo per superius, sed & inferius os vitiosa sentina exturbanda, talem etiam præscripsimus formulam: Recipe salis Sedlicensis, vel Ebshamenensis unciam dimidiam, tartari emetici grana duo, vel tria. M. F. pulvis, dissolvendus in libra dimidia aquæ puræ tepidæ & duabus à finito paroxysmo horis sumendus, facilitando postea evacuationem successivo largiori potu jusculi avenacei tenuioris, pinguedine liberalius imbuti. Recuperatis autem post evacuationem quodammodo viribus, sine mora electuarii superius descripti antifebrilis aliquot doses sumendas suasi, quo sæpissime factum est, ut in prima quasi herba jugulata febris cesserit, & subjuncto exquisito in regimine & victu moderamine, nunquam repetierit.

§. II.

Contra ea, si quæ fuerunt, quæ excretionem anotericam interdixerunt; multi tamen serosi & crudi succi intus delituerunt ac sufficientem evacuationem exegerunt, salibus deterfivis alvum aperientibus medicationem sum aggressus, hunc conficiendo pulverem: Recipe salis Sedlicensis unciam dimidiam, salis ammoniaci, vel digestivi Sylvii, lapidum cancrorum ana drachmas duas, nitri purificati drachmam unam. M. F. pulvis, de quo binis quibusvis horis drachma dimidia in uncia aquæ puræ, vel chamomillæ vulgaris aut ptisanæ, ingerenda, superbibendo semper vasculum infusi theæ. Quo postquam aliquoties diebus interjectis egregie, blande tamen & per epicrasin, alvus totusque intestinorum canalis expurgatus, febris

tamen nec depulsa, nec quoad vehementiam imminuta, vel corticem chinæ salibus æquali pondere admiscui, vel solum electuarium nostrum interponere jussi, & sic etiam brevi tempore tertianas expugnavi, epidemice etiam grassantes & autumnales.

§. III.

per clystere
res & le-
nissima.

Quod si vero æger affectioni hypochondriacæ obnoxius, inflati stomachi, alvi obstructioris, exquisitoris sensus, impatiens & ad animi motus proclivis; nec emeticis, nec purgantibus salibus, præsertim liberaliori manu, utendum est, sed commodissimam tum locant operam clysteres, ex temperatis carminativis & emollientibus conflati, item pilulæ nostræ balsamicæ, refractori dosi, ad novem vel undecim, tempore intermissionis deglutitæ, præmittendo aliquot horis, vel postponendo pulveris digestivi, ex cancrorum lapidibus, terra foliata tartari, tartaro, vitriolato & nitro depurato, usum.

§. IV.

Quid faciendum in
paroxysmo?

In accessione febris ipsoque paroxysmo, & maxime quidem rigore; nihil plane à medico tentandum. Abstinentum tum etiam à potione, præsertim frigida, licet sitis ipso sub frigore præsto sit. Increcente vero sensim æstu eoque ad vigorem deducto, potum utique, & quidem sufficientem, præbere decet, non tamen magnis haustibus, sed crebrius interpolatis, studendo simul, ut palato non sit ingratus. Propinanda hinc, quæ supra commendavimus, decocta & infusa, & quæ maxime accommodata pituitosa, seu decoctum hordei, cum scorzonera, adjecto limonum, vel rubidæ syrupo, nec non spiritu nitri dulci & oleo de cedro. Ad æstum quoque & sitim extinguendam ex usu est pulvis temperans, ex duabus lapidum cancrorum & una nitri parte, repetito cum pituitosa exhibitus.

§. V.

extra paroxysmum?

Erumpens remittente æstu & soluto paroxysmo mador, vel etiam sudor, tam lecti & hypocauti temperie, quam internis quoque adminiculis blande proritandus, eumque in finem, præter jam memorata, egregii usus infusum theiforme ex radice scorzonera, herba scordii & corticibus citri. Postquam vero febris penitus deferbuit, corpus ab omni tam interna, quam externa refrigeratione defendendum, & curandum potius, ut in jugi fervetur perspiratione, quod accommodata exercitatione & crebriori potuum calidorum usu optime impetrari poterit.

CAUTELÆ ET OBSERVATIONES CLINICÆ.

§. I.

Initium & finis
paroxysmi ratio
habenda.

In perita medicamentorum adversus tertianam, simplex sit, five duplex, aut continua, administratione, ante omnia observandum à medico, initium paroxysmi, ejusque finis, judicando illud ex refrigeratione partium extremarum, pandiculatione, oscitatione, horrore & pulsu in celeriore & contractum mutato, & solutionem ex pulsu molliori, remissione æstus, madore, vel sudore. Et enim nunquam in accessione, vel mox ante ipsam, sanguinem mittere, vomitorium, purgans, corticem chinæ, aut aliud roborans & adstringens exhibere licet; defervente vero impetu, sudor, ubi expedit, commode promovendus, & tempore demum à febre prorsus vacuo, diaphoretica, evacuatione, vel etiam pro re nata specifica præbere optimum & accommodatissimum.

§. II.

Quum tertiana in principio, præsertim in calidioribus, sæpe febrem continuam & ardentem mentiat, non nisi temperantia, diluentia & modice leniter salina, digestiva, nitrosa conveniunt, omittendo tum emetica, vel acriora calida sudorifera, donec in tertianæ typum concesserit.

§. III.

Si contumax est, ut autumno, vel in quotidianam transit, antifebrilis illa potio, quam primus Crollius & ex hoc Riverius commendat, ex aqua scilicet destillata, ut cardui benedicti, sale absynthii & spiritu vitrioli confecta, bis vel ter quotidie data, egregium affert levamen, eo certius, quando pilularum nostrarum balsamicarum usus interponitur. Monendum tamen, hanc servandam esse enchiresin, ut spiritus vitrioli non immediate cum sale absynthii commisceatur, sed miscela in aqua adornetur. Ego quoque sali absynthii oleum tartari per deliquium surrogare soleo, videndo, ut in connubio punctum saturationis exacte tangam. Et talis potio similem, immo superiorem aquis mineralibus, acidulis dictis, aperientem virtutem possidet.

§. IV.

Eadem potio in tertiana nimis biliosa, vel in choleris ex iracundia enata, admodum proficua; vitanda vicissim amara, sudorifera, alexipharmaca, acriora, aromatica, multo magis salia volatilia, & usurpanda potius temperatissima salina, nitrosa & præcipitantia.

§. V.

Chinæ cortex optimum certe antifebrile, ejusque virtutem etiam in grassantibus epidemice febribus præstabilem deprehendi atque securam; semper tamen securior in sensibiliore, calidioris & vegetioris naturæ subjectis, nec non ubi urina sedimentum ponit ac per cutis poros excretio succedit, quam in segnioribus, melancholicis, phlegmaticis, vel mensium suppressione laborantibus, ac ubi excretionum defectus & urina cruda. Hinc recte ipso assumpto, motus corporis, quantum fieri potest, imperandus, & potus non frigidus, sed calefactus exhibendus.

§. VI.

Quandoque ante correctionem & sufficientem materiæ morbiferæ evacuationem, paroxysmos per specifica & corticem chinæ compescere oportet; ut postea longe meliori effectu mineræ febris & corrigendæ & eliminandæ congruis præfidiis aliquamdiu insisti possit.

§. VII.

Quando æstus & pathemata gravius urgent, viresque exhauriunt, corticem chinæ, nitro nuptum, in forma electuarii, intermissionis tempore, cum bonis ægrorum rebus datum fuisse, multis confirmatum habeo exemplis; ita prorsus, ut mox symptomatum mitigatio & virium incrementum succederint. Tenendum tamen, hoc facto, materiæ febili & temperandæ, & expurgandæ, medicationem adhuc esse accommodandam.

§. VIII.

Purgantia acriora, uti, ob spasmodum quod ciet incrementum, nunquam in tertiana propinanda; ita eo minus, quando paroxysmi à cortice chinæ, vel aliis remediis cessant, eo quod facile febrem revocant. Sed quando alvus subsistit, clysteribus, vel pilulis nostris balsamicis, interposito salium usu, officii admonenda.

§. IX.

Emetica, si indicatio adest, statim in principio, quo citius, eo melius, offerenda, nec gratis expectan-

standum, donec materia fuerit concocta, sed proxima via exturbanda, priusquam noxam latius diffundat. Quod si enim febris corpus jam aliquandiu detinuit, aestus ille solennis nimis ventriculum ad inflammationem concipiendam disponit, ab emetico postea facile procurandam. Interim quando paroxysmus, sæpius, licet mitius, recurrit, & febris vel ex neglecto regimine diætetico, vel perperam instituta medicatione, ad aliquot menses extracta, utilissime sæpius dedi vomitorium. Id duntaxat servandum, minorem tum, ac in principio, sufficere dosin, eademque magnam biliosorum humorum colluviem è duodeno exturbari, tam salubri effectu, ut licet febris non penitus cesseret, ex facili tamen postea specificis antifebrilibus, & maxime quidem chinæ cortice, subjuncto debito in vita & victu moderamine, abigi possit ac per sanari.

§. X.

Sanguinis missio in tertiana summa cum cautione instituenda. Nimirum, quando febris primum accedens continuæ speciem refert, ingens aestus cum delirio urget, æstas regnat, æger ætate vicens, sanguine abundat, biliosus, ad iram pronus & diætæ vinosæ assuetus, utiliter utique vena pertunditur. Præmittenda tamen primarum viarum repurgatio & eligendum tempus à febre immune. Sorbillandum etiam paucis ante, vel post sectionem horis, infusum theiforme, inprimis ex floribus chamomillæ vulgaris, singularis plane adversus febres virtutis, partim quo sanguis tenuior redditus eo liberius circumferatur, partim quo motus spastici, quibus tota febrium natura continetur, quodammodo placentur. Contra eo quando prima regio cruditatum sentina fordescit, corpus non sanguine abundat, nec reliqua præsto sunt phænomena, sanguinem mittere nocivum, eo quod excretionem salutare, maxime ea, quæ fit per cutis poros, inde sufflamantur, ipsaque febris, experientia teste, obfirmatur magis & chronica fit.

§. XI.

Ab opiatibus & anodynis, quorum in numero etiam sunt pilulæ de cynoglossa, in intermittentibus prorsus abstinere consultum, quippe quæ infido effectu paroxysmum quidem mitigant, vel interdum suspendunt, sed vires simul dejiciunt totumque febris decursum cum salutari crisi turbant, ut morbi causa majores acquirat vires & paroxysmus longe gravior postmodum accedat; melioris vero notæ sunt pilulæ Wildegansi, vel theriaca coelestis.

§. XII.

Aluminosa & vitriolacea etiam febrium paroxysmos sistunt, sed si quis forsan in plebeiis iis uti velit, opus est, ut post eorum usum sudor decocto, vel infuso theiformi calide sumto eliciatur, vel corpus motu exerceatur, quo alias nocens facultas earundem quodammodo averti possit. Post præposterum enim tam horum, quam aliorum eminentius adstringentium usum, plura subsequuta fuisse incommoda annotavi, maxime in iis, qui excretionibus sanguineis assueti, ita ut hæ inde penitus fuerint suppressæ.

§. XIII.

Cortex chaccarillæ accommodatissimum etiam in intermittentibus est remedium, ob principium quo instructus est balsamicum & sulphureum anodynum terreumque adstringens. Sed quia sanguinem exæstare & calorem accendere solet, in biliosis & ad motuum impetus pronis subjectis minus, & non nisi in refracta dosi, ex usu est, in senioribus vero, in phlegmaticis & mulieribus magis, & tunc commodissime cum cortice chinæ miscetur.

Frid. Hoffmanni Oper. Tom. II.

§. XIV.

Absorbentium spectatus quidem in febribus effectus, nihilo minus tam moderate, quam cum delectu, sunt usurpanda. Copiosius quippe ingesta, solventibus in ventriculo succis minus obediunt, sed integra relicta, eundem onerant, quin in lentam plane pastam coëundo, anxietates & nauseam cient. Rudiora vero illa, ex marinis maxime deprompta, ægrius non modo liquantur, sed & adstrictivam plane postea sortiuntur virtutem.

§. XV.

Sæpius evenit, ut in paroxysmo præsertim accedente, à sanguine ad caput, potissimum in plethoricis, congesto, exquisita oriatur cephalalgia, cum sensuum & phantasiæ turbatione, cui non promiscue topicis occurrendum. Vidi enim epithemata illa domestica, ex absynthio, ruta, cumino, baccis juniperi, sale communi & pane trito, ob vaporem, quo caput replent, plus nocuisse, quam profuisse. Multo minus vero cephalica & nervina, ut balsamum nostrum vitæ, quod alias in doloribus capitis egregii usus, porrigenda sunt.

§. XVI.

In paroxysmo potus calidus, ut herbæ theæ, farbarum coffeæ, non confert, quia humores acres, biliosos, plus justo in sanguinem agit & æstum, nec non anxietates, mirifice auget; sed potius concedenda potio temperate calida. Recte enim Hippocrates lib. III. de morb. præcipit: *tertianis potus calidus non confert, sed frigidus*. Extra paroxysmum autem calidæ ejusmodi potiones commode inveniunt locum, præsertim quando excretio alvina libera est.

§. XVII.

Quando febris per specifica depulsa, non omitenda penitus sunt sanitatis præsidia, sed vitanda sedulo corporis refrigeratio, in appetitu moderamen servandum & aliquamdiu tam pilularum balsamicarum, quam elixirii stomachici usui insistendum, uti jam superius in sexta pluribus monuimus indicatione.

§. XVIII.

Quod si vero contigerit, ut ob ingestum largius frigidum potum, vel data præpostere adstringentia, tumores succedant oedematosi, neutiquam in usum vocanda acriora purgantia, martialia, aut salia volatilia, sed omnis medicatio salibus abstergivis, pilulis balsamicis & temperato lignorum decocto conficienda. Ubi etiam anasarca corpus obfidet, emeticum cum extracto panchymagogo Crollii iusta dosi oblatum, miram aquarum copiam evahendo, insigniter juvat.

§. XIX.

Senes plethoricos & venæ sectioni assuetos, à refrigeratione in atrocem colicum dolorem, subsequente tertiana continua epidemice grassante, incidisse, crebrius observavi, quibus sanguinis missio admodum fuit proficua, chinæ cortex autem, mature nimis datus, perniciosus, ita prorsus, ut quotidiana hæctica similis funesta inde fuerit enata.

§. XX.

Pueris octavum vel decimum ætatis ætatem agentibus, febre tertiana correptis, exoptato cum successu dedi potiunculam emericam, & post hanc clysters ex antifebrilibus, centaurio minori & cortice chinæ, applicare jussi, febre ex toto quiescente, nec unquam repetente.

§. XXI.

Fœminæ ex mensium suppressione cachecticæ febrientes, magna circumspeditione tractandæ, re-
jectis penitus omnibus validioribus, evacuantibus,

æque ac roborantibus, emmenagogis quoque, quæ quidem temperata, sed febre nonnisi discedente, locum inveniunt. Clysteres vero ex leniter laxantibus, amaris & carminativis, nec non infusa blande alvum subducentia, quæ simul amara, corticem chinæ & limaturam martis habent, opem ferunt optimam.

§. XXII.

Puerperæ.

Puerperæ intermittentibus affectæ febribus, gravissime inde luunt, & sæva pathemata hysterica incurrunt, nisi lochiorum curate habeatur ratio, tanto magis, quando hæc cum febre per absorbentia marina, vel præcipitantia rudioris texturæ, conchas, corallia, cum, vel sine acido, nimis cito supprimuntur. Tum potius insigni virtute splendent, pilulæ nostræ balsamicæ tonicæ, quæ morbis ex uteri vitio apprime medentur.

ENARRATIONES MORBORUM.

OBSERVATIO I.

Tertiana in biliosis puerperam salibus ex-
cepta.

Incidit vir quinquaginta annorum, cholericus & in iram admodum proclivis, æstivo tempore in tertianam, quæ per aliquot hebdomadam decursum perstitit, ægerque variis interea animi pathematibus, angore, cura, solitudine, quin ira affectus, in paroxysmis subinde conatus ad vomendum persensit. Vocatus in consilium medicus, non alia exhibuit medicamenta, quam salia, arcanum quippe duplicatum, sal ammoniacum, sal tartari, nitrum & id genus plura, & hæc quidem liberali admodum manu & repetitis dosibus. Sed tantum abfuit, ut his, quantumvis diu usurpatis, febris fracta fuerit vehementia, ut potius symptomata magis increverint, angustiae præcordiorum cardialgicæ intensiores, facies admodum contracta, pallida & livida, extremorum etiam die vacuo refrigeratio, cum perpetuo ad tussim siccam stimulo, vomendi conatu, quin singultu, accesserint & simul ac quicquam, esculentum fuerit, sive potulentum, in ventriculum delatum, illico pejus habuerit æger. Nostræ hinc commissus medicationi, omnia salina seposuit, à vino quoque, licet ejus potui antea assuetus, abstinuit, & crebrius juscula hausit ex pullo gallinaceo, cremore hordei & vitello ovorum, nec non decoctum florum chamomillæ vulgaris. Exterius ante paroxysmum epigastrii regioni imposita est vesica speciebus emollientibus repleta, & alvo injectus clyster ex lacte & manna, adjecto stimuli loco nitro & sale. Mitigatis autem hinc symptomatibus, electuarium ex cortice chinæ, julepo rosarum, theriaca & nitro, intercalari die aliquoties modica dosi dedimus, tam salubri effectū, ut febris penitus discederet nec unquam rediret.

Epicrisis.

Notatu utique dignum est, salium, præstantis alias in intermittentibus virtutis, usum, tam male hoc in ægro cessisse, & inflammatoriam quasi in ventriculo adduxisse erosionem, ut hinc omnia illa, quæ affligerunt, insolita pathemata pullularint. Ratio tamen peculiaris hujus effectus in proclivi est; scilicet cholericæ constitutionis erat corpus, æger ad iram pronus & sub ipsa febre animi affectibus agitabatur. Jam vero nihil tam prompte & celeriter ventriculum cum tenuibus intestinis spasmo afficit, dispositionem ad inflammationem ibi ingignit & bilem acrem ipsiusque effusionem causatur, quam ira, in subiecto præsertim plethorico. Dein notum etiam est, salia, cujuscunque fuerint generis, nervosæ ventriculi & intestinorum tuni-

cas mirum in modum irritare magisque ad spasmos sollicitare. Atque adeo, his tam exquisitis sentientibus & spastica jam strictura affectis partibus, non potuerunt non malum augere & sinistrum plane effectum edere hæc salina remedia, tanto magis copiose & iterato oblata. Contra ea optimum certe fuit consilium, afflictas has partes mulcere temperantibus, spasmos complacare, & febri-les demum motus, diu jam corpori inhærentes, sistere atque compescere.

OBSERVATIO II.

Vir quidam generosus, ruri degens, vegetus natura, robustus, sanguine succisque plenus, sexaginta & sex annos habens, postquam nocturno aëri sese incautius commiserat, & sudorem improvida refrigeratione repulerat, tertiana corripiebatur exquisita. Vocabar accedente tertio paroxysmo ego, ægrumque sub frigore deprehendebam omni fere sensu privatum, delirantem, trementibus ob anxietatem summam manibus pedibusque, cum corporis irrequieta jactitatione, facie inflata & bruni coloris, ac pulsu contracto, duro ac celeri. Metuebam hinc gravem capitis morbum & ex adstantibus quærebam: annon vena fuerit secta? sed regerebant: ob impensam naturalem quandam aversionem, nunquam ægrotum ut sanguinem mitteret induci potuisse, neque ipsum, quantumvis plethoricum, unquam spontaneum sanguinis ex narium, vel ani venis expertum esse fluxum. Ter interea tam graviter febricitans pituitam maxime lentam, instar gelatinæ, saturato bilis colore tinctam, alvo dejiciebat, & postquam frigus per tres horas duraverat, succedebat æstus sex horarum, remittentibusque sensim pathematibus, erumpebat demum maior, ægro intercalari die bene se habente. Sitis autem sub frigore & horrore erat intensior, quam sub calore, & urina in paroxysmo rufa sine sedimento secedebat, quod tamen intermissionis die deponebat. Quum igitur æger omnem penitus sanguinis missionem respuerit, ut exæstuationem & congestionem sanguinis ad caput omni modo præscinderem, operam dedi, eaque propter loco cerevisiæ, quæ crassior erat & lupulata nimis, ptisanam potui præbendam suasi, & in paroxysmo potionem temperantem, ex aquæ florum acaciæ, sambuci, tiliæ, cardui benedicti ana unciiis quatuor, pulveris nostri polychresti bezoardici dicti drachmis duabus, temperantis nitrosi drachma, succi citri cochlearibus binis & sacchari uncia dimidia, cujus etiam per intervalla crebrius aliquot pro dosi cepit cochlearia. Declinante impetu, ad madorem eliciendum, infusum ex scordio & corticibus citri sorbillavit, & extra paroxysmum pulverem ex lapidibus cancerorum, terra foliata tartari & nitro, cum sufficienti quantitate ptisanæ, subinde assumpsit. His aliquandiu usurpatis, symptomata post nonum paroxysmum multum mitescebant, & urina multum crassæ dimittebat materiæ. Quare quum ægrum duabus mannæ unciiis & salis polychresti drachmæ dimidio, in jure carnis dissolutis, purgassent prius, ad sistendum paroxysmum electuarium antifebrile, consueta methodo & idoneo regimine exhibui. Quo semel adhuc admodum leni insultu subsequente, febris penitus demum corpus deseruit, usurpatis postea aliquoties alternis diebus pilulis nostris balsamicis, cum pulvere salino aperitivo. Et ita perfecte cum sanitate sine recidiva in gratiam rediit æger, & in hunc usque diem ad septuagesimum septimum annum sanus vixit.

Febris in plethorico gravibus symptomatibus, sine vena secta sanata.

Epicrisis.

I. Sub gravibus & insolitis capitis in hoc ægro pathematibus, ab affecto graviter præter naturam nervorum systemate oriundis, singulari omnino naturæ beneficio evenit, ut minimum bis, vel ter, lentos biliosos succos copiose excerneret, & credibile merito, alvo simul adstricta, ancipitem subsequuturum fuisse capitis morbum.

II. Si febrientes plethorici, nec tamen venæ sectionem admittunt, optimum consilium, æstum temperantibus leniterque alvum subducentibus uti.

III. In corpore plethorico, denegata sanguinis missione & urina cruda prodeunte, febris nunquam cito per specifica jugulanda, sed tutius est decem minimum operiri paroxysmos, qui quasi remedium adversus succorum abundantiam, donec sponte mitescant symptomata, & urina cocta mingatur, ac tum demum, præmissis adhuc alvum moventibus, ad febrem transire depulsandam.

OBSERVATIO III.

*Tertianâ
implex
apostera
dicatio-
indupli-
m con-
versa.*

Quadragenarius quidam, sanguine & melancholicus, à longo jam tempore inordinata usus diæta, æstate, qua jam tum febres grassabantur, ira gravius incitatus & corpus auræ vespertinæ frigidiori liberius committens, incidit in artuum lassitudinem, cum somno inquieto, dolore dorsi, capitis & hypochondriorum tensione, succedente horrore & post hunc calore. Tertia die idem redit insultus, & licet frigus non adeo esset intensum, æstus tamen & reliqua pathemata longe erant acerbiora, anxietas intensissima & mentis plane quædam alienatio. Secatur à medico vena, offertur emeticum, unum tantum vomitum ciens, & post quartum paroxysmum, febris cortice chinæ sistitur. Prodit hinc post aliquot dies in publicum æger, & in hortu fluvio adjacente bene cœnatur quidem & potat, sed recidit in febrilem longe vehementiorem paroxysmum, stipatum summa præcordiorum angustia & æstu, nec non vomitione, ita ut non modo potum, sed & ipsa medicamenta rejiceret. Porriguntur hinc elapsis quatuordecim diebus bis pilulæ ex cortice chinæ & floribus salibus ammoniaci martiatis, tam infelici effectu, ut tertiana simplex in duplicem degeneraret & vires ægri mirifice attereret. Notabatur præterea circa ventriculi regionem tumor, ingesta omnia vomitu reddebantur, anxietas erat vix toleranda, pulsus etiam extra paroxysmi tempus celer, urina non semper eadem, interdum crassa cum sedimento, interdum flava tenuis, non nunquam plane rufescens, & clystere injecto, alvus copiosa mucida, foetida & biliosa dimittebat.

Epicrisis cum curatione.

Est hæc febris tertiana duplex, cum metu inflammationis ventriculi, quam imminentem maximæ anxietates, perpetuæ stomachi subversiones, alvi constipatio, pulsus continuo celer & tumor ventriculi haud dubie præfagiunt. Nec levis notæ error in medicatione commissus fuit, quod non modo emeticum in febre tanto æstu & angore stipata oblatum, sed & ante sufficientem materiæ febrilis correctionem & primarum viarum expurgationem, paroxysmus præmature primum cortice chinæ depulsus, & repetens postea, pilulis ex floribus salis ammoniaci, eminentius adstringente virtute præditis, oppugnatus. Ut igitur inducenda hinc noxa præscinderetur ipsaque febris persanaretur, hoc modo medicationem aggressus sum. In infuso theiformi ex scordii manipulo, florum chamomillæ vulgaris, summitatum millefolii ana pugillis quatuor, seminis foeniculi uncia dimidia,

exhibui liquorem anodynum cum elixirio stomachali. Deinde ad potum ordinarium commendavi decoctum rasuræ cornu cervi cum radice scorzonæræ, cum quo quandoque propinatus hic pulvis: Recipe pulveris Marchion. drachma, lapidum cancrorum, nitri depurati ana drachma dimidia, pulveris castorei grana X.M.F. Pulvis D. S. *Pulver auf eitliche mahl.* pulvis ad aliquot vices. Postea sal absynthii cum succo citri oblatum. Exterius vero cataplasma, quod habebat florum sambuci, chamomillæ vulgaris, Romanæ, salviæ, hormini, anethi singulorum pugillos sex, herbæ menthæ crispæ manipulum, nucis moschatæ, caryophyllorum, cardamomi, feminis foeniculi ana unciam semis, redactis omnibus cum fermento panis, spiritu vini & aceto rosaceo in formam cataplasmatidis, calide ventriculi regioni appositi. Quo facto per universum corpus sudor obortus & anxietas cum vomitu cessavit; ac mitiori quoque sensim facto febris impetu, tandem electuario ex cortice chinæ, floribus chamomillæ & syrupo acetositis citri, morbus feliciter persanatus.

OBSERVATIO IV.

Senex generosus, septuagesimum & quartum ætatis annum agens, sanus alias adhuc & vegetus, intermiserat consuetam vere sanguinis missionem, & post impensam totius corporis refrigerationem, atroci primum abdominis dolore infestabatur, cum extremorum frigore & tremore, ad viginti fere horas persistente. Succedebat postea æstus, cum sensuum perturbatione, pulsu vehementi, delirio viriumque prostratione. Tandem quidem superveniente leni madore, hæc inducias dabant, sed elapsis aliquot horis levis denuo eveniebat partium extremarum refrigeratio, iisdem quam antea symptomatibus stipata, ut non amplius obscurum esset, laborare ægrum febre, tum temporis epidemica, tertiana continua. Accitus hinc medicus, cui solennis, statim etiam in principio intermittenti, electuarii, cujus basis cortex chinæ, usus, & idem hoc suum remedium suadet, sed absumpta licet successive dimidia hujus libra, plus increvere, quam remittere symptomata, subsequuta enormis virium prostratio, continens capitis dolor, sitis, summa præcordiorum anxietas somnique defectus, pulsu semper magno, pleno, citato interdum plane intermittente. Nono morbi die advocabar ego, ægrumque offendebar imbecillimum, graviter de sinistro electuarii, biduo jam omisso, effectu conquerentem, ideoque sanguinis missionem, quæ in principio, meo & aliorum medicorum judicio, summo opere fuisset necessaria, instituere nolui, & nil nisi analeptica & temperantia, cum leniter diaphoreticis suasi. Aderat quidem quotidie symptomatum ad sex vel septem horas remissio, sed totalis virium prostratio pessima ominabatur, ideoque capitalem fore morbum prædixi, ægro etiam elapsis aliquot diebus, ipso sub paroxysmo, obeunte.

*Tertianâ
continua
in senes-
tate.*

Epicrisis.

Quamvis specifica antifebrilia, quorum potissimum cortex chinæ, nec non reliqua quæ mera adstrictione agunt, martialia scilicet, cortex fraxini & *Hartmanno* familiaria aluminosa, in moderandis, vel plane sedandis febrilibus motibus, non contemnenda prudenter usurpata polleant efficacia; nihilo minus tamen ego nunquam non gravissimam inde notavi noxam, in corporibus plethoricis, spasticis obnoxiiis vehementioribus stricturis, hypochondriacis & hystericis, & ubi nondum humorum acrimonia emendata, nec æstus mitigatus.

Tanto vero magis cum cautione standum sunt senibus, quanto major in his ut plurimum humorum spissitudo & crassities, alvi obstipatio, immo haud raro sanguinis redundantia.

OBSERVATIO V.

*Tertianae
cilio & uno
sanata.*

Annus currebat MDCCXIX. quum Charlot-
turgi, (quod amœnum prope Berolinum seces-
sui regio dicatum oppidum, sed ob paludum &
stagnorum circumjacentium copiam, febrium,
quotannis ibi grassantium proventu, infestum,) plures ex aulicorum ministrorum numero propter ciborum ingluviem, vespertinum improvide ad-
missum frigus & aërem noxiis effluviis refertum, tertianæ implicarentur, consuetis symptomatibus stipatæ. Ex his plures, qui mea utebantur medica-
tione hac ratione ad sanitatem reduxi. Superato sci-
licet tertio paroxysmo, intermittente die potionem emetico-laxantem porrexi, ex manna & tartaro emetico, in aqua veronicæ vel florum acaciæ solu-
tis, qua ingens vitiosorum humorum colluvies per inferiora & superiora exturbata. Hoc facto, tri-
bus, vel quatuor, ante subsequens paroxysmi ac-
cessionem, horis, ad lenem provocandum sudo-
rem, exhibui potionem ex tribus aquæ cardui be-
nedicti unciis & dimidia uncia aquæ theriacalis, cum drachma salis tartari & triginta spiritus vi-
trioli guttis. Tum extra paroxysmum corticem chinæ & flores chamomillæ vulgaris, vel in forma electuarii, vel potionis, binis quibusvis horis, præ-
bui, quibus per aliquot dies usurpatis, febris dis-
cessit, injuncta postmodum, ad arcendam novæ materiæ febrilis generationem, parciore victus ra-
tione, cum elixirii nostri stomachici usu.

Epicrisis.

Multiplici edoctus sum experientia, specifica intermittentium præsidia, horumque principem, corticem Peruvianum, felici cum successu dari, vel statim in principio febris, perpurgatis prius probe primis viis, vel declinante post aliquot pa-
roxysmos jam sua sponte febris impetu, non tam facile nocere, ac si natura per plures paroxysmos imbecilliori reddita, demum usurpatur. Tum enim magis noxa timenda & majori opus est pruden-
tia, eo quod per crebriores paroxysmos, motu tam intestino, quam tonico auctiori, tota sanguinis & humorum massa in excrementitias sordes fatiscit, quæ nisi prius sufficienter expurgatæ fuerint, per adstrictivam specificorum facultatem intus reten-
tæ, pejoris notæ recidivas, vel novos alios mor-
bos, ingignunt.

OBSERVATIO VI.

*Tertianae
epidemica.*

Ex præcalida, diuturna, insueta plane aëris tem-
pestatumque cōstitutione, elapso MDCCXXVII. anno, plures febrium species universam fere Ger-
maniam infestarunt & laborantes nimio, fere continuo æstu, virium prostratione, anxietate, capitis dolore & non nunquam plane delirio, mi-
rifice affligerunt, ita quidem, ut frequentissimæ ex illis essent tertianæ continuæ, symptomatibus non penitus intermittentibus, sed tantum remittenti-
bus, donec lapsu temporis, successive vel in quo-
tidianas, vel tertianas legitimas, vel etiam quar-
tanas, transirent. In harum perfanatione ego qui-
dem felici cum successu hac usus sum methodo. Sub febre, tribus singulis horis, duo circiter coch-
learia præbui potionis ex aqua florum sambuci, ti-
liæ, ceraforum nigrorum ana unciis duabus, pul-
veris præcipitantis & bezoardici ana drachma una, succi citri & julepi rosarum ana uncia dimi-

dia. Remissionis tempore oblatum laxans ex man-
næ uncia cum dimidia, vel duabus, nitri puri & sa-
lis polychrestæ ana granis XV. in jure carnis vel aqua destillata solutis. Foeminis autem spasmodi-
cis affectibus obnoxiiis, clysteres injicere jussi, le-
niter discutientes & demulcentes. Perpurgata his prima regione, ad electuarii usum accessi, hac ta-
men cum differentia, ut ad temperandum æstum, nitrum adjicerem. Fracta hic postero mox die fe-
bris atrociam, ut per aliquot adhuc dies hujus reme-
dii usui insisterent & alvum clysteribus apertam fervarent, febre autem penitus evanescente, ex-
actum in vita & victu tenerent moderamen, & sub-
inde pilulas nostras balsamicas confortantes deglu-
tarent, injunxi. Et sic brevi tempore, divino auxi-
lio, ægri convaluerunt, quum alii, iisdem febribus laborantes, adhibitis variis remediis, venæ sectione, emeticis, salibus, amaris & essentiis alexipharma-
cis, diu fuerint afflicti, viribus adeo consumtis, ut longo tempore omnique arte easdem vix potuerint recuperare.

Epicrisis.

Febres, quæ accedentes gravibus stipantur symptomatibus, intenso æstu, siti, virium & appe-
titus dejectione, nisi sint acutæ, sed notabiles fer-
vent remissiones, melius in principio specifica fe-
bris præsidia ipsunquæ chinæ corticem ferunt, ac illæ ex tertianis & quartanis, quæ lenius invadunt & lentius procedunt. In illis quippe expedit utique effrenes solidorum & fluidorum motus, roboran-
tibus & antispasmodicis moderari, vel plane seda-
re; in his vero languescente jam naturæ motu & ad removendam in viscerum infarctu & glandu-
larum obstructione repositam morbi causam non sufficiente, idem perficere oppido nocivum. Ego certe multis confirmatum habeo exemplis, longe melius antifebrilia propinari in tertianis legitimis; cholerica & juvenilia corpora graviorum symp-
tomatum insultu infestantibus, quam ubi segniora & phlegmaticæ constitutionis nothis implicantur. Nec infrequenter in illis fuit observatum, post Americani corticis usum, alvum fluxisse, sudorem largius manasse, pulsus intermissionis tempore cum virium incremento increbuisse, quin ipsum saliva-
lem laticem stillasse.

OBSERVATIO VII.

Prehendebatur verno tempore tertiana epide-
mica, vir quidam quadragenarius, laxioris habitus, qui militiæ deditus, tam propter effusum per cre-
briora vulnera sanguinem, quam ab usum vinorum Italico-
rum, corpus infirmum atque causarium red-
diderat. Advocabatur medicus, febremque arden-
tem & malignam, propter intensum ardorem & si-
tim, fore judicans, porrigebat alexipharmacum, ex spiritu cornu cervi & tinctura bezoardica. Sed in-
crescebat inde ardor cum siti & accedebat delirium plane, ut æger nudum etiam corpus in paroxysmo frigido subjiceret aëri, gelidamque largiter ingur-
gitaret aquam. Concedebat tamen febris in tertianæ intermittens typum, æstusque remittebat, debilitas autem insignis, magna ad sudorem procli-
vitas, & mira paroxysmorū anomalia succedebat. Discedebat tandem penitus febris tertiana, sed su-
dor cum tussi affligebat perpetua, & quotidie febrilis quædam, licet sine horrore & adeo notabili calo-
re, præsto erat commotio, ac præterea infra cordis scrobiculum, in media cartilagine ensiformi, tumor quidam prædurus eminebat. Conflictabatur cum hisce pathematibus per binos fere menses æger, ac interea à multis medicis exquirebat consilia, quorum quisque de affectu & medicatione pe-
culiarem promebat sententiam, uno febrem esse he-

*Exterius
abosce
muscu-
rum
minis.*

hecticam, altero tertianam duplicem, tertio hydropem, quarto glandularum omenti tumorem, affirmante. Errabant autem omnes. Increfcebat enim subinde tumor & exquisitus pungitivus cum ardore dolor jungebatur, & apostema potius intra musculos, non intra cavum abdominis, latitare conjiciebam. Rejctis discutientibus externis emplastris, solum diachylon simplex fuit admotum & super hoc positum cataplasma emolliens. Sic elapso triduo, attolli & mollescere coepit tumor, purisque subtus undulatio locum incisionis monstravit, qua quinto die facta, pus foetidissimum, ad tres minimum mensuras, paucis cruore intermixto, effluxit sensim. Inde mitior illico factus calor, somnus quietus redditus, & abscessu injectis balsamicis sensim ad consolidationem perducto, pristinam demum æger recepit sanitatem.

Epicrisis.

Sanguineum corpus apostemati concipiendo quam maxime est opportunum, ob succos in laxa fibrarum textura ex facili subsistentes. In hoc quidem, potus ille frigidus, sub paroxysmo copiose ingestus, cum improvida abdominis refrigeratione sub fervido calore, sanguinem & succos in musculis abdominis consistere fecerunt. Horum ex stasi enatum apostema, factus tumor & materia contenta computruit, quæ sanguini præterlabenti remixta, continuum lentum calorem cum languore induxit, & aperto apostemate, tam foetidum exspiravit odorem.

OBSERVATIO VIII.

Æstate qua varii generis febres circumibant, vir quadragenarius, post gravem iram, præcordiorum summas anxietates, cum vomendi conatu, incurrebat. Excipiebat hæc posteris diebus ictericus color, in oculi albo quam maxime conspicuus, nec non ferina tussis, noctu potissimum affligens somnumque interturbans. Nihilo minus, postulante sic, quo fungebatur, munere, iter suscipiebat, sub quo vero ob auram frigidiusculam & delicta, quæ committebat, diætetica, febrem nanciscebatur tertianam. Stipabatur hæc solitis pathematibus, major tamen in paroxysmo erat anxietas & inquietudo, urina saturate tincta, sine sedimento, æstus per viginti fere horas persistens, & tussis quoque, noctu præsertim & sub frigore, vehementior. Consulebatur medicus, qui propinabat emeticum, ex tribus tartari emetici granis, quo sexies pituitosus tantum bile leviter remixtus humor ejectus. Hoc facto dabatur electuarium ex radicibus alexipharmacis, pimpinella, gentiana, angelica, addita theriaca veteri & syrupo acetositis citri. Hinc vero mirum exasperabatur febris fereque reddebatur continua, somnus cum appetentia intercidebat & continuus sine frigore persistebat æstus, sub quo medicus ad sitim extinguendam Martisburgensem suadebat cerevisiam. Advocabar ego, & causam febris cum symptomatibus curatius expendens, rejectis, quæ à medico præscripta fuerant cunctis, contrariam plane medendi ingrediebar viam. Pro potu quippe suadebam decoctum avenaceum, idque etiam cum feminibus quatuor frigidis & papaveris albi in emulsionis formam redigere, & adjecta convenienti nitri portione, pro lubitu liberaliter ingerere præcipiebam. Pulverem dein absorbentem nitrosum, ex antimonio diaphoretico, lapidibus cancrorum, nitro & tartaro vitriolato, bis vel ter quotidie, in & extra paroxysmum sumendum, commendabam. Bis etiam quotidie liquor noster ano-

dynus mineralis ad guttas XX. in superiori decocto offerebatur. Redditis per hæc mitioribus cunctis, elapsis quinque diebus, electuarium antifebrile ex rob sambuci unciis duabus, corticis chinæ drachmis sex, syrupo acetositis citri unciis duabus, pulveris florum chamomillæ drachmis duabus, antimonii diaphoretici, extracti centaurii minoris, nitri, singulorum drachma, quovis bihorio ad drachmas duas, per quatrimum exhibitum. Quo ex toto cessavit febris, cum omni æstu ac siti, ferina tussis conquievit, urina, secus ac per totum morbi decursum, ex bruno-rubundo colore flavescens sedimentum dimisit, appetitus cum viribus rediit & flavus in facie & corporis superficie color successive disparuit. Denuo vero, ne ex ciborum ingluvie recidiva gigneretur, crebriorem pilularum balsamicarum & salis digestivi ex arcano duplicato, sale digestivo & sale tartari usum, cum abstinencia, serio injunxi, & sic æger, vitata simul omni refrigeratione corporis, animique commotione, quæ facile recidivam creare possunt, maxime si negligitur primarum viarum evacuatio, quæ demum septimo à febre die molienda, ad perfectam rediit sanitatem.

Epicrisis.

I. Hoc in ægro omnia primum in motu spastico excessivo fuerunt constituta, acris etiam subtilis materia potius in vitio fuit, quam crassioris & rudioris humoris moles, testantibus id origine febris ab ira, symptomatibus, ut tussis ferina, & ictertia, ex spasmo ductuum biliariorum. Perperam igitur à medico datum emeticum & electuarium calefaciens, quibus motus spastici cum intestino aucti & pathemata exacerbata. Ex usu potius fuissent motus complacantia & acrimoniam diluentia ac temperantia, cum iis, quæ per cutis poros subtiles sordes eliminant. Quod demum cum successu decocto diluente & humectante, pulveribus absorbentibus nitrosis & temperante diaphoretico electuario, à nobis confectum.

II. Magna omnino est cognatio inter subitanam ex spasmo ictericam, tussim ferinam convulsivam, & inter motum febrilem intermittentem, qui nostra sententia in spastica quadam universali vasorum & nervosarum partium systematis strictura consistit. Hinc etiam factum, ut iisdem remediis, terna hæc mala & symptomata omnia simul & semel funditus fuerint sublata.

OBSERVATIO IX.

Miles quidam robustus, postquam in coena ad satietatem usque ingessisset & noctu aëre nebuloso excubias egisset, præcedente horrore, nausea & conatu ad vomitum corripitur, subsequente æstu & anxietate. Redeunt hæc pathemata tertio die acerbiora, ideoque ad chirurgum properat, qui die vacuo primum dat emeticum, septem ante paroxysmum horis, quo strenue pituitam cum bile evomuit. Febrili die, tribus ante paroxysmum horis, idem morbi artifex piperis albi grana XV. stercoris muris grana X. & lapidum cancrorum drachmam dimidiam in aliquot cochlearibus spiritus vini porrigit, & jubet, ut desuper biberetur cerevisia probe calefacta. Miles lecto inclusus sudat inde fortiter, paroxysmus fugatur, & repetito aliquoties hoc remedio, cura feliciter absolvitur. Accidit vero haud ita multo post, ut juvenis cholericus, in iram pronus & liberaliter vini potui indulgens, tertianæ implicaretur. In consilio vocatur idem chirurgus & idem remedium exhibet, sed tam sinistro effectum, ut continua inde fere fieret

*Tertianæ
curata &
in conti-
nuum con-
versa uno
remedio.*

fieret febris, æstus augeretur, æger deliraret & de exquisito ardoris, quasi carbonis igniti, sensu, in scrobiculo cordis, conquereretur. Parata igitur emulsio ex aqua florum sambuci, tilia, papaveris rhœados, feminibus quatuor frigidis & papaveris albi, quæ tam sola, quam cum pulveribus absorbentibus & diaphoreticis, nitrosis, sumpta, ac demum adjunctus usus electuarii jam descripti, quem excepit liberalis alvi fluxus, tam salubri eventu, ut febris discederet, symptomata quiescerent & æger sanitatem reciperet.

Epicrisis.

Luculentum hoc exemplum est, non omnia omnibus prodesse. Nam si tertiana in corpus robustum, minus agile ac sensibile incidit, idque ob saburram in ventriculo & transpirationem impeditam; emetica quidem, & postea calidiora ante paroxysmum, eximie sunt utilitatis. Sed ubi corpus activum, & motus magis, quam qualitas & quantitas humorum peccat, contraria plane medendi methodus & sedantia adhibenda medicamenta. Et in ejusmodi quidem cholerica indolis ad iram pronis subjectis, singularis plane est ex China paratorum effectus, eo quod summa cum euphoria crebras & biliosas alvi dejectiones proritare solent.

OBSERVATIO X.

Ex tertiana ventriculi inflatio.

Sexagenarius robustus & plenus, sanguineophlegmaticus, calculi renalis doloribus ab aliquot annis subinde obnoxius, flatibus præterea & ructibus divexatus, nanciscebatur anno abhinc tertianam tum epidemiam. Post tertium paroxysmum, molestiarum pertæsus, à medico ut febrem abigeret, poscit. Paret hic, & electuario, ex rob juniperi, cortice chinae & syrupo acetositis citri, post sex dies, febrem ex voto, uti videbatur, profligat. Sed sequitur postea inflatio ventriculi, cum ructibus & borborygmis ventris, præsertim post pastum & alimenta gravis materiae. His jactatus æger meo ex consilio usus est mane pilulis balsamicis & vesperi pulvere salino aperitivo, ex arcano duplicato, sale Sedlicensi & cancrorum lapidibus, per sex dies, & postea ante prandium essentia carminativa Wedelii, cum æquali parte spiritus nitri dulcis remixta, felici cum successu. Quum vero elapsis vix quatuordecim diebus medicamenta rejiceret, eadem à flatibus & ructibus expertus est incommoda, eaque propter ad priora medicamina confugit, succedente ex voto effectu.

Epicrisis.

Quando tertiana corpus impurum, succis repletum & chronicis passionibus jam affectumprehendit, in medicinam cedit, motu intestino & progressivo auctiori obstructions referando, viscidos humores attenuando & sordes subtiles difflando. Quando vero cito nimis specificis compescitur, noxia materia remanens & deterior reddita, in disposito jam corpore, flatulentias creat malumque exacerbat. Et licet opposita his pathematibus præsidia leniter educendo vitiosam materiam ac tonum ventriculi & intestinorum roborando, egregie profuerint; expertus tamen scribo: non facile ejusmodi pathemata cessare, nisi aquæ minerales, præsertim Carolinae thermæ, in auxilium vocentur, ac vere, vel æstate debito cum regimine usurpentur.

OBSERVATIO XI.

Tertiana in senectute.

Superiori vere, quo tertianæ erant admodum frequentes, vocabar ad septuagenarium vegetum

adhuc & strictioris corporis habitus, qui eodem decumbebat morbo, & adhibitis licet pulveribus digestivis salinis, elixiriis amaris, pilulis etiam polychrestis, decimum quartum jam paroxysmum erat passus. Percontatus de omnibus, vires quidem prostratas, stomachum mire languentem & fastidientem & urinam sine sedimento esse, comperio, habitum tamen corporis expendens & pulsum in paroxysmo plenum adhuc & fortem offendens, electuarius offerre non dubitavi. Sumtum illud bihorio quovis ad drachmas duas, bibendo postea aliquot cochlearia vini, auspicato cum effectu, ita, ut subsequens illico paroxysmus mitior longe esset, nec nausea, nec capitis dolore, neque anxietate, ut antea, stiparetur, secundus vero penitus emaneret, urina crassa mingeretur, vires redirent & æger optime convalesceret. Ne autem recidiva accideret, ut eodem electuario, parcius tamen, adhuc uteretur, elapsis septem diebus, bis pilulas balsamicas cum sale aperitivo deglutiret, ingluviem ciborum & seria negotia vitaret, temperate calidum potum assumeret & corpus ab omni refrigeratione sollicitè defenderet, serio præcepi.

Epicrisis.

Chinae cortex non tam nocens est, ut vulgo creditur, sed ipsis etiam senibus cum fructu datur: Neque etiam sine exceptione illa practica est regula: quod nunquam sit offerendus, antequam urina compareat cocta. Ego enim multiplicitate compertum habeo experientia, nunquam ipsum nocuisse, si primæ viæ prius probe expurgatæ, si corpus non impuris succis scater, viscera sanguinea integra, & nullus inflammationis internæ metus. Multo magis innocens hujus corticis & salutaris effectus, in agro activæ indolis, fibrosi & amplioribus vasis instructi habitus. Longe præsentior etiam expertus sum ipsius efficaciam in corpore quodammodo jam per febrem debilitato fibrumque tono remissiori, ac si vires adhuc vegetæ & motuum vigor, nisi forsan expectationem interdican circumstantiæ.

OBSERVATIO XII.

Rari sunt in thermis Carolinis diu febricitantes. Simul ac enim febris impetit, intercalari die largiter ingerunt aquas thermales, quæ primas vias efficaciter deplent, sudorem etiam & urinam liberaliter eliciunt. Si post quintum paroxysmum febris non discedit, corticem Peruvianum die vacuo adhibent, vel in electuarii forma, vel decocto, hunc in modum: recipe corticis chinae unciam, radicis gentianæ rubræ unciam semis, herbæ cardui benedicti manipulum, centaurii minoris tantundem, vini Gallici mensuram; coque leni calore, cola & adde syrupi menthæ unciam, M. de quo tribus quibusvis horis extra paroxysmum duas uncias bibunt, sorbillando mane in lecto infusum theiforme & sudorem eliciendo. Sic feliciter ut plurimum ex toto febrem percurant. Mihi ansam hoc dedit, ut eadem methodo subinde uterem, & surrogata Carolinis Sedlicensi aqua, purgationem ventris molirer, & posteam decoctum illud præberem, auspicato pariter successu in tertiana & quartana, præsertim æstiva ac vernali.

Epicrisis.

Compendiosa & facilis est hæc intermittentes curandi methodus, solennis non modo in Carolinis, sed & iis locis, ubi acidulæ purgantes saliant. Nec male medentes eidem viæ insistant & primas vias crudis & biliosis sordibus obfusas salibus deplent. Salia enim reliqua ex regno vegetabili purgantia securitate & prompta efficacia longe

Tertiana cito curata in Carolinis.

longe superant. Tanto vero magis proficua sunt, quando in sufficienti quantitate humidi soluta assumuntur. Hinc si copia non est aquae ejusmodi medicatae, ego ad imitationem ipsius aquam paro laxantem, adjiciens uni aquae mensurae olei tartari per deliquium unciam dimidiam & in lagenâ angustî orificiî instillans eo usque spiritum vitrioli, donec nulla amplius eveniat ebullitio. Vel dissolvo in mensura aquae unciam semis salis polychrestî, ex sulphure & nitro calcinatis confecti. Usurpato aliquoties liquore hoc salino, descendo tandem perquam secure ad specifica roborantia, quae inter primas tenent, cortex chinæ, cascarillæ, tamarisci & omnia amara & ex marte rite parata.

OBSERVATIO XIII.

tertiana a puero in china et cinamomo.
Puer facie florens, indole vividus, complexionis sanguineus, à biennio aliquoties hæmorrhoidarius, cum abdomine tumido, ceterum valens, post æquinoctium autumnale, tertianam, quo ex diætetico errore nescio, incurrit, eademque ob paroxysmi vehementiam, stomachum penitus languentem somnumque turbatum, graviter decubuit, urina simul clara & sine sedimento comparente. Excepit hanc medicus aperientibus, cudos succos corrigentibus tutissimisque febrifugis. Sed quum decem paroxysmos passus esset æger, parentes percarum natum vitæ discrimen subire metuentes, inconsulto medico ab empirico quodam potius quam medico opem quæsiverunt, qui electuarium, cujus basis tormentillæ radix, prompte porrexit, ac ut tribus singulis horis, intercalari die, dosi castaneæ magnitudine deglutiretur, præcepit. Mitior inde facta febris, sed continuato aliquamdiu adhuc pharmaco, paroxysmî tempore, tremor ac frigus totum concussit corpus, cum collisione dentium & labiorum, sequuta mox convulsio epileptica universalis, per viginti horas, frustra datis omnibus antepilepticis, persistens, ægro sub ipsa extincto.

Epicrisis.

Ego quidem permultis confirmatum habeo exemplis, hæmorrhoides in infantibus ac pueris jam prodeuntes, accedentibus pubertatis, vel juventutis annis, raro alium quam sinistrum ac ut plurimum funestum sortiri eventum. Ipsum hoc enim ataxiam motus circulatorii in visceribus abdominis prodit, ex qua facile labem & vitium contrahere possunt. Neque ea propter dubium est quin hoc in puero, infimi ventris viscera, hepar, lien, vel pancreas, fuerint farta & obstructa. Motus autem febriles præsidio potius fuissent, imprimis quum intermittentes per annum sæpe infantes detineant, modo medicatio rite instituatur, nec tamen adeo sint detrimento, ut potius corpus firment & longævum efficiant. Perperam igitur adstringentibus salutes hi motus sedati & causa febris altius visceribus impacta, spasmi quoque tam ex hæreditate à matre hysterica, quam ex ipsa febre jam præsentis, & ex alvi strictura, ac limpida urina cognoscendi satis, ita adaucti, ut in convulsivos plane degenerarint funestos. Memoratu etiam dignum videtur, quod hic puer, multos annos insolita voracitate laboravit.

Has practico-clinicas de tertiana observationes hic adduxisse sufficiat, plures passim reliquis meis scriptis inserui, & quidem uberius enarratas ac evolutas, *Medicinæ consultatoriæ*, ex qua hanc in rem conferri poterunt ea, quæ *Tom. II. Sect. IV. cap. CLXXVII. usque ad CLXXX. attuli.*

CAPUT II.

De Febre Quartana.

§. I.

Tertianam, & gravitate, & contumacia, ex *Quartana quid?* intermittentibus longe adhuc superat ea, quæ quarto quovis die, intercalaribus integris binis, corripit, eamque ob causam vocatur quartana.

§. II.

Scilicet, post meridiem ut plurimum, hora *Paroxysmi historia.* quarta, aut quinta, quandoque etiam citius, quandoque serius, cum notabili corporis languore, pandicatione, capitis, dorfi, lumborum ac tibiarum contusivo dolore, accedit. Pedes hinc cum manibus refrigescunt, corpus universum pallescit, facies & ungues livefcunt, supervenit horror & rigor, huic febrî familiaris, lingua & labia tremunt, spiritus difficulter trahitur, præcordia anguntur, corpus inquietudine jactatur & pulsus arteriarum contractus ac durus, quandoque etiam inæqualis plane percipitur. Durant hæc omnia per duas plerumque, aut tres horas, ac interea alvus in plurimis stringitur, in nonnullis ad desidendum & mendum stimulus, in quibusdam, potissimum senibus, conatus ad vomendum, vomitus & alvi secessus. Multis etiam, inprimis ætate gravioribus, caput mirum turbatur & mens sibi non constat, ut aliena multa loquantur. Succedit lento postea gressu calor, non adeo urens, sed ariditate quammaxime molestus, evanescit rigor, arteriarum ictus ad æqualitatem redeunt, celerioresque ac majores micant, capitis tamen obtusus dolor perstat, cum vertiginosa affectione, & cutis demum pauca saltem humiditate perfunditur, donec elapsis quatuor vel sex horis, & æstus, & pathemata hæc discedant. Cessante sic febris impetu, duobus qui vacui sequuntur diebus, æger quidem constanter fere lectum relinquit, restitat tamen sensus quidam doloris in artubus ac pedibus, ipsa ossa quasi tundens atque profundo pondere obterens, osteocopus græco nomine dictus, caput quoque in quamplurimis grave est & animum fastidium tenet, urina, quæ in paroxysmo tenuis reddita & aquosa, nunc crassa & cum sedimento secedente.

§. III.

Hæc quæ sub paroxysmi impetu subinde obveniunt pathemata, uberius utique testantur, gravissime nervosarum partium systema in universò corpore pati & spasticis constrictionibus agitari. Eamque ob causam immediata & proxima hujus febris causa constituenda omnino in universali & vehementi spastica nervosarum partium strictura, quæ ex spinali medulla potissimum procedens, non modo tunicas vasorum, sed & totum nervorum ac fibrarum systema, præter naturam afficit, ut motus solidorum & fluidorum inde graviter turbentur.

§. IV.

Materialem vero causam, quæ nervosas partes *Materia lis.* in tam exorbitantes motus abripit, veteres quidem humorem melancholicum extra vasa putrescentem esse voluerunt; sed sicuti in omni febre, sic etiam in quartana, subest materia activæ indolis & caustica acrimonia imbuta, internas sensu exquisito pollentes partes ad spasticas crispaturas sollicitans. Quia tamen ex pancreate ei nupta est materia, quæ ad acido-viscidam indolem accedit, diu-

diuturniores dat inducias, nec tam cito colligitur, nec ad membranas spinalis medullæ ex prima regione tam cito appellitur. Quando vero sufficienti quantitate collecta in primarum viarum latibulo, massam sanguinis successive subiit, & certo interposito tempore, ad spinæ dorsi membranas delata, febriles eodem suscitatur motus, quos præcedenti capite de tertiana enumeravimus.

§. V.

Antecedens.

Jam si porro hujus materiæ febrilis natales rimamur, hæ utique primario arcessendæ ex tardo admodum sanguinis, per viscera abdominis depuratoria & secretoria, hepar præsertim, lienem & pancreas, progressu, horumque tandem succedente infarctu & obstructione. Hoc enim facto, humores fermentales, gastrici, lymphatici, salivales, à temperata, subtili, spirituosa indole desciscunt, ac fixam & acidam induunt, ut ad intimam ciborum dissolutionem & chyli extractionem minus sint idonei, sed cruditatum acidarum & viscidarum ingens fiat proventus. Quibus ipsa mora pejorem indolem contrahentibus, & ab accidentibus aliis externis causis acrimoniam induentibus, ipsa demum excluditur febris.

§. VI.

Impeditus humorum per viscera progressus.

Videlicet languidiorem sanguinis per abdominis vasa cursum in causa esse, ex eo patet, quod huic febri quam maxime opportuna sint corpora consistentis & provectioris ætatis, melancholici temperamenti, & quæ, vita sedentaria nimia, intermissa sanguinis missione, victu duro insalubri, nimioque acidorum & spirituosorum usu, vel etiam solennium criticarum sanguinis evacuationum suppressione, nec non animi affectuum intemperantia, succorum incurrerunt & abundantiam, & spissitudinem ac impuritatem. Causticam vero simul etiam subesse materiæ indolem nemo negabit, qui novit, quartanam post exclusas sub æstate fervente acres sordes plerumque autumnio prodire, per scabiem quandoque & purpuram solvi, iisdem repulsis impetere, variolis erumpentibus discedere, ex tertiana gigni, in tertianam quoque transire, & eodem modo ac tertianam in locis paludosis, aëre acrium recrementorum copia referto, frequentem admodum esse ac epidemiam.

§. VII.

Quartana simplex est vel duplex.

Sic quidem generata febris quartana varium subinde exhibet genium. Quandoque scilicet simplex est, quandoque duplex. Simplex, ea, ut jam delineavimus, incedit facie. Duplex vero tum dicitur, quando intra quatrimum bini succedentes accedunt paroxysmi, ita quidem, ut uterque peculiarem suum fervet typum, & singulare accessionis tempus, alternatim semper præcedenti insultui respondens, tertio duntaxat die à febre penitus vacuo. Id quod sæpius evenit, quando simplex quartana perversa medicatione excipitur, aut in vitæ, vel victus regimine, committitur error.

§. VIII.

Legitima vel notha.

Legitima dein observatur esse, vel notha. Illa exactius, quam ullum aliud febrium genus recursus terminum servat, tempore scilicet pomeridiano. In hac contra certum non est reditus tempus, plerumque tamen ante meridiem, æstus quoque impensior, ipsoque frigore gravior urget.

§. IX.

Continua.

Non nunquam porro quarto quidem quovis die, præviis ut plurimum pandiculationibus & horripilatione, repetit, statum tamen terminum non adeo exquisitè servat, nec deservescere impetu penitus intermittit, sed diebus in simplici intercalaribus, mitius tantum, quam febrili, affligit; calor naturali

intensior adhuc adest, pulsus magis auctus, appetitus languet, vires prostratæ sunt, os siccum, caput temulentum, somnus inquietus, & urina rubicunda, crassior, cum sedimento roseo mingitur, eamque ob causam à medicis quartana appellatur continua.

§. X.

Ut plurimum populares habet circuitus & epidemia est, tum maxime, quando æstas præcessit præter consuetudinem calida & sicca, eaque propter acria & multa biliosa recrementa in corpore genita. Id quod anno cdo 1061. *Sennertus de febr. lib. II. cap. 20.* nec non anno cdo 1061. *Bartholinus cent. I. hist. anat. 95.* contigisse, memorant, & nosmetipsi de annis cdo 1061. *Bartholinus cent. I. hist. anat. 95.* multiplici experientia edocti testamur. Et quia ob æstum nimium potus frigidus sæpe acescens ingeritur, & noctu frigus accedit, perspiratio sordium acrium impeditur, & humores cum sanguine spissi evadunt.

§. XI.

Nonnullas regiones & tractus endemia lues infestat: nimirum in Westphalia, Pomerania locisque, quæ ad boream vergunt, & incolas alunt, victu duriori, crassiori & crudiori utentes, nullus fere elabitur autumnus, quo non multi quartana prehendantur ac diu admodum eadem detineantur. Idem evenit in locis paludosis, stagnorum & lacuum pravis exhalationibus infestis, in quibus vere, tertianæ, autumnio quartanæ, largo provenitu pullulare & crebro recrudescere solent.

§. XII.

Varium etiam quartanæ exhibere solent genium, pro diversitate corporum, quæ corripunt. Nimirum si incidunt in corpus, quod, ob vitam sedentariam victumque crassum & durum, copiosum & crassum sanguinem in venis alit, vel quod hypochondria male constituta habet, aut diuturniori animi mœrori indulsit, tum graves & contumaces esse suefcunt, nec periculo vacant, eaque propter in ægrotante exquisitum victus ac vivendi moderamen; in medente autem magnum in exhibendis remediis poscunt judicium. Ubi cacochymica dispositio & purpuræ forsan materia simul subest, pathematibus longe acerbioribus incedunt, major virium est prostratio, vigilia, mentis alienatio, præcordiorum anxietas ac purpura demum erumpit, qua, levi ex causa retrocedente, febriles passionibus crescunt, graviusque affligunt.

§. XIII.

In subiecto, viribus per senium, valetudinem, pravam vitæ rationem, aut animi pathemata exhausto, facile in continuam transit, quæ ex languore virium post paroxysmum, pulsu frequenti, lento calore & appetentia prostrata, cognoscitur, ægrumque in haud leve discrimen adducit. Quando post intensiorem ætatis fervorem, corpus juvenile & agile invadit, proximus longius perdurat, æstus urens magis in liberalem solvitur sudorem, sitis quoque & stomachi languor impensius urgent. Infantes & pueri, quia ægre medicamenta sumunt, nec diætetis præceptis obtemperant, noctu, removendo stragula, corpus refrigerant, & præterea habitum corporis laxum, ad sufflaminandum perspirationis successum, nec non ventriculum, ad colligendam cruditatum saburram aptum, obtinent, diutius hac cum febre conflictantur, crebriores in recidivas incidunt, aut aliis postea morbis patent.

§. XIV.

Interim quartana hæc febris placida admodum est atque secunda, nec facile jugulare solet. Sin secus evenit, corpus aut senile fuit, & viribus jam exhaustum, aut tenerum nimis, epilepticis insul-

insultibus obnoxium, aut ipsa febris, intercurrentibus animi pathematibus, tam suscitata quam exacerbata fuit, aut etiam, vel medentis, vel ægrotantis accessit delictum, quo in quotidianam, aut longum alium funestum morbum fuit transmutata.

§. XV.

Gravitate tamen & contumacia securiorem decursum compensat. Diu enim trahi, ac sæpius, ceu verum medicorum scandalum, omnia eludere solet remedia. Evenit hoc maxime in ea, quæ autumnio oboritur, per hyemem persistens: raro admodum prius discedit, quam solstitii vernalis tempore, quo poris adaperitis succisque ob aëris serenitatem tenuioribus factis, sponte fere evanescit. Rebells etiam maxime est, quando in visceribus, præsertim hepate, liene & pancreate, vitium altius radices egit, vel tota humorum massa spurca & impura, vel etiam systema nervorum admodum debile ac ad anomalos ejusmodi motus, & concipiendos, & fovendos, dispositum & tanto magis, quando æger voracitate materiam febris colligit semper & auget.

§. XVI.

Contra si vernali, vel æstivo tempore incidit quartana, facilis & explicita ipsius curatio est, quia aëris temperies & tenuitas multum medicationi velificatur. Quæ etiam ex inordinata diæta & cruditatibus in prima regione collectis, integris autem visceribus, aut quæ ex valde prohibita transpiratione succrescit, ex facili, vel unico sæpe vomitorio, vel diaphoretico, ante accessionem dato, discutitur. Et illa pariter, quæ juvenile & viribus pollens corpus detinet, præsertim si bilis plus, quam humor tenax, acidus peccat, ut potissimum fit in epidemicis æstate grassantibus, nisi ægri vel medentis culpa ingravescat, ex facili medicationem admittit.

§. XVII.

Neque etiam quartana anomala, quæ typum non servat, incerto tempore redit, aut ex simplici in duplicem concedit, adeo est pertimescenda, uti quidem vulgo censent. Ipsum hoc enim indicio est, succos vitiosos non tam lentos & visceribus alte impactos, sed ad emotionem adhuc promptos esse, naturam quoque vegetam in amolienda, quæ morbum facit, materia. Ne dicam, paroxysmos rite decurrentes, multum facere ad dissolvendos viscidos & discutiendos subsistentes humores, adeoque, quo crebrius recurrunt, eo citius causa febris eliditur, & natura ministrante, curatio paucis congruis perficitur.

§. XVIII.

Licet quartana solenniter nullam criticam fervet excretionem, fit tamen quandoque, ut erumpentibus pustulis, maculis, ulcusculis & scabie per universum corpus diffusa, nec non prodeunte hæmorrhoidum fluxu, feliciter solvatur. Vidi quoque in infantibus eam cum auspiciato successu defuisse in variolas: & de gravidis compertum habeo, quod quartanam non prius evaserint, quam superato partu, infante vero eadem affecto.

XIX.

Quin præsidio quandoque est hæc febris & adversus alios, præsertim chronicos morbos, remedio. Auctus enim ille sub impetu solidorum & fluidorum motus lentos succos circumagendo attenuat, latibulis suis elidit & ad veteres obstructions, quæ in minimis vasculis, glandulis & nervosis partibus altius consistunt, expediendas & excutiendas multum confert. Hinc præsci jam

Frid. Hoffmanni Oper. Tom. II.

medicinæ principes, *Hippocrates*, *Asclepiades*, *Galenus* & *Celsus*, se quartana remedio uti, affirmarunt. Et certe ad expugnanda hypochondriaca pathemata spectata ipsius est virtus, quam etiam in epilepsia & convulsivis motibus mire deprædicat *Hippocrates lib. VI. epid.* Ab asthma quoque convulsivo, item calculo, podagra, si feliciter decurrit & prudenter à medico dirigitur, quartanam liberasse historiæ loquuntur. Dumque corpus ab inhærentibus viscerum vitiis liberat, post discessum suum illud mirifice firmat, ut non tam facile morbis pateat, aut pristinis attentetur denuo, uti experientia suffragante ex *Platone* jam habet *Gellius noct. Att. lib. XVII. cap. XII.* Et nos plures novimus, qui post quartanam longævitate nacti fuere. Quo magis admiranda hinc DEI providentia est, quæ ipsis etiam morbis plane incomparabilem & medicinalem virtutem tribuit.

§. XX.

Sed ubi longius quam par est extrahitur morbus, succi concipiunt dyscrasiam, & si humores tenues ac biliosi sunt, purpura excluditur, vel partibus spirituosus, roscidis, nutritiis diffilatis, lentescunt reliqui, corrumpuntur & longos morbos invehunt. Si etiam perversa medicatione excipitur, in graves & capitales degenerat passiones, cujus generis sunt maxime hydrops, anasarca & ascites, cachexia scorbutica, tumores oedematosi, febris lenta & hæctica continua, asthma ficcum, icterus, tussis ferina, in senibus affectus comatosi & hemiplexia, in junioribus affectio hypochondriaca & in infantibus sævi convulsivi motus, spinam dorsæ, antrorsum & retrorsum miseranda facie distorquentes. Et in his quidem omnibus conspicuum post mortem deprehenditur viscerum vitium, hepatis nempe, lienis, pancreatis, nec non glandularum mesaraicarum, obstructio, infarctus & corruptio.

§. XXI.

Qui vero quartana febre intereunt, sub frigoris rigore & mente turbata decedunt. Tum enim, qualia duo exempla vidi, in adultioribus adeo increfcit spasmorum atrocitas, ut nullus plane subsequatur æstus, sed symptomata veneni prorsus æmula adsint, demumque interimant. Et in infantibus, spastica stricturæ in convulsivos plane motus degenerant funestos.

§. XXII.

Qui demum evadunt, habent utique, ut in vitæ victusque ratione exactum servant postea per aliquod tempus moderamen: refractaria enim admodum est hæc febris, pristinamque sedem, data levi occasione, ex facili repetit. Sane qui superata ipsa gulæ indulgent corpusque extenuatum largo, tanto magis insalubri cibo, fardire nituntur, promptissime recidivam, ex congesta denuo cruditate saburra, incurrunt. Idem experiuntur, qui saluberrimam illam per cutis spiracula excretionem pensi habent, & corpus aëri frigidiori & humidiori incautius committunt, vel frigidum potum ingerunt. Neque minus ex facili iteratoprehendit eos, qui affectuum intemperantia jactantur, ac imprimis impenfiori tristitiæ diutius indulgent. Et, quod tamen rarius est, repulsa præpostere, quæ ad habitum corporis cum salute acta fuerat, & per scabiem, pustulas, ulcera & purpuram expulsa, materia, illico impetit denuo, qui sedatus fuerat, inde febris impetus.

Sed diuturna.

perperam excepta morbos facit graves.

Quibusdam funesta est.

facile recidivat.

METHODUS MEDENDI GENERALIS
CUM INDICATIONIBUS
CURATORIIS.

§. I.

Indicationes
quatuor.

Quo pacto intermittens febris sit arcenda, superiori capite sub methodo præservatoria tam fufe exposui, ut supervacaneum ducam illud hoc loco iterum tradere. Indicationes autem curatoriae causis quartanæ oppositæ, huc redeunt. I. Ut cruditates viscidæ, acidæ, biliosæ ex primis viis, cum chylo & lymphâ successive ad sanguinem abeuntes ac in nervosarum partium systemate febriles motus fuscitantes, & corrigantur, & per congrua emunctoria evacuentur. II. Ut sanguinis per abdominis viscera, præsertim ad quæ vena portæ excurrit, progressus liber præstetur; congestio vero, infarctus & obstructio expediat, vel minimum major impediatur. III. Ut spastica vehementior in genere nervoso constrictio, ceu acerbiorum symptomatum causa, leniatur. Et IV. ut dejectum viscerum, stomachi nervosarumque partium robur restituatur, sicque tum ulterior accessio, tum recidiva, præscindatur.

§. II.

Prima perficienda
temperantibus,
incidentibus
& vanantibus.

Primæ igitur indicationi exsequendæ serviunt ea remedia omnia, quæ acidum obtundendi, lentos succos incidendi, acres contemperandi, & primam maxime regionem expurgandi facultate pollent. Splendent autem hac virtute alcalina pharmaca, uti sunt salia plantarum per incinerationem parata, sal potissimum absynthii & cardui benedicti. Commendanda etiam salia neutra, maxime sal ammoniacum depuratum, terra foliata tartari, sal digestivum Sylvii. Quibus ad biliosam acrimoniam infringendam, addenda absorbentia teneriora, cancrorum lapides, conchæ, vel cornu cervi sine igne paratum. Et si præterea educendi scopus, salia fontium medicatorum, Egranum, Ebshamense, Sedlicense, aucta dosi, aut ipsa etiam aqua Sedlicensis, per alvum crassiores, tartarea vero, per urinarias vias subtiliores salinofulphureas sordes, efficaciter evehunt. Habet etiam purgantem facultatem in quartanariis magnesia alba, quæ acidum primarum viarum imbibendo, transit in sal amarum, sali cathartico Ebshamensi simile.

§. III.

Secunda
amaris.

Ad obtinendum secundæ indicationis scopum, egregie faciunt amara, quæ balsamico suo fixiori sulphure bilis balsamum restituunt, acidos simul ponticosque humores obtundunt, & lenem quandam spirituaſcentiam succis conciliant. Talia sunt extracta amara, fumarie, absynthii, cardui benedicti, gentianæ rubræ, trifolii fibrini, centaurii minoris, essentia, vel extractum rhabarbari, nec non pilulæ balsamicæ, secundum exemplar *Beccheri* confectæ, ex aloë bene depurata, extractis amaris & gummatibus resinosis balsamicis temperatis, quæ præter facultatem alvum laxantem, etiam attenuantem lentos & spissos succos obtinent, præsertim si earum usus supra laudatis salibus interponatur. Pertinet huc quoque conveniens cum debito regimine thermarum & acidularum usus. Sin vero inveterata nimis obstructio viscerum, præsertim pancreatis, quod in quartana rebelli non insons est, lenioribus expugnari nequit, in usum vocanda penetrantiora magisque activa mineralis prosapiæ pharmaca, mercurius quippe dulcis, vel nostra methodo diaphoreticus solaris, nec non antiquarium *Riverii*, quod ex

Et mineralibus.

mercurio, antimonio & auro, desuper abstracta aliquoties aqua regia & postea spiritu vini accenso, paratur. Ex antimonialibus, regulus antimonii medicinalis, panacea Glauberiana & Conerdingiana, item sulphur nostrum antimonii correctum, sine præcipitatione cum acido confectum.

§. IV.

Spasticas generis nervosi stricturas remittunt I. linimenta antispasmodica & nervina, spinali medullæ cum frictione calida admota, ex axungia humana, oleo spicæ, lavendulæ, rutæ, salviæ, balsamo Peruviano; II. clysteres ex herbis nervinis, carminativis & antispasmodicis, addita sufficienti quantitate oleorum demulcentium, parati; III. balnea aquæ dulcis, veteribus inprimis ante paroxysmi accessionem usitata: IV. epithemata & linimenta ex spirituosos & aromaticis parata, sub horrore & rigore regioni epigastricæ apposita.

§. V.

Ultimæ demum indicationi apprime satisfaciunt omnia amara, quæ simul balsamica quadam adstrictiva virtute pollent. Nobiles hac virtute sunt chinæ & chaccarillæ cortices, nec non cortex capparum, item tamarisci, cinnamomi, rasura fantali rubri & essentiæ ex amaris plantis extractæ, quæ cum liquore martiali acuata, omnibus fere palmam præripiunt. Instar omnium vero erit electuarium nostrum antifebrile, cujus descriptionem superiori jam capite suppeditavimus.

§. VI.

Peculiaris etiam virtutis adversus quartanam habentur emplastra carpis manuum applicata, quæ inter famigeratissimum est à *Strobelbergero* dictum. Concinnari autem possunt ex iis, quæ tam aromatico balsamico, quam irritante principio, motum & stimulum fibris addunt, ut materiam altius partibus nervosis impactam hærentem excutiant, & promptius die vacuo sanguis circumagatur.

§. VII.

Præter ea vero quæ hætenus adduxi quartanæ præsidia, non possum, quin bina subjungam adhuc remedia, quæ miram efficaciam mihi olim in Westphalia præstiterunt, propter quam etiam eadem jam *dissertationi de felici quartanæ curatione*, inserui. Primum est infusum vinosum, omnibus curatorii indicationibus satisfaciens, de quo matutino tempore quotidie liberalis haustus sumendus. Recipe fibrarum hellebori nigri, polypodii querni, foliorum sennæ sine stipitibus singulorum unciam, herbæ absynthii, centaurii minoris, cardui benedicti, trifolii fibrini, ana manipulum dimidium, rasuræ ligni colubri, corticis chinæ, aurantium recentium ana drachmas tres, limaturæ martis unciam semis, tartari tartarificati tantundem. Conc. cont. irrorentur drachmis duabus spiritus salis ammoniaci urinosi, misceantur & duabus vini mensuris infundantur.

§. VIII.

Alterum hic est pulvis: Recipe corticis chinæ drachmas tres, reguli antimonii medicinalis drachmas duas, mercurii dulcis, (qui non terendus cum pulvere propter salia, sed cuspe tantum cultelli miscendus) croci martis tenuissimi, arcani duplicati, singulorum drachmam, olei menthæ guttas quatuor. M. f. pulvis, cujus drachma dimidia, aut una, cum rob sambuci & julepo rosarum in electuarii formam redacta, mane & vespere poterit assumi. Et certe egregii usus est hic pulvis in quartana, quæ altas in viscerum penetralibus egit radices, requirit tamen corpus paullo robustius, cum exacto

Tertia
nimis.

Clysteribus,
balneis.

Epithematis.

Quarta
maris
strictura.

Epicarp
discutitibus.

Potissimum
stabile
nosum
fusum.

Et pulvis
resolve
ac robustans.

in diæta & vitæ ratione regimine. Licet etiam molestam quandoque lenem moverit salivationem; ex voto tamen cessit, febrisque rebellis fuit expugnata. Cæterum plura de speciali huic febri medendi methodo, infra observatione X. nec non *capite IV. de febribus epidemicis*, afferemus.

OBSERVATIONES ET CAUTELÆ CLINICÆ.

§. I.

Quartana
contumax
morbus.

Quartana, ex morbis fere contumacissimus, ægri patientiam & medici expectationem poscit: imprimis ea, quæ corpori melancholicæ constitutionis, senibus, hypochondriacis & ubi languidior sanguinis per venas mesaraicas progressus, viscera infarcta & autumnus adultus, accidit. Non itaque impetuose in his aggredienda, aut violentis pharmacis urgenda curatio. Si secus fit, plus detrimenti, quam emolumenti sperandum.

§. II.

Senioribus
ammonetur.

In principio quidem morbi, natura si robusta, validiora resolvendi & colliquandi atque evacuandi virtute pollentia locum inveniunt. Ubi vero morbus inveteravit, corpus tenerum & exquisite sentiens, multaue acria & biliosa recrementa præsto sunt, mirum inde exacerbatur febris, & haud raro ex simplici in duplicem, aut quotidianam plane transit. Temperata potius, plus diætica, quam pharmaceutica, cum iis quæ lenimento sunt generi nervoso, infestis spasmodis jam affecto, in usum vocanda.

§. III.

Et quan-
toque fu-
atur.

Neque enim adeo refractaria est quartana omnis, ut non sæpius lenissimis cedat. Ego certe plures novi, qui solo usu elixirii temperati balsamici, quod cum aqueo lixivio ex amaris extractis & rhabbaro, adjecto vino Hungarico, paratum, ex eadem feliciter evaserunt. Alii solo oleo tartari per deliquium, frequentius cum potu assumpto & hausto ante paroxysmum vino veteri Rhenano, cum, vel sine amaris, subjuncto postea vehementiori corporis motu, ab eadem sunt liberati. Nonnulli balneorum aquæ dulcis usu quotidiano, instituta simul ante accessionem corporis ad sudorem usque exercitatione, curati sunt.

§. IV.

Facilius
sub cali-
dore sa-
natur.

Semper tamen longe facilius atque felicius quartanæ curatio succedit, si cælum eidem velificatur, & aer purior, subtilior & rarefactus est, uti tempore verno, æstivoque sereno. Tum quippe veteres viscerum obstructions promptius expediuntur, lentorque succorum liquatur, & perspiratione æquabili atque constanti, acres per apertos cutis poros sordes diffantur. Quin novi quosdam, qui non prius convaluerunt, quam mutato cælo & in locum salubriorem secessu, vel alio vitæ victusque genere instituto.

§. V.

Potus mu-
tationem
oscit.

Potissimum in quartana febre, sicut omnibus longis morbis, ut potus mutetur ex usu est, & decoctum ex radice sarsaparillæ, cichorei, herba cardui benedicti, passulis minoribus & semine fœniculi, tam loco cerevisiæ frigidum, quam loco infusi thee calidum bibatur, declinante paroxysmo. Conducibiles quoque sunt pro potu temperatæ acidulæ, uti Selteranæ, quippe quæ cum dimidia, aut tertia vini parte potæ, in diluendis crassis & evehendis per urinarios ductus impuris succis, effectum præstant saluberrimum.

Frid. Hoffmanni Oper. Tom. II.

§. VI.

Studiose etiam providendum, ut per cutis poros acres subtiles sordes perpetuo eliminentur. Perficiendum hoc tam ante, quam post paroxysmum, ^{Nec non perspirationis successum ante} & obtinendum, non per potentia sudorifera, sed ea, quæ solidorum tonum intendendo, progressum sanguinis accelerant sicque sudorem eliciunt. Singularis hunc in finem virtutis est validior corporis motus, per equitationem, saltationem, aut ambulationem, aliquot ante paroxysmum horis institutus, quo ego quartanam multoties discussam esse novi. Priscum enim jam *Celsi lib. III. c. 15.* hoc est præceptum: *quo die quis febrem expectat, ante surgere & exercere dareque operam oportet, ut in ipsam exercitationem tempus febris incurrat. Sic enim sæpe illa discutitur.* Mira etiam hac in re virtus mixturæ innumeris experimentis comprobatae hujus: recipe aquæ cardui benedicti uncias quatuor, theriacalis unciam semis, salis cardui benedicti drachmam, antimonii diaphoretici drachmam semis, spiritus vitrioli guttas viginti ad triginta, syrupi cardui benedicti drachmas duas. M. de qua, modo prius probe prospectum fuerit primis viis repurgandis, tribus, vel quatuor horis ante paroxysmum, dimidia, & deservescente hoc, reliqua dimidia portio sumenda.

§. VII.

Declinante quoque febre quum deservescente ^{Et post paroxysmum.} æstu sponte corpus inadescit, cavendum, ne sudor externa refrigeratione, vel potu frigido intercipiatur. Si secus fit, febris non modo diuturnior redditur, sed & facile succedunt contracturæ, nec non tumores pedum oedematosi. Consultum potius, temperato externo calore & diluente calido potu, ipsum placide promovere.

§. VIII.

Sanguinis per venam sectam missio, auferendis quartanæ causis directe quidem non respondet; nihilo tamen secius, ubi suspicio est, febrem ab impedito sanguinis per abdominis viscera progressu sustentari, uti in iis qui parietatibus hypochondriaco-hysterici obnoxii, fluxum hæmorrhoidalem antea experti, aut molimina ad hunc persentiscunt, utiliter utique vena in pede pertunditur, adeo ut unica venæ sectione quartanam contumacem penitus discussam esse, observaverim. Quum etiam gravidæ tantum non omnes sint plethoricæ, venæ sectionem, si quartana corripuntur, utiliter non modo ferunt, sed & poscunt, ne intenso per spasmos febriles sanguinis motu, uterus ad præmaturam exclusionem sollicitetur. Consideranda igitur morbi tempora, ipsa corpora, vires & fluidorum ac solidorum dispositio, ne perperam instituta sanguinis subtractione, sanatio difficilior fiat & spasmi febriles accessionis tempore incrementum, uti pluribus in dissertatione, *observationes clinicæ circa curationem quartanæ*, inscripta, monui. Notabile autem est, quod sanguis è quartanariorum vena emissus conspicuum exhibeat vitium ac flavescens lenta pituita in superficie obductus compareat, cujusmodi crustam albam pituitosam in venis etiam quartana defunctorum se invenisse testatur *Schenckius*.

§. IX.

Vomitoriorum usus in quartana pariter cum ^{Et vomitoria.} distinctione admittendus. Quando enim crudorum ac viscidorum succorum colluvies primis, ex nimia ingluvie, est in viis, ac ad vomendum proclivitas; expedit omnino, ut brevissima via per emeticum exturbetur, antequam sanguinem subeat & systema nervosum afficiat. Consultius tamen est, istud non adhibere, nisi viscera salva,

ventriculus non adeo tener, nec genus nervosum nimis sentiens & debile, ac pulmones nulla labe infecti. Præferenda etiam tutiora & appropriata: ex illis palmam fert radix ipecacuanhæ, quæ præter vomitum moventem, aromaticam & balsamicam habet facultatem. Et inter hæc antimonialibus anteposenda venerea, vitriolum maxime cyprum, vel album, eo quod tam biliosos & glandulosos ductus simul constringendo, ulteriori affluxui materiæ febrilis aditum præcludunt, quam etiam fibras adducendo, & stimulo, ut firmius impacta nervosis partibus materia excutiat, faciunt. Utraque vero sociata, in temperamentum quasi rediguntur, ut medicina emergat, tum ad stomachum deplendum, tum febrem expugnandam, apprime utilis.

§. X.

Optime
fert chinæ
corticem.

Chinæ cortex, cum ratione usurpatus, spectatæ adversus quartanam est utilitatis: tenendum tamen, non prius ad ipsius usum esse descendendum, quam perpurgatis probe primis viis, demta plethora visceribusque integris atque apertis. Tumor etiam est in quartana biliosa æstiva, quam quæ autumno vergente grassatur, & viscerum vitio succisq; tenacibus fovetur. Tum præstat ipsum in decocto ex vino porrigere, adjectis amaris, aperientibus & diaphoreticis, uti sunt summitates centaurii minoris, herba cardui benedicti, radix gentianæ rubræ, pimpinellæ & sal tartari. Expedi quoque interdum in hac febre virtutem ipsius adjecto martis croco subtilissimo & sale volatili urinoso intendere. Interim si debito tempore, debita dosi & quantitate exhibebitur, & cum diaphoreticis & resolventibus rite permiscebitur, nocebit nunquam. De quo pluribus evolvendam commendo dissertationem, *de recto corticis chinæ usu in febribus*.

§. XI.

Nec non
epicarpia.

Ad minuendos præterea, vel sistendos plane paroxysmos, in quartana, præsertim autumnali & rebeli, nec non quæ segniores naturas infestat & sopore stipatur, admodum efficacia reperi epithemata, ex acrioribus, stimulantibus leniterque vesicantibus composita & manuum carpis applicata. Plebei quidem alio hunc in finem utuntur, sed ingratus nimis est inde foetor, ideoque optime ejusmodi epicarpia concinnantur ex terebinthina, fuligine, sale ammoniaco, araneis contusis, pipere atque theriaca.

§. XII.

Mineralibus
aquis
quomodo
utendum
& quando.

Minerales aquæ, acidulæ præsertim ac thermæ, meo quidem judicio, tam ad præservationem, quam curationem intermittendum faciunt. Sed ante paroxysmum & in ipso plane ab iis abstinendum, & videndum, ut ante accessionem febris, aqua per emunctoria congrua jam sit evecta, ne motus febriles inde exacerbentur. Loco potus tamen temperatæ, uti superius meminimus, semper possunt assumi.

§. XIII.

Alvus cly-
steribus
aperienda.

Si alvus in hac febre pertinacius clausa atque constricta, expedit eandem potius clysteribus, quam internis pharmacis sollicitare. Optima horum enematum ingredientia sunt, quæ præter vim emollientem, paregoricam & spasmos sedantem obtinent, ut summitates millefolii, flores chamomillæ vulgaris, sambuci, tiliæ, semen cumini, brodium carnis vitulina, vitellus ovi, cum pauxillo salis gemmæ. Opportune etiam quandoque iisdem specifica quædam antifebrilia, amara, nervina & roborantia commiscantur. Inter Gallos enim ab aliquot jam annis mos increbuit, intermittentes cu-

randi per decoctum chinæ chinæ, crebrius per anum injectum. Idem tamen etiam cum aliis succedit antifebrilibus, ut carduo benedicto, centauro minori, radice gentianæ, nec non herba majoranæ, rorifinarini, abrotani & salviæ. Et certe apprime hæc methodus ex usu est in infantibus, & qui ventriculum minus firmum & facile nauseantem obtinent, hac tantum servata cautione, ut alvus prius emolliente & salino solvatur clystere, quam nervinus & roborans injiciatur.

§. XIV.

Capitis dolores sævi, qui hisce febribus in provectoris præsertim ætatis personis, junguntur, ægre levantur. Potissimum lenimen sperandum ab iis, quæ alvum liberiores reddunt, nec non à pediluviiis, quæ sanguinis impetum à capite ad inferiora trahunt. Inter externa vero acetum rosaceum, item rutaceum, cum sale & nitro mixtum, pani inditum & applicatum, optimum affert solatium.

§. XV.

Quo demum pacto, ne quartana, uti frequenter fieri assolet, recurrat, sit præcavendum, egregium sane *Celsi* est consilium, *lib. III. cap. XVI* sic habens: *si febris quievit, diu meminisse ejus diei convenit, eoque vitare frigus, calorem, cruditatem, lassitudinem. Facile enim revertitur, nisi à sano aliquandiu timetur.* Hinc, paroxysmi in primis die, vitare oportet ventos boreales, aërem compressum frigido-humidum, qualis esse solet in humilioribus, paludosis & subterraneis locis, & perspirationis successus custodiendus. Victus etiam exquisita habenda est ratio, ne nimium ingeratur, tanto minus ex alimentis difficilis solutionis. Animus quoque in tranquillitate servandus, & providendum, ne ira & terrore commoveatur, quo febrem quartanam sanis etiam compluries inducuntam novimus.

§. XVI.

Tum stomacho subveniendum, & elixiriis stomachicis, ex amaris & aromaticis confectis, digestio secundanda, crebro quidem ac diu, sed parcius iisdem utendo, ne debile jam corpus præter naturam exæstuet. Inprimis curandum, ut per alvi secessum, denuo succrescentes crudi succi, blande subducantur, eamque ob causam crebrius utendum pilulis balsamicis, vel nostris cinnabarinis, item de ammoniaco *Quercetani*, quibus, si per chinchinam febris suppressa, salis digestivi usus jungendus. Et his præsidiiis non modo pessimæ recidivæ, sed & aliæ sæpius deteriores passionis, lentæ præsertim febres, opportune præscinduntur.

ENARRATIONES MORBORUM.

OBSERVATIO I.

Generosa foemina sanguinea, macilenta, quinto mense gravida, Septembri, posteaquam in nocturno, frigido, nebuloso aëre iter fecisset, incidit in quartanam, cui præter sueta symptomata, vehementis cephalalgia, summæ præcordiorum anxietates, vomendi conatus & inquietudo, juncta. Medicus amaram essentiam cum alexipharmaca, in paroxysmo & extra eum, quotidie ad guttas minimum sexaginta, porrexit, eo cum effectu, ut bini sequentes paroxysmi longe gravius impeterent, & superius dictis pathematibus intensissimus æstus, ventris tormina ac dorsi dolores accederent, & abortus plane esset metus. Meum hinc rogatum consilium & quæsitum: an venæ sectioni, quam reformidarat primus medicus, locus? Ego vero expensis circumstantiis, eandem oppido necessariam judicavi. Administrata igitur fuit sequenti post febrem die, & sanguis impetuosè exsi-

Quibus
vandus
capitis
lor.

Recidivæ
arcenda
diatericu

Et phar-
macenti-
cis.

Quartanæ
ingravida
curata.

exsiliit. Tum mixturæ calefacienti nimis substituti pulveres temperantes nitrosi, cum emulsione analeptica. Inde sequens paroxysmus mitior factus, & usurpatis per aliquot adhuc dies iisdem, demum electuario nostro, parce, sed iterato exhibito, penitus abacta fuit febris, & matre, & foetu salvis.

Epicrisis.

Sicuti tempestiva sanguinis missio gravidis, quæ ordinario plethoricæ, ad præcavendum abortum pernecessaria; ita multo magis ex usu est, quando motu febrili calido, vel medicamento exæstuante, sanguis in vehementem orgasmum, si-ve motum intestinum expansivum, conjicitur. Feliciter igitur in hac febriente non potuit non succedere febris curatio, posteaquam sanguis subtractus, calida rejecta & surrogata, quæ æstum sanguinis restinguunt. Corticem autem chinæ gravidis etiam non nocere, sed circumspicte datum insigniter prodesse, tum hoc, tum aliis multis in comperto est exemplis.

OBSERVATIO II.

Quartana in cachectico infestum hydropem terminata.

Quinquagenarius obesus, vini ac cerevisiæ potator, hinc cachecticus, autumnio quartana corripiebatur epidemica eademque per mensem detinebatur, pedibus simul tumidis, alvo adstricta, cum sopore ac torpore in paroxysmo. Frustra datis multis, chinæ cortex tandem in usum vocatus in decocto. Quo per hebdomadam usurpato, febris siluit, sed tumor dextri pedis cum dolore obortus, & enatum, initio superficialium, postea profundius ulcus, supra malleolum. Discussus tamen ligaturis & externis constringentibus aquosis tumor, ulcus quoque consolidatum. Brevi autem post rediit quartana & adhihitis incassum omnibus, per semestre spatium perstitit, ægro interim diætæ incurio & lac in paroxysmo copiose ingurgitante. Intumuit hinc venter, urina parce stillavit, spiritus angustus factus, scrotum quoque cum pedibus tumefactum, superiora autem tabida, sequutus hydrops ascites, quo æger extinctus.

Epicrisis.

Perperam tumor pedis vi repressus & ulcus ficitum, quum quartanæ haud raro his terminentur, iisdemque repulsis, & fiant primum, & repellant. E re potius fuisset, cachexiam & viscerum labem oppugnare, & internis magis, quam externis morbo occurrere. Sic omnino recidiva declinari & æger servari potuisset.

OBSERVATIO III.

Quartana tertiana in salivatione.

Juvenis literatus, computationibus in seram noctem subinde indulgens, autumnio pluvioso sub itinere incurrit tertianam primum. Cujus æstum, quum pomis citriis in taleolos discissis & julapiis copiosis exstingeret, successit quartana, cum exquisito contusivo artuum dolore, capitisque ac pedum quasi rigore, alvo simul clausa & urina cum ardore stillante. Diu hæc febris & medicos & medicamenta elusit. Tandem datus hic pulvis: Recipe coralliorum, salis absynthii, mercurii dulcis ana drachmam, olei caryophyllorum guttas sex, laudani opii grana quatuor. Sumtus is quotidie bis, eodemque intra triduum consumto, salivatio oborta, post quam febris discessit. Sed periculi non expers erat salivæ fluxus, quum per quatuordecim integros dies, quotidie sæpe ad mensuras duas, succederet, æger neque somnum capere, nec solidi quicquam assumere posset, manus & pedes fri-

Frid. Hoffmanni Oper. Tom. II.

gerent, faucium & gingivarum caro mirum tumeret, foetidissimus exspiraretur halitus, corpusque debile & marcidum redderetur. Hinc pedes inmissiter quotidie pediluvio, ex vino, aqua & herbis aromaticis. Alvus subducta clystere ex floribus chamomillæ, herba melissæ, origani, salviæ, oleo chamomillæ cocto, cum sale communi interius laxante ex manna, cassia, rhabarbaro & foliis fennæ. Potui datum decoctum ex sarsaparilla, china radice, ligno juniperino & mastiche, cum regimine sudorifero. Fauces elotæ decocto salviæ, menthæ crispæ, florum rosarum rubrarum, balaustrorum, sambuci & radice plantaginis, ex vino, adjecta postea essentia mastiches & myrrha. Et circa somni tempus oblatus pulvis bezoardicus cum theriaca coelesti & oleo ligni assafras. His intra mensem sublata omnia, & æger ad sanitatem traductus.

Epicrisis.

I. Abusus acidorum & pomorum citriorum tertianam in quartanam commutavit utique. Fioxorem enim & lentam reddidit febris materiam, simulque primas vias acidorum & ponticorum succorum copia opplevit. Et hinc etiam ratio subsequens incommodorum petenda.

II. Ex vero scribit *Willisus de febr. quartanarios* promptos esse ad salivationem, ex levi etiam mercurialium dosi, & quartanam etiam sæpe salivatione solvi. Utrumque confirmatur hoc casu. Ratio vero cur tam facilis sit in quartana, ac uti ego observavi in tertiana etiam, salivatio, hæc mihi videtur; quod, qui eadem decumbunt, primam regionem, falsis, acidis partim, partim biliosis acribus succis, gerunt obsessam, à quorum falsedine mercurialium vis mire intenditur. Neque tamen reticendum, enormis in nostro agro salivationis causam potissimum fuisse, quod mercurius dulcis cum coralliis in calcem ustis & sale absynthii intensius tritus fuerit atque commixtus. Inter omnis enim generis salia, fixa potissimum alcalina, cum mercurialibus pessime miscentur, & validiori tritu, drasticam, humores salivales & lymphaticos fortiter commoventem facultatem acquirunt. Memini etiam paratum à medico in contumaci quartana decoctum, ex cortice chinæ, sale tartari, terra foliata tartari, mercurio dulci & aqua communi, vix coercibilem concitasse salivationem. Idem contigisse novi in quartana ab oblato mercurio dulci cum specifico *Mynsichti*. Hinc auctor sum, ut, qui tuto uti velit mercurialibus, eadem nunquam triturando exactius misceat cum salibus, vel salia prorsus omittat.

OBSERVATIO IV.

Robustus & plethoricus vir, vitæ sedentariæ cum crassiori victu addictus, animi affectibus indulgens & ab anno hæmorrhoidarius, Octobri mense, sine præcedente externa causa, inhorrescere coepit, lassitudine corporis & contusivo artuum dolore affligi, pituitam viridem copiosam vomere, cum insigni præcordiorum angore, subsequutus calor universi corporis, cum cephalalgia, cuti arida & urina naturali. Quarto die hæc recurrerunt, ideoque medicus quartanam esse judicavit & elixirium amarum cum spiritu salis ammoniaci, nec non infusum herbæ thee, ante paroxysmum, largiter ingerere jussit. Sed ingravescente inde morbo, ad specifica magis descendit, & chinam chinæ, tam intermissionis, quam paroxysmi tempore, liberali manu porrexit. Licet etiam pectus inde longe gravius opprimeretur & vires corruerent, eodem tamen institit, eo cum effectu, ut alvus pertinacius obstiparetur,

Quartana china cortice & coralliorum rupta & sanata.

tur, vomitus in paroxysmo cum mirifica anxietate erumperet, hocque non succedente, lipothymia plane ingrueret, ac febris in continuam videretur mutata. Accitus igitur alius medicus, qui venæ sectionem instituens, paroxysmum effecit illico mitiorem. Intercalaribus postea diebus infusum leniter evacuans, ex foliis sennæ, radice cichorei, herba taraxaci, passulis, tartaro tartarificato, & syrupo rosarum solutivo, ex vino, per quatuor vacuos à febre dies sumendum suavit. Præcepit etiam ut clystere emolliente alvina regio expurgaretur ac ipso in paroxysmo dorso spina & pedes linimento nervino inungerentur. His deferbuit magis adhuc febris, dolor ostocopus sublatus, urina reddita largior & sudor liberalius prodire coepit. Transactis autem sic quatuor septimanis, pulverem supra descriptum ex martis limatura, cortice chinæ, mercurio dulci &c. duodecim dosibus obtulit, exspirante sensim febre & ægro, consumto hoc pulvere, ad perfectam sanitatem redeunte.

Epicrisis.

Docet hæc historia, perniciosum esse specficorum usum ante correctionem & evacuationem humorum nocentium, præstabilem vicissim leniter evacuantium, nec non pulveris ex aperientibus metallicis cum chinchina, facultatem. Et certe tutissimus cortex hic est, si cum laxantibus & diaphoreticis propinatur. Neque enim alia ipsius ratio ac opii, cujus soporifera virtus adjectis purgantibus, sudoriferis, vel etiam diureticis & analepticis, ita cicuratur, ut in innoxium quasi temperamentum redigatur. Hinc serio auctor sum, ut febrifugum hoc, præsertim in corporibus viscerum obstructione & infarctu laborantibus, nunquam solum, sed aperientibus præmissis, vel iis nuptum, exhibeatur.

OBSERVATIO V.

*Quartana
purgatione
curata.*

Quum anno c1010ccxix. ob siccum & calidum per integros fere quinque menses regnantem aërem, heic grassarentur febres varii generis, quartana etiam correpta fuit juvenula sanguinea mollioris & laxioris carnis. Post quartum paroxysmum chirurgus per sectam in brachio venam largiter sanguinem subtraxit, & die post pilulas dedit valide purgantes, quibus intra nycthymeron vigesies dejectum. Perstitit hic alvi fluxus per aliquot dies cum torminibus, licet non tam numerosis sedibus, ac demum sanguis plane cum muco secessit. Febris autem inde mitior facta & postea plane discussa. Cruentum etiam alvi profluvium, potibus demulcentibus ex floribus chamomillæ, sambuci cum lacte, item pulvere antidysenterico *Klapperbeinii*, ex bolo Armena & cortice chaccarillæ composito, feliciter sublatum.

Epicrisis.

Frequentes hoc anno erant & dysenteriae, & varii generis febres, ex una eademque causa, impuris nempe, excrementitiis, acribus, biliosis sordibus in corpore genitis, perspiratione suppressa retentis, atque in primis viis & duodeno potissimum collectis, quæ postea transmissæ ad sanguinem vel per intestina, vel per habitum corporis motu febrili, critice quasi expulsæ fuerunt. Secta igitur in febriente hac vena, perspiratio fuit imminuta, per drasticum purgans autem impetus humorum ad intestina proritatus, factaque ibi majori acris biliosæ materiæ excretionem, febrilis spasmus, ab hac suscitari solitus, cessavit.

Nam sub eadem epidemica febrium affectione observavimus dysenteriam præpostere cohibitam, febres curatu admodum difficiles induxisse.

OBSERVATIO VI.

Sub principio autumnii, quo frequens erat quartana, invasit etiam solitis pathematibus plebeium juvenem, post copiose ingestum potum corporisque refrigerationem statim ab ira. Superato quinto paroxysmo, tria tartari emetici & quindecim tartari vitriolati grana, sex ante accessionem horis data, quibus cum magna præcordiorum anxietate pituitosum liquamen cum bile evomuit. Ex eo in quotidianam, quæ typum non servabat, conversa est febris. Oblati igitur pulveres absorbentes, salini, nitrosi & cinnabarii: inde febris brevior & mitior, alvus laxa & sudor declinante impetu largus. Elapsis aliquot hebdomadibus, debito tempore ac dosi usurpatum electuarium febrifugum & febris successive abacta. Sed quum liberatus obvia quævis ingereret, corpus à frigore non defenderet, rediit febris, quæ tamen post aliquot paroxysmos, balsamo vitæ ad XXX. guttas, in duabus aquæ menthæ unciis, tam ante, quam post paroxysmum, sumto, iterum discussa. Breves autem & hæ erant induciæ. Reconvalescens quippe appetitui liberalius indulgit, nec à frigore sibi cavet, ideoque in eundem recidit morbum. Dedi hinc consilium, ut grana XV. piperis albi leniter contusi, cum aliquot cochlearibus spiritus vini, quatuor ante paroxysmum horis ingereret & in lecto sudaret. Quo demum quater usurpato, factum, ut febris penitus discederet.

Epicrisis.

I. Febres, præsertim quartanæ, in nullis frequentius recidivant, quam in plebeiis. Hi enim neque diæticis legibus obtemperare, neque ex præscripto medici vivere suescunt. Unde plerumque tam ob cohibitam perspirationem, quam ingestos multos & graves cibos, promte iterum formes colligitur febrilis. Ne igitur in morbum erumpat, vel emeticis superius, vel salinis detensivis & balsamicis laxantibus inferius, educendus, vel etiam medicamento digerente stomachico præscindendus, cujus generis maxime est piper, in plebeiis summopere proficuum.

II. Sudor ante paroxysmum convenienti remedio atque regimine prolectus, neutiquam nocet, sed ad febrem vincendam ejusque insultum arcendum, quam maxime salutaris, secus ac communis medicorum fert sententia. Ego certe multis confirmatum habeo exemplis, sudore ante paroxysmum per accommodata medicamenta provocato, modo prima regio à fermento febrili prius exquisite depleta fuerit, cutis inhorrescentiam & spasmus, sine quo nullus subsequi potest æstus, fuisse prohibita, ipsamque febrem fugatam. Decumanus etiam error est, febrilem materiam demum paroxysmo finito expelli sudore. Tantum enim abest, ut febrem sudoribus post paroxysmum, vel intercalari die largis, cum salute terminatam viderim facile unquam, ut potius, ipsi hi largi sudores debilitatem partium & atoniam cutis indicarint, corpus ad novum paroxysmum disponentem.

OBSERVATIO VII.

Puer decennis, facie lividus & pallefcens, abdomine turgidus, appetens tamen ciborum, ex

*Quartana
sæpius re-
cidivans
curata.*

*Quartana
in quoti-
dianam
sæpe re-
cidivans
refricta.*

refrigeratione sub aura vespertina contraxerat quartanam. Opponebantur amara in essentiam redacta. Sed aucta inde appetentia, corporisque nocturna denudatione accedente, in quotidianam post decem paroxysmos transiit febris. Hinc datæ alternis diebus pilulæ nostræ in vehiculo liquaræ, & cerevisiæ potandæ mensuræ indita bina cochlearia liquoris ex salis tartari, nitri, salis ammoniaci, arcani duplicati ana drachmis duabus, in aquæ fontanæ libra liquefactis & decem extracti croci granis adjectis. His intra trium hebdomadum decursum febris discussa, abdomen detumuit atque ex facie livescens color deterfus. Sed post quatuor hebdomades rediit febris quotidie, quæ quidem iisdem brevi profligata, post duos autem menses denuo repetiit, iisdemque iterum fuit abacta. Quia autem animadverti, causam tam crebræ recidivæ esse neglectum post febrem remediorum usum & diætam insalubrem, serio dulcibus, acidis, lacticiis, caseo, fructibus horæis interdixi, ac præcepi, ut ternis minimum diebus aliquandiu pilulis & liquore superius dicto insisteretur. Sic demum febris expugnata, puer ex voto convaleuit.

Epicrisis.

Ægre ex quartana levantur pueri; crebras experiuntur, etiam post longum tempus, recidivas, vel alios longos ex ventriculi imbecillitate morbos, vel etiam catarrhales defluxiones lentasque febriculas incurrunt. Interest igitur, ut tempestive statim in principio imminetia mala præscindantur. Ego quidem ut plurimum vacuantibus medicationem cum successu exorsus sum. Ad alvum purgandam frequens mihi fuit pulvis Cornachinus, ex cremoris tartari drachma, antimonii diaphoretici granis XII. & diagrydii sulphurati granis sex, cui interdum nitri pauxillum addidi. Hunc in tres doses divisum, ter, sex horis ante accessionem porrexī. Si vero nausea & conatus vomendi adfuit simul, dimidium tantum tartari emetici granum uni dosi admiscui. Sic expurgata sordium colluvie, infusum roborans, die vacuo omni bihorio ad cochlear unum, dedi sic paratum: recipe corticis chinæ unciam semis, chacarillæ terræ foliatæ tartari, salis tartari ana drachmam, infunde unciis octo aquæ cardui benedicti, colaturæ adde julepi rosarum unciam semis. M. Si his febris non discessit, indicium fuit infarctus viscerum, aut obstructionis glandularum in abdomine. Ad hanc submovendam usurpavi liquorem salinum supra descriptum, parca, sed repetita dosi, simulque pro potu præbui decoctum diluens atque aperiens. Præparatis autem hac ratione primis viis & visceribus referatis, non dubitavi, præsertim mitiore & breviori jam factō paroxysmo, febrilem compescere spasmus. In quo quidem conficiendo, tam in puerili, quam juvenili ætate, tutissimam inveni methodum *Helvetii*, per clysterem ex decocto corticis chinæ, bis, vel ter, intercalaribus diebus injectum, præmissō tamen, ad educendas prius sordes, clystere emolliente. Sic percurata fuit febris demum, neque unquam rediit, si modo convalescentes sibi à refrigeratione, instantibus & alvum constipantibus caverunt.

OBSERVATIO VIII.

Quartana in senescentia. Senex generosus octogenarius, per omnem vitam rarius morbis affectus, vesperi, post improvisum terrorem & superingestum cibum, hor-

rore & frigore corripiebatur, quod sequebatur calor, ut noctem duceret insomnem. Redibant hæc quarto die graviora, capitis dolore, artuum languore & præcordiorum anxietate stipata. Interim vacuis diebus sic satis bene habebat æger, somnum & cibum capiebat. Post septimum paroxysmum consulebatur chirurgus, qui bis ante paroxysmum porrigebat emeticum, intermedio tempore pulveribus acerbis salinis, cum zingibere & radice ari, febrem oppugnabat & potui suadebat decoctum lignorum temperatum. Invalescerebant hinc paroxysmi, inquietudo, sensuum torpor ac mentis plane emotio accedebant, die vacuo etiam persistebat capitis dolor, virium & artuum languor, cum calore præternaturali, & appetentia ciborum plane intercidebat. Vocabar nunc ego ad ægrum per binos jam menses febre decumbentem, nil vero ob plenariam & alimentorum & medicamentorum nauseam efficere poteram. Interim quia alvus adstricta & inflatio ventriculi cardialgica angebat, suadebam ut clyster injiceretur emolliens, cum carminativis & stimulo salino, quo levamen & somnus procuratus. Carpis etiam emplastrum ad imitationem Strobelbergeriani imponi jubebam, quo mitior fiebat accessio. Interne nil nisi elixir temperatum balsamicum dabam, inprimis quum à salinis deterfivis majores semper præcordiorum anxietates oboriri viderem. Sed deficiente, ob nauseam ciborum, febrisque, quæ in continuam quasi concedebat, diurnitatem, alimonia vires demum penitus exhaustæ & mors sequuta, ita quidem, ut bini penultimi paroxysmi, intenso ac diuturno horrore, rigore, anxietate, anhelosa spiratione, mentis emotione corporisque jactatione, per quatuor vel quinque horas, cum pulsu admodum contracto & debili, insisterent, succedente postea calore & pulsu in celeriore mutato, ultimus autem eadem quidem impeteret vehementia, sed nullus plane sequeretur æstus, & æger in ipso rigore atque frigore interiret.

Epicrisis.

Quartana febris, *Hippocratis & Celsi* effato, per se quidem secura est, & neminem facile jugulat, immo, si rite decurrit, ad longævitatē ducit. Sed visceribus inflammatis, aut labe affectis, recte monente *Galeno in lib. III. epid.* enecat quam plurimos, sive ob aquam inter cutem, sive omnimodam cibi abstinentiam. In pessimis enim est plenaria ejusmodi ciborum aversatio, & ego quidem putrescens tum quoddam viscus esse observavi. Dumque nihil alimenti assumitur, corpori viribusque subtrahitur pabulum, ut illud emacietur & hæc elanguescant penitus. Tanto magis id accidit senibus & febre jam diu attritis. Dein senibus longæ ejusmodi febres, ex animi affectu ortæ, admodum sunt infestæ, & licet vires primum non adeo languidæ, cautissime tamen tractandæ, quum commissos in diætā, aut medicatione, vel leves errores, decrepiti graviter, laud raro capite plane, luant. Qui vero intermittentibus decedunt, sub vehementia febrilium spasmodorum, qui fluida ad caput & interna vitalia organa urgent, ibique succos penitus consistere faciunt, pereunt; id quod non modo in quartanis, sed & quotidianis, si continuæ factæ, animadvertitur.

OBSERVATIO IX.

Juvenis, literarum perquam sub vita sedentaria studiosus, Septembri mense, aëre pluvioso *Quartana simplex primum,* vesp-

postea du-
plex, de-
mum tri-
plex cum
tumor pe-
dum, cu-
rata.

vespertino, iter suscipiebat, in diversorio bene prandebat, vinumque austerum, non adeo bonæ notæ largiter bibebat. Vespero domum rediens, paroxysmo afficiebatur febrili, cum artuum languore, qui quarto die gravior & cum majori præcordiorum anxietate redibat. Sumebat hinc ex consilio medici pulverem digestivum salinum, & in paroxysmo, temperantem nitrosum. Alvo inde sexies sine torminibus soluta, febris deservescerebat & levior reddebatur. Quum vero quinto post die, vesperi tempestate frigido humida medicum relaturus successum ipse adiret, domum reversus, ex improvise novum febrilem experiebatur insultum, priori longe acerbiorum. Redibat idem postero die, tertius erat vacuus, quartus paroxysmus primo, quintus secundo respondentem, inferebat, ut sic quartana esset duplex. Alvus præterea erat stricta, ventriculus cardialgia premebatur, pedes tumebant ad genua usque totiusque corporis & faciei aspectus erat turgidus. Exhibebatur ipsi liquor salinus, alcalinus, nitrosus, in paroxysmo & extra eum & die intercalari pilulæ balsamicæ. Quibus alvus bis soluta & in simplicem rursus mutata febris. Insistebatur iisdem eadem ratione remediis, & subsequerebatur copiosus alvi fluxus, cum exquisitis circa umbilicum torminibus, & tam acia noctu æque ac interdiu secedebant, ut anus fere eroderetur. Durabat hæc diarrhœa per aliquot dies, febrisque mitiorem insultum faciebat, sed tumor pedum cum gravitate & languore lumborum crescebant potius. Post usum mixturæ ex tinctura antimonii tartarifata, essentia chacarillæ & spiritu cornu cervi succinato, adhuc quidem febris mitescebat, sed languor corporis, cum inappetentia, lurido aspectu & pedum tumore, merum incutiebat haud levem. Datum igitur extra paroxysmum electuarium ex rob sambuci & juniperi, cortice chinæ & cascarillæ, extracto centaurii minoris, cerussa antimonii, sale cardui benedicti, cum spiritu salis ammoniaci, quo æger illico sensit virium incrementum, stomachus melius appetiit, obtusus & gravativus artuum dolor discessit, febris, post unum adhuc mitissimum paroxysmum, penitus cessavit, tumor quoque pedum sensim subsedit & elapso à primo insultu mense, integra reddita fuit sanitas. Ad quam conservandam, præter exquisitam vitæ ac diætæ rationem, pilularum balsamicarum & elixirii stomachici usus commendatus, & sex jam elapsis septimanis, nihil plane visum est incommodi.

Epicrisis.

Plura ex hac observatione in usum decerpenda. Elucescunt inde procatactica causæ, quibus conspirantibus, intermittens febris excludi possit, æris nempe conditio, sub qua tertianæ & quartanæ jam erant frequentes, imbecillis ex studiorum intemperantia & vita sedentaria ventriculus, perspiratio ab aëre vespertino, frigido humido intercepta & stomachus cibi ac potus minus salubris copia refertus. Alvo dein, & naturæ, & medicamentorum ope, soluta, paroxysmus fractus, concessione autem in auram vespertinam frigido-humidam rediit mox, eo quod recrementa halitiosa ac sulphureæ indolis, per poros elabi solita, retroacta & ad primas vias ceu imbecilles partes delata, febrilem rursus constituerunt fomitem. Quod autem simplex quartana in duplicem concessit, id mea quidem sententia, factum à nimis copiosa sentina succorum viscosorum, in ventriculo, propter ipsius imbecilli-

tatem confluentium. A quibus tamen natura suo robore, arte adjuta, per crebriores sedes se exoneravit, junctis simul ventris torminibus. Porro notabile & hoc, quod succedente copioso alvi secessu, tumor tamen enatus fuerit, imo increverit, luculento indicio, copiosas affuisse cruditates magnamque viscerum ac partium externarum atoniam. Hinc sumto electuario insigniter roborante, redditoque per illud ventriculo & primis viis robore, vires sensibilibus cum appetitu restitutæ, febris fugata, tumor successive subsedit, & sanitas perfecte revocata. Ut adeo pateat, tumorem pedum, sub ipsa febre oborientem, non sic esse pertimescendum, ac eum, qui post febrem, præsertim male curatam, succedit. Specificorum etiam antifebrilium & roborantium, quæ inter primas utique tenent chinæ & chacarillæ cortex, usum, felicius longe succedere, si corporis partes ipseque ventriculus atonia potius, quam strictura affectæ, & humorum potius copia, quam virulentæ indolis exiguæ molis materia, in vitio est.

OBSERVATIO X.

Plures hætenus speciales, de felici, æque ac infelici quartanæ curatione, enarravi practicos casus. Jam non abs re erit, brevibus adjicere, qua ego in sananda hac febre ut plurimum usus sum methodo. Nimirum primum fuit, ut ad contemperandos acidos salios, & liquandos viscidos succos, nec non obstructions referandas, ter vacuo die, & una vel altera ante paroxysmum hora, cum haustu cerevisiæ tenuis, præberem cochlear liquoris salini, ex sale tartari, ammoniaco, nitro, tartaro vitriolato, sive arcano duplicato & cortice chacarillæ singulorum uncia semis, soluta in libris duabus aquæ cardui benedicti, sive chamomillæ vulgaris, adjecta demum drachma dimidia extracti croci. Superato tertio paroxysmo, elixirio usus sum antifebrili, ex radice pimpinellæ albæ, contrayervæ, vincetoxici, ligno colubrino, cortice chaccarillæ ana uncia semis, extracto cardui benedicti, scordii, salis tartari ana drachmis duabus, extractis cum spiritus theriacalis & liquoris anodynii mineralis ana uncia, spiritus vini tartarifati octo, aquæ florum sambuci quatuor uncis; dando illud post paroxysmum ter quotidie, ad quinquaginta, vel sexaginta guttas, cum potu calido, ad sudorem placide eliciendum: discessit hinc sæpe febris. Quando vero persistit, infusum laxans superius descriptum, diebus intercalaribus mane exhibui, & vesperi modo dictum liquorem salinum. Post aliquot autem dies electuarium febrem fugans, ex rob sambuci, juniperi ana uncia, corticis chinæ, chacarillæ ana uncia semis, extracti centaurii minoris, salis ammoniaci, antimonii diaphoretici ana drachma, julepi rosarum uncia una cum dimidia, exhibui tempore à paroxysmo vacuo, bihorio quovis, magnitudine nucis moschata. Si etiam interea alvus officii oblita, clystere domestico eam ducere jussi, vel elixirium, ex massæ pilularum balsamicarum uncia semis, soluta in uncis quatuor aquæ fumaris, cum uncia olei tartari per deliquium, ad centum guttas porrexi. Discussa sic febre, ad recidivam declinandam, octiduo semel deglutitæ pilulæ balsamicæ, vel à robustioribus efficaciores, ex gummi ammoniaci, extracti hellebori nigri, croci, mercurii dulcis, cinnabaris ana drachma, trochiscorum alhandal drachma dimidia, triginta granorum pon-

Anstori
methodo
curand
quarta

CAP U

De Febre

S P A

S

De ver

est quid

De feb

De qu

De qu

De qu

De qu

De qu

De qu

De qu

De qu

De qu

pondere sumra. Usurpatum præterea quotidie elixir stomachale & injunctum exactum in vita victuque moderamen: quibus nunquam fere febris rediit; si vero forsan id factum, vecte opus fuit. Ideoque aggressus eam sum emetico, ex radice hypecacuanhæ, vitriolo cyprio & croco, ac subjungendo statim electuarii usum, penitus expugnavi. Qua etiam ratione, me multoties quartanam epidemicam & ex ingluvie ortam, in plebeiis potissimum, prima in herba jugulasse, testor.

Epicrisis.

Methodo hac frequentius summo cum fructu quidem usus sum, nihilo minus illud adjiciendum in gratiam eorum, qui praxin cum judicio & sufficiente ratione exercere nituntur, putavi, ut non talem methodum in ullo morbo universalem medendi dari autument, quæ perpetua sit, & in omnibus casibus & circumstantiis promiscue applicari possit. Illud enim satis serio inculcare soleo meis auditoribus, nec remedia adversus morbum, certæ semper efficacæ, nec unam eandemque medendi dari methodum, sed individua-lem & specialissimam, ex sollicita historię morbi & maxime corporis ægotantis & morbificæ causæ exploratione, prævia sufficiente meditatione & deliberatione, inveniendam esse, quæ in eo consistit, ut non modo remedia, quibus utendum sit, cognoscantur, sed & quo ordine, quadosi, quo tempore, & quamdiu cum iis continuandum, exquisita ratione & experientia, qua optime vires & remediorum virtutes perspicendæ & addiscendæ, judicetur. Memorabilis præter allatos casus, exstat *Tom. II. Consult. medic. Secl. IV. Observatione CLXXX.*

C A P U T III.

De Febre Quotidiana.

THESES PATHOLOGICÆ.

§. I.

Quotidiana quæ di-
ET quartana, & tertiana, ex intermittentibus rarior est quotidiana, quæ scilicet singulis diebus accedit & solvitur, subsequente postea aliquot horarum intermissione.

§. II.

Quotidiana quæ di-
Accessio hujus febris primo mane, hora circiter quarta, aut quinta, evenit cum frigore & horrore, sine rigore tamen. Sub hoc cardialgica præsto est nausea & ventris inflatio, in nonnullis capitis dolor, in aliis animi defectio, in plurimis vomitus, vel alvi secessus, vel etiam utrumque. Excipit postea calor magis lentus, quam mordax, cum siti minus intensa. Pulsus, inordinatus antea & debilis, increbescit, non adeo durus tamen est, sed mollior: neque urina flammea, sed potius cruda ex citrino turbida; multis etiam insuperabilis fere in somnum proclivitas. Paucus demum prodit sudor: & elapsis decem, vel ultra horis, discedit paroxysmus, corpus hebes & grave relinquens, statâ postero die hora reversurus.

§. III.

Quotidiana quæ di-
Sic quidem incedit & decurrit febris exquisita quotidiana intermittens. Quæ vero typum hunc non servat, sed vel meridie, vel circa ves-

peram, vel etiam vago invadit tempore, nothia appellatur, erratica, aut anomala.

§. IV.

Irregularis hæc quotidiana, haud raro obser-
vatur epidemica: tum nempe, quando irregula-
ris ac inordinata diuturna temporum anni fuit
constitutio. Ego quidem, post continuum inten-
sum æstate anni MDCCXXXVII. & XXVIII.
calorem, obortas vidi, pro diversa corporum
constitutione, tam diarrhœas & dysenterias,
quam varii generis intermittentes febres, & in-
ter has potissimum quotidianas.

§. V.

Intermittens autem est, de qua agimus quo-
tidiana, ideoque non permutanda cum quoti-
diana continua. Quæ quidem pariter prima lu-
ce cum frigore accedit, sed calor & languor,
cum pulsu celeri ac debili, inappetentia & in-
terdum colliquativus sudor, per totum reliquum
tempus durant. Et si longior, ut plurimum fu-
nesta, ægris, fractis penitus viribus, sub ipso fri-
gore pereuntibus.

§. VI.

Neque etiam confundenda cum catarrhali.
Hæc quippe benigna, vesperi cum leniori refri-
geratione accedit, mane deservescit & catarrho-
sis defluxionibus satis est conspicua. Et maligna
ex repentina insigni virium prostratione, & agryp-
nia facile innotescit, neque penitus intermit-
tit, sed tantum remittit.

§. VII.

Differt quoque ab aliis intermittentibus. Quan-
do enim ex tertiana simplici fit duplex, singu-
lis etiam diebus impetit paroxysmus, sed insul-
tus tempora alternatim sibi respondent; aliæ
sunt causæ, alia medicatio.

§. VIII.

Si ex quartana insultus quotidianus, triplex
dicitur quartana & paroxysmus non quotidie ea-
dem hora venit, sed quarto quovis die, quoad
accessionis terminum, conspirat; diversa etiam,
ob diversas causas, ineunda medendi ratio.

§. IX.

A lenta demum febre distinguitur, quod illa
post pastum & circa noctem sine horrore obre-
pat, cum calore in volis manuum plantisque pe-
dum, noctu etiam magis affligat sudore stipata,
mane vero tepescat, nec tamen penitus inter-
mittat.

§. X.

Jam sicuti omnis febris proxime nervosi ge-
neris est affectio; ita formalem pariter quotidia-
næ rationem spastica nervosarum partium &
systematis vasorum agitatione absolvi, indubium
plane. Hic autem præternaturalis febrilis motus,
per materiam, à naturali & blanda humorum
vitalium indole plane alienam, ad sanguinem de-
latam, nec tamen cum ipso miscibilem, indu-
citur.

§. XI.

Nimirum primæ sic dictæ viæ, ventriculus,
duodenum & potior jejuni valvulosi portio, sunt
illud latibulum, in quo vitiosa materia fermenti
instar hospitatur. Inde per vasa lactea ad sangui-
nem & succos transmittitur, & cum his ad sen-
tientes internas partes delata, easdem exagitat
& ad extraordinarium motum stimulat. Et cer-
te in quotidiana etiam febre, primam maxime
regionem, varii generis vitiosorum, corrupto-
rum, viscidorum, acido-bilioforum succorum sa-
burra, scatere, plura sunt quæ uberius evincunt.
Etenim junguntur ipsi ordinario fere ructus,
nausea,

nausea, cum conatu vomendi, inappetentia, cardialgica inflatio, præcordiorum angustia & pectoris oppressio, interdum tensivus, pungitivus ac morficans dolor, ad dorsum excurrent. Foedus dein ut plurimum & ingratus sapor in ore percipitur, quandoque amaricans, aliquando subdulcis nauseosus, non nunquam nidorosus plane. Ipsa demum febris naturæ beneficio per crebriores dejectiones alvi sponte haud raro solvitur, in artificiosa autem medicatione, per superius & inferius os evacuantia, cum stomachicis, utramque faciunt paginam.

§. XII.

Sedes in primis viis.

Quia tamen longior ut plurimum hæc est febris & ad plures sæpe menses trahitur, iusta utique suspicio est, labem in imi ventris penetrabilibus subesse firmiter radicatum. Organa quippe secretoria, glandulæ & glandulosæ intestinorum tunicæ, remissa nimis sunt atque laxata, ideoque loco subtilis lymphatici salivalis succi, copiosum impurum & ferosum plorant. Reliqua quoque sanguinis depurationi dicata viscera, hepar, lien & pancreas, ob defectum robur & languidiorem per ipsa sanguinis progressum, succum lymphaticum & biliosum minus purum in digestionis officinam mittunt. Hinc alimentorum solutio & chyli elaboratio turbatur, multæque ferosæ & corruptæ cruditates prima in regione & gignuntur, & cumulantur, quæ ipsa mora deterioris indolis factæ, & ad sanguinem delatæ, febrilem, uti diximus faciunt motum.

§. XIII.

Cur quotidianus insultus.

Quod autem crebrius, quam in aliis intermittentibus, febris insultus in quotidiana impetatur, ob eminentiorem primarum viarum imbecillitatem fieri arbitror. Hæc enim quam maxime cruditarum proventui favet, & facit, ut prompte eadem istuc confluant, cito ibi colligantur, breviori etiam tempore sanguinis massam subeant & ad nervosas spinalis medullæ membranas deferantur.

§. XIV.

Causæ antecedentes & subjunctæ.

Hinc igitur porro est, quod omnia quæ viscerum flacciditati inducendæ & crudorum ac impurorum succorum proventui favent, ad hanc febrem sternant viam. Infidiatur potissimum hominibus segnioribus, otiosis, inordinata & cruda diætâ utentibus, crapulæ ex cerevisia, nec non mœrori ac curis nimium indulgentibus, item qui debilem ob prægressos morbos, vel sanguinem effusum, nacti sunt ventriculum. Frequentius etiam infestat hyberno, autumnali nubilo cœlo, senes magis & pueros, foeminas plus quam viros, pituitosos, phlegmaticos & sanguineos, præbiliosos & melancholicos. Ex aliis quoque intermittentibus prompta ipsius genesis: tum scilicet, quando æger incongrua vorat, vel crebrius animo movetur, quando purgantibus & emeticis validioribus stomachi robur atteritur, anodyna, calida & spirituosâ usurpantur, aut pensâ habitæ primarum viarum repurgatione, adstringentia & specifica præpostere adhibentur.

§. XV.

Acquisita longa, vana non.

Ceterum quotidiana exquisita, ex viscerum atonia oriunda, longius ut plurimum trahitur, multumque negotii medico facessit. Quæ vero vaga, populares habet circuitus & succorum tantum vitio debetur, facilius sanationem recipit.

§. XVI.

Continua propinqua magis anceps.

Minus dein periculosa est, quæ plenariam paroxysmi habet intermissionem. Sed quæ ad continuæ indolem inclinât, & ubi soluta febre,

languor tamen virium, cum pulsuum debilitate & frequentia persistit, corpusque sudore diffluit, ita, si ad aliquot menses producit, vires enervat, ut æger haud raro succumbat.

§. XVII.

Quæ etiam ex intermittentibus, præsertim quartana, succrescit, rebellis & periculi plena est, prisco jam *Celsi lib. III. c. XV.* testimonio: *quartana, inquietis, neminem jugulat, sed si ex ea facta quotidiana, in malis æger est.* Magnum enim viscerum vitium subesse indicat & continuæ plerumque est propinqua.

§. XVIII.

Quando incipiente accessione biliosi & pituitosi vomitus, vel secessus, eveniunt, bonum, nisi forsitan ex febris diurnitate vires jam nimium fuerint exhaustæ. Sudor quoque declinante paroxysmo placide erumpens, & urina post febrem copiosior cum sedimento secedens, vehementiam insultus minuunt, febrisque felicem solutionem nunciant.

§. XIX.

Contra ea, ubi excretio nulla, febris etiam per longum nimis tempus detinet, viscera demum labem contrahunt & cachexiæ, febres lentæ & hecticæ, tabes, in dispositis etiam phthises, succedunt.

§. XX.

Idem perquam facile evenit, quando adstringentia & specifica febrifuga præpostere adhibentur. Et si calidioribus sudoriferis & essentiis alexipharmacis spirituosâ acria ex prima regione recrementa in sanguinem aguntur, expeditus in continuam, cum sudore perpetuo & virium jactura, est transitus.

§. XXI.

Qui autem hac febre demum decedunt, in his frigus longe est intensius ac magis diuturnum, cum rigore, virium prostratione mentisque turbatione. Hoc plerumque bis adhuc excipit calor, sub tertio autem insultu, pulsuum ictus debiles manent & inæquales, ipsumque frigus in rigorem transit emortualem.

INDICATIONES CURATORIÆ

cum

METHODO MEDENDI GENERALI.

§. I.

Quum itaque causæ quotidianæ intermittentes, cruditarum feroso viscidarum prima in regione saburra, viscerum & glandularum flacciditate & impedito sanguinis per imum ventrem progressu contineantur; omnis omnino medicatio merito eo dirigenda: ut I. impuri illi & pravi succi è primis viis, præparati prius, per congrua emunctoria proscribantur; II. viscera à tono dejecta roborentur & sic cruditarum ulterior proventus arceatur; & III. liber sanguinis per viscera abdominis & intestinorum canalem, tanquam digestionis & chyli elaborationis officinam, circulatio restituatur.

§. II.

Primum ut ex voto perficiatur, laudata est virtus incidentium & abstergentium, & quidem salium neutrius generis, inter quæ primas tenent sal ammoniacum depuratum, digestivum *Sylvii*, ex capite mortuo spiritus salis ammoniaci urinosi, tartarus vitriolatus, arcanum duplicatum, sal Ebshamense, Sedlicense, nitrum antimoniatum.

*acria
matica.* tum. Dein commendanda etiam, quæ sale acri aromatico pollent, uti radix ari, calami aromatici, pimpinellæ albæ, costi veri, zedoariæ, cannella alba, zingiber, piper album. Quæ in pulverem redacta, salibus dictis mixta, & adjecta una vel altera guttula olei carminativi, egregiam suggerunt medicinam antifebrilem.

§. III.

*ilula
balsamica
in sali-
s.* Ad primæ æque ac secundæ indicationis scopum obtinendum, exturbandas nempe leniter per alvum sordes, roborandum simul tonum ventriculi & intestinorum, eorumque turbatum motum restituendum, salubritatis laudem merito ferunt, pilulæ balsamicæ Beccherianæ, Stahlianæ & nostræ, massa etiam pilularum aloephanginarum, de succino *Cratonis*, item *Solenandri*, præsertim si una cum ipsis salibus offerantur.

§. IV.

*amara &
borantia.* Potissimum vero ad reddendum visceribus abdominis robur ac impediendum impurorum succorum in digestionis officinam affluxum, ex usu sunt elixiria amara cum martialibus mixta, uti quidem est meum temperatum balsamicum, sine spiritu vini paratum, cum liquore alkalino. Vel essentia chaccarillæ cum essentia gentianæ mixta. Vel etiam elixiria stomachica, uti nostrum, vel *Michaëlis*, additis aliquot guttis tincturæ martialis, ex floribus salis ammoniaci martialibus, cum spiritu corticum aurantium rectificato factæ.

§. V.

*thermæ
aprimis
acidu-* Et his quidem etiam promovetur egregie sanguinis per abdominis vasa ipsamque digestionis officinam progressus. Interim si refractaria admodum febris repetit, & ab inordinata diætâ sustentatur, omnia salubritate antecellunt medicatæ aquæ, thermæ potissimum atque acidulæ, uti Carolinæ & Egranæ tepesfactæ, quæ debito cum regimine, intermixtis amaris, balsamicis & anticachecticis, usurpatæ, viscidas sordes diluunt, per alvum & urinam cum serosis evehunt, infarctus expediunt, liberumque sanguini reddunt com meatum.

§. VI.

*lexhodus
edendi.* Specialis autem medendi cum hisce præsidii methodus, pro temperamentorum, ætatum, anni temporum ratione, corporum constitutione, dispositione primarum viarum, sexu, morbiq; causa instituenda, & singulis his, tam dosis remedium, quam sumendi ratio accommodanda. In genere tamen tenendum: horis à paroxysmo vacuis pulveres salinos cum incidentibus esse exhibendos, tertio vel quarto die ventrem solvendum pilulis, ita tamen, ut operatio earum accedente paroxysmo, jam sit absoluta, declinante paroxysmo erupturum sudorem quiete & calido potu esse promovendum, ac demum subjungenda roborantia, amara, martialia & antifebrilia. De quo tamen plura in cautelis & morborum enarrationibus.

OBSERVATIONES ET CAUTELÆ CLINICÆ.

§. I.

*Medicatio
ante insti-
tuenda.* Quotidianæ intermittentes circumspicte sunt tractandæ, ne in alios longos & ancipites morbos transeant. Inprimis aspernantur adstringentia & sopientia, præcipitantia terrea larga, item omnia purgantia drastica & sudorifera, nec non validiora emetica

§. II.

Multum tam ad quotidianæ curationem, quam recursum ipsius arcendum facit, vitare animi commotiones, moerorem inprimis ac diurnam solitudinem, cum insalubri cibo, ac vini potu, nec non refrigerationem, præsertim abdominis.

§. III.

*Alvina ex-
crudo pro-
movenda.* Quum natura ipsa hanc febrem critico alvi fluxu sæpe solvere soleat; ipsius ductui insistendum, ipsaque juvanda ab artifice. Unde ægri non ad regimen sudoriferum, aut pharmacis ad sudorem cogendi, sed potius eo annitendum, ut materia vitiosa ipsæque primæ viæ ad alvi fluxum salutarem præparentur ac disponantur. Quod quidem egregie perficitur, quando aliquot ante paroxysmum horis, lene laxans, pulvis cornachinus, vel pilulæ balsamicæ, cum sale præbentur.

§. IV.

*Vomitum
secundan-
dus.* Quia porro vomitus huic morbo jungitur, cum bonis ægrorum rebus succedens; è re est, ut idem debito tempore & convenienti medicina secundetur. Hinc expedit interdum omnino stomachi subversionem per emetica ante paroxysmum data provocare. Ego quidem memini, me aliquoties in febre exquisita quotidiana, quæ hora quinta matutina invadere solebat, porrexisse circa noctis tempus, prius quam cruditates ex digestionis officina ad sanguinem delatæ, lene vomitorium, ex radicis pecacuanhæ granis XV. cum dimidia parte pulveris cornachini. Proritatus inde felici cum successu fuit vomitus, non unquam alvi fluxus, & febris minimum mitior facta, aliis postea facile expugnanda.

§. V.

*Etiam in
diuturna.* Si etiam quotidiana febris, diu persistit per mensem, vel longius, ac in lentam ferme degenerare videtur, commode offerri potest granum unum tartari emetici soluti. Quo biliosum stagnantem succum, cum levamine, incredibili fere copia, fuisse exturbatum, novi.

§. VI.

*Externa
ventriculo.* Quando dolor ventriculi pressorius, vel inflatio & ciborum fastidium jungitur, regioni epigastricæ sacculi ex herba menthæ, absynthii, rorismarini, floribus spicæ, chamomillæ Romanæ, caryophyllis & nuce moschata, vel sicci, vel ex vino cocti, applicandi. Qui, ubi finita etiam febre imponuntur, perspirationem & sudorem efficaciter eliciendo, egregie profunt.

§. VII.

*Et epiga-
strio impo-
nenda.* Frigus, quum nimis acre partes externas exagitat, tum sacculi modo dicti, tum etiam spiritus vini purus, cum oleo menthæ in duplicato linteo stomachali regioni cum fructu apponuntur.

§. VIII.

*Febri fuga
cum dis-
tinctione
usurpan-
da.* Cum febrifugis caute in hac febre mercandum. In quotidiana tamen epidemica & erratica, præter superius dicta, specifica etiam antifebrilia, ipsum quoque electuarium, cujus basis chinæ & chaccarillæ cortex, tuto adhibentur. Provocata inde, observatorum etiam fide, alvi sæpe laxitas & copiosæ summa cum euphoria sedes. Chaccarillæ autem cortex in hac febre merito præferendus chinchinæ, quia magis roborans & adstringens est.

§. IX.

*Nec non
renascentia.* Sanguinis missionem raro admittit quotidiana: jam enim præsto est inprimis ventriculi imbecillitas & plerumque cachectici quippiam complicatur. Quod si autem eminens plethora, præsertim à mensum, vel hæmorrhoidum suppressione,

sione, urina præterea tincta & æger vini potui assuetus; in principio statim vena secanda, ne febris inde ingravescat, ac uti observata medicorum testantur, lentæ, hæcticæ, apostematicæ febres, subsequantur.

ENARRATIONES MORBORUM.

OBSERVATIO I.

*Quotidia-
na rebellis
Carolinis
expugnata.*

Illustrissima persona, triginta annorum, inordinatum diu sectata fuerat vitæ genus, multa incongrua edulia ingesserat, fructus horæos, lactinia, acetaria, variaque conchyliorum genera, vina etiam potentia & aquas sic dictas vitæ liberaliter potarat, prandium ad vesperam, & cœnam ad mediam usque noctem produxerat & præterea corpus frigido aëri autumnino crebrius exposuerat. Incidebat hinc, prægresso frigore, in febrem, quæ mane quotidie accedebat, cum præcordiorum anxietate, cardialgia, capitis dolore, artuum lassitudine & vomitu pituitoso affligebat, ad tertiam vel quartam pomeridianam durabat, somnum turbabat, & post aliquot insultus, largo stipabatur sudore. Appetitus tamen non adeo erat dejectus, sed æger in cœna subinde cibos sumebat, inprimis intrita cum vino. Insistebat hæc febris per quatuor & quod excedit hebdomades, corpusque admodum hebes & languidum reddebat, licet interim variis remediis, purgantibus cum emeticis, salinis pulveribus, etiam cum floribus salis ammoniaci martialibus oppugnaretur, donec infuso corticis chinæ cum comis absynthii, ex vino, abigeretur. Sed quum appetitui redeunti indulgeret æger multaque minus salubria assumeret, elapsa vix hebdomade, febris, majori cum symptomatum vehementia rediit. Opponebantur eadem & evacuantia, & antifebrilia, febrisque discedebat, brevi autem post eandem ob causam repetebat, idque minimum sexies factum, ut semestri interea efflueret spatium, quo corpus ob nocturnos sudores tepidum factum ac vires mirum exhaustæ. Alii igitur accersiti medici, qui de thermis Carolinis, sub exactiori diætâ & regimine usurpandis, consilium dederunt. Allata etiam in lagenis vitreis magnis impensis thermalis aqua, & tepesacta ante paroxysmum, mane æque ac vespere, pota. Sed quum intermedium tempus brevius esset, quam ut aqua ante accessionem corpore posset evehi, gravior primum inde fiebat paroxysmus. Ideo febriles motus specificis prius compositi fuerunt & postea per binos menses Carolinæ singulis diebus matutino tempore usurpatæ, interpositis simul medicamentis amaris stomachicis & pilulis balsamicis. Quibus demum effectum, ut febris contumax expugnaretur, nec unquam rediret.

Epicrisis.

Voracitas & inordinata diætâ rebellem facit intermittentem omnem, tanto magis quotidianam, quæ, ex imbecillitate stomachi & cruditarum copia oriunda, novum inde semper nanciscitur fomitem. Dein quum longa febris sedem potissimum habeat in visceribus imi ventris, à crasso sanguine fartis, quæ tracta diutius febre, magis magisque robore exuuntur, in illustrissimo etiam hoc ægro viscera debilia fuisse atque op-pleta, certum, unde crebriorum recidivarum origo. Nihil igitur salubrius fuit decenti thermarum usu, quæ partim salino aperitivo, partim terreo martiali principio roborante instructæ, cru-

dos succos efficaciter evehunt, infarctus expediunt & sic lentam febrem, nec non cachexiam, quam optime præscindunt. Sunt tamen thermæ æque ac acidulæ cum cautione in intermittentibus in usum vocandæ, & providendum, ne paroxysmus in earum operationem incidat, emunctoria claudat, & aquis retentis, anxietates cum gravibus symptomatibus inferat. Hinc tutius, iisdem, composita febre, ad recidivam arcendam uti possumus, & tum, adjunctis medicamentis stomachicis & balsamicis, opem ferunt certe laudatissimam.

OBSERVATIO II.

Generosa erat foemina, triginta circiter annorum, sanguinea, vegeta & tenera, quæ quarto mense gravida abortum cum enormi hæmorrhagia & post hunc mensium suppressionem experta, pallida hinc facta fuerat atque cachectica, cum alvo adstricta & appetitu dejecto. Hæc postquam ostreas in cœna comedisset & vespere sole occiduo in horto deambulasset, nocte insequente febre corripiebatur, cum anxietate, nausea & ingente artuum languore. Remittente febre dabatur ipsi quidem elixirium stomachale, sed noctu eodem tempore iterum redibat febris paullo gravior. Porrigebatur ob suspicionem cruditarum vomitorium, ex tartari vitriolati granis XII. & radice hypecacuanhæ granis XXV. quo crassam viridis coloris pituitam evomebat. Nihil minus statim repetebat tempore febris, majori adhuc compressorio in epigastrio sensu vomendique conatu, quæ silente etiam febre persistebant. Aperiebatur quidem vespere alvus stricta clystere emolliente; febris tamen & ventriculi spasmus per aliquot dies insistebant & facies icterica plane comparebat. Exhibebatur ipsi mixtura ex aquæ cardui benedicti uncis tribus, theriacalis, cinnamomi ana uncia semis, salis cardui benedicti, antimonii diaphoretici ana scrupulis duobus, spiritus vitrioli guttis XX. syrupi papaveris rhœados drachmis duabus, cujus dimidiam partem vespere sex ante paroxysmum horis, sumsit, imposito simul ventriculo sacculo, ex speciebus stomachicis & carminativis in vino coctis, quo sudor ante invasionem largus & febris mitior. Instante sequenti paroxysmo, alteram reliquam mixturæ sumsit partem, qui emanavit prorsus & spasmus quoque cardialgicus laxatus. Quum vero ægra convalescens appetitui indulgeret, fructibusque horæis ac marinis piscibus vesceretur, quinto post die iterum in febrem incidit, majori fere anxietate, vomendi conatu animique quadam defectione stipatam & vespere accedentem. Solvebatur hinc alvus, mixtura & externa adhibebantur, sed incassum fere. Persistebat enim potius fervor & languor cum magna debilitate, etiam superato paroxysmo, ut metus esset continuæ. Injiciebatur rursus clyster & vomitorium supra dictum porrigebatur, sequente & vomitu, & alvi secessu. Mitescebant inde symptomata cum febre, & pulvere ex corticis chaccarillæ, tartari vitriolati & salis ammoniaci anatica portione confecto & per septem dies, quatuor quibusvis horis, ad drachmam dimidiam usurpato, discussa demum omnia, ventriculo & corpori robur redditum, mensium quoque fluxus in ordinem redactus.

Epicrisis.

Caveant sibi omnes, qui ex sanguinis immunda profusione languent, à prava diætâ & corporis

poris refrigeratione. Tum enim, ob imminutum corporis ipsiusque ventriculi robur, perspirationem quoque imminutam, prompta febrium generis. Deinceps in quotidiana, cujus causa ingens cruditas in stomacho & primis viis saburra, magis quam ulla alia intermittente, conducibile est, ventriculum, præmisso blando enemate, leni emetico deplere. Tum spasticas ventriculi stricturas nihil promptius laxat, quam placidum elicere sudorem, quam in rem spirituosam regionem epigastricam calide applicata egregie conferunt. Tandem expurgata prima regione, chaccarillæ cortex cum salibus, non modo ad febrem fugandam, sed & digestionis successum fulciendum, utiliter adhibetur.

OBSERVATIO III.

Quotidiana ex tertiana electuario salina.
Senex, sexagenario major, macilentus, sanguineo-melancholicus, continuis laboribus per multos annos sub vita sedentaria distentus, superiori anno, quo solennes erant intermittentes, corripiebatur tertiana, postea quam peregre profectus, liberali convivio exceptus & noctu sub coelo valde humido & pluvioso frigido redux factus erat. Placide hæc admodum decurrebat, & adhibitis prius pulveribus salinis digestivis, post quintum paroxysmum electuario expedite discutebatur. Nolebat tamen pristinus vigor & appetitus redire, sed à sumto cibo pressorius semper in epigastrio urgebat dolor, nec somnus adeo erat quietus. Dabatur quidem, ad digestionem secundandam, quotidie bis, ad drachmam semis, pulvis ex radice ari, pimpinella alba, gentiana rubra, semine cymini & macis. Sed præter opinionem quotidiana post aliquot dies accedebat febris vesperti. Promptum statim habebat medicus electuarium ex rob juniperi, cortice chaccarillæ & syrupo acetositis citri, idque omni bihorio deglutire jubebat. Sumto hoc, repetebat quidem paroxysmus, sed sub illo & post eum copiosæ prodibant dejectiones, vel decem numero, ut æger firmiter crederet, validum se accepisse purgans. Continuabatur igitur parciore dosi electuarii usus tam salubri effectu, ut febris discederet & æger penitus convalesceret.

Epicrisis.

Enata procul dubio hæc ex tertiana quotidiana fuit, quod sub illa, prima non sufficienter expurgata regio. Unde reliquæ materiæ febrilis, accepto per malam digestionem incremento, induxerunt quotidianam. Plane peculiaris etiam hæc fuit corticis chaccarillæ effectus, canalem intestinorum efficaciter vacuans, febrisque fomitem simul & semel tollens. Is tamen non ubique perpetuus, sed peculiari primarum viarum dispositioni tribuendus. Alias inter omnes constat, corticem hunc potius ad compescendas nimias dejectiones valere. Ut adeo pateat: unum remedium, pro diversa naturæ & corporis habitudine, aliud atque aliud, & diversum, contrarium plane, exferre posse effectum.

OBSERVATIO IV.

Quotidiana anomala post hypercathart.
Nobilis quædam tenerior & sanguinei corporis scemina quinquagenaria, regnante Sirio & instante mensium fluxu, gravi exagitata fuit ira, cum extremorum tremore. Porrexit medicus paullo post purgantes pilulas, quibus tanta hypercatharsis suscitata, ut intra XXIV. horas plusquam quinquagesies, & postero adhuc die, vige-

fies fere, dejiceret. Fractum inde mirifice corporis robur, artus languerunt, ingruit animi, præsertim erecto corpore, defectio, periit appetitus, somnus turbatus & pene omnis intercidit. Exactis inter hæc aliquot diebus, vesperti accessit anxietas summa, cum levi duntaxat horrore & frigore, inquietudo & syncoptica affectio, ut jam animam agere videretur. Subsequuti pulsus ictus celeres, æstus corporis, oris siccitas, & mador corporis per duodecim horas halans, symptomatum attulit levamen. Habuit postea tantisper melius: febrilis tamen commotio modo vesperti, modo noctu, jam gravior, jam levior, rediit quotidie, tussi sicca, & ante, & post illam affligente. Aegre tulit fere omnia stomachus, analeptica, salina, balsamicas pilulas, elixiria stomachica, alimenta ipsa, & quamvis suspensa manu data, sequuta anxietas, æstus, pressio, strictura & ardor ventriculi, nec non tormina ventris. Sic decubuit per mensem, ac interea nihil melius ferre potuit, quam emulsionem ex amygdalis dulcibus, semine papaveris albi, aqua florum acaciæ, liliorum convallium, tilia & ceraforum nigrorum, quibus tantillum pulveris bezoardici nitrosi subinde inditum. Potui datum præterea decoctum avenaceum, non nunquam in levem emulsionem cum amygdalis redactum, & ad alvum obstructam solvendam, enema leniens injectum. Elapso autem mense, quodammodo commodius excepit ventriculus medicamenta. Hinc sumsit quandoque decem tantum pilulas ex nostris, quibus alvus cum euphoria laxata. Exhibitum quoque elixirium nostrum balsamicum, parca pariter dosi. Remanserunt nihilo minus febriles commotiones, licet mitiores & sine angore. Ad has igitur componendas oblatus ter quotidie hic pulvis: recipe lapidum cancrorum, antimonii diaphoretici, arcani duplicati, corticis chaccarillæ, ana drachmam. M. F. Pulvis, dividatur in decem partes æquales. Et ad alvum subducendam usurpatum elixirium purgans, ex massa pilularum balsamicarum in tenui lixivio soluta. His demum intra quadraginta dies sensim febris sublata, vires cum appetitu & sanitate integra redierunt.

Epicrisis.

Perniciosum utique fuit molimen, post iram & ingruente mensium fluxu, purgans dare, quia tum jam in motu est natura, & spasticæ in nervosis partibus stricturae adsunt. Neque dubium est, quin sub proritata inde vehementiori purgatione & affluxu succorum impurorum ab ambitu ad interiora, & erosio, & levis inflammatio intestinis fuerit inducta, quibus effectum, ut, nec medicamenta, nec alimenta, sine incommodo, anxietate & æstu suscipere potuerit. Febrilis etiam irregularis insultus, quotidie bis interdum accedens, cum tussi, suscitatus omnino fuit à levi intestinorum inflammatione, sub qua semper stimulus spasmodicus & viriata occultatur digestio. Hæc igitur partium & morbi causæ dispositio, nec correctoriam, nec evacuantem, nec roborantem aliam admisit medicinam, quam lenientia & demulcentia. Febri autem, quotidianæ typum servanti, accommodatius fuit nihil, quam chaccarillæ cortex, eximie roborans, mixtus cum aperientibus salinis, absorbentibus leniterque diaphoreticis. Cujus generis pulveres in quotidiana febre, etiam lenta & quæ ex vicio primarum viarum maleque digestorum succorum colluvie oritur, virtutis sunt certe laudatissimæ.

OBSERVATIO V.

Quotidianam
exquisitam
diuturnam.

Quadragenaria circiter foemina, sanguineo-cholericæ laxiorisque corporis constitutionis, quæ in iram prona, inordinata diæta cum fructibus horæis usæ & infusum théæ large nimis ingurgitans; stomachi sibi contraxerat languorem, paullo post mensium experiebatur suppressionem. Hos quum proprio artificio pellentibus urgeret, febrem incurrebat quotidianam, ordinariis symptomatibus comitatam, medici tamen ope, exactis tribus mensibus, ab eadem liberabatur. Non autem ita multo post, emanentibus semper mensibus & alvo stricta, in eundem recidit morbum, quem complures in auxilium vocati medici, nec pharmacis, nec aquis medicatis, Egranis æque ac Lauchstadiensibus, neque etiam lactis asinini usu, depellere potuerunt. Perstitit potius idem jam à triennio immedicabilis, & quotidie prima luce accedit febricula, quam comitatur sudor colliquativus pene, ad decimam usque antemeridianam manans, & pomeridie sequitur languor cum dolore lumborum. Præterea extra paroxysmum corpus totum tactu frigidum, vix vesperti ex cibis quicquam assumere valet, & tum etiam ad incongrua magis fertur appetitus. Pallida quoque facies totusque corporis habitus turnidus quasi & inflatus. Obambulat tamen & domestica obit negotia.

Judicium cum consilio.

Quotidianam veram exquisitam, non secus ac quartanam, ex longis esse morbis, & ad unum, immo plures annos, trahi non nunquam, hæc docet historia. Causa vero diuturnitatis inordinata omnino vivendi ratio ægræ, quæ animi affectibus indulget, palato accepta ingerit cuncta & extra paroxysmum in liberum qualemcumque regnantem aërem concedit. Neque enim omnis diuturna intermittens gravem in visceribus supponit labem: sed per ipsum febrilem motum nova semper gignitur vitiosa materia, quæ quando intermissionis tempore perspiratione non excluditur & insalubri victu augetur potius, novum semper induci paroxysmum non est mirum. Jam quidem morbus in habitum quasi transiisse videtur: vegeta tamen natura & corporis extra paroxysmum motus, in causa fuit, quod deteriores huc usque non sequuti morbi alii. Ego quidem, rebus sic comparatis, vix aliam medendi rationem esse, sentio, quam ut ægra curatius ex regularum diætetarum præscripto vivat, parcius, & cibos nec graves, nec fermentescibiles, sed leves, facile solubiles edat. Perspirationis dein successum custodiat ac secundet, nec obambulatione in aëre libero frigido interturbet. Tum ad contemperandos & liquandos pravos in prima regione succos, salino superius descripto liquore utatur. Blandis porro laxantibus intestinorum canalem expurget eumque in finem, bis octiduo, balsamicas nostras pilulas deglutiatur. Stomachi præterea languorem & digestionis vitium elixirio stomachali, crebrius inter cibos sumto, emendet. Ac demum, tam ad promovendam cuticularem excretionem, quam compescendam successively febrilem habitualement commotionem, pulvere ex antimonio diaphoretico, cornu cervi philosophice præparato, tartaro vitriolato & cortice chaccarillæ, bis quotidie ad drachmæ dimidium, per octo dies utatur. His nisi gravius quid interea acciderit, morbum rebellem, expugnari adhuc posse, speramus.

CAPUT IV.

*De Febris intermittentibus Epidemicis
anomalis mali moris.*

THESES PATHOLOGICÆ.

§. I.

Superioribus annis MDCCXXVI. XXVII. & XXVIII. plane irregulares & insolitæ erant, temporum ac tempestatum constitutiones, ingentes potissimum siccitates & ardores, complures menses perseverantes. Variis hinc languoribus corpora humana affligebantur, diarrhœis, dysenteris, intermittentibus febribus variis, simplicibus & duplicibus, quæ nulli temperamento, sexui, aut ætati parcebant. Maxime omnium vero æstate & autumno regnabant febres, partim intermittentes plane, partim remittentes tantum, anomalæ & irregulares, vagum & incertum typum habentes, facile inter se mutabiles, ut plurimum insuetis & gravibus symptomatibus stipatæ, contagio infestæ, nonnullosque per multos menses detinentes, quosdam etiam plane è medio tollentes.

§. II.

Ambigunt quidem adhuc medici, nostri æque ac prisca ævi: an intermittentes dentur malignæ febres? Re tamen paullo accuratius considerata, non dubitamus affirmare: intermittentes alio tempore esse benigniores, alio utique maligniores, non secus ac alii morbi ac febres epidemice grassantes. Nam prout variæ temporum & tempestatum sunt constitutiones, magis vel minus regulares, boni & mali moris progigni & grassari morbos, jam olim noster prodidit *Hippocrates*. Experientia quoque stabilit atque confirmat, dari certis temporibus intermittentes, quæ indolem malignam, seu virulentam, referunt, cujus indicia & quasi characteres hi sunt: si insolitis symptomatibus stipatæ & maxime omnium virium junctam habent prostrationem eminentiorem, si epidemice grassantur & contagio etiam inficiunt disposita corpora, sique earum ferocia exanthematibus in summa cute erumpentibus, pustulis, ulcusculis in labiis, naribus, facie, purpura, vel maculis purpureis, vel etiam scabie mitescit. Hæc enim omnia exiguæ molis, sed valde vehementis & virulentæ indolis materiam tenuissimam, ventriculo & nervosis maxime partibus inimicam atque infestam, in qua potissimum veneni ratio & natura fundata est, subesse, & subitas sævas commotiones atque alterationes concitare, luculenter arguunt.

§. III.

Sic febres, quæ superioribus annis nostris locis, immo universæ fere Germaniæ, fuerunt infestæ, anomalæ valde exsisterunt. In quibusdam semel uno die, in aliis bis, accessio facta. In nonnullis primis diebus comparuerunt continuæ, & tertio vel quarto die in intermittentes concesserunt; in aliis vicissim primis temporibus intermissionem habuerunt, postea vero, pessimo omine, factæ sunt continuæ. Aliqui enormes experti sunt per superiora, vel inferiora pituitosas & biliosas dejectiones, quidam remittente, vel intermittente paroxysmo, continuo sudarunt, cum ingenti languore. Nonnulli etiam se ipsa in febre,

febre, & calere, & algere simul, conqueſti ſunt. Juniores in paroxyſmo interdum valde delirant, & ſimul ac clauſerunt oculos, inſomniis agitati maleque coherencia ſunt loquuti. Senibus cum ſomnolentia accidit febris. Omnes vero de anxio & compreſſorio dolore circa ventriculi regionem, de dolore lumborum, pedum contuſivo, capitis etiam, ſunt conqueſti, & intermiſſionis tempore, de dolore ex nuca per totum ſpinæ tractum ad ſcapulas porrecto. Prodeuntibus demum in facie puſtulis, aut in ambitu exanthematibus purpureis, ſymptomata complacabantur. Et ſi purpura jungebatur ſcorbutica, diutius durabat febris; ſi vero ſuperveniebat alba, funeſtum erat ut plurimum.

§. IV.

Contagio
inſecerunt.

Obſervatum fuit & id maxime Magdeburgi & in Ducatu Brunſvicenſi, complures in una domo, non ſecus ac in variolis, vel morbillis fieri ſolet, ſucceſſive eodem morbo fuiſſe affectos, & præſertim poſt ſanguinis miſſionem, fortem purgationem, ſcæminas maxime inſtante menſium fluxu, multi ſi animi affectu immoderato commoti fuerunt, timore potiſſimum & triſtitia.

§. V.

Quomodo
terminata.

Licet vero, pro diverſa natura ægrotantium, ratione ætatis, temperamenti, naturæ magis, vel minus robuſtæ, mitiora, vel ſævia fuerint ſymptomata, & non nulli intra quatuordecim dies, alii intra menſem demum convaluerunt, perpauci tamen mortui, niſi ingenti errore medici, aut ægrotantis admiſſo.

PRÆSERVATIO ET CURATIO.

§. I.

Quomodo
recendat
febres.

Frequentes quam maxime fuerunt hæ malignitatis ſuſpectæ febres in locis paludosis, humidis & aquarum ſtagnis irriguis; uti noſtris in confiniiſ ſunt pagi Oſtrau & Dieskau. Frequentius etiam infeſtarunt eos, qui poſt ætatem intenſius fervidam, improba victus ratione uſi, veſperi, aut noctu, aëre humido frigido, corpus refrigerarunt, & præterea imbecillioris fuerunt naturæ. Optimum hinc ad declinandum epidemicæ hujus febris incurſum fuit conſilium: vitare loca humilia, uda, multo minus in iis dormire, aëris injuriis ſeſe non exponere, refrigerium omne, etiam per frigidum potum, fugere, ventriculum nec crudis, nec conſtipantibus cibus onerare, animum tranquillum ſervare, omniaque cum cura tenere, quæ acrimoniæ contemperandæ, fordibusque tam per poros, quam alvum leniter educendis, ſerviunt ac laudabiles ſuccos ingenerant. Neque tamen forti utendum purgatione, quæ ab ambitu corporis ſuccos trahendo, perſpirationem minuit adeoque noxia eſt, tanto magis quando diarrhœa forſan & dyſenteria jam circumeunt.

§. II.

Indicatio-
nes medendi
tres.

Quum vero harum febrium mali genii cauſa, partim in inſigni dyſcraſia & intemperie ſanguinis & humorum, à naturali & blanda temperie deſſectente, ſalino-ſulphurea, partim etiam in humore vitioſæ & virulentæ activæ indolis, in prima regione potiſſimum hoſpitante, univerſum nervoſarum & muſculoſarum partium ſyſtema commovente, conſiſtat; eo utique prudenti conſilio medicus curam dirigere debet, ut I. magis alterantibus & perversam ſanguinis & humorum qualitatem emendantibus, quam fortioribus evacuantibus utatur; II. ut placide & blandis eva-

Frid. Hoffmanni Oper. Tom. II.

cuantibus tam per cutem, quam alvum, præparatam materiam debito tempore excludat, ac III. ut congruis analeptiſis imbecillitati ſuccurrat, atque demum ſymptomata mitiget.

§. III.

In principio itaque, antequam medicus dignoſcere poterat genium morbi, pulveres diaphoretici, cum leviter nitroſis exhibiti fuerunt, in aquis diaphoreticis & analeptiſis hunc in modum: Recipe aquæ galegæ, cardui benedicti, acaciæ, ceraſorum nigrorum ana uncias tres, cinnamomi ſ. v. unciam, ſpiritus nitri dulcis, vel liquoris anodynii mineralis guttas XX. ſyrupi acetofiſis citri, vel papaveris rhœados q. ſ. Hæc tam intra, quam extra paroxyſmum oblata, & potui datum decoctum avenaceum, cum ſucco & corticibus citri, vel etiam cum amygdalis in emulſionem redactum.

Profuerunt
diaphoretici
ca fixa &
analeptici.

§. IV.

Ad alvum ſolvendam profuerunt oppido clyſteres tantum domeſtici, ex decocto avenaceo, noſtris *Haber-Grütze*, floribus chamomillæ vulgaris, oleo amygdalarum dulcium & ſale comuni parati. Interius vero ad laxandam alvum, potiones ex uncis duabus vel una mannae, cum drachma una cremoris tartari, in aqua florum acaciæ ſolutis & additis duabus guttulis olei de cedro, perquam utiles fuerunt. Quibusdam etiam infuſum rhabbarbari cum paſſulis magis conducibile deprehenſum.

Blanda laxantia.

§. V.

Ubi natura torpida ad movendum inſultu declinante ſudorem, eſſentia ſcordii probe ſaturata, non tamen adeo ſpirituoſa, cum anatica portione liquoris anodynii & aliquot guttis ſpiritus bezoardici Buſſii data, injungendo ſimul, ut in moderato calore & lecto corpus ſervaretur.

Quandoque ſudorem moventia.

§. VI.

Quibus remediis ſucceſſive fracta fuit vehementia febris, ſive potius virulenta ejus cauſæ indoles. Hoc factò, ſi ſine gravioribus ſymptomatibus intermiſerat febris, ad eam fugandam, alia, quæ è re erant accommodata & appropriata, cum debito regimine & juſta methodo, in uſum vocata præſidia.

Fracta febre appropriata.

§. VII.

Fuerunt tamen, ubi mox in principio conſultus medicus, qui expurgato per lene vomitorium ſtomacho, & uſurpato poſtea electuario ex cortice chinæ, caſcarillæ, antimonio diaphoretico & nitro cum julepo roſarum & ſyrupo acetofiſis citri, facili, & explicata curatione, evaſerunt; ſubjunctis poſtea, quæ ad ſanitatem firmandam videbantur neceſſaria.

Quandoque ſtatim in principio.

CAUTELÆ ET OBSERVATIONES CLINICÆ.

§. I.

In omnibus epidemicæ graſſantibus febribus, imprimis ſi inſueta habeant ſymptomata, & metus cujuſdam malignitatis ſit, ſemper tutior medicandi via, præſertim in principio, per bezoardica fixiora & analeptica temperata, abſtinendo à ſanguinis miſſione, emeticis, regimine etiam nimis calido, tam quoad lectum, quam quoad conclave, immo potum.

Bezoardica fixa non valide vacuantia profunt.

§. II.

In omnibus ejuſmodi morbis præſtat abſtinere à cibus & potum tenuiſſimum aſſumere v. g. decoctum ex radice ſcorzonæræ & cornu cervi uſto paratum, adjecto ſyrupo acetofiſis citri.

Cibus parvus, potus tenuis.

§. III.

Vomitus & inquietudo quibus sedanda.

Si vomitus & inquietudines cum extremorum frigore urgent, consultius est eas blanda diaphoresi, quam adstringentibus sedare; & utique commodam hac in re præstat operam liquor noster anodynus mineralis, vel cum refracta dosi liquoris bezoardici *Bussii*, vel aliquot guttulis olei destillati macis veri, aut tantillo extracti croci nuptus. Tum etiam, ad spasmodum stomachi potissimum laxandum, utile decoctum avenaceum, cum oleo amygdalarum dulcium & croco, liberaliter potare, vel emulsione, ex aquis antispasmodicis cum seminibus quatuor frigidis & papaveris albi, uti.

§. IV.

Diarrhœa quæ possit.

In principio si alvi fluxus sociatur, pulvis rhabbari cum pulvere nitroso absorbente, vel etiam dosis pilularum balsamicarum, cum ejusmodi pulvere nitroso absorbente, aliquoties data, summæ sunt efficaciam. Sique nimis ille urget, pulveri aliquot grana corticis chaccarillæ possunt admisceri.

§. V.

Valide vacuamta nocent.

In intermittentibus epidemice grassantibus curandis id in genere notare licet: fortes purgationes, per superiora æque ac inferiora parum proficere, ut potius noceant & gravior post eas impetatur paroxysmus: lenes autem evacuationes nunquam non proficiunt. Quo alvus enim adstrictior est, eo plus incrementum cardialgiæ flatulentæ & inquietudines. Monendum tamen, quod in paroxysmo difficulter, vel plane non, clysteres locum inveniunt, eo quod tanta plerumque flatuum intensitas resistit, ut nihil admittatur.

§. VI.

Calida item acris.

Observatum etiam est, acriora & aromatica, essentias sudoriferas alexipharmacas & calidiora omnia, ex simplicibus intermittentibus, duplices, vel continuas etiam lethales plane, effecisse, præsertim in corporibus scorbuticis & ubi materia exanthematica purpurea instar fermenti in humorum & sanguinis sinu delituit.

§. VII.

Nec non venæ sectio.

Sanguinis missio neque præservationi, neque curationi harum febrium accommodata. Sufflaminat enim saluberrimam cuticularem excretionem, sorditiem succorum hinc auget, vires magis exhaurit & in continuas inde transiisse intermittentes prius has febres, fuit animadversum.

§. VIII.

Quid faciendum purpura accedente.

Si purpura complicatur hisce febribus, cum copioso & foetido sudore, summo cavendum est studio à præcalido regimine & expellentibus. Aequalis potius caloris temperies servanda & temperata etiam medicamina optima, ne nimis incalasciat & dissolvatur sanguis, nec materia expellenda intus maneat, aut retrocedat prorsus. Hinc enim febris tantisper quiescens resuscitatur, vel minimum mitior, insigniter exacerbatur. Idem observavimus, si materia erysipelacea, cum magno pruritu juncta, quod interdum senibus accidit, ad habitum corporis præsertim pedes propulsa, ad interiora recessit.

§. IX.

Et febre intermittente versa.

Mitigata symptomatum atrocitas, in epidemica hac febre sique ex ea antea continua facta typica intermittens, superatis aliquot hujus paroxysmis, die intermissionis leni laxante, vel emetico prima corporis regio expurganda, & postea in usum vocandus hic pulvis: recipe corticis chaccarillæ, chinæ, nitri purificati, antimonii diaphoretici lapidum cancrorum, ana drachmam unam,

de quo drachma dimidia, ter, vel quater quotidie, vel in aqua diaphoretica, uti cardui benedicti, gallegæ, sonchi, scorzonera, vel etiam in electuario cum syrupo redacta, extra paroxysmum usurpanda. Quo non modo materia febrilis virulenta primis in viis optime corrigitur, sed & roborando systalticam canalium virtutem, placide per diaphoresin educitur.

§. X.

Ceterum epidemica hæc febres non una omnibus annis incedunt facie, sed varium pro diversitate prægressæ tempestatum constitutionis exhibent genium. Hinc Medicus ad medicationem attento semper accedat cum judicio necesse est. Quæ vero ego diversis annis observavi & utilia deprehendi, passim in scriptis meis tradidi. In primis autem circa hoc argumentum evolvi poterit *dissertatio, observationes practicas circa febres intermittentes anno MDCXCIX. grassantes, sistens, item observationes barometrice-meteorologicæ Sect. ult. de constitutione epidemica anni MDCC.*

Varius quovis anno attendendus generis.

CAPUT V.

De Febre Semitertiana.

THESES PATHOLOGICÆ.

§. I.

Inter epidemicas, quas jam exposuimus, intermittentes mali moris febres, haud raro occurrunt, quæ ex tertiana intermittente & quotidiana continua confit, eamque ob causam Græco nomine *ἡμιτρίταιος*, & Latino, semitertiana vocatur.

Semitertiana composita febris.

§. II.

Accedit hæc plerumque ante meridiem, cum frigore & horrore gravi pulsuque contracto. Succedit postea cum pulsuum frequentia calor aliquot horarum, sudore erumpente tepescens, non tamen penitus intermittens. Intenditur potius, post refrigerationem lenem, circa noctem æstus, cum pulsuum celeritate, & postero die lenior persistit, sine siti, donec vesperi, præcedente leviori horripilatione, denuo ingravescit. Tertio autem die horror iterum impetit, cum intensiore calore, eademque, ac primo die, ratione decurrit. Ut sic semper quidem adsit febris gliscens, vesperi ipsius exacerbatio & tertio die mane hæc cum rigore maxime conspicua. Virès præterea sunt dejectæ, appetitus languet, somnus deficit, urinæ minguntur tenues crudæ, post tertianæ vero paroxysmum crassæ & tinctæ, exspuuntur cum tussi pauca cruda, & dorsi, nec non abdominis dolor haud raro jungitur, cum hujus intumescencia. Plurimi accedente tertianæ paroxysmo nausea premuntur & cardialgia, quidam vomunt plane, nonnulli animi defectionem patiuntur, alii delirant prorsus.

Quomodo incedat.

§. III.

Ignota fere nostris hæc est febris & plerumque intermittentem malignam esse putant. Sed multum ab hac utique discrepat, quum neque contagiosa sit, neque exanthematibus stipetur, neque etiam tam enormi virium prostratione, & præterea peculiarem tertio quovis die cum horrore habeat conspicuam exacerbationem.

Dissertatio intermitte-maligna.

§. IV.

§. IV.

Tertiana
continua.

Alii eam cum tertiana continua permutant, perperam pariter: hæc enim secus ac semitertiana, tertio tantum die, non vero vesperi simul ingravescit, neque tota continua est, sed licet primum continuo calore impetat, tertio tamen ut plurimum die vehementiam ponit, ac in tertianam intermittentem transit.

§. V.

Et tertiana
duplex.

Neque etiam cum tertiana duplici confundenda est semitertiana: licet enim illa quovis etiam die accedat, insultus tamen alternatim sibi respondet & febris ipsa perfecte intermittit. In hac autem nulla plane intermissio, sed tantum remissio, vespertinus quotidie paroxysmus & tertio semper die duplex.

§. VI.

Continue
causa ex
mesenterio.

Composita igitur ex duplici febre est hemitritæa febris, ideoque duplex omnino erit ipsius focus, causa duplex. Nimirum continuæ nidus in mesenterio, ex intercepto per ipsius compagem transitu sanguinis ejusdemque hinc in contiguas tunicis nervosis oborta inflammatoria stasi. Ille autem alternis diebus accedens paroxysmus gravior, non secus ac ipsa tertiana, sedem ac causam habet in intestinis, maximeque duodeno. In cujus flexuoso cavo, ex glandulis, hepate & pancreate, lymphatici & biliosi, ob mesenterii vitium pariter vitiosi humores, nec non ex stomacho crudi succi, confluentes, mineram faciunt morbosam, quæ sanguini immixta & ad nervosas spinæ membranas delata, motum inducit præternaturalem febrilem.

§. VII.

Quibus ex
causis acci-
dant.

Inter ea vero, quæ febre huic ingignendæ apta, connumeranda omnia, quæ succos spissos & impuros reddunt, primamque potissimum regionem atque mesenterii vasa sordibus opplent. Eveniunt hinc quam maxime iis, qui salubris vitæ rationis incuriosi, cibos dulces, acidos & fermentescibiles, farinaceos cum butyro, saccharo & ovis frixos, ingerunt, vitam otiosam colunt & nimis sedentariam, parcius justo bibere solent, vel vina dulcia nimis amant & animi affectibus, præsertim tristitiæ, indulgent. Ex facili etiam eas incurrunt, qui brevi ex morbo convalescerunt, alvum habent strictam, qui crebrius utuntur purgantibus drasticeis, quibus etiam hæmorrhoides, vel menses suppressi. Autumno, qui ferax febrium perniciosarum, propter varietatem & inæqualitatem perspirationi saluberrimæ valde inimicam, præterea frequentior, quam aliis anni temporibus. Et haud raro accidit iis, qui corpori æstuant frigidum ingerunt potum, aut sudantes in locum frigidum humidum concedunt.

§. VIII.

Quibus-
dam regio-
nibus fa-
miliarior.

In quibusdam quoque regionibus frequens magis esse observatur. De Italia testantur hoc cum Galeno, Spigelius atque Baglivus. Et certe regnans ibi interdum æstus acris recrementa gignit multa, frigidior noctu aura horum exclusionem impedit, & frigidus, quem amant vel injecta glacie incolæ parant, potus facit, ut subsistant in mesenterio, ubi minor resistentia & languidior progressus, succi, stasi concipiant inflammatoriam & sic febris continua, intermittens vero à succis corruptis ex mesenterio ad intestina delapsis, gignatur. Idem evenit in Hungaria, ubi eadem coeli conditio & præterea usus vinorum dulcium spirituosorum liberalior, hanc febrem frequentissime accendit.

Frid. Hoffmanni Oper. Tom. II.

§. IX.

Quia igitur semitertiana hæc febris, præter communem intermittentium prima in regione *Semitertiana periculosa.* causam, fundamentum habet inflammationem & indolem continuam, ut nec symptomatum adsit magna remissio, nec ad vires reparandas spatium, admodum anceps & intermittente simplici longe est periculosior.

§. X.

Præcipitis etiam hanc ob causam est decursus, *Brevi decurrit.* & plerumque nono, aut decimo tertio die finem attingit, vel in salutem, vel transitu in alium morbum facto, vel etiam in mortem.

§. XI.

Ubi longius extrahitur, aut in suppurationem *Longior in alios morbos transiit.* inflammatio, & morbus in hecticam potissimum, vel lentam febrem concedit, aut si firmior in mesenterio obstructio, in hydropem, aut, rarius tamen, oppleta nimium sordibus prima regione, in intermittentem simplicem quandoque, quandoque duplicem.

§. XII.

Quando verò non modo declinante paroxysmo, sudor erumpit, sed & septimo critico die, aut *Quomodo solvatur.* post eum alvus turbatur & fluxus oboritur vel biliosus ac pituitosus, vel etiam cruentus plane, bonum & morbi solutionem nunciat. Vel si etiam dolores in ventre acerbiores, certis plerumque horis ingravescentes accidunt, iisdem discutitur morbus, aut subsequente postea diarrhœa saniosa & purulenta, aut sanguine copioso nigro secedente, solvitur.

§. XIII.

Contra ea, quando nihil horum evenit, sed *Mala signa.* potius ardor circa præcordia, tensio & dolor in tota ventriculi regione, vomitus, singultus, inquietudo, jactatio & tremor manuum, animadvertuntur, malum præbent omen & inflammationem latius ad ipsum quoque ventriculum serpisse produnt.

§. XIV.

Qui semitertiana decedunt, sub accessione gravioris paroxysmi, tertianæ typum servantis, succumbunt, inflammatione late diffusa & in putredinem conversa. Quam etiam mortis causam *Sphacelo necat.* Spigelius se semper invenisse testatur. *lib. de semitertian. cap. XIV.* disertis verbis scribens: quotiescunque mecum repeto, quæ in dissectionibus mortuorum à semitertiana observavi, toties nil aliud potui agnoscere, quam putredines semper in vasis constitisse. Erant enim in dissectionibus cadaveribus inflammationes, ex sanguine bilioso & pituitoso factæ, circa jecoris cavam partem, in ventriculo, intestinis, tam crassis, quam tenuibus, mesenterio, omento, liene, & sæpius in una partium commemoratarum, aut pluribus, aliquando etiam in omnibus, quæ celeris mortis causæ erant, superveniente gangræna, vel sphacelo alicui loco, etiam si quandoque exigua esset partium prædictarum.

CURATIO.

§. I.

Duplici potissimum fundamento semitertianis *Indicatio- nes curatio- ria bina.* medendi methodus nititur. I. ut inflammatoria in mesenterii & intestinalibus tunicis hærens stasis, vitæ periculum intentans, prompte vel discutatur, vel, ne latius serpat, impediatur. II. ut materia febris, quæ intermittit, corrigatur & placide evacuetur, servando simul motuum criticorum rationem.

§. II.

*Inflam-
matio quibus
discutien-
da.*

Ad primum obtinendum egregie proficiunt pulveres diaphoretici, leniter nitrosi, parca, sed crebriori manu dati. Formula esse poterit hæc: Recipe cerussæ, antimonii, matris perlarum, lapidum cancrorum ana drachmam, solutionis oculorum cancri, nitri depurati ana drachmam semis. M. F. pulvis, de quo tribus quibusvis horis quindecim grana propinari possunt cum decocto ex radicis scorzonæ uncis duabus, rasuræ cornu cervi uncia, passularum minorum tantundem, radicis cichorei uncia semis, in quatuor aquæ mensuris per horæ dimidium coctis. Idem præstant mixturæ resolventes & diaphoreticæ, ex aquis diapnoicis & analepticis, liliorum convallium, galegæ, cardui benedicti, scorzonæ, cerasorum nigrorum, cum aceto destillato, lapidum cancrorum, antimonio diaphoretico, mixtura simplici & syrupo cardui benedicti, ternis singulis horis, ad unum vel alterum cochlear exhibitæ.

§. III.

*Abusus &
sudor quo-
modo mo-
vendus.*

His contemperantur etiam & diluuntur primæ regionis sordes intermittentem facientes, ad quas dein expurgandas omnium optima, soluta manna cum cremore tartari, nec non rhabarbari, cum passulis & salis polychresti portione. Quippe quæ sine sanguinis commotione, sine stimulo nervosarum partium, sine virium dejectione, intestinorum canalem evacuant & ad mesenterii quoque infarctum expediendum multum conferunt. Conducunt tamen etiam pilulæ balsamicæ, ex amaris extractis, gummatibus resinosis balsamicis & aloë rite depurata, cum pulvere præcipitante nitroso, moderate, sed frequentius usurpatæ. Si etiam subtiliores sordes per cutis poros aucta perspiratione evehendæ, essentia scordii, cum æquali liquoris anodynæ mineralis parte nupta, tutissima pariter & efficacissima.

CAUTELÆ ET OBSERVATIONES CLINICÆ.

§. I.

*Medicatio
caute insti-
tuenda.*

Omnis medicatio ita instituenda, ne unquam motui critico salutari obsit, sed eundem potius deficientem juvet & excedentem moderetur.

§. II.

*Purgantia
nocent.*

Hinc purgantia propinare, tanto magis in principio, admodum perniciosum. Exagitur enim inde materia nondum præparata, inflammatio augetur & morbus ad funestum citum eventum disponitur.

§. III.

*Etiam sali-
na deterfi-
va.*

Ipsa salina deterfiva, per se data, in hac febre locum non inveniunt, præsertim in majori dosi, excepto nitro antimoniato, cui recte multum detulit Baglivus, cum sale polychresto. Habent enim vim aperitivam, diureticam leniterque laxantem, & commodissime ad grana XV. in sufficiente quantitate decocti interdum dantur.

§. IV.

*Abusus cly-
steribus
primum
aperiendæ.*

Si tamen febris hæc invadit alvo clausa, vel etiam sub ipsa hæc stringitur diutius, clystere tantum, ex paregoricis & emollientibus, feminibusque carminativis cum sapone Veneto, ducenda: quo à copia excrementorum liberentur primæ viæ. Hoc enim si negligitur, per superiora natura viam affectat & vomitum movet, præsertim ubi bile acri biliosi in hepate ductus turgent.

§. V.

Declinante autem jam febre, naturæ ductui, quæ sæpe eandem alvi fluxu solvit, insistendum, & superius dicta laxantia & pilulæ balsamicæ commodissime usurpantur.

§. VI.

In emeticis propinandis maxime cautus sit medicus, ne vomitum & singultum proritet, vel stomachum ad inflammationem disponat. Si vero materia per superius os exturbanda ipsaque natura eo tendat, potus aquæ tepidæ cum sale, aut lenissimo stimulo antimoniato, satisfacit.

§. VII.

Sanguinis missio non facile locum habet in hac febre, nisi eminens plethora, urgens æstus, in corpore agili adhuc & criticarum hæmorrhagiarum suppressione affecto. Tum utique perneccesaria ad lethalem inflammationem intestinorum præcavendam. Sed in principio statim administranda, & quo citius subtrahitur sanguis, eo expeditius succedit sanatio.

§. VIII.

Vitanda dein omnia calida, essentiæ alexipharmacæ & tincturæ bezoardicæ, ipsum quoque regimen æstuosum & potus copiosus calidus. Aestus enim inde magis accenditur, criticus minere morbi per intestina effluxus turbatur, & vires inter largos sudores dissipantur.

§. IX.

Pulveres quoque adstringentes, nimium fixi, terrei, testacei omittantur his in febribus, nec non cortex chinæ. Observavit enim jam Baglivus *prax. pag. 51.* iidem vel inflammationes lethales, vel lentas & hæcticas febres fuisse inductas.

§. X.

Si etiam dolor in abdomine exquisitus urgeat, vel crebriores quoque dejectiones adsint, abstinendum tamen à sedantibus. Exterior tantum succurrendum linimentis spirituosius roborantibus, abdomini illitis, & interius diaphoreticis tumultus componendus.

§. XI.

Potui ordinario egregie servit decoctum sub curatione commendatum, nec non decoctum avenæ sic parandum: recipe avenæ mundæ lotæ libram, radicis cichorei, sarsaparillæ, scorzonæ ana unciam, florum papaveris rhæados pugillos sex, nitri antimoniatum unciam semis, adde foliorum scabiosæ manipulum dimidium, nitri puri drachmas duas, coque in quinque mensuris aquæ communis ad consumptionem tertiæ partis, dulcificetur syrupo cardui benedicti, vel papaveris erratici, vel etiam acetositis citri.

§. XII.

Admodum præterea proficuum hac in febre deprehendi decoctum florum chamomillæ & summitatum millefolii, vel etiam confecta ex ipsis extracta. Spasmos enim, inprimis hystericos, sæpe complicatos tuto leniunt, simulque propter amaritiam, singularem tonicam antifebrilem possident virtutem.

§. XIII.

Quum vero vix ulla febris æque facile redeat ac semitertiana, post eam in diata & vitæ regimine cum cura vitanda utique omnia, quæ superius in causarum procatacticarum numerum retulimus. Temperata tenenda omnia, alvi beneficium clementioribus servandum, cruditarum proventus stomachicis præscindendus, & quod maximum, perspirationis successus omni modo custodiendus. Recidivæ enim, uti omnium februm,

brium, sic etiam hemetritææ, longe deterioris, magisque refractariæ sunt indolis, ac primus morbus.

§. XIV.

*Sic etiam
in continuis
intermis-
sionibus.*

Hæc sunt generalia naturæ ductui & ratione innixa medendi præcepta, quibus observatis, curatio recte adornanda & ex voto etiam perficienda. Individualem autem & specialissimam methodum, medici suggerat iudicium, quo pro diversitate circumstantiarum, ex morbi historia agnoscendarum, ordinem, dosin, tempus & usum remedium, perite disponat ac dirigat. Quumque eadem omnino sint, quæ in medicatione intermittentium continuarum, quotidianæ, tertianæ & quartanæ, præcipi solent ac possunt, eadem in his etiam tenenda serio inculco, & de iis peculiarem tractationem instituere supervacaneum duco.

ENARRATIONES MORBORUM.

OBSERVATIO I.

Semitertiana curata.

Virgo nobilis viginti annorum, tenerior, vitæ sedentariæ & deliciis in victu impensius addicta, acetaria, fructus horæos, dulcia & lacticia crebrius assumens, autumnio incipiente, quum jam per aliquot hebdomades albo laborasset fluore, corpusque motu exæstuatam frigidiori nocturno aëri exposuisset, primum experta est languorem universi corporis, dorsi & capitis dolorem. Mane post successit horror cum anxietate magna, nausea, vomendique & desidendi stimulo, quem excepit æstus, pulsu celeri, exiguo, & cuti arida stipatus. Mitescebat tamen cute demum madefcente, sed vesperti iterum, post levem frigoris sensum, ingravescebat. Die post meliuscule habebat & urina secedebat cruda, tenuis, febriculam autem nihilo secius adesse, calor quem per sentiebat internus & os siccum aridum prodebant. Post meridiem etiam increbescebat febris & altero die mane cum horrore novus accedebat insultus, eodem modo, ut primus, incedens atque decurrens. Alternatim hæc ad diem usque septimum persistebant, quo in abdomine oriebantur murmura, inflatio ventris & hypochondriorum tensio, & sequebantur plus quam decem dejectiones mucidæ & morficantes. Fluebat sic alvus ultra decimum quartum diem, ægra, inprimis noctu, mirum languebat, exteriora magis frigeabant & algebant, interiora vero calebant accedebatque tussis ægram violentius exerceans, cum somni & appetitus defectu. Medicus, quod à principio fecerat, insistebat absorbentium, refrigerantium nitroforum usu perpetuo; nolebant autem pathemata cedere, sed potius cum ventriculi inflatione cardialgica augebantur. Postulato igitur meo consilio, dedi mixturam hanc diaphoreticam: recipe aquæ liliorum convallium, scorzonæ, ceraforum nigrorum ana unciam unam semis, theriacalis cum vino unciam, lapidum cancrorum, antimonii diaphoretici, diascordii Fracastorii ana drachmam semis, mixturæ simplicis guttas XXX. syrupi cardui benedicti, quantum satis. M. Qua bihorio quovis ad tria cochlearia data, dejectiones pauciores factæ & cutis calido madore perfusa. Infusum etiam theiforme ex veronica, scabiosa, floribus chamomillæ vulgaris & semine anisi potum, & loco ordinarii potus, decoctum cornu cervi & hordei citratum. Cum quo subinde assumtus pulvis, ex solo antimonio diaphoretico & lapidibus cancrorum, addita solutione oculorum cancri & pauxillo nitri. His intra binas hebdoma-

des symptomata, tussis, alvi crebrior dejectio, virium labes, assidua vigilia & internus æstus, sublata. Quum vero metus esset febris lentæ, obgliscentem diutius internum calorem, præsertim post pastum, ad præscindendam hanc datæ pilulæ nostræ balsamicæ, cum pulvere salino aperiante & elixirium nostrum stomachale, felici pariter cum successu.

Epicrisis.

Febris hæc exacte servavit semitertianæ typum & septimo etiam die salutarem habuit excretionem per alvum. Interim tamen semper etiam in hac febre ratio habenda cuticularis excretionis. Perperam igitur à primo medico crebriori refrigerantium & nitroforum usu perspiratio fuit impedita motusque humorum ad intestina conversus, ex quo omnia pathemata. Mixtura autem leniter sudorifera ad superficiem corporis succos egit, hincque egregie profecit.

OBSERVATIO II.

Genetosa foemina quadragenaria, tenera, mobilis valde atque sensibilis, purpuræ præterea autumnio ab aliquot annis obnoxia, post corporis refrigerationem & animi commotionem, superiori anno, vesperti horripilatione, capitis & dorsi dolore corripiebatur, succedente æstu sedecim fere horarum. Vix inde septem aut octo elapsæ erant horæ, quum gravis impeteret horror cum præcordiorum anxietate, vomendi conatu & viium prostratione, qui paroxysmus cum subsequente æstu ad viginti fere horas producebatur. Superato hoc, melius quidem habebat, dormiebat etiam, sed exactis vix sex horis, denuo extremorum eveniebat refrigeratio, cum anxio æstu magnaue debilitate, vehementia tamen symptomatum non tam gravi, nec vomendi conatu. Vocabar in consilium, semitertianam agnoscebam, sed ob notam mihi ægræ dispositionem purpuræ, hanc simul subesse statim conjiciebam, inprimis quum insignis præsto esset pectoris angustia & oppressio. Injunctus igitur primo clyster & post hunc ad expellendam purpuræ materiam, hanc ante paroxysmum & remittente eo, ad aliquot cochlearia porrexi mixturam: recipe aquæ cardui benedicti, galegæ, scorzonæ, florum sambuci ana uncias duas, aceti destillati unciam, lapidum cancrorum, antimonii diaphoretici ana scrupulos duos, cinnabaris scrupulum unum, spiritus nitri dulcis, mixturæ simplicis ana guttas XXX. syrupi cardui benedicti drachmas duas. M. Hinc quidem symptomatum atrociam mitigata, febris tamen pristinam adhuc, & vesperti, & alterno die, servabat incurSIONem, & accedebat præterea abdominis dolor cum alvi adstrictione summaque anxietate. Indicio hoc mihi fuit viscidas & biliosas multas sordes primis hospitari in viis, eoque inductus, suasi, ut remittente paroxysmo, decem ex pilulis nostris balsamicis, cum dosi pulveris absorbentis nitrosi sumeret, & præterea elixirio nostro viscerali in decocto pro potu crebrius uteretur. Sequuta inde placida alvi solutio, & continuatis iisdem remediis per aliquot dies, foetidissimæ secesserunt feces pariterque copiosæ. Hoc facto, mixtura superius dicta iterum usurpata, nec non pulveres bezoardici, cum pauxillo pulveris corticis chaccarillæ. Sic demum molestus in universo corpore obortus pruritus, purpura effloruit, urina sedimentum posuit, ac intra tredecim dies febris discessit & postea vires etiam recuperatæ.

*Semitertiana cum
purpurâ
sanata.*

Epicrisis.

In omnibus fere morbis epidemicis complicata subesse solet ejusmodi materia exanthematica, qua ad habitum corporis, sub macularum, vel aliarum efflorescentiarum forma propulsa, febris, quæ præsto est, insigniter mitigatur; non fallaci testimonio, eandem ante ab acri subtili humore ortam fuisse. In hac vero historia commemorabile, quod materia scorbutica salino-acris in corpore delitescens, non statim à mixtura sudorifera ad cutis extrema fuerit expulsa, sed tum demum, quum natura arte adjuta à sordium sarcina primam liberasset regionem.

OBSERVATIO III.

Semitertiana dysenterica funesta.

Quum anno clodcccxxvii. autumnio initian- te, circumiret dysenteria, concessit in villam suam vir quinquagenarius, robustus, plethoricus, cibis duris ac falsis cum vini potu assuetus. Eo delatus, plurimos ex villicis maligno hoc fluxu decumbere percepit. Hinc terrore percussus est haud levi. Bene tamen pransit & bibit, in horto etiam post prandium deambulavit, leviter tantum vestitus, licet aer regnaret frigidiusculus. Vesperis horrere coepit ac frigere, torminibusque ventris affligi cum aestu, qui per totam fere noctem persistit. Mane post misit, qui medicum vocarent, interea vero novum expertus est frigoris accessum, cum nausea, anxietate & ventris tensione, subsequente calore. Medicus epidemicam luem subesse ratus, ad præscindendum ipsius fomitem, purgans dedit pharmacum. Quo vel quinquagesies dejecit cum acerbis torminibus æger, alvumque in latrina, torrenti domum al- luenti superstructa deponens, ad ventrem frigus incautius admisit. Accensa hinc magis febris, al- ternis semper diebus gravior, alvus perpetuo fluxit cruenta, demum cadaverosi foetoris, somnus periit, æger de ardore interno conqueri, corpus jactare & delirare coepit, donec sexto morbi die convulsus periret.

Epicrisis.

Est hæc febris dysenterica inflammatoria, semitertianæ typum habens, inducta à terrore, cruditatibus primarum viarum, refrigeratione & pur- gante, nec mirum, conspirantibus tam multis cau- sis, brevi in funestum morbum fuisse adductum hominem sanum atque robustum. Heic vero quam maxime proficua fuisset sanguinis missio, quam in dysenterico morbo mirifice commendat Sydenha- mus, Botallus, Amatus Lusitanus, cum aliis. Et hac sola, adjunctis medicamentis diaphoreticis, leniter nitrosis, inflammationem discuti, sphace- lum arceri, & firmum alias virum servari potuis- se, ego quidem arbitror.

OBSERVATIO IV.

Semitertiana ictero discussa.

Quadragenarius vir, tenerioris & biliosæ con- stitutionis multum delectatus dulcibus, & in pran- dio, loco vini, subinde sumens aquam sic dictam vitæ, jamque ante annum ictericus, incidit au- tumno in semitertianam cum magna debilitate, occipitis dolore, siti, calore, ciborum nausea & crebrioribus ventris torminibus. Septimo die sol- vebatur alvus & per aliquot dies largiter flue- bat, febrisque mitescebat. Nihilo minus medi- cus ad sistendum fluxum exhibebat pulverem, cum terra catechu, quo constitit. Sed factus æger ictericus, flavescente per totum corpus colore diffuso, alvus oblipata, excrementa alba, urina

nigra & oleaginosa. Interim sub icteritia hac prio- ra symptomata cessarunt omnia, rediitque appe- titus cum viribus. Icterus etiam discussus pulve- re rhabarbari cum speciebus diacurcumæ & li- quore aperitivo, ex sale tartari, terra foliata tar- tari & arcano duplicato, composito. Sicque æger penitus convaleuit.

Epicrisis.

Orta procul dubio hæc febris à copiosis sordi- bus biliosis stagnantibus & postea ad intestina de- latis, quarum affluxu cum pulvere adstringente ad interiora represso, icteritia supervenit. Adstruitur hinc veritas effati Hippocratis & Celsi: icteritiam febri succedentem, eam sæpe tollere.

CAPUT VI.

De Febre Catarrhali Benigna.

THESES PATHOLOGICÆ.

§. I.

EX febribus lymphaticis & serosis est excu- tienda nunc catarrhalis, in qua motu soli- dorum & fluidorum adaucto, serum, ob perspi- rationem interceptam, superfluum & impurum, per glandulosa, faucium præsertim, narium & bronchiorum organa, citrice quasi & salutariter ejicitur.

§. II.

Incipit hæc, vesperi ut plurimum, cum cutis inhorrescentia, extremorum, imprimis pedum & plantarum refrigeratione, alvi siccitate, stimulo ad mejendum, sed parco mictu, capitis debilita- te, languore universi corporis & appetitu adauc- to, quasi spurio, nec non siti, difficili deglutitio- ne, stimulo in larynge, narium, & faucium calo- re, sequitur sternutatio, pectoris gravitas, & calor circa noctem cum pulsu celeri auctiori, tussis vio- lenta, cum coryza, ardore faucium, somno in- quieto, mane sudor, gravitas & torpor totius cor- poris appetitusque prostratio.

§. III.

Immediata horum pathematum causa est se- rum, seu lymphæ, acris caustica, in tunicis glandu- losis subsistens, easdemque inflammans, cum do- lore, tumore & rubore. Contingit hoc in tota na- rium, palati & faucium regione, tota etiam arteria aspera, cum ramis bronchialibus, quin immo ipso œsophago, ventriculo & intestinis. Has enim si- mul affectas esse partes, raucedo, tussis, screatus materiæ viscidæ, sternutatio, pectoris gravedo, item nausea, quandoque in vomitum erumpens, ardor in præcordiis, tormina ventris, & subsequens salutaris alvi fluxus, testantur.

§. IV.

Hanc autem feri subsistentiam inducit potissi- mum interceptus perspirationis successus. Hinc enim est, quod vere & autumnio, æquinoctii tem- pore, frequentissimus hujus febris incursus. Tum quippe maxima tempestatum vicissitudo, ex cali- do in frigidum, sicco in humidum & vice versa, tam varie corporis corticem afficit, ut succedens ibi evacuatio graviter turbetur.

§. V.

Eandem ob causam catarrhi frequentissime ac- cidunt iis, qui subito aërem mutant, ex calido loco in frigidum, vel ex frigido in humidum conce- dunt; qui corpus autumnali, vel nocturno frigido humi-

Febris ca- tarrhalis quid sit?

Ejus histo- ria.

Causa im- mediata & sedes.

Frequens cur vere & autumnio?

Sub aëris mutatione.

humido aëri incautius committunt; qui vestitum hybernū vere cito nimis deponunt, vel autumnō serius resumunt; qui etiam æquinoctio sanguinis missionem passi, vel alias criticam largam hæmorrhagiam experti, improvide in aërem liberum frigidiusculum se conferunt.

§. VI.

Neque alia subest ratio, quod corpora spongiosa, laxa, phlegmatica & sanguinea, infantes, pueri ac feminae, longe frequentius febri catarrhali pateant, quam adulti, viri, strictioris magisque biliosæ constitutionis; quod etiam magis eadem afficiantur, qui vigiliis indulgent, crapulam sectantur, vinoque aut vini spiritu corpus exæstuant, humidiori & frigidiori aëri postea illud exponunt.

§. VII.

In iis quoque, qui post crustam lacteam & tineam capitis, nec non scabiem præpostere scitatum, post incuriosius, aut mala medicatione exceptam coryzam & tussim, febrem incurrunt catarrhalem; nulla utique alia potest suggeri causa, quam repulsum ex ambitu corporis ad interiora serum acre & rodens, inflammationi inducendæ aptum.

§. VIII.

Non tamen dubitandum, quin quandoque in aëre hospitetur subtilis caustica ejusmodi materia, quæ inspiratione hausta, locis, quæ pertransit, glandulosis, sese insinuat, eademque dolore, tumore & rubore afficit & febrem accendit catarrhalem. Prompta certe ejusmodi acris materiæ genesis vere ineunte, quo liquecente nive & regelata glacie, solum aqua inundatur effoeta, quæ passim stagnans & putrescens, noxia in aërem mittit effluvia multa. Quo etiam fit, ut febres hæc tum ut plurimum sint epidemicæ & plures uno tempore invadant.

§. IX.

Quod autem catarrhi & catarrhales febres contagiosæ etiam sint & alios propinquos atque dispositos contagio inficiant, eam utique fit ob causam, quod lymphæ potissimum vitio debentur, eodem modo ac notum est, omnes qui contagio propagantur morbi, lymphæ corruptionem, vappescientiam, vel putredinem, habere causam.

§. X.

Sic incedit & generatur catarrhalis febris benigna, & hæc qui novit, ex facili eandem distinguere poterit ab aliis quotidie accedentibus febrium paroxysmis, lenta, hæctica, quotidiana, tertiana duplici & quartana triplici.

§. XI.

Facili etiam negotio discrimen perspiciet inter illas glandulosarum in faucibus & naribus tunicarum affectiones, quæ ex lue venerea & scorbuto, & quæ ex catarrho eveniunt. In illis enim sola erosio & ulceratio, à materia caustica lymphatico-serosa, sine febre; in hac vero, præter arrosionem, inflammatorii quid subest, ex subtiliori sanguinis parte stasin concipiente, cum febre.

§. XII.

Obvia quoque erit differentia, inter catarrhalem, & eam febrem, quæ rheumatismo accedit. Quum in illa tunicæ glandulosæ internæ afficiantur & excretio subsequatur; in hac autem externæ musculorum tunicæ patiantur & morbus evacuatione critica non solvatur.

§. XIII.

Paullo difficilior autem benigna discernitur à

maligna, inprimis ab initio; ob plurima, quæ ambæ communia habent symptomata. In eo tamen differentia, quod hæc, secus ac illa, ingentem & subitam inferat virium prostrationem, cum vigilia perpetua, quam mentis turbatio sequitur, quod contagiosa magis sit & plerumque etiam petechias & maculas habeat junctas, uti pluribus infra dicitur.

§. XIV.

Ceterum, quo major sanguinis & feri impuritas, eo graviora adsunt pathemata eoque diutius trahitur morbus, uti potissimum obvium est in scorbuticis, nec non ubi purpuræ materia intus delitescit.

§. XV.

In hypochondriacis, præter diuturnitatem, ob labefactatum ventriculi & intestinorum tonum & proclivitatem ad spasticas stricturas & flatulentias, gravia varia jungi solent pathemata, anxietates præcordiorum inprimis, spirandi angustia & inquietudo, cum inflativo & pressorio in hypogastrio dolore.

§. XVI.

Qui sanguine abundant, intemperanter vivunt, vina non adeo bonæ notæ largius potant & acidis falsis cibis delectantur, majorem circa vesperam experiuntur ardorem & tussim ficcam ferinam, cum somno inquieto.

§. XVII.

Neque minus feminae, quæ terrore, vel alia ex causa mensium suppressione laborant, magnas in hac febre experiuntur præcordiorum anxietates, intercurrentibus lypothymiis, universi corporis notabilem debilitatem & alternantem frigoris & caloris in cute sensum, quæ noctu potissimum ingravescent.

§. XVIII.

Per se tamen hæc febris benigna omnino est, & omni periculo, si dextre in medicatione excipitur, vacat, & intra septem, aut quatuordecim dies, ut plurimum discedit, omni lassitudine sublata. Quin aliæ etiam capitis passionēs, cephalalgia inprimis & hemicrania, succedente catarrho & naribus bene fluentibus, optime solvuntur.

§. XIX.

Solvitur sæpe in principio statim aucta perspiratione per sudorem. In aliis post aliquot demum dies, vel copioso secreta materiæ viscidæ, vel liberali feri mucosi è naribus stillicidio. In quibusdam etiam per crebras alvi dejectiones & in nonnullis, quando urina tenuis antea & parca, largam nunc manat & pondere gravis, ut minimum duplo majorem materiæ solidæ quantitatem contineat, ac in naturali statu.

PRÆSERVATIO ET CURATIO.

§. I.

Quod igitur ad arcendum catarrhorum insultum attinet, vitanda inculco omnia, quibus induci eosdem supra dixi, & suadeo, ut vere & autumnō, tempestive sanguis mittatur, modicus cibus sumatur, perspiratio custodiatur & corpus subinde motu exerceatur. In iis autem, qui laxioris humidioris naturæ ac ætate juvenes sunt, & ob id, notante jam Hippocrate Sect. VI. aph. 2. frequenter exercentur catarrhalibus defluxionibus & rheumaticis affectibus; ego multoties cum fructu usus sum hac methodo, qua præcepi, ut per quadraginta dies decoctum ex radice chinæ, farsaparillæ, cortice ligni sassafras, cum passulis & pauco cinnamomo, biberent, ac interea ex cibis nihil

sumerent præter carnem assatam, cum amygdalis tostis & pane bis cocto, simul etiam aliquoties ad alvum subducendam uterentur pisana manciata, demum finita hac cura, elixir stomachale, ad XXX. guttas, cum aqua & vino, quotidie ante prandium usurparent.

§. II.

Indicationes curatoria.

Medicatio dein catarrhalium febrium, triplicem hunc sibi præfixum habet scopum: I. ut acrimonia illa salina acris lymphæ obtundatur ac temperetur; II. ut perspiratio turbata, quæ primaria congestionis ferossæ ad interiora causa, promoveatur ac in ordinem iterum redigatur; III. ut in fine excretio muci visci crassi promoveatur, ejusdemque ulterior generatio impediatur.

§. III.

Acrimonia quomodo temperanda.

Acredinem contemperant, præter pulveres sic dictos bezoardicos absorbentes, humectantia omnia & oleosa, instar omnium oleum amygdalarum dulcium, dein sperma ceti, butyrum rubrum, lac, cremor lactis, emulsiones ex amygdalis, vel pineis, cum semine papaveris albi, decoctum avenaceum, raparum, hordei, juscula caponum, gallinarum, cum vitello ovi. Ex dulcibus liquiritia, ejus infusum, essentia & succus Hispanicus, ficus quoque & passulæ. Si subtilis nimis & rodens est acrimonia, leniora anodyna locum habent, inter quæ aliis palmam præripiunt papaveracea, crocus, item pilulæ *Wildegansii*, diacodium *Montani*, pilulæ de styrace, quarum compositio & usus antiquissimus pariter ac probatus est, uti patet ex *Tralliani lib. V. pag. 247.*

§. IV.

Perspiratio quibus promovenda.

Ad excretionem, præsertim omnium saluberrimam cuticularem, faciunt infusa calida theiformia, ex herba veronicæ, hyssopi, radice liquiritiæ, floribus sambuci, papaveris rhœados & semine foeniculi. Proficui etiam sunt pulveres diaphoretici fixiores, inprimis cum aquis diapnoicis & antispasmodicis sumti. Nihil quoque ad purgationem feri per cuticulam utilius ipsa exercitatione & motione corporis, quæ ab *Hippocrate lib. de insomn. §. IV.* item *de victu acut. §. 67.* mirifice ad sudorem eliciendum, mane post frictionem, commendatur.

§. V.

Mucus quibus educendus, faucibus.

Educendæ demum, quæ restitat materiæ lentæ, ex faucium glanduloso peristromate, serviunt pectoralia, ficus & passulæ, cum spiritu vini accensæ & in syrupum quasi redactæ, balsamum pectorale *Meibomii*, item elixir pectorale, ex gummi ammoniaco, myrrha, radice liquiritiæ, enulæ, croco, benzoë & oleo anisi, cujus resolvens virtus addita tinctura tartari, vel spiritu salis ammoniaci vinoso, adhuc potest intendi. Ad fundendam autem stagnantem in narium cavitatibus pituitam, nihil præstantius sale volatili salis ammoniaci sicco, cum aliquot guttulis olei majoranæ puri, non foetidi, nec adulterati, essentificato, crebrius naribus admoto.

§. VI.

Methodus mendi remediis.

De applicatione horum remediorum id in genere tenendum: quod matutino tempore expediat perspirationem promovere potu infusorum ex herbis calidorum, nec non jusculorum & usu pulverum temperantium bezoardicorum; circa noctem vero anodyna & demulcentia dare. Specialis autem medendi methodus, partim in symptomatum mitigatione, partim etiam in oblatione medicamentorum, ratione doseos & ordinis, consistit, & ad individua corporum dispositionem

est accommodanda, de qua potiora in subjungendis nunc monitis practicis trademus.

CAUTELÆ ET OBSERVATIONES CLINICÆ.

§. I.

Sicuti omnis febrilis æstus, ita etiam catarrhalis, lenissime & placide tractandus est, æger quoque in moderato calore lecti & hypocausti semper fervendus. Exulent igitur omnia commoventia calidiora & validiora, una cum regimine æstuoso, eo quod materiam acrem magis exagitant, calorem adaugent & æstuosam partibus diathesin conciliant. Vitentur vero vicissim omnia refrigerantia, acida & quæcunque perspirationem turbant. Opiata etiam & theriacalia caute in usum vocentur, tanto magis si caput debile & grave, si ætas senilis & alvus adstricta.

§. II.

Cibus sit paucus, potus tepidus & salubris, optimus decoctum hordei excorticati cum rasura cornu cervi, passulis & radice liquiritiæ, item decoctum avenaceum. Vinum autem, nec non vini spiritus, propter acidum stimulans & spiritum, qui calorem accendit, nullius in hac febre utilitatis. In declinatione tamen morbi, si excretionem jam adsunt, vinum bonæ notæ conduxisse, paulo largius etiam sumtum, observatum est, eo quod circulum sanguinis promovet, & æqualem servat perspirationem.

§. III.

Si æstus est impensior, uti in plethoricis atque cholericis, fervor etiam internarum partium percipitur, nitri aliquot grana pulveribus bezoardicis cum fructu admiscuntur, & emulsiones liberius usurpantur.

§. IV.

Quando alvus dura nimis & stricta, sub morbo, præter juscula avenacea, mannata, prunata & passulata, nihil convenientius clystere emolliente. Egregium tamen quoque usum præstant pilulæ aloëphanginæ, vel Beccherianæ, ad X. vel XII. grana, cum granis IV. pilularum de styrace, ante lecti introitum sumtæ, eo quod & alvum aperiunt, & violentam siccam tussim moderantur.

§. V.

Si etiam declinante febre tussis humida nimis, copiosa & pertinax, ad humorem pituitosum derivandum & per alvum evacuandum, egregie proficit decoctum mannæ largiori dosi, ad uncias duas vel tres, ex aqua veronicæ. Tum quoque profunt pilulæ balsamicæ *Becheri*, nec non *Rufi*, ex aloë, myrrha & croco, æquali portione commixtis, paratæ.

§. VI.

In principio vero febris catarrhalis alvum stimulantia non conferunt, præsertim paullo acriora, quia humores serosos acres ad intestina invitant, tormina & alvi fluxus, non sine periculo febris lentæ, concitant. Quin à mercurio dulci cum resina jalappæ sic dato, in virgine plethorica inflammationem ventriculi inductam fuisse, novi.

§. VII.

Ubi tussis ferina & vehemens, componenda est oleo amygdalarum dulcium recenti, cum syrupo capillari Monspeliensi commixto, item hoc electuario: Recipe olei amygdalarum dulcium drachmas tres, spermatis ceti drachmam, sacchari candi albi, syrapi violarum ana unciam, croci

Febris catarrhalis leniter tractanda & causa

Cibus & potus sit congruus

Nitrum quando proficit

Alvus dura sub morbo

Item declinante febre

In principio purgatio nocens

Tussis ferina quibus componenda

scrupulum, olei anisi, macis, ligni sassafras, ana guttas sex, M. De quo subinde aliquid deglutendum.

§. VIII.

Quando in foeminis mensium suppressione affectis superius dicta pathemata ingruunt, alvus congruis clysteribus ducenda & diaphoretica propinanda, quæ sanguinis motum ad superficiem corporis urgent, tumque pulveribus bezoardicis cum fructu adjici potest, croci granum unum, vel aliquot grana florum sulphuris, abstinendum vero ab omnibus expectorantibus & dulcibus.

§. IX.

Quæ hypochondriacis accidunt insolita ex ventriculi potissimum inflatione symptomata, clysteribus emollientibus & carminativis, nec non essentiis carminativis, cum pectoralibus nuptis, quam optime discutuntur.

§. X.

Quando superata febre pulmonum restitat laxitas, ut justo largior fit scretus, pulveribus bezoardicis addenda aliquot corticis chaccarillæ grana, vel balsamum nostrum sic dictum vitæ, circa noctem ad aliquot guttas sumendum.

§. XI.

Sanguinis missio, debito tempore & regimine instituta, in plethoricis quam optime frequentem catarrhorum insultum arcet. Sed præsentem jam catarrhali febre, penitus ab ea abstinendum. Tum enim, experientia teste, diuturnitatem catarrhi adducit.

§. XII.

In tussi violenta & nimis diu durante, pectoralia dulcia, incrassantia, in nimia quantitate oblata, ad cachexiam, immo ad phthysicum affectum, disponunt, appetitum & digestionis vim infringendo & pulmonum tonum valde labefactando.

§. XIII.

Quamvis juxta *Hippocratem lib. VI. epid. Sect. III.* his, qui ex capite, gravedine & raucedine laborant, ubi febre correpti fuerint, minus recidivæ fiant, si videlicet morbus cum defluxione recte fuerit solutus; nihilo minus tamen ne via sternatur ad alium morbum, pariter ex *Hippocratis l. c.* consilio, suadeo, ut convalescentes victus & ventriculi rationem habeant, & præterea ad perspirationem servandam, potum infusi theiformis mane adhuc aliquandiu continuent, uti pluribus supra in præservatoriis monitis dictum est.

ENARRATIONES MORBORUM.

OBSERVATIO I.

Vir macilentus, natura sensibilibior, à multis annis hypochondriacis pathematibus obnoxius, præter consuetudinem in convivio stomachum non modo variis eduliis, sed & liberali vini potu onerarat. Aliquot horis post, noctu, sub aëre vernali humido frigidiusculo, iter fecit, ac domum reversus, correptus est horrore, languore totius corporis magnaue capitis gravitate. Sequuta ingens præcordiorum anxietas, tussis molesta & præternaturalis æstus, cum alvo tensa & adstricta. Suasu uxoris bibit decoctum Succoladæ, quod excepit intensior anxietas, inquietudo, suffocatoria quasi spirandi angustia, nec non inflativus dolor lateris dextri in regione hypogastrii. Vocatus hinc medicus, qui febrem non modo malignam, sed & peripneumoniaci quid sub-

esse judicavit, & tincturam bezoardicam cum spiritu cornu cervi, nec non mixturam ex aqua cardui benedicti, dialcordio Fracastorii, lapidibus cancerorum, antimonio diaphoretico & syrupo papaveris rhœados, exhibuit. Sed frustra & perperam: quarto enim die, quum ob alvum nimis strictam, clyster injiceretur, evanuerunt, quæ metum gravis morbi incusserant, symptomata omnia, & tussis tantum, gravativus capitis dolor, raucedo & æstus vesperti increbescens, remanserunt. Ab alio igitur medico commendatum infusum ex veronica, liquiritia & fœniculo, circa noctem dosis pulveris bezoardici cum grano uno extracti croci & papaveris rhœados, alterno die vesperti dosis pilularum nostrarum pectoralium, interdum aliquot grana nitri & succini cum emulsione, & ad expectorationem electuarium ex oleo amygdalarum, spermate ceti, croco & oleo anisi. His procuratus scretus & lenis sudor, & reliqua adhuc symptomata fere omnia discesserunt. Venter autem mansit imbecillis, & cibo sumto, gravativum & pressorium fecit dolorem. Tussis etiam noctu fuit acris cum materiæ copiosæ ejectione, quæ interdum etiam vomitum proritavit. Sed quum corpus equitatione exerceret æger, pilulis nostris balsamicis & inter cibos sale volatili oleoso uteretur, & loco tenuis acrescentis cerevisiæ, biberet saturatiorem & amaricantem, successive pristinae valetudini ex toto fuit redditus.

Epicrisis.

Fuit hæc febris nonnisi catarrhalis benigna, tum etiam popularis. Sed quia incidebat in hypochondriacum corpus, comparuere insolita pathemata. Stomachus etiam cruditatibus jam plenus non potuit non ægre ferre decoctum succoladæ in copia sumtum, quo tunica villosa & osculis ductuum in ipsa obstructis, inflatio inducta, cui angustia spirandi, præcordiorum anxietas, dolor sinistri lateris tensivus & inquietudo tribuenda. Medicus autem male consuluit famæ, quod præceps nimis in judicando fuit & hæc sibi impingere passus est. Et quod demum diutius hæc febris persistit, id utique omnibus evenire solet hypochondriacis, in quibus ventriculi robori immunito convenientibus succurrendum est præterea præsidii.

OBSERVATIO II.

Quum anno cdo lccix. post accerrimum hyemale diuturnum frigus, Martio mense leniori ex austro spirante vento, nives & gelu solverentur, Aprili & Majo initiante, Berolini, quo tum degēbam, & alibi, quamplurimos corripiebat febris cum horripilatione & æstu, summo languore, tussi ferina, nonnullis quasi suffocatoria, ingenti siti & ciborum nausea. Circa noctem invalescebant hæc omnia & somnus inde mirum turbabatur: in quibusdam extrema mox calebant, mox horrebant. Quidam diu decumbebant, præsertim ii, ubi ob præviam humorum diathesin, purpuræ scorbuticæ materia intus delitescibat, quæ etiam per vices crebrius maculis rubris & asperis in extrema cute comparebat, ex levi vero causa iterum evanescibat. In nonnullis quarto statim die exanthemata rubra morsicantia, urentia, cum magno pruritu, quasi ab urticis inducta, quæ dicunt *die Nesselsucht*, erumpebant & tussis æque ac caloris mitigationem inferebant. Alii, præsertim foeminæ phlegmaticæ sanguineæ provecioris ætatis, exquisitos simul rheumaticos dolores patiebantur. Qui vix convalescentes, in

Febres catarrhales epidemicæ.

publicum prodibant cito nimis, incurrebant ingentem capitis torporem, gravativum dolorem, vertiginem, gravedinem, *den Stockschnupfen*, languorem corporis cum spirandi angustia & difficili negotio iterum ad sanitatem redibant. Ubi etiam vetus jam erat in pulmonibus vitium ex hæreditate, febre hac discedente, tussis purulenta cum sanguine succedebat, sæpe vera phthisis. Qui porro ab imperitis chirurgis & pharmacopœis purgantes accipiebant pilulas, doloribus acerbis ventris affligebantur, mirumque debilitabantur, animi defectiones patiebantur cum frigido extremorum sudore, & gravius, & longius, decumbentes. Qui vero & proba victus & regiminis ratione, & dextra medicatione morbo occurrebant, ac pulveribus inprimis bezoardicis sedulo utebantur; cum uno, vel dimidio grano extracti croci, brevi convalescebant iterum.

Epicrisis.

Epidemicæ haud raro sunt catarrhales febres, tum maxime, quando ex tempestatum constitutione insolita ejusdemque subita vicissitudine, ob mutationem ventorum, inprimis quando rigidum boream mox lenior excipit aura zephyri, subnascuntur. Pejoris etiam tum sunt indolis & ægrius persanantur, qui dyscrasia sanguinis & humorum, ab aëris intemperie introducta, foveantur. Valde dissimilia quoque, pro dispositione habitus corporis, viscerum, ætatis, temperamento, nec non victus ratione, inferunt symptomata, magis, vel minus benigna. In curatione autem omnia, quæ criticum naturæ motum, feri superflui per glandulosa emunctoria excretioni dicarum, turbant, morbum graviter exasperant & sanationem impediunt, uti potissimum faciunt purgantia cum corporis refrigeratione. Contra ea optimum utique consilium, corpus in perpetua perspiratione fervare & usurpare ea, quæ acredinem mulcent, leniunt atque contemperant, ex medicamentis æque ac alimentis, & quod maximum est, ab omni cerevisia & vino abstinere & decoctum temperans bibere, sine quo refractarii catarrhi difficulter vel plane non cedunt.

OBSERVATIO III.

*Frequens
catarrho-
rum incur-
sus subla-
tus.*

Macilentus, nervosus & animo mobilis vir, quadraginta annos habens, quum Baccho & Veneri strenue subinde litaret, lauto vivendi genere uteretur, nec unquam tamen sanguinis missionem admitteret, à longo jam tempore, vere & autumnno, crebrius affligebatur catarrhalibus defluxionibus, quæ cum horrore, æstu, extremorum frigore, capitis dorsique dolore, lassitudine totius corporis & inquietudine ipsum invadebant, & accedentibus artuum, coxendicis & nuchæ doloribus, sæpius per aliquot hebdomades detinebant. A me igitur salubre consilium ad arcendum tam frequentem catarrhorum incursum rogans, obtinuit hoc: ut I. aliquot ante æquinoctium hebdomadibus, venæ sectionem cum debito regimine institueret; II. ut bis anno lac cum minerali leniori aqua, Selterana inprimis, ad mensē potaret, & loco cerevisiæ biberet ptisanam; III. ut bis hebdomade, pulverem bezoardicum absorbentem, paullo ante quam cubitum iret, assumeret, & mane post in lecto infusum veronicæ, cum liquiritia & semine fœniculi, forbilleret, lenem postea expectando sudorem. Quæ omnia, quum per aliquot annos fecisset, liber fere degit à molestis catarrhosis defluxionibus, & animadvertit, eosdem illico infestasse, simul ac

sanguinis missionem tempestivam neglexisset.

Epicrisis.

Per immoderatum vini ac veneris usum, adeo utique infirmantur corpora, ut postea levi ex causa ægrotent, & potissimum, incidente subita cœli mutatione, vere & autumnno admodum solenni, catarrhos, gravedinem, coryzam & tussim incurrant, cum febricula. Idem quoque macilentis & plethoricis, post corporis refrigerationem contingere, docet experientia. Venæ sectio autem omnium optime ab his molestiis defendit. Si enim sanguine nimis plena sunt vasa, ob difficile circuitum, non rite depuratur. Hinc serum fit & copiosum, & impurum. Et impedita postea per cutis poros diffatione, ad interiora, maximeque glandulosa loca, falsus agitur humor, catarrhum cum febricula serosa faciens. Ego certe multiplici confirmatum habeo experientia, catarrhis crebrius obnoxios, ab eorum insultu maturata sanguinis missione fuisse liberatos. Observavi quoque eos, qui venæ sectionem, certo tempore suetam, intermiserunt, affectos fuisse catarrhali febre.

OBSERVATIO IV.

Dux quidam militaris quinquagenario major sanguine & succis plenus, ex Italia ad nostras oras accedens, ob insignem aëris, victus & vinorum mutationem frequentissime affectus fuit acerbis colicis in abdomine doloribus. Bibit hinc, meo ex consilio, præmissa venæ sectione & purgatione alvi per infusum mannatum, aquam Sedlicensem, per aliquot hebdomades, quo factum, ut per totum autumnum ac hyemem liber à tormentis ageret. Iterandam igitur hanc curam, medio vere, suasi: sed antequam id faceret, vino se largius implevit & corpus deambulatione per aliquot horas sub frigido cœlo admodum frigesecit. Inde incidit in febrem, cum coryza, capitis dolore, horrore extremorum, præcordiorum anxietate, æstu, inquietudine, tussi valida, & febre fere continua. Post tres tamen dies remisit febris impetus, sed horror cum subsequente æstu versus noctem accessit adhuc, & quod commemorabile, declinante semper paroxysmo, venter flatibus distendebatur & cruciatus in ipso facti, calore vero oboriente mitigati. Interdum etiam in paroxysmo deliravit paulum & facies fuit rubicunda. Mane autem febris semper remisit. Consultus ego quarto morbi die, expensis curate cunctis, ex pulsu pleno ac magno judicavi, venam esse secandam: quod & remittente paroxysmo in pede feliciter factum est. Alvus dein aliquoties clystere carminativo & emolliente subducta, & postea curatio, pulveribus diaphoreticis, temperantibus, leniter nitrosis, cum emulsione ex decocto cornu cervi, amygdalis & semine papaveris albi, sub moderate calido regimine, intra tres hebdomades ex voto confecta, alvo tamen interea bis decocto mannato soluta.

Epicrisis.

Venæ sectio in catarrhosis affectibus non quidem directe indicatur; interim tamen, si corpus est plethoricum, si sanguis à calidis & præsertim immoderatiore vini usu incaluit, & febris catarrhalis subito invadens continua videtur, non nocet, sed prodest, elapsis etiam jam aliquot diebus. Dein hoc in casu commemorabile, quod abdominis dolores, jam per annum silentes, accedente hac febre, fuerint resuscitati, & quidem tempore remissionis, discussi vero per febris calorem.

lorem. Quod quidem nullam aliam ob causam factum fuisse arbitror, quam quod falsus & acris humor ad intestina delatus eadem moleste affecit, sub æstu vero ad habitum corporis propulsus. Multoties quoque me docuit experientia, pathemata hypochondriaca, colica & spasmodica, in iis, qui diu iisdem affecti, catarrhis, tussi, coryza & catarrhali febre fuisse revocata. Et hypochondriacos, eo tempore, quo alii catarrhis vere & autumnno laborant, vehementes tum quasi paroxysmos mali sui experiri.

OBSERVATIO V.

Ver erat, quum virgo nubilis, tenerior, sensibilis texturæ & spongiosi habitus, horripilatione, cum calore præternaturali, languore universi corporis, nec non præcordiorum anxietate corripereetur. Intumescabant circa tertium diem colli glandulæ, faucesque levi afficiebantur inflammatione, aderat simul tussis cum gravedine & raucedine. Vocabatur medicus, qui auri fulminantis, minus puri, grana sex, cum dimidio scrupuli antimonii diaphoretici propinabat. Sumto hoc pulvere, sævissima insequiebantur pathemata, animi deliquium, summa anxietas & inquietudo, extremorum refrigeratio & conatus ad vomendum. Opponebantur quidem bezoardica, & fixa, & volatilia, sed incassum. Sequebantur quatuor dejectiones viridissimæ & vomitu ejusdem indolis materia rejiciebatur. Anxietates vero inde nihil minuebantur, sed persistebant perpetuæ cum animi defectione, ardor etiam & constrictorius dolor in præcordiis fixus urgebat, & quovis assumpto exacerbabatur, sudor succedebat frigidus, facies Hippocratica & septimo die mors ipsa.

Epicrisis.

Miranda sane, febris hujus minus periculosa primum visæ, subita catastrophe, demum funesta. Orta hinc ingens controversia: utrum per se fuerit maligna? an vero simplex catarrhalis usu pharmaci facta fuerit lethalis? Id minimum verum: medicamina metallica non bene præparata & corrosivo sale adhuc imbuta, quale est aurum fulminans non rite edulcoratum, veneni prorsus induere naturam & funestum edere effectum in personis tenerioribus, & ubi jam ad lenem inflammationem, nervosæ partes, è quibus etiam ventriculus, jam sunt dispositæ. Aurum enim, ob gravitatem suam firmiter ventriculi tunicis inhærendo, eam cui insidet partem vehementer exstimulat, eandemque spastice constringit, haud secus ac venena, quæ pariter stomacho spasmus inducunt, qui postea per nervorum genus diffunditur totamque œconomiam motuum pervertit. Id quod tanto magis fit in corpore exquisitius sentiente, ubi jam adest febris, quæ nihil nisi universalis fibrarum spastica est contractio. Dein id pariter certum: materiam causticam lymphaticam foris secernendam, forti ejusmodi stimulo retrahi ad ipsum ventriculum & solam ad inducendam ipsi inflammationem esse sufficientem. Ne dicam, primam corporis regionem succis corrosivis acidis biliosis fuisse obsessam, teste ipso colore eorum, quæ secesserunt. Hos autem solos corrosivitate sua propria, multo magis corrosivo adhuc pharmaco adjutos, inflammationem parere posse, nemo negabit. Cautissime igitur mercandum cum medicamentis quodammodo corrosivis ex mineralium familia, ubi stomachus ad inflammationem dispositus, *Frid. Hoffmanni Oper. Tom. II.*

& saburra erodente acido-bilioforum humorum scatet. Tum enim medicamentum ab aliis sine damno sumtum, veneni naturam utique potest induere.

OBSERVATIO VI.

Literatus & vitæ sedentariæ addictus vir, quædragenarius circiter & corpore habitior, à multis jam annis vere & autumnno capitis defluxionibus, coryzæ, gravedini, tussi cum incallescencia quadam febrili fuerat obnoxius. Is initiante Octobre, quum poma cydonia cocta crebro & largiter edisset, & alvum inde obtinuisset solito strictiorem, postea etiam per aliquot horas liberiori frigido aëri sese exposuisset, sequenti mox die, circa vespere, horripilatione, intercurrente æstu corripitur. Manè sensum tractorium admodum dolorificum percipit in humeris & nucha, nec non acutum in anteriori capitis parte, maximeque fronte, dolorem, naribus quidem calentibus, sed aridis & siccis. Datis medicamentis diaphoreticis, leniter nitrosis, cinnabarinis, mitescebant symptomata pedetentim cum æstu, dolor autem in fronte persistebat supra oculos omnemque ferre adimebat somnum. Datum hinc consilium, ut crebrius naribus admoveret sal volatile Anglicanum siccum, quod ex sale ammoniaco & sale tartari paratur, oleo cephalico, uti est lavendulæ & majoranæ puro, essentificatum, non omittis infusis theiformibus, ex herbis cephalicis & diaphoresin leniter moventibus. Inde mitiora facta tormenta & præter opinionem è naribus fluxit liquor flavescens viscidus ad aliquot drachmas, idque aliquoties de die, quo facto, post biduum omnis evanuit dolor, & æger perfecte convaleuit.

Epicrisis.

Heic origo catarrhalis rheumaticæ febris cum gravi capitis dolore deducenda ab alvo obstructa & perspiratione prohibita, in corpore, ubi caput debile & ad defluxiones catarrhales jam tum fuit proclive. Locus autem doloris in fronte supra oculos fuit in sinibus ossis frontis, qui intus tunica nervosa & pituitaria sunt vestiti. Huc si cum impetu ruit sanguis, à nimio ipsius affluxu & stagnatione oritur dolor, serumque acre transsudat, hocque effluente, dolor discedit. Ut adeo verum sit priscum Hippocratis effatum: *sect. VI. aph. X. cui capite graviter dolenti, pus, aqua, vel sanguis è naribus profluit, is à dolore liberatur.*

CAPUT VII.

De Febre Variolosa.

THESES PATHOLOGICÆ.

§. I.

Variolosa febris est acuta, exanthematica, contagiosa, in qua motu quodam critico, materia valde tenuis, caustica, corrupta, inflammans & exulcerans, ad summam cutem propellitur, cum gravibus sæpe symptomatibus stipata.

§. II.

Febrem hanc imminuentem indicant lassitudo corporis, virium languor, somnus inquietus, ciborum fastidium, cum conatu vomendi, capitis dolor, pavor in somno, alvus clausa, stimulus ad tussim & horripilatio intercurrentes. Hæc per

E plures

Catarrhi cum cephalalgia narium fluxu soliti.

Morbi huiusmodi.

plures sæpe dies jam præsto sunt, & postea succedit æstus per totum corpus, cum pulsuum celeritate, siti; augetur capitis, lumborum & spinæ dorsi dolor. Infantes potissimum, sæpe ex improvise, epilepsia & rigor ac tremor artuum invadit. Aetate junioribus delirium familiare: corpus est inquietum & jactatur. Intra tertium & quartum diem conspiciuntur in facie & collo vestigia macularum rubrarum, quæ pedetentim numero plures efflorescunt, post faciem & collum, pectus, brachia, ac demum etiam abdomen, dorsum cum femoribus pedibusque occupantes. Durat hæc eruptio ad duos usque dies successive, ac interea decrescit febris cum symptomatibus, ut pulsus cum calore sexto die fere sit naturalis. Elapso autem quinto incipit fieri suppuratio, eodem modo ut eruptio gradatim à superioribus ad inferiora transiens, quæ ubi in vigore constituta maximeque in facie manibusque succedit, ob ingentem ardorem & dolorem cutisque tensionem fere intolerabilem, accenditur nova symptomata secundaria febris, cum siti, vigilia & præcordiorum anxietate. Quæ symptomata, ubi corpus impurum, pustulæ confluentes & virulenti genii, delirio & convulsionibus accedentibus, nono, vel undecimo die necant. Si vero pauciores & benigniores, pathemata remittunt & fit exsiccatio, donec undecimo & ultra decidant & æger ad sanitatem redeat.

§. III.

Prima origo ex utero.

Corripiuntur hac febre tantum non omnes homines, cujuscunque sexus, ætatis, temperamenti, quin nationis sint; ideoque in proclivi utique judicare, causam ipsius esse universalem omnibusque communem. Unde vero origo hujus omnibus adeo infestæ materiæ repetenda & ubi ipsius sedes, non æque expeditum. Veteres quidem natales ipsius à sanguinis menstrui, sub ingravidatione retenti, immunditie foetui communicata, duxerunt. Et vero utique simillimum, primordia hujus virulenti humoris, non ex aëre, victu, aut aliis externis causis, sed ex utero esse materno. Id enim experientia frequenti constat, infantes à matre minus sana & impuris succis scatente progenitos, variolis mali moris & quandoque exitalibus corripi, matre licet sub gestatione vegeta, ob succos pravos in foetum transeuntes. Vicissim etiam in comperito, gravidas, si proba victus ratione & affectuum moderatione, cacochymia, & plethoræ convenienti sanguinis missione, saluberrimæ quoque per alvum & cutem excretioni prospiciant, infantes in lucem edere, qui variolis correpti, non adeo periculose decumbunt, sed paucas ipsas & benignioris indolis, nanciscuntur.

§. IV.

Sedes causæ non in humoribus.

Sed neutiquam hujus maligni humoris sedes in ipsa sanguinis & humorum massa videtur ponenda. Etenim quamvis per alios morbos exanthematicos, morbillos, purpuram, scabiem, apostemata, tineam capitis, febres quoque, tota succorum massa exagitata fuerit, dissoluta omniaque ipsi involuta extricata, variolarum tamen materia manet & nihilo secius corpus adoritur. Hinc ad veritatem utique proxime accedere videtur, ex succo quidem chyloso lymphatico impuro & corrupto matris, oriri primum subtilem hunc & virulentum humorem, sed viscositate quadam involutum, firmitusque tubulis quibusdam impactum, delitescere tandiu, donec in motum fermentativum sui multiplicativum ab

aliis causis deducatur, succis insinuetur & critica quasi despumatione è corpore exturbetur. Nec officit, quod post longum interdum tempus in noxam erumpat. Diu enim malignus quidam humor, in tubulosa partium, immo ipsius cutis substantia, tanquam in latibulo sine noxa hære, & postea demum in motum excitatus, universum systema nervosarum & fibrosarum partium pessime afficere totamque motuum economiam pervertere potest. Testatur hoc cancer in glandularum substantia per longum tempus occultatus, testatur venenum canis rabidi, item miasma venereum, quod per lac nutricis infanti communicatum, post aliquot demum sæpe annos reviviscit, vel in adultis per gonorrhœam virulentam suppressam ad interiora pulsam, post longos haud raro annos prodit, & virulentiam suam exserit.

§. V.

Latibulum autem virulento huic, qui variolas facit, succo, præbent, mea quidem sententia, medullæ spinalis tubuli quidam obstructi. Probabiles minimum quæ id evincunt hæ sunt rationes. Spinalis quippe medulla cum capite omnium primo in utero formatur, & majus præ aliis partibus cito augmentum acquirit, quod aliter fieri nequit, quam per liquidum, quod per ejus minimos canaliculos fertur. Quod si stagnans obstruit quosdam, ex diuturna mora, ut omnis humor occlusus, valde alienam & perniciosam indolem contrahit. Talis humor compedibus postea liberatus & sui juris factus, non aliam sæpe ac veneni naturam & vim prodit, humores fermentando, eorum texturam & crasin immutando, solidas vero partes vehementer stimulando, arrodendo & vellicando. Quod vero ex imis medullæ, maximeque illius portionis, quæ in inferiori regione spinæ, materia, quæ variolas efficit, prodeat, hæc confirmare videtur ratio, quod nullus fere morbus tam subito totum systema nervorum & nervosarum partium adoriatur, quam hic ipse. Testatur id febris acuta celeriter invadens, spasmus nempe totius vasculosi & nervosi systematis, quam ego utique à membranis spinalis medullæ deduco. Testatur idem dolor capitis, dorsi & lumborum, individuus fere comes. Testantur epilepsiæ, convulsiones, tremores artuum, deliria, quæ mox statim in principio, secus ac in ulla alia febre, adfunt. Testantur præcordiorum anxietates, item nausea, vomitus, cardialgia, quæ à spasmis substantiæ nervosæ ventriculi & orificiorum ipsius proveniunt: testatur alvus stricta & clausa, quæ semper fere primis diebus est. Testatur demum inquietudo cum vigilia, quæ non nisi molesta generis nervosi affectio & commotio est.

§. VI.

Sed mittimus hanc paullo subtiliorem de prima origine & sede causæ variolarum theoriam, quia directe non pertinet ad artis usum & therapiam, quæ magis in eo versatur, ut naturam, genium, facultatem & potentiam operandi virulentæ istius materiæ probe indagemus. Indoles igitur hujus videtur mihi duplex, una acris & inflammans, unde dolor, ardor, rubor, tumor, arrosio & exulceratio, altera caustica & putrefaciens, quæ motu subtiliori intestino, crasin & unionem partium mixtum constituentium destruit atque corrumpit, & hæc proprie ad ipsam malignitatem, magis spectat, atque quam maxime sese in variolis malignis prodit.

§. VII.

§. VII.

*plex
variola-
um genus
benigna.* Optime vero variolæ distingui possunt in benignas, malignas, & quæ sunt inter has mediæ naturæ. Benignæ his cognoscuntur indicis: si non adeo copiosæ sunt numero; si debito tempore & ordine prorumpunt, suppurantur & exsiccantur; si non nimis profundæ; si bono pure refertæ, sufficienter elevatæ & circulum habent rubicundum; si facta eruptione in superioribus partibus, febris & symptomata notabiliter remittunt & omnia tranquille & placide fiunt. Hæ omni vacant periculo, immo sponte & solius sæpe naturæ beneficio curantur. Tales autem plerumque sunt, quæ temperato vere oriuntur, in corporibus non adeo impuris, nec fero & sanguine repletis, etiam in pueris. Nam acris & caustica materiæ qualitas non modo mediante succo rosco in corpore corrigitur, & ad expulsionem in cute præparatur, sed & affluxu ejusmodi succi, in ipso suppuratorio actu plane mitis & blanda efficitur.

§. VIII.

Malignæ. Vicissim malignum & causticum in variolis subesse virus, inde concludendum: si vel nimis cito, vel nimis tardo prodeunt; si manent depressæ & suppurationem renuunt; si plurimæ livescunt & quædam nigri coloris, vel limbum nigrum habent; si pullius celer, etiam post eruptionem sufficientem, cum inquietudine persistit; si erecti animo facile linquntur; si pustulæ sunt sanguinolentæ, vel diarrhœa cruenta, aut mictus cruentus supervenit. Lethifera hæc sunt indicia, & ex viginti vix unus evadit, qui ejusmodi symptomatibus afficitur. In corporibus demortuis hac specie variolarum sanguis fluidus est totus, nec in serum, nec in coagulum secedit, quod aliquoties observavi, manifesto indicio, putrefactione intima ejus crasin plane esse colliquatam, & vinculum feri & sanguinis destructum; & hæc est causa ipsius mictionis, nec non dejectionis cruentæ, & quod variolæ sanguinem fundunt. Ejusdem variolæ sunt indolis, quando petechiæ sese miscent, vel etiam pustulæ parvæ miliares asperæ, quæ de intima corruptione sanguinis & lymphæ testantur. In quibusdam porro tardius maligna & putrefactiva variolosi humoris indoles sese ostendit, dum post exsiccationem febris manet lenta, & in externis partibus, præsertim articulis, in brachiis, manibus, pedibus, tumores oriuntur, & ex iis fiunt foeda exedentia, fistulosa & ossibus cariem inducentia ulcera, quæ difficillime sanationem recipiunt, & procedente tempore, lentam inferunt mortem. Interim tamen in genere tenendum, quod malignitas hæc gradu, jam majori, jam minori, differat.

§. IX.

*Ubi & cur
tales.* Virulentæ ejusmodi variolæ sunt plerumque epidemicæ & nascuntur à statu anni temporum plane irregulari, anomalo, diuturno, præsertim sub coelo diutius nebuloso, pluvioso humido, ventis destituto, longe magis post diluviones & inundationes aquarum, quando diutius eadem supra terram stagnant, & aer ob id, & insectorum, & exhalationum putridarum copia refertus est, tumque ut plurimum simul grassantur, ipsisque etiam variolis complicantur petechiales & aliæ deleteriæ indolis non expertes febres. Deinceps ubi variolæ in corpora impura & cacochymica incidunt, & ubi primæ viæ magna impurorum succorum colluvie scatent, plus incrementi capit malignitas. Observamus porro miasma sive contagium uno tempore majorem viru-

Frid. Hoffmanni Oper. Tom. II.

lentiam habere, quam altero. Accidit hoc non semper ob manifestam quandam sensibus obviam causam, sed dubio procul ex pernicioso varii generis exhalationibus, quæ ex animantibus & vegetabilibus surgentes, cum aëris particulis salinisulphureis sese miscent, ut ipsa unione specificam quandam deleteriam virtutem nanciscantur, non secus ac videmus in chymicis, quod sola commixtione rerum, quæ per se non sunt venenatæ, venenum enascatur.

§. X.

Tertium genus est variolarum, quas nos mediæ naturæ dicimus, quia non sunt nec adeo malignæ, nec adeo benignæ, sed medio modo se habent, ideoque prudentem medicum & idoneam medicinam poscunt. Tales sunt, quæ non sparsim, sed confertim, imprimis in facie & manibus, comparent, & confluentes fiunt; item quæ interiora, nares, fauces, interdum etiam oesophagum occupant, ut ægri non bene deglutire possint. Anceps etiam facit judicium, quando in suppuratione acris denuo oritur febris, cum æstu, calore & ardore manuum; si caput nimium intumescit & largus salivæ fluxus est, si urinæ porro tenues, copiosæ minguntur & corpus largis sudoribus diffuit. Neque minus ubi novæ semper exsiccatis jam subnascuntur papulæ minores, & suppuratio atque exsiccatio nimis protrahitur; ubi cutis tensior & pustulæ profundius sedent, ætas juvenilis, vel virilis, tempus autumnale & hyemale, ætas etiam nimis fervida & sicca præcessit, & præterea non adeo proba victus ratio à decumbente observatur: & hæc sæpius omnino, nisi sollicitè præcaveatur, alios relinquunt morbos. Epidemicæ etiam ut plurimum grassantur, quum benigniores magis sint sporadicæ.

§. XI.

In suspectis quoque signis est, quando statim inter initia & ante eruptionem, acuti & pertinaces dolores in spina, brachiis, pedibus, lumbis, non coxendice affligunt; si cito nimis, primo illico, vel secundo die, variolarum vestigia in cute comparent, tanto magis quum exanthemata aspera, acicularum capita æquantia, interspersa; si stationem non servant, mox disparent, mox redeunt, si facies non intumescit die tertio vel quarto, vel mox detumescit iterum; si in juvenibus ante eruptionem grave delirium, nec non difficilis deglutitio; si in suppuratione sopor, & post hunc alienatio mentis & incongruus sermo; si etiam nimium salivæ stillicidium.

§. XII.

Alvi autem fluxus, licet copiosus, non adeo pertimescendus: eundem enim per totius morbi decursum sine ullo periculo successisse vidi, tantum abest, ut eruptionem impederet. Atque hanc in rem commemoratu dignum, quod scribit *Amatus Lusitanus Cent. III. pag. 234. pervenire hac æstate ad manus nostras plus minus CL. pueri, variolis & morbillis affecti, è quibus omnes evacuati evaserunt, alii vero, quibus parentum ex culpa evacuatio facta non fuit, vitam cum morte commutarunt, numero tres; alii vero, quatuor in ulcera difficillima & mala morigerata pervenerunt, quæ cum aphthosis communionem habent & facile in gangrænam abeunt. Iis similis superstes puer, qui ulcus cancriforme & malignum, cubitum dextri brachii occupans, multis foraminibus perforatum, habet. Scilicet sicuti in febribus malignis petechialibus, alvi profluvium morbi facit solutionem; sic etiam in mali generis variolis idem*

evenire experientia docet, quæ etiam *Ballonii in epid. & ephemerid.* sententia.

§. XIII.

Quando
& quomo-
do mors
eveniat.

Qui variolis moriuntur, criticis ut plurimum diebus, nono, undecimo, vel decimo quarto decedunt, & quidem maxime convulsionibus, quas exquisitissimus ardor, dolor ac tensio in brachiis, manibus & facie, præsertim si profundius sedent pustulæ, excitat. Quidam catarrho extinguuntur suffocativo. In nonnullis, inprimis si malignitas subest, quando in situ erecto, vel extra lectum sunt, animi obrepit deliquium, maculæ cum pustulis disparent, & convulsione superveniente, intra aliquot horarum spatium mors excipit. Vidi etiam variolis jam exsiccatis, juvenes quosdam subito insultu apoplectico esse extinctos, posteaquam in ipso morbo capitis gravitate, vigilia & per intervalla mentis emotione laborassent. Novi quoque infantes unius aut duorum annorum, quum absoluta exsiccatione in vado prorsus esse viderentur, macula erysipelacea livido-nigricante maligna, quæ totam fere furam, vel pedis regionem occupavit, ex improvviso fuisse affectos & subito mortuos, manifesto sphacelationis & magnæ corruptionis in sanguine indicio.

§. XIV.

Post vario-
las alii sa-
ni.

De iis autem, qui variolarum morbum superant, multiplici confirmatum habeo experientia, quod pueri, qui ante illum valetudine minus firma usi, variis oculorum & aurium defluxionibus, tinea capitis, doloribus artuum, imbecillitate pedum, rachitide & tabe, nec non adultiores mensium retentione laborarunt, postea integram sanitatem, corporis robur & nutritionem lætorem acceperint. Vicissim vero novi etiam alios, qui antea sani & valentes, in variolis vero perversa medicatione excepti, vel commissis in diæta erroribus, valerudinarii postea sunt facti, phthisin, febrem lentam, tabem & asthma incurrisse, visus vitia, ophthalmias, epiphoras, maculas & albugines contraxisse, aut ulceribus sordidis in facie & artuum juncturis fuisse affectos.

alii vale-
tudinarii.

§. XV.

Variola
contagiosa.

Ceterum ultimo adhuc loco probe tenendum: quod materia variolarum semper sit indolis fermentativæ & sui multiplicativæ. Unde vix ullus alius morbus, excepta forsan pestilentia, adeo contagiosus, ac variolarum. Quo etiam fundamento nititur, cum fructu ab Anglis potissimum instituta variolarum insitio, qua purulento ex varioloso decumbente humore in sauciatam sani variolas nondum experti hominis cutem immisso, protinus idem hic morbus, cum febre omnibusque quibus stipatur symptomatibus, suscitatur atque inducitur.

CURATIO.

§. I.

Indicatio-
nes curatio-
nis natura
ductu
conformes.

Natura, per quam partium solidarum & fluidarum corporis ad motus vitales se- & excretorios dispositionem, intelligimus, tam exactum in hoc morbo, si moratus, quam in nullo alio servat ordinem & tempus, & haud raro sponte, citra artificiosam medicationem, eundem percurat, quando videlicet crasis sanguinis & humorum viscerumque conditio, ita comparata, ut correctioni materiæ causticæ & expulsionem ejusdem non obstat. His naturæ viis merito insistendum me-

dico, nec aliud agendum, quam ut eidem in opere correctorio, expulso & suppuratorio congruis auxiliis subveniat. Igitur ita instituenda medicatio, ut I. materia acris, vitiosa, caustica contemperetur & ex veterum loquendi more coquatur, simulque effrenes in vasorum & nervosarum partium systemate primis diebus motus ad moderamen traducantur; II. ut eruptio secundetur & languentes circa eruptionis tempus motus erigantur, quo omnis ad corporis habitum pellatur materia, accedens autem in suppuratione secundaria febris moderata fervetur & graviora arceantur pathemata; III. ac demum declinationis & exsiccationis tempore sanguinis & humorum massa sub morbo dyscrasia & impuritate affecta, repurgetur, sicque oriundi ex reliquiis morbi tempestive præscindantur.

§. II.

Acridinem materiæ mulcent, simulque nimiam sanguinis exæstuationem, ipsam excretionem impediunt, blande componunt pulveres temperantes, leniter diaphoretici, cujus generis hic est: recipe cornu cervi philosophice præparati, usti, antimonii diaphoretici, lapidum cancrorum, matris perlarum ana drachmam, cinnabaris rite paratæ drachmam semis, nitri puri scrupulum. M. f. pulvis, de quo pro diversitate ætatis dandum, & dosis summa est dimidia drachma. Propinatur commodissima in vehiculo ex aqua scorzonæræ, nucleorum ceraforum, florum sambuci, acaciæ, herbæ cardui benedicti & scabiosæ. Dein eundem in finem utilia decocta humectantia & temperantia, avenaceum tenue, cum amygdalis in emulsionem redactum, serum lactis dulce, nostra methodo paratum, aqua hordei cum ficibus decocta. Item emulsio ex decocto scorzonæræ & cornu cervi, amygdalis feminibusque quatuor frigidis cum saccharo. Cui ad motuum vehementiam moderandam, commode adjicitur syrupus papaveris albi.

§. III.

Quando natura segnior in expulsionem sub eruptionis tempore, danda hæc emulsio: recipe minimis napi, cardui Mariæ, aquilegiæ ana drachmam, aquæ florum sambuci, galegæ, cardui benedicti ana unciam f. l. a. emulsio, adde antimonii diaphoretici drachmam semis, sacchari perlati quantum satis est. M. Efficaciter etiam expellit liquor bezoardicus ad mentem Buffii paratus, cum tripla portione liquoris nostri anodynii mineralis nuptus. Item elixirium alexipharmacum, sine spirituoso menstruo sic confectum; recipe radicis dictamni, angelicæ, vincetoxici, contrayervæ ana unciam semis, herbæ scordii, cardui benedicti ana manipulum, fiat extractio in aqua scordii libra medica & liquoris anodynii mineralis uncias tribus, additis prius salis tartari, croci & myrrhæ ana drachmis duabus; de quo viginti minimum & ad summum quinquaginta guttæ præbendæ.

§. IV.

Eadem profunt quando suppuratio lenta nimis, & pustulæ elevari renuunt. Tum quoque utilis hæc mixtura: recipe myrrhæ electæ drachmam dimidiam, croci salis tartari ana scrupulum, aquæ scorzonæræ uncias duas, coquatur, coletur & usui fervetur. De hac dimidium, vel unum cochlear in emulsione, ex aquis analepticis & diapnoicis cum feminibus quatuor frigidis, præsertim circa noctes, porrigendum.

§. V.

Sub exsiccatione demum propinanda sunt remedia,

Quid faci-
ciendum
ante erup-
tionem.

In erupti-
one.

In suppu-
ratione.

Et exsiccatione.

media, quæ putredini resistunt, item quæ fordes relictas, vel sub morbo genitas, per congrua emunctoria evehunt. Utilis tum pulvis ex lapidibus cancrorum, antimonio diaphoretico, pauxillo myrrhæ, succini, & croco. Proficuum quoque infusum theiforme ex herba scordii, summitatibus millefolii & semine fœniculi, cui si pectus simul affectum, veronica cum liquiritia addenda. Potissimum hoc tempore interponenda blanda laxantia, balsamicæ simul indolis, uti sunt instar omnium pilulæ Beccherianæ, vel ad earundem exemplar paratæ.

CAUTELÆ ET OBSERVATIONES CLINICÆ.

§. I.

Quibus vomitus & epilepsia compescenda.
Evenit haud raro, ut in principio, præsertim infantibus, accidant crebræ & anxie vomitiones. Ad has compescendas & spasimum ventriculi laxandum, egregie proficit liquor noster anodynus mineralis, vel solus, vel cum aliquot guttis spiritus bezoardici Bussiani remixtus. Idem hic noster liquor eximii usus, si convulsio epileptica, in lactantibus maxime & difficulter dentientibus periculi non expers, urget nimis. Conducit etiam pulvis Marchionis, cum cinnabari & pulvere lumbricorum terrestrium. Et alvus clystere molliente solvenda, qua clausa in principio, epilepticum malum augefcit.

§. II.

Austus mitigandus.
 Quando æstus acrior, nitri dosis in pulveribus augenda & tuto etiam præbenda tinctura rosarum, quatuor florum cordialium, cum phlegmate vitrioli parata, cui multum *Waldschmidtus* atque *Dolæus* tribuerunt. Nec male, quum in corporibus juvenilibus sanguineis, maximeque ubi variolæ mali moris ad putredinem pronæ grassantur, ratione & experientia teste apprime proficit; licet non omnem malignitatem extinguat, neque universale adversus copiosas variolas sit præservativum.

§. III.

Salivatio moderanda.
 Frequens juvenili inprimis ætati symptoma est salivæ fluxus, qui suppurationis tempore ut plurimum effusior accedens, non modo hanc, sed & somnum, non sine periculo, impedit. Moderandus igitur, tam per alvi apertionem mediante clystere emolliente, quam diaphoreticum bezoardicum medicamentum, cui aliquot grana florum sulphuris addenda & bibendum desuper infusum theiforme ex betonica, veronica & floribus chamomillæ officinalis, quo aucta sic perspiratione, à salivæ fontibus divertantur humores.

§. IV.

Dolor faucium multandus.
 Obsident pustulæ variolarum semper fere interiora faucium laryngem & pharyngem, ibique ardorem, dolorem & difficilem deglutitionem, quandoque etiam aphthas, excitare solent. Molesto huic accidenti succurrendum gargarismo demulcente, ex decocto hordei & rob diamoron, adjecto pauxillo lapidis prunellæ, quo sæpius os eluendum. Utile quoque decoctum avenaceum, cum butyro insulso, syrupo violarum vel granatorum, & nitri tantillo. Et ad mulcendum ardorem, pustulæ & aphthæ subinde tangendæ, & illinendæ mucilagine seminis cydoniorum, cum aqua rosarum facta.

§. V.

Oculi defendendi.
 Oculos quoque nonnunquam occupant pustulæ & suppurantes vitium eisdem inducunt. Hinc sub

eruptione statim ab iis defendendi, quod optime fit linteo duplicato, cui spiritus rosarum in quo camphora cum croco macerata, instillatus, quod tamen ante applicationem in loco calido tantisper siccandum, quo potior spiritus portio avolet. Mihi frequens, aquam rosarum & florum sambuci, adjectis aliquot liquoris nostri anodynæ mineralis guttis & momento camphoræ adhibere, eademque palpebras inungere. Quod si verò à pustulis pellicula relictæ, cito eadem post declinationem absumenda hoc liquore: recipe aquæ rosarum unciam, reginæ Hungariæ drachmas duas, vitrioli cyprini grana quatuor, sacchari saturni grana duodecim. M. quo frequentius cum subtili penna tangenda est excrefcencia. Idem hic liquor, omisso tamen vitriolo, egregiæ virtutis in oculorum acri, calida & ardente defluxione, cum rubore, quæ variolis crebro succedit.

§. VI.

Vena sectio quando proficiat.
 Pulsuum vehementia & robur, faciei rubor, capitis lumborumque gravitas ac dolor, venarum turgescencia, ætas juvenilis, ingenii activitas, diæta vinosa, sanguinis missio fueta & evacuatio critica suppressa, sanguinis subtractionem in variolis, primo vel secundo statim die, indicant. Sic evanescunt mox pectoris anxietates & oppressiones, maculæ confertim in cute efflorescunt, nec adeo gravia post eruptionem metuenda pathemata. Sæpius enim observavi, nimiam sanguinis redundantiam sufficientem materiæ variolosæ ad corticem corporis propulsionem impedire, & efficere, ut discretæ tantum prodeant pustulæ, intus autem relictæ materie, circa declinationem varia symptomata spasmodica, convulsiva, deliria, catarrhos suffocativos, quin apoplexiam, inducat. Contra ea, ubi pulsuum durities, humilitas & exilitas, vasa minus turgent, vires languent, temperamentum phlegmaticum, ætas infantilis & puerilis, corpus obesum, vomitus in principio adest, tussis & alvi fluxus, laborans etiam alias sub sanguinis missione facile animo linquitur, vena non pertundenda, ne nimia sanguinis copia subtracta, materia intus detineatur, & eruptio ad plures dies, non sine periculo, protrahatur.

§. VII.

Emetica in principio proficiant.
 Haud levis inter medicos est controversia: utrum emetica in principio variolarum proficiant, nec ne? Nos ita censemus. Quum variolæ circumcumeunt, ad præservationem expedit utique dare ea, quæ fordes copiosas & crudos succos non modo ex primis viis, sed & biliosos & vitiosos humores ex hepate eliminant, quibus retentis, justus metus est, ne graviolem reddant morbum. Primo etiam invasionis die locum adhuc habere possunt, quando turgere primam regionem vitiosorum succorum colluvie adsunt indicia, ex ægri potissimum voracitate incongruorum liquidorum & solidorum, nausea, oris amaritæ & ructibus, desumenda. Tum omnino lenè emeticum, tartarus emeticus, solutus prius, ad unum vel duo grana in adolescentibus in aqua menthæ, vel cinnamomi, additis aliquot mixturæ simplicis guttulis, cum fructu datur, evanescunt postea, quæ eruptionem impediunt, anxietatibus, ut pustulæ intra tertium & quartum diem prompte erumpant. Si alvum simul expurgandi intentio, tartarus emeticus cum infuso mannae dandus, in infantibus ad quartam vel dimidiam partem, aut pondus unius grani. Promiscue autem tale remedium alternis diebus

porrigere, empiricum est consilium.

§. VIII.

Alvus ante eruptionem tuto subducitur.

De purgatione per alvum hæc monenda: Ante morbi insultum omnino sunt utilia laxantia, non vero fortiora purgantia; neque etiam mercurius dulcis, præsertim in infantibus & pueris tenerioribus. Optimum decoctum tamarindorum cum rhabarbaro, vel manna: & si suspicio, crassa intestina scybalis duris esse facta, præmittendum clystina emolliens & stimulans. Sub totius etiam morbi decursu nunquam permittendum, ut alvina secessio nimis diu, ad octo vel decem dies restiteret. Si fecus sit, inde potissimum in infantibus, vel suffocativi accidunt catarrhi, vel purpura variolas, aut erumpentes comitatur, aut suppuratis iisdem, non sine insigni virium jactura & symptomatum vehementia, excipit. Neque hanc ob causam eveniens & per totum sæpe morbi decursum durans cum bonis ægrorum rebus alvi fluxus est compescendus. Eruptionis autem tempore, etiam si, uti ordinario fieri suevit, alvus sit siccior, ab omnibus eam moventibus abstinendum, ipsis etiam enematis, quæ tum retineri, retenta angustias parere maximas & demum post aliquot dies reddi, novi.

§. IX.

In suppuratione an & quibus ducenda.

An suppurationis tempore in febre secundaria proficua sint alvum ducentia, inter medicos Anglos fuit disceptatum. Freindius peculiari scripto adstruxit variis observationibus utilitatem, ita tamen, ut non nisi decoctum mannæ admittat. Nos etiam hanc methodum non improbamus, si adsint, quæ purgationem indicant, alvus nempe per totum morbi decursum sicca fuit & contracta, copiosa in suppuratione salivatio, & pectus copia humorum obsessum, ut anxia inde & difficilis sit respiratio. Sed ego semper laxantibus præferre soleo clysteres, emollientes alvinas duras feces & educentes. Qui, si non sufficiunt, laxantia mannata præsertim in infantibus, quibus prima regio & præcordia crassis viscidis humoribus obfessa, commodam omnino locant operam. Quin novi, me infantibus lactentibus, unius anni, vel ante eruptionem, vel in suppuratione, quum ob difficultatem & angustiam spirandi suffocationis metus esset, cum præsentaneo levamine porrexisse lene emeticum, ex sexta, vel quarta parte grani tartari emetici, soluti in aqua veronicæ, addito pauxillo syrupi violarum. Cæterum, quam utilia mannata in principio & incremento variolarum, tam perniciose esse aliquoties observavi, post declinationem, morbo soluto. Ingentes tum enim creant flatulentias, pectus lentis viscidis succis obruunt, anxietateque efficiunt, quandoque etiam, ut ulcerationes sequantur in ipsa cute, faciunt.

§. X.

Vitanda calida omnia.

Ante pustularum eruptionem, & sub ipsa etiam, improbanda porro merito omnia calidiora expellentia, tam quæ vulgo dantur semina nasturtii & aquilegiæ cum stercoribus, succus nimirum stercoreis ovilli & equini, quam etiam tincturæ bezoardicæ alexipharmacæ, nec non spiritus cornu cervi, cum æstuoso, quoad lectum & conclave, regimine. Inde enim sanguinis & humorum massa mirum exagitur, æstus, anxietas, convulsiones, spasmi, quin delirium, si adest, exacerbantur. Inde materiæ variolosæ major inducitur acrimonia atque subtilitas, ut ex benignis facile fiant malignæ. Et tantum abest, ut his æquabilis & constans eruptio procuretur,

ut potius cito nimis minus præparata foras agatur materia, stationem non servatura, sed cum majori damno mox iterum ad interiora reversura. Quin potus tantum calidos, infusa theiformia & decoctum fabarum coffeæ, liberalius usurpata, experientia edocti, rejicimus. Nimum enim sanguinis massam dissolvunt & materiam roscidam nutrientem cum viribus inter largos sudores dissipant. Temperatum igitur sit regimen, remedia temperata. Semper tamen distinguendæ naturæ, quæ si segniores, expulsionem juventia, partitis sed vicibus data, profunt utique, & circa sextum etiam & septimum diem, eruptionem regimine tantisper calidiori secundare licet.

§. XI.

Pariter in variolis oppido nocivum decumbere in loco humiliori, ubi plures eodem morbo detenti. Nam ibi aer, qui pabulum vitæ, impuris ac foetidis exhalationibus est refertus, quæ respiratione attractæ, organa subeunt vitalia & internam humorum corruptionem adaugent. Hæc etiam subest, cum regimine calido, ratio, quod ex plebeis plurimi, variolis, licet bonæ alias sint indolis, occumbant. Hinc præstat, ut sæpius cum fructu suasi, aërem gravem, coniecto prius probe ægro, ex apertis fenestris emittere, purioremque immittere. Neque minus ad corrigendum, inquinatum aërem, expedit collo appendere camphoræ frustulum, vel si caput odorem ferre nequit, in remotiori conclavis loco illud reponere.

§. XII.

An corpore sudore perfuso lintheamina, indufia & lectum mutare liceat, non levis ad curationem momenti est quæstio. Ego, uti largissimos sudores in variolis nunquam sine periculo esse, si diu perseverant, observavi: ita longe majus imminere discrimen, expertus scribo, ex mutatione lintheorum, quæ humidum & frigidiusculum aërem adhuc fovet. Cavendum itaque, ne facile æger in alium lectum transportetur, nisi prius diu in hypocausto calefacto steterit. Neque lintheamina & indufia mutanda, nisi prius calore sint probe siccata, vel ab alio gestata. Si hoc negligitur, in exquisitis sententibus ejusmodi corporibus, qualia sunt, quæ effusius sudant, cutis quam facile frigescit, maculæ & pustulæ disparent & cum vitæ discrimine recedunt.

§. XIII.

Quandoque pustulæ, vel ob deficiens naturæ robur, vel ob terrorem, refrigerationem, aut situm extra lectum diuturniorem erectum, subito concidunt, æger in vitæ discrimine versatur certo, & nisi prudens medicus illico analeptico & expellente remedio succurrat, mors in propinquo. Ego cum fructu tum dedi liquorem cornu cervi succinatum, cum liquore anodyno minerali, in aqua cinnamomi sine vino & cardui benedicti, sorbillare jussi poculum infusi thée, idque aliquoties iterare & præcordiis pedibusque calida applicare fomenta.

§. XIV.

Mictus sanguinis, alvus cruenta, hæmorrhagia narium & sanguinolentum ex pustulis serum manans, magnam sanguinis & humorum acrimoniam & colliquationem indicant, ac pessimum, plerumque lethale, præbent omen. Hæc ubi præsto sunt, acidula, refrigerantia & acrimoniam demulcentia, uti lac ebutyratum & serum lactis, plus opis præstant, quam cætera omnia exquisitissimi artificii remedia.

§. XV.

Aeris vitæ ruitati subducendum.

Lintheamina causæ mutanda.

Recedentes quibus expellenda.

Sanguis per alvum, urinam, nares, & pustulas exiens quid possit.

§. XV.

Periculofum fymptoma eft, fi gravidæ variolas nancifcuntur, & circa eruptionis tempus, vel etiam in fuppuratione, abortus accidit: fanguis enim cum impetu utero effertur. Majus adhuc periculum ipfiusque mortis iuftus metus, fi foetus non cito exturbatur: vehementius enim fanguinis fit profluvium, fub quo animi accedit deliquium, expulfioni materiæ adverfum. Si etiam fanguis parcius emanat, ejus motus ad caput convertitur, fubfequente inflammatione & delirio. Neque periculo vacat, quando menses primis diebus, vel in fuppuratione erumpunt copiofiores, id quod eam plerumque ob caufam accidit, quod fanguinis miffio neglecta.

§. XVI.

Obfervavimus, fi æftas nimis ficca & diu arida, variolas maxime effe inflammatorias & alvi fluxu quam facile ftipari; qui tamen nullo modo fiftendus, fed tantum demulcentibus & terreis diaphoreticis excipiendus. Vitanda tum quoque omnia calida expellentia, cum regimine æftuoso, vitanda vero etiam refrigerantia & corporis refrigeratio. Neque alvi profluvium nocet, quando petechiæ, pariter ob valde irregularem temporum anni constitutionem complicantur, ut potius remedio fit & malignos humores optime expurget, ideoque providum ac peritum defideret medicum.

§. XVII.

Quum variolis benignis, non facile quifpiam, nifi ex medici, aut proprio delicto, pereat, fed confluentibus, præfertim fi mali moris fuerint; ex centum autem vix unus fit, qui variolas non experiatur: ego certe ut funeftæ hæ arceantur, non certius novi confilium, ac eo tempore, quo malæ indolis variolæ grassantur, exquisitam victus & vitæ rationem fervare, succos corporis convenientibus evacuantibus & decoctis pro potu temperantibus & mundificantibus à fordibus liberare, & ad futurum forfan morbi insultum præparare. Eundem in finem commendabile novum illud inventum infitionis, feu inoculationis variolarum, quod ex oriente in Europam translatum, numerosis admodum exemplis ab Anglis potiffimum medicis cum fucceffu celebratum, ea tamen lege, ut pus variolosum ex papulis maturis & benignis promatur, corpusque ante operationem probe prius præparetur.

§. XVIII.

De veficatoriorum peculiari in hoc morbo efficacia, quam nostro hoc ævo, Angli inprimis medici, mirifice collaudant, pro certo ego quidem affirmare poffum nihil. Rarius enim eadem adhibui, nifi ubi pueri, vel adolefcentes, in ingentem foporem ac torporem inciderant, aut finito morbo, vitium oculi contraxerant, rubore ac defluxione affecti.

§. XIX.

Quum variolæ præfertim confluentes & profundiores faciem rugis, foveis & cicatricibus mirum deformare folcant; puellæ inprimis pulchritudini ftudentes enixe ut hoc avertatur rogant. Multi quidem ut faciem à variolis defendant, primis ftatim diebus ex invento *Sylvii* fuadent, ut pedes frequenter pediluvio immitantur, & fic materia ex fuperioribus ad inferiores partes trahatur. Sed ego ne quid diffimulem, nunquam periculum feci, nec ea propter certum quid de experimento hoc affirmare poffum. Interim non penitus rejiciendum cenfeo, fed frequentibus & circumfpectis id commendo

observationibus. Longe minus iis affenfum præbere poffum, qui papulas in facie pinguibus & oleofis, inungere jubent. His enim pori obliniuntur, difflatio impeditur, profundiores redduntur abfcessus & vefigia cicatricum longe magis confpicua. Optimum potius confilium, quando præter fuperius dicta interna fanguinem depurantia, exterius, antequam penitus arefcant papulæ, linimentum applicatur ex humana axungia, fpermate ceti, cera alba, pauxillo balfami de *Copaiva* & camphoræ. Favet etiam nitori ac ruborem tollit aqua florum fabarum, rofarum, radicis figilli *Salomonis*, tribus partibus remixta cum una parte aquæ fic dictæ *fclopetariæ*.

§. XX.

Accidit haud raro, ut exficcatæ jam, quæ primum effloruerant pustulis, ultimis diebus novæ & minores compareant aliæ. Hæ neutiquam negligendæ & refrigeratione aut improba victus ratione excipiendæ. Si enim recedunt, præter fperem fieri poffunt funeftæ. Hinc curandum, ut fub moderata & æquabili perfpiratione hæ pariter & maturefcant, & arefcant.

§. XXI.

Superatis tandem variolis, providendum eft, ne alii pejoris indolis, fupra jam nominati morbi, fuccrefcant. Hunc in finem inprimis neceffarium, ut prima regio à fordibus, tam in morbo, quam post eum ob languidam digestionem contractis, non femel, fed aliquoties repurgetur, & quidem per laxantia balfamica, acori & corruptioni refiftentia, inter quæ emnēt rhabarbarina, pilulæ *Avicennæ*, *Rufi*, & quæ in curatione commendavimus *Beccherianæ*, quæ commodiffime prius in aqua deftillata, ut menthæ, folutæ, propinantur. Dein convalescentes non nimis cito in publicum prodeant, fed aliquandiu adhuc vitent aërem liberum, tanto magis humidum & frigidum. Servent potius constantem perfpirationis fucceffum, eundemque fecundent, tam per pota mane infufa theiformia ex herba veronicæ, fcordii, femine foeniculi & anifi, quam etiam pulveres leniter diaphoreticos, per aliquod pofttea tempus alternis diebus vefperi ufurpatos. Fugiant frigidum potum cum gravis materiæ & infalubribus alimentis cunctis, & ad perfectam fanguinis depurationem, abftineant à cerevifia & bibant aliquandiu decoctum temperatum ex radice fcorzonæ, cichorei, farsaparillæ & femine foeniculi. Neque omittant inter cibos uti iis, quæ languentem ftomachi digestionem, ad novos bonos succos ingenerandos neceffarium, fulciunt ac firmant.

ENARRATIONES MORBORUM.

OBSERVATIO I.

Variolæ epidemicæ anni MDCXCVIII.

Insolita plane per aliquot ex poftremis fuperioris sæculi annos fuerat tempeftatum constitutio. Aeftas inprimis, propter crebriores boreales ventos, humida ac frigidior, autumnus fere naturam gesserat, ut raro etiam fructus & uvæ recte potuerint maturefcere. Autumnus effufis pluviis & fubinde nivibus, cum pruinis ac nebulis incedens, tempus fordidum, aërem denfum, cœlum obfcurum & modice frigidum attulerat. Et hyems regnarat mirum mutabilis, fqualida, fine constanti & acriori gelu. Accefferat præterea vere anni *1698* maxima in tractu nostro ex torrentibus

bus inundatio, & ob stagnantes passim alveis elapas aquas, aërem insigniter vitiat. Ut sic perfecta esset ubique ad epidemicum morbum dispositio.

*Variole
populares
ex et sine
contagio.*

Irruebat igitur hoc anno mense Septembri maxima cum vehementia variolarum morbus, & infantes, pueros, adultos, utriusque sexus, gravidas item, puerperas atque nutrices, inquilinos ac hospites, adoriebatur, ut non facile immunis maneret unus, qui non prius morbo hoc defunctus, & variolorum numerus fere ad bis millesimum, in nostra hac urbe ascenderet. Non nullis sine, plurimis ex contagio accidit. Ex illis fuerunt potissimum improbo victui, intemperantiae & comotationibus dediti, iracundia commoti, terrore ex aspectu aegrotantium maxime aut mortuorum perculsi, timentes & horrentes morbum, nec non qui circumëuntibus jam variolis, praesertim in domo, quae ipsos tenebat, purgantibus illarum incursum arcere susceperunt. Contagium vero penetrans maxime & efficax fuit, quod ex sanie jam suppurantium pustularum venit, idque non tantum in eadem domo commorantes infecit, sed in alias aedes, quin remotiora etiam loca translatum, perniciosam suam vim in dispositis corporibus exseruit, infestum potissimum personis constitutionis sanguineae, phlegmaticae, pituitosae, spongiosi & mollioris corporis habitus.

*Symptoma-
ta antece-
dentia
eruptionem
benigna-
rum.*

Sic autem incessit & sic decurrit epidemica hæc variolarum lues. Antequam in conspectum prodiret exanthema, omnes fere conquesti sunt, de dolore dorsi, capitis, lassitudine corporis, calore præternaturali, intercurrente horripilatione, cum pulsu frequenti, appetitus prostratione & somno inquieto. In nonnullis infantibus, rarius in adultis, incepit enormibus vomitionibus, quæ per aliquot interdum persisterunt dies. Qui non vomuerunt, continuum tamen persenserunt conatum vomendi, nauseam & anxietates præcordiorum, modo graviores, modo mitiores. In adultis quibusdam & infantibus alvus fluxa, eruptionis tempore iterum consistens; in aliis primum adstricta, & tertio, vel quarto die demum aliquoties sine damno fluens. Frequens etiam multis mingendi stimulus, paucioribus urina, sine damno tamen, per aliquot dies suppressa. Tenelli & lactantes inter continuos ejulatus, pavore in somno, alvi adstrictione, vel profluvio, corporis calore & circa finem tertii diei levioribus quandoque epilepticis insultibus fuerunt affecti. Serosis solennis fuit somnolentia, pruritus corporis, ardens & pruriginosus palpebrarum dolor, illacrymatio & sternutatio. Multis compunctorius in dorso & pectore sensus. Pueris circa tertium diem nares sæpe sanguinem stillarunt. Ex his etiam primis diebus magnam ascaridum copiam excreverunt nonnulli sine, nonnulli cum periculo. Adulti mirum fuerunt impatientes, subinde aliena multa loquuti delirarunt plane; quod tamen sufficienti narium stillicidio mitigatum, insufficienti vero adauctum.

*Maligna-
rum.*

Hæc pathemata præcesserunt ut plurimum benignas, ubi vero pejoris indolis suberant, alia adhuc fuerunt præsto. In infantibus clamores intensissimi, nulla requies, tremores, extremorum mox frigus, mox intensus calor, cum insueto languore, in pessimis fuerunt. In adultis dolor artuum immanis, nec non lumborum, nephriticum & ischiaticum mentiens, gravis præcordiorum angor, delirium cum diarrhoea, punctorius exquisitus in pectore, vel hypochondrio sensus, tremores, horrores, membrorum incurvatio &

contractura. Virium autem à primo statim insultu notabilis prostratio, vertigo, vigilia assidua, sub erecto situ lipothymia, pulsus debilis & frequens, effusus sudor, copiosa urina, salivatio & insolita muci è naribus ejectio, malignam plane prodiderunt indolem, licet interdum nec dolor, nec calor notabilis, nec anxietas, nec fitis adessent.

Intra tertium & quartum diem in benignis contigit eruptio. Nox antecedens plerumque gravis existit & inquieta, anxietatibus, tremoribus, phantasiis, hæmorrhagiis, quin non numquam epilepticis commotionibus, quidam etiam bis vel ter dejecerunt. Tum comparuerunt primum maculae rubrae, magnitudine differentes, quandoque exiles & successive incrementales, quandoque latae, in distinctas postea pustulas coeuntes. Factum id primum in superioribus, postea manibus pedibusque copiosissime, tum cruribus pectore ac dorso parcius & in abdomine parcissime. Cum iis in facie effloruerunt simul in faucium & laryngis internis, labiis & lingua, tumque obortus dolor, ardor, pruritus ac tensio harum partium. In ipsis quidem oculorum tunicis vidimus nullas, sed in superciliis & palpebrarum interna æque ac externa facie collectim confidentes. Unde acerbus oculorum dolor, pruritus & ardor, & sexto die, accedente faciei intumescencia, eorum oclusio ad suppurationem usque durans. Interim promte satis successit eruptio, & ubi pauciores quinto, ubi copiosiores, sexto die, penitus fuit absoluta, symptomata vehementiam posuerunt, pulsus antea concitatissimus, nunc tranquillus, æqualis & fere naturalis, somnus placidus, mens sibi constans & pectus ab angore liberum redditum.

Malum autem fuit, quando protinus secundo, vel in principio tertii diei, variolarum apparuerunt in facie vestigia, vel his interjectae pustulae varos referentes, vel etiam exanthema miliare, rubrum aut album; & vicissim quando septimo demum vel octavo die, novae eruperunt ob materiae copiam & naturae imbecillitatem variolae. Mala etiam fuerunt, quæ non rubicundæ, sed livida, pallida, aut fusca, sessiles item, duræ & arida, cum fovea in medio. Pessimæ, quæ facta eruptione, symptomatum non attulerunt levamen. Seri præterea copiosa effusio, sive per sudorem, sive per urinam, in adultis per alvum, sive salivationem, cum morbo incipiens & sub eruptionis æque ac suppurationis tempore durans, ut plurimum observata funesta. Mictum tamen cruentum, frequens alias malignarum symptoma, non annotavimus, sanguinem autem ex sinistro oculo, mirum statim tumefcente, in puero quinto die mortuo, manasse, novimus. Quibus prævia horripilatione, sub erecto corporis situ, vel ob animi commotionem, disparuerunt variolae, ingens accidit anxietas corporisque debilitas & haud leve vitæ periculum. Qui mortui, quinto, sexto, vel septimo die obierunt, vel delirio cum convulsione, vel sopore cum convulsione, aut tetano, posteaquam prævio notabili horrore, evanissent cuncta ferme exanthemata.

Sexto die in benignæ indolis variolis inchoavit suppuratio, ac uti eruptio, gradatim à superioribus ad inferiora processit, nono die ut plurimum, in copiosioribus undecimo, quin decimo demum septimo die, desinens. Elevatae tum sunt sensim pustulae, molles, albæ, rotundæ globosae comparuerunt, limbum rubicundum & pus bonum ex albo flavescens contraxerunt, cum interjecta

Signa bona

*Et male
eruptionis*

*Suppura-
tionis suc-
cessus in
benigna*

jecta tenfa, facies & manus, rarius pedes, intumuerunt, & vultus quidem adeo, ut palpebrae clauderentur. Successit ardor, rubor, dolor & tensio in facie potissimum & manibus, accensa denuo febris cum pulsus celeritate, inquietudine & præcordiorum anxietate, in quibusdam, licet innoxie, extremorum tremore. Fuerunt symptomata hæc jam mitiora, jam vehementiora, pro majori, vel minori, papularum in partibus præsertim extremis copia. Leniora etiam eadem observata, in infantibus, feminis, sanguineis, sanguineo-phlegmaticis, sero abundantibus & laxiori cutis habitu præditis. Graviora vicissim in adultis, cute stricta, tenfa ac dura, & ubi pustulæ profundiores. Non nunquam in adultis complicata frequens salivæ ejectio, in infantibus diarrhoea, ut quotidie ter vel quater dejicerent, interdum cinerei coloris, interdum purulenta plane, sine damno tamen. In vigore suppurationis, in iis maxime, quibus alvus per aliquot dies clausa, prodierunt aphthæ, cum ardore & dolore inflammatorio & viscosorum humorum in os confluxu, externis ut plurimum tempestive discussæ.

Et maligna indolis. Contra ea mali ominis fuit, quando pustulæ non elevatae, nec sanie repletæ, sed depressæ manserunt, vacuæ, instar corticis pisi, item si lividæ, cinereæ & viridescentes aut in medio foveola nigricante conspicuæ. Quod postremum quidem non semper lethale indicium fuisse notavimus, aliis benignis symptomatibus concurrentibus; minimum tamen alieni coloris papulæ profundius subjectam cutem eroserunt. Periculosum dein animadvertimus, si in facie, vel manibus, tumor exiguus, aut plane nullus, aut etiam subito iterum disparsens; quando saliva non bene fluxit, sed viscosa fuit & circa decimum, vel undecimum diem pectus cum suffocationis metu oppressit; neque minus in ancipiti versati, quibus saliva à primo morbi insultu eo usque copiose effluxit, quibus licet rarius id factum, diarrhoea accidit, cruentus vomitus, aut alvi secessus. Maximum periculum imminuit à graviore inflammatione, acerbiori dolore sicco, tensione, pulsu citato, intensa inquiete & anxietate stipata; tanto certius, quando frigore & horrore interpolata, ægri de interni ardore & siti & externo frigore conquesti, inflammatio hæc ut plurimum mortis fuit causa. Febrem enim accendit maxime æstuosam, delirium fecit, vigiliam perpetuam, inquietudinem maximam & corporis in lecto jactationem, quæ demum excepit horror notabilis, pustulas albas reddens ac demum convulsio letalifera. Factum id maxime in adultis, die nono, undecimo, aut decimo quarto. Infantes autem plerumque perierunt suffocatione, procul dubio, quod fauces interius copiosis pustulis obsessæ & variolosi humoris acrimonia ipsos nervos pneumonicos tunicasque nerveas in spasmodicam exitialem adduxit contractionem.

gularia in suppuracione. Ex singularibus observatis fuit, quod sanguis ex papulis suppuratis stillare visus in binis infantibus, uno trium, altero octo annorum, illo evadente, hoc decimo sexto die mortuo, posteaquam die quinto cutis utriusque manus & die nono crurum, colorem ex atro brunum contraxisset, in luculentum sanguinis subsistentis in sphacelum proni indicium. Duo etiam alii servati, qui non debita perfuncti suppuratione, sed ingentem copiam furunculorum ardentium loco hujus in universo corpore nati, simul passim efflorescentibus maculis latis, rubicundis, ardentibus.

Exsiccata. Qui suppurationem superarunt, in iis si cle-

mentes pustulæ, nono, si copiosiores, undecimo, si copiosissimæ, decimo quarto die, detumuerunt iterum partes, ardor imminutus, pulsus sedatior, somnus quietus, pustulæ sanie turgidæ factæ, maturuerunt, & vel sponte dehiscences, vel perforatæ, pus fuderunt coctum. Id eadem ratione ac in eruptione & suppuratione, factum primum in facie, postea in manibus ac tandem in pedibus. In dorso autem & pectore molliores semper manserunt, nec tanta copia puris repletæ sunt, nec crustas crassas conceperunt, forsan, quod ob poros magis ibi apertos & calorem, materia non tam glutinosa & arida fieri potuerit. Maturæ pustulæ dein sunt corrugatæ, foveolam in medio nactæ, exaruerunt demum & deciderunt, non sine ardore & pruritu relicto. Quod, quo citius confectum, eo minus subjecta cutis exesa est & foveis deformata, quo tardius, compactis in unum crustis, extus aridis, subtus saniem putridam habentibus, eo magis nævi & cicatrices deformantes superfuerunt. Contigit id maxime in iis, quæ tempore suppurationis & exsiccationis cinereæ & viridescentes apparuerunt, nec non ex ægrotis his, qui scalptu intempestivo minus maturas lacerarunt, earumque debitam exsiccationem sic impediverunt.

Absoluta exsiccatione, orti in quibusdam furunculi & abscessus minuti, omnem corporis ambitum cum dolore, ardore & febrili calore obsidentes. Aliis accidit temporaria manuum pedumque imbecillitas, vel contractura, balneis & linimentis spirituosus promte in plurimis quidem abacta, in nonnullis tamen cacochymicis & maturam opem negligentibus, transiens in ulcera circa articulorum epiphyfes ægerrime sanabilia, quæ incongruis remediis in pessimas & tabificas fistulas degenerarunt. In serosis & catarrhosis successerunt tumores glandularum, imprimis colli, insignes, duri & renitentes, emplastris tamen emollientibus & discutientibus feliciter cedentes. Infantibus præsertim & adolescentibus, post variolas frequens fuit malum epiphora, sive continuum lacrymarum stillicidium, cum dolore, rubore & luminis intolerantia. Cui, nisi cito occursum, turbidi redditi oculi & tenues in cornea enatæ tunicæ, visum quodammodo imminuentes. Qui nimis cibos, gravis materiæ, assumerunt, vel carnes avidius comederunt, aut præmature lecto surgentes, corporis experti sunt refrigerium, incurrerunt de novo anxietates, vomitus, immo diarrhoeas, magna quidem cum debilitate, sed sine periculo.

Jam in debellanda epidemica hac lue ita sum versatus: incursum quidem ipsius arcere ab iis, qui nondum experti, per remedia fuit irritum, optimum fuga tantum contagii. Id tamen ob servatum, vitæ temperantiam, victum laudabilem, naturæ cujusunque accommodatum, abstinentiam à liquoribus spirituosus & calidis inebriantibus & animum tranquillum, tantum effecisse, ut paucae, benignæ & periculi ut plurimum expertes variolæ in cutem exiverint. Tanto certius, quando frequens usus pulveris absorbentis, præcipitantis, nitrosi, adjunctus. Ii quoque qui primam regionem aliquoties à fordibus repurgarunt, minus copiosas minori periculo sunt nati. Sed clementibus, rhabarbarinis, tamarindinatis, mannatis & tartareis, non vero aloëticis, colocynthiacis, acribus & resinosis, id fuit perficiendum, optime ante morbum, priusquam sanguis à mialinate infectus, licet id sine damno etiam factum noverim, quum præsto jam

tionis phænomena.

Et post eam pathemata.

Penitus arceri non potuerunt, sed mitiores reddi.

jam essent symptomatum nonnulla. Vomito-
riis autem uti, interdixerunt ut plurimum cir-
cumstantiæ, licet alio tempore eadem alexiphar-
macis nupta apprime proficua deprehenderim.
Neque universalis fuit illa variolarum copiam
arrendi methodus, quam post *Sydenhamum*,
Waldschmidius alique celebres in Hassia me-
dici dilaudarunt, per crebriorem spirituum mi-
neralium acidorum bene præparatorum, ante
infectionem, vel etiam primis morbi diebus,
usum, sub temperato tantum regimine. Non
enim potuit hoc remedium, omni etiam dili-
gentia adhibitum, extinguere malignitatem in
nonnullorum sanguine, nec variolas numerosas
declinare. Quin observavi, complures ex illus-
tribus, aliquot antivariolosi liquoris absumpsisse
ante & post invasionem uncias, nihilo tamen se-
cius copiosis conspersos fuisse pustulis, vehemen-
tissimis symptomatibus stipatis. In quibus id præ-
terea singulare fuit; quod papulæ siccescentes ma-
gnam exseruerint corrosivitatē, profundius ser-
pendo & depascendo subjectam carnem, insig-
ni cum dolore, ardore & inquietudine.

Quid fac-
tum ante
eruptio-
nem.

Qui igitur morbo affecti, his æquabile calo-
ris temperamentum commendavi, & suasi, ut
quamdiu vires ferrent, lectum vitarent, aut mi-
nimum culcitris ex corio, minus calentibus, ute-
rentur. Ab omnibus etiam calidis, expellentibus,
sic dictis alexipharmacis & bezoardicis, volati-
libus, ipsa bezoardica tinctura, abstinui, præser-
tim in juvenili & florida ætate, in sanguineis at-
que plethoricis. Laudatissimus inventus spiritus
nitri probe dulcificatus, (cujus loco jam inven-
tum à me liquorem anodynum mineralem, ma-
jori adhuc cum fructu, usurpare soleo) cum ana-
rica portione syrupi papaveris erratici mixtus, ad-
ditis aliquot mixturæ simplicis guttis. Frequens
etiam fuit usus pulveris temperantis, ex matre
perlarum, antimonio diaphoretico, cornu cervi
sine igne parato, cum tantillo nitri puri. Et ve-
hiculum præbuit aqua scordii, scabiosæ, florum
tiliæ, sambuci, papaveris rheados & cerasorum
nigrorum. Eadem quoque usurpata ubi maligni-
tatem prodiderunt symptomata, & præterea pul-
veri pro una dosi adjectum vel dimidium gra-
num theriacæ coelestis, vel momentum campho-
ræ, cujus præstabilem virtutem cum nitro in ma-
lignis variolis semper deprehendi.

sub erup-
tione.

Ingruente eruptione, præscripta ut plurimum
emulsio, ex aquis florum sambuci, acaciæ, fœ-
niculi, scabiosæ, scordii, cerasorum nigrorum,
feminibus napi, aquilegiæ, cardui mariae, cum
matre perlarum & julapio rosaceo. Tum etiam
corpus curatius à frigoris accessu defendere jussi,
& calorem, præsertim die quinto & circa noc-
tem, tantisper intendere, ita tamen ut subjecti
semper haberetur ratio, nec non diversæ ætatis,
temperiei, copię vel motus sanguinis. Docuit
enim experientia, deficiente calore externo suffi-
ciente, eruptionem, in infantibus potissimum
& phlegmaticis, minus expedite successisse, pu-
stulas jam protrusas iterum collabi lenteque
refugere cœpisse, relicta quadam præcordio-
rum anxietate. Hinc quando in cutem jam ple-
nius ivissent variolæ, ad expellendas reliquias,
essentia scordii probe saturata, vel liquore be-
zoardico Bussiano, cum liquore anodyno mi-
nerali remixto, cum fructu sum usus, tanto ma-
gis in malignis.

Suppurati-
one

Exulcerationis tempore, si ob naturæ segni-
tatem pustulæ manserunt depressæ & elevationem
renuerunt, præstans fuit facultas myrrhæ, ali-

quot granis, cum pauxillo croci & pulvere be-
zoardico oblatae. Sed non nisi in principio: in sta-
tu enim suppurationis inflammatoria febris à myr-
rhatis increvit. Neque unquam usurpata hæc, ubi
suppuratio sponte recte successit. Urgente in exul-
cerationis vigore æstu & ardore, emulsione institi,
substituto in locum seminis napi, semine papave-
ris albi, & in locum julepi rosarum, syrupo pa-
paveris.

Absoluta suppuratione, siccescentibus jam in
facie & manibus pustulis & febre deservescēte,
proficuum observavi pulverem ex lapidibus can-
crorum, antimonio diaphoretico, myrrha electa
& croco, qui exsiccationem & consolidationem,
balsamica & temperante sua virtute egregie pro-
movit. Per totum præterea morbi decursum,
loco cerevisiæ decoctum ex cornu cervi rasato,
radice scorzonæræ, hordeo mundo, semine fœ-
niculi & ficubus, tepesactum bibere jussi, cum
emolumento; sed infusa calida herbarum, ve-
ronicæ, scabiosæ, herbæ thee, eruptionis & sup-
purationis tempore, liberaliter pota, minus pro-
ficua deprehendi.

Ex symptomatibus narium hæmorrhagia caute
fuit excipienda: si enim principio statim repressa,
sanguis cum impetu ad caput latus, phrenitidem,
vertiginem, deliria aliaque horrenda symptoma-
ta intulit. Si nimium excretum, defecit vis ad
expellendam extroisum variolarum materiam.
Optimum igitur sub profluvio pedes à refrigera-
tione defendere, interius usurpare diascordium
Fracastorii cum nitro, & externe, si effusior ex-
cietio, naribus attrahere & collo atque temporibus
tepede apponere, acetum rosaceum cum
camphora.

Ad delirium in eruptionis puncto nimis atrox,
nec emissis jam in cutem variolis cessans, com-
ponendum, ne in phrenesin mutetur, expertæ
virtutis fuit, spiritus vini camphoratus, cum oleo
ligni Rhodii, tam naribus haustus, quam tepide
iterato fronti & temporibus admotus. Adversus
præcordiorum anxietates, tremores, inquietudi-
nes, pavores in somno, convulsiones, horrores
& variolarum retrocessionem, probati usus hoc:
recipe essentia castorei paululum inspissatæ drach-
mam unam, camphoræ grana tria, extracti cro-
ci granum unum. Quo præsentissimum ægris le-
vamen allatum.

Diarrhœas sistere periculosum fuit; si tamen
vehementia & virium defectus urfit, pulvere be-
zoardico cum chaccarillæ cortice, id præstitum.
Nec prætereunda nitri in compescendis his alvi
fluxibus facultas, experientia, contra vulgarem
sententiam, multoties confirmata.

Faucium, laryngis & œsophagi ardorem ac
dolorem ab insidentibus pustulis, lenire & ab ul-
teriori inessu defendere jussi decocto florum sam-
buci, liquiritiæ, ficuum, nec non solo lacte ca-
lido, cum ficubus & croco decocto. Si anginosa
subfuit inflammatio, juvat aqua florum sambuci,
cum rob diamoron, nitro & croco. Aphthæ &
labia dolentia inuncta mucilagine seminis cydo-
niorum. Eadem mucilago cum aqua florum sam-
buci & rosarum extracta, adjecto croci & cam-
phoræ momento, mirifice profuit in pruritu, ar-
dore & rubore oculorum, nec non ad eos, si clau-
si, aperiendos. Nares obturatæ litu olei amyg-
dalarum dulcium, vel lini, adaptatæ.

Crustæ papularum duræ emollitæ & cutis sub-
tus ab acri humore exesa consolidata linimento
ex tinctura tartari, essentia myrrhæ, oleo amyg-
dalarum dulcium & camphora. Ad delendas,
decisis

Ex exsic-
catione.

Sympto-
matum
medicam
hæmorrh-
gia.

Delirium
aliorum

Diarrhœa

Faucium
narium
oculorum
pathem-
um.

Cutis vi-
rum.

decisis crustis, cicatrices, conducibile fuit unguentum ex axungia humana, spermate ceti, saccharo saturni, magisterio bisnuthi & oleo tartari per deliquium. Resistantia demum ulcera unguento de cerussa camphorato utiliter tractata.

Observata
le venæ
edione
pintis &
papaver-
is.
Cæterum sanguinis missio, neque ad præseruationem, neque ad curationem, utilis observata. Ab opiatīs & soporiferis interius abstinui, aliorum medicatione edoctus, inde in variolis copiosis majores obortas anxietates, & ante exquisitum suppurationis tempus, periculosum soporem cum tremore & membrorum succussione fuisse suscitatum. Papaveracea autem lenissima, semen papaveris albi in emulsione, aqua papaveris rhœados ejusdemque syrupus, utique fuerunt saluberrima.

conclusio.
Atque hæc est illa methodus & hæc sunt remedia, quibus ego usus sum in magno ægro-tantium, centum minimum & quinquaginta numero, è quibus aliquot illustrissima multique generosa stirpe geniti, hac in academia tum commorantes. Felix etiam fuit per DEI gratiam successus, maxima pars evasit & vigesima vix mortua, & ex his maxime, qui malignis affecti. Servavi postea eandem semper medendi rationem, & triginta qui inde elapsi sunt annorum experientia confirmatum habeo, vix ulla alia in variolarum morbo proficua esse atque accommodata.

OBSERVATIO II.

athema-
a insolita
alvo ob-
structa in
variolis.
Generosus adolescens, exquisiti sensus, activæ indolis & macilentus, superiori anno variolis affectus est, quæ sine vehementia symptomatum, placide fatis & ordinate in conspectum venerunt. Quum vero circa sextum diem ad suppurationem accederent, præter opinionem miris afflictus est præcordiorum anxietatibus, conquestus simul de dolore abdominis, inquietus fuit, somnum capere non potuit & desidendi stimulus ipsum dimidia quavis hora è lecto surgere cōegit, sed sine secessu. Licet autem hæc ultra diem & noctem urgerent, æstus tamen nec intensior, nec pulsus celerior factus. Ego accersitus in consilium, inquisivi, num sub morbo jam dejecerit? responsum tuli: nec in morbo, nec, quantum quidem recordari posset, triduo ante ipsum id esse factum. Illico igitur injicere jussi clysterem emollientem, oleosum, cum modico salis, flatuum vero & excrementorum renisus non totum, sed tertiam vix partem admisit; ad sellam tamen expertus est instinctum, ibique persensit inhærens orificio ani stercus durum & grandi mole, licet egerendi irritus esset conatus. Hinc iterato enema infundere jussi, & interius dare non dubitavi ptisanam mannatam, cum cremore tartari & oleo amygdalarum dulcium. Soluta inde alvus & per aliquot sedes incredibilis fere scybalorum induratorum copia egesta, æger etiam à prioribus symptomatibus liberatus, somnum recepit, variolæ rite suppurationem subierunt, & cura reliqua ex voto successit.

Epicrisis.

Quale sit alvi beneficium, in omni morbo quærendum: si enim quis in morbum, maximeque in variolas & morbillos, in quibus ordinatio primis diebus alvus adstricta, incidit, & intestina jam tum stercorum copia farcta, magna non possunt non insequi pathemata, quorum causam medicus vix perspicere valet. Hinc in quocunque morbo ab initio statim prospiciendum, ut alvus ab excrementis sit depleta, sive id commo-

dissime fiat per enema, sive per laxans internum.

OBSERVATIO III.

A matre hysterica, inordinate vivente, sub graviditate autem optime semper valente, procreati erant tres infantes. Hos anno 1710ccxix. corripuit variolarum morbus publice grassans. Is licet non adeo mali esset in aliis moris, in his tamen insolita habuit pathemata. In uno quippe, puero quinquenni, eruptio, licet febris cum consuetis symptomatibus adesset, per octiduum duravit & suppuratio etiam longius quam fieri suevit, potrecta fuit. In altero, puero quatuor annorum, secundo statim die prodierunt; interspersis maculis asperioribus quasi purpureis, æstus & pulsus per totum morbum fuit idem præternaturalis, pustulæ manserunt sessiles, pus non conceperunt & plurimæ punctulo nigro fuerunt conspicuæ. Et in sorore, puella septenni, variolæ confertim occuparunt fauces & guttur, ut vix solidi vel fluidi quippiam deglutire, quin spiritum trahere posset. Nihilominus usu convenientium & tutissimorum remediorum, temporis beneficio, discessit hic morbus. Sed quum appetitu redeunte, plus ingererent, quam debile corpus ferre posset, nec rigidam & ventosam auram vitarent, factum est, ut in tribus his infantibus passim orirentur dolores & tumores in articulis, junctura præsertim cubiti, in digitis manuum, plantis pedum, ipso etiam in collo, cum febre lenta. Medicus & chirurgus omnem quidem contulerunt operam; nihilo tamen secius nata inde ulcera ferina, carnem exedentia & ossa cum nigrore corrumpentia, accessit tabes & virium maxima prostratio, ut etiam pueri bini sub initio tertii mensis fatis cederent. Puella autem, non adeo malignis ulceribus affecta, servata: ego quippe in consilium vocatus, pro potu suasi emulsionem ex decocto hordei, seminibus cucurbitæ & melonum cum saccharo. Sumtus cum hac pulvis noster bezoardicus, crebriori, sed pariori dosi, adjectis quandoque aliquot granis reguli antimonii medicinalis, quandoque nistri. Ad alvum laxandam datus syrupus rosarum solutivus cum extracto rhabarbari & mercurio dulci, omniaque hæc per aliquot hebdomades continuata interius. Exterius vero ulceribus putridis injectum balsamum nostrum vulnerarium, cujus principale ingrediens balsamus sulphuris antimoniat, cum oleo terebinthinæ paratus, idque potissimum, remixtum cum essentia myrrhæ, succini & balsamo Peruviano, miram præstitit opem in ulcere quatuor foraminibus in olecrano hiant. Tumoribus quoque indolentibus ac duris, quibus pedes passim obsessi, impositum emplastrum Vigonis de ranis, aucta mercurii portione & admixtis floribus sulphuris. Quibus demum intra aliquot menses ex mortis faucibus erepta fuit puella.

Epicrisis.

I. Feminae valetudinariae, si uterum gerentes minus ægrotant, infantes edere solent infirmos & potissimum in variolis & morbillis graviter decumbentes, & credibile, in embryonem impuros matris succos defluxisse.

II. Variolarum morbus in se satis mitis est, si benignos in corpore ostendit succos, earumque materia non adeo est virulenta; contra ea, quando in corpus incidit impurum & fermentum à prima nativitate contractum malignum, pessimi

Variolæ
mali moris
ex vitio
materni
succi.

fimi genii emergunt variolæ, licet tum in aliis admodum sint benignæ.

III. Ubi exanthemata variolosa malignæ ex symptomatibus cognoscendæ sunt indolis, nunquam iis fidendum, etiam si jam aruerint, & lapsæ sint pustulæ. Ita enim sanguinis & humorum massam inquinare solent, ut accedente improba victus ratione, perspiratione intercepta & neglecta repetita primæ regionis & ipsius sanguinis repurgatione, postea insequantur gravissimi & lethales morbi, apostemata, abscessus in internis partibus, in mesenterio maxime & pulmonibus, cum febre lenta & hectica, in externis vero pessima & fœda ulcera cancrofa, exedentia.

IV. Quæ autem tum variolas excipere solent mala, non aliter oppugnanda, ac morbi, qui extremæ humorum corruptioni debentur. Unde memini, à peritis medicis & chirurgis ejusmodi maligna ulcera inunctione leviori cum hydrargyro, item mercurio dulci cum laxante dato, nec non decoctis temperatis, cum antimonio crudo, fuisse perfanata, modo febris absit.

OBSERVATIO IV.

*Scabies,
furunculi,
morbilli
& variola
in uno
successiva.*

Juvenis literarum studiosus, victus & vivendi rationis incuriosus, scabie humida & pustulosa per aliquot menses laboravit, liberatus decoctis & linimento, quod pro basi habebat flores sulphuris. Non ita multo post correptus est morbillis, tum epidemicis, quos pariter evasit. Sed post binas hebdomades effloruerunt sensim in universo corpore furunculi copiosi, quorum nonnulli insigni inflammatione stipati, in profundos ægre sanabiles abscessus abierunt, donec decoctis mundificantibus, laxantibus appropriatis, maxime mercurialibus, & lenioribus diaphoreticis, sanarentur tandem. Elapso inde circiter mense, denuo in variolarum incidit morbum, gravibus symptomatibus incedentem. Erant enim maxima ex parte confluentes, septimo vix die, licet febris adesset, comparuerunt, ægre quoque subierunt suppurationem, depressæ potius manserunt, nec post eruptionem pulsuum frequentia ex toto remisit. Egregium tamen levamen æger obtinuit solutione myrrhæ & croci in dilutiore liquore salis tartari, à cujus usu ad sensum successit suppuratio & variolæ cum symptomatibus ad legitimum decursum traductæ. Continuatus igitur longius hujus remedii usus, ficcatis etiam jam & deciditibus pustulis, & notabile fuit, sub ipsa suppuratione alvum quotidie sponte vel septies fluxisse, æstumque febrilem, qui tum alias auctior, fuisse mitigatum. Quo etiam factum, ut juvenis hic integram penitus recuperaret sanitatem.

Epicrisis.

I. Variolarum & morbillorum materia, sive, ut ita loqui liceat, fermentum, neutiquam in massa sanguinis & humorum delitescit, neque etiam à sola impuritate, sive cacoehymia humorum venit. Alias enim repurgatis in hoc juvene per scabiem & furunculos sanguine & fucis, non amplius potuisset habere locum. Hinc potius credibile, materialem horum exanthematum causam infixam esse firmitus tubulis partis cujusdam stabilis, ibique, haud secus ac cancri & canis rabidi virus, tam diu oculi, donec à contagio, vel specifico quodam liquido, vel aëre in actum deducatur & sui juris fiat.

II. Alvi fluxus, non, uti vulgaris est sententia, in hoc morbo adeo est pertimescendus, nec

suppurationem semper impedit, nec materiam ad interiora vocat, sed in variolis etiam mali moris, sæpe, expurgando excrementitios succos, in salutem cedit, haud secus ac febres malignas diarrhœa haud raro solvi novimus.

III. Solutio myrrhæ, cum croco, in liquore alcalino minus spirituofo, egregia omnino ad sanguinis depurationem, sulphur blandum & balsamicum vappidis humoribus reddendum, & ad præscindendos multos, qui variolas excipere solent, graves affectus.

OBSERVATIO V.

Binæ puellæ gemellæ quatuor annorum, quarum una habitior, grandior, animo segnis & torpida, altera macilentior, statura minor, animo autem magis sentiens & vegeta, uno tempore eundem variolarum morbum incurrerunt, sed in alterutra diverso modo & eventu succedentem. In utraque erant confluentes, sed in obfiori illa tardo admodum, die septimo, prodierunt, pus contrahere noluerunt, in facie & manibus fuerunt sanguinolentæ & apertæ serum plorarunt sanguineum, ægram interim miræ discruciarunt anxietates, cum febre & siti continua somnique defectu, donec undecimo die exspiraret. Altera vero omnia habuit mitiora, tertio die venerunt papulæ, nono aruerunt, deciderunt & ipsa mox convaleuit.

Epicrisis.

Infantes hæ eodem succo matris nutritæ, eodem victu & regimine usæ, eidem morbo implicite, eodem contagio infectæ, eadem methodo iisdemque medicamentis tractatæ sunt, plane dissimili tamen successu & eventu. Patescit igitur, sanitatem corporis, animi viriumque integritatem, morborum originem, decursum & finem, non tam à causis externis, cibo, potu, aëre, regimine, quin medicamentis, dependere, quam potius à peculiari & specifica partium solidarum structura, proportionem & dispositionem, & hanc ob id omnino magis à medico esse considerandam, quam solam conditionem fluidorum horumque naturam.

OBSERVATIO VI.

Juvenis succulentus & sanguineus, generosus, cujus familiæ variolarum morbus maxime fatalis, degerat ruri & autumnali tempore, venerationi, & mane, & in seram usque noctem, plus justo sub cœlo pluvioso ac nebuloso indulserat, & postea huc delatus, crapula ex vino & esu ostrearum corpus debilitarat & stomacho vim fecerat. Altero die post incidit in variolarum popularem eo tempore morbum. Invasit quippe eundem primum horror & vehemens anxius æstus, insequente nocte admodum inquieta. Die post impatiens fuit, conquestus de exquisito spinæ & capitis dolore, delira & absona multa protulit & alvus fuit adstricta. Injectus hinc ad avocandos à capite humores clyster, quo alvus respondit. Data quoque æstum refrænantia, acicula, nitrosa, pulveres præcipitantes & absorbentes. Inde mitigatum delirium, & intra tertium & quartum diem eruperunt in facie maculæ exiles, aciculæ capitis magnitudine, simulque pustulæ asperæ miliares albæ & rubræ. Quinto die manus & pectus occuparant pustulæ, tam numerosæ, ut vix spatium inter ipsas esset relictum. Hoc facto, remiserunt quidem symptomata

*Variola
gemellis
diversa*

*Variola
primo
funesta*

tomata cum æstu, pustulæ autem ægre maturuerunt, facies justo minus intumuit, pulsus semper mansit frequens, & septimo die tam exquisitus ardor & dolor tensivus in manibus obortus, ut plane esset intolerabilis; lectum & locum mutare voluit æger, frigidaque ad manuum incendium restinguendum contrahere; somnus aderat nullus, spiratio vero anxiosa & difficilis & pectus obsessum humorum copia, suffocationem minitante. Applicata enemata, exhibitæ emulsiones cum pulveribus bezoardicis ac temperantibus, sed omnia incassum, eodem potius die accidit extremorum refrigeratio, subsequente convulsione & brevi post ipsa morte.

Epicrisis.

Haud adeo infrequens est, variolas certis familiis magis esse infestas atque funestas, cujus tamen causa minus cognita. Id vero in comperto, multum ad pessimam variolarum naturam conferre corporis refrigerationem, ingluviem incongruorum & ebrietatem. Quæ si præcesserunt & paullo post morbus impetit, expedit omnino, antequam tota œconomia motuum turbetur, coluviem ex primis viis idoneo laxante vel emetico exturbare. Primæ enim regionis sordes mirifice impediunt materiæ variolosæ salutarem exitum, immo vim morbi augent. Et si tum natura alvi movet fluxum, egregie pro sanitate est. Ut plurimum vero variolosi moriuntur convulsione, quæ suscitatur ab intolerabili æstu ac dolore in suppuratione pustularum, inprimis si cuti profundius insident, corpus juvenile est ac tenerioris texturæ.

OBSERVATIO VII.

Subito corripiebatur infans lactans unius anni motibus epilepticis, qui singulis horæ quadrantibus impetentes, per XXIV. horas insisterant. Prorumpiebant inde dentes canini & aculeos visui & tactui sistebant, die post comparebant etiam variolæ, non ut ordinarie solet, sed primum in manibus & pectore, & postea in facie. Nutrici magis quam tenello dabantur medicamenta. Huic quidem præter pulverem Marchionis, cum specifico cephalico *Michaelis*, fere nihil, & illi pulvis bezoardicus noster cum præcipitante remixtus, elixir pectorale crocatum & liquor ex myrrha, croco & falis tartari solutione. Quibus & dentitio & variolæ successerunt feliciter.

Epicrisis.

Non mirum eruptione, & dentium, inprimis caninorum, & variolarum, tam atroces præcessisse insultus epilepticos. Quod autem variolæ serius in facie effloruerint, id procul dubio tribuendum spasticis tractionibus & strictionibus ex dentitione in hac regione vigentibus, poris inde nimium coarctatis, materiam impuram non admittentibus. In lactantibus tenellis variolis affectis, medicamenta magis nutrici sunt præbenda talia, quæ acrimoniam imbibendo, succum chylousum & nutrimentum dulcem ac roscidum reddunt, quo materia caustica, quam optime cicuratur ac temperatur.

OBSERVATIO VIII.

Adolescens generosus incidit in variolas, non quidem confluentes, nec nimis copiosas, nec in-

Frid. Hoffmanni Oper. Tom. II.

tenfa febre, nec aliis gravibus symptomatibus stipatas; pulsus tamen absoluta etiam ferme eruptione debilis & frequens mansit, somnolentia adfuit fere continua, æger semper & à somno magis languit, pustulæ elevatæ quidem, sed pellucido humore plenæ, in medio complanatæ & nonnullæ punctulo nigro insignitæ. Nono die, æger è lecto, ab adstantibus sternendo, levatus, sellæ in conclavi calido & stragulis tactus impositus est, sed per quadrantem vix horæ erectus sedens, rogavit, ut in lectum ipsum cito transferrent propter obrepentem animi defectionem. Factum id. Conciderunt tamen subito papulæ, pedes frige facti, pectus oppressum, spiritus interclusus & subsequuti motus convulsivi, quibus post aliquot horas æger extinctus.

Epicrisis.

Malignitatis characteres habuerunt hæ variolæ à principio statim, pulsus, somnolentiam cum virium lapsu, pustulas pellucidas, in medio depressoas & nigricantes. Sub ejusmodi morbi facie & virium languore, semper admodum perniciosum, ægrum paullo diutius in erecto situ servare. Languidior enim cordis pulsus non sufficit ad trudendum perpendiculari via versus caput sanguinem, unde animi fit deliquium, sub quo motus sanguinis elanguescit, ad interiora convertitur, cor obruitur, extrema frigent, cutis contrahitur, materia virulenta ad interiora & nervosas partes repellitur, in capite sanguis stagnat & convulsionem demum facit lethalem.

OBSERVATIO IX.

Generosa virgo, quatuordecim annorum, gra-
fantibus variolis de ingenti capitis & lumborum
dolore conquerebatur, cum æstu præternaturali,
fiti & corporis lassitudine, cutis mox horrebat,
mox calebat. Medicus vocatus, variolarum
morbum subesse conjiciens, mixturam ex spiri-
tus nitri dulcis & tincturæ bezoardicæ ana dra-
chma & scrupulis duobus syrupi papaveris rhœa-
dos, singulis horis, ad quadraginta guttas porri-
gebat, sed ægra post hujus usum alimenta omnia
vomitu rejiciebat, & inquietudo cum anxietate
& virium prostratione admodum urgebat. Da-
batur igitur hæc mixtura: recipe aquæ florum
sambuci, acaciæ, cornu cervi citratæ ana unciam
unam semis, theriacalis drachmam semis, lapi-
dis bezoardici orientalis scrupulum, spiritus salis
ammoniaci guttas X. croci grana tria. Qua bi-
nis vicibus assumpta, ægra stragulis obtegebatur
& in hypocausto calido ad sudorem coge-
batur. Sedabatur vomitus & intra secundum & tertium
diem cum æstu intensissimo prodibant maculæ.
Sed quum ob calorem ardentem strata remove-
rentur, mox corripiebatur horrore, & maculæ il-
lico disparebant, insequente summa inquietudine,
anxietate & vomendi stimulo. Eveniebat hæc
vicissitudo aliquoties quotidie, ut his vel ter au-
cto calore comparerent, & diminuto disparerent
iterum. Medicus certior factus præcessisse ma-
lam diætam & ingluviem fructuum horæorum
dulcium, lacticiniorum, casei & acetariorum,
ventriculum & primum intestinum multa obse-
sum esse saburra ratus est, ideoque, quum præter-
ea alvus per quatuor dies fuisset strictior, hanc in
usum vocavit potionem: recipe mannæ electæ
drachmas sex, tartari emetici granum, aquæ car-
dii benedicti uncias duas, mixturæ simplicis guttas
decem. M. D. Assumpta hac, plus quam decem sequuti
vomitus, pituitæ viscidæ & subviridis, nec non
aliquot

*Emetico. La-
xans in
erup-tione
variola-
rum cum
fructu da-
tum.*

*variola in
facie
dentitio
& sana-*

*variola
ligna
sum*

aliquot secessus. Postea data essentia theriacalis, cum aqua liliorum convallium, paulisper spirituosam, qua vomitus, & alvi fluxus sedatus, anxietates omnes remiserunt, & diffuso per universum corpus calore æquabili, copiosissimæ cum impetu quasi in facie, manibus, pectore & pedibus eruperunt variolæ, stationem servantes & supurationem quam optime subeuntes, sine sævis symptomatibus. Inprimis plantæ pedum variolis fuerunt refertæ, sub cute ibi crassiori delitescen-
tibus & sub exulceratione graves suscitantibus dolores, qui tamen spiritu vini camphorato cum oleo amygdalarum dulcium deliniti, secedente in exsiccatione cute totius plantæ.

Epicrisis.

Nil certe pejus est, ac si variolarum morbus invadit corpus, in quo ventriculus & primæ viæ crudiatum colluvie obfessæ. Inde enim augentur anxietates, spasmi invalescunt, & ad extremam cutem diffusi, horripilationem ibi faciunt ejusque constrictionem. Inanis hinc labor est, tum expulsionem internis & calore extremo urgere, quin noxius ante debitum eruptionis tempus, eo quod vi pulsæ variolæ admodum sunt instabiles & cum pathematum exacerbatione iterum recedunt. Utile potius ventriculum convenienti laxante & emetico à saburra deplere, quod etiam ipsa natura per nauseam & vomendi desiderium innuit. Patet igitur, emetica, ante eruptionem data, non tam facile nocere, sed potius, levata ab onere natura, eandem promovere. Sed imperitus non facile imitetur heic facta cum fructu. Semper enim distinguendum est inter vomitum & conatum vomendi, qui ab illuvie vitiosorum humorum prima in regione, & inter illum, qui ab acrimonia subtili caustica nervosis tunicis inhaerente oboritur. In illo utilissima vomitoria, in hoc nocentissima.

OBSERVATIO X.

Noxa ex calore regiminis & medicamentorum in variolis.

Puer quadriennis, grassantibus in parentum domo variolis, iisdem, quibus invadere solent, afficitur pathematibus. Mater hinc ipsum includit hypocaufto & lecto calido pedibusque lagenam aqua fervente plenam admovet. Medicus senex consultus omnia habet rata, & præterea ob pavores & ad promovendam eruptionem spiritum cornu cervi cum essentia castorei porrigit. Sed secundo die insultus accedunt epileptici, cum anxia & quasi suffocatoria respiratione, somno terroribus pleno maxime inquietudine. Me igitur advocant, qui adveni-
ens fenestras provide aperire & stragula nimia remove-
re jubeo, & loco spiritus cornu cervi, spiritum nitri dulcem, cum syrupo papaveris rhoeados, item pulverem Marchionis, cum nitro & cinnabari exhibeo. Inde post paucum tempus symptomatum vehementia mitigata, penitusque remittit, maculæ placide & copiose prodierunt, totiusque morbi curatio ex voto successit.

Epicrisis.

Pessimus, vulgi inprimis, mos est, variolosos calidissimo regimine excipere, & pessimum consilium expellentia & sanguinem exagitantia offerre. Pereunt enim hac ratione plures, vel minimum in gravia adducuntur pathemata. Memorabilis de eodem hoc cornu cervi spiritu est casus in *Ammanni Medicina critica*, de tribus

liberis, à paullo liberaliori ejusdem dosi, enectis. Hinc laude merito dignus *Sydenham*, qui primus fere hunc errorem detexit, & contrariam plane suavitatem methodum, temperantia nempe, motum sanguinis nimium sedantia, anodyna & acidula temperata, cum moderato regimine.

OBSERVATIO XI.

Diu admodum tertiana laborarat puella quindecim annorum, qua demum discedente, variolæ publice circumeuntes successerunt, ut illa in has tantum non mutata videretur. Prodibant interim feliciter & sanabantur. Sed exsiccatis iisdem, remanebat macula rubicunda acerbè dolens in labio inferiori, quæ aucto paulatim rubore, cum acri ardore in tumorem plane elevabatur. Imposito à balneatore cataplasmate ex albumine ovi & bolo Armena, nigra cum vicina carne comparebat, sine omni sensu. Sphacelum igitur adesse ratus, applicabat decoctum sic dictum nigrum, ex herbis amaricantibus, foliis quercus, cum aceto & vitriolo, sed malum longe magis invalescebat, & brevi adeo putrida crescebat corruptio, ut labia cum gingivis penitus absumerentur ipsique dentes nigrore inficerentur. Admovebantur quidem alia putredini efficaciter resistentia, una cum internis alexipharmacis, sed frustra plane, ægra ob id, consumtis post aliquot hebdomades viribus, miserrime pereunte.

Cancrofa corruptio in labio post variolas lethalis.

Epicrisis.

Causa horrendæ catastrophes vix alia, quam quod variolæ inciderunt in corpus, in quo per diurnam febrem & calorem vires consumptæ, & benigni ac temperati succi dyscrasiam viscidam, impuram excrementitiam contraxerunt. Quum enim ipsæ variolæ jam ejus sint indolis, ut roscidos corporis succos consumant, & putres ulcerationes ob id sæpe relinquant; mirum non est, cancrofam corruptionem in tam imbecilli & impuro corpore fuisse subortam. Discant autem hinc medicinam facientes, variolas in sordidis & infirmis corporibus circumspecte esse tractandas, & superatis iisdem, eo quam maxime enitendum, quo dyscrasia humorum per laxantia, diaphoretica, decocta & infusa, tollatur penitus. Plures hac de re legantur observationes in Consil. medicis *Tom. II. sect. IV. CXC VII.*

CAPUT VIII.

De Febre Morbillofa.

THESES PATHOLOGICÆ.

§. I.

Morbillofa febris est catarrhalis exanthematica, ut plurimum epidemica, qua motu virali cordis & arteriarum aucto, materia acris, caustica, inflammans, ex interioribus, nervosis maxime partibus, sub forma macularum rubrarum ad cutem pellitur.

Morbillofa febris descripta.

§. II.

In scholis & scriptis medicorum plerumque quidem morbilli simul cum variolis pertractantur: nec negandum, multum utrisque esse affinitatis. Utraque enim febris exanthematica, contagiosa & epidemica, omnibus fere hominibus per-

Ejus differentia a variola.

perpetienda ; utraque certis temporibus magis, vel minus benigna , & fequitur quam maxime atmosphaeræ statum , corporis dispositionem ac temperamentum. Sed mihi placuit morbillorum morbum seorsim perquirere, quum insignis tam quoad causam & genium, quam diagnosin & prognosin , utrisque intercedat differentia. In morbillis quippe materia non tam pernicialis, non tam caustica , nec exulcerans ut in variolis, febris etiam totusque morbus ob id longe mitior, nec tam multos jugulat. Ante eruptionem morbillorum adsunt quidem pariter inquietudines, pavores in somno, cordis palpitationes, facta efflorescentia cessantes, sed materia magis infesta est pulmonibus, ideoque id singulare habent, quod indivulsus comes sit, tussis violenta, ferina, qua infantes sæpe per quatuordecim & longius ante dies excruciantur. Præcedit etiam ut plurimum serosi humoris per nares & oculos cum sternutatione & palpebrarum intumescencia secessio. Et hæmorrhagiæ quoque tam narium, quam in foeminis per uterum, cruentus quin vomitus, morbillis longe magis solennes, quam variolis. Præterea non modo mirius, sed & citius decurrit morbillorum morbus & sæpe primo die, ut plurimum tamen post tertium diem, prodeunt maculæ, pro varia corporum succorumque dispositione diversæ, in aliis latiores & ampliores, in aliis minores, in quibusdam instar morsus pulicum, modo rubicundi & purpurei, modo pallidioris & magis plumbei aspectus. Maculæ hæ non elewantur in pustulas, ut variolæ, sed lenticulari aliquali eminentia planam cutis superficiem excedunt, facies & cutis in extremis minus intumescit, & brevi tempore, quinto interdum vel sexto die, ruborem sensim exuunt, & sub auctiori perspiratione iterum evanescunt. Quumque nulla eveniat suppuratio, neque dolor & ardor persentitur, sed insignis declinante morbo pruritus in genis, labiis & toto corpore, ægros ad scalpum excitans. Neque etiam foeda relinquunt vestigia, neque ulcera in articulis & partibus externis, sed supersunt communiter squamulæ furfuraceæ, successive decedentes.

§. III.

Hæc qui novit, morbillos ex facili ab aliis cutaneis efflorescentiis discernere poterit. Petechias enim amplitudine & elevatione tantisper notabiliore superant, longe mitioribus etiam symptomatibus stipantur & malignitatis ut plurimum sunt expertes. In purpura alba, secus ac in morbillis, ex maculis pustulæ exiguæ pellucidæ surgunt; in rubra eminentiæ miliares sunt, duræ & asperæ. Rubeolæ & rossalia ad erysipelaceam magis indolem accedunt, febrem habent irregularem & præterea in illis exanthematicæ maculæ minoris amplitudinis, ac morbilli, in his vero majoris, ut in statu universum corpus quasi erysipelate affectum, videatur. Et scorbuticæ maculæ latiores sunt ac morbillorum, coloris obscure rubicundi, ut plurimum sine febre.

§. IV.

Unde vero hujus omnibus communis morbi origo, haud secus ac de variolarum causa admodum est obscurum. Si tamen probabili ratione concludendum, veri omnino simile est, materiam morbillorum esse ex recrementis primi succi nutritii in utero, vel materni lactis extra uterum, glandulis quibusdam forsan firmitus impactis & ex longiori mora corrosiva plane in-

Frid. Hoffmanni Oper. Tom. II.

le imbutis. Sed bona fide hæc ignorare potest medicus, etiam rationalis, dummodo pernicialem indolem ex effectibus & quo pacto his obviam eundem, sciat.

§. V.

Interim morbilli per se minus periculi habent, ^{Quæ mala signa.} & sapius, potissimum in plebeiis, sine medici ope, debito tantum regimine, iterum discedunt. Interdum tamen, ob præcedentem anormalem, insalubrem, diuturnam temporum constitutionem, malignam habent, epidemici imprimis, indolem. Vel accidentales etiam possunt accedere causæ, ægros in discrimen adducentes. Malignitatem autem prodit virium impensa prostratio, extremorum frigus, inquietudo summa, vomitus, deglutitio difficilis mentisque alienatio. Malum dein, quando aliæ maculæ, virulentia non expertes, uti petechiæ, purpura, vel etiam pustulæ scorbuticæ, complicantur, vel in fine cum vitæ discrimine superveniunt. Tussis porro continua, cum alvi profluvio & inquietudine magna, infaustum præsagire solent eventum. Neque boni ominis sunt sudores largi, præsertim in provectionibus, qui ob malam diætam & spirituosorum potum, calidum alunt & impurum sanguinem; ex facili enim admissio levi frigore, maculæ, funesto plerumque eventu, recedunt. Finito etiam morbo, si tussicula cum raucedine persistit, nisi cito idoneis succurratur remediis, in phthisin, & hecticam fit transitus.

§. VI.

Qui autem morbillis occumbunt, maxime ex ^{Quomodo nocet.} infantibus, nono plerumque die suffocantur, evidenti indicio, nervosa & glandulosa pulmonum bronchia, ob copiosam inflammantem materiam, spasmis & stagnatione humorum fuisse affecta & ex nimio feri affluxu demum suffocationem inductam. In quibusdam superato morbo remanet alvi fluxus ad aliquot hebdomades durans, tamen cum morte demum inducens. In nonnullis etiam, præsertim plebeiis, febris succrescit lenta, cum atrophia & abdominis tumore, funesta, ubi post mortem ut plurimum glandulæ mesaraicæ magnæ & pulmones latentibus vomicis obsessi, deprehenduntur.

CURATIO.

Medicatio morbillorum, iisdem quam vario- ^{Medicatio} larum perficienda, acrimoniam nimirum temperantibus, diluentibus & demulcentibus, cum iis, quæ sub moderato lecti & hypocauti calore, materiam hostilem acrem ad corporis extima agunt. Profunt igitur pulveres absorbentes & diaphoretici fixiores, leniter cinnabarini, item emulsiones & decocta. Quæ, quum præcedenti capite jam sint uberius descripta, specialia autem in cautelis dicenda, plura de iis heic afferre supervacaneum.

CAUTELÆ ET OBSERVATIONES CLINICÆ.

§. I.

Si suspicio est in infantibus primam corpo- ^{Sub ini-} ris regionem copiosis & crudis succis redun- ^{rium qua-} dare, expedit in primo insultu leni emetico, ^{faciendo.} uti ex dimidio tartari emetici grano, cum syrupo de cichoreo cum rhabarbaro, eandem deplere. Quando etiam lumbricis laborant, & metus est,

incurfuri epidemice jam graffantis morbi, è re est, ut intestinorum canalis prius à verminosa progenie liberetur, quod commodissime perficitur pilulis *Rufi*, cum mercurio dulci & semine fantonici. Quod si negligitur, difficulter morbus superatur. In provectionis autem ætatis personis, si sanguis redundat, ut primis statim diebus subtrahatur necesse est. Declinantur sic non modo hæmorrhagiæ ominosæ, sed vidi etiam, hoc facto, remississe illico anxietates cum inquietudine & per univèrsum corporis ambitum exanthemata prodire.

§. II.

Calida & frigida nocent.

Sicuti impensius calefacientia, cum nimio externo calore, materiam deteriore ac subtiliorem reddendo, æstum cum anxietate augendo & vires dissipando, nocent; ita vicissim nitrosa & nimium refrigerantia, in ætate maxime infantili, oppido damnosa. Retardant enim eruptionem, & retentâ materia, ad sphacelum fit dispositio.

§. III.

Hysterici spasmi micigandi.

Quando morbilli accidunt foeminis, quæ spasmi hypochondriaco-hysterici obnoxie, vel mensium instat fluxus, haud raro animi deliquia, spirandi angustia, cum gutturi constrictione & ingenti præcordiorum anxietate, jungi solent; quibus materiæ in cutem exitus præcluditur. Igitur tum neutiquam pellentibus calidioribus eruptio urgenda; sed potius adhibenda ea, quæ spasmos leniunt, enemata ex paregoricis & carminativis parata, interdum venæ sectio, nec non pauxillum castorei & nitri pulveribus bezoardicis admixtum: sic brevi post in conspectum veniunt maculæ.

§. IV.

Tussis.

Molestissimum in morbillis symptoma est tussis ferina, ad quam complacandam nihil utilius oleo amygdalarum dulcium, recenter ex non rancidis expresso, cum syrupo capillari remixto & in decocto avenaceo ad dimidium cochlear crebrius porrecto. Conducit etiam pulveribus absorbentibus & diaphoreticis admiscere dimidium granum extracti croci, & uti infuso theiformi, ex herba veronicæ, radice liquiritiæ, floribus papaveris rhœados & semine foeniculi.

§. V.

Diarrhœa.

Diarrhœa si concurret, provide eadem tractanda, nec facile compescenda. Solvit enim sæpe morbum & multæ ac copiosæ fordes è corpore per ipsam secedunt. Ex tutissimis tum ad eluendam ex intestinis acrimoniam, clysteres ex puris demulcentibus parati. Si vero finito morbo pertinacius insistit diarrhœa, commode pulveribus bezoardicis admiscenda aliquot chaccarillæ corticis grana, vel etiam tantillum theriacæ coelestis.

§. VI.

Quibus medendum hæmorrhagiæ.

Quum sanguinis profusiones nimie mali sint ominis & plerumque malignitatis indices, easdem cum bonis ægrorum rebus moderari non minimæ res est prudentiæ. Exulent omnia positive adstringentia, item eminentius opiata & anodyna. Ego quidem sæpius cum fructu usus sum hac mixtura: recipe aquæ florum acaciæ, sambuci, tiliæ ana uncias duas, theriacalis drachmas tres, antimonii diaphoretici, diascordii Fracastorii ana drachmam semis, spiritus vitrioli guttas XX. syrupi papaveris rhœados drachmas duas. M. Li- quor quoque noster anodynus mineralis cum pulvere præcipitante nitroso sumtus, exoptatam sæpius præstitit opem. Per amuleta vero fluxum

hunc compescere velle, noxium potius, quam salutare deprehendi. Insita enim propria virtute nihil operantur, sed tantum impensiori animi impressione, quæ tamen in periculosis ejusmodi affectibus omni studio evitanda.

§. VII.

Ubi malignioris sunt indolis, apprime ex usu est pulvis noster bezoardicus, cujus basis bezoardicum minerale, qui non modo sudorem & eruptionem blande elicit, sed simul etiam humores corruptos imbibendo, sedem movet, cum euphoria. Præstabilem etiam sæpe deprehendi virtutem sulphuris antimonialis, nostra peculiari methodo præparati & ad dimidiam, vel quartam grani partem oblatis.

§. VIII.

Si sudore corpus nimium diffluit, ut linteamina ex toto madescant, provide eadem sunt mutanda, prius probe exsiccanda & leniter calefacienda, ne ab eorum frigore materia exanthematica cum periculo certissimo recedat. Idem in mutatione lecti tenendum. Maximopere etiam cavendum est, ne quis subito ex calido in frigidum concedat. Mortem enim inde intra aliquot horarum spatium vidi.

§. IX.

Quum plures, qui finita febre & discussis jam maculis præmature liberiori aëri sese committunt & salubrem victus vitæque rationem spernunt, obretentas sic & adauctas impuras morbi reliquias, in peiores morbos incidunt, asthma, vel suffocativum catarrhum, phthisin & tabem, quin uti observavi in contracturam; serio monendi sunt convalescentes, ut per aliquot adhuc hebdomades perspirationem sollicitè custodiant & eum in finem utantur infusis theiformibus, leniter diaphoreticis & sanguinem mundificantibus, interposito nonnunquam, ad fordes per alvum evehendas, balsamicarum pilularum usu. Victum vero habeant tenuem & aliquandiu à cerevisiæ potu abstineant bibantque decoctum temperans & diluens, ex radice scorzonæ, sarsaparillæ, cichorei, liquiritiæ, hordeo mundo, cortice ligni sassafras, vel semine foeniculi. Quod sicuti in omnibus fere morbis, sic etiam in febribus exanthematicis, utile est & maxime salutare.

ENARRATIONES MORBORUM.

OBSERVATIO I.

Conquerebatur generosa puella, duodecim annorum, de lassitudine, inappetentia, languore virium & doloribus lancinantibus in cruribus & brachiis, præterea lividum & plumbeum faciei offerebat aspectum. Octiduo post corripiebatur horripilatione, subsequente æstu & gravi dolore capitis lumborumque. Tertio die post in conspectum veniebant maculæ morbillorum, tum epidemiorum, tussis simul affligebat molestissima, & propter capitis oculorumque dolorem continuum, nec somnum capere, nec lucis ferre poterat aspectum. Quinto die sensim iterum evanescebant maculæ ex totius fere corporis ambitu, sed dolor capitis & oculorum remanebat & præterea alvus à primo morbi insultu erat sicciôr, ut non nisi clystere sollicitata responderet. Quum sic jam declinare videretur morbus, præter spem de novo accidebat summa præcordiorum anxietas, cum æstu totius corporis, siti, virium prostratione & difficili respiratione, prodibat postea purpura rubra, intermixta alba, sive miliari, & dolor in oculis & capite supra frontem pertinaciter insistebat. Pugnabatur quidem contra hæc tam gravia mala iis, quæ ac-
dinem

dinem humorum cum spafmis mulcere & eruptionem placide promovere poterant. Sensim quoque remittente capitis dolore, puella convalescebat; sed superato morbo visio erat imminuta, & sensim incrementum sumens, intra mensem in veram guttam serenam transiit, ita, ut nihil plane visu dignoscere posset; licet oculi integri, & pupilla tantum duplo naturali amplior, comparerent. Multa & probata adversus hoc oculorum vitium adhibebantur remedia, sed frustra. Eruptionibus autem decimo quarto anno primum mensibus, splendorem aliqualem receperunt oculi rursus. Hinc in consilium vocatus, suasi, ut temperatis balsamicis mensium negotium secundaretur, vesicatorium mitius aliquandiu gestaretur, oculi crebrius quotidie pinguedine viperina recenti inungerentur & cum cibo nonnunquam aliquot guttæ balsami nostri vitæ assumerentur. Quibus non quidem in totum, sed tamen in tantum restitutus visus, ut sub certo oculi situ objecta, & quidem tantum dimidiata facie, conspiciere posset, ceterum optime valeret, ingressa haud ita pridem matrimonium.

Epicrisis.

Semper suspectum in variolis & morbillis, quando ægri diu ante eruptionem male habent & de doloribus artuum, vel certam partem pertinacius infestantibus conqueruntur. Heic successit morbillis evanescentibus purpura, tam rubra, quam alba. Aut igitur duplex specificæ indolis materia impura intus delituit, quæ non simul critico motu, sed definito & successivo fuit expulsa. Aut purpuræ materia forsan per ipsum febrilem in morbillis sanguinis motum de novo fuit progenita. Dein nunquam etiam non suspectum, si gravis capitis & oculorum dolor, alias facta eruptione cessans, per totum morbum durat: grave enim ut plurimum capitis vitium relinquere solet; in hac guttam serenam. Quæ quidem insanabile semper fere vitium, in infantibus tamen & tenerioris texturæ puellis, accedente menstrua purgatione, & immutata per hanc totius corporis, quoad solida & fluida, natura, discutitur iterum, præsertim si natura sanationem moliens arte juvetur.

OBSERVATIO II.

Juvenis cholericæ & ficcæ constitutionis, qui per aliquot annos in academia plus Veneri & Baccho, quam Musis litarat, commovebatur aliquando vehementi ira, die post afficiebatur aestu insigni cum languore artuum & dorsi dolore, noctem transigebat insomnem & tussi exercebatur valida, quæ ferina plane fiebat, & comites habebat anxietates & cardialgias. Datis ardorem nimium temperantibus, post tertium diem comparebant maculæ numerosissimæ intra XXIV. horarum spatium universum corporis ambitum occupantes. Mirum autem inquietus erat æger & impatiens, corpus jactitabat, tantum temperatum etiam lecti calorem respuebat, & admissa subinde aura frigidiori, ut maculæ omnes brevi iterum evanescerent, faciebat. Oboribantur hinc anxietates cum magna inquietudine & siti inexhausta, ut intra diem & noctem quatuor minimum pitisanæ & emulsionis amygdalatae epotaret mensuras. Porrigebatur quidem ad revocandam extrus materiam lene diaphoreticum, sed propter ægri impatientiam & jectigationem nihil proficiebat, sitis potius reddebatur

Frid. Hoffmanni Oper. Tom. II.

intensior, ut vix posset extingui, & æger vel septem mensuras liquidorum absumeret. Inde incidebat in alvi fluxum & vel decies intra diem dejiciebat, urina etiam effuse fluebat, ægro tamen de interno ardore, siti & anxietate conquerente largissimeque potum ingurgitante. Fluebat sic alvus per quinque dies, calidus potus cum medicamentis spernebatur, neque maculæ amplius comparebant. Nihilo minus symptomata sensim mitiora fiebant, æger melius habebat, & præter spem intra XIV. dies convalescebat.

Epicrisis.

Singularis plane hic est casus largi alvi fluxus, quo morbillorum morbus & quidem retrocedentium, solutus. Jam quidem nullum est dubium, quin materia morbillorum sit causticæ & inflammatoriæ indolis, quæ exitu præcluso intus retenta, vel expulsa retrocessit, firmitusque nervosis partibus impacta est, graves, immo exitiales, efficere possit affectiones. In nostro ægro insedit utique ori, faucibus, ventriculi & intestinorum tunicis, ac sitim & ardorem cum leniori inflammatione ibi concitavit. Liquidorum vero & quidem accommodatorum copioso potu, caustica materia, tam intra tunicas hærens, quam in succis hospitans, mitigata atque correctæ fuit, & proritus alvi fluxus, quo impuri ex universo corpore succi eo confluerunt & evacuati sunt. Ego quippe crebrius observavi, in variolis & morbillis, ob impuros & redundantes corporis succos, malum genium exhibentibus, sponte ortum alvi profluvium, non modo sine periculo, sed & admodum salutare fuisse. Neque etiam facile in periculi plenis morbis desperare debet medicus, licet ægri magnam potus copiam appetant, modo per alvum, urinam & sudorem iterum emittatur. Plures enim sine, quam cum liquidorum appetentia, occumbunt.

OBSERVATIO III.

Infans decennis, feliciter, ut videbatur, superarat morbillos, sed tamen ea resistebat alvi laxitas, ut quævis assumpta citissime per inferiora transirent, aderantque præterea tormina ventris cum dolore pedum, qui tactu semper erant frigidi. Ad compescendum hunc fluxum, medicus minus peritus porrexit pulverem ex radice tormentillæ, terra de catechu & unicornu fossili, cum pauxillo laudani opiat. Inde enim alvus quidem constitit, sed acerbissimus dolor occupavit tibiam sinistram in malleolo, quem mox tumor excepit durus & renitens, qui tandem suppuratus & apertus sanguinem cum copioso ichore fudit. Successit postea serpens ulcus, totum ferme pedem depascens, cui febris cum tussi & difficili respiratione supervenit, quamque ob nimium pectoris infarctum infans non libere spirare posset, suffocativo demum catarrho fuit extinctus.

Post mor-
billos alvi
fluxus, ul-
cus &
mors.

Epicrisis.

Sæpius notavi, in infantibus alvum per totum variolarum & morbillorum morbum, & etiam post eum, sine periculo fluxisse. Neque alia utilia deprehendi, quam diaphoretica fixa, ut cornu cervi philosophice præparatum, ustum, antimonium diaphoreticum, lapides cancorum, succinum præparatum, quibus pauxillum corticis chaccarillæ admixtum. In usum quoque vocavi juscula ex carnibus cum ossibus

contusis, item cornu cervi parata, adjecta semper olei amygdalarum dulcium recentissimi portione quadam. Neque minus clysteres emollientes, ex decocto raparum exsiccatarum una cum butyro insulso, admodum fuerunt proficui, qui omnium optime acreditiem humorum, coli membranis potissimum in ejusmodi diarrhoeis insidentem, contemperant ac mulcent. Contra ea periculosum omnino, alvi hunc fluxum adstringentibus sistere. Sic enim materia acris caustica, intus remanens & succis reddita, ad alia sæpius loca relegatur, ubi postea atrocia ciet mala.

OBSERVATIO IV.

*Emetikum
in morbil-
lis profi-
cuisim.*

Lactans infans unius anni incidit in calorem præternaturalem, cum pavore in somno & vomitu. Die secundo eruperunt morbilli numerosi, sed asperi & cutem quasi stringentes. Die quarto accessit summa respirandi difficultas & pectoris angustia cum anxietate, inquietudine, vigilia & pavoribus. Dedi sextam partem grani tartari emetici, cum drachmis duabus aquæ florum tilia & quatuor guttis essentia castorei. Hinc quinquies dejecit infans viridissimam instar glutinis materiam, eoque facto vigor accessit toti corpori, respiratio facta liberior & morbillirubore perfusi magis. Oblata postea ad calorem temperandum gelatina cornu cervi in tenui decocto hordei, & feliciter evasit tenellus.

Epicrisis.

Colluvies vitiosorum humorum in ventriculo, morbillorum processum turbare & gravia symptomata iis adjicere potest utique. Omnia enim quæ circa quartum diem, quo alias morbus remissior, hoc in infante præsto fuerunt pathemata, non ex morbillis, sed cruditatibus acido-viscido-biliosis prima in regione stagnantibus atque corruptis, ortum traxerunt. Hinc exterminatis iis per lenissimum emeticum, symptomata non modo protinus conquieverunt, sed & ipsa natura gravi onere levata, eo feliciter ipsi potuit succurrere morbo. Quin patet, nec quarto & critico die, ejusmodi in casibus leniora & prudenter exhibita evacuantia nocere, inter quæ emetica, in infantibus præsertim lactantibus, merito primas tenent.

OBSERVATIO V.

*Morbilli
cum hæ-
morrhagia
æthales.*

Puer undecim annorum, rubicundus facie, ingenio alacris, sanguine plenus & constitutionis calidæ, correptus est immani æstu, dorsi capitisque dolore, datis tamen temperantibus nitrosis pulveribus, altero die habuit meliuscule. Tertio autem rediit urens æstus & quarto die sequutum narium stillicidium. Hoc quinto remisit, sexto vero effusius reversum. A septimo ad decimum mitiora erant symptomata & sanguinis fluxus siluit, erumpentibus passim morbillorum maculis. Sed breves induciæ. Undecimo quippe die, rursus copiosa è naribus facta hæmorrhagia & maculæ evanuerunt. Duodecimo largius adhuc fluxit sanguis, ita ut vires mirum corruerent & æstus internus invalesceret. Decimo tertio die mitiora pathemata iterum, die autem post cum hæmorrhagia recruduerunt, donec consumtis prorsus viribus, decimo quinto die æger efflaret animam.

Epicrisis.

In variolis & morbillis deterioris semper notæ symptoma est, effusior sanguinis, per quæcunque loca, fluxus. Indicat enim vehementes spasticas internarum partium, præsertim viscerum abdominis, stricturas, quibus inæqualis redditur sanguinis progressus & ex uno loco in alterum cum impetu urgetur. Per nimiam etiam profusionem virium inducitur jactura, & minimorum ad extima excurrentium canalium, per quos in cute eruptio fieri debet, exinanitio & subsidencia. Unde materia caustica retenta, novos ciet spasmos novasque hæmorrhagias ac demum funesti eventus fit causa. Magnæ itaque prudentiæ est, hæmorrhagias in morbis, quorum materia per cutem excernenda, moderari perite, ne deficiat expulsionis facultas. Ego quidem tum commendare soleo, ut omne frigus & frigidus potus vitetur, & partes extremæ, manus & pedes, quæ ordinario frigida existunt & contremiscunt, calore bene foveantur & vel lecto probe obtendantur, vel etiam aquæ calido vino mixtæ immergantur, quo revulsio sanguinis à capite fiat, simulque spastica fibrarum contractio laxetur. Dein eo quam maxime annitendum, quo caustica materia foras mittatur, eumque in finem danda diaphoretica cum temperantibus, cujus generis hæc mixtura: recipe aquæ cardui benedicti, florem sambuci ana uncias duas, theriacalis unciam semis, diascordii Fracastorii, antimonii diaphoretici, nitri ana drachmam dimidiam, mixturæ simplicis guttas XX. syrupi acetositis citri drachmas duas. M. D. de qua bina, binis quibusvis horis, cochlearia sumenda, superbibendo semper calidum haustum. Et si præterea æstus junctus nimius, interponendus est pulvis bezoardicus nitrosus.

OBSERVATIO VI.

Vir generosus, macilentus & fibrosæ corporis structuræ, triginta sex annos habens, aulico ministerio fungens, ab aliquot jam annis, vini potui liberaliter indulserat & sæpe inter potatores egerat tantum non heroem. Incidit is in morbillorum, aulicis tum familiarem & ab ipso nondum superatum morbum, sub quo ipsum præter immoderatum æstum & inquietudinem, violenta tussis & summæ anxietates præcordiorum, noctu æque ac interdiu affligerunt, corpore à principio statim sudore diffluente. Medicus aulæ ordinarius in consilium vocatus, quatuor quibusvis horis, triginta guttas essentia alexipharmacæ admodum calidæ porrexit, & ad sitim extinguendam liberalem potum cerevisiæ valde spirituosæ concessit. Interim expulsis maculis anxietates remiserunt & spiritus liberior meavit. Quum autem indusium sudore totum madescens & frigidum mutaturus, à ministro imperito recens minusque calefactum acciperet, illico omnes omnino quibus corpus confertim obseffum maculæ disparuerunt. Inde tanta sequuta inquietudo, anxietas cum virium jactura, ut omnibus morti videretur proximus. Ego tum temporis præsens accersitus exhibui illico pulverem meum bezoardicum cinnabarinum cum aqua analeptica, nec non liquorem anodynum minieralem cum tinctura antimonii temperata & aliquot guttulis spiritus Bussiani; quibus paullo post & sudor & maculæ redierunt, æger melius habuit & pulsus antea inæqualis, celer & debilis, plenior ac æqualis

*Morbilli
retrocedentes
sunt*

lis redditus. Sed septimo die, quum sudor effusus adhuc manaret & æger in alium lectum ob madorem se conferret, rursus cuncta evanuerunt exanthemata, extrema frigida facta, accessit anxietas maxima & spiratio difficillima, pulsus etiam contractus & parvus redditus, & brevi post, præcedente rigore & convulsione artuum, est extinctus.

Epicrisis.

Morbilli, non secus ac alii morbi exanthematici, sequuntur maxime constitutionem solidarum & fluidarum partium corporis ægrotantis, adeo, ut quo intemperatior hæc, eo peioris indolis sit ille. Potissimum, de vini potui deditis, crebriori confirmatum habeo experientia, quod raro ex febribus exanthematicis evadant, eo quod febrilis illa intestina partium sanguinis commotio, in plenariam tandem dissolutionem abit, cujus index largissimus sudor cum insigni virium lapsu. Medicus igitur, calida essentia, quæ æstum magis accendit, nocuit potius, quam profuit. Si quoque dissolutorius talis humorum vitalium est status, levis etiam in rebus externis error, uti refrigeratio, linteaminum mutatio, situs erectus, immedicabilem possunt inducere noxam. Et quo languidiores sunt in exanthematicis vires, eo plus semper metuenda retrocessio materiæ exanthematicæ, qua vitæ nihil est infensus.

OBSERVATIO VII.

Morbilli refrigerantium nitroforum usu le-ales. Puelli tres, unus sex, alter quinque & tertius trium annorum, filii viri perillustri Serenissimo Duci in Saxonia inferiori à consiliis, corripiebantur successive morbillis. Commendatione generosæ sceminæ in consilium vocabatur novellus Medicinæ Doctor, qui intempestivo nitri amore à præceptoribus imbutus, larga & repetita dosi, præter pulveres refrigerantes nitrosos, exhibebat nihil. Inde retardabatur macularum eruptio, spiratio fiebat angusta & difficilis, tussis continua sine sreatu, accedebat asthma intensum & intra septem dies, tres pueri occumbebant, cum ingenti parentum luctu.

Epicrisis.

Non ex unius, sed plurium fide dignorum relatione, de tragico hoc casu certior sum factus. Crebrior ac liberalis refrigerantium nitroforum usus utique taxandus est. Nam licet nitrum purum merito principem teneat locum inter ea præsidia, quæ æstum extinguunt, & spasticas commotiones componunt, & ego etiam jam ante quadraginta annos eodem frequentius usus fu-
rim, quin forsan primus, testantibus id variis scriptis; tum dissertationibus, tum *notis ad Poterium*, salubrem nitri facultatem perspexerim & exposuerim; nihilo tamen secius usus ipsius, haud secus ac aliorum magnæ virtutis remediorum, peritum ac prudentem exigit medicum, & ex ejus abusu, ab iis, qui medicinam rationalem nec callent, nec exercent, damna inducta novi, & plura, & gravia. Certe, in morbis exanthematicis, ubi non nimius urget æstus, in febribus catarrhalibus, item malignis, in quibus humorum potius corruptio, quam exæstuatio metuen-
da, in corporibus maxime humidioribus & infantilibus, omni modo à liberali nitri usu abstinendum. Ob nimiam enim refrigerationem re-
manet intus foras excernenda infensæ indolis ma-

teria, atque ut putredinosa dissolutoria humorum corruptio magis augeatur, facit. Et quum materia morbillorum maxime infensæ hujus sit indolis, ut firmiter insideat nervis pneumonicis & tunicis pulmonum nervosis; nullum omnino est dubium, quin in his puellis non emota, ibi im-
pacta hæserit & suffocatorias humorum stases suscitavit. Cæterum hoc loco monendum duxi, me in infantibus, quando morbilli prodire noluerunt ipforumque materia altius insidens pulmonum bronchiis suffocativum intentavit catarrhum, insigni cum fructu usum esse vesicatorio, quo sopiti canalium ad expulsionem necessarii motus, quam optime resuscitantur.

OBSERVATIO VIII.

Comes illustrissimus, viginti annorum, cholerico-sanguineus, nondum venæ sectionem passus & pathemathibus spastico-hypochondriacis, cum stomachi inflatione & crebriori post cibum vomitu, obnoxius, grassantibus epidemice morbillis, languere coepit & conqueri de anxietate præcordiorum, dolore capitis, dorfi ac pedum, tussi sicca, interno æstu, intercurrente horripilatione, cute arida & sicca. Tertio die compa-
ruerunt in fronte stigmata rubicunda nonnulla, pathemata tamen noluerunt remittere, nec plures etiam postero die efflorescere maculæ, pulsu interim pleno cum celeritate vibrante. Vena in pede pertusa, sanguis cum impetu exiliit floridus, variegatam post refrigerationem contrahens cuticulam, & inde illico anxietates & vehementes capitis dolores remiserunt. Quin licet primum stigmata in fronte disparere viderentur & pulsus admodum celer cum duritie micaret, æger etiam noctem insomnem fere ob æstum & compunctorium in cute sensum duceret; mane tamen in conspectum venerunt in facie & pectore maculæ morbillorum, pallidiores initio, successive autem magis rubentes & reliquas quoque corporis partes confertim occupantes. Discessit hoc facto capitis, dorfi & pedum dolor, cum pectoris angustia, tussi & interno calore, ac æger melius habuit, conquestus tantum de molesto pruritu ardente & tensione cutis. Potissimum vero ipsum excruciauit oculorum ardens dolor cum rubore adnatæ & illacrymatione, ita ut lucem ferre non posset & noctu palpebræ conglutina-
rentur. Nono die obortus sudor largus, decimo etiam manans & acidum foetidum odorem spirans. Undecimo intra nycthymeron sexies de-
jecit sine torminibus sponte & maculæ ruborem sensim exuerunt, decimo tertio die penitus discussæ, subsequente cutis desquamatione & sanitate.

Epicrisis.

Quum in iis, qui spasticis hypochondriacis detinentur pathematibus, nunquam non major succorum impuritas & acrimonia esse soleat; huic etiam illustrissimo ægro ejusdem constitutionis ea fere unice exhibita sunt, quæ demulcent ac temperant, pulveres nempe temperantes & diaphoretici, leniter nitrosi, emulsiones, exoptato cum successu. Venæ sectionem autem, quum pulsus admodum plenus & vasa turgida essent, eruptio quoque retardaretur, necessariam duxi, crebriori experientia edoctus, sanguine nimium redundante, difficillime, eodemque subtracto, prom-
tissime succedere materiæ exanthematicæ expulsionem. Insolitus vero ille oculorum ardor, ru-

Morbilli in hypochondriacis sanati.

bor & fluxus serofus, tribuendus utique est eorum debilitati in pueritia jam ex crebrioribus & diuturnis acribus defluxionibus contractæ. In quibusvis enim fere morbis solenne est, ut partes ex prægresso morbo debilitatæ, præ reliquis graviter afficiantur, ob decubitum humorum promptius ibi contingentem.

C A P U T IX.

De Febre Purpurata rubra & alba miliari.

THESES PATHOLOGICÆ.

§. I.

*Purpura
descriptio.*

Febbris purpurata est catarrhali æmula, exanthematica, qua motu systematis tam vasculosi, quam nervosi intensiori, materia lymphatica corrupta, specificæ indolis, ex interioribus, maxime nervosis partibus, ad summam cutem, ceu conveniens emunctorium, sub forma pustularum minimarum miliarium, asperarum, rubrarum vel albarum, salutariter protruditur.

§. II.

*Materia
exanthema-
tum
differt.*

Jam omnis quidem materia exanthematica in eo convenit, quod acrimonia sua nervos male afficiat ac in æstuosum intensiorem motum universum genus vasorum & sensilium partium excitulet, eoque tandem exterminetur. Attamen sicuti acrimonia caustica in vegetabilium & mineralium venenis peculiarem obtinet indolem, & ob id peculiaris cuivis speciei propria suscitatur pathemata: ita etiam singularem & specificam cuivis exanthematicæ materiæ esse naturam, non tam à priori, quam potius à posteriori, effectibus & phænomenis obviis, innotescit. Scilicet in petechiis, variolis, morbillis, febre urticata, scarlatina, rossaliis, rubeolis, maculis scorbuticis, scabie, herpete, phlyctænis, epinyctidibus, gutta rosacea, impetigine & sudaminibus, subest semper acris quædam materia, quæ modo cum, modo sine febre, per cutis emunctorium proscribitur, sed unumquodque ex his exanthema peculiaribus incedit symptomatibus, de quibus singulis suo loco seorsim.

§. III.

*Quibus
purpura ab
aliis differat.*

Nunc quomodo ab aliis exanthematicis morbis purpuraceus differat, exponendum duntaxat. Hi autem ipsius sunt characteres. Efflorescunt pustulæ minimæ semen milii amplitudine æquantes, numerosissimæ, cum corrugatione, aspritudine & ariditate cutis & spargunt foetorem peculiarem planie. Nullum aliud exanthema tam instabile, crebro ac celeriter retrocedens, iterumque comparens, ac purpuraceum: nec ullum etiam, tam crebro intercurrente mox pruritu & punctura, stipatum. Alia exanthemata omnibus æque regionibus incumbunt, & nobiliorem æque ac sequiorem sexum infestant, purpura autem in certis tantum locis familiaris & quasi endemia, ac præterea foeminas magis quam viros, maximeque puerperas, corripit. Alia magis epidemica sunt, contagiosa & sequuntur constitutionem æris, sed purpura magis ex vitio viscerum & succorum quam æris aboritur, nec epidemica est, nec adeo contagiosa.

§. IV.

Ipsa dein purpura inter se differt & definite à medicis in rubram & albam dispescitur. Utraque magis, vel minus acuta, benigna, vel maligna. Rubra ob pustulas rubicundas ita dicitur, ac ut plurimum minus periculosa, febris expers & chronica est, ut non modo diutius corpori inhærescat, sed & sæpius statis anni temporibus redeat, de qua inferius sigillatim. Interdum tamen etiam febre stipatur & acutæ indolis esse observatur. Alba vero magis acuta est, nec facile sine febre occurrit, ideoque plus alit periculi. Hæc etiam non tam facile redit ac rubra, puerperasque magis & foeminas juniores, teneriores serofas corripit, quam rubra, quæ adultioribus potius, succis & sanguine fartis ipsisque viris familiarior est.

§. V.

Nonnunquam purpura idiopathica est, nonnunquam symptomatrica, & aliis, maxime continuis febribus, ad exitum vergentibus, supervenit. Admodum enim familiare est, quod purpura rubra, vel alba, vel utraque simul, variolis, morbillis, synochis putridis, ardentibus quoque & petechizantibus aliisque epidemicis, in declinatione accedat, novam febrem accendat, & ægrum, fractis & priori morbo viribus, jugulet. Id quod potissimum evenire solet in iis, qui intemperantius vixerunt, largiori & quotidiano potui indulserunt, veneris nimio exercitio vires consumserunt, & peregrinam succis induxerunt diathesin; nec non iis, in quibus sub morbi decursu alvus diutius clausa, aut inconsulta medicatione refrigerantia & julapia nimis liberaliter sunt usurpata. Quandoque etiam in acutis febribus, maximeque variolis & morbillis, primis statim diebus, cum cutis aspredine apparet purpuracei quippiam, rarissime pariter cum felici morbi eventu. Neque minus catarrhalibus febribus, cum tussi & spirandi angustia, subinde in infantibus sese associat purpura, vomitu, vel etiam alvi fluxu stipata, quam, si inclinatur morbus, pedum & quandoque abdominis intumescencia, cum, vel sine aridura superiorum partium, excipit, donec tandem sudoribus, vel spontaneis, vel arte prolectis, ex toto cedat.

§. VI.

Idiopathica autem purpura his potissimum incedit symptomatibus. Præcedit levis horripilatio, quam subsequitur corporis exæstuatio, cum ingenti languore viriumque interdum ad lipothymiam usque dejectione. Præcordia stringuntur, pectus angitur, adsunt alta suspiria, inquietudines, vigiliæ, vel somnus minimum laboriosus & interturbatus. Aestus compunctorius in dorso sensus percipitur, alternante frigoris, horroris & caloris intra cutem affectione, in vola manuum maxime sensili. In puerperis lochiorum fluxus retinetur & lac è mammis resorbetur ac stillare cessat. His succedit cutis asperitas & instar anserinæ corrugatio, exsurgentibus innumeris pustulis, sive albis, sive rubris, sive utrisque sibi invicem appositis, milii semen figura & exiguitate referentibus, quæ primum collum, deinde pectus & dorsum ac postea brachia & manus occupant. His in summa cute efflorescentibus, graviora antea pathemata mitigantur, pulsus durior prius, contractior & celerior, mollius, liberius & remissius undulat, animo vigor dejectus redit, arida cutis madescit, & alvus ante hac compressa tam firmiter, ut nec flatibus transitus pateret, laxatur, & non solum hæc, sed & nonnunquam stercora,

stercora, sponte protrudit. Postea vesiculæ sensim sensimque explicantur ichore foetido plenæ, urina magis saturata prodit, & fudor singularis huic exanthemati proprii foetoris erumpit, sanguinis per lochia fluxus repetit, & intra septem vel plurium adhuc dierum decursum, cum insigni extremorum pruritu, pustulæ disparent, arescunt, squamularum instar decidunt, & æger sensim vires recipiens, ad pristinam redit sanitatem.

§. VII.

Purpura materia corruptus in corpore succus.
Materia potro, quæ exanthematicum hunc morbum proxime facit, ex pravo & corrupto in corpore est succo; ita tamen, ut, quum duplex sit purpuræ genus, duplex hic etiam sit asserendus. Jam uti in macrocosmo, sic etiam in microcosmo, duplex datur liquidorum corruptio, una acido-vappida, paullo fixioris indolis, altera sulphurea foetida, indolis magis alcalinæ atque volatilis. Illa cadit in succos, qui salino & sulphureo elemento minus instructi sunt, potissimumque in pellucidum, insipidum illum gelatinosum lymphaticum humorem; hæc autem in sanguinem & succos, qui copiosa sulphurea & salina substantia scatent, inter quos quam maxime connumerandus, ille, qui sanguini admixtus, spissior tantisper variique coloris est atque saporis, serum dictus. Hunc igitur corruptum purpuræ rubræ, illum vero albæ & miliaris causam esse, censemus.

§. VIII.

alba lymphatica ad hæmorrhoides.
Lympham enim alba in purpura acore esse infectam, evincunt plura. Nimirum solennis & tantum non essentialis huic exanthemati est nimia feri secessio, per sudores effusos, urinas copiosas tenues, salivationes quandoque, quandoque dejectiones aquosas. Acidi autem is effectus, ut sanguini insinuat, partes ejus crassiores in coagulum mittat, serosis secessum facientibus. Dein omnis generis acida & refrigerantia, ipsum quin nitrum, largius sumpta nocentissima; quæ vicissim acidum obtundunt & sanguini ac lymphæ blandam spiritualescentiam conciliant, saluberrima. Foeminis porro quæ horæis fructibus, acetariis, dulcibus, farinaceis, acescentibus, sub otiosa & sedentaria vita delectantur, frequens quam maxime in puerperio febris miliaris. Ne dicam, multos illos sanguinis grumos, quos in vasis majoribus & thalamis cordis invenerunt, qui purpura alba defunctos dissecuerunt, luculenter arguere, præsto fuisse acidum coagulans.

§. IX.

rubra acore lymphatica.
In rubra purpura subesse vicissim serum acre salino-sulphureum, testatur pruritus & ardor cutis, in hac longe impensior, ac in alba. Idem ex eo patescit, quod rubrum hoc exanthema, maxime eos invadere soleat, qui sanguinis impuri copiam alunt, scorbuticis, senibus, foeminis, quæ menstrui, & viris, qui hæmorrhoidum defectu laborant, diæta falsa, vinosa, cerevisiis crassioribus & tabaci fumo delectantur, prætereaque laxiori corporis habitu præditi, vitam agunt motus expertem. Quod porro sordes acres serosæ, per cutis poros eliminandæ, ab aëre frigidiori, à potu nimis perfrigerato, corpori sudanti ingesto, aut repentino terrore, ad interiora repressæ, frequentissime talem morbum inducant exanthematicum. Quod etiam medicamenta, quæ salium spicula involvunt, item temperantia, rubram purpuram egregie protelent; calefacientia autem & volatilia, nec non æstuosum regimen, eodem modo ac in scabie aliisque cutis desœda-

tionibus, ex prava, acri & falsa humorum diathesi oriundis, doloris, ardoris & pruritus faciant augmentum.

§. X.

Omnia igitur, quæ succorum & abundantiam & impuritatem ingignunt, ad generationem purpurati mali concurrunt remotius. Evenit autem hoc in iis, qui lauto & pollucibili victu, nonnisi leves cibos, farinacea, placentas, dulcia, fermentescibilia & horæos fructus admittente, item qui potu parco, crasso & aqua quoque impura & squalida utuntur; qui in aëre degunt insalubri, minus puro, sed vappido, multisque sordidis & putridis halitibus referto atque corrupto; quo purpuram subinde generari, maligniorem fieri, epidemiam quandoque, nonnullis etiam locis magis familiarem, certisque anni temporibus, Martio imprimis atque Aprili frequentior, experientia docet. Frequens porro purpuræ genesis in iis, qui alvum gerunt strictiorem, qui perspirationem incuriosius habent; quibus criticæ suppressæ, aut consuetæ sanguinis evacuationes omissæ, quibus vicissim largius sanguis effluxit, vel subtractus, cum virium defectu, qui animo crebrius jactantur, moerori imprimis ac diurnæ solitudini indulgent, qui vigiliis & impensioribus meditationibus robur atterunt, qui demum vitam ducunt otiosam motusque expertem. Neque minus præ aliis huic morbo patent, qui laxiorem corporis habitum & temperamentum sic dictum sanguineum, vel phlegmaticum obtinent, ætate magis infantibus, quam adultis, senibus quam floridis, sexu, magis foeminis, quam viris. Ex foeminis, non tam plebeiis & minus delicatis, quam potius teneris ac nobilioribus, fluore albo ante affectis & omnium maxime puerperis.

§. XI.

His autem quod adeo infesta sit purpura, & quidem alba, plerumque maligna, ob peculiaris quasdam sit causas. Videlicet foeminarum plurimæ redundantiis in corpore alunt lymphaticos & aquosos humores, adeoque acidæ potius patent humorum vappescentiæ, quam salino-sulphureæ corruptioni, & ob id purpuram potissimum nanciscuntur albam. In gravidarum dein utero, sanguinis tam progressus, quam regressus, ob nimium eo appulsum & vasorum distensionem, valde languidus est ac tardus. Hinc subsistente ibi diutius sanguine, lymphaticus humor in vasa ipsi vehendo dicata, magna copia secedit. In quorum diverticulis quasi incarcerationis hærens, longiori mora vappescit, corrumpitur & acorem contrahit, avolantibus quæ mixturem conservant spirituosos & subtiliores particulas. Quandocunque igitur enixo foetu, uterus concidit iterum, neque squalidus lymphaticus humor cum sanguine foeculento lochiali sufficienter expurgatur, accedente ordinario tertio puerperii die, motu febrili, Germanis *das Milch-Fieber*, in vasa majora is reprimatur ipsique cordi infunditur, ex quo maligni instar fermenti per corpus diffunditur totamque sanguinis & lymphæ massam inquinans, vires dejicit, vigorem animi perfundat, anxietates, pectoris compressiones, suspiria, cordis tremores cum spiritus difficultate facit, sudores colliquativos mucidos, corruptum acorem redolentes, non nunquam plane frigidos, suscitatur, somnum arcet, donec vel brevi post, die tertio aut quarto à puerperio, interdum septimo, quandoque etiam decimo quarto demum die,

Causa prædispositiva catarrhica & subjectiva.

Cur puerperis infesta purpura alba maxime & maligna?

die, in conspectum prodeat album hoc exanthema.

§. XII.

Origo ipsius recens unde?

Sed quum enumeratae haec purpuræ causæ, præsto fuerunt jam pridem omnes; disquirendum merito: cur ante aliquot demum lustra prodierit & subinde latius serpat? Jam vero ex iis, quæ succis vitalibus materiam, temperiem & intemperiem largiuntur, nihil novimus immutatum, præter frequentissimum factum potuum calidorum, herbæ thée inprimis & fabarum coffée, usum. Experientia etiam docuit, non plebeios & inopes, qui victu simplici & potu fueto utuntur, sed honoratiores, opulentos, qui laute vivunt & potum calidum in deliciis habent, purpura potissimum infestari, & in locis ubi mos invaluit liberalius ejusmodi potum forbillandi, purpuram etiam plus regnare & propagari, quam in aliis: in hunc igitur culpam esse rejiciendam admodum credibile. Non jam dicam, fabas coffée exoticas, peregrini quippiam nostri mixtioni sanguinis minus congruum custodire, sub adustione aliquid sulphuris empyreumatici nervosis partibus minus amici suscipere, ac præterea saccharum cum decocto hoc assumtum copiosius fermentescere & cruditates mucosas, acidas, augere. Id potius minimum pro certo habendum, calidum potum sordes intestinorum & salia scorbutica acria per urinam evehenda in sanguinem agere & una cum hoc ad cutis emunctorium pellere, ubi non ut sudoris materia promte diffilari possunt, sed obhærescunt maculasque sive pustulas protrudunt; inprimis quum post ejusmodi calidum potum perspiratio non secundatur, sed concessione in frigidam auram sufflaminatur. Ut adeo ne utique mirandum sit, quod sub inconsueto alias, jam vero communi abusu frequentissime & statim post cibum assumti potus calidi, ipsa naturalis mixtio & crasis partium sanguinem constituentium multum iminueretur & nova plane ac alia ingignatur, qua in utero cum sanguine materno in foetum transfusa, ipsius purpurati morbi semina, & ad illum dispositio jam latius propagentur; uti quidem pluribus docui in dissertatione *de purpuræ genuina origine, indole & curatione*.

§. XIII.

Purpura quando periculosa.

Cæterum purpuram albam periculosiorem esse rubra jam diximus. Prognosis vero de successu & eventu hujus morbi ex dispositione corporis laborantis potissimum desumenda. Aegrius quippe sanescit magisque anceps est omnis purpura, quæ cadit in corpus impuris succis fartum. Hinc viri quibus hæmorrhoides & foeminæ, quibus menses restitant, parcius fluunt, aut plane ob ætatis rationem emanent, nec non quibus lochia suppressa, gravius semper & diutius hoc morbo decumbunt. Hinc gravidæ, quæ alvi adstrictioris & sub sedentario vitæ genere, neque medio gestationis tempore, neque ultimis mensibus sanguinem redundantem mittunt, in puerperio majorem purpuræ experiuntur vehementiam. Dein majus etiam semper discrimen in imbecillitate, sive natura, sive ex morbo, sive alia ex causa affectis, omnium vero maxime in iis, qui per crebriores animi commotiones, diurnam inprimis mœstitiā, genus nervorum reddiderunt debile & ad spasticos anomalos motus concipientes proclive. Neque minus plus metuenda, quæ sub aëris constitutione insalubri, febres malignas, perechiales passim ingignente, impetit.

§. XIV.

Signa suspecta.

Inter suspecta vero in purpura signa connume-

randa hæc. Quando exanthematibus sufficienter expulsis, pulsus præter naturam durus & auctus manet, somnus nullus, inquietudo magna & spiritus difficilis. Quando statim sub initium & per totum morbi decursum sudores effusius manant, urinæ pallidæ copiosæ redduntur, vel continuus ad mingendum stimulus, vel etiam urina crassa antea & tincta, subito limpida, tenuis & pallida prodit, nec non quando alvus cum torminibus fluxa nimis, inprimis in puerperis. Mala prælagii est, si pustulæ purpuraceæ modo comparent, modo evanescent & symptomata vehementia semper eadem infestant. Pejus adhuc, si materia relapsa interioribus firmitus inhærescit omnique expulsionis obsistit, hincque pectoris cum suspiriis oppressio intenditur, fauces stringuntur, virium prostratio increfcit & præcordiorum anxietas cum inquietudine augetur. Funesta demum indicia, quum hærente intus deleteria materia, interiora ardent & extrema frigent ac rigent simulque copioso frigido sudore perfunduntur; aut vicissim quando extrema æstuant & in abdomine frigoris sensus percipitur notabilis. Hæc enim ubi præsto sunt, æger ut plurimum lipothymia occumbit lethali, ob inflammationem & sphacelationem, quæ ventriculum, intestina, cerebrum, vel in puerperis ipsum uterum, affecit.

PRÆSERVATIO ET CURATIO.

§. I.

Nullus quidem morbus tam ægre penitus extirpatur ac purpura, quæ plerumque relinquit fermentum ipsam denuo inducens: sed hoc inprimis proprium chronicæ illi purpuræ, quæ quo pacto sit arcenda, inferius dicetur. Jam de febre miliari. Quæ cum potissimum foeminis, & quidem puerperis, sit solennis, qua ratione hæ ab ipsius incurfu defendendæ, tradendum. Sub graviditate igitur exacta victus ratio servanda, corpus motu moderate exercendum, venter à refrigeratione defendendus, sanguinis copia venæ sectione ter, vel quater, in superioribus instituta, minuenda & alvina excretio subinde secundanda per mannata, rhabarbarina & tartarea. Instante dein partu, non per præmaturum nisum vires convellendæ, nec pellentibus humores exagitandi; post partum vero necessarium, quo impurus sanguis expurgetur utero & succi à cacoehymia contracta liberentur. Sedato hinc secundo die impetu, omnis generis excretiones modeste promovendæ & alternis diebus pilulæ balsamicæ roborantes, vel solæ, vel, si citatior adhuc pulsus, cum pulvere temperante nitroso, deglutiendæ. Tum quoque conducit cum jusculis tenuioribus dare ea, quæ spasmos leniunt, sanguinem grumosum dissolvunt simulque perspirationem servant, sperma scilicet ceti, oleum amygdalarum dulcium, infusum theiforme ex floribus sambuci, chamomillæ & summitatibus millefolii, pulveres diaphoreticos, nec non mixturam ex aquis analeptis & diapnoicis, cum aceto destillato, lapidibus cancrorum & syrupo acetositis citri.

§. II.

Ipsa vero purpuræ curatio ad tria hæc redit momenta: I. ut vitiosa, quæ subest, acris, nervosis partibus infesta materia corrigatur ac temperetur; II. ut spasticæ fibrarum nervearum inde productæ stricturæ laxentur; & III. præparata materia placide per cutis emunctorium evacuetur, nec retrocedat. Ego quidem has medendi indi-

Mala

& fune

Methodus præservandi diu

Curatio indicat

indicationes perfecti hifce ex multis probatissimis auxiliis. Ad acredinem diluendam & nervosas male affectas partes mulcendas, apprime utilia decocta humectantia, ex rasura cornu cervi, radice scorzonerae cum hordeo & liquiritia, gelatina cornu cervi, nec non serum lactis, nostra methodo paratum dulce. Idem faciunt & praeterea expulsiorem juvant emulsiões, ex aquis diapnoicis & antispasmodicis, cum semine napi, cardui Mariae & papaveris albi. Inprimis etiam duplici hoc nomine conducunt pulveres temperati bezoardici, cujus generis est *Ludovici* atque *Sennerti*, nec non noster. Quibus ad aestum temperandum & spasmos componendos subinde succum citri instillare, pulverem praecipitantem nitrosum, vel tantillum croci, aut castorei, pro circumstantiarum ratione admiscere, vel etiam horum usum interdum liquoris anodynii mineralis dosi interpolare, sicque in vehiculo appropriato ex aquis destillatis propinare soleo. Et si purpuræ eruptio justo impeditior, vel retrocessio metuenda, aut jam facta, instar omnium est idem anodynus liquor, remixtus cum tertia parte spiritus bezoardici, ad mentem *Buffii* parati & à me in *observationibus physico-chymicis Lib. II. obs. XXVIII. pag. 238.* descripti.

CAUTELÆ ET OBSERVATIONES CLINICÆ.

§. I.

Purpura, morbus omnium delicatissimus, nihil plane fert excessivum, in regimine æque ac medicatione. In regimine quidem æger semper in moderato & æquali calore, tam lecti, quam hypocaufti, detineatur, eo quod nimis æstuosum vires frangit ac pruritus ardoremque cum anxietatibus auget, frigidius exanthematum eruptionem impedit, subsequente languore & angore; & inæquale expulsiorem retardat, vel minimum instabilem facit purpuram. Vitetur etiam stragulorum & indusiorum quantum fieri potest mutatio, ac potius jam trita, sicca & fumigata injiciantur.

§. II.

Quam graviter dein calida & alexipharmaca medicamenta noceant, docuit sane uberius experientia, qua constat, eadem cum æstuoso regimine, in causa esse, quod ingruente primum novo hoc morbo, omnes fere perierint, quum jam sub temperata methodo plurimi evadant. Quin liberalior tantum infusorum & decoctorum calidorum potus, sudorem nimium movendo & serum plus justo exhauriendo, officit. Ubi vero motus est retrocessionis, vel hæc jam facta, tum potus calidus præsentis efficaciam, & moderata quoque expellentia locum utique inveniunt.

§. III.

Vicissim refrigerantia & intestinum motum nimis sedantia intus detinent materiam, & anxietates ob id ac languores cum periculo intendunt. Ipsum nitrum circumspicte usurpandum. In alba enim purpura & ubi malignitatis indicia, refrigerationes externæ cum æstu subinde intercurrente, præsto sunt, ab eo plane abstinendum. In rubra vero purpura, sive alba cum rubra conjuncta, ubi internus adest æstus, cum siti & pulsuum magnitudine, medicamenta diaphoretica leniter nitrata omnino accommodata.

§. IV.

Cerevisiæ etiam potum nullus minus fert morbus quam purpura, eo quod multas impuras, crassas & heterogeneas partes in sanguinem & lympham invehit. Hinc ego quidem semper purpura laborantibus auctor sum, ut ab omni cerevisiarum genere abstineant & bibant decoctum ex radice scorzonerae, salsaparillæ & cichorii, cum rasura cornu cervi, hordeo mundo & pauxillo seminis foeniculi, vel anisi stellati.

§. V.

Alvus in purpura nec nimis laxa, nec nimis stricta esse debet. Si enim diutius retinetur, morbus inde nanciscitur pabulum & longius extrahitur; si vero purgantibus, quin laxantibus omni virulentia destitutis, intempestive ducitur, materia per poros eliminanda revocatur & præcordiorum angustias, tormina & ardores in ventre, nauseam & stomachi subversionem inducit. Hinc in purpura tam idiopathica, quam quæ aliis exanthematicis accedit, tanto magis maligna, alvum nec paullo ante, nec paullo post eruptionem irritare licet, sed quando vis morbi deserbuit & purpura siccescere incipit. Neque tum vix aliud expedit remedium, quam clyster emolliens, injiciendus sub symptomatum remissione, plerumque matutino tempore major, quam vespertino & nocturno est.

§. VI.

Sanguinis missio maxima cum prudentia instituenda; nam in purpura alba & maligna, quam summa virium prostratio, cum largis sudoribus & debilitate ac frequentia pulsus, arguit, plane non est admittenda: contra ea insigniter prodest, quin necessaria est puerperis, quando lochiis retentis, symptomata purpuram comitantia ejus incursum nunciant; cito tamen administranda. Sic enim sæpius observavi, summas præcordiorum anxietates, animi defectiones, laboriosam & anxiam spirationem feliciter fuisse sublata & mox summo cum levamine in universo corpore purpuram propripuisse; id quod pluribus docui & adstruxi in dissertatione *de venæ sectionis prudenti administratione pag. 18. seqq.*

§. VII.

Quum porto vires plerumque hoc in morbo admodum sint prostratæ & ad lipothymias propensio, summo omnino cavendum est studio, ne æger ex lecto surgat, aut diutius erectus sedeat, quia facile sic obrepit animi defectio, & motu humorum ad interiora converso, exanthemata cum discrimine disparent. Subinde potius vires refocillandæ per mixturas analepticas, ex aqua mellissæ citratæ, vel Turcicæ, liliorum convallium, ceraforum nigrorum, florum acaciæ, rubi idæi, cum spiritu nitri dulci, matre perlarum & syrupo acetositis citri. Quibus pro circumstantiarum ratione lenia diaphoretica, uti cornu cervi philosophice præparatum & antimonium diaphoreticum; vel etiam si sudores colliquativi effusius manant, succus citri & species de hyacintho, cum fructu adjici possunt.

§. VIII.

Vesicatoriorum utilitatem in purpura jam dilaudavit *Hamilton de febre miliari*, eademque scapulis apponere suadet. Recte omnino. Subtrahunt enim humorem serosum impurum & fibras delassatas nerveas ad contractionem exstimulant, ut materiam morbificam promte excutiant. Hinc sub tarda eruptione & motu humorum ad interiora ipsumque caput converso, sæpius cum fructu præcepi, ut suris apponeretur vesicatorium,

rium, cujufmodi concinnare folco ex emplastro de meliloto, pulvere cantharidum, cum pauxillo balsami Peruviani.

ENARRATIONES MORBORUM.

OBSERVATIO I.

*Febris pur-
puræ in
perpetua
funesta.*

Fœminam novi viginti aliquot annorum, vegetam & alacrem, sanguineo-cholericam, quæ virgo levi ex causa hysterica experta fuerat pathemata, sub axillis quoque & pedibus largiter sudarat, bene cæterum appetens & corpus domestica negotia obeundo probe exercens. Hæc utero gerens ex hilaris præter morem fiebat tristis, sudores sueti siccescebant, à medio gestationis tempore perpetuo largus lactis in mammis erat proventus & quinto mense circa hypochondria exquisitus oboriebatur dolor ardens, quasi ex prunis candentibus. Post partum admodum laboriosum ingenti horrore febrili corripiebatur per totum corpus, quem excipiebat capitis dolor & inquietudo. Quinto die lochia sistebantur & accedebant præcordiorum anxietates, cum horripilatione febrili, intercurrente æstu, ardore in ventre & tandem deliriis. Datis diaphoreticis sub temperate calido regimine, in cordis scrobiculo collo & dorso, nec non brachiis, purpura & rubra & alba efflorescebat quidem; sed quum gravi commoveretur iracundia, cutis iterum fiebat arida & sicca, delirium in furorem plane transibat, lac post partum etiam copiosissimum, retinebatur, in ventre oboriebantur borborygmi, spiritus intercludebatur ac demum decedebat.

Epicrisis.

I. Adduxit utique hunc morbum sanguinis & feri impuri abundantia, ob vitæ genus ex mobili in sedentarium mutatum, sudores suetos suppressos & venæ sectionem sub graviditate plane omisfam, contracta. Nunquam etiam boni ominis in gravidis, si de ardore & æstu in interioribus abdominis conqueruntur. Signum enim præbet, hisce in partibus congestionis atque infarctus, qui successive ipsum sanguinem magis corrumpit, à quo natura post partum febrili motu se liberare intendit.

II. Nihil certe in morbis acutis deterius gravi animi affectu, inprimis iracundia vehementi. Si enim in sanis corporibus magna horum affectuum nocendi facultas, quidni in ægrotis? Heic quidem inde sanguinis & humorum motus ad caput conversus, phrenitidem cum morte attulit.

OBSERVATIO II.

*Post pur-
puram ani-
mi turba-
tio, Caroli-
nis sanata.*

Tenera, sensibilis & ad iram proclivis fœmina, triginta annorum, sterile per decem annos duxerat matrimonium, sana tamen & vegeta. Quum vero maritus inopinata morte extinguere- tur tempore menstrui fluxus, substitit hic, & misera tota luctui sese dedit, inquieta fuit, nec dormivit, nec appetiit. Paulo post horripilationem cum æstu persensit, nec non tremulam manuum & colli agitationem cum cynico spasmo oris, anxietatibus subinde affecta & lipothymiis. Datis antispasmodicis & antihysterics, conquieverunt tantisper hæc symptomata; subinde tamen, licet mitius, repetentia, donec die tandem tertio, cum horripilationis & tractionis in cute sensu, in collo, dorso & universo corpore purpura rubra cum alba prodiret, alvo per aliquot dies ante & sub

eruptione clausa. Interim spastica priora symptomata remiserunt, somnus vero non rediit, prætereaque perpetuus ad urinam fuit stimulus, quæ tamen parce stillavit. Sed quum inopinato percelleretur terrore, disparuerunt illico exanthemata omnia, sequuta ingens præcordiorum anxietas, redierunt pathemata hysterica spastico-convulsiva ac mentem plane turbare visa sunt. Hinc sanguis è vena missus floridus & datus postea liquor anodynus mineralis cum spiritu bezoardico, ternis singulis horis ex infuso theiformi. Inde tertio die post comparuit iterum purpura, rationem tamen non servavit, sed post corporis refrigerationem & injectum clysterem denuo maxima ex parte recessit. Successit hoc facto mentis confusio, ut sine causa subinde vel in cachinnos, vel in lacrymas ægra solveretur, multaque absurda loqueretur. Corpore autem melius habuit, cibos sumsit, somno non penitus caruit, & sensim eo pervenit, ut domestica iterum obire potuerit negotia. Elapso inter hæc semestri spatio meo ex consilio usa est Carolinis thermis, quibus purpura per omnem corporis ambitum expulsa, qua post septimum diem squamarum instar secedente, mens restituta, corpus & vires ex voto per DEI gratiam confirmatæ.

Epicrisis.

Purpuram in sanguineo corpore ex sanguine menstruo repente suppresso generari posse, ex hac historia patet utique. Excrementitia autem purpuræ materia, intus retenta, nervosis quam maxime infesta est partibus, easdemque spasmis & convulsivis plane motibus afficit. Quin diutius delitescens in interioribus, ipsam mentem turbare potest, hanc præcul dubio ob causam, quia nervosis cerebri membranis firmitus insidet easdemque exagitat. Carolinarum igitur præstans maxime est virtus ad depurandos corporis succos, recrementitiam materiam solidis & fluidis partibus intime insinuatam separandam & per cutis poros expellendam.

OBSERVATIO III.

Sanguineus ac robustus juvenis corripiebatur horrore, frigore, æstu postea & ingenti præcordiorum anxietate. Secabatur secundo statim die vena, quarto & quinto totum corpus purpura alba confertim occupabat. Æger in conclavi calido detentus, de molesta gravitate & tractione in sinistro latere conquerebatur, ad mingendum quidem stimulabatur, sed paucam reddebat cum stranguria urinam, alvo simul per sex dies clausa. Dabatur ipsi loco potus decoctum ex avena, radice scorzonerae, cum semine papaveris albi & cornu cervi usto, ac præterea quater quotidie doses hujus pulveris: Recipe cornu cervi sine igne parati, oculorum cancri, antimonii diaphoretici ana drachmas duas, cinnabaris antimonii drachmam cum dimidia. M. Inde melius habuit, urinam etiam facilius misit & exanthemata uberius prodierunt in universo corpore. Nono die vespere nares sanguinem stillarunt & alvus sponte soluta. Nihilo minus per totum morbum somno fere caruit, hinc data hæc potio: recipe aquæ florum sambuci, acaciæ ana uncias duas, antimonii diaphoretici, oculorum cancri, ana drachmam dimidiam, syrupi papaveris albi drachmas duas, mixturæ simplicis drachmam. M. Qua continuato simul pulverum bezoardicorum usu, undecimo die ex voto convaluit.

*Purpura
alba id
pathice
nata.*

Epicri-

Epicrisis.

Purpura alba admodum quidem periculosa, si aliis acutis & exanthematicis morbis accedit, si vero idiopathica, cum febre recte prodit & ordinatum servat typum, non adeo est pertimescenda, modo recte temperato regimine & temperatis diaphoreticis excipiat. Hec quidem sanguinis copia multum fecit ad generationem morbi, ideoque venæ sectio mature administrata commodam locavit operam, quæ in cacochymicis & symptomatica purpura, plus ut plurimum damni, quam emolumenti affert.

OBSERVATIO IV.

Purpura
post alvi
laxationem
feliciter
soluta.

Tertio post partum laboriosum die, foemina succulenta sanguineo-cholerica, viginti & aliquot annorum, conquesta est de capitis, dorsi & totius corticis corporis dolore, *als wenn ihr die Haut sehr weh thäte*, quasi cutis doleret, nec non de spastico stupefactivo in manibus sensu & scintillis igneis oculis obversantibus. Accesserunt dein anxietates præcordiorum, agrypnia, ardor febrilis, virium prostratio, sitis, oculorum rubor & squalor. Datis lenioribus diaphoreticis cum regimine temperate calido, die quarto erupit purpura, quinto & sexto die omnem corporis ambitum occupans, interspersa in pectore, manibus & abdomine rubræ alba: à sexto die alvus fuit adstricta & lochiorum fluxus ad nonum usque substitit. Hinc ad alvum solvendam & lochia revocanda data dosis pilularum Becherianarum, quæ lenem fecit laxationem, & data altera dosi, lochiorum fluxus rediit cum magno foetore, sequuti sudores largissimi, acidi & foetentes ad diem asque undecimum, urina quoque secessit graveolens. His excretionibus solutus morbus, vires successive redierunt cum somno & ægra sanitatem recepit.

Epicrisis.

Omissa sub graviditate sanguinis missio in sanguineo hoc corpore feri & sanguinis impuri genuit copiam, ex qua purpura. Quia vero à lochiorum itemque alvi suppressione succorum impuritas aucta, optimo utique consilio, pilulæ Becherianæ oblatae, quippe quæ primo statim die in puerperio datæ materiam & causam febris ac purpuræ tempestive præscindere solent. Ut adeo pateat: temperata laxantia in purpura non penitus esse reformidanda.

OBSERVATIO V.

Post erysipelas purpuræ ex amarum diarum ordie.

Foemina tres supra triginta annos nata filiolum edidit sanum ac vegetum, & ipsa quoque per tres hebdomades optime habuit. Post iracundiam vero & terrorem dextram mammam, sub alvo à triduo adstricta, occupavit erysipelas, quod tamen pulvere ex farina fabarum, cerussa & floribus chamomillæ confecto discussum. Tertio die ingens accessit horror ac frigus, subsequente acri æstu per totam noctem durante alvus dura fuit ac tensa, somnus parvus & nullus. Durant hæc per tres dies, quarto autem erupit purpura, quæ postquam per triduum molesto ardore & dolore pungitivo summam cutem divexasset, decidit, æstus cum pulsus celeritate viriumque dejectione remisit & ægra tandem & morbum & puerperium feliciter superavit. Nihil autem aliud usurpatum, quam leniora & fixiora

Frid. Hoffmanni Oper. Tom. II.

diaphoretica cum humectantibus, clysteres emollientes ex decocto cremoris avenæ cum chamomilla vulgari, addito oleo amygdalarum dulcium & sale communi, & remittente morbo ac febre, subiectus usus pilularum nostrarum balsamicarum.

Epicrisis.

Puerperæ hanc etiam ob causam tam frequenter in exanthematicas, erysipelaceas & purpuratas febres incidunt, quia primas vias à sordibus graviditatis tempore contractis non convenienti pharmaco expurgarunt. Quando enim prima regio corrupta ac impura materia repleta, vel levis animi affectus, ut ira, terror, vel improvida corporis refrigeratio, illam commovendo & sanguini invehendo, febrem suscitatur exanthematicam. In nostra erysipelas primum productum, eodemque repulso, de novo febris accensa, subsequente exanthemate purpureo.

OBSERVATIO VI.

Foemina triginta aliquot annorum, foecunda jam plurium liberorum mater, semper fere in puerperio laborarat purpura, feliciter tamen eandem superarat. Quum vero septima vice expectatione citius partus ei, ommissa ultima venæ sectione, obtigisset, die quinto post experta est horrorem cum subsequente æstu, lochia parcius iusto fluentia substituerunt plane, anxietates ipsam infestant, somnus defuit, caput doluit & universum corpus languit. Data quidem temperata diaphoretica cum temperantibus & die quarto post sparsim effloruit, imprimis in cordis scrobiculo, purpuraceum exanthema, symptomata autem discedere noluerunt, sed potius spasmi in artubus & abdomine accesserunt, purpura disparuit iterum, anxietates fuerunt summæ, ægra corpus jactitavit, delirare coepit & animo subinde linqui, ut omnia jam conclamata esse viderentur. Hinc vena incisa in brachio & quatuor circiter sanguinis unciae subtractæ. Quo facto, protinus præcordiorum angor remisit, animi defectio cessavit, ægra ad se rediit, corpus totum calore & madore perfusum ac paullo post erupit copiosissima purpura, quæ debito regimine & congrua medicatione ex voto persanata.

Puerpera
purpurata
venæ sectione
servata.

Epicrisis.

Fundatum quidem in experientia est, non tentandam esse sanguinis missionem, ubi purpuræ eruptio instat, aut modo facta; dantur tamen casus, ubi summopere necessarium, ut hoc etiam tempore sanguis mittatur. Nonnunquam enim, lochiis resistentibus, aut parcius iusto fluentibus, sanguis redundans, ob spasmos in abdomine, cum impetu urgetur & congeritur ad cor ac cerebrum, ibique atrocia & lethifera suscitatur symptomata, quæ perperam vulgo retrocessionem materiæ exanthematicæ tribuuntur. Hinc si per venæ sectionem sanguis superfluous subtrahitur, cessant illico pathemata & liberiore ac æquabili facto circuitu, eruptio expedite succedit summo cum levamine.

OBSERVATIO VII.

Purpurata febris, novus & incognitus veteribus morbus post quam circa annum Æ. C. MD. LII. Lipsiæ primum coepit, successive adeo virescens & longe lateque processit, ut in plurimis,

Judicium
& consilium
de
preservatione
& cura pur-

puræ puer-
perarum.

Germaniæ minimum locis, jam notus sit atque solennis. Quo vero penetravit, haud exiguum primum edidit stragem multumque negotii successit medicis, priusquam ipsa edocerentur experientia, cujus esset indolis, quæ ferret, quæ non, in medicatione æque ac regimine. Hinc sæpius tam in quam extra Germaniam, medici meum exquisiverunt iudicium atque consilium, qualis sit incognitus hic morbus & quo pacto eidem feliciter occurrendum? Quum igitur adhuc latius quotidie serpat, non infructuosum erit, heic inferere ea, quæ, quum anno MDCC XXIII. Francofurti ad Moenum primum compareret ad me à medicis perscripta, una cum iis, quæ respondi. Ita autem habebat missa mihi relatio historica: *Infestavit ab aliquo tempore puerperas nostra hac in urbe novus quidam morbus, hunc potissimum in modum incedens atque decurrens. Partum enixæ, secundo vel tertio puerperii die corripuntur horrore cum subsequente calore, conqueruntur de summa pectoris oppressione & crebrioribus suspiriis, lochiis ut plurimum restitantes. Interjectis aliquot diebus, erumpunt pustulæ miliares, imprimis circa cordis regionem conspicuæ, excipiunt deliria & nervorum subsultus, & plurimæ ex agris occumbunt, aliæ circa quintum, plures nono morbi die. Licet autem morbo huic omnibus viribus sit occursum, efficacissimis alexipharmacis, imperata quiete, regimine calido, vesicatoriorum applicatione & cucurbitulis siccis; irrita tamen fuerunt omnia & tritum obtinuit adagium: interdum docta plus valet arte malum. Hinc quæritur: qualis sit hic morbus; & qua methodo quibusque medicamentis sit expugnandus?*

JUDICIUM CUM CONSILIO.

Perscriptam morbi ignoti historiam curate & perlegi & expendi. Est autem is febris maligna miliaris, quæ nostris in oris, imprimis Misniæ tractu, à plurimis annis admodum frequens & puerperis sæpius funesta fuit. Ante sexaginta circiter annos nostris pariter incognitus fuit hic morbus, primum Lipsiæ observatus, ideoque *αἰματική* febris purpuratæ Lipsiensis nomen obtinuit. Jam longius processit ac vires sumsit, ut non modo puerperæ, sed & viri, imprimis tamen foeminae, eodem crebrius decumbant, modo acute & brevius, modo longius, per tres, quin sex quandoque menses. Hinc in chronicam & acutam purpuram dispescitur. Illa quidem admodum molesta, sed non periculosa, nec febre stipata; hæc autem semper febrem habet comitem, nec periculo caret. Periculum tamen in hac eo majus est, quo magis corpus quod corripit ex prægressa tempestatum diuturna insalubri constitutione, pravo victu & vivendi genere, nec non aliis causis vel debile est, vel impuris succis repletum. Et chronica illa etiam vehementius & diutius insistit, pro corporis, in quod cadit, dispositione. Dein purpura, vel rubra est, vel alba. Illa non tam malignæ & deleteriæ indolis, quam hæc, quæ, si, ut sæpius evenit, aliis acutis exanthematicis febribus in fine accedit, mortem ut plurimum infert.

Causa hujus tam fontici morbi maxima ex parte corruptæ, vappescenti & corrosivæ lymphæ tribuenda videtur. Quando enim lymphæ in diverticulis & tubulis glandulosis stagnat & diutius subsistit, corrumpitur & acrem corrosivam indolem induit. Quæ postmodum succis & san-

guini insinuata & cum hoc ad partes nervosas delata, truculenta illa in purpura obvia pathemata inducit, anxietates præcordiorum, cardialgias, angores, inquietudines, dolores & tractiones in artubus, languores, respirationem difficilem, oppressiones pectoris, horrores, lipothymias, pruritus aliaque. Omnia tamen hæc remittunt symptomata, si beneficio naturæ materia acris ad corporis perficiem propellitur. Singulare autem habet hoc exanthema illud, quod admodum sit variabile, mox compareat, mox evanescat, & hinc symptomata jam leniora, jam graviora inferat.

Chronicam purpuram observavi sæpius in foeminis, quæ antea fluorem album expertæ hunc subito siccarunt; disparente iterum, hoc repente, purpura. Dein notavi, foeminas, quibus post quinquagesimum annum menses emanferunt, purpuram crebrius incurrisse. Frequens quoque idem hic morbus omnibus, qui vitam colunt sedentariam, animi affectibus, ira præsertim ac terrore jactantur, lacticiiniis, dulcibus & placentis delectantur, nec legitimum experiuntur alvi beneficium. In acutis febribus, variolis & morbillis si alvus justo diutius adstricta, vel diarrhoea contingens subito sistitur, purpura subsequi solet, ob retentas acres, fallas, sulphureas sordes. Maxime omnium vero frequens & anceps est hic morbus in puerperis, eo quod sub graviditate, ob retentos menses, sanguis nimius fit & impurus, tanto certius, si accedit inordinatum vitæ genus, vita sedentaria, animi angor & somnus nimius. Impetere solet purpura vel cum, vel paullo post febrem lacteam, quæ subsistentem passim corruptam lympham è latibulis excutit & in sanguinem agit. Quod autem purpura jam frequentior sit, quam antea, id perverso potissimum abusu potuum calidorum, imprimis decocti Coffee, tribuendum. Quamvis enim potus hic, si alvum simul laxat, non facile nocet; certum tamen, quod, si liberalius sub alvo clausa ingurgitatur, multas recrementitias ex intestinis in sanguinem pellat sordes, & sudori movendo aptus sit, cujus tamen successus post eundem incuriosius habetur, ut succi hinc non possint non fordescere.

Ad arcendum porro hunc morbum nonnulla ante, non nulla post partum sunt tenenda. Sub graviditate sanguis quantum fieri potest ab impuritate vindicandus. Hunc in finem in sanguineis, quæ bene comedunt & minus corpus exercent, bis vel ter, quarto, sexto & in medio noni mensis, vena pertundenda. Alvus semper in officio retinenda, cujus si obliviscitur, admonenda alimentis, vel pilularum balsamicarum, Becherianarum, Stahlianarum, aut nostrarum usu, nec non potione ex manna cum rhabarbaro & cremore tartari. Perspirationis quoque saluberrimæ successus secundandus per corporis motum, diluentia, juscula, potum tenuem, vitando dulcia, acida, fructus horæos & omnia quæ spissum & viscidum sanguinem ingignunt. Ventriculus, præsertim in coena, non nimia ciborum copia onerandus, somnus longior arcendus & animus in tranquillitate servandus. Ex medicamentis ea profunt, quæ ebullitionem sanguinis componunt, leniterque cuticularem excretionem promovent, diaphoretica nempe fixa cum temperantibus & nitro. Post partum è re est, ut sedata sanguinis exæstuatione & pulsus vehementia, secundo post die, dosis pilularum supra dictarum assumatur, quæ non modo intestina,

sed

sed & uterum expurgant, simulque lochiale fluxum promouent, eaque propter altero iterum die easdem deglutire expedit, imprimis si lochiorum fluxus tardus nimis, vel insufficiens. Tercio demum die si febris lactea ingruit, necessarium est, quo bis quotidie dimidia drachma pulveris mei bezoardici cum præcipitante remixti, fumatur.

Quando autem purpura adest, in curatione rite adornanda, ante omnia in lochia inquirendum, an recte & sufficienter secesserint? Quod si hoc non factum, post pediluvium, vena in pede secanda. Tum vitandus omnis calor, tam in regimine, quam medicatione; vitanda vero etiam refrigeratio & refrigerantia remedia, ipsoque nitro caute utendum, ac non nisi ubi sanguis aestuat & pulsus celer est. Alvus quoque nec nimis sit adstricta, nec intempestive, vel acrioribus irritetur. Inter medicamenta nulla magis proficua deprehendi, quam pulverem meum bezoardicum, præcipitantem & liquorem anodynum mineralem, una cum pulvere castorino cinnabarino. Si pectus cum angore opprimitur, soleo liquorem anodynum, tribus partibus, cum una parte spiritus bezoardici Bussii & dimidia parte essentiae castorei miscere, & alternatim propinare hunc pulverem: recipe pulveris Marchionis drachmam, cinnabaris nativæ præparatæ scrupulum, pulveris castorei grana X. M. f. pulvis, dividatur in doses IV. Loco potus ordinarii præbere suadeo decoctum ex rasuræ cornu cervi, radice scorzonerae, sarsaparillæ, ana unciiis binis, decoctis in quatuor aquæ mensuris. Infusum théæ autem liberalius bibere non conducibile, sed sufficit aliquot tantum patellas interdum forbillare. Quod si demum alvus nimis ficca, enemate domestico, ex floribus chamomillæ, sale communi & nitro cum decocto avenaceo, subducenda.

Atque hæc sunt medicamenta & hæc est methodus, quibus ego per Dei gratiam multos purpura decumbentes feliciter sanavi. Quæ rogatus candide sic exponere volui, debui. Halæ d. X. Decembr. Anni MDCCCXXIII.

Plura exempla legi possunt in *Consult. Medic. Tom. II. Sect. IV. Cap. cxcI - cxcv.*

CAPUT X.

De Febribus Epidemicis, Exanthematicis, Catarrhalibus sive Petechizantibus.

THESES PATHOLOGICÆ.

§. I.

Febres hæc sunt lenes continuæ, cum virium prostratione, vigilia, inappetentia & quandoque cum eruptione macularum in summa cute junctæ, ortæ à feri excrementitii copia & intestina dissolutione, non sine contagio & vitæ periculo.

§. II.

Ab initio statim immutatur faciei aspectus in morbidum, & ægrotaturi tribus vel quatuor antequam lecto affiguntur diebus, conqueri solent, de spontanea lassitudine, gravativo corporis & artuum dolore, quasi ossa contusa essent & fracta, de virium languore, inappetentia, levi animi defectione, nausea cardialgica *Ubelseyen*, ca-

Frid. Hoffmanni Oper. Tom. II.

pitis dolore & somno inquieto, alvo simul adstricta. Accedit postea vesperi horripilatio & frigus, sequitur aestus, crescunt symptomata, major virium fit jactura, ut vix imbecilles & teneri erecti manere queant, capitis dolor cum vertigine & inquietudine ingravescit, in quibusdam dorsum, vel etiam latera exquisite dolent, præcordia anguntur, interna ardent, fauces arent, pulsus contractus, coler ac debilis est, urina pallida sine sedimento, & spiritus difficillime trahitur. Tum prodeunt in non nullis quarto, vel circa septimum diem, in dorso potissimum, pectore & brachiis, cum, vel sine levamine, maculæ, in aliis copiosiores, in aliis pauciores, coloris varii, vel, ut in plerisque, purpurei, vel lividi fusci, vel pallidioris rosei, modo latiores, modo minores, in plurimis instar morsus pulicum, à quibus tamen dignoscuntur, dum compressæ non relinquunt vestigium in medio rubicundum. Ob quam macularum diversitatem, febres hæc varia sortiuntur nomina, ut vel purpuratæ, vel puncticulares, vel petechiales spuria, audiant. Sub hoc morbi statu, si vigore, acerbiora sunt omnia, inquietudo maxima, corporis jactatio ejusque decubitus insuetus, mens turbata, sermo delirus, somnus nullus, sudor frigidiusculus, angustia spirandi intensior & pulsus contractus, inæqualis, celer & frequens.

§. III.

His si accedunt tendinum subsultus, sitis de- *Eventus.*fectus, borborygmi in ventre, singultus, faucium ab aphtis inflammatio, convulsiones, aut syncope, cum extremorum refrigeratione & sudore largissimo, certa sunt mortis indicia. Quando autem circa dies criticos, vel in ipsis, septimo, undecimo, vel decimo quarto, liberalius prodit tepidus sudor, per aliquot sæpe dies, licet cum virium languore manens, vel etiam alvus per aliquot dies fluit, salutis est indicium, tanto certius, quando postea pulsus mutatur, antea contractus, increbescit, durus mollescit, celeritatem tantisper ponit magisque æqualis fit, quando animus fit erectior, situs & decubitus corporis quietior, auditus difficilis, urina turbida & sedimentum ponens, quod quidem circa dies criticos certum fere fausti eventus indicium. Hoc quippe facto, successive postea somnus, appetentia & vires redeunt, quod tamen non facile ante diem accidit decimum quartum.

§. IV.

Veteribus hæc febres quotidianæ continuæ se- *Formalis ratio.*rosæ, vel etiam recentioribus catarrhales malignæ vocari solent, quia leniter procedunt ab initio & coryza, gravedo, pectoris infarctus, tussis sæpe primis diebus junguntur & vesperi per noctem exacerbationes fiunt. Formalis autem earum ratio consistit maxime in partium sanguinis, vel potius feri dissolutione, medicante motu febrili, cujus beneficio impuræ, corruptæ, heterogeneæ partes, si robur adhuc inest naturæ, nec adeo corrupta solidorum & fluidorum dispositio, evolvuntur, earumque subtilior serosa pars per largum sudorem, crassior & mucida per nares, fauces & bronchia, biliosa mucida per alvi secessum, & putrida salino-sulphurea, sub forma macularum, per tubulosam & fibrosam cutis substantiam, postea salutariter propellitur. Exanthematicam enim materiam non causam, sed potius effectum, neque etiam perpetuum hujus febris esse, ex eo patescit, quod morbus non sola efflorescentia exanthematum feliciter & perfecte solvi soleat, sed plures, eadem copiose

licet facta, pessime habeant, alii sine ea evadant & decedant quoque, nunquam vero firma salutis spes sit, nisi solennis evacuatio, vel per alvum, vel sudorem, diebus convenientibus criticis fiat. Quod autem dissolutio humorum fiat, intolerabilis & extraordinarius plane foetor fordium, quæ per alvum, sudorem & urinam copiosissime secedunt, planum facit testatumque.

§. V.

Materialis causa.

Materialis igitur harum febrium causa, utique ingens & insolita plane humorum excrementitiorum salino-sulphureorum & mucidorum corruptibilium impuritas, quæ unionem & mixturem sanguinis ingressa, eundem in intestinum dissolutorium motum deducit. Sed unde hæc primum habeat ortum, disquirendum merito. Nam licet semper, etiam secundum naturam, vitalibus succis insit impurum, per varii generis emunctoria excernendum jugiter: illa tamen impuritas, quæ hunc facit morbum, longe magis à succorum indole aliena est, quam ordinaria, & præterea ita comparata, ut sese intime cum lymphâ & sanguine uniat, eorumque crasim & mixturem ingrediatur. Interim sicuti omnis morbosa impuritas, sive cacochymia, ab ingestis intemperatis & incongruis excretionibusque, præsertim per alvum & cutim, suppressis, originem ducit; ita enim hæc corruptiva impuritas, febrium catarrhalium mali moris & exanthematicarum causa, pariter ab ingestis, maxime potu, incongruis simulque excretionibus, præsertim cuticulari, suppressis, oboritur.

§. VI.

Ex aëre.

Epidemias autem plerumque esse has febres, experientia docet, ac à præternaturali extraordinaria temporum anni tempestatumque constitutione oboriri, tali, qua multa in corpore gignuntur recrementa, eorumque per cutis poros secessione impedita, accumulantur. Quin aëris constitutionem sequuntur hæc febres epidemicæ, ac inde magis, vel minus deterioris sunt generis. Inprimis per multiplicem constat observationem, diu perseverantem aëris australis humidus, calidi, nebulosi & ventis destituti, præsertim vere & autumnus, statum, accedentibus postea frigidioribus septentrionalibus ventis, febres mali moris putridas, exanthematicas afferre. Neque minus constat, quod si æstas diutius sicior, autumnus, spirante vento boreali, prodeant affatim febres epidemicæ, acutæ, intermittentes, exanthematicæ, petechiales, purpuræ & dysentericæ, uti quidem annis clō lxxciix, clō lccc, xv, xxi. & xxix. factum fuisse novimus. Denique id etiam per experientiam certum, quod tempestatum subitæ ac vehementes vere & æstate, ex frigido in calidum, sicco in humidum & vice versa, vicissitudines, quam maxime generent febres mali moris, quemadmodum evenit elapso insaluberrimo anno, quo ea propter ubique fere plures mortuos, quam natos fuisse, comperimus. Et certe, nihil ad ingenerandos perniciosos morbos aptius, quam si tempestatem ferventem, excipit valde frigida, eo quod nimius calor motu intestino accendit sanguinem, multaque excrementa salino-sulphurea excludit, frigus autem, poros cutis stringendo, intus detinet eadem, gravissimum postea damnum certo inductura. Hinc etiam est, quod in locis, ubi interdiu æstus, noctu frigus regnat, Austria inprimis atque Pan-

nonia, ob varium hunc & insalubrem aëris statum, familiares sunt atque endemiæ exanthematicæ & petechiales malignæ febres. Inde quoque in proclivi judicare, cur in Italia, maximeque Romæ, adeo periculosum sit, post diuturnum calorem, corpus vespertino frigido humido aëri exponere.

§. VII.

Neque tamen omnes tales febres petechizantes sunt epidemiæ, id est, ex communi vitio aëris veniunt, sed quandoque etiam sine hoc oriuntur, in corporibus præsertim impuris, incongruis & pravis alimentis saginatis, nimiaque & crebriori refrigeratione affectis. Inde enim fit, quod febres hæc hyeme potissimum grassentur, & eos quam maxime corripiant, qui pravo victu ac regimine usi, ac præterea corpus intensius refrigerarunt. Vidimus id ipsa hac hyeme, qua ex civibus nostris multi, intemperantiæ in baccho ac venere indulgentes & traha diutius sub coelo rigido vecti, inciderunt in has febres & voluptatis dederunt poenas. Neque etiam ea propter effluvia ex iis, qui his exanthematicis febribus graviter decumbunt, aut mortui sunt, omnes inficiunt promiscue, sed eos tantum, qui dispositionem ad huiusmodi morbum, summam nempe succorum impuritatem gerunt, cæteris, qui ab hac immunes, à contagio etiam liberis.

§. VIII.

Cæterum quia sanguinis impuritas non in omnibus unius ejusdemque indolis; hinc varii generis subinde his in febribus prodeunt exanthematica variaque accidunt symptomata, magis vel minus periculosa. Etenim si deleteria prorsus subest impuritas, ad putredinosam dissolutionem humorum tendens, graviora sunt omnia & petechiæ magis emergunt veræ atque lethales, fusci, vel nigri coloris, de quibus infra. Quando vero non adeo corruptivæ indolis, sed mitioris salino-sulphureæ, symptomata non tam atrocia, sed ordinate magis morbus decurrit, maculæque magis sunt purpureæ & rosei coloris, ac febris ob id purpurea, vel petechialis spuria, sive petechizans, audit. Ubi serum salinum acre, recenter à perspiratione prohibita subnatum, sese adjungit, coryza, sternutatio, tussis ferina, cum defluxione salis ad fauces & epiglottidem, complicantur, eamque ob causam febris catarrhalis malignæ nomine insignitur. Quandoque etiam ob copiam partium salino-sulphurearum acrium sub ipso motu febrili dissolutorio evolutarum, maculis petechialibus sese associat easque antecedit, vel sequitur purpureum exanthema miliare, idque tam rubrum, ex pruritu, ardore, cutis asperitudine & foetore specifico acido cognoscendum, quam, quod pejus adhuc, album, cujus pustulæ miliares nonnunquam in vesiculas ampliores, sero acerrimo turgidas, explicantur. Id quod vero, si declinante morbo, undecimo, vel decimo quarto die, vel serius adhuc, cum magna anxietate, inquietudine, spirandi angustia, animi deliquio & extremorum frigore, accedit, æger ut plurimum, ob vires jam nimium fractas, succumbit.

§. IX.

Qui naturæ & corporis robustioris, plebei & vitæ rusticæ addicti, solo sæpe convenienti externo regimine, sine singulari artificio, patienter expectando tempus, melius & felicius evadunt, quam qui naturæ sunt imbecillioris, animi meticulosi, vel morore, curis aut intemperan-

Et corporis constitutione.

Unde symptomata varia.

Exitus.

tia

tia potus & ingluvie, defidia quoque, aut nimia mentis fatigatione, corpus reddiderunt morbidum & imbecille. Mali porro ominis effusæ excretiones ab initio statim & extra dies criticos, per sudorem, alvum & urinam quoque. Qui autem occumbunt, inflammatione meningum, sive phrenitide, vel faucium & œsophagi, ex aphthis, vel ipsius stomachi, pereunt. Sanguis qui his in febris extrahitur, conspicuum monstrat vitium, & vel valde fluidus & serosus, rubicundus, vel etiam nimis crassus & nigricans, comparet.

C U R A T I O.

§. I.

Felix harum febrium exanthematicarum eventus atque curatio, non tam in arte medici, quantumvis periti atque sagacis posita, sed potius à corporis naturæ bonitate ac vigore & convenienti regimine pendet. Hinc si enormis succorum impuritas, vires imbecilles, corpus laxum, spongiosum & minus perspirabile, nec selectissima remedia, nec optima medendi methodus, quicquam proficient. Contra ea quando non tota sanguinis & humorum massa adeo inquinata est, quando vigor adhuc motuum vitalium, animus etiam erectus, corpus nervosum, gracile & pori aperti, feliciter, vel levi artificio, vel sponte plane, succedunt omnia. In his enim dissolutioribus, exanthematicis, acutis & periculosis febribus quam maxime valet practicus ille Hippocrates veterumque canon: naturam esse optimam morborum medicatricem, per se doctam, quæ congrua fervet & incongrua rejiciat.

§. II.

Igitur id tantum in medicatione tenendum medico prudenti, ne motus & excretiones, quæ etiam sine artificio in salutem vergunt, turbet & pervertat, sed placide agat, ab omnibus tam fortiter commoventibus & evacuantibus, quam sedantibus & sistentibus, absteineat, & naturæ opus perite juvet. Proinde hos unice in fines medendi methodus dirigenda: I) ut plenaria dissolutio sanguinis & humorum moderate compescatur & impediatur: II) ut acrimonia salino-sulphurea humorum diluatur ac temperetur succique simul servantur fluxiles; III) ut excretiones per alvum, cutim, urinam quoque & spiritum, modeste promoveantur; ac IV) ut vires fractæ foveantur ac restaurentur.

§. III.

Ad impediendam putridam humorum resolutionem, spectatæ virtutis temperata acidula, quippe quæ putredinosum miasma, ad naturam salis alcalini sulphurei accedens, cicurant eidemque efficaciter resistunt. Hac virtute splendent ex vegetabilibus acetum vini simplex & destillatum, succus citri, limonum, aurantiorum, berberum, granatorum, ribii & confecti ex iisdem syrapi, nec non succus acetosæ & acetosellæ cum destillatis ex ipsis aquis. Ex mineralibus clyffus antimonii sulphuratus, spiritus vitrioli vulgaris & sic dictus philosophicus, spiritus salis, nitri & maxime omnium sic dicti dulcificati, quos inter ceu specificum eminet spiritus salis dulcis probe elaboratus, ex oleo vitrioli, cum sale communi & spiritu vini, per cucurbitam destillatus.

§. IV.

Dein tam ad dissolutionem corruptivam interceptiendam, quam acrimoniam acidam obtundendam, conducunt blanda diaphoretica & terrea fixiora alcalina, bolus nimirum Arinena, terra sigillata, unicornu fossile, lapides & chelæ cancerorum, mater perlarum, cornu cervi philosophice præparatum, nec non ex compositis, pulvis bezoardicus Sennerti, Ludovici, noster, Anglicanus, lapis bezoardicus & lapis de Goa. Quæ porro humectant & acrimoniam diluunt, sunt maxime pro potu usurpanda, decoctum scilicet hordei, cum scorzonera & rasura cornu cervi, nec non succo vel syrupo acetositis citri, aqua ipsa pura, vel Wildungensis, cum saccharo, cornu cervi usto & succo citri, prisana decocta cum cerasis siccis contusis, item juscula tenuia gallinarum, cum succo limonum, vel aurantiorum, decoctum avenaceum tenue, vulgo Habergrütze, nec non cerevisiæ leves diureticæ.

§. V.

Inter ea quæ excretiones secundant, & quidem per cutem, præter jam dicta bezoardica terrea, aqua scabiosæ, galegæ, cardui benedicti, scordii, florum sambuci, item mixtura simplex, acetum foliis rutæ, cardui benedicti, scordii & galegæ infusum, nec non essentia bezoardica, ex radice vincetoxici, angelicæ, pimpinellæ, dictamni, valerianæ, cortice cascarillæ, herba cardui benedicti & scordii, cum moderate spirituofo menstruo, vel melius adhuc, spiritu salis dulci, nostra methodo confecta. Alvinam vero excretionem juvant tutissime clysteres emollientes domestici, ex decocto avenaceo, oleo amygdalarum dulcium, floribus chamomillæ vulgaris, sambuci, syrupo violarum, sale communi, nitro. Eundem etiam in finem utile decoctum mannatum, circumspicte & tempore debito datum, ex mannæ uncis duabus, cremoris tartari drachma, in aqua scorzonæræ decoctis, addito syrupo violarum & oleo de cedro. Ex iis demum, quæ vires custodiunt atque reficiunt, præter modicum vini cum aliis diluentibus usum, laudem merentur aquæ rosarum, liliorum convallium, florum tilia, rubi idæi, fragorum, melissæ citratæ, cinnamomi, cydoniata, gelatina etiam cornu cervi, cum succo limonum, pomorum Chinenfium & saccharo.

§. VI.

Potissimum vero polychresta & expertæ à nobis per multos annos virtutis tria hæc commendamus medicamenta: Recipe antimonii diaphoretici, cornu cervi sine igne parati, lapidum cancerorum, matris perlarum ana drachmam, nitri depurati drachmam dimidiam. M. f. p. Hic pulvis à scrupulo uno, ad drachmam dimidiam, pro dosi sumendus, quandoque solus, quandoque cum drachma succi citri, ex decocto, vel prisana, quandoque etiam in hac mixtura: recipe aquæ cardui benedicti, florum sambuci, liliorum convallium, ceraforum nigrorum ana uncias duas, rosarum, cinnamomi sine vino, ana unciam dimidiam, spiritus nitri dulcis guttas XXX. syrapi acetositis citri unciam semis. Alterum utilissimum remedium mixturâ hæc: recipe aquæ galegæ, cardui benedicti, ceraforum nigrorum, florum acaciæ, ana uncias duas, aceti destillati unciam, lapidum cancerorum, antimonii diaphoretici ana drachmam cum dimidia, cinnabaris scrupulum, mixturæ simplicis, spiritus nitri, vel salis, dulcis, ana guttas XXX. syrapi acetositis citri drachmas sex. M. D. S.

Temperantia.

Humectantia.

Secundanda cuticularis,

Et alvinæ excretio.

Vires reficiendæ.

Remedia imprimis probata.

Mixtur, *davon vwohl umgerüttelt alle zövey Stunden ein Löffel voll zu geben.* Sumat. omni bihorio Cochlear unum bene agitata. Tertium est hæc mixtura bezoardica: recipe tincturæ bezoardicæ, superius descriptæ nostræ, vel *Michaëlis*, syrapi papaveris rhœados, liquoris nostri anodynî, ana drachmas duas. M. de qua quadraginta, vel quinquaginta guttæ pro dosi sumendæ.

CAUTELÆ ET OBSERVATIONES
CLINICÆ CUM METHODO
MEDENDI SPECIALI.

§. I.

Regimen
sit tempe-
ratum &
æquale.

Maximum periculosis hisce febribus rite medendi momentum, regimine continetur congruo. In hoc primum est, ut æger semper in æquali & temperato calore detineatur per totum morbi decursum. Sub nimio enim æstu dissolutorius in sanguine motus magis intenditur, alvus ficcatur, anxietates augentur, impuri & falsi acres humores acuuntur, vires exhauriuntur, sudor fit justo copiosior & cito nimis majorique copia, sine emolumento, ad cutem propelluntur exanthemata. Frigore autem improvide admissio, præsertim ad pedes, perspiratio facile cohibetur, maculæ & exanthemata retroaguntur, tormina in ventre & diarrhœæ cum singultu inducuntur, & criticæ evacuationes turbantur. Et ab inæquali regimine ac subita aëris calidi in frigidum, vel contra mutatione, eadem fere, quam ex frigido accidunt incommoda. Interim quia aër impurus continuo haustus inspiratione, viribus infensissimus, cavendum, ne æger in humiliori conclavi vappido aëre pleno decumbat; sed aër potius morbidis exhalationibus foetus, provide emittendus & purus admittendus.

§. II.

Perspiratio
custodia-
tur.

Dein summo providendum est studio, ut corpus in æquali semper maneat perspiratione & quo cutaneum cribrum, in his morbis admodum sensibile, cujus tamen beneficio optime materiæ pecantis secretio fit atque excretio, in æquabili semper servetur tono. Hinc fugiendæ omni modo mutationes lintheaminum, indusiorum & stragulorum, nec non transitus ex uno lecto in alterum. Ego quidem hanc ob causam interdiceret soleo, ut ægri crebro surgant, quin tempore critico & quo exanthemata prorepunt, præsertim si debiles admodum decumbentes, præcipio, ne lectus sternatur, nec, si lintheamina nimis madida, nova injiciantur, sed trita antea & exsiccata probe. Est quoque admodum salutare corpus involvere tunicæ talari manicatæ quam vocant *einen Schlafrock*, pedesque tibialibus induere, sicque in lecto decumbere, quo omnis auræ frigidioris accessus arceatur.

§. III.

Situs erectus
vitandus.

Tum vitandus erectus corporis, & capitis, tam in lecto, quam extra eum situs, tanto magis, ubi pulsus debilis & summa virium prostratio, nec non ubi morbus in vigore. Inde enim ob debilem cordis pulsum non sufficiens sanguinis copia perpendiculari via ad caput pelli potest, lipothymia facile obrepit, imminuitur, vel sistitur cordis & sanguinis motus, omnes motus ad interiora vertuntur, fibrosa & tubulosa cutis substantia contrahitur, materia exanthematica, pejoris nunc quam antea indolis, retropellitur, & ad nervosas partes delata, convulsiones, deliria, vel etiam sphacelationes funestas paullo post suscitatur. Id quod plurimis exemplis habeo confir-

matum & uberius meo ex consilio excussum est in dissertatione *de situ erecto in morbis periculosis noxio.*

§. IV.

Porro animus tranquillus & erectus servandus, omnesque occasiones præscindendæ, quæ ad metum, pusillanimitatem, iram, vel terrorem ægrum permovere aptæ. Mens potius solatio & salutis spe erigenda, quam mortis periculi denunciatione deijcienda. Ego certe novi febribus ejusmodi decumbentes, qui forsan non fuissent mortui, nisi à theologis & medicis intempestiva mortis prædictione & inculcatione, horror & metus ipsis fuisset incussus ingens, omnibus postea illico in pejus mutatis.

§. V.

Præterea neque in principio, neque in declinatione, multo minus in statu morbi, laborantes onerare decet alimentis, quæ ex carnibus, ovis & pinguibus parata, uti sunt illa juscula sic dicta confortantia, *die Krafft-Brühen*. Non enim non in manifestum damnum cedere possunt, quia præsentem jam virium defectu & humorum impuritate, vires magis aggravant, cruditates generant, materiamque & fomitem morbi augment. Memori potius mente tenendus verissimus ille practicus *Hippocratis* canon: *corpora impura quo plus nutriveris, eo magis læseris*. Mihi quam plurima nota sunt exempla eorum, quibus remittente morbi & symptomatum atrociam, præpostera liberalitate cibi alibiles congesti, cum præsentaneo damno, subsequente mox anxietate præcordiorum, inquietudine, virium debilitate, quin ipsa morte.

§. VI.

In medicamentorum autem usu, ceu perpetuum axioma tenendum: nunquam validiora commoventia & volatilia, emetica, purgantia, diuretica, nec non sudorifera nimis spirituosæ & expellentia, esse propinanda. Nihil enim vi & impetuosè hoc in morbo agendum, in quo naturæ quam maxime viget opus, cui omne nimium inimicissimum, temperata vero & moderata amicissima.

§. VII.

Deinceps quum hæ febres habeant certos suos typos, suas periodos, certis temporibus exacerbationes & remissiones; multum omnino refert, ut medicus hæc tempora & medendi opportunitatem observet. Quod si non facit, plus damni, quam emolumenti affert. Res enim in medendo maximi est momenti, ut quis sciat, quæ tempore exacerbationis, ante, & post hanc, sub declinatione & remissione, danda. Paucis igitur in genere notari velim: quod sub æstu & symptomatum intensione, humectantia, diluentia, pulveres absorbentes nitrosi, superius descripti, nec non acidula, cum valde moderato externo regimine propinare expediat. Finito vero paroxysmo, quando cutis laxa, mollior & ad excretionem disposita, analeptica, excitantia, vel, si opus bezoardica, perspirationem moventia, nec non infusum theiforme ex veronica, scordio & liquiritia, exhibere decet. Et quum alvi fluxu sæpius solvi soleat morbus, is utique nunquam sistendus, præsertim circa tempora critica, nec adstringentibus, nec sedativis, nec opiatis, sed si natura ad hanc excretionem inclinatur, nec tamen rite succedit, secundanda potius eadem tutissime per laxans mannatum, supra descriptum & tamariqindinata.

§. VIII.

Quia etiam corpora ægrotantium non sunt unius

Animus si
tranquil-
lus &
erectus.

Alimenta
videntur.

Pharmacia
valida n
cent.

Medica-
menta o
portune
danda.

Corporis
tempera

*menso ac-
commo-
danda.* unius ejusdemque indolis ac temperamenti, sed in quibusdam motus vegetiores & intensiores, humores quoque calidiores & agiliores, in aliis vicissim motus languidiores & tardiores, ac humores lentiores magisque visceri; curate utique hæc à prudenti medico discernenda cum humorum quantitate, & motus ubique ad temperamentum, convenientem proportionem & æquilibrium reducendi. Hinc ubi nimius æstus internus & externus, oris siccitas cum siti & inde vigiliæ nimiae pertimescendæ; ibi nitrosa & potus diluentes, crebrius, sed moderate, offerre expedit. Contra ea, quando in temperamento segni, phlegmatico, meticuloso, mitis admodum calor, sitis nulla, pulsus debilis & languidus, cum virium prostratione, somnolentia mentisque torpore, à refrigerantibus abstinendum, & analepticiis potius ac bezoardicis essentis, crebrius itidem, sed parcius datis, pugnandum. Quum impuritas sulphurea & acetosa in humoribus peccat, & exanthemata magis ad rubræ purpuræ naturam accedunt, pulveres bezoardici fixiores, item diluentia, demulcentia, emulsiones & liquor noster anodynus mineralis omnibus fere palmam præripiunt. Et in vappescencia sive corruptione lymphæ acetosa, accedente ea propter alba purpura, præter fixa diaphoretica, liquor bezoardicus *Bussii*, cum liquore anodyno, proficius.

§. IX.

*Symptomatum
medendum.* Quamvis autem in periculosis hisce febribus, non adeo scrupulosa symptomatum ratio sit habenda, sed potius affectus primarii, cujus hæc effectus & producta; quandoque tamen necessarium est, ut imminetia eadem arceantur, vel periculum quod præsentia minantur, avertatur. Ex his sunt cephalalgia atque deliria, ad quæ declinanda optimum utique est domesticum remedium, pullos, columbarum, vel gallinarum recenter discissos, capiti raso applicare, vel epithema ex pane, cum sale, nitro, camphora, oleo ligni Rhodii & nucleis cerasorum vel persicorum, fronti atque temporibus circumponere. In animi deliquiis, vomitu, singultu, syncope, cardialgia & summis angustis, emplastrum ex theriaca, oleo nucistæ expresso, camphora, balsamo Peruviano, croco, oleo de cedro & pauxillo spiritus vini, præcordiorum regioni applicandum. In faucium ardore & siccitate, gelatina cornu cervi, cum succo limonum & saccharo cantho, syrupus diamoron, nec non oris collutio cum decocto ficuum, syrupo diamoron & nitro, opem ferunt egregiam. Urgente sopore, fricentur suræ & plantæ cum aceto rutageo, vel vesicatorium nostrum temperatum, magnitudine dimidii thaleri, suris apponatur. Et si purpura retrocedens anxietates facit & inquietudines, liquor bezoardicus *Bussii*, vel liquor cornu cervi succinatus, cum spiritu nitri dulci, vel liquore anodyno minerali, ex usu est. In tussi oleum amygdalarum dulcium & croci extractum.

§. X.

*Excretio-
es mode-
anda.* Inter excretionem quæ metum incutit, est sanguinis per nares stillicidium. Prodit hoc sanguinis ad caput jam infirmum congestionem, ex spasmis inferiorum. Hinc si proportionatus & moderatus est fluxus, cum sanguinis in corpore abundantia, non adeo nocet, sed potius graves capitis affectus avertit, id quod tamen rarius evenit. Quando vero paucae tantum sanguinis guttæ stillant, nullum inde levamen, sed

potius prælagium delirii & inflammationis faucium. Et ubi effusius manat, vires prosteruntur, excretionem cutaneam ad interiora restringuntur, & exanthemata, quæ adsunt, non sine discrimine disparent. Ad avertendum igitur sanguinis ad caput confluxum, pedes semper in moderato calore & madore servandi, omneque frigus arcendum. Hunc etiam in finem conducibile vesicatorium, nostra ex inventione temperatum, nec nimis dolens, suris apponere, alvumque servare apertam, vel per temperata nitrosa, moderate & crebro data, vel clystere, vel infuso mannato. Et eadem quoque juvant, si hæmorrhagiæ nimiae. Ubi vero parcius justo nares stillant, sanguis tamen, testibus oculis rubicundis, torvis & arteriis temporalibus valide pulsantibus, ad caput impetuosius confluit, præter jam dicta revellentia, derivantia & cucurbitulas nuchæ admotas, stillicidium proritare expedit, vel per intrusum naribus stramineum culmum, vel scarificatorio instrumento. Ubi nimius alvi fluxus, pulveribus bezoardicis aliquot tantum grana corticis chaccarillæ admiscenda, externis tamen potius, quam internis excretio moderanda & abdomen balsamo stomachali ex oleo nucistæ expresso, menthæ & balsamo de Peru inungendum. In sudore effusiori stragulorum calor quam maxime evitandus, & abstinendum à potu infusorum theiformium, ac usurpandæ species de hyacintho cum nitro. Et si vomitus & singultus urgent, præter commendatum externum linimentum, liquore anodyno cum liquore bezoardico, nihil efficacius.

§. XI.

Venæ sectio in exanthematicis hisce febribus cum summa circumspeditione administranda. Magis enim ad præservationem facit, quam ad curationem. Hinc in gravidis & foeminis, quæ nimis sanguinis per uterum profluviis obnoxiae, quum tempus vernum & hyems præcessit nimis rigida, non sine fructu sanguis mittitur, id quod etiam tenendum de iis, qui purpuræ scorbuticæ patent, & morbi hujus insultum metuunt. Vicissim, ubi jam virium enormis lapsus, morbus ex cacochymia ortus jam præsens est, catarrhosæ affectiones complicantur, febresque ob aërem vappidum nebulosum malignæ & putridæ grassantur, plane à sanguinis missione abstinendum. De primam regionem vacuantibus monendum: quod si morbus invadit corpus, cujus ventriculus, copia alimentorum, præsertim incongruorum, recenter farctus, tartarus emeticus, in infuso mannato ad unum, vel duo grana datus, eximie sit proficius. Nam licet ejusmodi pharmacum vacuans malignitati non directe resistat, quia tamen materiam & fomitem morbi subtrahit, multum omnino facit ad curationem ipsam. Sed si quid movendum, heic maxime, sapienti *Hippocratis* effato, movendum in principio. Vesicatoris multum in his febribus tribuunt plures. Ego vero ita censeo: habent locum si metus retrocessionis exanthematum, si natura corporis tarda in excretionem, sopor & torpor adest. Tum novi, à vesicatoris brachiis, vel suris apposis, mox totum corpus purpura rubra vel alba fuisse conspersum. Sed nostrum temperatum hic etiam commendamus vesicatorium.

*Venæ sectio
emetica &
vesicatoria
cum distin-
ctione
usurpanda*

NARRATIONES MORBORUM.

OBSERVATIO I.

*Febris Maligna Petechizans Anno cIo lccxcix.
Halæ Epidemica.*

*Constitutio
aëris præ-
cedens in-
salubris.*

Varium admodum, maxima tamen ex parte nubilum & pluviosum coelum, autumnus anni superioris sæculi xcix. regnarat, hyems quoque præter morem tepida & humida, autumnus fere similis fuerat, & ver subsequens anni xcix. pariter justo calidiorem & humidior habuerat aëris statum, ventis semper fere ex austro spirantibus. Hæc autem præternaturalis diuturna & insalubris temporum anni constitutio pessime mortalium affecit corpora. Inde quippe fibræ motrices nimium laxatæ, succorum spirituscentia depressa, vitalis humorum progressus multum retardatus, se & excretiones, potissimumque omnium saluberrima perspiratio, turbatæ, omnibus succis impuritas ad corruptionem prona inducta, corporibusque magna ad morbos dispositio ingenta. Exceperunt igitur varii morbi, partim putridi & maligni, partim à feri redundantia & in locis glandulosis stasi pendentes. Inter eos, qui populares habuerunt circuitus fuerunt variolæ & febres malignæ petechizantes. Nimirum circa æquinoctium autumnale anni xcix. coepit variolarum morbus, & per sex fere menses tanta institit vehementia, ut vix ullus, qui ipsum nondum expertus, maneret immunis, uti quidem superius capite VII. pag. 162. seqq. enumeravimus. Circa æquinoctium autem vernale anni xcix. gravior adhuc prodiit lues, adultis præcipue infesta, & stragem edidit haud levem, febris nempe maligna, petechiis variisque exanthematibus comitata, cujus genium, ingressum atque decursum, ex propria attenta observatione jam fusius paullo delineabimus.

*Quos in-
vasit
morbis &
quibus ca-
pitulis.*

Scilicet invasit hic morbus ratione ætatis, maxime juvenes & viros; tenellis, puerili ætati & senibus pepercit: ratione sexus majorem edidit stragem in maribus, quam foeminis. Dein infestavit potissimum personas constitutionis sanguineæ, item sanguineo-phlegmaticæ, nec non sanguine abundantes, obesos, habitus corporis laxioris, spongiosioris & venis plurimis, angustis tamen & exilibus distincti. Graciliores autem, cholericæ & illi, quibus fibræ magis strictæ & venæ amplæ, non tam frequenter eodem affecti. Infensissimus, immo lethalis fuit iis, qui ex nimia intemperantia, præsertim vini generosi abusu, nimia voracitate & crebrioribus animi commotionibus, sanguinis impuritatem & cacochymiam sibi contraxerunt, vel ex morbis prægressis, aut aliis causis corpus obtinuerunt jam imbecille. Sine contagio ipsum hunc morbum fuisse subnatum & intus progeneratum, frequens docuit experientia. Contagii autem vis non in omnes promiscue se exseruit, sed maxime in vicinos atque dispositos, ita ut plures iisdem in ædibus simul ægrotarint. Rarissimi fuerunt ex peregre accedentibus, qui lue infecti.

*Sympto-
mata essen-
tialia.*

Omnes autem, quotquot corripuit hic morbus, hisce affecit pathematibus, ex quibus, ceu pathognomonicis signis, cognoscendus fuit. Insignis & subita statim inter initia & per totum decursum morbi durans, adfuit virium jactura atque prostratio, & tanta lassitudo & gravitas detinuit membra, ut ægri præ debilitate nec cor-

pus movere, nec erecta statura incedere potuerint, sed illico vertigo, vel leve animi deliquium, non sine insigni vitæ discrimine, accesserit. Pulsus dein arteriarum deprehensus debilis, parvus, frequens tamen, interdum majori, interdum minori celeritate & inæqualitate micans. Calor porro ut plurimum visus remissior & minor, sitis quoque non adeo magna & urina sanorum simillima, sed vigilia, aut in aliis somnolentia, perstitit continua.

Pro temperamentorum tamen ætatumque diversitate, nec non rerum externarum accessione, discreparunt symptomata. In sanguineis confusus & inconstans fuit decursus, dorsi autem dolor major, anxietas præcordiorum gravior, cephalalgia acutior, cum faciei & oculorum rubore, vigilia & delirio, maculæ etiam rubræ affatim in iis fuerunt conspicuæ. Qui sanguinem mobiliorem & biliosum aluerunt, sub strictiori corporis habitu, majorem experti sunt ardorem externum, vigiliam cum æstu, corporis jactatione & inquietudine; accessit etiam in his loquacitas, faucium inflammatio, delirium, oculis simul protuberantibus, ferocibus atque splendentibus. Qui laxiorem & obesum corporis gesserunt habitum, cum sanguine copioso, sero viscido scatente, non adeo mordaci calore, nec siti, nec inquietudine affecti sunt, sed somnolenti, debilissimi & morose taciturni jacuerunt. Somnus vero ut plurimum fuit turbulentus, variisque absonis insomniis interturbatus, à quo male habuerunt, & expergefacti leviter ut plurimum delirarunt. In melancholicis similia sunt observata.

Quoad excretiones etiam diversa annotata phenomena. In nonnullis per totum morbum diarrhœa moderata neque insalutari spumosa & variegati coloris secesserunt. Plurimis accidit id circa dies criticos, septimum, nonum, undecimum, vel decimum quartum, cum copioso sudore, ac critica quam maxime salutaris fuit excretio. Quin, non tantum hoc tempore, sed & alio, quo similes continuæ putridæ febres grassatæ, notavi, semper magis è re ægrorum fuisse, quando alvus lubrica & fluxa, quam si obstructa. Tum enim majores anxietates, cephalalgia, inflammatorii faucium affectus, vel purpura alba, cum vitæ discrimine successerunt.

Sudorum ratio non fuit ubique eadem: continuo quippe & per totum morbum manantes, morbi malignitatem, naturæ imbecillitatem infelicemque significarunt eventum; lenis autem sudor & mador continuus boni ominis præbuit signum. Quando etiam ægri nono, vel undecimo die copiosius sudare coeperunt, præcedente, vel etiam erumpente simul alvi fluxu, symptomata multum remisissent, animi rediit vigor atque constantia, nec non pulsum æquales ictus, cum optata spe sanitatis. Nec quisquam fere morbum hunc evasit periculosissimum, quam diarrhœa, vel sudore, vel utroque simul. Interdum tamen effusius & longius manavit sudor, ad hebdomadem fere, ac vires exhauriens hectici morbi metum incussit.

Narium hæmorrhagia largior ex voto non cessit, præsertim crebrius repetens; vidimus tamen & in principio copiosam, cum diarrhœa simul erumpentem, sine vitæ periculo. Mensium quoque fluxus liberalis adinodum tertio, vel quarto morbi die, innoxius tamen, prodiit. Sanguinis vero per ani venas stillicidium, quantum quidem novi, visum est in nemine.

Urinæ ut plurimum fuerunt sanorum similes, inter-

*Quoad
tempera-
menta di-
versa.*

*nec non
excretionem
& quide
diarrhœa*

Sudores

Hæmorrhagias

Urinam

interdum tenues & turbidae ac pallidae, sine sedimento, quod circa decimum quartum, inmo vigesimum diem, cum aliis fausti praesagii signis, comparuit. A non nullis tamen urinae statim post emissionem turbidae redditae, non sine foetore. In quibusdam tertio statim morbi die effusa secessit, succedente gravativo simul capitis dolore, torpore mentisque stupore ac turbatione, quae accedente die septimo copioso sudore, feliciter evanuerunt & aegri servati. Quidam vicissim, maximeque ii, qui diarrhoeam, vel vomitum frequentem experti, per aliquot dies parcissime urinam, limpidam instar aquae, reddiderunt.

Vomitum.

Vomitum cum singultu per totum fere morbi cursum observavimus lethalem. Conatus autem ad vomendum fuit frequentior, praesertim post assumpta medicamenta, vel quando aegri ante morbi insultum gravi terrore perculsi, aut in principio emeticum assumerunt validius. In non nullis peculiare hoc funesti ominis symptoma visum, quod liquidum assumtum & in stomachum delatum, accedente leviori corporis commotione, vel erectione tantum, iterum in os cum murmure ac borborygmo ascenderit, ac limpidus humor, duo fere cochlearia complens, eructatus. Vidi inprimis hoc cum singultu per aliquot dies in viro honorato, in quo instituta post mortem sectione, hepar in concava parte plane putridum, nigrum, instar picis, nec non in diaphragmate, duodeno & parte pylori, sphacelosa comparuit corruptio.

Exanthemata.

Exanthematibus quidam plane caruerunt, quidam confertim obfessi. Haec in non nullis antequam lecto affigerentur, quum adhuc non nisi de languore conquererentur, inter initia statim comparuerunt, minus fausto eventu. In aliis circa diem septimum, vel nonum in conspectum prodierunt, bono cum omine. Occuparunt autem ut plurimum collum, dorsum, femora, parcius abdomen pedes & manus, rarius etiam faciem, in uno tamen circa frontem, tempora & mentum rubicundae admodum conspicuae fuerunt maculae petechiales. Meliores fuerunt parvae & rubrae, pejores magnae, lividae & ad viridem, vel violaceum colorem accedentes. Praeterea in iis, quibus alvus tensa erat & dura cutisque sicca & arida, nono inprimis, vel decimo morbi die, quum petechiae disparere inceperunt, maximis cum anxietatibus, extremorum refrigeratione summaque virium & animi defectione, successit exanthema pessimi moris miliare, purpura nempe alba, multosque tam antequam prodiret atrocissimis symptomatibus, quam etiam postquam prodisset, ob vires penitus jam fractas, interfecit.

Signa ma-

Rarius morbum evaserunt, continua mortis formidine detenti, nec non qui medicamenta respuerunt, qui obesi fuerunt, & copiosum ac impurum aluerunt in venis sanguinem. Funesti ominis fuerunt sudores frigidi, cum pulsu frequenti, debiliissimo & intermittente, respiratione intensa & accisa, deliriis, convulsivis motibus, seu tendinum in manuum carpis contractione. Delirium nunciarunt oculi feroces, cum rubedine & illacrymatione, sitis defectus, inquietudo & jactatio corporis, pulsus celer & faciei inflatio. Pessima quoque macularum retrocessio, quae vel admissio improvide frigore, vel terrore incusso, vel corpore diutius erecto, inducta. Hac enim facta, mox summa debilitas, corporis refrigeratio, respiratio anhelosa & anxietas praecordiorum gravissima, cum vitae discrimine,

subsequuta. In bonis vicissim fuerunt, quietus corporis decubitus, mentis constantia, sius, somnolentia, macularum die septimo demum, vel nono processus legitimus, alvus liquida, surditas circa diem criticum eveniens & aliquamdiu perdurans, idque maxime in iis, qui habitu fuerant graciles, tenues, cum fibris strictioribus.

Eventus.

Qui mortui, die ut plurimum undecimo, nonnulli tamen etiam septimo, diem obierunt. Qui autem sanitatem recuperarunt, die undecimo, vel etiam decimo quarto, quin decimo demum octavo, virium restorationem & symptomatum remissionem sunt experti. Sex tamen plerumque hebdomadam spatio, antequam perfecte sanarentur, opus habuerunt, ac medio quippe tempore febris soluta est, & reliquum, tam ad tollenda supervenientia accidentia, quam ad vires recolligendas impensum.

In regimine commendata usura aeris sereni, limpidi, puri, temperate calidi; hypocausta enim nimis calefacta, vel excessivus calor à stragulis, semper fere, vires exhauriendo & excretorios actus turbando, nocuerunt. Cibi, praecipue solidi, admissi nulli, sed in declinatione & post illam, tantum liquidi & facili solutionis assumti. Usus vero ciborum liberalis, etiam nutrientium & jusculorum sic dictorum confortantium, particulis oleosis alibilibus foetorum, praesentissimum attulit damnum, inprimis circa dies criticos, in statu morbi, aut praesentibus evacuationibus criticis, & inde mox major virium jactura cum excretionum turbatione inducta. Quin novi, largiorem ciborum solidorum declinante morbo usum, gravem peperisse recidivam. Nihil autem fere magis nocivum fuit, quam situs erectus. De quo quidem silent praecorum libri; ego vero non tantum in hoc, sed & aliis malignis & acutis exanthematicis morbis notavi multoties, quod si agrotantes diutius corpus in erecta servarint statura, sive surgentes, sive in lecto sedentes, vehementia morbi mirifice increverit, quin ipsa mors exceperit. Inde enim illico summa affecti debilitate & animi quasi deliquio, anxietate praecordiorum, extremorum frigore & maculae in cute conspicuae evanuerunt, cum vitae periculo. Neque hoc, uti vulgo creditur, ob admissum frigus accidit, sed iis etiam, qui in calore detenti & ab omni frigoris accessu probe sunt defensi, ob languidiorem sanguinis ex corde perpendiculari via ad caput pulsus.

Ex medicamentis alexipharmaca, salia volatilia, bezoardica calida & spiritiosa, licet ceu efficacissima vulgo commendentur, plus damni, quam emolumenti attulerunt, praesertim liberalius & cum calido regimine exhibita. Dissolutionem enim sanguinis elementorum promoverunt, & ob id majorem petechiarum fecerunt copiam; vel cephalalgias etiam, anxietates, inflammationes, vel etiam sudores copiosos, suscitaverunt. Quin novimus his ad praeservationem cum regimine assumtis, mox ipso contagio corpus fuisse affectum. Fuit tamen, ubi haec volatilia alexipharmaca analepticis mixta, moderate & caute usurpata, opem tulerunt egregiam, tum nempe, ubi ex macularum retrocessione, vel corporis, sive ex terrore, sive ex frigoris externi admissione, aut statura erecta, refrigeratione, anxietates & debilitates insensibilissimae subsequutae. Suavissimus etiam moderatum horum usum statim in principio, quum circulatio sanguinis adhuc in vigore esset, quo

magna

Calida alexipharmaca nocuerunt.

magna materiae peccantis portio cum fructu dissipata. Sudoriferum tamen non simul injunximus regimen, nec iis usi sumus in plethoricis & cacochymicis. Neque minus eo tempore, quo crisis institit, vel etiam jam adfuit, bezoardica volatilia in moderata dosi, criticas evacuationes, debilem & languidum motum resuscitando, egregie secundarunt. Cauti tantum fuimus & parci, ne nimios sudores efficeremus & ad lentas febres induceremus dispositionem.

*De venae
sectione.*

Sanguinis missio ad arcendum morbi incursum proficua observata, in corporibus plethoricis & quibus sanguinis evacuationes tam spontaneae, quam artificiales consuetae: contra ea, quando jam debilitas & virium prostratio insignis adfuit, minus feliciter cessit venae sectio. Non enim putredinem tollere apta fuit, sed corpora inde magis potius debilitata, ut morbo superando facta imparia.

*De vomitoriis.
Vesicantibus
& opiat.*

Vomitoria lenia in iis, quibus prima corporis regio vitiosorum humorum copia obsessa, praeservationis ergo ante insultum morbi, opem tulerunt exoptatam. Novi etiam ipso in morbi principio eadem profuisse; verum circa morbi progressum ac statum, continuum vomendi desiderium, nauseam, ardorem circa regionem cordis & anxietatem cardialgicam suscitaverunt, vel potius hisce malis praebuerunt causam. Vesicatoria ab aliis nobis eximie laudata, in statu morbi, ubi delirium, vel sopor & convulsiones aegrum affligerunt, cervici admodum. Opiata omniaque soporifera rejecimus, propter pulsam debilem & motus vitales jam languentes, quippe quae vires magis debilitando & excretiones retardando, majorem efficiunt malignitatem & ad mortem aditum parant placidum quidem, sed certum.

*Materia
medica-
mentorum.*

Materia vero eorum, quae à nobis usurpata & salubria deprehensa, fuit haec: ex aquis; florum sambuci, acaciae, tiliae, ulmariae, rosarum, herbae scordii, scabiosae, cardui benedicti; ex syrupis: acetositis citri, granatorum, cum julepo rosarum; ex pulveribus: mater perlarum, antimonium diaphoreticum, lapides cancrorum, succinum, terra sigillata, cornu cervi ustum, philosophice praeparatum, nitrum purum; ex alexipharmacis: camphora, essentia & extractum scordii, vincetoxici, mixtura simplex, spiritus & tinctura bezoardica; ex acidis: spiritus vitrioli philosophicus & nitri dulcis; ex humectantibus: decoctum scorzonerae, rasurae cornu cervi, item gelatina cornu cervi; ex analeptis: aqua florum aurantiorum, oleum citri recens cum saccharo, confectio alkermes, de hyacintho, balsamus noster vitae externae; ex antispasmodicis: essentia castorei, cinnabaris, spiritus cornu cervi succinatus.

*Medendi
methodus.*

Ex his varii generis formulae pro circumstantiarum ratione concinnatae, & methodus iisdem utendi ita instructa: in principio morbi pulvis bezoardicus, cum nitro & pauxillo camphorae remixtus, iterato aliquoties exhibitus; per morbi dein progressum & statum, mixturae ex aquis temperatis, diaphoreticis, analepticis, antispasmodicis & pulveribus cordialibus bezoardicis cum succo citri aliquamdiu datae. Potui inditum nitrum, vel spiritus vitrioli philosophicus, aut clyssus antimonii sulphuratus, qui alvum fluidam servat. Et frequens potus decocti cornu cervi citrati, item radice scorzonerae, calidus & frigidus, admodum proficuum notatus. Circa diem

criticum leniora alexipharmaca & quae sudorem promovere poterant adjecta, quando natura ad sudorem movendum se armavit & non suffecit. Hinc vel mixtura, vel tinctura bezoardica, vel essentia scordii, mixturis indita.

Haec optima & securissima fuit medendi methodus & plus quam centies probata. Symptomatibus autem hac obviam itum ratione: in nimio vomitu, anxietate praecordiorum, enormibus diarrhoeis & ventris torminibus, externe theriaca cum oleo nucis moschatae expresso, camphora, oleo caryophyllorum & balsamo Peruviano mixta, regioni stomachali apposita. In diarrhoea etiam nimia vires exhauriente usurpatus pulvis bezoardicus nitrosus, cum momento camphorae & theriacae coelestis. In phrenitide & acuto capitis dolore cum fructu externe admovimus spiritum vini camphoratum & salis ammoniaci, cum oleo rutae, lavendulae. Si alvus nimis adstricta, vel tormina in ventre affligerunt, expertissimi fuerunt clysteres lenientes, vel pure oleosi. Ad erigendas vires, spirituosae, confortantia, aromatica, externe pulsibus & scrobiculo cordis apposita, vel naribus suscepta, opem tulerunt egregiam. Ad fallendam sitim egregium fuit electuarium, ex saccharo Canariensi & spiritu nitri dulci.

Qui demum ab epidemica hac lue sibi metuerunt, imprudenti medicorum consilio defensi purgationibus lenioribus, pilulis nempe ex extractis balsamicis amaricantibus, rhabarbarinis & aloëticis. Plethoricis sanguinis subtractio rite administrata. Ad sanguinem vero fluxilem servandum, & dyscrasiam cum malignitate arcendam, commendari meruit infusum veronicae & scordii, omnibus individuis accommodum. Accedere praeterea debuit decens vivendi ratio, cibus & potus moderatus, temperatus nec varius; abstinendum ab affectibus animi, vires omni modo custodiendae, corpus à refrigeratione defendendum, & ipse aer humidus & vapidus corrigendus accensione lignorum & gummatum resinosorum.

OBSERVATIO II.

Ego quidem per omnem vitam non facile memini, ullum annum adeo, quoad tempestatum aerisque constitutionem, ab ordinario statu declinasse & quasi praeternaturalem fuisse, quam elapsum MDCCXXVIII. Etenim Martio jam mense coelum regnavit praeter morem calidum, & subsequentibus mensibus calor cum siccitate adauctus, sicque ad medium usque Septembris duravit. Intervenerunt tamen subinde dies & noctes frigidae admodum & rigidae, quibus adeo in contrarium mutatus subito aeris habitus, ut praecipitante etiam Aprili noctu in glaciem à gelu aquae densarentur. Autumno postea tempestas ingruit ac perstitit humida & frigidiuscula fecunda. Sub finem demum, Decembri & Januario sequenti, successit praeter consuetudinem algidissima hyems, ita ut gelu VI. VII. X. XII. & XIII. Januarii die, intensissimum illud post hominum memoriam anni MDCCIX. si non superaret, certo tamen aequaret. Frigidissimam autem hanc tempestatem subito iterum excepit lenissima australis die XIV. aura, quae copiosissimam nivem cum glacie mox liquavit, interspersis subinde pluviis. Mira etiam sub hac coeli vicissitudine observata argenti vivi in barometro, ratione descensus & ascensus, crebra & quotidie fere mutatio, qualem me per triginta

*Symptomatum
medicatio.*

Praeservatio.

*Constitutio
aeris &
morborum
epidemici
anni 1728.*

triginta annos vix unquam vidisse recordor, adeo etiam, ut vel una nocte, à vigesimo septimo gradu, ad duodecimum, quin octavum delaberetur; luculento indicio, non modo valde subitam ratione caloris & frigoris in thermometro, sed etiam gravitatis aëris, mutationem ac varietatem factam fuisse. Hæc autem insolita & peculiaris aëris annique temporum constitutio, non potuit non ingentem etiam mutationem animantium & maxime humanis corporibus inferre functiones tam vitales, quam naturales, potissimumque secretorios & excretorios actus, turbare atque pervertere, & materiam ac dispositionem ad diversi & insueti etiam generis morbos ingignere. Hinc igitur factum est, ut non modo in universa Germania, sed & Belgio, Anglia & alibi, tam uberi proventu enati fuerint morbi, quam vix alio tempore visum unquam. Decurrente quippe vere, æstate & autumno, febres variæ intermittentes, tertianæ simplices, duplices & continuæ, quartanæ simplices & duplices, crebrius recidivantes, valde anomalæ & irregulares, in quibusdam malignitatis speciem referentes, contagio infestæ, sæpe purpureo exanthemate stipatæ, prodierunt affatim. Variolæ quoque & morbilli non siluerunt, & quidam præterea diarrhœa & dysenteria affecti. Octobre vero & Novembre appetente desierunt intermittentes irregulares & successerunt catarrhales, pro diversitate & impuritate corporum, plus minus benignæ vel malignæ, ac per Decembrem etiam ac Januarium infestant, factæ simul contagiosæ, cum exanthematibus, petechiis spuris ac purpura. In plurimis cum horripilatione, virium prostratione, contusivo artuum dolore, temulentia capitis, junctâ raucedine, gravedine & pectoris infarctu, inceperunt, & quotidie circa noctem, quæ ut plurimum insomnis fuit, major facta inquietudo cum æstu. In spurcis admodum corporibus, quarto, vel etiam septimo die comparuerunt exanthemata, petechiæ maxime spuris & purpura alba, vel rubra, vel utraque simul, modo cum, modo sine levamine. Optime potius morbus solutus vel sudore largo, vel alvi fluxu, vel copioso scretu. In benignioribus catarrhalibus cum violenta & convulsiva tussi, faucium tumore, quandoque exulceratione, pectoris copioso infarctu, parotidum, quin erysipelaceo faciei tumore, ego diluentibus, sanguinis æstum & acrimoniam temperantibus cum fructu sum usus. Evacuationem alvinam per infusum usitatum mannatum movi, quod sine ulla molestia sex, vel septem sedes proritavit, humorumque à pectore, faucibus & capite impetum efficaciter derivavit. Et postea pulveribus diaphoreticis cum pauxillo extracti croci, nec non infusis theiformibus, cura ex voto absoluta. In iis autem febribus, quæ genii minus benigni visæ, eadem, quam supra expositum, ratione, medicationem institui.

Ex his quibus exanthemata junctâ, memorabilis potissimum petechialis mitior, cum purpura alba, cujus historiam, inprimis ex observatione numerosissima praxi occupati medici, sigillatim percensere, operæ erit pretium. Cœpit scilicet hæc in plurimis cum horripilatione & subsequente æstu mitiusque per duos aut tres primos dies afflixit, ita ut ægri non penitus lecto affigerentur, sed tantum de doloribus tensivis in dorso & artubus, capitis temulentia, virium appetitusque prostratione conquererentur. Non nulli conatum vomendi, quidam etiam vomitus

experti, plerique tamen primos hosce dies somnolenti, dormituriens magis, quam vigilantes, transegerunt. Accedente autem quarto die, motus febriles graviores accesserunt & vix sequenti mane tantisper remisit æstus, simulque ipso hoc die in quamplurimis sanguinis per nares erupit stillicidium, ac paullo post sub leni madore prodierunt etiam petechiæ. Fuerunt præterea in plerisque quibus alvi circa hoc tempus obtigit lene profluvium, ad septimum usque diem, quin quandoque undecimum durans, quod morbi vehementiam imminuit magis, quam adauxit. Absoluta macularum eruptione, in junioribus potissimum, minus meticulosi & de vita solliciti, febris postea, sub levi mentis turbatione, placide & tranquille decurrit & circa decimum quartum diem ad faustum exitum pertigit, tantum quod in quibusdam tussis & furdaster status per octo, vel plures dies durans, remansit. Quod si autem post exanthematum efflorescentiam febris impetus cum deliriis increvit potius, undecimo, vel decimo quarto die certo expectanda fuit purpura alba. Quæ priusquam comparuit, ægri summa præcordiorum anxietate, insomnia & stricturis circa collum sunt affecti, ut conquererentur fauces strangulari, se cistæ esse inclusos, teneri, in alieno conclavi & inter peregrinos versari, rogantes, vincula ut laxentur, ipsique suis & quieti redderentur &c. Quod si tamen sub hoc angore & pathematum vehementia purpura in conspectum venit, & deliria cum reliquis symptomatibus postea cessarunt, & hi feliciter evaserunt. Sed quibus circa nonum diem tendinum subsultus, motus tremuli, respiratio anhelosa, involuntaria urinæ & alvi excretio acciderunt, licet etiam demum purpura proreperet, decimo, undecimo, vel decimo tertio die, sub convulsivis motibus obierunt. Medendi hisce febribus methodus fuit hæc. Adultis & qui venæ sectioni assueti, simul ac conqueri cœperunt, sanguis ad sex, vel octo uncias subtractus in pede, omnibusque quies, imoderatus calor & abstinencia injuncta. Conclavia semper in æquali tepore servata, nulli, quam poscenti, cibus datus, potus vero ex cerevisia tenui tepidus & parcis haustibus pro lubitu unicuique concessus. In medicatione, rejectis expellentibus & alexipharmacis, ternis singulis horis, exhibitus pulvis temperans, ex absorbentibus, tam simplicibus, quam acido saturatis, cum antimonio diaphoretico & nitro, vel loco hujus potio temperata ex aquis destillatis, cum temperantibus & syrupo acetositis citri. Comparantibus autem exanthematibus, ad impediendam eorum retrocessionem, pulveribus temperantibus, interpositis subinde parcis dosibus, usus essentia bezoardicæ, infusum theiforme potui datum & regimen diaphoreticum injunctum. Alyus quidem in paucissimis adstricta, sed ubi fuit, clystere emolliente soluta. Adversus cephalalgias usurpatus spiritus vini camphoratus, vel etiam epithema illud domesticum ex mica panis, bacis juniperi, sale & cumino. Reliquorum symptomatum, ut inappetentiæ, somni defectus & lassitudinis, minus rationem habuimus & præter analeptica temperata, datum præterea nihil. Cæterum feliciter per Dei gratiam, in omnibus fere qui consiliis medicis in diætâ & regimine rite obtemperarunt, curatio successit; ii vero, qui hæc pensi habuerunt, maxima quidem etiam ex parte evaserunt, sed in morbos postea inciderunt corruptos, lentescentes.

*Historia fe-
bris ma-
lignæ
exanthema-
tica.*

Idem hic morbus, iisdem fere symptomati-
bus, eodem tempore infestavit milites nostros
præfidiarios. Scilicet fama percrebuerat, poten-
tissimum Porussiae Regem huc venturum, mili-
tes lecturum. Hinc præfecti meditationes insti-
tuerunt campestris, suosque per aliquot dies an-
te diluculum in campum eduxerunt, ut armis
sefe exercerent. Erat autem October jam adul-
tus, coelum frigidiusculum, nebulosum ac sub-
inde pluviosum, milites tamen minus adversus
aëris injurias ob vestitum leviores muniti: ma-
le inde ipsorum corpora affecta & dispositio in-
genita morbosa, imprimis quum non deessent,
qui liberali vini adusti potu corpus calefacere
perperam fatagerent. Ex eo igitur languere cœ-
perunt multi & plures ægrotare, alii catarrhis,
alii rheumatismis, alii diarrhœis, alii intermit-
tentibus febribus, maximeque quartanis refrac-
tariis, affici, donec exeunte Novembre longe
plures adoriretur febris continua maligna exan-
thematica, & successive vel centum inficiens,
ad finem usque Decembris insisteret. Quotquot
hæc corripuit, omnes primum de insolito cor-
poris artuumque languore conquesti sunt, cum
capitis gravitate, appetitus defectu & nausea.
Sequitur dein horror corporis, quem excepit
calor & pulsuum celeres, debiles tamen ictus.
Postea non nullos primum mitius afflixit pecto-
ris infarctus, cum tussi & coryza; alios vicissim
mox ita prostravit morbi vehementia, ut lecto
affigerentur, & simul ac vel caput tantum eri-
gerent, lypothymiis afficerentur. Increbuerunt
tum, imprimis accedente quarto die pathemata,
somnia defuit, nausea urfit, caput & dorsum
doluit, pectus oppressum fuit, in non nullis na-
res sanguinem stillarunt, aliis vomitus, aliis co-
natus ad hunc accidit, fuerunt maxime inquieti,
delirarunt, corpus jactitarunt, de summo si-
mul angore conquesti. Exactis inter hæc ali-
quot diebus, circa quintum, ut plurimum ta-
men septimum diem, prodierunt maculae pete-
chiales, optimæ rosei & purpurei, pessimæ li-
vidi & fusci coloris. Exanthema quoque mi-
liare, maculis hisce quandoque fuit intersper-
sum rubrum, vel album, morbumque multum
exacerbavit. Longe pejus tamen fuit, si post no-
num, aut undecimum diem hoc accessit, viri-
bus jam nimium attritis; quin die demum vi-
gesimo primo uni id contigisse novimus, lethali
eventu. In quibusdam critico septimo die sudor
manavit; in plurimis vero circa quintum vel
septimum diem alvus fluere cœpit, ad nonum,
vel undecimum usque diem; & hæc quidem ex-
cretiones criticæ ægris in salutem evenerunt. Quod
si vero sudor statim ab initio fuit effusior, exan-
thematibus præsentibus nulla remissio, nullum
criticis diebus in urina sedimentum, alvus ad-
strictior, cutis arida, sitis nulla, malum præbu-
erunt omen, invalescente haud ita multo post
delirio, inquietudine, accedentibus cum singultu
convulsionibus ac tandem morte. In medicatio-
ne harum febrium regimen injunctum modera-
rum, potus tepidus sufficiens, ex decocto potissi-
mum hordei, cibus interdictus, rejecta calida &
alexipharmaca, vomitoria & purgantia, omissa
quoque venæ sectio, quæ in binis primum infe-
liciter cesserat. Dati tantum pulveres temperan-
tes nitrosi ac diaphoretici, modo cum, modo si-
ne succo citri, item potiones ex aquis analepticis
ac diapnoicis cum antimonio diaphoretico, ma-
tre perlarum, cinnabari & aceto. Alvus obstructa
emollientibus clysteribus referata, nimis fluxa

calore & pulverum diaphoreticorum usu ad mo-
deramen traducta, & de reliquo eadem fere ra-
tione, ac supra dictum, symptomatibus cæteris
obviam itum. Feliciter etiam cessit curatio, ita
ut ex omnibus vix ultra decem mortui, & hi
quidem vel nono statim die, vel undecimo ac-
cedente purpura. Cæteri fere omnes superato de-
cimo quarto die sensim vires cum somno & ap-
petitu receperunt ac successive cum sanitate in
gratiam redierunt. In quibusdam tamen per ali-
quod adhuc tempus restitit præter languorem tussi-
cula, in aliis etiam passim in carnosissimis
partibus effloruerunt furunculi admodum molesti,
congruis præfidiis demum etiam sanati.

Id igitur ex epidemicæ hujus febris historia
notatu dignum: quod à sola paulo intensiori per-
frigeratione corporis atque transpiratione adhibi-
ta, pro dispositione corporum, quatenus plus
vel minus impuros in venis inque prima re-
gione alunt succos, varii generis morbosæ affec-
tiones, plus vel minus mali moris, intermit-
tentes nempe, item catarrhales rheumaticæ, pete-
chiales & purpuratæ gigni possint. Dein & il-
lud observationem meretur, quod contagiosa qui-
dem hæc febris fuerit, non tamen omnes, sed
tantummodo milites infecerit, qui similem per-
frigerationem eo tempore passi, immunibus à
contagio & iis, qui in eadem domo habitarunt,
& qui visitarunt ægrotos. Quod quidem lucu-
lento est testimonio, contagium, ut effectui de-
tur, supponere & requirere, corpora, quæ suc-
cos ad recipiendum miasma & ejus activitati
obsecundandum dispositos alunt. Tum non præ-
tereundum est, quod milites valde proceræ sta-
turæ vehementius ægrotaverint & difficilius eva-
serint, quam alii minus proceri. Quia enim in
proceræ staturæ corporibus, ob longum ac dif-
ficilem sanguinis per venas perpendiculari via
regressum ad cor, circuitus tardior est & lan-
guidior ac in parvæ staturæ, excretionem autem
& maximo perspirationis negotium circulum
sanguinis tardiolem, vel celeriolem sequitur,
facile patet, sub languidiori sanguinis & humo-
rum circuitu, corpora magis & facilius reddi
impura, & autocratiam quoque naturæ in vin-
cendis morbis, quæ consistit maxime in circu-
latione sanguinis vegetiori & promptis excretio-
nibus, valde languidam esse & insufficientem.
Tandem memorabile omnino, quod venæ sectio
etiam in principio administrata noxam potius
quam opem attulerit, quæ alias non tam fa-
cile in robustis hominibus, ut militibus, nocet.
At quum à transpiratione prohibita & reten-
tione excrementorum, quæ per cutim diffan-
tur, primos malum traxit natales, aliquot jam
septimanis languor & ciborum ante invasionem
febris inappetentia adfuit, facile constat, san-
guinis missione imbecillitatem adauctam, per-
spirationem vero magis imminutam fuisse, quod
utrumque non potuit non cum damno accidere.

CAPUT XI.

De Febribus Petechialibus veris.

THESES PATHOLOGICÆ.

§. I.

FEbres petechiales veræ, sunt valde malignæ,
contagiosæ, capiti & viribus quam maxime
infestæ,

De Febribus Petechialibus veris.

85

infectæ, cum varii coloris maculis junctæ, & ortæ à succorum vitalium corruptione ac subsequente putrida dissolutione, eaque propter lethales.

§. II.

Merito hæc febres exanthematicæ vocantur malignæ, seu venenatæ: etenim plerumque à tenuissimo, activæ, virulentæ indolis vapore, sive miasmate, è corpore decumbentis halante, ortum ducunt & propagantur. Dein difficulter sanationem recipiunt & brevi sæpe plures jugulant. Tum vires, à quibus motus vitam sustinentes pendent, & celeriter, & graviter, pessundant ac destruunt. Demum, non secus ac maligni homines, mitem prima facie exhibent indolem, medicosque cum adstantibus, ac si catarrhales tantum essent, sæpe decipiunt, postea vero pernicialem effectum tanto majori exferunt vehementia.

§. III.

His tamen indiciis deleteria indoles morbi cognoscenda. Ab initio statim ægri conqueri solent de virium summa prostratione atque debilitate, ut erecti vix consistere, vel pedibus incedere queant, sed mox animo deficient, quum in aliis continuis & acutis morbis demum in statu & vigore ejusmodi imbecillitas observetur. Caput ab initio valde dolet, fervet, cum torpore, animus illico dejicitur, anxius & sollicitus est, ac salutis spem abjicit, pessima quævis ominatur. Assidua urget vigilia, nec ullus reficiens adest somnus, appetentia plane perit, faciei vigor intercidit, pulsus languidus, parvus & inæqualis micat, decubitus in lecto insolitus est atque inkompositus, membris quasi convolutis & corpore huc & illuc jectigato, pectoris est oppressio, quandoque cum tussi sicca, muscutorum fibræ undulatorio quasi & tremulo motu convelluntur, tendinesque contrahuntur atque subsultant. Plures nec de siti, nec æstu, nec dolore, nec anxietate queruntur, & asseverant potius, nihil mali se perferire, præter languorem & somni defectum. Urina primum mingitur ut plurimum tenuis sanorum simillima. Quarto, quinto, vel etiam septimo die in conspectum prodeunt maculæ, in dorso potissimum & lumbis, plus minus copiosæ, varii subinde coloris, plerumque tamen sine levamine, ideoque symptomaticæ magis, quam criticæ.

§. IV.

Exanthemata veteres generali denominatione has dicunt maculas. Latino ab Italis idiomate pedicularium petechiarum & petechialium nomine efferuntur, à voce pedechio, duplex, quia pulicum morsus figura æmulantur; à Gallis ob colorem purpureum, purpuratæ; ab Hispanis taberdillo, à calore ex flavo rubro; à Germanis lentilulares, propter lentis quam referunt figuram & colorem, aut punctilulares, vernacula die *Reb-Flecke*. Hungari vero propter gravem capitis dolorem & delirium complicatum nominant Germana voce *die hünzige Haupt-Krankheit*. Ab aliis autem exanthematibus præter figuram in eo discrepant, quod non modo sine omni ardore, sine pruritu, cutis elevatione, asperitate & exulceratione, prodeant, sed & ut plurimum sine levamine, quia materia eorum non est salina caustica, sed potius putrida & corrupta.

§. V.

Tantum hinc abest, ut maculæ hæc salutis spem faciant, ut potius quo copiosiores compareant, eo

Frid. Hoffmanni Oper. Tom. II.

majorem corruptionis gradum, quin lividi, plumbei & ex atro viridescens coloris, sphacelosam plane corruptionem arguant. Qui etiam evadunt, non cutanea excretionem, sed vel sudoribus largis, foetidum acorem spirantibus, vel alvi fluxibus criticis, convalescunt. Sed non nisi naturæ benignitate ac robore id accidit in his, ubi non adeo eminens succorum corruptio, sed temperata adhuc & quasi quodammodo alexipharmaca indoles. Plurimi potius occumbunt, vel sphacelosa corruptione in ventriculo, intestinis & aliis visceribus, vel phrenitide, frequentius anginosa faucium & œsophagi inflammatione, cadaveribus mox post mortem intolerandum plane foetorem spirantibus. Quem funestum eventum signa præstigiunt hæc: si sitis vel nulla, vel plane inextinguibilis, si lingua arida, discissa, nigricans, fauces inflammatae & squalore obfessæ, cum deglutitione difficili: si post exanthematum eruptionem respiratio anhelosa & pectoris angustia persistit & invalescit, vel post sudorem & alvi fluxum delirium cum aliis pathematibus ingravescit, nec urina turbida fit, nec sedimentum ponit; si demum oculi obscurantur, mens plane delira fit, ægri floccos carpunt, tendines subsultant, excrementa involuntarie elabuntur, sudor frigidus manat & convulsiones accidunt, spiritum cum vita præcludentes.

§. VI.

Formalis perniciosarum harum febrium ratio consistit in putrida dissolutione, sive colliquatione sanguinis & succorum vitalium, potissimumque in fluidi lymphatici elastici tenuissimi, quod in sanguine contentum, in cerebro ac spinali medulla separatum, per nervos in universum corpus distributum, sensum & motum partibus præstat cunctis, inquinatæ & vitiosa plane diathesi. Etenim venenatum illum vaporem, quo etiam sana corpora inficiuntur, ejus naturæ esse atque potentia, ut non modo sanguinis aliisque humoribus putredinosam successive inducat fermentationem, sed & immediate ad interiora cerebri nervearumque partium pervadat, fluidumque ibi corrumpat subtilissimum, ex eo planum fit, quod suscepto ipso, illico vires tam naturales, quam vitales & animales languescere incipiant omnes, in perfecte sanis corporibus salva adhuc sanguinis & humorum crasi & à corruptione immuni.

§. VII.

Hoc virulentum multiplicativæ indolis miasma, corpus maxime subit per nares, fauces & bronchia. Nam nullibi tam aperti minusque tecti discurrent nervi ex prima & secunda conjugatione, ac in narium cavo. Hoc igitur dum pertransit cum aëre vectus deleterius vapor, non mirum est, eundem immediate, proxime & intime perungere ad nervos ipsiusque cerebrum & infectos ea propter mox temulentia, capitis torpore, virium languore, nec non vertigine affici. Maxime omnium vero commiscet sese salivæ latici contagiosum miasma, & cum hoc descendit ad ventriculum, qui etiam, ceu pars nervosa, primam ferè sedem præbet contagiosis hisce febribus. Hinc in ventriculo & præcordiis primum se prodere solent prava symptomata, nausea scilicet cum vomendi conatu, alvi frequens cum torminibus dejectio, vel etiam fortis adstrictio, ciborum fastidium, anxietas præcordiorum, cardialgia, *das Ubelseyn*, & frequens copiosæ lymphæ ex stomacho eructatio. Hinc testantur observationes anatomico-præcticae,

H

in

in his febribus defunctis ventriculum maxime omnium sphacelosa corruptione affici. Dum vero miasma hoc & salivæ in ore & liquori menstruali gastrico & pancreatico in stomacho miscetur, multum ejus vis propagativa & multiplicativa intenditur. Etenim inter omnes constat, salivales hos succos, intimæ alimentorum digestionis fervientes, valde subtilis, spirituosæ, aëreo-elastica fermentescibilis naturæ esse, eaque propter dulcia quibus commiscetur illico fermentativo motu percire. Quare quia hi succi in motu intestino fermentativo jam constituti, longe utique facilius delato illuc subtilissimo putredinoso miasmati obsecundant, ut hoc sese propaget & augeat, non secus ac exigua pars fermenti panifici ingentem farinæ massam fermentat.

§. VIII.

Apophlegmatisantibus arcendum.

Hinc facile jam elucescit ratio, quare ad contagium perniciosi hujus morbi arcendum, nihil præstabilius jam pridem à peritissimis medicis annotatum, quam ut infectorum, præsertim quum ad extrema & putredinis acumen ventum, halitum facie averfa vitemus, salivam crebrius expuendo rejiciamus, ac ore contineamus ea, quæ salivam eliciunt, radicem angelicæ, zedoariæ, imperatoriæ, pimpinellæ, aut masticemus, vel fumigemus tabacum. Neque minus inde patefcit causa, cur miasma hoc deleterium longe facilius suscipiatur longeque citius pernicialem vim exferat, in ventriculo copiosis cruditatibus & pituitosis ac salivalibus sordibus obfesso; & cur vicissim leniora emetica, alexipharmacis nupta, in recen-ter infectis, certæ & securissimæ ad præscindendum prima in herba morbum sint efficacæ.

§. IX.

Origo ex aëre insalubri per se.

Primam autem harum contagio infestarum febrium originem recte omnino cum Hippocrate ex communi aëris vitio deducendam esse reor. Nimirum diurnus humidus, pluviosus, nebulosus, nec non austrinus calido-humidus aëris status, ob eminentem vaporum aqueorum copiam, vim ætheris vividam, elasticam, expansivam, quæ solidorum & fluidorum ad vitam necessarium in corpore motum, sustinet, obtundit ac deprimit. Inde salutiferæ excretiones, maximeque perspiratio, elanguescunt ac turbantur, inutiles, superflue & corruptæ partes retinentur, quibus in sanguine & succis accumulatis, non potest non summa ad corruptionem & dissolutionem prona ingigni dispositio. Accedit quod sub aliena ejusmodi tempestatum constitutione, ipsa vegetabilia & frumenta alienam naturam corpori inimicam contrahant. Nam notum est, humido & pluvioso coelo diu regnante, in secale potissimum uberem esse proventum lolii esculenti, vernacula *des Mutter - Korns*, quod noxiæ & tantum non venenatæ est indolis. Neque prognatum hoc tempore secale, tantam copiam spiritus vini per fermentationem præbet, neque tam salubrem & reficientem panem largitur, ac illud, quod temporibus anni siccis & calidis producit. Ut adeo non mirum sit, insalubria & corrupta hinc confecta alimenta ingesta, simul ipsa corpora disponere ad putredinem.

§. X.

Vel à pravis effluviis.

Dein aëri insalubritas & ad ingignendos putridos morbos aptitudo inducitur ex crebra ac diuturna aquarum inundatione. Hac enim facta, humor stagnans, accedente inprimis solari calo-

re, putrescere incipit, multaque putrida in atmosphæram mittit effluvia. Infectorum quoque varii generis copia circa aquarum stagna succrescit, à quibus causticæ, salinæ, deleteriæ materiæ subtiles multæ in aërem eleventur. Quæ quidem omnia quam sint sanitati insensa, historiarum utique docent monumenta, quibus uberius constat, post aquarum diluviones magnas, contagiosas & tantum non pestilentis naturæ febres fuisse subortas, de quo pluribus evolvenda dissertatio *de temporibus anni insalubribus*, item *tomus II. Medicinæ ration. system. pag. 278*. Ejusdem infestæ naturæ est aër exhalationibus putridis ex cadaveribus inhumatis putrescentibus, vel excrementis animantium surgentibus, refertus, tanto magis incarceratus & accessu purioris destitutus.

§. XI.

Neque tamen aër tantum impurus & insalubris ad generationem horum morborum facit, verum etiam ipsius corporis ad putredinem intus concipiendam habitus ac dispositio. Per ipsam certe experientiam uberius constat, phlegmatico-sanguineos, habitus corporis laxioris & spongiosioris, animo meticulosos & anxios, quorum vires luxuria, ingluvie alimentorum valde incongruorum, ebrietate, venere, fame, diuturna moestitia, vigiliis, laboribus, hæmorrhagiis, fractæ atque exhaustæ, facilius & crebrius gravi hoc morbo prehendi, & difficulter quoque evadere; nullam aliam ob causam, quam quod ipsorum corpora impura atque debilia ad putredinem ac corruptionem admodum proclivia. Neque minus de sceminis cachecticis, mensium suppressione laborantibus, item de lue venerea, vel minimum hujus reliquiis affectis novi, quod ex facili corripantur, sed ægerrime emergant.

§. XII.

Quæ quum ita sint, in proclivi sane est judicare, quare contagiosæ hæ febres in militum castris quam maxime circumeant & ob id castrenses appellari soleant. In castris enim omnes, quas enumeravimus, morbi hujus causæ fere conveniunt. Ibi quippe milites aëris humido calidi & postea humido frigidi experiuntur injurias, sub dio dormiunt in locis uliginosis, humidis sæpe atque palustribus, excrementa animantium & hominum passim non desunt, nec tamen vento ob circumductum vallum aditus ad dissipandos foetidos halitus patet, cibis vescuntur incongruis, nonnunquam plane corruptis, semicoctis, aquas quoque stagnantes & putres bibunt, fame & vigiliis corporis robur atterunt. Hinc quando ex laborioso & difficili hoc vitæ genere in hyberna concedunt, corporaque quieti dant ac ciborum copia onerant, corruptio interna sensim contracta adeo demum increfcit, ut apertius in capitalem hunc morbum erumpat, isque ob id frequentior in hybernis, quam castris observetur. Eandem fere ob rationem malignis contagiosis ejusmodi morbis, pauperes, in tenebris & coeno versantes, aëre fruentes in angustis tuguriolis vapido minusque puro, frequentius afficiuntur, quam opulenti, quibus accuratius vivendi genus & sanitatis regulas quoad aërem & victum observandi est copia. Idem evenit in nosocomiis, orphanotropheis & ergastulis publicis, ubi plures simul conversantur, & vitam colunt inopem, corpus ad concipiendum contagium disponentem.

PRÆSERVATIO ET CURATIO
CUM OBSERVATIONIBUS
CLINICIS.

§. I.

Præserva-
tio quoad
diætā &
regimen.

Curatio quidem harum exitialium febrium, tam ratione indicationum, quam regiminis, remedium, medendique rationis, nec non observationum practicarum, convenit utique cum iis, quæ capite antecedenti de febribus petechizantibus fuisse satis tradidimus, ut supervacaneum eadem heic etiam exponere foret. Sed longe magis à perito medico petendum consilium ad arcendum ejusmodi morbum, quippe quod multo tutius, multoque certiores effectus ipsa curatione. Præcipuum vero præservationis momentum in eo quam maxime consistit, ut insalubri ad ingignendos mali moris morbos apto anni tempore, solícite evitetur aer vaporibus & exhalationibus noxiis foetus, & vivida elastica expansione destitutus. Quum dein sub ejusmodi aeris constitutione corpora jam tum admodum debilia & ad morbos contrahendos disposita sint, expedit omnino, temperare sibi ab omnibus, quæ viribus adversa, languidioresque faciunt excretiones, animi scilicet vehementibus commotionibus, mœrore, terrore, cura, impensioribus meditationibus, vigiliis protractioribus & nimia venere, item corporis refrigeratione, præsertim noctu, cum leviori tempestate frigidiuscula vestitu. Porro præscindendus curate cruditas prima in regione proventus, abstinendum ab ingluvie tanto magis insalubrium, à crapula, continua tabaci fumigatione & effusiori potus coffeæ usu, qui sicut non ventriculo, ita longè minus nervosis partibus & mixturæ succorum vitalium amicus est. Ut deum aer purus & salubris hauriatur, studendum, & fugienda ob id loca humiliora, in quibus aer facile fit vapidus, nec non ædificia, quæ ventorum perflatui minus patent, ac præterea nimia humiditas accenso igne & suffumigiis ex mastiche, succino, baccis juniperi, corrigenda.

§. II.

mum op-
mum
a serva-
tum.

Inter præsidia porro, quæ ad declinandos hos morbos valent, ego quidem præstabilius novi nullum, convenienti & moderato vini optimæ notæ, & quidem Rhenani, usu. Hoc quippe mane, vel etiam inter cibos quotidie potum modice, vires mirifice reficit & sustinet, sanguinis progressum cum excretionibus promovet, ciborum digestionem juvat, ac optime putredini ac corruptioni resistit, præsertim quando moderatior etiam corporis motus & alius diluens potus simul jungatur. Ego sane longiori experientia edoctus, id pro certo affirmare possum, grassantibus populariter morbis ab aeris constitutione humida, eos, qui exquisitam victus rationem tenuerunt & quotidie moderate bono vino usi, incommodi sensisse nihil. Ipsa etiam in pestilentia ex præstantissimis præservativis vinum esse testantur, qui ex instituto de eadem scripserunt. Quin in petechiis quoque, vinum postremis diebus facta crisi debito modo potum, vires dejectas erigendo & cuticularem excretionem secundando, omnia ferè alia auxilia superare assevero.

§. III.

ida pro-

Ipsa autem in curatione ex omnibus remediis statim in principio optimam opem conferunt ac-
Frid. Hoffmanni Oper. Tom. II.

da, maximeque succus citri, ptisanæ potandæ ad extinguendum calorem & arcendam putredinem inditus, item acetum vini, sive simplex, sive destillatum, mixturis ex aquis & pulveribus fixioribus diaphoreticis nuptum. Præter hæc conducunt, quæ vires servando salivalem etiam latitem colliquant, & pectus ab infarctu liberant. Id enim cum celeberrimo olim Erfurtensi Professore, *Cramero*, quem Præceptorem colui insignem, observavi, non facile quempiam his in morbis decedere; cui saliva & sputum liberius fertur. Quam ob rem idem hic in arte exercitissimus vir frequentissimo in usu habuit mixturas alexipharmacas, quas ingrediebatur, cum aceto destillato, vel aceto scordii, cinnabaris, interdum bezoardicum minerale & oxymel squilliticum. Contra ea pessimum omnino practicum mos est, in principio statim volatilia, bezoardica & sudorifera cum regimine calido & infuso theiformi fervente exhibere. Sic enim intestinus ille putredinosus motus invalescit cum orgasmo, majorque virium subsequitur prostratio.

§. IV.

In morbo declinante nulla magis salutaris excretio, quam quæ fit convenienti tempore per alvum. Ego certe praxi quinquaginta & aliquot annorum uberius confirmatum habeo, rarius solo sudore & hæmorrhagia, sed frequentius per diarrhoeam septimo, nono, aut undecimo die erumpentem, solutos fuisse hos morbos, & vicissim nihil perniciosius fuisse diarrhoea gravi statim inter initia, vel alvi fluxu critico cohibito. Neque minus compertum habeo, si catarrhales malignæ & exanthematicæ alvi fluxu solutæ fuerunt, ægros immunes fuisse à purpuræ albæ incursum; quæ haud raro pulsu jam æquali facto, declinante undecimo die morbo, non sine magno periculo supervenit. Perspexerunt etiam jam pridem salubritatem alvini fluxus, artem cum attentione exercentes. Ipse *Hippocrates lib. epid.* memorat, laborantes hujusmodi acutis febribus alvi excretionem fuisse sanatos. In quadam pestilenti constitutione diarrhoeam admodum salutarem fuisse *Galenus de atr. bil. cap. IV.* testatur. Inprimis *Gerhardus Columba de pestil. febr.* multus est in laudando egregio effectum fluxus alvini, pag. 231. sic habens: *omnes quibus alvus copiose ejecit, licet cum signis cruditatis fuerit, tandem liberati. Procedente enim alvi fluore, in dies coctionis signa superveniebant, morbus evadebat clementior, & tandem alvi fluore perseverante, fideliter & integre ægri judicabantur.* Ut mittamus, quæ passim hanc in rem memoriæ prodita sunt à *Valleriola observ. lib. VI. de febr. Schenckio observat. lib. VI. de febr. Riverio observat. Cent. I. obs. XLVII. & LVII. item Cent. II. obs. XXXIV. & LXXXVII. Horstio obs. X. Johanne Rhodio Cent. II. obs. LXXXV. Scretæ de febre castrensi maligna cap. IV. pag. 331. pag. 175. Boneto in thes. pract. de febr. putr. pag. 71. item de causo cap. II.*

Alvi fluxus
salutaris.

§. V.

Hæc igitur naturæ via; cui insistendum ab artifice, eademque, si deficit, juvanda. Mihi omnino primum & multiplici observatione confirmatum, quicquid in putridis, malignis & pestilentialibus febribus curandis expectandum ab arte, id maxime in eo contineri, ut medicus convenienti tempore ea usurpet remedia, quæ ad alvum solvendam sine damno faciant. Sed hoc circa hos maxime
H 2 dies

Hinc pro-
movendus.

dies faciendum, qui audiunt critici, à septimo ad decimum quartum usque, non primis, quibus ob materiam nondum coctam & excretioni aptam, parum opis conferunt. Sicuti vero ad alvum vacuandam per totum harum febrium decursum nil pestilentius illis pharmacis, quæ acrimonia quadam caustica agunt, nec exceptis sennæ etiam foliis: ita nil certe hanc in rem magis proficuum iis, quæ nihil alieni & quod vires frangat in mixtione habent, sed blande & placide alvum subducunt. Eminent hæc inter benedicta illa manna, cum cremore tartari, hisce etiam febribus ob aciditatem non adverso, nupta & sufficienti dosi data. Conducibilis quoque syrupus rosarum solutivus, mixtus cum salino stimulo, ex cremore tartari, sale polychresto, vel nitro antimoniato & convenienti dosi ac tempore cum sufficienti diluto vehiculo, uti fero lactis nostra methodo dulci, vel aquis etiam temperatis mineralibus, ut Wildungensibus & Antonianis, oblatus. Non minus spectata virtus tamarindorum pulpæ, vel decocti ex his cum manna, aut rhabarbaro. Quam egregium enim effectum præstent hoc in casu laxantia, testis eximius est *Moræus de malign. febr. parox.* plus quam viginti exemplis confirmans, se ad alvum laxandam summo cum fructu usum fuisse tamarindorum pulpa, item infuso ex rhabarbaro, foliis sennæ, cremore tartari, manna & aqua acetosellæ concinnato.

§. VI.

Vena sectio præservatoria magis.

De venæ sectionis autem utilitate his in febribus disceptant adhuc medentes. Et certe tanta utique malignarum differentia, ut experientissimi etiam medici in iisdem experiundo demum discere cogantur. Id tamen verum: quum eadem plethoricos & plethorico-cachochymicos infestant, commodum omnino in his & præterea sanguinis missioni assuetis, diæta lauta & vinosa utentibus & vitæ sedentariæ indulgentibus, invenit locum ad præservationem. Experientia enim sum edoctus, post venæ sectionem, vel plane non corripì, vel lenius ægrotare & facilius convalescere, sanguinis subtractionem passos, quam non expertos.

§. VII.

Recidiva arcenda abstinencia.

Id vero omnibus curate tenendum: quod tam sub, quam declinante hoc morbo, stomachus valde languescens non alimentorum, multo minus insalubrium, præsertim carniū mole sit onerandus. Est hoc familiarissimum, vulgo hominum plebejorum inprimis, præjudicium, ut credant vires cibis esse reficiendas. Sed ipsum hoc est una ex præcipuis causa, quod ægri in portu sese jam constitutos censentes, sæpius naufragium faciant, recidivante priori, cum majori vitæ periculo, vel superveniente alio novo morbo.

ENARRATIONES MORBORUM.

OBSERVATIO I.

Historia Febris petechialis ANN. MDCLXXXIII. in Principatu Mindensi grassantis.

Quum anno MDCLXXXIII. copię Brandenburgicæ ab expeditione contra Turcas ex Hungaria redeuntes, in Principatum Mindensem hyematum reducerentur, attulerunt simul morbum castrensem, febrem nempe malignam petechialem, & successive multos pagos & vicos in

quibus sumserant hyberna, luc infecerunt eadem. Ego juvenis adhuc medicus provincialis à Serenissimo Electore Brandenburgensi Friderico Wilhelmo constitutus ibi, feci quod muneris postulavit ratio, decumbentes passim visitavi, in morbi hujus maligni statum inquisivi & operam contuli omnem, ut pro mea tunc scientia perniciosum hunc morbum congruis præfidiis oppugnarem & ne latius progredere, præcaverem. Excurri igitur & potissimum in præfectura Schlüsselfburg, plus quam centum hac febre laborantes offendi, in quibus præter summam virium prostrationem & consueta alia malignarum symptomata, peculiare fuit, quod plurimi statim in principio atroci & diuturna cephalalgia, in syncipite inprimis, cum vertigine, oculorum rubore, oblivione ac postea delirio, afficerentur; conquerentes simul de magno tinnitu & susurro aurium. Quidam de raucedine, pectoris infarctu, faucium ardore & falso catarrho conquerebantur. Quibus mox corpus petechiis lividis & flavescentibus obfessum, moriebantur omnes, cum iis qui incongruo, vel nimis calido, vel nimis frigido regimine excepti & à balneatore alexipharmacis expellentibus & theriacalibus usi fuerunt. In quibusdam tanta erat corruptionis vehementia, ut ægri surgentes & in pavimento frigido ambulantes aliquamdiu, funestum in plantis pedum nanciscerentur sphacelum, uti in duobus vidi. Qui autem paucas, & rubras habuerunt maculas, nec non ex plebejis, qui nec medico, nec medicamentis usi, ac minus meticulosi, solo regimine temperato, & potu feri lactis, vel decimo quarto die, remittente symptomatum vehementia, vel per largos & frigidos valde debilitantes sudores, vel per diarrhœam sunt judicati. In bonis fuit status surdaster circa declinationem accedens & aliquandiu persistens. Qui evaserunt vix intra aliquot menses ad perfectam sanitatem redierunt. In plurimis restitit tumor pedum, vel etiam abdominis, cum lenta febre & appetitus dejectione. Quidam diu stupidi & obliviosi manserunt. Nec defuerunt, qui, præsertim si caput frigidiori auræ nimis cito exposuerunt, post morbum gravitate capitis & difficultate auditus affecti sunt, quin nonnulli facti sunt & manserunt per totam vitam surdi. In pago, Raden dicto, eodem morbo infecto, commorabatur destillator quidam chymicus, qui gloriabatur, summo se cum fructu uti spiritu nitri, instillatis in mensuram aquæ puræ, vel cerevisiæ Mindensis levis, quinquaginta ad manifestam usque aciditatem guttis, dato postea liberaliter tepido potu hoc medicato. Nec contemnendæ virtutis deprehendi hoc experimentum, quo in aliquibus fluxus alvi cruentus quandoque suscitatus, non sine levamine cephalalgicæ aliorumque symptomatum, tantum quod qui eodem servari, paullo diutius imbecillitate ventriculi & intestinorum laborarunt, cachectici quasi facti, demum tamen etiam congruis remediis ad sanitatem traducti. Ego vero ad præscindendum ulteriorem contagii progressum, iis, qui nobilioris fortunæ & conditionis erant, præter moderationem & temperantiam, in victu, regimine & animi affectibus, & vitanda refrigeratione, suasi moderatum vini boni usum. Qui sanguine crasso & gravi abundarunt, uti Westphali ob. victum durum & crassum fere omnes, his sanguinem subtrahere jussi, & mane alternis diebus assumere dosin tincturæ bezoardicæ, vel pulveris bezoardici, expectando postea sub temperato calido regimine cuticula-

rem excretionem auctiorem, quæ etiam tam in locis infectis, quam alibi versantibus, egregie profuerunt. Cæterum sanos ab ægrotis, quantum fieri potuit, separari iussi: pro medicina pulverem ex cornu cervi usto & lapidibus cancrorum leniter nitrosum, cum pauxillo camphoræ cum roob sambuci, aqua & aceto vini singulis fere assumendum ordinavi: qui in primo morbi insultu sæpius usurpatus alios statim à morbo liberavit.

Epicrisis.

Nulla fere regio tam ferax morborum acutorum præsertim febrium catarrhalium mali moris atque petechialium, quam Austria & Pannonia. Unde etiam peculiare & grave huius morbi genus Hungarica κατ' ἐξοχήν febris, audit. Evenit autem hoc plures ob rationes. Aestus interdiu his in regionibus est intensior; etiam autumno, & vina ob id generosa admodum & dulcia facit, noctu vero succedit algidior aura, & ob excessivam hanc subitam cœli mutationem excretio salutifera, potissimumque quæ per cutis poros succedit, mirifice turbatur ac intercipitur. Dein victus ibi solennis admodum plenus, ex esu carniū & vini generosi potu, aquæ autem non adeo salubres, quibus sanguinis facile corruptibilis copia ingeneratur. Hinc non mirum est, quod frequentes ibi corrupti & putridi maligni morbi, imprimis in militibus & qui victus illius infueti, simul inordinate vivunt, semicoctis & male præperatis cibis ventriculum onerant, noctu excubias agunt sub frigida aura & in locis humidioribus & frigidioribus degunt ac dormiunt. Neque etiam mirum, dispositionem ad hos morbos cum militibus huc venientibus alio transportari, sub quiete & ingluvie in hybernis, corruptos succos augeri, cruditates prima in regione accumulari, ac tandem in apertum perniciosum morbum hyeme præsertim, erumpere.

Id autem peculiare habet hic morbus, imprimis in iis qui sanguine abundant, ut caput petat; hinc statim in principio venæ sectio suadenda: si vero ex stomacho vitiosorum humorum ex ingluvie & toto corpore huc confluentium colluvie obfesso, eveniat, optimum utique consilium statim in principio, clementi, efficaci tamen emetico, stomachum, vel intestinorum simul canalē expurgare. Quem in finem ego quidem commendare soleo decoctum mannatum, cum dimidia vel una drachma radicis hypecacuanhæ, aut infusum mannæ ex vino cum duobus tartari emetici granis. Sic datis post hanc evacuationem bezoardicis & leniter diaphoreticis, cura succedit longe felicius.

Ex singularibus etiam in hac lue fuerunt sudores copiosi, frigidi, per aliquot dies & noctes manantes, vapidum acorem spirantes, non tamen funesti. Hippocrates enim Sect. IV. aph. 37. malos eos pronunciat & mortis prodromos. Nos quoque largimur, quod sudor frigidus qui internæ visceris cuiusdam inflammationis, vel sphacelationis comes & tantum particularis est, internis calentibus & externis frigentibus, plerumque sit funestus. Sed longe aliam ejus frigidi sudoris efferationem, qui à defectu caloris & virium prostratione oritur, docet experientia. Luculentū hanc in rem est testimonium Raygeri in schol. observ. Spindleri obs. XCV. sic habens: vicissim sæpius & ego in morbi declinatione post XIV. dies vi-

Frid. Hoffmanni Oper. Tom. II.

ribus bene constitutis & rite se habentibus, reliquisque bonis signis apparentibus, in calido corpore frigidos observavi sudores, post febres acutas & malignas bene judicatas, cum allevatione magna erupisse & ultra XXIV. horas durasse. Quanquam autem huius generis sudores non ad mortem tendant, magnam tamen dissipationem caloris & virium indicant. Hinc si unquam, certe tunc succurrendum analepticis, diæticis æque ac pharmaceuticis, corpus crebrius linteis calidis detergendum & fricandum, quo per externa internus calor excitetur, nec æger in limine recuperandæ sanitatis constitutus deficiat.

Vicissim in pessimis signis fuerunt sudores ab initio & per totum morbum effusius manantes, cum urina perpetuo tenui & copiosa. Hæ enim symptomaticæ sunt excretionēs manifestumque præbent indicium colliquationis & dissolutionis elementorum sanguinis mixtionem constituentium. Et secedente tam copiose sero, crassior evadit cruor & ad cerebrum delatus, in vasis meningum capillaribus facile stagnat & inflammationem inducit.

Quod præterea spiritus nitri cerebro & liberè in aqueo vehiculo datus, quibusdam eximie profuerit, partim acido tribuendum, quod putredini resistit optime, partim stimulo, quem intulit intestinis, quibus vellicatis sanguinis & humorum impetus à capite ad inferiora vocatus & alvi fluxus cum euphoria proripatus. Sed longe tutior clystus antimonii sulpharatus, cum diluente tenui potu sufficienti copia exhibitus, quem ego, ceu præstantissimum auxilium, deprehendi & commendo.

Cæterum invadentibus exitialibus hisce morbis, id potissimum perito agendum est medico, ut propagationem & progressum contagii tempestive antevertat. Etenim longe facilius est, corpora ab insultu harum febrium defendere, quam infecta & oppressa perfanare. Ac nisi peculiare beneficium naturæ in curatione concurrat, omnia frustra molitur medicus, quantumvis doctus atque peritus.

● OBSERVATIO II.

Juvenis robustus, sed ob vitam sedentariam sanguine non adeo puro plenus, animum laxandi causa Januario exeunte ruri exspatiatus, societatem cerevisiam gravem & spirituosam potantium offendit. Affidet cum iis, & vesperi domum iterum recedens, corpus admodum perfrigerat. Die post de molesto dentium conqueritur dolore, cum corporis lassitudine viriumque languore plane insolito. Altero die accedit tussis, cum scretu, coryza, & æstu non tamen adeo gravi. Aucta vero præterea debilitas, appetentia perit cum somno, intercurfarunt subinde horripilationes & extremorum refrigerationes, caput torpidum fuit, licet æger non lectum peteret, sed officio suo fungeretur. Accedente quarto die morbus ægrum affixit lecto; hinc consultus medicus, qui serum ex lacte cocto succo citri coagulato bibere iussit. Factum id, subsequutus alvi fluxus vigesies & ultra, ægrum intra diem & noctem ad fellam urgens. Inde vires magis collapsæ, partium tremor cum delirio, alvo quamvis fluente accessit, sub quo quinto die comparuerunt maculæ petechiales, atrociam morbi tamen non levantes, sed sexta stercora & urinam sine sensu reddidit, respiratio facta anhelosa & nocte septimum diem antecedente mors excepit.

Febris petechialis sub diarrhoea funesta.

Epicrisis.

Hanc etiam febrem fuisse ex malignis illis catarrhalibus & petechialibus, quæ per aliquot menses nostra hac in urbe circumviverunt, testatur dentium dolor rheumaticus, coryza, & raucedo cum tussi. Malignitatem autem junctam ingens statim virium lapsus, appetitus plane prostratus & somni defectus, cum pulsu celeri, debili atque frequenti, nec non capitis dolor ac torpor faciunt testatum, licet ægroti, adstantes ipsique minus periti medici, hæc haud raro minus ex æquo attendere soleant. Serum igitur lactis in principio ad alvum laxandam & sistendam sanguinis ebullitionem, non quidem sine fructu commendandum. Sed ubi catarrhales affectus jam per aliquot dies adfuerunt, minus proficua sunt ea remedia, quæ alvum turbant & serum impurum ad interiora ac inferiora vocant. Licet etiam alvi laxitas, in catarrhalibus malignis criticis diebus sponte proveniens, admodum sit salutaria; primis tamen diebus alvum stimulantia nocent. Intus enim retinent materiam malignam, ac ut inflammatio ventriculi & meningum tandem sphacelosa inducatur, faciunt. Tum potius semper perspiratio servanda libera & serum corruptum dissipandum per blanda diaphoretica & regimen moderatum. Neque minus in plethorico ejusmodi corpore ante invasionem admodum proficua fuisset venæ sectio, subjuncta postea moderatiori & longiori diaphoresi.

OBSERVATIO III.

*Petechia in
sorore &
fratre di-
versa.*

Virgo triginta aliquot annorum, mensium anomaliis ab aliquot annis obnoxia, anno abhinc affecta fuerat erysipellate capitis, quod in fistulas mali moris, glandulas colli, genas faucesque perforantes, desiit. Sanata tamen adhibita omni diligentia à medico & chirurgo; sed ab eo tempore, languidior mansit & macilenta. Januario hujus anni ineunte subito ipsam infestavit ingens capitis dolor, cum torpore, somnolentia, virium languore, valida quoque tussi sicca. Increvit hæc debilitas indies, nihil plane appetiit, nec dormivit, simul conquesta est de præcordiorum & spirandi angustia, pulsu frequenti, sed debili micante. Sexto die passim in pectore comparuerunt punctula, septimo accessit delirium, sequutæ convulsiones epilepticæ ac mors, post quam maculæ magis venerunt in conspectum. Frater demortuæ insperato hoc discessu mirum contristatus, paullo post pariter conqueri cœpit de dolore capitis & artuum, sine catarrhosis defluxionibus, vires conciderunt, appetitus periit, somnusque defuit, quarto die petechiæ visæ ac pathemata mitigata, septimo cum caloris incremento sub inquietudine & anxietate accessit purpura & petechiales maculæ disparuerunt. Successive tamen convaluit, terreorum bezoardicorum & absorbentium cum succo citri & aquis diapnoicis & analepticis usu ac potu pitisanæ.

Epicrisis.

In virgine hac orta febris sine contagii suspicionem. Sed docet omnino experientia, corpora valetudinaria imbecilliora & ubi impuritas ex mensibus retentis, gonorrhœa, vel lue venerea in sanguine & succis lymphaticis resistat, facile corripit grassantibus ex communi aëris insalubris vi-

tio morbis, & promte quoque suscipere contagium, quod nihil metuentibus à medicis, chirurgis & assistentibus contagiosis morbis decumbentibus, assertur. Quod autem ab initio statim exquisitus & continuus capitis adfuit dolor, cui deinde delirium cum convulsionibus epilepticis junctum, id procul dubio ob debilitatem capitis ex perpeffo erysipellate exulcerato factum. Dein frequentioris etiam experientiæ est contagiosis morbis defunctorum consanguineos, sola sæpe animi perturbatione ac mœstitia diuturna, in eundem incidere morbum. In his vero à sanguinis missione, nisi corpus sit eminentius plethoricum, merito abstinendum, item à valide commoventibus & evacuantibus, ac vires potius erigendæ, perspiratio secundanda & succorum vitalium integritas conservanda. Petechias comparente purpura rubra disparuisse, in exanthematicis hujus anni febribus sæpe visum, & quidem sine damno, sed ubi declinante petechiali morbo supervenit purpura alba, id ut plurimum fuit lethale.

OBSERVATIO IV.

Acres cum commilitone rixas habuerat adolescens viginti annorum, simulque terrore fuerat perculsus. Nocte insequenti somno caruit, ac debilitatem, lassitudinem appetitusque prostrationem per dies aliquot persensit. Quinto post die horrore, præcordiorum anxietate & æstu præternaturali affectus est, cum pulsu celeri ac debili. Medicus in consilium vocatus, statim exhibuit vomitorium, sanguinem subtraxit & subjunxit tincturam bezoardicam, nec non pulverem bezoardicum cum & sine nitro. Sexto die comparuerunt maculæ rubræ & nares aliquoties sanguinem stillarunt, somnus fuit paucus, vel nullus, urina sanorum similis, vires tamen non penitus visæ prostratæ, sed æger surrexit subinde & obambulavit, defuit quoque delirium. Bene igitur omnia cessura spes fuit & morbus lenissime bezoardicis temperatis tractatus. At quum septimo è lecto surgeret æger, & per horæ quadrantem erectus sederet in conclavi licet moderate calido & sufficienter tectus, subito in lipothymiam incidit cum horrore cutis, pleræque petechiæ evanuerunt & quæ manserunt, nigræ comparuerunt, accessit ingens præcordiorum anxietas cum furore, ita ut gladium in adstantes stringere & è fenestra se præcipitem dare vellet. Usurpatus quidem pulvis bezoardicus cum nitro & camphora, conquievit etiam tantisper delirium, sed debilitas increvit, horripilatio perstitit, accesserunt convulsiones & sub finem diei septimi mors inopina.

*Petechial
febris ex
suis ere-
lethalis.*

Epicrisis.

Nunquam periculo carent petechiæ, licet omnia videantur pacata & medicus conferat cuncta. Quodvis enim accidens in pejus omnia mutare valet. Heic situs erectus tam pernicialem mutationem, delirium & mortem adduxit. Qui quantopere in morbis acutis & exanthematicis sit noxius, supra jam pluribus monuimus, ac ut evitetur iterum monemus iterumque.

OBSERVATIO V.

Generosa scemina quadragenaria, corporis obesi, laxi & spongiosi, genio indulgens variis-

*Petechia
febris vi-
bono san-
que ta.*

que eduliis dulcibus, acidis, lacte, vino quotidie delectata, tempore quo malignæ exanthematicæ febres circumibant, iisdem fere, quam quibus hæ incedebant, affecta fuit pathematibus. Adfuit quippe corporis lassitudo cum inquietudine, cutis horripilatione, capitis dorſique dolore, accedente poſtera die præcordiorum anxietate viriumque proſtratione. Datum illico lene emeticum, quod miram vitioſorum humorum colluviem evexit, & anxietatum & cephalalgiae levamen attulit. Tertio die vena in manu pertuſa & ſanguis largiter eduſtus, qui frigefactus cruſtam glutinoſam in ſuperficie contraxit. Sed poſt venæ ſectionem pejus habuit: ſopor præſto fuit continuus, facies tumida & fauces ſqualidæ factæ, urina vero tenuis naturali ſimilis ſeceſſit. Quinto die ſpiritus factus difficilis & poſt noctem admodum inquietam prodierunt maculæ rubræ in collo, dorſo ac ſcanibus, quæ quidem anxietates levarunt, ſoporem autem non ſuſtulerunt. Interim ob alvum clauſam clyſteres injecti, qui ingentem foetidorum ſtercorum copiam evocarunt: ſeptimo etiam die largo corpus ſudore perſuſum. Nihilo tamen minus ſine ſenſu ac motu jacuit ægra, appetens vinum, quod ipſi ſuſpenſa manu conceſſum. Quum vero inde melius haberet ac virium animi corporiſque ſentiret incrementum, poſt trihorium quatuor iterum vini Rhenani unciae potui datæ, iſdemque potis, mirifice ſe viribus reſci aſſeveravit. Sequutus poſtea ſudor largior, inſuſo theæ adjutus, ſopor mentiſque ſtupor diſceſſit, corpus quoque cum animo vires recepit, & ægra ad ſanitatem demum traduſta, alternis ſemper, vel ternis diebus, alvo laxantibus ſubduſta.

Epicriſis.

Quo major pravorum ſuccorum prima in regione colluvies; eo graviora etiam in febris popularibus mali moris adſunt ſymptomata. Urinæ quoque plerumque minguntur tenues, præcordia anguntur & caput exquisite dolet. Ad hanc igitur circumſtantiam artifice cum cura attendendum ſemper. Tum enim optimum conſilium, illico leni emetico ſordes expurgare. Merito etiam ſanguinis miſſioni præmittitur purgatio. Venæ ſectio heic quidem minus feliciter ceſſiſſe viſa eſt, ſanguine ad caput alleſto & ſoporem faciente. Quare etiam practicorum plurimi venam in ſuperioribus pertundere diſſuadent, ac ut potius in pede id fiat, præcipiunt, eo quod inde non facile congeſtio ſanguinis ad caput proritetur. Cruſta autem illa glutinoſa ſanguini emiſſo innatans non mali fuit ominis. Nam *Baglivus* jam *lib. I. opp. pag. 149.* diſertis verbis ſcribit ac teſtatur: *obſervamus in xenodachio omnes fere ab acutis evaſiſſe, quorum ſanguini venæ ſectione extracto cruſta alba atque chyloſa ſupercrescebat: contra mortuos, quorum ſanguis valde rubicundus.* Et certe ſanguis conſiſtentia craſſior non tam facile diſſolutorio motui inteſtino obſecundat, quam tenuis partibus ſalino-ſulphureis ſcatens. Demum notandum & hoc, quod vinum temperatius, in malignis & petechialibus etiam febribus, non noceat, facta petechiarum eruptione & poris adaperſis, ſed quod potius vires refocillando, ſecretorios & excretorios actus partium eſſoetarum egregie juvet. Cavendum vero ab eo, ſi inflammationis adſunt indicia in ventriculo & primis viis, ſi phrenitis, ſi cutis arida & ſicca.

OBSERVATIO VI.

Biennio abhinc febris maligna contagioſa, non quidem epidemice, ſed tantum ſporadice circumibat, potiſſimumque complures ex domeſticis orphanotrophei Halenſis infeſtabat. Eundem hunc morbum nanciſcebatur filius Inſpectoris huius orphanotrophei, theologi, tam eruditione, quam pietate & moderatione celebris, ipſe paedagogii Regii alumnus. Pater impenſius hunc ſuum natum deamans, contriſtari non modo cœpit & de ſalute, tam capitali morbo correpti angere, ſed crebrius decumbentem viſitavit, quin lecti & hypocausti ſocium fecit, ac cum univerſa familia eodem in conclavi cibos cepit. Hinc autem factum eſt, ut omnes ſucceſſive à contagio inficerentur. Pater quidem ſtatim tertio poſt die ſummum virium languorem, capitis artuumque dolorem, ſomnum inquietum, anxietatem & ardorem circa præcordia, cum plenaria ciborum inappetentia expertus eſt. Acceſſit tonſillarum tumor, ardor & æſtus faucium, quinto die delirium, poſtea ſudores colliquativi, nono placida mors. Decumbente hoc adhuc, uxorem idem morbus proſtravit iſdemque affecit pathematibus, eodem, altero poſt obitum mariti die, funeſto eventu. Excepit virgo his conſanguinitate junſta, quæ quinto die pariter exſpiravit. Ita ut intra quatrimum tres hæ perſonæ obirent. Medici, qui curationi præerant, catarrhalem morbum eſſe cenſuerant, & ob id venæ ſectionem omiſerant. Sed quum morbus ad reliquos etiam domeſticos procederet, & rumor paſſim increbeſceret, eundem tantum non eſſe peſtilentem, alius medicus in conſilium vocatus, qui ob capitis dolores, venæ ſectionem inſtituendam eſſe in principio ſuaſit. Hinc omnibus, quotquot poſtea corripuit, ſimul ac conqueri cœperunt, vena in pede pertuſa & conveniens ſanguinis quantitas eduſta, tam felici effectū, ut non tantum morbus mitior incederet, maculæ petechiales cum purpura, ſecus quam in primis comparerent, verum etiam ex ſeptem nec unus occumberet, ac ipſe contagioſus morbus ſic deſineret.

Epicriſis.

Perquam utique notatu dignum, ſervatos eſſe qui ſanguinis miſſionem admiferunt, qui omiſerunt, ſub gravi & diuturno delirio periſſe, ad quem tamen eventum ſumma animi triſtitia multum forte contulit. De venæ ſectione quidem, an in ejuſmodi acutis, malignis contagioſis & exanthematicis febribus proſit vel noceat, medici adhuc in utramque partem diſceptant. Ego vero cenſeo, abſolute nil poſſe deſiniri, ſed conſiderandas eſſe à medico circumſpecto ac perito circumſtantias omnes, quoad indolem, cauſam, ſymptomata & tempus morbi, quoad ſubjectum, corpus ægotans ſolidorumque & fluidorum in eo diſpoſitionem. Ego quidem multiplicitate edoctus ſum obſervatione, verum eſſe generalem hunc practicum canonem: ſi corpus eſt admodum plethoricum, amplis vafiſ inſtructum, ſanguinis miſſioni aſſuetum, ſi morbus ſanum antea corpus corripuit, nec à communi ad putredinem inclinante aëris vitio obortus, ſi vehementer ſtatim caput petit ac delirium metuendum; tum utique ante invaſionem tam ad præſervationem, quam etiam mox in principio, nunquam nocere poteſt moderata ſanguinis miſſio in pede; quin ſub his circumſtantiis in morbo Hungarico ipſaque peſtilentia

Febris maligna contagioſa venæ ſectione compreſſa.

lencia venæ sectio est utilissima. Subtracta enim nimia sanguinis & humorum copia, cordis & systematis vasorum systole longe liberior redditur atque vegetior, una cum motu humorum ad exteriora, quo per universale illud emunctorium cutis nocens materia expellitur atque diffatur. Neque minus à sanguinis in partibus inferioribus missione insignis ipsius à capite fit derivatio. Nam res certæ est experientiæ, sub acerbo capitis dolore, illico cordis & arteriarum pulsus immutari, irregularem fieri & inæqualem, & pendentes inde functiones vitium capere; & vicissim si caput cum cerebro & nervis à sanguinis stagnatione liberatur, pulsus mox in melius mutari una cum motu humorum progressivo vitali. Quod si vero adductæ hæc circumstantiæ defunt, corpusque minus sanguine redundat, noxia omnino & pernicialis sanguinis missio intempestiva. Quumque pauci ex medicis prudentia polleant discretiva, non mirandum, generoso hoc remedio plus sæpe damni, quam emolumenti afferri.

OBSERVATIO VII.

Febris maligna exanthematica jugulari emetico,

Quum anno MDCLXXXIX. hyemali tempore grassaretur febris maligna, quandoque exanthematibus stipata, multosque, præsertim perverfa medicatione exceptos, trucidaret, tota domus Consilarii cujusdam aulici eadem infecta est, & ipse cum uxore graviter decubuit, nostra tamen opera, benedicente DEO, regimine maxime temperato & lenioribus diaphoreticis, convaluit. Postea fratrem ipsius similis invasit morbus, iisdem cum symptomatibus, virium prostratione inprimis, capitis & artuum dolore, cum inquietudine. Ego statim in principio vocatus, lene exhibui emeticum ex aquæ florum sambuci, cardui benedicti ana uncia, tartari emetici granis duobus, mixturæ simplicis gutt. XX; quo assumpto ter vomuit viscidos cum bile humores & post vomitum valide sudavit. Promotus hic sudor circa noctem pulvere ex cornu cervi usti, antimonii diaphoretici, lapidum cancrorum, ana drachma una, cinnabaris, nitri puri ana drachma dimidia, camphoræ granis duobus, qui in sex doses divisus & ter quotidie assumtus. Potui præterea data ptisana ex cornu cervi, scorzonera, cum succo citri. Quibus morbus prima in herba feliciter jugulatus & æger post aliquot dies sanus prodiit ac vegetus. Quumque brevi post famuli bini eodem modo conqueri inciperent, eadem methodo facili & explicita curatione ipsos ex ancipiti levavi.

Epicrisis.

Attentionem utique hæc meretur observatio, cujus generis plures notavi, malignum scilicet periculosum morbum, præsertim si à contagio accidit, corporibus alias bene valentibus, nec adeo impuris, vel imbecillis, mox in principio congruis remediis opprimi posse ac jugulari. Scilicet quum miasma contagiosum primo omnium sese cum salivali latice misceat, sub hoc fermentescibili succo acrem malignam virtutem propaget atque multiplicet, hincque in naribus, faucibus ac oesophago catarrhosi quid simulet, & salivale fermentum destruendo, appetitum obtundat, quin etiam acredine sua nauseam & cardialgiam faciat; sane nihil magis indicatur atque è re est, quam ut istud proxima via per

efficax conveniens pharmacum ocysus, antequam latius procedat ex primis viis, vomitu & salivatione everratur, postea vero ministerio accommodi diaphoretici reliquæ miasmatis virulenti per poros cutis evaporent. Sed cavendum omnino ab alexipharmacis, inter quæ nunime connumeranda camphora, præsertim cum nitro remixta. Nam hæc neutiquam, ut vulgaris fert opinio, sanguinem commovet, sed vel unica olei cinnamomi, aut caryophyllorum guttula, plus exæstuat, quam camphoræ drachma dimidia. Non tamen prætermittendus potus diluens sufficiens temperatus ex ptisana, ad componendum sanguinis orgasmum. Ego novi practicum quendam non infelicem in more habuisse, in principio catarrhalium & malignarum petechialium, simul ac languor & ardor corpus infestavit, serum ex lacte cocto cum succo citri factum, largiter, sed per vices potui dare, tam felici effectu, ut post aliquot dies ardor, dolor, languor & gravedo disparuerit.

OBSERVATIO VIII.

Plures adhuc suppetunt observationes, sed ne nimii simus in historiis, brevitatis causa quædam duntaxat salutaria ex observationibus deprompta monita afferemus. Scilicet frequentiori experientia compertum habeo, ut in quacunque exanthematica & contagiosa febre, sic etiam in petechizante & petechiali, non ita multo post contagio tactos fuisse, præsertim ex domesticis, qui ad arcendum morbum laxans vel purgans assumere. Licet autem subductio in benignioris indolis exanthematicis minus noceat, si tamen pejoris naturæ, uti petechiales, præstat utique ab omnibus alvum stimulantibus abstinere. Etenim ad cicurandam veneni contagio concepti indolem ipsumque iterum exturbandum, tum præsevationem in metuentibus, tum ad curationem in affectis, nihil aptius & efficacius, quam perspirationem liberam servare & integram, qua, præsertim in imbecillioribus, per alvum vacuantia imminuta, venenum hoc magis detinetur intus. Hinc *Celsus* jam inter præcepta ad pestilentiae incursum arcendum etiam habet hoc: quod alvus non sit movenda, aut si jam per se mota est, comprimenda.

II. Crebriori edoctus sum experientia, declinante ac finito morbo, periculosiores, immo lethales excitari recidivas, quando ægri corpus plus justo auræ frigidiori exponunt, in pavimento nudis pedibus incedunt & ventriculum adhuc languentem nimia ciborum, tanto magis carniū, insalubrium aut semicoctorum copia, simul ac semel onerant. Quare minus etiam sanitati suorum consulunt ii medentium, qui nimis cito appetentiam usu elixiriorum stomachicorum, quæ spiritus mineralis acidus ingreditur, excitare contendunt. Et novi utique tum à copiosiori cibo, si non recidivæ, tamen statum quendam cachecticum, cum tumore pedum & abdominis accessisse & tardissime penitus convalescere ægros.

III. Neque minus experientia constat, diu omnino latitare posse susceptum in corpore contagium, interdum per aliquot septimanas, antequam in actum ducatur & pernicialem vim exerat. Atque hinc fit, ut qui eadem cum ægris domo contenti, sæpe successive unus post alterum aliquot hebdomadum spatio morbo afficiantur, licet jam antea aliquamdiu de lassitudine spon-

Purgatio ad præsevationem minus ficta.

Ex regimine & diætâ ad perversam recidivam.

Contagium diu delucere potest.

spontanea & functionum vitalium & animalium languore fuerint conquesti. His igitur cito succurrendum congruis diætericis & pharmaceuticis, præsertim iis; quæ circulum sanguinis & perspirationem placide juvant, quæ putredini resistunt & crasin sanguinis custodiunt, de quibus supra mentio facta, quo ocyus venenum iterum è corpore proscribatur.

Et cum vestimentis affertur.

IV. Sæpius quoque observavi, quod tempore insalubri, quo ob aërem gravem febres mali & benigni moris catarrhales & petechiales populares habuerunt circuitus, ex benigna facta sit præter spem maligna, à contagio, quod medici à vere malignis & petechialibus decumbentibus, cum vestimento aut capillitio attulerunt. Ut adeo non sine ratione à Principum aulis & persona arceantur medici, qui curationem malignorum & contagiosorum morborum tractant, & sæpius inter ægrotos versantur.

C A P U T XII.

De Febre Pestilentiali.

THESES PATHOLOGICÆ.

§. I.

Definitio.

Febbris pestilentialis est acutissima, à miasmate venenato ex locis orientalibus advecto orta, ac nisi vigore motuum vitalium venenum per bubones & carbunculos cito propellatur, lethalis.

§. II.

Differentia.

Differt in eo hæc pestilentialis ab aliis contagiosis, malignis & exanthematicis febribus, quod omnium sit acutissima, ac interdum primo statim, vel secundo die jugulet. Dein nostris in regionibus nec epidemia, nec sporadica ex prava victus vel vivendi ratione, aut insalubri aëris constitutione prognata, sed sub aëre saluberrimo, à solo contagio ex calidissimis jam infectis orientalibus plagis advecto, ortum ducit. Tum hoc habet peculiare, quod non ut aliæ malignæ febres & putridæ, per largos sudores, alvi fluxus, aut alias excretiones, sed tantum quod veneno ad partes externas glandulosas critice & salutariter protruso, per tumores in abscessus desinentes, solvatur. Porro secus ac in aliis contagiosis & petechialibus quoque febribus, tanta constantia & tenuitas miasmatis pestilentialis est, ut prompte adhæreat rebus porosis, & ad multa milliaria, integra manente perniciali sua vi, transferri possit. Deinum singulare in hoc miasmate infectivo, quod prava & multiplicativa ipsius indoles intenso frigore non modo cicuretur, sed & plane extinguatur, quo fit, ut tempestate frigida & in regionibus præfrigidis, rarius, vel plane non, sub calido autem coelo & vehementissime & frequentissime grassetur.

§. III.

Initium.

Quemadmodum vero in omnibus contagiosis & malignis febribus miasma venenatum cum aëre haustum salivali fermentescibili latici sese insinuat, ac in his quas pertransit partibus perniciousam suam vim exserit primum: ita idem etiam quam maxime evenit in pestilentiali contagio. Hoc enim mox caput, cerebrum, nervos & pu-

rissimum illud lymphaticum nervorum fluidum petens, capitis torporem, gravitatem, somnolentiam & acerbum dolorem, sensuum stuporem, rerum omnium oblivionem, inquietudinem, vigilias ac virium prostrationem inducit. Per fauces ad ventriculum vectum, ciborum fastidium, nauseas, præcordiorum anxietatem, cardialgiæ syncopitæ, vomendi conatum, nec non vomitum facit. Dein ad membranas medullæ spinalis tunicasque arteriarum nerveas delatum, horrorem, pulsus languidum, parvum, contractum, frequentem, quin lipothymiam, producit. Quæ quidem omnia statim inter initia sunt ordinaria pestis indicia atque symptomata, tanto vehementiora & celerioris operationis, quo plus venenum pestilentialiale aliorum contagiosorum & malignorum morborum miasma virulentia superat.

§. IV.

Quæ dein sub ipso morbo præsto sunt pathemata gravia & multa, nullibi plenius & accuratius enarrata, ac in prima de hoc morbo descriptione, quam vetustissimus Historicus *Thucydides*, lib. II. de bello Pelopones. de peste Attica dedit. Retinebimus igitur hanc morbi historiam, quam posteaquam dixit ex Aethiopia in Aegyptum, & inde Athenas pervenisse, sic insit: ego vero quod factum est narrabo; & quibus animadversis, si quando rursus incidat, possit aliquis provisum quippiam non ignorare, hæc monstrabo, qui tum ipse morbo laboravi, tum alios laborantes vidi. Itaque annus ille, ut in confesso est, inter omnes maxime aliorum morborum immunis fuit; quod si quis alio prius morbo laborasset, in hunc omnes decumbebant. Alios vero ex nulla occasione, sed continuo, quum sani essent, primum capitis calores invadebant vehementes & oculorum rubores, & inflammationes, atque internæ partes, & fauces, & lingua sanguinolentæ statim erant, spiritus difficilis & fortens exibat. Deinde ex his sternutatio & raucedo succedebant, ac non multo post labor in pectus descendebat cum tussi vehementi. Quod si quando ad cor inhæsit, tum id subvertit, tum purgationes bilis, quæcumque à medicis recensentur, subierunt, atque hæc magna cum defatigatione. Plerisque singulus incidit inanis, convulsionem afferens vehementem, quæ nonnullis sub hac cessabat, aliis vero multo post. Porro corpus extrinsecus tangenti non admodum erat calidum, neque pallidum, sed subrubrum, lividum parvis pustulis & ulceribus scatens. Internæ vero partes usque adeo flagrabant, ut ne tenuissimum quidem stragulum, aut linteum impositum, neque aliud quippiam, præter nuditatem, ferrent. Ac jucundissimum plane erat in aquam frigidam seipsos conjicere; quod multi fecerunt ex iis, in quibus cura non adhibita, qui in puteos se dederunt inexhausta siti vexati, & perinde erat plus ac minus bibere. Atque impotentia quædam, qua iis quiescere non licebat, & vigiliæ perpetuo comitabantur. Corpus, quandiu morbus vigeat, non contabescit, sed præter spem labori obstebat. Quam ob rem vel interierunt plurimi novem & septem diebus ex interno aestu, cum aliquid roboris adhuc haberent; vel si effugissent, morbo in ventrem irruente, & exulceratione in eodem facta, & diarrhœa simul immodica subeunte; plerique mox præ imbecillitate perierunt. Etenim initio sursum facto malum, quod in capite primum con-

Et decursus morbi.

derat, universum corpus pervadebat. Quod si quis maxima hæc superasset, huic extremarum partium noxa superveniebat. Malum enim ad pudenda & ad summas manus & pedes decumbebat; & complures his amissis evaserunt, non nulli & amissis oculis. Non nullos etiam, quum primum exsurgerent, cepit oblivio rerum æque omnium, ac tum se ipsos, tum amicos ignorabant. Morbus igitur, concludit paucis interjectis, (ut alia multa prætermittamus insolita, quæ cuique seorsum evenerunt, aliis alia) talem in universum habuit ideam. Alius præterea nullus infestavit eo tempore ex iis, qui consueti habentur, si quis autem accidisset, in hunc desinebat. Ac perierunt non nulli quidem ob negligentiam, alii vero diligenter etiam curati. Neque ullum, fere dixerim, comperium est remedium, cujus usu homines adjutos esse constaret. Nam quod uni opem tulerat, id ipsum officiebat alteri. Tam vero nullum corpus visum est adversus morbum sufficere, quod ad robur & debilitatem attinet, sed sublata sunt omnia, quavis etiam vivendi ratione ad curationem uterentur. Res porro miserrima fuit in universo morbo tum animi dejectio, cum quis se ægrotare intelligeret; nam mente protinus ad desperationem conversa, multo se ipsos magis consternebant, neque reluctabantur; tum vero quoniam alter ab altero, dum curationis officio fungerentur, instar ovium occidebat, atque hoc maximam cladis partem attulit.

§. V.

Subjecta.

Neque tamen in peste unius ejusdemque indolis semper sunt symptomata, sed multum utique secundum temperamenta & constitutiones corporum variant, quam diversitatem probe cognoscere & scrutari oportet medicum. Id vero omnes qui de pestilentiali morbo scripserunt unanimi suffragio confirmant, corpora quæ spongiosioris, rari & porosioris, nec non obesi sunt habitus, temperamento sanguineos & phlegmatico-sanguineos, sexu foeminas, ætate juniores ac infantes, animo timidos & abjectos, vitæ genere pauperes, insalubrem diætam colentes, crapulis deditos & comestationibus in seram noctem indulgentes, longe celerius corripitur & gravius decumbere hoc morbo, quam qui animo fortes ac intrepidi, corpore macilenti, nervosi & amplioribus vasis dotati, viri, senes, fluxui hæmorrhoidali obnoxii, item qui fonticulos & ulcera gestant aperta. Neque minus per observationes compertum, nihil ad suscipiendum & deleteriam miasmatis virtutem intendendam aptius esse metu, timore mortis animique consternatione, adeo, ut etiam quosdam solo terrore peste affectos & extinctos esse constet. Nam hi animi affectus sunt inter omnes præcipui, qui vitalem cordis arteriarum motum cum sanguinis circulo minuunt, destruunt & vires tam vitales, quam naturales & animales dejiciunt, quum tamen motuum beneficio venenum conceptum sit exterminandum.

§. VI.

Miasmatis natura.

Cujus autem porro indolis ac specificæ naturæ sit venenum, quod pestem excitat, à priori accurate determinare admodum difficile, quia sensibus minus obvium. Quantum tamen ratione assequi & à posteriori judicare licet, duplicis esse videtur, partim sulphureæ putridæ multiplicativæ, instar fermenti, partim subtilis valde acris

& causticæ, plus tamen alcalinæ, quam acidæ, naturæ. Putrida enim valde & peregrina sulphurea indoles ex eo patet, quod omnes maligni è putridis, quæ ex cadaveribus inhumatis, aquis stagnantibus putrescentibus & aliis foetidis excrementitiis fordibus, trahant, & quod ipsum hoc miasma illico contamine nervorum fluidum, motum solidorum systalticum sistat & corruptionem sphacelofam succis inducat. Causticam autem subtilem acrimoniam inesse miasmatis, ex eo concludendum, tum quod contagiosorum morborum ingressum ut plurimum antecedit copia infectorum sale caustico præditorum & ex putredine genitorum, tum etiam, quod nerveas fibrillas vellicando & rodendo, dolorem, ardorem, tumorem & inflammationem causetur, conspicuum satis in bubonibus atque anthracibus.

§. VII.

Pestilentialia hoc intus susceptum venenum, illico, ut supra diximus, omnes omnino in corpore functiones turbat atque pervertit, ac nisi cito ab internis ad externas partes propellatur, certissime necem infert. Neque tamen hoc ut in aliis malignis fit per largos sudores, neque per alvi, aut urinæ fluxum, neque per hæmorrhoidum, aut mensium profluvium, neque etiam per narium stillicidium, spontaneum æque ac arte proritatum, ut potius, tales, præsertim effusiores excretiones, minentur exitum. Sed salutaris & critica, qua perfecte solvitur pestilentialis morbus, excretio, absolvitur per tumores in externo corporis ambitu prodeuntes; ita quidem, ut non secus ac in erysipellate, intra tertium & quartum diem eadem contingat, & quo citius ac melius, eo magis morbi inde mitescat atrocitas. Formale enim venenum his tumoribus contineri atque excerni, vel ex eo patet, quod si chirurgus lancetta, qua aperti, venam sani hominis incidat, is illico etiam corripiatur peste.

§. VIII.

Duplicis autem generis sunt pestilentialia hi tumores. Primum à Græcis vocatur communi omnium tumorum nomine bubo. Occupant hi bubones maxime glandulosa loca, frequentius inguinales & axillares, quandoque etiam parotides & mammarias glandulas, item maxillares inferiores sub mento, nec non asperæ arteriæ appositæ, ac sese manifestant tumore glandularum duro, dolente, tensivo, cum ardore, ac si boni moris sunt, intumescunt, molliores fiunt & suppurantur. Alterum genus, primo longe deterius, græco nomine audit anthrax, propria significatione carbonem ignitum designans, unde Latinorum diminutivum carbunculus. Celsus quidem lib. V. cap. XXVIII. sic describit anthracem: *rubor est superque eum non nimium pustulæ eminentes, maxime nigrae, interdum sublivida, aut pallida. In his sanies esse videtur, infra color niger est. Ipsum corpus aridum & durius quam naturaliter oportet. Circa quod quasi crusta est, eaque inflammatione cingitur, neque in eo loco levare cutis potest, sed interiori carni affixa est.* Et Mindererus, qui ipse pesti interfuit & de ea egregie scripsit, ita de carbunculis habet: *quando anthrax magnitudine grani sinapis, aut cannabis confedit, contrahit circumlimbum & circum, aut ardentem halonem, amplitudine orbis mensalis, prout carnem & locum attigit. Caro quam tetigit à sana separatur ac uti eschara, seu caro putrida, excidit, ut hiet cavum ac si lupi exedissent.* Ab his carbunculis nulla cor-

Solvitur critica per tumores.

Bubones

vel anthraces.

corporis pars immunis est, obfident tamen quam maxime membranas musculorum & substantiam cutis nervosam ac fibrosam, in dorso potissimum, brachiis ac femoribus. In loco, quem afficiunt, ægri primo pruritum sentiunt exquisitum, si scalpunt, pustulæ emergunt, coloris vel rubri, vel lividi, vel albo-purpurei, vel nigri. Pustulæ compressæ sunt & pure plenæ videntur, ac sub una, vel pluribus ex his, crusta cinerea, vel nigra con- crescit, qua ablata, caro corrupta & spongiosa apparet, cum dolore intolerabili & ardore carnis circumjacentis, ac tandem insequitur totalis par- tis sphacelatio, sive mortificatio.

§. IX.

Quibus autem lethalis est pestilentialis morbus, ex his non nulli primo statim, vel secundo die syncope pereunt, procul dubio ex Panico, quo percussi terrore. Sed plurimi, quando venenum vel non expellitur, vel expulsum subito relabitur, & nervosis tunicis nobiliorum partium pleuræ, œsophagi, ventriculi & intestinorum, nec non meningibus inhærens, inducit sphacelum, qui ocyus ad omnia viscera ipsumque sanguinem ser- pit, quo fit, ut cadavera illico mire foeteant, in- tumescant & citissime putrescant. Quandoque etiam, quando nimia tumorum pestilentialium copia prodit, ob inflammationem, dolorem & ardorem intolerabilem, ex febre symptomata, non secus ac in variolis fieri solet, occumbunt.

PRÆSERVATIO ET CURATIO.

§. I.

Quum in comperto sit, nostris in regionibus pestilentiam non gigni, sed ex remotis locis ad- vehi, non securius utique & certius datur consi- lium præservatorium quam fuga contagii. Vetus enim jam *Celsi* est præceptum, ut adhuc integer, qui tamen securus esse non possit, naviget & pe- regrinetur, quod etiam in peste Italica anni MDLXXV. eximie profuisse, testis est *Natalis Comes hist. lib. XXVII.* Et *Sanctorius Med. stat. Sect. aph. 138.* libere profitetur: *qui aliud reme- dium pro vitanda peste instituunt, quam fugam, vel sunt homines ignorantes, vel volunt æruse- care.* Eandem etiam ob causam optime saluti civium consulunt principes, qui tempore pestis advectionem & accessionem contagii modis ar- cent omnibus, si vero domus fuerit infecta, fa- nos illico segregare & omnem mortuorum su- pellestem comburere jubent, ne cum ea ad alios transferatur & morbus. Omnibus vero grassante pestilentia temperatissime vivendum, vitandus omnis excessus in rerum non naturalium usu, ma- ximeque animi affectibus, & abstinendum à cun- ctis, quæ vires ullo modo deicere, perspirationis successum turbare & cruditates prima in regione gignere possunt. Inprimis animus firmandus, & terror, metus ac pusillanimitas discutienda, quum certum sit, timorem ac terrorem plures in peste necare ac ipsum miasma.

§. II.

Qui autem inter infectos versari necessum ha- bent, his videndum, ne miasma succos vitales subeat, nec salivales intra primas vias stagnantes humores in sui societatem, quod facile fit, per- trahat. Hunc in finem continenda frequens exspitio & oris, cum aceto vini, vel vino col- luitio, vel horum in nares attractio. Major effica-

cia adhuc, si scordio, ruta, vel corticibus citri fuerint imbuta. Acidum enim genuina miasma- tis putridæ & sulphuræ indolis videtur esse an- tidotus, quippe quod teste Chymia mechanica sulphur & salia volatilia figit atque enervat. Qua- re longe tutius est acida degustare, vel in ore continere, quam radices alexipharmacas zedo- riæ, angelicæ, ostrutii &c. masticare. Expedi- t hinc quoque tum vel vinum Rhenanum, vel ace- ti bezoardici aliquot cochlearia, cum aqua aut vino diluti, assumere. Locuples certe hanc in rei testis est *Forestus*: ego, inquit, *um grassante peste, nusquam trepide, plenus civium studio me ad agros conferrem, illis auxiliis ac potissimum mali curii putamine succulento, dentibus attri- to, me munire suevi.* Turcæ, memorante *Cole lib. de morb. acut. pag. 88.* regnante pestilentia, frequentius utuntur succo limonum, quem libe- raliter omni iusculo instillant.

§. III.

Inter externa adversus contagionem præsidia plures commendant fonticulos; inducti forsan pri- mum observatione, qua constat, eos, qui ulcera chronica & scorbutica in artubus gestarunt, à peste & aliis contagiosis morbis fuisse immunes. Multus inprimis in laudanda hac fonticulorum virtute est *Hildanus, Observ. chirurg. cent. IV. obs. XXIII.* sic habens. *Neminem autem, quod notandum, eorum, qui fonticulos in cruribus & brachiis habuerunt, præter unum aut alie- rum summe cacochymicum, peste obisse memi- ni, & proinde præsentaneum præservativum tem- pore pestis esse, cum in aliis multis, tum etiam in memetipso expertus sum.* Et idem mihi quo- que à medicis qui pesti Erfurtenfi interfuerant, relatum olim esse, memini. Ratio tam egregii effectus prophylactici videtur esse hæc, quod materia suscepti miasmatis, quæ firmiter adhære- re solet serosiori sanguinis parti, naturæ vigore ad partem cui fonticulus insidet, tanquam debi- liorem, cum hac ceu vehiculo ablegetur, & per hoc emissarium excernatur, unde tum sæpe cir- ca fonticulum insolitus dolor ac tumor observa- tur. Forsan etiam confidentia, quam gestantes de hoc, tanquam certissimo foveant præsidio, me- tum excutit & resuscitando animi vires juvat, eodem modo ac de amuletorum adversus pestem virtute censendum.

§. IV.

In curatione porro omnia à medico perito hos in fines dirigenda: I. ut ope naturæ expulsionem suscepti veneni per congruas vias maxime tumo- res illos criticos promoveat horumque habeat ra- tionem curate; II. ut vires, quæ cum vita pari passu ambulant, suscitet & urgentibus sympto- matibus occurrat. Sed quum quo pacto & qui- bus hæc rite sint perficienda, ego ex propria tra- dere nequeam experientia, aliorum utar, & me- thodum, quam in curanda peste summo cum fru- ctu adhibuit doctissimus pariter & exercitatissi- mus Medicus, *Joannes Langius*, heic inferam, cui postea judicium meum & monita rationi & experientiæ congrua subjungam. Ita autem gra- vis hic auctor suam pestem curandi rationem lib. I. *epist. XVIII.* describit: *Jam tu probe nosti, me multos, de quibus etiam conclusum erat, in hac pestifera lue hac methodo curasse. Primum, si alvus, aliquot dies ante morbi initium, parum, vel nihil excreverat, tum glande imposita, aut levi enemate eam exoneravi. Postea alexiphar- macum*

fonticulis.

Indicatio- nes & cura- tio.

macum

Sphacelo- negat.

Optimum præservati- vum fuga & tempe- rantia.

In acidis.

macum sudoriferum exhibui, quod, pro ratione ætatis ac virium, sudorem duas, vel tres, aut plures horas, promoveret. Cordis epithema applicui. A sudore hora sexta, vel septima, refectis tamen aliquo jusculo viribus, venam opportunam secui, ac mox ab alexipharmaco aliis singulis diebus, mane & vesperi, potagia alterantia, quæ sua qualitate & substantia veneno resisterent, exhibui, & cor quoque confortarent, qualia sunt, quæ ex succo citri, limonum, aurantiorum, acetosæ & jugulæ, cum momento aceti & saccharo decocta conficiuntur. In morbi declinatione, si appetitus edendi languebat, ad reliquias morbi extirpandas, medicamentum ex rhabarbaro, agarico, cassia, aut rore Syriaco, sive manna & tamarindis Indorum exhibui. Postremo chirurgis, ne ulceris aut carbunculi consolidationem præcipitarent; coquis vero ut præscripto tempore commoda esculenta & potulenta ægro suppeditarent, edixi. Qua curationis ratione ingens ægrorum numerus, Deo optimo auspice, convaleuit. Bubonibus, pergit paucis interjectis, vero & carbunculis, si circa emunctoria, juxta aures parotis, sub axillis abscessus, in inguinum adenibus bubo, virtute expulsa eruperit, aut interim carbunculus in brachiis aut cruribus effloruerit, tum festinanter, veluti in vulneribus virulentis, medicamenta, quæ venenum extrahunt, ad locum applicata, vel cucurbitulas, aut emplastrum ex fermento, theriaca, farina, sinapi & cepa sub cineribus cocta conficito, additis opoponacis & galbani gummis, acerrimo aceto solutis, imposito, & abscessum ante maturationem scarifica, aut aperi, vel cauterio adurito. Si vero patiens ignem veretur, cauterium potentiale ex cantharidibus & fermento confectum, aut contusam ex oleo stammulæ radicem applicato, quæ sua virtute calorifica & ardente non modo noxios humores attrahunt, sed & non raro factas ex his collectiones aperiunt.

§. V.

Initiante & rigense. Et utique hæc pestem curandi methodus rationi consentanea. Nam in omni morborum curatione sedulo tenendum hoc monitum, ut si alvus sub initium per aliquot dies, parum, vel nihil excreverit, leni enemate ducatur, quo ab excrementis liberentur intestina, ne inde tam symptomata exacerbentur, quam remediorum virtus obtundatur. Dein probandum merito auctoris institutum, quo commodo alexipharmaco sudorem per aliquot horas movit, ut halituosum illud venenum cito exhalaret & per cutem diffilaretur. Neque etiam de nihilo putandum, quod cordi applicuerit epithema. Quamvis enim non proxime tangat & afficiat cor, sed potius dextrum orificium ventriculi ejusque tunicas nervosas & musculosas; multum tamen interest, ut ventriculus, ceu pars maxime nervosa, & exquisiti sensus & quæ cum nervosis universi corporis partibus consensum alit intimum, ac ubi venenum primo omnium perniciosam suam vim exerit, probe defendatur, quod fit per topica, quæ antispasmodica simulque roborante balsamica virtute pollent; quem in finem ego commendare soleo, quæ ex theriaca, oleo nucistæ expresso, camphora, croco, castoreo ac balsamo Peruviano concinnantur. Porro post usum alexipharmacorum venam secare jussit, quod omnino proficuum. Initium enim curationis à sanguinis missione facere periculosum, eo quod primo vel secundo post eam die, motus sanguinis ad peripheriam, adeoque etiam perspiratio, semper

quodammodo imminuitur, ut venenum intus maneat. Ne dicam, metum & terrorem in peste correptis, protinus motum sanguinis à corporis ambitu revocare, ut hinc venæ sectio, quæ idem efficit, non possit non nocere. Sed admitti utique hæc potest si consuetudo, sanguinis abundantia & victus lautus atque vinosus urget, post usum medicamenti sudoriferi, eo quod demta sanguinis copia, propulsio materiæ virulentæ ad glandulas facilitatur & promovetur, tanto certius, quando postea lenioribus sanguinis ad exteriora fluxus subinde adjuvatur. Recte etiam laudantur acida, uti succus citri, limonum, acetum &c. quod tota substantia veneno resistant, quippe quæ putredinem humorum & dissolutionem sanguinis valide obtundunt & ob id merito omnibus alexipharmacis & antiloimicis anteponuntur.

§. VI.

Fracto præterea morbi vigore, sub declinatione alvum expurgat lenioribus. Quod quidem factum in principio pestis aliorumque contagiosorum morborum, ob effectum motum humorum ad externa retardantem, admodum nocivum; ita vicissim quam maxime conducibile, in declinatione. Sic enim educuntur sordes sub morbo genitæ perniciosæ, quibus retentis appetitus prosterinitur, lentæ, immo purpuraceæ febres de novo inducuntur, vires languent, calor fit lentus, novusque ac capitalis haud raro repullulascit morbus. At virus tum extrahendum in tumoribus pestilentialibus suadet cucurbitulas, scarificationem & vesicatorium, ac in eo pariter consentientes habet loimiatros. Inprimis elegans *Riverii* est observatio *Cent. II. obs. XIX.* qua ceu expertæ virtutis præsidium laudatur, ut, statim ac quis peste correptus, cantharides cum fermento & aceto pone aures ac in aliis fueris emunctoriis applicentur, ac in lecto postea quieti decumbere jubeantur ægri, eoque facto, post XXIV. horas effluere humorem atrum serosum & pestilentem morbum post aliquot dies plane discedere. Neque minus probe etiam monet *Langius*, ne præmature ac cito ulcera consolidentur. Evocata potius ad partes externas materia & suppuratione facta, tumor aperiendus, ulcus fueris digestivis mundandum, sed diu apertum servandum admota turunda, quo virus omne per illud sufficienter expurgetur, & tandem ad cicatricem perducendum.

CAUTELÆ ET OBSERVATIONES PRACTICÆ.

§. I.

Perquam attentione dignum est *Sanctorii* in *Medic. stat. aph. 139.* effatum nobilium fere neminem tum remediis, plebeji vero sine iis plures sanantur. Nam experientia uberius docet, plebejos, modo non omnibus subsidiis destituantur, sed temperato regimine & ad satietatem levi potu utantur, citius & rectius tam in pestilentialibus, quam aliis contagiosis malignis febribus convalescere, quam opulentos, qui medicorum & medicamentorum copia obruuntur plane. In illis quippe valens & robusta est natura, cui si negotium committitur curationis, longe felicius utique succedit, quam si artificiosa medicatione, nonnunquam plane perversa, impeditur ac turbatur. In nobilibus autem, quum per se ob inordinatam vitæ victusque rationem jam tum debilior natura, longe magis utique medicamentorum mul-

nec non declinatio morbo.

Pauca media op.

torum, variorum, quin saepe minus congruorum usu, in opere suo turbatur & morbus ad infelicem eventum promovetur.

§. II.

Alexipharmaca sola nocent.

Inprimis nihil perniciosius est, quam radices sic dictas alexipharmacas, oleo volatili calido turgidas, carlinae, angelicae, petasitidis, zedoariae, serpentariae, Virginianae, imperatoriae, vincetoxici, pimpinellae, ostrutii & ex his preparatas essentias, elixiria, theriacam quoque & mithridatum, ceu genuinam antidorum, liberaliter offerre. Multo vero magis detestandi adhuc illi tantopere laudati spiritus volatiles, urinosi & oleosi, ut cornu cervi, viperarum, fuliginis, item salia volatilia, nec non balsamum sulphuris. Tantum enim abest, ut iisdem noxium expellatur, ut potius intus detineatur & partibus nervosis altius infigatur. Perpetua quippe haec lex est, secretiones, quae antecedunt excretionem recrementorum in corpore, melius sub liberiori & moderatori ad emunctoria appulsu succedere, quam ubi humores impetuosae ac celeriter commoventur. Augent potius calidiora pharmaca anxietates praecordiorum, calorem intendunt, dissolutionem humorum promovent & miasma quoque malignum facile & cum impetu ex ventriculo in sanguinem ac nervosas partes agunt, ut sic multiplici ratione sint detrimentosa. Et haec omnino ita esse, loquuntur passim medicorum, qui pestilentiae interfuerunt, scripta, è quibus nominasse sufficit *Hildanum*, *Chaldaeus de Heredia*, nec non *Thonerum*, qui pluribus observationibus confirmat, alexipharmacis calidioribus usos, peste absumptos esse omnes.

§. III.

Sed acidis nupta promerent.

Neque tamen penitus radicum & herbarum sic dictarum alexipharmacarum usus in peste dammandus. Tum enim non nocent, quando miscentur cum iis, quae vim earum commoventem nimis & calefacientem cicurant & quasi ad temperamentum reducunt, uti sunt maxime acida, cum nitro. Sic relatum mihi est, in peste illa, quae anno MDCLXXXII. nostram hanc urbem infestavit, eximie profuisse mixturam ex aquae cardui benedicti & aceti vini quatuor cochlearibus, lapidum cancrorum & theriacae drachma, concinnatam & iterato datam. In peste quoque, quae anno MDLXXVI. totam fere Lombardiam pervagata, multi passim & praecipue Mediolani convalescere dicuntur, succo ex ruta capraria, cum aceto, aqua cardui benedicti & modico theriacae hausto, corpore postea ad sudorem confecto. Ipse *Thonerus observ. pag. 21.* testis est; nil profuisse in peste, praeter acetum theriacale, inter initia ad eliciendos sudores exhibitum, eodemque hoc remedio anno MDXLIII. grassante inter milites febre maligna, integram gregariorum cohortem fuisse servatam, convalescentibus omnibus, quibus tempestive hoc acetum oblatum, exceptis paucis, qui serius à chirurgo acceperant. In peste quoque Romana tam egregia praestitisse acetum cum ruta, radice pimpinellae, betonica, allio & baccis juniperi, addito camphorae momento infusum, ut quotquot illo usi fuerunt, quamvis inter infectos degerint, pestem evaserint, fidem facit *Kircherus de peste pag. 375.* Quin propter acetum, ceu praecipuum ingrediens, aqua prophylactica *Sylvii*, in malignis morbis & ipsa peste, magni semper aestimata. Et *Gesnerus* ob id *lib. III. epist. 27.* auctor est, ut omnia alexipharmaca ex vino, cui acetum admixtum, praefrid. Hoffmanni Oper. Tom. II.

Conveniunt autem haec alexipharmaca acidis nupta primo maxime die, ubi resolutione ac sudore opus est. Nisi enim, ex vero assensu *Mindererus*, intra viginti quatuor horas ab invasione alexiteria exhibeantur, omnia medica praesidia fore irrita.

§. IV.

Inter ea vero quae praesentissima in pestilentiali morbo efficaciae, communi omnium qui de peste scripserunt suffragio, sunt maxime acida & terrea. *Fracastorius lib. III. pag. 246 de morb. contag.* tam ad praeservationem, quam curationem commendat hoc: recipe succi acetosellae uncias duas, citri unciam, dialcordii *Fracastorii* drachmam, specierum cordialium scrupulos duos, aceri unciam. *Mindererus de pest. cap. XV.* disertis scribit verbis: *nulla est putredo, nulla infectio, nulla humorum depravatio, quae per acida non superetur. Sane, ut liberrime loquar, si mihi vitriolicorum remediorum usus, vel interdiceretur, ego ad curationem pestis nunquam, vel certe inermis, accederem.* Item testatur *Fonseca de ser. rat. curand. pest.* *Johannes Crato*, inquit, *Augenius de Monte Sancto*, *Mirinus Rulandus* & alii in febribus pestilentialibus spiritum vitrioli summo opere prodesse testantur. Et ego id testari ingenue possum, me non modo cum syrupis, sed & cum conserva rosarum mixtum, felici cum successu eum exhibuisse. Ex terreis vero & bezoardicis fixioribus singulari virtute pollent antimonium diaphoreticum, bezoardicum minerale, lapides cancrorum, cornu cervi ustum & philosophice praeparatum, succinum, terra sigillata, bolus Armena & cinnabaris. Ex quibus varia concinnari, eademque vel sola, vel acidis nupta, in usum vocari possunt. De quibus tamen omnibus pluribus legendi *Anonius Schneeberg in catal. med. simpl. adv. pest. opera Henrici à Bra edit. Unzerus lib. II. antid. pestil.* nec non *Mindererus de pest. cap. XV.*

§. V.

Deinde inter remedia in pestilentia conducibilia praecipuum fere locum tuentur analeptica. Vires enim in atroci hoc morbo, tam propter gravem animi metum & consternationem, quam ob ingentem malignitatem, summo opere sunt prostratae. Hinc medico quam maxime enitendum, ut removeat ex rebus moralibus & non naturalibus omnia, quae easdem offendere possunt, & in medicatione fugiat anodyna & valde vaporosa, graveolentia. Ad reficiendas autem vires praestabilis aqua confortans, nostra methodo sic paranda: recipe melissae Turcicae manipulos quatuor, rosarum cum sale contusarum, florum liliorum convallium ana manipulum, corticum citri recentium unciam unam semis, cinnamomi acuti unciam, macis unciam dimidiam, affunde vini Rhenani mensuram, aquae communis mensuras tres & leni igne abstrahere duas cum dimidia mensuras. Potest haec aqua vel cum tantundem aquae cardui benedicti remixta, vehiculum praebere sumendis reliquis medicamentis omnibus, vel sola dari, cum syrupo acetositatis citri & spiritu salis acidulata.

§. VI.

Neque minus apprime in pestilentia proficua sunt emetica. Nam prima & praecipua in medicatione indicatio est, ut venenum susceptum ocyus citius è corpore pellatur. Jam vero miasma contagiosum primo omnium salivali sese immiscet

miscet latici, cum hoc ad ventriculum descendit & inde ad sanguinem transfertur. Hinc optimum utique consilium, ut venenum brevissima, qua subiit via, iterum exturbetur, simul atque cruditates primæ regionis, quæ deleteriam ejus virtutem mirifice intendunt, per stomachi os everrantur. Sed opus est, ut cito id fiat, simul ac quis se infectum & languorem cum cardialgia sentit. Sic subjuncto congruo sudorifero, prima quasi in herba jugulari posse morbum multiplici constat experientia, eodem modo ac *cap. X. & XI.* in aliis malignis morbis id succedere pluribus docuimus. Curiosa non minus quam notabilis hanc in rem est observatio *Riverii*, de quodam, qui simul ac ex symptomatibus, dolore capitis & nausea, se peste laborare conjecit, illico pennam oleo illitam in fauces immisit, quaeducta per vomitum materia, primum serosa, dein flava, tandem porracea, in lectum se contulit, jusculum sumsit, sudavit & illico convaluit.

§. VII.

*Sub certa
condicione
admittenda
vena sectio.*

De venæ sectionis utilitate non æque inter omnes convenit, sed sunt qui laudant, sunt qui damnant. Optime præcipit *Celsus lib. III. cap. IV. de siderat*; inquit, *propriam animadversionem in febribus pestilentialibus casus. In hac minime utile est, fame aut medicamentis uti, aut alvum ducere. Si vero vires sinunt, sanguinem mittere optimum, præcipue si cum dolore febris est.* Neque minus fidem facit *Riverius in opp. tit. pest.* se in pestilentiali parotide, quæ plures necavit, venæ sectione, moderata tamen, ad uncias aliquot, & repetita, plures servasse. Nos quid de ea censeamus, supra jam in epicrisi ad *Langii* methodum exposuimus. Omnia autem huc redeunt: nunquam in principio post invasionem statim, ubi terrore & metu æger jactatur, habet locum, sed secundo vel tercio die, si urget plethora & vires sinunt, admittenda moderata.

§. VIII.

Ac nitrosa.

Sic etiam de nitri usu ambigunt medentes. Qui rejiciunt, putant illud nimium refrigerare & expulsi veneni ob id resistere, pestis etiam venenum jam tum esse stupefactivum, putredinosum ac diarrhœas inde metuendas fere lethales. Qui probant illud non secus ac in aliis exanthematicis inflammatoriis & malignis febribus, diaphoreticis nuptum, egregie prodesse contendunt. Sed lis facile dirimenda. Spectanda sunt individua eorumque natura & temperamenta, & expendenda morbi symptomata. Si corpus est plethoricum, temperamentum cholericum, vel sanguineo-cholericum, æstus acris, febris intensa cum siti & dolore capitis; nitrosa, refracta dosi cum bezoardicis pulveribus data, commodum locum habent omnino. At ubi torpor & somnolentia, pulsus debilis, extrema frigida & timor præcessit ingens, abstinendum à nitrosis esse docet ratio. Semper tamen tutius est, si nitrum sociatur camphoræ, quo connubio camphoræ vaporosa & nitri refrigerans indoles optime cicuratur & medicina emergit, non modo alexipharmaca, sed & inflammationi efficaciter resistens. Memini ego, me olim quum Londini versarer, à peritissimo chirurgo sene, qui pesti Viennensi interfuerat, audivisse, se summo cum fructu usum esse electuario, quod vocabat nigrum, composito ex rob sambuci & mellis ana libra dimidia, pulveris pyrii uncia & camphoræ drachma, ad unam vel duas drachmas dato. Et *Giselerus* quoque se in

peste Brunsvicensi summo cum fructu adhibuisse pulverem pyrium affirmat.

§. IX.

Perite præterea tractandi critici illi tumores pestilentem morbum solventes. Bubones quidem, si cito prorumpunt & cito maturant, boni, si autem statim redeunt, metuenda aut mors ipsa, aut minimum gravia symptomata, ex inguinalibus paralytis & gangræna ipsius lateris, ex mento relapsis deglutitio solidorum & liquidorum intercepta, cum angina ut plurimum lethali. Periculosiores etiam qui pone aures, pessimi, quibus carbunculus insidet, & lethales circulo livido septi. Carbunculi deteriores semper quidem bubonibus, sed quo majores, quo nigriores & quo propiores cordi, eo magis periculosi. In utrisque ex internis optima sudorifera & quæ succos ad ambitum corporis agunt. Exterius in bubonibus, si tardius prodeunt, attrahentia imponere jubent, cucurbitulas, quin vesicatoria. Si protuberant, suppuratione promovenda cataplasmate ex ficibus, radice liliorum alborum, cepis sub cineribus tostis, cum farina lini, melle & croco; vel imponenda suppurantia simul atque discutientia, emplastrum diachylon tam simplex, quam cum gummatibus, de mucilaginis, nec non de meliloto. Ubi suppurarunt, aperiendi & balsamo *Arcei*, non nunquam unguento Basiliconis remixto, mundandi & consolidandi, ita tamen, ut non nimis cito coeant, sed aliquamdiu materiæ saniosæ concedatur effluxus. Anthracibus, quia humor jam corruptioni obnoxius, non admovenda suppurantia, sed curandum, ut crusta decidat: quem in finem Loimiatri confinia digestivo inungere & acre emplastrum superponere jubent. Crusta delapsa unguento Aegyptiaco, vel fusco *Würzii* cum melle rosato tractandi. Quod si autem corruptio spha-celosa adest & latius serpere videtur, prohibendum hoc scarificatione sufficienti & applicatione liquoris, qui potenter inflammationi ac putredini resistit, expertæ sæpius à me virtutis, parandi, ex unciis quatuor spiritus vini rectificati, drachmis duabus camphoræ, drachma croci & tantundem nitri artificialis, quod ex spiritu salis ammoniaci urinoso & spiritu nitri confit, ac à vini spiritu perfecte solvitur.

§. X.

Demum quoad regimen in genere adhuc tenendum, quod, sicuti in omnibus acutis exanthematicis morbis, nimius lecti & conclavis calor omni studio, ceu summopere noxius, vitandus, ita multo magis ipsa in pestilentia. Vicissim vero arcendum etiam frigus, ne tumorum eruptio & diffusio subtilioris venenosæ materiæ per cutis poros ullo modo intercipiatur. Temperata potius sint omnia, uti jam in antecedentibus passim monuimus, iterumque monemus.

CAPUT XIII.

De Febre Erysipelacea.

THESES PATHOLOGICÆ.

§. I.

AD exanthematicas febres merito etiam refertur erysipelacea, in qua sub intensiori morbi, sanguis

sanguinis & humorum motu, serum acre, sulphureæ, causticæ naturæ, ad partes extremas, cum tumore, rubore, ardore & dolore propellitur.

§. II.

Certe non tam levis, innocens & simplex est erysipelacea febris ac vulgo putatur, sed gravis sæpe, periculosa & non raro lethalis; quin multum affinitatis alit cum morbo omnium atrocissimo, ipsa febre pestilentiali. Nam sicuti hæc subito cum intenso horrore, æstu, virium prostratione, vehementi dorsi capitisque dolore, vomitu quoque & delirio accedit; ita & sæpissime erysipelas statim in principio iisdem symptomatibus stipatum adoritur. Sicut deinceps in pestilenti morbo inter tertium & quartum diem materia maligna ad corporis ambitum propellitur, remittente postea paululum symptomatum atrocitas; ita similem successum servat erysipelacea febris. Quemadmodum porro pestilentialis venenata materia maxime glandulas, & quidem inguinales, invadit, ibique dolorem primum ac tensionem efficit; sic etiam gravi erysipelate affecti, primo tumorem, ruborem ac dolorem sentiunt in inguina adenibus, unde postea materia ferventissimæ & adurentis quasi naturæ ad pedes descendit. Uti quoque materia pestilentialis sedem sæpius figit in glandulis mammariis, axillaribus & parotidibus; ita eadem observantur in erysipelate, quod ubi capiti imminet, patiuntur primum parotides, si mammis, axillares. Pestifera præterea materia in glandulis abscessus format ac partibus extremis facile gangrænam & sphacelum inducit; sacrum autem ignem axillares præsertim & mammarias glandulas sic sæpe adurere, ut pus contrahant, & artus foeda corruptione afficere, omnes qui medicinam faciunt, uberius norunt. Demum sicuti in peste nil periculosius, quam si materia expulsa ab externis ad interiora relabitur; sic eadem noxa idemque periculum à retrocessione erysipelatis metuendum.

§. III.

In eo tamen erysipelacea à pestilentiali febre differt, quod non ex contagio, sive causa externa, sed interna oriatur, nec contagiosa sit & alios sola exhalatione inficiat, nec tam virulenta sit, & cum mortis periculo juncta. Inflammatio autem erysipelacea ab aliis his distinguitur, quod tumor in illa depresso, dolor non tam tensivus, color quoque roseus & floridus, qui in his magis fuscus. Neque minus à phlegmone discernendum erysipelas: In hoc enim inflammatio magis superficialis, in latum diffusa & pressa colorem exiit, materia quoque pauca & tenuis, in illo autem profundior inflammatio, subjectam non modo cutem, sed & pinguedinem & musculos tangens, tactu ob duritiem colorem non deponens, ac fit à stagnante impuro sanguine, propterea facilis in gangrænam est transitus.

§. IV.

Ipsam autem erysipelas à practicis vulgo distinguitur in verum, quod & simplex, ac in nothum, quod & scorbuticum vocant. Simplex facilis obsecundat commodis remediis internis & externis, ac tantum in superficie cutis hæret, nothum autem magis est chronicum, ob succorum impuritatem altius radices agit, difficile curatu & facile abit in ulcera mali moris. Subdividunt igitur hoc iterum in illud, quod cum, & quod sine exulceratione est, in exulcerato plus utique peri-

Frid. Hoffmanni Oper. Tom. II.

culi metuendum, & agris, & medicis, & per longum sæpe tempus detinet ægre consolidandum. Porro erysipelacea febris quandoque idiopathica, sive morbus primarius, quandoque symptomatice & morbus secundarius. In anasacra quippe, ascite, item diuturno ictero, flavo & nigro, accedit haud raro symptomatice erysipelas, & cito ægrum jugulat. Sæpe etiam complicatur vulneribus partium nervosarum, præsertim cranii ejusque membranarum, item fracturis ossium, ac tum quoque in ancipiti versatur æger.

§. V.

Deinceps non in omnibus unius semper ejusdemque indolis est erysipelas, ac vehementiæ. Etenim in quibusdam, juvenibus maxime materia nec adeo virulenta, nec adeo multa, levius facit atque benignius, quod neque glandulas occupat, neque febrem intensam movet, sed secundo mox die prodit, cum rubore, tumore ac dolore in pedibus, & sub perspiratione debita, vel leni remedio domestico, prompte discutitur. Contra ea in cacochymicis, senibus & impuris corporibus, ubi materia, & copiosior, & deterior, systema nervorum & vasorum gravius exagitur, febris est acrior, dolores & inquietudines acerbiores, ac nisi exquisita medicatione excipiantur, diu affligit & ægrius cedit. Differt quoque erysipelas ratione partium, quibus incumbit, & variis distinctis stipatur symptomatibus. In pedibus nitorem inducit tibiis, quin, si gravius, cum dolore ad crura usque propagatur & levi tactu exacerbatur. Faciem si occupat, intumescit hæc successive, rufescit, interspersis copiosis aqueis vesiculis, oculi tumore clauduntur, spiritus difficulter trahitur, nares & fauces aridæ valde sunt & siccæ, & torpor plerumque ac sopor conjunctus est, quin ob propinquitatem cerebri metuendum, ne in phrenitidem, vel lethargum degeneret lethalem. Mammæ ubi erysipelas tangit, intumescunt, sæpe lapidis instar indurescunt, cum exquisito dolore, & facile sequitur suppuratio. Sub axillis ibique positæ glandulis, acerbissimo stipatur dolore & plerumque in abscessum desinit. Umbilicalem regionem in infantibus frequentius infestat, ac inde per abdomen spargitur, cum gravibus pathematibus, funesto ut plurimum eventu.

§. VI.

Ex peculiaribus erysipelatis generibus est illud nostro tempore paucis cognitum & à veteribus quoque parum notatum, quod *Plinius* vocat *Zoster*, nostri zonam. Gravioribus hoc prodit symptomatibus & supra umbilicum medium corpus ambit instar cinguli, ex præcordiali regione per dorsi tractum, latitudine ut plurimum aliquot digitorum transversorum, cum intensissimo ardore, insidentibus pustulis acerbis, instat ignis urentibus. Sed perniciosum est ac interdum necat. Omnium vero, ut ita dicam, malignissimum est, quod post magnum virium languorem in corporibus senilibus, eminentius cacochymicis, non nunquam etiam in febribus malignis & pestilentialibus, sub papilla & in cordis regione, vel etiam manibus aliisque exquisitoris sensus partibus, prodit, lividum mox fit, demum atrum, morte cito subsequente, quod *Platerus* in primis *ost. tom. II. pag. 23.* sub nomine maculæ latæ describit.

§. VII.

Ad causas hujus febris quod attinet, materialis

Idiopathicum vel symptomatice.

Differt ratione corporum.

et partium.

Zoster

Et macula lata.

Causa materialis

Multum convenit cum peste.

Differt à peste in inflammatione & phlegmone.

Est verum vel nothum.

neutiquam simplicis, biliosæ, vel falsæ, sed potius causticæ, acris & putrefacientis indolis esse videtur. Vehemens enim ipsius in partes nervosas operatio, totius corporis œconomiam functionum illico graviter turbans & vigiliam, delirium, inquietudinem, anxietatem, corporis jectigationem, vomitum & sensuum turbationem, inducens. Longe gravior adhuc, quando expulsa materia retrocedit, quippe quæ tum haud secus ac venenum, cito deliria, inflammationem internam, asthma convulsivum & spasticas strictureas ciet sæpe lethales. Ne dicam gangrænam & sphacelum, quæ erysipelas inprimis male tractatum facile excipiunt, virulentiam materiæ luculenter satis prodere ac indicare. Unde vero hæc materia trahat ortum, non adeo quidem in expedito; ego tamen crediderim, ex bile variis ex causis vitiata & corrupta reddita, in duodeni flexura stagnante diutius, ibi cum succo pancreatico confermentata quasi & caustica acrifacta, eandem conflare, inde successive ad sanguinem & cerebri spinalisque medullæ membranas ferri, universum nervosarum & vascularum partium systema male afficere, febrem efficere, donec demum ad externum corporis ambitum pellatur.

§. VIII.

Subjecta.

Ad concipiendam hanc erysipelatis materiam, dispositi præ reliquis temperamento sanguinei & sanguineo-cholericis, plethorici, juvenes, viri, nec non foeminae gravidæ, in quibus tamen benignioris esse solet naturæ. Sed in scorbuticis, senibus & cacochymicis, item foeminis, suppressione, vel emansione, aut retentione mensium laborantibus, deteriore obinet genium. Crebrius etiam & facili ex causa eidem obnoxii, qui a parentibus eodem affectis prognati, & qui semel passi, sæpius postea ipsius experiuntur insultum, præsertim si senes & scorbutici. Ego quidem anniverfaria, æquinoctialia, quin singulis mensibus redeuntia erysipelata notavi. Sed de his, in senibus maxime & cacochymicis, verum etiam deprehendi *Hippocratis in aphor.* effatum: quod qui sæpe erysipelate corripiuntur, tandem eo moriuntur.

§. IX.

Causa procatartica.

Quæ autem hanc intus delitescentem erysipelatis materialem causam evolvere & in actum deducere possunt, ex rebus non naturalibus sunt multa. Inter hæc primum ac præcipuum locum sibi vindicant animi affectus vehementes, ira præsertim ac terror, & consignavit inter alia *Fallopius* exemplum foeminae, quæ, quotiescunque irata, erysipelas nasi incurrit, potu aquæ hordei facile discutiendum. Excludit dein erysipelas aer nimis calidus & intensior solis ardor, nec non vicissim subita & vehemens corporis, vel pedum refrigeratio. Idem facit cibus calidus, potus exæstuans, crebra ebrietas, nec non balneum fervidius. Inprimis vero ad exclusionem hujus mali faciunt evacuationes sanguinis tam artificiales, per scarificationes & venæ sectiones, omiffæ, quam spontaneæ per nares, uterum & sedis venas, interceptæ. Speciatim capitis erysipelas frequentius accidit his, qui diu noctuque in aëre humido & pluvio degunt, item senibus. In mammis solenne est puerperis, præsertim lactantibus, post gravem terrorem, tumque illico sistitur lactis effluxus, man mæ duræ fiunt, & à lacte coagulato ti meliunt.

§. X.

Interim erysipelas, si cito & sine adeo vehementi commotione erumpit, nec corpus sordidum, nec locus nobilior, aut cum nervosis partibus communicans, non tantopere periculosum, sed sub auctiori perspiratione, adhibitis congruis remediis, post unum aut alterum diem, tumor sensim subsidet, ardor ac dolor evanescit, color roseus mutatur in flavum, cuticula finditur, in squamas fatiscens secedit & morbus ex voto solvitur. Quin salubritatis plane notam quandoque fert; ac novi, alios morbos, præsertim asthma convulsivum, nec non colicam convulsivam, erysipelate superveniente, fuisse feliciter sublata.

Eventus bonus.

§. XI.

Sed ubi erysipelas magnum, profundum, succi corporis eminentius impuri, pars exquisitioris sensus, periculo, uti supra passim dictum, non vacat. Aut enim rubor livorem & nigredinem induit, ac brevi in sphacelum transit funestum, aut inflammatio discuti renuit, suppuratur, ac ulcera mali moris, fistulas & gangrænam inducit. Minimum in sanguineo-phlegmaticis & cacochymicis post erysipelas remanet ingens tumor pedis, ut tibia magnitudine tripla naturalem statum excedat, isque tumor difficulter admodum abigitur. Qui autem hoc morbo moriuntur, febre pereunt, quæ ut plurimum juncta est cum difficillima respiratione, interdum cum delirio, aliquando cum sopore & intra septimum plerumque diem catastrophe accidit lethalis.

Malum.

§. XII.

Male etiam cedit, quod perversa medicatione excipitur. Nam priscum & verum *Hippocratis aph. 25. Sect. VI.* est dictum: quod si retropellatur, sit perniciosum, quin funestum; id quod sæpius incidit. Novi ego post vomitorium & validum purgans recessisse erysipelas, insequutam ventriculi inflammationem & mortem. A venæ sectione etiam ad interiora revocatum esse, & vagum postea cum longe majori incommodo factum fuisse, vidi. Observavi quoque, repulso ab ipsa camphora cum minio & bolo cruris erysipelate, excepisse febrem intensam, stomachi dolorem intolerandum, respirationem mire laboriosam, vomitum biliosum, virium languorem, appetitusque prostrationem, nec prius conquievisse hæc pathemata, quam datis antispasmodicis leniterque diaphoreticis, & revocato ad pristinam sedem per vesicatorium erysipelate. De capitis erysipelate repellentibus, frigidis, adstringentibus, vel etiam nimis spirituosis, nec non camphoratis linimentis tractato, compertum habeo, quod induxerit vertiginem, affectus soporosos, anginam, phrenitidem, linguæ paralyfin, quæ mala senioribus & scorbuticis haud raro fuerunt funesta. Neque minus frigida, saturnina, oleosa, linimenta spirituosæ, largiter camphorata, exterius admota, malum erysipelatis eventum procurant, ac ut in ulcera mali moris, gangrænam & sphacelum degeneret, faciunt, uti pluribus *Hildanus Cent. I. obs. 82. Moynichen obs. II. pag. 245.* item *Timæus à Guldenclee lib. VI. cas. XXXIII.* testantur.

Ex perversa, & alicuiusmodi medicamine.

CURATIO.

§. I.

Recta erysipelati medendi methodus tribus his absol-

In licationibus necesse.

absolvitur indicationibus : I. ut motus iste febrilis naturæ nullo modo impediatur, sed potius si deficit, promoveatur, si excedit, ad temperamentum reducatur ; II. ut materia subtilis caustica, nervosis partibus insidens temperetur, atque ad se & excretionem præparetur ; III. ut stasis lymphæ putridæ & causticæ inflammatoria in partibus externis discutatur, & ad perfectam expulsionem traducatur.

§. II.

Præsidia
prima.

Inter ea præsidia, quæ motum febrilem naturæ quodam modo languentem excitant & promovent, ex classicis remediis laudem omnino meretur mixtura simplex, quando cum spiritu nitri dulci, aut melius adhuc liquore nostro anodyno minerali, miscetur ; vel si essentia scordii, aut pimpinellæ albæ, non adeo spirituosæ & concentrata, cum tantundem liquoris anodynii nostri confunditur & ad viginti, vel triginta guttas porrigitur. Juvat quoque expulsionem infusum theiforme ex herba scordii, floribus sambuci & semine fœniculi compositum, nec non ex temperatioribus pulvis bezoardicus noster, aut Ludovicianus. Motus spasmosque excedentes moderatur emulsio, ex aqua florum sambuci, tilia, acaciæ cum seminibus quatuor frigidis majoribus, nec non semine napi, præsertim si loco vehiculi usurpetur, cum quo pulvis noster bezoardicus, vel solus, vel cum aliquot nitri & cinnabaris granis, assumatur. Idem facit, simul atque expulsionem sustinet mixtura ex una spiritus bezoardici Buffii & tribus liquoris nostri anodynii partibus. Ubi vero motus legitimi, nec nimii, nec deficientes præsto, utilissimum omnino domesticum illud remedium, ex rob sambuci uncia, cornu cervi usti drachma, ex aqua florum sambuci sumtum, cui ego in calidioribus cum fructu adjicere soleo decem, vel duodecim nitri puri grana.

§. III.

Ad demulcendam humorum acrimoniam materiamque recte præparandam, præter jam dicta, spectatæ sunt virtutis decocta loco potus ordinarii sumta, ex rasura cornu cervi, radice scorzonera, altheæ, liquiritiæ & chinæ cum semine fœniculi, item decoctum avenaceum. Discussio staseos inflammatoriæ, per externa perficienda. Sed nil fere ex his sine periculo adhiberi potest ac debet, quam pulvis ex floribus sambuci & radice liquiritiæ, rejectis omnibus unctuosus, spirituosus, terreis, adstringentibus, saturninis, sub temperato calore lecti & hypocausti, subinde inspersus.

CAUTELÆ ET OBSERVATIONES
PRACTICÆ.

§. I.

Perpetua in practicis est regula : in acutis & exanthematicis febribus, corpus semper in blanda & continua diaphoresi esse servandum, quo sanguinis æqualis ad superficiem corporis fiat & maneat motus, ac cum hoc excrementitia materia jugiter advecta diffletur. Hinc merito etiam idem in erysipelate tenendum, cum quoad totum corpus, tum maxime quoad partem affectam, quo & dolores mitigantur, & discussio egregie promovetur.

Frid. Hoffmanni Oper. Tom. II.

§. II.

In externorum usu cautione opus est maxima, ne noceant & vel repellant, vel in ulcus convertant erysipelas. Quin quum cujusque fere corporis peculiaris sit idiosyncrasia, sive specifica quædam & individualis sensibilitas, quæ quam maxime in cute, seu parte nervosa, viget : hanc etiam ob causam in vitiis cutis eo majori cum circumspeditione topica admovenda, quia non omnia fert omnis. Observavi enim sæpissime in mammarum erysipelate, admoto innoxio, & in aliis vel centies probato emplastro, brevi tempore auctam potius fuisse cum dolore inflammationem, quæ, remoto emplastro, illico remisit. Hinc tutissimum nihil applicare, nisi forsan species parégoricas, ex floribus chamomillæ, sambuci, meliloti, radice liquiritiæ, farina fabarum, in forma sacculi, vel pulveris.

§. III.

Quod si adhibitis licet efficacibus internis & externis discutientibus, erysipelaceus tumor tantum manet, rubor livescere incipit, dolor profundius hæret, & ad periostium pertingere videtur, ad ulcerationem tendit erysipelas. Tum igitur transeundum ad ea, quæ suppurationem promovent, ita tamen ut simul corruptioni putredinosæ occurratur. Hunc in finem utilissimum emplastrum diachylon simplex, rite confectum, adjecta sufficienti quantitate camphoræ & croci, vel etiam emplastrum Barbette saturninum saponatum, superpositis epithematibus balsamicis, quæ corruptionem arcent. Quando his pus contractum & profundius hæret, aperiendus tumor lancetta & pus successive, non simul & semel, evocandum. Ne autem in glandulosis maxime locis abscessus in fistulosa & mali moris ulcera transeat, post materiæ secessionem, injiciendus liquor balsamicus, ex tinctura florum hyperici, essentia balsami Peruviani, myrrha electa & aliquot guttulis spiritus terebinthinæ.

§. IV.

Quando erysipelas nimis profundum & magnum, sphacelum, ex colore in bruno rubicundum vergente & symptomatum post expulsionem perdurante, cognoscendum, minatur, præter interna inflammationi & putredini resistentia, nitrum maxime cum momento camphoræ, externe spirituosæ & roborantia, conficienda ex aqua calcis vivæ, spiritu vini camphorato, aceto vini cum lythargyrio, admixta quoque essentia scordii & myrrhæ, crebrius calide cum linteis duplicatis applicanda.

§. V.

Sanguinis missio in erysipelate quandoque noxia, quandoque utilis. Ne igitur delinquat artifex, tenendum : si invadit erysipelacea febris plethoricos, potibus spirituosus assuetos, primis statim diebus vena in brachio pertundenda. Sic enim liberior fit sanguinis progressus, & expulsio materiæ ad cutem promovetur. Tanto vero magis utile id est, si caput petit erysipelas, tumque gravior hoc auxilio præscinduntur symptomata. Consultum quoque est interdum loco venæ sectionis, cucurbitulis cum scarificatione inervice uti. Semper tamen post sanguinis subtractionem curandum, ut expeditus & æqualis maneat perspirationis successus.

I 3

§. VI.

§. VI.

Epicrisis.

*Scorbuti-
cum inter-
nus sanan-
dum.*

In erysipellate scorbutico, quod diu detinet, in usum vocanda sanguinem depurantia & leniter laxantia, cum diaphoreticis, ita quidem, ut per aliquod dies alvina regio expurgetur, dein per aliquot tempus subjungantur diuretica ac diaphoretica, idque alternatim aliquoties repetatur, simulque pro potu ordinario decoctum temperans ex lignis & radicibus mucilaginosi, cum amaris, præsertim cum radice cichorei, taraxaci & passulis, bibatur.

§. VII.

*Recidivans
quibus ar-
cendum.*

Quod sæpe recurrit erysipelas, non sine periculo est. Hinc eo annitendum medico, ut corpus ab hoc malo vindicet. Ad quod obtinendum ego quidem nihil efficacius deprehendi, quam debitum, sub congruo regimine & victu, præparato prius, sive per laxantia, sive sanguinis missionem, corpore, institutum aquarum mineralium usum; eoque nonne præ reliquis laudem merentur, acidulæ Egranæ, thermæ Emsenses, nec non Carolinæ mitiores. His autem deficientibus, venæ sectio, vere & autumnopæ præsertim, purgationes per epicrasin & ea quæ sanguini repurgando serviunt, cum exacto in vita victuque moderamine, operam locant commodissimam.

ENARRATIONES MORBORUM.

OBSERVATIO I.

*Erysipelas
exulcera-
tum.*

Vir triginta annorum, pallidus facie & vitæ sedentariæ addictus, gravi terrore ex oborto improviso incendio fuerat percussus, ac per integrum postea diem sub coelo humido & pluvioso degenerat. Die post ingens horror per horæ spatium totum concussit corpus, sequutus calor intensus, cum dolore tensivo ac pungente in inguine, lassitudine, impotentia dextrum pedem movendi, conatu vomendi & somno inquieto. Tertio post invasionem die rubicundus & ardens tumor dextrum pedem occupavit. Adhibita hinc varia paragorica externa parabilia & domestica, interne vero nihil præter copiosum & frigidum sub calore potum, datum. Cessavit tandem tumor & dolor pedis, sed collectus alius ingens in malleolo tumor, cum ardore, tensione, rubore & pulsatione. Applicata iterum externe varia emplastra & linimenta spirituosa, at incassum. Hinc in suppurationem tendit. Ad quam promovendam, admotum cataplasma emolliens. Successit etiam suppuratio, sed stipata febre & atroci circa partem affectam dolore. Apertus demum abscessus & rite balsamicis mundatus fuit & tractatus, ut omnia bene cedere viderentur. At quum ex improviso ira corripere, die post denuo ipsum incessit horror, intensus per totum corpus ardor, ac abortus in genu sinistro infra flexuram tumor, nulla arte discutiendus. Adfuit simul febris, vigilia perpetua & inappetentia, æger ob tumoris molem ac dolorem nec pedem extendere, nec eo in latere decumbere poterat. Tandem successit suppuratio, sed generatus in femore abscessus, qui ingentem puris copiam ex cavo quod sibi in musculis supra positus fecerat, fudit, ægro interim penitus contabescente. Nihilo minus tamen injectionibus, variis emplastris, externe & interne congruis sanguinem depurantibus adhibitis, æger sanitati restitutus.

Cachecticis corporibus frequens malum est erysipelas, neque in his tam facile discutitur ac in sanguineis & cholericis. Ob profundiorum enim & firmiorem tubulorum obstructionem serique viscositatem, vel in abscessum, vel si incautius constringentibus, frigidis & quæ tonum partium destruant, tractatur, in sphacelum degenerat. Terror autem vehemens ad interiora, cor nempe & pulmones, pellit sanguinem, eodemque inde postea iterum repulso, febris suscitatur, viscerum humores cum impetu minimis tubulis impacti hærent & inflammationem faciunt, idque facile accidit in pedibus, per quos sanguinis circulus jam tum difficillimus. In hoc quidem erysipelas gravioribus stipatum fuit symptomatibus, ob partes, quas occupavit, valde nervosas ac tendinosas, quarum irritatio & molesta affectio, ut semper cum exquisitori doloris sensu juncta, ita febrem, anxietatem, inquietudinem aliaque peperit utique. In his igitur partibus summa semper in usu topicorum cautione opus est, nec nimis calida, nec acriora, nec spirituosa aut emplastra admovenda; sed potius demulcentia cum diaphoreticis ac nervinis, quo impediatur suppuratio, ex qua ulcera difficulter sanabilia emergunt.

OBSERVATIO II.

Vir sexaginta & octo annorum, carnosus & habitior, fluxui hæmorrhoidali ante obnoxius, jam à biennio eodem carens, ciborum tamen appetens, tempestate humida & calida fecerat iter, & ira commotus largum spiritus vini haustum ingurgitarat. Vesper domum redux correptus est horrore cum vomitu, quem excepit intensissimus calor, caput occupans, somnum turbans mentisque alienationem inducens. Die post insignem in inguine tumorem & ardorem sensit, ac tertio die dolor, rubor & ardor totum femur cum tibia occupavit. Inde remiserunt quidem priora symptomata, pulsus tamen mansit celer, & æger insuperabili sopore oppressus jacuit. Medicus accitus interius porrexit tincturam volatilem bezoardicam, naribus admovit spiritum salis ammoniaci, & loco affecto applicuit cataplasma ex aqua florum sambuci, acetato, lithargyrio, myrrha & bolo. Sed sopor discuti renuit, quin adauctus potius, ut plane non excitari posset æger. Sexto quoque die color pedis rubens in brunum & nigrum conversus, facies cum rubore intumuit, venter à prima statim invasionem oclusus, injectos quinque clysteres sine operatione reddidit, die octavo accessit difficilis respiratio, & post hanc lethum.

Epicrisis.

In senibus & plethoricis erysipelacea febris multum alit periculi. In nostro delirium secundo statim die indicavit congestionem sanguinis & quidem impuri ad caput, quæ postea etiam gravis soporis exstitit causa. Medicus vero perperam egit, quod nec primo statim die venam secare, nec alvum subducere jussit, sed potius interne & externe volatilia sanguinem magis exæstuantia adhibuit. Male etiam parti affectæ imposuit adstringentia, quibus discussio & exhalatio non modo impedita, sed etiam stasis obfirmata, & sanguis repressus ad caput vergit, præsertim quum intestinorum tunicæ etiam essent strictæ & alvus ob-

*Erysipel.
funesum
in sene.*

obserata, postea tamen decubuit quoque sanguis ad pectus, & ob difficilem per pulmones cursum, anhelosum spiritum & mortem demum induxit.

OBSERVATIO III.

*Erysipelas
topico cor-
ruptum in-
ternis sa-
natum.*

Fœminam novi triginta annorum, proceram, teneram ac biliosam, quæ per aliquot annos alvum segniorem & crebriorem iram fuerat experta. Hanc initiante autumnno, sub aquilonia tempestateprehendit erysipelas in manu sinistra, cum digitorum tumore ac rubore. Applicata topica varia & inter alia albumen ovi cum alumine conqualatum. Depulsum etiam malum, sed brevi post rediit idem, non vero pristinis cedere voluit remediis. Tumor quidem cum rubore discussus, dolor autem lancinatorius, cum fornicationis sensu in digitis eorumque articulis diu perstitit, quin sub victu minus laudabili crebriorique animi commotione increvit quotidie. Ruptus tandem tumor ploravit materiam ichorosam acrem, cutem passim erodentem, & ulcus enatum dolens & pruriens, noctu præsertim. Licet etiam varia externa & interna sanguinem depurantia adhiberentur, succrevit tamen alius dolorificus glandulosus in junctura brachii tumor, qui ad digitorum apices radium quasi vibrabat, sive lineam rubicundam, cum intensissimo cruciatu. Sumisit postea malum magis vires, digiti intumuerunt, aperti tandem, excrevit caro copiose spongiosa & ichor foetidus rodens exstillavit, appetitu & viribus simul prostratis somnoque deficiente. Admoverant chirurgi imperiti, affectæ parti valde acria, calida, decoctum ex vino, cum spiritu vini camphorato, balsamo sulphuris & oleo tartari foetido; simulque interius decocta lignorum & pilulas purgantes mercuriales liberali manu dederant, sed frustra. Applicarant postea linimentum ex vino, myrrha, thure, cerussa, herba chelidonii, floribusque sambuci, cui aliquid mercurii præcipitati admixtum, quo acris defluxio intra binas hebdomades substitit. Tumor quoque in junctura litu cum spiritu vini camphorato, cui balsamum sulphuris admixtum, discussum. Sed non ita multo post fœmina insignem virium incurrit languorem, plenariam appetitus defectionem, facile animo defecit, & ob id supina in lecto jacuit, crebrius præterea doloribus in manu, dorso ac pedibus, nec non ventris torminibus afflicta, pulsus quoque justo fuit languidior, cutisque mox frigore, mox volatice æstu persusa. Ego in consilium vocatus, pulverem ex lapidum cancrorum, antimonii diaphoretici ana drachma, nitri depurati, arcani duplicati ana drachma dimidia, cinnabaris nativæ granis XV. in octo doses divisum, bis quotidie dedi. Pro potu ordinario suasi decoctum ex radicibus temperantibus, & jussi, ut mane in theiformi infuso sumeret quinquaginta guttas mixturæ ex liquoris nostri balsamici uncia dimidia, essentiæ croci, liquoris nostri anodynii ana drachma. Consilium quoque dedi ut subinde pilulis nostris uteretur, & affecto brachio inuri permetteret fonticulum. Quibus per tres hebdomades usurpatis, exspirarunt sensim atrocia pathemata, appetitus rediit, somnus factus quietior, dolor remisit, & vires cum sanitate restitutæ.

Epicrisis.

Gravia varia & insolita pathemata ex impuritate scorbutica, sive feri acris biliosi redundantia, si in partes extremas tendinosas & nerveas cri-

tico quasi motu amandatur, pullulare, uberius certe hæc docet historia. Periculosum etiam in ejusmodi casibus topicorum usu insistere, quorum non alia vis, quam ut tonum partis affectæ variis modis defruant; materiam à sanguine separatam vel ad interiora pellant, vel ejus discussionem impedian, & flasim firmiorem faciant; ut symptomata non possint non aut magis incrementum, aut diutius affligere. Longe tutior & facilior hisce malis medendi ratio est, si internis dyscrasia humorum emendatur, materiæ acris affluxus divertitur eademque per alia emunctoria, cutem, urinam, aut alvum, excluditur.

OBSERVATIO IV.

Fœmina generosa, triginta aliquot annorum, sanguinea, spongiosa & carnosa, postquam valens antea & menstruam purgationem etiam recte experta, venationi interfuerat ante & post solis occasum, sub coelo, nubilo, autumnali, pluvioso, & corpus ob id non leviter perfrigeraverat, brevi post subito correpta est ingenti horrore, quem excepit æstus mordax cum inquietudine & tertio die erysipelas in crure. Brevi hoc depulsum, ne autem rediret, medicus ortum ejus ex sanguinis plenitudine arcessens, suavit, ut è pedis vena emitteretur sanguis largiter. Sed quum ægra Octobre peregrinationem institueret, rediit idem malum, & longius quam prius perstitit. Medicus igitur vulgari jam hypothese, omnium morborum causam plethoram esse, addictus, eandem heic etiam subesse opinatus est, eaque propter rursus venam secari jussit, largiterque extraxit sanguinem; nihilo tamen secius post binas hebdomades denuo infestavit erysipelas eundem locum. Licet etiam postea pulveres absorbentes cum nitro, scarificationes & infusum laxans in usum vocaret, quibus tamen nihil aliud effecit, quam ut binis quibusvis mensibus erysipelas recrudesceret, pedis autem affecti tumor & imbecillitas persisteret semper. Demum ego in consilium vocatus, commendavi Carolinarum internum & externum usum, cum exacto in vita victuque moderamine & abstinentia ab acidis, dulcibus, fructibusque horæis, quibus mire antea ægra delectata, injunxi quoque frequentem usum elixirii nostri balsamici, ex amaris extractis, corticibus citri & sale tartari cum vino Hispanico confectis, sanguinis autem missionem interdixi. Inde erysipelas primum depulsum, subsequuti vero dolores rheumatici, per aliquot hebdomades affligentes, qui tamen repetito insequenti anno Carolinarum usu, etiam prorsus abacti, & ægra perfectam recuperavit sanitatem.

Erysipelatis creber incursus non vena sectione, sed Carolinis deperit.

Epicrisis.

Perperam omnino heic à Medico ad recidivam arcendam commendata sanguinis missio eaque repetita. In nostra enim natales erysipelatis ex perspiratione suppressa, eaque propter hac magis adhuc sanguinis missione imminuta, non potuit non impurorum succorum copia crescere, quæ per erysipelas singulari naturæ vigore expulsa. Recidivæ autem frequentiores, quum de sanguinis impuritate testentur, hæc vero de viscerum maximeque hepatis vitio; ego certe acidularum, vel thermarum, ad sanguinem purificandum & viscera expedienda, & elixiriorum balsamicorum, quæ visceribus & succis spiritaliscentiam reddunt usu, præstantius novi nihil.

OBSERVATIO V.

*Erysipelas
scorbuti-
cum saepe
recidivans.*

Novi in Westphalia virum sexagenarium generosum, macilentum, sanguineo-melancholicum, qui delectatus carnibus & piscibus salitis ac infumatis, ab aliquot jam annis, ter vel quater quotannis, in pede sinistro, circa malleolum, passus fuerat erysipelas, quandoque exulceratum. Hic meum petiit adversus hoc malum auxilium. Suasi igitur, ut inter malleolum & genu inureretur fonticulus, qui materiam à malleolo exquisitoris sensus parte ad tibiam traxit, immuni ab erysipelate & fonticuli & malleoli regione. Tum consilium dedi, ut loco potus ordinarii acidulas Antonianas cum tertia vini parte biberet, à victu duriori abstineret & mane juscula cum radice cichorei, apii & scorzonerae sorbillaret, & pedem debilem & tumidum fascia spiritu vini camphorato madida ligaret arctius. His aliquandiu usurpatis, liber postea diu mansit ab erysipelatis incurfu.

Epicrisis.

Westphalis ob victum durum & crassum semper sanguis spissus lentescens, qui è vena missus, eandem ac apud nos pleuriticorum, exhibet faciem, cum cuticula glutinosa. Hinc etiam ipsis admodum familiares inflammationes, maximeque erysipelas scorbuticum. Adversus quod vero optime sese muniunt tempestiva sanguinis missione, potu ipsis frequentissimo feri lactis & vere usu infusi laxantis & resolventis ex vino. Pedes autem, quia lentior in ipsis sanguinis adscensus, perspiratio quoque languidior, ob id maxime & oedematosis & erysipelaceis tumoribus sunt obnoxii.

OBSERVATIO VI.

*Zona ex
purpurea
remissione.*

Professor celeberrimus, quinquaginta aliquot annorum, purpura scorbutica crebrius afflictus, post corporis intensam refrigerationem, corripiebatur subito languore virium, inquietudine, somni appetitusque defectu, horripilatione, aestu, cui juncta quaedam mentis turbatio. Durabant hæc per tres fere dies, quibus elapsis, nocte antecedenti sensit intolerandum plane ardorem in præ-

cordiali regione, ad dorsum usque excurrentem, mane autem inspecto loco dolente, insolitum comparuit exanthema, rubicunda nempe area, ex præcordiis ad dorsum cinguli instar extensa, cui infidebant confertim pustulae partim albæ, partim rubrae nigrescentes. Inde quidem symptomata remiserunt, excepto exquisito ardente dolore, qui tantus erat, ut nec somnum capere, nec locum affectum contingere posset. Medici quorum consilio utebatur, quid hoc rei, nesciebant, & purpurae peculiare genus, aut scorbuticum quoddam exanthema esse volebant; ego vero illico cognovi pejorem erysipelatis speciem, & interne diaphoretica temperata & externe in fine oleum ovorum adhibui, quibus aliquandiu usurpatis, intra quatuordecim dies, dolor conquievit, pustulae aruerunt, cuticula aspera facta, fissa & desquamata.

Epicrisis.

Est hic affectus ex rarioribus, paucis visus, plurimis incognitus. Solus fere ex veteribus est *Plinius*, qui ejusdem sub nomine *Zoster* meminit. Quam periculosus autem sit binis exemplis confirmat *Joannes Langius epist. p. 110.* uno Marchionis Georgii in Onelspachio, qui eodem ex ulcere crucis à chirurgo intempestive consolidato interiit, altero Comitis Palatini Otthenrici, qui à lumbis ad genua usque hoc exanthemate circumdatus, febre simul ad delirium usque æstuans, incisa tamen utriusque pedis vena adhibitisque, quæ febrem restinxerunt, à morte adhuc vindicatus. Idem etiam cum hoc esse videtur affectus, quem *Tulpius lib. III. cap. XLIV. observ. medicinal.* sub nomine exedentis præcordiorum herpetis describit, in viro pleni habitus & calidi jecinoris, qui vehementer circa præcordia doluit, cum acri pruritu, insigni dolore & frequentibus pustularum conglomeratarum circulis, primum rubris, mox albicantibus & comparente in qualibet earum crusta nigra, qua convenienti litu separata, quælibet degeneravit in humidum ulcusculum, cum acri dolore, sudore effuso & interdum tam impetuoso virulentæ materiæ raptu ad interiora, ut animus non secus aliquoties deficeret, ac si ipsum occupasset contagiosa aliqua pestilentia.



S E C T I O II.

D E

FEBRIBUS ACUTIS INFLAMMATORIIS,
item lentis putridis Hæcticis, nec non Symptomaticis.

C A P U T I.

De Febris Inflammatoriis in genere,
Speciatim de Febre acuta sanguinea,
græcis synocha.

THESES PATHOLOGICÆ.

§. I.



Tut irritatio generis nervosi spastica per omnes solidas nerveas corporis partes, proximam causam constituat omnis motus febrilis, qui horrore & velociore contractione cordis & arteriarum absolvitur; pro diversa tamen indole & actione materiæ genus nervosum præter naturam afficientis, diversa emergit febris species, distinctis phænomenis, effectibus & symptomatibus sese prodens, ita quidem, ut si stimulus sit ab humore acri, putrido, seu corrupto, quem veteres vocant ichorem, exanthematicæ plus minus malignæ excludantur, ubi vero sanguis, vel alius humor præter naturæ consuetudinem alicubi congestus nervosæque membranas tendit impensius cum dolore ac premit, inflammatoriæ acutæ, sine exanthematibus, suboriantur.

§. II.

Jam quidem omnis continua febris inflammatorii quid, sive à qualitate prava acri caustica, sive à quantitate nimia molesta, humoris cujusdam, alit: attamen proprie inflammatoria febris dicitur illa, cujus causa est eminens vasculorum, secundum naturam non sanguinem, sed tenue liquidum vehentium, à sanguine oppletio atque distensio. Hoc autem evenit vel in pluribus partibus simul, vel in una tantum. Hinc febres inflammatoriæ vel universales, vel particulares. Ex illis sunt, quando omnes fere sensu & motu instructæ corporis partes, maximeque nervoso membranaceæ, leviori inflammatione affectæ, quod accidit in synochis. Hæc vero sunt, quando uni tantum certæ parti insident, à qua etiam in scholis medicorum variam sortiuntur denominationem, adeo, ut si meninges tangat inflammatio, febris audiat phrenetica; si fauces, anginodes; si pleuram, pleuritica; si pulmones, peripneumonica; si ventriculum, stomachica; si duodenum & biliaris ductus, ardens & biliosa; si ileon, iliaca; si renes, nephritica; si mesenterium, mesenterica; si vesicam, vesicalis; si uterum, uterina; si

intestinum rectum, hæmorrhoidaria. Deinceps inter febres inflammatorias aliæ sunt idiopathicae primarium morbum efficientes, aliæ symptomaticæ, sive secundariæ, quæ sequuntur alium morbum, sed pessimo plerumque & lethali eventu, uti maxime de febribus continuis constat, qui ut plurimum inflammatione in sphacelum abeunte necant. Jam de singulis seorsim.

§. III.

Synocha igitur, sive sanguinea febris, est acuta, continua, suscitata à sanguine in partibus maxime nervoso membranosis nimium congesto, qui, nisi opportune naturæ & artis beneficio discutatur, inflammationem inducit lethalem.

§. IV.

Corripit hæc frequentius plethoricos & succulentos, temperamento sanguineos & sanguineo-cholicos, ætate juvenes ac viros, sanguinis evacuationibus assuetos, idque quovis anni tempore, potissimum tamen vere & æstate. Indicia autem ipsius & signa, quibus ab aliis acutis & inflammatoriis febribus discernitur, huc redeunt: Invadit hæc cum vix notabili horripilatione & leni admodum frigoris sensu, in aliis autem gravis est horror & longius extrahitur frigus. Aliæ mitius primum accedunt sensimque increbescunt, donec ad statum & vigorem perveniant, sed hæc cum gravissimis statim adoritur pathematibus. In aliis certis temporibus notabilis observatur symptomatum remissio, quæ in synochis rara, vel nulla, ut potius eadem quam sub accessione vehementia usque ad criticum tempus insistant, eaque propter haud incongrue à quibusdam non continuæ, sed continentes, vocentur. In malignis ab initio pulsus parvus, debilis & contractus, in hac magnus & plenus. In synocha hinc in principio absolute necessaria sanguinis missio; quam aliæ continuæ sæpe non ferunt.

§. V.

Causam hujus febris proximam præbet diffusior sanguinis in partibus ac visceribus internis congestio atque stagnatio. Quam in corporibus, calido sanguine, ex potuum spirituosorum largo usu, corporis exæstuatione, animique excarescentia, plenis, ex facili inducit potus ingurgitatus frigidior, corporis extremorumque refrigeratio & perspiratio quacunque ex causa prohibita. Sic enim tubulis & poris in externa superficie constrictis, sanguis cum impetu plus jussu urgetur ad interiora, ibique congestus, moleste afficit nervosarum & fibrosarum partium systema, ex quo symptomatum origo omnium. Nimirum si ad caput vergit impetus ibique colligitur san-

Synocha
descriptio

subjecta
& differe-
rentiæ

Causa est
inde pen-
dentiæ
symptomata.

Inflam-
matoria fe-
bris unde.

Differunt
autem ad lo-
cum.

sanguis, facies turgescit; oculi rubent & lacrymas plorant, caput dolet, arteriæ pulsant temporales, vertigo adest, sopor, torpor, vel plane mentis alienatio. Quando cordis ventriculi & vasa pulmonalia à sanguine impetuosius irruente nimium distenduntur, essentialè illud omnium febrium symptoma, respiratio difficilis & crebra, pectoris angustia & anxietas cordisque palpitatio accidunt, juncta simul sæpe virium corporis animique dejectione. In œsophago levior inflammatio & spastica glandularum fauciumque strictura facit sitim, ariditatem & linguæ nigritiem, præfertim si in corpus biliosum, calidum, post iram incidit, tumque vulgo vocatur febris ardens *das hitzige Fieber*. In ventriculo inflammatoria congestio gignit nauseam, vomendi conatum, quandoque singultum; in intestinorum volumine, inflationes malum graviter exacerbantes, alvi adstrictionem, vel excrementorum foetidorum ejectionem; in mesaraica arteria & venæ portæ vasis, dolorem fixum circa primam lumborum vertebra; in membranis spinalis medullæ, decubitus infuetum, membrorum jactationem, torporem & languorem artuum, quandoque etiam convulsiones.

§. VI.

Simplex vel putrida est.

Neque tamen hæc symptomata adsunt in omnibus omnia, neque vehementia ubique infestant eadem. Hinc in simplicem à medicis distinguitur synocha, & putridam, sive malignam. Illa sæpe à sola sanguinis boni extra locum & vias suctas congestione suscitatur, mitior, hinc brevi discutitur, nec adeo periculosa. Ubi vero cadit in corpora impuris succis plena, viribus à morbo præcedenti, diuturno animi angore, nimia venere & inordinata victus ratione exhausta, graviora longe præsto sunt pathemata, cum virium prostratione, morbus ipse diutius ad decimum quartum, vel vigesimum præter primum trahitur, & quandoque exanthemata, maculæ fuscae vel nigrae, excluduntur, non sine præsentis periculo. Datur præterea synocha epidemica; sed quæ plerumque cum febre catarrhali jungitur & autumno maxime ac hyeme infestat. Hæc in principio non aliis, quam synochæ suctis symptomatibus adnotatur, maxime homines sanguine & humoribus plenos, postea vero, si bene tractatur, post diem quartum prodit se manifestis signis catarrhalis, per longum adhuc durans tempus, & quæ per noctem usque ad diluculum calore præternaturali, nec non catarrhosis à capite defluxionibus, coryza, tussi sicca & humida infestat, donec tandem discedat.

§. VII.

Eventus bonus.

Solvitur morbus, si causa non adeo vehemens, solius sæpe bene valentis naturæ beneficio, sua sponte, die quarto, septimo vel undecimo, ordinarie largo sudore, vel secus ac in aliis acutis, optime per liberale narium stillicidium, vel etiam, rarius tamen, ac non nisi ubi maligni quippiam complicatum, per alvi fluxum. Quando etiam hæc febris in principio statim, primo, secundo & tertio die, recte tractatur, sanguinis missione & subjunctis refrigerantibus, blandisque diaphoreticis, quarto sæpe die exoptata fit solutio. Si vero omittitur, vel detrectatur venæ sectio, febrem ad decimum quartum, quin decimum septimum diem protractam vidi, persistentibus gravioribus symptomatibus ipsoque delirio, tandem vero naturæ beneficio, vel per sudorem, vel per alvum fuisse solutam. Sed quibus lethalis est, ii

Males,

percutunt plerumque inflammatione meningum, vel etiam aliarum partium, ut ventriculi & intestinorum sphacelosa, quam uberius testatam facit cadaverum inspectio, in quibus præterea ob sanguinem copiosum cito in foetidam putrilaginem abeuntem, illico adest insolitus tumor & foetor intolerandus.

CURATIO.

§. I.

In medicatione febris synochæ perito artificii agenda hæc: I. ut partes vitales à nimium congesto sanguine liberentur, sicque vel levior in iis inflammatio dispellatur, vel gravior impediatur; II. ut sanguinis exæstuatio simulque systematis nervorum spastica affectio componatur; III. ut illud quod stagnat & corruptum est, discutatur & liber sanguinis circuitus, maxime ad corporis superficiem, restituatur.

§. II.

Quo igitur vasa interiora in visceribus, corde maxime & pulmonibus, à nimium congesto, & stagnante sanguine liberentur, vena tempestive pertundenda & sanguis sufficienti quantitate emittendus. Quod quo pacto sit faciendum dicitur in cautelis. Deinceps ut impetuosis ille sanguinis succorumque orgasmus, vasorum, quam facit, distensione nervosas partes irritans ad contractionem, sedetur, ex usu sunt aquea, diluentia, acida, item nitrosa. Et certe si in ullo morbo, sane synocha, quam maxime conducit frigida potus aliaque refrigerantia, ex aceto succisque fructuum acidulorum, citri, limonum, ribium. Commendarunt hæc communi suffragio veteres, cui accedunt recentiores omnes. Ego quidem expertæ virtutis hanc habeo potionem: recipe aquæ fontanæ mensuram, aquæ rosarum, sacchari albi ana unciam, succi citri tantundem, vel loco hujus spiritus vitrioli guttas XX. *Riverius in prax. cap. de Synoch. pag. 37.* laudat pulverem, ex sacchari unciis quatuor, salis prunellæ uncia, eundemque in sufficienti quantitate aquæ assumere, cui, si sitis impensius urget, spiritum vitrioli instillare, suadet. Nobilis etiam demulcente & refrigerante virtute gelatina liquidior cornu cervi, cum saccharo, succo citri & aqua rosarum confecta. Potissimum tamen profunt loco potus ordinarii usurpanda, serum lactis ex lacte cocto cum succo citri coactum, vel nostra methodo dulce, & cum succo citri, aut spiritu vitrioli acidularum, item ptisanæ ex hordeo, rasura cornu cervi, scorzonera, cum succo & corticibus citri, nec non cerevisiæ leviores, imbutæ tinctura violarum, rosarum, papaveris rhœados, parata cum aqua acetosellæ, spiritu vitrioli acuata, vel instar omnium clysto antimonii sulphurato, de cujus præstabili virtute ita sentit *Baglivus opp. lib. I. pag. 50. non possum non*, inquiens, *laudare eximias vires clysti antimonii, cujus subacida virtute febres multæ ex aëris mutatione productæ aliæque ardentiores, tanquam in ovo suffocantur.* Hæc acida quoque magnopere conducunt in synocha sic dicta putrida, seu maligna, quia omnium efficacissime putredini resistunt, quæ non ab acido, sed alcalico volatili fovetur, quod acida destruunt.

§. III.

Quæ liberiores sanguinis ad superficiem corporis

Diaph.

his secundanda.

poris motum procurant, sunt utique blanda diaphoretica, pulveres scilicet vel bezoardici temperati, vel absorbentes, non nunquam foli, nonnunquam cum nitro, aut succo citri, assumendi. Idem faciunt infusa theiformia, ex herba veronica, scordii, aut cardui benedicti, cum semine foeniculi, quæ inprimis quando quarto die morbus critico sudore solvitur, pulsusque quietior cum somno redit, ad secundandam hanc salutarem excretionem, proficiunt.

CAUTELÆ ET OBSERVATIONES CLINICÆ.

§. I.

Prodest sanguinis missio.

In nulla febre, & veterum, & recentiorum omnium consensu, tam necessaria est sanguinis missio, quam in synocha, & quidem sufficiens atque matura. Recte enim monet *Trallianus lib. XII. pag. 688.* continentis solerti tractari debere diligentia, præsertim quod sanguinis missionem spectat. Maximum enim incommodum esse, cum in omnibus morbis, tum in his dilationem. *Nam febres, pergit, vehementiores redduntur & vires imbecilliores, ut non amplius magna præstidia ad curationem admitti possint. Hi vero indigent maxime, sanguinis missione, qui urinas habent rubras & turbatas, oculos rubros, totum corpus grave, venas latiores & earum torulos apertiores, calidioribus magna parte cibis, potibus, vino liberaliore & vetusto carnibusque pinguibus uti.* Sed non imitandi veteres, præsertim *Galenus*, & qui presse hunc sectatur *Zacuius Lusitanus*, qui sanguinem ad animi usque deliquium mittere suadent. Mensuram potius sanguinis extrahendi medicus prudens ex ratione virium, ætatis, sexus & temperamenti, nec non pulsuum magnitudine venarumque amplitudine, dijudicare debet, ac ubi corpus firmum succisque plenum, præstat iterare altero die venæ sectionem, quam simul & semel nimium evocare, quo successive demta copia, perspiratio fervetur & difflatio sordium liberior reddatur. Neque pueri & adolescentes pleni sanguine hoc remedii genus detrectare debent. Qui autem penitus averfantur, his hirudines collo & medianæ ipsi aliquando cum fructu admoveere jussi. Quando etiam sanguis cum impetu ad caput fertur, & arteriæ intus fortiter pulsant, facies simul tumida est cum oculis & rubicunda ac nares aliquot tantum guttas stillant, provocandum stillicidium, vel veteri *Ægyptiorum* more scarificatione narium, vel valida intrusione culmi straminei, quo delirium arceatur. Sed qui tali in casu venas sublinguales incidere jubent, minus securum consilium interponunt; eo quod inde aliquoties incompefcibilem hæmorrhagiam obortam vidi.

§. II.

frigida uti-ssima.

Deinceps ex præstantissimis in synocha remediis sunt acida, refrigerantia & nitrosa. Et certe in hisce auxiliis, prudenter ac circumspecte, ratione temporis ac mensuræ, pro diversa conditione corporis ægotantis, usurpatis, præcipuum curationis momentum in synocha æque ac ardente consistit. De quo tamen infra plura dicemus. Id autem singularis plane medico-præcticæ observationis est, quod hæc, quin sola aqua temperate frigida, sufficienti quantitate pota, sudorem moveant & somnum procurent.

§. III.

Præstat porro in hac febre, simplex five sit, *Laxantia conducunt.* five putrida, alvum servare apertam. Sub febre quidem, non tam internis, quam potius externis, glande, aut clystere molli, ex sero lactis, melle, oleo amygdalarum dulcium, pauxillo nitri & salis id perficiendum, quo leniatur fibrarum intestinalium strictura & flatus evocentur, qui intestini coli partem distendendo, anxietates faciunt, & perspirationis successum pervertunt. Declinante autem morbo & apparentibus coctionis signis in urina, ad exturbandas materiæ febrilis reliquias, apprime interna ex usu sunt, inter quæ ego inprimis utile deprehendi laxans ex manna, cremore tartari, vel etiam cassia & rhabarbaro. Sed absint *non drastica.* valida omnia purgantia, multo magis emetica: his enim, tactis jam levi inflammatione visceribus, ex facile inflammatio, inducitur funesta. Quin observavi, febre hac sanguinea laborantes, neque ferre posse pilulas alias benignas, quas, aloë, vel extractum ellebori ingreditur, uti sunt *Becherianæ*, aloëphanginæ, marocosticæ & id genus plures.

§. IV.

Ex iis quæ vitanda, sunt maxime omnia calida & spirituoza, vinum, potus etiam nimis calidi largi, ut infusum thee nec non regimen æstuosum, ratione lecti & conclavis, quæ omnia sanguinem magis exæstuant, acerbiora symptomata febremque diuturniorem reddunt. Neque etiam synocha putrida, five maligna ferre potest essentias alexipharmacas, aut tincturam bezoardicam. Cavendum quoque à multitudine & varietate remediorum, quæ nunquam utilis, sed semper damnosa est, tanto magis, ubi partes nervosæ sensus exquisitioris, leviter inflammatae. Inprimis autem fugiendi sedulo omnes animi affectus, ira præsertim ac terror, quibus inflammatoria jam in intestinis præsens congestio ingravescit, & inflammatio perfecta, quin sphacelatio, experientia teste inducitur.

§. V.

Cæterum de morbi decursu atque eventu hæc adhuc monenda. Vidi ego in hac febre sæpius in juvenili ætate ac temperamento sanguineo perpetuam somnolentiam, quæ tamen sine periculo fuit, admoto plantis pedum aceto, cum sale ammoniaco & baccis juniperi, discussa. Delirium etiam frequenter vidi diuturnum, post neglectam in principio venæ sectionem, sed quando decimo quarto die sedimentum posuit urina, discessit demum & hoc sine damno. Neque enim unquam firma salutis spes, nisi coctio in urina compareat. Sed quando ex præpostera medicatione sanguinis missione neglecta, datis calidioribus & alvo diutius occlusa, februi hæc sanguineæ, ille acutorum frequens nostro tempore socius, purpura, præsertim alba, accessit, pessimo id accidit omine. Neque minus pessimum & plerumque mortiferum est indicium, quando alvus diu cohibita, sponte miram quantitatem, sæcum biliosarum & corruptarum, simul & semel, junctis torminibus, profundit. Hoc enim sphaceli intestinorum signum esse, ex defunctorum cadaveribus habeo compertum.

Somnolentia & delirium non

Sed purpura ex delirio impetuosa periculosa.

ENARRATIONES MORBORUM.

OBSERVATIO I.

Adolescens annos habens octodecim, consuetudine *Synocha.*

recidivans
lethalis.

tutione tener ac sanguineus, vultu floridus, laute vivens, delectatus maxime dulcibus, farinaceis, decocto chocoladæ cum lacte & in prandio vinum Hungaricum liberaliter bibens, verno tempore, post intensam, ex ambulatione per acclivia & declivia in seram noctem, corporis exæstuationem, postera die corripiebatur horripilatione, ingenti æstu, inquietudine corporisque totius languore. Datum ipsi de venæ sectione consilium, sed noluit admittere. Hinc dati tantum pulveres ex matris perlarum, lapidum cancrorum, ana drachma, nitri puri drachma dimidia, cum succo citri ex aqua frigida sumendi. Loco potus exhibita ptisana ex hordeo, scorzonera & syrupo acetositis citri, alvus quoque clystere emolliente soluta. Quibus factum, ut quarto liberalis prodiret sudor, pulsus quoad vehementiam & celeritatem sedatior micaret, urina sedimentum poneret & somnus rediret. Morbus igitur ex voto solutus visus. Quum vero æger viribus nimium credens, dulcibus & lacticiis indulgeret, potens etiam Hungaricum vinum biberet, post septimum diem eandem rursus incurrit febrem. Sed gravioribus longe stipata erat symptomatibus, insomnia maxime atque delirio. Secta quidem die post vena, sed sine emolumento. Aderant simul tormina ventris, & pauca biliosa secesserunt. Clyster quoque infusus animi fere deliquium adduxit. Quarto die accessit forte ex amicis nonnemo, qui ægro imprudenter dixit: apparere ex omnibus ipsum moriturum, præpararet igitur se ad discessum. His adolescens vitæ amantissimus, mirum exterritus, virium illico animi & corporis ingentem expertus est lapsum, & frustra usurpatis omnibus, quæ in priori morbo fuerant utilissima, septimo die vitam posuit.

Epicrisis.

Nihil ad ingenerandam exuberantem sanguinis copiam valentius dulcibus, bellariis, cum saccharo & ovis frixis, vinoque Hungarico dulci spirituoso. Atque adeo his etiam nihil aptius ad inducendas febres, quæ sanguinis plenitudini debent natales. Ego certe plures novi juvenes litterarum studiosos, qui delectati his dapibus & potibus spirituosis, accedente corporis refrigeratione, hanc incurrerunt febrem. Omnes autem recidivæ febrium, quarum fundamentum inflammatio, admodum periculosa quin plerumque capitales. Quia enim corpus à priori morbo viribus exhaustum, maximeque partes, quæ passæ, tono adhuc privatae, ex facili iterum concipiunt inflammationem, quæ primis non amplius obsecundat remediis. Accedit, quod ipsi ægrotaantes recidivam ut plurimum parvi faciant, & ob id medicum serius in auxilium vocent, pharmacorum pertæsi sint, quorum operatio languente naturæ vigore minus præterea est efficax. Quare declinandæ summo studio recidivæ, temperanter vivendum, corpus non nimis cibis, multo minus spirituosorum potu aggravandum, nec motu aut animi affectibus exæstundum, ne sanguis urgeatur in vasa ipsius transitui non dicata, ibique subsistat. Vitanda quoque refrigeratio & potius exquisitum servandum regimen. Quam facile enim hæc febris repetat cum vitæ periculo, confirmatum habeo casu, qui novissime evenit. Inciderat scilicet in synocham artifex ingeniosus ferrarius eademque graviter decubuerat, post quatuordecim tamen dies præter expectationem ad se redire videbatur, dormiebat & appetebat. Sed quum

uxor, quo maritus cito vires reciperet & ad labores redire posset, ipsi apponeret carnem suillam assatam cum placentis, ipsumque ut ederet tantum non cogeret, illico excepit anxietas præcordiorum summa, difficilis inspiratio & inquietudo cum plenario virium lapsu, ac post viginti quatuor horas interiit. Et certe vix dici potest, quantum noceant cibi copiosi, viribus à morbo adhuc imbecillis. Quia enim ciborum moles in ventriculo languente digeri nequit, resolvitur in flatus, qui expandendo ventriculum & tendendo diaphragmatis velum, miras anxietates cum spiritu difficili faciunt. Hinc porro sanguis urgetur ad dextrum cordis ventriculum, ibi congestus systolem sufficientem ac in pulmones pulsus sufflaminat, unde tam ipse cordis ventriculus, quam ob allatum per cavam semper sanguinem auricula dextra, plus justo extenduntur, systole penitus intercipitur & lethalis obrepit syncope. Etenim subitæ mortis, sive syncopis lethalis causam esse coagulatum & congrumatum sanguinem in dextra cordis ejusque auriculæ camera, ob deficiens robur ad contractionem, testantur utique uberius anatomico-practicæ defunctorum sectiones.

OBSERVATIO II.

Virgo honoratissima viginti aliquot annorum, sanguinea, facie florida, laute vivens & liberalius paulo Rhenanum vinum bibens, solita semper erat ante æquinoctium vernale & autumnale sanguinis missionem admittere. Eo autem qui ipsi emortalis, anno præter morem calidum erat veris initium, ipsa tamen noluit discedere à consueto venæ sectionis termino, sed tempus expectavit æquinoctiale & lunæ decrementum. Accidit vero interea, ut ira commoveretur venusta hæc & sanguine plena virgo, eaque propter absente matre & medico ordinario, post levem cutis inhorrescentiam, dorso dolorem, æstum, anxietatem, inquietudinem, somnique defectum incurreret. Ipsa consilii inops, suasu cognatæ ad bilem commotam evacuandam, sumsit pilulas, nostris *die geschärfften Haupt-Pillen*, pilulæ cephalicæ acuatae, quarum basis trochisci alhandal. Inde quater quidem dejecit, sed conquesta postea de dolore pressorio & ardente sinistri hypochondrii. Quarto die accessit medicus, qui venam secare iussit, sed sine levamine. Dedit quoque probatissima remedia, quo inflammationi ventriculi, quam singultus arguebat, occurreret, sed incassum. Accessit potius extremorum refrigeratio, mens turbata & septimo die placida mors. Post mortem mirum intumuit corpus, efflorueruntque papulæ amplæ in pedibus atque abdomine, è naribus fluxit serum putridum sanguinolentum & totum corpus mox in foetidam putredinem ruit.

Epicrisis.

Communis quidem sed valde damnosa passim regnat opinio, sanguinis missionem certis temporibus & sub certa astrorum conjunctione esse instituendam. Videas inprimis plurimos adeo superstitiosos, ut credant, non feliciter cessuram venæ sectionem, nisi aliquot ante æquinoctium diebus & decresciente luna admittatur. Ego vero novi, plures & apoplexia, & febre sanguinea interiisse, antequam præstitutum hoc tempus attingerent. Nam necessitatis nulla lex, sed si sanguis redundans minatur periculum, mittendus, qui-

Synocha
usur-
gantis
omissa
ne sectio
lethalis.

quicumque sit dies, quodcunque tempus. Nostra formosa virgo periit inflammatione ventriculi & intestinorum gravi, quæ utique opportuna sufficienti sanguinis subtractione, datisque congruis refrigerantibus, potuisset averti, assumpto vero acri purgante adaucta potius. Ut adeo pateat, morbum, alias non adeo periculosum, neglecto tempestivo commodorum remediorum usu & mala tractatione, brevi malignum fieri posse atque funestum nostrum. Illa vero corporis post mortem cita intumescencia, deformis color, putredo subito succedens & feri sanguinolenti effluxus, luculenter utique testatum faciunt, à succorum plenitudine morbum, & ab eorum putrefactione mortem, fuisse inductam.

OBSERVATIO III.

Degebat heic juvenis literarum studiosus, viginti quatuor annorum, sanguineus, succi plenus, vultu floridus, qui hæmorrhagiis narium antehac obnoxius & postea venæ sectioni assuetus, utramque vero evacuationem ab anno non erat expertus. Hic verno tempore in palæstra gladiatoria vehementer incaluerat & postea in cellam concesserat, vinum potaturus. Postridie lassitudinem sensit in corpore toto, quam excepit extremorum levior refrigeratio, æstus vero intensus, pulsus celer, præcordiorum anxietas, angustia spirandi & pectoris oppressio. Tertio die temporum arteriæ valide pulsarunt, caput intumuit, doluit, oculi protuberarunt, nox insomnis fuit, urina rufa, sine sedimento & delirare coepit. Hinc vena secta & minimum septem sanguinis uncias subtractæ & data mixtura ex aquæ florum sambuci, acaciæ, ceraforum nigrorum ana uncias duabus, aceti destillati uncia dimidia, lapidum cancrorum drachma, nitri puri granis XV. syrupi papaveris erratici drachmis duabus, de qua singulis binis horis quatuor sumsit cochlearia. Quum etiam quarto die sanguis impetuosius ad caput ferretur, nec tamen hæmorrhagia erumperet, ad discussionem fronti & temporibus sæpius tepide admotum epithema hoc: recipe aceti rosacei uncias duas, spiritus rosarum drachmas duas, camphoræ drachmam, olei ligni rhodii guttas XXIV. Ad sitim fallendam æstumque extinguendum tinctura florum cordialium cum spiritu nitri dulci parata, cerevisiæ tenui pro potu instillata; alvus præterea per aliquot dies clausa, & clystere emolliente, & laxante, ex manna, cremore tartari & rhabarbaro quater soluta; eoque facto, urina apparuit cocta & sedimentum incarnati coloris dimisit. Datis demum ulterius bezoardicis temperatis cum tinctura modo dicta, sensim conquieverunt symptomata & die septimo pulsuum celeritas remisit, sudor largus prodiit, ægerque postea ad sanitatem rediit.

Epicrisis.

Ad præcavendum delirium, longe præstantius epithema discutiens, quam laudata à multis venarum sublingualium sectio, quam incompeabilem hæmorrhagiam induxisse vidi aliquoties. Utilissimum quoque ad sanguinis à capite derivationem alvum strictam mollire atque subducere, non quidem purgantibus, sed clysteribus & blandis laxantibus, modo id fiat, quando levamen & aliqualis remissio percipitur, quod secundum nostram observationem, certis diebus, secundo præsertim & quarto, accidere solet.

Frid. Hoffmanni Oper. Tom. II.

OBSERVATIO IV.

Monachus viginti quinque annorum, quadratus & carnosus, vitam colens otiosam, potui cerevisiæ crassioris assuetus, nunquam tamen venæ sectionem passus, verno tempore corpus succis plenum validius paulo in horto ad seram usque noctem exercuerat. Inde illico conquestus est de corporis lassitudine, inappetentia, somno turbulento ac inquieto, alvo simul clausa. Incessit ipsum dein levis horripilatio, æstus magnus, præcordiorum anxietas, pulsus quoque vehementer salit, facies rubicunda fuit & urina pellucida, sed rufa. Medicus in consilium vocatus, exhibuit tincturam bezoardicam volatilem cum regimine sudorifero. Sed nullus successit sudor, anxietas potius adaucta, spiritus factus difficilior, somno caruit, multa absona est loquutus & tertio die accessit præterea acerbus & ardens dolor in faucibus cum deglutitione difficili. Accitus igitur medicus alius, qui venæ sectionem administrare, clysterem injicere, gargarisma usurpare & exterius epithema discutiens gutturi applicare jussit, ac interius pulveres temperantes nitrosos leniter diaphoreticos dedit. His discussus primo tumor faucium & dolor sedatus. Septimo die post levem horrorem largius sanguinem stillarunt nares, quod, ne cum damno effusius fieret, cautum est mixturis diaphoreticis & pulveribus nitrosis, nec non epithemate frontali *Observatione III.* descripto. Sic octavo die æstus deferbuit & fudor erupit copiosus, pulsus sedatior factus, urina sedimentum posuit & æger successive convaleuit.

Epicrisis.

Male hoc in casu omissa in principio venæ sectio & pessime in corpore plethorico data volatilia cum regimine æstuoso, quibus facillime inflammatio in cerebro & faucibus conciliata. Neque ea propter quarto etiam die nociva fuit venæ sectio, sed ad avertendam inflammationem admodum proficua. Ad angustiam vero vasculorum laxandam & stagnationem sanguinis in faucibus discutiendam, epithema mature applicatum, cum internis diaphoreticis, utique egregium.

OBSERVATIO V.

Quam varia & insolita plane elapso anno MDCCXXVIII. aëris tempestatumque fuerit constitutio, & quam varii quamque graves inde succreverint morbi, imprimis febriles, supra *Seçt. I. cap. X. obs. II. pag. 250.* pluribus jam dictum. Persistit autem eadem hæc extraordinaria temporum anni habitudo & atmosphæræ inæqualitas, insequenti adhuc MDCCXXIX. anno, subitamque frigoris in teporem & vice versa teporis in frigus mutationem fecit. Scilicet attulit novi anni exordium acerrimum gelu, æquale omnino illi intensissimo, quod anno MDCCIX. regnavit, ac persistit ad duodecimum usque Januarii diem, mercurio interim, quod mirandum, in barometro demissiore stationem ad gradum tantum VII. servante, quum alias ascendere tum & gradum XXX. tangere soleat. Decimo tertio & quarto die lenior spiravit aura & regelatum. A decimo sexto ad vigesimum usque, argentum vivum altius iterum ad vigesimum septimum gradum elatum & frigus fuit acre. Vigesimo quarto subsedit mercurius ad duodecimum, nonum & octavum gradum

*Venæ sectio
quarto
die in syno-
chis nullis.*

*Synocha
catarrhalis
epidémica
anni 1729.*

gradum & sequentibus diebus successive remisit gelu, mercurio interim modo sublato, modo delapso. Nix præterea cecidit copiosa & diu solum obruit, donec medio Februarii discuteretur iterum, ex quo magnæ aquarum inundationes. Post has vicissitudines, remittente hyemis asperitate, Februario mense, coepit passim circumire synocha febris, non simplex, sed complicata, quæ recte dici potest synocha catarrhalis, ita, ut intra mensis spatium vel mille, ex divitibus æque ac pauperibus, eadem heic decumberent. Incessit quippe hæc febris homines mediæ potissimum ætatis, juvenes & viros, sanguine & succis plenos, minus infantes, omnesque quotquot corripuit, sine præcedenti notabili frigore vel horrore, affecit totius corporis & capitis gravitate, inappetentia, somni defectu, virium languore & æstu intenso, cum pulsu magno, celeri, quandoque inæquali. Quibusdam variæ statim in mente observatæ ideæ atque imagines & artus tremuerunt, aliis perpetua accidit somnolentia cum animi dejectione, & omnes situm erectum ferre non potuerunt, sed mox synopticam quandam debilitatem perceperunt. Quibus vena statim in initio pertusa & sufficiens sanguinis copia, pro ratione corporis & virium, subtracta; subiectis postea blandis diaphoreticis, diluentibus & orgasinum sanguinis compescen-
tibus, sub æquali & moderato regimine, cito & optime convaluerunt. Sic enim quarto statim die deferbuit febris, symptomata remiserunt, æstus restinctus, pulsus sedatior & corpus quietum factum, ac urina, comite sudore plerumque largo, posuit sedimentum. Restiterunt tamen postea copiosæ defluxiones, à capite ad nares, fauces & pectus, coryzam & tussim humidam, vel siccam inducentes, stipatæ quandoque artuum pedumque rheumatismo, quæ circa vespæram exacerbata, caloris fecerunt incrementum noctemque inquietam, donec decimo quarto ut plurimum die discederent penitus. Sed in quibus, aut ægri, aut medici culpa, sanguinis missio neglecta, & usurpata calida bezoardica, hi longe gravius & diutius decubuerunt, delirio & assidua vigilia affecti sunt, catarrhos acres & rebelles experti, quandoque exanthema purpuraceum & febris sæpe ad decimum quartum diem, non nunquam longius, magna insitit vehementia. Quin fuerunt, qui accedente purpuræ albæ, aut petechiali exanthemate, plane interierunt.

Epicrisis.

Recte omnino complicata hæc febris dicenda synocha catarrhalis: nam ipsius incursum vehemens statim, sine rigore, ipsius decursus sine remissione, ipsius eventus sudore, ipsius medicatio per sanguinis missionem & temperantia cum nitrosis, luculenter testantur, ad synochæ familiam ipsam esse referendam. Catarrhalis autem connubium produnt subsequentes copiosæ muci & feri salsi, ex naribus, faucibus & bronchiis, cum tussi ac sternutatione ejectiones, nec non febricula vesperi cum calore ingravescens. Natales epidemicæ hujus febris non aliunde, quam ex mira, diuturna aëris inæqualitate ac crebra mutatione ex calido in frigidum & frigido in calidum, nec non atmosphæræ mox gravis & raræ habitu vario, ducendi. Sub his prementis, mox levis vicissitudinibus, non modo universale illud pessimarum sordium emunctorium, cutis, diversimode afficitur, ejusque canaliculosa atque porosa compages à naturali tono dejicitur, sed & motus

illi cordis & arteriarum systaltici qui vitam sustinent & ab aëris puriori elastica substantia pendunt, vitiantur ac mutantur. Ex quo porro fit, ut labefactatis sic & sufflaminatis saluberrimis se & excretionibus, multæ impuræ & viscidæ fordes in succis maneat, quæ dein vascula obstruunt, ac fomitem febribus, populariter circumeuntibus, præbent. Neque nos nunc primum observavimus hanc febrem, sed eandem jam anno MDLXXX. visam esse Georgius Henischius *Comment. in Aretæum* pag. 315. testis est, hæc habens: anno MDLXXX. grassabatur synochus epidemica, non simplex sed composita, eo quod & catarrhum, & alia symptomata conjuncta habuit, unde & catarrhus cum febre epidemicus fuit appellatus. Eundem etiam ipsius ortum ac decursum fuisse, quam nostræ, idem auctor l. c. pag. 396. subnectit: febris, inquit, hujus catarrhalis epidemicæ, quæ spatio sex septimanarum, omnes fere Europæ gentes affligebat, ex quibus vix vigesimus hujus morbi experts erat, præsertim in Saxonia, causa, non erat ab alimentis, terra aut aqua putrida, sed ab aëre, vel cælo potius, nempe à magna illius & anni præcedentis aëris inæqualitate, unde copiosa humorum heterogeneorum & ichorum soboles succrevit, quæ facta meatuum constipatione & prohibita evacuatione, primum ebullit, & postea putrescens, hanc febrem excitavit. Quam primum hæc invadebat, omnes vires languebant, præcordia gravitatem sentiebant, cor pressionem, & palpitabat, pulsus parvi, celeres & inæquales erant, anhelitus difficilis; caput erat grave, & ingravescente morbo ita ægroti languebant, ut tremere & conciderent. Quidam vigilabant, alii profundiores somnum habebant. Ex capite fluxit acrior & subsulsus humor ad thoracem, qui tussim movebat, in extremis partibus dolores vagos & fugitivos excitabat. Initio horror & calor totum corpus & caput occupabat, & ad tactum non erat mordax, continuus tamen, cum rubore oculorum & tumore. Urina primum tenuis, mox crassa; aliis sanguis è naribus fluebat; plerisque sudor copiosus prorumpebat, quo & febris finiebatur, quarto ut plurimum die, interdum, sed raro, longius protrahabatur, ad septimum, vel nonum diem. Cæterum illud quam maxime notatu dignum, quod synochæ hæc epidemice grassantes & cum magna vehementia invadentes, administrata statim sub initium convenienti sanguinis per venam sectam missione & adhibitis postea temperantibus, & viscidum colliquantibus tertio mox & quarto die fuerint solutæ, nec in putridas, aut diuturnas transferint febres, quæ non sine periculo. Et certe dici vix potest, quam insigniter febrium synocharum æque ac ardentium vehementia in principio illico his præsidii obtundi queat ac frangi. Testis est jam ipse Galenus *meth. med. IX.* perite non minus, quam vere scribens: nemo ex synocha in putredinis febrem incidit, qui sanguinem primum detraxit. Quo quidem præsidio neglecto, in summum ægri discrimen perveniunt, nisi eos, vel virium robur, vel largum alvi profluvium, vel sudor ex manifesta phreniide eripiat copiosus. Ego quoque observavi frequentius, synocham simplicem, juvenes sanguine & succis plenos cum magno æstu & capitis dolore, nec non anxietate, sub pulsu pleno & crebro, prehendentem, post incisam medianam & dato pisanæ largo potu intra quatrimum, sudore per totum corpus manante,

manante, fuisse solutam, remittente mox inquietudine cum æstu ac siti, & somno redeunte. Opus tamen est, ut salutaris hæc diaphoresis per aliquot dies adhuc congruis remediis fervetur; & postea solutivo remedio, ex clementioribus manna, tamarindis & rhabarbaro & tartaro, alvus ducatur. Neque etiam omittenda venæ sectio sub initio hujus febris; si corpus sanguine redundans ac pulsuum adest magnitudo; licet haud ita pridem sit admissa. Aliquot enim exinde mortuos, vel in summum vitæ discrimen adductos novi, quibus medici ob id sanguinem subtrahere renuerunt; quia ante unum vel binos menses modo factum; quum tamen ex longo usu atque experientia in comperto sit, hac in febre, non semel, sed bis interdum, pro virium robore & sanguinis abundantia, venæ sectionem esse administrandam.

CAPUT II.

De Febre Ardente nec non Cholericæ.

THESES PATHOLOGICÆ.

§. I.

Nostra quidem ætate omnes acutæ & continuæ febres, quæ præcedente rigore, cum ingenti æstu, siti, anxietate & pulsuum celeritate junctæ sunt, vulgo vocari solent ardentes, Germanis *hitzige Fieber*. Quin ipse artis parens, *Hippocrates*, omnium febrium originem ex bile, plus minus vitiosa & meraci deducit, nec sanguinearum, nec synocharum facit mentionem, sed in scriptis suis, febres fere omnes continuas, inflammatorias, item synochas, tam simplices, quam compositas, putridas quoque & malignas, appellat ardentes. Nihilo minus tamen insignem inter has febres esse differentiam, luculenter omnino attentam observatio incurfus symptomatum & decursus singularum, nec non curandi ratio diversa, docent.

§. II.

Ardens itaque febris, Græco nomine causus, stricte & proprie dicitur illa, quæ cum ardente & igneo quasi calore totius corporis atque siti inextinguibili, lingua simul arida, fissa & nigra, junctæ. Binos hos enim pathognomicos causi esse characteres, veteres volunt omnes, & ob id torridam etiam hanc febrem appellarunt atque urentem. *Hippocrates lib. de affection. p. m. 167.* ita succincte describit ardentem: *calor fervidus, sitis fortis, lingua aspera ac nigra, color subbiliosus, & sputum biliosum.* Sed *Aræteus*, exactus historiarum morborum scriptor, *Lib. II. cap. IV.* hanc sistit plenior descriptionem: *ignis passim acer & tenuis est, sed intus maxime spiritus tanquam ab igne calidus; aëris vehemens attractio, frigidi cupiditas, lingua arida, in labiis & cute squalor, algent extrema, lotium quam biliosissimum, insomnietas, arteriarum motus crebri, parvi, imbecilli, oculi puri, luculenti, subrubri, facies colorata. Quod si morbus ulterius crescit, omnia majora & sæviora fiunt. Arteriæ minimis motibus & creberrimis agitantur, ignis aridissimus & acerrimus, mens delirat, neminem agnoscit, siticulosi fiunt, omnia frigida at-* *Frid. Hoffmanni Oper. Tom. II.*

trectare cupiunt, parietem, vestem, pavimentum, humorem. Manus frigent, sed palmæ perquam calidæ, ungues lividæ, spiratio crebra est & rorsidus humor circa frontem & jugula.

§. III.

Hæ ardentes proprie sic dictæ febres, multum differunt ab aliis continuis. Nam in synocha; tam simplici, quam composita & cacoehymica; non tam acris & ingens calor est, neque tam inexhausta sitis, sed æstus mitior cum dolore quodam. Synochæ magis invadunt sanguine plenos, habitus laxioris, laute viventes; idque potissimum tempore verno ac in regionibus temperatis; sed causi adoriuntur macilentos, biliosos, sensibiliores, generantur sub tempestate calida sicca diuturna, & regnant maxime in locis calidioribus. In ardente porro, secus ac in aliis continuis, facies flavescit, vomitio, vel conatus vomendi cum fastidio ciborum adest, urina flammea; intensius bile tincta mingitur, & per alvum biliosa foetida multa exturbantur. Tum id quoque peculiare habent febres ardentes, & quæ à copia & acrimonia bilis subnascuntur, præ aliis continuis inflammatoriis, item sanguineis & malignis, ut diebus imparibus & circa tertium exacerbentur, paribus autem remissiores sint, id quod etiam observatur in tertianis continuis, cholericis, nec non in illis quas veteres tritaephyas dixere, quæ tertio die sine horrore & rigore periodico exasperantur, qualis observatur in hemitritæis, sive semitertianis. Accedit, quod febres, quibus sanguinis puri, sive impuri copia complicatur, sæpius quarto statim die solvantur, sudore, vel hæmorrhagia larga sub facie rubicunda, quum ardentes demum circa septimum diem, post rigorem, vel criticum sudore, vel symptomaticum inflammatione ventriculi, duodeni & partium, ad quas biliarii ductus pertingunt, funesta, terminentur. Denum ratione curationis adest discrimen: ardentes quippe potum frigidum, ceu præstantissimum auxilium ferunt, sed non ita aliæ continuæ & inflammatoriæ, multo minus malignæ & putridæ. Sanguinis missio in febribus à sanguine in non minimis vasis stagnante oriundis, item inflammatoriis, præsertim, quæ occupant partes & viscera sanguinea, summopere est necessaria; in ardentibus autem veris & exquisitis, eadem non opus, ut potius noceat.

§. IV.

Sed simplicis ejusmodi & exquisitæ ardentes febres, frequentissimæ quidem fuerunt & sunt in Asia, Græcia, Ægypto ac Italia, & ob id à priscis medicinæ parentibus, *Hippocrate, Galeno, Aræteo*, fusè & accurate quoad prognosin & medicationem descriptæ. In temperato autem nostro climate oppido sunt raræ, ac non nisi à liberaliori potu vini spirituosius valde, æstate ardente, motu & exæstuatione impeniori animi corporisque & cohibita perspiratione, suscitantur. Nostro potius sub cœlo & inter nostrates familiares magis ardentes sanguineæ, sive synochæ biliosæ, item cholericæ febres.

§. V.

Synochæ autem biliosæ nobis dicuntur illæ, quæ sine præcedente singulari horrore ac rigore, cum magno ardore, siti, vigilia, anxietate & inquietudine, in corporibus sanguineo-cholericis, copia sanguinis calidi & biliosi refertis, oriuntur,

Differit ab aliis continuis & inflammatoriis.

Rarior est apud nos simplex & vera.

Sed frequens ardens sanguinea.

& diebus imparibus, seu criticis, antecedente rigore quodam, terminantur in salutem, vel mortem. In salutem quidem solvuntur sudore, vel ut plurimum hæmorrhagia narium. Hæ enim sunt ardentes illæ, de quibus *Hippocrates lib. I. epid. com. 2.* notavit: omnes ex iis evasisse, quibus sanguis è naribus aut aliis viis effluxisset, reliquis, quibus id non accidisset, pereuntibus. Quando vero funestus eventus, desinunt vel in partium nobiliorum, meningum maxime, pulmonum, ventriculi & intestinorum inflammationem lethalem, vel in lethalem syncopem, ob sanguinem in dextro cordis ventriculo collectum, stagnantem & demum congruatum.

§. VI.

Et cholerica febris.

quæ vel acutissima.

Et minus acuta.

Alterum nostris familiare ardentis complicatæ genus cholerica febris. Hæc etiam intenso æstu, siti, angore & inquietudine aggreditur, sed cum vomitu, seu perpetuo conatu vomendi, dejectione biliosa & copiosa, extremorum frigore, ardore interno, & anxietate cardialgica jungitur. Sed merito etiam cholerica hæc febris distinguenda in acutissimam & minus acutam. In illa longe major est symptomatum vehementia, dejectiones biliosæ, per superiora & inferiora copiosissimæ, junctæ cum cardialgia etiam syncoptica, & plerumque ante septimum diem necant vehementi ventriculi & intestini duodeni inflammatione, cujus indicia vehemens circa præcordia & fixus igneus ardor, cum extremorum refrigerio, summa inquietudo & anxietas, singultus & eructatio bilis & salivalis liquoris copiosa, ictericus faciei color, nec non facies cadaverosa, sic dicta Hippocratica. Non nullæ non adeo acutæ, sed longius extrahuntur, ita tamen, ut subinde remissione, vel plane intermissione quadam interpolentur, & vel quotidie, vel tertio quovis die, cum vomitibus, anxietatibus & refrigeratione iterum exacerbentur, merito ob id quotidianæ, seu tertianæ continuæ, vocandæ. Sed hæ ipsæ, nisi congruis cito succurratur auxiliis, in lentas febres perquam facile degenerant, & stomachi diuturna vitia, dolores pressorios, ructus, inflationes, ob erosionem ventriculi, aut duodeni, à mordaci bilioso succo, vel superficietenus, vel profundius factam, inferunt.

§. VII.

Causa proxima ardens.

Ad causas & generationem harum febrium quod attinet, illa quidem exquisitè ardens, quæ summo fervore & incendio, cum linguæ siccitate & siti clamosa, tam partes internæ, quam externæ, uruntur & exsiccantur, causam non habet aliam, quam celerrimam sanguinis & humorum agitationem, per fibroso-vasculosam totius corporis compagem, partim quoad minima vascula obstructam, partim spasmo tensam atque constrictam, sub quo motu attritivo solidorum ad fluida & fluidorum ad solida, intestinus partium sulphurearum quoque augetur, unde inflammatorius calor, fluidas diffans atque consumens & solidas siccans & adurens, enascitur. Hic vero æstus in corporibus sanguine & succis plenis, ob fibrarum molliem & laxitatem, lenior est atque remissior, ac febris emergit minor ardens, minus exquisita, in qua non tam impensa cutis & faucium siccitas, neque etiam sius adeo urgens. Et in illa ardentis specie, quam cholericam diximus, non tantum, ob partium salino-sulphurearum in succis redundantiam, & minima non nulla vascula angustata & obstructa, celerior est

motio, verum etiam succus biliosus copiosius in hepate secretus ac in duodenum & ventriculum effusus, acrimonia & mordacitate sua, nerveas tunicas acius sollicitat, lancinat, arrodit & inflamat, ex quo symptomata huic feberi propria, ardor, anxietas, cardialgica, nausea, vomendi conatus, impetuosæ per superiora & inferiora biliosæ dejectiones.

§. VIII.

Omnia igitur, quæ sanguinem exæstuant & uberi particularum sulphurearum in sanguine proventui favent, liberum quoque ejusdem per nimiam partium vascula transitum retardant atque impediunt, ad generationem ardentium febrium faciunt. Hinc est, quod iisdem præ reliquis imprimis pateant, qui biliosæ constitutionis, strictioris habitus, potibus spirituosus indulgent, crebrius animo, præsertim ad iram moventur, corpusque vehementiori motu exagitant. Neque minus inde ducenda ratio, quod sub cælo calido & in locis meridionalibus frequentissima sit ardens exquisita, nec non quod apud nos, post diuturnum solis æstate sicca fervorem, succedente autumno frigidior aura, crebrius incidant, quin epidemice quandoque cum diarrhœis biliosis, dysentericis, tertianis duplicibus & continuis cholericæ grassentur febres. Quæ autem ingenitam his ad concipiendum hunc morbum dispositionem effectui dant, sunt maxime perspiratio cohibita & vehemens ira. Nimirum quando succi calidis sulphureis particulis scatent, harum vero per vascula minima exhalantia diffusio, sive per aërem crassorem frigidum, sive improvidam refrigerationem, intercipitur, manent intus, intestinum motum suscitant & febrem accendunt. Vehementis autem iracundiæ is in corpore effectus, ut non tantum in universo systemate nervorum ac vasorum motus intensioem & rigidam spasticam stricturam inducat, sed & præ cæteris in ductus nervoso-musculosos biliarios agat, eorumque motum peristalticum fortiter augendo, ex toto systemate horum canalium exprimat biliosum succum, eundemque in duodeni cavum trumat copiose & impetuose. In quo flexuoso sinu dum stagnat, cum salivalibus succis & acidis cruditatibus mixtus fermentescit, eoque mordacem & tantum non causticam indolem acquirit, cujus index est color viridis æruginosus, qualis à commixtione bilis cum spiritu acido corrosivo, ut oleo vitrioli & aqua forti, emergere solet.

CURATIO.

§. I.

In medicatione probe distinguendæ diversæ ardentis species & corporum ratio habenda. Nimirum quando ardentissima est febris in corpore bilioso, macilento, sanguine & succis minus pleno, non habet locum sanguinis missio. Neque etiam eadem admittenda in febribus cholericis, tam acutis, quam intermittentis typum servantibus, & cum numerosis dejectionibus per os & alvum, summa præcordiorum anxietate & extremorum frigore stipatis. Sed ubi junctæ ardenti sanguinis plenitudo & febris est nostris frequentissima, quæ ex veterum denominatione synochus biliosa, sive putrida, recte dicitur, nunquam non pernecessaria est ac utilissima sanguinis conveniens, sufficiens & pro ratione virium & vasorum amplitudinis, proportionata missio. Hac enim facta, non modo vehementia febris & sympto-

Causa antecedens.

Sanguis non indiget cretism missio.

symptomatum multum frangitur, sed brevis etiam & felix eventus, cæteris paribus, sperandus. Contra ea experientia docet, gravius semper & periculosius decumbere hac febre, foeminas inprimis & sanguine abundantes, si in principio omiffa sanguinis subtractio. Tum enim natura ipsa superflui sanguinis excretionem, per nares potissimum, molitur, quod si non critico & convenienti tempore fit, non sufficienter succedit, sanguinis in vasis cerebri subsequitur stasis, phrenitidem valde periculosam membranarum cerebri inducens.

§. II.

Post sanguinis missionem omni studio eo an nitendum, ut igneus iste totius corporis æstus cum immodica siti & faucium ariditate, removeatur iis, quæ æstuosam illam partium sulphurearum agitationem figunt & temperant, ac præterea fibrarum rigidum spasmus laxant & humores in vasculis minimis stagnantes diluunt, fluxiles reddunt & obstructa referant, ut æquabilis & liberior fiat per loca convenientia & vasa transitus. Hunc in finem veteres omnes dilaudent potum frigidæ aquæ. *Hippocrates de affect. §. 2.* in ardente febre dandas præcipit portiones frequentes & paullatim quam frigidissimas. *Aretæus lib. II. cap. IV.* jivilius, ait, vomitus & distensio, adest fastidium, anxietas, virium labefactatio, tunc frigida aqua cyathi duo vel tres propinandi sunt ad ventris adstrictionem; facile enim frigida in ventre incalescit. Neque minus *Galenus meth. med. lib. IX. cap. V.* præter venæ sectionem, potionem frigidam impense laudat, adjecta ratione, quia extinguit febrem & naturam robustam reddit, ut deinceps per alvum & sudorem expellat, quæ noxia sunt. Idem sentit *Celsus, lib. III. c. VII.* si, inquit, in summo incremento est morbus ardens, utique non ante diem quartum, magna siti accedente, frigida aqua copiose præstanda est, & ad satietatem danda, qua pro medicamento utuntur. Ubi factum est, multa veste operiendus & collocandus, ut dormiat. Fereque post longam sitim & vigiliam, post multam satietatem, post infractum calorem, plenus somnus venit, per quem ingens sudor effunditur idque præsentissimum auxilium est. Has tamen subnectit cautiones; sed in his tantum, in quibus præter ardorem nulli dolores, nullus præcordiorum tumor, nihil prohibens, vel in pulmone, vel in faucibus, non ulcus, non defectio, non profluvium alvi fuit. Si quis vero in hujusmodi febre leniter tussit, is neque vehementer suture debet, neque aquam frigidam bibere. Accedit *Alpinus med. meth. lib. II.* ita habens: in continentibus febribus vehementer æstuosis, medici omnes largum potum algidæ aquæ exhibere suesunt, quia calorem nativum concentrat, ut statim inde sitis & calor cesset: roboratur inde totum corpus & aqua epota digeritur & plerumque largissimos sudores frigida aqua potus suscitatur, non nunquam vomitus biliosi fiunt & aliquando per alvum copiosi humores profluunt & urinam copiosam excitat. Mirabile est, concludit, quomodo tale præsidium has febres expugnet; nam excretionibus, quas aqua suscitatur, hæc febres finiuntur. Idem auctor *Ægyptiis* hoc in usu, quin inter secreta fuisse de *Med. Ægypt. lib. IV. c. XV.* tradit, aliqui, scribens, pro secreto habent synochas & ardentes febres, multam aquam angarill (quæ cucumeris species) egrotis propinantes, sanare, si modo febricitantes

Frid. Hoffmanni Oper. Tom. II.

iis multis diebus in cibo ac potu sola utantur. Alii tempore vehementioris æstus, largius frigidam potandam concedunt, qua epota, agro multis pannis contegentes, sudorem procurant, qua non paucos audio ibi sanatos fuisse.

§. III.

Nec immerito tam magnifice de frigida potu in ardentibus sensisse veteres, uberius testatur & ratio & experientia. Nisi enim ventriculus, vel aliæ internæ partes jam vera inflammatione affectæ, nec summa cum extremorum frigore anxietas, neque etiam pulsuum contractio & sanguis deficiens adsit, utique, aqua bonæ notæ, subfrigida, non prorsus gelida, haustu, non simul & semel, largiter tamen pota, egregie prodest. Nam frigus in humido æstuosum nimis partium sulphurearum & æthericarum in sanguine motum obtundit, fibrasque remissiores adducit, nimiumque distentis contractilitatem & elasticitatem justam reddit. Neque etiam à frigore noxa timenda, quia frigidum, successivis haustibus corpus subiens, à calore interno tepescit, qui humidus tepor ad relaxandas spasmo contractas fibras & succos in minimis stagnantes expediendos & fluxiles reddendos, apprime proficius, ut hinc sudor & urina copiosius fluant & alvus moveatur. Sed quum in septentrionalibus nostris regionibus admodum raræ leves ejusmodi, puræ & subtiles aquæ, reperiantur, coctione & admixtione congruorum corrigendæ utique. Ipse *Hippocrates* aquam cum hordeo coctam jam in ardentibus laudat. Et *Aretæus* aquam cum lacte mixtam in cholera commendat. Qui nostratibus proficui deprehensi frigidi potus, sunt maxime, julapia, ex aqua fontana cum succo citri & saccharo, nec non ptisanæ ex rasura cornu cervi, radice scorzonæ, cum syrupo acetositis citri, vel julepo rosarum & spiritu vitrioli, conditæ, item aqua cum frusto panis cocta. Huc quoque referendum serum lactis dulce, vel acidulum, cum succo citri coactum, item aquæ minerales temperatæ, quo nomine celebres acidulæ Selteranæ, Antonianæ & Wildungenfes.

§. IV.

Ad obtundendam tandem & contemperandam, in cholericis potissimum febribus, acrimoniam acidam causticam succorum biliosorum in ventriculo & duodeno stagnantium, spectatæ virtutis ex compositis pulvis Marchionis maximeque pulveres absorbentes, quæ commodissime ingrediuntur terrea teneriora, lapides cancrorum, mater perlarum, conchæ præparatæ, cornua & ossa philosophice præparata, nec non ex commendatione *Langii* atque *Cratonis* crystallus montana. Nobilis quoque ad æstum extinguendum & intestinum motum componendum nitri virtus, quod his pulveribus cum fructu ob id subinde admiscendum. Sed necesse est, ut pulveres ejusmodi temperantes in sufficienti quantitate diluti vehiculi assumantur, crebrius etiam & convenienti tempore. Neque minus ex usu sunt diluentia ac demulcentia, emulsiones scilicet, ex amygdalis, seminibus quatuor frigidis, præsertim cucurbitæ, cum aquis florum, quæ paregorica simul virtute pollent, sambuci, rosarum, buglossæ, primulæ veris, tilia, liliorum convallium, nec non aqua ceraforum nigrorum. Conducunt quoque hoc nomine gelatinæ ex rasura cornu cervi, lac ipsum cum aqua mixtum, oleum amygdalarum dulcium, serum lactis dulce, item julecula

ex pullis gallinaceis contusis & in vase clauso cocta. Et hæc utique remedia appriime proficua sunt ad arcendam inflammationem partium nervoso-membranacearum, quæ his morbis eventu demum accedit funesto modo exhibeantur debito ordine, tempore ac dosi, cum judicio & observatis quibuldam cautionibus, jam subnectendis.

CAUTELÆ ET OBSERVATIONES PRACTICÆ.

§. I.

*Temperies
utilis.*

Sicut in curatione omnium acutarum febrium; ita maxime ardentium & quæ ex inflammatione fiunt, tutissima & optima methodus est, per totius morbi decursum, placide & moderate procedere, omniaque quæ à temperie & moderamine, quoad pharmaciam æque ac diætam & regimen recedunt, evitare sollicite. Egregium inprimis hanc in rem est *Celsi lib. III. c. VII.* monitum, ita habens: *etiam amplo conclavi æger tenendus est, quo multum & purum aërem trahere possit, neque multis vestimentis stranguendus, sed admodum levibus tantum velandus est. Possunt etiam super stomachum poni folia vitis in aquam frigidam tincta, ac ne nimia siti vexandus est.* Moderatus quippe & æqualis calor, in febribus hisce, ad materiæ morbificæ correctionem, resolutionem & ex corpore diffusionem, plus præstat, quam omnis, quantumvis pretiosa, medicina. Sed nihil vicissim perniciosius, quam fervido conclavi accendere, vel etiam abstinencia potus intendere, calorem immodicum, qui vires exsolvit, debitam vitiosi humoris à succis vitalibus, se & excretionem impedit, & humidum ad expeditum sanguinis & humorum progressum & ad coarctata & repleta minima vasorum aperienda & relaxanda necessarium, absomit. Neque ea propter semper utilis, sed sæpius nocivus, in æstuosis hisce febribus, frequens potuum calidorum & infusorum theiformium usus. Multo vero magis detrimentum procurant ea, quæ calefaciunt, massam sanguinis commovent & positive sudorem movent. Deinceps non sine ratione *Celsus l. c.* commendat amplum conclave & aëris puri usum. Nam sicuti subtilior & ætherea elastica in aëre substantia, genuinum illud pabulum & fomentum est, quod virtutem vasorum elasticam vitalem systolicam & robur partium sustinet: ita aër multis humidis & pravis effluviis inquinatus & ob id vi elastica spoliatus, vel sanis, tanto vero magis infirmis corporibus, adversus est atque damnosus. Neque aliam subesse causam arbitror, quod plurimi ex plebeis, quorum natura ad vincendum morbum alias satis valens, in febribus acutis pereant, quam conclavia angusta, humilia, & haud raro nimis calefacta, in quibus, præsertim quando plures decumbunt, aër morbidus & tetrus halitibus gravis est, quem continuo hauriunt.

§. II.

*Natura
motus at-
tendendi.*

Natura etiam febrium continuarum medicatrix optima: hujus motus igitur cum cura ab artifice attendendi. Exserunt autem hi sese maxime per rigorem, qui ex medulla spinali, cum horroris & frigoris sensu, venit, & certis temporibus, diebus maxime imparibus, dimidio quarti, septimo, undecimo & decimo quarto, accidit. Est quippe hic rigor non nisi affectio generis nervosi

universi corporis spasmodica, qua sanguis & humores, ab exteriori corporis peripheria, versus interiora, cor, cerebrum & vasa majora, cum quadam vehementia pelluntur, eaque propter extrema refrigerantur, interiora vero sanguine nimis replentur & distenduntur, unde pulsus contractus est, pectus angitur faciesque cum vasis capitis turgescit. Quod si igitur post hunc rigorem, succi intus acti æquali renisu & auctiori cordis & articularum systole ad corporis superficiem repelluntur, sæpius tota morbi & causæ morbificæ vis, uno impetu, per largum universi corporis sudorem, aut narium stillicidium, frangitur penitusque eliditur. Sic procedens rigor salutaris est, criticus ob id recte vocatus, post quem articularum ictus æquabiles fiunt & molles, circulus sanguinis debitus, & vires cum somno redeunt. Sed ubi cordis & vasorum systolica vis non tam valida est, ut appulsum sanguinem iterum extus agere possit, symptomaticus est rigor & malus. Tum enim nec corpus incalescit rursus, nec pulsus æqualis fit, nec sanguis per nares, nec sudor calidus universalis per poros, sed particularis & frigidus circa caput & collum, effertur, nec corpus cum animo reficitur, nec somnus redit. Sanguis potius intus in minimis vasis impactus subsistit, ac in cerebro phrenitidem & convulsiones, circa cor & pulmones, summam præcordiorum anxietatem, spirationem anhelosam, difficilem, viriumque ad animi usque deliquium dejectionem, facit, ut postea nono plerumque die, mors excipiat. Quandoque etiam extra criticos dies accidunt ejusmodi rigores, sed hi pariter sunt symptomatici malumque præfagiunt eventum. Hi itaque naturæ motus, mortem, vel salutem, adducentes, probe à medente attendendi. In hoc enim præcipuum ad prognosin & tempestivum remediorum usum versatur momentum, quin totius doctrinæ practicæ fundamentum, quod optime tenuit primus artis parens *Hippocrates*, quod serio inculcarunt optimi & fidissimi hujus interpretes, *Mercurialis* atque *Dureus*, sed ex nostris norunt paucissimi.

§. III.

Quando sic natura motus instituit extraordinarios, quiescendum medico nihilque movendum. Abstinendum quoque plane à cibo. Et corpus tantum in moderato & æquabili calore conservandum. Si autem naturæ facultas ad expellendum sanguinem & excretionem efficiendas, sola non sufficit, juvanda congruis auxiliis perite, sive interius analeptis & diaphoreticis temperatis, sive exterius derivantibus & discutientibus. Nam profecto nunquam magis, quam in periculosis & acutis morbis, summopere necessaria maximique momenti est, temporis in agendo opportunitas.

§. IV.

Ubi igitur post rigorem incidit cephalalgia plethorica, cum incipiente mentis emotione & nares parum sanguinis stillant, epithema nobis usitatum, ex aceto & aqua rosarum, camphora in spiritu rosarum soluta, nitro & oleo ligni Rhodii, subfrigide, non modo temporibus, sed & melius raso toti capiti, admotum, egregie se gerit refrigerando, discutiendo & inflammationi resistendo. Idem hoc epithema, linteo triplicato lato, præcordiis impositum, ad levandam anxietatem, inquietudinem depellendam & spirationem facilitandam eximii usus. Optimum tamen etiam auxilium ad arcendam phrenitidem expectan-

*Non sur-
banda na-
tura, sed
juvanda.*

*Caput de-
fenden-
dum.*

expectandum à venarum in naribus, five id fiat per instrumentum scarificatorium, five intrusum culmum straminis, apertione, tepesactis simul & frictis pedibus atque femoribus, & data interius mixtura discutiente, diaphoretica & analeptica cum aceto stillatio, aqua cinnamomi, rosarum, cardui benedicti, mixtura simplici, cinnabari, lapidibus cancrorum & bezoardico minerali.

§. V.

Sitis sedanda.

Ad sedandam sitim & humectandas fauces aridas cum lingua, ego non præsentius vidi remedium, quam serum lactis dulce, in ejus mensura nitri puri drachma dimidia soluta, quippe quod crebrius, sed parvis haustibus subfrigide potum, æstum præternaturalem simul extinguit. Os quoque & fauces subinde eluendæ aqua, in qua rob diamoron & nitri sufficiens quantitas soluta. Præbere hæc etiam potest gargarifina. Injections vero per siphonem nunquam probo, quia valido attritu augent dolorem & inflammationem. Præterea ad præscindendam anginosam inflammationem, insigniter prodest linctus lente deglutiendus, ex julepi rosarum uncia, nitri puri granis quindecim & camphoræ granis tribus, in drachma una olei amygdalarum dulcium solutis.

§. VI.

Alvus perite movenda.

Utut alvum purgantia, ratione docente & experientia monstrante, in febribus ardentibus, non nisi periculo præbeantur; è re tamen est, ut alvus semper sit libera. Sub morbo igitur hoc optime præstant glandes & clysteres, ex solo lacte, melle & pauxillo nitri. Facta vero crisi, & coctione, ex urinæ sedimento cognoscenda, alvum utique clementioribus laxantibus ducere, tamarindinatis, mannatis, rhabarbariis, passulatis & tartareis, expertissimum, quo vitiosi succi, in primis viis per ipsum etiam morbum geniti, exturbentur, ne novo morbo ansam & causam præbeant.

§. VII.

Frigidæ potus nitida.

Aquæ frigidæ potio, à veteribus eximie collaudata, heroicum hoc in morbo & magnæ efficaciam est remedium, eaque propter attentionem & circumspeditionem medici poscit. Supra tamen satis fusc jam expositum, cur & quando ex usu sit. Heic igitur monuisse sufficiat: nunquam simul & semel magnis haustibus præbendum esse frigidum potum, sed successive & crebro, nunquam in principio morbi, sed elapsis jam aliquot diebus; nunquam tempore accessionis, vel exacerbationis, vel etiam sub rigore & pulsu parvo, aut intermittente, nunquam nisi plethora prius soluta. Sed quando extrema calida, pulsus æqualis, celer & magnus.

§. VIII.

Acrimonia temperanda.

Si febris est cholericæ, acuta, admodum periculosa, ob succos biliosos mordaces nimium & corrosivos, nerveas ventriculi & intestinorum tunicas arrodentes, celeri & efficaci auxilio est opus. Tum igitur consultum est, pulveres absorbentes ac temperantes, crebro & majori, quam alias moris est, quantitate, propinare cum diluentibus ac demulcentibus. Quo nomine ego nunquam non expertæ virtutis commendo pulverem ex lapidum cancrorum, matris perlarum, cornu cervi sine igne, crystalli montanæ, five lapidis talci calcinati, ana drachma, nitri scrupulo, de quo singulis horis sumenda drachma

una, cum emulsionis amygdalatæ unciis binis, cui drachinæ duæ olei amygdalarum dulcium commixtæ. Ad impetuosas autem biliosas excretiones compescendas, præstabilis virtus est liquoris nostri anodynæ mineralis, præsertim si cum aliquot guttis olei macis essentificetur & cum diluto vehiculo, vel aqua tantum frigida, propinetur. Quia enim nimis celere in systalticum, vel peristalticum motum in ductibus biliariis sistit, efficit, ut minor copia succi biliosi ad duodenum trudatur & ob id copiosior excretio sistatur. Et certe his præstidiis, debito tempore, congrua dosi & mature usurpatis, & cholicam, & dysentericam passionem, brevi fuisse sublata, multis exemplis edoctus novi.

Impetuosæ excretionēs compescenda.

ENARRATIONES MORBORUM.

OBSERVATIO I.

Summus quidam militum præfectus, quem vocant Generalem, quadragenario major, sanguineus & vividus, laute vivens vinique potissimum potui indulgens, cæterum bene valens, nisi quod vere & autumno, rheumaticis & catarrhosis defluxionibus affligeretur, potarat in convivio liberaliter vinum potens Hungaricum Tokkaviense, ad mensuras minimum quatuor, eodemque plenus, vesperi sub cœlo nubilo & frigido in villam suam vicinam redierat. Redux factus, noctem insomnem & mire æstuans exegit, mane expertus calorem intensissimum, cum pulsu magno & celeri, cephalalgia, virium prostratione, faucium ardore ac siti. Bibit quidem infusum thæe, sed inde anxietas increvit & vomendi conatus accessit. Sumisit pulverem absorbentem & nitrosum, sed symptomata perstiterunt. Admisit quoque venæ sectionem in brachio, sed sine levamine. Hinc vocatus ego quarto die, offendi ipsum ingenti æstu affectum & summopere conquerentem de ardore ventriculi ac siti. Illico igitur removi cerevisiam lupulata valde & spirituosam, male eo usque ad sitim extinguendam liberaliter datam. Annuit æger ac enixe petiit haustum frigidæ. Ego vero sic concedere nolui, sed paravi julapium, ex aquæ fontanæ mensuris duabus, succi citri uncia, cum tantundem julepi rosarum, de quo successive biberet & cum quo sumeret, binis quibuscumque horis, pulverem ex matre perlarum, conchis, nitro & lapidibus cancrorum. Æger impatiens quatuor haustibus julapium ingurgitavit omne, tres etiam assumsit pulveres ac inde refrigerium sensit internum, melius quievit & parum sudavit. Jussit itaque ut denuo conficeretur julapium, ejusdemque mensuras duas intra aliquot horas me inscio ingessit. Inde vero incidit in effusissimum sudorem, sequutæ alvi dejectiones crebriores, somnus rediit, symptomata discussa & convaluit.

Ardens co-pioso potus julapii sanata.

Epicrisis.

Veteres, & inter hos maxime Galenus, Aretæus ac Celsus, aquæ frigidæ potum in synocha & ardentissima febre mirifice commendarunt, quin in hujus usu omnem fere salutis spem reposuerunt; hac tamen cum cautela, ne detur ubi interna jam inflammatio, scirrhus, aut tumor œdematosus est. Ego quoque præstabilem simplicis hujus virtutem multoties expertus sum in cholicis passionibus, ad contemperandum bilis ardorem & acrimoniam, viresque languentes suscitandas. In nostro egregia pariter ipsius fuit facultas, maxime quod sudorem movit. Neque vero etiam

nocere hoc in casu magna julapii quantitas potuit, quum sanguis à copia Hungarici vini vehementer exagitatus esset & quasi incensus. Et enim debet esse proportio quædam inter vim morbi & vires remedii, maximeque huic feberi, perite monente *Aretæo*, magnum ac celer remedium opponi. De singulari autem aquæ effectu sudorifero notari inprimis meretur *Riverii* testimonium, *Cent. I. obs. XIX.* ita habens: *observandum, à spiritu sulphuris, vel ejus loco spiritu vitrioli, cum aqua exhibito, sudores copiosos fuisse provocatos; quod multis experimentis nobis innotuit, qui plures tertianas curatas vidimus eodem remedio, in summo accessionis æstu & urgente siti exhibito; unde copiosi sudores provocabantur, à quibus non solum paroxysmus, sed etiam totus morbus integre solvebatur. Minuenda tamen est in minori aquæ quantitate spiritus quantitas, ne nimium acefcat.* Cæterum sicuti aquæ frigida potus & refrigerantia efficacissima in febre, quæ à sanguine propter spirituosorum abusum nimium exæstuato accenditur; ita vicissim aquæ calida potus, in febre, quæ in sanguineo-pituitosis, ex obstipatis per aërem frigidum & humidum cutis poris inducitur, virtutis est longe saluberrimæ. Vidi ego sæpe plebejos, sub cælo pluvioso, nebuloso & humido inter labores versantes diu & inde febre correptos, solo potu calido, ex aqua, cum carduo benedicto & scabiosa decocta, adjecto æquali mensura vino, & calide pota hac mixtura, sudore inde oborto, cito ac tuto morbum discussisse. Quod autem frigida etiam sudorem movere possit, ratione non caret. Nam expansum nimis vasorum elaterem adducendo, tonum & robur ipsis restituit. Calorem fervidum restringendo, impedit seri & lymphæ coagulum, quod ipsis à forti calore induci albuminis ovi exemplo constat. Tenaces autem succi, minima vasculorum excretoriorum obstruentes liberam evacuationem impediunt. Frigidum quoque æstuanti corpori immixtum tepescit, tepidumque factum fluxilitatem humoribus conciliat & aridas exsuccas partes molliat.

OBSERVATIO II.

*Synocha
cacochymica
cum
purpura
funesta.*

Generosissima fœmina, triginta sex annorum, sanguineo-cholerica, natura sensibilior, animo in affectus prona, ingenio alacris & sagax, cæterum corpore nervosa & robusta, ciborum appetens & liberaliter cœnans, ob alvum adstrictiorem & collectas inde cruditates diu conquesta est de doloribus pressoriiis & inflatione ventriculi ac hypochondrii sinistri, mensium quoque, ob uterum ex crebra & annua fere imprægnatione debilem, fluxum, ratione copiae & temporis, non experta est legitimum. Ad tollenda hæc vitia multis quidem usa est medicamentis & medicis, sed sine levamine. Aquarum autem medicatarum potum, ob ventriculi imbecillitatem & atoniam, ferre potuit nunquam, melius tamen balneum ex aquis Tœplicesibus. Accidit interea, ut medio vere, post gravem terrorem & excandescentiam, præcedente levi horripilatione, incideret in febrem valde æstuosam, quæ sitim cum calore accendit intensissimam, somnum excussit omnem, viresque mirifice prostravit. Accitus primum medicus loci, qui venæ sectionem, ante sex hebdomades vix admissam, reiterare renuit. Quinto die vocatus ego, pulsum fortem & magnum deprehendi, cum æstu intolerando, anxietate circa præcordia, inquietudine, insomnia

& dolore dorsi. Pugnavi igitur adversus hæc symptomata diluentibus & refrigerantibus potionibus, pulveribus absorbentibus, nitroso-diaphoreticis, cum succo citri permixtis. Fluxit inter hæc ex utero ichor cum sanguine, ad viginti quinque horas. Sed septimo die incurrit horripilatio, extrema refrigerata, pulsus celer & contractus factus, facies turgida, oculi rutilantes & levis cogitationum aberratio visa. Exactis tamen duabus horis & data mixtura discutiente diaphoretica, ex aqua cardui benedicti, cerasorum nigrorum, theriacali, aceto destillato, antimonio diaphoretico, lapidibus cancrorum, cinnabari & syrupo acetositis citri, rediit calor per totum corpus ad pedes usque, pulsus increbuit, oculi splendorem rutilantem posuerunt, & per universum corpus fausto prodiit omine sudor, quem temperatis diaphoreticis & infuso theiformi secundare jussi. Inde magna sequuta symptomatum remissio & ægram in vado constitutam esse, visum quidem, sed quia somnus redire noluit, neque æstus penitus remisit, neque etiam vires restitutæ, non sufficientis & omnibus numeris absolutæ criseos fuit indicium. Nec vanus fuit metus: nono enim die, post lenem rigorem ex dorso, novus paroxysmus febrilis incessit, cum magna præcordiorum anxietate, intensiori æstu, inquietudine, spirandi difficultate, ita ut ægra corpus mirum jectigaret & lectum subinde mutaret. Postero die purpura rubra cum alba comparuit & collum totumque pectus obsedit, quæ congruis præsidiiis excepta. Decimo die sanguis rursus profluxit aquosus ex utero, in abdomine oborta tormina, & per alvum feces liquidæ & biliosæ, postea etiam sine sensu, secesserunt, & luculenter prodiderunt gravem in intestinis inflammationem eamque sphacelofam, quam præterea borborygmi in ventre post assumptum potum arguebant. Undecimo die, post perpetuas tandem vigilias mens alienari cœpit, pulsus reddi convulsivus, spiratio fieri anhelosa, subsequente paullo post morte, ob vim cordis & vasorum vitalem elasticam per morbum diuturnum & vigilias continuas fractam, nunc deficientem adeoque naturam penitus succumbentem.

Epicrisis.

Febris hæc merito vocanda synocha cacochymica, sive putrida universi corporis inflammatoria, ex abundantia impuri sanguinis progenita, quæ, si viscera offendit minus integra, ut hic ventriculum & uterum, raro ex voto, sed plerumque funestum, sortitur eventum. Ego vero etiam summopere improbavi, sed tacitus, ne medicus primus malum nomen incurreret, ob factum, quod infectum fieri non poterat, quod neglecta in principio sanguinis missio in corpore plethorico & cacochymico, sub pulsu vehementi, duro & magno, unde etiam ipsa natura à copia sese per uterum liberare molita. Licet etiam septimo die criseos indicia comparuerunt, somni tamen & virium defectus, cum resistente calore, imperfectam eam fuisse, prodidit, & latitare adhuc intus materiam perniciosam. Fuit hæc purpuracea, quæ teste experientia, in corporibus impuris cacochymicis, præsertim fœminarum, sub declinatione febris continuæ succedere solet, criticis diebus, sed funesto plerumque eventu. Natura enim, sive potentia elastica cordis & vasorum, morbi vehementia jam debilis nimium, eandem minus vincere & expellere potest, unde de novo in minimis vasculis fiunt stases inflam-

inflammatoriæ, tandemque mors excipit. Nostra in ægra insanabiles hæ inflammationes circa uterum & maxime intestina confederunt, easdemque dejectiones aquosæ cum torminibus, præfertim involuntariæ, ob secessum partium serofarum à sanguine coagulato stagnante, abunde satis indicant.

OBSERVATIO III.

Febbris ardens sanguinea copioso potu sanata.
Dux militaris quinquagenario major, sanguineo-cholericus, robustus, sanguine plenus, laute vivens, plus vini quam cerevisiæ bibens, in iram & vehementes animi affectus pronus, cœlebs, sed veneri vagæ admodum indulgens, postquam ebrius vehementer excaudisset & postea cum concubina habuisset rem, incidit illico in febrem vehementissimam ardentem. Invasit hæc cum artuum tremore, juncta fuit summa præcordiorum anxietas, æstus in pectore ingens, capitis dolor, somnolentia, nec non mentis emotio. Conquestus simul est de dolore lateris dextri & quarto die exspuit tussi sanguinem cum pituita mixtum. Secta quidem fuit in principio vena, sed quia inde nullum levamen, vocarunt me. Erat autem æger, quum advenirem, impatiens quandoque & irrequietus, quandoque somnolentia & torpore obrutus, sitis ingens, alvus adstricta, calor vehemens, urina tenuis flammea. Expenfis cunctis, inflammationem ventriculi & pulmonum ac minus faustum eventum sum suspicatus; ideoque ad contemperandum iterum illum inflammatorium æstus pro viribus adhibui præsidia. Clystma scilicet emolliens & relaxans, ex sero lactis, melle ac oleo amygdalarum dulcium, cum momento nitri alvo injicere jussi ad uncias duodecim aliquoties, non tam ad purgandum, quam potius ad humectandas & relaxandas intestinorum tunicas, siquidem clysteres stimulo carentes, aliquoties injecti & diutius retenti, balneum quasi præbent internum. Dein quum pulverulenta averfaretur omnia, emulsionem conficiendam scripsi, ex decocti cornu cervi mensura, amygdalarum dulcium uncia una cum dimidia & seminum quatuor frigidorum majorum ana drachinis duabus, additis aquæ cerasorum nigrorum unciis binis totidemque rosarum, matris perlarum, nitri depurati ana drachma, julepi rosarum uncia una. Hanc intra aliquot horas ebibit, ac præterea ptisanam ex hordeo, rasura cornu cervi & scorzonera, tam avide ob urentem sitim ingurgitavit, ut viginti quatuor horarum spatio, vel septem ejus mensuras epotaret, idque per aliquot dies. Dedi etiam quandoque jusculum avenaceum cum aliquot cochlearibus olei amygdalarum dulcium. Et exterius thoracem dolentem atque præcordia inungere jussi linimento ex olei amygdalarum dulcium uncia, camphoræ drachma & extracti castorei liquidi drachma dimidia. His æstus restinctus, septimoque die urina turbata ac non nihil ad fundum dimisit. Accessit nono die diarrhœa, ut plus quam decies intra diem & noctem dejiceret, cum levibus torminibus in ventre. Successit hic fluxus alvi per quatrimum, ac interea nihil sumsit, quam juscula confortantia carni cum tantillo vini & macis. Sic felicissime febris soluta, eoque facto, vires redierunt cum sanitate.

Epicrisis.

Natura valens & robusta, congruis auxiliis adjuncta, utique sæpe miracula præstat, seu effectus

extraordinarios plane. Quare ego non facile spem abjicere soleo, in perniciosis etiam & inflammatoriis febribus, quando ægri multum sitiunt & copiose commoda ingerunt liquida: in his enim magna vis, febres cum magno ardore junctas, sanandi. Nam fluxiles & dilutos reddunt spissos humores, qui obstructions vasorum efficiendo, æstum augent liberamque exhalationem, tam in, quam extra corpus, intercipiunt. Aridas quoque & nimis rigidas fibras molliendo, febrem efficiunt mitiorem & corpus disponunt ad excretionem. Nihilominus tamen prudenter etiam se gerat artifex in horum benignorum & innocentium remedium usu, & caveat, ne febrem, quæ naturæ medicatricis opus, quo auctiori sanguinis motu obstructions & stases viscidorum succorum dissolvit, intempestivo refrigerantium potu, nimium deprimat. Nam in febribus minus æstuosis & corporibus phlegmaticis, diluentia liberalius data plus nocent, quam profunt. Ubi vero æstus fervidus in sanguineo-cholericis, & massa sanguinis copia partium sulphurearum referta, largior liquidorum potus, modo ventriculus eum subigere possit, non nocet, sed præstans est medicina. Nisi enim in his nimius calor sistatur, vires brevi exsolvit, & lymphaticos humores incrassando ac coagulando, ipsam gangrænam partibus internis inducit.

OBSERVATIO IV.

Cholericæ passio cito sanata.
Illustrissima foemina tenera & exquisiti sensus, vigesimum quartum annum haud ita pridem egressa, appulerat in Carolinis, potatura thermæles aquas. Sed quum tertio die ira percita esset, & cerasa cum fragis avidius ingessisset, in prandio incidit in passionem cholericam. Vomuit nempe & dejecit copiose, intra diem & noctem plus quam vigesies, cum anxio æstu & dolore circa præcordia, extremorum refrigerio, magna inquietudine corporisque jectigatione. Accersitus ego lac cum tantundem juris pullorum tepide bibere, binis quibusvis horis pulverem ex cornu cervi sine igne parato, lapidibus cancrorum & pulvere Marchionis, æquali pondere mixtis, ad drachmam unam sumere & exterius abdomen inungere jussi totum linimento, ex tribus olei amygdalarum dulcium partibus, una olei menthæ & dimidia olei macis destillati confecto, positis supra linteis complicatis calidis. His anxietates & tormina sublata, evacuatio per superius & inferius os imminuta, & intra triduum, addito pulveribus cortice chaccarillæ, morbus facile & explicita curatione discussus.

Epicrisis.

Nil perniciosius est ira, si stomachus fermentescibilibus cibus fartus. Hic enim animi motus mox spasmo stringit stomachi & intestinorum tunicas, & facit, ut humores in hoc cavo hærentes, diutius detineantur, ac ipsa hac mora mutua quasi confermentatione, indolem contrahant sæpe tantum non venenatam. Tanto vero magis omnia hæc nocent, sub aquarum mineralium potu, quippe quo semper ventriculus ipsiusque systaltica vis infirmatur, ut dein eo facilius in ipso hærare & colligi possint incongrui succi & cruditates. Hæc autem vehemens passio, à summa humorum acrimonia, ex viridescente vomitu ejectorum colore cognoscenda, fuscitata, celerem opem & efficacem medicinam postulavit. Quare pleniori dosi & crebro data corrigentia & demul-

demulcentia. Et licet in principio ingesto largiter lacte subsequerentur vomitus caseosi, acidum in primis viis arguentes, institi tamen hoc remedio, quo etiam effectum, ut vomitu exturbata, postea nec virescerent, nec coagulata essent, sed liquida, muco & bile imbuta.

OBSERVATIO V.

*Cholerica
febris potu
aque fri-
gida cu-
rata.*

Quum anno MDCLXXXIV. Mindæ Westphalorum medicinam facitarem, æstate sicca & præcalida regnante, Chiliarcha generosissimus incidit in febrem cholicam. In hac miris torquebatur anxietatibus, inquietudine, interno æstu ac crebris dejectionibus, quæ ita vires prosternebant, ut aliquoties animi plane deliquium incurreret. Nil proficiebant pulveres terrei absorbentes, cum momento theriacæ coelestis, nil diascordium *Fracaſtorii*, nil emulſiones ex decocto avenaceo cum amygdalis, nihil etiam exterius linimenta spirituosæ. Tertio potius die excretionum vehementia & virium lapsu ad ultima ventum esse videbatur. Tum æger ob ardentem internum æstum enixe petiit haustum aquæ frigidæ. Ego vero propinare renui, & suasi, ut decoctum hordei cum rasura cornu cervi tepide biberet. Discedebam à summe debili & omnem fere salutis spem, irritis huc usque cunctis, abjiciebam. Sed quum post aliquot horas redirem, incredibilem & repentinam interea accidisse mutationem deprehendi. Neque enim amplius de anxietatibus, neque de tam magno virium lapsu, neque etiam de tanto interno æstu conquerebatur & pulsus quoque plenior & quietior micabat. Æger autem me magnopere hæc omnia admirantem alloquebatur & confitebatur: se ob sitim intolerandam sibi amplius temperare non potuisse, sed, siue mortem, siue salutem procuraret, ebibisse primum vitrum majus unum frigida aqua plenum à ministro porrectum & post dimidiam horam alterum, sicque mensuram aquæ ingurgitasse. Inde se mox sensisse virium quandam refectionem, adstrictionis quasi sensum in ventriculo, æstus mitigationem & quietem, dejectiones moderatiores cutimque antea aridam & siccam nunc etiam madescere. Nec male cessit postea experimentum, sed æger assumtis jusculis confortantibus, ex carnibus cum macere, vires mox iterum recepit, & sic præter omnium opinionem cito convaleuit.

Epicrisis.

Notabile hac in observatione, nil profecisse præsidia, quæ corrosivam humorum acrimoniam, potissimam passionis cholicæ causam, obtundunt, sed frigidum potum ægrum levasse. Ego quidem frigidam potionem roborantibus accenseo, quæ non tam materiæ, sed potius motuum vitio tollendo apta. Frigus nimirum tonum & elaterem partium vehementi æstu & dejectionum copia valde resolutum, fibras leniter stringendo & adducendo, reparat, & hac ratione facultatem motricem tonicam, in qua virium robur consistit, restituit. Eum enim frigoris esse effectum, ut fibrarum elasticitatem intendat, patet experimento, quo exciso carpio- nis corde adhuc pulsante, systole illico cessat, si immittitur in aquam calidam, si vero iterum frigida injicitur, moveri rursus incipit. Notum quoque est, corpora humana, sub diuturna æris austrina & humida constitutione, virium ex-

periri resolutionem atque languorem, accedente autem subfrigido & sereno à ventis ex oriente spirantibus aëris habitu, illico in omnibus functionibus robur pristinum recipere. Sed tati cuncta roborantia, exemplo martialium & famosi corticis chinæ, cum magna prudentia usurpanda sunt, & non nisi correcto prius, tam quoad qualitatem, quam quantitatem, materiæ vitio, & meatibus satis patulis, neque etiam primis, sed posterioribus diebus: ita etiam id ipsum circa frigidorum potum merito tenendum. Heroicum potius hoc manet auxilium, nec credendum, quod uni, id alteri etiam prodesse. Omnis enim medendi methodus, nititur exacta discretionem, non modo morbi ejusque causarum, sed & individuorum, circumstantiarum & quoque temporum. Et quando his minus observatis salutaris subsequitur effectus, ad fortunam potius, quam artem referendus.

OBSERVATIO VI.

Fœmina honesta aliquot supra triginta annos nata, corpore robusta, biliosa & animo impatiens, plus inter cibos vini quam cerevisiæ bibens, medio Majo incidit in febrem ardentem exquisitam. Medicus ordinarius præbuit bezoardicam tincturam aliquoties intra aliquot horas. Inde pathemata exacerbata, anxietas scilicet, inquietudo, æstus, vigilia, loquacitas nimia, cum alvi strictura, accesserunt etiam tormina in ventre & deglutitio facta admodum difficilis. Die quarto sanguis quidem ex utero fluxit, symptomata tamen non remiserunt, sed accessit potius, quum inscio medico largum vini haustum assumsisset, leve delirium. Semper autem major mane, quam vesperi symptomatum fuit vehementia. Septimo die, præcedente horrore & rigore, animam agere videbatur, sub mente emota & respiratione cita anhelosa. Elapsis tamen aliquot horis, ad se rediit, corpus sudore diffuere coepit, & in cute, præsertim dorſi, comparuerunt maculæ rubræ, quas petechias esse crediderunt. Ego nunc in auxilium vocatus, suasi, ut alvus per sex dies clausa duceretur clystere, & mixturam ex aquis destillatis, cum aceto lapidibus cancrorum, mixtura simplici, mihi usitatam, propinavi. Hinc circa decimum quartum diem sensim remiserunt symptomata & ad naturalem statum visa redire omnia. Præter spem autem hæc valde acuta & continua febris, mutata in tertianam intermittentem, quæ solito typo solitisque symptomatibus infestavit, post quatuor tamen accessiones, purgatis decocto mannato & tamarindinato primis viis & pulverum antifebrilium usu, mox discessit. Quum etiam inſequenti anno eadem hæc fœmina, eodem tempore, iisdem symptomatibus iterum afficeretur, administrata sub initium venæ sectione, adhibitis diluentibus potionibus & pulveribus salino-nitrosis cum clementer laxantibus, longe mitius decubuit, circa quartum diem febris in intermittentem concessit, mox pariter congruorum usu discussam.

Epicrisis.

Taxandus merito venæ sectionis in fœmina plethorica & vini potui assueta neglectus. Notandus etiam vulgaris, admodum tamen perniciosus error practicus, quo primis statim diebus, liberali manu essentias bezoardicas & alexipharmacas porrigere suescunt plurimi ad malignitatem,

*Ardens
continua
in inter-
mittentem
tertianam
mutata.*

lignitatem, uti stolidè putant, à corde pellendam. Hæc enim, si sanguis redundat, æstum inflammatorium magis augent & febrem graviolem ac diuturniorem reddunt, quin, si alvus simul diutius clausa, sanguinem nimium resolvendo, exanthema pariunt. Ego quidem hanc febrem in principio fuisse tertianam arbirror, ob intermissam autem sanguinis missionem & data bezoardica, factam esse continuam ardentem, ac tandem decimo quarto die defervescentem, naturam & genium suum repetisse. Nam alias continua prima periodo in intermittentem cedere solet, sed heic id tertia demum periodo factum, procul dubio & medici & ægotæ culpa, quæ in ipso etiam morbo vinum habuit in deliciis. Id vero etiam notatu dignum, quod tertianæ paroxysmi non diu durarint, siquidem per priorem morbum jam corpus à pravis succis satis liberatum.

OBSERVATIO VII.

Senex septuagenario major, macilentus, sanguinis missionem nunquam per omnem vitam passus, à morbis etiam gravioribus immunis, nisi quod interdum vere & autumnò coryzam & tussim humidam experiretur, Februario mense, quo frequentes erant synochæ catarrhales, febre correptus est vehementi, cum pulsu magno, subdulo & veloci; adfuit sitis magna & somnus defuit. Medicus consultus marasimum senilem esse putavit, ideoque sanguinem non misit, sed ad sudorem movendum dedit tincturam bezoardicam & mixturam simplicem, pro potu suavit decoctum ex sarsaparillæ unciis duabus, radicis chinæ, scorzonæ, cichorii & liquiritiæ ac corticis cinnamomi uncia, corticum citri uncia dimidia, & ad fauces aridas mulcendas linctum præbuit ex mucilagine seminis cydoniorum cum syrupo violarum. Sed nihil his profecit ac morbus indies potius exasperatus. Undecimo morbi die vocarunt me, ubi ægrum offendi viribus penitus exhaustum, miro ardore æstuantem, cum lingua arida, fissa, nigra & facie fere Hippocratica, conquerentem præterea de ventris torminibus & alvo fluxa. Candide igitur adstantibus illico edixi, inextinguibile esse incendium internum, ægrum moriturum brevi, quod etiam decimo tertio die factum.

Epicrisis.

Febris hæc fuit ardens, ex summo æstu, siti magna, lingua arida somnique defectu cognoscenda satis. Est autem hæc senibus plerumque fatalis: multum tamen differt ab ipso marasimo senili. Hæc enim hecticæ species, mitiori æstu stipatur, diutius trahitur, nec intra quatuordecim dies necat. Censendus autem merito medici error, qui præter sanguinis missionem, statim diluentia & humectantia cum leniter diaphoreticis & nitrosis exhibere debuisset. Sic enim intra paucos dies, vasculorum minimorum à lento in senili corpore sanguine, obstructions, quæ inflammationis causa, facili tolli potuissent ratione. Notandum præterea ex hoc casu, linguam nigram in ardente febre plerumque præfigurare inflammationem in partibus internis, quæ heic in ipsis fuit intestinis. In senibus enim ardentes non facile transeunt in meningum, sed potius in intestinorum inflammationem. Linguae igitur inspectio his in febribus admodum necessaria, quam etiam Hippocrates, multum commendat, qui Coac. cap. VII. habet effatum, quod in

nostrum apprimè quadrat: *lingua, quæ iniis morborum rigidiuscula est, sed in calore manet, labentibus inde diebus exasperatur, livescit & fit biluca, mortifera. Ac certe calamitosissima est, nigra & virulenta.*

OBSERVATIO VIII.

Fœmina generosa triginta circiter annorum, cholerica, vegetæ ac sensibilis naturæ, facie florida, sanguine turgida, ruri degens, post ingesta incongrua multa, iram & nocturnam refrigerationem, nanciscebatur febrem cholicam. Erat quippe æstus magnus, anxietas cardialgica, sitis vehemens, extremorum refrigeratio, corporis jactatio, per vomitum crebrius viridissima & per ani secessum etiam liquida biliosa multa ejiciebantur. Remittebant quidem paullo post hæc pathemata quoad vehementiam, cutis incalescere & madescere incipiebat; remanebat tamen magna debilitas, cum pulsu languidiori ac celeriori, omniaque assumpta vomitu reddebant. Tertio etiam die, post levem inhorrescentiam, dicta symptomata redierunt eadem vehementia omnia. Acceperat à medico pulveres ex lapidibus cancrorum, tartaro vitriolato & nitro, sed ab eorum usu majora in prima regione persenserat incommoda: hinc post tertiam accessionem me vocare jussit. Veni, ægram mire debilitatam & magnopere conquerentem offendi, quod nil neque ex medicamentis, neque alimentis retinere posset. Expensa igitur morbi natura & causa, vomitum, qui semper viridescens erat, à motu non tantum ventriculi, sed etiam ductuum biliariorum intensiori & spasmodico-convulsivo, componendum institui, & ob id liquorem meum anodynum mineralem, ternis singulis horis, ad decem guttas in dimidia uncia aquæ florum tiliæ frigidæ exhibui. Sedata inde ventriculi subversione, dedi emulsionem & ptisanam, quam retinuit. Tertio die post redierunt quidem symptomata cum dejectionibus, sed longe mitiora fuerunt. Institi itaque diluentibus, emulsivis, liquoris anodynii & pulverum absorbentium leniter nitroforum usu: noluit tamen penitus discedere accessio febris. Hinc post nonum demum paroxysmum, descendi ad usum electuarii antifebrilis ex cortice chinæ, floribus chamomillæ, rob sambuci & syrupo acetosittatis citri. Quod quidem ne fieret, clam dissuasit primus medicus, ex eorum censu, qui chinæ corticem frustra perhorrescunt, feliciter tamen sublata febris & ægra perfecte convaluit.

Epicrisis.

Recte dicenda hæc febris cholerica & quidem tertiana continua. In cujus curatione omnium maxime agendum id medico, ut humores acres caustici, primis in viis hospites, circurentur, & obtundantur, simul atque ductuum biliariorum, nec non ventriculi motus spasmodico-convulsivus, bilem continuo extrudens, sistatur, quo vomitus & sedes compescantur. Sic tandem ad febrilem etiam motum coercendum, sine damno perquam commode dari possunt specifica.

Notatu dignum exemplum legas in Consult. Med. Tom. II. Sect. IV. cas. cxcviii.

CAPUT III.

De Febre Stomachica Inflammatoria.

THESES PATHOLOGICÆ.

§. I.

*Ex inflam-
matoriis
particula-
ribus sto-
machica.*

Dantur febres ardentes & acutæ universales, ubi totum corpus æqualiter magno æstu & ardore sicco afficitur, propter inflammatoriam, in minimis vasculis, vel obstructis, vel spasmo constrictis, stasin, cujus generis sunt descriptæ modo synochæ & ardentes. Dantur vero etiam ardentes particulares, quæ à certarum tantum partium, præsertim internarum & sensibilibum, inflammatione oriuntur & magno cum dolore, ardore interno, æstu, ac functionum vitalium læsione stipantur, neque minus periculi alunt, quam quæ universum corpus occupant. Has inter præcipua fere & frequens admodum, parum tamen à medicis notata est illa, quæ in ventriculi & intestinorum substantiam cadit, veteribus epiale & lipeiria dicta.

§. II.

*Ejus defi-
nitio.*

Est igitur stomachica febris, passio acuta, ardens & inflammatoria, oriunda ab inflammatione nervosæ & membranaceæ ventriculi substantiæ, universum nervosarum partium systema afficiens & ob id admodum periculosa.

§. III.

Signa.

Symptomata, individui ipsius comites, è quibus, ceu pathognomonicis signis, cognoscitur, sunt, vehemens internum incendium, summa anxietas, dolor gravis tensivus in præcordiis, maximeque scrobiculi cordis regione, sitis magna, vigilia, inquietudo, corporis jactatio, extremorum refrigeratio, pulsus subdurus, contractus & frequens, vel etiam inæqualis, spiratio difficilis, creber conatus vomendi & doloris ad omnia assumpta, maxime irritantia & medicamenta, exacerbatio.

§. IV.

*Differen-
tia.*

His etiam distinguitur ab aliis, quæ in stomachum cadunt passionibus. In cardialgico quippe dolore, sive cardiaca veterum passione, pariter quidem magna circa præcordia anxietas, dolor pressorius & acutus, usque ad dorsum pertinens, extremorum refrigeratio, assiduus ad vomendum stimulus corporisque inquietudo, sed in ventriculi regione ardor non tam impensus, nec tanta sitis & linguæ ariditas, neque etiam pulsus tam celer & contractus; melius quoque ferre possunt ingesta tam alimenta, quam medicamenta, spasmus, quam inflammatione ventriculi affecti. Erosio dein stomachi, quæ sæpius biliosas febres, choleram morbum, item iracundiam, excipit, caret febre, non tam subito infestat, sed successive, per intervalla tantum ingravescit, neque dolore tam ardente stipatur & diutius trahitur. Quæ autem in intestinis consistit inflammatio, habet tormina circa umbilicalem magis regionem, cum crebris dejectionibus secum spumosis biliosis, aut leviter cruentarum, æstus quoque totam corporis superficiem, cum pulsuum celeritate & magnitudine occupans, major est, ac si ventriculus inflammatus, ubi ex-

trema, manus, pedes & nasus, magis frigescunt.

§. V.

Causa inflammati ventriculi est sanguinis stasis, non tam in tubulis arteriosis & venosis, qui sanguinem ordinario vehunt, quam potius in lateralibus, qui ob angustiam diametri, non rubicundos sanguinis globulos, sed tantum tenuem lymphaticum humorem secundum naturam admittunt. Hinc etiam partis inflammatae rubedo derivanda. Ardor vero & flammæ quasi in ventriculo sensus fit, dum, partim affluens jugiter sanguis per canales semi obstructos, vel constrictos, majori celeritate fertur, partim etiam libero transitu exclusus, ad ramos ampliores regurgitat, ibique crebriorem diastolen facit ac systolen; unde magna accidit partium sulphurearum attritio mutua & calor maximus, qui eo sensibilior, quo magis exquisiti sensus membranæ ventriculi nervosæ, in quibus consistit. Et dolor junctus tribuendus pressioni membranarum nervearum à minimis æque ac majoribus vasis nimium distentis, quæ inter tunicas nervoso-membranaceas collocata.

§. VI.

Quod autem liber & æquabilis sanguinis cursus, per minima arteriarum & venarum intercipiatur, isque in exiliora aquosi tenuis humoris receptacula præter naturam impingatur, duplici ex causa accidit. Una, quando extrema arteriolarum venis connexa, à lentis, crassis & glutinosis sanguinis particulis obstruuntur, altera, quando vehemens fibrillarum nervearum strictura & spastica crispatura, capillares subtilissimos canaliculos, potissimum arteriosos, plus justo angustat atque coarctat.

§. VII.

Ob id in proclivi est judicare, ventriculum perquam facile posse inflammari, si sanguis, crassus præsertim & glutinosus, vehementiori corporis, aut animi, ab iracundia, commotione, balneis nimis calidis, potu spirituosorum & medicamentis sudoriferis exæstuat, in vascula minima & angustissima impetuosè impellitur, à potu autem superingesto frigido incarceratur & ad stasin cogitur. Neque minus facile patet ratio, quare venena corrosiva, infame potissimum arsenicum, acriora item emetica stibiata, nec non cathartica valentiora, stomachi inflammatione cito interficiant, dum caustica sua virtute nerveas fibrillas stringunt, vascula coarctant, sanguinisque progressum sistunt. Eandem ob rationem ventriculi inflammatione pereunt, qui peste, ardentibus, cholericis & dysentericis febribus, item ex vehementi ira, assumpto potu frigido, vel porrecto emetico, aut purgante, moriuntur. Idem accidit iis, qui variolis, morbillis, petechiis, purpura, podagra & scabie retropulsis decedunt, in quibus materia subtilis caustica ad nervosas ventriculi membranas relapsa, spasmus & constrictionem vehementem vasculorum inducit, sanguinis cursum sufflaminantem. Opiata autem & narcotica, non alio modo, infirmos præsertim & debiles, necant, quam quod motricibus nerveis fibris stuporem inferant sanguinisque progressum sic sistant.

§. VIII.

Pro differente tamen harum causarum indole & agendi potentia, differt quodammodo inflammationis gradus. Nimirum, quæ à potu frigido corpori

corpori æstuant ingesto, item à bile per iracundiam commota & copiosius in duodenum effusa suscitatur, mitioribus stipatur symptomatibus, non tam facile necat, diutius trahitur & datis inter initia congruis remediis promptius obsecundat. Sæviora vero & periculosiora sunt pathemata, quæ à venenis causticis, ab emeticis acrioribusque drastis inferuntur & celeriter jugulant, nisi cito efficacia opponantur præsidia. Et omnium deterrima illa est inflammatio, quæ senibus, infirmis, scorbuticis & diuturno mœrore confectis, item in fine acutorum morborum accidit, ob succorum vitium inemendabile & magnam virium impotentiam, medicamentis non tam facile reparandam.

§. IX.

Sed quando irrequieta est corporis jactatio, potus ingestus eructatur, singultuosa ventriculi & diaphragmatis convulsio accidit, animus deficit, facies comparet Hippocratica, pulsus intermittens est, mens emovetur & artus convelluntur, funestum denunciant, ex inflammatione sphacelosa facta, eventum. Tum enim secto post mortem cadavere, non modo ventriculus admodum rubicundus & lumini obtentus copiosissimis ramusculis sanguine turgidis distinctus comparet, sed & interdum passim multis nigris maculis latis & parvis obsessus, interdum in fundo cum duodeno & annexis biliariis ductibus ac pancreate, niger, foetidus ac putris, interdum etiam flatibus mirum distentus atque oppletus conspicitur, fluctuantibus simul in ipsius cavo aliquot cochlearibus foetidi & nigricantis ichoris.

C U R A T I O.

§. I.

Genuinæ periculosa hanc passionem sanandi indicationes eo tendunt: ut I. obstructions, à tenacibus succis, locis ac tubulis minus congruis impactis, expediantur; & II. ut vascula à spasticis stricturis coarctata amplientur & ipsi spastici motus componantur, quo liber, æquabilis & naturalis sanguinis progressus per ventriculi substantiam restituatur. Quæ ut ex voto obtineantur, commodissimam locant operam diluentia, aquosa, humectantia, demulcentia, antispasmodica, æstum qui fluida incrassat restinguentia, nec non fibras strictas relaxantia. Quum vero non una, sed plures causæ ventriculo inflammationem inducere valeant, prudentiæ medicæ est, pro diversitate causarum ad eas removendas medicationem dirigere singulisque præsidia opponere congrua.

§. II.

Quando igitur ab assumpto veneno caustico, septico, arsenicali, vel acerrimo purgante, emetico, mercuriali, aut metallico medicamento male præparato, inflammatio accidit, non certius, non tutius & celerioris efficaciam est auxilium, quam demulcentia, oleosa, pingua, lac scilicet, cremor ipsius, oleum amygdalarum dulce, nec non olivarum, crebro in copia hausta. Horum enim ea est virtus, ut tenuia causticorum intima fibrarum penetrantia spicula obtundant, involvant & quasi inviscent, simulque fibras rigidas & vasa coarctata laxent, sicque spasmos horridos, inflammationis, symptomatum graviorum ipsiusque mortis causas, sistant. Insuper hæc ipsa,

Frid. Hoffmanni Oper. Tom. II.

inole sua ventriculum ampliando, salutarem hunc simul exerunt effectum, ut motus peristalticus naturalis, à spasinorum rigore sufflaminatus, restituitur, stomachus ad vomitum permoveatur & cum hoc simul venenum dilutum iterum extundatur. Si à bile acri corrosiva, ut in cholera, metuenda est inflammatio, tunc terrea, absorbentia fixiora & inter hæc maxime ossa & cornua philosophice, uti dicunt; præparata, cum decoctis gelatinosis, uti pedum vituli & vervecis, gelatina cornu cervi, decoctum hordei, avenaceum, cum, vel sine lacte, item cum oleo amygdalarum dulcium, ex usu sunt. Quando porro ab iracundia vehementi obortus in ventriculo spasmus inflammationem minatur, nihil efficacius est pulvere absorbente nitroso, cum liquore anodyno alternatim dato, vel in aqua quadam antispasmodica, vel emulsione ex seminibus frigidis, aut papaveris albi. Postea composito spasmo, ad educendas biliosas fordes, accommodatissima sunt rhabarbarina & passulata.

§. III.

Quæ à retrocedente ex corporis superficie recementitia acri materia, imminet, vel jam inducta ventriculi inflammatio, depellitur optime emulsionibus ex semine cardui Mariæ, cardui benedicti, napi, quatuor frigidis majoribus, cum pulveribus bezoardicis temperatis, quibus subinde nitrum cum momento camphoræ addendum. Incomparabilem etiam his in casibus ad arcendas inflammationes efficaciam exserit, liquor noster anodynus mineralis, spasticas stricturas resolvendo, & dolores sine virium lapsu, vel torpore, quod aliis sedantibus opiatissolenne, sed potius refectione, complacans. Inprimis egregie se gerit liquor hic, quatuor partibus, cum una parte spiritus bezoardici *Bussii* remixtus & parvis dosibus crebrius oblatus, ac dum stricturam solvit, sudoremque placidum movet, efficaciter materiam virulentam exanthematicam ab internis ad corporis superficiem agit. Si etiam miasma pestilentielle, aut aliorum contagiosorum morborum corpus subiit, quod primario ac celeriter vim suam putredinosam & inflammatoriam ventriculo insinuat, illico lenissimum exhibendum emeticum, ac postea subjungendi pulveres blandi diaphoretici, cum nitro & pauxillo camphoræ, vel oleum bezoardicum *Wedelii*, ex uncia olei amygdalarum dulcium, in quo drachma camphoræ soluta, ad octo vel decem guttas dandum. Et iisdem his discutientibus quoque depellenda inflammatio stomachi, quæ aliis acutis morbis in statu supervenit.

§. IV.

Præterea exterius diro huic malo omnibus modis obviam eundum. Sed improbo, quæ vulgo stomacho adinvenitur calidiora, ut spiritus vini camphoratus, olea destillata in spiritibus soluta, emplastra quoque stomachica. Hæc enim calore suo humores stagnantes magis coagulant & exsiccant, quam discutunt & in motum cient, eodem modo ac notum est, albumen ovi à forti calore indurari, à leni autem liquefcere in tenuem humorem. Quare ego quidem magno cum fructu multoties tepide tantum applicare jussi vesicam lacte cum floribus emollientibus & croco decocto plenam. Neque minus admodum proficuum cenfeo linimentum ex olei amygdalarum unciis duabus & camphoræ drachma, cum quo præcordia frequentius inungenda & superius ponenda.

L nenda

nenda lintea calida. Egregium quoque ad discutiendum & sudorem movendum est epithema, ex aceti rosacei unciis binis, spiritus vini camphorati drachmis duabus, essentiae croci, castorei ana drachma, nitri drachma dimidia, compositum & tepide prae cordiis admotum.

CAUTELÆ ET OBSERVATIONES CLINICÆ.

§. I.

*Venæ sectio
non juvat.*

Venæ sectio certum quidem & efficax remedium in inflammationibus partium & viscerum, quæ copioso sanguine referta; sed ubi partes nervæ ac fibrosæ valde sunt, secundum veteres frigida dictæ, cujus generis intestina, vesica & viæ urinariæ, quæ vehementibus spasticis stricturis patent, & uberiores sanguinis affluxum non admittunt, vix usus ullus, sed potius damnum inde expectandum. Ad declinandam autem ejusmodi inflammationem, si à dolore gravi colico & cardialgia, nec non post iram imminet, corpus valde est plethoricum, juvenile & vini potui assuetum, inter initia statim cum fructu admitenda sanguinis missio.

§. II.

*Anodyna
insecura.*

Sic etiam cavendum est in periculoso hoc affectu ab omnibus sistentibus, anodynis & præsertim quæ opium ingreditur. Nam hæc, cum sudoriferis mixta, in principio quidem arcere possunt inflammationem, quam atroces dolores ac spasmi minantur. Verum si adest inflammatio & paullo diutius jam duravit, perniciosissima sunt & mortem, sphacelum inducendo, accelerant. Quin neque tunc liquor noster anodynus mineralis, longe tamen tutior opiatis, ex usu est, neque etiam ipsa nitrosa, quæ alias in principio egregie resistunt inflammationi.

§. III.

*Frigida &
irritantia
nocent.*

Quemadmodum porro nihil aptius ad inducendam inflammationem frigido potu; sic etiam ad augendam si jam adest eandem, hoc nihilefficacius. Ob id etiam nitrum, quod liberalius sumtum admodum refrigerantis est naturæ, refracta dosi tantum, cum demulcentibus, lacte, vel emulsionibus, repetita vice dare expedit. In gravi autem cardialgico dolore, quem perperam tractatum facile excipit inflammatio funesta, sollicite cavendum ab omnibus irritantibus, maxime emeticis, purgantibus, imo salibus sic dictis digestivis majori copia oblatis, quippe quæ spasmus magis intendunt, & malum exacerbant.

§. IV.

*Post iram
quæ fa-
cienda.*

Ira quoque gravis sæpe funestæ inflammationis mater, quando mox post eam cibus, præsertim minus salubris & difficilioris digestionis, ingeritur, aut frigidus potus ingurgitatur. Hoc vero ubi accidit, ad arcendum malum in principio nihil conducibilius, quam elicere vomitum, non tamen per valida emetica, sed aquam tantum tepidam, cum oleis ac pinguibus mixtam, & largius potam. Sic novi quosdam post vehementem iram pessime habuisse & in propinquo fuisse inflammationem, usu tamen liquoris nostri anodynini, cum potu aquæ tepidæ, rejectos esse humores biliosos copiosissimos & morbum discussum. Sed de his aliisque in fontico hoc morbo tenendis,

pluribus evolvi poterit dissertatio nostra, de inflammatione ventriculi.

ENARRATIONES MORBORUM.

OBSERVATIO I.

Canonicum novi Halberstadii, robustæ constitutionis, ætate adhuc florentem, sub sanitate integerrima subito ac cito lethali ventriculi inflammatione affectum. Quum enim inter rixas ac jurgia vehementissime excanduisset, & paullo post vinum spirituosum, quod vocant Sect, bibisset, insequenti statim die habuit pessime. Incredibiles quippe circa præcordia dolores ipsum torserunt, cum mira angustia & vomendi conatu. Ardor quoque ipsum excruciat stomachi, & in ipso sensus fuit perquam molestus, ac si inhæret quippiam, quod exitum moliretur. Rogatum igitur à medico consilium, qui promte vomitorium ex sulphure antiimonii aurato dedit: inde æger ter valide quidem, sed sine levamine vomuit. Adaucta potius pathemata, pulsuum ictus parvi & fere imperceptibiles facti, frigidusque sudor malo omine erupit. Subsequuta mox mentis emotio, accesserunt convulsiones & intra decem horas excepit ipsa mors. Cadavere dissecto, in ventriculo visæ maculæ plures, nigrae partim, partim rubrae, quarum nonnullæ altius in ipsa substantia constiterunt.

Epicrisis.

Quantum valeat ira vehemens ad concitandos in ventriculi regione spasmos, hæc uberius docet historia. Inprimis hunc animi affectum excipit ut plurimum gravis in illa regione compressio, in qua pylorus ac duodenum situm habent. Quin ipse hic spasmus haud raro ad ductus usque biliosos propagatur, ac ut bilis effusio in duodenum impediatur & ipsa succis reafundatur, facit. Hinc non infrequens observatio, iracundiæ succedere icterum, cui *Sylvius* jam recte non aperientia, sed anodyna & sopientia opponere suadet. Dum vero ira sursum etiam bilem trudit, os semper amaro sapore plenum, & contracto validius pyloro, vomendi fit conatus. Quum igitur tanta spasmodorum post iram vehementia; ipsa sana ratio dictitat, vomitoria plane non convenire, eo quod teneras ventriculi fibrillas magis irritant, & spasmos augendo ad inflammationem pandunt viam. Mors autem tam subita in nostro, non tam inflammationi, ceu causæ proximæ, adscribenda videtur, quam potius spasmio violentiori, qui totum systema nervorum & vasorum convellens, liquidi nervei influxum in cordis musculos etiam sufflaminavit, ita, ut quatuor mortem novissime antecedentibus horis, vix pulsationis vestigium fuerit observandum. Illa igitur intoleranda anxietas, quæ tam vehementem ventriculi spasmus excipit, non tantum nervosarum partium præternaturali constrictioni, verum maxime nimiae distensionis dextri cordis ventriculi & arteriæ pulmonalis à nimium congesto sanguine debetur. Quod enim dolor est, à male affectis distentis nervosis membranis, id anxius etiam ille sensus, quando vasa sanguinea, præsertim circa cor & pulmones, valide diducuntur & præter naturam afficiuntur. Quum itaque nimia sanguinis copia, à spasmio ex partibus inferioribus ad ipsum cor ejulque cameram & auriculam dextram compellatur, ab ipso quoque hoc spasmio

spasmo liquidi nervei sufficiens in machinam hanc motoriam, omnes vitales totius corporis humores circumagentem, influxus impediatur ac intercipiatur, quam facile intelligi potest mortis causa, quæ subinde tam subito, sine præcedenti sphacelatione, venenum assumptum sequitur.

OBSERVATIO II.

Ventriculi inflammatio ex vitro antimonii. Balneator quidam ultra sortem, ut genius horum hominum, sciolus, foemina tertiana laboranti propinarat antimonii vitrum in substantia ad octo grana. Aegra assumpto hoc, accedente febre frequentissime vomuit, discedente tamen febre, vomitus etiam & dejectio iterum constitit, sed restitit virium lapsus ingens. Redeunte tertio die febre ejusque comite indivulso frigore, vomitus quoque & purgatio repetit, summo cum dolore in scrobiculi cordis regione & anxietate tantum non intoleranda, remiservant hæc tamen iterum defervescente febre. Quum vero tertia fieret febris accessio, denuo etiam accessit vomitus, & comitem habuit dolorem stomachi omnium acerbissimum, & qui suprema instare non obscure significavit. Nec vana fuit suspicio. Paulo enim post summa inquietudo, extremorum frigus, animi defectio, artuum convulsio ac postremo mors ipsa miseram foeminam occuparunt. Apertum cadaver, inflammata ostendit inferiorem ventriculi partem, maculis rubris & nigris passim, tam in duodeno, quam annexis intestinis, comparentibus. Et quod magis mirandum, virulentus vitri antimonii pulvis inhærebat adhuc tunicæ crustaceæ, ut vel manibus mortis causa posset tangi.

Epicrisis.

Similis fere est observatio, quam consignavit *Blasius*, de puella quinque annorum, quæ assumpto croco metallorum, vehementissime vomuit & convulsionibus demum periit, in qua ventriculus angustus & contractus repertus, ut vix ovum magnitudine æquaret & vesicula fellea præter morem turgida. In nostra vero observatione perquam dignum, quod vitri antimonii, virulenta spastica stricturas excitans facultas conquieverit, accedente in paroxysmo æstu & febris sine, & quod vicissim frigore rursus ingruente recruduerit, & effectum vehementer vomitorium exseruerit. Sed notum habetur, accessionem febrilem cum frigore & horrore spasmodis deberi, qui ex spinali medulla veniunt, totumque genus nervosum, atque adeo etiam ventriculum, afficiunt. His contrarius est motus ad exteriora tendens sub æstu, qui ob id spasmodorum & convulsionum quasi antidotus. Quod autem post paroxysmum quieverit operatio veneni, in universali lege motus microcosmica rationem habet positam: scilicet valde vehementem & diutius persistentem spasticam fibrarum stricturam excipere ejusdem partis affectæ resolutionem & atoniam, sub qua actio veneni est frustranea. Ut adeo pateat, ad actionem veneni, æque ac medicamento activi, requiri partium vitalium ad motum dispositionem.

OBSERVATIO III.

inens arsenico ventriculi inflammatio. Hospes quidam admiscuerat juscule ex errore loco sacchari arsenicum, idque apposuerat convictoribus suis, quorum plurimi generosa & no-

Frid. Hoffmanni Oper. Tom. II.

bili stirpe sati. Vix degustarant jus, quum omnes pectore angi inciperent, circa stomachum dolere, cum labiorum tremore & vomendi conatu. Advocarunt illico me, veni & cognita mali causa, copiose ingurgitare jussi lac cum oleo amygdalarum dulcium. Vomuerunt inde per dimidium diei strenue, quidam vel centies, semper tamen denuo ingerere jussi lac, donec nihil amplius veneni superesse videretur & vomitus quiesceret. Sic evaserunt plurimi brevi & explicita ratione præsentaneam mortem; non nullis tamen, qui lac & oleosa justo parcius potarant, emollientes adhuc & oleosos clysteres adhibere fuit necessum.

Epicrisis.

Optima & præsentanea veneni antidotus hæc ex simplici, vili & domestico deprompta. Certe vix cuiquam credibile foret, in lacte & oleo tam nobilem latitare virtutem, nisi experientia ita omnino esse demonstraret. Ea enim mentis humanæ indoles, ut exotica, pretiosa & ægrius obtinenda capter atque velit; domestica autem, parabilia, ubivis obvia & vilia negligat & contemptui habeat. Sed divina sapientia abjectis hisce longe nobiliorem & fructuosiore indidit facultatem medicam, ac magno pretio, labore & artificio comparandis. Norunt sane in arte exercitati, simplicem aquam calidam, vel frigidam, lac, serum lactis, olea expressa, acetum, nitrum, terrea absorbentia, salia mineralia, ubivis repiunda, optima adversus longos, graves atque rebelles morbos esse præsidia.

OBSERVATIO IV.

Serenissimus Princeps, ætate florens, sanguine & succis plenus, vinum potens spirituosum liberaliter potarat, postera die corpus sub veneratione ad sudorem usque largum vehementer commoverat, sicque æstuans & sitiens magnum cerevisiæ haustum ingurgitarat, frigidæ quoque auræ corpus exposuerat. Inde mox conquestus est de horrore, languore, interno ardore, vigilia & inquietudine, cum vomendi conatu. Medicus accitus, tertianam intermittentem, tum popularem, subesse ratus, porrexit vomitorium, ex tribus tartari emetici granis. Hoc assumpto ter vomuit maxima cum anxietate, quæ certis intervallis ita increvit, ut nullibi subsistere ac detineri posset. Aderat præterea virium prostratio maxima, ut non sine animi defectione erectus esse posset, pulsus emicuit languidus, irregularis, interdum celer, ex ore spiravit halitus mirum foetidus, mens tamen exacte sibi constitit. Nocte mortem antecedente incessit ipsum horror ingens ac frigus, accesserunt convulsiones & septimo die syncope quasi correptus obiit. Sectum est post mortem cadaver, in quo ventriculus ferme totus visus inflammatus, & in ipsius cavo, quod omnium rarum, aliquot cochlearia foetidi & corrupti sanguinis, ipse etiam stomachus expansus & corruptioni propinquus, ut ad levem contactum ipsa substantia dehisceret. In venis, & maxime separata ab hepate cava, nullus fere sanguis repertus. Lien & sinistra ventriculi pars, cum pulmonum lobo sinistro, tota corrupta, nigricantia & foetida. Quumque spongia putridus ichor abstergeretur, is adeo infecit spongiam, ut tota atro & nigricante colore imbueretur, nec calida, nec frigida detergendo.

Ex potu frigido & vomitorio inflammatio ventriculi.

Epicrisis.

Patet igitur, brevi tempore sphacelosa corruptione infici posse viscera, uti heic ventriculus, lienem & lobum pulmonum sinistrum, quæ atro colore & foetidissima corruptione nares inficere feriente infecta. Sine dubio tamen, ventriculus primum sphacelatus, viscera infecit reliqua. Ad generationem autem hujus morbi fecit non tantum haustus largus frigidus corpori calenti immissus, verum etiam improvida emetici assumptio. Nunquam enim certius & gravius damnum à vomitorio metuendum, quam si ventriculus & intestina graviori spasmo, vel inflammatione affecta. Mineralia quippe emetica virulenti quippiam alunt, quo in convulsiones & spasmos ventriculi & totum nervosum genus abripiunt. Hinc pessime agunt medici, qui tam temerarie ad ipsorum usum descendunt, antequam sedem, vel causam morbi exacte scrutati. Quod si enim post usum ejusmodi pharmaci symptomata ingravescunt, & ventriculus deprehenditur inflammatus, iusta omnino hæc conclusio: inflammatio aut jam ante emeticum fuit, aut non; si fuit, male datum emeticum, si non, subsequuta symptomata inductam eam esse testantur. Internas demum partes esse inflammatas recte conjiciendum, quando virium magna est prostratio, ut ægri facile animo deficient, quando evanescente ardore exquisito, conqueruntur de sensu frigoris circa præcordia & saliva subinde eructat in os; quando borborygmi & meteorismi sensu percipiuntur ab assumptis liquidis in abdomine; quando demum oculos ob debilitatem claudunt subinde & dormire videntur, postea vero de majori debilitate & anxietate conqueruntur.

OBSERVATIO V.

Inflammatio ventriculi decimo die lethalis.

Fœmina quinquaginta & quod excurrit annorum, sanguineo-phlegmatica, corpore spongiosa & animi sic satis sedati, omiserat ab aliquot annis suetam alias sanguinis missionem, vitam quoque coluerat maxima ex parte sedentariam, & tamen appetitui largius paullo indulgerat. Hæc gravius irritata corripiebatur ira, & post hanc languorem persentiebat virium cum inappetentia. Post aliquot dies denuo iracundia commovebatur, simulque assumebat intrita panis cum cerevisia frigida. Inde mox horror ipsam incessit, insequenti nocte ardor intensus, præcordiorum anxietas, inquietudo & punctorius in stomachi regione dolor, ad dorsum usque excurrentes, ructibusque exitum præcludens. Medici morbum colicam esse autumantes, carminativa cum anodynis dederunt. Perseverarunt autem anxietates præcordiorum cum maxima inquietudine per totum morbi decursum, intervernerunt subinde convulsivi quidam motus, cum manuum tremore, aquosus humor in os eructatus, & pulsus antea celer ac fortis, in debilem & inæqualem mutatus. Quarto die neque de æstu, neque etiam de ardore, sed tantum de siti & maxime, quod exquisitum frigoris sensum in cordis regione pateretur, conquesta est. Hinc frigidum non appetit potum, sed calidum semper, maxime infusum théæ sorbillavit, ex quo tamen pejus semper habuit. Quieta quidem semper jacuit dormire visa, non tamen dormivit, mens sibi consistit, debilitas autem magis magisque increvit, alvus sine clystere dimisit nihil, nec ullum medi-

camenta exseruerunt effectum. Septimo potius die accessit singultus, nonno refrigeratis prius extremis, per aliquot horas sine sensu jacuit, ac demum placide exspiravit.

Epicrisis.

Nullum omnino est dubium, quin morbus hic confederit in ventriculo. Hujus quippe nervoso membranacea substantia passa est inflammationem, ex præcedente repetita iracundia & superingesta frigida cerevisia. Et quoniam corpus fuit cacochymicum, succis crassis & impuris plenum, prompta in ipso fuit staseos sanguinis genesis. Factam autem esse inflammationem, horror, æstus, anxietas præcordiorum, dolor pungitivus in stomacho, ructus interclusi & accedens demum singultus luculenter arguunt. Lentius tamen processit & increvit inflammatio, ac demum in sphacelum concessit, quem frigoris in præcordiis sensus, summa debilitas, pulsus languidus & singultus prodiderunt. Notandum enim inflammationem lentius, vel celerius progredi, pro corporis differentia & differente causarum vehementia. In sensibilibus quippe & post venenum citissime fit & citissime decurrit; in phlegmaticis autem, senibus, ex iracundia & refrigeratione lentius serpit & septimo demum, decimo & longius die necat. Nihilo minus cita semper opus est ope, eodem modo ac in sphacelo exterius imminente. Neque ea propter dubitandum, quin in nostra etiam, adhibitis tempestive congruis præsiidiis, funestus averti potuisset eventus.

OBSERVATIO VI.

Vir, circiter quinquagenarius, sanus, robustus & integer, post iram gravissimam, mox afflictebatur tremore, horrore ac refrigeratione extremorum, cum ingenti præcordiorum anxietate viriumque dejectione, noctem etiam sequentem, iisdem symptomatibus adhuc persistentibus, transigebat, nauseam percipiebat continuam & vomendi conatum, una cum labiorum tremore & oris amaritie. His jactatus ab advocato medico importune flagitabat vomitorium, qui primum illud dare renuit, victus tamen continuis precibus, porrexit. Sed quia sumto hoc bis vel ter tantum cum summa anxietate & difficultate pauca biliosa & mucosa vomuerat, ad uberiores evacuationem aliam postulavit dosin, quæ ipsi etiam concessa: hinc autem non ita multo post in deterius versa sunt omnia. Adfuerunt quidem singultuosi ructus continui, sed nihil rejiciebatur, afflixit præterea inquietudo summa, oppressio, spirandi difficultas, intolerabilis ardens & anxius dolor in epigastrio, cum extremorum refrigeratione, pulsu parvo & non nihil intermittente. Petitum tandem à me auxilium, qui accedens, ægrum extrema fere agentem inveni, ob spasmodum vehementiam, quæ omnes fere corporis nervosas sensui & motui vacantes partes occuparat. Hæc videns, expendi mecum, & quum à sumto veneno arsenicali eadem symptomata oborta largiori lactis & olei cujusdam expressi potu felicissime sublata laborantes tantum non è mortis faucibus ereptos, cognitum haberem, pariter lac bubulum tepidum, successive, at copiose, bibendum, suasi. Inde insigniter quidem atrocia hæc symptomata conquiescere & per noctem remittere visa, mane autem ipse æger, inscio medico, unciam unam salis

Ex vomitorio & purgante post iram.

Ebs-

Ebshamenfis, ad aperiendam quæ firmiter clausa erat, alvum flatusque & anxietates discutendas sumfit, pessimo vero successu. Symptomata quippe priora reverfa omnia, atrocia longe majori, ut assumtis licet analeptis antispasmodicis, animam, intra tertium à sumto primo emetico diem, efflaverit.

Epicrisis.

Vel hanc ob causam commemorabilis hæc observatio, ut medicorum quisque inde discat, innocens alias remedium emeticum sibi datum, moderatiori dosi, uti tartarus emeticus ad duo grana datus, pro certa dispositione spasmodica ventriculi & partium nervosarum, veri veneni vim habere & lethalem effectum exserere posse. Quamobrem circumspæctus quilibet medicus, non tam promptus sit ad dandum ejusmodi pharmacum, sed prius scrutetur cum cura corporis ægrotantis cum ventriculo dispositionem ipsamque morbi causam urgentem. Deinceps illa quoque utilissima cautio ex funesto hoc casu elicienda: salia neutra, eaque amaricantia, ut sal Egranum, Ebshamense, Sedlicense, ad deducendos efficaciter & sine molestia per alvum vitiosos humores egregia, tali in casu, ubi primæ viæ spasticis stricturis tenentur, neutiquam esse proficua, ut potius noxam possint inferre & gravissimam & præsentissimam. Sed hanc in rem plura jam attuli in *Dis. de medicina emetica & purgante post iram veneno.*

OBSERVATIO VII.

Juvenis viginti annorum, Juris Studiosus, sanguineo-cholericus, macilentus & in iram levi ex causa proclivis, ebrius ex largo vini potu rixas habuerat cum quodam, ac sub his excanduerat vehementissime, postea vero sub cælo algidissimo vesperi traha vectus fuerat. Domum delatus, prævio horrore, incidit in æstum gravem, inquietudinem, præcordiorum anxietatem, ardore & pectoris in dextro latere dolorem, cum magna spirandi angustia & pervigilio. Irrito usurpatis non nullis, tertio die secta vena & sanguis extractus crassus ac niger. Nihilominus de internorum ardore perpetuas habuit querelas æger, ac simul ac quicquam assumfit, illico gravem persensit dolorem, sreatu materiam cruentam ejecit, pulsus fuit celer, debilis, quandoque plane intermittens, & incrementum indies virium lapsu, septimo die è vita discessit. Sub extispicio mox post mortem cadaver abominandum exspiravit foetorem, & scrutantibus mortis causam ventriculus sese obtulit mirum tumidus, inflammatus ac in fundo, cum ipso pyloro ac duodeno, niger, corruptus & putridus. Dexter quoque pulmonis lobus sphacelatus comparuit & foeda putrilagine affectus, una cum diaphragmatis portione gibbæ partis hepatis.

Epicrisis.

Quantum ebrietas, gravior ira & impensior corporis refrigeratio valeant, ad labefactandam sanitatem, sphacelum visceribus internis inducendum & brevi necandum, hic utique testatum facit casus funestus. Certe vix fortissimum venenum tam deleteriâ obtinet facultatem, ut tam cito tantam corruptionem sphacelofam invehere queat. Sed adeo non nunquam in transversum aguntur mortales, ut cupiditatibus præ-

Frid. Hoffmanni Oper. Tom. II.

vis obsecundando vitiaque sectando, mortem sibi procurent ipsi, tanto certius, quando tria, uti heic, simul uno tempore concurrunt atque conspirant.

CAPUT IV.

De Angina.

THESES PATHOLOGICÆ.

§. I.

Angina est inflammatio faucium, juncta cum ardente dolore, tumore, rubore, respirandi vel etiam deglutiendi difficultate & febre, orta à sanguinis, vel feri visceris acris, in sanguineis, vel lymphaticis tubulis stasi, periculi non expers.

§. II.

In dignotione hujus morbi, locus ubi consistit, inprimis notandus. Est autem sedes in faucibus maximeque iis partibus, quæ pharyngem & laryngem occupant & constituunt. Heic occurrunt plures numero & maximi usus ac sensibilibioris indolis partes: radix scilicet linguæ cum osse hyoide, narium foramina in os hiantia, oesophagi initium, musculi pharyngis, item laryngis interni, & externi quorum numerantur tredecim, glandulæ porro majores & minores, tonsillæ, musculi maxillas moventes, vasorum sanguineorum & lymphaticorum, nec non teneræ nervorum propagines.

§. III.

Prout igitur inflammatio alias atque alias ex his partibus tangit & occupat, gravior, vel levior est, & varia etiam sortitur nomina. Nimirum vetustissima est distinctio anginae generalis in internam & externam, five manifestam & occultam. Illa in interioribus nerveis & musculosis faucium tunicis consistit, & ob id neque in collo exterius, neque in ore, quantum visui patet, tumor & inflammatio conspicitur, sed ardor internus, febris acuta, in graviore casu non modo spirandi, sed & deglutiendi difficultas, multumque periculi subest. *Areteus* ita tamen describit, *lib. I. cap. IX. lingua extra dentes & labia prominens, saliva effunditur, pituita crassissima, facies rubicunda & inflata, oculi exserti, patentes, valde rubent, potus in nares refunditur, dolores acervi sunt, sed strangulatione vexati, eos obscurius sentiunt, pectus & cor ardent, frigidi aëris desiderium adest, & admodum exigue inspirant, eoque donec demum intercluso pectoris transitu strangulentur.* Externa autem magis in oculos incurrit, & occupat potissimum musculosas & glandulosas externas partes, amygdalas, linguæ radicem & uvulam, facilius quoque discutitur.

§. IV.

Specialius ratione partis affectæ considerata angina, gravissima & periculi plenissima esse solet ea, quæ internis laryngis musculis insidet, & in qua exterius non rubor, nil circa cervicem aut collum, observatur, sed interne ardens dolor urget, & ob angustatum asperæ arteriæ caput, vox non modo supprimitur, sed & spiritus difficilis redditur, quin quandoque plane præcluditur, & quidem tam celeriter, ut observatorum fide, haud raro intra viginti quatuor horas, vel tertio die necet. Græci hanc vocant cynanchem. Quæ autem ipsis synanche audit, internos

pharyngis musculos occupat, pariter sine conspiciuo externo tumore & rubore, majori deglutendi, quam spirandi difficultate stipatur, sed ingesta plerumque cum impetu per nares redduntur. Sed quando tumor & rubor oculos & tactum incurrit, inflammatio quæ externis pharyngis musculis incumbit, parasyanche, quæ autem laryngis, paracyanche à veteribus appellatur.

§. V.

Vera, vel spuria.

Deinceps à practicis angina distinguitur in veram, sive exquisitam, & notham. Vera oritur à sanguinis stasi, spuria vero magis à congestione feri, quam sanguinis inflammatoria, in faucibus & colli internis. Illa morbus acutus est, nunquam sine rigore & febre, hæc autem junctam habet febrem plus lymphaticam & catarrhalem, quam acutam. In exquisita non modo dolor ardens & pungitivus circa interiora faucium observatur, sed & lingua sanguine turget, obscuro rubicundo colore tincta, facies simul rubet, arteriæ temporales valide pulsant, quandoque cephalalgia, sopor, vel sensuum torpor jungitur, quandoque lipothymia accedunt, quin, si gravior, spiritus difficulter trahitur, anxietas est maxima, inquietudo & extremorum refrigeratio. Citam hinc poscit opem, multumque periculi alit. Sed in spuria gravia hæc pathemata partim plane absunt, partim mitiora adsunt, minus etiam periculi, si rite tractetur, metuendum. Distingui porro angina potest in siccam & valde ardentem, & humidam aut valde mucosam. Illa fit à sanguine, cum febre valde acuta, uti dictum de vera. Hæc autem magis chronica est, febribus catarrhalibus associatur, cachecticis & scorbuticis familiaris est, atque etiam linguam & fauces crasso viscido muco cum oris foetore obducit.

§. VI.

Differt à prunella.

Omnes hæ anginae species merito discernendæ ab aliis faucium affectibus. Vera quidem & sicca non permutanda cum illa inflammatione oris & oesophagi mucosa, quæ vocari solet prunella alba. In hac enim muco albo tota faucium regio & lingua oblitur, lingua fissuras dolorificas contrahit, & junctus est simul magnus ardor, qui usque ad præcordia pertingit, proptereaque Germanis audit *die Hertz-Braune*. Malignis hæc sæpe accedit febribus, omne plerumque malo, quia præsentem arguit ventriculi & oesophagi inflammationem. Neque etiam omnis faucium inflammatio est angina, sed ea tantum, quæ cum spirandi & deglutiendi difficultate junctæ. Hinc multum utique ab ipsa discrepat levior inflammatio colli & internorum in faucibus, cum tumore & dolore glandularum, quam nostri dicunt, *die bösen Halses*, quæ frequens admodum est scorbuticis, nec non si malum contumax cum erosione, lue venerea affectis. Vera quoque & interna angina discernenda à solennibus foeminis hysteriis & hypochondriacis spasmodis, qui faciem constringunt & respirationem æque ac deglutationem reddunt difficilem. Hi enim sine febre sunt, mox remittunt atque recedunt, atque etiam discuti possunt facile. Demum angina differt ab ardentibus illis & dolentibus in lingua pustulis, quas dicunt aphthas. Etenim in angina dolor & ardor latius sese diffundit & vicinas partes simul in consensum trahit; aphthæ vero certas duntaxat partes afficiunt, quibus pustulæ cum dolore & rubore

à leviori inflammatione.

à spasmodis hypochondriaco-hysteriis.

ab aphthas.

insident, neque tam familiarem habent comitem febrem, quam angina.

§. VII.

Causa igitur anginae proxima stasis, vel quandoque congestio feri inflammatoria in faucium internis eveniens, ad quam inducendam faciunt multa. Scilicet observatione constat, eandem frequentius incurrere, quibus evacuationes sanguinis spontaneæ per nares, uterum hæmorrhoides, aut lochia, suppressæ, aut omisæ artificiales, per scarificationes, vel venarum sectiones. In his certe prompta ipsius genesis post impenfiolem sanguinis commotionem, sive per potum spirituosum inebriantem, sive per validam corporis exercitationem, vel etiam nimiam vociferationem, præsertim in aëre frigido factam. Observavi quoque à summo fortiori sudorifero, admissio mox aëre frigidiori, item à balneo nimis calido, post haustum potus frigidi, inflammationis anginosæ initia, quæ tamen adhibitis congruis internis & externis remediis, feliciter mox discussa. Neque minus frequens anginae generatio admissis in fauces acribus, fibras vasaque irritantibus impenfius & constringentibus. Sic experientia teste, funesta sæpe faucium inflammatio accidit iis, qui conclavia calce recenter inducta inhabitant in iisque dormiunt, quo quidem aliquando plures simul infantes enectos esse ego novi, ac idem notabili exemplo confirmat *Tulpius lib. III. cap. XLI*. Eandem inflammantem venenis causticis inesse facultatem, inter omnes constat. Ex purgantibus, elleborus albus specifica quasi indole petit fauces & strangulationem facit. Argentum vivum, præsertim male ex ipso præparata pharmaca, fauces male afficere & inflammare pariter constat. Et idem quoque de solano furioso, nec non morfu canis rabidi accidere, medicorum testantur observata. Inprimis arsenicalium etiam & mercurialium minerarum fumi, item vapores spirituum mineralium, idem hoc malum improprie hausti causantur. Horum quippe omnium subtilissima & magnæ penetrantiæ spicula altius sese musculis, qui cartilagine laryngis movent, insinuando, nervosas ibi tunicas stringendo & liberum sanguinis per vasa transitum intercipiendo, tumorem ejusmodi inflammatorium, pulsatorium, cum dolore pungitivo, sæpius excitant funestum. Quod enim res acutæ pungentes, firmis hisce partibus inhaerentes, solam hujus affectus suppeditare possint causam, manifesto testantur spinæ piscium aut ossicula aspera deglutita & faucibus intrusa, à quibus tale malum sæpissime excitatur, de quo notabilis observatio est *Hildani Cent. III. obs. 42*.

§. VIII.

Sic per se & sua sponte exoritur angina; succedit vero etiam haud raro aliis morbis ceu symptoma. Accidit hoc sæpius in diarrhoea & dysenteria, præsertim si fluxus intempestive cohibetur, de quo memorabile exemplum apud *Hildanum Cent. III. obs. XXVII*. Idem evenit, à repulso præpostere erysipelate, aut topicis perperam tractato podagrico dolore. Neque minus in variolis & febribus malignis ac pestilentialibus, cum summo vitæ discrimine, demum supervenit. Inprimis de febre sic dicta Hungarica, observationes anatomico-practicæ testantur, quod ut plurimum inflammatione meningum & faucium, quæ ad ventriculum & oesophagum extenditur, necet. Sed causa hujus symptomatici insultus ple-

Causa ipsa.

Symptomatica etiam est quandoque.

Quando-
que epide-
mica.

plerumque vel in nimis diuturna alvi constipatione, vel perspiratione improvide cohibita, vel repulsa præpostere ad interiora materia acri caustica, quærenda. Quando vero epidemium est malum, æris vitio tribuendum, & plerumque aliquid maligni complicatum. Accidit hoc haud raro, si diuturna æris pluviosa & humida fuit constitutio, si ver est, vel autumnus, præco jam Hippocratis Sect. III. aph. 16. 20. 22. testimonio, & illud verum esse, propria observatione confirmat Bartholinus Cent. I. obs. LXXXI. Frequens quoque hujus mali incurfus, si aer effluviis sale acerrimo subtili, ob insectorum copiam, refertus, sole præsertim occiduo, hauritur, eamque ob causam Romæ familiarem esse, & quandoque pestis instar grassari anginam, fidem facit Hollerius lib. I. prax. c. XXIII.

§. IX.

Prognosis
de eventu.

Cæterum anginae morbus, tam ob febrem haud raro acutam, quam suffocationis metum, multum alit periculi. Periculosissimam autem esse veram internam & latentem, jam diximus, & de hac valet illud Hippocratis effatum prædict. lib. III. c. VIII. angina gravissima est, & celerrime interimit, quæ neque in cervice, neque in faucibus conspicuum quid habet. Hæc etenim eodem die, & secundo, & tertio, & quarto, strangulat. Inprimis maximum suffocationis est periculum, quando musculus, qui vocatur thyroarithenoideus, rimæ occlusioni dictatus, affectus. Anceps porro admodum est symptomatrica, ob corpus jam debile & materiæ virulentiam raro superanda. Malum etiam, quando tumor in externis subito disparet, non imminutis, sed auctis potius symptomatibus. Tum enim alias nervosas partes transilit morbus, & vel cerebrum petens, phrenitidem cum convulsionibus, vel ad pulmones delatus, peripneumoniam facit, testimonio Hippocratis Sect. V. aph. X lethalem. Sed quando suffocatio strangulatoria remittit, tumor, dolor & rubor magis extrorsum vergit sensimque evanescit, felicem solutionem nunciat. Sin secus, in apostema aut mortem fit transitus. Si in apostema, ac pus in bronchia & pulmones effunditur, teste Foresto lib. XV. obs. XXIV. anceps admodum eventus. Si in mortem, nunciant hanc spuma ante os, lingua valde tumida, purpureo-nigra, extremorum rigor, summa præcordiorum angustia atque anxietas, cum pulsu duro, convulsivo & intermittente.

CURATIO.

Cum methodo Medendi.

§. I.

Sanguis
mittendus.

Ipsa truculenti hujus mali curatio differt, prout variæ ipsius sunt species & singularum causæ differunt, ad quas recte pernoscendas & opportune removendas, unice directæ esse debet medentis intentio. Quando itaque ex manifestis signis eminens sanguinis ad caput congestio observatur, quæ non modo vehementiam inflammationis auget, sed & lethaliū symptomatum est causa, protinus & primo omnium hæc debet esse medici cura, ut impetum sanguinis à parte affecta derivet, id quod commodissime sectione venæ confiniis perficitur. In hoc enim auxilio præcipuam & unicam fere salutis spem, inde ab omni ævo, tam veteres, quam recentiores me-

dici, collocarunt. Instar omnium sit Hippocrates, qui lib. de loc. in hom. §. 1. sic angina tradit curationem: angina affectis, à sanguine in venis colli collecto & coagulato, sanguinem ex venis brachiorum & pedum detrahes, & simul alvum inferne subduces, quo, quod morbum exhibet, detrahatur. Sed quo pacto & ubi id faciendum, non omnes æque consentiunt. Plurimi enim sectionem venarum sublingualium suadent, quam alii rejiciunt, quia si non fiat sufficiens apertio, parum sanguinis effluat, si vero amplum foramen, hæmorrhagia sequatur non raro lethalis. Inter eos qui spernunt, potissimum Tulpius lib. I. obs. LI. hanc ob causam, quoniam sanguis eadem attrahatur ad locum per se angustum & facile suffocatio inducatur, sæpius ab ipso annotata. Alii, uti Zacutus Lusitanus Hist. Med. princ. lib. I. hist. LXXVI. Job. Stephanus in Hippocr. de struct. hom. Trallianus & Freind in lib. epid. sectionem venarum jugularium externarum, præsertim in malo desperato, sique præsens est strangulationis periculum, mirifice commendant. Sunt porro qui scarificationem dilaudant, in nucha & mento, ut Platerus lib. II. pag. 395. Amatus Lusitanus Cent. III. curat. XXVIII. Zacutus Lusitanus in prax. admirand. lib. IV. quæst. LIV. circa laryngem Riolanus in enchirid. anat. lib. IV. p. 385. Hirudinum appositionem pone aures atque in cervice Capivaccius & Hollerius malunt.

§. II.

Post sanguinis missionem, præcipiente eodem Hippocrate, aperienda alvus, quo etiam hujus beneficio humores versus inferiora trahantur & evacuentur. Sed his minime acriora, neque cathartica, in forma pulveris aut pilularum, sed mitiora, & quidem liquida, conveniunt. Ut vero una, quod dicunt, fidelia duo dealbentur parietes, ac non modo superflui humores detrahantur, sed & acres falsi contemperentur, utilissimum erit, decoctum ex mannæ uncis duabus, nitri antimoniatum drachma una cum dimidia & feri lactis uncis decem. Si autem per os nihil ingeri potest, enema injiciendum ex lacte, melle, oleo amygdalarum dulcium & sale communi ac nitro.

§. III.

Evacuatis sic tam sanguine superfluo, quam humoribus impuris, opera danda, ut humor sanguineus, vel serosus, tubulis impactus, resolvatur & discutatur congruis remediis, tam internis, quam externis, & febrilis æstus simul contemperetur. Hunc in finem perquam conducibilis frequens usus mixturæ diaphoreticæ & leniter anodinæ ex aquis antispasmodicis & diaphnoicis, florum sambuci, tilia, primulae veris, acacia, galegae, herbæ cardui benedicti, scordii, cum diascordio Fracastorii, antimonio diaphoretico, lapide prunellæ, aceto quoque & cancrorum lapidibus, nec non syrupo papaveris rhœados. Conducunt etiam potus diluentes & humectantes paullo liberalius dati, serum quippe lactis dulce & acidulum, cum succo citri & saccharo paratum, ptisana ex hordeo mundo, radice scorzonerae & rasura cornu cervi, cum syrupo acetositis citri, decoctum avenaceum, ipsum lac quoque, tantundem aquæ remixtum & saccharo atque momento nitri conditum.

§. IV.

Externis
succurren-
dum.

Externis præterea ancipiti huic morbo obviari eundum, non nullis quidem in oris cavo, non nullis exterius in collo atque cervice, quo his etiam dolor & æstus inflammatorius mitigetur, acrimonia humorum temperetur, & qui in vasculorum angustis firmiter subsistunt, succi dissolvantur. Externe frequentissimi usus sunt cataplasmata ex emulsionibus, paregoricis & discutientibus, floribus sambuci, meliloti, chamomillæ vulgaris, verbasci, radice liliorum alborum, ficubus, croco, semine anisi, fœniculi, farina lini, ex lacte coctis, quibus non nulli, nidos hirsutinis & sterco canis, seu specifica, adji- ciunt. Merentur hoc nomine etiam commenda- tionem emplastra lenientia, ac mollientia, uti est diachylon simplex, aut de meliloto, malaxatum cum oleo amygdalarum dulcium, vel admixtio- nis spermatidis ceti, croci & camphoræ efficacius redditum. Intra os vero non facile suaserim gar- garisimata, cum injectione per siphonem, ubi magnus dolor & fœcus ardor est. Sufficit os subin- de colluere, congruo tepido liquore, cui concin- nando serviunt pœura, rob dianucum, diamoron, syrupus granatorum dulcis, papaveris rhœados, violarum, mucilago seminis cydoniorum, cre- mor lactis, lapis prunellæ, quæ omnia pro cir- cumstantiarum ratione, vel lacte, vel decocto liquiritiæ, ficuum, aut avenæ misceri possunt. Neque minus nobilis est virtus olei amygdalarum dulcis recentis, cum spermate ceti, croco & syrupo violarum, in decocto avenaceo dati & aliquam- diu in ore detenti.

CAUTELÆ ET OBSERVATIONES
CLINICÆ.

§. I.

In sangui-
nis missione
tenenda.

In angina sanguinea & corpore plethorico, omnium primo per sanguinis missionem succur- rendum. Nam si in ullo morbo, certe in hoc, à præsentaneo periculo ipsius mortis liberat. Sed momentosa & præceptum est juvandi occasio. Op- timum auxilium ex sectione jugularium. Si ve- ro hanc instituendi copia deficit, aperiendæ sub- linguales, ita tamen, ut prius fecetur brachialis. Et quando angina sanguinea accedit febris ardenti & Hungaricæ, simulque phrenitidis metus est, vires tamen imbecilles largiorem sanguinis sub- tractionem non ferunt, cito sublinguales tantum aperiendæ. Quando autem ab acrimonia caustica nervosis faucium & laryngis tunicis inhæren- te hoc vitium oritur, neque manifesta adest san- guinis redundantia, indicatur potius scarificatio in cervice & mento, vel ~~in~~ in mento appositio. Ubi etiam in cacochymicis & phlegmaticis, à copia feri visceris, fauces & externas colli partes obsidet tumor cum dolore & leni inflammatio- ne, præferenda venæ sectioni, scarificatio, in nu- cha & scapulis.

§. II.

Usurpanda
in angina
ardente.

In usu externorum attendendum merito ad di- versa inflammationis in faucibus genera, & singu- lis accommodata remedia sunt opponenda. Ita- que in omni faucium inflammatione dolorosa & ardente, julepus rosarum cum nitro & momento camphoræ deglutitus, eximie conducit. Gelati- na quoque cornu cervi rite parata, cum albumi- ne ovi probe depurata ac succo pomorum Chi-

nenfium, nec non saccharo condita, iterato sumta, egregie levat. Si autem fauces arant, ardent, lingua tumet & respirationis æque ac de- glutitionis difficultas est, linctus parandus, ex albuminis ovi in aqua quassati unciis binis, aquæ rosarum uncia, syrupi granatorum, diamoron ana uncia dimidia, salis prunellæ granis duodecim, cui, pro circumstantiarum conditione, viginti vel triginta liquoris anodynii guttæ indendæ. Tum etiam exterius collum & cervice oleo camphorato, ex oleo amygdalarum dulcium uncia, olei papa- veris albi drachmis duabus & camphoræ drachma dimidia, inungendum.

§. III.

In angina latente interna, valde æstuosa, solo lacte & ejus cremore, addito lapide prunellæ & syrupo papaveris rhœados, os subinde colluen- dum, & frequentius bibendum lactis serum. In œsophagi autem inflammatione, febribus ma- lignis in statu haud raro superveniente, ex usu est pulvis, ex nitri drachma, camphoræ granis tribus & sacchari uncia, cum emulsione amygdalarum dulcium, & intus dandus, & exterius in ore aliquamdiu tenendus. Et ubi ab haustis & inspiratis exhalationibus acerbis metallorum, mi- neralium, calcis etiam vivæ & argenti vivi, suf- focationis periculum accidit, nec purgantia, nec venæ sectio locum habent, sed commodissimam locant operam humectantia, demulcentia, inter- na & externa, lac cum nitro, cataplasmata supe- rius descripta, nec non enemata.

§. IV.

Inflammatorius ille dolor, qui à sero falso acri in glandulosa faucium carne, circa pharyngis & laryngis confinia, fit, cum rubore & copioso sa- livæ fluxu, sine febre, optime discutitur ab ini- tio statim gargarismo ex spiritu vini Rhenani, vel Franconici. Quam præsentanea enim hujus fit virtus, disertis verbis testatur *Walæus meib. med. pag. 112.* inquit, *angina affectus in prin- cipio sese spiritu vini gargarizet, omnis guttu- ris inflammatio cessabit trium horarum spatio, sive solus hunc in usum cedat, sive cum aliis remisceatur.* Et *Martianus* hanc ob causam in cynanche vera commendat actu calida. Ipse quo- que novi, faucium inflammationem brevi fuisse discussam, guttulis octo vel decem spiritus vini camphorati, in quo granum nitri liquatum, len- te per fauces dimissis. Quem in finem alii com- mendant essentiam pimpinellæ albæ, cum spiritu vini confectam.

§. V.

Quando magna colluvies humoris impuri se- rosi ad palati & faucium glandulas decumbit, crebrius usurpanda sunt leniora laxantia, man- nata, rhabarbarina, tartarea & passulata. Tum etiam apprime conducit gargarisma, quod pro- basi habet sal pharyngæum à *Zobelio in tarta- rologia* descriptum, quod præparatur ex cremo- ris tartari & nitri uncia, aluminis usti uncia dimidia, solutis in aceto destillato & solutione postea secundum artem coagulata. Sic quip- pe parati salis drachma, cum duabus drachmis mellis, in quinque unciis aquæ plantaginis sol- venda & cum liquore hoc fauces tam crebro eluendæ, quam idem cum siphone subinde in- jiciendus.

§. VI.

§. VI.

Emplastro-
rum, gar-
garisima-
rum & in-
jectionum
usss.

In faucium & glandularum tumoribus inflammatoriis, emplastra emollientia, supra tradita, præferuntur merito cataplasmatibus, quibus ob plures difficultates, rarius uti soleo, sed frequentius decocto specierum emollientium ex lacte, vesicæ indito. De gargarisimatum vero usu tenendum, quod cum siphone injecta locum non habeant: impensiori enim attritu dolorem & inflammationem magis exasperant. Melius igitur ac tutius, os cum liquore ad gargarisimum subinde eluere. Quod si autem & hoc propter impotentiam fieri nequit, injectio lenissime tantum adigenda, ne irritatio ad vomitum fiat, caput quoque antrorsum inclinandum, non retrorsum, ne dilabendo ad asperam arteriam suffocationem minetur, & iterato injiciendum, si magna mucicopia inhæret. Præstat præterea in omnibus hisce faucium affectibus abstinere à loquela, quia crebrior ac fortior linguæ agitatio malum exacerbatur.

§. VII.

In suppu-
ratione
genda.

Si tumores faucium ad suppurationem tendunt, eadem optime procurari potest caricis pinguibus ichore detentis. Et quando tonsillarum tumor inflammatorius ichore repletus, externe nihil præstabilius deprehendi melle rosato, cum spiritu vitrioli remixto, & sæpius cum penicillo admoto, quod tumorem minuit, mundat, ulteriorem affluxum impedit, & pituitam subsistentem colliquat. In aphthis infantum, quæ linguam cum dolore & ardore obsident, ad hunc mulcendum nihil utilius, quam pustulas subinde illinire cremore lactis cum tantillo nitri imbuto. Interdum etiam expedit ad pituitam colliquandam & arcendum nimium affluxum applicare vitriolum album, in aqua pluviali, vel melius rosarum, aut florum sambuci, liquatum.

§. VIII.

Recidiva
arrenda.

Demum ne faucium inflammatio, quod haud raro accidit, repetat, vitanda cum cura omnia, quæ ad inducendam eam facere supra diximus. Potissimum perspiratio custodienda, ac imprimis caput, cervix & collum ab omni refrigeratione defendere ex usu est, ne humores & acris per poros difflanda materia ad interiora agantur ac in molli faucium substantia subsistant. Cavendum quoque ab omnibus, quæ succos impensius exagitant, maximeque ab impensiori vociferatione, qua humorum affluxus ad superiora alligitur. Si corpus plethoricum, tempestiva sanguinis missio instituenda, & minus rite succedentibus hæmorrhagiis spontaneis, ut eadem in ordinem redigantur, videndum. Neque minus subinde alvus subducenda, quo & impuritates expurgentur, & congestorius versus superiora motus intercipiatur.

ENARRATIONES MORBORUM.

OBSERVATIO I.

Angina al-
vi fluxu
soluta.

Fœmina triginta annorum, cholericæ & catarrhosis defluxionibus admodum obnoxia, levius vestita surrexerat tempore autumnali è lecto ac frigida se se auræ incautius exposuerat. Inde nacta est raucedinem cum ardore & dolore gutturis, difficulter simul deglutire & loqui potuit, & pulsus, præsertim noctu, fuit celerior. Quum

igitur menses restitassent, missus primum è vena brachii sanguis & injectum dein clystima, sed sine levamine: gargarisimata vero, propter dolores, ferre non potuit. Interim gutturis tumor, tam interius, quam exterius, mirum increvit, & parum abfuit, quin ægram strangularet: quinto tamen die subsedit tantisper tumor, & dolor mitigatus est. Hinc exterius collo admotum emplastrum maturativum, ex emplastro de mehloto cum croco, cui impositi sacculi calidi, ac ori inditum decoctum ex emollientibus: his maturuit tumor & noctu incisio ægra etiam feliciter rupit, Sed illapsa procul dubio fuerat materia acris pulmonibus, & ob id suffocationem minari visa est. Ad quam dispellendam, aqua hyssopi, cum essentia castorei & liquiritiæ, additis aliquot guttulis spiritus cornu cervi succinati, insulam quoque theiforme ex herbis pectoralibus cum aqua calida, usurpata. Inde sudor erupit per universum corpus simulque materia tenax viscida, sexies minimum quotidie, per alvi secessum ejecta, non sine torminosa ventris contractione. Medicus autem metuens damnosam fore hanc diarrhœam, de supprimenda eadem cogitavit, & electuarium ex dialcordio *Fracastron*, conservarosarum, pulvere hæmatitis & nucista dedit. Cohibitus etiam protinus alvi fluxus, sed sequutus singultus cum ardore per totum oesophagi tractum, iputatione materiæ viscidæ viriumque languore. Hinc alius advocatus medicus, qui pathemata hæc à perperam suppressio alvi fluxu deduxit & ob id suavit pilulas ex myrrha electa, diagrydio sulphurato, mercurio dulci, croco, castoreo & sale succini, cum vehiculo calido sumendas. His non modo singultus sedatus, sed & materiæ serosæ per alvum excretio revocata, cum summo ægræ levamine, quæ successive postea ad sanitatem rediit.

Epicrisis.

Memorable omnino, quod faucium inflammatio, pituitosa ac serosa alvi fluxu fuerit soluta; quod hujus adstrictio præpostera gravia induxerit pathemata, & quod hæc reverente illo expirarent iterum. Sed sæpissime in inflammatoriis faucium affectibus, oesophagus, quin ipse ventriculus, affligitur, ita, ut eadem quasi labe eodemque vitio laborare videantur. De aphthis sæpius notavi, quod eadem oesophagum & ventriculum obsederint: id enim factum fuisse, ardor, per totum oesophagi tractum usque ad præcordia excurrens, prodidit. Tum etiam ægræ salsa, acria & calida plane non ferre potuerunt, sed decoctum hordei, avenaceum, raparum exsiccatarum, insulam theiforme cum lacte, ex usu fuerunt, hisque assumtis, ardores, siccitates & dolores anxii circa præcordia sublati. Viciissim vidi, ex ventriculo, in ardentibus febribus, à venenis, aut acrioribus purgantibus inflammato, inflammationem ad fauces & laryngis musculos fuisse propagatam. Hinc manet utique firmum, in faucium orisque affectibus, præsertim si pituita viscida, crassa fuerint obsessæ, laxantia præsentaneam exferere opem.

OBSERVATIO II.

Sexagenarius quidam, diu quartana detentus, hac discedente, catarrhis & ventriculi imbecillitati admodum fuit obnoxius. Is quum noctu aère pluvioso fecisset iter, incidit in faucium difficul-

Synantho
curata.

ficulratem, ut solida quidem, non autem liquida posset deglutire, ac non nisi cum magna intentione deglutitionis, anxietate ac subsequente copiosa excretionē phlegmatis. Interius quidem rubescebant non nihil fauces, sed exterius nihil tumoris comparebat. Judicavimus igitur, epiglottidem, quæ instar operculi orificium asperæ arteriæ claudit sero mucido obfessam esse & turgidam, ut rimam subiectam non exacte claudat, sed liquidum deglutitum in asperam arteriam delabatur & anxietates subsequentes faciat. Quare iussi exterius applicare spiritum vini camphoratum, interius os subinde colluere aqua florum sambuci, mixta cum spiritu salis ammoniaci atque essentia croci, & quotidie usurpare pilulas nostras. His intra aliquot dies malum feliciter sublatum & æger convaleuit.

Epicrisis.

Proprium anginae symptoma difficultas deglutiendi, tam solida, quam liquida. Si enim tumor paullo amplior oesophagi principium obsidet, illudque angustat, liquida quidem, sed non solida dimittuntur. Si vero tumor hæret in principio gutturis, quod tegit epiglottis, solida quidem, dum comprimunt tumentem epiglottidem, transeunt ad oesophagum, sed liquida minus prementia per hians à tumore spatium asperæ arteriæ illabuntur, ibique magnas creant molestias.

OBSERVATIO III.

Angina sæpius recidivans sanata.

Putarant medici foeminam quandam venereo infectam esse contagio, eaque propter ipsi mercurialem adhibuerant salivationem. Hinc factum est, ut ipsa postea levi ex causa, ab aëre frigido & nebuloso, ab ira, ab assumtis acribus cibis, à refrigeratione capitis, à turbato mensium successu, sæpius incurreret exquisitum palati, nec non in faucium internis, circa pharyngem & laryngem, ardorem atque dolorem, sine febre tamen, sed cum respirationis difficultate. Accidit vero, ut dormiret in conclavi humili, noviter exstructo & vaporibus calcis pleno, ac inde non modo capitis dolore, sed & impensio faucium & colli ardore atque dolore, cum inquietudine, spirandi angustia, anxietate & æstu afficeretur. Ego vocatus sanguinis missionem, ob vasa minus turgentia omisi, sed tantum applicare iussi collo cataplasma ex farina lini, floribus sambuci, ficubus, croco, oleo amygdalarum dulcium & lacte. Suasi quoque ut clyster injiceretur ex lacte, nitro, sale communi, melle & oleo. Potui dedi lac, cum dimidia parte aquæ hordei, si ve ptisanæ remixtum, adjecta debita quantitate nitri & syrupi violarum, quod copiosius hausit & frequenter ore continuit; quibus brevi malum discussum est. Ad arcendam autem crebriorem recidivam, dedi consilium, ut aquas Spadanas, vel Selteranas cum lacte per mensem & ultra biberet, & quotidie mane fauces gargarizando, vel cum aqua sic dicta sclopetaria, vel decocto plantaginis ex vino elueret.

Epicrisis.

Prompta est tumoris & affectus anginoidis genesis, quando compages fibrosa, glandulosa & tubulosa faucium debilitata & tono privata, quod heic factum per salivationem mercurialem.

Quare qui semel, vel iterum ejusmodi tumore laborarunt, qui non statim congruis præsiidiis atque regimine discussus, ex facili postea, per nimiam vocis intensiōem, animi affectum, vinum copiose haustum ac frigido-humidum aërem admissum, idem malum rursus nanciscitur. Optime autem ejusmodi recidivæ præcaventur, quando malum primum statim recte persanatur, penitusque tollitur, ne partibus labem inferat ægre emendandam.

OBSERVATIO IV.

Virum novi honestum, quinquagenario majorem sanguineo-melancholicum, robustum, sanguinis missionem nunquam passum, belle tamen valentem, licet cerevisiæ lupulatae & spiritus ardentis potu admodum delectaretur. Sed quum gravius inter rixas cum uxore excanduisset, in exquisitum capitis incidit dolorem, sub quo arteriæ fuerunt turgidæ, facies rubicunda, oculi torvi, noctes insomnes & arteriæ tam valide pulsarunt, ut de sensu mallei quasi in capite pulsantis æger conquereretur. Hinc admotum cataplasma ex mica panis, baccis lauri, juniperi & aceto rosaceo. Fronti etiam & temporibus ex consilio vetulæ applicatum albumen ovi, cum alumine conquassatum. Sed gestatis his aliquamdiu, conquestus est æger de insigni dolore pungitivo faucium, deglutiendi difficultate & spiritu angusto; lingua mirum intumuit, atro colore tincta, siccam linguam ex ore hiantē exseruit, liquida indefinenter appetiit, pulsus celer & vehemens manum vibravit & propter spiritum arctius meatem in erecto semper esse debuit situ. Ad gravissima igitur hæc pathemata depellenda cum fructu usurpata sequentia. Sanguis è vena missus largiter; clyster injectus acrior; cataplasma ex stercore canis, hirundinum nido, ficubus, cepis tostis, floribus sambuci, chamomillæ, meliloti, semine cymini, nitro & camphorâ, cum aqua florum sambuci & vino tepide collo appositum; interius mixtura ex aquæ florum sambuci, rosarum ana uncis duabus, aceti destillati drachmis sex, lapidum cancrorum drachma, nitri drachma dimidia, camphoræ granis quatuor in oleo amygdalarum dulcium solutis & sufficienti quantitate julepi rosarum, sæpius ad aliquot cochlearia data & potum quoque infusum theiforme ex veronica, floribus sambuci & radice liquiritiæ; quibus feliciter discussum suffocationis periculum. Postea laxans ex syrupo rosarum solutivo, cremore tartari, diagrydio & rhabbaro exhibitum, quo aliquoties dejecit. Os demum frequentius elotum aqua pluviali, in qua nitri ac vitrioli parum & saccharum ad gratiam solutum. Sic brevi explicita ratione anceps hic morbus ex voto depulsus.

Epicrisis.

Attendenda merito in nostro truculenti hujus mali genesis. Ortum quippe duxit ex sanguinis ad caput congestione; huic opposita exterius constringentia; his sanguis ad interiora repressus ipsasque fauces; heic copiose collectus cruor substitit & dolorem, tumorem, ardorem aliaque symptomata induxit. Albumen enim ovi cum alumine insigni repellente & vasa constringente virtute pollere, ex ipsius usu in ophthalmia patet. Et ex constrictione in externis facilem ad interna esse transitum, docet vasorum mutua com-

Angina en repellens præ-postero usui gravis discussa.

communicatio. Sed quum illico venæ sectione & internis æque ac externis discutientibus stasi & stagnationi obviam itum, non potuit non feliciter succedere curatio. Nam si occasio præceps captanda unquam, certe in congestionibus inflammatoriis id faciendum, quæ nisi celerrime removeantur, transitus fit in corruptionem lethiferam & sphacelofam.

CAPUT V.

De Febre Phrenetica, sive phrenitide.

THESES PATHOLOGICÆ.

§. I.

Phrenitidis
definitio.

Nulla inflammatio, sive particularis febris, tam magni in medicina momenti, quam quæ in parte omnium nobilissima ipsiusque animæ rationalis domicilio, cerebro, consistit, & tam omnem rationis usum evertit, quam præsentaneum vitæ periculum intentat, ac Græco nomine audit phrenitis. Est igitur hæc phrenitis febris acuta inflammatoria, orta à nimia sanguinis congestionem ejusdemque intercepto, per minimas potissimum membranarum cerebri arteriolas, transitu, juncta cum magno æstu, delirio atque vitæ discrimine.

§. II.

Signa
phrenitidis.

Signa
phrenitidis.

Signa imminētis phreneticæ affectionis sic exacte & compendiose exhibet *Trallianus lib. I. cap. XIII. phrenitidem*, inquiens, *futuram vigiliæ potissimum continuæ & intensæ somnique turbulenti præcedunt, ægri exiliunt & somniorum imaginationibus detinentur, & facile eorum, quæ dicuntur, obliviscuntur; si respondent, ferociores ac iracundiores, quam prius, apparent, pulsus habent parvos & duros atque occipitio frequentius indolescent. Si affectus increverit, fixioribus oculis cernunt, eosque rubentes habent, nec non lacrymæ ex uirisque fluunt.* Præsentis autem indicia & pathemata omnium optime ex veteribus consignavit *Cælius Aurelianus lib. I. cap. II. pag. 12. ita habens: in phreneticam passionem declives sequitur febris acuta atque pulsus difficile ad superficiem corporis ascendens. sive humilior, tensior, vultus subinflatus, sive plenus, sanguinis per nares destillatio, vigiliæ juges, aut turbatus somnus & insania turbulenta, mentis sollicitudo ac pravitas sine ratione, frequens tergorum est versio jacendi, cum capitis assidua commotione aliquando etiam sine causa hilaritas, oculorum rubor, cum levi lacrymatione & circumjectio manuum, sine ullo capitis dolore, articulorum frigus, sine tremore, urinæ abundantia flavæ, aquatæ, tenuis & paullatim exclusæ; aliquibus etiam sonitus capitis atque aurium tinnitus, dolor quoque capitis non quiescens, nulla ex manifesta ratione præcordiorum tensio, visus attentus, cor frequenter palpitans.*

§. III.

Omnes hæc phrenitidi junctæ functionum in corpore læsiones, pendent à nimio & impetuoso sanguinis ad caput appulsu, ejusdemque ex intercepto per minima libero transitu, stasi & per alias insolitas vias celerrima trajectione, unde di-

stensiones fiunt vasorum cerebri & faciei, ferossus humor secedit, passim obharefcit, & cerebrum in functionibus suis, maxime rationis usui servientibus, prorsus turbatur. Ex vero enim *Hippocrates lib. de flat. & passim alibi tradit: prudentiam & rationem hominis in constanti sanguinis habitu in cerebro, sive rectius ejusdem æquabili motu consistere, adeo, ut, hoc interturbato, concidat simul & prudentia, & ratio. Et hæc omnino ita esse veramque phrenitidis sedem in cerebro consistere, testatum facit uberius sectio eadem defunctorum. In his quippe vasa, tam duræ matris cum sinibus suis, quam piæ meningis, mirum destituta & crasso coagulato cruore farta, ipsæ membranæ aridæ & exsiccata, ut pia mater facillime à cerebri cortice separari queat, reperiuntur, & præterea medulla cerebri multo seroso humore perfusa comparet. Id quod pluribus confirmant *Blancardus in anat. pract. obs. III. Schenckius lib. I. fol. 64. nec non M.N.C. Dec. II. A.V. obs. LXII.**

§. IV.

Inter antecedentes causas recte *Cælius Aurelianus l. c.* refert vinolentiam, vel vigiliam, aut jugem in sole moram, mentem natura mobilem, iracundiam, caput per literarum disciplinas debilitatum, ætatem juvenilem. Et certe ad phrenitidem disponunt omnia, quæ caput debile ac imbecillum reddunt, ut deinde in ipsius vasis facile fieri possit sanguinis & humorum mora, nec non quæ sanguinem, crassum præsertim & copiosum, ex partibus inferioribus impetuosè ad caput agunt ac congerunt. Hinc observatione medico-practica constat, ad deliras ejusmodi febres admodum esse proclives, qui diuturna molestia, cura, studiorum & meditationum profundiorum intemperantia, mentem nimis fatigant; qui vegeti ætate, constitutione melancholico-cholericis, sæpius animo per iram aut odium moventur, desiderii vehementioribus jactantur, vigiliæ, inquietudini, crapulæ ex cerevisiis liberaliter lupulatis, vel vino dediti, qui veneri litant, sedentariæ vitæ motus & exercitationis experti indulgent, & ob pravam victus rationem, & copiosum, & impurum sanguinem in venis alunt. Hinc porro per experientiam in comperto est, à cessante consueto, vel etiam repente suppresso hæmorrhoidali fluxu, emanente quoque aut cohibito menses, nec non in puerperis lochiorum profluvio, promptam esse, præsertim alvo simul adstricta, phreneticarum affectionum genesin. Tum enim ob stagnationes sanguinis in abdominis visceribus, in nervosis partibus spasticæ suscitantur stricturæ, quæ inæqualem reddunt sanguinis circuitum & faciunt, ut is cum impetu aliorum ruat, ibidemque nimium congeratur. Demum phrenitis etiam haud raro inducitur per violentiam externam. Accidit hoc in vulneratione & contusione capitis perquam facile, inprimis plethorico-cacochymicis, nisi cito sanguinis missione & discutientibus occurratur, tumque effato *Hippocratis Sect. VII. aph. XIV.* eventus sequitur ut plurimum funestus.

§. V.

Merito autem phrenitis distinguenda in idiopathicam & symptomaticam. In utraque quidem febris adest acuta, sed ea cum differentia, ut in illa præcedat, in hac vero individuus sit comes. Idiopathica in temperato nostro climate, rarior, frequentior autem in calidis siccis & meridie-

Causa
antecedens

Est vel
idiopathica

ridionalibus locis, unde etiam veteres Græci medici, inprimis *Aëtius*, *Trallianus* optime & copiose de hac passione in monumentis suis differuerunt. Dantur tamen subinde etiam inter nos exempla phreneticæ febris, sine præcedente alia, potissimum à nimia crapula, continua animi iracundia & cerebri per profundas continuas meditationes & vigilias fatigationes, imbecillitate, in sanguineo vel etiam cholericomelancholicis hominibus & vitæ sedentariæ addictis, hypochondriacis, vel hæmorrhoidariis, præsertim si fluxus imprudenter cohibetur. Sed de hac re æte omnino, confirmante id ipsius experientiae suffragio, tradit *Willisus in pathol. cerebr. cap. X. pag. 234.* quod, nisi cito & opportunis remediis discutatur, quam facile in maniam, sive delirium furiosum transeat. Neque etiam infrequens est idiopathica ejusmodi & in maniam degenerans phrenesis, post superatas febres ardentes, item purpuratas, exanthematicas & catarrhales, male tractatas, per nimis æstuosum regimen, per medicamenta volatilia, sanguinem commoventia, opiata etiam, aut repellentia nimis, refrigerantia, nec non incongruas venæ sectiones. Id quod eo certius & vehementius fit, quando æger ad iram levi ex causa promptus est ac facilis.

§. VI.

Vel sympto-
matica.

Frequentior tamen apud nos symptomatica: sæpius enim evenit, ut in febribus malignis & exanthematicis acutis, petechiis, variolis, catarrhalibus malignis, potissimum castrensibus & omnium maxime Hungarico morbo, præsertim male tractatis, phrenitis accedat in statu & mortem inferat. Scilicet supervenire solet circa dies criticos, cum rigore, tremore artuum, præcordiorum tensione, externorum refrigerio & urina tenui, vel parcius, vel effuse nimis fluente. Sed quia ob morbum præcedentem & diuturnas vigilias fractæ jam fere penitus vires & tonus quoque vasorum membranarum cerebri nimium labefactatus, stases fiunt in iisdem ex sanguine irresolubiles, quas tertio plerumque die mors excipit.

§. VII.

Differit à
mania.

Licet autem phrenitis sæpius in maniam transeat, veterum etiam, *Hippocratis*, *Cælii Aureliani* & *Aretæi* testimonio, qui illam ob id cum hac plerumque conjungunt, vel plane confundunt; ambo tamen multum discrepant. In phrenitide enim semper adest febris, cum pulsu celeri, duro ac parvo, delirium quoque non intermittens prorsus, sed tantum subinde remittens, quo tempore oblivio est omnium, quæ sub delirio contigerunt. Sed mania chronica est passio, sine febre acuta, licet cum pulsu præternaturali, duro & inæquali, quandoque parvo, quandoque magno & celeri. Habet quoque maniacus furor sua intervalla, junctus est ordinario cum magno fastu, ira & odio adversus amicos atque propinquos, & paroxysmo cessante, exquisitam ut plurimum memoriam omnium, quæ antea facta habent maniacy. Deinceps phrenitis etiam differt à leviori illa mentis alienatione, quæ in acutis febribus, ante expulsionem criticam exanthematicum non raro observatur. Nam hæc facilius transit, neque etiam urinas tenues aquosas, vel rigorem & refrigerationem partium externarum habet comitem. Neque minus, quandoque post declinationem febris acutæ, observatur per aliquot dies, aut hebdomades, quædam desipientia

à levi deli-
rio in aen-
tis.

& mentis inconstantia, à phrenesi diversa, quæ propter summam virium & cerebri ex perpeffo morbo debilitatem oritur, & redeuntibus viribus, vel sponte cessat, vel congruis præfidiis facile iterum penitus discutitur.

C U R A T I O.

§. I.

Quum gravia illa & exitialia pathemata, quæ phrenitidi juncta, à meningum inflammatione, seu causa proxima dependeant; prima utique & princeps medentis esse debet intentio, ut hæc in præservatione arceatur & in curatione removeatur. Hujus autem causa quum sit sanguinis in vasculis meningum alibi stasis, alibi cum dolore, tensione spastica & ardore, celerrima trajectio: ipsa certe sana ratio dictitat: ea remedia, quæ effrenem sanguinis impetum ad caput sistunt, ibi congestum derivant, subsistentem expediunt, atque discutunt, & meninges spasmis contractas relaxant, omnium esse, ut ita loqui liceat, indicatissima.

Curatio
quibus per-
ficienda.

§. II.

Jam in phrenitide, & curanda, & præservanda, principem merito locum obtinet, communi veterum & recentiorum omnium consensu, sanguinis missio; quam etiam circa affectam partem instituere præcipiunt omnes. *Tralliano* olim & Arabibus frequens jugularis venæ sectio, quæ nostris temporibus perperam exolevit. Nam per experientiam in comperto est, hanc in omnibus capitis à sanguine congesto & stagnante oriundis passionibus, aliarum venarum incisioni longe multumque esse antefereendam; eo quod hæc vena jugularis externa, cum interna, ex arteriis carotidibus & vertebralibus cerebri proxime sanguinem derivat atque deducit. Nec difficilis adeo & periculosa, ut vulgo putatur hujus venæ incisio, sed contracto tantisper fascia commoda, ut turgeat vena, collo, facili negotio instituenda. Deinceps magni æstimatur à medicis in hoc & aliis capitis morbis venarum sublingualium sectio. Inprimis *Ammannus in paræn.* fatetur: ex militibus qui anno MDCLXIV. ab expeditione Hungarica redierunt, & in nosocomio morbo Hungarico laborarunt, evasisse omnes, quibus tempestive raninæ venæ pertusæ, quibus non, esse mortuos. Atque ego etiam novi, eandem utilissimam fuisse ad præscindendum imminens in febribus acutis delirium, quinto, vel sexto die, sana adhuc mente, institutam. Sed difficulter admodum perficitur, si delirium jam adest, ac præterea ex foramine nimis amplo, ob sanguinis ad caput impetum, hæmorrhagia metuenda funesta, ex justo minori parum sanguinis fluit, & dato ibi spatio, fluxus potius ad cerebrum allucitur. Alii commendant venæ frontalis, contracto prius collo, incisionem, eademque potissimum *Trallianus* se magna phrenitide correptum sanasse, testatur. Nonnulli præferunt arteriotomiam in temporibus, quos inter est *Panarolus*, qui *pentec. I. obs. XIX. pag. 18.* testis est: se se arteriotomiam in phrenitide magna cum felicitate expertum, ut ipsa vexati statim resipuerint. *Cælius Aurelianus* scarificationem in toto capite prius raso in usum habuit. Longe magis tamen probandus Ægyptiorum mos nares scarificandi, cujus vices, deficiente commodo instrumento supplet experimentum, quo culmo straminis, aut bacillo exili

Sanguis
mittendus.

exili acuto, in nares validius truso, sanguinis pro-
ritatur stillicidium, quod ego quidem cum præ-
sentaneo cominodo aliquoties factum esse vidi.
Et hi in consini affectæ parte mittendi sanguinem
modi, tam in phrenitide idiopathica, quam symp-
tomatica locum inveniunt. Sed quando ex lo-
chiis, nec non mensibus retentis, aut suppressis,
malum hoc metuendum est, cito in pede vena
aperienda & sanguis largius emittendus. Neque
minus, si ex vitiato, aut intercepto hæmorrhoi-
dalis fluxus successu, delirium imminet, opti-
mum levamen ex apertione venarum hæmor-
rhoidalium, per appositionem hirudinum, ex-
spectandum.

§. III.

Post sanguinis evacuationem alvus ducenda,
qua adstricta, ad supernas partes, & qua soluta,
ad infernas, humorum convertitur affluxus. Sci-
te autem Hippocrates lib. III. de morb. §. IX.
monet: in curatione phrenitidis alvum esse præ-
parandam, ut egerat, humectantibus potionibus,
quæ tunicas intestinales spasmo constrictas rela-
xant, quia primarum viarum spasmus frequens
deliriorum est causa. Ego instar omnium hunc
in finem commendo potiones mannatas, ex man-
næ minimum uncias quatuor, solutis in libra feri
lactis, cum cremoris tartari drachma, nitri drach-
ma dimidia, & olei amygdalarum dulcium un-
cia una. Baglivus lib. I. prax. pulverem Corna-
chinum commendat, ita pag. 102. scribens: *quum*
pluries observatum fuit, alvi fluxu solutum fuisse
delirium, ideo natura id docente, proficuum non
semel expertus sum pulverem Cornachini, super-
bibendo ei longa diluentia, ex decocto hordei li-
mati, salis prunellæ aliisque dulcificantibus, præ-
cipue, si nimius viscerum ardor adsit & interna
inflammatio. Si vero celeri opus est auxilio, al-
vus leniente & paregorico domestico enemate
est solvenda.

§. IV.

Ex internis porro adversus phrenitidem præsi-
diis, sunt maxime potiones diluentes, demul-
centes & humectantes, largissima copia datæ,
modo, quod rarius fieri solet, ut innuit Aretæus,
phrenetici sitiant. Instar omnium est potus ex fero
lactis dulci, vel acidulato, cum succo citri pa-
rato & julepo rosarum, vel syrupo papaveris al-
bi edulcorato, in cujus mensura cum fructu dis-
solvitur drachma una nitri depurati, vel salis
prunellæ. Utiles quoque emulsiones ex decocto
hordei, rasuræ cornu cervi & seminibus qua-
tuor frigidis, cum julepo rosarum, præsertim
quando mensuræ duo nitri scrupuli adjiciuntur.
Non minus confert lac cum acidulis Selteranis,
vel Antonianis remixtum, item ptisana. Qui
potus omnes quo largius bibentur, eo plus effi-
caciæ in diluendis humoribus, relaxandis con-
strictis tubulis, expediendis obstructionibus &
extinguendo æstu præstabunt. Ex medicamentis
autem mixtura diaphoretica & discutiens, capite
antecedente descripta, uti in omnibus inflamma-
tionibus, sic etiam phrenitide, effectum exserit
longe saluberrimum.

§. V.

Inter externa, quæ caput ab humorum afflu-
xu liberant connumeranda pediluvia, vel invo-
lutiones pedum in lintea humida calefacta, &
quæ omnium optima, balnea aquæ dulcis tem-
perata. Horum insignem utilitatem quotidiana
Frid. Hoffmanni Oper. Tom. II.

uberius confirmat experientia & locuples inpri-
mis testis est Trallianus, qui lib. I. ita disserit: *la-*
vare eos & perungere convenit, quibus jam vacua-
tio facta est & quantitas totum corpus non offendit;
verum siccitas & vigiliæ plurimæ urgent. Et si fe-
bricitet æger, nihil nocebit ei, si ita lavetur, præ-
cipue etiam, cum balneum tepidum adhibitum fue-
rit, ut neque aer sit igneus, neque solium nimis
calidum. Qui autem febris metu eos non lavant;
maxime offendunt. Nam ægri vigiliis magis tor-
quentur balnei abstinencia, adhuc magis etiam ani-
mo turbantur. Lavandi igitur sunt, quemadmo-
dum comprehensum est. Sic enim balneo utentes;
ad bonam temperiem revertuntur, & in posterum
delirio & affectu febrem accendente, liberantur.
Dein veteres, ac inter hos potissimum Trallianus
& Aretæus, post sanguinis & alvi vacationem,
caput oxyrrhodino, ex aceto rosaceo composito
fovebant, ne, uti loquuntur, caput liberalius at-
traheret humores iisdemque repletur. Nec male.
Interim nos summo cum fructu, in omni delirio,
caput totum rasum fovere suavisimus, temperato
hoc epithemate: recipe aceti rosacci uncias duas,
spiritus rosarum, in quo decem grana camphoræ
soluta, drachmas duas, nitri puri scrupulos duos,
olei ligni Rhodii guttas XX. M. D.

CAUTELÆ ET OBSERVATIONES
CLINICÆ.

§. I.

Quam modo tradidimus phrenitidis medica-
tionem, tam in symptomatica, quam idiopathi-
ca, & præsertim illa inveterata, quæ in mania-
cum affectum transire videtur, quam maxime esse
accommodatam, expertus scribo, nec quicquam
præterea vix potest excogitari, sed opus est, ut
aliquamdiu horum usui insistatur. Quæ autem
in regimine phreneticorum servanda, egregie
trahit sæpe laudatus Trallianus lib. I. pag. 50. sic
præcipiens: *considerari debet etiam habitatio, in*
qua degit æger, ut aërem nec admodum crassum;
neque humidum frigidumque, aut nimis calidum
habeat, ne capiti meatuum densatio, aut repletio
superveniat, sed temperatus existat, quo animalis
spiritus temperie ipsius refocilletur ac relaxetur. Sit
autem magis lucidus, quam tenebrosus, ut æger per
huius sensum ad consuetorum perceptionem ac
conscientiam perveniat. Quare & amici non nulli
admodum familiares ei assistant, ut etiam incre-
pantes ipsum propter ea, quæ facit, revereatur.
Neque vero domesticus, aut cognatus, cuius cau-
sa aliquando tristetur, aut cui irascatur, ingredi
debet, quippe hoc irritare agros & commovere so-
let: & ut valde perturbentur, manifestam præ-
bet occasionem. Sed nec amici frequentes & co-
piosi ad eum ingrediantur; quippe turbam ei tan-
tum excitant, præterea aërem quoque crassum effi-
ciunt, frigidos emittentes spiritus. Jam non vio-
lenter movendus est, sed leniter, ne in lecto prop-
ter imbecillitatem concutiat. Hoc enim, si quid
aliud, ægrum irritat & somnum impedit, si vero,
qui adsunt, omnia ipsius membra citra violentiam
teneant, leniterque perfricent, & præsertim in-
feriora: atque tunc magis, ubi convulsiones ægro
oboriuntur, artus vinculis excipiantur. Quippe
hoc materiam ad inferna provocat, præterea con-
vulsiones lenit. Satiùs autem est inferiora quoque;
ubi perfricata fuerint, fovere atque sic deligare;
ut materia, quæ fotu simul & fricatione accitâ
fuerit, ad ima potius derivari possit;

Regimen
phreneticorum.

M

§. II.

Externa
usurpan-
da.

§. II.

De sangui-
nis missio-
ne tenenda.

De venæ sectione tamen, hæc adhuc tenenda: quod si, ut sæpissime fit, phrenetici eam admittere proflus renuunt, ego nil præsentius & factu facilius novi, quam ut ex improvise calamus, aut culmus stramineus valide in narium cavum adigatur: sic enim sanguis sæpius illico liberaliter & cum commodo evocatur. Ad venæ frontalis autem incisionem, si idiopatica & chronica est passio, non prius accedendum, præsertim in corpore plethorico, quam aperta prius brachii, vel pedis vena, ne impetus ad caput crescat. Cavendum etiam sub hac operatione, ne instrumentum adhibeatur acutius, venam perfodiens & pericranium cum detrimento lædatur.

§. III.

Phreniti-
dis ex sup-
pressis hæ-
morrhagiis
& materia
acri cura.

Quæ etiam ex mensium, vel hæmorrhoidum vitio & oriundis inde vehementibus spasmodicis pulsat phrenetica passio, optime levatur balneis, mineralium aquarum potu & appositione hirudinum ad venas ani, vel uteri, adhibito simul congruo victu atque regimine. Novi enim, phrenitidem diu durantem, erumpente mensium, vel hæmorrhoidum fluxu, feliciter fuisse discussam. Sed quando phreneticum malum non tam à sanguinis in vasis cerebri congesti copia pullulat, quam potius à materia subtili, acri, virulenta, vel repulsa ab externis, uti in exanthematicis, vel per calidiora & volatilia nimium exaltata, quæ firmiter nervosæ duræ matri impacta spasmos concitat, liberum sanguinis transitum & ad cor recursum intercipientes, præter venarum, quæ capiti propinquæ, sectionem, expedit calvariæ rasæ partes & viscera ex animantibus recenter mactatis adhuc calentia, ut pulmones, hepar & omentum, admove, & quando refrigerint, calidæ eadem immergere, quo iterum calefiant.

§. IV.

Item plicæ
Polonicæ.

In Polonia frequens est delirium phreneticum, melancholicum & maniacum ob latentem plicam, hacque erumpente insania cessat. Hinc optimum consilium plicæ egressum elicere, quem in finem usurpare suescunt decoctum ex musci clavati manipulis binis, in duabus aquæ mensuris decoctis. Quo dum bis quotidie caput & crines abluunt, intra hebdomadis decursum prodire solent cirri, delirium discutientes. Non raro etiam abscissam plicam sequitur crudelis capitis dolor, quem excipit phreneticus furor cum febre ipsaque mania, quæ tamen usu decocti, vel linimenti ex musco clavato in *M. N. C. Dec. I. Ann. II. obs. LIV.* descripti, plicam revocantis, promte iterum abigitur.

§. V.

Ab sint
commoven-
tia.

Narcotica

Cavendum autem, sicut in omnibus inflammationibus, sic etiam in phrenitide ab acris & commoventibus, liquoribus spirituosis, à motu animi & corporis fortiori, immo ab omnibus, medicamenta sint, sive alimenta, quæ sanguinem in præternaturalem motum ciere valent. Inprimis nullo modo ad iram irritandi ægri & ob id arcendi ab iis, à quibus læsi & quos ferre nequeunt, domestici sint, sive alieni. Opiata & narcotica absint penitus, præsertim ubi vires jam imbecilles. His enim deliria quandoque in febribus induci testatur experientia. Perite hinc monet *Trallianus l. c. si vires*, inquit, *imbecilles fuerint, tunc maxime vitabis, ne quid torpori som-*

noque inducendo incommodum exhibeas. Nam in his, qui infirmas vires habent, non mediocris noxam talium potionem comitatur. Vesicantia etiam, non nullis solemnia in phrenitide improbo. Nam cantharides acri, quo pollent, stimulo strictas jam & tensas spasmis membranas irritando, delirium augent, & convulsionem facile accersunt. Testatur id diserte *Baglivus, lib. I. prax. pag. 102.* ita scribens: *in aëre Romano, per adhibita viris vesicantia plures vidimus mortuos, ac sanatos. Proficere autem magis fœminis, quam viris, vidimus.* Et paullo post sic pergit: *delirantibus cum febre acuta, lingua arida, indiciis magnæ viscerum inflammationis, si applicentur vesicantia, omnes fere in pejus ruunt, & magna ex parte moriuntur convulsi.*

ENARRATIONES MORBORUM.

OBSERVATIO I.

Laborabat ardente febre cum intolerando ferine capitis dolore, quadragenarius quidam, cui sexto die accedebat alvi fluxus, quem medicus detrimentosum esse putans, pulvere ex bolo Armena, hæmatite & laudano opiato composuit. Cohibito hoc, dolor capitis gravior factus, & potu præterea vino, cui essentia ambraë instillata, maximæ præcordiorum anxietates subsequutæ, fauces cum œsophago inflammatione affectæ, magna colluvies viscidæ mucosæ materiæ in oris cavo collecta. Successit etiam delirium furiosum, tam vehemens, ut æger vix à quatuor robustissimis viris in lecto contineri posset. Adversus hoc multa quidem & varia adhibita præsidia, vena in pede pertusa, admota epithemata, appositus calens vituli pulmo, sed omnia incassum, perstitit potius per quinque dies delirium non interruptum, donec decimo quarto, à primo morbi insultu, die mors vitæ faceret finem.

Epicrisis.

Nihil profecto perniciosius, quam in ardente biliosa febre, ex colluvie acrium biliosorum prima in regione succorum oriunda, alvi fluxum, tempore præsertim critico erumpentem, imprudenter sistere. Neque enim hoc facto fieri potest aliter, quam ut materia biliosa retenta, vel inflammationes in ventriculo & intestinis, vel etiam in capite, uti heic factum, suscitetur. Id quod tanto certius accidit, quia à medico temerarie vini usus concessus, qui nunquam, ubi metus inflammationis in primis viis, etiam in parca quantitate, admittendus. Accessit etiam delirium furibundum alvo suppressa, quia ex spastica primarum viarum constrictione, sanguis cum impetu ruit ad caput, ibique congestus, dolores primum, ac postea, ob meningum inflammationem, delirium, peperit. Atque adeo patescit, imprudentem medicationem, frequentissime atrocium non modo pathematum, sed & ipsius mortis esse causam, tum maxime, quando eadem critica humoris peccantis excretionem supprimuntur, & materia nocens in corpore retinetur.

OBSERVATIO II.

In puerpera tenera, ad iracundiam prona, cerevisiæ & vini potui assueta, restitatur penitus post partum lochiorum fluxus, cum virium ingenti debilitate, ardore, præcordiorum anxietate & spirandi angustia. Medici igitur ad provocandum

dum sanguinis profluvium pulverem ex myrrha, flavedine corticum aurantiorum, lapidibus cancrorum, succino & oleo cinnamomi propinarunt, ac præterea sal volatile cornu cervi, in aqua cinnamomi solutum, dederunt. Sed his nihil aliud effectum, quam ut anxietates præcordiorum ingravescerent, urina supprimeretur & alvus dura ac tensa plane nihil dimitteret. Quin post sex dierum pervigilium, oculi fulgidi & facies rubicunda delirium nunciarunt, quod etiam paullo post, tanto cum furore successit, ut ægra è lecto surgens in plateam excurreret, nullumque frigoris sensum experiretur, sed potius in extremis intense caleret, licet hyems tum regnaret algidissima. Accitus hinc alius medicus, qui venam in pede pertundere iussit, interius dedit in emulsione seminis papaveris albi pulverem ex nitri drachma, camphoræ, theriacæ coelestis ana granis sex, in quatuor doses divisum & exterius temporibus admovit epithema nostrum cephalicum. His ægræ placidus somnus conciliatus, cum sudore largo, ex quo expergefacta, de languore & debilitate maxima est conquesta, sudor autem ille per totam hebdomadem manavit, sub quo ipsi liberali manu potui datum decoctum cornu cervi cum succo citri. Sic periculosum hunc morbum evasit quidem, sed remansit lenta febris post puerperium, quæ inordinato victu sustentata & adaucta, tandem degeneravit in hæcticam, quæ circa æquinoctium autumnale attulit mortem.

Epicrisis.

Peccant communiter medici, quando lochiorum fluxum imminutum, vel penitus emanentem, calidioribus & pellentibus urgent, quæ majorem orgasmum sanguini inducendò, anxietates augent alvumque siccant. Tum potius, in exquisitoris præsertim sensus corporibus, antispasmodica & sanguinis æstum temperantia, nitrum & castoreum, ex usu sunt, & longe felicius restituentem fluxum revocant. In nostra maturius mittendus fuisset sanguis, quod præsidium ex optimis in puerperis lochiis destitutis, ad præscindenda pathemata gravissima. Neque dubitandum, quod neglecta venæ sectione, sanguis, ob spasmus interiorum, ex urinae & alvi suppressione cognoscendum, sit ad caput delatus cum impetu, ibique induxerit phrenitidem, quæ deinde aliis convenientibus auxiliis, venæ sectione, nitrosis & internis æquæ ac externis discutientibus, depulsa, felicem finem per magnum criticum sudorem nacta est. Quod autem remanserit lenta febris, id non infrequens in puerperis, præsertim inordinato & incongruo victui indulgentibus. Nam naturæ robore per puerperium & morbum fracto, ventriculus etiam debilis est, ut postea ingesta non rite digerant & comminuat, sed cruditates gignantur multæ noxiæ, lentis febribus ansam & causam præbentes.

OBSERVATIO III.

Phrenitis ex calidioribus lethalis. Sub initium hujus anni, in febrem nobis aliquamdiu epidemicam, synocham catarrhalem, cum animi deliquio, horrore, æstu & catarrhis, incidit vir probus & profundæ eruditionis, muneris ecclesiastico haud ita pridem præfectus. Medicus vocatus, ad malignitatem arcendam crebrius exhibuit mixturam simplicem & tincturam bezoardicam, iussit quoque, ut æger in lecto & conclavi calido detineretur, ac ipsi nihil aliud potui præberetur, quam infusum calidum her-

Frid. Hoffmanni Oper. Tom. II:

bæ thæc. Quinto die apparere in cute exanthemata: hinc continuata eadem remedia, additum oleum bezoardicum *Wedelii* & interpositi quoque pulveres nitrosi. Ægrum vero à primo morbi initio affligerunt vigilie assidue, siis intensa, corpus sudore diffluit, jactatum anxietate perpetua ac inquietudine, eademque pathemata persisterunt jugiter, licet purpura esset expulsa, firmamque in cute servaret stationem. Nono die data à medico ad quietem conciliandam medicina, opii contagium haud obscure prodens; persisterunt tamen anxietates & corporis jactationes, & æger subinde delirare visus, absurda non nulla loquutus. Accidit postea, ut; nescio cur, vehementius animo commoveretur æger, quo in furorem per intervalla delirium erupit. Ad quod componendum medicus alius accersitus undecimo morbi die venam secare iussit, emissis decem circiter sanguinis uncias. Inde primum quidem somnus inductus, sed post hunc plane furere coepit æger, ut vix ab aliquot viris in lecto contineri posset, omnia discerperet & domesticos, parentes atque agnatos, diris verbis, quin verberibus exciperet, donec vigesimo primo die mors miseriarum faceret finem.

Epicrisis.

Pervenit ad nos tristis hæc historia, eo ipso tempore, quo hæc de phrenitide tractatio typis exscribebatur, quam non levibus causis inducti heic inferendam duximus. Luculentum autem præbet exemplum, quomodo ex præposterâ medicatione, regimine nimis æstuoso externo & internis calefacientibus, exanthematica alias benignæ indolis materia, malignam & subtilem in intima membranarum cerebri penetrantem induere possit naturam, ad delirium atrox, mania tantum non æquale, inducendum; præsertim ubi cerebrum jam tum imbecille. Dictum igitur hoc sibi putent, juniores inprimis medicinæ practici, ne unquam in exanthematicis, etiam purpura, calido regimine & calefacientibus pharmacis, suos excipiant, vires pessudent, morbum exasperent & truculenta inducant pathemata. Deinceps venæ sectio undecimo morbi die largior, levamen afferre potuit nullum, ut potius, uti subinde observavimus, detrimento fuerit. Nam in principio quidem, si vires adhuc valent & corpus sanguine redundat, tutissimum & efficacissimum præsidium est utique; sed ubi vires ob morbum, vigilias & præposterum calidum regimen calidaque pharmaca exhaustæ sunt; rejicienda largior subtractio, quippe quæ vires longe magis prosternit, ad vincendam morbi causam tamen necessarias. Recte ob id monet *Sydenham in opp.* phreneticis & maniacis, plus interdum succurrendum esse analeptics, quam sanguinis missione. Quod si tamen sanguis in cerebri vasis subsistens ventilationem poscit, satius est, ut eidem proxime per nares procuretur exitus, eo quod ex anatomicis notum est, quod internæ carotidis ramus per os cribriforme, unâ cum nervo olfactorio; ad pituitariam narium tunicam fertur. Hinc ego sæpius cum fructu, ad phrenitidem arcendam, stilo in nares provide, sed alte intruso, stillicidium elicere jussi.

OBSERVATIO IV.

Virgo tenera & in iram prona, septendecim annorum, à parciore mensium fluxu febrem incurrit pleuriticam, cui accessit phrenetica. Libe-

Delirium post phrenitidem sanatum.

rata tamen à mortis periculo liberali narium fillicidio; sed restitit postea mentis alienatio & phantasia corrupta, ut interdum angore ac mœrore afficeretur, interdum furore percieretur, cum crebris tensivis artuum tractionibus. Ego in consilium vocatus suasi Selteranarum cum lacte potum ad mensē cum balneo aquæ dulcis. Peracta hac cura, pro potu dedi decoctum hordei amygdalatum, cum nitro & saccharo conditum, quod largiter bibit. His non modo mens ad constantiam & sanitatem, sed & mensium fluxus in ordinem redactus, ac intra semestrem spatium perfectæ reddita est sanitati.

Epicrisis.

Dici vix potest, quam spectatæ virtutis in cerebri & nervorum gravibus affectibus, tam convulsivis, quam cum insania junctis, sit diluentium & humectantium usus: his enim humores fluxiles redduntur, obstructions expediuntur, acres succi diluuntur, ac temperantur, spasmo crispata fibræ remittuntur, & insigne imbecillis partibus adjicitur robur. Quo nomine, ego quidem, inprimis celeberrimum balneum aquæ dulcis & lac, si obtinendum, optime asininum, cum aquis mineralibus temperatioribus, alcalino sale foetis, quales sunt maxime Selteranæ.

OBSERVATIO V.

*Phrenitis
ex ira in
chronicam
insaniam
mutata cu-
rata.*

Adolescens quindecim annorum, litterarum studia intemperantius tractans, iracundus & cum sodalibus inter perpetua jurgia versans, aliquanto durius à parente verberibus paullo post cibum fuerat exceptus. Ex eo male habuit, parum appetit, minus dormivit, somno insomniis terrificis interturbato, donec post septimum diem in phreneticam pathemata erumperent febrem, cum motibus artuum convulsivis, qui per intervalla gravius affligerunt. In paroxysmo vehementissime vociferabat, maledicta in omnes eruclabat, cædebat & discernebat obvia. Licet etiam somnum ad aliquot horas caperet, ut videbatur placidum, delirium tamen manebat idem. Comparuerunt postea non nullæ pustulæ rubicundæ in dorso ac pectore, urinae secesserunt tenues sine sedimento, & pulsus durus semper fuit, celer & inæqualis. In hoc tam gravi morbo, æger præter prisanam, cum lacte, syrupo rosarum & nitro, bibit nihil, sed largiter, tam salubri effectu, ut gravia symptomata cum febre discederent. Non tamen perfecte mentis morbus sublatus, sed incessit animum odium erga propinquos & præpositos, levi ex causa vehementissime excanduit, ut tremere, fastus fuit insolens & domesticos cibos plane respuit. Hinc datum consilium, ut Schwalbacenses aquas biberet, per mensē, & postea per quatuordecim dies balneo uteretur ex aquis Schlangenbadensibus, quod etiam tam feliciter cessit, ut sanus, & corpore, & animo, domum rediret. Ut autem integritas hæc servaretur, suasu medici abstinuit postea à cerevisia gravi lupulata, ac prisanam ex hordeo cum radice scorzonera loco ordinarii potus bibit, mane etiam usus infuso theiforini cum lacte, cui subinde nitrum inditum.

Epicrisis.

Quam noxia post cibum sit ira, ex his uberiorius patet. Ac uti verum omnino est tritum: ira furor brevis, sic etiam in dispositis ira in fe-

brem facile degenerare potest furibundam. Patet dein, quam utilis sit humectantium & diluentium potus, ut recte adhibitus, curationis punctum absolvat fere omne. Porro notandum, ad abigendam insaniam, multum conferre itinera, ob loci, aëris & personarum invisarum mutationem corporisque motum. Multum vero etiam præstat, recte jam notante *Hippocrate*, ætatis mutatio, ut sponte sæpe, post vigesimum primum ætatis annum, ejusmodi capitis morbi discedant.

CAPUT VI.

De Febris Pneumonicis, sive Pleuritide & Peripneumonia.

THESES PATHOLOGICÆ.

§. I.

Pneumonica febris est acuta inflammatoria, *Descriptio pneumonice febris* porta à stasi sanguinis intra sanguifera vascula pulmonum, vel etiam venæ azygos ramulos in pleura, juncta cum acuto & pungitivo dolore lateris, spirandi difficultate, æstu immodico, pulsu duro & frequenti, tussi sicca, vel etiam humida, quandoque cruenta, periculi nunquam expers.

§. II.

Nulla febris inflammatoria est, quæ omnis *Differentiæ loci inflammationis* ætatis, sexus & temperamenti hominibus, in frigidis, æque ac calidis, & temperatis regionibus degentibus, adeo infesta est, & quæ etiam simul plures ob aëris inæqualitatem & intemperiem epidemice corripit, quam quæ in thorace fit, sive in ipsis pulmonibus, sive in musculis intercostalibus, tam internis, quam externis, pleura nervosa interius cinctis. Prout autem inflammatio in thorace partibus insidet diversis, varia non modo accipit nomina, sed & symptomatibus, eventu & curandi ratione, plurimum differt. Veteres quidem, accurata anatomica partium cognitione destituti, subjectum pleuritidis & peripneumonice esse putarunt pleuram, ob id omnem fere thoracis inflammationem dixerunt pleuritidem. *Hippocrates* tamen distinctionem jam fecit inter pleuritidem & peripneumoniam. Quo forsan omnes fere prisca & mediæ ævi, quin superiori adhuc sæculo medici, inducti, ut in peripneumonia pulmones, in pleuritide autem vera hos plane non, sed tantum pleuram cum musculis, quos succingit, affici, asseruerint. Falsum autem esse hoc assertum, & pleuriticum malum omnino etiam in pulmonibus consistere, pluribus & momentosis rationibus docui in *dissertatione de pleuritide & peripneumonia*. Validissimum enim est argumentum ex sectione pleuriticorum, quam *Petrus Servius* teste *Welschio* Dec. I. curat. IV. Romæ in nosodochio ad S. Spiritum, vel in trecentis instituit, & semper lobum pulmonis infectum materiaque repletum conspexit, pleura aut nihil omnino ad sensum vitata, aut leviter tantum quodammodo inquinata. Hinc, mea quidem sententia, ita sedes diversa inflammationis in thorace determinanda, ut si externas tantummodo partes occupet, emergat pleuritis spuria, si membranosa pulmonalis substantiæ superficiem, instar erysipelatis prehendam,

tendat, pleuritis sit vera, & ubi altius in ipsam pulmonum substantiam descendat, gravior sit atque profundior, peripneumoniā excludat.

§. III.

Signa pleu-
ritidis spu-
ria.

Hæ igitur inter se dissidentes inflammationum in thorace species probe sunt discernendæ à medico, per notas quasdam essentielles & characteristicas, jam sigillatim commemorandas. In pleuritide quippe spuria dolor est valde acutus & pungitivus lateris, qui etiam tactu augeatur, decubitus in latere affecto difficilis, tussis sicca, sine ejectione materiæ pituitosæ, vel cruentæ, dolorem tantum, si valida est, exacerbans: juncta etiam simul est febris, cum pulsu subduro, depresso & frequente. Causam deinceps ipsi præbet, non tam sanguinis, quam potius feri acris stasis, in finibus arteriolarum & venularum azygæ connexarum, nec non tubulorum lymphaticorum, in pleura, vel etiam periostio costarum, ubi sensus adhuc est acutior. Hinc nihil aliud quam rheumatismi species est, & ob id familiaris illis, qui catarrhis, doloribus rheumaticis, arthriticis obnoxii sunt, vel hemicrania subinde vexantur, præsertim si ex aëre nimis calido in frigidum, vel contra, tempore potissimum vespertino, concedunt. Neque ea propter sanguinis missionem poscit, nisi eminens admodum urgeat plethora, sed sola diaphoresi & auctiori perspirationis successu, mox & facile iterum, circa septimum plerumque diem, solvitur ac periculi expers est.

§. IV.

Pleuritidis
vera.

Pleuritis vera inflammatio est sanguinea, à stasi sanguinis in vasculis vasorum bronchialium, quæ superiori sæculo detexit Ruyschius, & quæ tantummodo nutritioni membranarum, vesicularum & vasorum, pulmonum compagem constituentium, serviunt. Atque adeo principaliter ipsi pulmones sunt affecti, sed quoad partem tantum externam superficiei. Et hinc est major, quam in spuria spirandi angustia, sputum cruentum & quod expectoratione morbus solvatur. Febris etiam juncta ut plurimum, sed magis acuta ac in spuria, adsunt quoque dolores, sed non tam acerbi, nec tactu exacerbandi, in latere affecto. Trahitur enim simul in consensum pleura thoracem investiens, tum quod exterior pulmonalis membrana pleuræ soboles, tum etiam quod in plurimis hominum pulmones in alterutro minimum latere pleuræ annati atque concreti sint.

§. V.

Et peri-
pneumonia.

In peripneumonia dolor est magis tensivus, obtusus, pressorius, quam acutus & ad dorsum usque & scapulas propagatur. Sed major spiritus difficultas, anxietas, & ægra expectoratio, qua sputum varii coloris ex imo ducitur. Nam in hac vasa pulmonum ipsa, quæ sanguinis cursum ex uno cordis ventriculo in alterum absolunt, affecta, & sanguine crasso, in solidescentem naturam abeunte, facta sunt atque obstructa. Quare majori stipatur periculo & facile, quos corripit, necat, præsertim si senes, & tempestiva sanguinis omittitur ventilatio.

§. VI.

Morbi hi-
storia ex
Aretæo.

Interim licet veteres minus exacte distinxerint thoracis inflammationes; quia tamen frequentissimus fuit morbus, ubi vixerunt prisca illi medici. *Frid. Hoffmanni Oper. Tom. II.*

dicinæ principes, *Trallianus, Aretæus, Cælius Aurelianus* & reliqui, ex ipsis morbi symptomatum historia accuratior peti potest, quam forsan ex recentioribus. Mihi præ reliquis placuit *Aretæi* descriptio, quam *lib. I. cap. X.* de pleuritico morbo consignavit: *comitatur, ait, illum dolor acutus, ad jugula ascendens, ignis acer. Quibusdam vero & in terga & in scapulas dolor protenditur. Sequitur etiam difficilis spiritus, vigilia, ciborum fastidium, malarum rubor, tussis arida, sputa ægre exeuntia, pituitosa, aut abunde cruenta, aut subflava. Pejus est, si cruentum sputum non adsit, si delirant, vel comate occupantur.* Scribit porro, ægros intra septimum, vel decimum quartum diem convalescere, aut perire, pro symptomatum vehementia. Vel si ad vigesimum diem malum extendatur, fieri empyicos. Addit etiam, quod hyems maxime ferax sit, secundo autumnus, ver minus, nisi interdum perfrigidum sit, æstas vero minime; item quod inter ætates senes maxime huic malo obnoxii sint, pueri minime, vel minus eo periclitentur, quia puerilia corpora rara sint, humida & fluxa, multa in iis difflatio & exhalatio.

§. VII.

Quum autem gravia omnino, quæ febrem pneumonicam comitantur pathemata, unice fundamentum suum habeant in inflammatione pulmonalis substantiæ; in procinctu est judicare: quod omnia, quæ libero sanguinis progressui per minima pulmonum vascula, vel canalium à copia crassæ materiæ obstructione, vel eorum valida spastica, à materia tenui, acri, constrictione, obicem ponunt, ad ingenerandam inflammatoriam hanc febrem sint aptissima, præsertim quando plures simul causæ, quæ dicuntur antecedentes, procatacticae & remotæ, in unum hunc effectum conspirant. Igitur ii, qui ex victu crasso, impuro, potu spirituosissimo, humidi & motus defectu, sanguinem in venis alunt, & copiosum, & spissum, qui recte *Sydenhamo* κατ' ἐξοχὴν dicitur pleuriticus, quam facile, conspirantibus aliis procatacticis causis, morbum hunc nanciscuntur, tum maxime, quando corpus per intensiorem exercitationem, operosum laborem, balnea item calida, nec non spirituosorum potum, vehementius exastuatur, & postea frigida septentrionali auræ incautius committitur, aut, quod pejus adhuc, subito potus ingurgitatur perfrigeratus. Prompta etiam eandem ob causam hujus passionis genesis in sanguineis & plethoricis est, ommissa tempestiva sanguinis missione. Idem evenit foeminis, quibus menses, vel inordinate, vel justo parcius fluunt, vel etiam si ob ætatis rationem plane emanent, nec non viris, quibus hæmorrhoidum fluxus non rite obtingit, aut plane suppressus est.

Ad proxima
mam causam
concurrunt
plures.

Crassus &
copiosus
sanguis.

§. VIII.

Deinceps non semel, sed sæpius observavi, tormina, spasmos & colicos, nec non hypochondriacos in abdomine & intestinis dolores, cum alvi vehementiori constrictione, sequutam fuisse inflammationem pulmonum, maxime in plethorico-cacochymicis. Nam horum ea est natura atque facultas, ut comprimendo vascula, præsertim venosa, liberum sanguinis iter impediunt, ejusdemque motum inæqualem & majorem præter naturam appulsum ad alias, imprimis superiores partes, efficiant. Quo postea nimio appulso fit, ut sanguis non modo urgeatur ad tubulos, qui ob minorem diametrum sanguinem ordinario

Spastica
vasorum
strictura.

nec velunt, nec capiunt, sed & in hisce vasorum angustis impactus hærens, æquabilem & inoffensum progressum intercipiat, & omnes functiones, quæ fiunt secundum naturam, perturbet. Et quia corpora hæmorrhagiis admodum obnoxia, plerumque sanguineæ sunt complexionis & spasticis in imo ventre stricturis patent; hinc fit, ut juvenes qui largas narium hæmorrhagias, sputum cruentum & hæmorrhoides præmaturas experiuntur, perquam facile, accedentibus occasionalibus causis, in pleuriticis & peripneumonias febres incidant. Porro frequenti observatione constat & illud, quod à scabie retropulsa, à præpostere cohibito simplici, vel dysenterico alvi fluxu, à consolidatis antiquis ulceribus, à critico consueto pedum, vel totius corporis sudore suppresso, vel purpura chronica ob frigus externum retrocedente, pectoris obortæ fuerint inflammationes. Illa enim materia acris causticæ indolis, recrementitia, nervosis pulmonum & thoracis tunicis impacta, ob spasticas, quas suscitatur, stricturas sanguinis progressui obicem ponit, eundemque in æqualitate turbat. Neque etiam rarum est, post variolas & morbillos, præsertim male tractatos, gigni in thorace inflammationem, quum hi morbi nunquam non pulmonibus infestis esse, ac in iisdem labem & imbecillitatem relinquere soleant.

§. IX.

Epidemica est.

Præterea, quandoque ab extraordinaria & infueta aëris temporumque constitutione, pleuritides, tam veræ, quam spuria, populares sunt & epidemica. Evenit hoc si hyems diuturna nimis rigida regnavit, item quando longam austrinam aëris temperiem & levem atmosphæram, repente frigida & borealis, valde elastica aura excipit. Quod postremum quum inprimis vere & autumnino contingere soleat, hinc tum febres tam catarrhales, & malignæ & benignæ, quam pleuriticæ circumire solent. Post asperam etiam hyemem notavimus grassantes pleuritides crudas, in quibus vix nono & decimo die sputum apparet. *Hippocrates morb. lib. II.* vocat siccas, & in ipsis ægri primis diebus admodum anguntur, viresque dolore & inani tussi admodum concidunt, ut procedente sputo, expectorationi vix sufficiant & ægri difficulter convalescant. Endemiæ etiam dantur peripneumoniæ. Notum quippe est frequentem admodum esse peripneumoniæ morbum & plures, in Westphalia, Pomerania, Suecia, Dania & Russia interficere. Id quod vero tam propter solennem his in regionibus victum durum & crassum, quam propter aërem frigidiorum & asperiorum, septentrionalibus locis proprium, accidere arbitror.

§. X.

Crises servat.

Ego quidem vix in ulla febre tam accurate observavi crises, quam in pneumonica, pleuritica scilicet & peripneumonica. Nam in juvenibus & qui paulo vegetioris naturæ, circa quartum plerumque diem sputum prodit cruentum & septimo die morbus sponte sua per sudorem largum solvitur. In phlegmaticis & senioribus, nec non ubi vitium pulmonibus insidet altius, undecimo, vel etiam decimo quarto die, morbi fit solutio, partim scretu, partim sudore, pulsu facto molliori, accedente somno placido & virium incremento. In imperfecta autem crisi criticis diebus etiam apparet sudor, sed non sufficiens, ideoque nec ægrum levat, nec morbum

solvit. Et ubi symptomata durant ad vigesimum primum diem, metus est abscessus in pectore periculosi. Bonum igitur indicium, quando expectoratio ex imo pulmonum succedit bene, evahens materiam viscidam, quarto die cruentam, dein flavedine tinctam, interdum etiam purulentam. Et quo expeditior scretus, eo major sanitatis spes, quo impeditior, eo minor. Laborandum modo, quando morbus expectoratione materiæ copiosæ virulentæ terminatur, ne in fine phthisis, vel hæctica accedat. Nunquam autem tuta crebra alvi fluxio, suspecta etiam urina sine sedimento & minus quoque fausti ominis sudor largus, extra dies criticos. Quando tamen undecimo, vel duodecimo die alvi dejectio non nimis copiosa accidit, non adeo pertimescenda, sed purulenta materia quandoque simul ejicitur. Quando etiam circa diem quartum naturæ beneficio narium prodit stillicidium, id non sine notabili contingit euphoria.

§. XI.

Nulla ex inflammationibus tam facile recidivatur, ac febris pneumonica, præsertim quæ paulo profundior fuit cum quodam abscessu. Mihi nota sunt exempla, ubi quidam vix convalescentes, inordinata diæta, potu inprimis copioso vini meracioris, in eundem morbum, elapso vix mense relapsi, lethali plerumque eventu. Quin novi inflammationem hanc, bis, ter, quater & pluries anno, eodem in loco, ubi primum constiterat, recruduisse. Ut adeo, qui semel hoc affectu tentati, ejusdem repetitum insultum exacta vitæ victusque ratione, semper opus habeant arcere cum cura.

§. XII.

Qui autem inflammatione pulmonum moriuntur, suffocatione pereunt, quia materiam in vesiculis aëreis & ductibus bronchialibus hærentem tussi amplius ejicere nequeunt. In sectione pulmones inveniuntur inflati, duri, instar hepatis, & ob vasa sanguine crasso tenaci facta, aquæ injecti fundum petunt. Vidi etiam pulmones abscessibus parvis & tuberculis duris obsessos, cum inflammata & sphacelata pleura, pulmonum substantiæ adhærente. Neque minus nota mihi sunt exempla, ubi polyposæ concretiones, in vena pulmonali, item arteria magna reperiuntur, obicem posuerunt liberiori sanguinis per pulmones cursui, & inflammationem, ob sanguinem copiosius, quam debebat, eo delatum, induxerunt.

Mortis causa.

CURATIO.

§. I.

Quia igitur sanguis subsistens & æqualem circulum intercipiens unica proxima hujus morbi causa, palmarium utique in sanando est momentum, ut is expeditur iterum atque discutiatur. Ad quod perficiendum, hæ subordinatæ faciunt indicationes: 1) quando ulterior sanguinis stasis atque stagnatio impeditur; 2) quando lentor in sanguine pleuriticorum obvius diluitur & colliquatur; 3) quando pars affecta, per spasmus, dolorem & copiosum affluxum rigida mollitur & laxatur, quo impactus cruor ab appulso sanguine arterioso eluatur ac in motum rursus cieatur; 4) quando excretio materiæ viscidæ, sanguinolentæ ac purulentæ, in bronchiis pulmonum

Indicationes curativæ.

monum hæc eris, per creatum facilitatur, si-
mulque abscessus & empyematis generatio præ-
scinditur.

§. II.

Sanguis
minuendus.

Ad præcavendam inflammationis incremen-
tum, nihil utilius est sanguinis missione, quæ
quo citius administratur, eo plus auxilii præstat.
Secetur vero vena in brachio, & quidem illius
lateris, quod affectum est: mittatur etiam libe-
ralius, si plethora eminens & cum impetu exsi-
lit sanguis. Quia ubi serum admodum tenax &
glutinofum emisso sanguini immatrat, & respiratio
post sectionem adhuc valde difficilis urget, con-
fidenter iterato subtractio administranda, præfer-
tim si paullo profundioris staseos inflammationis
suspicio.

§. III.

Diluens
profundum &
discutien-
tia.

Ex internis quam maxime proficua, quæ san-
guinem, serum ac humores tenues reddunt ac
fluxiles, crassos vero ac spissos colliquant, blan-
damque simul movent diaphoresin. Quod ut ob-
tineatur, conducunt hæc: Infusum theiforme, ex
herbæ veronicæ, chærefolii, salviæ ana manipu-
lis duobus, radicis liquiritiæ uncia, seminis fœni-
culi drachmis tribus, de quo frequentius patellæ
quatuor vel quinque forbillandæ. Dein mixtura
discutiens & diaphoretica, hunc in modum: re-
cipe aquæ cardui benedicti, scabiosæ, florum
sambuci, acaciæ ana uncias duas, theriacalis un-
ciam semis, aceti destillati unciam, lapidum can-
crorum drachmam, antimonii diaphoretici scru-
pulos duos, syrupi papaveris rhæados, vel syrupi
croci, ex sacchari dissoluti uncia & extracti croci
granis octo parandi, drachmas duas. De qua dua
vel tria cochlearia, bihorio quovis, alternatim
danda cum pulvere hoc: recipe antimonii dia-
phoretici, sive cerussæ antimonii, lapidum can-
crorum, mandibularum lucii piscis, dentis hip-
popotami, solutionis oculorum cancri ana drach-
mam, nitri puri drachmas duas, cinnabaris scru-
pulum. M. f. pulvis ad drachmæ dimidiæ pondus
pro dosi exhibendus. Quando etiam natura paul-
lo segnior & pleuritis epidemia mali moris, pul-
veri huic adjicienda camphora; quæ potenter re-
sistit inflammationibus, & ne latius serpent, im-
pedit. Tenendum tamen, dimidium granum
pro dosi sufficere & desuper bibendam esse emul-
sionem ex feminibus quatuor frigidis majoribus;
cardui Mariæ & nucleis pinearum, cum decocto
hordei & cornu cervi paratam:

§. IV.

Spasmus
exandus
& sputum
cundam-
um.

Dolores acutos mulcet & rigidas fibras opti-
me remittit, vesica calida dolenti parti tantum
non perpetuo admota, plena decocto emollien-
tium specierum, uti florum sambuci, meliloti,
verbasci, chamomillæ, malvæ, liliorum alborum,
feminum quatuor carminativorum, croci, ex
lacte. Recte enim jam *Aretæus lib. I.* in cura-
tione pleuritidis præcipit, ut lateri dolenti appli-
ceretur vesica calente oleo repleta, modo fatus le-
vis sit, ne pondere dolorem efficiat. Et certe hoc
topico mirifice levantur dolores, respiratio facili-
tatur, simulque materia ad expectorationem præ-
paratur. Ipsam tandem expectorationem egregie
promovet linctus: ex olei amygdalarum dulcium
uncia dimidia, spermatis ceti drachmis duabus,
croci granis decem, syrupi violarum, sacchari
canthi ana uncia una cum dimidia. De quo cre-
brius quicquam deglutiendum, vel cum decocto
avenæ excorticatæ, aut sero lactis dulci assumen-
dum.

CAUTELÆ ET OBSERVATIONES
CLINICÆ.

§. I.

Potissimum curationis momentum situm est
in sanguinis missione, de qua perite *Aretæus lib. I. pag. 186.* monet: *nulle moræ atque dilationis
in pleuriticis, quin protinus valenti remedio suc-
curramus, datur occasio, quo primo præcipue die
vena secanda est cubiti, & quum mediocriter efflu-
xerit, recreandus homo, interjecto temporis spa-
cio, iterum detrahi potest, si bene habeat, sin mi-
nus, postridie.* Hæc quippe non tantum in juve-
nili ætate utilissima, sed & senili, quia hæc plus
sanguine abundat, quam alia, magisque crassum
ac tenacem in venis alit, qui inflammationes fa-
cit profundiores ægre discutiendas, eaque propter
hac in ætate etiam, si vires patiuntur, venæ sec-
tio potest repeti. Inprimis curandum, ut pro viri-
bus & quantitate sanguinis, nec nimium, nec
parcius extrahatur. Quod si enim iusto plus emit-
titur, non modo expectoratio inhibetur, sed &
stasis sanguinis dissolvenda obfirmatur magis,
vel plane in sphacelum transit. Si autem minus,
quam par est, evocatur, parum juvat, sanguis;
nacto spatio, impetuosius affluit, & stagnatio
cum inflammatione increfcit.

Cautela
circa venæ
sectionem.

§. II.

Deinceps curandum quam maxime in his pneu-
monicis febribus, ut alvus aperta & intestina à
spasmis libera maneant. Suadet id jam *Trallia-
nus l. c.* nec non *Hippocrates lib. III. de morb. §. 17.*
*alvum, inquis, in primis quatuor aut quin-
que diebus subducere oportet, & hoc paullo am-
plius, quo & febres obtusiores sint & dolores levio-
res.* Nos quidem commendamus hunc in finem
clysteres emollientes & paregoricos, domesticos
cum oleo amygdalarum dulcium, quibus & al-
vus referatur, & strictura intestinorum spastica
laxatur. Recte etiam *Aretæus l. c.* præcipit: *me-
delam inferioribus partibus adhibendam negligere
non oportet, viris quidem in anum, oleum ruta-
ceum, mulieribus in uterum, infundendum est.*
Quod experimentum etiam locum habere potest,
si intestina crassa spasmis constricta, vel spasmo-
dica uterina passio mulieres detinet:

Alvi vāc-
cuationem.

§. III.

Trallianus lib. VI. pag. 269. majorem in mo-
dum in ejusmodi inflammatoriis affectibus com-
mendat, & quidem merito; potus aquosus mul-
sos. Commendat quoque & laudat cremorem
ptisanæ, bene decoctum, largiter sumtum; cum
amygdalis incoctum: *neque desinas, ait, tepi-
dam adhibere, dum cibis & aliæ potiones exhiben-
tur, & addit, nullum aliud auxilium pleuriticis
ita accommodatum invenient, etiam si febris ad-
fuerit vehemens.* Ptisanam suam semper etiam
laudat *Hippocrates.* Et certe humida tepide sum-
ta, omnibus præferenda esse, expertus scribo. Ad
humores vero diluendos, nil utilius decocto ave-
naceo, vel hordeaceo, addita decenti quantitate
mellis Prussici, nec non sero lactis dulci. Et quo
plus humidi, præsertim si corpus valde sudat,
assumitur, eo salubrius est.

Potum.

§. IV.

Uti in omni febre inflammatoria, sic maxime
in pneumonica, abstinendum a regimine nimis
calido,

Regimen
& valida
evacu-
tio.

calido, quoad lectum & conclave, potu etiam nimis calido. Cavendum vero etiam vicissim à refrigeratione & potu frigido. In medicatione exulent omnia fortiter urinam, sudorem, nec non alvum moventia, ne lymphatici tenues humores, quorum beneficio stasis dissolvenda, aliorum trahantur. Nam de alvina excretionem peritè jam monet *Hippocrates lib. III. de morb. multus humor si infra secedit à quinta die mortem inducit. Etenim supernæ partes refecantur & sputi purgatio sursum non prodit. Oportet igitur & infernam alvum neque valde suppressam esse, ut ne febres sint acutæ, neque valde egerere, quo saliva sursum educi queat & æger viribus valeat.* Quando tamen alvus bis, vel etiam quater sua sponte fertur, minime id est prohibendum.

§. V.

Anodyna.

Ad dolores acutos sopiendos commendantur plerumque anodyna & opiata. Sed cavendum ab iis est, præsertim in senili ætate, ubi humorum spissitudo & inflammatio profundior. *Fugito, serio monet Trallianus l. c. diacodium & philonium. Nam maxima pericula inducunt, cum humores educationi contumaces reddunt, & vires prosternunt redduntque emortuas.* Ubi vero impensior dolorum atrocitas in ætate juvenili, ultra papaveracea, emulsionem nempe cum semine papaveris ejusdemque syrupo, vel diascordium *Fracaistorii*, non facile ascendendum; ita tamen, ut semper ipsis admisceantur nitrosa & diaphoretica. Externe autem ad mulcendos dolores ipsamque discussionem secundandam, præter superius commendata, utilis est fons cum pinguedine caponis calefacta, in cujus uncia, dimidia camphoræ drachma soluta.

§. VI.

Expectorantia.

Expectorantia & dulcia non nimis cito propinari debent, primis scilicet diebus, sed tunc demum, quando materia cocta, viscida, mobilis est & ad excretionem apta; alias major ad pulmones proritur affluxus. Non nulli etiam sperma ceti in copia assumtum ad sanguinem dissolvendum commendant. Ego vero ob nauseam, quam parit, plus illud nocuisse, quam profuisse, observavi. Neque etiam hoc tanta dissolutoria facultate pollet, quam acetum cum cancrorum lapidibus.

§. VII.

Morbo declinante tenenda.

Quando die critico, uti sæpius, nisi turbas faciat medicus, incidit, inflammatio per copiosum sudorem solvitur, quem liberior respiratio, corporis quies & virium incrementum subsequitur, diaphoreticis & diluentibus aliquamdiu adhuc insistendum, sed non tam crebro. Exacta quoque victus habenda ratio, ne plus, quam par est & ventriculus debilis subigere potest, assumatur; quo morbi reliquæ penitus consumantur & recidiva arceatur.

ENARRATIONES MORBORUM.

OBSERVATIO I.

Peripneumonia omiſſa venæ ſectione lothalis.

Juvenis accedens ad annum vigesimum sextum, sanguineo-cholericus, habitus corporis stricioris, ante duos annos singulis fere mensibus sibi applicari curavit cucurbitulas cum scarificatione, postea simul & semel per annum id intermisit. Aliquandiu nullo notabili incommodo circa

pectus fuit affectus, sed Februario mense, hyeme tepida, corripitur primum horrore & rigore, corporisque lassitudine, quibus mox accessit dolor in pectore, spirandi angustia, cum prostratione appetitus, virium, calore præternaturali, pulsu celeri, duro & inæquali, somnoque inquieto. Adhibita remedia varia interna pneumonica, omiſſa tamen venæ sectione, incassum. Adauſta enim in pectore angustia cum metu suffocationis, expectoratio fuit difficillima, febris facta intensior, facies rubicunda, oculi feroces & assidua vigilia circa diem septimum delirii præbuerunt indicium, quod etiam eodem adhuc die accidit, cum ipsa morte. Aperto post mortem thoracis cavo, in conspectum venerunt pulmones mirum inflati, distenti & tactu duri. Replerunt hi omnem fere cavitatem & firmissime præterea erant adnati diaphragmati, costis & dorſi vertebri, in utroque latere, ut difficillime cultri acie potuerint separari. Exempti apparuerunt admodum duri instar carnis, vesiculæ quasi carnea crassa rubicunda substantia erant infarctæ, & quum discinderentur, pauca quantitas ichoris putridi sanguinei effluxit, præſente pure nullo. Lanci impositi gravitatem, quinque ponderum exhibuerunt & aquæ injecti semper ad ima descenderunt. Ipsa in aspera arteria spumosa & tenax materia reperta. Arteria & vena polyposis concretionibus, quæ ex corde & auriculis, quarum columnis & fibris firmiter erant connexæ, exemptæ, plus quam duarum unciarum pondus habuerunt. Cordis ventriculi crasso & nigricante cruore penitus erant conferti, & in pericardio sex minimum cochlearia aquæ, instar carnis loturæ, fluctuarunt.

Epicrisis.

Patet hac ex sectione, in peripneumonia, non semper adesse pus & materiam, sed potius crassam sanguinis substantiam firmissime poris & tubulis pulmonum impingi, & ita tumorem durum, qui omnium symptomatum succedentium causa est, effici. Innotescit deinceps hoc casu, omiſſam consuetam sanguinis subtractionem, in corpore plethorico sanguineo-cholericum, gravissimæ tali sanguineæ inflammationi ansam præbere posse & occasionem. Porro admodum probabile; polyposam substantiam ex crassiori sanguinis parte concretam & in pulmonalibus vasis hærentem, multum ad generationem hujus affectus contulisse. Testatur enim *Malpighius de polyp.* peripneumoniam sæpenumero induci à polyposis concretionibus in pulmonum vasis hærentibus. Non immerito quidem mirandum, cur, posito hoc sanguinis progressui obice, non perpetua ante peripneumoniam invasionem difficilis fuerit respiratio. Sed vasa, quibus polypi in hærent, ordinario magis ampliantur, ut sanguis nihilo minus præterlabi queat. Quamdiu igitur sanguis placide circumagitur, nec quantitate nimis redundat, liber manet ejusdem per hos etiam tubos transitus, nullumque subsequitur incommodum, ut viderim, polypos ad ulnæ usque longitudinem per arteriæ aortæ, item venæ cavæ truncum superiorem & inferiorem fuisse elongatos, sine ullo sanitatis detrimento atque periculo. Verum si sanguinis copia accrescit nimium, tumultuarius violentus in ipso motus exsurgit, præsertim si ab externis constrictis impetuosè ad interna urgetur, congestus circa cor & pulmones cruor, maximeque in tubis quibus in hæret polyposa

polyposa massa, stagnans & accumulatus, inflammatorios tumores, praesertim in viscere sanguineo, facillime excitare potest. Tum vero quam maxime necessaria sanguinis missio tempestiva, quo sanguini iterum paretur circuitus, quæ nostro in ægro pessimo consilio omissa.

OBSERVATIO II.

*Pleuritis
spuria ve-
na sectione
sanata.*

Quum synochæ & catarrhales febres sub finem elapsi anni milites nostros praesidiarios epidemica prorsus ratione infestarent, Januario mense etiam plures, praesertim ex iis, qui contagium vitaturi in circumjectas civitates, sub frigido valde & humido aëre hinc discesserunt, corripuit spuria pleuritis. Ex his triginta commissi sunt curæ medici, amici & auditoris olim mei, qui febre laborarunt valde gravi, cum acuto dolore lateris alterutrius in thorace, tussi sicca, sed intolerandum dolorem concitante & somni defectu. Omnibus is statim sanguinem mittere jussit in brachio, qui in pluribus cuticula glutinosa obductus comparuit. Potui liberaliter dare præcepit decoctum avenaceum tenue, cui incocta salvia. Temperatum in omnibus injunxit regimen, & præterea nil nisi pulveres, ex nitro, antimonio diaphoretico, lapidibusque cancrorum, admixto non nunquam aceto vini & aliquot uncias aquæ cardui benedicti, dedit. Et exterius lateri dolenti calida tantum linthea admota. Sic morbus solutus fuit largo sudore, septimo, vel etiam undecimo, aut decimo quarto die. Juvenibus non nullis & quibus non sufficiens sanguinis quantitas subtracta, septimo, vel nono die, nares sanguinem stillarunt cum euphoria, & pulsus per totum morbi decursum magis fuit depressus, quam velox. Quos autem febris longius ad decimum usque quartum diem detinuit, his accidit purpura rubra, quæ vesiculis aquosis albis quasi erat obsita in omni corporis ambitu. Nihil tamen aliud usurpatum, quam pulvis bezoardicus cum nitro, liquor noster anodynus mineralis & decoctum hordei, nec non avenæ ex-corticatæ, tepide largiter potum. His convaluere omnes, mortuus nullus, excepto unico, qui pleuritide cum petechiali febre fuerat affectus.

Epicrisis.

Facile in pleuritidem spuriam incidit, qui vestibus non satis munitus, in aëre frigido & humido, autumno, vel hyeme, diu versatur. Nam ego nullum morbum & inflammatoriam febrem, tam prompte ab aëris intemperie, inæqualitate & mutatione generari, observavi, quam quæ in thorace consistit. Notavi quoque, æstate valde sicca & calida, si admodum frigidus & septentrionalis ventus subito excipit, non tantum destillationes catarrhofas, sed & rheumatismos & pleuritides cum sputo cruento vehementesque lateris dolores fuisse frequentes. Nam aër quam maxime & proxime, propter continuam inspirationem, afficit pulmonum viscus intus, & exterius quoque thoraci & costis, quæ tenuioribus musculis, membranis nerveis & vasculis septæ sunt, allabatur, eaque propter quam facile spasticas crispaturas inferre & liberum humorum circuitum sistere potest. Recte autem medicus spuria hac pleuritide laborantibus omnibus secari jussit venam, ob crassum & copiosum qui hyeme gignitur sanguinem, quum alias non semper in spuria, si corpus magis serosum, sanguinis missio sit necessaria. Neque etiam in pleuri-

tide notha externe ita accommodata sunt unguenta & linimenta oleosa, vel etiam humida, eo quod perspirationem, qua stagnans humor discutendus & diffundendus, impediunt. Præstat tantum partem affectam in temperato & æquabili calore, sub levi calefacto lectulo, servare, imprimis quum nec omnis cutis, eodem modo ac in arthritide & erysipelate, ferre possit topica. Demum quoque notandum, purpuram rubram vesicularem non esse confundendam cum alba miliari. Illa enim longe benignioris est naturæ, & à sero non tam putrescente & vappido, sed potius acri scorbutico ortum ducit, & ob id, si modeste & perite à medico excipitur, non tanti est periculi.

OBSERVATIO III.

Juvenis literarum studiosus, viginti circiter annorum, spongiosus habitu & sanguine plenus, in prima ætate ob id crebrius narium stillicidium expertus, liberatus vix ante aliquot menses à quartana, qua cum per unum & dimidium annum fuerat conflictatus, Martio mense, post multos in victu errores, potum vini minus boni & corporis refrigerationem, incidit in pleuritidem veram, symptomatibus stipatam consuetis. Datum in principio purgans, quod aliquot sedes movit, non sine subsequente imbecillitate. Secta etiam in cubito vena, è qua exiit sanguis valde spissus, niger, obductus materia tenaci glutinosa. Nihilo minus tam impensa fuit spirandi angustia, ut propter suffocationis metum, nec supinus, nec in dextro latere cubare posset, sed erectus semper sedere necessum haberet. Pulsus simul erat admodum durus parvus & celer, vigilia continua, perpetua tussis, & sputum quodammodo cruentum, cum exquisito pungitivo dolore rejiciebat. Quinto morbi die vocor ego, & statim lateri dolenti admoveere jussi vesicam speciebus emollientibus ex lacte coctis plenam. Interius dedi pulverem hunc: recipe lapidum cancrorum, mandibularum lucii piscis præparatarum, antimonii diaphoretici ana drachmam, solutionis oculorum cancri, nitri puri ana drachmam semis, cinnabaris antimonii grana XV. M. f. pulvis, de quo ternis singulis horis dimidia drachma oblata, interposito potu infusi theiformis. Ter etiam vel quater quotidie porrigere jussi hanc mixturam: recipe aquæ chærefolii, florum sambuci, cardui benedicti ana uncias duas, aceti destillati drachmas sex, lapidum cancrorum drachmam, mandibularum lucii piscis, antimonii diaphoretici, ana drachmam dimidiam, syrupi jujubini drachmas tres. M. Cerevisiæ & frigidum potum interdixi omnem, sed liberaliter præbere jussi infusum herbæ veronicæ, florum sambuci, radices liquiritiæ & seminis fœniculi, ex aqua. Septimo die supervenit hæmorrhagia narium, sequutus quoque per universum corpus sudor & morbus ex voto solutus. Sanus etiam hinc discessit juvenis, sed audiui, eundem postea fere quotannis eodem malo fuisse affectum, ac trigesimo ætatis anno phthisi tandem extinctum.

*Pleuritis
vera pur-
gantis usum
corrupta.*

Epicrisis.

Juvenes sanguinei, qui hæmorrhagiis narium, vel hæmorrhoidum præmaturo fluxui in juventute obnoxii, à thoracis perfrigeratione facile incidunt in pleuritidem sanguineam. In his vero omne præsidium in sanguinis missione tempestiva. Quæ si negligitur, vel non conveniens quan-

quantitas emittitur, maxima spirandi ingruit difficultas. Quod ubi accidit, sanguinis è narium stillicidium sponte obortum egregio est levamini. Quam salutarem crisin etiam in binis pleuriticis gravidis vidi, quæ semel tantum, non vero bis, aut ter, ut in graviditate necessarium, venam sibi pertundi curarant. Deinceps nunquam per totum pleuriticum, & peripneumonicum morbum tuta sunt, quæ alvum ad dejectiones sollicitant, sed clysteres mox in morbi principio ejusdemque progressu, in fine autem laxantia pectori amica possunt admitti. Quæ autem ego adhibui auxilia, à me incomparabili cum fructu semper fere sunt usurpata, inprimis quum medicinam facerem ante quadraginta annos in Westphalia, ubi endemiæ pneumonicæ febres. Inprimis habeo, quod laudem crebriorem & largiorem potum infusi theiformis superius descripti, sive decocti avenacei cum saccharo & nitro conditi. Neque reticendum, me sæpius circa dies criticos pulveribus diaphoretico-nitrosis unum aut alterum camphoræ granum adjunxisse, eodemque effecisse, ut morbus solveretur sudore & subsequeretur expectoratio. Demum nulla inflammatio tam facile & crebro redit, quam pleuritica & peripneumonica, nec non ipsa pleuritis spuria, certis præsertim temporibus. Hæc enim rheumatismi est genus, quod ad aëris vitia facile incidit. Et ubi semel vel iterum pars quædam per ipsum morbum debilitata & pristino robore privata, structura quoque viarum & canaliculorum vitiata, accedentibus aliis causis, æquabilem & naturalem sanguinis motum turbantibus, perquam facile præternaturales humorum stagnationes in minimis vasculis accidere possunt.

OBSERVATIO IV.

Peripneumonia ex colica lethalis.

Illustrissimus Consiliarius, robustus & habitior, bene appetens & duro victui à longo tempore assuetus, interdum cum euphoria hæmorrhoidalem fluxum passus, mense Januario, cælo algidissimo, ex abdominis refrigeratione & esu leguminosorum, colicam incurrit, per diem & noctem graviter affligentem. Quum vero medicus alvum clausam clystere non molliret, sed potionem carminativam cum calidioribus essentiis propinaret, tertio die accessit ingens respirationis angustia, cum febre, inquietudine & tenso ac pungente dolore, à pectore ad dorsum usque excurrente. Secabatur igitur vena in brachio, ac non ita multo post decoctum mannatum cum aliquot tartari emetici granis porrigebatur. Inde quidem & intestina & stomachus depleta largiter, sed anxietas & spirandi difficultas facta major. Exhibitæ postea mixturæ pectorales resolventes, sexto die iterum vena pertusa & septimo denuo datum infusum mannatum. Omnia autem incassum, ut potius morbus inde ingravesceret. Exterior tum admotæ thoraci species carminativæ & pectorales cum aqua calcis vivæ in cataplasmatibus formam coctæ, pariter frustra. Tandem potandas suasit medicus Tönnssteinenses acidulas, quas æger avide per biduum frigide ingessit, donec undecimo morbi die, suffocatione & syncope superveniente, periret.

Epicrisis.

Sæpius observavi, ex solo dolore colico præcedente, qui clysteribus & aliis congruis facile solvi potuisset, ortam fuisse peripneumoniam, in robustis & crasso sanguine plenis, præsertim

senibus. Ob distenta enim à flatibus intestina, sanguis ad cordis & pulmonum vasa validius urgetur, ibique collectus & densatus, ægerriam facit spirationem cum pectoris angustia. Nam quod dolor est in partibus nervosis, id anxietas in corde & pulmonum vasis, à sanguine nimium distentis. Frustranea autem fuit evacuatio per superiora & inferiora, quippe quæ subtraxit humidum sanguinis, genuinam morbi medicinam, coarctatione etiam abdominis sub vomitu, magis fursum ad pectus sanguis est coactus & spiratio difficilior reddita. Potius quoque acidularum frigidus in morbi vigore, caruit ratione omni, ac propter frigus, non potuit non noxam inferre gravem. Fuit autem hic morbi artifex, qui singulari methodo febres petechiales curandi, in *Actis Berolinensibus* inclauit.

OBSERVATIO V.

Vir sanguineus, facie floridus, corpore obesus & spongiosus, post aliquot dierum epulas, vino & cibus saginatus, noctu & interdiu, Martio mense, Berolino Mindam Westphalorum iter facit. Peracto hoc, post aliquot dies nanciscitur pleuro-pneumoniam, febre stipatam intensam. Ego vocatus venæ sectione repetita & pulveribus antipleuriticis, nitrosis & cinnabarinis, nec non potu infusi theiformis, à periculosis liberavi ipsum symptomatibus. Remansit autem tussis quædam cum lenta febre, virium languore corporisque marcoræ, respiratione tamen non adeo difficili. Hinc usurpata auxilia varia diætetica & pharmaceutica, sed nihil per octo hebdomades iisdem profectum, & tussis potius cum dolore pectoris gravativo increvit, parum autem rejecit & vesperi lenta quædam gliscere visa febricula. Tandem ex improvviso simul & semel, intra tres, vel quatuor horas, ultra mensuram materiæ purulentæ cum impetu quasi ex ore rejecta, respiratio illico facta liberior & febrilis calor remisit. Duravit postea hæc puris exspuitio per mensem, minori tamen copia, ac æger interea bene appetiit atque dormivit, successive etiam per DEI gratiam sanitati redditus, solo lactis cum saccharo rosaceo cocti potu calido, quotidie ad unam cum dimidia mensuram, interposito usu balsami pectoralis, ex floribus sulphuris, oleo amygdalarum dulcium, spermate ceti, terebinthina Veneta, croco & oleo anisi, nec non pulveris pectoralis, ex lapidibus cancrorum, spermate ceti, saccharo, myrrha, radice liquiritiæ in pulverem redacta & bolo Armena.

Epicrisis.

Abscessum pleuritidem & peripneumoniam non sufficienter solutam sequi, passim præsci medici tradiderunt. Confirmat id quoque experientia, & ego id præsertim observavi in sanguineis, spongiosis & obesi habitus hominibus. In nostro autem memorabile, quod rupto abscessu, pus effluens simul & semel per os exturbatum, quod si in thoracis cavum delabatur, hæcticam facile inducit lethalem, nisi educatur paracenthesi, de qua notabile exemplum communicavimus, in *dissertatione de perpetuo succi nutritii ex thorace stillicidio*. Persanari tamen posse talem in thorace abscessum & amplam in pulmonibus cavitatem, monstrat hæc historia. Non vero prætereundum, agrum hunc postea sæpius de dolore quodam acuto in latere affecto fuisse conquestum, post paullo

paullo fortiores corporis motum, equitationem, largum vini potum ac nimium acidorum usum.

OBSERVATIO VI.

Peripneumonia gravis sudore soluta.

Juvenis generosus, viginti annorum, sanguineo-phlegmaticus, narium hæmorrhagiis & largis & crebris ab ineunte ætate obnoxius & ante biennium gravem acutum pectoris morbum passus, Februario mense, postquam corpus saltando vehementius exagitasset, & mox postea in prandio cerevisiam frigidam bibisset, & legumina cum salita carne avidius ingessisset, obscurum quendam in scrobiculo cordis sensit dolorem, sed magnam cephalalgiam, cum pulsu celeri, contracto, sub alvo adstricta. Datus vesperi pulvis temperans, noctem autem duxit insomnem & mane spiratio fuit laboriosa, cum pectoris angore & dolore in sinistro latere, paullo supra costas spurias. Hinc mane vena in brachio pertusa, sanguis evocatus niger, cuticulam glutinosam in superficie gerens, data quoque mixtura discutiens atque resolvens passim descripta. Subtracto sanguine, melius primum habere visus & dolor capitis discessit, postero tamen die & dolor lateris & pectoris angor rediit, quin magis adhuc increvit, cum virium debilitate, somno inquieto, appetitus prostratione, ut æger spem vitæ abjiceret ipse. Ad dolorem igitur mulcendum imposita vesica decocto ex speciebus emollientibus cum lacte plena, alvus quoque stricta clystere emolliente domestico mollita, flatu multos multaque crassa stercora dimisit, ægro inde aliquod levamen percipiente, inprimis quum subinde ex infuso theiformi forbillaret, & sputum rejiceret crassum fusci coloris. Septimo autem die iterum pejus habuit, corpus jectigavit, spiritus factus angustior & respiratio accisa, invalescente simul febrili calore & accedente mentis turbatione, inprimis quando oculos clauderat. Interpositi hinc mixturæ pulveres nitrosi cum camphora, quibus pectoris quandam sensit liberationem & tantisper appetente nono die sudavit, sputo semper succedente fusco, jam etiam quadantenus flavo. Post nonum diem accessit levior quidam alvi fluxus, ut quotidie ter vel quater dejiceret, primum crassa foetida, postea mucosa & uti dicebant purulenta. Parum tamen levaminis inde sensit, sed debiliior potius factus; donec undecimo morbi die ex improvviso subito largissimus per universum corpus prodiret sudor & per bihorium manaret, tam salutare eventu, ut æger post illum somno obrueretur alto, expergefactus virium incrementum & respirationem liberiores perciperet, ac postea, sputo & alvi fluxu cum leni madore per aliquot adhuc dies persistente, sensim cum sanitate in gratiam rediret.

Epicrisis.

Sic juvenem hunc generosum in ædibus meis commorantem ante annum curavi. Id autem ex casu hoc in practicum usum convertere licet: quod origo peripneumonici mali etiam esse possit ex primis viis, si stomachus flatibus & spasmis detinetur, qui sanguinem nimia copia, ad partes superiores, inprimis thoracem, urgent. Tum quidem, si candide æger delictum confiteretur, occasio datur cito præscindendi gravem futurum morbum, si commodis evacuantibus, lenioribus emeticis, laxantibus, aut clysteribus, primæ viæ à sordibus depleantur. Et hoc in casu ratione non destituuntur practici non nulli, uti

Rulandus atque Hartmannus, qui in principio inflammationis pulmonum dare præcipiunt vomitorium, quod, si hæc causa non subest, alias nocentissimum. Porro hac etiam ex historia apparet, non fidendum esse istis excretionibus, quæ in acutis pulmonum morbis fiunt per alvum. Sed genuinæ & saluberrimæ crises, succedunt per sudorem largum.

CAPUT VII.

De Febre Hepatica, sive Hepatide.

THESES PATHOLOGICÆ.

§. I.

Quo frequentior quam modo exposuimus pulmonum inflammatio; eo rarior hepatis inflammatio vera. Quod & cur hoc fiat, primus ego ante aliquot annos multis & validis rationibus adstruxi peculiari *dissertatione, de hepatis inflammatione vera rarissima, spuria frequentissima*. Potiora huc redeunt. Inflammatoriæ febres accidunt quam maxime nervosis & sensu acuto præditis partibus, in quibus ille in incongruis tubulis subsistens sanguis, dolorem movet ac spasmus, qui postea universum nervosarum partium systema in consensum pertrahit, exagitat sicque febrem accendit. Sanguinea autem minus exquisiti sensus viscera, non tam agre ferunt sanguinis stagnationem, sed cedunt impetuosius affluenti, nec dolor supervenit, nec spasmus, atque adeo neque etiam febris. Quia igitur hæc inter eminent inprimis hepar, quod ex paucis arteriis, sed maximam partem venis, portæ & hepaticæ propaginibus, coagmentatur, & propter tunicarum nervosarum absentiam, in magnam molem potest expandi sine acuto dolore; hinc in ipsius substantiam minus cadit inflammatio.

§. II.

Illam autem hepatis inflammatio, quam veteres fuscæ describunt, merito externa tantum, superficialis, quasi erysipelacea & spuria hepatitis, non secus ac pleuritis spuria, censenda, ejusdemque sedes non in ipsa interna hepatis substantia, sed potius circa convexam partem, in membranis & ligamentis viscus hoc cingentibus & quibus costas spurias ac diaphragmatis portioni adhæret, constituenda videtur. Sic enim Hippocrates de intern. affect. §. II. hepaticum describit morbum: *dolor acutus in hepar incidit, & sub ultimas costas, & in claviculam, & sub mammam, & suffocatio fortis tenet, & aliquando lividam bilem revomit, & rigor ac febris primis diebus debiliior habet, & dum attingitur hepar, dolet & color ipsius sublividus est, & cibi, quos prius comedit æger, suffocant ipsum & ingesti urunt ac torquent ventrem. Huic conducunt, ubi dolorem habuerit, tum alia, tum tepesfactoria eadem apposita, quæ etiam pleuritidi prosunt. Celsus lib. IV. cap. VII. hæc acuti jecinoris morbi signa esse perhibet: dextra parte sub præcordiis dolor vehemens est, idemque ad latus dextrum & ad jugulum humerumque partis ejusdem pervenit; non nunquam manus quoque dextra torpet, horror validus est, bilis vomitur, interdum singultus prope strangulat. Jam quicumque hæc pathemata curatius expendet, facile*

Hepatitis vera rarissima.

Sed frequentissima spuria, à veteribus descripta.

facile perspiciet, illum, ab *Hippocrate* delineatum morbum, non tam in ipso hepate consistere, sed potius ad magnam & paullo profundiorum erysipelaceam inflammationem partium externarum, thoracem & hepar investientium, esse referendum, eo quod non modo ultimas costas prehendit, sed & ad humerum, mammam & claviculam sese extendit ac dolor tactu augetur. Cum rigore quoque, febre & vomitu invadit, quæ symptomata inflammationi partium nervosarum solennia. Dolor porro externis mollioribus & fibras laxantibus remittit. Ac respiratio ad suffocationem usque difficilis, à spasmo pleuræ & peritonæi, quæ membranæ diaphragma superne & inferne investunt, idque in consensum trahunt, haud immerito derivanda. Qui autem à *Celfo* describitur morbus, non etiam in ipso hepatis viscere, sed in externis ipsi adhærentibus membranoso-nervosis partibus consistere videtur, quæ dolore & spasmo affectæ, nervos diaphragmatis, intercostales & qui ad ventriculum excurrunt, per consensum simili afficiunt. Hinc recte monet *Trallianus lib. VIII. cap. 1. considerari oportet, num inflammatio ipsi ecori proprie acciderit, an tunicis ipsius & musculis extrinsecus ambientibus*. Quin *Avanzoar lib. I. theiz. tr. XIII. cap. IV.* disertis verbis scribit: *aliquando in panniculo hepatis fit extensio, unde sequitur dolor fortissimus, quasi intolerabilis, & apparet patienti, quod hepar sit, quod doleat.*

§. III.

Licet hepar quandoque corruptione afficiatur.

In corruptionem quidem sphacelofam, ingrato fœtore & nigrore cognoscendam, nec non in purulentam & apostematicam interdum abire hepar, testatum faciunt observata in dissectione cadaverum, notata passim à *Foresto lib. XIX. de hep. affect. obs. X. Coitero in obs. anatomico-chirurg. M. N. C. Dec. II. obs. II. Capiavaccio lib. III. c. XXIII. Bartholino Cent. IV. hist. 18. M. N. C. Cent. III. & IV. obs. CXLIV. Dec. II. Ann. IX.* Sed tenendum omnino, non omnem sphacelationem supponere inflammationem; nam illa etiam commode fieri potest à quiete & stasi sanguinis in ramis majoribus, & nullas omnino partes in corpore citius & frequentius sphacelo affici aut apostemate, quam pulmones, hepar, lienem, uterum & omentum, observavi. Eadem quoque corruptio ex facili in hæc viscera transire potest, si contigua pars primum eadem fuit infecta, haud secus ac videmus in externis artuum exiguo loco ortam sphacelationem, subito latius serpere & vicinam carnem, quin integrum amplum membrum, manum & pedem, corripere atque corrumpere.

§. IV.

Hepatitis symptomatica & causa.

Est igitur inflammatorius ille affectus, qui partes externas hepatis contiguas & confines frequentius invadit, & ut plurimum cum horrore, frigore, interdum etiam vomitu & febre incipit, ac dein dolore, insomniis, spirandi difficultate, inquietudine & alvi adstrictione stipatur, ac vulgo pro hepatis inflammatione haberi solet, nihil aliud, quam species febris rheumaticæ, sive rectius erysipelacæ, quæ fit non tam à decubitu & stasi sanguinis, quam potius feri visceris acrioris, membranas & fibrillas nerveas lancinantis. Propterea eidem quam maxime obnoxii sunt, qui arthriticis & rheumaticis passionibus alias patient, qui potibus spirituosius ac iæ indulgent, quibus sætæ sanguinis evacuationes suppressæ, qui

in aëre frigido diu versantur, aut plane corpus æstuans eidem incautius committunt, nec non qui diarrhœam potu largiori spiritus vini cohibuerunt. Quod vero dextrum thoracis latus rheumaticis doloribus longe frequentius afficiatur ac sinistrum, hanc inprimis ob causam fieri arbitror, qui hepar magnum & ponderosum viscus ibi diaphragmati costisque spuris connexum, quod sub vehementiori corporis motu & respiratione citatiori, has partes jugi tensione debiliores reddit, eoque facit, ut humores ibi discurrentes facilius subsistant & etiam in tubulos incongruos urgeantur. Atque hæc etiam subest ratio, quod per lapsum, ictum, aut emplastrum calidius admotum, nec non cucurbitulas, longe facilius dolores & inflammationes inducantur in dextro latere, quam in sinistro & alibi.

§. V.

Perquam autem notatu digna est observatio practica, quod interdum casus occurrant, ubi partes membranacæ, supra & infra costas spiras, gravi dolore tensivo, cum febre, tussi sicca & angustia spirandi afficiuntur, ob irritatam graviter ab acri rheumatico confluxu, non tantum pleuram supra diaphragma, verum etiam peritonæi membranam infra hoc, ut adeo morbus partim pro spuria pleuritide, partim hepatitide haberi possit. Multum enim affinitatis bini hi morbi alunt, dum in utroque dolor sæpe ad jugulum & humerum sese extendit, difficultas quoque spirandi adest & tussis sicca, propter consensum non modo diaphragmatis, cui hepar firmiter annexum est cum pleura & peritonæo, sed & nervorum intercostalium, eo excurrentium. Sunt tamen notæ non nullæ, quibus ambo hi affectus possunt distingui. In pleuritide quippe nota intra veras costas dolor pungitivus & tensivus, cum tussi sicca, febre & doloris sub inspiratione exacerbatione percipitur; in hepatitide autem dolor magis sentitur circa spurias costas, qui ad cordis usque scrobiculum, cum febre, præcordiorum anxietate & quandoque vomitu atque singultu sese explicat. In hepatitide quoque, secus quam in pleuritide, decubitus in sinistro latere semper est difficilis, quia, ut recte notat *Cælius Aurelianus lib. III. c. IV.* pondere suspensi hepatis adducuntur dextræ partes, membranoscæ scilicet, & propterea fiunt punctiones, ob tractam & tensam membranam, cui jecur annexum est, & quæ cum diaphragmate colligatur.

§. VI.

Neque minus hepatitis merito distinguenda à dolore ardenti & fixo circa scrobiculum cordis versus latus dextrum, cum singultu & vomitu sæpe complicato, qui fit à calculo in ductu cystico, aut cholodocho hærente, & propterea aliam causam obtinet & aliam sedem, prognosin etiam aliam requirit & medicationem. Facile etiam hepatitis permutatur cum dolore tensivo hypochondriorum, nec non qui est in musculis abdominis, de quo jam monuit *Forestus lib. XIX. sæpe imponit tumor dextri hypochondrii medico, tanquam sit in jecore affectus, quum tamen sit in musculis abdominis*. Sed dolor ille dextri lateris, in hypochondriacis & hæmorrhoidariis admodum frequens, consistit in flexura coli, sine febre est, discedit citius, sæpe repetit, nec symptomatibus febris inflammatoriæ, sed malo hypochondriaco solennibus, stipatur, aliam habet causam, medicationem aliam. Et inflammatio musculi-

musculorum abdominis, præsertim transversorum, qui arctissime alligati sunt peritonæo circa hepatis confinia, sensibus magis est obvia & tumor tactui ac visui sese offert, cutis circumjecta tensa comparet, ut digitis attracta minime sequatur, febris sociata mitior, nec tussis, nec vomitus adest, plerumque etiam fit à violentia externa & contusione, ac nisi mature congruis præsiidiis succurratur, confines partes afficit, inflammatur, in abscessum, febrem lentam & hæticam transit.

§. VII.

Interim hæc frequens hepatitis non adeo terere debet medicum, nec ægrotum, eo quod si medicatio recte instituitur, non multum alit periculi & raro jugulat, nisi viscera interna labe sint affecta. Ut plurimum enim morbus intra septem, vel undecim dies, finitur largo sudore. Natura quippe ipso febrili motu utitur pro medicina, cujus beneficio intra certum tempus materia peccans & subsistens attenuatur, resolvitur ac sensim sensimque discutitur. Hinc qui ex inflammationibus convalescunt, hos per febrilem motum rite succedentem evadere, censendum est. Quo sensu merito accipiendus *Hippocratis aphorismus 52. Sect. VII. quibuscunque hepar circum circa dolet, iis febris accedens solvit dolorem.* Quando autem spuria hæc hepatis inflammatio, medici, aut ægroti culpa, non tempestive discutitur, sed diutius persistit, dolor permanet, febris accedit lenta, corpus tabescit, vires cum appetitu prosternuntur, os siccum est, urina tenuis alba, abscessus facti præbent indicium, qui tamen non tam in ipsa interiori hepatis compage, quam potius in externis tunicis, ligamentis, peritonæo & subjacentibus musculis consistit, gibbam hepatis partem simul afficit & plerumque funestum facit eventum, testimonio observationum & sectionum anatomico-practicarum.

MEDENDI METHODUS.

CUM CAUTELIS ET OBSERVATIONIBUS CLINICIS.

§. I.

Quum pleuritis & hepatitis multum convenientiæ quoad causam, originem, symptomata & prognosin alant, ac non nisi loco differant; hinc modus sanandi hanc parum discrepat ab illius, quem capite antecedenti exposuimus. Quemadmodum vero medicus in quovis morbo sanando prudentissime semper procedit, si ductum naturæ, quo morbus sponte solvi solet, comite ratione sana sequitur; ita idem hoc in medicatione hujus passionis quam maxime servandum. Jam quia hepatitis eodem modo ac pleuritis per sudorem, congruo critico tempore, dimidio nempe septimi & septimo ipso die, sponte solvi solet; eadem viæ merito insistendum, & usurpanda primo omnium ea, quæ ad liberiolem perspirationem conferunt, vitanda vicissim, quæ cuticularis excretionis successum, diætetica sint, sive pharmaceutica, ullo modo remorari & impedire possunt. Quia autem secundum principem illum præticum *Hippocratis* canonem, non cruda, sed concocta movere oportet; hinc principio id agendum, ut serum acre salum, nervoso-musculosis partibus vasisque minimis impactum, temperetur, diluatur ac resolvatur, simul atque viæ ad criti-

Frid. Hoffmanni Oper. Tom. II.

cam excretionem sunt præparandæ, iis maxime, quæ fibras rigidas, tensas, spasmo contractas remittunt ac molliunt.

§. II.

Igitur omnibus modis commendandus potus *Facienda* diluens, decoctum hordei cum passulis, vel etiam citratum, serum lactis dulce, cum pauxillo nitri & saccharo, nec non emulsionem ex decocto hordei, vel cornu cervi, cum amygdalis, quæ liberaliter sumta & temperant & diluunt. Ejusdem dein & adhuc diaphoreticæ virtutis sunt infusa theiformia ex herba veronicæ, cardui benedicti, floribus bellidis atque sambuci, crebrius forbillata. Diaphoresin movent simulque temperant pulveres, ex antimonio diaphoretico, præsertim ex regulo parato, lapidibus cancrorum, cornu cervi philosophice præparato, nitro & cinnabari, cum aqua cardui benedicti, cerasorum nigrorum, cinnamomi & florum acaciæ crebrius assumendi. Quibus subinde ad auctiorem perspirationem interponendus usus liquoris bezoardici, vel nostri, vel Buffiani, cum dupla parte liquoris nostri anodynæ mineralis, vel spiritus nitri dulcis. Neque negligenda alvina vacuatio, sed si segnior, clystere emolliente, aut clementi solutivo promovenda. Exterior quoque temperato calido fotu evaporatio & discussio subsistentis humoris secundanda. Quem in finem conducunt decocta ex herbis & floribus emollientibus, cum croco & lacte, vesicæ bubulæ indita & parti dolenti admota, nec non sacculi ex speciebus solventibus & discutientibus, herba absynthii, cardui benedicti, floribus sambuci, chamomillæ vulgaris & Romanæ, baccis juniperi, semine anisi & carvi confecti, & in vino, aut aceto vini cocti, ac prævia expressione impositi.

§. III.

Abstinentum vero interius ab omnibus opiatis, narcoticis & sopientibus, nec non à sudoriferis calidioribus, quæ febrem accendere, vigilias intendere & delirium suscitare valent. Exterior fugiendum regimen nimis calidum. Neque oleosa & pingua illinenda, quæ poros cutis obstruunt, neque emplastra saturnina, vel epithemata ex aceto & lithargyrio admovenda, quæ nimis refrigerant & constringunt, neque etiam spiritiosa applicanda, quæ fibras rigidiores efficiunt ac dolores intendunt. Ipse adeo decantatus camphoratus & crocatus vini spiritus, cautissime adhibendus, ob exsiccationem nimiam, quam partibus æstu ac incendio jam detentis, infert. Si tamen usurpare placet, fiat id statim in principio, ante intensum febrilem æstum, vel eo valde remittente, & maxime quidem in naturis segnioribus.

§. IV.

Præterea ad præcindendum inflammationis incrementum admodum utilis & necessaria est sanguinis missio inter initia, præsertim in manu vel pede lateris affecti instituta. Quantitas autem sanguinis mittendi, nec non repetenda quandoque venæ sectio, pro ratione plenitudinis vasorum, consuetudinis, virium, ætatis corporisque habitus, dirigenda & judicio medici merito relinquenda, ne in excessu, vel defectu peccetur. Interim si quis hæmorrhoidarius, præstat venam seligere in pede & si plethora urget, postea cubiti venam pertundere.

§. V.

*Symptoma-
rum singu-
larium me-
dicatio.*

Si spasmus in loco affecto tantæ est vehemen-
tiæ, ut etiam ventriculum, duodenum ipsaque
biliaria vasa in consensum trahat, & præcordio-
rum anxietas, vomitio, singultus & alvi adstri-
ctio id prodat, & externis, & internis, opem fer-
re expedit. Tum ego sæpius non sine fructu al-
vo infundere jussi enema pure oleosum, parti do-
lenti & præcordiis admoveve vesicam decocto
emolliente plenam, & interius crebrius dare mix-
turas diapnoicas & resolventes, quæ aquam car-
dii benedicti, florum tilia, acaciæ, chamomillæ
vulgaris, diascordium Fracastorii, nitrum & li-
quorem anodynum mineralem habuerunt. Quod
si autem infarctus & obstructio hepatis, ac oriun-
da inde icteritia, complicantur; ego quidem sin-
gularis virtutis deprehendi epithema ex herbis
cardii benedicti, scordii, absynthii, floribus sam-
buci, chamomillæ Romanæ & vulgaris, semine
levistici ac cymini, in vino coctis, crebro admo-
tum. Idem hoc epithema egregium quoque in de-
clinatione morbi ad intercipiendum abscessum
cum suppuratione. Sed ubi in inflammatione, à
causa potissimum violenta & externa, suppurationis,
vel etiam abscessus indicium præbet materia
purulenta, per urinam, aut alvum secedens, cum
febre lenta; ea utique adhiberi convenit, quæ ad
extinguendum æstum febrilem & suppurationem
debite tractandam proficua, de quibus tamen in-
fra pluribus agemus.

ENARRATIONES MORBORUM.

OBSERVATIO I.

*Hepatitis
ex lapsu in
abscessum
desinens le-
thalis.*

Vir sexagenarius, militum præfectus, sangui-
neo-cholericus, in Bacchi & Veneris castris stre-
nue militans, anno abhinc post gravem ex cabal-
lo lapsum, per aliquot hebdomades laboravit in-
genti & acuto dolore in dextro hypochondrio,
cum febre, spirandi difficultate & alvo adstricta.
Curatus tamen fuit, sed dolor remansit obtusior
& conquestus fere per annum de virium & ap-
petitus languore, nec tamen vini potum, nec ve-
neris exercitium intermisit. Accidit vero ut
quum equo gradario veheretur, sensum quen-
dam disruptionis internæ perciperet, quo simul
& semel prefforius ille dolor cessavit. In urbem
delatus me vocare jussit, magnasque querelas ef-
fudit de miro languore, summa spirandi difficul-
tate & præcordiorum constrictione. Ego propius
accedens, extrema frigida & frigidum in facie
sudorem offendi, pulsum autem arteriarum vix
percepi. Suasi igitur, ut ægrum in lectum trans-
ferrent calidum, & animæ medicum advoca-
rent, meæ enim medicationi non amplius esse lo-
cum. Interim secta vena, sed nil fere effluxit,
data analeptica interna & externa, sed frustra,
& elapsis decem horis, è vivis discessit. Post mor-
tem venter mirum in modum intumuit, ac in
umbilicali regione die post disruptit, effluente sa-
nie putrida & tam foeda, ut tota domus cada-
verosa mephiti inficeretur.

Epicrisis.

Quemadmodum pleuritis vera & levior etiam
peripneumonia, si ultra vigesimum diem persi-
stet, facile in empyema, sive abscessum admo-
dum periculosum abit; sic & hepatitis, sive in-
flammatio musculorum & membranacearum

partium circa hepar, si non discutitur, abscessum
formare solet, qui ipsam hepatis substantiam la-
be inficit atque corrumpit. Testatum id facit
casus, quem ego Mindæ Westphalorum obser-
vavi & jam enumeravi. Quia autem hanc obser-
vationem egregie illustrat, similis à *Foresto* no-
tata *lib. XIX. de hepat. affect.* non abs re erit, si
eandem heic inferam. *Vir, habet, annos trigin-
ta sex natus, dolore hypochondrii dextri per inte-
grum fere annum confectus, cui lenta accessit fe-
bris, tabe confectus & plane consumptus est, tota
facies citrina & universum corpus flavum evasit,
& dolor atrox eum torquebat in dextro hypochon-
drio, quod durum & valde subtumidum, muscu-
lis abdominis plane extenuatis erat, urina tenuis
& ignea, oris siccitas, alvus modo adstricta, modo
liquida, cibi fastidium, sitis inexhausta. Incisione
facta, materia purulenta foetida emanavit, cum
tanto foetore, ut totam domum impleret, ita ut vix
quisquam apud ægrum in cubiculo persistere pos-
set. Aeger autem paullo post animam efflavit.
Cadavere aperto, in tota ventris cavitate reper-
ta est ingens copia puris, peritonæum quoque dis-
ruptum & putridum conspiciebatur, hepar du-
rum, ingentis magnitudinis, albicans circa sto-
machum, sed in gibba sui parte prope costas spu-
rias nigrum, exustum & gangræna infectum. In
hepate vero nullum conspiciebatur pus. Præci-
pua autem corruptio hepatis erat in parte dextra,
versus costas spurias & circa musculos interco-
stales, qui etiam cum costis spuris nigredinem
contraxerant, instar carbonis & facillime frangi
poterant.*

OBSERVATIO II.

Vir sanguineo-melancholicus, triginta circiter
annos habens, diu jam vitæ sedentariæ addictus,
neque cibis boni succi usus, vinis vero dulcio-
ribus semper delectatus, omissa per aliquot an-
nos sueta sanguinis missione, in ingentem per
universum corpus languorem incidit, & miram
quoque expertus est ad iracundiam proclivitatem,
ita, ut à levissima causa commoveretur, & pro-
tinus saporem in lingua perciperet amarum. Post
mensē correptus est insigni dolore in crure &
hypochondrio dextro, tensivo partim, partim
gravativo, qui tactu fuit exacerbat. Accessit
cibi fastidium, inquietudo, somnus insomniis turba-
tus, calor præternaturalis, extrema ab aëre fri-
gidiusculo mox refrigercebant, faciei color sæpius
mutabatur, alvus erat quidem fluida, & à pul-
veribus, quos nitrum parca dosi ingrediebatur,
foetida & biliosa multa dimittebat, sed post al-
vi secessum semper fere dolor acerbior reddeba-
tur, qui etiam sub risu & fortiori inspiratione in-
gravefcebat, urina crassa, rubicunda, cum sedi-
mento secedente. Misso primis statim diebus ex
mediana largiter sanguine, dabantur diaphoreti-
ca, tinctura bezoardica bis quotidie ad triginta
guttas cum infuso veronica, item pulvis bezoar-
dicus, cum nitro & camphora mixtus, arcanum
quoque duplicatum cum nitro & cinnabari, quo
sedes proritata & anxietates adauctæ. Septimo
die accedente, cutis, antea sicca & arida, ma-
descere primum cœpit, & postea sudor erupit lar-
gissimus, per viginti quatuor horas manans, quo
omnia symptomata, respiratio difficilis, anxietas,
horror & extremorum refrigeratio discussa, &
somnia quoque rediit, ita ut post decimum quar-
tum diem æger lectum relinqueret. Mense autem
Augusto idem malum rediit, non quidem cum

tanta

*Hepatitis
ex lapsu in
abscessum
desinens le-
thalis.*

tanta symptomatum & doloris atrocitas, sed diutius ægrum detinuit, & lentam febrem reliquit, diæta salubri & congruis remediis post aliquod tempus etiam abactam, ægro perfectam sanitatem recuperante, & expirante simul illa ad iracundiam promptitudine.

Epicrisis.

Origo hujus morbi merito à crasso & copioso sanguine repetenda, quem vita sedentaria, victus crassus & crebrior potus vinorum dulcium ingenuit, eaque propter multum simul ad infarctum & obstructionem hepatis contulit. Accessit postea crebrior animi commotio, qua sanguis lentus in minima vascula impulsus, stasim ibi concepit inflammatoriam. Id enim curatam meretur observationem, quod qui hepatis vitio laborant, ad iracundiam admodum sint faciles, nec prius prava hæc dispositio cessat, quam hepatis labe sublata. Videtur autem hæc inflammatio levior tantum fuisse ac in ligamentis; forsan etiam superficie concavæ hepatis partis, constituisse, ideoque septimo die sudore discussa est largissimo, quod tempus ordinarium criticum inflammationum esse solet, si discussioni adhuc locus est.

OBSERVATIO III.

Ante aliquot annos vocabar ad generosum virum in vicina urbe degentem, sanguineo-cholericum, strictioris habitus & quadragenario jam majorem. Is à quinque diebus lecto fuerat affixus, conquestus de acutissimo lateris dextri sub costis spuris dolore, cum maxima præcordiorum constrictione & anxietate, spiritus difficultate summa, febre, vigilia & inquietudine. Medici primum in auxilium vocati, morbum oppido periculosum, quin capitalem fore, propinquus & adstantibus dixerant. Putarant enim hepar ipsum laborare & sphacelosa tantum non corruptione esse infectum, ideoque, præter interna putredini resistentia & analeptica, exterius epithema ex aceto cum lithargyrio cocto, adjecta camphora, apposuerant. Ego vero candide ipsis edixi, non adeo perniciosum esse, ut crederent, morbum, sed partes tantum externas hepatis connexas, non hepar ipsum, pati. Removere hinc jussi primum epithema & apponere lateri dolenti, vesicam cum decocto emolliente. Interius præbui pulverem supra descriptum, nec non mixturam, pro potu ptisanam, item emulsionem ex semine cardui Mariæ, melonum, cucurbitæ & papaveris albi, cum aquis diapnoicis & analepticis, nec non infusum theiforme ex herba veronicæ, floribus chamomillæ, summitatibus millefolii & semine foeniculi. Usurpatis his, lenis mador in universo corpore obortus, cum symptomatum levamine, undecimo die sudor manavit largus, & alvus quoque, sub dolore stricta & vix clystere soluta, sponte aliquoties dejecit. Atque sic æger ex voto convaluit, adhuc vivens & optime valens. Dedit autem hic casus mihi occasionem scribendi dissertationem academicam, de hepatis inflammatione vera rarissima, spuria frequentissima, quam epicriseos loco legendam commendo.

CAPUT VIII.

De Febre Nephritica.

THESES PATHOLOGICÆ.

§. I.

ORitur nephritica febris ex renum inflammatione, juncta cum dolore ardente fixo in lumbis, mictu difficili & aliis pathematibus spasmodicis infimi ventris.

§. II.

Prout autem inflammatio levior est, vel gravior, sive profundior, differunt etiam symptomata aliisque morbi est eventus. Scilicet quando extima & propria renum tunica, innumeris capillaribus vasculis, ex emulgentibus renum vasis prodeuntibus, perfusa, inflammationem patitur, levior hæc est, superficialis & erysipelatis speciem habet; stipatur tamen dolore ardente fixo, acuto, cum pulsu celeri, duro, siti, mictu ardente, urina tenui, cruda & convenienti medicina, cum regimine leni diaphoretico, citra suppurationem, brevi tempore discutitur.

§. III.

Quando vero inflammatio profundior, febris etiam vehementior, dolor in lumbis ardens diuturnior, mictio difficilior, alvus strictior & præcordiorum anxietas atque angustia major, urina cruda alba secedente. Quod si autem hic dolor ad decimum quartum usque diem persistit, suppurascere incipit, tumque haud secus ac in aliis inflammationibus in pus mutatis, dolor mitior fit & conquiescit, urina autem prodire solet admodum saturata cum crasso sedimento, quod partim ex purulenta materia, partim mucro tartareo conflatum est. Quin sæpe inflammatio tam profunda & inde oriunda exulceratio tanta est, ut per plures annos duret, & successive totam renum substantiam consumat atque depascat, tandemque macie & febre hectica ægri moriantur, ac post mortem, renis loco, nil quam sacculus reperitur plenus pure. Quod si perrumpit & in cavitatem pelvis delabatur, incredibiles, uti notavimus, facit ante mortem dolores & urinæ retentionem, ob vesicam, ceu partem nervosam & exquisiti sensus, ab incumbente pure, corrosam & vehementi spasmico affectam.

§. IV.

Deinceps datur febris nephritica brevis & quandoque tantum diaria, quæ cum horrore, dorso & partium extremarum rigore incipit, postea cum dolore lumborum & dorso ardente, cardialgica ventriculi & alvi strictura decurrit, & tandem sola diaphoresi & perspiratione aucta, intra XXIV. horas, sæpe solvitur, per urinam sabulo crasso secedente. Frequens hic affectus sanguine plenis, maxime foeminis post quinquagesimum annum, & à sola refrigeratione dorso, præsertim lumborum inducitur. Ibi enim renes antea minus integumentis & tantum musculis transversis sunt obtekti, propterea ex facili frigus penetrat & subjacentibus hisce partibus spasticam infert stricturam. Febris igitur hæc magis est à spasmico, quam inflammatione, & ideo

facile etiam converſo ab interioribus ad exteriora ſanguinis motu & perſpiratione revocata, iterum diſſipatur. Quod vero renes ſpaſticis ſtriſturis pateant, ex eo facile concludendum, quod plexus nervorum ex pari octavo & intercoſtali, renalis dictus, ipſam renum ſubſtantiam ingreditur, & non modo vaſis ſanguiferis, ſed & ductibus urinariis, tonum, ſenſum & motum largitur. Et quia idem hic plexus, per ganglion connectitur cum plexu meſenterico & inteſtinarum, cum ſtomachi quoque nervis; hinc eſt, quod renibus, magis adhuc ureteribus, dolore & ſpaſmo affectis, ſtriſturæ cardialgicæ etiam in ventriculo & inteſtinis oboriantur, flatus in ſtomachum cum ructuum eliſione urgeantur & alvus ſtringatur, quin ob inflatum ventriculum diaphragma prematur & ſpirandi anguſtia cum anxia præcordiorum conſtriſtione inducatur. Ne dicam tenues, limpidas & aquoſas urinas, quæ ſub ſpaſmibus minguntur, luculenter teſtari, quod tubuli illi, qui in renibus liquorem urinoſum ſequeſtrant, & ad pelvim ducunt, ſpaſmo, ſeu motu contractili afficiantur.

§. V.

*Calculoſa
gravis.*

Aliud febris nephriticæ genus, vehemens & ardentem tantum non mentiens, oritur à calculo: hic quidem, quamdiu in rene quieſcit, nihil incommodi affert; ubi vero loco movetur, & tranſitum per pelvim ac ureteres molitur, ſpaſmos & dolores graviffimos, febrem & ſupra memorata inducit ſymptomata, quæ etiam non prius quieſcunt, quam in veſicam fuerit delatus. Jungitur autem calculoſa hæc nephritis ſæpius non modo cum dyſuria, ſed & non nunquam periculofa urinae ſuppreſſione. Neque etiam prætereundum, non facile calculoſam nephritidem gigni, niſi præceſſerit nephritis ſimplex inflammatoria, vel etiam purulenta, in vaſculoſa & canaliculoſa renum ſubſtantia, poſt quam urina extravafa & ſtagnans, vel puri commixta, ſenſim dimittit terreas moleculas, è quarum coalitu tandem ſuccrefcunt calculi.

§. VI.

Cauſæ nephritidis.

Omnis autem nephritica febris & paſſio, eodem modo ac aliæ febres incipit cum horrore & frigore, quod maxime ex ſpina dorſali & primis lumborum vertebriſ ſumit initium, ſub quo ſanguinis motus ad interiora ipſumque cor convertitur, eoque à copioſo ſanguine laceſſito, ſyſtole poſtea ſequitur celerior. Atque adeo facile innotefcit ratio, quare renibus & iis, qui ad nephritidem, ſive ſimplicem, ſive calculoſam, ſive ſpaſmodicam, proclives ſunt, nihil ſit tam inferum, quam frigus hybernus, regnante vento boreali, aſpero & rigido, quo improvide admiſſo, paſſiones hæc promptè vel inducuntur, vel illico recrudeſcunt. Ad ingenerandas vero nephriticas has paſſiones & febres multa diſponunt, tanto magis quando plura ſimul concurrunt, atque in unum effectum conſpirant. Primum inter hæc merito obtinet locum plethora, præſertim in corporibus ſpongioſis & copioſis exilibus vaſis dotatis, item in iis, qui évacuationibus ſanguinis ſpontaneis criticis, vel artificialibus aſſueti, ſi illæ ſuppreſſæ, vel ob ætatis rationem emanſerunt, hæc autem aliquamdiu intermiſſæ. In his expedita mali nephritici geneſis, quando ſimul hæreditaria diſpoſitio, vita ſedentaria, nimia ſtomachi repletio, cibi ſtatulenti, potus craſſius non diluens, aut nimis ſpirituofus, nec non impenſior

animi mœror concurrunt. Tanto magis & citius excluditur, quando plethorica ejuſmodi craſſo & copioſo ſanguine ſacta corpora, vehementi & inconfueto motu, ſuccuſſante equitatione aut vectura in curru agitantur, vel etiam medicamenta calidiora, urinam moventia, terebinthinata, juniperina, ſuccinata, vel etiam purgantia aloëtica, liberalius aſſumuntur, quibus ſanguis craſſius cum impetu in ſubtiles & ultimas renum arteriolas urgetur, ibique ſubſiſtens, inflammatio-nem efficit.

§. VII.

Quod autem ſiniſter ren plus tentetur nephriticis paſſionibus ac dexter, id tribuendum eſſe videtur, tum quod ipſe non tam bene teſtus & à frigore munitus eſt, ac dexter, qui ſub hepate deliteſcit, tum quod flexura coli ei proxime adjacet, quæ, uti ſæpius, quam alibi ſit, à flatibus incarceratis diſtenta, renem & vaſcula ipſius ſanguifera comprimit, ut difficilior fiat per vaſa emulgentia ſanguinis circuitus, & ab hoc dependens urinae ſecretio. Atque hinc etiam eſt, quod, qui calculi renalis doloribus frequentius obnoxii, inſultum eorum illico experiantur, ſi cibos lentos & craſſos, aut alia flatus procreantia aſſumerint.

*Cur ſiniſter ren
afficiat.*

CURATIO CUM CAUTELIS ET OBSERVATIONIBUS CLINICIS.

§. I.

Quam veteres ſervarint in curanda nephritide medendi methodum, tradit Hippocrates de intern. affect. p. 217. ſi, inquit, *urina prodit velut à carnibus bubulis aſſatis ſuccus, ex renibus ulceratis, dolore lumborum & veſicæ, mox intenſiori; & qui ſimul deſcendit ad imum ventrem, hanc inſinuat curam: multa calida lavato, & tepefaſtoriam ad dolentem maxime locum adhibeto, & ſorbtione utatur è farina cocta, melle aſſuſo, & reliquo victu utatur quam maxime per alvum ſecedente & vinum bibat album Mendefium, mellei coloris, aut aliud album jucundiſſimum, probe temperatum. Pro temporis opportunitate ſerum & lac bibat, ſerum quidem ad purgationem, lactis autem potum faciat in tempore per XLV. dies. Hæc ſi ita feceris, morbum in melius diſpones.* Eundem fere curandi modum proponit Celsus lib. IV. cap. X. oportet, ait, ubi renes male habent diu, conquieſcere, cubare molliter, ſolvere alvum, ſi aliter non reſpondet, etiam ducere, ſæpe deſidere in aqua calida, neque cibum, neque potionem frigidam aſſumere, abſtinere ab omnibus ſaliſis, acribus, acidis, pomis, liberaliter bibere. Deinde ad dolorem levandum, immo, ſi renes exulcerati ſunt, ſemina cucumeris, nucleorum pinearum, crocum cum lacte decoctum commendat.

*Veterum
methodus
medendi.*

§. II.

Hæc veterum curandi ratio ita eſt comparata, ut nephritico morbo admodum ſit accommodata, ac nil fere in eadem deſiderari poſſit, quum omnia eo conſpirent, ut vaſcula & fibræ tenſæ, duræ & à ſpaſmo conſtriſtæ relaxentur & molliantur, humores ſtagnantes craſſi diluantur, & obſtruſtiones ſolvantur. Nos etiam hanc methodum deprehendimus probatiſſimam, in eaque perficienda his potiſſimum uſi ſumus auxiliis, ſero lactis dulci, vel lacte aſinino acidulis Selteranis remix-

*Congrua
praſidia.*

remixto, item prifana cum lacte confusa & potui data, emulfionibus ex amygdalis amaris, nucleis perficorum, femine cucumeris, cucurbitæ cum aquis florum acaciæ, ulmariae, ceraforum nigrorum; pulveribus, ex oculis cancrorum, cornu cervi philosophice præparato, lapide manati & nitro compositis, cum supra dictis, vehiculi loco, sumtis. Infusum quoque herbæ thée, propter blandam suam adstrictionem in omnibus renum affectibus, præservandi & curandi scopo, egregiæ est virtutis, & ceu specificum olim maximi semper fuit habitum.

§. III.

Levioris
nephritidis
medicatio.

Interim quum variæ sint nephriticæ hujus febris species & causæ, diversi etiam gradus; hinc diversimode etiam adornanda erit cura. Itaque in levi illo & diario sæpe, ex solo frigore & spasmo, renum dolore, nihil aliud agendum, quam ut facculis lateribusque calefactis, & dorfi, & abdominis regio, & ipsi quoque pedes, probe foveantur exterius, interius vero infusum thée, aut theiforme ex floribus chamomillæ, summitatibus millefolii, femine fœniculi, successive, sed largiter, corpore simul ad sudorem disposito, bibat & alvus stricta validius expediatur clystere ex lacte, nitro, melle & oleo. Inprimis ad dolores mulcendos & diaphoresin eliciendam spectatæ virtutis liquor noster anodynus mineralis, si tres ipsius partes, cum una liquoris bezoardici *Bussi* parte remisceantur, & bihorio quovis viginti guttæ cum potu calido porrigantur.

§. IV.

In graviori
usurpanda.

Quando dolor ardens & fixus in lumbis diutius tenet, & indicium est, vasa renalia sanguine crasso facta esse atque obstructa, cito solvenda plethora per venæ sectionem in pede, vel in dispositis ad hæmorrhoidalem fluxum hirudinum appositionem, ad anum. Postea interius danda, quæ æstum sanguinis temperant, & liberiores humorum circuitum cum diaphoresi procurant, quo nomine emulsiva, demulcentia, diluentia, antispasmodica, pulveres diaphoretici cum cinnabari & nitro, omnibus aliis palmam præripiunt.

§. V.

Exulcerata
præsidia.

Ubi vero inflammatio in abscessum transit, ex puris mictu & dysuria cognoscendum, medicatio eo dirigenda; ut pus acre temperetur, abstergatur & etiam fiat consolidatio. Ad hoc perficiendum laudata virtus lactis, vel feri lactis, cum herbis vulnerariis, floribus hyperici, summitatibus millefolii, herba veronicæ, scabiosæ, hederæ terrestris, consolidæ Saracenicæ & fœniculæ decocti. Tum quoque utiles emulsiones ex seminibus quatuor frigidis & amygdalis, quibus adjicienda sufficiens quantitas seminis lycopodii, cujus magna vis est dolorem leniens, exsiccans & consolidans. Sunt etiam qui in renum vitiis multum tribuunt gummi ceraforum in aqua, vel sero lactis soluto & crebrius assumto. In illo etiam renum cum exulceratione vitio, quod plerumque in iis, qui diutius calculo laborarunt præsto est, ab omnibus acribus, calidis, spirituosiss, diureticis & lithontripicis est cavendum, quia novam facile inflammationem, vel etiam mictum cruentum, excitare possunt. Præstantissimi vero tum usus mel Prussicum album, præsertim cum pulvere nucistæ remixtum & loco sacchari in decocto veronicæ sumtum, vel etiam syrupus de dialthæa *Fernelii*, qui certe, ceu specificum, in renum labe

Frid. Hoffmanni Oper. Tom. II.

merito commendari dignus. Præterea malvaticum juniperinum, quod ex vino Malvatico & rob juniperi paratur, in antiquis renum ulceribus, à senibus præsertim, ad aliquot cochlearia, post cibum, sumitur cum fructu.

§. VI.

In nephritide tam inflammatoria, quam calculosa, primum & princeps auxilium in clysteribus demulcentibus ano infusis, qui sine stimulo salino & purgante parandi, ex lacte, sero lactis, vel pura aqua dulci cum floribus sambuci & chamomillæ decocta, adjectis binis vel una tantum uncia syrupi de althæa *Fernelii* & drachma una nitri. Diutius enim enemata debent retineri, quo spasmos laxent & flatibus sic exitum parent.

§. VII.

Quum magna sit consensio & communicatio inter renes, colon intestinum ipsumque ventriculum; adeo ut unius vitium facile transeat & communicetur cum altero, atque etiam inflatio coli, circumflexæ potissimum ipsius partis circa sinistram renem, comprimendo hunc, non modo ad ipsius morbos disponat, sed & eos proritet atque exacerbet, hinc tam ad præservandum, quam mitigandum quod in renibus consistit vitium, operam dare oportet medicum, ut omnia ex iis, quæ flatu scient, & alvum stringente facultate polleant, evitentur, contra quæ eam lubricam servant, uti oleum amygdalarum dulcium, flatibus etiam discutiendis dicata sunt; usurpentur, è quibus instar omnium est semen cymini cum saccharo obductum & frequentius deglutitum.

§. VIII.

Ad externorum usum quod attinet, si ipsa febris cum dolore acuto adest, non facile ego suaserim linimenta pingua, neque etiam applicationem spiritus vini camphorati, multo minus balneum, sed foci temperate calidos, cum vesica semirepleta decocto florum emollientium cum croco ex lacte, longe erit utilior. Si autem febris abest, & labe exulcerationis postea metuenda, vidi emplastrum spermatis ranarum, sumendo uncias ipsius duas, addendo sacchari saturni, camphoræ ana drachmam, olei hyoscyami drachmas duas, dolorem mitigando, eximie profuisse.

§. IX.

Utut aquarum mineralium usus in omnibus fere renum vitiis opem spondeat eximiam, sed tamen quum magna sit in hisce ingredientium diversitas, non omnes promiscue in usum trahere convenit, sed utique selectus habendus. Carolinæ thermæ, si in renibus ulcus, propter sal calcarium purgans & diureticum, quo pollent, minus quadrant, quia nimium abstergendo, cavitatem faciunt majorem. Provide quoque & caute agendum cum acidulis efficacioribus Pyrmontanis & Egranis. Emsenses vero thermæ aquæ & ex acidulis Selteranæ, propter sal tenerum alcali & subtilitatem aquarum, magis conducunt. Semper tamen tutior est & acidularum & thermarum usus, si cum dimidia parte lactis mixtæ, usurpentur. Inprimis præstat ad abstergendas exulceratas renum partes, Selteranam, primum per quatuordecim dies solam, postea adhuc per mensem lacti nuptam caprillo, potare & traumatica, decoctum, sive essentiam, interponere.

ENARRATIONES MORBORUM.

OBSERVATIO I.

*Nephritis
exulcerata
sanata.*

Serenissima princeps, sexagenaria ferme, mollioris & sanguineæ texturæ, per aliquot annos nil nisi vinum, ac interdum aquam spirituofam, carminativam, quam vocant Aquavit, bibens, subinde tamen copiose infusum thee potans, ante aliquot annos, post præcedentem corporis exæstuationem per motum, incidit primum in dolorem dorsi & hypochondrii sinistri, cum horrida refrigeratione, febre, anxietate, inquietudine, strictura alvi, dolore in sinistro rene, fixo, subinde tamen de vehementia remittente, sed versus noctem semper exacerbato, sub quod urinæ tenues & albæ secesserunt. Perseverarunt hæc symptomata usque ad undecimum diem, quo tandem mitior dolor redditus & urina postea valde turbida cum crasso multo sedimento & bruni coloris emissa. Medicus disciplinæ meæ alumnus, non destitit per morbi decursum idoneis remediis succurrere, & potissimum emulsiões demulcentes & refrigerantes, pulveres temperate diaphoreticos & nitrosos, nec non oleum amygdalarum dulcium interne, & externe fomenta ex emollientibus & unguenta ex oleo amygdalarum dulcium cum camphora in usum vocavit. Ad impediendum quoque ulcerationis incrementum & consolidationem promovendam, suavit postea infusa herbarum vulnerariarum, ut alchymillæ, veronicæ, summitatum millefolii, florum hyperici, cum lacte per mensem & longius potanda, ac vere demum consilium dedit, ut acidulas Selteranas, per sex hebdomades, sub debito regimine biberet. Quibus per Dei gratiam perfecte convaluit Serenissima ægra, & etiamnum in exoptata vivit incolumitate.

Epicrisis.

Hæc inflammatio sine dubio ab obstructione vasorum minimorum in renibus fuit suborta, quæ in plethoricis, sicut omnes inflammationes, quam facile fieri potest, quando sanguis per motum, aut calidiora, in extremitates arteriolarum, qui lympham vel succum nutritium vehunt, urgetur & accedit lumborum refrigeratio. Non facile autem talis inflammatio, præsertim si paulo profundior, discutitur, sed in suppurationem abit, id quod certum requirit tempus. Deinde etiam illud in usum practicum hinc discendum, quod cito suppurationi factæ succurrendum sit blandioribus vulnerariis, ne scirrhum quid, quod longiorem suppurationem sequitur, gignatur & ulcus postea fiat insanabile.

OBSERVATIO II.

*Nephritis
calculosa.*

Vir sanguineus, forma venustus, venereus vero & vini potator, natus è familia nephritidi obnoxia, vigesimo octavo ætatis suæ anno, febre admodum ardente, cum vehementi dolore in regione lumbari lateris sinistri affectus est; adfuerunt simul cruciatus diri in regimine, alvus adstricta, ructus crebri, mingendi difficultas & urina exiit pauca, album deponens sedimentum. Medicus consultus febrem ardentem & colicam convulsivam esse putavit, ideoque venam secare iussit & clysteres applicare. Ego vero in auxilium vocatus, quum æger de dolore instar pali

circa renem sinistrum infixi & spasmodica cruris sinistri contractione conquereretur, quæsi, num olim laborarit calculo? respondit: non, sed ex familia eorum esse, qui calculi cruciatibus obnoxii. Dixi igitur, nephritidem esse calculosam, cum intestinorum doloribus, & exhibui emulsionem ex nucleis persicorum, ceraforum, cucurbitæ, milii solis, papaveris albi, cum aqua graminis, perlarum matre, nitro & syrupo papaveris albi adjecto. Exterius loco dolenti admovevere iussi vesicam oleo liliorum alborum & chamomillæ cocto plenam, & ternis singulis horis injicere clyisma ex fero lactis, oleo amygdalarum dulcium, syrupo dialthæa *Fernelii* & nitro. His alvus soluta, ructus molestissimi intercepti & ventris tormina non nihil sedata, sed calculus gravissimis doloribus descendit in urethères, ad quos tantisper componendos & spasticam crispaturam in uretheribus remittendam dedi liquorem meum anodynum mineralem cum aliquot guttis laudani opiatum liquidum, quibus in vesicam dimissus & inde etiam ad urethram delatus calculus, ob magnitudinem ibi obhærescens ac instrumenti ope eximendus, sub qua operatione meatus urinarius læsus quodammodo, ut dein, ob cicatricem hunc angustantem, per omnem vitam mictio facta fuerit difficilior. Ad præsertim igitur postea suavit primum potum infusi millefolii, dein acidularum Selteranarum cum vino & usum crebriorem pulveris ex magnesia & nitro. Et jam per aliquot annos à calculi doloribus vixit immunis.

Epicrisis.

I. Quoniam doloribus ex calculo non modo febris valde ardens, sed & dolores intestinorum, cum firma alvi obstructione, vomitibus & ructibus junguntur; hinc in nullo morbo diagnosis tam fallax, quam in hoc, præsertim si ægri antea nunquam insultum ipsius experti. Novi calculosam passionem pro ardente febre, pro iliaca passione, pro colica convulsiva, hæmorrhoidali, vel flatulenta, fuisse habitam, donec calculi proventus errorem argueret. Interim licet minus exquisitè cognoscatur causa, in remediis tamen propinandis ea propter non multum errabit artifex, quum in omnibus his, non alia possint usurpari, quam demulcentia, sedativa, fibras rigidas laxantia & spasmos remittentia. Quo magis patet, eandem methodum eademque remedia, pluribus morbis sanandis esse posse accommodata.

II. Febris vehemens inflammatoria ex calculo sine subsequente inflammatione esse potest: sed causa febris tum potius spasmus, quam obstructio vasculorum ab incarcerato sanguine; spasmus enim facilius solvitur, quam obstructio discutitur.

III. Ad arcendam calculosam nephritidem nihil utilius infuso vulnerario, antispasmodicæ simul virtutis, cujus generis est ex millefolio. Selterana dein pota aqua abstergit mucum viscidum, & prima calculi rudimenta colliquat sensim ac evehit. Alvus autem laxa, ne ex intestinis ren male afficiatur, prohibet, licet eadem nequaquam movenda sit pilulis, præsertim quæ aloen habent, quibus in sanguineis, præter dolorem calculosum, & colicus, & hæmorrhoidalis, suscitari potest.

OBSERVATIO III.

Fœmina quadraginta circiter annorum, san- *Nephritis
guine*

male tra-
ctata fune-
ra.

guine & succis plena, facie florida, venæ sectioni antea afflueta fuerat, quam à biennio vero omiserat, & tamen sedentariam coluerat vitam, plenæ ac vinosæ diætæ indulserat, neque sufficientem uteri purgationem habuerat. Hæc corripiebatur fixo in regione sinistra lumbari dolore, qui per aliquot dies cum virium prostratione, nausea & alvi adstrictione insistebat. Ad hunc leniendum medicus præbebat pulveres ex antimonio diaphoretico, lapidibus cancrorum & opiato sic dicto laudano, ita ut dosis laudani haberet granum, eoque obtinebat, ut dolor redderetur obtusior, alvus vero magis obstiparetur, urina supprimeretur, spiritus arctius mearet, vigilia esset assidua, & præcordia impensius angerentur. Nihilo tamen secius insistebat papaveraceorum usui & emulsionem non modo cum larga seminis papaveris quantitate, sed & pilulas ex diureticis & opio præbebat. Licet autem his dolorem abigere & somnum inducere niteretur, neutrum tamen obtinebat, sed symptomata potius cum spirandi difficultate ingravescebant, abdomen durum reddebatur ac tensum, & accedebat quoque febris. Alius igitur in consilium vocabatur medicus, qui ad alvum expediendam & respirationem facilitandam, exhibebat decoctum ex dulcibus, emollientibus, foliis sennæ sine stipitibus atque rhabarbaro, cui ad firim extinguendam non nihil spiritus nitri instillatum. Sed omnia frustra. Aegra enim corripiebatur horrore frequenti cum interiorum ardore, subsequēbatur syncope cum levi delirio, cumque medicus sub his emeticum ex tribus tartari emetici granis daret, operatio nulla sequuta, & duabus ab eo assumto horis, ægra exspiravit.

Epicrisis.

Imprudētissimæ medicationis hoc est exemplum, qua morbus benignus, in capitalem plane conversus. Expensis enim probe circumstantiis, facile judicandum, malum hoc à nimia sanguinis redundantia in foemina alias vegeta, ejusdemque stagnatione in vasis majoribus circa lumbos, nephritidem faciente, ortum traxisse, omneque damnum tempestitiva liberali sanguinis missione & alvi apertione per clysteres, mature potuisse præscindi.

OBSERVATIO IV.

Nephritica
febris ex
calculo.

Vir quadragenarius, cholericus-sanguineus, multorum liberorum pater, ac ob mercaturæ negotia, multum in itineribus versans, postquam autumnalem sanguinis missionem jussu diutius distulisset, & novissime curru noctu & interdiu vectus, corporis & succussionem & refrigerationem fuisset passus, domum delatus vespere correptus est horrore, quem excepit æstus & dolor acutissimus in sinistro latere supra ischii os, prope dorsum spinam, cum alvi adstrictione, inquietudine, siti, præcordiorum strictura & ructuum elisione, urina non quidem difficulter, sed alba & tenui secedente. Medicus ordinarius suavit clysterum oleosorum usum & potum olei amygdalarum dulcium cum jusculis. Delinita inde tantisper dolorum atrocitas, mane ob alvum strictiorem ac sponte nec flatus, nec stercora dimittentem, tormina quoque & murmura in abdomine, pilulas purgantes cum croco deglutire jussit, quibus non sine prægressis cruciatibus alvus quidem soluta, dolor autem fixus circa re-

nem sinistrum exacerbatus, inquietudo cum calore adaucta, æger assumpta illico revomuit corpusque admodum jectigavit, alvo simul denuo arctissime clausa. Ego in auxilium vocatus, ex dolore fixo in renis regione & subinde ad femur usque excurrente cum aliquali hujus rigore, nephriticam febrem esse conjeci, ac propterea primo omnium sanguinem è vena brachii mittere, dein alvo clysterem paregoricum domesticum cum nitro injicere & interius liquorem meum anodynum mineralem, alternatim cum pulvere temperante salino-nitroso præbere jussi, dato simul pro potu decocto avenaceo, non nunquam cum oleo amygdalarum dulcium, non nunquam brodium carnis cum citri succo. His æstus restinctus, vomitus compositus, dolor quoque conquievit, per intervalla tamen, vespere præcipue, recruduit. Hinc locum dolentem unguento dialthæa, populeonis, cum oleo juniperi subinde fovere ac bis quotidie liquorem salino-alkalinum ac nitrosum sumere suasi, quibus etiam effectum, ut post septimum diem alvus sponte solveretur, cutis antea arida madesceret, pulsus mollesceret, urina, sub dolore pellucida, crassa nunc secederet ac sedimentum poneret, ipseque dolor penitus evanesceret. Licet autem tum nec sabulum, nec calculus prodiret, nephriticum tamen morbum fuisse patuit postea luculentius. Quum enim æger ad vernalem sanguinis missionem sese accingeret, & ob id alvum prius purgandi causa decoctum mannatum cum cremore & terra foliata tartari usurparet, inde non modo efficaciter alvus est subducta, sed & post toleratos vespere leniores in lumbari regione versus pubem excurrentes dolores, mane cum urinam mitteret ex improvise simul etiam excrevit calculum oblongum, figuræ pyramidalis fere, diametri lentis, basi durum, superius autem friabilem atque porosum.

Epicrisis.

Calculus in renum substantia occultatus, paullo majorem & duriores, febrem inflammatoriam cum acerbis doloribus & spasticis symptomatibus, excitare posse, hæc docet historia. Neque tamen id fit, quod irritando vel distendendo partes nervosas spasmos facit, sed quia comprimendo canaliculosam renum substantiam, obstaculum ponit liberiori sanguinis per eorum compagem progressui, & quando tum sanguis abundans cum vehementia per motum succussatorium vehementem in curru aut equo, impetuosè ad renes pellitur, nec tamen per venas omnis æque expedite iterum reducit, gignitur demum inflammatio. Illa enim dorsum sub vectura aut equitatione succussatio, sanguinem omnino impetuosius agit ad renes; unde novi, foeminas curru vectas ad crebriorem urinæ urgeri missionem. Novi etiam validiori hoc motu calculum in renibus quiescentem, esse loco trusum & in urethres cum dolore translatus. In cura autem sic exclusæ nephritice febris, optimum & præsentissimum auxilium in sanguinis subtractione, cuius tamen quantitas merito medici judicio relinquenda. Neque etiam ego melius novi in plethoricis renum passionibus obnoxiiis præservativum, quam venæ sectionem tempestitivè & cum judicio institutam. Atque hinc petenda est ratio, quod notante dudum *Hippocrate*, ab inflammatoriis ejusmodi febribus, nephriticis, peripneumoniacis & phreneticis, liberi maneant, quibus hæmorrhoides recte fluunt.

OBSERVATIO V.

Nephritici & hæmorrhoidalis dolor cum numerosa calculorum excretionem.

Illustrissimus Comes, quadraginta circiter annos habens, optimæ & sanguineæ constitutionis, bis quotannis hæmorrhoidum, pariori tamen fluxui obnoxius, in intensum dorfi & abdominis incidit dolorem, ut erectus stare non posset, sed corpus semper incurvare necessum haberet: aderat simul creber ad mingendum stimulus, & urina secedebat parcior. Medicus huc usque ordinarius ansam hujus doloris esse voluit sanguinem per ani venas exitum molientem, & in tunicis intestinalibus stagnantem, eaque propter venam in pede aliquoties secari jussit, pulverem antispasmodicum exhibuit, & ad proritandum hæmorrhoidum stillicidium, crebriorem pilularum ad exemplar Becherianum paratarum usum suavit. Sed inde nihil accessit levaminis, dolores non modo remanserunt, sed & periodice sæpe cum extremorum frigore & subsequente totius corporis æstu, præsertim in regione lumbari, recurrerunt. Adit igitur Carolinas thermas, ibique me in consilium accivit. Quumque ex sedimento urinæ mucoso & quodammodo tartareo conjicerem, illustrissimum ægrum non esse liberum à calculo, ut temperatas tantum thermas aquas biberet consilium dedi. Potis his optime habuit, & quod mirandum, post potum plures numero, magnitudinis variæ, lapillos subcinericios leves, cum urina excrevit, ut numerus eorum intra aliquot hebdomades, vel ad quadringentos accederet. Postea successive pauciores secesserunt ac quadriduo ante finem curæ nullus amplius prodiit. Interim licet sub hoc potu dolores essent mitissimi, in itinere tamen recruduerunt acerbiores, nec per annum postea penitus discesserunt, donec usurpatis infusis herbarum vulnerariarum, liquore anodyno minerali & ad roboranda sub doloribus afflicta membra, Tœplices thermis, liberaretur tam à dorfi, quam renum calculosis passionibus.

Epicrisis.

Sanguineæ & forma venustæ personæ, si corpus jam omne nactum augmentum, ex facili patent internis partium inflammationibus, nec non sanguinis evacuationibus, præsertim per sedis venas. Quæ sanguinis excretio, si deficit, haud raro renum inflammatio & calculosa dispositio excipit. Hinc perite *Hippocrates Sect. II. aph. XI.* scribit: *nephriticis si hæmorrhoides fluunt bonum.* In nostro illustrissimo ægro & hæmorrhoidalis intestinorum, & calculi renum dolor fuit conjunctus, quod haud infrequens est. Thermarum autem Carolinarum ea virtus est atque efficacia, ut renes valide expurgent à sabulosis & tartareis fordibus. Sed cautus sit earum usus, si magna in renibus exulceratio, ne irritando eandem augeant majoremque faciant cavitatem. Optimo consilio in nostro ægro post thermalis aquæ potum in usum vocata decocta & infusa vulneraria, cum pulveribus nitrosis & liquore anodyno minerali. Renes enim male affecti ad consolidationem optime ferunt lenem adstrictionem. Unde ab auctoribus omnes fere herbæ vulnerariæ, in morbis ex renum vitio, quam maxime celebrantur.

Plures notatu dignæ observationes legantur in *Consult. med. Tom. II. LXXIII. LXXVII. item LXXXIX.*

CAPUT IX.

De Inflammatione Vesicæ.

THESES PATHOLOGICÆ.

§. I.

Vesicæ compages, ex quatuor tunicis, una à peritonæo, altera musculari, tertia nervosa, cui quarta mucosa seu villosa obducta, si spasmus & inflammatione afficitur, haud secus ac si ventriculi ejusdem texturæ carpus, aut aliæ nervosæ partes eandem patiuntur, & multis & gravibus stipatur symptomatibus, licet auctores medici recentiores paucam & vix ullam hujus passionis injiciant mentionem. Pathognomonica autem & essentialia ipsius signa sunt hæc: dolor acutus, ardens & pressorius in regione pubis, cum febre, perpetuo tenesmo sive desidendi stimulo, & continuo ad mingendum conatu.

Inflammatio vesicæ pathognomonica signa.

§. II.

Inflammationis hujus proxima causa sanguinis vel etiam feri impuri in extremitatibus arteriolarum stasis est, qua sanguifera per vesicæ tunicas discurrentia vasa, à sanguine copiosius congesto nimium replentur, distenduntur & nervosa exquisitissimæ sensationis tunica, in vehementem spasmus abripitur, ex quo reliquorum symptomatum origo.

Causa inflammationis.

§. III.

Nimirum gravia illa pathemata, quæ inflammationi vesicæ juncta, dolor ardens pressorius, ani constrictio, tenesmus, difficilis & continuo urgens mictus, borborygmi, ventris tormina, summa præcordiorum anxietas, ægra spiratio, inappetentia, mala digestio, vomitus, extremorum frigus, pulsus durus, inæqualis, contractus, celer, inquietudo, quandoque etiam convulsio, unice pendent à spasmis in vesica, qui, si vehementior, ob nervorum communionem, non modo rectum, sed & reliqua intestina, ventriculum & diaphragma, immo ipsas cerebri & spinalis medullæ membranas, cum universo nervosarum partium systemate, in similes spasticos & constrictorios motus abripit. Quam intima enim stomacho cum vesica intercedat consensio, notavit jam *Celsus lib. VII. cap. XXII.* ita habens: *non ignoramus, orto vesicæ ulcere, sæpe affici stomachum, cui cum vesica quoddam consortium est, ex quo fit, ut neque retineatur cibus, neque, si quis contentus est, concoquatur, neque corpus alatur.*

Item symptomata.

§. IV.

Non tamen semper unius ejusdemque est vehementiæ, sed quandoque levior, quandoque gravior. Levior illa superficialis magis est, spuria quasi & rheumatica, vel erysipelaceæ species, ac propterea brevi etiam & facilius ipsa febris per diaphoresin tollitur. Oritur etiam non tam à sanguine, sed potius à sero falso, acri, impuro inter vascula & fibrillulas nerveas hærente. Hinc familiaris quam maxime senibus, scorbuticis, arthriticis, rheumaticis, hemicanicis, purpura scorbutica laborantibus atque cachecticis, tum maxime, quando refrigeratione inferiorum à rigi-

Levior est vel gravior.

à rigido & boreali aëris statu, perspiratio incipitur, ac inoffensus sanguinis & humorum per minimos tubulos circuitus sistitur. Quæ autem gravior, profundior est, à crasso & impuro sanguine in vesicæ vasis uberius collecto provenit, plethorico-cacochymicos hinc frequentius infestat, atrociora habet symptomata & perquam facile in suppurationem, exulcerationem vel sphacelum funestum plane transit.

§. V.

Ex iis quæ ad ingenerandam vesicæ inflammationem conferunt, sunt maxime criticæ sanguinis evacuationes, per menses, vel hæmorrhoides deficientes, vel plane suppressæ. Magna enim consensus vesicæ & intestini recti, alterutra parte male & spasmico vel inflammatione affecta, propter hæmorrhoidalia tam interna, quam potissimum externa vasa, è quibus, notante *Vesalio lib. III. cap. IX. de fabrica C. H. pag. 475.* rami, hypogastricæ propagines, ad vesicæ cervicem abeunt, unde etiam suppuratio & exulceratio ex ruptis sanguiferis vasculis in cervice ut plurimum observatur magna. Inprimis in sceminis, si, uti haud infrequens, & mensium & hæmorrhoidum fluxum experiuntur, ac ille cessat, nec hic recte succedit, sanguis impetuose ruit ad vesicæ vasa & gravia symptomata, febrem, ulcerationem, purulentam mictionem, quandoque cruentam, dysuriam & alia plura incommoda adducit.

§. VI.

Deinceps non raro inflammationem vesicæ infert gonorrhœa, præsertim virulenta, male per adstringentia, vel etiam nimis calida & acria pellentia tractata. Attenta enim observatione constat, gonorrhœam sæpius recurrentem & perversa medicatione exceptam, abire in prostaticum, vesicularum seminalium & ipsius vesicæ ulcus. Prostatae quippe glandulæ, quæ ut plurimum gonorrhœæ sedes, quando tumore, dolore, inflammatione & suppuratione afficiuntur, facile labem communicant vesicæ collo proxime adjacenti, ut vitium latius serpat. Tum vero præter fluxum seminis ex urethra involuntarium, urina mingitur, quæ crassum, copiosum, mucilaginosum purulentum sedimentum ad fundum dimittit, quod ab urina separatum & exsiccatum flammæ si injicitur, tetrum foetorem, non secus ac sanguis combustus, spargit.

§. VII.

De successu & eventu morbi veritati & experientia omnino congruum *Hippocratis* effatum de prænot. pag. 464. sic habens: *vesicæ duræ & dolentes penitus quidem horrendæ sunt & perniciosæ; perniciosissimæ vero, quæ cum febre continua sunt. Etenim dolores ab ipsis vesicis ad occidendum sufficiunt, & alvi non egerunt hoc tempore, nisi durum quoddam & hoc coacte. Solvit autem urina micta purulenta, quæ albam ac levem subsidentiam habet. Si vero neque ab urina quicquam remiserit dolor, neque vesica molliatur & febris continua fuerit, in primis circuitibus morbi, agrum moriturum esse timor est.* Quando autem inflammatio non tempestive discutitur, lentius aut citius necat. Qui cito, ex sphacelo pereunt, ac uti testantur observationes anatomico-practicæ, vesica sphacelo affecta, vel vasa ipsius sanguifera varicosa, & nigro cruore facta reperiuntur. Tardius autem mors excipit, quan-

do exulceratio succedit, ex mictu purulento cognoscenda, quæ tandem vel hectico calore necat, vel latius serpens intestinum rectum etiam exedit, ac gangranam inducit funestam.

§. VIII.

Interim non omnis urina turbida & sub mictu difficili & ardore excreta, inflammata, aut exulcerata vesicæ est indicium. Id enim haud raro obvium in senibus, scorbuticis & qui dyscrasia humorum laborant, & accidit sine periculo. Quandoque etiam solus vesicæ spasmus, ab urina acri, calculo asperiori, aut collectione feri impuri in vasis vesicalibus, inductus, insignem mucii quantitatem ex villosa tunica exprimit ac urinæ insinuat. Neque minus vesicæ spasmus & dysuria sæpe comitatur febrem, quæ plerumque est scorbutica & exanthematica, cum purpura, vel maculis scorbuticis instar petechiarum, nec periculo vacat. Quin aliquoties in purpura scorbutica affectis obiervavi, quod impedita materiae purpuraceæ per improvidam refrigerationem excretionem, vel hac retropulsa, eadem pathemata, spasmus nempe vesicæ ac difficilis mictus, accesserint, nullam aliam ob causam, quam quod constrictis à frigore tubulis subcutaneis, motus sanguinis & humorum ab exterioribus ad interiora conversus, simulque recrementitia & acris illa materia nervosæ vesicæ illapsa.

C U R A T I O.

§. I.

Nulli morbi difficilius curantur, quam qui in vesica consistunt: est enim nervosa & exquisiti sensus pars, secundum veterum loquendi morem frigida, & paucò sanguine perfusa, ac urina perpetuo superne affluens consolidationem impedit, præsertim in senibus. Quare vesicæ vitia, uti spasmus, inflammatio, exulceratio, difficilis & dolorosus mictus, facilius arcentur, quam per sanantur. Interim quia spasmus vesicæ primam fere causam omnibus quæ ipsam infestant passionibus subministrat, præcipua utique medentis intentio, ut eundem tempestive præscindat, & modis declinet cunctis. Sed quum hic spasmus vesicalibus tunicis vel à sanguine uberius ibi congesto, tendente ac premente, vel ab acri impuro sero eo decumbente, inducatur, causæ hæc probe sunt discernendæ in medicatione. Quod si igitur post suppressum mensium vel hæmorrhoidum fluxum, tale vitium imminet, optimum consilium, ut excretionem hæc vel revocentur, vel sanguis copiose congestus per venæ, præsertim in pede, sectionem, deriveretur, quod auxilii genus, iis inprimis, quibus ani, aut uteri venæ stillare amplius jam cessarunt, proficuum est. Et hoc in casu verum omnino *Hippocratis aph. XLVIII. Sect. VII.* dictum: urinæ difficultatem & stillicidium solvere venæ sectionem.

§. II.

Quando scorbuticis & iis, qui rheumatismis, arthritide & purpura chronica laborant, ulcera antiqua consolidata sunt, aut materia quædam exanthematica retropulsa, senibus quoque ob dyscrasiam sanguinis & humorum impuram, vesicæ passiones imminet, cito remediis diluentibus, acrimoniam temperantibus, blandis diaphoreticis sanguinemque depurantibus est succurrendum. Hunc in finem utilia decocta pro potu ordi-

Urina micta & dysuria non semper ab inflammatione vesicæ.

Spasmus vesicæ ex sanguine.

Ab humore acri quibus arcentur.

ordinario temperantia, ex radice scorzonerae, chinae, sisere, foeniculi, item infusa theiformia ex summitatibus millefolii, floribus malvae, baccis alkekengi & semine dauci parata, cum dimidia parte lactis mixta & syrupo è dialthaea *Fernelii* dulcificata. Neque minus spectata feri lactis dulcis virtus. Quibus si accedit usus emulsionis ex seminibus quatuor frigidis, & pulverum temperantium ex pulvere Marchionis, antimONIO diaphoretico, lapidibus cancrorum, matre perlarum, cum nitri tantillo & aliquot guttis olei macis, effectus est exoptatus. Quia tamen puritas humorum multum etiam debita purgamentorum alvi excretionem conservatur, videndum utque, ut hæc præstetur libera, optime alimentis, sin vero minus responderit, mannatis, cum vel sine rhabarbaro, addito nitro antimoniato, aut clysteribus emollientibus ducenda.

§. III.

In inflammatione & spasmo proficua.

Ubi vero inflammatio cum spasmo jam præsto est, præter jam dicta, commendatissimus est usus liquoris anodynus mineralis, ad drachmam unam, remixti cum granis quinque extracti croci & granis duobus camphoræ. Tum etiam pulveres diaphoretici ac temperantes, aucta nitri dosi, cum emulsionibus ex seminibus quatuor frigidis sunt porrigendi. Et exterius partem affectam antispasmodicis & leniter discutientibus fovere expedit. Nobis hunc in finem usitata vesica decocto florum emollientium plena, vel loco hujus emplastrum ex emplastro de meliloto uncia, spermatis ceti drachmis tribus, croci, camphoræ ana drachma, nec non oleum anodynum camphoræ, ex olei amygdalarum dulcium uncia, hyoscyami drachmis tribus & camphoræ drachma, pubis & perinæi regioni crebrius illitum. Ubi etiam spasmus solus tenesmum molestum, vel difficilem, dolorosam mictionem efficit, præter balnea aquæ dulcis, omnia alia auxilia virtute superant vapores ex decocto florum meliloti, sambuci, chamomillæ officinalis, malvæ, summitatum millefolii cum lacte, in perforata sella ad laborantes partes admissi.

CAUTELÆ ET OBSERVATIONES CLINICÆ.

§. I.

Minerales aqua utilissima.

In vesicæ vitiis inveteratis, quæ cachecticis, hypochondriacis, scorbuticis, senibus & hæmorrhoidariis, nunquam non sunt frequentia, ad incrementum eorum præscindendum, per longum usum efficacius deprehendi nihil, quam peritum aquarum mineralium usum. Celebres jam pridem hoc nomine Spadanæ aquæ, de quibus sic disertis verbis scribit *Henricus ab Heer in Spadacren. hæc fontis Spadani, propria ac singularis facultas, ut vesicæ renumque dolores sopiat ac leniat, morbos vero harum partium persanet, ventriculorum debilem roboret, & ciborum languentem appetentiam excitet.* Quin idem gravis auctor suadet, ut, si renum & vesicæ vitiis affecti liberi ab iis vivere velint, per totum annum hanc medicatam aquam bibant. Neque minus *Tulpius lib. II. cap. LIII.* testis est fide dignus, deploratum vesicæ ulcus, omnibus parum aut nihil proficientibus, continuo aquæ Spadanæ usu, tam feliciter fuisse debellatum, ut summe obstupuerint, quibus id visum certam habere desperationem. Ego vero habeo, quod maxime laudem

usum Selteranarum, quarum saluberrima ingredientia penitus inspexi, quarumque virtutem in omni interna pulmonum, renum & vesicæ labe exemplis habeo confirmatam fere innumeris. Hinc suadeo, ut vere semper & autumnus, per mensem & longius bibantur, vel quod melius inter cibum potus ordinarii loco, cum quarta vini Mosellani parte remixta, potentur.

§. II.

Laeticinia quidem per se renum ac vesicæ lationibus & morbis minus accommoda. Sed si lac ipsum, præsertim asininum, cum Selterana aqua bibitur, vel quod melius adhuc, acidulæ hæ, ad abstergendam eo melius saniosam & mucosam materiam, per aliquot hebdomades primum solæ, ac postea vel solum lac, vel medicatæ huic aquæ confusum, usurpantur, magis quam ullum aliud remedium prodesse, expertus scribo.

Lac cum aqua proficuum est.

§. III.

Licet sanguinis missio utilissima sit, tam ad arceda, quam persananda vesicæ ex sanguinis congestione vitia: multum tamen nocet frequens ipsius administratio, ubi humorum magis impuritas, quam abundantia in vitio est, ac ubi materia acris purpuracea altius sanguini est insinuata. Nam subtracto nimium sanguine, motus ipsius ad corporis ambitum elanguescit, perspiratio simul imminuitur, & morbi causa magis obfirmatur, licet in principio doloris lenimentum inde accedere videatur.

Vena secta cum diffinitione admittenda.

§. IV.

Vini potum *Hippocrates l. superius c.* in urinæ difficultatibus commendat; merito tamen tenendum, quod nullum aliud ex usu sit, quam dulce, Malvaticum, Hispanicum, vel etiam Hungaricum, quod moderate & medice potum, tam ad roborandum stomachum, quam ad vires refocillandas, apprime conducit, nisi febris & calor prohibeant. Illa vero vina quæ multum acidi tartarei in sinu sovent, ut Rhennana, item nostratia austera, penitus merito sunt rejicienda.

Vinum dulce non acidum bibendum.

§. V.

Quum omne frigidum nervis nervosisque partibus sit inimicissimum, calidum vero amicitissimum; hinc in nervosæ vesicæ passionibus summa cum cura etiam vitanda refrigeratio, maxime inferiorum, frigidus potus, ac præsertim in senili ætate, remedia nimium refrigerantia, acida & nitrosa. Vicissim quæ corpus, abdomen imprimis & pedes, à frigore defendunt ac in perspiratione servant, ut motus corporis moderatus, potus infusi theiformis, potio calida, item pediluvia & balnea aquæ dulcis, optimum doloris procurant lenimentum. Atque etiam hanc ob causam è re est, ut aquæ medicatæ ipsæ, tam solæ, quam lacti nuptæ, tepidæ potius, quam frigida bibantur.

Frigus necesse est, calor temperatus prodest.

ENARRATIONES MORBORUM.

OBSERVATIO I.

Vir quadraginta annorum, vitæ sedentariæ ob intemperantiam studiorum addictus, intolerabili cruciatu & tormento circa pubis & perinæi regionem cum magna difficultate reddendi urinam diu sæpe per intervalla afflictus fuit, & propter

Dolor vesicæ ex sanguine stagnante.

propter dolorum atrociam, inquietudinem, anxietatem, vigiliam viriumque defectionem, cum extremorum tremore ac frigore, tam misere decubuit, ut ad desperationem quandoque redactus, cultro filum vitæ abrumpere voluerit. Affligebat hæc miseria interdum per aliquot hebdomades, postea sensim paulatimque remittebat, ut officio suo fungi posset; urina plerumque pauca & turbida profluebat, crassum sedimentum deponens. Et quum per sex fere annos hoc malo exagitatus esset, viribus tandem penitus consumptis, quadagesimo ætatis anno obiit. Omnes, quos per totam civitatem in auxilium vocarat, medici, & calculum, & vesicæ exulcerationem, hujus miseræ affectionis causam judicarunt; sed aliud longe partis affectæ post mortem scrutinium docuit, vesica quippe integra, sine exulceratione, inventa fuit, nec vestigium sabuli aut calculi in ea repertum, ipsum vero vesicæ corpus longe crassius & densius, copiosis & valde distentis vasis sanguiferis, quorum nonnulla calamus scriptorium crassitie æquabant, oblitum. Ut adeo omnium horum cruciatuum nulla alia fuerit causa, quam insolita illa stagnatio & incarceration sanguinis in vasis vesicæ.

Epicrisis.

Hæc historia luculenter docet, spasmodum vesicæ urinariæ vehementiorem, tantum valere, ut universum nervosarum partium systema in consortium trahere & œconomiam omnium corporis functionum perturbare queat. Dein patescit: difficilem cum ardore & stillicidio miæctum, urinam quoque glutinosam, juxta *Hippocratem* furfuraceam, non semper exulcerationem, vel calculum intus latentem prodere, sed à sola spastica contractione vesicæ oboriri posse, qua tunica interior mucosa fortiter compressa mucosum liquidum copiose in cavitatem vesicæ eructat, quod urinæ immixtum, postea cum ipsa excernitur, eodem modo ac notum est, dolorificum illum spasmodum, qui sæpe fit in extremitate intestini recti exquisiti sensus, ita comprimere tunicam cum vasis suis villosam, ut insignis copia muci albi, instar albuminis ovi, cum tenesmo dimittatur, quod vulgo vocant hæmorrhoides albas. Vesicæ autem spasmi causa non tam est in cavitatem vesicæ, quam potius intra ejus substantiam. Nam, sicuti à mensium vel hæmorrhoidum fluxu sufflaminato, sanguis regurgitans ad vasa ventriculi & intestinorum, & intra eorum tunicas sentientes stagnans, distractione & compressione, vehementia tormina, anxietates, dolores, convulsiones & spasmos concitat, ita etiam, quando vel ex vitio & emanatione fluxus hæmorrhoidalis, vel aliis ex causis, sanguis ad vesicæ corpus magna copia delatus ibi stagnat, non mirum est, quod in nervosa ipsius compage spasmos, & quæ ab iis proficiuntur symptomata, producat.

OBSERVATIO II.

Vir quadraginta annorum, sanguineo-chole-
ricus, ex vitæ genere valde inquieto transiens ad
quietum & sedentarium, experitur brevi post
hæmorrhoidalem fluxum, quem præpostere re-
mediis adhibitis suppressi curavit. Sequuta hinc
miæctio cruenta, singulis fere mensibus rediens,
qua cessante anxietates præcordiorum, dolores
lumborum, borborygmi ventris, prava digestio
& inappetentia oborta. Ad tollenda hæc mala
variis usus quidem remediis, thermis, lactis cu-

ra, sed non cum debito regimine. Accessit hinc
postea funesta vesicæ inflammatio, cognoscenda
satis ex magno ardore, dolore in regione pubis,
miæctu difficili & dolorifico, febre, præcordiorum
anxietate & delirio, ac post mortem vesica in-
flaminata & sphacelata inventa fuit.

Epicrisis.

Hæmorrhoidalis fluxus interdum transit in mi-
æctionem cruentam, criticam quoque, quæ nul-
lo modo cohibenda, nisi rursus provocentur hæ-
morrhoides, alias gravissima subsequuntur spas-
modica pathemata non modo, sed & ipsa vesica
tandem inflammatione gravi cum febre afficitur,
quæ facile abit in sphacelum. Nam qui morbis
vesicæ moriuntur, ii plerumque pereunt sphacelo,
qui etiam intestinum rectum sæpe afficit, ut hæ-
morrhoidalia vasa sanguine nigro infarcta cum
penis livore compareant.

OBSERVATIO III.

Summus hujus urbis Theologus, vitæ seden-
tariæ perpetuæque mentis per ardua multa nego-
tia fatigationi assuetus, à purpura intus delitesc-
cente scorbutica in gravem primum per interval-
la dysuriam incidit, juncta simul paralyti spuria
dextræ manus, quæ, quamdiu perstitit, remis-
sior fuit dysuria, illa vero evanescente, atrocior
vesicæ spasmus & dolor cum assiduo urinam mit-
tendi stimulo, illico rediit. Tandem cum sanita-
te quidem in gratiam redire videbatur, sed quum
forte languidum adhuc corpus auræ frigidiori ex-
posuisset, rediere intoleranda miæctus tormina,
quæ vesicæ inflammatio, ex parte exulceratio
febrisque acuta exanthematica exceperunt, fune-
sto proh! eventu.

Epicrisis.

Inflammatio vesicæ, à fero falso impuro &
corrupto, vesicæ tunicis nerveis firmius inhæres-
cente eosque lancinante, quandoque subnascitur.
Vidi non ita pridem in sene octogenario, qui
per aliquot annos summa difficultate mittendi
cum dolore urinam laborarat, ac demum, fru-
stra adhibita omni efficacissima medicina, in pe-
de nactus est erysipelas, quod reliquit ulcus,
ichorem saniosum sat copiose quotidie fundens,
tam salubri effectu, ut ex eo, & dysuria, &
dolor in pube, omnis evanuerit. *Dravvitzius*
quoque qui ante seculum jam omnium fere op-
time germanico idiomate de scorbutico integrum
scripsit tractatum, in eo pagina 350. & seqq. plu-
res affert observationes & casus ægrorum, qui
de doloribus sævis sub urinæ emissionem conquesti,
quorum causa non vesicæ labes ulla, aut calcu-
lus fuit, sed humor tantum impurus scorbuticus.
Memorabilis maxime casus, quem consignavit
de lanione, qui, quum nunquam antea ex cal-
culo laborasset, subito atroces in pedibus persen-
sit dolores, qui hinc depulsi, urethram invaserunt,
cum intenso ardore & difficultate guttatim vix
mingendi; applicatis tamen discutientibus cessa-
runt quidem, sed ad pedes redierunt, consequen-
te eorum tumore.

OBSERVATIO IV.

Fœmina quadraginta circiter annorum, san-
guineæ constitutionis, vitæ sessili nimium indul-
gens,

*Vesicæ in-
flammati-
o a materia
acrida hæn-
dit.*

*Vesicæ in-
flammati-
o a materia
opiatâ & in-
flammati-
o.*

gens, venæ sectioni alias fuerat assueta, sed per biennium eam omiserat, quo factum, ut obstructis mensibus, in summos dolores circa pubis regionem incideret, cum impensis præcordiorum anxietatibus, forti alvi adstrictione, appetitus viriumque destructione. Sedatis quodammodo ab imperito medico per opiata doloribus; mox incidit in syncopen & majores ac vehementiores circa præcordia urserunt anxietates, subsequutum delirium & mors. Inspecto post mortem corpore, & vesicam & uterum inflammatio ac sphacelus occupant, cæteris omnibus partibus sanis.

Epicrisis.

Instar axiomatis practici hoc loco notari velim: in inflammationibus nervosarum & membranacearum partium, ut in phrenitide, pleuritide, hepatitide, item inflammatione ventriculi, intestinorum & vesicæ, nil perniciosius esse, & quod tam facile ad mortem perducere queat opiato remedio interno. Stuporem enim hisce partibus facile inducit, & in minimis vasculis motum & progressum sanguinis penitus sistit, ut sphacelus ac mors inducatur. Quare cautissime cum ejusmodi remediis, etiam exterius applicatis, hisce in morbis agendum esse moneo ac inculco serio, compluribus lethiferis exemplis hanc observationem confirmantibus. Conferunt potius, præter idonea diluentia, discutientia, blanda anodyna cum diaphoreticis mixta, inter quæ liquorem nostrum anodynum mineralem, cum spiritu Bussii mixtum, & reiteratis vicibus, parca tamen dosi, exhibitum, cum blando regimine diapnoico, non satis laudare possum, si prius plethoræ, quando adest, tempestiva sanguinis missione rite fuit prospectum.

Præter allatos casus plures adhuc invenies in *Consult. med. Tom. II. sect. III. LXXXVIII. XC. XCIII.*

CAPUT X.

De Inflammatione & febre uterina.

THESES PATHOLOGICÆ.

§. I.

*Uteri mor-
bosa dispo-
silio &
consensio.* **P**eculiaris uteri fabrica & structura, mira scilicet fibrarum totius substantiæ elasticitas, vasorum sanguiferorum copia eorumque tortuosus & serpentinus flexus, glandulosa & nervosa textura, nec non colli & maxime orificii interni exquisitus sensus, faciunt, ut multis & variis morbis, maximeque etiam acutis & periculosis inflammationibus, oriundis inde abscessibus & mali moris ulcerationibus, hoc viscus pateat. Quin, quia non tam ob nervorum communio- nem & sensibilitatem, quam potius sanguinis progressum in fibrosa & vasculosa uteri compage interceptum, ipsius in omnibus reliquis corporis partibus motus turbatur atque pervertitur; hinc magna etiam uteri cum nobilissimis corporis partibus, capite, pectore, præcordiis, ventriculo & omni nervorum systemate est consensio, & ipso gravato, aut inflammato, sæva in propinquis & remotis partibus accidunt pathemata.

§. II.

Ex his quæ in uterum cadunt passionibus frequens admodum est ipsius inflammatio, cognoscenda ex ardore & dolore fixo in inguine; cum febre acuta, dolore lumborum & imi ventris, abdominis inflatione, stimulo ad urinam & alvum, mictu ardenti & difficili, gravibusque aliis in præcordiis, capite & pectore symptomatibus. Parum hujus morbi reminiscuntur medici recentiores, sed eo crebrius in monumentis suis veteres. *Aretæus* quidem sic egregie ipsum delineat *cap. LXIV. inflammatio uteri*, inquit, *fit ex pluribus causis, ex plaga, ex mensum suppressione, & frigidityte, & inflatione, non minus etiam abortu & partu, propter malam partus editionem. Sequitur ad uteri inflammationem febris acuta, dolorque capitis ac ejus tendinum & basis oculorum juncturaque manuum & digitorum, & colli detractio & declinatio, stomachi per consensum affectio, osculi uteri conclusio, pulsus parvi, densi. Si totus est inflammatus, totus vehementius pulsatorio motu dolet: si posteriores ipsius partes solum inflammatae fuerint, dolor circa lumbos fit, & ster- cora supprimuntur ex recti intestini compressione; si partes ejus anteriores, dolor circa pectinem fit, & urinae stillicidium ac emittendæ difficultas ex vesicæ compressione; at lateribus inflammatis, & inguina tenduntur, & crura gravantur, si vero fundus ipsius fuerit inflammatus, circa umbilicum maxime dolor consistit cum tumore; at si circa osculum est inflammatio, circa supernum ventrem dolent, & digito immisso durum ac renitens osculum occurrit.*

*Inflamma-
tionis ute-
rine signa*

§. III.

Hæc uteri inflammatio merito dispescenda in levio- rem superficialem, & gravio- rem, seu profundio- rem. Illa sæpe puerperis accidit, facile gignitur, potissimumque crebrius sequitur febrem lacteam, admittit etiam medicationem, si recte & prudenter instituat, ac facili negotio, intra paucos dies, discutitur. Gravior autem, quæ febre intensa & sævis symptomatibus de vehementia non remittentibus stipatur, septimo, nono, vel etiam undecimo sæpe die necat, superveniente maxime purpura alba, quæ pessimum semper præbet omen, atque ex corrupto, putrido, vappescente fero ac sanguine, in uteri latibulis hærente, ortum ducit, immo de corrupto jam & sphacelato utero testatur.

*Differentia
inter le-
vem &
gravem.*

§. IV.

Causa inflammati uteri materialis proxima est inæqualis sanguinis per uterina vasa circulus. Ob oppleta scilicet, coarctata à spasmo & obstructa minima vascula, sanguis majori cum impetu ac celeritate fertur per vascula vicina, eorumque ramos laterales, qui cruorem alias non capiunt, unde tumor, rubor & ardor fit, cum pressione & irritatione tunicæ nervosæ. Ad hoc autem vitium concipiendum in genere disponunt læsiones, contusiones & vulnerationes externæ, status plethoricus, cacochymicus, mensium & lochiorum suppressio, copiosior sanguinis ad uterum allapsus atque decubitus, partus laboriosus, animi affectus, ira maxime & terror, vomitus enormis, vel nifus impensior ad hunc, motus & labor corporis plethorici fortior cum subsequente refrigeratione imi ventris, balneorum calidorum abusus, abdominis & uteri refrigeratio externa, potus frigidus, fluentibus inprimis mensibus, lochiis

*Causa
rica.*

lochiis aut hæmorrhoidibus, colica quoque convulsiva, nec non affectio spastico-hysterica gravior.

§. V.

Nunquam vero magis hæc periculosa affectio infestat foeminas, quam si in puerperio sunt constitutæ. Post partum enim uterus ab onere levatus, elastica, qua pollet, virtute iterum in arctius spatium coit & sensim sensimque sese contrahit. Hinc diducta uteri vasa angustantur, contentus in iis sanguis per oscula aperta, secundinis prius continua, exprimitur, ac sub nomine lochiorum foras prodit, cum sanitatis emolumento. Simul vero etiam hac angustatione motus & cursus sanguinis aliter dirigitur, & quidem ab utero & inferioribus ad superiora ipsasque mammæ, quod circa tertium plerumque diem accidit, non sine febrili commotione, & Germanis propterea audit *das Milch-Fieber*. Quod si igitur lochialis sanguinis exitus per stricturas uteri spasticas impeditur, non modo in ipso utero periculosa inflammatoria stasis concitat, sed & ordinarius ille sanguinis ab inferioribus ad superiora impetus, tam ratione vehementiæ, quam molis sanguinis validius increfcit. Tum enim spastica & dolorifica in abdomine urgent stricturæ, sanguinis vel mucidi humoris ex utero fluxus restitatur, alvus clausa est, pedes frigidi, ad urinam stimulus, dolorosa mictio, caput rubet, tumet, oculi fulgent, nares non nunquam guttulas quasdam stillant, animus est inquietus, somnus nullus, vel insomniis terrificis turbatus, ac gravia illa symptomata, respiratio difficillima, lipothymia, convulsiones & delirium phreneticum, demum subito sæpius puerperis accidunt funesta.

§. VI.

Luculentis verbis hæc ita evenire testatur Hippocrates lib. I. de morb. mulier. §. 72. ita tradens: *si inflammati fuerint puerperæ uteri, venter ardet & magnus fit & ad præcordia suffocatio habet, & uterus, ubi puerperii purgamenta intus manserunt à frigore, occulte distenditur*. Nec non lib. II. de morb. mul. p. m. 489. si, inquiens, *ignis sacer in uteris fit, etiam pectus id percipit, venter intumescit, perfrigeratur, febris habet magna & rigor supervenit, & spiritus densus, & animi deliquium, & debilitas, & dolor totius corporis, & tristatur, & mente variatur, & affectio ascendit ex inferno ventre ad lumbos, & ad dorsum, & præcordia, & pectora, & collum, caput & stomachum & mortua esse videtur*. Experientia autem teste, foeminæ teneræ, exquisitoris sensus, in vehementes animi commotiones pronæ, pathematibus spasmodicis & flatulentis obnoxia, mensium inordinato successu affectæ, alvi adstrictioris, si gravidæ fiunt, post partum quam facile in lochiorum suppressionem cum febre uteri acuta incidunt, non sine summo vitæ discrimine. Interdum etiam inflammatio uteri nascitur, à secundinarum vel totali, vel tantum quoad partem retentione. Hac enim resstante, non tantum sanguinis ex utero exclusio prohibetur, verum etiam succedens putredo febrem movet, vel si hæc jam adest, deteriore reddit.

§. VII.

Jam sicuti in omni inflammatione, ille subsistens humor, si non discutitur, putrescit & in corruptionem transit, vel sphacelosa, vel ulcerosa, ita idem etiam accidit in ea, quæ uterum

Frid. Hoffmanni Oper. Tom. II.

infestat. Quæ in sphacelum abit, brevi necat & solennis maxime est puerperis, in quibus post sectionem uterus ut plurimum cum vagina durus, coloris ex atro bruni deprehenditur. Quæ autem suppuratur & ulceratur, diutius trahit, & accidit quam maxime extra puerperium. Patent inflammationi huic suppuratoriæ foeminæ sanguineæ, mollioris & spongiosioris habitus, præsertim si fluori albo sanguinolento fuerunt affectæ, isque adstringentibus intempestive cohibitus. Frequentius etiam eandem incurrunt, quæ impurum & crassum in venis alunt sanguinem, diætam insalubrem sectantur, fructibus horæis, dulcibus & lacticiiniis indulgent, inferiora subinde refrigerant, corpore præsertim æstuant, quæ tristitia anguntur, veneris stimulos concubitu obtundere impediuntur, suetam sanguinis missionem intermittunt, aut seniores quietam & ærumnosam vitam ducunt. Ac in his quidem frequentior est inflammatio in collo & orificio interno, quod ex multis fibris nerveis spiraliter est contextum, quam in ipso fundo, eaque propter dolor acerbis & ardens est in pube cum mictu difficili. Signa autem abscessus uteri sic in compendio Hippocrates lib. I. de morb. mulier. exhibet: *si, ait, uteri fuerint ulcerati, sanguis & pus purgatur & fætor gravis oboritur, & dolor acutus corripit lumbos ac inguina & imum ventrem, & dolor sursum procedit ad laterum mollitudinem, costas & scapulas, aliquando etiam ad claviculas pervenit, & caput vehementer dolet deliratque, processu vero temporis intumescit & debilitas ipsum corripit, & animi deliquium, & febris tenuis, & perfrigeratio, intumescunt autem maxime crura. Morbus autem corripit ex abortu, si qua corrupto humore ac putrefacto intus non fuerit expurgatus & calor totum corpus tenet. Corripit etiam ex fluxibus, si in ipsis acria fuerint & biliosa mordeant*. Sed plerumque ulcus uteri tandem etiam in gangrænam & sphacelum abit ac interficit. Interdum tamen accidit, ut apostema in utero prognatum interne rumpatur & copiose effluat sanies alba minime foetida & ægra evadat, qua de re legi meretur Forestus lib. XXVIII. obs. XLIV. pag. 693.

§. VIII.

Quod si autem exterior uteri pars inflammata, ob frigus externum, quam facile abit in scirrhum, qui ulceratus, cancer uteri recte dicitur ac est insanabilis. Neque adeo infrequens est, glandulas copiosiores circa collum uteri, & maxime orificium ejus internum confidentes, mutari in scirrhum, tandemque abire in inflammationem ulcerosam, quæ haud secus ac cancer exulceratus; medicationem admittit plane nullam. Recentiores quidem parum, hanc uteri affectionem notarunt; ego vero aliquoties observavi, eadem omnino ratione iisdemque symptomatibus ac pridem jam exacte prodidit Aretæus lib. II. cap. LXVII. ita perhibens: *cancro in utero, partim cum, partim sine ulceratione sunt, tumor reperitur circa uteri osculum durus, inæqualis præminens, colore feculentus, rubicundus, quandoque etiam sublividus & dolent vehementer inguina ad supernum ventrem & pectinem ac lumbos, ægreque ferunt contactum & variegatiorem medicationem. Si vero ulceratus est cancer, ad dolores, durities, & tumorem, erosa etiam & inæqualia ulcera conspiciuntur, plerumque quidem sordida oris tumida albicantia, turpes crustas inductas habentia. Quæ vero pura videntur, feculenta, livida, rubicunda*

Nec non in cancerum insanabilem.

da & cruenta apparent. Excernitur autem assidue ab ipso sanies tenuis, aquosa, nigra, aut fulva, graveolens, aliquando etiam sanguis fertur & alia signa ad inflammatum uterum relata. Affectio igitur ipsa incurabilis est, veluti alicubi etiam dixit Hippocrates, mitigare tamen oportet, per infusus ex fœnu græco, malva & per cataplasmata similia.

C U R A T I O.

§. I.

Curatio & præservatio causis accommodanda.

Uteri inflammatio, quum nunquam frequentius occurrat, quam in puerperis & post abortum, dum vel ab improvida obstetricum in partu difficili tractatione & contrectatione violenta, vel à violento nisu sub partus laboribus, sanguinem præsertim impurum ad uterum pellente, vel à lochiorum per dolores & spasmos hystericos, terrorem, aut refrigerationem, fluxu impedito, inducitur; necessarium omnino est, ad præservationem æque ac curationem, ut medicus omnes has causas probe noscat atque discernat. Quia autem facilius longe est periculosum hunc morbum imminuentem arcere, quam præsentem perferre; hinc medens etiam primo omnium eo eniti debet, ut eundem tempestive præscindat, ejusque incursum avertat.

§. II.

Post partum spasmum relaxandi.

Jam missis illis læsionibus, quæ ab externis & violentis causis inducuntur, frequentissimum in artis exercitio est, inflammatoriam hanc febrem, post partum, ob excretionem sanguinis lochialis vel plane deficientem, vel non sufficientem induci. Quare id imprimis agendum artifice, ut confecto partu, primis statim diebus, lochia rite secedant. Quod ut ex voto perficiatur, ad causas fluxus lochialis intercepti removendas, medicatio perite dirigenda. Notum autem est, sub diurnis & gravioribus partus laboribus, tam vehementem fieri partium, & solidarum, & fluidarum, commotionem & exagitationem, ut quisque ex pulsum celeritate, totius corporis ardore, siti & inquietudine vix aliter judicare possit, quam adesse febrem, sub quo impetu parum etiam vel nihil recrementorum putridorum & cruentorum utero effertur. Igitur opera danda, ut impetuofus hic post partum motus placide componatur. Fit hoc commodissime, si puerperæ in quiete & temperato regimine diaphoretico servantur, iisdemque diluentia ac blande æstum sedantia propinquantur. Quia tamen sub partu, qui non nisi stricturis spasticis & convulsivis ex spinali medulla absoluitur, per consensum spasmum & dolorificæ stricturæ ad intestina transeunt, quæ superato partu adhuc aliquamdiu persistunt, atque etiam eandem ob consensionem uteri fibras musculosas & nervas stringendo, liberum sanguinis cursum præcludunt; merito etiam curandum, ut eadem sedentur placide. Hunc in finem utilis pulvis, ex pulveris Marchionis, lapidum cancrorum ana drachma, antimonii diaphoretici drachma dimidia, nitri puri granis XVI. cujus quarta pars pro dosi, adjectis nonnunquam, si spasmus hystericus simul impensius urgent, granis sex, vel quatuor pulveris castorei, cum aqua florum chamomillæ vulgaris, destillata cum cerevisia triticea, sumenda. Conducit quoque oleum amygdalarum dulcium, ex recentibus, sine igne paratum, quod vel solum, vel cum quarta parte spermatis ceti remix-

tum, quotidie ad unam vel dimidiam unciam, cum jusculo pulli gallinacei, aut decocto avenaceo, usurpandum. Externe vero totum abdomen inungendum oleo ex anethini, chamæmelini & liliorum alborum ana uncia, olei carvi drachmis duabus, vel camphoræ drachma, superposita mappa complicata calefacta.

§. III.

Composito sic tumultu, ad promovendum lochiorum fluxum, vix præstabilius huc usque innotuit remedium, quam pilularum massa, quæ ad imitationem *Becheri*, ex amaris extractis, gummatibus resinosis temperatis, & aloe probe correctâ concinnata est. Secundo igitur statim die, ceteris paribus, quindecim grana pilulari forma, mane, vel vesperi exhibeantur, & pro circumstantiarum ratione, per quinque vel octo dies continuantur. Est enim hoc evacuans clemens maxime & accommodum. Nam roborando, tam intestinorum, quam ipsius uteri, per extensionem nimiam robore exuti, tonum, blande simul stimulando, imum ventrem ac intestina à sordibus, ipsum quoque uterum à stagnante corrupto sanguine repurgat, eoque quam optime & inflammationem, & febrem aliaque sæva à recrementis retentis oriunda pathemata, arcet. Quin eadem hæc curandi ratio apprime ex usu est, quando secundina, vel ipsius pars, aut aliud quoddam exturbandum concretum in utero resistat.

§. IV.

Quod si tamen medentis scopus his expediri nequit, sed febris impetit assidua, venter flatibus attollitur, uteri purgamenta retinentur, & spasmus ad superiora vergunt infestus, alia ineunda est medendi via. Scilicet sanguinis copia, sub graviditate justo plus accumulata, minuenda, per venæ sectionem, non in superioribus, sed pede institutam. Sæpe enim à nimia vasorum distensione fiunt spasmus, & sanguinis exsuperans moles uteri compagem nimium distendendo, ejusdem systolicam & expulsivam potentiam minuit ac impedit. Hinc venæ sectionis remedium omnino maximi, ad promovendum lochiorum fluxum & inflammationem arcendam, est usus. Quod sicuti in Gallia hunc in finem frequentius quam par est adhibetur; ita perperam in nostra Germania rejicitur, ut plures inflammatoria uteri febre correptæ, pereant, quæ tempestiva sanguinis missione potuissent servari.

§. V.

Præter venæ sectionem, ubi jam præsens est inflammatoria febris, id quam maxime agendum, ut sanguis stagnans in motum cieatur, humores spissi fluxiles reddantur, & stasis discutatur. Quod ut obtineatur, conducit mixtura hæc: recipe aquæ chærefolii, cardui benedicti, scordii, florum sambuci, acaciæ, aceti destillati ana unciam unam semis, lapidum cancrorum drachmam unam semis, antimonii diaphoretici, vel bezoardici mineralis drachmam semis, spiritus nitri dulcis, sive liquoris anodynus mineralis guttas XX. fyrupi card. bened. drachmas duas. M. de qua binis quibusvis horis, duo vel tria cochlearia porrigenda. Tum etiam pro potu exhibeatur tenue jusculum ex pullo gallinaceo, cum radice scorzonæræ, cichorei & rasura cornu cervi confectum, addito ad gratiam succo pomorum aurantiorum. Præbeatur quoque subinde infusum theiforme ex herba veronicæ, scabiosæ, sonchi, floribus hor-

hormini, chamomillæ vulgaris, semine fœniculi. Nec omittantur pulveres temperantes ac resolventes, ex lapidibus cancrorum, solutione oculorum cancri, nitro & sale polychresto compositi. Quales præterea Becherianis, vel ad harum exemplar paratis pilulis, ad lochialem fluxum promovendum & sanguinis à capite impetum divertendum, commode interponuntur. Sint demum in usu clysteres ex sero lactis dulci, vel decocto florum chamomillæ vulgaris, herbæ artemisiæ, salviæ, hormini, mercurialis, addito melle, nitro & pinguedine gallinarum.

§. VI.

Quando vero extra puerperium in corporibus impuris variis ex causis accidit inflammatio uteri, non tam in fundo, quam potius in collo, cervice atque vagina, præter jam memoratâ internâ, simul in auxilium vocanda præsidia externa, epithemata scilicet pubis regioni admota, injectiones uterinæ ex accommodis paratæ, nec non pessi, itera ob loci vicinitatem suppõsitoria in anum trusa. Epithema egregium est, quod ex aquæ sic dictæ d'arquebusade, (quæ non nisi vinum Rhenanum ab herbis vulnerariis in balneo maris ad siccitatem abstractum,) unciis quatuor, essentiæ croci, spiritus vini camphorati ana unciis duabus, nitri, in aqua florum sambuci soluti, drachma, paratur, ac pro circumstantiarum ratione cum aceto rutaceo, aut scordii remixtum, linteis duplicatis sæpius applicatur. Ad injectionem vero commendo solum lac, vel asininum, vel muliebri, cum floribus sambuci, myrrha & croco, adjecto nitro decoctum. Molestissimum demum hujus passionis symptoma tenesmus, præter infessus emollientes, egregie lenit oleum amygdalarum dulcium, vel mucilago feminis psylli, aut fœnu græci, ad uncias duas, cum duodecim extracti croci granis ano injecta. Et eadem hæc remedia semper etiam ex usu sunt, quando inflammatio abiit in suppurationem.

§. VII.

Porro non adeo infrequens est, ex fluore albo diurno, præsertim si simul sanguinolentus, male tractato, vel imprudenter cohibito, uterum ejusque partes tumore affici cum dolore & febre inflammatoria, immo in suppurationem abire & exulcerationem. Tum vero cura admodum perplexa est atque difficilis, imprimis, quando fluor non è glandulis externis, sed interna uteri substantia venit. Ego, si passio chronica, nil præstabilius novi, quam usum thermarum Emsensium & Carolinarum mitiorum, quippe quæ humores subsistentes efficaciter dissolvunt, partemque affectam simul roborant. Sed cavendum à balneis adstringentibus, ipsis etiam Carolinis fortioribus, quæ propter terram calcaream & martialem, adstringente & repellente virtute pollent. Infessus vero ex herbis uterinis & aromaticis, cum aqua dulci decoctis, profunt utique. Sic laxatis ductibus & humoribus dilutis, cum fructu postea pilulæ dantur Becherianæ, quæ inter specifica uterina locum tuentur præcipuum. Neque rejicienda videtur Hippocratis uteri ulcus curandi methodus, quam lib. I. de morb. mul. §. 88. sic tradit: *si hic morbus inciderit, multa calida lavato & tepesfactoria adhibeto, quâ parte fuerit dolor. Et si quidem superne fuerint dolores & mulier fortis est, totam fomentato & pharvacum deorsum purgans bibendum dato, & ubi tempus anni fuerit, serum coctum insuper bibendum præbeto, per dies quinque, si id* Frid. Hoffmanni Oper. Tom. II.

facere poterit. Si vero non adfuerit serum, lac asininum coquito, & per dies tres, aut quatuor bibendum dato. Post lactis autem potum, cum aquis ipsam reficito, & cum cibis commodis, carnibus ovilibus, teneris recentibus, & volucrum, & bera; & cucurbita. Abstineat autem à falsis, & acerbis, & marinis omnibus ac caprinis. Et certe lactis serum & asininum lac egregie proficit, non modo ad obtundendam humorum acrimoniam, sed & contemperandum calorem hecticum, qui ægros graviter ut plurimum urit.

§. VIII.

Quæ demum à violentia externa inducitur uteri inflammatio, cum febre, dolore inguillum, inejendi difficultate & spasmis in remotis etiam partibus, nec non alvi adstrictione, poscit quam maxime venæ sectionem, non modo maturam, sed & repetitam, primo in brachio, ac dein in pede institutam. Opus in hac etiam, ut alvus subducatur clystere, in uterinis morbis nunquam non singularis plane utilitatis. Et exterius imponendum emplastrum ex emplastri de meliloto unciis duabus, spermatis ceti uncia dimidia, gummi ammoniaci drachmis duabus, croci drachma, camphoræ drachina dimidia. Non omittis internis blandis diaphoreticis & discutientibus.

CAUTELÆ ET OBSERVATIONES PRACTICÆ.

§. I.

Quum puerperæ plurimæ in puerperio ex febre inflammatoria uterina moriantur, præsertim si multum sanguinis crassi & impuri in venis alant; hic optimum certe ad præsciendendas capitales ejusmodi affectiones est consilium, quando gravidæ partim salubri diætâ & vitæ regimine; partim etiam aptis & congruis præsiidiis, tam solidas, quam fluidas partes, in debita temperie, quantitate & motus æquilibrio servare student. Nam qualis natura ægotantium, etiam puerperarum, talis etiam est vis medicatrix, pugna adversus morbum, quin ipsa medicatio, in qua omnino plus præstat natura, quam ipsius ministrars. Igitur ad antevertendum hoc malum quam maxime necessarium est, ut tempore graviditatis sanitati consulatur tam opportunis sanguinis missionibus, quam debitis laxationibus; per rhabarbarina potissimum, ut etiam gravidæ modicam & laudabilem diætâ sectentur, animi temperantiæ studeant, & potus diluentes perspirationem simul sustinentes bibant. Deinceps quum haud raro inflammati in puerperis uteri causam præbeat, potus nimis calidorum & spirituosorum, vini aromatici, crocati &c. ad partum facilitandum datus, præsertim in sanguineis, & quæ non ultimis mensibus sanguinem miserunt; serio omnino monendæ sunt, & obstetrices, & uterum gerentes, ut ab ejusmodi sanguinem exagitantibus remediis abstineant, ac potius venæ sectione in pede, item balneis, novissime ante partum duabus vel tribus hebdomadibus, rite usurpatis, liberiores sanguinis per uterum commeatum & facilem post partum effluxum procurent.

§. II.

In nullo morbo tam infensa & perniciofa est animi commotio, per terrorem potissimum ac iram, quam in uteri inflammatorio. Nunquam

Inflam-
mationis à
causa ex-
terna me-
dicatio.

Præserva-
tio.

Omittenda.

etiam nocentior abdominis & inguinum perfri-
geratio, quam post abortum & partum. Puerpe-
ræ enim, ob continui quæ ipsis accidit solutionem,
fibrarum & vasorum dilacerationem humorum-
que extravasationem, haud aliter sunt confide-
randæ, quam graviter vulneratæ. Quam faci-
le autem dictæ causæ læsis & vulneratis partibus,
adeoque etiam utero, inflammationem inferre
queant, res est nota etiam in vulgus. Quare ut
puerperæ, nec non quæ labem in utero gerunt,
solicite sibi ab his caveant, iterum inculcamus
iterumque.

§. III.

*Cautela
de pellenti-
bus.*

Ad emovendum lochiorum fluxum subsisten-
tem, nunquam danda pellentia fortiora, croca-
ta, myrrhata, succinata, aloetica, vel calida aro-
matica, nec non salina stimulantia, tanto minus,
si mox post partum adhuc præsto est motuum
impetus: hæc enim febrem magis accendunt,
spasmus intendunt, sanguinem in latibulis uteri
hærentem, humido absumto, plus densant, &
ad effluxum reddunt ineptum, vias quoque &
emunctoria magis ficcant atque occludunt. Sed
quando spasmus laxari, dolores remittere, viæ
patefcere incipiunt & sanguis ex utero ferri, tum
dum moderate pellentia & tonica propinare
expedit. Inter quæ solutio succini, myrrhæ, rha-
barbari, croci, non cum spiritu vini, sed aqueo
lixivioso menstruo parata, nec non aqua melissæ,
aut artemisiæ leviter spirituosæ, qualis est, quæ
cum cerevisiâ triticea destillatur, omnibus fere
palmam præripiunt, si crebris & parcis dosibus
offerantur.

§. IV.

*Venæ se-
ctione.*

Ex præcipuis etiam lochiorum fluxum revo-
cantibus auxiliis est venæ sectio. Nec deterri-
patiatur artifex symptomatum gravitate, neque
etiam ipsa purpura efflorescente, sed confidenter
admittat, si indicationes adsunt, uti jam pluribus
superius Sect. I. cap. IX. de febre purpurata obs.
VI. p. 220. monui. Quando autem provida, ut
ita loquar, natura, cessantem aut insufficientem
lochiorum evacuationem liberali sudore, aut alvi
fluxu compensat, abstinendum ab iis, quæ lochiis
proritandis alias serviunt.

§. V.

*Ulceratio-
nis medica-
tio.*

Quando autem humor ex utero fertur visci-
dus, flavus & sanguinolentus, haud obscurum
præbet indicium læsæ uterinæ substantiæ & im-
minentis inflammationis atque ulcerationis. Ad
hanc igitur arcendam, vel si jam præsens est per-
sanandam, tuta quam maximè est ac necessaria
crebrior purgatio ex rhabarbaro, tamarindis &
manna, quæ frequenter iteranda est, quo vitiosi
ab utero humores divertantur. Tanti enim hæc
ad curationem est momenti, ut *Forestus lib.*
XXIX. obs. XLVIII. fidem faciat, quendam
Amstelodamensem nobilem matronam ab ulcere
uteri sanitati reddidisse, cui dederat de quarto in
quartum diem uncias quinque decocti fennæ,
epithymi, rosarum rubrarum, myrobalanorum
Indorum, saccharo dulcorati, & abstergentia de-
cocta in uterum injicere jusserat. Si ulcus adhuc
curandum est, post lenes aliquot dierum purgatio-
nes, decoctum ex santalo, lentisco, sarsaparilla,
mentha, epithymo, radice liquiritiæ & ligno Rho-
dio, per viginti quinque dies cum regimine sudo-
rifero cum fructu bibitur, qua de re pluribus con-
suli potest *Sylvaticus Cent. IV. obs. LXVIII.*

§. VI.

Ulcus uteri cancri ulcerati naturam æmulatur, *Cancris au-
xilium.* tumque sanies putrida & lacinia corruptæ uteri-
næ substantiæ cum magno foetore, summo dolo-
re gravibusque symptomatibus prodeunt, & ma-
lum fere est incurabile. Quicquid autem agen-
dum, non nisi demulcentibus & lenientibus per-
ficiendum. Si spes sanationis adhuc superest, ego
quidem habeo quod laudem potum lactis, po-
tissimum asinini, nec non usum temperatarum
mineralium aquarum, Wildungensium maxime,
vel Selteranarum, interposito mane & vesperi
balneo aquæ dulcis cum furfuribus triticeis, in
quo per horam & longius desidendum. Vicissim
abstinendum ab omnibus acerbis internis & sti-
mulantibus calidis. Caute etiam in uteri abscessu
ac ulcere adstringentibus & repellentibus uten-
dum, quia iisdem facile scirrhus inducitur. Op-
timæ injectiones ex lacte caprillo, croco & aqua
florum sambuci. *Hippocrates* brassicæ usum com-
mendat, sed præstat betæ rubræ succus, crebrius
calide injectus.

§. VII.

Immanis sæpe dolor exulcerato uteri cancro *Dolores complacidi.*
jungitur, qui vires penitus pessundat, omnem-
que somnum adimit. Ad hunc leniendum opti-
mum solatium in anodynis, cujus generis sunt
extractum croci & papaveris, massa pilularum
de styrace, de cynoglossa, *Wildegansii, Matthiæ,*
Starckii. Notabilis enim hanc in rem *Riverii*
Prax. cap. X. pag. 332. locus: hæc tamen omnia,
inquiuntis, aliquando non sufficiunt ad immansi-
mum dolorem placandum, qui interdum nullum
quieti & somno relinquit locum. Unde cogimur non
raro ad narcotica recurrere, quæ in hoc affectu
propter intensum humorum fervorem minus no-
cent. Et vidimus nos mulierem, cancro in mamma
laborantem, quæ singulis noctibus, per quatuor
menses, laudani grana duo, vel tria, innoxie,
cum magno solatio sumebat.

ENARRATIONES MORBORUM.

OBSERVATIO I.

Laborarat per aliquot menses largo sangui-
nis ex utero profluvio foemina sexaginta sex an-
norum, cholericæ, macilenta & in iram prona,
multos in consilium adsciverat medicos, & va-
riis etiam usæ fuerat medicamentis, sed incassum.
Tandem accedens junior quidam medicinæ pra-
cticus, suavit externa, partim calida & acrida,
partim adstringentia & aluminosa. His fluxus
quidem cohibitus, sed dolores aborti atrocissimi,
ac brevi post loco sanguinis materia saniosa fo-
etidissima effluxit, accessit lenta febris, corporis
tabes, summaque imbecillitas. Notabile in pri-
mis fuit, quod ægra, quando aliquid de pilulis
Anglicanis Matthiæ, quas etiam Starckianas vo-
cant, deglutivit, doloris intolerandi senserit ali-
quod lenimen, hoc autem omisso, illico recrui-
derint tormina acerbæ. Semper etiam aliquid
materiæ foetidæ ex utero secessit, hac autem re-
tenta, accesserunt protinus borborygmi in abdo-
mine, spasmi flatulenti, hysterica pathemata,
cardialgiæ & circa præcordia anxietates. Sic
ægra per biennium miseram traduxit vitam, ac
dum macie & febre confecta fatis cessit.

Epicri-

Epicrisis.

Imprudens medicationis hæmorrhagiæ uteri hoc est exemplum. Nunquam enim sanguinis profluvium, ubicunque fiat, five internis, five externis sistendum, sed potius roborantia cum discutientibus mixta exterius, si interna non suffecerint, parti affectæ laboranti sunt admoventia. Si secus fit, & sliptica constringentia in usum vocantur, aliter fieri nequit, quam ut sanguis in coagulum abeat, in vasis subsistat, ipsamque uteri substantiam labe inficiat. Anodynis autem dolores quidem tantisper sopiti, sed non in totum sublati, quia putridæ corruptioni auferendæ non fuerunt idonea. Et quod ab impeditiori materiæ saniosæ effluxu pathemata hysterica oborta, argumento est, non tantum à sanguinis & humorum copia atque stagnatione, verum etiam à materia acri caustica, fibras uterinas irritante, pathemata ejusmodi spasmodico-hysterica suscitari posse.

OBSERVATIO II.

Fœmina quadragenaria, sanguinea, plethorica, quarto mense gravida, suasu mariti, ut vegetior esset & infantem quoque robustum ac sanum ederet, sumsit pulverem *Monckii*, Ramoneur dictum, qui nihil aliud est, quam antimonii regulus cum nitro in calcem ustus. Successit autem effectus oppido infelix, ut plus quam vigesies vomeret, miramque experiretur debilitatem. Ex eo pessime semper habuit & post quatuordecim dies accidit abortus, quem præcessit dolor in inguine atrocissimus, & sub ipso cum lochiis fecessit materia graveolens. Passio abortu, perpetuos & fixos in abdomine ac inguine dolores experta est, pulsus semper fuit celer, interdum animi quandam defectionem incurrit, interdum etiam tussi & articulorum dolore divexata. His symptomatibus per aliquot menses graviter detenta, nacta est tumorem in abdomine, cum dolore lancinatorio jugi & alvi fluxu torminoso. Sequuta est summa corporis imbecillitas viriumque prostratio, extremorum refrigeratio, spirandi difficultas & frequentius syncope, donec tandem inter hæc vitam poneret. Dissecto post mortem cadavere, ingens puris ex albo viridescentis copia ad aliquot libras ex abdominis cavo profluxit. Intestina utero propinqua erant erosa, eorumque tunica comparuerunt quasi abrasæ. Uterus fuit spongiosus & ita ampliat, ut in longitudine ad decem, & in latitudine ad octo transversos digitos accederet. In ipso lacunæ fuerunt multæ, pure repletæ, ex quibus ingens illa puris quantitas in abdomen fluxerat. In vasis sanguiferis majoribus, nullus repertus sanguis, sed omnis fere in puris abierat materiam.

Epicrisis.

Quam perniciofa gravidis sint emetica & quidem validiora, ex hoc casu patescit luculenter. Quæ enim uterum gerunt, sunt fere semper plethorica, eaque propter fortiori illo nisu & pressione diaphragmatis & musculorum abdominis sub vomitu, sanguis cum magno impetu in uteri vasa urgetur, ibique impactus, inducit inflammationem in ulcus transeuntem. Hinc igitur abortus & reliqua gravia pathemata duxerunt ortum. Non tamen dubitandum, quin par-

Frid. Hoffmanni Oper. Tom. II.

tu abacto, gravissimum illud malum, uteri apostema, potuisset præscindi, si mature discutientia, resolventia & roborantia in auxilium fuissent vocata. Pus autem ex utero effusum in abdominis cavum, tunicas intestinales arrosit ac erosit, unde obortus alvi fluxus, cum intensis abdominis torminibus.

OBSERVATIO III.

Elapso anno vocabar ad mulierem tertium supra quadragesimum ætatis annum agentem, sanguineo-cholicam, quæ misere decumbebat, conquesta potissimum de dolore in regione pubis pressorio & elisorio quasi atrocissimo, partus dolores longe superante, stipato cum tenesmo, dorsi tensione, ructibus, vomitibus & alvi strictura, somni appetitusque defectu. Inquirenti in morbi causam & originem, dixit: se ante octodecim annos ultimo laborioso admodum partu esse perfunctam, tam male simul ab obstetrice tractatam, ut vestigia digitorum impressa adhuc in pube gerat. Tum menses, antea semper largos & ordinatos, post puerperium primum cum dolore aliquo stillasse, servasse tamen periodum postea & sufficienter etiam fluxisse. Ante sex autem annos se mensium tempore cecidisse in itinere in torrentem: inde mox constitisse fluxum & sequuta multa & varia pathemata spasmodico-hysterica, quin post aliquot menses corpus intumuisse totum, cum colore plumbeo. Difficillimum tamen congruis remediis esse post aliquod tempus tumorem & mensium fluxum etiam repetisse, excreto multo coagulato crasso & quasi concreto sanguine, ac postea viscida alba & flavida materia. Ex eo, quotiescunque mensium accesserit periodus, se per triduum acerbis in abdomine afflictam esse doloribus, tamdiu insistentibus, donec sanguis prodierit grumosus primum & crassus, dein tenuior, tum aqua sanguinolenta ac demum materia viscida flava. Sic transisse quatuor fere annos, & adhibitis interea variis medicamentis, maxime pilulis Stahlianis, cum pulvere salino temperante, spem valetudinis melioris fuisse irritam, malum potius increvisse magis. Jam à binis mensibus & dolorem & fluxum sanguinis emanasse, nunc vero eo esse graviolem & spasmos quasi convulsivos. Hæc audiens & atrociam pathemata videns, male statim ominari cœpi, ac scirrhum, aut aliud immedicabile uteri vitium subesse sum suspicatus. Interim alvum valide strictam clystere oleoso emolliente cum asa foetida subducere, interius pulverem temperantem cum nitro, cinnabari & castoreo, nec non liquorem meum anodynum mineralem dedi, & exterius parti dolenti admove-re jussi vesicam decocto emolliente plenam. His dolorum atrociam primum frangi est visa, & elapsi nonnulli sanguinis grumi, subsequente liquore sanguinolento. Sed post aliquot dies vehementia recruduerunt eadem, ut ægra lamentabili voce uterum extrorsum trahi violenter & jam vaginæ imminere clamaret. Advocata obstetrix, quæ orificium uteri apertum esse, eique durum quoddam corpus incumbere dixit. Data priora remedia, sed frustra. Parati infessus, momentaneum levamen afferentes, imposita exterius, ex muliercularum etiam consilio, varia carminativa, spirituosæ & acria, incassum tamen, & accessit capitis dolor. Optimum fuit solatium ex pilulis, quæ pilulas aleo-phanginas ac de styrace cum croco & cinnabari habebant. Sub his doloribus iterum aliquot

*Cancer uteri
vileshalis.*

sanguinis grumi & postea sanguis floridus parvus exiit, stillante postea liquore cruento. Sic decubuit aliquamdiu, doloribus, modo gravius, si fluxus resistebat, modo mitius, si excretis sanguinis grumulis quibusdam serum manabat sanguinolentum, afflicta, simul quoque tumorem sensit durum in latere sinistro supra inguina. Adhibita interea pro circumstantiarum ratione varia, tandem impositum emplastrum efficacius discutiens atque resolvens, quo admoto, formicationis quendam in regione tumoris percepit sensum, dolores mitiores affligerunt, & post triduum primum iterum sanguis grumulosus, tum tenuis & serum non cruentum, sed magis flavescens ichorosum, ac post aliquot dies materia crassa sebacea flavescens profluxit. Secessit hæc materia aliquamdiu ac ægra tolerabilius decubuit, usque interius, infuso ex herbis vulnerariis cum lacte, balsamo quoque ad imitationem balsami *Locatelli* parati, axungia canis cum herbis traumaticis confecta & exterius injectionibus modo lenientibus, modo abstergentibus & balsamicis. Nihilominus tamen latius serpsit labes interna, pus & sanies foetida, quin non nunquam laciniae quasi corruptæ carnis prodierunt, vires morbi diuturnitate sensim collapsæ, corpus contabuit, appetitus periit, calor hecticus increvit, urina per octiduum suppressa cathetere fuit evocanda, somnus intercidit, accessit demum mentis alienatio, quam triduo post excepit mors, elapsis inter hæc tribus mensibus.

Epicrisis.

Plurimi certe sunt morbi, etiam ipsius *Hippocratis* effato, qui ex utero prodeunt. Hic enim propter plane singularem vasorum fibrarumque structuram, dispositionem & situm, ita à sapientissimo opifice est fabrefactus, ut non solum ad generationis negotium aptus sit, sed etiam, ut superflui & effæti in corpore muliebri humores serosi, nec non ipse sincerus nimium exundans sanguis, salutari plane modo & motu, per ipsum foras ejiciantur. Huic scopo maxime quadrat tanta vasorum sanguiferorum copia & serpentinus ac inflexus eorum progressus ac cursus, quo scilicet propter paulo tardiores & difficiliorem sanguinis & humorum per uterum transitum, eo melius inutilis & superflui humoris fiat se- & excretio. Interim propter eundem hunc difficilem ac segnem humorum commeatum, non secus ac in hepate, multæ stases & stagnationes & inde obstructions, indurationes, extravasationes, scirrhotitates, fecundissimæ morborum matrices, gignuntur. Quin imo quia in hoc viscere remota & obstaculum sæpe ponitur universo sanguinis libero & æquabili circulo; fit, ut in aliis partibus, propter majorem sanguinis motum & impetum, functiones sæpe totius corporis labascant & vitium contrahant, ut in pathematibus sic dictis hysteriis clarum est ac manifestum. Multum itaque ad sanitatem mulierum refert, ut hæc pars salva, facta & tecta omnibus modis & artificiis conservetur. Parva enim ibi consistens labes, magnas perturbationes efficere potest. Clarissime id videmus, quando sub partu laborioso atque difficili, præsertim ab imprudenti obstetricum tractatione, labes in parte quadam uteri contracta fuit, quæ sæpius facit, ut ab eo tempore nunquam recte convalescant puerperæ. Atque etiam ea est natura vitiorum, quæ utero longius insident, ut demum post multos annos per-

nicialem suum effectum prodant, uti quidem etiam ex nostra morbi historia liquet. Morbus autem quo laboravit nostra recte pro cancro uteri, qui ex scirrho demum ulcerato productus fuit, haberi debet. Sed uti ego nunquam exulceratum cancrum, cujuscunque partis fuerit, medicamentorum ope curatum vidi; ita eo magis uteri cancer incurabilis est, quia minus commode externorum topicorum applicationem admittit. Neque etiam aliis symptomatibus incedit uteri cancer, neque alio modo interficit, quam febre succedente lenta, eodem modo ac is, qui in mammis consistit. Præter dolores quippe immanes & putridas foetidas varii coloris & consistentiæ emanantes sordes, cum sanguine sæpe mixtas, totius corporis languor, prostratio virium, hecticus & consumens calor, somni defectus & animi deliquia accedentia, vitales tandem motus extinguunt. Providendum igitur cum cura ac eo anitendum, quo apto consilio ejusmodi atrox & funestum malum arceatur. Jam ego certe non aptius ad roboranda uteri vasa & sanguinis cursum liberum & salvum tuendum, adeoque ad omnis generis morbos inde propullulantes præscindendos, maximeque etiam ad hujusmodi scirrhotitates valde suspectas amovendas, præstantius & certius novi auxilium, quam post abortum vel post partum, usum laxantium balsamicorum, uti nostræ sunt & aliorum balsamicæ pilulæ, item balnea ex herbis roborantibus & nervinis, vel etiam potum aquarum mineralium cum accuratiori diætæ & vitæ regimine. Quare ut medicus hæc remediorum genera multum, imo plurimum ad averruncandas morbosas, quæ ex puerperio oriuntur, affectiones, commendata sibi habeat, serio inculco.

OBSERVATIO IV.

Generosæ foeminæ triginta annorum, sanguine & succis plenæ, quum feliciter peperisset & secundinæ etiam prodissent integræ, substitit ^{Febris uterina sudor soluta.} mox sanguis lochialis, ac tenuis tantum materia profluxit ex utero. Hinc ad emovenda lochia, & à medicis, & à mulierculis, multa calida & pellentia exhibita fuerant medicamenta. Sed frustra, spasmi enim ac dolores imi ventris, quin tertio die febris acuta & continua accesserunt, & ægram in magnum discrimen adduxerunt. Petito à me consilio, suasi, ut primo omnium vena pertunderetur in pede, ac clyster postea molliens injiceretur. Factum utrumque & dolores mitigati, febris tamen cum pulsu duro & celeri persistit. Quum vero septimo die sudor erumperet, & per quatrimum ex universo corpore manaret tam largus, ut lectus & lintheamina aliquoties essent mutanda; vires quidem multum dejectæ, sed febris cum omnibus aliis symptomatibus sublata. Hinc sub sudore juscula tantum pullorum cum succo citri data, post eum vires analepticas, tam pharmaceuticas, quam diæticis resectæ, & sic sanitas rediit perfecta, ad quam confirmandam, elapsis quatuordecim diebus, uterum infuso laxante rhabarbarino, cum aliis congruis nupto, expurgare consului.

Epicrisis.

Notatu dignus ob id hic est casus, quod fere plane defecerit lochiorum fluxus, puerpera tamen servata. Ego vero notavi, difficiliorem semper esse lochiorum effluxum in foeminis, quæ vasa

vasa gerunt exilia & habitum corporis spongiosum. Sunt tamen hæ proniores in sudorem. Hæc provido naturæ instituto factum est, ut febris cesserit in medicinam, cujus beneficio stagnantes in vasculosa uteri compage humores sanguinei, ut in aliis inflammatoriis febribus, resoluti atque diffusi, simul etiam corpus per liberalem sudorem à superfluis humoribus repurgatum saluberrime. Nam recte scribit *Celsus lib. V cap. VIII. medicamentum sacri ignis fortissimum est febris, quæ humorem noxium absorbit.* Ita sæpius natura compensare solet defectum excretionis cujusdam in certa parte, per eo uberiores in alio emunctorio succedentes. Igitur cautelæ loco servetur: nunquam invita natura, vi quadam urgendas esse & movendas excretiones.

OBSERVATIO V.

Febris uterina sine venæ sectione sanata.

Honestæ foemina, tenera & macilenta corpore, animo alacris, vigesimo secundo ætatis anno feliciter enitebatur filiolum, altero statim die; post admissam ultimam venæ sectionem. Post partum parcius secesserunt lochia, graves in abdomine, dorso & inguinibus oborti dolores, quinto die accessit vehemens febris, cum inquietudine, præcordiorum anxietate, insomnia, magna impatientia & interveniente subinde delirio. Datum de venæ sectione consilium, sed quia haud ita pridem administrata, admittere noluit. Hinc ob alvum adstrictam injectus clyster emolliens, ex decocto avenaceo, cum floribus chamomillæ vulgaris, herba & floribus hormini, oleo chamomillæ cocto, addito nitro. Data postea quotidie; bis, vel ter, cum tenui juscule dosi pulveris hujus: recipe solutionis oculorum cancri, salis polychresti, nitri puri, lapidum cancrorum ana drachmam. M. dividatur in XII. partes æquales. Circa noctem deglutitæ viginti pilularum harum: recipe pilularum marocostinarum drachmam, extracti rhabbari scrupulum, extracti croci, castorei ana grana sex. M. f. pilulæ ex scrupulo uno no. XX. His per quinque dies usurpatis, alvus soluta & aliquot sedes quotidie motæ; nono quoque die fluxus humoris putridi & sanguinolenti ex utero adauctus, & successive ægra sanitati reddita.

Epicrisis.

Quando natura ex variis, sæpe occultis causis, corruptum sanguinem & humorem ex utero vel plane non, vel insufficienter, post partum emovet, ac inde imminet periculum, medicus, si non per ordinarias vias potest, per alia congrua emunctoria, noxium expurgare debet humorem. Sed quia febris adest, minus tuta sunt evacuantia, præsertim per alvum. Hinc lenienda tantum hæc, quod optime fit per clysteres atque nitrosa. Stagnantes dein humores resolvendi, quem in finem utilissimus fuit pulvis ille ex neutris salibus, innocentis & tamen præstantissimæ virtutis. Demum tentanda lenior alvi stimulatio, per innoxia etiam & clementia balsamica laxantia. Quod si ex voto succedit & vires decumbentis respondent, aliquamdiu est continuandum. Tutius enim semper est puerperas purgare per alvum, quam sudorem. Quam in rem peculiarem laudem sibi vindicant pilulæ Becherianæ, vel ad earum exemplar paratæ correctæ, quæ certe in mulierum morbis, præsertim qui in puerperio accidunt, leni evacuante

& simul roborante virtute, omnia reliqua antecellunt, si perite & cum aliis congruis in usum vocantur.

OBSERVATIO VI.

Fœmina acutioris sensus, macilenta ac tenera, viginti octo annos nata, pathematibus hypochondriaco-hysterics obnoxia & aliquoties abortum passa, pepererat novissime filiolum laborioso admodum ad tres dies extracto partu, post quem nec secundina eliminata, nec lochia evacuata. Sequuti hinc dolores abdominis totius, præsertim sinistri lateris, cum febre, vomitu, dyspnœa, inquietudine & cardialgia. Ego in consilium vocatus, tertio post partum die secare jussi venam pedis, ad uncias minimum quinque, & injicere enema ex sola aqua pluviali tepida, cum una drachma pilularum Becherianarum, mellis cochleari, adjectis duabus olei chamomillæ cocti unciis & dimidia salis Ebshamensis. Sic alvus bis subducta & cardialgici dolores cum vomitu depulsi. Ad æstum autem extinguendum pulveres nitrosi dati, & ad mulcendos dolores, sperma ceti cum extracto croci in juscule avenaceo. Septimo die quum æstus defervesceret, lochiale fluxum per usum pilularum nostrarum balsamicarum, item sale aperitivo ex lapidibus cancrorum, terra foliata tartari & sale polychresto, nec non infuso theiformi ex melissa, pulegio, floribus cheiri, calendulæ & chamomillæ promovere studui. Quibus male olens sanguinolentus humor è putrefacta secundina, quin integra hujus frustula excreta, & ægra præter omnium spem, intra tres hebdomades, sensim sanitati reddita. Quinta demum puerperii hebdomade infusum laxativum roborans uterinum, ex radice vincetoxici, pimpinellæ, rhabbaro, agarico trochiscato, semine levistici, herba melissæ, floribus salviæ, foliis sennæ sine stipitibus, passulis & tartaro crudo, ad aliquot dies bibendum obtulimus.

Epicrisis.

Fœminæ quæ spasmodicis hypochondriaco-hysterics & flatulentis passionibus obnoxia, sensibilibus ut plurimum naturæ, difficulter pariunt & gravius quoque in puerperio ægrotant. Spasmi enim, ad quos naturæ jam dispositæ; non modo debitum sanguinis lochialis effluxum, sed & secundinarum exclusionem sæpe intercipiunt. Quin, dum per spasmos sanguis motu inverso ad superiora, caput, pectus & stomachum urgetur: accidunt illa symptomata gravia; dolor sinistri lateris in stomacho & colli flexura, cardialgia & vomitus. Tum itaque præstabilius non suppetit auxilium, quam venæ sectio in inferioribus instituta & alvi subductio, quibus sanguinis motus ad inferiora revocatur simulque materia, quæ oneri naturæ est, ac fovet & sustentat sæva illa symptomata; expurgatur. Quum vero pilulæ balsamicæ ad secundinarum & lochiorum emotionem virtutis sint celebratissimæ; propter dolores tamen & vomitionem ore assumi nequiverint, optimum; ut sæpius expertus sum, fuit consilium, easdem dissolvere & cum clystere per os inferius injicere. Sedato post ea motuum impetu ac æstu, ipsa natura sponte materiæ putridæ ex secundina corrupta egressum est molita. Quem ductum sequi & molimen secundare fuit ex usu. Non tamen prætereundum;

post septimum diem, nostram affectam fuisse horripilatione quadam & frigore, intercurrente æstu, ac in situ erectiori lipothymia, quod procul dubio ab incipiente corruptione secundinæ accidit. Necessarium autem, sicuti in omni post puerperium morbo, sic etiam in hoc fuit, uterum cum primis viis, ultimis hebdomadibus, quando vires redeunt, convenientibus laxantibus & roborantibus expurgare, non neglectis, pro circumstantiarum ratione, balneis ex herbis nervinis ac uterinis.

OBSERVATIO VII.

Febris merina repetita venæ sectione & sudorifero curata.

Puerpera habitior, plethorica, exposuerat quinto post partum die corpus auræ frigidiori, simulque gravi terrore propter exortum incendium fuerat perculsa. Mox inde male habuit, lochiorum fluxus substitit, dyspnœa accessit, dolor acutus sinistri lateris thoracis, cum tussi sicca, pulsu duro, celeri & præcordiorum anxietate. Data mixtura diaphoretica & discutiens & postera die secta in talo vena est. His respiratio quidem facta liberior, sed fluxus lochialis non revocatus. Hinc exhibitum crebro infusum theiforme ex herba veronicæ, cardui benedicti, floribus salviæ & radice liquiritiæ, repetita quoque mixtura modo laudata. Nil tamen profectum, pulsus mansit celer, dolor persistit, mox fuit inquieta, leviter etiam deliravit & nares aliquot guttas stillarunt. Quare quum sanguine redundaret foemina, iterum in cubito vena pertusa, & postea datus liquor anodynus, cum quarta tincturæ bezoardicæ parte & grano camphoræ. Quo sudor per universum corpus viginti quatuor horas effulse manavit, post quem alvus clystere molliente subducta est. Demum rursus prodierunt uteri purgamenta, & ægra ex ancipiti est laxata.

Epicrisis.

Puerperis nil certe perniciosius, quam frigus & terror. His enim spastica inferitur strictura, sanguinis motus ad caput & pectus convertitur, lochiorum fluxus sistitur, pedes frigent, alvus stringitur, caput rubet & tumet, somnus fit turbulentus, delirium leve ingruit, ac nisi cito succurritur, aut phrenitis, aut lipothymia graves, mortis prodromi, accidunt. Hoc si evenit, præstantius non est remedium venæ sectione, etiam reiterata, & clysteribus lenientibus iterato, si necessitas urget, injectis. Post sanguinem autem missum conducit efficax sudorifero cum regimine congruo datum. In hoc casu, ubi spasmi & dolores symptomatum causa, liquor meus anodynus, qui tutissimæ virtutis sedativæ, cum sudorifero, uti spiritu cornu cervi succinato, aut spiritu bezoardico *Bussii* datus, ad sudorem movendum & motum humorum exterius vertendum, optimum fuit præsidium. Sola enim anodyna non suffecissent, neque etiam sola sudorifera, sed ambo mixta & quasi ad temperamentum reducta. Ratio vero, quare frigus tam pernicialia in puerperis inducat pathemata, est acutus sensus orificii ipsius uteri, quod ex multis fibris nerveis & musculosis contextum, & quo à spasmis gravius affecto, universa œconomia motuum salutarium, tam secretiorum, quam excretiorum potest inverti. Nam vere scribit *Hippocrates lib. II. epid.* post partum os uteri sæpe contorqueri & dolorem fieri juxta coxam & crus, sed secta tali vena liberari. Quem in lo-

cum *Mercurialis præl. Bonon.* commentatur hunc in sensum: contorsionem uteri esse affectum, in quo os uteri discedat à propria regione. Tandem in nostra etiam commemorabile, quod secunda venæ sectio in cubito plus effecerit, quam prima in talo. Est tamen hoc non perpetuum. Quod si enim lochia subsistunt, præstat semper in inferioribus sanguinem post pediluvium subtrahere. Sed quando sanguis jam cum impetu ad caput delatus, ad arcendam phrenitidem, satius est, in loco propinquiori impetum derivare. Mihi certe aliquot innotuerunt exempla, ubi lochiis subsistentibus, purpurata febris oborta, cum gravissimis symptomatibus, lipothymiis, præcordiorum anxietatibus, mortem ipsam minitantibus, quæ tamen missa in brachio & derivato à corde & appensis ipsi majoribus tubis sanguine, mox per DEI gratiam discussa.

OBSERVATIO VIII.

Illustrissima persona triginta aliquot annorum, habitu corporis laxo & pleno, sanguinea, antehac optima valetudine usa, sed ab aliquot annis, ob præmaturum conjugis discessum, impenso more alioque crebris animi commotionibus affecta, multis quoque arduis negotiis distenta, minusque salubrem victum colens, ante quadriennium incidit in pectoris oppressionem & spasticam ventriculi inflationem, quæ tamen interno & externo Carolinarum mitiorum usu abacta, ut postea belle valeret & mensium quoque successus legitimus esset atque sufficiens. Anno autem abhinc, post superatam febrem continuam & perpeffos diuturnos catarrhos, primum turbari coepit mensium fluxus, modo maturius modo serius semperque cum exquisitis ventris torminibus ac dorsi tensione prodire. Recruduerunt quoque pathemata spastica hypochondriaco-hysterica & accessit stillicidium muci rubicundi ex utero perpetuum, cum virium languore, appetitu prostrato, somno turbato & plumbeo corporis aspectu. Quin, quum nuncio adverso admodum percelleretur instante mensium periodo, præter superiora pathemata, dolor acutus in hypogastrio obortus, ac si omnia ex imo ventre vi quadam deorsum urgerentur, secedente simul cum difficultate urina turbida feculenta, intermixtis mox cruoris lenti grumulis, mox fibris & filamentis cruentis. Potissimum dolor acerbissimus compunctorius confedit fixus in hypogastrio, supra os pubis, in circumscripta regione, magnitudine dimidii uncialis, ex qua antrorsum ad vesicam, retrorsum ad sacrum os, inferius versus femora excurrit, superius autem venter flatibus fuit cum molestia obsessus. Interim ad hypochondriaco-hysterica pathemata & stomachi vitium tollenda ad Carolinas iterum tendit, iisdemque sub debito regimine interius atque exterius est usa. Quibus ventriculi & intestinorum dispositio morbofa emendata, uteri autem vitium, nec in deterius interea, nec melius mutatum. Idem potius persistit, & interjecto aliquo tempore, eo processit morbus, ut post spasimum in infernis, semper mox sanguis sincerus, nunc spissior, nunc crassior, mox concrementum quoddam coagulatum & quasi membranaceum secederet, difficultates tenesmodis sub mictione & cacaturitione essent perpetuæ, per alvum mucositates globosæ ac teretes, modo cum, modo sine excrementis, evacuantur, urina excreta turbida cum sedimento limoso, subroso & cuticula cærulescente pituitosa, pulsus maximam partem esset exilis, debilis ac fre-

Uteri stillicidium perpetuum cum gravibus symptomatibus.

frequens, corporis & faciei habitus pallidus admodum, extenuatus, appetitus inconstans, tussicula sicca, agrypnia propter dolores in hypogastrio exquisitos parum cessantes ferme habitualis, post partum phlogoses affligerent, refrigerationes artuum sæpe recurrerent, vires collaberentur & quandoque deficerent plane.

Epicrisis.

Ad oppugnandum gravem hunc morbum in consilium vocati medici multi, & plures forsan, quam expediebat, in diversum plane abeuntes. Aliqui enim calculum & nephritidem esse volebant, alii malum hypochondriacum, alii scorbutum, alii affectum hypochondriaco-spasticum hystericum, alii orgasmum furiosum. Ego vero, cum ordinario & celeberrimis binis medicis censui, vesicam, uterum & rectum intestinum arctius invicem connexa & in cavitate pelvis comprehensa, à sanguine & succis stagnantibus esse infarcta, eorumque vasa & glandulas relaxata partim esse nimiumque distenta, partim læsa, plane erosa atque exulcerata, & hinc prodire illum fluxum uteri perpetuum & pressorium illum etiam sub alvi & urinæ excretionem dolorem atrocem. Dedi etiam consilium, ut adhiberentur ea, quæ partes affectas à spasmis & inflammatione defendant; quæ nimium humorum affluxum ab iisdem avertant eademque tam interius quam exterius mulceant, roborent atque consolident, pulveres scilicet temperantes nitrosos, pilulas balsamicas, infusa theiformia, ex melissa & millefolio, potum ordinarium Selteranarum cum quarta vini parte, epithemata & emplastra discutientia & roborantia, injectiones quoque in uterum circumspecte factas demulcentes & balsamicas, & postremo omnium saluberrimum lactis asinini potum, aliquamdiu continuatum, interposito subinde balneo tepido, ex aqua dulci cum lacte & furfuribus triticeis. Sed uti fieri affolet in principibus personis, ut multi medici perdant ipsas, ita heic etiam, & multa, & varia, quin non nunquam incongrua plane, usurpata sunt remedia, & quod præcipuum est in longis ejusmodi vitiis rejectum, diu continuatus accommodorum medicamentorum leniorum usus. Hinc sensim, uti comperi, in pejus ruit malum, pathemata magis adaucta, corpus plane contabuit, vires exhaustæ, & vix alius eventus sperandus, quam quem in simili fere casu supra *observatione II.* accidisse meminimus.

OBSERVATIO IX.

Illustris foemina, triginta & trium annorum, sana & vegeta, post partum conquerebatur altero statim die de insigni ardore, dolore & tumore in interioribus vaginæ, à rudi contrectatione obstetricis colli uteri interni, inducto. Exacerbatis postea symptomatibus, accedente febrili æstu & lochiis etiam non rite fluentibus, advocabatur Archiater. Is venam secare jussit in brachio. Quo quum nil levaminis accederet, sed præcordiorum anxietates, cordis palpitaciones & inquietudo intenderentur, alvus quoque cum pedum frigore stringeretur, decoctum mannatum cum cassia dedit, & spatio septem dierum, sexies misit, modo in brachio, modo pede, sanguinem. Sed quum postremo id fieret, agræ oculi coeperunt obfuscar, ut candelam inferre juberet, quum dies esset quam lucidissima, quin brevi post lethali lypothymia correpta obiit. Die post sectum cadaver, nil autem repertum, præter tumorem vaginæ, cui infidebat macula nigra dimidii uncialis magnitudine,

ad internum uteri orificium, ac in toto vasorum systemate vix aliquot resistabant sanguinis cochlearia.

Epicrisis.

De veritate hujus historiae testis ego sum *ἀυτόπτης*. Quilibet autem illico judicabit, temerarie & imprudenter tam crebro administratam esse venæ sectionem, à medico, qui in Gallia hoc artificium edoctus, & alias ob peculiarem variolas & petechiales febres curandi modum non est ignotus. Dolor enim & spasmus ac inflammatio facili negotio, applicato parti dolenti epithemate discutiente & datis interius blandis diaphoreticis, potuissent abigi. Nimia vero sanguinis subtractione, & lypothymia inducta, & sphacelus contractus, licet unica non nocuisset venæ sectio. Nam ipsa inflammatio sufficienti & valido sanguinis appulsu discutienda, eodemque plus justo subtracto, necessario sequitur sphacelus. Igitur sicuti plures medici delinquant in eo, quod in inflammatoriis puerperarum affectibus sanguinis missionem repudient omnem; ita heic in excessu peccatum fuit graviter. Sed medium tenuere beati.

CAPUT XI.

De Inflammatione oculorum cum & sine febre.

THESES PATHOLOGICÆ.

§. I.

Frequentissima est inflammatio membrarum oculum investientium, tunicae præsertim adnatæ, sive albuginæ, græco nomine dicta ophthalmia. Jungitur hæc cum dolore acuto, interdum & pressorio, ardore, rubore, tumore & feri falsi ex oculis effluxu, nec non visu imminuto, vel plane deperdito. Oritur autem, quando vasa arteriolarum lateralia, quæ secundum naturam pellucidum nulloque colore infectum liquorem vehunt, à sanguine valide ad caput congesto implentur, distendantur & visui sese offerunt. Hanc enim causam esse, patet experimento, quo injecto per siphonem in carotidis ramum liquore spissiusculo rubicundo, adnata oculi tunica, per omnem sui ambitum rufescens & inflammata comparet.

Ophthalmia descriptio.

§. II.

Est autem ophthalmia, vel levior, vel gravior, vel etiam gravissima. Levior albuginæ tantum tunicae insidet, nec tam late diffunditur, facilius discutitur, & oritur potissimum à causa externa leviori, insperso pulvere, appulsu asperioris, plaga aut allisu leniori, aura liberius admissa frigida & sudore subito represso, nec non ab administrata cataractæ depositione. Gravior, præter adnatam, etiam confines palpebras infestat totumque oculum exquisito ardore & dolore afficit, qui ad levem lucis accessum exacerbatur. Enascitur hæc maxime à causis internis, feri nempe impuritate & salutaribus excretionibus cohibitis, ac uti ego observavi, à suppresso solenni matutino sudore, à scabie, nec non tinea capitis intempestive abacta, à cohibitis mensibus, ulceribus & fistulis consolidatis, item repulsa rosacea gutta, & propterea ægrius, nec nisi internis & externis adhibitis, discedit. Gravissima demum profundior est, ad ima oculi & interiores tunicas penetrat. Comitatur hanc dolor acerbissimus cum febre, quandoque etiam cum delirio, sequitur suppuratio & humo-

Levior est; gravior, vel gravissima.

rum effluxus, remanente cœcitate perfecta. Rarius tamen à causis internis, sed plerumque à contusione validiori inducitur. Vidi ego suppurationem excidente lente crystallina, post ictum fortem inter pugillandum oculo inflictum, vidi vero etiam talem casum à tinea capitis inveterata, subito externis siccata.

§. III.

Vera, vel
notha.

Deinceps alia ophthalmia est vera, alia notha, sive spuria. Veræ causa maxime interna & symptomata graviora, à sanguinis in tubulis stasi, ægrius abigenda. Spuria à causa magis externa, uti pulvisculo in oculos illapso, à vapore acri, ceparum & allii, symptomata hinc sunt mitiora & facilius cedit ipsa. Alia sicca est, alia humida. Illa fit à sanguine calido, cum dolore acuto, pungitivo, ac nil ex oculo effluit. Hæc mitiori quidem stipatur dolore & ardore, sed palpebræ tument & multum feri acris effluit, ut oculi noctu conglutinentur. Illa frequens sanguineo-cholericis, juvenibus ac æstivo tempore, hæc pueris & infantibus, nec non foeminis & phlegmaticis.

§. IV.

Epidemica
& periodica.

Datur quoque ophthalmia epidemica & periodica. Epidemica enascitur certis anni temporibus à diuturna humida & frigida aëris constitutione, post quam ophthalmicum morbum plures invadere sæpius observavi ac idem testatur *Amatus Lusitanus Cent. VII. obs. LXXX*. Quæ autem certo quodam tempore, vel quotannis, vel circa æquinoctium, vel singulis mensibus infestat, solennis est, quando sueta sanguinis missio intermittitur, menses non rite fluunt, aut retinentur, quando hypochondriacus affectus subest, & sanguis in vasis hæmorrhoidalibus stagnans flatus & spasmos concitat in abdomine, quibus sanguis cum impetu ad caput & oculos urgetur.

§. V.

Causæ ophthalmiæ.

Præter ea vero quæ jam de causis ophthalmiæ passim diximus; ad eandem maxime disponunt crapula, venus & vigilia immodica, lucubrationes cum intemperantia studiorum, ventus borealis, crebrior aspectus ignis, solis, & colorum splendidorum. Idem faciunt fumi acres & metallici, alvus diu & multum adstricta, refrigerationes extremorum immoderate, inprimis mensium tempore, item præcedentes oculorum morbi, debilitatem quandam relinquentes, ophthalmia ipsa, nec non quam maxime variolarum & morbillorum morbus, qui maximam ad oculorum affectus inducit dispositionem. Quando autem, uti haud raro fit, hemicrania, interdum etiam odontalgia, jungitur ophthalmia, serum acre scorbuticum subest, idque aliquoties contigisse novi, à podagra retro pulsa; ejusdemque materia non modo ad pericranium, sed & oculorum tunicas & periostium maxillæ superioris delata.

§. VI.

Eventus.

Levem illam ophthalmiam facile dispelli, gravissimam in oculi suppurationem cum cœcitate transire, etiam jam monitum. Gravior autem est contumacior, durat sæpius per mensem & longius, ac haud raro maculas in cornea relinquit, splendorem oculorum obfuscat, humores turbidos tunicamque corneam crassiorem, glaucam minusque pellucidam reddit. Semper etiam difficilior curatu in pueris, nec non in senibus, in illis ob succorum lymphaticorum abundantiam & partium ténertudinem; in his vero ob humorum impuritatem.

CURATIO.

§. I.

In medicatione ophthalmiæ tria hæc perficienda: I. sanguinis, vel etiam feri acris motus à capite derivandus; II. stasis inflammatoria discutienda; III. symptomata graviora arcenda & oculis à recidiva defendendus. Inter ea quæ humores à capite divertunt, est maxime sanguinis missio, quam ex jugulari institutam mire laudat *Hildanus Cent. IV. obs. XIII*. Alii sublingualium commendant sectionem, sed ante hanc, si sanguis redundat, in brachio aut pede prius pertundenda vena. Sunt qui cucurbitulas cum scarificatione in nucha & pone aures suadent, & veteres appositis hircinibus multum detulerunt. Dein divertunt efficaciter pediluvia, quibus ter intra viginti quatuor horas usurpatis, potio simul liberaliter infuso theiformi, feliciter discussam esse ophthalmiam, aliquoties vidi. Serum porro acre salsum valide ab oculis revocant vesicatoria, nec non si malum inveteratum setacea; profunt quoque sinapismi, ex semine erucæ sacculis incluso, in vino cocto ac in nucha, vel sub axillis admoti. Præterea optime caput ab humorum affluxu liberant laxantia, vel etiam pro circumstantiarum ratione purgantia. Sponte enim purgatione sæpe solvi ophthalmiam notavit *Hippocrates Sect. VI. aph. XVII*. Et *Galenus Meth. med. lib. XIII. cap. 2*. gravis testis est, nonnullos quibus oculi inflammati sola purgatione per alvum una die sanatos.

§. II.

Divertens simulque discutiens egregia virtus inest diaphoreticis, quæ liberam perspirationem procurando, non modo ab oculis & capite ad corporis ambitum humores agunt, sed & succos ab acrimonia falsa repurgant. In ipsa autem parte affecta inflammatoria stasis & internis & externis discutienda est. Ex illis omnibus præferendum infusum theiforme ex radice valerianæ, liquiritiæ, floribus sambuci & semine fœniculi, quod largius potandum & ante potum vapor ipsius consulto sub tecto capite ad oculum admittendus. Inter externa efficax & securum hoc collyrium: recipe aquæ florum sambuci, sclopetariæ ana unciam unam, camphoræ grana tria, sacchari saturni grana decem. M. quod cum linteo triplicato crebrius tepide oculis applicandum. Quando autem nimis mordens adest acrimonia, mucilaginem corticis medii florum tiliæ, item seminis cydoniorum, cum aqua rosarum, addito pauxillo croci, sine, vel cum opio, admoveere expedit. De symptomatum medicatione dicetur in cautelis.

CAUTELÆ ET OBSERVATIONES CLINICÆ.

§. I.

Quia ophthalmia gravitate differt, diversa etiam ineunda medendi methodus. Quam levem diximus, optime fert frigida & repellentia, ac solum albumen ovi, cum aqua rosarum & pauxillo aluminis conquassatum, sufficit omnibusque aliis palmam præripit. Gravior non solis externis cedit, sed interna efficacia exigit remedia, quæ serum recrementitium ab oculis divertant, falsos & acres humores diluant atque contemperent, eisdemque successive per congrua emunctoria eliminant. Proficua hunc in finem infusa theiformia, serum lactis dulce, aquæ minerales, tam martiatæ,

Humores
derivand.

Stasis d.
curiend.

Curatio
gravita-
mali ac-
commoda.

tæ, quam alcalinæ, temperantes & diaphoretici pulveres, non omissis laxantibus, pediluviiis, nec non urgente plethora & suppressis criticis sanguinis evacuationibus, venæ sectione tempeſtiva. In gravissima cum febre, & ubi periculum est, ne in suppurationem tranſeant interiora, è re est, ut repetita venæ ſectio iſtituatur, aut liberaliter sanguis ſubtrahatur, & hoc quidem omnium optime per venam ſectam jugularem. Interius pugnandum diaphoreticis, demulcentibus & reſolventibus, inter quæ ſalubritate antecellunt pulveres bezoardici, cinnabarini, leniter nitroſi & camphorati, pota ſimul loco ordinarii potus ptiſana. Exterius vero abſtinendum à collyriis refrigerantibus & potius aqua ſic dicta ſclopetaria, cum aqua roſarum & florum ſambuci, adjecto pauxillo croci & camphoræ, reſecta, cum linteo duplicato admovenda.

§. II.

Non in omni ophthalmia neceſſaria ſanguinis miſſio, ſed tantum ubi plethora eminens, venæ ſectio aut ſcarificatio omiſſa, vel etiam critica quædam hæmorrhagia intercepta. Interim ſi mali origo à ſanguinis redundantia, præſtat prius venam brachii, pedis, aut jugularem aperire, ac poſtea, ſi opus eſt, ſcarificare pone aures, vel in nucha. Seracea & veficatoria non facile applicanda in plethoricis, niſi ſoluta prius plethora, & alvo, præſertim in cacoſchymicis, ſubducta. Neque, ſi veficatoria neceſſaria, ea ſemel tantum apponere ſufficit, ſed ſæpius, in locis ſenſibilioribus, uti nucha, olecrano, carpiſ manuum. Hinc præfertur ſetaceum, cui tamen, quia & doloroſum, & moleſtum nimis, nos anteponimus veficatorium temperatum minus, groſſi magnitudine, per menſem & longius in nucha geſtatum.

§. III.

De purgantium uſu tenendum, corporum & naturarum diverſitati eundem eſſe accommodandum. Si res mannatis, tamarindinatis & tartareis expediri poteſt, non confugiendum ad acriora. Alias in torpidioribus & phlegmaticis, pilulæ efficacioreſ, uti tartareæ & de ſuccino *Cratonis*, vel tutius noſtræ baſſamicæ, aliquoties porrigendæ. Diaphoretica egregii uſus, ſed diutius adhibenda, quando magis ſerum acre ſaluſum, quam ſanguis in vitio eſt, tanto magis ſi ophthalmia ſymptomatica, alii morbo ſupervenit, aut jungitur hæmicranie.

§. IV.

Quemadmodum in omnibus oculorum morbis; ita maxime in eorum inflammatione, abſtinendum eſt, ab omnibus ſpirituofiſ, ſpiritu vini, vino, fumo tabaci, etiam ſternutatoriis. Arcendi fumi, ceparum & allii vapor, cum ignis, radiorum ſolis, lucis & colorum fulgidorum aſpectu. Vitandus corporis exæſtuans motus & nimius craſſuſque victus. Potuſ ſit aqua pura, vel ptiſana, aut decoctum ex ſemine ſœniculi, raſura cornu cervi & hordeo. Colenda ſobrietas, victu molli & temperato utendum, ac quiete in loco tenebriſoſo commorandum.

§. V.

In adminiſtratione topicorum, ſive collyriorum, magna opus eſt cautione. Plures enim, noſtante etiam *Septalio*, imperito horum uſu, cœcitate affectoſ novimus. Scilicet ut plurimum aut acria nimis ſunt, ex aqua calcis vivæ, ſale ammoniaco, cum vitriolo albo, vel Cyprio; aut nimis adſtringentia, cum alumine, ſanguine draconis, bolo Armena, lapide calaminari, tutia & albumine ovi; aut nimis refrigerantia, quæ aquam

ſpermatis ranarum, roſarum, plantaginis, adjecto ſaturni ſaccharo habent; aut nimis exſiccantia, ut quæ cum cornu cervi uſſo, lapide calaminari & tutia conſecta; aut etiam nimis laxantia, ex mucilagine ſeminiſ pſyllii, cydoniorum, ſœnu græci, tragacantha & butyro inſuſſo. Omnia autem hæc, licet in aliis oculorum affectibus præſtanti non careant uſu: in inflammatione tamen, præſertim ſanguinea, tantum abeſt ut proſint, ut potius noceant. Inde enim non modo peior & profundior redditur ſtaſis, ſed & ipſi humoreſ oculorum pellucidi ſiunt turbidi, ſequitur oculi tabeſ, corrugatio, ſuffuſio, epiphora chronica, rubenſ, ſicca & aſpera, quin & palpebrarum exulceratio.

§. VI.

Ego potius auctor ſum, ut ſeponantur topica omnia ante tertium diem, & antequam convenientia interna jam uſurpata, exceptiſ ſoliſ ſacculiſ ex paregoricis & demulcentibus compoſitiſ. Poſtea vero omnium optima quæ ſupra commendata. Neque tamen etiam in chronica ophthalmia, ubi continuum lymphæ ſalſæ, acris eſt ſtillidium, inglorium eſt *Hæchſtetteri* medicamentum ophthalmicum, ex butyri recentis inſuſſi drachmiſ duabuſ & vitrioli albi ſcrupulo, de quo granum piſi majoriſ magnitudine in oculi cantum ſubinde indendum.

§. VII.

Quando, quod ſæpius fit, ophthalmia tandem diſcedenſ relinquit ſpeciem maculæ & viſum imminutum, tunc nihil præſtantius eſt axungia viperarum recenti ex Italia allata, & crebrius ad aliquot guttas oculo inſtillata. Egrege etiam viſum turbatum & imminutum reſtituit ſal volatile ſaliſ ammoniaci ſiccum, oleo majoranæ imbutum & odore crebrius naribuſ ſuſceptum. Ejusdem virtutiſ vapor eſt ex decocto radicis valerianæ, florum ſambuci, ſeminiſ ſœniculi, ad oculos, teſto priuſ linteo capite, admiſſuſ. Sed opus eſt, ut hæc auxilia mature ac tempeſtive adhibeantur. Si enim inveteravit & radiceſ egit vitium, difficillime ſaneſcit. Novi tamen, viſum fere deperditum ex ophthalmico morbo, linimento mercuriali genubus & poplitibuſ illito interpoſitiſque balneis aquæ dulciſ, redditum fuiſſe. Neque minus potenter viſcidoſ & coagulatoſ humoreſ diſſolvit ac ſudorem movet, ſulphur noſtrum antimonii fixatum, eaque propter in oculorum vitiſ egrege conducit.

ENARRATIONES MORBORUM.

OBSERVATIO I.

Juvenis ſanguineuſ, in palæſtra gladiatoria æſtuans, acceperat forte inter pugillandum ictum cum gladio palæſtrico, quem vocant *ein Rappier*, in oculum ſiniſtrum, ſubſequentem mox rubore ac dolore. Ille tamen penſi hæc habent, vefperi largiteſ ingurgitavit vinum, rixas quoque acceſſit cum ſodalibuſ movit. Inde die poſt magnuſ tumor oculum ejuſque vicinæ parteſ occupavit, cum dolore pulſatorio, cephalalgia, præcordiorum anxietate ac pulſu celeri. Chirurguſ advocatuſ, non adeo magni momenti eſſe putant, applicuit collyrium frigidum, quo ſymptomata adeo exacerbata, ut ſomnum abigerent omnem. Hinc medicuſ in conſilium vocatuſ, qui ſanguinem mittere & pedibuſ burſam paſto-

ris admovere iussit. Sed incassum. Inflammatio potius abiit in suppurationem, & quinto ab inflicto ictu die, ingens puris quantitas ex oculo fluxit, quam ipsi humores sequuti, & sic oculus cum omni visu periit. Quin postea summa cura nitendum fuit, ne hæc inflammatio & exulceratio in sphacelum degeneraret, quod etiam à medico applicatione spiritus vini camphorati cum essentia croci, & data interius tinctura bezoardica, præstitum est.

Epicrisis.

Nunquam periculo vacat oculi inflammatio profundior, qualis exurgere solet à graviori contusione, vel vulneratione, quia ejusmodi inflammatio non facile discutitur, sed in suppurationem, non sine sphaceli ipsiusque vitæ discrimine, abit. Nostro quidem iudicio averti potuissent gravia hæc symptomata, si æger non largiori vini potu sanguinem commovisset, majoremque ad partem jam affectam proritasset affluxum; si dein statim post contusionem sanguis è brachio missus fuisset & cataplasma, sive sacculus ex discutientibus, uti radice sigilli Salomonis, ireos Florentinæ, rosarum rubrarum, anthos, lavendulæ, sambuci, chamomillæ, camphora & croco in vino coctis, fuisset admotus, nec chirurgus instillatione frigidi collyrii inflammationem reddidisset deteriorem.

OBSERVATIO II.

Ophthalmia periodica.

Fœmina XLII. annorum, sanguinea, obesa, scorbutica & glandulas in collo tumefactas gerens, post retentum mensium fluxum, corripiebatur oculi sinistri dolore ac rubore, cum ejusdem lateris cephalalgia admodum vehementi. Liberata primum, annum postea semper, mense Octobri, hujus mali experta est recursum, sub quo appetentia erat prostrata, lucem ferre non poterat & feri ex oculis copiosum stillicidium semper experiebatur, quod per aliquot menses persistebat. Pluribus usæ remediis, sed incassum, & notabile erat, quod quoties sal volatile oleosum sumeret, toties soporem & torporem ingentem capitis pateretur. Ut itaque hic affectus, qui per triennium ægram mirum affligerat, radicitus extirparetur, acidulas Pymontanas æstate sub debito regimine potabat, quibus etiam alvus & urina optime secessit & ipsa postea à contumacia malo est liberata.

Epicrisis.

Periodica hæc est ophthalmia, ex mensibus suppressis in plethorica fœmina oborta, mense maxime Octobri, quo alias solennes sunt sanguinis excretiones, commotiones & molimina ad excernendum, præsertim per hæmorrhoides. Quare impensius hoc tempore sanguis regurgitavit ad caput, ac non tantum oculum, sed etiam membranas capitis ejusdem lateris male affectis, unde dolores. Sopor vero & torpor ille, qui ex usu salis volatilis assumpti accidit, inde derivandus, quod hoc remedio, congestus in capite sanguis magis rarefactus, sicque recursus ipsius per venas interceptus. Dein notabile est, quod morbi, qui statas servant periodos, plerumque fundamentum habeant in abdominis visceribus, unde optimo consilio ad eradicandos eos, commendari solet usus aquarum medicatarum, thermarum & acidularum, ad removenda viscerum vitia efficacissimus.

OBSERVATIO III.

Vir quadragenarius sanguineo-cholericus, subito affectus est dolore oculi ac rubore, quem si-^{subita inflammatio} bi accidisse putavit, à festuca minima ferri, sub^{à festuca ferrea.} ictu clavi cum malleo in oculum saliente, licet nihil omnino de ea in oculo compareret. Ipse igitur ad tollendam passionem oculo subinde instillavit collyrium frigidum, ex aquis ophthalmicis, quo quidem calor & ardor delinitus, sed bulbus turbidus & obscurus comparuit ac omnis visus periit. Me hinc vocavit in auxilium, qui, ne cœcitas ingrueret perfecta, obviam ivi hisce; sal volatile ammoniacum siccum, oleo majoranæ imbutum, crebrius naribus admovere, fronti & temporibus emplastrum ex gummi elemi, animæ, mastiches, olei nucistæ ana drachmis duabus, camphoræ & balsami Peruviani ana drachma, applicare & frequentius ac copiose bibere iussi infusum seminis fœniculi cum aqua. Quibus intra aliquot hebdomades oculus recepit splendorem & visus aciem.

Epicrisis.

Si inflammatio subito oculum adoritur, non injusta est causæ externæ suspicio, licet eadem non semper in conspectum veniat, quia interdum adeo subtilis, ut visum fugiat, ut sit, si à fumo acri membranæ oculi male afficiuntur. Discimus vero etiam, quam nocens sit instillatio frigidi in oculum ardentem, nec non quo pacto quibusque remediis oculorum humoribus turbidis reddenda sit perspicuitas.

OBSERVATIO IV.

Juvenis literarum studia intemperantius tractans, indulserat à longo tempore nimium lubricationibus, & inde sibi insignem contraxerat visus debilitatem. Post annum invasit oculos dolor gravativus pressorius, non sine ardore, adeo, ut nec lumen aspicere, nec citra molestiam legere posset, sed statim largum oculorum stillicidium experiretur. Medici suaserunt purgantia, tabaci fumum, oculi cum balsamo Peruviano inunctionem externam, nec non fonticulum in nucha. Frustra tamen. Quin licet purgantia postea fortiora, decocta sanguinem purificantia, venæ sectionem in pede, pediluvia cum accurato in diæta & victu regimine adhiberent, nihil tamen aliud omnibus effectum, quam ut ventriculus debilitaretur insigniter. Alii de scarificatione administranda, fonticulo brachio inurendo & pinguedine viperarum instillanda oculo dederunt consilium, sed eodem frustraneo effectum. Adit etiam æger Pymontanas acidulas, quibus labes & infirmitas oculi adaucta, & nubeculæ visui oblatae, ut cataractæ plane metus esset. Pariter in vanum laboravit medicus, qui decoctis sanguinem purificantibus, vesicatoriis, sternutatoriis variisque collyriis pertinax malum abigere molitus est. Tandem vero solo usu pilularum mercurialium cum gummatibus & extractis balsamicis amaris, item infuso theiformi, ex semine fœniculi, cum anatica lactis parte, nec non externo cataplasmate, ex mica panis similaginei, cum cremore lactis, croco & floribus sambuci, allatum misero levamen, dolor pressorius discessit, remansit vero quædam visus imbecillitas.

Ophthalmia non rebellis.

Epicri-

Epicrisis.

Hic oculorum affectus non quidem ad veram & exquisitam ophthalmiam referendus, sed magis ad notham, quæ ex stagnatione lymphaticorum humorum in oculis & sanguinis circuitu libero impedito, ortum traxit. Hæc autem causa, quia chirurgos & medicos latuit, adhibita præpostere medicamenta nihil profecerunt. Erant enim non tanti, ut vasculorum tenuissimorum obstructionem expedire potuissent. Illa vero postremo usurpata efficacia resolventia, pilulæ mercuriales, nec non exterius cataplasma, accommodata utique fuerunt atque proficua. Igitur multitudo & varietas medicamentorum; prodit ut plurimum medici ignorantiam, qui, si causam morbi rite intelligit, nec adeo multis, nec variis opus habet remediis, sed paucis, usu probatis, sæpe simplicibus, diutius tamen usurpandis.

OBSERVATIO V.

Viro triginta annorum inopinato pauxillum succi illius acris, quo capillorum concinnatores, capillos atro colore inficere solent, in oculum ceciderat. Hinc sequutus rubor oculi & dolor acerbissimus, ut patiens nec cibum, nec somnum capere posset, ac ferendo cruciatui fere esset impar. Chirurgus in consilium vocatus, collyrium ex aqua rosarum, plantaginis & tutia, frigide instillandum suavit, hocque nihil plane proficiente, saccharum saturni in aqua rosarum solutum crebrius cum linteo dolenti oculo admovere iussit. Sed nihil his dolorum atrociam mitigata, oculi potius bulbus quasi decrevit & minor factus, humores turbati, & visus plane periit, in cornea quoque tumor instar pisi durus apparuit. Admota quidem nuchæ vesicatoria, usurpata quoque purgantia, sed malum plus in deterius, quam melius versum. Hinc chirurgus desperabundus deseruit ægrum, omnesque adstantes de visu unquam recuperando dubitare cœperunt, inprimis quum præterea palpebra oculi affecti elevari non posset, sed semper clausa & elevata manu sensus expers esset, quin vesiculosus tumor in internis palpebræ compareret, aspectum oculi fere interceptans.

Epicrisis.

Ophthalmia hæc fuit gravissima, cum ruptura corneæ, oborta à succo acris in oculum illabente, qui arrosione effluxum sanguinis ac humorum tunicarumque distensionem fecit. Multum vero etiam ad grave malum contulit collyrium frigide admotum, eo quod stasim & stagnationem humorum firmiorem reddidit & graviorem. Nos sequentibus ivimus obviam: spiritus vini camphoratus cum balsamo Peruviano, exhalato prius spiritu, cum linteo duplicato crebrius oculo fuit admotus. Alvus pilulis ex mercurio dulci, gummi ammoniaco, extracto panchymagogo *Crollii*, balsamo Peruviano & sale succini subducta. Adhibita pediluvia. Potum copiose infusum theiforme ex veronica & semine foeniculi. Datum interius diascordium *Fracaistorii*, cum lapidibus cancrorum & nitro. Et exterius cataplasma, ex pomo assato, croco, mica panis similaginei cum lacte coctum, oculo impositum. His dolor & rubor cum ardore sublatus, palpebræ quoque tumor discussus, sed visus, ob corneam ruptam & humores incrassatos, rediit nunquam. Ut adeo pateat, quantum damni ab improvida collyriorum applicatione sit metuendum.

OBSERVATIO VI.

Juvenis generosus, viginti aliquot annorum, constitutionis teneræ & a scorbuticis parentibus genitus, capitis dolores & narium hæmorrhagias crebrius expertus, defluxionibus etiam catarrhalibus & coryzæ sæpius obnoxius, vitæque sedentariæ, literarum amore ductus, nimium indulgens, incidit in cephalalgiam gravem, cum atroci oculorum dolore, alvo simul adstricta. Dolor hic erat periodicus, ita ut matutino quotidie tempore cum rubore & feri falsi effluxu, præcedente refrigeratione & subsequente pulsu celeri accederet, per sex circiter horas insisteret, ac postea sensim discederet, die post rediturus, ægro interim nec in somno, nec appetitu vitium observante, nisi quod subinde post cibos ructus experiretur. Detinebat singularis hic affectus per mensem ægrum & frustra adhibita fuerunt præsidia varia, collyria, errhina, evacuantia, cephalica, nec non cucurbitulæ, tandem vero à me abactus est hisce. Ter scilicet alternis diebus dedi pilularum harum viginti: recipe extracti panchymagogi *Crollii*, gummi ammoniaci, mercurii dulcis, cinnabaris nativæ præparatæ ana drachmam semis, extracti croci, castorei ana grana sex. M. f. c. balsamo Peruviano pilulæ ex scrupulo no. XX. Una antea accessionem hora pedes immittere iussi ad genua usque pediluvio ex aqua fluviali; cineribus clavellatis imbuta, ac dum sic in balneo pedes servabantur, ad mensuram unam bibere infusum theiforme, ex herba melissæ, floribus tilia, radice valerianæ & semine foeniculi, quo sudor proleptus copiosus. Vespèri exhibui per aliquot dies pulverem ex pulveris Marchionis drachma dimidia, succini, nitri puri, cinnabaris antimonii rectificati ana granis octo. Oculo exterius applicare præcepi aquam Reginæ Hungariæ, cum dupla parte aquæ rosarum & camphoræ momento. Crinibus quoque quotidie inspersus pulvis ex succino præparato, radice ireos Florentinæ, caryophyllis aromaticis & cardamomo. Quibus per octiduum usurpatis, discessit malum, sed restitit nubecula quædam, visum quodammodo interceptans, quæ tamen crebriori instillatione pinguedinis viperinæ recentis, etiam sublata.

Epicrisis.

Febris hæc recte dici potest cephalico-ophthalmica, cujus causa fuit non tantum capitis debilitas à longo tempore contracta, verum etiam alvi ob vitam sedentariam adstrictio, qua spasmi in primis viis inducti, quibus serofus sanguis ad caput impetuosius actus. Hinc primo omnium in medicatione fuit subducenda alvus, ac postea recte ante accessionem pediluvii & potu infusi theiformis roborantis copioso sudor proleptus per universum corpus. Sudor enim & aucta perspiratio egregie serviunt spasmi & doloribus periodice certis statisque temporibus redeuntibus discutendis & abigendis. Deinde quoque in pertinacibus ejusmodi capitis oculorumque doloribus cinnabarina & ipse mercurius dulcis, serum lentescens stagnans fundendo & obstructiones expediendo, opem ferunt præsentissimam. Errhina vero & sternutatoria, plus nocent quam prosunt, quia humores magis ad oculorum confinia convocant. Varii etiam generis collyria, nisi simul discutiente virtute polleant, in ejusmodi oculorum affectibus plus nocementi, quam emolumenti afferre multoties observavi. Tandem ad maculas oculorum & nubeculas delendas, pinguedine viperarum efficacius nihil, quam

*Febris ophthalmica-
cephalica;*

quam etiam *Ludovici & Wedelius* passim miris ornant encomiis: habet enim acrimoniam subtilem, blande detergentem. Sed præstat in fine illam exhibere, non in principio, si ardor adhuc & dolor impensius urgent. Cæterum plura tum de ophthalmico, tum aliis oculorum affectibus commentatus sum in dissertatione, *de morbis oculorum præcipuis recta medendi ratione*, nec non in *Medicinæ consultatoriæ Tom. II. Dec. IV. Cas. II.* de dolore & imbecillitate oculorum cum suffusione incipiente.

OBSERVATIO V.

Ophthalmica hemicrania.

Generosus vir, sexagenarius, macilentus, victui duro & crasso falso assuetus; aliquot per annos singulis fere tribus mensibus, erysipelatis in pede dextro cum horrore & vehementi dolore insultum expertus est, quod tandem in suppurationem & ulcus desit, ac per annum & ultra ipsum detinuit, postea vero à chirurgo perito consolidatum fuit. Ex eo tempore singulis fere mensibus, circa novilunium, incidit in hemicraniam dextri lateris; quæ simul gravi dolore, profundius in orbita hærente, cum feri falsi effluxu stipata; qui circa noctem exacerbatus fuit, & paroxysmus semper invasit cum horripilatione & extremorum refrigeratione, pulsu postea alterato & auctiori facto. Malum autem solvebatur post quartum diem facta crisi, mediante sudore largiore, ægro alias etiam sueto. Mali pertæsus, nostro ex consilio usus est Pyrmontahis acidulis, quas olim usurparat, hacque cura absoluta suasi, ut loco potus ordinarii decoctum ex radice scorzonerae, chinæ, sarsaparillæ, liquiritiæ & passulis, biberet & singulis mensibus infusum ex manna, rhabarbaro & cremore tartari, assumeret, victum durum, salsum, aromaticum vitaret, & fonticulum etiam dextro brachio inuri permetteret. Quibus remediis quum omni adhibita cura uteretur, liber non modo ab erysipelate, sed & ab hemicrania ophthalmica degit; scabie tamen sicca pruriente divexatus, sicque septuagesimum ætatis annum excessit.

Epicrisis.

Ophthalmica hæc est hemicrania, in qua notabile, quod cessante erysipelate & ulcere consolidato in pede dextro; materia scorbutica ad dextrum latus capitis & oculum fuerit conversa, & certis statisque periodis hunc excitaverit morbum. Quum vero scaturigo tam erysipelatis, quam hemicranie & ophthalmie, sit quærenda in sanguinis & lymphæ dyscrasia scorbutica, utique potu acidularum, decoctorum & congruorum laxantium usu, universam sanguinis & humorum massam perpurgare expedit, & hac ratione corpus potius ab ejusmodi vitiis defendere, quam eadem, si adsunt, abigere.

CAPUT XII.

De Febre Intestinorum, Inflammatoria ex Mesenterio.

THESES PATHOLOGICÆ.

§. I.

Intestinorum inflammatio- nes frequentes.

Intestina, tam tenuia, quam crassa, quæ membranosa fere tota, ex tunica prima à peritonæo, altera musculari, cum fibris longitudinalibus & circularibus, nervosa & villosa contexta,

innumeris nervorum & vasorum surculis perfusa & exquisito sensu ac motu instructa, & multis, & gravibus morbis patent, è quibus haud postremus inflammatorius, qui ipsis ex variis causis accidit. Nam atrocitas illa & lethalia quandoque pathemata, quæ assumpta venena, emetica validiora & drastica purgantia excipiunt, ab inflammatione in sphacelum transeunte ortum ducunt. Vulnere ac læsiones intestinorum, non aliter, quam inflammatione necant. Febres synochas & ardentes, maxime cholericas, dysentericas, item plurimas malignas, neque minus exanthematicas, imprimis variolas, lethalem sæpe inducere inflammationem, uberius testatur dissectio his morbis defunctorum. Convulsivam etiam colicam, maximeque eam, quæ à podagra retrocedente, ac subsistente, ex cohibito, aut sufflaminato hæmorrhoidali fluxu, sanguine inducitur, iliacam, quoque ex hernia incarcerata, aut intestinorum convolutione, passionem, non alia ratione, quam intestinorum inflammatione, lethum inferre, in comperto est. Nihil quippe vitalibus motibus adeo est infensum, quam putredo, quæ excipit inflammationem, ac in nervosis, exquisito motu ac sensu pollentibus partibus, consistit.

§. II.

Sed quia de intestinorum inflammationibus symptomaticis eisdemque complicatis febribus, jam supra actum & adhuc congruo loco agitur; nunc duntaxat pauca tradere libet, de inflammatoria febre illa intestinali, quæ proficiscitur ex mesenterio. Jam apud medicos in confesso est, plures morbosas affectiones, præsertim hecticas, lentas, errantesque febres, nec non apostemata, in mesenterio sedem habere fixam; sed diarrhoeas, dysenterias, immo inflammatorias febres intestinorum, pullulare ex mesenterio, id non æque omnibus patet. Verum qui ex physiologicis novit, sanguinis progressum, in mesenterio & mesocolo, quibus annexa intestina, esse tardissimum, tum quod tunicis nervoso-musculosis, sanguinem urgentibus destituantur, tum quod vena portæ, pulsu carens, recipiat sanguinem ex intestinis, & tardo flumine vehat ad hepar; is ultro fatebitur, promptam ibi esse genesin stagnationum & stasium & amplissimum nidum ad excludendas materiales morborum causas. Quin quum intestina arctius mesenterio sint connexa, ut ab ipso etiam fortiantur membranam, fibrarum quoque in intestinis annularium tendo juxta *Willisium*, sit mesenterium, & vasa ac nervi utriusque sint communia magnam inter has partes esse communionem, quoad morbosas affectiones, utique certum.

Minus nota quædam mesenterii

§. III.

Ipsæ tamen febres, quæ ex mesenterio veniunt & nobis cum *Baglivio* audiunt mesentericæ, in duo merito genera sunt dividendæ, acutas scilicet & lentas, sive chronicas. Utrarumque materialis causa ejusdemque sedes in mesenterio, sed febrium & symptomatum generatio quærenda in annexis intestinis membranaceis, ita quidem, ut acutæ & inflammatoriæ in tunicis magis consistent & ibi tyrannidem suam exercent. Licet enim mesenterium, quod ex duplicata constat membrana, cui interpositi innumeri arteriarum & venarum rami, vasa lymphatica & lactea, glandulæ quoque copiosæ magnitudinis variæ, nec non nervorum propagines, non omni careat motu ac sensu: hic tamen admodum obtusus ac magis gravativus est, quam acutus, qualis ad concipiendam inflammationem requiritur.

Quæ acuta, vel chronica.

§. IV.

§. IV.

Signa ex-
rum &
symptoma-
ta.

Quare si in infimo ventre ardor, dolor cum præternaturali totius corporis æstu, pulsu celeri, virium prostratione, anxietate & inquietudine sese prodit, in intestinis hæc considerare, merito judicandum. Sed pro diversitate locorum, quæ hæc pathemata occupant, varias & certas affectas esse partes, merito concludendum. Scilicet si dolor acutus est supra umbilicum & sub ventriculo cum febre, nausea & vomendi conatu; indicium præbet, laborare eum coli tractum, qui infra stomachum à dextro ad sinistrum latus porrigitur. Qui in dextro hypochondrio sub costis spuris urget doloris sensus, præter naturam affectum & inflammatum esse coli principium, ubi ileo committitur, arguit, quod etiam *Spigelius* in defunctis reperit sphacelatum. Acuti cum febre cruciatus in sinistro latere sub lumbis, ubi psoas musculus, in colo & mesocolo, præsertim ubi peritonæo adhæret, mali esse sedem produnt. Quando vero medium abdomen circa umbilicum cum febre gravius dolet, tenuia utique intestina inflammatione laborare, certum est indicium.

§. V.

Varii sunt
generis.

Febres etiam, quæ cum dolore, ardore, nec non tumore imi ventris junctæ, & tandem per alvi fluxus putridos & copiosos, vel etiam purulentos solvuntur, cum magna intestinorum difficultate, ex mesenterio provenire, nil dubii est. In cachecticis & scorbuticis corporibus, qui proveniunt diurni alvi fluxus, cum lenta febre, vires & corpus consumente, & qui non tam facile curationem recipiunt, ex eodem fonte scaturire, non sine ratione censendum. Febres quoque quæ epidemice & certis temporibus invadunt, cum diarrhœis, immo cruentis sedibus, non ex ingestorum alimentorum vitio, sed ex præternaturali aëris, præsertim nimis calidi & ficci, constitutione oriuntur, quales biennio abhinc ob insolitum diuturnum, ad medium fere autumnum productum calorem, universam propemodum Germaniam sunt pervagatæ, simul etiam grassantes tunc intermittentes anomalæ, vix aliam habent originem, quam quod in mesenterio multi acres & corrupti humores accumulati.

§. VI.

Earum
origo &
causa.

Ad ingignendas autem intestas ejusmodi primis in viis inflammatorias febres, præcipuum momentum habet plethora, vel simplex, vel cacochymica, à suppressis aut deficientibus salutaribus excretionibus oborta. Promte etiam inducuntur ab intentata per fortiora pellentia, hæmorrhoidum, mensium aut lochiorum provocatione, ab usu copioso validiorum purgantium ad superandam contumacem alvi stricturam, nec non, uti observavi, à purgantium & emeticorum acriorum assumptione ad abortum provocandum. Idem facit intensior animi corporisque commotio, ac vicissim improvida abdominis & corporis, præsertim æstuantis, refrigeratio, potus perfrigeratus, & qui opulentioribus in more est, glaciatus. His enim humorum ad interiora, maximeque primam regionem, convocatur partim, partim urgetur affluxus, omniumque facillime ad eas fertur partes, quæ imbecilliores, quibusque ob defectum sufficientis potentiae motricis systalticæ, vel perpendicularem vasorum tractum, difficilior est humorum progressus, quarum in numero potissimum sunt mesenterium, mesocolon & omentum. Quando igitur his in sedibus, maximeque intestinorum tunicis cum mesenterio continuis, inclusus hæret sanguis, aut humor acris,

Frid. Hoffmanni Oper. Tom. II.

febrem ciet inflammatoriam continuam, alvi vero, cruentus etiam fluxus, vel ex nimium ampliatis, vel exesis plane & disruptis vasorum osculis, succedit. Hæc enim omnia ita omnino evenire uberius testatur dissectio ejusmodi febribus intersectorum, in quibus *Spigelius de semitert. cap. VIII.* se invenisse prodidit: venas hepatis majores sanguine vacuas, ventriculi tunicam anteriorem leviori erysipelate inflammata, venas mesaraicas & quæ ad ventriculum atque omentum tendunt distentas & crassiori sanguine fartas, omentum consumtum & semiputrefactum, durum quoque pancreas & ductum cholodochum obstructum. Idem confirmat *Chiffletius* notabili observatione, de mesenterii inflammatione cum dolore umbilici.

§. VII.

Merito tamen consistentes his in sedibus inflammationes in leviores & graviores sunt distinguendæ. Leviores exterioribus tantum intestinorum tunicis, quæ maxime membranarum mesenterii productiones, insident; graviores vero altius ipsam intestinorum substantiam pervadunt, eorundemque interiora ipsasque glandulas tangunt, ideoque & profundiores sunt & ampliores. Quæ superficiem occupant, non tantum periculi alunt, sed adhibito laudabili regimine & congrua medicina, intra quartum, vel septimum diem, discutuntur. Quæ autem interiora profundius obsident, nisi per diarrhœam aut sanguinis fluxum solvantur, longius extrahuntur, quin in suppurationem ruunt & in hæcticam desinunt. Ex mesenterio quoque ibique stagnantibus corruptis humoribus prodeunt hemitritææ sic dictæ sive semitertianæ febres, quæ ex continua inflammatoria & intermittente tertiana sunt compositæ, periculi non expertes. Notæ hæc jam fuerunt *Hippocrati & Galeno*, easdem nitide ac accurate *Spigelius* peculiari libello descripsit. Discrepant tamen à nostris in eo, quod quotidie circa vespæram, & alternis quoque diebus, levi accedente horrore, ingravescant, junctam habeant abdominis dolorem ventrisque tumorem, & quandoque ad aliquot hebdomades protrahantur; & non nunquam in febrem lentam & hæcticam concedant. Sed quia de harum ortu, decursu & curatione jam supra *Seçt. I. cap. V.* uberius actum, heic plura dicere non attinet.

Distin-
guenda in
leviores &
graviores.CURATIO CUM CAUTELIS ET
OBSERVATIONIBUS
CLINICIS.

§. I.

Quum febres ventriculi & intestinorum inflammatoriæ, propter horum summam sensibilitatem & conspirationem cum nobilissimis corporis partibus, atrocissimis symptomatibus stipatæ & subinde funestæ sint; medentis cogitationem & intentionem quam maxime ad eas avertendas dirigere expedit. Igitur serio & cum cura sibi commissis medicus inculcet, ut vitent omnia quæ superius §. VI. ad easdem ingignendas facere diximus. Et quia præterea sæpius observavi, febribus ardentibus, item biliosis, dysentericis, nec non puerperarum acutis cum purpura, à vehementi ira, vel gravi terrore, accessisse mox gravem intestinorum inflammationem & sphacelationem, ac lethum brevi tempore attulisse; inprimis necessarium, ut occasiones favorum affectuum fideli consilio & monito præscindat artifex peritus.

Morbi præ-
servatio.

§. II.

Si vero jam adest inflammatoria stasis sanguinis, omnibus modis lenior est discutienda & gravior

In cura
sanguinis
affluxus
derivandus.

avertenda. Primus igitur recte medentis erit scopus, ut vehementiorem sanguinis motum ad partem affectam impediatur & hac ratione gravio- rem inflammationem avertat. Obtinetur id com- modissime in plethoricis sanguinis missione, ex- venis in superioribus partibus, amplo satis fora- mine facto, pertusis, qua in colica convulsiva, in diarrhoea & dysenteria, in acuto dolore vena- rum sedis, gravior inflammatio utique potest averti. Post sectam venam divertunt sanguinis affluxum à loco affecto pediluvia temperata, sed diutius usurpata, quæ solvendo & laxando stric- tas inferiorum partium fibras, adfluxum ad pe- des divertunt & invitant.

§. III.

Et stasis
discutienda.

Ad discutiendam dein inflammatoriam stasim, serviunt quam maxime, quæ dolores & spasmos sistunt, antispasmodica, humectantia & blanda sedativa, clysteres ex oleosis, gelatinosis & dul- cibus compositi, item exterius regioni abdominis applicata epithemata, facculi, vesicæ oleis expres- sis, vel pinguedinibus animantium, aut decoctis emollientibus repletæ, pinguedo cati sylvestris, mixta præsertim cum camphora & pauxillo olei hyoscyami. Interne vero discutiunt & inflamma- tionem arcent quam optime diaphoretica cum anodynis mixta, pauca, sed crebriori dosi per ali- quot dies data, quæ inter eminet spiritus carmi- nativus de tribus, aut spiritus tartari, vel bezoar- dicus *Bussi*, cum liquore anodyno minerali, aut spiritu nitri dulci mixtus. Item mixturæ ex aqua cardui benedicti, florum sambuci, aceto sambu- ci, rob sambuci, antimonio diaphoretico, nitro & syrupo papaveris rhœados confectæ, nec non pulveres temperantes nitrosi & diaphoretici, cum moimento camphoræ & pauxillo laudani. Neque minus huc spectat cautus pilularum *Wildegansianarum* usus. Quæ remedia, cum prudentia, certo tempore & ordine usurpata, etiam in passione iliaca & spastica tunicarum intestinalium corru- gatione, quam Græci chordapsium vocarunt, le- nimen afferunt exoptatissimum.

§. IV.

Vitanda
acria, ad-
hibenda
enemata
demulcen-
tia.

In dolore, spasmo & febre inflammatoria in- testinorum, omnia acria stimulantia, etiam sali- na majori copia data, calida, & purgantia, ceu perniciosissima vitanda. Et culpandus hic com- munis & detestabilis practicum error, qui alvo pertinacius adstricta, unum post alterum purgans ingerunt, eoque malum non tantum exacerbant, verum etiam reddunt mortiferum. Neque etiam clysteribus admiscenda salia acrius stimulantia, ut sal gemmæ; vel purgantia, ut extractum colo- cynthidis, vel catholiconis, sed ex solis emollien- tibus sunt parandi. Sic enim balnei aut fatus in- star, crassa eluunt intestina, & in colo tenuibus circumvoluto contenta, ceu vesica decocto emol- liente plena, eadem mulcent, foveant & laxant. Parari igitur possunt ex solo lacte, mixto cum ni- tro, vel aqua pluviali, nupta cum syrupo viola- rum, de althæa *Fernelii*, rosarum solutivo, aut melle mercuriali. Hæc tamen circa usum clyste- rum addenda observatio, ut bihorio fere quovis, si necessitas urgeat, injiciantur, & paulo diutius retineantur, quod maxime necessarium, si flatus per os eructant, & crebræ adsunt vomitiones.

§. V.

In dolore
opiata,
post eum
roborantia
profunt.

Præmissa, si vasorum plenitudo urget, venæ sectione, laxata etiam clysteribus admissis alvo, si atrox dolor cedere nolit; optimo consilio, sine omni metu, anodynum ex opio proficit, quo tormina conquiescunt & spasmi ac sudor sequitur.

Sed quiescente & sedata dolorum & spasmodorum cum febre ferocia, si summa debilitas corporis vi- riumque imbecillitas excipit, non ulterius infi- stendum superius laudatis diluentibus, laxantibus & humectantibus, sed potius nervina & roboran- tia in usum vocanda, quorum in numero sunt ma- xime essentia aut spiritus succini, aut mastiches, extracta cum hoc essentia chaccarillæ, elixir no- strum stomachale, pulvis solaris *Zellenensis*, balsa- mum nostrum vitæ cum liquore anodyno mix- tum, quod balsamum etiam exterius applicatum, levamen insigne affert, tonum resuscitando & ro- bur addendo.

§. VI.

Quando vero inflammationes & dolores alvi fluxu simplici, aut cruento, maxime hæmorrhoi- dali, aut etiam, uti quandoque accidit, purulen- to solvuntur, laxantia leniora, ut passulæ rhabar- barinæ & clysteres, item infusa theiformia, ex speciebus traumaticis & sanguinem purificantibus, scabiosa, veronica, alchymilla, agrimonia, consolida *Saracenica* & summitatibus millefolii confecta & cum lacte pota, nec non pulveres ro- borantes, ex cornu cervi philosophice præparato, usto, cortice cascarillæ & succino, in usum vo- cantur commodissime.

§. VII.

Quum diarrhoea & dysenteria epidemica sæpe cum vehementi inflammatoria febre invadat ju- venilia corpora, non infructuosa est medico- practica quæstio: an conducatur venæ sectio? Com- munis quidem medicorum, *Hippocratis* & *Galen*i autoritate confirmata est sententia: alvo flu- ente, non esse subtrahendum sanguinem, ne vi- res prosternantur. Neque etiam ego aliter sentio, quum per ipsam experientiam constet, multos, tam lienterico, quam dysenterico alvi fluxu la- borantes sanari, sine sanguinis missione; sed jam de illa tantum dysenteria sermo est, quæ cum fe- bre acuta, præsertim synocha inflammatoria, con- juncta. In hac utilem & necessariam esse venæ sectionem, affirmo utique. Notum enim est, non facile quempiam alvi fluxu, etiam dysenterico diuturno perire, nisi ex inflammatione & sphace- latione intestinorum, quam semper antecedit & comitatur vehemens acuta febris, ex pulsu mag- no & celeri, ardore & siccitate corporis, linguæ ariditate, & ingenti inquietudine cognoscenda. Et licet omni dysentericæ lenta quædam & levis, quasi erysipelacea inflammatio, sit juncta; mul- tum tamen hæc ipsa differt à synocha inflamma- toria febre, in qua proficuum esse sanguinis sub- tractionem assevero, & consentientes habeo vi- ros amplissima & felicissima praxi celeberrimos. Sane *Sydenhamus* in opp. cordate affirmat pag. 111. se semper fere curam dysentericæ cum venæ sectione auspiciari, quin pag. 115. seq. habet exem- plum dysentericæ rebellis, quæ nullis plane reme- diis cedere voluit, sed sola venæ sectione tandem curata. Idem hoc auxilium mire dilaudat *Riv- rius*, qui *Cent. II. obs. LVII.* fidem facit, se in dysenteria cum febre acuta, octavo demum die, cum fructu quinque sanguinis uncias è brachii ve- na extraxisse, & *obs. LXIV.* testatur, se venæ sec- tionem, in muliere dysenteria cum febre graviter decumbente, septimo & octavo die cum emolu- mento instituisse. *Amatus* quoque *Lusitanus Cent. II. obs. XLVIII.* consignavit exemplum Abbatis, sanguine pleni & multo vini potui dediti dysente- rici & simul acute febricitantis, qui secta vena lon- ge melius habuit, & paucis subjunctis remediis, plenarie convaluit. Maxime omnium vero multus est

Alvi flu-
xus super-
veniens pe-
rius exci-
piendus.

Sanguinis
missio in
dysenteria
cum febre
militis.

est in adstruenda hujus remedii singulari utilitate *Botallus*, qui *cap. IV.* plus quam decem exempla narrat, ubi nil ex omni remediorum censu, præter venæ sectionem, attulerit levamen.

ENARRATIONES MORBORUM.

OBSERVATIO I.

Passio
spasmodi-
co-inflam-
matoria,
iliacam
minitans,
curata.

Fœmina, quadragenaria major, ob vitam sedentariam & tacitum animi profundum cum iracundia moerorem pathematibus colicis & spasmodicis affecta, quum omisisset vere hoc fueram quotannis circa æquinoctium vernale & autumnale sanguinis missionem, Martio mense vehementi commota fuerat ira ad tremorem usque omnium corporis partium, & sumserat postea vesperti pilulas consuetas purgantes. Hinc noctem transegit inquietam, & die post nulla post pilulas sequuta purgatio, alvus potius firmissime clausa mansit, & ipsa æstuosis anxietatibus circa præcordia atque etiam eructationibus continuis ex ore fuit afflicta, & vomitu fere omnia assumpta tum medicamenta, tum alimenta rejecit. Injunctus ad alvum aperiendam clyster domesticus, qui per horam retentus, integer, nec flatibus, nec stercorebus stipatus, rediit, etiam sine symptomatum levamento. Adhibitum decoctum mannatum cum salibus aperitivis & rhabarbaro, sed mox vomitu rejectum. Medicus etiam ordinarius, flatu in causa esse putans, dedit carminativa: irrita tamen fuerunt omnia. Persisterunt potius symptomata, firma nempe alvi adstrictio, eructatio crebra & vomitus, magna debilitas, inappetentia & somni defectus, tantum quod circa vesperam gravius, circa auroram vero mitius affligerent, cum crebriori ad urinam stimulo, quæ tamen parca & turbida emittebatur. Tertio die vocatus ego, mox venam pedis secare jussi, & emissis, sine ulla virium jactura, ob vasa sanguine valde distenta, octo unciiis, mox meliuscule habuit ægra, conquieverunt anxietates æstuosæ & eructationes, ut etiam extra lectum versari potuerit. Nihilo minus pertinax ventris adstrictio & dolores tensivi abdominis in hypochondrio dextro persisterunt. Injunctus igitur clyster & data pilulæ nostræ balsamicæ polychrestæ, sed his nihil emotum; quin quum ad septimum usque diem alvus esset obstipata, & eructationes, & anxietates nocturnæ æstuosæ, cum febricula & dorsi doloribus redierunt. Hinc demum consilium dedi, ut singulis tribus horis clyster injiceretur, ex aquæ pluvialis unciiis XII. syrupi de althæa *Fernelii* uncia semis, nitri puri drachma, & abdomini vesica emolliente decocto plena admoveretur. Sic clysteres injecti semper per horam retinebantur, & postquam quartus esset infusus, flatu primum elisi, per aliquot dies coerciti, & post sextum secesserunt etiam fæces, quibus evacuatis, ructus atque anxietates in abdomine discesserunt, mictio etiam melius successit. Interius vero simul data essentia carminativa, cum liquore anodyno ad unciam dimidiam remixta, instillatis laudani liquidi guttis XV. inductus somnus, sequutus sudor ex cute ante ficca & arida, pulsus antea durus & celer mollior factus, & urinæ fluxus liber redditus. Hoc facto, ex mixtura remotum laudanum, & sola essentia cum liquore anodyno oblata, donec perfecte convalesceret.

Epicrisis.

Affectio hæc fuit spasmodico-inflammatoria intestinorum, iliacam minitans passionem. A sanguine quippe, ob venæ sectionem consuetam omissam, nimium redundante, & vehementi ira,

Frid. Hoffmanni Oper. Tom. II.

quæ insensissima intestinis, nec non purgantem assumpto, ortum duxit hæc passio, & inde etiam omnia quæ jungebantur symptomata derivanda. Ad discutiendam itaque inflammatoriam stasim & avertendam hujus pedissequam, passionem miserere mei, ante omnia necessarium duxi, ut sanguinis quantitas subtraheretur, quod etiam quoddam attulit levamen. Sed quum spasmus intestina inferiora fortiter stringens adhuc permaneret, consilium cepi, quod me tali in casu non destituit, de clysteribus pure demulcentibus & humectantibus, paullo frequentius injiciendis, qui quasi instar balnei interni sunt, fibras spasmō contractas temperato humido relaxantes, cui fini etiam exterius apposui emolliens remedium. Interius vero discutiens, sive carminativum, cum blando anodyno permiscui, & ita spasmī soluti, discussa sanguinis & humorum inflammatoria stasis, & excretiones per alvum & cutem adstrictæ, jam liberius & largius sequutæ.

OBSERVATIO II.

Præfectus militum, natione Gallus, quadragimum ætatis annum jam emensus, vir constitutionis alias robustæ, vitæ genus laboriosum & agile cum quieto & sedentario permutarat, interea largiter comedens & liberaliter quoque vinum Gallicum, quod vocant Pontack, bibens, hinc primum alvi factus adstrictioris & somni inquietioris, post aliquod tempus vero, dolorem lancinatorium in abdomine toto atque etiam lumbari regione expertus est, cum phlogosi, eructatione, pulsuum celeritate & deficiente somno. Medicus primis diebus colicum dolorem esse judicans, carminativa fortiora & spirituosā elixiria, cum oleis destillatis remixta, una cum clysteribus usurpavit, sed inde potius exasperata symptomata, & febre, & inquiete, & dolorum facibus magis accensis. A me quum peteret opem, & conquere-retur de dolore tensivo circa os sacrum acuto, quæsi: an hæmorrhoidali antea fuerit obnoxius fluxui? respondit: semel tantum ante aliquot annos, sed pariori, cum prægressis lumborum & ossis sacri doloribus. Hinc quum venæ sectionem penitus respueret, mutavi tantum medendi methodum, & loco calidorum, interne dedi humectantia & refrigerantia, pulveres nempe diaphoretico-nitrosos, demulcentes & lenientes clysteres, copiosius applicare jussi, largiter simul & temperate calida sumta ptisana. Levata inde quidem fuerunt symptomata, nihilo minus remansit dolor in imo ventre, ab ossē sacro ad inguina sese extendens lancinatorius, multum incommodi faciens. Exhibui igitur essentiam carminativam, cum liquore anodyno & pauxillo laudani opiat, ad mulcendos dolores, & postea dedi drachmam magnesiæ albæ cum drachma dimidia nitri in decocto mannato, inde alvus aliquoties soluta, & quod mirabile, larga portio sanguinis atrii, corrupti, foetidi excreta, ita ut intra sex dies aliquot libræ secederent, remittentibus inde mox doloribus & sævis pathematibus. Demum assumptæ pilulæ nostræ balsamicæ, cum pulvere roborante, cujus basis chaccarillæ cortex & succinum. Hic tum perfecte convaleuit, sed vertente anno, adultus jam vere, eundem in morbum cum gravissimis doloribus & intolerandis cruciatibus ad dorsum usque excurrentibus, febre & purpura rubra stipatis, idem hic vir est correptus. Data iterum omnia, quæ levando huic malo antea cum fructu adhibita, administrata etiam in dorso scarificatio, sed frustra. Sexta enim hebdomade, ob somnum

Inflamma-
tio intesti-
norum
cruenta
diarrhœa
soluta, re-
petens le-
thalis.

plane deficientem, viribus omnibus exutus, vivere desit.

Epicrisis.

Sine ullo dubio vir hic, animo & corpore fortis, intestinorum inflammatione periit. Causa hujus morbi in statum plethoricum, sine sanguinis missione & omissa simul consueta corporis exercitatione, & in potum copiosum vini rubri, quod adstrictivæ est virtutis, conjicienda, quum alias sanguine & humoribus abundantes, qui corpus nec satis labore exercent, nec sanguinem mittunt, si alvum paulo largius solutam habent, liberi permanere possunt à passionibus ex plethora oriundis. Si vero hæc etiam excretio deficit, grave imminet sanitatis periculum. Prior morbus fluxu sanguinis nigri & coagulati, procul dubio in vena hæmorrhoidali interna congesti, feliciter fuit solutus, id quod etiam in aliis similibus casibus notavi. Contra ea vidi etiam, quod febres intestinales, cum doloribus & spasmodicis abdominis, aliquot jam per hebdomades durantibus, subinde post excretum putridum & corruptum nigrum sanguinem, brevi mors sequuta fuerit. Cæterum non possum non hoc loco hanc observationem de vini rubri Gallici, austeri potissimum, noxa, adjicere, quod ipsius frequentiori potui causa multorum morborum, quibus Galli inter nos degentes occumbunt, merito sit adscribenda.

OBSERVATIO III.

*Diarrhœa
purulenta
cum febre
ex lapsu.*

Ruricola habitior & quadratus, pronus cum ventre ceciderat in truncum acuminatum, & ex eo exquisitum in abdomine, paullo supra umbilicum, perfererat dolorem, cum animi deliquio, accensa simul, præcedente horripilatione & refrigeratione, febre. Post aliquot dies sanguinolentam & saniosam per superius & inferius os ejecit materiam multam, eoque facto, siluit febris, remansit tamen languor & appetentiæ prostratio. Quum vero elapsis circiter quatuordecim diebus, domesticis laboribus manum admoveere inciperet, denuo recruduit abdominis dolor, animi defectione, horrorè & febre stipatus, cum extremorum frigido sudore, ut animam agere videretur. Sequuta tamen diarrhœa cruenta & saniosa per aliquot dies, symptomata iterum mitiora facta ac remiserunt. Sed vix septem dierum fuerunt induciæ, quibus circumactis, priora repetierunt symptomata cum febre, obortoque alvi fluxu, conquieverunt rursus. Imploratum igitur meum auxilium, qui crebriorem decocti avenacei usum, cum humana, vel canis axungia, butyro rubro potabili & balsamo *Locatelli*, suasi, ac demum decocto herbarum vulnerariarum, alchymillæ, agrimonie, faniculæ, pyrolæ, fragariæ, veronicæ, florum bellidis, hyperici aliorumque, ex cerevisia, ægrum hunc ad sanitatem, fortunante Deo, traduxi.

Epicrisis.

Celebris ille Italorum Medicus *Benedictus Sylvaticus*, abscessus subinde in mesenterio succrescere notavit, & notatu inprimis digna, quæ habet *Cent. II. obs. LXXXVI.* ubi sic scribit: *mesenterium sæpe fit sentina multorum excrementorum. Ac obtusi sensus quum sit, diuturnas tolerat affectiones, & in quo non raro suboriuntur apostemata suppurantia, qualia frequentissime à me fuerunt observata, quæ tandem subsidebant per dejectiones purulentas, iterum statim temporibus recurrebant, & oblitescabant denuo per similes dejectiones, non raro cruentas, ita ut imposuerint quibusdam, illas pro dysentericis habentibus. In*

nostro certe ægro, lapsu illo in stipitem acuminatum, quassatus forsan fuit excurrans infra ventriculum supra umbilicum coli tractus, quo inductus dolor, raptis etiam in consensum reliquis intestinis, febrem ciens, & per spasmodicam simul stricturam in mesenterii canalibus sanguinem detinens, qui in purulentam postea corruptionem abiit, perrupit & alvo exiit. Latius vero semper serpsit malum & relicta iterumque commota vicina arrodens materia, mali recursum iterato induxit, donec acrimonia ipsius obrunderetur, abscessus abstergeretur, demumque post semestrem spatium, in robusto & agresti corpore consolidationem reciperet.

OBSERVATIO IV.

Adolescens quindecim annorum, constitutione tener, indole alacris, Bacchanalium tempore, quotidie duas, vel tres, ficas & duriusculas spiras ingesserat, sub pilæ lusu cum sodalibus admodum incaluerat, & postea, depositis vestibus, ad fluvii ripam confidens, corpus perfrigerarat. Inde paullo post atrocia ventris incurrit tormina, cum alvi pertinaci ad aliquot dies strictura. Implorato nostro auxilio, causam à liberali esu spirarum & corporis refrigeratione duximus, inprimis quum in sinistro abdominis latere eminentia quædam dura tactui sese offerret. Suasimus igitur ut alvus ocys duceretur clystere emolliente, quo bis alvus stercore dura dimisit, postea dedimus infusum nostrum usitatum mannatum, cum oleo amygdalino, quo sex sedes motæ, tumor subsidere & dolorum vehementia remittere visa. Sed sequenti die tormina cum duro in hypogastrio tumore redierunt, licet flatu multi eliderentur; accessit præternaturalis æstus, cum pulsum celeritate, somnus inquietus, oris siccitas & ardor, cum lenta pituita. Hinc fauces gargarismatibus elotæ & ad æstum inflammatorium restringendum oblata emulsio ex seminibus quatuor frigidis, cum pulvere nitroso, interposito ad perspirationem secundandam, liquoris anodynii, cum momento bezoardici remixti usu. Æstu autem crescente, ani os adeo fuit occlusum, ut clysteris tubulum plane non admitteret & à crebriori molimine potius laderetur, circa vesperam tamen calor semper fuit intensior ad mediam noctem durans. Adhibuimus pulveres nitrosos cum salibus digestivis, quibus calor mitigatus & scybala cum flatibus multa emota. Sic decubuit ad duodecimum usque diem, quo tanta anxietas, inquietudo, æstus & virium jactura accidit, ut morti videretur proximus, conquerens maxime de atroci dolore in abdomine, ibi potissimum, ubi durities illa consistebat. Igitur ad arcendam funestam inflammationem potio discutiens ex aqua cardui benedicti, cum aceto, rhabarbaro, antimonio diaphoretico & cancrorum lapidibus data, qua aliquoties usurpata, dolores complacati & sudor prolektus. Imposita etiam ad emolliendum tumorem vesica decocto emolliente plena & clysteres aliquot injecti atque retenti. Hinc ingens stercoreum copia quotidie secessit cum emolumento & successive ad sanitatem factus est transitus.

Epicrisis.

Febris hæc recte dici potest iliaca inflammatoria. In ileo enim consedit obstructio, ab esu spirarum ficarum contracta, quæ dolorificos spasmos non tantum in abdomine, sed ad ipsam etiam vesicam excurrentes fecit, ut urina per totum morbi decursum parca & rubicunda tantum cum dolore secederet. Non tam prompte autem ex tenui hoc

*Febris
ca inflan
matoria.*

hoc intestino materiam tenacem obstruentem evertere licet, quia clysteres eo non pertingunt, & nec laxantia sufficiunt, nec potus diluentes. Hinc morbus diutius protractus. Interea ut intestinorum inflammatio arceretur, data mixtura & injuncta diaphoresis continua. Quia tamen intestinorum inflammatio quam facile recrudescit, hinc suasi demum, ut non modo exactam servaret dietam, ab omnibus constringentibus abstineret, animum tranquillum haberet, nec frigidum, sed calidum potum assumeret, verum etiam ad tempus aliquod mane infusum accommodum theiforme portaret in lecto, & sudorem blandum exspectaret.

CAPUT XIII.

De Febris Lentis & Hecticis.

THESES PATHOLOGICÆ.

§. I.

Hectica & lenta quæ dicantur.

HECTICÆ febris apud *Hippocratem*, *Aretæum* veteresque Græcos æque ac Latinos, ipsumque *Cornelium Celsum*, mentio nulla. Neque lentæ febris nomen in primorum medicinæ parentum monumentis obvium, sed *Celsus* demum lentarum curationem primus tradidit. Quæ autem postea lentæ & hecticæ appellatæ, priscis, longæ, tabidæ, marasmi audiunt. *Hippocrates* inprimis lentas febres *Secl. V. aph. 64.* vocat febres longas, iisque affectos non valde multum febrientes, hecticam vero sub nomine tabis passim describit. Nostro tempore lentæ & hecticæ febres dicuntur eæ, quæ diuturnæ sunt & continuo, licet leniori ac remittente, æstu præternaturali, succos corporis consumendo, tabem inferunt viresque debilitant.

§. II.

Utriusque differentia & symptomata.

Magna tamen harum est varietas & differentia, ratione vehementiæ symptomatum & periculi. Stricte nimirum lentæ febres appellantur illæ, quæ mitiora habent symptomata, æstum leniorem, sudorem sub somno largum, pulsum post somnum & ante meridiem naturalem, non tantam appetitus & virium prostrationem, corporisque ariditatem & urinam livescentem neque etiam tantum periculi. In hectica autem æstus est continuus, pulsus semper durus, debilis, celer, licet post cibum & vesperi calor, celeritas atque durities increcant, cutis cum lingua sicca, dura & arida, genæ rubent, totum corpus est imbecillum flaccidum, somnus reficiens nullus, urina rubicunda, inferius cum sedimento, superius cum cuticula coerulescente pinguedinosa, corpus contabescit totum, adeo ut ossa ubique promineant. Deinceps eminens est lentarum & hecticarum differentia respectu utriusque causæ. In illis enim vitium magis in fluidis & incipiente mala dispositione solidæ cujusdam partis; in his vero solidæ potius patiuntur & ipsa jam labes, aut magna corruptela, adest visceris. Hinc lente etiam accommoda medicina adhuc possunt abigi earumque causæ vinci, sed hecticæ difficillime, vel plane non sanationem recipiunt. Hecticæ quippe sunt magis symptomaticæ & gravioribus ulcerationibus, vomitis, abscessibus & viscerum corruptionibus superveniunt. Unde qui phthisi, abscessu, vomica aut exulceratione pulmonum, mesenterii, renum, uteri, & gravioribus suppurationibus in internis, musculis quoque abdominis latentibus, qui cancro genitalium, mammarum, uteri, item qui cachexia & hydrope, ex induratione, scir-

rho, corruptione & putredine hepatis, lienis, omenti, pancreatis & glandularum mesenterii; moriuntur, hectica febre pereunt omnes.

§. III.

Causa caloris continui his in febris, nulla alia, quam humor quidam corruptus & putridus. Hic enim temperatæ & naturali sanguinis & humorum vitalium mixtionem penitus est adversus, eandemque intestino alieno motu turbat, immutat atque dissolvit. Idem hic putris succus infestus plane ac alienus est nervorum fluido nervosisque partibus, & sensibiles has atque motrices partes ad intensiorem contractionem, quæ febris essentiam absolvit, exstimulat. Igitur quo uberius & diuturnior putridorum & corruptorum ejusmodi succorum ex viscerum vitio insanabili est provenus, eo vehementior febris, eoque graviora symptomata.

§. IV.

Lentæ, sive diuturnæ, mitiores tamen febres, sunt frequentissimæ, neque ulli ætati, aut temperamento, sexui, regioni, aut loco parcent. Origo vero illarum & causa varia est; sæpissime ex morbo præcedente & corpus cum viribus nimium debilitante. Experientiæ scilicet testimonio in comperto est, qui per contumaces intermittentes, vel continuas, item variolas & morbillos, effusiora sanguinis per uterum, anum & nares profluvia; per diuturnum alvi fluxum, simplicem æque ac dysentericum, nec non nimiam salivationem, gonorrhœam & fluorem album diuturnum vires perdidere, qui etiam moerore, curis, vigiliis, & assiduis lucubrationibus & studiorum intemperantia, nec non per famem, labores graves & continuos, veneris etiam crebrius exercitium, corporis robur attriverunt & exhausserunt, in lentescences & longas ejusmodi febres delabi facillime. Ratio hujus generationis in proclivi: corpora his perfuncta benignis sanguinis & alibilis humoris succis, sufficienti etiam purissimi & nobilissimi nervorum liquidi copia destituuntur, post morbum autem ciborum impensior succedit appetentia, succi tamen intimæ ingestorum dissolutioni servientes spirituosos, fermentescibiles & salivales, nec non biliosos, à naturali habitu descivere, nec adeo sunt efficaces, vigor quoque motus peristaltici in ventriculo & canali intestinorum languidus est: hinc ciborum liberalius ingestorum non exacta perficitur solutio, concoctio atque digestio, sed succus chylosus crassus, rudis minusque subactus elaboratur, ad sanguinis massam truditur, & aliena sua natura fluidorum crasin temperatam & solidorum æquabilem naturalem motum turbat atque pervertit.

§. V.

Deinceps perpetuæ & uberius confirmatæ observationis est, tabificas ejusmodi febres succedere quam maxime evacuationibus criticis solennibus deficientibus, aut perperam cohibitis. Nihil certe frequentius, quam ut ii, quibus vacuationes acutos morbos & febres solventes, sudor imprimis & aucta perspiratio, interceptæ, vel non sufficienter successerunt; quibus sudor consuetus nocturnus ficcatus, quibus fonticuli & ulcera antiqua consolidata, quibus catarrhi aliæque per uterum ceteraque organa defluxiones acres repulsæ, quibus alvi fluxus cohibitus intempestive, febribus lentis postea tabescant. Sic enim vitiosi, impuri, inutiles ac superflui humores, cum salute foras excernendi, intus manent, vitales temperatos & nutritios succos inquinant, ut omnis horum massa reddatur intemperata, omnesque in corpore motus ac functiones vitium capiant.

*Ex sup-
pressis ex-
cretionibus.*

§. VI.

*Hæctica-
rum &
lentarum
cur fre-
quens ni-
dus mesen-
terium.*

Porro lentarum & hæcticarum febrium nidum frequentissime esse in mesenterio, & ratione, & experientia habemus confirmatum. Recte enim jam pridem notavit *Fernelius* & ex eo *Sennertus*, in nulla universi corporis parte, tam plurimos, latentes etiam morbos, lentas febres, errantes, diarrhoeas, choleras, scorbutum, melancholiam, cachexiam, hydropem, intermittentes quoque contumaces, figere sedem, quam in mesenterio. Causa autem magnæ hujus ad morbos concipiendos dispositionis nulla alia, quam quia tardus & impeditus admodum per viscus hoc succorum & sanguinis progressus, stagnationes & stases facillime inducens. Nam vena portæ, pulsu destituta, sanguinem ex mesenterio reducem recipit, ac vice arteriæ fungens, eundem vehit ad hepar, quod quum lentius fiat, in mesaraicis etiam vasis ponitur obex, gignuntur stagnationes, infarctus, quin quandoque plane extravasationes. Dein hæmorrhoidalis vena, ob perpendicularem ductum & longius ab exortu remotum situm, tarde admodum reducit sanguinem ad portæ venam, ac facit, ut is sæpius in mesocolo, crassis intestinis, maximeque recto, stagnet vasæque cum dolore distendat. Ipso in mesenterio propter nervosarum & musculosarum tunicarum defectum, sanguinis cursus plane non adjuvatur & urgetur, sed vasa potius inter duplicatam cellulosa membranam discurrentia, pinguedine repleta, perpetua relaxatione, toni sunt remissioris, & facile cedunt sanguini in ipsis accumulato. Chylosa etiam lymphæ dum per lactiferos sic dictos canales innumeros, in capillares tubulos circa glandulas fissos, impeditius fertur, ac in ipsis glandulis ab exilissimis venulis recipitur, his in angustiis facile hæret, nec ea propter mirum, mesenterii glandulas sæpe infarciri, intumescere, indurari ac in scirrhus plane degenerare.

§. VII.

*Propter
humorum
in eo stag-
nationem
& impuri-
tatem.*

Licet autem ipse hic tardior succorum per mesenterii compagem meatus, hanc corporis præster utilitatem, ut humorum & mole & intemperie peccantium excretioni serviat, & quidem sanguinis per hæmorrhoides internas, ac serosarum, mucidarum ac fermentescibilium sordium, per intestinorum glandulas innumeras; eandem tamen ob causam accidit, ut quævis fere humorum, tam quoad quantitatem & qualitatem, quam etiam motum vitia, in mesenterium redundent, idque male afficiant. Inprimis plethora nullam partem gravius lædit, quam mesenterium, ac nimia distensione, vasorum tonum & elaterem debilitando, ibi stagnat, & cum detrimento plus justo coacervatur. Nam quo major in mesenterio sanguinis stagnatio, eo magis increfcit ipsius impuritas; quo major vero sanguinis & lymphæ sordities, eo magis functiones in corpore labefaciuntur, nutritio imminuitur, vires elanguescunt, intestinus in succis motus augetur, arteriæ cum corde ad auctiorem & celeriore motum excitulantur & sic febris accenditur.

§. VIII.

A suppressis mensibus, hæmorrhoidibus, diarrhœis & febribus.

Quæ quum ita sint, ratio est in proclivi, quare suppresso, aut deficiente mensium in foeminis fluxu, notante *Hippocrate lib. II. prædict. §. XIII.* periculosa tabidæ, id est, hæcticæ febres, emergant, chloroseos, aut febris ictericæ albæ nomine, passim obviæ; quare porro in viris subsistente, insufficiente, aut plane præpostere cohibito hæmorrhoidum stillicidio, juxta eundem *Hippocratem Sect. VI. aph. XII.* tabes, id est hæctica, generetur. Cur etiam, ut supra jam meminimus, consipatis salu-

taribus alvi profluviiis, quibus sæpe acuti morbi finiuntur, & quæ crebro critice certis anni temporibus naturæ beneficio succedunt, tabidæ & periculosa febres subnascantur. Neque minus causa patescit, cur tam perniciosum, & ad chronicas, lentas etiam & hæcticas febres ingignendas nihil sit aptius, quam, si quando, in corporibus præsertim plethoricis, cacochymicis item & hypochondriacis, ubi jam admodum tarda & impedita sanguinis per mesenterium & connexa viscera progressio, intempestive adstringentibus, etiam famigeratissimo chinæ cortice sistuntur febres intermittentes, quæ in his salutarem ad superfluum consumptionem, vasorum obstructions expediendas & liberum sanguinis progressum reddendum habent facultatem, quibusque oppressis, infarctus in mesenterii tubulis, oppilationes, humorum stagnatio & impuritas increfcunt, ac postea liberale chronicis & assiduis febribus aliisque morbosiss passionibus pabulum præbent.

§. IX.

Neque vero tantum ad stagnationes & obstructions dispositum admodum est mesenterium, verum etiam ad suppurationes & abscessus concipiendos, quibus perpetuo fere accedit intemperies quædam febrilis. Sunt quidem plures, qui autumant, inflammationes, sine quibus nulla suppuratio, nullusque abscessus fieri potest, in mesenterio non habere locum, quia in eo nec dolor acutus, nec ardor, perpetui inflammationum comites, observantur. Verum essentialis inflammationis ratio non ardore & dolore continetur, sed stasi humoris sanguinei in vasis alienis facta, & staseos potius productum est dolor cum ardore, si illa in parte nervosa, exquisitoris sensus consistit. Stases autem & extravasationes humorum cum oriundis inde suppurationibus, perquam commode fieri possunt in mesenterio, ob decubitus ibi solennem, dum vel ex arteriolarum minimis ramulis sanguis sæpe cum impetu in laterales tubulos, è quorum numero etiam pinguedinosi, urgetur, vel etiam ipsa hæc lateralia vascula ab impetu humorum rumpuntur, & contentum liquidum effundunt. Ne dicam, nullibi facilius & commodius pus gigni, quam in partibus pinguedine uberius obsessis, eo quod ipsa pinguedo, motu intestino & putrido humoris extravasati, promptissime in liquamen saniosum convertitur.

§. X.

Igitur frequentiores, ut vulgo putatur, in mesenterio sunt abscessus, cognoscendi ex febre continua hæctica, dolore gravativo & fixo in abdomine & saniosæ materiæ per alvum cum intestinorum dolore & ardore excretionem: quæ autem ad ingignendos hos faciunt, notavi multa. Observavi frequentius, in plethoricis, plethorico-cacochymicis, nec non hypochondriacis, à vehementi ira, præsertim paullo ante, vel post cibum, tanto magis accedente simul refrigeratione, corpus languore fuisse affectum universali, & successisse febres tabificas exitiosas. Idem vidi in iis, quæ validioribus pellentibus abortum procurare intenderunt, quando medici mensium suppressione laborantes calidis & fortioribus emmenagogis, vel purgantibus exceperunt, nec non in viris, quando hæmorrhoidalem fluxum, natura repugnante minusque proclivi, aloeticis aliisque calidis pellentibus emovere fuerunt conati. Novi etiam, crebrius subortas esse has ex abscessu febres, in sanguine & succis plenis, à vehementiori insueta corporis ad validum usque sudorem exercitatione, subsequente postea improvida refrigeratione corporis

*Abscessus
in mesen-
terio fe-
brium
causa.*

Eorum signa & causa.

poris totius, ac inprimis pedum, quorum ingens cum abdomine consensus.

§. XI.

Generandi
ratio &
decursus.

Nimirum tam valido & vehementi, sive per animi affectus, sive pharmaca, sive corporis exercitationem, motu, sanguis in minima mesenterii vascula cum impetu urgetur, stagnat ibi, in alienos tubulos vadit, subsistit ibi atque corrumpitur. Hinc prima origo suppurationis, quæ dein propter motum intestinum latius serpit, vicina arrodit, exedit, ut ex abscessu minori fiat major, ampla cavitas magnumque apostema. Quin materia saniosa corrupta, à venis resorpta & sanguini insinuata, sæpe etiam ad alia emunctoria, glandulas tracheales, nec non renes, fertur. Unde amplo in mesenterio apostemati jungitur sæpe urinæ fluxus purulentus, vel etiam sputum purulentum, integris renibus salvoque pulmone. Quandoque ipsum pus pondere suo per mesenterii poros descendit ad intestina connexa, cavum ipsorum subit sicque alvo expurgatur. Quandoque etiam apostema majus dehiscit tandem, & præcedente horrore, interdum etiam rigore, cum superveniente æstu, perrupto involucro, effunditur. Quod si in loco excretioni minus idoneo contingit, atrocitas quasi colica tormina oboriuntur, si in cavum abdominis, interna quæ tangit, male afficit, rodit & gangrænam iisdem inducit, si vero in intestinorum cavitatem, pus copiosum simul & semel per alvum exit. De qua puris excretionem historias consignerunt *Horstius lib. XIV. obs. XXV. & XXVI. Bartholinus Cent. II. epist. 23. Cent. VI. epist. pag. 490. Cent. IV. hist. pag. 96. nec non Tulpius lib. II. obs. XXXVI.*

§. XII.

Febres autem quæ grandes ejusmodi abscessus in mesenterio æque ac aliis visceribus, hepate, pancreate, renibus vesica & utero, comitantur & sequuntur, non sunt mites & lenes, sed graves, quæ vires & succos corporis consumunt omnes, hecticae lethales. Quæ quomodo incipiant, decurrant & quibus symptomatibus stipentur, accurate & ex vero prodidit *Hippocrates lib. de intern. affect. pag. 209. febris, inquit, debilis invadere incipit & rigor, & dolent pectora ad dorsum, aliquando etiam tussis premit acuta, & exspuit salivam multam liquidam & salsam. Et hæc quidem in principio morbi; in progressu vero corpus attenuatur, cruribus exceptis. Hæc enim intumescunt & pedes, & ungues contrahuntur, ex humeris autem tenuis & debilis est, & fauces velut lanugine implentur, & velut per arundinem sibilat, & fortiter suis per totum morbum, & multa impotentia corpus habet. Hic quum sic habuerit, in anno corruptus male perit, verum studium quam maxime adhibere oportet ac reficere.*

§. XIII.

Aliud lentæ remissioris & occultæ febris genus est infantibus familiarissimum. Jungitur cum insigni abdominis tumore, superiorum marcore, tussi sicca, virium prostratione, inappetentia & vago æstu, post cibum sumtum & circa vespeream ingravescente, alvo interdum adstricta, interdum etiam fluxa, alba multa & mucida dimittente. Nascitur hæc febris quandoque à succo chyloso nimis viscido, tenaci, villosam intestinorum tunicam & minima lacteorum oscula obstruente, quo inflatio intestinorum & chylosa diarrhoea inducitur. Non nunquam ortum trahit à lymphâ nimis viscida, lenta, quæ glandulas mesenterii farcit, obstruit, ac magis magisque accumulata mirum distendit. Occasionem autem

ad gliscentes has febres potissimum præbent nimia infantum voracitas, cibi qui chylum reddunt crassum, defectus tenuis potus, corporisque refrigeratio. Quæ vero corripuerunt, diu detinent corpora, nec sicuti omnes, quæ ex obstructione & glandularum nerveæ substantiæ nimia expansione oboriuntur febres, periculo carent, sed nisi convenienti medicina occurratur cum vivendi ratione, infantes perimunt, inventis post mortem plerumque glandulis mesenterii ingentis magnitudinis, intestinis inflatis & tumidis ac pulmonibus corruptis.

§. XIV.

Quæ senibus solennis atque fatalis est hectica, *Marasmus* græco nomine dicitur *μαράσμος*. In hoc lente attenuatur corpus, appetitus perit, vires sensim consumuntur, ossa carne privantur, ut instar scelerati pelle induti appareant, os siccum est, saliva glutinosa, exterior cutis cortex friget, riget, arefcit, interiora ardent, pulsus durus & frequens est, somnus parvus & non reficiens, spiritus ægre ducitur, vox rauca fit, lingua exsucca & falsa lenta pituita incrustata sæpe, ac omnia hæc sensimque ingravescent, donec post dimidium circiter anni vitam ipsam eripiant. Generatio senilis hujus hecticæ sic nobis concipienda videtur: senes ob vitam motus expertem & excretionem in omnibus emunctoriis, præsertim subcutaneo, languescentes, alvumque tardiolem, omissam etiam ex vano metu haud raro suetam sanguinis missionem, ingentem subinde sanguinis & impurorum humorum sibi colligunt copiam; hac præsentem, tardissima fit succorum per mesenterium, omentum, per hepar quoque, lienem & intestina progressus, vasa farciuntur, obstruuntur, sequuntur indurationes & demum corruptiones, febrium chronicarum pernicialium generatrices paratissimæ.

§. XV.

Demum lentæ febris species adhuc superest, *Hectica* stomachica & intestinalis. Ortum hæc ducit à *stomachica & intestinalis*. tunicarum ventriculi & intestinorum erosione, inducta vel ab acri bilioso mordaci succo, in ipso corpore genito, vel ab assumtis acrioribus, rosiva virtute præditis. Testatur enim experientia, post choleram, vel vehementem iracundiam, item dysentericum morbum, longas sæpe & exitiales succrescere febres. Venena assumpta stomachum cum intestinis corrodere, novit nemo non. De exulcerato stomacho à forti purgante, cum maximo post cibum dolore, testis est *Bartholinus Cent. VI. hist. 21.* Idem faciunt emetica improvide data, ipsa salia amara purgantia, vel sola liberalius exquisitius sentientibus oblata, vel, uti imprudens quorundam consilium, acidulis indita adhuc & sumta. Sed difficulter hæc febres, quoad suas causas & sedem, dignoscuntur, & difficulter etiam sanationem admittunt. Nam læsis arrosisque ex parte intestinorum tunicis, omne quod assumitur, præsertim falsedine, aut acore imbutum, vel etiam mole nimium eadem male afficit, spasmos, eructationes, tormina facit, alvus interdum laxa, interdum stricta est, corpus simul tabescit, mox horror & rigor, mox æstus, mox frigidus, mox calidus sudor tenet, cum celeri pulsu ipsaque symptomata certis horis periodice redeunt & ingravescent, quin nisi congruis remediis tempestive occurratur, morbus fit longus & capitalis.

§. XVI.

Cæterum lentæ hæc & tabificæ febres ex longis sunt morbis, qui agros diu tenent, & pro constitutione *Signa lethalia & mortis causæ.*

tione corporis laborantis, modo citius, modo ferius finem fortiuntur. Lenta quidem, si tempestive occurritur, in medicationem admittit, hectica autem raro & perfecta plane non. Mortis autem indicium in lethali hectica fuerunt, pulsuum continuo celeres & debiles ictus, summa appetitus & virium quoque maxima prostratio, ita, ut laborantes nec corpus movere, nec in situ erecto permanere possint, facies Hippocratica, urina pauca, rubra, vel oleoginosa, sine sibilo emissa, capillorum defluvium, alvi fluxus, sudor effusus & pedum tumor, quippe quæ de succorum partim consumptione, partim colliquativa dissolutione testimonium præbent. Qui demum moriuntur, magnam & insuperabilem viscerum labem post mortem dissecti exhibent. Quandoque enim adsunt ingentes cum amplis cavitatibus in visceribus abscessus, in pulmone, mesenterio, hepate & pancreate, quandoque etiam in utero, ventriculo, renibus, nec non membranis peritonæi, abscessus deprehenduntur, vel magni tumores scirrhusi, aut ingentis magnitudinis steatomata; quandoque etiam tumores glandularum in mesenterio, vel tubercula & vomicae in pulmonibus, hepatis quoque lienis, vel pancreatis scirrhuscentiæ, omenti & intestinorum sphacelationes & putrium humorum extravasationes in interaneis offenduntur.

CURATIO CUM CAUTELIS ET OBSERVATIONIBUS CLINICIS.

§. I.

*Curatio
lenta ex
cruditati-
bus.*

Quum variæ tabidarum febrium sint causæ, variæ sedes, hæ primo omnium recte investigandæ & iisdem medicatio accommodanda. Igitur quando ex prava digestionem & inde enatis crudis ac lentis primarum viarum succis, post morbos febris ejusmodi succrescit, cognoscenda ex languore, interno æstu, continua ad sudandum proclivitate, in volis manuum præsertim ac plantis pedum, eo dirigenda curatio, ut prima regio à fordibus, febris fomite, liberetur. Perfici potest hoc pro circumstantiarum ratione leni emetico, quale præbet radix hypecacuanhæ, in pulvere, aut infuso data, & testatur *Lindanus*, se uno vomitorio & hinc cum elixir proprietatis, intra quatuor dies, curasse hecticam. Si autem præstat materiam vitiosam per os inferius educere simulque digestionem prospicere, ex usu sunt salia sic dicta neutra, digestiva, terra scilicet foliata tartari, nitrum antimoniatum, sal polychrestum, tartarus vitriolatus, solutio oculorum cancri, sal Sedlicense, vel sola, vel cum dimidia parte pulveris rhabarbari electi mixta, parcius, sed crebrius, cum sufficiente vehiculo oblata. Eandem blande laxantem simulque egregie roborantem virtutem habent pilulæ balsamicæ, à *Bechero* dictæ, quæ ea propter utiliter aliquoties, sed minori dosi, deglutendæ. Expurgato autem alimentari canali, subjungenda postea analeptica & stomachica, inter quæ præ reliquis commendamus essentiam chaccarillæ & gentianæ rubræ, item elixir nostrum stomachale cum spiritu salis, aut nitri dulci, paullo ante cibum quotidie sumenda, non neglecto commodo corporis motu & salubri potu, præcipuo harum febrium præsidio.

§. II.

*Post mor-
bos & fe-
bres sasp.
pressas.*

Eadem hæc medendi methodus apprime est accommodata in principio illarum gliscentium febrium, quæ post intempestive oppressas inter-

mittentes, aut suffocatas præpostere harum recidivas obrepunt. Si autem his nolit discedere lenta febris, optimum est consilium ut ipsa prior febris resuscitetur, tanto magis si suspicio est infarctus viscerum & mesenterii, ut in cachecticis & hypochondriacis. Prisca jam hæc fuit *Celsi* methodus, quam *lib. III. cap. IX.* describit: *in hoc casu cura Medici esse debet, ut morbum mutet. Fortasse enim curationi opportunior fiet. Sæpe igitur ex aqua frigida, cui oleum sit adjectum, corpus ejus pertractandum est, quoniam interdum sic evenit, ut horror oriatur & fiat initium quoddam novi motus.* At, pergit, *si diu frigus est, & torpor, & jaclatio corporis, non alienum est, in ipsa febre dare mulsi tres aut quatuor cyathos, vel cum cibo vinum bene dilutum. Intenditur enim sæpe ex eo febris, & major ortus calor, simul & priora tollit mala, & spem remissionis, inque ea curationis, ostendit. Sed, concludit, est circumspecti hominis, & novare interdum, & augere morbum, & febres accendere, quia curationem, ubi id, quod est non recipit, potest recipere id, quod futurum est.* Nam sicuti auctior sanguinis circulus in intermittente sæpius optima est medicina causæ, quæ febrim efficit: sic etiam lentæ febris causam, quæ frequentissime latibulis partium solidarum, glandulis maxime & vasis mesaraicis, altius infixæ est, expedit ac tollit. Hinc si intermittentibus, præsertim quotidianæ succedit lenta febris, intermittens mox revocata, quod aliquoties à vento boreali, aspero, lumbis liberius admisso, accidisse novi, calor intensior redditus, adhibitis simul congruis incidentibus & temperantibus remediis, morbum cum tempore ex voto solvit.

§. III.

Quando in plethorico-cacochymicis, cachecticis & scorbuticis, à mensium, vel hæmorrhoidum obstructione, nimia voracitate, mala diæta, potuum spirituosorum abusu corporisque refrigeratione, lentescentes hæ febres oboriuntur, alia medendi via ineunda, & usurpanda ea, quæ viscera sanguinea, hepar, lien, mesenterium, vasa & glandulas ab obstructione liberant & expeditum sanguinis & humorum per abdominis, & maxime mesenterii vasa, commeatum procurant. Hunc in finem spectatæ virtutis aquarum mineralium, tam acidularum, quam thermalium, usus. Ipse ego longo usu & experientia edoctus scribo, quod ad eradicandos ejusmodi lentos morbos, non certius deprehenderim auxilium, fontibus medicatis, & idem proprio exemplo confirmat *Thonerus observat. pag. 173.* Præ reliquis autem hoc nomine salubritatis laudem ferunt, ex thermis Emsenses & Wisbadenses, ex acidulis Schwalbacenses & Selteranæ. Opus tamen est, ut debito ordine, tempore ac dosi usurpentur, junctis simul idoneis remediis, quæ digestionem juvant, spurcis corporis succis temperatam balsamicam indolem reddunt, & sordium è corpore egressum secundant. Ubi autem salubrium harum aquarum copia non datur, surroganda alia similis virtutis præsidia. Ego quidem loco illarum sæpe cum fructu usus sum decocto ex jusculo carnis vitulinæ tenui, cum radice cichorei, foeniculi, asparagi, graminis, taraxaci & scorzonæræ, ita quidem, ut quotidie ejus mensuram, per aliquot hebdomades bibere jufferim, & ante potum assumere medicamentum martiale probe elaboratum, cujus generis suggerit tinctura martialis, cum succo pomorum Borsdorffianorum, cydoniorum, nec non aurantiorum, item tinctura martis *Zwelferi*, ex vitriolo martis & terra foliata tartari cum spiritu vini extracta, nec

*Ex vitio
hypochon-
driorum.*

nec non tinctura florum salis ammoniaci martialis, qui cum hæmatite parantur, si cum spiritu vini purissimo, vel melius corticibus aurantiorum imbuto, in tincturam aurei coloris, saporis gratissimi, virtutis præstantissimæ extrahantur. Sed necessarium est, ut tum sub horum, tum aquarum medicatarum usu, exquisita vivendi ratio & salubris diæta accedat, simulque corporis motus imperetur.

§. IV.

Quæ ab intestinorum & ventriculi erosione accidit febris lenta tabescens, omnia acria salsa, acida, stimulantia, ceu venenum experitur, ipsum Rhenanum vinum propter acorem non fert, dulcia etiam & fermentescibilia, nec non omnes difficilioris solutionis cibi eandem exacerbant. Curatio vero difficillima est, nec alia poscit, quam demulcentia & roborantia. Ego aliquoties decoctum lactis cum ligno sassafras & cascarillæ cortice, aut floribus chamomillæ & summitatibus millefolii, quotidie ad mensuram potum profecisse novi. Tum quoque radices althææ & juscula cum oryza & lacte decocta proficiunt, tragacantha etiam cum aqua menthæ soluta. Conducunt præterea clysteres ex lacte, cum vitello ovi, terebinthina & melle, aut alii emollientes cum syrupo de althæa *Fernelii*. Et quando spasmi simul in abdomine urgent, egregie eisdem demulcent pilulæ nobis usitatæ, antispasmodicæ, ex extracto chamomillæ, millefolii, oleo nucistæ, extracto croci & castorei.

§. V.

Porro gliscens illa & tabifica febris, quæ oritur in iis, qui diuturno animi affectu, mœrore, cura, nimio labore, vigilia, inedia, crebro & intempestivo veneris exercitio, à nimia salivatione, à fluore albo & gonorrhœa diuturna, ab effusiori alvi profluvio, lactatione nimia, ulceribus multum purulentæ materiæ plorantibus, & vires & rœcidos succos perdididerunt, omnia sanguinem commoventia & alvum stimulantia, motum etiam corporis impensiolem, alimenta quoque gravis materiæ nimiumque, ut ita dicam, substantifica, interdicit, & poscit potius animi corporisque quietem, alimenta & medicamenta temperatiora, quæ acrimoniam demulcent, calorem restinguunt, blande nutriunt & vires labascentes refocillant. Horum in numero sunt emulsiões ex amygdalis dulcibus, pineis, seminibus quatuor frigidis majoribus, cum decocto cornu cervi, aqua rosarum & cinnamomi cydoniata confectæ, lac asininum & muliebre solum, aut caprillum, vel vaccinum decoctum, cum succo cancrorum fluviatilium, jus pulli cum ptisana mixtum, ptisana decocta cum cancris fluviatilibus, vel etiam testudinibus nemorosis contusis, ex commendatione potissimum *Amati Lusitani Cent. II. curat. LIII.* qui curavit hecticum per pullorum gallinaeorum testudinibus nemoralibus saginatorum usum & lactis asinini potum. Sunt qui ostreas commendant, si stomachus fert, & confirmat hoc notabili exemplo virginis viginti annorum ex pulmonum labe hecticæ, *Lindanus, supra Hartmannum*, quæ largo & diuturno ostrearum esu, tam perfecte convaleuit, ut postea diu supervixerit & octo liberos pepererit. Vinum non nisi modice concedatur, & hoc quidem Neccarinum, aut Mosellanum, lymphatum. Accedat quoque motio corporis lenis, per gestationes & deambulationem lentam.

§. VI.

Quando harum febrium origo est à nimio abusu

liquorum inebriantium, vini, spiritus vini, aquarum sic dictarum vitæ, vini adusti, cerevisiæ quoque spirituosioris, cum corporis contabescencia; tunc pariter vitentur omnia calefacientia, spirituosiora, analeptica; incidentia pituitam & stomachica, cum cerevisiæ potu, sed usurpetur loco potus decoctum avenaceum, methodo *Loweriana* paratum, ex avena, radice cichorei, floribus papaveris rhœados & pauxillo nitri antimoniatum. Tum quoque utile serum lactis, cum pauxillo nitri, item lac ebutyratum, quibus multum tribuunt *Piens de febr. part. II. pag. 61.* & *Barbatus de sangu. & sero pag. 110.* His etiam conducunt ptisanæ cum hordeo & cichoreo, & affirmat *Borellus Cent. IV. obs. 89.* multos hecticos, tantum non desperatos, solo frequenti hordeatorum usu, fuisse restitutos. Neque minus locum habere possunt emulsiões dilutiores, ac gelatinosæ, cum succo citri condita.

§. VII.

Si, uti frequentius incidit, harum febrium origo in tœminis est à subita mensium suppressione, per potum frigidum, refrigerationem, aut terrorem, ocyssime vena pedis aperienda & decoctum quoddam resolvens, ex radice cichorei, herba sonchi, floribus bellidis minoris & sambuci propinandum, & omittenda omnia fortiora emmenagoga. Quod si autem prognata ab hac causa lenta vel hectica febris diu jam corpus tabe & fervore afflixit, neutiquam suadenda, sed potius interdicens est sanguinis missio, quia vires nimium debilitat. Ubi etiam à partus tempore menses plane substerunt & vera jam adest hectica, cum atrophia, tussi, diarrhœa, pectoris difficultate, universali corporis languore & calore lento consumente, non de remediis menses pellentibus cogitandum, sed symptomata contrarium potius indicant. Idem tenendum de illa tabifica debilitante febre, quæ à fluxu hæmorrhoidali retento, aut obstructo, ortum ducit. Tum quippe, si vires & succi jam consumti, imprudens plane est molimen, ad evomendum fluxum evacuantibus & pellentibus aloëticis, aut sanguinis missione in pede uti. Observavi enim sanguinem valde fluidum & coccinei coloris fuisse evocatum, sed paullo post febrem accensam, vires prostratas, somnum turbatum, & citius, quam quidem fieri potuisset, ad lethalem eventum morbum promotum.

§. VIII.

Quæ senibus solennis hectica, marasmus dicta, melius avertitur, quam curatur. Quum vero attentata observatione constet, senes duplici ex causa tabificæ febris implicari, scilicet vel ex plethora, sive potius sanguine & crasso, & copioso, abdominis viscera ipsumque mesenterium infarciendo & obstruente, vel ex cacochymia, si copia feri impuri falsi, ob insufficientem ipsius, maxime per cutem, excretionem, ad binas has causas dirigenda utique cura præservatoria. Quod si itaque senex vitæ quietæ & sedentiariæ addictus, appetitu tamen ciborum adhuc valens, omiſsa, vel plane neglecta sucta alias sanguinis missione, vel emanente etiam spontanea sanguinis excretionem, & metus est, ne incurrat in lentum, continuum, debilitantem & tabefacientem calorem; id quam maxime agendum medico, ut sanguinis plenitudinem tempestiva venæ sectione minuat, diluentes salubres potus largius bibere suadeat, abstinentiam à cibis nimium nutrientibus ac convenientem corporis motum serio iungat. Si vero senum succi impuris & à blanda naturali indole alienis particulis scatent; nihil aliud agendum,

*vinosiorum
abusu.*

*Ab inter-
cepto men-
suum.*

*Et hæmorrhœa
rheidum
successu.*

*Marasmi
senilis
tractatio.*

dum, quam ut per clementissima laxantia, rhabbarina, mannata & passulata, sordes, spurcitiem humorum foventes, evocentur & temperati roscidi succi rursus ingenerentur, per usum gelatinarum & lacticia, maximeque asininum lac, quod utique senili ætati, ob demulcentem, aperientem & leniter evacuantem facultatem, est saluberrimum.

§. IX.

Tabis infantum medicatio.

Quæ infantili ac puerili ætati infesta est ac funesta lentescens febris, relinquitur potissimum post variolas & morbillos, ventre simul tumefacto, superioribus autem penitus contabescentibus & in dissectis eadem defunctis, mesenterium plerumque tumoribus duris, scirrhis & steatomatibus, præsertim circa venas quæ ad portam excurrunt, & pulmones tuberculis ac vomicis conspiciuntur obfessi. In hac consultius etiam mali insultum avertere, quam præsens abigere, quod nunquam non irritum esse solet atque frustraneum. Quæ autem tabes in infantibus ortum trahit ex nimia voracitate, sive addiphagia & refrigeratione corporis, medicationem admittit. Ego quidem non certius in hac novi auxilium, quam externe usum balneorum aquæ dulcis temperatorum, aliquandiu continuatum, & interne, ad expediendas obstructions glandularum, venarum mesaraicarum & lactearum, crebriorem, sed parciolem usum liquoris salini aperitivi, ex sale tartari, nitro, arcano duplicato, æquali pondere mixtis, & addita dimidia parte salis ammoniaci, cerevisiæ potandæ instillati.

§. X.

Lacutile est.

In omni autem hæctica hæud postrema eo tendit indicatio, ut roscidum illud humidum, quod calor continuus nō modo ex sanguine, sed etiam ex tubulis solidis, & una cum hoc ipsam tandem carnem atque pinguedinem absumit, resarciatur. Huic scopo quam maxime satisfaciunt, alimenta medicinali simul virtute instructa, inter quæ palmam fert lac ipsum. Nam priscum est Hippocratis Sect. V. aph. 64. præceptum: *convenit lac exhibere tabescentibus, non valde multum febrientibus, & in febribus longis, & debilibus, & præter rationem consumtis.* Optimum humanum, quod promptius consumtum restituit humidum & calorem extinguit, idque ex mammillis suctum, ne ab aëre vitietur, quo hæcticam curatam esse, fidem facit Forestus lib. V. obs. X. Asininum minus quidem nutrit, sed magis refrigerat, calorem temperat, abstergit, & aperit, ejusque præstabilem facultatem laudat mirifice Ballonius lib. I. pag. 236. integro consilio pro illustri Principe, qui pronus erat ad tabem. Cardanus fol. 323. dubium non est, ait, quin tota sanitas tabidi consistat in adhibitione lactis asinini. Et Aretæus lib. II. de cur. acut. tabis curam ita instituere suadet: *si quis in tabem prolabitur, tunc terendum tempus non ea quiete & victu tenui, sed æger ad motiones traducendus, per gestationes, frictiones & lavacra, quo vitæ residuum à morte vindicetur, augeatur & recreetur. Propinandum vero etiam est lac, maxime mulieris, quæ proxime peperit puerumque nutrit. Hi namque alimento, ut nuper in lucem editi pueri, egent. Si lactis humani copia non datur, asinæ, quæ non pridem peperit, lac accipito. Tenuis est enim & fluxile huiusmodi lac. Efficacius nutrit caprillum & vaccinum, sed gravius est multumque caseosæ substantiæ habet, ideoque ne ventriculum male afficiat, corrigendum.*

§. XI.

Mihi præ reliquis placuit Hippocratis lacte utendi methodus, quam de intern. affect. pag. 209. sic tradidit: *dandum est & lac asininum coctum ad suppurationem, bibat etiam crudum lac bubulum, tertia aquæ mulsæ parte admixtum, per XLV. dies, admixto etiam origano.* Recte enim gravis hic auctor passim ad lenem purgationem commendat lac asininum coctum, quia sal ipsi inest dulce instar sacchari, abstergens leniter & laxans, quod coctione diffuso humido, concentratur magis. Origanum autem adjicere præcepit procul dubio ad roborandum stomachum & genus nervosum debilitatum. Ego, si lac asininum haberi nequit, ita lactis curam adornare soleo, ut præcipiam primum, per duos, vel tres dies mane potare lac, è vaccis herbis recentibus & appropriatis pastis multum, ad libram unam, in qua uncia mannæ, aut sacchari rosati, vel conservæ rosarum dissoluta. Dein mensuram folius lactis quotidie bibere præcipio, addendo sacchari unciam dimidiam & nitri drachmam dimidiam. Pro circumstantiarum ratione, præsertim ubi suspicio labis in mesenterio, aut exulcerationis in viscere interno, lacti confundo ad dimidias, vel tertias, aquam, aut puram fontanam, aut longe melius Selteranam mineralem. Hac vero deficiente, aquam communem infundere suadeo cum veronica, soncho, pulmonaria, hepatica, musco pulmonario, tussilagine, hedera terrestri, scolopendrio, capillis veneris, floribus hyperici & rosarum, & infusum hoc cum tantundem lactis, vel caprilli, vel bubuli calide bibere, adjecto saccharo, & pro meliori absterfione, aliquot guttis olei tartari per deliquium. Cura hæc minimum per sex hebdomades continuanda, ac interea vitanda omnia quæ stomachum gravant, debilitant & lac coagulant. Vinum quoque ex toto circumcidendum, & non aliud ad stomachum fovendum concedendum, quam parcum Hungaricum, aut mulsam ex melle Borussico confectam.

§. XII.

Antequam tamen cura lactis instituatur, videndum est, an ventriculus illud ferre possit. Sunt enim non nulli, qui lac à natura penitus averfantur. Notavi etiam, quod qui diætæ vinosæ dediti, cerevisiam largius potant, lac commode ferre nequeant. Neque accommodum est hypochondriacis, neque si febris vehementissima & cephalalgia juncta. Si stomachus languidus & obstructa mesaraica vasa, corrumpitur, facile in vaporem abit magnaque creat incommoda. Videndum igitur, ne in ventriculo defideat, ad quod avertendum, Galenus lib. X. simpl. medic. præcipit, ut coquatur & chalybs ignitus, aut filices candentes, injiciantur. Tutissimum autem lac asininum, sero plus redundans, minusque caseosæ substantiæ habens, quod etiam Galenus in hæctica præfert; cujus saluberrimam virtutem perculiari dissertatione, de mirabili lactis asinini usu in medendo excussit. Quod si tamen asinini lactis copia non est, substitui potest serum lactis dulce, methodo à nobis descripta in dissertatione de feri lactis virtute longe saluberrima paratum. Sunt etiam, qui lactis serum in B. M. destillant, & prolectam destillatione aquam mirifice dilaudant, tam potam, quam loco vehiculi assumendorum medicamentorum.

§. XIII.

Porro in hisce suspectis febribus providendum, ut crasis & mixtio ipsius sanguinis, ab intima dissolutione & colliquatione elementorum, quam

quam continuus calor minatur, vindicetur & æquilibrium inter calidum & humidum conserve-
tur. Hunc in finem salubria, à medicis passim lau-
data leniora adstringentia & roborantia. Cele-
bres hoc nomine tincturæ, sive potius solutiones
coralliorum, aut matris perlarum, cum acido
subtili & naturæ amico, uti est succus citri, ber-
berum, aurantium, vel pomorum Chinenfium.
Utilis quoque tinctura rosarum, cum aqua rosa-
rum & phlegmate vitrioli parata. Quæ leniter
adstringunt & roborant, sunt species de hyacin-
tho, quæ cum aliquot granis coralliorum & nitri,
colliquativos sudores egregie compescunt. Mag-
næ etiam virtutis elixir nostrum balsamicum tem-
peratum, ex guminatibus resinosis temperatis &
extractis, sine vini spiritu paratum. Nec omit-
tendus chaccarillæ & ipse quoque chinæ cortex,
si cum syrupo acetositis citri, aut nucis Indicæ,
adjecto nitro, in electuarii formam redigitur. Pro-
ficit etiam bolus rubra fabrilis, cum conserva, vel
julepo rosarum subacta. Hæc enim omnia ad le-
vandas ejusmodi lentas febres, si prius humorum
& viarum vitio prospectum, eximie virtutis, eo-
rumque rectus usus merito commendandus. Quin
novi plures, & hecticos, & phthificos, his diu
fuisse servatos.

§. XIV.

Quæ autem à chymiatris ad hecticum calorem
& adversus sudores passim laudantur saturnina,
encomia minus sustinent, sed propter metallicam,
adstrictivam, nervis inimicam virtutem, tono
ventriculi & intestinorum sunt contraria & cer-
tius ac plus nocent, quam profunt. Hinc rejicien-
dum saturni saccharum, & quæ præ omnibus ce-
lebratur, parata ex hoc antiphthifica tinctura
Grammanni. Antihecticum vero *Poterii*, si rite
ex stanno puro, nitro & antimonio paratur &
cum emulsionibus datur, non tam noxium est, ut
quidam putant, sed ob blandam roborantem dia-
phoreticam virtutem, utile omnino. Neque enim
stannum, propter blandum quod fovet sulphur,
nervis est inimicum, nec adstrictivum, uti qui-
dem plumbum. Gravis de salutari facultate anti-
hectici hujus testis est *Muraltus* disertis verbis in
M. N. C. Dec. II. An. I. obs. CIX. ita scribens:
diaphoreticum joviale, sive antihecticum Poterii, ad demulcendam acritudinem humorum matricem, & nervos irritantium, mirum quantum valet. Idem uterum corroborat, sæpe ex emaciatis & debilibus, quadratos & robustos facit.

§. XV.

Balneorum in hecticis & lentis frequens, præ-
ferim apud veteres, commendatio. *Sennertus* ex
Galeno methodum iisdem utendi pluribus exhi-
bet. Instar omnium vero de eorum vario usu lo-
cus est *Alpini*, de *Med. method. lib. VI.* dignus,
qui totus huc transcribatur. De externis, scribit,
medicamentis balnea conveniunt, ex aqua dulci,
aut ex aqua alterata althæa, malva, violis & aliis
similibus. In *Ægypto* ex lacte asinino & camelino,
vel equino, balnea tepida instituunt pro Magnati-
bus. Epithemata iidem atque inunctiones com-
mendantur. Ex balneis tepida conveniunt atque
frigida. Illa humectant solidas partes, fuligines,
fumidaque excrementa digerunt, corpusque recte
transpirabile reddunt, & remissa caliditate, etiam
calorem hebetant. Hæc refrigerant, cutim densant,
virtutem, calorem augendo, roborant. Sed non in
excarnibus corporibus & valde prælanguidis, tu-
tum erit, uti admodum frigidis balneis, quando
nec hæc calorem augebunt, sed quinimmo præ-
languidum extinguunt. In robustis vero erunt uti-

Frid. Hofmanni Oper. Tom. II.

lissima. Robusti his in die, scilicet mane & vespere,
ante cibum, hisce balneis utuntur, semel vero de-
biles. Nonnulli non vehementer frigida balnea,
sed lenissima frigiditatis, utiliora & magis tuta esse
volunt. Ideoque primum ægrotos in balneum tem-
perate calidum ducunt, & mox in leviter frigidum,
ita ut tepidum potius sit, sive leviuscule frigidum.
Ægyptii & Arabes uti solent balneis ex aqua Nili
fluminis, ex lacte camelino, vel equino, asinino,
vel caprino; item thoraci, hepati, ventriculo, re-
nibus, ex lacte, oleo violato rosatoque tepido, aut
ex succo lactucæ, junci, endiviæ, portulacæ, poly-
goni, lenticulæ palustris, nenupharis & similibus,
cum modico lactis & croci, ad penetrationem, ad-
movent epithemata. Sed tenendum omnino in ge-
nere de balneis; eadem commode habere locum
in principio morbi & quando à viribus fractis
pendet, nec non in lenta infantum febre, quia
emolliunt, demulcent, rigidas fibras laxant & si-
mul humectant; nihil autem proficiunt in progres-
su morbi, sique putredo, abscessus & exulceratio
interna jam præsto sunt.

§. XVI.

Ex præcipuis veteres & molestas has febres ex-
pugnandi præsidia, est motus corporisque exer-
citatio. Veteres jam, *Hippocrates & Aretæus*, in
tabe curanda mirifice commendaverunt varia mo-
tum genera, deambulationem, vecturam, ge-
stationem, peregrinationem & navigationem,
quin *Hippocrates lib. de intern. affect. §. XXXIV.*
pag. 238. præcipit: si quis validus fuerit, per tri-
ginta dies ad ligna secanda ablegetur, & summis
humeris lætetur, & interdum d. ambulet, & vespere
dormiat. Sed saluberrima & accommodatissima
motus species equitatio, aut vectura in curru,
quibus, perpetua corporis succussatione, sangui-
nis progressus per mesenterium egregie adjuvatur.
Multi inprimis sunt in laudanda equitationis uti-
litate celeberrimi Angli, *Sydenham & Morton*.
Ille quidem *opp. pag. 524. & 781.* non veretur
affirmare, equitationem esse in hectica & phthi-
si specificum sine pari, eoque certius, quo neque
mercurius in lue venerea, neque cortex Peru-
vianus in febribus intermittentibus, efficacius aut
certius. Et *Morton. exercit. de phthif. pag. 26.* ita
graphice differit: nullum magis conveniens reme-
dium, quam quotidiana ad moderatos usque sudo-
res protracta equitatio est, in febribus lentis, hecticis,
ex vitio maxime ventriculi, ex perversa forte
februm intermittentium tractatione, nimio intem-
pestivoque sigentium, præcipitantium & adstrin-
gentium abusu, frigido potui calenti corpori super-
fuso &c. quorum præternaturalis æstus corporis lau-
dabiles succos depascit, ex ventriculi & intestino-
rum saburra acida, lenta simul & viscida, meatus
obstruente præternaturam; utpote qua viscosus len-
tor, sive effæctus chylus, qui vasa & habitum cor-
poris jam infarcit, æquabili succussione discontinua-
tur, excernitur, ut appetitus iterum restituatur,
novus chylus laudabilis & copiosior elaboretur. Ex-
pedit tamen innuere, in lentis auctam & frequen-
tem apprime utilem esse, in hecticis vero stricte sic
dictis moderatior sit.

§. XVII.

Tandem, quicquid in lentis his & tabidis præ-
standum, id mature faciendum omne. Neglecta
enim hac opportunitate, accedente medentis, vel
laborantis errore & morbo diutius protracto, ir-
rita prorsus atque frustranea est medicatio, & fe-
re semper in hecticam transitus fit lethalem. Qui
autem his febribus jam detinentur, autumno sem-
per pejus habent, ob languidiorem naturæ in acti-

Q.

bus

Motus com-
mendatur.

Mature
subvenien-
dum.

Non satur-
nina me-
tallica.

Balneorum
usus atque
utilitas.

bus secretoriis & depuratoriis virtutem. Quin, quia circa æquinoctia ordinario subitæ insalubres fiunt aëris & coeli mutationes, plerumque tum non modo gravius ægrotant, sed & decedunt hectici incurabiles. Igitur necessarium est, ut circa hæc tempora exactam victus servent rationem, animum tranquillum habeant, aëris injurias vitent & à medico quoque consilium petant.

ENARRATIONES MORBORUM.

OBSERVATIO I.

Lenta febris in bibulo curata repetens in phthisin transit lethalem.

Vir quadragenario major, phlegmatico-sanguineus, à multis jam annis computationibus in seram usque noctem indulserat, modo cerevisiam, modo vinam, modo vini spiritum bibens, parum vero appetens. A duobus autem mensibus valida affectus erat tussi, somnum omnem arcente, cum intenso æstu, vesperi ingravescente, ægra spiratione, virium dejectione & corporis consumptione, nec non copioso per tussim muci scretu. Meum per literas exquirebat consilium, sed nolui primum manum admovere, uti non facile soleo in longis ejusmodi & desperatis morbis & qui jam varia medicorum artificia experti. Quum autem intercederet vir honoratus, mihi amicissimus, suasi ut biberet cerevisiam medicatam hanc: recipe herbæ hepaticæ, pulmonariæ, hederæ terrestres, scabiosæ, cardui benedicti, veronicæ, agrimonix, tussilaginis, musci pulmonarii, florum hyperici ana manipulos duos, rhabarbari uncias duas. M. conc. indantur sacculo & ad fermentationem suspendantur in quinquaginta mensuris cerevisiæ recentis. Exhibui quoque pulverem ex matre perlarum, antihectico Poterii, lapidibus cancerorum & nitro, cum emulsione dilutiori ex amygdalis & pineis. Dedi porro consilium, ut largiter forbillaret juscula tenuia, ex carne vitulina, cum radice scorzonæræ & cichorei decocta. His per aliquot hebdomades usurpatis, nunciatum mihi, egregium accessisse levamen. Hinc suasi, ut usui insisteret adhuc per mensem, quo etiam cum periculoso morbo in gratiam rediit. Sed quum suetum vitæ genus bibulum nihilo secius sectaretur, multisque domesticis curis afficeretur, anno circumacto, post gravem iram incidit in hæmoptysin, quam sequuta phthisis, hectica tandemque mors.

Epicrisis.

Qui ex nimio potu sibi phthificum & hecticum morbum contraxerunt, omne lactis genus fastidiunt. Hinc in nostro concessi quidem cerevisiam, sed medicatam, per herbas leniter roborantes, balsamicas, consolidantes & sanguinem purificantes. Hac igitur labes viscerum, maximeque pulmonum atonia sublata. Sæpe enim hecticum hoc malum in principio à sola atonia pendet, sub qua & secretiones, & excretiones rite succedere nequeunt impuratum, largius ab ejusmodi bibulis heroibus collectarum. Et profecto ego testari possum quod decocta ejusmodi specierum, ex aqua, vel cerevisia, addito quandoque melle, in chronicis ejusmodi lentis febribus præstiterint mira, si modo aliquamdiu continuata, quin longe plus, quam pretiosa, singulari arte & labore confecta. Sed promptus omnino mali recursus, nisi exacta vitæ victusque ratione arceatur, & viscerum imbecillitas penitus emendetur.

OBSERVATIO II.

Juvenis literarum studiosissimus, ob teneram à nativitate corporis constitutionem, in catarrho fluxiones, diarrhœas, tusses, phthisin etiam pronus, animo quoque admodum sensibilis, tempore vernali afficiebatur tussi ferina, tum epidemia, primum sicca, dein humida cum interno æstu, intercurrente horripilatione & accedente virium, ob somni defectum, prostratione. Dabantur leniora laxantia, mannata, rhabarbarina, linctus pectorales, pulveres item & elixiria pectoralia, sed sine singulari levamine. Exactis sic sex & pluribus hebdomadibus, hectica imminere visa; hinc suasi ptisanæ, ex rasura cornu cervi, radice scorzonæræ, hordeo mundo ac semine fœniculi, cum æquali parte lactis bubuli, potum quotidie ad mensuram, ita, ut mane dimidiam & pomeridie iterum dimidiam biberet. Sed æger, quoplus, eo melius, putans, quotidie vel duas mensuras ingurgitavit, ventriculo tamen adhuc firmo, haud male. Sumsit quoque subinde pulverem ex spermate ceti, lapidibus cancerorum, floribus sulphuris, saccharo & pauxillo nitri. His paucis & euporistis tantum profectum, ut notabile paulo post sentiret auxilium. Sensim postea symptomata discesserunt omnia, tussis placata, æstus restinctus & appetitus cum somno rediit.

Epicrisis.

Non penitus, sicut in hydropico, sic etiam in hectico malo, desperandum est, si vitium fluidarum nondum transiit in labem & corruptionem ipsorum viscerum, inflammationem scilicet, ulcerationem, aut scirrhum. Felix igitur est medicus, qui hæc bene cognoscit. Sic enim curationem bonis avibus suscipere potest, quæ, si feliciter cedit, famam & gloriam inde reportat. Magna adversus difficiles & longos morbos facultas in ejusmodi temperatis, euporistis domesticis, diluentibus & humectantibus remediis, quin longe præstabilior, quam in pharmaceuticis cunctis. Medici in eo plerumque delinquant, quod si tussis humida valida adest, phthisin esse putant, eaque propter pectoralia multa adhibent, quum tamen sæpe sola humorum acrimonia horumque ad pulmones remissos decubitus, causa sit tussis vehementioris cum scretu copioso, & dulcia pingua relaxantia ob id plus noceant, quam profint. Lactis autem cum aqua diu continuato usu, veteres jam, *Hippocrates* & *Aretæus*, tabem persanarunt. Exstat quoque in *M. N. C. Dec. II. An. IX. obs. 189.* de viro hectico desperato viso, solo potu aquæ frigidæ curato, observatio *Burgii*, qui B. parentis mei anno MDCLXIV. fuit discipulus, ipsiusque effigiem, clavi pharmaceuticæ præfixam, carmine decoravit.

OBSERVATIO III.

Miles quidam, facile lividus, corpore macilentus & languidus, pulsus tamen celerem cum quadam duritie exhibens, conquerebatur de alvi fluxu per tres continuos menses ipsum adeo detinente, ut quotidie, octies, vel decies, desiderare cogeretur, secedentibus non nunquam, ut naturaliter fieri solet, excrementis, non nunquam vero saniosa, non nunquam sanguinolenta materia, sine scybalis, appetentia ciborum simul imminuta faucibusque aridis. Inquirenti in tam chronici mali causam, respondit: se graviter aliquando in

Hectica phthisis incipiens curata.

Mesenterii abscessus diarrhœa saniosa foetida.

sinistro dorſi & thoracis latere verberibus eſſe percuffum, ut locus etiam ſugillatus comparuerit, & dolor ſucceſſerit impenſus, præterlapſis autem aliquot diebus, doluiſſe hypochondrium ſiniſtrum, ibique ſupra os ilei protuberaiſſe tumorem, aliquot hebdomades ſubſiſtentem, donec obortis in ventre torminibus, alvus ſponte fuerit ſoluta, multaque ſanioſa, foetida, atro etiam ſanguine tincta, copioſis ſeceſſerint dejectionibus. Ex eo quidem tumorem ſubſediſſe & dolorem quoque evanuiſſe, ſed diarrhoeam perſitiſſe & adhuc ipſum mirum exercere ac vires abſumere. Dimiſſus igitur eſt conſilio, ut ſerum lactis dulce, noſtra methodo paratum quotidie ad menſuram unam, nec non inuſum, ex ſcabioſa, veronica, ſanacula, mentha, meliſſa, millefolio, floribus hyperici & papaveris erratici frequentius potaret. Quibus etiam effectum, ut poſt aliquot hebdomadam decurſum rediens, gratus profiteretur, parciore longe eſſe dejectiones, corpus vegetius, meliora omnia, nec de perfecta impetranda ſanitate dubium.

Epicriſis.

Nullum certe eſt dubium, quin in hoc abſceſſus fuerit in meſenterii compage obortus, qui demum ruptus, effudit in inteſtinorum cavum ſaniem & cruorem, per ani ſeceſſum excretum. Qui vero factum, ut à ſuperiorum percuffione, in abdominis penetralibus inductum apoſtoma, diſquiſitione omnino dignum. Nos quidem ab impedita ſanguinis in partibus plagis gravius contuſis circulatione, mali ducimus natales, unde factum, ut in homine plethorico ſanguis majori copia fuerit delatus ad meſenterii diverticulum, ibidemque collectus, demum putreſcere cœperit, & in abſceſſum conceſſerit. In meſenterio enim ſæpius oboriri ſtagnationem, ſi in remotioribus partibus ſanguinis progreſſus interceptus, non novum. Ipſi novimus, hoc facto, meſenterium cum omento putre & ſphacelatum fuiſſe inventum; vulnere lethali diaphragmati inſiſto, cruorem vaſa meſenterii perrupiſſe, & abdomen inundaiſſe, & in aſthmate ſpaſmodico, à polypo in appenſis cordi canalibus, meſenterium itidem ſanguine multo oppletum, vaſa ipſius diſtenta partim, partim plane diſrupta, comparuiſſe.

OBSERVATIO IV.

*Hæctica
phthiſica
lethalis.*

Vir erat macilentæ & cholericæ conſtitutionis, qui ex hæreditaria quadam & nativa diſpoſitione pulmonum alebat vitium, ac præterea ob nimias lucubrationes vitamque nimis ſedentariam variaſque animi ex ira commotiones, corporis & ſtomachi ſibi contraxerat imbecillitatem. Hic ab aliquot jam annis inagnam pituitæ viſcidæ copiam ſcreatu ejecerat, hæcque ejection mirum demum copia increvit, & per duos fere menſes, cum lenta febre, ſpirandi difficultate, viriumque jactura, nec non exquisito ſub urinæ emiſſione ardore, duravit. Tum quidem æger emulſionibus, juſculis medicatis & decoctis demulcentibus, interpoſitis clementer alvum laxantibus, cum ſanitate in gratiam rediit; exacto vero circiter anno, eidem malo denuo implicitus eſt. Alium igitur in conſilium adſcivit medicum, qui licet ſemper adſuiſſet anxia reſpiratio, tuſſim tamen non phthiſicam, ſed ex ſtomacho æſtuante & hypochondriacum ſymptoma eſſe judicavit, putavitque, ceſſatura omnia, ſi tempeſtivus prodiret hæmorrhoidum fluxus. Variis demum incuſſum ad-

Frid. Hoffmanni Oper. Tom. II.

hibitis, de vena ſecanda conſilium dedit, floridumque è pede extraxit ſanguinem. Sed eodem adhuc die veſperi ægrum horror per univerſum corpus inceſſit, ſubſequenti intenſo æſtu, nocte inſomni, virium jactura gravi & perfecta acceſſit hæctica, qua etiam è vita menſe Martio diſceſſit.

Epicriſis.

Qui ex parentibus phthiſicis geniti ſunt, iis per totam fere vitam ſemper debilis corporis conſtitutio, ut languſcat ventriculi digeſtio, & ipſi in catarrhos, ex levi æris vitio, lento cum calore, proni ſint, quin facillime, niſi regimen circa non naturalium rerum uſum exquisite obſervent, in phthiſin & hecticam incidant. Hic æger, Collega & amicus noſter, valetudinariam diu duxit vitam & aliquoties circa æquinoctia phthiſica tuſſi cum febre laboravit; DEI tamen auxilio, darorum à nobis remediorum ope, convaluit. Tandem vero ſe commiſit medico, qui perfectam morbi curationem brevi pollicitus eſt. Et quum à plethora & hæmorrhoidum fluxu impedito omnia pathemata pullulare putaret, a venæ ſectione cepit initium, ſed male hæc ceſſit. Inde enim mox peſſime habuit, & in phthiſicam hecticamque incidit tuſſim lethalem, fruſtra omnibus datis remediis. Diſcant igitur, qui plethora ubique crepant: in debili & hecticico corpore nunquam utilem eſſe venæ ſectionem & ſalutarem, quia per continuum calorem ſanguis jam conſumtus, & ſucci potius ingignendi ſunt, quam ſubtrahendi. Sed plura in ſimilibus caſibus notavi delicta. Obverſatur adhuc animo exemplum ſereniſſimæ perſonæ, vix vigefimum ætatis annum egreſſæ, quæ à matre phthiſica genita & ipſa phthiſi periit. Nimirum quum ex puerperio noviffime ſuperato admodum debilis, in curru aperto, incitato equorum curſu per aliquot horas vecta, ærem valde frigidum, vento agitatam, ad pectus admiſiſſet, mox de catarrhis, tuſſi anhelofa, ficca, laſſitudine corporis & ſudore nocturno conqueſta eſt. Medicus catarrhalem febrem eſſe autumans, pectoralia oppoſuit dulcia, indies vero hæc ſymptomata & calor conſumens vires, creverunt. Hinc quia menſes nondum iterum prodierant, venam incidere ſuaſit, quo longe debilior facta, & placide haud ita multo poſt ex hac vita deceſſit. Errant igitur medici vehementer, qui nullum diſcrimen faciunt inter menſium obſtructionem, quæ à copia ſanguinis & inſarctu viſcerum eſt, ubi venæ ſectio juvat, & inter eam, quæ ex ſanguinis defectu venit, uti ſit in phthiſi & hecticica, ubi utique ſanguinem detrudere, qui ordinarie deficit in hecticis, nil aliud eſt, ac mortem promovere.

OBSERVATIO V.

Vir illuſtris, Regi à conſiliis, quadragenario major, ſtatura longus & macilentus, hypochondriacis pathematibus & parciore hæmorrhoidum fluxui obnoxius, poſt iram vehementiorem, perſenſit totius corporis languorem, cum dolore preſſorio, circa primam lumborum vertebram, abdominis torminibus, æſtu interno, veſperi invaleſcente, inappetentia, alvo ſimul clauſa & flatibus ruſtibusque ad ſuperiora regurgitantibus. Secta fuit vena & dati pulveres digeſtivi, abſorbentes atque nitroſi: nihil tamen opis allatum. Ventris potius dolores cum æſtu interno increverunt, carnes ac vires conſumerunt, interdum abdomen mirum intumuit à flatibus, & præcor-

*Hæctica ex
meſenterii
abſceſſu
diarrhœa
purulenta
ſoluta.*

dia tenuit anxietas summa. Sic duos exegit menses, multisque medicis & medicamentis usus, hecticus visus fuit, tantum non conclamatus. Ipsa tamen natura tandem curationis aperuit viam, sedecente per alvum materia saniosa multa, quæ etiam apparuit in urina. Hoc facto, calor quidem & dolor factus mitior, appetitus quoque instauratus. Sed quia purulentus hic alvi fluxus, longius quam per tres menses successit, cum insigni virium debilitate corporisque marcore, indicium præbuit haud fallax grandis in mesenterio abscessus. Interim quum æger exquisitam diætam fervaret, juscula gelatinosa, lac asinum, bubulum cum herbis vulnerariis coctum, & caprillum cum Selteranis mixtum, potaret, simulque pulverem ex semine lycopodii, musco pulmonario, urtica mortua, tussilagine, semine cymini, nucista & saccharo, in emulsione ex amygdalis & pineis subinde fumeret, factum est, ut sensim vires redirent, ejectio materiæ per alvum ac tussim minueretur, & ipse, præter spem omnium, convalesceret, inuncto postmodum victu exacto & regimine congruo.

Epicrisis.

Hypochondriaci & hæmorrhoidarii in mesenterii morbos, inflammationes & abscessus delabuntur facile. In his enim jam tum mesaraica vasa sanguine farta & humoribus sunt distenta, tardissimisque per eadem comæatus. Nostro sine dubio, à gravi ira, accidit sanguinis extravasatio, inflammatio & inde suppuratio. Parva autem suppuratio, brevi potest ampliari & latius progredi in mesenterii compage, largiter obfessa pinguedine, quæ in liquamen saniosum facile liquefcit. Quod vero purulenta materia alvo expurgata, tribuendum naturæ beneficio: & quod in urina comparuit pus, à venis reforptum & per renale cribrum excretum, eodemque modo etiam successit puris screatus, integris pulmonibus renibusque. Quin novi, utero ulcerato, per asperam arteriâ rejectum fuisse pus, illæsis plane pulmonibus. Soli etiam naturæ debetur sanitas recuperata; nec minus providentiæ divinæ, si tam periculose laborans invenit medicum, qui morbum perite & leniter tractare novit. Sed quia ejusmodi abscessus perquam facile recrudescunt, exacte ad sanitatis regulas vita instituenda, & vitanda cum cura cuncta, quæ ad mali recursum facere possunt.

OBSERVATIO VI.

Lenta febris post tertianam curata.

Fœmina triginta annorum, tenera, victum tenuem, mollem, per multos annos suetum, cum crasso & duro permurarat, & carnes infumatas piscesque salitos liberaliter ingesserat. Incidit hinc primum in tertianam notham, à qua post mensem liberata, ad stomachum fuiciendum usa est tinctura aperitiva *Moebii*, ex spiritu salis, cum sale tartari, torna solis tincta: hac adeo aucta appetentiâ, ut vix famem sedare posset. Paulo post persensit virium lapsum appetitusque prostrationem, cum aestu interno ac phlogosi, pulsu vesperi ac post cibum semper multum increbescente, successit tandem languor universi corporis pedumque tumor ac dolor confusivus. Medicum igitur accivit: qui, quum primam regionem saburra acidorum humorum obfessam esse recte concluderet, lene dedit emeticum, ex tartari emetici uno & dimidio grano, aquæ menthæ uncia & julepi rosarum drachma. Assumpto hoc, ingens copia

viscidæ amurcæ viridissimæ, instar æruginis æris, vomitu rejecta, quæ instillato oleo tartari per deliquium, flavum induit colorem, luculento indicio, ex bile & acido corrosivo eandem esse constat. Mitior inde redditus calor & molestus ossium dolor complacatus, vires quoque reparatæ. Nihilo minus, ad reliquum exturbandum, tertio die iterato datum hoc pharmacum, & evocata tam per superius, quam inferius os, similis indolis recrementa. Postea vero datum elixirium nostrum balsamicum stomachale & pulveres præcipitantes cum duplicato arcano, tam salutari effectu, ut brevi post febris hæc cum omnibus symptomatibus discederet, & ægra cum valetudine in gratiam rediret.

Epicrisis.

Ortum duxit lenta hæc febris ex primæ regionis cruditatibus, quas ingenuit voracitas, post febres superatas solennis & usu spiritus salis adaucta. Licet enim aperitiva *Moebii* tinctura stomachi vitiis appetitum excitando & digestionem facilitando, egregie opituletur; ubi tamen ventriculus plus appetit, quam coquere potest, noxam potius affert, quam emolumentum. Recte igitur datum vomitorium, qua saburra acido-biliofa, morbi causa exturbata, sicque simul sublata symptomata cuncta.

OBSERVATIO VII.

Novi senem octuagenarium, robustæ naturæ & ob nimiam sanguinis redundantiam singulis mensibus hæmorrhoidum fluxui obnoxium, ceterum bene valentem & bene appetentem, inprimis quum quotidie vini liberalem haustum biberet cum oblectamento. Hic tandem autumnno, confecto itinere & pota cerevisia minus defœcata, ingestis quoque aliis fermentescensibus, digestionis turbas & flatulentias expertus est; subsistit paullo post hæmorrhoidum stillicidium, appetitus periit, vires successive conciderunt, ructus facti continui, cum coitatu ad vomendum, os siccatum, alvus obsæata, pulsus celer redditus ac debilis. Hæc durarunt per duos menses, & graviores indies facta, tandem frustra adhibitis omnibus, vitæ attulerunt finem.

Epicrisis.

Senes levi ex causa & errore commisso, in graves, immo funestas, ni mature succurratur, incidere possunt affectiones. Quando enim sanguis hæmorrhoidalis, evacuari solitus, retinetur, neque per tempestivam venæ sectionem ad liberum circuitum traducitur, stagnat in visceribus & ad corruptionem vergens, putridam talem febrem, quæ in senibus marasmi nomine venit, ingignit.

OBSERVATIO VIII.

Vir quadragenarius, tener constitutione, post longum animi mœrorem & vitam sedentariam, incidit in languorem virium, corporis marcorem, appetitus prostrationem, calorem præternaturalem, cum pulsu debili & frequenti, somno parco & interrupto, facie plumbea, oris siccitate perpetua & sudore matutino. Quum his per sex septimanas fuisset detentus, ob alvum adstrictam sumisit purgans, ex diagrydii sulphurati gr. II. cum tartaro vitriolato, quo multum dejecit & diu-

Marasmus senilis.

Hæctica ex corruptione sphaelosa interna lethalis.

diutius quam per octiduum. Inde vires adeo considerunt, ut animus facile deficeret in situ erectiori, calor etiam increbuit & accessit tandem summa præcordiorum anxietas, ad quam levandam vena aperta & aliquot unciae emissæ sanguinis fluidi & floridi. Licet autem anxietates hoc facto levarentur, æger tamen, ob virium plenarium lapsum, animam haud ita multo post efflavit.

Epicrisis.

Hæctica hæc febris est, enata procul dubio, à sphacelosa visceris cujusdam, ac uti viderur hepatis, corruptione. Non enim novum est, quod in languidioribus & diuturno mœrore affectis, viscera ob sanguinem stagnantem abeant in putredinem, ac teste cadaverum sectione compareant nigra, tanto magis, si vita accessit sedentaria. Signa ejusmodi corruptionis internæ sunt, plenaria appetitus & virium prostratio, somnus nunquam reficiens, facies livida plumbea, carnes flaccidæ, conatus ad vomendum & colliquativus sudor. In nostro notatu inprimis dignum, quod ab unica exigua purgantis dosi incompefcibilis alvi fluxus inductus. Neque tamen effectus hic tam purgantis virtuti, quam potius intestinorum inflammationi & humorum acredini tribuendus. Caveat igitur medicus circumspexit, ne, ubi motu intestino continuo vires consumptæ & massa sanguinis recrementitiis humoribus gravis, quippiam drastici purgantis præbeat & perversa incurrat judicia.

OBSERVATIO IX.

Fœmina sexaginta & trium annorum, tenera admodum, ante quinque menses terrore fuerat perculsa gravi, & confestim molestatam tractionem & tensionem in artubus persenserat. Ante tres menses supra claviculam sub musculo mastoideo in utroque latere exortus tumor, qui rebellis fuit, nec ullis cedere voluit remediis. Interea lenta & vires consumens febricula, ab aliquot jam mensibus ægram incessit, cum ardore, in volis manuum & plantis pedum, præsertim circa mediam noctem affligens. Accesserunt per intervalla capitis pulsantes & tensivi dolores, qui sub cute, modo huc, modo illuc discurrerunt, ad cervicem, quin ad gingivas usque. In artubus sæpe tractiones fibrarum musculosarum, oculis conspiciendæ, cum dolore lancinante adfuerunt. Nausea quoque cum anxietate, nec non tormina ventris obscura, non nunquam affligerunt, alvi secessu ut plurimum soluta. Appetitus fuit prostratus, urina crassa, turbida, rubra, cum sedimento & cuticula oleaginosa, præsertim paroxysmo finito secessit. Omnia autem hæc symptomata, mox secundo, mox tertio die invaluerunt, cum pulsu celeriori, qui tamen frequens semper fuit, sed exiguus.

Epicrisis.

Affectus hic merito lenta consumens febris dicendus. Originem dubio procul traxit à vehementi terrore, cujus tanta vis est, ut, præsertim in cacochymico corpore, totam œconomiam motuum, tam vitalium, quam secretoriorum & excretoriorum, pervertat, nervosarum quoque & fibrosarum partium systema valde debilitet, & ad spasmos, contractiones & dolores disponat. Eidem terrori etiam debetur glandularum colli

tumor, qui ad lentæ febris generationem multum contulit. *Hippocrates* enim jam eas febres, quæ glandularum tumoribus accedunt, lentas & periculi non expertes judicavit, tum quod sub musculo crasso siti sint intractabiles, tum quod nervos vicinos distendendo, febrilibus spasminis subministrant occasionem. In curando hoc morbo primum fuit, ut primæ viæ à sordibus repurgarentur. Hinc magnesia cum sale Epsomienfi ad drachmam dimidiam data, cum lacte amygdalino mannato, & clyster injectus ex decocto avenaceo, manna & chamomillæ floribus. Mane jejuno ventriculo potum caponis brodium, cui incoctæ radices petroselini, fœniculi, cichorii, herba nasturtii aquatici, addito cancerorum fluviatilium succo. Oblatus tum quoque pulvis ex cancerorum lapillis, nitro & solutione oculorum cancri. Potui ordinario serviit pituita. Exterius glandulis tumidis & dolentibus impositum emplastrum diachylon simplex, cum spermate ceti, oleo hyoscyami, croco & camphora. Et ad artuum dolores complacandos, linimentum discutiens & antispasmodicum inunctum. His ægra per DEI gratiam, intra mensem, ex ancipiti levata & febris perfanata.

OBSERVATIO X.

Juvenis melancholico-cholericus, vigesimum annum egressus, computationibus & ebrietati intemperantissime deditus, aliquoties hæmoptysin passus fuerat, cum pectoris angustia & quasi ebullientis sanguinis sensu circa præcordia, semper tamen liberatus tempestitiva venæ sectione, pediluvii & congruis temperantibus atque nitrosis. Accidit vero, ut vehementi ira aliquoties commoveretur, quam sequuta notabilis virium & appetitus prostratio, spirandi difficultas, somnus inquietus, sudor matutinus, tussis vehemens, cum copioso ad libram minimum quotidie sreatu, pulsus celer, à meridie potissimum ad medium noctis, cum calore in plantis pedum & volis manuum, urina turbida rubra, interdum cum sedimento, interdum tenui, corpore simul contabescente. Sic per duos menses, varia Medicorum consilia expertus est & artificia ex pectoralibus, antifebrilibus & refrigerantibus, sed frustra. Tandem nostrum petiit consilium; vix tamen dubiam, rebus sic comparatis, salutis spem facere potuimus. Interim lactis suasi potum, quod quotidie bis cum decocto fabarum Coffee hausit; loco potus bibit decoctum ex radice scorzonæræ, cichorii & rasura cornu cervi, cum passulis minoribus, potavit quoque Selteranas cum lacte ad mensuram quotidie, sumsit subinde gelatinam cornu cervi, & usurpavit pulverem ex radice ireos Florentinæ, liquiritiæ, lapidibus cancerorum, nitro & saccharo. His per mensem alternatim usurpatis, melius habere coepit, æstus mitior factus, & appetitus rediit. Hinc continuavit lactis potum & pulveris usum, subinde quoque juscula ex carne vitulina sumsit, simulque appetentior placentarum, ex iis, quæ minus graves & viscidæ, liberaliter quotidie comedit. Sic tandem præter omnium spem symptomata complacata, & æger tantum non desperatus, binis mensibus exactis, surrexit sensimque convaleuit, ac biennium supervixit sanus & integer. Sed quum postea antiquum obtineret & liquores spirituosos, cerevisiam, vinum, maximeque spiritus ardentes, ingurgitaret effusus, nocte intempesta perquam frigida è computatione ebrius domum tendens, in platea subito concidit, ac domum portatus, morte extinctus est subita.

Hæctica in juvene binulo curata.

Epicrisis.

Ex raris hecticae curationibus est hæc : aderant enim omnia hecticae febris signa. Sed quia primum acciti medici adversus phthysicum malum pectoralibus & dulcibus tantum pugnant, nec humidum deficiens refarcire, nec humorum acrimoniam demulcere laborant, parum potuerunt proficere. Ipse enim eventus per remedia procuratus docuit, causam hujus febris magis in humorum vitio eorumque viscositate & acrimonia fuisse positam, quam in labe, corruptione, aut exulceratione visceris. Patet igitur : in hectica febre non semper spem esse abjiciendam, si in juvenili ætate, subito, ex prægressa mala diætâ incidit, uti quidem heic factum est.

Cæterum de febribus lentis & hecticis plures jam prodidi observationes in *Medicinæ consultatoriae Tom. II. Sect. IV. cas. CLXXXII.* usque ad *CXC.* quas evolvendas commendo.

CAPUT XIV.

De Febribus Symptomaticis.

§. I.

Symptomaticæ febres quæ dicantur.

Symptomaticæ febres dicuntur eæ, quæ aliis morbis primariis, vel fonticis externis læsionibus, ceu symptomata, ob systema nervorum inde male affectum & gravius irritatum, accedunt, nec typum exquisitum servant. Sicut enim omnis generis febres nervosi maxime generis affectiones sunt, & à varii generis causis, hoc impensius affligentibus, stimulantibus & commoventibus, originem ducunt; sic etiam eodem ex fonte derivandæ symptomaticæ, quibus inducendis causæ velificantur pariter multæ.

§. II.

Morbis aliis primariis accedunt.

Ex iis, quæ aliis morbis adjunguntur, notabilis maxime illa symptomatica, seu secundaria febris, quæ in variolis observatur. Nimirum quando post quartum diem primaria febris, expulsa ad corporis habitum exanthematica materia, deferbuit, nono ut plurimum die, quo pustulæ suppurari & maturescere incipiunt, ob impensum qui inde suscitatur ardorem atque dolorem, nova accenditur febris, cum pulsum celeritate, æstu interno, siti, vigilia, inquietudine, quin delirio, quæ undecimo die haud raro laborantes necat, præsertim si adultiores & confluentibus obfessi. Dein dolores arthritici, rheumatici, podagra, chiroagra, ischiatis, nec non erysipelas inprimis capitis, semper incipiunt cum insultu febrili, frigore & æstu, sub quo ad cutim & articulos agitur ex interaneis acris recrementitia materia, ibique acerbos suscitatur dolores, qui novam cient febrem, eo graviores, quo graviores ipsi. In dentium quoque gravi dolore, maximeque difficili infantum dentitione, jungitur, ob cruciatum, frequentissime febris symptomatica, quæ periculi non expers, quin in teneris sæpe epileptica convulsiones sequuntur. Hæmorrhoidibus porro cæcis impensius dolentibus, sæpe febris, cum horripilatione, vigilia & tremore partium complicatur. Neque minus glandulis induratis, tumentibus & dolentibus febrile symptoma accedere solet. Nullum etiam dubium, quin in pestilentia, si anthrax, seu carbunculus, qui tumor est ardens & acutissime dolens in musculosis partibus, febris accendatur majusque intentet periculum.

§. III.

In puerperis præterea, tertio ut plurimum à partu die, febris supervenit symptomatica, lactea dicta, cujus origo nulla alia, quam quod ob uterum, enixo partu, iterum contractum, magnus sanguinis ad mammas fit appulsus, quo corporibus glandulosis & fibris nerveis male affectis, dolor inducitur tensivus, febrilem insultum ciens. Si abscessus & apostemata fiunt in partibus, præsertim nervosis & glandulosis, in inguine bubones, aut in axillaribus & mammariis tumores apostematodes, complicantur febres, sæpe gravissimæ & cum dolore junctæ. Idem accidit, quando pars exquisitoris sensus ambustionem graviores & ampliores patitur. Neque minus ex symptomaticis febribus sunt illæ sic dictæ vulnerariæ, quæ læsionibus ac vulneribus, manuum præsertim & pedum, nec non aliarum nervosarum partium, pericranii potissimum & meningum, accedunt, quæ etiam fiunt, quando tendines vel nervi, sub venæ sectione improvide punguntur, vel aliis acutis instrumentis læduntur, eodem modo ac evenire solet, si pleura, peritonæum, aut intestina fauciantur. Quin si vulnera & læsiones partium acutius sentientium, acris & causticis medicamentis, injectis aut inspersis, tractantur, intenduntur non modo dolores, sed & haud raro febres ardentes & continuæ ingignuntur. Tanto certius autem tantoque majori cum periculo hoc accidit, quando nervosis partibus communicatur plane venenum, uti fit in morsu canis rabidi, nec non quando mercurius sublimatus, aut arsenicum, carcinomatibus induntur. Demum non prætereunda illa febris, supra omissa, quæ vermibus & calculo accedit. Non enim adeo insolens in verminantibus febris, putrida dicenda merito, quæ irregularis admodum, cum nausea, abdominis torminibus, urina limosa, alvo ut plurimum laxa. Quæ autem calculo jungitur, oritur à doloribus acutis, tum maxime, quando per uretheres nervosas molitur transitum.

§. IV.

Ita autem omnes hæ symptomaticæ & continuæ febres sunt comparatæ, ut universam œconomiam functionum, vitalium inprimis & naturalium, pervertant, vires frangant, multaque exitalia symptomata, deliria, convulsiones & epilepsias, inducere possint. Plane omni tamen destituuntur utilitate, nec sicuti aliæ febres, removendæ & vincendæ causæ serviunt, multo minus sufficiunt. Hinc utique peritus Medicus eo dirigere debet in earum curatione medicationem, ut cito anomalos hos febriles motus compescat, eorumque vehementiam ocyssime retundat. Longe facilius enim & melius hoc in symptomaticis hisce perfici potest febribus, quam quidem primariis; eo quod illæ tantummodo à tensione & spastica stricture nervosarum partium, tanquam à causa immediata, proficiunt; hæ vero à causa materiali, non cito transeunte, sed permanente, ortum ducunt.

§. V.

Curatio ipsa sic instituenda, ut causis amolendis sit opposita. Quod si igitur à læsione, aut vulnere partium nervosarum & tendinosarum, tam internarum, quam externarum, maximeque ipsius capitis, insultus accidit febrilis, nullum præsentius & securius auxilium, sanguinis missione, & quidem in parte propinqua instituta. Vulnerariæ enim hæ sic dictæ febres, oriuntur potissimum à sanguine effuso, in partibus fauciatis decumbente. Expediit vero ut mature id fiat, præsertim in

iis,

iis, qui sanguine abundant. Post venam sectam, discutientium, resolventium & diaphoreticorum usus longe efficacior, quam hac neglecta. Nos commendamus poriones ex aqua scordii, cardui benedicti, chærefolii, scabiosæ, aceto destillato, aqua theriacali, lapidibus cancrorum, antimonio diaphoretico, mixtura simplici cum syrupo acetositis citri, adjecto interdum pulvere lumbricorum terrestrium, interdum sanguine hirci. Melius adhuc vinum bonæ notæ Rhenanum, cum succo cancrorum fluviatilium mixtum, addita lapidum cancrorum drachma & theriacæ drachma dimidia. Sic enim conflatur potio, ad inflammationem & sphacelationem arcendam, virtutis præstantissimæ.

§. VI.

Quando symptomatica febris ab atroci dolore, partium præsertim nervosarum & sensibilium, accidit; omnia quæ sine noxa dolorem levant & sedant ex usu sunt, id est, ea quæ blanda virtute vaporosa anodyna pollent. Horum classem ducunt flores aquarum fragrantium, uti tiliæ, primulæ veris, acaciæ, liliorum convallium, alborum, sambuci, rosarum, papaveris rhœados, pœoniæ, nymphææ, nec non blanda papaveracea, emulsiō scilicet ex seminibus quatuor frigidis majoribus, cum semine & syrupo papaveris albi, & maxime omnium liquor noster anodynus mineralis. Laudatissimi enim hæc in dentitione difficili, calculo & colica cum febre sunt usus. Neque etiam, nisi irritis his, si necessitas urget, confugiendum ad opiata & narcotica, massam pilularum de cynoglossa, diacodion montanum, laudanum cydoniatum *Helmontii*, *Sydenhami* & quæ plures hujus farinæ compositiones. Quando dolori ex inflammatione supervenit symptoma febris; interne diaphoretica cum nitrosis mixta, omnia fere reliqua virtute antecellunt, quia nihil magis inflammationem discutit, quam nitrum, præsertim cum fixis diaphoreticis & camphora mixtum, & qua discussa, & dolor cessat, & febris.

§. VII.

Quæ à causa externorum topicorum usum admittente, inducitur symptomatica febris, præter interna, exterius etiam poscit demulcentia, dolorem mitigantia & fibras duras strictas mollientia & relaxantia. Sunt hæc maxime necessaria in tumoribus venarum hæmorrhoidalium, in tumoribus & doloribus artuum, glandularum inguinalium tumore venereo, in tumentibus mammis, colli glandulis, nec non si sub infelici venæ sectione punctus nervus aut tendo, si animal rabidum, aut insectum intulit læsionem. His in pathematibus eximie conducunt cataplasmata ex ficibus, radice & foliis liliorum alborum, melle, farina fœnu græci, cepis tostis, vitello ovi, lacte & cremore lactis, cum croco; deinde nobili pollet virtute emplastrum diachylon simplex, mixtum cum sufficienti quantitate croci, vel cum spermate ceti & oleo hyoscyami; porro dolores egregie mulcent & spasimum laxant vesicæ, decocto emolliente plenæ, & parti afflictæ crebrius calide impostæ; neque ad temperandum ardorem & stricturam remittendam inutilis est mucilago seminis psyllii, cydoniorum, aut lini, cum aqua rosarum facta & crebrius illita.

ENARRATIONES MORBORUM.

OBSERVATIO I.

Virgo tenerioris constitutionis, quatuordecim annorum mensium fluxum parvisse experta,

incidit in febrem, continuo, lento calore per duas hebdomades affligentem, cum tussi sicca, & alvi fluxu, quo multa fœtida cinericei coloris excernebat, languor occupabat totum corpus & facies pallido fœdabatur colore, accedebant quoque crebrius dolores acuti circa spurias costas, urina erat pauca & crassum sedimentum deponebat. Indicabatur lenta febris, à mensium obstructione prognata; ideoque ad emovendos hos varia à mulierculis ingerebantur. Vocatus ego, quæsi: num forsitan antea vermibus laborarit? dixerunt: ipsam dulcibus & placentis admodum oblectari, atque etiam ante aliquot menses lumbricos quosdam per alvum excrevisse. Exhibui igitur potionem ex rhabarbari drachma, feminis santonici drachma dimidia, salis tartari scrupulo, aquæ florum acaciæ uncis sex, spiritus vitrioli guttis xx, infusus in calido loco, de qua dimidiam partem pro dosi sumsit. Expurgatis sic leniter primis viis, pristinam pro potu ordinario dedi hanc: recipe hordei mundi manipulos duos, radicis scorzonæræ, rufæ cornu cervi, radicis cichorii ana unciam, herbæ scordii manipulum unum, coque in aquæ fontanæ mensuris quatuor per horam, colaturæ adde syrupi acetositis citri uncias duas. M. Interpositus quoque interdum fuit usus pulveris, ex pulvere feminis santonici, cornu cervi usti, rhabarbari ana drachma una, nitri purificati, salis polychrestii ana scrupulis duobus, qui ad scrupulum una vice sumtus. His per mensem & ultra usurpatis, egregie convaluit, licet nulla amplius lumbricorum succederet excretio.

Epicrisis.

Febres verminosæ à lentis & hæcticis differunt in eo, quod hæc post cibum sumtum & vesperi ingravescent, in illis vero hoc non observatum. Deinde quoque febres ex vermibus junctum plerumque habent alvi fluxum, quo fœtida & cinereacrementa secedunt, urina turbida cum limoso sedimento mingitur, in lentis autem & hæcticis hæc non præsto sunt. Discerni tamen hæc febres inter se debent ex causis antecedentibus, victu maxime, ex dulcibus, lacticiiniis, aliis viscosis & fermentescens, optime vero si jam ante secesserunt lumbrici. In medicatione autem, si febris complicatur cum alvi fluxu, abstinendum ab anthelminticis, validioribus purgantibus, à mercurialibus, à sagapeno, asa fœtida, tanaceto, quæ alias specifica adversus vermes, sed utendum acidulis cum amaris mixtis. Acida enim non modo calori, sed & putredini verminosæ egregie resistunt. Plerumque tamen vermes non excernuntur, si febris juncta, quia æstu febrili dissolvuntur in putridum magma. Ego etiam tali in casu cum fructu usus sum potu acidularum Selteranarum, correctarum prius spiritu vitrioli, instillatis mensuræ triginta ipsius guttis, quo laxantem acquirunt virtutem. Quæ pro diversa ratione ætatis & corporis, majori, vel minori dosi quotidie offerri possunt.

OBSERVATIO II.

Juveni viginti circiter annorum, macilento & sensus exquisitoris, forte scalpellum librarium è manu exciderat in pedis dorsum, partemque hanc tendinosam cuspide acuta pupugerat & sauciarat. Postero die, antea perfecte sanus, incurrit acutum partis læsæ dolorem, cum febre, siti, præcordiorum anxietate, vigilia, quin mentis quadam alienatione. Missus tum, quia plethoricus erat, illico san-

Febris ex punctura tendinosi pedis.

san-

Si à doloribus partium sensibilium.

Et inflammationem supranibus.

Externa etiam promittunt.

Febris verminosa.

sanguis è brachii vena, & data emulsio ex amygdalis dulcibus & semine papaveris albi, cum aqua florum sambuci, tiliæ & acaciæ parata, quam tam solam, quam cum pulvere ex matre perlarum, lapidibus cancrorum & nitro sumsit. Oblata etiam mixtura diaphoretica & discutiens, cum diascordio *Fracastorii*. Et exterius vulnuscule partique dolenti impositum emplastrum nostrum discutiens & anodynum. Quibus per aliquot dies usurpatis, febris cum omnibus symptomatibus discessit.

Epicrisis.

Quotidiana testatur experientia, quam periculosa sint nervosarum partium læsiones, & quam perniciose invehant symptomata. Nulla autem alia horum omnium reddi potest ratio, quam quod universa nervorum compages, una tantum nervosa parte gravius læsa, consentiat, & motus inordinati vehementes in hac excitati, per totum nervorum systema facile propagentur, uti fusius deduxi in *tomo III. Med. ration. systemat. Sect. I. pag. V.* Discimus vero etiam ex hac observatione, morborum causas, non tantum in materiæ nocentis quantitate, aut qualitate, consistere, verum sæpius etiam motu vitioso & inordinato niti. Atque adeo perperam agunt medici, qui in ejusmodi morbis ad humorum correctionem, aut evacuationem, animum & medicationem dirigunt. Præcipuum potius tum in curando sibi vindicant locum, quæ motibus hisce turbulentis complacandis serviunt, quorum in numero cum reliquis anodynis sunt potissimum opiata correctæ, quæ alias minus quadrant, ubi perniciose quantitas sola, vel qualitati noxiæ nupta, in causa est.

OBSERVATIO III.

Febris buboni accedens.

Juvenis viginti aliquot annorum, sanguineo-cholericus, in Academia solertius Veneri & Baccho, quam Musis litarat, & ante biennium sub conflictu cum sodali vulnus acceperat in thorace, quod consolidatum, pectoris quandam gravitatem & difficilem sub ascensu acclivium, aut ambulatione incitatore, spirationem reliquerat. Hic vere initiante conqueri cœpit de virium languore, capitis dolore, inappetentia, somni defe-

ctu, calore febrili, modo vesperi, modo noctu, post levem horripilationem, ipsum infestante, subsequente mane sudore largo, admodum debilitante, cum majori respirationis difficultate & dolore in loco veteris circa mammillam vulneris. Medicum igitur in consilium vocavit, qui mixturis discutientibus & diaphoreticis, emulsionibus demulcentibus & refrigerantibus, pulveribus quoque temperantibus cum succo citri, febrem oppugnavit, interpositis subinde laxantibus blandis mannatis & rhabarbarinis & data pro potu pri-sana. Sed frustra. Licet enim & capitis dolor evanesceret, sudores matutini & febris vehementia tantisper minuerentur, respiratio quoque liberior redderetur & appetitus melior, insultus tamen febrilis perstitit semper, post mediam noctem accedens & sudore discedens, relicto miro corporis languore & debilitate, ut lecto etiam affigeretur. Hinc Medicus, dissolutioris ægri vitæ rationis non ignarus, forsan occultatâ causam subesse suspicari cœpit & in eam serio inquirere. Confessus igitur tandem est æger, in inguine dextro, durum quid protuberare, sed levem admodum ex eo se sentire dolorem, & credere, esse forsan ejusmodi tumorem, quem dicunt *eine Wachs-Beule*. Erat autem venereus bubo, qui impositis emollientibus, maturuit, & apertus magnam fudit puris copiam, quo evacuato, febris sensim magis magisque remisit, omniaque symptomata discesserunt, donec æger, traducto intra tres hebdomades ad consolidationem abscessu, penitus ad sanitatem redibat.

Epicrisis.

Ex hac historia id tantum occurrit notandum, quod febres ex glandularum tumoribus ortæ, teste ipso *Hippocrate*, perniciosæ sint, maxime omnium autem, quando causa tumoris materia virulentæ indolis, uti in bubonibus venereis, ubi in curando, non modo ad febris impetum compescendum, sed & ad venenum è corpore eliminandum, respicere decet medicum. Dein meretur & illud notari, quod partes olim à vulnere quodam læsæ internæ, à contracto postea morbo, vel febre, rursus præ aliis pejus afficiantur, & pathemata ibi affligere soleant extraordinaria, manifesto indicio, diu latitare posse partis imbecillitatem & labem, facile exacerbendam.



FRIDERICI
HOFFMANNI

MEDICINÆ
RATIONALIS SYSTEMATICÆ

TOMI QUARTI,

QUO

SPECIALIS MORBORUM PATHOLOGIA
& huic superstructa solida Therapia cum
medendi methodo,

CAUTELIS CLINICIS ET MORBORUM
ENARRATIONIBUS ADJUNCTA EPICRISI EXHIBENTUR,

PARS SECUNDA,

DOCTRINAM HÆMORRHAGIARUM ET DOLORUM
perspicua & demonstrativa methodo tradens.

DOCTISSIMIS
MEDICIS JUNIORIBUS,

QUI EX SELECTIS IN FIRMA EXPERIENTIA,
FUNDATIS OBSERVATIONIBUS ET MORBORUM HISTORIIS,

NEQUE MINUS

EX THEORIA VERA ET RATIONALI
IN SIMPLICISSIMIS NATURÆ MICROCOSMICÆ LEGIBUS

ET MOTIBUS FUNDATA,

CIRCUMSPECTAM ET NON SINE AUSPICATO

PER DIVINAM GRATIAM SUCCESSU, SALUBREM

ARTEM EXERCERE CUPIUNT.

HUNC LIBRUM

SINCERO ANIMO

DICAT ATQUE COMMENDAT

AUCTOR.

P R Æ F A T I O.



Secundam therapiae rationalis partem, veritatis Medicæ cupide Lector ! Tibi jam exhibeo : cujus maturiorem editionem , occupationum & consulationum , quæ me in senio plurimum urgent , assidua multitudo , quodammodo retardavit. In præsentî hoc libro , difficilem & perplexam admodum maximique in praxi medica momenti materiam , de hæmorrhagiis & doloribus , paulo curatius evolvendam atque observationibus clinicis illustrandam mihi summi. Nam primo ex omnibus , quæ in genus humanum incidunt , morbosæ afflictionibus , febres si exceperis , vix ullæ dantur , quæ frequentius invadunt , quæ nulli ætati , nulli temperamento , nulli sexui parcunt , quam spontaneæ à natura per varia corporis loca excitatæ sanguinis eruptiones. Hæ , probe consideratis phænomenis & paulo penficulatiùs subductis rationibus , iisdem propemodum utut non satis completis motibus , quibus febres oriuntur , progignuntur. Nam sicut duo principales motus ad febrem constituendam necessarij sunt ; alter qui præcedit & qui ab extima corporis humani superficie ad interiora sanguinem & reliqua fluida urget atque propellit ; alter qui sequitur , & ab interioribus versus exteriora rursus eundem cum aucta cordis & arteriarum celeritate protrudit : ita similes etiam motuum species in hæmorrhagicis excretionibus concurrere animadvertimus. Etenim à nulla causa interna suscitatur hæmorrhagia præsertim paulo gravior , quæ non extremorum refrigerationem & spasticam habitus corporis constrictionem , cum alvo plerumque stricta , urina tenui , & pariori per cutis cribrum perspiratione , comitem habeat , sanguinem ad interiora & cor pellendo : quem motum postea celerior & vehementior , non secus ac in febre fit , arteriarum motus & ad certam partem directus sanguinis impetus consequitur. Præterea , quemadmodum motus febriles in se & sua natura motibus vitalibus alieni , per sapientissimam autem DEI providentiam , quam in fabrica corporis humani dilucide monstravit , subinde salutarem effectum exerunt , causamque ipsam à qua originem habuerunt expugnando , hominem sanitati restitunt : ita etiam sanguinis quæ præter naturam fiunt excretiones , ipsam causam quæ eas excitavit quando subtrahunt , à gravissimis malis & periculo corpus sæpe vindicant. Cujus rei periodicæ menstruales in sexu sequiori sanguinis profusiones , atque per venas ani in sexu nobiliori institutæ à natura sanguineæ evacuationes , testimonio esse possunt luculentissimo. Quando autem febrium vel hæmorrhagiarum causæ ita sunt comparatæ , ut neque motibus istis justo intensioribus , neque evacuatoriis tolli possint , quemadmodum fit , si vitium non tam in materiæ mole , quam in perversa & maligna humorum indole , aut visceris cujusdam corruptela vel obstructione , aut in motu animi immoderatiore consistit , nunquam tales motus salutes censendi sunt , eo quod in detrimentum & præsentissimum sæpe exitum convertantur. Et quia ejusmodi motus excretorii hæmorrhagici , incompleti febriles , non rationali & intentionali quodam actu , multo minus ad salutarem finem destinato , sed ex causis physicis necessitatem effectus quæ inferunt peraguntur ; fit utique , ut non modo vel in excessu vel in defectu sanguinis emittendi peccetur , verum etiam , quod sæpenumero evenit , per partes nobiliores & vias plane inconvenientes & alienas , conservationi vitali proxime inservientes , ut sunt cerebrum , pulmones , ventriculus , intestina tenuia , vesica , renes , plane perverse & erronee , cum ingenti harum partium corruptela nec non cum summo vitæ discrimine , sanguinis subinde valde copiosi exclusio suscipiatur. Ceterum etiam doctrina hæmorrhagiarum ea de re multum difficultatis in usu artis habet , quod aliis iisque gravissimis tam acutis quam chronicis affectionibus sæpiissime conjungantur , & supervenientes quandoque , sed rarius , morbum solvant , sæpiissime vero in extremum exitum terminentur. Ex quibus omnibus adductis & paulo penitius consideratis facile intelligi posse arbitror , quam difficilis , ardua & intricata res sit , prudenter motus hos sanguinis excretorios tractandi , nec non , ut in salutem & conservationem corporis humani cedant , eos convertendi & dirigendi : atque hæc ipsa difficultas non parum succrescit & augetur , quod nullum in tota rerum natura divina sapientia constituerit remedium , quod tanta polleat efficacia , ut Medicus , pro suo arbitrio & rei exigentia , sanguinis fluxum si deficit , provocare vel restituere cum certo effectu possit. Enimvero Medicus , pro variis indicationibus & præservandi & curandi morbos , multi generis evacuantia possidet , ut pro lubitu ex-

cretiones per alvum, per urinam, per sudorem, per nares, per salivam, per expectorationem movere possit; sed ejusmodi medicamina, quæ sanguinem per certa loca pro Medici arbitrio evacuandi certa potentia instructa sint, plane non reperiuntur. Inter ceteras insuper difficultates non minima est, quod neque ullum certum detur remedium, quod sine majori detrimento enormem sanguinis profusionem expedite compescere possit. Quæ cum ita sint, intelligere quisque poterit facillime, quare post doctrinam febrium, quæ in priori tomo paulo penitius agitata & excussa est, intricatam & plane difficilem hanc in praxi frequentissime occurrentem materiam, paulo curatius præ ceteris evolvendam & illustrandam utilissimum imo summe necessarium judicaverim. Præter hæc placuit quoque in hoc Tom. II. dolorum pathologiam & theoriam paulo accuratiori scrutinio committere, & hæmorrhagiarum tractationi subnectere, eo quod inter hæmorrhagias & dolores magnus sit nexus, magna consensio, & inter causas quoque & curationem conspiratio. Dolores præsertim acerbiores certis paroxysmis certisque periodis invadere, ac semper fere cum febriculosa quadam partium solidarum & fluidarum commotione, quam extremorum constrictio, excretionum per alvum, per sudorem quæ fiunt retardatio, pulsuumque postea celeritas & durities subsequitur febribus communis, fieri nunquam non observatur. Et sicuti febrium paroxysmi, per motum sanguinis versus corporis superficiem restitutum & subsequentem sudorem salutariter finiuntur: ita etiam observamus dolorum tormenta non facile conquiescere vel sopiri, multo minus ex toto abigi, nisi prius sanguinis circulus uberius cum calore & madore subsequente ad partes extremas fuerit conversus. Neque iis qui assidue in artis exercitio versantur obscurum esse potest, omnis generis dolores, sive internas sive externas partes infestent, potissimum à sanguinis consuetis excretionibus retardatis vel plane cessantibus aut suppressis originem suam trahere, & vix aliter citius, nisi in ordinem iis prius reductis, perfectam sanationem recipere. Testimonio possunt esse cardialgici, colici, nephritici & podagrici dolores, qui, in fœminis, fluxu mensium, in viris consueto hæmorrhoidum fluxu restituto, insigne allevamentum accipiunt. Denique conspiratio & harmonia inter hæmorrhagias & dolores vel exinde elucescit, quod in utroque affectu, non tam sanguinis puri, consistentis & fibrosi, sed potius vitiosi feri intra vasa collecti redundantia magis peccet atque delinquat. Et quemadmodum porro hæmorrhagiæ in iisdem locis, ubi semel vel iterum proruperunt, reverti solent, ob debilitatem relictam: ita etiam res cum doloribus comparata est, qui, ubi semel radicem egerunt in nervosis quibusdam partibus, quam facile has rursus occupant atque invadunt. Postremo quantum difficultatis atque negotii, hæmorrhagiarum atque dolorum opportuna cura medentibus faceffat & quod plurimorum remediorum efficaciam eludant, ita ut ab anodynis sæpius exacerbentur, in praxi notissimum est. Prægnantes itaque & justæ causæ hæc fuerunt, quare præ ceteris morbis, maxime præsentibus hoc in secundo tomo, de hisce affectibus paulo curatius agere proposuerim. Et quoniam casus clinici & completæ de morbis historiæ unicum & verum pathologiæ & therapiæ rationalis fundamentum constituunt, sine quarum sufficiente apparatu nihil solidi Medicus in theoria statuere, neque in praxi præstare & efficere potest; cuivis morbo notabiliores quæ mihi ad manus fuere adjeci observationes, in quibus fideliter & candidè morbi cujusvis historiam & progressum, quæ remedia, quo ordine usurpata & qualis effectus consecutus fuerit, exposui, atque simul in subnexa epicrissi insignem dam demonstravi. Ego nihil magis in votis habeo, quam ut etiam alii qui ingenio pollent & in ampla praxi versantur publicumque bonum promovendi ardorem habent, me hac in parte sequantur. Ceterum nullus dubito, fore, ut plures ex Medicis, si scripta mea practica usque eo in lucem edita, quæ non præcipitavi quinquaginta annorum per DEI gratiam experientia innixus, cum attentione legant & perlegant, non modicum fructum in misere afflictos redundaturum abundanter percepturi sint. Sin autem invidi quidam aut in praxi rationali minus versati, hæc vel quæcunque alia mea scripta vilipendere velint, id certe parum curabo.

CONSPECTUS PARTIS SECUNDÆ

SECTIO I.

De Hæmorrhagiis partium tam externarum quam
internarum.

PROLEGOMENA.

De Hæmorrhagiis in genere.

- CAPUT I. *De Hæmorrhagia narium.*
 II. *De sanguinis fluxu ex pulmonibus.*
 III. *De vomitu cruento, sine & cum secessu nigro, sive morbo nigro Hippocratis.*
 IV. *De hæmorrhoidali fluxu nimio.*
 V. *De uteri hæmorrhagia immoderata.*
 VI. *De hæmorrhagia ex urinariis viis.*
 VII. *De hæmorrhagia cerebri.*

SECTIO II.

De Doloribus & spasmodicis varii generis internis & ex-
ternis nec non arthriticis & rheumaticis.

- CAPUT I. *De dolore cephalico.*
 II. *De dolore cardialgico spasmodico & flatulento.*
 III. *De doloribus & spasmodicis præcordiorum, à calculo felleo ortis, & de ejus generatione.*
 IV. *De dolore & spasmo iliaco.*
 V. *De intestinorum doloribus, atque in specie, de colica flatulenta & spasmodica.*
 VI. *De acuto dolore & spasmo ex calculo renali.*
 VII. *De spasmo & dolore vesicæ & adjacentium partium.*
 VIII. *De doloribus & spasmodicis externarum partium rheumaticis & arthriticis.*
 IX. *De rheumatismo odontalgico.*
 X. *De dolore & spasmo otalgico.*
 XI. *De dolore podagrico & arthritico vero & inveterato.*



SECTIO PRIMA.

DE

HÆMORRHAGIIS PARTIUM TAM internarum quam externarum.

PROLEGOMENA

De Hæmorrhagiis in genere.

§. I.

*In quibus
locis ordi-
nario hæ-
morrhagia
fiat;*



*in quibus
extraordi-
narie?*

PRIMO commemorandum est, quod sanguinis, quæ sponte à natura fiunt, excretiones, ordinario ex illis locis fiunt, quæ textura gaudent teneriori ac rariori, per quam vasa tenuissima undiquaque dispersa serpunt, neque firmis membranis circumtensa latitant, sed potius in superficie morantur: quo privilegio quam maxime gaudent interior narium pars, pulmonum bronchia, caro gingivarum, ventriculi pars amplior sinistra, intestinum ileum, recti intestini extremitas, exterior uteri & vaginæ substantia; ex quarum partium nimium distentis & apertis arteriis cum impetu sæpe sanguis prorumpit. Verum extraordinarie quandoque fit, ut per alias vias plane insuetas, & in quibus paulo profundius vasa latitant, sanguis sese exoneret. Ita per minimum digitum sanguinem excretum vidit SALMUTHUS cent. III. obs. 36. it. HENR. AB HEER obs. 36. Ex genu & manu profliantem sanguinem menstruum BARTHOLINUS observ. anat. cent. I. hist. 30. & ex mamma saltu eundem prodeuntem PANAROLLUS Pentec. IV. obs. 15. it. AMATUS cent. II. obs. 24. & cent. VII. curat. 48. memorant: menstrui vero in viris per penem profluvii observationes numero plures in STALPARTIO VAN DER WIEL cent. I. observ. 80. conspiciuntur.

§. II.

*Hi differe-
runt, ratio-
ne subjecti;*

Sanguinis eruptiones perquam familiares solent esse iis, qui habitus corporis mollioris, spongiosioris, atque texturæ tenerioris sunt, quorum vasa copioso sanguine & sero turgent, qui secundum veterum denominationem dicuntur sanguinei; his enim hæmorrhagiæ per omnem fere ætatem solennes esse solent. Qui vero sunt

cholericæ temperamenti, & vasa ampliora, strictioremque corporis habitum possident, per quorum vasa sanguis celerius fertur & circulatur; ii in juventutis annis hæmoptysi maxime sunt obnoxii. Sanguineo-melancholicis fluxus hæmorrhoidum frequentior; & sanguineo-phlegmaticis foeminis cruentus vomitus familiarior esse solet.

§. III.

Memoratu quoque dignum est, diversas excretionum sanguinearum species in diversis ætatibus contingere; quemadmodum id etiam jam olim recte notatum fuit ab HIPPOCRATE Sect. III. aphor. 27. 29. 30. Videlicet pueri & adolescentes sanguinis profluvium è naribus potissimum patiuntur: in juvenibus cruor exitum suum per pulmonum vasa magis molitur, unde hæmoptysis & inde orta phthisis huic ætati familiarissima; in viris & qui in consistente ætate sunt constituti, sanguis per sedis venas, in decrepita autem ætate per vias urinarias plerumque exitum affectat.

§. IV.

Annotationem deinceps meretur hæc observatio, quod vere & autumno, præsertim circa tempora æquinoctialia, sanguis nimium redundans plus quam alio tempore ex alveis suis effundi soleat, atque maxime per nares, in viris per hæmorrhoides, si alias ad hunc fluxum dispositi fuerint, fluat. Sanguineæ quoque apoplexiæ, quæ non nisi eruptiones sanguinis in cerebri medulla sunt, circa hæc tempora & potissimum vere contingunt: vomitiones vero & mictiones cruentas plus autumno quam vere incidisse, à nobis annotatum est. Atque etiam circa hæc anni tempora solenniter ejusmodi sanguinis excretiones & periodice redire atque reverti solent.

§. V.

Observamus porro, omnes fere eos, quibus sanguis copiosius & frequentius in primis annis per nares erumpit, natura valde imbecilles, animo quoque sensibiliores, variisque morborum afflictionibus, spasmodicis & doloribus per omnem fere ætatem subjectos esse, rarius etiam vitam diu

*Subiecta
hæmorrhagi-
arum.*

diu protrahere : quippe in juventute in phthisin inclinant, in consistente ætate in malum flatulento - spasmodicum sive hypochondriacum facile incidunt, atque ætate provectiori ad dolores nephriticos & podagricos multum proclives sunt.

§. VI.

Quæ ple-
rumque
heredita-
rie sunt,
atque ab
externis
suscitantur.

Dispositio ad hæmorrhagias est plerumque nativa, quæ à parentibus in liberos transfertur; promptissime vero, per causas externas, quæ motum validiorem sanguini inferunt, aut ejus intensam partium agitationem intendunt, in actum deducitur: inter quas omnes animi & corporis motus solito intensiores, atque interna ex alimentis vel medicamentis assumpta valde calida acria & spirituosæ, intempestivus quoque balneorum, sudoriferorum, vel purgantium usus, principem sibi locum vindicant.

§. VII.

Quando sa-
lulares;

quando
exiales;

Quemadmodum sanguineæ excretiones, quando à nimia vasorum repletionem & sanguinis ac feri redundantia fiunt, multum corpori salutis afferunt & promittunt: ita, quando à maligna acri materia, ut fit in febribus malignis exanthematicis, suscitantur, periculi sunt plenissimæ; & quodcumque à viscerum, præsertim hepatis, lienis aut etiam pulmonum obstructione, induratione & corruptela proficiuntur, lethum plerumque post se trahunt; quandoquidem facile in cachexiam, hydropem; morbum sic dictum nigrum Hippocratis, vel in hæcticam lethalem terminantur.

§. VIII.

Sanguinis
boni abun-
dantia non
est causa
proxima:

sed serum
copiosius.

Qui sanguinis boni, & consistentis, fibrosi, purpureo colore præditi abundantiam, pro causa hæmorrhagiarum præcipua & proxima materiali agnoscunt, hi multum errare videntur. Nam, qui sanguine valde crasso, denso abundant, quales sunt, qui corpus fibrosum & robustum possident, atque illud ipsum labore strenue exercent, victuque duro utuntur, rarius sanguinis excretionem patiuntur: ubi vero major & ultra proportionem feri copia in vasis continetur, sicuti fit in corporibus mollioris texturæ vitæ otiosæ addictis & quæ serosioris naturæ sunt, sanguinemque copiosius quam par est à vena emittunt, transpirationem impeditiorem habent, atque plus appetunt quam digerere & excernere possunt; ii quam maxime hisce præternaturalibus excretionibus & ex his provenientes incommodis & morbosis affectionibus subiecti & expositi sunt. Excessiva quoque & incredibilis propemodum sanguinis, quæ non raro per nares vel per uterum excernitur, copia, plethoræ magis serosæ quam sanguineæ testimonium satis firmum exhibet: quod vero perpauca sæpe fit massæ rubicundæ portio, respectu serosæ; id ex eo, quando à vena secta in ejusmodi enormibus hæmorrhagiis emissus sanguis in vasculo colligitur, luculenter demonstrari potest.

§. IX.

In cujus-
cunque
partis hæ-
morrhagia
singularia
quædam
signa præ-
cedunt.

Notabile insuper est, ubicunque in quadam parte plus solito sanguis erumpere gestit, in hac singularia prius quædam phænomena observari: ita totius faciei plus justior rubedo ac calor, tumor quoque cum arteriarum majori pulsatione & distensione sanguinis è naribus profluvium pronunciant. Ante sanguinis per uterum fluxio-

nem, lassitudo corporis, dolor dorfi & lumborum, tensio circa hypochondria, facies pallida, cutis horripilatio pororumque cutis contractio, contingunt. In hæmoptycis præcordiorum anxietas, spirandi angustia, dolor gravativus undulatorius circa diaphragma, flatulentia in abdomine, extremorum refrigeratio, ante eruptionem percipiuntur. Cruoris vomitum frequentissime dolor tensivus ac pressorius in hypochondrio sinistro antecedit: quin imo hæmorrhoidum eruptionem, spasticæ quædam stricturæ, flatulentia abdominis, in osse sacro tensivus & pressorius dolor, corporis languor & extimarum partium refrigeratio indicare solent.

§. X.

Ex quibus jam adductis & probe invicem expensis, liquido constare arbitror, hæmorrhagias, quibuscunque etiam in locis prodeant, neque à sanguinis copia, neque ab ejus nimia turgescencia exitum per vasa affectante, neque ex feri & sanguinis acrimonia, diæresin producente, aut ab ejus nimia tenuitate per vasorum poros transfudante, ut veterum fuit sententia, proxime & directe proficisci; sed potius ab extra ad intus converso motu atque inæqualitate circulationis sanguinis oriri: id quod efficitur, quando certæ partes, præsertim extremæ & à corde valde remotæ, intensiori fibrarum strictura ac contractione ita angustantur, ut sanguis per venas refluere nequeat, sed, harum aucta systole, majori copia & impetu, ad alia loca eaque inconvenientia transferatur; unde lateralia arteriolarum vasa, quæ ordinario non sanguinem stricte sic dictum, sed tantum tenuem lymphaticum humorem vehunt, plus justo distendantur & tandem aperiantur necesse est.

§. XI.

Ceterum causa quoque hæmorrhagiarum, præsertim enormium & symptomaticarum, quæ aliis morbis præcipue longis accedunt & superveniunt, in vasorum & viscerum infarctu, obstructione, induratione, quæ liberiori cursui obicem ponunt, quærenda erit. Videmus id in hydraulicis machinis, ubi obstructis quibusdam canalibus, fluidum per reliquos apertos majori impetu & celeritate erumpit. Atque idem fit in corpore nostro: nam quando per venas certæ partis spasmus contractas vel obstructas non libere transire & versus cor circulari potest sanguis, vis & impetus eum impellens crescit in ramis & ramusculis arteriosis, qui humore purpureo repleti & turgidi in extremitate aperiuntur. Declarant id maxime sectiones cadaverum, quarum leviter quasdam attigisse sufficiat. Sic in hæmoptycis dissecto, latus sinistrum pulmonis à tumore obsessum vidit WILLISIUS in *Pharmacologia* p. 90. Ita etiam in hæmoptycis reperti fuerunt pulmones copiosissima materia argillacea per totum obfiti, & ventriculi dextri auricula insignis magnitudinis. vid. M. N. C. Dec. II. an. VI. obs. 217. BLANCARDUS in *anatom. præf. obs.* 46. lienem tumentem & vasa mesenterii atque omenti sanguine infarcta invenit. In vomitu cruento demortuo hepar durum & scirrhum, lien quoque tumidus & sanguine impletus reperi- tus fuit ab eodem Auctore l. c. obs. 23. it. 32. conf. B. WEDELIUS in *amœnit. mat. med.* BARTHOLINUS in *histor. anatom.* p. 249. it. M. N. C. Dec. II. an. 4. obs. 86. Rectissime hinc scribit FERNELIUS *meth. med.* p. 14.

quibus viscera & jecur imbecillum & scirrhosum evadit, illis sæpius sanguis e naribus fluit, non secus ac hydropicis: id quod confirmat HEURNIUS aphor. Hippocr. p. 191. his verbis: quibus facies colore subviridi suffusa est, hepate laborant; & signum est jam adfuturi hydropis frequens in iis cruoris per nares effusio.

§. XII.

Quare hypochondriaci hæmorrhoidarii? Quoniam autem, ex spasticis partium contractionibus & venarum angustationibus, sanguinis præternaturales eruptiones plerumque suum ortum & causam mutantur; liquido nunc intelligitur, quare hypochondriaci, in quibus ventriculus & universus intestinorum canalis nervosus, ob motus peristaltici perversiorem, flatulentis distensionibus, spasticis quoque stricturis afflicte affligatur, ad motus & fluxus hæmorrhoidales valde sint proclives, atque, si sanguis ibi non exitum inveniat, hypochondriacorum pathemata plurimum exasperentur.

§. XIII.

Curatio generalis: quæ venæ sectione minus rite peragitur; In genere circa curationem omnis generis hæmorrhagiarum id velim notetur, inconvenientissimam esse eorum medendi methodum, qui, dum sanguinis rubicundi & κατ' ἐξοχήν sic dicti abundantiam pro causa unica materiali & occasionali nunquam non agnoscunt, crebro institutionis sanguinis missionibus audacter utuntur; utut, præsertim inter initia & præservationis gratia, in sanguineis præcipue, tempestivum venæ sectionis usum plurimi faciamus. Recta autem medendi ratio unice in eo reposita est, ut primo impetum sanguinis à parte laborante, opportunis remediis, ut sunt pediluvia, clysteres, externarum partium frictiones ac ligaturæ, calida tegumenta, fots, balnea, derivemus; deinceps ut spasticas nervosarum partium stricturas relaxemus; & demum lenioribus per epicrasin laxantibus, & moderatis diaphoreticis, item inedia sive abstinencia à victu pleno sanguinem ingenerante, nimiam serosæ colluviei abundantiam subtrahamus & præcaveamus.

§. XIV.

Epilogus. Hæc de doctrina hæmorrhagiarum in genere dicta sufficiant: specialior & fusior hujus in praxi utilissimi argumenti evolutio & discussio in sequentibus capitibus conspicienda erit.

CAPUT I.

De Hæmorrhagia narium.

THESES PATHOLOGICÆ.

§. I.

Narium hæmorrhagia quomodo fiat. Sanguinis per nares profusio debetur copiosiori ejusdem per validiorem cordis motum ad caput appulsui, quo arteriolæ in pituitaria tunica plus justo opplentur, earumque extrema nimium distenta tandem dehiscunt & sanguinem effundunt.

§. II.

Nares ad sanguinis eruptionem prona. Narium ea fabrica, ut eruptioni sanguinis facile obsecundent. Etenim in earum interioribus sanguifera vasa in minutissima capillamenta di-

remta, per tunicam, quæ vomeris os, spongiosa ac ethmoidalia ossa investit, copiose distribuuntur, ac tenui admodum membrana exterius obteguntur. Unde factò validiori sanguinis eo affluxu, is difficulter admodum per venulas refluit, sed ex facili in arteriis restitatur, harum extremitates ultra modum diducit, perumpit ac effluit, quin haud raro easdem in exigua aneurismata elevat, quæ postea stillicidium faciunt effusius.

§. III.

Ad nares ipsumque caput validiorem sub hac hæmorrhagia fieri sanguinis & humorum confluxum, cordis & arteriarum vehementior motus, arteriarum in collo ac temporibus potissimum intensà pulsatio, gravativus in capite sensus, faciei rubor ejusdemque cum capite toto intumescencia, naresque interius siccae & calidæ, luculenter faciunt testatum.

§. IV.

Hujus congestionis palmaria causa inæqualis sanguinis, per minimos, maxime partium extimarum tubulos, progressus, tantum per venas non reducens, quantum per arterias adductum. Quo dein fit, ut ad quasdam partes sanguis justo parcius volvatur ibique deficiat, ad alias vicissim copiosius cum impetu ruat, ibidemque canales ad crepaturam usque farciendo, exundet.

§. V.

Igitur quodcunque inæqualem sanguinis per canales in corpore commeatum facit; id etiam ad excludendas hæmorrhagias confert. Jam nullum sanguinis profluvium, maximeque omnium hoc per nares succedens, unquam facile sine cutis partiumque extremarum strictura, vasorum detumescencia, horripilatione, refrigeratione, sine alvi adstrictione, flatuum retentione, borborygmis in ventre, membrorum lassitudine, doloribusque in ventre contingere solet, ut potius hæc phænomena ipsam profusionem ordinario vel comitari, vel antecedere soleant. Ex quo fit planum: spasticam quandam fibrarum & vasorum in extremis maxime partibus minimorum stricturam, inæqualis sanguinis circuitus esse causam. Nimirum, quando per crispaturam hanc spasticam vascula sanguinem potissimum, tum etiam lympham, aut alios succos revehentia, nec non excretorii illi in cute tubuli, per quos juxta naturæ legem serosa sanguinis portio expurgatur, comprimuntur, sanguis ad vasa interna majora regurgitat, quo major citatiorque cordis & arteriarum proritur contractio, & ipse sanguis ad partes, præsertim debiliores, validius appellitur, ubi ejusdem congestio, aut decubitus, demum causam eruptionis sanguineæ, vel aliorum gravium affectuum præbet.

§. VI.

Quæ quum ita sint, expedita nunc est disquisitio, quo pacto aliæ adhuc causæ concurrant ad excludendum sanguinolentum hoc stillicidium. Jam scilicet ex facili reddenda ratio, cur, qui succis & sanguine redundant, quieti ac sedentariæ vitæ indulgent, voraces sunt & laute vivunt, corpus tamen, præsertim pedes, frigori incautius exponunt, accedente impensiori corporis vel animi motu insueto, aut assum-

assumtis iis, quæ sanguinem plus exagitant, aromaticis, spirituosiss, cerevisiis, vinis, pharmacis calidis volatilibus, nec non admixtis balneis fervidis, sanguinis per nares fluxum crebro & promte incurrant; eo quod his liber ubique & æquabilis sanguinis commeatus intercipitur, ut is per minima vasa facta ad omnia loca æqualiter distribui nequeat, sed dispositas partes nimium obruendo, ibi erumpat.

§. VII.

*Sub aëris,
autumno
et vere, vi-
cissitudine.*

Haud difficulter quoque reperiunda sic causa, cur ad certam aëris atmosphærici constitutionem crebro hæc hæmorrhagia erumpat. Per observationem enim in comperto est, plures, vere potissimum & autumnno circa æquinoctia, in provectiore etiam ætate narium incurrere stillicidium, non sine levamine. Tum quippe inæqualis admodum esse solet aëris habitudo & frequens ex calido in frigidum, ex sicco in humidum, ac vice versa mutatio. Qua vicissitudine crebriori, quia instratum corpori nerveo-vascularum cutis emunctorium male afficitur & tonus ipsius cum transpirationis successu labefactatur; mirum non est, sanguinis cursum ordinatum turbari & ad sanguinis eruptiones ansam præberi.

§. VIII.

Et ex frigido ac humido in elasticum & vice versa mutatione.

Eidem causæ tribuendum, quod narium profluvium quandoque populares habeat circuitus, tum scilicet, quando nimis frigidam & humidam aëris ex austro & septentrione constitutionem, subito excipit in elasticam habitudinem mutatio, vel etiam versa vice vicissitudo succedit. Sic enim illa per cutis poros succedens copiosa humidi exhalatio turbatur, serosior sanguinis pars augetur, majori copia ad vasa ampliora ipsumque cor redit, quo validior in his systole & validior quoque fluidorum impulsus, sed inæqualiter procedens, inducitur.

§. IX.

In iis qui morbis spasticis obnoxii.

Neque minus in prono est judicare, qui fiat, ut sanguinis per nares excretionem sæpe incurrant viri, qui rheumaticis, nephriticis, arthriticis & ischiadicis doloribus sunt obnoxii. Absolvuntur enim hi morbi motibus & stricturis spasticis, quibus reddito inæquali sanguinis meatu, ejusdem collectiones & eruptiones in aliis locis præter naturam contingunt. Unde eximium utique Hippocratis lib. de prædict. II. monitum, præcipientis, ut ex ægris provectæ ætatis ischiadicis & rheumaticis doloribus affectis quæratur: num ipsis adolescentibus vel juvenibus ex naribus sanguis fluxerit.

§. X.

Quibus restituantur alia sanguinis evacuationes.

Non adeo insolens porro est, ut resistente in foeminis præsertim junioribus, gravidis quoque, mensium, & in puerperis lochiorum, nec non in viris hæmorrhoidum fluxu, facta palindrome, narium stillicidium excipiat sanguinolentum. Nulla tamen alia pariter subest causa, quam quod spasmis, quibus omnes hæmorrhagiæ stipari solent, æquilibrium motus sanguinis progressivi tollatur, isque ad loca excretioni dicata cum impetu agatur, ibi vero exitu præclusus, ruat ubi congruum invenit locum ibidemque egrediendi sibi paret viam.

§. XI.

Frequenter præterea incidit, ut, in iis potissimum, qui tenerum, spongiosum & ad hæmorrhagias dispositum corpus nacti, febribus, præsertim synochæ exquisitæ, sese associet, nec non quartanæ superveniat, atque etiam in exanthematicis morbilliosis & variolosis, ante eruptionem accedat sanguinis per nares profusio. Cujus phænomeni ratio non nisi spasticis nervosarum partium vehementibus stricturis tribuenda. Has enim nunquam fere non his in morbis præsto esse, quæ antecedere solent luculenter indicant, urinæ scilicet tenues, alvus stricta, cutis ad levem auram admixtæ horripilatio, refrigeratio, inquietudines & anxietates, donec accedente faciei rubore & inflatione capitisque dolore, erumpat sanguis.

§. XII.

Nec prætereundum, Medicorum observata quibus subinde fidem facere, quod iis, quibus grandius paullo ex corporis membris mutilatum, aut amputatum, frequens esse soleat sanguinis è naribus stillicidium. Etenim eadem postea adhuc estque manetque sanguinis & chyli quantitas, spatium vero, quo diffundendi succi, minus quam antea, unde cruor stagnat in minimis, & ut aliorum vergant motus eluctatorii, facit.

§. XIII.

Accedit alia inæqualem sanguinis motum præter spasmus inducens causa, viscerum scilicet sanguineorum, hepatis & lienis, infarctus atque obstructio. Hic enim dum obex ponitur sanguinis per vasa cum his visceribus communicantia commeatui, aliorum convertitur ejus motus ac impetus, ac non raro superiora ipsumque caput petit. Atque hinc accidit, ut inveterato scorbuto, hydropi & cachexiæ demum, accedat hæmorrhagia sæpe funesta. De quo priscum jam Hippocratis de prædict. testimonium, magnos lienes comitari hæmorrhagias.

§. XIV.

Ipsam autem sic concurrentibus variis causis exclusum sanguinis stillicidium, vel ex dextra, vel ex sinistra nare, raro ex utrisque simul, succedit, ac præterea, pro uberiori, vel pariori sanguinis ad caput affluxu, ejusdemque ibi facto decubitu, ratione quantitatis multum differt. Interdum enim aliquot tantum stillant guttulæ, quandoque effluunt aliquot uncix, non nunquam vero tam effuse per aliquot horas manat sanguis, ut quinque vel sex librarum pondus æquet.

§. XV.

Dein hæc narium hæmorrhagia, ratione successus, quibusdam longius, quibusdam brevius, accidit. Quosdam etiam sæpius, quosdam rarius, infestat. Pueris scilicet & adolescentibus familiarior est, rarior viris ac senibus. Incidit quoque frequentius in virilem, quam foemininum sexum, cui exundans sanguis solenniter expurgatur per uterina vasa. Neque minus ut plurimum & crebrius observatur in iis, qui spongiosiori, copiosis atque exilibus dotato corporis habitu præditi, non vero ita in macilentis & amplis vasis pollentibus, quibus tamen si accidit hæc hæmorrhagia, esse solet effusior.

§. XVI.

§. XVI.

Facile re-
dit.

Præterea attentior docet observatio, eos, quibus ineunte ætate copiosa mucida & serosa per aures, nares oculosque exierunt, superatis pubertatis annis, narium hæmorrhagiæ fieri obnoxios. Hæreditariam etiam sæpius esse hanc sanguinis evacuationem & à parentibus transire in liberos experientia constat. Et nullam hæmorrhagiam tam facile repetere, quam quæ per nares contingit, est pariter certum; ita ut elapso diei, aut tantum aliquot horarum spatio, sæpe recrudescat.

§. XVII.

Quando-
que saluta-
ris est ple-
thoricis.

Jam omnes quidem solitæ & frequentes sanguinis fluxiones, debiliorem naturam, hoc est, talem partium corporis structuram, quæ impeditori minusque æquabili sanguinis progressui favet, indicant. Interim tamen salutare omnino sunt, quando à nimia sanguinis mole, in spongioso maxime corpore, stagnationum pessimarumque passionum metus est. Nec desunt numerosissima apud observatores medicos exempla, quibus vertiginem, scotomiam, gravativos capitis dolores, phrenitidem, convulsiones quoque & epilepsiam, per narium hæmorrhagiam soluta annotarunt. Vicissim quam gravia damna à præpostera hujus excretionis suppressione insequantur, vertigines, apoplexiæ, epilepsiæ, convulsiones, aurium cum auditus difficultate tinnitus, nec non serena gutta, vel solus primus artis parens Hippocrates passim confirmat, maxime prædict. & in coacis.

§. XVIII.

nec non in
synocha.

Criticæ quoque & salutare sunt ut plurimum narium hæmorrhagiæ, quæ in synocha febre, semicritico die, inter tertium scilicet & quartum, vel etiam critico pleno, septimo erumpunt, & has febres, à plethora ut plurimum ortas, solvunt.

§. XIX.

Frequens
nimis pue-
ris, juveni-
bus & ad-
ultis mor-
bos indu-
cit.

Attenta in artis exercitio observatio docet, & ab Hippocrate jam notatum, eos, quibus in pueritia frequentia fuerunt narium stillicidia, accedente juventute, facile incurrisse pectoris morbos graves, hæmoptysin, pleuritides, peripneumoniam ipsamque phthysin; in provectiori autem ætate virili, hæmorrhoidali fluxui, affectibus rheumaticis, arthriticis, ischiadicis, nephriticis & colicis factos fuisse obnoxios.

§. XX.

Enormis ac
diuturna
necat.

Enormes ac diuturnæ sanguinis per nares profusiones, quando ex vehementioribus internarum partium spasimis pendent, præcedentibus extremorum refrigerationibus & lipothymiis, tandem in mortem terminari solent. Vidimus id ante quadraginta annos in fœmina generosa, in qua post mortem carotides mirum distentæ & duplo capaciores, inferior autem coli portio arctius stricta, comparuerunt.

§. XXI.

Symptoma-
tica in ex-
anthemati-
cis, malignis & chro-
nicis mor-
bis pericu-
losa.

Quæ febribus exanthematicis, vel etiam malignis, ubi summa virium prostratio, accedere solet narium hæmorrhagia, monstri aliquid alit semper, viresque magis adhuc dejiciendo & sanguinis ad corporis superficiem cursum una cum materiæ peccantis expulsionem minuendo, periculum ad-

ducit gravissimum. Quæ etiam in chronicis morbis, ubi viscera destructa, erumpit, ad mortem ducit, eaque propter cachecticis & hydropicis funesta ut plurimum observatur sanguinis per nares evacuatio.

C U R A T I O.

§. I.

Si enorme sanguinis profluvium præsens est & periculum minatur & nimium destruit vires, utique auxilio medici opus est. Versantur autem medendi rationes potissimum in eo, ut perspectis genuinis causis, ea opponamus, quæ illis tollendis sufficere possunt.

§. II.

Quando itaque nimia humorum & sanguinis redundantia atque expansiva ejus vis & turgentia liberiores & æqualem per minima vasa transitum impediens, immodicam talem fluxionem causatur, quod præsertim fit in corpore juvenili, verno tempore & à motu corporis paulo fortiori, vel etiam ab ingestis spirituosius sanguinem exagitantibus, præter venæ sectionem, quæ etiam simul divertit motum sanguinis à capite, nitrosa omnibus aliis, ad nimium orgasmum compescendum & relaxandas etiam spasticas partium stricturas, palmam præripiunt. Olim jam ipse Paracelsus, nec non Hildanus, hoc sale tantum purificato, in omnibus hæmorrhagiis cum fructu usi sunt. Et Riverius in praxi & observationibus suis, hujus remedii efficaciam in sistendis fluxibus sanguineis non satis dilaudare potest. Similis tamen effectus, utut paulo inferioris, sunt ipsa acida, tam temperatiora ex vegetabilium familia, ut citri succus, berberum, aqua & succus acetosellæ, quam potentiora ex mineralibus, ut phlegma, seu spiritus vitrioli dilutus, vel tinctura rosarum & florum bellidis, cum aqua acetosellæ & spiritu vitrioli præparata, & cum aquæ fontanæ potu, cujus etiam magna vis est, intestinam illam sanguinis elasticam viam componendi, propinata.

§. III.

Quia vero in effrenibus ejusmodi & periculosis sanguinis profluviiis spastica quædam nervosarum partium strictura plerumque subest, quam pressio, ut dicunt pede, inæqualis fluidorum sequitur progressus, præter jam laudata nitrosa, ad blanda anodyna subinde est confugiendum, quorum in numero papaveracea, ut aqua, vel etiam extractum, aut syrupus papaveris rhœados, syrupus papaveris albi, emulsiones, quæ semina quatuor frigida & semen papaveris albi habent, & ex aquis florum acaciæ, sambuci, tiliæ, ulmariae, chamomillæ vulgaris, primulæ veris confectæ sunt. Persistente vero pertinacius validiore solidorum impetu, descendendum ad efficaciora, & aliquot grana massæ pilularum de cynoglossa offerenda. Camphora quoque, propter sulphureas, quas copiose spargit, exhalationes, sedativum præstat effectum, præsertim si cum nitro, antimonio diaphoretico, parciore & refractor ejus dosi permixta fuerit. Qualis pulvis insignem inprimis locum invenit, si exanthematica quædam materia, ut sæpius evenit, ejusmodi sanguinis profusionis causa fuerit. Ex omnibus vero ad moderandas sanguinis tam per narium, quam alia loca profusiones, vix tutius & certius datur ullum

ullum remedium, liquore meo anodyno minerali, qui sulphure vitrioli anodyno scetus & penitus satur est, & sive solus, sive adhuc melius, pulveri nitroso nuptus & cum aqua tantum fontana datus, orgasimum sanguinis illum effrenem protinus compefcit.

§. IV.

Præterea urgente gravius malo, ut sanguinis impetus à superioribus divertatur & alio dirigatur, curandum: hunc in finem plura sunt proficua. Palmarium venæ sectio in parte inferiori instituta. Dein egregia pediluvia temperata, vel immisiones manuum in aquam tepidam, quibus laxantur fibræ, partiumque vasculorum tonus remittitur, & sic quodammodo nimius sanguinis ad superiora affluxus impeditur.

§. V.

Cum porro materia acris biliosa, flatuum & spasmodorum genetrix sæpius, & præsertim in hypochondriacis immodicæ sanguinis fluxionis causa sit; derivandi scopo certe egregia virtus eorum, quæ canalem intestinorum blande expurgant. Quæ interius dantur, sint temperatiora roborandique simul facultate donata, cujus generis sunt rhabarbarina, rhabarbari pulvis, in substantia cum aliquot salis polychrestii & nitri granis permixtus, vel passulæ rhabarbarinæ. Exterius idem præstant clysteres ex emollientibus, carminativis temperatis & oleosis parati, qui latentes in intestinali canale spasmos & flatus mulcent ac evehunt.

§. VI.

Divertunt demum etiam nimium sanguinis affluxum simul atque imbecilliore partem roborant exterius applicata fronti, naribus & collo refrigerantia, cum discutientibus mixta, ex quibus probatissimæ virtutis epithema, quod ex aceto rosaceo, rutaceo, nitro, camphora, oleo ligni Rhodii paratur, atque etiam naribus attrahi potest.

CAUTELÆ ET OBSERVATIONES CLINICÆ.

§. I.

Qui impetuosius & frequentioribus narium hæmorrhagiis obnoxii sunt, ad has præcavendas, corpus, maxime pedes, ipsumque caput, à frigore probe defendere debent, ne perspiratio impediatur, quæ sicuti ad omnes hæmorrhagias, sic etiam hanc, multum confert, dum abundantia sanguinis & humorum etiam impurorum inde progignitur. Consultum igitur est, præter abstinentiam à largo victu, hanc excretionem corporis motu, & infusis theiformibus, ex herba veronica, summitatibus millefolii &c. servare ac promovere.

§. II.

Qui hæmorrhagiis in juventute frequentius fuere tentati, postea iis cessantibus & neglecta etiam sanguinis missione, cavere maxime debent ab omni vehementiori corporis motu, etiam intenso clamore, sermone ac voce. Observavi enim in aliquot litteratis docentibus capitis morbos fere immedicabiles, aurium tinnitum perpetuum, capitis dolorem, paralyin quoque supervenisse.

§. III.

Maximè omnium vero post enormes hæmorrhagias cavendum est à refrigeratione corporis, etiam capitis, nec non à terrore. Hoc enim neglecto, ingentem torporem, stuporem, dolorem gravativum capitis, cum dolore oculorum, visus imbecillitate, vertigine subortum observavimus, quin summam totius corporis debilitatem ipsiusque apoplexiæ metum. Nam quo plus exhaustum sanguine corpus, eo magis cavenda sunt ea, quæ sanguinem ab externis partibus ad interiores repellunt.

§. IV.

Eandem ob causam in profusa hæmorrhagia caute, & quidem statim ab initio, mercandum est cum frigidis & adstringentibus, tam per nares attrahendis, quam epithematis forma exterius applicandis. His enim incautius admotis, sanguinis impetus, obstructis naribus, vel ad asperam arteriam & pulmones, suffocationis metum, vel ad interiora cerebri conversus, apoplexiæ periculum infert. Tutius potius est & consultius, præmissis pediluviis, & alvo per clysteres soluta, ac venæ sectione, si opus fuerit, in pede administrata, externis hisce demum uti.

§. V.

Illæ sanguinis fluxiones, quæ à sanguine nimium redundante, omissa consueta venæ sectione & deficiente in foeminis menstruali purgatione, vel emanante lochiorum in puerperis, aut in viris hæmorrhoidum fluxu, oboriuntur & plus salutis quam periculi afferunt, nullo modo sistendæ sunt cum vi. Si vero modum excefferint, præter derivantia jam dicta, corallia cum speciebus de hyacintho & nitro mixta, ac succo citri imbuta, propinare sufficiet.

§. VI.

Neque minus maximopere est cavendum, ne consuetæ per periodum recurrentes ejusmodi hæmorrhagiæ subito cohibeantur externis, aut internis. Inde enim in senibus lethargum, imo apoplexiam obortam, non semel observavimus.

§. VII.

Solo frigido aquæ fontanæ in & extra paroxysmum potu, modo externa corporis superficies convenienti foveatur calore, successive ad duas vel tres mensuras singulis diebus hausto, narium hæmorrhagias compositas esse novimus, præsertim in choleris, biliosis & ubi intensior partium sulphurearum orgasmus est, qui hac ratione optime complacatur & blandus plerumque sudor optimo effectu suscitatur. Quare non improbandum consilium, ut, qui immodicis & crebrioribus vexantur hæmorrhagiis, aquam fontanam, sed puram, ordinarii potus loco bibant.

§. VIII.

In symptomaticis & raro cum bonis ægrotum rebus decurrentibus ejusmodi profluviiis, qualia febres exanthematicas, variolas, morbillos, purpuram scorbuticam, imo ipsas petechias comitantur, non aliâ convenit exhibere remedia, quam quæ nimium æstum moderando, cuticularem perspirationem blande promovent, inter quæ frequentis & probati usus mihi est mixtura ex aquæ florum sambuci uncias quatuor, aceti de-

Refrigeratio & terrore.

Externis qua cautione sistendum.

In plethoricis hæmorrhagiis non vi sistendæ.

Neque etiam si periodica est.

In choleris & frigidis potus produm est.

In symptomaticis quid faciendum.

destillati uncia una, lapidum cancrorum, diascordii Fracastorii, ana drachma una; nitri scrupulo uno, addita syrupi papaveris rhœados sufficienti quantitate; de qua bihorio quovis æger duo cochlearia capiat & temperato lecti calori se committat. Ac si quippiam malignitatis subest, pulvis ex antimonio diaphoretico, nitro depurato & camphora propinandus.

§. IX.

*Emanens
quibus pro-
nuanda.*

Quibus in pueritia & adolescentia sanguis frequentius è naribus stillavit, ii haud raro, cessante postea hac fluxione, capitis, oculorum & aurium vitis, nec non tumore parotidum vexantur, vel etiam gravioribus malis, epilepsia, phrenitide, idiopathica, vel symptomatrica, affliguntur. Quod ubi incidit, tum utrique commode, si caput ejusque vasa sanguine turgent, nares ad sanguinem fundendum externo artificio irritandæ & aperiendæ sunt, idque plerumque penna, vel stramine in nares fortius intruso, vel instrumento scarificatorio perficitur. Idem cum fructu adornatur, si in febribus synochis & sanguineis ingens sanguinis impetus ad caput præsto est, & gravia symptomata sine ejus effusione efficit.

§. X.

*Ab animi
affectibus
quomodo
iractandæ.*

Hæmorrhagiæ impetuosæ, quæ fiunt à gravibus animi affectibus, peculiarem tractationem postulant. Quod si enim ab animi excandescencia sunt, pulveres antispasmodici, nitrosi, cum pura aqua frigida successively dati, eximie prosunt; si vero à gravi mœrore oriuntur, diaphoretica cum antispasmodicis mixta, liquor noster anodynus mineralis, cum quarta parte spiritus Bussii, cum regimine blande diaphoretico, omne curationis absolvent punctum.

§. XI.

*Nec non in
cachecticis
& scorbuticis.*

Cachectica si fuerint corpora hæmorrhagiam hanc incurrentia, rhabarbarina, variis modis crebriusque oblata, sive sola, sive cum salibus digestivis permixta, omnibus aliis id genus remediis præferenda esse experientia didicimus; si vero scorbutica viscerum labes subest, feri lactis cura, interpositis rhabarbarinis, erit omnium optima.

ENARRATIONES MORBORUM.

OBSERVATIO I.

Hæmorrhagia in cachectico lethali.

Vir sanguineo-phlegmaticus, quadragesimum ætatis annum egressus, à multis jam annis, tam cerevisiæ, quam vini potui nimium indulgens & cachecticus redditus, incidit in icterum, qui congruis remediis rhabarbarinis & aperientibus item discutientibus externis aliquoties sublatus, sæpius rediit, ac tandem cutis nigrore prorsus fuit tincta, simul narium erupit hæmorrhagia, quæ remediis compesci potuit nullis, sed diu noctuque sanguis tenuis, lividus, coagulum prorsus respuens exstillavit, subsequuta virium jactura summa, & extremis semper frigescentibus, mente constanti obiit.

Epicrisis.

Omnes sanguinis profusiones in cachecticis corporibus, si modum excedunt, atque ex vitio & obstructione hepatis vel lienis fiunt, multum periculi alunt, nec facile admittunt sanationem,

duplicem potissimum ob causam. Scilicet propter obstructa alicubi vasa æqualis sanguinis cursus turbatur, & ad aliam partem plus, quam secundum naturam debebat, sanguinis conveyitur, cui postea facile supervenit eruptio ipsa. Dein si viscus nobilius, quod, uti hepar, sanguinis repurgationi, sulphureas acres partes fecernendo, dicatum, est obstructum, remanentibus intus his recrementis, succi in corpore fiunt falsi, acres, impuri ac intemperati, qui postea partim spasmos concitando intensos, partim tenera vascula erodendo, plane hæmorrhagias faciunt incompefcibiles. Id quod sæpius evenisse vidi ictero nigro laborantibus, inter quos etiam fuit, cui ex gingivis sanguis tam effuse profluxit, ut nullo modo posset reprimi. Narium quoque hæmorrhagiam ex ictero nigro lethalem annotarunt M. N. C. Dec. II. ann. II. obs. 144. pag. 318. Et maxime omnium hanc in rem notandum Heurnii testimonium, quod notis in S. III. aph. XX. ita habet: *vidi non nullos, quum à vini liberaliori usu æstuant & in hæmorrhagiam transirent, tandem evasisse ictericos moxque in hydropem abiisse calamitosum hoc malum.* Nec non illud, quod epid. L. VI. consignavit: *qui vitio lienis laborant, & quibus viridi atroque colore tinctis, nares sanguinem fundunt, malum.*

OBSERVATIO II.

A triginta, & quod excurrit, annis animo adhuc obversatur memoratu dignum de hæmorrhagia narium lethali exemplum in scemina illustri, tum heic degente. Erat hæc circiter trigemaria, macilenta & natura alvi segnioris, & cum utero gereret, perpetuas, ultimis præsertim mensibus habuerat querelas, de calore lento continuo, vires mirum atterente, cum intercurrente cordis palpitatione & quandoque tanta pulsuum debilitate, ut vix persentirentur, & ægra vernacula asseveraret: *Es wære ihr, als wven das Hertz gar keine Krafft hätte und in Wasser läge.* Post superatos partus labores, lochia manarunt non sufficienter, & successit è naribus fluxus satis largus sanguinis tenuis non coagulum assumentis. Subsistente hæmorrhagia hac interjecto aliquot horarum spatio, inceserunt puerperam pathemata spastica truculenta, cum extremorum frigore summisque anxietatibus, sub quibus mens ipsa sibi non constabat animusque desperans erat de salute, donec erumpente rursus è naribus sanguine, pathemata sensim remitterent & mens ad se rediret. Discessit postea hoc sanguinis profluvium iterumque accessit per paroxysmos, ita, ut per duas vel tres horas succederet, postea ad duodecim vel octodecim horas inducias daret, tum præviis anxietatibus, inquietudine, extremorum frigore, & faciei rubore rediret, inter quæ antecedentia pathemata mens semper erat aliena & desperatis cogitationibus adeo turbata, ut nec divini verbi solatia eidem erigendo sufficerent, quæ tamen extra paroxysmum avide sibi applicabat decumbens. In hoc tam gravi malo, consilia & auxilia adhibita multa; venæ sectionem natura horruit ægra, laxantia autem, clysteres, pediluvia, frictiones, nitrosa omniaque alias præstantissima fuerunt frustranea. Unde per continuans sanguinis profluvium vires prorsus exhaustæ atque dejectæ, pulsuum ictus facti inæquales, inquietudo perpetua, donec exactis inter hæc quatuordecim diebus, lipothymia tandem sub ipso paroxysmo spastico occumberet lethali.

Hæmorrhagia narium in puerperæ lethalis.

Epicri-

Epicrisis.

Quamvis narium profluvium hoc in casu speciem præbuerit critici & salutaris in locum lochiorum minus sufficienter fluentium succedentis; tamen propter pathemata in tenera & debili puerpera supervenientia spastica hysterica, utique exitii fuit plenissimum. Tanto certius autem fuit periculum ac damnum, in persona, cujus vires propter æstum, diutius jam corpori tempore, quo utero gessit, inhærentem, crasin sanguinis & temperiem naturalem destruentem, unde etiam sanguis sine coagulo prodiit, jam attrita, & postea per ipsum profluvium penitus quotidie magis prostrata sunt atque dejecta. Nam spasmi semper in corpore viribus destituto graviores sunt & pertinaciores, & vel hæmorrhagias, vel inflammationes, aut congestiones sanguinis, in capite relinquunt. Unde, quando gravidæ, ultimis præsertim mensibus, cum æstu interno de virium debilitate valde queruntur, vidi sæpe & prædixi in puerperio pravos eventus. Liquet etiam ex hac morbi historia, in paroxysmis spasticis redeuntibus, desperabundas illas & melancholicas anxias mentis alienatæ cogitationes originem suam in foemina alias eximiæ pietatis, à congestionem & stagnationem sanguinis in cerebri vasis traxisse, minime vero, ut vulgus autumat, à malo dæmone fuisse obortas, quum fluente sanguine per nares & spalmis remittentibus, omnia pathemata desperabunda simul quoque & semel exspirarint.

OBSERVATIO III.

Juvenis perillustis, sanguineæ constitutionis & facie floridus, in pueritia & adolescentia crebro jam fuerat expertus narium stillicidium, & postquam in nostram hanc ante aliquot annos concessisset Academia, tantam sanguinis è naribus profudit successive copiam, ut sex, vel octo mensuras compleret. Quo inducta ingens virium dejectio, cum appetitus languore visusque hebetudine. Data quidem plura congrua alias remedia, sed frustra. Tandem & ego in consilium vocatus suasi, ut ordinarii potus loco aquam fontanam frigidam, cum tinctura rosarum, spiritu vitrioli acidulata & syrupo berberum remixta biberet, corpusque exterius, præsertim pedes, probe à frigore defenderet. Quæ cum aliquandiu per quatuordecim circiter dies servasset, substitit sanguinis fluxus, ac posteaquam jusculis nutritibus gelatinosis ex carnibus sanguis exhaustus nimis reparatus, convaluit æger ex voto & ipsa quoque visus hebetudo cessavit.

Epicrisis.

Hæmorrhagiis sunt maxime obnoxii juniores, sanguinei & sanguineo-cholericis, habitus corporis spongiosi, iidemque miram sic sæpe quantitatem sanguinis, citra vitæ periculum, profundunt. Consignatæ sunt ejusmodi largi profluvii historiae à *Zacuto Lusitano*, *Valleriola*, nec non *Foresto*. Et nuper admodum retulit mihi Theologus, se per multos jam annos obnoxium esse tam largo narium stillicidio, ut non nunquam uno die vel quinque mensuras perdat, facie tamen semper rubicunda, pulsuque auctiori manente, nec quicquam proficere adhibita media, quin cohibito per spiritum vini naribus attractum fluxu, spirandi accedere anxietatem. Sed modo viscera salva sint, nec sanguis impurus scorbuticus; *Frid. Hoffmanni Oper. Tom. II.*

restitutionis tamen spes est, licet vires haud leviter per nimiam sanguinis jacturam atterantur. Ex omnibus vero ejusmodi in casibus præsentaneæ virtutis frigidus potus, ex aqua tantum simplici, sine additione acidorum, eaque sæpius cohibitam è naribus hæmorrhagiam vidi. Id tamen monendum, hoc remedium in iis tantum obtinere locum, qui non ex viscerum obstructionibus & internarum partium spasticis stricturis, sed ex nimia elasticitate & expansione partium in sanguine sulphurearum, atoniam vasorum inducente, hoc malum incurrunt. Frigus enim sic cum potu intro admissum, compescit orgasmum fibrasque nimium remissas adducit, eoque facit, ut sanguinis impetus ab affectis locis discedat & ad exteriora ab interioribus divertatur, ac haud raro sudor erumpat, boni in hæmorrhagiis semper ominis. Eadem hæc medicatio etiam locum habere potest, ubi à fortiori corporis motu, calida tempestate, potu spirituosissimo atque etiam ardenti veneris maxime desiderio, sanguis valde exagitatus prorumpit. Quo casu præterea *Hildanus* non sine ratione immisionem in balneum frigidum suadet.

OBSERVATIO IV.

Generosa foemina, quinquagesimum sextum ætatis annum ingressa, vegetæ alias constitutionis, per quinquennium admittere noluit suam alias venæ sectionem, sed interea aliquoties hæmorrhoidalium venarum stillicidium fuerat experta. Hæc ante mensem, eo tempore, quo propter aëris constitutionem insalubrem varii generis febres circumibant, etiam paroxysmo corripiebatur febrili, accedente tertio die delirio levi & narium stillicidio parco, quo tamen delirium non remisit, sed persistit potius cum leni quodam & continuo cutis madore. Medicus in consilium vocatus dedit nitrosos & cinnabarinos pulveres & quotidie aliquot mensuras aquæ frigidae ebibere jussit. Accedente sexto die graviora facta sunt cum delirio pathemata, unde medicus, quod primis diebus faciendum fuisset, venam secare jubet in pede & decem circiter sanguinis uncias emittere. Inde quidem æstus & pulsus sedatior factus, delirium quoque remittere visum, remansit tamen languor maximus, quin octavo die redierunt pristina pathemata, si non majori acerbitate, tamen eadem. Tandem quoque per uterum & anum excreta fuit ingens non tam sanguinis, quam feri sanguinolenti quantitas. Hinc iterum remittere visa primum morbi atrocitas, sed exacerbata paullo post denuo. Accessit præterea singultus, quem medicus frigida aqua clystere ano infusa compressit. Post hunc rursus per uterum magna feri colluvies evacuata, ac postremo fatis cessit ægra.

Epicrisis.

Ad hanc ægram accersabar die septimo & ego; sed malui spectatorem agere tantum, quam medicationem suscipere. Exspectavi potius exitum, quem prædixi, brevi funestum, tanto magis, quum de evacuatione feri sanguinolenti per uterum & anum redderetur certus. Interim testimonio est hæc morbi historia, venæ sectione non interceptum, aut anticipandum esse criticum sanguinis fluxum, qui in synocha febre septimo die solet erumpere. Haud dubia & fallacia enim fuerunt indicia, naturam ejusmodi criticum fluxum fuisse suscitaturam, eaque propter venæ

Hæmorrhagia in synocha venæ sectione turbata cum damno.

sectio primis, non postremis diebus, fuisset instituenda, naturæ negotium certo turbatura. Vicissim nunquam ego cum bonis agrarum rebus accidisse novi secessum non sanguinis, sed feri sanguinolenti per uterum. Etenim putrida talis hæmorrhagia labem in utero haud obscure innuit inflammatoriam, tanto certius, quo magis delirium & symptomatum inde oriundorum nullum levamentum ferunt testimonium.

OBSERVATIO V.

Hæmorrhagia morbillis accedens sanata.

Juvenis Hebræus, constitutione sanguineus, decimo octavo ætatis anno morbillis correptus, experiebatur simul narium hæmorrhagiam copiosam, cum anxietate præcordiorum pectorisque oppressione eximia. Vocatus ego dedi mixturam, ex decocti cornu cervi aquæ florum sambuci unciiis quatuor, succi citri uncia dimidia, coralliorum drachma, nitri puri, diascordii Fracastorii scrupulis duobus, syrupi acetositis citri uncia semis. Qua per vices cochleatim assumpta, eruperunt nocte una morbilli, sedata symptomata, compressa hæmorrhagia.

Epicrisis.

Morbillis complicari narium stillicidium non adeo rarum est, præsertim in plethoricis. Quin in sequiori sexu non modo per nares, sed vomitum etiam ac uterum sanguinem effusum esse novi, imprimis in iis, quæ exquisitius sentientis & ad iram pronæ naturæ. Sed si in exanthematicis ejusmodi morbis incidit hæc hæmorrhagia, eadem neutiquam sedanda per frigida, sed illa, quæ materiam illam acrem causticam nerveis membranis insidentem easdemque ad spasticas stricturas sollicitantem contemperant simulque blande expellere juvant. Et hunc utique effectum adhibita mixtura præstat egregie, de quo præterea multiplicia experientia sunt mihi testimonia.

OBSERVATIO VI.

Hæmorrhagia cum quartana sanata.

Puer generosus tener, octennis, ipso hoc anno, quo febres admodum frequentes, incidit in quartanam, quæ licet aliquoties depelleretur, semper tamen rediit, ut æger demum abdomen inflatum & faciem lividam circumferret, quibus crebriores accefferunt hæmorrhagiæ narium. Minus fausti hæc videbantur ominis; nihilo minus adjuvante DEO, infuso rhabarbarino, cum lixivio alcalino & nitroso, admixtis extractis amaribus, inter potum dato, febris ex toto quievit, omniaque per hæmatæ cum hæmorrhagia discussa.

Epicrisis.

Mala utique fuerunt hæc indicia. Sed in infantibus, non tam facile obstructions & indurationes viscerum accidunt, quam in adultis. Et si etiam adfuerint primordia ejusmodi labis, facilius tamen hæc amaricantibus & salinis iterum disjiciuntur ac tolluntur. Atque eidem causæ tribuendum, quod in nostro feliciter cesserit medicatio, quum, si in adultis eadem occurrunt phænomena, ex quartana facilis, quin certus, in cachexiam & hydropem sit transitus.

OBSERVATIO VII.

Virum ex omni hæmorrhagia.

Virum novi triginta circiter annos natum, spongiosi corporis habitu & temperamento, ut

vocant, sanguineo, qui à primis ætatis annis frequens expertus fuerat, circa æquinoctia potissimum, narium stillicidium. Adultior postea factus, sanguinis missionem vere & autumnno adinstitit liberalem, quo narium hæmorrhagia quidem emanavit, sed solennes facti circa id tempus capitis dolores, sponte tamen iterum discedentes. Quum vero aliorum concedens, ex consilio medici, fuetam omitteret venæ sectionem, vere ineunte gravativum capitis incurrit dolorem, cum faciei tumore ac rubore. Nihilo secius docentis, quod gerebat, munere strenue alta & elata voce fungens, aurium tinnitum & auditus gravitatem passus est cum torpore pedis & manus in latere dextro, quæ ipsum per multos annos ad mortem usque affligerunt.

giam intercipiente venæ sectione.

Epicrisis.

Patet ex hac relatione, consuetas fieri plethoricis, circa æquinoctia præsertim, narium hæmorrhagias, easdemque instituta sanguinis missione posse intercipi. Quia igitur omiſſa postea venæ sectione sanguis pristinam ad caput viam legit, mirum non est, subsequutas ibi stagnationes ipsius & gravativum sensum. Quin, quum per sermonem crebrum elatum magis augetur ad caput affluxus, factum utique, ut à cruore stagnante secederet serosa portio, ad inferiora descenderet, ibique aurium tinnitum atque etiam torporem pedis manusque induceret. Ex quo id in usum practicum tenendum: pessima esse medentium consilia, quæ contra experientiam suadent, ut sueta sanguinis missio, propter vanum decrementi virium metum, omittatur.

CAPUT II.

De Sanguinis Fluxu ex Pulmonibus.

THESES PATHOLOGICÆ.

§. I.

Illa hæmorrhagia, qua sanguis floridus & spumans mediante tussi ex pulmone fertur, recepto in scholis medicis nomine, origine Græco, hæmoptysis appellatur.

Hæmoptysis quid?

§. II.

Non omnis sanguinis è faucibus rejectio hæmoptysæ nomine insigniri debet. Nam sæpe è naribus in fauces & pulmones sanguis descendit, ac inde postea creatu grumosus per os rejicitur, præcedente in palato titillatione, in capite dolore, aut gravitate. Interdum quoque per acrem tenuem destillantem humorem, ab erosione & faucibus faucium, vel etiam ipsius asperæ arteriæ interioribus ramulis, sputum sanguine, vel sanguinis striis imbutum, educitur cum ipsa tussi; proprie tamen hæmoptysis dici nequit, nisi spuriam eam vocare velimus.

Differetia hæmoptysæ & hæmorrhagiæ.

§. III.

Neque etiam nostræ considerationis hic erit sputum illud subcruentum, quod inflammatum in pleuritide vera pulmonem, circa quartum, aut quintum ut plurimum diem, sequitur; neque etiam illud, quod à causa externa violenta, vulnere, contusione, vel graviore casu in pulmones subnasci consuevit, sed quod à causa interna excitatur, & à læsa vasculari pulmonum substantia

Ab inducitur per vitæ lenitiam.

oritur,

oritur, sicque proprie & stricte hæmorrhagia pulmonum dici potest.

§. IV.

Differt ratione quantitatæ & læsionis vasorum. Pro differente vasorum pulmonalium læsione & ejus quoque causa, varie, tam ratione modi, quam periculi & curationis, hic se habet affectus. Scilicet ubi sanguis spumans, floridus ac tenuis per intervalla, cum tussi, sine dolore, non adeo multus educitur, lateralium vasorum apertionem id denotat; ubi vero ubertim & magno impetu, quasi vomitu quodam, prorumpit, adeo, ut interdum magna inde pelvis impleatur, grandior venæ ramum vel in varicem expansum, vel in aneurisma arteriæ, quod sæpius accidit, abeuntem & ab *Hippocrate* jam animadversum, disruptum fuisse, est indicium. Qui casus, quo frequentius incidit, eo plus habet periculi, & repente non nunquam tam grandis sanguinis effusio hominem exanimat, dum vel intus intra tracheam cohibitus cruor, ob defectum virium, pulmones obruendo suffocat, vel vacuato nimium sinistro cordis ventriculo à sanguine, lethalem excitat syncopen.

§. V.

Causa hæmoptysicos proxima inæqualis circulus. Ut vero ipsa hæc eruptio fiat, aliæ variæ causæ concurrant necesse est. Immediata quidem, sive proxima, est inæqualis & impeditior sanguinis per pulmonum vasa transitus, seu circulatio, dum majori copia & impetu in arteriam pulmonalem ejusque ramulos affluit & appellitur, quam venæ eum recipere & reddere possunt, quo dein successive fit magna tenuium ramorum, qui substantiam cellularem & vesicularem ipsaque bronchia perreptant, expansio, tandemque varicosa, seu aneurismatica potius intumescencia, & denique violenta ruptio.

§. VI.

Quod testantur signa. Confirmant hoc uberius signa & symptomata, quæ malum hoc solent antecedere ac comitari. Scilicet invadit illud per vices insultibus, & quasi per paroxysmos revertitur sic, ut æger antea percipiat horripilationem in cute atque extremis maximeque pedibus refrigerationem, vasa in manibus dispareant, dolor in dorso, lassitudo & gravitas artuum affligat, borborygmi in imo ventre sint & alvus adstricta, in pectore gravativus sensus cum difficiliore spiritu observetur, donec sequente in faucibus titillatorio & secundum asperæ arteriæ tractum quasi pruriente sensu, sub calida ebullitione & undulatorio in dextro latere motu, ipsa eruptio sanguinis accadat. Hæc enim omnia indicant spasticam quandam externarum & internarum partium stricturam, sanguinisque motum non modo esse inæqualem, sed & à peripheria introverti, ad pectus vasaque majora cogi, ibi plus justo coacervari, impedito libero per pulmones ad cor transitu, regurgitare versus dextrum latus ibique calidi ebullientis sanguinis undulatorium sensum concitare.

§. VII.

Inæqualem circulum facit sanguinis ergasmus. Sunt autem plura, quæ æquabilem illum & liberum sanguinis progressum, in quo maxime integritas functionis in quacunque parte constat, per pulmones turbant, pervertunt & sic ad generationem hujus mali conferunt. Nimirum quandoque nimia tantum & simplex sanguinis intra canales, ob auctum intestinum partium sulphurearum aëreo-ætherearum expansivum mo-

tum, turgescencia, seu ergasmus subest, quo systaltica & elastica in vasis potentia minuitur ac demitur; unde stagnatio & nimia sanguinis ibi fit collectio, accumulatio, tandemque rami arteriæ pulmonalis apertio, vel ruptura.

§. VIII.

Alia deinde ratione per spasticas, tam interna- *Partium nervosarum spasticæ stricturæ.* rum, quam externarum partium stricturas, pariter æquabilis & liber sanguinis per minima motus impeditur, ejusdemque impetuosus cursus & appulsus ad alia loca, maximeque pulmones, inducitur. Unde frequens admodum in praxi est observatio, hypochondriaca passione laborantes, nec non pathematibus hystericis obnoxias fœminas, in quibus ut plurimum mensium fluxus sub multis & atrocibus spasmodis difficulter succedit, incidere in hunc sanguinis è pulmonibus fluxum, non sine periculo.

§. IX.

Haud dispar est ratio & effectus, quando obstructo, vel infarcto viscere sanguineo, præfertim liene, & inde affecto ventriculo, quod ex dolore tensivo in hypochondrio sinistro concludendum, incidit hæmoptysis. Etenim intercepto alicubi sanguinis libero per vasa transitu, vi legum hydraulicarum, impetus ejus sic increfcit, ut, ubi minorem resistantiam invenit, copiose confluat, vasa diducat tandemque perumpat. Tanto vero certius tantoque gravius hoc malum excluditur, quando ipsis in pulmonibus magna consistit labes, ac vel vomicæ, aut tubercula in ipsius substantia, vel polypo- *Viscerum sanguineorum, nec non pulmonis obstructio.* sæ concrectiones in ramis vasorum majoribus hærent, quibus, dum obex ponitur sanguini trans-eunti, is utique quæ datur via ruit, aut ubi subsistere cogitur, perrumpit & hæmorrhagiam facit admodum effusam.

§. X.

Porro de iis, quæ remotius ad inducendam sanguinis è pulmonibus eruptionem faciunt, per ipsam experientiam constat: corpora graciliora, tenerioribus fibris & vasis prædita, quæ collo instructa longo, pectore angusto simulque quandantenus depresso, in quibus pulsus celerius micat, cor etiam subinde palpitat, una cum iis, qui à parentibus phthisicis progeniti, in iram atque impatientiam sunt proclives, ac in juventute fluxum sanguinis per nares frequenter experti, desinente corporis augmento & in longum incremento, intra spatium anni vigesimi quinti ad trigessimum quintum usque, accedentibus aliis causis externis, perquam facile in hunc ancipitem morbum prolabi.

§. XI.

Non minus per observationem medico-practicam in comperto est, ut plurimum & omnium facillime, hoc sanguinis profluvium accidere sanguineis corporibus & juvenilibus, nec non cef- *Sanguinis abundantia cum aliis causis.* sante sanguinis, sive per nares in adolescentibus, sive per menses in fœminis, sive etiam per ani venas in provectionis ætatis hominibus spontanea evacuatione, vel etiam omiſſa artificiali subtractione. Qui effectus tanto certius subsequitur, quando accedit vehementior corporis & animi motus, aut calidiorum in cibis, potusque spirituosius abusus, intensus clamor, tussis vehementior, inflatio diuturna & violenta tubarum, nec non

nimius in facibus vel partu edendo conatus.

§. XII.

Aeris quoque consuetudo.

Autumno præterea, quando tempestas regnat inæqualis maximaque frigoris & teporis est vicissitudo, tum non modo frequentiores esse solent defluxiones catarrhales, sed maxime etiam subinde sanguinis fluxiones immodicæ variæ, atque etiam in dispositis illa, quæ fit per pulmones. Idem accidit, quando hyeme sub intensissimo gelu corporis superficies stringitur & sanguis ad interiora magis compulsus inque pulmonum canalibus accumulatus nimium, facile perrumpit. Unde haud raro accidit, ut hæmoptysis sit anniverfaria, quæ Februario mense, nec non ante æquinoctium erumpere atque redire solet, utque etiam circa hæc tempora idem hic morbus plures attentet & quasi popularis sit.

§. XIII.

Non in omnibus ejusdem periculi.

Ceterum de hoc sanguinis profluvio recte utique scribit *Hippocrates Sect. V. pag. 10. edit. Foesian.* qui sputis cruentis detinentur, ex his quidam brevi tempore pereunt, quidam vero diutius trahunt; præstat enim corpus corpori, ætas ætati, & affectio affectioni, & anni tempestas tempestati in qua ægrotant: quidam enim morbos facile tolerant, quidam vero omnino tolerare nequeunt. Etenim non omnibus idem hic morbus eodem modo observatur esse, aut exitialis, aut transitorius. Iis scilicet, quibus hæmoptysis ob solam abundantiam, aut ebullitionem sanguinis accidit, si recta medicatione & vitæ victusque ratione excipiat, nec periculosa est, nec capitalis. Ego certe vidi cessantibus in gravidis mensibus sanguinis exspuitionem singulis mensibus redeuntem, partu vero excluso & redeunte menstruo fluxu sponte sine periculo emanentem. Vicissim notavi hæmoptysin tempore graviditatis cessantem & enixo foetu utroque vacuo prodeuntem & sine periculo per aliquot annos insistentem. Vidi quoque sanguinis sputum periculi expers in iis, quæ parcius justo tributum solvebant lunare.

§. XIV.

Omnium tamen hæmorrhagiarum ferè periculosissima.

Id vero omnino certum, ex omnibus, quæ præter naturam accidunt hæmorrhagiis, vix ullam esse frequentiore non modo & sæpius redeuntem, sed etiam magis ancipitem & periculosam, quam hæmoptysin. Nam haud facile secundam valetudinem perfecte recuperant hoc malo semel gravius correpti, nisi qui magna cura vitam postea colunt & sanitatis regulas observant, neque etiam tum speratus semper consequitur sanitatis effectus. Pulmo quippe ex visceribus est nobilissimis, qui, dum sanguinem ex uno cordis ventriculo ad alterum transmittit, vitæ servit insigniter, quia vero ea propter, dum vita est, in continua expansione & compressionem versatur, vas in ipso ruptum vel fauciatum sanguiferum difficulter admodum coalescere & consolidari potest. Accedit, quod extravasatus in pulmone sanguis, non facile penitus per bronchia & asperam arteriam evehatur, sed in vesiculosa substantia restitans, putrescat & teste jam *Hippocrate* in pus, ulcus ac denique in hecticam & tabem lethalem transeat. Quare veritati omnino respondet *Tralliani Lib. VII. Cap. I.* testimonium, ita habens: ipsa quidem sanguinis excreatio per se, dummodo non immoderatam vacationem inducit, vitam non adimere consuevit, sed pessimorum mor-

borum longorum magna ex parte causa redditur.

§. XV.

Potissimum majus vel minus est discrimen quod infert hæmoptysis ratione causarum & illorum, in quæ incidit, corporum. Scilicet si senioribus accidit, debilior quantumvis & non tam vehemens quam juvenibus sanguinis evacuatio, major tamen virium sequitur dejectio & facilius putrida pulmonum corruptio, quam excipit hecticus calor, qui corpus & vires tandem cum vita penitus consumit. Gravius quoque ac certius subest periculum, quando diuturnum profundum moerorem insequitur hæc sanguinis evacuatio, quando infirmi ventris viscera una obstructa, atque humores dyscrasia scorbutica acri biliosa simul infecti.

§. XVI.

Demum nec sanationi spes, nec medicinæ locus est, si ipsum pulmonum viscus non amplius est integrum, sed vel vomicis resolutionem eludentibus obsidet, vel vasa polyposas concretiones recondunt, vel etiam varices, vel potius aneurisinata in canalibus præsto sunt, quibus crebra & profusissima sanguinis fit effusio, tandem funesta. Has enim plerumque in hæmoptycis subesse mortis causas, edocet cadaverum sectio, qua patefit, non modo pulmones maxima ex parte ut plurimum esse corruptos à sanguine ibi effuso putrescente & ipsam substantiam membranaceam solidam depascente, sed & hospitari sæpius polyposas concretiones in vasis pulmonalibus, & quidem magis in iis, quæ plus cum sinistro, quam dextro cordis ventriculo communicant; in iis autem, qui rupto sanguineo tumore pereunt, pulmones à sanguine effuso multo spumoso obrutos & nigros inveniri, resitante adhuc exigua in vasis sanguinis quantitate.

CURATIO.

§. I.

Quum, ut dictum, causæ hujus mali admodum differant, diversæ quoque curandi indicationes sint necesse est; præcipuæ tamen illarum redeunt huc: primo, ut sanguinis orgasmus nimius vasa plus justo venosa expandens compescatur; secundo, ut ejusdem affluxus copiosior & impetuosior à pectore ad exteriores corporis partes derivetur; tertio, ut spasticæ illæ stricturæ, quæ sanguinem ad pulmones validius congerunt, laxentur, & sic liberior reddatur per totum corpus sanguinis circulus; quarto, ut læsa pulmonum substantia vasculosa in integrum restituatur, & sic tam mali recursus, quam oriundi ex læsione alii morbi arceantur.

§. II.

Primum ut perficiatur, & sanguinis ebullitio componatur, apprime conducunt refrigerantia. Inter hæc potissimum connumerandus aquæ potus frigidæ, paulatim quidem, sed sufficienter quotidie haustus, tecto probe corpore. Novimus aliquot exempla, solo hoc medio, debita cum cautione & præmissa venæ sectione adhibito, periculosum hunc sanguinis fluxum substituisse. Idque tanto feliciter succedit, si corpus juvenile calore interno æstuat; quem potus frigidus reprimendo madoremque tepidum in peripheria corporis eliciendo, partes simul sub hureas calidas sangui-

Potissimum in senibus scorbutici.

Nec non ubi pulmones magis affe-

Medicæ indicationes.

Sanguinis orgasmus quibus compescendus.

sanguinis exæstuationem inducentes evehit. Non minus præstans pariter ac probatissima est in reprimendo calido sanguinis partium aëreo-ætherearum æstu virtus nitri rite tantum depurati & crystallifati, imprimis si cum aquis refrigerantibus, ut plantaginis, portulacæ, aut etiam sero lactis, convenienti, parca tamen, sed sæpius repetita dosi, assumatur. Spiritum quoque vitrioli, vel etiam ejus phlegma acidulum, præ omnibus aliis mineralibus, imo vegetabilibus acidis, peculiarem ad orgasimum sanguinis compescendum possidere virtutem, experti novimus, tanto certiore, si cum his ceu menstruo ex rosis extrahatur tinctura.

§. III.

Ad obtinendum secundæ indicationis scopum & divertendum sanguinis à pulmonibus nimium impetum, præcipuum certe momentum repositum est in venæ sectione, in brachio, vel etiam in pede instituta. Præstans etiam hoc nomine virtus pediluviorum temperatorum, nec non immisionis manuum in aquam tepidam. Neque minus ad derivandum proficua ea, quæ alvum expurgandi facultate pollent, inter quæ ex internis præcipuum locum inveniunt tamarindinata, passulata, rhabarbarina, & inter externa, clysteres emollientes, stimulo quodam acuat.

§. IV.

Tertium medendi momentum in eo versatur, ut spasticæ stricturæ, præsertim quæ in minimis vasis sanguiferis & partibus nervosis consistunt, relaxentur. Huic egregie satisfaciunt oleosa demulcentia, ut oleum amygdalarum dulcium, vel etiam lini, sine igne recenter paratum, cochlearium assumtum. Spectatæ quoque virtutis emulsiones ex seminibus cucurbitæ, pineis, semine papaveris albi & aquis quas vocant hypnoticas, ut rosarum, papaveris rhœados, nymphææ, liliorum convallium, florum tiliæ, nec non cerasorum nigrorum paratis, quibus nitri & syrupi papaveris albi parum adjiciendum. Vel etiam loco harum aquarum ad emulsiones parandas adhiberi potest decoctum cornu cervi, eboris, nec non dentis hippopotami; quia in his duris animalium partibus singularis quædam spasticis motibus resistendi facultas inest. Si vero adeo rebellis hæc strictura est, ut mitioribus hisce cedere & sanguinis profluvium subsistere nolit, ad paulo valentiora recurrere licet; inter quæ semen hyoscyami albi ad drachmam dimidiam, cum æquali pondere lapidum cancrorum, duodecim nitri granis & uno camphoræ grano mixtum, omnibus aliis, etiam opiatis, palmam præripit. Securioris tamen, ac nihilo minus egregii effectus est mixtura nostra tonica, quæ ex tincturæ antimonii acris, sive tincturæ tartari, liquoris anodynii mineralis ana uncia semis, liquoris nostri bezoardici Bussiani drachmis duabus & olei maccis guttis sex est composita; quippe quæ spasticas non modo stricturas mulcet, sed & diuresin & diaphoresin lenius movendo, sanguinis ad pectus affluxum divertit efficaciter.

§. V.

Quartum in hæmoptyseos curatione est, ut disrupta vasa consolidentur, tenues acres humores affluxum eo proritantes attemperentur & incraissentur ac partis affectæ tonus roboretur. Hoc autem non obtinendum uno eodemque modo ac medio. Quare quæ ego inter plura proficua de-

Frid. Hoffmanni Oper. Tom. II.

prehendi, candide dicam, certus, si cum debito iudicio & congruo tempore adhibeantur, eadem, si medicinæ adhuc locus, non fore frustranea. Est autem ex his primum mixtura, cujus formula hæc: recipe aquæ plantaginis, scorzonæræ, veronicæ, scabiosæ, aceti destillati ana unciam, coralliorum rubrorum præparatorum, specierum de hyacintho ana drachmam dimidiam, syrupi papaveris rhœados drachmas duas, M. Quæ mixtura tribus vicibus assumenda, & si vehementius sanguinis profluvium, addenda adhuc pulveris hæmatitis drachma dimidia. Alterum remedium, quod tam in hæmoptysi simplici, quam etiam in ea, cui complicata est phthisis, conducit, est decoctum, cujus hæc est compositio: Recipe florum bellidis, rosarum rubrarum, chamomillæ vulgaris, summitatum millefolii ana pugillos quatuor, herbæ consolidæ faracenicæ, hederæ terrestres, urticæ mortuæ, veronicæ, faniculæ, pyrolæ ana manipulum, seminis fœniculi, nucistæ ana drachmas duas. Mixta confusa dentur, signentur species, davon 3. Loth in 2. maas Bier zu kochen. Tertium quod mihi probati usus fuit auxilium, sunt pilulæ ex massæ pilularum de cynoglossa drachma dimidia & massæ pilularum balsamicarum Becheri drachmis duabus concinnatæ, ad scrupulum unum circa lecti introitum sumendæ. Quartum & ultimum quod in hoc gravi morbo commendem habeo pulverem hunc: Recipe lapidum cancrorum, antimonii diaphoretici, cornu cervi sine igne, dentis hippopotami, lapidis manati ana drachmam, nitri depurati drachmam unam cum dimidia, misce fiat pulvis, optime sic usurpandus, ut scrupulus unus ipsius viginti guttis liquoris nostri mineralis anodynii imbuatur & cum aqua antispasmodica propinetur.

CAUTELÆ ET OBSERVATIONES CLINICÆ.

§. I.

IN gravi illa & vera hæmoptysi, qua, ob ruptum majorem arteriæ pulmonalis ramum, magna sanguinis copia per brevissima intervalla erumpit, caveat medicus, ne promissis de restituenda sanitate sit dives, nisi fluxus sanguinis intra triduum convenientibus remediis compescatur. Interim tamen minime vicissim laborantem gravi metu mortis ita percellat, ut indicto magno periculo, omnibus viribus, ut sæpe vidi, eum privet & mortem acceleret.

Prognosis sit cauta in gravi hæmoptysi.

§. II.

Si sanguinis abundantia urget, & manifesta adest vaforum plenitudo, statim inter initia instituenda est, sive in manu, sive etiam in pede, sanguinis missio, & quidem largior, ad octo, vel plures uncias, ex amplo foramine; quo sanguinis impetus eo efficacius à loco affecto divertatur, & rupti ac sauciati canales eo melius iterum coire & coalescere possint.

Si plethora adest sanguis mittendus.

§. III.

Illa quoque anniversaria hæmoptysis, nec non quæ ex hæmorrhoidali fluxu emanante proficiscitur, inferre solet circa tempus annui recursus rheumaticos in pectore dolores, junctos cum sanguinis sputo. Habetur hinc à minus peritis morbus haud raro pro pleuritico; sed secta in pede vena, & provocato sic hæmorrhoidum fluxu, non modo

Nec non si hæmorrhoides emanant.

sanguinis exspuitio, sed & reliqua pathemata simul & semel solent conquiescere.

§. IV.

*Si ab acri
defluxione
fit, demul-
centia dan-
da.*

Ubi ab acri catarrhali defluxione excitatur cum titillatione in faucium profundo tussis acerrima, qua simul per vices floridus & spumofus sanguis cum muco excreatur, apparentibus nullis plethoræ signis manifestis, emulsio tantum amygdalarum dulcium seminisque papaveris albi pro potu operam locat præstabilem; ac præterea pilulis nostris balsamicis aliquot grana massæ pilularum de styrace aut de cynoglossa admiscere expedit. Neutiquam vero in usum vocanda consolidantia & adstringentia, quia minima tantum vascula arteriæ bronchialis non vero pulmonalis, sunt fauciatæ.

§. V.

*In rebelli
ligaturis
utendum.*

Quando effusior sanguinis fluxus præsens minatur periculum atque interna auxilia non sufficiunt, confugiendum utique est ad remedium à veteribus frequentius usurpatum, nempe ligaturam artuum. Hac enim sanguis in extremis tantisper retentus, non tam cito ad cor & ex hoc ad pulmones redit, atque adeo imminuto ad pulmones sic fluxu, rupti ramuli non ita sanguine implentur, sed concidunt faciliusque coeunt. Ne tamen ex stasi sanguinis partibus ligatis inferatur periculum, hæc adhibenda est cautio, ut sedata hæmorrhagia, ligaturæ non omnes simul, sed successive una post alteram solvantur.

§. VI.

*Si ex hy-
pochondri-
orum
vitio tem-
peramento-
rum ha-
benda ra-
tio.*

Quum hæmoptysis sæpissime ex primarum viarum & hypochondriorum vitio, intestinis flatibus ac spasmis distentis accidat, maxime in adolescentia & juvenili ætate, ob sedentariam nimis vitam, studiorum intemperantiam, vel etiam affectuum impetum; ad hanc utique causam dirigenda etiam est in curatione meditatio, ita tamen, ut exquisita temperamentorum servetur distinctio. Quodsi enim juvenes sunt cholericæ constitutionis, exquisitoris sensus, ad iram proni, palpitatione cordis subinde afficiuntur, & pulsus exhibent magnum, tum abstinendum est ab omnibus alias egregiis carminativis, stomachicis, salibus volatilibus oleosis, nec non purgantibus acrioribus, ac potius pulveres temperantes nitrosi, ad alvum laxandam mannata, passulata, tamarindinata & ad corrigendam sanguinis intemperiem diluentia, serum lactis caprilli, decocta hordeacea, avenacea & id genus plura, cum fructu adhibentur. Contra ea, ubi peccant humores viscosi, ubi infarctus viscerum, intemperies frigida & humida, & habitus corporis spongiosus, tunc pilulæ balsamicæ polychrestæ, nec non spiritus salis ammoniaci, vel volatilis oleosus Sylvii, cum tinctura tartari mixtus, item essentiaë temperatioris carminativæ, tincturis martialibus mixtæ, utiliter exhibentur.

§. VII.

*Adstrin-
gentia no-
cent vali-
da.*

Sicuti remedia quæ validiori adstringendi facultate pollent, nunquam ullo in morbo, ita nec in hæmorrhagiis securam operam præstant; omnium vero minime in hæmoptysi, præsertim illa quasi critica, nec non ab initio & in paroxysmo ex usu sunt. Etenim, licet fluxum ad tempus sistant, relinquunt tamen in pulmonalibus vesiculis sanguinis grumulos, qui in corruptionem abeuntes, inflammationem, putredinem, phthisin

& hæcticam expedito & facili modo inferre possunt. Interim tamen, neutiquam ex toto repudianda sunt leniora adstringentia & roborantia, opportuna extra paroxysmum & in fine fluxus, ad tollendas reliquias & præsciendam recidivam. Inter hæc laudem merentur eximiam solutio coralliorum cum succo citri vel aurantiorum facta & in syrapi formam redacta, confectio de hyacintho, conserva rosarum rubrarum cum terra sigillata, aut hæmatitis pulvere mixta. Chinæ corticem mirifice commendat *Morton in phthisiologia*, in electuarium cum syrupo rosarum redigendum, cui extractum cascarillæ aquosum, succinum & pulvis nucistæ commode adjiciuntur. Hæc enim, dum partibus motricibus à robore defectis debitum tonum blande reddunt, ut sanguis per totum corpus promptius & expeditius cum omnibus succis circumeat simulque cuticularis excretio liberius succedat, faciunt & sic utilitatem præstant. Nec minus eximia est efficacia infusorum theiformium, item decocti roborantis pro potu ordinario. Infusa quidem optime ex vegetabilibus supra memoratis traumaticis, cum herba polygoni, millefolii summitatibus & fœniculi semine concinnari & quotidie forbillari possunt. Decoctum vero ex radice sarsaparillæ, chinæ, rasura ligni santali rubri, citrini quoque, ligni lentisci, vel loco hujus mastiches, una cum passulis possunt confici.

§. VIII.

Lactis & lacticiniorum usus omnino præstans est in hoc morbo. Novi, solo lacte caprillo cum floribus papaveris rhœados cocto, admixta dimidia aquæ parte & adjecta portione mellis, quotidie largius assumto, immodicam etiam ex pulmonibus sanguinis profusionem optime conquiescisse primum, ac postea usurpatis simul multo inter cibos confectis ex amylo, ex toto fuisse sanatam. Id tamen de usu lacticiniorum omni tenendum: ut non modo ventriculi, an ea ferre possit, habeatur ratio, sed & ne simul & semel, sed parcis & repetitis vicibus, ingerantur.

§. IX.

Si seniores hunc morbum incurrunt, haud leve ipsis imminet periculum, licet sanguis non adeo largiter profundatur. Penitus vero in his abstinendum est tam à fortiter adstringentibus ad sistendam hæmoptysin, quam ab opiatis ad procurandum somnum, ne vires magis deiciantur & corruptio, in quam senilia corpora ipsorumque sanguis pronus, præcaveatur.

§. X.

Caveant sibi hæmoptyci omnes, præsertim ubi profusio gravior est & copiosior, ab aquarum mineralium, thermalium & acidularum usu, maxime omnium illarum, quæ sale quodam copioso acri & principio calcareo alcalino imbutæ sunt, Carolinis, Pymontanis, Egranis, Sedlicensibus. Ubi enim partis aut visceris cujusdam interni substantia læsa est aut corrupta, labem hæ aquæ augment & exacerbant, adeoque nunquam profunt. Vicissim acidulæ temperatioris, ut Selteranæ, quæ purum sal alcali recondunt, præsertim si cum lacte asinino vel caprillo miscentur, usus sunt saluberrimi, eo quod sanguinis & humorum salsam & acrem dyscrasiam contemperant non modo, sed & obstructions & infarctus pulmonum referant, simulque acres particulas per urinarias vias, ne denuo noceant, evehunt.

Est

*Sed temp-
ratoria
non repu-
dianda.*

*De lacti-
cinis cau-
te.*

*In senibus
tenenda.*

*Minerales
aque quæ
noceant,
quæ pro-
funt.*

Est autem sic institutus acidularum potus tunc quam maxime utilis, quando à scorbutica & icterica sanguinis & humorum intemperie malum hoc & inducitur & fovetur.

§. XI.

In vite
victusque
regimine
tenenda.

Ultimo loco addendum eximium *Celsi Libr. 10. Cap. 4.* consilium, de iis, quæ servanda in vita victuque ab hæmoptycis, dum monet: ipsis utilem esse quietem, securitatem, silentium; ut caput sublimè cubet, & facies sæpius aqua frigida foveatur: inimica autem ipsis esse, vinum, balneum, venerem, acriora omnia, item calida fomenta, conclavia calida & conclusa, multa vestimenta corpori injecta, etiam frictiones, nisi ubi sanguis bene conquieverit. *Hippocrates* autem *Libr. de internis affectionibus* commendat hæmoptysi affectis aquæ potum, item lac bubulum tertia parte aquæ mulsæ remixtum & copiosius assumptum, item lac caprillum, coctum cum semine lini & semine sesami; porro farinam cum lacte coctam. Quæ omnia proficua esse, experientia & ratio testatur, eo quod tali diætâ humores tenues incrassantur, acres mulcentur & læsarum partium conglutinatio promovetur.

ENARRATIONES MORBORUM.

OBSERVATIO I.

De hæmo-
ptysi men-
strua in-
autumni.

Percussa fuerat nobilis foemina, triginta annorum, ipso illo quo menses fluebant tempore, terrore ingenti, quo illico substitit sanguis, & inducta pectoris gravitas, præcordiorum anxietas & cordis palpitatio impensa. Recurrente dein menstrua periodo, rediit quidem sanguinis stiliticidium, sed admodum parcum, præcedente prefforio & tensorio dorsi ac hypochondriorum dolore, pectoris angustia & gravativo in præcordiis sensu. Accessit vero etiam sanguinis è pectore per tussim ejectio, post quatrimum sponte iterum cessans. Quin quotiescunque postea utero purgata, toties, per quinque vel sex dies, sanguinis plus vel minus è pulmonibus ejecit, idque per novem annos continuos; ita tamen, ut quum imprægnatione facta menses retinerentur, hæmoptysis etiam quiesceret, post partum autem mox rediret, atque etiam sub ipsa lactatione sueta periodo succederet. Interim nihil inde detrimenti redundavit in sanitatem, neque quicquam incommodi sensit foemina, frustra tamen ad compescendam hanc pulmonum hæmorrhagiam variorum medicorum conquirit & consilia, & auxilia.

Epicrisis.

Singulare hoc est hæmoptyseos menstruæ, diurnæ quidem, sed periculi expertis exemplum, quo aperte confutatur falsa non nullorum opinio, qua hæmoptysin omnem phthisin habere, aut comitem, aut pedissequam putant. Duxit autem originem ex sanguinis ab utero ad pectus, propter terroris vehementiam, facta regurgitatione, qua vasa pulmonalia diducta tandem aperta sanguinem eructarunt, sed remittente sanguinis ad interiora mensium tempore solenni restrictione & evacuato superfluo, liberior iterum factus progressus, vasa occlusa & sic sponte cessavit hæmoptysis ac damni intulit nihil. Interim per quas semel iterumque sanguis elatus est vias, ex facili postea relegit, & accedit quasi quædam naturæ consuetudo, certa scilicet solida-

rum partium dispositio, qua appulso validius sanguini, prompte viam concedunt ac diverticulum, ægre postea, ac nisi statim in principio, medicamentis iterum tollenda.

OBSERVATIO II.

Juvenis viginti annorum, corpore tener, animo ad iracundiam admodum proclivis, per aliquot jam annos circa veris & autumnii ingressum tussi ex pulmonibus ejecerat sanguinem; novissime autem accidit, ut circa idem tempus iracandesceret vehementius, eoque hæmoptysin incurreret largissimam, certis quotidie periodis accedentem, hora scilicet matutina quarta & vespertina nona. Eruptionem semper ingens præcordiorum anxietas, frigoris notabilis in pedibus ac prefforius & tensorius in hypochondrio sinistro sensus præcesserunt; postea successit screatus sanguinis, qui per quatuordecim dies persistit & octo minimum libras sanguinis eexit, non sine magna virium jactura. Medicus in consilium vocatus, neglecta sanguinis missione, decocta adstringentia, incrassantia & pectoralia, ipsum quoque hæmatitis pulverem obtulit, sed frustra prorsus, ac potius sanguinis evacuatio statas suas semper servavit periodos. Advocatus & ego in auxilium quaternis singulis horis propinavi salis volatilis oleosi genuini XX. guttas ex aqua cerasorum nigrorum; circa somni tempus pulveris antispasmodici, ex dente hippopotami, unicornu vero, lapidibus cancrorum, ungula alcis, nitro, diaphoretico antimonio, pulvere lumbricorum terrestrium & cinnabari, dosim, cum tantillo massæ pilularum de cynoglossa, sumere jussi; alvum liberam servare emollientibus clysteribus nitro largius conditis, ac pedes non modo aquæ tepidæ subinde immittere, sed & calidis integumentis à frigoris accessu solcite defendere, suasi. Quibus, fortunante DEO, curationem ex voto confeci.

Epicrisis.

Periodica fuit hæc hæmoptysis tam ratione recursus vernalis & autumnalis, quam etiam eruptionis ipsius mane & vesperi factæ, simulatque testimonio est, quantum valeat iracundiæ affectus ad provocanda sanguinis profluvia. Quia autem periodos servantes morbi fomitem ut plurimum habent sordium in prima corporis regione colluviem, in promptu est judicare, vulgaria illa pectoralia, incrassantia, adstringentia, efficere potuisse nihil, ac præter leniora evacuantia, recte in usum vocata fuisse ea, quæ spasticas stricturas, in consuetudinem & habitum quasi transeuntes, laxarunt, antispasmodica scilicet, maximeque illam cum cynoglossa confectam pilularum massam. Sed minus obvium erit non nullis id, quod sal volatile oleosum, cujus vis sanguinem exæstuans & humores commovens alias passim decantata, usurpatum cum fructu. Verum candide profiteamur ac confidenter, nos ipso hoc remedio sæpe sæpius sustulisse cito ac secure nimia sanguinis profluvia, per quæcunque loca facta. Id tamen monendum, neutiquam exhibendum esse efficax hoc auxilium, in, aut mox ante paroxysmum, sed cessante ac remittente fluxu. Etenim quia impeniores spasmos, eruptionis auctores, excipere solet debilitas & relaxatio, ad stagnationem novam adeoque inducendum denuo spasmus postea ansam præbens, hæc utique non melius potest præscindi, quam robo-

De hæmo-
ptysi vere
& autum-
no periodi-
ca.

rando partes atonia affectas, quod per ejusmodi volatilia oleosa perficitur commodissime.

OBSERVATIO III.

De hæmo-
pysæ alvi
fluxu so-
luta.

Theologus, vigesimum quintum ætatis annum egressus, succis & sanguine plenus, incidit, postquam è suggestu verba fecisset voce intentâ, in hæmoptysin largam, qua tantum sanguinis evacuatum, quantum replendæ pelvi integræ sufficiebat. Hinc debilitatus admodum à medicinæ studioso petit consilium, qui tincturam sulphuris vitrioli cum laudano opiato mixtam proponat, eo cum effectu, ut æger post aliquot dies suffocationem cum maxima præcordiorum anxietate incurreret. Ad hanc itaque levandam sanguis subtractus & mixtura data discutiens ex aqua chærefolii, scabiosæ, florum sambuci, destillato aceto, lapidibus cancrorum cum nitro & diascordio Fracastorii. Quibus quidem urgens malum discussum, sed interpositis aliquot diebus rediit sanguinis screatus non mediocri copia, cujus accessum aliquoties postea factum, æger ex horripilatione & refrigeratione partium externarum, faciei pallore & sensu è dextro pectoris latere calidi sanguinis adscendentis, prænunciavit. Licet autem huic malo complura præstantissima opponerentur auxilia, & æger etiam aliquod inde acciperet levamen, penitus tamen subsistere noluit sanguis, sed subinde aliquot sanguinis floridi cochlearia eruperunt. Interim accidit, ut æger cibum caperet flatulentum ex pomis terræ, radices cyclaminis vulgaris, vulgo *Erd-aeppfeln*, & stomacho admodum debili existente, inde tormentis in ventre atrocibus afficeretur, quibus in copiosum alvi fluxum solutis, id commodi tulit, ut sanguinis è pulmonibus fluxus prorsus ex eo subsisteret, nec unquam postea rediret, inprimis quum decoctis vulnerariis, admixtis balsamicis temperatis, novum accessum declinare satageret. Inter cibos commendavi pultem crebrius assumendam ex farina farris *Rocken-mehl*, aqua & butyro.

Epicrisis.

Caute mercandum esse cum stipticis adstringentibus, cujus generis est tinctura sulphuris vitrioli, antiphthifica Gramanni, in hoc sanguinis profluvio maximeque ejusdem principio, uberius confirmat hæc historia, nisi suffocationem, vel etiam ipsam phthisin arcessere velimus. Patet quoque, tormina & cruciatus imi ventris cum alvi copiosis dejectionibus, sanguinis à partibus superioribus ad inferiores impetum derivasse, & sic mali pertinaciam expugnasse. Quo egregie confirmatur insignis eorum utilitas, quæ alvum subducunt & biliosum serum educunt in rebellibus ejusmodi pectoris morbis. Simul vero innotescit, per accidens quandoque salubritatem per se nociva afferre, uti in nostro cibus incongruus flatulentus, tormina impensa suscitans. Cæterum hac observatione docemur, decocta ex herbis vulnerariis, quæ temperata amaritie & adstrictione nimis relaxata vasa firmant & roborant, ad perfectam hujus mali sanationem, ut non amplius redeat, modo viscera adhuc sint integra, utilissimam exhibere efficaciam.

OBSERVATIO IV.

Hæmopty-
sis sæpe re-
virescens

Theologiæ studio addictus juvenis, temperamento melancholicus, corpore procerus & ma-

cilentus, primis quidem ætatis annis sanus fuerat ^{lenissimè curata.} ac vegetus, sed ante sex annos in schola desudans, repente correptus est totius corporis refrigeratione, maxime pedum manuumque, cum virium languore, inappetentia, & nauseabundo anxio circa præcordia sensu, quem nostri vocant *Uebel-seyn*, nec non pectoris angustia ac stimulo adtussim. Nocte insequenti præter opinionem sanguinem exspuit sincerum, idque postea successit per biduum & priora pathemata infestarunt per hebdomades sex, donec Medici ope iterum convalesceret, & per sexennium ab hæmoptyseos recursum degeret liber. Sed quum in Academiam concedens erudiendis liberis operam suam addiceret sæpiusque ob id animo commoveretur, accidit, ut idem morbus, iisdem quam antea symptomatibus rediret, extremorum frigore, præcordiorum anxietate, spiratione difficili, virium & appetitus dejectione somnique defectu. Dato tum pulvere antispasmodico, morbus paulisper inducias dare visus est, sed remansit languor, ac cum ad pristinum docendi munus rediret æger, rediit & morbus, ita ut per quinque hebdomades quotidie successive sex vel septem sanguinis floridi cochlearia, ac intermedio tempore viscidam pituitam pure remixtam, screatu redderet. Adhibita igitur venæ sectio in pede, dati pulveres antispasmodici, quin dulcis essentia & solaris pulvis, verum frustra, morbus potius persistit idem, pulsus præterea fuit inæqualis, celer ac debilis, extrema frigida & tanta virium prostratio, ut vix loqui & corpus loco movere valeret, macilentus simul ob appetitus defectum redditus. Sic rebus fere conclamatis me accessit & meum auxilium imploravit, ego vero renui primum medicationem, parentis tamen precibus demum inductus bina ipsi suasi auxilia, quorum solo frequenti per octo hebdomades continuato usu divina gratia convaluit, ac non modo ab hæmoptysi & omnibus symptomatibus liberatus est, sed & somnum, appetentiam, vires & carnem recepit. Scilicet præter potum ordinarium ex decocto avenaceo cum semine fœniculi, suasi, ut quotidie minimum mensuram decocti temperantis, mane cum tertia parte lactis caprilli & vespere sine lacte tepide biberet, quod conficiendum ex rasuræ cornu cervi uncias tribus, radices scorzonæræ uncias duabus, herbæ veronicæ manipulo, summitatum millefolii, florum papaveris rhœados tantundem, cornu cervi usti uncia, coquendo binas harum specierum uncias in tribus aquæ libris. Circa somni autem tempus drachmam sumere jussi ex aqua ceraforum nigrorum hujus pulveris: recipe lapidum cancrorum unciam, coralliorum rubrorum præparatorum, matris perlarum, nitri depurati, cascarillæ, singulorum drachmas duas, olei de cedro, nucistæ destillati ana guttas sex. M. f. pulvis D.

Epicrisis.

Ex hac morbi historia id utique notandum, hoc sanguineæ excretionis genus, quod per pulmones fit, si primis annis infestat & conquiescit dein per aliquot annos, postea ex facili, nimio corporis, vel animi motu, maximeque vociferatione & intensione sermonis excitari posse. In ejusmodi autem debilibus & ad spasticas turbulencias solidorum ac fluidorum motiones pronis corporibus, plus utique valent simplicia ac temperata domestica quasi auxilia continuato usu, quam validiora chymica, concisa dosi danda, ipsa etiam phar-

pharmaceutica artificiosa & sic dicta pectoralia. Illa enim agunt mitissime, nec adeo moleste afficiunt sensiles nerveas partes, simul blande acrimoniam diluendo temperant, humores crassos attenuant, nutriunt & sic infirmo corpori præstant robur. Et quoniam non frigida, sed calida sumuntur decocta hæc domestica, id præterea ferunt utilitatis, ut sanguinis motum ab interioribus ad exteriora ipsumque cutis emunctorium dirigant. Pulvis autem ille absorbens nitrosus temperat acidam & biliosam acrimoniam, quæ in prima corporis regione hospitans, occasionalem materialem plerumque causam præbet, stimulando & irritando nervosas corporis partes, irregulari sanguinis motui inducendo.

OBSERVATIO V.

Generosa virgo triginta sex annorum, sanguineæ complexionis & animi in hilaritatem proni, per quatuordecim & ultra annos inordinatam in aula, ratione victus, somni & animi motuum agens vitam, incidit sæpius in anomalum mensium successum, dum illorum fluxus quandoque nimius, quandoque parvus, quandoque plane deficiens erat. Inde male sæpius habuit in ventriculi regione, ac de anxio pressorio dolore, nausea, vomitione, virium collapsu *oder Ubel seyn*, conquerens, potu aquarum spirituosarum, usu elixiriorum stomachicorum, neque minus frequenti esu pomorum citreorum, per integros fere quatuor annos hisce symptomatibus succurrere laboravit, sed penitus incassum. Accedente demum gravi diuturno tristitiæ affectu viribus orbata, ante anni dimidium in epilepticum incidit insultum, qui idoneis remediis usurpatis quidem emanfit, inflationes tamen circa præcordia, cum sensu anxietatis, eructationibus, conatu ad vomitum, alvi strictura persisterunt. Postea per quatuor fere mensium spatium ex toto menses substiterunt, neque ter celebrata venæ sectione in pede, neque moderate sumtis balsamicis & emmenagogis revocari potuerunt. Inde factum est, ut denuo ex fratris subita morte superveniente tristitia, non ita multo post in gravem sanguinis per pulmonem rejectionem incideret, adeo, ut aliquot libræ intra triduum floridi & spumosi sanguinis cum tussi & screatu ejicerentur. Sanguis ter in pede missus quidem, sed ex improvise succcessit paroxysmus epilepticus tam gravis & continuus, ut omni sensuum & rationis usu extincto, vitam tolleretur.

Epicrisis.

Gravis & lethalis hæc hæmoptysis non ut morbus principalis, sed ut symptomaticus considerari debet, qualis, si cachecticis, spleneticis supervenit, ut plurimum funesta est. Ego bis in simili casu, facta dissectione corporis, lienem magnum corrupto sanguine turgidum inveni, vasque brevia ventriculi atro sanguine valde distenta, ipsumque ventriculum nimis expansum. Neque dubium est, quin in nostra sedes insultuum epilepticorum, etiam hæmoptyses, in vitiato & corrupto liene ac ventriculi ob summam atoniam inflatione constituta fuerit; siquidem intercepto libero sanguinis per vasculosum lienis viscus transitu, per consensum vasorum non modo ventriculus patitur, sed & facile regurgitat sanguis ad ramos superiores magnæ arteriæ & versus cordis sinistram sinum, unde obice hoc posito, sanguinis impetus per arteriam pulmonalem in ipsam substantiam

pulmonum vesicularem increfcit, vasa minima à sanguine nimium dilatantur, tandem rupta excretionem sanguinis per bronchia & asperam arteriam efficiunt. Ad hujus mali nec non epileptici generationem, utique nimius usus acetosiratis citri & aquarum spirituosarum, ingens quoque tristitia mensiumque defectus plurimum valuerunt. Præterea nobis documentum hæc historia morbi præbet, quod sanguinis missio crebrius instituta, neque ad menses in ordinem redigendos, neque ad hæmoptysin sistendam per se efficax & promptum satis sit remedium, item, quod spasticæ stricturæ ventriculi, præsertim si lien obstructus fuerit, gravia mala, ut hæmoptysin, epilepsiam, facillime causari possint. Epilepsia vero superveniens hæmoptysi, effato *Hippocratis* lethalis est, præsertim quando per venæ sectionem multum sanguinis simul amissum fuit.

OBSERVATIO VI.

Prædictæ generosæ virginis frater ante sex menses eodem morbo eodemque fere modo occubuit. Is ante duodecim annos à lapsu equi in terram in sputum incidit sanguineum, quod tamen sanatum. Jam erat ætatis XXX. & aliquot annorum, staturæ macilentæ, tristioris animi, faciei pallidæ; & conquerebatur sæpius de anxietatibus & pressionibus præcordiorum sub costis spuris, præsertim sinistri lateris, cum ardore ventriculi impensio. Passionum harum originem rejecit in potum frigidum forsan calenti, post venationem, cui deditus erat, corpori ingestum. Accedente postea conjugio & insigni animi tristis affectione valde est debilitatus, in festivitate vero quadam aulæ solenni, præter morem & consuetudinem corpus vehementer saltatione exercuit, quo factum est, ut elapsis circiter XIV. diebus, anxietatem & restrictivum senserit circa præcordia dolorem, cum vomendi conatu, postea ex improvise sequuta vehemens admodum sanguinis per pulmones ejectio cum suffocationis metu, sequutæ simul brevi convulsiones epilepticæ satis fortes, quæ intra biduum vitam abstulerunt.

Epicrisis.

Viscera abdominis sanguinea, ut hepar, lien, si insolitæ magnitudinis sunt sanguine & humore infarcta & obstructa, dum æquabilem sanguinis circulum, obice quasi posito, impediunt, ad immodicas & subinde exitiales sanguinis tam per vomitum & secessum, quam per vasculosam pulmonis substantiam profusiones, disponunt. Quia vero tanto impetu & copia erupit à pulmonibus sanguis, nullum dubium est, quin ipso in pulmone jam vitiosa quædam adfuerit dispositio, quæ & *Hippocratis* & nostra sententia in eo consistit, quod rami arteriæ pulmonalis, dispersi per vesicularem & celluloseam substantiam, nimium distenti in tenera aneurismata diducantur, quæ tandem rupta tantam sanguinis copiam fundunt, ut hærens in trachæa metum injiciat suffocationis. Venam vero secare in tali paroxysmo, subtrahendo plus sanguinis adhuc magis nocet, quam prodest, & ad movendam magis epilepticam convulsionem, quam ad eam minuendam, confert.

OBSERVATIO VII.

Theologiæ Studiosus, vigesimum quartum ætatis annum agens, Pomeranus robustus, brenio abhinc febre correptus est autumnali, tum epidemica, post quam insequentis anni mense Fe-

Hæmoptysis copiosa cum convulsionibus lethalis.

Hæmoptysis post febrem sæpe repetens.

bruatio, sub ascensu scalarum calidam ebullitionem & fluctuationem in sinistro thoracis latere sub mammilla persensit, quam excepit tussis cum spirandi angustia ac demum sanguinis screatu evacuatio, intra duas horas, ad uncias aliquot. Quam ut compesceret, ingessit largam pulveris antispasmodici dosin, ad unam & dimidiam circiter drachmam, eo cum effectu, ut sanguis subsisteret & ipse per annum valetudine sic satis commoda frui videretur. Sed anni subsequenteris vere rediit sanguinis screatus, ac primo cruor pituita remixtus, dein noctu sanguis sincerus ad duas libras tussi exturbatus est. Aperta vena, hæmoptysis paulisper siluit, mox autem recruduit, ac per quinque dies, duodecies intra diem & noctem accedens, duravit, tandem tamen usu pulverum nitroforum cohibita, per tres hebdomades dedit inducias. Quibus exactis XIII. Januarii die noctu rediit, & ex eo ad sextum usque Maii diem, singulis veneris diebus, periodicum quasi servavit accessum. Ingesta interea pulverum tantum non moles hæmoptysin cohibuit, sed successit mane ingens sputi viscidum flavescens rejectio. Initante vero autumnno iterum apparuit in sputo sanguis, ac misso fere ad libram in pede sanguine datisque nitrosis pulveribus, rursus disparuit. Januario sequentis anni rediit hæmoptysis, eodem modo sedata, Martio repetiit, iisdemque remediis iterum est depulsa, copiosa autem sputi viscidum rejectio mansit, ac præterea in hypochondrio sinistro sub spuriis è regione ventriculi costis, intolerabiles successerunt dolores pungrivi & spastici, qui in hunc usque diem affligunt. Id vero memorandum, sanguinis exspuitionem semper præcessisse cutis horripilationem, manuumque refrigerationem, cum pungitivo in latere sinistro sensu, phlogosi caput & faciem occupante, nec non ructibus. Ut igitur tam screatum matutinum tolleretur, quam etiam mali recursum anteverteret, accessit æger ad me. Et quum vires non adeo exhaustæ, appetitus etiam adhuc constaret, sub spe successus felicitis suasi usum elixirii balsamici temperati, item mixturam ex liquore anodyno minerali, tinctura tartari & spiritu bezoardico Buffii constantem, laxantia ex rhabarbaro, terra foliata tartari & nitro, loco potus decoctum ex cornu cervi raspatum, radice scorzonæræ, chinæ, semine foeniculi ac passulis, nec non infusum theiforme, ex scolopendrio, melissa, polygono, veronica, scordio, millefolio, salvia, cum radice glycyrrhizæ & semine foeniculi.

Epicrisis.

Cruenta hæc tussis orta fuit post febrem intermittentem, quæ non modo diuturna, sed & forsitan non adeo dextre percurata, vitium reliquit in lienis, aut hepatis viscere. Id quod haud obscure arguit paroxysmi accessus, quem semper cum lateris sinistri dolore & exin propagata quasi fluctuatione & calida ebullitione in pectus cum phlogosi factum esse, æger asseveravit. Fere semper autem spastica tam exteriorum, quam internarum partium constrictio hæmoptysin præcedit, qua impedito sanguinis ad externa & libero progressu, ipse in interioribus & majoribus vasis uberiori copia colligitur, accumulatur atque congeritur, unde vasa nimium distenduntur tandemque dehiscunt ac sanguinem effundunt. Quoad medicationem dein tenendum, medicamenta ex nitro & absorbentibus, item venæ sectionem egregio utique esse præsidio, ad derivandum ac intercipiendum impetuosum sanguinis ad pectus

affluxum, ad cohibendam hæmorrhagiam atque etiam præscindendum novum insultum. Interim minime morbo tollendo penitus sufficit iis tantum instituta curatio, sed temporarium modo præstat levamen ac ceu cura palliativa consideranda. Etenim sanguinis missio in talo instituta liberalius, minuit omnino plethoram & sanguinis impetum à pectore ad inferiora revellit, sed si jam obstructio in vase aut viscere, haud raro fit, ut elanguescente inde pulsu, expediri nequeat is qui impactus hæret sanguis, & effectus sic subsequatur pravus. Nitrosa utilissima, quia intestinum nimium particularum sulphurearum organicum motum componunt, & relaxando ac mulcendo strictas nerveas partes, spasmi occurrunt. Ast non sufficit refrænasse impetum & excretionem, sed eo potissimum medicatio dirigenda, ut tollatur fundamentum mali, obstructa viscera, hepar maxime & lien, expediantur, dolores hypochondriorum depulsentur atque etiam postea relaxati nimium pori ac distenta vasorum orificia in pulmonibus ad naturalem habitudinem reducantur & roborentur, ne ibi fiant stagnationes, quibus tam copiosus screatus, quam etiam effluxus sanguinolenti recursus, merito tribuendus. Hunc igitur in scopum data à me remedia memorata, quibus à prioribus medicis omissis, spes jam haud vana est melioris effectus. Novi quoque in curato sic hæmoptico morbo ad arcendum phthisicum malum, egregie profuisse lacum Selteranis acidulis, vel etiam aqua calcis remixtum, & perite dextreque usurpatum.

OBSERVATIO VIII.

Plethoricus vir quadragenarius, corpore spongiosus, ingenio fecundo & amœno, laute vivens, omissa primum sanguinis missione, vernali semper & autumnali tempore expertus est hæmorrhoidalis fluxus indicia ac cum sæcibus quippiam sanguinis excrevit. Hinc ad minuendam plethoram vere & autumnno venam incidi passus est cum euphoria, sed quum æquinoctio vernali omisisset forte suetam sanguinis missionem, post vehementiorem corporis motum & liberaliorem vini Rhenani potum, incurrit hæmoptysin & cum tussi aliquoties sanguinem spumofum & floridum rejecit. Admisit igitur sanguinis è tali vena subtractionem largam, ac pulverem præcipitantem nitrosum cum liquore anodyno minerali sumsit, quibus sanguinis exspuitio constitit ac infuso dein veronicæ, melissæ, pulmonariæ, faniculæ, cum semine foeniculi & lacte ita convaleuit, ut nec amplius hæmoptysis redierit, neque etiam quicquam incommodi reliquerit.

Epicrisis.

Simplex recte dicenda hæc hæmoptysis. Quæ enim sic ex sola sanguinis plenitudine & suppressa solenni ejusdem, vel spontanea per menses & hæmorrhoides, vel artificiali ex incisa vena, evacuatione, sine labe visceris cujusdam, sine cacochymica etiam humorum dispositione, oboritur, palindrome quasi ad pulmones facta, periculo vacat, si cito succurritur. Sed tunc maxime juvat venæ sectio, quæ sanguinem copiosum non modo demit, sed & à parte affecta efficaciter revellit impetum. Juvant vero etiam ea remedia, quæ orgasmum sanguinis contemperant, nitrosa, lactis serum, nec non aquæ frigidæ perite admixtus potus, cum iis, quæ stagnantem in pectore sanguinem resolvunt ac ne putrescat ibi

Hæmoptysis simplex.

ibi efficiunt; quibus demum subjungenda pectoralia & remissum pulmonum tonum firmantia. Hac methodo ego complures plethoricos, maxime juvenes, ex corporis exaestuatione hæmoptysi affectos, facili & explicita curatione ad sanitatem reduxi. Sed si differtur medicatio, neque adhibentur remedia sanguinem in pulmones effusum dissolventia, & disrupta vasa consolidantia, purulenta gignitur materia ipsaque phthisis.

OBSERVATIO IX.

Hæmoptysis ex labe viscerum funesta.

Vir literatissimus, quinquagenario major, cuius fata ob merita illustria adhuc luget nostra hæc academia, nunquam antea hæmoptycus aut phthisicus, vitæ maxime sedentariæ addictus, quum studiis intemperantius aliquamdiu invigilasset ac præterea animo sæpe multumque ira ac sollicitudine fuisset commotus, neglecta sanguinis per venam subtractione, corpus exagitavit valide & æstuans adhuc frigidum ingessit haustum liberalem. Quo illico sensit virium corporisque languorem, & quum voce elata doceret auditores, incidit in hæmoptysin, eaque successive rejecit aliquoties uncias aliquot. Ipse autem periculi ex hoc malo probe gnarus, gravi inde mortis percussus est metu, quo vires conciderunt penitus; erectus tamen paullisper animo melius habere coepit, sed variis usus medicamentis, aqua frigida, sero lactis cum vino cocto, nitrosis, pectoralibus aliisque pluribus, parciorem quidem habuit sanguinis excretionem, tussis autem cum raucedine restitit, appetentia periit, somnus abfuit, vires indies magis collapsæ, caro consumta, & febris gliscere coepit ex pulsu celeri cum æstu cognoscenda, qua succi roscidi prorsus absumti, & mente ad ultima usque alacri, mors excepit insperata, licet nec pus, neque etiam sputum copiosum antecessisset.

Epicrisis.

Mortis causa principalis in erudito hoc viro neutiquam fuit sanguinis exspuitio, sed procul dubio tabescentia ac corruptio nobilioris cujusdam visceris, pulmonis, vel forte lienis. Hanc enim corruptivam labem semper fere prodit appetitus viriumque prostratio enormis, quæ, si in viscere stomacho propinquo, omnem ipsius appetentem & digerentem vim pessundat. Causa vero fatalis hujus morbi, nimis curis, labori erudito impensiori, ac potui frigido corpori calenti ingesto, tribuenda videtur, quo sanguis & omnes corporis succi labe infecti, & in progressu impediti stagnarunt, ac putrescentes, funestam induxerunt catastrophem.

OBSERVATIO X.

Hæmoptysis phthisica cum labe hepatis.

Locum tenens generosus, viginti quatuor annorum, sanguineo-cholericus, corporis constitutione debilis, & ab ineunte ætate morbis, præsertim acutis, crebro afflictus, decimo quarto ætatis anno, ex terrore sub somno, incidit in grave delirium periodicum, quod per biennium fere perstitit, ac tandem iterata sæpius alternis diebus sanguinis missione est abactum. Ex eo natura ita venæ sectioni assuefacta, ut quotannis minimum ter vel quater eandem admittere cogeretur, simul pectori inducta morbida ejusmodi dispositio, ut sæpius ex eo laboraret, & pleuritide vera, nec non vehementi spasmodica

angustante strictura subinde afficeretur. Quin, quum ipsi ex collato interea militari officio iter longinquum sub frigido & humido cœlo facienda necessitas imponeretur, illico post reditum correptus est tussi vehementi, qua subinde non nihil sanguinis floridi ejecit, & post octiduum, admissis adhuc diætetico delicto, successit ipsa hæmoptysis larga, intra quatrimum minimum duas sanguinis spumosi rubicundi libras evehens. Licet autem adhibitis remediis sanguinis recreatus remitteret, remansit tamen tussis molesta, pectoris gravitas, spiratio difficilis & nocturnus sudor admodum infirmans. Tussis per totum morbi decursum valida admodum erat, plus sicca quam humida, paucam quidem materiam flavescens evehens, sed quia dies noctesque vires & corpus nullis cedens remediis convellebat, nihil boni prælagiebat. Nihil vero magis afflixit ægrotantem, ac dirus & intolerandus fere sub osse humeri sinistri consistens dolor pungitivus & tensivus, qui per vices totum pectus spasmo adeo constringebat, ut omnem fere respirationem ad suffocationem usque tolleret. Quin dolor hic postea se extendit ad regionem lumbarem, sub tussi semper vehementior, adeo, ut æger vix per conclave pedibus incedere posset. Vesperis & maxime post coenam, frigus cum horripilatione quadam extrema occupabat, quod non vehemens æstus, sed effusus per noctem sudor sequebatur, cum pulsu duro & frequenti, urina rubicunda, cum copioso albo sedimento. Lateri sinistro ægre incumbere potuit, ac validior semper insequuta tussis. Ceterum tot passionibus indies vires cum carne consumebantur, ac præterea phlogoses interdum cum dolore & sudore in fronte caput occupabant, ac licet medicus nihil omitteret, tam ex diætetis, quam pharmaceuticis remediis, quod curationi hujus affectus, vel mitigationi symptomatum idoneum, omnia tamen erant frustranea. Demum meum etiam exquisitum ante duos menses consilium, qui pariter tristem exitum ominatus, nil nisi usum feri lactis dulcis commendavi. Invalescente itaque hæctica febre & perseverantibus spasmis ac doloribus in dorso acerbissimis, æger in delirium tribus ante obitum hebdomadibus incidit, & sic etiam rationis usu privatus obiit. Facta ex decumbentis voluntate post mortem sectione, tota pulmonum substantia, præsertim vero lobi sinistri, scirrhusa, multis vomicis, pure crasso, glutinoso refertis, plena fuit inventa, ac præterea in arteria pulmonali polypus instar minimi digiti longus & latus. Ipse pulmo non tantum cum pleura, sed & cum pericardio & diaphragmate tam firmiter concretus & quasi conglutinator erat, ut vix commodè cultro separari potuerit. Tam pertinacis vero & molestissimi in regione lumbari doloris causa nulla alia reperta fuit, quam quod ob firmam cohæsionem pulmonis cum diaphragmate, sub vehementi & pectus concutiente tussi, processus & tendines diaphragmatis lumborum vertebri annexi nimis vehementer tensi ac distorti.

Epicrisis.

Hæc morbi historia paulo curatius inspecta, haud exigua in usum theoriæ & praxeos medicæ præbet argumenta. Scilicet innotescit: quod delirium decimo quarto ætatis anno per duos fere annos integros durans, crebrius & fere alternis diebus repetita venæ sectione quidem conquieverit, sed quod eo natura ita assuefacta eidem, quin debilitata fuerit, ut ter, vel quater singulis

gulis annis, sanguinem mittere fuerit coactus, neque tamen sub tanta sanguinis imminutione, à rheumatismis in pectore & pleuritide cum febre, congestionibus etiam sanguinis ad partes superiores, potuerit liberari. Deinde id quoque in usum medicum cedere potest, quod post morbum pleuriticum, quum debiles adhuc sunt pulmones, nihil sit deterius, ac corpus diu atmosphæræ frigida & humidæ exponere, & quod hoc modo hæmoptysis ac phthisis, magna pulmonibus labe & obstructione inducta, ingenerari possit. Deterior porro semper est post hæmoptysin tussis sicca & vehemens, quam humidâ purulenta & copiosa, quam ego aliquoties in juvenibus sanavi lacte incocto cum speciebus vulnerariis, usurpato balsamo pectorali Meibomii & ordinario feri lactis potu. Præterea patet: quod dolor in lumbis fixus & intolerabilis à tensione nimia processuum diaphragmatis oriri possit, id quod etiam in Principe juvene Cizenfi, ante viginti aliquot annos hic mortuo, à copia extravasati puris processus diaphragmatis comprimentis, observatum. Tandem notabile est, quod delirium in febre hæctica & phthisi supervenire possit in corpore disposito.

OBSERVATIO XI.

De hæmoptysi cum inflammatione ventriculi.

Studiofus quinque supra viginti annos habens, constitutionis satis robustæ, ante anni dimidium à motu & exercitatione corporis vehementiori, sub hyeme frigida incurrit in ejectionem sputi cruenti, ita ut per vices aliquot cochlearia excrearet. Administrata in talo sanguinis missione sponte cessavit malum, quum vero post aliquot menses, in aëre frigido & humido pedibus iter faciens, potu spiritus vini repletus, cum sodali graves moveret rixas, & ira candens frigidam cerevisiam copiose superbiberet; ingentem quantitatem sanguinis spumosi tussi excrevit, ut intra diem & noctem libræ minimum quatuor fuerint rejectæ. Conquerebatur autem simul de vehementi incendio circa præcordia & pectus, partibus externis penitus refrigeratis; aderat continua sitis, pulsus durus & vehemens, nullus somnus, & quando sanguinem non exspuebat, miram quantitatem pituitæ viscidæ ore rejiciebat. Nihil levaminis à secta vena, ab usu feri lactis, à pediluviis, à lacte amygdalato cum nitro mixto, nec ab aliis medicamentis inflammationi resistentibus expertus est, sed potius ab omnibus ingestis major oborta est anxietas & dolor, donec tandem persistentibus hisce symptomatibus & fatiscentibus omnibus viribus, decimo quarto ab invasione morbi die, periret.

Epicrisis.

Videmus ex hac morbi historia, quomodo & à quibus causis simul concurrentibus, in homine plethorico & qui jam tum levem hæmoptysin expertus est, gravis hæmoptysis una cum inflammatione ventriculi lethali progigni possit. Nam atmosphæra frigido-humida existente, fortior motus, potus copiosus spiritus vini, ira, vociferatio, in homine plethorico sanguinem in tantam ebullitionem, orgasmum, congestionem & impetum a partibus exterioribus ad interiora urgere & pellere valent, ut ruptis vasis pulmonalibus, hæmorrhagia periculosa, ventriculi vero à potu ingesto frigido inflammatio, nullis levanda auxiliis, accedat. Post excretionem autem cruentam magna phlegmatis ejectio successit in nostro, propter majorem humorum ad pectus affluxum,

& nimiam membranæ in bronchiis glandulosæ relaxationem.

OBSERVATIO XII.

Fœmina generosi stemmatis, valde teneri corporis animique mobilioris, annorum quinquaginta, per decem fere annos menstrua caruit purgatione, & hinc etiam subinde flatulentis, præcordiorum anxietatibus, animi perturbationibus, phlogosis cum strictiore alvo junctis, à longo tempore fuit obnoxia. Ante annum & quod excedit, circa os sacrum & in imo ventre dolorem pressorium cum ardore & pruritu ani persensit, & paucis diebus elapsis, portionem sanguinis secessisse per alvum, quum eam deposuisset, observavit, idque aliquoties. Sed ab hoc tempore protinus omnis evanuit dolor & imi ventris molestia, brevi tamen post cum abdominis ventris alvique strictura percepit dolorem pungitivum in sinistro thoracis latere, cum titillatione in epiglottide tussique valida & sicca, qua demum aliquot sanguinis floridi & coccineo tincti colore extrusit per intervalla cochlearia, & sic iterum cunctæ molestiæ remiserunt. Quum vero talem accessionem per quatuor menses circa plenilunii tempus, cum iisdem antecedentibus symptomatibus, simili etiam eventu & solutione mali, generosissima fœmina experiretur, metu majoris periculi postulavit meum consilium. Ego igitur tres ante accessionis hæcenus consuetum tempus dies venam tali tundendam curavi, & minimum ut tres vel quatuor sanguinis uncia emitterentur jussi, pulverem etiam rhabbari cum lapidibus cancrorum & nitro bis in septimana cum haustu aquæ frigida circa lecti introitum & infusum theiforme mane sumendum suasi, quorum remedium ope ab omni accessione hæmoptyseos postea libera permansit.

Epicrisis.

Rectius hæc hæmoptysis pectoralis rheumatica appellari potest, quæ ex palindrome, sive translatione sanguinis affectantis exitum per venas hæmorrhoidales ad pectus, ubi etiam in musculis thoracis pleuritidem spuriam intentavit, fuit perfecta, & soluta per apertionem vasorum sanguineorum, quæ interius bronchiorum tunicas investunt. Tenuis enim, floridus & spumofus sanguis rarius immediate ex pulmonum substantia, frequentius ex bronchiis & asperæ arteriæ vasis fauciatibus venit. Quum autem venæ sectio validum sit sanguinem à partibus superioribus ad inferiores revellens medium, non sine levamine circa tempus accessionis instituta fuit.

Plures memorabiles observationes legas in *Consult. Medic. Tom. I. Sect. II. cas. LXIX-LXXIII.*

CAPUT III.

De Vomitu Cruento sine & cum secessu nigro sive morbo nigro Hippocratis.

THESES PATHOLOGICÆ.

§. I.

Sicut in hæmoptysi sanguis subinde spumofus, tenuis & floridus cum tussi ejicitur; ita ex ventriculo cruor concretus, ex atro-rufescente colore tinctus,

Hæmoptysis pectoralis rheumatica.

Vomituum cruentus quid?

tinctus, multo cum phlegmate insipido, acido, aut viscido mixtus per vomitum exturbatur.

§. II.

Ejus symp-
tomata &
signa.

Antecedit hunc sanguinis vomitum ut plurimum punctorius & tensivus hypochondrii finistri dolor, & ipsa eruptio nunquam fere non cum præcordiorum anxietate & dolore compressorio; nec non constrictione in hoc latere jungitur; atque etiam nullum sanguinis profluvium tam facile ac sæpe lipothymiam habet comitem, quam hoc, præsertim, quando cruor graveolens, corruptus exit.

§. III.

Sedes in
ventriculo
& liene.

Sedes morbi & scaturigo unde sanguis venit, est in ventriculo, ita tamen, ut in consortium mali, ceu sedes causæ morbi, veniat & ipse lien. Id enim aperte monstrant sectiones cadaverum hoc morbo defunctorum. De liene quidem, quod is semper fere sanguine tumidus, infarctus & quandoque plane induratus deprehendatur. De ventriculo autem, qui copiosis ubique vasis distinctus est, quod breviter potissimum sic dicta arteriosa & venosa, quæ in superna & sinistra tenuiori parte excurrunt, ibique admodum tenera membrana teguntur, si aperiuntur, vel disrumpuntur, sanguinem qui vomitu ejicitur, fundant & fuderint, eaque propter varicosa & nigro sanguine distenta deprehendantur, corrupta simul ibi ipsius ventriculi substantia. Sic *Riolanus anthropolog. Lib. II. Cap. 17.* vas breve minimo digito latum deprehendit in rejectione sanguinis per superiora & inferiora. Idem testatur *Columbus rerum anatomic. Lib. XV.* de Cardinali Cibo, nec non *Wedelius in Physiolog. reformat. Platerus Observat. Libr. II. & Bonetus medicin. septentrional. Libr. III. Sect. 5. Cap. 4.*

§. IV.

Non sem-
per ex bre-
vibus.

Interim non adeo videtur improbabile, licet rarius contingat, quod ex aliis etiam stomachi vasis, si à succis acido-corrosivis, vel etiam à venenis, fuerint erosa, vomitus cruentus succedat. Quod tanto magis factum fuisse concludendum, si dolor stomachi præcessit acutus, atque materia, quæ vomitu rejicitur cruenta, nigra simul est & acida, dentes stupefacit, fauces ac os adurit, & pavimento injecta ebullit, qualem descriptionem *Hippocrates L. II. de morbis §. 71.* tradit.

§. V.

Quæ ad
vomitum disposi-
ta corpora.

Jam sicuti corpora graciliora & teneriora omnium facillime hæmorrhagias, quæ fiunt in partibus internis, incurrunt; ita etiam idem fieri in ea, quæ succedit in ventriculo, testatur experientia, præsertim si subjecta sensibilibioris & mobilioris simul sunt animi. Ejusmodi enim corpora vasa ut plurimum gerunt subtiliora & quoad substantiam teneriora, quæ & facile distensionem & rupturam, atque hinc sanguinis effusionem, admittunt.

§. VI.

Inprimis
frequens
male men-
tuatis.

Potissimum atroci huic malo observantur obnoxie femellæ, inprimis quæ alvi sunt adstrictioris, pubertatis tempore, quo menses primo imminet, nec non quando postea suppressi sunt, aut parcius succedunt. Tum enim, quando gravi ira, vel terrore commoventur, & inferiorum partium accedit refrigeratio, vel etiam medicus

Frid. Hoffmanni Oper. Tom. II.

pathemata à regurgitante ab utero ad stomachum sanguine orta per emesin excitatam perperam tollere contendit, per quam facile sanguinis eructatio procuratur.

§. VII.

Pari ratione post intermittentem perversa methodo à medico tractatam & justo citius cohibitam, in tenerioris texturæ foeminis novi substituisse menses. Quos si postea validis & calidis emmenagogis iterum emovere ausus fuit morbi artifex, enormem & lethalem cruentam vomitionem successisse bis observavi.

Post inter-
mittentes
male carac-
tas.

§. VIII.

Annosiores quoque foeminas, desinente mensium fluxu, graviore & diuturniori mœrore confectas, de doloribus pressoriis in sinistro hypochondrio, cum inappetentia & virium debilitate, diu conquestas notavi; quibus tandem subito impetuosa sanguinis per vomitum mortifera eructatio accidit.

Mensibus
emanantibus.

§. IX.

Neque minus gravidas, si sanguine nimis redundant, ejusdemque missionem intermittunt, cruento vomitu tentari in experientia est fundatum; præsertim, quando circa medium gestationis tempus stomachus ipsis crebrius fuit subversus. Quia tamen is, quem vomitu rejiciunt sanguis, parvus est ac tenuis, magis videtur vero simile, eundem ex arteriolarum in œsophago & faucium furculis, non vero ex ipsius stomachi vasis venire, eaque propter minus periculi alere.

Gravidis
plethoricis.

§. X.

Contra ea capitale sanguinis observavi cum vomitu profluvium, in foeminis, quæ partu difficillimo ex pravo foetus situ laborarunt, & imensam sanguinis molem cum vita eructarunt. Vidi tamen etiam, vomitionem cruentam in parturientibus non funestam; sed in his parcius cessit sanguinis quantitas & puerperæ admodum fuerunt plethoricæ, ac ultimis temporibus venæ sectio male fuit intermissa.

Parturien-
tibus diffi-
cultus.

§. XI.

In virili etiam sexu occurrunt subinde valetudinarii & hæmorrhoidarii, qui succedente parcius, vel cessante penitus hæmorrhoidali fluxu, de præcordiorum anxietatibus, constrictionibus cardialgicis, cum sudore frigido, alternante calore & frigore, conqueruntur. Quibus, si tandem evacuationio sanguinis foeculenta & cadaver olens per superiora & inferiora accidit, recurrente aliquoties paroxysmo, brevi post sub animi defectione ipsi perire solent.

Hæmor-
rhoidarii
viris.

§. XII.

Minoris periculi fuit ille cruentus vomitus, quem superiori anno Septembri mense Martisburgi frequenter observavi. Licet enim cruor brunonigricans, ad aliquot mensuras, in plebejis maxime foeminis ac viris, eructaretur, præter virium debilitatem, vita tamen fuit superstes. Quin, eodem tempore, occurrerunt in plethoricis maxime hæmoptyses, quæ pariter sine singulari artificio iterum discesserunt. Circa æquinoctiale enim tum tempus, ob subitas & multiplices æris ex calido in frigidum, & ex frigido in calidum vicissitudines, sanguinis æqualis ac liber circulus turbatur, ut hic, maxime ubi redundat, ad

Ex æris
vitio non
adeo peri-
culosus.

T

hanc

hanc vel illam partem cum impetu ruat, & ubi exitum invenit, perrumpat, effuso autem nimio, iterum cesset.

§. XIII.

*Ab inflam-
matione
ventriculi
distinguen-
dus.*

De ipsius morbi decursu porro tenendum, spasticum illum & gravativum ventriculi dolorem, qui ut plurimum cum ardore sanguinis vomitui jungitur, non pro stomachi inflammatione esse habendum. Inflammatio enim nunquam non extremorum frigore, vehementi circa præcordia æstu, siti, febre, pulsu contracto, debili & celeri stipatur, quæ tamen in cruento vomitu non sic adsunt. Neque ventriculus inflammatus ferre potest calidum potum, nec non exterius applicationem regularum calidarum, vel calidorum pannorum, quæ tamen vomitu cruento laborantes eximie solantur.

§. XIV.

*Facile reci-
divat.*

Sicuti autem omnes hæmorrhagiæ facile recrudescunt & post hebdomadem non modo, sed mensium etiam, quin annorum decursum, revertuntur; sic etiam idem in hac ventriculi hæmorrhagia accidit. Nam quia per effusionem partibus inducitur debilitas, minus postea resistere possunt sanguini copiosius & validius affluenti, sed is pristinas servat vias, subsistit ibi tandemque etiam erumpit. Quin ea quandoque observatur naturæ quasi consuetudo, ut locum pristinum exacte repetat, & maxime in narium hæmorrhagia, ex nare illius lateris, quo primum successit, postea semper fere succedere soleat sanguinis stillicidium.

§. XV.

*Quæ ma-
gis, quæ
minus peri-
culosa.*

Periculum quidem, quod morbus hic inducit, non in omnibus idem, id vero certum, vix ullam hæmorrhagiam periculosiorem esse hac. Interim non tantum discriminis subest, si febris abest, si à suppressis evacuationibus ex plethora oriundis ortus. Contra ea, si febris jungitur, si sanguis corruptus, graveolens & niger prodit, si ex magno & corrupto liene, vel indurato hepate proficiscitur, animique tandem jungitur defectio, summum adest periculum & mortem proximam jam portendit. *Hippocrat. aphor. 37. Sect. VI.* nec non in prognosticis.

§. XVI.

*Periculo-
sissima cum
secessu ni-
gro.*

Longe gravius longeque certius est periculum, si, uti subinde accidit, vomitui cruento, nigra & pici similis eaque graveolens alvi dejectio jungitur. Hæc enim subitum ut plurimum denunciat interitum, ipsius *Hippocratis* testimonio, qui sub morbi nigri nomine hanc passionem describit.

§. XVII.

*Qui ex me-
saraicis in
ileo.*

Proficiscitur cruenta hæc, tam per inferius, quam per superius os ejectio, non immediate ex ventriculi vasis, nec à sanguine in stomachi cavo extravasato, sed potius ex alio viscere, vel intestinis tenuibus, maximeque ileo, & ruptis in ipso mesaraicis, quæ tenuissima tecta sunt tunica, vasis. Hæc enim in defunctis sæpe adhuc nigro sanguine valde distenta deprehendi, simulque totum ventriculum cruenta ejusmodi materia repletum.

§. XVIII.

Hæmor-

Qui autem funestis ejusmodi nigris alvi deje-

ctionibus, cum vel sine vomitu cruento, afficiuntur, vel hypochondriaci sunt, aut hæmorrhoidarii; in quibus sanguinis cursus per mesaraica vasa non recte, sed impeditius succedit, unde dolorificæ vasorum sub membranis excurrentium distensiones, spasmi, congestiones & tandem effusiones perniciosæ sequuntur. Quibus optime distingui potest à fluxu sanguinis hæmorrhoidali, qui licet interdum etiam subnigricans sit; neutiquam tamen tam immenso dolore intestinorum spasmodico stipatur, neque etiam præsentem interitum, sed potius magnum levamen, affert.

§. XIX.

Materia illa nigricans, quæ sic per alvum exit, solet esse foetidissima, quia sanguis effusus, cum stercoribus in cavo intestinorum quasi fermentatus, exaltato principio sulphureo alcalino, in foetidissimam abit putrilaginem. Quæ, quia insensibilissima fluidi nervorum naturæ, hinc mox cito vires deprimit & vitales in corpore motus destruit. Atque adeo summa, quæ fere morbo huic perpetuo jungitur virium dejectio, non adeo ex nimia sanguinis profusione ejusque natura, sed potius ex ipsius corruptione putrida est derivanda.

THESES THERAPEUTICÆ CUM CAUTELIS CLINICIS.

§. I.

In hujus tam horrendi & gravis morbi curatione Medicus utique pro diversitate corporum, causarum & temporis, prudenter & circumspiciente sese gerere debet. Etenim alia medendi ratio est in paroxysmo, alia extra eundem; alia, ubi à sola sanguinis abundantia & orgasmo malum suscitatur atque excretio quasi critica est, alia, quando à doloribus & spasmis sanguinem ad interiora urgentibus oritur; rursus vero alia, quando à corrupto aut obstructo viscere, aut à causa externa, veneno vel corrosiva materia, morbus inducitur.

§. II.

Ipsò in paroxysmo, si corpus est plethoricum, ipseque sanguinis motus ab exterioribus ad interiora præter naturam conversus est, commodissimum locum habet venæ sectio in brachio. Tenendum vero est, sanguinis mensuram missionisque repetitionem à perito & circumspicito medico pro corporis, vasorum repletionis, virium & ætatis ratione esse præcipiendam.

§. III.

Quandocunque sanguis nimium æstuat atque in orgasmo constitutus, & pulsus impetuosus ac validus est, aquæ fontanæ, vel plantaginis potus, in cujus libra nitri puri drachina & syrupi papaveris rhœados uncia dimidia soluta, successe & temperate sumtus, egregie conducit. Refrigerans enim hæc potio temperat simul humorum acrimoniam, elasticam partium sulphurearum exæstuationem intra vasa componit, & relaxata vasculorum apertorum orificia ita firmat & roborat, ut postea eo facilius coeant iterumque coalescant.

§. IV.

Porro nunquam non egregiam opem præstant emulsiones, imprimis, quando præcordialis regio,

dande
emulsiōes.

regio, circa sinistrum potissimum latus, pungitivis & vellicatoriis doloribus spasticisque stricturis affligitur ac sitis cum aestu urget. Possunt autem confici ex seminibus quatuor frigidis & papaveris albi, cum aquis antispasmodicis, florum tiliae, liliorum convallium, primulae veris, acaciae, papaveris rhoeados, poëoniae, ceraforum nigrorum, admixto nitri momento & convenienti syrupi papaveris albi quantitate.

§. V.

Et injicien-
di clysteres
emollientes.

Præterea ad laxandas spasticas intestinorum stricturas & divertendum impetuofum humorum ad partem affectam affluxum, desideratum subinde levamen afferunt clysteres emollientes ac demulcentes, stimulo tamen quodam leniori armati, nitro conditi & frequentius injecti.

§. VI.

Exterius
admovenda
discutiencia
& roborantia.

Neque minus inter externa hujus mali remedia connumeranda ea, quæ spasmos sistendo, ventriculum roborando, nec non discutiendo, virtutem suam exserunt. Hoc nomine ego nihil præstantius deprehendi ipso oleo camphoræ, quod paratur, si drachma una camphoræ solvitur in uncia una olei amygdalarum dulcium & postea viginti guttæ olei ligni Rhodii instillantur. Inungitur hoc oleo tota præcordialis regio cum toto hypochondrio sinistro, & postea facculus, cui species ex floribus chamomillæ Romanæ, sambuci, herba menthæ & absynthii inditæ, in aceto rosaceo, vel vino rubro coctus, subcalide applicatur.

§. VII.

Ligaturæ
item, & la-
vationes
manuum
pedumque.

Quodsi jam enormis cruoris copia profusa cum summa virium jactura, injiciendæ sunt ad compescendum nimium fluxum artuum ligaturæ, quæ postea, uti capite antecedente monitum, circumspecte iterum solvendæ. Novi etiam non sine successu fuisse consilium, ut manus & pedes ad malleolos usque, aquæ immittantur frigida, quo frigus sanguinem in minimis vasis diutius detineat, & sic ejusdem ad cor refluxus aliquantisper retardetur.

§. VIII.

Recurfus
quibus ar-
cendus.

Extra paroxysmum ad arcendum mali recursum eximie conducit rhabarbari electi pulvis, ad dimidiam drachmam, vel solus, vel cum cancrorum lapidibus, aut duodecim trochiscorum de carabe granis & dimidio camphoræ grano, bis singulis septimanis, ante lecti introitum, cum haustu aquæ fontanæ sumtus. Est enim rhabarbarum quasi specificum ad referendas paulatim obstructions. Egregia quoque virtus est infusi theiformis ex herba veronicae, centumnodii, summitatibus millefolii, radice glycyrrhizæ & semine fœniculi, ad aliquot patellas quotidie poti. Potui ordinario inservit commode aqua fontana pura & levis, in qua ferrum extinctum, vel etiam serum lactis acidulatum.

§. IX.

Si ex men-
struis sub-
pressis qua
facienda.

Peculiari ratione huic malo occurrendum, si ex menstruis suppressis, vel obstructis oritur. Tum scilicet vena secanda est in pede, & præterea clysteribus ex mensibus provocandis idoneis confectis, ut artemisia, pulegio, floribus cheiri, baccis lauri & juniperi, alvus frequentius eluenda, vel etiam temperatæ ejusmodi species emmenagogæ, in infuso, aut decocto, simul sunt propinandæ.

Frid. Hoffmanni Oper. Tom. II.

§. X.

Alia quoque ratione medicatio instituenda, quando ab assumtis acribus & acidis liquoribus stomachi vasa erosa & sanguis sic effusus evomitur. Tum scilicet ad contemperandam acrimoniam & cicurandam rodentem facultatem, eximie conducunt pulveres absorbentes terreo alcalini, ad consolidanda autem vascula sauciata optimum remedium lac cum amylo coctum.

§. XI.

In omni, à quacunque causa fuerit producta, stomachi hæmorrhagia, caute mercandum est cum opiatīs & narcoticis, eo, quod virium dejectionem, quæ nunquam non in hoc morbo præsto est, magis adhuc cum summo detrimento augment. Summo etiam studio cavendum est à validis stipticis, adstringentibus & vitriolaceis pharmacis. His enim sanguinis eruptio quidem sistitur, sed cruor in vasis stagnans putrescit & gravis inflammatio cum sphacelo metuenda, aut minimum, si cachecticum corpus est, expeditus fit in hydropem transitus.

§. XII.

Superato vomitu cruento, abstinendum postea omni cura ab emeticis, nec non ab aloeticis, quibus sanguinis orgasmus, ejusdem inordinatus progressus & ad stomachum confluxus inducitur, ac sic facillime malum revocatur. Recte etiam monet Hippocrates: fugienda esse oleosa & pingua, quibus addenda etiam dulcia. Nam licet hæc inter alimenta sint præstantissima, recursum tamen & generationi hujus mali favent, quia vascula dilacerata nimium relaxando, sanguinis affluxum potius invitant, quam arcent.

§. XIII.

Ceterum digna utique sunt, quæ subjungantur Hippocratis de morbo nigro monita practica, quæ libro II. de morbis Sect. V. consignavit & sic habent: Morbo atro laboranti medicamentum purgans crebro propinato, & serum & lac, si anni tempus ferat, & cibus abstineat dulcibus, oleosis & pinguibus; utatur potius frigidis & alvum subducentibus, & nisi debilis fuerit, sanguinem e brachio detrachito. Quod si alvus non dejiciat, molli infuso subluo, à crapula & venere abstineat, neque multum exerceatur, neque deambulet, calida non lavet, acrida non edat, neque salsa, quæ cum fecerit, cum ætate etiam morbus fugiet.

ENARRATIONES MORBORUM.

OBSERVATIO I.

Virgo, decimum octavum ætatis annum agens, corpore procera, macilenta ac tenera, facie pallida, anno ætatis decimo quarto, post vehementissimam iracundiam, tantam cruoris copiam evomit, ut mensuram fere compleret. Subsequuta tum febris assidua, qua discussa, mensium fluxus erupit & in hunc usque diem satis ordinate successit. Interim haud raro emicuit sensus doloris pungitivi in sinistro latere & pressorii in ventriculo, quo medicus consultus inductus, cruditates in stomacho subesse suspicatus est, & ob id porrexit vomitorium satis validum antimoniales. Sed inde dolores & pressiones ventriculi mirum exacerbatæ & accesserunt præterea stricturæ præcordiorum anxie, cum intenso

capitis dolore, quin triduo post, sanguis magno cum impetu per os erupit, sub extremorum algore, aponia, animi profunda defectione alvi- que adstrictione, quæ insequutus æstus ingens, cum magna siti; postero tamen die per vomitum nihil amplius sanguinis, sed tantum ingesta rejecta, & ante meridiem semper ægra melius, post meridiem pejus habuit. Cum demum ego in consilium adsciscerer, his usus sum magno cum fructu remediis. Binis scilicet singulis horis porrexi paulatim sorbendum haustum aquæ fontanæ frigidæ, cum pulvere nitroso absorbente & quindecim liquoris anodynæ mineralis guttis. Deinde ter successive injicere jussi clysterem emollientem domesticum, quo alvus ingentem viscidorum recrementorum colluviem dimisit. His levata quidem ægra, conquievit etiam æstus nimius & urgens præcordiorum anxietas, nihilo minus mansit semper conatus ad vomendum, junctus interdum, non cum sanguinis, sed pituitæ vomitu, neque capitis dolores, neque anxietates præcordiorum prorsus cessarunt, sed interjecto aliquo tempore redierunt & vires præterea multum fuerunt dejectæ. Quare emulsionem parare jussi ex decocto cornu cervi & scorzonæræ, aqua mellissæ & menthæ sine vino, cum feminibus quatuor frigidis, papaveris albi & syrupo papaveris, quam ægra insigni sumxit cum euphoria. Præcordiali vero regioni, sacculum herba menthæ, floribus sambuci & chamomillæ Romanæ plenum inque vino coctum sæpius applicare jussi. Et ad levandum capitis dolorem liquoris anodynæ mineralis guttas quinque, vel sex, frustulo sacchari Canariensis instillatas, sæpius ori indere suasi. Sic demum effectum est, ut & vomitus cruentus, & omnia reliqua pathemata discederent, & ægra pristinam perfectam recuperaret valetudinem.

Epicrisis.

Quando menses primum instant, decimo tertio, vel quarto ætatis anno, & juvenculæ ob id habent male, fortior animi, per moerorem, aut iram commotio superveniens, sanguinis è stomacho eruptionem perquam facile suscitare potest, idque tanto certius, quando exhibetur emeticum, tum certe veneni vim habens. Quod si etiam semel hæc adfuit hæmorrhagia, post longum annorum decursum, eadem, quavis data occasione, facile redit, uti quidem in nostra factum est per vomitorium validum, quo sanguinis impetus non modo ad ventriculum, sed & ad caput translatus, in illo cruentum vomitum, in hoc autem gravia pathemata induxit.

OBSERVATIO II.

Vomitus & secessus niger brevis lethalis.

Laborarat per longum tempus quartana febre juvenis, & tandem ab empirico, nescio quibus, curatus, pravum inde corporis contraxit habitum, cum livido ac plumbeo faciei colore, aliquali etiam circa palpebras tumore & virium languore continuo. Præterea sæpius conquestus est, imprimis post usum flatulentorum, vel animi commotionem, de dolore sinistri lateris, alvo simul dura & tensa. Tandem cum pedibus iter aliquot miliarium conficiens corpus valide exagitasset, & rixas etiam cum sodalibus habuisset, incidit inopinato in vomitum nigrum, largius & aliquoties erumpentem; simul secesserunt per alvum sæces instar picis nigræ ac foetidissimæ. Sub his æger sæpius animi deliquium, si erigeret corpus, in-

currit & intra viginti quatuor horas plane exspiravit. Dissecto altero statim die cadavere, tam infacetus nares feriit foetor, ut non ferre possent adstantes. In ventriculo vasa brevia nigro colore conspicua & disrupta apparuerunt, & tam in ejus cavo, quam etiam ileo intestino, liquamen nigrum foetidum comparuit, vasis ilei simul nigricantibus. Hepar, naturali aliquanto durius visum fuit, sed lien adeo durus, ut pene cartilaginis speciem præberet, atque exterior ejus substantia albescens vix acuto cultro discindi posset; mollior autem interior exigua compages superstes, atro sanguine erat plena.

Epicrisis.

Subitanæ hoc est exemplum mortis, ex sola sanguinis effusione, memoratu utique dignum. Nam in aliis sanguinis profluviis, licet is majori copia effundatur; non tamen tam subito mors, vel etiam animi deliquia accedunt. Quare alia utique subesse debet hujus eventus causa, quam ego quidem putredini cum intolerabili foetore tribuendam esse censeo. Quæ quia intimæ ad cerebrum nervosæque partes admiſſionis, subito fluidum illud inficit, quod vires præstat, eodem modo ac in iis, qui sphacelo partium tantum externarum afficiuntur, nec non qui cancrum exulceratum gerunt, & ea propter vitam cum viribus subito perdunt. Quoad causam vero hujus mali, febris quartana diuturna & forsan male etiam curata, reliquit insigne vitium in lienis viscere, quo obstructo, accedente spastica sub ira strictura, sanguis in progressu magis adhuc impeditus, nec ea propter mirum est, eundem tam brevia vasa, quam quæ sunt in ileo, disruptisse & effluxisse.

OBSERVATIO III.

Fœmina sexagenaria, plethorica, sedentaria vitæ & crassiori victui addicta, post perpessam diuturnam mœstitiæ, conquesta est aliquamdiu de lassitudine corporis & dolore in sinistro latere. Quum vero curru aliquando veheretur & simul vento frigidiori corpus exponeret, vomitu ejecit magnam materiæ nigricantis copiam, mox etiam similis coloris per alvum secessit cum foetore ingenti, ipsa autem sub his dejectionibus aliquoties redeuntibus animi semper passa est deliquium. Datæ fuerunt interne analepticæ mixturæ, cum aceto destillato & cancrorum lapidibus. Exterius ventriculi regioni applicatum balsamum nostrum vitæ, ac præterea, sedato post vomitu, rhabarbarum in substantia cum manna datum. Videbatur malum hisce mediis aliquantisper inducias dare, & spatium triginta horarum, neque per superiora, neque inferiora, contigit ejectio; nihilo tamen secius rediit postea aliquoties anoterica & catoterica dejectio cum animi deliquio, appetitus fuit simul prostratus, somnus turbulentus, paucus & nihil reficiens; quibus tandem, elapsis duabus hebdomadibus, consumpta fœmina occubuit. Tradito ad balsamationem cadavere, inspeximus mortis & morbi causam ac invenimus, vasa ventriculi brevia tumida & sanguine atro sarta ac in intestino ileo affatim cruorem atrum. Hepar magnum erat valdeque induratum, lien non quidem durus, sed naturali duplo major, adeo molliis, ut ipsius substantia digito pressa mox dehisceret & sanguis foetidus, obscure nigricans quaquaversum diffunderet.

Vomitus cruentus cum secessu nigro post XIV. dies lethalis.

Epicri-

Epicrisis.

Ortus fuit funestus hic morbus procul dubio ex emanente sanguinis per uterum purgatione, qua cessante, in foemina plethorica, neglecta praeterea venae sectione, necesse utique fuit, ut sanguis in visceribus stagnaret, ea infarciret, & substracto tandem per animi moerorem eorum robore, morbum mortemque hac ratione inferret. Quod autem diutius malo hoc affecta traxit agra, neque etiam tam ingens adfuit foetor, tribuendum videtur, tum, quod sanguis non simul & semel, sed successive effusus, tum etiam, quod sanguis in aetate senili non adeo particulis sulphureis scatet, quam quidem in aetate juvenili.

OBSERVATIO IV.

Prodierat in dextro brachio infantis mensis unius unica nocte tumor insignis, qui mox lividus ac durus cum venis inflatis redditus, tenello, postquam per tres dies & noctes continuo ejulasset & per alvum materiam instar picis nigram egressisset, vitam eripuit. Dissecto mali moris tumore, cuncti substrati muscoli, una cum vasis, exesi, corrupti, putrefacti, sanguine foetido infarcti comparuerunt, & exigua admodum sanguinis quantitas in reliquis corporis canalibus. Illam vero nigricantem materiam per alvum ejectam, partim ex ventriculo, partim ex intestinis venisse, arguebat, quod adhuc ibi non nihil ejus supererat & vasa intestinorum nigricante sanguine turgida apparebant.

Epicrisis.

Nutricem hujus tam misere pereuntis infantis fuisse impuram & lue gallica ante annum laborasse, fuit post fata compertum. Interim non dubium est, quin ob motum sanguinis in parte inflammata & corrupta interceptum, is alias vias quaesiverit ac demum tenuia ventriculi & intestinorum vasa perruperit, eodem modo ac subinde evenit, a gravibus partium externarum contusionibus sanguinem e naribus, vel etiam per alvum, aut alias vias prorumpere. Quam in rem consentit peritissimus *Platerus*, qui in *praxi* pag. 726. scribit: à contusione aliqua facta circa viscera ventriculo vicina sanguis non nunquam evomitur. Nigredo autem sanguinis intimam omnino corruptionem ejus indicat, quae sine omni dubio à corrupta illa putrida tumoris materia profecta & communicata. Neque etiam alia ex causa, nigri & picei coloris cruorem, qui per anum in ejusmodi affectibus fertur, quam ex valde corrupto in viscere quodam sanguine, totius massae instar fermenti texturam invertente, petendam esse arbitror.

OBSERVATIO V.

Non ita pridem foemina Hebraea Amstelodamo meum exquisivit consilium. Agit hac quinquagesimum annum, & ante octo jam fere annos, tribus, vel quatuor, ante mensium fluxum diebus, sanguinis e naribus per intervalla notabilem quantitatem profudit, donec prodiret uterina purgatio & narium stillicidium tolleretur. Successit hoc per sexennium, postea vero non amplius e naribus menstrua periodo sanguis prorupit.

Frid. Hoffmanni Oper. Tom. II.

pit, sed praecedente leviori tussi, e faucibus aliquot successive cochlearia scretu evacuata. Tum semestri abhinc spatio, circa meum suum tempus persensit, vomitu, sine tamen singulari conatu, e ventriculo sanguinem ad aliquot per intervalla, cochlearia protrudi; idque adhuc, quotiescunque redit tributi lunaris periodus, accidit. Ceterum foemina est succi plena, vitae sedentariae, lauto victui & potui vini addicta, & ex eo quo vomitu egressit inmensuatim sanguinem, ob periculi metum virium experta est languorem, cum appetitu prostrato & exiguo somno, quae tamen post mensium fluxum & exacto octo dierum spatio, inducias dederunt. Accepit & conquirit huc usque multa & varia medicamenta, sed frustra. Neque venae sectio, quae tantum circa aequinoctium fuit celebrata, ullam attulit operam. Ego igitur consilium dedi, ut ante imminens mensium tempus, venam pedis aperiendam curaret, & tres tantum uncias sanguinis effluere permetteret; dein ut singulis hebdomadibus bis rhabarbari pulverem, cum lapidibus cancerorum & nitro permixtum, mane, vel vespere, circa lecti introitum cum haustu aquae frigidae fumeret, frequentius infusum theiforme, ex veronica, scabiosa ac summitatibus millefolii mane biberet, a vino & carnibus penitus abstineret, pro potu vero prisana uteretur, usque ad tempus vernum, quo fontis Selterani cum quarta parte lactis mixti potum per quatuor vel quinque hebdomades instituire & ipsam ceterum hilari animo esse jussi.

Epicrisis.

Patet manifesto: hanc sanguinis eruptionem, non symptoma, vel effectum morbi cujusdam in viscere vasculoso obstructo consilientis, sed salutare opus naturae esse. Etenim in foemina hac valde plethorica, per spasmos, solenniter mensium fluxum praecedentes, pars sanguinis ad superiora, & primis annis ad caput, postea ad pulmones & denique ad ventriculi vasa translata fuit, quam translationem veteres palindromen, vel metastasin appellare consueverunt. Quia vero jam tempus adest, ut plenarie mox emanent menses; hinc suasi singulis mensibus sanguinis missionem & abstinentiam ab iis quae multum sanguinis ingenerant. Et quia praeterea cruoris vomitio nunquam non valde suspecta, metuendus omnino est gravior, si viscera abdominis sanguine forte oppleantur & infarciantur, progressu temporis, effectus; quem potus aquae Selteranae, cum victu tenui & moderata diata utique avertere & praecavere valet.

OBSERVATIO VI.

Triennio abhinc peregre vocatus fui ad generosissimam foeminam, delicatae & tenerae constitutionis, vomitu sanguinolento enormi correptam. Accedens illico obvium habui maritum, monstrantem binas argenteas pelves, liquamine ex cruore concreto & phlegmate plenas, quod vomitu fuerat exturbatum. In agra offendi pulsum valde debilem, & vires ita dejectas, ut erecto capite in animi incideret deliquium. Quare ingens periculum subesse dixi. Dedi quidem analeptica & roborantia, sed altero die, post aliquot adhuc instar lauræ carnis, intermixtis sanguinis fusci coloris grumulis, vomitus placide occubuit. Quum in causam morbi morisque inquirerem,

Vomitus cruentus ab emmenagogis calidis lethalis.

Vomitus cruentus moderatus mensis antecedens.

rem, rescivi: defunctam, post puerperium laborasse tertiana, tunc temporis grassante genii valde anomali; hanc post quinque accessiones à medico vicini oppidi, missis pulveribus fuisse sublata, ex eo vero per tres menses restitisse fluxum uterinum & successisse dolorem hypochondrii sinistri gravativum. Hinc matrem permotam fuisse, ut ab extraneo medico petierit & filiae miserit medicamenta, elixirium scilicet, quod, quum explorarem gustu, proprietatis sine acido, cum essentia zedoariae & succini erat, de quo ter quotidie guttas quinquaginta cum vino Rhenano veteri & generoso, sumserit ac pro ordinario potu cerevisiam valde lupulatam habuerit. Sed elapso vix trium hebdomadum spatio, incidisse ipsam in funestum hunc morbum.

Epicrisis.

Tragicus hic casus doceat juniores practicos: quam perniciosum sit, emmenagogis, ad ciendos menses, paulo validioribus uti in subjectis tenerioribus, in quibus post puerperium & febrem magis deficit, quam abundat sanguis; tanto magis, si ex dolore gravativo hypochondrii sinistri, labis in visceribus, post febrem, sine dubio adstringentibus cohibitam, & inprimis lienis, justa est suspicio. Nam ubi obstaculum ponitur in interaneis transeunti sanguini, is calidioribus medicamentis valde exagitatus & expansus, venas ventriculi teneriores facile vi percurrere & exitum affectare, atque etiam sibi parare valet.

OBSERVATIO VII.

Morbis niger ex hepatis vitio lethalis.

Causidicus clarus, quadragenario major, corporis habitu gracilis & inter labores fori assiduos sedentariam admodum vitam colens, à pluribus jam annis cerevisiam partim, partim vinum in seram usque noctem bibere consueverat, tam largiter, ut quotidie vix tres, vel quatuor vini mensuræ sufficerent. Dum vero potui sic indulgit, ciborum appetentia cum viribus languescere coepit, corpus quoque marcescere & sæpius gravativus dextri hypochondrii dolor affligere, facie simul existente plumbea & coloris ad ictericum vergentis. Venæ sectionem natura quasi horruit, eandemque vix semel, vel bis, per totam vitam admiserat, in juventute tamen narium stillicidium expertus fuerat frequentius. Quum demum in convivio plus quam tres potentis Hungarici vini mensuras ingurgitasset, saltando quoque corpus valide exagitasset, domum delatus, summam præcordiorum anxietatem persensit ac paulo post iterato per intervalla sanguinis fusci, ex parte concreti, colluviem evomit ingentem. Injecto ex jure galli, oleo amygdalarum dulcium, nitro & sale aliquoties clystere, ejusdem indolis etiam per alvum secessit liquamen, ut adeo intra viginti quatuor horas plus quam tres sanguinis mensuræ per superius & inferius os exirent. Vocatus ego, porrexi interius mixturam analepticam leniter adstringentem, ex aqua menthæ, melissæ, theriacali, cinnamomi sine vino, succo citri, cum coralliis, speciebus de hyacintho & syrupo papaveris albi. Exterius præcordiorum regionem inungere jussi linimento ex oleo amygdalarum dulcium, nucistæ & camphora, & superimponere facculum herba menthæ, absynthii, floribus rosarum rubrarum, chamomillæ Romanæ plenum, ex vino rubro

coctum. Quibus quidem sensim sanguinis per superna eructatio constitit, sed remansit magna virium dejectio, cum ciborum plenaria inappetentia, successit tandem ventris, cum superiorum tabe, tumor, & intra bimestre spatium mors ipsa.

Epicrisis.

Cruentam vomitionem ex lienē & hepate proficisci, prisca jam fuit *Galenī* sententia, & ego idem aliquoties experientia habeo confirmatum in iis, qui postquam aliquamdiu de dolore hypochondrii dextri pressorio diuturno conquesti, accedente gravi iracundia, motu corporis impensio, vini potentis abusu, aut refrigeratione externa, vomitus, nec non secessus alvinos sanguinolentos incurrerunt, tam largos, ut intra exiguum tempus, ejecta plus quam tres vel quatuor mensuras æquarint. Quare mihi omnino videtur verosimile, non tantum ex brevibus ventriculi vasis, uti in sola vomitione cruoris accidit sine secessu per alvum, verum etiam per hepaticos ductus nimium ampliatos, vel plane disruptos venæ portæ ramulos, ad duodenum percurrere sanguinem ibique effusum, non modo vomitus, sed & dejectiones alvinas sanguinolentas facere. Discant vero etiam ex hac observatione strenui illi spirituosorum inprimis potatores, quam male consulant suis visceribus. Ego enim inde obstructions, indurationes & rupturas in mesaraicis vasis sanguineis & lymphaticis vidi, unde postea ater funestus morbus, cruentus vomitus, hydropes, lentæ & hecticæ febres.

OBSERVATIO VIII.

Percelebatur ingenti terrore foemina trigena-
ria ipso illo tempore quo menstrua purgatio succedebat, & tremens adhuc ingerebat aquæ frigida haustum liberalem, eoque in artuum tremorem validum & inappetentiam ciborum delabebatur. Redeunte menstrua periodo, sanguis quidem comparuit, sed iusto parcius, ac maximæ præcordiorum anxietates, cum nausea, vomitu, extremorum frigore & faciei rubore ipsam infestant. Tertio mense priora redierunt pathemata cuncta, & præterea accessit per triduum vomitus largus sanguinis, vires summo opere prosternens.

*Vomitibus
secessus
cruentus à
mensuum
retentione.*

Epicrisis.

Nihil certe deterius & foeminarum sanitatem magis lædit, quam gravis animi ex iracundia, aut terrore commotio, incidens in illud tempus, quo uterina purgatio succedit. Salutares enim illi motus sucti excretorii sic statim invertuntur, ad interiora vergunt, ac facile postea in habitum transeunt, nisi cito iterum emendentur. Quare si incidit ejusmodi noxa, quam fieri potest citissime succurrendum congruis auxiliis, inter quæ præter venæ sectionem & clysteres demulcentes, quam maxime proficua theiformia infusa, cum iis quæ sanguinis ad exteriora motum rursus revocant, blanda scilicet diaphoretica.

ex labe hepatis, lienis, pancreatis, mesenterii & intestinorum fiunt, ingenerant.

CAPUT IV.

De Hæmorrhoidali fluxu nimio.

THESES PATHOLOGICÆ.

§. I.

Nimius hæmorrhoidum fluxus, quid & qualis.

Non omnis liberalior sanguinis per sedis venas secessus, pro eo, qui præter & extra naturæ legem fit ac nimius est, habendus; sed considerata vasa, corporis habitus, vires, ætas ac temperamentum. Non enim infrequens, quod ea sanguinis effusi quantitas, quæ certis corporibus legitima est ac salutaris, aliis vicissim sit nimia ac perniciofa. Neque etiam omnis solito largior, à mole sanguinis valde aucta eaque paullo impensius commota, fuscitatus hæmorrhoidalis fluxus, censendus est morbosus, sed is demum, qui diutius insistit, qui vires prostermit, quo appetentia, laudabilis alimentorum digestio, nutritio aliæque functiones læduntur, ac metus tandem est, ne via ad graves & chronicas passiones pandatur.

§. II.

Ejusdem signa.

Nimium hæmorrhoidum fluxum antecedunt ut plurimum & comitantur hæc: dorfi & lumborum gravativus prefforiusque dolor, interdum crurum stupor, extimarum partium cum levi horripilatione constrictio, vasorum in iis subsidencia, pulsus durior & constrictior, oris fauciumque siccitas, urina parcior & frequentius pallida, sensus ponderis in podice ad perinæum se extendens, ventriculi imbecillitas, flatulentia in iino ventre, frequens ad mejendum & desidendum stimulus, subinde cum muci albi & biliosi exclusione, ac senioribus magisque imbecillis accidit præterea ani procidentia.

§. III.

Quæ sanguinis excreti qualitas & quantitas.

Sanguis in nimio hoc profluvio ater plerumque in principio excernitur valdeque grumofus, interdum etiam in frustra, quæ palmam manus æquant, coactus è varicosis vasis evacuatur; postea sequitur rubicundus & demum admodum ferofus, quandoque pituitosus, sive mucus albuminis ovi speciem habens. Copia sanguinis excreti non nunquam oppido magna, ac uti *Montanus* notavit, quotidie duas libras, vel uti *Pannarollus* vidit, quotidie libram æquat. Diu etiam sæpe insistit profluvium, idque per integrum mensem, viginti, quin quadraginta quinque dies, factum esse, observatorum fide dignorum testimonio constat.

§. IV.

Ex hæmorrhoidibus internis venis.

Sanguinis per intestinum rectum excretio omnis fit per vasa sic dicta hæmorrhoidalia. Externæ tamen hæmorrhoides rarius fluunt, sed in varices dolorificas facile abeunt, quæ apertæ sanguinem plorant, neque tamen crebro nimium fundunt. At internæ hæmorrhoides, quæ propagines sunt splenici rami, & ad intestini recti anteriorem substantiam, quin ani usque sphincterem porriguntur, una cum arteriis ex mesarica inferiori productis, non modo fluxus effusioris fontem præbent, sed & suppressæ, morbos, qui

§. V.

Ipse fluxus immediate & proxime per arteriolarum ramos sanguine nimium distentos tandemque disruptos contingit. Neque tamen ex toto negandum, è vena etiam hæmorrhoidali, propter læsam, quæ ipsi cum arteria est, anastomofin, multum sanguinis ibi collecti & sæpe vitiosi prodire. Patet facta enim sic via, valvulæ egressum ibi impediens defunt, & si vel maxime essent, varicosa tamen venarum habitudo multum & valvularum situm immutet necesse est.

Arteris maxime; tum etiam venis.

§. VI.

Salutarem illam per sedis venas sanguinis evacuationem, difficiliore per hæmorrhoidales venas, ob situm earundem perpendicularem, progressui & ad portæ venam ipsumque hepar reditui, in acceptis referendam esse, & quando vasorum in recto extrema ab accumulato ibi sanguine nimis diducta aperiuntur tandem atque dehiscunt, contingere, inter omnes constat. Unde qui excedentis etiam & perniciosi hæmorrhoidalis fluxus causam atque originem ab impedito sanguinis per hæmorrhoidales & mesaricas venas ipsumque hepatis viscus motu progressivo repetit, is minime à vero aberrat. Testatum id sane faciunt observationes anatomico-practicæ, quibus confirmatur, illum venæ hæmorrhoidalis ramum, qui juxta coli tractum excurrit ad anum, multo quam quidem secundum naturam esse suevit, ac vel triplo ampliorem, in iis qui hæmorrhoidum excessu perierunt, offendit. Etenim quo major sanguinis per arterias est affluxus & segnior per venas refluxus, eo magis à collecto sero & sanguine fibræ laxantur, vasorum alvei diducuntur & labefactato sic magis magisque partium tono ac robore profluvium diutius durat, facilius etiam recrudescit.

Causa impeditus sanguinis per hæmorrhoidalia & mesarica progressus.

§. VII.

Quæcunque igitur sanguinem ingignunt nimium, ejusdemque per portæ ramos commetum remorantur, aut etiam copiosiore ad loca hæmorrhoidalia affluxum invitant, ad hæmorrhoidalem tam moderatum, quam etiam immoderatum fluxum disponunt. Hinc est, quod qui laxum, spongiosum, obesum, plurimis vasis sanguine turgidis distinctum corporis obtinent habitum, qui lauto fruuntur victu, vitæ genus colunt sedentarium motusque expers, & à majoribus hoc morbo affectis prognati, hæmorrhoidum excessui quam maxime sint obnoxii. Eandem quoque ob causam accidit, quod acriora purgantia, aloëtica crebrius usurpata, calidorum ciborumque aromaticorum, nec non potus vinosi dulcis atque potentis liberalior usus, omiffæ suetæ sanguinis subtractiones, animi affectus, ira potissimum & tristitia diuturna, & corporis quoque, maxime per equitationem, commotio impensior, aliaque id genus plura, ut impetat hic sanguinis fluxus præternaturalis, faciunt.

Ad quem concurrunt plures causæ.

§. VIII.

Ceterum periculosum utique est effusius hoc sanguinis hæmorrhoidalis profluvium. Inde enim vires convelluntur, corpus marcescit, femora gravantur, somnus fit laboriosus, præcordia gravativo sensu anguntur, venter cum borboryg-

Periculosus fluxus nimius.

mis tueret, ac pulsus micat debilis. Urgente postea diutius fluxu, pedes circa malleolos intumescunt, facies item & oculi, color illius fit luridus ac plumbeus, spiritus arctius meat, & postremo in cachexiam, hydropem, lentam & hecticam febrem fit transitus. Ut adeo pateat: ex defectu etiam sanguinis graves subnasci ægri- tudines, ac utique vitæ viriumque thesaurum esse sanguinem, nec quantitate, nec qualitate pec- cantem.

§. IX.

*Ducit ad
hecticam.*

Exitialis hæmorrhoidum excedentium even- tus certius imminet, si tumor hepatis, vel lie- nis, hypochondriorum inflatio, cum alvo adstri- ctiore, incipiens cachexia & hydrops, morbosam hanc sanguinis effusionem induxerunt. Sic enim sub ipsa priora mala ingravescent, obstructions incrementum & obfirmantur, ac vitiosa quoque san- guinis & succorum constitutio augetur. Unde profluvium fit chronicum, tandemque in atro- phiam lentamque hecticam febrem, cum extre- ma virium jactura terminatur.

§. X.

*Et hydro-
pem.*

Frequentioris observationis est, nimias sangui- nis per sedis venas profusiones ducere ad hydro- pem, idque præsertim in phlegmaticis, & qui rarum corporis obtinent habitum. Si autem hy- dropi ex hepate indurato supervenit ejusmodi ex- cessiva hæmorrhagia, certum mox subsequatur æ- mortis præbet indicium.

C U R A T I O.

Variæ & differentis indolis sunt causæ, quæ ad excitandum nimium hæmorrhoidum proflu- vium faciunt atque concurrunt; ideo variæ etiam medendi sunt indicationes, & varia quoque ac diversæ naturæ ad arcendum illud ac persan- dum remedia.

§. I.

*Sanguinis
copia mi-
nuenda.*

Non adeo insolens est, ut in corpore pletho- rico, resitante aliquandiu sueto alias fluxu, à ve- hementiori corporis, vel etiam animi commo- tione, à potu spirituofo liberalius assumto, bal- neo nimis calido, aut medicamento intestinum sanguinis motum nimium intendente, non modo subito & confertim fiat, sed & solito diutius in- sistat sanguinis, cum pulsu magno & vehementi, per hæmorrhoides profusio. Quod ubi accidit, primo omnium divertendus ac derivandus san- guinis impetus, eumque in finem sanguinis mis- sio in brachio, vel brachiorum in liquorem aquo- so-vinosum tepidum immissio, apprime ex usu est. Dein usurpanda ea, quæ excedentem inte- stinum partium in sanguine sulphurearum mo- tum componunt, diluentia maxime & refrige- rantia, potus aquæ frigida, præsertim chalybea- tæ, vel mineralis temperata, feri lactis cum suc- co citri coacti, aqua plantaginis, fragorum, ace- tosa, acetosellæ, decoctum cornu cervi citra- tum, tinctura rosarum cum spiritu vitrioli præ- parata, & confecta ex his cum syrupo rosarum julapia. Eundem in finem præstans est virtus nitroforum, nitri tantum purificati, vel artificia- lis, ex spiritu nitri & sale tartari parati, vel in pulvere cum absorbentibus & roborantibus, vel etiam in potu dati. Porro operam locant egre- giam, quæ impetuosum solidorum & fluidorum motum placant simulque dolores & spasmos le-

*Ejusdem
orgasmi
temperan-
das.*

vant, anodyna, inter quæ spectatæ virtutis est liquor noster anodynus mineralis, spiritus etiam nitri dulcis rite paratus, aqua item florum chamo- millæ vulgaris & summitatum millefolii, nec non ex papaveraceis, semen papaveris albi, syrupus papaveris utriusque, aqua & extractum papave- ris, aut si fortioribus utendum, semen hyoscy- ami albi.

§. II.

Quando cum virium jactura & nobiliorum functionum læsione effusior fluxus diu persistit, incipiensque viscerum labes subest, & magis se- rosi aquei, quam consistentis fibrosi sanguinis copia delinquit, conferunt quam maxime ea, quæ succos vitiosos ac biliosos clementer paul- latimque per alvum educunt, simul atque humo- rum motum à recto intestino ad tunicas & glan- dulas reliquorum intestinorum alliciunt, eoque nomine merentur laudem rhabarbarina, cum passulis minoribus & tamarindis, vel quod idem, cum cremore tartari, si corpus est biliosum, in potione elæosaccharo citri condita. Tum quo- que temperatiora diaphoretica, corrigendo & expellendo acres humores, officium faciunt op- portunum, ibi maxime, ubi scorbutici, vel pur- puracei aliquid, aut alius exanthematicæ mate- riæ, sanguinis & feri contextui altius inhæret. Horum in numero sunt cornu cervi ustum, vel, uti vocant, philosophice præparatum, unicornu fossile, diaphoreticum antimonium, acetum vi- ni cum lapidibus cancrorum mixtum, aqua ga- legæ, florum sambuci, cardui benedicti, theria- calis, simplex mistura, diascordium Fracastorii, quæ in potionem lege artis possunt redigi. Nec proleteria virtus est liquoris anodynus mineralis, cum quarta liquoris bezoardici Buffiani parte nupti; infusi item theiformis ex millefolio, ve- ronica, pilosella aliisque concinnati, & cum dis- positione in lecto aut conclavi ad blandum su- dorem, poti. Atque etiam non possumus non hoc loco merito commendare refractam cam- phoræ dosin, ad granum dimidium, præsertim quando nitrosis & bezoardicis pulveribus com- miscetur. Hac enim ratione acris & caustica ma- teria, quæ sæpe spasmodorum æqualem sanguinis commieaturn turbantium & hæmorrhagiam lar- gam inducentium causa est, obtunditur & foras ejicitur, simul adstringentium & anodynorum vis, tantisper ne noceat, refrenatur. Itaque non ineptus censendus ille veterum mos, quo cam- phoram præcipuis ad sistendas etiam hæmorrha- gias medicinis, commiscuerunt, utut exigua ad- modum dosi, cujus generis sunt species de hya- cintho, diatrion fantali, diatrion Abbatis, tro- chisci de carabe, sperniola Crollii, nec non fa- migeratissimus *Heurnii* ad sistendum sanguinis fluxum pulvis.

*Humores
impuri per
alvum.*

*Et cutem
evacuandi.*

§. III.

In graviore illo & difficillimæ medicationis fluxu, qui obstructione, vel infarctu moleque adaucta visceris cujusdam, hepatis, lienis, aut in foeminis uteri, nititur; eligenda, si medicinæ adhuc locus, ejusmodi auxilia, quæ dum obstru- ctionum repagula solvunt, humores non nimium commovent. Inter hæc à priscis jam temporibus usu & securitate celebres pilulæ de bdellio Mesue, à *Forcsto*, *Solenandro* & *Riverio* lauda- tæ. Nec contemnendæ pilulæ Becheriana me- thodo ex amaris extractis & gummatibus tem- peratioribus concinnatæ, ita tamen ut aloes in lo- cum,

*Obstructio-
nes referan-
da.*

cum, rhabarbari extractum, largius paullo commixtum surrogetur, si hisce nitrosi pulveres pro re nata interponantur. Nil vero ad expedienda obstructa aqueis & diluentibus est præstabilius. Unde quam optime in usum trahuntur minerales aquæ, subtilitate atque temperie nobiles, quarum classem ducunt Antonianæ, Wildungenfes & Selteranæ, vel cum, vel sine lacte potæ. Et certe prudens ac moderatus harum aquarum, ad aliquot hebdomades, sub debito regimine & interpositis pilulis dictis, nec non elixirii balsamici temperati martialis pharmaci mixtura acuatî usu continuatus potus, palmam præripit reliquis cunctis. *Montanus* præterea in *consiliis*, jus pulli copiose tribus ante prandium horis bibere jubet, eoque plures hoc malo se liberasse testatur. Majoris tamen adhuc efficaciam erit, si jusculo incoquantur acetosæ, cichorii & scorzonæræ radices, aut etiam medicamentum martiale temperatum, cujus generis est illa cum pomorum succo parata martis tinctura, cum extracto cascarillæ aquoso, primo mane sumatur, ac postea supra laudatum jus copiose bibatur.

§. IV.

Atonia re-
Et inuclini
firmanda.

Demum inter præcipuas copiosi sanguinis affluxus & effluxus causas referenda merito recti intestini, ejus membranarum & vasorum atonia. Quare adhibenda etiam utique ea, quæ relaxatis nimium & à tono dejectis partibus fœnerant iterum robur. Interius laude sua hoc nomine non defraudandæ sunt species de hyacintho, trochisci de carabe Mesues. Ex martialibus est maxime ipse hæmatites in subtilissimum pollinem redactus, tinctura martis Zvvólferi, crocus martis antimonialis subtilissimus cum conserva rosarum antiqua exhibitus, tinctura item florum salis ammoniaci martialium, cum rectificatissimo vini spiritu parata & cum æquali portione elixirii amari temperati mixta. Inter resinosa & balsamica nobilis est virtus succini præparati vel alcalisati, extracti cascarillæ & fantali rubri. Et hæc omnia cum prudentia convenienti ordine ac dosi usurpata, fructu non destituuntur, si modo malum recipit adhuc sanationem.

§. V.

Adhibenda
externa.

Adhibenda præterea etiam sunt topica constringentia, ad obtinendum effectum speratum. Si igitur venæ in ani lympo varicosæ, citra alvi depositionem, magnam sanguinis, non sine syncope, vel mortis metu, fundunt copiam, colcothar vitrioli, vel etiam lupi crepitum, sine noxâ admoveere licet. Tanto magis, si leniora prius adhibita profecerunt nihil, cujus generis est decoctum ex floribus balaustiorum, rosarum rubrarum, myrrha, plantagine, malicorio & chinæ cortice cum vino rubro præparatum & cum spongia recto intestino post dejectionem alvinam applicatum. Ubi autem impetus sanguinis effluentis jamjam compositus, ossi sacro cum perinæo & pube apponendum crebrius epithema ex herba menthæ, sumach, floribus rosarum rubrarum, hyperici, rasura ligni fantali rubri, mastiche, cardamomo & chaccarillæ cortice, in vino rubro coctis. Neque minus ad firmandum intestini recti tonum ex usu est, idem hoc decoctum ano injicere syringa.

CAUTELÆ ET OBSERVATIONES CLINICÆ.

§. I.

In medicatione effusi hæmorrhoidum ac morbofi profluvii hæc servanda methodus: ut præmittatur sanguinis missio & primarum viarum cum recenti cassia, vel rhabarbaro electo in decocto repurgatio; postea vero roborantia & leniter adstringentia, in & externa, tutius adhibere licet. Ex nimia enim sanguinis profusione tanta oritur imbecillitas, ut medicamenta efficaciora rarius felici cum successu applicare sit integrum. Generalis quippe medendi est regula: quo major naturæ est imbecillitas, eo leniora & diætetica magis remedia, minus vero validiora pharmaceutica usurpare decet.

Ordo in me-
dicatione
servandus.

§. II.

Nitrosa, acidula & refrigerantia, uti in principio, & ubi ingens æstus & orgasmus sanguinis præsto est, usurpantur cum euphoria: ita minus tutus eorundem est usus, sanguine cum viribus jam nimium profuso & ventriculo debilitato, præsertim, ubi ex viscerum obstructione fluxus est symptomaticus.

Cautelæ
circa refri-
gerantia.

§. III.

De phlebotomiæ usu tenendum, eandem non facile in ægro absente esse adornandam; eo quod multum refert, ut justa & conveniens sanguinis quantitas emittatur. Etenim in principio, si corpus sanguine valde turgit, major ipsius, ad derivandum, è brachii vena, copia, poterit subtrahi. At ubi jam multum cruoris sponte effusum, parcior & partitis potius vicibus, cum prudenti & cauta ratione, instituenda est missio.

Venæ se-
ctionem.

§. IV.

Optime jam monuit *Hippocrates*: hæmorrhoidibus nimium fluentibus, oclusis reliquis venis, unam servandam esse apertam, ne hydropis, vel tabis fiat metus, facta scilicet sanguinis ad pulmones, vel hepar, palindrome. Utur vero effatum hoc proxime intelligendum sit de externis venis nimium fundentibus, & per unctionem, vel siptica oclusis; recte tamen etiam applicari potest, ubi ex internis, uti in nostris solenne est regionibus, effusius sanguinis fit profluvium. Tanto magis, quia has occludere, sive potius fluxum sistere, non ita promptum est ac expeditum, nec nisi per validiora interna perficiendum, quod, si non perite & valde circumspicte adornatur, damnum redundat, effato *Hippocratis*, certissime.

Circa fluxus
occlusionem.

§. V.

Quæ quum ita sint, valide adstringentium usus utique sit cautissimus. Neque enim in principio, multo minus, quando vires cum sanguine jam exhaustæ, utilem locant operam, ac potius in corporibus imbecillis & exquisitis sentientis naturæ, spasmodica pathemata, convulsiva, animi deliquia, summas præcordiorum anxietates, cum tremore & palpitatione cordis concitant. Quod si itaque fluxum compescitibus uti necesse, consultum est, non vi & magnis dosibus id perficere, ne noxam inferant. Oportet quoque subjungere diluentia, temperantia & leniora laxantia, inter quæ præstantissimum est afini-

Adstringentium
usum.

asininum lac vel serum lactis dulce. Potissimum vero præstat martialia liquida cum ipsis diluentibus assumere.

§. VI.

*Cohibitus
quibus re-
vocandus.*

Quando tamen sanguinis ex hæmorrhoidalibus locis fluxum subito sublatum summæ præcordiorum anxietates, inflationes, cum inquietudine & angustia excipiunt; revocandus is est lenioribus elicentibus & laxantibus, clysteribus quoque emollientibus ac suppositoriis.

§. VII.

*Anodyno-
rum cautela.*

Pari ratione cum hypnoticis, opiatis & narcoticis mercandum est cautissime, quippe quæ, tanto magis intempestive data, insaniam plane inducere apta sunt. Ex optimis, si locus, est illa massa pilularum, à Wildegansio nomen gerens, quæ etiam cum fructu exhibetur, quando atrox dolor & spasmus sub prima lumborum vertebra, nimiam sanguinis effusionem movet, eaque propter est placandus.

§. VIII.

*Qua in vi-
ctu servan-
da.*

Si ullo in morbo exquisita vitæ victusque ratione opus est; in hoc certe id quam maxime necessarium, eaque neglecta, auxiliis, vel præstantissimis, obtinendum nihil. Quocirca ægris commendanda serio abstinencia à fructibus horæis, leguminibus, acetariis, lacticiis, carnibus vetustis, induratis fumo atque salitis, ab aromatibus, allio, cepis, vino potenti spirituosisque cunctis. Dissuadendæ etiam venationes, omnes impensiores corporis commotiones, per equitationem maxime & vecturam, in locis præsertim lapidosi & inæqualibus, & placidum potius motus genus, supernam magis, quam inferiorem corporis regionem afficiens, sub cælo amœno, sereno, concedendum. Nihil vero sic laborantibus perniciosius animi commotione, ira inprimis ac terrore, unde occasio ad eas studiose præscindenda omnis. Neque minus multum interest, ut congruo potu utatur hæmorrhoidibus effusis obnoxius. Nos quidem potum aquæ, vel feri lactis, item decoctum fantali rubri cum mastiche & cinnamomo, nec non julepos, ex decocto cornu cervi, syrupo acetositis citri, additis aliquot guttulis olei de cedro, vel unciis aliquot aquæ florum citri, maxime commendare solemus, tum præservandi, tum curandi scopo.

§. IX.

*Præserva-
tio.*

Composito morboso hæmorrhoidum profluvio, ne iterum erumpat, danda est opera. Obtinendum id exacta vivendi, modo commendata, ratione, sanguinis missione, ter, vel quater quotannis instituta, primæ regionis quovis mense per epicrasin repurgatione, ac dextro aquarum mineralium, vel solo lactis chalybeati usu. Sedulo denique cuncta ex alimentis & laxantibus vitanda, quæ dolorem excitant, quia hæc sequitur desidendi cupiditas.

ENARRATIONES MORBORUM.

OBSERVATIO I.

*Hæmor-
rhoidum
excessus le-
vissimus pest
Pyrmonta-
nas.*

Celeberrimi nominis vir, corpore plenus atque robustus, sexagesimum tertium ætatis annum egressus, à multis jam annis liberale sanguinis per venas sedis passus est stillicidium, fere menstruum, eodemque rite succedente, valetudinis

incommoda sensit nulla. Sed posteaquam diuturno affectus fuerat cum tacita iracundia moerore, restitit hæmorrhoidum fluxus, & facies antea florida, facta flavescentia & flaccida, cum oculorum intumescencia. Ob metum igitur cachexiæ Pyrmontanas adiit acidulas easdemque ingenti copia hausit, neque tamen in, neque post earum usum, conveniens coluit in vita victusque regimen. Inde effusissimus sanguinis puri per anum sequutus est fluxus, non compescibilis, licet nitrosis pulveribus Becherianisque pilulis uteretur. Pedes potius facti œdematosi, venter intumuit, vires collapsæ, anhelitus factus difficilis, superiora contabuerunt tandemque excepit mors.

Epicrisis.

Nihil certe ex animi etiam commotionibus hæmorrhoidariis est perniciosius, quam angor & moestitia diutius extracta, quæ vires, tonum ac robur partium labefactando, efficiunt primum stagnationes, quæ postea obfirmando in abdominis visceribus infarctus, excessivas inducunt hæmorrhagias atque funestas. Pyrmontanæ autem acidulæ, si quis illis uti velit cum fructu, exquisitum postulant regimen, tam sub, quam aliquot hebdomades post usum, tanto magis, si potans jam tum viscerum affectus est labe. Quod quia in nostro non factum, sed potus pro lubitu, sine observatione debita institutus, malum exacerbatum & ad exitum tristem tractum esse non est mirandum, nec ea propter dextro usui quicquam detrahendum.

OBSERVATIO II.

Judæus annorum quinquaginta, natus patre hæmorrhoidario, & ipse à prima statim ætate sanguinis stillicidiis, in variolarum quidem & morbillorum morbo è naribus, ac postea hæmoptysi obnoxius, quadragesimo anno cœpit primum pati hæmorrhoidalem fluxum, qui postea singulis fere mensibus, ac non nunquam sub fortiori in itinere maxime corporis commotione, rediit effusior. Quod quum sine sanitatis detrimento contingeret, tulit patienter; sed quum aliquot abhinc annis insisteret profluvium diutius, idque largum, inde admodum fuit debilitatus, & appetentia cum digestionem labefactata. Quare ut auxilium quæreretur fuit coactus ad moderandum fluxum. Ex variis autem multisque remediis obtinuit nullum. Optimum tamen tulit antimonii tinctura, ex sale tartari & regulo antimonii parata, & non tam acris, quam quæ cum nitro conficitur, in cujus uncia soluta camphoræ drachma dimidia, & mane vesperique cum aquæ frigidæ haustu sumta ad guttas viginti.

*Hæmor-
rhoides ni-
mia cam-
phorato
composita.*

Epicrisis.

Perperam utique putant præjudiciis toti inhærentes & parum periti, camphoram nimium concitare sanguinis æstuosum orgasimum eaque propter esse reformidandam, multo minus in immodicis sanguinis fluxionibus in usum trahendam. Alia enim omnino docet experientia, quin camphora, quandoque etiam in majori paullo dosi, ad scrupulum unum sumta, plus refrigerii sentitur, quam incalescentiæ. Veteres sane non adeo alieni fuerunt à camphoræ usu, sed eandem præstantissimarum medicinarum compositionibus commiscuerunt multis, ut quidem ex Augu-
stana

stana patet pharmacopœa. Ne dicam, *Riverium* & nos quoque eadem in inflammationibus, in malignis, magno cum emolumento in dosi non exigua fuisse usos. Atque etiam in nimis hæmorrhagiis, roborans simul atque anodyna camphoræ virtus utilitatis est maximæ, imprimis si aliis medicamentis sociatur & parva dosi exhibetur. Cum antimonii potissimum tinctura mixta camphora, diuresin, neque minus diaphoresin augendo, ac imbecilles partes roborando, sanguinis & feri affluxum à recto intestino divertit aliorsum, ac ob id eximie prodest.

OBSERVATIO III.

Hæmorrhoides nimie ex terrore in virgine curata.

Virgo novem ac decem annos habens, venæ sectionem nunquam passa, sed nimio mensium fluxui subinde obnoxia, cruentas experta est sedes, sine molestia tamen atque dolore, idque per dies aliquot. At cum gravi percieretur iracundia, ingentem sanguinis puri ac sinceri alvo exclusit copiam, non sine summa virium jactura. Substitit tamen rursus effusus hoc profluvium, quin hausto frigido potu, fluxus restitit penitus. Sed inde ingentes incurrit præcordiorum anxietates & constrictiones, quasi convelleretur cor ipsum, *als wenns ihr das Hertz abstoßen wolte*, extrema facta frigida, facies rubicunda, venæ in capite inflatæ, arteriæ pulsarunt valide ac celeriter cum quadam duritie. Datus ipsi pulvis ex diaphoretico antimonio, cancrorum lapidibus, nitro & cinnabari, cum infuso summitatum millefolii, data quoque simplex mixtura cum croco, & habuit melius.

Epicrisis.

Fœminas etiam hæmorrhoides pati, non novum est; neque etiam rarum, iræ affectum fluxum earum reddere immoderatum; id vero non adeo obvium, solum frigidum haustum sub ipso fluxu tam gravia concitare posse pathemata. At frigus nervosis partibus spasmo jamjam affectis, uti fit sub iracundia, est inimicissimum, & intensiores spasticas constrictiones augendo, tam gravia pathemata inducere valet utique.

OBSERVATIO IV.

Nimia hæmorrhoides sanata.

Præfectus militum quadragenario major, natura sanguineus atque robustus, à multis jam annis expertus fuerat hæmorrhoidum fluxum cum euphoria. Sed quum à sueto vini Rhenani potu transfret ad vini Gallici Pontack potum, elapso aliquot mensium spatio, hæmorrhoides præter morem sunt retentæ, & successerunt dolores atrocissimi in lumbis & abdomine, cum virium dejectione, inappetentia, vigilia pulsuque celeri & frequenti. Exhibita vero ter laxante portione ex tamarindis, rhabarbaro & passulis minoribus, non modo soluta est alvus, sed & ingens nigri & congrumati sanguinis copia excreta, summo cum levamine. Diutius tamen quam par erat perdurabat fluxus sanguinolentus; quo quia vires nimium atterebantur, datum est electuarium ex rosarum conserva, speciebus de hyacintho, succino, croco martis tenui & granatorum syrupo, cujus usu ad hebdomadem continuato, ad sanitatem traductus est æger.

Epicrisis.

Vina illa Gallica coloris saturate rubicundi, uti est Pontack atque Vin de Gray, si sine aqua & liberaliter bibuntur, propter adstrictionem quam alvo præstant, utilia sunt minime, sed experientia teste, admodum noxia. Unde omnibus etiam modis in periodicis & criticis sanguinis evacuationibus sunt vitanda, atque etiam in ipsis excedentibus hæmorrhagiis provide adhibenda. In omnibus autem hæmorrhoidalibus affectibus, si ve sanguis fuerit suppressus, si ve fluxerit immoderatus, præstantius non datur atque accomodatius purgans, quam quod nostro datum, quo diuturnum etiam fluxum, à copia serosi ac biliosi sanguinis oriundum, feliciter sanatum fuisse, ego vidi multoties.

OBSERVATIO V.

Ante triginta circiter annos Secretarius Regiminis quinquagenarius, corpore spongiosus & carnosus, ob assiduos muneris labores vitæ sedentariæ deditus, ab aliquot jam annis anxiiis cardialgicis doloribus & circa præcordia constrictionibus, noctu præsertim, subinde fuerat afflictus, alvi quoque ordinario erat strictioris, flatulentis ac ructibus obnoxius, dolores quoque lumbarem sæpius obsidebant regionem, urina cum difficultate & sæpe arenosa procedente. Hinc calculum subesse renalem judicarunt & varia ad eum proposuerunt amici domestica remedia, inter quæ etiam fuit spiritus baccarum juniperi, cum earum rob probe subactus, saccharoque edulcoratus. Ab horum vero usu potius ingravescebant symptomata. Mox enim truculentis spasmis & doloribus inflativis circa hypochondria & abdomen torquebatur, cum partium extremarum frigore & inquietudine, qui emollientes & discutiendi facultate pollentes clysteres etiam eludebant. Tandem accedente cum pulsu celeritate internarum partium æstu, mitescebant quidem dolores, remansit tamen inflatum abdomen, quod nec tactum manus tolerare poterat ob dolorem, appetentia cum viribus, persistente per quatuor septimanas affectu, concidebant. Celebris tum Medicus vocatus, causam horum symptomatum hepatis judicans obstructionem, pilulas Becherianas & mercurii dulcis aliquot doses præbuit. Sed his omnibus irritis, præter omnem expectationem, alvi fluxus, sine torminibus tamen, foetidæ corruptæ ex atro-gryseæ materiæ erumpebat, quem animi intercurrentis defectio cum extrema virium jactura tandemque mors excipiebat.

Hæmorrhoides nimie in hypochondriaco funestæ.

Epicrisis.

Ex vita sedentaria cum arduis mentis laboribus, ob difficiliorem redundantis in venis mesaraicis regressum per hepar, hypochondriaca pathemata, si ve spasmodico - flatulenta, quæ calidorum & sanguinem exagitantium immodico usu exacerbantur, accedere, non novum est. Hæc autem tempestiva venæ sectione corporisque motu & exercitatione omnino posse averti, experientia confirmat, qua etiam in confesso est, dolores hypochondriacorum diutius perdurantes demum fluxu sanguinis per venas sedales corrupti hæmorrhoidali solvi salutariter. Notavit id jam *Solenander*, & memoratu digna utique sunt ipsius de hoc observato verba, quæ *conf. VII. Sect. II. p.*

121. sic habent : *Observavimus hypochondriacos aliquot, quibus istæ corporis regiones, & potissimum sinistrum hypochondrium, multo nigro succo, tanquam atro jure distentæ ac repletæ erant. Novimus, quibus similis ex iis locis humor supra infraque abscessit, quod licet cum periculo conjunctum esset; tamen evasisse plures scio, & honesto viro, Johanni Philippo Sleidano, fratri, bis illud intra annum accidisse memini, & ante mensem honesta & nobilis matrona de Luttersdorff, istius atri succi, & quod mirum est fere insipidi, è dextro hypochondrio, ad libras sex, vel septem, vomitu rejecit, sed hi plerumque ascite moriuntur. Alia vero ratio & difficilior evadendi modus est, quando pervicacibus eusmodi in hypochondriacis doloribus assidua lentaque febris jungitur, quæ ab interna visceris corruptione suborta depascens vires, nunquam non periculosa est.*

OBSERVATIO VI.

Effusa hæmorrhoides soporem discutientes.

Non ita pridem generosissima in comitatu Mansfeldensi foemina vidua, quinquagesimum annum egressa me accivit, quæ ob lautam & motus expertem vitæ rationem, sanguine, succis & pinguedine plena, semel tamen tantum ab eo tempore quo menses prorsus cessarunt admisit venæ sectionem, & ante octo annos cum mensium fluxu simul apertas fluentes hæmorrhoides passa fuit. Hæc diu jam de lassitudine corporis & viribus languentibus conquesta, incidit circa æquinoctium autumnale in gravem morbum soporosum, adeo ut excitari omni sensu penitus privata nullo modo ab eo potuerit. Medicus hujus urbis famigeratus in auxilium vocatus, venam in pede secandam suasit, & postea potum fontanæ frigida præbuit sat largiter, ita ut singulis horis uncias aliquot caperet. Absumtis sic intra biduum quinque vel sex mensuris, post clysterem stimulantem admissum, ingens sanguinis copia, primum crassi, postea tenuioris, per alvum exiit, ita ut intra viginti quatuor horas, plus quam quinque mensuræ profluxerint. Ex eo illico ægra rediit ad se, sopor discussus, collectæ sensim paulatimque vires, datisque analepticis leniter adstringentibus, injecto etiam clystere ex pura aqua frigida, pauca tamen, confecto, belle convaluit.

Epicrisis.

In aqua communi pura fontana & pluviali, eaque frigida, summum adversus plures & magnos morbos repositum esse præsidium, antiqui Medicorum Græcorum & Arabum satis agnoverunt; recentiorum vero plurimi, qui vulgaria & simpliciaspernere & exotica pretiosa magna arte parata tantum in usum vocare solent, tam præstantissimam medicinam, quæ fere universalis est, si cautus & peritus Medicus ea uti scit, huc usque & neglexerunt & propemodum rejecerunt. Ego vero ante viginti jam annos scripsi dissertationem *de aqua medicina universali*, nec non *de simplicissimo doloris podagrici remedio* & haud ita pridem *de salubritate frigidi potus*; quin propria experientia, & Medici, qui heic in curationibus suis aqua frigida utitur fere semper, convictus testor, quod potus aquæ frigida generosum & valde efficax sit remedium, quo nimia redundantis & ebullientis sanguinis expansio, motibus vitalibus nunquam non adversa, efficaciter componitur, humores visceris diluuntur & acres mordaces demulcentur, & quod præcipuum, ipso frigore,

partibus à tono & robore defectis, conveniens elastica systaltica virtus restituitur; adeo ut magnum roborans sit remedium. In nostra ægro tante valde plethorica, præmissa venæ sectione in pede, potus aquæ frigida immodicam sanguinis ebullientis & vasa distendentis, quæ etiam causam morbi soporosi dedit, vim compressit, & robur systalticum adducendo ac firmando fibras, sanguinis ad venas ani extremas majorem appulsus earumque apertionem concitavit. Qua sanguinis effusione, revulsio magna feri stagnantis à capite facta & tota symptomatum depulsa fuit syndrome. Ex quo intelligitur: arte etiam inductum, immoderatum alias & nimium hæmorrhoidum fluxum, sub certis, quod bene notandum, circumstantiis, corporis & causæ morbificæ remedium saluberrimum quandoque esse posse.

CAPUT V.

De uteri hæmorrhagia immoderata.

THESES PATHOLOGICÆ.

§. I.

Non omnis larga sanguinis per uterum fluxio, quæ in foeminis sanguineis subinde ob nimiam redundantiam accidit, ac si nimia & noxia esset, censenda, sed ea demum, quæ virium imbecillitate stipatur, quam postea aliæ functionum læsiones conspicuæ, ut inappetentia, cruditas ex mala digestionem, gravativus circa ventriculi regionem sensus, foedus faciei color, pulsus languidus & frequens cum lento æstu, pedum oedematosus tumor, turbatus & minus reficiens somnus, insequuntur.

Hæmorrhagia uteri quædā qualis.

§. II.

Hæc nimia sanguinis ex utero effusio, ratione temporis quo impetit multum variat. Nimirum quandoque statim quo erumpere solent menses tempore, sanguis copiose & cum impetu effertur; quandoque extra illam lunarem periodum, bis vel pluries in mense, redit fluxus; quandoque ipsa menstrua purgatio solito diutius per complures dies liberaliter succedit. Quæ etiam parturientibus & abortientibus haud raro accidit hæmorrhagia, aliquando ante, aliquando post abortum vel partum, erumpit.

Differt ratione temporis.

§. III.

Sanguis qui utero sic effunditur, tam ratione quantitatis, quam qualitatis, item odoris, & coloris, à medico probe debet considerari. Interdum cum impetu exit tenuis & satis floridus sanguis, quem vulgo dicunt *das hertz-Geblüt*, idque frequentius in abortu, vel post eum, à retentis secundinarum frustis, quibus orificia vasorum aperta tenentur. Quandoque cum sanguine copioso coagulata & carnem referentes massæ, ovi minoris magnitudine, excluduntur, quod fit, ubi uterina purgatio ad duos vel tres menses substitit. Non nunquam valde grumofus, ater & coagulatus sanguis nigricans erumpit, idque subinde primis puerperii diebus, in gracilioribus & sanguine plenis. In cachecticis sique diutius jam duravit profluvium, sanguis effunditur aut valde aquosus & tenuis, aut mucidus. In scor-

Quantitas & qualitas sanguinis.

buticis

buticis corruptus, foetidus cum acrimonia & dolore. Frequentius etiam, præsertim in junioribus, vel quæ nondum pepererunt, immoderatam sanguinis vacuationem, fluor albus, sive stillicidium materiæ mucidæ albicantis impuræ sequitur.

§. IV.

*Causa sanguinis pro-
gressus per
uterum im-
peditus.*

Causa immoderatæ & noxiæ ejusmodi hæmorrhagiæ, in copiosiori & impetuosiori sanguinis ad uterum per arterias affluxu, & inæquali ac impedito per venas refluxu quærenda. Hoc enim si contingit à sanguinis turbato motu, vasa uterina nimium distenta, aut relaxata, dehiscunt tandem, vel disrumpuntur, aut eroduntur, ut sanguis liberaliter effluat.

§. V.

*In plethori-
cis.*

Sola sæpius plethora adeo exuberat, ut non solum vasa uterina diducat, sed & interdum plane disrumpat. Id vero his fere accidit, quibus menses diu suppressi, postea confertim ac citatius erumpunt; nec non iis, quibus abortus, aut veri aut spurii foetus, quavis ex causa contingunt. A partu quoque laborioso evenit, vel difficili, quum scilicet vel grandior foetus, vel oblique situs, nimio conatu excludendus, sub quo vasa vel rumpuntur, vel nimis dehiscunt.

§. VI.

*manen-
tibus & jam
mansis-
sionibus.*

Ordinario ferè contingit, foeminas circa illud tempus, quo menstrua purgatio sua sponte desinit, ante annum videlicet quinquagesimum, inordinatam diuturnam admodum, neque omnis periculi expertem, ex utero sanguinis fluxionem pati, qua cessante, cessat etiam peritus dein per uterum sanguinis menstrualis excretio. Interdum etiam, quod aliquoties observavimus, accidit, foeminas annosiores, sexagenarias circiter, subito & ex improvviso, immensam cum malo odore sanguinis utero excernere copiam, quæ, juncta tandem febre lenta, interierunt.

§. VII.

*Dum per
spasmos
cum
congeritur,
ut patet ex
signis.*

Immoderatus sanguinis ex utero profluvium, eo tempore, quo incipit, vel per intervalla revertitur, ut plurimum præcedunt & comitantur hæc: tensio & inflatio hypochondriorum, circa lumbos dolor gravativus & pressorius, quandoque cum sensu refrigerii junctus, extremarum partium refrigeratio, vasorum detumescencia, color faciei pallidus, pulsus citatior, cum interiorum ardore, alvi strictura, urinæ parcius fluxus. Hæc omnia autem satis abundeque testantur, non à causa solum passiva, id est, nimia debilitate & laxitate uteri, sed ab activa etiam, spasmodicis partium vasculorum & nervearum stricturis, sanguinem ad uterum nimium urgentibus, hoc vitium proficisci. Unde etiam ratio repetenda, quod foemina hypochondriacæ, hystericae, & quæ tenerioris sunt ad animi commotiones proclivioris naturæ, hoc molesto malo frequentius afficiantur.

§. VIII.

*Agensis
in utero
carnosus
massis.*

Nil frequentius est, quam si in puerperio salutare negligitur regimen, neque in eo, neque post illud, uterus à sordibus probe expurgatur, elapso aliquot mensium spatio, impetuosæ hæmorrhagiæ cum animi sæpius deliquio subsequantur, quæ etiam per intervalla repetunt, & non prius desinunt, quam ejecta foras una vel altera massa carnosæ, pugni interdum magnitudine, quam femel-

Frid. Hoffmanni Oper. Tom. II.

læ molam dicunt. Et hæ massæ procul dubio ex laciniis placentæ relictis, & succo nutritio in iis per calorem condensato, non secus ac carnes luxuriantes in faucibus partibus, gignuntur. Dum vero postea mole sua comprimunt venas uteri, sanguinis circuitum per eas retardant & ad impetum ejusmodi hæmorrhagicos ac motus uteri spasticos, quibus illæ concretiones carnosæ eliduntur, causam præbent sufficientem.

§. IX.

Si corpus est cacochymicum, pravus succis plenum; si scorbutica, vel etiam venerea lue infectum; ubi viscera non sunt integra, hepar, lien, aut vasa mesaraica sanguine crasso infarcta, non caret malum periculo, sed multum negotii medico facessit. Etenim sub ejusmodi fluxu, succorum labes & cachexia semper increfcit; eo quod quo plus debilitantur vires, eo minus ventriculus bene appetit & digerit, eo magis crudi succi, qui difficilius in sanguinis boni & liquidi cerebri substantiam transeunt, generantur, eoque minus dein per sueta & congrua emunctoria fit recrementorum excretio.

§. X.

Vita valde periclitatur in iis, quæ ante partum, foetu existente mortuo, magnum sanguinis partuntur profluvium. Nisi enim extraordinario naturæ robore & præsentaneo medici auxilio foetus excludatur, vel operatione chirurgica opportune eximatur, mortem sequi certissimum est. Periculosæ etiam eæ uteri hæmorrhagiæ sunt, quæ ex ruptis ob secundinam cum violentia extractam vasis oriuntur, nec non quando frustula retenta, postea, in deformes massas, molas dictas, con- crescunt, mensium fluxum semper vitiant & nimium reddunt.

*Periculo-
sa est uteri
hæmorrhæ-
gia.*

*Maximè in
parturien-
tibus & ab-
ortientibus.*

C U R A T I O.

§. I.

In medicatione dextre adornanda, omnino medicus ad varii generis causas & alias atque alias circumstantias & symptomata debet respicere, quo iis removendis idonea & efficacia convenienti tempore opponere possit remedia. Igitur, ubi nimia sanguinis redundantia & quidem à retardato sanguinis menstrui consueto fluxu immoderationis hæmorrhagiæ causa est, non melius ac certius ad præservationem ejusmodi mali suppetit præsidium, quam venæ sectio, aliquot dies ante suctum ordinarii fluxus tempus, in partibus superioribus instituta, sufficientem sanguinis copiam, ad sex vel octo uncias, evacuando. Rectius adhuc, si uterinæ purgationis per aliquot menses suppressio impetuosæ hæmorrhagiæ causa est, tempestiva sanguinis missione in pede, hæc ipsa avertitur commodissime. Ubi vero jam multum sanguinis profluxit, ad ejus impetum divertendum & ad superiora loca revocandum, parcius quantitas est emittenda. Et certe quam præstans sit in venæ sectione præsidium adversus hunc morbum, conceptis verbis testatur *Hollerius in comment. ad aphor. L. Hippocr. Sect. V. vidimus*, inquiens, quæ sanguine multo à venâ detracta convalescerunt, quum nullis aliis remediis fluxus sanguinis reprimi posset.

*Si sanguis
abundat
mittendus.*

§. II.

Quando nimius ebullientis sanguinis orgasmus fovet & auget hoc malum, ob motum

*Si in orgas-
mo consistit
curare.*

V

inte-

*refrigeran-
tia & di-
luentia
danda.*

intestinum partium sulphurearum concitatio-
rem, diluentia, humectantia, refrigerantia auxilio sunt
efficacissimo. Atque inter hæc excellit quam ma-
xime sola aqua frigida fontana, modo satis sit pu-
ra & subtilis, aut quæ melior adhuc pluvialis,
probe conservata & putredinis expers, vel ad-
mixta nitri decenti quantitate alterata, vel cum
spiritu vitrioli & syrupo papaveris rhœados in
julapii formam redacta, & sufficienti copia pota.
Etenim simplex hæc medicina, & diluendo spif-
fos humores, & acres temperando, nimium-
que æstum restinguendo, fibras quoque relaxa-
tas firmando, plus certe præstat, quam tantopere
à medicis, alia varii generis ad hoc malum do-
mandum laudata specifica. Non tamen postpo-
nenda virtus qua pollet hunc in finem serum la-
ctis dulce, & acidulum, item chalybeatum, nec
non aqua Selterana cum lacte asinino, præsertim
ubi corpora sunt graciliora, tenerioris & sensi-
bilioris indolis, & lento calore macerantur, item
ubi scorbutica & exanthematica acris materia vi-
talibus succis immixta, gravio-rem hunc & diffi-
ciliorem reddit affectum.

§. III.

*spasmi
componen-
di per ano-
dyna.*

Ubi spasmodorum & dolorum ferocia, quod
subinde in puerperio, item post abortum, atque
in hypochondriaca & hysterica passione affectis
evenit, sanguinis profluvium ciet, confugien-
dum utique ad ea, quæ blanda & anodyna vi
dolores & motus effrenos solidorum placant at-
que sedant. Hoc nomine liquorem nostrum ano-
dynam mineralem cum pulvere nitroso simul
sumtum, pulveres antispasmodicos, qui ungulæ
alcis, dentem hippopotami, lapidem manati, cor-
nu cervi philosophice præparatum, pulverem
marchionis, nitrum, cinnabarim, succinum, ca-
storeum recipiunt, merito laudamus, quorum
virtus eo fit efficacior, si unum vel alterum gra-
num laudani hysterici, item massæ pilularum de
cynoglossa additur ipsis. Papaveracea quoque,
anodynorum lenissima, ut folia papaveris rhœa-
dos, in infuso theiformi cum summitatibus mil-
lefolii, & floribus chamomillæ vulgaris, aqua,
syrupus, extractum papaveris, laudabilem, præ-
sertim ubi simul humorum peccat acrimonia,
opem locant.

§. IV.

*Serum im-
purum alia
ad congrua
emunctoria
diverten-
dum.*

Quia in hoc affectu frequentius copiosum &
vitiosum serum sanguini se immiscet, opus est,
ut ad alias vias id dirigatur & per congrua ex-
cretoria evacuetur. Perficitur id optime & effi-
caciter per blanda per epicrasin operantia laxan-
tia, inter quæ manna, rhabarbaro, cassia & ta-
marindis nihil datur convenientius & præstan-
tius, modo in convenienti & sufficienti quanti-
tate exhibeantur. Nam manna tabulata, ad duas
uncias cum drachma una cremoris tartari in in-
fuso ex aqua florum acaciæ cum oleo citri præ-
scribenda pro dosi, alias non sufficiens, & satis
valida fit purgatio. Rhabarbarum optime misce-
tur cum passulis Corinthiacis in infuso, vel si cum
iis in syrupiformem massam redigitur. In paulo
robustioribus pulvis mechoacannæ albæ, ad dra-
chmam dimidiam, vel scrupulos duos, cum
æquali cremoris tartari parte permixtus, locum
perquam commodum invenit. Divertenda vero
etiam serosa illuvies ad renale cribrum, quod præ-
ter serum lactis, vel aquam Selteranam, terra
foliata tartari, solutio oculorum cancri, nitrum
antimoniatum, tinctura tartari cum spiritu ni-

tri dulci & spiritu tartari mixta, præstant effica-
citer.

§. V.

Impetu sanguinis nimis vehemente ad lipo-
thymiam usque persistente, confugiendum uti-
que demum ad ea, quæ adstrictoria pollent facul-
tate efficaci, cujus indolis sunt species de hyacin-
tho, trochisci de carabe, hæmarites, bolus Arme-
na, essentia terræ catechu, cum liquore anodyno
& refracta dosi essentiæ anodynæ remixta, fa-
migeratissima Sylvii mixtura, ad omnes immo-
dicas sanguinis profusiones utilis. Externe vero
in forma emplastri stercus suillum, aceto forti
imbutum, regioni pubis applicatum, sistendi
facultate gaudet haud proletaria. Vel concinnan-
dum cataplasma ex foliis plantaginis & polygo-
ni, floribus rosarum, balaustrorum, coquendum
in aceto rosaceo & subfrigide apponendum. Nec
minus præstans hoc nomine est efficacia empla-
stri spermatis ranarum, cum alumine, oleo hyos-
cyami & camphora permixti, ac regioni lumbari
admoti.

§. VI.

Quando fluxio jam per aliquod tempus con-
quievit, præservandi causa ad arcendam recidi-
vam, præsertim si corpora sint ferosiora, & ca-
chexia jam adest, aut imminet, robur non mo-
do utero, sed & omnibus visceribus conciliare
oportet. Id vero commode & efficaciter præstari
potest pilulis methodo Becheriana paratis, ali-
quoties assumtis, item elixirio nostro balsamico
viscerali, cum tinctura martis Zwölfferi, vel
etiam Ludovici, permixto. Laudem etiam me-
rentur juscula alterata cum succo plantaginis,
cichorii, acetosæ. Potus sit aqua frigida, in qua
aliquoties frustum chalybis candefacti extin-
ctum. Aquæ quoque Selteranæ solæ per plures
dies epotæ, laudabilem præstabunt opem. Con-
tra ea fugienda vina, carniū, ovorumque esus
& omnia ea, quæ sanguinem nimium adaugent
& exagitant.

§. VII.

Quia vero experientia multiplici testante, quam
maxime abortio & puerperium ad enormes hæ-
morrhagias, præsertim si uterus postea non bene
purgatus fuit, disponere solent; providendum
utique omni cura erit, in puerperio, vel etiam
post illud, ut ipse satis mundificetur. Cui scopo
obtinendo feliciter & efficaciter omnino pilulæ
Becherianæ, & quæ ad earum imitationem pa-
ratæ sunt ex extractis amaris, temperatis resino-
so-gummatibus, extracto rhabarbari & refracta
aloës gummosæ dosi, concinnatæ inserviunt, si
non modo duobus aut tribus diebus post partum
per aliquot dies sumantur, sed & medio puerpe-
rii tempore, simili modo per tres aut quatuor
dies ipsarum usus continuetur. Vel pilularum lo-
co infusum ex aqua melissæ, vino, rhabarbaro,
herba melissæ, rorismarini, radice pimpinellæ,
agarico, passulis minoribus, corticibus aurantio-
rum & citri per aliquot dies hauriendum. Qui-
bus remediis id efficitur, ut uterus ejusque vasa ab
omni succorum vitiosorum illuvie, atque tia in
laciniis, quæ ex retenta secundina remanent &
rudimentum molarum carnearum præbere pos-
sunt, expurgetur ac liberetur.

CAUTELÆ ET OBSERVATIONES
CLINICÆ.

§. I.

Ad perſanandum æque ac protelandum hoc malum, potiffimum prudentiæ medicæ momentum in eo repositum, ut pro differente corporum & cauſarum ratione, meſura, modus ac tempus, mittendi è vena ſanguinis, rite perſpiciatur & obſervetur. Scilicet quæ habitioris ſunt corporis & à ſola ſanguinis abundantia ſæpe cum immani hæmorrhagia abortiunt; illæ ſola ſubtractione ſanguinis, tempeſtively in brachio celebrata, vel etiam ſi res poſtulat repetita, ab incurſu huius morbi poſſunt vindicari. Contra ea ubi viribus jam valde exhaustis, nimia ſanguinis copia profuſa, præſtat à venæ ſectione abſtinere. Tum vero è re eſt, brachium utrumque tepidæ aquæ, cui quippiam vini admixtum, per horæ dimidium immittere, quo ſanguinis impetus ad exteriora divertatur. Idque remedium longe efficacius eſt ac utiliſſimum iſſis cucurbitis ad mammas applicatis, quas tamen *Hippocrates* paſſim in ſcriptis ſuis in ejuſmodi caſibus magnopere commendat.

§. II.

Si diutius hoc malo colluctantur fœminæ, ſive ſint bilioſæ, ſive phlegmatico-ſanguineæ conſtitutionis, rarius feliciter ſine alvum ſolventibus remediis ſanantur. Sunt autem inter hæc optima rhabarbarina, rhabarbarum cum cremore tartari, aut ſi multum ſeroſæ colluviei evacuandum eſt, cum tertia parte mechaocannæ albæ acuatum. Utiles quoque pilulæ temperatæ balſamicæ, ſecundum exemplar Becheri, refracta bene præparatæ aloës doſi concinnatæ, vel loco harum aloëphanginæ, vel de ſuccino Cratonis, quarum virtus interpoſitis nitroſo-ſalinis pulveribus utique exaltatur.

§. III.

In tenerioribus bilioſis & cachecticis leniora emetica, cujus generis eſt radix ipecacuanhæ, ſingulis menſibus ad arcendum malum exhibita, non male ceſſiſſe novi, à qua methodo ipſe *Hippocrates* & *Riverius* quoque non alieni. Prima enim regio, ob deperditam digeſtionem, haud infrequenter multorum chronicorum uteri affectuum cauſam & fomitem fovet ac præbet eaque propter ut efficaciter depleatur expedit.

§. IV.

Validiora adſtringentia caute & provide admodum adhibere oportet, quod etiam de narcoticis tenendum, quæ neque in principio, neque etiam ubi vires à nimia ſanguinis profuſione penitus jam exhaustæ, imminente fere ſemper animi deliquio, conducunt. Quin vidi ſæpius, ab adſtringentibus fluxum exacerbatum fuiſſe; vidi quoque non nullas, ab immoderatiore horum uſu in immanes & graves chronicas paſſiones, cachexiam, hydropem, lentam & hæcticam febrem, perpetuum lymphæ ex utero ſtillicidium, cum intumeſcentia & tumore duro circa dextrum latus inguinalis regionis, fuiſſe præcipitatas.

§. V.

Pulvis *Heurnii* cujus deſcriptionem in *commentario ad aphoriſmos Hippocratis Libr. V. a Frid. Hoffmanni Oper. Tom. II.*

phoriſm. L. exhibet, & quem maximo cum ſucceſſu ſemper in immoderatiore uteri fluxu ſe adhibuiſſe refert, non contemnendus eſt. Compoſitio autem ita habet: accipe ſeminis hyoſcyami, papaveris albi ana drachmam unam, hæmatidis, coralliorum rubrorum ana drachmam ſemis, camphoræ ſcrupulum dimidium. M. de quo mane & vespere dimidia drachma pro doſi ſumenda. Nos quoque ab ejus uſu olim laudabilem effectum vidimus, ſed convenit eum exhibere, ubi omnia in actuoſo ſunt motu, arteriarum pulſu celeri & vehementi, cum aſſidua vigilia, atque tum etiam ſecurius, cum ipſi additur nitrum ad dimidiam drachmam; minime vero ubi vires cum ſanguine exhaustæ ſunt, & pulſus vix digito tangi poteſt. Nam à ſeminis hyoſcyami uſu paulo largiori, in dementiam conjeſtas fuiſſe quaſdam perſonas novimus. Idem monitum etiam tenendum de pilulis de cynogloſſa, quæ pariter ſubactum in exhibitione deſiderant judicium practicum.

§. VI.

Quando à viſcerum obſtructione chronicum malum fovetur, cura ſine legitimo aquarum mineralium, vel acidularum, vel thermarum temperationum uſu, rarius ex voto ſuccedit. Expedit vero medicamentis temperate balſamicis hanc curam ſecundare, & exterius quoque ad roboranda viſcera ipſumque debilitatum uterum, ſilente fluxu, balneo aquarum ſubadſtringenti virtute gaudentium, cujus indolis ſunt noſtræ Lauchſtadienſes, uti.

§. VII.

Multum intereſt, quo potus genere utantur illæ, quæ ejuſmodi immodicis ſanguinis fluxionibus macerantur. Neutiquam enim ventriculus, in hoc affectu valde imbecillis, omnia æque bene ferre poteſt. Inprimis abſtinendum ab omni cereviſia, à potu quoque vinoſo, ac potius in uſum vocanda decocta, ex raſura ligni ſantali rubri, citrini, radice cichorei, ſemine fœniculi & paſſulis, parata. Quibuſdam ſolus potus aquæ fontanæ frigidæ, alteratus quodammodo ſyrupo acetofiſatis citri, vel tantillo nitri injecto, optime ceſſit. *Ludovicus Septalius Libr. VII. animadverſ. medicar. articul. CXLIV.* decoctum corticum aurantiorum, mane ad octo vel novem uncias potum, tanquam remedium certiſſimum deprædicat, eoque fere infinitum mulierum numerum ab hoc morbo ſe liberaſſe aſſeveravit, ſed inter ſecreta id ſervavit. Recepit autem aquæ libras ſeptem, in hac incoxit cortices trium pomorum aurantiorum, aliquando adhuc viridium, interdum etiam addidit in fine aliquid herbæ pilofellæ.

§. VIII.

Uti in omni præternaturali hæmorrhagia, ita etiam in hac ipſa, ventriculi & exacta vivendi ratio maxime habenda eſt. Ob vires enim cum ſanguine deperditas, ventriculus nec bene appetit, nec decenter digerit, nec recte egerit, ſed cruditarum & flatuum copia turget ut plurimum venter. Optimus eſt cibus ſiccus, modicus & ſalubris; minime gelatinofus, difficiliſſimis ſolutionis & qui inflat. Potionibus, ſi fuerint aquoſæ, ſubinde modicum vini optimi rhenani, vel genuini vini Pontack, admixcendum eſt. Ac uti nimium frigus, ita etiam immoderatus æſtus aëris nocet. Neque admittenda eſt nimia corporis quies, neque nimia ejus exercitatio, veneris uſus ſit pauciſſimus. Demum ſi unquam affectus

*Minerales
aque ad
curam po-
tiſſima.*

*Potus ſeli-
gendus
commodus.*

*Qua vita
victuſque
ratio tenenda
tam in
curatione.*

*Vena ſe-
ctionis mo-
niſa &
cautela.*

*Alvum ſol-
ventia ne-
ceſſaria.*

*Quando
que emeti-
ca lenia.*

*Adſtrin-
gentia &
anodyna
ſane dan-
da.*

*Etiam
Heurnii
pulvis.*

animi præsentaneum damnum inferunt, certissime id contingit in sanguine exhaustis corporibus.

§. IX.

Quam post
morbum.

Multum tandem refert, ut quæ extreme immodicis sanguinis fluxionibus debilitatæ, sedato fluxu, convenienti diætâ pristinam sensim recuperent sanitatem. Nam si repente cibus se replent, quos imbecillis ventriculus non satis digerere potest, facile incurrunt ob cruditates in alias chronicas passiones. Nimirum uti effato *Hippocratis* impura corpora nutrientibus læduntur: ita etiam valde debilitata. Habenda igitur est quam maxime ventriculi ratio, & analeptics ac nutrientibus cibus quidem restaurandæ sunt vires, sed parca manu offerantur necesse est.

ENARRATIONES MORBORUM.

OBSERVATIO I.

Hæmorrhagia uteri
cum febre
lenta le-
thalis in
vetula.

Vidua hujus loci honesta, jam septuagenaria, extenuati corporis, sedentariæ vitæ multum addicta, post quinquagesimum annum cessante ex toto menstrua purgatione, assueta fuit singulis annis circa æquinoctia sanguinis missioni, post annum autem sexagesimum ex muliercularum consilio eam omisit. Unde intra sexagesimi & septuagesimi anni spatium aliquoties pathematibus spasmodico-flatulentis, tumentibus quoque venis hæmorrhoidalibus externis, interdum etiam sanguinis mictione, tentata fuit. Medicus salutaris consilio suavit venæ sectionem crebrius repetendam, sed ipsa hujus moniti negligentior, incidit tandem in ingentem animi mœrorem eumque diuturniorem, ac paulo post ex improvviso immodice sanguis per uterum effluxit, & frustra datis optimis analeptics & roborantibus, per menses aliquot & longius continuavit. Tandem cum intolerabili fœtore profluxit ex pudendis cruor, lenta successit febris & summa virium dejectio, donec placide obiret misera.

Epicrisis.

Neque ab immoderata uteri hæmorrhagia vetulæ immunes, si plethoricæ sunt & sanguinis missionem negligunt. Quin si cum vita sedentaria animi mœror jungitur, quam facile ab abundante sanguine & in visceribus abdominis, præsertim utero, stagnante, sphacelosa corruptio succrescere potest, quam fœtor subinde indicat, qui intolerabilis fit, maxime quando hæc corruptio ad ipsum intestinum rectum penetrat. De fœtidissimo uteri profluvio historiam quoque refert *Heurnius* in *notis ad aphorism. Hippocrat.* & quidem §6. *Sect. V.* vidi inquit, nobilem matronam, quæ profluvio uteri extabuit & tanto fœtore effundebatur, ut nullus non existimaret alvo venire. Sed hic fœtor longe alvum superabat. Existimo totum ejus uterum, in teterrimum tabum eliquatum, una effusum fuisse. Languebat hæc mirum in modum, ac quasi lethargo stupebat mente, lente obiit intolerabilibus fœtoribus, ego sane nil fœtidius unquam olfeci.

OBSERVATIO II.

Hæmorrhagia uteri
pess. stiptico
sanata.

Illustris stemmatis foemina, floridæ formæ, sanguine & succis plena, vigesimo octavo ætatis anno tertium jam mensem gravida, ex uteri sinu

sanguinem per duas hebdomades exigua quidem quantitate profluere sensit, vehementioris vero saltationis motu mox in talem incidit hæmorrhagiam, ut universus propemodum sanguis, usque ad mensuras sex, vel septem, floridus & fluidus, intra aliquot horas, è corpore promanasse visus fuerit, intercurrentibus subinde animi deliquiis. Nihil auxilii tam intra quam extra ad cohibendum tantum sanguinis impetum prætermisum fuit, sed frustraneo effectu. In tanto itaque vitæ periculo coactus ego fui ad anceps & extremum confugere auxilium, linteum scilicet apte contortum & probe solutione capitis mortui vitrioli imbutum, quod in uteri sinum quousque penetrari potuit, intrudi curavi. Hoc non multo post subsistit fluxus, & exhibitis analeptics medicamentis & alimentis erectus quodammodo animus cum viribus. Tertia die post, tentata est extractio linteæ, quæ non fuit sine difficultate, quia illud plane exsuccum & siccum erat, ipsique superne congrumatus, niger, aridus sanguis adhærescebat. Factum hinc est, ut, quum secessum peteret ægra, frustum massæ carneæ ex utero simul, cum aliqua sanguinis fluidi portione prolaberetur. Quo excluso, quum nihil amplius exiret, postea per commodam diætâ & medicamenta, ventriculi digestionem ac vires restaurantia, generosa hæc foemina successive convaleuit.

Epicrisis.

Non novum est, ab incoercibili sanguinis ex utero profusione in partu laborioso, in abortu etiam, in lethalem syncopen incidere posse foeminas. Sub tanto autem mortis periculo, anceps etiam remedium experiri non inconsultum est. Et licet tale stipticum uteri internis partibus applicare nunquam antea observatum vel visum fuerit; tamen hæc observatio docet, stiptica etiam internis uteri partibus non adeo esse inimica, siquidem post hæc foemina gratiosa admodum & concepit & peperit feliciter.

OBSERVATIO III.

Judæi uxor annorum sexaginta tenerioris & mobilioris naturæ multorum liberorum mater, quum tertio jam mense crederetur gravida, citra ullam manifestam occasionem copiose sanguinem ex uteri sinu prorumpere sensit, exclusa simul non ita multo post massa carnea pugni magnitudine. Hoc facto nihilo minus permansit fluxio puri & etiam fibrosi sanguinis cum virium insigni decremento; quin quum gravi terrore percelleretur, mox continua ad lipothymiam ingruit proclivitas, cor palpitavit, & tremuit cum magna præcordiorum anxietate spirandique angustia, extrema frigerunt, & quandoque, ut in epilepsia fit, sub animi deliquio, pollices cum reliquis digitis fortiter constricti fuerunt. Atque hæc omnia sub suavi quodam oblato odore, graviora; remissiora vero sub graveolenti adhibito remedio fuerunt. Quum itaque omnia desperata adstantibus viderentur, in consilium vocatus ego, bono animo ipsos esse jussi, ac remotis aliis medicamentis, clysterem injici curavi carminativum, postea ad violentas systematis nervosi illas commotiones sedandas præscripsi pilulas, quæ extractum florum chamomillæ, millefolii, crocum, castoreum, camphoram & asam foetidam habuerunt, quarum singulis tribus horis numero V. vel

Hæmorrhagia uteri
antispasmodicis sanata.

vel VI. deglutitæ fuerunt. Quibus ægrota successive sanata fuit.

Epicrisis.

Uti vehementiores animi commotiones in plethoricis magna, ita in sanguinis defectu longe majora damna procreare possunt, potissimum pathemata spasmodica convulsiva & quæ vulgo in foeminis appellari solent hysterica, quibus frequentius puerperæ post lochia infestari solent. Terror vero, si ullus ex animi affectibus, in immodicis hæmorrhagiis perniciosissimus. Nam sistit quidem ipsas, sed postea graviora concitat mala. Imprudentiæ hinc esset, denuo sanguinis missionem tentare. Nihil potius à prudenti medico aliud agendum, quam ut antispasmodicis convenientibus motus hosce intensiores nervosarum partium componat, & per diaphoretica & analeptica sanguinis liberum cursum, per extima etiam corporis, promoveat.

OBSERVATIO IV.

Hæmorrhagia uterina post menses emanantes re-bellis sanata.

Fœmina quinquaginta trium annorum, temperamentum cholerico-melancholici, in animi commotiones valde prona, ante annum & dimidium incidit in immodicam sanguinis ab utero fluxionem, quæ die nocteque integrum per annum duravit, & subinde parcior, quandoque vero tam larga fuit, ut cyathos aliquot compleret. Inde maxima animi ad lipothymiam usque, nec non virium & appetentiæ dejectio sequuta est, intercurrente sæpius, mox singulis, mox tertio die, cum horrore præcedente, febricula. Varia frustraneo eventu opposita fuerunt remedia, tandem vero martialium usu cohibita fuit hæc sanguinis profusio, sed in ejus locum fluor albus successit, cum tumore pedum œdematoso, spirandi difficultate, inappetentia & alvo adstrictiore junctus. Crebriori tamen pilularum nostrarum, item tincturæ antimonii acris, cum spiritu Bussii & liquore nostro anodyno permixtæ usu, fluor albus cum tumore œdematoso sublatus ad tempus est, licet non ita multo post rursus infestaret, ac tandem suffimigio, ex racamahaca, succino, rasura eboris & floribus sulphuris, aliquoties in die usurpato, cum continuatis superioribus remediis, ex toto etiam sanatus est.

Epicrisis.

In hac historia venit illud notatu perquam dignum, quod post illud tempus, quo alias ordinario cessat menstrua purgatio, excessiva adhuc tamdiu prodierit ab utero fluxio; id quod ex parte iracundiæ animi affectioni adscribendum. Quoniam autem hic morbus ingentem atoniam viscerum abdominis, præsertim uteri, habuit pro fundamento, ad eam expugnandam & tonum restituendum, præter amara atque memoratam essentiam, quæ simul diaphoresin & diuresin movet, nec non suffimigia, ad sistendum album fluorem nihil unquam inveni præsentius, & hinc quoque in nostra felicitis & saluberrimi fuerunt effectus.

OBSERVATIO V.

Hæmorrhagia uterina immodica cum mola sanata.

Illustris fœmina, constitutionis tenerioris, triginta & aliquot annorum, inordinatum mensium sæpius experta fuit fluxum, ita, ut ad duos & plures menses retinerentur & postea impetuosius

Frid. Hoffmanni Oper. Tom. II.

sanguis, primo grumofus, dein tenuis, magna copia profunderetur. Tum quidem remediorum convenientium beneficio malum depulsum, sed sequentibus annis, mensibus præsertim hyemalibus, Januario & Februario, suppressio tributi lunaris in tertium mensem rursus accessit, ac postea fluxus effusissimus rediit, exeuntibus simul frustis duris foetentibus, cum magna portione aquæ. Tertio anno species molæ prodiit, dura nempe carnea massa, pellicula alba cinctæ, multis cellulis referta cum excessiva sanguinis profusione, quam magna virium jactura, inappetentia, ventriculi imbecillitas, nausea, præcordiorum anxietas, dolor dorsi & artuum, cum paucis somno sequuta. Quare ego in consilium adscitus, hac medicationis methodo, divina favente gratia, ægram à molestissimo hoc affectu liberavi & integre restitui, ita, ut gravida aliquoties facta, singulis binis mensibus missio è brachio sanguine, feliciter liberos sanos pepererit. Methodus vero curationis, quæ tribus vicibus adhibita, in eo consistebat: per tres dies circa somni tempus deglutitæ fuerunt pilulæ balsamicæ nostræ, ad quarum operationem promovendam mane post sumptis drachmam pulveris salini, ex tartaro vitriolato, lapidibus cancrorum, nitro, sale Ebshamensi, æquali pondere permixtorum, post quinque dies descendit mane in balneum, paratum ex aqua pluviali, in qua infusa herba menthæ, melissæ, origani, hormini, salviæ, flores spicæ, adjecta convenienti quantitate aluminis & cinerum clavellatorum.

Epicrisis.

Mirum forsân cuipiam videri poterit, quod inter casus nimia hæmorrhagia uteri laborantium etiam abortus recensuerimus; verum cum hi ipsi non aliter fieri possint, nisi præcedente ex utero hæmorrhagia, eaque præternaturali, utique curanti incumbit, convenienti methodo, & foetum in utero servare salvum, & fœminam à gravibus & fonticis pathematibus, quæ à nimia sanguinis profusione, seu causa, oriuntur, vindicare. Quæ omnia melius præstari nequeunt, quam methodo jamjam à nobis proposita. Potissimum balnea & infusæ ex convenientibus remediis parata, in diuturnis uteri morbis & vitiis corrigendis, si ullum aliud, plurimum valent. Et sic multæ ad foetum vivacem edendum inhabiles ac sæpe abortientes, ad gestationem, partum & grata matrimonii pignora idoneæ redditæ fuerunt.

OBSERVATIO VI.

Generosa fœmina quadraginta & aliquot annorum, fluxibus ex utero immodicis sæpius laboravit, tandem à vehementi terrore in immanem hæmorrhagiam incidit, ad quam sistendam, Medicus venæ in brachio sectionem, pilulas Stahlianas, pulverem antispasmodicum, neque minus essentiam millefolii, tincturam martis Ludovici, massam pilularum de cynoglossa, sed omnia incassum, adhibuit. Eruperunt potius frustra sanguinis congrumati cum foetore, cui malo mixturis analepticis, item tinctura martis cydoniata cum arcano tartari maritata, & ad alvum pertinaciter constrictam, magnesia alba frustra obviam ivit, & iterata rursus venæ sectione in brachio, sanguis serosus lixiviosi saporis, profluxit. Diutius itaque perseverante hoc fluxu, mirum non modo vires languiscebant, sed & lipothymia, capitis

Hæmorrhagia uterina diuturna analeptica & diaphoretica mixtura sanata.

dolores, vertigo & aurium tinnitus accedebant. Unde ego in auxilium vocatus, sequentem dare jussi mixturam: Recipe aquæ florum sambuci, tilia, liliorum convallium, melissæ, ana unciam unam semis, theriacalis, cinnamomi sine vino ana unciam semis, aceti destillati unciam, lapidum cancrorum drachmas duas, antimonii diaphoretici drachnam, spiritus nitri dulcis guttas XXX. syrapi acetositis citri drachmas sex, M. D. de qua quotidie bis vel ter, duo cochlearia sumere præcepi. Ad regionem pubis vero epithema ex herbis menthæ, melissæ, rorismarini, origani, floribus rosarum rubrarum, & cortice chaccarillæ, cum vino rubro, Pontak, coctum tepide applicare, manusque sæpius de die in aquam tepidam cum vino rubro mixtam, immittere jussi, pro potu suasi decoctum santali, lentisci & radicis cichorei. Quibus dextre adhibitis remediis, hæmorrhagia uteri cum omnibus symptomatibus cessit, & generosa patiens, recuperatis sensim viribus, optime convaluit.

Epicrisis.

Nimis frequens & repetita uterina hæmorrhagia ingentem uteri ejusque vasorum atoniam subindicat, ad quam removendam, Medicus maxime apta remedia porrigere debet. Huic vero scopo obtinendo, neque adstringentia, neque anodyna, neque nitrosa, aut sola refrigerantia interne sumpta, respondent, sed applicanda etiam ad confirmandum harum partium robur externa idonea remedia. Præterea mixturæ analepticæ & diaphoreticæ, cum conveniente regimine calido, ad transpirationem, si malum urget, & alia, spectatissimæ alias virtutis remedia respuit, augendam, divertendo non modo sanguinis impetum, sed & acrimoniam, quæ sæpius subest, demulcendo, insigni emolumento sunt.

OBSERVATIO VII.

Hæmorrhagiæ uterine infelicis secundinæ extractione. Ediderat felici partu gemellos foemina fere trigenaria, sed retentis paullo diutius secundinis, extractionem earundem molita est obstetrix. Quod quum non sine violentia perficeret, remanserunt frustula non nulla, & sequutus tam immodicus lochiorum fluxus, ut aliquoties animi deliquium incurreret puerpera. Quin ex eo per dimidium anni stillicidium successit ex pudendis sanguinolentum, plane refractarium & fere perpetuum, vix quandoque ad aliquot dies inducias concedens. Bis etiam interea simul excreta massa ovi gallinacei minoris magnitudinem referens, cuticula obducta pellucida & intus habens liquorem spissiusculum turbidum atque foetentem. Pessime ea propter habuit misera, appetitus periit, vires conciderunt, caro contabuit & vix corpus movendi superfuit potentia. Tandem haud ita pridem à me salutare petiit consilium, qui ipsi suasi usum pilularum Becherianarum, cum æquali portione extracti rhabbari & aliquot granis pulveris antimonii martialis sic dicti cachectici, mixtarum, & exterius pubis regioni admove, ac si fieri posset, ipsum in uterum injicere jussi, decoctum melissæ, menthæ, caryophyllorum, mastiches, florum rosarum rubrarum & balauustiorum, ex vino Gallico, quod vocant Pontack. Quia methodo quibusque præsidiiis plures sanitati redditas fuisse novi.

Epicrisis.

De infelici extractionis secundinarum cum vi

quadam factæ successu, plures in artis exercitio notavimus observationes. Nam si quando diffiliunt in frusta secundo partu edenda, & ex his non nulla remanent, in corruptionem ipsa abeunt, & colliquata ichorosum faciunt fluxum, simul lentum quendam accendunt calorem, vires mirifice dejicientem. Quandoque præpostero hoc molimine enormis inducitur hæmorrhagia, cum omnimoda fere virium jactura, quin ipsius vitæ periculo. Non nunquam etiam ex relictis frustulis succrescunt postea concrementa fungosa, ex membranis in variam formam & magnitudinem contexta, quæ molas dicunt spurias, continuo materiæ sanguinolentæ serosæ foetidæ stillicidio stipata. Frustra autem, teste experientia multiplici, pugnatur contra hæc mala internis solis, ac potius locis affectis ipsique utero, nimis partim laxato ac debili, partim læso & exulcerato, admovenda injectionis, aut epithematis forma, ea, quæ roborant ac putredini resistunt. Interna enim salva sua textura eo pervadere & vitium tollere nequeunt; sed quæ immediate labe affectas partes tangunt operationis sunt & celerioris, & melioris. Unde longe profecto opportunius & efficacius succurri posset gravibus & diuturnis in utero morbis, qui haud raro post partum accidunt, si tam lubenter admitterentur injectiones ejusmodi & topica uterina, quam quidem veteribus pessos admove, moris fuit.

OBSERVATIO VIII.

Adiit Carolinas thermas foemina viginti quatuor annos habens, sanguinea, iisdemque ad hysteriam, qua detinebatur, passionem debellandam ex medici consilio usa est. Sed ipsum inter usum, minus forsitan dextrum, experta est inordinatum copiosum sanguinis ex utero fluxum & postea ad aliquot interdum hebdomades durantem. Inde virium debilitatem, appetitus defectum & languorem cum lurido faciei colore incurrit. Medicum igitur vocavit in consilium, qui pulvere Heurnii sanguinis profluvium composuit quidem, at ingens postea præcordiorum anxietas cum cardialgia infestavit, ipsam suffocationem minitans. Unde ad hæc mala depulsanda multis variisque usa est remediis, quorum tamen nullum effectum edidit speratum. Sumsit quoque ex alio medici suasu emeticum, quo multum viscidæ ac viridescentis materiæ exturbatum, & non nihil levaminis allatum. Nihilo secius sanguis paulo post largius profluxit & ægram ut de malo funditus extirpando esset sollicita coëgit, id quod etiam fortunante DEO præstitum est his; pilulis nempe nostris balsamicis, quotidie ad aliquot grana, interposito pulvere ex antimonio martiali cachectico; nitro antimoniato & depurato, assumtis, usurpata subinde tinctura martis Zwölferi & potu cerevisiæ loco decocto ex radicibus & lignis temperato.

Ex hæmorrhagiæ uterine Heurnii pulvere sublata epithemata curata.

Epicrisis.

Mineralium aquarum usus non minus nimium fluentibus, quam suppressis ex utero fluxibus, opitulatur; sed prudentem & peritum desiderat medicum. Nam morbus uterque, inveteratus præsertim, ab obstructione & factu vasorum uteri ducit haud raro natales, ea tantum cum differentia, quod in nimio profluvio obstaculum liberi progressus sit in vasis majoribus venosis, in defi-

deficiente vero in vasis minoribus, maxime arteriosis. Minerales autem aquæ utique impedimentum hoc tollere valent, eaque propter præstant utrumque. Id vero tenendum: utendum esse iisdem non ipso sub fluxu, sed extra eum, ad arcendum recursum. Si secus sit, augetur uteri laxitas, augetur affluxus. Tum potius per balsamica roborantia interius & exterius utero remisso robur reddere, ac postea, ne reperat profluvium, minerales aquas ad eluendos meatus eisdemque servandos apertos, in usum vocare convenit.

OBSERVATIO IX.

Illustrissimi Consilarii uxor, quæ quadragesimum jam compleverat annum, habitus valde teneri ac gracilis, animique admodum mobilis & sensus exquisitissimi, aliquot abhinc annis per semestre fere spatium diuturno & fere assiduo ex utero fluore alternante cruento laboravit. Hinc primum medicis loci usa, ab eorum medicatione effectum sensit nullum. Unde contulit se ad virum quendam celeberrimum, qui brevi felicem ac certam opem spondens, pilulas suas ipsi commendavit, ut de iis quavis hebdomade ter vel quater sumeret, idque aliquamdiu. Sed inde etiam vix quicquam levaminis est experta. Demum meum petiit consilium, quo potum Selteranarum per mensem & ultra in cura cum debito regimine, interposito interdum laxante, suasi. Quod priusquam faceret, B. D. Brunneri iudicium exquisivit, qui meo pariter calculum adjecit consilio. Unde tanto majori fiducia ad usum hujus præsidii accessit; atque etiam ex eo tam salutarem percepit effectum, ut hæmorrhagia sensim remitteret, penitus tandem cessaret, ac ipsa ad pristinam perfectam sanitatem rediret.

Epicrisis.

Concinnatæ illæ ad mentem & methodum Becherianam balsamicæ pilulæ utique in affectibus ex utero, præsertim in serosioribus, item puerperii tempore, debita sua non defraudandæ sunt laude. Sed quod medicus pro lubitu iisdem & inordinatas ac nimias hæmorrhagias moderari ac sistere, & vicissim menses, si suppressi sunt, revocare possit, id non sine ratione inter fabellas reponendum. In nostra certe id docuit eventus. Fons autem Selteranus acres & tenues humores diluendo & temperando, eosque per diuresin efficaciter evacuando, sicque causam spasmos hæmorrhagiæ auctores suscitantes tollendo, non potuit non prodesse egregie.

Confer quoque eos casus, qui Sect. III. CX. & CXI. item CXXVI. legi possunt.

CAPUT VI.

De Hæmorrhagia ex urinariis viis.

THESES PATHOLOGICÆ.

§. I.

VENIT hæc hæmorrhagia in scholis plerumque miæctus cruenti nomine, & est sanguinis per urinarias vias, cum, vel sine urina, sive ex renum, sive vesicæ vasis, nimium ampliatis, ruptis, aut arrosis, emissio, pro circumstantiarum ratione plus vel minus periculi habens.

§. II.

Haud raro accidit, ut medici in dignoscendo: *Quomodo dignoscendum an sanguis miæctus?* utrum sanguis cum urina miæctus sit, nec ne? eximie fallantur. Si quidem majori in copia, ut interdum contingit, ad libram & ultra, sanguis sincerus cum urina miæctus, vel pars aliqua cruoris sine urinæ connubio, prodit per urinarium meatum, res nullo eget discrimine. Si vero cruor urinæ fuerit admixtus parcius, tunc paulo curatiori opus est scrutinio. Sæpe enim mingitur lotium coloris sanguinei, sæpe etiam deponit sedimentum non aliter ac sanguis solet, nullo tamen præsentente sanguine. Sæpius vicissim bruni, vel nigrescentis coloris urina emittitur, ut nulli suspicio sanguinis, qui tamen mixtus est, in sensus & mentem incurrat. Quare suggerenda utique sunt certa indicia, è quibus hoc tam multiplex discrimen perspiciendum. Scilicet si rubedo urinæ sanguini æmula à particulis sulphureis, mixtura salium, præsertim alcalinæ indolis, exaltatis, proficiscitur, tunc quam primum emissâ fuit, clara & perspicua apparet, sedimentum vero incarnati & cinnabarini coloris est; quod tamen, sufficienti calore admoto, mox in supernatantem liquorem se recipit, ut clara rursus & perspicua ut antea appareat. Contra vero quum urina rubet à sanguine, tunc opaca & crassiuscula sine perspicuitate mingitur, sedimentum vero est grumosum, ex rubro nigricans, idque non dissolvitur, aut rursus ab urina absorbetur. Si etiam lotii rubedo est à sanguine, linteum per quod colatur, tingit rubore, quod non fit, quando est à salibus color tantum intensus.

§. III.

Quia plures urinæ secernendæ & excernendæ *Et unde veniat?* serviunt viæ; scire refert discrimen: unde profluerit miæctu redditus sanguis. Quod si itaque sanguis sincerus confertim, repente & sine dolore mingitur, ex renum substantia sanguineo vasculosa illum prodiisse recte jam judicavit Hippocrates Sect. IV. aph. 78. Sed ubi parcius sanguinis quantitas, obscuri nigricantis coloris, cum vel sine materia purulenta, maxime si cum dolore & ardore in pube sub miæctione, vel post eam redditur, tunc ex vesica læsa, aut exulcerata illum stillasse certum. Quod autem renalis sanguinis effluxus sine, & qui ex vesica venit cum exquisito dolore succedat, id diversitati structuræ tribuendum: renes enim exquisito carent sensu. Sed quando sanguis per nervosas acutissimæ sensationis vesicæ tunicas viam molitur; dolor non potest non oriri atrocissimus, nec mirum gravissima tum incidere symptomata, animi deliquia, spirationem difficilem, pulsum obscurum, parvum & frequentem non nunquam, nauseam, animi anxietatem, & frigidum sudorem. De quo miæctu etiam conferri meretur, Hippocratis aphor. lib. IV. aph. LXXX. Si quis sanguinem unaque grumos sæpe mingat ac stranguriam habeat, unaque dolor incidat in aqualiculum & in interfemineum, huic vesicæ vicinæ partes laborant. Quando porro ex uretheribus, à calculo magno, vel aspero læsis, sanguinis quippiam cum urina miscetur, dolor circa lumbos & ilia acutus, difficilis & sabulosa miæctio, aliaque calculi in uretheribus hærentis signa id manifestant. Propter læsa à calculo vesicæ ejusque tunicarum sanguinea vascula, si excernitur quippiam cruoris, non modo cum summo dolore & prævia obstructione quandoque urina prodit, sed & grumi interdum cum moleculis crassioribus

fabulosis firmiter compacti una cum ea emittuntur, quod etiam interdum accidit, si calculus in rene firmiter impactus eum sauciat.

§. IV.

Alia species ex vesica ejusque sphinctere.

Alia adhuc mictionis cruentæ species datur, cujus tamen raro mentio fit à scriptoribus medicis, quæ videlicet ex ipsis vasis vesicæ, vel potius ipsius sphincteris contingit, quando nimium hiant & à sanguine distenta aperta fuerunt. De hac mictionis cruentæ specie notatu dignum est *Cælii Aureliani Lib. IV. tardar. passionum cap. IV.* effatum, ita habens: *solent, sicut in podice, vel feminarum sinu, aut matricis collo, etiam in vesica, hæmorrhoides generari, quæ fluorem sanguinis præstant, quibusdam intervallis variatum. Quod oportet apprehendere prudentem, cum non coacervata primo fuerit effusio, sed augmentis quibusdam promota, interjectis defectionibus, ac retento sanguine dolore circa pubem, siquidem aliquando inflata ac tumentes hæmorrhoides difficultatem vel abstinentiam faciunt mictus, dysuriam Græcis vocatam, vel ischuriam. Archigenes vero dicebat, ut stas periodis menses & hæmorrhoides, ita & certis vicissitudinibus interdum plethora se effundit per renes & vesicam. Cui merito addendum Heurnii Comment. in aphorism. Hippocratis 78. de signis discriminis loci præceptum: sanguis qui à musculo vesicæ emingitur, non exacte permiscetur urinæ, sed in fundo depositus grumescit, quin hic grumus, qui interdum citra urinam excidit, dolorem circa vesicæ muscolum consistentem facit; à rene vero qui mingitur sanguis, & copiosus est, & urinæ exacte miscetur, videturque tota urinæ consistentia nihil aliud esse, quam tenuis ac dilutus sanguis; mox tamen sedet liquidus minimeque concretus & rubicundus.*

§. V.

Differt à gonorrhœa sanguinolenta.

Non autem confundi debet ipsa sanguinis mictio cum gonorrhœa, sive seminis fluxu sanguinolento. Non enim adeo est insolens, ut in iis, qui gonorrhœa laborant virulenta, ex glandulis prostaticis valde relaxatis, ob majorem lymphæ, vel feri affluxum, non modo feminalis liquor, sed & serum mucidum, arenulis etiam refertum, interdum quoque per intervalla plane sanguis ex hiantibus nimium, aut ab acrimonia materiæ effluentis arrosis vasorum osculis, per urethram, citra urinæ fluxum, emittatur.

§. VI.

Ab hæmorrhagia penis.

Probe etiam à sanguinis mictu dignoscere oportet illum sanguinis fluxum, qui fit per membri virilis integumenta. Nos aliquot memoria tenemus exempla, ubi certis periodis in viris ex ipso pene fluxit sanguis per aliquot hebdomades purus, satis largiter, præcedente tensivo quodam in inguine ac femoribus dolore. Collegit etiam ejusmodi exempla *Stalpart van der Wiel, Cent. I. Obs. LXXX.* Sed tum sanguis non prodit urinæ mixtus, sed stillat seorsim guttatim, ex ramo vasorum hæmorrhoidalium exteriorum, qui ad pudenda excurrit.

§. VII.

Salutaris est quandoque.

Dein tenendum discrimen mictionis cruentæ criticæ & salutaris, à minus tali & morbosa. Illa quippe fit frequentissime per renes magna in copia, rarius & in minori quantitate per sphincterem vesicæ, citra dolorem & magnum incommodum, & redit etiam certis periodis. Contin-

git hoc maxime per translationem, sive quæ Græcis dicitur *metastasin*, excernendi sanguinis per menses, aut hæmorrhoides, iis vel cessantibus, vel obstructis, aut suppressis. Vidimus nos talem criticam mictionem liberaliorem in viris, sanguine abundantibus, sive plethoricis, juvenilis, vel etiam senilis ætatis, suppresso, vel etiam penitus cessante hæmorrhoidali fluxu, aut consueta omissa sanguinis missione, periculi tamen prorsus expertem. Vidimus quoque in foeminis octogenariis, vegetis & laute adhuc viventibus, præsertim si cessantibus mensibus sanguinis missio vel fuerat neglecta, aut plane omissa.

§. VIII.

Præterea non semel, sed aliquoties notavimus in senibus, deficiente fluxu hæmorrhoidali, item in viris ætatis consistentis, hæmorrhoidibus cæcis & tumentibus si afflicti fuerint, à motu corporis & animi fortiori, sanguinis portionem non exiguam, bruno colore instar decocti caffèæ tincti, citra urinæ difficultatem cum mictu prodiiisse; qui procul omni dubio ex vasis vesicæ sanguineis circa sphincterem ejus tumentibus & apertis profectus fuit. Venæ enim hæmorrhoidales externæ communicant cum vesica & ramos etiam ad eam spargunt; minime vero, ut non nullorum fert opinio, de internis id putandum, quarum ramos ad vesicam excurrentes anatomicus huc usque vidit nullus.

§. IX.

Succedit vero hæc sanguinis cum mictu excretio, ex aliis sanguineis suppressis, hæmorrhoidalibus potissimum, per renes, dum videlicet sanguis accumulatus & per arteriam mesaraicam inferiorem ad tunicas intestini recti adductus, ibi cum exitum non invenit, quasi regurgitat ad truncum arteriæ magnæ, sive potius majori copia ibi colligitur, & ad vasa renum arteriosa, quæ & copia, & magnitudine, venas emulgentes superant, delatus, orificia eorum nimis distendendo & aperiendo, ad tubulos urinarios, qui cum arteriolarum finibus connexi sunt, ex his in papillarum oras, in pelvim, inde tandem ad uretheres & vesicam transit. Atque adeo in tali casu nec anastomosis, nec diæresis, nec diapedesis, tantopere ab autoribus decantata, locum obtinent.

§. X.

Vesica tam etiam excretioni sanguinis obnoxia est, quia valde difficilis est, ob perpendicularem & valde demissum ejus situm, sanguinis per venas ex ipsa regressus. Quo fit, ut sub hæmorrhoidibus externis tumentibus, vel internis obstructis, in plethoricis præsertim, accumulatus & ibi stagnans sanguis, præter naturam orificia vasorum capillarium ipsius vesicæ, vel magis sphincteris, aperiat atque perrumpat.

§. XI.

Maxime omnium fluxus hæmorrhoidalis suppressus, vel ex quacunque alia causa cessans, causam mictionis cruentæ, maxime illius, quæ fit per renes, subministrat. Notatu dignum hanc in rem est exemplum, cujus meminit *Hercules Saxonia lib. III. cap. IV.* nobilem Batavum, fluxu hæmorrhoidum suppresso laborantem, per quinque annos, ex intervallo, multum sanguinis sponte & subito ante urinam ex-

Post suppressas hæmorrhoides.

Quomodo succedat renibus.

Quomodo ex vesica.

Causa pressissima hæmorrhoides.

ure-

urethra emisisse. ROLFINKIUS quoque *Dissert. anatom. Lib. V. cap. 26.* aliam historiam refert: *Illustris vir*, scribit, hæmorrhoidali fluxui assuetus, eo suppresso, incidit in mictionem cruentam, multarum septimanarum spatio durantem, quæ evanuit hæmorrhoidibus apparentibus, levi fluxu & parco satis, ita, ut vix ani terga tingeret. Neque minus *Reiselius epistola LXIV.* casum memorabilem enarrat, de pastore quodam, ob hæmorrhoidum à triennio suppressionem, magnam sanguinis crassi & sinceri, sine urinarum aquis, cum impetu promanantem & matulam replentem quantitatem, excernente, qui tamen per totam vitam nihil sanguinis è vena miserat. Cum vero hic eundem paroxysmum, ter stato circuitu, expertus fuisset, secesserunt tandem naturales & limpida urinæ. Postquam autem medici consilio vino usus fuerat paulo largius, & diebus aliquot continuatis pilulis ex aloë, succo cichorii imprægnata & extracto trochiscorum alhandal, hæmorrhoides ei fluxerunt & malum cessavit.

§. XII.

Utut vero omnis motus corporis fortior in plethoricis facile ad hæmorrhagicas excretiones sufficitandas ansam præbet; speciatim tamen ad mictionem cruentam nulla ipsius species majorem vim habet equitatione. Possemus ejus exempla plura afferre, quæ etiam passim apud auctores reperiunda. Sic *Riverius Centur. II. obs. 13.* memorat de quinquagenario, qui quoties equitationi peregrinationis causa sese cominiscit, urinas sanguinolentas reddidit. *Hollerus quoque in Aphorism. 78. Sect. IV. Hippocrat.* inquit: *Sunt nonnulli, qui si durius equitent, aut sese exercent immoderatus, ex calefactis renibus, sanguinem mejuunt.* Et paulo post: *arbitramur, ait, sanguinolentam urinam & turbidam reddi ab hoc Reverendissimo Episcopo propter dilatationem factam tum in cavitatibus renum, tum in vasis urinariis, propter intensam caliditatem, à motu violento primo generatam, dum curru, salebroso itinere concuteretur, præcipue circa dorsi regionem: deinde succedente ingenti calore, dum cum veste pellicea sub sole ardente montem ascenderet. Ex his igitur omnibus tantus calor circa partes renum fuit excitatus, ut ob nimiam dilatationem, urina sanguinolenta excreta fuerit. Et inde est, quod nunc quoque quotiescunque fatigatur & corpus exercet, in idem symptoma incidat, turbida scilicet sanguinolenta urinæ.* Ratio vero, quare equitatio, cujus alias in præcavendis & etiam sanandis chronicis affectionibus magna vis & efficacia est, ad hæmorrhagiam renum & vesicæ plurimum disponat, inde petenda venit, quod propter compressionem venarum in femoribus, in perinæo etiam & ano, sanguinis recursus multum retardetur. Hinc copia sanguinis major fit & increfcit in arteriis, motusque sanguinis in superioribus partibus augetur & intensior fit præsertim circa lumbos, per motum succussorium. Sic facto citiori sanguinis affluxu, emulgentes tandem arteriæ quam facile aperiuntur. Recte enim scribit *MALPIGHIVS tractatu de renibus: In nostro corpore, præter pulmones, non alia est pars, quæ exundantis sanguinis injuriis magis subjiciatur, quam renes.*

§. XIII.

Calculus in rene delitescens. Deinceps sanguineæ mictionis, sed magis prioris infestæ & periculosa, causam non infrequenter calculus intra renem delitescens subministrat.

Multa enim hujus succurrunt exempla, & tale quoque habet *Horstius Lib. IV. Observ. 37.* ubi sine omni lumborum dolore, calculosi, præsertim qui sanguine plus justo abundant & corpus vehementer motu exercent, sanguineam emittunt urinam. Quomodo vero hoc fiat, vero videtur simillimum, quod calculus mole major ac figura asper, sine dolore quidem intra renes diu delitescere possit, nihilo minus haud levem compagi renum vasculosa labem suo affricu ac compressione inducat, eorum quoque functionem naturalem lædat & sic ansam erumpendi sanguini præbeat. Scilicet quando calculus mole & pondere suo ramos venæ emulgentis comprimit, liberiores sanguinis transitum per hos impediendo, efficit, ut per arteriolas emulgentes adductius, nimia copia & impetu earum tenues & capillares ramulos, qui ultimo terminantur in tubulos urinarios, valde distendat & tandem viam sibi faciat in eos, qui secundum naturam tantum urinam vehunt, eosdemque subeat ac in urinam transeat. Id quod longe adhuc magis fit, quando in dispositione ad calculum, varii generis remedia, quæ urinam & calculum pellunt, commendantur & applicantur, ut quidem communis & pessima est consuetudo, præsertim si calidiora fuerint, ex terebinthina, succino, vel junipero parata. Fit etiam tali in casu, ut calculus in renalibus tubulis incatceratus, arrosione & excoaratione dilacerando minima renum vascula, five siphunculos, exulcerationem efficiat. Quæ facta, pus cum sanguine per urethras in vesicam instillat, & sic mictum valde dolorificum, exeunte puris & sanguinis corrupti cum urina portione, producit. Id quod tamen etiam quandoque fieri potest, quanquam rarius, ab uretheris per calculum exulceratione.

§. XIV.

Mictionis quoque cruentæ, copiosæ & valde ancipitis species est, quando ex vesica, ab acriori præsertim ibi stagnante copioso sanguine, exulcerata, mucosa valde, ex parte purulenta & cruenta materia in ejusdem cavitatem descendit. Tum enim cum intenso ardore, intolerando dolore & difficultate urina redditur, simulque tremores & convulsivæ artuum, cum frigore & tremore stipatæ motiones, sese jungunt. Vidimus id aliquoties in gonorrhœa desperata & inveterata laborantibus, acri simul & corrosiva materia è genitalibus profluente ac partes vicinas arrodente. Quæ labes interna ubi adest, ac renum, vel vesicæ substantia simul corrupta est, & purulenta ac putrida materia copiose secedit, urinæ exeunt fursuraceæ, & parvæ carunculæ, aut corpora, capillos, vel vermiculos æmulantia, in urina conspiciuntur, quæ à vesica nequaquam possunt abscedere. Hæc enim resolvi nequit in ejusmodi filamenta. Sed à contenta mucosa, vel in renibus, vel in vesica, materia, concrefcunt in ejusmodi figuram & consistentiam.

§. XV.

Accedit aliud cruentæ mictionis genus, à causa videlicet externa, contusione, lapsu in terram, elevatione onerum & percussione productum. Hoc quidem in vita civili & praxi sæpius occurrit, causam tamen ipsius reddere non tam promptum ac obvium est. Quod si enim vasorum in renibus ruptio, vel continui solutio, causa foret, non tam subito, uti tamen fit, per venæ sectionem & sanguinem dissolventia posset lana-

A vesica arrosione & ulcere.

A violenta externa.

sanari. Nos potius modum ita concipiendum esse censemus, quod à contusione & contorsione vasorum, imprimis sanguineorum, & ibi stagnante sanguine, ejus circulatio per has partes læsas impediatur; hinc crescere impetum & copiam sanguinis in vasis internis; atque hæc nimium inde, præsertim in plethoricis, distenta, ut sanguis locum mutet ac effluat, facere. Tale quid enim commode maxime fit in renibus, si ibi facta fuit percussio. Unde sunt inter exempla, ubi etiam à subluxatione vertebrarum, cruenta insequuta fuit mictio. Quin sicuti ex tibia amputata dysenteriam *Hildanus Centur. II. Obs. 10.* sic etiam & nos observavimus, ex offe tibiæ fracto, urinam cruentam redditam fuisse. Ut adeo facile concipiendum sit, à contusione venarum & sanguine sic stagnante alicubi, fieri posse ejusdem per urethram stillicidium.

§. XVI.

A torminibus & acribus.

A torminibus atrocibus ventris, item à sumtis acrioribus purgantibus, nec non à diureticis acrioribus, ut cantharidibus, urinam reddi posse cruentam, experientia est confirmatum. Debetur autem hoc symptoma spasticis venarum stricturis, quibus liber sanguinis circulus intercipitur. Unde ex facili jamjam ratio reddenda, quare morbillis, & variolis imprimis malignis, funestus ejusmodi affectus interdum associetur. Prostant quidem observationes apud auctores, quod à vesicatoriis quæ habent cantharides, externe applicatis, cruenta fuerit mictio exorta; interim nos fatemur candide, à nobis nunquam tale quid visum vel observatum esse, ut haud injuria hanc operationem in dubium vocare liceat, ac forsan longe ab alia causa in morbo sub applicatione vesicatoriorum hæc cruenta urina excreta fuisse possit.

§. XVII.

Mictus cruentus periculosus.

Omnis vero cruentus mictus est periculi non expers. Etenim licet etiam in principio salutaris & criticus, à palindrome facta ob mensium vel hæmorrhoidum suppressionem, visus fuerit; tamen quia non modo facile revertitur & vires exhaurit, sed & si error accidit, vel in diæta, aut si imprudenter stipticis tractatur, inflammatio ac corruptio facile ipsis renibus, vel vesicæ induci potest, utique periculum alit. Incidit præterea & hoc frequentissime, quod grumus quidam sanguinis ex renibus descendens, in ea parte, ubi urether ductu obliquo inseritur vesicæ, impactus, valde infestam & difficulter sanabilem inducat ischuriam. Quandoque etiam congrumatur in vesicæ cavo sanguis, & sphincteri firmiter inhærens, implacabilem cum urinæ suppressione præbet dolorem, id quod etiam accidit, quando vasa sphincteris sanguinea, non secus ac hæmorrhoides cœcæ, sanguine crasso admodum turgent.

§. XVIII.

Periculosissimus cum puris mictus.

Ex periculosissimis mictus sanguinolenti speciebus est, quæ ex rene, vel vesica profundius læsa & ulcerata venit, & junctum habet cum acerbo dolore puris mictum. Interim tamen cavendum ne mucosum & glutinosum quod in urinâ subcruenta subinde conspicitur sedimentum, pro pure habeatur, quod supernatare magis solet. Sedimenti enim hujus sæpe tanta est copia, ut, si à renum exulceratione esset, jam centies absumti ipsi fuissent. Est potius mucosi-

tas, quæ ex nimis relaxata glandulosa vesicæ & urethræ tunica, aut ex prostaticis læsis exstillat & urinæ permiscetur.

C U R A T I O.

§. I.

Perspectis sic paulo penitius variis excretionis per urinam cruentæ causis & sedibus, prudentis nunc est medici, tum ad avertendas præservative, tum ad tollendas in cura differentes has causas judicium in propinandis convenientibus remediis paulo exactius adhibere. Igitur, quando ex nimia sanguinis redundantia oritur, vel metuendus est affectus, sanguinis missione nihil tutius & præstabilius est, hac tamen observata cautela, ut ipso in paroxysmo in partibus superioribus, brachio videlicet, sanguis detrahatur, & ejus mittendi copia ex virium & habitus corporis ratione æstimetur. Quod si vero à consueto hæmorrhoidum fluxu suppresso, insolita hæc evacuatio ortum traxerit, ad præservationem tutius est venam pedis aperire. Idem tenendum est, quando in colica spasmodica & vehementibus ventris torminibus, ut interdum fit, urina cruenta mingitur, ob sanguinem stagnantem & congestum circa intestinorum tunicas, exitumque per venas hæmorrhoidales non invenientem. Quin potius, quia hic affectus per certas etiam periodos reverti solet, tempestiva venæ sectione ut ipsi occurramus, eo magis est necessarium.

Vena secti utilissima à sanguinis abundantia.

§. II.

Si à vehementi, cum, vel etiam sine plethora, organica sanguinis ebullitione & expansione, qualis subinde à fortiori corporis, vel etiam animi commotione, vini & calidorum sanguinem nimis moventium remediorum abusu accidere solet, malum hoc ortum suum habet, præter sanguinis per venam sectam subtractionem, nitro- & intestinum elasticum motum sanguinis refrenantibus, sive refrigerantibus, nihil certius & præstabilius. Hoc nomine depuratum nitrum, vel artificiale, ex spiritu nitri & sale tartari confectum, cum terreis & absorbentibus mixtum, vel in forma pulveris, vel etiam potui inditum, plurimum commendamus. Cui pro vehiculo in hisce casibus serum lactis dulce, & acidulum, aqua decocta hordeacea, & sola aqua pura fontana, vel ad dimidiam partem cum Selterana, aut Tónnsteinensi mixta, decoctum cornu cervi & scorzonæræ, optime inserviunt, vel etiam cerevisiæ tenuiores, quibus tincturæ rosarum, florum bellidis, cum spiritu vitrioli, minime vero salis, cujus acrimonia volatilis pulmonibus & renibus infesta est, paratæ, sunt sufficienti quantitate instillandæ.

Dandæ refrigerantia.

§. III.

Quum alvi adstrictio, seu tardior fæcum secessio, plurimum ad ingenerandum, imo ad fovendum & sustentandum hoc malum habeat momenti, partim quod oriundis inde flatibus & spasmis intestinorum æqualis sanguinis circulus & distributio impediatur, & ad unam, præsertim debiliorem partem, solito plus sanguis feratur, partim etiam, quod multæ impuræ, acres, biliosæ ex prima regione particulæ ad sanguinis & humorum massam adducantur; hinc, si quid aliud, ad illud avertendum ejusque recidivam præscindendam,

Alvus servanda aperta.

dendam, certe alvi laxitas & subductio admodum proficua est ac necessaria. Id vero minime purgantibus, seu acrioribus stimulantibus, vel salibus copiose assumtis, multo minus aloëticis, & pilulis quas etiam refracta dosi aloë ingreditur præstandum. His enim exacerbatur malum certissime. Lenientibus potius laxantibus & quæ simul roborante gaudent virtute, id exsequendum, inter quæ, ut in omni immodica & præternaturali sanguinis excretionem, rhabarbarina, imprimis cum passulis mixta, uti sunt passulæ Corinthiacæ, solutione rhabarbari per blandam inspissationem laxativæ redditæ, vel pulvis rhabarbari cum cremore tartari remixtus, nec non clysteres emollientes, ita etiam heic primas tenent.

§. IV.

Vasa nimium laxata adducenda.

Ad vasa vero nimium in renibus diducta & aperta roboranda & leniter adstringenda, vel etiam, si eorum substantia læsa fuerit, consolidanda, decocta, vel infusa, ex lenioribus vulnerariis & leniter constringentibus, uti sunt agrimonia, hederæ terrestris, equisetum, herba millefolii cum summitatibus, virga aurea, radix consolidæ majoris, cum melle Prussico, renibus mirum amico, quodammodo dulcificata, opem ferunt laudatissimam; quæ decocta pro re nata etiam misceri possunt cum lacte. Neque minus egregii ad demulcendum & consolidandum usus erit lac amygdalinum, præsertim si bolus Armena cum ipso ceu vehiculo sumatur.

§. V.

Renibus aut vesicæ exulceratis danda acrimonia temperantia.

Si renum, uretherum, vel vesicæ, atrophia & exulceratio præsens est, ut sæpius fit in continuo & diutius cum doloribus vexante malo, ad humorum acrimoniam contemperandam, præcipua medentis debet esse directæ intentio, eaque neglecta, nullum doloris levamen, nulla etiam partis sauciata & læsæ consolidatio & restitutio speranda, aut obtinenda. Hunc autem in finem nobilis est virtus syrupi dialtheæ Fernellii, item decocti Foresti, nec non ejus, quod *Mynsichtus* contra mictum cruentum laudat. Facit huc quoque infusum, quod præter jam dictas herbas vulnerarias, corticem radice acaciæ, gummi ceraforum habet; nec non, pulvis ex radice altheæ, glycyrrhizæ, spermate ceti, seminibus quatuor frigidis, papaveris albi, lycopodii & croco, cum f. q. sacchari candi conditus.

§. VI.

Grumi sanguinis dissolvendi.

Ad dysuriam, immo ischuriam, quæ frequens & periculosum, renalis vel etiam vesicalis hæmorrhagiæ symptoma esse solet, dum sanguinei grumi uretheris principium, ubi inseritur vesicæ, vel ipsum sphincterem vesicæ obstruunt, non certe efficacius & promptius auxilium, quam aqua pura calida copiose hausta, & exterius balneum applicatum, prostat. Tum quoque præstat aquam tepidam syringa in urethram & vesicam injicere, quo acris humor diluatur & grumuli hi dissolvantur. Atque etiam ipse *Hippocrates l. c.* eadem hæc remedia commendat, lavacrum nempe aquæ calidæ & tepesfactoria ad locum affectum apposita. Quod si vero ob grumos sanguineos in ipsa vesica, seu sphinctere ejus obvios, spasmus oriatur, ut inde totalis & pernicialis ischuria inducatur, interne emulsionem ex seminibus quatuor frigidis, cum lapidibus cancerum & antimonio diaphoretico, item pulverem ex spermate ceti, lapidibus cancerum & nitro;

externe vero vesicam repletam decocto florum emollientium ex lacte abdomini applicatam, nec non alvi apertionem, cum manna, vel clystere emolliente & oleoso, usus deprehendimus longe præstantissimi.

§. VII.

Præter hæc autem omnia ad renum & vesicæ vitia detergenda, inveterata etiam sananda, nihil unquam aquis medicatis temperatioribus, ut sunt Selteranæ, Antonianæ, Wildungenfenses, efficacius, tanto certius si cum lacte, imprimis asinino, fuerint remixtæ. Id enim docent non modo saluberrima ipsarum elementa, sed potissimum multiplex de hoc effectu experientia, de quo omnes, qui de viribus medicatarum aquarum experti scripserunt, testimonium ferunt consensu unanimi.

§. VIII.

Neque minus egregia virtus & adversus hunc morbum præsidium est in lacte, nec non lactis sero. Hæc enim jam olim suo tempore, in urinæ mictione cruentæ, magni fecit *Hippocrates lib. de internis affectionibus §. 17.* Si, inquit, *urina prodit veluti à bubulis carnibus assatis succus, ægrotus pro temporis opportunitate serum & lac bibat; serum quidem ad purgationem, lactis autem potum faciat in tempore, per quinquaginta aut quadraginta dies; hæc si feceris, morbum in melius vertes.* Lac quoque ovillum vel caprillum laudat *Riverius Obs. XIII. Centur. 17.* nec non *Gatinarias* atque *Forestus*, qui hoc solo remedio sanguinis mictum sæpe se curasse gloriantur; ita tamen, ut unicuique dosi, boli Armenæ drachmam unam permiscuerit. Id quod etiam in graviore sanguinis mictu utique convenit, in leviori autem minus faciendum censet idem *Riverius*.

CAUTELÆ CLINICÆ.

§. I.

De venæ sectione, in qua præcipuum tam ad curationem quam præsevationem, si malum à criticis hæmorrhagiis suppressis oritur, repositum est momentum, hæc adhuc tenenda: quod sanguinis missio in principio sit instituenda largior. Sic enim non modo evacuantis, sed & divertentis remedii vicem gerit. Quando vero sanguinis mictus suas servat periodos, duabus vel tribus ante accessionem horis, vena pertundenda & prout corporis conditio fert sanguis emittendus.

§. II.

Hippocrates l. c. in mictione sanguinea ab ulcerato rene, vel vesica, vinum album, mellei coloris jucundissimum, probe temperatum, bibendum peritissime suadet. Nam vina nimium spirituosæ, aut acido abundantia, ut Rhenanum, minime ubi nimia & dolorifica adest sanguinis mictio, conferunt, sed potius vina dulcia, ut Hispanicum, Canariense, Hungaricum præstant, dum ventriculi digestionem & simul vesicæ afflicta favent.

§. III.

Quum porro multum intersit, quale potus genus in usum ducat renum & vesicæ vitio laborans; tenendum omnino: ab omnibus cerevisiis crassioribus & acidis abstinendum esse, potum eligendum copiosum, ex cerevisia tenui, quippe quæ medicamenti aquosi instar, acre & arenolum eluit ac diluit. Testis hanc in rem gravis est *Sydenham*

denham, qui eandem ceu saluberrimam commendat *Libr. de mictu* cruento à calculo renibus impacto pag. 705. adeo, ut ipse, quoties curru vehi debuerit, non prius rhedam ingressus sit, quam haustum cerevisiæ tenuis paulo liberaliorem ingesserit, eundemque pariter iterare ante regressum domum versus, si forte alicubi diutius fuerit commoratus. Et hoc pacto semper sibi à mictu cruento satis præcautum esse, asserit. Observandum tamen; cerevisiam bene coctam esse debere & fermentatam.

§. IV.

In corporis
motu.

Utut motus & exercitatio corporis conveniens magnum sit, tam ad præcavendas, quam persanandas chronicas passiones præsidium, attamen in excretionibus sanguinis, & præsertim quæ fiunt urinarias per vias, res longè aliter est comparata. Etenim vix aliud, motu corporis citatiori, præsertim equitatione, ad propagandum hoc malum magis valet, quin solam loquelam paulo elatiorem & longius continuatam, in mictione dolorifica & cruenta, quæ per vesicam læsam sit, vidimus damnosam. Jam dudum etiam id notatum fuit ab antiquissimo medicinæ nostræ parente *l.c.p. 16.* perhibente: *si quis sanguinem cum urina mittit, & corpus quietum habet, citius sanabitur, si vero laboraverit, dolores multo graviores obtinebit.* Neque minus *Sydenham* in *opp. p. 700.* suo exemplo rem optime decedit. Nam quoties permultum itineris pedibus confecit, vel in curru per platearum pavimenta vectus est, quantumlibet tardo equorum gressu, toties mictum reddidit cum sanguine permixtum, quoties vero per viam regiam lapidibus non stratum, licet perquam longissime, curru vectus est, tale quid ipsi accidit nunquam. De somno etiam peritissime refert, quod ipsi curæ fuerit, ut lectum citius peteret, quo eo magis concoctio recte perficeretur, sicut ex adverso nocturnæ lucubrationes eam imminuant.

§. V.

Quæ sus-
cipienda.

Inter ea vero demum, quæ in medicatione huius mali vitanda, nihil certe esse potest infestius, quam si cruenta hæc mictio, sive ex renibus, sive ex vesica fiat, sive critica, sive symptomatice sit, remediis adstringentibus, fluxum nimis impetuosè sistentibus, ut communis fere & detestabilis medentium error est, excipiat. Hoc enim facto, à grumis intra vasa retentis inflammationes fiunt, exulcerationes & putredines. Sicuti enim hæmoptysis iisdem his remediis tractata, quam facile in inflammationem & phthisin, vel pulmonum exulcerationem, ita etiam mictus cruentus in inflammationem, exulcerationem & putredinem abit. Nihilominus tamen, si excretio sanguinea effusissima fuerit, cum summa virium jactura, mixturam, qua *Sylvius* feliciter in cruento mictu usus est, ex aquæ plantaginis unciis duabus, portulacæ, cinnamomi, acetii destillati ana uncia una semis, coralliorum rubrorum præparatorum, lapidum cancrorum, terræ sigillatæ ana scrupulo uno, laudani liquidi granis tribus, syrupi coralliorum Quercetani, vel de symphyto Fernelii, q. s. ad gratum saporem, experientia invenimus olim comprobatam.

§. VI.

Externæ
adhibenda.

Externorum quoque non inutilis est ad lumbarem regionem applicatio. Hoc nomine venit emplastrum spermatis ranarum, quando cum alumine vel saccharo saturni & pauxillo camphoræ mis-

cetur. Vel meretur etiam commendari albumen ovi cum alumine conquisitum & subfrigide regioni pubis appositum, sub forma epithematis. Nam blanda refrigerante & adstringente vi, hæc sanguinis impetum quodammodo refrenant.

§. VII.

Qui ejusmodi malo subinde conflictantur, vel ad illud inclinant, providam omnino & diætæ & vitæ regiminis curam habeant necesse est. In victu quam maxime à vini potu, ab omnibus aromatibus, præsertim allio & cepis, radicibus aperientibus, ut petroselini, pastinacæ, Selleri, asparagi, prorsus abstineant, neque somnum in dorso capiant, atque nimis calidis pannis, seu pellibus illud suffulciant. Vitandus etiam est nimius potus calidus infusi Thee, vel aliarum herbarum, sed potius frigidus, vel subfrigidus concedi debet. Decoctum potissimum cerasorum exsiccatorum in ptisana, non sine euphoria, sæpius pro potu sumendum commendavimus.

Ad arcen-
dam recidi-
vam ser-
vanda.

ENARRATIONES MORBORUM.

OBSERVATIO I.

Fœmina illustrissima LII. annorum, sanguineo-cholericæ temperamenti, ab ineunte fere ætate catarrhis, tussi, cephalalgis, vere præsertim & autumnis, fuit obnoxia. Menses semper largiter fluxerunt, qui nunc à biennio penitus cessarunt. Ex quo tempore doloribus ex calculo sæpius conflictata, subinde quoque intensi spasmi, tensiones & dolores occuparunt abdomen, cum alvi strictura & urina aquosa copiosè secedente. Nunc sæpius in extremitatibus manuum & pedum dolores perferunt satis exquisitos, tunc maxime, quando dolores ex calculo conquiescunt. Nam his præsentibus protinus artuum dolores evanescunt. Anni vero spatium ferme est elapsum, ex quo mictu cruento, sine omni dolore lumborum vel artuum fuit afflicta, qui potissimum sub motu corporis, qualicunque etiam recrudescit. Originem huius profluvii derivandum esse arbitratur ex nimio lithontripticorum à medicis exhibitorum usu; quotiescunque ad cruentam mictionem comprimendam utitur remediis, protinus se pejus habet, & de tensivo hypochondrii sinistri dolore, de nausea, de flatibus, capitisque dolore conqueritur. Contra hæc vitia tollenda aliquoties secta est pedis vena, quam in brachio minus belle potuit ferre; invalescentibus inde mox symptomatibus. Frequentavit acidulas Selteranas, thermas Embesenenses, sed frustraneo effectu. Exegit à me salutare consilium, imperavi, ut singulis binis mensibus, sanguinis missionem sive per scarificationem, sive per incisionem venæ in pede admittat, secundo, ut loco potus ordinarii utatur sequenti decocto: recipe santali rubri, radicis scorzonæræ, ana unciam, cremoris tartari drachmas duas, sacchari Canariensis unciam, coque in mensuris duabus aquæ communis per horæ dimidium, in fine addantur guttulæ duæ vel tres olei de Cedro, cum saccharo subactæ. Infusum quoque theiforme ordinavi ex summitatibus millefolii, floribus papaveris rhœados, hyperici, herba veronicæ, pilosellæ & semine fœniculi adornandum; & ad singulas lunæ phases, ad alvum laxandam assumere iussi

Mictus
cruentus
ex plesho-
ra.

jussi decoctum rhabarbarino-mannatum, & circa proximum ver denuo curam fontis Selterani per integros duos menses, cum tripla lactis afinini parte remixti adhibere: Aliquot menses post, relatum mihi est ex Hollatia, insignissimum mali levamen ab hac cura fuisse expertam foeminam illustrissimam.

Epicrisis.

Sanguineam mictionem infestare quam maxime foeminas plethoricas, post cessantem menstruam purgationem, neglecta sanguinis missione, sub victu præsertim lauto & motu corporis concitatori, multis exemplis in praxi confirmatum habemus. Nihil vero ad calculi generationem & mictum cruentum proritandum, si dolores jam adsunt lumborum, magis valere, quam inconsulto & temere, calculum quæ pellunt propinare, etiam nobis compertum est. Optandum itaque foret, ut omnia lithontriptica, quæ rarissime optatum habent usum, è praxi medica ejicerentur, præsertim si aciora & calidiora fuerint; neque enim ante affectum nephriticum, neque in eo, neque post eum, utilitatem quandam habent. Denique quam circumspectam, immodicæ omnes sanguinis profusiones, tractandi methodum expostulent per adstringentia, etiam nostra historia docere poterit, quum represso sanguinis fluxu, mox sæva internas abdominis partes inceserunt symptomata. Venæ in brachio apertio, ubi jam plurimum sanguinis per inferiora profluxerit, non semper tuta & utilis: quia largius extracto sanguine partes vitales, cor & cerebrum, eo si deseruntur, cum tota functionum œconomia labefactantur. Fons Selteranus cum asinino nuptus lacte, in omnibus renum vitiis & doloribus ac spasmis nervosarum partium scorbuticis, est præsidium omnibus aliis longe superius.

OBSERVATIO II.

*Ex repulsa
scabie cruen-
tus mic-
tus.*

Vir sexaginta annorum, olim hæmorrhoidum fluxui circa æquinoctia obnoxius, per annum iis caruerat & pruriginosa scabie in toto corpore, præsertim circa anum, fuerat vexatus. Ad hanc tollendam variis usus est medicamentis sanguinem purificantibus, ut tinctura antimonii, tinctura sulphuris tartarifata, quam cum decocto temperato ultra mensem assumpsit. Externe, unguento ex balsamo sulphuris, cum oleo amygdalarum dulcium & saccharo saturni parato, frequentius cutem inunxit. Quibus remediis adhibitis, feliciter quidem molestum cutis malum evanuit; sed præter omnem opinionem, quum urinam redderet, apparuit illa crassa, sanguineo colore tincta, secessitque mox in fundum subnigricans cruor. Sic reddebatur aliquoties lotium, semper fere sine incommodo, sed quando alvum exonerabat, sub illo nisu, immani fere dolore cruciatus fuit, cum magna stranguria. Venæ sectione in pede singulis mensibus instituta, exhibitis simul infusis ex manna, rhabarbaro, passulis & nitro, laxantibus, ac decocto ex avena, radice cichorii, floribus papaveris rhœados, summitatibus millefolii, successive malum discessit.

Epicrisis.

Notatu in hoc casu perquam dignum est, quod à retropulsa scabie sanguis cum mictu prodierit. Sed dubio omni procul id factum esse

Frid. Hoffmanni Oper. Tom. II.

arbitror, quod materia serosa, tenuis, caustica, renum & vesicæ vasis se insinuavit & acrimonia tenues eorum furculos sauciavit, non aliter ac id à cantharidibus intro sumtis subinde obtingere solet. Notabile etiam hoc est, quod exiguus dolor fuerit, quia sanguis ex renibus promanavit, quando urina copiose emissa fuit, gravior autem factus sub alvi depositione, quia sub vehementi nisu falsus sanguis & acris sine dubio ex vesicæ vasculis expressus dolorem auxit.

OBSERVATIO III.

Accersitus ante aliquot annos ad Quæstorem, virum quinquagenarium floridi, sanguinei & carnosi habitus, qui semper sanus ac vegetus, nunquam etiam dolore ex calculo vexatus, vel hæmorrhoidum fluxu affectus, & qui nec sanguinis missionem per totam vitam, nisi bis, vel ter admiserat; is mane quum surgeret, emisit præter omnem expectationem, sine magna alteratione, urinam cruentam. Ego quum advenirem, fluxus jam per duos dies durarat, sedimentum erat valde turbidum, crassum, subnigricans. In patina uncias aliquot hujus urinæ probe subactæ super prunas ardentes curavi incoquendas & vix dimidia parte exhalata, crassamentum instar albuminis ovi coagulatum, nigricantis tamen coloris, remansit, non secus ac sanguis quando in cochleari argenteo supra candelam incoquitur. Inquisivi in hujus fluxus, insolentis plane, causam, nullam tamen aliam afferre potuit, quam quod liberalius potasset vinum in urbe vicina & post nocte mense majo, valde frigida, mane per tria milliaria equo concitatus vectus sit. Altero enim die post, hoc symptoma fuit sequutum. Quare quum pulsus adhuc satis magnus & citatior esset, venæ sectionem in manu, & loco cerevisiæ, quam ordinario bibebat valde saturatam, decoctum avenaceum, ex avena, radice scorzonæræ, cichorii, floribus papaveris rhœados, nitro & melle paratum, item pulverem præcipitantem cum liquoris anodynii aliquot guttis assumendum; infusum quoque theiforme ex herba veronicæ, agrimonie, polygoni, summitatibus millefolii, floribus papaveris rhœados semine foeniculi sæpius hauriendum suasi, & præcepi, ut à vino abstineret & singulis anni quadrantibus venæ sectionem admitteret. Quo facto, non ulterius mictionem cruentam est expertus.

Epicrisis.

Non semel sed sæpius observavi copiosi & sinceri sanguinis mictum ex improvise simul & semel factam & per intervalla ex levi causa recurrentem sine ullo apparente signo vel vestigio calculi renalis ante & post illum fluxum, idque in corporibus sanguine temperato valde diffluentibus; nullum dubium est quin in plethoricis, præsertim post equitationis motum, facto concitatori sanguinis ad renes affluxu & impeditiori ejus per venas refluxu, extremitates articularum emulgentium, quæ principium canaliculorum hydragogorum constituunt, nimis dilatata & disrupta, eum effuderint in canaliculosam & papillosam renum substantiam. Tali in casu quies, aquæ frigida potus, abstinencia ab omnibus spirituosus, venæ sectio, omnium optima sunt præsidia.

OBSERVATIO IV.

*Mictio
cruenta
cum dolore
ischiadico
curata.*

Laboravit ante aliquot annos vir consularis vicinæ celebris urbis quinquagenarius, lautæ & vinosæ diætæ deditus, tranquillî insuper vitæ generis, dolore gravativo lumborum, cujus causam consulti medici judicabant esse calculum renalem. Quidam tincturam *Amelungii* lithontripticam, alii baccas juniperi quinque singulis diebus mane devorandas suaserunt; sed nihil inde levaminis consecutus est, ut potius dolores invaluerint, ipsum lateris dextri femur in consensum trahentes. Commendatus ipsi fuit pulvis specificus antinephriticus, cujus basis millepedes & sal succini volatile erant, quem circa singulas lunæ phases assumsit, urinæ quidem fluxus liberalior inde redditus, sed per mensem usurpato hoc pulvere, observavit quum urinam redderet, eam sanguinolentam, ita ut interdum plus, interdum minus cruoris haberet. Medicus ordinarius à specifico hoc ut penitus abstineret suasit, & medicamenta ad fluxum sanguinis restringendum dedit, unde mictio restincta quidem, sed non multo post ardor in ossæ sacro ingens cum difficultate magna facies egerendi fuit subsequutus, dolore mox totum femur, qui ad pedem usque se protendebat, occupante. Hic postea venæ sectione in pede afflicto admissa satis larga, & decocto temperante usurpato superius à nobis descripto, convaluit.

Epicrisis.

Ex hac constat historia, aliisque innumeris comprobari exemplis potest, pernitiæ admodum eorum, quæ urinam & calculum valide pellendi pollent facultate, usum esse in plethoricis & quando de doloribus lumborum conqueruntur. Optandum certe foret, ut acriorum & nimis calidorum diureticorum, quæ sale subtili caustico vesicatorio agunt, ut sunt quæ ex insectis prodeunt medicamina, non secus ac aciora & valentiora purgantia penitus in praxi & usu medico exularent; quippe natura in excretionibus blande vult duci, non vi cogi; fortiora enim diuretica nunquam non teneram & vasculosam renum substantiam lædunt, calculosque, si non adsunt, ingenerant, vel si adsunt fortiter expellunt, vasisque fauciatis inde cruorem educunt aut inflammationes & exulcerationes contumaces & exitiales relinquunt. Novi à crebriori pulveris millepedum in asthma humoralis usu corporis atrophiam & funestam renum exulcerationem cum febre hectica successisse. Si quis autem ejusmodi causticis, cujus generis sunt cantharides, araneæ, vermium majalium & millepedum species, ut in gonorrhœa virulenta non nunquam accidit, uti velit, suasor sum ut nunquam sine miscela nitri & camphoræ, quæ omnium optima eorum sunt corrigentia, ea adhibeat.

OBSERVATIO V.

*De rara
mictus
cruenti
specie ex
vesica
ejusque
sphincteris
vasis.*

Ineunte anno noctu colica prehendebatur vehementi sexagenarius vir, qualem jam ante novem etiam menses circiter fuerat perpeffus, cui nunc accessit mingendi difficultas. Post aliquot dies remisit quidem colicus dolor, sed frequentior ad matulam stimulus fuit perpetuus, quin quandoque sine causa conspicua, mirum fuit exacerbatus. Interjecto aliquo tempore accedit tertium mictus sanguinis, qui quandoque per

octo & quatuordecim dies succedit, quibusque elapsis urina iterum quidem tantisper inclarescit, sine tamen ægroti levamine. Atque hic mictus cruentus citius aut serius impetit, quo magis vel minus corpus motu exagitavit. Sic miser jam septem anni quadrantes sub perpetuis vicissitudinibus affligitur, nec unquam penitus cessavit dolor, licet interea variæ adhibitæ sint medicationes, inter quæ etiam bis repetitus Egranarum potus. Post emissum in pede sanguinem & appositas ano hirudines, datisque subinde per epicrasin laxantibus, sincerus sanguis cum lotio non amplius profluit, sed postquam refrixerat urina, dimisit crassum subrubicundum sedimentum, tandemque plane moleculæ sanguinis congrumati exciderunt intra aliquot dies vel viginti, quarum non nullæ magnitudinem digiti fere auricularis æquabant & quasi in carnem videbantur mutatæ. Post aliquot dies ægrum incessit colica nephritica, & lapillos binos miliares elidebat, atque elapsis quatuordecim diebus eodem modo. Ex eo urina aliquamdiu mansit pellucida, neque etiam quicquam ex ipsa ad fundum secessit, sed illud crebrioris mictus malum mansit, ita ut singula hora dimidia, quin quadrante, matulam poscere cogere-tur, cum ardore in ano, tenesmo & spasmo circa glandem, ac pungente, ardente, scindente tam exquisito in glande dolore, ut rigida penis subsequeretur tensio. Interim urina nunquam plane fuit suppressa, alvus autem plerumque officii obliviscitur & flatibus tumet, appetitus quoque vacillat cum ructibus, succussatorium motum ferre nequit æger & circa lunæ phases tam notabile doloris percipit incrementum, ut plane non sese movere ipsi sit licitum. Somnus propter crebram urinæ emissionem interruptus. Vires mediocri adhuc sunt firmitudine. In ossæ sacro & dorso dolor non sentitur; sed in pubis regione exterius quandoque pruritus, interius pressorius & tractorius dolor versus dextrum latus, quasi ibi præternaturale quid consisteret, qui sensus, motu, tussi, sternutatione exacerbatur. Urina interdum tanta vehementia exitum molitur, ut vel involuntarie erumpat; vicissim non nunquam talis in membro est sensatio ac si exstillaret urina, quod tamen non fit; post aliquas vero sanguinolenti mictus inducias, rediit tandem illa eadem vehementia. Quare meum postularunt consilium, qui quidem candide edixi periculo non vacare ejusmodi malum, inveteratum maxime & in senili corpore, ne tamen ex neglectu ejus corruptio & sphacelus lethalis partibus affectis accedat, utique omni cura esse providendum. Hunc in finem suasi, ut quotannis minimum ter, vena in brachio pertunderetur; dein ut æger à vini ac cerevisiæ potu abstineat, ac ordinarium habeat decoctum ex radice chinæ, sarsaparillæ, ligno santalo rubro & citrino, nec non radice glycyrrhi-zæ, & stomachi causa unicum vini Burgundiaci aut similis vitrum bibat. Tum videndum, ut alvus semper sit aperta, idque ope maxime passularum rhabarbarinarum; aloëtica vero & acria purgantia cum cura esse vitanda. Exterius nihil fore conducibilius aqua sclopetaria, triplicatis linteis pubis & perinæi regioni noctu maxime adnota. Sic me ipem foveré haud dubiam, fore, ut æger exinde levamen obtineat exoptatum.

Epicrisis.

Venit redditus à nostro mictu sanguis, non ut communiter fit, ex renum vitio, aut vasorum emul-

gentium apertione, sed potius ex ramo venæ hæmorrhoidalis externæ hypogastricæ, quæ in viris præsertim, ad vesicam maximeque ipsius cervicem complures furculos spargit, testantibus anatomicis oculatissimis, inprimis *Baubino*. Est itaque miæctus cruenti genus oppido rarum, non tamen desunt inter observata medica ejus exempla. Sic *HOECHSTATTERUS*, in *observ. Dec. I. schol. in cas. II. fundit sæpius*, ait, hæmorrhoids externa sanguinem in vesicam, ut absque vitio renum mingatur, quod in nobili quodam licuit videre. Eiusdem indolis & nostro perquam similis casus relatus legitur in *M. N. C. Dec. I. Ann. VIII. Obs. XXIII.* Quod autem ex hoc fonte venerit sanguis, testatum faciunt pathemata. Nullus enim in lumbis & renibus adest dolor, sed continuus ad mingendum stimulus, cum doloribus in ano, pube & perinæo multis & variis. Quod si itaque sanguis, sub vita præsertim sedentaria, accumulatur & circa hæc loca stagnat, vasorum in cervice vesicæ orificia tandem dehiscunt, & sanguinem in vesicæ cavum fundunt, tumque multum sanguinis illabatur. Quod si vero per tunicas aliquid tantum mora transsudat, sensum coagulatur, & cum vesicæ mucositate miscetur, concrevunt inde ejusmodi moleculæ sanguinis congruati quasi membrana vestitæ, quæ postea excernuntur. Atque idem etiam factum esse habet allegata ex *M. N. C.* observatio, conceptis sic verbis: *tandem cum maximo cruciatu & ardore vehementi in ima pube & circa virgam, varios magnos, ac oblongos sanguinis grumos, instar hepatis lucii piscis, mingendo ejaculabatur.*

OBSERVATIO VI.

Ante duodecim circiter annos, vir generosissimus, aulæ Cellensis minister, meam opem ac consilium requisivit. Is jam septuagesimum & sextum annum complevit, constitutionis, per omnem ætatem, validæ & robustæ, ut nunquam fere ægrotaverit; lautiori quidem gaudebat victu, ita tamen, ut in poculis & venere modum servaverit. Solitus erat longo abhinc tempore, sub coelo sereno corpus equitatione exercere, idque, cum paulo fecisset validius, mane urinam, quæ antea semper erat naturalis, bruno & subatro colore tinctam prodiisse observavit, aliquot sanguinis grumis urinalis vasis fundo adhærentibus, & quotiescunque equitatione vel alio fortiori motu paulo validius corpus agigaret, idem expertus est; quamdiu vero corpus permansit quietum, urina & colore & consistentia naturali erat, nihilque vitii habebat. Per aliquot jam menses hoc insolito accedente affectu, de nulla corporis lassitudine, de nulla circa pubis vel lumborum regionem molestia, de nulla dysuria conquerebatur, nullo unquam calculi vestigio apparente, neque ullas unquam molestias ex hæmorrhoidibus percepit: interim bene appetebat, dormiebat. Venæ sectionem per totam vitam rarissime admisit. Delectatus multum cibus qui grata acrimonia linguam feriunt, germanice *vom hohen Gout*. Medici ejus loci peritissimi de morbi causa & effectu nihil certi decernere poterant, & medicamentis, quæ nihil proficiebant exhibitis, per litteras petiit meam opem & consilium. Judicavi mali originem & causam esse plethoram, quæ etiam senibus bene appetentibus & lautius victitantibus familiaris esse solet, præsertim si à sanguinis missione, quæ in florida senectute longe utilissima deprehenditur, prorsus

Frid. Hoffmanni Oper. Tom. II.

abstineant. Suasi itaque singulis mensibus venæ sectionem in brachio, parca tamen manu, ad uncias tres vel quatuor administrandam, & ut loco potus ordinarii decoctum ex radice chinæ, scorzonæræ, rasura cornu cervi, fantalo rubro & aniso stellato biberet; subinde quoque pulverem ex lapidibus cancrosum, rhabarbaro & saccharo assumeret, ab omnibus acribus & spirituosius abstineret, corpusque in quiete servaret. Quorum remedium energia ita adjutus est, ut generosus ejus gener, exactis aliquot septimanis rescripserit, illum immunem hoc malo fuisse redditum. Post duos vero annos, marasmo eum extinctum esse, mihi fuit relatum.

Epicrisis.

Binos, quoad omnes propemodum circumstantias, similes casus, olim in præxi mea observavi. Ante viginti annos generosus cameræ consiliarius octuagenarius mihi aperuit, se ultra decem fere annos, urinam per intervalla, sanguineo colore tinctam grumis interdum prodeuntibus ex ipsa urethra reddidisse, citra ullum tamen incommodum sive sanitatis offensam. Nullam potuit mali hujus causam assignare, nisi quod per multos annos, vinum quod in vinea sua rubrum, sive Rosacer fuit natum, in frequentissimo & quotidiano fere usu habuerit. Monui ut abstineret ab hoc, sed respuebat hoc consilium, eo quod jam per viginti annos, hoc vino fuerit usus. Secuta vero postea est crebrior cruoris miæctio, quam lenta excepit febris cum marasmo. Ante aliquot lustra in fœmina septuaginta & aliquot annorum vegetæ etiam constitutionis similem urinæ colorem observavi per certa tamen intervalla apparentem. Colorem urinæ bruno-nigricantem in senili ætate quam maxime familiarem cruditatibus acidis, sanguini permixtis, dum facile omnia alimenta in eorum ventriculo coalescunt, tribuendum esse existimo, quæ humorum acida acrimonia plurimorum senilium morborum matrix ad vasorum sanguineorum in renibus referenda orificia etiam multum conferre videtur.

OBSERVATIO VII.

Hebræus LX. annorum ab aliquot jam annis doloribus ex calculo valde excruciat, tandem ingentis magnitudinis unum cum cruenta excrevit urina, postea immani dolore in regione pubis corripitur, urina penitus suppressa, alvoque ita obstipata, ut nec flatus nec quicquam excrementi inde prodiret, quæ per quatuor dies symptomata persisterunt, tormentis ita adauctis, ut nec quicquam somni capere, neque in uno loco quiete consistere potuerit. Ad urinam eliciendam catheter sed sine effectu fuit applicatus, quum vix aliquot guttulæ urinæ profluxerint; hinc non sine ratione judicavimus, uretheres ubi vesicam ingrediuntur à grumis sanguinis esse obstructos, quare pubis regioni vesicam speciebus emollientibus in lacte coctis repletam applicari jussimus: ingentem quoque infusi herbæ veronicæ, urticæ mortuæ & radicis glycyrrhizæ quantitatem quotidie ebibere debuit; præterea clysteres oleosi emollientes in anum injecti plures, & nil levaminis inde fuit consecutus, auctus potius ab urina suppressa fuit dolor in abdomine & lumbis cum extremorum refrigeratione mortique vicinus in continuo sopore jacebat æger: quando paululum se recolligebat de summis querebatur anxietatibus quæ respirationem demere vi-

*Ischuria
ex miæctu
cruento,
potione
mannatâ
sanatâ.*

debantur. Dedi ad alvum, quæ erat strictissima, laxandam sequentem mixturam: recipe mannæ electæ uncias duas, solve leni calore in aquæ florum acaciæ unciis sex, adde olei amygdalarum dulcium unciam semis, nitri purificati grana XII. essentiæ corticum aurantiorum drachmam semis, qua duabus vicibus assumpta, atque intra quatuor horas repetita; habuit inde octo sedes, quibus copiosa materia stercorea rejecta & simul tanta urinæ profluxit copia, ut aliquot repleverit matulas, quæ vero primum prodiit, instar loturæ carniæ erat. Horum remediæ efficaciam ex orci pene faucibus ereptus miser, qui postea adhibitis idoneis stomachicis, roborantibus, bono vitæ regimine accedente, pristinam valetudinem recuperavit.

Epicrisis.

Extra dubium est à sanguinis grumis obstructum fuisse introitum uretheris in vesicam, qui transversim fit per ejus membranas; id vero mirum est, per alterum vacuum, urinam in vesicam non descendisse, quod à spasmodica vesicæ constrictione factum credibile est, quia etiam vicinum intestinum rectum per consensum ætissime fuit occlusum. Perquam notabilis etiam est singularis effectus decocti mannati in hoc casu, quod una cum clysteribus & cataplasmatibus emollientibus, spasmo harum partium relaxato, urinæ liberum iter & fluxum conciliaverit. Neque semel sed iterum à nobis observatum est, quæ alvum blanda virtute solvendi valent, in morbis vesicæ commodum etiam præstare solatium.

Plures observationes inveniri possunt in *Consult. Med. Sect. III. cas. LXXVIII. LXXX.*

CAPUT VII.

De Hæmorrhagia cerebri.

THESES ET OBSERVATIONES PATHOLOGICÆ.

§. I.

Quid intelligatur per hæmorrhagiam cerebri.

Hæmorrhagiæ cerebri appellatione, nos fortiter & pernitiæ illam apoplexiam sanguineam comprehendimus, quæ ab effusione cruoris in cerebro ex ruptis ibi, citra violentiam externam, vasculis, oritur, & subito functiones animales & vitales quoque pessumdat atque extinguit.

§. II.

Hanc demonstrant defunctorum sectiones.

Hæmorrhagiam cerebri existere revera, ejusdemque proximam causam esse rupturam vasorum in eo, luculenter monstrant sectiones anatomicæ in defunctis institutæ. His enim in comperto est; sanguinem modo inter cranium & duram matrem, modo inter hanc & piam, frequentius hanc inter & cerebrum, frequentissime in hujus anfractus & ventriculorum ineditullium, quandoque in basin ipsius, interdum minori, interdum etiam satis magna copia, effundi. His quoque constat: ipsa sanguifera vasa per cerebri membranas & corticem discurrentia, sanguine nunc liquido, nunc concreto turgida & veluti aneurisimatica nunc etiam rupta conspici. Possunt hanc in rem legi historiæ apoplecticorum dissectorum à clarissimo *Wepffero* consignatæ.

§. III.

Pars igitur primario affecta est cerebrum, quod ad concipiendam sanguinis stagnationem & inde oriundam hæmorrhagiam admodum dispositum. Etenim insignis sanguinis quantitas, & minimum, teste *Malpighio*, tertia pars, illius qui ex ventriculo cordis sinistro in universum corpus ejicitur, eo per quatuor capaces satis arterias adducitur. Dein arteriosa hæc sanguinem advehentia vasa tortuosum admodum ubique, & maxime in pia matre, servant tractum. Tum, quod maximum, ipsæ hæc arteriæ, postquam subierunt cranium, deposita exteriori tendinea, potissimo motus systaltici instrumento, tunica, tenuiores longe sunt, quam in reliquo corpore, & quasi venas referunt. Ne dicam, adeo demum gracilescere hæc vasa, ut sanguinis per ipsarum angustias in venulas socias transitus, sensus plane subterfugiat. Quæ omnia faciunt utique, ut sanguis heic tardius circumbeat, facile etiam subsistat, aditu in venas expedito facile intercludatur, novique accessu cumulatus continuo, alveos canaliculorum admodum dilatat & ad consequutura plura mala anam præbeat.

§. IV.

Inprimis præsentem jam ejusmodi dispositionem, facilis postea in rupturam & effluxum est transitus, tum videlicet, ubi accesserint causæ, quæ sanguinem majori copia & cum impetu ad caput congerunt, ejusdem in ipso stagnationem invitant ac liberum per venas recursum valide sufflamant. Sic enim demum fit, ut vasa non modo cruore turgeant, sed & ab appulso jugiter novo nimium farta, dehiscant, rumpantur & sanguinem effundant. Id quod maxime in piæ meningis nec non corticalis cerebri substantiæ vasculis, æque ac iis, quæ choroideos plexus constituunt, contingere, cadaverum sectione constat.

§. V.

Per effusum in cerebro cruorem non modo subtilissimi liquidi, quod motum, robur & sensum præstat partibus, secretio & distributio per nervos impeditur, sed & totus circularis sanguinis per cerebrum motus turbatur & intercipitur; ubi animales æque ac vitales functiones elanguescunt & tandem penitus extinguuntur. Quæ omnia sic omnino contingere, testatum faciunt pathemata illa truculenta, quibus hæc hæmorrhagia stipatur, & è quibus, ceu diagnosticis signis, etiam cognoscenda. Nimirum qui eam incurrunt in terram concidunt subito, omni mentis vi ac cogitatione, sensu quoque ac motu privantur omni, cuncta membra sunt languida & flaccida, lingua obmutescit, palpebræ suspensæ & os hians comparent, deglutitio sublata, & alvus, & vesica retinenda excrementa haud raro sponte dimittunt. Atque hæc omnia læsam cerebri functionem & elanguescens inde musculorum robur produnt luculenter.

§. VI.

Difficili autem & intercepto sanguinis per capitis interiora com meatui tribuenda reliqua quæ observantur phænomena. Quod scilicet genæ rubicundo admodum & florido colore suffundantur, facies tumeat, vasa per faciem & maxime tempora discurrentia, turgeant, rupta in ore, naribus ac auribus sanguinem interdum, maxime post mortem, fundant, quin accedente putredine,

dine, caput in miram distendatur magnitudinem; quod à sanguinis per carotides internas aditu denegato, & ea propter in externas facto impetu, merito derivandum. Quod oculi distendantur, promineant, rigidi & quasi vitrei compareant ac lacrimas uberius fundant, id lymphæ à sanguine stagnante copiosius secedenti in acceptis ferendum. Quod cor valide pulsset, arteriarum quoque pulsus in principio magnus, postea languidus ac rarus sit, quod spiritus sit difficilis cum stertore & rhoncho, id sanguinis pulmones obruentis moli, eorundemque ea propter intercepto æquali reciproco motui, aërem rite nec expellenti, nec admittenti, imputandum. Quod demum vomitus & convulsiones cum dentium stridore variæ accedant, non aliunde quam à sanguine in duræ matris vasis hærente eandemque ad spasmus sollicitante, deducendum.

§. VII.

Signa antecedentia.

Jam sicuti omnis omnino hæmorrhagia supponit ac præviā habet sanguinis, in illa ubi succedit parte, nimiam ad rupturam usque congestionem; ita quod eadem in hac, quæ in cerebro sit effusione, præsto sit, est utique certum. Evincent enim id omnes, quæ morbum hunc antecedunt ac prænunciant passiones, quas inter præcipuæ, capitis cum vertigine temulentia, ejusdemque præcipue in occipite, dolor pressorius & gravativus, formicationis sensus in artubus, visus modo per caligines, modo coruscationes, turbatio, oculorum humiditas & intumescencia, aurium susurrus atque tinnitus, memoriæ & ingenii aliqualis hebetudo, somnus profundus, incubo & insomniis stipatus, venarum jugularium turgescencia ac faciei præter consuetudinem rubore suffusio.

§. VIII.

Incessus difficilis.

Quemadmodum porro ad inducendam sanguinis in certa parte congestionem, præter ejusdem abundantiam, tum ipsius validior per spasmus in aliis partibus eo suscitatus appulsus, tum etiam partis congestionem admittens quædam debilitas, concurrunt; ita, quin eadem hæc ad gignendam eam, quæ in cerebri vasis colligitur congestionem, conferant, neutiquam dubitandum. Huc enim redit omnis vis & efficacia illarum causarum, quas ad ingignendum hunc morbum, ceu antecedentes & procatacticas conferre, ratio docet, experientia confirmat.

§. IX.

Plethorici maxime & ubi sanguinis solennes excretionibus deficiunt huic malo obnoxii sunt.

Ut de sanguinis plenitudine primum dicamus, propter eam omnino accidit, quod hæmorrhagia hæc frequentissime incidat in ætatem virilem, & juxta Hippocratis aph. 57. sect. 6. ab anno quadragesimo usque ad sexagesimum, ubi confecto corporis augmento, succi in vasis plus justo non modo accumulatur, sed & densiores fiunt. Hinc porro fit, quod qui temperamenti sic dicti sunt sanguinei, nec non obesi, cum iis, qui lautam, otiosam & sedentariam vitam sectantur somnoque indulgent, pernitali hæmorrhagiæ huic admodum sint obnoxii. Idem accidere iis, qui propter suppressas, aut imminutas spontaneas hæmorrhagias, nec non omiffas diu fueras antea artificiales subtractiones, nimiam sanguinis copiam colligunt & coacervant, uberius testantur medicorum observata. De neglecta sanguinis missione testes sunt Acta Medic. Vratislav. MDCCII. de narium hæmorrhagia suppressa,

Frid. Hoffmanni Oper. Tom. II.

Hildanus Cent. III. Obs. XI. de hæmorrhoidibus retentis Hippocrates, Amatus & Zacutus Lusitanus, & qui primo loco ponendus fuisset, Lancisus, de subit. mortib. de mensibus & lochiis cohibitis cum Fontano Acta Nat. Curios. passim; de vicaria etiam mensium per os & nares vacuatione Hildanus Cent. III. Observ. XII.

§. X.

Tanto vero magis tantoque certius hæc sanguinis redundantia ad inferendum quod diximus damnum sit efficax, si accesserit altera illa causa, spasmus nempe in aliis externis remotisque à capite corporis partibus. Hujus enim tam infesta est operatio, ut non tantum sanguinis progressui in ea, quam detinet parte, fibras stringendo & vasa coarctando, obicem ponat, verum etiam eundem urgeat, ut aliorum cum impetu ruat, ibi vasa oppleat, diducat tandemque perrumpat. Spasmus autem in hæmorrhagiis ferme omnibus, atque etiam in hac, præsto esse, testatur juncta magnitudini pulsus durities, strictionem nervosarum in arteriis tunicarum prodens. Testatur quoque antecedens extremorum refrigeratio, nec non ille, quem quidam in artubus sentiunt, formicationis sensus. Atque etiam hanc ob causam fieri censendum est, quod experientia teste, hanc hæmorrhagiā sæpe incurrant, qui spasmis, in abdomine maxime, aliquamdiu fuerunt detenti, qui scilicet colicis passionibus, præsertim spasmodicis, hypochondriaco malo, doloribus ex calculo vesicæ item cystidis felleæ nec non diuturna alvi strictione laborarunt.

§. XI.

Ex quo jam ulterius concludendum, omnia quæ spasmus inducere apta, in numerum causarum hujus mali esse referenda. Conspicuus hoc nomine maxime est animi affectuum effectus, iræ inprimis ac terroris, quæ proxime in nervosas partes agunt, easdemque in anomalos spasticos motus adducendo, inæqualem quoque faciunt sanguinis circuitum, atque malum hoc sæpius accersunt; uti inter alios Hildanus, Schenckius ac Forestus fidem faciunt. Idem efficere valet venereum œstrum, quo motuum æquilibrio sublato, adeo in quibusdam exagitatum fuisse sanguinem, ut ipso in actu occubuerint attoniti, ex Henrici ab Heers Observ. XVIII. Bartholino & nostra de morbis ex intempestiva venere oriundis, dissertatione, constat uberius. Neque tantum impensior animi, verum etiam corporis commotio, ad sanguinem versus caput urgendum multum facit. Nos inter alia novimus à mica panis asperæ arteriæ illapsa, vehementissimam concitatam fuisse tussim, quam excepit hæmorrhagia in cerebro, lethali cum eventu.

§. XII.

Magna quoque ad inducendum hoc malum vis est materiæ illi acri, corruptæ & veneni tantum non naturam habenti, quæ à succorum vitælium connubio, salutari admodum consilio segregata, ad corporis ambitum propellitur, quando, vel sponte iterum recedit, aut per injurias externas repellitur; quippe quæ nervosis internis membranis illapsa, spasticas atroces suscitatur strictiones, per quas sanguis utique etiam agitur cum impetu ad caput ibidemque congeritur. Sic ex ulcerum manantium & fonticulorum coalitu id factum esse, auctor est Wepferus; ex corryzæ, pedum sudoris catarrhaliumque affectuum

Spasmi in remotis partibus multum ad genesin hujus hæmorrhagiæ conferunt.

Affectus animi frequentes & potentes sunt hujus mali causa.

Excretiones quæ in partibus externis fiunt retro-pulsa sæpius causam præbent hujus diu affectus.

suppressione, nec non retrocedente scabie, *Ephemerides naturæ curiosorum*; ex arthritide & podagra emanante vid. *Med. System. rat. tom. III. p. 189.* nec non *Wepferus*. Haud dissimilem pernitialem effectum in internis nervosis partibus edunt adstringentia, præpostere, inprimis in hæmorrhagiis nimis data, de quo notabile exemplum à nobis observatum & quod pluribus expositum in dissertatione Altorffii habita, de *viro apoplexia ex inconsulta hæmorrhoidum suppressione extincto*, cujus auctor est Clarissimus *Schultzius*.

§. XIII.

Malum quandoque fit epidemicum à solita aëris mutatione.

Merito præterea in numerum causarum hujus mali venit ipse aër, cujus constitutionem insalubrem & præternaturalem, epidemicum prorsus fecisse hunc morbum, *Lommius* potissimum, *Baglivus* & *Lancisus* affirmant. Maxime omnium vero generationi ejusdem favet frigus, quod fibras cutaneas stringendo vasaque in ambitu coarctando, ad interiora ipsumque caput urget ac pellit humores. Unde *Hippocrates* jam *Sect. III. aph. 23.* hyemalibus morbis annumeravit apoplecticum. Et *Piso* notavit: quod, quando circa solstitium hybernum boreas, corpora valde comprimens & mercurium ea propter in barometro sursum urgens ventus, repente insurgit, dispositos admodum infestare soleat attonitus morbus. Neque minus ad producendum hoc malum multum facit subita aëris mutatio. Nos certe crebrius observavimus, quod, si diurnam aëris intemperiem frigido-humidam, vento diutius ex occidente & zephyro spirante, subito ventus frigidus valde ex borea excipit; aut etiam intemperiem aëris calidam & humidam cito sequitur algida & constringens atmosphæræ constitutio; facilis admodum in hunc morbum dispositis fit lapsus. Quo etiam fundamento nititur illa *Amati Lusitani Cent. I. curat. XXXVI.* observatio, qua admissio liberius corpori ex balneo fervido æstuanti frigido aëre, apoplexiam accessisse memorat.

§. XIV.

Hunc morbum ut plurimum antecedit imbecillitas corporis.

Accedit causa, inter præcipuas numeranda, vasorum scilicet & membranarum cerebri imbecillitas, sive imminuta potentia motrix systaltica. Sine hac enim nec abundantia, nec appulsus sanguinis, ad excludendum hoc malum sufficiunt; at ubi adest, membranæ sanguinem appulsus minus vegete protrudunt, vasa eidem cedunt, lentus fit circuitus, stagnatio, factus tandemque ruptura. Est autem hæc debilitas quandoque nativa & à parentibus accepta, qua fit, ut certis familiis, fatalis atque funestus sit hic morbus, uti exemplis *Hoeferus*, *Forestus*, atque *Senhertus* confirmarunt. Alia demum accedit; quod patet in senibus, in quibus, quia partium omnium labascit robur, non mirum est, id etiam contingere in capite, ipsosque ea propter frequentius pati hos manes.

§. XV.

Ad quam disponit inordinatum vitæ genus.

Inter causas, quæ vasa ac membranas cerebri tono privant debito, potissima utique est, ingluvies, intemperantia atque ebrietas, ex cerevisiis lupulatis, vino, maxime sulphuris fumo infecto, nec non vini spiritu. Horum enim ea indoles, ut sanguinem exagitent, expandant, eoque simul ipsa vasa per quæ decurrit, distendant. Quod ubi accidit crebro, manet illa distensio, systaltica vis infringitur & ad concipiendam

morbosam stagnationem sternitur via. Unde merito hinc causam repetit *Henricus ab Heer*, quod septentrionalibus populis adeo frequens sit hic morbus, ac uti *Lancisus* observavit, nemo fere sobriæ vitæ addictus eodem corripiatur. Nec dispar ratio eorum, quæ capiti stuporem conciliant, opiatorum, absynthii, lupuli, nicotianæ, croci, carbonum vivorum, musti & cerevisiæ fermentantis vaporum, quibus dum succi & canales plus justo rarefiunt ac distenduntur, impeditus utique fit progressus.

§. XVI.

Non minoris momenti ad funestam in cerebro hæmorrhagiam proritandam facit habitus corporis cachecticus cum dolore gravativo capitis junctus, sub quo fibrillæ cerebri medullares & nervosæ flaccidæ & nimis lubricæ evadunt, systaltica & oscillatoria sua virtute privata. Quæ cerebri dispositio quod non modo ad hemiplexiam, sed & ad fortem & sanguineam apoplexiam multum conferat, nobis compluribus est compertum exemplis. Observavimus etiam asthmaticos, præsertim quando truculentum hoc malum à polyposis coagulibus intra cordis ventriculos, vel vasa pulmonalia hærentibus fovetur. Observatum quoque frequentius est, non modo grumosas, sed & polyposas massas, sinibus cerebri, præsertim longitudinali, ac venis jugularibus internis inhærentes, lethalem sanguinis in cerebro effusionem produxisse.

§. XVII.

Dein hic qui à sanguinis effluxu in cerebro oritur attonitus morbus, probe discernendus ab illo, qui fit à feri ibidem secessu, & quem consequitur hemiplexia & paralyxis totius lateris, ac vita quidem servatur, sed admodum misera. Hæc enim fit, quando quidem sanguis nimia copia cum impetu congeritur ad caput, non tamen vasa perrumpit, sed propter diurnam tantum stagnationem serum per poros secedit, ac descendens vel ad cerebri basin, vel ad spinalis medullæ alterutrum latus, eidemque incumbens, liquidi subtilioris activi tam secretionem, quam influxum in nervos, intercipit, eoque partes in latere alterutro sensu privat ac motu. Ut prætereamus conspicuam illam differentiam, quæ affectus inter soporosos & hunc quem delineavimus intercedit, dum illi sensum non simul ac semel accedunt, neque sensus & motus abolitionem, sed tantum sub somnolentia ob nubilationem junctam habent.

§. XVIII.

Quod cæterum *Hippocrates* de apoplexia *Sect. II. aph. XXXII.* consignavit prognosticon, id utique veritati responderet egregie: *vehementiorem*, scilicet qualis est quæ à sanguine effuso, *plane non*, debiliorem autem, sive quam sanguis stagnans & serum secedens gignunt, *difficulter solvi*. Nisi enim post venæ sectionem & congrua adhibita auxilia intra XXIV. horas sequatur levamen & symptomata remittant, spes salutis decollavit, & ex observatione *Aureliani* tertius dies longissimus moriendi terminus. Isque funestus eventus metuendus tanto certius, si senes invasit plethoricos morbus, ubi jam vires fractæ & cerebrum debile; si inebriationem summam, gravemque animi affectum iram & terrorem excipit; aut etiam si alii antea perpeffo morbo supervenit. Mortem autem instare concludendum: si

Status cachecticus & polyposis coagulibus intra ventriculos.

Apoplexia sanguinis distinguenda ab ea quæ fit à feri effusione intra cerebrum.

Quæ hæmorrhagia cerebri sit periculosa.

si stertor magis magisque ingravescit cum respirationis difficultate; si cor palpitat vehementius arteriarumque pulsatio admodum magna, dura simul atque inæqualis; si, ubi paulisper ad se redit attonitus, aliena tamen est mens; si convulsivi motus unius lateris ipsiusque pectoris accedunt, frigidus præsertim in superioribus sudor hæret guttatim, ipsa exspiratio frigida est, & urina, & alvi stercora sponte elabuntur.

THESES THERAPEUTICÆ CUM CAUTELIS.

§. I.

QUum adeo præceps & periculosum sit hoc malum, cito utique ac tempestive succurrendum, ubi adhuc salutis spes, ac æger in loco temperato & lucido ita collocandus, ut cervice non nimis declivis ac supinus, neque etiam plane erectus cubet, pedesque inprimis, vel plumis, vel integumentis, à frigore defendendi ac fovendi. Ipsa autem curatio respondeat causis. Inter quas quia præcipua antecedens ipsum effluxum sanguinis redundantis in cerebri vasis congestio eminens, cum imminuta motrice vasorum ibi & membranarum potentia, eo quam maxime medicatio dirigenda: tum ut sanguinis motus & impetus à capite divertatur; tum etiam ut partibus, ibi à robore defectis illud reddatur, ad redigendum iterum in motum, qui subsistit, sanguinem.

§. II.

Ad exsequendum primum, ab omni ævo ceu efficax æstimatum, & ab ipsa natura comprobatum remedium est in sanguinis missione, mox in principio mali, sine mora instituta. Huic merito primas in medicatione detulit cum *Nymanno Dodonæus observ. medic. cap. VIII. exercit. pract. p. 385.* memorabili exemplo vetulæ LXXII. annorum, per eam ab apoplexia liberatæ, confirmat. Quin ipsam naturam hanc monstrare viam, ex *Lancisii* observatione patet, qua senem fere septuagenarium apoplexiæ prodromis affectum, effusissima narium, ad duodecim libras hæmorrhagia, sanatum esse memorat.

§. III.

Quo vero pacto sanguis sit subtrahendus? non omnes eodem modo definiunt. Nonnulli, ac inter hos potissimum *Catherwood*, in libello Anglice edito, arteriotomiam omnibus aliis sanguinem mittendi modis anteponendam esse rationibus & exemplis docet. Cui sententiæ calculum adjecerunt Germani quidam Medici, inter quos etiam *Loew* ab *Erlsfeld in Medic. pract.* Nec improbandum videtur consilium, ac dolendum modo, nostris in oris, ob Chirurgorum ineptitudinem ac remedii novitatem, illud adhibere non esse integrum. Plurimi venæ sectionem suadent; sed quo in loco secanda sit vena, iterum in diversum abeunt. Alii venas in brachio, alii in fronte, naribus, nec non sub lingua incidere jubent. *Morgagni* venarum occipitalium incisionem eximie collaudat *Advers. anat. VI. p. 108.* quia hæ venæ intra cranium cum utroque laterali sinu communicant, eaque propter instituta ipsarum sectione, sanguis, quem in sinus convectorum erant, avertitur, atque hinc reliqui sanguinis, qui per eosdem sinus progreditur, copia minuitur aliquantum, motus autem non

sine emolumento augetur. Quia vero harum venarum trunci profundius siti & non nunquam in plures minoresque ramos divisi reperiuntur, cucurbitulas & crebras altasque incisiones antefendas putat. Quo quidem modo jam *Zacutus Lusitanus Med. Princ. hist. lib. I. hist. XXXIII.* bis apoplecticos se sanasse refert. Ab exercitatissimis tamen & numero plurimis medicis *Severino, Lancisio, Freindio*, à nobis in *Medic. ration. system. tom. III. p. 608.* venarum jugularium incisio laudatur, quia cerebro valde vicina & quam optime spatium libertatemque fluendi facit sanguini cerebro impacto ibique copiosius congesto.

§. IV.

In sanguinis missione tenenda hæc. Instituat quam potest fieri cito, priusquam ad atoniam usque dilatata arteriola & à sanguine effuso cerebrum inundatum. Foramen infligatur satis amplum, ut sanguis citiori & liberaliori flumine efferatur, quia lentus effluxus juvat nihil. Adornetur in loco parti affectæ proximo, brachio scilicet vel jugularibus. Quantitas sanguinis emittendi, ex vasorum plenitudine, pulsus viriumque habitudine determinetur, semper tamen sit larga. Si corpus plethoricum, temperamentum sanguineum, morbus à sanguinis evacuatione impedita ortus, iteretur sanguinis subtractio, quin repetatur, quum *Dionis* perhibeat, septies demum incisam venam profuisse. Sed primum celebretur in pede, postea in brachio, seu collo, ne, si secus sit, dato in parte superiore exitu, ex inferioribus & corporis ambitu ad caput major invitetur affluxus.

§. V.

Præter venæ sectionem, ad divertendum sanguinis à capite affluxum, præstans virtus eorum, quæ alvum irritant fortius, non tamen drastringorum illorum cathartorum, quæ veneni quippiam recondunt, sed quæ indolis innoxie, nerveas tantum intestinorum tunicas exstimulant efficaciter & ad motum sollicitant, qualia sunt salia, gemmæ scilicet, *Sedlicense* & ammoniacum. Hæc indenda paulo liberaliori dosi clysmatibus, ac præterea addendæ species, quibus flatus discutiendi & roborandi virtus inest, cujus indolis ruta, salvia, majorana, satireja, thymus, serpillum, flores lavendulæ, liliorum convallium, chamomillæ Romanæ, item semina carvi & anethi, unacum oleis expressis, rutaceo, chamæmælino ac laurino. Et sic confecta enemata non nimia copia, sed crebro, injicienda, ne iterum elabantur, & quidem ministerio syringæ, quo eo altius penetrent ac pervadant.

§. VI.

Quæ vero nervosas robore exutas partes roborant & ad motum exstimulant eoque humoris subsistentis discussionem promovent, exterius partim, partim interius admovenda. Exterius præstans virtus volatilium urinosorum, mixtorum cum cephalicis; inter quæ palmam fert in liquida forma salis ammoniaci cum calce viva paratus spiritus, rutæ & majoranæ, vel lavendulæ oleo imprægnatus; in sicca forma sal volatile salis ammoniaci siccum, iisdem oleis irroratum. Quæ vel naribus ad odorem admota, vel pluma ad interiora narium admissa, vel etiam per calarium scriptorium insufflata, excitant efficaciter. Eundem in finem locis exquisitoris sensus, maximeque pedum plantis, admoventur ea, quæ

Cautela circa sanguinis missionem tenenda.

Clysterum in hoc malo usus.

Externorum excitantium.

Curatio quomodo instituenda.

Principem locum tenet vena sectio.

In commodis locis.

doloris quendam sensum ibi excitant, sicque universum nervosarum partium systema ad contractionem sollicitant. Quo nomine notæ sunt frictiones asperiores cum pannis aut excutia institutæ, nec non urticationes; notæ quoque vesicatoria ipsaque cauteria actualia, quorum novum & à *Lancisio* approbatum adhibendi modum, evulgavit *Dominicus Mistichelli* in tractatu Itala lingua de apoplexia edito.

§. VII.

Cautissime
interne
danda sunt
spirituosa.

Interius autem si deglutiendi facultas superest, aut reddita, neutiquam danda spirituosa, aut volatilia; quippe quæ sanguinem; jam tum æstuantem, magis commovent ac rarefaciunt, eaque propter à *Pitkarnio* de *circul. sangu.* merito rejiciuntur. Sed propinanda ea, quæ analepticam, excitantem & simul discutientem virtutem possident; inter quæ spectata virtus diaphoreticorum fixorum, cum cinnabari, succino & nitro, quæ in pulveris forma cum aquis congruis, vel melius adhuc in potionem redacta porrigi possunt. Nobis quidem frequentioris & probati usus mixtura hæc: recipe aquæ liliorum convallium cum vino, aceti destillati ana uncias duas, spiritus cornu cervi succinati drachmam, antimonii diaphoretici, cinnabaris, lapidum cancrorum ana drachmam semis, syrupi corticum aurantiorum drachmas duas. M. Cui non nunquam, ad levem quendam stimulum nerveis stomachi fibrillis cum omnibus reliquis consentientibus inferendum, tantillum tartari emetici adjicere solemus, ne tamen vomitum moveat.

§. VIII.

Ad arcen-
dum hoc
malum
utilissima
venæ sec-
tio equi-
noctialis.

Sed quia hæc cerebri hæmorrhagia non tantum oppido periculosa, verum etiam, licet curata fuerit, facile repetit; haud postrema medentis cura eo utique dirigenda, quo ejusdem tam accessum, quam recursum, arceat. Jam recte utique cum *Martiano* & *Ballonio*, sensit *Casp. Hofmannus*, lib. III. instit. med. apoplecticos, quotquot sint, esse plethoricos. Ideo, ut sanguinis redundantia minuatur, danda est opera quam maxime. Hunc autem in finem nunquam non utilis sanguinis missio, maximeque illa, quæ circa æquinotiale institui solet tempus, quo solennes fere esse solent sanguinis & humorum commotiones, naturæque conatus ad eliminandum id, quod est in corpore superfluum. Saluti ea propter etiam est, vel ipsius *Hippocratis* testimonio, hæmorrhoidum fluxus, maxime iis, qui eundem antea jam experti. Sed eundem sine damno provocare & promovere, est æque artis. Nos ad obtinendum hoc, præter frictiones in ano & admissos fatus, maxime proficuum censemus hirudinum applicationem. Quibus utiliter adjungitur usus elixirii balsamici, ex aloë correctæ, croco, myrrha & succino, cum menstruo lixivioso aquoso, non spirituoso parati, nec non pilularum balsamicarum circumspecte datarum. Quæ tamen hæmorrhoides movent, minime adhibenda, si nulla ad fluxum adest dispositio, sed tum demum, quando emanere, aut parcius fluere incipit, alias, præsentē plethora, plus nocent.

§. IX.

Alvus sol-
venda
blandiori-
bus.

Dein ad vindicandum ab incurfu hujus mali corpus, maximum utique est præsidium in debito alvi secessu. Etenim generalis fere canon est practicus: neminem facile capitis morbos incurere, cui officium rite facit alvus. Interim

tamen alvina hæc excretio neutiquam proritanda validioribus drastis, quæ nerveas intestinorum tunicas impetuosius aggrediendo, spasmos suscitant in iis, & inæqualem sanguinis circuitum inducunt. Blandioribus potius & naturæ amicis hoc expediendum. Inter quæ commendabilia maxime rhabarbarina cum salinis abstergentibus, nec non pilulæ polychrestæ ac clysteres.

§. X.

Quæ præterea à quibusdam commendantur aquæ & balsama sic dicta apoplectica, tam interne usurpanda, quam exterius temporibus, naribus ac nuchæ inungenda, ad curationem æque ac præsertim hujus mali, nostra quidem sententia, in iis, quibus metus hæmorrhagiæ cerebri, plethoricis, sanguineis, virilis ætatis personis, sunt potius perquam nociva. De quo grave est testimonium *Dodonæi Stirp. hist. lib. VI.* ita habens: *ubi humorum copia adest, præsertim sanguini permixtorum, non tutus hujus (stillatitii lavendulæ liquoris) usus est, sicuti neque compositionis, quæ ex stillatitio vino, in quo hujusmodi herbe, flores, semina & aromata macerata sunt, conficitur, quam plerique temere & indifferenter exhibent. Nam calidorum hujusmodi caput implentium usu, & morbus intenditur, & æger in periculum inducitur.* Tutiora longe infusa theiformia cum aqua, ex herbis cephalicis, melissa maxime, betonica, salvia, cum cardamomo minori condita, quæ frequentius forbillata, sanguinis motum æqualem servant atque ipsi etiam cerebro nervisque conducunt.

Cautè me-
candum
cum balsa-
mis &
aquis ap-
plecticis.

§. XI.

Nulla verò ab omnibus erit expectanda incolumitas, nisi simul accesserit exactum in vita victuque moderamen. Potissimum autem ad præsertim hujus mali, nostra quidem sententia, in iis, quibus metus hæmorrhagiæ cerebri, plethoricis, sanguineis, virilis ætatis personis, sunt potius perquam nociva. De quo grave est testimonium *Dodonæi Stirp. hist. lib. VI.* ita habens: *ubi humorum copia adest, præsertim sanguini permixtorum, non tutus hujus (stillatitii lavendulæ liquoris) usus est, sicuti neque compositionis, quæ ex stillatitio vino, in quo hujusmodi herbe, flores, semina & aromata macerata sunt, conficitur, quam plerique temere & indifferenter exhibent. Nam calidorum hujusmodi caput implentium usu, & morbus intenditur, & æger in periculum inducitur.* Tutiora longe infusa theiformia cum aqua, ex herbis cephalicis, melissa maxime, betonica, salvia, cum cardamomo minori condita, quæ frequentius forbillata, sanguinis motum æqualem servant atque ipsi etiam cerebro nervisque conducunt.

Sed exacta
victus ra-
tio tenen-
da.

ENARRATIONES MORBORUM.

OBSERVATIO I.

Comes illustrissimus, fere quinquagenarius, sanguine succique plenus, aliquot ante annos affectus fuerat aliquoties paralyti, leviori tamen, cum loquendi difficultate. Inde petiit vicinas ditioni suæ Carolinas, iisdemque usus est tam interius, quam exterius. Sed quum inconsulto id fecisset medico, neque sanguinis missione, neque alvi purgatione, corpus prius rite præparasset, accidit, quum in balneum nimis adhuc calens descenderet, ut subito sensum tam internorum, quam externorum usu privaretur omni, sequuta

Balnei ca-
lidi Caroli-
narum
usus valde
suspectus.

sequuta mox respiratio valde citata, cum convulsivo quodam pectus attollente motu, arteriæ pulsarunt valide cum quadam duritie & facies intense rubuit. Secta fuit vena, admotum quoque naribus sternutatorium, quo vehementior pectoris concussio cum summo stertore inducta. Latus sinistrum totum omnis motus ac sensus fuit expers, manus tamen in eo convulsa perpetuo agitata. Mens plane non sibi constitit & intra quinque horas excepit mors. Post quam ingens sanguinis ac feri sanguinolenti copia, per viginti quatuor & longius horas, è naribus manavit.

Epicrisis.

Si ullus thermalium aquarum ad balneum usus circumspeditionem poscit ac prudentiam, certe est Carolinarum. Harum enim ea indoles, ut terreo calcareo, nec non martiali quo pollent principio, corporis superficiem constringant valide & sanguinem ac humores ad interiora agant. Atque hinc est quod œdematosos pedum tumores abigant cito, ac ubi corpus spasimis obnoxium est simulque vasa sanguine turgent, graves passionis, cordis palitationem vehementem, capitis dolorem acutum, cum virium dejectione & artuum debilitate inducere, quin febrem continuam æque ac intermittentem accendere valent. Ea vero propter etiam non mirandum, quod in illustrissima hac persona, sanguine redundante & præfente jam in capite ad humorum stagnationem dispositione, usu inconsulto, sanguis cum impetu fuerit congestus ad caput, ac tam in ipsius interioribus, quam exterioribus vasa rupta, lethali cum eventu. Id enim luculenter arguit sanguinolentum illud largum post mortem narium profluvium, quod factam in cerebro hæmorrhagiam semper prodit. Quod autem sternutatorio admoto increvit spiritus cum stertore difficultas, id utique monet medentes, ut in apoplexia sanguinea parcum eorum quæ sternutamenta movent & circumspæctum, sedato prius sanguinis ad caput impetu, habeant usum, ne sanguis majori cum vehementia ad locum cui stimulus impressus ruat mortemque acceleret.

OBSERVATIO II.

Fœmina generosa, quinquagesimum ætatis annum agens, constitutionis sanguineæ & texturæ admodum teneræ ac mollis, copiosum semper experta fuerat sanguinis per menses fluxum. Sed quum is quadragesimo nono anno ob ætatis rationem retineretur, ipsa de anxietate & angustia præcordiorum, inflatione in latere abdominis sinistro, gravitate & flacciditate artuum, vertiginoso capitis ac gravativo dolore, cum somno inquieto & interrupto, graviter cœpit conqueri, licet vultum rubieundum admodum exhiberet. Accedente tandem hyeme, adeo exacerbata fuerunt hæc omnia, ut medici auxilium implorare cogeretur, qui ad discutiendos flatus salia dedit volatilia oleosa, itemque carminativas essentias, ac præterea porrexit purgantem pulverem, ex resinæ jalappæ scrupulo dimidio ac tartari vitriolati granis sex. Quo quum sexies non sine acerbis torminibus fuisset purgata, insequenti nocte insultu correpta est apoplectico, pulsu tamen & respiratione adhuc integra. Secta fuit vena protinus & injectus clyster acris; quibus ad se quidem rediit attonita, sed super-

fuit aponia magnaue capitis debilitas. Hæc ut tolleret & recidivam arceret morbi artifex, obtulit denuo purgantem cum aqua liliorum convallium pulverem, ex resinæ jalappæ granis XII. & vitriolati tartari granis X. Quo assumpto, elapsa vix hora, rediit apoplexia & miseram brevi tempore tradidit morti.

Epicrisis.

Inclinant utique in sanguineam apoplexiam sanguineæ fœminæ desinente mensium fluxu, eaque propter venæ sectione opus habent quam maxime, ne accedentibus aliis causis, in actum erumpat dispositio. Ad quod si quicquam aliud efficax, est certe usus purgantium validiorum ac tormina inducentium. Quæ inter merito numeranda funestis multis effectibus infamata jalappæ resina in pulvere data; quippe quæ deglutita in stomacho facile coit ac plicis nerveæ intestinorum tunicæ adhærescens, spasmos ciēt ac oppido dolorosas tensiones, quibus utique sanguis urgetur ad superiora, ibidemque effectus edit exitiales. Quo magis patet, graviter peccasse medicantem, qui accedente post oblatum hoc purgans apoplexia levior, hac remittente, idem obtulit iterum in tanta copia, eoque recidivam induxit graviolem simul atque lethalem. Ac licet haud adeo incongrua videri possit noxios humores ad inferiora deducendi intentio, clementioribus tamen laxantibus, vel etiam clysteribus id fuisset perficiendum, non iis, quæ intestinis spasmos, ex torminibus cognoscendos, inducunt, eoque sanguinem ad caput urgendo, ut ibi perumpat & lethum inferat, faciunt.

OBSERVATIO III.

Theologus celeberrimi nominis, quinquagesimum nondum ingressus annum, floridæ & sanguineæ constitutionis ac vividi ingenii, sanus semper ac vegetus; ob peculiare quosdam ejus famæ ac existimationis infestus casus, in impensam animi perturbationem cum anxio dolore & mœrore conjectus, & valde inquietus sub parco etiam somno, ad levandum animum & suppressendam melancholiam, poculis vini, quæ alias etiam amabat, paulo largius se subinde invitabat. Procedente inde tempore ciborum amittebat appetentiam, & vacillante digestionem perpetuis fere vexabatur ructibus sine ullo ex alvo constipata prodeunte flatu; labascere incipiebant vires, ingenti quoque præcordiorum dolore & angustia premebatur, mœstis simul mentem fatigantibus cogitationibus, repentine & inopinato cum omnium sensuum amissione cecidit in terram, pulsu tamen & respiratione manente salva; collectis vero intra bihorium, post remedia idonea data, paululum viribus, ad se rediit, sed inde de genium imbecillitate, de torpore & languore dextri lateris, nec non de debilitate memoriæ anxias instituebat querelas. Proprio suasu petit Carolinas, non modo ut affectum depulsaret hypochondriacum, sed itinere & conversatione mœstas abundas animo excuteret afflictiones. Quum ego jam præfens essem, enixe meum etiam quæsivit consilium, suasi ut moderatius biberet temperatiorem illum fontem vulgo *Mühlen-Brunnen*, quo per viginti dies insigni cum euphoria utebatur. In reditu vero quum celebrem pertransiret urbem, invitatus ab amicis, lautique conviviis exceptus nimium indulgit genio & vini potui. Sub nocturno frigido cœlo in patriam reversus, de spirandi angustia

*Apoplexia
levior, in
graviolem
& lethalem
mutata.*

*Ex pur-
gante
acriori re-
cidiva le-
thalis.*

angustia & anxietatibus conquestus sumsit diaphoreticos quosdam pulveres, à quorum usu purpura rubra in universo fere corpore comparere coepit, conquerenti simul de immani capitis dolore medicus in consilium vocatus venæ sectionem in pede commendavit. Explorans meam de hoc remedio sententiam, prorsus eam dissuasi ob merum recursus purpuræ ad interiora. Medico nihilo minus magnum periculum ex neglectu venæ sectionis prædicente, admisit eam, quæ in pede satis largiter celebrabatur. Non ita multo post præcordialis anxietas majora sumsit incrementa sub extremorum refrigeratione, & purpura disparente improvise vehemens insultus sequebatur apoplecticus cum omnium sensuum amissione, cum stertore, pulsu valido & inæquali, facie existente tumida & rubicunda. Quo gravi affectu intra octo horas Vir magnæ doctrinæ & ingenii in meliorem vitam transferebatur.

Epicrisis.

Plura in hac historia sunt memoratu digna quæ in usum pathologico-therapeuticum animadverti possunt; ac primum, quod in homine sanguinei temperamenti, quando mœrori diuturno & gravi adjungitur prava diætæ ratio, inque primis immoderatio vini usus, systema nervorum ita infirmari possit, ut pathemata formaliter

hypochondriaca progignantur, quæ non facile alias in ejusmodi temperamentum incidunt. Notandum quoque est, quod ob diuturnas mentis fatigationes & labores cum mœrore diutius infestante conjunctos, tam imbecille reddi possit cerebrum nervorumque systema, ut ad insultus apoplecticos evadat dispositum. Insuper nostro in ægro primus insultus fuit levissimus, à solo impetuosiori sanguine ex imo ventre ad caput per spasmos obortus, qui venæ sectione, stagnantem in vasis cerebri sanguinem resolvente & divertente, brevi potuisset submoveri. Quia vero nullus affectus facilius recurrit, quam apoplecticus, præsertim si non accurata & exquisita vivendi ratione, idoneisque remediis avertatur; factum hinc est, ut post usum Carolinarum, quæ magnum quidem hypochondriacorum præsidium sunt, minus vero morbis capitis favent, non observata accuratiori diætâ, gravior dein insultus subsequutus fuerit & quidem in nostro ægro lethalis, dubio procul, quod à larga venæ sectione purpuracea materia ad interiora violentia majori conversa, spasmos suscitavit, quibus sanguis impetuosius adactus ad caput, tandem intus vasa disruperit. Cæterum de apoplexiæ aliis causis, speciebus, & observationibus huc pertinentibus, in Parte III. de morbis ex atonia oris, fusius egimus.





S E C T I O II.

D E

DOLORIBUS ET SPASMIS VARII Generis Internis & Externis, nec non Arthriticis & Rheumaticis.

C A P U T I.

De Dolore Cephalico.

THESES PATHOLOGICÆ.

§. I.

Definitio



DOLOR cephalicus est valde molesta in membranis capitis nervosis à variis causis distractis suscitata sensatio, quæ pro differenti gradu & loco varia & gravia sæpius post se trahit symptomata.

§. II.

Sedes dolorum.

Dolor diversa in capite occupat loca, cujus rei nulla alia subest ratio, quam quod diversis intra & extra cranium nervosis membranis illud instructum sit. Extra cranium occurrit tenuis sed satis valida & exquisitæ sensationis membrana, quæ immediate id cingit, & à carotide externa plures accipit in anteriori, media & posteriori parte arteriolas; ramulos vero nervorum è vertebriis colli & pari septimo cerebri. Cohæret autem pericranium cum musculis cranio vicinis ac per futuras cum duræ matris exteriori lamina: in qua membrana frequentiore certe doloris cephalici sedem reponimus; quod inter alia, idonea ad leniendum gravem dolorem externe applicata remedia, sub forma emplastri vel epithematis, item ex fonte chirurgico, scarificationes, setacea, cauteria inusta & vesicatoria, clare satis atque perspicue demonstrant. Neque tamen excludere hic volumus ipsam quæ caput tegit cutem, præsertim interiorē ejus partem vicinam pericranio, à qua etiam separari potest, & quam plura sanguifera percurrunt vasa, tunc præcipue doloris sedem constituentem, ubi is magis solet esse obtusus, gravativus & pressorius, cum in pericranio magis sit acutus.

§. III.

in pericranio.

in cute.

in dura matre.

Neque immunis à doloribus est interior, quæ cerebrum cingit membrana, sic dicta dura mater, quæ ex fibris valde tendinosiis & nervosis contexta atque ex duplici lamina conflata est, & à quinto & septimo nervorum pari ramos accipit; arterioliis vero tribus donata: prima oritur à carotide interna, quæ ad anteriorem duræ matris partem abit, secunda, à carotide externa, quæ per foramen proprium intrat cranium & ad mediam partem vergit, tertia, à

vertebralis internæ ramo externo, quæ per foramen jugularis internæ ingreditur cranium & ad posteriorem duræ matris partem spectat. Rarior quidem ibi dolorum sedes, sed multo periculiosior: nam si sanguis in ejus vasis diu stagnat, vel copia aut acrimonia eorum vim motricem valde lædit, quam facile graviores morbum capitis; atque in acutis phrenitidem vel convulsionem, præsertim si dolor sit pulsatorius; in chronicis morbis paralyfin, hemiplexiam, nec non affectus soporosos post se trahit.

§. IV.

Reliquæ tenues illæ membranæ, quæ cerebrum immediate involvunt, utpote pia mater atque arachnoides, quæ posterior tamen potius externa piæ matris membrana videtur, cellulosum interstitium efformans per quod vasa repunt, nostra quidem sententia minime molestæ sensationis sedem constituere videntur, eo quod careant fibris tensibilibus nervosis elasticis, atque etiam nervulorum ramulis ibi non conspiciendis. Denique membrana valde exilis & sensilis, quæ ex tunica pituitaria nascitur, & sinus ossis frontis investit, non raro præbet acutissimi doloris domicilium.

Reliquæ membranæ sedem non constituent.

ratio.

Sed tamen membrana pituitaria.

§. V.

Ingens doloris in capite, ratione loci quem occupat, item ratione vehementiæ ac diuturnitatis discrimen est, quo inde etiam diversa ab auctoribus ipsi imposita sunt nomina. Nam si levior est, & modo partem capitis afficit, dicitur cephalalgia; si diuturnior & gravior, ac totum caput occupat, cephalææ nomen accipit, quam GALENUS ita optime describit: *pr. 3. tr. 2. cap. 35. cephalæa est dolor totius capitis diuturnus ægreque solubilis, qui à parva occasione vehementes habet exacerbationes, adeo, ut neque strepitum, neque vocem violentam, neque luminis splendorem, neque motum tolerare possit patiens, sed tranquillitatem & obscurum cubiculum quærat, idque ob doloris vehementiam; quippe alii se malleo percuti arbitrantur, alii caput contundi distendique sentiunt, ac paucis ad oculorum radices dolor extenditur: quo in dolore totam capitis membranam vehementer affectam esse non dubitamus.*

Discrimen

inter cephalalgiam & cephalæam.

§. VI.

Sæpius fit, ut unum tantum latus dolor obfideat, altero salvo & sine dolore; tunc græce hemicrania vocatur. Interdum etiam in certo tantum verticis loco circumscripto fixus hæret, ita ut vix magnitudine grossum vel imperialem æquet, mulieribus & quidem hystericis familiaris;

inter hemicraniam

& clavum hystericum.

liaris; qui clavi nomine insignitur. Quandoque dolor frontem & loca supercilia acutissimus obfidet: alius solum synciput, alius occiput, alius verticem prope futuram, alius tempora magis occupat. Neque una eademque solet esse sensatio: nam alius acutus, pungitivus, lancinans dolor est, alius contusivus, gravativus & pressorius, alius rursus constrictorius, quidam æstuosus & inflammans, alius frigidus est, qualis in mulieribus potissimum verticem ferire solet, ut quasi se glaciem gelidam in ipso gestare conquerantur.

§. VII.

Causa generalis.

In genere omnis doloris cephalici causam, à liberiori & æquabili sanguinis per vasa sanguifera, quibus cutis capitis, pericranium, ipsaque dura mater instructa sunt, progressivo & circulari motu impedito, tanquam à fonte derivamus. Nullus certe medicorum exactius, & secundum leges mechanicas, genesis doloris hujus demonstravit, ipso HIPPOCRATE, qui *lib. de flatibus* §. 13. ita rem perbelle exprimit: *sanguinis, inquit, transitus in capite magna angustia coarctatur, cujus abundantia ac conclusio dolorem excitat. Sanguis enim ipsa natura calidus existens, vi coactus, per angustam viam transire celerissime non potest, cum multa impedimento sint obstacula & oppilationes; quapropter etiam pulsus circa tempora.* Qui sane locus, Hippocrati non penitus incognitum fuisse sanguinis progressivum motum ex arteriis in venas, satis abunde declarat: obstacula enim, quæ liberiores transitum denegant vocat oppilationes, quæ in vasis revehentibus, quia carent impulsu, unde tardior & lentior motus, consistunt. Id quod etiam dissectiones ex gravi cephalæa mortuorum confirmare videntur: nam teste BONE TO, WEPFERO, PECHLINO aliisque, sinus cerebri, jugulares etiam internæ & externæ venæ, sanguine mucoso crasso, imo pseudopolypis subinde infarctæ fuerunt repertæ: quod etiam nos in malo epileptico demortuis aliquoties observavimus. Si enim major sanguinis copia ad caput fertur, quam ipsæ venæ eadem celeritate reducere possunt, vasa arteriosa, & inter hæc maxime minima & capillaria, à congesto sanguine valde distenduntur & ipsæ membranæ insigniter tenduntur; qua ratione tristis illa sensatio excitatur.

§. VIII.

Pro conditione sanguinis variæ doloris species enascuntur.

Notandum vero hoc loco est, quod pro conditione, intemperie vel vitio sanguinis, si vel nimia copia peccat, vel nimis spissus & glutinosus, vel sero valde acri refertus est, alia etiam atque alia inde doloris species enascatur. Nam quando is impetuosè & nimia copia in membranas irruit, quod præcipue de plethoricis & ubi consueta per nares fluxio supprimitur, nec non de adolescentibus valet, dolor totum caput occupare solet; quod tunc calet, tumet, dolet, rubet, vasa turgescunt, fortiter pulsant, præsertim circa jugulum & tempora, nares aridæ & siccæ sunt, fauces ardor & fitis occupat. Talem dolorem veteres à causa calida suscitari dixerunt.

§. IX.

Quando dolor gravativus, obtusus & pressorius?

Ubi sanguis in vasis capitis collectus multo scatet & mucido sero, vel ex obstructa aut superpressa, quod sæpius accidit, coryza aut gravedine, dolor in capite oboritur, tunc magis gra-

vativus, obtusus, pressorius, maxime in antica parte atque in fronte esse solet, quandoque etiam caput instar ponderis grave est, ut vix in altum possit elevari. Non raro evenit, ut in ipsius capitis cute, in vertice præsertim, tumores quibus digiti imprimi possunt exsurgant, pulsu interea languido, facieque livida existente. Quod inde à longo jam tempore CELSUS notavit, *lib. IV. cap. 2.* ita differens: *præter hæc invenitur genus doloris, quod potest longum esse, ubi humor cutim inflat, eaque intumescit & prementi digito cedit.* Veteres hujusmodi dolorem à causa frigida deduxerunt.

§. X.

Deterior doloris & magis pervicacis species est, qui accidit lue venerea valde affectis, cum materia serosa, acris, caustica firmiter pericranio insidet & interdum ipsum cranium cariosum reddens difficillime remediis cedit atque fanescit. Ejusdem generis esse solet is dolor, qui à materia salino-causticæ indolis ad habitum corporis propulsa & postea retrocedente nascitur; uti id in arthritide, podagra, scabie, erysipelate capitis, gutta rosacea laborantibus, sæpius in praxi observavimus. In variolis & morbillis, antequam peccans materia naturæ robore ad extimam cutem propellitur, vel, quod pejus, si repellitur, atrox sæpe cum febre aut delirio, vel in infantibus cum epilepsia, dolor caput torquet; quo casu, ubi materia exigua caustica dolorem efficit, præternaturalis & vehemens membrarum potius strictura, quam earundem distensio, quæ à copia feri & sanguinis magis fit, locum habet.

Qualis à lue venerea?

à materia salina?

§. XI.

Sæpius in capite dolor est acutissimus, fere intolerabilis, fixus & diutius affligens, qualis totius corporis & animi vires pessundat, somnum tollit, concoctionem impedit, nauseam & ciborum fastidium parit, & alios sæpe gravissimos capitis & nervorum morbos, ut sunt vertigo, oculorum caligo & suffusio, cœcitas, aurium tinnitus, convulsio, epilepsia, post se trahit, atque etiam reliquas nervosas corporis partes in consensum trahendo, vomitum, alvi stricturam, extremorum refrigerationem, faciemque moribundo similem efficit. Id quod à veteribus quoque animadversum videmus. CELSUS enim *lib. IV. cap. 2.* scribit: *cephalææ notæ sunt: horror validus, nervorum resolutio, oculorum caligo, mentis alienatio, vomitus, vocis suppressio, corporis refrigeratio, animæ defectio.*

Symptomata doloris acutissimi.

§. XII.

Ad genesis doloris cephalici quod attinet, consideratione etiam digna est nativa vel à parentibus tracta nervosarum capitis partium imbecillitas; pars enim quo debilior, id est vi tonica & elastica sua naturali valde privata, eo facilius & promptius humorem alienum admittit, recipit ac retinet, atque inde stagnatio, partiumque nervosarum afflictio contingit. Novimus sæpius cephalalgiam hæreditariam, à parentibus debili capitis constitutione præditis acceptam; vidimus etiam à diuturno animi moerore, à præpostera Venere, à nimis lucubrationibus & mentis fatigueationibus, item à nimis crebra sanguinis missione, vel effrenibus hæmorrhagiis caput ita debilitatum fuisse, ut graves inde dolores, nec non alii, qui vehementer caput infestant morbi, exorti fuerint.

À quibus causis præducatur.

§. XIII.

§. XIII.

*Causa re-
mota quo-
que frigus.*

Neque ex classe caularum, quæ vocantur remotæ, excludi debet frigus, quod uti omnibus nervosis partibus, si jam dolore premuntur, infestum est, & liberam transpirationem per cutim impedit: ita maxime nocet, si capiti denudato admittitur, vel si id non satis contra nocturnum frigus fuerit munitum, vel etiam, si à longo sermone vel motu corporis nimio, aut à sole, aut ab ira, vel ab ingestis largius potibus spirituosus & inebriantibus incalescens pluvioso cœlo, nocturno præsertim, repente exponitur.

§. XIV.

*Cephalal-
gia sympto-
matica.*

Memorandum id quoque est, cephalalgiam sæpius tantummodo esse symptoma, quod morbo demum accedit. Ita frequentius febribus continuis, intermittentibus quoque, & inter has maxime quartanæ jungitur: atque vix quicquam in praxi crebrius occurrit, quam quod mensibus inordinate prodeuntibus vel imminetibus, caput doleat gravissime; spasticæ videlicet dum ex imo ventre stricturæ, in caput suum effectum exerunt. Digestionis vitio & affectu sic dicto hypochondriaco laborantibus frequenter associatur: nam si prima regio vitiosorum humorum colluvie scatet, & inde oborientes spasmus ac flatus, humores ad caput plus justo urgent, nimia eorum congestio, vasorum distensiones, à quibus tunicarum nervosarum læsio fit, parit. Constat etiam hemicranie causam, à stomachi vitio frequentius oriri, dum hoc non bene coquente, multæ generantur cruditates, quæ cum succo ciborum chyloso permixtæ, per thoracicum ductum ad cor adductæ, ac protinus ad caput delatæ, antequam per congrua corporis emunctoria expurgatæ fuerint, dolores periodicos efficiunt; qui absoluta digestionis ut plurimum invadunt.

*It. hemi-
crania.*

§. XV.

*Puerilis
ætas, quare
cephalalgia
obnoxia?*

Observamus porro ætatem puerilem valde doloribus esse obnoxiam, tum quod in hac ætate minus exacta servatur diætæ & ventriculus cibis dulcibus, fructibus horæis, placentis ac lacticiis oneratur; tum quod etiam vermes, quibus gignendis pueri peropportuni sunt, causam hujus mali præbent, dum putres & corrupti humores ad caput cum chylo delati, membranis motricibus elasticis tonum & robur naturale auferunt. Sciendum quoque est, non semper & continenter dolorem hunc cruciare, sed dilucida sua ac definita interdum habere intervalla, ut magno ægrorum solatio subindè remittat, & ad notabile etiam tempus ægros deferat, qui certis tamen postea horis, diebus, imo mensibus & annis revertitur: certo tunc indicio, causam magis in remotis partibus, maxime omnium in ventriculo ac visceribus imi ventris hæere; quorum vitio sanguinis liber progressus per universum corpus, maxime per caput, ubi impeditur, dolor excitatur: quod inprimis in viris, qui fluxui hæmorrhoidali sunt vel fuerunt obnoxii, vel malo hypochondriaco affecti, observavimus.

§. XVI.

Prognosis.

Neque semper sine periculo cephalalgia est: nam si causa doloris magis intra cranium inque membranis cerebri consistit, sique dolor vehemens & assiduus cum febre excruciat & som-

Frid. Hoffmanni Oper. Tom. II.

num pæne omnem adimit, phrenitidem non raro prænunciat; si vero subito in hypochondriacis vel in melancholiam pronis, præsertim graviore animi affectu præcedente oritur, & somnum atque appetentiam aufert, ac cum auditus difficultate vasorumque interna pulsatione jungitur, hæc vero cuncta sine febre fiunt; furorem præfigit. Ubi vero subitum & peracutum in capite dolorem aurium tinnitus, difficilis incessus, genuum imbecillitas, & impeditus tardusque sermo sequitur, signum est futuri morbi attoniti vel etiam hemiplexiæ; qui tamen magis in opposito latere quam in affecto excruciat, dum hoc percipiendo dolori non amplius par est. Neque prætermittendum esse censeo, quod in adolescentibus & junioribus, frequentiores cephalalgia, futuræ arthritidis vel podagræ indicium præbeant.

INDICATIONES CURATORIÆ.

§. I.

Quod attinet ad curationem hujus mali, cum variæ ejus sint causæ, probe eæ debent discerni, quia eisdem removendis, omnis medendi ratio superstructa esse debet. In genere tamen omnes scopi hunc morbum curandi, sequentibus absolvuntur indicationibus. Primo sanguis & humores impetuosè ad caput congesti si fuerint, partim ad loca ignobilia derivandi, partim idoneis remediis discutiendi sunt. Secundo stricturæ membranarum capitis spasticæ, quarum causa plerumque est acris caustica materia, relaxandæ sunt, ut liberius fluida, quorum cursus per has impeditus fuit, nunc progredi possint. Tertio causa materialis vitiosa, peccans intemperie, temperanda & per convenientia emunctoria placide subducenda. Tandem ad avertendas recidivas, capiti & toti nervorum systemati idoneis remediis præsertim accurato diætæ & vitæ regimine robur conciliandum.

*Indicatio-
nes qua-
mor.*

§. II.

Si causa doloris est nimius ex inferioribus locis ad caput per spasmos appulsus & irruens sanguis, non facile præsentius auxilium quam in ejus missione positum erit, quæ in locis non procul à parte affecta, melioris derivationis causa instituenda est, videlicet sub lingua aut in fronte, vel venæ jugularis externæ incisione, aut hirudinum pone aures applicatione: hac tamen adhibita observatione, ut si corpus nimis turgeat sanguine, primo vena circa pedum talos pertundatur, postea sequente vel secundo die vena circa caput aperiri potest. Consultum quoque judicamus, ante sanguinis detractionem, alvum fordibus deplere, quod commode & insigni cum levamine clysteribus fieri potest domesticis, vel etiam per infusum mannatum & rhabarbarinum, adjecto sale quodam aperitivo, ut cremore tartari, vel sale Sedlizeni.

*Quando
venæ sectio
conferat.*

§. III.

Ad compescendum vero nimium sanguinis abundantis & ebullientis orgasmum, mixturam blande diapnoicam & temperantem, ex aqua florum tilia, liliorum convallium, sambuci, cerasorum nigrorum, antimonio diaphoretico, nitro purificato, cornu cervi usto, cinnabari & syrupo papaveris albi compositam, dare expedit. Externe vero epithema discutiens & temperans

*Quibus or-
gasmus seu
dandus.*

Y

fron-

fronti & capiti cum linteo duplicato est applicandum, cujus formula hæc esse potest: Recipe aceti rosacei, rutacei ana unciam & dimidiam, spiritus rosarum drachmas duas in quo camphoræ grana sex soluta, nitri purificati scrupulos duos, olei ligni Rhodii guttas quindecim: vel sequens emulsio cum fructu usurpari poterit. Recipe nucleorum Persicorum, amygdalarum amararum ana unciam dimidiam, seminis papaveris albi drachmas duas, aquæ rosarum, florum sambuci, ceraforum nigrorum ana uncias duas. Fiat emulsio: adde nitri drachmam dimidiam, camphoræ in oleo amygdalarum dulcium solutæ grana quinque. M. D.

§. IV.

*Quid faci-
endum si à
sero viscido
dolor ori-
etur.*

Alia vero medendi ratione opus est, si à feri visceri & vitiosi intra vel extra cranii membranarum vasa stagnantis copia, dolor cum torpore & gravitate sæpe valde diuturnus innascitur, ubi nec sanguinis missiones, nec leniora laxantia quicquam efficaciter præstare possunt, sed tum dare convenit paulo valentiora, quæ crassos glutinosos humores dissolvendi & simul per alvum expellendi facultate pollent. Id quod utrumque egregie præstant, quæ sequuntur pilulæ: Recipe gummi ammoniaci depurati, sagapeni, myrrhæ electæ, aloës rosatæ, extracti hellebori nigri, resinæ jalappæ, mercurii dulcis, cinnabaris præparatæ ana drachmam dimidiam, extracti croci, pulveris castorei, salis succini ana grana XV. M. F. Pil. ex scrupulo numero XII. quorum sex vesperi, & sex postero die mane sumi possunt; quo tempore etiam ab omni cibo abstinendum & tenuia tantum juscula ægro præbenda sunt: tribus vero diebus exactis, idem repeti potest remedium. Vacuata sic sufficienter vitiosi feri copia, medicina utendum est tonica roborante & simul diuretica; quo fine ego multoties mixturam, quæ ex tincturæ antimonii acris partibus quatuor, essentia succini & spiritus bezoardici Buffii, vel tartari & liquoris nostri anodynæ mineralis, singulorum partibus duabus erat composita, summo cum fructu expertus sum; cujus usus, dosin bis vel ter de die sumendo, per septimanam & ultra continuari potest. Nam quæ fibras torpidas roborando earum vim motricem elasticam excitant, simulque urinæ fluxum promovent, ea in hac cephalalgia specie, quæ ab extravasato sero intra cutim & cranium, vel etiam in ipso cerebro oritur, valde proficua observavimus. Præter hæc autem cum CELSO, laborem & exercitationem usque ad sudorem, vehementem fricationem, & cibos ac potiones quæ urinam movent, in tali doloris genere commendamus.

§. V.

*Adhibenda
externa
prioribus in
cassum ad-
hibitis.*

Si his in usum vocatis dolor non discutitur, confugiendum etiam ad externa, inter quæ veficatoria virtutis sunt expertissimæ, quia pernicioso stagnanti humori exitum concedunt. Nos in usu habemus emplastrum meliloti, cujus uncia cum drachma cantharidum misceatur, adjectis granis aliquot camphoræ. Hoc magnitudine thaleri nuchæ applicari, & postea renovando illud, per longum tempus continuari potest; quod sine ullo incommodo insignem serosi humoris copiam fundit. In malo graviore autem & ubi à sero sub cute capitis stagnante, tumor visu, nec non ex dolore tactu cognoscitur, B. WEPFERUS toti raso capiti emplastrum veficatorium,

instar cucuphæ imposuit, cujus effectus hic fuit, ut sine abortis vesicis magnam feri visceri subtraxerit copiam: quod remedii genus jam tum ab ipso RIVERO, vide *ejus observat.* in pertinaci capitis dolore, summo cum fructu usurpatum fuisse animadvertimus.

§. VI.

Interdum fit, ut præter consuetudinem intensus dolor, certum duntaxat locum occupet, à materia fixius & paulo profundius membranis inhærente, oriundus; quo casu medicus Gallus cum prudentia doctus & in observatione curiosus CHESNEAU, vide *ejus observationes*, miraculosum plane herbæ ranunculi pratensis impostæ veficantem effectum, non satis prædicare potest: de cujus herbæ specie scribit, quod foliis anemonæ assimuletur, & masticata linguam mordeat quam maxime; hujus folia in mortario marmoreo contusa, & simul emplastro perforato appposito, parti applicare jubet. Videtur hæc herba autem haud dissimilem cum moxa possidere effectum, quæ etiam in ejusmodi dolore à medicorum peritissimis magnopere æstimatur. Ego rebus sic stantibus, felici aliquoties cum successu, rasæ prius quam occupavit dolor parti, ficcum sal volatile salis ammoniaci, cum æquali parte pulveris sinapi mixtum imponi jussi, eo quod paulo fortiolem discussionem, tam profunde inhærens vitiosus humor requiratur.

§. VII.

Ubi vero dolor à suppressa coryza, sive à muco, intra narium concamerationes & sinus, detento oritur, expedit crebro, sal quod vocatur Anglicanum, & nihil aliud est, quam sal volatile ficcum salis ammoniaci, cum oleo cephalico, ut lavendulæ vel majoranæ exaltatum, naribus admove, vel etiam errhinum pulverem leniter sternutationem moventem, qui ex herba majoranæ, betonicæ, maro vero, floribus benzoës & pulvere caryophyllorum concinnatur, ad interiora narium admittere.

§. VIII.

Quod si vero causa chronici & immanis doloris, in valde corrupti feri & sanguinis massa, ut fit in lue Gallica & scorbutica, fundamentum suum habet, tunc utique necessarium est, congruis & specificis remediis hisce morbis sanandis accommodatis causam morbi aggredi; quo faciunt quam maxime lignorum decocta cum antimonio crudo, si prius humores corrupti per alvum probe, per ejusmodi quas jam supra dedimus pilulas, exclusi fuerint. Multum etiam tunc ex diætetis confert abstinencia sive inedia per unum vel alterum diem, nec non labor & exercitatio corporis ad sudorem usque. Utile quoque est, in pertinaci tali morbo, ab impuro qui nascitur sero, per medicinam, sudorem provocare: cui scopo egregie sequens pulvis satisfacit. Recipe cinnabaris nativæ præparatæ, cerussæ antimonii sive bezoardici mineralis, salis volatilæ viperarum vel cornu cervi, nitri purificati, singulorum grana X. camphoræ granum dimidium, pro dosi, desuper bibendo decoctum sanguinem purificans.

§. X.

Hemicrania & præsertim periodica, causam latentem ut plurimum prima in regione habet, quando ventriculus cum annexo duodeno, vitiosa humorum colluvie refertus est, quam lenioribus

*In dolori
fixo qui
conferas*

*Quid in
gravatibus*

*Quomodo
tractandus
quis sit à se-
ro & san-
guine cor-
ruptus*

*Quid in
hemicrania
proficiat*

ribus tunc emeticis evacuare proficit : alvum quoque ducere, & per inferiora sordes expurgare, noxiumque humorem à capite derivare, interdum valde est necessarium; id quod optime, per pilulas polychrestas balsamicas, fieri potest. Postea elixiria stomachica, tonum ventriculi & intestinorum roborantia, sunt subjungenda. Si vero ab inordinato mensium vel hæmorrhoidum fluxu, causa doloris nascitur, remediis quæ salutes excretionis in justum & convenientem ordinem redigunt, prudenter est utendum.

CAUTELÆ ET OBSERVATIONES CLINICÆ.

§. I.

Quomodo
& quando
dolor le-
niendus.

Absoluta sic doloris cephalici cura, quasdam necessarias adhuc cautelas & observationes ad eam spectantes subicere haud erit inuile. Quandoque dirus & acutus dolor, præsertim qui consistit in syncipite & sinibus frontalibus, tanta vi pollet, ut vires mirum in modum frangendo, vitæ discrimen minetur, ablatio causæ morbi minime erit prius exspectanda, sed ægro potius primo omnium levamen quoddam afferendum est; eo quod viribus amissis, medicus frustra semper laboret. Quin imo ipsa doloris acerbitas sæpe tanta est, ut graviora symptomata, vigiliam assiduam, animi deliquia, febrem, inflammationem mentisque alienationem accerere possit. Erunt ergo tum remedia interna, tum externa, ad dolorem levandum primario dirigenda. Ego vero ex internis, primas utique partes massæ pilularum Wildegansii, quando cum cinnabari nativa miscetur, nec non pilulis Starkii deferre soleo. Prius vero semper ante usum anodynorum enemate venter subducendus est. Inter externa nec tutius, nec virtute præstantius invenimus remedium, quam linimentum spissius ex sequentibus ingredientibus, sub tali forma paratum. Sumitur nempe olei nucis moschatae expressi uncia dimidia, resinæ styracis, resinæ corticis thymiamatis æquali pondere drachma, extracti croci, balsami Peruviani, utriusque drachma dimidia, olei ligni Rhodii guttæ XII. M. linimentum fiat spissius, quod corio inductum, magnitudine imperialis, temporibus applicetur. Sedato doloris impetu per interne & externe adhibita anodyna, lene catharticum propinare juvat: postea ad alia, causam morbi penitus pro ejus conditione & natura per congrua remedia removendi, medicus confugere debet.

Si dolor ab
humore ex-
travasato,
vel in sinu-
bus frontis
hæret

Quando dolor acutissimus vixque tolerabilis, cavernis narium, sinibusque osseis capitis diutius infixus hæret, qui ab exigua sanguinis vel humoris extravasati quantitate, sub membrana hos sinus tegente, producit, sedare non modo, per jam dicta remedia, doloris atrociam convenit, sed & laborandum est, ut sanguinis appulsus, sub quo dolor augetur, minuatur; quod commodissime more Ægyptiacorum medicorum scarificatione facta in naribus, fieri potest, vel commodiosiori modo, si straminis paulo durioris portio valide & subito naribus intrudatur, ut sanguinis inde sequatur profluvium.

§. II.

vel sub
membrana
pericranii.

Si vero sub membrana pericranii extravasatus, mordax & acris humor inclusus, os incipit cariosum reddere, tum omnibus aliis in cassum applicatis ad incisionem accedendum est, quæ

Frid. Hoffmanni Oper. Tom. II.

uti in paronychia ex simili fere causa orta, ita hic mirabile ferme adfert auxilium. Si vero jam caries ad diploën ipsamque lamellam inferiorem cranii penetraverit, unicum auxilium in trepanatione provide erit reponendum.

§. III.

Porro in genere sciendum est, in omni, à quacunque etiam causa proficiscatur, dolore cephalico, initium curationis ab injectione enematis, item à venæ sectione, si plethora id exigit, faciendum esse, ita tamen ut alvi apertio huic præcedat. Postea de aliorum congruorum remedium tam internorum quam externorum usu erit discernendum. Sæpius plethora soluta, ad meliorem derivationem causæ peccantis à parte affecta, frontis venam aperire expedit. Et tunc Clarissimi HEURNII monitum, quod *notis in aph. 68. HIPPOCRATIS, Sect. V.* insinuat, dignum utique observatione est. Suadet nempe, ante sectionem, ut *vinculum collo injiciatur, quo intumescat hæc vena, quæ oblique erit secanda, cavendo diligenter ne lædatur tunica pericranii.*

§. IV.

Arteriotomiam in temporibus celebrandam, præsentaneam & pene mirandam, ceteris omnibus inaniter adhibitis, sæpius opem ferre & lenimen, probatissimorum medicorum fide constat. Neque ego, quanquam nunquam hoc remedio usus sum, detrahare illi quicquam volo. Ita vero de hoc existimo, quod si sanguis ex ramo venæ jugularis externo aperto extrahatur, longe melius retardatum circularem sanguinis motum in capite restitui, humoremque subsistentem vel extravasatum, à quo pendet dolor, felicius dimoveri & excludi posse; dum videlicet sanguis arteriosus, majori ut antea celeritate in spatium venæ ab extractione sanguinis evacuaturn fertur. Si vero, ex consilio & deliberatione medicorum, temporalis vena pertundi debet, tunc optime hæc operatio juxta aurem prope articulationem mandibulæ, ubi periculo vacat, celebranda erit.

§. V.

In omni dolore, ubi vires non ferunt sanguinis detractionem, neque ejus satis est, pediluvia, quæ nunquam non in hoc affectu utilia, modo sint temperatiora, ad divertendum sanguinis & humorum motum ad partes infernas, cum fructu adhiberi possunt; neque pedum frictiones paulo asperiores cum pannis sunt improbandæ; nec rubefacientia, ut taleoli raphani rusticani cum sale mixti pedibus imponendi, usu suo destituuntur.

§. VI.

Circa epithemata actu frigida tenendum hoc est, quod cum summa circumspeditione applicanda sint. Prostant enim exempla nobis etiam cognita eorum, qui in febribus præsertim exanthematicis, variolis, morbillis, purpura, ubi natura per extremam cutim peccantem materiam sub specie halituum non sine fructu excludere nititur, per crebrius in dolore capitis applicata frigidiora epithemata, in cœcitatem ad dies vitæ durantem, in epiphoras quoque ac suffusiones oculorum sunt præcipitati. Neque etiam semper confert in hoc dolore profligando, pluribus & variis topicis uti, quorum applicatio interdum plus periculi habet, plus etiam prudentiæ à

Cautelæ
circa epi-
themata.

medico desiderat, quam internorum usus. Neque omnia, omnibus æque salutariter conveniunt: nam quæ alius ferre potest, ea alteri incommodant.

§. VII.

In paroxysmo.

extra eum.

In ipso paroxysmo ad atrocem dolorem mulcendum, non una sed pluribus vicibus, insignem efficaciam à liquore nostro anodyno minerali, aliquot guttulis ejus, saccharo in pulverem redacto instillatis & in os sumtis, experti sumus. Extra paroxysmum ad roborandum caput, vel etiam ut illud à recursum mali vindicetur, balsamo nostro analeptico quod vitale audit, si vel exterius temporibus aut vertici applicetur, aut naribus modeste hauriatur, vel ejus aliquot guttulæ saccharo instillatæ cum infuso Theiformi sumantur, peculiare plane, non sine ratione & experientia, virtutes & laudes tribuimus.

§. VIII.

In orgasmo sanguinis non evacuandum.

Quandocunque nimium ebulliens & variis de causis in motum concitatioem actus sanguis, doloris originem præbet, nequiquam purgantia vel evacuantia, sed potius refrigerantia & temperantia locum inveniunt: quo ego nomine plurimum solius aquæ frigidæ potui atque nitrosis tribuere soleo. Et certe in hac re non est de nihilo, eximium nostri HIPPOCRATIS monitum, qui *libr. de ratione victus in morb. acutis*, sic scribit: *Animadvertere oportet in iis quibus caput, vel ob exercitationes vel cursus, vel iter, vel nationem, vel alium quendam intempestivum laborem dolet; horum quidem nullos purgaveris. Vult enim præclarus senex, ubi ex calore vel sanguinis fervore oboritur dolor, purgantibus uti nos non debere.*

§. IX.

Cephalæa hypochondriacorum.

Sæpe fit, ut melancholiæ hypochondriacæ cephalæa conjungatur cum digestionem depravata, macie corporis, timore & vultus colore vitato: quo in casu venarum sectio, balnea aquæ dulcis, conveniens motus corporis, aquarum medicarum prudens usus, juscula medicata præsertim quæ fiunt cum succo cichorei, serum lactis caprini chalybeatum, nec non cichoreatum ceteris omnibus palmam facile dubiam reddunt.

METHODUS PRÆSERVATORIA.

Uti in omnibus capitis affectibus, ita etiam in dolore ejus hanc vivendi rationem suadet MERCURLIALIS. *Consultat. Tom. I. p. 140. Consult. 107.* cujus integrum textum methodi præservatoriæ loco hic inferere minime tædet. *Ærem, enim inquit, inclementem & insuetum quantum fieri potest aut vites aut integumentis & cubiculis arceas, somno moderate utaris, nec unquam nisi duabus post cibum horis: capite semper elevato dormias: corpus & animum ita exercere oportet ne alterum ab altero labore vel otio vincatur. Neve curæ nimie, nimieque cogitationes & studia calorem nativum hebetent. Alvum præ ceteris lubricam, nisi ita sit, quantum fieri potest serves; siquidem nihil est quod perinde caput afficiat & subinde vertiginosis affectibus occasionem præbeat, ac feces in intestinis diu retentæ. Jam vero repletiones & crapulæ, quas interdum istarum plagarum habitatores, etiam si peregrini sint, committere coguntur maxime omnium tibi inimicæ sint: & idcirco eas ac vinorum generosorum assiduos potus*

fugias necesse est. Cibi omnes crassi, pingues, flatulenti, cujusmodi legumina & olera, pisces ac fercula multis aromatibus conferta, qualibus gens germana uti solet, nisi à te vitentur, ne mala tua in dies augeantur metuendum est.

ENARRATIONES MORBORUM.

OBSERVATIO I.

Studiofus viginti & aliquot annorum gracilis & tenerioris habitus, à studiorum intemperantia & nimis lucubrationibus, dispositionem sibi contraxit hypochondriacam, cum digestionem ciborum vitata, alvi strictura, spasmodis, flatulentis, subinde etiam capitis dolore junctam. Invitatus ab amicis in convivium, magna & insolita vini Rhenani sed sulphuris fumo valde infecti copia se replevit, & ebrius factus. Ex hoc tempore gravi & continuo capitis dolore correptus fuit, qui tamen sinistram maxime latam occupabat, ejusque anticam cum primis partem, frontem, oculum, aurem & dentes ejusdem lateris vehementer interdum stringebat ac obtundebat. Sub notabili vero tempestatis mutatione vel sub profundiori paulo mentis meditatione adeo crescebat, ut vires, somnum, appetentiamque prorsus fere adimeret. Suaserunt medici crebras venæ sectiones, alvus sæpius polychrestis pilulis subducta, & cephalica tam interne quam externe, neque minus stomachica adhibita, sed citra optatum successum. Ego potius, cum consilium à me peteret, dissuasi ulteriorem sanguinis missionem & medicamentorum frequentem usum. Pediluvia vero & pedum frictiones cum pannis asperis, neque minus caput crebrius perfricandum commendavi, atque ut illud & pedes in æquali & temperato calore ac transpiratione contineret, maneque quotidie in lecto infusum Theiforme ex herba melissæ, salviæ, veronicæ & semine foeniculi assumeret, blandum sudorem expectando, auctor fui. Pro potu ordinario, loco cerevisiæ, decoctum ordinavi ex speciebus temperatis. Deinceps balsamo nostro liquido vitali sæpe inunctæ, ubi dolor nimis urgebat, nares, nucha, tempora. Quorum remediorum ope insigne levamen æger expertus est.

Contumacia capitis dolor in juvene hypochondriacæ ex repletionem vini Rhenani sulphure infecti, curatus.

Epicrisis.

Dici vix potest, quam inimicum nervosis capitis partibus sit vinum sulphuratum. Et sicut vinum præsertim potens & generosum, inque specie vina dulcia ad capitis morbos: ita multo magis quodvis infesto sulphuris vapore refertum vel adulteratum disponit. Sulphuris enim particulæ dum altius se se insinuant membranarum poris in stricturas eas adigunt. Vinum vero rarefaciendo sanguinem nimiam fibrarum nervosarum & vaporum efficit expansionem & distractionem: unde dolor oritur. Quod si vero semel & iterum solidis nervosis partibus inducta fuerit ingens infirmitas & earum vis motrix elastica naturalis læsa, affectiones quæ inde prodeunt præternaturales, ex facili causa, in iisdem partibus recurrunt. Deinceps observari quoque velim, in nulla corporis parte nervosæ & sensu præditas membranas facilius lædi quam in capite, eo quod liberiori aëris accessui sunt expositæ. Quantam autem vim subitæ aëris & tempestatis mutationes, præsertim quæ ab uno extremo ad alterum vergunt, in mutando & lædendo nervosarum partium tono & ela-

& elatere habeant; id dolores, spasmi, convulsiones & aliæ partium nervosarum præternaturales affectiones, quæ inde ingravescent, ostendunt luculentissime. Liquor noster balsamicus ex sinceris non adulteratis & temperatis oleis cephalicis confectus, infirmitati nervosarum partium, exterius præsertim si applicetur, mirifice opitulatur; nisi corpus admodum plethoricum sit, & natura prorsus à suaveolentibus abhorreat.

OBSERVATIO II.

Cephalalgia pertinet, cum oculorum ardente & dolorifica defluxione juncta, in persona diæta vino se dedita; curata.

Persona quædam splendida annum jam ætatis quadragesimum & tertium agens, validæ à natura constitutionis, à prima statim adolescentia largiori vini potui assueta, cui etiam in hunc usque diem nimium indulget, sub tempestate valde ventosa, humida & frigida, per aliquot septimanas venationibus incumbens, non modo defluxione acris, falsa, dolorifica & ardente in utroque oculo, sed & gravi & pertinaci cephalalgia cum cutis capitis tumore juncta corripitur. In consilium & ego quoque accitus, fontem Selteranum vino intermiscendum & vesicatorium nostra methodo præparatum nuchæ applicandum suasi; acidulæ quoque Egranæ cum decenti regimine fuerunt usurpatæ: & dolor inde valde mitescebat. Balsamo vero vitæ cum inungeretur caput, materia ichorosa, qualis ex ulceribus prodit, copiose effluxit: cucupha quoque ex speciebus balsamicis & cephalicis temperatis ad roborandum caput gestata fuit. Qua ratione atrox ille dolor penitus sublatus est.

Epicrisis.

In genere hoc attendi velim, eos qui pocula amant & fere quotidie se immergunt vino, ex transpiratione, qua diffilari debent partes nimis calidæ & sulphureæ, per auram frigidiorē admixtam cohibita, graves in capitis morbos & dolores frequentius incurrere, quia in nullo corporis loco immediate & proxime magis quam in capite, præsertim si illud non satis tegumentis munitum sit, tonus vasorum & tunicarum nervearum à vento frigidus penetrante læditur. Vesicatoria rite & paulo diutius applicata, ubi materia in partibus capitis externis vitiosa residet, eximiam solent opem etiam in acris falsis & calidis oculorum defluxionibus præstare. Ceterum in ejusmodi morbis, qui à discrasia calida & sulphurea sanguinis, qualis ab exsuperante vini potu & cuticulari perspiratione prohibita nascitur, aquea diluentia, acidulæ, imo aqua simplex loco potus ordinarii magno & efficaci sunt præsidio.

OBSERVATIO III.

Immanis cephalalgia cum auditus difficultate & tinnitu, ex neglecta venæ sectione sanguinis missione & hydroposia curata.

Juvenis spongiosi habitus & sanguineæ complexionis, à longo hinc tempore narium hæmorrhagiis obnoxius, ob paulo validiora corporis exercitia nimiumque veneris usum & potum largiorem, frequentiores & largiores eas passus est: ad quas minuendas & compescendas ter singulis annis admisit in pede venæ sectionem. Postea vero eam consueto tempore semel omisit vel potius neglexit. Hinc immani corripitur cephalalgia cum auditus difficultate & tinnitu, caput totum rubore intumescit. Venæ sectio instituitur in pede & multum sanguinis extrahitur. Mitiga-

Frid. Hoffmanni Oper. Tom. II.

tur inde quidem dolor; neque tamen sedem suam penitus relinquere voluit, donec stramine paulo duriori naribus intruso largius sanguinis ex iis stillicidium fuerit procuratum. Inde dolores mitigati fuerunt mirum in modum. Sed cum à supra memoratis causis ex facili dolores recurrerent, nec sola venæ sectio iis abigendis sufficeret; & quietam vitam & hydroposiam nec non serum lactis acidulatum frequentius bibendum commendavi; interpolato quandoque pulverum nitroforum usu. Quibus ex toto integram valetudinem consecutus est.

Epicrisis.

À sola plethora in junioribus nares crebrius fundere sanguinem, sique hoc non accidit, capitis ægritudines inque primis cephalalgias sequi, per crebram experientiam certissimum est. Quos morbos si natura non sponte per narium hæmorrhagias solvit, medicus id arte præstare debet evacuando sanguinem ex venis non procul à capite disitis, incisione venarum jugularium externarum vel quæ sub lingua positæ sunt; meliori vero adhuc successu per scarificationem in naribus vel apertionem venæ idoneo instrumento factam; non neglecta tamen sed probe observata hac cautela, quod videlicet, si nimia adsit sanguinis exundantia, consultius sit, in disito loco à parte affecta sanguinis missionem prius instituere, & postea non procul à morbosa parte; quia dato exitu sanguis ex partibus inferioribus spasmo subinde affectis sæpius cum impetu in læsam partem ruit, non sine gravioris mali metu. In tali cephalalgia specie topica, volatilia & suaveolentia calidiora fugienda esse censemus: sed præstat epithematibus paulo frigidioribus sanguinem ebullientem reprimere, quod tamen etiam adhibita prudentia fieri debet, præmissa videlicet venæ sectione, pediluviis, & alvi segnis per clysteres decenti subductione.

OBSERVATIO IV.

Vir quinquagenarius sacerdotali munere fungens studiis & meditationibus nimium indulgens, ex prava inde sequuta digestionē & ventriculi infirmitate, crebrius catarrhosis defluxionibus, odontalgias & cephalalgias obnoxius fit: quæ tamen pathemata, cum plane abstineret à prandio, sumpta tantum coena multum decreverunt. Postea vero dolores à capite usque ad colli & thoracis dextrum latus valde molesti exportecti sunt, diutius perseverantes. Quibus removendis varia à variis præscripta sunt remedium genera, atque inter hæc interne essentia & elixiria cephalica, pulveres cinnabarini, fonticulus quoque nuchæ & brachio dextro inustus, celebrata venæ sectio, externe affectæ partes oleis penetrantibus inunctæ: sed sine levamine. Scripsit ad me historiam, adjiciens, quod nares tenacem albicantem mucum sed exili in copia fundant, & sensum se ponderosi saxi in sinistra capitis parte percipere: caput vix sine dolore inclinari vel verti posse, ita ut linguæ etiam usus valde difficilis sit; colli quoque glandulas comparere tumidas. Addidit quod ante biennium febris tertiana ipsum corripuerit, quæ, postquam materia largiter è pectore excreta fuit, levamen quoddam attulit. Mentionem quoque fecit doloris circa ventriculi regionem atque inflationis in hypochondriis. Dedi consilium ut thermas Carolinas adiret & secundum præscriptum à me regimen per mensem & ultra iis uteretur: injunxi demum

Rheumatica cephalalgia, in sacerdote hypochondriaco, Carolinis curata.

accuratum vitæ institutum cum motu corporis sufficiente & animi quiete; suaserque fui, ut præmissis frictionibus in nucha & cervice cucurbitulas cum scarificatione apponendas curaret. Et inde eum melius se habuisse cognovi.

Epicrisis.

Non simplex cephalalgia hic affectus sed potius rheumatismus, qui totum caput & vicinas partes occupat, meretur appellari: eo quod humor vitiosus non unam partem occupet, sed per porosam substantiam serpendo, in vicinas nerveas partes, eas lancinando & vellicando delabatur. Causam sine omni dubio discrasia feri scorbutica, ex depravata ventriculi digestionem & hypochondriorum vitio nata subministravit. Originem primam vero dedit nimia studiorum cum profundis mentis meditationibus intemperies, juncta cum lucubrationibus: quæ quantam vim, ventriculum & intestina infirmandi & totum corpus morbidum reddendi habeant, experientia satis apertum ac manifestum est. In tali statu morbi particularia ut ita loquar remedia seu symptomatibus dicata nihil proficiunt, sed, si salus & sanitas speranda est, non ab aliis nisi ab iis, quæ vitiis fluidorum & solidorum amovendis sufficiunt, cujus generis sunt fontes medicati calidi vel frigidi cum regimine diætetico usurpati, peti debent.

OBSERVATIO V.

Hemicrania sanguinis evocatione è naribus & aqua frigida curata.

Fœmina nobilioris generis septuaginta jam septem annos transgressa sanguinis plena, contumaci à quinquagesimo circiter anno, quo menstrualis fluxus valedixit, hemicephalæa affligebatur. Ex quo tempore, multa licet atque varia ad sedandos & abigendos hos dolores continuo adhibuerit remedia & frequentiores in brachio pariter ac pede venæ sectiones instituerit; nulum tamen ex his percepit levamentum. Donec tandem sanguis ex narium venulis ad uncias circiter VI. ope pennulæ intrusæ, in eo nimirum latere ubi dolor consistebat, fuerit evocatus. Neque ullum aliud præter aquam frigidam simplicem in usum est vocatum, ita ut non modo externe in duplicato linteo capiti sæpius admota, sed etiam interne ad tres quotidie mensuras triduum sumpta fuerit. Et sic diu exoptatum, quæ DEI erat gratia, passionis valde dolorificæ persensit levamen. Qua de re simplici hac potione semper loco cerevisiæ est usa, hausto tantum interprandendum uno exiguo vini cyatho.

Epicrisis.

Aquam simplicem frigidam puram tamen, tum interno, tum externo usu, in multis & gravibus affectibus valde conducibile & efficacissimum remedium præbere, perpauca quidem cognitum & credibile videtur. Nihilominus & experientiæ & rationis & auctoritatis quoque multorum veterum Medicorum suffragio id ipsum est probatissimum. Egimus ex instituto in peculiari dissertatione *de salubritate potus frigidi*, paulo prolixius: ubi evidentibus argumentis tam aquæ quam frigoris quoque in ea contenti eximias in morbis debellandis vires abunde demonstravimus: nam magna inest vis frigoris elasticam fibrarum & vasorum corporis nostri vim firmandi, roborandi & virtutem expansi-

vam interni liquidi calidi coercendi, quo vis vasorum à nimia expansione valde debilitata ad statum redeat naturalem, & sanguinis ac fluidorum motus liber & æquabilis restituatur. Et sicut potus sufficiens aquæ simplicis & frigidæ, firmando tonum solidorum, humores fluxiles reddendo & salinas sulphureas partes diluendo ac evehendo, multorum affectuum causam præscindit; ita externe frigore suo etiam succurrit iis morbis, qui à nimio vasorum infarctu & expansione originem suam ducunt. Nihilominus quotidianus aquæ potus non omnibus naturis convenit, sed ejus præscriptum prudentiam medentis requirit.

OBSERVATIO VI.

Vir erat Hebræus circiter quadragenarius strictioris corporis habitus, qui ab iracundia & superingesto cibo contraxerat dolorem in vertice capitis fixum, spatium occupans magnitudine imperialis, sensus hujus doloris quidem non adeo erat acutus, vibratorius, lancinatorius aut pulsatorius, uti alias in cephalalgia esse solet, sed magis pressorius & gravativus sub cranio; neque erat perpetuus, sed subinde maxime circa vesperam & noctem ingravescens. Nihilominus tamen adeo graviter inde luebat, ut appetitus concideret, somnus abesset, vires mirifice deficerent, pulsus inordinatus, modo celer, modo rarus & languidus micaret, ipse quoque animus abjectus esset & sub paroxysmo quandoque plane turbaretur. Pugnatum fuerat adversus hunc dolorem tum à me tum ab aliis strenue & efficacissimis aliis remediis. Sed licet quandoque inde remittere per aliquot dies videretur, levitamen accedente occasione ex ira aut aliis externis injuriis iterum vehementia recrudescerebatur priori similis. Exactis inter hæc duobus circiter mensibus in consilium simul vocatus est civitatis hujus medicus natione Gallus, ingeniosa curandi tentamina subinde non infeliciter adornans. Is purgato prius per aquam Sedlicensem corpore, dedit consilium, ut æger mane & post meridiem biberet dimidiam aquæ fontanæ frigidæ mensuram in lecto. Inde primum quidem factum refrigerium & symptomata visa exacerbata, sed elapsa hora pulsuum magnitudo increvit, & sudor erupit largissimus cum doloris levamine. Hinc per septem dies potum continuare præcepit, tam felici successu, ut successive dolor evanesceret omnis. Ac licet elapsis aliquot hebdomadibus, post iram dolor hic repeteret, eodem tamen remedio per triduum usurpato iterum feliciter est discussus, & æger sanus jam est ac vegetus.

Dolor fixus in vertice capitis ex ira & superingesto cibo, aqua frigida sublatus.

Epicrisis.

Sedem hujus atrocis doloris in eo loco ubi conjunctio est futurarum, coronariæ nempe & sagittalis, qui in infantibus fontanellæ nomine venit, reponendam esse judico: nam ibi est pericranii cum dura matre arcta connexio; & proinde etiam dolor qui externe in illo loco extitit, in consensum trahendo duram cerebri membranam majorem symptomatum exacerbationem, virium prostrationem, animique turbationem neque minus pulsuum inordinationem effecit. Causam ego mali esse bilem vitiosam ab ira commotam in flexura duodeni stagnantem & corruptam credidi, cujus vis ebulliens & acrimonia

monia mire à frigida potu coercetur & reprimatur. Siquidem ego sæpius in praxi mea, ex vehementi ira mox ante cibum sumtum, gravem cephalæam animadverti, quam aliis nihil proficientibus, feliciter à feri lactis aciduli potu quotidie ad mensuram sumti à me discussam memini. Secutæ inde fuerunt sæpe sex alvi de die dejectiones, & sic expurgata biliosorum humorum sentina, desiderata convalescentia secuta est.

OBSERVATIO VII.

Cephalæa ex quartana cort. chinæ profligata, Carolinis discussa.

Civis hujus urbis annorum quinquaginta febre per novem menses laboravit quartana, quæ tribus corticis chinæ dosibus sumtis præter expectationem evanuit: sed in ejus locum gravissima cephalæa, quæ mire torset hominem, vires atterendo successit: dolor erat continuus & valde gravativus qui maxime incrementa sumsit per actis quatuor vel quinque horis à digestionem, conjuncti simul erant dolor, tumor, imbecillitas manuum cum insigni corporis debilitate. Postquam in cassum multa fuerant usurpata, venit ad me auxilium meum rogans. In similibus casibus essentia nostræ tonicæ usum paulo protractiorem subinde convenientissimum expertus sum: quoniam præter vim roborantem, serum vitiosum, tum per vias urinarias, tum per insensilem transpirationem eliciendi efficaciam possidet insignem. Sed suasi thermarum Carolinarum usum, corpore prius, per salia deterfiva, aperientia, interpositis nostris pilulis balsamicis probe præparato: & sanatio successit auspicato.

Epicripsis.

Quartanæ familiarissimum esse cephalicum dolorem symptoma satis constat. Causam hujus rei inde deducendam esse arbitror, quod in hac febre quam maxime humor corruptus, tenacis, fixioris acidæ potissimum indolis duodeno & valvulis tenuium inhærens, simili caractere præterlabentem chylum inficiat, qui postea ad minima & capillaria membranarum capitis vasa delatus, liberiori fluidorum motui obicem ponens earum distensionem dolorificam causari potest. Id vero non modo in capitis, sed & aliarum nervosarum partium minimis vasculis evenit. Quamdiu motus febrilis durat, tam diu vasorum obstructio & humorum stagnatio neutiquam incrementum capit, propter celeriore sanguinis per solidas partes trajectionem. Quandocunque vero motus febriles corpori salutes supprimuntur, non mirum est, majores fieri infarctus & obstructions vasculorum, indeque dolores artuum, capitis, tumoresque œdematosos sequi, qui non meliori & tutiore ratione, quam laudatis jam tempestive adhibitis remediis possunt expugnari. Ejusmodi in casibus, ubi neque locus neque tempus vel occasio est utendi aquis mineralibus, curam haud infeliciter cum decoctis blande diaphoreticis lignosis & pulveribus ex cinnabari, sale volatili, cornu cervi, vel etiam regulo antimonii medicinali & sale absinthii compositis, non omissis ex manna & rhabarbaro per infusionem paratis laxantibus, bono cum DEO peregi. Atque insignis quoque & expertæ virtutis, usum essentia nostræ roborantis, cujus mentio supra §. 4. p. 197. fit, reperi.

OBSERVATIO VIII.

Fœmina tenerioris & sanguineo-cholericæ constitutionis annum quæ jam trigessimum complevit, vitæ nimium quietæ & inordinatæ diætæ indulgens, minus ordinatas nec sufficientes per annum & ultra habuit menstruales purgationes. Exinde de dolore in capite tensivo, gravativo, lancinante diu conqueritur, qui primum totum occupavit caput, nunc vero ad sinistrum latus declinat, ubi bregma, tempora, mandibulam, dentes, aurem, labia ejusdem lateris pungitivo & urente dolore infestat, ad brachium interdum pertingens, frequens intercurrit horripilatio cum pulsu inæquali, duro & celeri. Ab hisce incommodis sequentibus liberata est. Primo singulis diebus pediluvia convenientia fuerunt ordinata: dein venæ sectio in pede post menses inordinate & parcius fluentes: tum quotidie infusum loco Théæ mane copiose haustum, quod ex verbena, melissa, summitatibus millefolii, semine fœniculi, cubebis, floribus chamomillæ vulgaris constabat. Pilulæ nostræ balsamicæ cum extracti croci & mercurii dulcis portione remixtæ, alternis diebus circa lecti ingressum, pariori dosi assumptæ fuerunt. Tandem externe balsamum nostrum vitæ sine ambra cum spiritus vini camphorati æqualibus partibus mixtum locis affectis dolentibus inunctum fuit; injuncto accuratori vitæ regimine, motu corporis & ut frigida atque acidæ vitaret, nec non digestionem vacillanti cum cibis sumendo elixirio nostro stomachico, quod in notis ad Poterium describitur, succurreret. Et ita per DEI gratiam ad valetudinem exoptatam pervenit.

Cephalalgia rheumatica ex menstrialibus.

Epicripsis.

Quando in gravi capitis dolore etiam vicinæ nervosæ partes in consortium trahuntur, cephalalgia rheumatica oritur, quæ à sero acri vellicante, ob interceptum per venas obstructas sanguinis circuitum, secedente ac extra vasa posito, & per poros & loculos ad membranas delato originem suam sumit. Et tales rheumaticæ affectiones ab impuro sero frequentissime in sexu sequiori, ob lunaris tributis minus rectum statum eveniunt. Neque melior ac certior iis medendi ratio suppetit, ac si medicus operam & studium in ordinem redigendo uterinam excretionem per convenientia remedia adhibet. Nihilominus tamen semper, si talis casus occurrit, ventriculi simul ejusque digestionis habenda est ratio, ut bene temperatus chylus ad sanguinis & humorum massam accedat, qui ejus intemperatam crasim sensim paulatimque, successu temporis corrigere valeat. Quod vero dolor sæpius unum tantum capitis & vicinarum partium latus petat, ex anatomicis repetenda erit ratio: quandoquidem constat, sicut cerebrum in duo hemisphæria divisum; ita etiam in dextro & sinistro latere distinctos ramos arteriarum, venarum, nervorumque extare & communicationem inter se habere, ut licet læsio fiat & circulatio non recte procedat quoad vasa in uno latere, salvus tamen & integer motus sanguinis circularis in altero hemisphærio persistat.

OBSERVATIO IX.

Nobilis adolescens qui vix ætatis annum decimum

Cephalæa

consuetu-
narium
hæmorrhæ-
gia sup-
pressa.

mum octavum attigit, excitati alias & prompti in studia ingenii, postquam sanguinis è naribus stillicidium cui frequentius obnoxius fuit, nescio ex qua causa, præter quod crebro venationibus sub coelo frigidiori interfuerat, emanferit, insignem in capite aliquot jam menses torporem & obtusum ac gravativum dolorem, qui ad oculorum radices pertingit, persensit. Periit omnis animi & corporis vigor, ciborum appetentia, placidusque somnus. Facies erat pallida cum extremorum frigore & lassitudine. Opem à me & ipse & mater ejus efflagitarunt quam sollicitè. Celebrata in pede fuit venæ sectio, & quia aliquid hypochondriaci subesse judicavi, præscripsi curam fontis Selterani cum debito regimine: sed effectu plane frustraneo. Postea infusum Theiforme ex temperatis herbis cephalicis mane hauriendum ordinavi: reiterandam quoque jussi venæ sectionem & tertio die post, cucurbitulas cum scarificatione nuchæ apponendas; errhinus quoque pulvis naribus frequentius admotus. Et non ita multo post cessavit dolor, rediit appetitus & quietus somnus, omniumque actionum vigor, ac pristina valetudini redditus fuit. Stillare quoque rursus sanguis, sed non largo flumine, coepit è naribus.

Epicrisis.

Causam hujus gravis doloris & symptomatum quæ eum subsequiebantur, à sufflaminata narium hæmorrhagia deducendam esse, extra dubium positum est. Vasa vero cerebri retento sanguine plus quam par est fuisse infarcta, testatum faciunt symptomata in nervosis primarum viarum partibus, non secus ac in hypochondriacis contingit, suscitata, idque tantum propter passionem & consensum nervorum: siquidem ante accessionem hujus doloris, ab ejusmodi pathematibus plane liber fuit, quæ sedato dolore etiam conquieverunt, ut adeo clare pateat, quanta sit capitis cum ventriculo & aliis nervosis corporis partibus consensio. Deinceps illud notari velim, in capitis morbis qui à redundantia sanguinis ortum ducunt, ejus missionem semper observari meliorem in loco capiti propinquiore ac in diffitis partibus. Pulveres errhinos & cephalicos naribus susceptos, vellicando & irritando in cerebri quoque membranas agitationem quandam dum efficiunt, à molesto humorum infarctu eas liberandi vim & potentiam exserere posse, haud videtur improbabile.

OBSERVATIO X.

Cephalæa,
ex gonorrhœa viru-
lenta, decocto sudorifero curata.

Juvenis vegetæ & robustæ constitutionis, annorum XX. & aliquot, virulenta gonorrhœa binis vicibus affectus, sed nescio qua methodo curatus. Aliquot menses post, ulcerosæ & prurientes pustulæ hinc inde in cute efflorescebant: quarum tamen major copia in dextra quam in sinistra capitis & reliqui corporis parte conspiciebatur, qua in regione etiam tumor testiculi durus & valde molestus consistebat. Præter languorem universi corporis, inmaniter eum dolores in capite, præsertim nocturno tempore, torquebant, adeo, ut non modo somnum tollerent, sed appetitum etiam & vires imminuerent. Ad sublevandum hoc malum & chirurgorum & medicorum opera usus: sed nihil omnia, neque mercurialis quam adhibuerat salivatio profecerunt. Ultra anni dimidium atroci hoc malo afflictus

& valde extenuatus me quoque in auxilium vocavit. Expurgatis prius lenissimis remediis aliquoties primis viis, decoctum cujus vires in purificando sanguine multoties expertus sum, tum ad sudorem eliciendum, tum ad corrigendam intemperiem, pro potu ordinario usurpandum & quidem sequentem in modum imperavi: Sarsaparillæ uncis IV. & antimonii crudi uncia, salis gemmæ & salis tartari cujusque drachmam adjeci, & cum mensuris quinque aquæ simplicis puræ decoctio facta est in vesica stanno obducta, cui alembicus imponebatur. Decenti sic admoto igne, cum propemodum dimidia pars destillata esset liquoris forti odore vires ferientis, destiti ab ulteriori coctione & destillatum affudi residuo in vesica; facta filtratione, quod filtrum subiit servavi pro usu, eo quo sequitur modo. Dimidia ejus pars cum æquali portione decocti scorzonæ & passularum miscebatur pro potu ordinario; quod remanebat in duas partes divisum fuit, quarum una mane, altera hora quinta pomeridiana calide fuit hausta, sudorem cum debito regimine in lecto expectando. Interpolatus quoque huic decocto interdum fuit usus tincturæ antimonii acris cum spiritus tartari & liquoris nostri anodynii mineralis tertia parte permixti. Qua cura per integras sex septimanas usus est. Sed testium dolorifico tumori simul duxi per idonea resolventia & discutientia topica prospiciendum; inter quæ emplastrum diachylon emplastro Vigonis cum mercurio permixtum, decima parte florum sulphuris, nec non balsami sulphuris antimoniatum notabili portione adjecta, cataplasmate superimposito, quod ex radice enulæ, althææ, iridis nostratis, cucumere asinino, floribus sambuci, semine cymini, carvi, cum aqua florum sambuci & vino coctis constabat, laudabile levamentum attulerunt, tumore ad dimidium & ultra discusso. Quibus remediis per DEI gratiam id consecuti sumus, ut ab omnibus incommodis liber, sanitati fuerit restitutus desideratissimæ.

Epicrisis.

Et gonorrhœa virulenta & Gallica lues, ex eorum sunt morborum numero, qui nisi radicitus idonea & satis efficaci cura extirpentur, ob relictas vel in glandularum tubulosa substantia, vel etiam, ut nonnullorum fert sententia, in membranis quæ pinguedinem cingunt, altius impactas particulas, ex facili reviviscunt, dum ex latibulis suis excussæ & denuo cum lymphæ & sanguinis massa connuptæ, pernitiali sua vi, instar seminii vel fermenti sese multiplicant, omnis generis fluida inquinando. Cura horum affectuum, quæ per salivationem à mercurialibus excitatam, quasi specificum passim commendatur remedium, si immanis & chronicus capitis dolor fuerit junctus, non semper expectationi respondet; & proinde WILLISIUS de anima brutorum cap. 2. tali in casu eam rejicere, multis exemplis quæ recenset infelicitis successus adductus, non veretur. Addo etiam illud, quod chirurgi quibus vulgo ea committitur, empirice ut plurimum, posthabita & individui & aliarum circumstantiarum ratione, hanc curam tractare soleant. Ceterum sudorifera, quæ antimonium crudum ingreditur, decocta, si decenti modo & artis lege præparata adhibentur, in hujusmodi venereis affectibus maxime recrudescensibus laudabilem opem subinde

De dolore Cardialgico spasmodico & flatulento. 257

de præstitisse, compluribus exemplis edocti sumus; neque etiam, sine convenienti horum usu, testium tumorem curatu non tam facilem, solis externis etiam alias valde efficacibus sanari posse identidem nobis perspectum compertumque est. De usu vero & viribus supra laudatæ tincturæ antimonii acris cum aliis permixtæ illud insinuandum esse duxi, quod morbis & præsertim capitis doloribus à colluvie serosa ortis magnas vires medendi possideat, eo quod vitiosum serum cum per cutis meatus tum per renes insigniter educat. Illud enim notatu dignum est, quod cachecticis gravativi dolores noctu maxime infestantes & per longum tempus durantes admodum sint familiares, atque ægritudines quæ ex vitiata & impura lymphæ proveniunt ut plurimum insequi soleant; unde cum WILLISIO loco citato p. 202. non semel annotavimus, plures post variolas, morbillos, imo purpuram, cephalalgia quotidianæ fuisse obnoxios, ubi & sanguinem depurantia, quæ feri vitiosi copiam per renes efficaciter educunt, optimam locant operam: nam serum in cachecticis corporibus in cerebri sinuositatibus imo ventriculis stagnans, dolorem illum ponderis instar gravem excitare valde est credibile.

Præter huc usque recensitos casus, notatu dignos adhuc suppeditant consultationes nostræ medicinales *sect. I. cas. I. & 2.*

CAPUT II.

De Dolore cardialgico spasmodico & flatulento.

THESES PATHOLOGICÆ.

§. I.

INter graves & acerbos, qui misere genus humanum torquent, & corpus æque ac animum moleste afficiunt dolores, is qui cardialgiæ nomine venit, non postremum sibi vindicat locum. Neque vero cordis, ut vulgi fert opinio & germanice *Hertzens-Angst* dicitur, dolor est, sed ipsius stomachi, ceu partis valde nervosæ & exquisitæ sensationis, & præcipue ejus orificiorum, acutus circa scrobiculum cordis consistens, cum ingenti anxietate, spirandi angustia, viriumque prostratione, inquietudine, nisu vomendi, extremarum partium tremore & frigore, levi animi defectione junctus, à spasmo vel inflatione ortus, totum sæpe nervorum systema in consensum trahens.

§. II.

Neque vero omnis stomachi dolor, qualis subinde, à crudorum ingestorum copia & longiori eorum in ventriculo mora, pressorius & anxius incidit, cardialgia nominanda, quia non est acutus, neque orificia ventriculi tunc valde dolent, neque jactatio corporis ac virium prostratio, quæ propria fere & formalia hujus morbi sunt signa, sentiuntur: nisi cardialgiam hanc spuriam vocare velimus. Est vero pro magnitudine causæ dolor vel vehementior vel mitior; & hinc vel gravioribus vel levioribus stipatus symptomatibus.

§. III.

Acerbi hujus doloris sedes, ex communi medicorum tam veterum quam recentiorum sententia, sinistrum tantum stomachi habetur orificium, quod jam olim HIPPOCRATES & GALENUS cardiam vocarunt; unde etiam hic dolor cardialgiæ nomen mutuatur. Nos vero potius dextrum, quod pylorus nominatur, orificium, imo totum, ratione tunicæ qua instructus est valde sensibilis nervoso-fibrosæ, stomachum adfici, vel ex eo elucescere arbitramur, quia circa cordis scrobiculum, sub mucronatâ cartilagine ad latus dextrum, ubi constans pylori sedes est, hic atrox incipit & consistit semper dolor, & inde ad sinistrum, quod in dorso non procul à spinali medulla situm est & diaphragma circa vertebram thoracis undecimam vel duodecimam penetrat, se extendit. In iis enim qui cardialgia defunguntur dextrum potius quam sinistrum orificium in sectione affectum fuit inventum, adeo ut in quorundam pyloro, ulcera, abscessus, tumores, corruptiones sphacelosæ, quæ simul duodenum ipsumque ventriculi fundum affecerunt, annotatæ fuerint.

§. IV.

Cum autem nunquam tristis & anxia in anima excitetur sensatio, nisi à causa violenta partes nervosæ & fibrosæ, vehementi distensione continui dissolutionem minante, vel valida constrictione, sive spastica strictura supra modum afficiantur: ita etiam observamus, cardialgiam aliam esse flatulentam, aliam spasmodicam, adeo ut in illa, ab incarceratis flatibus, totus stomachus violenter distendatur atque distrahatur; in hac vero in arctius potius spatium crispetur, coarctetur atque contrahatur.

§. V.

Non parum quoque refert discrimina & signa nosse, quibus cardialgia flatulenta à spasmodica distinguitur: in illa major spirandi junctæ est difficultas atque angustia, eo, quod ventriculus inflatus, liberum diaphragmatis descensum, qualis ad faciliorem spiritum trahendum summe necessarius est, intercipiat: dein tumor frequentius ad sensum sat manifestus, instar ovi in scrobiculo cordis ad dextrum latus inclinans, observetur, dum pylorus inflato ventriculo semper attollitur: præter hæc ructuum adsit frequentia, quibus ex ore prodeuntibus, dolor nonnihil levare incipit: denique post cibum, præsertim qui inflat, assumptum dolor ordinario ingravescere soleat. Ubi vero pertinaciori spasmo tota ventriculi substantia affligitur; tunc major circa præcordia anxietas, major virium defectio, corporis jactatio atque extremorum frigus percipitur.

§. VI.

Si ad veneni naturam accedens humor causa est, longe vehementiora & quæ plurimum habent periculi junctæ sunt symptomata. Ita subinde in capite dolor, vertigo, scotomia, agrypnia, mentis interdum emotio & convulsio: in cavitate thoracis, pectoris oppressio, cordis tremor & syncope, pulsus exiguus, debilis, interdum durus & inæqualis intermittens quoque: in abdomine, ventris tormina, alvi constipatio, urinæ suppressio: in partibus externis, refrigeratio, tremor, horror, sudor frigidus, facies livida, con-

Sedes

Dividitur
in flatulentam
&
spasmodicam.

Signa flatulentiæ

Spasmodicæ

ex causa
venenata

Definitio
realis cardialgiæ.

Quomodo
gnoscat
a spuria.

contracta, scædi & flavescentis coloris in conspectum prodeunt.

§. VII.

*Pathema-
um ex ner-
vorum
communi-
catione c.
ventriculo
explicatio.*

Tam atrocita in universo corpore, à ventriculo male affecto, suboriri posse pathemata, is non mirabitur qui ex anatomicis didicit, par nervorum octavum, quod ad præcipuas nervosas corporis partes internas fertur, & iis vigorem, robur, motum & sensum largitur, valde notabiles & insignes duos ramos ad ventriculi finistrum orificium spargere: atque internos per arcum minorem ad pylorum; externos vero ad fundum ventriculi ferri: & hinc consensionis, quam hæc nobilis pars cum systemate nervosarum partium alit, ratio ducitur quam aptissime. Neque enim ulla alia, in universo corpore pars est, quæ similem cum præstantioribus ejusdem partibus alat habeatque consensionem ac mutuam communicationem, præter stomachum; uti id fusius in *Medicinæ ration. System. Tom. III. Sect. I. c. V.* à nobis est expositum. Inter alia hujus rei luculenta testimonia, observationes hinc inde in medicorum, qui casus ad medicinam forensam spectantes ediderunt scriptis, repertæ id exhibent: quibus constat, à forti percussione cum manu vel instrumento duro circa cordis scrobiculum facta, gravissima protinus symptomata, ut quis statim in terram gelidus concidat, epilepsia, imo morte repentina corripiatur, insequi.

§. VIII.

Cum duplex sit cardialgiæ non secus ac colicæ species: altera nimirum flatulenta, quæ ab incarceratis fit flatibus, totam ventriculi cavitatem fortiter distendentibus, qualis vocari solet germanice *Ober-Colic*, *Hertz-Colic*: altera fit cardialgia spasmodica convulsiva, vulgo *hefftiger Magen-Krampff*, sequitur nunc ut inquiramus, qua ratione flatus, cum liberum alias habeant per aperta orificia transitum, firmiter in cavitate ventriculi includi & detineri possint. Hujus quidem phænomeni ratio vix à medicis est tacta. Nos ejusmodi vehementem inflationem, quæ incidit in ventriculum, etiam effectum spasmi esse, affirmare nihil dubitamus; qui tamen non totam ventriculi nervoso-membranaceam substantiam, sed tantum ejus orificia subtilioris sensationis infestat: unde iis valde coarctatis & clausis, non mirum est, vapores ex indigesta maxime crudorum ingestorum mole, mediante calore, cum non inveniant exitum, totum ventriculum mire distendendo ac distrahendo, atrocem cum summa anxietate & spirandi angustia dolorem excitare.

§. IX.

*Subiecta
cardialgiæ
flatulenta.*

Sunt vero imprimis flatulentæ cardialgiæ obnoxii hypochondriaci, quorum stomachus copiosa colluvie biliosa & acida scatet; ex quo fit, ut à pastu aliquot horas, fortes circa præcordia tensiones, inflationes, gravesque dolores cum difficili spiratione experiantur, qui postea, ructibus ut plurimum acidis prodeuntibus, non nihil remittunt, vel vomitu superveniente acido pituitoso insigniter levantur, & demum paulatim redeunte calore ad ventriculum & extremas partes, quæ algescebant, solvuntur. Vidimus tale quoque vitium sæpius in iis, qui post morbum paulo diuturniorem, magnam sibi ventriculi infirmitatem contraxerunt, quando paulo avidius cibos, præsertim incongruos, ut sunt pingues, acidi & fermentescibiles; fructus quoque horæi, ingerunt,

accedente simul corporis & quam maxime pedum vel regionis lumbaris refrigeratione, subortum & crebrius per intervalla reversum.

§. X.

Vidimus quoque ejusmodi ventriculi, cum dolore & respiratione difficili, inflationem, in infantibus lactentibus, à lacte in ventriculo coagulato & ibi stagnante acidoque facto, ubi tota præcordialis regio, sub costis spuris, mire flatibus distenta & turgida, visui pariter ac tactui se offerebat. Vulgo id vitium dicitur *das Hertz-Gespann*. In mentem nobis etiam incidit exemplum cujusdam juvenis, qui, à nimia recentis & mollioris casei comestione, & desuper Rhe-nano non adeo spirituofo sed acidulo vino hausto, in flatulentam & gravem cardialgiam incidebat: quam medicus colicum dolorem, qui tamen longe inferiorem sedem habet, neque cum tanta spirandi angustia jungitur, reputabat. Neque hoc loco discrimen illud inter dolorem colicum, qui sub ventriculo in ea parte coli, quæ immediate ipsi substernitur, & inter stomachalem colicam, si ita loqui licet, præterire debemus; quia non semel sed aliquoties, hac in re deceptos fuisse medicos, animadvertimus. Ut itaque circumstantias loci dolentis, antecedentes causas, notas quoque quæ cardialgiæ propriæ sunt, item faustos remediorum successus, probe semper circumspectus medicus observet, non sine ratione monendum ducimus; nam unico discutiente applicato clystere, colicum sub ventriculo consistentem dolorem sublatum meminimus.

*interdum
infantes la-
tentes.*

*qui differ-
à colica.*

§. XI.

Utut vero plerumque flatulenti & tensivi ventriculi doloris causa, vitiosus humor, qui intra duodeni cavitatem paulo diutius retentus, flatus ventriculi orificia spasmo constringentes excitat: scimus tamen occurrere exempla mali flatulenti, ubi nullam materiam vitiosam in ventriculi vel duodeni cavitate animadvertimus. Quod vel ex eo dijudicare potuimus, quia tales anxietas & flatulentæ cardialgiæ, foeminis præsertim junioribus, resitante mensium fluxu, imo per primos menses gravidis, familiarissimæ observantur, & ructibus doloreque circa cordis scrobiculum & dorsum se manifestant, atque exacte circa mensium tempus revertuntur. Simile quid aliquando in viris, hæmorrhoidibus suppressis qui laborarunt, evenisse notavimus.

*A mensi-
bus vel hæ-
morrhoid.
suppressis.*

§. XII.

Quamvis vero non adeo facile sit, hujus rei invenire causam, nos tamen quodcumque consideramus, à sanguine intra intestini coli vel recti membranarum vasa stagnante, spasmodicum dolorem in iis partibus effici; nullam aliam pariter hic subesse causam judicamus, quam, quod facta palindrome, sanguis ad regionem ventriculi & præcordialem delatus, atque vasa ventriculi infarciens, ejus potissimum orificia spasticis stricturis pariter afficere & infestare possit. Et confirmamur in hac sententia, cum inter frequentes observationes in comperto sit, in iis qui asthmate stomachali flatulento spasmodico, sæpius lethali, & ut plurimum hydropem post se trahente, laborarunt, post mortem infarcta & obstrueta viscera sanguinea, præsertim hepar, vel etiam polyposas concreciones in cordis ventriculo repertas fuisse, quibus dum obex ponitur sanguinis libero circulo, facile ejus impetus

*Causa effi-
ciens.*

De dolore Cardialgico spasmodico & flatulento. 259

petus ad præcordia fertur, qui sic causam tam anxii doloris, quem perpetuo ructus concomitari solent, subministrat.

§. XIII.

Cardialgia spasmodica ab animi affectibus. Cum vero & sine singulari vel plane nulla inflatione, ille acerbissimus & anxius ventriculi dolor, vulgo *Magen - Krampff*, non tantum orificiorum, sed etiam totius substantiam, ob tunicam nervosam, spasmodorum vehementia affligat, ejus etiam causas paulo exactius investigare oportet. Jam vero nil propemodum in praxi frequentius occurrit, quam quod mox à vehementi iracundia, circa præcordia & cordis scrobiculum, & magis versus dextram partem, compressorius & constrictivus dolor cum anxietate & angustia pectoris, nausea, ciborum fastidio, oris amaritiei oboritur. Hujus ergo mali causam non difficulter is reperiet, qui considerat talem esse iræ vehementioris vim atque indolem, ut maxime suum pernitiæ effectum in præcordiis exerat, per quæ, ut bene explicat FERNELIUS *lib. IV. de febr. C. 10.* regio circa ventriculum, diaphragma, jecoris cavum & in eo ductus biliaris detenti, pancreas, in specie ventriculus, ejusque superius orificium, & quæ sub costis nothiis, anteriora versus & sternum inflectuntur, intelligitur, spasticis constrictionibus ea exercendo. Dein quoque ab ira valde commoveri biliosum succum, & systole canalium, qui bilem vehunt, intensiori reddita, eam copiosius in duodenum effundi constat; ubi postea diuturniori mora, corrosiva fit & corrumpitur, & diarrhœæ, cholæræ, vomitionis, atque etiam doloris cardialgici causam omnino subministrat, quia acrimonia sua, & pylorum & fundum ventriculi afficit. A terrore quoque paulo graviore cito induci posse cardialgiæ multoties experientia docet: & moerorem etiam sensim sensimque humores corrumpendo ad graves diuturnasque cardialgias disponere PLATERI *Observ. II.* testimonium exhibet.

§. XIV.

Symptoma aliquando est. Affectio ventriculi spasmodica est frequenter symptomatice. Non pauca nobis sunt cognita exempla ubi calculus in principio, vel quod pejus, in medio ureterum hærens, præter alia gravia accidentia, etiam vehementem cum intolerabili anxietate junctam cardialgiæ excitavit. Simile etiam quid observavimus à calculis biliaris, si canalem cysticum vel cholodochum pertranseant, vel fixiorem in iis sedem habeant. Quæ de re in sequenti Capite fusius agere nobis constitutum est. Luculenter vero etiam hinc apparet, quomodo per consensum à solo motus vitio, pars corporis nostri sensu prædita, absque materiali ibi existente causa graviter affici queat.

§. XV.

Veneno. Longe vero atrocior & plenior periculi species cardialgiæ est, quæ ab hausto veneno urentis & causticæ indolis inducitur. Vulgatissimum atque innumeris funestis exemplis infamatum illud arsenicum, & ei similia, non alia ratione perimunt, quam quod subtili & penetrante veneni acumine, altius in intima fibrarum nervearum ventriculi se insinuant, easque discindendo ac arrodendo, ad immanes spasticas stricturas adigunt atque exstimulant: quæ postea universum nervosarum partium genus in consensum trahendo, non modo ea symptomata, quæ cardialgiæ sunt essen-

tialia, sed & insuper sæviora & funesta, ut inflammationem sphacelofam, delirium, convulsionem, inducunt.

§. XVI.

ab emeticis. Emetica ex stibii regulina substantia petita, si paulo fortiori dosi imprudenter offeruntur, non nisi cardialgica inducunt symptomata; quin aliis etiam intus concurrentibus causis, & ubi præcordia jam spasmo adfecta sunt, lethalem, non secus ac venena, quod multis, pro dolor! constat exemplis, operationem exsequuntur. Id quod etiam de acrioribus & validioribus purgantibus, quæ subtili, caustico, & vesicante principio agunt, quorum imprudenti usu multi pereunt, intelligendum esse existimamus.

§. XVII.

in febrili exanthematicis. Ipsum pestilentiae virus, truculentam suam vim, primo omnium, in ventriculum spasmis atque inflammationibus exercere, & graves cardialgicas passiones, sæpe syncopicas inducere, in propatulo est. Petechiis, febribus purpuratis & malignis, si cardialgia succedit, quod maxime in morbi vigore fit, lethale signum esse solet. Pessimum quoque est, si cardialgia doloribus arthriticis, podagricis, quod evenit maxime, retrocedente materia ad interiora, item quando foedis cutis & partium externarum exulcerationibus supervenit, quod frequentius accidere solet. Nam materia illa activæ causticæ indolis, ubi à nexu & implexu humorum sequestrata, & ad cutis extima propulsa, relegit sua vestigia, atque nervosis tenerioris & firmioris texturæ ventriculi & intestinorum tunicis se altius insinuat, non secus ac venenum agere solet, sique diutius persistit, cardialgicas anxietates inducendo, hominem exanimat atque non raro interficit.

§. XVIII.

in dysenteria epidemica. Dysenteriae epidemicae & malignae, quando ea incaute comprimitur, infausto & periculoso sane omine cardialgia supervenit: dum caustica acris materia, ex intestinorum inferioribus ad superiora & ventriculum, retrogrado motu & impetu delata, principes has partes graviter infestat, subinde lethalia arcessere symptomata consuecit.

§. XIX.

à vermibus. Periculi quoque plena à vermibus innascitur cardialgia, quando videlicet, uti bene meminit TRALLIANUS, ex partibus inferioribus sursum ad ventriculum ascendunt, ejusque orificiis firmiter inhærescunt. Memorabile est quod proponit HERCULES SAXONIÆ in prælect. pract. P. II. cap. 7. scribens: ante tres annos ego vocatus ad puerum undecim annorum, vermibus refertum, cui pilulas exhibui. Mane cum reverterer, erat mortuus. Curavi ventriculum aperiri, inveni triginta tres vermes dodrantodes vivos, ori ventriculi adeo tenaciter inherentes, ut vix avelli potuerint. Similia exempla legi possunt apud HENRICUM ab HEER, & LANCISIUM *tr. de mort. subitan.* nec non apud RIVERIUM *L. 9. cap. 10.* Repentinæ ejusmodi mortis causam non aliam fuisse, quam syncopen invincibilem, à validiori cordis seu potius valvularum ipsi vicinorum constrictione derivandam, veri est simillimum. Ex quo intelligitur, quanta sit ad vitam servandam stomachi seu nobilioris

bilioris partis præstantia, ut igitur HELMONTIUS hac causa fuerit adductus, animæ sentientis ibi sedem collocare.

§. XX.

causæ ab-
ditæ

in partibus
solidis vi-
tiosis.

Sunt vero adhuc aliæ, atrocis stomachalis spasmii abditæ causæ. Nam ubi dolor indefinens est, & per multos trahit menses, ut carnem ac omnes demum vires consumat, labem ac vitium in partibus solidis subesse recte concluditur: quod etiam sectionibus post mortem institutis evictum habemus. Ita in tali chronico vitio, RIVERIUS, vid. cent. 1. obs. 90. scirrhum, totum pancreas, pylori ac duodeni principium ambientem, invenit. JACOBUS HOLLERIUS, de morbis internis pag. 153. de quodam narrat, qui febre, cardialgia, vomitu, torminibus ventris, dejectionibus pici similibus diu vexatus, tandem obierit. In cujus secto corpore inventum ulcus pustulatum in ambitu, quod tunicas omnes ventriculi, qua parte in pylorum est aditus, exedit.

§. XXI.

à parotidis
bus retro-
pulsis.

Alia adhuc dirum hunc affectum generandi ratio ac via per metastasin est. Ita binis exemplis nobis constat, parotidum tumores in sexu muliebri non adeo exiguos, externis quidem applicatis evanuisse, sed brevi post cardialgiam cum angustia spirandi infecutam fuisse. Observatum quoque à nobis est, & hemicraniam, & cardialgiam inter se alternasse, ita ut cardialgia sublata hemicrania fuerit secuta, & postea, hæc ipsa discussa, cardialgia redierit.

§. XXII.

Morbi de-
auris.

Ceterum dolor ventriculi cardialgicus ex iis est morbis, qui, nisi diutius persistant, non facile necent, nisi accedat inflammatio: quare non sine periculo est, si aliis morbis præsertim febribus acutis & malignis superveniat. Perite enim HIPPOCRATES prodidit Sect. IV. aph. 65. in febribus circa ventriculum fortis æstus & cordis morsus seu dolor malum est. Porro etiam hic adfectus inter eos referendus est, qui certis & ordinatis temporum intervallis quandoque etiam inordinatis redit, & vel breviori, vel longiori tempore affligit, ac alio tempore mitior, alio vehementior est. Et uti ordinario fere cum frigore in dorso, horripilatione cutis, non raro etiam oscitatione & pandiculatione ejus accessio est, atque in vigore extremæ, inferiores maxime partes inalgescunt, adeo ut etiam calidum satis vehemens admotum vix percipiatur: ita hic dolor, non nisi calore redeunte in partibus extremis, calidoque tandem sudore oboriente per totum corpus, solvitur atque discutitur. Et uti sub frigore pulsus contractus & exiguus est, ita major & mollior sub declinatione fit: quod etiam evanescentis mali certissimum est signum.

C U R A T I O.

§. I.

Indicationes
quæ
tuor.

Quemadmodum sagax & peritus medicus, nec certa ad morbum tollendum remedia commendare, nec una eademque semper via ac methodo in curando procedere debet & potest; sed opus habet, ut ad varii generis causas, agro-

tantis naturam, & alias atque alias circumstantias, morbos antecedentes & symptomata respiciat: ita etiam in hoc gravi & periculoso morbo sanando, idem fieri debere omnino necesse est. Nihilo minus tamen generales has medendi indicationes, pro scopo, per medicamenta succurrendi, tenere debet, quæ hæc sint: primo, ut materia vitiosa vel mole vel acrimonia peccans, circa stomachum hærens temperetur, corrigatur ac demulceatur, blandeque per discutientia vel commoda evacuantia removeatur: secundo, atroces dolores, qui vires mirum quantum deprimunt, ne inflammatio succedat, sopiantur: tertio, si symptomata est, morbi primarii ratio habeatur, & quarto, ut tonus & robur ventriculi & intestinorum à dolorum & spasmorum violentia labefactorum idoneis remediis restituatur & confirmetur.

§. II.

Quia sæpius acidi pontici humores accumulati ac congesti in stomachi regione, bilem in duodeno diuturna mora porraceam, æruginosam & valde corrosivam reddunt, & arrodendo tunicas nerveas, præbent doloris cardialgici causam, idque non raro in hypochondriacis, nec non à nimia vinorum acidorum ingurgitatione & fructuum horæorum fermentatione evenit; solis utique absorbentibus, nec non acrimoniam demulcentibus, non adeo difficulter curam expediri posse experientiæ conforme est. Quo nomine pulveres qui lapides cancrorum, cornu cervi philosophice præparatum, conchas vel matrem perlarum, crystallum montanum vel melius glaciem Mariæ præparatam recipiunt, commendamus, præsertim si cum aqua carminativa leniter spirituosam exhibentur. Pertinent huc quoque ad infringendam & mulcendam acrimoniam ex rasura cornu cervi gelatinosa decocta probe saturata, decoctum avenæ excorticatæ, cum amygdalis dulcibus subactum & syrupo papaveris albi edulcoratum.

§. III.

Ubi vero bilis valde acris sulphurea & calidissima, ab ira commota, causam hujus mali subministrat, consultum est, ejusmodi jam laudatis pulveribus aliquot grana admiscere nitri purificati pro dosi, atque in decocto eos exhibere. Opus vero interdum est correctam bilem leniter per alvum evacuare. Experientia etiam crebriori didicimus, in hoc atroci adfectu, si à bile nimis calida ebulliente & caustica obortus fuerit, solam aquam puram & frigidam, per vices, usque ad mensuram dimidiam vel ultra haustam, recto bene corpore & imposito stomachali regioni calido fomento, insigniter profuisse, ac subsecuto sudore per universum corpus, dolorem summo cum levamine discussum: eoque remedio acrimoniam biliosam non modo dilutam & temperatam, sed & nimium æstum depresum, ac denique ipsum robur, quod ingenti calore & dolore dejectum erat, quodammodo restitutum fuisse. Vidimus quoque, cardialgiam cum cholericâ passione junctam hoc unico remedio summo cum levamine conquiescere. Pertinet huc quoque insignissimus feri lactis, item emulsionum usus.

§. IV.

Non rarum nec insolens quoque est, post tertianam, anxium circa præcordia dolorem, cum

cum insigni virium languore, ciborum fastidio, oris siccitate, & animi leviuscule defectione, lentoque calore interdum observari; quæ cuncta mala à bile acri & vitiosa, copiosius in duodeno, si virtus ejus motrix peristaltica sub morbo valde fracta fuerit, coacervata diutiusque stagnante produci, exinde demum intelleximus, dum leni emetico, verbi gratia, uno vel altero grano tartari emetici, cum sufficiente quantitate aquæ dato, effusa magna faburra, conquievissè protinus hæc omnia mala vidimus. Referri huc optima ratione HIPPOCRATIS *Aph. XVII. Sect. IV.* meretur, qui, *non febricitanti, ubi cibi fastidium, cordis dolor, vertigo tenebricosa & oris amaritudo, purgatione per superiora opus esse,* significat.

§. V.

Vomitioni
obviam
eundum.

Sique cardialgiæ biliosæ, quod sæpius fit, vomitio jungitur, liquorem anodynum nostrum mineralem cum aqua frigida fontana, vel aqua florum chamomillæ, millefolii, acaciæ, tiliæ, sambuci, liliorum convallium, primulæ veris, cum præsentaneo levamine exhibuimus. Sub hoc statu magnopere cavendum est, ne medicus calidas essentias stomachales vel carminativas porrigat, neque crebriori calidorum infusorum usu ægrum maceret, quippe hæc omnia dolorem magis augment, quam minuunt.

§. VI.

Qui ex
cruditati-
bus oritur
dolor aliter
tractan-
dus.

Ubi vero intensus, pressorius, & gravativus stomachalem regionem diutius infestat dolor, isque à cruditatibus acido viscidis, firmiter ventriculi aut duodeni tunicis inhærescentibus oritur, quod frequentissime in iis, qui ex morbo jam convaluerunt, ac qui etiam ab aliis causis infirmum habent ventriculum, evenit, tum utique alia curandi opus est ratione. Nam sub tali casu, medicamenta digestiva, & quæ salino oleoso & aromatico incidente ac roborante principio agunt, necessaria sunt: quo nomine probatæ & expertæ virtutis ea, quæ sequuntur, proponere & laudare volumus, ac primò pulverem qui ita habet: rec. radicis ari, pimpinellæ, zingiberis, galangæ, flavedinis corticum aurantium, seminibus cymini, macis, singulorum drachmam, sacchari Canariensis ad pondus omnium. M. f. Pulvis, qui convenienti dosi leniter cum vino optimo decoqui & propinari potest. Dein sequens se commendabit mixtura: rec. essentia zedoariæ, carminativæ Wedelii, spiritus de tribus ana drachmas duas, balsami nostri vitæ guttas XV. Interdum vero opus est, ut ante horum usum, colluvies vitiosorum humorum, si nimia est, blande per superiora educatur, præsertim si ad vomitum appareat dispositio. Verum tunc non facile ultra radicem ipecacuanhæ ascendere licet: cum hæc non tam valide nervosas tunicas commoveat atque aggrediatur, nec post operationem, dispositionem ad vomitum relinquat, sicut ea quæ ex sibio parantur consuecunt.

§. VII.

aliter qui
ex veneno.

Ab hausto veneno caustico, item à nimis drastico purgante & vomitorio, si quis in hoc malum, quod vitæ sæpius præsens minatur periculum, conjectus fuerit, tunc vix efficacius auxilium, ac in usu lactis recentis, item in oleosis, oleo amygdalarum dulcium, olivarum, sufficiente quantitate haustis, addita simul dosi theriacæ veteris expectandum erit. Præstat vero in principio

Frid. Hoffmanni Oper. Tom. II.

tantum lac solum, five melius ejus cremorem sine theriaca dare, ne vomitus & secessus, quo sæpius optime venenum & corrosiva materia simul expellitur, nimis cito sistatur.

CAUTELÆ.

§. I.

Quando cardialgia ceu symptoma, aliis morbis ut acutis vel etiam exanthematicis supervenit, quod rarius fit sine periculo exitialis inflammationis, tum pulveres bezoardici, cum aliquot granis nitri, & quarta parte vel dimidio grano camphoræ, ob vim blande diaphoreticam & discutientem, non carent usu eximio. Sed consulo ob auspiciatum & meliorem successum, ut cum emulsione, quæ ex amygdalis dulcibus, feminibus IV. frigidis, & semine cardui Mariæ, cum aquis florum præsertim sambuci concinnata est, pulveres dicti propinentur. Sique materia à superficie corporis retropulsa, veneni propemodum indolem referens, rursus ad extimam cutim releganda censeatur; liquorem nostrum anodynum mineralem, cum quarta parte spiritus Bussii vel tartari mixtum, & per vices pro re nata datum, adhibito simul conveniente & placido regimine diaphoretico, sæpe numero convenientissimum & proficuum invenimus.

Quomodo
tractanda
symptoma-
tica.

§. II.

Quando à mensibus subsistentibus, & represso inde sanguinis impetu ad præcordia, mali origo est, tunc utique venæ sectio in pede celebrata, modo non fiat in paroxysmo, sed eo remittente, nec sub extremorum frigore, præsens & efficax auxilium præstat. Postea reliqua curatio, cum blande anodynis & discutientibus externe adhibitis, erit conficienda. Nos in omni dolore cardialgico, ceu peculiaris virtutis remedium, flores chamomillæ vulgaris & quæ ex iis parantur, plurimum commendamus; cujus generis aqua florum chamomillæ, oleum destillatum delicatissimum verum, non cum oleo terebinthinæ adulteratum, in elæosaccharum redactum, item Essentia bene saturata cum Spiritu florum chamomillæ non adeo spirituoso & elæosaccharo ejusdem olei adornata, ad motus spasticos sopiendos, longe efficacissima. Spectat huc quoque extractum, quod cum aliis convenientibus, intra pilulas recipi potest. Vulgatissimum, sed revera valde probatum domesticum est decoctum chamomillæ florum, cum cerevisia vel juscule avenæ excorticatæ, vulgo *Haber-Grütz*, addito præsertim oleo amygdalarum dulcium, calide per vices haustum.

Si à men-
sum defec-
tu.

Laudan-
tur ex cha-
momilla
parata.

§. III.

Deinde in omni dolore cardialgico, clysteres ano infundere demulcentes & emollientes, nunquam non proficuum. Quales ex floribus chamomillæ, ex oleo horum cocto & destillato, item feminibus IV. carminativis parati, si ex lacte coquantur, sunt omnium optimi. Sed opus est, ut bis vel ter quandoque injiciantur, nam blando suo tepore demulcente, nec non rigidas fibras laxante ac emolliente facultate, ut in omnibus fere gravioribus doloribus, ita etiam in hoc, insigne levamen afferunt.

Clysterum
usus.

§. IV.

In præcordiali & gravi dolore quoque, nunquam

Externa,
quam

quam non exterius epigastricæ regioni applicata idonea remedia, magnæ observantur utilitatis; & inter plura alia summam & mirabilem efficaciam eorum, quæ sequuntur, sæpius experti sumus. Inter quæ primum est linimentum, ita componendum: Recipe theriacæ, olei nucistæ expressi utriusque unciam, castorei, croci, balsami Peruviani ana drachinam, olei de cedro, caryophyllorum ana guttas XX. camphoræ drachinam dimidiam. Alterum sunt species quæ sequuntur. Rec. herbæ menthæ, florum chamomillæ vulgaris, Romanæ, sambuci, singulorum manipulum, baccarum lauri, juniperi utriusque unciam dimidiam, seminis cymini, carvi, caryophyllorum, nucis moschatæ, ana drachmas duas C. C. D. S. Species quæ sacculo possunt includi & calide parti adfectæ applicari. Calor enim egregiam vim levandi & discutiendi possidet.

§. V.

Si a ver-
minibus.

Si vermes causam subministrant, tunc utique longe alia curationis est ingredienda via. Minime vero, si hospitium eorum est in ventriculo, fortiora anthelmintica, præsertim quæ acri, valida arrodente facultate, operationem suam exsequuntur, ut mercurialia, vitriolum Veneris, vel Martis, purgantia aloëtica, vel etiam salia alias non inutilia porrigenda; eo, quod hæc malum sæpius exasperent: sed potius lac tepidum, cum oleo amygdalarum dulcium sufficienti quantitate offerendum. Quæ demu cendo, escam pariter animalculis his, ne arrodant tunicas, præbendo aptissima sunt; maxime omnium vero, eam quoque ob rationem, quia, si tepide lac in magna copia hauriatur, ventriculi inversione facta; ingrati isti hospites per superiora ejiciuntur.

§. VI.

Hypochon-
driacis Ca-
rolinæ
conferunt.

Hypochondriaco-spasmodicæ passioni obnoxii, crebro recurrentibus hisce anxiiis doloribus, per longum tempus premuntur. Quo in casu, omnibus aliis inaniter adhibitis, aquas thermales, præsertim Carolinæ aliquoties usurpatas utilissimas observavi. Sed harum usus interdum reiterari debet. Hæmorrhoidalem fluxum inde secutum, maximo cum levamine, non semel experti sumus. Ceterum elixir balsamicum nostrum quod viscerale audit, item quod in notis ad *Poterium* descripsimus, cum essentia castorei remixtum; nec non pulveres temperati leniter nitrosi, antispasmodici, venæ sectiones æquinociales, in chronicis istiusmodi doloribus, magno sunt præsidio.

§. VII.

Salia vi-
tanda.

Qui cardialgicis passionibus sunt obnoxii in & extra accessionem à medicamentis, quæ salinæ sunt naturæ, provide sibi cavere debent: quo pertinet usus fontis Sedlicensis, quem plus noxæ quam emolumenti attulisse observatum à me est.

§. VIII.

Methodus
præserva-
toria.

Ad recursum perniciosi hujus mali impediendum, plura occurrunt notatu digna. Primo non facile, qui ad hoc malum sunt dispositi, purgantia præsertim acriora admittere debent: quia hæc natura sua, stomacho ejusque partibus insensa, ingentem, si crebrius usurpantur, infirmitatem relinquunt: qua nihil ad recidivas contrahendas pejus est. Præter hæc, motum humo-

rum ad primam regionem ex aliis partibus allciunt. Videndum tamen nihilo minus, ut alvus semper maneat libera atque aperta, quod multo tutius fit, quando per alimenta id præstare alaboramus. Deinde contra frigus quam maxime & præcordialis & dorsalis regio, ubi ventriculus cum orificiis situm suum occupat, sufficientium integumentorum ope, munienda erit. Quam nocivum enim partibus nervosis, & morbis qui in earum debilitate consistunt, frigus sit, dici non satis potest. Vix autem eo perducere homines possunt, ut veritati huic fidem faciant, eamque intelligant. Denique, victum quod concernit, ab omnibus excessiva qualitate & intemperie præditis, nimis salitis, fumo induratis, pipere, allio, aceto conditis, raphano rusticano & huic similibus abstinere oportet. Vicissim majorem in modum commendamus jura gallinarum, ac carnis vitulinæ; & ut sibi à pingui carne temperent, inprimis quando potio frigida superingeritur, vel externo frigore stomachalis regio tangitur, suademus.

ENARRATIONES MORBORUM.

OBSERVATIO I.

Fœmina honesta aliquot supra quinquaginta annos nata, habitus corporis spongiosi, succi & sanguinis pleni, vitæ sedentariæ addicta, decennio abhinc fluxum uterinum non amplius passa, venæ sectionem binis vel ternis quotannis vicibus celebrans, vegeta atque continua sanitate utens; sex ante annos gravi & diuturno animi mœrore ob luctuosos familiam ferientes casus afficitur. Ab hoc tempore valetudo vacillare & molestissimus per quinque jam annos crebro redeuntibus paroxysmis infestare coepit morbus, à levi statim frigore dorso admissio vel ab animi commotione aut terrore originem mutuans. Morbi vero incessus hunc servare plerumque suevit modum. Præcedit nimirum oscitatio, sequente narium, aurium nec non faciei frigore. Stringuntur dein fauces, tum gelu dorsum, manus ac pedes occupat, postea scrobiculus cordis pressorio, fixo & ardente dolore affligitur, qui extenditur ad ipsum dorsum ubi ventriculi orificium sinistrum situm est, imperialis tantummodo spatium implens. Adest præterea summa anxietas, inquietudine juncta; pulsus contractus, frequens & debilis micat. In lecto consistere nequit sed exurgere debet. Ad alvum & urinam reddendam neque minus ad vomendum stimulum quidem perſentit, neutris tamen subsequenter. Inter omnia autem, quæ ægram acriter infestant symptomata, animadverti meretur illud, quod frigus quo dorsum corripitur adeo intensum sit, ut nulla, nec à calidissimo admoto lapide caloris percipiatur sensatio, quin sub brevi temporis delapsu illud satis frigidum removeatur. Sed ad alvum firmiter clausam subducendam, clysteres emollientes & oleosi injecti sine effectu redierunt: neque flatibus per inferiora, neque ructibus per superiora exitus ullus; sive raro illud contigerit, fuit concessus. Tandem elapsis aliquot horis partes superiores primo, dein inferiores sensim incalescere ac madescere incipiunt; donec ultimo largus sudor prolicetur, & paroxysmus, quatuor vel sex interdum horas perstans hoc ipso solvitur. Sub decursu paroxysmi omnia fere remedia, cum primis sub frigore, ægra valde aversatur: conclave autem calidum, tegulas calidas

Cardialgia
spasmodica
ex animi
affectionibus
& frigore,
sæpius re-
currens.

De dolore Cardialgico spasmodico & flatulento. 263

calidas & linreamina calefacta extremis præsertim partibus admota ferre quam optime potest. Calore corpori reddito pocula aliquot infusi Coffee cum liquore nostro minerali anodyno, quarta balsami vitæ, vel dimidia elixirii stomachalis parte remixto assumit, quod unicum fere medicamentum naturæ ægrotantis conducibile reperi. Finito morbi impetu virium remanet defectus, & urina quæ modo in paroxysmo aquæ instar limpida comparebat, rubicunda crassum deponens sedimentum prodit.

Epicrisis.

Affectus hic cardialgiæ chronicæ spasmodicæ nomen jure meretur. Neque enim ventriculi inflatio ab incongruis ingestis oriunda, siquidem ægra accuratiorem servare diætam consuevit, dici poterit: sed nervosum maxime genus affici atque compati & ortus & morbi progressus aperte loquuntur. Notatu enim dignum est, mororem affectui originem dedisse, ac frigus demum & animi affectus eum excitasse. Animadverti quoque, morbum hunc paroxysmi febrilis pene typum æquare, à lumbari regione, ubi magnus mesenterii plexus situm obtinet, initium sumere, ac nervosas corporis partes contrahendo, sanguinemque & humores ad cor & vasa majora repellendo tragœdiam ludere. Accedit quod acceperim ab honestissima fœmina, ægritudinem esse hæreditariam, quæ matrem, matrisque sororem corripuerit, easque longo tempore excruciauerit. Ceterum consului, ut frigus omni modo vitaret, atque sedulo caveret, ne illud dorsum tentare possit, calidis idcirco pannis tegendum; ab animi quoque commotione nec non alimentis refrigerantibus quantum fieri possit abstineret. Quandoquidem & pulverem nostrum præcipitantem non bene ferre potest; elixirio autem stomachali cum liquore anodyno remixto, sæpius utitur, nec non infusum Coffeæ ter per septimanam bono cum fructu usurpat. Suasi denique ut corpus motu decenti sæpius exerceret, quia tum malum rarius affligere observavi.

OBSERVATIO II.

Cardialgia colica ex comestione carnis assatæ vervecinæ & frigore.

Mulier parvæ sed obesæ staturæ atque plethorica, quadragesimum jam annum supergressa, cognatum invisendi gratia cum marito in propinquam civitatem iter fecit. Præter alia edulia carnem vervecinam pinguem assatam larga manu assumsit, cerevisiam triticeam, qua neutiquam alias fuerat usa, superbibendo. Vespere sub aura intense frigida domum reversa, conqueri de anxietatibus & vehementi dolore circa præcordia cœpit, concomitante faciei & extremorum frigore, nocteque inquieta. Dolor non persistit in præcordiali regione, sed per totum abdomen flatibus mire turgens se extendit: alvus simul erat adstrictissima. Symptomata non modo nocte affligebant, sed die etiam sequente insistebant. Opponebantur huic malo varia ex domesticorum apparatu petita: panni quoque & tegulæ calidæ in usum extrinsecus tractæ: sed successus fefellit. Accersitus ego, ægram inveni angustis circa pectus valde molestam, ut spiritum ægre ducere potuerit; abdomine mire turgido, animique leviusculis defectionibus intercedentibus. Adstantes catarrhum suffocativum trepide metuebant. Ego singulis horis, duo pocula brodi tenuis ex carne gallinarum, una cum cochleare

Frid. Hoffmanni Oper. Tom. II.

olei amygdalarum dulcium, additis X. liquoris nostri anodynii mineralis & V. balsami vitæ guttulis præbere jussi: post, enema, ex speciebus carminativis, oleis expressis, adjuncto stimulo salino paratum ano injiciendum præcepi. Præstabilem reliquerunt effectum, & flatus ac ructus ἀνω & κάτω non sine levamine successerunt. Tegulas valde calefactas removi, utpote qui non modo molestiam, sed & doloris augmentum, ipsa id ægrotante asseverante, creabant: ast linimentum, quo inungeretur locus affectus, ex axungia humana, oleo destillato carvi & aliquot granis camphoræ substitui. Ad levandam, qua premebatur, sitim, infusum Theiforme ordinavi. Præterea vini calidi medicati ex infusione absinthii, corticum aurantium & macis parati poculum aliquando porrexi. Postero die potiunculam mannatam, ex mannæ uncis duabus, cremoris tartari drachma, essentiae corticum aurantium guttis XX. & olei amygdalini dulcis aliquot cochlearibus paratam propinandam curavi: cujus operatio duas post horas clystere secundata. Quibus id consecuti sumus, ut ingens vitiosorum humorum colluvies, tam per superiora quam per inferiora, fuerit educta. Sudor denique per totum corpus erupit, & symptomatum vehementia DEO adjuvante sensim discussa. Ad recursum vero morbi præsciendum, ventriculi digestionem pilulis nostris balsamicis atque elixirio carminativo adjuvimus.

Epicrisis.

Nihil ad ingenierandum ventriculi & intestinorum dolores ac flatulentias reperitur valentius, ac caro pinguis vervecina, superingerendo frigidum inusitatum potum, corpusque spongiosum excessive frigida auræ committendo. Erit autem enarratus affectus cardialgico-colicus recte dicendus, eo quod coagulum pingue in duodeno subsistens, ventriculum & intestina flatibus mire distenderit, atque à transpiratione prohibita serum acre redditum, tunicas earum vellicando & irritando, ad spasticas stricturas magis sollicitaverit. Quæ cum in corpus plethoricum venæ sectioni minus assuetum, sed eam maxime abhorrens, inciderint; tam atrocia malo se sociasse symptomata nemo mirabitur. Ceterum ut coagulum in duodeno dissolveretur atque saluberrima transpiratio restitueretur, potus utique calidus erat præbendus: sicut ad discutiendos flatus vinum absinthites non in cassum fuit adhibitum. Hoc quoque instar cautelæ tenendum reputo, quod in abdominis doloribus qui ab inflationibus oriuntur, extreme calida partibus affectis applicare non semper sit consultum; ut autem extremæ partes blando atque temperato calore foveantur ego quidem auctor sum. In priori enim casu, flatus qui ab aëre rarefacto & intestinis incluso nascuntur, à calore externo, ut experimentis physicis edocemur, majorem elasticam & expansivam vim acquirunt. Deinceps annotationem meretur, vitiosam materiam flatus in intestinorum canali excitantem nunquam felicius ac etiam tutius quam lenioribus convenientibus laxantibus, & clystere una vel altera hora post injecto eliminari posse; siquidem hac ratione primæ viæ non modo potentius à sordium inquinamento liberantur, sed flatus quoque versus inferiora ducuntur.

OBSERVATIO III.

Quinquagenarius illustris, temperamentii sanguinei

Cardialgia flatulenta

ex incon-
gruorum
ciborum
nimia in-
gurgitatio-
ne.

guinei & animi excitati, ab anno & quod ex-
currit crebrioribus itineribus, arduis in officio
Regis laboribus animique fatigationibus continuo
detentus, sex ante menses febre corripitur con-
tinua biliosa. Qua curata, per aliquot vero heb-
domades revertente, iterumque depulsa sanus
egit atque incolumis. At vero iter denuo in Re-
gia causa suscepit, fame atque vigiliis vexatus
domum revertitur. Esuriens inter cibos reliquos
halecem salitam, cucumeres aceto maceratos nec
non fabas coctas liberalius ingessit, melones quo-
que cum saccharo avidius assumpsit, hausto insu-
per vino acidulis Tönnsteinensibus diluto; ves-
peri cerevisiæ triticeæ vulgo *Breyhan* sat largam
copiam, tabaci fumo fauces aridas stimulante,
ingurgitavit. Sic lectum ingressus, anxietates
circa præcordia persequitur, adest spirandi angus-
tia, inquietudo, virium defectio, cum sudore
anxio frigido corpus totum perlucens, adque vo-
mendum stimulus perpetuus. Haussit infusum
Thée paulo calidius, atque ingentem crudorum
ciborum copiam vomuit, persistentibus nihilo
minus vix tolerabilibus anxietatibus. Alvus te-
naciter adstricta nihil flatuum emittens, ad min-
gendum quoque stimulus, urina tamen nulla ef-
fluente. Partes externas frigus obsidebat, atque
pulsus exploratu durus & contractus erat. Vo-
catus in consilium, liquoris anodynii mineralis
CXXV. guttas cum balsami vitæ guttulis L. in
aqua frigida vini dimidia parte remixta propina-
vi. Sacculum deinde avena igne torrefacta re-
pletum regioni epigastricæ applicare atque in
lectum concedere ægrotantem jubeo. Elapsa vix
quarta horæ parte per superiora pariter ac infe-
riora flatus ac ructus in maximum ægri solatium
procefferunt. Factus quietus, sumtis aliquot in-
fusi Thée poculis, calor in partibus extremis
redit: anxietas demum evanuit, corpus sudore
maduit, ac, placido somno inducto, ab omni
dolore & morbo liber evasit. Post hæc clysterem
carminativum applicandum curavi, à quo in-
gentem sordium copiam deposuit. Altero die
ægri accessi & faciem flavo colore tinctam
inveni, urinamque brunni icterici coloris de-
prehendi, parca quantitate emissam. Continuavi
usum liquoris nostri anodynii mineralis, sed lon-
ge parciore dosi, pulverisque præcipitantis, ali-
quot olei chamomillæ guttulis adjectis. Quibus
sanitati in integrum restitutus, mox rursus iter
officii causa suscepit.

Epicrisis.

Cardialgiæ huic atrocissimæ flatulentæ ansam
suppeditavit nervosarum partium imbecillitas ab
animi & corporis defatigationibus, nec non à
morbo præcedente contracta. Hinc balsamum
nostrum vitæ blanda naturæque amabili gau-
dens anathymiasis ad roborandum, & ad spas-
mum relaxandum liquorem nostrum anodynum,
successu haud frustraneo porreximus; eo mayo-
ri quidem dosi, quo morbi vehementia poten-
tioris requisivit resistentiam: semper enim pro-
portio inter vires medicamenti atque obsistentes
morbi seu potius causæ morbificæ debet inter-
cedere.

OBSERVATIO IV.

Cardialgia
spasmodica
ex hæmor-
roid. fri-
gore sup-
pressis, ve.

Princeps Serenissimus in quadragesimo æta-
tis constitutus anno, liberaliori & vinosæ diætæ
affluens ac sanguine turgidus, per aliquot jam
annos sanguineam per sedis venas expertus erat

excretionem. Instante fluxu quum corpus frigi-
diori aëri iusto diutius exponeret; insequente
nocte & postero die, inquietudine, virium lan-
guore, æstu, cum pulsu celeri, nec non anxietate
cardialgica premi cœpit. Jungebantur animi
levis defectio, sitis inextinguibilis, abdominis
tormina, alvusque dura & renitens. Clyster ap-
plicatus à flatibus statim & sine effectu repellitur.
Obferuntur blande diaphoretica, nitro, ca-
storei momento nec non cinnabari permixta, cum
aquarum analepticarum vehiculo, sed nihil inde
levaminis persequitur. Secta in pede fuit vena, sed
cum ultra quinque uncias sanguinis non extrahe-
retur, parum inde auxilii consecutus; quin potius
symptomata incrementa ceperunt. Nos sangui-
nis abundantiam manifeste cernentes, ad secun-
dam venæ sectionem transeundam nulli dubita-
vimus: qua libra pene sanguinis è secta in pede
vena fuit emissa. Adeo vero hoc auxilio adju-
tus fuit, ut mox circa præcordia dolor, ardor,
anxietas remitterent, noxque quietior esset. Tan-
demque exhibitis analepticis diaphoreticis, ene-
mate emolliente, atque interne infuso mannato,
ex toto cum sanitate Serenissimus Princeps in
gratiam rediit.

Epicrisis.

Sanguinem in vasorum intestini recti & coli
membranis stagnantem, spasticis stricturis, &
facta hinc ad ventriculum translatione orificii
ejus vasa infarciens, cardialgicum excitare
posse dolorem, enarrata hac morbi historia, quan-
tum ego quidem inemini, sufficienter edocemur.
Præterea ex curatione à nobis instituta elucet, in
corpore plethorico venæ sectionem vel binis vi-
cibus cum emolumento posse adhiberi. Postremo
id quoque elici poterit salutare porisma: caven-
dum esse quam maxime iis, qui ejusmodi criti-
cis obnoxii sunt hæmorrhagiis salutem porten-
dentibus, ne circa vel in ipsa excretionem talia
admittant, quæ turbare eam vel plane sistere
valent; inter quæ, animi fortior commotio, ter-
ror præsertim, neque minus frigus externum,
primas omnino ducunt.

OBSERVATIO V.

Serenissima stirpe prognatus juvenis vigesimum
& sextum agens annum, carnosus & sanguine
abundans, ex hæreditate à Serenissimo Parente
in eum translata, jam tum hypochondriacis pa-
thematibus ut & quandoque melancholia fuit
affectus; à quibus mea opera, per DEI gratiam,
binos ante menses immunis degebat. Suasi ut
Carolinas adiret, antequam autem iter suscipe-
ret, quod hoc anno adhuc erat prætermisum,
ut venam secari pateretur. Neglecto à medico
ordinario quod omni diligentia inculcaveram mo-
nito, veloci cursu sub sole fervente iter suum
perficiens appulit thermas. Egit noctem inquie-
tam, atque expergefactus summa circa præcor-
dialem regionem anxietate ad vomitum incli-
nante, extremorum frigore, interiorum æstu,
molesta corporis jactatione torquetur. Accitus
ego tum temporis præsens, plethoram solvendam
præcipio. Instituta venæ sectio, sed chirurgus exi-
guam nimis aperturam faciente, sanguinis vix
uncia paulatim profluxit: & Princeps novam
incisionem admittere noluit. Hinc symptomati-
bus exacerbatis, non in lecto consistere potuit,
sed noctem plane insomnem egit. Altero ma-
ne, iterandæ venæ sectionis necessitate multis
argu-

na sectio-
ne curata

Cardialgia
spasmodica
in pletho-
rico sub
æstuoso cœ-
lo præfiscif-
cente, ve-
na sectione
per instituta
curata.

argumentis demonstrata, eo perventum est, ut aperiri quidem venam sed non ultra quinque uncias educi permetteret. Verum nec tum symptomata conquieverunt, utut remittere visa fuerint. Dedi interea sanguinis impetuosum motum compescencia: quo nomine liquorem meum anodynum, pulverem præcipitantem nitrosum, nec non emulsionem ex seminibus IV. frigidis celebrem deprehendi. Quum vero ex toto cessare malum nollet, pulsus eadem celeritate agiteret, atque nox inquieta persisteret, multa opera impetravi, ut tertium, quarto videlicet ab invasione die, venam secari concederet. Detractis VIII. circiter uncias, præcordiorum anxietas, inquietudo, ac febrilis calor confestim deseruerunt immanibus tot doloribus maceratum Principem, non sine insigni ejus & adfistentium exultatione. Atque appetitu, somno, viriumque augmento redeuntibus, integræ sanitati divinæ bonitatis adjutorio fuit restitutus.

Epicrisis.

Circa hunc casum animadvertere quam maxime licet, sanguine nimium abundantibus vehementem & diuturniorem motum subito & imprimis sub cælo æstuoso susceptum valde perniciosum atque infensum esse; siquidem sanguis copiosus intestina agitatione fortiter commotus valde turgescit, vasaque distendens hinc inde stagnat atque subsistit, graves suscitans spasticas strictureas pariter ac impetuosas ad partes congestiones. Similiter fieri observamus, quando corpora plethorica in balneum nimis calidum mittuntur, vel sudorifera fortiora cum regimine calido obtruduntur: nisi enim symptomatibus ingravescentibus mature solvatur plethora, graves & periculi haud expertes scenam ludent ægritudines. Porro ex hac morbi historia docemur, quod immanes cardialgicæ passiones à solo sanguine intra membranas ventriculi stagnante, sine ulla vitiosorum humorum in ejus cavitate stabulante copia, excitari possint, atque unicum auxilium in sufficienti sanguinis detractione repositum sit: qua neglecta vel insuper habita, nec præsentissimæ alias virtutis ad vincendum talem morbum remedia quicquam perficere posse, recte colligitur.

OBSERVATIO VI.

*Cardialgia
spasmodica
ex plethora
& hæmorrhoidibus
non rite
fluentibus.*

Duobus abhinc annis ex Anglia hic casus ad nos fuit missus & consilium meum requisitum. Illustrissima foemina, triginta annorum, sanguineæ complexionis, ante decem jam annos gravissima laboravit hemicrania, qua usu thermarum Epsoniensium fuit liberata. Postea maritata, in ipso puerperio idem malum rediit, atque identidem ope acidularum post aliquot tempus sublatum fuit. Verum non ita multo post, intolerabilis intestinorum invasit dolor, per decem dies in inferiori eorum parte consistens cum tumore, qui etiam alvi depositionem valde difficilem reddebat. Ubi vero hæmorrhoides fluere cœperunt, sublevatus quidem dolor, sed inferior tumor alvi obstructionem efficiens remansit, atque etiam semper pressione thoracis, quæ fit in foeminis per ligacula, increvit, qui tamen applicatione allii cum lacte levatus quodammodo fuit. Ab eo tempore labem contraxit ventriculus, ita ut à cibo minus salubri vel etiam copiosius ingesto, anxiosa compressio & constructio circa præcordia fuerit secuta: quæ in puerperio secundo atro-

cior reddita, licet carminativis & anodynis exhibitis quodammodo remiserit, tamen ex toto vinci non potuit. Hanc medicus quidam expugnandam vomitorio promisit; sed tantum abfuit ut inde diminuta fuerit, quin potius incrementa majora cœperit. Neque vina medicata, neque laxantia, quæ in usum subjunxit, quicquam profecerunt. Optimum tamen levamen vinum Hungaricum, in quo cinnamomum & caryophylli cum saccharo leniter coquebantur, ad duo pocula loco Théæ haustum, præstitit. Inde vero facies valde rubicundo pruriente tædii pleno colore perfusa fuit, qui sub graviditate multum remisit. In ipso vero subsequente puerperio tam atrox spasmus ventriculum & præcordiorum regionem per septem fere hebdomades indefinenter affixit, ut vires inde mirum in modum fuerint profligatæ, omniaque fere ingesta vomitu rejecta: pari modo à vino Gallico Frontignan vel Hispanico quodammodo sævus hic dolor fuit sedatus. Interea spasmus primarum viarum semper continuat, adeo ut ab omni cibo, sive in cœna, sive in prandio sumto, augeatur: ita, ut interdum caput & pectus constringendo, & abdomen comprimendo, afficiat. In scrobiculo cordis, circa dextri lateris costas spurias, dolor semper magnitudine ovi gallinacei percipitur, qui interdum remittit, sed sub ejus accessione, quam ira facile proritat, dorsum occupat & intensum languorem, externarum quoque partium tremorem inducit. Ceterum, hæmorrhoidum internarum tumor, cum alvi obstipatione, continuus & fere indivulsus mali hujus fuit comes. Cerevisiam assumens, ardorem semper cum dolore percipit, qui tamen sumta magnesiæ dosi mitescit; quare decocto ex mastiche & cinnamomo parato, pro quotidiano utitur potu.

Resolutio.

Meum de hoc affectu ejusque causa & mendendi ratione tale fuit judicium. Originem videlicet & causam tum cephalici tum cardialgici atque hæmorrhoidalis tumoris & doloris, à nimia sanguinis spissi & impuri redundantia, vasa sanguinea membranarum capitis, ventriculi & intestini recti, præsertim cum ibi non invenerit exitum, supra modum distendente & distrahente, in persona lautius absque dubio & nimis quiete vivente, ducendam ac derivandam esse putavi. De sanguinis missione nulla fuit mentio facta, quæ tamen summe fuisset proficua, perinde ac hirudinum ad venas sedis applicatio. Tempore gravitationis semper melius se habuit, quia supervacaneus sanguis in nutrimentum foetus absumtus est. Puerperium exactum, converso rursus per spasmos hystericos puerperis solennes impurioris sanguinis motu ac impetu ad consuetas imbecilliores nervosas partes, exacerbatio mali fuit secuta. Nihil omnino ad hanc causam removendam & eradicandam, neque emetica, laxantia, neque potus etiam spirituosi, licet levamen quoddam palliativum præstiterint, conferre potuerunt. Consilium dedi, ut ter minimum quotannis venæ sectio in pede administraretur: dein, ut bis in anno curam cum aquis mineralibus institueret, utpote quæ etiam inter initia hemicranicum dolorem sustulerunt felicissime. Ejusmodi enim aquarum subtilium & spirituosarum ope, spissi & impuri humores corriguntur, diluti & fluxiles evadunt, excretiones salutares promovenitur & partibus nervosis robur adjicitur,

præsertim, si cura debito diætæ moderamine, motuque corporis decenti secundetur. Id quod nos etiam omni diligentia inculcavimus.

OBSERVATIO VII.

*Cardialgia
spasmodica
Carolinis
& Tœpli-
censibus
curata.*

Tribus circiter abhinc annis, Consiliarius & Nobilis ex Livonia ad me valetudinarium suum statum perscripsit, consilium meum efflagitans. Conquestus nempe est de immani dolore præcordio & spasmio circa præcordia, quo jam per aliquot annos correptus fuit: initium sumens cum extremorum frigore, ab hypochondrio sinistro ad cordis scrobiculum, sternum, pectus, dorsum, imo ad brachia se extendens, cum spirandi angustia, inquietudine, virium omnium dejectione atque anxietate afflixit, quandoque mitiori gradu & haud diu insistens. Admotis fomentis calidis, injectis clysteribus, exhibitisque internis diaphoresin moventibus remediis, sensim redeunte ad partes externas calore, vis mali imminuta quidem vel sopita fuit; attamen ex animi perturbatione aut frigore hiemali ad cutim penetrante, vel incongruo assumpto potu ac cibo, promte & facile recruduit. Originem & causam hujus perquam molesti affectus interpestivis & immodicis venationibus, sub cœlo rigido & frigido susceptis, nec non liberalioribus vini potationibus adscripsit. Non nulli ex medicis à defectu hæmorrhoidalis fluxus mali causam accercentes, quem nunquam tamen expertus est, venam pertundi bis vel ter quotannis suaserunt: sed citra omnem salutarem successum. Exquisivit meam de usu Carolinarum sententiam. Ego consilium omnibus modis approbavi, eo, quod plures viderim simili affectu laborantes, qui non nisi interno horum fontium, externo vero Tœplicensium usu, ab atroci malo liberari potuerant. Adjeci illud, quod si stagnatio sanguinis in intestinis crassioribus exitum per venas sedis moliens causam præbeat mali, vix ullum præter has dari neque mihi cognitum esse remedium, quo, si modo natura ad hæmorrhoidalem fluxum inclinet, rectius & facilius promoveri possit. Scripsi quoque post aquarum thermalium potum, balneum Tœplicense in ejusmodi partium nervosarum affectibus longe utilissimum me observasse. Mira enim est ejusmodi aquarum subtilium in infirmis nervosis partibus roborandis, in spasmio constrictis relaxandis, atque in sanguinis & fluidorum motu versus superficiem corporis determinando, efficacia. Auscultavit Generosus & illustris patiens meo consilio: & antequam adiret thermas, suum ad me direxit iter. Ubi præscripto salutari regimine & idoneis atque necessariis medicamentis ipsum instructum dimisi. Quantum levaminis ab hac cura expertus fuerit, revertens dilaudare non satis potuit. Quum postea breviori tempore ac minori gradu accessio facta esset; altero anno, vernali tempore ipse rursus cum uxore has thermas petiit: & utrisque, tam externus quam internus horum fontium usus prosperrimo successu se probavit. Nam, quum per sex annos in sterili vixerint conjugio, uxor gravida reddita pulchrum & bene valentem filium peperit. Ex medicamentis quæ ipsi suppeditavi atque postea transinisi, elixirii visceralis cum liquore anodyno permixti, nec non pilularum balsamicarum polychrestarum, item pulveris præcipitantis nitrosi cum aliquot guttulis olei macis vel chamomillæ veri conspersi usum & virtutes, non sine singu-

lari commodo atque emolumento expertus est.

Epicrisis.

Ejusmodi affectus chronici & inveterati, non tam fluidarum, quam potius solidarum nervosarum & partium, quæ motu & elatere præditæ sunt, nimia plerumque coarctationi debentur; quæ si in habitum & consuetudinem degeneraverit, omnia remediorum genera, quæ humoribus corrigendis unice dicata sunt, pene eludit. Hinc neque venæ sectiones, neque laxantia, purgantia, anodyna, diaphoretica, neque etiam diuretica, tali in casu usui sunt, ut potius malum sæpius adaugeant. Præcipuum vero auxilium in ejusmodi remedio, quod totam sanguinis massam omnesque partes solidas moderate & blande afficit, cujus generis fontes & balnea, est reponendum.

OBSERVATIO VIII.

Vir triginta annorum, generosa stirpe ortus, robustæ alias naturæ & structuræ corporis; pectus & præcordia vix unquam commodis tegumentis defendit à frigore, sed linteis & levibus vestibus munitum libero aëri omni fere tempore exposuit. Præterea & ingluviei & poculis deditus, frequentius ad ebrietatem vinis varii generis se immerfit. His de causis acerbissimos sæpe dolores, distensionem, lancinationem cum inappetentia, vomitu, anxietate circa stomachi regionem est expertus. Enixe & anxie remedium à me petiit & quæsit. Misi identidem multa ad demulcendum dolorem interna & externa alias apta, sed speratus effectus non sequebatur, quia plane omnia diætetica respuebat præcepta. Tandem consilium dedi, ut thermas Carolinas & Tœplicenses adiret, iisque cum regimine debito uteretur: & inde etiam levamen, cum ipse ibidem essem, inveniebat præsentaneum. Sed exiguo post curam tempore, inter initia autumnii, venationibus deditus, frequentius pedes & femora in stagna & piscinas dimisit. Inde valde refrigeratus; post varios cibos vinum in copia ingessit. Recurrit paroxysmus valde acerbus, qui etiam nundinis Lipsiensibus, me tum præsentē, tam graviter eum affligebat, ut omnem fere respirationem tolleretur & partibus extremis sudore frigido perfusis, crebroque recurrentibus animi deliquiis, morti videretur proximus. Fomenti calida externa & apta remedia interna allevamenti parum attulerunt. Suasi ut in balneum sive potius semicupium ex aqua & lacte paratum descenderet, & per horam imo amplius in eodem moraretur. Quo facto, postea in lecto liquorem anodynum mineralem cum dimidia parte spiritus Bussii remixtum ex aqua florum chamomillæ vulgaris propinavi. Tum sudore prorumpente id consecutus est, ut dolorum vehementia remiserit, alvus per aliquot dies clausa, jam soluta, & calor ad exteriora fuerit reversus.

Epicrisis.

Quam infestum sit frigus partibus nervosis, imprimisque regioni stomachali & præcordiali, vix credibile est; & plures suo damno id subinde experiuntur. Inde non semel sed sæpius asthma spasmodicum, affectum spasmodico-hypochondriacum & dispositionem ad fluxum hæmorrhoidalem, sed minus rite succedentem, vidi excitatam. Id quod facile ii ex medicis concipere possunt, quibus multa experientia cognitum perspectumque est, quantam consensionem & confor-

Cardialgia, ex frigore & intemperantia, Carolinis, & recurrens balneo curata.

confortium inter se partes corporis universi nervosae alant, adeo, ut una laesa ad reliquas facile idem vitium transeat. Deinceps id quoque debet animadverti, quod vitae aulicae addictae, Serenae & splendidae personae, prae aliis omnibus, ventriculi & maxime cardialgicis passionibus expositae sunt; quia vitae illud genus, quod ejusmodi personis est familiarissimum, cum exactam vitae & dietae rationem respuant ac perpetuo ferre saluberrima medicorum hoc in genere praeccepta insuper habeant, ejusmodi morbis invehendis, materiam, originem & causam subministrat uberrimam. Possent multa recensere exempla illustrium imo Serenissimarum personarum, quae fervidiore aestate glaciato potu, ita ventriculi & primarum viarum tonum atque inde bonae digestionis opus destruxerunt, ut per omne pene vitae tempus multa incommoda, quae vix ulla medicina poterant tolli, circa praecordia perpessae fuerint.

OBSERVATIO IX.

Cardialgia, ex iracundia, ab assumpto vomitorio funesta.

Vir in vigore aetatis constitutus, nec tenerioris natura habitus, sed satis validi, in iram vero valde proclivis, occasione data, binis mox vicibus gravissima animi incandescencia adeo turbatus, ut frigore & horrore extremas partes tentarentur; immani mox corripiebatur circa praecordia anxio dolore cum ardore & morfu in scrobiculo cordis, nausea & vomendi cupiditate juncto, totamque noctem transigebat insomnem. Hisce symptomatibus intra viginti quatuor horas maceratus, flagitabat à medico vomitorium & quidem instantissime. Iste pulverem, qui tria grana tartari emetici continebat, porrexit. Inde paucam quidem & mucosam viridescens coloris materiam, sed summo labore & anxietate evomuit. Poscebat aliam dosin, quae ipsi etiam concessa, sed protinus omnia in deterius conversa. Associabantur continui ructus convulsionis quippiam prae se ferentes, sed nihil amplius rejecit. Praebui vocatus liquorem anodynum mineralem, & videbatur symptomatum atrociam mitigare & remittere per noctem. Sed ipse patiens impatientissimus, altero mane, ob alvum firmiter clausam, à flatibus hanc tragoediam fuisse ortam reputans, petiit à medico priori salis Epsomienensis unciam, quo ad alvum aperiendam alias frequentius fuerat usus; dedit, sed protinus priora symptomata multo atrociora revertentur, & viribus omnibus collapsis intra tertium ab emetico diem è vita discessit.

Epicrisis.

Affectus irae si vehementior fuerit, quam infestus sit universo generi nervoso maximeque stomacho, eum non modo spastica strictura dum afficit, sed & bilem in duodenum magna in copia effundit, gravissima atque haud infrequenter funesta, praesertim si non ocyus appropriata medicina malorum fomes praescindatur, quae inde sequuntur pathemata satis abundeque testantur. Et sicut tali in casu, lenissimo emetico, quod ex uncis duabus vel tribus olei amygdalarum dulcium, mellis uncia dimidia, & libra aquae tepidae paratur, ad spasmodum relaxandum & vitiosam bilem vomitu exturbandum, remedium vix datur praesentius: ita vitae nihil insensius nec perniciosius, praeter emeticum vehemens è minerali regno petatum excogitari potest, praecipue, si primo statim post iram tempore porri-

gatur. Plures novi hac ratione mortuos, non aliter ac si verum venenum arsenicale assumsissent. Hac de re etiam peculiarem dissertationem: *de emetico post iram veneno*, ad praecavendam gravissima hinc inde illata damna, conscribere permotus fui. Lethalis enim & cum convulsionibus juncta ventriculi inflammatio, nisi inter initia statim congruis remediis occurratur, insequi consuevit. Postremo ex hac morbi & mortis historia hoc eliciendum duxi, quod, ubi ventriculus spastice afficitur, medicamina salina majori dosi & sine sufficiente diluentium quantitate data, ad augendum potius quam minuum dolorem & spasmodum, stimulo nerveas fibras, sint apta atque disposita. Hinc in omni cardialgicarum affectionum specie, salini generis medicamenta semper dissuadere solitus sum.

OBSERVATIO X.

Illustrissimus vir tenerioris & paulo sensibilibioris naturae, quinquagesimum aetatis agens annum, à longo inde tempore, cardialgica & febre quotidiana, tempore praesertim autumnali & hiemali, ex stomachi inflatione, corripiebatur passione, quae inde suam trahebat originem: Ipse ob exsuperans prima in regione acidum, avidissime cibos justo majori quantitate in prandio praecipue cepit. Sed alvus semper pigra existens, nunquam recte respondit ingestis. Praeter haec, aestivo tempore fructibus horaeis, fragis, cerasis, malis Persicis, praeter omnem modum, autumnus vero uvis, & hieme dulcibus se replevit, corpusque tegumentis idoneis minori diligentia à frigore defendit: omni posthabita dietae ratione, & ex toto dictis medicorum speretis atque contentis. Post sumtum cibum ad dextrum scrobiculi cordis latus tumor gallinaceum ovum aequans se prodidit: mox sequebatur spirandi angustia cum facie rubicunda & anxii stomachi compressionibus, nec non extremorum frigore, ut in lectum concedere teneretur. Admotis ventriculo & extremis partibus fomentis praecalidis, ructibus praecedentibus vomitu rejecit mucidam tantummodo materiam: post aliquot horas, reverso calore madido in superficiem corporis, à doloribus fuit liberatus. Ceterum Illustrissimus hic Vir interdum autumnus catarrhosis defluxionibus cum gravi tussi & inquiete afficiebatur. Medici tum ad praestandum lenimen, dosin pilularum de styrace cum refracta aloëphanginarum dosi, repetitis vicibus porrigebant. Hinc mitiora quidem reddita symptomata; sed postea morbus praecordialis cum inflatione cardialgica, longe majora summis incrementa, adeo, ut quandoque per integram septimanam graviter in lecto decumbere cogeretur. Opem vero tunc temporis atque levamen saepius insigne fuit expertus à leni emetico, dum ab uno tantum tartari emetici grano soluto & cum potu diluente sumto, magna saburræ & materiae pituitosae copia vomitu fuit rejecta: quae obscuri bruni coloris cum esset, metum & suspicionem incussit sanguinis corrupti; cui etiam sententiae medici ordinarii suffragabantur. Sed ego postea accersitus cum rem penitus inquirerem, Illustrissimum Virum saepius usum fuisse potu succolade reperi. Judicavi inde hunc insolitum colorem accersendum: & obfirmavit me experimentum à me factum, ubi materia incocta & carbonibus injecta, nullum foetidum odorem diffundebat.

*Cardialgia
b atonia
& infla-
tione ven-
triculi, usū
pilularum
de styrace
chronica
facta.*

Epicrisis.

Ex præfata morbi historia id saltim in usum suum medicæ artis tirones depromere possunt, quod in tali cardialgiæ, quæ ab atonia & inflatione oritur specie, doloris levandi causa, minime quæ opium ingrediuntur, ut sunt pilulæ de styrace, in usum ducenda, præsertim quando causam morbi vitiosæ & copiosæ ex prava digestionem provenientes cruditates subministrant. Nam utut hæc ipsa cum aliis corrigentibus permixta, in morbis ubi spasmodorum atrocitas urget circumspicte data, locum invenire possint; tamen ubi robur ipsius ventriculi & primarum viarum deficit, & cruditarum ingens est proventus, nunquam, nisi augere velimus mala, præbenda sunt. Ejusmodi potius in casibus, quæ leniter provocant vomitus, educendo saburram vitiosorum humorum, utilitatem afferunt desideratissimam; quibus denique tonica & temperate balsamica interne & externe substitui possunt. Ceterum illustrissimus vir omnia remedium genera aspernabatur, præter lapides cancerorum quibus cum aqua fontana quotidie fere vesperi utebatur, nec non aquam analepticam spirituofam ex corticibus citri, aurantium, pomorum chinæ, cum vino Hispanico destillatam & julepo rosarum dulcificatam, quam non nunquam assumebat.

Plura qui de hac adfectione desiderat exempla, adeat *Consult. Medic. Sect. I. cas. VII. IX. X.*

CAPUT III.

De doloribus & spasmodis præcordiorum à calculo felleo ortis, & de ejus generatione.

THESES PATHOLOGICÆ.

§. I.

Calculi fellei sæviter satis affligunt.

SÆvissimæ quidem sunt passionēs, eæque dolorificæ, quæ universum nervosarum partium systema vel maxime impetentes, totam motuum vitalium œconomiam pervertendo, à calculis in viis & canalibus urinariis suscitantur: sed non minoris sævitæ, nec minoris periculi sunt illæ affectiones, quæ à calculosis concretis intra canales biliosos contentis proficiunt. Uti vero interdum ægre admodum in ductibus qui consistunt urinariis calculi, ita longe difficiliore ratione biliosi dignoscuntur & dijudicantur, adeo, ut demum post sectionem atrocium variorum symptomatum, quibus per longum tempus afflicti fuerunt ægri, incognitæ causæ in sensus incurrant. Hinc quum frequentius, quam medici communiter existimant, graves, pertinaces & vix explicabiles ab ejusmodi calculis foveantur dolores & spasmi, qui præsertim præcordia infestant; è re utique fore duximus, hanc in praxi medica utilissimam materiam speciali capite includere.

§. II.

In homine crebrius reperitur.

Primo annotare licet, quod in nullo animalium genere crebrius ac in humano corpore folliculus felleus calculis refertus observetur, & quod hi ipsi ratione figuræ, coloris, magnitudi-

nis, consistentiæ, numeri mirifice inter se differant. Vix enim ulla in rerum natura reperitur figura, vix ullus color, qui non in calculis cystidis felleæ conspiciatur. Alii ovalem & rotundam, alii exacte cubicam, quidam triangularem, sexangularem, octoædram, pyramidalem etiam recipiunt figuram: sunt, qui fabas, phaseolos, lentes, pisas, castaneas, tribulos aquaticos, nucem moschatam referunt. Mirum etiam in modum ratione coloris variare solent; sunt, qui cretacei, gypsei, ex albo-cinerei, plumbei coloris observantur; frequentius flavescentes vel ex flavo rubicundi, bruno-nigricantes, nigri, viridescentes etiam interspersis maculisprehenduntur; alii pluribus coloribus variegati; quidam exterius crusta cretacea & gypsea obducti, interius nucleum habent ex bruno-rubicundum.

Figura color variant.

§. III.

Ingens etiam est differentia biliosorum calculorum ratione consistentiæ. Quidam sunt friabiliores & molliores & tales sunt plerumque albi, cineritii & flavescentes valdeque leves; alii sunt magis compacti, solidi & graviores, & tales sunt quam maxime qui saturatiorem colorem habent ex flavo-rubicundum nigricantem, & hi sæpe lævigati & politi observantur. Licet vero ordinario plurimi lapides cystici aquæ injecti supernatent, tamen solidiores & compactiores, quales sunt maxime lævigati & obscurioris coloris, submergi & fundum petere non semel observavimus. Deinde etiam sæpius vidimus, eos, qui leviores aquæ supernatant, si paulo diutius in ea detinentur, descendisse, forsitan quod in ipsis poris successive particulæ aqueæ sese insinuaverint. Neque hoc prætermittendum esse ducimus, quod lapidum, qui supernatant, fragmenta & minores portiones in fundum secedant, non secus ac in pumice, qui grandioris molis supernatat, in pulverem vero redactus descendit.

item consistentia.

§. IV.

Mirum etiam variat cysticorum calculorum magnitudo & numerus. Nam certa auctorum probatissimorum fide & observatione constat, totam vesiculam à calculo ingentis magnitudinis, qui aliquot uncias pendebat, valde fuisse expansam & totam ejus cavitatem impleram: quin interdum in defunctis numero triginta, quinquaginta, octoginta, imo trecentos, quorum alii sunt majoris, alii minoris, alii mediæ magnitudinis, inveniri experientia docet.

Magnitudo & numerus.

§. V.

In ductibus biliosis, qui immediate ex hepate vel intra vel extra ejus parenchyma proveniunt, concrementa etiam solida ex bile producta, in animalibus præsertim bovini generis frequentius, in humano vero corpore paullo rarius offendi, ipsa loquitur experientia. Dubio procul ob eam rationem, quia bilis hepatica longe liquidior, dilutior quoque est ac cystica, quæ crassioris consistentiæ & saturatiore etiam coloris, nec non amaricantis saporis observatur: deinde, quia in ductibus hepaticis, ex quibus continuo in satis notabili quantitate ad duodenum biliosus fertur humor, non tam diuturnam, quæ requiritur ad fluidi dissipationem & solidescens materiæ concretionem, necesse potest moram. Si tamen, ut auctores testes sunt, ibi offendantur, longe friabilioris & mol-

In ductibus biliosis humanis rarius offenduntur.

lioris

lioris sunt consistentiæ, asperiores quoque, tubulosi ac flavescentes.

§. VI.

Recensentur experientia cum calculis felleis humanis facta.

Experimenta, quæ cum calculis felleis ad eorum elementa & ingredientia paullo curatius pervestiganda & discernenda, instituimus, hoc loco recensere operæ pretium videtur. Primo observavimus, quod omnes illi, qui saturioris & obscurioris coloris pauloque solidioris texturæ, sufficienter exsiccati, vel in massa, vel in pulvere, candelæ ardenti admoti mox instar resinæ lucidissimam concipiant flammam, & toti, exigua saltem relicta materia nigra & cineritia fere insipida, comburantur: illos vero, qui albi & cineritii coloris, gypseæ & cretaceæ materiæ erant, flammam respuere, vel leviter saltem eam suscipere & instar ceræ in lamina ferrea ignita fluere vidimus. Deinceps annotavimus, eos lapides cysticos, qui solidioris fuerunt texturæ & saturioris coloris, nec à spiritu vini rectificatissimo, nec ab aqua, accedente etiam leni coctione, dissolvi potuisse. Alio vero tempore à nobis animadvertum est, lapides cysticos, qui ingentis fuere magnitudinis & mollioris substantiæ, totam fere cystidis implentes cavitatem, ultra dimidium in aqua calida fuisse solutos.

§. VII.

cum calculis bovinis.

Non indignum porro observatione est, quod qui in hepate ejusque ductibus in bove reperiuntur & eximuntur calculi saturate flavescentes & friabiles, difficulter admodum, vel exiguam saltem concipiant flammam, in nigrum vero cum fumo, qui crinium instar combustorum refert odorem, redigantur carbonem. Spiritus vini hifce affusus & leniori calore digestus, brevi tempore flavo colore tingitur & saporem valde amaricantem exhibet. In aquam calidam horum calculorum fragmenta injecta parumper dissolvuntur, sed saltem levis, flava cum amaricante sapore extrahitur tinctura.

§. VIII.

cum bile bovina.

Recens bilis ex vesicula bovis desumpta tribus uncias æquans, tam amaricante prædita est sapore, ut una guttula unciam aquæ amarore imbue-re possit. Hujus uncia in vase stanneo leni evaporatione in extractum resiniforme redacta, drachmam vix unam largitur, cujus portio flammæ admota lucidissime ardet, dimidio præterpropter in cineres abeunte. In spiritu vini rectificatissimo ægre solvitur, optime vero in aqua atque etiam spiritu vini aquoso: color est flavus & sapor valde amaricans. Quod si inspissatæ bili bovinae liquidiori tenuissima argillacea & gypseæ materia intime permiscetur, per exsiccationem exhibet massam paulo durior, quæ flammæ admota æque ac calculus cysticus ardet.

§. IX.

Salia non faciunt ad generationem calculi.

His ita constitutis & accurate perpensis plane apparet, salia nec alcalia, nec acida, neque neutra vel tartarea, ut communis fert opinio, ad generationem & concretionem biliosorum calculorum concurrere; sed eos ex sulphurea paulo mucidiori bilis portione, intermixta plus minus teneriori glutinosa vel tophacea materia calore successive inspissata in durum quoddam concrecere mixtum, & variam figuram, variumque, pro differenti partium mixtum constituentium positu & situ, recipere colorem. Nam salia-

bus tantummodo haud proprium esse sub variis coalescere & concrecere formis & figuris, id inter alia varii & elegantissime sæpius figurati lapides ex sola aqua calcarea in cryptis & specubus subterraneis, ut sunt Baumanniana, Scharzfeldiana, guttatim stillante producti, luculenter demonstrant.

§. X.

Genuinam autem tam diversæ configurationis & coloris in progignendis calculis cysticis rationem ac modum expedite concipere atque invenire, non tam explicatu promptum est ac facile, sed tamen possibile videtur. Equidem, si consideramus longe crassiores & saturiores quin etiam amaricantiores esse, quæ in cystide detinetur, bilem, ac eam, quæ immediate ex ductibus hepaticis ad duodeni cavum deferitur, utpote quæ longe tenuior, liquidior minusque amaricans est: sique simul attendimus bilem, ex qua in ejus folliculo efformantur calculi, ex hepate etiam per minimos ductus, qui recte cystico-hepatici nominantur & in tunicam cellulosam cystidis finiuntur, in ejus cavitate identidem liquidam & dilutam fieri; non aliam possumus durioris consistentiæ reperire causam, quam quod in homine ob situm vesiculæ felleæ erectum biliosus humor non continuo flumine promanet, sed tum demum prorumpat, quando à ventriculo cibis referto ipsa premitur: hinc fit ut vacuo sub longiori inappetentia ventriculo diutius ibi moram necere & stagnare debeat, atque interea liquidior ejus pars tum per ipsos etiam poros ejus tunicarum, quæ microscopio inspectæ oculis non aliter se obijciunt ac pannus Indicus vulgo *Nessel-Tuch*, foras propellatur, crassiori quæ facile in coagulum abire potest, remanente parte.

§. XI.

Prout vero bilis pro diversa indole & constitutione feri excrementitii, quod materiam præbet, in tanta varietate corporum infirmorum, non unius ejusdemque est mixtionis ac crasseos, sed plus minus partibus terrestribus, tophaceis & in coagulum abeuntibus, item sulphureis magis vel minus exaltatis, referta, hinc variæ inde resultant figuræ & colores. In cachecticis enim sæpius calculi gypsei albicantes inventi sunt, quin immo in ipsis ictero chronico laborantibus, copiosa cretacea & gypseæ, quæ dubio procul ductibus hepaticis insedit, per alvum dejecta materia, morbum sublatum fuisse binis observavimus exemplis. Ita etiam commemorant *M. N. C. Decur. II. anno VII. obs. 145.* materiam tophaceam in puero atrophia laborante cum alvi dejectione copiose fuisseeductam, quæ instar lateris modo rufo, modo fusco, modo atro prædita fuit colore.

§. XII.

Ad generationem calculorum biliosorum complures utique causas concurrere certissimum est. Has inter præcipuæ sunt ætas inclinans: rarius enim in hominibus ætatis florentis, frequentius vero in senibus decrepitis sexaginta, septuaginta, octoginta annorum cystidem pluribus & durioribus etiam calculis refertam fuisse, per multis observationibus confirmamur. Qui desidentem agunt vitam & parum corpus exercent, præ iis qui mobile semper vitæ genus colunt, ad ejusmodi calculosas concreciones magis idoneos esse videmus. Sic quoque in foeminis crebrius

Genesios ratio.

Figura & coloris.

Causæ pro catartica

ætas

vita otiosa

crebrior

*circulatio
sanguinis.*

brius quam in viris reperiuntur. Quarum rerum hæ in promptu sunt causæ. Progressus sanguinis per venas meseraicas, per portæ venam & hepar, uti secundum naturam & consuetudinem semper paulo tardior & difficilior est quam in aliis visceribus: ita in iis, qui vitam colunt sedentariam, cujus generis præcipue sunt ætate confecti & sequior sexus, longe segnior & difficilior redditur; unde ob impeditiorem sanguinis per hepar progressum fit, ut partes aqueæ & fluidæ in vasa secedant lymphatica, remanente & sanguinis & biliosi humoris, qui ex eo separatur, crassiori substantia.

§. XIII.

spirituosa.

Porro ad horum calculorum frequentio-rem proventum immoderatum spiritus vini item cerevisiæ crassioris usum plurimum conferre, non modo auctoritate & fide Cl. SYLVII constat, qui *prax. med. libr. I. p. 302.* testatur, se ex hujus aliorumque potuum generosiorum abusu aliquoties icterum & huic succedentem ascitem ut plurimum lethalem observasse, hepate scirrhuso multisque calculis & tophis obsessio subinde reperto; sed & ipsa sana ratio id evincit: nam spirituosa inque primis spiritus vini, & chylum & lympham & sanguinem ad coagulum quam facile disponunt. In laboribus enim chymicis ad crystallisationis negotium promovendum spiritum vini mixturæ affusum magnam vim habere, compertissimum est: præterea, potibus vinosis & spirituosius corpora nimis incalescunt, & dissipato liquido sanguinis & humorum increpatur massa.

§. XIV.

*In feminis
quinqua-
genariis
sanguis
spissus.*

Deinceps foeminas post quinquagesimum annum, cessante mensium fluxu, calculis non modo urinariis, sed & biliariis atque inde gravibus obortis symptomatibus tentari, identidem experientia docemur; cujus vix alia subest ratio, quam quod succrescente majori sanguinis in vasis copia, hic difficilior moveatur, & hinc inde subsistens secedentibus partibus tenerioribus spissior reddatur. Nec rarius vidimus, ejusmodi foeminas inexplicabilibus in epigastrica regione doloribus expositas fuisse, ita, ut morti vicinæ ob vehementes angustias & anxietates visæ fuerint, superveniente intenso subinde extremorum frigore, dictorumque symptomatum singulis diebus circa mediam noctem recursu, quibus accessit dolor in hypochondrio dextro ad totum abdomen interdum sese extendens, cum foedo ad flavum accedente, faciem totumque corpus deturpante colore; quæ tamen pathemata exclusis per alvum vel sua sponte vel artis beneficio excrementis argillaceis prorsus quieverunt.

§. XV.

*Narratio
pathema-
tum.*

Sunt vero varii & valde acerbi generis, quæ calculos ductibus biliariis inhærentes comitari & insequi solent pathemata, ut etiam collective sumta & considerata, eorum præsentiam arguant. Ordinaria fere sunt: non vagus, sed in una eademque sede, hypochondrio nempe dextro circa regionem hepatis defixus & constans, premeus, gravativus vel etiam acutus cum foedo plerumque faciei colore, interdum ad epigastricam regionem & cordis scrobiculum sese extendens dolor; cujus certis intervallis tanta fit exacerbatio, ut tormina ac cruciatus totam abdominis cavitatem occupent, juncta plerumque inappetentia, nausea, conatu ad vomendum, circa

præcordia anxietate, dolore cardialgico, animi defectione, alvo duriori & adstrictiori: quibus tandem dira & contumax optimis haud auscultans remediis accedit icteritia. Quidam afflictorum continuo ventris torminibus exagitantur & vitam per multos annos miserrime trahunt; plurima pars hydrope perit. In quibusdam gravativus, obtusus, profundus satisque contumax cum sensu ponderis dolor perferitur, idque plerumque fit, quando mollioribus & minoribus calculis folliculus felleus valde distenditur.

§. XVI.

Intensior vero & acutior si persistit & universum systema partium nervosarum in consensum trahendo vehementes spasticas stricturas, non modo circa partes vicinas, sed etiam remotas, brachii nempe & artuum distensiones, convulsiones epilepticas, neque minus cum pulsu duro & celeri febrem efficit; indicium est, calculum & mole & asperitate insignem firmiter ductibus biliariis inhærescere: ex quibus causis tandem fit, ut brevi mortem accersat.

§. XVII.

Inter hæc vero omnia, quæ jam monuimus, signa, nihil datur certius vehementes à calculo felleo prognatas dijudicandi passionibus, ac si ipsi cum excrementis per alvum secedunt; & tum non secus ac in calculis renalibus, quando hi ex ureteribus in vesicam fuerunt delati, omnes simul & semel dolores cum reliquis gravibus afflictionibus cessant atque expirant, ictero saltem excepto qui non simul, sed sensim tandem evanescit, eo, quod bilis sanguini & lymphæ intime immixta non tam facile & expedite rursus è totius corporis sphaera discuti possit. Calculi autem hi, qui per alvum deturbantur, non unius ejusdemque coloris, magnitudinis & numeri observantur, atque etiam pro differenti horum ratione, sedem quam occupare solent, subindicant: Nam si sunt molliores, dilutioris, vel etiam tophacei & gypsei coloris, è ductibus hepaticis, quibus inhæserunt profectos esse haud levi argumento est: si vero minores, si asperi, si duriores, angulares & coloris paulo saturatoris, folliculi fellei hospites fuisse & per angustum illum canallem cum acerbissimis symptomatibus iter suum confecisse, haud obscure colligitur.

§. XIX.

Ceterum testantur observationes cæque non raræ, post mortem vesiculam fellis multis lapidibus refertam inventam fuisse, ubi & corpus à foedo flavo colore immune & ab aliis etiam gravibus passionibus liberum extitit. Cujus rei causam sine ulla dubitatione inde derivamus, quod calculi tam illi qui vesiculam felleam, quam etiam qui renum substantiam obsident, si quiete jacent, nullas valde sensibiles procreant molestias atque incommoda: quodcumque vero ita vel ratione sedis vel ratione molis & figuræ sunt comparati, ut nervosas exquisitæ sensationis membranas vel ductus violenter lancinent aut distendant, protinus tota œconomia actionum vitalium & animalium in universo corpore perturbatur. Idque non tantum fit, quando calculi per ductum cysticum ad cholodochum iter suum conficiunt, sed & quando ipsa vesicula fellea, quæ membranis nerveis sensibilibus ob dextri intercostalis nervi interspersas ramificationes, gaudet, à nimium aucto bilis coagulo vehementer & supra modum disten-

Dolor acutus quid indicet.

Calculi per alvum secessus.

*Nullo sepe symptoma-
te stipantur.*

ejus ratio.

distenditur, tunc non secus ac in vesica urinaria, si ingentis molis quandoque ad sex vel octo uncias accedens, quale exemplum nuper habuimus, ibi hospitatur calculus, symptomatum acerborum caterva corpus obruitur. Legimus enim apud auctores spectatæ fidei, felleam vesicam tam grandem à copioso intus hærente solida materia fuisse deprehensam, ut naturalem magnitudinem vel triplum superaverit.

§. XX.

Dolores ex calculo felleo periodici.

Dantur etiam dolores & spasmi cum consuetis symptomatibus juncti ex calculis felleis oborti, certis periodis invadentes & repetentes. Ita notabilis est casus, quem B. PETERMANNUS in differt. *de scrutinio icteri ex calculo vesiculæ felleæ* recenset, ubi quidam ictero annuatim periodico cum doloribus afflictus est, qui vero post evacuationem lapilli baccae lauri similis cessavit: altero anno cum idem morbus rursus invaderet, exhibitis convenientibus remediis rejecti sunt per alvum plus quam sexaginta calculi flavescens, quorum alii rotundi & lævi, alii angulosi & asperi, alii molliores, alii duriores fuere, magnitudine partim phaseolos & pisa, partim quoque lentes referentes.

METHODUS MEDENDI GENERALIS CUM CAUTELIS.

§. I.

Perspectis sic omnibus & singulis, quæ ad historiam hujus affectus, tum quoad causas & prognosin, tum quoad eum dignoscendum faciunt, pertinentibus circumstantiis; sequitur nunc, ut etiam solliciti simus de accommodatis ad eum tollendum vel mitigandum saltim, vel ad eorum generationem præcavendam præsidii. Quemadmodum verò duplex semper morbis medendi via est; altera quæ in paroxysmo, altera quæ extra eum locum invenit, dum in illo medici consilium magis ad symptomatum, spasmorum & dolorum ingravescentium mitigationem & allevamentum: extra paroxysmum vero ad removendas causas directum esse debet; ita etiam hanc in præsentis affectu locum obtinere existimamus.

§. II.

Spasmus sedandus anodynus & demulcentibus.

Nihil itaque antiquius esse debet medico, ac ut sæva illa, quæ à spasticis nervosarum partium stricturis circa præcordia & etiam partes vicinas excitantur, quodammodo leniantur symptomata; cui scopo obtinendo, quæ anodyna, demulcente & fibras nimis strictas relaxante virtute gaudent, egregie serviunt. Hujus generis sunt ex pinguibus interne sumendis oleum amygdalarum tam dulcium, quam amararum, recens sperma ceti: externe vero pinguedo cati sylvestris, castorei &c. Ex demulcentibus lac, ferum lactis dulce, emulsiones ex seminibus IV. frigidis, infusa vel decocta ex radice altheæ, herba parietariæ, floribus malvæ, papaveris rhœados, sambuci, quibus addi potest syrupus de althea Fernelii. Ex anodynis spiritus nitri dulcis rite præparatus, liquor anodynus mineralis, extractum croci, papaveris rhœados. Ex antispasmodicis pulvis ex lapidibus cancrorum, cinnabari & nitro paratus, cui tantillum extracti croci adjici potest, pulvis antepilepticus Marchionis, pulvis lumbricorum terrestrium, pulvis antepi-

lepticus niger & qui ex rasura ungulæ alcis, crani humani, nec non lepore ex utero secto & exsiccato parari solet, præsertim quando ex iis cum aquis florum blanda anodyna virtute gaudentibus concinnantur mixturæ.

§. III.

Externe epithemata & sacculi ex emollientibus & carminativis speciebus parati, vel etiam vesicæ decoctis florum emollientium & paregoricorum repletæ partibusque affectis applicatæ, plane singulare dolorum & spasmorum lenimen afferre solent. Expediit quoque ad dolores sopiendos clysmata ex lenientibus parata ano crebrius infundere, nec non alvum per blandum laxans, quale est, quod ex manna, rhabbaro, agarico recenter trochiscato, cremore tartari & id genus aliis confici solet, leniter ducere.

§. IV.

Extra paroxysmum vero quiescentibus spasmis & doloribus ad causam mali funditus evellendam, ad obturatos meatus felleos aperiendos & ad calculos, si ipsis firmiter inhærescunt, quantum fieri potest, extra corpus propellendos utique alia medendi via est ineunda. Ea enim, quæ strenua sua virtute jam dictos effectus præstant, in usum vocanda, cujus generis sunt infusa & decocta ex aperientibus, resolventibus, discutientibus & excretionem promoventibus, vel ex aqua sola vel vino permixta parata v. g. radice rub. tinctor. graminis, asparagi, petroselinis, pimpinellæ, aristolochiæ, curcumæ, cichorei, glycyrrhizæ; additis postea rhabbaro, trochiscis de agarico, tartaro tartarizato, terra foliata tartari vel sale polychresto & syrupo de althea Fernelii. Quæ decocta, si convenienti dosi & longo satis tempore in usum ducuntur, in hisce affectibus debellandis magna vi gaudere, experientia & multis observationibus evicti sumus. Clariss. SYLVIUS in *prax. med. Lib. I. Cap. XLV.* & ex eo Celeberrimi nominis Itali medici LANCI-SIUS, item BIANCHI inter medicamenta calculos biliosos specifica quadam vi dissolventia, decoctum radices graminis, graminisque succum mirifice laudant atque commendant; hac potissimum ducti ratione, quod boves & oves mense Maii, quo gramine viridi vescuntur, sensim ab omni crusta lapidosa liberentur, quæ tempore hyemali, ubi feno nutriuntur, in eorum folliculo fellis concrecere suevit.

Externæ.

Extra paroxysmum causa morbi evellenda.

aperientibus

decocto radicis graminis.

§. V.

Præter hæc radix pareiræ bravæ haud ita diu ex Brasilia in Europam translata ad drachmas duas in libra una aquæ leniter decocta, potum admodum salutarem in omni calculo etiam in asthma humido præbet, si tertia ejus pars tribus singulis horis cum pauxillo sacchari tepide bibitur: hac enim ratione icterum felleum cum torminibus & ingenti dolore stipatum intra viginti quatuor horas discussum in *l'Acad. Royale des Sciences Anno MDCCX. p. 76.* legimus.

Radix pareiræ bravæ.

§. VI.

Nonnulli etiam millepedes vivos vino infundendos & siccatos in pulverem terunt & hos ipsos cum salibus neutris, ut sunt terra foliata tartari, sal polychrestum, tartarus vitriolatus & tartarizatus, solutio oculorum cancri, parca & refracta dosi ad obstructos hepatis neatus expediendos & ab omni biliosa amurca liberandos maximi

Pulvere millepedum.

Cura Avicennæ.

maximi faciunt. AVICENNÆ vero cura, uti in ictero chronico, à veteribus medicis magni semper habita est, ita etiam eam in iis, quæ in meatuum biliariorum obstructione & bilis ad concoctionem ciborum necessarii præpedito affluxu, consistunt vitiis, locum habere posse haud dubitandum est. Vetustissimus vero hic auctor lumbricos ficcatos cum vino albo & saccharo ad saporis gratiam sumptos plurimum laudat, vel etiam horum pulverem cum syrupo de byzantiis in pilularem redigit formam & crebrius vesperi propinat, postridie superbibendo serum caprillum, ex lacte à capris, herbis prius aperientibus, fœniculo, apio, petroselino, rusco, lupulo, eupatorio, asparago, nutritis desumto, relicta ejus caseosa substantia paratum. Ceterum externis quoque leniendis gravioribus symptomatibus occurrere è re erit. Faciunt huc plurimum epithemata hypochondrio dextro applicata, quæ ex floribus chamomillæ vulgaris & Romanæ, herba scordii, absinthii & cardui-benedicti, aqua florum sambuci & vino rubro præparantur, si frequentius de die renovata admoveantur.

§. VII.

Ultima spes in aquis medicatis.

Hæc vero omnia quando inaniter & incassum longo tempore usurpata fuerunt, ultimo tandem spes est sanitatem recuperandi in aquis medicatis naturalibus tam thermalibus, quam etiam sic dictis acidulis; inter quas celebrioris famæ & effectus sunt thermæ Carolinæ, Aquisgranenses, acidulæ Egranæ, Pyramontanæ, quibus certe magna & efficax virtus inest rebelles chronicas, quæ ab obturatis & crasso humore fæctis visceribus, præsertim hepate, proveniunt, persanandi passiones, si corpore prius probe præparato, soluta nempe plethora, vel cacochymia attemperata, debito regimine tum interne tum externe adhibentur.

CURA PRÆSERVATORIA.

Præservatio libero sanguinis circulo per viscera obvietur.

Cum in superioribus dilucide satis ostensum sit, quam gravia & sæpius funesta calculi fellei, præsertim si exitum per angustos & valde sensiles canales nerveos moliuntur, excitent symptomata; circumspecti nunc erit medici, ut, ubi in corpore ad eos progignendos dispositionem invenerit, id omnibus modis impediatur. Quod nostra quidem sententia vix rectius & meliori successu fieri poterit, ac si diligenter ad progressum & cursum sanguinis per mesenterium, per viscera abdominis inprimisque per hepar attendat, an liber ille ac integer, an vero difficilis & præpeditus sit; quandoquidem ex hoc, tanquam ex fonte sicut plurimi hepatis morbi, ita etiam calculosæ concretiones in hoc viscere proveniunt. Nam quo spissior est sanguis & serum multis glutinosis partibus refertum, eo bilis ad coagulationem magis prompta atque proclivis est: & quia graves illæ chronicæ passiones, cachexia, hydrops, icterus, asthma hydropicum ex retardato sanguinis per hepatis viscus progressu identidem nascuntur, non mirum est, in corporibus, quæ ejusmodi morbis defunguntur, passim id testantibus observationibus, concreta calculosa in folliculo felleo vel etiam ductibus biliariis inventa fuisse.

Quæ huc faciant.

Quicumque itaque ex medicis hos morbos prudenter avertere vult, is ejusmodi remedia præscribere & in usum ducere debet, quæ in genere morbis, qui ex vitio hepatis nascuntur præcavendis dicata sunt, cujusmodi sunt fontes medi-

cati & minerales, item potus diluentes, ut serum lactis cum convenienti regimine, sufficienti motu & exercitatione corporis usurpati, nec non medicamenta, quæ tenaces viscidos humores dissolvunt, & acidum, quod fere omnis coagulationis principium est, destruant, uti sunt decocta ex radicibus quinque aperientibus, præsertim si cum sale polychresto, terra foliata tartari, nitro acuuntur, item elixir temperatum viscerale cum æquali parte essentiae rhabarbari saturatæ permixtum, cujus frequentem usum in ejusmodi morbis hepatis præcavendis non modo tutissimum, sed & efficacissimum semper deprehendimus. Præterea tempestive instituta sanguinis missio, potus sufficiens, temperatus & modicus victus, parior cerevisiæ crassæ, vini, spiritus vini ac calidorum medicamentorum purgantiumque usus, sicuti nunquam non à molestis & chronicis passionibus, ita etiam à præfatis hepatis morbis corpus egregie vindicant.

ENARRATIONES MORBORUM.

OBSERVATIO I.

Vir generosus sexagesimum & sextum jam supergressus annum, sanguine & succis plenus, lautæ & vinosæ diætæ assuetus, jam fere per decem annos dolores modo ex calculo, modo podagricos est expertus. Ante aliquot annos immanes dolores accesserunt circa vesicæ regionem cum ingenti gravitatis ibi sensu, qui suscepto corporis motu augebatur. Aderat simul titillatio circa pubem & perineum, & veluti stillicidium sequebatur urinæ, ut vix potuerit inhiberi: stimulus quoque ad alvum deponendam persentiebatur, atque urina prodibat alba, turbida, cui sedimentum mucosum inerat; interea dolores nephritici & podagrici quiescebant. Æger immensis fractus doloribus & viribus sensim privatus ac emaciatus tandem supremum diem obiit. Dissecto post mortem corpore, lapis in vesica VIII. uncias pendens inveniebatur, & pelvis renis sinistri, lapidem firmæ instar marmoris consistentiæ drachmas VI. pondere habentem involvit; in cystide vero fellis plus quam LXX. minoris vel majoris magnitudinis calculi deprehendebantur, quorum nonnulli tam pulchre lavigati, politi, variegatique erant coloris, ut jaspidium instar annulis aureis à curiosis includerentur.

Calculi fellei in pelvis renis experti.

Epicrisis.

Retulerunt mihi de hujus ægri statu, quod averfatione quadam naturali nunquam venæ sectionis remedium passus neque etiam inclinante ætate, sanguinis excretionem natura molita fuerit, quam tamen in juventute per nares frequentius fuit expertus. Relatum quoque accepi, quod pater ejus podagricis & nephriticis doloribus sæpius fuerit tentatus. Quibus circumstantiis probe animadversis, haud sine ratione colligi poterit, nimiam sanguinis & succorum exsuperantiam, in corpore, per nativitatem hæreditario quasi jure imbecillitatem ad calculum trahente, præsertim sub quieto reddito vitæ genere & intemperantiori vini usu, adeo numerosæ calculorum concretioni, non modo qui in vesica & renibus, sed & fellea cystide delituerant, primam originem & causam subministrasse. Sententia in hac ego confirmor exemplo celeberrimi nominis Archiatri, qui cum per totum vitæ cursum abstineret ab omni sanguinis missione, per

per plures annos calculosa nephritide laboravit, cui tandem accessit icteritia; ad quam tollendam dum præscriberentur mixturæ vi aperiente & laxante pollentes, septem per anum calculos exclusit. Ex quibus demum id in usum præservatorium ad dictos morbos avertendos colligere licet, quod venæ sectio in statu plethorico neglecta, ad procreandos dictos aditum patefacere possit morbos, tempestive autem admissa, corpus ab iis vindicari queat. Discere etiam id ex commemorata morbi historia licet, plures in fellea cystide calculos sine incommodo & dolore consistere posse, modo non affectent exitum per angustos canales, quorum nimia & violenta distensio tot gravissimorum & pene lethalium symptomatum vera & genuina causa unice evadere potest.

OBSERVATIO II.

Calculi fel-
lei in hy-
dropico &
icterico,
vomitu re-
jecti.

Primarius hujus urbis civis, sexagesimum jam quintum agens annum, ictero & tumore hydropico laborabat. His plura remedium genera frustra opponebantur. Tandem medicus hujus loci infusum corticis medii sambuci ex vino, paulo largiori porrexit dosi: inde factum, ut à medicamento & vomitiones & alvi dejectiones strenue concitarentur, & quod valde erat notabile, per ipsum vomitum successive numero viginti lapides ex flavo viridis coloris, diversæ magnitudinis, valde latæ superficiei, figuræ tam quinquangularis quam angulosæ, drachinam vel unam & dimidiam ponderantes, quorum ego adhuc aliquot in rarithecio meo recondo, rejeçti fuerunt; idque sine præcedentibus lateris dextri torminibus. Cessavit inde quidem icterus, sed remansit tumor hydropicus, qui etiam augmentum sumens, laborantem è vita sustulit.

Epicrisis.

Id maxime præfatio in casu memorabile atque consideratione dignum videtur, quod sine atroci dolore præcedente, ex tam angusto nerveo canali, qualis est cysticus, tot numero lapides tam insignis magnitudinis & figuræ potuerint propelli. Ego itaque in hanc deveni meditationem vel potius conjecturam, quod in ipsius duodeni flexura ejusmodi lapides à bile crassiori & terrestriori successive concreescere & progigni potuerint. Nam quod in ipsis intestinis, præsertim ubi in flexuram abeunt, variæ formæ & magnitudinis calculi ex præterlabentibus humoribus apponi & compingi possint, id non pauca à fide dignis auctoribus memorata exempla testatum faciunt. Neque prætereunda hanc in rem est animadversio dignissima observatio, quam Cel. LUC. SCHROECKIUS. M. N. C. Dec. I. ann. IX. inseruit, ita se habens: *mulier annorum septuaginta quinque de ventris torminibus, flatibus, ac aliis pathematibus hypochondriacis sæpius conquerens, respiratione subinde, ad suffocationis motum subsequentibus animi deliquiis sup-pressa, ita ut de vita ejus actum esse adstantes judicarent, subito in colo obtusos persentiebat dolores, sensim adeo incrementos, ac intestinum rectum lancinantes, ut præ atrocitate doloris disrupturam anipertimesceret, donec tandem calculum valido conatu, divaricatis cruribus stando deponeret, ponderando unciam cum drachmis duabus, color erat castalinus eleganter lævigatus & potius ex cinereo flavescens variegatus, ex lamellis aliorum calculo-*
Frid. Hoffmanni Oper. Tom. II.

rum more sensim concrecentibus constans: interna substantia meros ostendebat circulos striis intersectos; indicio haud obscuro, eum feces intestinales esse induratas. Pertinet huic quoque similis observatio FERNELII quam lib. VI. c. IX. de partium morb. & symptom. prodidit, calculos in intestini coli, cœci valvulis fuisse repertos referens. In equis grandes lapides libram & ultra pondere æquantes, instar marmoris duos & politos, in flexuris intestini coli inferioris, Altenburgi & nuper in pago Herrn-Gosserstadi fuisse repertos & mihi monstratos testari plena fide possum. Ceterum de calculis in intestinis progenitis SYLVATICUS Cent. III. Consultat. VII. it. ZACUT. LUSITANUS lib. III. prax. admirand. obs. 133. haud parum luculentum testimonium exhibent. Nihilo minus non plane etiam incredibile est, in ductibus biliariis hepatis minimos felleos calculos primum posse hæere, sensim à præterlabente bile augmentum capere, & successiva horum ductuum ingenti dilatatione facta ibi diutius subsistere, donec per valida medicamenta fortiolem systolen ductuum intendentia expurgentur: atque in hanc sententiam ob eam rationem deduci quispiam poterit, quod statim à rejectione lapidum per vomitum icteritia sublata fuerit.

OBSERVATIO III.

Ante aliquot lustra artifex ensifaber, per integrum ante obitum biennium de intolerabilibus & fixis moribus, doloribus, ardoribus circa præcordia in dextro hypochondrio, quasi ignitos in corpore aleret carbones, conquestus est, qui totum sæpe abdomen acerbissimis tormentis occupabant, cum foedo faciei colore, animique deliquio intercurrente. Post mortem ejus vesica biliaria tota erat calculis repleta: nam ultra sexaginta sex grana, partim pisa, partim globulos referentia, bilis coagulata & lapidescentis continebat. Circumjacentes vero partes, præsertim intestinum colon, nec non pars duodeni cum pyloro, item ventriculi fundus foedo flavo colore tinctæ conspiciebantur, earum tunica exteriori corrosa.

Intolerabiles dolores à calculis in cystide.

Epicrisis.

Sævi dolores & tormenta, quæ circa hepatis regionem in dextro hypochondrio fixam sedem habent, non tam à calculo quam potius ipsa bile, per poros, cum non liberum habeat exitum, transudante & partes circumjacentes arrodente oriuntur. Legi meretur de hac re STALPARTUS van der WIEL cent. I. observ. XLVII. qui in apertis infantum cadaveribus, ventris doloribus, nausea, vomitu, febre ac convulsionibus, nec non cardialgia correptorum ventriculum non intrinsecus, sed & extrinsecus bilis flavo colore infectum se reperiisse, fidem facit.

OBSERVATIO IV.

Aliquot abhinc annis requirebat à me consilium honesta foemina quadraginta & aliquot annorum, quæ à multo inde tempore pathematibus hystericeis cum suffocatione junctis erat obnoxia, quandoque etiam incidebat in icterum recidivantem, modo longiori modo breviori tempore perseverantem, sub lauto victu, otio quoque maximam vitæ partem transigebat: vacationes

Sævissimi dolores in hypochondrio dextro ab amara biliosa.

A a men-

menfium & hæmorrhoidum quibus fubjecta erat, parcius & non ftato tempore procedebant, corpusque ingravefcere fubito & ex improvifo cœpit. Intolerabilem in dextro latere & fub coftis fpuriis perfentiebat dolorem cum naufea, vomendi conatu, vehementi præcordiorum anxietate, fpirandique ad fuffocationem difficultate: circa fcrobiculum cordis perfiftebat dolor vehemens prefforius, qui etiam ad umbilicalem ufque fe extendebat regionem. Alvus erat obftructa, urina fuppreffa, pulfus cum æftu celer & noctu levi delirio corripiebatur, fummaque aderat corporis jaëtatio, inquietudo cum extremorum frigore: quæ cuncta, per biduum, mala & tormenta perfiftebant. Supposito clyftere fæces infar albi græci fecedebant. Datis pulveribus anodyno-antifpafmodicis & infuso florum chamomillæ vulgaris, potibus calidis oleo amygdalarum dulcium alteratis & fotu emolliente in vefica fuilla loco affecto appofito, remiffio fymptomatum fenfim fenfimque facta, fecelferunt fæces naturali colore tinctæ, & abdominis quoque dolorifica diftenfio atque inflatio, leni oborto sudore interjectis aliquot diebus fuit difcuffa. Sedato morbi impetu per vices potio, quæ conftabat ex rhabarbaro, radicibus quinqueaperientibus, radice curcumæ, fummitatibus centaurii minoris, agarico trochifcato, terra foliata tartari, femine fœniculi, tartaro tartarifato, & nitro purificato ex aqua fummitatum millefolii & vino propinata. Ita fenfim magna copia craffarum biliofarum fæcum fuit edueta, ægri optata virium cum tolerantia. Quæfitum à me fuit, quænam ad recidivam tam immanis dolorifici affectus præcavendam effent utilia remedia; & num inftante vere acidularum porus conveniens fit? In refponfo ego caufam atrocis hujus doloris & infequentium fymptomatum non quidem à lapide folido & compacto, fed amurca biliofa ductum cholodochum obturante, & bilis ad duodenum progreflum retardante reponendam effe judicavi, eam ob rationem, quia mihi fimiles in praxi cafus obtigerunt, ubi ipfis calculis per fedem rejectis mox omnia gravia conquieverunt fymptomata. Ego vero potum acidularum Egranarum, præfertim fi calidæ bibantur, fumme proficuum judicavi.

Epicrifis.

Male affectum in hac nobiliffima ægra iecur effe ibique fedem ponendam hujus fubitæ & dolorificæ affectionis, ex hifce caufis judicandum cenfui: quia non femel, fed aliquoties icterum perpeffa; dein quod fub paroxýfmo alvi fcybala rejecta fuerint: tum, quod fub otiofa vita & lautiori victu, præfertim ubi vacuationes per hæmorrhoides & menses non rite fuccedunt, quam facile obftructiones in hepatis vasis, quæ calculorum generationi velificantur, fieri poffint. Et utut non femper mitefcence malo calculi fub forma ejiciantur duri & folidi, fuffecerit tamen, quod materia biliofa tenax, ad concrefcendum valde apta, fimilem in obturandis ductibus effectum ac calculus verus, quando exitum per anguftos canales molitur, producere valet, quæ fi ad cavitatem inteftinorum delata cum reliqua vitioforum faburra rejiciatur, dolor conquiefcit. Quod vero hæc affectio morbofa comitem non habuerit icteritiam, inde deducendum puto, quod obftructio illius ductus non diu perfeveraverit. Tandem etiam & illud monendum exiftimo, quod calculi

fellei, fi minoris fuerint molis cum fæcibus infenfibiliter fæpius projiciantur.

OBSERVATIO V.

Aliquot ante annos, contumaci icteritia, Vir Ampliffimus annorum quinquaginta, tenerioris corporis & melancholici fic dicti temperamenti, laborabat. Dolor fixus erat circa jecoris regionem lancinatorius & prefforius. Quotiefcunque quippiam ore, five alimentum, five medicamentum affumebat, fumma circa præcordia infequente anxietate, vomitu mox omnia rejiciebat. Totum corpus flavo fædo colore tinctum confpiciebatur, fæcesque gryfei coloris prodibant. Ego in confilium accitus, tum ad fedandum dolorem & fpafmum, tum ad roborandum ventriculum efficacia alias remedia præfcripfi; fed nihil opis tulerunt. Ex omnibus tamen arcanum duplicatum, minori fed repetita dofi, item liquorem noftrum anodynum, ex aqua ceraforum nigrorum exhibitum, citra offenfam ferre poterat. Extrinsecus jecoris regioni epithema ex vino rubro, in quo coquebantur, herba abfinthii, flores fambuci & chamomillæ vulgaris ac Romanæ, crebro imponebatur. Interne emulfio ex feminibus IV. frigidis, amygdalis dulcibus & amaris, femine papaveris albi cum aquis florum confecta, per intervalla frequentius fuit propinata. Ita fenfim mitefcabant dolores atque fymptomata, urina infar craffæ cerevifiæ rubra prodibat & alvus fpon te aperiebatur, ac quod valde notabile erat, fæces fecedebant albæ, tophaceam & calcaream minus folubilem fubftantiam referentes, cujufmodi dejectiones cum difficultate per feptimanæ fere fpatium continuabant. Quod naturæ beneficium, leni laxante ex rhabarbaro, manna, & cremore tartari fecundavimus, fubjunctis poftea medicamentis temperate balsamicis. Ita intra menfis fpatium cura fuit feliciter abfoluta.

Dolor fixus in regione hepatis excreta materia tophacea fedatus.

Epicrifis.

Nobiliffimus hic tenerioris & melancholicæ constitutionis vir, in officio valde laboriofo, quod fedentariam vitam atque ingentes mentis contentiones & fatigationes exposcebat, erat conftitutus; & quum multo jam tempore ventriculi imbecillitate & ex hac proveniente lenta febre laboraffet, ceteris nihil proficientibus, tandem à me leni emetico hæc fuit evicta, quo ingens vitiofæ & corruptæ bilis copia edueta. Non mirum proinde eft, eum incidiffe in talem hepatis morbum. Illud vero in hoc cafu explicatu difficile admodum videtur, unde copiofa illa gypfea materia alvo exclufa prognata fuerit, ubi fedem habuerit, & unde ejus color albicans fubortus? Si conjecturæ rationali tamen locus eft, crediderim in ductibus hepaticis eam in principio hæfiffe, productam ex bile terreftribus fixioribus particulis referta, pinguioribus vero oleofis deftituta; quæ poftea ad ductum cholodochum delata, eum obftruendo memorata concitavit fymptomata; quandoquidem ego hac in fententia fum, multum biliofum humorem, ratione materiæ & ingredientium ex quibus componitur, pro corporum difpofitione & maxime ftatu valetudinario variare, adeo ut varii generis impuritates ipsis fæpius immifceantur: & ab hac caufa omni procul dubio etiam, tanta ratione magni-

magnitudinis, coloris & confidentiæ in calculis diverfitas, & tam valde differens biliofi humoris actio & operatio nervofis partibus plus minus infelta ducenda & derivanda venit. Poftremo illud hoc loco inferendum putavi, epithemata ex roborantibus & leniter difcutientibus parata, extrinfecus regioni hepatis in ictero pertinaci & aliis hepatis vitiis applicata robur & tonum huic visceri conciliando egregiam opem ac levamen conferre: quod crebriori experientia confirmatus fcribo.

OBSERVATIO VI.

*Acutiffimus circa
hepar dolor
ex calculo
fellico.*

Uxor Judæi quinquagesimum & quintum ætatis agens annum, macilenta & imbecillioris naturæ, animique diuturno mœrore ob calamitates domesticas sæpius perpeffas valde macerata, colicis pariter ac cardialgicis doloribus sæpius obnoxia, derepente à purgante affumto, in acutum & vix tolerabilem hepatis regioni firmiter infistentem incidit dolorem, intercurrentibus intestinorum cum alvo adftricta doloribus qui per intervalla remittebant & quiefcebant. Accedebat feptimo die icterus, fœdo colore totum corpus perfundens. Quibus fymptomatibus per mensem fere jactata, adeo privabatur viribus, ut morti propinqua videretur. Nil proficientibus euporiftis, & quæ ab aliis præfcripta erant medicis, petitum etiam à me fuit auxilium. Juffi ego primum, decoctum radicis curcumæ cum fale tartari & aqua paratum valde faturatum, cum cerevifia potui dari. Dein potionem laxantem ex mannæ unciis duabus, cremoris tartari drachma & dimidia, nitri purificati granis XII. olei amygdalarum dulcium uncia una femis paratam, mane per vices hauriendam præcepi, quæ octo fedibus magna vifcidorum & bilioforum humorum colluvies eft educta. Tum regioni dolenti vefica fuilla, olei calidi plena, ad demulcendam doloris fœvitiam fuit adnota. Poft aliquot dies dolores fenfim mitefcabant & ægra cum fanitate in gratiam rediit. Hoc paroxyfmo, mioribus tamen fymptomatibus ftipato, aliquoties poftea per annum cum affligeretur, non præftantius unquam ac in dictis remediis auxilium invenit. Interea retulit mihi ægra, quod inter excrementa sæpius duri globuli piforum inftar in paroxyfmo & extra eum prodirent. Ceterum Halberftadium fe contulit, ibique, ut intellexi, valetudinaria perpetua degit.

Epicrifis.

Fœminæ cachecticæ quam facile in morbos hepatis, icterum flavum & nigrum incidunt; neque mirum eft huic visceri calculos ingenerari, præfertim quando non amplius tributum lunare perfolvunt & mœrore afficiuntur. Ex curcuma petendi auxilium in hoc affectu permotus fui, ob hiftoriam, quæ legitur in *Clave Pharmaceutica* B. mei Parentis & fic audit. *Cum Clariff. Dominus Chriftianus Gueinzus, meritiffimus olim Gymnafii noftri Rector p. m. aliquando acutiffimis dextri hypochondrii doloribus ufque etiam ad medicorum defperationem de reftitutione in fanitatis plenum torqueretur. Medicis reliquis confultantibus ultro citroque de remedio aliquo appropriato huic affectui adhibendo, tandem D. D. BENEDICTUS OHEIMIUS medicus sine pari* *ἑχαστος* *p. m. femi drachmam radicis curcumæ in haufu cerevifiæ calidæ butyracæ propi-*

Frid. Hoffmanni Oper. Tom. II.

navit, à cujus ufu elapfo bitorio dolores dicti non folum remiferunt, fed & per feceffum ipfo falvo lapilli aliquot fublucro colore fplendentes in pelvim fubstratam excreti fuerunt; quos quidam medicorum ex intestinis, ego autem ex fellis folliculo feceffiffe judicavi. Elapfis duodecim & circiter annis poft eadem perpeffus fymptomata, fed defuncto tunc laudato D. OHEIMIO p. m. & nullis excretis lapillis, in quos caufam mortis refero, hujus iter adiit. Potionem mannatam cum oleo amygdalarum dulcium sæpius conducibilem ad calculos etiam renales, fi ureteribus firmiter inhærefcunt, in veficam promovendos deprehendi; qua non modo fæces intestinorum, fed & flatus, qui fymptomata augent & iter calculorum præcludunt, bonis cum ægri rebus educuntur.

CAPUT IV.

De Doloze & fpafmo iliaco.

§. I.

Inter graves generis nervofi morbos, qui mentem permolefta fenfatione & corpus periculofis pathematibus excruciant, referendi omnino funt fævi intestinorum dolores, inter quorum numerum primas fere tenet, qui in ileo valde teneræ & fenfibilis texturæ confiftit & vulgo paffio dicitur iliaca. HIPPOCRATES dolorem ilei, quia caufa ibi refidet, vocat: Græci chordapfon five morbum chordium appellarunt; quia intestinum ægrotans ad chordæ fimilitudinem tenditur. Dicitur Latinis volvulus, quia intestina ex parte invicem convoluta apparent in defunctis. CORN. CELSUS tenuioris intestini morbum vocat.

*Evolutio
nominis.*

§. II.

Est dolor intestinorum tenuium acutiffimus facile in inflammationem tranfiens, sub quo periftalticus eorum motus fecundum naturam ad inferiora vergens violenter invertitur, atque in intestinis contenta atque affumta vomitu rejiciuntur & extorquentur; ac nihil, neque flatus per alvum fortiter claufam, descendere potest, gravia poft fe trahens & sæpe funefta fymptomata.

Definitio.

§. III.

Progreffus hujus morbi una cum fymptomatibus ita adornatur. Præcedunt alvi obftructiones, mox acuti & fæviffimi prodeunt dolores, cum inflatione, diftentione, duroque ad tactum tumore regionis umbilicalis. Alvus prorsus eft confipata & confticta, adeo ut neque flatus nec excrementa per eam tranfmittantur; poftea fuperius erumpunt flatus & primum biliofa ac pituitofa materia, antecedente naufæa, crebro vomitu protruditur, fpiritus eft difficilis & quicquid cibi vel potionis affumitur, tametfi id intro defcendat, paulo tamen poft, quia tranfire inferius nequit, iterum vomitu redditur, fæces fubrubræ, non abfimiles ftercoribus, cum fœdo fæpe halitu ejiciuntur. Summa fequitur virium proftitatio, calor præternaturalis, pulfus durus & contractus cum immodica fiti, urina rubra eft & difficulter redditur. Cum ad extrema ventum eft, accedit fingultus, delirium itemque nervorum diftentione, fudore frigido perfunditur corpus, & atroces

Morbi præceffus.

convulsiones ac lipothymia vitæ sæpius finem afferunt. Ipse HIPPOCRATES *Lib. III. de morb.* ita exprimit volvuli generationem : *resicatur intestinum & præ inflammationis caliditate obturatur, ut neque flatus neque cibi pertranseant, sed venter durus sit, & quandoque vomant primum mucosa, dein biliosa, postremum stercus.*

§. IV.

*Anatome
ilioforum.*

Per dissectionem hoc morbo defunctorum, ileum inter se convolutum, & in una & altera parte, ubi mali sedes, inflammatum ac sphacelosa putredine corruptum apparet, & supra inflammationem ilei pars magna ab hac labe libera, flatibus adeo turget, ut ipsum colon amplitudine interdum superet.

§. V.

*Ratio for-
malis.*

Ratio formalis hujus mali consistit in inverso plane intestinalium tunicarum nerveo-musculosarum motu peristaltico, à fortiori coarctatione, angustia & clausura in intestino ileo facta, qua nihil ad inferiora transmittitur.

§. VI.

*Causam
præbet her-
nia.*

Plerumque hujus miseræ ac dolorificæ passionis causam præbet hernia scrotalis vel inguinalis, quando intestini ilei portio intra processus peritonei eo impellitur, ubi illi in viris ad scrotum abeunt, in foeminis vero uteri ligamenta rotunda penetrant. Jam vero notum ex anatomicis est, hos processus, dum musculos abdominis perforant & transeunt, certis quasi angulis aut gradibus hanc facere penetrationem, ita ut, cum unum musculus perforarunt, intra eum & sequentem aliquantulum progrediantur, antequam alterum pro ulteriori itinere transeant; sapienti naturæ consilio, ut eo minus promte aliquid ad scrotum vel inguinalem regionem extra abdominis cavitatem prorumpat. Si vero cum violentia id fiat, ut eo ilei pars dilabatur, annulique nimium dilatentur; facile contingit, accidentibus præsertim aliis causis, ut pristinum locum repetere nequeat: atque sic firmius ibi inhærescat & incarcerata sit, omnemque contentorum transitum plane impediat.

§. VII.

*quæ in fo-
eminis peri-
culosior.*

In foeminis res est majoris periculi, cum processus ibi sint angustiores & difficilius prolapsa intestini portio reponatur: & licet in nonnullarum inguine tam exiguus tumor, ut vix fabam æquet, protrudatur, tamen sævissimam hanc passionem invehere potest. In herniis scrotalibus minus est periculi quo major intestinorum est prolapsus. Vidimus non semel sed sæpius vel tertiam intestinorum partem miro & magno tumore in scrotum descendisse, sine ullo succedente passionis iliace periculo, quia transitus contentorum commodius & facilius tunc fieri potest.

§. VIII.

*causam
mutuus in-
gressus.*

Præter hernias, occasionem huic sævo malo producendo dat frequentius intestini ilei mutuus ingressus sive intus susceptio, quæ per sectionem mortuorum venit in conspectum. Et utut nonnulli auctores hanc plane negare & pro impossibili habere velint, contrarium tamen testantur experientia & observationes: inter quas attentione plane digna est Cel. PEYER in *tract.*

de glandulis intestinalibus relata de sectione foeminæ volvulo extinctæ, quæ ita habet: *patefacto abdomine ileum alicubi plane constrictum atque veluti injecto laqueo strangulatum vidimus; nimirum portio ejus quatuor digitos transversos longa, plurimum vero contracta ac angustata intra proximæ portionis superioris cavitatem prorsus abscondita latebat.* Simile quid à Clar. SYLVIO in *praxi Medic. lib. I. cap. XV.* descriptum est. Et talis ingressus in puella simili morbo extincta idem PEYERUS tribus distinctis locis, præsentibus nobilissimis Medicis Hardero & Brunnero, ostendit.

§. IX.

Genesis hujus phænomeni, licet prima fronte paulo difficilior videatur; non tamen omnem conceptum transcendit: nam si una portio ilei vehementer constringitur, fit ut in vicinam flatu distentam cum impetu intrudatur. Talis ingressus non modo maximi doloris, sed & inflammationis esse causa potest, quæ compressis & constrictis vasis ilei una cum mesenterii portione exoriri debet. Dein etiam sphacelata ejusmodi partes in sectione reperiuntur: & notabilis est casus quem LAZARUS RIVERIUS *Cent. III. Observ. 26.* prodidit; ubi in dissecto cadavere ileum in fine suo tribus complicationibus convolutum & quasi compactum in unam massam deprehendit, quæ tota sic convoluta portio gangræna erat affecta, una cum mesenterii proxima parte; reliqua intestina erant amplissima & flatibus mire distenta.

§. X.

Ad funestum talem intestinorum ingressum qui causam ileo præbet, plura alia implicita mala conferre possunt: & testantur diversorum auctorum observationes, à lumbricis in ileo detentis & in dissectis cadaveribus repertis, si morsu dolores efficiant, iliacam passionem fuisse productam. HENRICUS ab HEER *observ. XXIV. pag. 214.* puellam secuit ab epilepsia iliosam factam vermesque evomentem, in cujus ileo, circa finem, quinque complicationes vermium invenit, quarum aliæ inferne fursum repebant, aliæ supra deorsum complicabantur. Et in M. N. C. *Detur. II. ann. V. observ. XIX.* de foemina triginta annorum refertur, quod ileo correpta cum sæce liquida evomuerit XVI. lumbricos teretes robustissimos, & animam sub frigido sudore efflaverit. In medio intestini ilei membranæ cuculli instar extensæ videbantur & foramen grossi magnitudine tenuissima membranula exterius tectum. Utrunque vero intestinum unius digiti longitudine, duodenum autem duorum digitorum transversorum latitudine nigrum & gangræna corruptum viscebatur. Eandem morbi causam etiam confirmare & adstruere videtur LOMMIUS *lib. II. observ. Medicin.* dum ait: *si ad extrema ventum est, subinde lumbrici evomuntur.*

§. XI.

Neque inter causas antecedentes quæ ileum excitare possunt, atque non modo stricturam & coarctationem ipsis intestinis inferunt, eaque ad inversam peristalticam motionem irritant, excludenda sunt venena, item purgantia acriora nec non emetica, præsertim si jam labe & vitio quodam intestina laboraverint. Ita CÆLIUS AURELIANUS, qui præter Hippocratem optime de acuto hoc tormento, quod Græci ileon

*Quomodo
is genere-
tur?*

*Et quæ ad
id confe-
rant.*

*Inter causa-
sas etiam
venena
&c.*

ileon appellant, fcripfit, inter caufas, venenum potum aut cibo datum nec non fungos comestos refert. Et ALPINUS *de medic. method. p. 313.* de *Guilandino* memorat, quod è colico dolore à devoratis catapotiiis & hiera ad femi unciam, in ileon, quo extinctus est, inciderit. Neque nos tali in cafu largiorem pilularum, quæ aloën recipiunt, ufum probare possumus, utpote quæ post operationem non modo intestina exsiccant, fed & uberiorem sanguinis ad illa affluxum procurant, ut hinc etiam, fecundum noſtram obſervationem, inteſtinorum in hac vel illa parte coarctationes, quæ liberum excrementorum tranſitum inhibent, & ad dolores colicos diſponunt, efficiant.

§. XII.

Nec non que in intesti-
ni obtu-
rati.
Neque ex numero caufarum paſſionis iliacæ obturationes inteſtinorum præſertim tenuium omittendæ veniunt, quæ alimenta ficca, conſtringentia, vel humido non ſatis diluta excitare conſueſcunt; inter quæ, teſtantibus obſervationibus à medicis paſſim notatis, frequens panis ſicci & bis cocti, ſpirarum, caſtanearumque eſus, pyra & poma maxime cydoniata, fructus immaturi & acerbi, in magna copia ſi devorentur, magnum momentum conferunt; præſertim ſi vita ſedentaria, mœror animi, qui omne robur & tonum ventriculo & inteſtinorum canali ſubtrahit, vel parcus potus, acceſſerint.

§. XIII.

aut intesti-
na craſſa
diſtendunt.
Præterea inteſtina craſſa à ſcybalis diutius retentis obſtructa & obturata acerbam hanc paſſionem, dum nihil, quod ore aſſumitur, tranſmittunt, ingenerare poſſunt, præſertim quando ex pudore aut loci defectu, vel alia ex cauſa ſtimulus ad alvum deponendam reprimitur & cohibetur. Accumulatur hinc maxima excrementorum copia, quæ poſtmodum tunicas inteſtinales tam violenter diſtendunt, ut vis earum elatiſtica, ſyſtaltica & expulſrix plane ceſſet atque deficiat. Hæc dum cogito, in mentem mihi venit ante aliquot annos à celebri quodam Archiatro Regio ad me facta relatio, quod nimirum Celſiſſimus Princeps, ex nimia cohibitione & retentione ſæcum, iliacus factus fuerit; in cujus poſt mortem diſſecto corpore inteſtinum colon ſcybalis totum repletum & diſruptum in una parte inventum eſt, atque tanta ſcybalorum moles deducta, quæ pondere circiter viginti libras æquavit. Neque attentione indignum eſt, quod HENRICUS ab HEER in *obſervat. pag. 54.* narrat, ſe præſente, dum ileo demortui abdomen diſſecaretur, ſponte inteſtina crepiſſe cunctorumque adſtantium veſtes inſigniter commaculaſſe, cum impetu erumpentibus & exploſis ſcybalis.

§. XIV.

ira quoque.
Ex ceteris vero omnibus cauſis antecedentibus, affectus iræ, præſertim ſi vehementior fuerit, ad iliacam paſſionem producendam; & quidem facilius in iis, qui vitio quodam inteſtinorum laborant, aut hernioſi ſunt, magnam habet potentiam. Neque deficit ratio: nam ea eſt natura ac indoles hujus affectus, ut nervoſas maxime partes ſpaſtice convellendo operationem ſuam exſerat, inque partibus etiam imbecillioribus, ad quas merito extra abdomen prolapſa inteſtini portio pertinet, quam facile, ob copioſiorem ſanguinis affluxum, ſtagnationem

Frid. Hoffmanni Oper. Tom. II.

& ſtaſin, ex qua demum oritur inflammatio, producat.

§. XV.

Quæſtio nunc occurrit curioſa ac non levis *An ſtercora vomiti queant?* momenti: an nimirum, ut communis fert ſententia & veterum etiam medicorum aſſertio eſt, in noſtro morbo, præſertim quæ ab incarcerata hernia, vel à mutuo inteſtini ilei ingreſſu fit, ſtercora per os evomi poſſint? Dubitandi non levis ratio in eo poſita eſt, quod primo per coli valvulam, qua ilei ingreſſus in cœcum & colon munitus eſt, fæces non poſſint relabi & reſurgitare: dein, quod nulla ratione concipi poſſit, quomodo per conſtrictam & firmiter incluſam in hernia tenuem ilei partem ſtercora penetrare queant. Ego quidem non in totum rejicere volo teſtimonium medicorum probatiſſimæ aliæ fidei, ſed tantummodo id, quod ipſe in aliquot vidi & obſervavi ſubjectis hic adducere volo; videlicet rejectam quidem vomitu fuiſſe materiam, quæ colore ſubruſo & externa ſpecie liquidas alvinas fæces referebat: quodocunque vero ipſa rejecta & collecta materia naribus fuit excepta, nullus plane foetor vel gravis odor ſe prodidit, ut potius aſſumtarum rerum odorem habuerit, præterea & ipſa quaſi ebulliens cum ſpuma apparuerit. Nihilo minus ego haud negaverim, quando nec ab incarcerata hernia, nec à convolutione inteſtinorum, ſed à ſola ſpaſtica ilei ſtrictura dolor fuerit ortus, inteſtina vero craſſa, rectum & colon, validiſſima ſimul ſpaſtica ſtrictura laboraverint, poſſe hac ratione fæces valde liquidas, & ut alii obſervarunt, clyſteres per coli valvulam ad ſuperiora penetrare. Ceterum hanc de ſtercoribus vomitu in hoc malo rejectis obſervationem ulteriori & accuratori medicorum animadverſioni atque examini commendatam velim.

§. XVI.

Quod attinet ad ipſam prognofin, ſpes ſalutis *Prognofis.* ſuperest, quam diu non adeſt inflammatio & clyſteres in alvum recipiuntur & redduntur, dolores quoque locum mutant, neque dolor & vomitus aſſiduus eſt, ſed per intervalla urgent, atque malum ab obſtructis inteſtinis à contentis fæcibus, enatum fuerit. Major adhuc ſpes eſt, ſi medicamentum ore ſumtum laxans alvum perumpens dejectionis initium facit. Si vero inflammatio jam præſens, quæ ex febre, vehementia torminum, urinæ ſuppreſſione, pulſu duro & celeri, ſiti inextinguiſta, jaſtatione corporis & ſumma virium proſtratione atque extremorum frigore, dijudicatur, parum ſpei ſuperest. Repentina vero & omnimoda doloris ceſſatio, ſummus virium lapſus cum pulſu debili, animi defectio, foetor oris, inflammationem abiſſe in ſphacelum certo denunciant. Quod reſtat, id ſciendum eſt, quod grave hoc malum, ſi inter initia, ad avertendam inflammationem & dolorem ſopiendum congrua opponantur remedia ad duas vel tres hebdomades, antequam prorsus conquieſcat, poſſit produci.

C U R A T I O.

§. I.

Si ullo in morbo temporis momenta attendere & obſervare juvat, proſecto in morbo iliaco ſanando id neceſſarium eſſe exiſtimo: nam is ipſe tantæ eſt vehementiæ, ut intra tres

Tempus attendendum.

quandoque dies satis validum hominem, nisi cito ope succurratur, enecare possit. Quando vero quævis momenta temporis præcipiti gradu aufugiunt, subinde juvandi occasionem secum arripiunt; & valet hic egregium illud HIPPOCRATIS monitum practicum, quod *libr. I. de morb.* medicinam qui faciunt, graviter inculcat, his verbis: *Si unquam aliquis in ullo morbo utilitatem attulit, eum justo tempore attulisse necesse est.* Quo circa, si ullo in affectu certe in hoc diro, præcipiti & periculi plenissimo, medicus peritus statim accersendus est, cui nihil prius, nihil posterius curæ cordique sit, quam ut sævissimo dolori, qui inflammationis & mortis etiam causam præbet sufficientem, per convenientia tam interna quam externa remedia sublevando prospiciat.

§. II.

*Methodus
curandi
Hippocra-
tica.*

Qui in veterum medicorum Græcorum lectione paulum versatus est, is facile deprehendet, eos sollicite & accurate admodum partium nervosarum affectus inque primis dolores, tum quod ad eorum historiam, tum ad curationem pertinet, descripsisse; non ex alia sine dubio causa, quam quod ob regionum præcalidarum, vitæ, & victus intemperati rationem ejusmodi morbi sæpius occurrant & opem medici requirant. Videbimus itaque quomodo & qua methodo HIPPOCRATES hujus mali curationem instruxerit & adornaverit. Describit hanc ipsam *lib. III. de morb.* §. 15. Jubet hoc in affectu alvi apertionem tentandam per glandem satis longam ex melle paratam, quæ anteriori parte felle taurino oblinatur, & bis ac ter submittatur; *quo combusta*, ut inquit, *stercora circa rectum intestinum contenta educantur.* Post hæc clysterem adhibendum docet. Et ulterius addit: *sin minus hæc opem ferant, folle fabrili in ventrem indito flatus immittantur, à quo & ventrem & intestini contractionem distendere oportet;* dein extracto folle, clysterem applicandum, qui non ex calefactoriis, sed ex his qui stercora dissolvunt ac colliquant parandus est, suadet; postea obturata per spongiam sede in aquam calidam laborans consideat, continens clysteris infusum; & addit: *si hoc infusum susceperit & rursus dimiserit sanus evadet.* Annectimus quæ venerandus senex alibi scribit: *Supernum ventriculum quam citissime purgato, ac sanguinem de capite ac cubitis detrachito, ut superne alvus calefcere destinat; & partes supra septum transversum frigefacito, excepto corde. Infernas autem calefacito, homine in folio aquæ calidæ collocato, ac semper oleo illito.*

§. III.

*Methodus
Cæli. Aurel.*

CÆLIUS AURELIANUS præclarus non minus Medicinæ scriptor *lib. III. acut. passion. cap. XVII.* in ilei tormento, quæ sequuntur remedia proponit atque commendat. Per clysterem nimirum oleum calidum purum, vel aquam cum æquali parte olei dulcis & cum hybisco, per quem altheæ radicem intelligit, coctam donec aqua fuerit consumpta, ut olei pinguior natura mucilagine radice temperetur, ano infundendam esse proponit. Vesicam quoque calidam ex oleo semiplenam, item mediocrem vaporationem pro mitigando dolore parti morbosæ applicandam jubet. Præterea si hæc nihil perficiant, *folliculo artis arariæ immittendum*, inquit, *ventum per podicem, quo distantia ventris*

atque intestinorum replicatis folliculis fiat: & tunc statim adhibendum clysterem probat. Detracto supra dicto folliculo, podicem cum spongia deobstruendum præcipit. Ceterum hoc affectu laborantem fovendum esse loco mediocriter calido atque lucido, adhibita requie cum silentio & abstinencia cibi usque ad triduum, potum quoque parcum dandum imperat; cavendumque esse monet, ne externa & cataplasmata apponantur, quæ gravitate & pondere dolorem inferant. Nos vero curandi hanc veterum methodum non possumus improbare, sed potius laudamus, modo convenienti tempore & ordine suscipiatur. Directa enim quam maxime est ad alvi secessum procurandum & ad stricturem intestini crassi spasticam, quæ huic obicem ponit, removendam, pariter etiam ad inflammationem in locis superioribus, à qua summum imminet vitæ periculum, abarcendam. Nos ante omnia ad primam mali causam & originem in curatione administranda respiciendum ducimus.

§. IV.

Igitur, quando causam mali incarcerata hernia præbet, quod ut plurimum fit, prima & præcipua cura esse debet, ut prius emollita intestini prolapsi portio, si non sponte retrocesserit, in suum locum reponatur. Quod ut facilius ac promptius contingat, primo clysteres applicentur singulis bihoriis, ut flatibus abdomen depleatur: dein pinguibus & oleosis pars affecta erit emollienda; quo fine vesica suilla axungia humana vel canina semiplena, parti affectæ applicari & totum quoque abdomen omento ex animante ut vitulo desumpto, vel si non fuerit ad manus, linteo mundo oleo raparum vel lini calido immerso tegi potest. Postea supinus æger locari debet, ventre & abdomine paulo eminentiori, capite vero decliviori: & sic cruribus diductis, chirurgus manu oleo amygdalarum inuncta, intestinum scroto prolapsum, molli contactu & intropulsione sensim digitorum adminiculo facta, in abdomen reponere tentet, ita tamen, ne intestinum complicitur, vel ullo modo lædatur: nisi enim tempestive repositio herniæ fiat, sive sit in inguine, sive in scroto, sive cruralis hernia fuerit, quam facile inflammatio in sphacelum desinens supervenire potest; quando videlicet sanguis, ob coarctati & occlusi ac quasi à tendinibus abdominis strangulati ilei portionem, per vasa sanguinea compressa regredi nequit, is restagnat atque in sphacelosam putredinem abit.

*Si causa
ilei herniæ,
ea reponenda.*

§. V.

Præcedenti non posterior in hoc affectu esse debet indicatio, ut atroces & intolerabiles dolores convenienti medicina sopiti conquiescant. Nam ea est doloris vehementissimi vis ac potentia, ut lege consortii, quod partes nervosæ inter se habent, gravia illa symptomata, vomitus, singultus, anxietates, assidua vigilia, febris, delirium, virium exolutio, inquietudines, neque minus strictura totius canalis intestinalis usque ad inferiora ipsumque anum, tremor quoque extremitatum partium atque urinæ difficultas inde pendeant: quæ cuncta sedato dolore mitescere & placari solent. Ego itaque in ejusmodi præcipiti casu cum singulari fructu & non sine summo levamine nullo non tempore aquam menthæ leniter spirituosam, quæ etiam in se leni vi anodyna gaudet, cochleatum singulis horis cum

Dolores sedandi.

internis

ex-
ter-
nis.

Post alvus
laxanda.

X. vel XV. liquoris anodynii mineralis, duobus vel tribus laudani opiatii juxta Helmontii methodum parati liquidi, guttulis remixti porrigere soleo. Exterius quoque ad singultum & vomitum compescendum epigastricæ regioni emplastrum ex theriacæ veteris & olei nucis moschatae expressi æquali portione, additis oleo menthæ & camphora concinnatum, suavi imponendum. Sedato vomitu vel etiam singultu, feliciori cum fructu & successu clementer laxantia, ex manna, cremore tartari, amygdalarum dulcium oleo retineri & operationem suam exferre possunt; videlicet quando ex diutius retentis excrementis in intestinorum flexuris, malum oritur.

§. VI.

Inflamma-
tio averten-
da venæ
sectione.

Neque inter medendi indicationes neglectui haberi debet, quod inflammatio omnibus modis sit avertenda, quia hæc tandem in sphacelum abit & mortem infert: siquidem testantibus id passim observationibus, nullus facile iliacus absque sphacelatione intestinorum perit, sive illa fuerit ex hernia, sive convoluzione, & mutuo intestinorum ingressu subnata. Ad hanc vero declinandam, præter clysteres & externa emollientia, interneque data anodyna, quæ dolores, spasmodorum non modo, sed & insequentis inflammationis fabros egregie sedant & demulcent, venæ sectio magnam vim habet; quam ipse etiam HIPPOCRATES ad febrem sedandam & impediendam loco citato commendat. Et CÆLIUS AURELIANUS quoque l. cit. phlebotomiam ad dolorem levandum magni facit. Uterque auctor in cubitu eam instituendam esse monet. Nos in pede, in sexu præsertim sequiori, eam utiliter celebravimus. Est vero sanguinis missio eo magis utilis ac necessaria imò reiteranda, quo major sanguinis abundantia in vasis deprehenditur.

§. VII.

Si jam ad-
fuerit, dis-
cutienda.

Deinceps ad æstum febrilem & inflammationem reprimendam, sicut nunquam non nitrum depuratum omnia remedium genera exsuperat, ita etiam in hoc morbo locum invenit commodissimum, si pro dosi VI. vel VIII. grana cum pulvere Marchionis permixta, addita interdum quarta, pro dosi, camphoræ grani parte, in decenti vehiculo per intervalla porrigantur. Tum quoque quam utiliter pulvis nitrosus antispasmodicus in emulsione ex amygdalis dulcibus & amaris, semineque papaveris albi & aquis paregoricis composita, potest exhiberi. Exterius ad arcendam inflammationem partes dolentes, linimento, quod ex uncia axungie humanæ & camphoræ drachma constat, debent inungi.

§. VIII.

Ultimum
auxilium
in mercu-
rio vivo.

Postremo, si malum omnibus jam laudatis & expertæ virtutis remediis resistat, nec ullo cedere modo velit, ultimum neque contemnendum auxilium in usu argenti vivi repositum est; quo etiam ipse ego, ut in sequentibus docebit observatio, bis feliciter usus sum. Neque etiam ullum facile reperiri hoc ipso præsentius & efficacius, quando mutuus intestini ilei ingressus adfuerit, licebit remedium. Plures quidem novi qui in exhibendo hoc remedio valde sunt timidi, sed citra metus rationem: modo opportuno & convenienti tempore id fiat. Sic enim RHODIUS

Observat. Medicin. cent. II. observ. 80. testatur hydrargyri uncias V. cum melle rosaceo solutivum haustas deploratum iliacum sanasse. Libram dimidiam mercurii vivi impune sumtam, ilico alvum exonerasse, memorat HENRICUS ab HEER in Observation. Medicinal. p. 56. qui plures morti vicinos hujus præsidio restituit. Quid? quod integram ejus libram ZACUT. LUSITANUS Pr. adm. lib. II. observ. 35. cuidam Duci strenuissimo optimo cum eventu præscripserit. Ut taceam ejusdem libras aliquot in aqua sumtas, pluribus in iliaca passione periclitantibus, annotante PARÆO Oper. Chirurg. lib. XX. cap. 38. vitam servasse.

CAUTELÆ.

§. I.

Memori sane, circa hunc affectum, merite tenendum existimo; quod purgantia validiora alvum ducendi causa exhibere maximopere sit infecurum; dolorum enim pariter ac spasmodorum augmentum, nec non symptomatum omnium exacerbationem nunquam non inferunt. Neque clysteres etiam ex valde calidis & carminativis concinnatos in usum trahere conducibile est; multo minus interne essentiae carminativæ stomachales vel vina medicata porrigenda: quippe hæc omnia ejus sunt naturæ, ut in colica quidem flatulenta, & quæ à causa frigida, ut cum veteribus loquar, oritur, levamen afferre possint; minime autem ubi morbus est acutus, & omnia in vehementi motu ac impetu constituta sunt.

Neque
purgantia
neque cly-
steres valde
admit-
tendi.

§. II.

Ubi vero vires deficere incipiunt, & animi deliquia imminet, temperata analeptica omnino possunt usui & præsidio esse, quæ videlicet ex aqua ceraforum nigrorum, melissæ Turcicæ, liliorum convallium, menthæ, cinnamomi sine vino paratæ sunt; vel ipsum vinum generosum cochleatim porrigi debet.

In defectu
virium
analeptica.

§. IV.

Si status plethoricus adest, venæ sectio statim instituenda, imo si opus est reiteranda. Et plurimum quoque attendenda erit docta & circumspecta observatio Clar. PASCOLII qui Tom. II. Oper. pag. 199. ita eleganter & prudenter scribit: Si adsit febris, si viscerum inflammationis indicia tamen si imminet, vena statim solvenda, in partibus potius infernis quam supernis. Hinc hirudines intestino præcipue recto admotas, mirum in modum profuisse ad ileum sedandum hætenus pene semper observavimus; quum sanguis qui ex vasis hæmorrhoidalibus profluit, partem affectam proxime oneret.

Ubi pletho-
ra vena se-
ctio.

§. V.

Quando usus argenti vivi internus utilis ac necessarius judicatur, ipsum prius probe depurandum, lavandum & per corium trajiciendum est; dein non facile ultra libram vel dimidiam offerri decet, quod optime fit cum jusculo pingui; tum, post ejus potum in latus dextrum aliquandiu ager decumbere, ut eo citius ventriculi orificio dextro egrediatur, & insuper, si vires id permittant, corpus ambulatione vel vectatione movere debet, ut eo melius ad inferiora descendere possit. Cavendum vero, ne inflammatione jamjam præsentē & viribus dejectis, hoc me-

Mercurius
vivi rite
depuran-
dus.

dicamento quis utatur, ne vulgus & adfistentes, si pereat æger, ab hoc remedio, quod ab omnibus fere suspectum habetur, periisse sibi vane persuadeant.

§. VI.

*Clysteres
profunt.*

Magna vero salutis & convalescentiæ in miserando hoc malo spes in clysteribus est posita, modo illi convenienti tempore & quantitate applicentur. Hi enim, si vehementi spasmō constricta sunt intestina crassa, fibras eorum crebriori injectione relaxatas & flaccidas reddendo, inversionem peristaltici motus inibent. Et præstat tantummodo aquam calidam cum syrupo dialtheæ *Fernelii* permixtam non semel sed aliquoties, & si vires patiuntur, una die singulis bihoriis, & quidem primo statim die, ano infundere, ut stercorea etiam liquidiora fiant.

§. VII.

*Cæl. Aurel.
circa Topi-
ca moni-
tum.*

Quoad prudentem topicorum usum, perplacet mihi *CÆLII AURELIANI* supra jam citatum à nobis monitum: qui à gravibus cataplasmatibus abstinendum esse docet, ne pondere & asperitate passio & dolores incrementum. Sæpe enim tanta est ventris inflatio & distensio, ut nec tactum cum manu paulo validiorem ferre æger possit.

§. VIII.

*Alvo fir-
miter clau-
sa, forus
confert.*

Quandocunque alvus ob spasticas stricturas ita clausa est, ut nec syphonem, multo minus follem admittere aut recipere possit, tunc præstat forum temperate tamen calidum applicare & blandam ac successivam puri olei tepesfacti injectionem subtili syphone tentare, quo tunicae intestini recti valde coarctati & spasmō constricti hac ratione emollitæ, eo facilius postea, majorem quantitatem humorum per clystima in se recipere queant.

§. IX.

*In declina-
tione mor-
bi, balnea.*

Declinante & remittente morbo, lavacra, quæ etiam si vires ferunt pro circumstantiarum ratione primis morbi diebus adhiberi possunt, convenientissima sunt. Faciunt ad passionis solutionem & ad morbosas reliquias fibræ relaxatis facilius expellendas; siquidem iis frequenter admodum & optimo consilio *Methodici* in morborum declinatione utebantur, quemadmodum ex *CÆLIO AURELIANO* videri licet.

§. X.

*In dolorum
sævitia,
opiata.*

Ad mitigandam dolorum sævitiam, quæ fere præcipuum tot gravium symptomatum & motus inversi peristaltici causam præbet, minime est metuendus opiatorum usus, modo fiat statim in principio si vires adhuc integræ, si plethora præsens soluta, & nullum sphacelationis subfuerit indicium. De quorum insigni usu egregia *B. WEDELII* observatio, quam in *M. N. C. Dec. I. an. 2. observat. 238.* communicat, legi meretur.

§. XI.

*Si hernia
reponi ne-
quit, inci-
pi.*

Si causa iliaci mali est hernia cruralis, atque ob non sperandam intestini repositionem sphaceli & mortis periculum imminet, ultimum auxilium & spes salutis in incisione est, quæ, si dextre à perito chirurgo, adfistente docto medico, administretur, sine omni metu est & ex orci fau-

cibus ægotantem eripere potest. Talem sectionem non ita pridem in urbe celebri, in illustri foemina ex iliaco affectu in summo vitæ periculo versante, felicissime & salutifere summa chirurgi dexteritate celebratam esse intelleximus. Sed in ejusmodi casibus ut operatio mature & in tempore suscipiatur, ac antequam indicia præsentem sphacelum denuncient, valde necessarium est.

§. XII.

Plurimum etiam scire refert, malum iliacum ex eorum esse numero, quæ facile recidivant. *Recidiva præscindenda.* Novi aliquot, qui secunda & tertia vice recurrente affectu demum extincti fuere, sed hi quod bene notandum hernia laborarunt. Ut itaque corpus à periculi plenissima recidiva vindicaretur; opus est, ut sollicita nunquam non herniæ habeatur ratio: quæ hæc est, ut beneficio subligaculi intus retineatur, vel si id fieri non expedit, omni modo & cura à frigore defendatur, & inter cibos, qui inflant, ut sunt fructus horæi, pisa, olerum ceparumque species, rapæ, maxime omnium vero quæ adstringendi & siccandi facultate præditæ sunt, evitentur, quo alvus libera & mollis servetur. Cumque ex multiplici observatione mihi compertum sit, nihil præter iram & purgantia acriora herniosos in iliacam passionem vel ejus recidivam præcipitare posse, sedula utique opera danda est, ut hæc ceu valde perniciofa declinentur.

ENARRATIONES MORBORUM.

OBSERVATIO I.

Ante triginta annos, Vir spectatæ in hac urbe auctoritatis, cognatione mihi conjunctus sexagesimum jam annum supergressus, à viginti jam annis hernia laborabat scrotali, quæ temporis progressu ita increvit, ut tertia minimum intestinorum pars, extra abdomen in scroto detineretur: si erectus staret, insignis capitis magnitudinem præ se ferebat tumor, qui tamen in supino situ, relabentibus intro intestinis, minuebatur. Periculi quidem honoratissimus vir ab enormi hoc malo nihil passus est, præterquam, quod quinque vel sex ante obitum annos, tarde & parum cum succederet alvus, valde copiosos & molestos vomitus, aliquot horas perseverantes sustinere debuerit: quibus ingens copia humorum vitiosorum in intestinis collecta dejiciebatur, qui vomitus singulis fere novem vel decem diebus recurrebant, quos futuros tumor grandior & dolor pressorius in scroto indicabat. Excretionem hac exantlata salvus & vegetus perstitit, appetitu bono gaudens.

Epicrisis.

De hac affectus historia, hoc nostrum esto judicium; quod tantæ molis tumor intestinalis in scroto, extra periculum mali iliaci sit, quia fæces & flatus non possunt ita intercipi, ac id in hernia inguinali, crurali, vel scrotali, ubi exigua tantum intestini portio prolapsa, incarcerata & quasi strangulata à tendinibus abdominis hæret, acutissimis doloribus comitantibus, contingit. Dein nihil dubii est, quin in tam enormi intestinorum prolapsu, non relaxatio tendinum & annulorum, sed potius disruptio locum habeat: alias enim tam subito in situ supino, tota intestino-

ftinorum moles intra abdomen recedere non potuiffet. Tum in præfata obfervatione hoc in-
fignis momenti phænomenon non erit præter-
eundum, quod videlicet, præcedente dolore ten-
fivo in fcroto, omnia propemodum quæ ante
tres vel quatuor dies affumta erant, quod ex co-
lore, odore & confiftentia liquefcebant, æger
evomuerit, intus remanentibus quæ in prandio
tres vel quatuor ante infultum horas comederat.
Id noftra quidem fententia ita factum effe judi-
camus: inverfio videlicet motus periftaltici in in-
teftino ileo, in fcroto quod detinebatur, incepit,
fed non per totum ventriculum penetravit, fun-
do ejus tantummodo affecto, minime autem
arcu majori five facco, qui in latere finifiro
eft locatus.

OBSERVATIO II.

*Spafmus
ilei ex mu-
fti repletio-
ne in her-
niofo.*

Honestus hujus urbis civis, fatis vegetæ &
robustæ constitutionis, annorum triginta & ali-
quot, ex hernia per multos jam annos fine of-
fenfa vel moleftia laboravit: neque fubligaculo
intus eam detinuit. Autumno ingentem quan-
tatem mufti bibit, atque nocte, in fomno fri-
gefacto abdomine, dum evigilat, tumorem val-
de auctum & dolorificum perfentit, qui nolebat,
ut antea, intra abdomen fubire. Dolores fuc-
cedebant acerbiffimi per integrum diem duran-
tes, qui non in fcroto tantum partem affectam,
fed abdomen & totum corpus occupabant, cum
infigni anxietate & conatu ad vomitum juncti.
Anxie à me petiit auxilium, mifi peritum chi-
rurgum, ut patientem inviferet & relationem
mihi faceret. Ego itaque fuafi, ut tumorem
inungeret axungia omenti vitulini recenti & de-
super fomentum calidum continuo applicaret,
quod ex lacte cocto cum floribus malvæ, ver-
bafci, chamomillæ, croco, femine anethi & cy-
mini conftabat, & blande ac modeste repositi-
onem manu tentaret. Interne per intervalla fo-
lam aquam menthæ cum aliquot granis extracti
croci & julepo rofarum propinavi. Peracta re-
pofitione fimul & femel, & omnes dolores &
cuncta permolefta fymptomata ceffarunt & con-
quieverunt.

Epicriftis.

Ex hoc jam clariffime apparet quam caute &
provide fe herniofi circa dextrum rerum non na-
turalium ufum gerere & custodire debeant;
cum levis etiam error funefti affectus caufam &
originem fubminiftrare poffit. Deinceps & hoc
notari licet, quod folus acerbus dolor, qui par-
tim nimia ilei intra fcrotum detenti diftentione,
partim etiam ejus intra annulos tendinum ftri-
ctura & arctatione fit, tam gravium fympto-
matum quæ iliacum malum formant & quæ
fæpenumero lethalia evadunt, vera & genuina
caufa cenfenda fit.

OBSERVATIO III.

*Dolor &
fpafmus
lei ex urvis
omeftis, in
herniofo,
mercurio
vivo cura-
tus.*

Honestæ fœmina, uxor graviffimi in urbe
confulis, cognatione mihi propinqua, annorum
XL. in ftérili vivens conjugio, utpote cui nun-
quam fluxere menses, tumore circa femoris cur-
vaturam, in regione inguinali longo abhinc tem-
pore correpta; in vinea ex unis nimium come-
ftis, & fub cœlo frigido ac humido refrigerata,
perfentit mox tumorem duriores, gravesque &

acutos in eo dolores, qui noctu ingravefcebant.
In confilium accerfitus cum jam per biduum ni-
hil per alvum fe dejeciffe affirmaret; prima fla-
tim cura fuit, ut alvus per clyfteres iterata vi-
ce infufos aperiretur, & tam per externa quam
interna remedia dolorum levamen afferretur.
Secefferunt quidem excrementa, fed non adeo
fufficienti copia: perfeverarunt tamen dolores,
qui abdomen occupabant & fomnum pariter ac
appetitum tollebant: nec quicquam fomentis, ca-
taplafmatibus balneisque proficientibus, tumore
duro & dolorifico permanente. Nil igitur aliud
agendum duxi, quam ut inflammationi verē-
dæ perquam exitiofæ occurrem: quapropter
venam in pede fecandam curavi. Interne vero
pulverem Marchionis leniter nitrofum ex aqua
appropriata menthæ videlicet & ceraforum ni-
grorum parva & reiterata dofi obtuli. Æftus
quidem non adeo intenfus erat, ruftationes ta-
men fingultuofæ & ad vomendum conamina
permanserunt. Tertio ab invafione die copio-
fæ infestabant, præcedente anxietate, vomitio-
nes & quidem materiæ, tam fubrufo colore quam
fpumefcentia, liquidas, quæ alvo dejiciuntur,
fæces referentis, conquerente etiam fœmina de
malo odore. Ejusmodi vomitus per tres fere
continuabant dies; quibus ingens corruptorum
humorum illuvies fuit protufa. Ego re paulo
curatius penfitata, materiam ftercoream non ha-
bendam effe, ut adftantes volebant, judicavi,
ob nimiam ejectorum quantitatem, quæ in in-
teftinis craffioribus non poterat colligi, cum li-
quidorum defcenfus, ob incarceratam ilei por-
tionem prorfus effet interceptus. Cum vero &
alvi confilipatio, & ventris tormina & vom-
itiones & vigilie affiduæ, vires in dies magis
dejicerent, & præfentaneum levamen ufque eo
ufurpata remedia non adferrent, veni in hanc
cogitationem, anne argentum vivum intro hau-
ftum poffit in hoc cafu opportunum habere lo-
cum? Ego, cum medendi hæc ratio plane ex-
traordinaria & plurimis fufpecta fit, nolui folus
hoc experimentum facere: ideoque petii ut me-
dicus, quem ob candorem femper æftimavi,
advocaretur. Ille, cum meas perciperet ratio-
nes, idem fentiit, afferens, quod fine omni pe-
riculo id fieri & forfan defideratiffimo cum fuc-
ceffu poffit. Mane itaque, dato prius pingui
jufculo libram dimidiam rite depurgati argenti
vivi uno hauftu fumendam porreximus, defuper
bibendum brodium carnis cum aliquot uncis
olei amygdalarum dulcium. Promte ægra af-
fumfit. Post horam, leniorem per conclave de-
ambulationem fuafimus. A medicamento fum-
to omnis prorfus defiftebat vomendi conatus, &
horas quinque poft, in lecto, præter opinionem,
alvus folvebatur. Linteis infpectis apparebat
mucida gryfei coloris materia multis argenti vi-
vi globulis intermixtis, qui diligenter collecti
unciam præter propter æquabant. Ex quo fa-
ctum eft, ut afflictionum omnium fere, quibus
ante angebatur, facta fuerit remiffio. Alvum
femel fponte dejectam poftea clyfteribus demul-
centibus & emollientibus, pauco ftimulo falino
addito, eluere & craffa inteftina purgare con-
ftituimus: interne quoque laxans rhubarbarinum
& mannatum cum cremore tartari ex vino de-
dimus. Ita infignis copia progreflu temporis ma-
teriæ excrementitiæ, permixta nunquam non
portione argenti vivi, feceffit, idque ultra duas
fere hebdomades. Ex quo per DEI gratiam eve-
nit, ut periculofe ægrotans fœmina meliuscule
fem-

semper habens ex orci quasi faucibus hoc remedio erepta fuerit. Ultimo vero loco id non prætereundum esse censeo, quod collectis licet viribus somnoque ac appetitu redeunte, tremorem in artubus, atque vacillationem & impotentiam in pedibus ultra mensis adhuc spatium perceperit: quæ permolestæ affectiones, dextro nihilo minus balneorum usu prorsus demum sublata & discussæ fuerunt.

Epicrisis.

Ex hujus morbi & curationis progressu, id demum in usum practicum depromere licet, quod passio iliaca acuti alias periculi atque exitii, opportune datis medicamentis quæ inflammationem arcant & dolores mitigant, in affectum quasi chronicum minoris periculi possit converti. Deinceps non contemnendum in hoc atroci malo, sed potius incomparabilem usum & efficaciam argenti vivi esse, ex hac curatione intelligi & edisci potest, licet modus operandi non adeo explicatu facilis sit. Ego tamen ita rem concipio: argentum vivum intro haustum, dum fundum ventriculi petit, pondere suo resistit ejus subversioni, sive inversæ ejus motioni peristalticæ, ut potius meo quidem judicio, eam ad inferiora, facta in contrarium compressione, rursus dirigat atque convertat: & hinc etiam ratio reddi poterit, quare globuli plumbei paulo majoris molis intus deglutiti, ad curandum hunc difficillimum affectum commendentur; de cujus remedii salutari usu quamvis multa mihi relata fuerint, nunquam tamen me experimentum fecisse ingenue fateor. Tandem hoc addendum esse existimavi, quod dejectiones illæ spumascentes liquidæ & biliosæ, quarum materia partim per continuum humoris biliosi & lymphatici per glandulas in intestina secreti affluxum, in ileo, progressu temporis colligitur, non modo à vulgo, sed etiam à medicis pro veris stercoribus habeatur; licet in totum negare nolim, per vehementiorem intestini coli spasmus quippiam ex eo putridi liquaminis ad tenuia conscendere & ibi contenta inquinare possit.

OBSERVATIO IV.

Passio iliaca in infante ex terrore nutricis & dato auro fulmin.

Infans puer, unius anni, lac adhuc ex mammis sugens, ex terrore nutricis, continuo ejulatu ac clamore noctem insomnem degebat, absque dubio ventris torminibus, quæ parca alvus & viridescentes atque coagulataæ fæces denunciabant, per duos dies & noctes imo ultra excruciat. Medicus ordinarius, cum ex clysterum applicatione & usu pulveris laxantis nullum conspiceret levamen, duo auri fulminantis grana cum pulvere absorbente permixta præbere decrevit. Inde vero nihil secutum levaminis, ut potius sub majori alvi clausura, vomitus & quidem viridescentes insculti fuerint; quibus demum convulsiones epilepticæ jungebantur & mors. Concessa à parentibus, ad petrum meum, abdominis apertione, cui etiam medicus ordinarius interfuit, offendimus in medio ileo, mutuum ad articulum digiti, intestini ingressum. Supra quem tenuia intestina ileon, jejunum, imo ventriculus, in quo subviridescens putridus humor inventus, flatibus valde erant turgida.

Epicrisis.

Graves & ut plurimum funestæ, quæ per animi affectus inque primis terrorem, à nutricibus in infantes derivantur, sunt afflictiones. Horum enim ea est indoles, ut pernitiæ vim, maxime in intestina tanquam partes valde nervosas exerant, quarum tonum & motum penitus subvertendo & pene infringendo, ventris tormina, alvi constipationem, convulsiones & epilepsiam quam facile accersunt. Quibus infantum morbis ordinario fere dejectiones virides conjunguntur, non aliam ob rationem, quam quod retenta excrementa acidam corrosivam ob moram induant naturam, ut bilis permixta inde viridem colorem, non secus ac fieri solet, quando spiritus nitri cum bile miscetur, contrahant. Uti vero aurum fulminans vel mercurialis profapiæ medicamentum, ab admixtis salibus valde corroden-tem & virulentam indolem acquirit, ita summo-pere cavendum est, ne infantibus tenerioribus, præsertim si acrium humorum copia obfessa sunt intestina, ejusmodi medicamenta porrigamus. Illa involutio quæ in conspectum venit ilei intestini, ab atrocibus torminibus & spasticis intestinorum contorsionibus absque omni fuit dubio oborta.

OBSERVATIO V.

Honoratior foemina, quadraginta & aliquot annorum, animi in affectus valde proni, corporis gracilioris, vitam sine motu amans quietam, venæ sectionem ab aliquot annis, circa tempora æquinoctialia consuetam, vere præteriti anni intermisit, purgans vero infusum, quo post sanguinis missionem circa hæc etiam tempora subinde fuerat usa, per tres dies usurpavit. Interea vehementiori commovetur iræ affectu, quam inappetentia, virium languor ac artuum tremor sequebatur; alvus quamvis esset obstructa, nihilo minus ad eam exonerandam ægra sæpius sollicitabatur. Mox acerbis in regione hypogastrica dolores & tormina, cum præcordiorum angustia & crebra flatuum per os eructatione, perſentiebat. Ego accersitus, ad alvum referendam, clysterem ordinavi emollientem, cujus tantum levis portio fuit admissa. Interne ad flatus discutiendos, liquorem meum mineralem anodynum cum essentia corticum aurantiorum bene præparata æquali miscui pondere & per intervalla præbui. Externe lintheum aqua Reginæ Hungariæ & balsamo nostro vitæ ebrium abdomini applicari jubebam. Sedatis doloribus ægra quievit & cœnavit; clausa vero permansit alvus. Sequenti ego die rursus vocatus sum, & tum dolores patiebatur prioribus longe acutiores & sæviora tormina, cum ingenti abdominis inflatione, umbilici retractione, extremorum frigore & continuo ad vomendum conatu. Tum mihi aperiebat, quod ex laborioso partu, ante multos jam annos, in inguine sinistro contraxerit tumorem, qui sine singulari sanitatis incommodo modo prodiret modo regrediretur; nunc vero longe major & valde durus sine regressu persisteret. Et quoniam nobilissima patiens omnia quæ ore assumserat vomitu reddebat, iliacum malum imminere non sine ratione judicavi. Prima itaque & princeps, cum statum animadverterem plethoricum, fuit intentio, inflammationem, qua nihil sane in hoc affectu est perniciosius, avertere. Ad aliquot igitur uncias sanguinem

Dolor & spasmus ilei in foemina plethorica & herniosa, ex ira vehementi.

guinem è vena pedis detrahi juffi. Dein ad alvum ante omnia referendam medendi confilium direxi : fed quoniam ob firmam claufuram , clyfterem non admitteret , decrevi ut fucceffive leni fiphunculo aliquot unciae olei raparum & chamomillae cocti immitterentur , quo poftea intestino recto relaxato , eo facilius clyfteres infundi poffint ; quod etiam confecuti fumus , & duo applicati fuerunt , fed nihil educebant. Igitur quum praefatae afflictiones , vomitus , fingultus , inquietudo , vigilia , anxietas cum extremorum frigore perfisterent ; vifum mihi fuit , fingulis bi-horiis , clyfterem ex fola pifana , oleo olivarum & fyrupo dialtheae FERNELII infundere & ad potum aquam fontanam puram frigidam , aqua menthae correctam , cujus librae falis abfynthii drachmam unam & fucci citri unciam femis adjeci , commendare : abdomine cum linimento ex axungia humana , camphora , fpermate ceti , & oleo hyofcyami quod constabat , calide inuncto. Poft fex clyfteres injectos , flatus fecefferunt copiofi : quibus continuatis , in balneum aquae dulcis agram dimitti jubebam. Paulo poft egreffa , alvum intra horam ter deponebat. Continuatum fuit balneum , & interne infufum mannatum cum aqua fceniculi , addito cremore tartari & nitro antimoniato propinatam : ita ingens mucidae , craffae & liquidae biliofae materiae copia alvo fuit edueta. Sequebatur hinc ftatim fingulorum pathematum remiffio , largusque fudor cum virium & pulfus augmento , quem promovere , exhibita mixtura fudorifera , ex tinctura antimonii , liquore anodyno minerali & fpiritu tartari compofita , ftudui. Sic permolefta haec affectio , Divinae benignitatis adjutorio feliciter fuit depulfa.

Epicriftis.

Ex praefata hiftoria id animadvertere licet , herniam , quanquam per longum tempus fine valetudinis incommodo geri poffit , nunquam tamen tutam , fed formidandam effe. Hoc in cafu ad iliaci morbi genefin , plethoricus ftatus , affumtum purgans & demum fupervenienti gravi irae affectus fymbolum fuum contulerunt : utpote quae omnia nerveae intestinorum fubftantiae funt infenfiffima , naturalem & placidum fibrarum intestinalium verfus inferiora tendentem motum pervertendo & invertendo ; quod ex flatuum & excrementorum pertinaci intra intestina retentione & inde pullulantibus ceteris fymptomatibus judicandum eft. Sanguinis miffio , quam tantopere ceu fummum hujus affectus remedium veteres , ut HIPPOCRATES , CORNELIUS CELSUS & CAELIUS AURELIANUS , laudarunt , in hoc cafu fumme proficua ac neceffaria fuit. Quoniam vero ob fpafmum vehementem , intra intestina craffa confidentem , fuperiora fummo cum dolore inflantur , rationi utique confentaneum eft , hanc stricturam tollere : quod omnium optime fieri poteft , per oleofa humida in magna copia injecta , ut strictae inde fibrae flaccidae & relaxatae evadant. Placuit mihi praeter ceteris cura quam CELSUS *Lib. IV. cap. XIII.* his verbis proponit. *Si dolor non quiescit , etiam in alvum , ex parte inferiore , tres aut quatuor cyathos calidi olei dare convenit.* Et balnei ufum HIPPOCRATES ad felicem curam mirifice commendat. Cura absoluta primum quod huic foeminae confilium dedi , fuit , ut exquisi-

tam femper habeat vitae & victus rationem , atque ab omni animi affectu fe temperet : multiplici enim experientia edoctus fum , his neglectis , malum quam promte recidivare ; id quod praeter HIPPOCRATEM ipse CELSUS loco citato notavit : *facile , inquit , id malum redire confuevit , & cum frigus subit , five aliqua jaectatio , nifi bene jam confirmatis intestinis , revertitur.*

OBSERVATIO VI.

Berolini cum olim agerem , vir in Regiis servitiis constitutus , quadraginta & ultra annorum , gracilioris corporis habitus & naturae cholericæ , ingenti femper gaudebat appetitu & varii generis eduliis ventrem quotidie infarciebat , nec jejunii patiens , vinum liberalius quoque hauriebat ; alvus ordinario pigra erat & obftructa ; vomitus subinde pituitosi liquaminis matutino praesertim tempore experiebatur. Posteaquam in solennitate quadam , fupra modum , placentas , carnes affatas , acetaria , condita mala cydonia devorasset , & alvus per aliquot dies claufa nihil egeffisset , male habuit. Venter enim durus , renitens , rugitibus & borborygmis hinc inde difcurrentibus turgidus erat , atque continua ad vomendum aderat proclivitas. Opera medicaftri ufus pilulas ad alvum aperiendam fumfit purgantes ; fed fine fucceffu. Augebantur potius anxietates circa praecordia cum continua naufea. Rurfus ab eodem fumfit pulverem purgantem , qui tamen nullam movebat fedem , fed decumbens omnia quae affumferat ore rejiciebat. Suppositoria & clyfteres omni effectu carebant. Uxor vehementer & anxie à me petiit confilium. Ego accedens agram per decem dies nihil per alvum emisiffe deprehendi. Venter contactu erat durus , inflatus , & magna inquietudo atque anxietas , vigilia quoque affligebant. Bono vero cum DEO hac methodo miser patiens eft fanatus. Primum ad vomitionem componendam praescripsi mixturam Riverianam , quae componitur , ex aquae communis libra , fucci citri uncia & falis abfynthii drachma , quam per vices affumfit. Dein agram chirurgo commiffi , cui injunxi , ut clyfteres ex decocto emolliente , in quo fufficiens faponis Veneti quantitas foluta , fingulis horis ano infunderet , & poftea in balneum ex herbis emollientibus & femine lini paratum agram dimitteret. Ventri quoque applicare linimentum ex oleis expreffis , atque interne , cum juscule oleum amygdalarum dulcium , addito pauxillo vini , praebere juffi : quae cura alternis vicibus aliquoties fuit repetita , adeo felici cum fucceffu , ut brevi temporis progressu ingens copia faecum conglobatarum duriffimarum & pituitae glutinosae , quibus poftea fuccefferunt liquidiores , multis fedibus intra duos dies fuerit edueta ; quam excretionem , femel aperta alvo , feri lactis potu per vices fumto , in cujus menfura cremoris tartari uncia dimidia & mannæ electae unciae tres folutae erant , promovendam decrevi : & ita per DEI gratiam à gravi malo aeger fuit liberatus.

Epicriftis.

A fola diutina faecum alvinarum retentione , iliacum morbum fubnafci poffe , praefenti edocemur hiftoria ; ex qua animadvertere etiam licet , tali in cafu purgantibus praesertim validioribus intro

*Iliacae passio
ex ingluvie
& sumto
valido pur-
gante.*

intro sumtis nihil esse perniciosius, utpote quæ frustra plane dantur, cum summo potius detrimento: nam dum fortiter stimulando intestina, materiam immobilem & fæces aridas per inferiora movere & deturbare nequeunt, invertendo potius peristalticum intestinale motum, malum reddunt deterius, atque anxietates & vomitus augent. Balnea vero temperata, dum externe, & clysteres interne, fibras tensas emolliunt, fæces dissolvunt & colliquant, non omis- sis internis congruis laxantibus, convenientissimum præbent auxilium; quia ipsam causam & originem mali expugnandi efficaciam satis præstabilem possident.

OBSERVATIO VII.

*Passio ilia-
ci ex ver-
mibus su-
nesta.*

Puer septem annorum spongiosioris habitus & coloris albidioris, dulcibus & fructibus horæis nimium usus, carnes ac panem supra modum appetens, qui aliquot ante menses unum vel alterum alvo dimiserat lumbricum, in tormina ventris, alvi obstructionem & inquietudinem incidebat. Frustra applicari clysteres, & data fuerunt carminativa atque laxantia; augebantur potius cruciatus, assidui accedebant vomitus, & interdum per horam semi-mortuus in syncope miser infans jacebat. Fædos ex ore halitus & fæces reddidit: subsequiebantur singultus & epilepsia, tandem mors.

Epicrisis.

Minime dubitandum est, affectum hunc fuisse iliacum, à lumbricis vel in intestino vel ventriculo residentibus subortum. Uti vero hi arro- dendo & lancinando tunicas teneriorum intesti- norum nerveas, graves in universo nervorum systemate concitant passiones: ita etiam motum intestinorum peristalticum penitus subvertendi utique sufficienti vi ac facultate pollent. Veri- que omnino simillimum est, lumbricos in ven- triculo existentes hujus mali exitialis causam fuisse. Incidit mihi in confirmationem hujus rei hi- storia, quam ex relatione BEATIMEIBOMII habeo: Helmstadii studiosus, ante aliquot an- nos, supra umbilicum ferro vulneratus, conti- nuo vomere coepit primum cibos, dein mate- riam stercoris instar; sub finem secundi diei mor- tuus est. Vulnerata quidem intestina arbitratus medicus, sed sectio facta plane ostendebat, ven- triculum antrorsum & retrorsum esse læsum; tam late penetrante vulnere. Ex quo discimus, læso tantum ventriculo, salvis intestinis, totum posse intestinorum canalem inverti; nihil juvan- tibus suppositoriis & clysteribus. Alias in tali affectu, aqua cum mercurio vivo puro deco- cta, addita vini quarta parte, remedium nes- cio præstantius: hac enim & necantur vermes & alvus solvitur; sed tempestive, antequam ven- triculi & intestinorum tunicæ sint laceratæ, de- bet exhiberi.

CAPUT V.

*De intestinorum doloribus, atque in spe-
cie, de colica flatulenta & spas-
modica.*

THESES PATHOLOGICÆ.

§. I.

Inter graves generis nervosi afflictiones, non immerito referri debent vehementes dolores, qui intestina ceu partes valde nervosas & sen- siles motuque propulsorio præditas obsident, at- que per consensum alias etiam nervosi generis partes, in locis remotioribus consistentes, affi- ciendo, perniciosas subinde afflictiones pariunt.

*In dolore
intestino-
rum nervo-
se partes
patiuntur.*

§. II.

Quemadmodum tenuia & crassa intestina, ra- tione texturæ, capacitatis, functionis & situs dif- ferunt: ita etiam dolores, prout in iis sedem suam figunt, ratione vehementiæ, periculi & aliorum accedentium affectuum differunt.

*Ratione loci
& vehe-
mentia dif-
ferunt.*

§. VII.

Observamus longe acerbiores & acutiores oboriri dolores in tenuioribus quam in crassis: id quod luculenter validiora purgantia & ve- nena causticæ indolis testatum faciunt, cum tor- mina supra & infra umbilicum atque in medio etiam hujus compareant sævissima. Et hanc ob causam ab HIPPOCRATE in genere omnes intestinorum dolores, iliaci denominantur; nul- la facta in monumentis suis doloris colici men- tione: quum nostro tempore omnes fere qui in- testina obsident dolores, colici dicantur atque ha- beantur.

*In tenuiori-
bus acutio-
res sunt.*

§. IV.

Rectius itaque iliaci censendi erunt illi, qui medium graviter affligunt ventrem, sive spas- modice illum constringendo, sive vehementer inflando; quum contra colici illi obtineant, qui in hypochondrio dextro & sinistro hærent, & pressione ac distensione ingentes creant mole- stias. HOLLERIUS de morb. intern. Cap. XXXIX. ita coli dolorem descripsit: *insistit in certo loco instar infixi pali; subinde tamen vagus ad inguina, sinistrum & utrumque renem, sur- sum aliquando revolvitur, & locum mutat, ut sunt flexus intestini coli, quod relicto recto in sinistrum inguen divertit. Ascendit inde ad sinistrum re- nem ubi angustius est, quæ angustia & simul ibi occurrens flexura, causa est, ut hac in parte dolor sit intensior. Hinc ad splenem laxius intenditur, subitque hepar, atque aliquando in cystide fellis hæret; postremo in dextrum ileon descendit, ubi desinit in cæcum.*

*Quinam
dicuntur
iliaci? qui
colici?*

§. V.

Nos omnem intestinorum tractum pro subje- cto & sede dolorum agnoscimus, ita tamen, ut una ejus parte graviter affecta, totus nervosus canalis à faucibus ad podicem trahatur in con- sensum, sive rectius præternaturales motiones imo inversiones & læsiones motus peristaltici, reliquis omnibus communicentur, adeo ut si vehementior causa fuerit, etiam totum univer- si corporis systema nervosum gravius simul af- ficiatur.

*Totus inte-
stinorum
tractus
subiectum
colicæ præ-
bet.*

§. VI.

Affectiones & symptomata acerbiora, quæ intestini jejuni, ilci, coli, vel recti, ut apparet in hæmorrhoidibus cœcis, dolores comitantur vel subsequuntur, à spasm. partium nervosarum quam

*Symptoma-
ta.*

quam maxime oriuntur & sunt sequentia: horror, tremor partium externarum, sudor frigidus, virium omnium prostratio, inquietudo, corporis jactatio, summa anxietas & interna angustia, singultus, vomitus, alvus constipata, tenesmus, urinæ suppressio, spasmus vesicæ, febris, pulsus contractus, spirandi difficultas, quandoque delirium & convulsiones epilepticæ.

§. VII.

Ratio formalis est vel spasmus, vel nimia distensio.

Sicut ratio formalis sive proxima causa omnis doloris est nimis vehemens tunicarum & partium nervosarum distensio, distractio atque expansio, vel earundem validior & spastica contractio & coarctatio: ita etiam ab iisdem causis intestinorum proficiscitur dolor. Vel enim à flatibus retentis & occlusis, supra modum certi intestinorum tractus distenduntur & divelluntur, ut quasi continui solutionem moliantur; vel ab humore mordaci caustico intra intestina vel etiam in eorum substantia membranacea contento, spasmotica constrictione crispantur, coarctantur, cum valde molesta & sensibili passione: qua de causa etiam in scholis medicis distinctio inter dolorem intestinorum, sive colicam flatulentam & spasmoticam, adhuc viget & locum obtinet.

§. VIII.

Distinctio colica flatulenta.

In dolore tenuium flatulento, mire abdomen inflatur & turgescit; & tanta sæpius flatuum vis est, ut cutem ita distendat, ut dolor ipso tactu exacerbetur: neque exempla deficiunt, à vehementia flatuum herniam umbilicalem fuisse subortam. Dolores sunt acuti, alvus valde constipata, summa angustia, sique simul ventriculus inflatur, respiratio valde difficilis evadit, & eructationes cum levi levamine subsequuntur; accedunt cardialgicæ passiones & inanes vomendi conatus.

§. IX.

à colica spasmotica.

In colica sic dicta spasmotica & convulsiva, ventris arctior fit compressio & umbilici introrsum retractio, alvus est constipatissima, ut neque flatus transmittat, neque clysterem facile recipiat. Adest simul ingens in lumbis dolor, ipsumque peritoneum musculique abdominis violenter contrahuntur: extremorum adest refrigeratio, tremor, horror, pulsus durus & contractus, summa anxietas & quam facile animi deliquium supervenit.

§. X.

discrimen inter flatulentiam & colicam flatulentiam.

Nos hoc loco monendum ducimus, insignem esse differentiam inter flatulentiam intestinorum, & dolorem intestinorum flatulentum. Nam hic à sola atonia, motu & robore intestinorum labefactato, in senibus potissimum & qui cibis inflantibus frigidis nimium utuntur, item in corporibus à prægresso morbo labefactatis nascitur. Illa vero nunquam sine labe intestinorum est, neque tam facile tollitur, & graviora habet accidentia, cum hic per ructus, per flatus & alvi solutionem facile terminetur.

§. XI.

inter dolorem nephriticum & colicum.

Illud quoque monitum non est prætereundum, dolorem nephriticum & qui à calculo renali fit, non confundendum esse cum eo cujus causa in ipsis intestinis residet: de qua confusione jam olim à GALENO & ejus affectis instituta fuit

Frid. Hoffmanni Oper. Tom. II.

querela. Utut vero ratione symptomatum & effectuum multum inter se convenient; in eorum tamen est differentia posita, quod dolor, si est à calculo, in lumbis fixior, pertinacior & acutior sit quam in colica spasmotica; in hac alvus longe constipatior & fortius occlusa ac in dolore nephritico: dein quod, alvo per enema soluta, remissio doloris colici fiat, quod non contingit in nephritide calculosa: ad urinam quoque emittendam major in calculo adest stimulus, eaque tenuis, in paroxysmo aquosa & subinde arenosa apparet. Et postremo, dolor secundum ureterum tractum successive protenditur: id quod in intestinorum non observatur doloribus. Longe vero facilius est in iis qui semel vel bis dolore ex calculo laborarunt, notas ejus characteristicas discernere.

§. XII.

In theoria vero dolorum intestinalium id maxime attendendum venit, quod horum causa, à qua oriuntur, longe aliam sedem fixam habeat, quam ubi eorum exacerbatio percipitur. Ita nunquam fit inflatio intestini, nisi in alia parte vel tractu, cujusdam intestini strictura spastica, angustia vel etiam obstructio ab excrementis aut alio humore tenaci præcedat vel conjuncta sit: siquidem flatus in intestinorum canale, propter calorem & humorem aqueum semper præsentem, nunquam defunt, sed nullam creant molestiam, quia liberum habent spatium & æqualiter se expandere possunt; simul ac vero obice posito, non possunt transmitti, & intercipiuntur, sed in certo loco coacervantur, occluduntur & quasi incarcerantur, tunc magna vi expansiva agunt in intestinorum tunicas, eas supra modum distendendo & distrahendo.

Causa efficiens in alia parte ac dolens hæret.

§. XIII.

Quandocunque in tenuiori intestini quadam parte, sicut in hernia scrotali, vel etiam à vermibus aut foecibus induratis evenit, spasmus, occlusio vel nimia coarctatio producitur, vel etiam quando in principio coli in dextro latere excrementorum copia stagnat, nec loco movetur, ingens & acerbè dolorifica abdominis inflatio, supra, infra umbilicum & in medio ejus, oritur.

Quid fiat, si tenuis spasmus efficiatur.

§. XIV.

Quod si vero intestinum rectum vel inferior coli tractus vehementem patitur spasmus, mire inflatur coli magna flexura in sinistro hypochondrio versus splenem, una cum illo, qui infra ventriculum tractus protenditur & juxta hepatis positus est. Quando autem, quod frequentius in malo sic dicto hypochondriaco & hysterico occurrit, principium jejuni, vel finis duodeni spastice afficitur, ob vicinum & supra illud decurrentem ramum superiorem mesentericum & intercostalem, ingens in lumbis oritur dolor, ipsumque duodenum & ventriculus flatibus mire implentur, diaphragmatis quoque liber motus impeditur; unde ingens illa præcordiorum anxietas, spirandique angustia, & ructus cum impetu, frequenter & fere sine fine, crumpunt. Non semel ego sed aliquoties observavi in colica spasmotica inferiorem coli partem funis instar contortam & convolutam, tenue vero intestinum ad crassitiem brachii expansum fuisse repertum.

si rectum aut colon

vel principium jejuni

§. XV.

*Colica sub-
jectum.*

Intestinorum dolores adeo frequentes sunt, ut nulla ætas, nullus sexus, nullus corporis habitus & nullum temperamentum ab iis sit immune. Infestant autem quam maxime infantes, foeminas, atque etiam senes, & quicunque tenerioris, debilioris & sensibilibioris sunt naturæ.

§. XVI.

*Causa &
generatio
colica fla-
tulentiæ.*

Acerbæ & torminosæ hæ intestinorum affectiones diversi generis agnoscunt causas, & pro harum differenti natura, genio & vehementia, variant symptomata, variat etiam & intenditur subinde periculum. Frequentissimam vero alvi scybala retenta & indurata, in intestinis crassis, interdum in tenuioribus hærentia, causam præbent. Atque multum huc cruditarum acido-vilcidarum copia, cibi ficci, aridi, adstringentes, diuturnior somnus & vitæ genus motus ac laboris expers contribuunt. Et quandocunque sub pigra & obstructa alvo, cibi dulces, fermentescibiles, carnes pingues præsertim vervecinæ, cum potu frigido, vel refrigerationes pedum atque abdominis accedunt, inflatio abdominis intenditur & dolor acerbior fit. Atque in eo colicæ potissimum flatulentæ, & quæ veteribus à causa frigida producta dicitur, ratio & genius versatur: cujus generatio & crebra invasio imbecillitatem & atoniam intestinorum eorumque toni ac roboris defectionem indicat atque supponit; hinc obesitas, phlegmaticis, senibus & debilibus admodum familiaris est, præsertim si frigus improvide ad pedes, dorsum & ventrem admittatur.

§. XVII.

biliosæ.

Alia colicæ species est biliosa, quæ secundum veteres, à causa calida subnascitur, atque ab humore bilioso, acri, corrupto, in intestinis tenuibus præsertim duodeno copiosius collecto & stagnante ortum suum trahit, à gravi frequentius ira, præsertim in corporibus calidæ & siccæ constitutionis, sub æstate fervida & ætate juvenili, vel virili, aut ab assumtis potibus nimis spirituosus & calidis proficiscitur, majorique tormentorum, post frigidum sumtum potum vel transpirationem prohibitam, sese prodit sævitia. Symptomata quæ hanc insequuntur potissima sunt vox rauca, cardialgia, continuum ciborum fastidium, vomitus materiæ biliosæ porraceæ, singultus, intemperies æstuosa & febriculosa, inquietudo, sitis intensa, os amaricans, urina pauca & rufa, cui quandoque alvi dejectio biliosa & crebra succedit.

§. XVIII.

in infantibus lactantibus.

Datur quoque valde atrox & torminosus intestinorum dolor in infantibus, à lacte stagnante per miscelam bilis valde corrupto & corrosivo reddito, unde fæces plerumque secedunt virides, paucae & coagulatae, & ab arrofone tunicarum intestinalium subinde convulsiones epilepticæ lethiferæ tragœdiam ludunt.

§. XIX.

in pueris.

Pueris valde familiaris & frequens est colica, quæ fit à vermibus si convoluti in intestino ileo hærent, cui sæpe febris continua & syncope, ventrisque lancinatio ac si terebra perforeretur, jungitur. Qualia exempla, apud ZACUT. LUSDANUM *Prax. admir. Lib. II. obs. 33.* &

HILDANUM *cent. I. obs. 57.* legi atque conferri possunt.

§. XX.

Neque puerperæ ab immanibus abdominis doloribus immunes degunt, præsertim quando lochiorum fluxus deficit, & post partum abdomen non decenter ligatur, vel partium ventris accedit refrigeratio.

§. XXI.

Frequentissimum etiam hypochondriacorum symptoma est atrox colicus dolor, isque maxime occupat latera, & vel in dextro hypochondrio infra sub ossæ ilii, ubi principium coli flatibus & stercorebus infarctum est, vel sub hepate in flexura, quam colon facit, flatibus vel scybalis distenta, maxime omnium vero in sinistro hypochondrio sub diaphragmate & liene, ob maximam coli flexuram, tensivus consistit, cum alvi obstipatione, urinæ difficultate, anxietate, angustia, interna inquietudine viriumque dejectione junctus. Nam, quia in sic dicto hypochondriaco morbo valde læsus & vitatus est intestinorum peristalticus motus, nec flatus, nec stercorea versus inferiora rite moventur & descendunt; hinc in flexuris maxime intestinorum, ubi diminuta est vis motrix contractilis & elastica, illa morantur, stagnant, & graves ac dolorificas ejusmodi distensiones pariunt.

§. XXII.

Alia adhuc ratio & natura est eorum dolorum intestina torquentium, qui fiunt à materia intra tunicas intestinales hærente, fero videlicet impuro & acri. Et talis in corporibus scorbuticis ac purpura scorbutica vel scabie infectis, in arthriticis quoque & podagricis sæpe numero observatur; quando vitiosa materia, deficiente naturæ robore, retinetur, nec ad extremas partes transmittitur, vel etiam ab iisdem, ob varias externas causas, intra corpus per metastasin transponitur. Et hæc species colicæ spasminis maxime se exerens, ad spasmodico-convulsivam spectat & sæva conjuncta habet symptomata, difficilis etiam est curationis, ac inflammationem minatur, neque facile conquiescit, nisi relegata materia ad extremas partes fuerit.

§. XXIII.

Neque prætereunda erit gravior & identidem à sanguine spasmodico-convulsiva colica, à nonnullis sanguinea vocari solita, à sanguine nimium intra intestinorum, coli præsertim tunicas congesto, stagnante & sensiles nerveas tunicas valde distendente. Et hæc fieri solet in foeminis à mensium fluxu suppresso: tunc hysterica vocatur; vel etiam à consueto hæmorrhoidum fluxu deficiente, vel violenter cohibito aut suppresso: tunc recte dici solet hæmorrhoidalis. Quæ sicut sæpius in praxi occurrit, ita etiam ejus causa medicis ut plurimum incognita est. Hac sæpissime homines boni, robusti & sanguinei, habitus eufarci, qui lautius & liberius, sub meri præsertim potu, degunt, otiosam colentes vitam, afficiuntur. Cujus colicæ sanguineæ multa exempla & observationes Doctissimus CAROLUS PISO in egregio tract. de morbis à colluvie serosa oriundis vid. *Sect. IV. cap. II.* posteritati reliquit.

§. XXIV.

Immanis quoque est illa colicæ spasmodicæ *Colica sanguinea.*

species, quæ à fumis saturninis, ore haustis & cum saliva deglutitis ortum suum ducit, atque iis qui mineras Saturni igne tractant & calcinant, vel plumbum ab argento in docimasticis furnis separant, ut in Hercinia fit, familiarissima est, vulgo dicitur *die Hütten-Ratze*. Dolor est in intestinis intolerabilis, alvus constipatissima, nec clysteribus neque laxantibus facile cedit, umbilici fit introrsum retractio, summa adest inquietudo & artuum tractio, nausea & assiduus ad vomendum conatus, in paresin vel veram paralyfin vel asthma spasmodicum quam facile terminatur, ac diu & misere sæpius ægrotantes torquet. Eiusdem generis dolori, figuli qui vasa figulina vitro ex plumbo obducunt, vulgo *glasiren*, obnoxii sunt. Testantur quoque observationes practicæ, quod medicamenta quæ Saturnus ingreditur, ut tinctura antiphthifica *Garmanni* vel magisterium Saturni, quibus medicastri in gonorrhœa supprimenda frequentius uti solent, invincibilem alvi stricturam cum immanibus tormentis stipatam relinquant. Quam gravia & periculosa valetudinis damna atque incommoda, à vinis acidis lithargyrio immisso dulcificatis, ante aliquot annos in Suevia oborta fuerint, id exquisite & docte in Dissertatione, Præside *Clar. ZELLERO* habita, *de noxa vini lithargyrio mangonifati*, est deductum. Inde enim non modo dolores stomachi, abdominis, sinistri hypochondrii cum forti alvi strictura, item colica convulsiva, sed & asthma convulsivum oborta fuere.

§. XXV.

Colica endemia
spasmodica.

Restat adhuc alia colicæ species, quæ rectius endemia vocari potest, quia certis regionibus familiaris admodum est: ita Moraviæ, Austriæ, atque Hungariæ incolæ atrocissimo colico dolore spasmodico & convulsivo creberrime devexantur. Cujus rei nulla mihi alia suppetit ratio ac causa, quam vinorum in hisce regionibus valde spirituosorum largior potus & abusus, præsertim si corporis accedat refrigeratio; ex quo fit, ut sanguis nimium ebulliens, & in concitationem motum adactus, si neque per naturalem, neque per artificialem evacuationem invenerit exitum, in intestina incumbat & ibi accumulatus dira symptomata inferat. Cæterum hæc quoque jure referri ad colicam sanguineam & spasmodicam meretur.

§. XXVI.

Colica ex morbis prægressis.

Dantur etiam atroces colici dolores, qui alios morbos prægressos excipiunt: ita extant passim observationes, & nota mihi quoque sunt exempla, ubi ex diarrhœa ab adstringentibus cito suppressa, item post dysenteriam, ab incauta diætâ, & alimentis instantibus & fermentescibilibus copiose admissis, graves & exitiales ventris dolores successerunt. A cydoniato largiori manu in diarrhœa exhibito, sævissimos ventris dolores atque torsiones, ad stercoris usque vomitiones lethales vidit *FERNELIUS lib. VI. Pathol. c. X.* quod identidem à fortioribus purgantibus haud raro observavimus. Neque iis qui in artis exercitio frequentius versantur, obscurum esse poterit, post intermittentes, tertianam, quartanam, perperam curatas, prava præsertim diætâ accedente, sævissima subinde in abdomine secuta fuisse tormenta: testante illud *BINNIN-GERO cent. III. obs. 34. cent. IV. obs. 41. it. lib. IV. obs. 8. & 9.* quibus submovendis non tam

Frid. Hoffmanni Oper. Tom. II.

facilis conceditur locus; siquidem in modo memoratis morbis ingentem labem & vitium jam contraxit intestinorum canalis, ejusque functio, quæ maxima ex parte, à convenienti, ordinata & successiva constrictione & dilatatione, sive peristaltica motione dependet, adeo læsa ac labefactata est, ut dein multo facilius vitiosorum humorum colluvies ibi consistere, & causam ejusmodi & aliorum pravorum affectuum possit subministrare.

§. XXVII.

Porro colica spasmodica, frequens imo assiduam fere aliorum affectuum & dolorum esse solet symptoma: sic nihil frequentius contingit, quam quod dolori, ex calculo renum per ureteres descendente & ad vesicam iter faciente, gravis sæpius abdominis cruciatus, cardialgia, nausea & vomitio adjungatur: idque maxime fit ob consensum harum partium, quam nervus intercostalis hisce communis præstat. Qua de causa nonnulli medicorum colicum dolorem cum calculoso sæpe confundere, nec rite discernere solent: cujus jam supra facta mentio. Observamus quoque in praxi, à dentitione infantum dolorifica, convulsivam colicam cum alvi forti adstrictione, quam demum epilepsia sequitur, subortam; idque tantum ob mirificum illum nervosarum partium cum aliis consensum.

Symptomatica, à calculo renali.

§. XXVIII.

A biliario calculo, in cystide fellea detento, à calculo felleo, ejus ductum lancinante, ventris dolorem subortum, præter alia, defunctorum dissectiones testatum fecerunt. Ita in colicorum cadaveribus vesicam felleam lapidibus refertam *BALLONIUS lib. II. epidem. pag. 253.* item *M. N. C. ann. VI. & VII. observ. 220.* fidem faciunt. Et *HORSTIUS lib. IV. obs. 47.* colicæ gravissimæ, *CCXXXIII.* calculorum mediocri magnitudinis è folliculo fellis rejectione sedatæ meminuit. Quo loco non possum non peculiarem doloris colici causam insinuare, quam *Clar. NICOL. TULPIUS* disertis verbis in *Observ. Lib. II. c. 37.* prodidit, ita habentibus: *Colicus dolor sæpissime fit à bile flava, innatante huic intestino, quæ sæpius ab anatomicis cum animadvertatur, verisimile est eam transfudare paulatim per tunicas folliculi fellis, huic intestino quam aliis vicinioris. Qua propter male sibi consulunt illi, qui præ nimio studio validius comprimunt jecur: exprimit quippe prona hæc flexi corporis incurvatio bilem.*

§. XXIX.

Neque absolum sed verisimile potius videtur, ab acri humore tunicas intestinales externe arrodente, dolores in toto intestinorum volumine concitare posse. Quam sententiam clariorem faciunt observationes, quibus per sectionem defunctorum constat, ex abscessu mesenterii rupto, purulentam materiam intestinis inhærescentem ante mortem sævos dolores & tormenta produxisse. Quales *WILLISIUS*, *BENIVENIUS*, & *WARTHONUS* scriptis suis passim insinuant.

ab erosione intestinum externam.

§. XXX.

Præter dolores autem intestinorum, qui acutioris sunt indolis & vel in salutem vel in mortem brevi terminantur, dantur etiam chronici qui sunt generis, & diutius insistant, ac per

Colica chronica.

multas hebdomades imo per anni aliquando spatium excruciant, licet per intervalla suas habent remissiones & exacerbationes. Horum post mortem demum fuit inventa causa, quæ in eo constitit, quod in quadam parte intestinum fortiter angustatum, constrictum, scirrhum vel callosum fuerit deprehensum: quare in totum motus intestinorum æqualis destruitur. Ita KERCKRINGIUS *Spicileg. Anatom. Obs.* 50. in puero tormentis intestinorum qui obierat, cuncta flatu distenta, pylorum vero adeo exiguo foramine pervium vidit, ut flatum vix transmitteret; duodeni vero atque recti parietes subfidentes, conglutinatos & quasi filo constrictos, ut nullus flatus ea perrumpere potuerit, invenit. Scirrhum coli HOLLERIUS *de morb. intern. Lib. I. cap. 41.* & RHODIUS *cent. II. obs. 76.* describunt. A callo quoque in intestinis colicam productam BENIVENIUS conspexit: vid. *Lib. V. de abdit. cap. 30. & 34.* Intestinorum vero coalitum post dysenteriam RHODIUS *cent. II. obs. 77. it. 82.* annotavit; de qua re BARTHOLINUS *cent. VI. obs. 38. & obs. 2. it. M. N.C. an. 1672.* conferri possunt. Angustati quoque intestini & cartilagine obducti meminit BALLONIUS *epidem. Lib. I. p. 58.* Præterea de angustia intestinorum, perdocta dissertatio Clariss. WALTHERI *Lipsiensium Prof. lectu dignissima est.* Sæpius quoque in sectionibus cadaverum colica spasmodica demortuorum implicatio omenti observatur, manifesto documento, vigere etiam in hoc motum quendam spasticum. Ab hepate male affecto abdominis dolores chronicos obortos non raro vidimus, ita ut illud albicans induratum fuerit inventum, & cystis fellea calculis repleta. Quandoque enim liberior sanguinis per hepar transitus impeditur, à biliosis fordibus non bene depuratur, & impetus quoque ejus ad intestina ruit; ubi ob copiam & nimiam distensionem vasorum tardius progrediens, stagnationes dolorificas in intestinorum membranis efficit.

§. XXXI.

Anatome
colica de-
functorum.

Ceterum, qui subito ex acuto intestinorum dolore pereunt, in iis plerumque intestina inflammata & sphacelosa reperiuntur. Ita SPIGELIUS in *libr. de Semiteriana*, in dissectis hac febre extinctorum cadaveribus, qui ante immani dolore quasi colico fuerant excruciat, intestina inflammata & erysipelatosa detexit: & adjicit, his in casibus phlebotomiam omittere & purgationem, ut vulgus solet, substituere nefas esse. Sphacelatum quoque intestinum rectum, ab hæmorrhoidibus cœcis male curatis, nos vidimus.

§. XXXII.

Quando
dolores sa-
lutariter
solvuntur.

Salutariter vero sæpe numero horum dolorum solvi solet atrociam, per sudorem copiose obortum, vel etiam per hæmorrhagiam narium, aut hæmorrhoidum fluxum supervenientem, item per expulsionem purpuræ ad extimas partes, aut per arthritidem & podagram succedentem, vel macularum scorbuticarum proventum. Crebra enim & perquam notatu digna hinc inde reperiuntur exempla, ubi ex arthritide repulsa factæ fuerunt pertinaces colicæ, qua redeunte ubi illæ cessarunt. Sic colicæ sæpius biliosæ diarrhœa superveniente solvuntur, qua putrida & nigra materia evacuatur. Spectat huc quoque insignis locus apud HIPPOCRATEM *libr. de hum. §. 11. cui*

intestinum in dextra parte dolebat & articulari morbo correptus, quietior erat. Neque parum salutis promittitur, si dolores locum atque sedem mutaverint.

§. XXXIII.

Minus salutariter, colicæ inprimis spasmodicæ & convulsivæ, viribus plane dejectis & dissipatis, ac sudore, colliquativo suborto, vel in veram paralyfin vel in notham sive paresin, vel in manuum & pedum stuporem terminantur; vel etiam si atrocior dolor urget, epilepsia, convulsiones, vel aliæ graves capitis affectiones, ut lethargus, carus, apoplexia finem vitæ faciunt. Multum vero periculi alit colica sive convulsiva sive biliosa, quæ cum actuali invadit horrore & atrocius affligit: nam designat inflammationem, quam, si non succurramus, sphacelus excipit.

Quando
minus sa-
lutariter
termina-
tur.

CURATIO CUM METHODO MEDENDI.

§. I.

Sicut ex antecedentibus plenius perspicere ac animadvertere licet, causas dirum hunc affectum excitantes mirum variare: ita nunc identidem colligi poterit, medendi methodum, pro differentia causarum quæ intestinorum dolores foveant, longe aliam atque aliam esse instituendam.

Medendi
methodus,
pro differ-
entia cau-
sarum va-
riarum.

§. II.

Quando itaque consueto hæmorrhoidum vel mensium fluxu suppresso, in corporibus præsertim sanguine abundantibus, immanis abdomen infestat dolor, cum gravi æstu ac pulsu citatiore junctus, venæ sectio in pede instituta, clysmata emollientia, pulveres antispasmodici leniter nitrosi & cinnabarini momento castorei remixti, nec non liquor noster anodynus mineralis, additis essentia castorei & spiritu salis ammoniaci vinosi, neque minus pediluvia, dolorum sævitiam mirifice mitigando, omne curationis in ipso paroxysmo absolvunt punctum. Extra vero illud tempus, & præservationis gratia laborandum est, ut mensium in sceminis & hæmorrhoidum in viris solennis restituatur fluxio; quo maxime omnium faciunt conveniens acidularum, thermarum, balneorumque vernali cumprimis tempore susceptus usus, præter hunc, pediluvia, motus & exercitatio corporis debito modo instituta, diætæ commoda, pilulæ balsamicæ, atque infusa theiformia ex herbis partim carminativis, partim uterinis composita erunt adhibenda.

Quid
agendum,
si à fluxu
sanguineo
critico sup-
presso do-
lor.

§. III.

Quando dolor intestinorum à copia bilis effera & causticæ suam mutuatur causam & originem, eadem prope præcedente §. memorata remedia proficiunt. Palmam vero inter alia, pulvis nitrosus, una vel altera gutta olei millefolii veri destillati commixtus, ex aquæ florum chamomillæ vulgaris unciis III. vel IV. propinatus, quæ gravior adhuc & virtute præstantior redditur, adjunctione syrupi papaveris albi & spiritus nitri dulcis rite præparati, jure sibi vindicat: sicut autem hæc aqua, in omni abdominis dolore vehiculum remediorum præbet convenientissimum; ita multo felicius operationem suam exerit, si ejus destillatio cum cerevisia triticea instituitur. Præstat quoque in hac colicæ specie medicamenta in vehiculo subfrigido quam calido exhibere, & abstinere à decoctis & infusis calidioribus pariter à regi-

Si à bile co-
piosa cau-
stica.

regimine sudorifero & balneis calidis : eo quod hac ratione biliosus ferocior redditur humor, & partes nervosas intimius penetrat. Hinc observationibus practicis edocemur, hujusmodi in casu, solum aquæ frigida potum, quo ipse G A L E NUS in colica biliosa usus est, optime profuisse atque malum depulisse. Majorem autem hoc monitum attentionem meretur, si ex ira suscitata fuerit torminosa affectio.

§. IV.

Si à flatibus vel excrementis incarceratis.

Si fixus & tensivus in dextro vel sinistro hypochondrio vel infra ventriculum hæserit dolor, certum indicium est, flatus vel excrementa coli flexuris incarcerata hanc scenam ludere. Tunc præcipuum curationis in eo positum est momentum, ut enemata emolliendi, discutiendi & roborandi virtute prædita injiciantur; non omissis externis linimentis carminativis & emollientibus, parti dolenti applicandis. Aperta sic alvo, flatibusque discussis atque propulsis, pilulæ nostræ balsamicæ ad Becheri exemplar compositæ, interposito sale digestivo, vel decocto mannato, cremore vel terra foliata tartari, & uno vel altero cochleare oleo amygdalarum dulcium permixto, porrigi debent.

§. V.

Si à spasticâ recti & coli strictione.

Ubi rectum & intestini coli portio, in sinistro præsertim latere, fortiori spastica strictura afficitur, ita ut alvus nec flatui nec excrementis exitum concedat, neque clyster commodo ano immitti queat; tunc totum abdomen oleis calidis & pinguibus fovendum est; v. g. oleo chamomillæ, anethi, rutæ, coctis, pinguedine taxi, canis, vulpis, castorei, humana, quæ etiam per clysterem ad spasticam illam stricturam relaxandam ano infundi possunt: quo facto, infusum mannatum, quod supra memoravimus, erit offerendum.

§. VI.

In colica flatulenta quid conferat.

Colica flatulenta ex atonia & imbecillitate ventriculi & intestinorum, à cibis crudis male digestis & infantibus, enata, carminativa & paulo calidiora admittit, quorum censum subeunt aquæ carminativæ spirituosæ, ex semine cymini & carvi, corticibus aurantiorum, floribus chamomillæ vulgaris & Romanæ ac cardamomo cum vino destillatæ, essentia carminativa B. Wedelii, essentia corticum aurantiorum probe saturata, spiritu salis ammoniaci exaltata, liquor anodynus mineralis cum balsamo nostro liquido, quod vitæ audit, permixtus, vel sequens liquor carminativus: Recipe spiritus nitri dulcis vel liquoris nostri anodynus mineralis, essentia corticum aurantiorum, tincturæ tartari ana drachmas tres, spiritus salis ammoniaci drachmam, olei carvi destillati, cymini, de cedro, chamomillæ vulgaris destillati, singulorum guttas VI. M. D. Dosin constituunt guttæ XXX. ad L. Haustus insuper vini sic dicti Hippocratici ex speciebus aromaticis, v. g. corticibus aurantiorum, citri, macere, caryophyllis, cardamomo & saccharo parati, senibus præsertim & ubi ex refrigeratione abdominis & externarum partium malum traxit originem, insigne & præsentaneum solet levamen præbere. Perutile quoque est, abdominis regionem tegulis & marmoribus calidis, item sacculis avena, sale communi, tostis, semine carvi, milii, baccis lauri atque juniperi repletis, subinde fovere.

Frid. Hoffmanni Oper. Tom. II.

§. VII.

Dolores abdominis, ubi à retropulsa materia exanthematica vel excretionem critica, scabie, purpura, podagra, arthritide, rheumatismo, erysipelate proficiuntur, nihil aliud agere prudens & rebus suis satagens medicus debet, quam ut leniter diaphoresin promovere studeat; id quod ego nonnunquam, essentia scordii probe saturata cum spiritu florum sambuci non intense rectificato extracta, liquori anodyno nostro ad dimidiam partem admixta, si ad guttas XXX. vel XL. in infuso calido bis de die propinatur, felicissime perfeci: circa lecti vero introitum pulverem meum bezoardicum, pauxillo nitri & cinnabaris mixtum, adjecta succi citri recentis portione in idoneo vehiculo obtuli; non prætermissem emollientibus & demulcentibus clysteribus, atque corporis in blanda diaphoresi constitutione.

§. VIII.

Quando ex vermibus intestinorum dolor in junioribus oboritur, ad dolorem sopiendum primo decoctum ex emollientibus & paregoricis, floribus videlicet sambuci, chamomillæ vulgaris, meliloti, verbasci, semine fœnu græci, anethi, anisi, croco, & lacte paratum, vel vesicæ suillæ inclusum, vel linteis exceptum abdomini applicari potest. Dein clysteres ex iisdem speciebus in usum frequentiores ducendi sunt, qui etiam ex lacte recenter mulcto parandi. Interne vero tinctura rhabarbari & tanaceti, quæ herba vere specificum est anthelminticum, alvus sollicitanda, & quandoque aquæ cum mercurio vivo coctæ usus est interpolandus. Non raro contingit, ut hac ratione vermium glomera, quæ intestina obfesseant & angustarant, ejiciantur, sedatis & placatis mox omnibus symptomatibus & gravissimis abdominis tormentis.

§. IX.

Neque prætereundus est acerrimus ille & prope intolerabilis dolor, qui intestini recti tunicæ nerveæ exquisitissimæ sensationis subinde infidet & universi fere corporis partes in consensum trahit, à sanguine hæmorrhoidali minima vascula obsidente ortum ducens, cæcarum hæmorrhoidum nomine notus: is enim peculiare curationis genus expostulat. Venam tunc ego non in pede, sed in brachio secari præcipio, ad meliorem sanguinis à partibus inferioribus ad superiores derivationem. Exterius vero duo remedia expertissimæ virtutis deprehendi, quorum alterum est linimentum, quod ex drachmis tribus spermatis ceti, olei hyoscyami drachma, camphoræ granis VI. & croci granis X. constat, quo calide inungi tumores debent; alterum est epithema, quod ex aqua calcis vivæ, cum aqua rosarum & florum sambuci temperata, saturni saccharo & spiritu vini camphorato compositum, linteis tepide applicandum.

§. X.

In immani illa colica sic dicta saturnina vere convulsivo-spasmodica, quæ metallurgos afflictim & immaniter excruciare solet, non invenitur præstantius præservativum, quam manesuntum jusculum pingue: in ipsa vero cura clysteres mere oleosi item oleum amygdalarum dulcium in copia haustum, cum vel sine decocto mannato, omne exhauriunt punctum. Ad paresin

Bb 3 vero

vero sanandam balnea aquæ dulcis, & post eorum usum, inunctio spinæ dorsi & abdominis cum linimento, quod habet axungiam humanam, oleum nucistæ expressum, hyoscyami, crocum & oleum rorismarini, vix datur præsentius & certius auxilium.

CAUTELÆ ET OBSERVATIONES CLINICÆ.

§. I.

*In colica
spasmodica
purgantia
vitanda.*

In spasmodico & convulsivo intestinorum & abdominis dolore, ubi alvus firmissime est clausa, cane peius & angue acria purgantia, & ex iisdem quoque parata clysmata sunt vitanda. Novimus, hac ratione inflammationem & mortem fuisse productam.

§. II.

*Clysteres
plus una
vice inji-
ciendi.*

Ad alvum longo temporis intervallo clausam, si excrementis & scybalis induratis referta sunt intestina, referendam, non sufficit una clysteris injectio, sed duos vel tres intra horæ sæpius spatium injicere oportet.

§. III.

*Recto duris
fecibus ob-
sesso, foris
conferunt.*

Aliquando accidit, ut induratum & compactum excrementum intestinum rectum occupans, flatuum ac scybalorum exitum penitus impediat. Tunc foribus emollientibus fovenda anus, & suppositoriis pinguibus & salinis stimulanda alvus, nec non uncia aliquot olei lini vel raparum cum decocto emolliente, in quo prius sufficiens saponis Veneti portio soluta, ut durties scybalorum emolliatur, per syphonem immitte-
tendæ.

§. IV.

*Fumus ta-
baci quid
præstet.*

Solus tabaci fumus per accommodatam syringam immissus, ad aperiendam alvum, omnia fere alia remediorum genera, testantibus id observationibus, fausto suo effectu superare creditur, utut ego certa de singulari ejus efficacia promittere nequeam. Id vero scio, quod experimentum hoc in equis ad alvum valide adstrictam aperiendam maximi sit virtutis. Novi etiam homines quosdam plebeios atroci intestinorum dolore vexatos, fumi tabacini sola deglutitione, ab omnibus cruciatibus in instanti fuisse liberatos.

§. V.

*Alvo clau-
sa, carmi-
nativa no-
cent.*

In omni graviore intestinorum dolore, antequam alvus fuerit soluta, calidiora carminativa & sudorifera, balnea quoque nocentissima sunt. Nam, dum materiam biliosam vel corrosivam invehunt sanguini nec ad partes exteriores præcipitant, anxietates augentur, & paralyfes, contracturæ, febres hæcticæ imo convulsiones epilepticæ haud raro inducuntur.

§. VI.

*Opiata in
senibus
exulent.*

In senibus & imbecillis corporibus, si instantur dolore abdominis opiata magis adhuc narcotica penitus exulent, item quando acerbiores dolores diutius perseverantes vires admodum fregerunt. Quod etiam tenendum erit, si ex summa debilitate, nimis sudoribus corpora perfunduntur: paralyfin enim tam veram quam spuriam inde suscitata fuisse, vel etiam sphacelum internarum partium inde productum fuisse meminimus.

§. VII.

Nihilo minus in hypochondriacis & hysterica passione detentis, vel ubi simul affligit ferina <sup>Ubi pro-
sint?</sup> tussis, cum gravibus abdominis doloribus & erosionibus, pilulæ balsamicæ nostræ, vel aloëphantinæ extracto panchymagogo *Crollii* acuata, uno vel altero grano laudani opiatum rite paratum vel theriacæ coelestis adjecto, interpositis pulveribus nitroso-salinis & absorbentibus, insigne dolorum & spasmodorum levamentum afferunt. Ita pilulas purgantes cum refracta dosi laudani opiatum mixtas, multi celebres medici, nominatim *RI-VERIUS, POTERIUS, CRANIUS, HOL-
LERIUS & FORESTUS* mirifice in abdominis doloribus deprædicant. Neque deficit ratio utpote remittente dolore & spasmo, purgantis operatio longe promptior & felicior fæcum alvinarum dejectio sequitur.

§. VIII.

Si atrox intestinorum dolor, certo temporis spatio recurrit; quod pluries mensibus *Martio & Octobri* contingit, flante & sævientie maxime Borea vento, probabile est ejus causam sanguinem intra intestinorum tunicas congestum esse, quia sub tali tempestate ob regurgitantem sanguinem, ejus in sedis venis fit accumulatio. Quae de causa venæ sectio in pede, ad hæmorrhoidum fluxum, si natura ejus fuerit assueta, promovendum, præservationis gratia, commodissime instituitur. Sin vero quis criticæ hujus sanguinis excretionis fuerit expertus, consultius ego semper deprehendi, brachii venam secare, quo sanguis à partibus inferioribus derivetur ad superiores, cum, si non invenit exitum per hæmorrhoides, major, per crebras sectiones in pede administratas, ad partes inferiores fiat imperus atque affluxus.

§. IX.

Hypochondriaci & hæmorrhoidarii flatulentis ac ventriculi & intestinorum doloribus perpetuo fere exercentur. Si itaque malum inveteratum neque domesticis, neque è pharmacis petitis obtemperare vult remediis; ego sane nec præsentius nec efficacius, nisi in thermarum *Carolinarum*, vel aquarum mineralium temperatarum ut *Selteranarum*, imo *Embsensium*, convenienti interno & *Tæplicesium* externo per balnea usu, unquam deprehendi auxilium; præprimis, si decente & sat frequenti motu & exercitio corporis secundet, diætæ quoque selectæ habeatur ratio.

§. X.

Puerperis intestinorum & lumborum dolores <sup>Colica
puerpera-
rum vena
sectione
profligan-
da.</sup> sunt familiarissimi, præsertim si lochia non debito modo, quantitate ac tempore procedunt, ex quibus postea doloribus febres exanthematicæ, quæ si ingravescent puerperam tollere consuecunt, oriuntur. Quae de re circumspiciendus eo animum advertere debet medicus, ut convenienti methodo horum dolorum sævitiam componat; quod optime fit, sanguinis lochialis promotione, qui si medicaminibus morem gerere recuset, venæ sectio in pede tutissime celebratur, post quam statim sæpe numero prodeunt lochia, & dolores penitus sopiuntur: quod crebra me docuit experientia.

METHODUS PRÆSERVATORIA.

Qui intestinatorum & imi ventris doloribus frequenter recurrentibus infestantur; quod ego haud raro, in arthriticis, nephriticis, item hypochondriacis & hæmorrhoidariis animadverti; his ante omnia exquisita diæta & accurato vitæ regimine superveniendum est. Id quod in eo maxima ex parte consistit, ut primum sedulo & omni studio, quasunque occasiones ad nocentissimas animi perturbationes, ut terrorem, iram & tristitiam, fugiant: nihil enim reperitur, quod generi nervoso adeo insensum, & morbos in eo desidentes tam confestim resuscitare magis idoneum est, quam vehementior animi commotio. Dein frigus Boreale, cujus ea est natura ac conditio, ut nervosi generis morbos revocandi & exacerbandi maximam vim habeat, omni modo vitetur, & regio lumbaris, præcordialis & pedes quoque ab eo diligentius defendantur. Tum prospiciendum est, ne legumina & inter hæc maxime pisa, fabæ, brassica, caro pinguis vervecina, & frigidus præcipue huic superingestus potus, admittantur. Denique, ut corpus non diu otiosum maneat, sed frequentius exerceatur. Optime enim TRALLIANUS & etiam rectissime *libr. X.* in hisce morbis motus commendat remedium, ita perhibens: *motus quicumque, & omnis exercitatio insigniter iis conferunt, qui diutius tali morbo laborarunt & frequentius eo corripuntur, si pedibus, si per equum, si etiam navigio movere corpus velint, item palæstra & totius corporis perfricatio, locique mutatio & longa perigrinatio. Hæc enim omnia extenuant discutiuntque & totum corpus excrementis liberum reddunt, universum habitum corroborantia, ut in posterum affectæ partes frigidum humorem colligere nequeant, imo ne aliunde influentem promte in se recipiant.* Postremo parciolem potum spirituosorum & præsertim aquæ vitæ stomachalis carminativæ omnibus suadeo, utpote qui plus noxæ & incommodi quam fructus, à copiosiori harum rerum usu resultasse, crebro observavi: vulgaris quippe & damnandus error est, ad meliorem ciborum dissolutionem & digestionem potus hocce conferre; quum tamen hæc ipsa à lactice salivali potissimum dependeat, neque ciborum solutionem ullo modo spirituosam prorsus attingat; sed potius è contrario, partes chylosas in intestinis præcipitando, incrassando, & poros obstruendo, materiam ad ructus & flatus subministrant.

ENARRATIONES MORBORUM.

OBSERVATIO I.

Colica spasmodico-convulsiva ex ira & superveniente terrore.

Fœmina nobilioris conditionis erat, quæ quinquagesimum & ultra jam annum attigerat, staturæ mediocris sanguine & succis plena. Per duos jam annos menstrualis filebat purgatio; ceterum sana & vegeta. Vehementi afficitur ira, & elapsis aliquot horis, ob infortunium quod ipsi nunciatur, summo & panico terrore atque tremore animus & corpus percelluntur. Nox erat inquieta. Sequenti confestim die regionem lumbarem & ingens frigoris sensus & dolor tensivus tam acerbis corripit, ut in erecta statura corpus ægerrime retinere potuerit. Brevi post, horrorem & refrigerationem præsertim partium

externarum percipit; quam ventris dolores & tormina insequabantur, cum ingenti præcordiorum anxietate. Persuasio fuit, spinam dorsii passam esse subluxationem. Unde spinæ facta fuit distractio; sed dolores magis ingravescebant. Die tertio, postquam noctem inquietam transigerat, cardialgiæ accedebant anxietates cum summa spirandi angustia junctæ, inanisque urgebant ad vomendum conatus. Pulsus erat celer & durus, pedes frigidi, alvus obstipata, & ad urinam stimulus, sed ejus parcius fluxus, & dolor lancinans in dorso. In consilium ego vocatus quæsi, quia mater ejus per plures annos obnoxia erat renum calculo, an nunquam laboraverit hoc affectu? Negavit id ipsum. Porro interrogavi, an sanguinis missionem neglexisset? Respondit annum esse elapsum. Aperuit mihi causam morbi supra tactam. Consultum ante omnia visum fuit, alvum injectis clysteribus solvere, qui parum tamen utilitatis attulerunt. Postea venam pedis secari jussi. Eduximus sanguinem cum virium constantia & euphoria ad IX. uncias: atque ingens mox dolorum & symptomatum, cardialgiæ præsertim & vomitionis sequebatur mitigatio; sed dolor circa hypochondrium dextrum lancinatorius cum abdominis inflatione permansit, neque alvus flatuum vel stercoris quicquam transmisit. Clysteribus carminativis & emollientibus, ac fomentis ejusdem indolis abdomini applicatis insistere placuit. Interne vero nihil aliud dedimus, quam oleum amygdalarum dulcium in juscule avenaceo ex quo flores chamomillæ vulgaris decocti, item pulverem marchionis & bezoardicum, adjecto nitro, cinnabari & gutta olei chamomillæ veri, it. liquorem anodynum nostrum, cui essentia castorei quarta pars admiscebatur; potum paulo frigidiorum melius tulit quam calidum. Alvus paruit clysteribus: sed permanserunt dicta symptomata. Memorabile fuit, quod alternatim abdomen mirifice fuerit inflatum cum tensivo dolore, adeo ut tactum manus ferre nequiverit. Alio tempore summa fuit umbilici retractio cum spasmodica ventris strictura. Urinæ difficultas permansit: dolor vero in dorso & hypochondrio dextro, ubi prima lumbaris vertebra est, incipiebat. Hæc symptomata & meum & cognatorum animum tenuerunt dubium atque suspensum, num morbus ex calculo renali provenerit, an colica convulsiva hysterica sit? qua tamen nunquam fuit correpta. Die quæ erat ab invasione septima, mixturam præscripsi sequentem in modum. Rec. tincturæ antimonii acris, liquoris anodynii mineralis, utriusque unciam dimidiam, spiritus tartari drachmas duas, essentia anodynæ gt. XII. M. Singulis tribus horis sumsit triginta guttas cum aqua florum chamomillæ vulgaris, flor. sambuci & cerasorum nigrorum. Et inde obortus ingens per totum corpus sudor, durans per totam noctem, ut linthea madefacta nimis mutare conveniens visum fuerit: ægra ceterum insignissimum levamen percipiente. Pulsus à naturali vix deflectere coepit. Appetitus rediit & somnus; non tamen cedebat dolor in dorso. Urina secedebat naturalis coloris, sed sine ulla arena vel crasso sedimento. Pilulæ datæ polychrestæ, interposito sale digestivo: & alvus etiam respondit; ubi multa foetida & putrida egesta fuerunt. Et ita sensim collectis viribus, adistente Divina benedictione, ægra cum atroci hoc morbo rediit in gratiam.

Epicrisis.

Hic affectus rectissime colicæ convulsivæ titulum meretur, quæ à bile per iram copiosius in intestinum duodenum, cujus situs ad dorsum reflectitur, quod primam causam ipsius morbi sustentabat, effusa ortum duxit. Unde cardialgiæ anxietates, vomitiones & angustia sequebantur. Quia vero à vehementia terroris, mox iram subsequens, sanguis ab exterioribus ad interiora maxime ad mesenterium ipsaque intestina fuit repressus & compulsus, flatulenta illa & spasmodica intestinorum affectio est secuta. Fixus ille in dorso dolor, nostra sententia, ramo mesenterico nervi intercostalis majoris, qui ut notum ex anatomicis est, una cum ramo mesenterico arterioso ipsum duodenum supergreditur, ab hujus inflatione & copia sanguinis, distento & compresso debetur. Neque vero hic gravior dolor & spasmus tantum, in intestinorum volumine sedem habuit, sed & peritoneum, ipsius abdominis musculos & lineam albam, ob plexum mesentericum & intercostales nervos partibus his communes, in consensum traxit; à qua causa retractionem umbilici & abdominis ducendam esse arbitror. Sanguinis missionem in tali statu plethorico, ubi tanta est spasmorum juncta atrocitas, ad arcendam inflammationem, quæ, nisi sanguine vel sponte vel arte evacuato, promte sequitur, perutilem imo necessariam judicavi: suadente id ipsum HIPPOCRATE in *coac.* Sect. III. ubi inquit, *dolores in lumbis sanguinis fluxionem inducunt, & spinæ distorsionem ac spirandi difficultatem sanguinis fluxio solvit.* Præter alia & hoc videtur notatu dignum, quod hic dolor typum febrilem servaverit, horrore & terrore incœperit, & sudore septimo die sublatus fuerit, ut adeo recte dolor intestinorum spasmodicus acutæ indolis nuncupari queat.

OBSERVATIO II.

Colica spasmodica, chronica, herniam producens Carolinis & Tabl. curata.

Triennium est, & quod excurrit, cum vir honestæ conditionis, mediocris staturæ & strictioris corporis habitus, vitæque sedentariæ & lucubrationibus addictissimus, doloribus in dorso & abdomine cum inappetentia & virium lapsu torqueretur. Quorum causam medicus in molimina hæmorrhoidalia rejiciens, ad hunc fluxum movendum varia præscribebat remedia; sed nihil sanguinis, multum autem tenacis & albidæ materiæ, per alvum, alternis vicibus secedebat. Iter cum susciperet Berolinum, exquisitos & pungitivos in dextro hypochondrio sub inguine, alvo simul valde adstricta, patiebatur dolores; quos protuberans tandem tumor excepit, qui procedente tempore ex inguine in ipsum scrotum descendebat, multum ægro molestiarum faciens. Consuluit celebrem in eadem urbe medicum, qui pilulis suis & aliis adhibitis medicaminibus, id quidem effecit, ut semel sanguis per anum cum ægri quodam levamine erumperet. At vero fluxus hic, quum per annum resitasset, nullo medicamento revocari potuit: sed dolores truculenti, quamvis per venam pedis sanguis eductus fuerit, repetebant, & immaniter abdomen cruciabant; ingravescentes quando è lecto surgebat & leniter obambulabat, vel auræ frigidiori se exponerat. Acutus in regione umbilici constitit dolor, & permolesta, quasi ingentis globi ibi hærentis & prementis sensatio, quæ tam gravi-

ter sæpe torquebat, ut æger corpus in erecto situ vix servare, sed incurvare debuerit, lamentabili sæpius voce doloris exprimens sævitiam: nam tum prolapsum intestinum cum dolore lancinatorio & ardente valde distendebatur, atque in hypochondriis, dorso & femoribus tam dolorificæ rosiones & stricturæ urgebant, ut rigidum & contractum corpus æger plane è loco dimovere non potuerit. Alvus firmiter erat occlusa, ut nec flatibus exitum concederet, nec clystrem intromitteret. Accessio doloris, ab hora octava matutina fuit, qui ad meridiem duravit, vomituque desivit; atque ingenti virium languore, abdominis ad tactum incremente dolore, nausea, ciborum inappetentia, sudore nocturno, tussi sicca, præcordiorum anxietate, marcere, urinæ suppressione comitatus ægrum mire maceravit. Misit ad me historiam morbi. Suasi, ad levandum malum, pulveris antispasmodici usum, qui ex lapidibus cancrorum, nitro, cinnabari & castoreo erat compositus, item liquorem anodynum cum refracta dosi spiritus bezoardici *Bussi* remixtum, nec non elixir viscerale inter cibos assumendum: balneum etiam aquæ dulcis & hirudinum ad anum applicationem, atque ut, loco cerevisiæ, aquam Selteranam cum pauxillo vini vel ptisanam biberet, & alvum clystere oleoso & emolliente apertam servaret, ordinavi. Proximo autem vere, meo ex consilio, thermas Carolinas adiit; & absoluta cum iis cura balneo Tœplicensi, optimo & sperato cum successu ac levamine, usus est.

Epicrisis.

Dolores intestinorum spasmodici & flatulenti, si chronici sunt, plerumque originem suam sanguini intra tunicas intestinales nimium congesto & stagnanti, ob impeditiorem per mesenterium & hepar circuitum, sub vita ad otium & quietem composita, debent. Neque hi corpus facile deferunt, nisi natura sponte sanguinem per sedis venas emittat, si videlicet naturalis quædam ad hunc fluxum adsit dispositio; qua deficiente nil perniciosius est, ac sanguinem commoventibus, aloëticis præsertim, & pilulis balsamicis, cujuscunque etiam fuerint generis vel Auctoris, ad hunc fluxum naturam cogere velle. Tantum enim abest, ut symptomata inde remittant, quin potius à commoto & ebulliente inter tunicas nerveas stagnante sanguine, spasmi & dolores exacerbentur, cum tanta sæpius vehementia, ut etiam nervus mesentericus magnus intercostalis & omnes partes ad quas ille ramos suos dispergit, peritoneum quoque & muscoli abdominis cum intestinis in consensum rapiantur: atqui exinde herniam inguinalem & postea scrotalem fuisse subsecutam aliquoties notavi; quemadmodum similem effectum à validissime operantibus drasticis & emeticis enatum vidi. Tunc vero semper deterior fit ægrotantium ejusmodi conditio: nam ubi labem notabilem vel vitium quoddam intestinum vel tantum pars ejus contraxit, sicut in herniis contingit, colica non modo affectos, sed hypochondriacos quoque gravissime luere perpetuum fere est; excrementa quippe in ejusmodi tumore intestinali quam facile congeruntur & sistuntur, atque ita totum motus peristaltici adeo necessarium negotium perturbatur. Per remedia diætetica & accuratum vitæ regimen, inoderationem animi affectuum, sanguinis decentem per venas evacuationem, aquarum

rum mineralium quæ temperie gaudent tam externum quam internum usum; melius & citius, quam per multa medicamina nervina, calefacientia & purgantia ad desideratam sanitatem ægrotantes perveniunt: sicut ego quoque in ejusmodi morbis abstinētiā ab omni cerevisia, & potum quo puriorem & simpliciorem eo præstantiorem commendo.

OBSERVATIO III.

Colica biliosa iliaca in ænopoia, ex frigore, epithemate &c. curata.

Quadraginta abhinc circiter annis, cum officio Physici Mindæ fungerer, vir honoratior annorum XL. cholericæ & in iram valde proclivis naturæ, ingenii vero acuti & vividi, cibos infumatos & salitos in delitiis habebat, & liberaliter quoque vino & spiritu vini utebatur. Hyeme, sub aura valde algida, ex itinere domum reversus, de dolore lumbari, acerbis ventris torminibus, alvo dura & constricta, quæ trium clysterum injectionem elusit, conquerebatur. Aderat calor præternaturalis, summa sitis & vigilia. Admissis clysteribus primo emollientibus, deinde carminativis, item sumto decocto mannato cum oleo amygdalarum dulcium, & mixtura ex aqua menthæ, spiritu nitri dulcis, syrupo papaveris albi & pulvere præcipitante nitroso propinata, malum fuit depulsum. At vero elapso vix duarum hebdomadum spatio in eundem morbum ægrotans incidit, qui profligatus, etiam tertia vice repetiit, tam vehementi gradu, ut ego & medici adstantes summum timeremus vitæ discrimen. Nam atrox dolor assidue affligebat, cum intenso calore, siti inexhausta, animi defectione, ingestorum & medicamentorum per superiora rejectione, præter aquæ simplicis frigidæ potum cui quippiam calidi panis injectum, quem retinebat: alvus nullis clysteribus vinci poterat: iliacum morbum ante oculos conspiciebamus: neque ab ullo medicamento tam externo quam interno quicquam levaminis recipiebatur. Æger vero, quia per quinque continuos dies, assiduis vigiliis & jactatione corporis detinebatur, in extremum virium lapsum conjectus erat. Igitur, ad somnum conciliandum, sequens excogitavi epithema, Rec. florum rosarum, sambuci, lavendulæ ana pugillos tres, feminis papaveris albi, hyoscyami, anethi, nucistæ, nucleorum Persicorum, singulorum drachmam unam semis, croci drachmam; quæ species concisæ & contusæ, postquam in lacte ebullierant, applicatæ toti capiti fuerunt. Hujus tam felix erat operatio, ut per totam noctem placide miser ægrotans dormiverit: à quo tempore omnia priora symptomata, conatus vomendi, dolor vehemens, inquietudo & anxietas conquieverunt, alvus quoque adnoto suppositorio respondit. Datis postea convenientibus & temperatis stomachum & intestina roborantibus integre restitutus fuit. Ad præcavendam vero tam atrocis morbi vim & recursionem, consilium dedi, ut, quia non assuetus erat venæ sectioni, eam bis vel ter quotannis admitteret; dein ut duriorem victum & largiorem vini, adhuc magis vero, spiritus vini potum evitaret. Mixtura quam ad stomachum roborandum præscripsi, ex essentiæ carminativæ *Wedelii* uncia dimidia, essentiæ cascarillæ drachma & dimidia, spiritus oleosi *Sylvii*, guttis LX. constabat; quam, ante & post cibum sumtum, per annum usurpavit. Pro potu aquam simplicem commendavi, cui panis calidus recēter ex furno extractus, injiciebatur. Ita à recurſu hujus mali plenarie fuit vindicatus.

Epicrisis.

Ex hac morbi historia & curatione paulo penſaculatiſſe conſiderata, evidenter apparet, primo, ſub omni graviore dolore in parte quadam nervoſa ſuſcitato, univerſum nervorum ſyſtema in conſenſum rapi & atrocia in variis partibus induci poſſe pathemata. Dein quoque ingens illa capitis membranarum cum ventriculo & inſteſtinis conſenſio, ex ea evincitur; cum capiti ceu parti à dolore valde remoto exterius tantum applicatum ſedativum remedium, in diſſitis partibus graviter affectis, vim ſuam & efficaciam exeruerit. Sicut vero omnes affectus nervoſi generis, ita etiam inſteſtinorum & ventriculi dolores, facile ex neglecto vitæ regimine, inque primis per affectus animi immoderatos, per frigus & ventum Borealem exterioribus improvide admiſſum, nec non cibum & potum minus convenientem, recidivant: id quod facillime, in cholerici & ad iram proclivis temperamenti corporibus evenit; quibus aquæ frigidæ potus vino multo eſt convenientior: docente id ipſum *GALENO Lib. X. method. cap. VII.* De cujus etiam ſalutari uſu *AMAT. LUSITANUS* teſtatur, ſe atrocem inſteſtinorum dolorem, aquæ frigidæ exhibitione, ſubito & incantamenti inſtar ſuſtulſiſſe.

OBSERVATIO IV.

Anno circiter ſupra milleſimum ſexcentiſimum, octogefimo quinto, cum Halberſtadii Provincialis medici nomine degerem, ad monaſterium Hammerslebenſe, cui medicus alius ordinarius præerat, ob plures religioſos ibi graviter laborantes, fui vocatus. Offendi ibi numero plures qui per longum tempus atrocibus ventris torminibus cum alvo pigerrima & conſtricta conſictabantur, de frigore quod ſuſtinere, horas primo mane in templo frequentando, debebant, contraxerant: quidam ex iis herniam inguinalem & ſcrotalem ſibi contraxerant: alii qui liberati erant, paralyſi & ſtupore manuum affecti. Erant homines repleti, euſarci, ſanguineæ complexionis, qui venæ ſectionem in anno vix ſemel admiſſebant, lauteque viventes mero non parum indulgebant. A dictis vero malis liberi permanſerunt, qui tenuiori victu & cereviſia ſimpliciori ſe ſuſtentabant. Igitur cum ex nimia ſanguinis abundantia ejuſque ſtagnatione inter inſteſtina morbum prognatum judicarem, conſilium dedi, ut impoſterum ſanguinis miſſionem frequentius celebrarent, & piſanam cum vini portione remixtam biberent: datis medicamentis magis refrigerantibus & leniter carminativis, ſpiritu nitri dulcis præſertim, & ipſo nitro cum lapidibus cancrorum & croco permixto, quam valde calidis, quibus antea erant uſi. Suaſor quoque fui, ut vere approximante acidulas Pyramontanas vel Egranas regimine cum convenienti biberent. Ad paralyſin vero tollendam, poſt balneum aquæ dulcis, linimento ex aqua Anhaltina, ſpiritu & ſale volatili lumbricorum terreſtrium, oleo nucistæ expreſſo, camphora & caſtoreo parato, partes affectas ut probe inungerent ſuaſi & edixi. Neque exiguum inde levamen conſecuti ſunt.

Colica ſanguinea ex diata lania & vinoſa, venæ ſectione & aqua potu curata.

Epicrisis.

Sicut colica vulgo & in ſcholis medicis in bilio-

biliosam & pituitosam distingui solet : ita etiam sanguineam, in plethoricis præsertim, ab iis rebus, quæ sanguinem nimium in vasis accumulanti, excitari posse experientia nos crebrior docet. Nam ex mensium, in foeminis, in viris, hæmorrhoidum suppresso fluxu, acerbos abdominis dolores gravibus symptomatibus stipatos oboriri, nostro tempore non novum est ; licet veteribus hæc morbi species videatur incognita. Equidem apud HIPPOCRATEM *Lib. III. de morbis hæmatitis ilei* nomen occurrit : sed si penficulate, quem describit morbum consideramus, longe alius est quam iliacus, cujus signa in eodem loco proponit : adeo ut nihil fere cum hoc habeat commune. Nam ileos, quo nomine omnes dolores ventris complectitur, vera historia *lib. III. §. 15.* cumulate & perfecte traditur. Rectius, optimus HIPPOCRATIS interpres FOESIUS in *œconomia* sua, ac non sine ratione, suspectum esse hunc locum, & defectum atque mendum subesse judicat. Neque etiam in regionibus calidioribus, in quibus venerandus Senex egit, tam frequenter ex plethora vel fluxu hæmorrhoidali oboriuntur ægritudines, quam in nostris meridionalibus & temperatioribus. Solent vero huiusmodi dolores esse & longiores & atrociores, maxime quando cacoehymia concurrit : hinc fit, ut, debilitato valde genere nervoso, in paralyfin, epilepsiam vel alios morbos nervorum & capitis terminentur, præsertim, si non rite, per calidiora videlicet interna & externa, anodyna immoderate sumta, tractentur. In regionibus præcalidis in Italia & præsertim Romæ, item in Hungaria, superiori Austria, Moravia, ob abusum vini generosi, sanguineæ & biliosæ colicæ frequentiores sunt. Neque ibi datur ad eas tollendas, præter usum refrigerantium & præsertim aquæ frigidæ, præsidium facile convenientius & efficacius. Et ob hanc rationem non modo AMATUS, sed & ZACUTUS, LUSITANI *hist. 295. pag. 351.* colicam à bile factam, aquæ frigidæ potu, & *Lib. II. obs. 25. prax. adm.* nive curatam meminerunt. Conf. hac de re M. N. C. *cent. V. p. 193. 194. cent. X. p. 273.* item *Decur. II. An. VIII. obs. 13. & Anno X. observat. 139.* Vidi quoque in paralyfi ab eadem causa exorta, balnea paulo frigidiora, plus efficaciam quam calida præstitisse.

OBSERVATIO V.

Colica sanguinea, ex mensibus terrore suppressa, aqua frigida curata.

Anni propemodum sex elapsi sunt, quum Beat. D. D. NABOTH me Lipsiæ degentem, ad foeminam mercatoris primarii viduam, quæ gravissimis abdominis doloribus, ex mensibus per vehementem terrorem suppressis torquebatur, duceret. Deliberatione invicem habita, primo sanguinem è vena emittendum, dein clysteres emollientes & oleosos cum stimulo salino injciendos curavimus, & mixturas carminativas ac sedativas, quarum princeps ingrediens spiritus nitri dulcis fuit, propinavimus : sed sine effectu. Ipse asseverabat, se modo in hac ipsa ægrotante, valde sanguinea, quæ ante dimidium anni eodem morbo fuerat correpta, miro cum effectu & dolorum levamine, solo aquæ frigidæ usum fuisse potu. Nolui prius in ejus descendere sententiam, quum inflammationem vererer : sed ipse cum assertis & promissis suis insisteret, nolui morosius repugnare : & res etiam feliciter, ac putaram, successit. Hic itaque aquæ frigidæ simplicis potum ad II. cyathos de die per vices sumendum, recto prius probe corpore & pedibus,

curavit. Subsecuto largo sudore, postea placido somno, omnes dolores abdominis conquieverunt. Affirmavit quoque, quod lintea aqua frigida madefacta, felicissimo sæpius cum effectu, in tali casu applicasset.

Epicrisis.

Quod in aqua frigida summa lateat medicina, ego multa experientia, qui ipse : *de aqua medicina universali*, dissertationem scripsi, edoctus fui. Sed uti omnia magnæ efficaciam remedia, quæ à medicis sagacioribus heroica audiunt, exquisitum iudicium ac prudentiam, omniumque causarum considerationem desiderant ; ita id ipsum de aquæ frigidæ interno & externo usu, maxime valere existimo. Nam imprudenter & intempestive data, præsertim ubi metus inflammationis est, non potest non summum periculum, imo necem asserre. Nihilominus ad calidam acrem materiam temperandam, nimium sanguinis ebullientis æstum reprimendum, ad vires ab immodico fervore collapsas restituendas, ad roborandum partium tonum, & systolen cordis & vasorum augendam remedium efficacissimum utique præbet. Vidi ab ejus potu in cholericâ passione miraculosos plane effectus. Neque indignus animadversione est locus apud LUDOV. SEPTALIUM, quem *lib. VII. animadvers. p. 248.* insinuat, & huc integer adduci meretur. *Contingit, scribit, aliquando ut colici dolores adeo vehementes sint, ut omnem medicamentorum operam eludant, ac quocunque auxilio adhibito potius augeantur. In quo casu erit ad contraria transeundum. Quum enim colici dolores majori ex parte, à materia frigida fiant aut à flatibus distendentibus ; fit aliquando, ut aut ratione vigiliarum, dolorum, aut mœroris ob contumaciam aut invalescant nimium, aut intestina, accedentibus etiam calidis & foris appositis remediis, aut phlogosi quadam tententur, aut etiam vera inflammatione incipiant affici, aut multa præexistens bilis ibidem transfundatur. Unde ad contraria erit transeundum & insigniter refrigerandum. Quod mihi præterito anno contigit, in nobili quodam Hispano, qui cum colicis doloribus per aliquot dies acerrime fuisset conflictatus, ut jamjam mors esset præ foribus, nulli persentirentur arteriarum, pulsus, sudores essent resolutorii, nulla denique superesset spes salutis, ne quidem apud medicos etiam præstantissimos : accersitus & ego, cum sitim inextinguibilem, linguæ scabritiem, nigrorem atque duritiem ; pertactis autem hypochondriis & ventre inferiori, calorem illum in partibus æstuantem adesse observassem, Hispano aquam multam nive etiam refrigeratam, bibendam exhibui, cum natura abstemius esset. Et multæ aquæ potator in somnum prolapsus est, & quatuor horarum spatium dormiisset, dolore quodam inferioris ventris, à primo maxime, ut ipse referebat, diverso, excitatus à somno, miram bilis flavæ copiam evacuavit & à doloribus liber evasit. Unde collegi, medicos, qui illius curationem susceperant, in causa morbi illius longe deceptos fuisse, cum calidis remediis curationem instituissent, à frigida materia morbum factum judicantes. Neque in colica flatulenta, à causa calida, frigida exterius applicata penitus improbanda veniunt ; qua in re auctoritate eximiorum medicorum CRATONIS, item VALESCI de TARANTA niti licet, qui lintea aqua frigida madefacta & ventri imposita in colicis doloribus sedandis magni fa-*

faciunt. Cui experientiae, adstipulantem quoque habemus rationem : nam flatus qui valide & mirifice tunicas & parietes intestinorum distendunt, nihil aliud sunt ac aer calore rarefactus, elatere ejus valde adaucto; frigida igitur, ut experimentis mechanicis compertum est, cum aerem nimis rarefactum condensent, atque in angustius spatium cogant, nec non fibris nimis relaxatis tonicam vim reddant, ut calefacto corpore sanguis majori velocitate propellatur, efficiunt.

OBSERVATIO VI.

Colica convulsiva, ex gonorrhoea adstringentibus suppressa.

Juvenis XXII. annorum studiis operam navans, gracilioris corporis structurae, ex impura Venere, gonorrhoeam sibi contraxit; ad quam curandam Chirurgi opera usus est. Hic primum fortiter corpus purgabat, dein adstringentia, tincturam sulphuris vitrioli, antiphthificam *Grammani* & pulveres ex magisterio Saturni, terra sigillata, succino & osse sepiæ compositos, ad sistendum fluxum copiose adhibuit. A quorum usu per septimanam continuato hæc mala infecuta : atroces cruciatus in abdomine, quod durum tensum & renitens erat, oborti, alvo prorsus obstipata; aderat inappetentia, inquietudo, & tremore ac tractionibus artus, femora, pedes torquebantur. Enixe meum exposcebat auxilium. Neque infeliciter successit curatio, quæ clysteribus emollientibus & oleosis crebrius injectis, infuso mannato, ex fero lactis, quod stimulo salino erat armatum, & pinguioribus jusculis, blandisque internis carminativis, & balneo aquæ dulcis, intra novem dies absolvebatur.

Epicrisis.

Quantam noxam improvide data adstringentia, ventriculo & intestinis ceu partibus valde nervosis & membranosis inferant, tonum & motum eorum plane turbando & invertendo, dici vix potest. Atque innumeris exemplis, quam perniciosas ea, in alvi, sanguinis, feminis fluxu sistendo, effectus exerant, confirmare & illustrare possemus. Ex horum vero numero peioris adhuc notæ sunt, quæ ex Saturno depromuntur. Hæc uti exterius non carent sua laude & virtute: ita interius usurpata, fibras nerveas intestinales constringendo, veri veneni naturam & vim habent; adeo ut ipsa, ceu per se quidem non damnosa, tamen quoad usum internum damnanda, è re publica medica, jure meritoque exterminari debeant. Memoratus morbus recte dici potest colica convulsiva, quæ ab HIPPOCRATE *lib. de victu acutor. §. 61.* cholerae sicca nomine venit; qui hunc in modum ejus naturam & curationem perite & optime exponit : *In cholera sicca venter inflatus est & strepitus insunt. Dolor laterum ac lumborum : secedit autem nihil deorsum, sed alvus adstricta est. Talem observato, ut ne vomant, sed alvus subeat. Infusum itaque calidum ac pinguiusimum quam citissime per clysterem immittito, & oleo illitum in aquam plurimam calidam paulatim affundens, & si calescenti ipsi alvus subierit, morbus solutus est, à cibis vero abstineat: sique non remiserit dolor, asininum lac bibendum dato, donec purgatus fuerit.*

OBSERVATIO VII.

Colica flatulenta ex ira & superingesta carne suilla.

Vir quidam plebejæ fortis, robusti & obesi corporis, XXX. circiter annorum, cerevisia ebrius, rixando in diversorio cum sui similibus, domum

brumali tempore revertitur, & carnem suillam pinguiorem cum magna panis copia ingerit. Alvi fluxus cum torminibus insequabatur; sed, cum sub coelo frigido alvum deponeret, sistebatur. Unde dolores sævissimi totum occupabant abdomen, lumbos, hypochondria: atque alvus erat valde obstipata, artus frigidi tremiscebant, summa aderat anxietas & inquietudo, internaque præcordiorum angustia & constrictio; demum spasmi & dolor genua infestabat eaque constringebat. Curatus fuit jusculo avenaceo, in quo flores chamomillæ & sambuci cocti, quod cum salis Ebsoniensis & nitri dosi atque oleo amygdalarum dulcium per vices sumsit, non omissis clysteribus oleosis & emollientibus, atque internis carminativis & anodynis. Postea crebro balnei aquæ dulcis usu, ad convulsivas artuum tractiones leniendas, sanatus est.

Epicrisis.

Ad subitam atrocis hujus ventris doloris generationem, variæ, sed validæ concurrebant causæ: ebrietas, affectus iræ, & post hanc ingesta pinguium & viscidorum ciborum copia, frigus, & ab hoc alvi fluxus suppressio. Non mirum hinc est, ex flatibus intra intestinorum cavitatem excitatis à spasticis tunicarum intestinalium contractionibus, intus retentis & incarceratis, tam atroces dolores & gravissimas nervosarum partium afflictiones fuisse productas. Et quia obstructio alvi proxima causa horum malorum fuit, eam rursus aperiri expediebat. Quod vero non promiscue per purgantia & fortiter stimulantia, quæ dolores & spasmos potius excitant, fieri debet, sed per salia oleosis & demulcentibus mixta, quo nomine sal Ebsoniense laudamus, quod ad unciam in aqua solutum & exhibitum, præmissis clysteribus, ad flatus & excrementa provocanda, præ omnibus aliis laudem & commendationem promeretur. Balneis aquæ dulcis ex emollientibus & roborantibus paratis, ad robur partibus externis conciliandum, quod à vehementi dolore & spasmo plane læditur & destruitur, in fine ejusmodi morborum nil est convenientius, nil efficacius; cum veteres, inter quos HIPPOCRATES, CÆL. AURELIANUS, TRALLIANUS, ARETÆUS, usum eorum mirifice tollant atque commendent.

OBSERVATIO VIII.

Serenissimus S. R. J. Princeps ante aliquot annos per Archiatrum adversam suam valetudinem, salutare consilium suppeditandi causa, ad me per scribere jussit. Is cum in florente ætate constitutus, boni & sanguinei corporis habitus, ingenii valde vividi & alacris, narium hæmorrhagiæ in juventute valde obnoxius esset; per integrum fere annum sævis doloribus, & atrocibus intestinorum tormentis fuit affectus: quo factum est, ut in ingentem virium lapsum atque in corporis tabescentiam conjectus fuerit. Ad fluxum hæmorrhoidalem quædam adfuit suspicio; qui tamen non rite & ex voto procedebat. Ad hunc promovendum & dolores mitigandos varia usurpata fuere remedia, & hæc quoque pilularum polychrestarum & ad exemplar Becherianarum paratarum frequens usus intercessit: qui parum tamen profecit. Quæsitum itaque ex me fuit: utrum thermæ Carolinæ convenienti regimine usurpatæ, tuto & exoptato cum fructu possint adhiberi? Ego responsum dedi, quod tam ad arthritidem, quam

Colica sanguinea chronica, alternans cum arthritide, Carolinis curata.

quam ad dolores ventris spasmodicos, nec tutius, nec præstantius, harum thermarum usu, cognitum mihi sit atque perspectum auxilium: quod multis exemplis confirmare valerem. Huic consilio multi, & medici quoque, ob anceps remedium & verendum periculum, sese opponebant; dubio procul ex hac causa, quod nullam prorsus de hisce salutiferis fontibus, ratione ingredientium & virium, habuerint notitiam & experientiam. Serenissimus Princeps autem, pro eo quo pollebat iudicii acumine, utpote omni hæctenus destitutus fuerat auxilio, sententiam meam amplexus, iter suscepit, per hanc civitatem transiens: & fatigatus ex itinere hic advenit, sed in uno pede tumore erysipelaceo ingenti correptus, qui sano vel triplo grandior erat. Altero die intolerabiles abdomen invadebant dolores, tanta cum ferocia, ut clamores & lamentationes exprimerent, & omnem somnum adimerent. Ad quos sopiendos & ego & alius loci huius medicus accerseremur, sed præter clysteres emollientes & carminativos atque linimentum externum, pulverem ex antimonio diaphoretico, nitro, sale absinthii & lapidibus cancrorum paratum per vices dedimus; sanguinem quoque è pedis vena emittendum curavimus; sed parum inde levaminis persensit. Per tres & ultra dies dolorum perstitit atrocitas. Tandem consultum duximus, præmissio fotu, hirudines quinque ano applicare, quæ sanguinis aliquot uncias extrahebant: quo facto insignis dolorum remissio & sensim plenaria sanitatis restitutio, Divino sub adiutorio est secuta. Data instructione de usu harum aquarum decenti, adiit Carolinas & per IV. fere hebdomades iis interne usus est: balneum quippe interdixi; pediluvium vero pro discussione tumoris in dies adhibuit. Quæ cura ex voto successit: & ad nos sanus & incolumis Serenissimus est reversus, non sine insigni comitatus gaudio & applausu. Immunis à truculento affectu tam colico quam podagrico per integrum mansit annum. Altero anno & iter & curam hanc repetiit, majorique virium augmento rediit, integra etiamnum, ut mihi relatum est, valetudine gaudens.

Epicrisis.

Quin arthriticus & colicus spasmodicus dolor nimiam sanguinis abundantiam, ejusque impeditionem per mesenterium & viscera abdominis transitum, pro vera causa agnoscat, nihil dubitandum est. Minus recte, sed perperam horum malorum, per promotionem fluxus hæmorrhoidalis tentata fuit depulsio. Per multis ego exemplis compertum habeo, quod si natura non inclinet ad hunc fluxum, & meatus ad egerendum sanguinem non satis sint dispositi, ejusmodi calida gummoso-resinosa & aloëtica, urgendo sanguinem ad intestina, colon & rectum, detrimentum potius quam emolumentum asferre. Jam vero ipsa dictitat sana ratio, quod longe tutior & certior hisce malis medendi sit via, si per viscera abdominis inque primis hepar, liber sanguinis motus & circuitus promoveatur: quod omnino per convenientem aquarum mineralium & maxime Carolinarum usum præstari & confici potest; cum multa mihi hisce sanatorum morborum obvia sint auspiciatissimi successus exempla. De cetero singularis & plane admirabilis, in sedandis ejusmodi doloribus, ex admotione hirudinum effectus meretur animadver-

sionem. Et inde luculenter intelligimus, sanguinis missionem, quæ fit in partibus à loco affecto remotis, non tanti esse momenti & usus, ac illam, quæ in locis propinquioribus instituitur; quamvis non negaverim, tali etiam in casu, si corpora sanguine nimium exundant, ante hirudinum applicationem, venæ sectionem sæpe numero utilissimam observari.

OBSERVATIO IX.

Post crebriores ex calculo renali dolores, post alvi fluxus atque intermittentes perperam curatas, sæpe numero ego in praxi intestinorum tonum & motum naturalem labefactatum & destructum notavi. Nam ab eo tempore, & alvus non rite respondit, & flatulentis, borborygmis & assiduis eructationibus, concurrente præsertim sedentaria vita, per longum temporis spatium decumbentes affecti fuerunt. Ad quas molestias & incommoda avertenda & tollenda, sequenti methodo haud infeliciter sæpe numero usus sum. Pilulas meæ compositionis leniter laxantes balsamicas, bis in septimana ad grana XV. vel XX. mane sumendas ordinavi, ubi præcedente die circa lecti introitum, salis aperitivi dosis, quod e. g. ex tartaro vitriolato, nitro, sale Ebsoniensi, terra foliata tartari concinnari potest, præmissa fuit. Dein ad labefactatum intestinale tonum & labem restituendum, essentiam carminativam B. *Wedelii*, quæ ob spiritum nitri, ejus compositionem ingredientem, singulari flatus discutiendi facultate pollet, quando cum dimidio essentiæ cascarillæ, item una parte spiritus de tribus miscetur, ego non satis dilaudare possum: cujus medicamenti conveniens pro circumstantiarum ratione dosis, bis de die, mane scilicet & finita post prandium concoctione, in idoneo exhiberi potest vehiculo. Sed opera danda est, ut cibi fermentescibiles inflantes, pingues & qui difficilioris sunt concoctionis, atque ante omnia frigus evitentur. Præterea & id quoque compluries in praxi mea annotavi, quod dolores colici & flatulenti, cum borborygmis & ructationibus, interna angustia atque gravitatis circa præcordia sensu, à sola sphincteris ani valida constrictione & angustia producti, hæc vero à copiosiori sanguinis vel feri affluxu ad ejus venas internas vel externas hæmorrhoidales suborta fuerit: ex quo fit, ut nec flatus, nec excrementa liberum habeant exitum, sed retenta resiliant & versus superiora ferantur, plurimum molestiæ & incommodi procreando. Tali in casu, quando fortior sit ad excernendam alvum nifus, is plane inanis est: exprimit quippe mucus instar albuminis ovi & quandoque prolapsus recti efficit; imo vidi herniam inguinalem inde productam, sique hæc, vel scrotalis jam præsens fuerit, eam longe grandiorē factam. Atque hic tenendum, quod suppositoria, præsertim stimulantia, & acriorem dolorem & majorem affluxum excitando, malum exasperent: quin potius clysteres emollientes & interne pulveres absorbentes nitrosos, item infusum mannatum cum cremore tartari, & interdum si plethora urget, venæ sectionem, commodissimum invenisse locum testari possum.

Epicrisis.

Ad tonum & motum intestinorum labefactatum, qui obstructionis, flatuum, dolorum & mul-

*Tuta me.
rhodus cu-
randi coli-
cam ex
morbis præ-
gressis or-
tam.*

multorum aliorum incommodorum causa ac fons est, reparandum & confirmandum, ego non modo remediis internis, sed etiam clysteribus accommodatis & idoneis usus sum felicissime. Et tales sunt, qui ex speciebus, quæ non tam evacuante sed & roborante efficacia pollent, parantur; cuiusmodi sunt herba salvia, ruta, flores chamomillæ Romanæ, bacca lauri, juniperi, semen anethi, carvi, myrrha, quæ leni facta ebullitione, in vini Gallici & aquæ communis æquali portione, extrahantur & injiciantur. Quandoque portionem balsami nostri liquidi vitæ, clysteribus carminativis adji- ciendam curavi. Sed necessarium est, ut ante horum usum, alvus aperta & à flatibus libera sit. Præ- terea, & hoc loco id monere consultum duco, quod, ubi tumor in extremitate intestini recti, flatuum & incommodorum in imo ventre, obstructionis quo- que alvinæ causa sit, pilulæ purgantes, item quæ aloën recipiunt & motum sanguinis ad intestina crassa dirigunt, nisi malum exacerbare & revo- care velimus, plane non, vel cautissime exhiben- dæ sint.

OBSERVATIO X.

Curatio
colicæ, ex
morbis
exanthema-
tiscis,
vel retro-
cedentibus,
vel non
expulsis.

Placet in genere quasdam adhuc insinuare ob- servationes practicas non exigui momenti, quarum attentior consideratio medicis junioribus haud pa- rum utilitatis & adjumenti, in sanandis intestino- rum dolorificis affectionibus afferet. Nam sæpius annotavi, familiarissimo nostro ævo qui foeminas præcipue corripit morbo, purpuræ videlicet, inte- stinorum dolorem sæpius adjungi, idque maxime evenire, quando incauta victus ratione, vel im- portuna medicina, materia vitiosa non satis ad ha- bitum corporis protruditur, sed intus retinetur, aut à superficie corporis retrocedit: qua ad intestino- rum tunicas delata, subito tormina, aliaque gravia accidentia incidunt. Neque vero tam facilis la- bor est, peccantem humorem ad extimam rursus cutem prolicere, sed moderationis, temporis & patientiæ beneficio opus est. Lenissima vero & æqualis est procuranda diaphoresis, per crebrius datos pulveres diaphnoicos cum tantillo nitri & cin- nabaris: liquor etiam anodynus mineralis paucio- ribus liquoris *Bussii* guttulis animatus, ad foras ex- cludendam pessimæ indolis materiam, plurimum valet. Uti vero in hoc morbo potus cerevisiæ nunquam non noxius; ita plus detrimenti, si re- trocedens materia interiores nerveas partes obfi- det, certo affert. Commodum itaque, ex demul- centibus & acrimoniam temperantibus placideque diaphoreticis speciebus decoctum cum aqua para- tum, per totum morbi decursum offerendum. At vero cum ex frequenti observatione compertum habeam, dolorem colicum in iis qui purpuræ scor- buticæ sunt obnoxii sæpius repetere & gravibus accidentibus ægrotantes torquere, sine ullo in ex- timis partibus apparente exanthemate; ego qui- dem ad avertenda hæc mala non efficacius reme- dium, præter usum acidularum temperatarum cum tertia lactis vaccini, vel quod ego protule- rim, asinini parte facta miscela, verno tempore susceptum, reperire potui.

Deinceps frequentius id in praxi mea observa- vi, quod dolores intestinorum paulo acriores, ubi in extrema ætate constitutos adoriuntur, & pau- lo diutius insistent, vitalibus viribus valde attritis lethalem plerumque exitum post se relinquunt. Cujus eventus ratio, mihi hæc videtur, quod se- nes ordinario, ob virium languorem & dyscrat- siam humorum intemperatam & scorbuticam, ex

Frid. Hoffmanni Oper. Tom. II.

levi etiam partis externa læsione, in sphacelum sint proclives. Quod multo magis evenire puto; quando à dolore & spafmo intestina, velut par- tes texturæ prorsus nervosæ & fibrosæ, paulo acrius infestantur. Ex quo intelligitur, quam cau- te & provide, circa res diæteticas infirmi senes se gerere debeant, ne quicquam admittant, quod dolores & spasmos in intestinis excitare aptum sit.

Neque dum in hac materia versamur, quæ non minoris in praxi momenti est, hanc observatio- nem præterire possum ac debeo, quod biliosa co- lica, ea præprimis quæ ex gravi progignitur ira, tertianæ sive continuæ sive intermittenti superve- niens, magni non expers sit periculi, utpote quæ perperam per purgantia, emetica aut sudorifera, vel nimium calorem externum tractata, quam fa- cile in intestinorum tenuium inflammationem le- thalem, præeuntibus anxietatibus & convulsioni- bus, transeat, & die paroxysmi mortem plerum- que accersat. Ex quo discere tyrones possunt, quam provide & caute tractare debeant tertiana alias benigna detentos, tam gravi symptomate in- cidente. Ego in demulcentibus & temperantibus potionibus ac lenioribus laxantibus, cujus generis sunt serum lactis bene depuratum, decoctum ave- naceum, ex floribus chamomillæ vulgaris, emulsio amygdalarum dulcium, papaveris & seminum IV. frigidorum majorum cum ptisana præparata, pul- vis *Marchionis*, vel ex lapidibus cancrorum, nitro & rhabbarbaro confectus, atque clysteres emollien- tes, optimum & præsentaneum auxilium depre- hendi.

Exempla adhuc legantur in *Consult. Medic. Sect. III. cas. XIII. XXI.*

CAPUT VI.

De acuto dolore & spafmo ex calculo renali.

THESES PATHOLOGICÆ.

§. I.

Dolor, qui ex calculo renali firmitus urinæ meatibus impacto proficiscitur, uti omnium quidem passionum, quæ genus humanum misere torquent, est acerbissima: ita sæpius fit, ut is, si quis prima præsertim vice ex hoc laboret, difficil- lime ab aliis, quæ circa regionem lumbarem con- sistunt dolorificis affectionibus discernatur.

§. II.

Communis sed pessimus mox invaluit, ut, si quis circa regionem lumbarem doleat, statim ex calculo renum se dolere existimetur; cum tamen ibi complures valde sensibilis indolis & dolori obno- xia sint partes, ut muscoli lumborum externi & interni, ligamenta vertebrarum lumbarium nervea, plexus nervorum superior mesentericus, ramus ar- teriæ meseraicæ superioris, & circa viciniâ, flexuo- sus intestini duodeni finis, neque minus sigmoidea coli flexura; quæ singulæ, quando à vitioso ibi stagnante, sive sanguineo, sive seroso impuro hu- more, vel nimis distenduntur, vel comprimuntur, dolorem satis gravem exhibent. Fit etiam quan- doque, ut à rheumatismo has partes occupante tantus exsurgat dolor, ut quasi lumbis per medium sectis incurvatus incedere debeat ager, nec surge- re queat. Quod itidem fieri solet, si à casu, vel à magna oneris levatione, vertebræ cum nervis tan- tum

Dolor ex calculo re- nali d'ffi- cilis dig- noscitur.

Non omnis dolor circa lumbos est ex calculo renali.

tillum à propria sede recedunt. Neque tam raro evenit, ut à sola sanguinis copia, circa plexum mesentericum, & circa arterias emulgentes stagnante, in plethoricis vel hæmorrhoidariis, vel à neglecta consueta venæ sectione, ingens circa lumbos oboriat dolor, qui vulgo pro calculoso, sed perperam, habetur: dum vel solius venæ sectionis in pede beneficio, vel pulvere nitroso discutiente subito sæpe definit.

§. III.

Quomodo
discernen-
dus à coli-
ca.

Id vero frequentius contingit, ut dolor colicus cum nephritico calculoso confundatur: nam, quando flexura coli circa lumbos quæ jacet, vel flatibus nimium distenditur, vel spasmodice constringitur, non modo atrox in regione lumbari fit dolor, sed & ipse ad præcordia transit, nauseam ac vomendi conatum efficit, urinæ fluxum impedit, alvum constringit, imo totum abdomen cruciatibus torquet, non secus ac à calculo fieri solet. Sed tamen, quia hic dolor spasmodicus, non assiduus, non fixus, sed magis vagus est, ac clysteribus emollientibus alvo infusis magnopere levatur: hinc peritus utique medicus, hunc à calculoso, non adeo difficulter distinguere potest: cum hic magis pressorius sit, quod germanice exprimunt: *Es drücke sie, als ein Klotz*, atque vires non tam intense destruat, per intervalla etiam remittat, ut ægrotantes sæpius surgere & ambulare possint; quod in acerbo intestinorum dolore non accidit. Deinceps vomitus & nausea, à calculo si dolor est, jejuno ventriculo magis urget, ac in uretra imo ipsa glande titillatio & sensus punctorius percipitur, urina sabulo referta, testiculi quoque retractione ac femoris stupor & contractio ejusdem lateris fit, quod in dolore intestinorum vix observatur.

§. IV.

Calculus
non nisi è
sede sua
dimovetur
atrociter
afflixit.

Notabile est, quod calculi etiam prægrandis magnitudinis & ramis insignibus præditi in renum substantia, placide sine ullo doloris incommodo, per aliquot annos quieti delitescere possint; simul ac vero è sede sua dimoventur, & in angustos nerveo-musculosos canales, ureteres dictos descendunt, perque hos in vesicam exitum moliantur, mox gravissima invadunt symptomata: adeo, ut hi ipsi canales veram & fixam dolorum ex calculo sedem ac domicilium constituent, qui tamen pro differente calculi magnitudine, asperitate, ac figura, tunicas nerveas plus minus distendente & lancinante, vel intensiores vel leviores evadunt. Quandoque tam crudeles sunt, ut præter extremorum horrorem & refrigerationem, nauseam, vomitum, spasticam præcordiorum constrictionem, difficilem urinæ mictum, alvi strictionem, spirandique angustiam, stuporem cruris, retractionem testiculi ad os pubis, inquietudinem, ingentem virium lapsum, syncopen, convulsiones etiam epilepticas concitent, vel plane fatalem ischuriam inducant. Vidimus aliquando ægrotantes conquestos fuisse, se non alium sensum percipere, ac si quis cultro acuto vulnus profundum, secundum longitudinem spinæ, versus vesicam continuo infligeret; ubi, in defunctis, ureteres instar farciminum à copia urinæ, cujus in vesicam influxum calculus circa introitum ureteris in vesicam hærens intercept, extensi & turgidi comparuerunt.

§. V.

In uretere
sæpe sine
singulari

Res est experientia confirmata, quod interdum longo tempore lapis in uretere, sine singulari do-

lore sine mictus interceptione hære & conquiescere possit, ubi tamen mox subito & ex improvviso dolor revertitur acerbus, cum ciborum subsequente fastidio, nausea, vomitu & urinæ interceptione; forsitan quod ab incommodo motu situm suum mutaverit lapis, & sic asperitate sua, tunicæ nerveæ fibras magis offendar. Neque etiam semper iisdem symptomatibus hic affectus stipatur: nam, ut ERASMUS de suo calculo loquitur in *Epistol. ad Perckmeyerum*, subinde se novat, ut plane credatur aliud esse malum, quod maximam partem inde pendet, quod alia symptomata sint ab initio, alia in progressu, interdum quiescat, interdum se moveat & locum mutet.

§. VI.

Atqui etiam illud attentionem excitare debet, quod calculi sinistrum renem, præ dextro, frequentius obsideant; quo fit, ut dolores ex renali calculo longe crebriores in sinistro, quam in dextro latere observentur: id quod confirmat CAROL. PISO in *tract. de morbis ex serosa colluv. oriund. c. II.* dum scribit: *ex centum calculosa nephritide laborantibus octoginta & amplius renem sinistrum dolent.* Neque hujus eventus ratio, adeo in obscuro posita est: in rene enim dextro, quia hepatis amplo viscere tegitur & majori præ altero calore fovetur, promptior multo atque expeditior evadit sanguinis per hujus renis vasa progressio, feri itidem urinosi separatio: hinc non tam facile sanguinis & urinæ fieri in hoc possunt stagnationes, ac in sinistro, qui coli flexura obsessus, ob frequentem flatuum restagnationem magis premittitur; ex quo fit, ut liberior sanguinis per vasa compressa interceptus cursus, difficiliorem laticis urinosis per tubulos transcolationem, atque promptiorem ibi stagnationem & materiæ tartaræ secessionem & concretionem reddat atque efficiat.

§. VII.

Notabile idque experientia pariter suffultum est, quod calculus diutius in renum parenchymate vel pelvi delitescens, pluribus modis ac causis, è loco suo dimoveri atque in ureteris principium propelli possit: & inter has, primas fere tenent, fortior animi per iram conturbatio, corporis subita & vehemens per vecturam sive equitationem commotio, inque primis penetrans, quod venti è plaga septentrionali præbent, frigus improvide lumbis admissum, item diureticorum, cujus generis sunt terebinthinacea, juniperina, cetera, quibus subinde sed perperam medici ad præservationem à calculo uti solent, liberalior usus: Non semel quoque, sed iterum iterumque observavimus, quod dolores colicæ flatulentæ, item spasmi hypochondriaci, hysterici, hæmorrhoidariis familiares, nucleos calculosos papillis renalibus inhærentes protrudendo, occasionem ad crudeles istos dolores subministraverint.

§. VIII.

Quod attinet ad causas remotas & sic dictas naturales, quæ ad gignendos in renibus calculos & inde provenientes dolores symbolum suum conferunt; temperamentum sic dictum sanguineum, inter has non ultimum tenet locum. Nam corpora mollioris & spongiosioris texturæ, foemini præsertim sexus & quæ copiosum alunt in venis sanguinem, diæta lauta & vinosa utuntur, otioque & vitæ sedentariæ indulgent, nec non placentis, lacte, caseo delectantur, post quinquagesimum maxime annum, tributo lunari cessante, doloribus ex cal-

Causa etiam
è rene di-
moveres.

Causa re-
mota cal-
culi rena-
lis.

calculo fiunt obnoxia; à quibus plerumque libera & immunia, fluxu mensium rite se habente, persistunt. Ex Viris ii, qui in adolescentia hæmorrhagis narium, capitis doloribus frequentibus subiecti fuerunt, item qui hæmorrhoidali fluxui sunt affueti, hoc cessante vel imminuto, calculosis & podagricis affectionibus, sub provectiori ætate; subinde tentantur. Senilem vero ætatem frequentius & calculo renum & vesicæ infestari experientia docemur, quia humores fiunt crassiores & cibi in ventriculo acescunt, alvus fit pigrior & otium quoque calculorum generationi multum patrocina-
natur. Quo fortasse respiciens ERASMUS de suo malo ipse ita jocatur: Illud mirum videri potest, cum fœminæ sterilefcant ætate, me senectus fecit fœcundiores: nam indies crebrius parturio.

§. IX.

Calculus & podagra sunt morbi maxime hereditarii.

Accedit etiam hoc, quod vix ullus affectus tam crebro ex parentibus in liberos transmigrare observetur, quam calculus & podagra, quippe quæ cum illo, ratione dispositionis solidorum & fluidorum plurimum affinitatis habet; quia uterque adfectus non modo hominibus sanguine plenis, & qui vulgo dicuntur sanguinei, est infestus, sed ambo etiam in quadam nativa debilitate & atonia solidorum, videlicet in nephriticis, renum; in podagricis ligamentorum quæ articulos vinciunt, fundati sunt. Crebrius quoque animadvertimus, morbos rheumaticos, arthriticos, podagricos quam facile transmigrare in nephriticos & hos rursus per metastasin in illos transformari & transponi, adeo ut etiam, si à dolore ex podagra quis diu immunis fuerit, in calculosam nephritidem facile incidat, & vice versa. Neque raro contingit, utrumque affectum conjunctim & uno tempore atroci dolore hominem torquere.

§. X.

Ratio formalis calculorum renalium.

Quod attinet ad generationem calculorum in renibus, hanc tali modo concipere licet: quando, à nimis vehemente sanguinis appulsu, ejusque regressu per venas difficiliore, vasa renum sanguinea nimium distenduntur & infarciuntur, fit tandem, ut minima arteriolarum, ubi in papillulas & syphunculos urinosos abeunt, aperiantur ac disrumpantur, & ita à stagnante & extravasato sero sanguineo, primum parvi abscessus atque ulcuscula generentur, quæ successive majora fiunt; in quibus, quando serum urinosum multis tartareis limosis partibus refertum subsistit, particulae graviores & acuminatae secedunt ac invicem concre-
scunt, ita quidem, ut materia primo crassior ac rudior sabulosa, dein etiam grana compactiora gignantur, quæ urinæ copiosius secretæ beneficio facile eluuntur, & sæpius non sine dolore foras propelluntur: ubi igitur tale crassum ac grave sabulum, in urina subsidet, haud dubium calculosæ nephritidis indicium præbet. Quando vero hi acini, vel nuclei calculosi, substantiæ renum ulcerosæ insidentes, successiva accretione majores & duriores facti, alluvione seri urinosi tartareis partibus referti, vel aliis ex causis ad pelvim & principium ureterum feruntur, majores utique cruciatus, & atrocior symptomatum concursus omnino metuendi sunt, si videlicet, per angustos hos exquisitoris sensus meatus, iter suum versus vesicam conficere debent; ad quam si fuerint delapsi, protinus omnimoda symptomatum, cum ingenti decumbentis gaudiò & virium restitutione, fit sublatio.

§. XI.

Quod calculi autem in ipso renum parenchymate ex ichoroso vel sanguineo purulento quodam stagnante humore generentur; id inter alia vel hæc evincunt, quod in nephriticis sæpe quippiam purulenti vel sanguinei, ut olim à CELSO jam notatum, cum urina secedat, calculosis etiam mictio cruenta familiaris sit, & renes post mortem valde magni flaccidi; atque exulcerati inveniantur: quid quod curatio id ipsum testetur, quæ omnium optime, per abstergentia, vulneraria, consolidantia, leniter constringentia perficitur. Neque vero ego inficias iverim, citra præviam substantiæ renalis læsionem, in pelvi vel majoribus renum syphunculis, ex urina stagnante, materiam etiam tartaream five arenulas aggeri & concre-
*scere sensim paulatimque in insignis molis lapillos posse. Prout vero materia illa, si sit ichorosa, si-
 ve tartarea, ratione coloris, craseos & consistentiæ differt & accretio major vel minor est; varii generis etiam lapilli concre-
 scunt: alii quippe sunt prope saxei, dura constantes substantia; alii friabiles & male compacti, alii pallidi cinerei rubri ac Sanderachini; alii majores, minores, plus minus angulosi & asperi deprehenduntur.*

§. XII.

Omnes morbos nephriticos, ut sunt renum infarctus, inflammationes, exulcerationes, dolores ex calculo, difficilius in senioribus sanari experientia confirmat; quæ etiam HIPPOCRATIS testimonio, quod *aphor. VI. Sect. VI.* extat, ulterius stabilitur. Nam sicut læsiones & exulcerationes internarum partium, propter humorum intemperiem & excrementorum abundantiam, quæ in provectiori ætate increfcit; ita etiam, quæ renibus & vesicæ inhærescunt, propter urinæ ingentem acrimoniam, difficillime ad sanationem perducuntur.

Renum affectus difficilius in senibus sanantur.

§. XIII.

Si quando dolor atrox per plures dies & noctes non remittit, sed assidue torquet, & vires valde atterit ac nullis vult medicamentis expertissimæ alias virtutis cedere, omnimoda quoque urinæ accedit suppressio, cum extremorum frigore & convulsione tendinum, mortem in propinquo esse, indicio est. Maxime vero omnium, dolor ex calculo, iis, exitum atque periculum minatur, qui antea diuturno animi moerore macerati, vires amiserunt: nam major virium mox sequitur dejectio, partiumque internarum sphacelatio. Neque res boni ominis est, quando lapis, longo tempore ureteri continuo inhærescit; perit enim ciborum inappetentia ac digestio, nausea vero, & firmiter conatus ad vomendum, anxietasque diutius persistens, tandemque lentus hecticus calor; virium & carnis substantiam penitus consumens, mortem accelerat.

*Quæ mortem præse-
 gians.*

§. XIV.

Post mortem miræ sæpe magnitudinis valdeque compactus & ramis majoribus instructus calculus in renibus, qui toti per exulcerationem consumti & membrana duriore tecti comparuerunt, repertus fuit, cum de dolore per vitam nunquam quis fuerit conquestus: & tali malo adfecti tabe inoriuntur, quæ renalis vocatur. Quidam vero ex calculi doloribus brevi tempore succumbunt, & morbo acuto pereunt, dum acutissimum dolo-
*rem, ventriculi vel intestinorum, tandem inflam-
 matio subsequitur: quidam ob totalem urinæ sup-
 press-*

*Tabes renalis perim-
 is.*

*is. inflam-
 matio sus-
 perveniens.*

pressionem, in hydropem pectoris, lethargum vel convulsiones incidunt.

C U R A T I O.

§. I.

Indicatio-
nes curato-
rie.

Momentum profecto omne curationis positum esse videtur, tum in facili & ab omni molestia immuni calculorum exclusione, tum in impedienda sabuli excrementitii generatione tanquam occasionis & objecti sævissimi doloris & aliorum symptomatum. Longe enim alia medendi via ac ratio est in ejus accessione; alia extra eam, quæ præservatoria est.

§. II.

In paroxys-
mo dolor
& spasmus
sedandus.

In ipso paroxysmo, ubi symptomatum ingens est exacerbatio, & ab atroci dolore tota œconomia functionum vitalium turbatur, primo omnium eo respiciendum est, ut dolorum vehementia idoneis remediis mitigetur, atque spastica stricturæ, quæ non modo partes vicinas, sed totum subinde nervosarum partium systema lege consensionis afficiunt, idoneis remediis componantur ac sopiantur; idque maxime eam ob causam, quia sub tanto spasmorum, qui meatus urinarum constringunt, impetu, calculi iter per ureterem in vesicam ægerrime perficitur. Inter probatæ vero & spectatæ virtutis remedia, quæ huic intentioni satisfaciunt, non possum non liquorem meum anodynum mineralem, ob efficacem & securum usum, dilaudare; quippe qui pariori sed repetita dosi sumtus, spasmos circa primas vias sedando, molestam illam sensationem, nauseam ac vomitionem egregie tollit. Qui hujus autem medicamenti copia caret, huic spiritum nitri, rite, methodo nostra, quam præscripsimus in *Observat. physico-chym.* præparatum, plurimum commendamus; hic enim nullo amplius acore imbutus, blanda sulphurea exhalatione, & flatus discutit, & spasticas stricturas relaxat. Commodissime vero hi spiritus cum aquis sedativis, ut sunt, cerasorum nigrorum, florum acaciæ, sambuci, papaveris rhœados, tilia, primulæ veris, liliorum convallium, ulmaria, & præcipue omnium florum chamomillæ & summitatum millefolii, adjecto syrupo papaveris rhœados vel albi: vel etiam in brodio carnis, cum aliquot cochlearibus olei amygdalini recentis & purissimi, sine tostione prævia parati, exhiberi possunt. Spectant huc quoque emulsionem, ex amygdalis dulcibus, seminibus IV. frigidis, papaveris, milii solis, semine dauci, cum jam dictis aquis præparatæ, & syrupi papaveris albi sufficienti quantitate edulcoratæ. Quando vero leniora hæc, dolori mitigando non sufficiunt, ad paulo validiora transeundum, & quidem opiata, per aliorum additionem valde correctæ & secunda reddita, cujus generis sunt: massa pilularum *Wildegansii*, *Starckii*, laudanum liquidum *Sydenhamii*, & cœlestis theriaca; item trochisci de *Alkekengi*, qui ob virtutis præstantiam & ingredientia dolori mulcendo aptissima, laude omnino dignissimi sunt.

§. III.

Laudantur
ex nitro.

Præter hæc dicta, nitrosa, & inter hæc nitrum tantum purificatum & crystallisatum, vel artificiale ex spiritu nitri & sale tartari compositum, vel nitrum antimoniatum, in compescendis præcalidis gravibus & acutis doloribus cum sanguinis & humorum exæstuationibus junctis, certe omnibus aliis remedium generibus, virtute ac securo usu, superiora sunt, atque in morbis nephriticis

laudem insignem promerentur. Quam optime vero cum cancrorum lapidibus, cum cinnabari, vel pulvere Marchionis & aliquot granis trochiscorum alkekengi vel massæ pilular. *Wildegansii* miscantur, & cum emulsione vel sero lactis dulci propinantur.

§. IV.

Enim vero, ubi dolorum & spasmorum vehementia fere intolerabilis est, sola interna huic sedando non sufficiunt, sed externis etiam occurrere oportet. Inter omnia autem desideratissimi effectus clysteres sunt, ex emollientibus floribus, præsertim malvæ hortensis, sambuci, papaveris rhœados, millefolii, chamomillæ vulgaris, & verbasci, cum sero lactis decoctis, addito syrupo dialtheæ *Fernelii*, nitro & sale Ebsoniense confecti. Quando inferior recti & coli pars constrictissima est, ut flatus transmitti nequeant, sed ad superiora vergentes, anxietates augeant, enemata ex oleis & pinguedinibus, ano injecta, mirabilem attulisse opem, non una sed pluribus vicibus à nobis est observatum. Alvo aperta, flatibusque sic exitu parato, stomachi vomibundæ inversiones, cum anxietatibus præcordiorum intensioribus, protinus remittunt.

Clysteres

§. V.

Deinceps, in mitigandis hisce doloribus, veterum inque primis HIPPOCRATIS methodum, uti antiquissimam, ita optimam maximique habendam esse censemus, dum *lib. V. de intern. affection.* hæc tradit: *cum dolor in renibus preßerit, multa calida lavato, & tepesfactoria, qua parte maxime dolet, adhibeto.* Idem remedium *TRALLIANUS lib. IX. cap. 4.* his verbis valde commendat, *omnium optimum est balneum, ut quod non solum mitiget, sed & curare possit: nam colicos frequenter solummodo lenit; nephriticos vero utraque ratione juvat, utantur vero agri loci inunctione, chamæmelo, in balneo & diutius morentur, non semel tantum in die sed bis vel ter lavare expedit.* Et profecto, balnea & inessus ex aqua dulci, præsertim pluviali temperate calida, in sistendis acerbissimis tormentis, vix habent sui similia, si modo crebrius repetantur. Atqui linimenta, ex axungia humana, cati sylvestris, canis, castorei, unguento dialtheæ parata, vel etiam vesicam, decocto florum emollientium antea recensitorum, ex lacte, repletam, ac parti intense dolenti applicatam, singularem plane exerere virtutem & efficaciam, multiplici usu confirmatum habemus.

nec non
balnea ma-
gna effica-
cia sunt.

linimen-
ta.

§. VI.

Quandocunque, legitimum horum usum notabilis spasmorum sequitur remissio, pulsus sedatior & mollior evadit, calor madidus ac æquabilis totum corpus occupat, & flatus probe ex ano descendunt; protrusio calculi idoneis remediis, sub debita tamen adhibita cautione, tentanda venit. Vidimus ad obtinendum hunc scopum varia præsentissimi fuisse effectus, atque inter hæc largissime assumtum infusum herbæ veronicæ & petroselinii, vel ex seminibus dauci, selleri, foeniculi, baccis alkekengi, radice glycyrrhizæ, summitatibus millefolii, paratum, eximium attulisse levamen, cum primis si potius quodammodo spirituosus, ut malvaticum juniperinum, horum usum exceperit. Mirabilem quoque, in educendo ex viarum angustis calculo, decocti antinephritici *Foresti* largiorem potum, adjuncto corporis motu, efficaciam subinde præstitisse, à nobis observatum est. Sed interdum paulo fortioribus pel-

Spasmo se-
dato, calculi
protrusio
tentanda.

pellentibus opus est, quæ inter eminent ac tutissima sunt mater perlarum, vel cochleæ aut testæ ovorum ustæ cum succo citri in convenienti vehiculo exhibitæ.

METHODUS PRÆSERVATORIA.

§. I.

Præservatio in progressu morbi difficilis.

Præservatio pernicialis hujus mali, uti in principio quidem facillima, ita in progressu, si ex renum magno vitio & exulceratione, calculorum prognata fuerit ubertas, dolorumque crebrior recursus, multis sane difficultatibus implicata ac circumsepta est. Nam quia, complures, ut supra exposuimus, ex sanguine vel præter naturam exsuperante, vel multorum incongruorum viscidorum ac acidorum alimentorum assumptione crudiori ac spissiore reddito, quam facile in hoc malum incidunt; certe sanguinis decenti missione, motu & exercitatione corporis sufficiente, nec non potionibus diluentibus, aquis medicatis præsertim *Selteranis*, item sero lactis dulci & acidulo, ad arcendum molestissimum hunc & exitialem morbum, nihil facile præstabilius ac efficacius reperire licet.

§. II.

Quando traumatica conseruant.

Ubi vero continuus fit calculorum partus, opus est, ut ea in usum ducantur, quæ virtute traumatica leniter consolidante & adstringente gaudent; quare à multis retro temporibus est observatum, imo plebeiis & domesticis constat experimentis, decoctorum vel etiam infusorum, ex herbis vulnerariis, & aqua vel cerevisia paratorum, ac cum butyro insulso, vel cum melle mixtorum longiori usu, quosdam penitus à malo hoc calculoso fuisse liberatos: cujus generis præcipuæ sunt, equisetum, virga aurea, hederæ terrestris, fragaria, marrubium album, veronica, parietaria, millefolium cum summitatibus, malva, cortex radicis acaciæ, lycopodium, baccæ juniperi tostæ, fraga exsiccata, acini & fructus cynosbati tosti; ex quibus speciebus, cum melle Prussico albo, quod identidem consolidante & balsamica sua virtute renum morbis admodum amicum, electuarium paratum & mane ad cochleare dimidium usurpatum, superbibendo infusum Théæ, ingens solamen iis, qui per multos annos nephritide calculosa laborarunt, attulisse, observatum est.

§. III.

Quando alcalina.

Alia jam, præservandi à calculo, via ac ratio suppetit, per alcalina, quæ acidum & glutinosum, tanquam præcipuum calculosæ concretionis fundamentum, domant atque destruunt; & hinc est, quod cancrorum lapides, mater perlarum, testæ ovorum, conchæ & cochleæ simpliciter paratæ, vel etiam ustæ, lapis lyncis & judæicus, nec non pulvis famigeratissimus *Volkhammeri*, qui ex lapidibus pretiosis calcinatis concinnatus creditur, vel simplex tantum oleum tartari per deliquium, liquor cinerum clavellatorum, vel nitri fixi, tinctura tartari, antimonii acris, frequentius in usum ducta, calculorum generationem egregie impediant, & ab atrociori dolorum concursu corpus vindicent.

§. IV.

Quando demulcentia.

Sunt quoque adhuc plura, non minoris ad præservandum efficaciam, præsidia, quorum legitimus usus calculosis admodum observatur proficiuus. Et hæc sunt quæ oleosis, pinguiusculis ac temperatis & quodammodo anodynis, demulcentibus particulis, spiculorum salinorum unionem, quæ ad

Frid. Hoffmanni Oper. Tom. II.

concretionem solidescens est necessaria, impediunt; quantum enim pingua, exigua etiam dosi admixta, crystallisationis negotium impediunt, ex chymicis perquam notum est. Ad hanc classem merito referre possumus, fructus & semina quæ blando & dulci oleo gaudent, ut sunt, semina IV. frigida majora, milii solis, saxifragæ, papaveris albi, cardui mariæ, amygdalæ dulces & amaræ; nuclei cerasorum & malorum Persicorum, quæ vel in pulverem cum saccharo vel in emulsionem redacta, frequentiusve usurpata, non satis ab iis, qui huic adfectui obnoxii frequenter sunt, dilaudari possunt. Neque vero, inter optima & specifica ad renum vitia corrigenda præsidia, radix glycyrrhizæ, silentio prætereunda est, cujus pulvis vel infusum in demulcentis & temperandis acribus salium particulis, in detergendis mucositatibus, magnæ efficaciam est. Atque etiam ex compluribus aliis millefolium ejusque summitates in renum vitiis specificam plane & mirabilem edunt efficaciam, quando ejus infusum vel decoctum per longum satis tempus quotidie usurpatur. Vidimus hoc modo aliquot ab omni calculosa affectione, cui diutius obnoxii erant, prorsus liberatos: nam hæc herba multiplici ratione proficua est, & præter virtutem consolidantem & demulcentem, ob oleum vere anodynum, quod exacte cum oleo florum chamomillæ ratione coloris & virtutis convenit, dolores & spasmos sedandi efficacia pollet.

§. V.

Ante omnia vero, sicut in cunctis morbis chronicis, ita etiam in calculo præcavendo, ventriculi & ejus digestionis, nec non alvinæ excretionis, ut hæc singula se recte habeant, ratio habenda est. Placuit mihi hac in re insignis plane locus *ÆTII*, quem *cap. XVI. p. 177.* prodidit, ita se habens: *præservat à calculo moderatus cibus bonæ concoctionis; nam cruditates non solum exasperant morbum, sed etiam gignunt; inde abstineant ægri, à satietate, à cæna, sæpe vomant & absinthium assidue bibant, ac per certum tempus per ventrem se purgent. Cibos sumant, à quibus neque satietates neque cruditates eveniunt. Urinam etiam cientibus utantur, pastinacam in dies edentes valde percocctam, feniculum, pulegium, calaminthen; ex marinis strombos, locustas, gammaros; per plures autem dies radicis eryngii decoctum bibant, similiter dictamni. Oportet aquam per omnem vitam esse purissimam & percolatam, vinum tenue album, urinam ciens; exercitationibus utendum modicis & frictionibus in balneo, ex nitro assato, ac fece vini usta & pumice. In quo genere TRALLIANUS quoque audiendus, qui l. c. hanc diætæ rationem præscribit: probe faciunt, qui bibunt aquam & evitant omnia quæ ex pipere constant, & non solum acres, sed & crassi succi cibos, ut similaginem, ova dura, placentas & quæ ex lacte parantur, ipsum lac & caseum, item vina admodum nigra & austera. Ad hæc cavendum, ne ægri culcitris indormiant ex anserum plumis confectis, hæc siquidem renes valde calefaciunt. Præterea, ne multum stent; magis vero studendum, ut vel moveantur vel consideant. Et paulo ante: bibere oportet, ante omnem cibum, aquam tepidam: nihil renes enim à recremento magis vacuos temperatosque reddit, ut non amplius calculos procreare possint; nam temporis spatium igneus eorum calor à tepore aquæ extinguatur. Exinde dubio omni procul prodiit secretum illud eximium *ZECCHII* relatum in suis Consultation. nempe haustus aquæ calidæ ad libram unam circiter, statim ante prandium. Et *CAROL.**

Alvi habenda ratio.

PISO, multis ante *Zecchium* annis, hoc idem aquæ calidæ remedium comprobavit, dicens, quod post primum excretum calculum, nunquam in posterum alii geniti fuerint, si quis usum hunc aquæ calidæ multo tempore continuaverit.

CAUTELÆ ET OBSERVATIONES PRACTICÆ.

§. I.

*Respicien-
dum ad
corpus a-
grotantis.*

At vero, cum ad persanandum æque ac protelandum hoc malum, potissimum medici momentum in eo sit repositum, ut pro differenti corporum constitutione, ratione ætatis, temperamenti, læsionis functionum, nec non sensibilitatis aliarumque causarum, alia atque alia medicamenta, debito tempore, & convenienti ordine adhibeat; è re utique duxi, quasdam cautiones & observationes, in praxi utiles atque necessarias, hoc loco subnectere. Primo omnium, attente & pensitate considerare oportet: remedia, quæ præservationis vel curationis gratia in usum veniunt, non æque omnibus convenire, neque semper eundem effectum ac levamen præstare, ob differentem valde & mutabilem corporis, ratione fluidorum dispositionem, & solidarum plane peculiarem texturam & inde pendentem sensationem, quæ Græcis idiosyncrasia vocatur; quare interdum variari debent medicamenta, siquidem successu temporis, etiam ipsa natura iis assuescere solet, ut effectum laudato, quem ante ediderunt, nunc carere observentur.

§. II.

*Sæpe natu-
ra sponte
calculum
protrudit.*

Observatum quoque sæpius est, ex improviso, naturam nullis remediis coactam, sed sibi relictam, se ad calculum protrudendum accingere & feliciter id præstare. Simile quid subinde in partu animadvertimus, cum non ante facile remedia proficiant aliquid, quam in subsidium venerit natura: qua de causa fit, ut empyrici sæpe suis inanibus remediis gloriam reportent. Solers itaque & in sanandis morbis occupatus medicus, id probe attendat, quod natura sæpe sola, nulla remedium ope adjuvata, à violentis spasmodis, doloribus & motibus remittat & conquiescat; (id quod tamen non intellectui imaginario vitali adscribendum est; cum causæ ac rationes physicae subsint,) siquidem magna prudentiæ medicæ pars in eo consistit, ut temporis illud momentum, quo natura se ad agendum & corpus à morbo liberandum armat, sedulo æstimetur. Hinc consultum quandoque est, ubi ad tempus frustra adhibita fuere medicamenta, subsistere ac ferias agere, ut quies quasi naturæ concilietur, quia ipsa sæpius sua sponte & præter omnium opinionem, plus præstat, quam medicus cogendo & stimulando.

§. III.

*Quando
diuretica
exhiben-
da?*

Quemadmodum diuretica & urinam pellentia, eaque paulo acriora & vehementiora, ut sunt terebinthinacea, juniperina, succinata, alliacea, porracea, & ex petroselino parata, neque ad præservationem in plethoricis, neque in paroxysmo nephritico, sive is simplex tantum sit, sive simul calculosus, unquam proficiunt, sed malum deterius reddunt atque symptomata exasperant: ita prudens eorum usus non plane dammandus & interdicens est. Quare in plebeis,

robustioribus, humidioris & segnioris naturæ corporibus, præsertim ubi præservandi sine exhibentur, non modo tonum vasorum renalium roborando, sed & copiam feri impuri tartarei, per renes, ejiciendo, commodam collocare operam possunt.

§. IV.

Uti tempestiva, modica ac æqualis motio sive vectio, naturæ in calculis pellendis admodum idonea, & congruorum pellentium usum, diluentia, præsertim quæ mole operantur, ut acidulæ, thermæ, lactis serum egregie secundat, ut celeriter sæpe calculi, è sede sua, quam occuparunt fixam, dimoveantur: ita etiam observatum fuit, intempestivam vectionem vel equitationem, plurimis damnum attulisse, quia è sede sua non incommoda calculum expulsum, in transversum egerunt, ut nunc acutis suis angulis membranæ sensibili nerveæ magis fuerit allisus; subsequente inde majori spasmodorum sævitia, imo lethali quandoque ischuria.

§. V.

Tempestiva & sufficiente venæ sectione non modo ad præservandum à calculo, non facile superius ac efficacius reperitur præsidium, præsertim, ubi corporis natura ad excernendam nimiam sanguinis quantitatem est disposita; sed ejusdem quoque remedii utilitas, non raro in ipso paroxysmo sese commendat, nimirum, ubi plethora cum pulsu celeri, magno æstu ac intensa siti associata est. Doloris enim vehementioris ea indoles ac vis est, ut, spasmodis liberiores sanguinis circuitum per venas maxime impredientibus, cum impetu ad alia incongrua loca copiosum sanguinem adducendo, epilepsiam, convulsiones, lethargum, delirium, apoplexiam sanguineam, mictum cruentum, febres inflammatorias & hujus generis alia, de quibus nobis exempla sunt nota ac obvia, concitet; quæ singula prudenti sanguinis missione averti possunt.

§. VI.

Quando nephritis calculosa incidit in corpus scorbuticum, sive impuris excrementitiis humoribus refertum, & nostro tempore, purpuræ grassanti chronicæ obnoxium; sub ipso paroxysmo, concurrente simul impuritate scorbutica, varia & terroris plena se immiscent symptomata, quæ insignem, in præscribendis medicamentis, medici prudentiam requirunt ac desiderant. Neque enim facile alia, nisi diluentia, ac demulcentia, ut serum lactis acidulum, vel dulce, præbenda sunt; ab omni cerevisiæ & vini potu abstinendum; serum lactis vero calide, vel temperate frigidum sumtum, cum temperatis diaphoreticis, tali in casu maximi usus fuisse observavimus.

§. VII.

Balnea, utut quandoque præsentissimi levamini & magnæ necessitatis sint; abstinendum tamen ab iis penitus, in plethoricis nimis repletis & pinguibus corporibus, ubi simul spirandi angustia ac difficultas adest. Ante itaque horum usum, solvenda plethora, alvus laxanda, & dolorum vehementia compescenda.

§. VIII.

Non raro jungitur affectioni calculosæ colica ex hæmorrhoidum vitio, convulsiva; prudentis hinc

Circa motum causam.

Vena sectio etiam in paroxysmo non inutiliter celebratur.

In scorbuticis calculosis, diluentia ac demulcentia danda.

Plethoricis à balneis abstineant.

Colica hæmorrhoidalis insuper hinc

niens quo-
modo trac-
tanda?

hinc medici est, hæc omnia probe discernere, & caute in prognosi & curatione procedere: maxime omnium vero, ratio est habenda atrocis intestinorum doloris, ut vel venæ sectione, vel hirudinum applicatione, vel alvi, per clysteres commodos, apertione, ei succurramus. Sæpe fit, ut, quando calculus uno & maximo impetu fertur per ureteres, intolerabilis per dorsum & totius abdominis regionem, cum magna virium jactura oborietur dolor, qui tamen protinus uno quasi momento conquiescit, quando videlicet celeri itinere calculus in vesicam delabitur.

§. IX.

In virium
prostratio-
ne opiata
fugienda.

Ubi diutius torquet dolor & virium adest prostratio, ætas quoque senilis vel animi moeror præcessit, pulsuumque observatur debilitas; opiata instar veneni esse fugienda, inter quæ pessima massa pilularum de cynoglossa, & ratione, & experientia multiplici confirmatum habemus. Præstat tunc potius naturam analepticis leniter spirituosius aquis, ut sunt, aqua menthæ, melissæ, liliorum convallium, cinnamomi sine vino, addito uno vel altero grano ambræ & extracti croci, modico quoque vini usu, erigere, nec non exterius, nimis debilitatum tonum intestinorum, linimentis spirituosius balsamicis, quantum fieri potest, restituere.

§. X.

Inter
aquas mi-
nerales,
Carolina
optima
sumi.

Ex aquis mineralibus & quidem thermalibus, nullæ sunt, quæ, ob calcaream quæ pollent terram, potentius calculosam tartaream materiam resolvunt & exturbant, quam ipsæ *Carolina*; cum quibus tamen provide agendum. Vidimus, post harum usum internum, intra mensis spatium, quingentos & ultra calculos, leves, qui lentis & ciceris magnitudinem æquabant, successively fuisse excretos. Sed postea blande consolidantibus & temperate balsamicis opus est, ut cavitates renum calculis exclusis exhaustæ, in se coeant & carne repleantur: omnium vero securissimum, & usui tam præservatorio quam curatorio, aptissimum esse fontem *Selteranum*, qui præter subtiliorem aquam, sal alcalinum in sinu suo fovet, neque minus in vitiis & læsionibus vesicæ reliquis omnibus remediis superior est, innumerabili experientia evictum habemus & scribimus. Dein quoque, ubi magna scorbutica humoribus inhæret impuritas, atque simul adest partium exulceratio, dictum fontem cum lacte, debito modo miscere, & sufficienti satis temporis spatio adhibere, consultissimum est.

ENARRATIONES MORBORUM.

OBSERVATIO I.

Vertigo
cum neph-
ritide cal-
culosa ex
plethora.

Vir generosus in dignitate Consilarii Cameræ constitutus, quinquagenarius, complexionis admodum robustæ, quindecim jam ante annos à tertiana febre, insignem sibi contraxit ventriculi imbecillitatem, cum flatulentia abdominis & crebrioribus ructibus conjunctam. Ante X. annos vertigo caput crebrius corripuit, quæ superveniente è naribus hæmorrhagia mox cessavit. Posteaquam vero circa æquinoctia venæ sectionem admittere cœpit, immunis prorsus ab hoc affectu permansisset, nisi venæ sectio fuerit omissa, ubi brevi post insultum quendam de novo est expertus. Sexennium elapsum est, ex

quo graviores sæpe numero à calculo renis sinistri passus est dolores; postquam nempe vitam magis sedentariam coluit. Major doloris atrocitas in regione inguinali sentitur, calculo circa introitum vesicæ persistente, & tunc pauca cum ardore prodit urina: acerbior in lecto dolor est, mitior, si ambulare potest atque etiam sub motu & largiori infusi Thée potu; ita calculi descensum in vesicam cum insigni levamine sæpius procuravit. A clysteribus & linimentis anodynis, item ab oleo amygdalarum dulcium interne sumto, insigne percipit levamen. Si dolor urget, facies flava evadit, corpus sudore frigido perfunditur, adest nausea, vomitus & præcordialis anxietas. Debet sedulo sibi cavere à cibis qui inflant atque etiam à frigore boreali: ab his enim paroxysmus facile refuscitatur. Extra accessionem urina multum semper sabuli continet. Colica etiam flatulenta sæpius ipsum affligebat. Consilium quod à me expetiit, dedi, ut mutaret potum, qui erat domestica crassioris substantiæ cerevisia: & nostram *Löbejünensem* diuretica & antinephritica virtute celebratissimam biberet. Dein suasi, ut singulo mane infusum summatum millefolii cum radice glycyrrhizæ largius paulo sumeret, & ter in mense pilulas meas balsamicas mane usurparet, sumta prius, præcedenti die circa somni horam, salis mei aperitivi drachma. Essentiæ quoque carminativæ *B. Wedelii* cum liquore anodyno mixtæ usum interpolandum, ad flatuum discussionem ordinavi. Quamethodo per aliquot jam annos à dolore ex calculo prorsus liberatus est: neque à flatibus & ructibus tam molesta, ut antea, sentit incommoda.

Epicrisis.

Et vertiginem & nephritidem calculosam in hoc ægro, tum à nimia sanguinis & humorum exundantia, tum à pravo primarum viarum flatu originem suam accepisse, extra omnem dubitationem collocatum est, ubi concurrens vita sedentaria & potus cerevisiæ crassioris & minus diureticæ, ac flatuum in primis viis, præsertim quæ hypochondrium sinistrum occupant, copia, ad calculorum ortum & generationem, in sinistro præsertim rene plurimum contulit. De cerevisia *Löbejünensi*, quæ ex aqua valde levi & subtili, scaturiente ex petroso tractu, coquitur, insuper valde tenuis, minus spirituosius & alba est, ac cito per urinam decedit, hoc memoratu dignum est, quod & à calculo & à podagra omnes fere immunes sint, qui ordinario eam bibunt. Maximum profecto & curationis & præservationis à calculo momentum, in quotidiano congruo potu positum est: hinc qui dispositionem, sive hæreditariam, sive adscititiam ad calculum habent, cerevisias inebriantes & crassiores omni studio vitare debent: laudantur vero cerevisiæ tenues, albæ, valde diureticæ & quæ non flatu ingenerant. Ubi non salubris haberi potest cerevisia, ego decoctum, radicis eryngii, graminis, asparagi, chinæ, fœniculi, cichorei, glycyrrhizæ, addito pauxillo nitri ad potum, non sine insigni subsequente successu commendare solitus sum. Neque omne vinum calculosis utile est: Mosellanum ad præservationem, quia citius per alvum & urinam redditur, omnium est optimum. Ubi autem calculi partus ex labe renum inveteravit, vinum mulsum bonæ notæ vel recens Hungaricum moderata dosi sumtum est valde proficuum.

OBSERVATIO II.

*Dolor &
spasmus
ex calculo
renali in
plethorico.*

Vir in L. ætatis anno constitutus lautæ semper ac vinosæ diætæ affluens, sanguinis ac succi plenus, ceterum satis sanus, inopinato in ipso itinere, per aliquot miliaria curru quo vehebatur succussus, dolore in regione lumbari valde acerbato afficitur; domum reversus dolor increfcit, & ad umbilici regionem se protendit. Accedit tussis vehemens, alvus constipata & urina guttatim cum ardore exit. Remittunt per intervalla dolores. Nihil ad sopiendum dolorem & quod ad facilem calculi exclusionem pertinet ex remediis diætericis & pharmaceuticis fuit omiffum: sed citra præsentaneum effectum. Ex consilio amici sumfit infusum Théæ, cum aliquot olei amygdalarum dulcium unciis, ad mensuram & ultra. Inde excitatus est vomitus & cum magno nisu multa ejecit aquea & pituitosa: non ita multo post, dolores & alia symptomata quieverunt, & altero die insignis magnitudinis calculus cum urina excretus est. Petiit à me ad recidivam præcavendam, remedium. Suasi venæ sectionem ter in quovis anno celebrandam & infusum herbæ veronicæ, summitatum millefolii & radice glycyrrhizæ multa in quantitate sumendum. Et nunquam abhinc rursus à calculo molestias perferfit.

Epicrisis.

Non semel sed sæpius, à motu paulo fortiori per currum vel per equitationem, calculum protrusum derepente acerbissimas passiones produxisse novimus. Evenit hoc, quando in pelvi concretus calculus latitat, salvo renum parenchymate. Annotavi quoque aliquoties, & à motu corporis validiori, & fortiori in vomitum nisu, lapidem ex angustis meatuum, insperato in vesicam elicitum fuisse, præsentaneo mox sequente levamento & symptomatum mitigatione. Venæ sectionem, ubi sanguis abundat, ego ad præservandum & calculum arcendum, maximi semper feci & facio: nam sicut hæmorrhoidum fluxus, testante id Hippocrate vetustissimo medicinæ parente, ab hoc malo præservat: ita ubi hic fluxus deficit, vicariam venæ sectionem præstare operam posse, & sanæ rationi & experientiæ consentaneum est.

OBSERVATIO III.

*Dolor nephriticus
notus venæ sectione
sublatus.*

Vir qui vix quadragesimum annum attigit, sanguinæ constitutionis, texturæ mediocris & macilentioris, nullo unquam morbo nedum calculo correptus fuit, comestationibus & poculis sæpius interfuit; derepente in vehementem circa regionem lumbarem incidit dolorem, cum horrore & refrigeratione extremorum. Succedit vehemens æstus cum pulsu celeri & magna siti: alvus est dura & flatibus distenta. Quidam morbum pro subluxatione vertebrarum dorfi, ad quam tamen defuit occasio, existimarunt; alii habebant pro febre ardente. Sed quum conatus adesset ad vomitum, & urina pauca cum ardore proflueret, circa vias urinarias vitium subesse judicavi. Dedi, præmissis clysteribus & fomentis externis, liquorem anodynum, decoctum hordei cum amygdalis dulcibus in emulsionem redactum; cui portio nitri ad æstum restinguendum adjecta fuit. Sed levamenti inde nihil sequebatur. Quum vero sitis, æstus & dolor urgerent, die quæ erat quarta, ad arcendam quam verebar inflammationem, venæ sectionem in pede suasi; & sanguine ad ali-

quot uncias educto, non ita multo post magna remissio omnium dictorum symptomatum sequebatur. Continuavimus cum ante dictis remediis, alvus clystere aperta, urina liberalius profluxit, dolores sopiti, sudor occupabat totum corpus, & septimo ab invasione die, per urinam, arenacea tantummodo grana, splendida & acuminata, nullus vero calculus prodibant.

Epicrisis.

Dolores ex lumbis aciores quando repente invadunt, febrilem interdum typum servant: quo sæpe factum est, ut morbus pro febre ardente habitus fuerit; quod maxime fit in sanguine repletis, quando plexus nervi mesenterici vel à flatibus in duodeno vel colo stagnantibus, vel potius ab adjacente arteria meseraica superiore sanguine valde distenta fortiter premitur, & demum ipsi renes & ureteres nervosi per consensum sive secundario compatiuntur. Rectius vero secundum meam sententiam hic morbus, dolor nephriticus nothus vocari potest, uti videmus in *Riverii obs. 58. cent. II.* Frustra tunc sola antinephritica opponuntur, quæ nisi per venæ sectionem, sanguinis in locis affectis congestio tollatur, omni prope modum effectum carent. Missio sanguine clysteres carminativos alvum subducentes & quæ nimiam sanguinis ebullitionem sedant, præsentaneam opem tulisse observavi: quin imo in dolore valde acuto à calculo, venæ sectionem ad arcendam inflammationem in corpore sanguine pleno salutarem, & felicior semper medicamentorum operationem animadverti, quo ex *TRALLIANO lib. IX.* insignis locus respicit: *Si sanguinis copiam subesse aut inflammationem una cum calculi obstructione suspiceris, venæ omnino sectionem prius adhibeto: ita nempe haud delinques, si medicamentum offeras; laxatione enim facta, & meatibus rarefactis multo magis auxilia quæ adhibentur propriam vim ostendunt.* Quæ sententia observatione *XV. cent. II.* à *RIVERO* notata magis adhuc confirmatur: *vidua dolore nephritico vehementissimo vexabatur, qui à rene sinistro ad pubem usque, secundum longitudinem ureteris exporrigebatur, cum urinæ acrimonia & frequenti micturitione: huic neque clysteres cum aqua benedicta neque cum terebinthina; neque cum laudano, neque vomitus ingens qui sponte veniebat; neque semicupium; neque laudanum assumptum quicquam profuere, dolore clamoso per biduum perseverante. Tandem aperta fuit vena malleoli, & statim sanguine misso dolor ingens quievit, superstitie tamen dolore obtusiori.*

OBSERVATIO IV.

Fœmina annos quæ habebat XL. à parentibus calculosis nata, ante viginti jam annos, bis minimum in anno tormento hoc cum consuetis symptomatibus comitato, excruciat fuit. Singulis noviluniis alii quædam frustula cum spiritu vini ad præservationem sumfit. Venæ sectione rarius usa; ac jam modo per annum & ultra eam omiserat. Per sex menses permolestus in lumbo sinistro continuo afflixit dolor, qui protensus ad inferiora, ejusdem pedis in eodem latere movendi potentiam & contracturam induxit. Perpetuus in urina emitenda est ardor. Afflicto lateri incumbere ægerime potest: nam increfcit semper dolor & fit acerbior. Abdomen flatibus turgit, appetitus languet, liquida plus justo appetit, pedes semper frigidi, ut ab admotis valde calidis integumentis vix incalescant. Menses quidem tempus suum adhuc

*Nephritis
calculosa
hereditaria.*

huc servant; sed quando imminent atrox dolor & spasmus totum abdomen pervadit. Quæsitum à me fuit, anne hoc malum tolli penitus possit, & an thermæ Carolinæ proficuae sint?

Epicrisis.

Plura sunt in hoc casu, quæ & observationem & censuram merentur. Primo uti omnes ægritudines, quæ à parentibus ad liberos transmittuntur: ita etiam nephritides calculosæ difficillime evelli & eradicari possunt, & mox in adolescentiæ vel juventutis annis sese sistunt, atque accuratissimam vitæ rationem expostulant: nam *calculosam hæreditariam dispositionem*, ut eleganter dicit ARETÆUS lib. II. cap. III. *fecundam, sterilem nemo reddere potest: facilius enim est uterum à pariendo prohibere*; quæ si non observatur & morbus per multos jam annos inveteravit; nulla convalescentiæ spes superest: ob hanc potissimum rationem, quia affectuum hæreditariorum ratio in solidarum partium nativa labe & vitio posita est: quod in acutum deductum crescentibus annis majorem vim acquirit. Quam perniciosus sit, in tali affectione hæreditaria, pellentium ut alii & aliorum præmaturus usus, exprimi vix potest: nam causticis ejusmodi rebus plus adhuc renum substantia læditur; quam ob rem non mirum est, in valde miserum ægram nostram statum fuisse conjectam, cum procul omni dubio in rene sinistro insignis ulcerosa jam præsens fuit corruptio: ubi ab aquarum mineralium & præsertim *Carolinarum* potu, qui si proficere debet, largissimus sit necesse est, lubens abstineo, ne subsistentes aquæ solidæ partis corruptionem magis augeant. Ego sub tali statu ad mitigandos dolores balnea aquæ dulcis commendare soleo, sique acerbiores sunt, trochiscos de alkekengi, qui moderatiori, ad scrupulum, dosi, præsens solamen afferunt. Extra paroxysmum decocta & infusa ex mitioribus traumaticis, omnium convenientissima sunt: inter quæ radix althææ, eryngii, herba hederæ terrestres, veronicæ, virgæ aureæ, urticæ mortuæ, summitates millefolii, bacca alkekengi, cortex radices acaciæ, semen dauci, foeniculi, item bacca juniperi tostæ, si ex iis paretur infusum & adjecto melle Prussico albo dulcificetur, longo & præstabili usu & efficacia sese admodum commendant. Huc pertinet etiam decoctum antinephriticum *Foresti*, quod ob insignem aptorum ingredientium virtutem non laude sua defraudandum est, pariter syrupus dialthææ *Fernelii*: atque decoctum herbæ equiseti ex cerevisia alba, adjecto butyro infuso & melle, plebeium & domesticum quidem, sed non spernendum remedium. Plus enim semper efficaciæ & securitatis à temperatioribus istiusmodi Galenicis & simplicibus, quam à pretiosis exoticis, ut sunt acmella, pareira brava & id genus alia, & activioris indolis chymicis sperari potest. Nam, ut ingenue fatear, uti victus quo simplicior, eo gravior & salubrior; ita etiam idem de medicamentis valere existimo. Ego quoque in tam inveterato malo, non sine insigni fructu, medicamentum leniter alvum subducens, ex manna atque rhabbaro, per infusionem paratum, vel rhabbarum cum terebinthina in pilulas redactum commendare & usurpare soleo: nam qui calculosos & non integros habent renes, ii quam maxime sibi providere debent, ut intestinalis excretio probe respondeat.

OBSERVATIO V.

Illustrissimus Comes, sex supra quadraginta annos natus, sanguineæ & robustæ constitutionis, à primis annis integra valetudine gavisus, in deliciis

Dolor nephriticus cum nomen rosa calen.

semper habuit venationes: ex quo factum, ut interdum inum usque ventrem in piscinas & aquas stagnantes se demiserit. A longo inde tempore pedes habuit valde frigidos, ut fervidis pannis vix ad calorem naturalem reduci potuerint. Per decem annos usque eo hæmorrhoidalem excretionem passus est, singulis ut plurimum mensibus, quæ vero per duos aut tres quandoque resisterunt. Imi ventris doloribus, quos spasmus & flatus excitant, nunquam fere obnoxius fuit: inopinato autem acerbissimi dolores lumbum sinistrum, ubi ren situm obtinet, invadunt, qui interdum ita asperati sunt, ut summus hic vir nec ambulare, nec se erigere, potuerit; atqui stationem suam nonnunquam deferuerunt & inum ventrem occuparunt, juncto simul vomitu & ciborum fastidio. Duobus abhinc annis, longinquo itinere peracto, triginta duos calculos cum acutissimis doloribus stipatos, per urinam una vice excrevit; quorum minimi magnitudinem seminis cannabis æquabant. Et ita immanes isti dolores simul & semel expirarunt. Interea dolores circa lumbos in sinistro latere insisterant sæpius, quandoque comite summo cruciatu, qui excretis calculis, cum multa pituita remissior factus. Hoc non obstante fluxus hæmorrhoidalis omni bimestri spatio permanfit. Sub equitatione quicquam etiam cruoris mictu reddidit. Missus est ad Carolinas; à quarum potu per XXII. dies sub debito regimine continuato, per vices, decem, viginti & ultra ducenti, cum urina, albi & cinericei coloris calculi emissi sunt; cujus sedimentum erat valde tenax & viscidum, igni injectum odorem foetidum volatilem & urinosum spargens. Peracta cura, consilium dedi, ut balneum *Toeplitense* per quatuordecim dies in usum duceret; & optime inde se habuit. Petiit à me, ut præservationis gratia curam instruerem, quæ sequens fuit. Ordinavi infusum, ex speciebus leniter traumaticis, quarum in superioribus facta fuit mentio, mane loco Thée sumendum. Dein, ter minimum quotannis, præmissio pediluvio, venam pedis secandam suasi. Tum pro potu ordinario, decoctum ex radicibus scorzonæ, graminis, chinæ, cortice ligni sassafras, semine foeniculi, & passulis præscripti. Posthæc, usum pulveris antinephritici bis vel ter in septimana, cum emulsione amygdalina sumendi, commendavi, ex hac formula. Recipe lapidum cancrorum unciam semis, cochlearum ustarum, seminis lycopodii, arcani duplicati, nitri depurati ana drachmam, olei macis guttas VI. M.f. Pulv. D. Demum, quarumcunque pilularum, quæ aloës ingreditur, quarum insignem antea quantitatem sæpius devoravit, item purgantium usum, studio & non sine fundata ratione, splendido huic viro, non secus ac aliis qui renum vitio laborant, præsertim si sanguine corpora superabundant, penitus interdixi, & clysteres injiciendos esse præcepi. Quorum remediorum diutius continuato usu, & studiose simul servata accurata victus ratione, summus hic vir tortura & tyrannide tam immanium dolorum à tam frequenti calculorum partu provenientium, liberatus, jam sanus & incolumis, per Summi Numinis gratiam degit.

Epicrisis.

In hac morbi enarratione & ejus curatione, plura occurrunt practica momenta paulo curatius observanda. Primo, quod & fluxus hæmorrhoidalis & calculus simul in uno subjecto obvenire & incidere possint. Quod quibusdam paradoxon videri potest, qui sanguinis per venas sedis profluvium, pro certissimo, adversus calculum & podagram, præsidio ac præservativo agnoscunt. Verum aliquot

aliquot mihi obvia fuerunt exempla, eorum, (inque primis celeberrimi medici B. *Dolæi* recorder) qui nephritici & podagrici, fluxui hæmorrhoidali, his alternatim graviter infestantibus, obnoxii fuerunt. In præsentī casu considerationem meretur, quod refrigeratio, pedibus à longo tempore à descensu in stagnantes aquas inducta, sanguinis motum versus abdomen nimium urgendo, in corpore præsertim plethorico stagnationibus cum in renibustum in intestinorum volumine, à quibus hi dicti morbi propullularunt, ansam præbuerit. Secundo, tam copiosa calculorum per unam vicem, exclusio, parenchyma renis sinistri, à copiosiori sanguinis congestione, plane vitiatum, labefactatum & destructum arguit; quandoquidem sine vasculorum urinariorum ruptura & extravasatione humoris, tam larga accretio lapillorum fieri nequit: sed notandum quod hi calculi minus compacti, valde friabiles & tophacei fuerint, qui longe facilius & citius ex muco quodam viscido terreo, generari possunt, ac duri & compacti. Tertio, mirabilis plane thermarum Carolinarum is est effectus, ut mirifice, sale suo alcalino, sordes viscidas resolvant, eluant, exulceratas partes mudent & canaliculos muco obstructos aperiant; quo postea roborantia & traumatica eo meliorem & auspiciorem operationem exerere queant.

OBSERVATIO VI.

Nephritis calculosa cum podagra, in Senæ, ex mas- sa pilulari de cynoglossa usu, functa.

Incidit in memoriam casus quoad abusum anodynorum memorabilis, qui in principatu Halberstadiensi, olim mihi obtigit. Erat vir venerabilis religiosus, dignitate Abbatis ornatus, LXX. & ultra annorum, sanguineo cholericæ complexionis, staturæ macilentioris, ingenii præcellentis, calculi & podagræ doloribus jam diu vexatus. Hic ipse suus sibi erat medicus. Prædicabat mihi sæpius tum balneorum aquæ dulcis, tum, si nimium urgerent è calculo dolores, pilularum de cynoglossa insignes ad dolorem sopiendum virtutes. Ad excludendum vero calculum, oleum amygdalarum dulcium cum succo citri, item succum citri cum matre perlarum, se usurpasse affirmabat. Extra paroxysmum liberalis infusi Thée erat potator. Per plures annos hisce præfidiis non sine felici successu se usum fuisse memorabat. Sed ob quosdam fortunæ infestos sibi obtingentes casus, & inde consecutum animi mœrorem, vires cum appetitu non parum languescere & corpus cum facie lurida matescere cœperunt. Post aliquot tempus, calculus consueto more renem sinistrum adoriebatur, & diutius paulo ac ante dolor lumbis & ureteribus inhærens persistebat. Ipse pro more sumebat pilulas de Cynoglossa ad X. grana, usum earum aliquoties repetendo. Sed in ingentem conjectus virium prostrationem meum consilium requisivit. Ego accedens, ipsum offendi omnibus viribus dejectum, cum pulsu valde debili & formicante, qui proximam mortem significare solet. Analeptica probatissimæ virtutis externe & interne in usum ducebam, sine tamen effectū. Dolorem quippe nullum amplius percipiebat, soporque cum extremorum frigore eum opprimebat; ita ut secunda post accessionem meam die placide obiret.

Epicrisis.

Quæ dolorum sopiunt atrociam remedia, quæ inter palmam opiata tenent, minime è praxi medica exterminanda esse; ego quidem persuasus sum. Atqui idem nobiscum sentire tenentur ii, qui medicos opio utentes imposturæ publice accusare non dubitarunt, cum nihilo minus in praxi sua pi-

lulas de cynoglossa, quæ, præter opium, semen hyosciami habent, ad sistendas enormes hæmorrhagias frequentem in usum ducant & plurimi faciant. Ego, ante quam liquoris anodynī mineralis præstantia, quæ vitrioli sulphuri debetur, in componendis & sedandis enormibus hæmorrhagiis & doloribus, mihi innotuit, non infelicitè opiatis rite correctis me usum fuisse, assevero. Sed uti omnia magnæ activitatis remedia, ita etiam hæc, iudicium & circumspeditionem medici, qui omnes circumstantias probe pensitare & ad rationem subducere didicit, desiderant. Ubi enim ætas juvenilis, satis adhuc adest virium, pulsus magnus, & dolorum ac spasmorum immanitas virium & motuum vitalium destructionem minatur, divinam certe præstant opem: sed ubi præ dolorum atrociam & à morbo præcedente, vel ex mœrore, jam attritæ vires fuerint, in ætate præsertim senili; ipsa sana, qualem omnibus medicis practicis apprecamur, ratio dictitat, ejusmodi remedia summe exitialia esse. Neque diffitendum, medicis sanioris praxeos præceptis destitutos, sæpe numero ingens damnum & periculum miseris ægrotantibus inferre: id quod probe animadvertit CAROL. PISO l. c. lib. IV. c. 2. in-quiens: *incredibile est dictu, quot nimium credulos intemperante vel laudani nostro ævo celeberrimi vel pilularum de cynoglossa usu, Themisones & circumforanei mittant in orcum.*

OBSERVATIO VII.

Vir sexaginta & quatuor annorum, ante duos annos, tumore cum dolore, pedis pollicem satis acerbe obsidente corripiebatur, qui venæ sectione admissa atque diapnoicis internis discutiebatur. Post novem dies cruciatus hi lumbos acriter invadebant, cum magna mingendi difficultate & ingenti circa inguinalem regionem pressorio & æstuante dolore, qui invalescens omnem urinæ profluxum plane impediēbat. Ad quod symptoma tollendum, nec balneum aquæ dulcis, nec fomenta externa, neque medicamina interna antinephritica cum anodynīs refractè juncta, quicquam profuerunt. Illa quando manu fortiter comprimebantur, urina effluebat sed parciore, multum tophaceæ albæ & tenacis materiæ continens. Alvus erat obstructa, & sub frequenti desidendi cupiditate nihil reddebat. Aquam *Selteranam* quæ ad manus erat, post aquæ dulcis balneum, in lecto per duos dies largiter bibendam suasi. Postea tres mannæ unciae cum drachma & dimidia cremoris tartari, atque granis sex trochiscorum alhandal, in infuso ex aqua fuerunt exhibitæ; cujus tam felix erat operatio, ut non modo ingens excrementorum copia per aliquot sedes dejecta, sed & largior urinæ fluxus, non sine insigni levamine, secutus fuerit.

Epicrisis.

Rheumaticam renum & viarum urinariorum affectionem, si quis prædictam passionem denominare velit, mea quidem sententia non errabit: nam sæpius observavi, subito eos qui arthriticis & rheumaticis fluxionibus obnoxii sunt, dolore in lumbis & mingendi difficultate corripī, cum serum impurum tophacea & tartarea materia refertum, ad renale cribrum copiosius fertur, & in uretere, præsertim ubi introitus est in vesicam, collectum ac stagnans, gravem dysuriam parit: quia propter dolorem, alvi excretio supprimitur, ab intestino recto excrementis farto, magis adhuc vesicam comprimente, & dolor & mingendi impotentia augentur. Sub ejusmodi morbi circumstantiis, utique non convenientius auxi-

Rheumatism ca renum & ureterum affectio.

auxilium, præter balnea, aquas medicatas & laxantia, inveniri licet. Ego profecto, si à tali causa ischuria proficiscitur, mirabilem eorum quæ alvum efficaciter aperiunt, sæpius opem expertus sum: nam expedita alvo, & expurgatis fordibus, uberior est urinæ ad vesicam aditus, & lege consensionis, quam nervosæ partes inter se alunt, ipsa etiam vesica cum ureteribus simul afficitur & ad contractionem atque urinæ expulsionem sollicitatur. Neque temni hanc in rem debet monitum CELSI lib. IV. cap. 13. in renum affectibus oportet solvere alvum, si aliter ea non respondeat.

OBSERVATIO VIII.

Monita
quædam,
circa anti-
nephriticorum
usum.

Cum maximum curationis & medendi methodi momentum in convenienti, ratione temporis & ordinis, antinephriticorum usu repositum sit; non abs re, sed operæ pretium mihi visum est, generalia quædam eximii in praxi usus, ex longa experientia mihi enata monita proponere atque subungere. Primo omnium, plurimum scire refert temporis rationem: num recens sit malum; num per plures jam annos quis eo laboraverit; an valde inveteratum? item qualis sit renum status & conditio? num saltem flaccidi & à tono & robore naturali dejecti; an eorum substantia corrupta exulcerata; & feri vel urinæ aut etiam sanguinis extravasatio adsit? Facilius curatu est morbus inter initia, præsertim quando à nimia sanguinis ad hoc viscus in plethoricis sit congestio, vel etiam quando rheumatismo renes afficiuntur. Tunc omnia quæ urinam pellendi facultate pollent, & quæ acrimoniam salinam causticam conjunctam habent, vel sanguinem nimium commovent, perniciosissima sunt: sed potius sanguinis missio, per sectionem venæ, hæmorrhoidum apertionem, atque subjunctus diluentium, feri lactis, & aquarum medicatarum temperatarum, item nitroforum pulverum usus, omne absolvere curationis punctum possunt. Ubi vero jam malum radices egit in renibus, iique late affecti, vel eorundem vascula disrupta, ut latex urinosus subsistens tartaream gravem materiam dimittat, & calculorum frequenter jam fuit exclusio: tunc abstinendum utique est à fortioribus acrioribus & sanguinis massam valde commoventibus diureticis. Nihilominus, quæ urinæ fluxum inter alimenta & medicamenta placide promovent, & majorem materiæ tartareæ in magnæ molis calculos accretionem impediunt, egregio usui sunt: qualia sunt, præter serum lactis dulcis & acidulum, præter lac asininum purum vel cum fonte Selterano mixtum, pariter ac acidulas; juscula ex radicibus quinque aperientibus parata, infusum baccarum juniperi & acinorum cynosbati tostorum, ex medicamentis arcanum tartari, tinctura tartari, liquor nitri fixi, & id genus alia. Profunt tunc etiam, ad ulteriorem corruptionem renis arcendam temperatiora traumatica supra recensita, in infuso vel decocto exhibita.

Si vero malum jam inveteraverit, substantia renum valde corrupta & exulcerata, ætas quoque senilis fuerit; abstinere præstat ab omnibus salinis, & potissimum acribus diureticis, item nitrosis refrigerantibus, sanguinis missionibus, fortiori corporis motione, equitatione: sed infusa traumatica, cum syrupo dialthæ Fernellii edulcorata, mel Prussicum cum rob juniperi mixtum, item mel cum pulvere radicis pimpinellæ, si ad illius libram, uncia hujus adjiciatur, malvaticum juniperinum, moderatus vini Hungarici, Canariensis potus, eleosacchara terebinthinæ Venetæ, balsami de Mecha, de Capaiva, quando videlicet sacchari uncia

horum drachmia admiscetur, item balnea temperata ex aqua dulci, omnium tutissima & convenientissima sunt. Malum enim est incurabile & usque ad mortem comitatur; hinc non nisi mitigantia & vires reficientia desiderat.

Cum vero nihil utilius nihil salutarius nephriticis & calculosis unquam, præservandi inprimis scopo, deprehensum fuerit, alvo libera atque aperta, & primis viis à fordibus & excrementis probe expurgatis; præcipua omnino medici intentio esse debet, ut, si natura hac in re deficiat, commodis & idoneis alvinam excretionem promovere studeat remediis. Sed ego hoc in genere, nec tutius, neque convenientius aut efficacius scio & reperi laxans, ipso rhabarbaro electo & optimæ notæ, quod in pulverem cum absorbente & abstergente sale, vel in pilulas cum terebinthina Veneta reductum & circa lecti introitum usurpatum, leniter & citra virium jacturam, roborando potius renum viscerum & ventriculi tonum, fordes altero die egregie subducit.

Postremo, hanc, circa antinephriticorum & urinam cientium usum, cautelam omnibus medentibus commendatam volo, ut neque nimium urinæ fluxum promoveant, neque etiam eum tardiozem & parciorem reddant: utrumque siquidem noxium; nam si à sanguine, quod fluidum, tenue & albidum est, in nimia quantitate segregatur, remanet crassius, quod obstructions efficit & facile coit; si vero illud in coagulum reductum non abstergitur & educitur, successive in majorem molem accrescit.

Coronidis loco ad illustranda & confirmanda hæc à me suppeditata non inutilia monita, egregium & observatione dignum locum, ex CASPARO HOFFMANNO, huic tractationi annectere haud dubitavi: siquidem lib. II. medicam. officinal. cap. 102. p. 483. ita perite scribit: in curatione calculi semper bene distinguere opus est remedia: nam ita pauciores habere calculos. Qui enim perpetuo utuntur propriis dictis diureticis, præcipue non purgatis primis viis, ad locum affectum materiam calculosam adducendo, malum faciunt pejus: tanto melius illi faciunt, qui præservationis gratia singulis anni quadrantibus evacuant primas sic dictas vias, dein lacte amygdalino per aliquot dies utuntur. Pro curatione autem ante omnia leniter purgandum; postea utendum domesticis & improprie dictis frigidis, quæ tonum reddunt renibus: Nam in quovis corpore adest quidem materia calculi, quæ tamen non ita statim coit & concrevit, nisi tonus & vigor renum expulsiuus vitietur; unde altero rene bene habente, alter calculosus esse solet. Et hanc ob causam CELSUS lib. IV. c. II. p. 207. renes ubi affecti sunt, & diu male habent, abstinere etiam ab omnibus falsis, acribus, acidis, & liberaliter bibere & molliter solvere alvum jubet.

CAPUT VII.

De gravi spafmo & dolore vesicæ & adjacentium partium.

THESES PATHOLOGICÆ.

§. I.

Vesica, seu pars corporis nervoso-musculosa, Definitio. frequenter & ex facili obnoxia est spafmo, per quem, intensiorem & præternaturalem corporis vesicæ,

vesicæ, nec non sphincteris constrictionem, five strictionem, coarctationem & fibrarum crispaturam intelligimus, & ex quo postea, ceu fonte, plures aliæ morbosæ affectiones & symptomata pullulant ac deducuntur.

§. II.

Processus morbi qui ex calculo vesicæ oritur.

Grave illud tormentum, quod vesicæ diu inhærens calculus sæpius excitat, cum assiduo mingendi stimulo & difficillimo ac dolorifico mictu, nonnisi spasmum ceu causam arguit. Propter spasticam enim strictionem, quæ non modo vesicæ tunicam musculofo-nerveam, sed & ejus sphincterem ipsamque urethram vehementer afficit, dolorosum urinæ fit stillicidium & tantus nixus in pube, ut urina vix cohiberi posse videatur, quæ tamen, ut primum stillare cœpit, mox iterum penitus retinetur. Accedit dolor in toto coli tractu, qui gravissimus sæpe glandem duntaxat occupat, ut annotante HILDANO lib. III. de lithotom. ves. & BAGLIVO Opp. pag. 343. ingens hic doloris, pruritus & continuæ irritationis in glande penis & virgæ extremitate, in adultis æque ac pueris obuius sensus, merito inter pathognomica calculi signa referendus sit. Jungitur quoque crebrior desidendi stimulus, five tenesmus, ob arctam recti cum vesica connexionem, nervorumque communionem. Prodit sub hac dysuria urina plerumque alba & turbida, cum sedimento mucoso, eo quod ipse spasmus fibrarum muscularium, forti strictione & compressione, ex interiori mucosa vesicæ tunica copiosius lympham exprimit mucidam, glutinosam, quæ immixta urinæ, sedimentum illud quod fundum petit mucidum suppeditat. Sæpe vero tenuis aquosa minus colorata, sub ejusmodi gravi dolore, & spasmu urinæ emittitur, qui spasmus mutua consensione & communicatione etiam ad tubulos renum urinarios penetrat, ut non nisi tenue & aquosum ex sanguine per emulgentes adducto transmittant. Præterea æger sub mictu sæpe gravissimos patitur dolores, crura bina transversim complicat, coxas comprimit, caput ad terram inclinat, manumque altera, interdum etiam ambabus, ventrem juxta pubis regionem quantum potest coarctat & sub ejusmodi dolorifica mictione, tremuli interdum & quasi convulsivi totius corporis motus, ut probe observavit VIEUSSEN in Neurologia pag. 203. concitantur. Nam vesicæ nervuli acerrime à quacunque etiam causa vellicati & spasmu affecti, eundem tremulum & convulsivum motum per nervos intercostales nervis spinalibus communicant & sic ceteris omnibus partibus inferunt. Observamus etiam sub stranguria & vehementi dysuria, alvum obserari & flatus cum facibus retineri, quæ conquiescente dolore, promte iterum secedunt.

§. III.

Qui interdum à stasi sanguinea fit.

Constat quoque observatione, hæc omnia recensita symptomata, & adhuc acerbiora, non tantum à calculo vesicæ, verum etiam à sanguinis stasi & stagnatione intra vesicæ vasa sanguifera, quam sæpius sequitur gravis inflammatio, fieri. Vulgaris enim error est, quo hæc pathemata tantum vel calculo vesicæ, vel urinæ acrimoniæ adscribuntur, cum tamen observationes & dissectiones cadaverum abunde doceant, ægros non modo iisdem symptomatibus, quæ calculus in vesica hærens profert, sed & majoribus fuisse affectos cruciatibus, nullo plane post mortem invento calculi vestigio. Nam quemadmodum à mensium vel hæmorrhoidum fluxu sufflaminato, sanguis regur-

gitans ad vasa ventriculi & intestinorum, & intra eorum tunicas sensibiles stagnans, distractione & compressionem vehementia tormina, anxietates, dolores, convulsiones ac spasmos concitat: ita etiam, quando vel ex vitio & emanatione fluxus hæmorrhoidalis, vel aliis ex causis, sanguis ad vesicæ corpus magna copia delatus ibi stagnat, non mirum est, quod in hac sensibili parte, spasmos & quæ ab iis proficiuntur symptomata producat.

§. IV.

Simili modo à suppresso hæmorrhoidali fluxu nonnunquam fit mictus cruentus, quo cohibito, dolor, spasmus & inflammatio vesicam infestant; cuiusmodi atrox spasmus, qui demum funestam progignit inflammationem, interdum quoque à mensium plenario defectu, & earum post quinquagesimum annum emanatione in foeminis plethoricis ortum ducit. Nam qui morbis vesicæ moriuntur, inflammatione & sphacelo, ob sanguinis in vasis pertinacem & fixiorem stasim, vasa minima nimium distendentem, pereunt, ita plerumque, ut hæc inflammatio non modo vesicam, sed & rectum intestinum afficiat, ubi simul hæmorrhoidalia vasa sanguine nigro infarcta, cum penis livore, & venæ cervicis sanguine admodum distentæ & varicosæ comparent, fidem faciente BONETO pag. 673. Observat. 22. & pag. 664.

Sæpe vesicæ spasmus & inflammatio à suppresso hæmorrhoidum vel mensium fluxu.

§. V.

Est vero unica funestæ ejusmodi inflammationis causa, eaque principalis, validus vesicæ spasmus, qui, quo validior est, eo vehementius sanguinis stasim & incarcerationem in vasis auget, & resolutionem ejus ac discussionem impedit, ut tandem vel in abscessum & ulcus transeat, & chronicum fiat malum, vel in sphacelum brevi tempore perimentem concedat. Et profecto vehemens ille vesicæ spasmus, qui præsentem inflammationem augetur, causa est plurimorum gravium illorum symptomatum, inflammationem vesicæ stipantium, quæ inter, teste AETIO & ORIBASIO, referenda potissimum continua febris, magnus æstus, dolor, ardor ac tumor infra perinæum & supra pectinem atque pubem, urinæ ægerrima & cum magno conatu & dolorifico ejulatu guttatim facta emissio, frequens desidendi stimulus, quibus demum accedunt bilis vomitus, dolor capitis, sitis, difficilis anhelitus, faciei cum oculis rubor, lingua ardens cum nigræ, immodica vigilia, delirium, inquietudo, extremorum frigus ipsaque mors. Dignus memoratu est de funesto morborum vesicæ eventu HIPPOCRATIS locus libr. prænotion. pag. 464. ita habens: *Vesicæ duræ & dolentes penitus quidem horrendæ & perniciosæ sunt, perniciosissimæ vero quæ cum febre continua fiunt. Etenim dolores (qui utique spasmodorum effectus sunt) ab ipsis vesicis ad occidendum sufficiunt, & alvi non egerunt hoc tempore, nisi durum quoddam, & hoc coacta. Solvit autem urina purulenta micta, quæ albam ac levem subsidentiam habet. Si vero neque ab urina quicquam remiserit dolor, neque vesica molliatur, & febris continua fuerit, in primis circuitibus morbi ægrum moriturum esse, timor est.*

Causa proxima est spasmus.

§. VI.

Sunt certe hæc vesicæ inflammationem quæ comitantur, inque variis corporis partibus conspiciuntur symptomata gravissima; omnia tamen paulo curatius considerata, vix aliam causam, quam vehementem spasmum, qui in vesica, ceu parte affecta, incipit & per universum nervosarum partium

Quod probatur & ulterius explicatur.

gnus

genus inde propagatur, agnoscunt. Nam quando fortiffima ftrictura & crispatura fibras vicinarum partium, intestini videlicet recti & fphincteris aniprehendit; vel affiduum delidendi calcar, vel adeo impenfa adest ani constrictio, ut nec flatus, nec fæces transmittat, neque etiam clyfterem admittat. Quumque solenniter validior spasmus partem cui diutius infedit debilitet, demum & in ea relaxationem relinquat, fit, ut ani etiam procidentia, præsertim in senibus & infantibus, consequatur. Quandoquæque veficæ gravior spasmus ad superiora porrigitur, & quidem ad intestina, borborygmus & tormina caufatur, & ubi ad ventriculum pergit, inappetentia, mala digestio & vomitus fiunt: de quo consensu veficæ cum ventriculo præclara sunt quæ habet **CELSUS** *libr. VII. cap. 27. pag. 486. non ignoramus*, inquiens, *orto veficæ ulcere, sæpe affici stomachum, cui cum vefica quoddam consortium est; exque eo fit, ut neque retineatur cibus, neque si quis contentus est, concoquatur, neque corpus alatur.* Idem porro spasmus veficæ sub inflammatione, quum musculum diaphragmatis & nervos tunicalque nervos pulmonum ac bronchiorum afficit, ægram & difficilem cum anxietate præcordiorum relinquit spirationem: ad cordis vero musculos & tunicas arteriarum musculoso-nerveas delatus, duriores, contractos & celeriores efficit pulsum ictus, cum febre continua & siti inexhausta, quæ itidem spastica ftricturæ mollium & glandulosarum in lingua & faucibus partium debetur. Majoris vero periculi est, si ad membranas cerebri & nervorum principia pertingit; tunc enim affidua vigilia, mentis alienatio, convulsiones, extremorum frigus ac horror, inæqualis & intermittens pulsus, mortem significant imminentem.

§. VII.

Inter causas remotas serum scorbuticum.

Quamvis vero gravia & sæpius lethalia symptomata sint, quæ ex inflammatoria sanguinis, si ve sinceri & puri, si ve impuri stasi in veficæ vasculis suboriuntur: nihilo minus tamen mitiora minusque funesta sunt illa veficæ vitia, quæ a sero fallo, impuro, corrupto veficæ tunicis firmitus inhærescente easque lancinante subnascuntur, cujus generis sunt illi dolores cum valde difficili & guttatim succedente mictu. Passim ejusmodi pathematum in observatis medicorum fit mentio, inprimis tamen memoratu dignus **DRAWITZIUS**, qui jam ante sæculum omnium fere optime, germanico idiomate *de scorbutico* integrum scripsit tractatum, in quo *pag. 350. & seqq.* plures affert observationes & casus ægrorum, qui de doloribus sævis sub urinæ emissionem conquesti, quorum causa non veficæ labes ulla aut calculus fuit, sed humor tantum impurus scorbuticus, è quibus memorabilis maxime, quem consignavit de latione, qui quum nunquam antea ex calculo laborasset, subito atroces in pedibus persensit dolores, qui hinc depulsi, urethram invaserunt, cum intenso ardore & difficultate guttatim vix mingendi, applicatis tamen discutientibus cessarunt quidem, sed ad pedes redierunt, consequente eorundem tumore.

§. VIII.

Materia arthritica & podagrica.

Neque minus multoties observavimus in senibus, veficæ vitia, maximeque dysuriam, tum ob vitam sedentariam, tum ob dyscrasiam humorum scorbuticam, quæ in hac ætate fere perpetua est, inprimis tamen quod cessantibus rheumaticis, arthriticis & podagricis doloribus, difficilis accessus

Frid. Hoffmanni Oper. Tom. II.

dere soleat mictus, qui repetentibus pristinis doloribus, sponte discedit iterum. Crebrioris quoque observationis est, scorbuticos, quibus purpura chronica nostro jam tempore admodum solennis, hac; ob refrigerationem corporis, vel alias causas, ut venæ sectionem crebrius institutam, retrocedente, vel intus remanente, experiri ingentem mingendi difficultatem cum præcordiorum anxietate, inquietudine, vigilia & interno aestu, quæ, expulsa rursus ad superficiem corporis purpura, disparent iterum ac evanescent.

§. IX.

Sed alia adhuc ratione spasmus & dolor veficæ introducit, ex renum videlicet vitio. Interdum enim ex his purulenta & viscida materia, interdum calculi per ureteres in veficam delabuntur. In utroque casu, nisi peregrinus hospes tempestive foras ejiciatur varia fontica mala & in his vehementissimum spasmus ciere valet. Quod si enim tenacior & acrior materia est, parietibus veficæ, inprimis circa collum adhæret & stranguriam, dysuriam, tenesimum inflammationemque excitat, vel membranas veficæ clandestine ac lente magis erodit, atque ita hanc exulceratam reddit. Si vero aliarum causarum accessione in calculum tandem illa transformata fuerit, vel is jam factus in renibus ad veficam migravit, aspredine sua vel pondere hanc continuo laceffit eademque mala quæ modo recensuimus, producit: in posteriori autem casu fundus quoque veficæ & latera, præsertim ubi calculus fuerit grandior, exulcerantur.

§. X.

Interdum veficæ collum irritant, tendunt ac spafmo affligunt, diversæ ab iis quas hætenus enarravi causæ, e. g. quando gonorrhœa, si ve benigna si ve maligna fuerit, diutius in hospitio suo, hoc est in glandulis binis prostaticis collo veficæ appositis, commoratur; mora hic venereis inquinamenti corruptus humor deterior redditus, ulcera nunc leviora nunc graviora, & inflammationes in parte affecta parere, & si horum quoque vitiorum curatio perverse peragatur, simili labe alias sæpe partes inprimis proxime adjacentes afficere, subinde observatur. Mingitur tunc urina purpuracea, & veficæ scabies, imo & exulceratio præsertim circa cervicem frequentius accedit. Atque hinc est, quod gonorrhœa virulenta laborantes urinam sæpius turbidam & quæ multum viscida & saniosi ponit sedimenti reddant.

§. XI.

Causarum, unde gravior veficæ spasmus proficisci non nunquam solet, censum quoque subire videntur, inflammatio intestini recti vel ejusdem ulcus, eadem coli vitia, partium omnium interiorum abdominis abscessus, ex quibus ruptis, pus in abdominis cavitatem effusum, versus veficam tandem progreditur; corruptio inprimis omenti longius protensi, sanguis quacunque de causa in abdomen effusus, aqua in hydrope ad veficam libere ruens, inflammatio & ulcus uteri maxime ejusdem cervicis, & id genus alia; quorum omnium exempla passim apud **BONETUM** & alios occurrunt.

§. XII.

Devolvimur nunc ad causas externas à quibus veficæ spasmus provenire possit. Pertinent vero

Dd huc

à pure ex renibus in veficam delabente.

à gonorrhœa.

ab inflammatione intestini recti.

pure &c.

Ab externis.

huc contusiones & ictus graviores in pubis & perinaei regionibus, sectio calculi imprudenter instituta, in qua vel à cultri ineptiori administratione, vel à calculi, praesertim majoris & asperioris extractione, vulneris à sectione facti curatio perversè instituta, catheter ad explorandum calculum vel in urinæ suppressione vel alia de causa incuriosius intrusus, sphinctere praesertim vesicae arctius constricto, aut à tumore, caruncula, scirrho vel alio vitio via praecclusa; fistulae in ano exsectio, in qua ani sphincter arctius cum vesicae collo connexus incaute nimis vulneratus, aut ejusdem vulnus negligentius habitum fuit. In foeminis huc referri debet partus difficilis, in quo vesicam & hujus imprimis collum ita saepe premi afficique, ut inde ulcus & fistula proveniant, MEAURICEAU *aph.* 285. confirmat. Cæterum hic notari meretur singularis cantharidum malignitas, qua vesicae infestae sunt. Eas enim sive intra corpus assumptas, sive externe tantummodo applicatas, spasmodum, inflammationem & ulcera interdum ciere satis observationibus constat, quarum exempla exhibentur in M. N. C. *Dec. I. An. II. obs.* 105. *An. VIII. obs.* 88. Potum denique frigidae post sectionem calculi, vehementem spasmodum concitare, aut lethali gangraenae, aut fistuloso ulceri occasionem praebere, ex observationibus practicis constat.

§. XIII.

Cur spasmus vesicae per intervalla infestetur.

Hisce quoad causas quae spasmodum vesicae cient, expositis; ratio porro reddenda peculiaris istius phaenomeni, cur symptomata, uti difficilis & dolorifica mictio & quae ipsi juncta sunt mala, causa materiali, ut calculo vel dyscrasia scorbutica, perpetuo praesente, per intervalla tantum infestent & tantopere affligant? Ita vero hoc explicandum videtur: omnes atroces in parte nervosa sensibili dolores, paulo diutius obhaerentes, inducunt demum & relinquunt in ea, quam tenuerunt, sede debilitatem & atoniam, qua praesente, dolores quidem non amplius percipiuntur, sed propter ipsam hanc imbecillitatem, ibi de novo successive succrescentes in corpore impuri humores colliguntur, stagnant & subsistunt, novaeque sic ad resuscitandos paroxysmos gignitur & coacervatur materia. Debilitas enim, teste CELSO, omnibus morbis opportuna; ideoque instar universalis pathologici canonis tenendum: languidas à praegressa morbi violentia partes, quam facile recipere morbificum humorem, qui sensim congestus, vel sponte, vel à levi causa exagitatus, novum adducit insultum; & hinc merito periodicorum affectuum origo repetenda.

§. XIV.

Quomodo excitetur.

Pluries observavimus, calculum in vesica existentem, per certa tantum intervalla multa incommoda, ut mingendi crebrum & difficilem conatum, cum ardore & dolore, ventris torminibus, extremorum frigore & virium languore excitasse, idque maxime ventis ex borea flantibus, vel si inflantes cibi aut cerevisiae minus defaecatae sunt, aut insolita animi commotio praecessit, aut corporis partes extremae nimium refrigeratae, vel etiam sanguinis consueta missio diutius omissa, hanc procul dubio ob rationem: quod haec omnia ejus naturae ac indolis sunt, ut partim excretionem salutes suppressendo, partim etiam copiam humoris impuri augendo, eum ad vesicam tanquam partem debiliorem propellendo, movendis & revocandis novis insultibus oc-

casione praebant. Crebrioris quoque observationis est, colicas flatulentas junctas esse vesicae vitio, praesertim ardenti & dolorifica mictioni, & omnia alimenta, quae inflant, hoc quoque exacerbare, & carminativa contra, sive flatus discutientia, optimo esse praesidio.

§. XV.

Ad vesicae morbos qui spasmo stipati sunt referri etiam merito debet cruenta mictio, quae tamen non omnis, ut vulgi medicorum fert opinio, ex renibus & vasis emulgentibus fit, sed saepius proxime & immediate ex vesicae vasis sanguiferis, praesertim ramis venae haemorrhoidalis externae perruptis, succedit. Cognoscitur sanguinolentus ejusmodi ex vesicae vasis mictus, quando difficultas mingendi conjuncta, ardor cum tenesmo circa anum, spasmodus circa glandem & dolor pungitivus à glande ad perinaeum affligit, cum rigida penis tensione, nec non ubi simul adsunt borborygmi & flatulentiae in abdomine, inappetentia, ructus quoque frequentes junguntur; item si mictio cruenta & stipantia ipsam symptomata post sanguinis missionem in pede, post hirudinum applicationem circa anum, remittunt & cessant. Et quamvis ejusmodi species mictionis cruentae ex vesica non adeo familiaris sit & frequens, annotata tamen non nunquam fuit, & prostat observatio HOECHSTETTERI *Decur. I. schol. in cas. 2. M. N. C. Decad. I. ann. VIII. observ.* 23. Mingitur interdum sanguis sincerus una cum urina, vel loco hujus urina bruni coloris, instar coffee, ut vidimus in sene octogenario quotiescunque equo vectus fuerat: frige facta urina sedimentum ponebat densum, rubicundum. Gravissima vero quoque incidere solent ex sanguine intra vesicam concreto, symptomata, quae recenset LOMMIUS *in observat. p.* 195. crebro enim anima deficit, agra fit spiratio, & pulsus obscurus, parvus & frequens, oritur multa nausea, animi anxietas & frigidus sudor, hinc totus homo fit imbecillis & pallet & extremis partibus refrigerat, quae quidem omnia vehementi spasticae stricturae, quae per totum systema nervorum propagatur, recte adscribenda. Fiunt tamen etiam à sanguine in vesica condensato maximi cruciatus & ardores vehementes, in ima pube & circa virgam, qui referente *observat. jam citata M. N. C.* in momento quasi evanuerunt, postquam aeger magnos & oblongos sanguinis grumos, instar hepatis lucii piscis, mingendo rejecerat. Sed de curatione hujus mictionis cruentae, quae nascitur ex vesica affecta, recte judicat LOMMIUS *l. c.* quod tardius curetur, quam illa, quae à superioribus locis proficiscitur.

§. XVI.

Neque etiam praetereundum, quod vesicae spasmodus qui stranguriam & dysuriam parit, ab urina etiam, praesertim in senibus, scorbuticis & cacoehymicis, valde salsa, acribus, tartareis salino-sulphureis & limosis excrementitiis partibus referta, nascatur. Tam salsa enim quandoque deprehenditur urina, ut linguam arrodant & ex urethra stillans vicinas partes excoriet, quae utique diutius in vesica stagnans, vellicando fibras nerveas, sphincterem claudit, urethram angustat, & lincinatione & arrosione tunicarum ingentes dolores parit. Si vero in urina cum dolore excreta moleculae furfuraceae & exilia ac copiosa filamenta apparent atque subsident; veteres affectum vesicae scabiem appellaverunt,

à mictu cruento

à sero impuro scorbutico.

quid vesicae scabiis?

runt, quia mucidam & villosam tunicam arro-
sam arguunt.

§. XVII.

ex plethora
in vita se-
dentariæ
addictis.

Diximus superius, quod quidem calculus in vesica contentus occasionem sæpius præbeat ad vehementes & dolorificos cum dysuria junctos spasmos, per intervalla infestantes; monendum tamen & illud est, quod spasmi vesicæ, etiam aliis ex causis proficiscentes, ad ipsius calculi in vesica generationem & concretionem primam originem & fundamentum frequentius suppeditent. Contingit hoc quam maxime in senibus plethoricis, vitæ sedentariæ addictis & qui ob perspirationem languidiorem urinam ordinario valde tinctam & scoriis tartareis limosis saturatam mingunt. Nam ob spasmus dysuria fit, & liquor urinosus dum paulo diutius retinetur, mora deponit tenacem glutinosam materiam, quæ salibus tartareis involuta, utique principium ad successivam concretionem calculosam suggerit, nisi congruis medicamentis opportune subducatur, & urinæ, sublato spafmo, liber paretur exitus.

§. XVIII.

Spasmus
vesicæ
quando le-
thalis?

Inter morbos vesicæ utique vehementior stricture, gravissima & sæpe mortifera est, præsertim ubi cum vehementiori dolore febris acuta, vesicæ durities juxta pubem observata, alvique & urinæ suppressio juncta est. De qua in *Prognosticis & in coacis præfag.* ita scripsit HIPPOCRATES, *vesicæ duræ ac dolentes omnino malæ, pessimæ fere cum febre continua: nam qui dolor inde est, necando homini satis esse potest, atque ii alvo non multum dejiciunt.*

§. XIX.

Quando
mior, va-
rie termi-
natur?

Mitis inflammatio est, si dolor atque durities est moderata, sine acuta febre. Varios vero exitus habere solet, aliquando critice, erysipelate in cute oborto solvitur & sensim hac ratione discutitur: vel in suppurationem vergit; & tunc urina est purulenta quæ album habet & leve sedimentum: quod si pure ita erumpente, urina in copia profundatur; tumor subsidet, vesica remollescit, febris imminuitur atque excrementorum exitus patet. Pessimum est, quando in sphacelum lethiferum mutatur.

CURATIO.

§. I.

Plethora
solvenda.

Vidimus quot & quam gravia mala atque incommoda, ex dolorifico vesicæ, urethræ & vicinarum nervosarum partium spafmo, eaque secundum variæ indolis causas oboriantur. Nunc breviter etiam strictimque explicandum erit, quæ opportuna via ac methodo hisce malis per convenientia remedia succurrendum sit. Quod si igitur ex nimia sanguinis copia vegetæ naturæ senibus præsertim, qui vitam diu sine sufficienti corporis motu egerunt, hic morbus vel ingruit vel saltem verendus est; omnino maxima præsidii & auxilii spes in tempestiva & sufficienti sanguinis missione, erit reponenda. Idque eo magis quando ex subsistente mensium vel hæmorrhoidum fluxu, aut omissa & diutius afflueta venæ sectione vel scarificatione, mali causa suborta creditur: nam monente jam HIPPOCRATE *aph. 36. Sect. VI.* in urinæ difficultate *secare oportet internas.*

Frid. Hoffmanni Oper. Tom. II.

§. II.

Ubi feri impuri, scorbuticis, acrioribus, salinis partibus turgidi, copia peccat, & ab ejus colluvie & decubitu in vesicam & partes pelvi inclusas irruente, aut à scorbutica purpura, quæ nostro tempore frequentior subest, malum suam duxit originem; tunc vigili cura allaborandum est, ut ab istis heterogeneis impuris partibus referta sanguinis & humorum massa depuretur, & nimia feri copia per congrua emunctoria educatur. Cui scopo obtinendo, diluentia temperata, satis larga quantitate & longiori tempore usurpata, cujus generis sunt acidulæ temperatiores, quæ puriori & leviori aqua ac tenero sale alcalino imbutæ sunt, qualem prærogativam, præ reliquis omnibus aquæ *Spadanæ* & *Selteranæ* sibi vindicant, quippe quæ convenientissimæ sunt & apprime pectoris, renum & vesicæ vitiis, ubi labem ac vitium hæ partes receperunt, specifica quadam virtute opitulantur, egregie satisfacere possunt. Longe majorem vero utilitatem in purpura scorbutica præstant ac foenerantur, quando, per miscelam cum lacte præsertim asinino, horum fontium usus suscipitur.

§. III.

Sicuti vero diætæ tam in præservando quam in curando malo primæ sunt partes, adeo, ut qui leges medicorum aspernantur atque rejiciunt & arbitrio suo vivunt, nunquam à calamitosis ejusmodi malis liberari vel saltem levamen recipere possint: ita in tam diuturno morbo, ubi nervosæ & valde sensibiles partes affectæ sunt, maximè id necessarium est; eo quod levem in victu errorem, nervosæ statim partes luere debent. Sedulo itaque monendi ægrotantes, ut à cibis falsis, acribus, acidis, item vegetabilibus, quæ inflant, quæ adstringunt, nec non ab omnium cerevisiarum & vini acidi austeri potu prorsus abstineant: moderatius vero dulcium, inprimis Hungarici, usus, non modo non nocet, sed egregie prodest. Meretur hic allegari locus ex *AETIO Serm. XI. c. 22.* de scabiosa vesica; à mordacibus igitur & quæ humores acres ac falsiores reddunt, abstinendum. *Exhibenda autem vina dulcia, lac, & gallinæ, aut hædorum, aut agnellorum juscula.* Et quamvis motus & exercitatio corporis, ad avertendos ejusmodi morbos, dum & nimie sanguinis multitudini resistit, & liberum per vasa humorum transitum conservat, magnam vim habeat; tamen, si dolore & spafmo affectæ partes nervosæ imi ventris, quies magis quam motus salutaris evadit, qui tunc maxime nocet, præsertim ea motus species, sub qua sanguis magis ad inferiora pellitur, ut nimia vocis elevatio & longior ac intensior oratio, superiorumque partium agitatio, gestatio & oneris sublevatio.

§. IV.

Porro, ubi passio spastica cum ingenti cruciatu & mingendi difficultate urget, nihil præstantius, clysteribus emollientibus oleosis, balneis atque femicupis esse, crebriori deprehendi experientia; & idem quoque passim observata medicorum confirmant, mereturque hanc in rem legi elegans observatio *DRAWITZII* in libro de scorbutico malo pag. 153. Sunt quoque in paroxysmo ex usu vapores, ex floribus emollientibus & anodynis, ut sunt flores chamomillæ vulgaris, meliloti, sambuci, malvæ, verbasci, millefolii in lacte decoctis, debito modo admissi ad partem affectam;

Dd 2

quip-

quippe qui leniendo & mulcendo, spasmos & dolores egregie complacant. Interne vero liquor anodynus noster mineralis, sive solus, sive cum carminativis mixtus, nec non pulveres antispasmodici, ex pulvere Marchionis, specifico cephalico *Michaelis*, nitro purificato, addito pauxillo croci & castorei, cum emulsione seminum quatuor frigidorum majorum propinati, reliquis certe omnibus palmam præripiunt. Et eadem hæc remedia, etiamsi inflammatio imminet & febris adest, locum habere possunt, modo dosis nitri adaugeatur.

§. V.

Si ab acri retrocedente materia, fonticuli, it. decocta profunt.

Quando denique ex rheumatica quadam partium externarum fluxione retrocedente ad interiora, vesica morbum patitur, vidimus fonticulos brachiis inustus fructum non poenitendum præstitisse. Quo in casu decoctum demulcens ac leniter diaphoresin ciens, ex radice scorzonerae, farsaparillæ, chinæ, rasura cornu cervi, radice glycyrrhizæ, graminis, cichorei, ac semine foeniculi concinnatum, nec non liquor noster anodynus mineralis cum spiritu bezoardico *Bussii* permixtus, nunquam frustra adhibentur.

§. VI.

Mictus cruentus.

Si mictus cruentus in vesica ortus, spastica vesicæ affectioni jungitur, vel exulceratio supervenit, externe discutiendi & roborandi sine aquam vulnerariam, *l'eau d'arquebuse*, vulgo dictam, pubi & perinæo, haud frustraneo sæpe effectu, applicari jussi, vel sacculos ex mentha, melissa, foliis myrthi, lauri, floribus rosarum, chamomillæ vulgaris & Romanæ in vino rubro decoctus crebrius externe vesicæ regioni apponi curavi. Interne vero, ne sanguinis grumi in vesica forte relictæ cum muco tartareo ibi hærente coire & calculum producere queant, commodissime, abstergentia & traumatica leniora, quæ inter eminent virga aurea, alchymilla, fummitates hyperici, millefolii, radix caryophyllatæ, altheæ, glycyrrhizæ, ficus, cetera, sub infusi vel decocti forma, cum primis si hæc ipsa, melle Prussico, vel syrupo è dialthea *Fernelii* probe edulcorentur, in usum vocari possunt: sicuti non minus decoctum *Foresti*, item sperma ceti, sanguinis grumis in vesica hærentibus resolvendis remedia aptissima præbent.

§. VII.

Abcessus aperientius.

Quando inflammatio in abcessum, qui ex symptomatum exacerbatione & sensu quasi ponderis in perinæi & pubis regione dijudicatur, abiit; ut ille mature aperiatur & pus è vesica deriveretur necesse est: diutina enim mora acrius semper hoc redditum, vicinas partes arrodit, similique modo afficit atque exedit, fistulas aliaque pessima symptomata introducit. Ad quod gravius malum avertendum, injectio lactis tepidi, cum speciebus emollientibus cocti, tentanda est, ac si parum illa proficiat, ultima spes in operatione chirurgica est reponenda, quæ per cultrum in eo perinæi loco, ubi sectio calculi, cum magno quem vocant apparatu, peragi solet, instituitur. Quam in rem annotationem merentur bina, quæ ex RIOLANO desumfit exempla *BONETUS in sepulchr. Libr. III. p. 634. seqq.* In foeminis res aliter cedit, neque iis hoc auxilio opus est, eo quod orificium vesicæ amplius possident & liberior ad ipsam accessus patet. Ulcere autem aperto ac probe expurgato, eadem quæ modo memorata sunt in §. præced. remedia, erunt proficua.

CAUTELÆ.

§. I.

Quando multitudo sanguinis, sui depletionem *Sanguinis detractio, qua ratione instituenda.* exigit, consultius est, per venas superiores primo, ob revulsionem sufficientem, ejus copiam detrachere; altero vel tertio die, derivationis gratia aperiendæ sedis venæ, si tumescant & promineant, vel si id commode non fieri potest, in malleolo vel poplite sectio potest institui. Sub habitu corporis spongiosiori sanguine ac succi pleno, in sexu præsertim sequiore, ad revocandos versus exteriora sanguinem & humores, cucurbitulæ partibus superioribus & inferioribus applicatæ plurimum utilitatis afferre possunt.

§. II.

Sed monendum hoc loco est, quod hujusmodi sanguinis detractiones ubi plethora urget, in principio, ad inflammationem vel arcendam, vel ubi jam adfuerit, ad eam discutiendam, aut majorem impediendam multum valeant & profint; ubi *quando ea proficiat.* vero non satis est virium & sanguinis, atque exulceratio præsens, plus noceant: quia virium robur detrahunt, cujus tamen præsentia ad expugnandum & solvendum morbum impendio est necessaria.

§. III.

In omnibus vesicæ doloribus & spasmis, à *Purgantia fugienda.* quacunque etiam causa proficiscantur, validiora purgantia nunquam exhibere convenit, neque in principio, neque in progressu: metuendum enim est, ne exagitati humores ad partes afflictas magis impellantur & præcipitentur. Remittente vero dolore & spasio, atque morbo inclinante, alvum solvere, & intestina à stercoreis sordibus, quæ per dolores & spasmos plerumque retinentur, liberare, utile omnino, imo necessarium subinde est. Sed benignioribus id semper præstandum erit; cujus generis sunt mannata, rhabarbarina, syrupus rosarum solutivus, cum sero lactis vel lacte asinino propinata.

§. IV.

Ad spasmodorum ferociam mitigandam præter *Clysterium usus proficuum.* externa linimenta & fomenta, clysteres ex lenientibus & emollientibus conflati, sunt injiciendi, eo quod blando suo calore ac tepore rigidas spasio afflictas vicinarum partium fibras molliendo & relaxando, insigne dolorum solatium atque allevamentum afferant, sed exigua quantitate, ne comprimantur inde vesicæ parietes, applicandi erunt.

§. V.

Ubi ingens vesicam & ei connexas partes corripuit exulceratio, quæ ex copioso viscidæ materiæ sedimentò, & lenta quadam vires & carnem depascente febre apparet; ab interno & largiori *Carolinarum* usu abstinendum esse, ex damno, quod inde emerfit, maximo didici: ob stagnantem enim aquam & corruptio & febris intenditur.

§. VI.

Injectionibus anodynis, ad temperandam humorum acrimoniam, neque minus ad efferratos dolores sopiendos, commodus utique locus concedendus. Parari illæ possunt ex albumine *Injectio- nes.*

ovorum no. IV. conquaffato & in aquam redacto, addendo lactis fœminini uncias duas, butyri recentiffimi drachmatn: vel etiam emulfio artificialis ex femine cucurbitæ, papaveris albi, aqua florum sambuci, rofarum & ceraforum nigrorum concinnari in talem ufum & finem potest.

§. VII.

Acia vitanda.

Ab omnibus diureticis, acrioribus in fpastica hac affectione maximopere abstinendum: nam ubi viæ urinariæ exulcerationem paffæ sunt, ab adhibito eorum usu dolores & fpafmos exacerbati atque longe crudeliores reddi, nullum est dubium.

§. VIII.

Anodyna.

Ubi dolores sunt vehementiffimi atque exinde gravia metuenda sunt fymptomata, anodyna quæ valide dolorum fœvitiam compescunt, ne vires nimium frangantur & febris cum urinæ difficultate augeatur, vel amentia provocetur, ufui poffunt effe. Et vidi à trochifcis de alkekengi ad drachmam dimidiam pro dofi fumtis, ægrotantes insigniter fublevatos. Cavendum tamen maximopere ab eorum usu est, ubi ab ætate fenili, ab affectu animi, mœrore præfertim, virium adest prostratio.

ENARRATIONES MORBORUM.

OBSERVATIO I.

Spasmus vesicæ diurnus funestus.

Vir circiter quadragenarius, caufarum patronus, per aliquot jam annorum spatium, immanes plane ac intolerabiles dolorum juxta pectinem & pubem, cum summa urinæ difficultate & quandoque fuppreffione, vigilia, virium defectione, extremorum frigore, & tremore, per intervalla paffus est cruciatus, ut fæpius ad desperationem adaçtus, vitæ fibi finem propter atrociffima tormina, gladio procurandi fatius duxerit. Tormenta hæc per aliquot hebdomades affidue affligebant, poftea remittebant, quamvis non prorfus ceffarent, ita tamen ut officio fuo quadantenus fungi potuerit; dein poft unam vel alteram, eodem infultu revertebantur. Urina pauca & turbida effluebat, vifcidum deponens feditum. Cumque per aliquot annos hoc malo affectus effet, viribus tandem confumtis, in quadagesimo ætatis fuæ anno obiit: omnes per totam civitatem in auxilium vocaverat medicos: quorum alii caufam tam immanis cruciatus in vesicæ calculum; alii in ejus ulcus rejiciebant. Sed aliud longe partis affectæ poft mortem docuit fcritinium; vesica quippe integra, omni vacans inflammatione, fuit inventa, nec veftigium fabuli aut calculi in eà repertum. Ipfa vero vesicæ membranacea substantia præter naturam valde craffa & denfa erat, copiofis amplis ac diftensis fanguiferis vasis, quorum nonnulla calami fcriptorii capacitatem æquabant, obfita, & fanguine craffo & atro repleta.

Epicrifis.

Dolor & fpasmus partium nervofarum atque membranacearum, ab humore vitiofo, vel intra cavitatem, vel in ipfa textura & compage tunicarum nerveo-fibrofæ hærente progignitur. Pofterior caufa, quanquam minus à medicis ufque eo fere cognita, atque in eorum fcriptis ta-

Frid. Hoffmanni Oper. Tom. II.

ta fit, frequentiffima tamen: testante id inter alia, cardialgia, dolore ilei & coli fpafmodico, à fanguine intra tunicas ventriculi & intestinorum nervea ftagnante subortis. Simili ratione, in vesica, quæ ex meris tunicis & membranis nerveo-musculosis, subtilis sensationis constat, à fanguine intra vafa nimium congesto & nerveas partes divellente ac diftrahente, vehementem fuboriri poffe fpafmum, non modo vero est fimillimum, fed & fectio in præfenti cafu inflituta, id luculenter apertum reddidit. Neque mirandum est, quod calamitofi hi interdum cruciatus inducias egerint & ad tempus quieverint, hoc videlicet contigit, quando ex variis caufis fanguinis ad vesicam appulfus quodammodo diminutus & retardatus fuit. Medicamenta, quæ ad dolores levandos, ad acrimoniam humorum obtundendam, ad exulcerationem mitigandam; ad urinæ fluxum provocandum fuerunt exhibitæ, fupervacanea & nullius ufus fuiffe, jam quifque fagacioris ingenii & judicii medicus ex facili intelliget.

OBSERVATIO II.

Vir generofus, militum præfectus, LX. & ultra annorum, podagricis doloribus fubinde vexabatur, & complures ante annos, fluentes habebat hæmorrhoides, quæ tamen per magnum temporis spatium filuerunt. Autumno dolore incipiunt pedes cum fpasticis tractionibus: fed is minime hæc curans, iter aliquot milliarium, sub coeli temperie valde humida & frigida fufcipit. Dolores quidem evanefcebant, fed poftea incidit in mingendi difficultatem cum ardore & dolore circa pubem & radicem penis, virium defectione & conatu ad vomendum, alvo obftipata, horrore artuum & æftu intercurrente intensiori junctam. Ego in confilium accitus, venæ fectionem in pede, quum per integrum fere annum eam neglexiffet, fuafi. Interne pulveres diaphoreticos, nitrofo-cinnabarinos, item liquorem anodynum cum fpiritu Bullii remixtum, ad transpirationem placidam promovendam exhibui. Exterius regioni dolenti linimentum applicari juffi, ex aqua Anhaltina, camphora, croco, oleo nucifæ expreffo & pauxillo opii compositum; nec non, ad alvum aperiendam, clyfteres emollientes, ex floribus anodyna quadam virtute imbutis, injiciendos curavi. Et intra feptem dies, morbo per copiofiorem sudorem foluto, fanitati fuit reftitutus.

Epicrifis.

Hanc urinæ, cum stranguria & febricula, difficultatem, ab humore ferofo acri, qui pedum digitos obfidebat, retropulfo, fubortam dijudicavi, & rheumatifmum eryfipelaceum vesicæ substantiam occupantem pro caufa agnovi. Ea-que propter ejusmodi remedia cum intrinsecus tum externe ufurpanda duxi, difcutiendi quæ pol- lent facultate, & quæ cum insigni alias fructu in eryfipelate affectis tutiffima & convenientiffima deprehendi. Ex quo, praxeos medicæ fundamentis initiati difcere poffunt, quantum interfic, ad expeditam & felicem fanationem morbi conficiendam, veram ejus caufam inveftigare, & statim inter initia, ad eam amovendam congrua & idonea remedia in ufum advocare.

OBSERVATIO III.

*Spasmus
vesicae, à
materia
scorbutica
purpuracea
retrocedente.*

Theologus magni nominis hujus loci sexagesimum ætatis annum supergressus, sanguineæ constitutionis, vitæ sedentariæ, lucubrationibus & mentis fatigationibus nimium deditus, doloribus subinde gravativis & pressoriis circa os sacrum & regionem pubis corripiebatur, atque tum maxime, quando sermonem sacrum alta voce diutius paulo protraheret; qui, corpore quiescente & sanguine misso, quodammodo remittebant. Purpura scorbutica sæpius eum afflixit, tandem in gravem primum per intervalla dysuriam incidit, cum horrore & febricula alternante, & ingenti circa pubem dolore. Demum superveniebat paresis manus dextræ: quæ quamdiu persistit, remissior fuit dysuria; illa vero evanescente, atrocior vesicæ spasmus & dolor cum assiduo urinam mittendi stimulo illico repetebat. Duravit hoc malum per aliquot septimanas. Varii generis tentata à medicis remedia. Missus aliquoties intra morbi decursum, è pedis vena, sanguis: sed citra fructum. Tanta enim doloris & spasmi in pube & pectine secuta est atrocitas, ut appetentiam ciborum, somnum & vires penitus dejiceret, atque urina pauca & cum summa difficultate efflueret, purulentæ quippiam materiæ continens. Inducias quandoque dolores agere videbantur: sed mox redierunt. Tandem vesicæ inflammatione, ex parte exulceratione, febreque acuta purpuracea supervenientibus, vitam cum morte, non sine summo totius civitatis luctu commutavit.

Epicrisis.

Quando in hac gravis morbi historia enarrata phænomena & circumstantias probe rationi subicimus, & paulo attentius consideramus; abunde constare arbitror, causam funesti hujus mali neque in vesicæ calculo, neque in humore acri intra cavitatem vesicæ detento, sed in decubitu sanguinis serosi scorbutici intra membranas ejus delitescentis esse quærendam & constituendam: quem postea inflammatio cum febre acuta & purpuracea exitiosa infecuta est. Mea quidem sententia nullum dubium superest, quin à purpura retrocedente, ob incautius paulo, intra morbi hujus decursum subinde admissum frigus, & crebrius celebratam venæ sectionem, quæ distillationem humoris morbifici per extimam cutim valde moratur, vis morbi multum increverit. Placet vero hoc loco similem quandam notatu dignam observationem, M. N. C. insinuatam, adjicere, quæ abunde docet, à sero impuriori intra vesicæ tunicas stagnante lethales fieri posse vesicæ inflammationes. Ita enim legimus, *Dec. II. ann. VII. observ. 143.* quendam sanguineo-cholericæ constitutionis à juventute stranguria afflictum, incrementum ætate commissisque in diætâ erroribus, frequenti ac dolorifico paucæ & pallidæ urinæ, singulis fere vel vix dimidiæ horæ quadrantibus cruciatum fuisse mictu, una cum tenesmo. Quod malum posteaquam ultra annum frustra omnibus datis durasset, octo ante obitum hebdomadibus accessisse in urina reddenda impedimentum, brevi tamen iterum cessans, intumuisse, doluisse pedes, ac erupisse passim in dorso & pedibus pustulas, cum ardore, subsequente spontanea ruptura, exulceratione, tandemque leniori quasi gangræna. Ma-

ture quidem topicis hæc fuisse abacta, in regione pubis autem intensissimum dolorem subsecutum tam incredibilem, ut æger ejularet, mens alienaretur, paralyti latus sinistrum afficeretur, tandemque motibus convulsivis ipsa mors accederet. Exemta post mortem vesica, interius totam nigricantem conspectam fuisse, sphacelatam, sine ullo tam fabulo quam calculo.

OBSERVATIO IV.

Honestæ fœmina, in urbe vicina degens, quæ annum superavit quadagesimum, mediocris staturæ & sanguineæ ut vocant complexionis, menstruorum fluxum ordinatum persentiit, venæ sectionem etiam aliquoties admisit; aliquot abhinc menses, supra vires aliquoties facta onerum elevatione, insignem gravativum instar ponderis circa regionem pubis & os sacrum percepit dolorem; quo præsentem menstruus etiam fluxus parcius. Demum ex terrore accedente, spasmus ad inguina acutissimus redditus est, ita ut, ægra id ipsum fatente, longe superaret dolores, quos fœminæ in partu etiam laborioso sustinere debent, cum summa urinam emittendi difficultate & continuo meiendi & desidendi desiderio stipatus. Excepta urina crassum semper deposuit sedimentum, fibrosis quibusdam moleculis in ea natantibus. Ciborum periit appetentia, atque somnus, ob urgentem urinæ stimulum, difficilis & interpolatus. Auxilium à me petiit. Ego sanguinem ut in brachio mitteret, & loco cerevisiæ decoctum ex speciebus emollientibus & leniter carminativis biberet, auctor fui. Interdixi autem vinum Rhenanum, & ut in quiete corpus servaret suavi: liquorem quoque anodynum nostrum cum croci essentia mixtum, ad usum internum commendavi: neque minus infusum Theiforme, quod herbam veronicæ, virgæ aureæ, flores malvæ, summitates millefolii, radicem althææ, eryngii, glycyrrhizæ, nucistam & semen fœniculi habebat, mane hauriendum præcepi. Dedi quoque consilium, ut vesicæ regioni frequenter epithema, quod ex vino rubro cum floribus lavendulæ, chamomillæ Romanæ, sambuci atque rosarum rubrarum decocto, parabatur, applicaret. Hæc quidem usurpavit ægra, & quamvis nondum ex toto malum fuerit depulsum, levamentum tamen eam exinde recepisse mihi rescriptum est.

Dolor vesicæ, ab oneris elevatione, ex terrore accedente, acutissimus redditur.

Epicrisis.

Affectus qui ex læsa vesicæ substantia oriuntur, præsertim si per aliquod jam duraverint tempus, curatu non tam faciles sunt ac esse forsitan putantur. Possunt tamen opportunis adhibitis remediis mitigari, ut per plures annos trahere adhuc vitam, licet cum molestia, possint hoc vitio laborantes: cum alias incauta victus ratione, vel importuna per medicamina tractatione, lethalem facile eventum sortiantur. Perquam enim ardua & difficilis res est, vasa vesicæ sanguinea, à fortiori impetu & appulsu sanguinis in eadem, nimium relaxata, ad pristinum tonum reducere, & motus naturæ aliquoties eo directos avertere. Ex hac porro morbi historia illud in usum convertere possumus, quod à sola causa externa, videlicet corporum gravium sublevatione & gestatione, in sanguine abundantibus, impetuosa ad partes inferiores in abdomine contentas, quæ quo nobiliores & sensibiliores eo gravius

vius luunt, fanguinis enafci queat congestio; quæ certe multorum, nifi cita ope fuccurramus, funestorum fymptomatum fons atque origo evadit. Neque ullo modo mirandum eft, congestionem illam in noftro cafu vehementiores turbas excitaffe, quum terror supervenerit, cujus ea indoles ac facultas eft, ut univerfam humorum maffam, motu vitæ plane contrario atque infenfiffimo, ab exterioribus ad interiora cogat atque repellat.

OBSERVATIO V.

*Urina fup-
preffio ex
gonorrhœa.*

Vir annorum XXXVII. fanguineo-cholerici temperamenti, habitus corporis macilentioris, prima ftatim in juventute, Veneri atque Baccho hostias affidue litaverat, lauto infuper ufus vitæ & victus genere: fanus alias atque robustus, nifi quod aliquoties gonorrhœam dignam factis mercedem deportaverit, quæ femper brevi fuit fanata. Ante aliquot annos, improvifo quodam horrore & frigore cum alternante æftu corripitur, ac inde in totalem incidit urinæ fuppreffionem. Medicus calculum veficæ fubefle ratus, fuafit balneum, & tincturam ex cantharidibus præbuit; ac applicato cathetere reftitutus urinæ fluxus. Exactis tribus menfibus, idem malum reverfum eft, idque aliquoties. Poftea alterius medici confilio ufus eft, qui ordinavit emulfiones refrigerantes & antifpafinodicas, quibus uberior & liberior redditus urinæ curfus. Anno abhinc prior morbus denuo cum horrore, frigore, alternante æftu, & totali urinæ fuppreffione repetiit. Meam vero opem non modo ob præfens malum, fed etiam ob impotentiam qua laborabat, popofcit. Ego infufum Theiforme, pulverem antifpafinodicum, & mixturam ex tinctura tartari, liquore anodyno & balfamo Peruviano commendavi: quibus naturalis urinæ fluxus reftitutus. Poftea urinæ non penitus quidem fuppreffa, fed fili tenuiffimi inftar, prævio femper horrore per certa intervalla prodiit. Semen quando vult ejaculari, ad orificium urethræ fubfiftit, poftea fenfim exftillat & indufium madafacit. Notabile adhuc, quod urina fubfiftat prius, dein cum impetu prorumpat, præcedente fonitu, *als wenn eine Rûbe zerbrochen würde.* Sanatus fuit, diuturno per aliquot menfes fontis *Selterani* ufu, pro potu ordinario. Et ad alvum laxandam quæ fæpius erat ftricta, pulvis magnesiæ cum arcano duplicato & nitro mixtus conduxit.

Epicrifis.

A gonorrhœa venerea perperam & nimis cito curata, ego in praxi mea, morbos veficæ & vicinarum partium poft longum fæpius tempus demum fucceffiffe, multoties obfervavi. Et ratio ex anatomicis quam facile petenda eft. Notum enim eft glandulas proftatas, quæ plerumque fedem gonorrhœæ conftituunt, collo veficæ, adeoque ejus fphincteri & urethræ principio efle annexas. Quod fi itaque hæ glandulæ vel nimium relaxatæ & tumefactæ, aut fcirrholæ, comprimunt veficæ collum, vel acrem exsudantes humorem fphincterem & urethram fpafmo ac dolore afficiunt, miçtum difficilem & ad tempus penitus fuppreffum, imo interdum cum dolore & fpafmo confequi, minime mirandum eft. Et tale vitium quoque in præfenti cafu, dictis partibus inhærere, fymptomata

fatis perfpicuum reddunt: nam propter compreffum veficæ collum, ejaculatio feminis non modo impeditur, fed & urina tenuis quafi filum prolicitur, & quandoque ejus fluxus penitus intercipitur; quod fi vero, ob molem tandem prorumpit, orificium urethræ cum vi aperitur: unde talis fonitus, qualis in cafu enarratur, emergit. Ego pro potu ordinario fontem *Selteranum* fuafi, cujus eximiam virtutem ac facultatem in renum & veficæ morbis, ad leniendos dolores & fpafmos, urinæ fluxum promovendum, canales obftructos aperiendos, atque mucum vifcidum detergendum non fatis dilaudare poffum. Et quoniam in gonorrhœa inveterata, & in morbis veficæ & urethræ ex hac prodeuntibus, per aliquot exempla, mirabilem thermarum Carolinarum potum, & earum aquæ falutiferæ in membrum injectionem crebriorem, deprehendifsem; non dubitavi ejus ufum & fructum de meliori commendare.

OBSERVATIO VI.

Quondam in Principatu Halberftadienfi me confulebat magnæ dignitatis vir quinquagenarius, fanguineæ complexionis ac venæ fectionis ofor, ob infanos & immanes fere fpafinos & dolores, quibus, præfertim Borea flante, in pube, perinæo & radice penis torquebatur. Juncta fimul aderat urinæ difficultas, ftanguria alvi-que pigrities, cum horrore extremorum, atque vigilia. Remittebant fæpius hi dolores ad tempus, poft revertebantur majori vel minori impetu. Quum morbi hujus pertinacis & infefti primam investigarem originem; accepi, Dn. ægrotantem aliquoties in juventute laboraffe gonorrhœa; quæ quidem à chirurgis curata, fed ab eo ftatim tempore, difficultatem in urina emittenda, cum fenfu conftriktionis circa hæ partes ipfum percepiffe. Ipfe jam à multo tempore, propter continuas in officio occupationes, vitæ fedentariæ nimium indulgebat: nihilo minus data occasione, qua crebro utebatur, vinum liberaliter bibit, à victu quoque duro & infumatis carnibus, quibus affuetus erat non abftinuit. Ad levandos dolores, fe nihil melius & efficacius inter omnis generis remedia deprehendiffe referebat, ac jufcula, in quibus herbæ emollientes, ut parietaria, malva cum floribus atque althea decoctæ erant; quæ etiam cum aqua calida infufa, & cum fyrupo dialtheæ Fernelii edulcorata, infigne allevamentum tulerunt. Ego, morbo & ejus caufis probe in examen vocatis, eum vix efle fanabilem, propter magnam læfionem in vefica & ejus collo, edixi. At quia urina lentum vifcidum ac arenofum deponebat feditum, vel jam rudimenta calculi præfentia, vel futura, ipfi præfagium feci. Ut itaque morbi ferociam leniret & à gravioribus veficæ morbis fe præmuniret, interdixi cibos falfof & infumatos, omneque cerevifiæ & vini genus; ac ut fontem *Wildungensem*, quem jam olim ufurparat, pro potu ordinario biberet, balneis frequentius uteretur ex aqua dulci, decocta memorata ex emollientibus continuaret, ad roborandum vero imbecillum ventriculum, qui perpetuus fere continuorum dolorum comes eft, vini Hungarici optimi & recentioris hauftrum intra cibos fumeret, ac intra menfis fpatium, pilulis ex pulvere rhabarbari, extracto rhabarbari & therebinthina Veneta paratis, alvum ter minimum fubduceret, auctor fui fuaforque. Qui-

*Vehemens
vesicæ do-
lor, è go-
norrhœa
perverfe
curata.*

bus monitis, vir summe prudens quum obtemperaret, ad sexagesimum & tertium annum, nunquam tamen ab omnibus doloribus prorsus immunis, vitam protraxit.

Epicrisis.

Gonorrhœa ex impura venere contracta, quo familiarior juvenili ætati est, eo minus recte ejus sanatio suscipitur; quia affecti non periti & circumspecti medici consilio, sed chirurgorum ope uti consuecunt, qui fluxum plerumque adstringentibus nimis cito compescunt; ex quo fit, ut vel statim in graviora incurrant mala, vel dispositio quædam prava in locis affectis relinquatur: quæ demum in provectiori ætate, concurrentibus aliis erroribus sese exerit, atque variis pathematibus ac vitiis præsertim circa vesicam manifestat. Nam, post quinquagesimum annum, lentior ac difficilior incipit fieri sanguinis in partibus inferioribus & extremis, ut sunt, quæ in pelvi jacent, per venas recursus & reditus; præsertim in sanguineis qui vitam sine motu & exercitatione, atque in occupationibus agere debent. Quando itaque sanguis non exitum habet, neque per sedis venas, neque per artificialem evacuationem; in vesica & vicinis partibus imbecillioribus facile subsistit, & nimium ibi collectus, propter vehementem tunicarum nervearum distractionem & divulsionem, graviores excitat spasmos ac crispaturas sphincteris ac urethræ; qui difficultatem meiendi relinquunt. Urina autem mingitur turbida & viscosa, non aliam ob rationem, quam, quod à stagnante intra vesicæ substantiam sanguine, humor instar albuminis ovi viscidus magno nisu exprimitur, simili ratione, ac fieri solet in hæmorrhoidibus quæ vulgo vocantur albæ; qui mucus postea cum partibus tartareo-terreis urinæ paulo diutius in vesica detentæ commixtus, calculos quam facile in vesica procurat, & non raro ejusmodi affectibus quo laboravit noster patiens adjungitur, nisi congrua vitæ, diætæ, & medendi ratione id præpediatur. Quod vero sæviente Borea spasmi & dolores partium internarum ingravescere soleant, ventis vero ex contraria plaga flantibus mitescant; id à nobis sæpius animadversum est: & quanta vis ac potestas sit ambientis atmosphæræ, quæ, à ventis, testante Barometro, mirifice modulatur, partes corporis nostri maxime nervosas distendendo ac strictiores reddendo, inde luculenter demonstratur.

OBSERVATIO VII.

*spasmus
vesicæ, in
vitæ seden-
taria addi-
cto, fune-
stus.*

Clarissimi nominis vir, magnus literator, sexagenario major, sanguineo-melancholici temperamenti, qui continuis lucubrationibus, mentis laboribus & sedentaria vita maximam suæ vitæ partem peregit, ante tres annos mingendi difficultate, cum ponderis cujusdam pressorio sensu in regione inguinali corripitur. Urina non modo viscidum sedimentum, sed multa concretamenta calculosa cinericei coloris deposuit. Quæ symptomata, succedente tempore, semper propter dolorem & spasmus, ischuriam, dysuriam, urinæ incontinentiam, ani procidentiam & tenesimum, vigiliam quoque, sequentes per annos incrementa, ita vires ejus paulatim attriverunt, ut sexagesimo sexto ætatis anno extremum spiritum reddere debuerit.

Epicrisis.

Morbos qui vesicam infestant, ut sunt calculi, exulcerationes, mictus cruentus, dysuria, stranguria, recte & perite satis, primis artis nostræ conditor Magnus *Hippocrates* inter ætatis senilis affectus retulit. Ad quorum generationem difficilior sanguinis regressus, tum per venas hæmorrhoidales tum per hypogastricas, sedentaria & motus expers vita, sanguinis intermissa deductio, & impuri feri viscosi tartarei, ob excretionem per cutim, urinam, sub hac ætate labascentes, cumulatio multum omnino conferre possunt. Sed hos morbos, si ingruunt, difficilioris sanationis imo insanabiles esse, gravissimus idem Auctor pronunciat. Placet nobis hunc in finem ex M. N. C. Dec. II. an. IX. similis argumenti casum adducere, cui simul anatome eodem morbo defuncti annexa prostat. Fuit autem Matrona sexagenaria, per viginti annos vidua, sanguinei temperamenti, quæ à deambulationibus plane abstinens, sedentariam solitudinem quærens, ob mœrorem lacrymis sese fatigans, doloribus ad os sacrum, pariter ac colicis afficitur, aliquando & stranguria; dein etiam pedum tumore: hinc magis motu corpus destruitur. Ingravescente ad os sacrum malo calculos ad piforum magnitudinem cum sabulo egerebat: tandem viribus fatiscentibus, appetitu debilitato, cruciatibus stranguriæ gravioribus, & accedente tenesmo, parum sabuli cum foetido & purulento muco excreto, placide animam exhalavit. Aperto corpore intus vesica rugosa & ad magnitudinem pomi contracta conspiciebatur, & non tantum ulcerata interior ejus tunica, sed vasa etiam nigra in ipsa prominentia se offerebant, urethra nimis ampla ut manubrium cultri anatomici promte trajici posset, vesica fellis colore instar rob cerasorum cum calculis minutis nigerrimis conspectui se prodidit.

OBSERVATIO VIII.

Incidit in memoriam casus, quem, ante quinquaginta propemodum annos, cum Mindæ Westphalorum ut Physicus Provincialis medicinam facerem, annotavi. Vir erat sexagenarius, qui, cum ob copiosi spiritus vini ingurgitationem & victum duriorum, vitamque otiosam, rheumaticis & nephriticis doloribus plures per annos obnoxius fuisset, tandem in febrem lentam cum mictu difficili quandoque purulento dolore gravativo & ardore in lumbo sinistro stipatam incidebat. Corpus macie erat consumptum, & vires in dies decredebant. Tandem intolerabilem circa regionem pubis passus est cruciatum, cum totali fere urinæ suppressione junctum. Ad quem sublevandum, neque externa neque interna probatæ virtutis anodyna & discutientia remedia quicquam opis contulerunt. Ex quo factum, ut viribus pæne omnibus dejectis, exacto aliquot hebdomadam spatio diem supremum placide subiverit. Concessa à cognatis defuncti corporis sectione, renem sinistram ulcere penitus consumptum & exesum inveni, in pelvi autem insignem, aliquot unciarum, crassi, foetidi puris copiam conspexi, vesicæ tunicis valde laceris atque arrosis. Dexter ren satis erat magnus, cujus ureter instar pollicis distentus: ventriculum valde parvum & contractum, eo quod ultimis diebus nihil assunserat, deprehendi.

*Spasmus
vesicæ, ex
spiritu vini
& c. abusu
su oritur,
funestus.*

Epicri-

Epicrisis.

Ex dissectione hoc affectu defuncti cadaveris, id discere & animadvertere licet, sævissimum vesicæ dolorem & spasmus cum urinæ suppressione, à causa externa, purulenta nempe materia, quæ ex erosa renum substantia in inferiore vesicæ sedem descendit, nerveas membranas extrinsecus corrodendo, contingere posse. Lethalis vero ischuria ex eo secuta fuit, quod non modo collum & sphincter vesicæ ab acredine materiæ hujus purulentæ constrictus, sed etiam ab urinæ copia compressus fuerit: unde factum, ut usus catheteris immissi plane fuerit frustraneus. Atqui hic recordor sectionis nobilis aulici ante viginti fere annos institutæ, qui gladio vulneratus ex lethali ischuria, per decem fere dies durante, *Dælitii* quæ est civitas Misnienfis, sub summis dolorum tormentis animam efflavuit. Reperimus, abdomine aperto, in cavitate pelvis uncias aliquot sanguinis coagulati, qui paulatim sensimque ex vulnere non adeo insigni vasis sanguinei in omento stillavit in ipsam pelvim, & valde comprimendo vesicæ collum, non modo vehementissimos dolores, sed etiam urinæ suppressionem insanabilem reliquit.

Notabiles adhuc extant casus in *consult. medic. sect. III. cas. XC. XCIII.*

CAPUT VIII.

De doloribus & spasmis externarum partium rheumaticis & arthriticis.

THESES PATHOLOGICÆ.

§. I.

Quid arthritidis veteribus fuerit?
Veteres medicorum omnis generis dolores, qui vel externas partes musculosas, vel ossium juncturas & articulationes infestabant, arthritidis nomine comprehenderunt atque sic in monumentis suis proposuerunt, ignorato vocabulo rheumatismi. *ARETÆUS lib. II. cap. XII. de arthritide ita scripsit: quibusdam in omnem corporis ambitum vagatur, & demceps transitus quoque in dorsi thoracisque musculos fit; incredibile est quam late malum serpat: vertebrae dorsi cervicisque dolent & in summo sacri ossis dolor inhaerescit, & paulo post cum renibus & vesica communicatur.* Superiori vero seculo, Clarissimi Galliae medici, quos inter primas omnino partes, **CAROLUS PISO, RIVERIUS, BALLONIUS, CHESNEAU**, tenent, dolores, qui medios artus & musculos cervicis, brachii alterutrius, thoracis antici & postici, humeros, scapulas, femora, manus, obsident atque affligunt, rheumaticos vocarunt. Arthriticos autem dixerunt eos, qui in articulis tantum & juncturis ossium resident; ita tamen, ut pro diversitate partium affectarum differentes etiam denominationes factæ fuerint: si enim dolor in pedum articulis consistit podagra; in manibus chiragra; in cubitu onagra; in dentibus dentagra; in vertebra dorsi lumbago; in articulationibus ossis ischii, dolor ischiadicus audit. Verum nostro etiamnum tempore, incipientem & facilius transeuntem arthritidem, chiragram, &

podagram, rheumatismi nomine insignire consuecunt.

§. II.

Cum vero insignis ratione partium dolentium, *Cur spectat hic affectus pertractentur?* causarum, symptomatum & methodi medendi inter rheumaticos & arthriticos dolores sit differentia, cum sufficienti & stabili ratione, medicorum & sagaciores & peritiores hos affectus specialiori tractationi & explicationi submittere haud dubitarunt. Neque est exigui in ipsa praxi medica momenti, arthritidis recentis & incipientis à vera radicata & inveterata differentia.

§. III.

In rheumatismo, musculi cum eorum membrana communi & tendinibus ubi ossibus inferuntur, gravi dolore & spasmo hinc inde in artubus aliisque corporis regionibus afficiuntur; in arthritide vero ipsa ligamenta tendinoso-nervea, quibus invicem ossa conjunguntur & combinantur, quatenus illa periosio cohærent vehementius affliguntur. Sed uti in arthritide ac podagra incipiente dolor magis in superficie ligamentorum hæret & urget: ita in inveterata, humor vitiosus, dolorum fomes, profundioris est situs, & spatium magis inter cavitates articulorum occupat. Deinceps quoque in eo differentia arthritidis veræ & rheumatismi constituenda venit, quod illa sæpius recurrat, homines misere exerceat, atque longiori tempore insistant, difficilioris quoque sit sanationis; rheumatismus vero quandoque semel vel bis tantum per omnem ætatem adoriatur, neque tam diu inhærescat, facilius transeat & sanationem promptiorem admittat. Variat quoque sæpe ipse dolor: nam in rheumatismo magis est tensivus, pressorius, gravativus cum frigore junctus, sine conspicuo tumore ac rubore; in arthritide vero lancinatorius, divulsorius, pungitivus & quasi rupturam minans cum insigni tumore & rubore percipitur.

§. IV.

Sicuti omnis permolestæ sensationis causa est humor five copia five intemperie peccans, intra vasa minima tunicarum & membranarum nervosarum stagnans atque congestus; qui violentia quadam eas distendit, vellicat, divellit, arrodit: ita etiam eandem causam in rheumaticis & arthriticis affectionibus locum habere extra omne dubium esse videtur.

§. V.

Attenta constat experientia, non modo ætate florescentes, juniores, sanguineæ, & sanguineo-sensu complexiones, spongiosioris corporis habitus, ab improvide admisso frigore, vel vento Boreali impetuosius in partem irruente; sed etiam plethoricos five scæminas, five viros vegetæ alias naturæ, omissa consueta venæ sectione vel scarificatione, post prohibitam cum primis transpirationem, rheumaticos e.g. in cervice, scapulis, humero, dorso, sternó, thorace, dolores vel levioris gradus arthritides experiri: cum natura debiles minus fibrosi & laxioris habitus, à parentibus arthriticis & podagricis geniti, & qui immoderato Veneris vel vini usu, comestationibus, mentis fatigationibus & vehementioribus animi commotionibus, tono & robore valde imbecilles redditi fuere, vera profundiori & magis pertinaci arthri-

arthritide imprimisque podagra afficiantur atque excrucientur.

§. VI.

*Et cum ne-
phritide al-
ternant.*

Qui graviore præsertim inveterata arthritide laborant, ii, conquiescente hac, quam facile in nephritidem calculosam dilabuntur, & cessante hac, in arthritidem alternatim quasi recidunt: insuper quotidiana docemur experientia, arthriticos & maxime podagricos digestionis vitio plerumque laborare, & primas eorum vias ructibus, flatibus, spasminis & illuvie vitiosorum humorum, sub alvo pigriori esse turgidas: quin imo observamus plurimos podagricos esse hæmorrhoidarios, sive insultus ac motus, quamvis inaniter & sine bono successu & exitu, hæmorrhoidales experiri, doloribus in ossæ sacro pertinacius insistentibus & quandoque venis circa sedem tumescen-
tibus.

§. VII.

*Differunt
dolores tam
rheuma-
tici quam
arthritici,
ratione cau-
sarum, &c.*

Quemadmodum non una eademque humorum, qui dolores fovent atque ingenerant, indoles atque conditio est: ita etiam & ipsi dolores ratione gradus, genii, & symptomatum rheumatici & arthritici multum habent discriminis. Nam ubi sanguis tantum copia peccat & nondum multis impuris particulis est inquinatus, mitius solent affligere dolores: id quod in rheumatismo simplici, & incipiente arthritide plethoricorum occurrit. Longe vero gravior horum dolorum species est, quando à feri impuri & excrementitii colluvie foveantur & sustentantur. Si quidem ego multoties observavi, uti in omnibus doloribus; ita etiam in iis qui partes externas & nervosas graviter afficiunt, rarius solum sanguinem bene temperatum & purum peccare, sed sero excrementitio ut plurimum esse stipatum: ita tamen, ut vel nimis sit tenuis & serofus, exigua rubicunda consistente portione refertus, vel sero viscido glutinoso tenaci imbutus delinquat; ipsa etiam excrementitia & impura salia multum ratione acrimoniæ volatilis fixæ salis & tartareæ in cruore differunt, quæ diversa hinc symptomata producant: ut adeo pro dissidente inter se harum causarum natura & indole, rheumatismus non inale à medicis exercitatis in sanguineum, in cacochyimicum, scorbuticum, fixum & vagum, distinguere possit.

§. VIII.

*Hinc è vena
missus san-
guis dif-
fert.*

Ex quo fit, ut sanguis in diversi generis doloribus è vena emissus, & ratione coloris & consistentiæ multum differat. Nam, quandoque in aquam calidam immixtus multo tenaci muco ex fibris varie intertextis constante abundans conspicitur; interdum serum quod supernatat, mox instar glutinis vel corii concrevit, non secus ac in peripneumonia graviter affectis evenit; alio tempore serum valde tenue est, & sanguis coccinei coloris, quod fit sæpiissime in rheumatismo vel arthritide vaga, indicio non incerto, sal ad alcalinam volatilem naturam vergens ei admixtum esse. CAROLUS PISO in *libr. de morb. ex colluv. serof. oriund. Sect. V. cap. III. p. 433.* in doloribus externi habitus massam sanguinis tanta serosa colluvie scaturisse observavit, ut seposito in pelvi vigesima vix pars in fundo subderit, quæ sanguinis colorem & consistentiam retinuit, reliquo liquore supernatante penitus aqueo, sed obducto pellicula viscida & alba. BALLONIUS quoque *libr. de rheumatismo*,

*in quo ratio
formalis
quærenda.*

aliquoties sanguinem, quem magna copia è brachio detraxit, impurum & in putridum serum resolutum vidit. Ego vero non semel sed multoties annotavi, quod in principio horum dolorum sanguis bonæ consistentiæ, longiori progressu, vel quando malum altius radices egit, admodum serofus, corruptus & pellicula tenaci imbutus fuerit emissus. Nam sanguis abundans primam quidem causam & originem hisce doloribus præbet, sed sub longiori morbi decursu, motu intestino calido per continuam agitationem in vitiosum serum convertitur: qua de causa ipse modo laudatus CAR. PISO, eruditissimus scriptor, omnes arthritidis & rheumatismi species inter morbos à colluvie serosa ortos retulit: id quod etiam urinæ copiosæ tenues, neque minus limosæ & turbidæ, atque copiosi foetidi sudores, qui hisce doloribus adjungi solent, commonstrare videntur.

§. IX.

Quæstio nunc haud exigui in theoria medica momenti solvenda incidit: quomodo & qua ratione feri vitiosi à sanguine qui jugi per vasa & tubulos motu circumvolvitur, separatio, stagnatio & decubitus in partibus exterioribus nervosis fieri possit? Utut vero veterum theoria, subsidiis physicis & anatomicis plane destituta in evolvendis morborum causis ac generatione imperfectissima sit, nihilo minus HIPPOCRATES *libr. de flatib.* ratiocinio mere physico mechanico harum fluxionum dolorificarum causas & modum generationis pulchre exponere annisus est; ubi §. 13. 15. 16. meminit: sanguinem ipsa natura calidum vi coactum, per angustam viam, celerrime, propter obstacula & oppilationes, transire non posse, & hinc tenuissimum per venas excludere, atque id ipsum tenuissimum liquidum, cum coacervetur, per alios meatus fluere, & ubi tandem in loco constiterit, fluxiones & dolores in partibus fieri.

§. X.

Nos vero, ut genesin horum morborum ad paulo clariorem conceptum redigamus, primo causas occasionales & antecedentes, deinceps modum quo invadere hi dolores solent spectare debemus. Jam autem per constantem & indubiam experientiam notissimum est, quod dolores artuum rheumatici incidant frequentissime in ea corpora, quæ præcedente intensiori motu, labore & exercitatione aut balneo calido vel aëre nimis fervido calefacta, inclementiori frigido cœlo, aut vento boreali subito exposita fuerunt; ubi non ita multo post, cum prævia quadam horripilatione & lassitudine, dolor gravativus pressorius & contractorius, hinc inde in partibus v. g. in cervice, scapulis, humero, dorso, lumbis, genibus vel in eo latere quod vehementia borealis venti profundius penetravit, interdum etiam in universo corpore oboritur: qui eo gravius affligit, quo corpus majori sanguinis copia turget. Ego insuper plus vice simplici observavi, permultos à largiori sanguinis per venam sectam missione, vel foeminas post sanguinis menstrui copiosioris profusione, vel post eandem ex abortu factam, quin etiam post nimias alvi à purgantibus acrioribus vel sponte à natura ductas dejectiones, penetranti frigida boreali vel humido-frigida nocturnæ auræ ubi corpora paulo diutius commiserunt, in graves rheumaticas affectiones incidisse: idque non alia ex causa, quam

*Ratiogene-
rica, ex
Hippocr.*

*Ex nostra
sententia.*

quam quod frigoris in poros corporis penetrantis vehementia, tubuli minimi venosi, arteriosi, lymphatici, sanguinem revelantes, & ad substantiam partium pro nutritione adducentes, compressi coarctati & occlusi fuerint: quo factum est, ut, cum serosus latex vasis suis amplius contineri & circulari non potuerit, instar fluvii sese alveo efferentis, in ipsam partium substantiam modo hic modo illic magis exundaverit, sive extra vasa & circulum positus fuerit. Omnis vero humor extravasatus, cum per ipsam moram à crassi blanda naturali deficiat & indolem plane alienam acquirat, partimque glutinosus tenax, partim acris salus evadat; fit, ut à tensione, compressione, lincinatione, & vehementi strictione partium fibrosarum & nervearum molestissimi & acerrimi dolores sæpissime cum frigoris glaciati sensu oboriantur: sed quandoque etiam accidit, ut serum extravasatum, non secus ac albumen ovi fieri solet, in tenue & corruptum liquamen quod amplius à calore fortiori non admittit coagulum, faceffat, & ex uno loco præfertim superiori ad inferiores per porosam partium substantiam & habitum carnosum transeat; nihil enim frequentius in praxi occurrit, quam quod rheumatismus locum suum mutet & ex capite in cervicem, in scapulas, humeros ac petus præfertim in ætate minoribus transeat, in adultioribus vero in dorsum, coxendicam regionem & femora descendat.

§. XI.

Rheumatismus & arthritidis vernali & autumnali tempore affligunt.

Constanti insuper experientia confirmatum habemus, rheumaticas æque ac arthriticas affectiones frequentissime circa vernal tempus & mense Octobris, sub insignibus aëris & tempestatum ex calido in frigidum & ex frigido in calidum mutationibus, ventisque repente ex contraria plaga se invicem excipientibus, corpora tam sanguine quam sero impuro plena impetere atque laceffere, & quidem cum febriculosa quadam commotione sequentem in modum: Præcedit spontanea lassitudo & gravitas artuum cum extremarum partium refrigerentia, horripilatione & quodam rigoris sensu; subsequitur anxius internus æstus præfertim circa præcordia, concitator & strictior pulsus, inquietudo, sitis, inappetentia, alvi obstructio, quandoque spirandi angustia: dolor postea gravis acutus vel gravativus, tensivus, has vel illas partes occupat, qui noctu exacerbatur, non secus ac in febribus catarrhalibus fieri affollet: & utut febrilis hæc commotio alios gravius alios mitiori gradu affligat & facilius transeat, nihilo minus dolor in affectis partibus adhuc relinquitur, easque laceffendo diutius sæpe perseverat. Cum vero omnis febrilis commotio ejus sit genii & indolis, ut partes exteriores & nervosas spasmio afficiat, & tenuissimas vasorum radices & apices coarctando & comprimendo, sanguinem & humores in vasis majoribus & interioribus accumulet, atque in corde & arteriis celeriore systerolen efficiat; fieri aliter vix potest, quin cum magno impetu sanguis in laterales arteriolarum ramos, qui sanguinem coloris coccinei non vehunt, intrusus, tandem serosam sui extra vasa portionem dimittat: & inde dolorum origo fit. Sed monendum hoc loco est, quod dolorificæ hæ partium sensilium spasticæ strictione non tam à sero tenui in eas irruente, quæ pars maxime diffatur, sed potius à vilcioribus ejus partibus, spiculisque & aculeis salino-acribus relictis & intine earum poris se infi-

nuantibus proficiscantur. Hinc etiam fit, ut non tam promte & facile, ob materiam vitiosam partibus altius impactam, hi affectus medicaminibus cedant.

§. XII.

Ex dictis itaque luculenter constare potest, *Causa proxima impediens circuitus.* impeditum sanguinis circulum & regressum per minima vasa, proximam & evidentem causam ad generationem ejusmodi rheumaticorum dolorum constituere: id quod clarius elucescere & demonstrari potest exinde, quod, ut ego ipse aliquoties observavi, à paulo strictiori ligatura, post sectam venam, ob inflictum paulo gravius vulnus in pedibus intra XXIV. horas relicta, dolor ipsos pedum & maxime pollicis articulos non secus ac in podagra fieri solet, per multos dies cum molestia durans invaserit. Idem non ita pridem continebat celebri medico, qui in ipsa sura certas forte ob causas venam pertundendam curavit, ubi fortiori ligatura ob profundior venæ situm opus fuit; sed factum exinde est, ut altero mane, atrox dolor cum tumore non modo suram, sed ipsos quoque pedum articulos infestaverit, cujus per interna & externa remedia discussionem, ne deterius succresceret malum, magna cura & sollicitudine moliri & procurare debuimus. Videmus etiam ex dictis, propinqua admodum cognatione rheumatismus cum morbo articulari conjunctum esse, huncque sæpius ita mentiri, ut à quibusdam arthritidis universalis & vagæ nomine insigniatur: nam & hæc quandoque repente in plures irruit articulos, & spinæ vertebrae & juncturas ossium gravibus excruciat doloribus. Neque ignotum in praxi est, quod rheumatismus fixus ac vagus in iis qui sæpius ac iterum eundem patiuntur, præfertim si aliunde debilitatem contraxerunt, in veram tandem arthritidem transformetur. Et quia hemicrania pleuritis & hepatitis spuria, de quibus supra actum, item odontalgia species rheumatismi sunt, certum ac nihil dubii est, quin etiam earum generatio sub iisdem causis atque eodem modo procedat.

§. XIII.

Ceterum illud crebra animadversione commentum est, nulli ætati, nulli sexui rheumatismus parcere: quos alioquin ab arthritide fere immunes HIPPOCRATES *Seet. VI. aphor. 29. & 30.* pronunciat. Maxime vero omnium videmus, eos, quibus in juventute hæmorrhagiæ narium frequentiores fuere & dein cessarunt, rheumaticis esse obnoxios doloribus: quod itidem ab Hippocrate lib. II. *prorhet.* notatum est, ubi nos docet, quod in his, quibus circa articulos tumores & dolores fiunt, viscera plerumque magna subsint, quibus in pueritia & juventute sanguis è naribus fluere desierit: ac proinde interrogandum esse admonet, de sanguinis eruptione, factane in juventute fuerit; item an pruriginosæ, veluti ab urtica puncturæ vel in pectore vel in dorso subsint, utpote quæ impuritatem feri abunde arguunt. Sed quod Hippocrates de hæmorrhagiis narium innuit, id intelligendum quoque esse arbitror de omnibus aliis sanguinis salutaribus excretionibus. Nihil enim magis in praxi occurrit, quam quod foeminae præfertim sanguineæ complexionis, post quinquagesimum annum prorsus cessante sanguinis fluxu, nisi tempestive venæ sectionibus occurratur, vagis & gravibus hinc inde in partes irruentibus dolorum

tor-

tormentis afficiantur. Neque amplius incognitum esse potest in arte exercitatis, hæmorrhoidalem fluxum consuetum, si debito modo & tempore procedit, à doloribus & rheumaticis & arthriticis viros immunes præstare posse; quibus sub ejusdem fluxus defectu vel suppressione tandem obnoxii fiunt. Neque tamen mihi ignota sunt exempla, ubi in debilitatis & cachecticis, præsentē hoc fluxu nec dolores arthritici nec nephritici desierint.

§. XIV.

*Qui ab his
afflictibus
liberi?*

*qui his ob-
noxii?*

Denique quod ad generationem horum dolorum pertinet, non prætermittendum esse arbitror, eos qui corpus valide movent & exercent, qui parcius vivunt, & aquam potant, liberos plane ab ejusmodi afflictionibus permanere; cum contra qui vitam agunt otiosam, vinis & spirituosus potibus & comeffationibus nimis delectantur ac Veneri intempestive & nondum matura ætate nimium dediti sunt, gravioribus rheumaticis & arthriticis doloribus crebrius exercentur.

§. XV.

*Causa ad
eos dispo-
nentes.*

Neque hoc loco omittendum est, quod ab aliis præcedentibus & diu inhærentibus morbis, febribus maxime intermittentibus, præsertim si male tractatæ fuerint, insignis ad hos affectus dispositio arceffatur. Ita BALLONIUS *lib. de rheumatism.* plurimos vidit, qui, quartana chronica laborantes, sub finem morbi, in graves artuum imo totius corporis dolores inciderunt. Novimus etiam doloribus ventris & colicis diu affligentibus artuum dolores vagos certis periodis infestantes satis acerbos successisse.

§. XVI.

*Rheuma-
tismus
scorbuticus.*

Datur etiam rheumatismus scorbuticus, in quo universa lymphæ & feri massa impuris excrementitiis salino-sulphureis acerbis particulis, quæ subinde per exanthemata, maculas & purpuram sese manifestant, infecta est, atque ex prava dura salsa diætâ, vita otiosa & sedentaria, familiari aëris gravidæ & vappidi usura, diuturnaque tristitia, originem suam ducit: & exinde incolis regionum maritimarum solennis, & frequentissimus esse solet.

§. XVII.

Venerius.

Gravior vero est rheumatismus venerius, qui horrendis dolorum tormentis, noctu præsertim intensioribus, certis nervosis partibus pertinaciter inhærescens, eos qui ex impuro coitu, virulento & putrido miasmate universam lymphæ & sanguinis massam contaminarunt, misere excruciat. Quæ omnes commemoratæ huc usque causæ eo collineare videntur, ut serum sanguinis adaugeant, intemperatum ac impurum reddant, robur ac vires partibus solidis subtrahant, excretionibus salutaribus imminuendo, ut postea ejusmodi feri stagnationes, fluxiones ac acerbæ & dolorificæ passionibus inde resultent.

§. XVIII.

*Solvuntur
hi morbi
per sudore-
m &c.*

Atqui ex hisce jam clarius patet ratio, quare hi affectus salutariter copiosis urinis & sponte sudoribus obortis, nec non hæmorrhagicis excretionibus solvantur, vel cur à variis cutis efflorescentiis multum levaminis ægrotantes accipiant? quorsum pertinet aphorismus Hippocratis LXXIV. Sect. IV. quibus spes est ad articulos

futurum abscessum, eos liberat urina multa, crassa & alba prodiens, qualis in laboriosis febribus quarto die quibusdam exire incipit. Si vero sanguis è naribus profluxerit, brevis admodum fit solutio. Per laboriosas vero febres nonnulli rectius rheumaticas intelligunt, quæ cum sensu doloris & lassitudinis in toto corpore accidunt. Annotatum quoque à nobis sæpius est, artuum dolores, ulceribus sponte subortis in pedibus, conquievissē, qui, postquam arte consolidata fuerunt, mox resuscitati sunt. Novimus pariter, immanes artuum dolores, oborta psoa vel scabie lepræ albæ naturam habente, penitus sublatis. Nam sicut metastasis materiæ vitiosæ à partibus interioribus ad exteriores saluberrima est, ita contra, quæ ab externis ad interiora & ipsa viscera vergit est perniciosissima.

§. XIX.

Affectus rheumatici, & incipientes podagrici quam diu in externis partibus versantur, neque perversa tractatione humor vitiosus introrsum ad nobiliores partes repellitur, omni vacant periculo, nec facile hominem è medio tollunt. Quemadmodum vero in primis annis, atque in adolescentia ejusmodi molestæ ac catarrhossæ fluxiones in capite, & rheumaticæ in partibus musculosis cum crebrioribus narium hæmorrhagiis insignem naturæ imbecillitatem sive tonum & robur solidorum dejectum designant: ita plures chronicas in juvenili & virili ætate, ratione causæ & genii cum hisce affectibus correspondentes ægritudines prælagiunt, præsertim quando ex parentibus morbosus & hypochondriacus prognati fuerunt.

*Aque-
rise tra-
ctantur,
periculo va-
cant.*

CURATIO.

§. I.

Ex hisce omnibus, quæ jam in medium à nobis prolata fuere, satis abundeque intelligi posse arbitror, totum curationis caput & methodum medendi rationalem in eo consistere, ut probe & pensiculate individui laborantis naturam, differentes causas: num incipiens sit, & à sanguinis copia & nimia mole, num à colluvie impuri feri provenierit, & jam malum radices egerit? consideremus, & secundum has circumstantias & differentias indicationes therapeuticas primum formemus, apta dein & convenientia remedia in usum proponamus.

*Indicatio-
nes ther-
apeutice.*

§. II.

Quandocunque igitur corpus evidenter est plethoricum, & rheumatismus universalis omnes propemodum corporis artus cum febriculosa quadam motione graviter impetit atque infestat, adeoque secundum veterum scholas sanguineus est, omnino in venæ sectione & quidem statim in principio administrata, celerrimum & præsentissimum est reponendum præsidium. Id quod jam olim medicorum peritiores agnoverunt: qua de re insignis locus extat apud ALEX. TRALLIANUM qui *libr. XI.* ita scribit: *si humorem, qui in articulos confluerit sanguineum esse suspicemur, ubi quidem nihil prohibet, vacuationem quæ per venæ sectionem adhibetur tentato: hac enim ratione multos novi aut in totum morbo liberatos aut raro fluxionibus correptos; eo, quod non neglexerint, sed veris statim initio sanguinem sibi detrakti curarint, non solum vacuandi,*

*Venæ sectio
statim in
principio
celebranda.*

cuandi, sed etiam præservationis causa id facientes. Id quod etiam nos confirmamus: nam plures novimus, sanguine ac succis plenos, qui à causa externa transpirationem universalem sufflaminante in immanes totius corporis dolores cum stupore & immobilitate partium repente coniecti, unice fere matura sanguinis missione eaque intrepide & tuto, urgente necessitate, circa quartum diem repetita prorsus convaluerunt. Novimus etiam homines sanguineo-cholericæ vel melancholicæ constitutionis, consistentis ætatis, in dolores chiragricos & podagricos mitioris naturæ prolapsos, venæ sectione circa æquinoctia, vel interdum etiam circa solstitium æstivum admissa, ab iisdem & præservatos & immunes redditos fuisse.

§. III.

Et quia rheumatismus sanguineus in nulla regione familiarior ac in Gallia est, ob sanguineam incolarum complexionem & victum copiosum sanguinem ingenerantem; non mirum est, præstantissimos Galliæ medicos, qui primum & optime de rheumatismo quicquam solidi & effato dignum literis prodiderunt, hoc remedii genus maximopere æstimare ac collaudare. Ita BALLONIUS *libr. de rheumatism.* inquit: *laudamus impendio phlebotomiam in hoc morbo, quam salutare remedium esse testamur.* Pariter ac CAROL. PISO *l. c.* plurimum momenti tam in curatione, quam in præservatione rheumatismi, in repetita sanguinis missione situm esse affirmat, multaue notatu perquam digna in eam rem exempla subjungit. RIVERIUS *Cent. III. obs. 42.* & *Cent. IV. obs. 42.* septem vicibus in juvene, atque in alio totidem instituta venæ sectione, adhibitis paucis aliis remediis, contumacem rheumatismum feliciter abactum observavit. Maxime omnium vero spectandus LEONH. BOTALLUS primus ille venæ sectionis in Gallia auctor, qui *libr. de curat. per sanguin. mission. cap. XII.* pluribus & rationibus & exemplis confirmat, quantum utilitatis & levaminis præsentissimi in doloribus rheumaticis etiam repetita venæ sectio attulerit. Ex Anglis SIDENHAMUS *in Oper. p. 170.* curationem non aliunde ac à phlebotomia petendam esse asseverat, eamque aliquot dierum spatio repetendam. Lectu quoque dignissima est observatio, quæ in M. N. C. *Dec. II. an. IX. obs. 120. p. 290.* extat, de rheumatismo universali, sola venæ sectione reiterata felicissime & brevi tempore curata. Multo vero magis hoc auxilij genere opus erit tam ad sanandum, quam ad avertendum hoc malum in foeminis mensium defectu vel plenaria emansione laborantibus, vel in viris quando consueta hæmorrhoidum fluxio fuerit suppressa.

§. IV.

Præter sanguinis missionem in affectione rheumatica & arthritica calida incipiente & cum febrili æstuatione juncta, temperatiora diaphoretica cum nitrosis moderate mixta, mediocri sed sæpius repetita & continuata per tempus dosi oblata, ad æstum, fervorem & orgasmum sanguinis temperandum, atque etiam ad humoris vitiosi lenem & successivam discussionem æqualiter per universum corpus promovendam, præsentissimum levamen conferre & ratione & experientia suffulti asseveramus: quo in genere ceteris omnibus palmam præripiunt, pulveres ex lapidibus cancrorum, unicornu fossili, cornu cervi sine igne.

Frid. Hoffmanni Oper. Tom. II.

ne vel usto, antimonio diaphoretico vel ejus cerussa, succino, conchis præparatis, cinnabari, adjecta sufficiente quantitate nitri purificati vel melius artificialis confecti, qui cum aquis diapnoicis & leni anodyna virtute conspicuis, ut sunt aquæ florum sambuci, acaciæ, ulmarie, tiliæ, ceraforum nigrorum, cardui benedicti, mariæ, scabiosæ, propinandi sunt: neque inutile, sed valde commodum erit, ad febriles volaticos æstus melius compescendos, succi citri quippiam, vel ad gratiam syrupum acetositis citri in convenienti quantitate adjicere & hæc singula in mixturam redigere. Pro potu ordinario serum lactis cum succo citri vel cremore tartari acidulatum, aut tamarindinatum, vel aquam decoctam cum rasura cornu cervi, radice scorzonæræ, cichorei, glycyrrhizæ, graminis, semine fœniculi, commendamus.

§. V.

Quandocunque vero rheumaticæ ejusmodi afflictiones non tam sanguinis puri & consistentis copiam, sed serosi impuri plenitudinem & colluviem, in corporibus præsertim debilioribus serosæ & phlegmaticæ constitutionis pro causa agnoscunt, tunc omnino cautissime, præsertim in ipsa curatione cum sanguinis missionibus agendum est. Recte hinc GALENUS *libr. VI. aphor. 47.* scribit: *illis, qui plenitudinis passionibus subjiciuntur, per venæ sectionem succurrendum esse, qui vero corruptos succos in corpore foveant purgationem exhibendam,* seque hac ratione non modo plurimos servasse sanos qui longo ante tempore singulis annis morbis caperentur, sed & podagram & morbum articulare adhuc incipientem ex tali evacuatione multis jam annis fieri prohibuisse. Qui vero jam sæpius cum hisce fluxionibus conflictati sunt, plus noxæ quam auxilii ex sanguinis detractione sunt consecuti, præsertim, si corpore sint imbecillo & frigido ac in ætate senili constituti.

§. VI.

Ex quibus jam liquido constare potest, quod veterum medicorum peritiores, differentiam dolorum maxime arthriticorum secundum causas in curando probe observandam esse animadvertierint. Nam alia ratio est curandi rheumatismum vel etiam arthritidem incipientem eumque universalem in corpore plethorico, qui à sanguinis præternaturali redundantia ob transpirationem interceptam proficiscitur; alia medendi ratio est, ubi atrox dolor certæ tantummodo parti pertinaciter inhærescit, cum ingenti frigoris sensu stipatus & à vehementia hujus imprudenter admissi in corporibus serosioribus excitatus: alia medendi via ineunda, quando status plethoricus longiori sub morbi decursu vel improvida medicatione in statum cachecticum vel cacochymicum degeneravit, & parum sanguinis boni & consistentis, permultum vero liquaminis serosi & excrementitii in vasis continetur: quibus in casibus ea, quam maxime remediorum genera indicantur, quæ feri vitiosi illuviem blande sed sufficienter tamen per congrua emunctoria, per alvum videlicet, per subcutaneum cribrum & per urinas evehunt.

§. VII.

Quod ad usum evacuantium attinet, nullo modo hic vi agendum, sed paulatim & successively biliosæ & viscidæ serosæ sordes per mitiora & temperatiora medicamina educendæ. Cui scopo

E e

obti-

Quando cum venæ sectione caute merendum?

Cura pro differentia causarum instituenda.

Biliosæ sordes per blanda laxantia educendæ.

Hinc in Gallia etiam valde æstimatur.

Pulveres dein diaphoretici cum aquis diapnoicis propinandi.

obtinendo, ex nostra quidem experientia, egregie satisfaciunt, infusa ex aqua dimidia vini parte remixta, cum radice cichorii, pimpinellæ, polypodii, rhabarbaro, foliis fennæ sine stipitibus, herba cardui benedicti, summitatibus centaurii minoris, agarico, corticibus aurantium, citri, cortice ligni assafras, passulis minoribus & tartaro tartarifato leniter decoquenda. Utile quoque est rhabarbarum mansum ad scrupulos duos vel drachmam cum uvis pinguibus vel Corinthiacis: nam nostra certe experientia rhabarbarum in substantia sumtum abundantius multo & duplo plus quam si in decocto & infuso detur, educit, quippe simul tonum intestinorum & viscerum insigniter roborat. Bis autem minimum vel ter in hebdomade ejusmodi evacuans exhibere convenit, ut sordes ex primis viis à prava digestionem relictæ evocentur, quæ alias ad morbum fovendum & sustinendum, ejusque vim augendam permultum conferunt. Atqui hujus generis alterantibus & evacuantibus, in doloribus periodice, sive certis horis irruere atque infestare solitis, nunquam carere nos posse multoties edoctus sum.

§. VIII.

2] Vitisum
serum per
mitiora
diaphoretica
evocandum.

Primis viis sic probe evacuatis, vitiosi feri molem, per decocta liberiores transpirationem quæ expediunt & leniter sudorem movent, educere & utilissimum & necessarium est: qualia ex radicibus & lignis, ut radice chinæ, sarsaparillæ, cichorei, glycyrrhizæ, scorzonæ, ligno & cortice assafras, ligno santali citrino, guajaci, ficubus & passulis minoribus parari possunt. Si malum quodammodo radices egerit & inveteraverit, antimonium crudum cum dupla portione pulveris bezoardici & diaphoretici supra descripti, convenienti dosi & tempore exhibitum opem non spernendam præstitisse à me pluries observatum est. Ceterum liquor qui diuretica diaphoretica & simul tonica efficacia insigniter sese commendat, ex tinctura tartari, antimonii acris, cum liquore anodyno minerali & spiritu tartari decenti proportionem permixto componendus, accommodatissimum remedium est, & præsentissimo cum fructu usurpatur.

§. IX.

Rheuma-
ismus cor-
pus scorbu-
ticum infe-
stans, dilu-
entibus &
demulcen-
tibus abi-
gendus.

Quandocunque rheumatismus sive fixus sive vagus scorbutico corpori insidet, & evidentibus se signis ac symptomatibus prodit, curationi paulo longius insisterendum erit. Neque enim tam prompte & facile tota lymphæ & feri massa intemperata, corrupta & salinis excrementitiis partibus deturpata, in nativam & pristinam dulcedinem & consistentiam reduci poterit. Conveniunt tunc maxime diluentia demulcentia, paulo majori copia & longiori tempore exhibita: inter quæ, serum lactis dulce mannatum, vel acidulum tamarindinatum, aut purum cum succis herbarum antiscorbuticarum permixtum, item aquæ minerales temperiores: *Selteranæ*, *Wildungen-ses*, *Tœnnsteinenses*, vel in robustioribus, *Pyr-montanæ*, *Egranæ* cum dimidia lactis asinini vel vaccini parte maritata, & sub convenienti diætetico regimine usurpata, omne fere curationis exoptatæ punctum complent.

§. X.

Si ex lue
Gallica
provenit,
do. esse

Si rheumatismus ex luis venereæ reliquiis in sanguinis massa contentis, ut non raro evenit, originem suam ducit, duriori cuneo opus est,

utpote, nisi decocta lignorum sudorifera, per antimonii crudi vel etiam mercurii dulcis additionem armata & nobilitata, prudentem in usum vocentur, raro speratus & salutaris effectus obtinetur.

§. XI.

Quod attinet ad ipsa topica, quæ ad humoris certam partem obsidentis placidam & successivam discussionem quidpiam conferre valent, magna etiam cautione in iis eligendis & exhibendis opus est, ne plus detrimenti quam emolumenti afferant. Si rheumatismus est sanguineus, præstat penitus ab iis abstinere, & tantum moderato & æquali lecti & tegumentorum calore partes dolore affectæ fovendæ sunt: siquidem tali modo longe felicius blanda materiæ quæ in vitio est diffusio & exhalatio promovetur, ac si variis externis eam adjuvare velimus. Si vero spissus, immobilis & frigidus humor paulo altius & pertinacius, cum frigoris sensu ac strictura pororum, partibus insidet; tunc omnino frictiones cum pannis asperis & calidis institutæ, è sedibus suis fixis humorem tenacem potentissime evocant. Post frictiones cucurbitulæ cum vel sine scarificatione applicandæ; ubi tamen animadverti illud debet, quod cucurbitæ cum scarificatione dolentibus ejusmodi partibus appositæ, cum profundiori etiam vulnusculem inflectione, parum admodum sanguinis eliciant: luculento satis documento, vasorum sanguineorum ramulos à spastica strictura ita coarctatos & compressos esse, ut sanguinis circularem motum respuant; atque adeo non tam à sanguine nimium ibi congesto, quam ab humore viscido & acri stagnante, hos dolorum faces accendi veri sit simillimum.

§. XII.

Ubi igitur altius insidet humor & immanes artubus dolores inducit, tunc omnino externis præstidiis ex toto carere vix possumus. Licet vero plura hunc in finem magnis ab auctoribus hinc inde celebrari soleant laudibus: ego tamen in nullo majorem juvandi efficaciam deprehendi ac in nostræ inventionis nervino linimento, sequenti modo conficiendo: rec. aquæ Anhaltinæ uncias duas, balsami Peruviani drachmas duas, theriacæ veteris drachmam. Infunde & per digestionem extrahe: colaturæ adde essentiæ croci, castorei, nucistæ ana drachmas duas, camphoræ drachmam. M. f. linimentum, quo dolentes artus sæpius inungi debent. Si vero à diutius partem affigente dolore rigiditas, immobilitas cum stupore remanet, quæ affectio paresis nomine venit, linimentum quod habet axungiam humanam, cujus duæ unciae cum balsami Peruviani & olei caryophyllorum drachmis duabus permisceantur, mirabilem plane præstitisse efficaciam, per crebriorem usum à nobis animadversum est.

§. XIII.

Balneorum quoque tam naturalium quam artificialium caute administratorum usus est insignissimus. At vero neutiquam in principio aut in statu morbi, sed in declinatione potius, tum ad reliquias morbi ex intimis sedibus suæ penetralibus moderato sudore eliciendas, tum ad membra per spasticas dolorificas tractiones & agitationes imbecillia reddita roboranda & rigida emollienda, usurpari debent. Inter alia vero balneum ex fonte *Lauchstadiensi* in Misnia, qui tenerimum Martis crocum alit, atque natura admodum sub-

*lign. c. an-
tim. cr. vel
mercur.
dulc. pro-
sunt.*

*Topicorum
usus sit
cautus.*

*Quando
omitten-
dus?*

*Quando
admitten-
dus?*

*Quando
optime præ-
sit?*

*Balnea in
declinatio-
ne morbi
conferunt.*

subtilis ac levis est, paratum, innumeris exemplis hoc fine & scopo adhibitum, opem desideratissimam tulisse ego religiose possum asseverare: quæ de re dissertationem nostram de hoc fonte germanico & latino idiomate conscriptam ad legendum atque conferendum commendo.

CAUTIONES ET OBSERVATIONES CLINICÆ.

§. I.

Quantumvis sanguinis missio etiam paulo largior, in externarum partium doloribus, qui à sanguinis spissioris abundantia & salutaribus excretionibus impeditis proficiscuntur, maxime quando in principio administratur, divinum plane sit remedium: sed tamen, si dolor diutius perseverans, digestionem atque laudabilem chylicationem ipsasque vires destruxerit, ut serosa magis quam sanguinea plenitudo corpori sit infensa, ipsumque corpus annis jam confectum fuerit, provide certe cum ea mercandum est. Idem tenendum est, quando ipso in paroxysmo cum febrili commotione affligente, metastases materiæ vitiosæ ad externos artus natura molitur; quo tempore, non aliter ac in erysipellate, negotium naturæ salutare turbare & subvertere minime convenit.

§. II.

Non semel ego sed aliquoties observavi, venæ sectionem rite ante æquinoctia institutam corpora strictioris habitus, sanguineo-melancholici & sanguineo-cholerici temperamenti à catarrhalibus defluxionibus, item rheumaticis & arthriticis passionibus, quibus crebro obnoxia fuerunt, egregie præservasse, adeo, ut ad avertendos hoste affectus, præsertim si sufficiens corporis motio ac labor, abstinencia à potibus spirituosus, à diætâ lauta & carnea, accesserit, non facile excellentius detur remedium.

§. III.

Diætâ & cura lactea, utut in doloribus artuum vagis & ubi acrimonia subtilis & biliosa peccat, suo quidem usu & fructu non destituatur: nihilo minus tamen, ubi vasorum, vel à sanguine consistente, vel à nimis seroso adest plenitudo, & ventriculus cum intestinorum tractu atonia laborant, ne inde viscerum infarctus emergat & ad cachexiam via pandatur, abstinere ab ea cautius erit.

§. IV.

Quando sufflaminatus hæmorrhoidum fluxus ejusmodi dolorum causam præbet, consultissimum est opportune eum procurare. Cavendum tunc, ne venæ sectio in partibus superioribus instituat, quam in pedibus celebrare expedit. Postea vero, quæ moderate hunc fluxum movere & ciere valent, ad quorum classem referendæ pilulæ Avicennæ, Becherianæ, nostræ & his similes, interpositis pulveribus temperantibus & nitrosis, qui æstum internum ad suppressendum fluxum multum conferentem infringunt, subjungenda sunt; quæ si non proficiunt, & tormina ac vomitiones dolorum externorum comites evadunt, ad applicationem hirudinum, mirabilis nonnunquam efficaciarum remedium, omnino confugiendum erit.

Frid. Hoffmanni Oper. Tom. II.

§. V.

Caveant sibi porro studiosissime omnes qui catarrhosis rheumaticis & arthriticis passionibus tentari & affligi solent, & quorum natura ad motiones spasticas, pariter ac sanguinis & humorum congestiones parata & disposita est, ab omnibus fortioribus, calidioribus, diureticis, sudoriferis, acrioribusque purgantibus, nec non ab omnibus spirituosus balsamicis sic dictis quæ sanguinem in orgasmum concitant medicamentis, item à potibus spirituosus & generosis, post quorum usum urina valde tincta & rubra apparet: caveant quoque sibi, quantum fieri potest, à potu cerevisiæ, nisi ea sit medicinalis, qualis est quæ non caput gravat, bene per urinam secedit & digestionem adjuvat: sed pro potu vel puram aquam fontanam vel mineralem temperatam, aut decoctum gratum nullum pariens fastidium sibi eligant. Idque eo majori sedulitate iis observandum commendamus, qui purpuram scorbuticam nostri ævi quasi endemium & familiarissimum morbum, vitalibus succis immixtam & immerfam foveant atque recondunt.

§. VI.

Quando dolor & atrox & pertinax inferiores corporis partes ut ossa ischii & coccygis diutius obsidet, & individua ægotantia paulo sunt robustioris ac firmioris texturæ, medicamina potentioris efficaciarum & virtutis chymica, ut mercurius dulcis, præcipitatus solaris bene præparatus, regulus antimonii medicinalis, quæ etiam decoctis sudoriferis addi possunt, ad crassum & lentum tartareum & vellicantem humorem è sedibus suis intimis dimovendum, auxilium utique pollicentur spectatissimum.

§. VII.

Quando dolores immaniter urgent, quod in sensibilibus fieri solet, ita ut vires, appetentiam, omnemque somnum adimant, & neque sanguinis detractiones, neque nitrosa & temperantia, neque liquor noster anodynus iis mitigandis sufficiant, non inconsultum est, à lenioribus, videlicet emulsione seminis papaveris albi & ejus syrupo, ad fortiora paulo anodyna transire, atque ad massam pilular. *Wildegansii*, vel pilulas *Starckii* aut de styrace, imo ad unum vel alterum laudani opiatum granum, addendo croci extracti pauxillum confugere: cum alias opiata non temere in ejusmodi affectibus usurpanda sint, utpote quæ, ut crebrius observatum, tam contumaces ejusmodi affectus reddunt, ut postea omnia alia remedia etiam efficacissima spernant, efferatiusque inhærendo & medicis & ægotantibus plurimum negotii facestant.

§. VIII.

In rheumatismo scapularum incipiente, nihil est præstantius vesicatorio intra scapulas posito. Si vero in plethoricis accidit, quod sæpius observavi in foeminis post cessantem circa annum quinquagesimum mensium fluxum, cucurbitulæ cum scarificatione partibus inferioribus singulis mensibus appositæ, juvamentum attulerunt insignissimum.

§. IX.

Quemadmodum illa corpora, quæ ad anomalias solidorum & fluidorum motiones, & ad horum translationes sive congestiones à natura disposita

Calidiora
& spiri-
tuosa su-
gienda.

Quando
activiora
chymica us-
urpanda.

Quando
anodyna.

Vesicatoria
& cucurbi-
ta quando
usurpan-
da.

Animus ab
omnibus
affectibus
liber sit.

Circa venæ
sectionem
cautela.

Præserva-
tive cele-
branda.

Cura lactea
quando no-
ceat?

Si à sup-
pressis hæ-
morrhoidi-
bus, hæ-
promoven-
de.

posita sunt, & vulgo sensibilibus indolis vocantur, mobilissimi sunt animi & ab ejus affectibus, qui præcipuam hisce morbis causam ac fundamentum subministrant, facillime offenduntur: ita servata animi quies & tranquillitas, sufficiens etiam corporis motus, & abstinentia ab iis rebus quæ multis modis animum turbare atque dispo- nere ad affectus possunt, in iis morbis commen- datissima esse debet.

ENARRATIONES MORBORUM.

C A S U S I.

*Affectio
rheumatica
calculosa in
fœmina
plethorica.*

Fœmina quinquaginta & aliquot annorum, post plenariam mensium cessationem, ante bien- nium per uterum æque ac per alvum enormes quandoque sanguinis experta est profusiones: qui- bus medicus satis opportune venarum sectione & medicamentis orgasmum sanguinis temperanti- bus antispasmodicis leniterque diaphoreticis sub- venit, infusum insuper ex millefolii comis, quæ herba maxime sanguinis nimis effusionibus com- pescendis dicata, subjungens. Quibus adhibitis, sa- tis diu hæmorrhagiæ tam uterinæ quam alvinæ disparuerunt: procedente vero tempore dolores valde gravativos circa regionem lumbarem & pungentes tractorios circa ossa coxendicis ægra experiebatur. Ad hos mitigandos, licet præter venæ incisionem & leniter laxantia, temperata diaphoretica & nitrosa usurpata fuerint, nullum tamen levamentum attulerunt; sed perstiterunt dolores, fixum quasi locum occupassent. Postea mox ad scapulas & pectus, mox ad genua, relicta priori lumbari & ossis ischii sede vagabantur; quam tamen expirante superiorum partium cru- ciatu denuo repetebant. Calculorum quoque in- terdum excretiones cum urina non sine molestia successerunt, calculosis & rheumaticis doloribus crebrius alternantibus: qui tamen acerbiores sem- per ab animi affectibus & tempestatum varietate redditi, ægram ita excruciarunt, ut cum viribus penitus omnibus caro quoque consumeretur, præ- sertim quum jam per annum & ultra cum hisce malis conflictari debuerit. Notabile vero quam maxime id fuit, quod, quum ægra ad constantem & graviolem dolorem, qui lumbarem & ischia- dicam regionem indefinenter infestabat, aliquo modo leniendum, situm dorsi curvum sibi sele- gisset, inferiorum dorsi vertebrarum ligamenta adeo fuerint relaxata, ut è situ suo quodammo- do protrusæ prominuerint, & sine dolore erecta incedere vix potuerit. Interea ad dolores tam rheumaticos quam nephriticos sedandos, & san- guinis missiones & anodyna cum diaphoreticis mixta, & antinephritica temperatoria, aut singula irritò plane effectu, præscripta fuerunt. Petiit er- go à me salutare quoddam, adversus pertinacem hunc duplicatum affectum, consilium.

RESOLUTIO CUM CONSILIO.

Ex hac morbi descripti historia, plura notatu digna ad usum tam pathologicum, quam thera- peuticum accommodanda elici possunt. Primo qui- dem, quod mensium totalem suppressionem, quæ ordinario circa quinquagesimum annum contin- git, in fœminis plethoricis vitæ sedentariæ addi- ctis & quæ sensibilibus animi atque tenerioris etiam corporis sunt texturæ, graves sæpius hæ- morrhagiæ per uterum vel etiam per venas hæ- morrhoidales sequantur: ubi summa cura atque

cautione in applicatione remediorum opus est, ne forte adhibitis fortioribus stypticis & opiatīs pla- ne sistantur, neque etiam modum excedant & sic corpus valde debilitantes aliis ex debilitate oriun- dis morbis ansam porrigant. Secundo, in nostra ægrotante, effusiones sanguinis per hæmorrhoi- des, quæ haud infeliciter sæpius mensibus defi- cientibus succedunt, humorum stagnationes in aliis locis & quidem maxime circa regionem lum- barem & ischiadicam, cum per vicinas alvi ve- nas vitatus fuerit exitus, exceperunt. Ab ejus- modi vero sanguinis & humorum stagnatione cir- ca majora vasa, & progressu in circulum eunte impedito, feri fit secessio, quod tartareis salibus & rudioribus terreis particulis onustum in tubu- losa renum substantia facile concrevit in calcu- lum, atque etiam ad ligamenta tendinosa & glandulosa quæ ossa coxendicis cingunt atque ligant, delatum, graves atque diuturnos cum impoten- tia motus efficit dolores. Eadem quoque feri à sanguine in inferiori corporis regione stagnante copiosior secessio, luxationis vertebrarum lum- barium omni procul dubio fuit causa; ad quam plurimum utique situs incurvatus, qui doloribus in hisce partibus leniendis quodammodo inservit, contulit: laxatis enim à feri exundantia ligamen- tis, facilis est ossium è sede sua protrusio. Ter- tio attendi etiam in nostro casu meretur, con- versio motuum sanguinis & dolorum è regione lumbari & ischiadica ad partes superiores scapu- lam, pectus, manus, quandoque etiam genua, quæ ut plurimum aëris & cœli intemperiem & variationem vel gravem animi affectum iram præsertim & terrorem pro causa agnoscit: quo- rum utique ea est natura, ut partibus præcipue membranaceis firmiter constrictis motum humo- rum invertant & ad alia loca transponant. Me- thodum autem huic malo medendi quod attinet, eam ita instruendam esse arbitrati sumus. Primo omnium sanguinis missionem instituendam cura- vimus: quippe hæc dolores semper leviores efficit ac priora mala ex sanguinis congestione in affe- ctibus spasmodicis ad nobiliores partes prodeuntia impedit. Dein infusum Theiforme ex chamomil- læ vulgaris floribus, summitatibus millefolii & semine fœniculi compositum, somno peracto satis larga copia mane in lecto hauriendum præscripsi: cujus utique virtus in omnibus affectibus chronicis & spasticis, non satis deprædicanda, eo quod hu- moribus fluxilitatem fœnerando & acrimoniam hostilem, quæ spasmodorum genitrix est, temperan- do, liberiolem sanguinis cursum & ab eo depen- dentes utilissimas sordium excretiones egregie promovet. Tum pro potu ordinario, ob eandem fere efficaciam, decoctum ex radice scorzonæræ, chinæ, sarsaparillæ & rasura ligni sassafras, atque abstinentiam ab omni cerevisia vel aliorum potu- lentorum genere, quæ sanis & integris quidem corporibus non adeo facile nocent, aut valetudina- riis & imbecillis nunquam proficua observantur, impense commendavi. Demum, pulveres leniter diaphoreticos absorbentes & qui spasms resistunt, humorumque acrimoniam temperandæ idonei sunt, quorum censum subeunt, qui ex cerussa antimonii sive materia perlata *Crugneri*, lapidibus cancro- rum, cinnabari, adjectis, nitro, pauxillo extracti castorei, vel etiam, nisi alvus obstricta obstet, the- riaca cœlestis aut sulphuris nostri antim. fixati, con- ficiuntur præscripsi: qui vel sub lecti introitum vel etiam mane, adhibito regimine blande diaphoreti- co, ex aquis antispasmodicis v. g. florum acaciæ, tilia, primula veris, cerasorum nigrorum porrigi pos-

possunt. Injunxi denique hæc medicamina non per saltum, sed per gradus & procedente tempore virtutem suam exserere; quare usum eorum diutius protrahendum esse edixi. Et quoniam alvinæ excretionis semper habenda ratio, clysteribus pariter ac alimentis lenientibus ex passulis & pomis Porstorffianis eam expedire convenit. Subluxationi unguento ex axungia humana & oleo lavendulæ occurrendum esse statui. Hoc itaque consilio quum per hebdomadam aliquot spatium ægrota uteretur, & aquas *Selteranas* postea quoque usurparet, adspirante Divino favore, cum sanitate in gratiam rediit.

C A S U S II.

Rheumatismus aurium, ex suppressa per frigus coryza.

Insignis hujus urbis artifex, in re pictoria clarus XXXIX. annorum, vitæ sedentariæ valde addictus & Veneri plus justo deditus, ante biennium die sereno mensis Septembris iter facit Lipsiam, quum caput coryza tentaretur. Nocturnum somnum capiebat, ex improvise aperta fenestra, frigidior ventus dextrum capitis latus non satis tectum impetit: postero die circa aurem ejusdem lateris perlenitit dolorem valde acutum & æstuantem, ita ut quasi ignitus clavus aurem transfodere videretur. Is porro ex aure dextra ad sinistram etiam se protendebat, & plenarium non modo auditus, sed etiam gustus & odoris sensum adimebat; quo acerbò dolore accedente per duas & ultra septimanas ita excruciatu fuit, ut ob assiduas vigilias in lecto decumbens insaniam propemodum correptus fuerit. Accersitus medicus in chirurgica arte exercitatissimus, causam insolentioris hujus affectus, abscessum intra cranium & cutem, vel intra cranium & cerebrum reputans, trepanationem proponebat, quam patiens autem respuebat. Ex nostro igitur consilio abrasum fuit totius capitis capillitium & applicatum emplastrum leniter diaphoreticum & vesicatorium cum refracta cantharidum admixtarum dosi. Quo effectum est, ut ex aure dextra, ichorosa multa sensim paulatimque effluerit materia, per aliquot dierum intervalla persistens. Unde in hac aure auditus quidem restitutus est, quod postea etiam in sinistra contigit; nihilo minus tamen observabat, quod intra hoc tempus dolor ad dextrum humerum, ex eo in ejusdem lateris regionem ischii, postea in ipsum genu & tandem in pollicem pedis descenderit, ut sine baculo vix incedere potuerit; licet nunquam antea podagra fuerit vexatus. Nihil autem amplius ex medicamentorum classe ei, præter infusum theiforme ex speciebus lenem diaphoresin promoventibus, nec non pulveres diaphoreticos cum paxillo nistri & cinnabari nobilitatos, præscripsimus: quibus per Dei gratiam intra dies octo perfectæ sanitati fuit redditus.

Epicrisis.

Peculiarem fluxionum dolorificarum sive rheumatum speciem prædictus casus exhibet, atque clarius commonstrat, quomodo humor serosus in capite, ex coryza, ob accessum inclementioris & penetrantioris frigidaæ auræ, spissior, immobilisque redditus & extra vasa constitutus, hostili subtilique per moram acrimonia imbutus, ex partibus superioribus successive ad inferiores ejusdem lateris per porosam membranarum nervosarum musculis communium substantiam descendere, in articulatione partium ad tempus decum-

Frid. Hoffmanni Oper. Tom. II.

bere, graviter affligere & ad extremos usque perdes iter & progressum suum absolvere possit. Et quoniam tale quid à medicis etiam antiquissimis observatum fuit, non mirandum est, eos credidisse quod omnes defluxiones serosæ ex capite tanquam fonte proveniant originemque suam trahant, & inde in subjacentes partes deriventur. Commode etiam hic casus ad rheumatismum aurium sive otalgiam referri potest, qui ut sæpius observavi, abscessu salutariter solvitur. Demum, emplastri diaphoretico-vesicatorii operatio animadversionem quandam meretur, quod videlicet hujus efficacia morbidus humor fixiorem sedem occupans, è loco suo in alium demigrare debuerit: id quod facilius in capite quam in aliis partibus musculosis & pinguibus, ad quas vix ac ne vix quidem ejus energia pertingere potest, si ejusmodi dolorificis fluxionibus affliguntur, effici & præstari potest.

C A S U S III.

Judæus habitus corporis spongiosi in quadragesimo ætatis anno constitutus, temperamentum sanguinei, affectibus animi parum deditus, temperate semper vixit & binis annuatim vicibus circa æquinoctia sanguinem è brachii vena detrahi curavit. Sex jam præterlapsi erant anni, quibus vere semper & autumnopodagra laborabat, quæ pedum pollices dolore, ardore & intumescencia exagitans, vix ultra decem dies duravit, & nullis in usum vocatis medicaminibus, sponte evanuit. Ab hæmorrhoidali fluxu plane fuit immunis. Mense Augusto, alvi fluxu maxima ex parte cruento cum doloribus lancinatoriis circa hypochondria subito corripitur. Adjungebatur tenebimus, ut æger vicies fellam petere debuerit, sæpius non nisi mucos albo deposito. Decem hic fluxus dies continuavit, sub quibus sinceri quidam sanguinis circiter mensuram dejecit. Licet vero valde debilitatus fuerit, vires tamen non ita multo post recuperavit. Ceterum dolor podagricus in principio Septembris invadere solitus jam penitus siluit: acutus vero dolorificus sensus oculos ita afflixit, ut lacrymas stillare debuerint. Hic quidem intra aliquot dies cessavit, sed ad dextrum ossis ischii latus delatus ad os quoque sacrum & coccygis protensus fuit: qui per mensis fere spatium durans, circa proximum æquinoctium ita invaluit, ut tolerari prorsus, noctu præsertim, nequiverit, atque omnem somnum ademerit. Accessit vero hujus doloris vehementia per paroxysmos, & quidem circa horam tertiam pomeridianam cum frigore, subsequente postea pulsu celeri & æstu corporis. In principio hujus affectus ante V. hebdomades venæ instituta fuit sectio, sanguinis valde crassi & nigri sex uncias emissis: sed in cassum. Accersor in consilium: ubi ægrum vehementi dolore & languore excruciatum inveniri, utpote qui nihil ex alimentis expetiit, nec dormire potuit, de nocturno æstu conquerens. Porrexi itaque pulverem præcipitantem nitrosam una cum liquore anodyno minerali: & inde altero die meliuscule se habere coepit, mitigata doloris quodammodo sævitia. Febricula tamen rursum accessit circa tempus consuetum. Sequenti mane quum pulsus validius adhuc micaret, venam pertundi jubeo: quæ secta in pede fuit. Et quoniam sanguis cum impetu profusiliret, decem minimum uncia cum virium constantia emissæ fuerunt. Hac autem evacuatione id consecuti sumus, ut simul & semel omnis dolor ex ossis sa-

Rheumatismus ossis ischii sacri & coccygis venæ sectione iterata curatus.

cro & ischii qui etiam ad genua sese extendebat, evanuerit; quin imo æstu febrili penitus cessante, nocte insequente placida quiete gavisus est; & abhinc vires amissas rursus colligere cepit.

Epicrisis.

Plura notatu digna porismata practica præfato ex casu eruere non sine fructu possumus. Primo videlicet, quod fluxus qui à medicis habitus est dysentericus, hæmorrhoidalis potius censendus sit: in dysenteria enim non sic simul & semel feri & sanguinis copia deponitur, neque etiam sine acerbissimo dolore & torminibus abdominis, quibus patiens noster caruit, id contingit, sed dolor magis hypochondriacam regionem feriit, intra quam, ut notum est ex anatomicis, intestinum colon situm obtinet: atque hoc per spasmus affecto, sanguinis liber per vasa ejus sanguifera circuitus impeditus, & hinc per minima vasorum hæmorrhoidalium oscula in anum effusus est. Dein etiam notandum est, dysenteriam non adeo cito evanescere, quæ nunquam sine febre affligit: tenesmus vero, ut ego non semel observavi, non modo dysentericos, sed hæmorrhoidibus cœcis quoque laborantes vexare solet. Interea animadversione dignum est, ægrum, qui nunquam alias fluxus hæmorrhoidalis vestigia expertus est, jam modo insigni cum impetu & quidem satis largiter eum passum fuisse. Quod autem quieverit inde dolor consuetus podagricus, id sine dubio ob naturæ imminutum robur factum fuisse judico, utpote sub quo serum vitiosum ad partes externas cum energia protrudi non potuit. Relicta interim arthritica materia primo oculos invasit, & dein ad ligamenta & membranas ossis ischii, coccygis & sacri delata est. Ibi vero propter vehementes spasmos liberiores sanguinis circuitum ac progressum quum impediverit, ingens ejus circa has partes stagnatio hoc modo inducta fuit. Quapropter non sine sufficienti ratione, largiorem venæ sectionem in pede instituendam suasi, videlicet ad stagnantem sanguinem à loco affecto derivandum & ejus circulum æquabilem restituendum. Id quod etiam felicissime successit.

C A S U S IV.

Rheumatismus ex hæmorrhoidibus superpressis, Carolinis & Tæplicesibus depulsus.

Vir generosus gracilioris & sanguineæ constitutionis annum ducens trigessimum, aliquot ante lustra, gravativum circa os sacrum persentiebat dolorem, qui vero mox sanguinis ex venis sedis profluxu sedatus fuit. Intra anni spatium, sanguinea hac excretionem propter crebras animi valde exagitandi occasiones cohibita, & neglecto omni remediorum usu, atrox dolor junctus simul cum tussi valida brachium sinistrum tam molesto cum sensu lancinabat, quasi acutis cultris caro discinderetur. Exactis aliquot mensibus dextro quoque brachio eundem doloris insultum & impetum experiebatur, citra omnem salutiferum tot adhibitorum remediorum, venæ sectionis, purgantium, sudoriferorum, vesicatoriorum, cucurbitularum effectum. Nulla præsens erat contractura, quia brachiorum motus factus rectus remansit, sed talem modo percipiebat sensationem ac si ingens ex plumbo pondus ipsi inhæreret, cum adeo ingenti manuum infirmitate, ut nihil quod grave erat apprehendere vel retinere potuerit. Per intervalla etiam spasmus manus occupabat perquam moleste atque atro-

citer ut somnum ægre capere potuerit. Hos sat acerbos dolores postea excepit gravior aurium & fere intolerabilis dolor, qui sensim cum cephalalgia lancinante, valde acuta & vehementi vires & appetentiam ciborum enervante ipsam corporis carnem consumebat. Hæc symptomata non quidem continuo infestabant, sed per intervalla, imo certis periodis præsertim pro atmospheræ dispositione revertebantur & exasperabantur. Expetiit à me consilium. Suasi, ut rite prius præparato per venæ sectionem in pede & per nodulum laxantem corpore, thermas Carolinas adiret, iisque cum convenienti regimine uteretur. Quarum cura absoluta, ut in usum externum thermas Tæpliceses, ad imbecillum partium robur confirmandum & restituendum duceret, auctor fui. Cui consilio cum morem gereret æger, ex voto sanitas successit: nam ab eo tempore hæmorrhoidalis fluxus reversus, corpusque ab hujusmodi doloribus diu immune perstitit.

Epicrisis.

Quandocunque consuetus hæmorrhoidum fluxus inordinatus sit, vel plane supprimitur, multa non modo valetudinis sequuntur incommoda, sed maxime omnium ad morbos ex corrupto & vitioso sero qui originem trahunt, corpus disponitur: in quorum classem dolores externarum partium sive dolorificas rheumaticas & artuum passiones merito referre debemus; utpote quæ ab humore seroso excrementitio hinc inde in partibus sensibilibus & nerveis stagnante & secedente oboriuntur. Sanguis enim quando per vasa meseraica & viscera abdominis inque primis per lienem & hepar non jugi & perenni motu ac cursu libere fertur, sed restagnat atque moram necit, intestina & calida agitatione, in liquamen putridum corruptum fatiscit; quod dein sanguini permixtum & ad debiliora loca translatum, dolores & ulcerosas sæpe fluxiones efficit. Ex eodem fundamento ac fonte purpuræ scorbuticæ, quæ intus retenta causam sæpissime graviorum in artibus dolorum præbet, genesis derivanda venit; eo, quod consuetas & salutares sanguinis in foeminis per uterum, in viris per hæmorrhoides vacuationes cohibitas & compressas hos ipsos pressio pede insecutos fuisse, multoties à nobis observatum est.

C A S U S V.

Ante aliquot annos, generosus vir in sexagesimo & sexto ætatis anno constitutus, post febrem quartanam, quæ per dimidium anni eum exercuerat, vagis doloribus hinc inde in artibus & partibus externis quam maxime circa lecti introitum exacerbatis vexabatur. Cum aliquando mense Majo, matutino frigori caput paulo incautius exponeret, dirus & lancinans cervicem ipsasque scapulas dolor invadebat, qui per intervalla adeo efferatus erat, ut nec caput ullo modo flectere potuerit. Nunquam integerrimus vir admisit sanguinis missionem, neque per venarum sectionem neque per scarificationem; quum tamen esset sanguinis & succis plenus, appetitu integro & pulsu magno gauderet. Suasi venæ incisionem; quam, licet natura non respiceret, omnibus qua fieri potuit rationibus detrectabat. Cum vero gravioribus assidue torque-

Rheumatismus capitis, ex admisso frigore, venæ sectione curatus.

per-

perferret levamen, tandem ad instantiam meam chirurgus accitus, & celebrata venæ sectione, cruoris octo minimum unciae detractæ fuerunt. Ab eo mox tempore insigne dolorum allevamentum percepit, & quod notabile erat, post sectam venam noctu copiosum semper profudit sudorem præter modum & consuetudinem: quo dolor non modo penitus abactus, sed & omnes corporis vires pristinum incrementum receperunt.

Epicrisis.

Similem fere historiam apud LEONH. BOTALLUM *libr. cit. cap. XII. p. 201.* legere licet, quam ad verbum huc recensere nobis è re visum est: *Dominum de Varenes*, inquit, à Regis cubiculo, annos ut minimum quinque & septuaginta natum, dolor assiduus & lentus ad cervicem & humerum à multis mensibus detinebat, quem medici frequenti medicamentorum purgantium usu & calefacientibus litibus curare studuerunt: à quibus ille cum parum aut nihil levaretur nos consuluit, qui salutarem diximus futuram sanguinis missionem. Ille contra objicit inconsuetudinem mittendi sanguinis, senilem aetatem, inchoantem hiemem, morbum fieri à frigidis humoribus & flatibus: quæ omnia, testantibus aliis medicis, tale auxilium debortabantur, quare non posset intrepide acquiescere nostræ sententiæ. Diebus aliquot post, morbi perseverantia & incremento impulsus, ad nos rediit, sic animo affectus ut polliceretur, se post hac nulla in re à nostris consiliis recessurum. Mitti sanguinem jussimus, ex brachio affectæ partis, ad uncias decem: post aliquot dies parem modum ex adverso cum maxima utilitate, tandem iterum ex altero, & sic liberatus est. Non tamen interea contempsimus purgantium & litum calefacientium & discutientium usum. Ab eo tempore dictus patiens familiarissime & cum maxima utilitate pedum, quibus vix poterat insistere, visus & totius corporis, primum bis & ter in anno, postea quinquies & sexies meo consilio sibi sanguinem mittit, firmiter incedens nunc, quam ageret abhinc decennium.

C A S U S VI.

Dum hæc scribimus, transmissa nobis est ab Excellenti Uratislaviensium medico historia, quæ accuratam morbi rheumatici generationem, progressum & medelam quoque complectitur. Circa cujus ulteriorem curam, quum meum consilium requireretur, id ipsum hoc loco recensere non inconsultum mihi visum est. Dominus de H. LXVIII. annos natus, fibra forti atque elastico vasorum robore natura instructus. Olim itinerum incommodis & aëris variis injuriis adfuerus: jam sedentario vitæ generi, in publici, quod obit muneris gratiam addictus. Ante hos viginti annos apoplexiæ impetum expertus est, cruore ex raninis sponte larga copia erumpente solutum. Inde aliquoties arthritidem perferens, quindecim posterioribus annis non amplius observatam. Versus autumnum superioris anni irrepere sensim ventriculi flatuosæ pressiones, thoracis constrictiones, brachiorum, maxime circa cubitum, tensivi dolores. Hæc omnia usque adeo tandem invalere, ut misso licet sub finem Septembris è brachii dextri vena media sanguine (qui tenax erat, & præpingui muco abundans, seroque destitutus) die XXVI. Octo-

bris novum apoplexiæ metum inferrent. Complicari ea die cum febre continua coepit malum, hac fere ratione, quavis vespere, modo levius, modo gravius affligens: Post repetitam aliquoties oscitationem & perceptum brachii ut plurimum sinistri gravativum dolorem ingruit spasmus dolorificus cubitum utrumque, præcipue sinistram infestans, mox pectoris musculos in consensum trahens, præcordia stringens, suspiriosam respirationem producens, sudorem universalem exprimens, manibus interea algentibus. Remittit & intenditur per vices talis impetus, donec tandem elapsis aliquot horis cesset pederentim, lassitudine, torpore, & rheumatici doloris sensu relictis. Hic talis totum thoracem ambiens asthmale stipatus rheumatismus, ubi in summo vigore constitutus erat, durum, citatum, febrilem pulsum, aliquoties oculorum hebetudinem, tinnitum, vertiginem, suspectumque soporem comites habebat. Aliquando distentum flatu hypochondrium sinistram indoluit, sæpius nucha, scapulæ, dorsum. Quandoque in ipso somno ægrum nostrum obruens spasmus, loquelam præpediendo, siderationem comminatus est. Febris socia, in lentam & marasmoden abire visa, sub tertii dierum septenarii finem acquievit, postquam duplex comparuit solutionis modus. Præterquam enim quod lotium primo febrile & biliosum, à quarta febris die turbulentum, sabulosum, pure quasi & subcruento tabo remixtum vicesima die in naturale mutatum est; copiosæ etiam & per totam corporis superficiem diffusæ miliares pustulæ rubræ comparuere. Rheuma interim spasmis socium silente febre continuavit, ita tamen ut sensim mitescens, post quadragesimum diem penitus tandem visum fuerit se recepisse. At vero post repetitas per vices intimationes, die morbi octogesimo quarto novus malorum impetus subitæ mortis metum omnibus incussit, urgente inter summas præcordiorum angustias extremorum frigore, marcere, stertore, faciei livore, extrusoque cum tussi aliqua spumoso ex aspera arteria & florido cruore ad drachmam fere unam vel alteram. Quod si hæmorrhoidum ulla ante adnotassemus inolimina, sanguinis illam per os effusionem, cum medicis solas hæmorrhoidales venas in deliciis habentibus, pro fluxu hæmorrhoidum anomalo habituri fuisset. Visus autem potius è glandulis per interiori fistulæ spiralis membranam disseminatis & spasmorum vi dilataris, aut etiam miliaribus ibi quoque hærentibus pustulis disruptis extravasatus cruor. Angebamur tunc imminenti vel asthmatis convulsivi vel apoplexiæ, vel denique, fluente iterum tabida & subcruenta urina, lentæ consumptionis metu. Saltem suspicio erat morbum in consuetudinem abiturum virium collectioni obfuturam. Sed & hac vice post sectam altera ab impetu illo die venam (qua sanguis non adeo tenax è brachio educabatur) ita paulatim Divino auxilio adjutus est æger noster, ut non nisi rheumatis illius chronici rudera supersint. Poscunt tamen & hæc quotidie se manifestantia maturum adultæ experientiæ consilium, ne tertium ferociens malum omni auxilio majus experiamur. Inter remedia quibus obsecutum fuisse visum est rheuma cum asthmale complicatum, eminent oleum amygdalarum dulcium, sub emulsionis forma largiori copia propinatum, chamomillæ cohobatum decoctum, frictio, ablutio externa frigida calida & frequens. Nec sine omni effectu in usum

vocata : liquor mineralis anodyn. D. Hoffmanni, specificum cephalicum, pulveres solares, lumbricorum succus, pulvis antispasmodicus, & quæ demulcendo inalo apta credidimus. Quibus tamen certa & fida magis desiderantes, rescire avemus, quæ cum de morbi, tum de curæ instituendæ ratione Excellentissimo Hoffmanno videantur. Interque alia præoptamus, ut si forte præparata Viri Practicotati ex balsamo Peruviano, ex amaricantibus extractis sub forma elixirii visceralis, aut genuinus liquor mineralis, tanquam nervis & visceribus amica pharmaca, facere in rem nostram videantur, eorum apparatus simul nobis concedatur.

EPICRISIS CUM CONSILIO.

Accuratius paulo descripta hæc morbi historia, quanta valetudinis incommoda genus vitæ valde mobile & laboriosum subito in quietum mutatum adferat, luculenter satis demonstrat. Vidi sæpissime splendidas personas, venationibus cum celerrima equitatione conjunctis, vulgo Par force *Jagden*, quotidie fere affuetas, si eas ob urgentes quasdam causas omiserint, in graves diutinas passiones, quæ à stagnationibus intra viscera abdominis & exinde subortis valde intemperatis impuris & corruptis humoribus, originem suam traxerunt, delapsos fuisse: cujusmodi fuerunt flatulentæ & spasmodicæ intestinorum constrictiones, cum pigra alvo, angustia præcordiorum ac pectoris, dolore & artuum lassitudine, spirandi difficultate, febreque lenta consociatæ. Non mirum hinc est, idem expertum fuisse præsentem generosum ægrum, in quo, ob inclinatam ætatem, impuriore adhuc redditi humores, fibrosum ac nervosum mobile & sensibile systema ad spasticas strictiones atque febriles commotiones sollicitarunt; unde ex nimis hinc ortis ad partes sanguinis congestionibus, in capite insultus apoplectici, in pectore infarctus asthmatici, in artubus dolores vagi tensivi, producti fuerunt. Quam difficulter vero, quando vitium tum solidorum tum fluidorum in habitum quasi degeneravit, ejusmodi chronicæ affectiones, quæ accuratum vitæ regimen & assiduum remedium valde salutarium per plures fere annos expostulant usum, sanescant, iis qui in artis opere diutius versati sunt, quam optime cognitum perspectumque est. Et quoniam ex intermissione motus, laboris & exercitationis corporis, quæ alias optimum est sanguinis depuratorium, & juxta *Hippocratem* nervosarum & musculosarum partium cibus ac nutrimentum, præcipua horum parthenum causa fuit subnata, utique secundum nostram experientiam & sententiam, tum ad ejusmodi chronicum affectum mitigandum, tum ad pejora mala avertenda, motus, modo commode hic fieri possit, v. g. per unctionem, vel equitationem, omnibus modis suadendus est. Præterea in talibus casibus ab omni generis cerevisia abstinendum, potanda decocta ex speciebus demulcentibus parata, vel fontes temperati, ut *Selterani*, aut serum lactis; & quoad cibos, ab omnibus acidis, salis, viscosis, acribus, est abstrahendum: inter remedia vero solum elixirium temperatum balsamicum, ex amaris temperatis cum menstruo aquoso paratum, sæpius & diutius, moderata tamen dosi usurpatum, spiritaliscentiam blandam fluidis & tonum solidis conciliando, omnibus aliis medicamentis longissime præferendum esse, experientia fida & crebriori edocti su-

mus. Denique iteratis vicibus, aut per scarificationes aut venarum incisiones, sanguinis nimiam copiam demendo, promptior & expeditior circulus promoveatur. Et hæc fuit mea de cura hujus mali sententia, quam ad Doctissimum Virum transcribere non dubitavi.

C A S U S VII.

Vir robustus, sanguine & succis plenus, annorum quadraginta, acerbo scapulæ dextræ dolore conflictatus, sine præcedente sanguinis missione, sine primarum viarum per laxantia absterfione, à medico pro sudore eliciendo bezoardicam tincturam, æquali pondere cum spiritu cornu cervi succinato permixtam, largiori paulo dosi assumsit. Sed ne ullus quidem inde sudor, nec nocte nec mane secutus, licet corpus probe stratis munitum & involutum fuerit. Scapularum vero dolor postmodum non solum longe acerbior fuit redditus, sed etiam colli musculum in consensum pertraxit, ut in nullum latus caput flectere æger potuerit. Accessit præterea ingens capitis in latere dextro dolor, quem acris & calida oculorum defluxio cum rubore diutina excepit. Administrata venæ sectione, & alvo per convenientia remedia successive depleta, usurpatis quoque infusis herbarum Theiformibus atque pediluviiis, hæc symptomata quadantenus quidem remiserunt: ab eo autem tempore defluxio serosa in palato cum continuo uvulæ delapsu per annum & ultra permansit. Cui tandem vitio amovendo frequens tabaci fumus egregie serviebat; licet diutius adhuc, tempestate præhumida regnante, in faucibus & uvula nimia relaxatio observata fuerit.

Epicripsis.

Ex præsentī casu praxeos medicæ tyrones discere possunt, quantum detrimenti invehere possint medicamenta alias satis apta & innocentia, quando non debito ordine & tempore usurpantur. Nisi enim prius demta fuerit vasorum plenitudo per sanguinis detractionem, quæ motum circulatorium liberum, & transpirationem quoque auctiorem impedit; nisi etiam ante horum usum, cruditates copiosæ & vitiosæ ex prima regione idoneis laxantibuseductæ fuerint, sudorifera positive sic dicta, quæ calida & expansiva vi agentia, cum impetu quodam crudos & rudes humores in angustias vasorum & glandularum protrudunt atque accumulunt, ut inde non tantum dolores in vicinas partes se propagent, sed & acres defluxiones, dum, ubi sanguis stagnat, serum secedit & depluit, hinc oboriantur, nunquam qui cum ratione curam suscipere annittitur, exhibere debet.

C A S U S VIII.

Non ita pridem accessit ad me quidam hujus loci causarum patronus, trigessimæ ætatis annorum superans gracilioris quidem sed fibrosi corporis habitus, qui mihi aperuit, quod per quindecim & ultra annos singulis fere mensibus sanguinis fluxum per sedem expertus fuerit; ad quem disposita tota ejus familia, quæ in Thuringiæ oppido adhuc degit, ita ut non solum pater & mater continuo hunc fluxum passi fuerint, sed etiam in liberos imo ipsas sceminas circa annum duodecimum & decimum quintum, mensibus licet

Rheuma scapularum, calidiori pharmaco, exacerbatum & ad caput delatum.

Rheumatismus pectoris, ex hamorrhoidibus suppressis.

licet rite fluentibus, idem iste redundaverit. Conquestus hic fuit, quod per quatuor fere menses, ex causis minus sibi cognitis, hæmorrhoides cessaverint. Et ab eo tempore non modo insigni animi & corporis languore, sed etiam dolore tenfivo & constrictivo in sterno, toto thorace, cum frigoris quodam sensu, atque respiratione præsertim post motum difficiliore alvoque pigriore correptus fuit. Quater ex incisa pedis vena, consilio celebris hujus urbis medici, sanguis largiter emissus: sed omnem citra salutarem effectum. Indicavit simul æger, postquam, à fortiori corporis motu ante aliquot septimanas suscepto, hæmorrhoidal fluxus, sed exigua in quantitate comparuisset, omnem dolorem & molestiam simul & semel conquievissè & sensum calidioris fluidi à thorace ad ipsam pelvim successive descendens, sese animadvertissè; sed mox cessante fluxu superiorem pristinum locum dolores repetiissè. Ipse quidem non sine ratione affectum hæmoptycum inde metuens, auxilium meum efflagitavit. Ego nihil aliud suasi, quam ut motu moderato primum, dein intensiori, corpus quotidie ad lenioris sudoris eruptionem usque exerceret, & mane in lecto infusum Theiforme, ex herba veronicæ, cardui benedicti, radice glycyrrhizæ & aniso stellato biberet, neque pediluvia ante lecti introitum negligeret; circa illud vero tempus, quo alias ipsæ hæmorrhoides fluere solebant, pilularum Becherianarum aliquot doses, præmissio pulvere digestivo nitroso sumeret. Quibus non juvantibus, optimum inter alia esse consilium, hirudines ani venis applicare, edixi.

Epicrisis.

Rariora certe sunt fluxus hæmorrhoidalis exempla, liberos in prima ætate per dispositionem parentum hæreditariam infestantis: qui uti hoc in genere quasi naturalis, salutaris & criticus habendus, ita omni cura & sollicitudine per paulo exquisitiorem victus rationem conservandus, neque ullo modo impediendus, nisi mox difficiles & subitaneas morbosas afflictiones expectare velimus: inter quas sunt illæ præcipuæ, quæ à translatione sanguinis ex partibus inferioribus ad superiores facta pullulant, & rheumatismi nomine veniunt. Sicuti vero effrenem illum & incoercibilem sanguinis mittendi hodie epidemice quasi regnantem methodum, in sanandis maxime chronicis affectibus valde improbamus: ita etiam ad solennes & criticas sanguinis evacuationes, per uterum vel per intestini recti venas provocandas, sæpius repetitam venæ sectionem plus damni quam commodi tulisse, certa & multiplici experientia confirmatum habemus.

C A S U S IX.

Subit jam animum historia foeminæ ad trigésimum annum accedentis, sanguineo-cholericæ complexionis, quæ gravi ira supra modum excandescens, brevi post ingentem anxietatem & circa præcordia angustiam, cum tremore artuum, appetitus dejectione & ciborum tædio persensit. Sumisit hac de re ab amico volatilem cornu cervi spiritum liberaliori dosi, & ad eliciendum sudorem corpus in lecto composuit. Incaluit inde quidem fortiter, sed nec odor nec sudor sequebatur. Ab eo tempore in artubus, cruribus, brachiis, scapulis, gravativos pressorios dolores, & in universo corpore languorem cum lento calore

perpeffa est: quibus symptomatibus nostra adeo fuit afflictata, ut caro penitus consumpta, & hinc phthisi imo hectica ipsa laborare videretur. Lactis tandem caprini cum infuso veronicæ diluti usu, diutius per septimanas aliquot continuato, infuso ex manna & cremore tartari interposito, atque etiam pulveribus leniter diaphoreticis ac nitrosis, cum acido citri & aquis temperantibus analepticis usurpatis, pristina valetudini patiens fuit restituta.

Epicrisis.

Casus recensitus præclarum nobis documentum suppetit, quam perniciosum sit, materiam naturæ prorsus hostilem per minus convenientia loca, contra monitum *Hippocratis aph. I. Sect. 21.* educere. Per vehementem animi excandescentiam, non modo totum systema nervosum & vasculosum vehementi præter naturam motu agitur & concutitur, sed & insuper plane singulari modo ductus qui in hepate consistunt & ex eo prodeunt biliarii nervoso-fibrosi, convulsivo quodam motu afficiuntur, ut biliosus omnis propemodum humor in duodeni cavum effundatur, qui ibi ob hoc ipsam spasmum identidem per consensum affectum paulo diutius subsistens & retentus, graviorum quæ iræ affectum ordinario insequi solent pathematum causam materiale & fomitem præbet. Ad hæc itaque avertenda prudens & peritus medicus iis utitur remediis, quæ motus effrenes nervosarum partium sedandi, biliosas excrementitias sordes contemperandi & leniter per alvum educendi facultate pollent. Nihil autem à vero medendi scopo magis alienum est, quam medicamento calido & volatili motus solidorum concitiores reddere, illuviemque corruptam biliosam ad sanguinis massam & ad interiora sensilium & nervosarum partium invitare atque adducere.

C A S U S X.

Præsenti in opere dum occupatus sum, occurrit mihi casus, dignus qui commemoretur: quare ipsum huic tractationi subnectere operæ pretium duxi. Vir erat sexagenario major, firmiore & animo & corpore, atque elastico fibrarum robore instructus, qui raro per vitam adversa valetudine tentatus, biennio abhinc circiter, colicis quidem atque cardialgicis passionibus per vices affligentibus, attamen convenienti remediorum usu statim mitigatis atque depulsis correptus est. Mense Januario hujus anni vicinam urbem tendit, judiciales quasdam compositurus lites. Quum autem impetrata judicis sententia voto minus responderet, vehementer & supra modum animo commotus est, corpus dein multis modo laboribus & vigiliis fatigatum, inter discursum per plateas, frigoris vehementiæ improvide exposuit. Hinc statim ciborum periit appetentia, & alvus segnior reddita fuit, ita ut perpauca feces ano protruserit, imo per aliquot dies officii sui oblita fuerit. Domum reversus patiens de languore universi corporis, doloribus abdominis ex uno hypochondrio in alterum divagantibus, nec non de anxiis & cardialgicis præcordiorum stricturis circa scrobiculum cordis, cum pertinaci alvi clausura stipatis conqueri coepit. Rebus sic stantibus, mihi in consilium vocato, primo omnium, strictiorem alvum per cnema emolliens nec non infusum mannatum cum oleo amygdalarum

Rheuma ex seri impurificia, partes tam internas, quam externas affligens in juncu enatum.

Rheumatismus, ex ira & superingesto sp. volat. C.

rum dulcium permixtum relaxare fecesque restitantes educere visum fuit. At vero pauca in quantitate durissima scybala nigricantis & quasi adusti coloris secesserunt: doloribus morfibisque in abdomine persistentibus & per certa intervalla acius affligentibus. Suasi dein, ut lactis serum cum cremore tartari acidulatum atque manna nobilitatum, per aliquot hebdomades mane ad mensuram biberet. Postea quum sanguinem redundantem & ejus missionem neglectam adverterem, pedis venam pertundendam curavi: ubi emissæ aliquot sanguinis unciae, satis bene quoad cetera constituti, nisi quod permultum lentæ & viscidæ pituitæ, aquæ calidæ immerfus deponebat. Unde æger parum levaminis persensit. Interim tamen alvus quinquies vel sexies de die fuit soluta, multumque pituitæ una cum durioribus excrementis educitum. Sed dolores cum cardialgici tum colici, licet aliquando mitigarentur, continuabant, dorsum & lumbos sæpe repetentes. Quibus æger tandem ita enervatus fuit, ut assidue in lecto decumbere cogeretur. Ex medicamentis internis nihil intentatum vel omissum, quod ad discutiendos flatu, ad sedandas spasticas stricturas, ad acrimoniam temperandam & infringendam, atque æquabilem transpirationem conservandam commodum proficuumque visum fuit: & tamen parum adjumenti inde persensit æger, nisi quod observatum sit, dolores hos acerbiores magis ad artus & externas partes, interiori sede relicta, conversos esse; quandoquidem mox scapulas, mox lumbos, mox pectus, mox præcordia invadebant, capite tamen ab iis libero relicto. Somnum interdum placidum capiebat, cibosque concoctu faciles ingerebat, alvus vero rarissime sponte libera fuit & urina nunquam non parce profluxit. Interea cum jam per duos & quod excurrit menses hoc malo conflictatus fuisset æger, non parum vires exhauriebantur. Percipiens vero pulsum adhuc valentem & plenum, pedis venam iterum secandam præcepi, è qua longe alia facie emanavit sanguis quam prior erat: nam vix sexta ejus pars rubicunda erat, quæ sero placetulae instar innatabat, superius lento, viscido muco obductus. Sed neque etiam inde adjumentum quoddam percipiebat ægrotans. His rebus ita constitutis, meum constantissime cum domesticis suis efflagitavit auxilium, rogans, morbum, ejus naturam, totumque progressum paulo accuratiori meditationi & acriori judicio subicerem. Ad hanc itaque rem incumbens, ex inspecto sanguine judicabam, vitium non, ut antea forte existimaveram in solidis esse, ubi angustiam vel scirrhositatem quandam in intestinis præsentem divinaram, sed seri excrementitii colluviem non tam partes internas quam externas affligentem, horum dolorum causam & fomitem existere. Hanc itaque non commodius nisi per alvinam regionem educi posse credidi. Nolebam vero in corpore viribus valde fracto atque intestinis spasmis & torminibus jam extreme debilitatis acre quoddam purgans per superiora exhibere. Itaque cum in consiliis *Riverianis* me aliquoties legisse meminerim, aquam benedictam *Rulandi* ad aliquot uncias in enemate, optimo cum fructu ad serosam colluviem educendam adhibitam fuisse, tentare & hoc auxilii genus constitui. Et cum ad manus non esset aqua illa benedicta, tartari emetici solutionem huic substitui, atque in talem formam redegi: Rec. tartari emetici in aqua menthæ soluti grana VIII. vini Hispanici uncias sex M. Hanc mixturam cum

clysteris emollientis domestici tribus partibus aequum infundendam juberem, mox inde largissima viscidorum humorum secuta est excretio, magna fecum liquidarum copia stipata, quam postea tres sedes exceperunt, sed cum paucioribus excrementis: quo facto juscula quædam analeptica porrigere jussi. Et bene se habuit æger. Sed tertio die post, cum intolerabilibus per IV. dies abdominis cruciatibus cum diarrhœa & tenesmo copulatis, corripere, interne theriacæ veteris dosin, item oleum amygdalarum dulcium ter, vel quater per diem cum sero lactis, vel infuso veronicæ exhibui, & exterius abdomen inungendum linimento, ex theriaca in aqua Anhaltina soluta, cum balsamo Peruviano commixta, jussi. Atqui inde & alvi dejectiones & tormina ex voto conquieverunt ac remiserunt. His peractis mixturam diaphoreticam, quæ ex liquore nostro minerali, syrupo croci saturato & quarta parte spiritus tartari composita erat, propinavi. Unde placido secuto sudore, vique dolorum mitigata sensim paulatimque ad se redire videtur ægrotans.

Epicrisis.

Chronicus hic gravis morbus, ad dolores rheumaticos ab excrementitii seri copia originem suam trahentes, nervosasque partes internas æque ac externas infestantes, referri debet. Senes vero quam maxime ad ejusmodi morbos à sero vitioso oriundos disposita aptaque habent corpora, quia ob bilis lentorem & inertiam, vacillantemque intestinorum tonum alvus pigrior fit, atque adeo à fecibus retentis corruptæ sordes ad sanguinis massam feruntur, quæ ob languidiorem perspirationem senili ætati familiarem & communem magis magisque succrescunt. Credibile igitur est, eodem modo hos dolores fuisse excitatos. Et quia per ipsius morbi paulo longiorem decursum, in corpore omni motu & exercitatione vacante, ipse sanguis & humores boni atque laudabiles in corruptum serosum liquamen conversi sunt, vero est simillimum, contumaciam hujus affectus inde esse petendam. Denique notabilis hæc observatio non prætereunda est, quod emetica & paulo fortiora infusa per clysterem, ad copiosas serositates è corporis latibulis eliciendas & exturbandas, tutiori longe modo ac validiora purgantia ore assumenda adhiberi possint.

C A P U T IX.

De rheumatismo odontalgico.

THESES PATHOLOGICÆ

§. I.

Odontalgia, sive dentium acutus, gravis & perquam molestus dolor non nisi rheumatismi species est, à seri impurioris decubitu, ligamenta & tunicas nerveo-glandulosas, quibus radices dentium in alveolis maxillarum arctius circumvestiuntur atque obfirmantur, valde lancinantis & arrodentis subortus; qui varia molestaque post se trahit symptomata.

§. II.

Nos non semel sed pluries observavimus, ar-

Sæpe in
tuum,

rheumatismo odontalgia oritur.

Et vice versa.

tuum, scapularum, humerorumque dolores, in capitis sæpenumero transiisse latus, atque dentes pariter ac maxillas molestissime invasisse. E contra, capitis & dentium dolores, sede sua mutata, in humeros, brachia vel scapulas descendisse, identidem à nobis haud raro est animadversum. Quin, per experientiam obvium est, maxillam superiorem cum dentibus suis, dolore & spasmo frequentius ac inferiorem affici.

§. III.

Interdum in ipsa dentis cavitate residet.

Alia porro sedes est odontalgici doloris, qui in ipsius dentis cavitate, videlicet in funiculo isto vesiculari, ex membrana nervosa, vase arterioso, venoso & lymphatico composito residet, videlicet si is ipse graviter, vel nimia, à sero stagnante, distensione, vel spastica constrictione affligatur, præsertim ubi dens est cariosus, ipsaque caries ad funiculum modo dictum pertingit: siquidem certa & quotidiana experientia constat, cariosos dentes rheumaticis affectionibus maxime tentari, eo quod quam facile, ob imbecillitatem hujus partis humores ibi stagnant atque subsistunt.

§. IV.

Symptomata.

Quemadmodum in arthritide dolor, rubor, tumor, & febricula præsens est: ita hæc omnia quoque in odontalgia fieri animadvertimus. Jungitur insuper copiosa salivæ ex ore profusio, quæ non aliam agnoscit causam, ac spasium dolorificum, qui dum vasa lymphatica & venosa constringit, liberum sanguinis & feri regressum impedit; quam ob rem à subsistente sanguine salivalem illum laticem in glandulosa faucium loca copiosius secedere æquum est.

§. V.

Odontalgia ex tempestatum mutatione oritur.

Rheumatismus intemperati & subito mutati aeris plerumque soboles evadit; atqui non secus res in odontalgia cedit, quæ in corporibus dispositis præsertim cacochymicis quam facile oritur, si ea ex calida subito in frigidam auram secedunt, vel si vere & autumnio tempestas per vices austri-
na calida atque frigida est.

§. VI.

Fœminas frequentius ac viros affligit.

Uti fœminæ præ sexu virili rheumatismis magis sunt obnoxia: ita etiam odontalgiam frequentius experiuntur. Id quod maxime contingit, quando utero gerunt, vel defectu mensium laborant, aut alimentis acidis, falsis & alvum adstringentibus, item dulcibus plus justo delectantur: quippe quæ, etiam externe denti carioso admissa, desubito sæpe dolorem proritant. Nihilo minus, si viros hic dolor apprehenderit, acerbius multo affligere solet.

§. VII.

Rarius rheumaticos & arthriticos infestat.

Experientia rursus constat, quod qui rheumatismo vel arthritide laborant, rarius odontalgia corripiantur, sed dentes integros habeant; cum contra dentium doloribus magis sint expositi, qui hujusmodi artuum & musculorum affectionibus vacant.

§. VIII.

Facile revertuntur.

Qui dentium doloribus semel iterumque excruciantur, ii rursus ex facili & leviori causa in eundem incidunt, non secus ac in arthriticis & podagricis tentationibus id fieri affolet, propter debilitatem quam dolores hujusmodi pariunt atque relinquunt.

§. IX.

Acerbior dentium dolor in corpore sensibili atque impuro gravia inducit symptomata, vigiliam nempe, febrem, appetitum prostratum, delirium, refrigerationem extremorum, imo convulsiones, præsertim in infantibus, propter systema nervosarum partium in consortium si-
ve motuum morbosorum communicationem pertractum.

Malum quandoque exitum sortitur.

CURATIO.

§. I.

Quoniam odontalgicus dolor, ab illuvie plerumque serosa ortum suum fortitur, utpote quæ à sanguine copiosius ad caput congesto & lentius in vasis procedente, separata, in ligamenta tendineo-nervea depluit; potissimum medendi huic molesto affectui in eo reconditum erit momentum, ut serum scorbuticum impurum primum à capite divertatur & derivetur; dein, ut correctum præparatum atque mobile redditum, per congrua emunctoria è corporis sphaera eliminetur; demum parti affectæ justum robur reconcilietur, & hac ratione materiæ peccantis decubitus atque affluxus præpediatur.

Indicationes.

§. II.

Primum quod concernit nostrum propositum scopum, huic clysterum injectiones peccantem humorem divertendi gratia, quam maxime optulabuntur. Ut plurimum enim sub gravioribus quibuscunque dolorum tormentis alvus pertinacius renititur, quam per enema lenitivum & stimulant salinum emollire atque educere nihil est convenientius: utpote, à cujus applicatione ingens statim dolorum levamentum ægrotantes recepisse observavimus. Præstat tamen ea ex domesticis usitatis, quam ex variis purgantium atque emollientium speciebus curiosius conflare. Dein quoque inter ea, quæ humorum impetum à partibus superioribus ad inferiores invitant, pediluvia egregiam operam collocant: quæ ex sola aqua pluviali vel fluviali cum fursuribus triticeis, adjecto sapone Veneto decocta præparari atque circa somni tempus in usum vocari possunt; adhibita tamen hac cautela, ut pedes diutius atque paulo profundius in ea dimittantur, neque nimis calide, sed tepide tantummodo admoveantur.

Humor viscosus divertendus, per clysteres.

Pediluvia.

§. III.

Huic prædictæ intentioni non minus satisfaciunt, quæ leni stimulo alvum clementer subducunt, inter quæ, uti in omnibus tam arthriticis quam rheumaticis, ita etiam in odontalgicis affectionibus, mannata & ex cassia recenti parata, utpote quæ simul acrimoniam humorum contemperandi virtutem possident, præsertim si in sero lactis dulci vel lacte asinino, aut etiam in fonte minerali v. g. acidulis Schwalbacensibus dissolvuntur, præcipuas sibi partes vindicant.

Ope laxantium.

§. IV.

In corporibus ætate florentibus & quorum vasa nimio sanguine turgent, si vel ob transpirationem prohibitam, vel aliis demum ex causis, acerbiori oboriuntur dentium dolores, primæ æque ac secundæ indicationi therapeuticæ omni ex parte satisfacit venæ in pede instituta sectio; quæ utique tam

Venæ sectio quando adhibenda.

tam ad humores ad superiora congestos, inferius invitandos, quam ad æquabilem eorum per omnis generis vasa circuitum restituendum ut & materiam hostilem è corpore eliminandam præsidium atque auxilium pollicetur insignissimum, aliis omnibus præferendum.

§. V.

Diaphoretica.

Quod si materia peccans odontalgicos dolores efficiens, discutienda atque educenda est, egregie huc conferunt ipsa diaphoretica, blandiora tamen & sedativa simul virtute conspicua, è quorum numero electuarius ex rob sambuci, admixtis cornu cervi usto, antimonio diaphoretico & nitri aliquot granis, cum aqua florum sambuci propinatum, laudem certe meretur amplissimam, præsertim si repetatur & regimen sudoriferum exactius paulo observetur.

§. VI.

Acidularum usus.

Non raro evenit, ut horum dolorum sævitia à serosa foveatur illuvie, quod fit in cacochymicis, scorbuticis, & catarrhosis phlegmaticis corporibus, ubi malum sæpius quoque revertitur. Tunc autem ego ad molestissimum malum præsciendum non certius, tutius nec præsentius, quam in convenienti thermarum vel acidularum usu inveni præsidium, præcipue si in subjectis tenerioribus & biliosis cum lacte asinino permiscantur.

§. VII.

Sacculi speciebus emollientibus repleti.

Jam quod remedia externa concernit, sacculi ex speciebus paregoricis emollientibus, videlicet ex floribus sambuci, meliloti, chamomillæ vulgaris, baccis lauri, juniperi, semine carvi, milii & sale tosto parati, qui si tepide applicantur, ex omni remediorum genere securissima sunt. A suffimigiis quoque v. g. fumo succini, resinæ styra-
Suffimigia. cis, benzoës, olibani, gummi elemi, per infundibulum vel linteorum ope dentibus affectis admisto, insigne dolorum levamen securum fuisse novimus. Interea tamen non omnes æque hanc medicationem ferre potuisse, & in quibusdam graves capitis dolores, hemicraniam, vertiginem, oculorum dolorem pressorium sic excitatos fuisse observavimus.

§. VIII.

Bals. vitæ externe.

Quod si vero dolor acerbus maxime in carioso dente consistit, liquor anodynus mineralis vel solus, vel cum balsamo nostro vitæ permixtus, ope gossypii dentibus inditus egregium præstare solet levamen. In corporibus humidioribus una vel altera olei caryophyllorum gutta, item olei origani Cretici, nec non buxi destillati carioso denti instillata vel cum gossypio applicata, opem non contemnendam affert. Mixture ex spiritu vini camphorato cum croco, castoreo & opio permixta gingivis atque excavatis dentibus admodum, non secus ac ejusmodi linimentum in rheumatismo & arthritide exterius applicatum, insignis persæpe levaminis esse solet.

§. IX.

Diata.

Cæterum, uti accuratum vivendi regimen ad præservationem affectuum chronicorum, & etiam dolorum, utile semper ac proficuum est: ita illud ipsum in nostro affectu non minorem adfert utilitatem. Diata vero primario in eo consistit, ut ægri ab omnibus salsis acribus induratis & nimium aromatificatis cibis, vino præsertim

acido & liquoribus spirituosiss, omnibusque alvum duram & adstrictam quæ reddunt abstinere, auram frigidiorē, ventum præcipue ex Borea flantem quam sedulo vitent, caputque maxime ab eo arceant. Et sicut in omnibus rheumaticis affectionibus præcavendis nullum præstantius ipso sufficienti motu & exercitatione corporis datur remedium: ita id ipsum quoque in chronicis & sæpe recidivantibus odontalgiis commendationem meretur.

CAUTELÆ ET OBSERVATIONES.

§. I.

Quando atrocior odontalgia à dente carie infecto atque excavato proficiscitur, si situs id permittat, cauterium ignitum ab exercitato chirurgo dextre applicatum, omnia decantatissima etiam remedia superat: siquidem funiculo illo nerveo, in quo doloris sedes est, exusto, & putredine, ignis ope, è dente sublata, dolorem non modo penitus exspirasse, sed & foetidam cariem prohibitam fuisse, pluries etiam in nobis ipsis observavimus. Quin hac ratione quoque dens servari potest, si modo ejus cavitati postea cera cum massiche mixta, quo impediatur ciborum & aeris frigidioris ingressus, intrudatur.

§. II.

Quod si vero dirum illum in dente dolorem excitans caries, cavitatem efformaverit minus idoneam, ut cauterium commode non admitti possit: externa tamen, atque interna quoque in usum vocata remedia nullius efficaciam sunt, nihilo minus à diutius affligente dolore gravioris mali periculum imminet; vix datur certius remedium, ac dentis affecti, à circumspecto chirurgo, idonea encheiresi celebrata evulsio.

§. III.

Sed tenendum circa hanc operationem, ne ipso in paroxysmo, ubi dolorum vehementia quam maxime urget, instituat. Neque facile in plethoricis, ubi capitis, temporum & genarum venæ tument, vasaque arteriosa vehementius pulsant, nisi prius iusta sanguinis extracta fuerit quantitas, dentis evulsionem tentare convenit. Testantur enim practitorum hinc inde recensitæ observationes, lethalem persæpius hæmorrhagiam, à dentibus præsertim molaribus improvide extractis excitatam fuisse.

§. IV.

Observationum fide constat, venarum sublingualium incisionem in graviore odontalgia eximiam tulisse opem. Nos etiam hoc medendi genus admittimus, sub hac adhibita tamen cautione, ut incisio venarum paulo subtilior sit, alvusque libera existat: quin imo pediluvia in usum, prius quam vena secetur ducenda statuimus. Si vero nimia sanguinis copia corpus turgat, sanguinem è pedis vena detrahare expedit: ubi dolore adhuc persistente, postea forte raninas pertundere conducibile erit.

§. V.

Peculiare id habent remedia odontalgica externa, ut nunc juvamentum afferant, nunc in eodem corpore nihil efficiant, & nullum adhuc constans & perpetuum contra dentium cruciatus reperiat remedium. Securissimum itaque

Cauteria.

Qua si non locum inveniunt dens evellendus.

Soluta tamen prius plethora.

Sectio venarum.

Externa non perpetuo juvant.

Hinc differt.

cutientia
securissi-
ma.

est, stagnantium & acrium humorum lenem & successivam procurare discussionem, & ab aëris frigidi injuria partem affectam quam sedulo defendere: id quod sacculi superius recensiti, mitiora quoque diaphoretica omni ex parte præstant.

§. VI.

Purgantia
quibus
condu-
cam?

In corporibus cachecticis, quorum vasa ingenti vitiosi seri colluvie repleta sunt, & quæ artuum doloribus alias frequenter vexata fuerunt, blandiora evacuantia in cassum exhibentur. Sed duriori cuneo hic opus est, atque ad paulo validiora properandum. Inter plura alia autem, quæ huic scopo inserviunt, pilulæ ex gummi ammoniaco depurato, trochiscis alhandal, extracto fibrarum hellebori nigri, mercurio dulci, cinnabari præparato, croco & castoreo compositæ eminent, & ob laudatissimum successum, expectationi desideratæ respondent.

§. VII.

Mixtura
dolores ex-
templo se-
dans.

Mixtura ex spiritu vini camphorato, essentia croci, nucistæ, & spiritu cornu cervi volatili vinoso concinnata, ad guttas aliquot naribus excepta, admirandum plane in modum acutissimos etiam dentium dolores in momento sedat atque profligat: cujusmodi effectus à liquore anodyno cum balsamo vitæ liquido nostro maritato identidem expectandus. At vero dolendum maximopere est, hanc dolorum expirationem modo ad tempus plerumque persistere. Ratio autem hujus phænomeni in eo posita est, quod nervi qui ad mandibulas, dentes atque nares tendunt, ex uno trunco pari videlicet quinto originem mutuuntur.

§. VIII.

Omnibus
irritis,
opiatæ
corr. pro-
sum.

Dolores dentium si tanta ferocia insistant, ut cuncta remediorum genera penitus eludant, ego insigni cum fructu porrexī pilulas, ita à me excogitatas: Rec. massæ pilularum aloephanginarum drachmam, de styrace drachmam dimidiam extracti croci grana sex. M. f. l. a. Pil. No. LX. D. S. 6. bis 8. auf einmahl.

ENARRATIONES MORBORUM.

C A S U S I.

Odontal-
gia, ex ve-
hementi
motu, sub
sævis tem-
pestatibus,
sæpius re-
petito,
oborta.

Serenissimus Princeps, firmæ & robustæ quoad fibras & habitum corporis constitutionis, qui inculcata, & constanti valetudine quadragesimum jam annum superaverat, continuis venationibus & vehementioribus corporis exagitationibus, sub inclementiori frigido & humido aëre, sub solis intensiori æstu, sub ventis sæviter sæpe regnantibus, ita fatigavit vires, ut naturam ad permolestas defluxiones in capite & circumjacentibus partibus frequentius laceffiverit. Quæ non modo in capite, sed & in maxilla præcipue in dentibus acerrimum dolorem pariunt, atque per intervalla ex capite in subjacentia loca collum, humeros, scapulas delatæ, atroci dolore musculosas ac nervosas has partes affligunt, principium vero asperæ arteriæ obsidentes permolestam cum raucedine tussim inferunt. Ceterum sub quietiori jam corporis statu & vitæ instituto ingravescere hæc symptomata videntur, quippe & ciborum appetentia minuitur, & alimenta minus probe digesta flatus & borborygnos cum alvo pigriori excitare solent. Ego in consilium arcessitus, primum atroci illi dentium dolori, qui valde urge-

Frid. Hoffmanni Oper. Tom. II.

bat, subveniendum esse duxi: quem in finem latus affectum linimento, ex una balsami nostri vitæ & duabus liquoris anodynī partibus inungere jussi; quod etiam gossypii ope denti qui cariosus fuit admotum, levamen non mediocre attulit. Postea exquisitam victus rationem imperavi: quæ in eo consistebat, ut omnem aërem inclementem, ventos impetuosos maxime, ac solis æstum evitaret, & exercitationes corporis, equo vel curru vehendo, vel ambulando cum moderatione tamen, quia iis assuetus erat, non intermitteret; loco potus ordinarii decoctum temperatius ex radice chinæ, cortice ligni sassafras, passulis, atque pauxillo cinnamomi paratum bibat, parcius vero vinis spirituosius utatur, vel saltem tenuia Mosellana & huic similia, aut valde diluta cum aqua hauriat. Præter rectam vivendi rationem, in qua constanter pergere debet, etiam hæc malo expugnando accommodata remedia ad usum proposui. Adeoque infusum Theiforme ex mellissa, salvia, veronica, betonica, corticibus citri recentibus, cardamomo, justa dosi mixtis, mane sumendum in lecto cum lenioris sudoris expectatione suasi. Ante prandium elixirii nostri balsamici drachmam cum pauxillo vini & aquæ caperet, atque ad alvum liberam servandam bis in septimana passulas Corinthiacas i habarbarinas ad unciam, ante lecti introitum sumeret, consului: ad tussim vero levandam, oleum amygdalarum dulcium sine igne paratum, cum duabus partibus syrupi capillorum veneris permixtum, in avenaceo jusculo circa noctem usurparet auctor fui. Præterea frictiones in capite & dolore affectis partibus mane & sero adhibendas, cum pannis succini fumo imbutis, calidis, plurimum commendavi, atque ante omnia ut caput & partes superiores à frigore muniret, suasi. Cucupham quoque in capite gestandam ex herba majoranæ, fatuereia, floribus spicæ, rorisinarini, chamomillæ Romanæ, succino, benzoe, styrace, cardamomo præscripsi. Quibus remediis adjutus per divinam gratiam, à molestis istis rheumaticis doloribus immunis redditus, jam sine ullo valetudinis impedimento ex voto vivit Princeps Serenissimus.

Epicrisis.

Quemadmodum ad constantem tuendam sanitatem, & ad morbosas à corpore avertendas afflictiones, nil nec efficacius nec securius conveniente & sufficiente corporis motu, labore & exercitatione est: ita attentæ etiam observatione animadvertimus, non modo ex intermisso corporis motu, sed etiam ex nimis, vehementibus inopportunis & sub inclementi cœlo institutis exercitationibus viam ad morbos apertissimam sterni: videlicet quandocunque illæ subito omittuntur. Nam quo celerior sub ipso motionum impetu & agitatior fluidorum & solidorum est motus & progressus, eo tardior & imbecillior postea evadit, quando prorsus corporis exercitium negligitur. Hinc pressio pede sanguinis & humorum stagnationes, decubitus, seri separationes, ejus extravasationes atque in subjectas partes defluxiones, præsertim eas, quæ aëris injuriis expositæ imbecilliores & à naturali tono dejectæ fuerunt, aliaque permolesta accidentia insequuntur; quemadmodum superius haud ignobile exemplum satis luculenter demonstrat. Ceterum, quoniam natura assiduus & quotidianis iisque validioribus exercitationibus fuit adueta, non penitus eas intermittendas, sed sub modo & moderatione continuandas esse censui.

C A S U S II.

*Rheuma
dentium è
colluvie
serosa prog-
natum cu-
ra ema-
ciantia abi-
gendum.*

Cum nuper ad aulam Serenissimi Principis vocarer, consultum me adiit foemina honesta ante XL. annos nata, sanguine & succis plena, quæ sub priori conjugio & ante illud etiam in primis juventutis annis largiter semper sanguinis menstrualis fluxum experta est, atqui, dum singulis fere annis liberos peperit, satis valens & salva permansit. In altero conjugio, quod plane fuit sterile, per aliquot annorum spatium, tempore potissimum vernali & autumnali, permolestis & gravibus in capite defluxionibus, coryza, gravedine, dentium acerbo dolore, tumoribus faucium, uvulæque prolapsu misere admodum fuit tentata: quæ symptomata duos, quandoque tres menses continuarunt. Tumor internus faucium non mediocriter ita sæpius compressit mandibulas, ut os deducere, nisi quantum sufficeret ad forbillanda juscula vel tenuiores cibos capiendos, non potuerit. Multis usæ domesticis & pharmaceuticis remediis: sed cunctis effectu plane frustraneo. Cum in plenioris morbi statum ejusque causas inquirerem, cognovi eam cum marito inferiorem domus humili loco sitæ stationem inhabitare & in ipsa dormire, quæ cum minus à ventibus perflari queat, aer inclusus quam facile vapidosus & humidus redditur; deinceps in quieto semper vitæ genere versata est: tertio in conjugio sterili vixit & menses longe parciore quam superioribus annis experta, singulo quoque vere & autumno venæ sectionem in brachio admittere consuevit. His perspectis & diligenter expensis, vitiosi feri potius illuviem in hoc corpore, quam sanguinis redundantiam peccare judicavi. Quare non tam ad sanguinis quantitatem detrahendam, quam ad feri intemperati & impuri nimiam copiam impediendam imo è corpore exturbandam, & ad robur toti corpori, capiti imprimis, conciliandum medicationis consilium direxi. Suasi igitur, ut mutaret conclave & dormitorium, atque in loco diffusibili altiori vitam ageret: dein, ut intermedio tempore quo libera erat ab hoc affectu, à copiosiori cibo, carnibus elixis & pinguioribus jusculis, à coena etiam abstineat, & corpus labore & motu moderatiori exerceat, præcepi. Loco cerevisiæ crassioris aquam coctam cum cinnamomo, cortice l. saffrafras, passulis & quarta vini parte mixtam bibat; & ut singulis mensibus, bis vel ter pilulis meis balsamicis polychrestis, & totidem in septimana vicibus elixirio balsamico temperato utatur edixi. Demum balsamo nostro liquido caput inungendum, & aqua cum vino remixta, in qua aliquot guttulæ balsami dicti instillatæ, os frequentius colluendum commendavi.

Epicrisis.

In ejusmodi diuturnis crebrius recurrentibus rheumaticis affectibus profligandis, medicus qui consultatur, probe semper prius statum corporis, causas antecedentes & concurrentes investigare debet: siquidem ut plurimum sagax & circumspectus Philater, permolestas has diuturnas fluxiones seu rheumata, à tenuiore & excrementitio sero ex atonia solidorum oriundo potius, quam à sanguinis boni redundantia dependere atque produci deprehendet. Et tunc pessimo consilio largiores sanguinis detractiones proponuntur, quæ naturam imbecillioris reddunt & ad morbosas afflictiones disponunt. Ego in doloribus rheumaticis arthriticis neque minus in catarrhosis

defluxionibus, singulari semper cum fructu diætam, ut ita loquar, emaciantem commendavi & imperavi; quæ in detractione copiosi alimenti, abstinentia, ab omnibus quæ copiosum alunt nutrimentum tam cibis quam potibus, sufficienti motu & exercitatione corporis, tenuique ac levi potu consistit; interposito nonnunquam apto balsamico laxante & roborante. A quibus auxiliis, in ejusmodi abigendis & avertendis morbis, ampliorem me semper consecutum fuisse opem, ac ab aliis pharmaceuticis remediis omnibus, sancte adstruere & affirmare possum.

C A S U S III.

Juvenis annorum XXX. corpore carnosissimo & boni habitus, sanguine abundans, hyemali tempore domi bene pastus & cibis nutrientibus saturatus, vini quoque non raro haustum interponens, sub libero vernali, ventoso & humido coelo, non tecto satis & munito corpore iter per aliquot milliaria facere debuit. Hinc domum reverso, ingens lassitudo corpus, caput molesta cum vertigine gravitas, dentes vero immanis admodum dolor irruebat atque invadebat, qui noctu acerbior erat. Quum per annum sanguinis missionem non passus fuerat, ex meo consilio venæ circa pedis malleolum facta incisio, & plus quam decem unciae extractæ; quæ vacuatio cum euphoria celebrata quandam horum pathematum remissionem largita fuit, pulsu inde valentiori reddito. Ipse sponte sua ante lecti ingressum, quum per syringam tabaci hauriret fumum, aquæ frigida fontanæ mensuram successu temporis epotavit, cubitumque petens corpus stratis probe textit atque circumvolvivit. Hinc largissimus in toto corpore subortus sudor per integram noctem manavit. Inde expergefactus, omnis dolor à capite & dentibus, felicissime fuit abactus.

Epicrisis.

Quandocunque dolores gravativi & rheumatici artuum, capitis, imo dentium, à sanguinis *νατ ἐξοχὴν* sic dicti consistentis & rubicundi redundantia, quæ impeditioris humorum circuitus & secretionis atque excretionis imminutæ parens est, potius quam à feri impuri copia & decubitu in eufarcis & bene pastis corporibus oboriuntur; ipsa ratio sana medico-practica dicitur, ad liberiores circuitum sanguini & humoribus conciliandum, sectionem venæ remedium esse aptissimum. Et tunc ordinario pulsus major, auctior & fortior post sanguinis vacationem sequitur, qui certum minimeque fallax, ex redundante illo purpureo liquore morbum provenisse, indicium exhibet. Deinceps insignes aquæ puræ fontanæ frigida sudoriferas & discutientes virtutes, hic casus magis conspicuas atque illustriores reddit. Ego semper in hac hæresi fui, aquam frigidam fontanam puram, terrestrioris calcareæ vel salinæ materiæ expertem, incomparabilem multis in morbis præbere medicinam, tum ratione frigoris fibras attonitas firmantis & roborantis, tum respectu mineralis ætherei spiritus, quo nulla aqua destituta, viribus identidem amici; quin & ratione fluxilitatis ac tenuitatis, qua crassos humores mobiles, fluxiles atque libero progressui aptos reddere valet. Sed hoc remedium, quod utique magnæ utilitatis est, & recte heroicum dici potest, maxima eget cautione & circumspectione. Quam hisce capitibus includere non dubitamus: quorum primum est, ut imbecillo & tenui

cor-

corpori, ubi motus languent & venæ sero turgent non exhibeatur: secundum, ut tantummodo corporibus sanguine, calore, & motu vegetiore adhuc plenis præbeatur, quo in totius corporis ambitum actuari & distribui possit: tertium, ut non uno haustu, sed successive ac per vices ingeatur: quibus addimus quartum, ut corpus post epotationem vel motu ad sudorem usque exerceatur, vel in lecto calidis tegumentis probe foveatur.

C A S U S IV.

Odontalgia ex incongrua dieta.

Fœmina XXX. annorum, victui crassiori salino indulgens & otiosæ vitæ dedita, sanguine abundans, alvum patitur crebrius tensam atque strictam, mensiumque defectum experitur. Sanguis è vena missus apparuit glutinosus. Autumno gravissimo corripitur dolore circa nucham, qui sese ad aurem extendit, parotidem totamque dextram maxillam cum inflatione atque rubore occupans, in dente carioso ejusdem lateris gravissimum dolorem excitat. Pulsus erat febriculosus, arteriæ fortiter circa tempora pulsabant, somnus inquietus vel plane nullus, & perpetuo salivalis latex ore effluxit. Ut his medelam faceret, externe utebatur linimento, quod habebat oleum hyoscyami, carvi & parum camphoræ, à quo dolor minime mitigatus, sed potius exacerbatus fuit, inflammatione in facie aucta. Curata vero est sequentibus. Primum mixturæ, ex liquoris anodynii uncia dimidia, camphoræ, laudani opii cydoniati utriusque granis tribus paratæ, quindecim guttas vel viginti, tribus de die vicibus sumsit. Secundo, loco potus ordinarii decocto hordei, scorzonæ & rasuræ ligni sassafras, cum semine papaveris albi in emulsionem redacto fuit usa. III. Nuchæ & capiti sequens applicatum fuit linimentum: Rec. aquæ Anhaltinæ, spiritus florum sambuci ana unciam, spiritus salis ammoniaci drachmas duas, nitri artificialis, quod præparatur ex spiritu salis ammoniaci & spiritu nitri, camphoræ utriusque drachmam dimidiam, opii grana decem, olei nucistæ destillati guttulas quindecim. M. Quod exterius adhibitum, egregium plane tulit solatium. IV. Mitigato paulisper dolore, alvus vacuata fuit cum infuso, quod capiebat folia fennæ, rhabarbarum, agaricum, cremorem tartari, & passulas minores, cum aqua & vino. Utut vero dolores ex parte remiserint, remansit tamen fixus in gingiva circa dentis sedem cruciatus, cum insigni inflatione & rubedine, qui ad aliquot menses durabat. Ex consilio itaque medici, & opera chirurgi extracto dente, materia ichorosa & putrida in copia successive ex alveolo effluxit, cum plenaria doloris remissione. Foramen vero relictum usu adstringentis medicaminis fuit clausum.

Epicrisis.

Ex hac morbi relatione discendum est, quod odontalgia frequentius conjuncta sit cum phlegmone seu erysipelacea quadam defluxione; quare etiam eodem modo ac via sanatio utriusque affectus instituenda. Et quemadmodum in erysipelaceis affectibus exterius applicata oleosa nunquam profunt, ita etiam in hoc casu ea non bene ferre potuit ægrota, sed dolor potius discutientibus, temperatis & diaphoreticis auscultavit. In cacochymicis corporibus, maxime, si humorum adsociatur abundantia, frequentissime gignitur & quidem circa autumnum odontalgia; quo tempore etiam arthriticæ affectiones familiarius

Frid. Hoffmanni Oper. Tom. II.

occurrunt. Rebus itaque talium eventum fortientibus, ad præservationem venæ sectio, decocta lignorum temperata, convenientia evacuantia, abstinencia à vino, cibisque salitis acrioribus, utilissimam, depurando totam sanguinis massam, locant operam. Porro, cum fistula facile generetur in maxilla, quando in ejus alveolis materia acris putrida stagnat & exitum non invenit, quæ non modo ipsum dentem, sed osseam etiam maxillæ substantiam exedit, corrodit & ulcus difficulter sanabile, quod cognoscitur ex dolore, tumore & rubore, nec non putridæ materiæ post compressam gingivalem carnem effluxione, efficit; ut mature ipse dens extrahatur, quo corrupta illa materia non solum habeat exitum, sed etiam medicamenta proxime ipsi ulceri applicari possint, maxime est necessarium.

C A S U S V.

Fœmina XXX. annos nata, venarum sectioni diu adsueta, quotannis eam, quotiescunque uterum tulit, omisit, ob vanum & nullis rationibus innixum metum, ne hoc evacuationis genus periculum portendat. Sed semper fere affecta est gravi odontalgia, juncta cum tumore faciei seroso. Inter præludia vero hujus recurrentis affectus, ad frequentiam illius præscindendam usa est essentia, quæ constabat ex terra catechu, sanguine draconis, pauxillo aluminis usti & spiritu vini; quæ tam externe, quam interne sumta, mox acerbissimi capitis secuti sunt dolores, cum summa præcordiorum anxietate, insigni virium defectu animique deliquio conjuncti. His cessantibus symptomatibus tumor utramque maxillam occupavit, quem externa applicata cataplasmata non sublevarunt, sed exacerbarent, ita ut intensiori febre facta & intercurrentibus animi deliquiis abortum passa fuerit. Tandem emplastro manus Dei pertinax ille in scirrhosam duritiem abiturus tumor fuit depulsus.

Epicrisis.

Gravidis familiarissimæ sunt propter plethoricum & cacochymicum statum, & ob impeditionem perspirationem, mensiumque defectum, œdematosi vel etiam erysipelacei capitis & odontalgici affectus, qui matura venæ sectione, & eorum usu, quæ alvum clementer cum euphoria & per epicrasin movent, motuque insuper & victu moderato præscindi feliciter possunt. Si quis itaque excretionem humoris vitiosi, si jam imminet imprudenter velit impedire, quod sit adstringentibus; non potest aliter fieri, quin materia à sanguine jam segregata & corrupta in internas & nobiliores partes irruat, longe graviora symptomata inducendo. Notabile porro est, quod non secus semper sint cataplasmata ex discutientibus etiam composita, quia sæpius repellendi facultatem, dum videlicet humida non quisque ferre potest, nanciscuntur. Deinceps tumor serosus facile transit in scirrhosam duritiem, præsertim si nimis spirituosus discutientibus fuerit tractatus, qualis diutius inhæret, & difficillime resolvitur, neque facile emollientibus ad suppurationem disponi potest. Egregiam vero virtutem non semel sed aliquoties tali in casu experti sumus, ab emplastro sic dicto Manus Dei, quod maximam partem ex gummatibus compositum, atque in *Charas Pharmacopœa Regia* descriptum est.

Odontalgia, ex omitta cœnosa V. Sect.

CASUS VI.

§. II.

*Dolor den-
tium perio-
dicus, ex
vini &
dulcium
intempe-
rantia.*

Vir sanguineo-melancholicus vino adfuetus & dulcibus ultra modum delectatus, ex carioso dente dira sæpius tormenta, præcipue autem tempore nocturno passus est. Dolor hic erat periodicus: incipiebat enim circa decimam horam, excrucians usque ad tertiam matutinam, nullo extrinsecus apparente tumore aut calore præternaturali. In cavitate dentis hærebat particula spongiosa exquisitissimo sensu prædita. Hujus foramini intrusa fuit essentia castorei, cui tantillum laudani opiatum admixtum erat. Ita quidem doloris atrocitas quievit, nec per biduum reversa est; sed tertio die recruduit, & eadem hora rediit: non autem eodem remedio, sed ex camphora indita remisit. Elapsis aliquot diebus, cum idem dolor recurreret, nec camphora, nec prædicta essentia ullum levamen afferebant; sed potius tunc ad oleum caryophyllorum confugiendum fuit, cujus una & altera guttula denti carioso immissa levamen attulit. Accidit vero ut, cum sequenti septimana malum eodem modo infestaret, neque unum ex hisce tribus, utut singula applicata fuerint, quidquam in allevando malo præstiterint. Suasi, ut interne electuarium superius recensitum, cujus basin constituit rob sambuci, repetitis vicibus sumeret; externe vero balsamum nostrum vitæ naribus susciperet & denti essentiam castorei inderet: quo dolor etiam mitigatus fuit. Tandem dentis extractione facta, dolor nunquam rediit.

Epicrisis.

Hæc memoratu digna observatio luculenter docet, quam incerta & infida sint specifica sic dicta antodontalgica externa, idque hanc ob rationem, quod fibrarum & pororum in partibus solidis textura, & ab ea dependens debilitas non semper eadem maneat, sed brevi ab ipsis etiam medicamentis mutari possit: quo fit, ut idem remedium non eundem, sed alienum plane sæpe numero præstet effectum. Parum itaque auxilii cum expectandum sit ab externis, consultius semper procedimus, si curam ejusmodi affectuum congruis internis remediis adgrediamur & prosequamur, affectamque partem tantummodo in temperato calore & in expiratione æquabili & liberiori detineamus.

CAPUT X.

De dolore & spasmo otalgico.

THESES PATHOLOGICÆ.

§. I.

Definitio.

Circa dolorum & spasmodorum doctrinam dum versamur, ille etiam qui ad aures pertingit & non minori sævitia ac ceteri affligit, non reticendus erit: licet breviter, quicquid de hoc affectu commemorandum, dicamus. Est vero otalgia gravis dolor, in aurium cavitate sive meatu auditorio consistens, à fero acri extravasato, & subsistente intra membranam nerveam meatum auditorium cingentem exortus.

Pertinax hic aurium dolor, eos, qui rheumatismis & catarrhalibus defluxionibus sunt obnoxii, *Genesis & causa.* frequentius adoritur, vel, si sudor consuetus supprimitur, aut caput sudore madidum ventis frigidioribus desubito exponitur, prognascitur. Sæpe causa, inflammatio vel ulcus aurium est, ubi insignis ardor, dolor tensivus, pulsatilis, rubor, febris imo delirium junguntur: interdum à vermibus excitatur, & dolor vagus lancinans atque rodens percipitur. Præclare ARETÆUS lib. II. cap. III. de aurium dolore sequentem in modum differit: *Acusticus porus difficillime sæpe doloribus vexatur, ut etiam occipitium teneant & oculos atque buccarum musculos, & perseveratione quadam tardissima tempora & caput. Aliquando etiam humoris fluor per easdem cavernas fit quem græci rheumatismum vocant, & ita jugis ut sæpe vulneret altiora atque corrumpat, & ossa carie inficiat.*

§. III.

Otalgia tanta sæpius vehementia affligit, ut in provectioris atque adultæ ætatis hominibus delirium exciter, cum summa inquietudine & anxietate conjunctum; quinimo epilepsiam sic fuisse introductam nos observavimus. Phlegmaticos autem licet minori gradu infestet, horrendos tamen in cholericis, capitis dolores cum quadam mentis alienatione, vigiliis & inquietudine infert. *Processus & symptoma.*

§. IV.

Ratio, cur aurium dolores tam crudeliter lædant, ut tolerari vix possint, in eo potissimum posita videtur, quod membrana aurem quæ investit, osseo illo meatui firmiter annectitur, adeoque magis tenditur, nec non à dura matre originem sortitur, nervorumque irreptatu dives est. Quo magis autem membranæ nerveæ tensæ atque expansæ sunt, eo acutioribus doloribus eæ sunt obnoxie: quemadmodum id liquido apparet in perioestio, intra quod & subjectum os contentus sæpe humor horrenda symptomata producit, quod in panaritio aliisque ossium vitiis videre est. *Horum ratio.*

§. V.

Sæpe otalgia symptoma febrium acutarum *Prognosis.* evadit, ubi materiæ morbificæ ad aurem per metastasin fit translocatio; quemadmodum in morbo Hungarico interdum evenit, ubi surditas vel ingens saltim auditus difficultas exoritur. Quæ si in declinatione febris accidit infallibile convalescentiæ præbet signum: sed tunc vitium in auris internæ membrana & nervo acustico hæret. Quando vero metastasis ad aurem externam pertingit, tunc otalgia suboritur, quæ, nisi cito succurramus, ob doloris atrocitatem demere vitam potest. Qui ex lapsu vel casu in terram otalgiam patiuntur; ubi materiam saniosam per aures reddidere, è medio omnes sublatis sunt, teste RIVERIO observ. XVIII. p. 291. HIPPOCRATES vero in coac. prænot. pag. 538. §. 55. de exitu hujus morbi sequentia habet: *auris dolor pertinax, cum febre acuta & alio quodam signo aliquantum maligno juvenes quidem septima die occidit, & citius delirio correptos, si non multum pus effluerit ex aure, aut sanguis è naribus, neque aliud quoddam bonum signum compareat, Seniores autem tardius & minus tollit: nam & aures suppuratione præveniunt & minus delirant. Verum multi ex his*

his recidivant, atque sic pereunt. Monere autem hoc loco debeo, quod hoc decretum Hippocratis magis de dolore & tumore inflammatorio parotidum intelligendum fit.

METHODUS MEDENDI GENERALIS.

§. I.

Dolor componendus.

In curatione hujus dira tyrannide aures exercitis affectus, omni ratione eo annitendum est, ut dolorum illa vehementia, quæ causam interdum gravissimis symptomatibus præbet, componatur vel saltem mitigetur. Id quod variis quidem modis tentari atque obtineri potest. Nos autem aliis cunctis, pulveres nitrosos cinnabarinos, liquorem nostrum anodynum mineralem, nec non emulsiones seminum IV. frigidorum majorum præferimus. Quibus nihil proficientibus, ad opium rite correctum fugiendum est, quo nomine massam pilularum de styrace, *Starckeï*, *Wildegansii*, laudanum liquidum *Sydenhami*, vel cydoniatum *Helmontii* commendamus.

§. II.

Externis.

Externe emplastrum anodynum tempori lateris affecti nec non pone aures applicatum, quod ex mastiche, galbano, croco, oleo nucistæ expresso, castoreo, opio compositum est, desideratissimas fert suppetias. Dein etiam vapor ex lacte & speciebus fragrantibus atque emollientibus auri immixtus materiam peccantem non modo emendat, corrigit atque ad suppurationem disponit, sed & fibras nerveas nimis tensas relaxando dolorem solvit. Convenit quoque vesicam suillam decocto cum lacte ex floribus malvæ, verbasci, sambuci, meliloti, chamomillæ vulgaris, nymphææ, papaveris rhœados, semine lini & pauxillo croci repletam exterius adfecto lateri admove. Fumus quoque nicotianæ cum fistula inversa auri immixtus, item millepedes in oleo olivarum vel amygdalarum amararum infusi, nec non oleum scorpionum ad dolorem, si ab inflammatione vel sero acri provenerit, compescendum, maxime valere creditur.

§. III.

Humor stagnans discutendus.

Quemadmodum autem ubicunque humor stagnat atque subsistit, is promovendus atque discutendus est: ita etiam pulveres diaphoretici, leniter nitrosi, cinnabarini, cum aquis diaphoreticis atque analepticis propinati opportunissimam in hoc affectu locabunt operam. Plethora si urget, vena secanda: atque alvus renitens clysteribus emollientibus, vel internis laxantibus ex manna, cassia & rhabbaro paratis, ad officium redigenda. Dignus certe est qui hac occasione commemoretur locus apud modo laudatum ARETÆUM, ubi curationem hujus mali pulchre admodum proposuit. *Utendum inquit, loc. cit. requie corporis atque abstinentia & silentio summo: etenim organo auditorio accepta voce aures necessario commoventur, & propterea majores dolores efficiunt. Locandi præterea egrotantes calido lecto, & si dolor coegerit, phlebotomandi, atque tertia die levi atque sartil cibo reficiendi, & ob mitigationem doloris exterius admovenda vaporatio tepidi liquoris vel sacculi ex polline tenera confecti. Tum cataplasmata laxativa, & cum dolor initium sumserit, statim erunt admovenda sanguisugæ quas hirudines appellant circa fines auriculæ, vel circa ejus posteriora cucurbita admota, scarificando,*

Frid. Hoffmanni Oper. Tom. II.

adhibita spongiarum calidarum. Ipsam quoque cavernam involuta lana per specillum oleo calido tinctum, paulatim penetramus, atque illic lana derelicta ferramentum detrahimus.

CAUTELÆ ET OBSERVATIONES.

§. I.

Quandocunque dolor aurium à causa externa, immixta v. g. dura mole in aurem provenit, cuius rei exempla apud HILDANUM prostant, tunc in ipsa doloris sævitia neutiquam tentanda erit extractio cum forcipe vel alio instrumento: eo, quod non modo frustra hoc tentamen suscipitur, sed & dolor mirum adaugetis symptomatibus intolerabilis redditur. Sub doloris enim impetu nervus auditorius meatus vehementiori spafmo constringitur, ut adeo, quacunque demum etiam leviori vi externa accedente, dolor exacerbetur, & meatu sic angustiore evadente, materiæ exitus eo magis prohibeatur. Rebus ita se habentibus, foris supra dicti potius locum invenit applicatio, vel aliquot olei amygdalarum amararum in aurem instillatio; quippe quod præter vim demulcentem, sedativa quoque facultate est instructum: qua ratione, dum membranae tensæ emolliuntur & relaxantur, sola oborta sternutatione, corpusculum illapsum simul & semel sponte excussum fuisse, novimus. Atqui, cum huc apprime quadrent, quæ monumentis suis reliquit TRALLIANUS, non possumus, quin ejus de hac re sententiam ad verbum recenseamus, quæ *libr. III. cap. III.* ita se habent: *Si lapillus, aut faba, aut aliud quicquam in aurem incidat, specillum lana involutum in resinam terebinthinæ aut glutinosum aliquod intingito, ac ubi in aurem injeceris leniter protrahito, & sternutamentum excitans, os & nares obturato. Nam spiritus intentione, quæ ita fit, id quod intus impactum est, expellitur. Hoc autem continuo facito diligentiam adhibito, ut quam primum eximatur. Sin autem neque sic exciderit, inflammatione oboriente, convulsiones sæpe comitantur, ut etiam ægri de vita periclitentur. Quare oleum quoque tepidum frequenter infundere oportet: sic enim locis inflammatione liberatis, id quod insidet, facile eximetur.*

§. II.

Otalgia plerumque à causa interna solvitur & abscessu finitur, dum materia purulenta ichorosa, ex ipsis glandularum meatum auditorium externe obsidentium atque cerumen alias largientium poris & tenuibus canaliculis, stillat. Ad quas etiam in infantibus, præsertim qui spongiosioris corporis sunt habitus, tantus sæpe humoris serofi fit affluxus, ut ingens foetidi & purulenti humoris copia quotidie exeat. Sub tali morbi statu humorum impetus per laxantia leniora, mannata, rhabbarbina, passulata, aliquoties repetita divertendus, vel pediluviorum, vesicatoriorum, aut cucurbitularum ope in provectioris præsertim ætatis hominibus, ad inferiora invitandus est. Hac ratione molestus hic aurium fluxus successive minuitur, & salvo auditu organo sanatio perficitur.

§. III.

Quando major jam puris copia post inflammationem præcedentem ex aure effluxit; tunc, præter ea, quæ humorum impetum, à capite & auribus divertunt, quæ leniter exsiccant, putredinique

Ff 3

resistunt

Quid agendum, si à causa externa in aurem illapsa otalgia oriatur?

Materia purulenta diutius effluens divertenda.

Leniter exsiccanda.

resistunt exterius admovenda sunt. Veteres eo fine pastillos, ex aloë, croco, myrrha, sarcocolla, confecerunt, & aurium cavernis indiderunt, vel mulsam ex vino factam cum mali punici cortice, nardo, amygdalis amaris, croco, myrrha, alumine, vel herbarum vulnerariarum succis coctum, cavernæ aurium, si humor fortius effluerit, infuderunt. Qua de re evolvendus CÆL. AURELIANUS *libr. II. cap. 3.*

§. IV.

Tamen non subito inhibenda.

Cavendum vero est, ne diutino aurium purulento fluxui, à quacunque etiam causa proveniat, externis validioribus exsiccantibus & fortioribus adstringentibus desubito obex ponatur. Exinde enim ingentem parotidum tumorem, cum summo dolore sævisque symptomatibus stipatum, profectum fuisse, nostra pariter & aliorum fide constat.

§. V.

Parotides in febr. quomodo abigenda?

Quandocunque febribus acutis supervenit atrox ille aurium dolor cum intumescencia parotidum; non præsentius auxilium, ac in cucurbitularum cum scarificatione in nucha appositione, & solius cataplasmatibus emollientis, ex caricis pinguibus, croco, melle, succo ceparum tostatarum & radice liliorum alborum parati tepido usu, me invenisse plena fide testor.

§. VI.

Permes vel eliciendi vel enecandi.

Si dolor à vermibus aurem ingressis ortum traxerit, lacte tepido auribus immisso hi eliciendi, vel oleo absinthii, nucleorum Perficorum aut amygdalarum amararum sunt enecandi.

ENARRATIONES MORBORUM.

CASUS I.

Otalgia suffimigiis & emplastro brachii tumori applicatis inducitur.

Nobilissima Virgo quinquagesimum quæ jam complevit annum, activi ingenii, sanguineæ constitutionis, decem abhinc annos dolorificis partium externarum fluxionibus à sanguine nimium abundante, & ob ejus tardiores progressus impuriore reddito subortis continuo fere fuit obnoxia. Me quum hac de re consuleret, ut ter minimum singulis annis nimiam redundantis sanguinis quantitatem à secula vena detrahi curaret, auctor fui: unde melius etiam se habuit. Consuetam vero hac sanguinis educatione æquinoctio autumnali intermissa, atque sudore nocturno usitato, ex improvida brachii dextri refrigeratione, cohibito, postero die ingenti dolore una cum tumore in ejusdem brachii cubitu tentata fuit; qui adeo sensim crescebat, ut brachium neque flectere neque attollere potuerit. Ad hanc molestiam abigendam, amicarum suavis, frequentius ex guminatibus resinosis, succino, tacamahaca, usa est suffimigia: quo remissior quidem dolor redditus, sed tumor mutata sede superiorem humeri partem invasit, qui insignem in magnitudinem crescebat. Huic cum à chirurgo emplastrum applicaretur, evanuit ex parte quidem, sed in dextrum capitis latus irruens, in aure potissimum horrendum & acutum dolorem, ut vix ferendo illi par esset ægrota, introduxit. Totum dein caput insigniter tumefactum comparuit, auditus aderat summa difficultas, atque è naribus aliquot sanguinis guttæ cum mucosis multis humoribus secesserunt. Consilium meum, cum per medicinæ candidatum qui mihi ad manus erat exquireret, consultum primo omnium du-

xi, ut aperiretur vena pedis sinistri, quo abundanti nimium sanguini quodammodo exitus daretur; deinceps, ut infuso foliorum fennæ & rhabbari cum decocto passularum minorum, fordes è primis viis blande educerentur. Quibus præmissis, tenuem victum & pro potu decoctum, ex radice sarsaparillæ, glycyrrhizæ & floribus papaveris rhœados sumendum imperavi; atque ad successivam transpirationem & uberiores pravi humoris subsistentis promovendam diffusionem, ut æquali lecti calore corpus foveret, & mixturam, ex aqua florum sambuci, cornu cervi usto, antimonio diaphoretico & pauxillo nitri frequentius usurparet, laterique dolenti sacculum supra descriptum leniter calefactum applicaret, suasi. Et ita circa undecimum diem, largo sudore sponte erumpente, totum corpus fuit persusum, evanescente penitus permolesto accidente. Cum vero auditus gravitas cum dolore pressorio remaneret, consilium dedi, ut panis cum semine fœniculi igne cocti, recenter ex furno extracti & diffissi vaporem meatui auditorio reiteratis vicibus admitteret. Quo pacto expurgata demum pilulis balsamicis & cephalicis nostris, sordium mole, pristina valetudini sensim sensimque Nobilissima patiens fuit restituta.

Epicrisis.

Ex hujus affectus generandi, pariter ac eum curandi modo, medicorum juniores plura ad praxin utilia momenta capere & depromere possunt. Primo, quod dolores ejusmodi rheumatici, à venæ sectione neglecta & sudore consueto salutari cohibito, originem suam ducere possint. Dein, quod ad eos abigendos suffimigia non satis sint secura remedia, dum tonum cutanearum fibrarum nimium augendo, pravorum humorum motum ad interiora convertunt, quum potius ejusmodi vitiosi humores sensibilibus corporis partibus & poris inhærescentes successive & placide commovendi, & ad liberiores exhalationes incitandi sint. Et quod, tertio, in ejusmodi pertinacibus rheumatibus profligandis longe magis circumspicere & efficaciter agat medicus, si non multis activioribus sudoriferis naturam laceffat, sed tempus expectando, blandis & temperatis ad diapnoën disponentibus remediis utatur: quæ ratione contingit, ut natura sponte sæpe critice & salutariter morbum solvat.

CASUS II.

Generosus senex sexagenario major, macilentioris staturæ sed floridæ faciei, olim cum inter Westphalos medicinam facerem, consultum me adiit, qui à convivio, in quo vinum liberalius potaverat, sub aura nocturna peregre domum reversus, altero mane de gravativo capitis dolore, sinistrum præsertim latus affligente conquerebatur. Huic mox dolor auris valde acutus successit, qui tam atrociter intra paucos dies invalescebat, ut non modo omnem somnum adimeret, sed & tremorem partium universi corporis cum frigore excitaret, adeoque non frustraneus esset convulsionum metus. Intolerabilibus plane dolorum tormentis miserrime excruciatum senem inveni, qui non nisi à globo per sclopetum trajecto levamen optabat: tantæ insanix & desperationi proximus erat. Exterius, dolente in parte nihil præternaturale conspiciendum erat. Itaque alvus aliquoties à clysteribus ut aperiretur, curavi:

Otalgia immanis, ex ingesta vini copia & sequente refrigeratione.

curavi: atque interne non nisi pulveres antepilepticos, cum nitro, cinnabari & pauxillo laudani opiati remixtos propinavi, vaporem quoque decocti florum chamomillæ cum lacte auri frequentius admovendum præcepi: eo quod intra meatum auditorium consistere dolorem, conquerebatur. Tandem elapso die septimo, mitesciente doloris sævitia, corpus madore perfusum, pulsus redditus sedatior & mollior, qui ante contractus & durus erat, urina quoque antea valde tenuis & aquosa, crassius nunc sedimentum deposuit, & denique sponte aperto abscessu, ex aure successive duobus purulentæ materiæ cochlearibus effluentibus, omnia & singula gravia symptomata penitus remiserunt atque evanuerunt.

Epicrisis:

Mirari omnino subit, senem nostrum tam valenti & robusta natura adhuc gavissimum fuisse, ut adeo gravem capitis affectum, qui totum nervosum systema afflixit, feliciter superare potuerit. Atqui in hoc genere hæc ipsa curatio, quæ plus naturæ quam arti debetur, insignis autocratiæ naturæ exemplum præbet. Venæ sectionem cui non adfuetus erat, nolui admittere, nec fortioribus, sed lenissimis tantum remediis atrocissimum morbum in sene pertractare æquum duxi. Et hæc viri magna auctoritate in principatu Mindensi pollentis è tam gravi morbo evasio, mihi tum temporis juveni medico, magnam supra meritum meum famam & estimationem conciliavit.

C A S U S III.

*Dialgia
diutina
mira cru-
delitate
ludens,
effluxu pu-
ris soluta.*

Generosæ scæminæ, viduæ consiliarii Aulici filia, decem annorum puella, tenerioris & mollioris naturæ, de languore, inappetentia & doloribus abdominis, pungitivo etiam circa hypochondria, querelas cum ejulatu instituit maximas. Somnus erat exiguus, cum pavore plerumque comitatus. Præsentiam vermium horum parthenatum causam cum judicavissim; quæ iis & enecandis & expellendis accommodata videbantur, à me fuerunt præscripta: at vero in cassum adhibita. In lecto detenta per mensem & ultra, perpetuas de hisce symptomatibus movebat querimonias. Tandem facta dolorum ex imo ventre evanescencia, cephalalgia cum auditus difficultate graviter tentabatur. Accessit assidua vigilia, adeo ut per quatuor & quod excurrit hebdomadam spatium ne horam quidem capere somnum potuerit. Quotidie delirabat; nec quicquam cibi vel potus assumsit, auditu penitus amisso. Nihil ad vitam & vires conservandas præter intritum cerevisiæ cum pane cepit: quippe medicamina cuncta, omnia juscula atque alimentorum genera respuebat. Frequenter ægram invisebam: & quum urgeret consilium moestissima mater, me nihil certi de morbo ejusque eventu edicere posse fassus sum, DEO, naturæ & tempori opus relinquere consultius ducens. Tandem præter omnem opinionem evenit, ut nocte multum purulentæ materiæ aure effluxisse deprehensum fuerit, majori quantitate sensim succedente. Ita ad miraculum intra diem & noctem rediit somnus, revertit auditus, utut adhuc gravis, & pedetentim appetitus & vires revocatæ sunt: verbo, DEI ac naturæ beneficio reddita valetudini fuit nobilis puella, bona adhuc dum & prospera valetudine utens.

Epicrisis.

Et hoc quoque exemplum plane evincere & demonstrare potest, causas morborum adeo abstrusas sæpe esse, ut mentis acie medicus vix eas penetrare possit. Videinus tamen iterum ex enarrata historia, quomodo solus atrocior capitis dolor omnes functiones animales & naturales pervertere imo propemodum destruere valeat, atque à sola violenta nervosarum & fibrosarum partium agitatione, commotione & distractione proxime proficiatur. Hinc etiam fit, ut dolore sublato, tanquam causa horum accerborum symptomatum proxima, omnia ad pristinum & naturalem statum redeant.

C A P U T XI.

*De dolore podagrico & arthritico vero
& inveterato.*

THESES PATHOLOGICÆ.

§. I.

Discrimen podagræ & arthritidis recentis ab ea quæ radicata & inveterata est, insignie in prognosi & praxi medica habet momentum: nam illa est magis transitoria, ætate florentes & sanguine ac succis plenos ob vitium in rebus non naturalibus commissum corripit, & rheumatismi simplicis species est; hæc vero magis hæreditaria, corpora imbecilliora invadit atque in sanguine & sero corrupto radices agit, difficulter etiam tollitur, & sæpius ad mortem usque durat.

*Differen-
tia poda-
græ inci-
pientis à
radicata.*

§. II.

Quin nemo ideam, historiam, ac progressum podagræ melius & rectius SYDENHAMO, qui ipse fuit podagricus, delineaverit; placet hoc loco ex ipso auctore breviter & concinne eam exponere: *podagra exeunte Januario, aut incipiente Februario derepente & nulla fere præfensione antecedente ingruit, nisi quod ventriculi cruditate, aut apepsia ad septimanas aliquot æger laboraverit; corporis interim intumescencia quasi ventosa ex gravitate, quæ in dies augetur, donec tandem detonet paroxysmus, quem paucis diebus præit torpor & quasi flatuum descensus per femorum carnes cum affectione avas- uosæ, tum etiam pridie paroxysmi, appetitus voracior, non tamen naturalis. Sanus lecto somnoque committitur; hora vero secunda post mediam noctem excitatur à dolore pollicem pedis ut plurimum occupante, quandoque vero calcaneum, suram aut talum: hic dolor eum refert, qui ossium dictorum dislocationem comitatur, cum sensu quasi aquæ tantum non frigida partis affectæ membranæ affusæ. Mox sequitur rigor cum horrore & febricitatione aliquali. Dolor autem hic primo remissior gradatim intenditur (pari passu rigor & horror recedunt) idque in singulis horis, donec tandem sub noctem ad apicem pervenerit, se ad varietatem ossiculorum tarfi & metatarsi, quorum ligamenta obsidet, perbelle accommodans; nunc tensionem violentam, vel ligamentorum istorum dilacerationem, nunc morsum canis rodentis, quandoque pressuram & co-*

*Historia
podagræ ex
Sydenha-
mo.*

arctationem exprimens. Ad hæc, ita vivum exquisitumque habet sensum pars affecta, ut nec linteorum superincumbentium pondus, nec cubiculi à fortiori ambulatione concussionem ferre valeat: hinc mille conamina, situs tum ipsius corporis, tum membri affecti mutatione assidua, doloris sedationem incassum exambit; quæ tamen non contingit ante horam secundam tertiamve matutinam (decursu scilicet nycthemeri spatio à primo appulsu paroxysmi;) quo tempore æger post materiæ peccantis modicam digestionem & difflationem aliqualem, subito à dolore respirat. Jam leni madore perfusus somno concedit, à quo evigilans, dolore multum imminuto, partem affectam tumore recenter occupatam cernit. Intra paucos dies alter pes eodem dolore torquetur, easdemque excitat tragædias, nonnunquam etiam ambos pedes in initio occupat: postquam utrumque pedem exercuerit, qui sequuntur paroxysmi abnormes sunt, tum etiam quoad durationem; hoc tamen ubique servat, quod dolor noctu recrudescat, mane vero remittatur; atque ex serie horum paroxysmorum constat paroxysmus, qui dicitur podagræ, diuturnior breviorve pro ægri ætate, &c. quod in vegetioribus, & iis, quos podagra rarius invisit, diebus sæpe quatuordecim fit; in senioribus, atque iis, quos sæpius afflixit, duobus mensibus; iis vero, qui aliquot annis podagrici fuerunt, non prius valedicit, quam ætas adultior eam fugaverit.

§. III.

Ulterior
progressus
& terminatio.

Ad quatuordecim primos dies urina coloratior est, quæ post separationem sedimentum rubrum, & quasi arenulis refertum deponit; nec æger ut plurimum nisi tertiam potulentorum quæ assumsit partem per vesicam reddit; alvus item ad dictos fere primos dies constipata est. Appetitus prostratio, rigor totius corporis sub vesperam, partium etiam non affectarum gravitas & molesta sensatio integrum paroxysmum comitantur. Recedentem paroxysmum excipit pedis affecti pruritus vix ferendus, maxime inter digitos, unde decidunt furfures, & pedes ipsi quasi ab epoto veneno desquamantur.

§. IV.

Symptomata morbi
post annos
aliquot in-
festantur.

Atque hoc modo se habet podagra regularis, cum vero vel indebita medicatione turbetur, vel diuturnior invaserit jam per annos aliquot, phænomena sunt multum diversa à jam descriptis. Jam manus, carpos, cubitos, genua, aliasque regiones occupat; quandoque digitos distorquens, motu paulatim privans, tandemque concreciones, circa articulorum ligamenta, tophaceas generans, cretam vel oculos cancrorum æmulantes; nonnunquam in cubitis tumorem subalbum ciet, fere ad ovi magnitudinem, qui sensim inflammatur; nonnunquam femur occupans, sensum exhibet quasi ingentis ponderis appensi, sine dolore tamen notabili; ad genu exinde petens, id acrius urget, artus jam habet æger fere undequaque contractos & impeditos, ita ut claudicet, & permolestè prorepat.

§. V.

Descriptio
arthritis
ex Aureliano.

Ex veteribus omnium optime historiam arthritidis descripsit CÆLIUS AURELIANUS Lib. V. cap. II. morborum chronicorum hunc in modum: sequitur autem passione articulari tentatos torpor, atque fornicatio eorum articulorum qui tanguntur, & difficilis flexio, atque rursus

extensio: item gravedo & vacandi dulcedo, & ad parvum motum vehemens labor, atque dormientibus sensus quidam resonantium articulorum, & cum de somno surrexerint, veluti saltu earundem partium afficiuntur: tum horror, vel rigor, atque tremor sine ulla manifesta ratione partium sequuntur. Dehinc cum passio se extollere cæperit, in podagricis dolor alterius pedis, aut utriusque cum punctionibus nascitur, incipiens à vestigio aut plantæ cavitate, vel sæpius à majore digito, attestante torpore, & gravedine, & difficili motu, cum horrore rigido, atque inæquali per membra, & aliquando plurimo fervore, aliquando frigore, ut alii refrigerantia, alii calida desiderent ægotantes, & propterea quidam alteram calidam, alteram frigidam podagram putaverint nuncupandam. Item initio, ut sæpe contingit, similis color patientium atque sanarum videtur partium, attestante æqualitate, nullo emergente tumore. Dehinc inflatio partium fit cum rubore. Quapropter relevatio altiorum sæpe sequitur. Tum pejorante passione arthritica sufficitur passio, cum in unum omnium cogitur articulorum consensus, & facile ex articulo in articulum venit dolor, nec desinens priusquam cunctos invaserit nodos. Sæpe denique prioris articuli dolore declinante secundus invaditur, atque eodem similiter mitescente tertius sumit exordium, consentiente etiam vesica, atque spinæ majoribus nervis, quos *τένοντες* appellant: & in stomacho etiam nausea vel vomitu jactantur ægotantes. Tunc articuli tumentes inflantur, ac deinde durescunt, & solidati saxeam faciunt qualitatem: tunc etiam nigriores efficiuntur, atque contorti, ut in obliquos partes digiti vertantur, aut reflexi supinentur, aut vicinis adfixi incumbant, & aliquando humore purulento vel mucilento collecto, aut viscoso generent poros, quos non transitus dicere poterimus: dehinc etiam lapides sufficiant, qui quidem articulos solvant, & cutem distendant, atque erumpentes promineant, & chirurgia detrahantur: aut exilientes cyathis, cum ferramento tollantur, quod nos laureolum dicere poterimus, & rursus renascantur. Tum membra dolentium partium, cessante nutrimento, tenuata languescunt, & arida efficiuntur. Erunt præterea ægotantes parvis ex causis mobiles atque iracundi, siquidem motum vel actum non sine querela accipiant.

§. VI.

Podagræ igitur rationem formalem, si rectius investigare velimus; consistit ea ipsa in vehementi spasmio, quo membranæ ac ligamenta nerveo-tendinosa, quibus ossa in sedibus suis collocata retinentur & firmanantur, violenter lancinantur, divelluntur, distrahuntur sæpe ad rupturæ usque vel pali infixi sensationem, à sero vitioso acrisalfo, per minimas arteriolas & exiles glandulas ligamentorum copiosius advecto suscitatus, cum febrili motione & partis adfectæ inflammatione conjunctus.

§. VII.

In hoc adfectu atrocem spasticum dolorem fibrillarumque & membranarum nervearum strictionem excipiunt atque indicant varia phænomena & quæ hoc dolore correptis contingunt symptomata: videlicet invadente dolore pori cutis in pede angustantur, influxus sanguinis & refluxus debitus impeditur, sudor ac transpiratio nunc cohibetur, nunc augetur, membrum rigore

Ratio formalis podagræ.

Symptomata spasmio debentur.

ac rubore concutitur, venæ disparent, & valde sensibilis in parte affecta distensio & distractio percipitur, concomitante aestu, rubore & sublequente tumore. Spasmus autem hic non tantum in afflicta parte incipit & subsistit, sed ulterius serpit, inque consensum trahit alias eximioque sensu præditas internas partes, quæ, simili spasmo affectæ, varia producant symptomata. Unde non ignota potest esse ratio, quare frequens oscitatio, flatuum descensus per femoris carnes, horripilatio per dorsum ac lumbos, ac febriculosis pulsus, præcordiorum anxietas, animi defectio, somni inquietudo, torpor atque vermiculatio articulorum, ciborum inappetentia, nausea, in furis quasi convulsio, vomitus ubi imminet paroxysmus vel jam præsens est, ægros infestet? quæ omnia ex spasmodica constrictione & inde resultante sanguinis motione non possunt non originem suam repetere.

§. VIII.

Id demonstratur.

Hujus argumenti veritas, nimirum quod arthritici & podagrici doloris essentia in spastica fibrillarum nervearum contractione versetur, ulterius exinde clarius demonstrari potest, quod, quandocunque materia serosa acris arrodentis indolis è partibus dolentibus perversa medicatione aut alia fontica causa ad nobiliores internas partes nervosas repellitur, atroces in iisdem dolores & spasmi excitentur. Ita in praxi frequentibus & fere quotidianis constat observationibus, à materia podagrica retrocedente, si ea fertur in cranii membranas, gravem cephalalgiam, in membranas dentium atrocem odontalgiam, in tunicas ventriculi, ejus spasmus, singultum, vomitus seu cardialgiam, in pulmonum tunicas nerveas, tussim convulsivam & asthma spasmodicum, in membranas costarum pleuritidem spuriam, in tunicas intestinorum, gravissima tormina & colicum dolorem, denique in viis urinariis & vesica ischuriam & spasmus excitari.

§. IX.

Causa efficiens

non est sal acidum vel biliosum,

sed tartareum.

Exposita sic indole podagræ, quæ in spasmo dolorifico, omnium ferme symptomatum parente consistit, excutiendum ulterius remanet, quænam hujus effectus causa, atque in quibusnam partibus genesis mali existat? Medicorum recentiores ferme omnes in hac sententia videntur convenire, podagram morbum esse metastaticum salinum, à collectione salis fluidi acris stimulantis intra membranas ac ligamenta articulorum productum. Cujus generis autem ac ingenii illud sal sit, dissentire videntur. Alii acidum, alii sal tenue corrosivum biliosum, alii austerum & stypticum principium inculant. Nos purum & sibi relictum acidum in animantium corporibus vix reperiri existimantes, tartareum illud esse asserimus, ita tamen, ut acidum quoad figuram suam scindentem spiculatam, haud secus ac in tartaro prædominetur. Interim tamen non negamus, pro diversitate morbi atque ægrorantium natura ac temperamento, & pro causarum antecedentium diversa indole, majori volatili acedine biliosa, vel fixiori, serum, quod salium morbosorum est vehiculum, esse imbutum; unde etiam arthritis variat, & volatilis & fixus exsurgit dolor, magis vel minus ardore atque inflammatione insensus.

§. X.

Quæ sententia stabilis.

Multa autem sunt, quæ peccantem materiam

tartaream subinde peccare evincunt. Etenim experientia compertum est, ad calculum dispositos ut plurimum evadere podagricos, & hos è contrario calculo tentari; ita ut affectus hi invicem sororientur, & unus in alterum facile abeat. Serum autem in dictis morbis tartarea salfedine imbutum esse, nemo qui gnarus rerum medicarum est, ibi inficias. Accedit, quod in consummata podagra vel ischiatide ligamenta juncturarum erosa à sabulo tartareo ibi subsistente reperta in sectionibus fuerint. Quin imo tophacea materia, quæ intra articulos in senum qui acido abundant, podagra, copiose quandoque reperitur atque eximitur, manifestissime naturam tartarei salis, quod ex acido & copiosa terra conflatum est, demonstrat. Ita KERCKRINGIUS in *spicileg. anat. obs.* 28. sub examine chymico ejusmodi tophis sive materia podagrica, elicit spiritum quendam inter spiritum tartari & salis ammoniaci quodammodo medium, hoc nimirum acidiorum; illo vero mitiorem: & oleum, oleo tartari foetido colore, foetore & consistentia in omnibus simile: nec non sal ex capite mortuo quod extraxit, ab eodem sale tartari parum abludens, nisi quod sapore quodam extraneo infestus, ingratam quandam pariebat nauseam.

§. XI.

Sic observatum quoque fuit ab auctoribus, *Et ulterius probatur.* podagricorum excrementa nimirum sputum, urinam, sudorem collecta, prævia evaporatione, præbuisse materiæ candescentis concretæ in tartari consistentiam insignem copiam. vid. PECHLINUM *obs.* 25. & KERCKRINGIUM *l. c.* Notavi ego in Viro generoso, qui subinde podagra divexari solet, sequentia: hic paroxysmum imminens præsentire solet maxime ex colore annuli, quem digito gerit, ex mercurio mediante venere ac tutia confecti, qui aliquot dies ante paroxysmum & per totum morbi cursum livorem ac nigredinem contrahit, qui sponte tandem desinit, pristino redeunte colore sub declinationis tempus. Id quod curiosum phænomenon mea sententia effluviis salino-sulphureis per transpirationem prodeuntibus adscribendum venit. Taceo materiam in articulis podagricorum collectam, & quandoque vesicatoriorum vel aliorum remediorum usu effluentem, summe corrosivam, ipso sensu teste, naturam præ se ferre. Confirmare inter alia præsentiam tartarei fluidi salis in podagricis videtur nimia potatio vinorum tartareo talismodi succo scatentium, quæ podagram generare solent frequentissime; item nimia ciborum appetentia & voracitas, maxime ante tempus invasionis, quæ sine dubio lymphæ acidæ abundant in salivali & gastrico fluido debetur.

§. XII.

Congreditur autem tartareum hoc sal cum mucilaginoso ac pingui, quo articuli & juncturae omnes gaudent, rore ac glutine, quod secundum naturam insipidum, ossa, juncturas, ac cartilagine lævigare & obducere solet. Notabile enim est, sub membranoso ligamento, quo articuli firmari solent exstare tunicam mere glandulosam ac vesiculosam, quæ etiam synoviae sedes est, in quam terminantur maxime in homine multæ vasorum sanguiferorum ramificationes, hæcque tunica, propter laxitatem suam minime inservit ossium conjunctioni, sed mucilaginem certam instar ovi albuminis, licet non semper adeo

Sal tartareum cum mucilagine glandulæ con- greditur.

adeo claram & limpidam secernit. Præterea in majoribus articulis exstant quoque corpora glandulosa pinguedine obsita, quæ similem mucilaginem à copiosis sanguineis vasculis ibi secernunt ad lubricandas juncturas ipsasque ab incalescentia & attritione conservandas, uti copiose pariter ac solide id deduxit celebris Anglus CLOPTON HAVERS, in *Osteologia*. De hoc ipso glutine articulorum jam dudum divus HIPPOCRATES in *Libr. de locis in homine*, sequentia pronunciavit: *Humidum nativum articulorum ubi male valet, male habent articuli; ubi bene, & ipsi articuli.*

§. XIII.

Exinde
coagulum,
quod cruciatum
causa me-
diata est.

Quotiescunque itaque serum falsum excrementitium in sanguine superabundans descendit per glandularum poros nimis laxatos ad ipsos articulos, non modo coagulum mucilaginis efficit, quod difficilius postea resolvitur, vel etiam, si in copia adfuerit, in gypseum corpus tandem convertitur, verum & intra subtilissimi sensus membranas incarceratum propter angustissimas vias, minus commode propellitur nec evaporat, sed detestabiles cruciatus in parte affecta suscitatur: cujus sæpius tanta est sensibilitas, ut omnia quantumvis leniter admota tegumenta vel medicamenta officiosamque manum vel è longinquo reformidet. Attentione dignum est, nihil magis mucilaginem articulorum destruere atque coagulare, quam acidum tartareum sal lenius v. g. acetum vini, vel vinum rubellum album, neque tantam mutationem atque coagulationem ipsi inducere aliud potens, uti oleum vitrioli &c. sicuti id variis experimentis clarissime demonstravit *Clopton Havers l. c. p. 258.* evidenti scilicet documento, vina tartarea aptissima esse ad procurandos paroxysmos arthriticos, ubi tonus glandularum debilitatus est & patiens aliquam ad hunc affectum dispositionem habet.

§. XIV.

In podagra
calida se-
rum sul-
phureum,
acre &c.

Quemadmodum vero in senibus neque minus in hypochondriacis & calculosa nephritide laborantibus podagricis serosa sanguinis pars tartareo fixiori acido referta est: ita in corpore bilioso calidæ temperaturæ virili, ubi arthritidis & podagra magis calida vaga, dum ex una parte in alteram transit, serum biliosis acribus sulphureis imo alcalinis onustum est. Sic *Acta Erud. Ann. 1698.* referunt, Medicum Anglum *Colbatch* serum podagricum miscuisse cum syrupo violarum, & semper colorem cœruleum in viridem mutatum observasse.

§. XV.

Paroxys-
mus poda-
gricus, fe-
bre stipa-
tur.

Deinceps quoque illud animadversione dignum est, quod nullus paroxysmus podagricus sine motu febrili sit, quem præcedens lassitudo corporis inquieta, horripilatio, refrigeratio extremorum, oscitatio, alvi obstipatio, pulsus citior, sitis, vigilia & subsequens æstus, ejusque circa noctem exacerbatio, urinæ in principio tennes & aquosæ, spasmo vero remittente, crassæ cum sedimento, neque minus solutio doloris & spasmodorum per sudorem copiosorem satis evidenter arguunt: cujus motus febrilis beneficio sit, ut excrementitiæ serosæ salinæ peregrino caractere imbutæ sordes, ex parte per varii generis in corpore nostro organico constituta colatoria & emunctoria foras salutariter eliminentur atque excernantur. Hic motus quoque auc-

tior febrilis solidorum & fluidorum, qui non actu electivo, multo minus morali & rationali fit, genuina causa est sævorum dolorum ac spasmodorum in partibus extremis, qui paroxysmis in podagra nunquam non associantur, dum videlicet ad nervosas & valde sensilis texturæ articulorum membranas & ligamenta, quibus complures exiguæ glandulæ inhaerent & quæ minus congrua sunt salium excrementitiorum emunctoria, cum impetu impurus serosus sanguis advehitur & congeritur; ubi postea ichorosus ille latex præter naturæ ordinem separatus, stagnans & subsistens ejusmodi atroces naturæ humanæ plane infensos spasmos & dolores concitat; qui quo vehementiores sunt, eo plus febrilem æstum incendunt, atque symptomata exacerbant. Siquidem id probe tenendum est, duplicem in paroxysmis ejusmodi arthriticis & podagricis observari febrem, essentialem & symptomaticam, illa ad naturam catarrhalis, vel in sanguineis ad synochæ simplicis genium accedit, cum qua paroxysmus incipit & progreditur, noctuque habet suas exacerbationes: altera vero symptomatica doloris acerbioris soboles est, & inflammationem insequitur.

§. XVI.

Quod autem humor vitiosus non intra omnes articulos & quidem mediante tunica ligamentorum glandulosa, sed duntaxat certis in partibus separetur, ut videmus in chiragra, gonagra, podagra & affectione ischiatica; id potissimum tono & robori destructo horum ligamentorum, quæ articulos firmant, adscribendum est. Quod vero ad pedes frequentius feratur ac descendat, hæc subesse ratio videtur, quod pedes frigori humido, quod valde eorum naturalem tonum lædit, plus quam aliæ partes expositi sint; deinceps quod à calceorum pressione ac strictura copiosi tubuli arteriosi & venosi minimi, per quos libere humor redire & circulari debet, valde comprimantur: accedit quod lentior & tardior per partes à fonte caloris corde nempe remotas, ob situm etiam perpendicularem, lymphæ ac humorum sit circulatio. Superest adhuc una ratio & quidem præcipua, scilicet quando pedes dolor affligit, cogimur quiescere, ne deterius fiat malum; quies autem ulterius nocet, dum humores ob motum cessantem, ibi magis tenentur subsistere, & ita imbecillitas augetur: sic edocemur familiari exemplo, quando pedem diu in uno situ tenemus, vermiculationis sensum oboriri. Vocanda huc quoque est in auxilium, nativa pedum imbecillitas à parentibus podagricis contracta, quæ partim in spirituscentia humorum deficiente, & inde resultante partium solidarum maxime extremarum debilitate, vel in ipsa prava textura & conformatione, & pororum dispositione consistit. Idem obtinet in aliis artubus, quos occupare solet dictus dolor arthriticus.

Ratio cur
materia
vitiosa cer-
tas solum
partes oc-
cupet.

§. XVII.

Unde vero tanta feri excrementitii ex parte falsi & tartarei, ex parte etiam acris biliosi coluvies, in arthritidis & podagræ subjectis corporibus ingeneretur, quæ proinde & motuum febrilium podagricorum & acerbissimorum dolorum veram & materiale causam constituit, vix aliam quam naturæ ægrotantium debilitatem & vitium in usu rerum non naturalium commissum reperire & incusare licet. Per naturæ debili-

Copiosus
feri humor
proventus.

ex debili-
tate.

debilitatem vero nihil aliud intelligimus, quam talem, à nativitate, solidorum, quæ fluida continent, movent, imo motibus vitalibus secretoriis, excretoriis præfunt, non satis validam & robustam conformationem & structuram à parentibus potissimum acceptam: hinc natura debiles & morbofi parentes, ut sunt hypochondriaci, hæmorrhoidarii, podagrici, calculosi, aliisque anomalis motibus obnoxii, etiam liberos in hos morbos proclives generant. Nam quando ipsos podagricos, qui diutius hoc morbo affecti sunt, spectamus ac consideramus, plerique sunt habitus minus fibrosi, spongiosi, tenerioris, qui nervos & tendines habent exiguos, copiosis & valde exilibus vasis donati, qui sanguine multo seroso, qui è vena emissus in oculos incurrit, abundant, & hinc etiam in primis annis narium hæmorrhagiis & in proveciore ætate hæmorrhoidum fluxui sunt obnoxii & affueti, animi quoque sunt inconstantioris mobilioris, ad omnis generis passiones vitalibus motibus nocivas proclives; quæ cuncta satis totius naturæ microcosmicæ imbecillitatem arguunt atque demonstrant. Accedunt postea satis insignes diætæ atque in regimine vitæ aberrationes & vitia, quæ ita sunt comparata, ut non modo partium solidarum tonum, robur ac vim systalticam motricem plus debilitent ac labefactent, sed etiam multos crudos, intemperatos, naturæ & succis vitalibus, qui blandi esse debent, plane alienos humores invehant, & ob imminutum salutarium excretionum negotium plus justo in corpore retineant & accumulent.

§. XVIII.

Ad quam
conferunt:
Venus im-
moderata.

Ex iis vero, quæ nervosis & motricibus partibus vires & robur subducunt, primum merito locum Venus immoderata obtinet. Nam semen, ur̄i delibatissimæ & spirituosæ lymphæ in sanguine soboles est, ita si intemperantius exhauritur, non potest aliter fieri, quin & partes fluidæ subtilitatem & blandam spirituascentiam, solidæ vero vigorem & elaterem amittant, atque adeo omnes functiones corporis non exiguum inde capiant detrimentum. Et hinc potest etiam secundum scita Hippocratis, ratio repeti: quare pueri, quare mulieres & eunuchi non facile podagram patientur? Hinc quoque poëtis Bachi & Veneris filia nuncupata est; unde antiqui versus:

*E solvilumba venere, solvilumboque
Baccho, creata est solvilumba chiragra.*

Et Latini Poëtæ carmen:

*Ut Venus enervat vires, sic copia vini,
Et tentat gressus debilitatque pedes.*

Notabile autem hoc est, quod arthritidis ex abusu Veneris sæpius unice suam originem petat, & quod omnes arthritici & podagrici, propter sal illud tenerum stimulan in lymphæ & sanguine contentum, ad Venerem præ aliis magis sint proclives, adeoque magis magisque enervando vires, malum contumacius reddant.

§. XIX.

Vini potus
largior.

Præterea spiritus, corporis nostri motores, non parum invertit & nervis debilitatem addit vini & maxime generosi vel etiam tartarei acidi largior potus, utpote partes vini sulphureæ nimis celeriter per venas rapiuntur ad caput, subeuntque poros nervorum & spiritibus sese associant, quorum crasin ob cruditatem & heterogeneam indolem suam valde invertunt, ut munere suo in regendis machinæ artubus defungi minus recte queant Experientia multiplici deprehensum

est, nihil plus ad tartaream illam, aut quomocunque appellare libet, materiam podagricam & arthriticam generandam aptum esse quam vinum; quæ etsi in corporibus quibusdam sequestretur, tamen in illis quæ viscerum debilitate laborant, servatur atque in sanguine accumulatur.

§. XX.

Datur tamen vinorum magna diversitas. Quæ enim in arenosis terris proveniunt, minus materiæ ejusmodi tartareæ continent. Dixit WEPFERUS Dec. I. An. 2. c. 39. raros apud Schaffhusianos esse podagricos & calculosos, neque convulsivos motus frequentes, & potissimum id fieri à vino rubello salubri. Sic etiam memini Jenæ, quamvis ab incolis ejus loci satis liberaliter bibantur vina vernacula, non tamen multos esse podagricos. Contra observatum fuit, quæ in terra pingui argillosa & limosa proveniunt, ad fovendam podagram esse paratissima; cujus generis sunt *Bohemica, Hungarica, Austriaca &c.* Neque obstat, vina magnam quantitatem tartari terrestris, qui sæpius vias urinarias magis detergit, possidere, utut in podagra progignenda minoris efficaciam sint aliis, quæ talem quantitatem non complectuntur, sed forsitan subtiliori ac penetrantiori acido, quod cum succis vitalibus facillimam init copulam, instructa sunt. Sic vini *Tockaviensis* libræ quatuor destillatæ vix drachmam dimidiam; totidem autem libræ *Rhenani* drachmas minimum quinque largiuntur. Multo magis autem talia vina nocent, si ad ebrietatem usque ingurgitantur, quo spirituum vigor naturalis magis extinguatur & lymphæ tenuis inspissatur, ut deinde viscerum tono debilitato minus commode illa, quæ in vinis nociva atque perniciosa sunt, excludi queant.

Quod tam
men limi-
tandum.

§. XXI.

Sicut affectuum intemperantia in excitandis & fovendis morbis plurimum valet: ira id maxime in chronicis affectibus, inter quos podagra primas tenet, animadvertimus, & quidem hanc potissimum ob rationem, quod diuturnior tristitia animique angor, intensior cura ac sollicitudo, profundior quoque & haud interrupta meditatio, necessarias corporis vires suffurando & vitales humorum motus, neque minus secretorios & excretorios imminuendo, exsuperans pabulum atque materiam, impuritates videlicet varii generis salino-sulphureas, ad genesin hujus affectus subministrant. Ita vehementior quoque animi commotio & ira ipsos arthriticos paroxysmos desubito sæpe cum febrili quodam motu excitat.

Affectus
animi.

§. XXII.

Ulterius, luxuria, nimia voracitas, continuæ comestiones, cum vita sedentaria otiosa & desidii si conjunguntur, neque minus exercitiorum intermissio & ex mobiliori vitæ genere quietum & motus expers, & podagræ & aliis pertinacioribus morbis ingenerandis mirifico velificantur. Nihil enim magis, præterquam nimia ingestorum copia cum desidii, magnum illud excretionum, sine quibus sanitas consistere nequit, negotium supprimendo, ad impurorum humorum redundantiam, à quibus deinceps dolores, febrilesque motiones proveniunt, corpori ingenerandam conferre, attenta consideratione discimus.

Luxuria
& desidia.

§. XXIII.

§. XXIII.

*Transpira-
tio probi-
bita.*

Et quoniam sufficienti, per jugem transpirationem facta, sordium valde activæ indolis aquoso-salinorum halitusorum expulsionem, corpus ab innumeris morborum afflictionibus nec non à paroxysmis & recidivis immune redditur: ita etiam in rebeli isto podagrico affectu, qui in corporibus gracilioribus minus densi & obesi habitus, perspirabilibus, paulo rarius sedem fixiorem tenet, neque in hominibus opificibus & qui labore & motu corpus continuo exercent facile gignitur, id ipsum observamus. Quare etiam æstivo tempore arthritici & podagrici paroxysmi filere & conquiescere solent; cum, è contrario, qui densi & pinguioris habitus sunt, literati & laboribus corporis & manuum vacantes, crebrius & diutius hoc affectu exerceantur, qui præsertim autumnali humido & frigido aëre, subita tempestatum mutatione ingruere & tragoediam ludere solet: quinimo sudoris consueti intermissionem, notabilisque transpirationis, quæ ex indusiis inspectis cognoscitur, atque excrementorum inter pedis digitos defectionem, imminemtem designare paroxysmum sæpe à nobis observatum est.

§. XXIV.

*Hæmor-
rhagiarum
con-
suetarum
defectio.*

Inter antecedentes doloris podagrici causas, non exiguum locum fluxuum sanguinis consuetorum, hæmorrhoidum & mensium intermissio vel interceptio tueri videtur: siquidem & firma experientia & unanimi veterum consensu & auctoritate confirmatum habemus, foeminas, quamdiu menses rite fluunt, & viros in quibus consuetus hæmorrhoidum fluxus rite, ratione modi, quantitatis & temporis se habet, à molestissimis hisce affectionibus immunes degere, imo hos fluxus doloribus istis supervenientes, corpora ab iis præservare: ex adverso vero, si solennes hæmorrhagicæ vacuationes, vel ex vacillante naturæ robore, aut ex perversa diætâ, vel importuna & imprudenti medicatione resistant, deficient, vel supprimuntur; atroces dolorificas has passiones generari imo recrudescere & ingravescere observatione identidem firma & stabili constat: ut itaque ex hisce observatis clarissime elucescat, quantum ad depurandum sanguinem & ad morbos ex feri vitiosi colluvie succrescentes impediendos, hæ solennes licet præter naturam contingentes sanguinis excretionem valeant. Ex quibus tamen neutiquam id consequitur, ut nonnullorum nostri ævi medicorum & theoreticum & practicum dogma fert, tantum à fluxu hæmorrhoidali, ejus defectu & frustraneis ad eum excitandum naturæ moliminibus, originem hujus truculenti affectus arcessendam esse, & totum curationis opus ad illum provocandum collineare debere; cum hujus hypotheseos patroni, plethoram pro causa proxima materiali potissimum habeant, utut ei inter remotas locum concedamus. Nos vero vitiosam feri dyscrasiam atque impuritatem potius ad excitandum hunc affectum maximum momentum afferre arbitramur, cum nota nobis sint exempla, sub ipso paroxysmo podagrico, calculoso & arthritico, hæmorrhoides fluxisse: id quod inter alios, celeberrimi nominis medicus B. DOLÆUS, crebro per litteras apud nos conquestus est.

§. XXV.

Prognosis.

Ratione morbi eventus, quoad prognostica hæ observationes rarius fallunt: Podagra non

facile è medio tollit hominem, nisi humor vitiosus, ob magnam virium expultricium imbecillitatem, ad summam corporis corticem propelli nequeat, sed intus retineatur: vel ab errore medentis aut ægrotantis ad interiora repellatur, quod HIPPOCRATES *libr. de affect.* affirmat: & tunc gravibus supervenientibus morbis, ut sunt lethargus, hemiplexia, apoplexia, asthma convulsivum & suffocativus catarrhus, peripneumonia, hydrops, inflammatio ventriculi & intestinorum, extinguuntur.

§. XXVI.

Quemadmodum, quibus congenita & hæreditaria est arthritis & podagra, & qui ex pravo vitæ genere primis in eam annis incidunt, rarius diu vivunt: ita iis, qui demum provectiori ætate atque in senectute, dolore corripuntur podagrico, longævitatem promittit; dum arthriticis & podagricis paroxysmis re vera criticis, humores excrementitii, impuri senectuti familiares corporique infensi, hac ratione expurgantur.

*Juniores
podagrici
rarius diu
vivunt.*

*Seniores
contra,
longius.*

§. XXVII.

Podagra incipiens, præsertim si rheumatismi sanguinei species est, moderata & convenienti diætâ congruisque remediis, sanguinis præsertim missionibus opportune institutis, facile præcaveri & tolli potest: ubi vero jam multoties & singulis fere annis paroxysmus recurrit, & quos affligit, in articulis tophos habent, sicca alvo vexantur & senes sunt, ii, testante HIPPOCRATE *libr. II. prorrh.* nulla humana arte sanari possunt: hanc potissimum ob rationem, quia vitium non tam in fluidis, sed in solidis, eorum tono, robore, textura & conformatione naturali destructa, quod non facile tollitur, consistit. Hinc vetus dictum enatum: *solvere nodosam nescit medicina podagram.* Optime vero HIPPOCRATES *l. c.* ratiocinatur: *juvenes nondum callos habentes curari possunt, si accurate vivant laborisque sint amantes, alvumque bonam & apertam habeant.*

*Incipiens
podagra
facile ab-
igitur.*

*Inveterata
incurabi-
lis.*

CURA PRÆSERVATORIA.

§. I.

Quamvis valde difficilis eorum morborum, qui congeniti sunt, quorum causa in labe tam fluidarum quam solidarum partium consistit, & quæ à prava vitæ & diætæ ratione foveantur, ac in habitum quasi degenerarunt, sit curatio; attamen facilius longe & expeditior est eos præservandi, præcavendi, & avertendi via ac methodus. Quam cum medicus omnino & recte cognoscere & prudenter applicare debeat; nobis eam hic exponere est propositum: utpote quæ potissimum in causis hujus morbi, remotioribus dictis, declinandis & removendis consistit.

*Præserva-
tio facilius
ac curatio.*

§. II.

Primo omnium, qui vult degere immunis à pertinaci tam podagrico quam articulari affectu, temperet sibi, quantum possibile est, ab usu Veneris maxime immoderate, quam corporis languor & dolor subsequitur: subito namque exhaurit subtiliores spiritus, caput debilitat, mentem ac sensus infirmat atque convellit. Dein ebrietatem, copiosam vini potationem & liquo-

*Fugienda
autem Ve-
nus immo-
derata.*

*Ebrietas,
liquor.*

vinum
pres.

liquorum inebriantium ingurgitationem omni cura & studio fugiat : quippe hoc pacto multos ab arthritide liberatos novimus. TRINCAVELLUS *de ratione cur. particul. hum. corp. affect. libr. XII. cap. XI.* tradit, se novisse medicum Venetiis, qui, cum non parum infestaretur à podagra & ad senium usque, & solum primum atque in quinquennium vinum interdixisset, liber tandem ab omnibus molestiis ita evaserit, ut amplius usque ad ultimum senium imo ad mortem horum dolorum fieret expers. Id quod CELSUS *lib. IV. cap. 24.* egregie confirmat, perhibens : *quidam cum toto anno à vino, mulso, Venere se temperassent, securitatem totius vitæ consecuti sunt.* Et SOLENANDER *S. V. conf. I.* refert, viduam quandam Hispanicam, cum usum vini, quo tamen pro more gentis paucissimo & dilutissimo usa fuerat, omisisset, podagra amplius non fuisse tentatam. Quin imo plures talis modi historiæ notissimæ sunt eorum, qui, vel in carcerem coniecti vel ad paupertatem redacti, cum à vino abstinuerint, ab arthritide & podagra liberati sunt. Hinc præstat ad præscindendum gravissimum morbum, aquam puram & levem quam vinum bibere. Ex hydropotis enim nemo facile est, qui hunc in morbum prolabitur : quorum exempla apud BRUYERIUM *de re cibaria lib. XVI. cap. 13.* SCHENCKIUM, HERM. von Heyden, *de podagra*, & PECHLINUM legi atque evolvi possunt.

§. III.

Quod tam
men quan-
doque pro-
ficuum.

At vero quamvis nonnullis podagricis vinum admodum sit infensum, negandum tamen non est, dari casus, ubi ventriculi quædam & intestinorum imbecillitas à frigido humore, ut cum veteribus loquar, orta est, in quibus ad virium refectionem admitti illud debet, maxime si diluatur cum aqua & vetus excoctum optimæ notæ assumatur : quod eo magis locum invenit, si in consuetudinem abiit vini potatio, nec ad ejus usum ægrotans protinus sentiat incommodum : de qua re conferri meretur PECHLINUS *obs. XXXVII.*

§. IV.

Nimius ci-
bus.

Porro qui vitam à podagra liberam ducere, vel ejus dolores lenire atque mitigare intendunt, temperent sibi à multo cibo tam in paroxysmo, quam extra morbi accessum. Vere scribit HIPPOCRATES : *præcipuum sanitatis studium est, non satiari cibis & impigrum esse ad laborem.* Sique profecto quid est, quod vitam servare potest à morbis diuturnis immunem, temperantia in victu est : hac enim alacritas & ingenio & corpori accedit. Consistit autem hæc temperantia in eo, ut vel bis de die parum cibi assumamus, nec plenarie appetitum satiemus & coenam intermittamus : id quod podagricis mirifice commendat TACKIUS p. 97. item SYDENHAMUS p. 579. qui prandium saltem commendat ; humoribus digerendis cum lectus solum sit dicatus. Præcipue autem in paroxysmis à cibo abstinendum est. Nam ejus accessio, ipso HIPPOCRATE teste, damno est : *Eo enim tempore, inquit, reflui sunt humores ad centrum corporis, unde opprimitur anxique evadit respiratio, & aliena regio ab impuris succis occurritur. Si cibum tunc dederis in impuritatem ille abit, ac distento hypochondrio opprimitur pectus, unde anxia respiratio & calor cordis major.*

pres. in pa-
roxysmo.

§. V.

Facile hinc apparet ratio, quare egeni raro sint podagrici, magis autem opulenti, voluptuosi & qui per multas horas mensis accumbunt, utriusculi instar abdomen distendentes. De opulento quodam Germano SCHENCKIUS apud *Casp. de Reics Camp. elys. juc. quæst.* tradit, quod hic, cum otio, deliciis, luxuque circumflueret, familiarem huic vitæ podagram arthritidemque adeo miserabilem contraxerit, ut non nisi duobus suffultus adjutusque famulis promoveri loco potuisset : verum lapsis sensim rebus ad paupertatem redactus tantam, ut & opibus destitueretur & famulis, nec nisi frugalis mensa ad vitam suppeteret; hoc fretus & pocularim ipse solus incesse, & à podagra prorsus desertus fuerit. Non incommode hinc PETRARCHA : *Si à podagra, inquit, liberari cupis, aut pauper sis oportet, aut ut pauper vivas. Multos ab hac ægritudine liberasse traditur paupertas, vera defæcatrice corporum : quosdam vero frugalitas, quam voluntariam seu fictam & imaginariam paupertatem dixerim. Vidisti aliquos perpetua vini abstinence curatos : ita fit, dolore dolor, clavus clavo pellitur, ut antiquo dicitur proverbio.* Specialiorem autem paulo diætam podagricis commendat atque præscribit GALENUS *lib. VI. de sanit. tuenda*, his quidem verbis : *intemperantes in podagram & alios diutinos morbos incidunt, à quibus tota vita se explicare nequeunt. Cavendum ab eduliis ex pasta, ab acidis fructibus, cepis, allio, salsis, lardo, carne suilla.* Cæterum Vinum Mosellanum aut Neccarinum aqua destillata dilutum bibendum. Alvus sollicitanda passulis, prunis Damascenis. A carnibus quoque annosis & pinguibus abstinendum. Parari debet vestimentum pellibus agninis confutum.

§. VI.

Postremo, qui à cruciatibus podagricis & at- ticularibus immunes degere cupiunt, temperare sibi debent ab omnibus gravioribus curis, animi laboribus, meditationibus & perturbationibus. Hæc enim elogio Sydenhami ad dissolvendam spirituum, qui sunt digestionum instrumenta systasin, ac proinde ad podagræ incrementum multum faciunt. Refert PORPHYRIUS *in vita Plotini* quendam Regulum, quum captus esset pedibus, sese ab omnibus curis abnegasse & à podagra fuisse liberatum. Tanti, inquit, *in hoc morbo vincendo, animum quietum habere!* Ceterum commendandus est podagricis labor ac motus, qui firmitudinem & robur partibus foenerat, transpirationem promovet, cruditates dissipat, ad totius corporis habitus immutationem aptissimus, atque optimum sanguinis depuratorium est, dum omnis generis excretiones promovendo, ab ejus naturali temperata crasi sive temperie alienas, impuras salino-sulphureas partes per congrua emunctoria separat. Elegantissime scribit HIPPOCRATES *lib. prorrh. n. 162.* curari podagricos posse juvenes, in quibus nondum sunt facti calli, qui laborem amant, qui vivunt accurate, & quorum alvus fluida est. Exercitium autem hoc non nimis sit vehemens, sed moderatum, quale est vectio in curru, ambulatio, scalarumque repetita ascensio.

§. VII.

Celeberrimus & maxime circumspectus trium Imperatorum Archiater JOH. CRATO *conf. 14.* Consilium Cratonis.

G g

tent.

tent. I. hoc pro præservatione podagræ consilium suppeditavit, dignum quod huic tractationi inferamus: *Primo monendi sunt podagrici, ne ullo modo corporis medicamentis affligant; sed recta victus ratione & mediocri diligentia articularum dolores vitari posse sibi persuadeant. Abstineant à vinis Moravicis, Austriacis, Hungaricis, dulcibus & crassis: utantur cerevisia triticea. Ventriculi robur medicamentis purgantibus non debilitetur. Nostris pilulis uti possunt hora dimidia ante coenam, quæ sit parcior, singulis septimanis, dosin quæ est scrupulus, capientes. Singulis diebus matutine de nostro stomachali sumat. In lecto matutine sudet quotiescunque poterit: nam quo frequentius hoc fecerit, eo tutiorem se esse putabit. Mundare pedes oportet cum spongia intincta vino rubro, in quo sal sit decoctum. Topicis minus potius quam nimium est faciendum. Aër frigidus & humidus vitandus est.*

§. VIII.

Quibus hi
afflictus
hereditariis
& chronicis
sunt cura-
torem dia-
tam ser-
vatio.

Præservatoria hæc cura uti universalis fere est, & ab omnibus ac singulis qui à gravibus valedudinis incommodis immunes esse volunt, servanda: ita potissimum quadrat & necessaria admodum est, in affectibus tam arthriticis quam podagricis, quando à parentibus liberi seminum quoddam multiplicativum ipsis vitalibus humoribus alius insinuat, & quod inter pueritiæ vel adolescentiæ annos jam tum sese exerere incipit, acceperunt; quo in prima quasi herba suffocetur. Atque etiam hæc ipsa cura diætetica ad eos spectat, quos jam per plures annos hoc malum & chronicum & quasi habituale factum exercuit: eo fine & scopo, ut minimum dolores ac symptomata leviora & mitiora inde reddantur, breviores quoque fiant paroxysmi, & roborata sic quodammodo natura deteriores & exitiales affectus, qui excipere nunquam non solent podagram pertinacem & chronicam; corporis vires valde infringentes arceantur.

DE CURA SPECIALIORI PODAGRICORUM MEDICA.

§. I.

Podagra
ralicata
non potest
exstirpari.

Optandum quidem serio & vehementer esset, ut tam efficacia in rerum natura extarent remedia, quæ huic difficillimo morbo, ubi longo tempore in succis vitalibus & nervosis partibus radices egit, exstirpando sufficerent: sed, quoniam talia nondum per experientiam cognita atque comprobata sunt; eo tantummodo laborandum est, ut non modo diætata præscripta servetur, sed & aliis remediis languenti corpori succurratur, quo recursus hujus mali, si non prorsus tolli possit, pauciores tamen & breviores evadant, levioribusque symptomatibus stipati incedant paroxysmi. Et cum ordinario fere horum periodicorum dolorum, sive febris potius rheumatico-podagricæ incurfus fieri soleat tempore vernali, item ante & post solstitium hibernum; opus est, ut antea congruis evacuantibus, alterantibus & massam sanguinis depurantibus, vitiosos humores doloribus istis podagricis pabulum administrantes, quo postea eo felicius paroxysmus sustineri possit, & corrigamus & eliminemus.

§. II.

Vena sectio.

Ad hunc scopum, ex voto obtinendum, ego sanguinis missionem decenti tempore & quidem ante æquinoctium vernum, ubi massa sanguinis

& feri singulari quodam interno ebullitionis quasi motu agitur, & sic heterogeneæ partes quæ in eorum profundiori ac intimiori nexu tectæ & involutæ hæserunt, extrorsum vertuntur, unde omnis generis febres exanthematicæ, catarrhales, rheumatico - arthriticæ originem suam mutuuntur, celebratam magni admodum facere soleo: id quod optime succedit, ubi corpora non adeo firma fuerint, quæ bene appetunt, vitæ sedentariæ indulgent, lautaque diætata utuntur. Longe vero magis necessaria est venæ sectio in iis, qui ob laxiorem multis exilibus vasculis donatum corporis habitum multum sanguinis & feri ingenerant & ad hæmorrhagicas excretiones proclives sunt, præcipue si hæc resistent vel parciore evadant. Et quoniam ante & post solstitium brumale mense Decembri, Januario, Febuario, plerumque insolescunt & ingravescent podagrici dolores, ego in fine Octobris si res postulaverit & plenitudo vasorum evidens fuerit, sanguinis missionem suadere solitus sum.

§. III.

Deinceps non possum non ego hoc loco candidè fateri, quod à cucurbita cum scarificatione dorso pedis, singulis trimestribus apposita, insignissimum allevamentum in pluribus, atque etiam in me ipso, qui non immunis fui ab ejusmodi insultibus podagricis, licet obtusioribus & non diu persistentibus, expertus fuerim. Rationem si quis hujus effectus exposcere velit, hæc satisfacere posse videtur: quod in nulla fere corporis parte, difficilior sanguinis circulus ex arteriis in venas, quam in extremo pede ejus præsertim digitis procedat; nulla etiam pars sit, quæ tanta copia musculorum tendinum, membranarum & ligamentorum tendineo - nerveorum, vasorum etiam sanguineorum instructa sit, ac extremi ipsius pedis compages. Quodcumque itaque hæc partes, ab ipsa nativitate, imbecillitatis quodam vitio laborant; non mirum est, sanguinis circulum sive itum ac reditum in illis ipsis admodum esse segnem, tardum & impeditum, præsertim quando ille copiosiori sero, excrementitiis salinis partibus referto scatet, & tempore paroxysmi, qui semper febrili motione fit & incipit, majori copia ad has partes appellitur: unde non possunt non humores stagnare, & vasa nimium distendendo eorumque nervosas membranas divellendo, dolores, cum inflammatione licet leviori producere. Atqui hinc utilissimum omnino est, ut sanguinem superfluum & stagnantem per has partes valde ad circuitum difficilem è vena extrahamus, & sic ejus liberiores progressum promoveamus.

Cucurbita
cum scari-
ficatione
dorso pedis
apponenda.

§. IV.

Quoniam paroxysmorum & rheumatico-arthriticorum & podagricorum evidens & materialis causa, in feri excrementitii abundantia & colluvie consistit: atque huic ingenerandæ vitiata prima in regione alimentorum digestio & cruditatum proventus multum velificatur; complures non minus periti ac eruditi medicorum singulis mensibus vomitum excitandum commendarunt, ut ventriculi & duodeni cavitas, & qui huc pertingunt ex hepate & pancreate canales à sentina crudorum & vitiosorum humorum expurgentur. vid. HILDANUS cent. VI. obs. 34. MERCATUS de morbis intern. lib. IV. cap. 18. RIVERIUS in Praxi lib. VI. SYLVIUS in Pr. pag. 153. Alii vero pro cura vernali vel autumnali, ad primam regionem & totum corpus à sordibus pro-

Vomito-
rium sin-
gula mense
exhiben-
dum.

probe expurgandum, infusa ex variis laxantibus, roborantibus & aperientibus concinnata usurpanda suadent.

§. V.

*Therma
Carolinæ
omnia re-
media su-
perant.*

Ego, ut fideliter & candide pro more meo dicam, non certius, non efficacius & magis genuinum in ejusmodi affectibus & avertendis & minuendis, vel, si medicina inopportuna turbatis motibus intro inversa vitiosa materia fuerit, in ordinem redigendis, quam in usu thermarum & quidem Carolinarum inveni remedium: quarum virtus & energia, in calculo, podagra inveterata, & in hac, si fuerit ad interiora repressa, ad partes exteriores revocanda, hæmorrhoidum quoque fluxum, si causam & occasionem malo suggesserit, restituendum, incomparabilis est. Cujus veritatis permulta imo millia exempla, adducere integrum esset, ut adeo, qui eam vel in dubium vocare vel plane negare gestiunt, aut improbitatis, aut inscitiae sese ipsos accusent. Nam hæ aquæ in larga satis quantitate potatæ, ob spirituosum quo pollent elementum, & ob salia mineralis propiæ quæ in sinu fovent, tenues non modo & fluxiles reddunt humores, atque obstructa & infarcta minima vasa aperiunt, sed & per omnia quæ evehendis à corpore alienis & morbidis humoribus dicata sunt excretoria, per hepaticos ductus videlicet, per alvum, per subcutaneum emunctorium, per vias urinarias, per mucum bronchiorum & narium, copiosissime & sine ulla virium jactura per multos continuos dies materiam peccantem educunt. Hinc certe universalis morborum chronicorum præservatorii & curatorii nomen, si non altiores malum egerit radices, jure sibi vindicare possunt: siquidem ego, qui has salutiferas aquas viginti circiter vicibus frequentavi, sancte affirmare possum, quod non per artem existat vel inveniri possit tale remedium aut medicina, quæ huic, quam Benignissimi, qui curam etiam corporis nostri habet & semper habuit Creatoris beneficio pientissimo animo acceptam referre debemus, æquiparari possit. Atqui id etiam observavimus, quod si sub ipsa cura irruat hic affectus, longe mitior, brevior & placidior semper procedat & finiatur. Neque etiam aliis mineralibus fontibus thermalibus & quas acidulas salutare vulgo consuecunt, modo pro differentia corporum & naturarum recte & cum debito regimine & convenienti methodo præscribantur, usurpentur, commendentur, laudes & energias suas detrahare volumus, cum passim etiam indubia adfint faustissimi effectus in ejusmodi radicatis & chronicis morbis exempla. Possunt vero temperatiores aquæ minerales, ad quas pertinent *Wildungenses*, *Selteranæ*, *Veteraquenses* in Silesia, loco potus, si tertia admisceatur vini pars, per totum anni decursum in usum duci.

§. VI.

*Quibus
non infe-
riores potus
alii tempe-
rantes.*

Postremo quoque potibus diluentibus, acrimoniam salisam temperantibus & demulcentibus, leniterque evacuantibus, ut sunt lac, serum lactis, summam, tum præservandi tum curandi scopo adhibitis, virtutem adscribimus, quippe eam exeruisse multiplici experientia comprobatum est. Id autem remedii genus, in eodem morbo antiquissimos jamjam maximi fecisse, HIPPOCRATES & CELSUS loquuntur. Ille enim passim speciatim in *libr. de affect.* in difficilissimis podagricis & articulationum doloribus, lac asininum commendat. Hic vero *libr. IV. cap. 24.*

Frid. Hoffmanni Oper. Tom. II.

ita scribit: *quidam cum asinino lacte poto ex toto se eluissent, in perpetuum hoc malo evaserunt.* Præterea quoque PLINIUS, sunt inter exempla, inquit, qui lac asininum bibendo liberati sunt podagra, chiragraque. Novimus nos non paucos lactis bubuli per aliquot annos usu, itein aquæ pluvialis pro potu ordinario, per plures à doloribus podagricis annos immunes vixisse. De cura vero lactea prudenter instituenda, infra in cautelis & monitis plura subjiciemus.

§. VII.

Porro, ad methodum tam præservatoriam quam curatoriam, nihil securius, nihil accommodatius, regimine diaphoretico, salutari consilio procurato, inveniri potest. Nam si verum, uti est verissimum, quod sanguis serosus impurior, qualis maxime ex transpiratione prohibita redditur, causa antecedens & materialis paroxysmorum podagricorum sit; ipsa certe sanior dicitur ratio, quæ experientia confirmatur, atrocem hunc morbum, quam optime & tutissime, facta liberiori transpiratione, vel ea quæ secundum naturam sit restituta, esse remedium omnibus aliis superius. Et quoniam hac de re insignissimus & notabilis admodum locus in CAROLI PISONIS utilissimis observationibus: *de morbis à serosa colluvie oriundis Sect. V. cap. II.* extat; operæ pretium nos duximus eundem nostræ tractationi subnectere. Verba autem laudati elegantioris Auctoris hæc sunt: « Denique quod spectat ad » vacationem feri per cutim eamque sensibilem, » hanc plurimi facio, ut debeo, quia & revulsio- » nis vim habet, & maxime est opportuna in his » affectibus, quippe quæ naturæ convenientissi- » ma, cum ea feri portio, quæ per cutem insen- » sibiliter ex naturæ instituto continenter quotidie » expirare debet, suppressa quacunque ratione & » introrsum depulsa materiam præstet arthriticis » doloribus, ut antehac demonstratum. Quamob- » rem consulo, ut Illustris Præsul sudorem quo- » tidie, si fieri potest, aliqua arte promoveat, aut » certe insensibilem expirationem: quod ut con- » sequatur, inprimis densitati cutis, quam infert » inclementia aëris, præsertim hyberno tempore » consulere debet, nam quæ à polyfarcia aut æ- » tate densitas infertur, de ea nulla providentia » haberi potest. Ergo accurate videat, ut bene » tectus incedat semper, & de nocte potissimum » stragulis levibus quidem sed calidis, pluma vi- » delicet aut pelle infartis desuper subterque stra- » tis opertus dormiat, & ita opertus ut sponte » sudor, sub diluculum erumpat: quod eveniet, » si non ita de mane expergiscatur, sed aliquan- » tis per quietem in lecto longiorem capeffat; & » si sudor nihilo minus non erumpat, is multa » longaque provocetur universi corporis frictio- » ne. Quod si eo frustretur, aut hisce modis » eum provocare tædiosum illi est, suadeo cer- » te, ut semel in hebdomade hypocaustum jeju- » nus adeat, ibique per horulam fudet, quod » primum tentabit, ubi plethoræ corporis venæ » sectione prius providerit, ut avertat cutaneos » affectus, qui ab insolito hypocausti usu spon- » te emanare solent. Atqui si his artibus sudor » erumpens minus emendandæ colluviei feri » in corporis habitu stagnantis satisfacere po- » test, certe auctor sum, ut ineunte vere & au- » tumno, quibus anni temporibus fluxiones re- » petere solent, utatur decocto sudorifico si- » ve sarsaparillæ sive radicis Sinarum, idque » per unam aut alteram septimanam, vel certe

*Diaphoretica laxa-
dantur.*

„*syrupo Ambrosiano*, si metus sit à viscerum & sanguinis æstu.

C U R A T I O.

IPSO IN PAROXYSMO.

§. I.

*Imminente
paroxysmo,
alvus sub-
ducenda.*

Ego imminente paroxysmo, qui ex lassitudine insolita & inquieta, appetitu adaucto & gravitate capitis & artuum cognoscitur, primam regionem ante omnia leniter à sordibus alvinis, neque minus à collectis in duodeno & reliquo intestinorum canali vitiosis humoribus deplendam, & expurgandam suadere soleo; id quod tutissime tum per clysteres emollientes & temperate carminativos, tum interne per infusa rhabarbarina & mannata, cremore tartari exaltata, perfici potest. Memini, me olim statim sub initio doloris podagrici & arthritici, insigni sæpe cum fructu usum fuisse sequenti mixtura: rec. aquæ florum acaciæ uncias duas, cinnamomi sine vino unciam dimidiam, pulveris Cornachini drachmam, syrapi rosarum laxativi, vel cichorei cum rhabarbaro unciam semis. Nam instar aphorismi practici medicorum juniores teneant hoc: mitiores semper dolores evadere, in quocunque etiam loco consistant, si prima regio prius sordibus suis, ante usum aliorum medicamentorum, probe fuerit expurgata; quæ alias migrando in sanguinem inque partes affectas penetrando, & dolores intensiores reddunt, & graviora symptomata producunt. Atque in eo quoque laudandum est SOLENANDRI consilium, quod extat in *Oper. suis* p. 78. ubi scribit, se in paroxysmi podagrici principio magno cum successu exhibere aliquod purgans solere, primum id edoctum ab ALEX. TRALLIANO *libr. II.* Et singulare esse, PECHLINUS *obs.* 26. eruditissime innuit, quod arthritici leniorem plerumque experiantur insultum, detracta ex primis viis vitiosa materia.

§. II.

*Materia
vitiosa po-
dagrica per
transpira-
tionem au-
ctam dif-
flanda.*

Cum vero omnis doloris articularis & podagrici paroxysmus motum febrilem comitem habeat, cujus etiam beneficio, natura optima morborum medicatrix, solenniter & felicissimo sæpe cum successu morbum curare, & quæ eum excitat vitiosam & hostilem materiam convenienti tempore, per congrua emunctoria evacuare atque foras rescribere solet: idque in doloribus maxime per sufficientem & auctiorem transpirationem perfici, dum non modo tota sanguinis & feri massa depuratur, sed & ipse dolorem in pedibus creans vitiosus humor successiva difflatione & exhalatione excernitur; prima ac princeps medentis debet esse intentio ac cura, ut placidam continuam & non interruptam diaphoresin, suo consilio & auxilio procuret & moderetur. Præstare id opportunissime possunt ipsa infusa, quæ loco Théë, ex herba scordii, cardui benedicti, veronicæ, radice glycyrrhizæ, corticibus citri recentibus parantur: cui scopo identidem egregie inserviunt mixturæ, ex aquis destillatis, cardui benedicti, galegæ, scordii, succo citri, lapidibus cancrorum, antimonio diaphoretico, cinnabari, nitro purificato, & syrupo acetositis citri, singulis debita dosi & proportionem sumtis concinnandæ. Instar omnium vero potest esse liquor noster anodynus mineralis, si

*Quo spe-
rant infu-
sa Théë &
mixtura.*

cum quarta parte spiritus *Buffii*, & tartari volatilis roboretur: de quo triginta vel quadraginta guttæ pro dosi, ex ordinario decocto vel infuso jam laudato propinari possunt. Præstat vero ejusmodi medicamenta mane, cum expectatione lenioris sudoris in lecto exhibere. Vesperi & circa noctem pulveres temperantes bezoardici nitrosi, cinnabarini, cum aquis analeptics, diapnoicis, vel cum emulsione amygdalarum dulcium aut seminum quatuor frigidorum majorum commodissime porrigi possunt.

§. III.

Expedi etiam pro feliciori sanationis obtinendo scopo in hoc affectu, pro ordinario potu, decocti temperantis & diluentis paulo liberaliorem usum commendare, ex quo summum me sæpius fructum percepisse recordor. Species hæ sunt: rec. radicis chinæ, sarsaparillæ, polypodii ana uncias duas, liquiritiæ, cichorei ana unciam, corticis ligni sassafras unciam dimidiam. Quorum dimidia pars in quinque aquæ mensuris & una vini coquantur ad consumptionem septimæ partis: quo decocto non modo pro ordinario potu & ad extinguendam sitim utendum, sed & ex eo medicamenta propinanda sunt, atque insuper singulis duabus horis, octo uncias calide bibendæ sunt, idque statim à morbi insultu faciendum. Inde urina copiose fertur & corpus in continua perspiratione servatur, alvus quoque fluida & laxa manet; si vero hæc officii sui fuerit immemor, supra propositum laxans exhibendum; abstinere quoque ab omnibus jusculis pinguibus nutrientibus expedit. In doloribus autem vagis præsertim à scorbutico humorum inquinamento qui oriuntur, serum lactis dulce vel acidulum, item fons Selteranus cum lacte remixtus utilissime pro potu dantur.

*Neque mi-
nus deco-
cta.*

§. IV.

Ad mitigandos artuum, si acerbius affligant dolores, cautissime cum ipsis topicis procedere æquum est: quia multiplici experientia teste, plus damni quam emolumenti attulisse constat. Consultius autem & securius est, partes dolentes culticis levioribus plumaceis involutas, in quiete & temperato æquabili calore retinere, ut lenis & successiva humoris vitiosi difflatio procuretur. Ceteris vero externis omnibus minus noxiis, antiquissimum illud cataplasma, ex mica panis albi, lacte, vitello ovi, croco & floribus sambuci paratum, mea quidem sententia præferendum erit. Potest etiam, præsertim in arthritide vaga, succus lumbricorum terrestrium addi. Novi quoque non sine insigni levamine in acerbioribus doloribus, frustum carnis ex recentis mactato animante parti affectæ applicatum fuisse: quod post viginti quatuor horas amotum, foetidum sparsit odorem. A tinctura sulphuris volatili, quæ ex calce viva, sale ammoniaco & sulphure paratur, cum charta bibula, membris affectis, non quidem statim in principio, sed circa finem & ubi topi metuendi admota, ob fortiorem procuratam discussionem, effectus laudatissimos vidi: sed non omnes hoc medicamentum, ob summum, quem spargit foetorem, ferre possunt. Dolore & paroxysmo sublato, quando ingens in partibus affectis imbecillitas movendique impotentia remanet, balsamum nostrum spirituosum liquidum, cum aqua Reginæ Hungariæ dilutum, moderate inunctum insigne robur asferre crebro observavimus.

*Topica
quæ, & ubi
conferantur*

CAUTELÆ ET OBSERVATIONES
CLINICÆ.

§. IV.

Quod attinet ad decoctum Viennense, nostro tempore ad podagram curandam medicamen famigeratissimum, cuius insignes virtutes una cum modo usurpandi in *M. N. C. cent. I. obs.* paulo curatius describuntur, à multis qui eo ipso usi sunt, magnopere quidem collaudatum memini, quorum autem corpora robustioris paulo constitutionis erant. Neque prorsus ejus usum improbare velim: sed, quoniam plerumque debilioris; tenerioris, & sensibilibioris naturæ podagrica affectione laborantes esse solent, ab hermodactylis & à ligno guaiaco, quæ istud ingrediuntur, & omnino sale acri stimulante prædita sunt, libens abstineo, qui securiora tantum amo & approbo, quæ inter hoc quod supra à nobis traditum est decoctum præcipuum locum obtinebit.

Decoctum
Viennense.

§. V.

Externa remedia partibus dolentibus applicata, utut raro careant noxa, longe tamen periculosiora in corporibus sanguine vel sero impuro repletis, sive cacochymicis, sensibilibioris naturæ, hypochondriacis & hysteriis, in quibus nervorum & fibrarum systema spasmodicis jam adfuerit, est; fortiantur eventum: siquidem plurimarum observationum fide constat, lethales horum applicationem excepisse affectus, quos inter apoplexiam, hemiplexiam, memoriæ amissionem, asthma convulsivum, cardialgiam, colicam spasmodicam, ventriculi & intestinorum inflammationem nominasse sufficiat.

Topicorum
circa usum.

§. VI.

Topica spiritiosa ac camphorata in subjectis segnioribus & humidioribus non adeo nocent: in ficcioribus vero, si materiam podagricam non retropellant, ad calculum tamen disponunt, vel topiorum generationi velificantur, aut molestissimas partium contracturas relinquunt.

Spirituosa
topica quibus
conferantur.

§. VII.

Non possumus non, iterum iterumque monere, in affectibus podagricis & articularibus, paucioribus & fidis remediis tantummodo utendum esse, rejectis infecuris & ancipitibus, quæ sæpius damna intulisse animadverti. Hinc mihi perplacent, quæ tradit Clariss. Romanorum Medicus ALEX. PASCOLIUS *Oper. tom. III. Sect. III. cap. V. p. 220. At enim vero, inquit, ut quicquid in eo morbi genere, quem in publicis nosocomiis non minus, quam in ædibus aliorum privatis, crebro præ manibus habuimus, ad hoc temporis observavimus, ingenue ut nostri moris est fateamur; proferre non dedignabimur eos, quibus aut nihil prorsus, aut nihil propemodum in rheumatismo fecimus, felicius ut plurimum evasisse, quam alii, quos validioribus artis præsidis subjecimus. Quæ res porro effecit, ut posterioribus annis ejusmodi ægrotantes tractando, præter victum tenuem & congruum, ac uberrimas potiones ex aqua vel simplici vel per levem infusionem sarsaparillæ, glycyrrhizæ, florum papaveris rhocados, hisque similium medicatos, nihil aliud præbere consueverimus; quo solo temporis processu, sudores plane criticos, optimo cum successu excitavimus.*

Pauciora
& secunda
remedia
usurpan-
da.

§. I.

Venæ sectio
in quibus-
dam caute
admini-
stranda.

Venæ sectio, utut in corporibus, quæ sanguine plus quam sero abundant, atque in ætate juvenili constituta, diætâ simul lauta vinosâ delectantur, ad præcavendos paroxysmos podagricos & arthriticos utilissimam præstet operam, atque etiam, ubi à defectu excretionis hæmorrhoidalis vel menstrualis morbus vel ejus paroxysmus metuendus, plane necessaria sit; neque etiam imminente paroxysmo in arthritide valida & vaga reformidanda, sed intrepide admittenda: nihilo minus ubi corpus valde debilitatum, excrementitii feri copia obsessum, ex vitio bonæ digestionis & excretionis insufficientis prognati, cautius est ab ea abstinere, & quidem hisce de causis, quia cum excrementitio sero, portio etiam consistentis sanguinis non sine virium jactura amittitur; secundo, quia criticus ille naturæ motus ad exteriora & peripheriam corporis vergens intercipi potest, quod in febribus erysipelaceis sæpius fieri videmus; tertio, quia, candide quod fateri debeo, aliquoties post venam sectam acerbiorum symptomatum impetum animadverti.

§. II.

Cura la-
tis.

Circa curam podagræ per lac, sive potius ejus paroxysmorum ad magnum & notabile tempus suspensionem, id observavimus: quod, si hac finita ad pristinum victum & vivendi genus ægrotantes redierint; vel ipsi paroxysmi bono omine reverti cœperint, vel loco horum, in corporibus præsertim senilibus & imbecillioribus, pathemata spasmodica, in abdomine colica, ventriculi cardialgicæ inflationes, dolores nephritici cum ischuria, & non adeo longum post temporis spatium mors fuerit infecuta. Insuper etiam circa lacteam curam, quæ alias ad expugnandos atque avertendos arthriticos & podagricos dolores, non destituitur laude & effectu, id monendum ducimus, quod, ubi corpus plethoricum, vel sero abundantiori impuro turgit, vel ob tonum ventriculi & intestinorum labefactatum, prima regio semper fere cruditatibus vitiosis obfessa est, aut si pathemata hypochondriaca, quod sæpius fit, subsint, atque ipsa natura lacticia respuat, prorsus hanc damnandam esse judicemus, quippe in viscerum ulteriorem infarctum, in cachexiam, hydropem & hecticam febrem tali pacto ægrotos præcipitari posse certum est.

§. III.

Purgantia
fortia ipso
in dolore
non exhi-
benda.

Recte monet CRATO *lib. V. in consil.* quod fortiter & violento impetu evacuantia, eo quod naturæ & inprimis ventriculo vim inferant, nequaquam inchoantibus & perseverantibus doloribus exhiberi debeant. Hinc perite TRALLIANUS *lib. XI. p. 601.* suadet, in podagra talia purgantia esse adhibenda, quæ stomachum non subvertunt, & addit rationem hanc: *nam hujus cura in omnibus affectibus haberi debet, ut ne ventriculi os ab iis quæ adsumuntur offendatur. Ipsi namque infirmanti omnes nervi consentiunt & fluxionibus tentantur.*

§. VIII.

*Vena sectio
repetita.*

Gallarum medici celeberrimi, quos inter CHESNEAU, BOTALLUS, RIVERIUS, CAROL. PISO, referendi, in doloribus podagricis & arthriticis crebro repetitam venæ sectionem maximopere laudant & commendant, præservandique potissimum fine & scopo celebrant: quæ tamen methodus in nostris septentrioni vicinis hominibus, quorum corpora non tanta sanguinis abundant copia, haud curate quadrat. Nihilominus, si morbus non adeo inveteratus & corpus ad sanguinis abundantiam ingenerandam pronum fuerit, levior & sæpius repetita venæ sectio, seu singulis potius mensibus in pede admissa scarificatio, præmissa tamen semper leniori laxante, non erit infructuosa. Eximius plane est locus, quem de venæ sectione utilissime frequentius repetita, habet laudatus PISO l. c. Sect. V. cap. I. p. 406. hic merito apponendus: *Addo autem, inquit, singulis mensibus, quoniam eadem experientia me docuit, quotiescunque per inducias vel paucarum septimanarum æger corpus refecerit, sanguinisque jacturam reparaverit, tum prima quoque commotione aëris & alteratione sive ad algorem, sive ad æstum omnino arthritim recrudescere. Et certe sæpe audiivi magnos viros ex arthriticorum familia, nihil longo usu reperisse retardandis cohibendisque fluxionibus arthriticis, si non prorsus tollendis, ipsa venæ sectione, eoque ejusdem usum etiam in affecta ætate non reformidasse. Itaque repetita placet venæ sectio & per epicrasin: quod si probatur, nemo non videt omnino parca manu esse administrandam, & quantitatis hunc esse scopum, ut providenter duntaxat ne turgeat sanguis in vasis & orgasmo spontaneo commoveatur.*

§. IX.

*Tumor à
solutione
morbi reli-
ctus caute
tractan-
dus.*

Paroxysmo finito & morbo soluto, in corporibus spongiosioris habitus & sanguine seroso turgentibus remanet sæpiusculæ pedis affecti insignis & valde diffusus, qui impressa digiti vestigia relinquit, tumor, caute profecto tractandus: nam si quis eum pro incipiente hydropē habuerit, & ad hunc præcavendum vel abigendum, validioribus purgantibus uti velit, is non leve sanitati & vitæ damnum infligere poterit. Opus tunc potius est lenioribus laxantibus balsamica virtute eminentibus, ut sunt rhabarbarum in substantia, pilulæ Cratonis, Becheri, nostræ, mediocri quidem dosi, sed crebrioribus exhibitis uti. Externe autem pulvere, ex farina fabarum, camphora & floribus sambuci conspergendi pedes, & leniter non autem nimis valide, vinctis, ne uberius feri fiat affluxus & stagnatio, constringendi.

§. X.

*Tophi re-
solvendi.*

Ad tophos discutiendos & resolvendos in fenili & inveterata podagra, ego non præsentius, ipso balsamo sulphuris antimoniato, quod ex sale scoriarum reguli antimonii simplicis, superinfuso oleo terebinthinæ & juniperi paratur, me deprehendisse, asseverare possum.

ENARRATIONES MORBORUM.

CASUS I.

*Podagra ab
empirico
retropulsa
junesta.*

Vir sexagenario major, sanguineo-cholericus, sanguine & succis plenus, habitus corporis ro-

busti, animique ad iram valde proclivis, per complures annos doloribus convulsivis, colicis, spasticis, nec non podagricis misere divexabatur: quorum tamen malorum solamen, in usu *Carolinarum* singulis annis adhibitarum, nunquam non præsentissimum invenit. Nihilominus, nescio sub quo infausto fidere, prudentissimus vir in empiricorum infelices manus irruit, qui, fiduciam addentes amplissimam, nostro pedibus per aliquot dies laboranti pulverem commendarunt, cujus dosis admodum quidem exigua, sed sapor valde constringens, & metallicæ sine dubio mercurialis & vitriolicæ naturæ erat. Oblata duabus singulis horis dosi, hacque ad duodecimam usque reiterata, omnes dolores & cruciatus simul & semel conquieverunt. At vero altero die, in gravissimas incidit cardialgicas anxietates, cum inquietudine, ventris tormentis, alvi pertinacissima adstrictione, animique intercurrente deliquio, comitatus: insuper nec corpus nec caput erectum detinere poterat: quæ symptomata brevi post, cum insultus apoplecticus exciperet, corpore mirum in modum inflato, capite in immensam molem turgescente, sanguineoque sero ex ore & faucibus effluente, nimiae confidentiæ poenas morte miserrima luere debuit.

Epicrisis.

Funestæ hujus catastrophes causa, vix alia inveniri vel excogitari poterit ac infesti remedii antipodagrici assumptio: quandoquidem sensibilibus corporibus, si spasmoticis primarum viarum tentantur constrictionibus, ejusmodi mercurialia & metallica remedia semper nocentissima sunt, eo quod non nisi spastica quadam strictura operationem suam exerunt, & ita universum nervorum genus male afficiunt. Cui etiam in nostro casu repentina dolorum podagricorum remissio adscribenda venit, dum videlicet ob spasticam stricturam partium externarum, materia podagrica intro coacta fuit; qui spasmus simul effecit, ut sanguine plus justo ad pedes & caput propulso, ex nimia vasorum distensione ejus extravasatio in cerebro oborta fuerit. Hinc omnibus & singulis qui praxin exercere sustinent, non sine summa ratione suademus, ut in quibusvis morbis spasticis qui in sensibilibus præsertim corpora incidunt, cane & angue pejus, cuncta mercurialium, metallicorum, emeticorum atque acriorum purgantium genera, fugiant: inter quæ etiam mercurium dulcem, aurumque fulminans, ob inauspicati successus, quem sæpius sub ejusmodi circumstantiis observavimus, effectum, reponere non dubitamus; siquidem à pulveribus sic dictis solariis non raro maximas præcordiorum anxietates, comite singultu, in podagricis obortas, doloribusque licet mitigatis omnia intus pejora reddita fuisse novimus.

CASUS II.

Vir Illustris quadraginta & aliquot annorum, *Tumor pe-*
rheumatismis scorbuticis crebrius affectus, tu-
more erysipelaceo in dextro corripitur pede, *dum erysi-*
quod ulcus olim purulentam materiam continen-
ter stillans obsessit. Hic tumor inflammatorius *pelaceus re-*
radium rubicundum à glandulis inguinalibus, ad
extremum usque pedem emisit. Altero die dor-
lor metatarsum pedisque sinistri pollicem satis
atrox

atrox cum insigni tumore invasit : unde plane immobiles redditi pedes fuere. Chirurgus in principio statim ad erysipelas profligandum spiritum camphoratum crocatum applicavit, & cum in alterum pedem dolor transfiret spiritum removit, & huius loco siccos pulveres cum camphora mixtos applicuit. Inde mox notabilis dolorum levatio & remissio in utroque pede successit : non ita multo post autem tam gravis circa præcordia anxietas & diaphragmatis constrictio, ut omnem penitus respirationem tolleretur, cum æstu & plenaria appetitus prostratione secuta fuit, quibus alvina obstructio, cum inflatione associabatur. Præscripsi quum me consultum adirent, ad alvum leniter educendam, decoctum mannatum ; & ad flatus discutiendos materiamque retrocessam sudore diffundendam, aliquot liquoris anodynæ mineralis cum tertia spiritus Bussii parte remixti doses propinavi. Quo pacto & totum mox corpus largissimo sudore perfundebatur, & ipsæ hæmorrhoides quibus aliquando affluens erat, denuo fluere cœperunt, omniaque sic evanuerunt symptomatibus penitus evanescentibus.

Epicrisis.

Similis fere casus, qui evidenter camphoratorum externum usum in podagra noxium declarat, aliquot ante annos in Illustrissima fœmina mihi occurrit : hæc enim postquam minium cum camphora remixtum pedibus podagra tentatis applicasset, hæc quidem siluit, ast non multo post cardialgici dolores, summa virium prostratio, vomitus, inquietudo, cum æstu febrili, alvus renitens & leve delirium accedebant ; quæ symptomata statim ab oblato cum emulsione ex feminibus IV. frigidis pulvere præcipitante nitroso, cum tertia parte grani unius camphoræ permixto pro dosi, remiserunt, & materia podagrica ad exteriores partes reversa est. Siquidem ego passim quoque animadverti, camphoram, cum exterius applicata noxam intulisset, interne exhibitam illata damna refarcivisse. Memorabilis quoque est observatio, quam recenset HAGENDORNIUS *cent. I. obs. 28.* ubi mercator ex dolore & tumore scorbutico laborans, applicato epithemate ex aquis destillatis cum cerussa & camphora, doloribus sedatis, loquelam amisit nec brachium movere potuit. Neque vero in totum camphoram ejusque spiritum in tumoribus & doloribus partium extremarum damnare & rejicere animus est, sed prudentia & distinctione naturarum opus esse velim : nam qui in artis versantur exercitio, subinde experiuntur, non omnia omnibus promiscue prodesse, atque id maxime valere in topicis, dum quod alterum juvat, idem alteri noceat. Est autem causa non tam dispositio peculiaris humoris peccantis, sed potius ipsa tensiva tonica fibrarum, pororum & vasorum cutis constitutio : habent enim omnes partes, & maxime quæ emunctorii & colatorii vices gerunt, suum peculiare robur, tonum, tensionem nec non suam quoque dilatationem, quæ species motus ad secretionem & excretionem summe necessaria, dependet potissimum à fluidi nervei influxu & nervearum membranarum tensione : qualis itaque hæc sit in omnibus individuis & etiam morbis eorumque temporibus, in exhibitione topicorum provide animadvertendum est ipsis meden-

tibus. Quis enim non videt, si pori nimis fuerint constricti à dolore & spasmo, neutiquam tunc spirituosæ calida conferre, sed potius ea quæ blande constrictas partes relaxant ; contra si nimia est post dolorem relaxatio, quod apparet ex tumore, dolore mitiori reddito, omnia unguenta humida unctuosæ anodyna valde nocere, & potius tunc linimentis spirituosis nervinis utendum esse. Deinde utut quandoque topica egregie mulceant dolores & febrem mitiorem reddant, nihilo minus non semper illud valet, etiam in eodem individuo, paucis : quo robustior in expellendo est natura majorque corporis adest vigor, major quoque motus internus ; eo minus periculi inducunt externa decenter applicata ; quæ tamen, si vigor motuum cesset, si ætas senilis vel status cachecticus supervenerit, plane sunt seponenda. Illud enim unice intendat medicus necesse est, ut externis non sistat evaporationem materiæ peccantis, sed eam promoveat : verum, quoniam magna prudentia in hac re opus est, securius potius est abstinere ab omnibus externis & totum negotium curandi internis committere, partesque affectas in blando tepore servare. Dein etiam hoc observavimus, topiorum generationem, quæ fit maxime in arthritide fixa, improvidæ non raro externorum applicationi deberi, stupescientibus præsertim & infrigidantibus. Meretur hic adduci B. WEDELIUS qui in *tr. de medicament. facultat.* scribit : *Frequenti experientia edocti sumus, plus damni ipsos podagricos inde passos, imo plures ex arthritide vaga hoc modo sibi fixam accersivisse, plurimos vero topios, quod usurpaverint unctuosæ & pinguiæ emplastica.* Hinc & ipse GALENUS *method. medend. libr. IV. cap. 3.* topios in articulari morbo produci recte memorat ex humore glutinoso & crasso, quando is non paulatim digestus, sed violentis remediis totus simul exsiccatus est : & FERNELIUS *conf. 12.* geminari inde dolores observat. Caterum non omnia topica, plane exterminanda esse in externis articularum doloribus arbitramur ; siquidem quando adfectus partium inveteratus cum torpore quodam & insensibilitate relictæ, qualis in senili ætate, sæpiissime evenit, tunc sedata prius interna sanguinis & humorum ebullitione, ad roborandos nervos, & invitandum spirituosæ elasticæ fluidi influxum in imbecilles partes, nervina linimenta balsamica virtute nobilitata, expectationi & medici & miseri ægrotantis eximie satisfaciunt.

C A S U S III.

Vir sanguineo-melancholicus annum agens quadragesimum quartum, habitus corporis strictioris, à decem annis passus est dolores tarsum pedis obsidentes, qui tamen non adeo vehementes erant, sed diaphoreticis facile cedebant, ut plurimum autem circa mensem Januarii revertebantur. Hi quatuor ante annos acerbiores facti ægrum lecto adfixerunt, abhinc autem duobus annis prædicto tempore adhuc gravius affligerunt. His cum ipsis luctaretur ægrotans, ingenti terrore affectus est, quem diuturnior cura & animi angor exceperat : quo pacto dolores interiora occupantes, anxios in abdomine cruciatus excitarunt ; qui mox remiserunt, mox reversi sunt. Elapsis aliquot septimanis sævissimo

Podagra, retrocedens ex frigore, lethalis.

frigore regnante, iter fuscipere honestus vir debuit: à quo tempore dolores longe truculentiores invasere, qui ventrem, brachia, fauciumque interiora aggressi, quandoque in capite subsistebant, atque somnum & quietem admodum turbabant, aliquando etiam effluxum materiæ foetidæ purulentæ ex aure interna egregio cum allevamento excitabant. Mense Junio ejusdem anni acidulas Egranas usurpavit, sub quarum usu quidem dolores filuerunt & cuncta bene successerunt: absoluta vero cura abdomen multo atrocius affligentes, appetitum penitus profligarunt: ubi alvus pigra, urina coloris naturalis sed parcius reddebatur, virium aderat dejectio, & æger de fixo ac duro tumore supra umbilicum conquerebatur. Nausea quoque premebatur & saliva copiose ex ore sæpius emanavit, vomituque nonnunquam & alimenta & medicamenta rejecta sunt: siquidem dolor superiora petere, fauces constringere atque ad scapulam usque se extendere sæpius solebat. Flatus ventrem distendentes per totum hinc inde intestinorum canalein cum fluctuatione & borborygmo percurrerant, & ad intestinum rectum ubi pervenerunt, mox regurgitabant, cum quasi exitus ipsis præcluderetur. Notatu dignum fuit, quod per periodos dolores hi infestant, hora pomeridiana quarta, media nocte & ante meridiana decima dum accefferunt. Variis usus est remediis, & præcipua medendi intentio eo fuit directa, ut ad ipsos pedes rursus derivaretur infesta materia. Hinc frictiones, pediluvia in usum vocata, venæ quoque in pede celebrata sectio. Hirudines tandem applicatæ, nitrosa cum camphoratis sine diaphoretico administrata, nec usus carminativorum, stomachicorum balsamica temperata virtute inclytorum neglectus; alvus quoque clysteribus, lenioribusque laxantibus ad officium redactus. Sed successus speratus fefellit. A nulla tamen re præsentius levamen ac à potu lactis calidi cum infuso florum sambuci remixti expertus est, quippe per duos quandoque dies ab eo assumto dolores conquieverunt. Quatuor abhinc septimanas elixir stomachicum ex amaris balsamicis extractis concinnatum exhibui, à cujus frequentiori usu, dolores sopiti, viresque cum appetitu erectæ fuerunt, adeo ut patiens domo egredi functionibusque suis præesse potuerit. Sed inconstans hæc valetudo fuit, siquidem in manu & dorso dolores rursus apparuerunt, somnum impediverunt, & tumor umbilicalem regionem obsidens, exterius manu percipi potuit. Tandem his malis dirius insistentibus, succumbere noster debuit, documentum sat clarum relinquens, contra mortis atrociam nullum inveniri remedium posse.

Epicrisis.

Ex præfata historia liquide apparet, quam contumax morbus sit ille, & quantum negotii creet medentibus, qui ex doloribus podagricis in corpus retrocedentibus ortum suum habet. Singulare illud est, quod materia, absque dubio, vellicans acris, indolis plus minus fixæ & volatilis, si in extremis articulorum membranis subsistat & ipsi denegetur sedes & exitus, occupet in abdomine viscera membranacea, nempe intestina, quæ maxime ex membranulis tendinoso-nerveis conflata sensu acutissimo prædita sunt, & similis structuræ ac texturæ cum ligamentis ar-

ticulorum nerveo-tendinosi ac glandulosi sunt, unde etiam propter affinitatem & structuræ communionem materia peccans mox transit ad intestina, mox rursus ex ipsis ad articulos. At vero, quod talem viam ac modum servet materia podagrica retropulsa, jam HIPPOCRATES suo tempore eleganter notavit *lib. VI. epidem. part. IV. aph. 3. it. Sect. II. p. 20.* hisce verbis: *qui articulari morbo detentus intestini dolore dextra parte vexabatur, quietior erat; hoc autem curato magis dolebat.* Et memoratu hanc in rem digna sunt, quæ tradit SOLENANDER in *Consil. pag. 77.* ubi ait: *in cura habui nobilem inveterata arthritide occupatum, in sexagesimo quinto ætatis anno constitutum, qui colico dolore reprehensus fuit. Auctor eram, ut arthritis revocaretur, pedum lotionibus, frictionibus, venæ sectione in pede, monitus ab Hippocrate & Benedicto Sylvatico in Consil. Obstitit autem Senior medicus & æger interiit. Atqui ego, pergit, idem plane observavi in muliere, quæ arthritide fere semper laborabat, quando à doloribus coli liberata erat, & vice versa, cessantibus coli doloribus misere ex juncturis afficiebatur.*

C A S U S IV.

Vir staturæ mediocris, circiter septuagenarius, ^{Podagra functio omine re-tropulsa.} temperamenti sanguinei, habitus corporis spongiosioris & robustioris, podagricis crebrius afflictus doloribus, aliquot abhinc mensibus ad sedandam cruciatuum atrociam, ipsa in paroxysmi accessione, partes dolentes, spiritu quodam à pharmacopœo sibi misso, inunxit, à cujus crebriori & continuato usu, omnis propemodum dolor evanuit. Exacto aliquot septimanarum spatio sæva in abdomine tormina passus est, juncta cum vomitu & alvo adstrictissima. Medicus in consilium accersitus, ob metum iliacæ passionis, alvum clysteribus aperiri curavit, aliaque interna, quæ inflammationi resistunt & dolorem levant, in usum vocavit. Inde non modo cessavit vomitus, alvusque soluta, sed & sedatus fuit abdominis dolor, ita prorsus, ut æger è lecto surgere & in publicum rursus prodire potuerit. Sed pauco interjecto tempore paroxysmus modo descriptus, quia hæc valetudinis spes non diu perseveravit, rediit, nisi quod vomitus lenior fuerit: & iisdem iterum in usum vocatis medicaminibus ad sanitatem perductus est. Duabus vero elapsis hebdomadibus idem paroxysmus repetiit, & adhibitis denuo remediis paruit. At vero aliquoties reversus iterumque depulsus est: remansit tamen omnium ciborum fastidium, corpusque in dies consumi coepit. Interea nunquam rursus podagra affectus fuit, octiduoque nulla amplius perlenfit tormina: appetentia vero omnis periit, nec alvus nisi adjuta respondit, urina rubicunda, & semper adfuit oris siccitas cum humidi desiderio, lectumque perpetuo custodire ægrotus debuit; qui rebus ita constitutis, inter vivos esse tantem desiit.

Epicrisis.

Morbi, quem depinximus, decursus atque eventus, plurimos admonere poterit, quam caute & circumspecte cum podagricis senioribus ratione topicorum agendum sit: siquidem ipsa natura, per senium & morbi vim debilitata tandem fatiscit, atque ad serum acreimpurum, quod ar-

De dolore podagrico & arthritico vero &c. 353

artuum doloribus materiam subministrat, per criticum & febrilem motum ad extremas partes & ambitum corporis propellendum, redditur minus idonea; quare materia peccans in corpore remanens nervosas & membranaceas ventriculi & intestinorum tunicas infestat, ventrisque tormina efficit: quæ si interna inflammatio excipit, ægri vel subito è medio tolluntur, vel successive marasmo aut hæctico calore vires ipsamque carnem defurante consumuntur. Notabile vero in præfata morbi historia fuit, quod podagricus dolor non redierit, sed per paroxysmos, hujus loco, ventris tormina, vomitus, sitis, inappetentia afflictarint; quæ tamen symptomata per clysterum oleosorum, medicaminum diaphoreticorum, cinnabarinorum cum castoreo remixtorum usum expirarunt: unde consensus intestinorum cum partibus nervosis & tendinosis manuum & pedum, quem in podagricis & chiragra affectis quam maxime observamus, liquido iterum evincitur. Nam in praxi medica perpetuum fere est, atrociam ventris tormina ut plurimum transmissio ad artus vitioso humore solvi, & retropulsam etiam materiam arthriticam vel podagricam acerbiora ventriculi & intestinorum tormina & spasmos sequi. Alvus ejusmodi in casibus, ob tonum primarum viarum destructum, officii sui nunquam non obliviscitur, atque per clysteres sollicitata parum excrementorum, sed multos foetidos flatus emittit. Ceterum in senibus, appetitus omnimoda viriumque prostratio, sitis & oris ficitas, lentam febrem, mortemque imminentem indicant.

C A S U S V.

Podagra in hæmorrhoidario, ex opiato- rum usu funesta.

Vir sexaginta annos natus, spongiosi corporis habitus, hæmorrhoidali fluxui adsuetus, dolorum podagricorum utut mitiorum, vere & autumnò ineuntibus, tentatus fuit insultibus. Circa ætatis exitum, horæos fructus refrigerantes liberalius paulo ingessit, & contra podagricos dolores panacæam sic dictam ab empirico assumsit: quæ constabat, ex opii crudi in frustula dissecti drachma, cui duæ aquæ liliorum convallium spirituosæ uncie affusæ fuerunt, & ita leni digestionem steterunt. Hujus liquoris cochleare circa lecti introitum medicaster sumendum jussit: cujus usus, quod placidiorem somnum conciliabat, per aliquot septimanas continuatus est: & paroxysmi, circa consuetum alias tempus infestare soliti, mirum in modum allevati sunt. At vero, elapsis aliquot hebdomadibus, mense Octobris, febris cum totali virium suppressione, extremorum frigore & perpetua somnolentia infecuta, ægrum omnium præter opinionem jugulavit.

Epicrisis.

Dici vix potest, quod tamen quotidiana declarat experientia, quam perniciosum sit, consuetos podagricorum paroxysmos valentioribus remediis suppressere, & materiam illam acrem causticam, quæ solenniter, utut cum dolore, per congrua emunctoria protruditur, intus retinere: quippe tali modo partium internarum inflammationes, spasmi vel sphacelationes, quam in nostro ægro præsentem fuisse nulli dubitamus, perpetuo fere subsequuntur. Non potuit autem non, propinata narcotica medicina in corpore laxioris habitus, senio vicino & à refrigerantium fru-

ctuum abusu jamjam debilitato, infaustum relinquere effectum: quippe practicum fide dignorum observationes confirmant, à solo refrigerantium abusu, corpora podagricorum orci faucibus tradita fuisse.

C A S U S VI.

Ante quadraginta propemodum annos, cum in principatu Halberstadiensi, provincialis medici munus obirem, me consulebat Illustris regiminis Consiliarius, qui parente hypochondriaco & podagrico natus, jam per decem annos & ultra, vix enim tunc trigésimum quartum superavit, & hypochondriacis pathematibus & doloribus podagricis fuit afflictus. Vere & autumnò potissimum invadebant paroxysmi, cum gravativa artuum lassitudine; appetituque aucto, quem postea sequebantur horripilatio cum extremorum frigore & tremore, vomitusque crebriores, quibus liquamina pituitosa & valde corrosiva acida, quæ & dentes stupefaciebant, & pavimento immissa ebulliebant, copiose educebantur. Successit dein febrilis æstus, & tertio vel quarto die acerbii dolores pedes oppetebant, qui ad aliquot sæpe septimanas persistebant, & demum sudore foetido acidum spirante perque plures dies durante solvebantur. Id vero erat memorabile, quod, si vomitus non præcesserint, paroxysmi diutius semper & acerbius pedes affligerint. Inter medicamenta, quibus per complures annos usus fuit, non præsentius solamen atque lenimen, quam in pulvere absorbente nitroso, & essentia florum liliorum convallium, cum spiritu vini phlegmatico extracta & sexta parte essentiae castorei remixta expertus est. Tandem Illustris hic vir quinquagesimo ætatis anno, febre acuta Berolini defunctus est, & dissecto corpore pancreas totum scirrhum, & valde tumens etiam glandulæ mesenterii repertæ fuerunt.

Epicrisis.

Hypochondriacos procedente ætate demum fieri podagricos experientia testatur, id quod ratione quoque demonstrari evidenter potest. Uterque videlicet affectus natura debiles & à parentibus iisdem morbis laborantibus genitos quam maxime infestat, atque primarium vitium potissimum in depravata alimentorum digestionem, crudorum succorum abundantia, & excretionum, quæ sanguinis & humorum depurationi inserviunt, defectu consistit. Deinceps aliquot exemplis compertum habeo, in dissectis corporibus & hypochondriacorum & podagricorum, ubi ex superveniente alio morbo extincta fuerunt, inter alias viscerum corruptiones, pancreas scirrhum maxime deprehensum fuisse, & ubi tale quid repertum fuit, ingentem semper acido-ponticorum humorum prima in regione colluviem adfuisse, quæ appetitus præter naturam aucti, cardialgicæ anxietatis, obstructionis alvinæ, ructuum & vomitionum acidissimorum succorum vera causa exstitit. Quam inimicum vero acidum sit ad sanguinem delatum, dum temperatam ejus & gelatinosam crasin imò fluxilitatem destruit, præternaturalem spissitudinem ingignit, excretionemque retardando, cacochymia & viscidæ & tartareæ genitrix sit; is quam facile, qui fundamentis physico-mechanicis morborum generationem explicare novit, poterit penetrare. Ego itaque semper cum singulari fructu & hypo-

Podagra hereditaria in hypochondriaco.

poëchondriacis & nephriticis & podagricis, tum ad symptomatum mitigationem, tum etiam ad sanationem, si adhuc ejus spes fuerit integra, medicamenta quæ acidum destruant in primis viis, ut sunt absorbentia sibi relicta terrea, quæ subinde, cum in sal neutrum degenerent, alvum largius sæpe ac si purgans sumtum fuerit, solvunt, exhibeo; atque insuper elixiria amara temperate balsamica, cum lixiviosis menstruis parata frequentius usurpanda, injungere ac commendare soleo. Tandem in præfata morbi historia id commemoratu dignum est, quod etiam in aliis sæpe annotavi, leviores semper arthriticos & podagricos paroxysmos fieri, quando natura vel sponte vel arte adjuncta sese à colluvie vitiosorum humorum per vomitus ante accessum liberaverit; manifesto indicio, originem dolorum esse in primis viis: in cujus asserti confirmationem ipsum adduco MARTIANUM, qui ita dicit: *in arthriticis doloribus, ob acorem in ventriculo peccantem à doloribus correptos memini, qui ab iisdem liberati vel levati fuerunt, ubi acida evomuisent.* Quod identidem comprobatur SYLVIIUS *Oper. pag. 786.* aperte scribens, hanc curam per vomitionem utilissimam arthritidi, multisque à se confirmatam experientis. Imo eadem ratione non paroxysmum tantum imminuentem sublatum, sed & novi impetus semina extincta fuisse idem eodem loco scriptum reliquit. Atque ALPINUS de *medicina Ægypti* multos se vidisse, qui, cum à podagræ calculique doloribus excruciatii fuissent, crebro usu vomitorii egregie adjuti fuerunt, affirmat.

C A S U S VII.

Podagra hereditaria inveterata in corpore remanens, Carolinis expulsa & allevata.

Vir generosissimus, sexagenario major, ob insignia merita in summa dignitate in hac provincia constitutus & Illustris regiminis consiliarius, tenerioris & sensibilioris quoad corpus & animum constitutionis, à parente qui fere per totam vitam fuit podagricus, & pedes tophis obsessos habuit, genitus, ante triginta fere annos pathemata hypochondriaca, rheumatica, & podagrica expertus erat, quæ procedente ætate magis ingravescebant, & utut moderata admodum diæta & vitæ ratione inculcata usus fuerit, singulis tamen annis vere & autumnis ob podagram affligentem lecto decumbere, mox breviori temporis mox longiori intervallo, cogebatur. Aliquando vero consueta podagra, præter morem & consuetudinem, solito tempore non recurrebat: sed quia materia vitiosa intra succos vitales retinebatur, multis ac gravissimis tentabatur symptomatibus: continuis nempe ventriculi eructationibus, cordis palpitationibus, tremore artuum, inquietudine, dolore capitis acuto, tractorio, lancinatorio, circa tempora, circa nucham, accedente cogitationum confusione memoriæque debilitate. Consulebat me atque Clariss. D. D. *Strauchium* Archiatrum Martisburgensem, qui sæpius frequentaverat *Carolinas*, atque inprimis ex nobis quærebat, num has thermas sanitati suæ profuturas judicarem. Hic longiori experientia edoctus, statim consilium probavit; cui ego quoque facile assentiebam: & ille cum eo ad fontes hos salutiferos profectus fuit, à quarum interno usu decenti cum regimine instituto, in tertia & ultima cura, vehemens paroxysmus podagricus, qui tamen non nisi per septem dies durabat, ipsos pedes corripiebat, remittentibus mox omnibus prioribus symptomatibus. Inde optime quum se habuisset, binis adhuc vicibus,

aquas hæcæ thermales cum summo fructu semper usurpavit.

Epicrisis.

Ego sane complura possem recensere & allegare exempla, quæ mirabilem & incomparabilem plane horum fontium virtutem & effectum in atrocibus & contumacibus morbis expugnandis, qui ab arthritica & podagrica materia remanente in corpore vel improvide retro-pulsa oborti fuerunt, demonstrare valerent; qui potissimum in eo consistebant, quod materiam morbificam ad pristina sua loca ex interioribus relegaverint, conquiescente mox omnium symptomatum periculosissimorum syndrome. Vidi colicas spasmodicas, vidi asthmata convulsiva, affectus soporosos, morbos melancholicos cum sensuum & rationis perturbatione conjunctos, pertinacissimasque tussis, atque pulmonum infarctus, qui non nisi à materia podagrica remanente vel retrocedente originem suam habuere, hac ratione divino adjumento felicissime subactos & curatos; maxime vero, si non semel, sed bis vel ter in usum decentem fontes ducti fuerint.

C A S U S VIII.

Vir generosus, perstrenuus Chiliarcha, non procul ab hac urbe degens, corporis macilentioris, fibrosi tamen & robusti, superato jam sexagesimo & sexto anno, in gravem & exitialem incidit morbum, cujus profligandi causa, me in consilium vocavit. Is jam ante decem annos doloribus podagricis, mitioribus tamen & obtusioribus vernali tempore fuit obnoxius, neque minus his deficientibus, acerbis abdominis doloribus, sive potius intestinorum stricturis spasticis vexatus. Ante annum Generosus hic vir, sub initium hiemis, prægressa vehementi corporis refrigeratione, neque minus ingenti animi, quam tamen prudenter compressit, indignatione, desubito truculento ad suffocationem usque asthma convulsivo corripitur. Ego tertio die accedens morti ferme proximum inveni: nam sub summa virium prostratione ad animi usque defectionem, pulsu duro, debili & tremulo, extremorum frigore, & sub cogitationum ac rationis turbatione, ægerrime & cum sonitu spiritum ducebat. Primo omnium clysteres injiciendos, ad fordes alvinas cum flatibus educendas, curavi: dein mixturas blande diaphoreticas & discutientes, singulis horis sumendas, præscripsi. Factum hinc DEI beneficio est, ut ad omnium adstantium admirationem, intra quinque dies somnum, qui plane fuerat antea sublatus, capere & respirare sine molestia æger cœperit, atque successive ingentem viscosæ materiæ copiam tussi ejecerit. Verum non ita multo post, de doloribus ac cruciatibus ipsius abdominis Generosissimus Vir conquerebatur, qui in dies incrementis intolerabiles evasere. Alvus adstrictissima, præcordiorumque adfuit anxietas atque inquietudo. Sed singula hæc adhibitis idoneis remediis, expulsa è sede sua materia hostili, conquiescere cœperunt: relicta tamen statione sua in regionem inguinalem non procul à virili membro hæc ipsa descendit, atque in musculis ibi conspicuis, præcedente gravi dolore & inflammatione, abscessum efformavit insignis certe magnitudinis, qui post supurationem factam demum apertus plus quam libram

Podagra levior, ex ira & refrigeratione facta graviore & metastatica.

libram puris per vices fundebat. Dum consolidari coepit, truculenti dolores pedes infestare coeperunt: quos etiam commoda medicina abegimus, relicta tamen debilitate & tumore oedematoso. Decursus autem hujus morbi valde acutis & difficilis per trium fere mensium spatium duravit. Interea valetudini perfectæ fuit redditus Generosissimus ægrotans.

Epicrisis.

Medicamenta, quæ in toto hujus morbi decursu in usum duxi, non alia fuerunt, præter clysteres & cataplasmata, quam mixtura ex ptisana, aqua cardui benedicti, florum sambuci & cerasorum nigrorum, adjectis, pulvere meo bezoardico leniter camphorato, succo citri, liquore anodyno minerali, & succo papaveris albi composita: quandoque mixturæ simplicis aliquot guttas pro dosi adjeci. Qua plus quam vicies reiterata usus fuit. Præter hæc, infusum Theiforme, ex herba veronicæ, salviæ, floribus sambuci, semine fœniculi, & decoctum nostrum usitatum pro potu ordinario largius sumendum præcepi, interposito interdum electuario vel elixirio pectorali, quia tussis longo tempore insistebat. Ceterum me tam vehementem metastas-

in in morbo nunquam observasse memini. Atque ex hac morbi historia & curatione, illud curiosi naturæ & medicinæ scrutatores, meo quidem judicio, addiscere possunt, eam esse materiæ quæ dolores in articulis creat & fovet indolem & crasim, ut vix ab ulla medicina immutari, alterari & ejus pernitalis vis destrui possit: licet enim in præsentis casu reliquerit suam sedem, nihilo minus salva hostili indole & crasi permanente, eandem suam vim in aliis & compluribus locis exercuit, ut adeo remediorum, quæ vulgo & à chymicis æque ac medicis minus in præxi versatis, tantis laudibus passim venditantur ac celebrantur, & ad aucupandum magis argentum quam salutem asserendam apta sunt, inanis atque plane impotens facultas clare demonstrari possit. Cordatus autem & prudens medicus in sanando ejusmodi morbo nihil aliud efficere vel præstare potest, quam ut temperiem & texturam earum corporis partium quæ nondum simili vitio affectæ, integram servet, quo morbosa materia successiva & blanda evaporatione & discussione per universale cutis emunctorium feliciter excludatur.

Plures invenies observationes in *consult. medic. sect. IV. CLXVII. CLXX.*

F I N I S.







